


3 1761 01479756 7







CÆSARIS BARONII

ANNALES ECCLESIASTICI

TOMUS OCTAVUSDECIMUS

Cet ouvrage, par les corrections et les additions considérables qui y ont été opérées, est devenu la propriété des Editeurs, qui se réservent tous leurs droits. Toute contrefaçon ou imitation, quelle que soit la forme sous laquelle elle se présente, sera poursuivie rigoureusement, conformément aux lois.

Hoc in opere tam multa sunt aut correctæ aut addita, ut id suum Editores reddiderint et. quidquid suorum jurium sit, sibi vindicent. Itaque, si quis idem aut furto ediderit aut quoquo modo erit imitatus, in crimine erit et de injuria postulabitur.

001
B

CÆSARIS S. R. E. CARD. BARONII

OD. RAYNALDI ET IAC. LADERCHII

CONGREGATIONIS ORATORII PRESBYTERORUM

ANNALES

ECCLESIASTICI

DENUO EXCUSI ET AD NOSTRA USQUE TEMPORA PERDUCTI

AB AUGUSTINO THEINER

EIUSDEM CONGREGATIONIS PRESBYTERO, SANCTORUM TABULARIORUM
VATICANI PREFECTO, ETC., ETC.

TOMUS OCTAVUSDECIMUS

1094-1146



75204
22

BARRI-DUCIS, LUDOVICUS GUÉRIN, EQVES ORDINIS S. SILVESTRI, ET SOCI,
TYPOGRAPHI EDITORES

—
M DCCC LXIX

SUMMARIVM

TOMI XVIII.

- MXCIV.** 1. Factio Schismaticorum Romanos vexat. 2, 3. Concilium Constantiense. 4-17. Concilium Gallicanum contra illegitimum regis Philippi connubium, præside Hugone archiepiscopo Lugdunensi legato Apostolico, et Ivone episcopo Carnotensi multum per litteras laborante. 18-22. Fides et constantia monialium miraculo dignata. 23-26. Querela Ivonis ad Urbanum papam de clerico monetario. 27-32. Librum de Incarnatione Verbi ad Urbanum papam mittit S. Anselmus, docens cur et contra quem sit scriptus. 33. Sancti Anselmi cum rege Angliæ altercatio. 34-38. Schismaticorum conversio, et inventio corporis S. Marci Venetiis.
- MXCV.** 1-7. Concilium Placentinum, in quo acta causa imperatricis Prædixis, decretum auxilium Orientalibus, hæreses vigentes damnata. 8. Indicitur concilium Claramontense. 9-23. In causa Philippi regis quanta scripserit, egerit et passus fuerit Ivo, ut ab illicito conjugio eum revocaret. 24-33. Concilium Claramontense et ejus canones et statuta. 34-49. Indicitur in Concilio expeditio Hierosolymitana, ad quam Urbanus papa suis concionibus populos adhortatur. 50-53. Prædicatur ubique expeditio, et divinis fulcitur auxiliis. 54-58. Concilium Anglicanum in causa Urbani papæ.
- MXCVI.** 1, 2. Concilium Turonense ab Urbano papa celebratur : Philippus rex absolvitur. 3-8. Confert privilegia, tollit abusus ab Ecclesia Turonensi Urbanus papa. 9, 10. De monasterio S. Mauri in Glannafolio et monachis Fossatensibus. 11, 12. Parata expeditio in Orientem et profectio. 13. Urbani II reditus Romam.
- MXCVII.** 1-10. S. Anselmi cum rege Angliæ conflictus, et Romam adventus, Barensi Concilio affuturus. 11, 12. Obsidio Capuana. 13. S. Anselmus laborat pro infidelium conversione. 14-17. Rogerius comes Siciliæ mirabiliter liberatus, cum quo Urbanus papa congregitur Salerni. 18-143. Hic Baronius aggreditur serio admodum tractare de male instituta monarchia Siciliæ occasione diplomatis Urbani papæ, hoc anno dati Rogerio Siciliæ comiti. 144, 145. Expeditionem in loca sancta Urbanus papa litteris ad Alexium imperatorem datis comitatur. 146-153. Concilium Barensis, quod S. Anselmus illustrat, scribens de processione Spiritus Sancti. 154. Obitus S. Margaritæ reginæ Scotorum.
- MXCVIII.** 1-3. Concilium Romæ in Basilica Vaticana. 4-8. Urbani papæ erga Anselmum officia, et præclara hujus virtutum exempla. 9-13. Conciliabulum Romæ schismaticorum. 14-16. Expeditionis Hierosolymitanæ felices res gestæ. 17, 18. Origo Cisterciensium.

- MXIX. 1-22. Gravis controversia inter Ivonem episcopum Carnotensem et legatum Apostolicæ Sedis. 23-25. Synodus Romæ, et obitus Urbani papæ. 26. Hierosolyma capta. 27-39. Litteræ decretales Urbani papæ, et cætera de eo. 40, 41. De imagine Crucifixi Hierosolymis inventa. 42, 43. S. Petrus episcopus Anagninus, et Concilium Hierosolymis. 44, 45. Baronii digna consideratio. — Peroratio cum gratiarum actione. — Præfatio auctoris cum imploratione divini auxilii.
- MCI. 1-6. Electio Paschalis papæ II. 7-13. Litteræ encyclicæ ab exercitu Terræ-Sanctæ ad Occidentem missæ. 14, 15. Ivonis ad Paschalem papam litteræ de bene disponenda Ecclesia Gallicana. 16, 17. Studia Paschalis pro expulsionem antipapæ, qui moritur. 18-20. Paschalis perduelles cohibet : in causa Philippi regis legatos mittit in Gallias. 21, 22. Concilium Pictaviense et ejus canones. 23-26. In clericum concubinarium terribilis ultio divina. 27-29. Paschalis papæ litteræ et legatio ad militantes in Oriente. 30-34. Obitus Godofredi regis Hierosolymitani, cujus successor Balduinus male meretur de patriarcha Hierosolymitano. 35-39. Mortuo Willelmo rege, Anselmus redit in Angliam, et quid cum Henrico successore transactum. 40. Legatio a Paschali papa Gebhardo Constantiensi episcopo tradita. 41. Privilegium Cisterciensium monachorum.
- MCI. 1-5. De investituris quæstio et legatio regis Angliæ et Anselmi episcopi ad Romanum Pontificem, et hujus sententia. 6. Conradi regis obitus. 7. Philippus rex Romam venturus. 8-12. Ivonis litteræ et labores pro electione Gallonis contra Stephanum in sede Bellovacensi. 13. Secunda expeditio Hierosolymitana. 14. S. Brunonis Carthusiensis obitus.
- MCI. 1-11. Concilium generale Romæ, ubi de juramento ab episcopis dando Apostolicæ Sedi. 12, 13. Concilium Londoniense sub S. Anselmo, et ejus canones. 14-16. Otto cancellarius imperatoris electus Bambergensis episcopus, Paschali papæ se subiecit. 17-19. Robertus comes Flandriæ adversus schismaticos excitatur. 20, 21. Donatio Mathildis renovata. 22, 23. Bernardus cardinalis legatus apud Mathildem, quid passus a schismaticis Parmensibus.
- MCI. 1-3. Otto consecratus Bambergensis episcopus a Paschale papa, litteras ad suam Ecclesiam dat. 4. Paschalis papæ Epistola ad Bambergensem Ecclesiam. 5-10. S. Anselmus Romam veniens et Paschalis papa pro Ecclesiæ Anglicanæ libertate cum Henrico rege agunt et laborant. 11, 12. Ivonis litteras delert Walo episcopus Parisiensis ad Paschalem papam. 13. Elevatio reliquiarum S. Priscæ Romæ. 14. Dispensatio in quarto gradu consanguinitatis cum duce Poloniæ. 15. Privilegium monasterio Bantino in Apulia.
- MCI. 1. Legatio a Paschale papa missa in Poloniam. 2-7. Legatio in Galliam pro absolutione regis, et Concilium Trecense. 8-10. Pro suo clero labis simoniacæ impetito Ivonis litteræ ad legatum Pontificium. 11, 12. Querelæ Ivonis de appellationibus ad Romanum Pontificem. 13, 14. Judicia Paschalis papæ contra jurum Ecclesiæ violatores. 15-17. S. Brunonis episcopi Signiensis legatio in Gallias. 18. Paschalis Epistola ad episcopum Compostellanum.
- MCI. 1-5. Henricus filius a patre desciscit Catholicam fidem restitutus. 6, 7. Henrici imp. litteræ ad Paschalem papam. 8-11. In conventu Germanico, Henricus imperator se abdicat, filio tradens regnum, unde legatio ad papam. 12. Ossa Guiberti antipapæ effossa, et in flumen projecta. 13, 14. Obitus Petri Anagninæ episcopi, et ejus canonizatio.
- MCI. 1-8. Henricus imperator fuga lapsus litteris declamat in papam, suam agens causam. 9-11. Sylvester antipapa : legati Germanici capti. 12-22. Ad filium et episcopos litteræ querulæ et vaferimæ Henrici imp. suæ restitutioni inhiantis, et ejus obitus. 23, 24. Gaudium orbis mors Henrici. 25. Paschalis II in Gallias profectio. 26. De Antichristo prædicationes. 27-35. Synodus Guastalensis et ejus canones schismatica vulnera medentes. 36-40. Quid in Synodo actum in causa Herimanni pseudo-episcopi Augustani. 41. Paschalis Parmæ. 42. Ejus profectio in Gallias. 43-48. Mortuo Philippo Galliarum regi Ludovicus filius succedit et consecratur : unde Ivonis episcopi apologia contra Rhemenses. 49-51. Rhemensis Ecclesia collapsa quomodo restituta.
- MCI. 1. Paschalis in Gallia Concilium Trecense celebrat. 2-4. Dolensis Ecclesia episcopum poscit Vulgrinum renitentem. 5. Reditus Paschalis in Urbem. 6-8. Henricus Angliæ rex, rebus Ecclesiæ compositis, debellat hostes, potitur Normannia. 9-11. Status infelix Ecclesiæ Nortmanniæ. 12-14. Henricus rex Angliæ mutatus in tyrannum Ildebertum episcopum Cenomanensem

persequitur. 15-20. Concilium Hierosolymitanum, in quo Gibelinus episcopus Arelatensis legatus eligitur patriarcha : unde litteræ ipsius et Paschalis ad Aurelianenses.

- MCVIII. 1. Paschalis compescit rebelles. 2, 3. Concilium Beneventanum sub Paschale papa. 4-7. Concilium Londoniense de libertate Ecclesiæ et castitate clericorum. 8, 9. Paschalis papæ litteræ gratulatoriæ ad S. Anselmum. 10-12. De Hierosolymitana Ecclesia amplianda Paschalis litteræ. 13, 14. Patriarchæ Antiocheni querelas compescit papa.
- MCIX. 1, 2. Paschalis incestuosum inhibet conjugium Alphonsi Aragoniæ regis cum Uraça : unde Burdini episcopi Bracharensis mala initia. 3, 4. Obitus S. Anselmi et Hugonis abbatis Cluniacensis. 5-7. Godefredus episcopus Ambianensis agit Romæ cum Paschale papa de suis iuribus. 8. Pontius abbas Cluniacensis. 9. Egino abbas S. Udalrici Augustæ Vindelicorum.
- MCX. 1-7. Henrici regis adventus in Italiam, et pacta conventa inter ipsum et Paschalem papam. 8. Urbs Bethleem erigitur in episcopatum.
- MCXI. 1-4. Quæ Henrici regis ingressum in Urbem præcesserint. 5-12. Introducto rege in Basilicam S. Petri, post varios tractatus Romanos inter et Germanos bellum oritur, fit cædes. 13. Epistola Joannis cardinalis Tusculani de rebus gestis. 14-24. Paschalis papa captivus tractus ab Henrico cogitur cum eo de investituris agere, eumque coronat. 25, 26. Conradi archiepiscopi Salisburgensis constantia contra Henrici sacrilegium perperam ab aliquo defensum. 27-32. Conventioni Paschalis adversantur multi, et maxime S. Bruno episcopus Signinus per litteras. 33, 34. Paschalis suum factum damnans recusat ipse dampni. 33-43. De Paschale inter episcopos altercatio, et maxime inter Ivonem et archiepiscopum Lugdunensem. 44. Henricus ubique damnatus. 45. Obitus Boamundi principis Antiochiæ. 46. Berythus et Sidon captæ. 47-49. De certitudine resurrectionis miraculum.
- MCXII. 1-3. Concilium Lateranense Paschalis litteræ suum factum improbantis præcedunt. 4-11. Celebratio Concilii Lateranensis. 12-18. Concilium Viennense investituras damnans, cujus confirmationem Paschalis papa differt. 19, 20. Adalbertus archiepiscopus Moguntinus mutatus pro Pontifice contra Henricum. 21. Alexii imperatoris Orientis legatio Romam. 22-25. Causa Herimanni episcopi Augustani ad Paschalem papam delata. 26-28. Craticula S. Laurentii educta et aliæ SS. reliquæ inventæ Romæ. 29. Arnulphus patriarcha Hierosolymitanus.
- MCXIII. 1-3. Paschalis papa Beneventi dat litteras patriarchæ Antiocheno et Balduino regi. 4. Balduini illicitum conjugium. 5. S. Bernardi a sæculo conversio.
- MCXIV. 1. Synodus habita Ceperani. 2, 3. Legationes papæ Beneventum ad turbas sedandas. 4-8. Quæ acla in Synodo Ceperani habita. 9, 10. Pallium papa ad Rodolphum archiepiscopum Cantuariensem mittit. 11-14. Synodus Bellovacensis, in qua Godefredus ad suam redire Ecclesiam Ambianensem jubetur. 15. Privilegium datum monachis Vallumbrosianis.
- MCXV. 1-4. Ob novi præfecti electionem turbæ Romæ, quibus sedandis Paschalis papa laborat. 5. Concilium Trojanum. 6. Moguntini in imperatorem insurgunt pro suo archiepiscopo. 7. Dietericus cardinalis legatus. 8. Mathildis comitissæ obitus. 9. Concilium Hierosolymitanum in causa Arnulphi patriarchæ.
- MCXVI. 1-6. In Concilio generali Lateranensi, Paschalis papæ nobilis pœnitentia, et retractatio pro rebus cum Henrico imp. gestis. 7-16. Chrysolani episcopi Mediolanensis ad Alexium imp. legati docta disputatio de processione Spiritus Sancti.
- MCXVII. 1-5. Henrici adventus in Urbem, absente Paschale papa. 6, 7. Henricus imperator legationes ad Paschalem frequentat, pro absolutione obtinenda. 8, 9. De legationibus in Angliam mittendis controversia apud Paschalem papam. 10. Causa Furstani archiepiscopi Eboracensis. 11. Terremotus in Longobardia; prodigia. 12-14. Origo historica et progressus monasterii Fontis-Ebraldi. 15. Balduini regis pœnitentia. 16. Obitus Muzalonis patriarchæ Constantinopolitani.
- MCXVIII. 1-3. Paschalis papæ in Urbem reversi obitus, cui Gelasius II successurus. 4-9. Gelasii papæ

electio, captio et fuga, persequentibus schismaticis. 10. Intrusio Burdini Bracharensis episcopi in Petri Sedem, unde Gelasii Epistolæ circulares. 11-16. Gelasius Romam reversus iterum impetitus et multa passus, rebus bene dispositis, in Gallias navigat. 17-19. Galli liberales erga exulem Pontificem, qui consecrat episcopum Casaraugustanum, et dat litteras de indulgentiis. 20. Conon legatus Apostolicus in Germania. 21. Templariorum institutio. 22. Balduini regis obitus. 23-27. Alexius imperator Orientis moritur, Catholicus censendus, hæresum propulsator, in aliis laudandus, in aliis vituperandus. 28. SS. Godefridi episcopi Ambricaniensis et Lidgani abbatis Ord. S. Benedict. in agro Setino obitus.

- MCXIX. 1-3. Gelasius papa Cluniaci moritur, successore designato. 4-8. Calisti papæ II creatio, quæ Romæ et Germania rite innoscit. 9-11. Concilium Rhemense et Henrici imperatoris excommunicatio renuentis dimittere investituras. 12, 13. Congressus regis Anglorum cum Calisto papa. 14-17. Calistus Rhemis Norberto munus prædicandi confirmat, ecclesias dedicat, Cistercienses ornat privilegio. 18-20. Petri Cluniacensis litteræ ad imperatorem Constantinopolitanum et patriarcham pro restitutione cenobii.
- MCXX. 1, 2. Quæ Calistus papa Ecclesiæ contulerit Viennensi. 3-7. Calisti papæ iter et ingressus triumphalis in Urbem. 8-10. Calistus Beneventi investituram dat Willelmo duci, et monasterio Cassinensi consulit. 11. Legatio Ludovici regis ad Calistum papam. 12. Præmonstratensis Ordinis initium. 13. Rogerius princeps Antiochenus occisus.
- MCXXI. 1-3. Burdino antipapa sublato Ecclesia liberatur : unde Calisti papæ litteræ circulares. 4, 5. Cupiditas Romanorum cohibita, et pax Ecclesiæ restituta. 6. Legatio archiepiscopi Moguntini pro conversione Henrici imp. 7, 8. S. Erminoldi abbatis Pruloungensis prope Ratisbonam transitus et res gestæ adversus Henricum imperatorem.
- MCXXII. 1-3. Concilium generale Lateranense cum singulis canonibus : in quo auditi legati imperatoris de pace acturi. 4-8. Legati ex Concilio in Germaniam missi, per quos reconciliatio imperatoris et libertas Ecclesiæ firmata. 9-11. Pontius abbas Cluniacensis temere se abdicat, Hierosolymam pergit. 12. Obitus S. Berardi episcopi Aprutini.
- MCXXIII. 1, 2. Monasterio Cassino et Ecclesiis Compostellanae et Bracharensi Calistus papa consulit. 3, 4. Dedicatio ecclesiarum in urbe. 5. Venetorum victoriæ in Turcas. 6, 7. Commenus imperator Orientis, victis hostibus ope B. M. Virg., ei dicat triumphum.
- MCXXIV. 1-5. S. Otto episcopus Bambergensis Apostolatam ad Pomeranos suscipit, eosque optime instituit. 6. Obitus Calisti papæ, et ejus munificentia erga Urbis Ecclesias. 7, 8. Electio Honorii II per dolum peracta, deinde validatur. 9. Ingens et insperata victoria divinitus obventa in Saracenos. 10, 11. Ecclesia Hibernensis languescens per S. Malachiam restituta : et Belgica per S. Norbertum ab hæresi purgata. 12. Constitutio Joannis imperatoris Orientis.
- MCXXV. 1. Honorius contumacem abbatem deponit Cassinensem. 2. Honorius Beneventi. 3. Excommunicatio abbatis Cassinensis. 4-7. Cluniacensium querelæ adversus Pontium aggressorem ad Honorium papam delatæ. 8-10. Rhemi liberati a Francis, oppugnante Henrico imp., qui moritur. 11. Lotharius regnat. 12. Joannis Cremensis cardinalis legati in Angliam fama vindicatur. 13. Concilium Londoniense a legato Apostolico habitum.
- MCXXVI. 1-5. Legatus Apostolicus missus ad componendas res monasterii Cassinensis : et inde tumultus et rixæ. 6-8. Petri Cluniacensis causa judicata, damnatio et obitus. 9. Matthæus episcopus cardinalis Albanensis ex monacho Cluniacensi. 10, 11. Quæ inter Cluniacenses et Cistercienses dissidia. 12, 13. Tanchelinus hæresiarcha, in quem pugnat S. Norbertus. 14-16. Hæreses Petri Broisini vulgo de Bruis et ejus supplicium. 17. Stephani abbatis Grandimontensis obitus et sanctitas. 18. Godefridi monachi Præmonstratensis diocesis Monasteriensis obitus.
- MCXXVII. 1-5. Defuncto Willelmo duce, Rogerius audacter fit dux Apuliæ, contra quem papa agit in conventu Beneventano. 6-8. Cardinalis episcopus Albanensis legatus Concilium celebrat Trecentum, ubi Ordo Templariorum, agente S. Bernardo, confirmatur. 9-12. Inter episcopum Parisiensem et Ludovicum regem, qui illum bonis expolaverat, dissidia. 13, 14. Qua causa

Ludovicus rex infensus archiepiscopo Senonensi. 15-17. Pro Senonensi archiepiscopo apud Honorium papam agunt Stephanus et Bernardus abbates. 18, 19. Concilium Wintoniæ contra clericos concubinarios. 20. S. Norbertus archiepiscopus Magdeburgensis. 21, 22. Willelmus archiepiscopus Tyri et S. Gualfardi Augustani obitus.

- MCXXVIII. 1. Rogerius accipit investituram Apuliæ et fidelitatem jurat Honorio papæ. 2. S. Hugo episcopus Gratianopolitanus frustra pro dimittendo laborat episcopatu. 3. Stephanus abbas patriarcha Hierosolymitanus. 4. Rogerius excommunicatur.
- MCXXIX. 1. Honorius papa commotus in Beneventanos. 2. Legatio in Daniam, Sveciam et Bohemiam. 3. De episcopo Virdunensi deposito S. Bernardi litteræ ad papam. 4, 5. Scripta S. Bernardi usque ad præsens tempus.
- MCXXX. 1-5. Mortuo Honorio, eligitur papa Innocentius II, contra quem antipapa Anacletus evahitur: unde clades et sacrilegia in Urbe. 6, 7. Antipapæ Anacleti et Innocentii legitimi papæ merita discussa. 8-11. Petri cardinalis episcopi Portuensis litteræ ad cardinales pro antipapa. 12-15. Anacletus antipapa excommunicat Innocentium papam, et scribit ad Lotharium regem. 16-22. Schismaticorum cardinalium et aliæ ipsius Anacleti litteræ ad Lotharium regem et ad reginam. 23-26. Magistratus Romani ad Lotharium litteræ pro Anacleto. 27-34. Anacleti antipapæ legatio et litteræ ad regem Francorum et alios. 35-37. Anacleti litteræ frustra ad se Cluniacenses allicientis. 38-40. Reimbaldi episcopi Leodiensis admonitio circa Ecclesiæ Romanæ statum. 41-45. Legatio ab Anacleto data Gerardo episcopo Egolesmiensi, ejus ambitionem S. Bernardus perstringit. 46. Mathæus cardinalis legatus Innocentii papæ. 47, 48. Anacleti antipapæ litteræ ad Orientales. 49-52. Anacleti insignia pietatis et munificentiae monumenta ad sibi animos conciliandos. 52, 53. Rogerius dux creatus et coronatus rex Siciliæ ab Anacleto: qui auctor fuit Siculæ monarchiæ. 54, 55. Quos et quot Anacletus antipapa illuserit. 56-60. Innocentius papa peregrinans obsequiis principum, episcoporum et populorum frequentatur. 61-64. S. Bernardi scripta et labores pro confundendis schismaticis. 65-66. Legatio ad comitem Pictaviensem in schismate obstinatum et pessimis moribus. 67. Clades Christiani exercitus in Oriente.
- MCXXXI. 1. Innocentius papa Parisiis Pascha celebrat. 2-4. Rhemense Concilium, in quo consecratus Ludovicus VII rex Francorum. 5, 6. Anacleti excommunicati litteræ auctoritatem præsumptam ostentantes. 7-9. Innocentius papa cum Ludovico rege congreditur, et visitat Claramvallem. 10, 11. Privilegium Cisterciensibus de non solvendis decimis. 12-15. Innocentius papa in Galliis Lexoviense monasterium restituit, florentibus ubique Ordinibus monasticis et piis viris. 16. Balduini regis obitus.
- MCXXXII. 1. Innocentius Cluniacensibus privilegium confert, et in Italiam iter aggreditur. 2. Innocentius papa Pisis. 3, 4. Beneventani, rejecto Anacleto, inhaerent Innocentio. 5. Bruno Coloniensis archiepiscopus electus. 6. S. Hugo episcopus Gratianopolitanus moritur.
- MCXXXIII. 1-3. Innocentius papa Romam venit cum Lothario, eumque imperatorem coronat, concedens alodium Mathildis. 4. Beneventani ad Innocentium. 5. Rogerii crudelitas in Apulos. 6, 7. Innocentius Pisas revertitur, ad ejus urbis cives S. Bernardi Epistola. 8. Diploma Innocentii papæ pro episcopo Pistoriensi.
- MCXXXIV. 1. Concilium generale Pisanum. 2. Canonizatio S. Hugonis episcopi Gratianopolitani. 3-5. Episcopi Gallicani a Concilio revertentes per satellites Conradi regis vexantur. 6-9. S. Bernardus legatus cum cardinalibus ad Mediolanenses, ad quos et dat litteras. 10. S. Bernardi reditus ad Innocentium. 11. Rogerius proditione potitur civitatibus. 12. S. Norberti obitus.
- MCXXXV. 1-6. Legatio Gaufredi episcopi Carnotensis in Aquitaniam, socio S. Bernardo, qui comitem Pictaviensem a schismate convertit. 7. Ultio divina in Gerardum episcopum Engolismensem Antipapæ legatum. 8-10. De martyrio Thomæ prioris S. Victoris Parisiensis. 11, 12. Adalbertus archiepiscopus Moguntinus suos subditos eximit a tributis. 13-15. Adversus Rogerium in Campania debachantem legatio et litteræ Innocentii papæ ad Lotharium imp. 16, 17. S. Bernardi litteræ hortatoriæ ad Januenses. 18, 19. Adalbero archiepiscopus Trevirensis consolatur, et S. Bernardus juste redarguit Innocentium II. 20, 21. Moritur Henricus rex Angliæ, ei que succedit Stephanus, qui de libertate Ecclesiæ reddenda jurat.

- MCXXXVI. 1-8. Quanta Rogerius mala intulerit monasterio Cassinensi per Guarinum cancellarium. 9, 10. Infaustus ejusdem Guarini obitus. 11, 12. Ad legatos Cassinenses Lotharii imp. responsio. 13. Schismate inter se divisi Cassinates. 14, 15. De Conceptione Dei genitricis Lugduni celebrari cœpta et S. Bernardi ea de re sententia. 16-20. Hugonis de S. Victore Epistola ad archiepiscopum Hispalensem apostatam. 21-25. Pœnitentia atque obitus Ludovici Crassi regis Francorum : et Willelmi ducis Aquitanie testamentum et obitus. 26-33. In causa Rudolphi patriarche Antiocheni acta tum Romæ, tum in Oriente per legatos papæ.
- MCXXXVII. 1. Congressus Lotharii imperatoris cum Innocentio papa. 2-5. Innocentius S. Bernardum accersit, qui contra schismaticos laboret. 6-10. Res feliciter gestæ in Apulia ab Heurico duce et Lothario imp. pro Innocentio papa. 11, 12. Innocentius Beneventi Rainulphum dncem Apuliæ creat, et episcopum Beneventanum consecral. 13-23. Acta Cassini in causa depositionis Rainaldi abbatis, et electionis Guibaldi ab Innocentio papa et Lothario imp., cujus pietas innotescit. 24-33. Rogerius ablata recuperaturus venit et pugnat : ad quem S. Bernardi legatio, et cum schismaticis disputatio. 34-37. S. Malachie metropolitæ Hibernensis Romam adventus pallium accepturi et signa.
- MCXXXVIII. 1-6. Mortuo Anacleto frustra alius subrogatur : unde pax Ecclesiæ reddita. 7-10. S. Bernardus ad suum monasterium revertitur, et pro electione episcopi Lingoniensis laborat. 11. Extincto schismate, Roma relloret. 12. Lotharii imp. obitus. 13. Acta de disputatione coram Lothario a Petro Cassinensi scripta arguuntur falsitatis. 14, 15. Causa inter patriarcham Hierosolymitanum et archiepiscopum Tyrensem, de qua litteræ Innocentii papæ.
- MCXXXIX. 1, 2. Conradus rex creatus, rejecto Henrico. 3. S. Bernardus ad Conradum scribit. 4, 5. Concilium generale Romanum, et ejus triginta canones. 6, 7. Pro Petro cardinale Pisano intercedit S. Bernardus. 8, 9. Arnaldus de Brixia cum suis erroribus damnatus. 10-16. Innocentius papa captivus factus a Rogerio, eundem regem Siciliæ creat, dato diplomate : unde pax juramento firmata. 17, 18. Petri Cluniacensis et S. Bernardi litteræ gratulatoriæ et hortatoriæ ad Rogerium. 19-21. Cistercienses missi in Siciliam : unde Rogerius valde proficit.
- MCXL. 1, 2. S. Bernardus Guidonem cardinalem legatum Apostolicum monet de Arnaldo. 3-6. Petrus Abailardus S. Bernardum provocat ad disserendum, a cujus colloquio prosternitur. 7. De Abailardi erroribus S. Bernardus et episcopi Gallicani docent Innocentium papam, qui dat rescriptum. 8-12. Petrus Abailardus ab Innocentio papa damnatus convertitur, fit monachus, sancte vivit et moritur. 13. De Hugone et Richardo de S. Victore. 14. Rogerii invasiones. 15, 16. De Willelmo intruso Eboracensi archiepiscopo, cujus fama vindicatur.
- MCXLI. 1-3. Occasione belli Tiburtini Romana seditio orta, instigante Arnaldo de Brixia.
- MCXLII. 1, 2. Divortium Radulphi Viromandorum comitis, quem Ivo cardinalis legatus damnat S. Bernardi consilio. 3, 4. S. Bernardi ad episcopum Suessionensem excusatio et admonitio. 5. Petrus Cluniacensis pro rege Ludovico apud Innocentium II agit. 6. Fulco rex Hierosolymitanus moritur, Balduinus succedit.
- MCXLIII. 1-3. S. Bernardus in Ivonis legati morte calumniam passus ad Innocentium papam scribit. 4, 5. De schismate imminente S. Bernardi Epistola. 6-9. Ludovici regis furores et persecutionem compescere studet. S. Bernardus. 10, 11. Innocentii papæ obitus, qui multas Ecclesias instauravit. 12, 13. Pacifica Cœlestini II Pontificis creatio. 14. Concilium Londoniense. 15, 16. Obitus Joannis imperatoris Orientis, qui succedit Manuel, et Leonis patriarchæ.
- MCXLIV. 1. Cœlestino mortuo succedit Lucius II papa. 2, 3. Cluniacensibus datum monasterium S. Sabæ Romæ. 4-8. Lucius papa adversus Romanos Arnaldistas Conradum interpellat, et ejusdem regis auxilium. 9-10. Divina ultio in Ecclesiarum violatores. 11. S. Crucis ope exercitus Christianorum liberatur.
- MCXLV. 1-3. Lucii papæ obitus et Eugenii III creatio et fuga. 4-10. S. Bernardi Epistolæ ad papam et cardinales de Eugenii creatione. 12, 13. Arnaldistæ in Urbe debacchantur. 14-18. S. Bernardus per Epistolam monet Romanos. 19-21. Idem hortatur Conradum regem ad defensionem Ecclesiæ. 22-25. Legatio ex Anglia, Armenia et Syria ad Eugenium papam in oppido Viterbi. 26-27. Rolandus electus S. R. E. cancellarius. 28-32. Eugenius, favente Ludovico rege, pro

expeditione in Terram-Sanctam dat litteras Apostolicas. 33. Reditus Eugenii papæ in Urbem. 34-39. Petri Cluniacensis adventus Romani ad Eugenium papam, sedandis Etruriæ tumultibus, et quid ei Romæ contigerit.

MCXLVI.

4. Eugenius III rursus infestatur a Romanis. 2-5. In Concilio Carnotensi decernitur expeditio Hierosolymitana, cujus primarius dux S. Bernardus. 6-9. In quo Ludovicus rex deliquerit, unde infelicem belli exitum sit expertus. 10-20. S. Bernardus tum in conventu, tum per litteras ad principes et populos datas excitat ad bellum sanctum, Judæorum cædem vetans. 21. In quos expeditio parata. 22-24. Nicolaus falsarius litterarum S. Bernardi. 25. Fulcherius patriarcha Hierosolymitanus. 26. Obitus Oxytæ patriarchæ Constantinopolitani.

ANNALES ECCLESIASTICI.

URBANI II ANNUS 7. — CHRISTI 1094.

1. *Factio schismaticorum Romanos vexat.* — Millesimus nonagesimus quartus incipit annus, Indictione secunda, quo res urbanae sub Urbano papa etsi tranquilliores, nondum tamen pacatae penitus exstiter, perdurantibus Romanorum nonnullis in perfidia Henriciana, eo quod adhuc Guibertini munitionem sancti Angeli possiderent, cum Urbanus papa vitaret armis rem agere adversus eos. De his igitur haec Bertholdus rerum inspector : « Dominus papa Urbanus Nativitatem Domini Romae solemniter celebravit, quamvis plures Guibertini in Urbe adhuc latuerint, quos dominus papa absque militari manu non facile potuit appellere (expellere). Maluit ergo eorum injuriam ad tempus tolerare, quam Romanos cives armata manu inquietare. Guibertus autem haeresiarcha cum imperatore suo apud Veronam eo tempore fuit, seque libenter papatum deserere simulavit, si alio modo pax in Ecclesia recuperari non potuerit ». Et inferius eodem anno : « Dominus papa Romae prope sanctam Mariam Novam in quadam firmissima munitione morabatur. Sed Guibertini turrim Crescentii, ipsam molem Hadriani dietam sancti Angeli obtinentes, adhuc liberum viatoribus transitum ad papam per pontem Tiberis nondum permiserunt. Nam abbatem quemdam de cella S. Petri in Alemannia, a Gebhardo Constantiensium episcopo et fratre ejus Bertholdo ad papam directum, dum per illum pontem transire vellet, in captione detinuerunt ». Ille de rebus urbanis ipse; qui et de his quae gesta sunt per legatum Apostolicum in provinciis, haec inferius subjicit :

2. *Concilium Constantiense.* — « Gebhardus Constantiensis Ecclesiae episcopus, magnam Synodum Constantiae in hebdomada majore ante Pascha cum abbatibus et clericis innumerabilibus, et cum praedictis ducibus et reliquis Alemanniae princi-

pibus canonice celebravit, ibique multa quae corrigenda erant correxit. Ibi etiam incontinentiam presbyterorum ac violentiam simoniacorum adeo prohibuit, ut etiam populum ab eorum officio sub banno prohibuisset, si ipsi in tali facinore positi contra fas et jus ministrare praesumpsissent.

« Statuit etiam juxta statuta sanctorum Patrum, ut jejunium Martii in prima hebdomada Quadragesimae, et jejunium Junii in hebdomada Pentecostes semper celebretur.

« Item statuit, ut tam in hebdomada Pentecostes quam in hebdomada Paschali, tres tantum dies festivi celebrarentur. Nam usque ad illud tempus, Constantiensis episcopatus morem provinciarum non est secutus, videlicet integram septimanam in Pascha, et unam tantum diem in Pentecoste observando, quamvis utraque septimanae ejusdem observationis esse debuerint, et quamvis alii episcopatus paene omnes predictam Constitutionem jam ab antiquo tenuerint. Haec, inquam, ipse in proprio episcopatu, et ex episcopali auctoritate, et ex Apostolica legatione canonice potuit instituire. Nam legatus fuit Sedis Apostolicae per totam Teutonicam terram usquequaque.

3. « Querimonia Praxedis reginae, quae dudum ad Welphonem ducem Italiae a marito suo Henrico rege discessit, ad Synodum Constantiensem pervenit; quae se tantas tamque inauditas fornicationum spurcitas, et a tantis passam fuisse conquesta est, ut etiam apud inimicos fugam suam facillime excusaret, omnesque Catholicos ad compassionem tantarum injuriarum sibi conciliaret ». Ibidem pertractatam controversiam Sigelridi abbatis enarrat. Atque haeculus de Concilio Constantiensi.

4. *Conc. Gallicanum contra illegitimum regis Philippi connubium, praeside Hugone, archiepiscopo Lugdunensi, legato Apostolico, et Teone epi-*

scopo Carnotensi multum per litteras laborante.— Rursus autem ab alio Apostolica Sedis legato in Gallia aliud Concilium, idemque generale nominatum, celebratum est, et quidem magni momenti, in quo nimirum Philippum Francorum regem Patres excommunicarunt. De his acturi, in primis de legatione credita Hugoni archiepiscopo Lugdunensi, a quo celebratum est Concilium, dicendum est. Virum istum apud Gregorium Septimum magnæ æstimationis fuisse meminimus, eodemque ab eo legationis munere insignitum, et summo Pontificatu dignum iudicatum; sub Victore papa autem (ut vidimus) aliquantulum resiliisse ab Apostolica unione, non tamen ut deficeret ad schismaticos. Sed liber absque publica functione manens, sese Urbano papæ communicatione ab exordio ejus Pontificatus conjunxit. Cum vero Ivo Carnotensis (ut vidimus anno superiori) suis litteris ad Urbanum, legatum in Gallias mittendum esse exorasset; Urbanus flexus petitionibus Ivonis, legationem ejusmodi eidem Hugoni Lugdunensi archiepiscopo decernit: quam cum ipse obire omnino renueret, idem Ivo has ad eum litteras dedit, quibus eum ad suscipiendum oblatum munus hortatur. Epistola sic se habet¹:

5. «Hugoni reverendo Lugdunensium archiepiscopo, Ivo humilis Carnotensium episcopus in Christi esse visceribus.

«Audivi dominum Urbanum Apostol. legationem Apostolicam tuæ credidisse charitati, qua laudabiliter functus es tempore prædecessoris sui B. memorie papæ. Greg. Audivi et lætatus sum in his quæ dicta sunt mihi, tum propter sinceram qua te amplector charitatem, tum propter communem Ecclesie Christi utilitatem. Sed hanc meam letitiam postea perturbavit, quod mihi dictum est, te in tanta perturbatione humerum huic oneri nolle supponere, dissuasionem quorundam, dicentium propter languidum caput ægrotanti corpori pene viribus definito (destituto) non posse commode subveniri. Sed imperitorum medicorum est tale consilium, tumores palplantium, et palpando putredines degustantium, amantium suam tranquillitatem non ægrotantium sanitatem, nec attendentium quod Veritas dicit²: Non est opus sanis medicus, sed male habentibus. Licet enim in regno Italico surrexerit alter Achab, in Gallico autem altera Jezabel, querentes altaria suffodere, prophetas occidere; non est tamen dicendum Elie: Relictus sum solus, et quærunt animam meam, ne divinum dicat ei responsum: Reliqui mihi septem millia virorum, qui non curvaverunt genua sua ante Baal.

6. «Licet ad placitum Herodis saltet Herodias³, petat caput Joannis, concedat Herodes; dicat tamen Joannes: Non licet tibi uxorem tuam inordinate relinquere, et contribulis tui conjugem vel pellicem in conjugium habere. Licet Balaam doceat Balac edere et fornicari, Phinees tamen non pareat

Israeliti cum Madianitide fornicanti. Licet ad persuasionem Simonis Nero Petrum liget, incarceration, non minus tamen Petrus Simoni dicat: Pecunia tua tecum sit in perditionem. Quanto enim studiosius perversorum temeritas et audacia rectitudinis statum labefactare conatur, eo vehementius est eorum improbitati resistentum, et religioni Christianæ consulendum, et lamentabilibus Ecclesie ruinis obviandum. Non hæc quasi ignoranti scribo, sed persuasum esse vellem tuæ paternitati, ut iterum manum ad aratrum mitteres, et de agro Domini spinas quas posses evelles, et semina quæque messem futura supereminare non differres. Hæc hacenus. De cætero devotissime postulo paternitatem tuam, quatenus parvitati mee rescribas, utrum navi periclitantis Ecclesie etiam pæne naufragium patientis, manum adhibere disponas, et quo in loco circa initium Quadragesimæ te valeam invenire. Quædam enim Ecclesiastica negotia tractanda sunt mihi cum tua prudentia: quod mihi operosum, tibi autem non erit onerosum. Vale». Hæc Ivo ad archiepiscopum Lugdunensem, legatum designatum in Galliis.

7. At quodnam fuerit istud tam grande malum exortum in regno Francorum, cujus causa moneant plures Hugonem recusare munus legationis? Illud utique immensum ac detestabile, quod Philippus Francorum rex, divortio dimissa legitima uxore, cognatam suam, uxorem Fulconis comitis Andegavensis, sibi junxerit matrimonio, juvenili furore percitus, non considerans quot horrenda simul scelera perpetraret.

8. At vero antequam de his agamus, hic primum de ipsa regina quam Philippus rex dimisit, dicenda sunt aliqua, quibus intelligas judicia Domini esse recta et justificata in semetipsa, dum quæ ipsa fecit, eadem sit pati coacta, prædicente hæc omnia quæ ei obventura essent, S. Arnulpho tunc abbate, postea episcopo Suessionensi: cujus Vite Acta¹ Lisiardus iidem Suessionensis episcopus ejus successor dum scribit, hæc habet de expulsiōe Geraldii abbatissæ monasterii sancti Medardi, quem ipse sanctus in sui locum elegerat: «Eo abbate ociosus instituto, derepente advolat supradictus ille Pontius vesanus monastici ordinis temerarius, ducens secum reginam Bertradam (Bertam), quæ auctoritate regia Geraldum expelleret, et Pontium contra fas in sancti loci administrationem intruderet. Id ubi rescivit Christi servus Arnulphus, e cella egreditur, reginam furibundam blanditer appellat, submisce rogat ut licet regina sit, memor tamen muliebris conditionis, memor divinatorum judiciorum, contra leges Ecclesiasticas venire formidet, ab injuria tanti viri verecunde se temperet.

9. «Cum autem ea præ regio fastu et timore viri sancti monita non admitteret, prophetico spiritu dixit ei: Crede, (si lubet) o regina, fratri Ar-

¹ Ivo. Ep. XVIII. — ² Matth. IX. — ³ Ibid. c. 6.

¹ Lisiard. in Vit. Arnul. c. 8. apud Sur. tom. IV. die XV Aug.

nulpho, imo potius crede Spiritui sancto. Nam si tu fratrem Geraldum hinc eieceris, Deo vindice, tu quoque ante obitum tuum e regno extruderis, contemplantque et ærumnosa morieris. Eam viri Dei prophetiam luce clarius est completam esse, quando omnes norunt reginam illam post annos aliquot regis animum adeo offendisse, ut conciliari prorsus nollet, amotamque a regni consortio, et in pagum Pontinum translatam, post diuturnam calamitatem, illic plebeio more defunctam et sepultam». Ilac Lisiardus de Berta regina, qua dimissa, ipse rex Bertradam accepit. Ita enim, ne confundantur nomina, Bertam reginam, Bertradam scias pellicem appellatam.

10. Sed jam ad Philippum regem revocemus orationem, qui cum ejusmodi scelera perpetrasset, ut legitimam uxorem dimitteret et pellicem duceret, quod scelestius est, invenit Galliarum episcopos, qui faverent adeo nefandis criminibus, uno contradicente omnibus illis Ivone, ejus recitandæ sunt breves Epistolæ eo argumento tunc scriptæ, atque ea primum, quæ secunda ordine posita perbrevis ad episcopos ad regis nuptias invitatus data est, qua hortatur regi tot inconcessa legibus præsumenti resistere, quæ sic se habet ¹:

« Archiepiscopis et episcopis ad regales nuptias invitatis, Ivo humilis cum spiritu consilii spiritum habere fortitudinis.

« Exemplar litterarum quas misi domino nostro regi charitati vestræ transmitto, ut eandem causam me habere sciat, quam et vos habetis, cur nuptiis ad quas vocati estis, subtrahere vos debetis. Vos igitur qui convenistis, nolite fieri canes multi latrare non valentes, sed sicut boni speculatores, videntes gladium venientem super terram, buccina insonate. Ut cum feceritis quod debetis, vestras animas et eorum qui ad vocem buccinæ se observaverint, vobiscum liberetis. Exemplar autem hoc est:

11. « Domino suo Philippo magnifico Franco- rum regi Ivo humilis Carnotensium episcopus, sic militare in regno terreno, ut non privetur æterno.

« Sicut serenitati vestræ dixi præsens ante iuramentum vestrum, ita nunc scribo absens, quia huic nuptiarum solemnitati, ad quam me vocatis, interesse nec volo nec valeo, nisi prius generalis Concilii definitione decretum esse cognoscam, inter vos et uxorem vestram legitimam intervenisse divortium, et cum ista quam ducere vultis, legitimam vos inire posse matrimonium. Si autem invitatus fuisset ad hujus discussionem, in eo loco in quo cum episcopis canonicas secure possem conferre sententias, ubi temerariam non timerem multitudinem, libentissime ad hoc venire, quod lex et justitia dictaret cum audientibus audirem, cum dicentibus dicerem, cum facientibus facerem. Nunc vero quia absolute vocor, ut Parisium (Parisios) cum uxore vestra veniam, de qua nescio

utrum possit esse uxor; propter conscientiam meam quam coram Deo conservare debeo, et propter famam quam Christi sacerdotem bonam habere oportet apud eos qui foris sunt, malo cum mola asinaria in profundum mergi, quam per me mentibus infirmorum tanquam caeco offendiculum poni. Nec ista contra fidelitatem vestram, sed pro summa fidelitate dicere me arbitror, cum hoc et animæ vestræ magnum credo fore detrimentum, et coronæ regni vestri summum periculum. Mementote, quia primum parentem quem Dominus universæ visibili creaturæ præfecerat, mulier in paradiso seduxit, et ita uterque a paradiso exulavit.

12. « Samson quoque fortissimus per mulierem seductus, fortitudine amissa qua hostes superare solebat, ab hostibus est superatus. Salomon sapientissimus propter mulierum concupiscentiam a Deo apostatavit, et ita sapientiam qua præcellerat amisit. Caveat ergo sublimitas vestra, ne in horum incidatis exemplum, et ita cum diminutione terreni regni amittatis æternum. Consulite ergo Angelum magni consilii, ut accepto ab eo spiritu consilii, inhonesta et inutilia vitare, honesta et utilia in omnibus negotiis vestris valeatis perficere. Valete ».

13. Ad Rhemensem vero archiepiscopum, cuius esset nuptias benedicere, ista conscripsit idem Ivo Apostolico spiritu roboratus ¹:

« Rainaldo reverendo Rhemorum archiepiscopo, Ivo humilis Carnotensium episcopus consolationis visceribus abundare. Expertus quantum sit periculum prælatorum, juxta quod in Psalmo legitur ²: Qui descendunt mare in navibus, facientes operationem in aquis multis: ipsi videntur mirabilia in profundo: ascendunt usque ad abyssos, anima eorum in malis tabescebat: turbati sunt, et moti sunt sicut ebrius, et omnis sapientia eorum devorata est. In quo per me minus sapio, vestro cæterorumque consilio prudentium informari vel confirmari desidero. Nuper enim cum a domino rege fuisset invitatus ad colloquium, quorundam malevolorum meorum suggestione obnixi me rogavit, ut essem ei adjutor in celebrandis nuptiis, quas facere disponebat de Bertrada (Bertrada) dicta conjuge comitis Andegavensis.

14. « Ad quod cum respondissem non ita oportere fieri, quoniam nondum esset causa definita inter eum et uxorem ejus; testatus est pleniter definitam esse Apostolica auctoritate, et vestra vestrorumque coepiscoporum laudatione. Quo audito, respondi me hæc ignorare, nec hujusmodi nuptiis velle interesse, nisi vos earum essetis consecrator et auctor, et coepiscopi vestri assertores et cooperatores; quoniam id competit juri Ecclesiæ vestræ ex Apostolica auctoritate et antiqua consuetudine. Quoniam igitur confido de religione vestra, nihil vos de re tam periculosa, et famæ vestræ et hone-

¹ Ivo, c. 11.

¹ Ivo, Ep. XIII. — ² Psal. CVI.

stati totius regni tam pernicioſa facturum dicturumve quod non auctoritate vel ratione nitatur, studiosissime et devotissime obsecro charitatem vestram, ut mihi fluctuanti veritatem huius rei quam scitis, aperiatis, et sanum consilium, licet arduum et asperum, super hoc præbeatis. Malo enim perpetuo officio et nomine episcopi carere, quam pusillum gregem Domini me legis prævaricatione scandalizare. Sunt etiam latentes causæ, quas interim tacere me convenit, propter quas hoc matrimonium laudare non possum. Vale ».

15. Porro quod ipse fecit, et aliis faciendum suavit, ut potius legationi Sedis Apostolicæ obediatur quam regi. Sic enim ipse ad Abrincensem episcopum ¹: « Cogit enim vos ex una parte legatio Apostolicæ Sedis, ut præceptis ejus obediatis: urget vos ex altera parte regia potestas ut resistatis. Cum igitur sibi invicem adversentur præcepta Apostolica et regalia, sanum consilium nemo vobis dare potest aliud, quam quod Susanna dictante Spiritu sancto sibi dedit ²: Melius est mihi incidere in manus hominum, quam derelinquere legem Dei mei. Videlicet ut aut Apostolicæ Sedi in legatis suis plenarie obediatis, aut principaliter ad Sedem Apostolicam vicarios vestros mittatis, qui ibi pro vobis satisfaciant et gratiam Sedis Apostolicæ vobis restituant: alioqui anathematis vinculum rumpere potestis, solvere non potestis ». Hæc Ivo. Quæ et præstiterunt in hoc conflictu episcopi Gallicani, quos legatus Apostolicæ Sedis Lugdunensis archiepiscopus roboravit; cum ex altera parte rex furens incensus concupiscentiæ facibus æstuaret, ex altera legatus sacris legibus ei pararet obistere. Rex autem habenas concupiscentiæ laxans, sponte fertur in detestandum toto Christiano orbe conjugium.

16. Cum autem Hugo archiepiscopus Lugdunensis munus legationis suscepisset, mox ab eo Gallicanum in casu ejusdem conjugii est indictum Concilium, constanti animo paratus irrumpere iniquitatem. De quo idem Ivo ita scribit ad Waltherium Meldensem episcopum: « Hoc vero vobis consulo, ut conjugium ejus quod ante factum ratione resistente non laudastis, post factum nec dicto nec facto inconsulto approbetis, sed commune consilium et judicium compvincialium episcoporum et cæterorum studiosè expetatis et longanimitè expectetis, et si quid adversi pro amore justitiæ vobis acciderit, æquanimiter supportetis: hoc attendendo, quia non sunt condignæ passionibus huius temporis ad futuram gloriam, quæ revelabitur in nobis. Vale ».

17. At quid demum? Cogitur per Hugonem Apostolicæ Sedis legatum hoc anno Concilium, causa regis exacte cognoscitur. Improbatur, damnatur conjugium, ipseque rex Synodali judicio sententia excommunicationis afficitur. Sed audi Bertholdum in rebus gestis anni huius de eadem

Synodo Gallicana: « In Galliarum, inquit, civitate, quam Ostionem vulgariter dicunt, congregatum est generale Concilium a venerando Hugone Lugdunensi archiepiscopo et Sedis Apostolicæ legato, cum archiepiscopis, episcopis et abbatibus diversarum provinciarum, decimo septimo kalend. Novembris. In quo Concilio renovata est excommunicatione in Henricum regem, et in Guibertum Sedis Apostolicæ invasorem, et in omnes eorum complices. Item rex Galliarum Philippus excommunicatus est, eo quod, vivente uxore sua, alteram superinduxit. Item simoniaca hæresis et incontinentia sacerdotum sub excommunicatione damnata est. Item monachis interdictum est in eodem Concilio, ne parochialium sacerdotum officia in parochiis usurpent. Hæc, inquam, omnia ibi sunt constituta, et Apostolica legatione firmata ». Hæc ipse. Quomodo autem isud ipsum iudicium rursus ventilatum est in Concilio Claromontensi, et ibi rursus idem rex est excommunicatus ab Urbano papa, suo loco dicturi sumus.

18. *Fides et constantia monialium miraculo dignata.* — Quod rursus ad legationem ejusdem Hugonis archiepiscopi Lugdunensis, hoc anno eidem in Gallias creditam pertinet; quid admiratione dignum ei acciderit, apud Marcianicenses sanctissimas moniales, hic describendum, auctore Petro Venerabili abbate Cluniacensi ¹, ejusdem temporis scriptore fide præstantissimo, qui de loci institutione hanc memoria dignam habet narrationem: « Est idem locus inter alia sanctimonialium sancta loca singularem gratiam obtinens, et velut inter fulgentia cæli sidera quodam suo proprio fulgore perfulgens. Ibi nobilium mulierum multitudo, et quæ de ipsius regii sanguinis sublimitate descendunt, spernunt divitias et honores contemnunt, calcant superbiam, luxuriam subigunt, Christique sequentes pauperiem proprio mundo cum principe vincunt. De quarum numero, plurimæ virorum morte destitute secundas iterare nuptias refrugerunt, aliæ incolumes maritos deseruerunt (legitima puta ex causa), quædam ab omni carnis corruptione immunes Evangelicum virginitatis honorem carnalibus voluptatibus prætulērunt. Omnes tamen in communi, virili constantia femineam molliem supergressæ, non solum mundana omnia, sed seipsas sibi subjugant, etc. » Et de observantissima clausura pergit:

19. « Claustro salutari conclusæ, et (ut sic dicam) vitali obrute sepultura, pro præsentī coarctatione sempiternam latitudinem, pro sepulchro beatam resurrectionem expectant. Unde potius mori quam egredi, ante occumbere quam limen designati ostii transgredi eligerunt. Quod tunc apparuit, quando in circumpositis villæ domibus casu quodam tempore ignis exarsit. Ferebantur in sublime globi flammarum, et exustis circumquaque omnibus, sanctarum illarum habitaculis ap-

¹ Ivo, Ep. CCLXXI. — ² Dan. XII.

¹ Petr. Ven. l. I, mirac. c. 22.

propinquabant. Tollitur in altum clamor populi, ne sacrae domus comburerentur magis quam de propriis damnis solliciti. Fit concursus omnium ad muri eas ambientis propugnacula, et super domorum tecta conscendentes, totis viribus obviam ire ignibus parant. Arentem materiam quam superinveniunt, longe projiciunt, nihil quod ad igneam vim repellendam possit valere, intentatum dimittunt. Sed nequidquam proficiunt.

20. « Aer enim vento commotus multiplicatas vires ignibus dabat, et fumum flammæ vapore admixtum vultibus atque oculis defensantium inferens, ne defenderent prohibebat. Cumque aliquandiu restitissent, victi tandem violento elementorum conflictu, tecta relinquunt, et se passim ad terram præcipientes, non jam domos, sed propria corpora salvare contendunt. At ignis obstaculo remoto, libere omnia pervagatur, et partem propinquiorem sibi ædificiorum invadens, horridono strepitu maximas lignorum moles consumit. Dum vero luctuosa universorum vox confuso clamore omnia replet, totius ignari consilii nihil nisi extremum ancillarum Dei exitum præstolantur. Erat tunc forte in loco Lugdunensis Ecclesiæ archiepiscopus venerabilis Iugo, multa morum probitate et religiosa conversatione, a domino papa Urbano cunctarum ferme Galliarum constitutus legatus, ad quem velut ad patrem confugiunt, et (ut in perturbatis rebus fieri solet) anxie ab eo consilium exposcunt.

21. « Precantur præcipue, ut inclusis sanctis mulieribus exitum persuadeat, neque tantum ovium Christi gregem ignibus pastor perire permittat. Motus archiepiscopus cursim claustrum ingreditur, omnesque sub celeritate congregans, summa industria ut periculo cedant hortatur. Cumque illæ omnino remnerent, et prius se mori, quam propositum infringere constanter affirmarent, ait episcopus: Auctoritate beati Petri et domini papæ, cujus vice fungor, atque ex abbatibus nostri (vestri) obedientia, vobis præcipio, ut ad præsens hinc exaltis, neque vos cum habitaculis vestris hic incendio incremari sinatis. Ad hæc quædam maximæ nobilitatis et conversationis, Gisle nomine, quam et ipse multoties vidi, spiritu et fide succensa, respondit: Nos, pater, timor Dei et præceptum abbatibus nostri, ut ignem æternum evadere possemus, intra hos quos cernis limites usque ad mortem permanuras inclusit. Unde nullo pacto fieri potest, ut aliqua necessitate præfixos nobis penitentia terminos saltem pedis passu transgrediamur, nisi ab illo qui in nomine Domini in hoc nos inclusit loco, solvamus. Noli ergo, domine, si placet, hoc injungere quod nobis agere non licet; sed sicut nos ignem præcipis fugere, ita magis igni ut a nobis fugiat, virtute Christi Domini nostri armatus injunge.

22. « Ad quam mulieris fidem stupefactus archiepiscopus, ac subito et ipse fide repletus, foras exiit, et coram cunctis qui aderant, flammam in-

tuens, ac lacrymis ora perfusus, ait: In nomine Domini, et per meritum fidei hujus quæ nunc locuta est mulieris, recede, ignis pestifer, ab ancillarum Dei habitaculis, nec damna aliqua ultra inferre præsumas. His a pontifice verbis prolatis (sicut mihi testificati sunt qui viderunt) repente immensitas flammarum invisibilis virtute repressa, velut ferreo muro obstante, ultra procedere non potuit, et absque ullo humano subsidio, absque aliqua pluviae gutta, incredibili celeritate semetipsum exstinxit. Sic magnifico atque inspirato miraculo, sanctum propositum mulierum sibi bene acceptum esse divina pietas comprobavit, et veræ fidei merito omnia possibilis credenti (sicut in Evangelio promiserat¹) demonstravit». Hucusque Petrus.

23. *Querela Ivonis ad Urbanum papam de clerico monetario.* — Ut autem ad Urbanum Pontificem atque ad Ivonem Carnotensem episcopum redeamus, post tot angustias, quas Ivo resistens regi, ut ex suis litteris audisti, perpassus est, vehementer eum Urbani papæ rescriptum perturbavit pro clerico illo monetario datum, quem jam Ivo juste damnasset, et appellante Apostolicam Sedem, cum et ne circumveniretur ejus mendaciis, suis litteris anno superiori, ut vidimus, eundem Urbanum papam monuerat ut caveret. Sed Urbanus cum illi plus satis mendacia asserenti, tamquam vera narranti, fidem adhibuisset, atque pro illo ad eum rescripisset, idem Ivo non sine animi magna amaritudine ad Urbanum ista respondit, sic expostulans, ut tamen illi in omnibus parere non prætermisit²:

24. « Urbano summo Pontifici, Ivo spiritualis ejus filius, non servilis timoris, sed castæ dilectionis obsequium.

« Ad visitandam paternitatis vestrae dulcedinem, ad revelandas quotidianas cruces meas, præsentiam vestram jam sepe adire proposui; sed, impediante Satana, votum meum adhuc implere non valui. Nam ad bestias quotidie pugnans, non invenio requiem spiritui meo, et miserabiles Christianæ religionis ruinas, quibus reficiendis vix aliquis aut nullus insudat, cum multa cordis contritione deploro. Unde quia video me præesse, sed nulli fere prodesse, sæpe delibero renuntiare curæ pastoralis, ad pristinam quietem redire, ubi illum³ expectem qui salvum me faciat a pusillanimitate spiritus et tempestate. Sed pæne sola retinet me paternitatis vestrae dilectio, cui quantum debeam, nec ipse pensare sufficio. Tamen⁴ nisi viderer os meum ponere in cælum, injuriarum adversus eum agerem, qui septem annis pro Rachel servienti Liam jussit nocte supponi⁵. Quæ saltem si letaret et speciositatem Rachel sua fecunditate compensaret, vix tandem ea conditione toleranda videretur, ut ad amplexus Rachel post alios septem annos perveniendi copia donaretur. Nunc vero quia hujus

¹ Marc. XIX. — ² Ivo, Ep. XIX. — ³ Psal. LIV. — ⁴ Id. Ep. LXXII. — ⁵ Gen. XXIX.

sterilitatem exterior et illius delectatione non perfruar, miserabiliorem omni homine me iudico, et ut tam lamentabile damnum diu toleret, animæ meæ persuadere non valeo. Si placet itaque sanctitati vestræ ut adhuc tolerem, eudite mihi virgam ferream, quæ vasa Iulea conferantur, quæ non eo modo parcat uni ut in discrimen adducantur plurimi.

25. « Hoc ideo suggero sanctitati vestræ, quia quidam clericus nostræ urbis falsis delationibus aures vestræ pietatis jam secundo pulsavit, dicens se per conjecturas accusatum, et de sola suspitione proscriptum. Sed causa illa propter quam a clero separatus est, tam manifestis indicis est revelata, tam certa accusatione publicata, tam evidenti exitu comprobata, ut nemini non tantum civium, sed etiam comprovincialium dubium sit, quin in domo sua falsam monetam fabricari fecerit, et in quadam Ecclesia ejusdem præposituræ, quam ei Gaudfredus vendiderat contra voluntatem omnium fratrum. Hoc publicum facinus et quædam ejus horrenda flagitia, Deo volente, vera esse probabo suo tempore in vestra præsentia. Ideo sacramentum quod mihi obtulit, intuitu charitatis nolui suscipere, sciens eum peccatum perjurii priori peccato velle superponere. Tamen propter reverentiam vestræ paternitatis, ad quam confugerat, quamvis dolose, interim volui ei redditus unius præbendæ integerrime dare et cibum mecum in mensa, donec possem de hoc negotio in præsentia vestra agere, et consilio vestro, quæ restituenda viderentur misericorditer restituere.

26. « Ipse autem uti superbus et arrogans est, tanquam falsa dicendo perditam recuperasset innocentiam, neque mihi neque amicis suis voluit acquiescere, nisi quæcumque pecebant et in manu mea non sunt, ab his qui ea legitime acceperunt inivitis auferri non possunt, redderem integerrime. Igitur secundum quod placuerit discretioni vestræ, aliquid tale super hoc parvitati meæ rescribite, quod huic stulto et cæteris cornua non addat, et vires meas non excedat. Ipse autem nunc ad vos venire disposueram, sed iste publicavit adventum meum studiosissime per totam Romani itineris viam. Quæ damna, quas passiones, quas persecutiones intus et foris hoc anno pro lege Dei pertulerim, nota vobis facere poterit iste frater. Litteras sanctitatis vestræ, securus mei periculi, metropolitani et eorum suffraganeis sine mora direxi. Adhuc tamen taceat, tanquam canes muti non valentes latrare. Valete »¹. Erant isti illi quos nuper audisti in causa regis adeo clamorosa penitus tacuisse, uno tantum Ivone sacerdotali robore fortiter resistente, et constanti animo contradicente.

27. *Librum de Incarnatione Verbi ad Urbanum papam mittit S. Anselmus, docens cur et contra quem sit scriptus.* — Ille eodem anno sanctus Anselmus archiepiscopus Cantuariensis ubi scripsit.

set librum de Incarnatione Verbi, misit ad Urbanum papam. Ita Edinerus in Vita ipsius, et Dodechini in Chronico. Ejus autem scribendi occasionem idem ipse in nuncupando ipsum, ita præfando declarat :

« Domino et Patri universæ Ecclesiæ in terra peregrinantis summo Pontifici Urbano frater Anselmus, vita peccator, habitu monachus, sive jubente sive permittente Deo, Cantuariæ metropolis vocatus episcopus, debitam subjectionem, cum humili servitio et devotis orationibus.

« Quoniam divina providentia vestram elegit sanctitatem, cui vitam et fidem Christianam custodiendam, et Ecclesiam suam regendam committeret : ad nullum alium rectius refertur, si quid contra Catholicam fidem oritur in Ecclesia, ut ejus auctoritate corrigatur ; nec ulli alii tutius, si quid contra errorem responderunt, ostenditur, ut ejus prudentia examinetur. Quapropter sicut nulli dignius possum, ita nulli libentius præsentem Epistolam, quam vestræ destino sapientiæ, quatenus si quid in ea corrigendum est, vestra censura castigetur, et (quod regula veritatis tenet) vestra auctoritate roboretur ». En vides quem recognoscat sanctus Anselmus caput totius Ecclesiæ, doctrinæ arbitrum, et dogmatum cognitorem et iudicem. Pergit vero de nova hæresi, imo veteri restituta insania Sabelliana, verbis istis :

28. « Cuius adhuc in Becchi monasterio essem abbas, præsumpta est a quodam clerico in Francia talis assertio : Si in Deo, inquit, tres personæ sunt, una tantum res, et non sunt tres res, unaquæque per se separatim, sicut tres Angeli aut tres animæ, ita tamen ut potentia et voluntate omnino sit idem : ergo Pater cum Spiritu sancto cum Filio est incarnatus. Quod cum ad me perlatum esset, incæpi contra hunc errorem scribere quandam Epistolam, quam, parte quadam edita, perficere contempsisti, credens non ea opus esse, quoniam et ille contra quem fiebat, in Concilio a venerabili Rhemensis archiepiscopo Rainaldo collecto, errorem suum abjuraverat, et nullus videbatur qui eum errare ignoraret. Partem tamen illam quam feceram, quidam fratres, me nesciente, transcripserunt, atque alios legendam tradiderunt.

29. « Quod idcirco dico, ut si in alicujus manus pars illa venerit, quanquam ibi nihil falsum sit, tamen tanquam imperfecta et non exquisita relinquatur. Postquam autem in Anglia ad episcopatum, nescio qua Dei dispositione captus et retentus sum, audiavi præfate novitatis auctorem in sua perseverantem sententia dicere : Se non ob aliud abjurasse quod dicebat, nisi quia a populo interdicti timebat. Hæc igitur causa quidam fratres precibus suis me coegerunt ut solverem quæstionem, qua ipse sic irrelitus erat, ut nullo modo se ab ea expediri crederet, nisi ad Incarnatione Dei Patris et Spiritus sancti, aut eorum multitudine impediret etc. » Insulsus plane hæreticus et impenitus, quippe qui si legisset quæ a sanctis Patribus

¹ Isai. LV.

de Trinitate innumera scripta sunt documenta, et quæ de Incarnatione Verbi ab iisdem tam Græcis quam Latinis edita sunt immensa volumina: doceri ab iisdem quam disertissime potuisset, quod Filius assumpsit naturam humanitatis in unitate personæ, non naturæ.

30. Quod si et libris his carnisset, tunc ad id quod Ecclesia tradit ipsi recurreretur fuisset, et non ad inanes debuisset disputationes ex tenebris suæ ignorantiae fabricatas fidem Catholicam revocare. Unde idem S. Anselmus, ipso disputationis exordio auream istam sententiam, dignam plane tanto Ecclesiastico tractatore ex penetralibus pietatis ita depromit dicens: « Nullus quippe Christianus debet disputare, quod Catholica Ecclesia corde credit et ore confitetur, quomodo non sit: sed semper eandem fidem indubitanter tenendo, amando, secundum illam vivendo, humiliter (quantum potest) querere rationem. quomodo sit. Si potest intelligere, Deo gratias agat, si non potest intelligere, non immittat cornua ad ventilandum, sed submittat caput ad venerandum. Citius enim in se potest confidens humana sapientia impingendo cornua sibi convellere, quam innitendo petram hanc evellere ».

31. At quisnam fuerit hæreticus iste, licet sanctus Anselmus eum consulto non nomet, quod contemptibilis sit habendus omnis hæreticus, quippe qui ex impietate sibi gloriam nominis quærat, sed nec nomine dignus, quamvis ex eo cum dedecore sit majori injuria afficiendus: tamen non alium hunc existimo, quam eum ad quem Ivo nis tunc temporis scripta exlat¹ Epistola istis verbis:

« Ivo Dei gratia Carnotensium humilis episcopus, Roscelino non plus sapere quam oportet sapere, sed sapere ad sobrietatem ». Iste titulus, sequitur Epistola.

« Si esses ovis centesima in deserto perdita, sed gregi jam reddita, sicut exarserat in zelus meus, quandiu te intellexi aversum et adversum: sic requiescere in te spiritus meus, si te cognoscerem ad doctrinam sanam conversum et reversum. Sed quia scio te post Concilium Suessionense, in auribus quorundam, quos mecum bene nosti, pristinam sententiam tuam clandestinis disputationibus studiosissime defendisse, et eandem quam abjuraveras, et alias non minus insanas persuadere voluisse, non potest intrare in cor meum, quod adhuc fidem tuam correxeris, quod mores in melius commutaveris. Si ergo ex hac occasione te afflixit et rebus tuis nudavit quorundam violentorum rapax avaritia, non hoc ex se fecit injusta eorum violentia, sed justa et correctioni tuæ consulens Dei sapientia, faciens etiam per malos quamvis nescientes bona sua, cujus vestem scindere conabar rationibus humanis armata sed tamen infœcunda facundia. Cum vero multis

exemplis ethnici tractatoris veram constet esse sententiam:

Quo semel est imbuta recens servabit odorem
Testa duri.

32. « Non tamen propter me timerem vel horrerem præsentiam tuam, de te sperans meliora et salutem viciniorem: sed quidam cives nostri ad cognoscendam vitam alienam curiosi, quamvis ad corrigendam suam desidiosi, te quidem odibilem, me vero propter te suspectum haberent, et audio nomine tuo et pristina conversatione tua, more suo, subito ad lapides convolarent, et lapidum agere obrutum præfocarent. Interim igitur consulo tibi, ut assumpta patientia beati Job, quamvis longe impar, cum eo tamen dicas¹: Sustinebo iram Dei quoniam merni, donec justificet causam meam. Testificor enim tibi, si conversus ingemneris, et in simplicitate fidei degere volens, a vanitate carnalis sensus tui detumneris, non deerunt tibi verba divinæ consolationis, et mater Ecclesia, quæ devium exasperavit paterna severitate, correptum assumet materna pietate. Restat igitur, ut palinodiam scribas, et recantatis opprobriis, vestem Domini tui, quam publice scindebas, publice resarcias: quatenus sicut multis exemplum erroris fuisti, sic de cætero fias exemplum correctionis. Sic enim bono odore præcedente, et pristinum factorem consumente, et a nobis et ab aliis diligi et coli, et beneficiis poteris ampliari ». Illicusque Ivo nis Epistola absque salutatione præmissa, vel consuela bona imprecatione bene valendi in fine ipsius apposita, quod ad hæreticum scriberet, cui nec dicendum Ave monnerit Joannes Apostolus².

33. *Sancti Anselmi cum rege Angliæ altercatio.* — At magna post hæc persecutio sanctum Anselmum exagitavit: occasio autem ex eo manavit, quod Anselmus ipse legitimum Pontificem haberet Urbanum, eundemque coleret ut Christi Vicarium atque Petri Apostoli successorem, sed vero faveret potius Guiberto: hincque factum est, cum profectionem ad eundem Urbanum petendi causa pallium Anselmum instituisset (non enim nisi præsentem dandum, jam fuisse usu receptum Gregorius papa Septimus scribit³) rex prohibuit, et hinc ingens persecutio, non a rege tantum, sed ab omnibus ferme Angliæ episcopis est oborta, quam Edinerus qui aderat sic describit⁴: « Regem autem de transmarinis locis ingressum Anselmum adiit, et ut sibi Romanam ad papam Urbanum pro stola sui archiepiscopatus emendi fiduciam daret, humiliter petiit. At ille ad nomen Urbani turbatus, dixit se illum pro papa non tenere, nec suæ consuetudinis esse, ut absque sua electione alicui liceret in regno suo papam nominare. Hinc igitur

¹ Ivo. Ep. VII.

¹ Job. VI. — ² Joan. II. — ³ Greg. I. I. Ep. XXIV. — ⁴ Edin. in Vit. S. Ans. I. II. apud Sur. tom. II. die XXI. April.

orta quædam dissensio gravis est, sed in aliud tempus discutienda est dilata. Jubetur ergo, ut totius Angliæ episcopi, abbates, et principes in discussione dissidii hujus apud Castrum, quod Rothingehum dicitur, veniant. Quod factum est anno sequenti, tempore Quadragesimæ, ut suo loco dicturi sumus.

34. *Schismaticorum conversio, et inventio corporis S. Marci Venetiis.* — Hoc eodem anno, grassante mortalitate in Germania, Gallia, atque Italia, magnus proventus ex conversione schismaticorum Catholicæ accessit Ecclesiæ, penitentibus illis timore mortis, atque ad Ecclesias redeuntibus, ut Bertholdus testatur, qui et eosdem schismaticos multis perterrefactos prodigiis tradit, ex illis aliis sibi ipsis manus inferentibus, aliis a bestiis devoratis.

De femina autem ob crimen quod penitentiario, sua confitendo peccata, revelaverat, incendio condemnata, et iterum incenso igne circa ipsam, divina virtute per Dei Genitricis intercessionem illæsa servata, Sigebertus hoc anno in Laudensi Ecclesia contigisse narrat.

Hoc anno, xxv Junii (ut veteres Annales Venetorum habent) contigit inventio corporis sancti Marci, precibus solemnibus impetrata, et magno miraculo demonstrata, sese prodente beato Evangelista, cum ejus corpus solenni ritu collocatum fuit sub altari primario. Quod magnum Dei beneficium perpetua memoria conservandum statuerunt, cum annua die eandem inventionem esse celebrandam publicis sancivere decretis.

35. At his attexamus Petri Damiani dignum elogium, qui in sermone tertio de sancto Marco, ubi contemplatur Venetiarum civitatis splendorem et dignitatem, quam ex corporis sancti Marci possessione est divinitus consecuta, in hæc verba divino Spiritu afflatus erumpit : « Tu felix es et nimium beata, Venetia, quam ad hoc, ut pretiosum corporis sui thesaurum tibi commendaret, elegit. Plurima quidem divitiarum copia ex diversis in te mundi partibus confluit; sed hæc gemma cælestis quæ in medio tui posita est, in excelsum te gloria conspicuæ dignitatis attollit. Incomparabilis enim iste thesaurus vibrantium metallorum supergreditur genera, cuncta gemmarum coruscantium superat ornamenta. Sicut enim beatus Job de Sapientia dicit¹ : Non æquabitur ei aurum, vel vitrum, non commutabuntur pro ea vasa excelsa et eminentia; non adæquabitur ei aurum de Æthiopia, non tincturæ mundissimæ componetur. Et (ut ita loquar) hæc est quædam

species aromatica, quæ sua virtute melliflua cinnamomum excelsit ac balsamum, et omnem superat fragrantiam pigmentorum.

36. « Porro si tantæ per eum dignitatis est Alexandria, quam glorioso martyrii sui cruore perdidit, ut Sedes Apostolica nuncupetur; quantæ, putamus, est excellentiæ felix illa provincia, in qua nunc pretiosa corporis ejus gleba reconditur? Numquid non ejusdem gratiæ et dignitatis esse credenda est, etsi non vulgato nomine, sed ipsa re, et arcana sacri mysterii veritate? Illas denique partes ingressus est, dum adhuc jam in corruptibili carne mortalis existeret; istas autem elegit, cum jam in æternum victurus in regni cælestis aula regnaret. Illos invisit, ut eos de tenebris infidelitatis ad id quod ipse jam mente conceperat, veræ fidei lumen educeret; ad istos autem transferri voluit, ut illos ad eum cum quo nunc est, ductorem luminis revocaret.

37. « Gaude igitur, et exultans in Domino plaude, Venetia, quia per illud pretiosi thesauri talentum, quod in te constat esse reconditum, facta es superni Regis ærarium; et dum in tuo gremio virum Apostolicæ gratiæ suscepisti, et ipsa quodammodo Sedes Apostolica fieri meruisti. Quamobrem sicut mater urbium Roma super omnia regna terrarum sublimatur in Petro, sic et tu velut ejus insignis filia per Marcum gloriaris in Christo. Quem scilicet humiliter imploramus, ut sicut beatum Petrum de mari vocavit et navi, deinde ne lapsus in pelagus obrueretur erigendo continuit: sic remigium tuum inter discrimina marina custodiat, et te cum filiis tuis ad portum quietis æternæ perducatur, qui vivit et regnat Deus etc. » Ista Petrus, qui prudenti moderatione orationem sese per encomii latum campum dilatantem et diffluentem, veluti freno compescuit limitibusque continuit, cum non simpliciter et absolute Venetam Ecclesiam ex sancti Marci sepulchro Sedem Apostolicam voluit appellasse, ubi illud ait : *Et ipsa quodammodo Sedes Apostolica fieri meruisti.* Etenim sepultura Apostoli enjuseumque non id sola conferre satis valet, ut ea Ecclesia in qua est, pleno jure Sedes Apostolica dici possit, cum alia plura requirantur, de quibus non est modo dicendum, cum de his primo Annalium tomo satis.

38. Hoc eodem anno, Tranensis in Apulia Ecclesia nobilis, magis illustratur sancto Nicolao, cognomento Peregrino, dum ex hac vita migrat in cælum quarto nonas Junii. Ita Christo copioso imbre gratiarum fecundiorum reddidit eandem Ecclesiam, quæ merito ejus cultum propensiori semper studio est persecuta.

¹ Job. XXXVII.

ANNO PERIODI GRÆCO-ROMANÆ 6587. — ANNO ÆRÆ HISPAN. 1132. — ANNO HEGIRÆ 487, INCIPIT DIE 21 JANUAR., FER. 7. — JESU CHRISTI 1094.

— URBANI II PAPÆ 7. — HENRICI IV REG. 39 IMP. 11. ALEXII COMENI IMP. 14.

1. *Gesta inter Henricianos et Catholicos.* — A num. 1 ad 4. « In Italia qui ad imperatorem ab hostibus ejus se transtulerant, eo ad Galliam reverso, omnesque pene ad hostes ejus rursus transeunt, et munitiones ab eo expugnatas contra eum muniunt », inquit Siebertus in Chron. ad hunc Christi annum. De hac protectione Germanica, quam Gallicam Siebertus appellat, nec Dominizo, nec Urspergensis, nec Bertholdus mentionem faciunt; imo Henricum anno tantum MCVII ex Italia discessisse asserunt. Quare *Henricus* hoc vel superiori anno in Germaniam quidem venit, sed non multo post in Italiam rediit. Neque enim Siebertus, qui hoc tempore in Gallia Belgica vivebat, hoc ignorare potuit. *Henrici* rebus inclinantibus, existimavit *Mathildis* comitissa, ut refert Dominizo in ejus Vita, præsentiam Urbani II Catholicis Longobardie animos facere posse, et Guibertinos metui afficere, ideoque Pontificem rogavit, ut illuc se conferret, quod et ab eo obtinuit; indeque, ut habet Bertholdus in Chronico, *Urbanus II* Natale Domini in Tuscia celebravit, dum scilicet in Longobardiam pergeret. Anno quidem superiori *Urbanus Romæ* eandem festivitatem celebravit, sed quia Guibertini Castellum sancti Angeli adhuc occupabant, Catholici Romæ et in Italia finem hujus intestini belli summis votis exoptabant.

2. *Urbanus II recuperat palatium Lateranense.* — Colfridus *juvenis ætate*, XII kal. Septemb. anni superioris abbas Vindocinensis electus, et ab *Leone episcopo Carnotensi XI kal. carundem* consecratus, ut testatur Chronicon Andegavense tom. I Biblioth. Labbei, Romanum ad Urbanum II Guibertine factionis metu latitantem profectus, pecuniam unde Lateranum, et turrim Crescentiam hodie castellum sancti Angeli dictam, redimeret, contulit, ut ipsemet in Epistola VIII ad Paschalem II Urbani successorem data hoc modo narrat: « Primo anno, quo, Deo volente vel permitte, nomen abbatis suscepi, audiui pie recordationis dominum papam Urbanum in domo Joannis Fricapanem (vel Franchipaneum) latitare, et contra Guibertistam hæresim viriliter laborare. Licet locus noster pauper esset, Romam tamen veni, illius persecutionum et laborum volens particeps

fieri, et suam pro posse meo desiderans supplere inopiam: quod et Dei gratia feci. Mala quæ in itinere et in civitate passus sum, nostrorum per omnia, ne agnoscerer, factus famulus famulorum, longum est enarrare. Quasi alter Nicodemus ad dominum papam in domum prædicti Joannis nocte veni: ubi cum pene omnibus temporalibus bonis nudatum, et alieno aere nimis oppressum inveni. Ibi per Quadragesimam mansi cum illo: et, si fas est profiteri veritatem, ejus onera in quantum potui, charitatis humeris supportavi. Quindecim vero diebus ante Pascha, Ferruchius, quem Lateranensis palatii custodem Guibertus fecerat, per internuntios locutus est cum domino papa, quaerens ab eo pecuniam, et ipse redderet illi turrim et domum illam. Unde dominus papa cum episcopis et cardinalibus qui secum erant locutus, ab ipsis pecuniam quesivit: sed modicum quid apud ipsos, quoniam persecutione et paupertate simul premebantur, invenire potuit. Quem ego cum non solum tristem, verumetiam præ nimia angustia lacrymantem conspexissem, cepi et ipse flere, et flens accessi ad eum dicens, ut secure cum Ferruchio iniret pactum. Illi aurum et argentum, nummos, mulas et equos expendi: et sic Lateranense habuimus et intravimus palatium, ubi ego primus osculatus sum domini papæ pedem, in Sede videlicet Apostolica, in qua longe ante Catholicis non sederat papa ». Ita Guibertus ab Urbano II, Petro Leonis et abbate Vindocinensi ante Pascha Roma expulsus fuit, ut in Epist. insequenti idem abbas scribit.

3. *Synodus Constantiensis.* — Interim *Gebhardus* Constantiensis episcopus in Majori hebdomada Constantiæ Synodum celebravit, de qua hæc Bertholdus a Baronio citatus: « Quarimoniam Præxedis regine, quæ dudum ad Welphonem ducem Italiæ a marito suo Henrico rege discessit, ad Synodum Constantiensem pervenit, quæ se tantas tanque inauditas fornicationum spurcitas et a tantis passam fuisse conquesta est, ut etiam apud inimicos fugam suam facillime excusaret, omnesque Catholicos ad compassionem tantarum injuriarum sibi conciliaret ». Porro Gebhardus, seu Gebhardus Zaringensium dux, in locum Ottonis a

Gregorio VII episcopali honore privati subrogatus fuerat, et Urbani II in Germania legatus erat; adversus quem cum Henricus imper. Arnolfum comitem de Sancto-Monte episcopum constituisset, gregem suum dimittere coactus fuit circa annum MXCIX, et postea *controversia inter electum et intrusum ipsos XII duravit annos*, ut legitur in Chronico Constantiensi.

4. *Philippus rex cum uxore divorcium facit.* — A num. 4 ad 15. « Rex Philippus suggestione diabolica Bertham reginam repudiavit, et ei subtrahens sui praesentiam, ad castrum quod dicitur Monasteriolum supra mare situm, quo illam dotaverat, eam destinavit: et (quod turpe est dicere, turpius autem facere, nec ad tantum pertinet virum) libidini deserviens, Fulconi Rechin Andegavensium comiti suam abstulit uxorem nomine Bertradam, cum qua pluribus annis adulterans, genuit ex ea duos filios et unam filiam, Philippum scilicet et Florum, et comitissam Tripolitana », inquit Aimoinus lib. 5, cap. 50. Erat Bertha Florentii comitis Frisiae filia, a Philippo Francorum rege circa annum MLXXI uxor ducta, ex qua « anno Dominicae Incarnat. MLXXXI natus est futurus rex Ludovicus, orationibus et meritis sancti Arnulphi (hoc tempore Successionensis episcopi, de quo Baronius num. 8 et seq.) impetratus: qui utinam ut bono fine potiat, ejusdem sancti suffragio sit adjutus », inquit Lisiardus sancti Arnulphi in episcopatu Successionensem successor, in ejus Vita tom. IV Duchesui pag. 163 et seqq. Hic Ludovicus cognomento *Grossus* post Philippum patrem in Francia regnavit. *Bertrada* vero Simonis de Monte-forti filia, nupta erat Fulconi Andegavensi comiti, vulgo *Richino* ob morum asperitatem appellato, quae ad Philippum regem fugit, et post ejectionem ab eo *Bertham*, nuptias cum illo contraxit, quod graves turbas in Galliis concitavit. *Urbanus* enim II illicitum illud conjugium, sicuti et Paschalis II ejus successor improbavit, et *Philippum* excommunicavit.

5. *Quo anno hoc divorcium factum.* — Hoc matrimonium, Baronius et cum eo complures ex meris conjecturis hoc anno consignarunt. Verum Clarus vel alius quispiam, in Chronico sancti Petri Vivi Senonensis post Baronii mortem tom. II. Spicilegii Dacheriani publicato, annum quo hae turbae inchoatae et Bertha regina dimissa, his verbis aperit: « Anno MXCII, Philippus rex dimisit uxorem suam nobilissimam, de qua habuit filium suum Ludovicum, et accepit Bertradam, quae reliquerat Fulconem Andegavensium comitem ». Praeterea Ordericus lib. 8, pag. 699, referens gesta anno MXCII, ait: « Circa haec tempora, in regno Galliae fœda turbatio exorta est. Bertrada enim Andegavorum comitissa, metuens ne vir suus, quod jam duobus aliis (nempe uxoribus) fecerat sibi faceret, et relicta contempti ceu vile scortum fieret, conscia nobilitatis et pulchritudinis suae, fidissimum legatum Philippo Francorum regi destinavit, eique quod in corde tractabat, evidenter notificavit, etc. » Blon-

dellus in Diatriba de Formula *regnante Christo* pag. 345, verbis illis fretus, Philippi regis divorcium cum Bertha regina anno MXCII alligat. Verum si vir doctissimus Urbani II litteras de quibus mox vidisset, Ordericum de anno MXCII interpretandum esse non dubitasset. Addit Blondellus ex eodem Orderico, regem desponsante *Odone* Bajocensi episcopo *Bertradam* duxisse; sed de hoc capite Ordericus non bene edoctus fuit: hujus enim culpæ non Bajocensis, sed Sylvanectensis episcopus reus fuit, ut statim videbimus. Hanc nostram opinionem de anno conjugii *Bertradæ* cum Philippo Franciæ rege, valide confirmat Instrumentum recitatum a Mabillonio, in fine Partis I Sec. IV Benedictini inter Monumenta Historica pag. 763, quod dicitur scriptum « mense Maii, ipso anno quo Philippus rex Francorum accepit uxorem *Bertradam* nomine, uxorem Fulconis Andegavensium comitis, anno videlicet ab Incarnatione Domini MXCII ».

6. *Urbanus II hoc divorcium reprobavit.* — Hæc extra controversiam ponit Epistola Urbani II ad Raynaldum archiepiscopum Rhemensem et suffraganeos ejus, « data sexto kalendas Novembris, anno videlicet Dei Christi MXCII », ut in fine ejus legitur, recitata tom. V ejusdem Spicilegii, et ex eo tom. X Conc. pag. 463, in qua Pontifex, narrato et improbato Philippi cum Bertrada connubio, ait: « Te autem, clarissime confrater Raynalde, noxa hæc maxime impetit, pro eo quod Sylvanectensis subiectus tibi episcopus, hoc publici adulterii crimen, suo ut audivimus firmavit assensu, cum mæchis illis benedictionis sacerdotalis manus imposuit. Quod etsi licite nubenter, bigamis tamen impendi secundum canones non liceret. Nunc igitur vobis Apostolica auctoritate præcipimus, ut his visis apicibus, quod etiam non jubentibus nobis jam dudum fecisse vestram prudentiam decuisset, mature convenire curetis regem, et ex Dei et nostra pariter et vestra parte instanter commoneatis, arguatis, obsecretis, increpetis, et a tanto tamque horrendo facinore desistere compellatis. Quod si contempserit, et vobis et nobis necessitas imminet, ut ad ulciscendas divinæ legis injurias pro nostri officii debito accingamur, et Phinees gladio Madianitas adulteros performemus.

7. *Petit ut Ivo episc. Carnotensis e carcere educatur.* — Eamdem quoque instantiam pro ereptione confratris nostri Carnotensis episcopi (scilicet Ivonis) adhibete. Quod si monitis vestris qui cum cepit obtemperare contempserit, vos et ipsum excommunicationi subjicite, et castellis in quibuscumque cum retinerit et terræ ejus, divinum officium interdicit, ne similia deinceps in viris hujus ordinis præsumantur. Ut ordinem vestrum diligitis, ita hoc accelerare omnibus modis satagitis. Valete. Data sexto kalendas Novembris », ut supra. Quare Epistola Ivonis alias c, nunc XX, *Clericis et laicis Carnotensibus* scripta, et a Baronio an. MXXV, num. 21 et seq. recitata, ad an. MXCII, quo Ivo a Carnotensi vicecomite captus, retra-

henda. Ait in ea Ivo : « Audivi primates urbis vestrae ad invicem conjurasse guerram se facturos adversus vi ce comitem pro mea liberatione. Quod nequaquam mea liberatio est, sed inclusionis meae non solum exasperatio, sed interminata productio. Quare ne fiat prohibeo, interdico, etc. » Ad eum annum reducenda etiam Ivonis Epistola utroque ordine xiv, *archiepiscopis et episcopis ad regales nuptias invitatis* data, sicuti et Epistola ab Ivone Philippo Francorum regi scripta, quae est ordine xv, et Epistola Ivonis ad *Raynaldum Rhemensem archiepiscopum*, cuius erat nuptias benedicere, scripta, quae novo et veteri ordine est xiii, quas omnes Baronius hoc anno refert, cum tamen Ivonis detentionem praecesserint, ideoque ad an. mxcii spectent. Denique ex recitata Urbani II ad Raynaldum Rhemensem archiep. Epistola liquet, deceptos esse viros eruditos, qui in initium episcopatus Ivonis mense Novembri Capuae ordinati, vel ad annum mxcii, vel ad annum mxciii retulere, cum anno mxcii ante diem xxvii mensis Octobris iam episcopus fuerit, ideoque et consecratus mense Novembri anterioris Christi anni, ut supra ostendimus. *Ivonem* in carcere ipsam etiam penuriam panis perperum, testatur Hildebertus Cenomannensis episcopus Epist. c.

8. *Conventus Rhemensis.* — A num. 15 ad 27. *Philippus* rex, cum videret Ivonem episcopum Carnotensem quem nuper in carcerem conjecerat, aliosque quosdam episcopos nuptias cum Bertrada contractas non approbare, et in prima sententia persistere, conventum Rhemis hoc anno convocavit, de quo Clarius laudatus in suo Chronico haec habet : « Anno mxciv, congregavit Philippus rex archiepiscopos et episcopos regni sui in Rhemensi urbe, et obtinuit ab archiepiscopo (nempe Senonensi) Richerio magnis precibus, ut Rhemis ad Concilium non dedignaretur ire, ostendens Raynaldum Rhemensem archiepiscopum podagrico dolore contractum, non posse progredi de sua sede : et perrexit Richerius archiepiscopus Rhemis, et susceptus est cum maximo honore a Raynaldo archiepiscopo et universo clero Ecclesiae Rhemensis, et sedit in Concilio in nullo inferior Rhemensi archiepiscopo, sed penitus par et aequalis, utpote qui non per aliquod debitum illuc perrexerat, sed per dilectionem et orationem regis. Eodem anno obiit Bertha regina, quae a rege Philippo prius fuerat derelicta, ipso rege adhuc tenente Bertradam quam huic superduxerat, reclamante iustitia ». Ita Clarius, seu potius ejus continuator, quih oc tempore vivebat, ut ostendit Dacherius ex iis, quae ille

scribit pag. 749, ubi loquitur de Gestis an. mxcviii tanquam a se visis (1).

9. *Qua de causa convocatus.* — Causam convocationis conventus Rhemensis aperit Ivo Carnotensis episc. in Epistola xxxv ad Richerium Senonensem archiep. data, in qua ei significat, se male argui, quod perjurium incurrerit et majestatem regiam minuerit, et quia sacri canones docent accusationes extra provinciae terminos judicandas non esse, et quantum ex intentatis minis intelligit, non liceret sibi in illo conventu dicere veritatem, se Sedem Apostolicam appellare. Quare in illa Synodo de nuptiis regis et depositione Ivonis actum : « Quantum vero, inquit, ex intentatis minis intelligo, non liceret mihi in conventu vestro impune dicere veritatem, qui pro jam dicta veritate et Apostolicae Sedis obedientia tantam sentio severitatem, ut perjurium arguar incurrisse, et majestatem regiam minuisse. Quod, ut pace vestra dicam, rectius in eos retorqueri potest, qui vulnus fomentis incurabile tanquam pii medici cauteriis competentibus dissimulat urere, vel medicinali ferro praecidere. In qua sententia si mecum firmiter fuissetis, jam egrotum nostrum (nempe Philippum regem) ad sanitatem perduxissetis. Quod quandiu differtis, videte si fidelitatem quam debetis, pleniter exhibetis, si officii vestri munus expletis. Faciat dominus rex adversus parvitatem meam quantum Deo permittente libuerit et licuerit : includat, excludat, proscribat, inspirante Dei gratia et prosequente decrevi pati pro lege Dei mei, nec ulla ratione cogente volo ei consentaneum in culpa esse, qui nolo consors esse in poena ».

10. *Epistola Ivonis ad Turgedum episc. Abrincensem sub Paschali II papa scripta.* — Baronius hujus Epistolae non meminit, sed huc refert Epistolam Ivonis alias cclxxi, nunc cclxx ad Turgedum episcopum Abrincensem datam, in qua ait Ivo : « Cogit vos ex una parte legatio Apostolicae Sedis, ut praecceptis ejus obediatis ; urget vos ex altera regia potestas ut resistatis, etc. » Verum haec Epistola, Paschali papa sedente, anno mcn scripta. Ordericus enim lib. 4, pag. 507, tradit Turgedum seu Turgisum *proslutum ferme xxx annis* tenuisse, et lib. 12, pag. 889, cum an. Christi mxcix adhuc in vivis fuisse, ut recte observat Juretus in Notis ad eam Ivonis Epistolam. Hoc itaque anno Turgetus nondum episcopus erat, ideoque nec ea Epistola scripta.

11. *Philippus rex excommunicatur.* — Tandem Hugo Apostolicae Sedis legatus Concilium *Augustoduni* (2), quae urbs est ducatus Burgundiae, a Ber-

(1) Concilium seu conventus Rhemensis, de quo Pagius hic, ipsum esse credo Concilium quod Raynaldus Rhemensis in Epistola ad Rober- tum Flandriae comitem Spicil. Dacher. l. iii, pag. 423, nov. edit. celebratum a se fuisse scribit die xv kal. Octob. (quae Dominica erat) cum *coarchiepiscopis et episcopis suisque, principibus multis*, juxta domini papae Urbani II praecceptum, ut consecratio Lamberti Atrabatenus episcopi confirmaretur. Ex his habes mensem et diem conventus hujus incepti. Porro Concilia hujus Acta recitari a Dacris in Chronico Belgico pag. 233, ex eruditio ad Spicilegium novissime editionis adiutore discimus.

MANSI.

(2) Concilium hoc Augustodunense du ante hunc annum celebratum, colligo ex Epistola ejusdem Hugonis ad Rodulfum Thuronensem invitatoria ad eandem Synodum indictam ad IV idus Septembris. Porro in ea Epistola Hugo episcopum se diensem, non archiepiscopum Lugdunensem (quam dignitatem anno MLXXXII obtinuit) appellat, apud Baluz. l. vi, Miscell. pag. 413. Sed post huc scripta, incidi in aliam Episto-

tholdo in Chron. quem sequitur Baronius num. 47, *Ostio* barbare appellata, *XVII kal. Novembris* celebravit, et Philippum regem excommunicavit, « eo quod vivente uxore sua, alteram superinduxit », inquit idem Bertholdus.

12. *Error Roscelini de Mysterio Trinitatis.* — A num. 27 ad 34. Dodechinus in Appendice Mariani Scoti ad annum mxciv, de sancto Anselmo Cantuariensi archiep. verba faciens ait : « Praesumpta est illi talis assertio, cum abbas erat : Si in Deo tres personae sunt, una tantum res, et non sunt tres res, unaquaeque per se separatim, sicut Angeli aut tres animae, ita tamen ut voluntate et potentia sint idem omnino : ergo Pater et Spiritus sanctus cum Filio est incarnatus. Verum auctor istius perversi dogmatis, a Patribus et doctoribus Ecclesiasticae fidei circumventus ac convictus, et pene populo neci traditus, ut mortem exaderet, errorem abjurasse dicebatur. Contra quem errorem pater Anselmus Epistolam abbas inchoavit, episcopus consummavit, scribens ad Urbanum papam ». Loquitur Dodechinus de Roscelino, de quo Otto Frisingensis lib. 4 de Gestis Friderici I, cap. 47, postquam asseruit fuisse « praepotorem Abaelardi, subdit : Qui primus nostris temporibus in Logica sententiam vocum instituit ». Auctor quidem Historiae a Roberto rege ad mortem Philippi I, tom. iv Duchesnii, scribit : « In dialectica hi potentes extiterunt sophistae : Joannes qui eandem artem sophisticam vocalem esse disseruit, Robertus Parisiacensis, Roscelinus Compendiensis, Arnulphus Laudunensis. Hi Joannis fuerunt sectatores, qui etiam quamplures habuerunt auditores ». Sed quia ex omnibus Joannis illius parum cogniti discipulis, optime scientiam illam vocum concepit et docuit *Roscelinus*, natione Britto seu Armoricus, Compendiensis vero canonicus, pro auctore et institutore *Nominalium* vulgo habetur, inquit Buteus in Hist. Universit. Paris. tom. 1, ad an. mxxvii, qui addit, eam Aristotelicorum sectam a veteribus pene explosam, a *Guillelmo Occano* Franciscano rursus excitatam atque de integro instauratam esse, et varias Universitates in hujus verba olim jurasse.

13. *Damnatur in Concilio Suessionensi.* — Anno mxcii aut insequenti, *Raynaldus* Rhemensis archiep. Synodum adversus *Roscelinum* habuit Suessione, cui inter ceteros adfuit *Fulco* Belvacensis episcopus, ad quem Anselmus tunc adhuc abbas Beccensis scripsit, rogans ut se apud Synodum purgaret, mentemque suam de sancta Triade omnibus praelatis aperiret; verebatur enim, ne *Roscelinus* publice assereret quod in scriptis et in privatis conventibus dicitare solebat, *Lanfrancum* et *Anselmum* idem secum sentire. Legitur ea Epistola in Operibus Divi Anselmi lib. 2, Epist. xli. In eo Concilio *Roscelinus* interrogatus mentem

explicavit, erroremque fassus abjuravit. Verum paulo post solutum Concilium, haereticorum more dixit, se non ob aliam rationem sententiam suam damnassem, quam quia timebat ab ignaro populo interfici et lapidibus obrui, seque semper in eadem quam coactus abjurarat sententia permanere. Quamobrem *Anselmus*, ut fidem purgaret hominemque confunderet, Tractatum edidit de *Incarnatione*, quem Urbano Pontifici II dedicavit, statimque initio *Roscelinum* tanquam haeticum et prava sentientem condemnat. Anselmi ad Urbanum II Epistolam recitat Baronius num. 28 et seq.

14. *Ivo Rosceli ino suadet, ut palinodiam canat.* — *Roscelinus*, cum videret se tanquam haeticum haberi et undequaque expelli, ignarus quid faceret, confugit ad Ivonem Carnotensem, rogat ut in tanto rerum suarum discrimine sibi opem ferat, asseritque se toto animo errores suos detestari. Ad eum respondit Ivo Epistola utroque ordine vii, qua ei consulit, ut palinodiam scribat, « quatenus sicut multis erroris exemplum fuisti », inquit Ivo, « sic de caetero fias exemplum correctionis ». Antea dixerat « quia scio te post Concilium Suessionense in auribus quorundam, quos tecum bene nosti, pristinam sententiam tuam clandestinis disputationibus studiosissime defendisse, et eandem quam abjuraveras et alias non minus insanas persuadere voluisse, non potest intrare in cor meum quod adhuc fidem tuam correxeris, quod mores in melius commutaveris ». Recitat eam Epistolam Baronius num. 31 et seq. atque eam esse absque salutatione praemissa, vel consueta bona imprecatione bene valendi in fine ipsius apposita, « quod ad haeticum scriberet, cui nec dicendum Ave monuerit Joannes Apostolus ». Verum, ut in Notis ad Epistolam illam Juretus observavit, in aliquot Mss. plures sunt Ivonis Epistolae ad alios scriptae etiam non haeticos, in quarum calce similis precatio abest, ut negligentia potius librarii fuisse videri possit, quam auctoris voluntas.

15. *Roscelinus culpatur a quodam Petro Theologiae professore.* — Extat Epistola cujusdam *M. Petri* Theologiae professoris, conquerentis apud G. Parisiensem episcopum, quod *Roscelinus* plurimas contumelias in opusculum quoddam de Sancta Trinitate adversus ipsius haesim in Synodo Suessionensi damnatam, a se compositum evomisset, in qua Petrus ait : « Cujus tam vita quam disciplina omnibus est manifesta. Hic contra egregium illum praeconeum Christi Robertum Arbroscello contumacem ausus est Epistolam confingere, et contra magnificum illum Ecclesiae doctorem Anselmum Cantuariensem archiepiscopum adeo per contumelias exarsit, ut ad regis Anglici imperium ab Anglia turpiter impudens ejus contumacia sit ejecla, et vix tum cum vita evaserit. Vult enim

am ejusdem Hugonis jam archiepiscopi Lugdunensis, in qua Lambertum Arelatensem ad Synodum Augustodunensem invitat, indictam ad id. Octobris, igitur duas Augustodunenses Synodos sub Hugone distinguamus oportet, alteram ante annum mxxxvii, aliam vero hoc anno mxciv celebratam. Prioris hujus Synodi Augustodunensis mentio in Collectionibus nulla est, camque habitaui opinor anno mxxxvii, quo dies illa Septembris in Dominicam incidit.

infamiae habere participem, ut per infamiam bonorum suam consoletur infamiam, etc. » Duchesnius hanc Epistolam male Petro Abaelardo tribuit, Gaudfridus enim Parisiensis episcopus, anno sequenti obiit, quo nondum *Abaelardus* Parisios venerat, et adhuc valde juvenis erat. Deinde auctor ejusdem Epistolae loquitur de Tractatu S. Trinitatis, quem in Roscelinum conscripserat; cum tamen, quo tempore *Abaelardus* Tractatum suum de *Trinitate* edidit, jam *Roscelinus*, et *Robertus Arbricellensis* et sanctus Anselmus obiissent. Quare recte existimat Bulæus citatus ad annum *xxv*, hujus Epistolae auctorem esse quemdam *Petrum* Theologiae iis temporibus professorem, qui adversus haeresim *Roscelini* in Concilio Suessionensi damnatum scripserat. Eadem Epistola tom. x Concil. pag. 487, male etiam tribuitur Petro Abaelardo.

16. *Obitus califarum Bagdadi et Aegypti.* — *Mustadeus* Bagdadensis califa anno Hegiræ *cdlxxxvii* e vivis excessit, postquam califatum annos novemdecim et aliquot menses gessisset, cui successit *Mustadirus Billa* filius. Obiit et *Mustasirius* Billa califa Aegypti, postquam per sexaginta annos imperasset, non vero per sexcentium, ut errore librarii in Ebnacino, lib. 3 Hist. Sarac. cap. 9 legitur, qui ait ei *Mustalim Billam* filium successisse.

17. *Attrebatensis episcopatus ab Urbano II restituitur.* — Urbanus II litteris Clero et populo *Attrebatensi* datis Romæ, die et anno non expressis, *Attrebatensi* Ecclesiæ præcipit, ut jugo Cameracensis subjectionis excusso, « et recepta dignitate primis temporibus rationabili firmitate possessa », episcopum sibi eligant. Plures hanc in rem Epistolam scripsit Urbanus II, recitatas tom. x Concil. et inter alias unam ad Lambertum *Attrebatensem* episcopum, pag. 446. datam *X kalend. Aprilis, Indictione ii, anno Domini Incarnat. xxciii, Pontificatus autem domini Urbani II papæ vii*, in qua dicitur, Rhemensem Ecclesiam metropolitanam duodecim alias sub se habuisse episcopales sedes, « inter quas, inquit, *Attrebatensis* nobilis et populoſa civitas, quæ per B. Remigium episcopi Vedastum obtinuit, post nonnullorum antistitem obitum episcopalis cathedræ perdidit dignitatem, et per nonnulla tempora Cameracensi episcopo subdita obediit ». Paulo post : « Nos ergo *Attrebatensis* Ecclesiæ restitutioni et Rhemensis metropolis redintegrationi pro nostri officii debito imminentes, te, frater charissime Lamberte, cleri plebisque consensu electum unanimi, B. Vedasto et sanctis qui in urbe ipsa quondam præsedere pontificibus, constituimus successorem ». Vedastus, circa annum Christi *mlxix* episcopus *Attrebatensis* ordinatus, Cameracum sedem transtulerat, indeque episcopatus *Attrebatensis* nomen perierat, ut habent Ecclesiæ *Attrebatensis* Tabulæ.

18. *Lambertus primus ejus episcopus ordinatur.* — Cum vero Urbanus II *Raynaldo* archiepiscopo Rhemensi litteris suis mandasset, ut *Attrebatensis*

Ecclesiæ episcopum electum consecraret, ad Urbanum II respondit Raynaldus, ut tom. x Concil. pag. 465 videre est, omnium episcoporum et clericorum suorum hanc sententiam esse, ut electum episcopum Romani transmitteret, et summi Pontificis arbitrio relinqueret : « Timuerunt enim, inquit, et timent, ne Cameracenses ex hoc facto accepta occasione, se ab Rhemensi Ecclesia abrumperent, cum et civitas eorum alterius regni (sc. Germaniæ) habeatur, et regni ejus rex nobis et Ecclesiæ Rom. jam ex longo tempore inimicatur ». *Attrebatenses* itaque Lambertum a se electum episcopum Romani consecrandum transmissere, et litteris suis ibidem relatis Urbanum II rogarunt, « ut divisio duorum regnorum, Francorum scilicet et Teutonorum, sit episcopatus nostri meta, sicut antiquis temporibus fuisse per successorum relationem et alia indicia cognovimus ». Lambertus vir summæ sanctitatis, Summum Pontificem summopere rogavit, ut eum ab imposita sibi electione absolveret; sed is ei præcepit ut obediret : « Ille tandem acquiescens divini ordinationi et Apostolicæ obediitioni, consecratur in episcopum Romæ apud Sanctam Mariam novam, a sapius jam dicto Apostolico Urbano, anno Dei Christi *mxcm, xiv kalend. Aprilis*, quæ tunc Dominica *Letare Jerusalem* habebatur », inquit vetus chronologus ineditus, a Labbeo pag. 468 citatus, qui recte advertit eum a Paschate annum inchoare, annumque Christi *mxcm* juxta nostrum computum demonstrare; hoc enim anno, littera Dominicalis A in cursu fuit, et dies xix Martii incidit in Dominicam quartam Quadragesimæ, quæ vulgo dicitur *Letare*. Tandem an. *mlxxii* sedes Cameracensis a Paulo IV metropolitana declarata fuit.

19. *Licet invitus ac renitens.* — Agunt de separatione utriusque episcopatus Joannes de Colle-Medio, in Vita beati Joannis Morinorum episcopi anno *mcxxx* demortui cui coævus fuit, Locrius in Chron. Belgico ad annum *mxcm*, et auctor anonymus foundationis monasterii Aroasiæ in Belgio siti, quæ refertur a Bollando ad diem xii mensis Januarii, in Vita B. Heldemari eremitæ Aroasiæ fundatoris. Scribit Joannes de Colle-Medio cap. 2, *Lambertum*, primum post eam separationem episcopum *Attrebatensem*, a clero et populo invitum et reclamantem episcopali cathedra sublimatum fuisse, et cum etiam ab Urbano II Romæ obtinere non posset ut ab ejus obedientiæ vinculo absolveretur, solemniter consecratum esse. In Belgium redux, *beatum Joannem* adiutorem sibi adscivit, et archidiaconum suum constituit invitum et censuris coactum. Sed de B. Joanne anno *mcix*, quo Morinorum episcopus dictus, verba facimus; hic tantum monemus, Joannem Buzelinum e Societate Jesu Lamberti Vitam ex veteribus Ecclesiæ *Attrebatensis* monumentis concinuisse, quam Bollandus in Notis ad Vitam B. Joannis laudati dicit extare Ms. San-Marthani in episc. *Attrebatensibus* exhibent Epitaphium, ejus sepulchro marmoreo inscriptum,

in quo dicitur Lambertus obiisse *an. Domini* mcxv, *sexto decimo kal. Junii*, aliudque versibus compositum, in quo habetur mundo decessisse idibus Maii exeuntibus. Cumque utrumque antiquum sit, liquet *Lambertum* die xvi mensis Maii demortuum, et die insequenti sepultum.

20. *Annus Incarn. ab Urbano II diversimode inchoatus.* — Tomo I Spicilegii Dacheriani, pag. 423, exlat Urbani II Privilegium pro Attrebatensi Ecclesia, Lamberto a se consecrato ejusque successoribus concessum, quo episcopatum Attrebatensem restituit. decernitque, ut Attrebatensis Ecclesia deinceps semper cardinalem episcopum sortiatur. In eo legitur: « Datum Romæ per manum Joannis S. R. E. Card. diaconi, X kalend. April. Indict. II, anno Dom. Incarnat. millesimo nonagesimo tertio, Pontificatus autem domini Urbani II papæ VII », diciturque in Claromontensi Concilio recitatum fuisse. Qua ex subscriptione eruo, Urbanum II anno Incarnationis a die xxv mensis Martii deducto aliquando usum esse, cum hoc Privilegium currenti anno quo annus ejus Pontificatus VII et Indictio II die xxi Martii in cursu erant, emissum sit. Urbanum vero II annum Incarnationis Pisanum, qui novem mensibus annum Incarnationis communem antevertit, adhibuisse, demonstrat ejus Epistola ordine XII ad canonicos sancti Martini Turonensis scripta, et tom. X Concil. pag. 436 recitata, dataque « Pictavis per manum Joannis S. R. E. Diaconi Card., IV kalend. April. Indict. IV, anno Dom. Incarnat. mxcvii, Pontif. autem domini Urbani II papæ nono ». Est hic enim annus Æræ nostræ vulgaris mxcvi, ut tam ex Indictione, quam ex anno Pontificatus evidens est. Qua etiam ex subscriptione deducitur, Urbanum II annum Incarnationis Pisanum ante Pascha inchoasse, licet Celsus II, ut infra videbimus, enim a Paschale exorsus sit. Vix credi potest quot errores chronologici vitari possint, harum similiumve observationum antea non factarum ope.

21. *Sanctius Ramirus Navarrae et Aragoniæ occiditur.* — Hoc anno *Sanctius Ramirus* Ramiri primi Aragonum regis filius, Navarrae hujus nominis V, et Aragoniæ hujus nominis I rex, post rem in Mauros sapinus streuente gestam, *Oscham*, (vulgo *Huesca*) totius Saracenice ditionis, uti Romanorum tempore fuerat, ea parte propugnaculum, obsidione cinxit. Urbs est Hispaniæ ceterioris, episcopalis olim sub archiepiscopo Tarraconensi, nunc vero sub archiepiscopo Cæsaraugustano, citra Ebrum fluvium posita, cui *Abderrhamanus* rex praeerat. Celeberrimæ hujus obsidionis mentio in Diplomate a Joanne Britz Martinez, abbate monasterii Sancti Joannis Pennatensis, lib. 3, cap. 26

Historiæ suæ relato: « Ego Sanctius Dei grat. Aragonensium et Pampilonensium rex, etc. Quia spes mea est in sancto Joanne de Pinnia, etc. feci votum Deo et beato Joanni, quod si Deus daret mihi *Oscham* de infidelibus, predictum locum de sancto Joanne amplificarem, etc. Nunc vero quia sum in obsidione *Oschæ*, ut votum meum adimpleatur, etc. Facta Charta in obsidione *Oschæ*, octavo idus Martii, Æræ discurrente mxcxiii, regnante me rege Sanctio in Pampilona » et in Aragonia, in Subrarui, et Ripacurtia, episcopo Petro in Pampilona. Non multo post, *Ramirus* lethaliter vulneratus, a *Petro* filio jam in regni societatem adscito, se ab obsidione non destitutum donec *Oscham* expugnasset, promissum exegit. Rodericus Toletanus ait, hanc obsidionem semestrem fuisse. Verum Mauros per biennium Christiano exercitui fortiter restitisse, ostendunt *Surita*, *Garibayus*, *Blancus*, et *Briz Martinez*, qui lib. 4, cap. 9, Chartam a Sanctio Ramiro in gratiam sancti Joannis Pennatensis Æræ mcdxxxii, in mense Junii emissam recitat, ex qua eum illius mensis initio adhuc in vivis fuisse constat (1).

22. *Oschæ a Petro ejus successore expugnata.* — Durante obsidione, *Petrus* Aragoniæ et Navarrae rex, ejus filius, dedicationi Ecclesiæ ejusdem sancti adfuit, Chartanque dedit a *Brizio Martinez* lib. 4, cap. 2 relatam, in qua legitur: « Facta Charta in monasterio antedicto, Æræ mcdxxxii, pridie nonas Decembris die, secunda feria, prima hebdomada Adventus Domini (ex quo apparet ejusmodi solemnitas diebus Dominicis hoc tempore non semper peracta) in die quando fuit consecrata dicta Ecclesia sancti Joannis ab archiepiscopo Burdegalensi Amato nomine, atque ab episcopo Jacensi, etc. in præsentia domini regis Petri, et predictorum prælatorum, et multorum virorum nobilium de curia regis. Ego *Petrus* Dei gratia episcopus Jacensis hanc Chartam confirmo ad preces D. regis; Ego Amato, Burdegalensis archiepiscopus et legatus Domini papæ, hanc Chartam laudo et confirmo, etc. » Anno mxcv, *Urbanus II* litteris die decima sexta kalend. mensis Maii, Pontificatus sui anno viii, Indictione tertia datis, *Petro* regi et ejus successoribus Breve Apostolicum concessit, ut templorum quæ extrinerentur vel Mauris criperentur, decimas et redditus ipsi perciperent, exceptis tantum Ecclesiis cathedralibus. Quod Privilegium in eadem Bulla proceribus etiam concessit; tanta erat cupiditas Saracenorum extirpandorum, ut quid incommodi ea indulgentia allatura esset in posterum, non satis considerarent. Ea enim complures abutentes varias Ecclesias spoliaverunt, ut videre est apud *Rerum Hispanicarum* scriptores. *Oschæ* expu-

(1) Si genuina esse admittatur Charta hujus Sanctii Aragonie regis, de concessione decimarum et locis quibusdam Mauris paulo ante ereptis, relatam a PP. Martene et Durand Anecd., t. I, col. 271, ex ea deducimus regem hunc vitam ad annum usque MVI prorogasse. Consignatur enim Charta illa Æræ MXXIV, quo in annum MXXVI incidit. Ex eadem patet Charta evincit *Petrum* Jacensem anno illo nondum sedem suam *Oscham* transulisse, nam eodem Charta subscripti et *Petrus* Jacensis. Insuper in ex discimus ejusdem Sanctii familiam, cum ibi memoratur Felicia regina et filius ejus *Petrus Sanctus*, quod si *Urbanus II* mense Aprilis A. MXXV, bullam suam ad *Petrum* Aragonie regem dirigat, non hinc sequitur Sanctium eo anno et die jam vita functum fuisse, cum enim *Petrus* vivente patre cum illo jam regnaret, potuit utique *Urbanus* litteras ad illum eam ad regem dare.

gnationem præcessit victoria de *Almosabeno* Cæsaraugustæ rege a Saracenis in auxilium evocato, ad *Alcoracium* die decima nona Novembris reportata. Post eam enim *Abderrhomanus* Oschæ rex, oppido die xxvii Novembris anni mxcvi dedito, *Barbastrium* recessit. Petrus rex *Oschæ* regem sese appellavit, et Petrus Jacensis episcopus statim sedem in eam urbem transtulit, uti in præcedenti

Concilio Jacensi decretum fuerat. Annum captæ *Oschæ* notavit etiam chronographus Malleacensis, ut suo loco videbimus. Eam Carolus M. cum Barcinone anno dclxxviii in suam potestatem redegerat, ut legitur in Annalibus Masciacensibus, tom. II Biblioth. Labbei pag. 733, sed Saraceni eam iterum occuparant.

URBANI II ANNUS 5. — CHRISTI 1095.

1. *Concil. Placentinum in quo acta causa imperatricis Praxedis, decretum auxilium Orientalibus, hæreses vigentes damnatæ.* — Nonagesimus quintus supra millesimum surgit annus, Indictione tertia, quo ab Urbano papa hæc esse gesta, sigillatim Bertholdus rerum inspector enarrat: « Dominus papa Urbanus jamdudum de Roma profectus, Natalem Domini in Tuscia gloriosissime celebravit: in qua provincia Pisanus episcopus, nomine Dagobertus (Dailbertus), ei studiosissime servivit, quem ipse jamdudum archiepiscopali pallio et potestate sublimavit, quod antenus Pisanensis episcopus habere non consuevit ». Et post aliqua: « Dominus papa, Deo et sancto Petro prosperante, jam pene ubique prævaluit, et in media Longobardia in civitate Placentina, inter ipsos schismaticos et contra ipsos generalem Synodum condixit, ad quam episcopos Italiae, Burgundie, Franciæ, Alemanniæ, Bajoariæ, aliarumque provinciarum, canonica et Apostolica auctoritate missis litteris convocavit. Facta est autem hæc Synodus circa mediam Quadragesimam Placentiæ, ad quam Synodum multitudo tam innumerabilis confluit, ut nequaquam in qualibet Ecclesia illius loci possit comprehendi. Unde et dominus papa extra urbem in campo illam celebrare compulsus est. Hoc tamen non absque probabilis exempli auctoritate: nam primus legislator Moyses populum Dei in campestribus, legalibus præceptis, Deo iubente, instituit. Et ipse Dominus non domibus, sed in monte et in campestribus discipulos suos Evangelicis statutis informavit. Missas quoque nonnunquam extra Ecclesiam satis probabiliter, necessitate quidem cogente, celebramus, quamvis Ecclesias

earum celebrationi specialiter deputatas non ignoramus.

2. « In hac Synodo, Praxedis regina jamdudum ab Henrico separata, super maritum suum domino Apostolico et sanctæ Synodo conquesta est de inauditis fornicationum spurciitiis quas apud maritum passa est. Cujus, querimoniam dominus papa cum sancta Synodo satis misericorditer suscepit, eo quod ipsam tantas spurciitiis non tam commisisse, quam invitam pertulisse pro certo cognoverit. Unde et de pœnitentia pro hujusmodi flagitiis injungenda illam elementer absolvit, quæ et peccatum suum sponte et publice confiteri non erubuit.

3. « Ad hanc Synodum Philippus rex Galliarum legationem suam direxit, sequæ ad illam iter incorpisse, sed legitimis sociis (causis) se impeditum fuisse mandavit: unde inducias sibi usque ad Pentecosten apud dominum papam, Synodo intercedente, impetravit. Dominus autem Inngo Lugdunensis archiepiscopus, ad eandem Synodum vocatus, ab officio suspenditur, eo quod ipse non venerit, nec legatum cum canonica excusatione illuc pro se direxerit.

« Item legatio Constantinopolitani in primis ad hanc Synodum pervenit, qui dominum papam omnesque Christi fideles suppliciter imploravit, ut aliquod auxilium sibi contra paganos pro defensione sanctæ Ecclesiæ conferrent, quam pagani jam pene in illis partibus deleverant, qui partes illas usque ad muros Constantinopolitanæ civitatis obtinuerant». Sane quidem plures eodem argumento scripsisse litteras Alexium imperatorem ad Urbanum papam, implorantem ab eo auxilium,

testatur Urspergensis in Chronico. Pergit vero Bertholdus : « Ad hoc ergo auxilium dominus papa multos incitavit, ut etiam iurejurando promitterent, se illuc Deo annuente ituros, et eidem imperatori contra paganos pro posse suo fidelissimum adjutorium collaturos.

4. « Hæc autem inter alia in illa Synodo constituta sunt, ut ad penitentiam nullo modo reciperentur, qui concubinas et odium ex corde et quodlibet mortale peccatum dimittere nollent.

« Item ut nullus presbyter aliquos ad penitentiam reciperet, nisi cui proprius episcopus hanc curam commisisset.

« Item ut quibuslibet rite ad confessionem venientibus Eucharistiam non denegemus, quos solo corpore, non mente inter excommunicatos manere, nec tamen eorum sacramentis communicare cognoscimus.

« In hac quoque Synodo hæresis simoniacorum penitus damnata est, ut quidquid in sacris ordinibus et in Ecclesiasticis rebus data et promissa pecunia acquisitum simoniacis videretur, pro irritato haberetur, nullasque vires habuisse et habere judicaretur. His tamen qui non simoniace et nescienter ab huiusmodi ordinati sunt, cum suis ordinatoribus irrecuperabiliter damnati sunt.

5. « Item hæresis Nicolaitarum, id est, incontinentium subdiaconorum, diaconorum, et præcipue sacerdotum irrefragabiliter damnata est, ut deinceps de officio se non intromittant, qui in illa hæresi manere non formidant : nec populus eorum officia ullo modo recipiat, si ipsi Nicolaitæ contra hæc interdicta ministrare præsumant.

« Item hæresis Berengariana, jam ab antiquo sæpissime anathematizata, iterum damnata est, et sententia Catholice fidei contra eandem firmata ; videlicet, quod panis et vinum, cum in altari consecrantur, non solum figurate, sed etiam vere et essentialiter in corpus et sanguinem Domini convertantur.

« Item in Guibertum hæresiarcham, Sedis Apostolicæ invasorem, et in omnes ejus complices, sententia anathematis synodali judicio cum ardentibus candelis iterum promulgata est. In hac Synodo quatuor millia fere clericorum, et plusquam triginta millia laicorum fuisse perhibentur.

« In hac Synodo constitutum est, ut pro chrismate, et baptismo, et sepultura nihil unquam exigatur.

« Item ut jejunia Quatuor-Temporum hoc ordine celebrentur, scilicet primum in prima hebdomada Quadragesimæ, secundum in hebdomada Pentecostes, tertium vero et quartum in Septembri et Decembri antio more fiant. Huic Synodo reverendissimi antistites interfuerunt : de Bajoaria quidem, Domo Salzburgensis archiepiscopus, et Udalricus Pataviensis episcopus, ejus suffraganeus, de Alemannia vero Gebhardus Constan-

tiensis episcopus, qui et Arnulphum Mediolanensem archiepiscopum diu quidem electum sed nondum consecratum, eodem tempore ex concessione domini papæ Mediolani consecravere.

6. « Ipse quoque dominus papa Udalricum Augiensem abbatem eo tempore consecravit, qui itidem prædictæ Synodo interfuit : cui in præsentia Constantiensis episcopi omnem episcopalem potestatem in clerum et populum Augiensis insulæ interlaxit, quam dudum Constantiensi episcopo concessit. Abbas tamen ille non multo post de illa potestate se intromisit. Unde querimonia facta ab episcopo, dominus papa illum, missis litteris, ab huiusmodi præsumptione iterum compescuit ». Hucusque de Synodo Placentina Bertholdus. Porro ejusdem Concilii quindecim canones continentur in Codice scripto Anselmi Lucensis, libro septimo decretorum, ab eadem Synodo Placentina statuti, his quæ sunt recitata superius consentientes, ut hic ipsos describere non sit opus ».

7. Sed non pigeat audire de tanta Synodo etiam Dominizonem qui aderat, hæcque de ipsa metro cecinit, licet inculto, veraci tamen :

Tunc pastor sanctus Synodum celebravit, et annus
Christi millesimo nonagesimo quoque quintus,
Primus erat mensis quo nascitur humor in herbis,
Ore sacerdotum damnantur facta malorum,
Affuit his dictus Proxedis atque Mathildis,
Catholicos plene benedixit papa fideles,
Hanc Synodum sanctam Placentia continet ampla :
Expleta Synodo, dominus quem sæpe recorder
Papa valedixit, clericis comitatus abivit
Per multas arbes curas convertere plures,
Gallia quem patrem suscepit maxima clarum.

Idem vero Bertholdus affectatus vestigia ejusdem Urbani Pontificis, quo processerit post Placentinum Concilium, et quæ gesserit sic narrat : « Conradus rex, filius Henrici, domino papæ Urbano Cremonam venienti obviam progreditur, eique stratoris officium exhibuit quarto idus Aprilis.

8. *Indicetur Concilium Claromontense.* — « Deinde fecit ei fidelitatem juramento, de vita, de membris, et de papatu Romano. Dominus autem papa in filium sanctæ Romanæ Ecclesiæ recepit illum, eique consilium et adjutorium ad obtinendum regnum et ad coronam imperii acquirendam coram populo firmissime promisit, salva quidem iustitia illius Ecclesiæ et statutis Apostolicis, maxime de investituris in spiritualibus officiis a laico non usurpandis ». Et inferius : « Conradus rex cum regio apparatu in Tusciam Pisas perrexit, ibique sponsam suam, filiam Rogerii ducis de Sicilia, adhuc admodum parvulam cum inaudita pecunia sibi oblatam recepit. Dominus papa rebus in Longobardia bene dispositis, in Gallias marino itinere cæpit divertere, et ad sanctam Mariam ad Podium in Assumptione ipsius pervenit, Synodumque ad Montem-Clarum in octavam sancti Martini Apostolica auctoritate condixit ; ad quam diversarum provinciarum episcopos, missis litteris, canonica

vocatione invitavit ». Hæc de indicta Synodo Claramontensi Bertholdus.

9. *In causa Philippi regis quanta scripserit, egerit et passus fuerit Ivo, ut ab illicito conjugio eum revocaret.* — Indicta quam diximus jam Synodo Claramontensi apud Arvernos, statim a Francorum rege Philippo legati parantur ad papam, qui eum emolliant, ut nervos censuræ Ecclesiasticæ relaxet, regem benigne habeat, condescendatque labili juventuti. Hos autem præveniens Ivo episcopus Carnotensis, has ad eundem Urbanum Pontificem litteras de his scripsit, dignas ipsas quidem quæ Annalibus Ecclesiasticis intexantur, quæ sic se habent ¹ :

« Urbano summo Pontifici, Ivo, sanctitatis suæ filius, fidelium orationum munus.

« Venturi sunt ad vos in proximo nuntii ex parte regis Francorum, per quorum os locuturus est spiritus mendax; qui infatuati adeptione vel promissione honorum Ecclesiasticorum, infatuare moliantur Sedem justitiæ. Contra quorum calliditatem a parvitate mea vigilantiam vestram volo esse præmunitam, quatenus rigorem vestrum promissiones eorum non emolliant, comminationes non exterreant.

10. Ut quidam enim dicent, jam securis ad radicem arboris posita est, nisi ut aut arcum remittatis, aut gladium suspendatis? Qui ergo venturi sunt, in calliditate ingenio sui et venustate linguæ suæ, prædictis de causis impunitatem flagitii se impetraturos regi a Sede Apostolica promiserunt, hac ratione ex parte usuri, regem cum regno ab obedientia vestra discessurum, nisi coronam restitueris, nisi regem ab anathemate absolvas. Si autem impoenitenti venia concedatur, quanta spes impune peccandi peccantibus de cætero relinquetur? Non est incum instituire vestram prudentiam, cujus potissimum interest delinquentium errata non fovere, sed ferre. Si autem aliqui subdoli evidenter ab unitate matris suæ Ecclesiæ discedunt, qui jam pridem mente discesserunt, consoleretur sanctitatem vestram divinum responsum ² : Reliqui mihi septem millia virorum; et illud Apostoli ³ : Oportet hæreses esse, ut hi qui probati sunt, manifesti fiant.

11. « De cætero volo sciat vigilantia vestra, quia ex præcepto regis, Rhemensis, et Senonensis, et Turonensis archiepiscopi invitaverunt suffraganeos episcopos, ut post responsa vestra apud Trecas prima Dominica post festivitatem Omnium Sanctorum conveniant. Quo invitatus ire dissimulo nisi vestro consilio munitus, timens ne quid contra justitiam et Sedem Apostolicam moliatur ille conventus. De his itaque et de his quæ circa vos sunt, quæ libuerit rescribat mihi vestra paternitas, ut in adversis compati, et in lætis valeam congratulari. Vale ». Quæ autem rescripserit Urbanus papa non liquet, constat tamen omnia ab eo post

hæc effecta secundum ejusdem Ivonis consilium, ut adversus adeo enormiter delinquentem regem perseveraverit intrepidus, judicans regem et puniens ex sacrarum legum præscripto.

12. Post discessionem legatorum regis, idem Urbanus papa litteras scripsit ad omnes archiepiscopos et episcopos Galliarum, quibus hortatus est eos, ut regem hortarentur ad resipiscentiam, alioqui in eum exercerent Ecclesiasticam disciplinam. Meminit harum litterarum idem Ivo episcopus Carnotensis, qui laboravit suis litteris ut regem ad meliorem frugem reduceret, ut ex eis apparet. De litteris autem Urbani sic Ivo : « Exemplar litterarum, quas misit mihi dominus papa de causa regis, postquam legati regis nuper discesserunt, vobis transmittito; ut sciatis quia dominus papa etsi non antecedit, non tamen retrocedit ». Et de iisdem etiam idem Ivo ad dapiferum regis Willelmum hæc scribit :

13. « Clarissime, quia te scio velle laborare de componenda pace inter me et dominum regem, nullas gratias tibi reddo. Sed quia hæc pax non possit esse stabilis, quandiu voluerit incepto suo durare, consilium meum est adhuc exspectare, si forte Dominus daret ei mentem bonam, ut vellet consilium suum in melius commutare. Quod si facere vellet, scias omnia esse parata quæ necessaria sunt ad faciendum divortium inter eum et novam conjugem suam. Vidi enim litteras, quas misit dominus Urbanus Apostolicus ad omnes archiepiscopos et episcopos regni sui, ut eum ad rationem mittant, et nisi resipuerit, ecclesiastica eum disciplina ad emendationem venire constringant. Hæc quidem litteræ jam publicatæ essent, sed pro amore ejus feci eas adhuc detineri, quia nolo regnum ejus, quantum ex me est, adversus eum aliqua ratione commoveri. Hæc omnia volo ut dicas domino nostro regi, et secundum hoc quod apud eum inveneris, mihi facias remandari. Vale ».

14. Verum omnes Francorum episcopi sic litteris Urbani papæ commoti sunt, ut tamen non vere correctionem regis urgerent, sed palpando potius indulgerent. Queritur de his Ivo ipse Carnotensis episcopus, et quo ipse sit animo declarat, ita scribens ad Richerium archiepiscopum Senonensem ¹ : « Conductum enim a domino meo rege quasivi, nec habere potui. Quantum vero ex intentatis minis intelligo, non licet mihi in conventu vestro impune dicere veritatem, qui pro jam dicta veritate et Apostolicæ Sedis obedientia tantam jam sentio severitatem, ut perjurium arguar incurrisse, et majestatem regiam minuisse ». Hæc in Ivonem languentes episcopi, in quos hæc ipse : « Quod (ut pace vestra dicam) rectius in eos retorqueri potest, qui vulnus fomentis incurabile tantquam pii medici canteris competentibus dissimulant urere, vel medicinali ferro præcidere. In qua sententia si mecum firmiter fuissetis, jam ægro-

¹ Ivo Ep. xxviii. — ² Reg. xix. — ³ 1. Cor. xi.

¹ Ivo Ep. cix.

tum nostrum ad sanitatem perduxissetis. Quod quandiu differitis, videte si fidelitatem quam debetis pleniter exhibetis, si officii vestri munus expletis. Fiaciat ergo dominus rex adversum parvitatem meam, quantum Deo permittente libuerit et licuerit, includat, excludat, proscribat; inspirante Dei gratia et prosequente, decrevi pati pro lege Dei mei, nec ulla ratione cogente, volo ei consentaneus in culpa esse, qui nolo esse consors in poena. Angelus magni consilii et spiritus fortitudinis sit vobiscum, ut recta sapiatis et recta faciatis». Itac Ivo ad episcopos ad provinciale tunc Synodum convocatos, ad quam ipse vocatus cur non accesserit, sic se ad regem scribens excusat¹:

15. «Philippo, Dei gratia magnifico Francorum regi, Ivo humilis sublimitatis suae clericus, sic se regere ut Regi regum valeat complacere.

«Excellentiae vestrae litteras nuper accepi, quibus submonebar, ut apud Pontesium vel Calvum-Montem cum manu militum vobis, die quem statueratis, occurrerem, iturus vobiscum ad Placitum quod futurum est inter regem Anglorum et comitem Northmannorum. Quod facere ad praesens, magnae et multae causae me prohibent. Prima, quia dominus papa Urbanus interdicat vobis Apostolica auctoritate, thorum mulieris quam pro uxore habetis. Quia sacramentum de securitate Concilii, quod vobis mandaverat, fieri vetuistis. A cuius commixtione si amodo non cessatis, separat vos eadem auctoritas a participatione corporis Domini et sanguinis. Interdicat etiam omnibus episcopis, ne capiti illius mulieris coronam imponant, quam (ut ubique paene terrarum dicitur) lateri vestro illicite copulastis. Parens igitur majestati vestrae dissimulo vestram adire praesentiam, ne Sedis Apostolicae jussione compulsus, cui vice Christi parere me oportet, quod nunc dico in aure, cogar in vestris et multorum auribus publicare. Ego autem nolo vos scandalizare, vel regiam majestatem vestram minuire, quandiu possum honesta ratione dissimulare. Praeterea casati Ecclesiae et reliqui milites paene omnes vel absunt, vel pro pace violata excommunicati sunt, quos sine satisfactione reconciliare non audeo, et excommunicatos in hostem mittere non debeo.

16. «Postremo novit vestra serenitas, quia non est mihi in curia vestra plena securitas, in qua ille sexus est mihi suspectus et infestus, qui etiam amicis aliquando non satis est fidus. Exspecto igitur, ut aliquando cor vestrum, illustrante divina gratia, contra sibilum serpentis auditum obturetis, et monitis salutis aures cordis aperiat. Hoc desidero, hinc ante Dominum quotidie preces fundo». Ilac tunc ad regem Ivo episcopus Carnotensis. Tentavit autem rex inflectere ferreum Ivonis animum multis promissis, ut sibi liceret saltem ad tempus cum pellice commorari. Sed quid ipse rescripserit ad eum qui ista tentaret, accipe tanto episcopo,

plane decore et ornaento Galliarum saeculi huius, dignam Epistolam:

17. «Ivo, humilis Carnotensis episcopus, Widoni dapifero salutem¹.

«Quae mihi mandasti per Landricum presbyterum, jam audieram per Eberardum nepotem tuum, videlicet quod rex multa mala dimittere, et multa bona se promittat velle facere, si cum pace Sedis Apostolicae et communione Ecclesiastica, mulierem quam illicite habet valeat ad tempus retinere. Unde ex auctoritate divina hoc charitati tuae rescribo, quod nulla redemptione vel commutatione quis peccatum suum poterit abolere, quandiu vult in eo permanere; secundum illud Apostoli²: Voluntarie peccantibus non relinquitur hostia pro peccato. Quod est aliis verbis dicere, quia nemo in peccato suo perdurare volens, peccatum suum poterit aliqua elemosyna vel oblatione redimere. Unde et Dominus Cain sua offerenti et tamen homicidium cogitanti legitur respondisse³: Si recte offeras et non recte divides, peccasti, quiesce. Quasi dicat, peccas non recte partiendo, qui tua offers, et de homicidio tractans, teipsum qui tuis melior es mihi auferis. Hinc etiam dicit beatus papa Gelasius: Legatur ex quo est religio Christiana, vel certum detur exemplum in Ecclesia a quibuslibet Pontificibus, aut ab ipsis Apostolis, ab ipso denique Salvatore, veniam nisi corrigentibus fuisse concessam? Auditum autem sub isto caelo ab aliquibus nec legitur omnino, nec dicitur: Date nobis veniam, ut tamen nos in errore duremus. Ostendatur ergo quibus occasionibus, quibus regulis, qua lectione, vel quo documento sive a maioribus nostris, sive ab ipsis Apostolis, quos potiores fuisse merito non dubium est, sive ab ipso Domino Salvatore, qui iudicaturus creditur vivos et mortuos, vel si factum est unquam, vel faciendum esse mandatur. Propter haec et alia his multa similia, scio consilium domini regis bonum exitum habere non posse, nisi a peccato desistat, et Christi iugo se poenitendo subiciat, cum Dominus non nostram, sed nos ad salutem nostram requirat. Dic ergo haec omnia domno regi, ut sanius consilium perquirat. Quod si ei Dominus ministraret, me adiutorem in quibuscumque possem inveniret. Vale».

18. Sed quae post haec passus sit Ivo, ubi tentatus per omnia inventus est adversus regem pro iustitia immobilis stare, littere ejusdem ad Willelmum abbatem tuis temporibus datae declarant, quae sic se habent⁴:

«Magnis honestatis propugnatoribus et turpitudinis oppugnantibus, Joanni scilicet et Eliae assimilare me voluit in litteris vestris vestra fraternitas. Quorum sanctitati quamvis longe impares simus, eorum tamen vestigia honorare, mirari et imitari quantum exoptamus, donante Deo possumus. Unde non tantum a rege, cujus illicito

¹ Ivo Ep. cv.

¹ Ivo Ep. cxv. — ² Heb. x. — ³ Gen. iv. — ⁴ Ivo Ep. xcix.

conjugio contraximus, verum etiam a quibusdam aliis filiis hujus sæculi, quorum perversitatibus quantum possumus reluctamur, honorum Ecclesiasticorum gravia damna perpetimur. Quorum direptionem lucri majoris compensatione per Dei gratiam longanimitèr sustinemus, et majora, si necesse sit, subire parati sumus, attendentes illud Apostoli ¹:

19. « Quia non sunt condignæ passionēs hujus temporis, ad futuram gloriam quæ revelabitur in nobis. Et illud ²: Si compatiimur, et conregnabimus. Et quia jam instant illa tempora periculosa, in quibus impletur quod scriptum est ³: Ex abundantia iniquitatis refrigescet charitas multorum; dicendum est petris montium ⁴: Cadite super nos, et ⁵ abscondite nos ab ira Agni. Quod quid est aliud dicere, nisi in fide robustis et sanctitate sublimibus viris in hac sententia supplicare: Nostræ miseriæ misericorditer condescendite, et ne in tentationem inducamur et iram Dei incurramus, vestris orationibus impetrate. De quibus petris quia vos, et in sancta societate vestra plures esse non diffidimus, hanc a vobis apud Dominum intercessionem obnixè postulamus, quatenus sic per ignem et aquam transeamus, ut in refrigerium divino ductu educi valeamus. Nos enim publicorum negotiorum tumultibus occupati, cum ipsis compescendis tota die laborando sufficere non possimus, internæ quietis suavitatem vix aliquando admittimus, non canonicum pensum determinatis horis solvere prævaleamus. Vos igitur et ceteri servi Dei, qui velut in portu navigatis, oportet ut nobis orationis manus, quia longe potestis, extendatis, et vobiscum ad optatam requiem studeatis etc. »

20. Ad regem vero pro recuperandis ablatis Ecclesiæ bonis, has tunc idem Ivo litteras scripsit ⁶:

« Philippo piissimo Francorum regi domino suo, Ivo humilis Carnotensium episcopus sic gubernare temporale regnum, ut non amittat æternum.

« Quoniam præcedente divina gratia, de stercore pauper usque ad solium principum per manum vestram elevatus sum, fateor me post Dominum pro posse meo cuncta vobis debere quæ vestro congrunt honori et saluti. Sed quia exasperatus propter salubres monitus, quos serenitati vestræ ex summa fidelitate et charitate direxi, me diffiduciasti, et bona episcopalis domus diripiendi adversariis nostris exposuistis, gravia et grandia inde perpeusus incommoda, regali curiæ ad præsens nec secure possum interesse nec honeste. Supplico itaque majestati vestræ, ut regia interim mansuetudine supportetis, donec possim aliquantulum respirare, et damna quæ mihi usque ad penuriam panis inflicta sunt, aliqua ex parte reparare. Exspecto etiam per misericordiam Dei cito

futurum, ut verum esse cognoscatis illud proverbium Salomonis ¹: Meliora sunt vulnèra diligentis, quam fraudulenta oscula blandientis. De cætero, calumniatoribus meis, quibus me respondere jubetis, cum insinuali fuerint qui sint et quid expositulent, respondere non subterfugiam, vel in Ecclesia, si Ecclesiastica sint negotia, vel in Curia, si sint curialia. Bene valete ».

21. At non hic quievit persecutio, sed eo usque processit, ut abreptum sanctum episcopum in carcerem, prohi scelus! detruserit. Cumque a suis Carnotensibus se sciret manu violenta educendum parari, ne id facerent, his litteris ad eos datis, exoravit ²:

« Ivo Dei gratia Carnotensis episcopus clericis et laicis Carnotensibus salutem.

« Audiavi primates urbis vestræ ad invicem conjurasse guerram se facturos adversus Vicecomitem pro mea liberatione. Quod nequaquam mea liberatio est, sed inclusionis mee non solum exasperatio, sed interminata productio. Quare ne fiat prohibeo, interdicto. Nec enim incendiis domorum, depredationibus pauperum potestis Dominum placare, sed vehementer asperare, sine cuius beneplacito, neque vos, neque aliquis poterit me liberare. Nolo ergo ut adversum me implere facialis aures Dei pauperum clamoribus, lamentis viduarum. Neque enim decens est, ut qui armis bellicis ad episcopatum non veni, armis bellicis reciperem: quod non est pastoris, sed invasoris. Si manus Domini tetigit me et adhuc extenta est super me, permittite me solum cibare miseriæ meam, et sustinere iram Dei donec justificet causam meam, et nolite tribulationem meam aliena cumulare miseria. Decretum est enim mihi non solum includi, vel Ecclesiastico honore privari, sed etiam magis mori, quam per (pro) me stragem hominum fieri. Monco igitur vos per supereminentem Christi charitatem, ut neque hoc facialis, neque fieri permittatis. Quod tamen si feceritis, certum est quod nihil proderit nobis, cum defector meus multos habeat adjucores, et nihil habeat quod ei auferre possitis. Recordamini quod legitur ³, quia Petrus servabatur in carcere; oratio autem sine intermissione fiebat ad Dominum pro eo. Orationibus ergo et severitate Ecclesiastica contenti estote, quam si transgressi fueritis, scio quia me ulleris episcopum habere non vultis.

22. « In eo enim quod semel recessistis, sicut exitus approbat, non bene mihi et vobis consulistis. De cætero ergo contenti estote terminis quos posuerunt patres vestri; ne si his contenti non fueritis, quamam liberationem meam eo forsitan modo, qui non placeat vobis. Valete. Deus pacis et dilectionis det vobis in hoc negotio et in omnibus aliis recta sapere et facere ». Liberatus autem ista scripsit ad Boellum episcopum Cenomanensem, cujus ad Deum precibus per sancti Juliani inter-

¹ Rom. viii. — ² 2. Tim. ii. — ³ Matth. xxiv. — ⁴ Luc. xxiii. — ⁵ Apoc. vi. — ⁶ Ivo Ep. cii.

¹ Prov. xxvii. — ² Ivo Ep. c. — ³ Act. xii.

cessionem fuerat liberatus e carcere, gratias dignas illi referens, hac ad eum perbreui data Epistola¹:

23. « Gratias ago primum Deo liberatori meo, in die qua eripuit me de manu omnium inimicorum meorum, et de manu Saul: dehinc vigilantissimæ charitati vestræ, quæ intensis orationum clamoribus Dominum in navi dormitantem suscitavit, quatenus eo increpante ventos et mare, cessaret nubilosa tempestas, et rediret serena tranquillitas. Unde me vobis arctioribus charitatis vinculis astrinxistis, et inexcusabilem commodorum executorem acquisistis; sed in hoc nubilo mentis meæ plenam adhuc consolationem non habui, quod illi sanctæ lætitiæ, quando corpus beati Juliani translatum est, adhuc in ergastulo clausus interesse non merui. Posset autem vestra fraternitas hanc nubem cordis mei in serenitatem cito convertere, si aliquas illius sancti corporis reliquias parvitati meæ velletis communicare: non enim patrocinium loci vestri minueretur, sed fama et meritum beati Confessoris pro mea occasione in Belgica provincia, in qua meritum ejus nimis notum est, publicaretur, et festivitas ejus omni anno celebriter coleretur. Mandate igitur per fratrem istum, cum ad nos redierit, si hoc fieri possit, quatenus vel ad vos mittam, vel ipsemet, si vobis visum fuerit, veniam. Vale ». Sed jam ad Urbanum Pontificem redeamus, paratam habentem securum, ad præcedendum omnem altitudinem extollentem se adversus scientiam Dei.

24. *Concilium Claromontense et ejus canones et statuta.*— Sic igitur post hæc, ipse Urbanus Pontifex apud Arvernos Concilium tandem celebrandum indixit, de quo Bertholdus: « In Galliis ad Clarum-Montem Synodus generalis a domino papa in octava S. Martini congregata est, in qua tredecim archiepiscopi cum eorum suffraganeis fuerunt, et ducente quinque pastorales virgæ numeratæ sunt. In hac Synodo dominus papa eadem statuta, quæ et in præterita Synodo Placentina, confirmavit. Insuper et Philippum regem Galliarum excommunicavit, eo quod propria uxore dimissa, militis sui uxorem sibi in conjugium sociavit. Ibi etiam aliam Synodum in tertium subsequens Quadragesimæ hebdomadam Turonis celebrandam denuntiavit ». Hæc ipse. Eadem de excommunicato rege Sigebertus. Sed et Bertradam regiam pellicem eadem excommunicatione mulctatam, Willelmus in rebus Anglicis tradit², canonesque recenset. Porro ex Concilio Claromontensi triginta duo canones excerpti reperiuntur in Codice Lamberti episcopi Atrebatensis, ex quo totidem lineis Antonius Augustinus sic descripsit:

25. « Anno Domini Christi millesimo nonagesimo quarto (quinto) mense Decembrio, decreta domini Urbani papæ Secundi in Claromontensi Concilio data ». Ita titulus præfixus a librario se-

quentibus canonibus, et primum propter schismaticos federe conjungendos.

1. « Statutum est ut omni die, et monachi et clerici, et femine, et quæ cum eis fuerint, in pace permaneant; tribus autem diebus, scilicet secunda, tertia et quarta, ab aliquo alicui illata non reputabitur pacis fractio; quatuor autem reliquis diebus, si quis alicui injuriam intulerit, fractionis sanctæ pacis reus habeatur, et prout judicatum fuerit puniatur.

« 2. Quicumque pro sola devotione, non pro honoris vel pecuniæ adeptione, ad liberandam Ecclesiam Dei Hierusalem profectus fuerit, iter illud pro omni pœnitentia reputetur¹.

« 3. Ut nullus fiat decanus in Ecclesia, nisi presbyter nullus archidiaconus nisi levita².

« 4. Ne aliquis clericus arma deferat.

« 5. Ut nullus laicus, clericus, vel tantum (saltem) subdiaconus in episcopum eligatur.

« 6. Ut nullus sibi præbendam emat: quod si quis emerit, vel parentes ejus illi emerint, in manum et dispositionem episcopi se reddat. Hoc idem de altari et de omni Ecclesiastico beneficio fiat.

26. « 7. Ut allaria congregationibus canonicorum vel monachorum per personas data, mortuis personis libera redeant in manus episcoporum, nisi fuerint illis per eorum scripta vel privilegia confirmata.

« 8. Ut nullus deinceps sepulturam exigit.

« 9. Ut nullus sacerdos, aut diaconus, aut subdiaconus, sed et nullus qui canonicum habet, fornicationis sibi copulam adjungat. Quod si fecerit, a canonica omnino arceatur.

« 10. Ut in domibus clericorum nullas liceat habitare mulieres, nisi quas sancti canones permittunt.

« 11. Ut nulli filii concubinarum ad ordines, vel aliquos honores Ecclesiasticos promoveantur, nisi monachaliter vel canonice vixerint in Ecclesia.

« 12. Ut nulli clericorum liceat deinceps in duabus civitatibus duas præbendas oblinere, cum duos titulos non possit habere.

« 13. Ut omnis clericus ad eum titulum, ad quem primum ordinatus est, semper ordinetur.

« 14. Ut nullus deinceps in una Ecclesia geminos honores habeat.

« 15. Ut nullus Ecclesiasticorum aliquem honorem a manu laicorum accipiat.

« 16. Interdictum est, ne reges vel alii principes aliquam investituram de Ecclesiasticis honoribus faciant.

« 17. Ne episcopus vel sacerdos regi vel alicui laico in manibus ligum fidelitatem faciat.

« 18. Ut nullus presbyter capellanus alicujus laici esse possit in confessione (absque confessione) sui episcopi.

27. « 19. Ne laici decimam partem de labori-

¹ Ivo Ep. ci. — ² Willel. Malm. l. IV. c. 2.

¹ Dist. VI. c. Nullus. — ² Dist. VI. c. I.

bus suis retineant; et sicut nec debent retinere, ita nec accipere.

« 20. Unde et interdictum est omnibus laicis, ne amplius altaria vel Ecclesias sibi retineant.

« 21. Ne aliquis laicus alterius sibi hæreditates usurpet: quod si quis fecerit, nec reus satisfecerit, nullus sacerdos cum interim ad poenitentiam admittat.

« 22. Similiter nec alium quemlibet, nisi perfectam confessionem fecerit. Verbi gratia, ut si perpetrato homicidio confessus fuerit, manserit in adulterio) vel huiusmodi, ad perfectam poenitentiam minime recipi debere decretum est. Attamen consilium damus, ut jejundet et elemosynas det, ut ad veritatis viam possit reverti.

« 23. Ut nullus Christianus a capite jejunii usque ad Pascha carnem comedat.

« 24. Ne fiant ordines (ordinationes), nisi Quatuor certis temporibus, et sabbato mediante Quadragesima: et tunc protrahatur jejunium usque ad Vesperas, et si fieri potest usque ad crastinum, ut magis appareat in die Dominicæ ordines fieri.

« 25. Ne filii presbyterorum, diaconorum, vel subdiaconorum, canonicorum, ad ordines vel alios honores Ecclesiasticos promoveantur, nisi monachus vel canonicus fuerit.

« 26. Ut in sabbato sancto protrahatur jejunium circa noctem.

« 27. Ut semper fiat jejunium veris in prima hebdomada Quadragesimæ; jejunium vero æstatis infra hebdomadam Pentecostes.

« 28. Ne quis communicet de altari, nisi corpus separatim et sanguinem similiter sumat, nisi per necessitatem et per cautelam. Idque ob recentem damnatam hæresim Berengarianam, quæ per unam tantum speciem satis esse impleri figuram aiebat.

28. « 29. Si quis ad aliquam crucem in via persequentibus inimicis confugerit, liber ac si in ipsa Ecclesia permaneat.

« 30. Quod si quis pro securitate Ecclesiæ vel prædictæ crucis aliquod crimen peregerit, et ad Ecclesiam vel crucem confugerit, accepta securitate vite et membrorum, reddatur iustitiæ.

« 31. Ne aliquis clericus res episcoporum vel clericorum in vita vel post mortem eorum diripiat, vel in usus proprios conferat. Quod si quis fecerit, anathema sit. Et dictum est ab omnibus: Fiat.

« 32. Si quis episcopum ceperit et incarcerationi, perpetuæ infamie subiaceat, ulterius arma non exerceat. Et claustrum est ab omnibus: Fiat. Hactenus canones. Qui autem exscripsit, ista adiecit: « Hæc sunt inventa in libro Lamberti episcopi Atrebatensis, ante quadringentos annos scripto: quæ quia in promptu erant, mittenda putavi ».

29. Apud Gratianum insuper ista leguntur ¹:

« Congregato apud Claramontem urbem multorum episcoporum synodali conventu, proposita est nobis a quibusdam eorum questio de Ecclesiis vel de Ecclesiasticis possessionibus, a clericis vel monachis usque ad præsentiarum, inconsultis episcopis, acquisitis. Nos autem usi saniori consilio eorumdem episcoporum, condescendentes pro tempore, providentesque Ecclesiasticæ paci, vel quid aliter absque inevitabili periculo huiusmodi questio non poterat procedere, Apostolica auctoritate decrevimus, ut ea quæ a clericis vel monachis, vel a quibuscumque personis, prout potuerint, usque hodie fuerint acquisita, rata perenniter et inconcussa permanent; hoc tamen tenore, ne in posterum inconsultis episcopis talia præsumant. Excepti ista Gratianus ex collectione Bernardi Papiensis. Porro apud eundem Gratianum recitati inveniuntur aliquot canones ejusdem Concilii Claramontensis sub titulo ¹ Concilii Arvernensis, cum eadem sit civitas.

30. Insuper et hæc sub eodem Concilio Claramontensi leguntur posita ²: « In Ecclesiis ubi monachi habitant, populus per monachum non regatur, sed capellanus qui populum regat ab episcopo per consilium monachorum instituitur: ita tamen, ut ex solius episcopi arbitrio, tam ordinatio quam depositio et totius vite pendeat conversatio ». Hæc ex Concilio Claramontensi. At non ita de regularibus clericis faciendum respondit ³ Ivo his verbis adversus Lemovicensem episcopum, talia in Synodo diocesana statuentem: « Quantum intellexi ex litteris ex vestra parte mihi nuper oblatis, graviter fert vestra fraternitas, quod Lemovicensis episcopus in Synodo agens, interdixit omnibus regularibus clericis et regimen parochiarum, et confessionem. Qui rectius quidem fecisset, si omnes sacerdotes ad regularem vitam invitasset, quam regulariter viventes a Dominicarum ovium custodia penitus removisset, quibus tanto plus displicet aliena malitia, quanto longius discesserunt a sua etc. » Suadet tamen episcopo obedire.

31. Confligit autem ut alii collectores in his laboraverint, licet non omnes recensuerint canones neque eodem ordine, exscripserintque, sed longe minorem numerum, ut inter alios Franciscus Belleforestus ⁴, qui profitemur ex scripto Codice Abbatie sancti Dionysii se descripsisse, sed lingua Gallica, a Serario Jesuita, viro insignis nominis nostri temporis, ita latine reddidit:

« Primo statutum est, ut nullus episcopus, vel abbas, vel alius e clero quivis dignitatem ullam Ecclesiasticam a principibus laicis et secularibus acciperet. Ita quod vigeret ejusmodi controversia, refragantibus schismaticis principibus: in singulis quippe Conciliis hoc sæculo celebratis id repetitum sæpe reperies. Pergit:

¹ Dist. LX. c. 1. et 1. q. III. c. 1. et alii. — ² C. 1. de ca. monach. Greg. IX. et c. 2. eod. tit. in prim. collect. — ³ Ivo Ep. XCIII. — ⁴ Lib. IV. Annal. Franc.

¹ Dist. XVI. p. VII. c. 2.

« Eademque opera omnem simoniacam rerum sacrarum acquisitionem veluit. Prohibuit omnibus in ordinibus sacris constitutis, ne cum mulieribus vel matrimonio conjunctis vel non conjunctis consuetudinem haberent, sed in perpetuo degerent cōlibatu.

« Quod si quis fornicatione pollueretur, omni Ecclesiastica privari dignitate jusserunt.

« Uti absolverentur a simoniæ crimine qui beneficia possiderent a suis cognatis eorum causa pretio empta, illis tamen insciis.

« Vetitum est etiam laicis a die Cinerum ad festum Paschæ carnibus vesci. Clericis autem et in Ecclesia promotis, a Quinquagesimæ Dominica ad diem Resurrectionis Domini.

32. « Neve Sabbati sancti officium divinum ante horam nonam matutinam celebraretur.

« Qui manus inficeret in episcopum, vel cum in vincula aut carcerem duceret, impius declaratus est, et legis cognitionisque Dei penitus expertus, et ut anathemate feriretur, atque ab Ecclesiæ communione rejiceretur.

« Qui parem vim faceret clericis atque ad ordines sacros promotis, fuerunt et anathemate percussi; et qui bona morieulium episcoporum vel abbatum invaderent, tanquam sacrilegi et excommunicati.

« Ut nemo admilleretur vel consecraretur in episcopum, nisi presbyter aut diaconus esset aut subdiaconus, et illustri genere ortus: nisi forte a Pontifice cum illo dispensatum esset.

« Nec filios presbyterorum, aut aliter etiam ex concubinis susceptos liberos ad presbyteratus gradum proveli liceret, nisi aliquo in monasterio religionem professi essent.

33. « Ne parochi et qui præsunt Ecclesiis, ob sepulturam defunctorum quidquam acciperent vel exigent.

« Mandatum esse etiam omnibus Christianis, ut diebus singulis sabbati officium beate Virginis recitarent ». Ilucisque ibi.

Sed præcipuum fuit illud, cujus causa potissimum illud Concilium indictum et collectum fuit, ut in eo indiceretur expeditio in Terram-Sanctam, de qua dicturi, historiam sui nobilitate insignem sed jam omnibus notam aggredimur, ob idque ea tantum monumenta veterum, quæ vel dicta vel scripta tunc fuisse reperiuntur, hic descripturi sumus.

34. *Indicetur in Concilio expeditio Hierosolymitana, ad quam Urbanus papa suis concionibus populos adhortatur.* — Urbanus igitur papa, quod sciret sepe a prædecessore suo Gregorio Septimo id esse tentatum, sed schismaticis intercedentibus, variisque bellis fuisse impeditum: urgentibus litteris Alexii imperatoris nuper in Placentino Concilio lectis, rem naviter agere cepit, ut ex fidelibus Christianis cogeretur exercitus in auxilium periclitantis Orientalis Ecclesiæ, potissimum vero Hierosolymorum, a cujus patriarcha Simeone,

deferente Petro eremita, natione Gallo, patria Ambianensi, litteras commiseratione dignas acceperat, quibus Christi incunabula, ejusque Sepulchrum atque reliqua loca sancta ejusdem Redemptoris nostri memoria consecrata, infidelibus Turcis profanata, omnique genere contumeliarum affecta deplorabat. Iste enim, teste Willelmo Tyrō archiepiscopo¹, qui eam de bello sacro historiam texuit (quem sequimur), cum petisset Hierosolymam, et litteras ad Urbanum papam et ad Christianos principes accepisset; a Christo quoque per visum, dum oraret ad sacrosanctum templum Resurrectionis, ad tanti muneris obeundam legationem accepit, non autem per Epistolam de cælo lapsam, ut plures sunt fabulati. Perdifficile intra veritatis septa continetur stylus historicorum, ne ad fabulosa vulgo jactata declinet. Quod solum vital, qui non aliunde quam ab originariis fontibus puram curat haurire aquam. Hic igitur ad tantum opus missus a Deo, ad sacrum bellum afflatus divino spiritu, classicum potenter intonuit, cujus divinæ tubæ clangore, ab universo pæne orbe Occidentali ad arma concurrirunt. Altamen primarius dux verbi atque promotor tantæ molis operis Urbanus Pontifex erat, qui in hoc ipso Claromon- tensi Concilio ad fratres ejusmodi, quam recitat Tyrus, habuit concionem²:

35. « Nostis, fratres dilectissimi (et vestram nosse id expedit charitatem) quomodo humani generis Reparator pro nostra omnium salute carnem assumens, et homo inter homines conversatus, terram promissionis, quam pridem Patribus promiserat, propria illustravit præsentia, et assumptæ dispensationis operibus, et crebra simul miraculorum exhibitione redditit specialiter insignem. Id enim et veteris et novi in omnibus syllabis docet series Testamenti. Quadam sane dilectionis prerogativa certum est eam dilexisse, ita ut eam orbis partem, imo particulam, *Hæreditatem* suam dignatus sit appellare, cum ejus sit omnis terra et plenitudo ejus. Unde per Isaiam ait³: Hæreditas mea Israel. Et item⁴, Vinca Domini Sabaoth domus Israel est. Et licet totam in partem præcipuum sibi dedicaverit ab initio; peculiarius tamen Urbem sanctam sibi adoptavit in propriam, testante Propheta, qui ait⁵: Diligit Dominus portas Sion super omnia tabernacula Jacob. De qua gloria Domini.... videlicet quod in ea docens, passus et resurgens Salvator, salutem operatus est in medio terræ, ad hoc a sæculo est prælecta, ut tantorum esset conscia et cella familiaris ministeriorum. Electi nimirum, quod ipse qui elegit, testatur dicens Et de Hierusalem civitate quam elegi veniet vobis Salvator.

36. « Quam etsi peccatis inhabitantium id exigentibus, justo judicio suo in manus impiorum sæpius tradi permiserit Dominus, et duræ jugum

¹ Willel. de bell. sac. l. i. c. 11. 12. — ² Id. ib. c. 15. — ³ Isa. xix. — ⁴ Isa. v. — ⁵ Psal. lxxvii.

servitutis ad tempus eam sustinere passus sit, non tamen arbitrandum est, quod eam quasi a se reputatam abiecerit, cum scriptum sit : ¹ Flagellat Dominus omnem filium quem recipit; illi vero thesaurizat iram, cui dicitur : ² Recessit zelus meus a te : jam amplius non irascar tibi. Diligit ergo eam, nec intepuit erga eam dilectionis fervor, cui dicit : ³ Eris corona gloriæ in manu Domini, et diadema regni in manu Dei tui; et non vocaberis amplius desolata, sed vocaberis voluntas mea, quia complacuit Dominus in te.

« Hæc igitur salutis nostræ cunabula, Domini patriam, religionis matrem, populus absque Deo, ancillæ filius Ægyptiæ possidet violentem, et captivitatis libere filii extremas imponit condiciones, quibus versa vice merito servire tenebatur.

37. « Sed quid scriptum est? ⁴ Ejice ancillam et filium ejus. Sarracenorum enim gens impia et mundanarum sectatrix traditionum, loca sancta, in quibus steterunt pedes Domini, jam a multis retro temporibus violenta premit tyrannide; subactis fidelibus et in servitutem damnatis, ingressi sunt canes in sancta, profanatum est Sanctuarium, humiliatus est cultor Dei populus, angarias patitur indignas genus electum, servit in luto et in latere regale sacerdotium : princeps provinciarum facta est sub tributo civitas Dei. Cujus non liquefiat anima, cujus non tabescant præcordia iis ad animum recurrentibus? Quis hæc siccis oculis audire potest, fratres charissimi.

38. « Templum Domini, de quo zelans Dominus vendentes eiecit et ementes ⁵, ne domus Patris ejus fieret spelunca latronum, facta est sedes dæmoniorum. Idipsum enim et Mathathiam sacerdotem magnum, sanctorum progenitorem Machabæorum, ad zelum accendit commendabilem, sicut ipse testatur dicens : ⁶ Templum Domini quasi vir ignobilis, vasa gloriæ ejus abducta sunt captiva. Civitas Regis regum omnium, quæ aliis regulas intemerate tradidit fidei, Gentium superstitionibus cogitur invita deservire. Sanctæ Resurrectionis Ecclesia, requies dormientis Domini, eorum sustinet imperia, fœdatur spurcitiis eorum qui Resurrectionis non habebunt participium, sed stipulæ ignis æterni perennibus deputabuntur incendiis. Loca venerabilia divinis deputata mysteriis, quæ Dominum in carne susceperunt hospitem, signa viderunt, senserunt beneficia, quorum omnium in se plena fide prætendunt argumenta, facta sunt gregum præsepia, stabula jumentorum. Landabilis populus, cui benedixit Dominus exercituum, sub angariarum et sordidarum patrationum pondere gemit fatigatus, rapiuntur eorum filii, matricis Ecclesiæ clara pignora, ut Gentium immunditias deserviant, et nomen Dei vivi abneget vel ore blasphement sacrilego compelluntur; aut imperia detrectantes cæduntur gladiis more bidentium,

sanctis martyribus sociandi. Non est sacrilegis locorum differentia, non est personarum respectus. In sanctuariis occiduntur sacerdotes et levite, coguntur virgines fornicari aut per tormenta perire, nec matronis ætas maturior suffragatur.

39. « Væ nobis, qui in hanc tam periculosi temporis descendimus miseriam, quam in spiritu prævidens electus a Domino David rex fidelis deplorat, dicens : ¹ Deus, venerunt gentes in hereditatem tuam, polluerunt templum sanctum tuum; et item : ² Populum tuum humiliaverunt, et hereditatem tuam vexaverunt. ³ Ut quid, Domine, irascaris in finem, accendetur velut ignis ira tua? ⁴ Ubi sunt misericordiæ tuæ antiquæ, Domine? Verumme est, quod dicitur : Non obliviscetur miseri Deus : non continebit in ira sua misericordias suas? ⁵ Recordare, Domine, quid acciderit nobis : intueri et vide opprobrium nostrum. ⁶ Væ nobis : ut quid nati sumus videre corruptionem populi nostri, et contritionem civitatis sanctæ? et sedere illic, cum dantur in manibus inimicorum sancta?

40. « Vos igitur, dilectissimi, armamini zelo Dei, accingimini unusquisque gladio suo super femur suum potentissime. ⁷ Accingimini, et estote filii potentes : melius est enim nobis mori in bello, quam videre mala gentis nostræ et sanctorum. Si quis zelum legis Dei habet, adjungat se nobis. Subveniamus fratribus nostris, dirumpamus vincula eorum, et projiciamus a nobis jugum ipsorum. Egre dimini, et Dominus erit vobiscum, armaque eade mutua illicite cruentatis (cruentata), in hostes fidei et nominis Christiani convertite. Furta, incendia, rapinas, homicidia, et cetera qualia qui agunt regnum Dei non possidebant, hoc Deo bene placito redimite obsequio, ut delictorum quibus Dominum ad iracundiam provocastis, celerem indulgentiam hæc vobis obtineant pietatis opera et deprecatio collata sanctorum. Monemus igitur et exhortamur in Domino, et in remissionem peccatorum injungimus, ut fratribus nostris et ecclésiæ regni coheredibus (omnes enim invicem sumus membra, coheredes autem Christi) qui Hierosolymis et in limbus ejus habitant, afflictioni et laboribus compatiētes, infidelium insolentiam, qui sibi regna principatus et potestates subijcere contendunt, debita compescatis animadversione, et illis lotis viribus occurratis, quibus est propositum nomen delere Christianum. Alioquin futurum est, ut in proximo Ecclesia Dei jugum indebitæ perferens servitutis, fidei sentiat dispendium, prevalente Gentilium superstitione. In quanta autem positi sint afflictione, noverunt ex vobis nonnulli, qui hæc quæ loquimur oculata adspexerunt fide, et præsens illorum per manum Petri viri venerabilis, qui præsens est, ad nos delata docet Ecclesia (Epistola).

¹ Psal. LXXVIII. — ² Psal. XLIII. — ³ Psal. LXXVIII. — ⁴ Psal. LXXVIII. — ⁵ Psal. LXXVI. — ⁶ Thren. V. — ⁷ 1. Mac. II. — ⁸ 1. Mac. III.

¹ Heb. XII. — ² Ezech. XVI. — ³ Isa. XXVIII. — ⁴ Gen. XXI. — ⁵ Luc. XIX. — ⁶ 1. Mac. II.

41. « Nos autem, misericordia Dei et beatorum Apostolorum Petri et Pauli auctoritate confisi, fidelibus Christianis, qui contra eos arma suseperint, et onus sibi hujus peregrinationis assumpserint, immensas pro suis delictis penitentias relaxamus. Illis in urbibus ubique luctus, ubique miserie, ubique gemitus. Suspirio hæc dico, Ecclesie, in quibus olim divina celebrata sunt sacrificia, prohi dolor ! ecce animalibus eorum sunt stabula. Nequaquam homines sanctas occupaverunt civitates : Turce spurci et immundi nostris fratribus dominantur. Antiochie B. Petrus præsedil episcopus : ecce in ipsa Ecclesia Gentiles suas collocaverunt superstitiones, et religionem Christianam quam potissimum coluisse debuerant, ab aula Deo dedicata turpiter eliminarunt.

42. « Episcopi vero et presbyteri qui talibus forsitan non restiterint, officii suspensione mulcentur, donec misericordiam Sedis Apostolicæ obtineant ». Hactenus Urbanus in Synodo peroravit. Subjicit vero ista Tyrinus : « Illis dictis, finem dicendi fecit, præcipiens iis qui aderant Ecclesiarum prælatis, ut ad propria reversi, cum omni instantia et debita sollicitudine plebes suas ad idem hortentur et invitent diligentius ». Et paulo post : « Ante omnia, juxta statuta Synodi fideliter laborantes, ut pax quæ verbo vulgari Treuga dicitur, ab omnibus observaretur illibata, ne ire volentibus et ad necessaria discurrere, ullum obiceretur impedimentum. Extat alius adhuc sermo ab hoc plane diversus ejusdem Urbani Pontificis, recitatus a Wilhelmo Malmesburiensi in Historia rerum Anglicarum¹ : ut non mirum sit in eodem Concilio de re tanta eundem Pontificem sæpius perorasse, vel in aliis Conciliis ab eo eadem ex causa habitis, sermones alios habuisse. Quinetiam inter schedas Vaticanæ Bibliothecæ adhuc alium sermonem Urbani papæ reperimus, a duobus nominatis plane diversum, quem hic describendo, ne pereat, perpetuitati consecrandum putavimus ; sic se habet :

43. « Sermo Urbani papæ in Concilio Claremontensi.

« Audivimus, fratres dilectissimi, et audistis, quod sine profundis singultibus tractare nequaquam possumus, quantis calamitatibus, quantis incommoditatibus, quam diris contritionibus in Hierusalem et in Antiochia, et in cæteris Orientalis plagæ civitatibus, Christiani nostri, fratres nostri, membra Christi flagellantur, opprimuntur, injuriuntur. Germani fratres vestri, cubernales vestri, coterini vestri (nam et ejusdem Christi, et ejusdem etiam Dei filii estis) et in ipsis suis domibus hæreditariis ab alienis dominis mancipantur, vel ex ipsis expelluntur, aut inter vos mendicant, aut, quod gravius est, in ipsis suis pa-

trimoniis venales exulant et vapulant. Effunditur sanguis Christianus Christi sanguine redemptus, et caro Christiana carni Christi consanguinea, nefandis ineptiis et servitutibus nclariis mancipatur. Illis in urbibus ubique luctus, ubique miserie, ubique gemitus. Suspirio hæc dico, Ecclesie, in quibus olim divina celebrata sunt sacrificia, prohi dolor ! ecce animalibus eorum sunt stabula. Nequaquam homines sanctas occupaverunt civitates : Turce spurci et immundi nostris fratribus dominantur. Antiochie B. Petrus præsedil episcopus : ecce in ipsa Ecclesia Gentiles suas collocaverunt superstitiones, et religionem Christianam quam potissimum coluisse debuerant, ab aula Deo dedicata turpiter eliminarunt.

44. « Prædia sanctorum stipendiis dedita, et nobilium patrimonia sustentandis pauperibus contradita paganæ tyrannidi subjiçuntur, eisque in proprios usus redactis, domini crudeles abutuntur. Sacerdotium Dei humotenus conculcatum est, Sanctuarium Dei per nefas ubique profanatum est : si qui adhuc ibi latitant Christiani, uti audistis, exquiruntur tormentis. De sancta Hierusalem, fratres..... loqui dissimulavimus, quod valde de ea loqui pertimescimus, quoniam ipsa civitas, in qua (prout omnes nostis) Jesus Christus pro nobis passus, peccatis nostris exigentibus sub spurcitiam paganorum redacta; denique servituti, ad ignominiam nostram dico, subducta est. Quod enim superest imperii nostri, tantillum est : Christianorum qui ista promeruimus, est dedecus. Cui servit nunc Ecclesia B. Mariæ, in qua ipsa pro corpore sepulta fuit in valle Josaphat ? Sed quid templum Salomonis, imo Domini, prætermittimus, in quo simulacra sua Barbaræ nationes contra jus et fas modo collocata venerantur ? De sepulchro Domini ideo reminisci supersedemus, quoniam oculis vestris vidistis, quantæ abominationi traditum sit.

45. « Inde violenter abstrahunt quas ibi pro cultu illius multoties intulistis oblationes. Ibi nimirum multas et innumeras religioni nostræ ingerunt irrisiones. Et tamen in illo loco (non ignara loquor) requievit Deus ; ibi pro nobis mortuus est, ibi sepultus est. Neque quidem ibi Deus hoc annuatim prætermittit facere miraculum, cum in diebus passionis suæ, extinctis omnibus et in sepulchro et in Ecclesia circumcirca luminibus, jubare divino lampades extincte reaccenduntur. Cujus pectus siliçium factum tantum miraculum non emolliat ? Credite mihi, bestialis homo et insulsi capitis est, cujus cor virtus divina tam præsens ad fidem non verberat, et cum Gentiles cum Christianis ista videant communiter nec emendantur. Perterrentur equidem hi, nec convertuntur ad fidem ; nec mirum, quoniam mentis obcæcatio illis dominatur. Quantis afflictionibus vos qui aestis, qui redistis, invaserunt, vos ipsi melius nostis, qui substantias vestras, qui sanguinem vestrum ibi Deo immolastis.

46. « Hæc idcirco, fratres, diximus, ut vos

¹ Will. de reb. Angl. l. iv. c. 2.

ipsos sermonis nostri testes habeamus. Plures sunt et fratrum nostrorum miserie, et Ecclesiarum Dei depopulationes, quæ sigillatim possemus referre; sed instant lacrymæ et gemitus, et instant suspiria et singultus. Ploremus, fratres, eia! ploremus, et cum Psalmista¹ medullitis plorantes, ingemiscamus, nos miseri, nos infelices, quorum tempore Dei prophetia ista completa est: Deus, venerunt Gentes in hæreditatem tuam, polluerunt templum sanctum tuum: posuerunt Hierusalem in pomorum custodiam. Posuerunt morticina servorum tuorum escas volatilibus celi, carnes sanctorum tuorum bestiiis terræ. Effuderunt sanguinem ipsorum tanquam aquam in circuitu Hierusalem, et non erat qui sepeliret. Vae nobis, fratres, nos qui jam facti sumus opprobrium vicinis nostris, subsannatio et illusio his qui in circuitu nostro sunt. Condoleamus et compatiamur fratribus nostris saltem in lacrymis. Nos abjectio plebis facti et omnibus deteriores, immanissimam sanctissimæ terræ plangamus devastationem. Quam terram merito sanctam diximus, in qua non est etiam passus pedis, quem non illustraverit et sanctificaverit vel corpus vel umbra Salvatoris, vel gloriosa præsentia sanctæ Dei Genitricis, vel amplectendus Apostolorum conneatus, vel martyrum ebibendus sanguis effusus. Quam beati, o Stephane protomartyr, qui te laureaverunt lapides? Quam felices, o tunc Baptista Joannes, qui tibi ad Salvatorem baptizandum servierunt Jordanici latices? Filii Israel ab Ægyptiis ducti, qui rubri maris transitu vos præfiguraverunt, terram illam armis suis, Jesu duce, sibi vindicaverunt, Jebuseos, et alios convenas inde expulerunt, et instar Hierusalem cælestis, Hierusalem terrenam excoluerunt.

47. « Quid dicimus, fratres? audite et intelligite. Vos accincti cingulo militiæ, magno supercilio fratres vestros dilaniatis, atque inter vos dissecamini. Non est militia Christi, quæ discerpit ovile Redemptoris. Sancta Ecclesia ad suorum opitulationem sibi reservavit militiam (ut veritatem fateamur) cujus præcones esse debemus. Non tenetis vere viam per quam eatis ad salutem et vitam. Vos pupillorum oppressores, vos viduarum prædatores, vos homicidæ, vos sacrilegi, vos alieni juris directores, vos pro effundendo sanguine Christiano expectatis latrocinantium stipendia, et sicut vultures odorantur cadavera, sic longinquarum partium auspicamini et sectamini bella. Certe via ista pessima est, quoniam a Deo omnino remota est. Porro si vultis animabus vestris consuli, istiusmodi militiæ cingulum quantocius deponite, et ad defendendam Orientalem Ecclesiam velocius concurrite. Hæc est enim, de qua totius vestræ salutis emanaverunt gaudia, quæ distillavit in os vestrum divini lactis ubera, quæ nobis propinavit Evangeliorum sacrosancta dogmata. Hæc ideo, fratres, dicimus, ut et manus homicidas a fraterna

nece contineatis, et pro fidei domesticis vos externis nationibus opponatis, et sub JESU Christo duce vestro, acies Christiana, acies invictissima melius quam ipsi veteres Israelitæ, pro vestra Hierusalem decertetis, et Turcos, qui in ea sunt nefandiores quam Jebusæi, impugnetis et expugnetis.

48. « Pulchrum sit vobis in illa civitate mori pro Christo, in qua pro vobis Christus mortuus est. Ceterum si vos antea mori contigerit, idipsum autumate mori in via, si tamen Christus in sua vos invenerit militia. Deus enim denarii retributor est prima et hora sexta. Horrendum est fratres, horrendum est vos in Christianos rapacem manum extendere. In Sarracenos gladium vibrare singulare bonum est, quia et charitas est pro fratribus animas deponere. Ne vero de crastinis eventibus solliciti sitis, sciatis quia timentibus Deum nihil deest, nec eis qui eum diligunt in veritate. Facultates etiam inimicorum nostrorum vestræ erunt, quoniam et illorum thesauros expoliabitis, et vel victoriosi ad propria remeabitis, vel sanguine vestro purpurati perenne bravium adipiscemini. Tali imperatori militare debetis, cui panis deesse non potest, cui quæ rependat nulla desunt stipendia. Via brevis est, labor permodicus est, qui tamen immarcescibilem vobis rependat coronam. Jam nunc ergo auctoritate loquamur prophetica¹: Accingere, homo, unusquisque gladio tuo super femur tuum, potentissime. Accingimini, inquam², et estote filii potentes; quoniam melius est nobis mori in bello, quam videre mala gentis nostræ et sanctorum. Non vos demulceant illecebrosa blandimenta mulierum rerumque vestrarum quin eatis; nec vos deterreant perferendi labores, quatenus remaneatis ». Et conversus ad episcopos:

49. « Vos, inquit, fratres et coepiscopi, consacerdotes et cohæredes Christi, per Ecclesias vobis commissas idipsum annuntiate et viam in Hierusalem toto ore universaliter prædicate. Confessi peccatorum suorum ignorantiam, securi de Christo celerem impetrent veniam. Vos autem qui ituri estis, habebitis nos pro vobis oratores: nos habeamus vos pro populo Dei pugnaturos. Nostrum est orare, vestrum est contra Amalecitas pugnare: nos extendemus cum Moyse manus indefessas orantes in cælum, vos exerite et vibrare intrepidi præliatores in Amalech gladium. Amen ». Hactenus ibi.

Fuisse autem multum in exhortando suis concionibus Urbanum papam, docet etiam Dominico presbyter in Vita Mathildis, versibus istis, quibus et plurimum ipsum Christianum populum profecisse testatur:

Urbani Galli papæ Petri quasi sancti
Dieta receperunt, et ei bona multa dederunt.
Verba salutis eis dabat hic pastor vice Petri;
Nam docuit summus Pater illos ire Sepulchrum

¹ Psal. LXXVIII.

² Psal. XLIV. — ² 1. Mac. III.

Ad Domini nostri, locus ut pugetur, et hostis
inde repellatur populus paganus avarus.
O fidei semen! bona germina quæ modo præbes,
Cum utiles flores refluunt pastoris ab ore,
Et parant fructus, etc.

50. *Prædicatur ubique expeditio et divinis ful-
citur auxiliis.* — Sed ne quid rerum gestarum ac
verborum papæ Urbani pereat, accipe ad eandem
expeditionem spectantem præsentem canonem :

« Item placuit, omnia bona eorum qui Hiero-
solymas pergunt, semper et ubique esse salva in
pace et tregua, quousque redierint ». Recitantur ista
ibidem inter canones tunc ab Urbano papa editos ;
inter quos primus est de pace et tregua constitutus.

Ut autem indictam in Synodo expeditionem
promoveret Urbanus papa, permansit in Galliis.
Episcopi autem ad sua reversi hand otiosi persi-
stere, sed in suis diocesisibus singuli singula circum-
euntes oppida, Hierosolymitanam expeditionem
magno animi fervore litteris pontificiis indicebant.
Porro eorum qui ejusmodi celesti tuba excitati
nomina dabant, infinita erat propemodum multi-
tudo, ut opus fuerit dehortari plurimos, quorum
vel ætas, vel sexus, vel valetudo ponderi militari
subeundo impar esse manifestis indicis videbatur,
atque ut magnus fuerit delectus habendus.

Pro stipendio erat indulgentia peccatorum
proposita, atque ut Petrus Diaconus ait ¹ : « Erat
pro tessera militari, signum sanctissimæ Crucis.
De qua inquit : Ad hujus autem rei evidens indi-
cium, communi consilio signum sanctæ Crucis
super scapulam dexteram impressere vestibus ».
At ista anno sequenti, quo ad bellum sacrum de-
lectus est habitus. Post Synodum enim absolu-
tam, labente ad finem anno, urgente hieme, pro-
movendi ulterius rem tantam interclusus est
aditus.

51. Ut autem res difficillima inchoanda, ha-
tenus in Ecclesia Catholica intentata, optatum con-
sequi posset effectum, placuit Urbano Pontifici
Dei Genitricis precibus imitendum, ut conciliaret
sibi caeleste numen; quod probe sciret experi-
mento, quæque ardua progressura feliciter, qui-
bus beate Mariæ Virginis faveret gratia et aspira-
ret auxilium. Ad quod promerendum, idem Christi
vicarius, eodem Claramontensi Concilio, rogata
sententia Patrum egit, ut horarum illarum preces et
laudes, quæ vulgo Dei Genitricis appellari con-
sueverunt Officium, apud monachos eremitas in-
stitutionis Petri Damiani (ut superius vidimus) fre-
quentari cæpte, ex illis deducerentur ad clericos,
a quibus digne ex animo eidem sanctissimæ Vir-
gini persolvi deberent; ut ipsa apud Filium præ-
cibus ageret, quo fidelis populus in tot et tantis
discriminibus subeundis, ejus fulciretur auxilio,
atque presidio muniretur. Quod quidem tunc a
sancta Synodo, Urbano agente, ea occasione in-
dictum, et a clericis pie susceptum, ad laicos quo-

que fuit tam viros quam mulieres propagatum, et
quidem cum magno fenore gratiarum, ut experti
sunt omnes jugiterque experiuntur fideles illud ex
animo frequentantes: quas preces et Carthusiani
divino monitu hand pridem susceperere dicendas.

52. Qui et ejusdem ipsorum ordinis eandem
Dei Matrem adscivere sibi patronam, prout in rebus
gestis S. Brunonis ² ejus ordinis institutoris apparet,
in quibus et de præceptis in dicto Claramontensi
Concilio iisdem precibus mentio habetur. Ipse au-
tem S. Bruno aliquandiu retentus ab eodem Ur-
bano Pontifice, celebrato hoc anno Concilio Pla-
centino, ab eodem dimissus, et in eremum abire
permissus, abiit (ut dictum est) in Calabrium, ubi
liberalitate Rogerii ducis, nobile erexit in Squilla-
censi regione monasterium. Sed de sancto Bru-
none atque Rogerio rursus inferius suo loco di-
cendum erit.

Cum autem hoc anno post celebrata duo Con-
cilia ab Urbano Pontifice, legatus Apostolica Sedis
aliud adhuc indixisset in proximam Quadragesi-
mam; rumor quidam pervenit ad regem Francorum,
eodem anno aliud generale Concilium celebran-
dum. Qua de causa, de multiplicitate ejusmodi Con-
ciliarum nonnihil offensus ipse Philippus, consu-
luit Ivonem Carnotensem episcopum, num liceret
et tunc eodem anno per legatum indictum ha-
beri Concilium. Ad quæ breviter Ivo ista respon-
dit ³ offensus et ipse :

« Philippo Dei gratia serenissimo regi Franco-
rum, Ivo humilis presbyter suis salutem, sicut et
domino et regi suo fidele servitium.

53. « De eo quod parvitati mee mandavit vestra
sublimitas, post duo Concilia hoc anno a domino
papa celebrata, nunc legatum ejus Lugdunensem
archiepiscopum intra eundem annum, tertium
generale convocare, et ad hoc regni vestri episco-
pos invitare; serenitati vestre respondeo, quia cum
nuper litteras ejusdem habuerim, nihil tale ibi legi,
vel a misso ejus audivi. Quod tamen si faceret, non
esset hæc Apostolica institutio, vel Ecclesiastica
consuetudo. Si autem aliquis pro culpis suis, in-
dulto sibi congruo spatio, a legalis Apostolicis
vocat fuerit; non potest subterfugere quin ad
diem sibi præscriptum occurrat, nisi cum legitima
causa delineat. Quod si quis eos ultra terminos a
Patribus constitutos angariare voluerit, vos habito
cum eis communi consilio, injustis oppressionibus
pro persona vestra resistite; sic ut quæ sunt Dei,
Deo reddant, et quæ Cæsaris sunt, Cæsari reddere
non omittant. Valeat multo tempore sublimitas
vestra ». Vides quantum obsint Ecclesiæ indiscreti
ministri, cum præcipiunt interdum absque consi-
lio dura, quæ præstari vix possint.

54. *Concilium Anglicanum in causa Urbani
Papæ.* — Celebratur hoc item anno et in Anglia
generalis Synodus in causa Urbani papæ, quem

¹ Pich. Hist. Chron. C. 1. L. IV, c. 11.

² Apud Sur. tom. V, die VI Oct. in Vit. S. Brun. c. 21. 22. —
³ Ivo Ep. LXX.

Anselmus ut legitimum Pontificem recepisset; rex vero inhaeret potius Guiberto, qui et edixisset in Anglia neminem episcoporum alium aliquem recipere debere Romanum Pontificem, nisi quem rex ipse pro Pontifice recepisset. Quid autem, in Synodo, Edinerus, qui aderat¹, ita describit:

« Factum est et tertia septimana Quadragesimae, juxta edictum, convenerunt omnes episcopi totius Angliae et abbates, causa praedicta in medium adducitur, et Anselmus diversis querelis hinc inde conculitur. Siquidem multi, et maxime episcopi, regiae voluntati favere volentes, spreto aequitatis iudicio id probare nitentur, quod Anselmus, salva fide quam regi debebat, nullatenus posset in regno Urbanum Sedis Apostolicae praesentem pro papa tenere. Quibus cum plura quae ratio tulerat objecta fuissent, et Anselmus ex verbis Domini²: Reddite quae sunt Caesaris Caesari, et quae sunt Dei Deo, aliisque nonnullis quae ratio nulla refellere poterat, penitus infrenasset; illi e contra quid dicerent non habentes, eum in regem blasphemare uno strepitu conclamare, quandoquidem ausus esset in regno ejus, nisi eo concedente, quidquam vel Deo adscribere. Igitur ad unam regiae indignationis vocem, quidam ex episcopis archiepiscopo suo atque primati omnem subjectionem, professam obedientiam uno impetu abnegant, eique unitatem fraternae societatis pari voto miserandi abjurant.

55. « Quidam vero, in eis tantum quae ex parte Urbani papae praeciperet, illi se obedituros negant. Episcopi itaque omnes qui affuerunt, Roffensi solo excepto, aut uno, aut alio modo debitam illi subjectionem et obedientiam abnegant. Rex etiam ipse cunctam ei confidentiam et securitatem sui in omnibus admittit; nec se illum pro archiepiscopo vel patre amplius habiturum jurat, nisi ipse vicario beati Petri se ulterius obediturum statim deneget. Tres dies in isto negotio, clamoribus in Anselmum et contumeliis gravioribus expensi sunt, et tandem in hoc quem dixi fine conversi sunt. Tunc Anselmus in suo proposito constans, per internumtum condictum a rege postulat, quo tutus regno decedat. Quod principes multi damnosum fore dignoscentes, pro restituenda pace inducias utrinque usque ad Pentecosten dari precantur et obtinent, ac sic eum ne de regno decedat impediunt. Spondet igitur rex se rebus ejus, usque ad praefixum tempus induciarum, plenam pacem et tranquillitatem indulturum, et tunc voluntati illius pro sua religione multum in negotio quod emergerat condescensurum. Verum omnino in contraria lapsus est, et Anselmum, domino Balduino ejus domus praefecto, extra regnum depulso, hominibusque suis captis et expoliatis, terrisque vastatis, immensum afflictus est ». Hactenus Edinerus; sed ista pluribus est prosecutus Willelmus, qui et ea quae ista sunt consecuta, sic enarrat³:

56. « Nuntii duo singulares versutiarum artifices, ipso ignorante et nihil minus suspicante, Romam missi, ut explorato Urbis statu, agerent apud papam, ut regi pallium mitteret, tradendum cui liberet. Strenue illi et impigre qui missi fuerant executi. Albanensem episcopum Walterum ex praecepto Urbani papae in Angliam adducunt. Is Doctis appulsus, clam Anselmo in curiam venit, ingentibusque pro missis animum Willelmi regis sitientem explevit, si Urbanus in Anglia recipere in papam, fore ut quaecumque rex petenda existimasset, ille privilegio Sedis Apostolicae roboraret. Ceterum ad causam archiepiscopi nihil suffragii, nisi quod rogatus ut eum expelleret, impossibile factum respondit, ut vir celebratissime sanctitatis et scientiae et in praesulatum introductus legitime, deturbaretur nullius obnoxius culpe. Continuo edictum per provinciam promulgatur, Urbanum Apostolicum debere dici et credi. Eo audito, mirari Anselmus.

57. « Tum ecce frequentes episcopi ad eum missi venerunt, pertentatoque sensim homine, utrum ad redimendam regis amicitiam esset infraction; cum nihilo mutatum experirentur, quod latebat aperuere: dominum regem sua opera et impensa pallium a Roma meruisse, suoque labore transegisse negotium quod illi constaret multis marcis; par esse ut tanto principis beneficio digno responderet muneris officio. Ingenuit ille doli machinam in effectum deductam, dicta episcoporum largis suspiriis excipiens, negavitque se quidquam propter hoc daturum, quia parvi aestimaret beneficium, cujus amplitudinem ipsi tanti penderent. Per hoc rex edoctus, nullo modo mentis ejus robur enervari posse, ut in amicitiam suam cederet, salva dignitatis suae magnanimitate, ultro eam expetiit et impetravit. Dataque ei publice potestate, ut per totum regnum primatus sui jus exerceret libere, dies praefixa, quia Albanensis episcopus cum pallio Cantuariam veniret. Venienti et sacrum insigne in vase argenteo deferenti vulgo applausum, ab archiepiscopo nudipede, sed sacerdotalibus vestimentis induto occursum. Inde super altare Domini Salvatoris pallium assumptum sacratum pontifex beatis humeris composuit, et ad divina celebranda processit. Erat tunc dies Dominica, quarto idus Junii, fuitque nonnullis ingenti miraculo, quod idem Evangelium illa die occurrit, quod ante prognosticon ejus fuerat⁴: Homo quidam fecit cenam magnam, et vocavit multos, et misit servos suos hora cenae etc. »

58. Dum dies certa signatur, nempe incidisse diem Dominicum in quartum idus Junii, plane praesens annus Redemptoris millesimus nonagesimus quintus ostenditur, quo littera Dominicalis fuit G, ex quo sequitur diem decimum Junii, id est quartum idus Junii, qui ea littera signatur, fuisse Dominicum diem. Ita pace composita, anno integro

¹ Edin. in Vit. S. Anselm. I. II, apud Str. tom. II, die XXI April. —

² Matth. XXII. — ³ Willel. Malmesb. de gest. Pont. Angl. I. I.

⁴ Luc. XIV.

eam perdurasse, idem auctor Willelmus affirmat. Eadem de pallio Edinensis; sed paucis rem agit.

Hoc eodem anno, Gastono Franco viro nobili provincie Viennensis cum Gerino filio ejus, auctore, junctis sibi octo aliis, institutus asseritur ordo ministrantium infirmis, qui sacro igne consumpti

perpetuo viverent, truncatis membris calamitate: qui cum laici essent, pro insignibus Thau signum sibi sumpserunt. Hæc pluribus in historia Antoniana dicta, ejus auctor extitit Hinnarus Fulco ejusdem ordinis præceptor.

Anno periodi Græco-Romanæ 6588. — Anno Æræ Hispan. 1133. — Anno Hegiræ 499, inchæato die 10 Januar., Fer. 4. — Anno Hegiræ 499, inchæato die 31 Decemb., Fer. 2. — Jesu Christi 1095. — Urbani II papæ 8. — Henrici IV reg. 40. imp. 12. Alexii Comneni imp. 15.

1. *Synodus Placentina*. — A num. 1 ad 8. Holstenius in Collectione Romana publicavit Acta Synodi Placentiæ hoc anno habite circa mediam Quadragesimam, ut refert Baronius n. 4, ex Bertholdo in Chron. Certe Urbanus Placentiæ erat pridie idus Mart., ut liquet ex ejus litteris episc. Magalonensi datis, et a San-Marthanis relatis. Labbeus, tom. x Concil. pag. 503, ait in Codice Ms. tam Barberino quam Claromontano haberi Synodum celebratam kal. Martii, et initio Actorum legitur: « Septimo tandem die post tractationem diutinaam hæc sunt capitula profata »; ideoque Synodus habita circa mediam Quadragesimam. Addit Baronius num. 6, ejusdem Concilii xv canones contineri « in Codice manuscripto Anselmi Lucensis. libro 7 Decretorum » ab eadem Synodo statutos. Ad quæ verba Holstenius ait: « Qua in re eum memoria vel potius amanuensium oscitantia fefellit. Neque enim canones illos Placentinos in suam Collectionem referre potuit Anselmus, qui novennio ante decesserat: nec Vaticani Codices citato libro 7 vel alibi eosdem agnoscunt. Tum vero xiv tantum Capitula statutorum libri probatissimi Bibliothecæ Vaticanæ referunt, ubi Baronii schedæ septimo in duo male diviso xv exhibent ». Ita Holstenius. Verum Baronius non dicit, Anselmum canones illos in suum Decretum inscripsisse, ut illum legenti perspicuum fiet. Illa Capitula contra simoniacas et schismaticas ordinationes condita, tom. x Concil. legenda. Ad hæc Bertholdus citatus testatur, in ea Synodo Præzedem imperatricem a spurciis quas

invita pertulerat absolutam esse: Philippo Galliarum regi concessas inducias in causa incestarum cum Bertrada nuptiarum; aliaque decreta esse quæ Baronius de verbo ad verbum recitat (1).

2. *Ivo anno mxcii in carcerem trusus*. — A num. 8 ad 24. Baronius num. 21 et seqq. refert Epistolam Ivonis episc. Carnotensis Carnotensibus datam, quæ veteri ordine est c, novo xx, qua prohibet ne bellum inferatur vicecomiti Carnotensi, quod cum in carcerem conjecerit, quia ante hunc annum Ivonem in carcerem, quod regis Philippi nuptias probare nollet, detrusum non fuisse cardinalis doctissimus putavit. Verum anno superiori monstravimus, Ivonem anno mxcii hanc vexationem passum esse. Præterea, Baronius refert ibidem Ivonis ad Hoellum Cenomanensem episcopum Epistolam xxi, alias ci, qua ei gratias agit, quod ejus ad Deum precibus e carcere liberatus fuerit. Sed jam anno superiori Ivo invitatus fuit ad Conventum Rhemensem, ideoque in libertatem assertus fuerat; cumque anno mxcii carceri mancipatus sit, ea Epistola vel eo, vel insequenti anno data, ejus enim carceris duratio incomperta.

3. *Epistolæ Ivonis ad præcedentes annos referenda*. — Ivo in Epistola xxii, alias cii, Philippo regi scribit, se ad curiam ire non posse, ut suis inimicis respondeat, quod bona sibi ab eis sublata nondum restituta fuerint. Eum Baronius num. 20 recitat, sed ad aliquem ex annis præcedentibus referenda; sicuti Epistola xix, alias ix, ad Wilhelnum abbatem Fiscannensem ab Ivone scripta, in

(1) Hoc anno Synodus Moguntinæ celebrata est infra mediam Quadragesimam, ait Cosmas Pragensis, Chronici lib. 3, quo universi per Germaniam episcopi cum principibus Romani imperii conveniunt. Eo pariter missi sunt Cosmas electus Olomuensis in Moravia, ut episcopalem consecrationem a metropolitano suo acciperent. Il vero executioni mandatum fuit a Rothardo Moguntino, die ix id. Martii, quæ dies anno isto incidit in Dominicam. Porro, cum sacre episcoporum initiationes per hæc tempora diebus Dominicis agerentur, ex die qua ambo isti episcopi consecrati sunt, quæ a Cosma Pragensi Chronice. lib. 3 delimita est, colligimus Synodum hanc non quidem anno mxcvii, cui illigata est ab eodem Cosma, a quo totam hanc historiam accepimus, sed ad sequentem referendam, nec Cosmam alia ratione anno mxcvii adscripsisse, nisi quod veterem rationem anni a die xxv Marti decendi sequitur. Concilium istud Collectores fugit. Ita brevi concilio illo illa episcopatus Moravia cum Pragensi, quæ in Concilio Moguntino ante novennium anno mxcxxvii stabilita eodem anno a Clemente III pseudopontifice confirmata fuit.

qua memorat damna quæ patitur, quod illicito regis *Philippi* conjugio contraxerit.

4. *Urbanus II in Galliam venit.* — A num. 24 ad 34. « Anno ab Incarnat. mxcv, papa Urbanus II, qui præsedebat Apostolico culmini, pervasis Alpibus venit in Gallias; adventus causa ferebatur perspicua, quod violentia Guiberti Roma extrusus, Citramontanas ad sui reverentiam sollicitaret Ecclesias », inquit Malmesburiensis lib. 3, cap. 2. Bertholdus vero in Chron. hoc anno scribit: « Dominus papa rebus in Longobardia bene dispositis, in Gallias marino itinere cepit divertere, et ad sanctam Mariam ad Podium in Assumptione ipsius pervenit, Synodumque ad Montem-Clarum in Octavam sancti Martini Apostolica auctoritate condixit ». Hoc autem anno, dies xviii mensis Novemb. in quem octava illa incidit, fuit Dominica, eoque peractis precibus, feria secunda Actiones Synodales de more inchoabantur; indeque auctor Magni Chronici Belgici hoc anno de hoc Concilio loquens ait: « Sedit a die Lunæ XIV kal. Decemb. per dies decem », ubi tamen loco XIV kal., legendum XIII kal., qui in feriam secundam incidit. Sicut Paschalis II in Gallias veniens, ad monasterium Cluniacense accessit, ut suo loco videbimus, ita et Urbanus II, ibique majus altare consecravit, ut testatur Innocentius II, cujus verba anno mxcxx, num. 37 referemus. Innocentius quidem II nec diem nec annum adventus ejus ad illud monasterium notavit, sed San-Marthani in episcopis Maliscensis pag. 681, Urbani II rescriptum referunt, « datum Cluniaci per manum Joannis S. Rom. Eccl. diaconi card. XV kal. Novemb. Indict. iii, anno mxcvi (1) ». Urbanus vero, uti mox monstrabimus, anno Incarnationis Pisano quandoque usus est, ideoque ipse annus Christi nobis est mxcv, quo mense Octobri currebat Indictio iv in locum Indictionis iii subroganda. Quare Urbanus II die xviii mensis Octobris majus altare Cluniacense monasterii, vel aliquo ex proximioribus, hoc anno dedicavit. Neque enim dies ille, quo ex litteræ datæ, intelligi potest de die XV kalend. Novemb. sequentis Christi anni, cum ex illi dicendis appareat eum jam Gallias reliquisse et in Italiam profectum esse, post Concilium mense Julio *Nemansi* congregatum.

5. *Præsidet Concilio Claromontano.* — Concilium *Claromontanum* numerosum fuit, sed Patrum numerus incertus. Malmesburiensis laudatus, et Aimoinus lib. 5, cap. 49, tradunt trecentos decem, tam episcopos quam abbates ei interfuisse, et tamen Guibertus abbas Novigenti, hujus temporis scriptor, et Lisiardum Suesionensem præsedem de hoc Concilio habet: « Fuit tanto alias celeberris, quanto excellentis et usitate persone ora cernere, verba audire, erat desiderabilis (Urbanus enim II in Gallia natus erat). Illic præter episcoporum et abbatum examina, quos circiter eo per præeminen-

tes ferulas (id est, baculos episcopales et abbatiales, ut videre est apud Ducangium, in voce *Ferula*) fuisse aliqui numerant, totius Franciæ et appendicium comitatum litteratura confluit », id est, magistri seu professores. Denique in Decreto Urbani II, ejusdem Synodi Claromontanæ, de primatu Lugdunensi, a Marca ex Codice Ms. erulo in Dissert. de primatu Lugdunensi, dicitur ei interfuisse archiepiscopos xii, episcopos lxxx, abbates xc et eo amplius. Baluzius, in Additione ad lib. 6 de Concordia cap. 31, publicavit Concilium Claromontanum ex pervetusto Codice Ms. monasterii Anianensis. Et tom. x Concil. non solum eadem Notitia ex Centii Camerarii volumine descripta, sed etiam quæ Malmesburiensis et Ordericus lib. 9, pag. 719, de iisdem canonibus habent, leguntur.

6. *Prohibetur communionis forma per intinctionem factæ.* — Canon xxviii his verbis exprimitur apud Baronium num 27: « Ne quis communicet de altari, nisi Corpus separatim et Sanguinem similiter sumat, nisi per necessitatem et per cautelam ». Idque, inquit Baronius, ob recentem damnatam hæresim Berengarianam, quæ per unam tantum speciem satis esse impleri figuram aiebat. Verum Marca citatus hanc explicationem rejicit, quia Berengario affligit quæ nunquam professus est, imo neque ex hæreseos suæ principii profiteri poterat. Vera itaque hujus loci interpretatio desumenda ex eis, quæ vitiose a quibusdam disciplinæ Ecclesiasticæ sæculo xi parum callentibus fiebat in Eucharistiæ administratione. Fidelibus enim Eucharistiam Sanguine Domini intinctam porrigere non dubitabant, ut testis est auctor Micrologi, qui ante Gregorii VII tempora scripsit, cap. 26. Quæ forma non tantum adversa erat Ordini Romano, sed etiam institutioni Christi, qui Corpus seorsim a Sanguine commendaverat, ut recte annotavit Concilium Bracarense III anno dclxxviii, quod similem corruptelam capite primo damnavit. Usus autem ille utramque speciem commiscendi, hoc tempore servabatur apud Græcos: quem hodie quoque in suis Ecclesiis frequentant, porrecta populus in cochleari Eucharistia, liquore sacro poculi intincta. In quo ab illis graviter peccari contra Christi institutionem, *Nicæto* pectorato abbati, disputatione cum eo Constantinopoli habita, objecit *Humbertus* Sylvæ-Candidæ cardinalis episcopus, legatus Romanæ Sedis ad Constantinum Monachum imp. anno miv missus. Gliscbat in Occidente communionis usus: adeo ut Ivo in Tractatu de Divinis Officiis eum tolerandum putaret in populi communiōne. Ilam tamen communicandi formam Synodus Claromontana proscribendam duxit his verbis: « Ne quis communicet de altari, nisi Corpus separatim et Sanguinem similiter sumat »: Separatim, id est, seorsim, ut loquitur Concilium Bracarense, sive singulatim, quemadmodum Orderi-

(1) Urbanus II utique Cluniacum venit hoc anno; sed altare consecravit die VIII kal. Novembris, ut ex relatione de ejus adventu Cluniacum patet Baluz. Miscell., tom. vi, pag. 463.

cus laudatus sensum hujus canonis expressit.

7. *Hujus regulæ exceptio.* — Huic regulæ hanc exceptionem exhibet Synodus Claromontana: « Nisi per necessitatem et cautelam », ubi intincti sacrați panis consuetudinem jam sublatam retinet, in excepto *necessitatis* casu, nempe si communio præbenda esset ægris vel pueris. Tunc enim, ad adjuvandum esum, panis intinctio permittitur, ut scripsit Paschalis II Urbani successor ad Pontinum abbatem Claniacensem, Epist. xxxii. « Novimus enim per se panem, per se vinum ab ipso Domino traditum. Quem morem sic semper in sancta Ecclesia conservandum docemus atque præcipimus: præter in parvulis ac omnino infirmis, qui panem absorbere non possunt ». *Cautelæ* quoque ratio habita est: qua voce receptum a quibusdam morem in distribuenda populis Eucharistia Synodus confirmat. Veriti enim illi, ne Sanguinis effusio accideret: in frequenti communicantium cætu, solo panis consecrati symbolo laicos impertiebant, non præbito poculo: qua ratione Corpus seorsim a Calice sumebatur. Id egregie docet Rodulfus abbas sancti Trudonis, qui ea ætate vixit, iis versibus, quos laudat Gropperus cap. 44, de Communione alterius speciei:

Hic et ibi cautela fiat, ne presbyter ægris
Aut sanis tribuat laicos de Sanguine Christi:
Nam fundi posset leviter: simplexque putaret,
Quod non sub specie sit totus Jesus utraque.

8. *Eucharistia sub solo panis symbolo data.* — Cæterum Eucharistiæ administratio sub solo panis symbolo laicis hoc sæculo porrecta, magnum incrementum habuit post constitutum a Christianis regnum Hierosolymitanum, ad exemplum antiquissimæ Ecclesiæ illius civitatis: in qua, nulla specierum mixtione facta, solo pane sibi exhibito, adventantis ex Orbe universo populi pietas rem Sacramenti percipiebat. Consuetudo illa unius symboli non statim obtinuit in omnibus Ecclesiis Occidentis, quamvis in quampluribus servaretur; sed postquam divus Thomas ea de re consultus, earum Ecclesiarum pietatem et prudentiam in eo usu laudavit, certatim reliquæ omnes illum amplexæ sunt: « Provide », inquit sanctus Doctor 3 part. quæst. 80, art. 12, « in quibusdam Ecclesiis observatur ut populo sumendas sanguis non detur ». Plura ad eum Canonem xxviii Marca laudatus.

9. *Presbyterorum filios a sacris Ordinibus aliqui arcendos censuit.* — Baronius num. 32 affert aliqua Decreta in hoc Concilio statuta, inter quæ istud: « Nec filios presbyterorum, aut aliter etiam ex concubinis susceptos liberos, ad presbyteratus gradus provehi licere, nisi aliquo in monasterio religionem professi essent ». Ipsa verba Concilii et Urbani II refert Antonius part. 2, tit. 16, cap. 1. « Presbyterorum filios a sacris ministeriis removemus, nisi aut in cenobiis, aut in canonicis (scilicet regularibus) fuerint religiose conversati ». Cum enim hoc tempore vix paterentur presbyteri suas

sibi auferri uxores, pruden-ter judicavit Ecclesia, eorum filios a sacris Officiis et Ordinibus omnino arceri. *Roscelinus*, cum anno superiori in Anglia exularet, hanc quæstionem movit, contenditque presbyterorum filios ad sacros Ordines nullatenus promovendos. Theobaldus vero Stampensis, qui tunc Oxoniæ Scholam Theologicam regebat, contrariam sententiam propugnavit, eamque in rem Epistolam scripsit ad Roscelinum, quæ legitur tom. iii Spicilegii Dacheriani, in qua ait: « Quoniam sacerdotum filios, et alios ex lapsu carnis generatos non satis provida ratione calumniaris, et calumniando illos exleges esse nimis imprudenter adstruere conaris: quæ super iis a Patribus sanctis rationabiliter audivimus, non quasi præsumendo, sed diligentie subserviando, ad memoriam revocare curavimus ». Post plura interposita: « Joannes quoque in Apocalypsi, qui lavit nos in sanguine suo et fecit nos Deo regnum et sacerdotes. Qua igitur fronte quidam homunciones non palam, sed e latibulis loquentes, et totam Campaniam libidinosa peregrinatione polluentes, indignos sacerdotio judicant, quos Petrus et Joannes regali sacerdotio dignos esse confirmant? etc. ideoque Deus nasci voluit de progenie peccatricis, ut discerent homines peccata parentum non obesse sibi. Unde in Genealogia Christi nulla sanctarum nominatur, sed Thamar et alia tres, quas divina pagina reprehendit, apponuntur, ut qui pro peccatoribus veniebat, de peccatoribus nasci dignaretur. »

10. *Decretum ut cum dispensatione Sedis Apostolicæ ad eos admitti possint.* — Paulo post: « Quod prohibetur, ne filii sacerdotum ad Ordines promoveantur, sic est intelligendum secundum Augustinum, eosque qui hanc prohibitionem audiunt, ab hujusmodi concupiscentiis abstinere debere. Si enim filius sacerdotis honeste vivit, ordinandus est; si vero filius militis inhoneste vivit, re pudandus est; quia magis placet Deo vitæ perfectio et contra peccatum affectio, quam superba de parentibus gloriatio: filii namque sacerdotum non ideo quod sint exleges, refutantur, sicut imperiti homines arbitrantur, sed ut sacerdotes a concupiscentiis carnis refrænentur. Quia nimirum quolibet sacro fonte renatum vel plenarie divina mundat gratia, vel sacri mundati lavacri non est sufficiens, nec plenaria, quod contradicit fidei Catholicæ. Non enim sunt exleges judicandi, quorum Deus ipse est pater, et quos peperit Christi gratia omnium regeneratorum piissima mater, nec debemus illis delictum patris sive thorum matris impropere, sed potius perfectionem diligenter attendere: quoniam patris sive matris perpetratum crimen non potest filiis paradisi claudere limen. Unde quidam Sapiens: *Quid metuere pati quocunque thoro generati?* » Plura eandem in rem idem Theobaldus Oxoniæ magister. Hanc controversiam diremit Urbanus II in Concilio Claromontano, vetuitque quidem sacerdotum filios ad sacros Ordines promoveri absque dispensatione Ecclesia-

stica, aut nisi cœnobiiis nomen dederint, eos tamen cum dispensatione sancte Sedis admisit. Hinc ad archiepiscopum Turonensem scribens : « Cenomannensem electum, inquit, eo quod filius sacerdotis dicitur, si cæteræ virtutes in eo conveniunt, non rejicimus, sed suffragantibus meritis cum patienter suscipimus, non tamen ut pro regula inposterum hoc assumatur; sed ad tempus Ecclesie periculo consulitur ». Mabillonius tom. I Musæi Italici part. 2, exhibet Epistolam Noviomensium clericorum ad Cameracenses datam *de filiis clericorum ad sacros Ordines admittendis*.

11. *Expeditio Hierosolymitana præcipua causa hujus Concilii*. — A num. 34 ad 52. Concilium Claromontanum ob expeditionem in Terram-Sanctam ab Urbano II indictum, quod, ut melius intelligatur, summarie hic ex Guillelmo Tyrio lib. 4, cap. 9 et seqq. quo in statu res in Oriente essent, exponam. *Turci* jam Syriam et utramque Ciliciam, Isauriam, Pamphiliam, Lyciam, Pisidiam, Lycœniam, Cappadociam, Galatiam et utrumque Pontum, Bithyniam et Asiæ Minoris partem, infra modicum tempus in suam potestatem redegerant, Ecclesias dejiciebant, et Christianos magno furore persequabantur. Quod si navium copiam habuissent, Constantinopolim procul omni dubio sibi subjecissent. Neque ad sacra loca devotionis causa tam Græci quam Latini proficisci poterant, nisi per mille mortis genera. Christiani Hierosolymis post longam peregrinationem inclusis morbi singulis diebus imminebat, quando sacerdos quidam « Petrus nomine, de regno Francorum, de episcopatu Ambianensi, qui et re et nomine cognominabatur Eremita », devotionis fervore incensus Hierosolymam pervenit.

12. *Hujus expeditionis auctor vel incentor Petrus Eremita*. — Is moram faciens in civitate plenius didicit quod prius aliis referentibus audierat; cumque accepisset civitatis patriarcham nomine *Symeonem* esse virum religiosum et timentem Deum, eum alloqui voluit. Patriarcha familiariter ei narravit quæ populum Dei magis affligebant, et quærenti *Petro* num tot malis superesset aliquod remedium, respondit patriarcha, quoad Græcos nullum auxilium ab illis sperandum esse, quia « infra paucos annos plusquam dimidium amiserunt imperii ». Promisit *Petrus* quod si ille pape, et regibus ac principibus Occidentis tantas calamitates significare vellet, paratum se esse omnes convenire, et ad afferendum aliquod remedium diligenter invitare. Ecclesias Dominicæ Resurrectionis ingressus *Petrus* visionem habuit Christi, ut injunctam sibi legationem intrepide perageret exhortantis. Hinc navim conscendit, et prospera usus navigatione Romam venit, circa quas partes Urbanus II reperiebatur. Promisit Pontifex se tempore accepto fidem cooperatorem futurum, interimque Petrus permensa Italia Alpes transiit, Occidentales principes omnes sigillatim monuit, increpavit, rogavitque ut fratribus in tanta affli-

ctione positis subvenire non differrent. « Fuitque domino pape, qui cum ultra montes sine dilatione sequi decreverat, in eodem verbo plurimum necessarius. Nam præcursoris functus officio, auditorum mentes ad obediendum præparaverat, ut facilius idem persuadere volens, oblineret propositum, et universorum animos ad se compendiosius inclinaret », inquit Tyrius cap. 13.

13. *Urbanus II ad hanc expeditionem omnes hortatur*. — Urbanus II in Concilio Claromontano « promulgatis canonibus, qui ad morum ædificationem et corrigendam delictorum enormitatem poterant proficere, suggerente Petro Eremita », pluribus hortatus est omnes qui in Synodo erant, ut Christianis in afflictione positus subvenirent : « Noverunt, inquit, ex vobis nonnulli, qui hæc quæ loquimur, oculata conspexerunt fide, et præsens illorum per manus Petri, viri venerabilis (qui præsens est) ad nos delata docet Ecclesia. Nos autem de misericordia Dei et B. Petri et Pauli Apostolorum auctoritate confisi, fidelibus Christianis, qui contra eos arma susceperint et ovus sibi hujus peregrinationis assumpserint, injunctas sibi pro suis delictis penitentias relaxamus ». Non solum præsentibus, sed etiam absentibus Urbani II verba accenderunt. « Non erat in regnis Occidentalibus, qui aut ætatis, aut sexus, aut conditionis, aut status vellet esse memor, aut aliquibus persuasionibus deterritis ab incæpto desisteret : sed omnes indifferenter manus dabant, omnes unanimiter corde et ore votum profitebantur. Catervatim concurrebant populi, ubicunque unum de principibus iturum novissime audierant, ut se illius comitatu sociarent, ejusque super se in toto itinere invocarent nomen, obsequia promittentes et fidem ».

14. *Philippus rex Gallie in hoc Concilio excommunicatur*. — In hoc Concilio Urbanus II *Philippum* regem Galliarum excommunicavit, ut refert Baronius num. 24, ex Bertholdo in Chron. *Fulco* enim Andegavorum comes, *Bertrade* maritus, questus est quod sibi uxorem subtraxisset, et etiam illicite retineret. Is hoc anno piam quandam donationem fecit monasterio Andegavensi sancti; Sergii pro suorum et parentum peccatorum absolutione, missaque singulis hebdomadis celebranda; quæ his verbis clauditur : « Facta est autem hæc donatio anno ab Incarnat. Domini millesimo nonagesimo quinto, Indictione in die sabbati, luna xxv, Urbano Apostolico, Francia ex adulterio Philippi indigni regis foedata, Rodulpho Turonensium metropolitano, Gofrido Andegavorum episcopo. Deo gratias. Amen ». Exhibet eam integrum Peireskii in Registro LVII, jussu suo anno mcccxxii a duobus Notariis ex archetypo recognitam. Fuit *Fulco* pater Fulconis sæculo sequenti regis Hierusalem renuntiati.

15. *Simonia prohibetur*. — Decreto primo Concilii Claromontani, a Baronio num. 31 relato, *simonia* prohibetur. Idem hoc sæculo præstitum fuerat a Leone IX in Concilio Rhemensi,

deinde a Gregorio VII per suos legatos Amatun Oleronensem, et Hugonem Diensem episcopos, ac sanctum Hugonem abbatem Cluniacensem, qui coactis variis in provinciis Synodis, episcopos et canonicos simoniacos in ordinem redigere; verum hæc corruptela adeo hoc et sequenti sæculo invaluit, ut ei etiam principes ipsi auctoritatem darent. Indeque Guibertus abbas de Novingento, lib. 1, cap. 7 testatur, sua ætate, hoc scilicet et sequenti sæculo quo mortuus est, anno MCXXIV, presbyteros agre semper tulisse, tum simoniacorum abusuum emendationem, tum etiam sibi interdicta subinde matrimonia. Carpit Guibertus Henricum Primum Franciæ regem, qui, ut ait, « multum erat cupidus, et episcopatum venditionibus assuetus ». Sed et Philippum ac successorem « hominem in Dei rebus venalissimum appellat ». Quod confirmat Michael Scotus cognomento et patria Dunelmensis. Is Friderico II et imperatori familiaris fuit; Eb. 4 Mensæ Philosophicæ cap. 28, ait : « Cum episcopus Carnolensis promississet Philippo regi Franciæ, quod primam præbendam sibi daret ad votum, et cum multe vacassent per vires, indignatus est rex : cui remandavit, quod nullam adhuc dederat, sed omnes vendiderat ». Neque Michaelis Scoti testimonium in dubium revocandum, cum Lisiardus Suessionensis episcopus, in Vita sancti Arnulphi decessoris sui, quæ extat apud Surium ad diem xv mensis Augusti cap. 9, scribat : « Interea defungitur abbas Reinaldus (sub cuius disciplina in monasterio Sancti Medardi Sanctus Arnulphus monachus vivebat), et instigante ambitionis spiritu, Pontius quidam pseudo-monachus, gradu comparativo, non secundum Grammaticam, sed juxta Simoniam, a rege Francorum Philippo nomen et sedem abbatis adipiscitur ». Porro Lisiardus obiit anno MCXXV, ut dicitur in Chronico Rhemensi, tomo I Bibliothecæ Labbei. Sed exempla simoniæ in Gallia, Anglia, Italia, Germania aliisque regionibus, libros implent.

16. *S. Bruno curiam Rom. relinquit.* — Ad num. 52. *Divus Bruno* Carthusiensium institutor anno MXC Romam ab Urbano II vocatus fuit, ut supra diximus : « Qui cogente papa Urbano, cujus quondam præceptor fuerat, Romanam perrexit ad curiam, eundem papam solatio et consilio in Ecclesiasticis negotiis juvaturus. Sed cum tumultus et mores curiæ ferre non posset, relicte solitudinis et quietis amore flagrans, relicta curia, contempto etiam archiepiscopatu Rhegiensis Ecclesiæ, ad quem ipso papa volente electus fuerat, in Calabria eremum, cui Turris nomen est, secessit, ibique laicis et clericis quamplurimis adunatis, solitarie vitæ propositum, quandiu vixit, exercuit », inquit auctor anonymus *Libelli de Institutionibus Ordinis Carthusiensis*. Cum autem auctor Vitæ sancti Brunonis a Surio ad diem vi mensis Octobris editæ scribat, Brunonem Calabriam petiisse, antequam *Pontifex e Placentia abiret in Gallias*, celebrato nempe hoc anno Concilio Placentino, apparet Brunonem non

annos tres, ut habet Baronius, sed annos quinque in curia Romana mansisse.

17. *Institutio Congregationis Antonii M. in Gallia.* — A num. 58. Postquam Gasto, vir nobilissimus provincie Viennensis, et Girinus filius ejus meritis sancti Antonii Magni sanitatem receperunt, statim se et sua pietatis operibus exercendis dedicaverunt, quibus in hoc sancto proposito haud multo post octo viri sese adjunxerunt, et piissimam inter se societatem et fraternitatem inierunt. Hæc paulatim sublimius provecta, postquam custodiam corporis sancti Antonii adeptæ, regulam sancti Augustini amplexa est, hujusque instituti plurima monasteria paulatim erecta sunt per Galliam, Italiam, Hispaniam, Germaniam aliasque orbis Christiani provincias, ut narrat Aymarus in Historia hujus ordinis parte 2.

18. *Congregatio Antoniana ad statum religionis erecta.* — Antoniani xenodochii sancti Antonii curam gessere usque ad annum MCXXIII, et præfecturam *Falconis*, proprio carentes templo, in quo privatis pietatis exercitiis possent incumbere. Postea *Falco* Ecclesiam construere cepit; Benedictini quidem ad quos sancti Antonii prioratus pertinebat, aggredienti obstitere, sed *Humbertus* archiepiscopus Viennensis, utrarumque partium compromissarius, causam Antonianis adjudicavit, et Innocentius III ejus sententiam confirmavit. His non contentus, *Falco* suos solemnibus votis obstringere meditatus est, idque ab *Honorio III* Summo Pontifice anno millesimo ducesimo decimo octavo obtinuit; a quo tempore Antoniana congregatio, quæ per centum viginti tres annos aut circiter nulla vota emiserat, ad statum religionis et ordinis sancti Antonii erecta est. Tandem *Bonifacius VIII* anno MCXCVII, Bulla sua *Quarto idus Junii* data, prioratum sancti Antonii imposterum abbatiam esse voluit, religiosos ejusdem ordinis canonicos declaravit, et ut regula sancti Augustini ab illis deinceps servaretur statuit. Tunc *Aymo* primus abbas ordinis sancti Antonii institutus, ut Aymarus *Falco* in Historia ejusdem ordinis narrat.

19. *Concilium Lemovicense.* — Urbanus II, postquam Concilium Claromontanum celebravit, cum pluribus archiepiscopis et episcopis mense *Decembrio, X kal. Januarii* Lemovicas venit, et Basilicam sancti Martialis dedicavit *secundo kal. Januarii*, ac in perpetuum *diem illum solemnem et celebrem dedicationis agi constituit*, ut narrat Beslyus in Historia Pictaviensi, ex Tabulario Lemovicensi. Gaudfredus prior Vosiensis in Chron. hoc anno scribit : « Decimo kal. Januarii, Lemovicas adventit Urbanus papa », addique Humbaldum Lemovicensem episcopum, accusatum et convictum, ab Urbano II depositum esse. In Synodo ibi ab eodem Pontifice habita, de protectione Hierosolymitana sicut et in omnibus per Galliam Conciliis, sine dubio actum. Chronographus enim Malleacensis, qui hoc tempore vivebat, ad annum MCXVI scribit : « Ubicumque fuit, præcepit Cruces facere hominibus, et pergere

Iherusalem, et liberare eam a Turcis et aliis gentibus». Hoc autem anno, refert Urbanum papam celebrato Concilio Claromontano, Lemovicas venisse et prefatum Humbaldum deposuisse, die et mense non memoratis. Idem Gaufridus ibidem jam dixerat, Urbanum II Assumptionem B. Mariæ apud Anicium peregrisse, monasterium sancti Roberti de Casa Dei *decimo quinto kalend. Septembris* consecrasse, in festo sancti Thomæ Usarchiæ hospitatum esse, *decimo kalendas Januarii* Lemovicas venisse, die post festum Innocentium cathedrali Ecclesiam dedicasse, sequenti die quiescisse, *pridie kalendas Januarii* Basilicam regalem consecrasse. Indeque patet, quantum Bertholdus in Chron. aberrarit, qui asserit Urbanum II Nativitatem Christi apud Arelatem celebrasse. Non memorat Gaufridus singula oppida ab Urbano II invisa.

20. *Urbanus II Æra Pisana quandoque usus.* — Duchesnius in Notis ad Vitam sancti Hugonis abbatis Cluniacensis, pag. 86, recitat Diploma, quo bona et privilegia cœnobii puellaris Marciniacensis, positi in territorio castri antiquitus *Sinemuro* nuncupati, prope alveum Ligeris in episcopatu Augustodunensi (Marciniacus dicitur), confirmantur. Hujus hæc subscriptio: «Datum apud oppidum Sancti-Flori (in Alvernia situm xv leucis a Claromonte) per manum Joannis S. R. E. diaconi card., Indict. iii, anno Dom. Incarnat. mxcvi, Pontificatus autem domini Urbani II pape viii, vii idus Decemb.» Est hic annus Jacar. Pisanus, qui nobis est tantum mxcv. Ex quo et liquet Urbanum II Æra Pisana aliquando usum esse, quam infra videbimus quandoque etiam usurpam fuisse a Gelasio II et Callisto II. Sed suspicor mendum in Indictionem irrepsisse, legendumque *Indict. iv*; alii enim Pontifices qui ea Æra usi sunt, Indictionem a Septembri inchoarunt. Porro *Urbanum* Æram Pisanam quandoque usurpasse, liquet etiam ex ejus Epistolis xi et xii, tom. x Concil. recitatis, ubi perperam in margine anni Incarnationis Pisani corriguntur, qui tamen puri sunt.

21. *Obitus Ladislai Hungariæ regis.* — In Chron. Hungarorum a Thwrocio scripto, de morte sancti Ladislai Hungariæ regis, habetur: «Sanctitate et gratia plenus, transiit ad consortia angelorum, anno regni sui xix, et sepultus Waradini in monasterio suo, anno Domini mxcv, tertio kalend. Augusti, feria prima», sed legendum *quarto kalendas Augusti*, in quem diem hoc anno Dominica

incidit. Ladislaum hoc anno demortuum, testantur etiam chronographus Hildesheimensis alique. Ei successit *Colomanus*, ut habet idem Thwrocizius. Rogerii comitis Siciliæ filiam uxorem postea duxit *Colomanus*, ut testatur Malaterra lib. 4, cap. 23. Erat autem filius Geisæ sancti Ladislai fratris.

22. *Obitus S. Vulstani episc. Vigorniensis.* — «Anno mxcv, vir venerabilis et valde admirabilis vitæ, Vulstanus episcopus sanctæ Vigorniensis Ecclesiæ ab adolescentia, divinis maucipatus obsequiis, post multos sancti sudoris agones, quibus pro gloria regni cælestis adipiscenda, magna mentis devotione et humilitate sedulo Deo servivit intensissime, die mensis Januarii decimo octavo, nocte sabbati, septima hora mediante, migravit e sæculo», inquit Hovedenus part. 1 Annal., pag. 463. Idem habet Vigorniensis ejus Vitæ scriptor, sed loco *die mensis Januarii* xviii, in utroque auctore legendum *die mensis Januarii* xix, ut methodus cyclica docet, quo etiam die in variis Martyrologiis a Bollandi ad diem xix Januarii, ubi ejus Vitam exhibet relatis, consignatur.

23. *Obitus S. Geraldii fundatoris Congregationis Silvæ-Majoris.* — Mortuus est hoc anno *sanctus Geraldus* abbas monasterii Silvæ-Majoris non longe a Burdegala positi, *nonis Aprilis*, ut legitur in ejus Vita a Christiano monacho Silvæ-Majoris, paulo post ejus mortem composita (1), et in alia ejus Vita ab anonymo auctore ferme synchrono scripta, in Actis SS. Bollandianis ad diem v mensis Aprilis recitatis. Venit Geraldus ex monasterio Corbeie in Aquitaniam. Auctor anonymus laudatus cap. 3 scribit: «O quanta reverentia ille venerandus est dies ab hujus patriæ incolis, quo beatus vir a Deo missus, de longinquis terræ partibus huc advenit! Anno siquidem ab Incarnato Domino millesimo septuagesimo nono, cum sociis suis venit dominus Geraldus in Silvam-Majorem in festivitatem (ut fertur) Apostolorum Simonis et Judæ. Fama igitur tanti viri per diversas regiones se velociter extendit; in secundo anno inceptum est monasterium, quinto scilicet idus Maii, in honore Domini et B. Mariæ Virginis et SS. Apostolorum Simonis et Judæ». Ejus Congregatio latissime quondam propagata fuit, illumque Celestinus III anno mxcvii in sanctorum numerum retulit, ut liquet ex Rescripto ab illo «Laterani V kalendas, Pontificatus anno septimo» dato.

(1) Vita a Christiano monacho Silvæ-Majoris, paulo post ejus mortem composita etc. Nempe post centum ab ejus obitu annos, nam Christianum lucubrationem illam exarasse anno exacter mxcv Bollandistæ probant.

URBANI II ANNUS 9. — CHRISTI 1096.

1. *Concilium Turonense ab Urbano papa celebratur : Philippus rex absolvitur.* — Sequitur annus Redemptoris millesimus nonagesimus sextus, Indictione quarta, quo Urbanus papa degens in Galliis totus in Synodis, complura Romano Pontifice digna peregit, atque inter alia indictam Hierosolymitanam expeditionem promovit. Bertholdus dum ejusdem Pontificis iter relegit, hæc de ipso hoc anno : « Dominus papa Arelati diem Dominicæ Nativitatis cum diversarum provinciarum episcopis gloriosissime celebravit. In his locis ex parte schismaticorum Wirezburgensis episcopus ad Apostolicum pervenit, ejusque misericordiam consecutus est ; ita tamen ut eadem misericordia a legatis papæ in Teutonicis partibus perficeretur eidem. In tertia hebdomada Quadragesimæ, dominus papa Synodum celebravit cum diversarum episcopis provinciarum in civitate Turonensi, ubi iterum suorum præteritorum statuta Conciliorum generalis Synodi assensione roboravit. Et non multo post, episc. Strazburgensem de excommunicatione resipiscentem recepit in communionem, ita tamen ut de illatis criminibus se expurgaret ». Pergit agere de Hierosolymitana expeditione ibi decreta, deque his qui in Hungaria periclitati sunt militibus, ac deinde de regis Francorum absoluteione his verbis :

2. « Philippus rex Galliarum, jamdudum pro adulterio excommunicatus, tandem domino papæ, dum adhuc in Galliis moraretur, satis humiliter ad satisfactionem venit, et abjurata adultera, in gratiam receptus est, seque in servitium domino papæ promptum exhibuit ». Hæc ipse : reliqua in fine anni hujus.

Hic autem duo sunt subjicienda Diplomata ab eodem Urbano Pontifice data ; atque primum, Turonis dum esset, quo edita jura ac privilegia ejusdem Ecclesiæ Turonensis cognovit, probavit, ac etiam Apostolica auctoritate firmavit : quod nuper acceptum hic tibi primum describendum curavius ; sic enim se habet :

3. *Confert privilegia, tollit abusus ab Ecclesia Turonensi Urbanus papa.* — « Urbanus episcopus, servus servorum Dei, universis sanctæ

Ecclesiæ filiis salutem et Apostolicam benedictionem.

« Notum fore volumus tam futuris quam presentibus, quoniam omnium bonorum largitor Deus devotionem nostram ad B. Martini tumulum visitandum sua miseratione perduxit. Quia vero in ejusdem beati confessoris Ecclesiæ quædam inoleverant, quæ in melius promovenda, salutis falce extirpanda videbantur ; nos per septem dies et eo amplius immorati, medicinam animarum, frequentius inter eos intrantes et exeuntes, eis imperativimus, et nobis in omnibus obediētes et benevolos, Deo inspirante et in eis cooperante nobiscum, experti sumus. Sed quoniam ad nostras aures pervenerat, quod legatos Romanæ Ecclesiæ suscipere cum processionis benignitate supersederant, neque etiam eis, videlicet legatis, auctoritas hujus Ecclesiæ per notitiam privilegiorum ejus innotuerat : succensuimus, et graviter eos increpavimus, cur tantam inobediētiæ offensionem incurrerant. Illis itaque humiliter nobis scripta patrum nostrorum Romanorum Pontificum prætendentibus, diligenter attendimus eorum privilegia. Et quia præter Apostolicum et regem, et Turonensem archiepiscopum semel in vita sua, neminem ad processionis susceptionem admittebant, studiose notavimus, nostris cardinalibus Teuzone, Alberto, Gregorio Papiensi, Rausgerio et Hugone Lugdunensi primate, et aliis tam episcopis quam aliarum dignitatum personis presentibus, Brunone Signiensi episcopo, et Ingelramo Suessionensis Ecclesiæ archidiacono.

4. « Porro nos tanta auctoritate refecti, eorum antiquam consuetudinem, eorum scriptis suffragantes, auctoritate nostra corroboravimus, in presentia nostrorum prædictorum fratrum. Et quia filius noster Amatus Burdegalensis archiepiscopus unus erat de legatis Romanæ Ecclesiæ, a Gregorio Septimo prædecessore nostro in Galliam destinatus, non ab hac Ecclesiæ processionis solemnitate susceptus, unde etiam graviter contra eosdem clericos commotus, in Exulduensi Concilio eos excommunicatione perfoderat ; eum in concordiam et pacem

eorum reformavimus. Neque eos ad ullam satisfactionem, quia auctoritate pollente sese munierant, compulimus, neque qualibet pro tali excessu absolutione purgandos censuimus. Denique, quoniam in quibusdam suæ Ecclesiæ privilegiis proprium eis habere episcopum concessum est, ejus vice nos Romano eos sancimus specialiter adherere Pontifici, et graviores eorum causas ejus pendere judicio.

5. « Si quis sane in crastinum cardinalis, aut legatus, aut episcopus, aut quilibet a nostro latere missus hanc nostræ confirmationis paginam sciens, contra eam tenere venire tentaverit, et nostram perfringens auctoritatem, processionem ab ipsa sancti confessoris Ecclesiæ expetierit, si communis non destiterit, potestatis honorisque dignitate careat, reumque se divino judicio existere de perpetrata præsumptione cognoscat. Cunctis autem ista servantibus sit pax Domini nostri Jesu Christi. Amen, Amen, Amen. Dat. Turonis, castello sancti Martini, per manum Joannis sanctæ Romanæ Ecclesiæ diaconi cardinalis, secundo idus Martii, Indict. quarta, anno Dominicæ Incarnationis MXXVII. (MXXVI), Pontificatus autem Domini Urbani Secundi papæ nono. »

Turonis autem recedens Urbanus papa, cum Pictavis se contulisset, ibi dum esset, quod acceperat de inuito abusu, ut nonnisi pretio præbendæ atque canonicatus in Ecclesia S. Martini conferrentur, abolendum curavit, sancto decreto, quod sequenti Diplomate continetur, reliqua vero Apostolica auctoritate munivit. Diploma autem sic se habet :

6. « Urbanus episcopus, servus servorum Dei, dilectis filiis Ecclesiæ beati Martini canonicis tam præsentibus quam futuris in perpetuum.

« Bonorum omnium largitori Deo gratias agimus, qui devotionem nostram ad beati Martini tumulum visitandum sua miseratione perduxit. Quia vero in ejusdem beati confessoris Ecclesiæ consuetudo pravitatis ejusmodi inoleverat, ut honores seu præbendæ omnes pretio acquirerentur; nos locum illum sanctum emundare ab hac peste execrabili cupientes, religiosos viros ad præmonitionem nostram decrevimus præmittendos. Quibus estis fideliter, Domino inspirante, polliciti, et præceptis nostris omnimodis obedire, et simoniacæ pravitatis inquinamenta deserere. Quod et præsentibus nobis per Dei gratiam perfectis, in nostra tanquam beati Petri manu firmantibus, nihil vos ulterius honorum, nihil præbendarum vendituros aut empturos, nec ut vendantur aut emanent aliquando consensuros. Adjicientes etiam, nullum deinceps in canonicorum numerum admittendum, nisi eandem sponsonem jurjurando firmaverit. Quæ videlicet universa nos sanctorum Apostolorum auctoritate firmavimus, et violatores omnes anathematis mucrone confodimus. Et præteritorum igitur gratiæ respondentes, et futurorum spem longe meliorem gerentes, secundum prædecessorum nostrorum Ecclesiæ Romanæ Pontificum privilegia,

vos in spirituales filios Apostolicæ Sedis assumpsimus, et eadem auctoritate statuimus, nullum pontificum, nullum regum, nullum cujusque dignitatis aut ordinis præter præpositos vestros, in vestra Ecclesia vel ejus pertinentiis, potestatem aut dominium exercere; ut Romanæ Ecclesiæ præcepta servantes, Romanæ Ecclesiæ libertate perpetua gaudeatis, salvo nimirum jure seu consuetudine quam hactenus erga vos Turonensis noscitur archiepiscopus habuisse.

7. « Quæcumque igitur venerabilis illa beati Martini Ecclesiæ legitimo jure, vel Pontificum collatione, vel regum et principum liberalitate, vel fidelium oblatione possidet, seu in futurum, præstante Domino, juste poterit et canonice adipisci, firma vobis semper et illi bata permaneant. Nullus in villis aut mansionibus, sive territoriis, sive Ecclesiis, aut pagis, ad vestram Ecclesiam pertinentibus, invitis vobis judicaria agere, ingenuos servosve sæculi potestate constringere, nec teloneum aut nauticum præsumat exigere. Possessionum vero vestrarum decimæ seu novæ, in pauperum usus omnino proficiant. Episcopus autem, in cujus diocesi eadem possessiones sunt, ordinandorum clericorum tantum curam gerat, nihil de cætero gravaminis clericis inferat, nec Ecclesiarum altaria vel alia bona, per regum præcepta vobis antiquitus data et Pontificum Romanorum privilegiis confirmata, vel aliis dare, vel venalitate distrahere, vel modo quolibet alienare præsumat.

8. « Quidquid præterea libertatis, quidquid immunitatis vel prædecessores nostri Romani Pontifices, vel Turonenses archiepiscopi, vel Gallicanarum Ecclesiarum, apud Tussiacum in Tullensi parochia generalis Synodus congregata, pro B. et apostolici confessoris Martini reverentia vestræ Ecclesiæ, vestrisque prædecessoribus contulerunt, nos præsentis Decreti pagina confirmamus. Et quia in quibusdam vestræ Ecclesiæ privilegiis proprium vobis habere episcopum concessum est; nos ejus vice Romano vos sancimus specialiter adherere Pontifici, et graviores vestri causas ex ejus pendere judicio. Si quis sane in crastinum archiepiscopus aut episcopus, imperator aut rex, princeps aut dux, comes, vicecomes, judex, aut Ecclesiastica quælibet sæcularisve persona, hanc nostræ Constitutionis paginam sciens, contra eam tenere venire tentaverit, secundum tertioque communis, si non satisfactione congrua emendaverit, potestatis honorisque sui dignitate careat, reumque se divino judicio existere de perpetrata iniquitate cognoscat, et a sacratissimo corpore ac sanguine Dei et Domini Redemptoris nostri Jesu Christi alienus fiat, atque in extremo examine districtæ ultioni subjaceat. Cunctis autem eidem Ecclesiæ justa servantibus sit pax Domini nostri Jesu Christi, quatenus et hic fructum bonæ actionis percipiant, et apud districtum Judicem præmia æternæ pacis inveniant. Amen, Amen, Amen. Datum Pictavis per manum Joannis sanctæ Romanæ Ecclesiæ diaconi cardina-

lis, quarto kal. Aprilis, Indictione quarta, anno Dominicæ Incarnationis millesimo xcvi (mxcvi), Pontificatus autem domini Urbani Secundi papæ ix ».

9. *De monasterio S. Mauri in Glannafolio et monachis Fossatensibus.* — Antequam autem hinc cum Urbano Pontifice recedamus, quæ reperimus fragmenta ad dictum Concilium Turonense spectantia, hic describenda, ut quæ spectant ad causam monachorum monasterii sancti Mauri. Etenim testatur Petrus Diaconus hæc de monasterio sancti Mauri¹: « In Turonensi Concilio, ubi ipse Urbanus papa præsidebat, monasterium sancti Mauri in Glannafolio, a Fossatensium monachorum abstractum tyrannide, pristinae dignitatis libertatique restituit, sub magisterio tantum Cassinensis cœnobii perpetuo mansurum ». Hæc Petrus. At hic recitanda est brevis Ivonis episcopi Carnotensis Epistola, qua expostulat, ad successorem Urbani papæ scribens, de injusta sententia per subreptionem contra Fossatenses monachos in hoc ipso Turonensi Concilio ab Urbano papa nesciente lata. Epistola sic se habet²:

10. « Paschali summo Pontifici Ivo humilis Ecclesiæ Carnotensis minister, per mare hujus mundi prospere navigare, et post superata naufragia navem in tuto collocare.

« Quoniam judicia Romanæ Ecclesiæ a nemine foris retractari posse, eadem Romana Ecclesia docente didicimus; si qui aliquando se prægravatos ipsius Ecclesiæ auctoritate conqueruntur, hoc eis consilium damus, ut non descendant in Ægyptum propter auxilium³, sed ab ipsa ad ipsam confugiant, et inde expectent levamen unde se conqueruntur accepisse gravamen; quia quæ aliquando corripit paterna severitate, eadem frequenter colligit materna pietate. Quod ideo prælibavimus beatitudini vestræ, ut causam Fossatensium monachorum patienter audiat, et quantum salva Apostolica reverentia fieri potest, anxietatem eorum misericorditer relevetis. Conqueruntur enim se in Concilio Turonensi prægravatos, quoniam ad suggestionem comitis Andegavensis dicunt fuisse subreptum domno papæ Urbano, ut monasterium S. Mauri, situm in patria Andegavensi, quod sub jure Fossatensis monasterii antea per trecentos aut eo amplius annos extiterat, de ejusdem monasterii jure auferret, et ordinato ibi abbate, liberum esse constitueret: quod et factum est, Fossatensibus monachis jus suum reclamantibus, et multis, qui Concilio intererant, aliter sentientibus, cum viderent Privilegium quo nitebantur Fossatensibus fuisse ereptum, et in plures partes fuisse concisum. Adhibitis ergo multorum intercessionibus supplicant prædicti monachi, ut eorum negotium a majestate vestra legitima discussione retractetur, et vel misericordia flectente, vel justi-

tia dictante terminetur ». Illicque Ivonis Epistola.

11. *Parata expeditio in Orientem et profectio.* — Hoc eodem anno, expeditio Occidentalium pro Orientalium Christianorum sub Turcis periclitantium subventionem, indicta per Urbanum papam anno superiori, sub diversis ducibus, diverso tempore, diversis locis in procinctu posita, Constantinopolim versus iter arripit; alique ex ipsis qui primi fuere, sub Galtero duce, octava die mensis Martii, alii paulo post sub Petro Eremita proficiunt: Godefredus autem dux Lotbaringæ, cum aliis ducibus et comitibus, mense Augusti, die decima quinta, alii vero, ut Boamundus comes Apulie, anno sequenti, ut suo loco dicemus. Hæc autem pluribus prosecutus est⁴ Tyrius, quem consulat qui ista cupit addiscere: commentarium enim eo argumento elaboravit lectione dignum. Nobis autem in proposito est, ista tantum nota temporum consignare, non autem singula prosequi, quia jam notissima cunctis scriptorum copia facta sunt. Ante professionem autem hoc anno magnam ab eis pluribus in locis stragem factam esse Judæorum, Bertholdus atque alii horum temporum scriptores affirmant. Qui enim divino instinctu adversus Christiani nominis hostes dedere sacræ militiæ nomen, in quos primos incidunt Christi hostes Judæos infelices, animi impetu, legum habenis excussis feruntur, eosque trucidant, fugant vel obsident, atque ex desperatione ad consciscendam sibi mortem impellunt: datur tantum illis venia qui Christianam fidem, abjurato Judaismo, profiteri vellent.

12. *Profectique sunt cum militibus Christianis* episcopi, inter quos Ademarus Podiensis Anicii Vellunorum episcopus eminuit Apostolica legatione sublimis, insuper cum illis Willelmus Aurasii. Hi primi Cruce signati alios eodem sacro signo nobilitarunt. Eodem Urbani papæ classico excitatos Bernardus Toletanus archiepiscopus, iterum in Terram-Sanctam hac cruce signatus, est peregrinationem aggressus; sed primo ob clericos Toletanos qui eo absente, quasi nunquam amplius reversuro, alium subrogandum putarunt archiepiscopum, reverti coactus, sed pulsus illis, monachis sancti Facundi in eandem Ecclesiam introductis, iterum se ad iter illud capessendum accinxit, pervenitque ad Urbanum papam, qui misertus ejus Ecclesiæ tunc coalescentis nondum adultæ, jussit illum redire Toletum. Qui parens Pontifici, rediens, quos potuit ex Gallia secum duxit viros, quos eruditione et moribus ad regendas Ecclesias putavit idoneos; sed (quod humanum est) iudicio erravit in electione Burdini, quem Lemovicensis secum duxit Toletum, et archidiaconi dignitate nobilitavit, atque inde in Combricensem, postea in Bracharensis archiepiscopum extulit, hominem versipellem, astutum ad decipiendum quemlibet licet sapientem optime

¹ Petr. Diacon. Chr. Cassin. l. IV, c. 45. — ² Ivo Ep. CLXXXIII. —

³ Hoc est, ad principes seculares.

⁴ Willel. Tyr. de Bell. sac. l. I, c. 18; l. I, c. 1.

comparatum, de quo inferius sæpe dicendum. Hæc ex Rodrico ejusdem Toletanæ Ecclesiæ archiepiscopo ¹.

13. *Urbani II reditus Romam.* — Demum vero, ut Urbani papæ Romam ex Galliis redeuntis vestigia assectemur, hæc de ipso qui tunc ea scribebat Bertholdus Constantiensis hoc anno : « Dominus papa, bene dispositis rebus in Gallia, post reconciliationem regis Galliarum et post multa Concilia, tandem in Longobardiam cum magno triumpho et gloria repedavit, et Exaltationem S. Crucis apud

Hortarium prope Papiam solemniter celebravit : multosque episcopos et principes in suo comitalu habuit ». Et inferius de reditu Romam : « Dominus papa, tandem ad Apostolicam Sedem cum magna gloria et tripudio reversus, Nativitatem Domini Romæ cum suis Cardinalibus gloriosissime celebravit ; quippe tota Romana Urbe pæne sibi subjugata, præter turrin Crescentii, in qua adhuc latitabant Guibertini ». Hæc ipse exordio sequentis anni, incipiens more suo anni cujuslibet exordium a Natali die Domini numerare : juxta autem a nobis more majorum initam rationem, in fine præsentis anni sunt collocanda.

¹ Rod. Tolet. l. vi, c. 27, 28.

Anno perindi Græco-Romanæ 6589. — Anno Æræ Hispan. 1134. — Anno Hegiræ 490, inepto die 19 Decemb., Fer. 6. — Jesu Christi 1096.

— Urbani II papæ 9. — Henrici IV reg. 44 imp. 13. Alexii Comneni imp. 16.

1. *Urbanus II apud Turonas Concilium celebrat.* — A num. 1 ad 41. Urbanus II, non *Arelate*, ut perperam habet Bertholdus in Chron. a Baronio num. 1 citatus, sed apud *Lenovicæ* Natale Domini anni superioris celebravit, ut patet ex iis quæ eo anno num. 49 in medium adduximus. Bertholdus enim annum a Natali Domini exorditur, et in rebus extra Germaniam gestis narrandis quandoque peccat. Verum autem est quod is postea ibidem refert, Urbanum nempe in tertia hebdomada Quadragesimæ Synodum in civitate Turonensi celebrasse, et *Philippum* Galliarum regem abjurata Bertrada in gratiam a Pontifice receptum fuisse. Baronius enim num. 5 refert Diploma Urbani II, quo privilegia Ecclesiæ Turonensis confirmavit, *dat. Turonis*, secundo idus Martii, Indict. iv ; et num. 8, aliud Diploma ejusdem Pontificis, *datum Pictavis, quarto kal. Aprilis Indict. iv*, ideoque hoc Christi anno.

2. *Ad varias urbes pergit, et Philippum regem in amicitiam recipit.* — Confirmantur hæc omnia et magis illustrantur, primo ex chronographo Malleacensi hujus temporis scriptore, ad annum mxcvi, ubi ait : « Urbanus papa veniens ad festivitatem sancti Hilarii (quæ celebratur vel xii vel xiii vel xiv Januarii) fuit Pictavis, et benedixit Monasterium-Novum sexto kalendas Februarii (qui hoc anno in Dominicam incidit. Monasterium-Novum, vulgo *Montiers-neuf*, fundatum fuerat anno mxxviii a Guidone Gofrido comite Pictaviensi, duce Aquitanie, ut dicitur in eodem chronico Malleacensi). Post hæc perrexit Andegavis

et benedixit monasterium Sancti-Nicolai (quod ipsemet Urbanus, in litteris datis *apud Sablesium*, quæ urbicula est media inter Andegavum et Cenomanum, vulgo *Sable*, *Xvi kalend. Mart.*, *Indict. iv*, a San-Marthanis in tomo de abbatibus Galliarum recitatis testatur). Inde abiens Turonis tenuit Concilium in monasterio sancti Martini, in quo inter alia restauravit abbatiam Sancti-Mauri, et præcepit habere abbates, etc. Inde reversus est Sanctonas civitatem et celebravit ibi sanctum Pascha : et inde remeavit Romam, et in eundo remeavit Nemausum civitatem, ubi item tenuit Concilium et reconciliavit Philippum regem Francorum ».

3. *Gesta ab Urbano II apud Andegavos.* — Holstenius in Collectione Romana part. 2, pag. 222, ex libello Ms. Fulconis comitis Andegavensis hæc refert : « In fine istius anni mxcvi, (legendum mxcv, ut ex dictis liquet et verba sequentia demonstrant), appropinquante Quadragesima, (ideoque Fulco illius libelli auctor annum a Paschate auspicatur), venit Andegavum papa Romanus Urbanus, et ammonuit gentem nostram, ut irent Jerusalem expugnaturi gentilem populum, qui civitatem illam et totam terram Christianorum usque Constantinopolim occupaverant. Tunc in Septuagesima dedicata est Ecclesia sancti Nicolai ab ipso papa. Constituit etiam idem Apostolicus, et Edicto jussit, ut in eodem termino quo dedicationem fecerat, indictum publicum celebraretur (id est, mundinæ, ut recte Ducangius in Glossario explicat) unoquoque anno apud S. Nicolaum, septima pars penitentiarum populo convenienti ad

illam celebritatem dimitteretur. Unde discedens Cenomannum venit, et inde Turonum; ibique datis venerabili Concilio decretis, media Quadragesima coronatus est, et cum solenni processione ab Ecclesia S. Mauriti ad Ecclesiam B. Martini deductus, ubi mihi florem aureum quem manu gerebat, donavit: quem ego etiam ob memoriam et amorem illius, in Hosanna semper mihi meisque successoribus deferendum constitui ».

4. *Gesta ab Urbano II apud Turonos et Pictavos.* — Ad hæc Chiffletius in Probationibus Historiæ Trenorciensis, pag. 333, refert ex veteri Diplomate, in Concilio Turonensi præsentem Urbano II hoc anno habito, Ecclesias sanctæ Crucis et sancti Nicolai de Lausduno, Petro Trenorciensi abbati ejusque monasterio adjudicatas esse. In fine legitur: « Actum Turonis, anno ab Incarnat. Domini mxcv, Indict. iii, XIII kalendas Aprilis, feria v », ideoque ni error sit in numeris, notarius annum et Indictionem a Paschate inchoat, ut feria v cum die xx Martii copulata indubitatum reddat. Et postea refert Chiffletius ex Tabulis autographis: « Tempore P. abbatis, mense Januario, anni mxcv a Paschate deducti (ideoque jam numerabatur annus mxcvi, juxta nostrum calculum) Indictione iv, (ex quo liquet notarium Indictionem a Septembri, annum vero a Paschate exorsum esse) Petrus Pictavorum episcopus, natam inter monachos Turonenses et canonicos Sanctæ-Crucis de Lausduno controversiam dirimit. Subscribunt ejus sententiæ, Urbanus papa II, etc. » Quare verum est quod scribit chronographus Malleacensis, Urbanum II in die festivitatis sancti Hilarii Pictavos venisse, qua etiam in urbe erat die xxix Martii, ut patet ex dictis anno dcxcix, num. 20. Insuper Urbanus II, postulante Petro Trenorciensi abbate, Turonis hoc anno ejus monasterii bona juraque omnia recepit in tutelam Apostolicæ Sedis, ut liquet ex ejus Rescripto ibidem a Chiffletio relato, ab Urbano papa subscripto, datoque « Turonis XIII kalendas Aprilis, Indictione iv, Incarnationis Dominicæ anno mxcvi ».

5. *Gesta Tolosæ.* — Catellus in Hist. Comitum Tolosæ, lib. 2, cap. 3, hæc refert ex Codice Ms: « Anno Domini mxcvi, Indict. iv, nono kalend. Junii, dominus papa Urbanus una cum archiepiscopo Toletano Bernardo, et Amato Burdegalis archiepiscopo, Pisanoque archiepiscopo (aliisque episcopis ibidem designatis) consecravit Ecclesiam sancti Saturnini martyris, Tolosæ episcopi ». Quod et testatur ipsemet Urbanus II in Rescripto a se anno insequenti emisso, et a Catello ibidem memorato, qui addit Bernardum Guidonis recensere Concilia ab Urbano II celebrata, et habere apud se Epitomen Ms. ab eodem Bernardo editam inscriptamque: *De temporibus et annis generalium et particularium Conciliorum.*

6. *Gesta Magalonæ.* — Urbanum II ex urbe Tolosana Magalonam profectum esse colligo, ex tempore quo in utraque urbe fuit, et ex Arnaldo

de Verdala episc. Magalonensi in Catalogo episc. Magalonensium, a se circa annum mcccxl scripto et tom. i Biblioth. Labbei relato: « Anno xcvi, (legendum mxcvi), in Vigilia Apostolorum Petri et Pauli, Urbanus papa II, qui ad visitandas et confirmandas Galliæ Ecclesias Alpes transisset, ad præces dicti Gothofredi episcopi (nempe Magalonensis) intravit Magalonem, ibique stetit per quinque dies, et tunc secunda die adventus sui, scilicet Dominica (quæ hoc anno incidit in diem xxix mensis Junii, festo SS. Apostolorum Petri et Pauli sacrum) congregato totius pæne Magalonensis episcopatus clero et populo, sermone facto, assistentibus archiepiscopis Pisano et Tarraconensi, ac episcopo Albanensi, Signensi, Nemausensi et Magalonensi, præsentibus comite Substantionensi, Guilhelmo Montis Pessulani domino, de terræ nobilibus totam insulam Magalonensem solemniter consecravit, et omnibus in ea sepultis ac sepeliendis absolutionem omnium delictorum concessit, et multa alia privilegia eidem Ecclesiæ donavit, etc. » San-Marthani in episcopis Magalonensibus, videntes Verdalam deinde scribere Urbanum II eodem anno xcvi Concilium apud Clarum-Montem celebrasse, et existimantes eum in anno adventus Urbani II Magalonam, uti in anno Concilii Claromontani peccasse, Verdala nomine alto silentio suppresso, hæc ejus verbis cum anno mxcv copulat. Verum Verdala, qui in Historia generali parum versatus erat, hæc ex Actis publicis desumpsit, et ei adscribenda erant.

7. *Urbanus II Nemausi Concilium celebrat.* — Dacherius in Spicilegio tom. iv, publicavit Concilium *Nemausense*, ab Urbano II mense Julio celebratum, cujus extant tantum canones. Hoc Concilium nunc legitur tom. 10 Concil. pagina 603, in eoque varia continentur ad disciplinam Ecclesiasticam pertinentia. De eo intelligendus Bertholdus de Philippo Francorum rege verba faciens: « Dum adhuc in Galliis moraretur (nempe Urbanus), satis humiliter ad satisfactionem venit, et abjurata adultera in gratiam receptus est ». In illo confirmata donatio facta Odiloni abbati et ejus monachis, terræ sancti Ægidii, per Raimundum comitem Tolosanorum et Autenensium, ducem Narbonæ et marchionem Provincie. In fine legitur: « Facta et confirmata Charta in Nemausensi Concilio a domino papa Urbano II, celebrato anno ab Incarnat. Domini mxcvi, Indict. iv, septima (legendum sexta) feria, IV idus Julii, Pontificatus domni Urbani papæ anno ix, regnante Philippo rege ». Charte subscripsit ipse *Raimundus comes*. Hanc donationem Urbanus iterum Avenione post aliquot dies confirmavit, et monasterium sancti Ægidii immunitate donavit, Rescripto dato « apud Avenionem in monasterio sancti Andree XI kalendas Augusti, Indictione iv, Incarn. Dominicæ mxcvi, Pontificatus autem domini Urbani II papæ ix ». Tam donatio quam ejus confirmatio tom. x Concil. recitantur, ex iisque constat, Concilium Ne-

mausense mense Julio habitum, indeque Urbanum II Avenionem profectum.

8. *Nemauso venit ad S. Ægidium, indeque Avenionem.* — Ex urbe Nemausensi, ad monasterium sancti Ægidii paucis leucis ab illa dissitum Urbanus II antea venerat, ubi confirmavit quæcumque privilegia Revipollensi monasterio in comitatu Ausonensi sito, antea a Pontificibus Romanis ac principibus concessa fuerant. Baluzius in Appendice Marce Hisp. Urbani Rescriptum recitat, « datum in monasterio S. Ægidii, etc. XVII kal. Augusti, Indict. iv, Incarnat. Dominicæ anno mxcvii, (Pisano, ut iam Indictio iv quam annus ix Urbani demonstrant) Pontificatus autem domni Urbani II papæ ix ». Postridie idem Pontifex Apostolico Privilegio munivit monasterium Balneolense, in comitatu Bisuldinensi positum. Ejus Rescriptum ibidem recitatur: « Datum in monasterio sancti Ægidii apud Vallem-Flavianam, XVI kalendas Augusti, Indictione quarta, Incarnat. Dominicæ anno mxcvii (Pisano), Pontificatus autem domni Urbani II papæ nono ». Sancti Ægidii monasterium Benedictinum, quod urbi nomen dedit, ad presbyteros sæculares postea translatum.

9. *Prima pars exercitus Cruce signatorum est Francorum Orientalium.* — Ad num. 41 et seq. Mabillonius tom. i Musæi Italici part. 2, Historiam *Belli sacri* ab auctore anonymo, quem coætaneum arbitratur, scriptam publicavit. Is Gesta hoc anno recte in compendium redegit. Quare licet cum ab aliis qui interfuere, quæ narrat, exscripsisse existimem, ejus tamen verbis utar, quia quæ isto anno refert in scriptoribus contemporaneis etiam habentur: « Primum, inquit, cepērunt arripere iter, fecerunt tres partes. Una pars Francorum in Ungariæ intravit regionem, scilicet Petrus Eremita, et dux Gottifredus (Bullonius dictus), et Balduinus frater ejus, et comes Balduinus de monte. Petrus vero Eremita Constantinopolim venit in kal. Augusti, et cum eo maxima generatio Alamannorum. Illic invenit Lombardos et Longobardos, et alios plures congregatos, quibus imperator Græcorum jusserat dari mercatum (id est, cibaria ad alimentum exercitus) sicuti mos erat in civitate. Dixitque illis: Nolite transmare Brachium (nempe S. Georgii, seu Hellespontum), donec veniat maxima Christianorum virtus, quia vos tot non estis, quot cum Turcis preliari valeatis. Ipsique Christiani nequiter deducebant se, quoniam civitatis palatia sternebant et incendebant, et auferebant plumbum unde Ecclesiæ erant cooperte, et vendebant Græcis. De quo magis iratus imperator mox jussit illos transmare ultra Brachium. Postquam vero transfretaverunt, non cessabant agere omnia mala. Tandem pervenerunt Nicomediam. Illic divisi sunt Lombardi et Longobardi, et Alamanni a Francigenis, quia Francigenæ erant tumidi superbia. Elegerunt autem Lombardi et Longobardi dominum super sese, cui nomen Raynaldi, et Alamanni

similiter: et intraverunt in Romaniam, et per quatuor dies iverunt ultra Niceam civitatem, et invenerunt quoddam castrum, cui nomen Sceregoro, quod vacuum erat gentē, et apprehenderunt illud, in quo invenerunt satis frumentum, et vinum, et carnem, et omnia bona.

10. *Male habentur a Turcis circa Niceam.* — « Audientes itaque Turci, quia Christiani essent in castrum, venerunt continuo obsidere illud. Ante portam castrum erat quidam puteus, et ad pedem castrum erat fons unus, juxta quem exiit Raynaldus, excubare scilicet Turcos. Venientes autem Turci in die dedicationis S. Michaelis Archangeli, scilicet duobus diebus stantibus mensis Septembris, invenerunt Raynaldum et alios omnes qui cum eo erant, et occiderunt multos ex eis. Alii qui remanserunt vivi, fugerunt in castrum, quod Turci obsederunt continuo, eisque abstulerunt aquam: fueruntque nostri in tanta afflictione sitis, quod flebotomari faciebant suos equos et asinos, quorum sanguinem bibebant. Hac persecutio fuit per octo dies. At dominus Alamannorum (scilicet Raynaldus) consiliatus est cum Turcis, qualiter traderet alios omnes: et fingens se exire ab bellum, fugit ad illos et cum eo multi ex aliis. Turci ceperunt castrum: illi autem qui Deum abnegare noluerunt, capitalem sententiam susceperunt: qui vivi remanserunt, decapitati sunt a Turcis. Isti primo acceperunt feliciter martyrium pro Christi nomine. Audientes autem Turci, quod Petrus Eremita et Gualterius *Sine habere* (ita cognominabatur) fuissent in civitate quæ supra Niceam, venerunt illic gaudentes occidere illos. Cumque venirent, latantes obviaverunt Gualterius et sui milites, quos omnes confestim occiderunt.

11. *Alexius imp. lætatur de strage Christianorum.* — « Petrus vero Eremita paululum antea recesserat Constantinopolim, eo quod nequibat retinere illam diversam gentem, quæ nolebat eum audire nec verba ejus auscultare. Turci vero post hanc malignam illorum victoriam, ubicumque inveniebantur peregrini, irruerant super eos: quorum alios inveniebant vigilantes, alios dormientes, alios nudos jacentes, quos omnes interficiebant. Presbyterum quoque unum invenerunt celebrare sanctam missam super altare, eumque martyrizaverunt. Alii qui poterunt evadere fugerunt ad civitatem: alii miserunt se in mare, alii in silvis, alii ascenderunt in montaneis, et introierunt in quoddam castrum. Turci namque persequentes illos, adunaverunt ligna, ut illos incenderent simul cum castro. Christiani igitur qui in castello erant, miserunt ignem in lignis adunatis, et reversus ignis adversus Turcos, quoniam Deus noluit suos relinquere. Illos vero qui capti erant a Turcis, diviserunt inter se, sicut prius fecerunt per universas eorum regiones. Hoc totum factum est in mense Octobri. Audiens hoc imperator, quod Turci ita dissipassent nostros, luctus et gavisus fuit, et mandavit et fecit eos transmare Brachium; et post-

quam reversi fuerunt, comparavit ab eis omnia arma eorum.

12. *Secunda pars exercitus Christiani male etiam habita.* — « Secunda vero pars intravit in Sclavoniæ partibus, sc. Raymundus comes sancti Ægidii, et cum eo Podiensis episcopus (Ademarus appellatus) : in qua Sclavonia multa pars passi sunt pro Christi nomine et sancti Sepulchri. Nam per quadraginta dies ambulaverunt per obscura loca propter nebulas, quæ erant tam dense, ut vix paululum longe conspiciere possent, et Turci undique eos insidiantes. Sed belli potens et providus comes minutam gentem faciebat ire in medio, et ipse cum exercitu suo custodiebat eos ante et retro ab insidiis Turcorum. Itaque plures e suis militibus perdidit fame et gladio, quoniam mala terra erat. Viam etiam nesciebant, nisi per ortum solis ». Vides Raimundum comitem sancti Ægidii hoc anno in Terram-Sanctam profectum, et hunc anonymum suffragari Tudebodo, Fulcherio Carnotensi aliisque qui id etiam scripserunt.

13. *Franci Occidentales tertiam exercitus partem componunt.* — « Tertia pars per antiquam viam Romam venit. In ista vero parte fuit Robertus comes Flandrensis, et Robertus comes Normannus et Ugo Magnus (qui frater erat Philippi Francorum regis), et alii plures : ac deinde appropinquant ad portum Brondusii aut Bari, aut Tarenti. Ugo vero Magnus, et Guillelmus Marchusii filius confestim miserunt sese in mari ad portum Bari, et transfretantes applicuerunt Dyrrachium. Audiens itaque dux illius civitatis illos prudentissimos viros illuc esse applicatos, continuo mala cogitatione in cor ejus ascendente, jussit eos moveri, et Constantinopolim ante infelicem imperatorem caute deduci, quo ei fidelitatem facerent.

14. *Gottfredus Bullonius Constantinopolim venit.* — « Dux itaque Gottfredus, nostrorum comitum primus, Constantinopolim venit cum suo magno exercitu diebus duobus ante Nativitatem Domini nostri, et hospitatus est juxta Constantinopolim : fuitque ibi donec iniquus imperator jussit eum honorabiliter hospitari in Burgo. Cumque hospitatus fuisset secure, mandabat armigeros suos foras per unumquemque diem, quatenus pacem et alia necessaria apporarent. Cum vero jam putabant cum fiducia exire quocumque voluissent, inimicus imperator, Alexius nomine, sagaciter faciebat ipsos observari : suisque Turcopolis et Piccinacis imperabat, quod eos invaderent et occiderent. Balduinus itaque ducis frater audiens hoc quod traditor imperator suis imperabat hominibus, statim misit se in nimiam attentionem, si forte illos invenire posset. Ad ultimum invenit eos occidentes gentem suam, illosque invasit toto corde, et Deo adjuvante superavit, et apprehendit sexaginta... Ex eis partim occidit, et partim ante conspectum ducis conduxit. Cumque vidisset hoc imperator infelix, valde iratus est. Videns autem dux quod imperator eis esset iratus, jussit suis

militibus exire de Burgo, et hospitari extra civitatem, ubi fuerant prius. Sero autem superveniente, mandavit infelix imperator exercitum suum, et fecit invadere ducem simul cum Christi gente : quos persequens invictus dux una cum Christi militibus, occidit septem ex illis; et persequendo alios, venit usque ad civitatis portam. Reversus itaque dux ad sua tentoria, et fuit in campo illo fere per quinque dies, donec pactus est cum imperatore : dixitque illi imperator, quod transfretaret Brachium S. Gregorii, promisitque facere illuc conduci omnem mercatum, sicut erat Constantinopoli, et pauperibus elemosynam erogare unde vivere possent ». Ita anonymus testis oculatus eorum quæ narrat, cujus aliquas tantum phrases non necessarias prætermisi. Quæ hoc anno peracta esse docet chronographus Malleacensis, cujus verba anno sequenti referam.

15. *Urbanus II Romam redit.* — Ad num. 13. Bertholdus in Chron. quem sequitur Baronius, refert Urbanum II « Exaltationem S. Crucis apud Nortarium prope Papiam, et Nativitatem Domini Romæ » celebrasse. Verum *Urbanus* triduo ante festum Exaltationis sanctæ Crucis, *Tarasci* ad Rhodanum quatuor leucis ab Avenione dissiti agebat, ut docet Charta ex Chartulario monasterii sancti Victoris Massiliensis descripta, et a Bacheo lib. 9 Hist. Provinciæ pag. 83 relata, in qua habetur : « Notum fieri volumus, quod venerabilis papa Urbanus anno Incar. Domin. mxcvi, sui autem Pontificatus octavo, III idus Septemb. per castrum Tarasconem transiens, etc. » sed loco *Pontificatus octavo*, legendum *Pontificatus anno nono*. Præterea Noguierus in libello de episcopis Avenionensibus, hujus Pontificis Bullam XVII kalendas Octobris Avenione datam recitat, qua canonicorum Ecclesiæ Cathedralis regulam sancti Augustini assumere volentium, consilium promovit et confirmavit. Vita regularis in ea Ecclesia observata usque ad annum mcdlxxv, quo Sixtus IV canonicos religionis legibus solvit, ut habet idem Noguierus. Fulcherius Carnotensis in Historia Hierosolymitana ab anno mxcv ad annum usque mcdxxvii, lib. 4, cap. 2, loquens de exercitu Francorum in Orientem proficiscente ait : « Nos Franci Occidentales per Italiam excursa Gallia transeuntes, cum usque Lucam pervenissemus, invenimus prope urbem illam Urbanum Apostolicum, cum quo locuti sunt comes Robertus Nortmannus et comes Stephanus, nos quoque ceteri qui volumus. Et ab eo benedictione suscepta, gaudentes Romam ivimus ». Paulo antea scripserat : « mense Septembri, Robertus Normanniæ comes iter arripuit, cum quo ivit etiam Stephanus comes Blesensis, Theobaldi filius, etc. » Landulphus vero a sancto Paulo in suo Chronico cap. 28, mentionem faciens cujusdam rei in juventute sua gestæ, ait : « Urbanus papa Synodum Placentiæ celebravit, atque de Francia (non vero de Alemannia ut perperam ponit Galvaneus in Chron.) Mediolanum rediit. In qua civitate cum

ipse papa staret (currenti nempe anno) in pulpito sanctæ Theckæ, immense multitudinī hominū utriusque sexus prædicavit, quod minimus clericus de Ecclesia Dei est major quolibet rege mortali. Addidit etiā, quod clerici et sacerdotes per pecuniā in Ecclesias non sunt introducendi ».

16. *Urbanus II Mediolani Herlembaldum in numerum SS. refert.* — Per urbem Mediolanensem transierat etiā Urbanus II in Franciam veniens : « Superiori autem potius anno quam præsentī », inquit Puricellus lib. 4, cap. 81, « ego Herlembaldum ab Urbano papa connumeratum sanctis martyribus, et nobiliori tumultu traditum idcirco credidi, quia et causa ipsius iustitiæ, et Sedis ipsius Apostolicæ dignitas omnino deprecere videretur, ut hoc utrumque fieret, quā primum posset oportunitate, nec ulla cæteroqui veniret in mentem ratio, cur in aliud postea tempus differendum esset ». Verum hæc conjectura mihi parum verosimilis videtur; cum enim Pontifex urgentibus tunc universalis Ecclesiæ negotiis totus intentus esset, et major de *Herlembaldi* virtutibus et miraculis informatio capiendā, rem in suum reditum distulisse existimo. *Herlembaldum* vero ab Urbano II in numerum sanctorum relatum, testatur auctor Chronici cui titulus *Flos Florum*, anno mcccxcix compositi, in quo apud Puricellum lib. 4, cap. 6, num. 2, sub Guidone archiepiscopo Mediolanensi hæc leguntur : « Hoc tempore passus est beatus Arialdus martyr et levita. Jacet in corpore (nempe Ecclesiæ) sancti Dionysii. Beatus quoque Herlembaldus miles, qui amasias sacerdotum persequabatur, occiditur, et per Urbanum Secundum papam in Ecclesia beati Dionysii sepelitur in navello (id est, in sepulchro) in pariete, ubi ejus passio depicta est.

17. *Saraceni in Aragonia victi.* — « In Hispania ipso anno », inquit chronographus Malteacensis ad annum mxcvi « subacta est Osca civitas, et rex Petrus Aragoniæ (id est, Aragoniæ) pugnavit cum quinq; millibus militum et viginti millibus peditum, contra centum millia peditum Moabitum et novem millia milium. Fuerat enim possessa civitas cum aliis civitatibus Hispaniæ, trecentum annorum et eo amplius. Hoc bellum et victoria, Domino donante, facta est mediante Novembri mense. Hoc eodem anno devicerunt Moabites Hildefonsum regem Hispaniæ, et nonaginta milites occiderunt ». De expugnatione Oscæ vide dicta an. mxciv.

18. *Concilium Rothomagensis.* — Ordericus lib. 9, pag. 721, postquam de Claramontano Concilio sermonem habuit, aliud refert in quo canones septem conditi, cujus initium est : « Odo episcopus

Bajocensis, Gislebertus Ebrouicensis, et Serlo Sagensis, legati quoque aliorum de Normannia præsulū cum excusatoriis apicibus Arvernensi Concilio interfuerunt : et inde cum benedictione Apostolica regressi, Synodales Epistolæ coepiscopis suis detulerunt. Guillelmus igitur archiepiscopus Concilium Rothomagi aggregavit, et cum suffraganeis episcopis de utilitatibus Ecclesiasticis tractavit. Tunc omnes mense Februario Rothomum convenerunt, capitula Synodi quæ apud Claramontem facta est, unanimiter contemplati sunt, scita quoque Apostolica confirmarunt, et hujusmodi scriptum posteris dimiserunt : Statuit Synodus sancta, ut *Trevia* Dei firmiter custodiatur, etc. » In Concilio Claramontano *Treuga Dei* confirmata fuerat, induciæ nempe in bellis inter privatas personas gestis, de quibus frequens hoc et sequenti sæculo mentio occurrit.

19. *Pax inter Raimundum et Gilbertum de comitatu Provinciæ contententes.* — Hoc anno *Raimundus*, comes sancti Ægidii, ad bellum sacrum profectus est, ut num. 12 jam vidimus. Antequam e Galliis discederet, comitatum Tolosanum *Bertrando* filio suo notho commendavit, ut refert Guibertus de Nongento in Hist. Hierosolymitana lib. 2, capite 18 : « Qui quidem, inquit, naturali cuidam suo filio comitatu quem regebat relicto, propriam conjugem (nempe Elviram, Alphonsi VI Castellæ et Legionis regis filiam) cum filio quem ab ea exegerat unico, secum duxit ». Ordericus lib. 13, *Bertrandum* comitem Tolosæ semper appellat, atque Alphonsum fratrem ei in comitatum successisse; Gaufredus vero prior Vosiensis in Chron. apud Labbeum tom. II Biblioth. habet : « Raimundus (sc. comes sancti Ægidii) filius Pontii Tolosani, pro argento cum quo Hierosolymam abiit, Ruthenis præfecit comitem Richardum, filium Richardi vicecomitis de Carlat, (cum scribere debuisset, Richardum filium Berengarii vicecomitis de Carlat) », ut demonstrat Boncheus in posterioribus Additionibus ad tom. II Historiæ Provinciæ, pag. 2 et seq., qui ibidem etiā ostendit hunc *Richardum*, hujus nominis II, fratrem extitisse *Gilberti* comitis Æmiliani et Provinciæ. Quare *Raimundus* comes sancti Ægidii, hoc anno, postquam castrum sancti Maximini invasit, pacem cum *Gilberto* composuit, et ex tunc is comitatum Provinciæ pacifice obtinuit, extinctumque bellum a morte *Bertrandi* comitis Provinciæ inter utrumque per annos circiter xvi magno Provincialium damno gestum. Vide dicta anno mxxxv. Semper tamen Raimundus *Provinciæ comes* dictus est, sed ratione tantum partis Provinciæ, seu comitatus Venascini, ad Tolosanum comitem pertinentis.

URBANI II ANNUS 10. — CHRISTI 1097.

1. *S. Anselmi cum rege Angliæ conflictus et Romam aduentus, Barensi Concilio affuturus.* — Sequitur annus Redemptoris millesimus nonagesimus septimus, Indictione quinta, quo Urbanus papa, cum (ut vidimus) anno superiori expeditionem Hierosolymitanam in Galliis promovisset; ne Græcorum Ecclesiæ schismate officii posset, ut eos cum Latinis uniret sollicitè curavit, Romæ dum esset. Quamobrem ea de causa convocatis Græcis, Bari in Apulia Concilium celebrandum indixit ad kalendas Octobris; cui contigit, Deo ita disponente, interfuisse sanctum Anselmum Cantuariensem archiepiscopum. Quomodo autem id acciderit, ex Edinero comite ejus peregrinationis addiscimus; cum alioqui adsit Willelmus Malmesburiensis bibliothecarius, his temporibus proximus, res ab Anselmo tunc gestas fusius prosecutus.

2. Sed præstat audire Edinerum, quem iidem interfuisse, tractasse et vidisse certo comperimus, qui vix annum in pace cum rege sanctum Anselmum transegissee testatur; inde vero regem persecutorem fuisse expertum, adeo ut desperatione juvandi suos victus, unum illud remedium esse reliquum senserit, principem pastorum Urbanum adire, penesque eum vel deponere sarcinam, vel per eum apud regem juvari, quo securus quod sui esset muneris libere exerceret. Anno enim superiori, mense Octobris, Wintoniam vocatus a rege, vix tandem post plurimam contentionem, protectionem hanc extorsit ab eo. Sed quis tunc inter eos sermo contentionis extiterit, et quæ transacta fuerint inter utrumque, alibi se scripsisse testatur Edinerus; quæ quidem a Wilhelmo descripta hic tibi legenda proponimus, Annalibus digna; sic enim se habent :

3. « Sciebat, credo, instinctu diaboli contra pontificem fortuna, parabantque in proximam curiam contra eum machinamenta, quæ omnia, petendo licentiam eundi Romam, quassavit et depulit, cum prius multis moliminibus voluntatem ejus super Ecclesiarum statum attentasset. Quocirca hæc communicaturus cum papa, rogavit (ut dixi) licentiam pergendi Romam, bis terque frustra. Intellego enim (sciebat rex) licentiam interdicendam,

cum eum nullo gravi peccato sciam onerari, cujus a Roma petat absolutionem; nec egere illius loci consilio, cum ei nullius scientiæ desit copia. Magis certe dixerim Urbanum Anselmum cedere scientiæ, quam Anselmum Urbano indigere. Quod si pertinacius coëptis institerit, omnem archiepiscopatum in meum fiscum redigam : transgreditur enim promissa sua, quibus fidem suam adstrinxit, omnes consuetudines servaturum regni mei. Insolitum est quippe mihi, ut quisquam procerum meorum eal Romam, nisi meo potissimum missu (permissu). Ideo vel juret mihi, se nunquam deinceps pro qualibet oppressione Sedem Apostolicam appellaturum, vel evacuet regnum. Illic, inquit, vos fideles mei dicite sibi. Et si videritis eum nolle desistere itinere, tunc vigorem curialis judicii experiatur, quod me toties inquietare non timuerit de re quam ad summam perducere nolit. Contra hæc per nuntios Anselmus agendum non ratus, ipse ad regem ingressus, pro more, dexteræ illius assedit, habuitque orationem in hanc sententiam :

4. « Quod dicis me non debere ire Romam, quod gravi peccato caream et scientia affluam, quamvis neutrum pro vero arrogem; tamen Dei libere committo examinanda. Quod dicis me promississe, ut consuetudines tuas servarem; amplector, sed conditiones requiro. Cum exceptione enim dixi me servaturum, illas duntaxat quæ legibus Dei consentaneæ cum honestate essent constitutæ. Quod dicis me fidem excedere, quod prævaricatis consuetudinibus tuis, Sedem appello Apostolicam, custodita reverentia principatus tui, non verum esse alter diceret. Fidelitatem enim quam tibi, rex, debeo, ex Dei fide habeo, cujus vicarius est sanctus Petrus, cujus Sedem appello.

« Quod dicis, debere me jurare ne ulterius pro quavis causa Romam appellem; publice pronuntio quod Christianus princeps ab archiepiscopo suo tale sacramentum exigiti injuste. Si enim sanctum Petrum jurejurando abjurarem, negarem Christum. Quando vero pro ulla re Christum negavero, tunc tibi de petite licentiæ peccato satisfacere non tardabo. Forsitan autem, me discedente, procurabit Deus, ut non diu res Eccle-

siasticæ, sicut minaris, tuis famulentur compendiis.

5. « Obstrepuunt dicenti rex et proceres, illud maxime objurgantes, nunquam in consuetudinibus servandis mentionem Dei fuisse, vel honesti rectique. Tum ille comi vultu, et pene in risum resolutus, dixit hæc verba eadem : Papæ ! Si nec Dei nec rectitudinis mentio, ut dicis, facta fuit, cujus tunc ? Absit ab omni Christiano, leges vel consuetudines tenere et tueri, quæ Deo et rectitudini noscuntur esse contrariæ.

« Ille illi dicto, quasi malleo frontes impudentes reperi, demissione capitum et vocis silentio injustitiam suam testati sunt. Nihil enim ille turbabatur, sed quodcumque illi succlamante, tacens rursus ad caput sententie impetum revertebatur. Verumtamen non continuit rex animum, quin crudeles minas intorqueas diceret, non illum quidquam de regno suo exoptaturum (exportaturum). At ille impavidus : Pedes, inquit, et nudus pergami, si equitaturas meas et vestes, vestrum esse quis affirmaverit.

6. « Pudenti principem dicti, et rubore finctus ora : Non ita, inquit, volo, sed undecimo abhinc die, cum ad portum veneris, nuntio meo in portandis vel dimittendis parebis. Irascere alius, sed Anselmus imperturbatus manens, benedictionem suam regi non abnuenti obtulit, prælocutus moleste se quidem et ægre iram regiam ferre, sed si dignaretur intelligere, ad commodum ejus animæ viam inchoatam spectare ». Quomodo autem antequam recederet, ex omnibus episcopis quos contrarios expertus fuerat, duos pœnitescentes recepit ad veniam, et quomodo nuntius regis consensuri navim archiepiscopi cunctas sarcinulas indigne sit perscrutatus, sed nihil pecuniarum inveniens, cum tandem abire permiserit, idem pluribus narrat. Hæc (ut accepisti) in fine anni superioris fieri contigerunt; reliqua peregrinationis sive miracula, sive sacræ functiones sanctissimi viri, et singulæ mansiones atque superata pericula, moraque Lugduni apud Hugonem ejus civitatis archiepiscopum, Sedis Apostolicæ legatum, per singula ab eodem Edinero, necnon ab ipso Willelmo pluribus describuntur, quæ brevitatis causa præterimus. Quæ vero tantum ad ejus Romæ adventum spectant, ab Edinero ejus peregrinationis comite narrantur, sic tu accipe :

7. « Celebratis dehinc in cœnobio sancti Michaelis archangeli, quod in monte situm Clusa vocatur, Passionis et Resurrectionis Dominicæ solemniis, in iter reverti Romam festinavimus. Mirum dictu, pauci atque ignoti per loca peregrini ibamus, neminem agnoscentes, nemini qui et unde essemus innotescerent; et ecce solus Anselmi aspectus in admirationem sui populos excitabat, eumque esse virum vitæ designabat. Unde cum jam hospitati etiam inter eos, quorum insidias metuebamus, fuisset; nonnunquam viri cum mulieribus hospitum intravere, et ut hominem

videre ejusque mererentur benedictione potiri, obnixè precabantur. Tali ergo vulgi favore Romanus usque persecutus, Lateranis, ubi tunc temporis summus Pontifex morabatur, adventit. Nuntiatur Pontifici Patris adventus, et ovans jubet illum in parte sui palatii hospitari, et die illo indulgere quieti. Mane confluit ad papam Romana nobilitas, et de novi hospitis adventu sermo conseritur. Adducitur cum reverentia vir in medium, et in qua coram papa sedeat, sella profertur. Ingressus, humiliter se pro more ad pedes summi Pontificis, sed statim ab ipso erigitur ad osculum ejus, sedet, ac pro adventu illius lætari se Apostolicus cum Romana curia dicit. Aclamat curia tertio.

8. « Postremo, silentio facto, multa in laudem hominis papa locutus est, virum illam virtutis ac totius religionis esse contestans, et quidem, inquit, ita est. Cumque illum, utpote hominem cunctis liberalium artium disciplinis imbutum, pro magistro teneamus, et quasi comparem velut alterius orbis Apostolicum et patriarcham, jure venerandum censeamus; ita tamen excellens menti ejus humilitatis constantia præsidet, ut nec marinis periculis, nec longissimis peregrinæ terræ spatiis terreri potuerit, quin vestigiis beati Petri, nostræ parvitatibus ministerio se præsentare, nosque magis illius, quam illum nostro egentem consilio, super causis suis consulendos adire studuerit. Quapropter considerate quo amore, quo honore suscipiendus sit et amplectendus. Hæc cum Anselmus de se, et multo his plura pro sui laude dici audiret (sicut ipsemet sæpe fateri solebat) non parum erubuit, quoniam se talem apud se, qualem a tanto viro prædicabatur minime cognovit. Verumtamen erat inter verba tacens, decentius fore perpendens, ad hujusmodi silere quam loqui. Post hæc de sui adventus causa perunctatus a papa, eo sibi modo narravit omnia, quo veritatis et discretionis ratio poposcit. Ille audita miratur, et subventionem plenam pollicetur. Præcepit itaque ut subventionis ipsius effectum circa se Anselmus præstolaretur ». Hæc de Anselmi in Urbem adventu Edinerus.

9. Quod autem Barensæ Concilium nonnisi ad kalendas Octobris celebrandum indictum fuit, quid inter hæc sanctus Anselmus egerit, ex eodem Edinero dicendum erit : non enim transegit tot mensium tempus otiosus, siquidem nihil otio sanctorum operosius. Quoniam secesserit æstivo tempore, ita narrat Edinerus : « Verum quia calor æstatis in partibus illis cuncta urebat, et habitatio Urbis nimium insalubris sed præcipue peregrinis hominibus erat, Joannes quidam nomine, olim monachus Beci ubi Anselmus fuerat abbas, tunc autem abbas cœnobii S. Salvatoris Telesini, annuente papa, suscepit eum ad proprium patrem amice, et duxit in suam villam, Schlaviam nomine, quæ in montis vertice sita, sano jugiter aere atque tepente, conversantibus illic habilis extat. Igitur habitatio nostra in montis erat summitate collocata, a turbarum tumultu instar solitudinis

vacua. Quod Anselmus advertens, et spe futuræ quietis exhilaratus ait: Illic requies mea, hic habitabo. Ad primum igitur conversationis ordinem, quem antequam abbas esset habebat, quemque se in pontificatu positum maxime perdidisse deflebat, vitam instituit, sanctis operibus, divinæ contemplationi, mysticarum rerum enodationi die noctique mentem intendens. Unde Christianæ fidei amore permotus, insigne volumen edidit, quod *Cur Deus homo?* titulavit, quod opus (sicut in Prologo ejus ipse testatur) in Anglia cœpit, sed hic in Capuana videlicet provincia constitutus absolvit ».

10. Contra infideles elaboratum esse librum illum, idem Anselmus in Præfatione docet. Quamplurimos ibi fuisse infideles, stipendia merentes sub Rogerio Sicilia comite in obsidione Capuana, idem qui supra Edinerus qui videbat, ostendit, eosque plurimum coluisse Anselmum testatur. Mahometi cultores erant isti, qui nihil auditu magis horrent, quam Deum factum hominem dici; quos ad fidem amplexandam ab eo suasos, quominus impleverint sævitia principis esse prohibitos, idem testatur est Edinerus.

11. *Obsidio Capuana.* — De Capuana obsidione acturus, primo quod ad tempus spectat, Gaufridus monachus, qui tunc temporis res gestas ejusdem Rogerii comitis scribebat, eque hoc anno millesimo nonagesimo septimo contigisse tradit ipsam obsidionem Capuæ per Rogerium comitem factam; deque adventu Urbani papæ ad ipsum, componendarum rerum causa illuc Roma proficiscentis hæc habet¹: « Cum ista aguntur, de obsidione scilicet Capuæ papa Urbanus colloquium ducis et comitis desiderans, a Roma progrediens, apud Capuam, ubi obsessionem tenebat, venit: comesque sex tentoria illi deliberans ad hospitandum, sumptus necessarios abundantissime ministravit. Porro ille sciens scriptum²: Beati pedes evangelizantium pacem. Et³: Beati pacifici, quoniam filii Dei vocabuntur. Et alibi scriptum est⁴: Pacem habete, et Deus pacis et dilectionis erit vobiscum: et maxime quia sciebat totius Christianitatis curam suæ provisioni delegatam, de pace inter ipsos reformanda, primo ducem et comitem principemque pariter conveniens, attentare cœpit.

12. « Qui consilio comitis prudenti responsione usi, in præsentia Apostolici, copia beati Petri dicunt se jus inire, si a Capuanis pari discrimine idem exequatur; concedunt. Papa intra urbem idem de Capuanis rescitum vadens, dum ab utrisque partibus conceditur, spe concifiendæ pacis frustra gaudens, renuntiat; dies disputandi statuit. His opponentibus, et illis prout sese res habebat respondentibus, gravi syllogismo Capuanis a iudicibus legaliter conclusio determinatur. Capuani audientes se iudicio prægravari, vel oppositione, vel rationabili contradictione contra iudices usi, publice se injuriosos ostentantes, exequi vel nolle

vel non posse denuntiant. Quod audiens vir Apostolicus, et quia hæc ab illis exequendi internuntius fuerat, aliquantulum erubescens, gladio B. Petri animadvertens interminat. Parti nostrorum ex toto favendo se contulit, constantiam comitis in fortia exercendo per plurimum laudans, vitamque ejus omni cura Romæ et Italiæ per necessariam asserens. Nam timor ejus plures ab insolentia plusquam zelus honestatis compescebat. Apostolicus itaque, Ecclesiasticis negotiis plusquam expeditionalibus exercitiis intentus, totalibus tumultibus mente declinatis, his tribus principibus, sed et omni exercitui Apostolica benedictione concessa, Beneventum secessit ». Pergit auctor de obsidione et deditione reliqua recensere.

13. *S. Anselmus laborat pro infidelium conversione.* — Nos sanctorum facta prosequamur quæ tunc contigerunt. Narrat ea Edinerus qui et ipse aderat, in Vita sancti Anselmi¹. Quem tunc contigit una cum Urbano papa in castris versari; de quo ista: « Humanitas sancti Anselmi sine personarum acceptione suscipiebat omnes. Et quos omnes? Paganos etiam, ut de Christianis taceam. Siquidem nonnulli talium, fama bonitatis ejus inter suos exciti, mansionem nostram frequentabant, et sumptis ab Anselmo corporalibus cibis, gratiosi revertebantur, admirandam viri benignitatem suis prædicantes quam experiebantur. Unde in tanta deinceps veneratione apud eos habitus est, ut cum per castra illorum, quæ in unum collocata erant, transiremus, ingens multitudo eorum elevatis in cælum manibus, ei prospera inprecarentur, et osculatis pro ritu suo manibus propriis, etiam coram eo genibus flexis, pro sua benigna largitate grates agendo venerarentur. Quorum etiam plurimi, velut comperimus, se libenter ejus doctrinæ submisissent instruendos, ac Christianæ fidei iugo sua per eum colla injecissent, si crudelitatem comitis sui per hoc in se sevituram non formidassent. Nam revera nullum eorum pati volebat Christianum impune fieri. Quod qua industria (ut ita dicam) faciebat: nihil mea interest, Deus ipse viderit ». Hucusque Edinerus.

14. *Rogierus comes Sicilia mirabiliter liberatur, cum quo Urbanus papa congregitur Salerni.* — Sed quomodo ipse Rogerius comes, dum ad Capuanam persisteret obsidionem, per sanctum Brunonem Carthusianorum auctorem ei per visum apparentem, a Sergii ducis militum sit liberatus insidiis; cujus rei erga ipsum munificentia factum est, ut eadem Carthusianorum familia propagaretur latioribus spatiis in Calabria, ejusmodi tunc scripto Diplomate videamus. Sic se habet²:

« Ego Rogerius divina misericordia comes Calabriae et Siciliae, nota esse volo omnibus fidelibus Christianis beneficia, quæ mihi peccatori concessit Deus orationibus reverendi mei fratris Bru-

¹ Gaufr. l. iv. c. 27. — ² Rom. x. — ³ Matth. v. — ⁴ 2. Cor. xii.

¹ Edm. in Ansel. l. ii. Apud Sur. die xxi Apr. — ² Exstat apud Sur. die vi Oct. tom. v.

nonis, piissimi patris fratrum qui habitant in Ecclesiis sanctæ Mariæ de Eremo, et S. Stephani protomartyris, quæ sitæ sunt in terra mea, inter oppidum quod dicitur Stillum et Arenam. Cum essem in obsidione Capuæ kalendis Martii (Maii), et præfēcissem Sergium, natione Græcum, principem super ducentos armigeros nationis suæ, et exercitus excubiarum magistrum, qui sathanica persuasione præventus, prius ipsi principi Capuæ promittenti auri non modicam quantitatem, ad invadendum me meumque exercitum, noctu aditum pollicitus est se præbere. Nox proditionis advenit, princeps Capuæ ejusque exercitus juxta promissum est paratus ad arma. Dumque me sorori dedissem, interjecto aliquanto noctis spatio, adstilit cubili meo quidam senex reverendi vultus, vestibus scissis, non valens lacrymas continere. Cui cum in visu dicerem, quæ causa ploratus et lacrymarum esset, visus est mihi durius lacrymari. Interato quærenti mihi quis esset ploratus, sic ait: Fleo animas Christianorum, teque cum illis simul. Eurge (exurge) quamprimum, sume arma, si liberare te Deus permiserit tuorumque animas pignatorum.

15. « Hic mihi per totum videbatur, velut si esset per omnia venerabilis pater Bruno. Expergefactus sum cum terrore grandi, pro visione pavescens. Illico sumpsit arma, clamans militibus ut armati equos conscenderent, visionem si vera esset satagens comprobare. Ad quem strepitum et clangorem fugientes impius Sergius ejusque sequaces, subsecuti sunt principem Capuæ, sperantes se in dictam civitatem confugium habuisse. Ceperunt autem milites inter vulneratos et sanos centum sexaginta duos, a quibus visionem fore veram comprobavimus. Reversus sum, Deo volente, vice-sima nona Julii mensis Squillatum, perhabita Capua civitate, ubi fui per quindennam continuam infirmatus. Venit vero jam dictus venerabilis Bruno cum quatuor de fratribus suis, qui me suis sanctis devotissime colloquiis consolati sunt. Cui reverendo viro visionem retuli, et humiles gratias egi, qui de me etiam absente suis in orationibus curam habuisset. Qui se humiliter asservit, non ipsum fuisse quem vidi, sed Dei angelum qui adstat principi tempore belli. Rogavi quoque ipsum humiliter, ut propterea de rebus meis in terra Squillacensi sumere dignaretur largos redditus quos donabam. Remuens ille, recipere nolle dicebat, quod ad hoc domum sui patris, meamque dimiserat, ut omnino de rebus extraneis liber, deserviret Deo suo. Illic fuerat in domo mea quasi primus et magnus. Tandem vix ab eo impetrare potui, ut gratis acquiesceret sumere modicum munus meum. Donavi enim eidem patri Brunoni ejusque successoribus, ad habendum in perpetuum absque temporali servitio, monasterium sancti Jacobi cum castro, et quamplures res et bona alia, cum amplissimis libertatibus in dictis litteris specificè declaratis ». Hæc Siciliæ comes Rogerius.

16. Qui non post multos dies ad dedicationem

Capuanam civitatem coegit, prout idem qui supra Gaufredus enarrat. Interea vero, sanctus Anselmus de missione sua ardenti studio cum Urbano papa egit, sed frustra. De eo enim hæc Edinerus: « Deinde soluta obsidione, multa prece Anselmus papam ad hoc flectere conatus est, quatenus ab onere pontificali eum absolveret, et quieti liberum vacare concederet. Verum cum quantum ad effectum ad nihilum laborasset, fretus benedictione ejus, Sclaviam reversus est, opperiens tempus Concilii, quod idem papa apud Barum kalendis Octobris erat celebraturus ». Quæ autem, dum ibi maneret, digna Apostolico viro ediderit miracula, et illud præcipuum, cum sitienti populo e rupe aquam eduxit, idem auctor pluribus narrat. Nos vero ex instituto Urbani papæ vestigia assecutemur.

17. Gaufredus monachus, qui tunc ista quæ inspieiebat, et scribebat, his subjicit, Rogerium comitem Siciliæ, una cum Rogerio duce Guiscardi filio, post dedicationem Capuæ mox perrexisse Salernum, illucque ad eum advenisse Urbanum papam, qui hactenus Beneventi rerum eventum expectans sese continuisset. Quomodo autem ab eo ipse Pontifex acceptus fuerit, ita narrat: « Papa urbem redditam et pacem inter ipsos factam audiens, et gaudet de fraude compressa et de pace confecta. Sed quia ducem et comitem Salernum secessisse audivit, nolens comitem, donec sibi loquatur, versus Siciliam remeare: illorsum accelerat. Veniensque cum archiepiscopis apud sanctum Mattheum, ut cum debito honore eum acciperet, cum processione præsolatur. Et tamen propter amicabilem venerationem quam versus comitem habebat, primum ad ejus hospitium eum amabiliter visum vadit, diuque ejus colloquio usus, ad processionem quæ præstolabatur, suscipiendus accessit. In crastinumque convenientes, alter alterius colloquio cum maxima dilectione (delectione) fruuntur ». Hæc de adventu Urbani papæ Salernum, et de congressu cum Rogerio Siciliæ comite Gaufredus, qui tunc ibi potuit esse præsens.

18. *Hic Baronius aggreditur serio admodum tractare de male instituta monarchia Siciliæ, occasione Diplomatis Urbani papæ, hoc anno dati Rogerio Siciliæ comiti.* — At quæ sequuntur de Privilegio ab eodem Urbano papa ipsi Rogerio comiti concessio atque filiis ejus hereditibus, maxima indigent per investigationem atque discussionem, quo veritas ipsa elucidata perspicua omnibus fiat, nec amplius mendaciis circumnecta celetur. Rem plane aggredimur, quæ multipliciter parere nobis possit invidiam, atque in nos odium concitare multorum. Sed summa inde nobis parva est dicendi fiducia, quod ipse ad quem spectat ista corrigere, rex sit veritatis amantissimus, justitiæ observantissimus, et in omnibus animo tranquillissimus. Atque insuper ex eo augetur magis alacritas cum libertate dicendi, quod non contra ipsum regem, sed pro

¹ Gaufr. l. IV. c. 9.

ipso (ita dixerim cum sancto Ambrosio ¹ ad Theodosium) sint a nobis ista tractanda. Pro rege namque agimus, imo et cum rege, dum pro veritate cuius est cultor, et pro iustitia cuius est rector, atque pro religione cuius est custos et defensor, nos laboramus. Quod et cum a nobis id exigat institutum, tacere non liceat: nos silentes arguerent jure multi ac objicerent, esse passos auream anginam Demosthenis. Qui enim elucidandæ historicæ veritatis ex instituto provinciam subierimus, atque hactenus, quantum nostræ fuit facultatis, indefesso studio, non penitendo labore, pro viribus præstiterimus, quoniam modo que maximi ponderis esse noscuntur, absque culpa gravi præterisse poterimus intentata, relinquere indiscussa, vel omittere insoluta? Aggredimur igitur, Christo prævio qui est Veritas, veritatem exultantem postliminio restituere, et obscuratam tenebris in lucem apertissimam vindicare. Equo, rogo, patiaturnimmo lector, si nos in his diutius necessitas detinuerit.

19. In isto quem diximus Salernitano congressu, ab Urbano papa datum asserit Diploma illud amplissimum, super quod, veluti fundamentum immobile, recentem Siciliæ monarchiam esse fundatam atque firmiter stabilitam, asserunt omnes qui ejus sunt pugnacissimi defensores; et inter alios Fazellus Siculus, qui illud ipsum Diploma in sua Historia de rebus Siculis, veluti emblema pretiosum intexit, quod et fecit rerum Hispaniarum recens historicus, sique quod latebat in angulo, perstreptentibus hisce tubis sacerdotilibus in Sicilia altera, altera in Hispania, est divulgatum in orbe, quarum clangoribus non destruantur menia Hierichontina, sed magis qui in bona voluntate Domini sunt edificati muri Hierusalem²; cum bellicum insonuerint, quo excitati sunt plures pugnare adversus Ecclesiam, ejus expugnare jura et adimere libertatem, captivamque pati cogere miseram servitutem. Par erat, prius de ipso, antequam ederent, investigare, et a quo sic primum editum intelligere, et in quam fidem acceptum cognoscere, et an integrum examinare, originem petere, et prototypum, si posset reperiri, consulere; denique vero illud ipsum erroribus purgatum, in candorem pristinum revocatum, scholisque illustratum proferre, atque ita bene mereri de Ecclesiastica antiquitate. Ista vero prætermissem, et inemendatum, imo et depravatum penitus edidisse, nec commonuisse lectorem, quam grave peccatum sit judicet ipse lector, qui eorum fidem secutus, in Scyllæos se delatum vortices non cognoverit, cum ita navigaverit in tenebris, nec nisi adnota veritatis face, in quod periclitandus discrimen inductus fuerit, postremo vix sentiat.

20. De ipso igitur Diplomate nos acturi, quo tempore ipsum, uti scriptum legitur, et quo auctore editum fuerit primo dicendum, ac deinde in quam tunc auctoritatem atque fidem acceptum.

Rem haud ignotam prodimus, sed jam ore fere omnium pervulgatam, ac veram, atque monumentis etiam publicis comprobatam. Tempore siquidem Ferdinandi regis, cognomento Catholici, Siculus quidam, Joannes Luca Barberius dictus, anno Domini millesimo quingentesimo decimo tertio, egit cum eodem rege, ut ejus auctoritate perquisita undique antiqua Diplomata, eadem in unum volumen, quod caput Brevium appellaret, ad regni jura noscenda colligeret. In quo præter alia multa, illud de quo agitur, Urbani papæ Diploma, uti editum legitur, pariter scripsit; sed sicut cætera unde acceperit, verbum nullum. In quem talium inventorem, ut impostorem publice conclamatum ab iis, quorum antiquæ possessiones recessus inventis hisce Diplomatum turbarentur. A quibus et eidem Ferdinando regi fuit libellus oblatus, quo regia implorabatur clementia, ne in præjudicium plurimorum, Barberianæ collectioni fides aliqua adhiberi deberet, nisi de singulis doceretur autographum, quod quisque cum opus esset, consulere posset.

21. Quorum iustissimæ petitioni princeps iustissimus annuit. Porro autem rerum gestarum fides, ne quis de his dubitare aliquo modo possit, expressa habetur, et descripta legitur in libro Capitulorum regni Siciliæ, capite 109, pagina ducentesima vicesima prima, eademque per eundem Ferdinandum regem confirmata, die vicesima quarta Junii, tertia Indictione, anno Domini millesimo quingentesimo decimo quinto. Qui erim ista diligenter exploravit et vidit testis fidelis, scriptis nobis tradidit quam fidelissime. Sic igitur, ut evidenter appareat, nullam penitus conciliat Diploma editum sibi fidem, nec auctoritatem aliquam sibi vindicat, nisi ex autographo accipiat eam. Provo-candum igitur ad prototypum, ex cujus fide pendet hujus auctoritas atque veritas: quod cum nunquam hactenus factum sciatur, ut ei credatur in rebus præsertim magni momenti, nihil prorsus est quod cogat, vel aliquo modo suadeat.

22. Vis videre, lector, atque perspicue intelligere, istud ipsum, quod est editum Urbani Diploma, aliud omnino atque diversum esse ab eo quod datum est Salerni ab eodem Urbano papa Rogerio Siciliæ comiti? accipe perspicuam de his rationem. Cum sæpe contigerit, adversus Apostolicam Sedem Siciliæ reges de Ecclesiæ et regum juribus altercari, utique ex eodem Diplomate facessere negotium, ipsi, si ita ut se habet existisset, minime prætermisissent; utique eo usi fuissent, ut nunc utantur, tanquam potentissimo telo. Sed cum nusquam vel levis sit mentio, ipsum citatum vel nominatum aliquando, plurimis ut id facerent occasionibus exigentibus: utique dici posse videtur, ipsum haud ejusmodi fuisse, ut nunc describitur, Ecclesiæ Romane juribus adversarium. Cur, inquam, non eo usus Rogerius Rogerii hujus filius, cum adversus Innocentium et Eugenium ageret de juribus Romane Eccl. in regno Siciliæ? Cur

¹ Paulin. Aulic. — ² Paul. L.

non hujus nepos Guillelmus, cum adversus Hadrianum Quartum de iisdem juribus misceret litigia et contentiones? Cur non alii horum successores regni ejusdem? Cur nec ipsi tyranni præensionum audacissimi ac pertinacissimi defensores? Omittimus de reliquis dicere, quorum nec unus quidem usque ad Carolum Quintum ostendi poterit citasse illud, uti causæ suæ proficuum testimonium. Sed jam istud ipsum Diploma quale sit, uti nunc eusum legitur, hic describamus. Sic se habet :

23. « Urbanus episcopus, servus servorum Dei, charissimo filio Rogerio comiti Calabriae et Siciliae salutem et Apostolicam benedictionem.

« Quia prudentiam tuam supernæ Majestatis dignatio multis triumphis et honoribus exaltavit, et probitas tua in Sarracenorum finibus Ecclesiam Dei plurimum dilatavit, et sanctæ Sedi Apostolicæ devotam se multimodis semper exhibuit : nos in specialem atque charissimum filium ejusdem universalis Ecclesiæ te assumpsimus. Idcirco de tuæ probitatis sinceritate plurimum confidentes, sicut verbis promissimus, ita litterarum auctoritate firmamus : Quod omni vitæ tuæ tempore, vel filii tui Simonis, vel alterius qui legitimus tui hæres extiterit, nullum in terra potestatis vestræ, præter voluntatem aut consilium vestrum, legatum Romanæ Ecclesiæ statuemus. Quinimo quæ per legatum acturi sumus, per vestram industriam, legati vice, cohiberi volumus. Quando ad vos ex latere nostro mitteremus (miserimus), ad salutem sanctarum (videlicet Ecclesiarum), quæ sub vestra potestate consistunt (existunt), ad honorem beati Petri, sanctæque ejus Apostolicæ Sedis, cui devote hactenus obedisti, quamque in necessitatibus suis strenue et fideliter adjuvisti.

24. « Si vero celebratur (celebrabitur) Concilium, et tibi mandavero, quatenus episcopos et abbates tuæ terræ mihi mittas, quos et quos volueris milites (mittas) : alios vero ad servitium Ecclesiarum tuarum (et ad tutelam) retineas. Omnipotens Deus actus tuos in beneplacito suo dirigat, et te a peccatis absolutum in vitam æternam perducatur. Datum Salerni per manus Joannis sanctæ Romanæ Ecclesiæ diaconi, tertio nonas Julii, Indictionis septimæ, anno Pontificatus nostri undecimo ». Hactenus Diploma.

25. Quod quidem toties abrogatum fuisse oportuit, quoties inter ipsos Romanos Pontifices atque Siciliae reges de his constat fuisse transactum ; ut cum inter Rogerium atque Eugenium papam ita est concordatum, quod nullum legatum mitteret in Siciliam Pontifex, nisi quem rex ipse peleret ; non autem ut rex ipse legati Apostolici vicem terneret, quod ab Urbano fuisse concessum asseritur. Quod constat ex Romani senatus Epistola ad Conradum regem Romanorum, quam recitat Otto Frisingensis episcopus, ejus temporis auctor ¹. At de

aliis transactionibus initis in favorem Romanæ Ecclesiæ, inferius dicturi sumus.

26. Sed antequam ulterius procedamus, corrigamus primo errorem illapsum in tempus. Nam cum constet Diploma datum esse Salerni, et adventum Urbani illuc hoc ipso anno contigisse, exploratissimum sit testificationibus ejus temporis scriptorum omnium quos recensimus : utique signatum ipsum oportuit Indictione non septima, sed quinta, neque anno undecimo Urbani papæ, sed decimo : confirmantur ista eo validius, quod non anno sequenti, quo annus undecimus Urbani Pontificis numeratur, qui in Diplomate scribitur, potuit datum esse Diploma. Nam eo tempore, anno sequenti scilicet, non Salerni, ubi datum legitur, sed Romæ constitit Urbanus ad celebrandum Concilium, ut suo loco patebit : neque post sequentem annum, quo signata in Diplomate septima currit Indictio ; nam eodem pariter anno, eo tempore, non Salernum, sed Roma Urbanum tenuit pariter in alio celebrando Concilio, ut intelliges suo loco. Sic igitur quæ depravata ostendimus, sunt in Diplomate corrigenda ; cum tamen non adeo severi exactores simus, ut ob ejusmodi librariorum vitia illapsa, velimus idem Diploma rejicere.

27. At istud ipsum, quidquid sit et quale sit, a nobis nuper recitatum Diploma scias, uti oraкулum cælitus lapsum, in plenissimam fidem acceptum atque in fundatione monarchicæ molis fundamentum positum esse. Illorescit auditus, ut explosum sententia Ferdinandi, cujus nullum extaret quod ostendi posset autographum, nullius esset auctoritatis assertum Urbani papæ Diploma : illud ipsum sub ejus successore Carolo Quinto imperatore bellicis rebus intento, principe invicissimum, tunc in regno Siciliae opera advocati fiscalis, uti quidpiam divinum in sublime attolleretur, præconiis laudaretur summoque plausu exciperetur, et ut lapis angularis faciens utraque unum, temporali simul et spirituali juncta auctoritate, nova hactenus in Ecclesia Catholica inaudita constituta fuerit monarchia. Sic itaque cum de his est agitatum consilium, consiliarios fefellerit iniquitas religionis obducta velo, dum servandum proponitur, quod papa sanctissimus, Urbanus Secundus, sacro Diplomate statuisset ; cui adversari nefas duceretur, diceretur et impium.

28. Prætensa igitur Apostolica auctoritate, contra Apostolicam ipsam Sedem grande piaculum perpetratur, dum ipsa inconsulta Apostolica Sede, ejus in regno Siciliae potestas labefactatur, auctoritas abrogatur, læditur jurisdictio, et cum ea leges violantur Ecclesiasticæ, patiturque dispendium antiqua traditio, atque demum, ut ipsa erigatur in Sicilia monarchia, jura omnia Ecclesiæ dissipantur. Nomen hactenus inauditum tunc proclamatur infaustum, adscribitur Chartis, et memoriæ perpetuæ consecratur, jam regis eusum typis, et imperatorio promulgatum Edicto. Ita abusi ministri illi nomine tanti imperatoris, ut tantum nefas au-

¹ Otto Frising. in Frideric. l. i. c. 29.

derent. Siquidem anno Redemptoris millesimo quingentesimo vicesimo sexto, die septima mensis Decembris, datum legitur Edictum, Caroli Quinti nomine potius quam voluntate, de confirmatione Pandectarum impressi voluminis, in quo asseritur monarchia, atque ipse seorsum scriptus legitur liber, qui inscribitur *Monarchia*, omnium regni consiliariorum subscriptione munitus, ejus autographum asservatur in Siciliae cancellaria, ex quo exemplaria duo descripta dicuntur, quorum alterum fertur ad regem missum, alterum vero ad Aragonense Concilium datum. Qui se vidisse testatur, vir pius, retulit ista.

29. Sed et quæ sibi jura eadem vindicet monarchia, dicendum. Quod enim auctoritate Urbani papæ Diplomatis, ipsum Rogerium Siciliae comitem atque ejus hæredes legatos a latere constitutos omnino velint: omnes pariter successores reges esse in Sicilia regno legatos notos esse contendunt, eisdemque omnia quæ sunt legatorum a latere efficere posse confirmant, imo et substituendi potestatem habere cum eadem auctoritate, nimirum, ut judicare et punire possint, absolvere et excommunicare quos velint, laicos, monachos, clericos, etiam Ecclesiastica dignitate prælatos, abbates, episcopos et archiepiscopos, imo et S. R. E. cardinales ibi degentes eidem monarchiæ subditos esse velint. Ejusdem quoque monarchiæ esse facultatis, appellationes ad sanctam Sedem Apostolicam impedire, nuntios ejusdem sanctæ Sedis non admittere, atque demum respectu Ecclesiasticæ jurisdictionis, neque ipsam Apostolicam Sedem recognoscere, et habere superiorem, nisi in casu præventionis. Ista sunt, quæ Urbani auctoritate Diplomatis reges in Sicilia velint sibi licere. Quid tu ad ista dixeris, lector, nisi vocabulo *Monarchiæ*, præter monarcham unum, quod unicum caput visibile in Ecclesia a fidelibus omnibus semper est cognitum atque cultum, aliud in monarcha Siciliae obortum, aliud superinductum pro monstro et ostento caput Ecclesiæ, in qua non amplius, ut semper antea unus, sed duo audiantur, scribantur, legantur esse monarchæ, ac duo insuper in ea deformiter ostentari capita?

30. At quod ad ipsum in primis nomen spectat: quomodo post quadringentos triginta annos a tempore dati ab Urbano papa Diplomatis, quod nunquam a piis regibus, nec a tyrannis ipsis Romanæ Ecclesiæ perduellibus, neque ipsis acerbissimis Romanæ Ecclesiæ persecutoribus Friderico, filio, atque nepotibus, ejusmodi marchiæ nomen usurpatum ullatenus reperitur: recens natum invenitur superinductum? potuitne tot sæculis intra viscera latuisse parentis, ut nonnisi hoc postremo tempore tantum pareretur ostentum? Exhortuit semper Catholica Ecclesia, assueta servare quod antiquitus traditum, voces novas, nisi cum ad novas profligandas hæreses, nova ipsam oportuit excogitasse remedia, custodiens in Timotheo Pauli depositum, ita scribentis ad eum: « O Ti-

mothee, depositum custodi, devitans profanas vocum novitates ». Illic, inquam, ut serpentis sibilos, consuevit Ecclesia Catholica novas hujusmodi audire, atque horrescere voces et execrari. Et quomodo ipsa patietur istam, quæ adversatur custodiæ mordicus in Ecclesia unitati? Si una est consensu fidelium omnium in Ecclesia a tempore Evangelii promulgati monarchia, nec alteram superinduci ab illa, quæ Christi ore noscitur stabilita, ad Petrum tantum, non ad alium quempiam Apostolorum ista dicentis: « Tu es Petrus, et super hanc petram edificabo Ecclesiam meam »; et ad eundem post resurrectionem: « Pasce agnos meos, pasce oves meas », unquam passi sunt Orthodoxi: quomodo hodie infansum nomen, vox infelix, altera auditur in Ecclesia monarchia?

31. Quod si dixerint, non est dicenda ista altera monarchia, cum pendere istam dicamus ab illa, dum eam auctoritate Diplomatis Pontificii vindicamus: et nos hoc ipsum dicimus, si non est altera, sed una cum ea; utique non altera dicenda est monarchia, sed unicum relinquendum, servandum, et custodiendum *Monarchiæ* nomen est illi, quod ipsi impertitum a Christo, in ea solum semper sunt venerati fideles. Si igitur auctoritate Diplomatis Pontificii id vobis juris quæsitum contenditis (ministros illos regios compello) cur plusquam concessum sit illo, vobis sumitis in novitate vocabuli? Demus quod dicitis: Urbanus voluit reges Siciliae esse legatos natos a latere: numquid Diplomate sanxit, eos dicendos esse monarchas? nequaquam. Magna quidem inter utramque vocem est differentia. Cum autem plures sint hodie in Ecclesia Catholica nobilissimarum Ecclesiarum antistites, qui ex vero certoque privilegio Apostolicæ Sedis legati nati obtinent dignitatem: num ex eo aliquis eorum ausus est aliquando sese appellare monarcham? minime gentium. Quamobrem etsi non alia ex causa, vel ex hac saltem succedendum est nomen adulterinum, ne tali exemplo propagetur in alios: alioqui in Ecclesia Dei, in qua nonnisi unus possit esse monarcha, monarcharum silva (horrendum dictu) succresceret infamia sempiterna primatus Romanæ ipsius Ecclesiæ. At hæc, quod ad nomen ipsum, dicta satis; res autem ipsas ad examen modo revocemus.

32. Quoniam jure, qua ratione ex eodem Urbani Papæ superius recitato Diplomate tanta vobis sumpsistis, ut ex eo legatos a latere itemque natos atque demum monarchas effectos reges omnes Siciliae dicere præsumperitis? Esto, concesserit ista Rogerio ejusque filiis Urbanus papa: numquid hæredibus cunctis, et successoribus omnibus esse concessa affirmare poteritis? nullo modo. Recitentur eadem verba Pontificis; sic se habent:

33. « Quod omni vitæ tuæ tempore, vel filii tui Simonis, vel alterius, qui legitimus tui hæres extiterit, nullum in terra potestatis vestræ etc. » En

quem cautissime papa voluit expressisse personas, quibus illud concederet privilegium. Expressit enim Rogerium patrem, Simonem filium, et alterum filium, si existerit ipse hæres. Duo namque Rogerio comiti erant filii, Simon major natus, atque Rogerius, quem voluit expressisse voce illa, *alterius*, quod quidem nomen non de pluribus, sed de uno ex duobus duntaxat dici, sciunt omnes qui latinas litteras didicerunt. Sic igitur tantum, ut filios illos duos Rogerii privilegium non excederet. Quomodo ergo deducitis ad hæres omnes? quomodo adhuc insuper, cum hæredes Rogerii omnino defecerint, trahitis etiam ad successores omnes? Ubi de hæredibus omnibus, et successoribus aliqua inest mentio in Diplomate? quod quidem, cum id præstari voluerint Romani Pontifices expresse conscribi, exacte notari, dilucide poni, minime prætermisisse noscuntur.

34. At quid amplius? etiam si expresse Urbanus Pontifex ea concessisset omnibus hæredibus atque etiam successoribus omnibus Rogerii comitis: adhuc tamen ea ipsa nullo modo deduci potuisset ad Carolum Quintum, hac apertissima ratione firmamus, quod cum plurima extent Pontificum Romanorum Diplomata, quibus sunt collate investiture de regno Siciliæ diversis regibus, atque in eis disertis verbis revocantur cuncta sigillatim quæ adversus Ecclesiasticam immunitatem quoquo modo sint præsumpta: plane nihil est, ut adversus tot Pontificum Documenta, de quibus sigillatim inferius fiet mentio, istiusmodi Diploma aliquid sibi vindicare possit auctoritatis.

35. At nec quod prætenditur, nullo pacto concesserim, per Urbani Diploma creatum legatum a latere fuisse Rogerium ipsum, atque filios ejus. Hæc ut plenius cognoscantur, ejusdem hic papæ Diplomatis verba sunt repetenda, quæ sic habent: « Nullum in terra potestatis vestræ, præter voluntatem aut consilium vestrum, legatum Romanæ Ecclesiæ statuimus. Quinimo, qui per legatum acturi sumus, per vestram industriam legati vice cohiberi volumus ». Quis ista perlegens, non percipiat ex verbis ejus, non legationem a latere concessam esse Rogerio, sed cum vicem legati implere voluisse, et in his tantum cohibendis, quæ per legatum Apostolicæ Sedis cohibenda forent? Aliis namque formulis, iisdemque plenioribus atque adeo specificis, consuevisse concedi ab ipsis Romanis Pontificibus legationes a latere, nemo ignorat, qui ejusmodi lectionibus assuevit.

36. Præterea non perpendunt quanta ab ipsis irrogetur injuria Urbano Pontifici, cum velint ea concessisse ipsum Urbanum Rogerio, quæ per reges hujus temporis male adversus Ecclesiasticam juram, universa Ecclesia Catholica scandalum patiente, exercentur: cum in vindicandis Ecclesiæ juribus ab usurpatione laicorum, idem sanctissimus Pontifex nulli reperitur fuisse secundus, sed inter primos ejusmodi zelo exestuantibus claros Romanos Pontifices numerandus, quique iis ipsis temporibus

vixerit, quibus jugiter certandum erat pro his ipsis adversus invasores Romanæ Ecclesiæ juriū. In quibus laboribus obundis, quæ ejusdem Urbani Pontificis partes fuerint, docent quæ de eo sunt enarrata per annos singulos Pontificatus ejus, quorum causa Concilia adeo frequentia indicenda, peregrinationes assidue ab ipso obundare fuere, scribique ad diversos Epistolas frequenter oportuit; ne vel latam unguem præjudicium inferri sineret Ecclesiasticæ immunitati.

37. Potuitne tanta concessisse Rogerio, quorum partem aliquam tantum si imperatori Henrico ferocissimo Ecclesiæ persecutori cecisset, pacem proculdubio universalis Ecclesiæ redemisset, et tot tantisque cladibus afflictam diutius Ecclesiam liberasset? Si quid igitur vulneris fuisset infligendum Ecclesiæ, plane pacis universalis causa comparanda et pseudo-pontificis propulsandi, tolerandum utique fuisset illud: sed prius cuncta pati, quam quid minimum Ecclesiæ juriū immitti decrevit animo Urbanus papa, quod et dum vixit, effectu ipso egregie præstitit, nihil magis sollicitè curans tota ipsa sui Pontificatus functione, nihil studiosius tractans, vel cupidius satagens, quam ne quid minimum Ecclesiæ juriū sibi sæculares principes vindicarent. Nam audi quæ de Urbano ipso ejusdem temporis scriptor dicat Domnizo:

Nunquam decrevit libertas denique Sedis
Romane per eum.

Hæc ipse in Vita Mathildis, citata sæpe superius. Imo audi Urbanum ipsum ita rescribentem ad Rudolphum comitem¹: « Nosse te volumus, quia nulli secularium domino potestatem in clericis habere licet: sed omnes clerici episcopo soli esse debent subjecti. Quicumque vero aliter præsumperit, canonice proculdubio sententiæ subiacebit ». Sed et eodem argumento scriptam ab eo ad Salernitanum clerum et populum brevem Epistolam legito. Sic se habet:

38. « Urbanus episcopus, servus servorum Dei, dilectis filiis clero et populo Salernitano salutem et Apostolicam benedictionem.

« Lanzzonem presbyterum, qui Ecclesiam sanctæ Mariæ per manum laicam invasit, expulso eo qui legitime possidebat, noveritis sententia nostra officio et beneficio interdictum. Omnes præterea, qui Ecclesias, vel Ecclesiastica beneficia, aut capellanias, sine episcopi sui consensu per manum laicam obtulerint; donec satisfaciant suo episcopo, secundum sanctorum canonum constituta, ab officio et beneficio interdicimus ». Hæc ex monumentis Salernitanæ Ecclesiæ, quæ in Vaticana bibliotheca asservantur. Quæ quod certo careant anno quo data sunt, hic volumus descripsisse, cum cæteris ferme annis singulis Pontificatus ejus res geste ab ipso hæc de eo latins prædicent.

¹ Ivo p. 6. c. 408.

39. An potuit, quæ tanto labore ædificavit tot annis, una hora in congressu illo Salernitano cum Rogerio Urbanus Pontifex destruxisse: ut secundum illud Apostoli¹: « Si quæ destruxi, iterum hæc ædifico, prævaricatorum me constituo ». Ipse turpiter prævaricationis nomine fuerit arguendus, si tanta Diplomate illo, quanta isti proferunt renovata per recentes reges Siciliæ, Rogerio ac posteris concessisset? Absit, absit, longe longius, inquam, proculque absit, ut monarchiæ illius dicatur Urbanus erector, ædicatorque turris Babel in contumeliam Dei, et opprobrium Apostolicæ Sedis; cujus plane non ædificatorem, sed destructorem se dum vixit, semper Urbanus exhibuit, qui et nunc de cælo in ipsam fidelibus clamat illud Davidicum²: « Exinanite, exinanite usque ad fundamentum in ea ». Utpote quæ ipsis cum erigentibus atque tuentibus æternum exitum pariat, in cuius tantum ruina spes sit eorum ad salutem erectionis. Sed et in Concilio universali Romæ sub ejus successore Paschali Pontifice celebrato, ab universa Synodo acclamatum est eidem Urbano Pontifici, uti jurium Ecclesiæ accerrimo vindici, defensori atque propagatori; idque sæpius facitatum, prout suo loco, sequenti tomo dicitur; quod profecto fieri minime potuisset, si erectorem monarchiæ Siculiæ posse dici modo aliquo contigisset.

40. Sed quid detineo ultra lectorem, et non cito detego adversantium malas artes, qui non ut se habuit, ipsum verum, germanum, legitimum, in omnibus integrum ediderunt Diploma; sed mutilatum, decurtatum, atque corruptum in omnibus quibus jura Romanæ Ecclesiæ salva essent, exhibuerunt ipsum? Agimus immensas Deo gratias, quia cæcitate perculiens illos, qui manu sacrilega sacrum Diploma Pontificis in pluribus mutilarunt, non sivit eos videre illa, quibus istiusmodi per eos patratum scelus aperta luce, certa probatione, atque evidentissimo argumento probari posset. Si enim vidissent atque considerassent, quis dubitet idipsum, ab eis eadem falce adhibita falsitatis, fuisse peractum? Quemnam putas ad hæc probanda adhibitori sinus testem? illum ipsum ex adversantium domo petitum, ab ipsis jure laudatum receptum, probatum, cui nec sit quod objici possit, quippe qui hoc eodem tempore vixit, et scripsit historiam Siculam, eodem ipso (ut profiteatur) exposcente Rogerio comite de quo agitur. Nominatus est iste Gaufridus, professione monachus Benedictinus, cujus opus antiquitate ipsa plane venerandum, delituit pæne sepultum inter vetera monumenta regum Aragonum ad nostram usque ætatem; cum illud ipsum Hieronymus Surita, vir celebris, de rerum antiquitate bene merens in lucem protulit, ediditque Cæsarauguste typis Dominici a Portonariis, anno salutis millesimo quingentesimo septuagesimo octavo, idemque munus ad huc et laudatum regio Privilegio (ne quid ad

absolutissimam fidem ejus deesse posset) dedicatum vero Antonio Augustino tunc archiepiscopo Tarraconensi, eruditione legum sacrarum suæ ætatis in Hispania facile principi.

41. Ille ipse auctor a nobis superius citatus, eadem occasione congressus Urbani papæ cum Rogerio Siciliæ comite, acturus de ejusmodi privilegii concessione, facta ab Urbano Pontifice ipsi Rogerio, ista prælendi ejusmodi præcessisse sic narrat occasionem¹: « Sed quia ipse Apostolicus jamdudum Robertum episcopum Trainensem, comite inconsulto, legatum in Sicilia ad exequendum jus sanctæ Romanæ Ecclesiæ posuerat, perpendens hoc comitem grave ferre, et nullo modo ut stabile permaneat assentire: cognoscens etiam, ipsum comitem in omnibus negotiis Ecclesiasticis exequendis zelo divini ardoris exferrescere: cassato quod de episcopo Trainensi fecerat, legationem beati Petri super comitem per totam Siciliam, vel habendam hæreditatiter ponit, ea discretionem, ut dum ipse comes advixerit, vel aliquis hæredum suorum zeli paterni Ecclesiastici executor superstes fuerit, legatus alius a Romana Sede, ipsis invitis, nullus superponatur ». Hæc ipse. Quæ plane integra ut vidisti, in ipso recitato superius Diplomate continentur.

42. Sed quæ malis artibus et dolo malo de eo sint dempta, quæ in eo contineri idem ipse testatur, jam demonstramus, atque nos hic, honoris causa reddite postliminio diu exulis veritatis, grandiusculis litteris describamus, sic se habent:

SED SI QUA ROMANÆ ECCLESIE JURIS EXEQUENDA FUERINT, CHARTULIS² A ROMANA SEDE IN SICILIAM VEL CALABRIAM DIRECTIS, PER IPSOS CONSIGLIO EPISCOPORUM EARUNDUM PROVINCIARUM AUTHENTICè DEFINIANTUR. Ista sunt quæ manus audax, ad sacrilegium prompta, abstulit a recitato papæ Diplomate. Quæ tanti noscuntur esse momenti, ut si ista restituantur in ipsum, nullum penitus videas irrogatum damnum per eam concessionem privilegii Rogerio factam juribus Apostolicæ Sedis, cum sit in his verbis illi integrum reservatum, ut cum opus esse judicaverit papa, ministros suos in Siciliam mittat causas urgentes cognoscere; qui, et si ita placuerit ipsis, episcopos ad Synodum congregent, quorum consilio ipsorum sententia expectetur. Talia igitur tantaque e Diplomate subduxisse, quanti reatus fuerit, judicent omnes.

43. Porro istud ipsum, ut pro tuendis juribus Romanæ Sedis, post hujusmodi privilegium ab Urbano Rogerio impertitum, usu frequentaverint Romani Pontifices mittere in Siciliam ministros cum opus fuerit, certum esse, certo exemplo monstratur de Urbani ipsius successore Paschali papa, qui legitur misisse apocrisarios in Siciliam ad exigenda Apostolicæ Sedis jura, dum ab archiepiscopo Panormitano præstari jubetur juramentum

¹ Gal. vi. — ² l'ol. cxxx.

¹ Gau. l. iv. c. 29. — ² Chartulariis necessario legendum, cum paulo post dicit, per ipsos.

fidelitatis sanctæ Apostolicæ Sedi. Extant de his ejusdem Paschalis Pontificis litteræ, quas Gregorius Novus intexuit inter Decretales a se collectas Epistolas¹. Habes ex his igitur, et quod ex Diplomate demptum fuerat restitutum, et quod fuit in eo declaratum ejusdem Urbani papæ successeris exemplo, ut nihil sit quod de his desiderari ulterius possit.

44. At non hic finis latrocinii expilati Diplomatis. Aperiantur cætera, ut restituatur in integrum tantopere passa damnum veritas ipsa. Subjicit idem Gaufredus auctor de his dicere, quæ post hæc eodem ipso Diplomate continerentur, sic pergens : « Quod si episcopi ad Concilium invitati fuerint, quot et quos ipsi comili vel suis futuris hæredibus visum fuerit, illuc dirigant ». Hæc integra sunt conservata in textu, sed quæ fuit addita limitatio ab Urbano, penitus sublata nescitur, quæ mox ab eodem Gaufredo fide sincera ita subjicitur : NISI FORTE DE ALIQUO IPSORUM IN CONCILIO AGENDUM SIT IN SICILIA VEL CALABRIA IN (CI) PRÆSENTIA SUA AUTHENTICE DEFINIRI NEQUIVERIT. En quanta isla, quæ dolosus artifex in gratiam principum abstulit, similis illi de quo in Psalmo² : « Sicut novacula acuta fecisti dolum », abradens a Diplomate, quæ sibi ad concinnandam quam moliretur fraudem viderentur esse contraria.

45. Qui enim visus est indulsisse Urbanus papa Rogerio, ut vocatos ad Concilium episcopos, quos vellet retineret vel mitteret, cum superaddidit : « Nisi forte de aliquo ipsorum in Concilio agendum sit » ; plane significavit, quod ipsi esset liberum cum vellet, Siculos et Calabros episcopos ad dicendam causam vocare ad Apostolicam Sedem, « cum videlicet (ut subdit) ipsorum causa in Sicilia vel Calabria authentice in præsentia sua definiri nequiverit ». Nam quid est quod ait : *Authentice definiri non posse* ? nisi canonice secundum leges Ecclesiasticas terminari, quæ prohibent principes cognoscere et judicare causas episcoporum, quibus quidem casibus causæ episcoporum, quæ agitari authentice, ut ait, coram principe sæculari non possunt, ad Sedem Apostolicam sint deferendæ. En vides, lector, quanta subtraxerit, et quanti momenti veterat (quisquis fuit ille) quæ si in locum suum restituantur, fient etiam integra una cum Diplomate Sedis Apostolicæ jura, et Urbani papæ laudanda prudentia erit, quod ita indulserit roganti comiti, ut tamen voluerit Romanæ Ecclesiæ juri in omnibus esse consultum.

46. Quis ista considerans non exclamet : O fraudem solemnem, Cornelia rege plectendam ! quam non timuit, in quam peccavit, qui ista adeo enormia ad conciliandam sibi principum gratiam perpetravit, cum descriptum mox ab eodem auctore ac additum ipsum integrum Urbani papæ Diploma, ut proficitur, cum isdem haud dubium per ipsum assertis sententiis, turpiter mutilavit,

dum in ipso Diplomate apud Gaufredum edilo desiderentur eadem ipsæ sententiæ, paulo ante ab eodem auctore qui vidit et descripsit, integre, ut vidimus, recitate. Quando autem admissum portentosum adeo scelus, et a quo fuerit perpetratum adeo pudendum facinus, haud adeo exploratum habemus ut possimus asserere : verum illos minime vacare culpa libere dicimus, qui ex eodem Gaufredo illud ipsum Diploma describentes alque edentes, sententias illas ab eodem superius recitatas describere penitus prætermiserint, quarum vel saltem meminisse debuerant. Siccine bona fide res acta, ut ad monarchiam construendam oportuerit prius ita destruere Urbani papæ Diploma, et ita ipsum reddere mutilatum ? cum in promptu esset resarcire jacturam, et sublata fragmenta conjungere, ab eodem Gaufredo suppeditata, deque his monere lectorem, atque ita bene mereri de prodita veritate ; quo nomine ab unoquoque legentium immortales gratiæ fuissent agendæ. Agimus vero nos iterum Deo gratias, qui sic, cum ipse sit Veritas, patrocinium suscipit veritatis, ut demolet fraudulentos, nec permittat facere cuncta quæ velint, cum voluit Urbani papæ Diploma illibatum et integrum in Gaufredo mansisse, dum ab eo ipsius describitur argumentum, atque sententiæ recitantur : quod postea, ut vidisti, eo modo manus fraudulenta corrupit, et manus artifex mutilavit.

47. Quod si integrum ipsum reddatur, prout ab ipso Pontifice nescitur esse datum, restitutus in ipsum clausulis illis atque sententiis per Gaufredum verbis totidem recitatis : tantum abest ut a nobis rejiciatur, ut exoscuemur illud, utpote sanctissimi Pontificis monumentum, quo magna caute la ita principi voluerit satisfactum, ut tamen Apostolicæ Sedis immunitati nihil passus sit esse detractum. Tantum, inquam, abest, ut restitutum ipsum integrum, esse Urbani gementum negare velimus ; quin potius parati simus ostendere aliud id genus Privilegium ab alio Romano Pontifice, eodemque Urbano non impare, alii Christiano principi esse concessum ; sed nec per ipsum Apostolicæ Sedis jura esse sublata, ut aliqua super ipsum erecta fuerit monarchia, sicut super ipsum Urbani datum Rogerio factum apparet. Qui enim post Urbanum Secundum successit tertio loco, Callistus papa Secundus, quique in vindicandis et extorquendis de manu imperatoris abreptis Ecclesiasticis juriis, summam præ omnibus suis antecessoribus sibi gloriam comparavit : post celebratum ab ipso Rhemense generale Concilium, congressu habito cum Henrico Anglorum rege, quid petierit rex ab eo, et quid concesserit ipsi Callistus, sic in Annalibus Anglorum Rogerius narrat, quod et nos inferius suo loco ponemus : « Rex a papa impetravit, ut omnes consuetudines, quas pater suus in Anglia et Northmannia habuerat, sibi concederet, et maxime, ut neminem aliquando legati officio in Anglia fungi permitteret, si non ipse aliqua præcipua querela exigente, quæ ab episcopis regni sui terminari

¹ Cap. Significasti, extr. de elect. — ² Psal. LI.

non posset, hoc fieri a papa postularet». Hæc ipse. Quibus plane nihil derogatum scitur Apostolicæ Sedis juribus, quia majoribus exigentibus causis, ab Ecclesia Romana legationes in Angliam fuerint frequentatæ, eademque decenti cultu a regibus Anglorum exceptæ, prout declararunt eventa. At sicut his non contradicimus, ita nec rejicimus Urbani Diploma, si reddatur integrum, et non, ut est demonstratum, tot sententiis mutilatum.

48. Sed nec est quod verba Gaufredi, quæ in Diplomate scripta fuisse docet, aliquis in alium sensum convertere jure possit, ut nullum eidem concessioni afferat præjudicium: nam vel ex eo tantum quod e textu ablata noscuntur, ipsum delictum arguit malam fidem, et contrariam ipsi veritatem magis insinuat. Sed et ipsa narrata nuper Paschalis papæ legatio in Siciliam missa, quæ sunt dicta declarat eo modo esse intelligenda; nempe ut cum in Sicilia de juribus Apostolicæ Sedis agitur conservandis, tunc esse liberum Romano Pontifici chartularios, quos ipse Paschalis nominat apocriarios, illuc pro arbitrio mittere. Quenam verborum interpretatio poterit esse verior, certiorque probari ea, quam ipso usu experientia comprobavit? nimirum dum mox post Urbanum a successore Paschali vidimus facilitatum, quod faciendum ejus Diplomate cautum erat.

49. Jam igitur patefacta fraude, et ostenso ipso Diplomate vitio, adulterato, depravato atque corrupto; et quod ita ut est edilum corruat penitus et non subsistat: plane necesse est, ut ingens ista moles erectæ desuper monarchiæ magno fragore ruat, si res jure agitur, et non violentia. Quod existimare nefas de rege Catholico maxime pio, Christianæ religionis cultore studiosissimo, fidei orthodoxæ custode vigilantissimo atque potentissimo defendere; quem et libentissime scriptiois hujus nostræ arbitrium constituimus, probe scientes, a justissimo principe non nisi justa fore præstanda.

50. Quod vero præter eandem Urbani assertam Epistolam, adhuc alia quædam eademque levissima pro monarchiæ Siciliæ firmitate in medium afferuntur: hic eadem sunt convellenda. Dicunt enim, reperiri nonnulla Siciliæ regum Diplomata, in quibus ab iisdem regibus legatur anathematis sententia promulgata, adversus eos qui ea quæ ipsi jussissent, non impleverint sed evertent. Siquidem in Cancellaria regni Siciliæ de omnibus regiis patronatibus liber collectus est, qui continet donationes ab iisdem regibus in diversas Ecclesias atque monasteria collatas: ad quarum finem hæc vel his similes formulæ legantur appositæ, quæ excommunicationem videantur inferre, videlicet: Si quis hanc nostram donationem infregerit, anathemate condemnatur, vel auctoritate Apostolica anathemate damnetur; itemque: Cum Juda traditor partem habeat, et alia his similia, quæ velint isti ab eis apposita auctoritate legationis Apostolicæ Sedis, qua reges Siciliæ (ut nugantur) Urbani papæ funderentur auctoritate.

51. Potuissent fortasse isti ejusmodi exemplis suadere simplicibus quod conantur: verum qui antiquarum formularum ex inspectione ejusmodi a diversis solitarum fieri donationum notitiam habet, ridebit ista; cum vix aliquid sit reperiri instrumentum ejusmodi donationum, quæ sive a principibus, sive a privatis utriusque sexus fieri solerent hominibus, in quibus eadem formulæ non legantur, et interdum atrociore: quæ quidem non sententiam continent (ut putant) excommunicationis Ecclesiasticæ, quæ ab episcopis infligi solet in subditos, sed imprecationes potius ad terrendum eos qui aliquid contra præscripta moliri tentarent. Sunt de his superius diversis in locis in recitatis ejusmodi Diplomatum exempla patentia: quinetiam in eodem ab illis scripto Codice, aliæ diversorum privatorum, quæ ibi sunt scriptæ, locis piis factæ donationes, continent eadem omnino imprecationes: ut liberum fuisse quibuscunque videatur, ejusmodi apponere formulas imprecatorias anathematis, adversus eos qui moliri aliquid adversus ea quæ illi statuerent, conarentur. Adde his insuper, non solum in ejusmodi scribi solitis Diplomatum asserti ista, sed etiam a nonnullis consuecta fuisse apponi sepulchris, ut violatores absterrent. Quorum exempla habes superius recitata, ut inter alia sepulturæ Theodini subdiaconi:

SI QUIS PRÆSUMPERIT HUNC TUMULUM VIOLARE, ERIT ANATHEMATIS VINCULIS INNOTATUS. Et in Ecclesia sancti Gregorii Romæ, ad Clivum Scauri, erat in abside, fracto tamen lapide, cujusdam Anastasii lectoris Epitaphium, in cuius fine habetur:

52. SI QUIS HINC ABSTULERIT SEPULCRUM, SIT EXCOMMUNICATUS ET DAMNATUS IN INFERNUM, ET HABEAT PARTEM CUM CAÏN ET JUDA TRADITORE. Et in principio tomi hujus in Epitaphio sepulchri cujusdam Joannis in fine: NEMO SUUM, NEC ALIENUM CORPUS SUPER ME MITTAT. QUOD SI HOC PRÆSUMPERIT, SIT MALEDICTUS, ET IN PERPETUUM ANATHEMATE CONSTRUCTUS. En vides an ista ex functione legationis Apostolicæ ponerentur a regibus ut anathemata, vel potius imprecationes ad terrorem ab unoquoque pro arbitrio in qua vellent prohibitionem usurpari solerent.

53. Sed inspicimus cætera, quæ ad roborandam jam sua sponte collabentem monarchiam afferunt. Abbas Panormitani celebris canonici Juris interpretis sententiam descriptam proferunt in suo ipsorum Monarchiæ libro, quæ est: « Liceat regi ex longa consuetudine, appellationes eorum qui ad Sedem Apostolicam provocant, impedire ». Quam tamen postea dicitur declarasse, ut intelligi debeat, quando non esset tutus accessus ad Apostolicam Sedem, vel tempore schismatis, tunc regi licere de appellationibus ad Apostolicam Sedem cognoscere: sicque respondisse abbatem tempore Alphonsi regis, sub Martino papa Quinto, cui rex valde esset infensus. Cujus declarationis exemplum non scribitur in dicto Monarchiæ libro, sed repe-

ritur in abbatia dicta Novæ-Lucis in eodem regno posita, et in aliquibus aliis monasteriis.

54. At tanti æstimantur responsa prudentis, ut illa in legem accipiantur, qualiacunque sint? eo præsertim tempore, cum idem abbas Panormitanus colligeret cum schismaticis adversus Catholicæ Sedis antistitem? Quis unquam adversus Ecclesiam testimonium accepit hostis Ecclesiæ? Si ista sapuit, imo si sic desipuit abbas, quomodo in commentariis, quos elaboravit et edidit, ista non defendit atque probavit?

55. Addunt præterea Alphonsi regis ejusdem exempla, quod ejusmodi ad papam impediret appellationes. At quid? Num erant accipienda pro lege, quæ rex contra id quod jurasset perjurus, percitus furore facere aliquando voluisset? dum et petentibus et rogantibus Siculis, ne appellationes ad Apostolicam Sedem ejusmodi (quod rex facere cœperat) per magistratus laicos cognoscerentur, sed per Ecclesiasticos prelatos potius: rex eorum petitionibus annuit, datis anno Domini millesimo quadringentesimo quadragésimo sexto de hoc litteris. Cujus petitionis extat exemplum, et legitur ibidem Rescriptum regis perjury. At quenam fortiora contra Alphonsum regem afferri possunt, quam Diplomata ejusdem regis, cum investituram accepit ab Eugenio papa Quarto, data anno superioris a dicto Rescripto, nempe millesimo quadringentesimo quadragésimo quinto? Extat in Vaticana bibliotheca investitura ei ab Eugenio papa Quarto factæ exemplar in libro Privilegiorum Romanæ Ecclesiæ, et alio Codice qui apud nos existit, quod sic incipit: « Cum sanctissimus dominus noster Eugenius, divina providentia papa Quartus, anno a Nativitate Domini nostri Jesu Christi millesimo quadringentesimo quadragésimo tertio, idibus Julii, Pontificatus sui anno terdecimo, etc. » Ubi inferius ista habet de appellationibus libere dimitteendis ad Apostolicam Sedem, præter alia multa de immunitate Ecclesiastica libera conservanda:

56. « Omnesque etiam causæ ad forum Ecclesiasticum in regno et terra prædictis pertinentes, libere et absque ullo impedimento agitantur, tractantur et ventilantur coram Ordinariis et aliis Ecclesiasticis iudicibus, et terminabuntur per eos. Et si ad Sedem Apostolicam super hujusmodi causis appellari contigerit: tam appellantes quam appellati ad eandem venire Sedem pro appellationum prosecutionibus libere et absque inhibitione aliqua permittuntur ». Hæc ibi de appellationibus ad Sedem Apostolicam libere deferendis, per eundem regem solemniter juramento firmatis. Et quidem in Investitura facta de ipsa Sicilia et terra citra Pharium, ratificata ab eodem Alphonso cujus ratificationis hoc est exordium:

57. « Ego Alphonsus, Dei gratia rex Siciliæ, plenum homagium, ligum et vassallagium faciens vobis domini meo Eugenio papa Quarto et Ecclesiæ Romanæ, pro regno Siciliæ et tota terra ipsius, quæ est citra Pharium usque ad confinia etc. » In

fine vero Bullæ Auræ ejusdem Alphonsi regis, hæc de tempore dati Diplomatis atque loco: « Datum Neapoli apud majorem Ecclesiam, per manus nostri prædicti regis Alphonsi, anno a Nativitate Domini millesimo quadringentesimo quadragésimo quinto, die vero secunda mensis Junii, octavæ Indictionis, regnorum nostrorum trigésimo, hujus vero Siciliæ et terræ citra Pharium, anno regni undecimo ». Hæc ibi. Quid igitur his adversans citatur Rescriptum Alphonsi, datum anno sequenti, contentum capitulo trecentesimo nonagesimo septimo, p. 128? Nam ore suo perjurus esse convincitur atque prævaricator, ut qui ea ipsa quæ juramento promiserat, rata habuerat firmaveratque, pejerando destruxerit atque prævaricando impie dissiparit. En quale instituendæ principium monarchiæ. Quod quidem nomen quo significatur, sub uno eodemque dominio regum Siciliæ, junctam simul spirituales ac sæculares auctoritatem et potestatem, ut insolitum nec usurpatum fuisse a tyrannis, manifestis Romanæ Ecclesiæ perduellibus, ut Frederico et ejus filiis, nec ab invasoribus ejusdem regni, ut Petro vel aliis, satis constat; cum tamen res ipsa sæpius per tyrannidem atque invasionem fuerit perterrita, ut ex his quæ sumus dicturi patebit.

58. Si quis enim antiquiora abolenda vestigia ejusmodi monarchatus curiosius indaganda putaverit, plane inveniet, non Urbani, vel alterius alienijus Catholici antistitis inventum esse, sed (si conjecturæ aliquid deferendum) primum auctorem fuisse schismaticum papam, non Christi, sed antichristi vicarium, Petrum, Leonis non Columbæ filium, eundemque contra Innocentium Secundum, legitimum Ecclesiæ Romanæ Pontificem, ex adverso sedentem, dictum pulchro nomine (ut sic deciperet populum) Anacletum. Iste enim, ubi Pontificatum arripuit violenter, ut contra legitimum Pontificem ejusque fautores prævalere aliquo modo posset, quo minus justa causa polleret, eo amplius potentia sæculari sese studuit roborare communiareque, adversus Romanos præsertim quos erga Innocentium seiret esse proclives: magnoque sibi fore existimans adjumento, si Northmannos Northmannorumque principem sibi conjungeret, nihil prætermisit officii vel obsequii, quibus Rogerium, Rogerii superioris filium, qui tunc non Sicilia tantum, sed dominaretur Apuliæ atque Calabriæ, conciliaret sibi amicum et constitueret defensorem.

59. Quamobrem ubi Sedem invasit, nihil antiquius habuit, quam ut ad demerendum hominem eidem quæcumque præstaret; sicque eum ex comite regem constituit; cui et inter alia illud quoque concessit, ut sicut laici, ita et clerici, abbatibus, episcopis et archiepiscopis, qui in ejus ditionis provinciis essent, dominaretur, ac si esset re ipsa, si non nomine, monarcha unus Christianorum, utriusque ordinis, laicalis et clericalis. Id quidem ejusdem temporis auctor, quinque ea videbat quæ scripsit, testatur Petrus diaconus Cassinensis: qui

tamen intentus rebus ejusdem monasterii conscribendis, cætera obiter tantum attingit, non tamen incognita prætermisit: deque his agens hæc breviter habet¹: « Defuncto Honorio, electi sunt, Gregorius diaconus cardinalis sancti Angeli in papam Innocentium, et Petrus presbyter cardinalis sancti Callisti in Anacletum. Anacletus autem aliquantum tempus in Urbe permanens cum episcopis et cardinalibus qui suæ parti favebant, ad civitatem Pisanam perrexit, Conradum Sabinensem episcopum vicarium in Urbe relinquens.

60. « Petrus autem cardinalis Rogerio duci Apuliæ coronam tribuens, et per Privilegium Capuanum principatum, et ducatum Neapolitanum cum Apulia et Calabria et Sicilia illi confirmans, regemque constituens, ad se altraxit, præcipiens, ut episcopi et abbates qui in suæ ditionis solo manebant, ei obtemperarent ». Hæc tantum de his Petrus, ad res Cassinates styllum revocans. Qui quidem cum ista tantum ex omnibus quæ in Diplomate essent, expresserit: aliquid specialius indicasse voluit per ea verba, præter communem ex Apostolicis jussis debitam regibus observantiam; quod tacuit auctor æque schismaticus, nullam eundem laudandi Rogerium prætermittens occasionem, quem tamen S. Bernardus, cum opus fuit ejus meminisse, absque regio titulo nominat tantum ducem Apuliæ², tyrannum Siculum³, atque usurpatorem coronæ regie. Sed et quænam fuerint ista singula, quibus Anacletus subjecit Rogerio universum ordinem Ecclesiasticum, plane intelliges, cum ea revocata a Romanæ Ecclesiæ Pontificibus, recitanda inferius audies. Mercimonio igitur possidendæ Sedis quam invaserat Anacletus, ingressus in ovile ovium nonnisi ut fur qui maculat et perdat, quolibet cuique potenti concedere consuevit, si promitteret quod sibi in schismate inhaereret. Quod sancti Bernardi testantur Epistolæ⁴, qui etiam de Rogerii nundinaria monarchia hæc ad Guillelmum comitem Pictaviensem, Aquitaniam ducem nomine ducisse Burgundiam⁵: « Habet tamen (Anacletus scilicet), ducem Apuliæ, sed solum ex principibus, ipsumque usurpatæ coronæ mercede ridicula comparatum ».

61. At ista adeo verisimilia ejusdem temporis scriptoribus consignata vel non novit, vel nosse dissimulavit ipse Fazellus, ne monarchiæ auctorem (ut erat) pseudo-papam assereret; qui ut ista sibi adeo adversa vitaret, inextricabiles plane mendaciorum quæsiuit anfractus. Nam non solum ista de collata Rogerio ab Anacleto in Ecclesiasticis potestate penitus tacuit; sed etiam ad ista vitanda, nequaquam una cum Innocentii creatione simul ortum schisma Petri Leonis ponit (quod omnes absque controversia sive veteres sive recentiores affirmant), ipsumque schismaticum papam Anacletum obortum, sed longe postea, nec antea, nisi

ubi est auditus ipse Innocentius ab eodem Rogerio detineri captivus. Hos sinuosos oportuit lubricum anguem excogitasse reflexus, ne si recta via sequeretur, in antipapam ipsum offenderet, atque quod nollet cogeretur asserere, Anacletum ipsi auctorem fuisse regni monarchici ex laicis clericisque compacti. Vides, lector, quam male meritis invenitur de historica veritate Fazellus, nihil magis conatus, quam monarchiæ vanæ favendo, Ecclesiasticam libertatem alla scrobe relinquere sepultam, dum in ejus favorem non solum quod non esset omnino, Urbanum papam vitiatum Diplomate ejus demonstravit auctorem, sed qui revera dici potuisset ejus inventor, antipapa ille, antichristi successor, minister satanæ, caput schismatis Anacletus, ne proderetur, ipse adeo prodidit veritatem? Ut exhorrescere quisque Catholicus debeat sub hujus capitis membrum annumerari.

62. At quid post hæc actum? nisi quod male ortum, malum accepit occasum, ex adverso sententia illa Christi vigente, et in perpetuum feriente¹: « Omnis plantatio quam non plantavit Pater meus, eradicabitur ». Et insuper quod præconio divinæ Sapientiæ in Ecclesia jugiter innotatum, fidelium omnium aures pulsant²: « Adulterinæ plantationes sive spuria vitulamina non dabunt radices altas, nec stabile firmamentum collocabunt. Et si in ramis in tempore germinaverint, infirmiter posita a vento commovebuntur, et a nimietate ventorum eradicabuntur: confringentur enim rami inconsummati, et fructus illorum inutiles et acerbi ad manducandum, et ad nihilum apti ». Ita plane accidit, ut per falsum agricolam male plantata arbor infelix, nequaquam altas radices emiserit, licet patrocinio regum aliquantisper frondescere visa sit. Etenim etsi peculiari regibus sit, ut per fas et nefas semel parta amittere nolint, sed tueri velint; tamen non eo usque contentio est progressa, ut non cesserint jussionibus Romanorum Pontificum, sed sicut Rogerius qui accepit, ita Willelmus filius ejus successor, licet ad tempus restiterit Hadriano Quarto Romano Pontifici, tamen eadem sunt in omnibus obsecuti. Testes omnium istorum adducimus publica monimenta, hæc ipsa testantia, Diplomata, inquam, Innocentii papæ Tertii, sæculi sequentis line conscripta, quibus cuncta quæ facta sunt in illam usque diem, quam fidelissime elucidantur. Atque in primis salis aperte fide integra intelligitur, quid in prima investitura facta Willelmo Rogerii filio post ejus obitum, ab Hadriano PP. fuerit concessum, in destructionem vanæ monarchiæ, inani studio per antipapam Anacletum erectæ. Nam etsi illa ipsa facta ab Hadriano Willelmo investitura non reperitur, sed tantum quæ petiit ab eo præstari Willelmus; tamen quod extet investitura Innocentii papæ ad instar illius facta, idem plane est, ac si ipsa Hadriani investitura integra haberetur.

¹ Petr. Diacon. Chron. Cass. l. iv. c. 99. — ² Bern. Ep. cxxvii, cxxix. — ³ Ibid. Ep. cxxx. cxxxix. cxi. — ⁴ Ibid. Ep. cxlvi. — ⁵ Ibid. Ep. cxlvi.

¹ Matth. xv. — ² Sap. iv.

63. Hæc ut, lector, accipias, scire debes Rogerium, qui talem monarchiam accepit ab Anacleto, anno Redemptoris millesimo centesimo trigésimo, pervenisse ætate usque ad annum millesimum centesimum quinquagesimum quartum, ipsoque mortuo, filium ipsius Willelmum successisse in paternum regnum, atque investituram quæsisse ab ipso Hadriano ejus nominis Quarto, Romano Pontifice : cujus causa haud fuit leviter altercatum, expellente illo litteris suis ab Hadriano investituram conditionibus valde iniquis, ac fortasse iisdem, quibus Rogerius pater regnum accepisset de Anacleto. At licet legati ab Hadriano ad eum pacis causa missi, visi sint ex parte aliqua his quæ petierat concessisse, Hadrianus tamen omnino resiliit, nec investituram concedere voluit cum infamibus conditionibus illis, quibus monarchia illa male composita per schismaticum papam subsisteret, sed aliis plane contrariis. Qualis autem ista fuerit, mox audieturus eris. Siquidem post tumultuarios reges absque investitura regnantes, anno Redemptoris millesimo centesimo nonagesimo nono, cum Constantia imperatrix atque regina Siciliæ, defuncto viro Henrico imperatore, sibi filioque parvulo Friderico investituram quæreret ab Innocentio ejus nominis Tertio nuper creato Pontifice, concessit ille ipsis eam ad instar illius quam Willelmo regi concesserat Hadrianus. Quod idem ipse Innocentius testatur in ipsius investituræ Diplomate. Adeo ut qui legerit idem Innocentii papæ Diploma, quale illud fuerit olim ab Hadriano Willelmo regi concessum intelligat, et lectione unius noscat utrumque.

64. Quamobrem hic ipsum tibi describendum operæ pretium existimavimus. Exat ipsam in Registri Epistolarum Innocentii tomo primo, Romæ cuso, anno Redemptoris millesimo quingentesimo quadragesimo tertio, apud Priscianum Florentinum. Sic enim se habet ¹ :

« Constantiæ imperatrici gloriøsæ reginæ Siciliæ, ac charissimo filio Friderico illustri regi Siciliæ, eorumque hæredibus in perpetuum.

« Super gentes et super regna divina providentia constitui, ut evellamus noxia, et salubria cum Propheta plantemus, sic ad universas provincias nostræ considerationis aciem extendere volumus, et circa eas pie sollicitudinis studium exercere, ut sopitis turbinibus tempestatum, quas parit mater diversitas, servent ad invicem mutux charitatis affectum. Porro specialiter et præcipue specialem ac præcipuam sollicitudinem circa regnum Siciliæ nos convenit adhibere, quod in Apostolicæ Sedis ferventius hactenus devotione permansit. Ad quod etiam inelytæ recordationis Rogerii quondam patris, Willelmi fratris, et Willelmi nepotis tuorum, regum Siciliæ, filia imperatrix, grata memoria inducit, qui in Apostolicæ Sedis ac prædecessorum nostrorum dilectione firmius persistentes, ab ejus

non potuerunt unitatis firmitate divelli, quia tanto fortius in ipsius obsequio permanerent, quanto adversus eam se amplius impetus extolleret tempestatis.

65. « Hæc igitur consideratione diligenter inducti, ac credentes quod prædictorum regum vestigia regia serenitas in devotione ac obsequiis imiletur : vobis et hæredibus vestris (qui, sicut dixi, dictus rex Willelmus quondam frater tuus felicitis memoriæ Hadriano papæ prædecessori nostro exhibuit; nobis et successoribus et Ecclesiæ Romanæ fidelitatem et hominum exhibere, ac quæ subscribuntur voluerint observare) concedimus regnum Siciliæ, ducatum Apuliæ, principatum Capuæ cum omnibus pertinentiis suis, Neapolim, Salernum, Amalphiam cum pertinentiis suis, et alia quæ ultra Marsiam habere debetis, et reliqua tenimenta quæ tenetis, a prædecessoribus vestris, hominibus sacrosanctæ Romanæ Ecclesiæ jure detenta, et contra omnes homines adjuvabimus honorifice manu tenere.

66. « Pro quibus omnibus coram venerabili fratre nostro Ottone episcopo Ostiensi, Apostolicæ Sedis legato, quem ad juramentum tuum, filia imperatrix, recipiendum transmisimus, fidelitatem nobis nostrisque successoribus, et Ecclesiæ Romanæ jurasti, sicut continetur in duobus similibus Capitularibus, quorum unum penes te sigillo nostro, alterum penes nos sigillo tuo signatum habetur, firmiter repromittens, quod quia præsens præsentii hominum debet exhibere, quandocumque nos et successores nostri te in aliqua parte regni, quam secure possis adire, ad nostram præsentiam vocaverimus, reverenter accedes hominum præstatura, nisi certum impedimentum aut necessitas evidens interveniat, quibus cessantibus, sine fraude venias ad ligium hominum faciendum. Cum autem tu, fili rex, favente Domino, ad legitimam ætatem perveneris : nobis ac successoribus nostris, ac Ecclesiæ Romanæ fidelitatem et ligium hominum exhibebis. Censum vere sexcentorum squiætorum de Apulia et Calabria, quadringentorum vero de Marsia, vel æquivalens in auro vel argento vos ac hæredes vestros statuistis Ecclesiæ Romanæ soluturos, nisi forte impedimentum aliquod interveniat, quo cessante census integer persolvetur.

« Electiones autem secundum Deum per totum regnum canonice fiant, de talibus quidem personis, quibus vos ac hæredes vestri requisitum a nobis præbere debeatis assensum.

67. « Ut autem hæc quæ supra diximus, tam nostro quam successorum nostrorum tempore perpetuam obtineant firmitatem, nec vestris nec hæredum vestrorum temporibus alicujus valeant præsumptione turbari : nos ea de consilio et voluntate fratrum nostrorum, auctoritate Apostolica confirmamus, et valitura in perpetuum præsentii pagina communimus, et tam a nobis quam a successoribus nostris, perpetuis temporibus statuimus observanda. Nulli ergo, etc.» Usque ad verbum,

¹ *Top. i. Regist. Innoc. Ep. DCCLII. l. 1. p. 203. 2.*

« Indignationem incurrat : ream se divino Iudicio de perpetrata iniquitate cognoscat, etc. » In modum Privilegii : Connetis autem prædicta servantibus, etc. Ita in Codice edito, sique nulla prorsus mentio, ut concesserit regi quæ revera ab antipapa Roge-rius obtinisset, vel ab Urbano papa per mutilatum illud Diploma assertur consecutus. Sed ista sunt revera (ut audisti) quæ Innocentius Constantiæ et Friderico filio concessit, præter hæc autem nihil. Quænam autem in duobus illis quorum meminit Innocentius papa Capitalaribus contine-rentur, proxime audietur eris, ubi prius dixerim-us, quomodo his (ut vidisti) firmiter constitutis, novæ petitioni Constantiæ idem Innocentius adhuc satisfaciendum putavit, nimirum, ut quæ jejune nimis de electionibus faciendis in Diplomate reci-tato continerentur, paulo fusiùs ab eodem Ponti-fice explicarentur, cum ei annuens idem Pontifex, Diploma quod ordine sequitur scripsit, quod inci-pit¹ : « Nec novum, nec injustum existit, etc. » Ubi inferius hæc de electionibus continet :

68. « Quantum cum Deo et nostra possumus honestate deferre velimus, salva justitia et Eccle-siarum canonica libertate, petitionibus vestris assen-sum faciemus exhibere. Ne igitur ulla de cætero inter nos et successores nostros, et vos et hæredes vestros super electionibus dissensio suscitetur, modum faciendæ in posterum electionis præsentibus curavimus litteris explicare : in quibus sic in multis regiæ serenitati deferimus, ut libertatem Ecclesiæ non lædamus.

« Sede vacante, Capitulum significabit vobis et vestris hæredibus obitum decessoris : deinde con-venientes in unum, invocata Spiritus sancti gratia, secundum Deum eligent canonice personam ido-neam, cui requisitum a vobis præbere debeatis assensum, et electionem factam non different publi-care. Electionem vero factam et publicatam de-nuntiabunt vobis, et vestrum requirent assensum. Sed antequam assensus regius requiratur, non inthronizetur electus, nec decantetur laudis solem-nitas, quæ inthronizationi videtur annexa. Nec antequam auctoritate Pontificali fuerit confirmatus, administrationi se ultatenus immiscebit. Sic enim honori vestro volumus condescendere, ut liberta-tem canonice observemus, nullo prorsus obstante Rescripto, quod a Sede Apostolica fuerit impetra-tum ». Hæc de electionibus faciendis. Quæ omnia seorsum, datis litteris Apostolicis, idem Innocen-tius papa innotescenda curavit omnibus archiepi-scopis et episcopis, atque universo denique infe-riori clero Siciliæ regni. Quas litteras, quod conti-nant illa etiam quæ in assertis superioribus Capitu-laribus scripta erant, hic tibi verbatim curavimus describendas. Sic se habent :

69. « Archiepiscopis, episcopis et aliis eccle-siarum prælatis, et universo clero in Sicilia con-stitutis.

« Si charissimæ in Christo filiæ nostræ Con-stantiæ imperatrici regiæ una cum charissimo filio illustri regi Siciliæ in multis gratiam fecimus specialem : non est ab aliquibus in admiratione ducendum, cum regnum Siciliæ ad jus et proprie-tatem Ecclesiæ Romanæ pertineat, et in ejus fide-litate perstitit ac permanserit unitate. Nostis enim qualiter indyctæ recordationis Rogerius, Wilhelmus, et Wilhelmus Siciliæ reges illustres, in Apostolicæ devotionis fere semper permanserint firmitate ; qualiter prædecessores nostros fuerint humiliter venerati ; qualiter etiam in Ecclesia Romana post Deum suæ spei posuerint et gaudii fundamentum, et in eam et per eam se crediderint exaltari. Nostis etiam, qualiter prædecessores nostri Romani Pon-tifices reges ipsos ac regnum Siciliæ quadam sem-per prærogativa dilexerint, et ad augmentum ipsius, utpote quod peculiare sicut est, et proprium repu-tabant, intenderint et quietem. Quia vero quantum-cunque velimus eorum honori deferre, libertatem canonicam et honestatem Ecclesiasticam intendi-mus observare. Ne igitur ulla de cætero inter nos, et successores nostros, et prædictam imperatricem et ejus filium, Siciliæ regem illustrem, vel hære-des eorum super electiones denuo dissensio susci-tetur, quæ hactenus inter Ecclesiam et regnum rancoris cujusdam et indignationis fomitem mi-nistrabant : modum faciendæ in posterum electio-nis, præsentibus curavimus litteris explicare : in quibus sic regiæ serenitati deferimus, ut libertatem Ecclesiasticam non lædamus. Sede vacante Capitu-lum, etc. » Prout in superioribus litteris ad Con-stantiam et filium datis sunt descripta de electio-nibus faciendis. Quibus recitatis, vel ex parte, quæ ad rem spectarent, sic pergit describere quæ supe-rius nominavit Capitalaria.

70. « Ideoque universitati vestræ per Aposto-lica scripta mandamus et districte præcipimus, quatenus cum aliquam Ecclesiarum vestrarum pastore vacare contigerit, secundum præscriptam electionis formam, omni gratia et timore postpo-sitis faciatis, nec contra eam aliqua præsumptionis occasione venire. Alioquin electione taliter facta, diligenti discussione præhabita, dante Domino in-firmare curabimus, et eligentium transgressionem animadversione debita castigare.

« Volumus etiam nihilominus et mandamus, ut de cætero ad Romanam Ecclesiam libere, cum opus fuerit, appelletis, et interpositis ad nos appella-tionibus, curetis humiliter et devote deferre.

« Nos etiam, quoties necessitas postulaverit, Apostolicæ Sedis legatos ad vos curabimus desti-nare, qui quæ plantanda sunt plantent, et evellant quæ fuerint evellenda, quorum obediatis monitis et præceptis : nullo prorsus in omnibus præscri-ptis capitulis obstante privilegio, quod a Sede Apo-stolica fuerat impetratum.

« Ut autem quæ præscripta sunt, apud vos nulla possint oblivione deleri, mandamus atque præci-pimus, quatenus forma litterarum ipsarum ad

¹ Innoc. I. 1. Ep. DCCLXIII. p. 201. 2.

perpetuam memoriam in majoribus Ecclesiis transcripta servetur». Post hæc in Codice ista subduntur :

71. « In eundem modum archiepiscopis, episcopis, abbatibus, prioribus, et universo clero in Apulie constituto, scriptum est scilicet. Atque hactenus Capitularia, primum (ut audisti) ab Hadriano papa præscripta Willelmo Rogerii filio, deinde ad instar illius concessionis ab Innocentio repetita, in investitura facta Constantiæ et filio Friderico, quibus quæ concessisset Urbanus de non mittendis legatis et aliis, audisti sublata.

72. At ne quis putet, eundem Fridericum adhuc puerum invitum his consensisse, puberem vero factum resiliisse : hic describendam putamus Auream bullam, quam post annos quatuordecim, nempe Redemptoris millesimo ducentesimo decimo tertio dedit, acceptam ipsam ex libro Privilegiorum Romanæ Ecclesiæ, quam etiam scriptam invenimus in alio Codice, qui inscribitur liber Census, hisce verbis :

« In nomine sanctæ et individue Trinitatis. Amen. Fridericus, divina favente clementia, Romanorum rex et semper Augustus et rex Siciliæ.

« Regnum nostrum tunc stabili confidimus, cum Altissimum, de cuius manu ea quæ possidemus bona recepimus, honoramus. Tanto enim Domino qui bona tribuit nobis, ad offerendas hostias operis et devotionis adstringimur, quanto ipsum misericordem in nobis et mirabilem experimur. Cognoscentes igitur gratiam, quæ data est nobis ab ipso : habentes quoque præ oculis immensa et innumera beneficia vestra, domine et reverendissime pater, protector et benefactor noster, domine Innocenti, dei gratia summe Pontifex venerande, per cuius beneficium, operam et tutelam aliti sumus, protecti pariter et promoti, postquam in sollicitudinem nostram mater nostra felix memorie Constantia, imperatrix et Siciliæ regina, ex ipso quasi utero nos jactavit : vobis, beatissime pater, et omnibus successoribus vestris Catholicis, sancteque Romanæ Ecclesiæ speciali matri nostræ omnem obedientiam, honorificentiam atque reverentiam semper humili corde ac devoto spiritu impendimus, quam prædecessores nostri reges et imperatores Catholici vestris antecessoribus impendisse noscuntur, nihil exinde volentes diminui, sed magis augeri, ut major devotio enitescat.

« Illum igitur volentes abolere abusum, quem quidam prædecessorum nostrorum exercuisse digressum, decretum in electionibus prælatorum : concedimus et sancimus, ut electiones prælatorum libere et canonice fiant, quatenus ille præficiatur Ecclesiæ viduæ, quem totum Capitulum, vel major et sanior pars ipsius duxerit eligendum, dummodo nihil desit ei de canonicis institutis.

73. « Appellationes autem in negotiis et causis Ecclesiasticis ad Sedem Apostolicam libere fiant, earum prosecutionem sive processum nullus impedire præsumat.

« Illum quoque dimittimus et refutamus abusu, quem in occupandis bonis decedentium prælatorum, aut etiam Ecclesiarum vacantium, nostri consueverunt antecessores committere pro motu propriæ voluntatis. Omnia nos spiritualia vobis et aliis Ecclesiarum prelatiis relinquimus libere disponenda, ut quæ sunt Cæsaris Cæsari, et quæ Dei Deo recta distributione reddantur.

« Supereradicando autem hæreticæ pravitatis errorem auxilium dabimus et operam efficacem.

« Possessiones etiam quas Ecclesia Romana recuperavit, ab antecessoribus nostris seu quibuslibet aliis ante delentas, liberas et quietas sibi dimittimus, et ipsam ad eas obtinendas bona fide promittimus adjuvare. Quas vero nondum recuperavit, ad recuperandum erimus pro viribus adjutores : et quæcumque ad manus nostras devenient, sine difficultate ac mora eas restituere satagemus. Ad has pertinet tota terra quæ est a Radicofano usque Ceperanum, marchia Anconitana, ducatus Spoletanus, terra comitisæ Mathildis, comitatus Bertinorii, exarchatus Ravennæ, Pentapolis, Massa Trebaria cum adjacentibus terris, et omnibus aliis ad Romanam Ecclesiam pertinentibus, cum omni jurisdictione, districtu et honore suo.

74. « Verumtamen cum ad recipiendum coronam imperii, vel pro necessitatibus Ecclesiæ ab Apostolica Sede vocati venerimus, de mandato summi Pontificis recipimus procuraciones sive fodrum (feudum) ab ipsis. Omnia igitur supradicta, et quæcumque alia pertinent ad Romanam Ecclesiam de voluntate et conscientia, consilio et consensu Principum imperii, libere illi dimittimus, renuntiamus et restituimus ; necnon ad omnem scrupulum removendum, prout melius valet et efficacius intelligitur, concedimus, conferimus, donamus, ut sublata omnis contentionis et dissensionis materia, firma pax et plena concordia in perpetuum inter Ecclesiam et imperium perseverent.

« Adjutores etiam erimus ad relinendum et ad defendendum Ecclesiæ Romanæ regnum Siciliæ, cum omnibus ad ipsum spectantibus, tam citra Pharum quam ultra, necnon Corsicam et Sardiniam, ac cætera jura, quæ ad eam pertinere noscuntur, tanquam devotus filius et Catholicus princeps.

« Ut autem hæc omnia memorato sanctissimo patri nostro domino Innocentio, sacrosanctæ Romanæ Ecclesiæ summo Pontifici, ejusque successoribus, per nos et nostros successores Romanorum reges et imperatores observentur, firma et inconvulsa semper permaneant, præsens Privilegium conscriptum, majestatis nostræ Aurea bulla jussimus communiri. Testes autem sunt hi :

75. « Sigefridus Moguntinus archiepiscopus, Sedis Apostolicæ legatus.

« Eberhardus Salisburgensis archiepiscopus.

« Conradus Ratisponensis episcopus.

« Otto Wirzburgensis episcopus.

« Manegoldus Potaviensis episcopus.

« Eingerardus Zisensis episcopus.

« Giadiacus Bohemorum rex.

« Ludovicus dux Bavarie.

« Leopoldus dux Austrie et Styrie.

« Hermannus landgravius Thuringie.

« Comes Albertus de Eberstein.

« Comes Adolphus de Sonneberg.

« Comes Eurchardus de Mannesuadel.

« Berardus Bers comes.

« Ludovicus de Wirttemberg.

« Gebhardus busclavius Magdeburgensis.

« Henricus de Slahenverch.

« Walterus de Langenberg.

« Henricus de Calandina.

« Mareschalens imperii Walterus, et Sept. pincerna imperii, et alii quamplures.

« Signum domini Friderici Secundi, Romanorum regis invictissimi, et regis Sicilie.

‡ Loco sigilli.

76. « Ego Conradus, Dei gratia et Apostolicæ Sedis Metensis et Spirensis episcopus, imperialis aulæ cancellarius vice domini Sigefridi Moguntini archiepiscopi, et Apostolicæ Sedis legati, ac totius Germaniæ archicancellarii recognovi.

« Acta sunt hæc anno Domini nostri Jesu Christi millesimo ducentesimo decimo tertio, Indictione prima, regnante domino Friderico Secundo Romanorum rege glorioso, et rege Sicilie, anno regni ejus Romani primo, regni vero ejus Sicilie decimo sexto.

« Datum apud Egram per manus Bertholdi de Nife, regalis aulæ protonotarii, quarto idus Julii ».

Rursum vero post annos sex, huic per omnia similem Auream bullam dedisse reperitur Honorio papæ Tertio, totidem verbis conceptam, quæ in nominatis Codicibus extat : in qua post testes descriptis hæc leguntur :

77. « Acta sunt hæc anno Incarnationis Domini millesimo ducentesimo decimo nono, mense Septembris, Indictione octava, regnante domino Friderico Secundo Romanorum rege glorioso, regni ipsius in Germania sexto, et in Sicilia vicesimo secundo feliciter Amen.

« Datum apud Agnov. per manus Henrici regalis aulæ protonotarii, anno, mense et Indictione præscriptis ». Idemque in edicto, quod promulgandum curavit die, qua ab eodem Honorio coronatus est imperator, hæc primo loco servanda præcepit his verbis.

« Nos Fridericus, Dei gratia Romanorum imperator et semper Augustus hac edictali lege irritamus, et præcipimus irritari omnia statuta et consuetudines quæ civitates, vel loca, potestates, consules, vel quacunque alie persone contra libertatem Ecclesiæ, vel personas Ecclesiasticas edere vel servare tentaverint, adversus canonicas, vel imperiales sanctiones. Et ea de Capitularibus suis infra duos menses post hujusmodi publicatio-

nem edicti penitus aboleri etc. » Plura alia eodem edicto sanciens in favorem Ecclesiasticæ libertatis. Est inter Honorii papæ Epistolas libro quinto Epistola quadringentesima octogesima tertia. Hæc quidem Fridericus in destructionem male erectæ a Rogerio, vel ejus filio Willelmo, cognomento Malo, monarchiæ Sicilie.

78. Verum non tantum hæc in regno Sicilie, sed quidquid per universam Italiam per dominos et magistratus præsumptum esset contra Ecclesiasticam libertatem, idem Fridericus anno Domini millesimo ducentesimo vicesimo abrogandum curavit, Constitutione hac edita :

« Fridericus, Dei gratia Romanorum rex semper Augustus, et rex Sicilie, potestatibus, consulibus ac comitibus universorum comitatum, et castro-rum Italie.

« Cum divæ memoriæ imperatores Romani sacrosanctam Ecclesiam multiplici libertate dotarint : nos disponente Deo, a quo est omnis potestas, ad fastigium culminis imperialis electi, quæ pie ab illis et a sanctissimæ Sedis præsulibus pro statu Ecclesiarum et Ecclesiasticorum virorum sunt edita, conservare volumus inconcussa ; et illis contraria, sicut ad nos spectare dignoscitur, amputare. Cum igitur ad aures celsitudinis nostræ pervenerit, nonnullos vestrum cupidine cæca seductos quædam detestanda edidisse statuta, præjudicantia Ecclesiasticæ libertati, ac divino et humano juri obviantia : manifeste nos ea tanquam de radice pravitatis hæreticæ provenientia, auctoritate præsentium cassamus sub pœna mille marcharum, districtius iuhibentes, ne quis vestrum illis de cætero inherere præsumat, aut eorum prætextu Ecclesias et Ecclesiasticos viros contra sanctiones canonicas et legitimas molestare. Quinimo ea de nostris Capitularibus, seu brevioriis condemnata penitus abolentes, Ecclesias et Ecclesiasticas personas permittatis indulta sibi libertate gaudere, si vullis pœnam effugere prenotatam, et indignationem regiam evitare. Datum in castris apud sanctum Leonem, anno Domini millesimo ducentesimo vicesimo, Indictione octava, kalendis Octobris ». Hæc in libro Collectionis Nicolai de Aragonia, qui in Vaticana bibliotheca servatur sub numero 498.

79. Ad dicit aliquis eundem Fridericum post hæc in acerbissimum tyrannum conversum Ecclesiam oppugnasse, hæcque omnia operibus destruxisse. Attamen certum est, nullius fuisse roboris, quæ sibi absque consensu Romanæ Sedis Pontificis tyrannice vindicavit. Cum enim quid sibi juris rex arrogat in Ecclesias, non concedente Pontifice, nullatenus id posse subsistere, et nullius penitus esse momenti, quis ignorat ? Cum aliquin idem Fridericus conversus in arcum pravum, effectus prævaricator eorum, quæ tot publicis monumentis sancte pieque statuerat, primum sub Gregorio Nono, ut ab excommunicatione absolveretur, scriptis publicis iteratis omnino correxit. Extant ipsa in Registro ejusdem Gregorii IX, dati

anno Domini millesimo ducentesimo trigesimo, mense Julii, Indict. tertia, apud sanctum Germanum. Inde vero eundem iterum rerum Ecclesie statum in Sicilia perturbantem, his ad eum litteris datis compevit idem Gregorius :

80. « Ascendit ad nos clamor, ululatus et stridor miserabilis, validus et horrendus, Ecclesiarum et clericorum regni Sicilie et Apulie, quod in eos niltra quam de facili exprimi valeat, inique deserviens, ipsos affligis cruciatibus intulisti, bona eorum diripiens et extorqueas, in manifestam contumeliam Redemptoris, et atrocem injuriam Ecclesie generaliter, ut taceamus Apostolicæ Sedis contemptum, in quam cadunt ex hoc opprobria exprobrantium. Cum igitur hæc nequeamus sine periculo sustinere, qui Christi vicarii licet immensi constituti pro tuenda justitia, et defendenda Ecclesiastica libertate tenemur, et volumus impendere nosmetipsos, ab eo nobis digna vicissitudine rependenda, qui beatificat tribulationem propter justitiam patientes. Imperialem celsitudinem tuam monemus et hortamur attente, quatenus Ecclesiis et personis Ecclesiasticis ablata restituens integre universa, ab illorum molestatione penitus conquiescas, tamæ tuæ consulens et salutis. Alioqui ne contra Deum hominem deferamus, super hoc procedemus, dante Domino, sicut fuerit procedendum. Ad hoc autem dilectos filios B. et R. fratres minores ad te mittimus, si forsitan saltem sero salubriter monitionibus nostris aures aperias, quas hactenus nimium inconsulte clausisti. Datum Reate non. Maii, Pontificatus nostri anno secundo ».

81. Fuit autem ex his et aliis ab eo perperam factis idem Fridericus ab eodem Pontifice excommunicatus, absolutus autem, cum ea omnia emendare promisit, ultore existente non solum, quæ in Ecclesiam et personas juraque Ecclesiastica deliquisset, sed et in laicos ipsos, miserabiles personas, pupillos et viduas, imo et omnes homines nobiles sive ignobiles perpetrasset : ut apparet ex capitulis, quæ, ut absolveretur idem Fridericus, est pollicitus observare. Scripta illa anno Domini millesimo ducentesimo trigesimo, Indictione tertia, mense Julii.

Rursum vero longe prolixiori Epistola¹ in eum invehitur, cum jura Ecclesie sibi inique impieque usurpat. Ut plane intelligas, exhorruisse Romanos Pontifices, vindicare sibi reges quæ essent Ecclesie, in eodemque vigore sacerdotali insurrexisse pariterque damnares.

82. At Fridericus ipse, licet aliquandiu aversione contentiosa resisteret momenti Pontifici, tandem ultimo elogio, testamento condito, nullius decrevit esse momenti quæcumque contra libertatem Ecclesiasticam statuisset. Habentur autem ejus testamenti præcipua capita recitata a Mattheo Paris in Annalibus sui temporis, in quibus hæc inter alia : « Item relinquo totam terram Ecclesie liberam,

et volo quod jura Ecclesie restituantur etc. » Sicque juxta illud propheticum de inimicis Ecclesie² : « Sanctifica illos in die occisionis ». Hoc impio tyranno magna Dei misericordia concessum, ut novissimo elogio, quæ pii principis essent, præstare posset.

Vidisti, lector, ex his, omnem illam molem arcem monarchie penitus corruisse, quæ non, ut fingunt, concedente Urbano papa, sed pseudo-pontifice Anacleto, Rogerio, absque fundamento super arenam, nullo sibi glutino coherens, male composita fuit. Cujus hic ex parte quamdam representamus imaginem.

83. Reperitur quod Rogerii hujus primi regis temporibus, non in Sicilia modo, sed etiam in Apulia cæterisque ejus regni provinciis, episcopatus per regios codicillos conferbantur, ut declarat Roberti ejusdem regis cancellarii exemplum apud Joannem Sarisberiensem³. Narrat enim, Robertum hunc, Ecclesiam Avellanam, tunc forte vacantem, tribus diversis, qui oblato pretio eam expetebant, per simulatam speciem addixisse, ac deinde quartum quemdam nec opinantem, illis rejectis, consecrandum curasse. Quæ quidem per successores legitimos Romanos Pontifices, præsertim vero per Innocentium Tertium, ejus de horum abrogatione extant Diplomata, abroganda fuerunt. Sed per Hadrianum papam ista postea fuisse sublata, cum concessit investituram Guilelmo regi Rogerii filio, ita declarat Robertus abbas in Additamento ad Siebertum his verbis⁴ : « Cum papa Hadriano pacem fecit, concedendo ei consecrationes episcoporum regi sui et ducatus, sicut antiquitus eas habuit Ecclesia Romana, unde discordia fuerat inter patrem suum Rogerium, et Innocentium et Eugenium Romanos Pontifices. Idem vero Apostolicus concessit ei regnum Sicilie et ducatum Apulie et principatum Capuæ ». Porro ista cum aliis ab antipapa Anacleto fuisse concessa Rogerio, quis poterit dubitare, cum aliunde accepisse dici non possit, laborantibus in contrarium omnibus antecessoribus Pontificibus Romanis, et in hoc ipsum usque ad mortem insistentibus, ut ista a laicis principibus male usurpata in pristinum usum atque libertatem Ecclesiasticam revocarent ?

84. Verum liquet tot Romanorum Pontificum, potissimum vero Innocentii, imo et contrariis edictis Sicilie regum, eandem jam solo æquatam jacuisse prostratam, imo potius veluti absorptam terræ chasinate, nullatenus vel in ruinis aliqua ejus superfuisse vestigia, sed et in anathema oblivionis sub dira illa maledictionis sententia constitutam⁵ : « Maledictus vir coram Domino, qui suscitaverit et edificaverit civitatem Hiericho », cujus muri in altum erecti, arca Domini circumducta, intonantibus tubis sacerdotalibus, corruerunt. Ubi ergo quod posterunt recentiores Sicule monar-

¹ Jer. XII. — ² Luc. VII. Pollic. c. 49. — ³ In Addit. ad Siebert. an. 1157. — ⁴ Jos. VI.

⁵ Greg. IX. anno pont. A. Ep. cccxliii.

chiæ fundamentum, Urbani papæ Diploma? nonne oportuit, si ita fuisset aliquando, ea tanta totius ejus molis ruina, tam Pontificia auctoritate, quam regia potestate remansisse sepultum, tot contrariis editis scriptis tum ab ipso Pontifice, tum etiam a dominantibus principibus ipsis adversus omnes quascunque Ecclesiasticorum jurium oppressiones? Quid si aliis adhuc pluribus ostendamus, et Pontificiis atque regis publicis documentis, eadem ipsa contra Ecclesiasticam immunitatem rediiva funesta decreta, fuisse mox sui ortus principio condemnata penitusque rescissa; ut nihil fuerit in Ecclesia adeo vigilantissimo studio pertractatum, vel propensissima solertia agitatum curatumque, quam hoc ipsum ne quid injuria principum, præter jus fasque cuncta sibi sumentium, adversus antiquam a Patribus acceptam, legibus custoditam Ecclesiasticam libertatem emergeret?

85. Quod igitur rem semel aggressi, ingressesque latissimum campum, qui finibus suis tempora nostra pertingat, quibus sæpe dejecta penitusque disjecta ejusmodi monarchia, auctoritate prætensa ejusdem Urbani papæ Diplomatis revocatur in usum: eo usque progredi, licet inviti compellimur, ita tamen, ut compendiarie via prolixum nimis conficiamus iter, per quod sinus majori olio, longiori mora, commodioribus mansionibus, ipsa scriptione Annalium annos singulos singulis stationibus metientes iterum transiuri. Attingemus enim tantum ea, et quam brevissime possumus, quæ ad institutum semel susceptum spectare noscuntur, nimirum quoties istiusmodi perosam monarchiam restituere sint aggressi Sicilia reges, eamque disjecerint sacris legibus Romanis Pontifices, ac reges ipsi, dum singulis concessis investituris, voluerunt in omnibus esse consultum Ecclesiasticæ immunitati, interemusque ipsum rerum usum: quibus perspicua luce perspectis, lector, cuncta quæ ad hæc spectant, habeat explorata.

86. Primum vero summam illud sciendum, omnes Romanos Pontifices, usque ad tempora Caroli Quinti, investituras consuevisse conferre, tam Siciliae regni positi ultra Pharium, quam etiam Siciliae (sic eam libuit appellare) citra Pharium, sæpe conjuncte, aliquando vero distincte ab invicem. In omnibus vero investituris istis magna consideratione consultum in primis Ecclesiasticæ immunitati, quibusdam semper præscriptis capitibus ad ista spectantibus, iisdemque per reges accipientes easdem investituras subscriptis, atque juramento firmatis: quorum omnium gestorum adhuc integra apud nos extant vetera monumenta, eademque omni fide probata. Ut plane in singulis ipsorum appareat, nihil magis omnes Romanos cavisse Pontifices, quam ut in omnibus sartam, tectam in-violatamque libertatem Ecclesiasticam conservarent; ea enim polliceri renuentibus denegasse, vel pollicita præstare detrectantes censuris Ecclesiasticis exagitasse. Sed cum omnes impense adeo in his

perseverarint: admiratione quidem haud mediocri dignum videri potest unde emeris, ut falce Apostolica successi radicibus monarchiæ infelices palmites, iidem sæpe densiori atque altiori germine pululaverint et excreverint, et quæ Christi damnata sententia infructuosa arbor aruerit, rursum majori bonorum fructuum sterilitate, et malorum fertilitate viruerit, jam ab Ecclesiæ terra, quam male occupat, penitus evellenda.

87. Ita vero causam roganti: « Unde in bene sato atque culto agro zizania? » nihil proprius respondendum quam illud Evangelici patrisfamilias, dicentis¹: « Inimicus homo hoc fecit ». Sed non cum dormirent homines tantum scelus præsumptum, imo ipsis vigilantibus, reclamantibus etiam et exclamantibus, damnantibus pariter, atque auctoritate Apostolica, quantum licuit tyrannos istos, Fridericum, Conradum atque Manfredum, cum id violenter agerent, cohibentibus. Prævaluit tamen ad tempus vis tyrannica, grassatio violenta, principum latrocinium. Sic dixerim, secundum Justinii martyris sententiam ad Antoninum Pium scribentis, atque libere profitentis: « Tantum valent principes, opinionem veritatis præferentes, quantum prædones in solitudine ». Dum sicut isti, ita illi grassantur, sed majori isti potentia, minori tamen verecundia, cum quod nefas est, id jure factum velint, et quod per vim tyrannicam imperant et extorquent, hoc veluti ratione summa sancitum jubeant, pariter ut sacrosanctum ab omnibus custodiri, atque transmitti curent ad posterum. Ita plane accidit, ut cum monarchia illa pristina excisa penitus atque extincta fuerit Romanæ Ecclesiæ juribus; rursus tyrannorum principum viribus sit nefarius restituta, sed Romanis semper Pontificibus obtinentibus atque fortissime resistentibus.

88. Fuernnt primi, qui ista tentarunt, post Rogerii regis et ejus filii Willelmi ausus temerarios condemnatos atque rescissos, Fridericus imperator, idemque maximus impius, et infestissimus omnium Romanæ Ecclesiæ persecutor, itemque patri filius non dissimilis Conradus, atque Manfredus frater, qui eosdem superavit impietate. Hi tres in primis jurato bello adversus Romanos Pontifices, in servitute deduxere Ecclesias omnes, et cum Ecclesiis etiam viros Ecclesiasticos summa tyrannide compresserunt, cum Pharaone dicente superbo fastu²: « Nescio Dominum, et Israel non dimittam ». Hi tres igitur eversæ penitus Siculæ monarchiæ restitutores fuere atque propagatores amplissimi, quos tandem ab ipsis Romanis Pontificibus condemnatos atque magno prodigio Dei vindicta sublato, erubescant atque simul horrescant imitari principes orthodoxi. Imitantur plane atque sectantur, qui iisdem quibus illi legibus Siculam revocant atque renovant monarchiam. Ad quam evertendam ab his temporibus quotquot fuere Ro-

¹ Matth. XIII. — ² Exod. V.

mani Pontifices, ad quos pertinuit investituras conferre Siciliae regibus, omnes uno consensu sicut uno spiritu laborarunt, ut inter alias expressas condiciones praescriptas ipsis servandas illae essent potissimae, quibus abrogarent quaecumque ab his sanctitas leges adversus Ecclesiasticam libertatem. Haec ut ostendamus, agendum de singulis.

89. Atque primum quod spectat ad tres hos tyrannos, Fridericum, Conradum atque Manfredum: ob violata jura Ecclesiastica Fridericus a Gregorio Nono primum excommunicatus fuit, deinde in Concilio Lugdunensi ab Innocentio Quarto regno simul et imperio spoliatus est. Inter alias vero causas ejus abdicationis haec allata est, quod electiones sacrorum antistitem in Sicilia atque in imperio turbasset, Ecclesiasticosque eorum laicis conveniri permisisset. Hujus exemplum secuti Conradus atque Manfredus, non legitimi reges, sed tyranni, quippe qui Siciliam absque investitura accepta, invitis Pontificibus occupassent, cum nulla contra Sedis Apostolicae auctoritatem et jurisdictionem impis legibus suis sancire conati essent; successores Pontifices ipsis damnatis in singulis ab eis traditis investituris, de abrogandis iisdem legibus ab ipsis promulgatis egerunt, hoc adjecto ab Alexandro papa Quarto magna consideratione: ut quoniam invadende Ecclesiasticae libertatis in Friderico occasio fuerat auctum imperio regnum Siciliae, quo munitus desepit parere Pontifici, non liceret in posterum ulla penitus ratione jungi regnum Siciliae cum imperio. Quae quidem tunc praescripta conditio, consuevit in omnibus postea concessis Siciliae regibus a successoribus Romanis Pontificibus investituris addi, atque verbis totidem innovari. Siquae procul abfuit, ut ex Ecclesiae juribus passi sint monarchiam Siciliae innovari, qui et additamento secularis potentiae eam conflari penitus vetere: tantum abest, ut ex spiritualibus eam augeri voluerint. Sed de ipsis agamus investituris.

90. Vivente adhuc Manfredo tyranno Siciliae, dum primo Innocentius papa Quartus, et post eum Alexander papa item Quartus, anno Redemptionis millesimo ducentesimo quinquagesimo quinto, Indictione decima tertia, die sexta Novembris, investirent de regno Siciliae Edmundum filium Henrici regis Anglorum, inter alias pro libertate Ecclesiae in Sicilia restituenda condiciones servandas proferre, quae in bulla Aurea ita leguntur expresse:

91. « Omnes quoque Ecclesiae de regno et terra praedictis, tam cathedrales quam aliae regulares et seculares, necnon et universae Ecclesiasticae personae, illis libertatibus et immunitatibus omnino gaudebunt, quae ipsis competunt secundum canonicas sanctiones. Itaque circa eandem Ecclesias et personas, tam in faciendis provisionibus et electionibus confirmandis quam in omnibus aliis, Romanus Pontifex et Romana Ecclesia jurisdictionem et auctoritatem omnimodam libere exerce-

bunt, salvo debito regi et suis haeredibus jure patronatus, si quod reges Siciliae, seu ejusdem regni et terrae domini haecenus in aliqua vel aliquibus Ecclesiarum ipsarum consueverunt habere; in tantum tamen, in quantum Ecclesiarum patronis canonica instituta concedunt ». Haec in Aurea bulla investiturae. Extat apud nos una cum aliis ad haec spectantibus documentis, sive ex Vaticana bibliotheca, sive ex archivo munitionis sancti Angeli, sive ex Registris Camerae Apostolicae, at aliunde petitis. Ex quibus vides solo aequari turres illas exallatas a tyrannis illis super omnem Ecclesiasticam libertatem, cum nullum refraingerit contra eam regibus privilegium; dum tam res omnes quam personas Ecclesiasticas in libertatem illam vindicatas voluit, quae sacris legibus debetur ipsis; nec in jure patronatus regibus tributum aliquid amplius, quam caeteri omnes patroni jure debitum possidere solerent.

92. Cum autem dicta investitura facta Anglorum regi, ipso non curante, effectu caruit, et Carolus Andegavensis comes, sancti Ludovici regis Francorum frater, investituram a Clemente papa Quarto accepit: occiso in bello Manfredo, Siciliae regni invasore, liberiori dispositione idem Siciliae regnum ad jura Romanae Ecclesiae reversum est. Siquae post haec, ampliori forma in ipsis investituris per Sedem Apostolicam factis libertas Ecclesiastica est declarata atque munita, cum prohibitione semper ac deestatione legum dictorum principum tyrannorum, quae fuerat ab eis promulgatae pro monarchia contra Ecclesiasticam libertatem. Nam audi quae in Aurea bulla continentur Caroli Andegavensis Siciliae regis, qui auctoritate Apostolica ibi regnavit. Ipse enim, cum regi investituram accepisset a Clemente papa Quarto, anno Domini millesimo ducentesimo sexagesimo quinto, Indictione septima, haec inter alia se fore servaturum promisit, quae his ipsis verbis in eodem Diplomate scripta leguntur:

93. « Omnes insuper Ecclesiae, tam cathedrales quam aliae regulares et seculares, necnon et omnes praelati et clerici, ac omnes personae Ecclesiasticae, seculares et religiosae, ac quaecumque religionis loca cum omnibus bonis suis in electionibus, postulationibus, nominationibus, provisionibus, et omnibus aliis plena libertate gaudebunt. Nec ante electionem, sive in electione, sive post, regis assensus, vel consilium aliquod requiritur. Quam utique libertatem promitto ego, et mei in regno haeredes semper manutenebimus, et conservabimus, et manuteneri, et conservari faciemus ab omnibus subditis nostris; et quod dictae Ecclesiae atque personae uti possint libere omnibus bonis et juribus suis, salvo mihi meisque in regno haeredibus jure patronatus in Ecclesiis, in tantum, quantum in hac parte patronis Ecclesiarum canonica instituta concedunt, ubi antiqui reges Siciliae hujusmodi jus patronatus in ipsis Ecclesiis habuerunt.

94. « Omnes etiam causæ ad forum Ecclesiasticum pertinentes, libere et absque ullo impedimento agitantur, tractantur et ventilantur, coram ordinariis et aliis Ecclesiasticis iudicibus, et terminantur per eos. Et si ad Sedem Apostolicam super huiusmodi causis appellari contigerit, tam appellantes quam appellati ad eam venire Sedem pro appellationum prosecutionibus, libere et absque inhibitione aliqua permittantur. Et promitto tam me, quam hæredes meos facturos, curaturos, et permissuros, quod sic agitari, tractari et ventilari, ac terminari possint, et sic quod possit appellari et libere venire Romanam.

95. « Sacramenta vero fidelitatis præstabantur secundum antiquam et rationabilem consuetudinem, prout canonica instituta permittunt, ab illis Ecclesiarum prælati, quorum prædecessores antiqui illa Sicilia regibus præstiterunt. Ab illis autem prælati et Ecclesiis, qui regalia sive temporalia bona tenent, si qui tamen sunt qui huiusmodi bona teneant a domino regni et aliis dominis temporalibus, et qui ratione huiusmodi bonorum, ab antiquo consueverunt regibus et ipsis dominis temporalibus servitia exhibere, ejusmodi honesta et antiqua servitia eis secundum rationabilem et antiquam consuetudinem, prout statuta patiuntur canonica, impendantur, salva semper circa Ecclesias cathedrales et alias regulares, ac personas, ac loca Ecclesiastica, tam in faciendis provisionibus et electionibus confirmandis, quam in aliis quibuscunque, Romani Pontificis et Ecclesie Romanæ jurisdictione ac auctoritate plenaria et libera potestate.

96. « Revocabo quoque omnes Constitutiones, seu leges, per prædictum Fridericum, vel per reges Siciliae, sive per Conradum ipsius Friderici filium, aut Manfredum, quondam principem Tarentinum, qui de facto regnum ipsum detinuit occupatum, editas contra Ecclesiasticam libertatem. Nec statuta vel Constitutiones aliquas edam, aut etiam promulgabo, per quæ juri vel libertati Ecclesiasticæ derogeretur. » Quamnam autem fuerint Friderici ejusmodi Constitutiones contra Ecclesiasticam libertatem, possumus intelligere ex bulla anathematis, qua Innocentius Quartus in Concilio Lugdunensi excommunicavit eundem Fridericum imperatorem, ex his scilicet causis, quod in regno Siciliae prælatorum electiones perturbabat, tributa, quæ talliam vocant, eis solvenda præscribebat, quodque clericos coram iudice seculari conveniri permittebat, etc. Pergit vero :

97. « Promitto etiam, quod tam ego quam mei hæredes, non patiemur quod aliquis clericus vel persona Ecclesiastica eorundem regni et terræ, in civili vel criminali causa conveniatur coram iudice seculari, nisi super feudis iudicio petitorio conveniatur civiliter : ita quod omnes Ecclesie ac personæ Ecclesiasticæ omnimodo erunt libere, et etiam in nullo regi vel principi subiacebunt.

« Et quod nullas tallias vel collectas impone-

mus Ecclesiis, monasteriis, clericis et viris Ecclesiasticis, vel rebus eorum, et quod in Ecclesiis vacantibus, nos vel nostri in regno meo hæredes nulla habebimus regalia, nullosque fructus, redditus et proventus, nullas etiam obventiones, ac nulla prorsus alia percipiemus ex iisdem, custodia earundem Ecclesiarum interim libera remanente penes personas Ecclesiasticas, juxta canonicas sanctiones etc. » Plura alia addit faciendi in favorem Romanæ Ecclesie, a qua regnum acceperat. Repetite sunt autem hæc in Diplomate investituræ, factæ eidem Carolo ab eodem Clemente Pontifice, cujus est exordium : « Constituti ab eo per quem reges regnant etc. » In fine autem ipsius ista : « Actum apud Lateranum in Basilica sancti Salvatoris, quæ appellatur Constantiniana, ante sanctissimum altare ipsius Basilicæ, quarto kalendas Julii, anno Domini MCLXV, Pontificatus Clementis Quarti anno primo ».

98. Tenuit Carolus regnum Siciliae ultra Pharam usque ad annum Redemptoris millesimum ducentessimum octogesimum secundum, quo cæsis Francis, eam occupavit rex Aragonum Petrus, de quo inferius dicturi sumus : modo cæplam semel Andegavorum successionem suo ordine prosequemur, qui singulas a successoribus Romanis Pontificibus de utraque Sicilia investituras sunt consecuti iisdem conditionibus, quibus a Clemente Quarto Carolus Primus acceperat, licet re ipsa possessores tantum essent Siciliae citra Pharam.

Carolo Primo successit, anno salutis millesimo ducentesimo octogesimo nono, decimo quarto kal. Julii, Carolus Secundus rex Siciliae, exhibens juramentum fidelitatis Nicolao papæ Quarto. Idemque inter alia, quæ brevitalis causa recensere omittimus, eadem servanda promisit, quæ pollicitus fuerat rex Carolus prædecessor Clementi papæ Quarto, iisdem capitulis, totidem verbis superius recitatis, atque ex eadem bulla descriptis, cum abrogatione omnium legum trium tyrannorum contra libertatem Ecclesiasticam sancitarum : quæ omnia repetita habentur atque descripta in bulla ejusdem Nicolai papæ. In fine autem ipsius Caroli promissionis ista de ejus tempore scripta leguntur : « Actum Reate in majori palatio, juxta cathedralem Ecclesiam Reatinam, decimo quarto kal. Julii, anno Domini millesimo ducentesimo octogesimo nono, Indictione secunda, regni Siciliae anno quarto ».

99. Anno vero millesimo ducentesimo nonagesimo quinto, idem Carolus investituram accipiens a Bonifacio papa Octavo, die decima septima mensis Februarii, Indictionis octavæ, anno undecimo regni ejus, parem in omnibus eidem bullam Auream fecit, in qua per singula quæque verba, in iis quæ spectant ad libertatem Ecclesiasticam sartam, tectam, in omnibus custoditam, eadem quæ superius sunt recitata in Diplomate Clementis papæ Quarti, et Aurea bulla Caroli regis sunt repetita ; itidemque abrogatio legum tyrannorum contra Ecclesiasticam libertatem sancitarum, atque descripta

totidem syllabis reperitur. Quibus plane omnibus omnes monarchiæ nervi successi penitus sunt, ut stare nullatenus possit. Extat ipsum Diploma in iisdem tribus Codicibus superius nominatis, quod qui voluerit, inspicere poterit.

100. Nepos vero Caroli Robertus, rex utriusque Siciliæ, regni investituram accepit a Clemente papa Quinto, salutis anno millesimo trecentesimo nono, Indict. septima, die vicesimo sexto mensis Augusti, primo ipsius regni anno, ut in ejus Aurea bulla signatur, eademque promissiones præstitit pro conservandis libere juribus Ecclesiasticis, ita ut ex Clementis Quarti investitura per apices singulos esse descriptæ apparent, cum eadem detestatione legum trium tyrannorum contra Ecclesiasticam libertatem in Sicilia editarum, ita ut sic per suos intonante desuper Sancto de celo¹: « Succedite arborem ». Una omnium tam Romanorum Pontificum, quam regum Siciliæ, eademque fuisse conspiratio videatur destruentæ male plantatæ ab initio monarchiæ. Extat ipsa bulla Aurea in iisdem citatis superius libris.

101. Rursum vero idem Robertus Siciliæ rex, cum præstitisset juramentum fidelitatis Benedicto Duodecimo Romano Pontifici, bullam Auream pariter scribendam curavit de his quæ ab eo observanda essent, cujus exordio tempus ita exacte describitur, scilicet: « Anno Domini millesimo trecentesimo trigesimo quinto, Indictione tertia, die vicesima quinta mensis Junii, Pontificatus sanctissimi patris et domini nostri domini Benedicti, divina providentia papæ Duodecimi, anno primo etc. » Ubi inferius inter alias obligationes quas a se fore servandas expressit, de libertate Ecclesiastica in regno Siciliæ jugiter retinenda, eadem totidem verbis sunt expressa, quæ in regio Diplomate avi sui Caroli regis sunt superius recitata; specialisque pariter facta habetur abrogatio legum tyrannorum illorum Friderici, Conradi atque Manfredi, qua videri possit convulsa penitus monarchia.

102. Quæ huic successit Joanna, anno Redemptoris millesimo trecentesimo quadragesimo quarto, a Clemente papa Sexto investituram accepit de utraque Sicilia, iisdem prorsus conditionibus de libertate Ecclesiastica conservanda, quibus Carolus Primus, atque alii successores superius nominati, a Romanis Pontificibus acceperunt. Sed et anno millesimo trecentesimo septuagesimo secundo, novo Pontifici Gregorio Undecimo fidelitatis juramentum exhibens, omnia quæ supra servare promisit, quæ tum ipsa, tum prædecessores promiserant de Ecclesiastica immunitate tuenda. Hæc Avenione, anno secundo Pontificatus ejus, die quarta Januarii. Extant de his tunc scripta Diplomata. Ili omnes igitur Andegavi Caroli primi successores, investituras, iisdem supra narratis conditionibus pro Ecclesiæ libertate præscriptis, dictis Romanis Pontificibus acceperunt de utraque Sicilia,

quavis Siciliam ultra Pharus minime possiderent, quam occupant Aragonenses, Petrus Primus et successores.

103. Ita quidem Romani Pontifices, cum Petrus et successores non peterent (ut par erat) ab Ecclesia Romana investituras, damnatis illis ut injustis occupatoribus, jura ut sibi illæsa servarent quæ a tempore Roberti Guiscardi Sedes Apostolica possedisset, perseverarunt de eodem regno ultra Pharus, ut prius, conferre petentibus regibus Andegavensibus more solito investituras, iisdem, ut dictum est, conditionibus, quibus a tribus tyrannis monarchia restituta atque collapsa restitui ultra non posset: quæ tamen ab Aragonensibus in Sicilia ultra Pharus regnantibus interea pararetur tyrannica potestate, ita dixerim, prout contra eos lata sæpe sententia a Romanis Pontificibus atque Conciliis comprobavit, scriptis de his publicis monumentis, quæ extant adhuc.

104. Petrus enim Aragonum rex, qui cæsis Francis Siciliam insulam occupavit, cum antiqua jura hactenus possessa ab Ecclesia Romana super ipso regno recognoscere nollet, nec ab ea vellet investituram accipere, ipsique censum pendere, juramentum fidelitatis præstare et homagium exhibere, a Martino papa Quarto excommunicatur, ipsumque regnum interdicto subjicitur. Extant de his litteræ Apostolicæ apud Eberardum in Chronico. Duxerat hic Constantiam, filiam Manfredi notii filii Friderici, in matrimonium, quo putavit conjugio ad se jure regnum Siciliæ pertinere. At quid? Non enim propterea solutus, qui non accipere deberet investituram ab Apostolica Sede, nam et Guillelmus quantumlibet Malus, accepit eam ab Hadriano, ipsaque Constantia major Friderici mater, ipseque Fridericus, ac denique, præter tyrannum Manfredum, investituram omnes acceperunt.

105. Quantum autem fuerit iste a prædecessorum pietate degener, et ingratus in Apostolicam Sedem, ex eo poteris intelligere, quod ipse feudatarius antea esset Romanæ Ecclesiæ ratione regni Aragonum, regnumque titulum regni ejus beneficio Sedis Apostolicæ possideret, cum avus ejus pater Jacobi, cujus filius erat, itidem Petrus dictus, Aragonum rex, regnum Romanæ Ecclesiæ obtulisset. Quod apparet ex ejusdem primi Aragonum regis Diplomate, quod hic tibi (quod perbreve sit) describendum curavimus. Sic se habet:

106. « Cum corde credam et ore confitear, quod Romanus Pontifex, qui est beati Petri successor, vicarius sit illius per quem reges regnant et principes principantur, qui dominatur in regno hominum, et cui vult dat illud. Ego Petrus Dei gratia rex Aragonum, comes Barchioneus, et dominus Montis-Pessulani, cupiens principali post Deum beati Petri et Apostolicæ Sedis protectione muniri: Tibi, reverendissime pater et domine, summe Pontifex Innocenti, et per te sacrosanctæ Romanæ Apostolicæ Sedi offero regnum meum, illudque

¹ Dan. iv.

tibi et successoribus tuis in perpetuum divini amoris intuitu, et pro remedio animæ meæ et progenitorum meorum, consilio censuale, ut annuatim de camera regis ducenta quinquaginta massetunæ Apostolicæ Sedi reddantur, et ego et successores mei specialiter ei fideles et obnoxii teneamur. Hoc autem lege perpetua servandum fore decerno; quia spero firmiter et confido, quod tu et successores tui, me ac successores meos, et regnum prædictum Apostolica auctoritate defenditis: præsertim cum ex multo devotionis affectu me ad Sedem Apostolicam accedentem, tuis quasi beati Petri manibus, in regem solemniter coronandum voluisti. Ut autem hæc regalis concessio inviolabilem obtineat firmitatem, de consilio procerum curiæ meæ, præsentē venerabili patre meo Arelatensi archiepiscopo, et Sancio patruo meo, et Hugone de Baucio, et Arnaldo de Fociano, baronibus meis, sigilli mei feci munimine roborari. Actum Romæ apud sanctum Petrum, anno Incarnationis Dominicæ millesimo ducentesimo quarto, idus Novembris, anno regni mei octavo. Fuit idem annus Innocentii papæ Tertii septimus. Bernardus ejus temporis scriptor in Chronico, dum de his agit, elucidat summam polliciti census, nempe fuisse ducentas quinquaginta uncias auri. Extat in Codice privilegiorum Romanæ Ecclesiæ.

107. Qui igitur feudatarius Romanæ Ecclesiæ erat atque juramentum fidelitatis præstiterat eidem, invadens regnum Siciliæ feudatarium Romanæ Ecclesiæ, adversus eam rebellis extitit et contumax adversarius, rursum erigens monarchiam: quam ob causam (ut audisti) sententia excommunicationis affectus, in ea dum vixit perseveravit impœnitens, regnum relinquens Jacobo filio, anno millesimo ducentesimo octogesimo quarto, qui eadem cum patre est sententia condemnatus, ipso regno per annos septuaginta (ut Gregorius Undecimus papa testatur) interdicti pœnam subeunte. Dixerisne tu, lector, si bona fide rem agis, eos omnes, qui eo temporis spatio reges Aragonum in Sicilia, qui invita, contradicente atque irrogante pœnas, Sede Apostolica, regnare, legitimos fuisse reges, an potius jure censueris nominandos fuisse tyrannos? Dixerisne, si æquitatis es arbiter, ipsos Romanos Pontifices eodem tempore consulentes Romanæ Ecclesiæ juribus in Sicilia collabentibus, non legitime investisse de eodem Siciliæ regno a tyranno eo modo occupato atque detento Andegavenses, quousque Aragonenses in ea contumacia perstiterē, et pulsando ostium Romanæ Ecclesiæ, ea aperiente ingredientes, legitimi facti sunt regni Siciliæ possessores.

108. Qui primi ostium pulsare fuere duo Frederici, Secundus et Tertius dicti, iidem Siciliæ reges, quorum prior fuit Petri filius, qui post Jacobum fratrem regnavit; posterior vero idemque Sextus numeratus Aragonensium Siciliæ rex, Frederici prioris nepos, filius vero Petri Secundi. Senior Fredericus inita concordia cum Andegavensi-

bus Carolo Secundo et Roberto nepote, Siciliæ regibus legitimis, qui investituram acceperant a Romano Pontifice, junctoque fœdere nuptiarum inter eos, cum Elionoram Caroli filiam in conjugem accepisset, sic pactus est cum illis, ut ipse dum viveret Fredericus, dominus Siciliæ ultra Pharam esset, ita tamen, ut non Siciliæ, sed rex Trinacriæ diceretur, et post ejus obitum regnum illud rediret ad Carolum sive hæredes ejus: recognosceret vero Romanam Ecclesiam ejusdem Trinacriæ regni dominam, cui census more majorum persolveret et præscriptas condiciones impleret, et inter alias, eas quæ libertatem et immunitatem Ecclesiasticam in omnibus in statum pristinum revocarent, atque plenissime restituerent. Extat de his Bonifacii papæ VIII Diploma, quod incipit: « Rex pacificus, cujus locus factus est in pace etc. » Et paulo post hæc de Aragonensibus, qui regnum Siciliæ occupassent, et hactenus tyrannicè possederant: « Sane post commotionis amaræ dissidium, et protervæ rebellionis insultum in insula Siciliæ ex favore reprobiæ præsumptionis exortam, ac subsecutam invasionem et occupationem ipsius per Petrum olim regem Aragonum attentatas, ejusque posteros cum accessione vitii continuatas, in culpam rebellionis ex eodem et invasionis excessu, et illicita continuatione protracta, prout sana judicia supponunt, etc. » Datum habetur Anagninæ duodecimo kalendas Junii, anno nono ejus Pontificatus, qui est Redemptoris millesimus trecentessimus secundus. Sic igitur monarchia per Petrum restituta, ejusque filium primogenitum Jacobum successorem propagata, demum per Fredericum ejus filium, hujus fratrem, est penitus fracta, libertas vero Ecclesiæ revocata, cum se dictis conditionibus obligavit, quibus Romanam Ecclesiam, cui eo nomine census solveret, dominam recognosceret, eamque potiri juribus omnibus immunitatis in Sicilia, ut prius ex præscripto sacrorum canonum possedisset, promisit, atque juramento firmavit. Quæ hæc omnia ad tempus vitæ suæ servanda a Frederico II promissa, Fredericus III cumulatius præstitit, dum se suosque in perpetuum successores, ad ea cuncta implenda quæ innovatam violentam monarchiam destruerent, voluit quam firmissime obligasse.

109. Porro Fredericus Secundus bellum cum Roberto aggreditur, anno Redemptoris millesimo trecentesimo decimo tertio, quod et prosecutus est Petrus secundus et Ludovicus, per quos, increbrescentibus præliis, religio ubique coli neglecta est, et monarchiæ aconitum in necem miserorum hominum Ecclesiæ perduellium crevit. Tandem vero cum post diuturna bella, quæ per septuaginta eoque plures annos, inter Andegavenses legitimis Siciliæ reges et Aragonios, Petri regis, qui insulam adversus Carolum Primum occuparat, successores gesta fuerant, pax et concordia a Joanna regina, Caroli abnepte, cum Frederico tertio, Petri ejusdem pronepote, his conditionibus inita fuisset.

ut Fridericus ejusque hæredes, Siciliæ insulam, seu regnum Trinacriæ (sic enim nuncupari placuerat) possiderent, ita tamen, ut eam a regina ejusque posteris se tenere agnoscerent, ac pro ea fidelitatem et homagium illis jurarent, et quotannis, in festo Apostolorum Petri et Pauli, reginæ ejusque successoribus auri unciarum tria millia Neapoli persolverent; quæ congruentem insulæ partem conficiebant octo millium, quæ a Siciliæ regibus, totius regni nomine quotannis Sedi Apostolicæ debebantur: cum his, inquam, aliisque de mutua inter utrosque confœderatione et auxilio legibus, sub Pontificis Ecclesiæque Romanæ, ad quam directum ejus regni dominium spectabat, beneplacito et assensu convenissent; Gregorius Undecimus, qui Ecclesiæ tum regebat, etsi animadvertibat divisionem hanc regni a Clementis Quarti Constitutione, qui in Caroli Primi investitura, Siciliam a terra quæ est citra Pharium, sejungi vetuerat, alienam esse; permotus tamen tot stragium et depredationum, quæ ex bellis prodierant, consideratione; et quod propter interdictum, cui Sicilia per multos annos subjacuerat, divini cultus ratio populi que pietas usque adeo decreverant, ut periclitari in ea fides Catholica videretur; exemplo Bonifacii, de quo dictum, relaxandam hac ex parte prædictam constitutionem (quam in cæteris, quæ hujus concordie articulis non continerentur, integram atque intactam manere jubebat) quoad regni partes iterum aliquando coalescerent, conventionisque inter Joannam et Fridericum tabulas approbandas censuit, nonnullis tamen adjunctis et explicatis, quæ desiderari judicaret, ac tribus maxime capitulis, quæ ut in omnibus olim regum Siciliæ investituris proponi consueverant, ita in posterum a regibus Trinacriæ pari studio servari oporteret.

112. Primum quidem ad homagium sacramentumque fidelitatis pertinebat, quod Romano Pontifici præstaret, suisque temporibus renovare ac regis quoque litteris testari jubebantur. Deinde ad successores, ut descendentes dumtaxat a Friderico, sique legitimi, in Trinacriæ regno succederent. His autem deficientibus, regnum ad Joannæ hæredes si qui essent, aut his quoque sublati, ad Romanam Ecclesiam devolveretur.

Alterum ad Ecclesiasticorum jura, eorumque conservationem; de bonis scilicet ipsorum restituendis omnibusque privilegiis a jure concessis conservandis. De tuendo electionum et nominationum jure ac libertate, sine ulla regii consensus necessitate. De causis clericorum per ordinarios aut Pontificis delegatos terminandis, appellationibusque ad Sedem Apostolicam non inhibendis. De revocandis statutis et legibus, si quæ a Friderico ipso prædecessoribusque editæ essent contra Ecclesiasticam libertatem; aliisque in posterum non sanciendis.

113. Tertium, ne regnum Trinacriæ cum imperio Romano, vel regno Teutoniæ, seu dominio Longobardiæ vel Tusciæ sine expressa Pontificis

voluntate conjungi unquam posset: si secus fieret, regno exciderent reges, et ad Ecclesiam Romanam devolutum censeretur.

His ergo adjunctis conditionibus, Gregorius, cum Joannæ et Friderici concordie capitula apud Villam-Novam, Avenionensis diocesis oppidum, VI kalendas Septembris, Pontificatus sui anno secundo confirmasset: Joannæ eadem omnia postmodum cum Friderici legatis, regis sui nomine acceptantibus, coram Joanne episcopo Sarlatensi, Sedis Apostolicæ nuntio in eam rem delegato, ratificavit Aversæ, die ultima mensis Martii decimæ Indictionis, anno Domini MCLXXIII. Deinde Fridericus ipse in ejusdem episcopi manibus homagium pro Trinacriæ regno Pontifici juravit Messanæ, anno MCLXXIV, die decima septima Januarii, Indictione undecima, Pontificatus Gregorii anno quarto, ut ex publicis instrumentis constat, quæ omnia in omnibus integerrima tum Vaticana Bibliotheca, tum Apostolicæ Sedis archiva conservant. Porro autem ex hujus concordie auctoritate in regno Trinacriæ successuri erant Friderici posterum.

114. Verum is unicam filiam reliquit, quæ sine liberis defuncta, Aragonii Siciliam occupavit, non ut Friderici hujus, sed quod profiterentur, ut Petri Primi tyranni hæredes; et homagium, utpote qui sine investitura regnabant, nullum præstiterunt. Sicque ex consuetâ atque sæpe iteratâ tyrannide parta est violenta iterum monarchia, profidentes successores se, ut Petri Primi invasoris hæredes, Siciliam possidere, utpote, quos necessario fateri oporteat, se hæredes esse tyrannidis, invasionis, cum in hæredes vitia transcant hereditatis, quos sequatur et pœna excommunicationis, quæ Petrum, cujus se jactant hæredes, affecerat, sicque in hoc vocati sint omnes, iisdem non dico juribus, sed injuriis innitentes, ut maledictionem hereditate possideant; quorum adeo fuit deplorata conditio, ut eos non a sacrilegiis his revocaverit timor ille, qui tonitru summi Tonantis mortales concutit verbis illis: « Et quid prodest homini si universum mundum lucretur, animæ vero suæ detrimentum patiat? Aut quam dabit homo commutationem pro anima sua? »

115. Quod autem religiosiores omnino existimemus esse recentiores Siciliæ reges, procul abest ut credere vel opinari velimus, eos in Siciliâ ultra Pharium regni possessione inniti Petro, manifesta tyrannide jura Ecclesiæ invadenti ac pessumdanti, ob idque ad interitum usque execrationibus diris affecto: quin potius quod pietas et ratio persuadent, eorum se Siciliæ regum successores esse legitimos gloriantur, qui legitime illud ab habente ejus verum dominium, ab ipsa ejus domina Sede Apostolica obtinuerunt, ut Friderici Tertiî de quo diximus, qui recensitis superius pro immunitate ac libertate Ecclesiastica conditionibus observandis, illud ad successores omnes posteros voluit propagari. Cujus

¹ Matth. xvi.

si qui dedignantur hæredes haberi, sed magis Petri successores voluerint nominari; plane (quod horresco dicere) cum illo dici tyranni, et eisdem cum illo infamari probrosis titulis in Bullis a Romanis Pontificibus irrogatis, et eorum percelsis sententiiis anathematis velint. Quod Deus prorsus avertat. Cum præsertim ejusmodi professione, omni se penitus ejus adipiscendi regni jure privarent, cum nullus penitus asserere legitime possit eum fuisse vere Siciliæ dominum, quam non ab Ecclesia Romana, habente ejus directum dominium, accepisset. Nam esto quod Carolus eodem regno privari valuerit: numquid aliquam de ipso pati jacturam Romana Ecclesia potuit, et sic suis juribus spoliari? quod nemo certe divinarum et humanarum legum peritus vel somnians poterit affirmare.

116. Sed prosequamur posteriores Siciliæ reges, atque rerum eventa quam breviter perstringamus, acturi rursum de singulis suo tempore, si Deus concesserit, locupletius. Deficiente Andegavensium stirpe in Joanna Secunda, cum Martinus Quintus anno Redemptoris millesimo quadringentesimo vicesimo eam abdicasset, Ludovicumque Tertium ducem Andegavensium ejus loco regem designasset: illa Alphonsum regem Aragonum et Siciliæ insulæ, deinde mutato consilio, Ludovicum eundem rejecto Alphonso adoptavit, anno millesimo quadringentesimo vicesimo tertio. Cæterum præliis rem agentibus, post varia bella victor Alphonsus, ut stabiliret sua, investituram Siciliæ, et terræ citra Pharus ab Eugenio papa Quarto tandem obtinuit, anno Christi millesimo quadringentesimo quadragesimo tertio, atque ita utriusque Siciliæ, sive Siciliæ citra et ultra Pharus, partibus regni post tot annos conjunctis, factus est rex. Ita dicto anno, concedente Eugenio, id. Julii. Cujus Diplomate juberetur, utraque Sicilia indivisa ab invicem semper in posterum permanere. Exstat ratificatio ejusdem Alphonsi, facta post ferme biennium, nempe anno salutis millesimo quadringentesimo quadragesimo quinto, die secunda mensis Junii, qua et continetur homagium ab ipso Romæ præstitum, istis verbis:

117. « Ego Alphonsus, Dei gratia rex Siciliæ, plenum homagium ligium et vassalagium faciens vobis domino meo Eugenio papæ IV, et Ecclesiæ Romanæ, pro REGNO SICILIÆ ET TOTA TERRA IPSIUS, quæ est citra Pharus usque ad confinium terrarum ipsius Ecclesiæ, excepta civitate Beneventana cum toto territorio ac omnibus districtibus ac pertinentiis suis secundum, antiquos fines territorii pertinentiarum, et districtus civitatis ejusdem, per Romanum Pontificem distinctos, vel in posterum distinguendos: ab hac hora ut antea fidelis et obediens ero beato Petro, et vobis domino meo domino Eugenio papæ IV, vestrisque successoribus Romanis Pontificibus canonice intrantibus, sanctæque Apostolicæ Romanæ Ecclesiæ. Non ero in consilio, vel consensu seu facto, ut vitam perdati seu perdant, aut membrum, sive capiuntur vel

capiantur mala captione. Consilium, quod mihi credituri estis per vos aut nuntios vestros, vel per litteras, ad vestrum vel eorum damnum scienter nemini pandam. Et si scivero fieri aut procurari seu tractari aliquid quod sit in vestrum aut ipsorum damnum, illud pro posse impediam. Et si hoc impedire non possum, illud vobis vel eis significare curabo. Papatum Romanum, Regalia S. Petri tam in REGNO SICILIÆ ET TERRA prædictis, quam alibi consistentia adjutor vobis et eis ero ad retinendum, defendendum et recuperandum, ac recuperata manutenendum contra omnes homines.

118. « Universas et singulas condiciones superscriptas, et contentas in præsentibus litteris Apostolicis, super IPSORUM REGNI ET TERRÆ concessione confectis, et omnia et singula quæ continentur in eisdem litteris, plenarie adimplebo, et nullo unquam tempore veniam contra illa: et maxime, quod ego nunquam per me vel alium, seu alios, quoquo modo procurabo ut eligar vel nominer in regem vel imperatorem Romanorum, seu regem Teutoniarum, aut dominum Longobardiæ vel Tusciæ, seu majoris partis earumdem; et si electio de me celebrari contigerit, nullum hujusmodi electioni, seu nominationi assensum præstabo, nec intronitam me modo aliquo de eorum vel alicujus ipsorum regimine, neque etiam de civitate Beneventana et suis pertinentiis, seu Campania, vel Maritima, ducatu Spoletano, marchia Anconitana, patrimonio beati Petri in Tuscia, Massa Trebaria, Romandiola, alma Urbe, in civitatibus Perusina, civitate Castellì, Bononiensi, Ferrariensi, et Avinionensi, comitatu Venassini, seu in aliis terris quibuscumque vestris et domaniis, seu feudis ipsius Ecclesiæ ubilibet constitutis ex successione vel legato, aut venditione seu donatione, seu alio quovis titulo vel contractu: et nihil unquam mihi acquiram seu vindicabo, seu potero acquirere, vel quomodolibet vindicare, et nihil unquam recipiam vel habebo, vel potero recipere, habere vel retinere in illis; neque ullam potestariam, capitaniam vel rectoriam, nullumque aliud officium recipiam seu accipere potero, habebo vel retinebo, aut habere seu retinere potero in eisdem, aut ipsorum aliquo; nec etiam occupabo aut occupare permittam, seu faciam præmissa, vel partem aliquam eorumdem; nec illa offendam vel molestabo; nec etiam Romanam Ecclesiam quoquo modo sub censuris, pœnisque spiritualibus et temporalibus in superscriptis conditionibus et in feudationibus contentis, quas hic haberi volo in singulis partibus alias pro specificè repetitis etiam et expressis.

119. « Item perditionis alumnus Amedeo hæretico et schismatico, a fide devio, et ab ipsa Ecclesia præciso et sententialiter condemnato, ejusque sequacibus et dantibus ei auxilium, consilium vel favorem non dabo quovis modo, per me seu alium, seu alios directe vel indirecte, publice vel occulte auxilium, consilium, vel favorem; nec ab aliis quantum in me fuerit, si impedire potero, dari

permittam, sed eos juxta posse meum, donec convertantur, persequar et invadam. Sic me Deus adjuvet et hæc sancta Evangelia». Hactenus homagium et juramentum intertextum in ipsa Alphonso ratificatione, ubi in fine : « Datum Neapoli apud majorem Ecclesiam per manus mei predicti regis Alphonso, anno a Nativitate Domini millesimo quadringentesimo quadragésimo quinto, die secunda mensis Junii, octava Indictionis, regnorum nostrorum anno trigesimo, hujus vero Siciliae citra Pharium regni undecimo ». Hæc ibi.

120. Qui cavillantur ex eo quod semel ejus ratificationis exordio scriptum invenitur, investituram Eugenii esse de regno Siciliae citra Pharium, non nisi pro eo ratificationem factam esse contendunt. Verum cum ipsum ibi ab eo integrum Eugenii Diploma recitetur verbatim, in quo centies reperitur, dari ab eo investituram de utraque Sicilia, sique formandum homagium et juramentum, quod ibi cum Eugenii Bulla recensuerit atque descripserit in ipsa sua ratificatione : quomodo ex ipso nec non convincitur mendacium, ut amplius dubitandi locus reliquus esse non possit, cum præsertim decreto Eugenii ibidem descripto junctum sic fuerit ab eo utrumque regnum, ut non liceat ipsa ab invicem separari?

121. Recitantur autem in ratificatione facta ab eodem Alphonso, omnes conditiones ab Eugenio propositæ, a se autem acceptæ atque rite habite, juratæ atque subscriptæ, et ipsæ quidem, quibus omnia Ecclesiæ jura collapsa, a regibus usurpata, revocantur in pristinum usum, quæ vindicarent ipsam Ecclesiam in pristina libertatem, præcis vinclis omnibus tyrannicæ monarchiæ, iisdem plane et amplioribus appositis conditionibus, quas superius recitatas legisti ex Diplomate Clementis pape Quarti de investitura facta Carolo regi : ut non sit quod possit desiderari ad perfectam extinctionem infante monarchiæ, et absolutissimam restitutionem Ecclesiasticæ libertatis.

Ut autem proseguatur de reliquis dicere : ex novo accidente, nova rursus regni divisio facta est. Sicilia enim insula cum regno Aragoniæ ad Joannem ejus fratrem, quod Alphonsus legitima prole careret, transiit, ejus filius et successor fuit postea rex Catholicus. Qui quidem Joannes, cum absque investitura ab Apostolica Sede accepta regnaret, nec peteret, Pius papa Secundus concessit investituram Ferdinando, Alphonso filio naturali, de utraque Sicilia, anno millesimo quadringentesimo quinquagesimo octavo. Extat ipsum Pontificium Diploma de investitura utriusque Siciliae facta eidem Ferdinando, quod incipit : « Divina disponente clementia, per quam reges regnant et principes imperant, etc. »

122. In quo primum mentio habetur de investitura facta ab Eugenio papa Quarto ejus patri Alphonso expressissime de regno utriusque Siciliae, deque alia eidem de utroque regno facta ab Eugenio successore, Nicolao papa Quinto, eidem Fer-

dinando post obitum patris sui, quem habilitasset ad utriusque regni successionem simulque posteros omnes. In eodem pariter omnes et singulæ recensite habentur, inter alias multas conditiones, illæ quibus detestabilis monarchia proscriberetur omnino, et sancta libertas Ecclesiæ in omnibus restitueretur, atque conservaretur illæsa in suis omnibus juribus et privilegiis, cum iisdem plane conditionibus et capitulis, quæ superius sunt recitata in Carolo regis investitura per Clementem Quartum facta. Nam in ea sigillatim sunt posita, ad verbumque repetita omnia illa, cum solita detestatione et prohibitione omnium legum, quæ a tribus illis tyrannis, sive a Joanna regina, sive ab aliis promulgatæ fuissent. Extat ipsum Diploma una cum subscriptione testium, datum anno Domini millesimo quadringentesimo quinquagesimo octavo, quarto idus Novembris, Pontificatus Pii Secundi pape anno primo. Cui mox subjicitur ratificatio ipsius Ferdinandi, habita sæpius expressissima mentione de facta et ratificata investitura Siciliae utriusque ultra et citra Pharium, ut nihil penitus sit, quod in iis desiderari possit.

Sed et Sixtum papam Quartum, eandem investituram a Pio Secundo factam de Sicilia et terra quoque citra Pharium, eidem Ferdinando iisdem conditionibus confirmasse, ex ejus apparet Diplomate, dato anno primo sui Pontificatus, Redemptoris vero anno millesimo quadringentesimo septuagesimo primo.

123. Ipse etiam Ferdinandus rex prospiciens in futurum, egit apud Innocentium papam Octavum, ut investiret de regno Siciliae et terra citra Pharium filium suum primogenitum Alphonsum, tunc ducem Calabriæ, necnon ejusdem Alphonso filium primogenitum Ferdinandum, tunc Capuæ principem ; iidem de regno Siciliae et terra citra Pharium, in qua solemniter investitura omnes illæ posite et descriptæ fuerunt conditiones pro libertate et immunitate Ecclesiastica tam locorum quam personarum, quas conscriptas superius legisti in investitura a Clemente papa Carolo regi facta, continentes libera jura appellandi ad Apostolicam Sedem, et abrogationes legum Friderici, sive aliorum quorumcumque contra libertatem Ecclesiasticam editarum : ita ut ne vel minimum quidpiam prætermisum, vel diminutum a recitalis superius iisdem conditionibus invenitur.

Facta est ejusmodi investitura, datumque Diploma Romæ, anno Redemptoris millesimo quadringentesimo nonagesimo secundo, pridie nonas Junii, anno ejusdem Innocentii Pontificatus octavo, ejus est exordium : « Romanus Pontifex inter curas multiplices, etc. » Habemus exemplaria ejusdem investiture in Vaticana Bibliotheca ; authentica vero originalia in archivo in castello Sancti-Angeli asservantur.

124. Sed modo dicendum de alio Ferdinando, cognomento Catholico, qui de Sicilia citra Pharium a Julio II papa investituram accepit, cum tamen

Siciliæ ultra Pharam regnum, quod succedens (ut dictum est) Joanni patri acceperat, absque investitura aliqua possideret. Sed quæ ratio, ut Siciliæ citra Pharam peteret investituram ab Apostolica Sede, Siciliæ vero ultra Pharam minime? cum æque utriusque Siciliæ dominium penes eandem Apostolicam Sedem esset, et sicut illius, ita et istius investituram conferre consueverint Romani Pontifices a primis temporibus, cum ea Sarraënis expulsis, sunt potiti Northmanni, et Robertus Guiscardus, qui primus invasit, et frater ejus Rogerius, qui plene possedit (ut pluribus de singulis dictum est superius suis locis) sicut et posteri usque ad tyrannos Conradum, atque Manfredum, et Conradinum, de Sicilia ultra Pharam, sicut de Sicilia citra Pharam, quam vocant, æque ab Apostolica Sede acceperunt investituram.

125. Sed num quia non accepit Petrus, de quo superius dictum, bene factum probari potuit, cum quantumlibet juste, ut sibi visum est, eam vindicasset a Carolo? numquid ab ipsa Sede Apostolica potuit abstulisse dominium, quod et posteriores, iidemque prudentiores reges sunt venerati, Fridericus Secundus, Tertius, et alii superius recensiti, qui ab ipsa Sede Apostolica non alterius, sed utriusque Siciliæ investituram ab Apostolica Sede petierunt et acceperunt? Sed numquid Julius, qui Siciliæ citra Pharam tantum investituram petenti tradidit Ferdinando, voluit Ecclesiæ Romanæ juribus super Siciliam ultra Pharam aliquid derogatum contra omnia prædecessorum Diplomata? vel ejus successores Romani Pontifices, qui ad instar Julii, successoribus regibus investituram concessere Siciliæ citra Pharam, deniptum et abrogatum voluerunt dominium directum, quod semper habuit eadem Romana Ecclesia in regno Siciliæ ultra Pharam? minime gentium. Siquidem de ea re privilegia per singulas investturas diversis collatas usu recepta, probata, confirmata atque adeo stabilita fuere, ut ad abrogationem eorum, specialem mentionem requirerent, et causam magnam exposcerent. Cum igitur a nullo penitus Romanorum Pontificum iisdem vel in minimo derogatum possit ostendi: eadem Ecclesiæ Romanæ jura suo robore integra permanere quis est qui negare præsumat? Cæterum ipsi Romani Pontifices uti patres ista interdum toleranda pro temporum ratione, et dissimulanda putarunt ad tempus, fidentes ad iracundiam provocare filios suos¹. Sed numquid dormiunt vel dormitabit qui custodit Israel, ut non sit exacturus rationem? non puto. An patietur ipse cujus sunt ista, Petrus², qui de suo ipsorum vendito agro exigens severus exactor a dominis rationem, eosdem partem pretii occultantes, obtegentes fraudem mendacio, interfecit spiritui oris sui? non certe.

126. Quod vero magnopere admiramur, illud est: quemodo in investitura facta Ferdinando Ca-

tholico a Julio papa, usurpata adeo reperitur inversio nominum, ut per Siciliam et terram citra Pharam non utraque Sicilia intelligatur, cum semper a majoribus, ex quo etiam facta est ante Carolum Primum investitura Henrico Anglorum regi, et per eum ejus filio Eadmundo, et sic in cæteris omnibus usque ad hæc tempora Julii, in omnibus investituris, et earum per reges exhibitas ratificationibus, in illis verbis frequenter adhiberi solitis, Sicilia cum terra ultra Pharam, seu, Sicilia et terra ultra Pharam; semper, inquam, per hæc verba intelligi voluerunt utramque Siciliam, ultra Pharam videlicet, et citra Pharam? At in dicta Julii investitura, per eadem verba, Sicilia et terra citra Pharam, seu, Sicilia cum tota terra citra Pharam, nisi Siciliam citra Pharam intelligi debere, de qua facta legitur investitura, contendunt. Cæterum si verba illa more majorum sunt intelligenda, haud dubium de utraque Sicilia Ferdinandum dixeris accepisse, dum sic ipse jurat:

127. «Ego Ferdinandus, Dei gratia rex Siciliæ citra Pharam et Hierusalem, plenum homagium ligium et vassallagium faciens vobis, domino nostro domino Julio papa Secundo et Ecclesiæ Romanæ, pro regno Siciliæ et Hierusalem, atque tota terra quæ est citra Pharam usque ad confinium terrarum ipsius Ecclesiæ, excepta civitate Beneventana, etc.» Et inferius, ex parte hæredum et successorum: «In proprio, inquit, juramento fatebuntur, et recognoscent expresse, regnum Siciliæ et Hierusalem ac totam terram eorum, quæ est citra Pharam usque ad confinia, ut supra». Pergit: «Et mera liberalitate Sedis Apostolicæ et nostræ, sibi suisque hæredibus et successoribus fuisse concessa, ipsosque recepisse et tenere regnum Siciliæ et terram hujusmodi a nobis, et dicta Romana Ecclesia, etc.» Quæ, inquam, verba, si posita sint eo sensu, quo poni usque ad ea tempora consueverunt in omnibus investituris, res pie ac religiose confecta est, ut facta dicatur investitura de utraque Sicilia, etiam si de Sicilia citra Pharam tantum factam investituram, sit dictum superius: si vero alio sensu quam sonant sint posita, ecce in verbis caplio et deceptio. Cæterum Julius papa, qui rebellione Alphonsi Ferrariæ ducis, et aliorum magnopere urgebatur, egebatque auxilio (ut ipse ibi testatur) ejusdem Ferdinandi contra rebelles atque tyrannos, haud de investitura Siciliæ ultra Pharam explicatius agendum existimavit; cum tamen nequidquam jura Apostolicæ Sedis super idem regnum Siciliæ ultra Pharam dimisisset eo Diplomate vel alio, neque aliquis successorum, qui eadem verborum forma conceperit investturas a se factas sive Carolo V, sive Philippis regibus, dici possit, ita ut in omnibus penitus remaneant integra necesse sit jura Apostolicæ Sedis in regno Siciliæ ultra Pharam, sicut et citra Pharam, quæ possidet.

128. Quibus a Nicolai papa Secundi tempore, per spatium quingentorum fere annorum possessis per investituram ab eo factam Roberto Guiscardo,

¹ Psal. cxx. — ² Act. v.

et per successores Romanorum Pontificum successoribus Northmannis comitibus, ducibus atque regibus, et post eos Constantie et ejus filio Friderico, inde Anglorum regi, deinde Carolo et successoribus Andegavensibus, postea Friderico Secundo et Tercio Aragonensibus, inde Alphonso et ejus filio Ferdinando notho atque nepotibus : et his omnibus exhibitis semper investituris cum conditionibus omnibus, quibus sunt jura Ecclesiastica immunitatis semper conservata in omnibus integra et illaesa, iisdemque a nemine Romanorum Pontificis revocatis speciali aliqua quae exigebatur abrogatione, derogatione, abrenuntiatione, et sic alteri facta expressa concessione : quomodo absque speciali facta investitura ab ipsa Apostolica Sede vere domina, de regno Siciliae ultra Pharus, illud ab eis dici potest legitime possideri, et non potius occupari, et praeter omne jus fasque violentia delinere? Cum ostendendum sit, quando vel quomodo semel ab ejus directo dominio excidit Apostolica Sede, ut absque investitura per eum faciendi possit a quopiam illud regnum legitime possideri. At haec cursim modo, suis autem temporibus agendum pluribus.

120. Sed quod polliciti sumus, ea etiam, licet breviter, de his quae spectant ad rerum usum insinuare : de his acturi, incipiamus ab eo tempore, quo sub Innocentio papa Tercio ipsa male coepta exstincta est monarchia, perveniamusque usque ad Carolum Quintum, quo restituta ponitur, per quaeque saecula, actales omnes, in quibus ostendamus jugem continualamque possessionem omnium jurium Romanae Ecclesiae in omnem Ecclesiam Siciliae etiam ultra Pharus. Ecce Innocentius ipse visitatorem mittit illic plenissima facultate ea quae opus essent agendi, cardinalem episcopum Ostiensium. Extant adhuc datae litterae Apostolicae ad archiepiscopos, episcopos, abbates et alios; Innoc. Registr. tom. 1, lib. 1, Epist. cxv. Insuper misisse reperitur rursus legatum presbyterum cardinalem S. Laurentii in Lucina, ut apparet in 2 et 3 cap. sub tit. de Offic. deleg. extr. Adhuc etiam constituisse legatum Syracusanum episcopum, ut habet Epist. dxi, lib. 4; postea vero alia occasione misisse item legatum a latere Gerardum diaconum, cardinalem S. Marie in Porticu, ut patet ex litteris ipsi datis pluribus ejusdem argumenti lib. cod. Epist. dlxxi, dlxxii, dlxxiv. Rursus post haec legatos misit a latere Julium presbyterum, cardinalem tituli S. Stephani in monte Celio, et Gerardum diaconum, cardinalem S. Hadriani, ut apparet ex litteris illis datis Epist. dlxxiii, lib. 4. Causas insuper deferri solitas ad Sedem Apostolicam, et ab illa delegatas diversis ejusdem insulae episcopis, docent aliae ejusdem Pontificis litterae. Epistol. clxxx, cccx, dlxxvi, lib. 1 et lib. 2. Epist. xiv. Haec quae cursim legendo invenimus in euso primo tomo Epistolarum ejusdem Innocentii papae Tertii, cum aliqui nec omnes datae ab eo Epistolae inveniantur, plerimas ex eis excidisse constat; aliae vero in aliis

voluminibus antiquitus scriptae in Vaticana Bibliotheca asservantur, ex quibus aliqua ad rem spectantia voluminus deprompsisse; hicque non eas descripsisse, sed indicasse tantum, signasseque loca, ut si velit lector, consulere ipsas possit.

130. Post alia namque habentur in iisdem quod idem Pontifex, anno quinto sui Pontificatus, misit in Siciliam R. S. Marcelli presbyterum cardinalem, et cum eo consobrinum suum Jacobum Mareschal, cum amplissima facultate. Extant de his litterae Apostolicae tomo tertio Epistolarum ejusdem Pontificis; incipiunt : « Opera testimonium perhibent veritati, etc. » Rursus anno septimo sui Pontificatus, misisse reperitur legatum in Siciliam G. diaconum cardinalem S. Hadriani, cui suas vices tribuit tam in spiritualibus quam in temporalibus. Datae de his litterae incipiunt : « Egressus satan, etc. » Extant libro septimo. Et ad regem Siciliae Fridericum, ut ejusdem legati monitis et consiliis acquiescat. Incipit Epistola : « Regiae excellentiae litteras, etc. » Et ad eundem legatum litterae de optimo statu regni instituendo.

131. Ejus vero successor Honorius papa Tertius, cujus Epistolarum adhuc extant volumina, nihil magis curasse videtur, quam ut jura Romanae Ecclesiae in Sicilia integra servarentur : sicque cum concedit privilegia archimandritae Messanensi, salvae Ecclesiae Romanae juribus id se facere contestatur Epistola xlii, libro primo, data kalendis Novembris anno Domini millesimo ducentesimo vicesimo sexto, Pontificatus anno primo. Litteris quoque saepe redarguit regem ipsum, quod se imminisceat electionibus et aliis juribus Ecclesiasticis : cum ipse rex Fridericus se id nec cogitasse facere excuset. Extant de his litterae dxxvii, libro tertio et dxxxi. Regis vero Epistola dxxii ad eundem Honorium papam, quibus excusans, haec inter alia ipse rex ait : « An forte nos ignorare creditis, quia qui praesumunt offendere sanctam matrem Ecclesiam, ipsi bibunt in calice Babylonis? etc. » Cujus Friderici regis tempore, quamvis idem Honorius papa cum experiretur adversum, nihilominus liberam in regno Siciliae jurisdictionem exercuisse reperitur, nimirum indixisse collectam de persolvenda vicesima omnium Ecclesiasticorum reddituum, pro subsidio Terrae Sanctae. Cujus causa legationem instituit ad ipsum Siciliae regnum. Extant de his litterae Apostolicae civ. ccclix, datae anno primo Pontificatus. Rursus de alia collecta indicta pro Templariis, Epistola cxxvi, libro tertio, data anno tertio sui Pontificatus. Insuper de appellationibus ad Sedem Apostolicam extat Epistola ejusdem Honorii papae sexcentesima, data anno secundo sui Pontificatus ad Syracusanum episcopum, cum tempore Innocentii papae ad Sedem Apostolicam appellasset : cujus causae juribus inspectis, idem Honorius adversariis perpetuum silentium indixit.

132. Successor Honorii post Gregorium et Celestinum, Innocentius papa Quartus duos legatos

in Siciliam misisse reperitur anno tertio sui Pontificatus, nempe S. presbyterum cardinalem S. Mariæ trans Tiberim, et R. sanctæ Mariæ in Cosmedin diaconum cardinalem, amplissima concessa eisdem facultate. Extant de his ejusdem Pontificis litteræ ad archiepiscopos, episcopos et abbates, atque barones ejus regni. Est undecima ejus anni tertii Epistolarum, quæ incipit: « Nostra ferventer in hoc aspirat affectio etc. » Alia rursum ad eosdem legatos, cum tribuit eis facultatem beneficia conferendi. Est 14 ordine; incipit: « Si circumspector Dominus etc. » Insuper idem Pontifex post hæc reperitur misisse nuntios in Siciliam. Extant de his litteræ Apostolicæ, datæ Lugduni anno ejus Pontificatus octavo, mense Februarii. Est eorum exordium: « Letentur celi etc. » Et ternæ aliæ quæ sequuntur, ejusdem sunt argumenti. Aliæ insuper, quibus continentur collationes beneficiorum ejusdem regni Siciliæ factæ diversis.

133. Sed quod tædio putamus fore lectori, si successorum singulorum Pontificum Romanorum hic nimia prolixitate describere velimus singula, sive de appellationibus ad Apostolicam Sedem ex eodem Siciliæ regno delatis, sive de legationibus ab eadem Sede in Siciliam missis, aliisque juriis libere jugiter administratis; satis esse putamus, si missis cæteris jungamus postrema prioribus, quibus significetur, eadem ipsa quæ actitata videmus, etiam usque ad dicta tempora Caroli V imperatoris perseverasse, nec unquam penitus desiisse. Progredientes igitur, ex Vaticanæ Bibliothecæ Epistolarum voluminibus antiquorum Romanorum Pontificum, divertamus aliquantisper ad Tabularium Camerale, ex cujus aliquibus scriptis libris, ista in exemplum perseverantis usus adduxisse sufficiat.

134. In libro Bullarum primo Bonifacii papæ Noni, qui in dicto Tabulario sive Archivio Camerali usque hodie asservatur, in primis Bulla habetur, qua mandatur nuntio Sedis Apostolicæ in regno Siciliæ restitutio rebellium. Data Romæ, quarto kalendas Februarii, anno primo Pontificatus. Hæc fol. 15.

Alia Bulla insuper, qua datur facultas eidem nuntio absolvendi excommunicatos ob violentas manus injectas in clericos. Dat. Rom. ut sup. fol. 117 et fol. 119. Habentur insuper litteræ Apostolicæ, quibus datur facultas nuntio Apostolico in regno Siciliæ colligendi decimas: Datæ habentur Romæ, tertio kal. Februarii, anno primo.

Rursum alia Bulla, qua datur facultas eidem nuntio in Sicilia consistenti, exigendi charitativum subsidium ab omnibus bona Ecclesiastica possidentibus, pro supportandis Apostolicæ Sedis oneribus. Data Romæ, tertio kal. Februarii, anno itidem primo Pontificatus ejusdem, ibid. fol. 123. Eidem nuntio facultas mittitur concedendi comitatum octo navibus Alexandria solventibus, ibid. fol. 129, 131. Facultas eidem nuntio datur dispensandi super defectum natalium fol. 131.

135. Anno vero secundo ipsius, missus reperitur in Siciliam ab eodem Pontifice, Nicolaus de Summa Ripa, ad componendas controversias ejusdem Siciliæ regni. Extat de his Bulla data Romæ, quarto nonas Julii, fol. 133, et fol. 136 facultas concessa componendi cum proceribus, de censibus non solutis Romanæ Ecclesiæ debitis. Quo pariter anno, deputatur ab eodem ad regnum Siciliæ Raymundus de Baucio de Ursinis, confalonarius papæ. Est de his Bulla data idibus Augusti, fol. 161.

Anno autem Pontificatus quarto aliæ datæ habentur litteræ Apostolicæ, quarto, kalendas Decembris, ad Apostolicæ Sedis nuntium, cum ei tribuuntur pro expensis quotidianis decem floreni aurei a clero ejusdem regni exigendi. Extant fol. 222, libro secundo.

Libro vero tertio Bullarum ejusdem Bonifacii papæ Noni est Bulla de Commissario deputato in Siciliam contra occupantes bona Ecclesiæ Panormitanæ. Data Romæ idibus Novembris, anno septimo, ibid. fol. 10. Qua die etiam habetur data alia Bulla de simili commissione, contra occupatores bonorum Sedis Apostolicæ in Sicilia.

Libro ultimo Clementis papæ Sexti Diploma extat, quo Guillelmus episcopus Nazarenus deputatur nuntius Apostolicæ Sedis, et Collector in regno Siciliæ ultra Pharus loco Theobaldi archiepiscopi Panormitani defuncti. Datum habetur Avenione, tertio kalendas Februarii, anno primo, ibid. fol. 532.

136. In eodem Camerali Tabulario, inter monumenta Innocentii papæ Sexti habetur Bulla, qua committitur Apostolicæ Sedis nuntio in regno Siciliæ commoranti, exactio spoliatorum defuncti episcopi Agrigentini. Data undecimo kalendas Februarii, anno quarto Pontificatus ejus, ibid. fol. 192, et duodecimo kalendas Martii. Eodem anno quarto Pontificatus ejus, habetur data Bulla, qua committitur episcopo Catanensi exactio omnium spoliatorum Siciliæ.

Ejusdem vero Innocentii papæ Sexti tempore, Nicolaus de Aragonia S. R. E. cardinalis, Commentarium scripsit de jurisdictione quadruplici demonstrata Romanæ Ecclesiæ in regnum Siciliæ. Extat volumen antiquitus scriptum in Vaticana Bibliotheca una cum aliis ejusdem auctoris commentariis.

137. Successor Innocentii, Urbanus Quintus, reperitur misisse nuntium et collectorem decimarum in Siciliam ultra Pharus, Dominicum de Sasonorio canonico Beneventanum. Extant de his ejus litteræ, datæ anno Domini millesimo trecentesimo sexagesimo octavo, Pontificatus ejus anno sexto, id est decima sexta Maii.

Ex libro tertio Apostolicarum litterarum Joannis papæ Vigésimi Tertii extant litteræ Apostolicæ, quibus Arago de Malaspina decernitur reformator in regno Siciliæ in rebus temporaliis, cui pro expensis persolvantur viginti quinque floreni a clero Siciliæ qualibet die. Conceditur eidem facultas

tas conferendi canonicatus et alia beneficia Ecclesiastica. Datæ habentur litteræ decima quinta kalendas Novembris, anno secundo ejus Pontificatus, fol. 116.

138. Insuper etiam consuevisse frequenter Apostolicam Sedem in Siciliam collectores mittere, cum vetera recensita, tum recentia sunt exempla. Extant enim in eodem Tabulario Camerali, Martini V litteræ Apostolicæ, quibus quidam Cyprius Balaverius deputatus in Sicilia collector reddituum et fructuum quorumcumque, Camere Apostolicæ debitorum. Datæ habentur Constantiæ, decimo kal. Octob., anno primo Pontificatus ejus, ibid. fol. 2. Novissime vero reperitur, quod Paulus papa III misit etiam speciatim in Siciliam collectores Tobiam Palavicinum, et Lucam Justinianum, deputatos ad colligendum subsidium medietatis veri annui valoris (ut verbis utar litterarum Apostolicarum) omnium fructuum beneficiorum Ecclesiasticorum. Missi sunt autem iidem idipsum prestare per universam Italiam; adeo ut nihil minus juris in Sicilia, quam in cæteris Italiæ provinciis, usque ad nostra tempora sibi Pontifex vindicaret. Quod quidem de his scriptum Diploma extat in libro impositionum Camere Apostolicæ, datum in eadem Camera Apostolica ultima Februarii, anno Domini millesimo quingentesimo quadragésimo tertio, Pontificatus vero ipsius anno nono, ibid. fol. 154. Ista sunt quæ spectant ad ipsum rerum usum, quem cursim rem agenti licuit reperisse.

139. Si autem Deus concesserit, ut in Anna-lum prosecutione futura tempora disquiramus, locupletiores de his tractationem pollicemur ex uberiori messe colligendam, quibus appareat, quantam scriptis omnibus reclamationibus, juri-bus omnibus contradicentibus, celo terraque testantibus, Apostolica Sedes in regno Siciliæ patitur injuriam, et sentiat suorum jurium detrimentum, et inauditam hactenus inter Catholicos ignominiam subire cogatur, rebus ipsis (quod est gravius) in deterius prelabentibus. Nam quæ est in his grave passa dispendium, et adhuc graviore in dies in eodem regno afficiatur opprobrio, jamque a tempore Caroli V experta plane intolerabile in spiritualibus et temporalibus damnum, cum in temporalis dominio domina ignoretur, et in spiri-tuali esse nesciatur, quod est: Universalis Eccle-sia; cum in his quæ sunt divini humanique juris exercendis in Sicilia careat facultate, ut quæ re-censita sunt superius manifestant: lugubre cum Propheta lamentum occidit: « Super dolorem vulnere meorum addiderunt ». Quot enim opor-tuisset tanta ista quæ audent, Diplomatus esse concessa, quot specificis asserta sententis, definita clausulis, elucidata periculis, obsignata sigillis subscriptionibusque munita, ut vim aliquam obli-nerent, si tamen vel sic obtinere potuissent? ut

non levissimo prætextu Diplomatis Urbani papæ, nihil hujusmodi (ut ostensum est) concedentis, omnique ex parte mutantis, penitusque ruentis, ea servanda sancirent, usu rerum inducerent, reli-nerent, defenderent, in diesque deterius propaga-rent, quibus desciscant a matre, dissideant ab Ecclesia, cui renunt vel in iis quæ juris divini, naturalis, canonici, communisque sint, parere.

140. Quæ quidem, etsi authentico, obsignato, subscripto, omnique ex parte fide constante Diplo-mate alicujus Romani Pontificis concessa monstrari possent: nec sic subsisterent, quæ contra præcipua Ecclesiæ Romanæ jura invenirentur esse disposita. Nam audi quæ mascula voce, energia virili, vigore sacerdotali in Henricum imperatorem, istiusmodi jura Ecclesiastica invadentem, Desiderius, idemque Victor papa Tertius, cum ei in faciem restitit, verba protulit: « Sedes enim, inquit, Apostolica domina est nostra, non ancilla, nec alicui subdita, sed omnibus prælata; et ideo nulla omnino ratione sub jugum a quoquam mitti potest. Quod si a Nico-lao papa factum est (scilicet ut arbitrium expectaretur imperatoris in electione Romani Pontificis, quod ut dictum est falso prætendebatur): injuste profecto et temere præsumptum est: non tamen ejusquam stultitia vel temeritate amittit Ecclesia dignitatem suam ». Hæc ipse. Quæ etiam eodem tempore Deusdedit, cardinalis tituli Eudoxiæ, (de quo suo loco dictum) scripto insigni volumine ad eundem Victorem Tertium papam, pluribus argu-mentis asseruit. Sed et sanctus Brunus episcopus Signinæ, et cum eo plurimi alii episcopi et cardinales, in Concilio Romano coegerunt Pascha-lem papam revocare quæ contra Romanæ Eccle-siæ jura promississet Henrico imperatori, ut suo loco inferius dicturi sumus.

141. Cum alioqui in confesso sit apud omnes, privilegia ab Apostolica Sede collata, non debere contra eandem Ecclesiam militare. In quam sen-tentiam Nicolaus papa, idemque Sanctus, ejus nomi-nis Primus, in decretali Epistola quam scripsit ad Henricum archiepiscopum Turonensem, quam superius suo loco reddidimus, ubi agit de privi-legio ab Apostolica Sede concessa Rheimensi Eccle-siæ, quo ejus archiepiscopus Hincmarus contra ipsam abuteretur, hæc inter alia habet: « Sic Apostolica Sedes aliena jura custodit, ut sua non minuat; sic honorem debitum dat, ut suum non tribuat alienis. Nam et arma illi a nobis collata, ita volumus, ut pro eo sint valida, ut potius pro nobis, ubi necesse est, non contra nos firmitatem obtineant ». Hæc ipse, qui de privilegio Apostolicæ Sedis agens, quo ipsa præsidet Ecclesiis omnibus, et ab omnibus exigit obedientiam, hæc habet, scribens ad Carolum Francorum regem: « Quæ tanta Sedis Apostolicæ privilegia usque ad mortem, ope freti divina, prædecessorum meorum vestigia sequendo, cassari taliter minime patiemur ». Et

¹ Psal. LXXIII.

¹ Chron. Cass. l. III. c. 49.

quod ad eam omnes appellandi nullius obice privilegii habeant facultatem, subiicit ista: «Privilegia namque Romanæ Ecclesiæ, totius sunt Christi (ut ita dicamus) remedia Ecclesiæ Catholice; privilegia, inquam, Petri arma sunt contra omnes impetus pravitalum, et monumenta et documenta domini sacerdotum, et omnium prorsus qui in sublimitate consistunt, imo cunctorum qui ab iisdem potestatibus diversis afficiuntur incommodis». At tanta ista Deo accepta, qui eorum est auctor, Angelis et hominibus reverenda, qui in eorum semper custodiam vigilant, ab ipso exordio nascentis Ecclesiæ usu recepta atque probata, unius sed mutilati nihilque huiusmodi concedentis Diplomatis occasione adducenda sunt in discrimen, exponenda ludibrio, atque penitus abolenda? At aboleri non possunt quæ vivunt in radice sua: sed qui præciditur ex eis ramus, arescit.

142. Quæ rursus ratio postulat, ut contra tot Romanorum Pontificum antea et postea data Diplomata, unum proponatur depravatum, omnino concisum, nunquam a successorum aliquo confirmatum, Diploma Urbani papæ, idemque etiam germanum legitimumque fuisset, jam in Rogerii heredibus desinens, nullius alterius Romanorum Pontificum confirmatione roboratum, imo contrariis penitus constitutionibus rescissum et abolitum, post tot sæcula oblivione sepultum, a nemine regum, qui contra Sedem Apostolicam pugnaverunt, nec minetenus cognitum, nedum exhibitum vel citatum: hoc ipsum, inquam, hoc sæculo nostro sub Carolo Quinto, ad erigendam contra Romanam Ecclesiam monarchiam emergerit redivivum? Cujus occasione flamma semel incensa in dies magis magisque majoribus incrementis Siculam depascat Ecclesiam, de qua illud propheticum jure occini posuit¹: «Olivam uberem, pulchram, fructiferam, speciosam vocavit Dominus nomen tuum; ad vocem loquelæ grandis exarsit ignis in ea, et combusta sunt fruteta ejus». At quæ loquela grandis? utique male usurpatum monarchiæ infaustum nomen, quo eadem infelix Ecclesia veluti igne consumpta, reducta suspiret in cinerem. Unica nobis reliqua spes in nostro Zorobabel, in Philippo Tertio, qui incensum restituat templum, et efficiat ut major sit gloria domus hujus novissimæ quam prioris², qui et exæquet magnum superbiæ montem in planum³.

143. Quod utique æquum est me sentire de tanto Catholico rege, pietate insigni, virtutum omnium corona fulgente. Cui in his explendis favet, rogemus jugiter, Spiritus sanctus. Illic nobis occasione Urbani papæ Diplomatis dicta sunt simpliciter, candore animi, ex corde puro⁴ (Deum testem invoco) conscientia bona, et fide non ficta. Cæterum sciat lector, nos ista hic obiter occasione Urbani papæ Diplomatis pertractasse: verum de his, quæ ad investituras Romanorum Pontificum de regno Sicilia ultra citraque Pharam posita

spectant, prolixior atque lucubrator tractatio erit, cum ad ipsa earum tempora, quibus date noscuntur, pervenerimus, simulque reliqua omnia, quæ sive per legatos vel nuntios, aut per Epistolas cum regibus vel episcopis, abbatibus aliisque religiosis personis vel laicis ab ipsis Romanis Pontificibus sunt transacta, majori otio opportuniorque occasione, reddentes cuncta temporibus suis, ex instituto omni fide constantia, in medium afferemus. Jam vero canentes receptui, quæ post Urbani papæ datum Diploma Salerni sunt secuta, narremus.

144. *Expeditionem in loca sancta Urbanus papa litteris ad Alexium imperatorem datis committatur.* — Accepta Capua in dedicationem, Boamundus frater Rogerii ducis ad militiam sacram accingitur, parat expeditionem, Hierosolimam profecturus, de quo ista Petrus diaconus Cassinensis¹: «Interca Boamundus Roberti ducis filius, qui primum cum parte, et per se postmodum nulla cum Constantinopolitano imperatore ejusque exercitibus prælia prospere gesserat, cum esset in expeditione una cum duce Rogerio in Campaniæ partibus, et hæc omnia confecisset (maximum hoc ipsum negotium) cælesti instinctu protinus jussit afferri pannum sericum, totumque in frusta concidi, ut tam sibi quam suis et aliis ad se confluentibus, cruces inde confectas superponeret humeris; omnesque iidem DEUS LO VOLT, clamare magnis vocibus jussit. Illic fama exciti Rogerii milites, tam multi repente confluxere, ut vix paucis cum comite Rogerio scilicet relictis, in Siciliam solus ferme redierit». Illic Petrus de expeditionis exordio. De cuius procinctu et progressu, de litteris ab Alexio imperatore ad eum missis, deque adventu Constantinopolim, et cum eodem imperatore congressu, atque rebus ab eo præclare gestis agit diffuse Tyrinus de bello sacro, quem tu, si his plura cupis, pro arbitrio consulas. Mirum dictu, quanto animi ardore susceperint in Occidente ubique locorum Christiani milites sacram tesseram, sanctissimæ crucis signo decoram: cum Urbanus papa, sive voce, sive litteris, ad omnes promovendos ardentissimus promotor accederet. Cujus hic modo recitandæ sunt litteræ ad Alexium imperatorem datæ, ubi ex hac peregrinatione reversus est Romanam. Sic se habent:

145. «Urbanus Secundus, Romanus Pontifex, Alexio Constantinopolitano imperatori, etc.

«Cum statutum fuisset ad Clarum-Montem Arvernæ, ut communibus votis bellum adversus Saracenos gereretur: tanta hominum multitudo cruce signata est, ut ad trecenta hominum millia censa fuerint. Ducum autem fortissimorum tantus ardor, ut de recuperanda Hierosolyma multum sperare debeamus. Primus omnium, Petrus Eremita innumerabilibus se ducent præbuit, cni Godefredus, Eustachius et Balduinus, fratres Bolonii, comites se addiderunt, majores etiam copias parave-

¹ Jer. XI. — ² Agg. II. — ³ Zaccb. IV. — ⁴ 1. Tim. I.

¹ Chron. Cassin. I. IV. c. 11.

runt. Hinc Poldensis episcopus belli dux, et Raymondus S. Ægidii comes, inde Hugo Magnus, Philippi Francorum regis frater, et Robertus Normanniæ, et alter Robertus Flandrie, et Stephanus Corneli comites. Quid dicam de Boamundo ipso, qui ingenti animi magnanimitate iis se comitem adiunxit, cum septem millibus delecte juventutis Italicæ, relicta fratri rerum omnium cura, quocum diu bello contenderat? ad hos belli maximos apparatus unum illud in primis est necessarium, ut tuo præsidio commeatque tantæ copiæ juventur. Quare abs te peto majorem in modum, ut quibuscumque rebus poteris justissimo bello gloriosaque faveas. Illud autem, tametsi non dubitem abs te curatum iri, volui tamen te per litteras nostras scire, id mihi et universæ Christianæ Reipublicæ jucundissimum fore. Vale. Romæ, etc. » Censæ extant ejusmodi Urbani litteræ in volumine litterarum diversorum principum, sed ut apparet, ab eo qui edidit redditæ cultiores.

146. *Concilium Bareuse, quod S. Anselmus illustrat, scribens de processione Spiritus sancti.*—Ad postremum autem, hoc eodem anno ab eodem Urbano papa celebratur Barensæ Concilium, indictum ad kalendas Octobris, quo in primis inter Græcos illic vocatos et Latinos agitatæ sunt controversiæ inter eos diutius ventilatæ, potissimum vero de processione Spiritus sancti. Porro nobilissimi Concilii hujus perierunt Acta: quorum ea duntaxat nota facta sunt nobis, quæ ad Græcorum confutationem a sancto Anselmo, qui interfuit, sunt scripta; et quæ familiaris ejus qui aderat Edinerns, itidem scriptorum monumentis posteris tradidit, qui ait: « Cui Concilio dum Anselmus se præsentasset, et persuasus a papa, Græcos in processione Spiritus sancti, nptote quem a Patre et non a Filio procedere Græci astruant errantes, rationabili et Catholica disputatione confutasset: magni apud omnes est habitus et veneratione dignissimus comprobatus. Finito Concilio, cum Apostolico profecti sumus ». Hæc tantum de his Edinerns. Apud Willelmum autem Malmesburiensem¹ sua paulo gloriosius ostentantem, hæc scriptis mandata legimus: « Ut ergo ventum ad Concilium, Apostolicus ante corpus S. Nicolai constratus tapetibus et palliis, ipse casula cum pallio amictus tribunal ascendit, cæteri cum cappis sedebant. Omnibus ergo sum locum ex antiquo vindicantibus, Anselmus humilitate summus quo poterat assedit. Excidit animo summus Pontifex, ingruente tumultu, ut ei locum delegaret. Sed erroris admonitus est questionis necessitate a Græcis propositæ, probare volentibus Spiritum sanctum nonnisi a Patre procedere.

147. « Hanc ergo questionem dum expedire tentans magis involveret, Græcis contra non improbabilius occurrentibus, Anselmi recordatus exclamavit: vividæ vocis tonitruum ædis capacitatis et turbæ multiplicitas ingeminant: Pater et magister

Anselme, Anglorum archiepiscopo, ubi es? Ille ubi se vocari audivit, in pedes constitit. Quem Apostolicus compellans: Nunc, inquit, magister, opus est scientiæ, opus eloquentiæ tuæ opera. Veni, ascende huc, et defende matrem tuam Ecclesiam, quam Græci labefactare conantur. Succurre ergo quasi a Deo huc missus. Continuo cuncti adstantes et assidentes, oculos et ora in eum conversi, percontari quis esset; annitentibusque proximis, ad consessum Apostolici levatus, sedere jussus juxta Romanum archidiaconum, cui ante papam sedere moris est: Includamus, inquit, hunc in orbe nostro, quasi alterius orbis papam. Nec morantibus, omnibus exposuit palam sui genus, unde domo, cujus scientiæ, cujus facultatiæ, quam religiosus, quanta pro fidelitate Romanæ Sedis passus esset. Dilatusque in posteram diem questionis tractatus, quamvis Anselmus statim respondere non dubitaret.

148. « Sed sequenti die, solito maturius cætu coacto, promotus in editum, ita tractavit questionis latera, ita penetravit et enubilavit intima, ut Latini clamore testarentur gaudium, Græci de se præberi dolerent ridiculum: nullus porro inops et inanis scientiæ discederet. Sensus illius sermonis, precedente tempore, luculenter digressi in libro de Processione Spiritus sancti facto. Tunc ubi verbum absolvit, omnes in eum oculos et ora conversi, hic laudare fidem, ille scientiam, omnes eloquentiam. Sedato fragore quem laus ejus suscitaverat, intendens in eum summus Pontifex, ait: Benedictum sit cor tuum et spiritus tuus, os et sermo oris tui benedictus. Nec mora, cum consensu omnium roboratus, in aliter sentientes fulmen excommunicationis intorsisset, ventilari de rege Anglorum sermo cepit. Proferuntur in medium scelera dictu horrenda; adjicitur contemptui humano celestis injuria, quod scilicet bis terque admonitus, nihil correctionis exhibuerit. Quocirca, cum suffragio et clamore omnium papa ad excommunicandum jam paratus esset, Anselmus genibus adusus ejus, orat dilationem et vix impetrat. Quæ res ei non mediocrem apud cunctos videntes peperit gratiam, eo quod ostensione veræ sanctitatis vicisset famæ suæ gloriam. Quam pulchrum erat, ut ille oraret veniam, a quo tantum acceperat contumeliam? » Illicusque de Barensi Concilio apud Willelmum.

149. Certum est autem in hoc Concilio S. Anselmum in confutandis Græcis primas tulisse; cui et ea ex parte plurimum Ecclesia Catholica debet, quod cum ipsius Synodi Acta perierint, ipse tamen pulsatus precibus amicorum, quod in controversia illa tractavit, scriptorum monumentis perpetuæ memoriæ commendavit. Inter alios qui hoc ab eo exegit, fuit Hildebertus Cenomanensis episcopus, ipse quidem hæc ætate inter celebres doctrina et sanctitate viros annumerandus; cujus adhuc extat, absque titulo tamen in Cobree, exarata Epistola¹ istis verbis ad eum, postquam in Angliam est reversus:

¹ Willel. de Gest. pont. Angl. lib. x.

¹ Hild. Ep. II. tom. III. Biblioth. sanctorum Patrum.

140. « Familiare est sapienti tolerare nescientem. Hinc est, quod inscitiam meam aperire non timui, quia erat cum sapiente colloquium. Eam, ni fallor, et scientia vestra erudit, et charitas supportabit. Felicem me, inquam, si meruissem vel præsens instrui, vel tanquam familiaris Epistolam suscipere destinatam. Hoc autem invidet mihi locus, et nisi aliter salutationis indulset obsequia, nisi prius orbis dimidium consultarem. Oportet enim maris et aeris explorare clementiam, si quem in Anglia iudicamus salutandum. Cæterum incommoda separationis charitatis copula suppletur, quæ neminem patitur esse nobis absentem, neminem non familiarem. Ea enim nihil est diffusius. Par enim est latitudo charitatis et mundi. Charitas amplectitur quicquid oceanus; charitas in sacrario dilectionis et amicum colligit in Deum et inimicum propter Deum: eadem diligere non desinit, cum diligi definitur. Suos habet presentes omnes affines; quibus non potest obsequio, subvenit affectu. Absit igitur, ut publicum charitatis beneficium maris fluctibus auferatur, cum scriptum sit: Aquæ multæ non potuerunt extinguere charitatem. Facile enim est, ut diversi litoris cultores charitas uniat, quæ unam Rempublicam terram facit et celum. Huius itaque fiducia injecta est mihi presumptio inquirendi atque postulandi id, quod impensum non minuet erogantem. Si votorum summa queritur, sequens illam pagina declarat.

141. « A proborum relationibus didici, vos in Concilio Barensi sermonem habuisse de Spiritu sancto, quem calumniosa Græcorum versutia a Filio minime procedere fabulatur. Quod igitur adversus hanc illorum dementiam in prælato promulgastis Concilio, succincto tractatu deprecor annotari. Et quia ipsi Latinorum Patrum testimonia non suscipiunt, his auctoritatibus opus flagitatum munire non tædebit, quas græca calliditas et suas fateatur et nostras. Magna quidem, beate pater, postulo; sed quæ pariter suscipienti proficiunt et danti. Nobilis enim est possessio scientiæ, quæ distributa suscipit incrementum, et avarum dedignata possessorem, nisi publicetur, elabitur. Conservet nobis Dominus sanctitatem vestram, et videant vos oculi mei, antequam moriar ». Hæc Hildebertus; etsi ad quem scribat, exiderit titulus, tamen quod ad Anglicanum antistitem scripserit, et eum qui interfuerit Barensi Concilio, ibique de Spiritu sancto adversus Græcos sermonem habuerit, alium quem dicamus præter Anselmum invenimus neminem, cum nonnisi unus ex Anglia episcopus illic interfuisse inveniat sanctus Anselmus.

142. Rescripsit sanctus Anselmus quæsitus Epistolam (ita enim librum illum de Processione Spiritus sancti contra Græcos inscripsit) sed ad quem illam scripserit, pariter reticetur: quam quidem post Barensæ Concilium esse scriptam ipsemet testatur. Sed non ut Hildebertus postulaverat, ex doctoribus Græcis testimonia accersivit,

sicut nec ex Latinis, prout in eodem Concilio Barensi fecisse videtur, eo quod Latinorum testimonia Græci illi non esse fidelia, sed ut testes domesticos suspicione non vacuos dicerent; quodque Græcorum Patrum assertiones non absque calumnia illata de Codicibus depravatis solerent excipere: S. Anselmus, justæ causæ fidens, abstinens se ab omnibus his, tam Latinis quam Græcis, ex divinæ tantum Scripturæ pharetra petitas sagittas in hostes quos confecit, emisit, ut ex eodem commentario ipse lector satis intelliget.

Insuper nonnisi adversus eosdem Græcos post hæc librum sive Epistolam illam scripsit, de Fermento et Azymo, ad Walramum episcopum; quem quoniam suspicabatur esse ex classe schismaticorum episcoporum, quibus præsens sæculum abundabat, in titulo Epistolæ a salutatione abstinere ita scribens:

143. « Anselmus, servus Ecclesiæ Cantuariensis, Walramo episcopo Hurremburgensi » (Nuremburgensi). At quod salutationem non sit imperitius, exordiens, sic excusat: « Scienti breviter loquor, si certus essem prudentiam vestram non favere successori Julii Cæsaris, et Neronis, et Juliani Apostatæ (ita jure legit Dodechinus¹, non ut habet editio Parisiensis Andoeni, quæ depravate legit, loco « Apostatæ, potestati », contra successorem et vicarium Petri Apostoli, libentissime vos et amicissimum et reverendum episcopum salutarem, etc. » Vidisti quibus laudibus Henricum imperatorem schismaticum ornet: nempe cum post Julium Cæsarem, a quo dimanavit nomen imperatoris in posteris, Neronis et Juliani Apostatæ cum nominet successorem, a quorum altero crudelitatem, ab altero impietatem et fraudulentiam hereditate possederit. Ut et hic meminisse lector debeat, quotquot hoc sæculo vixere viri sancti atque scientia clari, eosdem absque aliqua dubitatione inhæsisse Ecclesiæ Catholicæ ipsique Romano Pontifici, adversus schismaticum imperatorem et pseudopontificem Guibertum. Anselmus vero, ubi certo novit eundem Walramum episcopum communionis esse Catholicæ, scribens ad ipsum postea librum de Diversitate sacramentorum, en qua eum salutatione voluit honestasse: « Domino et amico Walramo venerabili episcopo, Anselmus servus, Ecclesiæ Cantuariensis archiepiscopus, salutem, servitium, orationis, dilectionis effectum ». Cur autem tanta mutatio, sic exordio verbis hisce significat: « Gaudeo et gratias ago Deo, quia sicut scribitis, glorificat eum in vobis Catholica Ecclesia: quoniam in vestra mutatione divinæ voluntatis apparet gratia, domini papæ Paschalis amicitiam habetis et familiaritatem, ut jam mihi liceat vestram amabilius salutarem sanctitatem, etc. » Quibus et apparet, eam esse scriptam Epistolam post Urbani papæ obitum, cum ipsi Paschalis successit.

Eodem anno, decima Junii, ab Occidentali

¹ Dodechin. in Chron. anno Domini 1094.

exercitu, post plura adversus Turcas confecta certamina, capta est Nicæa in Bithynia, Quomodo vero ista se habuerunt, consule Tyrium¹.

154. *Obitus S. Margaritæ reginæ Scotorum.* — Hunc insuper annum suo ad Deum illustravit transitu (ut Rogerius notat) S. Margarita regina

Scotiæ, quæ collapsam illie infelicitèr Ecclesiasticam disciplinam restituendam curavit; adeo ut Scotorum Ecclesiam jam silvescentem defectu culturæ, reddiderit speciosam. Ista pluribus, qui ejus Vitam scripsit, Adelredus abbas. Hujus etiam viget mentio apud rerum Anglicanarum historicos hujus temporis, Willhelmum Malmesburiensem et alios.

¹ Willel. Tyr. de Bell. sac. III. c. 11.

Anno periodi Græco-Romanæ 6590. — Anno Æræ Hispan. 1135. — Anno Hegiræ 491, incchoato die 8 Decemb., Fer. 3. — Jesu Christi 1097.

— Urbani II papæ 10. — Henrici IV reg. 12, imp. 14. Alexii Comneni imp. 17.

1. *Concilium Barensē anno sequenti habitum.*

— A num. 1 ad 11. Eadmerus in Vila sancti Anselmi Cantuariensis episcopi, lib. 2, cap. 3, loquens de iis quæ anno mxcviii gessit Anselmus, narrata obsidione Capuanæ civitatis hoc anno suscepta, et insequenti soluta, ait: « Dein soluta obsidione, Anselmus multa prece papam ad hoc flectere conatus est, qualenus ab onere Pontificali eum absolveret, et quieti liberum vacare concederet. Verum cum, quantum quidem ad effectum spectabat, in nihilum laborasset, fretus benedictione ejus, Scavian reversus est; operiens ibi tempus Concilii, quod idem papa apud Barum kalendis Octobris erat celebraturus ». Cum vero Baronius persuasum haberet, Concilium Barensē, *kalendis Octobr.* præsentis anni habitum, et Capuam obsidione liberatam, quæ ad sequentem annum pertinet, cum iis quæ currenti gesta permiscuit, quemadmodum et Alfodus in Annal. Angl. et Labbeus tom. x Concil. Sed, ut hæc certius suis annis reddantur, obiter hic quæ anno superiori in Anglia contigere, referenda.

2. *Concilium Hibernicum anno superiori celebratum.* — Eadmerus in Historia Novorum, lib. 2, part. 1, cap. 1, scribit: « Eo tempore (nempe tertio anno pontificatus Anselmi, ut antea dixerat, qui annus a die iv mensis Decembris anni mxcv incchoatur), Robertus comes Normannie in expeditionem Hierosolymitanam proficisci disponens, fratri suo Willelmo regi Angliæ, Normanniam spatium trium annorum, pecunie gratia, in dominium tradidit: quæ pecunia per Angliam partim data, partim exacta, totum regnum in immensum vastavit. Nihil Ecclesiarum ornamentis hæc in parte indulsit dominandi cupiditas, nihil sacris altarium vasis, nihil reliquiarum capsis, nihil Evangeliorum libris auro vel argento paratis ». Subjungit postea

Eadmerus conventum tunc fuisse Anselmum, qui de thesauro Ecclesiæ aliquam quidem summam obtulit, sed vicissim Ecclesiæ donavit villam suam cum nonnullis aliis. Venit postea Willelmus rex in Normanniam, « quo cum demoraretur, rex Hiberniæ, Murchertachus nomine, et Dofnaldus episcopus cum cæteris episcopis, et quique nobiles cum clero et populo ipsius insule, miserunt nuntios ac litteras ad Anselmum, innotescentes ei civitatem quandam, Watafordiam nomine, in una suarum provinciarum esse, cui ob numerosam civium multitudinem expediret episcopum institui, etc. Jam enim sæcula multa transierunt, in quibus eadem civitas absque providentia et cura Pontificali consistens, per diversa tentationum pericula jactabatur, etc. Igitur Anselmus, considerans et intelligens eos justa et utilia petere, petitioni eorum libens annuit. Electum ergo pontificem, etc. dignum episcopatu comprobatum, sumpta ab eo ex more de subjectionis suæ obedientiæ professione, sacravit eum Cantuariæ, quinto kal. Januarii », id est, die xxviii mensis Decembris, qui anno mxcvi in Dominicam incidebat, quo ideo Malchus Watafordiensis episcopus consecratus est, ut recte vidit Alfodus, non vero anno currenti, quo perperam tom. x Concil. Concilium *Hibernicum* tunc habitum consignatur. Ubi observabis, Eadmerum uno tenore hæc recitare, quia hujus ordinationis tempore, jam quartus Anselmi Pontificatus annus in cursu erat, licet Concilium anno tertio ejus præsulatus in Hibernia fuerit congregatum. Porro *mensē Septembri* Robertum Guillelmo regi fratri Neustriam commisisse, et postea ad expeditionem Hierosolymitanam profectum esse, testantur Ordericus, lib. 9, pag. 724, Hovedenus et Simeon Dunelmensis.

3. *S. Anselmus Romam proficiscendi facultate*

tem a rege extorquet. — Baronius a num. 2 ad 7 narrat, sanctum Anselmum mense Octobri Wintoniam a Guillelmo rege vocatum esse, et vix tandem post plurimam contentionem, quam ex Edinero in huius sancti Vita refert, facultatem ab eo extorsisse Romam ad Urbanum II proficiscendi. Addit hæc contigisse mense Octobri superioris Christi anni. Verum Hovedenus, part. 1, pag. 466, hæc accurate refert ad præsentem annum, ad quem hæc habet: « Mox inter regem et Doroherneusensem archiep. Anselmum orta dissensione (quia ex quo archipræsul factus est, Synodum tenere, et prava, quæ per Angliam pullulaverant, non licuit corrigere) mare transit: et ad tempus in Gallia mansit, et post ad Urbanum papam perrexit Romam », quod ipsissimis verbis legitur etiam in Simeone Dunelmensi, in lib. de Gest. reg. Sed Edinerus lib. 2 Novorum, cap. 2, rem extra omnem controversiam ponit: « Anselmus, inquit, cepte petitionis suæ non immemor, rogavit regem quatenus quesitam jam olim licentiam, vel tunc repetitis precibus non negaret. Sed secundo negat, sicut primo negarat. Postea conventu soluto in mense Octobri, Wintoniæ ad regem ex conducto venimus. Instantius itaque tam per se quam per alios regem Pontifex oral, quatenus bono animo sibi concedat, quod se jam tertio postulare necessitas sua coegit ». Multis interpositis, narrataque facultate a rege tandem concessa, ait Anselmum Romam aditurum regi benedixisse: « Nunc igitur ignorans, quando vos iterum visurus sim, Deo vos commendo, et sicut spiritualis pater dilecto filio, sicut archiepiscopus Cantuariensis regi Angliæ, vobis Dei et meam benedictionem, antequam abeam, si eam non abiciatis, tribuere volo. Tunc rex: Benedictionem, ait, tuam non abjicio. Mox ille surgens, levata dextra, signum sanctæ Crucis super regem ad hoc caput humiliter edidit et abscessit, viri alacritatem rege cum suis admirante. Anno ab Incarnatione Filii Dei millesimo nonagesimo septimo acta sunt hæc, feria quinta, quæ fuit idus Octobris ».

4. *Hæc facultas hoc anno S. Anselmo concessa.* — Alfordus anno mxcvi, ubi fuse totam Historiam ex Edinero lib. 2 Novorum recitat, ad citata verba quæ nulla explicatione eludi possunt, ait ea Edinero affuta fuisse oportere, cum is antea tertii anni Pontificatus Anselmi mentionem fecerit, et mense Octobri anni mxcvii Concilium Barensæ coactum sit. Verum ex citato loco intelligere potuit vir doctissimus *Concilium Barensæ* ad annum mxcviii pertinere, et *Edinerum*, quando tertium Pontificatus Anselmi annum numerat, illum ad omnia sequentia non extendere. Ex certissimo itaque temporis caractere, feria nempe quinta cum idibus Octobris conjuncta, certo liquet, non solum Anselmum hoc anno ex Anglia discessisse, sed etiam *Concilium Hibernicum*, cuius paulo ante meminimus, et ordinationem episcopi Watafordiensis contigisse anno superiori;

cum hic præsul die xxviii mensis Decembris ab Anselmo Cantuariæ consecratus fuerit, et currenti eo die in Galliis Anselmus egerit; Edinerus enim ait: « Venimus Cluniacum, tertio die ante Nativitatem Domini, etc. ».

5. *Anselmus Romam adventavit.* — « Celebris dehinc in cœnobio Sancti-Michaelis Archangeli, quod in monte situm Clusa vocatur, Passionis et Resurrectionis Dominicæ solemnibus, in iter reverſi Romam festinavimus », inquit Edinerus a Baronio citatus num. 8, qui ex eodem addit, Anselmum, ubi Romæ fuit, ab Urbano II valde laudatum esse. Verum Edinerus non de Paschate currentis anni, ut eum interpretatur Baronius, sed de Paschate anni millesimi nonagesimi octavi, die vicesima octava Martii celebrato verba facit, uti ex dictis certo sequitur, et ex dicendis magis constabit.

6. *Illo anno librum Cur Deus homo composuit.* — Sed quia *astabat astas*, Joannes quidam olim monachus Becci suscepit Anselmum ut proprium patrem, et duxit eum in suam villam, ubi « insigne volumen edidit, quod *Cur Deus homo* titulavit: quod opus, sicut in Prologo ejus ipse testatur, in Angliā cœpit, sed hic in Capuanā videlicet provincia constitutus, absolvit », inquit Edinerus in Vita sancti Anselmi quæ Baronius num. 10, ad præsentem annum revocat, quæque juxta ea quæ mox in medium attulimus, ad annum sequentem spectant. Porro villa illa, sicuti cœnobium Joannis, *prope Telesinam urbem* sita erat, ut habet Edinerus lib. 2 Novorum, cap. 3, et Telesia urbs episcopalis, nunc fere deserta, Beneventano archiepiscopo parebat.

7. *Honorifice excipitur a Rogerio duce Capuam obsidente.* — A num. 11 ad 17. Gaufridus monachus, Malaterra dictus, cujus verba recitat Baronius, asserit Urbanum II cum Rogerio comite colloquium habere cupientem, Capuam venisse, *ubi obsessionem tenebat* hoc anno inchoatam, ut habet idem Malaterra. Verum obsidio usque ad sequentem Christi annum perduravit, tuncque, non vero anno currenti, contigit quod narrat idem Edinerus mox citatus: « His ferme diebus (anno nempe mxcviii), Rogerius dux Apuliæ, adunato grandi exercitu, Capuanam civitatem a sua ditione resilientem obsidebat, et audita fama Anselmi, directis nuntiis, rogavit eum venire ad se, cupiens illum videre et alloqui, atque per eum his quæ salutis suæ adminiculari poterant, informari. Igitur ergo pater ad eum. Adhuc longe eramus, et ecce dux ipse copiosa ducum multitudine septus patri occurrit; ac in oſcula ruens, ei pro suo adventu gratias egit. Plures exhinc dies in obsidione fecimus, remoti in tentoriis a frequentia et tumultu perstreptentis exercitus. Cum autem inter hæc Sedis Apostolicæ Pontifex Urbanus illo adventaret, et ei ab Anselmo ac principibus totius exercitus obviam itum esset, ingenti secularis gloriæ pompa prosecutus, ductus est in tentorium, quod ei prope

nos erat cæteris excellentius constitutum. Sicque donec civitas in deditionem transit, obsidio illius Dominum papam et Anselmum vicinos habuit, ita ut familia illorum magis videretur una quam duæ ». Subjicit paulo post Edinerus : « Obsidione dehinc soluta, Anselmus cum papa ad Aversanam civitatem vadit », quæ Capuam inter et Neapolim sita est.

8. *Contigit hoc anno tantum sequenti.* — Hæc autem anno sequenti accidisse, extra omne dubium esse debet. Lupus enim protospata, qui hoc tempore in illa regione vivebat, in Chronico suo scribit : « Anno MXXVIII, comprehensa est Capua a Rogerio mense Martio ». Verum loco mense Martio, legendum Mense Junio, isque error adscribendus librario, qui mensem male exaratum in alium mutavit. Pascha enim illo Christi anno, die XXV Martii celebratum, quo tempore sanctus Anselmus in Abbatia Sancti-Michaelis adhuc versabatur, et ubi Romam pervenit, illic per dies decem resedit in palatio Lateranensi cum Urbano II, ut narrat Edinerus in lib. 2 Novorum citato. Præterea Capuanæ urbis obsidio per aliquod tempus duravit, post Anselmum in eam adventum, ut ex memoratis Edineri verbis colligitur.

9. *Quo et Salernum Urbanus II venit.* — A num. 17 ad 144. Cum Malaterra lib. 4, cap. 29, cujus verba Baronius exhibet, doceat, Capuam expugnata, Urbanum II Salernum venisse, et cum Rogerio duce colloquium habuisse, ex dictis sequitur quæcumque hoc in loco Baronius habet, cum anno MXXVIII, quemadmodum et præcedentia connectenda esse. Confirmat hæc omnia Epistola Urbani II ad Rogerium, Calabriae et Siciliae comitem, a Baronio num. 23 recitata, quæ data dicitur Salerni, III nonas Julii, Indict. vii, anno Pontificatus nostri XI, anno sc. MXXVIII, quo ideo, non vero currenti, Urbanus II tam Barii quam Salerni fuit. Sed Indictio mendose a librario descripta, legendumque Indictione vi, loco Indictione vii.

10. *Buamundus dux crucem assumit.* — Ad num. 144 et seq. Buamundus Tarenti princeps, non hoc anno, sed præcedenti, cum suo exercitu mare transit, et in Orientem perrexit, teste Fulcherio Carnotensi, lib. 1, cap. 2, qui ad annum MXXVI ait, Hugonem Magnum Philippi regis Francorum fratrem, primum heroum, mare transisse, et post eum Buamundum, Roberti Guiscardii filium. « Dum tanta nobilitas in unum convenit », inquit Ordericus lib 9, « et incomparabilis probitas sine fictione ad opus Dei se obtulit, ingens cunctis timentibus Deum qui aderant tripudium fuit. Alexius autem imperator, qui jamdudum Cisalpinorum arma graviter expertus est, audito adventu tantorum baronum nimis territus est; et perspecta arte per quam periculum evaderet, sub specie pacis eos dolo decipere conatus est. Erat enim callidus et facundus, largus, et fallendi artifex ingeniosus. Legatos igitur ad nobiles peregrinos misit, et pa-

cem ab eis humiliter requisivit, liberumque statutum per terram suam, et necessarium negotium atque subsidium se illis daturum cum juramento promisit. Dux vero Buamundus, qui fraudes ejus bene dudum expertus erat, cumque bello bis devicerat, simulatis concionibus non acquievit, sed socios suos ad obsidendam Constantinopolim viriliter incitavit, et multis ac probabilibus hoc sibi commodissimum esse allegationibus manifeste ostendit. Franci autem dixerunt : Nos divitias nostras derelinquimus, et peregrinationem sponte aggressi sumus, ut pro amore Christi paganos confundamus et Christianos liberemus. Græci autem Christiani sunt. Pacem ergo cum illis faciamus, et quæ Turci eis abstulerunt, reddamus. Coactus est itaque sagax Buamundus consiliis Francorum, ut pacem faceret cum imperatore Græcorum, ad magnum, ut postea claruit, detrimentum Christianorum ». Ita Ordericus de rebus hoc anno gestis verba faciens. Tyrinus vero, lib. 2, cap. 20 : « Quotidie magis et magis Græcorum dolus et fraus imperatoris detegebatur, ita ut jam nemo esset de principibus, cui non esset manifestum et luce meridiana clarius, quanto odio populum prosequeretur nostrum, et omne Latinorum genus haberet invium. Verumtamen quoniam ad alia eorum properabat intentio, et a Deo magis placitum propositum anhelabant, tutius judicabant illatas dissimulari injurias, quam se a tam pio revocare conceptu, aut assumpto labori impedimentum ministrare ».

11. *Concilium Barensæ.* — Ad num. 146 ad 154. Urbanus II, post professionem suam tam Capuanam quam Salernitanam anno sequenti peractam, apud Barium Apuliæ urbem Concilium celebravit, idque kalendis Octobris, ut jam ex Anselmi Vita diximus. Edinerus de kalendis Octob. sequentis Christi anni interpretandum, recte viderunt Hovedenus, part. 1 Annal. pag. 467, et Simeon Dunelmensis, de Gestis reg., qui ad annum MXXVI habent : « Urbanus papa, comitante secum Dorobernensi archiepiscopo Anselmo, ut illi mandat, ad Concilium quod apud Barium k. l. Octobris celebrari constituit, profectus. In quo concilio plurima de fide Catholica ab Apostolico disserla sunt fidentia ratione, etc. »

12. *Anno MXXVIII coactum.* — Præterea Lupus protospata in Chron., ubi quandoque annum incarnat. a kalendis Septembris, sicut Græci cum quibus vivebat, auspicatur, ait : « Anno MXXIX, mense Octobri, papa Urbanus congregavit universam Synodum in civitate Bari, in qua fuerunt CXXXV episcopi, et mense Junii in festivitate S. Petri Apostoli, comprehensa est Hierusalem civitas a Christianis.... et mense Julii prædictus papa Urbanus obiit, et datus est Paschalis papa ». Chronographus vero Barensis : « MXXIX, Indict. vii, tertia die infra mense Octobr., venit papa Urbanus cum pluribus archiepiscopis et episcopis (solecismi auctoribus sunt) abbatibus et comitibus; intraverunt in Baris, et suscepti sunt cum magna reverentia, et præpa-

ravit domino Heliae nostro archiepiscopus mirificam sedem (addendum, *pro papa*, cuius gratia sedes illa Heliae jussu parata), intus in Ecclesia beatissimi Nicolai confessoris Christi, et fecit ibi Synodum per unam hebdomadam. Post completos dies octo, perrexit in pace (nempe papa), et in mense Julii obiit ipse papa Urbanus, et surrexit Paschalis papa. Ex his liquet protospatam et chronographum Barensis annum illum Christi *mxix* a kalendis Septemb. anni Christi *mxviii* inchoare, exemplo Græcorum Apuliam, Calabriam et Siciliam incolentium, qui tam Indictionem quam annum mundi juxta *Aram* Constantinopolitanam a Septembri incipiebant. Uterque enim post mensem Julium collocat, mortem Urbani papæ cum mense Julio anni *mxix* connectit, asseritque *Urbanum II* mense Octobri ejusdem Christi anni, Concilium Barensis celebrare, quod nonnulli de mense Octobri anni *mxviii* intelligi potest, indicatque utrumque scriptorem a kalendis Septembris annum quandoque exordiri, licet sæpe alibi illum a Januario, vel a Natali Christi repetant. Hujus itaque Concilii epocha nunc certa et indubitata, recteque annotata a Gerberonio in Censura operum sancti Anselmi nova editione a se donatorum.

13. *Hildebertus fit episcopus Cenomanensis.* — *Hildebertus* Cenomanensis episcopus, hoc anno renuntiatus, in Epistola ad Anselmum post Concilium Barensis scripta, et a Baronio num. 150 et seq. relata, ait: « A proborum relationibus didici, vos in Concilio Barensi sermonem habuisse de Spiritu sancto, quem calumniosa Græcorum versutia a Filio minime procedere fabulatur, etc. » De processione itaque Spiritus sancti in illo Concilio inter alia actum, *Hildebertum* hoc anno dictum episcopum Cenomanensem, docent *Vetera Gesta episcoporum Cenomanensium*, a Mabillonio tom. III *Analect.* publicata. Ibi enim cap. 34 legitur, « Hoelium anno suæ ordinationis XII obiisse, IV kalend. Augusti, anno Dominicæ Incarnation. *mxvii* », et *Hildebertum* « scholarum magistrum, et archidiaconum propter scientiæ et honestatis suæ meritum » in locum ejus substitutum esse: « Ipse autem, ni fallor », inquit idem auctor anonymus Gestorum illorum, « nondum XL annos ætatis exegerat, cum ad honorem episcopatus electus est. Unde metuens, ne caro more suo semper adversus spiritum concupiscens, vigorem spiritus sui blanditiis emolliret, cepit corpus suum cibi et potus parcimonia, status duritia ac cilicii asperitate domare, etc. et si quæ fuerant juventutis delicta, eleemosynarum largitione redimere ». Tum pag. 324, postquam plura in ejus laudem protulit, inquit: « Charitatis gessit seminarium, quod intra et supra omnia ejus opera honestatis pariter et religionis emicat splendore et liberalitatis. Hoc plane beneficium suis preponderat excessibus ». Baronius anno *mlxxxviii*, num. 19, refert Epistolam ab Ivone Carnotensi *Hildeberto Cenomanensis Ecclesie electo* datam, alias *cclxxix*, hunc *cclxxvii*, in

qua Ivo scribit: « Dicunt quidam de majoribus Cenomanensis Ecclesie, qui antea vitam tuam se nosse testantur, quod ultra modum laxaveris fræna pudicitie, in tantum ut post acceptum archidiaconatum, accubante lateribus tuis plebe muliercularum, multam generis plebem puerorum et puellarum ». Paulo post: « Addunt quoque calumnias prætaxatæ personæ, quod nec earum consilio fueris electus nec consensu ». Quibus verbis freti Baronius et Sirmondus, in Notis ad Epistolam Goffridi abbatis Vindocinensis, *Hildeberto* archidiacono solutioris vitæ et impudicitie notam inurunt.

14. *Laudatur.* — Contra vero Juretas, in illius Epistolæ Ivonis margine, et in Notis ad eam, contendit Epistolam, non *Hildeberto*, sed *Aldeberto Cenomanensis Ecclesie electo* datam esse; quod ita in duobus antiquis exemplaribus Mss. legitur. Ad hæc asserit, extare præcedentes litteras ad *Hildebertum* jam Cenomanensem episcopum, quæ suo ordini restitute fide aliquot priscorum Codicum, subinducant hanc posteriorem vix posse eidem recte inscribi, ita Juretas. Verum hæc sententia prorsus explodenda, cum ex laudatis Gestis episcoporum Cenomanensium, aliisque documentis certo constet, *Hildebertum* fuisse immediatum successorem *Hoelli* anno currenti demortui, nullumque *Aldebertum* Ecclesiam Cenomanensem Ivonis tempore rexisse. Librarii itaque *Hildeberti* nomen in duobus illis Mss. depravarunt, ut non raro in aliis. Præterea, cum ex lectione ejusdem Epistolæ manifeste appareat, eam primam esse quam ad *Hildebertum* jam episcopum Ivo scripserit, aliæ, quæ nomen *Hildeberti* præferunt, post præsentem annum datæ, et in Codicibus tam Mss. quam impressis male collocatæ, ac post hunc annum exaratæ. Quoad opinionem Baronii et Sirmondi, verum quidem est, *Hildebertum* ab *Hoello*, anno *mlxxxv* episcopo Cenomanensi creato, ad archidiaconatum ejusdem Ecclesie promotum, prioribus archidiaconatus sui annis, dissolutioris vitæ fuisse, ut ex verbis mox a nobis in medium allatis eruitur, sed cum a Goffrido Vindocinensi abbate, cuius ad eum variæ extant Epistolæ, a Malmesburiensi, lib. 3 de Gest. reg., a sancto Bernardo, præsertimque ab auctore anonymo Gestorum Cenomanensium episcoporum, pietas ejus aliæque præclaræ virtutes commendantur nullaque ei vitia imputentur, perspicuum est, *Hildebertum* jam ante episcopatum sancte vixisse, ejusque æmulus aliquot juventutis ejus delicta non solum refricasse, sed calumnias etiam in eum texuisse. Hinc sæculo sequenti ad archiepiscopatum Turonensem evectus fuit, et utrique Ecclesie summa cum laude præfuit, ut ibidem ostendetur.

15. *Gesta in bello Hierosolymitano.* — Ad num. 154. Chronographus Malleacensis ad annum *mxvii*, gesta in bello Hierosolymitano his verbis refert: « Acta sunt tria bella in via de Hierusalem cum Turcis, in quibus Christianos usque ad inter-

necionem persecuti sunt occulto Dei iudicio. In primo bello, Lombardi seu Longobardi et Alamanni, cum Rainaldo domino suo perierunt in castrum quoddam Exceregoro in die Dedicationis sancti Michaelis: in secundo, Petrus Eremita et Gauterus intrantes Cinotot, quod est supra Nicenam civitatem, confestim venerunt illuc Turci, et omnes occiderunt; solus Petrus evasit, et hoc factum est in mense Octobri. Hæc facta sunt in præcedenti anno millesimo nonagesimo sexto ab Incarnatione Domini (quo ea narravimus, licet Mabillonius in margine ad Historiam Belli Sacri a se publicatam, ea cum currenti perperam illigavit). Deinde insequenti anno Mxcvii, alii principes venerunt Constantinopolim et in Scavia, et fuerunt in magna persecutione. At Buamundus et Tancredus et Guillelmus frater ejus, et multi postquam acceperunt cruces, persecuti sunt Turcopolos et Princinnatos, et vicerunt et superaverunt in quarta feria, quod est caput jejunii. Deinde in alio bello, Turci et Princinnati, et Commani, et Slavi, Visi et Athenasi omnes contra Christianos erant, et quoddam die episcopum Podiensem acceperunt, et per vim perdidērunt, et a Christianis superati sunt.

16. *Nicæa a Cruce signatis capitur, et Antiochia obsidetur.* — Tandem ergo kal. Maii, concordēs et unanimes effecti cum imperatore Alexio causa sanctæ expeditionis. Collecti itaque principes et consociati firmiter mediante Maio, pugnauerunt apud Nicram civitatem cum Turcis, et interfecerunt innumerabilem multitudinem Turcorum, ipsamque, quæ est caput totius Romanie urbis, et multa alia ceperunt, fueruntque in obsessione illa per septem hebdomadas, et in die Ascensionis pridie idus (nempe mensis Maii) ceperunt primum invadere. Fueruntque vulnerati multi et martyrizati: quas inter duas pugnas ceciderunt tredecim millia Christianorum et ducenta millia Turcorum. Eodem anno apparuit stella Cometa pridie Nonas Octobris per septem noctes, fuitque tremotus tertio idus Octobris. Mense Novembri fuit magna perditio seminum, partim ex vernibus, partim ex pluviis, et flumina creverunt magna, et castella et vicos et homines necaverunt, maxime pedites. Fuitque bellum aliud primo die Julii contra trecentos et sexaginta millia Turcorum, Sarracenorum, Publicanorum, Persarum et Agulanorum, in quinque generalibus bellis, Deo opitulante triumphaverunt, acceperunt quadraginta et unam prin-

cipales civitates et ducenta castra in Romania et Suria; et post hæc omnia duodecimo kal. Novembris obsederunt tres partes civitatis Antiochiæ, quæ anno sequenti in Crucesignatorum potestatem venit, ut ibidem videbinus.

17. *S. Margarita ante quadriennium demortua.* — Sanctam Margaritam, Scolie reginam, anno Mxciii animam Deo reddidisse, ibidem monstravimus. Asserit Baronius ejus Vitam ab Adelredo abbate scriptam fuisse, sed eum falli suspicor, erroremque inde procedere, quod Adelredus seu Ailredus abbas Rievallensis, in Epistola ad Henricum ducem, postea Anglorum regem scripta, de sancta Margarita, ejusque genealogia agit. Gemeticensis, lib. 7 Hist. Normannorum, cap. 10, loquens de Mathilde sanctæ Margaritæ filia, ab eodem Henrico rege in uxorem accepta, de utraque ait: «Quantæ sanctitatis et scientiæ tam sæcularis quam spiritualis utraque regina, Margareta scilicet et Mathildis fuerint, liber qui de Vita ipsarum scriptus est, plano sermone describit».

18. *Henricus imp. Italiam relinquere coactus.* — Bertholdus in Chronico, ad annum Mxcvii ait: «Domina Mathildis, egregia dux et marchionissa, devotissima sancti Petri filia, magnum sibi nomen ubique eo tempore acquisivit. Nam ipsa pæne sola cum suis contra Henricum, et hæresiarcham Gilbertum complicesque eorum, jam septennio prudentissime pugnavit, tandemque Henricum de Longobardia satis viriliter fugavit, et ipsa, recuperatis suis bonis, Deo et S. Petro gratias referre non destitit». Henricum autem imp. currenti anno ex Italia in Germaniam rediisse, affirmant Urspergensis abbas et Dodechinus abbas in Appendice ad Marianum Scotum. Mansit Henricus in Italia ab anno Mxc, quo illuc venit, usque ad præsentem.

19. *Floret Congregatio canonic. regularum Araosiarum.* — Vivebat adhuc hoc anno beatus Hedelmarius fundator Araosie in Belgio, cui hoc anno Lambertus episcopus Attrebatensis donationem fecit, a Locrio in Chron. Belgico recitatam. Araosiensis canonicorum regularium congregatio ab Hedemaro, Conone presbytero, ac Rogero laico circiter annum Mxc instituta, et a Jacobo Vitriaco in Historia Occident. cap. 23 valde commendata, initium cepit Araosie, altero lapide ab Apalma Artesie oppido posite. Hæc congregatio etiamnum floret, de eaque legendus Bollandus in Encomio beati Hedelmari ad diem xiii mensis Januarii.

URBANI II ANNUS 11. — CHRISTI 1098.

1. *Concilium Romæ in Basilica Vaticana.* — Annus Redemptoris millesimus nonagesimus octavus ordine sequitur, Indictione sexta, « quo », inquit Bertholdus, « dominus papa Romæ Natalem Domini celebravit, maximamque pacem in ipsa Urbe et ejus finibus firmissime composuit, ibidemque Paschalem solemnitatem cum magna gloria itidem celebravit; sed æmulus ejus Guibertus, in partibus Ravennæ eo tempore demoratus, quamdam munitionem perdidit, in qua ipse spem suam maxime habuit, videlicet Castellum nomine Argentum, quod Pado imminet, et omnes Padum transeuntes distringere potest ».

Constat insuper hoc eodem anno, post Pascha ab eodem Urbano Pontifice Romæ fuisse Synodum celebratam, cui voluit interesse sanctum Anselmum archiepiscopum Cantuariensem; quem discedere properantem, ea de causa Romæ papa deflinuit. De quo Edinerus qui aderat, ista scribit¹:

« Finito, inquit, Concilio Barensi, Romam cum Apostolico profecti sumus. Transactis autem aliquantis diebus, venit Romam Wilhelmus ille, cujus in exitu Angliæ memoriam fecimus. Inter alia hoc effecit apud Apostolicum, ut inducias regi Angliæ daret usque ad festum S. Michaelis Archangeli. Quod Anselmus agnosceus, illico Lugdunum redire volebat, sed prohibitus a papa est propter Concilium, quod se tertia hebdomada Paschæ Romæ habiturum statuerat ». Quæ autem constituta fuerint in Concilio, præterit Edinerus, sed Wilhelmus Malmesburiensis in Historia rerum gestarum pontificum Anglorum de his agens, sugillat Urbanum papam ac suos, quod pecunie mercimonio inducias regi concessisset usque ad festum S. Michaelis archangeli.

2. Verum idem auctor meminisse debuit, a se paulo superius dictum, anno superiori in Concilio Barensi, quod idem Urbanus Pontifex jam sententiam excommunicationis in regem ibi laturus statim intercessionem sancti Anselmi, ne faceret, cohibitus esset. Accusarine potuit tarditatis Urbanus, qui ab Anselmo actore, ne in eum dicat sententiam, contine-

tur? Quod si petenti regi per nuntium inducias usque ad festum sancti Michaelis Archangeli concessit Urbanus; potuitne vel istas ipse negasse, non dico regi, sed cuilibet homuncioni petenti, ut acturus causam Romæ, ex Anglia testes et testimonia perduceret, atque produceret, ex tanto terrarum spatio? An et vitio dari potuit summo Pontifici, aliquid indulgisse regi, quem vidimus haud pridem a schismaticis defecisse, atque ad communicationem Urbani Catholici antistitis convolasse? Ubi illud de Domino dictum, et repetitum¹ (ut omittamus externa): « Arundinem conquassatam non confringet, et linum fumigans non exstinguet, donec eiciat ad victoriam judicium? » Vel illud Apostoli²: « Vos, patres, nolite ad iracundiam provocare filios vestros ». De qua dictum³: « Sicut fremitus leonis, ita et regis ira ». Attamen declamatas esse per Lucensem episcopum has inducias, illa idem Wilhelmus enarrat:

3. « In Ecclesia S. Petri erat Concilium, ingens strepitus astantium, nullus concursus venientium. Ideoque cum decreta minus audirent, præcepit papa Reingerio Lucensi episcopo, ut vocali sonori-tate cuncta enuntiaret in vulgus. Assurgit ille imperato muner, nec clamor inceptus frustrabatur hiantem; sed etiam longe positorum pulsabat et penetrabat auditum. Multaque parte decretorum edissera, repente, quasi animo excussus, aliena, et quæ a negotio dissidere videbantur, verba intulit; (ista scilicet:) Sed vae! Quid faciemus? præceptis subditos oneramus, et auxilium a nobis querentibus nullum afferimus. Dolet hinc et conqueritur totus mundus, quod caput omnium membris suis non conqueritur. Ecce quidam inter nos modeste sedet et tacite, cujus silentium clamor magnus est apud Deum, qui jam secundo anno Apostolicæ Sedis vigorem operiens, de omnibus suis injuste ablatis, quid, quæso, excepit auxilii? Anselmus est de quo dico, archiepiscopus Angliæ. Hæc dicens, virgæ quam tenebat gravi ad pavimentum illusione indignitatem rei exaggerare visus est. Ille papa in eum tendens: Absiste, inquit,

¹ Edin. in Vit. S. Anselm. l. II. apud Sur. tom. II. die XXI April.

¹ Matth. XII. ex Isai. XLII. — ² Eph. VI. — ³ Prov. XIX.

moveri, frater Reingeri; procurabitur huic rei correctio. At Reingerius fervore spiritus actus, cum dixisset: Ita expedit; aut: Iustum iudicem res non transibit; rursus interruptam seriem decretorum contexit. Horum dictorum stupor affecit Anselmum, cum sciret nec suorum, nec suis querelis Reingerium ad huc commemoranda inductum fuisse. In hoc Concilio, papa cum omnibus sententiam excommunicationis vibravit in laicos investitores Ecclesiarum, et in investitos a laicis, et in taliter investitos consecrantes, et in illos qui pro Ecclesiasticis honoribus laicorum homines timent. » Hæc de Concilio tunc in Basilica Vaticana celebrato Willelmus; moxque de discessione Anselmi ab Urbe narrationem aggreditur.

4. *Urbani erga Anselmum officia et præclara hujus virtutum exempla.* — Sed quibus tunc diebus illis morarum in Urbe Anselmi, Urbanus papa cum officiis ac beneficiis frequentaverit, sic accipe ab Edinero teste fidei, qui aderat illis fruens: « Morati itaque Romæ sumus ferme per dimidium annum, hujus scilicet anni ferme sex mensibus, continue circa papam degentes, et quasi in commune viventes. Unde et ipse papa nonnunquam ad Anselmum veniebat, late cum eo sese agendo, et curiam ei faciendo. Dedit ei quoque hospitium, in quo conversabatur, eo jure, ut si aliquando Romam rediret, contra omnes homines illud sibi vindicaret. Ipse in conventu nobilium, in processionibus, semper et ubique a papa secundus erat, præ cunctis honoratus, præ cunctis acceptus, et ipse omnibus simplici humilitate submissus. Præterea Angli illo tempore Romam venientes, pedes ejus ad instar pedum Romani Pontificis in sua oblatione honorare desiderabant; quibus ille nequaquam acquiescens, in secretiore domus parte fugiebat, et eos pro tali re nullo patiebatur ad se pacto accedere. Quod ubi papæ relatum est, admiratus in homine humilitatem mundi que contemptum, jussit sese in se tenere, et nullam benefacere volentem prohibere, sed omnes pro tali causa adventantes patienter admittere. At ille modesta quadam verecundia actus, jussa profecto postponeret, si non inobedientie nævo corrupti timeret.

5. « Quid referam nonnullos cives Urbis, quorum ingens multitudo propter fidelitatem imperatoris ipsi papæ erat infesta, nonnunquam in unum conglobatos, Anselmum a Lateranis ad Sanctum Petrum euntem cum suis, propter odium papæ capere volentes; sed mox viso vultu ejus territos, projectis armis terra procumbere, et se illius benedictione deprecare insigniri? Hi honores et horum similes ubique illum comitabantur, quia mores ejus in cunctis Deo famulabantur. Hinc etiam erat, quod non facile a quoquam Romæ simpliciter homo vel archiepiscopus, sed quasi a proprio nomine, sanctus homo vocabatur. Quicumque igitur ei serviebamur, amori et honori cunctis eramus. » Hæc Edinerus, pergens dicere de ejus recessu ab Urbe Lugdunum, ubi ad biennium quoque per-

mansit, cum audita morte regis est reversus in Angliam. Sed hæc modo nobis satis ad institutum.

6. Verum quid ante recessum petierit ab Urbano, non prætereundum, sed in exemplum omnium Christianam modestiam profitentium, in tanti viri commendationem est enarrandum: « Antequam ab Urbe recederet », inquit Willelmus in rebus gestis Pontificum Anglorum ¹, « ipse Anselmus obedientie pertinax custos, cum archiepiscopus liberæ potestatis esset, rogavit papam Urbanum, ut sibi aliquem præponeret, cujus jussis vitam disponderet. Is Edinerus (quem alii Edinorum vocant) exhibuit, cujus Anselmus tanti jussa faciebat, ut cum eum cubili locasset, non solum sine præcepto ejus non surgeret, sed nec latius inverteret ». Erat iste famulus ejus a secretis, qui (ut dictum est) ejus res gestas conscripsit. At his plane consentientia sunt, quæ idem ipse Anselmus rogatus scribit de seipso ad Falconem episcop. Bellocacensem ², cum excusat se non teneri amore honoris et gloriæ in archiepiscopatu, sicut apud quosdam in suspicionem adductus fuerat; post multa ista subiungens:

7. « Sciant ergo omnes, sicut mea conscientia mihi dicit coram Deo, quem invocare testem mendacii nefas esse scio, quia non me rapit aut alligat ad archiepiscopatum Anglorum cupiditas alicujus rei, quam servus Dei contemptor mundi contemnere debet; sed timor Dei me cogit pati, ut quamvis dolens et timens, ab Ecclesia Dei trahar. Et quia si mihi liceret, servata obedientia et charitate, quas Deo debeo et Ecclesiæ ejus matri meæ, propter eam potius ac libentius eligerem sub abbate et regulari disciplina in monastica paupertate et humilitate esse et obedire et servire, quam regnare in hoc mundo sæculariter, aut dominari, aut archiepiscopatum sive episcopatum possidere, vel abbatiam aut hominibus quibuslibet præesse ad animarum gubernationem, sive ad corporum sustentationem, in magna terrarum et rerum terrenarum possessione et opulencia.

8. « Quod ego ipse non imputo mihi ad tantum, quantum ad hoc, quia talem me scio, tam parum utilem, tam parum fortem, parum strenuum, parum prudentem, parum justum, ut potius mihi congruat et expediat subesse prælato quam præesse aliis, obedire quam præcipere, servire quam dominari, ministrare quam ministrari. Cogor hæc de me confiteri; sed malo hæc in simplicitate mea, ut puto, sine duplicitate dicere, quam pati ut alii homines peccent in me, aut malum exemplum sumant per ignorantiam et errorem suum de me etc. » At de S. Anselmo modo hactenus: inferius nobis occurret sepe de præclaris ejus actionibus agere. Jam vero quæ anni hujus sunt reliqua, prosequamur. Conveniendi sunt nobis ipsi schismatici, eorumque opera propalanda. Ita plane in via ista omnibus, bonis scilicet et

¹ Willel. Malmesbur. l. 1. — ² Ansel. Episc. Ep. IX.

malis, usu communi configit ut occurramus.

9. *Conciliabulum Romæ schismaticorum.* — Quod enim mali simulatione bonorum, quæ ab ipsis pie sancteque fieri vident, facere æque nitantur, ne quid minus ab ipsis habere virium et facultatis cessando demonstrent; cum scirent per Catholicos assidue cogi Concilia, legitimisque agitari conventus, ipsa quoque amula factio schismaticorum cogit Romæ suos, non ad Concilium, sed conciliabulum, et conventiculum celebrat, at nequaquam in Spiritu sancto legitime congregatum. Imitari possunt et vespe apes, favum et ipsæ fabricant, sed repleti ipsum melle non æque prestare valent, cum extra Catholicæ Ecclesiæ alvearium una conveniant. Qui igitur gregarii erant pseudopontificis cardinales, Romæ conveniunt adversus Catholicos, contra quos synodalem confiant Epistolam, quæ ad calcem commentarii Bemonis unius ex illis extra cardinem cardinalis, his verbis scripta legitur :

10. « Adalbertus episcopus Sanctæ Ruffinæ Silva-Candide, Joannes episcopus Ostiensis, Hugo episcopus Praenestinus, Albertus episcopus Nepe-
sinus, Benno cardinalis presbyter Urbis Romæ, Romanus cardinalis presbyter Urbis Romæ, Romanus cardinalis presbyter Urbis Romæ, Guido cardinalis presbyter designatus, Paulus primicerius Romanæ Ecclesiæ, Nicolaus electus abbas Sancti Silvestri Urbis Romæ, N. abbas Sancti Pancratii Urbis Romæ, et clerici, et clarissimi principes laici Theobaldus Chinebii, et Udalricus de Sancto Eustathio, et populus Romanus, omnibus Deum timen-
tibus, et salutem Romanæ Reipublice diligentibus ». Vidisti ex titulo acephalum conventiculum, carens capite conciliabulum : Guiberti enim (ut audisti anni hujus exordium) in Longobardia commemorabatur, ipsorum auctor pseudopontifex. Epistola sic se habet :

11. « Nolumus ignorare prudentiam vestram, quod ad destruendas hæreses noviter ab Hildebrando inventas, et antiquas sub nomine pietatis impie ab ipso renovatas, et ad defensionem fidei Catholicæ, et ad exterminandam impietatem eorum, qui noviter ipsam fidem Catholicam (quantum in ipsis erat) scindere non timuerunt, Deo auctore, nonis.... apud Sanctum Blasium convenimus, octavo idus apud Sanctum Celsum, septimo idus apud Sanctam Mariam, in Ecclesia quæ vocatur Rotunda, consedimus; ipsas hæreses damnatas, sicut majores nostri, et nos damnavimus; omnes sectatores, communicatores, complices semel damnatæ pravitas pari sorte censuimus, ne si vel paululum taceamus, consentire videamur. Eos vero qui auctoribus eorum communicant, data securitate libere veniendi et abeundi, vocamus, ut per majores suos, dominum Rainerium, et Joannem Burgundionem, causam suam agant, admonemus; securitatem integram, in quantum possumus, usque ad festum omnium Sanctorum proponimus;

etiam cum in causa sua defecerint, neminem circumvenientes, nullius sanguinem, sed omnium vitam et honorem sitientes, nec seditiones in populo commoventes. De causa enim sua dissidere videtur, quisquis auctor est seditionis. Pacem vero et dilectionem sinceram proponimus, omnibus pacem et veritatem et unitatem Catholicæ Ecclesiæ amplectentibus, ut simul filii Patris nostri qui in cælis est. Qui enim ex patre diabolo sunt, opera patris sui faciunt, conspirationibus, seditionibus, et cujus filii sint manifeste ostendunt. Nos vero illius discipuli esse desideramus, cujus doctrina etiam inimicis sane est intelligenda. Orent pro nobis Ecclesiæ filii, ut crescat sermo Domini, etc. Data Romæ contra schismaticos in sacro conventu, anno ab Incarnatione Domini millesimo nonagesimo octavo, Indictione sexta, septimo idus Augusti ».

12. Illis litteris vocati sunt. Declinarunt autem audientiam schismatici per sexdecim annos, per obsides potentes et clarissimos, etsi per sacramenta invitati, ne caperentur suis mendaciis, ne suis libellis convincerentur, quibus auctores eorum corruerunt terram hæresibus variis, longe lateque disseminatis per apostolos multiplicis erroris. Sacer etiam conventus, loties deprehensa eorum astutia, in conspectu Ecclesiæ, coram multitudine Romanorum ait : « Eos qui S. Ecclesiam scindere non timuerunt, iterum vocamus ad Synodum, quam Deo auctore, celebrare disposuimus circa kalendas Novembris. In presenti tamen, quia venire renunt, testes invocamus contra eos cælum et terram, quod nullum consensum adhibemus eorum perversitati. Et in testimonium illius, in medio Ecclesiæ, in conspectu angelorum et hominum incendio tradimus decreta eorum hæretica, quibus orbem terre perverterunt, verbum Dei adulterantes, sub ementito colore pietatis, quærentes plus se quam fidem Catholicam amari; qui per sexdecim annos nullum dederunt locum veritati, fugientes lucem examinationis, tenebris errorum assueti, falsis expositionibus violenter intorquentes Scripturas in adjumentum nefandissimi schismatis.

13. « Hildebrandus, in extremis suis, vocavit ad se unum de cardinalibus duodecim quem multum diligebat præ cæteris, et confessus est omnipotenti Deo et toti Ecclesiæ, se valde peccasse in pastoralis cura quæ ei ad regendum erat commissa. Atque hunc confessorem suum misit ad imperatorem et ad totam Ecclesiam, ut optarent illi veniam ». Hucusque Acta pseudosynodi apud Bemonem in Vita Gregorii pape Septimi edita : quorum partem postremam de Gregorii pape penitentia tempore mortis, jam sæpe superius apertissimis demonstrationibus confutatum audisti, ut non sit opus eandem rursus erroris convincere.

14. *Expeditionis Hierosolymitanæ felices res gestæ.* — Inter hæc autem cum prospera nuntiarentur de Orientali expeditione, visum est Urbano pape Apostolicum legatum in partes illas decer-

nere. De qua legatione habet ista Bertholdus horum inspector hoc anno : « Dominus papa ad eandem multitudinem suam legationem direxit, videlicet venerabilem Theobertum, Pisanæ Ecclesiæ archiepiscopum, qui et illis in omnibus Apostolica vice adesset, et Ecclesias in locis unde pagani expulsi sunt, instauraret. Sed Constantinopolitanus rex huic dispositioni impedimento fuit, qui se omnimode a nostrorum adjutorio subtraxit. Nam civitates illas, quas nostris de manibus eripuerunt, ille penitus incendio devastare, et paganos reddere non timuit, iterque Hierosolymitanum per suam potestatem omnibus peregrinis omnino prohibuit ». Hæc ipse. Post Nicæam vero captam, has reperimus cusas jam datas litteras a Boamundo :

15. « Boamundus, Rogerio Northmanno fratri.

« Posteaquam Nicæam urbem per deditionem accepimus, copie commeatibus inopia in dno divisæ sunt : erat inde nobis iter per inculta et deserta loca ; demum cum ad flumen quoddam devenissemus, oportunitate loci aquari et instaurari exercitus cepit. Vix datum fuerat momentum temporis quieti, cum Sarraceni una cum Solimanno principe innumerabilibus copiis castra invadunt. Pugnatum est aliquantisper nostro aliquo incommodo, cum Godefredus et Hugo, Bolionii fratres, quadraginta millibus equitum opem tulerunt. Magna cedes edita est hostium : videre erat strues et montes Saracenorum, qui maxima ex parte deleti sunt. Fuere in castris hostium Medii, Syri, Chaldaei, Turcæ, Saraceni, Arabes, quorum spiritus compressi sunt. Nos hac satis insigni victoria futurum speramus, ut Christianorum armis omnia cedant. Tancredus filius plurimam tibi salutem dicit in castris ». Edita est Epistola inter cusas litteras principum.

16. Porro non Nicæa tantum et plures aliæ civitates capte sunt a Christianis Occidentibus adversus Turcas bellantibus, sed hoc ipso anno, Antiochia in Syria capta est, die tertia mensis Junii. Quomodo autem ista contigerint¹, Tyrium consule. Sed et quonam pacto iidem, qui urbe illa potiti sunt, ab hostium immensa multitudine obsessi, fame ac morbo consumpti, inventionem lanceæ illius quæ Christi latus perforavit, animosiores effecti, in hostes irrupentes ingenti sunt potiti victoria, idem pluribus narrat : quod factum affirmat hoc anno, vicesimo octavo die mensis ejusdem Junii. Sed et quomodo aliis Syriæ civitatibus sint potiti,

et plures sint consecuti victorias, eundem copiosissime res gestas prosequentein adeas ; istorum nobis tantum meminisse, eademque certa nota temporis consignasse pro instituto, sat erit.

17. *Origo Cisterciensium.* — Hoc ipso anno, Sedis Apostolicæ auctoritate, jacta sunt prima fundamenta Cisterciensis ordinis, ex quo tanquam e fonte rivi universum Occidentalem orbem donis celestibus irrigarunt ; cum construendi monasterii Cisterciensis, sanctus Robertus, abbas Molismensis monasterii, quod situm est in episcopatu Lingoniensi, auctor extitit, qui una cum viginti duobus suis monachis illuc profectus habitavit : sed ubi ipse redire coactus est ad suos Molismenses, Albericum illis prepositum abbatem reliquit, cui defuncto successit Stephanus : omnes viri sanctissimi, sub quibus Cistercium monachorum sanctorum frequentia mirifice est propagatum. Quod totum factum Sedis Apostolicæ auctoritate, hoc ipso anno, legato Apostolico annuente, et adjuvante, Siebertus ita testatur his verbis : « Hoc igitur anno, ab Incarnatione scilicet Domini millesimo nonagesimo octavo, venerabilis Hugonis, Lugdunensis Ecclesiæ archiepiscopi, Sedis Apostolicæ tunc legati, et religiosi viri Walterii Cabillonensis episcopi licentia et assensu, necnon et clarissimi principis Odonis Burgundie ducis freti consilio, auctoritate roborati, inventam cretum in abbatiam construere ceperunt, prefato abbate Roberto ab illius diocesis episcopo, videlicet Cabillonensi, suscipiente curam virgamque pastorem, cæteris sub ipso in eodem loco firmantibus stabilitatem. At vero post non multum temporis factum est, ut idem abbas Robertus, requirantibus cum monachis Molismensibus, pape Urbani Secundi jussu, Walterii Cabillonensis episcopi licentia et assensu, Molisium reduceretur, et Albericus vir religiosus et sanctus in ipsius loco substitueretur, hoc sane inter utramque Ecclesiam sequestro, pacis gratia, retento, et Apostolica auctoritate confirmato, ut ex eo jam tempore, neutra earum utriuslibet monachum ad habitandum sine commendatione regulari susceperent. Quo facto, novum monasterium novi patris sollicitudine et industria, in brevi, et non mediocriter, Deo cooperante, in sancta conversatione profecit, opinione claruit, rebus necessariis crevit ». Hucusque Siebertus. Sed ista locupletius in Vita sancti Roberti abbatis narrantur¹.

¹ Wilhel. Tyr. de Bell. sac. l. v. c. 23. in fin. et l. vi. c. 11 et 22.

¹ Exstat apud Sur. tom. II, die XXIX April.

Anno periodi Græco-Romanæ 6591. — Anno Afræ Hispan. 1136. — Anno Hegiræ 492, inchoato die 28 Nov., Fer. 1. — Jesu Christi 1098.

— Urbani II papa 11. — Henrici IV reg. 43. imp. 15. Alexii Comneni imp. 18.

1. *Urbanus II Concilium Romanum in annum sequentem indicit.* — A. num. 1 ad 9. Edimerus seu Eadmerus, corrupte Edinerus appellatus, in lib. 2. Novorum cap. 4, postquam capite superiori narravit protectionem Capuam Urbani II et D. Anselmi hoc anno susceptam, ut præcedenti monstravimus, disserit de Concilio Barensi, *kalend. Octob.* hujus anni congregato, ut etiam ibidem visum, aitque de Anselmo: « Flexis genibus coram papa, præfatum regem (Angliæ nempe) jam tunc excommunicare parato, vix obtinuit, ne in regem faceret, quod communis omnium sententia promulgavit ». Multis interpositis: « Finito Concilio, a Baro discessimus, comitatum papæ Romam usque non deserentes ». Subdit et Willelmum quemdam, nuntium a Willelmo Angliæ rege missum, causam spoliati Anselmi addidisse, sed eam Urbanum II non probasse, eique dixisse: « Redi, quantocius redi, et præcipe illi ex parte B. Petri, quatenus muta omni contradictione, illum suis omnibus integre restitui, si excommunicari recusat. Haque fac, ut quid hinc velit, scire me faciat ante Concilium, quod tertia hebdomada Paschæ (anni nempe millesimi nonagesimi noni, non vero currentis, ut apud Baronium, et tom. x Concil. etiam legitur) in hac urbe sum celebraturus: alioquin certissime noverit, se in eodem Concilio damnationis sententia puniri quam promeruit. At ille: Priusquam abeam, tecum secretius agam. Mansit ergo ibi per dies plurimos idem Willelmus, prudenter operam dando hos et illos suæ causæ auctores efficere: ac, ut domini sui voluntati satisfaceret, munera quibus ea cordi esse animadvertibat dispertiendo et pollicendo, parvi habere. Deductus ergo a sententia Romanus Pontifex est: ac pro voto Willelmi, inducias usque ad festum S. Michaelis dedit regi. Acta sunt hæc in ipsis solemnibus Nativitatis Christi », currentis nempe anni, non vero superioris, ut ex dictis necessario sequitur.

2. *Concilium Rom. S. Anselmus interfuit.* — Reprehendit Baronius Malmesburiensem, quod lib. 1 de Gest. Pont. scribat, Urbanum II muncribus victum, regi Angliæ terminum ad festum sancti Michaelis protraxisse. Eadmerus tamen, cujus libri Novorum Baronii tempore nondum lucem vi-

derant, id tantum de ministris curiæ Romanæ asserit, aitque, cum Pontifex Reingero Lucensi episcopo præcepisset, ut statuta in Synodo Romana, *sonora qua pollebat voce*, legeret, Reingerum paruisse: « verum nonnullis ab eo capitulis in audientia omnium diserte expositis, subito admirantibus cunctis, vultu, voce ac gestu corporis in alium habitum demutatus est: unde snorum luminum acie in circumsedentes directa, vulneratæ mentis dolorem ultra dissimulare non potuit. Rupta igitur decretorum serie, quæ exponenda susceperat, intulit dicens: Sed videlicet quid faciamus? Præceptis subditos oneramus, et iniquis tyrannorum sævitiis non obviamus. Oppressiones namque quas ipsi sua tyrannide Ecclesiis inferunt, et expoliationes personarum, quæ tuendis illis institutæ sunt, quotidie ad hanc Sedem referuntur; consilia et auxilia sicut a Capite omnium requiruntur: sed quo terminentur effectu, heu! totus mundus novit et inde conqueritur. De hujus mundi remotissimis partibus unus ecce inter nos, modesta faciliturnitate quiescens, mitis residet etc. Jam annus secundus est quo hic venit (ideoque Anselmus, de quo ibi sermo, currenti tantum anno Romam pervenit, ut supra ostendimus); sed numquid hucusque subventionis invenit? Si de quo dico non omnes agnoscitis, ipse est Anselmus, archiepiscopus Angliæ regionis ». Subjungit Edimerus, in eodem Concilio papam excommunicationis sententiam intorsisse in dantes vel accipientes Ecclesiarum investituras, et in eos qui pro Ecclesiasticis honoribus laicorum hominum servi et quasi ancillæ fiunt.

3. *Male illud Concilium in duo dispartitum fuit.* — Tom. x Concil. et apud Baronium, hoc Concilium Romanum in duo dispartitur, quorum alterum præsentī anno coactum fuerit, in eoque de Anselmi causa actum; alterum vero anno *mxix*, in quo canones *xviii* ibidem recitati, conditi fuerint. Verum secundum illud Concilium Romanum mere fictitium, ut ex die et mense ejus celebrationis evidenter apparet. Chronographus enim Malleacensis scribit: Concilium Romanum *VII kalend. Maii* anni *mxix*, in uno Ms. *VI kal Maii pridie kalendas Maii* celebratum, qui dies omnes in tertiam hebdomadam post Pascha, anno sequenti, die

decima mensis Aprilis habitum, incidunt. Quare Hovedenus in priori parte Annal., et Simeon Duneimensis in lib. de Gest., Concilium Romanum cum anno *mxix* et tertia post Pascha hebdomada accurate alligarunt, neque hoc imposterum in controversiam venire debet. Hæc chronographiæ Malleacensis verba ad annum *mxix*: «Eo anno fuit factum Romæ Concilium, quod novissime tenuit Urbanus papa (inter Romana ordine II, non vero III) septimo kalendas Maii, in quo confirmavit viam Sancti Sepulchri Domini nostri J-C, et decrevit in ipsa Synodo omni sexta feria jejunare pro peccatis suis omnibus Christianis, et maxime pro illis quibus non confessi sunt immemores». Bertholdus in Chron. ad annum *mxix*, Concilium Romanum tertia post Pascha hebdomada indictum refert, qui licet Anselmi mentionem non faciat, non dubium tamen, quin de Concilio cui ipse interfuit interpretandus sit, nempe de Concilio Rom., tertia post Pascha hebdomada coacto, de quo etiam anno præcedenti sermonem habuimus.

4. *In eo electio B. Joannis Morinorum episcopi confirmata.* — Pertinet ad hoc Concilium Romanum, quod refert Joannes de Colle-Medio in Vita beati Joannis Morinorum episcopi, qui ei annos quatuordecim cohabitavit. Ecclesia Morinensis viginti circiter annis multis tribulationibus vexata fuerat, et ad magnam confusionem redacta. Cumque canonici *Aubertum Ambianensem*, Ecclesiæ Morinensis canonicum, contra canonum sanctiones elegissent, abbates religiosi et viri quidam laicali ordinis, *Joannem Atrebatensem archidiaconum* etiam renitentem episcopum elegere. «Eodem tempore», inquit Joannes de Colle-Medio cap. 3, «Romæ Concilium generale de diversis mundi partibus papa indixerat. In quo Concilio Morinensis causa tractata, et Auberti electione haud difficile reprobata, dominus Joannes, cujus sanctitatem celebris fama vulgaverat, multorum vocibus dignus pronuntiatur, et electio ejus ex sententia Concilii a Domino papa solemniter confirmatur». Quæ cum ipso ignorante acta fuissent, Urbanus II, ne subterfugere tentaret, litteris ad eum datis inunxit, ut oneri collum submitteret: «Annus erat», subdit Joannes de Colle-Medio, «ab Incarnat. Domini N. J. C. *mxix*». Hocigitur anno, II nonas Junii, presbyteratus ordinatione suscepta, sequenti mense, XVI videlicet kal. Augusti, a Manasse archiep. Rhemensis consecratus est, et IX kal. ejusdem mensis apud Marveanum solemniter inthronizatus. Concilium itaque Romanum sub Urbano ordine II, non vero III, ut perperam habet Bollandus in Notis ad cap. 3 laudatum, anno tantum sequenti celebratum.

5. *Florent in Gallia plures illustres episcopi.* — Funeit illo tempore», ait Joannes de Colle-Medio loco citato, «diversarum Ecclesiarum episcopi, religione conspicui, scientia præcipui, fama celeberrimi. Ex quibus fuit Hugo Lugdunensis, archiep. Apostolicæ Sedis in Galliam legatus, Manasses archiep. Rhemensis, Ivo Carnotensis, Lan-

bertus Atrebatensis, Odo Cameracensis, Noalo (legendum, *Guado*) Parisiensis, Godefridus Ambianensis, præter alios quos illustres illa habuit ætas». Sed de Hugone et Manasse vide dicta suis locis.

6. *Nicea a cruce signatis capta.* — A num. 14 ad 17. Litteræ *Boamundi* Tarenti principis ad Rogerium Apuliæ comitem date, in quibus sermo de expugnatione Niceæ, et de victoria a cruce signatis post eam urbem captam reportata, ad annum superiorem pertinent. Tunc enim *in mense Junio*, *xx die mensis*, ut habet Tyrius lib. 3., Nicea capta, et *in ipsa die kalend. Juliarum* pugnatum est «viribus longe imparibus, et numero multum dissimili. Nam qui Solimannum secuti fuerant, centum quinquaginta millium, solis connumeratis equitibus, dicebantur excedere numerum. Nostrorum autem qui presentes illo in tanto certamine desudarunt, vix fuit numerus equitum ad millia quinquaginta», inquit Tyrius.

7. *Antiochia ab iisdem expugnata.* — Gesta vero hoc anno his verbis narrat chronographus Malleacensis: «Anno *mxviii*, fuit bellum cum Turcis quinto kalend. Januarii, et idibus Februarii, fueruntque Christiani septingenti, et Turci viginti quinque millia. Fuit et aliud bellum, ubi amirali duodecim sunt occisi post Pascha, quod fuit isto anno V kalend. Aprilis. Acta sunt hæc mense Aprili et Maio. Subacta est Antiochia intrante tertia die mensis Junii, in die Jovis. Tertia die post hæc obsessa est civitas a Gurbalando, qui adduxit trecenta sexaginta quinque millia, excepto amirali Hierosolymitano, qui fuit cum sua gente, et rege Damasci cum suis, et rege Aleph similiter cum suis; et ita fuit exercitus circa Antiochiam per undecim dies. Tandem visione Domini Jesu et sanctæ Mariæ sanctique Petri Apostoli confirmati, et visione et revelatione simul sancti Andreæ Apostoli et repertione lanceæ Domini nostri Jesu Christi, acceptis penitentis et processionibus actis, construxerunt acies suas principes Christiani contra Gurbalam, et illam innumerabilem gentem Turcorum, Arabum, Saracenorum, Publicanorum, Azymitarum, Curtorum, Persarum, Agulanorum, et aliarum nullarum, quæ nominari nec numerari poterant. In prima acie, fuit Hugo Magnus cum Francigenis et Flandrensi comite. In secunda vero, dux Godefredus cum suis. In tertia, Rothebhis Nermanus cum suis. In quarta autem Adhemarus cum lancea et cum exercitu suo, et exercitu Raimundi S. Egidii. In quinta, Tancredus et Gasto cum Aquitanis. In sexta fuit Boamundus cum suo exercitu, episcopi et clerici revesiti simul cruce in manibus tenentes. Septimam aciem fecerunt ex aliis coacti, quam ducit Raimundus comes. Postquam venerunt sancti martyres Demetrius, Georgius et Theodorus, quos Dominus promiserat mittere in auxilium eorum cum sancto exercitu, versi sunt in fugam, et fugerunt inimici Dei victi; et hoc bellum factum est quarto kal. Julii. In illa fuerunt inclusi per viginti

et septem dies, et obsederunt per octo menses, et post captionem requieverunt per quinque menses et dimidium ».

8. *Boamundus princeps Antiochie dictus.* — « Urbis potestatem », inquit Tyrus lib. 7, cap. 23, de Antiochia verba faciens, « et dominium, sicuti ab initio promiserant, omnes unanimiter domino Boamundo concesserunt ». Joannes vero patriarcha, egregius sub Saracenis confessor, in sua dignitate remansit, sed hoc intra biennium ultro cedente, « quod non satis utiliter præesset Græcus Latinis, urbe cedens, Constantinopolim abiit ». Post ejus discessum, Bernardus legatus Apostolici capellanus, *natione Valentinus*, id est, Valentinas, Francus patriarcha electus est, ut ibidem Tyrus habet. Antiochia autem circa annum MXXXIV in Turcorum potestatem venerat, testibus Raimundo de Agiles pag. 148, Orderico lib. 13, cap. 914, et Tyrio lib. 5, cap. 11, asserentibus, eam Turcos per annos XIV, antequam a Francis caperetur, obtinuisse. Dacherius tom. IV Spicilegii pag. 257, inter alias Epistolas refert quam Stephanus comes Carnotensis et Blesensis hoc anno scripsit ad Adelam uxorem, in qua ei accurate refert quæ in castris ante Antiochiam a Christianis acta sunt, quam juvabit legere.

9. *Fundatur Ordo Cisterciensis.* — Ad num. 17 et seq. Annum fundati Ordinis Cisterciensis exhibent versus in fronte Ecclesiæ Cisterciensis descripti :

Anno milleno, centeno, bis minus uno,
Pontifice Urbano, Gallorum rege Philippo,
Burgundis Odone duce et fundamina dante,
Sub patre Roberto coepit Cistercius ordo.

Ordericus lib. 8, pag. 711 et seqq., de hac fundatione pluribus agit, ex quo, relictis minus necessariis, hæc excerpti : « In Burgundia locus est, qui dicitur Molismus, etc. Ibi, tempore Philippi regis Francorum, venerabilis Robertus abbas cœnobium condidit, et inspirante gratia Spiritus sancti, discipulos magnæ religionis aggregavit, studioque virtutum in sancta paupertate juxta usum aliorum cœnobiolorum cœnites instruxit. Post aliquot annos, sancti Benedicti regulam diligenter perscrutatus est, aliorumque sanctorum documentis Patrum perspectis, convocans fratres sic allatus est : Nos, fratres charissimi, secundum normam S. Patris Benedicti professionem fecimus ; sed, ut mihi videtur, non eam ex integro tenemus. Multa quæ ibi non recipiuntur observamus, et de mandatis ejus plura negligentes intermittimus. Manibus nostris non laboramus, ut sanctos Patres fecisse legimus, etc. His dictis monachorum conventus non acquievit : imo prædecessorum, quorum vita evidentibus miraculis insignita manifeste refulsit, exempla et instituta, venerabilium vestigiis trita virorum moderatis novitatibus objecit, etc. De hoc, quod redarguimus a te, pater venerande, quia exorbitamus a rigore monachalis regule, nec aspero gradimur

Ægyptiorum Patrum tramite, qui in Thebaida et Sancta in Terra commorabantur ; inter Barbaros antiquo tempore necessariam rationem subtili considera examinatione. Nullus doctor jure cogit fideles omnia pati pacis tempore, quæ sancti martyres compulsi sunt in persecutionibus paganorum tolerare : quoniam nec ipsi eadem ante pressuram impiorum ultra perpassi sunt, quæ necessitate postmodum cogente pro fide certantes sustinuerunt etc.

10. *Monachi Molismenses huic fundationi ad-versantur.* — « Sic palam monachis repugnantibus dixit abbas Robertus : Inimitabilem Ægyptiorum patrum vitam ad informationem boni commemoro, sed inde nulla vobis violenta imponitur exactio, imo salubris proponitur persuasio, etc. Ad hæc monachi responderunt : Beatus pater Benedictus, ut nobis omnibus evidenter patescit, B. Maurum monasterii sui priorem, quem a pueritia nutrierat, in Calliam misit, etc. Hoc, o reverende pater, sanctitati vestre indubitanter nolum sil, quæ a prioribus cœnobiis, qui religiose vixerunt, servanda didicimus, ac ut hæredes Ordinis et professionis habemus, quandiu Cluniacenses, sive Turonenses, alique regulares viri ea nacti fuerint, non dimittimus ; neque temerarii novitatum adinventores, a fratribus nostris longe lateque condemnari volumus.

11. *Urbani II auxilium implorant.* — « Hæc et plura his similia monachis constanter dicentibus, abbas in sua satis pertinax sententia, recessit ab eis cum duodecim sibi assentientibus : diuque locum quæsit idoneum sibi suisque sodalibus, qui sancti decreverant regulam Benedicti, sicut Judæi legem Moysis, ad litteram servare penitus. Tandem Odo, filius Henrici, Burgundiae dux, illis compassus est, et prædium in loco qui Cistercius dicitur, in episcopatu Cabilonensi largitus est. Ibi Robertus abbas cum electis fratribus aliquandiu habitavit in eremo, nimis distractionis et religionis cœnobiū construere cepit, Deoque donante, in brevi plerosque sanctitatis æmulatores habuit. Cumque Molismenses cœnobites per aliquod tempus pastore carerent, viroque Dei virtutibus famoso discedente, despicabiliores erga vicinos et notos fierent, Urbanum papam supplices adierunt, eique prorsus enodata serie rerum quas supra retuli, consilium et auxilium ab eo postulaverunt. Ille vero paterno affectu utrisque consuluit ; abbati enim Apostolica jussit auctoritate, ut prius monasterium repeteret, et ne laberetur regulariter regeret, ac in alio, quod postmodum coeperat, quemlibet de suis idoneum substitueret. Deinde firma statuit sanctione, ut imprimis quisque quam vellet institutionem vitæ arriperet, ipsamque omni vita sua irrefragabiliter teneret, etc.

12. *S. Robertus fundator Molismum redire jubetur.* — « Coactus itaque Robertus abbas, Molismum repedavit, ibique laudabiliter usque ad finem vitæ suæ Deo militavit. Albericum vero, magnæ religionis virum, ad opus Cistercii vicarium

sibi elegit, et Joanni ac Hilboldo Attrebatensibus, aliisque viginti duobus fratribus abbatem Cistercii constituit, qui magna egestate per x annos ibi degit, etc. » Ita Odericus ad annum mxciv. Labbeus tom. i Biblioth. pag. 640, refert *Origines Cisterciensis Ordinis incertis auctoribus scriptas*, ubi plura de ejus fundacione habentur, in quibus litteræ Urbani II, Paschalis II et aliorum, hujus fundacionis occasione date, et processus canonizationis S. Roberti abbatis Molismensis, et primi Cisterciensis Ordinis fundatoris, mandato Honorii III factus, recitantur. Annus emortualis S. Roberti incomptus. Vita ejus, auctore monacho Molismensi anonymo, sub Adone abbate seculo XII scripta, exlat in Actis SS. Bollandianis ad diem xxix mensis Aprilis. Gaufridus a Collone adhuc ineditus, qui cæteris omnibus accuratius Senonensium antistitum Chronologiam expendit usque ad an. mxcxiv, quo vivere desiit, ut docet Mathoudus in Prefat. ad Catalogum archiep. Senonensium, Molismensis monasterii fundacionem his verbis notavit: « Anno Domini mxxv, fundatum fuit Molismense monasterium, in territorio S. Petri-Vivi prope villam de Riciaco, per sanctum virum Robertum monachum; qui postea habitum album accipiens, Cisterciensem ordinem instituit secundum regulam S. Benedicti ».

13. *Era secundum Evangelium annos xxii numerat plusquam Dionysiana.* — Mabillonius lib. 6

de Re Diplom. refert Rescriptum Urbani pape II de translatione cæmeterii S. Michaelis ad Mosam, in cujus fine legitur: « Data Laterani VII kalend. April., anno ab Incarnatione Domini secundum Dionysium mxcviii, secundum vero certiozem Evangelii probationem, millesimo centesimo xxi, Indict. vi, Epacta xvi, concurrente iv ». Verum hæ notæ Chronicæ, excepto die mensis, additiæ sunt. Neque Pontifices Romani duplici illa Incarnationis Æra, quod saltem legerim, usi fuere, et cum anno Dionysiano mxcviii, non annus Domini secundum Evangelium mxcxi, sed mxcx concurrat. Mabillonius quidem lib. 2 de Re Diplom. num. 13, de duplici illo calculo loquens ait, Marianum Scotum et Sigebertum in Chron. ratos esse Dionysium annos xxii Christi annis detraxisse; sed certum est quod scribit Gervasius in Chronico pag. 1337: « Si quis annos Domini, qui secundum Evangelium dicuntur esse conscripti, nosse desiderat, supputationi Dionysii, quem imitatur, viginti duos annos apponat. Hæc est enim de annis Domini inter Evangelium et præfatum Dionysium dissonantia, sicut in suis Chronicis testatur Marianus Scotus, spatium scilicet annorum viginti duorum ». In Diplomatis regum Merovingicorum, *Indictio* aliæque notæ chronologicæ, uti et in Actis Sanctorum sæpe adjiciuntur, a quibus omnino cavendum.

URBANI II ANNUS 12. — CHRISTI 1099.

1. *Gravis controversia inter Ivonem episcopum Carnotensem et legatum Apostolicæ Sedis.* — Annus agitur salutis humanæ millesimus undecentesimus, Indict. vii, quo perdifficilis controversia agitur inter Hugonem archiepiscopum Lugdunensem, Apostolicæ Sedis legatum, atque Ivonem episcopum Carnotensem; cujus causa Urbanus papa querularum plenam ad eundem Ivonem Epistolam scripsit. Quoniam quidem in ea pertractata est magni momenti controversia, par est, ut eam (quod aiunt ab ovo exordiamur, atque primum tempora consignemus ex more. Presentem quidem annum ejus fuisse controversiæ certum

tempus, ipse Ivo in ultima Epistola ad Urbanum papam evidenter ostendit¹, dum septem numerat expletos annos a sua ad Carnotensem episcopatum promotione in illum diem. Dico illum esse ultimum ad Urbanum Epistolam, quoniam illa in Codice edito Epistolarum Ivonis posita numero centesima decima sexta, extravagatur, nec suo loco collocata est: sed non sic in Codice Vaticano, ubi inter Epistolas ad Urbanum ab Ivone scriptas ponitur ordine. Cum ergo ex his quæ superius dicta sunt constet, Ivonem creatum ab Urbano episco-

¹ Ivo Ep. LVIII.

pum anno Redemptoris millesimo nonagesimo secundo, post illud præsignatum tempus si addes septem, hunc oportet intelligas annum consignatum esse. Hæc de tempore.

2. Quod autem ad rem gestam pertinet, sic habeto. Mortuo Richerio, Senonensi archiepiscopo, in die Purificationis Mariæ¹, electus est in locum ipsius Daimbertus, et ut sequenti Dominica consecraretur instabat Senonensis Ecclesia apud Ivonem, qui negans id fieri posse nisi temporibus proximi jejunii, facere distulit. Inter hæc allerunt litteræ legati consecrationem impediendis ad eundem Ivonem, quibus deberet impertire omnes comprovinciales episcopos. His acceptis Ivo, quid de his sentiret Urbanus papa explorandum putavit, data ad eum² Epistola, in qua hæc de Senonensi electo, quem consecrandum legatus Apostolicus impediret: « De Senonensi electo, cujus consecratio a legato vestro Lugdunensi archiepiscopo ob hæc impeditur, quia ei iure primatus sui ante consecrationem suam obedientiam non proficitur; quid nobis agendum sit, rescribat vestra paternitas. Cum enim nulla, aliquo accusante, alia causa prætenderetur, propter quam ejus consecratio differretur, eo tamen iubente, propter reverentiam vestram, manus ab ejus consecratione continuamus; cum de professione a metropolitans primatibus faciendi nihil legamus consuetudine firmatum, vel legibus institutum. Ultra quas metas nihil concessum esse primatibus, testatur papa Nicolaus, ita scribens inter alia Radulpho Bituricensi archiepiscopo: Primates vel patriarchas nihil privilegii habere præ cæteris episcopis, nisi quantum sacri canones concedunt, et prisca consuetudo illis antiquitus contulit, definimus ». Hæc ad Urbanum papam Ivo episcopus.

3. Ad archiepiscopum autem Lugdunensem, qui hæc exigeret nimis audacter et importune magno cum imperio, et cum Petri uleretur auctoritate, Petri tamen immemor doctrinæ dicentis³: « Neque ut dominantes in cleris, sed forma facti gregis ex animo », aculeatam satis scripsit Epistolam, cum tamen ejus parere mandato, differendo consecrationem electi, minime prætermiserit. Reddenda hic est igitur Ivonis ad legatum Epistola, cujus causa Urbanus papa in eundem Ivonem est valde commotus. Sic enim se habet⁴:

4. « Ilugoni Lugdunensi archiepiscopo, Sedis Apostolicæ legato, Ivo humilis Ecclesiæ Carnotensis minister, salutem et servitium.

« Factum est ut imperastis, et manus a consecratione Senonensis electi continuimus, et litteras vestras per comprovinciales episcopos pro Apostolicæ auctoritatis obedientiam direximus. Petendo itaque consulimus, et consulendo petimus discretionem vestram, ut parcius de cætero nos Apostolicæ obedientiæ vinculis adstringatis, ne humeris

nostris importabilia imponendo, in inobedientiam labi, prohibente aliqua impossibilitate, vel impetrante aliqua necessitate, faciatis. Quia facile est vobis, comminante arcu, de longinquo pugnare; nobis autem nimis periculosum, adversantem gladio de præsentibus ferire. Nos tamen interdicta seu mandata pro fideli defensione, pro fidelium correctione, pro sceleratorum emendatione, pro imminenti vel futurorum malorum interdictione, promulgata a Sede Apostolica sic volumus observare, ut parati simus, Deo cooperante, quælibet adversa pro eorum defensione tolerare. Cum vero ea quæ indifferenter se habent, in quibus non observatis minime salus periclitatur, vel observatis minime juvatur, tam obnixè servanda sanctitas, vel cum ea, quæ antiquitas sanxit, consuetudo servavit, et venerabilium auctoritas Patrum sacra firmavit prout vultis, minuitis, aut mutatis: attendere debet prudentia vestra, quid saluti eorum, quibus per omnia prodesse debetis, conferatis: vel quorum institutio sit potius tenenda, vel quibus obedientia potius sit exhibenda, an illis sanctis Patribus, (Romanis scilicet Pontificibus), qui adhuc nobis in scriptis suis loquuntur; an vobis, quibus nihil est aliud propositum, nisi priorum sequi et honorare vestigia.

5. « Neque hæc dico, quod contra novos excessus non liceat nova promulgare mandata; sed hoc dico quod dicit papa Zosimus Narbonensibus: Contra statuta Patrum concedere aliquid vel immutare, nec hujus quidem Sedis potest auctoritas; apud nos enim inconcussis radicibus vivit antiquitas, cui decreta Patrum sanxere reverentiam. In libro quoque Pontificum, qui dicitur Diurnus, ita continetur de professione Romani Pontificis: Nihil de traditione, quam a probatissimis prædecessoribus meis traditam et servatam reperi, diminueri, vel mutare aut aliquam novitatem admittere, sed ferventer ut eorum discipulus et sesquipedal totis mentis meæ conatibus, quæ tradita canonicè compertio, observare ac venerari profiteor. Beatus quoque Gregorius Laurentio magistro pro causa Theodori: Grave nimis est, contra veterem usum sacerdotes sibi quidquam arripere. Item idem: Omnia quæ usus antiquitatis statuit, intemerata servantur. Inde Leo Quartus scribit judici Sardinie: Nec mos, nec noviter introducta consuetudo nostræ Ecclesiæ nostris prædecessoribus fuit, contra canonum statuta nova vel inusitata præsumere. Item Gregorius universis episcopis Numidiæ: Consuetudinem, quæ contra fidem nihil usurpare dignoscitur, immotam permanere concedimus, sive de primatibus constituendis, sive de cæteris Capitulis. Item Leo Quartus Lothario: Quod iusta ac sedula consuetudo nos imitari non præcepit, ita ab hoc velut a magno præcipitio nos custodire oportet. Nicolaus quoque inter cætera sic scribit Hinemaro Rhemensi archiepiscopo: Ridiculum est, et satis abominabile dedecus, ut traditiones quas antiquitus a Patribus suscepimus, infringi patiamur.

¹ Ivo Ep. LXIII. — ² Ibid. Ep. LVIII. — ³ 1. Pet. v. — ⁴ Ivo Ep. LXV.

6. « Gelasius quoque universis episcopis per Dardaniam de hac eadem re ita scribit : Quia per ambitiones illicitas non pudet quosdam Ecclesiarum jura turbare, et privilegia, quæ metropolitani vel comprovincialibus episcopis decrevit antiquitas, avida presumptione pervadere, non respicientes, quoniam æterno iudici rationem tam de Catholice sinceritatis injuria, quam de traditionum præjudiciis paternarum, non sine perpetuo damnationis interitu sint reddituri, si in hac obstinatione permanserint ; charitatem vestram duximus instruendam, ut vos omnes in commune fratres per Dardaniam, sive per contiguum quamque provinciam constituti, qui vos sub metropolitani vestris esse meministis, et ab iisdem substitui decedentes, sicut vetus consuetudo deposcit, unanimiter studeatis antistites : et vicissim si metropolitani humane conditionis sorte recesserit, a comprovincialibus episcopis, sicut vetus forma transmisit, sacrari modis omnibus constitutis. Cum ergo tam ista quam alia generalia instituta absolute consecrationem metropolitani contineant, miramur, cur privatis legibus et novis traditionibus veteres traditiones et consuetudines removere contenditis, præcipiendo, ut Senonensis electus ante consecrationem suam vobis præsentetur, et jure primatus vestri subjectionem et obedientiam profuturum. Quod hactenus nec in Senonensi provincia, nec in aliis provinciis antiquitas instituit, nec consuetudo servavit.

7. « Unde papa Nicolaus inter cætera sic scribit Radulpho archiepiscopo Bituricensi, aliqua ultra jus sibi usurpanti : Primate vel patriarchas nihil privilegii habere præ cæteris episcopis, nisi quantum sacri canones concedunt et præca illis consuetudo contulit, definimus, ita ut secundum regulas Nicænas sua privilegia serventur Ecclesiis. Quod si privilegio vestre legationis cum vobis contenditis præsentari, qui nec apud nos, nec apud vos ab aliquo est accusatus, non ita papa Leo Anastasio instituit Thessalonicensi episcopo vicario suo, sed ut tantum de nomine electi ad notitiam ejus provinciales referant sacerdotes, ipse autem nullis difficultatibus, nullis dilationibus justas fatigaret electiones.

8. « Quantum enim audivimus, persona nobiliter nata, competenter erudita, boni testimonii inter natos, cum in Ecclesia sua diaconatus fungetur officio, sine ulla dissonantia gratuitum habuit electionem. Sed si his actionibus cederet, diceretur munere linguæ vel officii suam comparasse consecrationem ». Hæc Ivo, de his quæ spectant ad jura male usurpata per archiepiscopum Lugdunensem, contra antiquam consuetudinem, atque sancta decreta Patrum, sanctorum Romanorum Pontificum, eo magis temere agentem, cum ex privilegiis concessa a Gregorio papa Septimo Ecclesie Lugdunensi, ut super quatuor provincias primatum gereret, nempe super Lugdunensem, Rothomagensis, Turonensem, et Senonensem;

nihil amplius tribuit ipsi, quam quod antiquitus ab aliis Romanis Pontificibus eidem concessum esset. Extat ipsum Privilegium inter ejusdem Gregorii Epistolæ editum ¹, et ipsum continens Epistola ² ab eodem data ad quatuor illarum provinciarum archiepiscopos.

At quæ ejusdem Ivonis Epistolæ reliqua sunt, scabrosiora plane esse noscuntur, cum de investituris vetitis nimis abjecte loquatur, imo despecte multa ingerat, quæ nisi corrigerentur ab aliis ejusdem auctoris Epistolis, famam suam, et nomen gloriosum, quod ex defensione Apostolicæ Sedis et Catholice veritatis sibi dignissime comparaverat, in discrimen maximum adduxisset. Audi igitur quæ sint ista. Sic enim habet :

9. « Quod autem scripsisti, predictum electum investituram episcopatus de manu regis accepisse ; nec relatum nobis ab aliquo, qui vidit, nec cognitum. Quod tamen si factum esset, cum hoc nullam vim sacramenti gerat in constituendo episcopo, vel admissum, vel omissum, quid fidei, quid sacre religioni officiat, ignoramus : cum post canonicam electionem, reges ipsos Apostolica auctoritate a concessionem episcopatum prohibitis minime videamus. Legimus enim sancte recordationis summorum Pontifices aliquando apud reges pro electis Ecclesiarum, ut eis ab ipsis regibus concederentur episcopatus ad quos electi erant, intercessisse ; aliquorum, quia concessionem regum nondum consecuti fuerant, consecrationes distulisse ; quorum exempla supposuissimus, nisi prolixitatem Epistolæ vilassemus. Domnus quoque papa Urbanus reges tantum a corporali investitura excludit, quantum intelleximus, non ab electione, in quantum sunt caput populi, vel concessione, quamvis octava Synodus solum prohibebat eos interesse electioni, non concessioni.

10. « Quæ concessio sive fiat manu, sive nutu, sive lingua, sive virga, quid refert ? cum reges nihil spirituale se dare intendant, se tantum aut votis petentium annuere, aut villas Ecclesiasticas, et alia bona exteriora, quæ de munificentia regum obtinent Ecclesie, ipsis electis concedere. Unde Augustinus super Joannem prima parte, tractatu sexto : Quo jure defendis villas Ecclesiæ, divino an humano ? divinum jus in Scripturis habemus, humanum in legibus regum : unde quisque possidet quod possidet, nonne jure humano ? nam jure divino : Domini est terra et plenitudo ejus. Jure humano dicitur, hæc villa mea est, hæc domus mea est, hic servus meus est. Tolle jura imperatorum, quis audeat dicere, hæc villa mea est, meus est iste servus, mea est ita domus ? Item noli dicere : Quid mihi et regi ? Quid tibi ergo et possessioni ? per jura regum possidentur possessiones. Dixisti : Quid mihi et regi ? Noli dicere possessiones tuas, quia ad ipsa jura renuntiasti humana, quibus possessiones possidentur. Quod si hæc æterna

¹ Greg. I. VI. Ep. XXXIV. — ² Ibid. Ep. XXXV.

lege sancita essent, non esset in manu præsidentium, ut ea in quibusdam districte judicarent, in quibusdam misericorditer relaxarent, ipsis in honore accepto permanentibus contra quos ista loquuntur. Nunc vero quia ea illicita maxime facit præsidentium prohibitio, licita quoque eorumdem pro sua estimatione remissio; videmus nullos aut pæne nullos pro hujusmodi transgressione damnatos, plurimos autem vexatos, plurimas Ecclesias spoliatas, plurima scandala exorta, divisum regnum et sacerdotium, sine quorum concordia res humana nec incolumes esse possunt, nec tutæ. Videmus quoque miseros episcopos et abbates, nec ruinis morum nec murorum reficiendis velle vel posse vacare, solum ad hoc intentos, ut possint sibi aliquam linguam magniloquam amicam facere, cujus nudinis se possint utcumque defendere.

41. « Multi quoque electi qui gratiam et canonicam habent electionem, quia hujusmodi dilationibus vel fatigationibus impediuntur, comparatis sibi pecunia mediatoribus et prolocutoribus, ne turpem patientur repulsam, in simoniacam offendunt aliquando consecrationem. Cum ergo omnis institutio Ecclesiasticarum legum ad salutem referenda sit animarum, istarum institutionum transgressiones aut districtius essent corrigendæ, ut saluti prodessent, aut interim silentio premendæ, ne spiritualia vel temporalia commoda supradictis modis impedirent ». Hæc autem Ivonis, quod in deteriore partem accepta nonnihil videri poterant virus habere, iis mox apponens antidotum, ista subjungit :

« Non ista dico tanquam velim adversus Sedem Apostolicam caput erigere, vel ejus salutaribus dispositionibus obviare, vel meliorem sententiis præjudicium facere, si vivis nitantur rationibus et evidentioribus veterum Patrum auctoritatibus. Sed hoc vellem cum multis mecum pie sentientibus, ut Romanæ Eccl. ministri tanquam probati medici majoribus morbis sanandis intenderent, et non ab irrisoribus suis audirent¹ : Calicem excolentes, et camelum glutientes, mentham, rutam, cymium, et anethum decimatis : graviora autem legis prætermittitis, cum per totum pæne mundum flagitia et facinora videamus publice perpetrari, nec ea a vobis aliqua justitiæ falce rescari. Quorum exempla, quia vel a vobis non sunt remota, vel vobis non ignota, non est meum ea speciali sermone taxare. Vos videritis quid de his et similibus agere debeatis. Nunc vero specialiter ad hoc intendit stylus meus, ut electum Senonensis Ecclesiæ, si nihil in eo quod sacris canonibus obviet, repertum fuerit; secundum morem antiquum consecrari permittatis.

42. « Quia de tantillo jure, quod habent Ecclesiæ nostræ, nec volumus nec debemus cedere, cum beatus dicat Cyprianus : Quam periculosum

sit in divinis rebus, ut quis cedat jure suo et potestate, Scriptura sacra declarat², cum Esau primatus suos inde perdidit, nec recipere id postmodum potuerit quod semel cessit. Quod si huic petitioni nostræ acquieveritis; consecrato omni studio persuadebimus, ut primum Lugdunensis Ecclesiæ recognoscat, vobis sicut primati suo deferat, et omnem debitam reverentiam secundum traditiones Patrum exhibeat. Qui si acquiescere noluerit nostris persuasionibus, nos tamen ab his quæ præceperit Apostolica Sedes, non recedemus. Si autem petitionibus nostris non acquieveritis, et aliquod schisma inde fuerit exortum contra votum nostrum; secure dicam³ : Neque iniquitas mea, neque peccatum meum. Neque vos poteritis dicere vobis non fuisse prædictum ». Audisti periculum imminens, ut non adeo mireris, si Ivo ita commotus appareat. Qui tamen ruituram domum contemplatus, se in tutum recipit locum, dum se ab Apostolicæ Sedis jussionibus non recessurum aliquando, nuper, ut accepisti, consulto professus est. Ad postremum vero has in eum querelas ingerit :

43. « De cætero, prædam a Putecensibus in me et in Carnotensem Ecclesiam factam jure possem a vobis repetere, si reverentiam vestram in jus vocare possem, qui ad suggestionem æmulatorum meorum prædictos sacrilegos a me et coepiscopis meis communione privatos, me nesciente communioni reddidistis, ac per hoc scelorum suorum impunitate ad perpetranda majora sacrilegia relaxastis. Quod utrum faciendum fuerit, vel post factum cognita veritate corrigendum, judicet justitia vestra, cum justa vincula non solvat nisi vera poenitentia. Si ad hæc omnia respondere non licet vel non placet, ad hæc saltem duo ultima respondeat sanctitas vestra. Bene vale ».

44. Vidisti, lector, in quot quantaque discrimina minister improvidus conjecerit Ecclesiæ statum? Si enim quæ suas vult querere⁴, ut claritati Christianæ repugnans, vetat Apostolus; quomodo Apostolicæ Sedis legatus quæ sua non erant, cum tanta jactura Ecclesiæ Gallicanæ, præsumpsit? Sed quoniam prudentia carnis et non spiritus perperam facta a ministris defendi soleant ab eorum dominis, cum legibus divinis atque humanis quemque peccantem pœna consequi debeat, Urbanus papa humani quicquid passus, his Ivonis acceptis litteris a legato, vehementer in Ivonem ipsum commotus est; cujus iræ pondus ipse Ivo non ferens, eo desperationis adductus est, ut se ab episcopatu abdicare statuerit, licentiamque id peragendi ab eodem Urbano petierit, has ad eum litteras scribens⁵ :

45. « Urbano summo Pontifici Ivo minimus sanctitatis suæ filius, misericordiam et judicium.

« Audi vi dulcedinem vestram in me amaritatem, serenitatem vestram adversum me turbatam. Audi vi et conturbatus est venter meus, et ossa mea conturbata sunt. Et diligenter consului

¹ Matth. XIII. Luc. XI.

² Gen. XXV. — ³ Psal. LVIII. — ⁴ Rom. VIII. — ⁵ Ivo Ep. LXII.

memoriam meam, quid dixerim, quid fecerim, unde mansuetudinem vestram exasperaverim. Nec occurrit mihi, nisi quod dixerunt quidam mihi, quasdam litteras me composuisse adversus Romanam disceptantes Ecclesiam, quas miseram legato vestro Lugdunensi archiepiscopo pro causa Senonensis electi. Sed cum has apud me reperiens diligenter perlegissem, nulla ibi pro Romana Ecclesia, nihil contra Romanam Ecclesiam in his scriptum intellexi, nisi quis forte ad voluntatem scriptoris non accedens, et unam faciem castorum eloquiorum non attendens, dicat (quod absit) authentica scripta sibi invicem adversari, et auctoritatem auctoritate impugnari, cum nulla dissona ibi legantur, nisi suo modo intelligantur, et ad sententiam scriptoris accommodentur.

16. « In his enim litteris, sicut mihi testis est conscientia mea, et ipsarum tenor litterarum, nihil aliud intendi, nisi quod propter crebras invectivas ac murmurationes adversus Romanam Ecclesiam, quibus quotidie tinnunt aures meae, per dominum archiepiscopum Lugdunensem, cui consilia vestra committitis, sollicitudinem vestram volui esse praemonitam, quatenus cum vicariis vestris sic vestra decreta libaretis, ut Ecclesia non gravaretur, et eorumdem transgressor sua sententia mulctatus, aliis se corrigendi exemplum praebere, et fama vestra illibata servaretur. Hinc simplex oculus totum defendit corpus illarum litterarum. Sed quia domino Lugdunensi archiepiscopo quaedam sibi verba adversa, secus quam vellet, sonuerunt, maxime de primatu Lugdunensi, postposita contemplatione scriptoris, secundum quod tunc affectus fuit, participem vos suae amaritudinis fieri voluit. Liceat cuique dicere quod sentit: Ego de me sentio, quod non est aliqua persona transmontana, quae pro fidelitate vestra, pro assertionem praecceptorum vestrorum tot contumelias pertulerit, tot injurias acceperit.

17. « Sed quia illa verba quaecumque occasione animum vestrum exacerbaverint, non est meum adversum vos intrare in iudicium. Malo enim episcopatum renuntiare, quam iram vestram justam vel injustam sustinere. Illic satisfactio si placuerit vestrae paternitati, placet et meae parvitati. Hanc si placet, accipite: si plus placet, plus addite. Si desisto vester esse servus, non desistam vester esse filius; et sicut expertus sum ante episcopatum, plus potero prodesse in Ecclesia Dei exemplo privatus, quam verbo praelatus. Gratissimum enim mihi est nudum nudam Christi crucem portare, ut in ullo uberrimo et amplissimo praedio contendam, in quo amor pauperum copiosus, amor divitiarum facit avarum. Ecce jam hoc transacto septennio vicinam mihi commissam pro posse meo excolui, stercorea etiam circumposui; fructum autem quaerebam, et non inveni.

18. « Detur ergo mihi libertas octavo anno, ut hoc principium vere octavae aggrediar, ut posim mihi sabbatizare, dulces fructus contemplantum

carpere, et octavae illius gaudia praebere. Quod si vestra permissione id modo non facio, necessitate tamen, me oporteret id facere propter renovatas in me veteri de causa regis inimicitias, et propter parochianos meos contemptores verbi Dei, qui prout sunt solis terrenis inhilare, nunquam autem parati sursum cor levare; qui neque propter timorem Dei, neque propter ruborem temporalis excommunicationis, sacrilegia quae perpetrant in Ecclesiis volunt dimittere, nec iustitiam Dei recognoscere.

19. « Per portitorem ergo praesentium quod vobis placet mihi rescribite, et si petitioni meae acquiescitis, in vestra manu me retinete, ne possint me pseudoepiscopi pro libitu suo fatigare. De cetero, quidquid de me fiat, obsecro vos per charitatem Christi, ut si Turonensis archiepiscopus vel aliquis Aurelianensis clericus pro electione pueri sui ad vos venerit, non ei aurem praebatis. Cujus dotes ut vobis breviter amplectar, persona est ignominiosa, et de inhonesta familiaritate Turonensis archiepiscopi et fratris ejus defuncti, multorumque aliorum inhoneste viventium, per urbes Franciae turpissime diffamata. Quidam enim concubii sui appellantes eum Floram, multas rhythmicas cantilenas de eo composuerunt, quae a foedis adolescentibus (sicut nostis miseriam terrae illius) per urbes Franciae in plateis et compitis cantantur, quas et ipse cantitare, et coram se cantitari non erubuit. Harum unam domino Lugdunensi in testimonium misi, quam cuidam eam cantitanti violenter abstuli. Providendo itaque vestrae honestati et Ecclesiae utilitati, nunquam eum consecrari permittatis, ne Ecclesiam Dei prostibulum publicum et speluncam latronum faciatis. Scitis etiam quia Turonensis archiepiscopus, contra interdictum legati vestri, in Natali Domini regi coronam imposuit, et ut iste episcopus fieret, hac mercede promeruit. Et ut scitis puerilem fuisse electionem, quidam etiam de eligentibus in Natale Innocentium in eligendo ita jocatus est:

Eligimus puerum, puerorum festa colentes,
Non nostrum morem, sed regis iussa sequentes.

Illucque Ivonis Epistola ad Urbanum, eademque novissima ex iis quae ab eodem ad ipsum sunt datae: inferendo enim hoc anno ejusdem Urbani obitu (ut in fine suo loco dicitur) scribendi rursus ad eum est omnis occasio interitica.

20. Exat, quam citat item Ivo, Epistola de turpitudine pueri electi in Aurelianensem episcopum, inter ejusdem Epistolae editas sexagesima septima ordine posita, in qua turpia dicta, horrenda cogitata, opere vero nefanda de Turonensi archiepiscopo promovente et promotore puero Aurelianensi, et rege assentiente narrantur. Ibidemque de corona imposita regi contra interdictum ipsius Urbani papae ab ipso Turonensi praesule, qui ab eo in praenuntium Aurelianensem episcopatum acceperat pro

puero illo probroso, mentio habetur. Obstitisse autem Ivonem, ne impudicus ille puer eligeretur Joannes nomine, archidiaconus illius Ecclesiae, sed ordinaretur legitime decanus, idem ipse in alia ad eundem Hugonem Lugdunensem archiepiscopum legatum significat ¹, in qua totius rei gestae narratur historia : cujus etiam argumenti extant aliae ejusdem Ivonis Epistolae ².

21. Quod vero ad impositionem coronae regi faciam in die Natalis Domini pertinet, scias idem ipsum postea etiam praesumptum anno sequenti in die Pentecostes ab aliis episcopis, ut ejusdem ³ Ivonis aliae litterae docent, de quibus suo loco dicendum. Ad postremum, ne qua suspicio praeviaricationis ex recitatis litteris Ivonis ad Hugonem legatum, quibus investiturarum prohibitionem inessit, in legentis animum aliquo modo irrepere possit, sequenti loco suo loco ponenda erit alia ejusdem Ivonis sub Paschalis papae naufragio data Epistola ⁴, qua docetur, quantum Ivo ipse fuerit assertor et praedicator decretorum Gregorii et Urbani, prohibitum investiturarum.

Praeter haec autem idem Hugo Sedis Apostolicae legatus, alia quoque occasione in se provocavit Ivonem et alios episcopos provinciae Senonensis, dum electum Nivernensem episcopum, absque aliqua necessitate consecrandum extra provinciam, Augustodunum vocavit praeter omnem antiquum morem, omnemque Ecclesiae Catholicae consuetudinem.

22. Ad quem cohibendum idem Ivo egregiam plane Epistolam scripsit, et inter alia de comprimendo Apostolicae legationis fastu haec habet ⁵ : « Licet enim prudentia vestra velit et debeat ministerium suum honorare, reminisci tamen debet, quia cum Petrus Paulo esset praefatus, dederunt tamen sibi invicem dexteram societatis, ut alter in Gentibus, alter in Circumcisione predicaret. Attendat ergo discretio vestra, utrum hoc fieri liceat, et si liceat, utrum expediat ; ne forte odisse et detrectare incipiant jugum vestrum, quos vultis habere subjectos, dum hoc exemplo suo intellexerint esse jure privandos etc. » Idemque imperium adversus Bellovacensem electum importune nimis idem legatus exercuit, prout idem Ivo in aliis ad eum datis litteris docet ⁶.

23. *Synodus Romae et obitus Urbani papae.* — Ille in Galliis. Quemam autem Romae reliquae fuerint ejusdem Pontificis res gestae ad obitum usque, ejus temporis scriptor Bertholdus, incipiens annum a Nativitate Domini, sic aggreditur enarrare : « Hoc anno millesimo nonagesimo nono, dominus papa Natalem Domini Romae cum magna pace celebravit : nam et castellum Sancti Angeli cum aliis munitionibus in sua potestate detinuit, omnesque amulos suos in civitate cum Dei adjutorio satis viriliter, aut placavit, aut vi perdomuit,

Synodum quoque suam in tertia hebdomada Romae celebrandam post Pascha, missis litteris usquequaque denuntiavit ». Haec de Synodi indicatione. De celebratione autem ipsius ita inferius :

« Romae dominus papa generalem Synodum centum quinquaginta episcoporum, abbatum et clericorum innumerabilium, tertia hebdomada post Pascha collegit : in qua Synodo, confirmatis suorum antecessorum statutis, etiam sententiam anathematis super Guibertum haeresiarcham et omnes ejus complices iteravit. Statuit quoque ibi, ne communicare praesumerent iis qui concubinas haberent, nisi prius eas dimitterent. De Hierosolymitano itinere multum rogavit, ut irent et fratribus suis laborantibus succurrerent ». Ilucisque de Concilio Romano Bertholdus.

24. Idemque et inferius, hoc quoque anno, quarto kal. Augusti, eundem Urbanum papam esse defunctum affirmat, rebus jam sedatis, munitionibus vindicatis, Romanis omnibus sibi conciliatis, paceque diu exule restituta, ipsaque Ecclesia Catholica in statu tranquilliorum vindicata. Cum igitur sedisset annos undecim, menses quatuor, dies decem et octo, S. R. E. Pontificatu bene perfuncto, ultimum spiritum Deo reddidit dicta die, in aedibus Petri Leonis, apud S. Nicolaum in carcere Tulliano positus. Ab eodem enim nobilissimo Romano cive hospitio semper exceptum, cum tot tantisque premeretur angustis, defensumque in insula Tiberina inter duos pontes, in eodem Vaticano Codice legitur ; in quo Vita ipsius, ut audisti, describitur ab ejus temporis auctore : ubi etiam asseritur, corpus ejus per Transiberinam regionem fuisse delatum in Basilicam Vaticanam, atque ibidem honorifice sepultum.

25. Porro de obitus tempore ejusque laudibus, Donnizo in Mathilde instar Epitaphii sepulchralis habet hos versus musa rudi, ut aetas illa ferebat, ex quibus tu sensum potius quam verba capies, sic se habent :

Non erat hic rector tremulus quasi cannula vento,
Sed veluti ferrum, truncabat noxia verbo.
Ut cervam serpens, haerens sic turba timet quem :
Cuncta sibi prava subduntur dogmata falsa.
Numquam decrevit libertas denique Sedis
Romanae per eum, sanctum peramant quia Petrum
Aureus Antistes, color optatus exstitit ipse
Sicilicet Urbanus, sanctis merito sociatus.
Talem, va Romae ! cum perdidit Uplonem.
Mortuus est Romae, digno conditus honore,
Julius ipse dies binos cum dat prope linem,
Anno millesimo nonagenoque noveno
A nato celso de prima Virgine vero.

26. *Hierosolyma capta.* — Hucusque Donnizo. Sed non praetereat, quod ad triumphum pertinet Urbani papae, nimirum eodem tempore contigisse capi Hierosolimam civitatem ab exercitu Christiano, sub Godofredo duce : cujus sanctae expeditionis (ut vidisti) idem Urbanus promotor fuit. Sic igitur in calo meruit sanctissimus triumphare, cui non erat in terris par laboribus honor. Res

¹ Ivo Ep. CXXII. — ² Ibid. Ep. CXIX. CXXVI. — ³ Ibid. Ep. XXXIV. — ⁴ Ibid. Ep. CCXXIV. — ⁵ Ibid. Ep. LXXV.

gestas memoria dignas omni scriptorum genere illustratas, et ab eorundem temporum auctoribus fidelissimis cujuslibet propemodum nationis munitis perpetuis consignatas, adeo constat esse vulgatas, ut non indigeant stylo nostro. Tu autem, lector, si ista cupis, habes Willelmum Tyri archiepiscopum¹, qui colligens in unum volumen plura diversorum volumina, ista locupletius fide sincera pertractat.

27. *Litteræ decretales Urbani papæ et cætera de eo.* — At vero antequam præsentem tomum cum Urbano claudamus, quæ in manus nostras devenerint scriptorum ejusdem Pontificis, hic describamus. Cujus quot apices, tot gemmas existimamus: periisse autem Epistolarum Registrum doluimus. Apud Anselmum Lucensem, in volumine quod magno labore collegit ex Conciliorum canonibus atque decretis summorum Pontificum, nonnulla reperies. Sed et Ivo pariter Carnolensis episcopus, qui item his temporibus doctrina clarus enituit, nonnulla etiam ex Epistolis ejusdem Urbani papæ accepit, atque in Corpus canonum quod elaboravit inserens, suis locis apte disposuit. Novissime vero Gratianus id ipsum abundantius præstitit. Quæ cum jam edita habeantur, hand nobis laborandum, ut hic singula describantur. Illa vero hic integra est reddenda ejusdem Pontificis decretalis Epistola, quæ data habetur præposito Sancti Inventii (Juventii) Papiensis civitatis, quam necdum cusam reperimus. Extat enim ipsa apud Anselmum Lucensem, cujus librum Collectionis canonum adhuc scriptum tantum, nondum editum scimus; qui et incrementum ab aliquo hujus temporis scriptore accepisse videtur. Etenim quæ ex Urbano papa desumpta decreta continet, oportet ab aliquo esse addita: siquidem ipsum ante Urbanum papam esse defunctum, superius salis est demonstratum. Porro quam etiam apud Gratianum diversis in locis, sub diversis titulis, per fragmenta positam habes Epistolam, hic ut scripta fuit, simul integram leges; quæ sic se habet:

28. «Urbanus episcopus, servus servorum Dei, dilecto filio Lucio, præposito Ecclesiæ S. Inventii apud Ticinum, salutem et Apostolicam benedictionem.

«Salvator prædicit in Evangelio, circa finem sæculi pseudochristos et pseudoprophetas surgere, et multos seducere; et fideles suos in mundo multas habituros pressuras; sed tamen portas inferi adversus Ecclesiam non prævalituras. Proin quia, ut ait Apostolus, oportet hæreses esse, ut qui probati sunt manifesti fiant; oportet nos cum Propheta ex adverso ascendere, et murum opponere pro domo Israel, et cum eodem Apostolo per multas tribulationes intrare in regnum Dei. Unde non sunt condignæ passionibus hujus temporis, ad futuram gloriam quæ revelabitur in nobis. Idcirco quia innotuisti nobis, quod tibi objicitur: Utinam ven-

dere Ecclesiasticam rem, simoniacum sit? Hoc simoniacum esse, patenter colligitur ex hoc, quod beatus Petrus Apostolus ait Simoni¹: Pecunia tua tecum sit in perditionem, quia existimasti donum Dei pecunia possideri. Donum quippe Dei est Spiritus sanctus, et donum Dei est res ipsius Ecclesiæ oblata. Et si bene advertis, Simon magus, qui fide ad fidem accessit, non Spiritum sanctum propter Spiritum sanctum, quo ipse indignus erat (quoniam ut scriptum est²: Spiritus sanctus discipline effugiet fictum) sed ideo, quantum in ipso erat, emere voluit, ut ex venditione signorum quæ per eundem fiebant, multiplicatam pecuniam quam obtulerat lucraretur. Nec Apostolus emptionem Spiritus sancti, quam bene noverat fieri non posse, sed ambitionem talis questus, id est, avaritiam quod est idolorum servitus, in eodem Simone exhorruit, et maledictionis jaculo percellit.

29. «Quisquis itaque res Ecclesiasticas, quæ Dei dona sunt, quoniam a Deo fidelibus, et a fidelibus Deo donantur, quæque ab eodem gratis accipiuntur, et ideo gratis dari debent, propter sua lucra vendit vel emit, cum eodem Simone donum Dei pecunia possideri existimat. Ideo, qui easdem res non ad hoc, ad quod institute sunt, sed ad propria lucra munere linguæ, vel indebiti obsequii, vel pecunia largitur vel adipiscitur, simoniacus est: cum principalis intentio Simonis fuerit sola pecuniæ avaritia, id est, idololatRIA, ut ait Apostolus Paulus. Alioquin cur Synodus Chalcedonensis sexcentorum triginta episcoporum, procuratorem vel defensorem Ecclesiæ, vel quemquam regulæ subiectum, adeo pro pecuniam ordinari prohibet, ut interventores quoque tanti sceleris anathematizet, nisi quod eosdem simoniacos judicet? Quod si præfati milites Ecclesiæ ob hujus scelus taliter percelluntur, nemo sapiens negabit non militantes Ecclesiæ multo damnabilius hanc ob causam, id est venditionis vel emptionis, debere percelli.

30. «Sed et beatus prædecessor noster Paschalis, de consecratione, et de rebus quæ proveniunt ex consecratione, affirmat, quod quisquis alterum eorum vendit, sine quo alterum habere non potest, neutrum non venditum derelinquit. Ac per hoc cum, qui rem Ecclesiæ vendit vel emit, simoniacum intelligit. In nomine vero procuratoris, intelligit præfata Synodus quoniamlibet Ecclesiasticarum rerum administratorem, ut, verbi gratia, præpositum, æconomum, vicedominum; defensoris nomine, advocatum sive castaldum et judicem; in subiecto regulæ archipresbyterum, archidiaconum, canonicum, monachum, vel quemlibet Ecclesiastico mancipatum officio. Quod vero Spiritum sanctum, quantum in se, vendat vel emit qui præposituram vel hujusmodi vendit vel emit, audi Augustinum super Joannem: O quot proposita fecerunt? Alterum propositum habet Carthagine Primitianus, alterum habet Maximianus, alterum habet

¹ Will. Tyr. de Bell. sac. l. VIII. c. 9. usque ad XIII.

² Act. VIII. — ² Sap. I.

in Mauritania Rogatus, alterum habent in Numidia illi et illi, quos jam nec nominare sufficimus. Circumivit ergo aliquis emere columbam? unusquisque propositum suum laudat, quod vendit etc.

31. « Ecce venerabilis Augustinus de præposituræ distractione agens, in nomine columbe sancti Spiritus venditionem vel emptionem accipit, sicut et omnes hujus Evangelici capituli tractatores. Pensandum vero est qua poena muldentur, qui jam Deo et Ecclesie suæ ablata vendunt vel emunt, si cum flagellis a Dei templo ejecti sunt, qui quæ Deo erant offerenda vendebant vel emebant. Si de offerendorum venditoribus vel emptoribus dictum est ¹ : Vos fecistis domum Patris mei domum negotiationis et speluncam latronum; quid dicetur jam de Ecclesie oblatorum venditoribus vel emptoribus? Et ne quis insanus objiciat, merito hos Dominum tam acerbè vindicasse, quia tunc illa in Dei templo, Ecclesiasticæ vero res modo extra templum distrahantur : attendat super his Augustinum non determinantem locum venditionis vel emptionis propositum, sed tantum indefinite dicentem : Circuit aliquis emere columbam? unusquisque propositum suum laudat, quod vendit, non adjiciens in templo, vel extra templum. Hæc contra venditores vel emptores sacramentorum rerum.

32. « Ad hoc vero quod in Epistola tua sequitur, id est : Utrum obedire his tentantibus ad mortem nefas sit, et circa finem ejusdem Epistolæ hoc idem iterum inculcatur; illud beati Petri respondemus ² : Obedire Deo oportet magis quam hominibus. In quo exemplo notandum est, hominibus interdum obediri debere, sed magis Deo; hominibus quidem in his quæ contra fidem et religionem non sunt. Quoniam cives Hierusalem legimus Babylonis civibus militasse, ut sanctum Joseph et socios Danielis : quorum primus stuprum domine, sequentes vero idololatriam perhorrentes, rempublicam et alienigenarum principum strenue gubernaverunt. Et in Evangelio habes ³ : Cum eo qui te angariaverit uno milliario, alia duo ambulare debere : et reddere quæ sunt Cæsaris Cæsari, et quæ sunt Dei Deo. Item Hieronymus super Epistola ad Philippenses ⁴ : Si dominus ea jubet quæ non sunt adversa Scripturis sanctis, subijciatur domino servus : si vero contraria præcepit, magis obediat spiritus quam corporis domino. Et infra : Si bonum est quod præcepit imperator, jubentis exequere voluntatem ; si malum, responde : Obedire oportet Deo magis quam hominibus.

33. « Ad hoc vero, quod subjungitur in eadem Epistola, ⁵ id est : Utrum sit utendum ordinationibus et reliquis sacramentis a criminosis exhibitis, ut ab adulteris, vel sanctimonialium violatoribus, vel hujusmodi; ad hoc, inquam, ita

respondemus : Si schismate vel hæresi ab Ecclesia non separantur, eorumdem ordinationes, et reliqua sacramenta sancta et veneranda non negamus, sequentes beatum Augustinum, qui super Joannem de hujusmodi tam copiose quam veraciter disseruit. Ait enim : Baptizet servus bonus, sive servus malus : non sciat se ille qui baptizatur, baptizari non ab eo qui sibi te nunt baptizandi potestatem. Et paulo post : Non horreat columba ministerium malorum, respiciat Domini potestatem. Si fuerit superbus minister, cum Zabulo computatur, sed per illum Christi sacramentum non contaminatur. Quod per illum fluit purum est, quod per illum transit liquidum est. Item : Spiritualis vero virtus sacramenti ita est ut lux, quæ et ab illuminandis pura excipitur, et si per immunda transeat, non inquinatur. Quos baptizat ebriosus, quos baptizat homicida, quos baptizat adulter, Christus baptizat, et cætera hujusmodi. Attamen decessores nostri Nicolaus ac Gregorius, a missis sacerdotum, quos tales revera esse constiterit, fideles abstinere decreverunt; ut et peccandi licentiam cæteris auferrent, et hujusmodi ad dignæ poenitentiae lamenta revocarent. Scribit hoc prædecessor noster Gregorius Rudolpho et Bertholdo ducibus inter cætera : Officium simoniacorum et in fornicatione jacentium scientes nullo modo recipiatis, et quantum potestis, tales sanctis deservire mysteriis vi, si oportuerit, prohibeatis, etc.

34. « Porro ad hæc quæ tibi syllogistice in eadem Epistola objiciuntur, id est : Si corpus et sanguis Christi non sunt, et alia quæ prædicimus, proprias non habent virtutis dignitates, quid agentibus obsunt; quod si habent, cur spernuntur, sicubi ab indigno presumentur? Ad hæc, inquam, ita respondemus : Proprias quidem habent virtutis dignitates, ut præfatus Augustinus ait super Joannem contra Donatistas; sed agentibus, vel suscipientibus eadem sacramenta contra præfatorum Pontificum instituta, nisi forte sola morte interveniente ⁶, utpote ne sine baptismate vel communione quilibet humanis rebus excedat; eis, inquam, in tantum obsunt, ut veri idololatæ sint, cum talibus et ordinationum et sacramentorum confectio, et aliter quam præmissum est scienter susceptio vehementer a sanctis canonibus prohibeatur. Ait namque Samuel propheta ⁷ : Quoniam peccatum ariolandi est repugnare, et quasi scelus idololatriæ, nolle acquiescere. Hæc de malis Catholicis qui intra Ecclesiam sunt. Cæterum schismaticorum et hæreticorum sacramenta, quoniam extra Ecclesiam sunt, juxta sanctorum Patrum traditiones, scilicet Pelagii, Gregorii, Cypriani, Augustini, Hieronymi, formam quidem sacramentorum, non autem virtutis effectum habere profiteamur, nisi cum ipsi,

¹ Joan. I. — ² Act. v. — ³ Matth. v. — ⁴ I. q. III. c. 93. — ⁵ VI. dist. XXXII. c. 6. in ad.

⁶ Greg. VII. l. II. Ep. XLV. — ⁷ Nisi in casu necessitatis, qui a prævio accepto sacramentum extra casum necessitatis, peccat, non tenet qui a malo. D. Th. p. 3. q. vi. art. 9. ad 2. etiq. LXVII art. 1. — ⁸ I. Reg. XV.

vel eorum sacramentis initiati per manus impositionem ad Catholicam redierint unitatem.

35. « Sciendum vero est, quod canones Apostolorum, quorum auctoritate Orientalis, et ex parte Romana utitur Ecclesia, et insignis martyr Cyprianus et lxxx episcopi cum eodem, baptismum hæreticorum lavacrum diaboli appellant. Stephanus vero et Cornelius martyres, et Pontifices Romani, et venerabilis Augustinus in libro de Baptismate, eundem Cyprianum et præfatos episcopos hanc ob causam vehementer redargunt; affirmantes, baptismum sive ab hæretico sive schismatico, Ecclesiastico more celebratum, ratum esse: et merito, quia alia in baptismo, et alia in reliquis sacramentis consideratio est; quippe cum et ordine prior, et necessarius sit: subito enim morituro prius baptismate, quam Dominici corporis communione vel aliis sacramentis consulitur. Et dum forte Catholicus non invenitur, satius est ab hæretico baptismi sacramentum sumere, quam in æternum perire. Et hanc sententiam præscriptorum Pontificum, Cornelii, Stephani, et Augustini, secuti sunt Innocentius, Siricius, Leo, Anastasius, et Magnus Gregorius, et omnis Ecclesia Catholica. Et quoniam Epistolaris brevis propositis tibi questionibus fortasse non sufficit, eorundem temeritatem ad Sedem Apostolicam instruendam mitte, aut, juxta Apostolum ¹, veluti sanæ doctrinæ adversarium post secundam et tertiam correctionem devita. Tu vero esto fidelis usque ad mortem, ut percipias coronam vitæ. Data Romæ ».

36. Ex his autem illud infertur, quod apud Gratianum apponitur istis verbis: « Prohibetur ergo de manibus talium sacerdotum sacramenta suscipi, non quia non sint vera quoad formam et effectum; sed quia dum hujusmodi sacerdotes se a populo contemptos viderint, rubore recedentes facilius ad penitentiam provocentur ». Porro eadem in diversis orbis partibus agitata, et in controversiam deducta, sed præscripto decreti Urbani papæ correctæ definita esse inveniuntur. Est inter alia de his scripta Epistola S. Anselmi Cantuariensis episcopi ad Gulielmum albatem ², in quo ejusmodi Urbani papæ decreti mentionem fecisse videtur his verbis: « De presbyteris vero, qui se aperta reprobæ libidinis conversatione Deo reprobabiles exhibent, omnino tenendum est quod Apostolica providentia Ecclesiastico justoque rigore constituit, nempe: Nullatenus convenit, ut ibi reverenter astetur, ubi pertinaciter aperta et impudenti libidine fatentes, Dei et sanctorum prohibitionem contemnendo, sacris altaribus deserviunt, imo non deserviunt, sed quantum ad ipsos conculant, non quo quis ea que tractant, contemnenda, sed tractantes execratos existimet.

37. « Ut qui Dei et Angelorum præsentiam non reverentur, vel hominum detestatione repulsi, sacra contaminare desistant. Nec ullatenus oportet, ut

illi sint consortes de altari participantium, qui per immunditiam se faciunt exsortes altari servientium ». Illicusque sanctus Anselmus. Sed et hæc ipsa rursus acutata reperies in Concilio Pictaviensi sub Paschali papa anno sequenti celebrato; de quo suo loco tomo sequenti pluribus dicendum erit.

Sed quæ sunt reliqua Urbani papæ scriptorum videamus. Extat ad Alphanum, Salernitanum archiepiscopum, ejusdem Pontificis data Epistola, qua collatum illi Ecclesie Privilegium continetur: quam quidem ejusdem sancti Pontificis ultimum fuisse elogium satis apparet, cum data habeatur hoc anno decimo tertio kalendas Augusti. Accepimus eam ex scripto Codice Bibliothecæ cardinalis Sirlæti, modo autem cardinalis Columnæ, sed non integram, amputatis scilicet iis, quæ ad privilegia spectare videbantur ejus Ecclesiæ; quæ vero nos habuimus, sic se habent:

38. « Urbanus servus servorum Dei, dilecto fratri Alphano Salernitano episcopo, ejusque successoribus canonice promovendis in perpetuum.

« Singulare semper Sedis Apostolicæ privilegium claruit, subjectas sibi per orbem terrarum Ecclesias et auctoritate disponere et benignitate clementius confovere. Quibus autem supernæ majestatis dignatio suæ gratiæ pleniorē contulit largitatem, ipsis etiam consuevit excellentiorem tribuere dignitatem. Unde non immerito existimamus, Salernitanam Ecclesiam amplioribus nostræ benignitatis muneribus honorandam, quam omnipotens Dominus eximia suæ benignitatis prærogativa per misericordiam gratuitam sublimavit. Ex novissimis namque terrarum finibus beati Matthæi Evangelistæ corpus ad hanc deferri, apud hanc haberi, clementissima suæ dispositionis dignitate (dignitione) permisit. Cujus scilicet Apostoli quanta sit in Deo et Ecclesia gloriæ excellentia, collatorum divinorum munerum gratia cumulata demonstrat. Hic enim primus inter cæteros Evangelii seriem scribere inspiratione divina exorsus est: hic in divini seminis fructu trium ordinum coronam centesimam reportavit, ut simul Apostolus, et Evangelista, et martyr existeret. Adjecit ad hæc omnipotens Deus, ut eandem Ecclesiam gloriosorum martyrum Fortunati, Gaii et Anthes, triumphis simul et corporibus honoraret. Apposuit etiam tertii muneris claritatem, ut eam nostris temporibus Gregorii Apostolicæ memoriæ Septimi papæ tam exilio quam tumultu illustraret. Cujus quam egregia jura, quam præclara doctrina, quam miranda constantia fuerit, Romana Ecclesia prædicat, Occidens universus agnoscit, tyrannorum pertinacia tolerat, et conculcata testatur ». Illicusque in Codice Sirlæti.

39. Ad postremum, quod pertinet ad ejusdem Urbani Pontificis sepulturam, non prætermittamus quod breviter Manlius attigit in libro De antiquis monumentis Ecclesiæ S. Petri in Vaticano, nimirum ejusdem Urbani papæ sepulturam satis pulchro

¹ Tit. III. — ² Ans. Ep. VIII.

schemate fuisse constructam, in memoriam tanti Pontificis, adeo de universa sancta Ecclesia benemeriti, juxta oratorium Hadriani papæ Primi in eadem Basilica Vaticana, quam fideles frequentantes, quisque intimo cordis affectu bene precaretur animæ ejus, et laudaret nomen ejus, sicut ejus vigens memoria semper aucto fenore benedictionum, sit summa gloria ad posteros propagata.

40. *De imagine crucifixi Hierosolymis inventa.* — Sed transferat se rursus oratio in Orientem, in enarrandis quæ memoria digna post Hierosolymas expugnatas fieri contigerunt, et inter alia, illud celebre de certitudine venerande imaginis Jesu Christi Redemptoris nostri crucifixi schemate regio, pictura antiquitas ad similitudinem ejus expressæ, curante id scilicet (ut vetus traditio de lapsa ad posteros firmiter testabatur) Nicodemus nocturno Christi discipulo, prout didicit, et retulit inde pius valde vir, Stephanus nomine, patria Lucanus, qui religionis causa una cum aliis anno superiori peregrinationem susceperat ad Terram Sanctam, quam acceperat a Gregorio quodam Syro homine, eaque insigniter esse illustratam Lucanum in Tuscia civitatem, ubi hæcenus religiosisime conservatur; apud quam et totius rei gestæ historia antiquitus scripta servatur.

41. Cur autem regio cultu, non, ut passus est, nudus, idem Redemptor noster fuerit expressus, a pluribus quæri scimus: quibus aliquando respondimus, id præstitum olim ab eo ad evacuandum scandalum Crucis, et illustrandam magis gloriam Christi, ut quem inter latrones audierint crucifixum, scirent revera fuisse regem Judæorum unctum a Deo¹, eundemque regem regum ac Dominum dominantium²; ita, inquam, Jesum Christum crucifixum Judæis scandalum, Gentibus stultitiam, ea de causa pietas Nicodemi effigandum curavit, et non honestatis causa tantum. Nam qui ejus rationem habendam consueverunt, ipsum Dominum nostrum Redemptorem indutum solum interula sive indusio Crucis affixum, sive sculptura sive pictura representare consueverunt. Sed de his alias nos dixisse meminimus. Stet ergo veneranda sacrosancta imago Christi Regis in Cruce pendentis adversus infelicissimos Iconoclastas, semper loquens perpetuum ab exordio nascentis Ecclesiæ monumentum transmissum ad posteros. Sed jam de his hæcenus, cetera prosequamur.

42. *S. Petrus episcopus Anagninus et Concilium Hierosolymis.* — Quid autem tunc temporis, hoc, inquam, ipso anno, memoria dignum, Hierosolymis receptis, acciderit S. Petro episcopo Anagninæ, qui suos pertæsus, a quibus plurima indigna passus esset, cum Boamundi exercitu navigavit in Orientem; hic describendum ex sancto Bruno Signæ episcopo, hujus temporis scriptore celebri, qui in Vita ejusdem Petri, quam scripsit, hæc

habet: « Petro in proposito manente, non amplius scilicet ad Anagninam Ecclesiam redeundi, sed permanendi Hierosolymis usque ad mortem, beatus Magnus, ejusdem Ecclesiæ Anagninæ patronus, ei astilit in habitu peregrini. Qui a beato Petro quis esset et unde veniret interrogatus, Peregrinus respondit: Italus ego sum, jugalis consortia fugiens, huc salvationis meæ causa, quoad vixero, moraturus accessi fugiens debitum ipsi reddere postulatum, tuum peto consilium: Ne salvabor? Petrus inquit: « In obscenitate criminalis propositi salvationem hic expetis contra vinculum conjugale? Quod Deus conjunxit, homo non separet¹, originaliter Domino statuente. Cur ergo (beatus Magnus intulit) Ecclesiam jugaliter tibi meis interventio-nibus desponsatam, contra propriæ salutis consilium et Dei voluntatem temerarius abdicasti? Ubi jam vota tuæ peregrinationis implesti, tuam in Dei nutu Ecclesiam repetens regredi non moreris. His dictis evanuit. Tum Petrus, his acceptis monitis, dicto tempore ad suam est reversus Ecclesiam ». Hincque Brunus.

43. In fine autem anni hujus, iidem Hierosolymis, post celebratum solemnem diem Natalis Domini, habitu generali conventu principum, et eorum qui aderant episcoporum, Theobertus Pisanus archiepiscopus, idemque Apostolicæ Sedis legatus, eligitur in patriarcham Hierosolymitanum, pulso nefario homine, qui thronum illum invaserat, Arnulpho, qui sequebatur principem Northmannorum, cum inter ea throno Antiocheno Bernardus patriarcha electus esset. A quibus religiose admodum Christiani principes accipere voluerunt singuli suorum principatum investituras, Godfredus regi Hierosolymorum a suo patriarcha eam accipiens, Boamundus principatus Antiochiæ ab Antiocheno patriarcha. Quo facto ab iisdem constitutæ sunt doles iisdem Ecclesiis, quales antecessores patriarchæ habuisse scirentur: licet horum occasione multæ sint postea obortæ contentiones, de quibus dicendum erit inferius suis locis. Ista omnia pluribus narrat Wilhelmus Tyrius², quem tu consulas pro arbitrio.

Quæ autem hoc item anno dicenda essent de Urbani successoris electione, in sequentem to-mum rejicimus, ne ejusdem Pontificis electio a reliquis ab eo rebus gestis ex divisione to-morum magno lectoris incommodo disjuncta ponatur.

44. *Baronii digna consideratio.* — Hic modo mecum post diuturnum laborem fessus, sicut ego scribendo, tu legendo, lector, consideto, et una pariter admiremur Dei providentiam in sancta Ecclesia Catholica moderanda; memores in quot quantaque discrimina sepe vidimus incidisse Petri naviculam, quanta subiisse pericula, disjectam ventis, absorptam fluctibus, sed iterum ex insperato emergentem ex abyssi profundo, rursum vero novis flatibus repercussam, conspeximus obruen-

¹ Act. x. — ² Apoc. xix.

¹ Matth. xix. — ² Will. l. viii. c. l. ix. c. 111. §. 19.

dam, ad momenta singula periclitantem, borealibus rabidis ventis magno impetu debacchantibus, insanientibus, inquam, et sævientibus ab Aquilone adversus Ecclesiam, Germanorum imperatoribus miscentibus omnia atque turbantibus, intrudentibus tot potentissimos schismaticos pseudopapas, in Romanæ Ecclesiæ extremum exitium atque perditionem. Qui enim magnæ moli suffultas columnas auferat, et stupea fulcimenta earum loco sufficiat: quid senseris de isto, nisi hoc unum agere, ut totum simul erectum miro opere ædificium penitus demoliat? Quid vero si tanta passam sæpius adhuc tamen subsistere inconcussam, sibi ipsi firmiter inherentem perspexeris celsam domum; quid senseris, nisi invisibili Dei potentia eam sic subsistere, suspendique divino præsidio, ne sic subrutâ machina ruat?

43. Ita plane recte censueris, ejus tantum ope factum, ut talia tantaque passa sancta Ecclesia damna subsistere potuerit, eamque nonnisi invisibili Dei manu, omni columna potentiore, quæ terræ molem appendit tribus digitis¹, sustentari.

Sicque firmiter asserueris adhuc inhabitare perpetuo in eadem Ecclesia Christum, qui migraturus e terra in cælum, hoc suis firmatum testamento reliquit, dicens¹: « Ecce ego vobiscum sum omnibus diebus usque ad consummationem sæculi ». Pariterque etiam affirmaveris, in navicula illa, quæ nullo ventorum impetu et maris violentia jactata potuerit unquam pati naufragium, ipsum adhuc existere, « qui facit ventis pondus, et aquas appendit in mensura². Qui clausit ostiis mare, et dixit: Hucusque venies, et non procedes amplius, et hic confringes tumentes fluctus tuos³ ». Idem ipse Dominus noster Jesus Christus, qui olim in eadem Petri navicula constitutus, periclitantibus una cum ipsa discipulis, e somno surgens, « imperavit ventis et mari, et facta est tranquillitas magna⁴ ». Quod si ita est: « intelligite, reges, et erudimini qui judicatis terram⁵ ». Intelligite vos contra Ecclesiam, cui præest Deus, frustra pugnare; erudimini, dum hoc facitis, contra vos ipsos magna vestri jactura lacescere Deum bello.

¹ Is. XL.¹ Matth. XXVIII. — ² Job. XXVIII. — ³ Job. XXXVIII. — ⁴ Matth. VIII. — ⁵ Psal. II.

1. *Peroratio cum gratiarum actione.* — Jam ad littus rele. Instar enim sagenæ missæ in mare ex omni genere piscium congregantis¹ Annalium scriptio se habet, quæ sui amplitudine in collectione rerum gestarum in vasto pelago sæculi hujus, quot continet tomos, tot tu, lector, veluti retis jactus enumeres. Sed ubi ductum est rete, non Judaico more secus litus sedendum ad delectum piscium; quin potius una cum Paulo² in littore positis genibus nobis orandum, et gratiæ agendæ Deo, cujus totum id munus esse cognoscimus; sicque cui cuncta accepta ferimus, eidem dignas laudes pariter referamus, procul abhorrentes ab illorum arrogantia, qui sibi omnia tribuentes, immolant sagenæ suæ³, et sacrificant reti suo. Petri namque nobis potius proponimus imitandum exemplum, a quo et rete accepimus ad piscandum⁴: qui stupens ad insperatam copiosissimam capturam piscium, procidit ad genua Jesu, a quo se totum intelligeret consecutum. Sed cum omnem gratiarum actionem tanto beneficio impari esse sciret, sese ad humilem peccatorum confessionem convertit, ex abundantia cordis in illud erumpens admirandum humilitatis elogium: « Exi a me quia homo peccator sum, Domine ».

Procido et ipse, sed eo humilior quo gravius peccans, ad pedes ejus: ut humi stratus, non os tantum, sed omnia ossa mea dicant¹: « Domine, quis similis tibi? » qui tot tantaque confers in immeritum beneficia, quorum excrecente diluvio prope modum obruendus, æque cum Petro exclamare compellat: « Exi a me, quia homo peccator sum, Domine », propriæ conscius infirmitatis, longe impar ad tanti ponderis beneficia subeunda.

2. Quod insuper ex tanta ac toties repetita piscatione nec sit hactenus rete conscissum, sed et ad jactus alios adhuc integrum perseveret; quod, inquam, nec defecerint ex laboribus in senio vires, sed virescant ad opus: totum id gratiæ est Abisag² Sunamitidis nostræ, senilia membra foventis, ipsius videlicet sanctissimæ atque purissimæ Virginis operi cæpto faventis, cunctaque nostra curantis, atque feliciter promoventis. Cui pro meritis, quot hujus descriptionis sunt apices, tot fluant gratiarum actionum imbres quot syllabæ, tot laudum fontes erumpant fluxu perenni ad vastum illud pelagus confluentes, ex quo omnia prodierunt, ad ipsum dico bonorum omnium copiosissimum largitorem Deum optimum maximum: cui semper laus, honor et gloria in sæcula sæculorum. Amen.

¹ Matth. XIII. — ² Act. XXI. — ³ Hab. I. — ⁴ Luc. V.¹ Psal. XXXIV. — ² 3. Reg. I.

Anno periodi Græco-Romanæ 6592. — Anno Æræ Hispan. 1137. — Anno Hegiræ 493, inepto die 17 Nov., Fer. 5. — Jesu Christi 1099.

— Paschalis II pape 1. — Henrici IV reg. 41, imp. 16. Alexii Comneni imp. 19.

1. *Controversia de primatu inter archiepiscopos Lugdunensem et Senonensem.* — A num. 1 ad 20. Controversia inter *Hugonem* Galliarum primatem ac Sedis Apostolicæ legatum, et *Daimbertum* archiepiscopum Senonensem, qui *Richerio* successit, anno millesimo nonagesimo septimo exorta, annoque nonagesimo octavo continuata; ideoque eam Baronius loco suo non refert. Continuator enim Chronici Sancti Petri-Vivi hæc de Richerio, cujus mortem Baronius hoc anno consignat, et de Daimberto scribit ad annum MXXVI: « Eodem anno obiit Richerius archiepiscopus, vir bonæ vitæ et beatæ memoriæ, qui antequam moreretur IV kalendas Januarias, in die scilicet festi Joannis Evangelistæ, accessit personis sanctæ matris Ecclesiæ Senonum, Daimberto præposito et archiclavari (id est, thesaurario, quæ dignitas in Ecclesiis cathedralibus et in monasteriis ea voce appellata sæpe reperitur) nondum, sed mox post eum futuro episcopo, et Hilduino archidiacono, et reliquis archidiaconis et præcentore, et nonnullis proceribus Senonicæ urbis, misit et mandavit fratribus monasterii Sancti Petri, ut eo vivente eligerent et providerent sibi abbatem, quod et fecerunt ». Paulo post: « Verum præfato Richerio de medio sublato successit Daimbertus ipsius Ecclesiæ vicedominus, nobilis et clarus, ab omni clero et populo electus. Permansit autem sine benedictione pastoralis, anno uno et duobus mensibus. Postea vero Romæ a papa Urbano consecratus, cum Apostolica benedictione et pallii decore rediit, in sede collocatus XIV kal. Maii, anno MXXVII ab Incarnat. Domini, lætante clero, et bona devotione populi. Cujus jam in archiepiscopio XI anno pæne peracto, testor Deum nusquam abbatiam Sancti Petri, vel audisse, vel legisse, aut vidisse, quietius vixisse vel fuisse ab omni inquietudine. De Deo succedentia tempora sub eo et cum eo habere læta et prospera ». Quibus ex verbis intelligimus, continuatorem istum hoc tempore vixisse, vel eum ex auctore hoc tempore vivente ista accepisse, et in prima persona, ut sæpe sit, protulisse.

2. *Contigit anno MXXVII.* — Die itaque vicesima septima mensis Decembris anni MXXVI, *Richerio* Senonensi archiepiscopo vita functo, *Daimbertus* in

locum ejus subrogatus est, statimque post ejus electionem clerus ad provinciales de ejus electione scripsit. Hi ordinationem celebrare volebant Quadragesimæ tempore, sed *Hugo* Lugdunensis archiepiscopus et summi Pontificis legatus prohibuit, nisi prius sibi tanquam primati reverentiam, quam *Richerius* denegaverat, profiteretur; missisque litteris ad provincie episcopos, ut a consecratione manus abstererent diserte jussit. Paritum quidem est legati mandatum; sed rescipit *Ivo* episcopus Carnotensis Epistolam ordine LX, alias LXV, Baronio num. 4 et seqq. recitatam, personalem illam exhibitionem ante susceptum consecrationis munus nulli primati deberi ex more, sed neque legatis jus illud complere, nisi electus alicujus criminis reus delatus sit. Quare petiit ut præmitteret liberam illius ordinationem provincialibus episcopis. Cum vero *Hugo* destinatis pertinaciter adhæreret, *Ivo* ea de re certiore fecit *Urbanum II*, Epistola LXV, relata a Baronio num. 2. « De Senonensi electo », inquit, « cujus consecratio a legato vestro Lugdunensi archiepiscopo ob hoc impeditur, quia ei jure primatus sui ante consecrationem suam obedientiam non proficitur, quid nobis agendum sit, rescribat vestra paternitas. Cum enim nulla aliquo accusante alia causa prætenderetur, propter quam ejus consecratio differetur, eo tamen jubente, propter reverentiam vestram manus ab ejus consecratione continuimus, cum de professione a metropolitani primatibus facienda nihil legamus consuetudine firmatum, vel legibus institutum: ultra quas metas nihil concessum esse primatibus testatur papa Nicolaus ». Hæc Epistola veteri ordine est LVIII.

3. *Daimbertus electus Senonensis ordinatus est Romæ anno superiori.* — *Daimbertus*, cum nec ordinationem a provincialibus episcopis obtinere posset, neque contra jura suæ sedis, Lugdunensis archiepiscopi primatum vellet agnoscere, intelligeret etiam *Hugonem* in sua sententia permanere, prohibitosque provinciales episcopos quominus ordinationem ejus peregerint, Romam profectus est, ubi absque ulla conditione ab Urbano II consecratus fuit, ut discimus ex Epistola ejusdem Pontificis ad *Hugonem Lugdunensem archiep.* data, et a Marca in Dissert. de Primatibus num. 118, ex Ms.

Lugdunensi eruta, scriptaque « Romæ apud B. Petrum. Indictione septima, VIII kalend. Maii, anno Dominicæ Incarnat. MXXIX, Pontificatus domini Urbani II papæ duodecimo ». Anno itaque millesimo nonagesimo septimo Hugo, archiep. Lugdunensis prohibuit suffraganeis archiepiscopi Senonensis, ne Daimbertum ordinarent; quod cum accepisset Ivo episcopus Carnotensis, e suffraganeis unus, ad eundem Hugonem scripsit Epistolam ordine LX, eo Christi anno, non vero currenti, quo eam recitat Baronius, et *Daimbertus* sub illius anni finem, vel initio anni MXXVIII, Romam profectus, postquam ab Urbano II consecratus fuit, in Galliam rediit, ubi *in sede propria locatus est XIV kal. Maii*, seu die decima octava mensis Aprilis, qui anno MXXVIII in Dominica incidit. Consecratus autem est Romæ mense Martio anni MXXVIII, cum anonymus laudatus affirmet Daimbertum fuisse « sine benedictione pastoralis anno uno et duobus mensibus ».

4. *Initium episcopatus Ivonis obiter statuitur.* — Post hæc, Ivo anno millesimo nonagesimo octavo ineunte, dedit ad Urbanum II Epistolam novo ordine LXVII, a Baronio num. 43 et seqq. relata, in qua significat se episcopatu renuntiare velle: « Ecce jam, inquit, hoc transacto septennio vineam mihi commissam pro posse meo excolui, stercorea etiam circumposui. Fructum autem quærebam, et non inveni. Detur ergo mihi libertas octavo anno, ut hoc principium verè octavæ aggreddiar, ut possim mihi sabbatizare, dulces fructus contemplationis carpere, et octavæ illius gaudia prælibare ». Quæ verba ostendunt Ivonem anno MXX, ante diem XXIV mensis Novembris Capuæ ab Urbano II episcopum ordinatum fuisse, quod jam suo loco probavimus. Neque enim eo in loco *Ieo* suæ ordinationis annos, ut Baronius num. I existimat, ab anno MXXII repetit, quia eo pacto annus ordinationis ejus septimus anno tantum MXXIX exeunte Novembri expletus fuisset et octavus inchoatus, cum tamen Urbanus II mense Julio præsentis anni e vivis abierit. Ordinatio itaque Ivonis cum anno MXXII alligari non potest, cumque ea Ivonis Epistola scripta sit post Natale Christi, quo Turonensis archiep. Philippum Francorum regem coronavit, imo post Natale sanctorum Innocentium, ut in ea legitur, manifestum est Ivonem hæc scripsisse initio superioris anni. Sed redeo ad Daimbertum.

5. *Daimbertus primum Lugdunensis archiep. agnovit.* — *Daimbertus*, postquam mense Aprilis anni MXXVIII in præsulatus Senonensis possessionem inductus fuit, circa præsentis anni initium Romam rediit, et in Synodo Romana hoc anno coacta, Urbano II promisit se Lugdunensis Ecclesiæ primum super Senonensem agniturum, ut nos docet Epistola ejusdem Pontificis ad Hugonem Lugdunensem data, cujus mox mentionem fecimus. In ea enim, postquam dixit Pontifex se Daimbertum consecrasset, subdit: « Nuper autem, cum ad Apostolorum limina tam pro ejusdem causæ actio-

ne, quam pro communi Synodica vocatione rediisset, præsentibus legatis tuis, etc. Sedis Apostolicæ cogente judicio, omni demum tergiversatione casata, in manu nostra professus est, se et Lugdunensis Ecclesiæ super Senonensem primum agnoscere, et de cætero sibi suisque legitimis successoribus tanquam primatibus obedire etc. præsentibus fratribus nostris quorum infra scripta sunt nomina, Anselmo videlicet Cantuariensi, Leodegario Bituricensi, etc. » Hæc autem Epistola VIII kalend. Maii, ut supra diximus, præsentis anni exarata, quo quidem tempore S. Anselmus Romæ versabatur, ut statim videbimus.

6. *Philippus rex anno superiori ad Bertradæ consuetudinem rediit.* — A num. 20 ad 23. Ivo in Epistola laudata, ordine LXVII ad Urbanum data, eum rogat, ut si Turonensis archiepiscopus vel aliquis Aurelianensis clericus pro electione Joannis pueri ad eum veniret, ei aurem non præberet: « Persona est, inquit, ignominiosa, et de inhonesta familiaritate Turonensis archiepiscopi, etc. per urbes Franciæ turpissime diffamata ». Paulo post: « Sciat is etiam, quia Turonensis archiep. contra interdictum legati vestri in Natali Domini regi coronam imposuit, et ut iste episcopus fieret, hac mercede promeruit. Et ut sciatis puerilem fuisse electionem, quidam etiam de eligentibus in Natale Innocentium in eligendo ita jocatus est:

Eligimus puerum, puerorum festa colentes,
Non nostrum morem, sed regis jussa sequentes.

Quare Epistola illa, in qua festi sanctorum Innocentium mentio, initio præcedentis anni scripta, et *Philippus* Francorum rex in Natali Domini anni MXXII a Turonensi archiep. coronam accepit, cum jam antea eodem anno ad consortium *Bertradæ* reversus fuisset. Nam id ante annum illum contingere non potuit, cum primo restitutus Ecclesiasticæ paci sub conditione *abjurandæ Bertradæ* anno MXXI rex fuerit, et improbable sit ad eandem, mora nulla interposita, reversum, et annua vix minor dari possit. Secundo, *Joanni* episcopo Aurelianensi, qui ad anni MXXV finem Claramontano Concilio interfuerat, defuncto anno MXXVII, suffectus est ab Ivone Carnotensi et Willelmo Parisiensi *Sanctio*, ut liquet ex Epistola LIX Joannis ad Hugonem Lugdunensem archiep. Sedis Apostolicæ vicarium. Sed *Sanctione* ob intrusionem et simoniam eodem anno deposito, *Joannes* hujus nominis II, in quem pluribus invehitur Ivo Epist. LXVII, episcopus Aurelianensis dictus est, electus die Natali sanctorum Innocentium anni MXXVII, postquam die Natali Christi præcedenti Philippus rex per *Rodulfum* Turonensem archiep. coronatus fuisset. Cum enim Ivo in Epistola adversus Joannem hujus nominis II ad Urbanum II data asserat, octavum episcopatus sui annum se attigisse, ea ab initio præcedentis Christi anni disjungi non potest, quia *Ieo* mense Novembri anni MXXVII octavum præsu-

latus annum inchoavit, et Epistolam illam post festum sanctorum Innocentium, uti jam diximus, exaravit. Cæterum duratio sedis *Sanctonis* I et *Sanctionis* episcoporum Aurelianensium, neque a Saussaio in Annal. Aurelian., neque a San-Marthanis ex antiquis documentis notata, non potuit non esse brevis. Sed Joannes II plures annos Aurelianus sedit. In Biblioth. Clun. pag. 531 et seq. refertur donatio ab eo facta Ecclesie *Pitueri*, cœnobio Cluniacensi subdite, in cujus fine legitur: « Actum est istud anno ab Incarnat. Dom. mcm, episcopatus Joannis Aurelianensis episcopi anno xvii », ubi rejiciendus denarius numerus, ab oscitanti librario intrusus, numerusque seplenarius qui restat, ab anno mxcvii exeunte repetendus. Quæ emendatio certa: *Joannes* enim discrete in ea donatione alterius meminit *sub eodem anno* a Ludovico rege Francorum designato factæ mense Octobri anni mcm, ibidem recitatæ. Ex quo et liquet *Joannem* die Innocentium anni mxcvii episcopum Aurelianensem electum.

7. *Nec dissentit Fulco maritus ejus.* — Revocatæ *Bertradæ* causa adscribenda videtur consensui Fulconis mariti, quem ipsa blandimentis muliebribus ad suam voluntatem alliciebat: « Inter opulentos rivales », inquit Ordericus, lib. 8 de Philippo rege et de Fulcone comite Andegavensi verba faciens, « ingens tumultus et prætorum conatus exorsus est (initio scilicet conjunctionis *Bertradæ* cum Philippo), verum versipellis mulier inter rivales simultatem compescuit, ingenioque suo in tantam pacem eos compaginavit, ut splendidum eis convivium præpararet, et apte prout placuit illis ministraret ». Sugerius vero in Vita Ludovici cap. 17: « Andegavensem priorem maritum, licet throno omnino repudiatum, ita molliciebat, ut eam tanquam dominam veneraretur, et scabello pedum ejus sæpius residens, ac si præstigio fieret, voluntati ejus omnino obsequeretur ».

8. *Synodus Rom. II sub Urbano II.* — Ad num. 23. Baronius post Concilium *Barense* kalendis Octobris præcedentis anni habitum, unam Synodum *Romanam* in duas divisit, autumavitque priorem anno præterito, posteriorem currenti congregatam fuisse. Verum ut jam anno superiori monstravimus, post Concilium *Barense* unicum Romanum coactum, et quidem hoc anno, tertia post Pascha hebdomada, eique sanctus *Anselmus* interfuit.

9. *Moritur Urbanus II PP.* — A num. 24 ad 40. Simeon Dunelmensis, in Historia de Gest. reg. ad annum mxcix: « Urbanus papa, inquit, IV kal. Augusti, feria v obiit ». Verum loco *feria v*, legendum feria vi, ut littera Dominicalis B demonstrat. Urbanum autem II *quarto kalendas Augusti*, seu die xxix mensis Julii currentis anni e vivis excessisse, constans est auctorum antiquorum sententia. Quare cum an. mxxxviii die xii mensis Martii Pontifex Romanus consecratus fuerit, sedit annos undecim, menses quatuor, et dies octo-

decim, die emortuali incluso, et hoc sine controversia. Paschalis II ei post dies xvi successit, ut anno sequenti videbimus.

10. *Gesta ante expugnationem Hierosolymæ.* — Ad num. 40 et seq. Chronographus Malleacensis, hujus temporis scriptor, civitatis Hierosolymitanæ expugnationem hoc modo refert: « Raimundus comes Sancti-Ægidii exivit de civitate Maira idibus Januarii, et venit ad castrum Capharda, ibique junxit se cum eo comes Rotbertus Normannia: Rotbertus Flandrensis et dux Guodefredus venerunt usque Liciam (Laodiciam) civitatem, sequentes Raimundum Sancti-Ægidii. Ibi Raimundus separavit se ab aliis, et reversus est Antiochiam. Indeque tendentes venerunt Tripulim, et ibi pugnaverunt contra Turcos et maximam partem occiderunt. Alia die equitaverunt ultra vallem Edissem, et inde ad castrum Archæ. Quod tenuerunt obsessum per tres menses uno die minus; ibique Pascha Domini celebraverunt tertio idus Aprilis (legendum, *quarto idus Aprilis*). Fecerunt Placitum cum rege Tripuli, et discesserunt a castro, et pervenerunt in sexta feria quarto idus Maii (legendum, *tertio idus Maii*, qui hoc anno in feriam sextam incidit). Postea discesserunt a civitate, veneruntque ad castrum Betholon, deinde Gibelon, (Biblum), et inde ad civitatem Barut, et de illa ad Sagittam (Sidonem), et de Sagitta civitate ad civitatem Sur (Tyrum), de civitate autem Sur ad Acram civitatem, et de Acra ad Caiphaz, indeque pervenerunt ad civitatem Cæsaream; ibidem Pentecosten celebraverunt quarto kal. Junii, unde venerunt ad civitatem Ramam, et ibi ordinaverunt episcopum.

11. *Hierosolyma a Christianis expugnata.* — « Et inde venerunt lætantes Hierusalem septimo idus Junii, eamque robustissime prope muros civitatis obsederunt. Robertus Normannus obsedit eam a Septentrione, et juxta eum Flandrensis comes Rotbertus, a meridie comes Raimundus Sancti-Ægidii. Quinto idus fecerunt bellum: quarto idus aggrediuntur civitatem, et minorem murum straverunt, et unam scalam ad majorem exerexerunt, et super suis ensibus ac lanceis cominus pugnabant. Fuerunt in illa obsidione per decem dies in magna siti et fame, et fecerunt processionem circa civitatem, et postea fecerunt duo lignea castra, et VII idus deportaverunt ad civitatem. Sexto idus, et quinto et quarto, aptaverunt machinas, et pridie aggrediuntur mirabiliter civitatem usque in noctem. Sexta feria, summo mane, undique aggrediuntur eam et nimis stupefacti erant, usque venit illa hora, in qua Dominus noster JESUS CHRISTUS passus est in ipsa civitate mortem. Tunc expugnata est et subjugata, quamvis pugnasset fortiter, nisi per voluntatem Dei intraverunt. Primus qui intravit, miles extitit Letot, secundus Guodefredus dux, tertius Eustachius comes frater ejus. Octava postquam civitas capta fuit, celebraverunt festivitatem ereptionis per omnem civitatem Hierusalem, et elegerunt principem Guodefredum, qui

pugnaret paganos et custodiret Christianos. Similiter in loco patriarchæ elegerunt Arnulfum, in esivitate sancti Petri ad Vincula. Aliud bellum fecerunt apud Ascalonem, pridie idus Augusti, cum Amiraviso Babyloniæ, ubi nonaginta (nongenta) sexaginta millia erant: sic dictum fuit, et tamen nemo scivit numerum, nisi solus Deus ».

12. *Gothofredus Bullionius rex Hierosolymæ creatur.* — Hæc fuse ab auctoribus qui bellum Hierosolymitanum scribere narrantur. Chronographus Maxentianus mensem et diem captæ urbis annotarat, sed ab amanuensi prætermisus fuit. « Capta est autem », inquit Tyrius, lib. 8, cap. ult., « prædicta civitas, anno ab Incarnat. Domini mxcix, mense Julio, quintadecima die mensis, feria sexta, circa horam diei nonam, anno tertio ex quo fidelis populus tante peregrinationis sibi onus assumpserat ». Dies et mensis ab historicis, qui testes oculati fuere, confirmati. Octavo post urbem captam die, Gothofredus Bullionius, Lotharingæ dux, rex Hierosolymitanus unanimi consensu electus: « Promotus autem », inquit Tyrius lib. 9, cap. 9, « humilitatis causa, corona aurea, regum more, in sancta civitate noluit insigniri: ea contentus et illi reverentiam exhibens quam humani generis Reparator in eodem loco usque ad Crucis patibulum pro nostra salute spineam deportavit. Unde quidam in catalogo regum, non distinguentes merita, eum dubitant connumerare: magis attendentes quæ exterius geruntur in corpore, quam quæ fidelis et Deo placens anima mereatur. Nobis autem non solum rex, sed regum optimus, lumen et speculum videtur aliorum. Non enim consecrationis munus et Ecclesiastica sprevisse credendus est princeps fidelis, sacramenta, sed pompam sæculi; et cui omnis creatura subiecta est vanitatem, et perituram humiliter declinasse coronam, ut immarcescibilem alibi consequeretur ».

13. *Arnulfus, dein Daymbertus, patriarchæ Hierosolymorum dicti.* — Ad num. 43. Petrus Tudebodus, presbyter Siuracensis apud Pictones, qui descripsit *iter Hierosolymitanum* cui interfuerat, quique res per quinque priores annos gestas narravit, lib. 1, pag. 812, apud Duchesnum tom. 4, postquam locutus est de expugnatione civitatis Hierosolymitanæ, et de electione Godefridi in regem, quæ facta est octava die a capta civitate, ait: « Similiter elegerunt in loco patriarchæ quemdam sapientissimum et honorabilem clericum, cui nomen erat Arnulfus, in festivitate sancti Petri ad Vincula ». Simon enim, ultimus patriarcharum Græcorum, propter minas Turcorum ad insulam Cyprum profectus erat; « sed illo, tempore obsidionis, in prædicta insula ex hac luce subtracto, Ecclesia suo pastore viduata remansit », inquit Albertus Aquensis, lib. 6, § 39, qui Arnulfum valde laudat, de quo tamen variant scriptorum iudicia, sicuti et affectus. « Post aliquantum temporis, cum facta usque ad Apostolicam Sedem procrebuisset electio, papa Paschalis, post obitum

Podiensis episcopi (Adhemari appellati) vices super Dominici exercitus curas suas archiepiscopo Dairberto (seu Daymberlo) Pisano mandavit », inquit Guibertus abbas Monasterii S. Mariæ Novigenti, hujus temporis scriptor, lib. 7, qui Arnulfum in aliquibus culpam, additque eum cum dignitate motus fuisset, auctorem fuisse ut *Daymbertus* legatus patriarchæ eligeretur, quod exeunte hoc anno factum fuisse prodit Fulcherius Carnotensis, qui præsens erat, lib. 1, cap. 21, Historiæ Hierosolymitanæ ab anno mxcv ad annum mxcviii perductæ.

14. *Institutio equitum Hospitaliariorum.* — Hospitale Hierosolymitanum sancti Joannis, uti narrant Tyrius lib. 18, cap. 6, et Jacobus de Vitriaco in Hist. Hierosol., cap. 64, in hunc modum initium habuit. *Amalphitani* (qui Normanni erant), quia merces peregrinas afferebant, califam Aegypti muneribus sibi benevolam reddidere, et ab eo obtinere, ut prope Ecclesiam Sepulchri Dominici Ecclesiam Latinorum construerent, dictam postea Ecclesiam *Sanctæ Mariæ de Latina*, quia abbatem et monachos more Latinorum divina celebrantes in ea statuerunt. Illuc postea confluyente peregrinorum multitudine, cum tam monasterium illud quam monasterium *sanctæ Mariæ Magdalene*, pro peregrinis mulieribus Latinis ab ipsis fundatum, ad excipiendos omnes pauperes et infirmos non sufficerent, prædictus abbas et monachi hospitale et capellam in honorem *sancti Joannis Eleemosynarii* patriarchæ Alexandrini in eodem loco construxerunt. Postquam vero Hierosolyma a Christianis capta fuit, vir quidam sancte vite, nomine *Gerardus*, qui diu de mandato abbatis in prædicto hospitali pauperibus ministrarat, adjunctis sibi quibusdam aliis, « habitum regularem suscepit, vestibus suis albam crucem exterius affluens in pectore, regulæ salutari et honestis institutionibus facta solemniter professione, seipsum obligavit », inquit Jacobus de Vitriaco, cui consonat Tyrius citatus.

15. *Sub patrocinio S. Joannis Baptistæ.* — At equites Hierosolymitani negant *Gerardum* dedicasse sancto *Joanni Eleemosynario* hospitale quod Hierosolymis ante initium belli sacri ædificavit, affirmantque nullam unquam in Ordine Ecclesiam in honorem sancti Joannis Eleemosynarii constructam, aut aliquod festum de eo celebratum, sed *sanctum Joannem Baptistam* semper Ordinis patronum agniti, varia per annum festa ab antiquissimis temporibus de illo facta, ejusque mentionem in votis ab equitibus Hierosolymitanis quando professionem emittunt fieri solitis, semper habitam. Hanc difficultatem quanta potui diligentia examinavi, comperique Ordinis traditionem in dubium revocandam non esse. Extat apud Samarthanos, in archiepiscopis Arelatensibus, Charta Bernardi Arelatensis archiep. qua confirmat « Deo et sancto Joanni Baptiste, et Hospitali sancti Sepulchri, et pauperibus » ac fratribus hospitalariis, do-

nationem Ecclesiae Sancti Thomae Apostoli in urbe Arelatensi site, factam ab Attone antecessore ejus; in eaque dicitur: « Acta est Charta in civitate Arelate in mense Octob., XIV kal. Novemb., anno ab Incarnat. MCCCXIX, Indict. vii », a Natali Domini vel a Januario inchoata. Quare cum *Atto* circa annos MCV, ut apud eosdem San-Marthanos videre est, sedere coepit, evidens est ipso Ordinis initio, non sanctum *Joannem Eleemosynarium*, sed sanctum *Joannem Baptistam* equitum Hierosolymitanorum patronum extitisse.

16. *Quod probatur ex Actis publicis.* — Ad hæc tom. II Monastici Anglicani, pag. 509, refertur Charta Willelmi filii Adelini Henrici, Angliæ regis dapiferi, qua confirmat quandam donationem a se factam « Deo et B. Marie, et S. Joanni Baptiste, et beatis pauperibus sanctæ domus hospitalis Hierusalem, et fratribus in eadem domo Deo servientibus ». Scripta Charta « anno Incarnationis Dominicæ MCLXXXVI, XVI kal. April., apud Londoniam ». Tum p. 510, recitatur alia Charta Joannis Angliæ regis, qua confirmantur donationes factæ « Deo, et fratribus sancti hospitalis Hierusalem ». Donationes autem, quæ ibidem sigillatim confirmantur, paulo ante sine anno et die referuntur; dicunturque factæ in honorem sancti Joannis Hierosolymitani (1). *Joannes* anno MCCCIX in Angliā regnare coepit, ideoque primo hujus Ordinis sæculo, non sanctus *Joannes Eleemosynarius*, sed sanctus *Joannes Baptista* patronus agnitus in Angliā, et Guillelmi Tyrii ac Jacobi de Vitriaco narratio præfatis Chartis plane convulsa. Nec video quid ad eas responderi possit. Verum quidem est, has donationes factas fuisse hospitali Londoniensi, cujus Ecclesiam *Heraclius* patriarcha Hierosolymitanus anno MCLXXX, sexto idus Martii, cum in Angliā versaretur, in honorem sancti Joannis Baptiste dicavit, ut legere est loco laudato Monastici Angliæ. p. 505; sed quemadmodum hospitale illud dicitur Hierosolymitanum, et in honorem sancti *Joannis Baptiste* fundatum est, ita alia per Occidentem ædificata, ideo appellantur hospitalia et Ecclesie sancti Joannis, tam in libris, quam in Actis publicis, quia domus Hierosolymitana cæterarum caput ac mater, primo Ordinis sæculo sanctum Joannem Baptistam patronum reverebatur.

17. *Refellitur opinio contraria.* — Bollandus tamen ad diem XXII Januarii relata Vita sancti Joannis Eleemosynarii patriarchæ Alexandrini, et notis illustrata, pag. 533 patrociniū Ordinis Hospitaliariorum ei attribuit, et de opinione contraria ait: « At nobis frivolū id videtur. A quo enim

Veterum traditum est litteris, aut quis omnino usquam meminit? Sacellum vero illud; cui dicatum fuerit utri tandem certius nosse potuerunt, Tyriusne et Vitriacus, qui id suis ipsi oculis lustrarunt? An recentiores, qui sola ratiocinatione id concludunt, et quidem sententiæ dubiis? » Sed præter ratiociniā, Acta publica quorum mox meminimus, traditionem Ordinis Hierosolymitani extra omnem dubitationem ponunt. Neque ratiociniā ad eam corroborandam in medium allata parum roboris habent. Nam verum quidem est sanctum *Joannem Eleemosynarium* toto Oriente celeberrimum fuisse, sed minime verosimile *Gerardum* et equites Hierosolymitanos, a quibus instituti monachi et sanctimoniales, qui ritu Latino divina officia Hierosolymis peragerent, alium patronum elegisse, quam qui in Ecclesia Occidentali in summa celebritate esset: improbable pariter in aliquo Ordine religioso nunquam aliquam Ecclesiam in honorem patroni sui ædificatam fuisse, nullamve de eo in officiis divinis mentionem unam unquam factam.

18. *Testimonium Guillelmi Tyrii hac in controversia infirmum.* — Argumentum, quod ab auctoritate *Guillelmi Tyrii* desumitur, in specie quidem validum, sed revera infirmum; nam quoad *Jacobum de Vitriaco*, is serius Hierosolymam venit, et *Tyrii* opinionem amplexus est. In Præfatione libri 16 quem Tyrius exorditur ab iis quæ anno MCLXII accidisse credidit, ait se hæcenus narrasse quæ relatione acceperat, sed imposterum scriptis mandaturum, quæ vel ipsemet vidit, vel a testibus oculatis didicit; et tamen eo anno et consequentibus, non pauca refert de quibus constat cum male edoctum fuisse, et in iis fidem ejus nutare. Nequē dici potest scriptor coævus respectu foundationis istius Ordinis, cum lib. 19, cap. 4, verba faciens de divortio *Amalrici III*, regis Hierosolymitani, et Agnetis, filiae comitis Edessani, quod contigit anno MCLXII, affirmet se tunc in juvenilibus annis versatum fuisse, cum scribat: « Nondum de scholis redieramus, sed trans mare adhuc circa liberallium artium detinebamur studia, quando Hierosolymis hæc facta sunt ». Quare Tyrius, longe post conditum Ordinem, in Orientem perrexit, neque operi suo manum admovere potuit ante ultima tempora *Amalrici III*, anno MCLXXXII demortui. In Præfatione enim suæ Hlistor. et in fine lib. 20 ait, se ad hujus regis postulationem eam scripsisse. Tyrius igitur auctor coævus non fuit; imo auctores coævos non raro in errorem abripi ac hallucinari sæpius insinuavimus, sed immerito adversus tra-

(1) Nullum jam superesse dubium potest circa agitatam hanc controversiam, cui potissimum patrono Ecclesia Hospitalis Hierosolymitana dicata fuerit, S. Joanni Eleemosynario sive potius S. Joanni Baptiste; nullum, inquam, modo dubium superest, ex quo opera viri Cl. P. Sebastiani Pauli, Congregationis nostræ scriptoris incliti, pro uti Codex Diplomaticus sacri Ordinis Hierosolymitani. In eo enim tom. I, pag. 268, vulgata est Bulla Paschalis II, data « Beneventi per manum Johannis sanctæ R. Ecclesie card. ac bibliothecarii, XV kalend. Martii, Indict. vi, Incarnationis Dominicæ anno MCLXII, Pontificatus autem Domini Paschalis PP. II anno XIV ». Data est ad Gerardum, in tutorem ad præpositum Hierosolymitam xenodochii; in ea vero sub tutela Sedis Apostolicæ suscipitur « Xenodochium quod in civitate Jerusalem juxta B. Joannis Baptistæ Ecclesiam instituit ». Perspicuum inde fit Ecclesiam hospitalis Hierosolymitam ab ipsa institutione sua S. Joanni Baptiste dicatam fuisse, idem pariter refert Callistus II in sua Bulla ad eundem Gerardum, data anno MCCCX, XVI kalendas Julii, Indict. XII. Callistus anno in qua privilegia Paschalis confirmans exprimit inter cætera « Xenodochium juxta Ecclesiam S. Joannis Baptistæ institutum ». MANSI.

ditionem Ordinis, cui tot monumenta favent, profertur testimonium Guillelmi Tyrii, qui prorsus abhorruit ab equitibus Hierosolymitanis post dissidia inter eorum Hierosolymitanum et eosdem equites exorta, quod hi sese ab episcoporum jurisdictione subtraxissent, et ab Hadriano IV obtinissent, ne bonorum a se possessorum decimas eisdem solverent. Legenda quæ hanc in rem a nobis dicuntur anno mclv, unum. 7 et seq. Illa itaque fabula tandem explodenda. Porro Charta laudata Bernardi archiep. Arelat. extracta fuerat a Peireskio ex libro authentico, uti vocatur, Capituli Arelatensis, ut legi in ejus registro res Ecclesiæ Arelatensis contingente.

19. *Henricus imp. Henricum filium reg. renuntiat.* — «Henricus imperator», inquit abbas Urspergensis «in Epiphania, Aquis filium suum juniorem Henricum Quintum regem fecit, reprobato majore suo Chunrado quem prius coronavit. Chunradus vero, causam rebellionis suæ paucis tantum sibi que familiarissimis in regno detegens, assumpto quodam ex ordine ministerialium patris, æque Chunrado nomine, forti admodum et prudenti viro, per quasdam Italiæ partes et nomen et dignitatem regis annis fere novem obtinuit, tantum indolis suæ per orbem Romanum diffundens interim odorem, ut nemo religiosus, nemo sapiens in ipso saltem Republicam constituendam fore dubitaret. Erat enim vir per omnia Catholicus, et Apostolicæ Sedis subjectissimus, plus religioni quam fascibus vel armis deditus, etc. Cælibatus pudorem perpetualiter et servare cum proposuisset, coactus tamen a suis filiam Ruggeri ducis Siciliæ, famosissimi pæne nostrorum temporum viri, duxit uxorem, ejus tam casu usus est conjunctione, ut vix crederetur eam unquam cognovisse, etc.» Eandem Henrici Quinti inaugurationem cum hoc Christi anno copulat chronographus Hildesheimensis.

20. *Floret Malaterra.* — Usque ad hunc annum *Gaufredus* a Malaterra, monachus Benedictinus, opus suum perduxit, nempe «libros 4 de Gestis Roberti Viscardi Calabriæ ducis et Rogerii ejus fratris, principum Normannorum, et eorum fratrum in Campania, Apulia, Sicilia», incertos in totum *iv Scriptorum Hispaniæ Illustratæ*, initio hujus sæculi editorum. Inde Possevinus cum Hispanum male credidit, hunc enim in Normannia Galliæ provincia natum non dubitandum.

21. *Obitus Roderici Cidi.* — Obiit hoc anno magnus ille heros et fidei in Hispania defensor *Rodrigo Díaz*, Cidus vulgo appellatus, quem jure merito queritur Sandovalius in Historia Ferdinandi Magni Castellæ et Legionis regis, Historicum nactum non esse, qui illustres ejus actiones posteritati commendavit. Pauca enim quæ de eo scripta, fabulosis narrationibus plena. Post *Valentiam* captam et post alia egregia facinora et vivis excessis, postquam Valentia annis quinque prefuisset. Annus ejus emortualis in Tumbo Nigro Sancti

Jacobi apud Sandovalium, pag. 56, *Æra mccccviii* consignatur, quod et in antiquo documento Ms. apud eundem Sandovalium etiam legitur. Denique chronographus Malleacensis, qui hoc tempore floruit, ad hunc annum habet: «In Hispania apud Valentiam Rodericus comes (Cidus scilicet) defunctus est, de quo maximus luctus Christianis fuit, et gaudium inimicis paganis». Plerique Hispanorum scriptores tradunt, mortuo *Cido*, Christianos, conservandæ Valentia spe abjecta, eam deseruisse. Verum in eodem documento lingua Castellana scripto apud Sandovalium pag. 56, diserte dicitur, *Alfonsum regem Valentiam mense Maio Æra mclxi*, anno nempe Christi non dereliquisse, et *Maurum*, quem nominat regem, eidem præfectum fuisse.

22. *Philippus Franciæ rex Ludovicum filium reg. dicit.* — Philippus Francorum rex Ludovicum filium, qui post ejus mortem monarchiæ Franciæ præfuit, hoc vel superiori anno in consortium regni adscivit, deceptique qui hanc designationem in annum mem aut etiam serius differunt. In Bibliotheca enim Cluniacensi, pag. 530, extat Diploma ab eo solo nulla patris mentione facta emissum, in ejus fine legitur: «Actum est istud mense Octobri apud Toriacum, regnante Ludovico rege, v anno, anno ab Incarnat. Domini mcm». Quare hoc anno ante mensis Octobris finem, vel forsitan superiori post ejusdem mensis initium, Franciæ rex ductus fuerat. Ad hæc Catellus, in Hist. comit. Tolosæ lib. 2, cap. 2, refert reperiri in Chartulario S. Saturnini donationem quandam cum hæc subscriptione: «Facta Charta in mense Augusto, feria quinta, anno ab Incarnat. Domini millesimo centesimo, Ludovico rege Francorum regnante, Bertrando comitante (in comitatu sc. Tolosano) et Amelio episcopante». Denique Simeon Dunelmensis, in Hist. de Gest. reg. Angl. ait: «Anno mci, Henricus rex (nempe Angliæ) tenuit curiam suam Londoniæ in Nativitate Domini, ubi interfuit Ludovicus electus rex Francorum», quod et Hovedenus in Henrico I, pag. 468 etiam habet, et uterque annum a Natali Christi exorditur. De Ludovico, hujus nominis VI, sæpe infra sermo fiet.

23. *Ludovici regis anni raro in scriptis publicis ante ejus coronationem memorati.* — Blondellus in Diatriba de formula regnante Christo sect. 1, contendit *Ludovicum Grossum*, hujus nominis VI, Philippi regis filium, ante patris mortem nunquam regem absolute, sed tantum *regem designatum*, vel *regni defensorem* vocatum fuisse, ideoque subscriptionem quam ex Catello produximus, mendose descriptam, ac loco *anno ab Incarnat. Domini mc*, legendum esse *anno ab Incarnat. Domini mcm*, quo in mense Augusto post Philippi patris obitum coronatus fuit. Verum si vir pereruditus animum advertisset ad Diploma regis Ludovici, in Bibl. Cluniacensi, quam legerat, recitatum, in eam sententiam non abiisset. Charta enim, quam mox ex ea memoravimus, non solum dicitur scripta *regnante Ludovico rege*, v anno, sed etiam in ea visitur

magna crux, circum quam scriptum, *Signum Ludovici regis*, ejusque in alia Charta in eadem Bibliotheca immediate post recitata, dataque a Joanne episcopo Aurelianensi *anno ab Incarnat. Domini MCII*, eodem sc. anno ac Charta regis, mentio est, quia utraque in gratiam Ecclesiae *Pitueri* cœnobio Cluniacensi subjecta emissa. Cæterum Ludovicus plerumque rex designatus tantum ab historicis appellatur, vel, ut in Charta a Mabillonio lib. 6 de Re Diplom. pag. 504 relata, « Ludovicus regius filius, Dei gratia Francorum rex designatus », et anni regni ejus perraro notati; imo postquam solus regnavit, nonnisi a Philippo patris morte deducti, cum

tamen tam *Philippus*, quam *Ludovicus VII* Ludovici Grossi filius, et *Philippus Augustus*, qui ei successit, annos suos a die quo coronati sunt et cum patribus regnare cœpere repetant. At Ludovicum VI a Philippo patre etiam coronatum fuisse et aliquando regni ejus annos a prima illa coronatione in ejus Diplomatis numeratos, demonstrat Præceptum ab eo emissum, et a Jacobo Petito post Theodori archiepiscopi Cantuariensis Pœnitentiale pag. 581 relatum, in cujus calce dicitur: « Actum Parisius anno Incarnat. Verbi MCX, Indict. tertia, pridie nonas Februarii, anno unctionis nostræ XI. Stephanus cancellarius relegendo subscripsit ».

HIC BARONIUS UNDECIMUM ANNALIUM TOMUM ABSOLVIT.

PASCHALIS II ANNUS 1. — CHRISTI 1100.

Præfatio auctoris cum imploratione divini auxilii. — Post alios editos Annalium tomos, ecce duodecimum, Deo favente, ad Ecclesiam inferre paramus, id conantes, ut simul omnes divinatorum operum indices persistent velut inscriptæ columnæ, quæ tum veritatis firmitate constantes, quassatam jugiter ictibus persecutorum sanctam Ecclesiam servant illæsam, tum inscriptione vocales prædicent ubique terrarum in ejus regimine gloriam summi Dei, haud oblivioni tradendam, sed mille titulis illustrandam, atque angelorum et hominum linguis perpetuo celebrandam. Ita namque divino illo erudimur exemplo, cum post transmissas magno miraculo cum sacra sarcina siccæ vestigio Jordanis undas, in perennem memoriam supernæ potentiae, Deus duodecim lapides et profundæ fluminis alveo tolli, et in Galgalis elevatos, perpetuæ memoriæ suæ gloriæ consecrari præcepit, dicens ¹: « Tollant de medio Jordanis alveo, ubi steterunt pedes sacerdotum, duodecim durissimos lapides, quos ponetis in loco castrorum, in signum videlicet, quod defecerint aquæ Jordanis ante Arcam foederis ».

At quod semel tunc accidit, cum ad inferendam in Terram promissionis, Josue duce, humeris sacerdotalibus Arcam, obices ponerentur aquæ

Jordanis, cohibita ipsæ Dei nutu, deorsum fluere desinentes, sursum intumescentes, conversæ retrorsum, liberum transeuntibus exsiccatum alveum reliquere: in sancta Ecclesia, cujus typum Arca illa gerebat, frequentius actitatum ostenditur, dum adhuc ipsa peregrinans, JESU CHRISTO prævio, perducitur in Terram viventium, non unius tantum turgentis annis vortices superans, sed quæcumque ad mergendam eam e portis inferi dirus ille draco flumina vomuit ¹. Quotquot enim Ecclesiæ persecutiones numeras superatas, tot dixeris fluvios magno impetu rapidos esse divina potentia arefactos, atque secure transmissos, sive cum a gentilibus, sive cum ab hæreticis, schismaticisque, aliisve persecutoribus sancta Ecclesia jugiter exagitata, victrix semper emergens, de ipsis omnibus gloriosissime triumphavit. Quæ cuncta cum omnes hactenus editi Annalium tomi copiose atque manifeste demonstrent, merito quot ipsos numeras tomos, tot lapides dixeris de antiquitatis abyssis erutos, et in memoriam sempiternam divinæ gloriæ, in Galgalis (quod interpretatur Acervus acervi) alterum super alterum, aucto cumulo sublimes in Ecclesia collocatos.

Ut autem, quod in reliquis jam editis tomis, idipsum in hoc duodecimo, quem præ manibus

¹ Josue IV.

¹ Apoc. XII.

habemus, æque feliciter præstare possimus : consuetum præsidium illud nobis tutum, indeficiens atque præsentaneum summa fiducia imploramus, ipsam videlicet patronam nostram sanctissimam Virginem Dei Genitricem Mariam, ut quæ Dei Verbum e profunda divinitatis abyssu susceptum, et in alvo conceptum, tanquam lapidem vivum ¹, summum, angularem, electum in domo Dei, super ²

montem posita, in vertice montium angelis et hominibus adorandum, in salutem credentium exaltavit ; ipsa nobis subveniat in imo alveo laborantibus ad erigendum duodecimum lapidem istum, multiplicibus sæculi hujus victoriarum titulis exarandum, in laudem honorem et gloriam sempiternam christi jesus, qui pro Ecclesia sua jugiter pugnat, vincit semper, atque triumphat in sæcula. Amen.

¹ 1. Pet. II. — ² Isa. II.

1. *Electio Paschalis papæ II.* — Millesimus centesimus christi Redemptoris incipit annus octava Indictione, idemque primus Paschalis Romani Pontificis, inchoatus tamen mense Augusti anni superioris, cujus electionem hic describendam distulimus, ut novo tono cum novo Pontifice incipiente, hic una simul lector inveniat quæ facta noscuntur anno superiori ; nec sint ipsi ea petenda ab eo quem absolvimus præcedenti Annalium tonio, sed hic habeat etiam electionem ejus, cujus hic primum annum incipimus numerare. Mortuo igitur, ut dictum est, anno superiori Urbano papa, summus dolor Orthodoxos omnes obtinuit, eo quod ejus obitu videretur, secundum illud Hieremie lamentum ¹, murus seu antemurale pariter dissipatus. Ita quidem, cum qui adversus schismaticum imperatorem jugiter perseverasset infractus et antipapæ restitisset invictus, quique etiam adversus infideles Christianæ religionis hostes bella movisset, vicisset, et loca sancta ab inepiorum manibus vindicasset, fuit ex hac vita, Deo vocante, subductus : Occidentali atque Orientali simul orbi dolorem hand mediocrem reliquit. Contra vero, desertores Catholicæ unitatis, schismatici sectatores vehementer sunt tanti Pontificis obitu gratulati : potissimum vero ipse schismaticus antipapa Guibertus, exultans ac insultans pariter, quod tres ipso vivente atque in Petri cathedra condente (ut vane gloriabatur) Deo vindice essent extincti Pontifices, Gregorius Septimus, Victor Tertius, atque Urbanus Secundus, nesciens infelix jam suæ domus pulsantem ostium adstare mortem anticipi gladio formidandum, ut duplici feriens acie, et præsentem vitam auferat et futuram. Hoc siquidem anno cum contigit ex hac vita ad inferos morte repentina perducti, ut suo loco dicendum erit inferius.

2. Ubi igitur sacer senatus licet mœrens ac tristis Urbano Pontifici persolvisset extrema, ad successoris electionem comitia ex more frequentat diebus quatuordecim. Una omnium illa erat precibus declarata sententia, ut eo calamitoso Ecclesiæ tempore, nemo quod suum esset quereretur, sed quæ JESU CHRISTI, utque consuleretur lugenti Ecclesiæ viduatae pastore : ad hoc preces fideliū adhibentur et piorum omnium vota conspirant. Nulla eos turbat dissensio, nulla discordia dividit, vel schisma

dissolvit quos charitas in sancta unitate conjunxit, et pax sancto fœdere strinxit. Sic igitur die decimo quarto ab Urbani papæ obitu, hoc est duodecima mensis Augusti, subrogatur in locum ipsius Rainerius, sive Rainerius, presbyter cardinalis tituli Sancti-Clementis, abbas vero monasterii Sanctorum Laurentii et Stephani extra muros, nominatusque est Paschalis Secundus ; de quo iste prædictiones a Dodechino hujus temporis scriptore narrantur : « Cuidam religioso revelata est mors Urbani. Cui interroganti, quis post eum futurus esset Pontifex, respondit is qui apparuit : Rainerius (Rainerius) abbas. Rursum illo interrogante quandiu vivere deberet : Respice, ait, ad suppedaneum lectuli tui. Cuique respexisset, vidit adjacentem schedulam parvulam, ex una parte pilosam, ex alia puram, paucis litteris taliter inscriptam : TERNI TER QUATERNI TERNIQUE, qui simul fiunt decem et octo ». Ita apud Dodechinum, signantem numerum decem et octo annorum quos explevit. Sed quod decimum nonum inchoaverit, in anonymo Vaticano ejusdem quoque temporis scriptore in hunc modum : QUATER QUATERNI TERNIQUE, ulpote quod pervenerit ad annum decimum nonum sui Pontificatus. Sedit enim annos decem et octo, menses quinque, dies quatuor. Pergit vero Dodechinus : « Rursum autem illo sciscitante, cur prædicta schedula partim pilosa, partim pura esset ? respondit : Tempus papatus ejus partim placidum, partim turbulentum erit ; quod verum fuit ». Hucusque ipse.

3. Antequam autem ulterius de Paschalis electione agamus, hæc quæ ejus vite primordiis tunc temporis scripta reperiuntur hic describenda putamus. Idem qui supra citatus anonymus habet, fuisse Paschalem natione Tuscanum, patria Bledanum, patre Crescentio, et matre Alsatia natum ; eumque amore vite religiosæ celebre sanctitate Cluniacense monasterium petisse, ibique sub sancto Hugone abbate monasticam vitam excoluisse. Quem cum mitti contingerit Romanam ob negotia monasterii, tempore Gregorii papæ Septimi, ab eodem Pontifice retentum, creatum presbyterum cardinalem tituli S. Clementis : postea vero abbatem monasterii (ut dictum est) electum fuisse. Hæc summam ex anonymo Vaticano. Ex quo etiam, quomodo idem promotus fuerit in Romanum Pontificem, hæc his verbis habentur :

4. « Solemnis memorie domino Urbano papa

¹ Thren. II.

magnanimo defuncto, Ecclesia, quæ erat in Urbe, pastorem sibi dari expedit. Ob hoc patres cardinales episcopi, presbyteri, diaconi primores Urbis, primiceriarii et scribæ regionarii in Ecclesia Sancti Clementis conveniunt. Hic dum de multis agitur, subito eum eligendum commodius placuit. Quod compertum Rainerio ipsi displicuit, volensque vitare, fugit latuitque. Sed non diu potuit invisus humano latere consilio. quem in multorum salutem divini numinis gratia revelare disposuit. Invenitur, trahitur in conventum, convenitur de fuga, redarguitur a patribus. Fugere me (inquit ille) magis oportuit, patres, quam inæqualis sarcinæ pondus immoderata nimis præsumptione suscipere: nec decebat me sacerdotem illius honoris cingulo accingi, ejus oneris vinculo involutus succumberem. Non sic (ajunt patres) non sic facias oportet; sed illic tua se debet cohibere intentio, quo divini intuitus cognoveris te dirigere sapientiam. Ecce te in pastorem sibi dari expedit populus Urbis, elegit clerus, te collaudant patres dominique: in te solo quievit totius Ecclesie examinatio. Divinitus ista proveniunt, divinitus hic congregati, in nomine Domini te ad Pontificatus apicem et eligimus, et confirmamus.

5. « Sed licet eo renitente, sic a primiceriariis et scribis regionariis, mutato nomine, ibi acclamatum est responsumque: PASCHALEM PAPAM SANCTUS PETRUS ELEGIT. His aliisque laudibus solemniter peractis, chlamyde coccinea induitur a patribus, et fiera capiti ejus imposita, comitante turba, cum cantico Lateranum vectus equo, ante eam porticum, qua ducitur ab australi plaga ad Basilicam Salvatoris, quam Constantinianam dicunt, adducitur, equo descendit, locaturque in Sede quæ ibidem est. Deinde in patriarchale ascendens palatium, ad duas curules devenit. Hic balthæo succingitur cum septem exinde pendentibus clavibus, ex quo sciat, septem¹ sigillis septiformem Spiritus sancti gratiam cunctarum Ecclesiarum, quibus simul Deo auctore præest, regimini in claudendo, aperiendoque tanta ratione providere debere, quanto solertius id quod intenditur, operatur. Est locatus in utrisque curulibus, sedibus scilicet eburneis: data est ei ferula in manu. Per cætera palatii loca, Romanis Pontificibus destituta (restituta), solus jam dominus, vel sedens vel transiens, electionis modum implevit.

6. « Die altera mensis sexti, Augusti videlicet decima quarta, consecrandus in Pontificem, consecraturi Pontificem pontifices, cum frequentia populi plebisque Basilicam beati Petri adeunt, quorum nomina sunt, Oddo Ostiensis, Mauritius Portuensis, Gualterius Albanensis, Bono, alias Boso, Lavicanus, Milo Prænестinus, Otto Nepesinus: et inter missarum solemnias, loco et termino quem decuit, manum ipsi imponunt. Primus in consecratione Oddo Ostiensis, qui ad hoc utitur pallio,

et benedixit, et linivit eum chrismate. Catholice igitur a Catholicis et orthodoxis episcopis in Pontificem consecratus, translato in se pallio, expletisque iis quæ restabant missarum solemnibus, cum plenitudine laudum, cum ingenti applausu populi plebisque, cum alacritate Patrum ac devotione, dominus Paschalis papa Secundus coronatus in Urbem rediit, convalescente Ecclesia dum hæc Romæ agerentur ». Et inferius: « Robur autem ex successu ejus in his quæ Dei sunt hominumque, multiplicabatur et crescebat devotione solemnibus, spe melioris gratiæ certi, cuncta prospera, cuncta salubria in Urbe inveniebantur, quies pro tumultu, pax pro bello, pro seditione concordia gentes indissociabili connectebantur, omnes gaudebant, et cælitus eum advenisse clamabant, et merito dominari debere dicebant, qui statum Urbis mutare, mores componere, et in copiam egestatem mutare cognoverit. Is multorum hominum salutis publice privatimque providere cepit, omnibus erat amabilis, ab omnibus diligebatur, ut toto affectu in ejus Pontificio quisque tantum sibi applauderet, quanta familiaritate in ejus sacerdotio fuerat conjunctus. Instabant cause et multiplicabantur, densioribus turmis hinc inde plebs populusque ad eum confluere cepit, ad aurem loqui, nova afferre nunc certa, certiora nunc nuntiare. Providendum sibi nunc, quisque commodius cepit ei intimare ». Ille auctor, idcirco ingerit copiose, quod vivente adhuc Guiberto antipapa, et ob eum in factiones olim Urbe conscissa, pro miraculo duceretur, ut in electionem ipsius omnes simul in Urbe nemine adversante consenserint. At quæ post hæc secuta sint, anno præsentis suo loco dicturi sumus.

7. *Litteræ encyclicæ ab exercitu Terræ Sanctæ ad Occidentem missæ.* — Ubi igitur Apostolicum thronum Paschalis papa descendit, Catholicos principes litteris ex more de sua electione reddidit certiores, eosque in fide perstare Ecclesiæ Romanæ commonuit: in primis vero admirabilem illam fœminam, quam ob confusionem tyrannicæ superbæ posuit Deus obicem in ipso Italiæ ingressu, Mathildem dico, litteris frequentavit hortatus eam, et ut filiam Apostolica benedictione munivit. Dominizo enim in Vita ipsius hæc de his habet, dum de Paschalis papæ promotione agit:

Dogmate pro Christi certanti porro Mathildi
Signatos apices benedictentes sibi mittens,
Illos ut mores tenet monet anteriores,
Quos docere Patres ipsam vehementer amantes.

Quod præstitit ipsa quidem, usque ad obitum in fide præstans.

8. At sicut ipse ad Catholicos principes litteras dedit, ita vice versa ab illis accepit, et inter alias quidem extant a Codefrido duce post Hierosolimam captam, quas encyclicas esse voluit ad omnes Occidentales, quibus eos permoveeret ad exhibendum auxilium Dei exercitui, in terra aliena peregrinanti. Scitent litteræ mendis, sed ut nobile

¹ Apoc. v. vi.

antiquitatis monumentum Annalibus dignas duximus, quas ex Wilhelmo Tyrio, quantum fas fuit, mendis purgavimus. Sic enim se habent :

« Paschali papæ Romanæ Ecclesiæ, et omnibus episcopis, et universis Christianæ fidei cultoribus, Pisanus archiepiscopus Apostolicæ Sedis legatus, et Godefredus dux, gratia Dei Ecclesiæ Sancti Sepulchri nunc advocatus, et Regimundus comes Sancti Ægidii, et universus Dei exercitus, qui est in terra Israel, salutem ».

Quod autem hic in titulo Pisanus archiepiscopus non se nominat Hierosolymæ patriarcham, satis apparet, hanc ipsam Epistolam superiori anno datam, non præsentem; siquidem in fine anni superioris liquet eundem fuisse electum patriarcham, ut superius dictum est. Sed ipsam audi Epistolam, imo compendium rerum gestarum Occidentalium in Oriente :

9. « Multiplicate preces et orationes cum iucunditate, quomodo (quoniam) Deus magnificavit suam misericordiam, complendo in nobis ea quæ antiquis temporibus promiserat. Etenim cum capta Nicæa cunctus exercitus inde discessisset ¹, plusquam trecenta millia armatorum ibi fuerunt. Et licet tanta multitudo esset, quæ universam Romaniam occupare, atque epotare flumina omnia, compascere omnes segetes una die posset; tamen cum plenitudine tanta conduxit nos Dominus, ut de ariete minimi (nummi) vix duodecim acciperentur. Præterea etsi principes et reges Sarracenorum contra nos surrexerunt, tamen Deo volente, facile victi et conculcati sunt. Ob quæ quidem feliciter acta, quia quidam intumuerant, opposuit nobis Dominus Antiochiam ², humanis viribus inexpugnabilem, ibique per novem menses nos detinuit, atque in obsidione ista ita nos humiliavit, ut in toto exercitu nostro vix boni centum equi reperirentur. Tandem aperuit nobis Dominus copiam suæ benedictionis, et nunc etiam induxit in civitatem, et turres et omnia eorum potestati nostræ tribuit. Cum hæc quasi viribus nostris acquisita teneremus, tanta multitudo Sarracenorum obsessi sumus, ut de tanta civitate nullus egredi auderet. Præterea fames ita invaluerat ³, ut vix ab humanis dapibus aliquis abstinuerit. Longum est enarrare miseras quæ in civitate fuerunt.

10. « Respicens autem Dominus populum quem ita diu flagellaverat, benigne consolatus est nos. Itaque primo, quasi pro satisfactione tribulationis, lanceam suam, a nemine inventam a tempore Apostolorum, pignus victoriae nobis contulit: deinde corda hominum adeo animavit, ut illis, quibus ægritudo vel fames ambulandi vires negaverat, arma sumendi et viriliter contra hostes dimicandi virtutem infunderet.... Denique cum triumphantibus hostibus, fame ac tædio deficeret

exercitus Antiochiæ, et maxime propter discordias principum ⁴, in Syriam profecti, Varram et Marram urbes Sarracenorum expugnâvimus, et castella regionis obtinuimus.

11. « Cumque ibi moram facere disposuissemus, tanta fames in exercitu fuit ⁵, ut corpora Sarracenorum jam fœtentium, a populo Christiano ibi comesta sint. Deinde cum interiora Ispaniæ (Lysaniæ) ingrederemur, largissimam et misericordem et victoriosissimam manum omnipotentis Dei Patris nobiscum habuimus. Etenim cives et castellani regionis, per quam procedebamus, ad nos cum multis donariis legationes præmittabant, parati servire nobis, et oppida sua dedere. Sed quia exercitus noster non multus erat, et in Hierusalem unanimiter venire festinabat, acceptis securitatibus, tributarias eas fecimus, quippe quod de multis civitatibus, in una de illis quæ ex minimis est, plures homines haberentur quam in nostro exercitu essent. Cumque auditum esset Antiochiæ et Rhoe, quia manus Domini nobiscum esset, plures de exercitu, qui ibi manserant, consecuti sunt nos apud Tyrum. Hinc itaque Deo cooperante usque ad Hierusalem pervenimus. Cumque in obsidione multum exercitus laboraret, maxime propter inopiam aquæ: habito consilio, episcopi et principes circumdandam esse civitatem nudis pedibus prædicaverunt ⁶, ut ille, qui pro nobis humiliter ingressus est, per se iudicium de his hostibus faciendo nobis eam aperiret.

12. « Placatus itaque Dominus hac humilitate ⁷, octavo die post humiliationem, cum suis hostibus civitatem nobis tribuit, eo videlicet die, quo primitiva Ecclesia inde abjecta fuit, cum festum dispersionis Apostolorum celebraretur. In porticu Salomonis et in templo ejus nostri equitabant in sanguine Sarracenorum usque ad equorum genua ⁸. Deinde cum ordinatum esset, qui civitatem retinere deberent, cum alii amore patriæ et pietate parentum suorum redire voluissent: nuntiatum est nobis, regem Babylonis Ascalonam ⁹ venisse cum innumerabili multitudine militum, ducturum Francos qui Hierosolymis erant in captivitate, et expugnaturum Antiochiam. Sed aliud Deus de nobis statuerat. Itaque descendimus obviam illis, relictis sarcinis et infirmis Hierusalem cum præsidio. Cumque exercitus noster et hostium se conspexissent, genibus flexis adiutorem Deum invocavimus, ut qui in aliis necessitatibus Legem Christianam confirmaverat, in præsentem bello, contractis viribus Sarracenorum et diaboli, regnum Christi et Ecclesiæ a mare usque ad mare usquequaque dilataret. Hic Dominus altius et tantas tribuit vires, ut in hostem currere, ut videntem fontem aquæ vivæ sitientem cervum segnem iudicarent: miro videlicet modo, cum in nostro

¹ Wil. Tyr. l. III. c. 13, 14. — ² Ibid. l. IV. c. 9, 10, l. V. c. 22.

— ³ Ibid. l. VI. c. 5, 6, 7.

⁴ Wil. Tyr. l. VII. c. 8, 9, 10, 11, 12. — ⁵ Ibid. l. II. c. 21, 22.

— ⁶ Ibid. l. I. c. 11. — ⁷ Ibid. l. VIII. c. 18. — ⁸ Ibid. c. 27. —

⁹ Ibid. l. IX. c. 10, 11, 12, 13.

exercitu non ultra quinque millia equitum et centum quinquaginta millia peditum fuissent, et in exercitu hostium centum millia equitum et quadraginta millia peditum esse potuissent. Tunc mirabilis in servis suis Dominus apparuit, cum antequam confligeremus, pro solo aspectu nostro hanc multitudinem in fugam vertit, et omnia eorum arma diripuit, ut si deinceps vellent repugnare, non cito haberent arma. Spolia inaudita, thesaurum regis Babylonis obtinuimus: ceciderunt ibi Maurorum ultra centum millia gladio. Timor autem eorum tantus erat, ut in porta civitatis ad duo millia suffocati sint. De his vero qui in mari interierunt, non est numerus, spineta etiam ex ipsis occiderunt: pugnabat certe pro nobis Deus. Prædie quam bellum fieret, multa millia camelorum et boum et ovium cepit exercitus. Principum jussu populus hæc divisit. Ad pugnam progredientes multe turmae horum animarum comitabantur miraculose, et stabant cum stantibus, et currebant cum currentibus. Nubes ab æstu solis defenderunt nos et refrigerabant.

13. « Celebrata itaque victoria, reversus est exercitus Hierusalem, relicto ibi Godefredo duce. Comes S. Egidii, et Robertus comes Northmanniæ, et Robertus comes Flandriæ Laodiciam reversi sunt: ibi classem Pisanorum et Boamundi invenerunt. Cumque archiepiscopus Pisanus Boamundum et dominos nostros concordare fecisset, regredi Hierusalem pro Deo et fratribus suis Regimundus disposuit. Ad hanc igitur tam admirabilem fratrum nostrorum fortitudinis devotionem, ad tam gloriosam omnipotentis Dei retributionem, ad tam exoptabilem omnium peccatorum nostrorum per Dei gratiam remissionem, et Catholicæ Christi Ecclesiæ et ipsius Latiniæ, invitamus vos ad exultationem, et omnes episcopos, et bonæ vitæ clericos et monachos, et omnes laicos, ut ille nos ad dexteram Dei considerare faciat, qui vivit et regnat per sæcula. Rogamus et obsecramus vos per Dominum JESUM, qui nobiscum semper fuit et collaboravit, et ex omnibus tribulationibus nos eripuit, ut fratrum sitis memores vestrorum qui ad vos revertuntur, benefaciendo eis et solvendo debita eorum, ut vobis Deus benefaciat et vos absolvat ab omnibus peccatis, et in omnibus quæ vel nos vel illi apud Dominum meruimus, partem vobis concedat. Hactenus Epistola Hierosolymis militantium, quæ in Occidentali orbe ubique vulgata, omnium ferme incendit animos Hierosolymam adeundi, et subsidio esse fratribus. Sicque nova expeditio jam cepta est procurari in Gallia¹, et in Italia classis Januensium præparatur ad opus.

14. *Ieonis ad Paschalem papam litteræ de bene disponenda Ecclesia Gallicana.* — Ubi innouit trans Alpes, Paschalem papam Urbano defuncto subrogatum esse, inter alios Ivo Carnotensis episcopus ad eum litteras dedit de bene dispo-

nenda Ecclesia Gallicana; quæ sic se habent¹:

« Paschali summo Pontifici, Ivo humilis Ecclesiæ Carnotensis minister, debitam obedientiam cum fidei orationum obsequio.

« Paternitatem vestram Apostolici culminis gradum ascendisse, et in locum beatæ memoriæ papæ Urbani successisse, nostra parvitas gratulatur, et summæ providentiæ gratias inde referens, ut de bonis principiis meliores exitus proveniant, pro modulo suo Dominum quotidianis orationibus deprecatur. Credimus enim religionem vestram zelum Dei hactenus habuisse, et decorem domus Dei non fecte dilexisse. Unde postquam paternitatem vestram vicem Apostolici gradus accepisse cognovimus, summum desiderium nostrum fuit, ut per propriam personam adiremus præsentiam vestram, ni nos retinisset periculum molestiæ corporalis, quod in cundo facile incurreremus de nobis vera fatendo, vel periculum lapsus animæ, quod nobis imminet vera negando». Nimirum si diceret, ut erat, se Romam pergere ad Paschalem, ab illis retineretur qui faverent ejus inimico imperatori et antipapæ; sin vero negaret se, ut erat, inhærere Paschali, peccatum incurreret haud leve. Quod exaggerat, ita pergens: « Sic enim Petrus Christum negasse dicitur, non quod negaret Christum esse Christum, sed quia negavit Christi se esse discipulum. Mitto interim itaque vobis fratrem istum præsentium portitorem, quem rogo ut vice mea familiarem habeatis, et in his quæ salubriter et utiliter reverentiæ vestræ suggeret, tanquam me ipsum audiatis ». Hæc Ivo ad Paschalem; qui rursus ad eundem de legatione mittenda in Gallias litteras dedit his verbis²:

15. « Quoniam apud nos quotidie videmus Ecclesiam ruentem, et nullam aut pæne nullam erigentem, et pro domo Israel murum ponentem, charitas Christi urget nos, ut dolorem cordis nostri, quo pro morte et morbis ovium Christi cruciamur, paternitati vestræ revelemus. Interest enim capitis, membrorum imbecillitatibus providere, et pro valetudinum quantitate vel qualitate congrua remedia procurare. Cum enim a latere vestro mittitis ad nos cardinales vestros, tanquam filios uterinos, quia in transitu apud nos non tantum possunt curanda curare, sed nec curanda prospicere: inde est, quod multi præpositorum facta gladio linguæ ferire cupientes, dicunt, Sedem Apostolicam non subditorum quærere sanitatem, sed suam aut lateralium suorum quærere commoditatem. Unde ego et quidam correptionales nostri, hoc murmur non equanimiter accipientes, utpote Romanæ Ecclesiæ filii unanimes, scribere decrevimus sanctitati vestræ, ut alicui transalpine legationem Sedis Apostolicæ injungatis, qui et vicinias surreptitiam mala cognoscat, et ea vel per se, vel per relationem ad Sedem Apostolicam maturius curare prævaleat. Cui sollicitudini nullum magis

¹ Wil. I. x. c. 12. 13. 14.

¹ Ivo Ep. XXXIII. — ² Ivo Ep. LIII.

cognovimus idoneum, quam dominum Lugdunensem archiepiscopum, qui et in eodem officio jam diu ministravit, et ut experimento cognovimus, tam Romanæ Ecclesiæ quam transalpinis Ecclesiis venerabiliter profoit ». Post hæc pluribus se excusat, cur præsens ipsam sanctam Apostolicam Sedem non visitarit, nempe ob pericula, indignitatem, et debilem corporis valetudinem. Certe quidem quæ ad pericula spectant, ita ab hostibus vias obsessas hoc tempore Dominizo scribit, de Henrico imperatore perduelle Romanæ Ecclesiæ :

Atque viam domini Petri faciebat hic hostis
Custodire, viros spoliare jubens peregrinos.

16. *Studia Paschalis pro expulsionem antipapæ qui moritur.* — Paschalis vero ita, ut vidisti, super solium Apostolicum exaltatus, super universalem Ecclesiam figens obtutus, cum undique illatas per schismaticas clades infelici spectaculo contempleretur, ac curandas illas quas intulisset atque in dies magis inferret pestilens antipapa, monitu suorum firmat animum. Quænam isti ingererent, addentes currenti calcaria, ita in Vita ipsius refert ejusdem temporis scriptor anonymus : « Turpe tibi merito videri debere dicebant, hæresiarcham Guibertum ab Ecclesia toties in capite damnatum, a gloriosæ memoriæ domino Gregorio, Urbano magnanimo, et Victore religioso, prædecessoribus tuis miræ virtutis Pontificibus, diu acriterque divexatum in Urbe suburbisque : in eum etiam aliquid perniciosum machinari, atque pati cum non posse omnes clamabant. Et Patres : Si pecuniæ, inquit, desunt, auro argentoque subveniemus. Dum hujus dispositionis acriter ageretur negotium, legati Rogerii comitis in Urbem veniunt, curiam intrant, et more ex parte comitis officiosissime papam salutant et resalutant, atque inclinati ad pedes ejus posuerunt auri uncias mille. Id tam devote susceptum est, quam opportune mandatum. His auxiliis ad expugnandum prædictum hæresiarcham desuper collatis, audaciam adeptus dominus Pontifex : Operari, inquit, jam Dei gratia magis quam consilii tempus est ». Hæc de studio Paschalis ad expellendum fugandumque longe longius a Romana Ecclesia antipapam. Fervens studio cæctus Orthodoxorum, sic leram illam bestiam assiduo venatu est insectatus, ut de loco ad locum fugere cogeretur, donec infelix cum fuga diem clausit extremum hoc anno, sive sequenti, ut est diversa diversorum scriptorum assertio. Hujus namque temporis Germani scriptores, Dodechinus, Siebertus, et Urspergensis hoc anno eum defunctum affirmant ; Itali vero anno sequenti ponunt, ut Dominizo atque Petrus Diaconus in Chronico Cassinate, iidemque ipsi hujus quoque temporis auctores et quidem integræ fidei. Dominizo enim in Vita Mathildis hæc habet de tempore obitus Guiberti antipapæ nefandissimi :

Ille per viginti tres annos denique Christi
Ecclesiam nisu toto turbabat iniquus.
Post annos binos Urbanus erat quod ab isto
Sæclo portatus, coëque choro sociatus ;
Iste dolore gravi tactus Guibertus manis
Mortuus est, secum portans antheuma per ævum.
Propterea cæli populus, pariterque fidelis,
Exultanteque boni, perit quia perditionis
Filius. Ut surgat similis non det Deus unquam.

Ista Dominizo hic posuit uti dignum perditissimum hominem Epitaphium. Sed quomodo ad postremum sepulchro quoque caruit, projectis ossibus ejus in aquas, inferius suo loco dicturi sumus.

17. Porro quod spectat ad numerum viginti trium annorum quem ponit, non referendus est iste ad tempus integrum quo sedit pseudopapa, quod contigisse vidimus anno Redemptoris millesimo octogesimo ; sed ex quo idem pessimus omnium hominum facto schismate, a Gregorio papa descendit. Sic igitur exitiale monstrum, fax, luesque fidelium, cujus opus et studium nonnisi suadere vel urgere Christianos adorare bestiam, ab Ecclesia vera recedere, et in latronum speluncam cum schismaticis convenire, periit infelix mœreore consumptus, desperationis dentibus devoratus. Quod enim in Urbani papæ obitu suam omnem fiduciam collocasset, cum vidisset, eo deluncto, nihilominus res Catholicorum in Paschale successore magis magisque virescere : exsecatus est ipse dolore tristitiaque consumptus, et tristem animam diabolo extorquente, decessit tandem, relinquens post se sibi a cunctis fidelibus maledictionem cum dira execratione atque blasphemis, in eum inferri juxta consuetis.

18. *Paschalis perduelles cohibet : in causa Philippi regis legatos mittit in Gallias.* — Quod autem nequaquam una cum antipapæ obitu extinctum est schisma, vivente adhuc qui foveret illum Henrico imperatore : haud medioeres labores superfuere Paschali. Etenim Henrici opera, tres post Guibertum sunt subrogati sibi invicem succedentes pseudopontifices, Albertus, Theodoricus, et Maginulphus, arcescentibus suo ipsorum ortu maledictionis palmitibus infelicibus, de quibus dicendum inferius. At vero Paschalis papa, cujus munus Apostolicum in eo erat, ut evelleret atque plantaret, destrueret pariter et ædificaret, in his erat totus, ut Romanam Ecclesiam in splendorem pristinum restitueret, atque ea quæ direpla novisset, eadem e tyrannorum manibus vindicaret ; quænam autem ista fuerint, ita idem qui supra auctor Vitæ Paschalis narrat : « Eodem tempore, dominus papa civitatem Castellani per suos aggressus, locum natura satis munitione miro Dei auxilio virtuteque obtinuit : parum post obtinuit et Beneventum. His diebus, Petrus de Columna Cavas oppidum de jure beati Petri invaserat ; sed dum aliena contumaciter retinere nititur, turpiter amisit propria. Egressus Urbe dominus papa Cavas recepit, Columna et Zagarolum, oppida juris illius, sapienter expugnata, atque potenter sunt capta ». Hæc ipse, qui inferius

eundem Petrum abbatem fuisse Farlensem, eundemque Romanæ Ecclesiæ perduellem ostendit. Illic primum occurrit mentio nobilissimæ familiæ Columnensium; oplassent honestioris tituli occasione. Addit auctor, ab eodem Paschale perdomitam Corsorum familiam; insuper Stephanum atque filium cepisse, qui invadentes monasterium Sancti Pauli, illud in munitionem converterant, illicque recepta sceleratorum manu, haud mediocriter facescebant Urbi negotium; loco capto, eundem Stephanum jussit Pontifex in exilium duci. Hi primi fuere Paschalis papæ labores, qui cum haud leviter fatigarunt.

19. His accesserunt externa mala quæ ipsum valde molestia affecerunt; illa vero omnium maxima, quæ regum sunt inobedientia parta, quæ licet ab Urbano papa medicamento penitentiae jam ante sublata fuissent, tamen iterum, cum ex cicatrice male obducta recrudesceret multa sanis apostema tumescens, ferro chirurgi potius quam unguenti lenitate curandum fuit. Debet lector hic meminisse, Philippum Francorum regem ob legitimam uxorem ejectam, atque pellicem subintroductam, fuisse in Claramontensi Concilio ab Urbano Pontifice excommunicatum, penitentem vero postea absolutum, sed rursus ab vomitu redemptum, rursus ab Urbano subiectum interdicto. Qui ut audivit Urbanum ipsum esse defunctum, perinde atque cum ipso sacrae leges pariter essent extinctæ, fregit vincula quibus tenebatur adstrictus, idque summa iniuria violatæ censuræ Ecclesiasticæ. His auditis, Paschalis papa vindex legum exsurgens, decernit legationem in Gallias, per quam in regem Concilium indiceretur, cui rex ipse ad dicendam causam reus assisteret. Credita est legatio tanti ponderis duobus sanctæ Romanæ Ecclesiæ cardinalibus, Joanni ac Benedicto; quorum alter, nempe Joannes, cum de his scriberet ad Ivonem episcopum Carnotensem, nimirum de loco et tempore congregandi Concilii, hanc ad redditas litteras accepit ab Ivone responsum¹:

20. « Joanni presbytero cardinali Romanæ Ecclesiæ legato, Ivo humilis Carnotensium Ecclesiæ minister, legatione fungi in Christo.

« Litteras tuæ benevolentie indices nuper accepi, quibus aliqua constantiæ tuæ opera parvitati meæ notificasti. In quibus hoc egregie laudabile intellexi, quod te a communione regis abstinuisti, quoniam in hoc et famæ tuæ et legationi tibi commissæ sane consulisti: licet quidam Belgiæ provinciae episcopi in Pentecoste, contra interdictum bonæ memoriæ papæ Urbani, coronam ipsi regi imposuerint, tanquam mortuo præcone, justitiam mortuam esse crediderint. Quod autem Pictavis, aut intra provinciam Aquitanicam Concilium celebrare disponis, omnino laudo. Quod si intra provinciam Belgicam, vel Celticam Concilium celebraretur, multa premi silentio oporteret, quæ ven-

tilata scandalum generarent, et totum pæne fructum Concilii aliqua exestuatione præfocarent; pressa vero silentio, tanquam verbo Dei alligato, legationis tuæ auctoritati plurimum derogarent. De termino vero habendi Concilii, quem quarto kalendas Augusti designasti, facile occasionem querent episcopi partium nostrarum, dicturi non esse congruum spatium ad prægendam viam et præparandum viaticum. Non enim poterunt multi episcoporum ad locum pervenire Concilii, nisi per multos circuitus, et per acquisitos undecumque conductus. Si ergo videtur prudentiæ tuæ, convenientior videretur mihi terminus in capite autumnus, quoniam et annus erit fertilior, et unusquisque invitatus, indulto sibi congruo spatio, ad eundem parator. Si autem præter spem venerint hæc omnia: cum Deus invicem nos loqui concesserit, et de termino, et de loco habendi Concilii, et de multis aliis cum prudentia tua tractabo; quia multa prætereo, quæ non sine ratione interim chartæ commendare dissimulo. Mitto itaque tibi cum brevigerulo tuo cursorem istum, per quem mihi remandes et de tempore et de loco colloqui nostri, et de constitutione habendi Concilii. Vale ».

21. *Concilium Pictaviense et ejus canones.* — Convenit tandem ut Pictavis Concilium cogeretur, legatis Sedis Apostolicæ rem agentibus; de quibus ita in fragmentis Francorum Historiæ¹: « Urbano obuente, successor ipsius Paschalis in Gallias misit duos de suis cardinalibus probabiles viros, Joannem et Benedictum etc. » Cum autem episcopi ibi collecti contra Philippum, essent ejus litteris inde pelliendi, quid mirandum Deo agente tunc acciderit, acceperit ex Annalibus Aquitanie, a Joanne Boucheto conscriptis, in quibus hæc habentur: « Cum innovisset regi cogendum esse Concilium, scripsisse illum Guillelmo duci Aquitanie cognato suo Pictavis agenti, petiisque, ne talem sibi sineret injuriam in urbe sua inferri: tum Guillelmus legatis denunciavit, ut de urbe excederent. Qui cum spatium deliberandi ac respondendi unum diem postulassent, et impetrassent: nocte quæ interjecta fuit, visus est adstare legato S. Hilarius et hortari, ne minis Guillelmi ducis territus, ab incepto desisteret: non enim passurum Deum, ut ea res ei fraudi esset, aut male succederet. Quam visionem cum postmodum Guillelmo recitasset legatus, permisit ille, ut pro arbitrio cuncta perficeret. Itaque mox habita questione de regis adulterio, censuris Apostolicis rex admonitus est, ut Bertradam a se ablegaret: quod et fecit ». Hæc ibi. Sed hæc de penitentia regis et obedientia exhibita decreto Concilii, postea contingere. Interim autem (ut citata supra fragmenta Francorum Historiæ habent) penitentem regem ipsum et refragantem penitus Apostolicæ jussioni per legatos significatæ, resistentemque Concilii Pictaviensis decreto, liquet fuisse anathemate condemnatum. De eadem in regem

¹ Ivo Ep. cxxxiv.

¹ Fragm. hist. Franc. post Helgald, p. 93.

excommunicatione meminit idem qui supra Ivo, in Epistola ad Rudolphum Rhemensem archiepiscopum, paucis his rem gestam perstringens ¹: « Propter quam accusationem et patrati incestus comprobationem, excommunicatus est rex Philippus a domno papa Urbano in Claromontensi Concilio. Et cum post factum divortium predictus rex esset reversus ad predictæ mulieris consortium, excommunicatus est in Pictaviensi Concilio a cardinalibus Joanne et Benedicto ». Hæc Ivo superioribus consentientia, idemque alia occasione meminit ejusdem Concilii Pictaviensis ².

22. De canonibus autem in dicto Concilio constitutis, hæc reserat nobis Vaticanus Codex: « Decrevit sancta Synodus, ut nullus episcopus, abbas, presbyter, vel quolibet persona de clero, accipiat de manu regis, vel comitis, vel cujuslibet laicæ personæ donum episcopatus, vel abbatiæ, vel Ecclesiæ, vel reliquarum rerum Ecclesiasticarum: sed episcopi a suo metropolitano, abbates, presbyteri, et cætera inferiores personæ a proprio episcopo. Si vero laici decretis canonicis resistentes Ecclesias violenter retinere præsumpserint, ipsi excommunicentur. In Ecclesiis vero illis nullum divinum officium fiat, nullus oret, lumen non ponatur, mortuus non sepeliatur; tantum baptismi gratia ibi non negetur, infirmis remedio pœnitentiæ et communionis subveniatur.

« Item, ut nemo episcopatum, abbatiam, archidiaconatum, archipresbyteratum, præbendam, vel alios Ecclesiasticos honores, vel prælationes in duabus Ecclesiis exerceat, nisi in una tantum, et neutram horum quisquam per pecuniam acquirat, et quidquid tali modo acquisisse comprobantur, omni remota occasione, deponantur.

« Item, ut nullus de clero sive de populo Ecclesiastica bona jure consanguinitatis requirat sibi habenda.

« Item, ut nullus ep. pro sacris ordinibus, vel pro Eccl. benedictionibus vel quibuslibet aliis benedictionibus munus accipiat.

« Ut nullus abbas, vel monachus, vel quilibet alius pœnitentiis injungat, nisi quibus proprius episcopus hanc curam dederit.

« Ut abbas, monachi, canonici, Ecclesias quas nunquam habuerunt non enant, vel aliquo modo sibi vindicent, nisi consentiente episcopo, in cujus fuerint diocesi. In illis vero, quas hactenus absque calumnia habuerunt, redditus beneficiaque obtineant. Presbyter autem de cura animarum et de Christianitatis ministerio episcopo respondeat.

« Ut abbates, decani qui presbyteri non sunt, presbyteri fiant aut prælationes amittant:

« Qui archidiaconatus tenent, diaconi fiant; qui presbyteratus, presbyteri fiant, aut honores amittant. Quod si aliqui, justa causa prohibente, presbyteri aut diaconi esse non possunt, prælationes amittant.

« Ut filii presbyterorum ¹, et cæteri in fornicatione nati ad sacros ordines non promoveantur, nisi aut monachi fiant, aut in congregatione canonica regulariter viventes; prælationes vero nullatenus habeant: sed neque servi, nisi a dominis suis libertate donentur.

« Ut nullus presbyter, diaconus, vel subdiaconus concubinam habeat, sed nec aliam feminam unde magna suspicio habeatur, in una domo secum teneat. Et quicumque hujusmodi sacerdotis concubinarij sive per pecuniam ordinati missam scientes audierint, excommunicationi subjacere debeant.

« Clerici arma portantes, vel usurarii, excommunicantur ». Hucusque canones Concilii Pictaviensis.

23. In clericum concubinarium terribilis ultio divina. — Occasione autem sancti ibi canonis adversus clericos concubinarjos, hic opportune describenda putamus, quæ adversus ejus contemptorem in eadem provincia, imo in eadem diocesi Pictaviensi contigisse plane miranda narrantur ab integerrimo scriptore, Petro Venerabili abbate Cluniacense, hujus temporis auctore fidelissimo. Ait enim ²:

24. « Apud castrum Liziniacum, quod in Pictaviensi pago situm est, nuper quidam presbyter erat, qui sacerdotalis ordinis supercælestem dignitatem miserrimæ vilæ conversatione delurpans, non ad animarum quibus præerat curam, sed ad carnis suæ voluptatem explendam sacro ministerio utebatur. Qui juxta Prophetam ³ hac gregis sui comedens, et ejus se lanis operiens, absque ulla spe æternorum mercedibus mercenarij avidissime pascebatur. Mundissimam atque omnia mundantem Christi carnem et sanguinem in altaris Sacramento frequenter officio, non devotione sumebat, nec ab immundis tamen carnis operibus sese cohibebat. Cumque ut sus immunda multo tempore in cæno luxuriæ versaretur, et sui ipsius fœtoribus delectaretur: terribis conscientie malo (sicut aliquando et mali ad horam compunguntur) familiaritatem quorundam bonorum virorum expetiit, et abbati Bonævallis, ac fratribus ejusdem monasterii se in amicitiam speculatus copulavit. Qui longo tempore eum de vite emendatione commonentes, et ut sæculo renuntiaret assidue exhortantes, nihil ab eo impetrare præter inanem spem aliquando potuerunt. Nam libenter quæ dicebant audire se fingens, et semper cos de conversione suspendens, de societate sanctorum illorum gloriabatur, nec admonitione vel exemplis eorum a malis retrahabatur. In his atque aliis perditæ atque perdendæ vite suæ actibus perdurans, et obstinatione impia iram sibi in die iræ thesaurizans, in morbum incidit, quo post aliquos dies ingravescente, ad extrema pervenit. Adierat eum visitationis gratia

¹ Ivo Ep. CCXII. — ² Ivo Ep. CXXVII.

¹ Cap. 1. de adul. et qual. — ² Petr. Venerab. l. 1. t. mirac. c. 25. — ³ Ezech. XXXIV.

prior jam dicti monasterii, atque cum eo per aliquantum diei spatium ipso quoque rogante permanserat.

« Et ecce nocte superveniente, cum cunctis discedentibus solus lecto ejus assideret, clamare terribiliter æger ille ad priorem cepit : Succurre, ait, succurre, ecce duo super omnem feritatem expavescendi leones in me impetum faciunt, hiant ore ac rictu feroci per frusta discerpturi me totum consumere volunt. Deprecare cito Dominum, ut ab his eripiar, antequam morsibus eorum consumar. Dicebat hæc et tremebat, ac velut devoratos fugiens timore, defecto corpori vires addente, retrocedebat. Prior vero vocis illius ac gestus terrore turbatus, non sine multo et ipse timore erat; ad preces tamen, ipsa necessitate impellente conversus, pro misero illo, ut poterat, Dominum exorabat. Quo orante, mutata voce ager : Bene, inquit, bene, recesserunt crudeles bestię, et per orationes tuas jam ultra nusquam apparent. Et quia usque ad ultimum spiritum semper compos sui exitit (nec ut quidam morientium solent, vel in modico sensu imminutus fuit) conversus ad priorem, loqui cum eo de quibuscumque veluti sanissimus cepit. Cumque tam de his quam de aliis multa inter se verba conferrent, horę fere unius spatio elapso, rursus inclamare longe terribilius quam primo exorsus est : En, inquit, en ignis de cælo, ut torrens inundans descendit, et super hunc lectum meum veniens, jamjam me in favillam usque comburet. Festina, adjuva, ora : si forte et ab hac morte eripi valeam. Et hæc dicens, manibus et brachiis operforia sublebat, eaque velut aliquid juvare possent, invisibilibus ignibus turbatus opponebat; sed nequidquam : non enim corporalia tegmina a spiritualibus incendiis tegere poterant, quem cælesti vindictę impia opera expuebant. Prior adaucto timore, denuo ad orationem convertitur, et quantum in tali casu possibile erat, Domini misericordiam deprecatur. Illo, ut supra, orationi instante, post paululum patiens gratulationis vocibus preces ejus interrupit, dicens : Quiesce, jam ab igne tutus sum ; nam dum super me (ut dixi) cum impetu descenderet, interpositus est linteus, usque ad quem ignis pervenit, sed eum transire non potuit. Jam et ab isto periculo ereptus, oro ne a me discedas quousque quis istorum finis futurus sit agnoscas. Tum prior, qui tam timore quam hospitandi necessitate recedere volebat, substitit, et ab oratione surgens, rursus ei assedit. Cumque eum tantis terroribus anxium consolaretur, et uterque ad invicem (ut prius) colloqueretur, subito ægrotus ad invisibilia raptus obmutuit. Prior raptum eum ab humanis intelligens, rei exitum præstolabatur.

25. « Cum ecce post multum noctis spatium, homo ad se rediit, et miserabiliter ingemiscens ait : Ha ! ha ! ad judicium æternum raptus sum, et heu miser ! æterna morte damnatus sum. Traditus sum horrendis tortoribus, igne inextinguibili cum

diabolo et angelis ejus perpetuo cruciandus. Ecce, ecce ignita sartago plena bullienti adipe, quam coram me tormentorum ministri detulerunt, camque ad me frigidum undique succenderunt. Qui enim carnis voluptatibus, succedente libidinis igne carnis concupiscentiam, Deum offenderat, juste ei succensa igne adipe cruciandum fore, per visum ostensum est. Pergit vero : « Et cum prior orationi, sicut jam his fecerat, tertio quoque incubisset, ille ait : « cessa, cessa pro me orare : nec pro illo ultra fatigeris, pro quo nullatenus exaudieris. Priore vero dicente : Frater, redi ad cor, et misericordiam, dum adhuc vivis, a Deo require ; ille adjecit : Putas, ait, me ut insanum loqui ? Non insanio, sed sana mente quę dixi confirmo. Et cucullam prioris manu tenens eum interrogavit : Nonne hoc quod manu teneo, cuculla tua est ? Quo respondente, est ; adjunxit : Sicut hæc vestis cuculla est, et sicut hoc quod substructum mihi est, palea est : sic et hoc quod coram cerno, ignita sartago est. Et dum hæc loqueretur, gutta invisibilis ignis de illa quam dicebat sartagine exiens, in manum ejus priore vidente cecidit, et, mirabile dictu, cutem et carnem usque ad intima ossis consumpsit. Tum ille acricum gemitu : En, inquit, indubia rei probatio : nam sicut ista quam vides, de sartagine prolapsa gutta carnis partem consumpsit : sic confestim totum me ignea vorago consummet. Priore ad ista stupente, iterum dixit : Ecce sartaginem istam ministri infernales propius afferunt, ut me in illam injiciant, jam namque manus adaptant. Et post modicum : Ecce linteum in quo jaceo, undique concurrentes accipiunt, et me in ignitam sartagine æternam frixuram projiciunt. Hoc velut ultimum vale mox ut priori atque his qui ad hoc horrendum spectaculum convenerant, dixit : subtrahat voce, ac reflexa cervice, puniendum spiritum condemnatis spiritibus tradidit. Tantus vero terror omnes invasit, ut illico universi aufugerent, neque aliqui in domo, ubi cadaver mortis remanserat, remanere auderent. Facto mane, miserum cadaver sepulturę mandatum est.

26. « Post aliquot autem dies, cum ad universos circa positos hæc tam terribilis fama pervenisset, rei veritatem probare volentes, tumulum aperuerunt, atque fossam illam, quam in manu adhuc viventis presbyteri gutta prænuntia damnationis fecerat, in mortui cadavere invenerunt ». Hæc Petrus et alia de tanti miraculi horrendo visu et divina vindicta, de qua per Prophetam ¹ : « Pluet super peccatores laqueos : ignis et sulphur et spiritus procellarum, pars calicis eorum. Quę omnia », inquit Petrus, « secundum quod beatus Gregorius dicit, nullo modo propter se infelix presbyter vidit, cui nihil visio ista profuit ; sed quanta cautela sacerdotale officium administrandum, quam reverenter divina mysteria tractanda, superna per eum dispositio demonstravit ». Tunc temporis po-

¹ Psal. x.

tissimum, cum in sacrorum ministrorum impudicitia ejusmodi Nicolaitarum haeresis nominata magnopere invaluisset. Ad quam excidendam cum minime satis esset Apostolice censura gladius, toties sanctis Patribus in eodem delinquentes sacros canones innovantibus, placuit divina misericordia ad correctionem multorum, eo modo tantam vindictam ita multipliciter testatam, reddere fidelibus manifestam. Haec dicta sunt occasione Concilii Pictavensis, hoc anno per legatos Apostolicos habiti.

27. *Paschalis papae litterae et legatio ad militantes in Oriente.* — Sed ad reliquas legationes, hoc anno a Paschali Pontifice ad diversas provincias missas, convertamus orationem. Qui anno superiori litteras acceperat de felici progressu Christiani exercitus in Palestina Paschalis papa, decernit legationem in Orientem: legatus vero eligitur cardinalis episcopus Portuensis, cui has litteras dedit, quas etiam accepimus ex scripto Codice Antonii Augustini:

28. « Paschalis episcopus, servus servorum Dei, venerabilibus fratribus sive filiis, episcopis, clericis, proceribus, militibus, et omni populo militiae Christianae in Asia triumphantis, salutem et Apostolicam benedictionem.

« Quod per Prophetam populo suo Dominus pollicetur, impletum in vobis cognoscimus¹: Inhabitabo, inquit, in eis, et inambulabo cum eis, quia per fidem in vestris pectoribus habitat, et per operationem ita inambulabo, ut patenter in vobis inimicos suos expugnasse videatur. Renovavit enim Dominus antiqua miracula², ut in uno mille, et in duobus decem millia persequeretur, et his Ecclesiae annis, sacerdotalium precum tubis inimicarum urbium moenia aperiret³. Illud vero quanti gaudii, quam potentis miraculi aestimatis, quod sacrosancti lateris sanguine cruentam lanceam, et vivificae crucis partem vestris oculis revelavit, vestris tractandam manibus obtulit? Quantas super his Redemptori nostro gratias debeamus, nec humanus animus opinatur, nec lingua praevalet enarrare. Videmus enim Christianae fidei hostes, Christiani populi oppressores per divinam misericordiam manu vestra partim contritos, partim e diu possessis regionibus effugatos: videmus Orientalem Ecclesiam post longa captivitatis tempora, magna ex parte ad antiquam libertatis gloriam rediisse, dicendum igitur ore, dicendum corde⁴: Gloria in altissimis Deo, et in terra pax hominibus bonae voluntatis. Orationi etiam et vigilis insistendum, ut quod cepit adimpleat, et manus vestras quas hostium suorum sanguine consecravimus, immaculatas usque ad finem affluentes firma pietate custodiat.

29. « Quapropter agite, filii in Christo desideratissimi, rememoramini quanta pro amore Do-

mini reliqueritis, quanta pro fratrum salute et ereptione pericula subieritis: patriam, domos, parentes posthabeuistis, vosmetipsos exilio addixistis, morti opposuistis: curate nunc ad meliora semper tendere, pacem cum omnibus conservate, ut possitis ad aeternam pacem Domini misericordia pervenire. Plurima vobis significare per chartam et abramentam supersedemus, quoniam ex Apostolice Sedis gremio charissimum fratrem Mauritium Portuensem episcopum destinamus, ut qui per beati Petri vicarium, sanctae in Christo memorie praedecessorem nostrum Urbanum, tanti peregrinationem itineris assumpsistis, beati Petri solatiis semper abundetis, et quem fundamentum tanti operis habuistis, ipsum quoque ad finem caput in fide et obedientia teneatis. Vices etiam nostras eidem fratri Mauritio et episcopo commisimus, ut eum in omnibus reverenter excipere, audire, et per ipsum nobis, imo beato Petro obsequi debeatis. Qui nimirum in praecipis dedimus, ut Ecclesiae, quam per vos Dominus liberavit seu liberaturus est, ordinationi vigilanter imminet, si quae minus canonicis regulis apta reperiret, corrigat, et in eisdem cum vestro auxilio plantanda plantet, aedificanda aedificet. hortamur itaque, hortantesque praecipimus, ut ei tanquam personam nostram praerentem, in omnibus obedire curetis. Omnipotens Dominus et velle et posse in vobis tribuat, ut quae eo auctore faciendi cognoscitis, ipso adjuvante impleatis. Ipse vos ab omnibus peccatis absolvat, et exilio vestro patriam aeternam tribuat. Dat. Romae, quarto nonas Maii, Indictionis octavarum, per manum Joannis diaconi ». Haec ad militantes in Oriente Occidentales fideles Paschalis papa.

30. *Obitus Godfredi regis Hierosolymitani, cujus successor Balduinus male meretur de patriarcha Hierosolymitano.* — Haud multum temporis post haec effluxit, cum Godfredus dux, sive (ut vult Tyrinus) rex Hierusalem ex hac vita migrat, nempe hoc eodem anno, XV kal. Augusti; vir quidem praeter peritiam ac fortitudinem militare pietate insignis, ut qui jam, quo ab impio imperatore cui militabat se divelleret, protectionem eam sanctam instituit, in qua cum Deus multiplici gratia est consulatus, ut omnes qui stylo persecuti sunt res Orientales affirmant. Eidem vero est subrogatus Balduinus principum omnium consensu. Haec pluribus Willelmus Tyrinus¹, qui et obortas mox dissensiones inter ipsum Balduinum et patriarcham Hierosolymorum enarrat. Pessimo enim Arnulpho illo, de quo superius, instigante, post obitum Godfredi multa est passus Balbertus patriarcha a Balduino, sibi usurpante jura Hierosolymorum Ecclesiae, quarum causa contentio tum idem Balbertus Antiochae principem Boamundum interpellavit, ut protector accederet pro conservatione jurium Hierosolymitanae Ecclesiae, ad

¹ Deut. XVI, et I. Cor. VI. — ² Deut. XXXII. — ³ Jos. VI, — ⁴ Luc. II.

¹ Will. Tyr. I. IX. c. III. et I. X. c. I.

quem et has litteras dedit, quibus de cunctis quæ gesta essent ipsum reddit certior¹ :

31. « Scis, fili charissime, quoniam me igno-
rantem et invitum, bonæ tamen ac sancte inten-
tionis affectu, in eam quæ omnium Ecclesiarum
singularis est mater et Gentium domina, rectorem
et patriarcham elegeris, electumque communi tam
cleri ac plebis quam principum assensu, in hujus
summæ dignitatis sedem licet indignum, Dei præ-
eunte gratia, locaveris. In quo ego culmine consti-
tutus, quanta pericula, quot labores, quot perse-
cutiones sustinam, injuriis offensus mille, meus
cognoscit animus, et ipse cognoscit omnium inspec-
tor Christus. Vix enim dux Godefredus, dum
adhuc viveret, non tam propriæ voluntatis arbi-
trio quam maiorum persuasione seductus, ea reli-
quit Ecclesie tenenda, quæ Turcarum temporibus
qui tunc fuerat patriarcha tenuerat; et sancta Ec-
clesia cum amplius honorari et exaltari debuerat,
tunc majora desolationis et confusionis suæ oppro-
bria sustinuit. Resipuit ille tamen, et per miseri-
cordiam Dei ab impietatis desistens proposito, in
die Purificationis Beate Mariæ Virginis de Joppe
quartam partem Ecclesie Sancti Sepulchri dedit, et
post in die Paschalis solemnitate jam ultra superbe
sapere, aut in seculari pompa confidere respuens,
divino nutu compunctus, cuncta quæ juris erant
Ecclesie, libere reddidit, et homo Sancti Sepulchri
ac noster effectus, fideliter se Deo et (nobis) amodo
militaturum spopondit. Reddidit itaque nostræ po-
testati Turrin David cum tota Hierosolymitana
urbe ejusque pertinentiis, et quod in Joppe ipse
tenebat: sic tamen, ut ob rerum temporalium in-
sufficiens, nostra concessione ipse hæc tam diu
teneret, donec illum Deus in captione Babylonis
aut aliarum urbium amplificasset. Si autem absque
hærede masculo moreretur, hæc omnia absque
ulla contradictione Ecclesie redderentur. Hæc
omnia cum in præsentia totius cleri et populi, in
die solemnî Pasche ante sacrosanctum Sepulchrum
confirmasset, et in lecto aegritudinis, de qua mor-
tuus est, coram multis et probatis testibus ipse
constituit.

32. « Quo defuncto, comes Garnerius ut hostis
contra Ecclesiam Dei insurgens, fidem et pactum
justitiæ nihili pendens, Turrin David contra nos
munivit, et legatis suis ad Balduinum directis, man-
dat, uti Ecclesiam Dei directius, resque ejus vio-
lenter occupaturus quocumque veniat. Unde judicio
Dei percussus, quarto post obitum ducis die obiit.
Hoc autem ipso mortuo, viri ignobiles ac de plebe
adhuc eandem Turrin cum tota urbe occupantes
tenent, adventum Balduini ad ruinam Ecclesie et
totius Christianitatis interitum præsolantes. At ego,
qui solius Dei clementiæ, tueque dilectioni, fili
charissime, sum relictus, miseris omnibus, ca-
lumniiis insidiantium mihi malignorum circum-
ventus, tibi soli, quia in te solo post Deum confido,

et spei mere anchoram in tuæ dilectionis soliditate
figo: tibi, inquam, soli quas patior ærumnas, imo
quas Ecclesia patitur, voce flebili, et anxia pietate,
et cogitatione refero.

33. « Tu autem, si quid pietatis habes, et nisi
paternæ gloriæ vis esse degener filius, qui tyran-
nica crudelitate clausum ab impia manu dominum
Apostolicum Gregorium de Urbe Roma eripuit,
unde memorabile sæculis omnibus nomen meruit:
omni occasione remota, festina venire, et terræ re-
gumque tui cura in militibus tuis prudentioribus
sapienter disposita, sanctæ Ecclesie mirabiliter la-
boranti misericorditer succurre. Et certe scis ipse,
quoniam auxilium tuum consiliumque promiseris,
et debitorum sanctæ Ecclesie ac mihi sponte tua
feceris. Scribe igitur ad Balduinum litteras, inter-
dicens ei, ne sine licentia nostra et legatione, (cum
ille tecum in patriarcham et rectorem Ecclesie
Hierosolymitanæ me elegerit) sanctam Ecclesiam
devastaturus et res ejus occupaturus ullo modo ve-
niat, monstrans ei, quoniam ignorabile est, tot vos
pro eadem Ecclesia labores sustinuisse totque pe-
ricula, ut illa libera fieret, non ut nunc vilis et ab-
jecta servire cogatur illis, quibus dominari et præ-
esse jure materno debet. Quod si ille justitiæ
resistens, rationabilibus acquiescere noluerit, per
eam quam beato Petro debes obedientiam con-
testor, ut quibuscumque modis vales, aut etiam si
necesse sit, armis adventum ejus impediās. Quid-
quid autem super his quæ mando tu facturus sis,
galea tua ad me sub unctione missa, pro hunc
eundem quem ad te mitto nuntium, mihi, charis-
sime, manifesta ». Hucusque patriarcha Hieroso-
lymorum ad principem Antiochiæ Boamundum.
Sed hanc Epistolam minime ad eum pervenisse
idem auctor existimat, eo quod inter hæc idem
princeps, eodem mense quo obiit Godefredus, dum
invasurus pergeret Mesopotamiam, interceptus in-
sidiis, ab hostibus captus est. Quomodo autem dolo
adversariorum Hierosolymis idem patriarcha pul-
sus, Romam ad Paschalem Pontificem venerit, suo
loco dicturi sumus.

34. En quam male meritis de acceptis a Deo
beneficiis Balduinus, sui principatus auspicatur
exordia, ut iram offensi numinis in se converteret,
ita mala jaciens sui regiminis fundamenta, non-
nisi cum labore et dolore regnavit. Ut nihil sibi
ipsis principes infelicius consulant, quam Ecce-
lesiastica jura deprimere, et sic sibi omnia vindicare;
qui enim lacessit Ecclesiam, sibi quidem Deum
adversarium constituere et ultorem, innumera do-
cent exempla. Cæterum, quibus rationibus tanta
sibi vindicaret pro ea Ecclesia patriarcha, pluribus
idem Wilhelmus ostendit, quem tu consulas. Porro
ipsum qui illi præerat Ecclesie Daibertum, constan-
tissimi animi fuisse antistitem, omnibus numeris
absolutum ad sedem illam regendam, cum scrip-
torum omnium hujus temporis, tum testificatione
Ivonis episcopi Carnotensis ad eum post creatio-
nem ipsius scribentis Epistolam, satis apparet; eu-

¹ Will. Tyr. l. x. c. 4.

jus hoc est exordium¹: « Quia divina miseratio sollicitudinem vestram illi Ecclesie præsepe voluit, de qua Verbum Dei processit, gaudemus, tum propter familiarem qua vos amplectimur charitatem, tum propter utilitatem quam populo Dei collaturam speramus vestram sollicitudinem, etc. »

35. *Mortuo Willelmo rege, Anselmus redit in Angliam, et quid cum Henrico successore transactionem.* — Eodem anno mortuo Willelmo Anglorum rege perturbatore Ecclesiasticæ libertatis, ejus causa S. Anselmus (ut vidisti) extorris ab Ecclesia sua Cantuariensi in Gallia exul debebat, eidem reddendi facultas ab ejus successore Henrico data est. Sed ad breve tempus pace retenta, rursum eadem novo turbine sub rege novo exagitatur Ecclesia: ejus occasione opus fuit Paschali pape discernere legationes in Angliam. Sed cum hæc ad plures annos sint propagata, quid annis singulis gestum sit, ex more dicemus. Jam triennium explebatur sancti Anselmi extra suam Ecclesiam in Galliis exilii, cum Deus ultor tandem exsurgens, in regem persecutorem vindictam exercuit. Cujus quidem iræ Dei complura ostensa sunt antea documenta, signis pluribus manifestissime declarata, quæ recitant ejusdem temporis rerum Anglorum historici, qui hæc spectarunt oculis: Edinerus in primis in rebus gestis Anselmi, et Wilhelmus Malmesburiensis monasterii Bibliothecarius, quos tu, si scire cupis, pro arbitrio consulas; nobis satis, si quæ viri sanctissimi, Hugonis scilicet, magni nominis ejusdem temporis Cluniacensis abbatis testificatione recitat Edinerus, referamus²:

36. « Hinc exilii nostri anno tertio, qui, ex quo Roma Lugdunum venimus, erat secundus, venit Anselmus Marciniacum, loqui domino abbati Cluniacensi Hugoni et sanctimonialibus. Ubi cum ante ipsum abbatem consedissemus, et de his quæ inter Anselmum et regem eousque versabantur, verba (ut fit) nonnulla hinc inde proferrentur: intulit idem venerabilis abbas sub testimonio veritatis, proxime præterita nocte eundem regem ante thronum Dei accusatum, judicatum, sententiam tum damnationis in eum promulgatam. Ex quibus verbis admirati non modice sumus. Sed perpendentes et viventis sanctitatem et reverentiam ejus, fidem his quæ dicebantur, nullatenus habere nequivimus. Facta sunt ista ultima Julii; ipsis vero kalendis Augusti, cum S. Anselmus Lugdunum reversus esset, alia sunt divinitus ostensa de ipsius interitu regis, quem jam pluribus deterritum ante prodigiis, in venatione dum esset, sagitta in cervum emissa ejus præcordia subiens interfecit die sequenti, nempe secunda mensis Augusti.

37. Hæc tu, lector, obiter nequaquam velim prætereas, sed sapienter attendas secundum illam Domini sententiam, clades Hierosolymorum lugentis³: « Si in viridi ligno hæc faciunt, in arido quid fiet? » si tali meruit sententia condemnari Catho-

licus princeps, ob unius duntaxat episcopi extorris injuriam: quatenam judicium sunt habituri, qui fidei Catholice perduelles, Anglicanos Catholicos omnes episcopos sive ferro, sive exilio consumpserunt, et alias injurias nefandas ipsis Ecclesiis intulerunt? Non patitur Deus inultum unquam remanere peccatum, quod non diluit pœnitentia, qui ad tempus puniendi reservat; nam ipse⁴: « Nonne hæc condita sunt apud me, et signata in thesauris meis? mea est ultio, ut reddam illis in tempore ». Sed sic ulciscitur sæpe minora peccata, ut ex his timere discant qui maxima perpetrarunt. Cujus rei gratia casum turris Siloe nuntiantibus posuit eum in exemplum futuri Judicii magni Dei⁵.

38. Sublato igitur e medio rege persecutore, ejus germanus Henricus regnum cepisset: qui statim S. Anselmum ad suam Ecclesiam in Angliam revocavit, quem et suscepit honorifice redeuntem. Sed quod pax diuturna esse non possit ubi iustitia procul abest, quam ad pacem conservandam oporteat semper esse præsentem, juxta Davidicum illud⁶: « Iustitia et pax se osculatae sunt ». Quæ hanc concordiam interceperint, scie accipe ab Edinero: « Ubi S. Anselmus Saresberiam ad regem venit, et ei quid de Ecclesiarum investituris in Romano Concilio statutum acceperit, plano sermone innouit: turbatus est rex ac vchementissime indoluit, nec nutum ejus in aliquo, sicut nuntii dixerant, expectare voluit ». Hæc tantum paucis agens Edinerus in Vita Anselmi, eo quod ista omnia in alio commentario seorsum scriberet, ex quo ista qui eum præ manibus habuit idem qui supra Willelmus enarrat: « Verumtamen cum rex, more antecessorum suorum, ab archiepiscopo Anselmo hominum interrogaret, et ille pro excommunicatione Romæ facta differret, missi sunt Romam ab utraque parte nuntii. Jubebat Anselmus regis interea hominum facere, vel absolutis morarum nexibus, regno excedere. Quin potius, respondit ille, inspiciantur Apostolicæ litteræ, et quod tenor earum continet, fiat. Redierant enim jam Roma nuntii, et casso labore semitam triverant, quod Paschalis papa sententiam antecessoris invicto robore tuebatur. Quid ad me de litteris Apostolicis, ait rex, jura regni mei nolo amittere. Precedente in contentione sermone, asseruit Anselmus, terra se non exiturum, sed ad suam iterum Ecclesiam, consideraturum quid sibi vel suis expediret, scilicet, Ita nunc discessum. Sed posterioribus diebus molliores ex parte regis virum convenire litteræ, ut pacato animo curiæ suam præsentiam exhiberet, futurum ut habito inter se colloquio, omnis sopiretur controversia. Non negat ille adventum, si forte Deus instinctu suo regalem contigisset animum. Rursus igitur communi edicto legati mittuntur Romam, etc. » Quid vero per eos actum sit, suo loco, servato temporis ordine, dicturi sumus. Per biennium in his laboratum esse, idem qui

¹ Ivo Ep. XXXIX. — ² Edin. in Ansel. I. II. — ³ Luc. XXIV.

⁴ Deut. XXXII. — ⁵ Luc. XII. — ⁶ Psal. LXXXIV.

supra Edinerus affirmat : adeo ut posterior ista legatio non nisi sequenti anno potuerit contigisse. Sic igitur vides regis inconstantiam, modo Anselmum ab exilio revocantis, modo exilium comminantis : constantiam vero viri sanctissimi admirare, qua fregit impetum regis, et eo invito suam Ecclesiam adeptus, et in ea pariter commorantis. Cum autem ista in Anglia agerentur, Ivo episcopus Carnotensis, fulgor Ecclesiae Gallicanae, apud reges ob egregios vitae mores et doctrinam incomparabilem magnae aestimationis ad eundem Angliae regem litteras dedit, quibus in primis cum hortatus est ad exhibendam Christi sacerdotibus reverentiam : quas dignas existimamus Annalibus, ut debeant hic describi ; sic enim se habent ¹ :

39. « Henrico excellenti Anglorum regi, Ivo humilis Carnolensis Ecclesiae minister, in eo vivere et regnare per quem reges regnant.

« Quoniam paterni regni solum conscendere vos fecit divina dispensatio, pro gratia vobis collata divinam interpellamus clementiam, quatenus paternos mores, paternam vos faciat imitari honorificentiam, ut in nullo vestra sublimitas ab eorum nobilitate degeneret, et in nullo ab eorum frugalitate declinet. Et quia res omnes non aliter bene administrantur, nisi cum regnum et sacerdotum in unum convenerint studium, celsitudinem vestram obsecrando monemus, quatenus in regno vobis commisso verbum Dei currere permittatis, et regnum terrenum caelesti regno, quod Ecclesiae commissum est, subditum esse debere semper cogitatis. Sicut enim sensus animalis subditus debet esse rationi, ita potestas terrena subdita esse debet Ecclesiastico regimini. Et quantum valet corpus nisi regatur ab anima, tantum valet terrena potestas nisi informetur et regatur Ecclesiastica disciplina. Et sicut pacatum est regnum corporis, cum jam non resistit caro spiritui ; sic in pace possidetur regnum mundi, cum jam resistere non molitur regno Dei. Hoc cogitando, servum servorum Dei vos esse intelligite, non dominum : protectorem, non possessorem : unam debere esse de cedris Libani quas plantavit Dominus, in qua nidititenter passeresset, id est, sub cuius tutela quiescit fructificet, et conversentur Christi pauperes, quorum orationes pro statu regni vestri et incolumitate vestra quanto quietiores, tanto saniores (sanctiores), quanto saniores, tanto constat esse efficaciores. Hoc enim faciendo, et regnum terrenum quiete, Deo cooperante, possidebitis, et ad regnum aeternum ejusdem miseratione pervenietis ». Hucusque Ivonis ad novum regem Epistola, digna plane, quae regibus omnibus legenda jugiter ingeratur, his nostris praesertim temporibus, quibus execranda Politicorum haeresis velata jure reguandi, regum penetrabilibus interdum se immittat, ubi et honesto sub nomine delitescat.

40. *Legatio a Paschali papa Gebhardo Con-*

stantiensi episcopo tradita. — Sed finem imponamus jam rebus gestis anni hujus Paschalis papae, qui ad regimen Germanicarum Ecclesiarum, quas Henricus schismaticus imperator persecutione vexabat, legationem Apostolicam credidit Gebhardo Constantiensi episcopo, Apostolico plane viro, qui praeter ceteris stetit pro muro domui Israel, perditissimis hisce temporibus : ut nisi Deus tale semen illis Ecclesiis reliquisset, penitus fortasse interissent ; de quo ista hoc anno Bertholdus : « Dominus Paschalis papa Nativitatem Domini Romae cum magna pace celebravit, et per litteras suas venerabili Gebhardo Constantiensi episcopo in Teutonicis partibus Apostolicas vices commendavit, quas ab antecessoribus multis annis obtinuit ». Haec Bertholdus, qui et hic scribendi finem fecit, forte praeventus morte ; qui ex vitae integritate, et Catholico nomine summam sibi gloriam comparavit inter chronographos hujus temporis : cui et veritatis studiosissimo bene precamur. Sed quod post haec in manus nostras pervenit, accipe Privilegium, quod hoc anno Paschalis papa concessit sancti Alberici abbatis monasterio nuper fundato in territorio Cabilonensi, ubi prima plantatio cohaesit Ordinis Cisterciensis, de quo dictum tomo superiori ante biennium. Litterae Apostolicae Paschalis sic se habent :

41. *Privilegium Cisterciensium monachorum.* — « Paschalis episcopus servus servorum Dei, venerabili filio Alberico Novi-Monasterii abbati, quod in Cabilonensi parochia situm est, ejusque successoribus regulariter substituendis in perpetuum.

« Desiderium quod ad religiosum propositum et animarum salutem pertinere monstratur (auctore Deo) sine aliqua dilatione est complendum. Unde nos, o filii in Domino dilectissimi, citra difficultatem omnem vestrarum precum petitionem admittimus, quia religioni vestrae paterno congratulamur affectu. Locum igitur illum, quem inhabitandum pro quiete monastica elegistis, ad omnium mortalium molestiis tutum ac liberum fore sancimus, et abbatiam illic perpetuo haberi, ac sub Apostolicae Sedis tutela specialiter protegi, quamdiu vos ac successores vestri in ea quam hodie observatis disciplinae ac frugalitatis observantia permanseritis, salva Cabilonensis Ecclesiae canonica reverentia. Praesentis itaque decreti pagina interdiximus, ne cuiquam omnino personae liceat statum vestrae conversationis immutare, neque vestri (quod Novum dicitur) cenobii monachos sine regulari commendatione suscipere, neque congregationem vestram astutiis quibuslibet aut violentiis perturbare. Eam sane controversiae decisionem, quam inter vos et Molisimensis Ecclesiae monachos frater noster Lugdunensis episcopus, tunc Apostolicae Sedis Vicarius, cum provinciae suae episcopis aliisque religiosiis viris, ex praepcepto praedecessoris nostri Apostolicae memoriae Urbani II perpetravit, nos tanquam rationabilem ac laudabi-

¹ Ivo Ep. LI.

lem confirmamus. Vos igitur, filii in Christo dilectissimi ac desideratissimi, meminisse debetis, quia pars vestri seculares latitudines, pars ipsa etiam monasterii laxioris nimis auseras angustias reliquistis. Ut ergo hac semper gratia digniores censeamini, Dei semper timorem et amorem in vestris cordibus habere satagite, ut quanto a secularibus tumultibus liberiores estis et deliciis, tanto amplius placere Deo totius mentis et animae virtutibus anheletis. Sane si quis in crastinum archiepiscopus aut episcopus, imperator aux rex, comes aut vicecomes, iudex aut Ecclesiastica quavis secularisve persona, hanc nostrae Constitutionis paginam sciens, contra eam temere venire tentaverit, secundo tertiove communita se non satisfactione congrua emendaverit, potestatis hono-

risque sui dignitate careat, reamque se divino iudicio existere de perpetrata iniquitate cognoscat, et a sacratissimo corpore et sanguine Dei et Domini nostri Jesu Christi aliena fiat, atque in extremo examine districti ultioni subjaceat. Cunctis autem eidem loco justa servantibus sit pax Domini nostri Jesu Christi, quatenus et hic fructum bonae actionis percipiant, et apud districtum Iudicem praemia aeternae pacis inveniant. Ego Paschalis Catholicae Ecclesiae episcopus subscripsi. Datum Troje per manum Joannis S. R. E. diaconi cardinalis, quarto decimo kal. Maii, Indictione octava, Incarnationis Dominicae anno millesimo centesimo, Pontificatus autem domini Paschalis Secundi papae primo.»

Anno periodi Graeco-Romanae 6593. — Anno Aerae Hispan. 1138. — Anno Hegirae 491, inchoato die 6 Nov., Fer. 3. — Jesu Christi 1100.

— Paschalis II papae 2. — Henrici IV reg. 43, inop. 17. Alexii Comneni inop. 20.

1. *Paschalis II anno praecedenti papa creatus.* — A num. 2 ad 7. Anno superiori, *Urbano II* demortuo, Paschalis II summus Pontifex electus est, ut ad annum *xxxix* his verbis narrat Bertoldus in Chronico, quod illo anno absolvit: «Romae venerabilis papa Urbanus, hujus nominis II, postquam Sedem Romanam XI annos et V menses (praeter paucos dies ab hoc chronographo neglectos) gubernavit, post multas tribulationes, tandem IV kal. Augusti de hac luce migravit, post cujus obitum dominus Paschalis, qui et Regengerus (scilicet Raginigerus vel Rainerus dictus) in ordine CIX papa ordinatur, et hoc ex divina revelatione factum (ubi respicit Bertoldus ad id quod refert Baronius num. 2 ex Dodechino abbate) ubique divulgatur. Ordinatus est autem a clero et populo, post discessum sui praedecessoris die decima sexta», seu die decima quarta mensis Augusti anni praecedentis, in quam Dominica cadebat. In Vita Paschalis II a Pandulfo Pisano, auctore contaneo scripta, qui tantum ex hac littera P eidem praefixa immolescit, et a Baronio sub anonymi nomine citatur, ac a Papebrocio in Conatu Chron.-Hist. perperam *Petrus Pisanus* creditur, ait Pandulfus eum ex monacho Cluniacensi creatum fuisse cardinalem presbyterum Sancti-Clementis, et postea ad Pontificatum diu renitentem evertum «electionis modum implevit», inquit idem Pandulfus, «die altero (nempe ab electione) mensis sexti XIV, (scilicet Augusti qui sextus est

a Martio), die primo (id est, die Dominica) consecrandus in Pontificem». Porro *Pandulfum* auctorem esse Vitae Paschalis II ex eo colligitur, quod Gelasi II successoris Vitam lib. 3 mandavit, quod certo constat, et Omphrius initio Chron. Ecclesiastici auctores enumerans, quibus in Historia Ecclesiastica conscribenda usus est dicat: «Guillelmus S. R. E. bibliothecarius Anastasium supplevit ab Hadriano II usque ad Alexandrum II. Vixit anno *mlx*. Pandulfus Pisanus, subdiaconus Apostolicus, Guillelmum supplevit a Gregorio VII usque ad Honorium II. Vixit anno *mcxxx*». Neque dubitandum, quin Omphrius utriusque scriptoris opus, atque quaedam quae perierat, per manus habuerit.

2. *Wigbertus antipapa moritur durante Concilio Valentino.* — A num. 16 ad 19, Baronius de Guiberti seu Wiberti antipapae, Clementis III nomine appellati, morte locutus ait, eum diem clausisse extremum «hoc anno sive sequenti, ut est diversa diversorum scriptorum assertio», neque enim desunt qui mortem illam in annum sequentem differant, uti Papebrocius in Conatu Chron.-Hist. alique quidam. Verum cum currenti anno, et quidem exeunte Septembri vel mense insequenti demortuum, post testimonium Hugonis Flaviniacensis abbatis in dubium revocari non potest. Is in Chronico Virdunensi de Synodo Valentina, in ejus causa habita verba faciens ait: «Anno Incarnat. Dom. ac advenerunt missi ad Gallias le-

gati sancte Romane Ecclesiae, Joannes et Benedictus, a quibus Concilium primo apud Eduam designatum, apud urbem Valentiniam institutum est II kal. Octobris, ad quod convenerunt archiepiscopi, episcopi et abbates numero 24, occurrentibus legatis domni Lugdunensis archiepiscopi (scilicet Hugonis, ex Diensi antistite creati Lugdunensis) quia ipse inlirmabatur, quamquam episcopi dioceseos ejus, Lingonensis et Cabilonensis (Matisconensis enim in redeundo a Roma captus a Wiberto in custodia detinebatur) non interfuerint, prohibiti, ut dicebatur, ab eodem Lugdunensi. Eduensis autem interfuit, quia accusabatur a canonicis suis de simonia et aliis quibusdam, pro ejus defensione maxime illo convenerunt Lugdunenses. Ibi ego in primo aditu Concilii purgationem illatorum offerens, accusatoribus tacentibus et deficientibus, judicio Concilii ad primam abbatis Divionensis vocem de abbacia investitus, adstantibus canonicis Eduensibus et laudantibus, cappa et baculo donatus in circo residere jussus, post soluto Concilio ad propria sum remissus litteris Apostolicis munitus, quas postea recitat.

3. *Ea mors hoc anno removeri non potest.* — Paulo post subdit Hugo: « In spatio temporis, quo Valentinesce celebratum est Concilium, obiit Wiberlus, vicesimo anno ex quo Sedem invasit Apostolicam, cum haberet in captione Matisconensem episcopum, et alios quamplures clericales Ordinis, quos omnes pro absolute sua in egressu suo per se absolvit, monens episcopum, ut Romam remeans apud papam pro sua laboraret ereptione ». Quare Otto Frisingensis, Siegbertus, Dodechinus abbas, et Urspergensis abbas hanc mortem cum hoc anno accurate alligant. « Vir utique », inquit Urspergensis, « satis ingenio, facundia, nobilitate, personaeque reverentia clarus, nec Roma tunc, nec Ravenna bene usus; et qui super unum papam viventem (sc. Gregorium VII.) quamvis coactus, ut aiunt, ipse tres sibi met alternatim succedentes supervixit (sc. Gregorium VII., Victorem III., et Urbanum II.) extorris utraque sede Romae et Ravennae, malens, ut ab ipsius ore didicimus, Apostolici nomen nunquam suscepisse »; quod ab auctore hoc tempore vivente accepit Urspergensis abbas, qui ejus verba exscribit, et in ejus persona loquitur. Qui loquendi modus a variis aliis scriptoribus etiam usurpatus plures criticos in errorem induxit; existimant enim, qui eum adhibent eo tempore floruisse, quo se visa narrare dicunt; non animadvertentes, eos testium oculatorum verba proferre, non vero sua, licet eosdem non citent, quia tunc is invaluerat usus. Neque Urspergensis, quae de Wiberlo refert, ab ipsius ore didicisse potuit, cum Chronicon suum usque ad an. MCCXXVIII perduxerit.

4. *Ei tres antipapae deinceps succedere.* — Wiberlo de medio sublato « duo statim deliguntur papae, alter post alterum. Et unus quidem eodem, alter vero post cy electionis suae diem a fidelibus

captus; qui Albertus vocabatur, apud S. Laurentium retrudi, et qui Theodoricus, apud S. Trinitatem in Cava eremiticam vitam addiscere, Patrum judicio adjudicati sunt », inquit auctor Vile Paschalis II, qui addit electum fuisse et tertium, *Maginolfum* nomine, sed hunc amissa urbe exulem vitam misere finisse, sicque Ecclesiam quievissse. Quod sibi nomen hi pseudopontifices imposuerint, ab antiquis notatum non inveniri asserit Papebrocius landatus; at in genuino Chronico Siegeberli a Miraeo publicato, ad annum MCV refertur *Excerptum Epistolae directae Henrico imp. a Guarnero principe Anconitano*, qui schismaticis adhaerebat, in qua Maginolfus *archipresbyter* appellatur, et subjicitur: « Maginolfus et insidias hominum, et onus Apostolici honoris fugiens, in humilissimum locum se contulit. Berto vero caput et rector Romane militiae, quasi causa audiendi verbi vitae, ad eum accedens cum expeditione cleri et populi eum inde extraxit, et ad Warnerum principem Ancone in Tiburtinam urbem adduxit, et sic electus IV non. Novembris, in Sedem Apostolicam promotus, et Silvester Quartus appellatus est ». Siegbertus vero ibidem ait: « Maginolfus invasionis reus non multo post reprobat a Romanis, et fama nominis ejus evanuit ».

5. *Nullus ex antiquis Wigberti mortem in annum sequentem distulit.* — Baronius ait eorum opinionem, qui Wiberlo mortem in annum sequentem differunt, inniti Petro diacono, qui l. 4 Chron. Casinensis cap. 24, scribit: « Cum ab electione Paschalis II summi Pontificis secundus jam annus esset elapsus, ab Incarnatione Domini MCCCXCVolverat, Wiberlus haereticus invasor Apostolicae Sedis, vita privatus est ». Verum vel librarius in anno Incarnationis exarando erravit, vel Petrus Diaconus secundum Paschalis II annum imperite cum anno MCCCX copulavit. Mortuus quidem Wiberlus anno II Paschalis papae, sedis annus die XIV mensis Augusti currentis Christi anni, uti inter omnes convenit, inchoatus est, et adhuc in cursu erat sub finem mensis Septembris, ac mense Octobris insequenti, quo alterutro mense Ecclesia peste illa liberata. Afferit etiam Baronius ibidem hos Domnizonis testis coevi versus:

Post annos hinos Urbanus erat, quod ab isto
Saeulo portatus, cuiusque choro sociatus:
Iste dolore gravi latus Guibertos inanis
Mortuus est.

At Domnizo more multorum aliorum partem superioris Christi anni et partem praesentis pro biennio usurpat, et duos annos Julianos utrinque incompletos biennium appellat. Cujus rei tot exempla in hac Critica in medium adduxi, ut similes loquendi formulae nullum negotium imposterum faceres debeant.

6. *Duratio schismatis ab eo conflati.* — Anno MCCCX, Wigbertus pseudopontifex creatus fuerat, ideoque Hugo Flaviniacensis in Chronico recte

scripsit, eum per annos viginti Ecclesiam turbasse. Et tamen Donnizo laudatus numerum illum atget, atque :

Ille per viginti tres annos denique Christi
Ecclesiam nisu toto turbavit iniquus.

Verum Baronius num. 48 recte observavit, illum viginti trium annorum numerum non referri a Donnizone ad tempus quo in pseudo-Pontificatu vixit, sed ad illud, quo a Gregorio VII papa descivit, et schisma conflavit.

7. *Concilium Pictaviense.* — A num. 49 ad 23. Francia, propter illegitimas *Philippi* Francorum regis cum *Betrade* Fulconis Andegavensium comitis uxore nuptias, quam contra omnes Urbani papae preces minasque retinere voluit, valde turbata fuit. Quare Paschalis II ubi Pontificatum adeptus est, per *Joannem* et *Benedictum cardinales* legatos suos Concilium *Pictavi* celebravit, episcoporum quidem abbatumque frequentia illustre, sed vi et furore *Willelmi* Aquitaniae ducis disturbatum. Diffugientibus tamen episcopis aliisque qui intererant, subistere *sanctus Bernardus* abbas Tironiensis in diocesi Carnotensi, et *Robertus de Arbrissellis*. Goffredus Grossus, monachus Tironiensis utrique coetaneus, in Vita ejusdem Bernardi rem paulo aliter narrat quam Baronius et Hugo Flaviniacensis in Chron. Quare ad majorem rei tanti momenti intelligentiam, hic nobis ejus verba referenda.

8. *In eo Philippus Francor. rex excommunicatur.* — « Per idem tempus duo cardinales Joannes atque Benedictus, Apostolicæ Sedis legatione fungentes, ad urbem Pictavium Concilium convocarunt. In quo centum quadraginta Patres adfuerunt, qui Philippum regem Francorum propter Fulconis consulis (id est comitis) Andegavensium uxorem, quam in adulterio tenebat, anathematis vindicta percusserunt. Qua excommunicatione comperta, Willelmus dux Aquitanorum, qui aderat, totius pudicitiae ac sanctitatis inimicus, timens ne similem vindictam pro consimilibus actis pateretur, nimio furore succensus, jussit omnes illos deprecari, flagellari, occidi. Quod ministris suis facere incipientibus, pontifices et abbates omnes huc illoque diffugiunt : et ut temporalem vitam retinerent, tuta latibula querere contendunt. At vero Bernardus atque Robertus Abressellensis, qui Concilio intererant, fortissimi justitiae propugnatores ac totius iniquitatis et injustitiae expugnatores, aliis turpiter diffugientibus, ita immobiles constantesque persistenterunt, ut nec ab incepto excommunicationis desisterent, sed pro Christo mortem vel contumeliam pati gloriosissimum ducerent ». Hugo Flaviniacensis in Chronico diem Concilii celebrati notavit, diem nempe *Octavarum S. Martini*, qui in XIV kal. Decemb. incidit. Tom. x Concil. pag. 724, recitantur canones xvi in hoc

Concilio statuti, qui Baronii tempore latebant, et observatur canones decem quos Baronius num. 22 recitat, pertinere ad aliud Concilium Pictaviense anno mxxviii, presidente *Rugone* Diensi episcopo legato Gregorii VII celebratum, de quo disertam mentionem facit Hugo Flaviniacensis in Chron. pag. 202. Porro Guillelmus ille Aquitaniae dux et comes Pictaviae fuit hujus nominis VIII, qui teste chronographo Malleacensi hujus temporis scriptore « duxit anno mxciv uxorem, Philippam nomine, filiam Willelmi comitis Tolosani », dictam etiam Mathildem, ex qua suscepit *Willelmum IX*, ultimum Aquitaniae ducem.

9. *Clericorum et monialium hujus temporis incontinentia.* — A num. 23 ad 27. Occasione canonis adversus clericos concubinatores in Concilio Pictaviensi sanciti, narrat Baronius ex Petro Venerabili, quæ adversus ejus contemptorem confingere. Verum, ut jam dixi, canon ille aliique hic a Baronio recitati, pertinent ad aliud Concilium Pictaviense an. mxxviii coactum. Fatendum tamen hoc tempore clericorum et monialium incontinentiam non minus quam tunc in variis Galliae partibus invasisse. Hinc Ivo Carnotensis in Epistola Guallerio Meldensi episcopo hoc circiter anno data, ordine lxx, eum hortatur, ut nullus timor incommodorum ab officii sui intentione dimoveat. « Quod ideo, inquit, suggero dilectioni vestre, quia tam ex verbis Turonensium monachorum quam ex litteris dominae Adeleidis venerabilis comitis, audivi turpissimam famam de monasterio Sanctæ-Faræ, quod jam non locus sanctimonialium, sed mulierum demonialium prostibulum dicendum est, corpora sua ad turpes usus omni generi hominum prostituentium ». Juretum in Notis ad illam Epistolam ostendit, annis mcvii et mxxxix moniales ob turpem vitam ex aliquot monasteriis expulsa fuisse, et in ea monachos introductos.

10. *Moniales e monasterio S.-Faræ ejectæ.* — Mabillonius lib. 5 de Re Diplom. pag. 368, recitat Epistolam Philippi Francorum regis, Bernardo Majoris-Monasterii abbati datam, in qua ait : « Sequendo vestigia prædecessorum nostrorum, monasterium Sanctæ-Mariæ semper Virginis Sanctæque Faræ, in quo ex infirmitate et incuria inhabitantium omnis religio et monasticus ordo penitus est ad nullatenus, et (quod miserabilius est) prostibulum factum esse condolemus; pro salute animæ meæ per præsentem Chartam in cellam vobis jure perpetuo possidendam tradimus, concedimus et auctoritate regia confirmamus. Quatenus etc. Ecclesia Dei, quæ hactenus (proh dolor !) adulterinis fedata est complexibus, et tanto tempore a servitio Dei privata est, cum Ecclesiæ vestre filiis de valle lacrymarum ascendere, et canticum graduum se cantare congratuletur ». Positum illud Sanctæ-Faræ monasterium in regione Briæ ac comitatu Meldensi, cujus tam regionis quam comitatus Adelais domina erat. Conatus omnes tam principum quam episcoporum ad hoc monasterium

reformandum adhibiti frustra fuere usque ad Ludovicum Juniores Francorum regem, et Sugerium monasterii Sandionysiani abbatem. Tunc enim, ut legere est apud Doubletum in Antiquitatibus Sancti-Dionysii pag. 229, Abbatie Sanctae-Faræ ad pristinum splendorem restituta. Quæ tunc Doubletus in Archivis monasterii Sancti-Dionysii legit, nunc præ vetustate deleta, licet ante triginta aut quadraginta annos, uti a quibusdam viris doctis mihi relatum, non pauca ex illis adhuc legi possent.

11. *De earum incontinentia loquitur Ivo episc. Carnotensis.* — Porro fallitur Mabillonius citatus, cum ait eam Philippi regis Epistolam : « non de Eboriacensi Sanctae-Faræ apud Brigenses parthenone diocesis Meldensis, sed de quadam cella ei subjecta » intelligendam esse; hanc enim interpretationem citata Ivonis Epistola plane convellit. Subdit vir doctissimus : « Nescio an de Gaiaco pagi Wastinensis B. Mariæ sacro, quod Ludovicus Augustus S.-Faræ celebri parthenoni attribuit, idque confirmavit Lotharius Augustus », intelligenda sit. At monasterium illud B. Mariæ in comitatu Wastinensi et diocesi Senonensi situm, cum tamen monasterium, de quo agitur, in diocesi et comitatu Meldensi, Ivone citato teste, positum fuerit. Si tamen ea Ivonis Epistola non extaret, cum aliqua verosimilitudine dici posset, *Philippum* regem verba facere de antiquo monasterio Campellæ, quod oppidum est Briegii, haud procul a Meloduno, a *sancta Fara* de sui patrimonii redditibus fundato, et Eboracensi monasterio annexo, cujus monachæ cum incorrigibiles essent, ab *Odone Soliacensi* episcopo Parisiensi, regnante Philippo Augusto, circa annum MCC ad magnam Sanctae-Faræ monasterium, tum sicuti et hodie, valde reformatum traductæ, et canonice seculares XII in earum locum subrogati; qua de re legendus Ro-villeus in Historia Meloduni. Sed non tantum in Gallia, Lotharingia et Belgio, verum etiam in Germania aliquæ sanctimoniales, voto castitatis contempto, vitam sæcularem amplexæ sunt, et eo processit Ecclesiasticorum incontinentia, ut ecclibatus abolitus videretur, et concubinatus quasi lege constitutus.

12. *Penuria Grammaticorum in Gallia.* — Licet hoc tempore Gallia tot viris doctis abundaret, magna tamen in ea penuria erat Grammaticorum, qui linguam Latinam docerent. Guibertus enim de Novigenio, qui hoc tempore floruit, lib. 1 de Vita sua scribit : « Erat paulo ante id temporis, et adhuc partim sub meo tempore tanta Grammaticorum charitas, ut in oppidis fere nullus, in urbibus vix aliquis reperiri potuisset; et quos inveniri contingerat, eorum scientia tenuis erat, nec etiam moderni temporis clericulis vagantibus comparari poterat, etc. »

13. *Obitus Godefridi primi Hierosolymorum regis.* — A num. 27 ad 35. Mense Julio Godefridus Hierosolymorum rex aegrotare cepit, et invale-

scente morbo « obiit quintodecimo kalendas Augusti, anno ab Incarnat. Domini MC », inquit Wilhelmus Tyrinus lib. 9, cap. VII, cui quoad annum et diem emortualem consentiunt Fulcherius Carnotensis lib. 1, aliiq. « Uno tantum anno », inquit abbas Urspurgensis, « populo Dei præfuit, languore superatus XV kal. Aug. plenam vitam bonique operibus presentem in Christo vitam finivit. Exceptis sive tacitis cunctis quibus pollebat virtutibus, tanta se mansuetudine conjunxerat tam indigenis quam cum peregrinis, ut vix adverteretur Francie plus plangeretur, quam Syris vel Græcis ». In ejus locum Balduinus frater ejus rex electus est, qui Hierosolymam pervenit « die quo solstitium hyemale accidit », inquit idem Fulcherius qui eum comitabatur, qui addit : « Et præparatis ornamentis quæ regi compellant coronando, pacificatoque Daiberto cum domno Balduino et cum canonicis Sancti-Septulcri alloquentis, quia viri sensati de hoc tractaverunt, cessavit contentio eorum. Anno ab Incarnat. Domini MC, in Basilica B. Mariæ apud Bethleem, die Nativitatis Domini a patriarcha memorat (nempe Daiberto) una cum episcopis cleroque ac populo assistentibus, in regem honorifice sub sacra unctione sublimatus et coronatus est rex Balduinus. Et quod fratri suo prædecessori non fecerant, quoniam noluit, et tunc laudatum a quibusdam non fuit, hinc ratione prudentius considerata fieri decreverunt ». Ubi Fulcherius de die Natali currentis Christi anni, a quo sequentem incipit, quemadmodum et Wilhelmus Tyrinus lib. 10, cap. 1, verba facit.

14. *Wilhelmus II Angliæ rex occiditur.* — A num. 35 ad 40. « Anno ab Incarnat. Domini MC, feria quinta, IV nonas Augusti, Guillelmus Rufus in Nova-Forestia ictu sagittæ mortuus est, postquam XII annis et pæne X mensibus regno Angliæ potius est », inquit Ordericus lib. 10, pag. 783, qui subdit, Henricum fratrem ejus *Dominico sequenti* consecratum fuisse ab episcopo Londoniensi, quod sanctus Anselmus Cantuariæ archiepiscopus exularet. Tum subjungit : « Triginta annorum erat Henricus cum regnare cepisset, et XXXV annis et IV mensibus regnavit. Hic inter prospera et adversa regnum sibi divinitus commissum prudenter et commode moderatus est, ac inter præcipuos totius Christianitatis principes, obtentu pacis et justitiæ fulgens insignis habitus est. In diebus ejus Ecclesia Dei divitiis et honoribus alacriter emicuit, et omnis ordo religiosorum ad laudem Creatoris multipliciter crevit ». Quarto mense ex quo cepit regnare, Mathildem Malcolm regis Scotorum et sancte Margariæ reginæ filiam sibi desponsavit, quam sanctus « Anselmus die Dominica festivitatis sancti Martini reginam consecravit et coronavit », inquit Simeon Dunelmensis, qui jam dixerat Anselmum de Gallia ab Henrico rege revocatum fuisse. Henschenius tom. II SS. Aprilis ad diem XXI ejusdem mensis, quo sanctus Anselmus colitur, pag. 927, ait *Henricum* regem a *Thoma* archiepiscopo Eboracensi

benedictum (1). Verum nullum ad id probandum testem adducit, et tam Ordericus, quam novus chronographus Saxo ac Simeon Dunelmensis in sua Historia discrete asserunt, factum id esse Londoniæ et a Mauritio ejusdem urbis episcopo. Mathæus quidem Parisiensis ad annum se tradit, *Henricum* consecratum esse in regem in *die Assumptionis B. Mariæ*, eique continuo a Mauritio Londoniensi episc. et a Thoma Eboracensi archiepisc. coronam capiti impositam; sed hic non magis in utroque capite audiendus, quam cum matrimonium Mathildis cum rege Henrico et adventum sancti Anselmi in Angliam in annum se differt.

15. *Adventus S. Anselmi in Angliam.* — Eadmerus, qui præter vitam sancti Anselmi, cujus continuus comes fuit, scripsit Historiam Novorum sex libris comprehensam, quam Baronius non vidit, lib. 3 cap. 1, narrat Anselmum, in cujus comitatu ipse erat, nono kal. Octobris Dubrim appulisse, et cum post paucos sui reditus dies ad Henricum regem venisset, « postulat est pro consuetudine antecessorum suorum regi hominum facere et archiepiscopatum de manu ejus recipere », et Anselmum respondisse: « Si dominus rex ista suscipere, et suscepta servare voluerit, bene inter nos firma pax erit: sin autem, non video remanere mecum in Anglia utile fore vel honestum, præsertim cum, si episcopatus aut abbatias dederit, privari me penitus tam a sui quam et eorum qui suscepimus communione necesse sit. Nec ea enim de causa Angliam redii, ut si ipse Romano Pontifici obedire nolit, in ea resideam ». Regem inter et Anselmum conventum, ut utrinque Romanum mitterentur, interimque inducere usque ad Pascha essent. Hinc *paucis diebus interpositis*, Mathildis nupsit Henrico regi, et Anselmus eos coniunxit.

16. *Legatus in Angliam missus re infecta revertitur.* — « Eodem anno », subiungit Eadmerus, « venit in Angliam Guido archiepiscopus Viennensis (Pontifex postea Romanus sub Callisti II nomine) functurus, ut dicebat, legatione totius Britannie, ex præcepto et auctoritate Apostolicæ Sedis. Quod per Angliam auditum, in admirationem omnibus venit, inauditum scilicet in Britannia cuncti scientes quemlibet hominum super se vices Apostolicas gerere, nisi solum archiepiscopum Cantuariæ. Quapropter sicut venit, ita reversus est, a nemine pro legato susceptus, nec in aliquo legati officio functus. Exinde, cum ad tempus induciatur Pascha (sequentis Christi anni) ventum esset, et qui Romam missi fuerant nulli necdum redissent, usque ad adventum illorum induciæ dilate sunt ». Agebatur de investituris quas Henricus rex petebat, et Anselmus a summi Pontificis sententia recedere volebat.

17. *Paschalis II confirmat Ordinem Cisterciensem.* — Ad num. 41. B. Robertus abbas Molisicensis, qui ante biennium monasterium Cisterciense in diocesi Cabilonensi construxit, hoc anno duos monachos Romam misit, cum litteris commendatis Joannis et Benedicti cardinalium, Sedis Apostolicæ in Gallia legatorum, Hugonis archiepiscopi Lugdunensis, atque Walteri præsulis Cabilonensis, quorum precibus Paschalis II Ordinem Cisterciensem confirmavit, rescripto *Troie* dato *XIV kal. Maii, Indict. viii*, quod integrum a Baronio recitatur. Tum Albericus, Cistercii abbas, anno sequenti artissimam regulæ sancti Benedicti observationem instituit in novo suo monasterio, ut videre est apud Manriqueum in *Annal. Cisterciensibus*.

18. *Petrus Aragoniæ rex Saracenis bello vexat.* — Toti erant hoc tempore Hispaniarum reges in Saracenis debellandis: quam in rem chronographus Malleacensis hoc anno scribit: « Guillelmus (hujus nominis VIII.) consul Pictavorum (id est, comes) accepit apud Lemovicæ crucem, et cum eo multi alii suorum procerum (qui cum eo Hierosolymam profecti sunt). Similiter Petrus rex Aragoniæ (id est, Aragoniæ) cepit Barbastram et multa castella, quæ pugnavit cum Moabitibus (id est, Saracenis) apud Oscam, et vicit, et subjugavit civitatem decimo quinto kalendas Novembris ».

19. *Anselmus archiep. Mediolanensis anno sequenti in Occidentem profectus.* — Anselmus archiepiscopus Mediolanensis, semel tantum, idque sequenti anno in Palæstinam profectus est; vana enim et inutilia, quæ Puricellus in Monumentis Basilicæ Ambrosianæ et lib. 4 de sanctis Arialdo et Herlembaldo in medium adducit, ut ostendat Anselmum jam illuc anno mxcviii perrexisse. Constat enim hunc præsulem anno mxcix sancti Arialdi reliquias ex Ecclesia Sancti Celsi in Ecclesiam Sancti Dionysii transtulisse circa tempus autumnale, et antea *quarto nonas Februarii* sententiam emiserat in gratiam religiosorum Sancti Simplicii, quam integram refert Puricellus in Basilica Nazariana cap. 5. In exemplari ab eo viso habetur tantum mxcix. At numerus c velutate temporum deletus; legendum enim mxcix, ut habet aliud exemplar authenticum ab Ughello relatum, et Indictio septima, quæ in utroque legitur, certum facit. Hoc vero anno, Anselmus mense Julio Mediolani consistens celebravit dedicationem Ecclesiæ Sancti Sepulchri, cujus dedicationis Monumentum insigne recitat Ughellus scriptum « anno ab incarnatione Domini nostri millesimo centesimo, Indictione octava, idibus Julii ». Eo Instrumento indulget Anselmus, ut quicumque aliquo impedimento detentus, « ad sepulchrum in quo Christi

(1) Optimum jus assisit Hescheno asserenti Henricum benedictum seu potius coronatum fuisse regem a Thoma Eboracensi; id enim discrete tradit Thomas Eboracensis monachus in Historia ejusdem monasterii, quam ante finem hujus sæculi scribat, vulgata a Bollandistis ad diem xxiii Junii pag. 553. Ita enim ibi lib. 2, cap. 5, num. 26: « Anno Domini millesimo centesimo, nonis Augusti, die Dominico, in Westmonasterio, a Mauritio Londoniensi episcopo (Henricus) est consecratus in regem, et a Thoma Eboracensi » coronatur. Auctori parve curæ fides habenda est, in re præsertim cui nemo veterum refragatur; reliqui enim a Pagio producti consecrationem factam a Mauritio commemorant, non coronationem.

corpus dormivit, ascendere non potuerit, et ad hoc sepulchrum ad ejus veram similitudinem factum venerit sana mente et bona intentione, remissionem suorum tertiæ partis delictorum habeat, et ad laudem Hierosolymitani sepulchri hoc se retulisse cognoscat ». Instrumento ita subscripti Anselmus : « Ego Anselmus quartus Dei gratia archiepiscopus ». Quare ante sequentem annum Anselmus peregrinationem illam non suscepit.

20. *Cruciatam prædicat in Longobardia.* — Postquam enim petendæ Hierosolymæ consilium iniit, cruciatam in Longobardia publicavit, et episcopum aliquem, qui se absente vices suas Mediolani ageret, instituire decrevit, quod Landulphus Junior, seu a Sancto-Paulo, qui scripsit librum Historiarum Mediolanensis urbis, ab anno Christi mxcvi usque ad millesimum centesimum tricesimum sextum perductum, apud Puricellum citatum, licet ordine præpostero, testatur : « Cum adhuc homo iste simplex (sc. Anselmus) Mediolani viveret, et exercitum congregaret, habuit consilium statuendi sibi vicarium, hominem multarum artium. Unde quidam sagacissimi viri ab eo ordinati sacerdotes, mandatum eundi Saonam (sive Savonam) susceperunt, ut in ipsa civitate suo jussu et auctoritate electionem episcopi admonerent, et fieri cogerent. Qui dum iter facerent, venerunt Ferrariam (adnam a Ferraria ad Padum posita) in quo nemore amplexi sunt Grossulanum et ejus consilium. Quorum sacerdotum exercitium in tantum valuit, quod quidam ex Saonensibus ipsum Grossulanum in victu afflictum, in vestitu abjectum, elegerunt sibi episcopum. Eligentes una cum illo electo et illis duobus sacerdotibus ab archiepiscopom issis, Mediolanum pervenerunt, ibique per jussionem archiepiscopi, qui jam erat in expeditione positus, Grossulanus... ordinatus est episcopus, et archiepiscopi vicarius ». Et tamen Grossulanus, quo factus episcopus Savonensis eo munere functus est, in Instrumento citato subscribit his verbis, *indignus episcopus subscripsi*. Contra vero ejus nomen non legitur in judicio in causa monachorum Sancti Simpliciani, anno superiori *quarto nonas Februarii* habito, licet abbates omnes, priores et dignitates cleri Mediolanensis eidem subscribentes officii sui titulum addant. Quare Grossulanus mense Februario superioris Christi anni, nondum episcopus ac vicarius archiepiscopi Mediolanensis erat, nondumque tunc forte ab Anselmo cruciata prædicabatur.

21. *Multi crucem accipiunt.* — Puricellus laudatus contendit gesta hæc fuisse anno mxcviii, Conradum Henrici imperatoris filium ante Urbanum II papam demortuum esse, et Grossulanum consecratum eo tempore quo Anselmus erat in *expositione positus*, in Oriente scilicet, ut Puricellus interpretatur. Verum is Landulphum Juniorem non intellexit, qui tantum indicat Anselmum Mediolano abfuisse, prædicantem tunc cruciatam in urbibus Longobardiæ, indeque cap. 2 Landulphus

ait : « Ad vocem hujus prudentis viri (sc. Anselmi) viri cujuslibet conditionis per civitates Longobardorum, villas et castella eorum cruces susceperunt ». Hæc expeditio, in qua positus erat Anselmus, non vero in Orientali, ubi paucissimo tempore moratus est, et in ipso adventu male habitus. Conradum vero anno tantum sequenti, non vero anno mxcviii vita functum esse, anno sequenti demonstrabimus.

22. *Refellitur Puricellus Conradi regis mortem prævertens.* — Ut ostendat Puricellus Conradum regem ante Urbanum II demortuum, adhibet verba Landulphi Junioris cap. 1 : « Cono (id est Conradus) quoque rex, qui dum Henricus pater ejus viveret, per contractionem Mathildis comitissæ, et officium hujus Anselmi de Rhode (hujus nominis filii) fuit coronatus Modoetie, et in Ecclesia Sancti Ambrosii, regali more... regnans in loco qui Burgus Sancti Dominici dicitur (in Parmensi tractu posito) vidit presbyterum Luitprandum propter PATARIAM naso et auribus truncatum (vides factionem Pontificiam Patariam a Mediolanensibus appellatam fuisse) euntem ad Urbanum Pontificem Romanum (anno mxcviii secundum Puricellum, aut potius anno mxcix), cui presbytero rex ipse cum devotione inquit : Cum sis magister PATARIORUM, quid sentis de pontificibus et sacerdotibus regia jura possidentibus, et regi nulla alimenta prestantibus ? Et presbyter ipse absque ullo rancore in beneplacito Dei et ipsius regis respondit. Verumtamen altera die, faciens iter suum cum presbytero Arnaldo magistro scholarum Mediolanensium, et Syro sacerdote Ecclesiæ Sanctæ Mariæ Poloniæ (quem Puricellus cum esse credit, qui Vitam sancti Arialdi, quæ nunc non extat, composuerat) captus est ab hominibus Parmensis episcopi... per quatuor dies retentus excoxiatus, inde Mediolanum rediit. Rex vero ipse, prout audivi a raptoribus illis, emendans (id est, quod datum fuerat a presbytero pro sua redemptione), et mulum ipsius presbyteri suscepit, et mox in Tusciam adire tentavit. Et cum pervenisset Florentiam, rex ipse prudens et sapiens atque decorus specie, prohi dolor ! adolescens, arrepta potione ab Aniano medico Mathildis comitissæ, vitam finivit ».

23. *Explicatur locus Landulphi Junioris.* — Ex præfato adverbio *mox* Puricellus sequi putat statim a Luitprandi expoliatione, Conradum in Tusciam perrexisse, ibique an. mxcviii vitam cum morte commutasse. Verum hæc adverbia *mox, statim*, aliaque tempus exprimentia, aliquam latitudinem habent; neque istud *mox* semper significat nullam moram interpositam fuisse, sed aliquando *deinde*, uti apud Suetonium in Augusto cap. 47 : « Nec mox (id est, *deinde* vel *postea*) occasio aut causa trajiciendi fuit ». Landulphus itaque intelligit *deinde*, id est, biennio post, annoque mci, Conradum Tusciam petisse, ibique mense Julio ejusdem anni mortem oppetiisse, Luitprandus enim anno mxcix injuriam illam passus est.

24. *Secunda ratio Puricelli.* — Ait secundo Puricellus, Landulphum Juniorem secundum caput Historiae suae his verbis auspicari : « Rege igitur (sc. Conrado) in regno deficiente, supradictus Anselmus de Bois Mediolanensis archiepiscopus, quasi monitus Apostolica auctoritate, cum dicto presbytero (nempe Luitprando) nolente, de diversis gentibus exercitum studuit congregare, cum quo caperet Babylonicum regnum ». Quibus ex verbis infert Puricellus, quod cum constet ex Catalogo archiepiscoporum Mediolanensium Anselmum IV die xxx mensis Septembris anni mci vivere decessisse, certumque sit eum eodem anno in Oriente fuisse, necessario admittendas duas ejusdem praesulis profectiones in Orientem quarum prior suscepta fuerit anno mxcviii, eodemque *Conradus* rex obierit. Nam si Conradus die xxxi mensis Julii anni mci in Tuscia vita functus esset, ut communis fert opinio, cum Landulphus testetur, eo mortuo *Anselmum* milites collegisse, seseque ad expeditionem Hierosolymitanam parasse, quomodo Anselmus intra diem ultimam mensis Julii, ultimamque mensis Septembris, militum copias comparare, et cum iis Constantinopolim pervenire potuisset? Certe ad rem utramque ei tempus non fuisset. Ita Puricellus.

25. *Refellitur.* — At frustra se vir doctissimus thorquet, ut Landulphum cum aliis historicis conciliet. Accurate enim ii Conradi mortem cum

anno mci connexuere, et Landulphus Junior, qui unica Anselmi in Orientem peregrinationis mentionem facit, non scribit eam post Conradi regis obitum, ut eum Puricellus interpretatur, iniisse; sed tantum *eo in regno deficiente*, id est, eo jam morti proximo, vel cum prope esset ut in regno deficeret. Neque Landulphus Junior, qui annum mortis Conradi ignorare non potuit, ab aliis scriptoribus etiam coevis in anno hujus regis emortuali consignando discrepat, uti ex dicendis anno sequenti magis patebit.

26. *Landulphus Senior Historiam suam absolvit.* — *Landulphus Senior*, qui rerum Mediolanensium Historiam ab anno millesimo duodecimo exorsus est, eandem currenti absolvit. Ea nondum typis data, sed Puricellus in Monumentis Basilicae Ambrosianae aliisque suis operibus, varias ejus Periochas exhibet, quibus Annales Ecclesiasticos locupletare conati sumus.

27. *Fuadatio Ordinis Fontebraldensis.* — « Eodem anno », inquit chronographus Malleacensis ad hunc Christi annum, « Robertus magister (de Arbrissellis cognominatus) cepit dignosci apud nos (sc. in Pictoniis) et incepit locum Fontis-Euardi (seu Fontis-Ebraldi) aedificare, et fratres et monachos adjuvare in pluribus locis, qui sub disciplina sua religiose vivunt ». De beato Roberto, ejusque Ordine pluribus infra.

PASCHALIS II ANNUS 2. — CHRISTI 1101.

1. *De investituris questio et legatio regis Angliae et Anselmi episcopi ad Romanam Pontificem et hujus sententia.* — Sequitur annus Redemptoris centesimus primus supra millesimum, Indictione nona, quo ad Paschalem papam tam ab Henrico Anglorum rege, quam a S. Anselmo Cantuariensi archiepiscopo, inter se ob investituras Ecclesiarum concertantibus, legationes misse sunt. Res gestae una cum Epistolis utro citroque missis scorsum ab Edinero, isthaec omnia contuente, descriptae fuerunt, ut ipse testatur in Praefatione ad Vitam ejusdem Anselmi. Sed cum liber ille exciderit, pauca quaedam, quae ex illo descripsit Wilhelmus Malmesburiensis bibliothecarius, hic reci-

tanda erunt, quae sic se habent¹ : « Kursus igitur communi edicto mittuntur legati Romam, qui tam dura praecpta tentent vel lenire, vel rescindere, (de investituris scilicet a rege non exhibendis). Ex parte antistitis (Anselmi videlicet), Balduinus et Alexander monachi : ex parte regis, Girardus archiepiscopus Eboracensis, Herbertus Norwicensis, Robertus Cestrensis episcopi sunt missi. Sed priores (hos episcopos) familiaris quoque causa urgebat, Girardum pro adeptione pallii, Herbertum pro rescissione Privilegii abbatis S. Edmundi, quod Balduinus abbas illi carnobio per Alexandrum pa-

¹ Will. Malmesh. de gest. pontif. Angl. l. 1.

pam multis laboribus acquisierat. Iderat, ut abbas illius loci nec episcopo Norwicensi, in cuius parrochia esse cognoscitur, nec ulli alii, nisi primati Angliæ subjiçatur. Hoc Herebertus depellere intendens et pergens, ignoro quo infortunio socios relinquens et devia seculus, prædonum manum incurrit, sed quadraginta marchis datis, servitilem exiit, libertatem viæ recepit: primo per omne quod dicitur sanctum, jurare compulsus Guidoni (id nomen viro raptorum magistro) nihil se Romæ acturum, quod ad domini sui Anselmi archiepiscopi spectaret incommodum». Adeo enim increbuerat S. Anselmi ubique nomen, ut etiam latro-nibus esset in honore et defensione, exhibentibus se sponte vindicibus ejus juriur: contra regem Anglorum apud Romanum Pontificem. Sed pergit auctor: «Datis ergo munus, raptum socios prosequatur liberio ore otio, quia levio-re marsupio.

2. «Conjuncti corripunt viam, papæque obtulibus presentati, quidquid poterant promissis et numeribus agunt, ut regis voluntatem effectui mancipare possint; sed nequidquam. Stat ille inflexibilis, nolens (ut dicebat) statuta sanctorum Patrum evolvere pro voluntate unius hominis. Nihil ergo iste labor proficit ad aliud, nisi ut lites consenserentur in regno, legalis inter se dissidentibus; nam rex Epistolam ab episcopis sibi allatam, quod suæ voluntati refragari viderat, occultendam pulavit. Cæterum nuda verba foras extulit, quibus illi pro episcopali veritate asserbant, Apostolicum regis investituræ æquanimiter ferre, si cætera boni principis officia exequeretur; ideo autem noluisse litteris hæc videre (credere), ne accepta occasione cæteri principes in eum inclamarent. Contra, monachi palam clamitabant, Apostolicis præceptis fraudem innecti conquirentes: siquidem et Epistola, quam Anselmo attulerant, vulgo jam lectitabatur, in qua non solum investituræ non concedere, sed etiam statuta Urbani pertinaciter probabatur Paschalis urgere, servandaque monere. Strepbat igitur omnis aula murmure, non debere attendi monachis, qui libenter facis veritatem obsecrent dummodo archiepiscopo placeant: episcopalem gradum et sermonem magni esse ponderis, monachos jus in secularium rerum testimonio perdidisse. At istud », inquit Baldinus, «seculare negotium non est. Tum procures: Probum et prudentem te scimus virum, nec de illis esse, quæ maxima turba ordinem vestrum male vivendo infamat; sed tamen et humana et divina exigit ratio, ut magis tribus episcopis quam duorum monachorum credatur testimonio. Diu ergo fluctavit Anselmi sententia quo vergeret, quod et adversa fronte testimonium episcoporum refellere, videbatur superbum: porro Epistolæ, quæ sigillum Apostolicum prætendebat non credere, stultum. Confirmato animo respondit, ad certitudinem facti cognoscendam missurum se Romam; interim illis qui investirentur, nec communionem suam negandam, nec benedictionem impetrandam ».

Quid vero responderit Paschalis papa in declaranda sententia sua de investituris non concedendis, silentio præterit auctor, nescio an in gratiam regis; cum tamen de his ipsis extet Epistola illa inter Epistolæ S. Anselmi, ordine duodecima posita, quæ sic se habet:

3. «Paschalis episcopus, servus servorum Dei, Anselmo Cantuariensi, venerabili fratri et coepiscopo, salutem et Apostolicam benedictionem.

«Suavissimas dilectionis tuæ suscepimus litteras, charitatis calamo scriptas: neque enim aliud chartæ calamus indidit, quam quod de fonte charitatis influxit. In his reverentiam devotionis tuæ complectimur, et perpendimus fidei tuæ robur et pie sollicitudinis instantiam. Exultamus, quia, gratia Dei tibi præstante auxilium, te nec minæ concutiant, nec promissa sustollunt. Dolemus autem, quia cum fratres nostros episcopos legatos regis Anglorum benigne suscepimus: quæ nec diximus nec cogitavimus, redeuntes ad propria retulerunt. Audivimus enim eos dixisse, quia si rex in aliis bene ageret, nos investituræ nec prohibere, nec factas excommunicare; et quod ideo volebamus chartæ committere, ne sub hac occasione et cæteri principes in nos inclamarent. Unde JESUM qui renes et corda scrutatur, in animam nostram testem inducimus, si, ex quo hujus sanctæ Sedis curam cepimus gerere, hoc immane scelus vel descendit in mentem. Et hoc a nobis Deus avertat, ut es, et non subrependo nos inficiat, ut aliud habeamus ore promptum et aliud corde reconditum; cum contra mendaces Prophetas precetur, dicens¹: Disperdat Dominus universa labia dolosa. Si vero nostro silentio pateremur Ecclesiam felle amaritudinis et impietatis radice pollui; qua ratione possemus apud æternum Judicem excusare, cum Dominus sub specie sacerdotis dicat Propheta²: Speculatorum dedi te domui Israel? Non bene custodit urbem, qui in specula positus, dum non obsistit ejus hostibus, diripiendam exponit. Si ergo pastorale signum, si anulum, signaculum fidei tradit laica manus: quid in Ecclesia pontifices agunt? Ecclesiæ honor atteritur, solvitur discipline vigor, et omnis religio Christiana concutitur, si quod novimus sacerdotibus solis deberi, laica patiamur temeritate præsumi. Non est laicorum Ecclesiam tradere, nec filiorum, matrem adulterio maculare. Jure ergo privandus est patrimonio, qui matrem polluit adulterio; nec meretur Ecclesiasticæ benedictionis consortium, qui eam impia infestatione persequitur: laicorum est Ecclesiam tueri, non tradere. Quare quidam, cum illicitum sibi sacerdotium vindicaret, lepra percussus est³. Filii quoque Aaron, quia ignem alienum imposuerunt, igne divino consumpti sunt⁴. Alienum enim est ab Ecclesia, et a sacris canonibus est inhibuit, ne principes et sæculares viri investituræ non solum dare, sed nec electioni epi-

¹ Psal. xl. — ² Ezech. iii. — ³ 2. Par. xxvi. — ⁴ Levit. x.

scoporum audeant se violenter inserere. In septima (viii) quippe Synodo (ut nostis) scriptum est: Sancta et universalis Synodus definivit, neminem laicorum principum vel potentum se vi ingerere electioni vel promotioni episcoporum. Si ergo filii Aaron, quia ignem alienum intulerunt, corporaliter puniti sunt; isti qui a laicis, a quibus alienum est, Ecclesiam susceperunt, spirituali gladio feriuntur.

4. Episcopos autem, qui veritatem in mendacium commutaverunt, ipsa Veritate quæ Deus est in medium introducta, a beati Petri gratia et nostra societate excludimus, donec Romanæ Ecclesie satisfaciant et reatus sui pondus agnoscant. Quicumque vero intra prædictas inducias investituræ seu consecrationem acceperunt, a consortio fratrum et ordinatos et ordinatores alienos habemus; nec eis ad excusationem deceptio sufficit, quia et propheta ab alio propheta deceptus, nec ideo mortem evasit¹. Rogamus interea charitatem tuam, nos tui sanctis precibus commendari, ut quanto propitius (propius) ad Deum passibus virtutum accedis, nobis orationum tuarum manus extendas. Omnipotens Deus, qui te huius stadii invitat ad cursum, felici consummatione perducat ad præmium. Ilacisque ad S. Anselmum Paschalis papa.

5. Hic Anselmus, ab Apostolica Sede acceptis litteris, iisdemque promulgatis, ad celebrandum in Anglia generale Concilium anno sequenti se magna animi constantia præparavit, in quo in primis de velitis principum investituris ab Apostolica Sede cum episcopis ageret: insuper tractaret etiam de restituendis collapsis sacris institutis, atque revocanda pristina Ecclesiastica disciplina, pravosque mores qui succrevissent evelleret. Agemus de his suo loco, nempe anni sequentis exordio.

6. *Conradi regis obitus.* — Hoc eodem anno, qui tertius ab Urbani papæ obitu numeratur, Conradus rex moritur Florentiæ ibidemque sepelitur, cum jam antea Mathildi reconciliatus esset, cum qua dissensio oborta erat. Cecinit ista versibus Dominico, simulque Ferrarie quæ rebelarat deditionem, cum ab eadem bello terra marique perstringeretur. De Conrado rege Urspergensis testatur finis ejus versibus exornatum.

7. *Philippus rex Roman venturus.* — Inter hæc autem Philippus, rex Francorum, quem vidimus anno superiori, in Concilio Pictaviensi, ab Apostolicæ Sedis legatis fuisse excommunicationis sententia ob pellicem condemnatum, Romam pro absolutione ad Paschalem papam misit. Cum autem ipse rex Romam aditurus diceretur, Ivo episcopus Carnotensis admonuit Paschalem Pontificem, ne ab ipso deciperetur, extorqueretque e manu ipsius absolutionem, ut fecerat ab Urbano, a quo absolutus rursus est reversus ad vomitum. Verba Ivonis ad Paschalem papam sunt ista²: « De cætero

notum facio sanctitati vestræ, quod Francorum rex Romam in proximo se venturum dicit; quod tamen non credimus, sed sen veniat sen militat, cavete et nobis et vobis, ut semper clavibus et calceis Petri forlitter teneatur. Et si forte absolutus fuerit, et ad vomitum, sicut jam contigit, reversus fuerit; e vestigio eisdem clavibus recludatur, eisdem calceis religetur, et hoc litteris vestris omnibus Ecclesiis manifestetur. Ita enim corrosorum dentes confringetis et iustitiæ satisfacietis. Quod si forte Deus cor ejus ad penitentiam illustraverit: mementote nostri, qui portavimus pondus diei et æstus; ut sicut foimus participes tribulationis, ita simus et consolationis. » Hæc de rege ad Paschalem papam Ivo. Porro adventus Philippi regis in Urbem absolutionis causa petendæ evanuit; legatos tamen, ut vidimus, misit, quorum petitione a Paschale Pontifice duo legati in Gallias missi sunt, ad recipiendam debitam satisfactionem a rege, qua prævia deberet absolvi: quod et factum est.

8. *Ivonis litteræ et labores pro electione Galloniæ contra Stephanum in sede Bellovacensi.* — Quoniam autem eisdem Ivo litteris ad Paschalem papam ingerit querelam adversus eundem regem Philippum de Gallone, sive Gaulone, vel Galono (ita diversimode appellatum invenio) electo Belluacensi episcopo, cujus electioni assensum præbere volebat; cum ejus causa eidem Ivoni plurimum fuerit laudabiliter laborandum: quomodo ista se habuerint, ex iisdem ad Paschalem litteris est petenda narratio, quæ sic se habet¹: « Bellovacenses clerici melioris famæ et consilii sanioris, præcedente consilio vestro, consilio optatumque diocesis suæ et laude populi, dominum Gallonem (Gaulonem), virum vita honestum liberalibusque studiis et Ecclesiasticis disciplinis ornatum, in episcopum sibi elegerunt; pauci tamen ex clericis Stephani illius repudiati complices, quos sibi pelliculis peregrinorum murium, atque aliis huiusmodi vanitatum aucupis inescaverat, huic electioni non assenserunt, nec tamen ei aliquid quod sacris canonibus obviet objicere potuerunt. Cum vero rem per se impedire non valerent, regem adierunt, quedam verba acribus ejus instillaverunt, quæ facile in cor ejus eliquaverunt, videlicet, quod prædictus electus discipulus mens fuerit, apud me nutritus, apud me eruditus: addentes quod a sanctitate vestra fuerit electus, et quod magnus ei futurus esset adversarius, si in regno ejus aliquando fuerit episcopus. Rex itaque virulentis his verbis succensus, et ab omni bona voluntate turbatus, non vult electioni assensum præbere, nec electo bona episcopalia dimittere. Unde electores ejus ad paternitatem vestram jam confugissent, nisi quia metropolitani eorum eos detinet, conducto die inter contradictores et electores, sicut dicitur, pacem volens componere, vel forsitan propter voluntatem regis rem callide impedire. Superest ergo, dilectissime pater, ut pro po-

¹ Reg. XIII. — ² Ivo Ep. XLIX.

¹ Ivo Ep. XLIX.

testate et auctoritate vestra, sicut episcopis, Ecclesiae, prout clerici rationabiliter postulaverint, succurratis, consilium vestrum inconfusibile faciat, ne insidiatores et detractores vestri subsannando de vobis dicere incipiant¹: Hic homo cepit aedificare, et non potuit consummare».

9. Ita quidem, quod anno superiori legati Apostolicæ Sedis in Gallias missi prohibuerunt eligi Stephanum illum, hominem scelestum, ante damnatum ab Hugone archiepiscopo Lugdunensi; sed tamen improbi clerici illi contra prohibitionem eundem Stephanum elegerunt: eadem ex causa idem Ivo ad Paschalem Pontificem has litteras dedit, tanto viro dignas, et cui scriberentur valde utiles²:

10. «Paschali summo Pontifici, Ivo humilis Ecclesiæ Carnotensis minister, quidquid filius patri.

«Quoniam utrumque filium Romanæ Ecclesiæ, testante conscientia mea, me esse cognosco; cum scandalizatur, non possum non uri, cum tribulatur, tribulor, cum detractorum livido dente laceratur, disrumpor. Unde suggero dulcissimæ paternitatis vestræ, ut si quæ de partibus nostris accusandarum (vel excusandarum) episcoporum, vel aliorum hominum ad aures vestras causæ perlatae fuerint: non statim petitionibus eorum, qui sua quærunt et non quæ JESU CHRISTI, acquiescat; sed indulto congruo et prolixo spatio, religiosorum, qui in vicina regione rem liquide nosse possunt, testimonia requiratis, et ita cognita veritate, prout vobis Deus inspiraverit, juste vel misericorditer quolibet negotia terminetis. Ita enim bonam famam vestram quæ Sedi Apostolicæ valde necessaria est conservando, multorum salutem providebitis, et amulorum linguas malediclo revocabitis. Alioquin si qua pudenda patris (quod Deus avertat) revelata fuerint, non ea ut filii aversionis deridebimus; sed tamen ab huiusmodi admonitionibus, quas infructuosas videbimus, styli et linguam cohibebimus. Non indignetur sanctitas vestra, si ut filius talia suggero paternitati vestræ, quia multos pastores jam vidi propter remissa flagitia vel multorum dissimulata facinora, ori suo silentium posuisse, et a spe corrigendorum malorum plurimum defecisse. Hæc hæcenus.

11. «De cætero notum facio excellentiæ vestræ, Belluacenses clericos contra interdictum vestrum et legatorum vestrorum, quemdam clericum, nomine Stephanum, in episcopum assumptisse procul a sacris ordinibus inventum, utpote nondum subdiaconum, hominem illitteratum, aleatorem, mulierum secatorem, pubæ olim de adulterio publico infamatum, et ob hoc a domino Lugdunensi archiepiscopo, tunc temporis Sedis Apostolicæ legato, Ecclesiæ communione privatum. De quo possent dici multa alia inhonesta, sed hæc quæ vera et manifesta sunt, ad repulsionem ejus sufficiunt, si Apostolica et canonica instituta vigorem

sum non amittunt. Volo itaque sanctitatem vestram a parvitate mea super hoc esse præmonitam et præmunitam, ne per surreptionem innocentiam vestram aliquis decipiat, ut licentia vestra ad episcopatum perveniat. Quod si factum fuerit, quantum in hoc casura sit Sedis Apostolicæ auctoritas, si verbis meis non creditis, tandem rei experientia cognoscetis». Et post alia hæc de munere Romani Pontificis: «Vestrum autem est, inquit, et oves errantes et dissipatas per nebulas et avia deserti quærere, et ad pascua reducere: pastorem qui gregis curam habeat, eidem providere. Et licet oves ipse velint perire, velint errare, velint se voracitati luporum suffocandas objicere; dicendum est tamen sanctitati vestræ: Nolo erretis, nolo pereatis». Eodem quoque argumento antea scripserat idem Ivo ad Joannem et Benedictum cardinales, Sedis Apostolicæ legatos, cum sic ab eo admoniti, venterunt ne perditus ille Stephanus eligeretur³. Scripsit et alias pro electo idoneo idem Ivo ad Paschalem litteras⁴.

12. At quod spectaret ad jura regis deligendi promovendos episcopos, idem Ivo hæc scripsit tunc ad archiepiscopum Rhemensem, cum rogat, ut eundem legitime electum debeat consecrare⁵: «Non enim, inquit, licet rebus, sicut sanxit octava Synodus, quam Romana Ecclesia commendat et veneratur, electionibus episcoporum se immiscere, vel aliqua eas ratione impedire. Francorum enim reges Carolus et Ludovicus electiones episcoporum Ecclesiis concesserunt, quod et in suis Capitularibus scriptum reliquerunt⁶, et in Conciliis episcoporum provincialibus sanciri permiserunt. Habeat ergo Deus in Ecclesiæ suæ principaliter quod suum est; habeat rex posterior in ordine post Deum, quod sibi a Deo concessum est». Porro obtinuit Ivo quod conatus est, ut Stephanus ille probrosus repelleretur, prout aliis ad eundem Paschalem papam litteris idem Ivo testatur⁷. Sed ut electio Gallonis probaretur, quod adhuc videretur illud ob stare de juramento⁸, quo se rex Ludovicus Philippi filius obstrinxerat, nunquam fore ipsum Gallonem quousque viveret episcopum: ut ob id non desisteret, scriptis iterum ad eum instare ipse non destitit. Quid tandem? prævaluit Paschalis, ut idem Gallo consecraretur episcopus Belluacensis. Verum quod regis inimicitia eum urgerent, factum est per Ivonem, ut idem ab Ecclesia Parisiensi in suum eligeretur episcopum⁹, Belluacensi autem Ecclesiæ Gaufridus quidam daretur episcopus, ad quem datæ Ivonis litteræ extant¹⁰: sique negotium istud per triennium agitatam esse reperitur usque in annum millesimum centesimum quartum, quo etiam regis absolutio in eisdem Ivonis epistolis legitur pertractata; de qua suo loco dicitur.

¹ Ivo Ep. XXXVI. — ² Ibid. Ep. XLV. — ³ Ibid. Ep. XLVII. vid. dist. XLIII. — ⁴ Capit. l. i. c. 76. — ⁵ Ibid. Ep. XLI. — ⁶ Ibid. Ep. L. — ⁷ Ibid. Ep. CLXIX. CLXX. CLXXI. — ⁸ Ivo. Ep. CLXXVI.

¹ Luc. XIV. — ² Ivo Ep. XLIV.

Hoc ipso anno idem Paschalis papa confirmavit primum Ecclesie Toletanæ, sic scribens ad Bernardum, ejusdem Ecclesie archiepiscopum :

« Paschalis Episcopus, servus servorum Dei, reverendissimo fratri Bernardo Toletano archiepiscopo, ejusque successoribus canonice substituendis in perpetuum.

« Actorum synodaliū decreta scrutantibus liquel, quantæ Toletana Ecclesia dignitas fuerit ex antiquo, quantamque per eam in Ecclesiasticis negotiis utilitatem acceperunt. Unde et nos ejusdem urbis statum, quantum nostræ est facultatis, in Ecclesiasticis dignitatibus gloria stabilire, Domino adjuvante, optamus. Igitur tum pro bonitate S. R. E. debita, tum pro digna Toletanæ Ecclesie debita reverentia, tum etiam lili nostri præstantissimi regis Hldefonsi postulationibus, cujus nimirum virtute et prudentia Toletana Ecclesia Maurorum et Moabitum jure erepta est; te, charissime frater, iusta Constitutum prædecessoris nostri sanctæ memoriæ Urbani papæ II, in totis Hispaniarum regnis te primatem fore, præsentis Privilegii auctoritate sancimus, sicut ejusdem urbis constat antiquitus exiisse pontifices, etc. Primalem te universi Hispaniarum præsules respicient, etc. Ego Paschalis, Catholice Ecclesie episcopus subscribo. Dat. Laterani per manum Joannis S. R. E. diaconi cardinalis, secundo nonas Martii, Indictione octava, Incarnationis dominicæ anno mci, Pontificatus autem domini Paschalis papæ Secundi anno secundo». Præstiterunt hoc ipsum ferme singuli successores, de quibus inferius suis locis dicendum.

13. *Secunda expeditio Hierosolymitana.* — Hoc anno innovatur alia expeditio in Terram Sanctam, et quidem ingenti numero ingentiora factura, si per Alexii imper. perfidiam fuisset, qui sub nomine amici, subque tegmine pacis, acerbius quam hostis, crudeliusque quam si aperto bello, eos est persecutus. Porro ista singula qui scire cupit, consulat Conradum Urspergensē abbatē, qui cum eadem expeditione profectus est Hierosolymam, atque cuncta quæ acceperunt fidei stylo perpetuæ memoriæ commendavit; prodigionem videlicet Alexii imperatoris erga Turcas magis quam Latinos propensi; strages Christianorum per Turcas in itinere furtim illatas; grassantem lucem, per quam ingens valde numerus Christianorum est consumptus; insuper etiam pugnas Balduini regis in Turcas de victoria securos ex responsis suorum, cum sanctæ Crucis virtute, quam Sedis Apostolicæ legatus ante se per abbatē Gerardum ferebat, ipsius tantum intuitu hostes perterriti, fugam inierint cæsq; pugne exordio extitissent; Joppen insuper obsessam, sed Crucis virtute pariter liberatam; insuper consuetum miraculum de incensione luminum divinitus fieri solita Hierosolymis

die magni Sabbati ante Pascha. Hæc quidem miranda, Dei misericordia populo suo exhibita, ipse qui aderat Urspergensis abbas, exacte describit. Sed et Wilhelmus Tyrius¹ ex eis aliqua attigit, qui et de Januensiū classis appulsu, quorum ope capta Antipatrida, et Casarea maritima, ubi iidem Januenses potiti sunt vase smaragdino aliisque munitionibus expugnatis, historiam texiit, quem majori otio pro arbitrio consulas; attigisse nobis salis pro instituto.

Sed plane longe his locupletiora, sicut et celebriora fuere sacra pignora, quæ Myra in Lycia civitate iidem Januenses pictate insignes in patriam detulere, nempe sacrosancti cineres sanctissimi præcursoris Joannis Baptiste, quorum suis locis superius mentio facta est. Quæ ipse venerandæ reliquæ insignioribus in dies illustratæ miraculis, cujus sint sublimi voce virtutis annuntiant. Quibus etiam factum est, ut cum eadem innotuissent sanctæ Romanæ Ecclesie Pontificibus, ab iisdem religiose sint cultæ, qui in ipsarum ampliore venerationem, Ecclesie, ubi sunt collocatæ, indulgentias plurimas contulere, atque insuper addidere, ut in gratiarum actionem tanti a Deo accepti muneris, ejusdem translationis dies anniversaria ageretur officio duplici. Vidimus de his scripta sacra Diplomata, ad nos perlata diligentia amici charissimi domini Angeli Grilli nobilis Januensis, abbatis Sancti Pauli hic in Urbe, cui bene precamur, quod ejus opera factum sit, ut quod missum fuerat in editione, restitueretur hic in Appendice, unde postea, cum contingerit eundem totum Annalium iterum cudi, in locum suum exacte notatum typographus adhibita diligentia inserat.

14. *S. Brunonis Carthusiensis obitus.* — Ad extremum autem illustratur præsens annus obitu S. Brunonis Carthusiensium patriarchæ, qui optimo fine bene institutam vitam felicissime consignavit; ad cujus sepulchrum sequens excisum est Epitaphium :

Primus in hac Christifundator ovilis eremo
Promerui fieri, qui tegor hoc lapide.
Bruno mihi nomen, gentrix Germania, meque
Transibit ad Calabros grata quies memoris.
Doctor eram, parco Christi, vir notus in orbe :
Desuper illud erat grata, non mentum.
Carnis vincula dies Octobris sexta resolvit;
Ossa manent tumulo, spiritus astra petit.

Quem ipsum plurimis illustratum miraculis venerandum suscepit Ecclesia. Porro ejus Ordinis institutionem habes dualis clarissimis tubis toto orbe Catholico personantibus commendatam, nempe sancti Bernardi abbatis Clarevallensis Epistolis ad Guidonem priorem Carthusiæ datis.

¹ Willel. Tyr. l. x. c. 44. 45. 16.

Anno periodi Græco-Romanæ 6594. — Anno Æræ Hispan. 1139. — Anno Hegiræ 495, inchoato die 26 Octob., Fer. 1.^a — Jesu Christi 1101.

— Paschalis II papa 3. — Henrici IV reg. 46. imp. 48. Alexii Comneni imp. 21.

1. *Opera S. Anselmi pax inter Henricum regem et Robertum fratrem conciliata.* — A num. 1 ad 6. Termino induciarum inter *Henricum* Angliæ regem et *S. Anselmum* Cantuariæ archiepiscopum anno superiori pactarum adveniente, nuntii, quos Romam Henricus rex miserat, et ante Pascha redituri credebantur, necdum reduces erant. Quare rex inducias prorogandas censuit. Interim *Robertus*, Normanniæ dux et Henrici regis frater, ex Oriente redierat, et se delusum a fratre, dicens de regno ei eripiendo cogitabat, et non paucos proceres ad suas partes attraxerat. « In subsequenti solemnitate Pentecostes », ait Eadmerus lib. 2 Vitæ S. Anselmi, « adventus comitis Roberti, fratris regis, in Angliam prævia fama, totam regalem curiam commovit, et quorundam animos, ut et postea patuit, in diversa permovit ». Robertus regnum sibi debitum contendebat, quod major natus esset, et Guillelmus frater sine prole obisset. Tota regni nobilitas *Anselmum* Robertum inter et regem medium fecere, et sancti præsulis opera fratres in concordiam rediere, exercitusque dimissi. Paschalis papa, qui nolebat injuriam fieri Roberto ex Palestine reduci, *Anselmum* per litteras monuit, ut se pacis sequestrum interponeret; interimque nuntii, quos Henricus rex ad Paschalem II miserat, ex Urbe redeunt, referuntque Romanum Pontificem pro Anselmo et Ecclesiarum prærogativa dixisse et scripisse.

2. *Dissidium inter reg. Angliæ et S. Anselmum de investituris.* — Paschalis litteræ ad Henricum regem datæ recitantur ab Eadmero in lib. 3 Novorum cap. 2, iisque investiture regie improbantur. Quibus relatis subdit Eadmerus: « Cum ad curiam venissemus, rex usus consilio fratris sui et amicorum illius, qui acerbo contra Anselmum pro regni amissione odio erant inflammati, exegit ab eo, ut aut homo suus fieret, et eos quibus episcopatus vel abbatias se daturum dicebat, pro more antecessorum suorum consecraret; aut terram suam sine retractatione et festinanter exiret ». Verum Anselmus negavit se alterutrum facturum, et Cantuariam abiit: « Reversus est Anselmus ad sua, Deo in cunctis placere studens, et oppressionibus Ecclesiarum Angliæ gravi contritione cordis ingemiscens ». Postea agentibus Angliæ episcopis, Ansel-

mus duos monachos Romam destinavit, rex vero tres episcopos, quibus papa incunctanter crederet. Paschalis II litteris suis sancti Anselmi constantiam laudavit, aliisque litteris regem monuit, ut investituras sibi non arrogaret. Sed cum rex in sententia perstaret, incitantibus eum episcopis regnique proceribus, quatenus « sibi Anselmus hominum faceret, et eos quibus se daturum protinus episcopatus dicebat, consecraturum sponderet, servata in omnibus antecessorum suorum consuetudine », Anselmus Romanum Pontificem sese consulturum respondit, iterumque nuntios Romam destinavit. Citatas Paschalis papæ litteras, tam ad regem quam ad Anselmum datas, refert Eadmerus, cujus libros sex Novorum Angliæ cum Baronius perditos existimaret, hanc controversiam ex Malmesburiensi narrat, sed fusius Alfordus, qui libros Novorum ab Eadmero elucubratos viderat, in Annal. Angliæ hoc anno num. 6 et seqq.

3. *Obitus Conradii Italie regis.* — Ad num. 6. Conradum Italie regem filium Henrici imp. hoc anno e vivis abiisse, superiori insinuavimus, idque nobis nunc ex auctoribus cœvis probandum. Abbas Urspergensis in persona auctoris cœvi hæc scribit: « Anno Domini mci, Chunradus rex adolescens ix anno postquam a patris palatio discesserat (anno enim mxciii adversus patrem rebellavit, ut ibidem vidimus) Mathildis magnæ illius et nobilissimæ, et ut quidam dicunt, religiosæ feminae, sicut sanguine ita et contubernio conjunctus, et in rebus per Italiam disponendis tam illius quam domini Apostolici, cæterarumque Deum timentium personarum consilio semper usus, immaturo præventus occasu, plena fide et bona confessione a regno transitorio ad æternum creditur regnum migrasse. Sunt etiam qui veneno eum dicant interfuisse (uti Landolphus Junior, hujus temporis scriptor, cujus verba anno superiori retulimus). Testari solent qui aderant, in brachio corporis examinî, crucis signaculum subito exortum se vidisse, ipsasque ejus exequias quibusdam miraculis honorificatas fuisse (quæ verba Baronius in ista mutavit, fumus ejus versibus exornatum). Visus est et a nostro quodam familiari ab Oriente in Occidentem volans ignis, ad instar non modicæ civitatis ». Vides Urspergensem loqui in persona testis oculati,

quod ei non raro accidit. Ad hæc Sigebertus in Chronic. qui adhuc in vivis erat, eam mortem cum præsentis anno etiam copulat.

4. *Contigit mense Julio.* — Imo Dominizo scriptor etiam hujus temporis, in Vita Mathildis comitis lib. 2, cap. 12, de Conradi morte verba faciens, annum et mensem ejus obitus notavit :

Scrivere res gestas cum non sit res inhonesta,
Carmen adesto meum, sic ne promas nisi verum.
Infra Conradus, Longobardos comitatus dum staret,
Discorsa Mathilde fuit ipso
Tempore, duravit modicum discordia talis;
Nam petuit partes Tuscanas rex : ibi tandem
Nobilibus quidam facientibus expulsi iram.
Ad pacem firmam rediit bene cum comitissa.
Post istam pacem febre tactus, JULIUS ACTEM
MENSIS erat, magnus moritur Conradus : et annus
Tertius, Urbanus, quod transierat memoratus.
Ejus habet corpus Florentia flonda prorsus.

Obiit *Urbanus* papa anno *mcix*, die *xxix* mensis *Julii*, tertioque post anno *Juliano*, currenti nempe, *Conradus* eodem mense *Julio* vita functus est, postquam pacem inisset cum *Mathilda* comitissa, a qua biennio et paulo amplius aversus fuit. Mitto hic testimonium *Ottonis Frisingensis*, qui lib. 7 cap. 7, idem in litteras misit. Sed *Puricellus*, cum *Landulphum Junio*rem cum aliis scriptoribus in concordiam abducere non posset, nodum quem solvere non potuit, discidit, scriptisque *Conradum regem* juxta *Landulphum* an. *mcviii* extinctum esse, aliosque auctores, qui eam mortem usque ad hunc annum differunt ex *Landulpho* corrigendos esse; cum tamen idem ac illi hac in re sentiat. *Puricelli* dubiis jam satisfacimus.

5. *Ivonis Epistolæ de Philippo Franciæ rege.* — A num. 7 ad 13. Quæ habet hic *Baronius* de *Philippo* Francorum rege, et de *Gaulone* electo *Belvacensi* episcopo, commodius anno *mciv* examinabimus. Quare ad eum annum lectorem remittimus.

6. *Expeditiones Christianorum in Terram Sanctam.* — Ad num. 13. Gesta hoc anno in Oriente narrat *Urspergensis* in persona auctoris cœvi, qui dicit se vidisse quæ refert (1). « Mox profectio populoſa, et quæ pæne priorî posset numero duntaxat æquari, subsequitur : quæ post auditas ultra spem res *Hierosolymæ* prospere gestas, a residuis totius Occidentis gentibus, maxime ab his quarum prius votis timor vel diffidentia, inopia vel imbecillitas obstitierant, denique parabatur primum ab episcopis *Mediolanensi* (*Anselmo* sc. IV, de quo mox agemus) *Papiensi*, cæterisque *Longobardorum* populis ad quinquaginta millia signatis, deinde a diversarum provinciarum *Teutonicis*, postremo ab *Aquitanicis*, quibus *Willelmus Pictaviensis* (hujus nominis VIII, ut supra ostendimus) præerat, præter vulgus ad xxx millia loricatis. *Longobardorum* plebs per-

missu *Henrici* ducis *Carinthiæ* permeata, dum post *Ungaros* tergo relictos in *Bulgarie* civitatibus hycmarent, numero rareſcere cœperunt, tandemque *Constantinopolim* pervenientes, in alteram ripam (illud enim beneficium maledictus *Alexius* peregrinis accelerare solet) transposite sunt, imo paganorum sagittis expositæ. Turci enim explorata *Longobardorum* inertia, stipularum eos tenebant more in tantum, ut exercitus *Teutonicus*, qui eadem via subsecutus, circa *xxix kal.* ad eandem metropolim pervenit », et cætera, quæ apud eum legi possunt.

7. *Anselmus archiep. Mediolanensis Constantinopoli moritur.* — Ex his tempus habemus, quo *Anselmus IV* *Mediolanensis* archiepiscopus, postquam anno superiori ingentem militum numerum in *Longobardia* collegisset, et ibidem cruciatam prædicasset, peregrinationem *Hierosolymitanam* suscepit. Cum enim circa kalendas *Junii* exercitus *Longobardicus* *Constantinopoli* fuerit, apparet inenunte vere *Anselmum* cum exercitu sese viâ dedisse. Hæc expeditio parum felix fuit. *Landulphus* quippe *Junior* cap. 2, hæc de ea habet : « *Archiepiscopus* ille de *Buis*, a *Turcis* et *Saracenis* fugatus in gravi luctu *Constantinopoli* expiravit ». In antiquo vero *Catalogo* episcoporum *Mediolanensium* de *Anselmo* legitur : « Sedit annos iii et menses x et dies xxviii; obiit ii kalendas Octobris, sepultus est *Constantinopoli* ut peregrinus ». Quare ad archiepiscopatum erectus fuerat, die tertia mensis *Novembris* anni *mcvii*, quæ in feriam tertiam incidebat, obiitque die xxx *Septembris* præsentis Christi anni. *Chalcus* in *Historia Mediolanensi* ait : « Cæterum archiepiscopum *Mediolanensem* conſcendiſſe *Genuæ* classem, *Ligustici* annates habent ». Nihil tamen hac de re *Annales Justiniani* et *Foglietta*, licet de bellicis apparatibus anno superiori ac ſequentibus factis verba faciant. Cæterum *Puricellus*, *Chalcus*, aliqui *Genuensium* expeditionem eum *Anselmi* et *Longobardorum* expeditione male confundunt; *Genuensium* enim felicem sortita est exitum, *Longobardica* vero parum fausta fuit, ut videre est apud *Albertum Aquensem* lib. 8, ubi fuse de *Anselmo Mediolanensi* archiep. et de ejus morte agit.

8. *Obitus S. Brunonis.* — Ad num. 14. In opusculo de *Institutionibus Ordinis Carthusiensis*, a *Labbeo* tom. i Biblioth. pag. 638 recitatis, dicitur sanctum *Brunonem* illius fundatorem in *Cathabria* mortuum esse, post egressum *Carthusiam undecimo plus minus anno*. Quare cum anno *mcx* Roman, quo ab *Urbano II* vocabatur, relicta *Carthusia* venerit, mors ejus a *Baronio* recte hoc anno consignata, liquetque eum perperam scripsisse *Brunonem* anno *mcxi* peregrinationem illam instituisse.

(1) Cœvus iste scriptor, unde omnia hæc, imo et totam historiam suam usque ad annum *mcviii* circiter de verbo ad verbum haurit *Urspergensis*, et *Ekkhardus abbas*, qui et *Chronicon rerum in orbe cæstrum*, et *libellum* de expeditione *Hierosolymitana* scripsit anno illu vel circiter. *Vulgatus* est libellus iste a *Martene* tom. v in *Collect. Vet. Monum.* Vide *Præfationem Martenii* ad eundem libellum ibidem. *MANST.*

9. *Officium Rom. in regnis Castellæ et Legionis recipitur.* — Sandovalius in Vita Alphonsi VI Castellæ regis, pag. 91 et seq. refert ex antiquis Hispaniarum Documentis, hunc principem *Ara* MCXXXI quæ in præsentem Christi annum competit, habuisse Comitiam in urbe Legionensi, iisque interfuisse duos summi Pontificis legatos nuper Roma in Hispaniam missos, Bernardum scilicet cardinalem et archiepiscopum Toletanum, ac Randalum: venisse et abbates ordinis sancti Benedicti, aliosque prælatos, « eo quod rex voluit, ut confirmaretur Officium Romanum, et per omnia relinqueretur Gothicum; pariter egit ut relinqueretur character Gothorum vel Longobardus, quem episcopus Ulphila ipsis dederat.

10. *Obitus Rogerii Calabriae et Siciliae ducis.* — *Rogerus* comes Calabriae et Siciliae, mense Julio præsentis anni, qui usque ad senectutem sanctissime vixit, mortuus est; cui *Simon* ejus filius suc-

cessit, et huic anno sequenti vita functo *Rogerus* germanus Rogerii frater, ut scribit Fasellus lib. 7, in posteriori Decade. Is postea Siciliae rex coronatus, ut infra videbimus.

11. *Obitus calife Egypti.* — Elmacinus lib. 3 Hist. Sarac. cap. 9, tradit, *Mustalim Billam* califam Egypti vita functum esse anno Hegiræ cxcv, et durasse imperium ejus septem annos et duos menses, lunares scilicet. Ei successit *Alis Abulmansor* filius, quinque tantum annos natus. Idem habet Abulpharajus in Hist. dynastiarum. Sunt hi calife Egypti e familia Fatemitarum. Mustalis Billæ tempore « Franci Joppem expugnaverunt et Arsufam receperunt pactionibus, subjugaruntque majorem partem regionis maritimæ », inquit auctor anonymus Chron. Orientalis, et confirmant Fulcherius Carnotensis, alique Belli Sacri scriptores.

PASCHALIS II ANNUS 2. — CHRISTI 1102.

1. *Concilium generale Romæ, ubi de juramento ab episcopis dando Apostolicæ Sedis.* — Millesimus centesimus secundus annus sequitur, Indictione decima inchoatus, quo Romæ tempore Quadragesimæ generale Concilium congregatur, ad conciliandum Henricum imperatorem ipsi Pontifici, prævia satisfactione quam promiserat; sed cum defecisset, ut alias ab eo sæpe factum, sententiam ibi rursus damnationis accepit. Audi ergo quæ de eodem Concilio ejus temporis scriptor, Urspergensis abbas, narrat his verbis: « Anno Domini millesimo centesimo secundo, imperator Henricus habito cum principibus colloquio, Romam se profecturum, ac generale Concilium circa kalendas Februarii inibi convocaturum condixit, quatenus tam sua quam domini Apostolici causa canonice ventilata, Catholica inter regnum et sacerdotium confirmaretur unitas, quæ tot annis scissa permansit. Constat tamen, nec ipsum juxta placitum venisse, nec nuntia dignitati Apostolicæ subjectionem profitentia misisse. Nec hoc latet, quod alterum papam ipsi domino Paschali superponere, si fieri posset, conatus sit nec profecerit. Transacta post hæc media Quadragesima,

convenientibus universis Apuliæ, Campaniæ, Siciliae, Tuscaniæ, totiusque simul Italiæ præsulis, Ultramontanorum autem quamplurimorum Patrum legatis, Synodus magna Romæ est habita, ubi præter antiqua Patrum instituta more solito reverenter confirmata, etiam sæpe dictum nostri temporis schisma inter præcipuas hæreses computatur, ac perpetuo cum suis auctoribus atque sequacibus anathemate hujusmodi subscripta professione condemnatur:

2. « Anathematizo omnem hæresim, et præcipue eam quæ statum præsentis Ecclesiæ perturbat, quæ docet et adstruit anathema contemnendum, et Ecclesiæ ligamenta spernenda esse. Promitto autem obedientiam Apostolicæ Sedis Pontifici domino Paschali ejusque successoribus, sub testimonio Christi et Ecclesiæ, affirmans quod affirmat, damns quod damnat sancta et universalis Ecclesia.

« Ibi etiam, quam sententiam in imperatorem vel patricium Romanum Henricum idem Apostolicus Paschalis promulgaverit, nos quoque inter innumeras diversarum gentium catervas, proxima Cæna Domini in Ecclesia Lateranensi ab ejus ore

didicimus; nimirum postquam octavo kal. Octobris maris fluctibus Joppe traditi, Romæ sumus per gratiam Christi prædicta majori hebdomada introducti ». Quæ sic se habet :

3. « Quia, inquit, tunicam Christi scindere, id est, Ecclesiam rapinis et incendiis devastare, luxuriis, perjuriis, atque homicidiis commaculare non cessavit, primo a beate memoria Gregorio papa, deinde a sanctissimo viro Urbano prædecessore meo propter suam inobedientiam excommunicatus est et condemnatus : nos quoque, in proxima Synodo nostra judicio totius Ecclesie perpetuo cum anathemati tradidimus. Id notum volumus et maxime Ultramontanis esse, quatenus ab ipsis se contineant iniquitate ». Hactenus quæ ex hac Synodo retulit Urspergens.

4. In hoc etiam Concilio, archiepiscopus Capuanus a Cassinatibus monachis accusatus sacrilegii sententiam subiit, ac satisfecit. Rem gestam sic narrat Petrus Diaconus ¹ : « Sequenti tempore idem abbas Capuam pergens, capellam S. Angeli ad Formas, quæ in honorem S. Nicolai noviter constructa erat, fecit a Brunone Signiensi episcopo et hujus monasterii monacho dedicari, convocato etiam Senne Capuano archiepiscopo. Facta itaque dedicatione, die alia idem archiepiscopus congregata Capuanorum multitudine, armata manu misit illos ad eandem Ecclesiam violandam altareque demolendum, et reliquias inde auferendas sibi-que asportandas. Hoc facto conquebatur contra nostrum abbatem et dictum episcopum, quod contra canones egissent in eadem dedicatione, metropolitanus non cedentes in his quæ deceret archiepiscopum agere. Nostri una cum episcopo dicebant, se concorditer egisse omnia quæ ibi gesta essent. Hac de re insimulatus a nostris in Synodo Romana idem archiepiscopus, irruptionem Ecclesie, destructionem altaris, reliquiarumque violationem objicientibus una cum clero civitatis et populo, emendaturum se errata, respondit : quod etiam fecit ». Hæc Petrus. Sed redeamus ad sanctam in Concilio professionem.

5. Quam autem audisti superius recitatam fidei professionem, exhibere cum tenebantur etiam cum juramento episcopi, archiepiscopi, et omnes a quibus Romanus Pontifex exigere vellet. Accidit autem ea occasione, ut cum accepturus pallium Panormitanus archiepiscopus, ad idem juramentum præstandum exigeretur ab Apostolicæ Sedis apocrisiariis, et id facere detrectaret, eum Paschalis papa corripuerit, ut apparet ex Decretali Epistola ipsius ad eundem archiepiscopum data; quæ sic se habet ² :

6. « Significasti reges et regni majores admiratione permotos, quod pallium tibi ab apocrisiariis nostris tali conditione oblatum fuerit, si sacramentum, quod a nobis scriptum detulerant, exhiberes ». Et inferius de causa hujus faciendi decreti : « Nonne

malum est ab Ecclesiæ unitate et Sedis Apostolicæ obedientia resilire, et contra canonum statuta prorumpere? quod multi etiam post sacramentum præstitum præsumpserunt ». Et infra : « Hoc nimirum malo ac necessitate, compellimur juramentum pro fide, pro obedientia, pro unitate requirere. Aiant in Conciliis statutum non inveniri, quasi Romanæ Ecclesiæ Concilia ulla legem præfixerint, cum omnia Concilia per Romanæ Ecclesiæ auctoritatem et facta sint, et auctoritatem et robur acceperint, et in eorum statutis Romani Pontificis patenter excipiatur auctoritas ». Et infra : « Cum igitur a Sede Apostolica vestræ insignia dignitatis exigitis, quæ a B. Petri tantum corpore assumuntur : justum est, ut vos quoque Sedi Apostolicæ subjectionis debitæ signa solvatis, quæ vos cum B. Petro, tanquam membra de membro habere (hære), et Catholici capitis unitatem servare declarent ». Hæc Paschalis ad archiepiscopum Panormitanum.

7. Eodem quoque argumento, eadem præcedente occasione, idem Paschalis papa tunc scripsisse ad archiepiscopum Poloniæ reperitur his verbis in Codice Vaticano, qui inscribitur liber Censuum, ex collectione Cencii Cameralis :

8. « Paschalis episcopus, servus servorum Dei, N. Polonorum archiepiscopo.

« Significasti, frater charissime, regem et regni majores admiratione permotos, quod pallium tibi ab apocrisiariis nostris tali conditione oblatum fuerit, si sacramentum, quod a nobis scriptum detulerant, jurares. In pallio, frater, plenitudo conceditur pontificalis officii, quia juxta Sedis Apostolicæ et totius Ecclesiæ consuetudinem, ante acceptum pallium, metropolitani minime licet aut episcopos consecrare, aut Synodum celebrare. Mirentur in hac causa et Dominum JESUM CHRISTUM. Cum enim Dominus JESUS CHRISTUS ³, ut omnium ovium suarum curam Simonî Petro committeret, conditionem posuit dicens : Diligis me Simon Petre? pascere oves meas; si conscientiarum factor et conditor conditione hac usus est, nec semel tantum, sed et secundo, et usque ad contristationem : qua nos sollicitudine, qua provisione oportet tantam Ecclesiæ prælationem, tantam Christi ovium curam fratribus imponere, quorum conscientias non videmus, illis maxime quos nullo usu novimus, quorum dilectionem penitus ignoramus? Aiant omne iusjurandum a Christo Deo in Evangelio esse prohibitum, nec ab ipsis Apostolis post Dominum, nec in Conciliis inveniri posse statutum. Quid est ergo quod idem Dominus subsecutus ait : Quod amplius est, a malo est? hoc enim amplius ut exigamus, malum nos, illo permittente, compellit. Nonne malum est, ab Ecclesiæ unitate, a Sedis Apostolicæ obedientia resilire? Nonne malum est contra sacerdotum canonum statuta prorumpere? Quam multi hoc etiam post sacramentum præsumpserunt? Nonne prædecessor tuus præter Romani

¹ Pet. Diacon. Chr. Cass. l. IV. c. 30. — ² Extr. de elect. c. 4.

³ Joan. XXI. — ² De his XXII. q. I. II. per tot.

Pontificis conscientiam damnavit episcopum? Quibus hoc canonibus, quibus Conciliis legitur esse permissum? Quid super episcoporum translationibus loquar, quæ apud vos non auctoritate Apostolica, sed nudo regis præsumuntur? Propter hæc mala et alia evitanda, huiusmodi iuramentum exigitur.

9. « Cur autem iuramentum Dominus prohibuerit. Apostolus Iacobus manifeste adjiciens docet: Ut non sub iudicium incidatis, ne quisquam (sicut et Augustinus exponit) assidue iurandi ad perjurium per consuetudinem dilabatur. Quapropter iuratione quis non utatur nisi necessitate, cum videt pigros esse homines ad credendum, quod utile est eis credere, nisi iuratione firmetur. Hoc nimirum malo ac necessitate compellimur iuramentum pro fide, pro obedientia, pro unitate requirere. Porro Apostolum Paulum auditorum diffidentia iurasse, ejus Epistole testantur

10. « Aiunt in Conciliis statutum non inveniri, quasi Romanæ Ecclesiæ legem Concilia ulla præfixerint: cum omnia Concilia per Ecclesiæ Romanæ auctoritatem et facta sint et robur acceperint, et in eorum statutis Romana patenter auctoritas excipitur. Nonne in Chalcedonensis Concilii Actione xvi statutum est: Ante omnia quidem, primatus honorem præcipuum secundum canones antiquæ Romæ reverendissimo archiepiscopo conservari? Itaque, quod consuerunt rex et magnates a supradicti sacramenti conditione te quiescere: videturne vobis iudicium Evangelicum? videturne primatus nostri honor præcipuus? Numquid animo cecidit illa sententia Domini¹: Non est discipulus super magistrum? Numquid Hungarico principi dictum est²: Et tu conversus confirma fratres tuos? Numquid hæc nos commodi nostri profectioe requirimus, et non unitatis Catholicæ statuimus firmamentum? Possunt Apostolicam Sedem contemnere, possunt adversum nos calcaneum elevare: datum a Deo privilegium evertere vel auferre non possunt, quo Petro dictum est³: Tu es Petrus, et super hanc petram ædificabo Ecclesiam meam, et: Tibi dabo claves regni cælorum. Quibus tamen quatuor Conciliorum decretis dandi pallii modus præscriptus est, et professionis vel obedientiæ ordo sanctus est.

11. « Cum igitur a Sede Apostolica vestræ insignia dignitatis exigitis, quæ a beati tantum Petri corpore assumuntur, iustum est ut vos quoque Sedi Apostolicæ subjectionis debite signa solvatis, quæ vos cum beato Petro tanquam membra de membro hære, et Catholici capitis unitatem servare declarant. In quibus a prædecessoribus nostris ea est adhibita moderatio, ut nihil injuriosum, nihil difficile sit appositum, quod non etiam præter exactionem nostram ab omnibus debeat episcopis observari, qui sub Apostolorum principum Petri et Pauli obedientia decreverunt et unitate persistere.

Numquid non ultra vos Saxones Danique consistunt? Et tamen eorum metropolitani et idem iuramentum asserunt, et legatos Apostolicæ Sedis honorifice tractant, et in suis necessitatibus adjuvant, et Apostolorum Limina per legatos suos non tantum per triennium, sed annis singulis visitant. Ita te, frater charissime, fruamur in Domino, ut non per te in Ecclesiis subtractionis et dissidii (quod absit) oriatur occasio». Huusque in Codice Vaticano, consentientia iis quæ scripta vidimus ad archiepiscopum Panormitanum. Subjungit Willelmus Malmesburiensis:

12. *Concilium Londoniense sub S. Anselmo et ejus canonibus.* — « Eodem anno, agente S. Anselmo Cantuariensi archiepiscopo, generale Londoniense Concilium celebratum est in Ecclesia S. Petri, circa festum diem S. Michaelis archangeli, in quo potissimum quæ Romæ decreta in Concilio generali acceperat de investituris Ecclesiarum, plano sermone descripsit, videlicet:

« Quod nullus Ecclesiæ prelati, episcopus, vel abbas, vel clericus investituræ alicujus Ecclesiasticæ dignitatis de manu suscipiat laicorum. Unde idem archiepiscopus, asserens hoc animabus expedire, degradavit abbates et priores quosdam, qui de manu laicorum et data pecunia prelatias acceperant, sicut Riccardum etc. » Numerat plures ab eodem S. Anselmo redactos ad ordinem Matthæus Westmonasteriensis, scribens de rebus Britannicis, hoc anno.

Idem Willelmus Malmesburiensis recenset titulos canonum in hoc Concilio editorum, ita primum consignata exacte temporis ratione: « Anno Dominicæ Incarnationis millesimo centesimo secundo, quarto autem præsulatus Paschalis summi Pontificis, (inchoato scilicet), tertio regni regis gloriosi Henrici Anglorum, ipso annuente etc. » Post recensitos diversos diversis ex causis depositos, hæc habet de editis in Synodo sacrorum canonum titulis:

13. « Statutum quoque est, ne episcopi secularium placitorum officium suscipiant, et ut non sicut laici, sed sicut personas religiosas decet, ordinatas vestes habeant, et ut semper et ubique honestas personas habeant testes conversationis suæ.

« Ut archidiaconus non detur ad firmam.

« Ut archidiaconi sint diaconi.

« Ut nullus archidiaconus, presbyter, diaconus, canonicus uxorem ducat, aut ductam retineat. Subdiaconus vero quilibet, qui canonicus non est, si post professionem castitatis uxorem duxerit, eadem regula constringatur.

« Ut presbyter, quandiu illicitam conversationem mulieris habuerit, non sit legalis nec missam celebret, nec si celebraverit, ejus missa audiatur.

« Ut nullus ad subdiaconatum aut supra ordinetur sine professione castitatis.

« Ut filii presbyterorum non sint hæredes Ecclesiarum patrum suorum.

¹ Matth. x. — ² Ibid. xvi. — ³ Ibid.

« Ne quilibet clericus sint sæcularium præpositi, vel procuratores, aut iudices sanguinis.

« Ut presbyteri non eant ad potationes, nec ad pinnas bibant.

« Ut vestes clericorum sint unius coloris, et calceamenta ordinata.

« Ut monachi vel clerici, qui ordinem suum abjecerunt, aut redeant, aut excommunicentur.

« Ut clerici patentes coronas habeant.

« Ut decimæ non nisi Ecclesiis dentur.

« Ne Ecclesiæ aut præbendæ emanent.

« Ne novæ capellæ fiant sine consensu episcopi.

« Ne Ecclesia sacretur, donec provideantur necessaria et presbytero et Ecclesiæ.

« Ne abbates faciant milites, et ut in eadem domo cum monachis suis dormiant et comedant, nisi aliqua necessitate prohibente.

« Ne monachi penitentiam civis injungant sine consensu abbatis sui. Et quod abbates sui de hoc eis licentiam dare non possunt, nisi de eis quorum animarum curam gerunt.

« Ne monachi compadres, nec monachæ comatres fiant.

« Ne monachi feneant villas ad firmam.

« Ne monachi Ecclesias nisi per episcopos accipiant, neque sibi datas ita expolient suis redditibus, ne presbyteri ibi servientes, in his que sibi et Ecclesiis necessaria sunt, penuriam patiantur.

« Ut fides inter virum et mulierem occulte et sine testibus data de conjugio, si ab alterutro negata fuerit, irrita habeatur.

« Ut crimini sic tondeantur, ut pars aurium appareat et oculi non tegantur.

« Ne cognati usque ad septimam generationem copulentur, vel copulati simul permaneant : et si quis hujus incestus consens fuerit et non ostenderit, ejusdem criminis participem se esse cognoscat.

« Ne corpora defunctorum extra parochiam suam sepelienda portentur, ne presbyter parochiæ perdat quod illi inde juste debetur.

« Ne quis temeraria novitate corporibus mortuorum, aut fontibus, aut aliis rebus (quod contigisse cognovimus) sine episcopali auctoritate reverentiam sanctitatis exhibeat.

« Ne quis illud notarium negotium, quo hæcenus solebant in Anglia homines sicut bruta animalia vendi, deinceps præsumat.

« Sodomiticum flagitium facientes, et eos in hoc voluntarie viventes (juvantes), in eodem Concilio gravi anathemate damnati sunt, donec confessione et penitentia absolutionem mereantur. Qui vero in hoc crimine publicatus fuerit, statutum est, si quidem fuerit persona religiosa, ut ad nullum amplius gradum promoveatur, et si quem habet, ab eo deponatur : si autem laicus, ut in toto regno Angliæ suæ conditionis dignitate privetur : et ne hujus criminis absolutionem his qui sub regula non voverunt, aliquis nisi episcopus deinceps facere præsumat. Statutum quoque est, ut per to-

tam Angliam in omnibus Ecclesiis et in omnibus Dominicis diebus excommunicatio præfata renovetur ». Hactenus de generali Concilio anni hujus ex Willelmo in Gestis Anglorum episcop. Porro hujus quoque occasione Concilii S. Anselmo multiplicatæ sunt afflictiones, rege non ferente, ut exors esset investiturarum Ecclesiarum. Quamobrem opus fuit eidem sanctissimo viro Romam iterum ad Paschalem Pontificem redire : quod factum est anno sequenti, ut suo loco dicturi sumus.

14. *Otto cancellarius imperatoris electus Bambergensis episcopus. Paschali papæ subjecit.* — Illo anno, defuncto Ruperto episcopo Babenbergensi, ab Henrico imp. substitutus est Otto cancellarius ejus. Ita Urspergensis hoc anno. Porro cognita est in eodem Ottone electo mutatio dextere Excelsi. Siquidem execratus mox schisma, verum in Ecclesia Catholica caput agnovit, Paschalem Romanum Pontificem : apud quem Romam veniens, insignia regie investiture, quam acceperat ab imperatore, facti penitens deposuit, projiciens ea ad pedes ejus. Res ab eo præclare gestas ab auctore ejusdem temporis fidelissime sicut et copiosissime tribus libris conscriptas, e latebris antiquitatis nuper edidit opportune nobis laborans, vir egregius Canisius Noviomagensis secundo tomo antiquæ lectionis. Ille ergo coactus accipere Babenbergensem Ecclesiam, qui jam duos alios recusaverat episcopatus, primo Augustanæ Ecclesiæ, inde Halberstadensis : « Ille, inquit, vovit nunquam se in episcopatu mansurum, nisi et consecrationem pariter et investituram canonice consensu et petitione Ecclesiæ suæ a manu domini Apostolici suscipere mereretur ». Ille inferius : « Memor ergo voti sui, post paucos dies susceptionis suæ, antequam de aliis rebus suis ordinaret, nuntios Romanam mittit, et litteras in hunc modum :

15. « Domino et patri suo Paschali, sancte et Apostolicæ Sedis universali episcopo, Otto Babenbergensis Ecclesiæ, id quod est, tam devote quam debite subjectionis orationes et servitium.

« Quia totius Ecclesiasticæ dignitatis ac religionis firmamentum in Christo petra est, et in Petro ¹ ejus discipulo, et ejus successoribus : idcirco ab hac linea, ab hac virga directionis ², virga regnorum, pontificatum et omnium potestatum in Ecclesia, insanum duxi aberrare. Vobis igitur, pater sanctissime, et sanctæ matri nostræ Romanæ Ecclesiæ collum devote submittere, auxilium et consilium de rebus meis flagito. In obsequio enim domini mei imperatoris per aliquot annos degens, et gratiam in ejus oculis inveniens, suspectum habens in manu regis investituram, semel et iterum cum dare vellet, renui episcopatum : nunc vero jam tertio in Babenbergensi episcopatu me ordinavit. In quo tamen minime permancho, nisi vestræ complaceat sanctitati per vos me investire et

¹ Vlt. Oti. 1. i. c. 3. — ² Eod. 1. i. c. 4 et 5. — ³ Matth. xvi. — ⁴ Psal. XLIV.

consecrare. Quidquid ergo placeat discretioni vestræ de me, per nuntios mihi significare servo vestro, ne forte in vanum curram, si ad vos currere incipiam. Omnipotens mihi propitiam incolumitalem vestram custodiat ». Hactenus Ottonis litteræ. Pergit auctor : « Dominus autem Apostolicus visis litteris gavisus, eo quod pauci episcopi Tentonici regni in ea malignitate temporum, matri suæ, ut justum esset, deferrent, ei tales litteras destinavit ¹ :

16. « Paschalis servus servorum Dei, Ottoni dilecto fratri Bambergensis Ecclesiæ electo, salutem et Apostolicam benedictionem.

« Filius sapiens kelficat matrem suam ²; opera tua et consilium tuum, virum præ se ferunt sensatum. Nos igitur honorare, et profectus tuos iuvare congruum duximus. Nihil ergo de nostra benevolentia dubitans, tuam nobis quantocius valeas presentiam exhibeto. Certi enim sumus, quod divina sapientia etiam malis hominibus bene uti novit ». Illicusque Paschalis litteræ. Porro adventus ejus Romanæ, et cum eodem Paschali congressus, contigit anno sequenti, quo nos, Annalium servata mensura, de ipso acturi sumus.

17. *Robertus comes Flandriæ adversus schismaticos excitatur.* — Hoc eodem quoque anno, cum Robertus Flandriæ comes, jam ante biennium reversus ab expeditione Hierosolymitana, arma convertisset adversus schismaticos inherentes Henrico imperatori contra Romanam Ecclesiam, et Cameracenses (ut Sigebertus affirmat) exagitasset : ut adversus Leodienses eadem insania laborantes vires converteret, his litteris exhortatus est eundem Paschalis papa :

18. « Paschalis episcopus, servus servorum Dei, dilecto filio Roberto Flandrensium comiti, salutem et Apostolicam benedictionem.

« Benedictus Dominus Deus Israel, qui in te virtutis efficaciam operatur, qui reversus Hierusalem Syriæ, in cælestem Hierusalem justæ militie operibus ire contendis. Hoc est legitimi militis, ut sui regis hostes instantius persequatur. Gratias ergo prudentiæ tuæ agimus, quod præceptum nostrum in Cameracensi parochia executus es : idipsum de Leodiensibus excommunicatis pseudoclericis præcipimus. Justum enim est, ut qui semetipsos a Catholica Ecclesia segregarunt, per Catholicos ab Ecclesiæ beneficiis segregentur. Nec in hac tantum parte, sed ubique cum poteris, Henricum hæreticorum caput, et ejus fautores, pro viribus persequaris. Nullum profecto gravius Deo sacrificium offerre poteris, quam si cum impugnes qui se contra Deum erexit, qui Ecclesiæ Dei regnum auferre conatur, qui in loco sancto Simonis idolum statuit, qui a principibus Dei sanctis Apostolis eorumque vicariis, de Ecclesiæ domo sancti Spiritus judicio expulsus est. Hoc tibi ac militibus tuis in peccatorum remissionem, et Apostolicæ

Sedis familiaritatem præcipimus, ut his laboribus ac triumphis ad cælestem Hierusalem, Domino præstante, pervenias. Datum Albani, duodecimo kalend. Februarii ». Hæc ad Robertum comitem Paschalis papa.

19. Porro Leodienses schismatici, ubi has a Paschali Pontifice litteras esse scriptas intellexere, more suorum in schismate comparum antiquorum Donatistarum, adversus principes resiliuntium, contra has Paschalis litteras, quibus in eos censura justitiæ animadverti juss erat, scripsere declamationem accerrimam, cujus hæc est inscriptio : « Omnibus bonæ voluntatis hominibus Leodiensis Ecclesiæ, veritatem fidei et Catholicam unanimitatem inconcusse tenens » ; ita quidem more (ut dixi) antiquorum schismaticorum, qui licet divulsi ab Ecclesiæ Catholice corpore, affectarent tamen Catholicum nomen. Declamatio autem sic incipit : « Stupendo et gemendo exclamo cum Isaia ³, qui onus deserti maris exaggerans exclamat : Sicut turbines etc. » Prolixia nimis est, quæ cusa labetur tomo secundo Conciliorum editionis Coloniensis, anno Domini mxcxi, et si libet, tu, lector, legere poteris, legensque semper memineris ita loquentes esse schismaticos.

20. *Donatio Mathildis renovata.* — Hoc anno comitissa Mathildis, cum donationem ab ea Romanæ Ecclesiæ factam sub Gregorio papa Septimo publicis consignatam monumentis audisset sublatam atque deperditam, renovandam curavit per novum hujusmodi ab ea jussu scribi Diploma, quod ad Vitam ipsius a Donnizone carmine scriptam, positum vidimus Appendicem ; seorsum vero in Vaticano Codice, quo ejusmodi publicamenta descripta leguntur. Sed ipsum jam antiquitate nonnihil læsum, ut reperimus, hic fidelissime reddimus :

21. « In nomine sanctæ et individue Trinitatis. Anno ab Incarnatione Domini nostri JESU CHRISTI millesimo centesimo secundo, quintodecimo die kalendas Decembris, Indictione decima (xi), tempore domni Gregorii Septimi papæ in Lateranensi palatio, in capella sanctæ Crucis, in præsentia Cencii Frangipani, Gratiani, Cencii Franculini, et Alberici de Petro Leone, et Benincasa fratris ejus, Alberti de Tuscio, et aliorum plurium, ego Mathilda, Dei gratia comitissa, pro remedio animæ meæ et parentum meorum, dedi et obtuli Ecclesiæ S. Petri per interventum domni Gregorii papæ Septimi omnia bona mea jure proprietario, tam quæ tunc habueram, quam ea quæ in antea acquisitura eram, sive jure successionis, sive alio quocunque jure ad me pertinentia, et tam ea quæ ex hac parte montium habebam, quam illa quæ in Ultramontanis partibus ad me pertinere videbantur. Omnia (sicut dictum est) per manum domni Gregorii Septimi papæ Romanæ Ecclesiæ dedi et tradidi, et Chartulam inde fieri rogavi. Sed quia

¹ Vit. Otton. l. 1, c. 6. — ² Prov. x.

³ Isa. xxi.

Chartula nusquam apparet, et timeo ne donatio et oblatio mea in dubium revocetur: ideo ego quæ supradicta comitissa Mathilda, iterum a præsentī die dono et offerro eidem Romanæ Ecclesiæ, per manum Bernardi cardinalis et legati ejusdem Romanæ Ecclesiæ, sicut in illo tempore dedi per manum domni Gregorii, omnia bona mea, tam quæ nunc habeo, quam quæ in posterum Deo propitio acquisitura sum, et tam quæ ex hac parte montium quam in Ultramontanis partibus habeo, quam quæ in posterum Deo propitio acquisitura sum alio quocumque jure, pro mercede et remedio animæ meæ et parentum meorum. Quæ autem ista bona mea juris mei superius dicta, una cum accessionibus et ingressibus, seu superioribus, seu inferioribus qualiter supra legavi: in integro ab hac die eidem Ecclesiæ dono et offerro, et per præsentem Chartulam offertionis istidem habenda confirmo. Insuper per cullellum¹, festucam nodatam, guantonem, et gurrascionem terræ, atque ranum arboris, et me exinde foras expuli garpini, et absentem me feci, et a parte ipsius Ecclesiæ habenda reliqui facienda exinde papæ, aut cui papa illius Ecclesiæ dederit a præsentī die quidquid voluerit, sine omni mea et hæredum et prohæredum meorum contradictione. Si quid vero (quod futurum esse non credo) sive ego comitissa Mathilda (quod absit) aut nllus de hæredibus aut prohæredibus, seu quælibet apposita persona, contra hanc Chartulam offertionis quandoque agere tentaverimus, aut eam per quodvis ingenium infringere quesierimus, tunc inferemus in illam partem, contra quam exinde litem intulerimus, multam, hoc est penam, auri optimi libras mille, argenti pondera quatuor millia, et quod reperierimus, vindicare non valeamus. Sed ut præsens hæc Chartula offertionis omnibus temporibus firma permaneat atque persistat, eam peramentum cum atramento de terra levavi, paginam Guidoni notario tradidi et scribere rogavi, atque subter confirmans, testibus obtuli roborandam, Actum Canusii feliciter.

« Mathilda quidquid est in hac Charta a me facta subscripsi.

« Ego Adericus iudex interfui et subscripsi.

« Ego Ubaldu iudex interfui et subscripsi.

« Signum manus Attonis de monte Burranzonis, et Bonvicini de Canusio.

Rogati testes.

« Ego Guido notarius palatii, scriptor hujus

Chartulæ offertionis, post traditam complexi et dedi». Hactenus ibi, facta collatione cum aliis exemplaribus æque depravatis. Quæ autem hæc secuta sint de bonis relictis Romanæ Ecclesiæ, suo loco dicetur.

22. *Bernardus cardinalis legatus apud Mathildem quid passus a schismaticis Parmensibus.* — Quod autem spectat ad Bernardum sanctæ Romanæ Ecclesiæ cardinalem, legatum ad Mathildam missum, cujus in exordio Diplomatis factam audisti mentionem: constat quidem quod Paschalis papa misit ad Mathildam comitissam legatum eundem Bernardum, tunc presbyterum cardinalem sanctæ Romanæ Ecclesiæ, cujus consilio in rebus agendis uteretur et opera. Ita in Vita Mathildis Homnizo presbyter tradit, nempe ad hoc opus delectum ex toto sacro collegio cardinalium virum sanctiorem, Bernardum ipsum, qui ex abbate monasterii Vallis-Umbrosæ, sive Ambrosiæ (ut textus habet) ob egregias animi ejus virtutes ad cardinalatum sanctæ Romanæ Ecclesiæ assumptus fuerat. Ille cum apud Mathildem esset, post sequentem annum, Parmenses nonnulli pii viri, quod nosset Bernardi sanctitatem ubique ex fama vulgatam, venerunt rogare eum ut Parmam se conferret, et civitatem illam, ob schismatici sedem quæ in illa fuerat adhuc erroribus plenam, prædicationis verbo purgaret.

23. Annuit ipse, hortatuque Mathildis Parmam perrexit, ipsa die Assumptionis Dei genitricis Mariæ, quæ populo sollemnis erat: in cujus Basilica missam celebraus ritu sollemni, sacro cantato Evangelio, ex more concionem ad populum habuit, in qua cum aliquantisper Henricum schismaticum imp. perstrinxisset, adeo in eum commota est plebs infidelis adhuc studiosa hæretici principis, ut impetum nudatis ensibus in eum fecerit in altari sacro hostiam offerentem. Dimovent eum ab altari, trahunt extra Ecclesiam ut detrudant eum in carcerem, diripiuntque sacra vasa quæ erant super altare dona comitis Mathildis. Quæ his auditis cum exercitu Parmam venit. Cujus adventu perterriti cives illi sacrilegi dimittunt Bernardum, sacraque ablata vasa restitunt; ut autem ipsa Mathildis parcere non tam tanti facinoris culpa respersis, intercessio instans effecit ipsius Bernardi. Scripsit pluribus ista versibus Donnizo, qui forte aderat, presbyter. Facta sunt hæc autem, ut dictum est, post biennium. Quomodo vero in Concilio Guastaldensi, petentibus iisdem Parmensibus penitentibus, Paschalis papa eundem sanctum virum Bernardum Parmensem ordinavit episcopum, suo loco dicturi sumus.

¹ Sunt formulæ ex idiotismis ejus temporis, quæ in aliis diplomaticis reperiantur, quæ modo exoleverunt.

ALLO periodi Græco-Romanæ 6595. — Anno Æræ Hispan. 1110. — Anno Regiæ 496, incognito die 15 Oct., Fer. 4. — Jesu Christi 1102.

— Paschalis II papæ 4. — Henrici IV reg. 47, imp. 19. Alexii Comneni imp. 22.

1. *Concilium Lateranense.* — A num. 1 ad 5. Concilium Lateranense primum sub Paschali II habitum refert Baronius ex Urspergensi abbate, qui tradit promissam in eo fuisse Paschali II ejusque successoribus obedientiam, et sententiam in Henricum imperatorem promulgatam, quam subdit Urspergensis, « nos quoque inter innumeras diversarum gentium catervas, proxima Cœna Domini, in Ecclesia Lateranensi ab ipsis ore didicimus : nimirum postquam octavo kalend. Octob. maris fluctibus Joppæ traditi, Romæ sumus per gratiam Christi prædicta majore hebdomada introducti ». Ubi Urspergensis, qui nunquam in Terra Sancta fuit, loquitur in persona auctoris, qui quæ videt narrat. Ad quem loquendi modum cum animum non advertisset Blondellus, tom. 1 Genealogie Franciæ, in Disquisitione de *Anapulla Rhenensi*, valde probat quod scripsit Bellarminus in lib. de Script. Eccles., dum verba facit de Conrado a Lichteno abbate Urspergensi : « Necesse est », inquit Bellarminus, « hanc Historiam, vel non esse unius auctoris, vel Conradum hunc inseruisse aliqua in Historia sua ex scriptis aliorum. Siquidem anno mcm scribit se Romæ fuisse, cum Paschalis Secundus Pontifex feria quinta in Cœna Domini publice imperatorem Henricum excommunicatum pronuntiavit. At ipse (ut paulo ante notavimus) scribit se anno mccxv factum esse abbatem Urspergensensem, quæ certe non cohærent, nisi forte factus sit abbas cum esset plus quam centum et quindecim annorum. Sed neque hoc dici potest, cum ipse idem loquens de initio Pontificatus Innocentii III, id est de anno mxcviii, dicat se tunc fuisse in minori ætate, et adhuc laicum : quomodo enim poterat esse in minori ætate, si plus quam centenarius erat ? » Verum abbas Urspergensis hoc anno Romæ esse non potuit, cum anno mccxxvii adhuc vixerit, et Chronico suo finem imposuerit. Certum itaque indubitatumque tam Urspergensensem, quam Actorum sanctorum interpolatores et abbreviatores, varia quandoque in prima persona enarrare, quæ tamen ipsi nec viderunt, nec audierunt, sed alii quorum nomina tacent. Hujus observationis ope varii errores vitari poterunt.

2. *Sumptus necessarios legatis solvere Hun-*

gari recusant. — A num. 5 ad 12. *Gregorius VII* legalorum in provincias mittendorum commodis consulens, metropolitani formulam præscripsit secundum quam jurare debebant, cum pallium eis ab Apostolica Sede dabatur. In ea formula addita est clausula de procuracionibus legatorum, ut certi essent sibi sumptus ab iis ad quos mittebantur suppeditatum iri. Clausulæ illius hæc sunt verba apud Baronium anno mxxix, num. 9 : « Legatum Romanum eundo et redeundo honorifice tractabo, et in necessitatibus suis adjuvabo ». Hungari tamen detractaverunt illis munera seu tributa dare quæ citra contradictionem eis in aliis provinciis solvebantur. Colligitur istud ex Epistola Paschalis II ad archiepiscopum Colociensem data et a Baronio recitata, qui ad eum scripserat, regem et regni majores admiratione permotos, quod pallium sibi ab apocrisiariis Apostolicæ Sedis tali conditione oblatum fuisset, si sacramentum juraret, quod ei per apocrisiarios eosdem miserat summus Pontifex, id est, sacramentum a Gregorio VII institutum, de quo mox diximus. Quare Paschalis II, ut *Hungaros* ad obsequium inclinet, ostendit quid sit pallium, deinde disserit de auctoritate Romani Pontificis in universa Ecclesia, et denique docet juramentum illud per omnes ubique provincias vigere : « Numquid, inquit, non ultra vos Saxones Danique consistunt ? Et tamen eorum metropolitani et idem juramentum asserunt, et legatos Apostolicæ Sedis honorifice tractant, et in suis necessitatibus adjuvant ». Falsa autem istius Epistolæ inscriptio, quæ extat in libris Decretalium, Baronium in errorem induxit. Nam, ut observatum a Francisco Florente ad Tit. *De usu et auctoritate pallii*, et a Baluzio in Supplemento lib. 5 de Concordia, cap. 48 num. 3, in libris Decretalium legendum non est, *Panormitano archiepiscopo*, ut vulgo editum est, et Baronius habet, sed *Colociensi archiepiscopo*.

3. *Indebitas contributiones a quibusdam legatis petite.* — Sumpta inde quandoque occasio ad contributiones indebitas exigendas ; indeque illa Joannis Saresberienensis querela, lib. 5 Policrat., cap. 16. « Sed ne legali Sedis Apostolicæ manus suas excutiant ab omni munere, qui interdum in provinciis

ta debacchantur, ac si ad Ecclesiam flagellandam egressus sit Satan a facie Domini ». El lib. 6, cap. 24: « Provinciarum dripiunt spolia, ac si thesauros Græci studeant reparare ». Quæ per hæc tempora adeo publica erant, ut S. Bernardus ad Eugenium III Epistolam scripserit, qua cum monet, ut tales in cardinalium collegium admittat, qui cum legatione Sedis Apostolicæ ornati fuerint, « Ecclesias non spoliunt, sed emendent, qui marsupia non exhauriant, sed corda reficiant, et crimina corrigant », qui cum ad Apostolicam Sedem redierint, « redeant fatigati quidem, sed non suffarinati simul et gloriantes, non quod curiosa seu pretiosa quæque terrarum attulerint, sed quod reliquerint pacem regnis, legem Barbaris, quietem monasteriis, Ecclesiis ordinem, clericis disciplinam, Deo populum acceptabilem, sectatorem bonorum operum ». Hæc et alia huiusmodi Baluzius loco citato, de quibus etiam Baronius variis in locis.

4. *Concilium Londiniense.* — A num. 12 ad 14. Divus Anselmus, cupiens gregem sibi commissum in fidei morumque puritate regere, *Londoni* Concilium celebravit, in quo præter episcopos et abbates, pluresque Ecclesiastici ordinis regni etiam proceres affuerunt, ut quæ decreta essent a suis servanda curarent. Refert hanc Synodum Baronius ex Malmesburiensi, quia ejus tempore libri Novorum Eadmeri lucem non viderant. Sed cum nunc eos Seldenii beneficio habeamus, ex iis summarie describimus quæ ad rem nostram faciunt, Eadmerus itaque lib. 3 Novorum ait: « Anno Dominicæ Incarnat. mci, quarto autem præsulatus Paschalis summi Pontificis, tertio regni Henrici gloriosi regis Anglorum, ipso annuente, celebratum est Concilium in Ecclesia B. Petri, etc. in quo præsedit Anselmus archiepiscopus Dorobernensis et primas totius Britannie, etc. Huic conventui affuerunt, Anselmo archiepiscopo petente a rege, primates regni: quatenus quicquid ejusdem Concilii auctoritate decerneretur, utriusque ordinis concordia cura et sollicitudine ratum servarebatur ». In eo Concilio abbates tres ibi nominati simonia notati depositi sunt, et aliqui alii propter alias causas ab abbatis remoti. Decretum etiam, « ut nullus archidiaconus, presbyter, diaconus, canonicus uxorem ducat, vel ductam retineat ». Præterea « ut presbyter, quandiu illicitam conversationem mulieris habuerit, non sit legalis, nec missam celebret, nec si celebraverit, ejus missa audiat ». Alia hujus Synodi Decreta tom. x Concil. legenda. Porro Concilium *sancti Michaelis festo* habitum fuisse notavit novus chronographus Saxo.

5. *In eo de clericorum colibatu præcipue actum.* — In horum canonum promulgatione Anselmus moram nuxit, donec ad incudem revocati essent, ut ipsemet in Epistola ad Willelmum archidiaconum suum scripsit, ubi inter alia dicit: « De archidiaconibus et canonicis, qui uxores

suas derelictas extra domos suas in maneriis suis ponunt (id est villis suis), existimo interim, donec aliud statuatur, tolerandum, si certam promissionem fecerint se nullam conversationem cum illis habituros, nec sine legitimis testibus locuturos ». Simeon Dunelmensis, in sua Historia de hoc Concilio loquens, ait: « Presbyteris concubinae interdictæ sunt. Unde plures eorum ostia Ecclesiarum observaverunt, omittentes omnia officia Ecclesiastica ». Adeo difficile fuit inveterato malo mederi. Sed quancunque cautionem sanctus Anselmus adhibuerit, Henrici regis iram avertere non potuit. Hic enim ubi Synodus celebrata fuit, jussit Anselmum manum episcopis imponere, quos ille nuper per investituram elegerat; quod tamen ab eo obtinere non potuit, quod ille adhuc Romæ pendente, sine Ecclesiasticæ potestatis præjudicio fieri non posse arbitraretur.

6. *Crucesignati in Oriente male habiti.* — « Anno mci », inquit chronographus Malleacensis, « principes Christiani ceperunt civitatem Tortosam (in Syria positam) duodecimo kalendas Maii, et apud Joppen iterum rex (nempe Hierosolymorum) Baldwinus impugnavit sexto kalendas Junii, ubi devicti fuerunt, et apud Romam civitatem inclusi, et duodecim consules (id est comites) capti cum aliis multis, et ipse rex evasit. Postea recuperaverunt, et Dei adjutorio devicerunt infestissimam gentem inimicorum ». Sed antequam Tortosam sibi subicerent, miserabili prælio victi fuere, teste Fulcherio, qui in Oriente erat: « Cum Francorum exercitus ingens », inquit Fulcherius lib. 2, « Hierusalem tenderet, aderant in illa multitudine simul Willelmus Pictaviensis comes, et Stephanus comes Blesensis, qui ab Antiochia relicto exercitu discesserat ». Addit cum his etiam fuisse Hugonem Magnum, qui frater erat Philippi Francorum regis et Veromandhorum comes, Raimundum comitem Provinciarum, et Stephanum Burgundiæ comitem, iisque in Romanie finibus obstitisse Solimanum Turcum, et exercitum Francorum confudisse, et totum fere interfectione delevisse. « Sed quia eos fatigatos, et fame et siti anxios, atque pugne sagittariæ indolitos esse didicit, magisquam centum millia equitum atque peditum gladio peremit. De mulieribus nempe alias occidit, alias secum adduxit ». Comes Pictaviensis perdidit quæcumque habebat, vivique mortis periculum evadens, pedes Antiochiam pervenit. Ex his qui evaserunt, *Hugo Magnus* Tarsi defunctus est.

7. *Grosolanus Ecclesiam Mediolanensem turbare incipit.* — Anselmum archiepiscopum Mediolanensem anno superiori Constantinopoli mortuum esse, nominis hoc anno Mediolani nuntiavit. Quod nuntium magnos tumultus in ea urbe excitavit, Grosulano qui Ecclesiam illam regebat in eam intruso, ut Landulfus Junior cap. 4 apud Puricellum fuse narrat. In antiquo Mediolanensi episcoporum Catalogo de eo legitur: « Grosolanus hanc sedem annos ix et menses iv perturbavit »,

usque ad annum nempe *mcxii*. « Bernardus abbas Umbrosæ-Vallis et cardinalis Romanus Grosulano favit », inquit Landulfus, qui cap. 6 apud Purcellum in Monument. Ambros. num. 294, de eodem Grosulano habet: « Quoscumque non potuit sibi blandiri, (sen blandimentis conciliare) tentavit minus terrere, presbyterum Liprandum præcipue ». Hunc pluribus Landolphus, qui nepos ejus erat, laudat, capiteque nono asserit Grosulanum Synodum provincialem Mediolani indixisse, « ut ipsum Liprandum ejusque assectatores ab ejusmodi proposito dimoveret ». Ambonem ascendit, et adversarios suos his verbis provocavit: « Si quis vult adversum me dicere aliquid, nunc dicat; quod si modo tacerit, amplius adversum me audientiam non habebit. Hoc cum presbytero Liprando renuntiatum fuit, et ipse principales cives ad Ecclesiam Sancti Pauli vocavit in die, quibus dixit: Videtis me abscissum naso et auribus pro nomine Christi. Unde mihi magna retributio est promissa, si in finem perseveravero, etc. Et cum hæc et plura benedictæ benique sonantia præsertim adversus simoniam dixisset, proposuit dicens: Grosulanus, qui pro archiepiscopo tenetur, est simoniacus de archiepiscopatu Mediolanensi per minus a manu, per minus a lingua, per minus ab obsequio. Et cum hæc in suo proposito procederet, sæpissime hortabatur omnes, ut cognitionem hujus propositi per divinum judicium (nempe transitu per ignem) approbatam (subaudi, *cognitionem*) in vita vel morte sua (dum scilicet per ignem transiret) manifestata per ipsum. Sed Grosulani turba hoc perturbat auctoritate pontificum, qui Mediolani venerant ad celebrandum Synodum cum Grosulano. Veruntamen presbyter ipse adversus episcopos disputans, rationibus et exemplis suam sententiam sustinuit, nec dimisit. Grosulanus vero parvipendens hujus presbyteri verba, velut in præsentia ejus non essent prolata, Synodum suam in Ecclesia Sanctæ Mariæ, quæ dicitur Hyemalis, per duos dies tractavit ». Quæ postea contigerint, anno sequenti referemus. Erat Grosulanus caput simoniacorum in urbe Mediolanensi, Liprandus vero presbyter sanctissimus, ut ex iis quæ sæculo superiori de eo diximus perspicuum est. Grosulano tamen favebat S. Bernardus abbas Umbrosæ-Vallis et cardinalis presbyter tituli S. Chrysogoni, ejus Vita a scriptore anonymo forsitan coævo edita, Romæ anno *mcxii* typis mandata fuit. Papebrocius tamen ad diem *xxii* mensis Maii in Vita sancti Attonis, p. 196, dicit eam a Thesaurio Veli ejusdem Congregationis monacho, qui initio sæculi *xvii* vixit, interpolatam fuisse.

8. *Moritur Wladislaus Poloniæ dux.* — Hæc anno mortuus est *Wladislaus* hujus nominis primus Polonorum dux, postquam viginti regnasset annos. Cumque de successione ejus inter *Boleslaum* et *Sbigneum* filios controversia orta esset, tandem convenit, ut æqualem interque partem acciperet. *Sbigneus* filius notius *Wladislai*, et *Boleslaus*

hujus nominis *III Crivovslus* cognominatus fuit. De utroque legendus *Chromerus* lib. 5 de Rebus Polonorum.

9. *Richardus Albanensis episc. legatus in Francia.* — « Legatus in Burgundiam et Franciam directus est Richardus Albanensis episcopus, primo Sancti-Stephani Metensis Ecclesiæ decanus », inquit Hugo Flaviniacensis in Chron. Exeunte anno *mciv* e Gallia discessit, ut ibidem dicemus.

10. *Lebertus fit abbas S. Rufi.* — Eo legatione fungente, *Leodegarius* episcopus Vivariensis in Septimania, « Ecclesiam Sancti-Andeoli fratribus Sancti-Rufi pro elemosyna et religione » a se concessa passus est eis a clericis suis auferri, uti refert Paschalis II in litteris ad eum datis, quibus ei prohibet, ne Constitutiones hæc de re ab eo factas et a se confirmatas infringat, et jubet ut clericos suos emendet, nisi suam Constitutionem integram ratamque custodiant. Præterea *R. Albanensis episcopus* et Sedis Apostolicæ legatus, nempe *Richardus*, mandat eidem episcopo, ut eandem concessionem factam *Ecclesiæ S. Rufi et domno L. loci ejusdem abbati*, nempe *Leberto*, quam ut ipsemet scripto firmaret petierat, inconvulsam teneri faciat, et qui eam perturbare præsumpserit, anathemati subijciat. Utraque Epistola refertur a Jacobo Peltto in Appendice ad Pœnitentiale Theodori archiep. Cantuariensis, pag. 505 et seq. Quare *Lebertus* prætermisus a San-Marthanis et a Castruccio in Catalogo abbatum Sancti-Rufi, circa hujus sæculi initium ad illius abbatiæ præfecturam evectus est. Petitus enim laudatus, pag. 629, refert ex Chartario Ecclesiæ Sancti-Rufi donationem a *Leodegario* Vivariensi episcopo factam Ecclesiæ « Sancti-Andeoli in loco, qui Burgius dicitur », quam donat « sub prævidentia *Leberti* abbatis Sancti-Rufi, et successorum ejus ibidem canonice substituendorum »; sed numeri in ea corrupti; dicitur enim ea corroborata « anno Dominicæ Incarnat. *mcxviii*, kalend. Junii, Indictione tertia »; et tamen hæc Indictio neque in annum *mcxviii*, neque in annum *mcviii* ut errorem illum emendant San-Marthani in episcopis Vivariensibus, competit. Certe hæc donatio ante annum *mcviii* a *Leodegario* facta; cum currenti circiter anno *Richardus* legatus in Francia eam confirmavit, uti supra diximus.

11. *Est auctor libri de Floribus Psalorum.* — Composuit *Lebertus* librum de *Floribus Psalorum*, quem *Oudin* in Supplement. de script. Eccles. testatur se vidisse Ms. tribus voluminibus in-fol. in Biblioth. Brancien ordinis Premonstratensis in tractu Suessionico, quem ait esse « insigne et prolixum in Psalms omnes Davidis Commentarium ». Præterea *Mabillonius* tom. I Analect. pag. 289, e tenebris eruit Epistolam *Galteri* episcopi Magalonensis ad *Robertum præpositum Insulanum* datam, in qua *Galterus* ait, *Hescelinum* Insulæ in Flundria canonicum diligenter inquisisse « de Floribus Psalorum, quos a sanctæ memoriæ *Leberto*, olim canonico vestro, postmo-

dum Sancti-Rufi abbate audierat exceptos, et in unum collectos ». Addit Galerius Hesselinum *totum aut partem illius operis* a se petiisse, seque illud *toti* Insulanæ Ecclesiæ mittere. Galerius autem anno mcm Magalonensis Ecclesiæ episcopus dictus, annoque mxxxix vita functus.

12. *Liber ille male Galtero adscriptus.* — Trithemius in lib. de Script. Eccles., in voce *Galterus*, plures scriptores in errorem induxit; ait enim: « Scripsit ad petitionem prepositi et clericorum Insulensis Ecclesiæ super Psalterio lib. I ». Et tamen ex Galli Epistola laudata, de qua Trithemius loquitur, constat eum librum *de Floribus Psalmorum* inscriptum, ex Expositionibus Augustini, Casiodori et aliorum Ecclesiæ doctorum a Letherto compositum. Galerium misisse ad Robertum prepositum Insulanum aliosque ejusdem Ecclesiæ canonicos, non vero Opus aliquod *de Floribus Psalmorum* a seipso editum. Hunc Trithemii lapsum cum San-Marthani non animadvertissent, in episcopis Magalonensibus unum Galerium in duos dividere, quorum alter Magalonensis Ecclesiæ episcopus fuerit, alter vero Insulensis Ecclesiæ canonicus et auctor Commentariorum in Psalmos, *de quo*, inquit, *Joannes Trithemius*.

13. *Galerus poeta cum Galtero episc.* *Magalonæ male confusus.* — Horum errorum fons et origo *Henricus de Gandavo*, in lib. de scrip. Ecclesiasticis, qui de Galtero scripsit: « *Walterus*, Insulis, oppido Flandriæ oriundus, Magalonensis episcopus, exposuit Psalterium limato sermone, ad petitionem prepositi et clericorum Insulensis Ecclesiæ ». Nam hæc verba cum legisset Trithemius, *Walterum* seu *Galerium* inter scriptores Ecclesiasticos reposuit. Cum vero illis ista subjecerit *Henricus de Gandavo*: « *Walterus* dictus de Castellione, Insulis oriundus, unde est illud monasticum,

Insula me genuit, rapuit Castellio nomen,

scripsit gesta Alexandri Magni eleganti metro. Qui liber in scholis Grammaticorum tantæ dignitatis est hodie (post medium scilicet seculum xiii, quo

Henricus de Gandavo floruit), ut præ ipso veterum poetarum lectio negligatur ». Valesius Andreas in Biblioth. Belgica, et Miræus in Notis ad *Henricum Gandavensem* pag. 165, ex illis intulere, *Henricum Gandavensem* unicum *Galerium*, qui circa annum mclv floruerit, in duos desperitum esse. At accurrate *Henricus de Gandavo* utrumque *Galerium* distinxit, certumque est, poetam ante annum millesimum ducentesimum secundum Opus suum heroicum publicasse, cum illud dicarit *Willelmo II*, ex archiepiscopatu Senonensi ad Rhemensem translato anno mclxxvi, ac postea cardinali creato. De isto *Willelmo*, filio Theobaldi hujus nominis III, Campaniæ comitis, pluribus agit *Marlotus* in *Metro-poli Rhemensi*, docetque ejus mortem contigisse anno millesimo ducentesimo secundo, et eo Ecclesiæ Rhemensem regente, *Galerium* Vitam *Alexandri Magni* decem libris constantem, (quot sunt litteræ in vocabulo, *Guillemus*, non vero *Willelmus*, ul perperam *Marlotus* ei consecrasset, ita ut quilibet Poematis liber ab unaquaque incipiat. Addit *Marlotus* illud adhuc Ms. in Bibliotheca Rhemensi asservari. Verum sæculo elapso ter impressi sunt *libri decem Alexandrides, sive de Gestis Alexandri Magni*, sub nomine *Philippi Gualteri Castellionensis*, quorum antiquissimum manuscriptum Bukeus tom. ii Hist. Universitat. Parisiensis pag. 740, ita inscriptum sese legisse testatur. Vidi tertiam editionem *Philippi Gualteri poetæ Alexandrides* libros decem continentem, Lugduni anno mdviii curatam, in Bibliotheca illustrissimi domini de Mazugues, pulchris characteribus, prout ferebant illa tempora, impressam. Super Lugduni Batavorum prædix Collectio veterum aliquot scriptorum, in qua extat *Gualteri Castellionensis disputatio adversus Judæos* hactenus inedita. Hæc fusius discussa, quia hactenus non satis cognita. *Letherto* successit in abbatiam S. Ruti beatus *Oldegarius*, prior monasterii Barcinonensis Sancti-Adriani, idque anno mcmii, ut habet *Diagus* in Hist. comitum Barcinonensium lib. 2, cap. 83. De *Oldegario* sæpe mentio infra occurret.

PASCHALIS II ANNUS 4. — CHRISTI 1103.

1. *Otto consecratus Bambergensis episcopus a Paschali papa litteras ad suam Ecclesiam dat.* — Annus sequitur millesimus centesimus tertius Redemptoris, undecima Indictione, quo Paschalis papa die Pentecostes consecravit episcopum Babenbergensem, Ottonem, cancellarium imperatoris, a schismaticis transfugam ad Catholicos. Quomodo autem ista se habuerint, ex ejusdem Vite Actis fidelissime scriptis sic accipe¹: « Igitur acceptis litteris, juxta verbum domini Apostolici, beatus Otto Romam in Ascensione Domini veniens, transivit, et in Anagnina civitate Campanie dominum Apostolicum invenit. Porro viri honorati qui cum eo erant, data et accepta salute, dominum Apostolicum etiam ex parte salutant Ecclesie Babenbergensis, subdentes petitionem et vota pro electo. Otto vero nihil cunctatus, ordinem et modum ascensionis aperit, fateretur omnia, baculum ponit et annulum ad pedes Apostolici, temeritatis vel errati veniam petit, insinuans tamen non voluntate sua, sed potestate factum aliena: pro quo et severius in se canonicæ districtiōis sibi inest imprecatur ultionem. Apostolicus vero, vir summe prudentiæ, constantiam ejus admiratus, levare jubet insignia: negat ille, indignum se et peccatorem protestatus. Cum Apostolicus: Sancti Spiritus, inquit, festum propinquat, tanti arbitrii consiliis rem hanc commodare debemus. Deinde ubi de his satis utraque dictum est, benedictione accepta, Otto cum suis ad hospitium adgreditur (regreditur). Ubi multa secum tota nocte et sequenti die tractabat, malitiam temporum, anxietates et pericula pastorum, inobedientiam et inquietudines subditorum, postremo quidquid in tali re duri vel adversi esse potest, ante oculos ponebat; ac plena deliberatione, omnibus depositis, privatus et quietus a, ut se vivere decrevit. Itaque accitis sociis vice, quid deliberasset aperuit, moxque, valedicens domino Apostolico et curie, per viam qua venerat redire cepit.

2. « Cumque iter cucurrisset, missis legatis, sub sancte obedientie mandato Apostolicus redire jubet abeuntem. Mitit dona donorum significantia,

monet cor et corpus aptare Spiritus sancti donis. Quid faceret? Obedientia retrahitur, a comitibus repellitur, et cum tremore ac reverentia, juxta mandatum domini Apostolici reversus, in sancto die sacrosancte Pentecostes, petentibus nuntiis... talis suæ ab ipso domino Apostolico investitur, multoque decore ac lætitia totius curiæ, sancti Spiritus invocatione, inter missarum solemnia in episcopum consecratus est; et revertens, de itinere litteras expectatas Ecclesie suæ premisit ». Quibus narratur, quæ cum ipso a Paschali Pontifice gesta essent; sic enim se habent:

3. « Otto Dei gratia Babenbergensis episcopus, Eberardo præposito, Adalberto decano, cæterisque fratribus omne bonum.

« Quantum ego novi et expertus sum charitatem vestram, scio vos jamdiu expectare eventum nostri laboris, ut de nostro successu, siquidem bene, per misericordiam Dei gaudeatis. Ne ergo diutius suspensi aut dubii sitis de nobis, aut si justum est, sincerissime gaudeatis, litteris istis vobis significare decrevimus, quam misericorditer Deus more suo post immensos labores et sudores plurimos nobiscum operatus sit. In die Pentecostes sancto, qui ex adventu sancti Spiritus factus et cunctis fidelibus univere sollemnis est; illo, inquam, die, Deo sic ordinante, in Anagnina civitate Campaniæ, quæ¹ Romanam dividit et Apuliam, episcopalis benedictionis munus, quamvis indignus Domino largiente suscepi, venerabili papa domino Paschali manum imponente, cæteris vero episcopis plurimis cooperantibus, clero quoque Romano Ecclesie, cujus magna pars ea die in eandem civitatem convenerat, adstante et consentiente. Et quod nulli a Romano Pontifice consecrato nostris temporibus contigit, sine obligatione alicujus juramenti consecratus sum. Hujus loci, hujus diei, hujus gratuite misericordie Dei semper memores esse debemus; ut vos memores esse velitis cum gratiarum actione obnixè precamur:

¹ Adde *ditionem*, sed non quod prope Anagninam sit Apulia, sed quod Northmanni, qui duces dicerentur Apuliæ, pæne usque Anagninum confinia dilatassent.

¹ Vit. Otton. l. 1. c. 7.

præcipue cum aliæ quamplures venerandæ personæ de magnis rebus ad Apostolicam Sedem agentes, infecto negotio redierunt. Valete ». Pergit auctor: « Apostolicus vero hac commendatitias litteras Ecclesie scripsit pro dilectione Ottonis episcopi:

1. *Paschalis papæ Epistola ad Bambergensem Ecclesiam.* — « Paschalis episcopus, servus servorum Dei, clero et populo Bambergensi salutem et Apostolicam benedictionem.

« Quanto affectionis debito Babenbergensis Ecclesia ab ipso suæ institutionis primordio Sedi Apostolicæ constringatur, etsi nos lateret, litterarum vestrarum significatio manifestat. Quod affectionis debitum venerabilis frater Otto, vestræ Ecclesie electus, constanter tenuisse ac tenere cognoscitur, cum per tot et tanta pericula ad Apostolicæ Sedis visitationem percurrat. Nos igitur eum debita benignitatis affectione suscepimus, et iuxta vestræ dilectionis desiderium, nostris tanquam beati Petri manibus, salvo metropolitani jure, vobis per Dei gratiam præselem ordinavimus. Hunc igitur sub presentium litterarum prosecutione ad Ecclesie vestræ regimen remittentes, plena hortamur affectione diligi, plena humilitate venerari. Confidimus enim cum disciplinæ Ecclesiasticæ futurum esse eundem, et salutis vestræ sollicitum provisorem. Itaque ergo sedulis officiis obedite, et gratiam vobis in eo conciliate caelestem. Integritatem Catholicæ fidei firmam semper in omnibus conservate; Sedi Apostolicæ semper devotius adhaerete, ut per ejus consilium a contagiis omnibus liberi, ad æternæ salutis portum feliciter pervenire, Domino largiente, mereamini ». Hucusque ex litteris Paschalis papæ. Ad quem autem sanctitudinis verticem Otto a Romano Pontifice initiatus sacerdotio venerit, aliqua ex parte suis locis dicturi sumus inferius. Qui vero ista uberius scire cupit, quæ citavimus ejus Vite Acta perlegat; mox enim una cum episcopaliunctione donis Spiritus sancti ita est abunde repletus, ut Apostolorum instar loqueretur magnalia Dei, et operaretur mirabilia de lege ejus. Paschalis autem tantam virtutem eo mox compensavit honore, ut usum pallii duplicatis diebus ipsi concesserit, cum quater tantum in anno eo utendi ejus prædecessores accepissent a Romanis Pontificibus facultatem.

5. *S. Anselmus Romanum veniens et Paschalis papa pro Ecclesiæ Anglicanæ libertate cum Henrico rege agunt et laborant.* — Hoc eodem anno, rebus Ecclesiasticis in Anglia fluctuantibus, vigentibus et in dies magis excrecentibus discordiis inter regem Henricum, et S. Anselmum archiepiscopum Cantuariensem, ob investituræ Ecclesiasticas, quas sibi rex sumere, antistes vero e seculari potentia vindicare studebat; idem S. Anselmus rogatus a rege Paschalem et Romam se conferre, quinto kal. Maii¹ Romam proficiscitur, præcurrente ejusdem Henrici legato ad Paschalem

Pontificem, cujus sententia tanta controversia finem accepit. Res gestas ab Edinero itineris comite diffuse fuisse conscriptas, tum idem ipse testatur auctor², tum qui ab eo accepit, affirmat Willelmus Malmesburiensis, qui ea cuncta compendio relexuit, ex quo hæc accipe: « Convenitur (Anselmus) a rege et episcopis et magnatibus, ut ipse Romam dignetur proficisci, quod alii minus egerant sua præsentia supplēturus. Non careret effectū, quod vellet, quem Sedes Apostolica tantū penderet: impenderet modo hunc laborem patriæ, quo pacem Ecclesiæ, quod dignitatem repararet imperii. Iste precibus flecti non nescius, ne omnia suo tantum videretur præsumere arbitrio, consensit iturum se, ne cunctorum voluntati deesset. Quanquam legatorum penuria eos ad munus senem annis gravem, corpore debilem adegisset: scirent tamen, nihil se Apostolico suggesturum, quod antecessoris sui gloriam adrogaret, statuta effringeret. Tu tantum, inquit, vade, et in Apostolici præsentia, legato, si vera dicat, testimonio tuæ auctoritatis adstipulare.

6. « Consensu accepto, discessum est ab invicem. Anselmus continua prosperis flatibus maxima pericula transvectus, bona etiam fortuna terrenum iter Romam usque emensus est. Ubi Apostolico favore et senatoria frequentia exceptus, paucis diebus silentio et quieti indulsit, jubente papa. Cumque vires resumpsisset otio, die constituto palatium Lateranense ingreditur. Adest et nuntius, qui paucis diebus adventum ejus prævenerat, notus jam Romæ, Willelmus de Warlewast electus Exoniensis Ecclesiæ. Is omnes impendens eloquentiæ vires, causam regis perorabat, ut ei omnes paternæ fraternæque consuetudines redderentur. Angliam peculiarem esse Rom. Ecclesiæ provinciam, et ei tributa quotannis persistere regem, sicut munificum ita magnanimum. Dedecus ei videri et esse, si antecessorum suorum jura perderet, quos ipse et animi magnitudine et opum affluentia longe præiret et premeret. Provideret itaque papa regis honori, consuleret sibi, quem non dubitaret magno fructu emungendum pecuniæ, nisi putaret abstinendum canonum severitate. His et aliis ad causam valentibus dictis, traducta est in sententiam Romana curia, obnixis favoribus regis vota debere impleri pronuntians.

7. « Sicbat interea Pontifex uterque, perorantis ampullas et adulationum fumos prudenter attendens, latenter iridens. Tum legatus putans illorum taciturnitatem esse comitum, securus cupit: Plurima hinc inde possunt agitari verba, sed hæc est summa, quod dominus meus nec pro amissione regni patietur sibi Ecclesiarum investituræ auferri. Nec ego, inquit papa, pro capitis mei redemptione eum investituræ permittam impune habere. Illujuscemodi dicti tenore converse fantorum linguæ, et in diversa mutata: Benedicta, inquit, cordis

¹ Roger, in Annal. hoc anno.

² In Prefat. in Vlt. S. Anselm.

tui constantia, benedieta oris tui loquela. Legatus confusus obtinuit ». Recitat et ista Edinens in Vita Anselmi istis verbis : « Legatus inter alia, quod rex ipse nec pro regni amissione investituras Ecclesiarum pateretur amittere, minacibus verbis asseruit. Ad quæ papa : Si quemadmodum dicis, rex tuus nec pro regni amissione patietur Ecclesiarum donationes amittere, scias (ecce coram deo dico) quia nec pro sui capitis redemptione eas illi aliquando Paschalis papa impune permetteret habere ». Pergit vero Willelmus : « Effecit tamen (legatus videlicet) ut nonnullæ consuetudines patris regi laxarentur, ipsoque interim ab excommunicatione, quod aliquos investierat, immuni, investiti auctoritati canonum subjacerent; eorum satisfactio Anselmi commissa iudicio. Qui cum remeandi licentiam accepisset, alter reditum excusavit dicens se voti reum eundi ad Sanctum Nicolaum; aversabatur dicto intentio. Nitebatur enim, ut quoquo modo papam a sententia traderet. Quod ubi ad nihilum tendere vidit, compendiarie tramite archiepiscopum ad Placentiam anticipavit. Aliquantis ergo diebus communiter perrexit. Sed cum eos viæ separaret divortium, ille quod ante celaverat aperuit, dicens : Mandat tibi dominus meus, quod si sic te sibi exhibueris, sicut antecessor tuus exhibuit se patri suo, libenter volet adventum tuum in Angliam; sin minus (prudenter loquor) seis quid sequatur. Ita Wilhelmo citato in Angliam, Anselmus Lugdunum contendit, indeque misit litteras regi super veritate dictorum Willelmi exculpanda ». Epistolarum seriem, quæ in immensum porrigitur, Apostolici ad regem, et Anselmi ad regem, et regis ad Anselmum, hic non placuit intexere : volentibus legere, liber Edinens copiam faciet; quas ideo vir ille apposuit, ut nullus eum mendacii carperet, et ut ipse invictum robur dictorum assumeret. Affluebat enim otio, utpote solius Anselmi Gestis enucleandis intentus. Ego majus epus moveo, et in multorum Gesta conor, ideoque necessaria tantum libans, fastidio lectorum mederi meditor. At idem auctor¹, in rebus gestis ipsius Henrici aliquot recitat Paschalis papæ Epistolas, quarum prima tunc ad ipsum regem reddita, ad præsentem annum spectat, quæ sic se habet :

8. « Paschalis episcopus, Henrico regi salutem.

« In litteris, quas nuper ad nos per familiarem tuam nostræ dilectionis filium clericum Willelmum transmisisti, et personæ tuæ hospitalem cognovimus, et successus prosperos quos tibi superatis regni adversariis benignitas divina concessit. Audivimus præterea optatam virilem sobolem ex ingenua te et religiosa conjuge suscepisse. Quod profecto cum nos lætificaverit, opportunum ratumur, nunc tibi præcepta et voluntatem Dei validius inculcare, cum amplioribus beneficiis benignitati ejus te prospicis debitorem. Nos quoque divinis

beneficiis benignitatem nostram penes te sociare optamus : sed grave nobis est, quia id a nobis videris expetere, quod omnino præstare non possumus. Si enim consentiamus, aut patiamur investituras a tua excellentia fieri; et nostrum proculdubio et tuum erit immane periculum. Qua in re contemplari te volumus, quid aut non faciendo perdas, aut faciendo conquiras. Nos enim in prohibitione hac nihil amplius obedientiæ, nihil liberalitatis per Ecclesias nanciscimur; nec tibi debitæ potestatis aut juris subtrahere quiddam nitimur, nisi ut erga te Dei ira minuat, et sic tibi prospera cuncta contingant; ait enim Dominus¹ : Honorificantes me honorificabo, qui autem contemnunt me, erunt ignobiles. Dices itaque : Mei hoc juris est. Non itaque, non est imperatorium, non regium, sed divinum. Solius illius est, qui dixit² : Ego sum ostium. Unde pro ipso te rogo, ejus hoc munus est, ut reddas hoc ipsi, ipsi dimittas, ejus amore etiam quæ tua sunt debes. Nos autem eum tuæ obviemur voluntati, eum absteremus gratiæ, nisi Dei sciremus nos in hujus negotii consensu voluntati obviare, gratiam amittere? Cur tibi quiddam negaremus, quod cuiquam esset mortalius concedendum, cum beneficia de te ampliora sumpserimus?

9. « Prospice, fili charissime, utrum deus an dedecus tibi sit, quod sapientissimus et religiosissimus Anglicanorum episcoporum Anselmus, propter hoc tuo lateri adhærere, tuo veretur in regno consistere. Qui tanta de te bona hactenus audierant, quid de te sentiant? quid loquentur, eum hoc fuerit in regionibus divulgatum? Ipsi qui coram te tuos excessus extollunt, cum præsentia tua caruerint, hoc profecto validius infamabunt. Redi ergo, charissime fili, ad cor tuum : propter misericordiam Dei, et propter amorem Unigeniti deprecamur; revoca pastorem tuum, revoca patrem tuum. Et si quis (quod non opinamur) gravius se adversus te gesserit, si investituras adversatus fuerit : nos juxta voluntatem tuam, quantum cum Deo possumus, moderabimur. Tu tamen talis repulsi infamiam a persona tua et regno removeas. Hæc si feceris, et si gravia quælibet a nobis petieris, quæ cum Deo præberi facultas sit, profecto consequeris, et pro te Dominum, ipso adjuvante, exorare curabimus, et de peccatis tam tibi quam conjugi tuæ sanctorum Apostolorum meritis indulgentiam et absolutionem faciemus. Filium autem tuum, quem ex spectabili et gloriosa conjuge suscepisti, quem (ut audivimus) egregii patris Willelmi nomine nominasti, tanta tecum imminente confortabimus, ut qui te vel illum læserit, Romanam Ecclesiam videatur læsisse. Datum Laterani, nono kalendas Decembris ». Et inferius idem auctor : « Eratque tunc Anselmus archiepiscopus iterum tempore istius regis Lugduni exul apud Hugonem ejusdem civitatis archiepiscopum, quando epistola

¹ Willel. de reb. gest. reg. Angl. l. v.

² 4. Reg. x. — 2 Joan. xx.

prima, (nempe ista), quam apposui, emissa est.» At nihil in praesens profuerunt littere istae, sed rex in S. Anselmum, cujus instigatione haec a Pontifice scribi putabat, gravius commotus, quam potuit in eundem vindictam exercuit: nam audi Edinerum, qui ait¹:

10. «Rex autem Henricus, ut comperit papam in sua sententia stare, mox archiepiscopatum in suum dominium redegit, et Anselmum suis omnibus spoliavit. Acta sunt hinc inter eos multa, et anno uno et semis indignatio regis non est sopita». Et inferius: «Post haec, tum pro exercendo Ecclesiasticae disciplinae rigore (vigore) tum pro Ecclesiasticarum rerum in Anglia revelatione, relicta Burgundia Anselmus in Franciam ivit. Quod ubi regi Anglorum Henrico innotuit, revestivit illum de suis, et in amicitiam ejus receptus est. Conversante dehinc Anselmo in Northmannia, reversos aut legatos regis ad Paschalem papam pro explendo eo negotio. Quid autem confectum sit hac postrema legatione, suo loco dicturi sumus.

11. *Ivonis litteras defert Walo episcopus Parisiensis ad Paschalem papam.* — Quod autem idem Edinerus in his enarrandis testetur, Walonem, alias Galonem, Parisiensem episcopum, de quo nos ante biennium ex Ivonis Epistolis pluribus egimus, functum legatione Pontificia, tunc Romae fuisse, dum S. Anselmum contigit ex dicta cum rege causa in Urbe morari, atque interfuisse elevationi reliquiarum S. Priscæ: hic primum occasionem, unde oborta sit ei Romam eundi, quid ibi fecerit, et quoniam ab eodem Paschali papa sit missus antequam reverteretur in Gallias, dicturi sumus. Petenda sunt ista ex Ivonis Epistolis, cujus testificatione patet, hoc eodem anno, Ivonem ipsum Romam ad Paschalem Pontificem pro deponendo onere episcopatus, aliisque negotiis Ecclesiasticis magni momenti instituisse professionem, secumque adscivisse socinm eundem Walonem, sive Galonem, Parisiensem episcopum, cujus causa tantopere laborasset, pervenisseque usque pene ad Alpes. At quoniam paratas ab adversariis Ivoentibus regis causam sibi novit insidias, destitit prosequi coeptum iter; praemisit tamen eundem Walonem episcopum, qui suo nomine cuncta quae ipse cum Pontifice pertractaturus erat, ejus acribus deberet inferre, litterasque eidem ad Paschalem dedit hujusmodi²:

12. «Paschali summo Pontifici, Ivo humilis sanctitatis suae filius, quicquid potest esse felix.

«Quoniam pro gratia nobis collata decorem Ecclesiae Dei diligimus, multa inordinate in eadem fieri vehementer dolemus. Qui in quibusdam subditis cum quadam corrigere, vel cum quosdam ad meliora promovere studemus, ipsi in stercorebus suis computrescere cupientes, litteras a Sede Apostolica, nescio quibus surreptionibus impetratas nobis, deferunt ad palliandam malitiam suam, vel

defendendam inobedientiam. Unde sit in Ecclesiae mirabilis contemptus mandatorum Dei, et ineffabilis morum corruptela: cum ibi invenit quorundam perversitas incorrupta confugium, ubi innocentia sola deberet habere presidium. Et quod mirabilius et miserabilius est, isti vite suae curiosi corruptores ab ipsis columnis gratanter audiuntur, cum vitam religiosorum aliquibus maculis respicere moliantur, quibus non est credendum de aliena injustia, quandiu non discesserint a sua. Cum itaque tam pro nostra insufficientia, quam pro subditorum duritia praedictae causae de fructu laboris nostri pene desperare nos cogant: onus quod pene infructuose portamus, deponere sepe deliberamus, et penas columbae nobis dari flagitantes, avolare a molestiis inutilibus, et in mentis solitudine quiescere praecipimus. Haec itaque necessitate communiti, praesentium sanctitatis vestrae adire cupientes, et de his quae dicta sunt, cum multis aliis vobiscum tractare cupientes, venimus pene usque ad Alpes; in quarum angustiis quia insidias nobis paratas audieramus, nisi magnum virorum consilio, initio itinere supersedimus. Bonnum itaque Walonem contrafrem et coepiscopum nostrum, qui in suspectis locis ad occultandum se aptior est, paternitati vestrae transmissimus: in cujus ore verba nostra posuimus, quatenus cum tam pro sua quam pro nostra necessitate paterne audiat, et quae corrigenda sunt corrigatis, et quae utiliter statuenda firmiter statuatis. Quamvis enim, quod ratio suadet, vel quod usus approbat, vel episcopalis moderatio disponit, per se satis vigere videatur: tamen clarius sit, et quasi quadam luce irradiatur, cum id quod prohibendum, vel praecipendum est, decreto Apostolico roboratur». Hucusque Ivo ad Paschalem papam.

13. *Elevatio reliquiarum S. Priscæ Romæ.* — Cum autem idem Walo Romam venisset, tractaretque tam sua, quam credita sibi ab Ivone negotia cum Pontifice, contigit eum illic reperisse S. Anselmum (ut audisti) itidem occasione negotiorum curiam frequentare, immoluisseque ei atque usu familiaritatis adstringi, atque una cum ipso interfuisse elevationi reliquiarum S. Priscæ, et ex ejus corpore os etiam accepisse, ex eoque partem Edinero impertitam esse. Recitat ista omnia Edinerus in Anselmo, atque ex ejus verbis ista narrat de reliquiis iisdem Romæ acceptis: «Romæ, inquit, eram, et oratorium nominatè martyris Priscæ, in quo beatissimus Apostolorum princeps Petrus altare sacravit, vetustate consumptum dirutum est, et corpus martyris in nova reconditum Ecclesia, me adstante, levatum est. Igitur cum loci ipsius cardinalis reliquias in suo jure haberet, et ipse mihi familiaris existeret, os istud quod videtis, de sacro corpore sumptum, mihi pro signo mutui amoris dedit. Finierat praesul in istis. At ego earundem reliquiarum habendarum amore illectus, ut ex ipso osse mihi partem daret, deprecari episcopum cepi. Et ille: Accipe, inquit, et

¹ Edin. in vita S. Anselmi, l. II. — ² Ivo Ep. XXIX.

quantum inde primo conatu frangere poteris, humil. Accepi, et en, extra quam sperabam, in principio mei conatus una mihi particula in dextera manu remansit. Cumque de parvitate ipsius mœrorem animi dissimulare nequirem, et ut semel adhuc frangere inde mihi liceret, magnopere gestirem, rupit desiderium meum Anselmus, et ait: Noli, noli, quod habes sufficiat tibi. In veritate quippe dico tibi, quod pro toto auro, quod Constantinopoli et ultra citrave habetur, non omitteret domina ipsa cuius est, quin illud sibi vindicaret in die resurrectionis cunctorum. Quamobrem si debitam illi reverentiam exhibueris, æque suscipiet, ac si toti corpori ejus exhiberes. Quod ego audiens acquievi, et quam decentius potui, ipsum ex hoc hucusque servavi. De quo osse post plures dies, Petrus quidam monachus Cluniacensis, vir suo tempore magnæ auctoritatis, qui camerarius erat domini papæ Urbani atque Paschalis, ad nos veniens, a me percunctatus est quid sentiret. At ille, ubi me referente accepit qualiter id adeptus fuero, vera omnino esse confessus est, quæ episcopos inde dixerat, sequæ præsentem fuisse asseruit, quando idem os a corpore martyris sublatum a cardinali susceperat. Hæc de elevatione reliquiarum et delatione earum in Gallias, ubi tunc adhuc erat cum S. Anselmo Edineros, expectans ut inter ipsum atque regem obortæ controversiæ

sedarentur. Porro quod idem affirmat eundem Walonem Parisiensem episcopum functum esse munere Apostolicæ legationis; quænam ista fuerit, anno sequenti suo loco dicemus.

14. *Dispensatio in quarto gradu consanguinitatis cum duce Poloniæ.* — Quo pariter anno Paschalis papa dispensavit super consanguinitatis impedimentum in matrimonio, quod contractum est inter Boleslaum Poloniæ ducem, et filiam Russiæ regis Sbislavam nomine, in quarto consanguinitatis gradu sibi conjunctam. Hæc Longinus, cæteris antiquitate sicut et veritate præstans.

15. *Privilegium monasterio Bantino in Apulia.* — Hoc eodem anno, Paschalis papa dedisse reperitur Privilegium nobili monasterio Bantino in Apulia, de quo etiam superius, quod a Northmannis exstructum sub speciali cura Romanæ Ecclesiæ fuerat reservatum. In cuius fine hæc habentur de tempore ipsius: « Datum Laterani per manum Joannis sanctæ Romanæ Ecclesiæ cardinalis diaconi, II kal. Jun. Indict. XI, Incarnationis Dominicæ millesimo centesimo tertio, Pontificatus quoque domini Paschalis papæ Secundi anno quarto ». Extat sigillum sub plumbo pendenti, in quo sunt effigies beatorum Pauli et Petri ab uno latere, ab alio nomen descriptum Paschalis papæ II. In sigilli autem crepidine circumcirca verba ista: VERBO DOMINI CÆLI FIRMATI SUNT.

Anno periodi Græco-Romanæ 6596. — Anno .Erre Hispan. 1141. — Anno Hegiræ 497, inepto die 5 Octob., Fer. 2. — Jesu Christi 1103.

— Paschalis II papa 5. — Henrici IV reg. 48. imp. 20. Alexii Comneni imp. 23.

1. *S. Otto ordinatur episc. Bambergensis.* — A num. 1 ad 5. Canisius Tom II Antiq. Lect. refert Vitam S. Ottonis episcopi Bambergensis, ab auctore anonymo scriptam, qui in Præfatione dicit se narrare, quæ probatissimè viri *ab ipso gesta oculis suis viderunt*. Lib. 1, cap 1, ait: Ex Suevia duxit originem, « et percursis aliquibus poetis et philosophis, et Grammaticæ metrorumque regulis tenaci memoriæ commendati, etc. in Poloniam peregre vadens, ubi sciebat litteratorum esse penuriam, scholam puerorum accepit, etc. Ob ea igitur

studia omnibus gratus, etc. Legationibus etiam et responsis, inter magnas personas disserendis apissime aptus erat ». Anno superiori renuntiatus est episcopus Bambergensis ab Henrico imperatore, ut ibidem ex Urspergensî in Chron. Baronius n. 14 narrat, qui et currenti ex laudato auctore ejus Vitæ ostendit, eum die Pentecostes a Paschali II consecratum fuisse Bambergensem episcopum. Fuit ista postea Apostolus Pomeranorum, ut suo loco videbimus (1).

2. *Dissidium inter Henricum regem et S. An-*

(1) Non isto quidem anno, sed triennio post, anno mœvi, S. Otto a Paschali II episcopus Bambergensis consecratur, ut ex Vita ejus, ab Ebbone, ut putant, conscripta, PP. Bollandistæ ad diem 11 Julii perspicue demonstrent; ait enim scriptor ille subaquilis: « In die sacra Pentecoste quæ erat tertio idus Maii (anno nempe mœvi, qui eam diem Pentecoste sacram habebat) propriis manibus solemniter Ottonem consecravimus ». Erravit igitur Pagnus, hunc consecrationem triennio anticipans, sed venia dignus est, eo quod ante eundem hoc Ebbonis scriptum gregoriarum fuerit in hujus antistitis electionem Romanam consecrationem ejus triennio præcessisse; quare anno mœvi electus, ut recte Urspergensis, nonnisi anno mœvi initiatus fuit.

selmum de investituris. — A num. 5 ad 11. Acerime in Anglia de jure investiturarum disputatum. Rem gestam referam ex Eadmero lib. 3 Novorum, qui ait Henricum regem Cantuariam venisse cum Anselmo ea de re acturum. Qui videns Anselmi constantiam in iuribus Ecclesiæ conservandis, « hæc inter voce summissa rex antistiti mandat et multis precibus obsecrat, quatenus ipse per se Romam ire, et quod alii nequiverant, sua sibi industria conetur acquirere, ne ipsi perdendo suorum jura antecessorum, ei vilior fiat. Sensit pater quo hæc vergerent, et respondit: Differantur hæc, si placet, usque in Pascha, ut audito episcoporum regniq[ue] primatum consilio, qui modo non adsunt, respondeam hinc ». Noluit Anselmus in re gravissima, aut arbitrio suo, aut turbate regis menti concedere, et in Paschate in curiam venit. « Communis consilii vocem unam accepit, æquum scilicet fore illum tante rei gratia, viæ laborem debere non subterfugere ». Finitis itaque Paschalibus festis Angliam reliquit, et *V kalend. Maii* navem conscendit.

3. *Quidam Angliæ episcopi animum regis exasperant.* — Tres episcopi qui nuper Romæ regis causam egerant, reduces retulerunt, *Paschalem* papam vivæ vocis oraculo aliud regi indulxisse, quam litteræ a monarchis allatæ testarentur; et horum præsulum auctoritate suffragioq[ue], rex in vindicando investiturarum jure pertinacior fuerat. Sed Anselmi constantia fecerat, ut rursum novi oratores in Urbem pergerent, relaturi certius, an monachorum litteris, an vero episcoporum testimonio standum esset. Indigne tulit Romanus Pontifex, in dubium vocari, an unum monachis, aliud episcopis mandatum regi perferendum dederit; et anathematis sententiam in episcopos fulminavit. Recitat Eadmerus litteras ea de re a Paschali II ad S. Anselmum datas, in quibus inter alia scribit: « Dolemus, quia confratres nostros episcopos, legatos regis Anglorum benigne suscepsemus: quæ nec diximus eis, nec cogitavimus, redeuntes ad propria retulerunt. Audivimus enim eos dixisse: Quia si rex in aliis bene ageret, nos investituras Ecclesiarum nec prohibere, nec factas excommunicare. Et quod idem nolebamus chartæ committere, ne sub hac occasione et cæteri principes in nos inclamarent. Unde Jesum, qui renes et corda scrutatur, in animam nostram testem inducimus, si ex quo hujus sanctæ Sedis curam cœpimus gerere, hoc immane scelus vel descendit in mentem; et hoc a nobis Deus avertat, ut est; et non surrepundo inficiat nos, ut aliud habeamus ore promptum, aliud corde reconditum ».

4. *Paschalis II investituras damnat.* — Anselmus Romanus perveniens, *Guillelmum* Henrici regis legatum invenit. Ubi ergo adventus ejus summe Sedis antistiti nuntiatum, illum deprecatus est, quatenus diem illum atq[ue] sequentem a fatigatione sui apud S. Petrum quietos duceret. « Dein pape præsentatus, honorifice suscipitur: ac pro

ejus adventu, ipse et quæ confluerat Romana curia, vehementer se letari fatetur, etc. Adest et *Willelmus*, legationi qua fungebatur toto studio curam impendens, etc. Exponit etiam statum regni regiamq[ue] in Romanos munificentiam, unde ampliori quadam et digniori præ cæteris sublimitate, ex Apostolica largitione regis Anglorum probat antiquitus usos: eaque re non solum molestum et indecens fore huic suorum antecessorum jura perdere, verum etiam sicut se certo cognovisse ferebat, magno hoc ipsum Romanis damno futurum, si contingeret. Et dum forte locum recuperandi inventuri non essent, ab eis sero lugendum, etc. ipse nihilominus pontificum Pastor, cum ad cuncta sileret: et quid quisque diceret, prudenti consideratione examinaret; æstimans *Willelmus* janjam illum pro favore Romanorum in se, nihil eorum quæ quærebat sibi negaturum, erupit et ait: Quidquid hinc inde dicatur, volo norint quicumq[ue] assistant, dominum meum regem Anglorum nec pro amissione regni sui passurum se perdere investituras Ecclesiarum. Tunc vir Apostolicus paucis hæc verba locutus est: Si quemadmodum dicis, rex tuus, nec pro regni amissione patietur Ecclesiarum donationes amittere: scias, ecce coram Deo dico, quia nec pro redemptione sui capitis eas illi aliquando Paschalis papa impune permitteret habere. Quod auditum oppido conturbavit *Willelmum* ».

5. *S. Anselmus Roma redux Lugduni resedit.*

— Paulo post: « Itaque Romanorum consilio, papa nonnullos paternos usus, interdictis omnino Ecclesiarum investituris, regi concessit, eumq[ue] ab excommunicatione quam antecessorem suum fecisse superius diximus, immunem ad tempus constituit: iis duntaxat, qui a manu ipsius investituras susceperant vel deinceps susceperunt, usque ad dignam tanti reatus satisfactionem, pro servanda Ecclesiastici rigoris disciplina, sub excommunicationis catena retentis ». Paucis interpositis: « Nobis itaque Roma decedentibus *Willelmus* remansit, asserens sese voto constrinxisse beatum Nicolaum adire. Re autem vera, Romæ moraturus, et si posset, Anselmo absente, quod eo præsentem nequiverat, antistitem a data sententia tractaturus. Quod quia nequaquam facere potuit, persuasorias litteras regi deferendas, ne nil videretur egisse, a papa obtinuit ». Eas recitat Baronius num. 8 et seq. dateq[ue] sunt *Laterani nono kalendas Decemb.* Pervenit Anselmus Lugdunum paulo ante Nativitatem Dominicam, ubi præfatus *Willelmus* regis nomine hæc ei significavit: « Dicit (nempe rex) quia si sic ad eum redieris, ut talem te illi per omnia facias, quales antecessoribus suis, antecessores tui se fecisse noscuntur: tunc libenti animo tuum in Angliam reditum volet et amplectetur ». Videns Anselmus quo hæc tenderent, litteris ad Henricum regem datis, gesti negotii summam, et quid ex *Willelmo* ejus nomine accepisset, narravit, Lugdunumq[ue] remansit, regi responsum præ-

stolatus. Summo cum honore ab Hugone Lugdunensi archiepiscopo susceptus fuit, ibique ut « dominus loci ab omnibus habitus », inquit Eadmerus, qui postea Anselmi ad regem litteras refert. Fusius hæc exponit Alfordus in *Annal. Angliæ* qui legerat libros Novorum ab Eadmero elucubratos, quos Baronius non vidit.

6. *Liprandus ignis examine Grosulanum esse simoniacum probare offert.* — Episcopis anno superiori in Concilio Mediolani habito adhuc coactis, *Liprandus* obtulit probare ignis examine *Grosulanum* archiepiscopum Mediolanensem simoniacum esse, quo in proposito cum persisteret, factum illud iudicium, antequam ii a Concilio digrederentur, et quidem currenti anno, ut docet *Galvanus Flamma* in magno suo *Chronico*, cap. 250 apud *Puricellum* in *Monum. Basilic. Ambrosianæ* num. 255. « In millesimo centesimo tertio, secundum *Chronicam* *Gothofredi de Busseto* (opus illud perit) iudicium ignis presbyteri *Aliprandi* Ecclesiæ S. Pauli in *Compito*, et tunc *Crysolaus* (id est, *Grosolanus*) archiepiscopus depositus fuit tanquam simoniacus de archiepiscopatu ». Idem legitur in *Chronico Ms.* cui titulus, *Flos florum*, fol. 136. *Puricellus* his contradicit; sed is in *Monumentis Basilicæ Ambrosianæ* varia errata chronologica admisit, quæ in suo ultimo opere de SS. *Arialdo* et *Hierlembaldo* postea correxuit. Quomodo res se habuerit, narrat *Landolphus Junior* cap. 10 apud *Puricellum* lib. 4, de SS. *Arialdo* et *Hierlemb.* cap. 88, et in *Monum. Ambros.* num. 29. « Attamen *Grosulani* turba dimicans adversus primicerium *Landolphum*, ejusdem primicerii clericum lapide occidit; deinde quasi in consensu lotius civitatis dictum fuit presbytero (sc. *Liprando*) ut ad faciendum iudicium multa ligna congregaret in prato, quod clauditor in muro (id est muro) juxta S. *Ambrosii* monasterium. Et presbyter ipse plenus magno spiritu ammonam et vinum, quæ ad edendum habebat, pauperibus erogavit, suamque lupi tunicam pellem (id est pellitam vestem) pro lignis pignoravit; cætera vero quæ possidebat in libris, statuit ut conservarentur *Landolpho* nepoti suo et alumno, (*Landolphus* hujus narrationis auctor de semetipso loquitur) qui tunc temporis dicebat *Aureliani* (ex quo scholæ *Aurelianiensis* antiquitas probari potest) ab egregio magistro *Alfredo* et nobili *Jacobo*. Statuit etiam, si contingerit illum mori in illo iudicio, si quid corporis ejus residuum fuerit, portaretur ad Ecclesiam Sanctæ-Trinitatis, etc.

7. *Se ad illud prævio jejuniis parat.* — « Et cum ipse facturus esset iudicium, manus *Grosulani* prævaluit, et ipsa ligna in prato disposita dispersit, ipsum presbyterum separavit ab illa dispositione ignominiose. Deinde in domo sua et S. Pauli Ecclesia presbyter ipse siluit et quievit, donec pueri et puellæ, mares et feminae in proximo tempore clamaverunt: *Foras, Grosulane; hunc clamorem Grosulanus* cupiens compescere, habuit

consilium cum satellitibus suis, quibus dixit: *Ite et vos, et publice eligite viros e populo, qui dicant illi Liprando, ut aut ad satisfactionem meam veniat, aut de terra ista exeat, aut iudicium quod se facturum promisit, faciat.* Consiliarii itaque de latere ejus venientes ad concionem populi in vespertina hora Dominicæ diei de *Ranis Palmarum* seu *Olivarum* (qui hoc anno in diem xxii Martii incidit) publicaverunt quæ audierant a domino suo archiepiscopo *Grosulano*. Quapropter non solum viri in concione electi venerunt ad presbyterum hanc legationem dicere, sed innumera hominum multitudo venit hanc legationem confirmare. Ad quorum clamorem clamantem veniat presbyter ipse *Liprandus*; ipse humilis exivit, et ut legationem audivit et intellexit, manus ad caelos levavit, et Deo gratias egit, et interrogando legatos, inquit: *Vult et mandat ipse quod mihi dicit? Qui omnes respondentes dixerunt: Utiqve vult et mandat.* Et presbyter ad eos: *Terram non exeo, sed in istis duobus diebus, (feria ii et iii) jejunium ago, et in quarta feria faciam iudicium præstante Deo, sed unde ligna emam non habeo.*

8. *Pergit ad locum ubi examen faciendum erat.* — « Tunc *Grosulani* et *Reipublicæ* ministri querema ligna ad flammam et ad calorem aptissima triginta atrium S. *Ambrosii* in duabus congeriebus respicientibus se composuerunt. Longitudo quarum decem cubitorum fuit, latitudo et altitudo major statura hominis cubitorum quatuor; via vero inter ipsas congeries unius cubiti et semis. Iis ita dispositis, et quibusdam lignis in via interpositis, in quarta feria (die sc. xxv mensis Martii) presbyter indutus cilicio, camisio atque casula, more sacerdotis, ab Ecclesia S. Pauli usque ad Ecclesiam SS. martyrum *Protasii* et *Gervasii*, et beatissimi *Ambrosii* nudis pedibus crucem portavit. Super quorum sanctorum altare, et cæteris sacerdotibus deficientibus, ipse sibi missam cantavit (ante examen ignis id observabatur, et tamen *Liprandus* non habuit sacerdotem qui missam caneret), missa cantata; *Grosulanus* quoque gerendo crucem tandem Ecclesiam intravit, et pulpitem cum *Arialdo* de *Meregiane* et *Berardo* iudice *Astensi* (qui præcipui *Grosulani* sectatores erant) ascendit. Et facto silentio in populo, et presbytero (nempe *Liprando*) stante nudis pedibus super lapidem marmoreum, qui in introitu chori continet *Herculis* simulacrum (de qua statua alias ad S. *Ambrosium* posita fuit et docte disserit *Puricellus* in *Monum. Basilic. Ambros.* numero 296) idem *Grosulanus* ait ad populum:

9. *Grosulanus conatur eum a proposito avertere.* — « Attendite, quia in tribus verbis hunc hominem vincam, et ejus confusionem ostendam. Et ad presbyterum inquit: *Proposuisti quod ego sum simoniacus per munus a manu, modo die, cui dedi? Tunc presbyter super populum oculos aperuit, et ad tres illos qui stabant in pulpito extendit dicens: Videte tres grandissimos diabolos,*

qui per ingenium et pecuniam suam putant me confundere. Et nomine diabolus ille, qui suasit illum fieri simoniacum per pecuniam, suadere potest ut adhuc majorem pecuniam daret et veritatem occultaret, et testes et iudices mundanos mihi auferret? Et nonne scitis, quia propter vitandam astutiam diaboli et pravorum hominum, ego elegeram Deum iudicem, qui neque per pecuniam, nec aliquo modo potest falli iudicio? Ad cujus iudicium, si vultis venire, paratus sum quod promisi facere. Et Grosulanus ad eum; Modo dic de qua simonia dicis? Et presbyter ad illum: Modo dic tu quæ est bona. Et aliquantulum Grosulanus subsiluit et ait: Est simonia quæ simoniacum non deponit. Et presbyter ait: Ego dico de illa quæ deponit abbatem de abbacia, episcopum de episcopatu, archiepiscopum de archiepiscopatu in quo est. Et cum his verbis satisfacisset omnibus, audivit populum clamantem: Exite foras ad iudicium, exite foras ad iudicium. Et presbyter in hoc multiplicato clamore licet senex, desuper lapide continente Herculis simulacrum prosilivit, et una cum populo in campo in quo erat lignorum congeries venit; ibique cum ignis lignis accendebatur, presbyter circumstantibus dixit: Vos præter me non cernitis sacerdotem qui mihi ignem benedicit (secundum morem in examine per ignem facto), sed cernitis Chartam hanc quam teneo, in qua sancta verba et signa sanctæ crucis continentur. Et ego minister hæc verba et signa inferius dicam et faciam, et Deus, qui est Dominus meus, desuper ignem benedicat, audientes et bene intelligentes. Amen.

10. *Liprandus per ignem illæsus transit.* — « Atque cum in circuitu ignis hæc verba dixisset et signa fecisset, et aquam benedictam et incensum super ignem, adstante ibi Grosulano, aspersisset, dubitabat de ordinando sacramento apud Grosulanum et Arialum de Meregnane, qui erat quasi potentissimus princeps Grosulani, et quasi procurator iudicii, et expectans presbyterum per ignem in morte finire, vel per nimium terrorem ad dominum suum Grosulanum converti. Ipse namque (Grosulanus) Berardo iudici Astensi hanc legem non solum per mortem (sc. Liprandi opera ignis), sed per quamlibet ignitam læsuram in presbytero factam condemnanti dixerat: Absit quod læsuram (id est, una sufficiat), sed ignem adeo magnificabo, quod procul oculos ignis de capite ejus eruet, et in ipso igne ardens ignis putrefiet. Attamen presbyter cum vidisset eos de ordinando sacramento (sen iurejurando) dubitare, dixit ad eos: Sinite me quod ego bene ordinabo, nec finiam sacramentum, donec dixerò tantum, quantum vobis satisfierit. Et illico in consensu eorum appre-

hendit cappam Grosulani, ipsamque cassavit dicens: Iste Grosulanus, qui est sub ista cappa, et non de alio dico, est simoniacus de archiepiscopatu Mediolani per munus a manu, per munus a lingua, per munus ab obsequio. Et cum illis videbatur sufficere, addidit: Et ego ad fiduciam maleficii, aut incantationis, vel carminis non intro hoc iudicium; sic Deus me adjuvet, et ista sancta Evangelia in isto sancto iudicio. Facto hoc sacramento, Grosulanus concorditer equum ascendit, et ad Ecclesiam S. Joannis, quæ dicitur ad Concham, venit. Arialus vero prædictus de Meregnane, inquirens et expectans plenitudinem ignis, presbyterum tenuit. Et tenendo manum suam læsam procul ab ipso calore ignis sensit; et tamen ad presbyterum inquit: Presbyter Liprande, vide mortem tuam in igne, convertere ad dominum meum archiepiscopum, habita securitate vite tuæ: alioquin vade et arde te cum Dei maledictione. Et presbyter ad illum: Satana, retro vade. Illo retrocedente, presbyter prostratus a terra levavit, et signo crucis sibi appposito, ingens flamma ignis in meridiem et septentrionem se divisit; et via apparuit quam presbyter intravit, et transiens per ipsos carbones ignis, cum arenam calcaret sensit: et dum per ipsam viam transibat, flamma post ipsum coibat. Et, ut ipse (sc. Liprandus) mihi (Landolpho) dixit, et bene intellexi, donec in via hujus ignis fuit, hanc orationem Deo protulit: *Deus, in nomine tuo salvum me fac; et in virtute tua libera me.* Et dum tertio proferret hoc verbum: *Fac*, se extra ignem vidit, nec in suis sacerdotalibus vestibus lineis aut sericis, quibus erat indutus, sive in cilicio, læsionem ullam sensit ».

11. *Grosulanus Mediolanum relinquit.* — Initio capituli 2 idem Landolphus Junior apud Puricellum loco laudato ait: « Tunc populus plene quasi ex uno ore laudem Deo et huic presbytero extra et infra civitatem contulit. Grosulanus vero intrepidus (id est, populum non timens) sedem archiepiscopatus deseruit et civitatem, qui aperte Communi civitatis conjuratum erat, quod neutri eorum (Grosulano et Liprando) nec alieni de parte illorum pro hac actione malum fieret, nisi quod Dominus sibi faceret ». Sicut itaque *Petrus Ignescens* sedente Alexandro Papa II transivit per rogam ardentem, quando Petrus Florentine civitatis episcopum accusavit; ita Paschalis II tempore, *Liprandus*, qui Grosulanum archiep. Mediolanensem accusarat, per flammam transivit illesus. Cum vero *Grosulanus* Mediolanum reliquisset, capitulum canonicorum Ecclesiæ metropolitane regiminis spiritualis possessionem adiit, quasi vere sedes vacaret, et per annos duos, ut infra videbimus, administravit.

PASCHALIS II ANNUS 5. — CHRISTI 1104.

1. *Legatio a Paschali papa missa in Poloniam.*

— Sequitur annus millesimus centesimus quartus, Indictione duodecima, quo Paschalis papa bene usus occasione præsentiæ Wallonis Bellovacensis episcopi, qui in Gallia haud quietam sedem haberet ob persecutiones regis Francorum, de quibus suo loco dictum est superius, decernit eum legatum a latere ad visitandam Poloniæ Ecclesiam, corrigendaque ea quæ correctione digna videri possent. De qua legatione apud Longinum sub hoc anno hæc scripta leguntur: « Summi Pontificis Paschalis Secundi nuntius cum potestate legati de Latere Gualdo, (alias Walo), episcopus Bellovacensis in Poloniam, Boleslao de Moravia expeditione redeunte, venit. Qui a Boleslao comiter exceptus, Polonica visitata, prout a summo Pontifice jussus erat, Ecclesia, rigore justitiæ in sceleratos, Boleslai ducis illum animante acutentque assistentia, duos provinciæ Cnesnensis episcopos, culpa exigente, damnavit, et suis per sententiam depositionis privavit sedibus. Qui tamen hi fuerint et quarum Ecclesiarum episcopi, vario et diligenti in quibuslibet Annalibus scrutinio facto, legisse me non memini. Reor tamen ex conjectura evidenti, quod unus depositorum episcoporum fuit Ezyaslaus, qui Cracoviensem episcopatum nulla summi Pontificis auctoritate, sed sola ducis Poloniæ donatione detinebat. Editus est a ducissa Sbislava consorte Boleslai ducis Poloniæ in anni hujus fine infans egrepius, quem præfatus Gualdo episcopus Bellovacensis cum aliis Polonorum episcopis in Cracoviensi Ecclesia de sacro fonte levavit, qui patre jubente, avitum nomen, Vladislaus accepit ». Ille ipse. Porro quod idem Walo modo Bellovacensem, modo (ut anno superiori) Parisiensem invenisti appellatum episcopum, nequaquam diversum putes ob diversos episcopatus; imo ex iisdem notis unum eundemque fuisse certo intelligas ex Epistolis Ivonis, de quibus supra, Carnotensis episcopi, quibus liquet hunc primo Bellovacensem consecratum episcopum, inde persecutione regis translatum in Parisiensem episcopatum. Extant enim plures lit-

teræ ad eum¹, postquam pacifice sedit Parisiensis episcopus, quod et contigit præsentī anno, cum in Gallias rediit, ut proxime dicturi sumus.

2. *Legatio in Galliam pro absolutione Philippi regis, et Concilium Trecentense.* — Hoc eodem anno decernitur alia legatio Albanensi episcopo cardinali in Gallias, ad impertiendam absolutionem ab excommunicatione Philippo Francorum regi, quam per legatos pœnitens petisset. Ad quem quidem legatum admonendum Ivo Carnotensis episcopus has litteras præmisit²:

« Richardo, Dei gratia Albanensi episcopo et sanctæ Sedis Apostolicæ vicario, Ivo humilis Carnotensis minister, salutem et obsequium.

« Sicut de excommunicatione regis graviter doluimus propter Christianæ religionis detrimentum, ita de absolutione ejus, si ad honorem Dei et sanctæ Sedis Apostolicæ fieri posset, granditer gauderemus propter ejusdem sanctæ religionis incrementum. Ut autem secus fiat quam sollicitudini vestræ a domino papa commissum est, consulere non audeamus, quia de rerum exitu, sicut vos ita et nos incerti sumus. Si autem divina gratia cor ejus humilaverit ad pœnitentiam, consilium nobis videtur, ut coram positis quamplurimis episcopis, publice eum et solemniter absolvatis, quatenus sicut longe lateque patuit ejus aversio, ita multorum religionum testimonio publicetur circumquaque ejus oplanda reversio. In qua re satagendum erit diligentia vestra, quatenus, qui pro amore justitiæ et obedientia Sedis Apostolicæ perdidit ejus amicitiam, in reconciliatione ejus redintegrentur ad gratiam. Consultum autem famæ vestræ melius credidissem, si alibi quam Senonis ista fieret absolutio, ubi cuique liceret libere dicere quod sentiret. De cætero ad Concilium denominatum gratanter ire desidero, sed contra voluntatem regis, ejus odium jam per decennium tolero, qua via, quo conductu vel circuitu Treceas venire valeam, non invenio. Si ergo vel per ipsam regem, vel per comitis-

¹ Ivo Ep. CCXIII. CCXX. CCXLV. — ² Ibid. Ep. CLXVI.

sam aliquam mihi securitatem impetrare potestis, obnixè rogo ut id facere studeatis». Hæc ad legatum Ivo, qui dum numerat annos decem ab eo tempore quo rex in eum infensus est ob pellicem subintroducendam, plane hoc eum anno hanc scripsisse Epistolam asseverabis. At quoniam exilium ista habuerint, accipe ex Epistola ejusdem Ivonis ad Paschalem papam tunc data¹:

3. « Paschali summo Pontifici, Ivo humilis Carnotensis Ecclesie minister, cum debita obedientia fidelium orationum obsequium.

« Notum facimus paternitati vestræ, quod tertio kalend. Augusti plures episcopi tam Rhemensis quam Senonensis provincie, invitati a domno Richardo Albanensi episcopo, legato vestro, convenimus in quoddam municipium Aureliensis episcopatus, nomine Balgenciactum, ad faciendam absolutionem regis secundum tenorem litterarum, quas super hac remiserat moderationi vestra. Convenit etiam rex et lateralis sua, et secundum præceptum vestrum, tactis sacrosanctis Evangelii, parati fuerunt abjurare absolute omnem carnalis copulæ consuetudinem, insuper et mutuam colloquutionem, nisi sub testimonio personarum minime suspectarum, usque ad vestram dispensationem. Sed quia in litteris vestris conlinebatur, ut in hac absolutione consilium prudentium sibi adhiberet domnus Albanensis episcopus, totum onus consilii voluit pendere ex arbitrio pontificum. Episcopi vero, nescimus quid conjicientes, semper replicabant, se debere esse hujus consilii comites et non duces; quamvis quibusdam nostrum videretur, quod prædicta absolutio ita posset, sicut prætaxata est, honeste fieri, et propter quorundam similitudines non satis rationabiliter impediri. Cum itaque ita res indefinita remanserit in medio, rex clamitans se male esse tractatum, tamen per se et per nos adhuc pulsas ad aures paternitatis vestræ, ut secundum moderationem litterarumstrarum, et verba quæ domno Galoni coepiscopo nostro injunxistis, causam ejus temperetis, ne contigat de eo illud Salomonis²: Qui multum emungit, elicit sanguinem. Dispensationis autem modus nulli unquam sapientum displicuit. Unde beatus Cyrillus ad Gennadium presbyterum: Sicut enim qui mare navigant, tempestate urgente, navique periclitante, quædam exonerant ut cætera salva permaneant, ita et nos cum non habemus salvandorum omnium negotiorum certitudinem, despiciamus ex iis quedam, ne cunctorum patiamur dispendia. Et quia hæc suggerendo dicimus, non docendo; nostræ suggestionis summa est, ut inbecillitati hominis amodo, quantum cum salutis ejus potestis, condescendatis, et terram quæ ejus anathemate periclitatur ab hoc periculo eruas.

4. « De cætero, sanctæ paternitatis vestre supplicando suggerimus, ut domnum Galonem coepiscopum nostrum, de Belvacensi episcopatu, quem

per sacramentum domni Ludovici habere non potest, per manum Senonensis archiepiscopi transferri jubeatis in Parisiensem episcopatum, quem ei gratanter et devote concedunt pro vestro amore rex et regis filius». Hæc Ivo. Porro regis absolutionem solemniter factam Parisiis esse, habetur in Fragmentis Francorum historie, una cum Glabro atque aliis auctoribus nuper editis.

5. Quod autem audisti in superiori Ivonis Epistola, indictum fuisse per Richardum S. R. E. cardinalem legatum Trecentis Concilium, ad idemque ipsum Ivonem vocatum esse: certum est illud tunc frequenti episcoporum numero celebratum fuisse. Insuper ad evitandam de Trecenti Concilio omnem quæ posset oriri de tempore dubitationem, præmonendum putamus, sub eodem Paschali papa duo eademque celeberrima Trecentis in Gallia fuisse celebrata Concilia, alterum per Richardum cardinalem legatum hoc anno, alterum tertio abhinc anno per ipsum Paschalem Pontificem, cui idem ipse qui vocavit, interfuit: de quo suo loco dicturi sumus.

6. Quod igitur ad præsentis anni Trecentis Concilium per Richardum legatum actitatum pertinet, de eo apud eundem Ivonem mentio habetur in Epistola ad Paschalem papam data, in qua causam Silvanecensis episcopi in eo tractatam esse testatur his verbis: « Novimus enim præteritis annis, cum domnus Richardus Albanensis episcopus Apostolica legatione fungeretur, quia Trecentis ab eodem legato Concilium celebratum est, in quo a malevolis et æmulis personis crimen venditionis sacrarum ordinum eidem episcopo objectum est, sed propter insufficientiam accusantium personarum, consentientibus in hoc episcopis, minime probatum est. Sed prædictus episcopus tanti criminis infamiam cupiens evitare, ad arbitrium legati vestri (sicut testantur qui affuerunt) spontaneus de objecto crimine se purgavit, et innocentiam suam jurejurando comprobavit etc. » Quibus annuit, cum citat testes episcopos qui Synodo interfuerunt, se non interfuisse, qui se jam ante excusaverat eidem interesse non posse. Posteriori autem Conc. Trecenti ipsum præsto fuisse, suo loco dicturi sumus.

7. In hoc eodem Concilio sub legato Richardo celebrato, creatum fuisse Godefredum virum sanctitate conspicuum episcopum Ambianensem, qui res ab eo præclare gestas, quas vidit, vel ab his qui viderunt accepit, et quam exacte adque fideliter conscripsit, narrat his verbis Nicolaus monachus Suessoniensis³: « Eodem tempore quo electio facta est, Richardus cardinalis et Apostolicæ Sedis legatus apud Trecentis celeberrimum habuit conventum episcoporum, abbatum et Galliarum procerum. Eo igitur se Ambianorum legati conferunt, suo proponunt se pastore orbatos, unanimiter a clero et populo electum asserunt Godefredum, rege

¹ Ivo Ep. CLXIX. — ² Prov. XXX

³ Ivo Ep. CLXIX. — ² Vit. Godefred. l. I. c. 30. apud Sur. tom. VI. die VII Novemb.

quoque assentiente. Tum vero omnes, qui in eo conventu Godefredum noverant, Christum summo opere collaudarunt. Sed ille interim fugam meditabatur (aderat enim ibi ut abbas cum cæteris). At vero interceptus, jubente cardinali et episcopis in medium eorum adductus, cunctis acclamantibus, dignum enim fore Ecclesiæ ministrum, strenuum dispensatorem, beatum futurum populum, qui talem sit pastorem habiturus. Aiunt enim tunc omnes, Te Deum laudamus, cantasse etc. » Hæc de electione ejus in Concilio illo Trecensi confirmata. Porro res sane admirandas ab eo gestas, a tempore quo post ingressus est monasterium, et postquam creatus est abbas, et in episcopatus functione, idem auctor est pluribus prosecutus. Confligendum illi fuit primum adversus clericos concubinarios, a quibus persecutionem passus, venenum ab eis preparatum, divino Spiritu monitus evitavit. Certandum quoque fuit adversus inpostores, quorum occasione Romam ad Paschalem Pont. venire coactus est. Quid autem tunc acciderit, suo loco dicturi sumus.

8. *Pro suo clero labis Simoniacæ impetito Ivoonis litteræ ad legatum Pontificium.* — Dum adhuc in Gallia idem Richardus episcopus Albanensis Sedis Apostolicæ legatus moraretur, contigit ab eo suscipi accusationem adversus clerum Carnotensem labis simoniacæ impetitum : ad quorum defensionem tunc eorum episcopus Ivo istam ad eundem legatum scripsit Epistolam¹, respondens ad ejus litteras paulo amarulentius :

9. « Richardo, Dei gratia Albanensi episcopo et sanctæ Ecclesiæ Romanæ legato, Ivo humilis Ecclesiæ Carnotensis minister, bene valere, et non omni spiritui credere.

« Sciens quia meliora sunt vulnera diligentis quam fraudulenta oscula blandientis², et illud Psalmographi³ : Corripiet me justus in misericordia et increpabit me ; caustica verba vestra, quantum pertinet ad simplicitatem intentionis vestræ, æquanimitè accepi ; sed duplicitem falsorum fratrum, qui quasi quibusdam latrocinii noctis, falsa pro veris sollicitudini vestræ suggerunt, graviter animadverti. Quorum falsitas cito patebit, cum luce veritatis cito reverberabitur, et in lucem prodire non audebit. Horum sunt quidam, qui infamiam suam non aliter se posse velare arbitrantur, nisi famam bonorum lædere, et vasa sincera incrustare moliantur, qui atia de causa simoniam non reprehendunt, nisi quod simoniaci esse non possunt, cum alii aliqui in Ecclesia assequuntur quod isti prepedientibus quibusdam incursionibus assequi non merentur. Quod si oculos mentis in se reflecterent, præter simoniam multa in se tam facinora quam flagitia merito reprehenderent, ut patenter eis dici possit illud Apostoli⁴ : In quo alterum judicas, teipsum condemnas : eadem enim agis quæ judicas. Nec ista dico, quod conscientiam meam

tali scelere contaminatam intelligam ; sed miror cur hoc solum vel in sola Carnotensi Ecclesia reprehenditur, cum et hoc et multa alia æque damabilia in omni pæne Gallicana Ecclesia dominentur. Quod autem vobis suggestum est, simoniacam hæresim, me permittente, in Ecclesia Carnotensi publice dominari, omnino veritate caret : quia hoc malum ab initio clericatus mei semper exhorui, et postquam ad episcopatum veni, quantum Deo donante prævalui, in superficie resecaui. Quod manifestum fieret, si pace confratrum et coepiscoporum nostrorum fieri posset, in quorum Ecclesiis multe malæ consuetudines adhuc caput erigunt, quæ temporibus nostri sacerdotii, Deo auxiliante, in Ecclesia Carnotensi sopite sunt.

10. « Si qua autem adhuc sunt, quæ pro consuetudine antiqua publice exigant decanus et cantor et alii ministri, ab his qui canonici sunt, me contradicente et persequente : Romanæ Ecclesiæ consuetudine se defendunt, in qua dicunt cubicularios et ministros sacri palatii multa exigere a consecratis episcopis, vel abbatibus, quæ oblationis vel benedictionis nomine palliantur, cum nec calamus nec charta gratis, ut aiunt, habeatur ; et hoc quasi lapide conterunt frontem meam, cum non habeam quid respondeam, nisi Evangelicum illud⁵ : Quod dicunt, servate et facite : sed si id faciunt, secundum opera eorum nolite facere. Si autem hanc pestem radicitus evellere non valeo, non tantum invaliditudo meæ hoc imputandum est, quia ad hoc ab origine nascentis Ecclesiæ Romana Ecclesia laboravit, nec a gremio etiam suo tales sua quærentes penitus prævaluit eliminare : nec in diebus malis regnare desinet cupiditas, donec finito mundi termino, pacatum regnum accipiat charitas. Interim autem (ut verbis Augustini utar⁶) quantumlibet vigilet disciplina domui meæ, homo sum, et inter homines vivo, nec mihi arrogare audeo, ut domus mea melior sit quam Arca Noe, ubi inter homines septem reprobus unus derisor patris inventus est, aut melior quam domus Abrahæ, ubi dictum est : Ejice ancillam et filium ejus, aut melior sit quam domus Isaac, cui de duobus geminis dictum est : Jacob dilexi, Esau autem odio habui. Et ut ad Christiana tempora veniam, semper patitur Christus in membris suis Judam proditorem, (Antiochena) Ecclesia Nicolai fornicationis laudatorem, Simonem lucrorum sacrilegorum sectatorem. Et ut universaliter dicam, semper abundabit palea, donec ventiletur area. Si qua tamen talia in auribus vestris (nostris) judiciario ordine publicantur, si certis documentis approbantur, conservato quidem legum tramite, inulta præterire non patimur. Incerta autem æterni judicis tribunalibus judicanda reservamus etc. » Quod autem nullas alias ab eo de eadem causa datas litteras volumen Epistolarum ejus habeat, sicut de aliis, par est credere legatum litteris

¹ Ivo Ep. xciv. — ² Prov. xxvi. — ³ Psal. cxl. — ⁴ Rom. ii.

⁵ Matth. xxiii. — ⁶ Aug. Ep. cxxxviii.

Ivonis reverberatum quievisse. Optaret quisque bonus his caruisse semper Rom. Ecclesiam, quæ quantumlibet honestis titulis decoretur, tñm quia secundum Apostolum ¹ : « Omnia mihi licent, sed non omnia ædificant ; » atque illud ² : « Si esca scandalizat fratrem meum, non manducabo carnes in æternum. » Expediret in omnibus (quantum possibile esset) consulere scandalo pusillorum, atque libera fronte dicere episcopum illud Apostoli ³ : Bonum est mihi magis mori, quam ut gloriam meam quis evacuet. Quæ sæpe ministrorum aviditate penes occasionem quærentes periclitatur ; sitque ut domus illa quæ est repleta boni odoris unguento ex diversorum sancti Spiritus charismatum donis, ob huiusmodi muscas morientes, quæ perdunt odorem unguenti ⁴, male malis oleat in ipsorum perditionem. At de his hactenus.

11. *Querelæ Ieonis de appellationibus ad Romanam Pontificem.* — Sed qui laboravi pro defensione suorum, coactus est paulo post ad eundem Paschalem papam apologeticam pro se Epistolam scribere ⁵, cum accusatus esset apud eundem Pontificem per clericos quos ipse damnavisset, quod patrem cuiusdam preposituræ a clericis abstulisset. Quamobrem ubi suam patefecit innocentiam, eamque comprobatione ejusdem Richardi Albanensis episcopi legati Apostolicæ Sedis multo magis perspicuam reddidit, ita lamentanda perorat : « De cætero senectutem meam propter superfluum et impunitam appellationum licentiam vexari non permittatis. Dum enim premit nos a prælata potestate illata adversitas, regendi in nobis debilitatur auctoritas, cum Ecclesiasticam in eos non audemus exercere disciplinam, qui eam adversum nos appellant, non contentia justitiæ, sed prolatione sententiæ. Quod si juvenili vigore possemus adhuc peditare per ruinas Alpium vias, equitare per precipites præterfluentium torrentium undas, et præcedere aut subsequi ad Apostolicam Sedem delatores nostros : proculdubio refrenaret se murmurantium lingua, quæ parum adhuc novit, qui distet inter serenitatem charitatis et caliginem cupiditatis.

12. « Si ergo aliquod temperamentum adversum hæc incommoda non procuraveritis, et inveteratis dierum malorum et indisciplinatis juvenibus, qui vix sunt digni habere quæ habent, nedom ambire quæ non habent, vexandum me exposueritis : unum restat mihi tutum et totum consilium, assumptis pennis columbæ a molestiis inutilibus avolare, et in solitudine requiescere, ubi expectem eum qui salvum me faciat a pusillanimitate mentis et inquietudine, cum ante episcopatum et in episcopatu semper voluntas mea fuerit magis in loco humili salvari, quam in alto periclitari, et in domo Dei magis abjectum esse, quam illis præesse

quibus non possem prodesse. Sed quia tantæ sublimitatis aures ad fastidium verbis nolumus onerare, si qua minus de necessariis dicta sunt, isti fratres supplebant, et si opus fuerit, probabunt. Vale ».

Vetus querela episcoporum in Romanam Ecclesiam, de appellationibus per clericos incorrigibiles ingeri solitis, ut evitent vel saltem differant, quam juste merentur subire sententiam, de qua abunde satis S. Bernardus ad Eugenium papam scripsit. Cui malo cum plura sint adhibita per Pontificia decreta remedia, tamen quod aditus iste non potest nec debet ita ocludi malis, ut non pateat bonis adversus malos : haud omnino ita potuit in omnibus esse prospectum, ne cum bonis mali se misceant in ingressu, cum præsertim justitiæ speciem in omnibus repræsentent, et voce magis ostendent, et nonnisi adversus malum remedia postulare proclamant, nec prohiberi posse quemquam ab illo confugio quod omnes homines possident jure naturæ, a minori ad majorem potentiam provocandi.

13. *Judicia Paschalis papæ contra jurum Ecclesie violatores.* — Inter hæc autem accidit, ut deferretur querela ad Paschalem Pont. adversus Rotrocum comitem Cenomanensem ¹, qui jura possessionis Hierosolymitani militis invasisset, quæ ex privilegio sub protectione atque defensione esse deberent Apostolicæ Sedis. Quibus acceptis, idem Pontifex rescripsit ad archiepiscopum Senonensem, Parisiensem, Aurelianensem, atque ad ipsum Ivonem episcopum Carnotensem, ut eundem comitem excommunicare deberent : quod faciendum non esse, nisi audito reo, examinata causa, idem Ivo contendit cum collegis, quantumlibet simpliciter excommunicandum, ex mandato Apostolico censeret archiepiscopus Senonensis. Contra autem ipse Carnotensis episcopus de his ita suam sententiam declaravit, dicens : « Ego itaque, servato legum tramite, nolo quemquam more sciariorum sine audientia punire, nolo satanæ tradere, donec vel audientiam subterfugiat, vel iudicium contumaciter respuat. Consulatur super hoc Evangelium, consulantur leges divinæ et humanæ : si de re in contentione posita aliter aliqua lex fieri jusserit, postposita mea sententia, libenter cedam alienæ. Nec aliter puto donum papam intellexisse, ubi præcepit, nos pro debito officii nostri prædictis petitoribus justitiam facere, etc. » Perstetit in sententia, donec qui excommunicandus erat, Sedem Apostolicam appellans e manibus eorum iudicium abstulit.

14. At non Occidua tantum, sed et Orientalia iudicia hoc anno Paschalem Pontificem fatigant. Hoc siquidem anno patriarcha Hierosolymorum Daibertus, qui jam anno superiori, dolo Arnulphi archidiaconi nequissimi passus ² multa, Hieroso-

¹ 1. cor. x. — ² Ibid. viii. — ³ 1. d. ix. — ⁴ Eccl. x. — ⁵ Ivo Ep. lxxv.

¹ Ivo Ep. cxchi. cxchii. cxcliv. et cxcvii. — ² Will. de Bell. sac. l. xii. c. 26.

lymis recedens Antiochiam ad Boamundum a Barbaris dimissum se contulit, Ebremario a Balduino in suum locum subrogato : una cum eodem Boamundo ¹ in Italiam navigans, ad Paschalem Pontificem contendit, apud quem detulit quaecumque dolo Arnulphi sustinisset a Balduino, jura Hierosolymitanæ Ecclesiæ immiuta deplorans. In eundem regem eam quoque accusationem ingessit, quod divortium sponte sua, absque causæ cognitione iudicioque Ecclesiæ, cum legitima uxore fecisset.

His auditis, Paschalis papa diu definuit patriarcham, Hierosolymam scribens, indeque venire mandans, si quis adversus eum aliquid quod accusaret haberet, resque delata in annum sequentem, quo iudicio Apostolicæ Sedis patriarcha innocens comprobatus, in sedem propriam restituitur, ut suo loco dicturi sumus. Ita quidem male consulti principes, dum putant impugnatione rerum Ecclesiasticarum stabilire sibi firmiter regnum : nam nihil aliud agunt, quam ut absque fundamento magnæ molis grande ædificium in altum erigant, casurum citius quam putant. Siquidem sententia Veritatis ², illud duntaxat erit stabile ac permanens ædificium, quod supra petram contigerit esse fundatum. Porro verissima ista esse, infelicia declarantur eventa, cum eodem quo ceptum est sæculo, perditis Hierosolymis, corruiat cito regnum, in quo non super petram male jacta fundamenta nutabant.

15. *S. Brunonis episcopi Signiensis legatio in Gallias.* — Tunc etiam cum, ut dictum est, Dairbertus patriarcha Hierosolymorum Roman venit, contigit pariter (ut Wilhelmus Tyrinus ³ asserit) venire in Italiam, et inde in Gallias ad Philippum regem proficisci Boamundum principem Antiochiæ, ut duas Philippi regis filias, alteram Constantiam ex legitima conjuge ortam sibi in matrimonium copularet, alteram ex pellice, Cæciliam nomine, jungeret nepoti suo Tancredo. Tunc cum Boamundo S. Bruno episcopus Signiensis mittitur legatus in Gallias, ut Petrus Diaconus testatur in Chronico Cassinate ⁴. Sed quæ hanc præcesserunt legationem, in Vita ipsius ita narratur : nempe ipsum Brunonem profectum in Apuliam cum Paschali Pontifice, ibique ægrotaantem, licentiam accepisse redeundi, atque monasterium Cassinense adeundi curationis causa. Sed ipse dimisso episcopatu, monasticum habitum induit, illic perpetuo permansurus. Quod ubi Signini populi cognovissent, percussi nuntio, haud æquanimiter passi sunt tanto pastore privari ; de his enim hæc idem Petrus ubi supra : « Signienses pastore orbat, neque illius ferre valentes absentiam, Romanum Pontificem adeunt, flentesque orant ut illum episcopatus sui curam gerere compellat. Pontifex ad hæc verba commotus, strenuos

a latere suo dirigit viros, per eos Brunoni Apostolicæ Sedis auctoritate præcipiens, ut ad ovium suarum redeat curam, et Romano Pontifici pro causis Ecclesiæ semper adherere, arguens acriter, quod absque permissione sua ausus esset monasterium petere, omnia gregis sibi a Deo crediti cura ». Ad hæc Bruno ista rescripsit ad amicos S. R. E. cardinales.

16. « Cuncti proculdubio sciunt, qui in Romana Ecclesia sunt, quia nisi contra Ecclesiam schismaticorum sæviisset insania, quod modo egi, multis jam annis implessem. Nunc vero, quia Romanæ Ecclesiæ Petro claves regente, tota per orbem Christi Dei nostri gratulatur Ecclesia, ventorum iam turbines silent, maria pacata quiescunt : quod Deo semel voveram, reddere cogor ; melius est enim non vovere, quam vovere et non reddere ¹. Quod si quis objiciat, me semel acceptam episcopatus sarcinam non debuissse deponere : respondebo liberius, multos qui pontificatus jura non deserunt, a sinistris esse statuendos, dicente Domino ² : Principes fuerunt, et non cognovi ; duces existerunt, et non per spiritum meum. Porro qui recta intentione episcopatum dimiserunt, certum est eos de æterna felicitate perenniter in Christo gaudere. Mihi quidem exempla non desunt, quorum auctoritate subnitar, eorum scilicet qui relictis turbibus sæculi, quietam vitam delegere. Unde, quæso, summum Pontificem orate, ne mihi ultra molestus sit, tranquillumque portum, in quem Christo duce perveni, ne me deserere cogat ». Hucusque litteræ Brunonis ex monasterio date. Pergit auctor :

17. « Cumque nulla ratione Apostolicum, Signiensemque populum sedare posset, supradictus Oderisius abbas rogavit Pontificem, ut memoratum virum in hoc monasterio Deo militare permitteret : ejusque precibus papa aures accommodans, quievit ». Verum non sivit ibi cum immorari diutius, sed cum titulo episcopi Signiensis legavit in Gallias hoc ipso anno, quo illic Boamundus, ut diximus, peregrinatus est ; nam pergit : « Post hæc ab eodem pontifice et abbate nostro una cum Boamundo (ut superius retulimus) directus in Galliam, vice Romani Pontificis Synodum secundum traditionem Ecclesiasticam tenuit ». Hæc de legatione S. Brunonis in Galliis, cujus est frequens mentio apud Ivonem in suis Epistolis ad diversos ³. In Vita ipsius, ubi de hac ipsa legatione agitur, hæc in ejus reditu contigisse narratur : « Cum autem de Gallia reverteretur, in itinere latrones insidias posuerunt, volentes ipsum suis facultatibus spoliare. Cum autem sanctus illis appropinquasset, tanto ejus aspectu sunt divinitus terrore percussi, ut ad pedes ejus cum reverentia procidentes, de malo proposito veniam peterent, ipsique in conductu itineris, quantum ipsi placuit, obsequium exhiberent ». Hæc ibi. Præter hanc legationem alia adhuc

¹ Will. de bell. sac. l. XI. — ² Matth. VII. — ³ Will. de bell. sac. l. XI. c. 1. — ⁴ Pet. Diaconus in Chron. Cass. l. IV. c. 33.

¹ Eccl. v. — ² Osæe I. — ³ Ivo Ep. cxc. cxcii.

ipsum perfunctum esse ab eodem Paschali papa sibi commissam ad Rogerium comitem, idem auctor Vite ipsius affirmat. At de ipso iterum alia occasione dicendum. Contigit autem ipsum revocari rursum ad monasterium Cassinense, cum scilicet defuncto Odone, qui Oderisio successit abbas, successor eligitur. Sed de his suo loco.

18. *Paschalis Epistola ad episcopum Compostellanum*. — Inter hæc autem contigit eundem Pascalem Romanum Pontificem Compostellanum episcopum litteris admonere, ut sacrorum prescripto canonum cuncta in ejus Ecclesia gererentur. multa enim bellorum causa irrepere in eam Ecclesiam deformia, quæ corrigenda mandata. Extat adhuc ejus Epistola apud nos, quæ et edita habetur a Joanne, luculento historiographo rerum Hispaniarum, ut hic leges¹:

« Paschalis episcopus, servus servorum Dei, venerabili Didaco Compostellano episcopo, salutem et Apostolicam benedictionem.

« Ecclesia quam regendam disponente Domino suscepisti, jam diu, etiam cum pastorem

habere videretur, pastoris solatiis caret. Idecirco strenuitati tuæ vigilantius insistendum est, ut in ea rite omnia juxta normam Sedis Apostolicæ disponantur. Cardinales in Ecclesia tua presbyteros seu diaconos tales constitue, qui digne valeant commissam sibi Ecclesiastici regiminis onera sustinere. Porro quæ presbyterorum intersunt, presbyteris, quæ diaconorum, diaconibus committantur, ut in aliena dispendia nullus obrepit. Si qui sane ante Romanæ legis susceptionem, secundum communem patriæ consuetudinem conjugia contraxerunt, natos ex eis filios neque a sæculari, neque a dignitate Ecclesiastica repellimus. Illud omnino incongruum est, quod per regionem vestram monachos cum sanctimonialibus habitare audimus: ad quod rescandam experientia tua imminet; ut et qui in presentiarum simul sunt, divisim longe habitaculis separentur, prout arbitrio et religiosorum virorum consilio melius visum fuerit: neque in posterum consuetudo hujusmodi præsumatur. Datum Laterani, Incarnationis Dominice anno millesimo centesimo tertio (iv), nostri Pontificatus quarto (v) ». Jam vero his absolutis, ad res gestas anni sequentis veniamus.

¹ Recitat Joan. Marian. hist. Hispan.

Anno periodi Græco-Romanæ 6597. — Anno Eræ Hispan. 1142. — Anno Hegiræ 493, inchoato die 23 Sept., Fer. 6. — Jesu Christi 1104.

— Paschalis II papa 6. — Henrici IV reg. 49. imp. 21. Alexii Comneni imp. 24.

1. *Galo a legatione Polonica rediit*. — Ad num. 1. Legatio *Galonis* episcopi Bellovacensis electi, et quidem anno millesimo centesimo, quam Baronius hoc anno collocat, revocanda ad an. mcm; anno enim mcm Romam rediit, legationis suæ rationem Paschali II redditurus. Quantum laboraverit Ivo Carnotensis, ut Galo vir doctus et pius episcopus Bellovacensis possessionem adire posset, pluribus narrat Baronius anno mci et seqq. Quare hic tantum legatio ejus Polonica, ad corrigenda quæ correctione digna videbantur decreta, suo anno adlenda. Profecto ea ad præsentem annum pertinere non potest, cum tunc *Galo* e Polonia Romam reversus sit, et eodem hoc anno episcopus Parisiensis electus, Baronius enim num. 3 et seq. refert Epistolam Ivonis ad Pascalem papam, quæ novo ordine est cxlii, quæ ei significat *tertio kalend. Augusti* episcopos convenisse ad Balgenciacum, eique suggerit, ut « domum Galonem episcopum nostrum, de Bellovacensi episcopatu, quem propter sacramentum domini Ludovici habere non

potest, per manum Senonensis archiepiscopi transferri jubeatur in Parisiensem episcopatum, quem ei granter et devote concedunt pro vestro amore rex et regis filius », scilicet Ludovicus, qui cum patre regnabat. Galonem antea consecratum esse episcopum Bellovacensem, testatur idem Ivo Epist. cxli et cxlii, juxta novum ordinem. Ineunte vero mense Decembri currentis anni, jam translatum fuisse ad episcopatum Parisiensem, mox certo patebit. Errant itaque, qui ejus episcopatum Parisiensem in annum sequentem distulere.

2. *Philippus Francorum rex absolvitur excommunicatione*. — A num. 2 ad 5. Blondellus in Diatriba de Formula regnante Christo, paragrapho 10, et ex eo San-Marthani in Genealogia Francica lib. 12, cap. 3, existimant *Philippum* Francorum regem anno mcm excommunicationem solum fuisse, inixi Epistola Ivonis ad Richardum Sedis Apostolicæ vicarium, quæ novo ordine est cxli, in qua Ivo vocatus ad Concilium Trecentense ubi Philippus rex absolutionem ab excommunicatione im-

petrare debebat, ait: « Ad Concilium denominatum grater ire desidero, sed contra voluntatem regis, cuius odium jam per decennium tolero, qua via, quo conductu vel circuitu Treas venire valeam, non invenio ». Putavit enim Blondellus anno mxcii Ivonem e gratia ejusdem regis excidisse. Verum præterquam quod id anno mxcii contigit, ut ibidem demonstravimus, Ivo annos illos decem repetit ab anno mxciv, quo rex magis in eum exarsit, ut eo anno ostendimus. Quare Baronius hanc absolutionem accurate cum presenti anno illigat, licet falso fretus principio, quod scilicet Ivo anno tantum mxciv in Philippi regis odium incidere cœperit. Sed Baronii Blondellique tempore, documenta quæ nunc habemus adhuc in tenebris latebant.

3. *Conventus ea de re Balgentiaci habitus.* — Currenti itaque anno, Richardus Albanensis episcopus, Paschalis II papæ legatus, ad faciendam regis absolutionem in Franciam misus, efflagitatu Ivonis, qui alibi quam Senonis eam fieri desiderabat, nec Treas ire audebat, Balgentiaci (quod lambit Liger oppidum decimo ab Aurelia milliario distans, conventibus episcoporum et principum aliis temporibus nobile) die xxx Julii Concilium congregavit, in quos rex et « Bertrada carnalem copulam, imo mutuum colloquium abjurare usque ad papæ dispensationem paratos esse se protestantur ». Sed re infecta Concilium (rege se male esse tractatum clamitante) solutum est. Rex per se et per Ivonem ac coepiscopos dispensationem probantes, ad Paschalis papæ aures pulsant, causamque suam temperari rogant, ut videre est in laudata Ivonis epistola a Baronio relata.

4. *Litteræ Paschalis II de absolutione episc. Gallie date.* — Post hæc Paschalis papa scripsit archiepiscopis et episcopis per Rhenensem, Senonensem ac Turonensem provincias constitutis, et de causa Philippi regis et Bertradae illis hæc significavit: « Quam nimirum causam fratri nostro Richardo Albanensi episcopo reminiscimini a nobis fuisse commissam. Si ergo idem frater Franciæ jam fines egressus est, nos eandem causam, aspirante Domino, una vobiscum peragendam venerabili fratri LAMBERTO Attrebatensi episcopo commitimus. Convenientibus itaque vobis in unum, si communis filius Francorum rex et illa ejus lateralis, tactis Sacrosanctis Evangeliiis, omnis carnalis copulæ consuetudinem abjuraverint, mutuum quoque colloquium et contubernium nisi sub testimonio personarum minime suspectarum, nunquam videlicet ad idem flagitium redituri, sicut quorundam vestrum litteris significatum est, satisfactionem eorum vice nostra vobiscum Attrebatensis episcopus suscipiat, et a vinculo excommunicationis absolvat, quatenus, largiente Domino, et filium Ecclesiæ, et regem sibi Francia reconciliatum episcopali ministerio gratuletur. Datum Laterani per manum Joannis, III nonas Octobris.

JURAMENTUM PHILIPPI REGIS FRANCORUM.

5. *Juramentum Philippi regis et Bertradae.* — « Audias tu, LAMBERTE, Attrebatensis episcopo, qui hic Apostolica vice fungeris: audiant archiepiscopi et presentes episcopi, quod ego PHILIPPUS, rex Francorum, peccatum et consuetudinem carnalis et illicitæ copulæ, quam hactenus cum Bertrada exercui, ulterius non exercebo, sed peccatum istud et flagitium penitus et sine omni retractatione abjuro. Cum eadem quoque femina mutuum colloquium et contubernium, nisi sub testimonio personarum minime suspectarum, non habebo; hæc omnia, sicut littere papæ dicunt et vos intelligitis, sine omni malo ingenio observabo. Sic me Deus adjuvet, et hæc Sacrosancta Jesu Christi Evangelia. Similiter et Bertrada, cum excommunicationis vinculo solvetur, tactis Sacrosanctis Evangeliiis, in persona sua hoc idem juravit sacramentum. Actum Parisiis in præsentia domini Daimberti Senonensis et Radulphi Turonensis archiepiscoporum; domini quoque Ivonis Carnotensis episcopi, Humbaldi Autisiodorensis episcopi, Joannis Aurelianensis episcopi, Gualonis Parisiensis episcopi. (et trium aliorum episcoporum ibidem nominatorum, ac trium abbatum etiam designatorum,) archidiaconorum etiam quamplurium, et honorabilium clericorum et laicorum non parva multitudo inibi consistentium. Taliter itaque ex Apostolicæ Sedis auctoritate, reincorporatus est Philippus rex Francorum sanctæ Catholicæ Ecclesiæ matri suæ, IV nonas Decemb., Indict. xiii, anno autem Dei Christi mxciv, Pontificante vero in Sede Romana domino Paschali papa II anno sexto ». Hæc Dacherius tomo in Spicilegii ex Ms. Corbeicensi, et ex eo Labbeus tom. x Concil. pag. 638 et seq. Porro Richardum S. Sedis legatum ante diem secundam mensis Decembris Galliam reliquisse demonstrat absolutio regis a Lamberto episc. peracta, quam ei Paschalis II commiserat, si Richardus jam e Gallia exisset.

6. *In Concilio Parisiensi factum.* — Acta hæc esse hoc anno in Concilio Parisiensi IV nonas Decemb. docet aliud Ms. Igniacense, quod ex Sirmondo exhibet Labbeus ibid. pag. 642, sed is animum non advertens ad errorem anonymi, qui pro mxcv, scripsit mxcv, Concilium illud in annum illum differt, quamvis in eo Codice alia non narrantur, quam quæ hoc anno gesta, et quidem eodem die ac mense. Refert iste anonymus litteras Philippi regis ad Lambertum Attrebatensem episc. cui mandat et precatur, « quatenus in crastino festivitatis sancti Andreae, ad hoc negotium præcipue tibi commissum adsis cum archiepiscopis et episcopis nostris, qui ibi aderunt, tum ex præcepto papæ, tum ex fide quam mihi debes communitus ». Paruit regi Lambertus ut vidimus, et quod factum fuit, Paschali II litteris significavit ibidem recitatis, quarum initium: « Convenientes Parisiis ex vestra auctoritate archiepiscopi », et episcopi a priori anonymo nominati, quemadmodum et abbates. Subdit Lam-

bertus : « Advenit rex satis devote multumque humiliter, nudis pedibus, peccato renuntians, et excommunicationem emendans, et sic ex vestra auctoritate absolutionem suscipere meruit ». Postea Juramentum integrum supra a nobis descriptum refert, Epistolamque his verbis concludit : « Actum Parisius anno Dei Christi mcv, IV nonas Decemb. anno Pontificatus Paschalis papæ II quinto ». Ubi anonymus, tam in anno Christi quam in anno Pontificatus Paschalis II peccat. Nam cum rem hoc anno gestam, eandemque quam alter anonymus narrare, certum et indubitatum esse debet, ideoque in altera Conciliorum editione error iste corrigendus erit.

7. *Filii Philippi regis ex Bertrada spurii fuere.* — Blondellus citatus contendit matrimonium Philippi regis cum Bertrada validum fuisse, et Paschalem II postulatam ab Ivone et aliis Gallie episcopis dispensationem, ut illud contrahi posset, largitum esse. Verum non solum Juramentum mox recitatum, sed etiam consensus et testimonium historicorum cœvorum aliorumque huic temporis proximorum, opinionem illam plane everunt. Referam hęc tantum verba Sugerii, in lib. de Vita Ludovici Grossi, Philippi regis filii ac successoris, qui de eo capite I scribit : « Famulos juvenis unicus patri erat de nobilissima conjuge Roberti Flandrensis comitis sorore. Qui enim duo supererant philippus et florens, de superducta Andegavensi comitissa Bertrada geniti erant, nec illorum appretiabatur successionem, si uni eum primum decedere quocumque infortunio contingeret ». Paschalem vero dispensationem ratione alinitatis Bertrada cum rege, ab Ivone et aliis quibusdam episcopis petitam, concedere noluisse, ex laudatis ejus verbis certo intelligimus. Quare San-Marthani citati filios et filias, quas *Philippus* rex ex Bertrada suscepit, nothos fuisse recte censuere. Blondellus tamen in laudata Diatriba pluribus testimoniis invicte refellit errorem eorum, qui scripsere Philippi regis annos, dum excommunicationis vinculis teneretur, formula *Regnante Christo* notatos fuisse; demonstratque eam ante et post Constantinum M. usurpatam.

8. *Concilium Trecense.* — A num. 5 ad 7. Ante Concilium Parisiense aliud *Trecis* habitum fuerat, cuius meminit chronographus Sancti-Petri-Vivi Senonensis : « Anno mcv, tenuit Concilium apud Treas Richardus Albanie episcopus, V kal. April. » Sed loco mcv, legendum mcv, et loco V kal. April., legendum V non. April., ut docet Privilegium Molisense a Labbeo loco laudato recitatum, quod in eodem Concilio emissum fuit. Mentio etiam hujus Trecensis Concilii in Vita S. Godefridi episcopi Ambianensis, a Nicolao monacho Suevionensi hujus æquali scripta, quæ extat apud Surium ad diem vii mensis Novemb. Fuit Godefridus in celebri monasterio S. Quintini in Veromanduis educatus, quinquennisque induit habitum monasticum, ac postea a multis episcopis abbas Novi-

genti designatus. Aliquot post annos, Richardus Apostolicæ Sedis legatus, « apud Trecenses celeberrimum habuit conventum episcoporum, abbatum et Gallie procerum », qui effecere, ut electioni de se factæ in episcopum Ambianensem assentiretur, qua in dignitate « sanctitatis et pudicitie custos adeo præclarus et studiosus ubique extitit, ut infames clericos vel impuro matrimonio copulatos, non solum a suo consortio, sed etiam a chori ingressu constanter arceret », inquit Nicolaus citatus. S. itaque Godefridus hoc anno episcopus Ambianensis renuntiatus. Neque enim Concilium Trecense in annum sequentem, quo in Chronico S. Petri-Vivi collocatur differri potest, cum, ut paulo ante diximus, *Richardus* legatus S. Sedis, qui eidem præfuit, ante diem secundum mensis Decembris currentis anni *Franciæ fines egressus* fuerit. Celebratum autem fuisse hoc anno, V et IV nonas Aprilis, Indict. xii, tam Privilegium Molisense laudatum, quam aliud Ecclesiæ S. Petri Trecensis in eodem confirmatum et tom. x Concil. recitatum, extra omnem controversiam ponunt.

9. *Querela Hugonis de Puteolo militis Hierosolymitani adversus Rotrocum comitem.* — Ad num. 13. Querela ad Paschalem II adversus *Rotrocum*, qui jura possessionis ad *Hugonem* de Puteo Hierosolymitanum militem pertinentis invasisset, non hoc anno, sed anno mcv, contigit, ut observavit Spuchetus in Not. ad Epist. Ivonis clxviii juxta novum ordinem, nec *Rotrocius* comes Cenomannensis fuit, ut habet Baronius, sed comes Perticensis. *Hugo* enim *Puteacensis* vicecomes, de quo in ea Epistola sermo, iturus tunc erat Hierusalem, ut ibidem dicitur, et in Epist. clxix juxta novum ordinem iteratur. Hierosolymitanum iter aggressus est, quando *Boamundus* in Gallias venit, ut diserte legitur in Fragmento Hist. a Roberto ad mortem Philippi regis. Venit autem Boamundus in Gallias anno mcv, ut ex infra dicendis constabit. Tunc innumerabilem equitum et militum multitudinem ex ea cduxit, inter quos fuit *Hugo de Puteolo*; quare quæ in eo Fragmento et in Epistolis laudatis Ivonis de *Hugone illo* et *Ivone Curvæville* domino referuntur, spectant ad annum mcv, quo *Ivo Carnotensis* controversiam illam, quæ erat inter Ivonem de Curvæville, vicecomitem Hugonem et Rotrocum Perticensis comitem, de mandato Paschalis II diremit. Jure conquerebantur *Hugo* et *Curvævillanus Ivo*, quod ad Sacrum Bellum iturus *Rotrocius* Perticensis pacem turbaret, et facultates, quæ in protectione Ecclesiæ erant, sibi vindicaret, quia in Synodo Claromontana canone 1, ut videre est apud Baronium anno mxcv, num. 50, *Tregua Dei*, ut vocabatur, confirmata fuerat. De qua *Tregua* a nobis anno mxxxiv actum adversus Baronium, qui eam ibidem negavit, quam tamen postea anno mxcv admisit et probavit, ut utroque anno ab eo dicta inter se conferenti liquebit. Agit de ea querela Ivo Epist. clxviii, clxix, clxx et clxxiii juxta novum ordinem; Baronius enim veterem se-

quitur, quod non raro lectori negotium facessit. Porro *Puteolus* castrum vulgo nunc vocatur *le Puits*, jam inde a Ludovico Crasso dirutum et in vicum redactum, estque in diocesi Aurelianensi, ut videre est apud Hadrianum Valesium in Not. Galliarum, voce *Puteolus castrum*.

10. *Legatio Gallica S. Brunonis episc. Signiensis.* — A num. 15 ad 18. Legatio S. Brunonis episcopi Signiensis, cujus mentio est in duabus Epistolis Ivonis Carnotensis episc., pertinet ad annum MCVI, cum enim Bruno una cum Boamundo directus in Galliam vice Romani Pontificis fuerit, ut tradit Petrus Diaconus lib. 4 Chron. Casin., et Boamundus in Galliam anno MCVI venerit, ab eo Christi anno ea legatio moveri non potest, ut jam observavit Sirmoudus, lib. 2 Epist. Gaufredi Vindocinensis, Epist. XIV, frustra que contendit Souchevus in Notis ad citatam Ivonis Epistolam, ordine CLXVIII, eam anno sequenti datam esse, et S. Brunonem currenti in Gallias missum, quod in ea Ivo asserat *præterita æstate*, Hugonem Album præsentiam Brunonis legati adisse: ex illis enim verbis tantum inferri debet, eam Ivonis Epistolam autumno vel hyeme sequenti scriptam fuisse, cum certum sit, Boamundum cum Brunone legato initio anni MCVI in Galliam venisse; qua de re Ordericus lib. 11 nos dubitare non patitur. Meminit etiam legationis Brunonis Ivo in Epistola CLXVII juxta novum ordinem.

11. *Concilium Romanum.* — Egilberto archiepiscopo Trevirensi, nonis Septembris anni millesimi centesimi primi demortuo, Trevirenses ab Henrico IV imp. petiere dari sibi episcopum, et consentientibus civibus, Bruno, *Francus natione*, ordinatus est idus Januarii anni millesimi centesimi secundi, et Trevirim venit die Purificationis sanctæ Dei Genitricis, uti refert auctor anonymus Historiæ Trevirensis tom. XI Spicilegii Dacheriani, ex Codice Ms. Sancti Cornelii Compendiensis, qui postea Concilium hoc anno Romæ celebratum, et a Labbeo tom. X Concil. præternisum his verbis narrat: « Anno ordinationis sue tertio, mense Martio, Romam profectus Apostolorum et percipiente benedictionis magistri causa, invenit dominum Paschalem papam universali Synodo præsentem, papatus sui jam annum octavum (legendum annum quintum) agentem, a quo honorifice susceptus est, utpote Belgice Gallie primæ metropolis præsul magnificus, etc. Sed quoniam episcopalia, annulum videlicet et baculum, per manum laicam suscepisset, atque quia Ecclesias dedicasset, et clericos necdum pallium consecutus promovisset, multum aspere correptus est, et decernente episcoporum ibi congregatorum Concilio, pontificatus officium deposuit, quod tamen ipsis intervenientibus, quia discretio ejus et prudentia officio et temporis congruens erat, et post triduum, non sine admissorum pœnitentia recuperavit; inuncta ei pœnitentia est, ut quotiens in spatio trium annorum proximorum missarum solemnia cele-

braret, dalmaticis non uteretur: quod ipse humiliter implevit. Deinde accepta tam Apostolici quam totius Synodi benedictione, pallii honore donatus, cum gaudio remeavit. Vivebat hoc tempore anonymus iste, ut ipsemet indicat ad annum MCXXII, quo historiam suam absolvit. Idem brevis refert Brouverus in Annal. Trevir. libro 43, ex alio Chronico Ms. Trevirensi, in quo etiam dicitur Concilium istud Romanum anno tertio sedis Brunonis congregatum esse, ideoque annus Pontificatus Paschalis II papæ recte a nobis emendatus.

12. *Floret Bruno archiep. Trevirensis.* — Bruno « fuit constans in oratione, devotus in elemosynarum largitione, pius in viduarum et pupillorum defensione », inquit anonymus Dacherianus, qui subdit: « Quoniam in rebus commissis sibi strenuissimus erat, defuncto imperatore, communi consilio principum curiæ regiæ vicedominus effectus est, et regnum regniq; hæres Henricus, videlicet hujus nominis V, rex adhuc adolescens, circa annos XX ei committitur, ut et regnum sua providentia disponeret, et heredem regni morum suorum honestate et disciplina, qua ipse præ omnibus pollebat, informaret, quosque in virum perfectum ætate et sapientiâ educatus succrevisset: quem susceptum tandem educavit, usque dum Adelberti tunc cancellarii, postea vero Moguntiensis episcopi detractionibus exasperatus, regni et hæredis providentiam proceribus reconsignavit ».

13. *S. Anselmus per menses XVI Lugduni resedit.* — Sanctus Anselmus, postquam Henrico Angliæ regi, quæ Romæ gesta fuissent per nuntios significavit, Lugduni resedit, eosdem expectans. Verum rex a Willelmo procuratore suo male edoctus, reditus archiepiscopales fisco addixit. Anselmus itaque « suis spoliatus, Lugduni remansit, degens circa sæpe nominatum venerabilem Hugonem, ipsius civitatis antistitem, anno integro et mensibus quatuor », inquit Eadmerus lib. 4 Novorum cap. 1. « Quæ autem mala ex hoc diutino exilio ejus per Angliam quaque emergerint, vel ejusmodi studio illius ipsum exilium, multi reditum illius desiderantes, eaque, minus rei veritatem considerantes, ipsi adscripserint », intelligi dicit Eadmerus ex Epistola cujusdam Anselmo addictissimi ad eum scripta, qua eum urget ut in Angliam redeat, neque existimet se inimicorum Dei contumaciam influxurum: « Etiam, pater sancte, si quispiam incarcerationum et afflictum evisceraret, hoc modo recessisse non deberas. Quanto magis cum nihil horum expertus fueris, nec sedes tua tibi negata sit; sed pro uno verbo cujusdam Willelmi fugere decrevisti, et relicto hoste dilacerandas impiis oves tuas dimisisti », et cætera, quæ fusc scriptor illius Epistolæ prosequitur. Cumque non deessent, qui suo sensu rem metientes, ejus constantiam damnarent, coactus fuit pro se Apologiam scribere, et facti rationem reddere in Epistola XC libri 3 Epistolarum, ad Ernulphum Cantuariensis Ecclesiæ priorem, ubi inter alia scribit:

« Quod autem dicunt, quod non oportuerit eum pro uno verbo fugere; qui suum sanguinem pro ovibus suis et pro Ecclesia Dei debuerit effundere.

14. *Inmerito a quibusdam culpatus.* — Dico quia non est parvipendendum illud verbum, in quo tam gravia mala continentur, qui jam dixi, in quæ sine periculo animæ meæ, et sine detrimento Ecclesiæ mihi commissæ, nullatenus me possum ingerere. Denique non timeo sanguinis effusionem, aut quamlibet corporis mei destructionem aut rerum amissionem. Quæ si personæ meæ evenirent, libenter paterer, propter veritatis assertionem. At nil horum super me cadet: sed Ecclesiam nostram et homines ad eam pertinentes, si cum rege contenderem, gravis oppressio frustra contereret: multitudo vexatorum ad culpam meam arumnas suas me execrando converteret. Melius itaque mihi videtur, ut me absente qualibet tribulatio, si vitari nequit, in Angliā debacchetur, quam per meam præsentiam et tolerantiam, quælibet prava consuetudo in futurum confirmetur, aut multitudo hominum, me adspiciente, propter me, tribulationem se pati lamententur», et cætera quæ fusc prosequitur Anselmus.

15. *Grosulanus Romæ honorifice exceptus fuit.* — Landulphus Junior, cap. 41 apud Poricellum in Monumentis Basilicæ Ambrosianæ, hæc narrat, quæ ut ex consequentibus eruitur, ad præsentem annum spectant: « Interea Grosulanus dominum papam Paschalem gratum sibi invenit. Landulphus vero de Varegate (quem absentem archiepiscopum Mediolanensem canonici eligere voluerant) qui primus in Coritiana fuga fuerat (urbs hæc in limitibus Syriæ ad Euphratem posita, cujus meminimus Guillelmus Tyrinus lib. 10, cap. 24, sed non meminimus me vel in eo auctore vel in alio, aliquid de hac Mediolanensium et Longobardorum clade legisse: Landulphus vero iste hoc anno ex expeditione Syriacâ rediit, et Roma transivit) rediens a Hierosolymis, Romam pervenit: atque in Grosulano jam inde (sc. Roma) dilexit non solum quod actum fuerat Mediolani propter concertationem presbyteri et Grosulani, sed et quam solemniter Romanus Pontifex post alia facta Grosulanum susceperat. Quia ipse quidem papa Paschalis super sedem suam ipsum Grosulanum posuit, et per quot dies idem Grosulanus fuit Laterani, cum supra sedem suam sedere fecit, atque ipsi sedenti cessit, et locum dedit (notabilis circumstantia) suam quoque curiam, et omnes causas Ecclesiasticas a se discernendas et judicandas, ipsi Grosulano ad discernendum et judicandum tradidit.

16. *Plures Mediolani ei adhaerent.* — « Sed tamen Landulphus ille de Varegate, veniens Mediolanum, non presbyterum (nempe Liprandum) nec ejus legem directe contempsit, sed clero et populo Mediolanensi promittens deponere Grosulanum ab omni Ecclesiastico officio juxta canonum rationem, inquit: Cur de lege presbyterii (nempe Liprandi) et Grosulano confenditis? En vobis cer-

tissime dico, et per Joannem Vicomercatensem Grosulano mando, quod ego apud dominum papam Paschalem, ejusque curiam vel Synodum, certis cum rationibus et justis et sanctis canonibus comprobabo, illum non posse subsistere in numero episcoporum vel presbyterorum, aut etiam in aliquo ordine clericorum. Clerus vero et populus huic authentico viro, et secundum quamdam novitatem canonicæ Sancti Nazarii præposito, et majoris Mediolanensis Ecclesiæ ordinario, credulus, una cum Grosulano ad Romanam Synodum pervenire studuit: unde regibus et sapiens capitaneus Mediolanensium Amygo de Landriano ait: Vos ludriam in aqua negare vultis». Ludria seu lutra, tum in aquis, tum in arido per intervalla degit, et molaribus minutiorum arborum radices ac truncos momento excidit; et Grosulanus ob magnam quæ Romæ florebat gratiam et auctoritatem, erat veluti lutra in aqua. Cætera ad eandem litem pertinentia anno sequenti gesta.

17. *Obitus Petri Aragoniæ Navarræ regis.* — Mortuus est hoc anno Petrus hujus nominis Primus Aragoniæ et Navarræ rex; Sandovalius enim p. 94 notat, in antiquo Ms. Tumbo-Nigro vulgo appellato, legi eum obiisse ÆRA MCLXII, exeunte Septembri; chronographus vero Malleacensis ad hunc Christi annum: « Rex Petrus Aracundie (id est, Aragoniæ) defunctus est, et ei successit Idelfonsus frater ejus», quia nempe filios nullos reliquit. Idelfonsus, Alfonsus etiam vocatus, frater fuit Ramiri monachi, qui post eum regnavit. Petrus in uno prælio ad Oseam habito, quatuor nigrorum Arabum reges occidit, et paulo post Osea ipsi dedita; indeque Aragoniæ reges eorundem regum capita in insigniis usurpant, ut tradunt historici Hispanici.

18. *Venetorum potentia et divitiæ auctæ.* — Andreas Dandulus in Annal. refert, Venetos primam expeditionem in Terram-Sanctam cum classe ducentarum navium suscepisse anno MCCCXVII, et secundam currenti anno, ipso duce Ordelapho Phabetro classem ducente. Is diu in Palestina moratus est, et Veneti urbium expugnationum participes facti, coloniis ibi relictis, merces Orientales in Europam, et Francos peregrinos in Asiam transfretando, duplicem continuatumque quantum percipiebant, Navigationem vivente Mexio imperatore prosequentes, commoda quæ olim illis communia cum cæteris nationibus erant, ex singularibus privilegiis ejusdem imperatoris auxere, exindeque navium numero crescente, prolatoque in Asiam dominio, opes ampliarunt, Venetorumque nomen apud externas nationes celebre evasit, et in mari Mediterraneo cæteris nationibus præcellere cœpit, ut narrat Lucius in Historia Dalmatiæ, lib. 3, capp. 4 et 10.

19. *Gesta in Palæstina.* — Balduinus Hierosolymorum rex, qui anno superiori Achou, Ptolomaidam appellatam, frustra obsidione cinxerat, eandem iterum hoc anno obsedit: «Ad quam», inquit

Fulcherius in Hist. Hierosolym. lib. 2, «venerunt Januenses cum classe LXX navium rostratarum». Post viginti dies civitas cruce signatis valde necessaria, *quoniam inest ei portus valde utilis*, in potestatem Christianorum venit. Hanc expeditionem

refert etiam Elmacinus, lib. 3 Hist. Saracenicae cap. 9, aitque eam contigisse anno Hegiræ cxcvii, eique interfuisse Genuenses cum navibus supra nonaginta, ideoque hoc Christi anno, quo et eamdem memoral chronographus Malleacensis.

PASCHALIS II ANNUS 6. — CHRISTI 1105.

1. *Henricus filius a patre descendit catholicam fidem restitutus*. — Jam vero Redemptoris millesimus centesimus quintus Indictione decima tertia annus adest, idemque retributionis jure dicendus voce Prophete¹, quo Henricus imperator, qui per tot annos Romanum Pontificem legitimum persecutus est patrem, filium suum itidem nominatum Henricum ab imperio patitur depulsorem. Quod autem, quos suæ hæresis reliquit successores, eosdem quoque habeat defensores : nos rem gestam ad vitandam invidiam, et calumniam propulsandam, non ab alio petemus quam a Conrado Urspergensis abbate, quem anno superiori Hierosolymis in Germaniam redeuntem vidimus; et quæ ob oculos habuit præsens existens scripsit, auctor aliqui in Germaniæ imperatores propensior, et in Romanos Pontifices parum æquus : ut nulla de eo possit esse suspicio, in gratiam Romanæ Ecclesiæ esse mentitum. Accipe igitur quæ hoc eodem anno gesta esse ipse sic scribit, a Natali die Redemptoris annum præsentem auspiciatus.

2. «Anno Domini millesimo centesimo quinto, dum imperator Henricus Natalem Domini Moguntia celebrat, Henricus filius ejus, nominis illius Quintus rex dictus, rebellionem adversus patrem in Bajoaria parat, machinantibus scilicet Dieboldo marchione, Berengero comite et Ottone quondam nobili viro, sibi quippe materna stirpe cognato; quorum consilio et adjutorio ante paucos dies a patris latere discesserat. Primo quippe hæresim præscriptam anathematizans, Apostolicæ Sedis Pontifici debitam profitetur obedientiam, indeque fœderatis sibi Noricis principibus, atque ab Alemannia, necnon Orientali Francia nonnullis nobilibus, ad Saxones convertitur. A quibus honorifice susceptus, et in Quintileneburg Pascha celebrans, in brevi

universis Saxonie civitatibus potitus, ab optimatibus est dignitate regia satis honoratus : consilio tamen atque ministerio Ruothardi (Buothardi) Moguntini, atque Gebehardi Constantiensis episcopi, responsalium scilicet domini Paschalis papæ, totam Saxoniam Romanæ Ecclesiæ communioni reconciliavit : Episcopis vero atque clericis conventum generalem in villam regiam, quæ Northusum dicitur, quarto kalendas Junii, ubi super Ecclesiasticæ institutionis jam depravata disciplina tractaretur, indixit.

3. «In quo Concilio super sententiis instantibus, Patrum decretis primo relectis, quæque poterant ad præsens laudabiliter corrigebantur; quædam vero, quæ et graviora videbantur, ad Apostolicam audientiam differebantur. Simoniaca quippe hæresis Patrum consuetudine condemnata, Nicolaitarum quoque fornicaria commixtio ibidem est ab omnibus abdicata : jejunium mensis Martii hebdomada Quadragesimæ, jejunium vero mensis Junii, in ipsa hebdomada Pentecostes Romano more celebrandum, a præscriptis præsulibus Apostolica auctoritate indicitur, et pax Dei confirmatur. His vero, qui a pseudoepiscopis fuerant consecrati, per Catholicam manus impositionem reconciliatio proximo jejunio danda fore promittitur. Vidimus inter hæc, quod silentio præterire non possumus, regem Henricum non modicam bonæ indolis spem, magna simul humilitate et auctoritate coram omnibus prætendentem. Nam cum servorum Dei conventui nonnisi vocatus interesse vellet (ingens enim ibi cum episcopis et clericis, etiam abbatum atque monachorum Ecclesiasticam sitiens unitatem turba confluerat) tandem in aljecto productus habitu, locoque stans editiori, omnibus juxta principum decreta suas leges atque jura rationabiliter innovavit; si qua vero irrationabilia rogabantur, mira, ac ultra suos annos prudenti responsione et avila

¹ Isai. xxiii.

magnanimitate confutavit : in omnibus his , et sibi-
met miro modo servans adolescentiæ verecun-
diam, et Christi sacerdotibus dignam exhibens reve-
rentiam.

4. « Inter hæc obortis lacrymis, ipsum regem
cæli cunctamque militiam cæli testabatur, se nulla
regnandi cupiditate paternum sibi regnum usur-
pare, neque dominum et patrem suum a Romano
deponi imperio exoptare, imo debitam pertinaciæ
et inobedientiæ ejus semper compassionem exhi-
bere ; sicque sancto Petro suisque successoribus
lege Christiana suljici veliti, sive regno cedere, sive
serviliter ipsi se subesse promisit. Quod auditum
omnis multitudo collaudans, lacrymas simul et
preces tam pro patris conversione quam pro filii
prosperitate fundere coepit, voce magna *Kyrie
eleison* declamans. Eadem hora Flo Bildinishei-
mensis, et Henricus Paderburnensis, ac Fridericus
Halberstadensis presules, vestigii metropolitani
prostrati, ipsius atque regis stantis totiusque præ-
sentis Ecclesiæ testimonio Apostolicæ sese dederunt
obedientiæ : quorum etiam commissa Apostolico
nihilominus iudicio reservantur, sub officii sui
tantum suspensione.

5. « His rite dispositis, rex idem Pentecosten
Meresburg celebrans, Henricum Magdeburgensi
Ecclesiæ dudum designatum archiepiscopum, sed
ab imperatoris fidelibus repulsum, consecrari fecit.
Nec multo post expeditionem contra Moguntiam
movit, expulsum inibi pontificem restitutum ». De
cujus restitutione hæc inferius : « His etiam diebus,
venerabilis Buother archiepiscopus, a Thuringia, in
qua per annos octo tyrannicam declinaverat rabiem,
præsidio Catholicorum principum deductus, ma-
ximo nobilis Moguntiae tripudio cathedræ suæ re-
stituitur ; sicque tam populum quam clerum Apo-
stolicæ reconcilians Ecclesiæ, ab universis, non
solum ut pater jam grandævus, sed etiam velut ex
mortuis redivivus omnimodis excolitur ». Ilæc de
restitutione archiepiscopi Moguntini, agitque de
aliis, deque apparatu bellico, et tam filii quam
patris exercitibus proxime, flumine tantum medio,
ad congressum paratis, cum agentibus principibus
paciæ studiosis, absque pugna digressis, hæc a filio
Henrico dicta, idem auctor enarrat : « Grates, in-
quit, o boni commilitones, affectui circa me vestro
summopere refero ; unicuique vestrum par pari re-
ferre, si res exigerit, non abnuo : nemo tamen in
hoc me sibi velit vel credat fore foederatum, ut
dominum et patrem meum per se gloriæ occi-
sum, vel unquam æstimet occidendum. Ego quidem
Christianis mihi legibus subarrhatum regnum,
ut hæres et successor Augusti tenere, si tamen re-
rum omnium dominatori placuerit, cupio ; patri-
cida vocari vel esse nolo. Quod si pater meus
Apostolicæ se subiecerit obedientiæ jugo : ego mox
in his quæ sua duntaxat mihi clementia conces-
serit contentus ero, interim me non impugnato-
rem esse patris, sed paterni regni propugnato-
rem noveritis ». Ita quidem præparationem cordis ejus

audiens Deus, noluit sanguine patris quantumlibet
impii cruentari filium justitiæ vindicem ac pietatis
cultorem ; sed eum ipse repentina ægritudine e
medio sustulit anno sequenti, quo, eodem auctore
prævio, reliqua sumus prosecuturi. Qui et enarratis
pluribus de aliis episcopis Catholicis in sedem re-
stitutis, cæctis schismaticis, ad postremum relatis
quæ ad finem anni hujus sunt gesta de filii cum
patre colloquio, hæc ait ad excusationem ipsius :
« Bingæ, circa idus Decembris, Henricus filius pa-
trem reperit, ore ad os de anathematis vinculo,
cæterorumque insolenter in Republicam com-
missorum, ordine quidem præpostero, sed neces-
sarie commutato, filius patrem commonuit, obe-
dientiæ debitum, si respicere duntaxat dignetur,
repromisit. Senior has et hujusmodi complures
sententias ad audientiam optatum, et senatum-
consultum instanti curiæ distulit, etc. » Narrat de
convento Moguntino anno sequenti, nosque eo loco
quæ sunt ejus anni dicemus.

6. *Henrici imperatoris litteræ ad Paschalem
papam.* — Quod autem Henricus filius nullam
majorem causam habuerit patrem exagitandi, quam
quod ab Ecclesia Romana toties excommunicatus,
in eadem execratione obstinato animo permaneret :
Henricus senior consilium inivit, ut Paschalem sibi
amicum redderet, ejusque animum pertentaret. Ad
quem secreto misso nuntio, has litteras scripsit :
« Henricus imperator Romano Pontifici Pas-
chali.

« Si illa inter nos pax esset et concordia, quæ
inter nostros olim et tuos fuit antecessores, quæ
inter nos etiam et Nicolaum et Alexandrum, et viros
Catholicos et religiosos Romanos Pontifices, plena
charitate et integra devotione viguit ; mandarem
tibi quidquid filius patri : sed distulimus, expectan-
tes et recognoscere desiderantes, si in beneplacito
Dei sit, nos in charitate et amicebilibiter posse
convenire, et Ecclesiam suam nostris temporibus, no-
stro labore, ipso cooperante, in statum redire uni-
tatis pristinae. Hoc quamquam dudum, Deo teste,
desideravimus, tamen cognita nimia eorum auste-
ritate, qui in Romana erant Ecclesia, non utile
nobis visum est vel competens, eos hæc de causa
convenire : quia magis videbantur nos prosequi
odio et indignatione quam zelo justitiæ, vel etiam
quam velle nos amplecti dulcedine charitatis ad
profectum Ecclesiæ. Effectus hoc probat. Quia cum
ipsi regnum hæreditario jure nobis collatum tem-
pore religiosorum virorum Romanorum Pontifi-
cum pacifice a nobis diu possessum, contra nos
commovere studeant et armare, multa inde orta est
strages populorum, tam corporum, quam etiam,
quod magis dolendum est, animarum. Nunc quo-
que filius noster, quem tam vehementer dileximus
ut usque ad solium regni nostri exaltarem, eodem
veneno infectus, consilio quorundam perdidissi-
morum et perjuratorum sibi adherentium, insur-
git in nos, postpositis omnibus sacramentis, qui-
bus se nobis obligaverat ; posthabita omni fide et

justitia, tantum ut Ecclesiarum bona et regni libere valeant perdere, rapere, et inter se dividere. Et cum multi nobis persuadent absque dilatione in eos vi et armis esse ulciscendum, maluimus tamen adhuc differre, ut tam in Italico, quam in Teutonico regno sciatur manifeste, quod nec nostræ sit voluntatis nec culpæ, si tandem inviti et coacti in eos insurrexerimus, quæcumque mala, vel infortunia, vel populorum strages inde evenierint.

7. « Præterea, quia audivimus te hominem discretum, Deum timentem, charitati insudantem, sanguinem hominum non sitire, rapinis et incendiis non gaudere, unitatem Ecclesiæ super omnia diligere: consilio et suggestione principum nostrorum millius tibi nuntium istum cum legatione nostra. Per hanc quippe volumus cognoscere, si est tibi voluntati, te nobis in charitate et amicaliter, et nos uniri tibi, salvo nobis honore regni et imperii, et totius nostræ dignitatis, sicut et avus et pater noster, alique antecessores nostri habuerunt; servato etiam tibi a nobis honore Apostolicæ dignitatis, sicut antecessores nostri tuis antecessoribus servaverunt, et nos præfatis pontificibus. Quod si placuerit tibi paterne nobiscum agere, et eam quam mundus dare non potest, pacem integre nobiscum componere; mitte nobis familiarem nuntium tuum cum privatis litteris tuis, et secreta legatione cum hoc nuntio nostro, ut hoc modo indubitante possimus cognoscere omnem de hac re certitudinem voluntatis tuæ. Quæ cognita, mittemus tibi de majoribus principibus nostris, quales et nos tibi mittere, et debeat a nobis recipere, ad tantam rem componendam, per quos exclusa omni ambiguitate, manifeste possis cognoscere, nos veraciter velle complere quæ tibi mandamus secreta. Præterea, quæ hic scripta non sunt, commissimus huic fidelissimo nostro nuntio quædam tibi dicenda, quibus tam veraciter quam scriptis credas ». Hactenus Henricus imper. ad Paschalem Pontificem. Reliqua vero in annum sequentem idem auctor gesta refert, quæ die Natali Domini fieri contigerunt, utpote qui a Natali Christi die annum incipit. Sed cum nos a kalendis Januarii, more majorum, annum incloare consueverimus: ad finem anni hujus hic sunt collocanda, quæ ab eo vel aliis sub anni sequentis exordio facta ponuntur; ait igitur idem qui supra Urspergensis:

8. *In conventu Germanico Henricus imperator se abdicat filio tradens regnum, unde legatio ad papam.* — « Tantus apud Moguntiam factus est in Natali Dominico totius regni Teutonici conventus, quantus per multa annorum curricula nunquam est visus. Referunt enim qui aderant, quinquaginta duos ibi tunc optimates vel eo amplius affuisse, adeo ut solus dux Saxonie Magnus nomine, quem jam gravior ætas impediabat, notaretur defuisse. Ibi supervenientes Apostolicæ Sedis legati, episcopus, scilicet Albanus cum Constantiensi, sententiam anathematis in Henricum Seniore, dictum impe-

ratores, a tot sibi succedentibus Apostolicis sæpius sæpiusque promulgatam scriptis simul et dictis testificantes, universam multitudinem, imo totam toto orbe diffusam Ecclesiam ab ejus communione, Christi et beati Petri auctoritate multis jam annis sequestratum confirmabant. Qua de causa, dum ipse se de castello quo manebat, Moguntiam exhibere tentaret, principes propter cavendum tumultum vulgi, suæ potius quam filii parti favere solentis, ipsi Ingeheim occurrerunt; tandemque generali illi circumvenientes consilio, usque ad reatus confessionem satisfactionisque professionem perducunt.

9. « Cui cum legati communionem, seu pœnitentiæ modum, absque generalis Synodi et Apostolicæ discussionis censura reddere ad præsens non possent, ipse partis utriusque consiliis annuens, regalia vel imperialia insignia, crucem scilicet et lanceam, sceptrum, globum atque coronam filii potestati tradidit, prospera illi imprecans, illum primatibus multo fletu commendans, et ex tunc juxta summi sacerdotis totiusque Ecclesiæ decreta, suæ consulationum animæ promisit. Hoc ordine Henricus, illius nominis Quintus rex, primum a patre, deinde ab universæ Germaniæ principibus in regem jam secundo electus, ab Apostolicis quoque legatis per manus impositionem Catholice confirmatus, acceptis tam ab episcopis quam laicis, juxta morem patriæ, sacramentis, regnare cœpit ». Qui favent Henrico patri, ut anonymus, qui ejus inhærebat lateri, quique ipsi erat a secretis, scripsitque paulo post mortem ejus Vitam, seu funebre Encomium ejusdem Henrici, captivum tentum a filio patrem, vique coactum eo modo se ab imperio abdicasse, filii impietatem exaggerans, tradit.

10. Quid vero tunc cum Richardo Albanensi episcopo Apostolicæ Sedis legato sit gestum, secundum ea quæ per Urspergensem sunt enarrata, idem auctor sic ait: « Sed et pedibus Apostolici legati advolvitur, orans et obsecrans ut se a banno solveret, et communioni Ecclesiæ redderet. Laici misericordia moti veniam dabant; legatus autem domini Apostolici absolutionem negabat, asserens non hoc sue potestatis esse, oportere ab ipso Apostolico absolutionis gratiam ipsum expectare. Quid multa? Abrenuntiata imperiali dignitate, privatus discessit, et ad quandam civitatem, quam filius victui illius permiserat, recessit ». Hæc ipse. Sed quomodo facti pœnitens, rursus ad arma paranda convertitur, dicetur suo loco anno sequenti; quæ autem sunt reliqua ejusdem conventus, Urspergensis sic narrat:

11. « Relatis igitur coram rege cunctisque totius Germaniæ optimatibus et præsulibus, omni- que clero simul et populo, legationibus Romanæ Sedis, Ecclesiarum regni istius commaculatione diversa et inveterata, contra emendatione ab universis unanimiter promissa, placuit tam regi quam primoribus, ad sanctam matrem Romanam Eccle-

siam tantos ac tales a partibus istis legatos transmitti, qui et de objectis rite rationem reddere, et de incertis sagaciter investigare, ac per omnia utilitatibus Ecclesiasticis sapienter consulere sint idonei. Separantur in hoc opus viri spiritu sapientie pleni, dignitatibus, natalibus et elegantia, seu divitiis præcipui, in illaque secundum Deum sive sæculum veneratione insignes, a Lotharingia Bruno Trevirensis, a Saxonia Henricus Magdeburgensis, a Francia Otto Babenbergensis, a Bajoaria Eberardus Eichstatisensis, ab Alemannia Gebhardus Constantiensis, a Burgundia Curienensis episcopi: nonnulli etiam nobiles de latere regis laice professionis; idque inter cætera suscipiunt in mandatis, ut si fieri possit, domini Apostolici præsentiam Cisalpinis partibus impetrent exhiberi». Ille est legatio in eo conventu decreta, quam tamen anno sequenti mense Februarii protectionem instituisse, ex iis quæ idem auctor inferias tradit possumus intelligere. Agemus igitur de ea suo loco.

12. *Ossa Guiberti antipape effossa et in flumen projecta.*— Hoc præterea anno, qui numeratur quintus ab infelici exitu Guiberti antipape (ut testatur Urspergensis abbas), ejus ossa, quæ Ravennæ sepulta fuerant, exhumata, in fluenta projecta fuerunt. De his enim idem auctor, rerum præsentium scriptor, hæc habet anno sequenti: « Jam enim exaltatis sibi divinitus Ecclesia Romana cornibus, ad incutiendum timorem cunctis usquequaque schismatum membris, etiam capitis ipsius ossa, Guiberti scilicet dicti pape, de sepulchro suo, quod per quinque jam annos in Ecclesia Ravennensi possederat, projici fecerat, universaque ejus instituta, ut verè non Apostolici sacerdotis, sed apostatici invasoris annullari decreverat ». Hæc ipse. Porro ut ista decernerentur insolita, eam affert Wilhelmus Bibliothecarius causam, quod scilicet, qui adhuc ejusdem pseudopape studiosi remanserant, quo minus pollerent viribus, eo amplius mendaciis niterentur, spargerentque in vulgus falsas visiones ostensas in sepulchro ipsius, nimirum visas illic noctu splendere facellas civitatis missas, indices ejus apud Deum receptionis; quibus cum traducere facile possent simplices, atque seducere imperitum vulgus, placuit ut ejusmodi decerneretur ei, pseudoprophetis¹ illatum aliquando supplicium, ut ossa ipsius exhumarentur, non tamen ut illorum effossa cremarentur, sed projicerentur in flumen. Porro exemplum de ossibus Guiberti imitati sunt

anno sequenti Catholici in Germania, cum imperatore in ordinem redacto, acceperunt ex novo principe vires; de quibus ista Urspergensis abbas: « Denique in tantum divina legis subito zelus effervuit, ut etiam ipsa cadavera pseudoeπισcoporum ab Ecclesiis eliminarentur»: utpote quod indigni censerentur Catholicæ Ecclesiæ sepultura, qui viventes eidem Catholicæ Ecclesiæ minime communicassent. Al de his hactenus; reliqua in sequentem quo sunt facta rejicimus annum.

Quod ad res Orientales pertinet, moritur hoc anno laudatissimus princeps Raymundus¹, comes Tolosanus, vir pietate sicut et armis insignis. Quo pariter anno Balduinus rex, prævio ligno sanctissimæ Crucis, ingentem divino auxilio comparavit sibi victoriam; de quibus omnibus tu consulas Tyrium.

13. *Obitus Petri Anagninæ episcopi et ejus canonizatio.*— Hoc eodem anno, S. Petrus, Anagninæ episcopus, ejus præclare res gestas scripsit S. Bruno Signinæ episcopus, ex hac vita migravit, tertia die mensis Augusti: quem virtutibus insignem, miraculis clarum, anno decimo sui Pontificatus Paschalis papa inter sanctos refudit, ut ejus Diploma significat, quod sic se habet:

14. « Paschalis, servus servorum Dei, venerabilibus fratribus episcopis Anagninæ et aliis per Campaniam constitutis, salutem et Apostolicam benedictionem.

« Dominum excelsum habentes præ oculis, qui in amicis suis laudatur et benedicitur, et considerantes propterea strenuæ probatæque vite merita, quibus vir sanctus Petrus, quondam Anagninæ episcopus, de regula monachorum assumptus, in pastoralis officio pure, simpliciter, solerti vigilantia et exemplo Deo deservivit: admirantes etiam miraculorum insignia, quibus sanctum suum ante et post obitum divina gratia decoravit, prout per Brunonem Signinensem episcopum fideliter annollatur, et usque ad nostra tempora decorare non desinit: auctoritate præsentium nobis licere volumus et mandamus, quatenus tertio nonas Augusti diem natalem ejusdem confessoris et præsulis memorandi sanctorum Catalogo congrue celebrem recolatis, quatenus in presenti gratiam, et in futuro, opitulante divina clementia, piis ejus intercessionibus mereamur gloriam sempiternam. Dat. Signinæ, secundo nonas Junii, Pontificatus nostri anno decimo ».

¹ 4. Reg. xxiii.

¹ Wil. Tyr. l. xi. c. 23.

Anno periodi Græco-Romane 6598. — Anno Ære Hispan. 1143. — Anno Hegire 499, inchoato die 12 Sept., Fer. 4. — Jesu Christi 1105.

— Paschalis II papa 7. — Henrici IV reg. 50. imp. 22. Alexi Comneni imp. 25.

1. *Henricus rex adversus Henricum imp. patrem rebellat.* — A num. 1 ad 12. Baronius pluribus refert rebellionem *Henrici V* adversus *Henricum IV* imper. patrem suum, ex Urspergensis abbate; sed num. 1 perperam ait, hunc anno superiori Hierosolymis in Germaniam rediisse, cumque quæ videbat scripsisse, ut enim anno men. n. 1 ostendimus, historicus iste nondum hoc tempore natus erat, et more quorundam aliorum, exscribit quæ auctores cœtanei dicunt se vidisse aut audisse. Vide quæ ibi de hoc loquendi modo in medium adduximus. Porro Gesta hoc anno accurate narrat Urspergensis, qui annum a Natali Christi incipiens ait, *anno Domini mcv* (qui nobis tantum erat mcv), dum Henricus imp. Natalem Domini Moguntie celebraret, Henricum filium ejus adversus illum rebellasse, Apostolicæ Sedis Pontifici debitam professum esse obedientiam, in *Quintilincburg* Pascha celebrasse, et ab optimatibus dignitate regia honoratum fuisse. Postea indixit Henricus rex Conventum generalem in hebdomada ante Pentecosten, in Thuringia celebrandum « in loco, qui dicitur Northusum », inquit chronographus Hildesheimensis, in quo inter alia statutum « uxoratos clericos nullum divinum officium celebrare ». Vocatur hoc Concilium *Quintilincburgense*, seu *Northusense*, habitumque pro reformandis moribus Ecclesiæ. Trithemius, in Chron. Hirsaugiense, vocat illud Concilium Generale episcoporum et abbatum.

2. *Henricus a filio imperio deponitur.* — Narrat postea Urspergensis bellum inter *Henricum* patrem et *Henricum* filium gestum esse, et in Natale Domini anni mcv, qui nobis est mcv, factum esse apud Moguntiam totius regni Germanici conventum, ubi Apostolicæ Sedis legati, episcopus sc. Albanus cum Constantiensi, sententiam anathematis in Henricum imp. alias latam confirmarunt. Is vero consilio principum imperialia insignia filii potestati tradidit. « Hoc ordine Henricus, illius nominis V rex, primum a patre, deinde ab universæ Germaniæ principibus in regem jam secundo electus, etc. regnare cœpit », inquit Urspergensis. Legendus chronographus Hildesheimensis, qui fusc hæc omnia narrat.

3. *Moritur Raimundus comes S. Ægidii.* — Ad num. 13. Hoc anno mortuus est *Raimundus comes Ægidii*, qui per plures annos de comitatu Provinciæ cum Gilberto Provinciæ comite decertavit, quique *comes Provincialium* vulgo appellatus fuit. Mortuus est, inquit Fulcherius lib. 2, « in oppido suo ante Tripolim civitalem, pridie kal. Martii ». Is valde laudatur in Veteribus Assisiis Hierosolymitanis, Bituricis anno mxcx in fol. publicatis, lib. ultimo cap. 5. Ei successit in comitatu Tripolitano a se capto nepos ejus *Guillelmus-Jordanus*, filius Bertrandi, cui comitatus Tolosanus obtigit, ut legere est apud Catellum, lib. 2 Hist. comitum Tolosæ. Porro Raimundus iste ordine iv est inter comites Tolosanos hujus nominis.

4. *Concilium II Lateranense sub Paschali II.* — Concilium II Lateranense, Paschali II sedente habitum, Labbeus tom. x Concil. et Alfordus in Annal. Eccles. Angl. præcedenti collocant; sed illud ad præsentem pertinere, ad secundum nempe commemorationis S. Anselmi in urbe Lugdunensi, disertè docet Eadmerus lib. 4 Novorum : « In secundo, inquit, anno adventus nostri a Roma Lugdunum, ipse papa, coacto Lateranis generali Concilio, comitem de Mellento et complices ejus, qui regem ad investituræ flagitium, sicut dicebatur, impellebant, necnon illos qui ab eo investiti fuerant, a liminibus sanctæ Ecclesiæ judicio Spiritus sancti repulit ». Recitat postea Eadmerus litteras, a Paschali II ad S. Anselmum de hoc Concilio et excommunicatione in præfatum comitem lata datas, quas Pontifex his verbis claudit : « Regis vero sententia ea ex causa dilata est, quia suos ad nos nuntios in præteritæ Paschæ (anni sc. Christi mcv) tempore debuit destinare. Date Lateranis VII kal. Aprilis ». Quare Concilium Lateranense eo circiter die indictum. Nuntii quorum meminuit Paschalis II, ab Henrico rege anno superiori Romam missi sunt, cum quidam regi insisterent ut Anselmum revocaret : « Unde nobis », inquit Eadmerus, « adhuc Lugduni degentibus, nuntii Romam ab ipso rege directi sunt, qui modis omnibus elaborarent Apostolicum ad hoc deducere, ut Anselmum Angliam redire et regiæ voluntati juberet in cunctis subdi et obedire. Ad quod dum minime illum flectere pos-

sent, sicut venerunt, infecto negotio reversi sunt ». Quæ refert Eadmerus immediate antequam de Concilio Lateranensi verba faciat. Horum ergo nuntiorum expectationem ab Henrico rege excommunicando abstinuit Paschalis II; sed ubi vidit regem tempus et Apostolicam Sedem inutili tergiversatione fallere, voluit Anselmum in eum surgere, ut post narrata quæ gesta sunt in Concilio Lateranensi exponemus.

5. *Agitata in eo causa Grosulani et Liprandi.* — Venere ad Concilium Lateranense Grosulanus archiep. Mediolanensis et Liprandus presbyter; ille ut in dignitate confirmaretur, hic ut illud impediret, uti narrat Landulfus Junior cap. 14, apud Puricellum in Monument Basil. Ambrosianæ c. 9: « Grosulanus nihil moratus, ad pedes Apostolici provolutus sibi et suis iterum refugium suscepit: presbyter vero Liprandus, cum jam senex esset, et duo anni post legem ab ipso factam (hoc est, conditionem quam ipse obulerat divini iudicii per ignem) transiissent, provocatus et compulsus Romanam ad Synodum venit. In qua prædictus Landulfus de Varaglate, qui post ipsam Synodum fuit Astensis episcopus, neque ante papam, vel ejus curiam vel Synodum, adversus Grosulanum verbum ignominiosum protulit. Sed presbyter Liprandus causam, quam adversus Grosulanum habuit, pure notificavit: et Apostolicus non legem per ipsum presbyterum datam, et sacramento et igne notatam laudavit, sed gratiam et officium presbyteratus in illo firmavit, et dixit: Si presbyter juraret, et duodecim sacerdotes cum illo jurando affirmarent, quod Grosulanus coegit ipsum presbyterum ire ad ignem; sustineret Grosulanus depositionem. Atque super hoc spatium consulendi per unam noctem dedit ».

6. *Grosulani in archiepiscopatum Mediolani restituit.* — Tum Landulfus cap. 12 subdit: « Nocte autem illa transacta, Apostolicus coram Synodo a Grosulano suscepit sacramentum, in quo sacramento Grosulanus sic ait: Ego Grosulanus, gratia Dei archiepiscopus, non coegi dictum Liprandum presbyterum ire ad ignem et facere iudicium. Tunc et Arderiens, Laudensis episcopus, jurando firmavit idipsum. Azoni vero Aquensi episcopo proferenti idipsum, jurare ex parte Grosulani ab Apostolico fuit condonatum. Grosulanus itaque accessit, ut acciperet gratiam restitutionis. Et cum ad accipiendum restitutionem accederet, gabata, et pastoralis virga, quam ipse Grosulanus sua tenebat manu, coram Synodo ad terram corruit. Quod signum quampluribus fuit indicium, quod sacramentum ejus fuit sacramentum mortis. Veruntamen nec papa nec ejus Synodus ad hoc tunc respexit: sed ipsum Grosulanum Azoni Aquensi, et Arderico Laudensi, atque Jordano de Clivi, et ceteris Mediolanensibus, tam clericis quam laicis, verum etiam episcopis ejusdem Ecclesie suffraganeis, volentibus eum habere in archiepiscopum, licet otiose, restituit », ubi otiose restitutum idem

significat ac *frustra*, quia non obstante hoc iudicio, Grosulanus archiepiscopatu pacifice frui non potuit. « Grosulanus vero », inquit Landulfus, « gratia Guillelmi abbalis monasterii S. Ambrosii, et Andrea Mediolanensis Ecclesie primicerii, et aliorum multorum prudentium, tam clericorum quam licorum, nec sedem, nec aliquam munitionem archiepiscopatus post legem primam a presbytero factam, sive restitutionem a Synodo celebratam, habuit ». In Appendice ad tom. x Concil., pag. 1833, dicitur hæc gesta esse in Concilio Romano anno men coacto. Verum Landolphus laudatus, cap. 12, apud Puricellum in Monument Basil. Ambros. n. 302, demonstrat hanc Synodum diversam non fuisse a Lateranensi, cum ait: « Putavi non prætereundum silentio, quod durante lite Grosulani, scilicet millesimo centesimo quinto anno, septimo idus Maii, inventæ sunt reliquie pretiosæ in Ecclesia S. Mariæ ad Portam. Unde ordinarii cum universo clero statuerunt festum solemne illa die in Ecclesia prædicta ».

7. *Per annos vii Grosulanus pacifice in dignitate mansit.* — Quæ postea Mediolani contigerint, refert ibidem Landulfus: « qui quidem presbyter ille Liprandus, licet occasione hujus restitutionis foret suspectus Grosulano restituto, et restitutum suscipientibus, tamen in Ecclesia S. Pauli suaque domo fuit sacerdos idoneus in suo officio per septem annos », ubi Landulfus tantum denotat *Liprandum*, non obstante inimici sui restitutione, remansisse in pacifica possessione sue Ecclesie et beneficii per septem annorum spatium, id est, usque ad mortem, quæ durante septennio, in Valle Tetina moratus est, ut suo loco dicitur. Puricellus loco laudato Landolphum interpretabatur, quasi toto illo temporis spatio *Liprandus* Mediolani mansisset, et ex ea urbe egressus non esset, et hoc pacto universam tam historiam quam chronologiam turbabat. Videtur tamen hanc opinionem retractasse, ut patet ex illis quæ lib. 4, cap. 90, de SS. Arialdo et Herlembaldo statuit. *Grosulanus* usque ad annum mxi Mediolani a suis sectatoribus, qui non pauci erant, agnitus, substitit eo tranquillius, quoniam nullus ei in ea dignitate competitor erat. Sed redeo ad S. Anselmum.

8. *Colloquium S. Anselmi cum Henrico rege in Norwennia.* — « Postquam Anselmus intellexit », inquit Eadmerus lib. 4 Novorum, « se amplius frustra Lugduni Romanam opem postulari », præsertim cum jam sæpenumero ipsi Romanæ Sedis Antistiti legatos et litteras de sui negotii consummatione transmisisset, consulto Hugone Lugdunensi archiepiscopo, Lugduno Franciam petiturus decessit. Cum ergo ad *Charitatem*, quæ cella Chiniacensis canobii est, comitissem Blesensem nomine *Adelam*, apud castrum suum Blesense quod ad Ligerim flumen Aurelianum inter et Turonis situm, infirmari accepisset, eam visitare voluit, quod ea erga se valde nimifica fuisset; verum inventillam ferre convaluisse. « Anselmus

comitis causam redditus sui Franciam ab ea inquisitus, innotuit; et quia fratrem ipsius, Henricum videlicet regem Anglorum, pro injuria quam Deo sibi jam per biennium et ultra fecerat, excommunicare veniebat, non celavit. Quod illa audiens, ut eum cum fratre in concordiam reduceret, operam dare disposuit. Rex per legatos comitis de *Anselmi* adventu monitus eam deprecatus est, ut eum sibi in Normanniam duceret, pollicitus se in multis voluntati ejus, pacis gratia condescensurum. Tandem « habito inter eos colloquio, Anselmum rex de redditibus sui Pontificatus revestivit, et in pristinam amicitiam utriusque recepti sunt ». Sed cum de omnibus conditionibus inter se convenire non possent, ex conducto decretum fuit, ut Romam nuntii mitterentur. « Itaque autem inter ipsos acta sunt anno tertio exitus nostri de Anglia, undecimo kalendas Augusti », inquit Eadmerus, ex quo haec excerpta.

9. *Obitus Guitmundi archiepisc. Aversae.* — Ad hunc circiter annum pervenit *Guitmundus* episcopus Aversanus, quem Ordericus lib. 4, pag. 524 et seqq., ubi pluribus de eo agit, ait « Ecclesiam sibi commissam diu rexisse ». Guillelmus Angliæ rex cum ad se accersivit, sed *Guitmundus* qui in Neustria natus erat, oblatum sibi Ecclesiasticum Angliæ regimen omnino repudiavit. Ordericus tamen, qui haec narrat, fallitur quando ait, *Urbanum II* eum Ecclesiæ Aversanæ prefecisse; *Guitmundus* enim sedente Gregorio VII jam archiepiscopus erat, ut ostendit cap. *Si consuetudinem*, apud Ivonem Carnotensem episcopum eidem aequalem, part. 4, cap. 213. *Gregorius III Vinondo episcopo Aversano*, quod et legitur in Decreto Gratiani distinct. 8. Ex eodem capitulo intelligimus *Guitmundum* eo fere tempore quo *Lanfrancus*, ad episcopalem dignitatem evectum fuisse.

PASCHALIS II ANNUS 7. — CHRISTI 1106.

1. *Henricus imp. fuga lapsus litteris declamat in papam suam agens causam.* — Sequitur annus Redemptoris millesimus centesimus sextus, Indictione decima quarta, quo Henricus imperator a filio spoliatus imperio, demum ab ulciscente numine privatur et vita. Sed quæ ista præcesserint, suo narranda sunt ordine. Henricus igitur Senior exutus imperio, e loco ubi constitutus fuerat privatam vitam agere, fuga lapsus, Coloniam primum, inde Leodium venit, ubi benigne exceptus, dum maneret, litteras has dedit sub titulo, ad regem Celtarum, cæterum quas voluit esse patentes, ad commovendos omnes in filium: quæ sic se habent:

2. « Henricus rex regi Celtarum.

« Princeps clarissime, et omnium in quibus post Deum speramus fidelissime, primum et præcipuum inter omnes vos excepi, cui conqueri et deplorare omnes calamitates meas et miseras necessarium duxi, et etiam genibus vestris advolvi, si licet, salva majestate imperii. Primum quidem est quod non solum vobis, sed totius Christianæ professionis hominibus gravissimum ac intolerabile arbitramur, quod de Apostolica Sede, unde usque

ad memoriam nostri temporis, salutariter fructus consolationis, dulcedinis et salvationis animarum oriebatur, modo persecutionis, excommunicationis, et omne perditionis flagellum emittitur; nec ponunt ullum modum sententiæ, tantum ut satisfiat voluntati indiscretæ. Hujus voluntatis suæ intemperantia adeo usque nunc abusi sunt, ut nec Deum, nec quid aut quantum mali inde proveniat pensantes, per se et per suos omnibus modis in nos invehantur, cum obedientiam et omnem subjectionem debitam sæpe obtulerim Apostolicæ Sedi, si tamen honor debitus et reverentia, sicut antecessoribus meis, exhiberetur et mihi. Quid autem intendant, opportunius significabo vobis, si quando optati colloquii copiam Deus dederit nobis. In hac igitur persecutionis et odii sui inflammatione, cum parum viderent se proficere, contra ipsum jus naturæ laborantes (quod sine maximo cordis dolore, sine multis lacrymis dicere non valeo, et quia dicitur, vehementer contremisco) filium meum, Absalon, inquam, dilectissimum, non solum contra me armaverunt, sed etiam tanto furore animaverunt, ut in primis contra fidem et sacramentum, quod ut miles domino juraverat, regnum

meum invaderet, episcopos et abbates meos deponeret, inimicos et persecutores meos sustineret : ad ultimum (quod maxime vellem taceri, aut si taceri non potest, vellem non credi) omnem affectum naturæ abiciens, in salutem et animam meam intenderet, nec quidquam pensi haberet, quomodo vi et fraude ad hanc periculi et ignominie suæ summam aspiraret.

3. « In hac tanta mali sui machinatione, cum essem in pace et in aliqua salutis meæ securitate, in locum qui Confluentia dicitur, in ipsis Dominicis Adventus sanctissimis diebus, ad colloquium evocavit me, quasi de communi salute et honore filius tractaturus cum patre. Quem cum vidi, illico ex paterno affectu tactus intrinsecus dolore cordis mei, ad pedes suos procidi, admonens et obtestans per fidem, per salutem animæ, si pro peccatis meis flagellandus eram a Deo, de me ipso nullam conquiret maculam honori et nomini suo, quia culpæ patris vindicem filium esse nulla divinæ legis constituit sanctio. At ille tam pulchre, imo miserrime institutus ad malitiam, quasi abominabile et execrabile scelus cœpit detestari, et precidens ipse ad pedes meos, de præteritis cœpit veniam deprecari; in reliquum ut miles domino, ut patri filius cum fide et veritate per omnia se mihi obanditurum promissit cum lacrymis, si modo Sedi Apostolicæ vellem reconciliari. Quod cum promptissime annuissem, et deliberationi suæ et consilio principum hoc tantum mancipandum promississem, in præsentī Nativitate se producturum me Moguntiam, et ibi de honore et reconciliatione mea, quam fidelius posset acturum, et inde in pacem, et securitatem me reduendum promisit, in ea veritate et fide, qua patrem a filio honorari, et filium a patre præcipit Deus diligere. Hac promissione, quæ et Gentili observanda est, securus ibam, et filius meus aliquantulum me præcesserat : et ecce quidam fideles verissime me deceptum affirmabant, et proditum sub falsa pacis et fidei sponione. Revocatus autem filius meus, et iterum a me instantissime admonitus, sub ejusdem fidei et sacramenti obtestatione animam suam pro anima mea fore promissit secunda vice.

4. « Cum ergo ad locum qui Binga vocatur pervenissem, jam existente die Veneris ante Nativitatem, numerus armatorum suorum jam satis augebatur, jam frater ipsa de se detegebatur, et filius ad me : Pater, inquit, nobis secedendum est in vicinum castellum, quia Moguntinus episcopus in suam civitatem non admittet vos, quamdiu in banno eritis; nec vos impacatum et irreconciliatum haud eo ingerere inimicis vestris. Illic Nativitatem cum honore et pace agatis, quoscunque placuerit vobis vobiscum habebitis : ego interim quanto instantius, quanto fidelius potero, pro nobis utrique laborabo, quia causam vestram meam existimo esse. At ego : Mi, inquam, fili, iudex et testis sermonum et fidei sit inter nos hodie Deus, quomodo te in virum et hæredem meum produ-

xerim, quantis tribulationibus meis honori tuo inservierim, quot et quantas inimicitias pro te habuerim et habeam, solus conscius est. Ille autem terlio sub ejusdem fidei et sacramenti attestatione, si ingrueret occasio periculi, caput suum pro meo capite fore mihi promisit.

5. « Sed postquam clausit me in eodem castello, quo omnia animo et corde fuerit locutus, manifeste rei ostendit eventus. Ex omnibus meis quartus ego sum inclusus, nec quilibet alius admitti potuit; custodes deputati, qui vitæ meæ erant atroces inimici (benedictus per omnia Deus, exaltandi et humiliandi quæ voluerit rex potentissimus). Cum ergo ipso sacratissimo die Nativitatis suæ omnibus redemptis suis ille Sanctus Sanctorum Puer fuisset natus, mihi soli filius ille non est datus. Nam ut laceam opprobria, injurias, minas, gladios in cervicem meam exertos, nisi omnia imperata facerem : præterea famem et sitim, quam perfecebam ab illis, quos injuria erat videre et audire, ut etiam laceam, quod est gravius, me olim satis felicem fuisse : illud nunquam obliviscar, illud nunquam desinam omnibus Christianis conqueri, quod illis sanctissimis diebus, sine omni Christiana communione in carcere illo fui.

6. « In illis penitentiae et tribulationis meæ diebus, a filio meo missus venit ad me quidam princeps Wigbertus, dicens nullum vitæ meæ esse consilium, nisi sine ulla contradictione omnia regni insignia redderem ex voluntate et imperio principum. At ego, etsi omnis terra, quantum inhabitatur, mei regni terminus esset, nollem regno vitam commutare : quia vellem nollem, sic agendum, et sicut definitum intelligebam, coronam, sceptrum, crucem, lanceam, gladium misi Moguntiam. Tunc communicato consilio cum inimicis meis meus filius egrediens, relictis ibidem fidelibus et amicis meis, quasi me eo adducturus, sub nulla frequentia armatorum suorum me adductum ad villam, quæ dicitur Ingelheim, fecit me ad se adduci, ubi maximam inimicorum meorum multitudinem collectam inveni, nec ipsum filium cæteris mihi meliorem reperi. Et quia firmus et stabilis videbatur eis esse, si propria manu cogerent me regnum et omnia regalia exsternere; simili modo et ipsi omnes minabantur mihi, nisi omnia imperata facerem, nullum vitæ meæ consilium fieri posse. Tunc ego, inquam, quia desola vita mea agitur, qua nihil pretiosius habeo, ut saltem vivens penitentiam exhibeam Deo, quidquid imperatis, faciam. Cumque inquirerem si saltem sic de vita mea certus essem : Apostolicæ Sedis legatus, qui ibidem aderat (non dico qui omnia hæc audierat) respondit, me nullo modo eripi posse, nisi publice confiterer me injuste Hildebrandum persecutum esse, Wigbertum ei injuste superposuisse, et injustam persecutionem in Apostolicam Sedem et omnem Ecclesiam hactenus exercuisse.

7. « Tunc cum magna contritione animi pro-

stratus, cœpi per Deum, per ipsam conscientiam orare ut locus et tempus mihi daretur, ubi in præsentia omnium principum, cum innocens essem, vellem ex iudicio omnium me expurgare; et in quo culpabilem me recognoscerent, ex consilio omnium sanioris sententiæ, penitentiam et satisfactionem quo ordine iuberent querere; et in principibus regni, de fidelibus nostris quoscunque obsides vellent, dare. At idem legatus locum et diem mihi abnegavit, dicens: aut totum ibi debere determinari, aut nulla spes mihi esset evadendi. In tanto tribulationis articulo, cum interrogarem, si confiterer omnia quæ imperabatur, an confessio mea, ut justum est, veniam et absolutionem consequeretur: ibi legatus dixit, non esse juris sui me absolvere: si vellem, inquit, absolvi, Romam irem satisfacere Apostolicæ Sedi. Sic desolatum et spoliatum (nam et castella et patrimonia et quidquid in regno conquiesceram, eadem vi et arte sua extorserant a me) in eadem villa reliquerunt me. In qua cum aliquo tempore commoratus essem, et filius meus ex eodem fraudis suæ consilio demandasset, ut ibidem cum expectarem, superveniens quorundam fidelium meorum legatio, præmonuit, ut siquidem admonitum ibi remanerem, fore aut in perpetuam caperer captivitatem, aut in eodem decollerer.

8. « Quo nuntio satis tunc vitæ meæ diffusus, illico aufugiens, fugiendo Coloniam veni, et ibi aliquot diebus commoratus postea Leodium veni. In quibus locis fideles viros et in fide regni constantes semper inveni. Horum cæterorumque regni fidelium consilio usus, vobis fiducialius et honestius habeo deplorare hæc omnes meas misérias. Fiducialius quidem, propter mutuum consanguinitatis et antiquæ amicitiae debitum: honestius autem, propter tanti regni nomen gloriosum. Vos igitur per fidem, per amicitiam rogo, in tantis tribulationibus meis ac injuriis propinquo et amico consulatis. Quæ fidei et amicitiae vincula etsi inter nos non essent, vestra tamen et omnium regum terræ interesset, injuriam et contemptum meum vindicare, et tam nefarie proditoris et malitiæ exemplum de superficie terre extirpare ». Hactenus Henricus, cujus querelæ, utrumque sive vere sive false formata, magnam vim commovendi animos habuerunt; eo magis quod fuga lapsus et milites congregans, in pristinum statum se revocandum spem multis suis fidelibus fecerat. Illic a schismaticis nova præsumpta, nempe ut novus antipapa decerneretur, atque legati missi ex Moguntino conventu Romam ad Paschalem Pontificem, capti conficerentur in carcerem. Narrat ista Urspergensis verbis istis hoc anno:

9. *Silvester antipapa: legati Germanici capituli.* — « Inter hæc Wernerus quidam, ex ordine ministerialium regis, qui Marchiæ quæ in partibus Aquini præerat, quasi hæresim eandem resuscitaturus, collectis undecumque per Italiam copiis, corruptis quoque multa pecunia Romanis nonnullis,

dum dominus Apostolicus Beneventanis immoratur finibus, quemdam pseudoabbatem de Farfa, proh nefas! Cathedræ sancti Petri imposuit, et ipsum papam Cæsaris, sub vocabulo Silvestri appellari voluit. Qui tamen post paululum, turpiter ut merebatur a Catholicis eliminatus, vesaniæ suæ premium, male conquistis pejusque dispersi aeris retulit damnum etc. » Hæc de pseudopapa. De legatis autem in via tentis subiicit mox ista:

10. « Porro procures jam dicti, dum e suis singuli partibus in valle Tridentina convenientes, apud ejusdem nominis civitatem, id est Tridentum pernoctarent, quidam Adelbertus adolescens, partium illarum quodam insignis comitatu, summo mane super ipsos utpote inermes et peregrinos cum civibus armatis irruit, spoliat, capit, custodie tradit, idque sibi per legationes domini sui Henrici eximperatoris mandatum comprobatur. Artibus quippe solitis idem Henricus usus, clamque religiosi Epistolæ, nuntii, quascunque poterat regni civitates et provincias impleverat, quibus se vim a principibus passum, imo ab unico filio depulsum imperio deplorabat, regnum in suis miseriis confusum, cunctis usquequoque partibus ejusdem fortunæ timendum fore præmonerat exemplum. Qua de causa nullus jam per Italiam liber transitus eisdem patuit legatis: Gebhardus tantum Constantiensis episcopus cum suis per occultiores Alpium semitas ingressus, Mathildis comitissæ, alterius nimirum Deboræ præsidii, Apostolicis præsentatur vestigiis. Reliqui (ut diximus) magnates, ut nimirum a stultissimo captivatore deprehensi, indigne tractantur, præter Ottonem Babenbergensem episcopum, cui idem Adelbertus, eo quod esset suus miles, parcere cogebatur. Quo etiam mediante, Bruno Trevirensis episcopus, et Wigbertus comes eo pacto dimituntur, quatenus et per imperatorem, cum illo pacem facturî, conveniant, et quid de reliquis ipse præcipiat, relaturi redeant.

11. « At Jests, qui semper prope est omnibus se invocantibus, et his juxta qui tribulatio sunt corde, repente super eosdem sibi rebelles Welfonem ducem Noricum quasi gladium de vagina sua eduxit: qui tertia superveniens die, manu valida Clausas obstructas effregit, Gebhardum virum probatum, Tridentinæ Ecclesiæ constitutum a rege Catholico novum episcopum, quem nunquam se suscepturos cives ipsi conspiraverant, recipi coegit. Ipsum quoque Adelbertum suique sceleris complices adeo perterriti, ut eductos quos clausurant principes, ipsumque castellum novo episcopo redderent, ipsi insuper nudipedes ab his quos afflixerant veniam postularent ». Hæc de liberatione legatorum Urspergensis; qui hæc contigisse ait prima hebdomada Quadragesimæ. Narrat post hæc prælium, in quo tulere Catholici posteriores, trecentis ex illis cæsis, ex quo eventu sunt redditî schismatici audaciores. Henricus vero filius obsedit Coloniam pro patre slantem, ubi dum esset,

legatos a patre missos suscepit, de quibus illa idem Urspergensis: Interea regi Henrico patris legati de Leodio missi presentantur, litteras tam sibi quam principibus regni deferentes, quarum exemplar hic inseri non absurdum duximus, ad probandam scilicet ejusdem viri multimodam tergiversationem, qua se toto vite suae tempore cunctis sibi resisten- tibus, ficta subjectione eatenus fecisset superio- rem ». Quas ad filium scripsit sic se habent :

12. *Ad filium et episcopos litteræ querulæ et vaferimæ Henrici imp. suæ restitutioni inhiantis, et ejus obitus.* — « Henricus Dei gratia Romanorum imp. Augustus, Henrico filio suo.

« Si ea nos debita affectione tractasses qua deberes, libentissime tecum loqueremur et paternam tibi mandaremus; verum quia longe alius quam paternæ affectionis et humanitatis circa nos animus tibi fuit, nequivimus aliter tecum loqui, quam quod ipsa rei manifestissimæ veritas habet. Tu enim ipse scis, sicut ipse publico experimento facti tibi conscius es, qualiter data fide et securitate persone et honoris nostri, omni affectione devo- tionis promissis nos ducere Moguntiam coram principibus, et inde nos securissime reducere quo- cumque vellemus. Ilac fiducia cum tecum amanter et indubitanter ascenderemus, contra datam fidem apud Bingham nos cepisti. Ubi nec paternæ lacrymæ, nec patris mæror, nec tristitia qua ad pedes tuos aliorumque advolebamur, te commovit ad misericordiam, quin nos caperes, et captum mortalibus inimicis illudendum et custodiendum traderes, ubi multimodo genere contumeliæ et terroris afflicti, compulsi sumus ferme venire usque ad ipsum mortis articulum. Ante captivitatem abstulisti nobis episcopatus, et quidquid de honore regni po- tuisti, et prædia nostra, et ipsam familiam: in captivitate vero quidquid residuum erat, ut lan- ceam, et crucein, et omnia regalia insignia vi et timore mortis (ut ipse bene scis, et omni ferme notum est Christianitati) a nobis extorsisti, relicta vix ipsa vita. Cum hoc tibi de nobis non sufficeret, postea semper ubicumque fuimus, modis omni- bus quibus potuisti, nos persequi non cessasti, ut vel perderes, vel de regno expelleres. Verum nos satis mirari non possumus, qua ratione vel occa- sione tam obstinate facias, cum de domino papa et Romana Ecclesia nulla tibi residua sit occasio. Nos enim nuntio domini papæ et Romanæ Ecclesie, te præsentem, parati fuimus et sumus obedire, et omnem debitam obedientiam et reverentiam ei coram et semper exhibere, et consilio principum, et spiritualis patris nostri Henrici (Ingonis) Clu- niacensis abbatis, aliorumque religiosorum viro- rum, de statu Ecclesiæ et honore regni libentissime agere. Te ergo rogamus pro honore regni et tua et paternæ devotione, et per auctoritatem Romani Pontificis et Romanæ Ecclesiæ, ut de injuria nobis illata, et de his quæ nobis vi et injuste abstulisti, justitiam facias. Rogamus etiam, ut cum nil ratio- nis tibi sit quare nos persequaris, nos et fideles

nostros cesses infestare, imo permittas nos pacifice et quiete vivere: ut integre et cum tranquillitate possimus omnia supradicta agere.

13. « Recognosce etiam et tecum cogita, quia Deus justus iudex est, cui commisimus causam nos- tram et vindictam, cujus etiam judicia sunt oc- culta velut abyssus multa. Quoniam quantum- cumque super afflictionem et infortunia glorieris, et super humilitatem te extollas, forsitan de sede sancta sua inter me et te gratuita misericordia aliud jam definiuit, intercedente justitia, quam tu ipse cogites et disponas. Quod si nulla alia vel reverentia vel intercessio nobis valet, opto ut justi- tiam consequi possimus, vel ut tuæ persecutionis impetus cesset. Ad hoc idem Romanum Pontificem, et sanctam universalem Romanam Ecclesiam ap- pellamus ». Hactenus ad filium pater.

14. Inter quos si arbiter sedes, quod ad per- secutionem, captivitatem atque privationem im- perii spectat per filium procuratas in patrem: cum ex animi affectu ista pendeant, nihil habes in quo damnes filium magis, quam si vehementi febre phrenetico, deliranti, insanienti furentique pius filius injiciat vincula patri, si vere intuitu pietatis, ut facere præ se tulit, ea omnia præstitit. Certe quidem furor Henrici Senioris, toto vite suæ tem- pore majoribus in dies accessionibus auctus, in Ecclesiæ Catholicæ detrimentum, et cladem assi- duam Occidentalis imperii, ejusmodi plurimis ex- perimentis cognitus est, ut aliter curari non posset nisi hujusmodi vinculis. Quibus si ad hoc (ut præ se tulit) usus est filius, ut patrem ad sanio- rem sensum converteret, solvique procuraret tenaciori- bus vinculis anathematis arctius frequenti itera- tione constrictum, quis negare poterit, summum fuisse hoc pietatis genus, in hoc se exhibuisse crudelem? Imo ex eo quod non firmiter vin- culis strinxerit donec curaretur, ne in malum suum et aliorum effingeret, deliquisse. Cæterum (quod exclamat pater) si ea ex malis artibus, nempe perjuriis offensæ præstite fidei, fieri contigerunt: laudari minime possunt. Utinamque tamen illata per filium ista meruit pati pater, æqua divinæ justitiæ lance librata sententia, ut pateretur a filio quæ in sanctum patrem ipse facere jugi persecu- tione tentasset: qui et necessitate cogente, extor- quente ut olim ab Antiocho¹ desperat immissa vindicta, patrem nominare, patrem cognoscere, patremque appellare, habuerit pro remedio singu- lari sibi relicto. Sed audiamus reliquas litteras, quas per eodem legatos ad archiepiscopos et principes tibi inherentes, eodem argumento con- scripsit. Sic enim se habent:

15. « Henricus, Dei gratia Romanorum imp. Augustus, archiepiscopis (episcopis), et cæteris Sa- xoniæ² principibus, ac etiam reliquo populo gra- tiam et dilectionem dignantibus eam recipere ».

¹ Mac. ix. — ² Saxonum non habet Ursperg.

Ita titulus in censis seorsum Henrici litteris, sed apud Urspergensē alio modo legitur.

« Conquerimur Deo omnipotenti, et Dominae mae sanctae Mariae, et beato Petro principi Apostolorum patrono nostro, et vobis principibus omnibus, quia injuste et inhumane et creduliter in illa confisi fide, in qua dubitare non debueramus, tractati sumus; et tam honore regni quam praediis et omnibus quae habebamus, contra divinum et humanum jus, ad infamiam et vituperium regni, ita expoliati sumus, ut nihil penitus praeter vitam nobis relictum sit. Ubi cum ferme omnes essetis, magna pars vestrum visa est dolore contristari. Sed prohi dolor! nihil nobis contulit vestra tristitia, quin in nobis sibi satisfaceret voluntas inimicorum nostrorum odiosa. Et quia consilio et rogatu filii nostri, fide et securitate vitae et honoris primum ab eo accepta, fiducialiter et desideranter Moguntiam, in praesentiam legati Romani et principum tenderemus, ut eorum dispositione ageremus tam de statu Ecclesiae et honore regni, quam de salute animae nostrae, ipse non est veritus in hac voluntate et obedientia nos contra datam fidem capere, et usque ad articulum mortis ferme ducere: non ausi sumus nos illi credere, ut injuriis et contumeliis nos pro voluntate sua, sicut prius, valeat tractare. Quapropter nullum vos rogamus et obnixē precamur, ut pro timore Dei et honore regni, et honestate vestra dignemini studere, quomodo de injuria in manibus vestris nobis illata per vos possimus recuperare justitiam.

16. « Nos autem, pro consilio vestro et aliorum qui nos odio non habent religiosorum virorum, parati sumus tam filio nostro, si in aliquo eum offendimus, quam alicui in regno libenter rationem dare. Praeterea sicut domino papae in praesentia legati sui et vestra obedire parati fuimus, ita nunc parati sumus ei omnem debitam reverentiam et obedientiam, sincero corde et devotione praesentialiter exhibere, et tam consilio vestro quam spiritualis patris nostri Henrici (Hugonis) Cluniacensis abbatis, aliorumque religiosorum virorum, de statu Ecclesiae et honore regni, quantum in nobis est, disponere. Cum ergo ad haec omnia parati simus, rogamus vos et obnixē precamur, quatenus pro Deo et honore regni et vestro, instanter moneatis filium nostrum, cum nulla ei secundum praefatam sententiam adversum nos residua sit occasio: amodo desistat nos et fideles nostros persequi, et pacifice et quiete vivere permittat, ut supradicta integre et cum tranquillitate perficiantur. Quod si noluerit, rogamus vos per auctoritatem Romanae Ecclesiae, cui nos committimus et honorem regni, ne super nos et fideles nostros veniat; quia manifestum est, cum non divinae legis zelo, vel Romanae Ecclesiae dilectione, sed concupiscentia regni, patre injuste eo privato, hoc incepisse. Apud quem si interpellatio vestra nullaque alia interventio ad praesens prodesse poterit, appellamus Romanum Pontificem, et san-

ctam universalem Romanam Sedem et Ecclesiam». Haec ad principes Henrici, habita collatione cum textu Urspergensis abbatis, qui eandem Epistolam recitat, atque haec subiicit:

17. « Post lectas coram multitudine tam has quam alias litteras, parum verbis, nihil autem sensu vel intentione prioribus dissonantes, filii tamen personae specialiter directas, rex Henricus ex optimatum consilio legationem vicariam patri destinavit, quam tamen prius publicae praedicari per Magdeburgensem archiepiscopum Henricum fecit, hocque facto, suorum animos secum valde roboravit». Erat autem hujusmodi:

18. « Post inveteratam, id est, per annos circiter quadraginta discessionem imperii Romani, quae tam divinas quam humanas jam pene leges abolevit, et exceptis mortibus, omnimodis sacrilegiis, perjuriis, rapinis et incendiis ipsum regnum nostrum non tantum in solitudinem, sed etiam ad apostasiam Catholicae fidei, sive in ipsum paganismum propemodum redegit: respiciente tandem suam Ecclesiam divina clementia, nos ejusdem Christi sponsae filii per Spiritum sanctum in unitatem fidei aequanimis resipimus, ipsum incorrigibile schismatum illorum caput, Henricum scilicet, dictum imperatorem nostrum, zelo Dei et Apostolicae fidei obedientia abdicavimus, Catholicum nobis, licet ipsius de semine natum, regem elegimus. Cujus regni principium sui finem esse conspiciens, etiam ipse tanquam voluntarius, sed ut jam ejus latentur littere, nimis invitatus collaudavit, regalia reddidit, filii curam cum regno nostrae fidei lacrymando commisit, de reliquo nullam se regni pompam, sed animae potius suae medelam ulterius affectaturum spondidit. At nunc ecce pristinis se reddens tergiversationibus, praedictum se passum per orbem terrarum conqueritur, Gallorum, Anglorum, Danorum, caeterarumque finitimarum gentium gladiis cordibus nostris infligere meditatur. Super illatis etiam injuriis, recuperari sibi justitiam precatur, consiliis quoque nostris amodo promptum obedire se pollicetur; re autem vera solitis argumentis castra haec Domini dispergere, Christi exercitum exarmare conatur, et (ut in propatulo est) vineam Domini, quae jam sero florescere cepit, tam per se singularem utique ferum denuo depascere, quam per vulpes, illos nimirum qui sibi adhaerent pestilentes homines, demoliri, ac per sacrilega sacerdotum Belial anathemati recidivo reddere; imo (quod dictu nefas est) Christum jam iterum in Ecclesia sua resurgentem in omnium cordibus crucifigere meditatur.

19. « Quapropter placet tam regi quam universis regni principibus, imo cuncto exercitui orthodoxo, quo senior idem, ne ulla sibi pateat adversum nos justa querela, quacumque elegerit securitate, quacumque maluerit statione, coram praesenti senatu simul et populo causam suam agat, justitiam suscipiat, justitiam ei reddat, qualem ab ortu schismatis omnibus seditionum causis,

ac si nihil inde jam fuerit definitum, undique discussis, tam filio quam patri sua iustitia respondeat; Ecclesiae vero regniue status, non ut ipse more suo proponit, post longas inducias, sed in praesentiarum his controversiis diremptis vacillare desinat.». Hucusque significatio principum ad Henricum Seniore. Pergit vero Urspergensis, de his quae sunt haec secuta ac de legatis missis agens: « Quam legationem probatae singularis prudentiae personae, abbatis videlicet ac Ribuvini presbyteri, una cum quibusdam laicali sub habitu viris religiosi, tam a rege quam universis principibus, imo toto exercitu susceptam eximperatoris sepelito, vix ejus praesentiam fandique licentiam consecuti cum retulissent; horribile memoratu est, quam ingenti vite suae periculo per dies sex, eo quod nullo modo conventi malignantium communicare voluerint, indigne tractarentur: tandemque abirruente sibi in eadem qua manebant custodia vulgo liberati, absque omni ducatus praesidio castris circa Coloniam positis redderentur: id tamen praecipuum inter Senioris responsa referentes, quatenus ad praesens armis discederetur, et in futurum super hujusmodi similitudinis curiale colloquium indiceretur ». Haec Urspergensis.

20. Inter haec autem Henricus pater, donec plene ex confluentibus ad eum auxiliaribus copiis augeretur exercitus, illud in primis agebat, ut sub velamento pacis suaderet filio ejusque principibus exercitum dimittere, quae sunt pacis, in comitiis pacifice pertractare. Quod tantum abest ut impetrabilis qui probe noverant animum ejus, ut Henricus filius solvens obsidione Coloniae, mitteret legatos ad patrem, qui significarent, vel propediem armis decernendum, vel, si hoc recuset, veniendum intra dies octo Aquisgranum, ubi res componerentur. Missi legati conjiciuntur in carcerem, quos post aliquot dies dimisit. Cum et idem Henricus pater postremas ad principes adversarios has litteras dedidit querimonia plenas, his verbis:

21. « Henricus, Dei gratia imper. Romanor. Aug., archiepiscopis, episcopis, ducibus, comitibus, caeterisque regni principibus, gratiam et dilectionem dignantibus eam recipere.

« Rogamus (rogavimus) filium nostrum, et vos multum precati sumus, ut dimisso exercitu ordinaretur quomodo possemus convenire, ut de injuria nostra et pace componenda ad honorem regni possit digne et decenter definiri. Placuit vobis remandare (unde nobis longe gravior priori oritur querimonia) quod dimissa obsidione Coloniae, vultis super nos et fideles nostros sub specie colloquii cum exercitu venire, datis induciis octo dierum, quae nunquam datae sunt homini alicujus conditionis (ut bene scitis) usque ad hanc diem, pro legitima definitione alicujus minoris negotii, nedum pro tanta re, secundum legem divinam vel humanam, vel etiam secundum usum hominum. Oportet enim nos habere, si vobis placeret, saltem tales inducias, intra quas possumus convocare et precibus invitare

ad hanc eandem causam, Moguntinum, Trevirensen, et Bremensem archiepiscopos, Frisingensem, Augustensem, Curiensem, Basiliensem episcopos, ducem Magnum cum duce Theodorico, et ducem Boemicum, et comitem Flandrensem cum comite Burgundiae, et alios qui ad praefatum negotium (ut bene scitis) sunt valde necessarii. Quapropter, sicut prius, rogamus et obnixi precamur, quatenus pro Deo et anima vestra, et pro appellatione domini Romani Pontificis Paschalis et Romanae Ecclesiae, et pro honore regni, dignemini apud filium nostrum efficere, ut dimisso exercitu cesset nos persequi: et ordinetur quomodo secure et absque ambiguitate possimus nos cum caeteris supradictis, ad agendum de nostra injuria et pace in regno componenda, quiete et pacifice convenire.

22. « Quod si nullatenus cessare voluerit, proclamationem inde fecimus et semper facimus Deo, et sanctae Mariae, et beato Petro patrono nostro, et omnibus sanctis, et omnibus Christianis, et vobis maxime, omni devotione precantes, ut dignemini cessare cum (f. nos) persequi, ad persecutionem tante injuriae cum vos et imitati. Appellavimus et tertio appellamus dominum Romanum Pontificem Paschalem, et sanctam universalem Sedem et Romanam Ecclesiam. Quod si hoc tantum nobis, et ad hoc ut ipse cesset nos persequi, prodesse non poterit: commitemus nos omnipotenti Patri et Filio sanctoque Spiritui paraceto, et beatae Mariae perpetuae Virginis, et beato Petro et Paulo, et sancto Lamberto omnibusque sanctis, ut divina miseratione omniumque sanctorum intercessio humilitatem nostram respicere, nosque contra tantum tamque injuriosum imperium defendere dignetur. Amen ». Certe quidem, nisi quae processerunt et superius suis sunt locis dicta ac crebrius repetita, Henricum ipsum vaferrimum hominem dolose nimis agere cuncta consuevisse significassent, demonstrassentque hominem nullius fidei ad fallendum aptissimum semper inventum: possent ista quae litteris prodidit, multis argumentis hominis maxime pii animum insinuare; sed quod sic comparatus esset, ut cum deprimeretur, tunc subdole ad fallendam sibi larvam pictatis induceret, quam mox deponeret cum quod esset conatus effecerat: jure meritoque eos quos appellavit patronos sanctos, est expertus ultores.

Ex insperato siquidem est morte repentina mulctatus, de qua Dominico in Mathilde:

Mortem non sperans, demum tamen ipsa catena
Mortis eum strinxit, rapuit de corpore tristi,
Augusti quarto defungitur idus¹, in anno
Christi millesimo centeno denique seno.

Agens aetatis annum quinquagesimum quintum; natus est enim (ut Lambertus habet) anno Domini millesimo quinquagesimo primo, quarto idus Novembris.

¹ Septimo Ursperg.

23. *Gaudium orbis mors Henrici.* — « Miserabile tamen dictum est », pergit Urspergensis, « tanti hominis, tante dignitatis tantique animi virum, sub professione Christiana mundum tanto tempore lueratum, nec ad instar ejuslibet pauperis defuncti, pium vel compassivum luctum a quavis inter tot Christianos persona promeruisse; sed potius universorum tam ibidem quam ubivis vere Christianorum eorda simul et ora, infinito nimis tripudio sui oblitos, rumore replese. Non altius concinebat Israel Domino ¹, Pharaone demerso, nec angustiori ipsi Octaviano, sive ulli unquam Augustorum applaudebat Roma triumpho. Frænum quippe ², quod erat in maxillis populorum, versum est illis in canticum, sicut vox sanctificate solemnitate. Igitur quia cessante tandem exactore quievit et tributum ³, mox omnes qui questus duntaxat gratia eidem principi eatenus adhaerendo, suas animas venalitati proposuerant, dedicationi regi simulque et communioni Catholice subjiçuntur. Leodiensis autem episcopus cæterique coepiscopantes inter cætera recipiuntur in communionem penitentiae, hac conditione, quod cadaver ipsius excommunicati per se pridie in monasterio tumultum effoderent, et absque ulla sepultura vel exequiarum communi in loco non consecrato deponerent, comprobantibus his qui aderant archiepiscopis et episcopis: quia quibus vivis Ecclesia non communicat, illis etiam nec mortuis communicare possit. Quo facto, paulo post corpus ipsum Spirensi civitati est in sarcophago lapideo regis consensu delatum, sique extra Ecclesiam ibidem per quinquennium mansit inhumatum.

24. « Hic finis, hic interitus, hæcque sors ultima Henrici, illo sub vocabulo Quarti (Tertii) Romanorum imperatoris a suis appellati: a Catholicis vero, id est, cunctis beato Petro suisque successoribus fidem et obedientiam lege Christiana conservantibus, archipirata simul et hæresiarcha, neenon et apostata, persecutorque plus animarum quam corporum competenter dicebatur: utpote qui nec naturalibus, nec consuetudinariis contentus sceleribus, nova et a sæculis inaudita, adeoque nonnulla incredibilia excogitasse et exercuisse infamabatur. Quæ si quis illorum arbitrati, qui tam perperam quam recte ab imperatoribus gesta litteris digna iudicant, scribere velit, nos loco cedimus, maxime cum aliqua ex his oblivione potius quam memoria digna non dubitemus. Pluribus autem testibus comprobare poterimus, quod nemo nostris temporibus, natura, ingenio, fortitudine et audacia, statura etiam totaque elegantia corporis videretur fascibus imperialibus ipso aptior, si tamen in conflictu vitiorum homo non degeneraret, vel succumberet interior ». Et inferius: « Deo autem gratias, qui licet tarde, tamen permagnifice victoriam concessit Ecclesie suæ, cui etiam ejusdem Nabuchodonosor quinquagesimum exactionis an-

num iste Galileus, qui Julianum quondam viceerat, vertit in Iubikeum ». Hanc a suo gentili, ejusdem temporis scriptore, imperator omnium nequissimus dignam meruit panegyrim. Ex qua redarguas, quisquis ille anonymus fuerit, sive verus extiterit sive fictus, qui Vitam ejus texuisse dicitur homo, quam jam oblivione damnatam novator hæreticus paulo ante eundem curavit una cum litteris ejusdem Henrici superius recitatis, ex quibus idem ipse qui edidit impius peracutis confoditur telis, cum se Henrico exhibet nequiores, dum ille necessitate coactus cognoscit tandem, laudat, proficitur, atque denique tertio appellat Apostolicam Sedem, quam hæreticus iste damnat. Ut hanc unam, hac saltem ex parte, mererit Henricus laudem, quod profundum illud nondum attigerit impietatis, in quo hic ipse auctor libens volensque ut sus enim delectatione revolvitur.

25. *Paschalis II in Gallias profectio.* — « His ubique locorum Occidentalis orbis quam citius pervulgatis, Paschalis papa ordinavit protectionem suam, ut legati comitiorum Moguntie habitiorum peterant in Galliam Cisalpinam, ubi et Concilium celebrandum mense Octobris indixit, ad instaurandam sanctam Ecclesiam, longiori Henrici Senioris persecutione concussam. Dum in itinere positus Florentiam pervenisset, de adventu Antichristi proxime futuro sparsam famam inveniens, Florentie substitit: eum vero audisset quæferrentur, ut nullius fidei et auctoritatis assertionem contempsit, et ceptum iter est prosecutus ». Hæc Acta Vitæ ipsius.

26. *De Antichristo predicationes.* — Quod pertinet ad Antichristum: fuit quidem opinio non vulgarium virorum, Antichristum hoc fore sæculo revelandum, et inter alios Norberti, viri temporis hujus fama celeberrimi, de quo ista sanctus Bernardus ad Gaufridum Carnotensem episcopum ¹: « Cum ante hos paucos dies ejus faciem videre, et de cælesti fistula, ore videlicet ipsius, plurima haurire mererim, hoc tamen ab ipso non audiui; verum de Antichristo cum inquirerem quid sentiret, durante adhuc ea quæ nunc est generatione revelandum illum esse, certissime se scire protestatus est. At cum eandem certitudinem unde haberet sciscitanti mihi exponere vellet, audito quod respondit, non me illud pro certo credere debere putavi. Ad summam tamen hoc asseruit, non visum se mortem, nisi prius videat generalem in Ecclesia persecutionem ». Hæc sanctus Bernardus de oraculo quod in illud relabi visum est usitatum, quod cum sæpe sancti viri prenovissent ingentes futuras persecutiones Ecclesie, putarint rerum magnitudine ipsa affore Antichristi tempora. Sed ad Paschalem redeamus, in Gallia Cisalpina Synodum celebrantem.

27. *Synodus Guastallensis et ejus canones schismatica vulnera medentes.* — De hac Synodo

¹ Exod. XV. — ² Isai. XXX. — ³ Isai. XLV.

¹ Bern. Ep. LVI.

hæc in primis qui interfuit Urspergensis abbas, scriptis mandavit his verbis : « Post hæc, hebdomada quarta mensis Octobris, habitum est Concilium generale in provincia Longobardia super ripam Padî fluminis, loco qui Wastallis nuncupatur, ubi præsidente vere per omnia Apostolico viro Paschali Secundo, coram multitudine maxima clericorum necnon laicorum, qui de diversorum regnorum Ecclesiis convenerant, præsentibus etiam legatis domini Henrici regis, multa sunt (prout canonica dictabat æquitas) de inimici zizanitis evulsa, multa de structuris super arenam positâ destructa, plura quoque pistici seminis plantaria profundius plantata simul et rigata, nonnulla etiam luttissimæ munitionis per Ecclesias propugnacula sunt edificata.

28. « Nam cum eadem Dominica, quæ erat XII kal. Novembris, Juvanensibus Conradum, Tridentinis Gebhardum præsules consecrasset, enarrare longum est, quam indefesse prudens et fidelis ille summi Patris-familias dispensator, conservos suos Verbi Dei tritico laudissime quotidie reficeret, pseudoepiscopos deponeret, Catholicos constitueret, archiepiscopos pallia, monasteria privilegia concesserit, præsentibus ovium Christi pastores mellifluis alloquiis, absentes paternis comonitoriorum litteris instruxerit, quedam olim abscissa membra Ecclesiæ iterum incorporaverit, quedam etiam quæ insanabilia videbantur, anathematis abscissione truncaverit. Super ordinationibus autem tempore schismatis factis, unde per maximæ ventilabantur quæstiones, decretum discretionis maternorum viscerum artificiose meditatum in hæc verba promulgavit :

29. « Per multos jam annos regni Teutonici latitudo ab Apostolicæ Sedis unitate divisa est, in quo nimirum schismate tantum periculum factum est, ut (quod cum dolore dicimus) vix pauci sacerdotes aut clerici Catholici in tanta terrarum latitudine reperiantur. Tot igitur filii in hac strage jacentibus, Christianæ pacis necessitas exigit, ut super hos materna Ecclesiæ viscera aperiuntur. Patrum itaque nostrorum exemplis et scriptis instructi, qui diversis temporibus Novatianos, Donatistas, et alios hæreticos in suis ordinibus suscepunt, præfati regni episcopos schismate ordinatos (nisi aut invasores, aut simoniaci, aut criminosi sint probati) in officio episcopali suscipimus. Id ipsum de clericis cujuscunque ordinis constitui-mus, quos vita scientiæque commendant.

30. « His et hujusmodi super Ecclesiam divini luminis orientis auroræ jucundanti splendoribus, quia nimirum tandem venerat tempus miscendi ejus, pariterque Apostolicis dignati benedictionibus, ad sua quique convertuntur. Nos vero, id est, Alpium transcursores, speciali quodam præcunctis efferebamur tripudio, eo quod certi essemus domini Apostolici perfectionem sic fuisse dispositam, qualenus iter nostrum quammatre subsequens, Natalem Domini Moguntię celebraturus

esset, præsentem cum universis regni principibus novo rege nostro ». Illicusque de his Urspergensis abbas. Sed reliqua quæ ad Synodum hanc pertinent, ex aliis auctoribus hinc inde petamus.

31. Quæ autem legati regis a Paschali papa perfecerint, Dominico qui aderat cum Mathilde, his verbis docet :

Juxta tuncque Padum tenuit Synodum memoratus
Papa, suum missum direxit natus ad ipsum
Defuncti regis, quarens ut jus sibi regni
Concedat, Sedi sanctæ cupit ipse fidelis
Esse velut matri, subjeci sibi vel quasi patri.

Laudatam a Pontifice pietatem regis, pariterque a Mathilde quæ aderat idem auctor subjicit, hisque addit post hæc advenisse ad Synodum Parmenses cives, pœnitentes, suppliciterque petentes episcopum sibi dari Bernardum, quem expulisset ante biennium, insuper postulantes, ut idem Pontifex consecrare dignaretur Basilicam sanctissimæ Dei genitricis Mariæ. Annuisse civium votis Pontificem, eundemque Synodo absoluta, Parmam ad dedicandam Basilicam pervenisse, idem versibus cecinit : sed de his post Synodum inferius dicturi sumus.

32. Præter hæc etiam in eadem Synodo hæc actitata reperiuntur, quæ scripta habentur in Vaticano Codice, qui liber Censuum inscribitur, a Cencio camerale collecto, his verbis : « In hoc Concilio constitutum est, ut Emilia tota cum suis urbibus, id est, Placentia, Parma, Regio, Mantua, Bononia, nunquam ullerius Ravennati metropoli subiaceret. Hæc enim metropolis per annos jam fere centum adversus Sedem Apostolicam crexerat se; nec solum ejus prædia usurpaverat, sed ipsam aliquando Romanam invasit Ecclesiam Guibertus, ejusdem metropolis inenbator.

« Per multos jam annos etc. » ut supra. Itemque :

33. « Jam diu a pravis hominibus tam clericis quam laicis, Catholica est Ecclesia conculcata, unde plura temporibus nostris schismata et hæreses emergerunt. Nunc autem cum per Dei gratiam hujusmodi nequitie deficiant cum auctoribus : in ingenuam libertatem resurgit Ecclesia. Unde providendum est, ut horum schismatum cause penitus abscindantur. Patrum ergo nostrorum Constitutioni consentientes, Ecclesiarum investituras a laicis fieri omnimode prohibemus. Si quis autem decreti hujus temerator extiterit, tanquam materna injuriæ reus, clericus quidem ab ejusdem dignitatis consortio repellatur, laicus vero ab Ecclesiæ liminibus arceatur.

34. « Nullus abbas, nullus archipresbyter, nullus præpositus audeat possessiones Ecclesiæ suæ vendere, commutare, locare, vel in feudum dare, sine communi fratrum consensu, vel episcopi propriæ civitatis : alioquin ordinis sui periculum patiatur ». Hactenus de hujus Concilii canonibus in dicto Codice repertis ; quibus hæc quæ

sequitur Epistola ejusdem Paschalis subscripta legitur :

35. « Paschalis episcopus, servus servorum Dei, venerabilibus fratribus Gebhardo Constantiensi, Ordrico Pataviensi episcopis, et ceteris Teutonicarum partium tam clericis quam laicis Catholicis, salutem et Apostolicam benedictionem.

« Pro religionis vestrae fervore gaudemus, et omnipotenti Deo gratias agimus, qui vos in sui nominis amore confirmat. Quosdam autem vestrum minus secundum scientiam zelum Dei habere audivimus, ut dum pravorum communionem vitant, etiam a regionibus vestris discedere meditentur. Qui profecto nequaquam laude Apostolica digni sunt, dum in medio nationis prave et perverse perseverare non possunt, inter quos luceant velut luminaria in mundo, verbum vite continentes. Uno enim pondere peccata hominum metiuntur, dum tam propriae voluntatis merito excommunicatis quam communicantes, reos aequaliter arbitrantur. Verum enimvero diversarum voluntatum diversus eventus agnoscitur. Si quis enim criminosus juxta Apostolum vocatur, hujusmodi omnino cavendus est. Eadem etiam cautela vitandi sunt, qui excommunicatis ipsis aut actione cum possint, vel cum nequeant, voluntate se copulant. Qui vero hujusmodi excommunicatis omnino inviti, vel servitio vel cohabitatione junguntur, si hujusmodi imperfectionis dolore tanguntur, non omnino vitandi sunt, nec tamen ad communionem sine correctionis medio admittere. Hinc est quod praedecessor noster sanctae memoriae Gregorius Septimus papa, excommunicatorum uxores, filios, servos, rusticos, quorum consilio vel voluntate excommunicationis meritum non perpetratur, et viatores quoque ob eandem necessitatem invitos excommunicatis communicantes, excommunicationis vinculo non teneri constituit, sicut beatus Augustinus ad Auxilium scribens evidenter ostendit. Dignoscant igitur fratres nostri in omnibus regiam tenere viam, et in medio nationis prave et perverse tanquam luminaria lucere studeant; ut non suae tantum, sed ut alienae salutis mercedem a Deo mereantur accipere, quod singulorum excommunicatorum voluntates et causas discutiant : quia nuda omnia et aperta sunt oculis ejus, de cujus miseratione confidimus, quia simplicis oculi corpus tenebrarum caligine non opprimetur, quoniam charitas operit multitudinem peccatorum ». Illicusque in dicto Vaticano Codice.

36. *Quid in Synodo actum in causa Herimanni pseudo-episcopi Augustani.* — Ad hanc quoque Synodum legatio civium Augustanorum venit, adversus pseudo-episcopum ipsorum Herimannum, qui pecuniarum mercimonio Ecclesiam illam emerat ab Henrico imperatore. ut suo loco superius dictum est. De hac eadem legatione agens Udascalus¹, qui de ejusmodi controversia

ex eis quae viderat commentarium scripsit, ab anno superiori res gestas sic aggreditur enarrare : « Temporibus illis, praefatus Romanae Sedis legatus Richardus Albanus episcopus, in Teutonicas directus partes, Moguntiam devenit, ubi, cum apud Ingelheim Henricum imperatorem regalibus privasset insignibus, capite nimirum haereseos abscisso, communionemque omnibus reddita, singula in unum Ecclesiae pacificantur membra. Hic, inquam, Herimannus, hic dictus episcopus, in generali absolutione non excipitur; sed per Wibertinae haereseos abjuramentum, necdum ventilata sui causa, inter ceteros recipitur. Legato quoque Augustani veniente, cleri ac populi exponuntur querimoniae, dictum videlicet episcopum absque canonica electione seu consecratione sedem illam invasisse. Diligentius res audita discutitur, si aliquis canonicorum se huic subtrahat accusationi perquiritur, omnes unum dicentes, idem sapientes, nominatim subscribuntur, cuncta in domni Apostolici praesentia finienda differuntur, Synodus colligit Warstallensis (Guastallensis), adsunt cum suo episcopo nuntii Ecclesiae Augustensis, refert legatus quae audierit, qualiterve audita distulerit. Idonea iteratur excusatio, nulla praetenditur accusatio, facile ab omnibus concordatur ut talis episcopus deponatur. Quod et factum fuisset, si non Gebhardus Constantiensis episcopus in Ecclesia Augustensi hoc faciendum persuasisset. Eo namque tempore dominus papa Teulonicum adire proposuerat regnum, quod in ruinam perficere nequivit multorum. A pontificali tamen suspensus officio semiepisopus Herimannus regreditur, terminus huic rei finiendae constituitur. Augusta sui liberationem dolens praestolatur, dum in spe Apostolici adventus defraudatur, infraque scilicet terminum idem episcopus pro interdicti restitutione officii Apostolicum adivit; sed litteras ab eo hunc in modum se continentes accepit :

37. « Paschalis episcopus, servus servorum Dei, Augustensis Ecclesiae canonicis et ceteris parochianis, salutem et Apostolicam benedictionem.

« Venit ad nos non vocatus frater noster Herimannus, vestrae civitatis episcopus, causam suam postulans certiori fine concludi. Nos autem quarum vestrarum memores, quod fratres, qui adversus eum in Concilio coram nobis capitula protulerant, cum eo in praesentiarum coram nobis minime affuerunt : ne qua pars adversum nos possit praedictum conqueri, causae ipsius protractionem in proximas kalendas Novembris, fratrum nostrorum deliberatione distulimus; ad quem videlicet terminum, omnes qui adversus eum causam agunt, litteris praesentibus ad nostram audientiam invitavimus. Interim eidem fratri nostro potestatem concedimus, ut eos qui Ecclesiae bona rapiunt et invadunt, juxta sanctiones canonicas excommunicare praevaleat. Volumus enim, ut tam ipse quam Ecclesia quae sub eo est, usque ad praefinitum tempus pacem et tranquillitatem

¹ Habetur tom. II, Antiq. lect. p. 218.

tatem, Domino largiente, obtineat. Dat. decimo kal. Decembris¹.

38. « Has litteras idem Herimannus episcopus Augustæ vix Venetium adportavit, initoque consilio, cunctos earundem conscios, ut unius anni spatium non detegerentur jurare compulsi: sicque fictis pro libitu mendaciis domum rediit. Execogitata vero graviori adhuc nequitia, unum de accusatoribus suis, qui præstantior cæteris videbatur, pretio corrupti, et litteras quasi ex Augustensium persona occulte per eum Apostolico direxit. Qui falsitatis nuntius benigne susceptus, dum auditur, magna contra eum papa indignatione involuitur, corde et corde loqui ab omnibus deprehenditur. Cariensi tamen episcopo atque Gotwigensi abbate pro ipso supplicantibus, datis veluti Augustensium respondentibus litteris, abire permittitur vera cum falsis relaturus; vera, hoc modo:

39. « Paschalis episcopus, servus servorum Dei, dilectis filiis Augustensis Ecclesiæ clericis salutem et Apostolicam benedictionem.

« Post impetitionem quam super episcopo vestro fecistis, dilectionis vestræ litteras suscepimus, in quibus quia pacem et concordiam cum eodem episcopo vos habere nobis significastis, lætati sumus, si eamdem concordiam gratis factam fuisse constiterit. Nos tamen constitutum terminum expectamus, ut quidquid æquitas dictaverit, auxiliante Domino exequamur. Dat. oclavo idus Februarii.

40. « Quibus litteris clam episcopo lectis, contra nuntium infremuit; non æque pretio sibi referri mandata objicit; patre iterum mendacii suggerente, interminatur ne tam adversa prodantur, sed prospera fingantur, egreditur in publicum, arriguntur aures expectantium.

Parturiunt montes, nascetur ridiculus mus;

dum falso benedictione Apostolica salutatur episcopus, eademque gratia participatur populus». Hactenus de rebus gestis in causa Augustana ad Concilium delata: quæ autem post hæc secuta sunt suo loco dicturi sumus. Hisce enim fraudulentis involueris mendaciorum præfœcata veritas situit. Quibus videas quam difficile sit in judiciis, licet iudex sedeat æqua lance merita causarum expendens, iustitiam prævalere, eum fervore potentium, erogatione pecuniæ, armata præcedit iniquitas, satellitio mendaciorum undique sepla.

41. *Paschalis Parmæ.* — Denum vero et Parmenses auditi et exauditi de iis quæ petissent a Paschali Pontifice. Etenim petierunt dari sibi in episcopum sanctum Bernardum, S. R. E. presbyterum cardinalem, quem adeo diris contumeliis affecissent: sed et invitaverunt eundem Pontificem venire Parmam. Fuit ista Parmensium legatorum petitio.

Paschalis igitur, ut dictum est, receptis Parmensibus, illisque petentibus concesso sancto Bernardo presbytero cardinali in episcopum, ad eum consecrandum post Synodum Parmam profectus est, ubi et Basilicam Dei Genitricis pariter dedicavit. Cecinit ista in Mathildis Vita Donnizo qui aderat, versibus istis:

Castrum Guastallæ Synodi locus extiteratque,
Inde pius papa discedens, ad memoratam
Advenit Parmam, faciens ibi quæ regitabant:
Nam sacravit ibi templum Christi Genitricis,
Ians ibi decretum, ne subjaceat nisi Petro
Clavigero cœli, simul ipsius quoque Sedi.
Hoc venit templum Mathildis et aspiciendum;
Donum tale dedit, placuit quod maxime plebi,
Pontificem sacras Bernardum tunc ibi papa.
Jussit eum papæ vice sancti degere Parmæ,
Hincque valedicens dominæ sapissime dicte,
Francigenos fines petat venerabilis idem.

Hæc ipse.

42. Sed ad Paschalem Pontificem redeamus, qui eum iter in Germaniam oclusum sibi cognovit, non quidem Romam reditum, sed in Gallias protectionem instituit, inde etiam rebus Germaniæ consulturus. Jam enim quæ in corde Henrici imperatoris venena ebullierant, persentiscere cepit. Porro, ut audisti, et secundum Urspergensem, in Gallias profectio contigit in fine anni hujus, nam Natale D. Cluniaci celebravit; eum autem non Moguntiae, ut condixerat, hanc ab eodem auctore accipe rationem. « Paschalis vero suorum consiliis, quasi proterviam Teutonicorum declinans, maxime propter seditiosum quemdam tumultum qui sibi Veronæ hospitanti dudum occurrerat; insuper suggerentibus quibusdam quod non facile gens nostra decretum illud recipiat, quod quamlibet Ecclesiasticam investituram a laicis manibus velat, necnon et animosum cor regis adolescentis, quod nondum per omnia Dominici iugo sit habile: hæc, inquam, multaque id genus vir Dei percepta considerans, needum sibi ostium Germanicis in partibus apertum esse cum gemitu pronuntians, protectionem suam cum Hispaniarum legatis per Burgundiam ad Gallias convertit, et Natalis Dominici gaudium sua præsentia Cluniacens. multum ampliavit». Hactenus ipse, quibus annus hujus peregrinationis Paschalis absolvitur; de reliquis ab ipso rebus gestis in Galliis anno sequenti agemus.

43. *Mortuo Philippo Galliarum regi Ludovicus filius succedit et consecratur: unde Ikonis episcopi apologia contra Rhemenses.* — Hoc eodem anno moritur Philippus rex Francorum apud Midunum, præsentem Ludovicum filio suo, et sepelitur in monasterio S. Benedicti super Ligerim flumen. Hæc pluribus in Appendice ad Aimoinum, ubi et hæc quæ sequuntur, habentur de fili successionem, et coronationem¹: « Ludovic. autem præfati regis Philippi filius, quoniam in adolescentia Ecclesiæ amicitiam liberali defensione promeruerat, pau-

¹ Septembris vel Octobris.

¹ Ann. I. V. c. 49.

perum et orphanorum causam sustentaverat, tyrannos potenti virtute perdoctuerat, Deo annuente, ad regni fastigia sicut honorum voto adsciscitur, sic malorum et impiorum votiva machinatione, si fieri posset, excluderetur. Consulti ergo proceres, et potissimum dictante venerabili ac sapientissimo Ivone Carnotensi episcopo, ut ad refellendam impiorum machinationem citissime Aurelianos conveniant, ejus exaltationi operam dare mature festinant. Senonensis igitur archiepiscopus Daimbertus invitatus cum compluvialibus, videlicet Walonne Parisiensi episcopo, Manasse Meldensi, Joanne Aurelianensi, Ivone Carnotensi, Hugone Nivernensi, Ilmbaldo Antiodorensi, accessit. Qui in die Inventionis sancti protomartyris Stephani, sacratissimæ unctionis liquore delibutum regem, et missas gratiarum agens, abjectoque secularis militiæ gladio, Ecclesiastico ad vindictam malefactorum eum accingens, diademate regni gratanter coronavit, necnon et sceptrum et virgani, et per hæc Ecclesiarum et pauperum defensionem, et quæcumque regni insignia, approbante clero et populo, devotissime contradidit. Necdum post celebrationem divinorum festivas deposuerat exuvias, cum subito mali nuntii bajulatores a Rhemensi Ecclesia assistunt, litteras contradictorias deferentes, et auctoritate Apostolica, si tempestive venissent, ne regia fieret unctio interminantes. Dicebant siquidem primæ regis coronæ primitias ad jus Ecclesiæ Rhemensis pertinere, et a primo rege Francorum, quem baptizavit beatus Remigius, hanc prærogativam illibatam et inconvulsam obtinere, et si quis eam temerario ausu violare tentaverit, anathemati perpetuo subjacere etc. » Hæc ibi de initiatione novi regis, et contradictione Rhemensis archiepiscopi, litteris Apostolicis sua jura tuentis: quibus respondendis injunctum est opus eorum omnium longe doctissimo Ivoni episcopo Carnotensi, qui has tunc litteras apologeticas patentes, ab unoquoque inspicendas conscripsit his verbis¹:

44. « Ivo, Carnotensis Ecclesiæ humilis minister.

« Noverit sancta Romana Ecclesia, noverint omnes Ecclesiæ, ad quas murmur Rhemensium clericorum pervenerit, nos in consecratione Ludovici regis Francorum nihil nostrum quæsisse, sed pro communi utilitate regni et sacerdotii consulte vigilasse. Erant enim quidam regni perturbatores, qui ad hæc omni studio vigilabant, ut aut regnum in aliam personam transferretur, aut non medio-criter minueretur. Quod ne fieret, cooperante Deo, et pro integritate regni et pro tranquillitate Ecclesiarum, quantum potuimus, præcavere studuimus. Unde livori adscribendum videtur aut tumori, si quis utili et honestæ actioni derogat, quam nec ratione potest redarguere, nec consuetudine infirmare, nec lege damnare. Si enim rationem consulimus, jure in regem est consecratus, cui jure

hereditario regnum competeat, et quem communis consensus episcoporum et procerum jampridem elegerat. Præterea, quæ ratio est Belgicorum regem suum creare et consecrare, quamvis in aliis provinciis regnatorum sit, si ita ipsorum regum voluntas, et temporum atque locorum opportunitas se obtulerit: eadem est Celticorum et Aquilanorum qui Belgiarum provinciæ nihil debent, regem suum quamvis et in Belgica regnatorum sit, eligere et omne regi debitum obsequium exhibere.

45. « Si vero ad consuetudinem recurrimus, quæ in exemplis maxime declaratur: respondemus ex verbis Augustini, quia ratio exemplis antependa est, cui tamen et exempla concordant. Ecce rationem dedimus, quam apud eos æque validam super hoc negotio inveniri non credimus: addamus exempla rationi concordantia. Sicut enim legitur in Gestis Francorum, divisum est regnum inter filios Lotharii nepotes Clodovei: Charibertus et Guntrannus provincias Celticorum et Aquitanorum acceperunt in regnum suum, et alter eorum, Charibertus scilicet, Parisium sibi sedem regiam posuit, et usque ad flumen Garumnæ regnum suum extendit: Guntrannus vero Aurelianensis sedem regiam sibi constituit, et Burgundiam, quæ Celticæ pars est, in regnum accepit. Isti reges quippe nullam a Rhemensi episcopo benedictionem vel coronam acceperunt, sed a sacerdotibus provinciarum quas regebant sublimati sunt et sacrali. Postquam vero regnum Gallorum in suam monarchiam revocatum est, deleta progenie Clodovei, Pipinus et filii ejus Carolus et Carlomannus, nec Rheinis nec a Rhemensi archiepiscopo in reges sublimati sunt, nec inuncti. Ludovicus quoque nepos Ludovici Senioris apud Ferrarias, qui locus est in pago Senonensi, et uxor ejus, nullo præsentem metropolitano, a quibusdam episcopis in reges sunt consecrati et coronati. Unde in Gestis Francorum ita legitur: Audientes etc. » Et inferius: « Unetus vero est in regem ipse Rudolphus, tertio idus Julii Suessionis civitate. Post mortem Rudolphi regis, per Willelmum archiepiscopum reductus est ab Anglia Ludovicus filius Caroli Simplicis in Franciam, et quarto kal. Julii nactus est in regem apud Landunum.

46. « Post translationem vero regni Francorum in progeniem Hugonis Magni ducis, Robertus piissimus rex, filius Hugonis regis, Aurelianensis in regem consecratus est et coronatus: cujus filius Hugo juvenis Compendii est unctus, et in regem sublimatus. Ex his et hujusmodi exemplis manifestum est, quod Francorum reges non omnes in Rhemensi Ecclesia, vel a Rhemensibus archiepiscopis sunt consecrati: sed multi in multis aliis locis et a multis aliis personis consecrati sunt. Quæ omnia si relexerentur, et prolixam facerent orationem et superfluum disputationem, cum nullis scriptis vel exemplis probari possit, Rhemensem archiepiscopum Francorum regem extra Belgicam unxisse aut coronasse. Cum ergo hæc eadem potestas sit

¹ Ivo Ep. LXX.

enjusque metropolitani in metropoli sua, mirum videtur quare unus in proprium jus ambiat vindicare, quod multorum constat esse commune. Nisi forte quis dicere audeat, majorem vim sacramentorum esse apud alios quam apud alios, quod schismaticum esset et unitatem Ecclesiae divideret.

47. « Hæc dicentes, non reprehendimus institutionem Ecclesiasticam, per quam pax Ecclesiae firmitus colligata est, cum inferiores a superioribus sacramentorum dispensationem suscipiunt, nec ultra quam sibi concessum est usurpare præsumunt; verum ubi personarum æqualis est potestas, quarum altera alteri nihil præter charitatem debet, si alteri jus suum vult detrabere et sibi soli arrogare sua querens, deceptus est seculi ambitione. Nos quippe Rhemensi Ecclesiae non invidemus, et si reges Francorum erga eam habuerint tantam devotionem, et malint a metropolitano ejus consecrari quam ab alio, non repugnamus, non dolemus; imò super benedictionem eorum, si nos adesse contingerit, gratanter loco idiotæ, Amen respondebimus.

48. « Supradieta vero verborum serie ostensum est, in unctione Ludovici regis nihil nos fecisse contra morem: restat ut ostendamus, nihil nos fecisse contra legem. Lex quippe est præceptio vel prohibitio scripta, ad communem utilitatem referens quicquid jubet aut prohibet. Contra hanc ergo nihil fecimus, quia nulla contradictione prohibiti, communi utilitati in hoc facto, charitate suggerente, consulimus. Si vero privilegiis nititur Rhemensis Ecclesia, illa privilegia apud nos nulla sunt, quia nec in generalibus Conciliis nobis audientibus sunt recitata, nec ad Ecclesias nostras epistolari maturitate directa; et ut manifestius dicamus, nulla nobis familiari vel publica relatione propalata. Illius ergo legis prævaricatores non sumus, cujus auditores nunquam fuimus. Quæ tamen si audita esset, nihil nobis obesse deberet: lex enim justa debet esse et possibilis, loco et tempori congruens: justa si sit, Deus scit. Nos autem interim nec ut justam approbamus, nec ut injustam condemnamus, quam adhuc ignoramus. Possibilis vero non erat, quia consecratio regis Rhemis, archiepiscopo Ecclesie nondum inthronizato, sine summa perturbatione et sanguinis effusione celebrari non poterat. Loco non conveniebat, quia civitas sub anathemate posita erat. Tempori opportuna non erat, quia si consecratio regis differretur, regni status et Ecclesie pax graviter periclitaretur. Quod ergo fecimus, salubri deliberatione et provida dispensatione fecimus, nulli invidentes, nullius nobis auctoritatem arrogare molentes, sed nos intra terminos nostros simplici oculo cohibentes. Sentiant aliter qui volunt: non timeamus tribunum terreni judicis, quia securos nos facit conscientia nostra ante tribunal interni cognitoris. Novimus enim quia necessarie dispensationis modus nulli unquam sapientium displicuit, quam

non solum privatae leges, quibus nec fidei veritati, nec morum honestati consulitur, sed etiam leges generales contra hæreticos vel sceleratos promulgatae admittunt, quando majoribus malis amovendis melius subvenit moderatio sinceræ charitatis, quam rigor indiscrete severitatis. Hæc primo ex auctoritate Evangelica, dehinc ex Actibus Apostolorum, tertio ex Epistolis Apostoli, postremo ex decretis Romanorum Pontificum cæterorumque orthodoxorum Patrum sententiis facile probarentur, nisi prolixitas Epistolæ modum excedere videretur. Illicusque diserta quidem Ivo's Apologia.

His cognitis Paschalis papa acquievisse visus est, cujus nulla habetur ad hæc ipsa adversus eum progressa ulterius commonitio, vel comminatio, nec Ivo's (ut consuevit) defensio fortius inculcata.

49. *Rhemensis Ecclesia collapsa quomodo restituta.* — Quod autem adeo deploratum audisti statum Rhemensis Ecclesie, quomodo dispensatione agendum fuerit, ut qui ejus erat episcopus suum locum reciperet, atque pelleretur intrusus: de his omnibus auctoritate Apostolica roborandis scripsit idem Ivo Carnotensis episcopus sequentem Epistolam ad Paschalem papam, qua rei gestæ series aperitur his verbis¹:

50. « Paschali summo Pontifici, Ivo humilis Ecclesie Carnotensis minister, directionem filii et obedientiam per cuncta subjecti.

« Notum esse volumus excellentiæ vestræ, quia ego et domnus Theobaldus, Beati Martini Parisiensis prior, audientes miserabilem et mirabilem Rhemensis Ecclesie desolationem, ausu familiaritatis opportune et importune regem Francorum interpellavimus, quatenus prædictæ Ecclesie, expulso invasore Gervasio, pacem restitueret, et domnum Rudolphum ejusdem Ecclesie metropolitani, in gratiam suam receptum, eidem Ecclesie præesse concederet. Acquievit tandem precibus nostris, et concessit ut eum ad curiam suam, quæ Aurelianis in Natali Domini congreganda erat, secure adduceremus, et ibi cum eo et cum principibus regni de hoc negotio, quantum fieri posset, salva regni integritate tractaremus. Factum est ut conditum erat, convenientes in curiam, multiplicatis intercessoribus petitionem nostram semel et sæpius replicavimus. Sed reclamante curia, plenariam pacem impetrare nequivimus, nisi prædictus metropolitani per manum et sacramentum eam fidelitatem regi faceret, quam prædecessoribus suis regibus Francorum antea fecerant omnes Rhemenses archiepiscopi, et ceteri regni Francorum quamlibet religiosi et sancti episcopi. Quod persuadentibus et impellentibus totius curiæ optimatibus, etsi propter mandatorum rigorem minus licebat, factum est tamen, quia Ecclesiæ paci et fraternæ dilectioni sic expediebat. Cum enim plenitudo legis sit charitas: in hoc

¹ Ivo Ep. CCV.

legibus obtemperatum esse credimus, in quo charitatis opus impletum esse cognovimus.

51. « Petimus ergo flexis genibus cordis, ut hoc eodem intuitu charitatis et pacis veniale habeat paterna moderatio, quod illicitum facit non aeterna lex, sed intentione acquirendae libertatis praesidentium sola prohibitio. In excessibus ergo filiorum utili dispensatione et compensatione contractis, sufficiat patri verbum pro verberare, et devota filiorum supplicatio pro summo reputetur supplicio. Si enim vult Apostolica auctoritas omnia quae medicinali condescensione dispensantur districte judicare, oportebit pene omnes ministros administrationibus suis renuntiare, aut de mundo exire; nec habebunt ubi seminent spiritalia, nisi permittantur aliqua tolerare carnalia. Unde necessitati temporum cedendum esse Apostolica docet sublimitas, et Orthodoxorum consulit auctoritas, dicens: quia ubi populorum strages jacent, detrahendum est aliquid canonum severitati, ut majoribus morbis sanandis charitas sincera subveniat. Haec dicendo, doctam paternitatem vestram non docemus, sed eandem consulendo et rogando monemus, ut

ibi consilii et pietatis studeatis visceribus abundare, ubi fas non est debitam fortitudinem exercere ». Illicusque Ivo ad Paschalem papam, qui petitis annuit post factum, quod faciendum penitus contraxisset. Ita plane in more positum fuisse Ecclesiae Romanae, alibi alia etiam occasione sic idem ¹: « Novi enim consuetudinem Romanae Ecclesiae, quae non solet neque vult decretis suis patenter obviare: solet tamen dispensatione multa infirma tolerare, postquam patrata sunt, tam pro locorum necessitate, quam pro personarum utilitate et honestate. Neque enim aliter cogendus est summus Pontifex contraria sibi scribere vel facere, ne cogatur illud dicere Apostolicum ²: Si quae destruxi iterum aedifico, praevaricatore me constituo etc. »

Eodem anno atque Indictione, habet Romualdus Salernitanus archiepiscopus in Chronico, corpora sanctorum Pontiani papae et martyris, Eleutherii episcopi et martyris, et Anastasii confessoris ab Urbe translata esse Trojam in Apulia civitatem, in qua translatione multa miracula edita tradita.

¹ Ivo Ep. CCLXII. — ² Gal. II.

Anno periodi Graeco-Romanae 6599. — Anno Aerae Hispan. 1144. — Anno Hegirae 500, inchoato die 2 Sept., Fer. 1. — Jesu Christi 1106.

— Paschalis II papae 8. — Henrici V reg. 1. Alexii Comneni imp. 26.

1. *Henricus imp. ab Henrico filio detinetur.* — A num. 1 ad 25. Herimannus, in Narratione Restaurationis abbatiae Martini Tornacensis, tomo xii Spicilegii Dacheriani num. 83, refert quomodo Henricus IV imp. a filio Henrico imperio spoliatus fuerit, quod hoc anno accidisse testatur Sigebertus in Chronico: « Callidus papa », inquit Herimannus, « Henricum adolescentem filium Henrici imperatoris adversus patrem concitat, et ut Ecclesiae Dei auxilietur admonet; ille regni cupidus et gaudens se competentem occasionem ex Apostolica auctoritate invenisse, contra patrem ferociter armatur, cumque regno propellit, ita ut praeter Authertum, Leodiensem episcopum, nullum inveniret qui sibi adhereret. Juvenis frendens eo quod contra voluntatem suam a praedicto episcopo pater suus in urbe Leodiensi retineretur, exercitum congregat et in die sancto Parasceves (qui hoc anno cum die xxiii mensis Martii concurrat) Leodium violenter intrare parat. Praecedente igitur feria quinta, cum episcopus jam vespere finitis ex more Ecclesiastico pedes canonicorum lavaret et Cenam Dominicam celebraret, ecce subito nuntiatur milites juvenis regis castrum quod Visetum (ad Mosam posi-

tum) dicitur obtinuisse: exiliunt cum impetu Leodienses, et praecedente Namurcensi comite, obviam venientibus ire festinant; ecce autem dum militia novi regis inconsulte et praepropere pontem Mosellae fluminis (Sigebertus habet *Mosae*) conscendit, repente pons fluminis frangitur, et quingenti fere milites loricati et armati cum equis in flumine corruentes necantur. Sicque rex juvenis, quod contra patrem iam solemniter pugnavisse voluisset, sero renitens (forte legendum *penitens*) non sine magna confusione retrocedere, et Moguntiam redire compellitur; sed quia iam totum regnum excepto Leodio obtinuerat, rursum resumptis viribus contra patrem armatur, donec pater omni principum auxilio destitutus in quodam castello ab eo includitur. Extat quaedam Epist. ab eodem patre Philippo regi Francorum scripta, in qua de filio suo conqueritur, quam si quis legerit et non flevit, videtur mihi duri esse cordis ». Extat ea inter ejus Epistolas, editas a Reinero Reinecio ad Vitam Henrici IV.

2. *Moritur Henricus imp.* — Aliqui tamen tradunt non paucos ei fuisse: « Contigit interim, imperatorem Leodio aegrotasse, et perductus usque

ad mortem kalendis Augusti diem ultimum clausit», inquit chronographus Hildensheimensis, qui bellum inter eum et Henricum filium gestum prolixè narrat, et ex Urspergensis Baronius. Eum tamen die septimo mensis Augusti obiisse notat Ordericus pag. 762 et pag. 819, eique alii passim suffragantur: «Henricus imp. Alemannorum VII idus Augusti expiravit, sed quia pro multis reatibus suis Ecclesiæ, teste Deo, non satisfecerat, terra carni: nec per multos annos humano ritu sepeliri mernit. Karolus Henricus V filius ejus post eum imperavit, qui post tres annos Mathildam filiam Henrici I regis Anglorum uxorem duxit, sed legitimum sibi de ea successorem non habuit», inquit Ordericus in postremo loco citato.

3. *Scriptis ad S. Hugonem abbatem Cluniac.* — Henricus imp. Epistolas tres ad S. Hugonem abbatem Cluniacensem relatas tom. II Spicileg. Dacheriani pag. 396 et seqq. dedit, rogavitque ut illum inviseret, quo pacem inire posset cum summo Pontifice. In ultima hæc habet: «Notam facimus serenitati vestræ quod pro reparatione Ecclesiarum, quæ nostris temporibus nostris peccatis, heu? corruerunt, omnibus modis, prout Deus vires dederit, volumus laborare, et sanis consiliis omnium bonorum amodo acquiescere, si quo modo valeamus dispersa colligere, et hiantia cuneo schismatis unionis glutino coadunare, atque ruinam Ecclesiæ quæ per nos facta est, pacis et justitiæ instauratione recompensare. Præterea significamus vobis, quod si, Deo propitio, regnum et sacerdotium in unum recolligere poterimus, post confirmatam pacem ire Jerusalem disponimus, et videre Sanctam Terram in qua Dominus noster in carne visus est, etc.» Sed res in eo statu non erant, ut verbis ejus fides adhiberi posset. Obiit anno regni sui quinquagesimo, in excommunicatione trium Romanorum Pontificum.

4. *Concilium Guastaldense.* — A num. 25 ad 42. Concilium *Guastaldense* celebratum est a Paschali papa XI kal. Novemb., in eoque statutum, «ut episcopi et clerici in schismate ordinati, si sunt alioqui probati vitæ, suscipiantur», quia nempe pauci sacerdotes aut clerici Catholici in Longobardia reperiebantur, inquit Cencius Camerius, ex quo plura referuntur tom. X Concil. ibidem legenda. Porro Guardastallum positum est super ripam Padis fl., diciturque etiam *Wastallis*, hodie ditionis ducis Mantuani. Vide dicta anno mxcvii, num. 8 et seqq.

5. *Paschalis II in Galliam venit.* — Ad n. 42. Paschalis papa rebus Germaniæ consulturus in Galliam venit, et in Burgundia Natale Domini apud Cluniacum celebravit, uti habet Baronius ex Urspergensis in Chron. Causa adventus Pontificis in Galliam annotavit Sugerius in Vita Ludovici Grossi regis pag. 288, tom. IV Duchesnii: «Sequenti Boamundi repatriationis anno, venerandæ memoriæ universalis et summus Pontifex Paschalis ad partes Occidentales cum multis et sapientissimis viris episcopis et cardinalibus, et Romanorum nobilium

comitatu, ut regem Francorum, et filium regem designatum Ludovicum, et Ecclesiam Gallicanam consuleret super quibusdam molestiis et novis investiture Ecclesiasticæ querelis, quibus cum et infestabat et magis infestare minabatur Henricus imperator, vir affectus paterni et totius humanitatis expertus, qui et genitorem Henricum crudelissime persecutus exheredavit, et ut ferebatur, nequissima captione tenens, inimicorum verberibus et injuriis, ut insignia regalia, videlicet coronam, sceptrum, et lanceam sancti Mauriti redderet, nec aliquid in toto regno proprium retineret, impiissime coegit. Et quidem deliberatum est Romæ propter Romanorum conductitiam perfidiam de prefatis, imo de omnibus questionibus tutius regis et regis filii, et Ecclesiæ Gallicanæ in Francia, quam in urbe disceptare naufragio. Venit itaque Cluniacum, a Cluniaco ad Charitatem». Boamundus Antiochiæ princeps anno mciiv in Apuliam venit, uti scribunt Willelmus Tyrius lib. 11, cap. 1, et Fulcherius in Hist. Hierosol. lib. 2. Quare præsens annus secundus est ab ejus *repatriatione*, sed Sugerius secundi anni menses negligit. Qui modus annos numerandi ab historicis quandoque usurpatus chronologis, valde observandus, ne, dum eos errare perperam putant, ipsimet errent.

6. *Philippus Franciæ rex mortuus an. mcviii.* — A num. 43 ad 49. *Philippus* Francorum rex anno tantum millesimo centesimo octavo e vivis excessit, Ordericus lib. 11, chronographo Malleacensi, et Fulcherio lib. 2 Hist. Hierosol. auctoribus coævis testibus, quibus passim alii consentiunt. Ordericus, et quidam alii eum IV kal. Augusti mortuum tradunt, quidam vero III kal. Augusti; quare priores diem mortis, posteriores diem sepulture notarunt. Mortuus est *anno regni sui XLVII* inquit Ordericus, et liquet ex dictis. *Ludovicus* cognomento *Grossus*, hujus nominis VI, qui jam ab anno mxcix rex designatus fuerat, ut supra diximus, Aurelianis, reclamantibus Rheimensibus, ut videre est apud Baronium, coronatus est sequenti *Dominico*, ait Ordericus, ideoque die secunda mensis Augusti, verum quæ eo Christiano anno cum Dominica concurrat; non dubito, quin Ordericus hic sicuti non raro alibi, in chronologiam peccet. Sugerius enim in Vita Ludovici Grossi regis cap. 13 asserit, eum unctum et coronatum a Daimberto *Senonensi* archiep. *Aurelianus* die antecedenti, sc. in die *Inventiſonis sancti protomartyris Stephani*, quod et ex eo habet confirmator Aimoini cap. 50, *III nonas Augusti* (quod idem est), inquit chronographus Senonensis. In Chron. S. Petri Catalaunensis tom. I Biblioth. Labbei ad annum mcviii legitur: «*Philippi regis obitus. Ordinatio Ludovici filii ejus vicissim sexto anno ætatis ejus*», sed annum unum minus dicit; cum Lisardus episc. Suessionensis in Vita sancti Arnulphi sui decessoris prodatur eum natum esse an. Dominicæ Incarnat. mxxxii, *orationibus et meritis S. Arnulphi* impetratum. Sugerius in Ludovici Grossi Vita cap. 13, ait:

« Præfatus Ludovicus, quoniam in adolescentia Ecclesiæ amicitiam liberali defensione promeruerat, pauperum et orphanorum causam sustentaverat, tyrannos potenti virtute perdomuerat, Deo auctante, ad regni fastigia, sicut honorum voto asciscitur, sic malorum et inipiorum voliva machinatione, si fieri posset, excluderetur.

7. *Tertia profectio Occidentalium in Terram Sanctam.* — « Anno ab Incarnal. Domini mvi, in fine Februarii, quando cometa longissimum crinem emittens in Occiduis partibus apparuit, Boamundus famosus dux post capiam Antiochiam in Gallias venit (ex Apulia nempe), et Constantiam regis Francorum Philippi filiam (ex Berta nempe legitima conjuge) uxorem duxit, et nuptias honorabiles apud Carnotum administrante sufficienter apparatus Adela comitissa (Blesensi nempe et sorore Henrici Angliæ regis) celebravit. Tunc tertia profectio Occidentalium in Jerusalem facta est, multorumque maxima conglobatio militum pedibus suis Bizanleum stemma proculecare minitanti contra Turcos progressa est. Cæterum iustissima Dei dispositio conatus concupiscentium invadere rem proximi sui frustrata est: unde superba conglomeratio ambitiosorum nihil eorum quæ incassum rata fuerat adepta est », inquit Ordericus lib. 3. pag. 589. Addit Willelmus Tyrinus lib. 11, cap. 1, Boamundum alteram filiam Philippi regis nomine *Ceciliam* ex Bertrada natam Tancredo nepoti suo destinasse uxorem. Peractum *Constantiæ* matrimonium coram Philippo rege, et multis episcopis ac regni proceribus: « Astitit etiam ibidem », inquit Sugerius in Vita Ludovici Crassi cap. 9, « Romanæ Sedis Apostolicæ legatus dominus Bruno Signiensis episc., a domno Paschali papa ad invitandam et confortandam sancti Sepulchri viam, dominum Boamundum comitatus. Unde plenum et celebre Pictavis tenuit Concilium, cui et nos interfuimus, quia recenter a studio redieramus. Ubi de diversis Synodalibus, et præcipue de Hierosolymitano itinere ne tepescat, agens, tam ipse quam Boamundus, multos ire animavit ». Habitu illud Concilium VI kal. Julii, ut refert chronographus Malleacensis, et Boamundus mense Martio in Gallias adventavit, ut docet Ordericus lib. 11, pag. 816.

8. *S. Anselmus in Angliam redit.* — Hoc anno S. Anselmus, qui in Galliis agebat, ab Henrico rege revocatus est in Angliam, misso ad eum Willelmo legato suo; ipsemet rex in Normanniam venit, ubi Anselmus ægrolabat: « Igitur in Assumptione B. Mariæ », inquit Eadmerus lib. 4 Novorum c. 3, « rex Beccum (monasterium est in diocesi Rothomagensi trans Sequanam, ad rivum Beccam prope amnem Rillam) venit, celebratoque ab Anselmo solemnii missæ officio, una rex scilicet et ipse conveniunt, et tandem omnia quæ illos in diversa traxerant, pacem et concordiam invenerunt. Siquidem Ecclesias Angliæ, quas Willelmus rex frater regis Henrici sub censum primus redegerat, liberas ab eadem exactione rex in manus Anselmi

reddidit: et se de ipsis dum viveret nihil accepturum, quandiu essent sine pastore, promisit. Pro pecunia autem quam a presbyteris acceperat, eam emendationem spondidit, ut ii qui nondum inde quid dederant nihil darent; et qui dederant, tribus annis sua omnia in pace et quiete libera possiderent. Cuncta vero quæ de archiepiscopatu, exulante Anselmo, suo jussu accepta fuerant, se redditurum cum Angliam esset reversus, dato vadimonio, pollicitus est. His et aliis quæ res expetebat inter viros compositis, Anselmus iter Angliam remeandi ingressus est ». Paucis interpositis: « Itaque posthac, ii qui Ecclesiis ac monasteriis pro exigenda regia pecunia fuerant intromissi, ejecti sunt; et personis ejusque Ecclesiæ, res intus et extra ad communem utilitatem commendatæ. Presbyterorum etiam causæ, sicut regem Anselmo promissæ diximus, dispositæ sunt; atque idipsum per totum regnum divulgatum. Rex ipse inter hæc Normanniam sibi bello subegit », et quidem præsentis anno; sed quia Baronius rem anno sequenti narrat, ejus ordinem sequemur.

9. *Annus natalis Alfonsi VII imp. incertus.* — Postquam præfectus Maurorum Africæ a Miramolino Almorabitarum missus, maguam partem Hispanicæ Saracenice subegit, hoc anno ejus regimen *Abdallæ* tradidit, uti narrat Sandovalius fol. 96. Hoc pariter anno, uti in Cartulario legitur, Asturicæ idem Alfonsus Chartam dedit subscriptam *Æra quatuordecena centena et quaterna post peracta millesima*. In ea dicitur: *Alfonsus imperatorem* totius Hispaniæ regnare cum *Isabella* conjuge. Recentiores scriptores rerum Hispanicarum nativitatem *Alfonsi VII*, cui nationes omnes titulum *imperatoris Hispaniæ* tribuere, hoc anno collocant; a quibus dissentit Garibaius, qui Raimundi comitis ejus patris mortem cum anno mc connectit. Verum de anno natali *Alfonsi VII*, nihil illi certi in medium adducunt. Quoad *Raimundum comitem*, patrem ejus, *Alfonsi VI* generum et Galliciæ principem, is e vivis excessit post mensem Aprilum anni mxcvi. Sandovalius enim fol. 96 Chartam refert die xvii April. ejusdem anni datam, qua constat eum adhuc in vivis fuisse, qui tamen die xxix Decemb. ejusdem anni jam obierat, ut liquet ex alia Charta ab eodem in Historia Salmantiensi recitata.

10. *Alfonsus Aragon. rex ad Sacralia victus.* — Hoc anno mortuus est *Josephus*, seu *Jusepus* imperator Almorabitarum seu Saracenorum Africæ et Hispaniæ; Noveirius enim anno Hegiræ n, obitum ejus consignat, quo anno « in campo Zalla, quæ prope Badaloz (vulgo Badajoz) cum Aldefonso rege acriter dimicavit », inquit Rodericus in Historia Arabum cap. 48. Describit illud prælium Rodericus in Historia Goth. lib. 6, capitulo 32, atque: « Licet multi de Arabibus periissent, tot et tanti de Christicolis perierunt, quod illius belli strages et memoria quasi in proverbium adhuc extant ». Locum prælii, quem in Hist. Arabum *Zallam*, hic

Sacralia appellat; Petrus vero episcopus Legionensis, qui praelio interfuit, eum vocat *Saltatrices*, ut videre est apud Sandovalium, qui opus ejus Ms. habuit. in Alfonso VI. fol. 95. Rodericus in Hist. Gothica non nominat imperatorem *ad Sacralia* victorem; sed ex iis quæ in Hist. Goth. cap. 33 habet, videtur intelligere *Alim* seu *Kalim*, cum eum ibi nominet; et revera, qui Saracenos ducebat, vocabatur *Abenjufax* (qui idem est ac *Ebenjufax* filius Josephi, idemque ac *Itali*), et *Josephus*

nonnisi sub finem hujus Christi anni demortuus. Petrus Legionensis citatus tradit, *Italim* post hoc insigne praelium in Africam transfretasse relicto Abdalla vicerege, ex quo eruitur, Josephum tunc demortuum, et Alim Marocum perexisse, ut sedis imperii possessionem iniret. Hæc enim inter se optime conveniunt. Deinde *Alis* imperator mare iterato trajecit, annoque mox ad *Uclesium* Christianos vicit, ut ibi videbimus.

PASCHALIS II ANNUS 8. — CHRISTI 1107.

1. *Paschalis in Gallia Concilium Trecentense celebrat.* — Annus sequitur millesimus centesimus septimus Redemptoris Indictione decima quinta, quo Paschalis papa Gallias visitans, Concilium Trecentense habuit. Quanto autem fuerit exceptus amore pariter et honore cultus, Urspergensis sic narrat: « Ab universis finium illarum Ecclesiis, ut vere Christi discipulus et Apostolorum vicarius, ingenti honore suscipitur, digna reverentia tractatur, non aliter quam legifer de celo missus auditur. Sic itaque per menses aliquot, ut fidelis dispensator et prudens, quotidianam sollicitudinem omnium Ecclesiarum gerens, tandem circa Ascensionem Domini Concilium non modicum apud Trecentas habuit, ubi inter multa quæ pro tempore et necessitate corrigenda erant correxit, sententiam de libera pastorum electione, et de coerenda laicorum in Ecclesiasticas dignitates presumptione juxta prædecessorum suorum decreta promulgavit. At rex Henricus peragratis Saxonie finibus post, Paschale festum Moguntiae actum, eidem se Concilio vicinum, non tamen præsentem cum nonnullis episcopis et optimatibus exhibuit. Cum quibus etiam inito consilio, legatos honorabiles ad Apostolicum transmisit, per quos tam ipsi quam universæ Synodo potestatem constituendorum episcoporum, privilegiis Apostolicis Carolo imperatori concessam notificarent. Super qua questione, quia in alieno regno quidquam definiri, utpote Romano jam incipiens potiri sceptro, Henricus non patitur, inducias sibi totum sequentis anni spatium Romanum veniendi et eandem causam generali Concilio ventilandi concedunt. Tunc etiam nonnullos nostrates

episcopos, eo quod eidem Concilio non intererant, officii suspensione dominus papa mulcavit, quos tamen non multo post satisficientes elementer absolvit. Rursum necdum humilitatem quam quaesivit, Germanicis in cordibus invenire se satis conquestus; nos nequaquam ut proposuerat visitare, sed finibus Italicis se comitatumque suum disposuit referre ». Hæc de Synodo rebusque gestis in ea, et Henrici regis legatione Urspergensis.

2. *Dolensis Ecclesia episcopum poscit Vulgrinum revertentem.* — In eodem Trecentensi Concilio dum esset Paschalis papa, contigit ad eum mitti legationem ab Ecclesia Dolensi, quæ viduata pastore, peteret dari sibi archiepiscopum Vulgrinum, Carnotensis Ecclesie cancellarium, Ivonis discipulum, virum quidem doctrina atque probitate præstantem: qui suæ electioni repugnans, et ab eodem Concilio recedens, ad Ivonem venit, implorans ab eo auxilium apud Pontificem, ne egeretur invitus munus episcopale suscipere: ejus rei gratia has tunc ad Paschalem papa Ivo litteras dedit¹:

« Paschali summo Pontifici, Ivo humilis Carnotensis Ecclesie minister, debitam cum omni subjectione obedientiam.

3. « Reversus a Concilio Trecentensi filius noster Vulgrinus Ecclesie nostræ cancellarius anxie conquestus est, quod Dolensis Ecclesia, destinatis excellentiæ vestræ quibusdam legatis suis, eum sibi in episcopum sub præsentia vestra elegerit, et huic electioni ad eorum petitionem vestra paternitas assensum præbuerit, nec ejus excusatio-

¹ Ivo Ep. cc.

nibus quamvis idoneis, adhuc anrem accommodare volnerit. Quamvis enim sit bene litteratus et bonis moribus ornatus, multis tamen allegationibus humiliter insufficientiam suam prætendens, dicit se potius multa gravia perpassurum, quam onus episcopii hoc tempore subiturum. Novit autem vestra paternitas, quia leges sæculi¹, dissensiente filio familias, sub ejus nomine sponsalia fieri non permittunt. Quanto magis in sponsalibus Ecclesiæ id observare convenit, in quibus nisi sincera subveniat charitas, quid boni per angariam facere possit, sive facultates suas distribuendo, sive se ipsum ad martyrium exponendo humana imbecillitas? Nemo enim invitus bonum facit, etiamsi bonum est quod facit. Unde nos admonet Spiritus sanctus in Cantico canticorum²: Adjuro vos, filiæ Hierusalem, nolite suscitare dilectum, neque evigilare faciatis donec ipsa velit. Ne igitur nostro Jacob amanti Rachel, nocte supponatis Liam, nisi forte Rachel³ mandragoras primogeniti Liæ concupiscat, et hac mercede conductum Jacob cum Lia dormire permittat. Tali enim ordine posset de tali copula merces boni operis provenire, et fortitudo quæ plurimum necessaria est omni regimini, ad tolerandos ejusdem regiminis labores exuberare. Et vero diu verbis oneremus sanctitatem vestram, flexis genibus cordis opportune et importune imploramus clementiam vestram, ut nullius vinculis obedientiæ prædictum fratrem constringatis, cujus saluti, quantum possumus, providere debemus, quia eum de sacro fonte suscepimus: qui etiam elegit magis in loco humili salvari, quam in alto periclitari. Vale». Hæc ad papam: ad electores autem sic breviter, cum illi egissent apud Ivonem, ut cogeret electum acquiescere electioni⁴:

« Ivo Dei gratia Carnotensis Ecclesiæ minister, clero Dolensis Ecclesiæ et Stephano comiti salutem.

4. « Bonæ intentionis vestræ laudamus affectum, quod Vulgrinum filium nostrum vita honestum, scientia clarum elegistis vobis in archiepiscopum. Sed quantum nobis videtur, frustra laborat studium vestrum, quia nec prætaxati filii nostri voluntas est electioni vestræ acquiescere, nec nostræ potestatis ad hoc eum invitum cogere. Habent enim leges imperiales, quia filio familias dissensiente, nequaquam possunt sponsalia sub ejus nomine contrahi. Multo itaque minus spiritualis sponsi animus ad spiritualis sponsæ copulam in angaria est pertrahendus. Prædictus enim frater jam super hoc per litteras nostras et suas allegationes domno papæ transmisit, et onus episcopii prout potuit refutavit. Si ergo studia vestra mutare non vultis, si in aliam personam deliberatione vestra declinare non vultis non a nobis, sed a summo Pontifice est querendus, cui concessum est invitos ad hæc officia cogere, et de volentibus et de nolentibus, Ecclesiæ Dei pontifices ordinare. Quan-

tum ergo domnus papa super hoc me coegerit, tantum ego prædictum fratrem cogam». Hæc ad electores Ivo. Quid autem post hæc actum sit, nobis hactenus incompertum.

5. *Reditus Paschalis in Urbem.* — Dum ipse Paschalis papa hoc anno Gallicanas Ecclesias visitaret, adiit illustre Floriacense cœnobium: quænam autem cum ejus monachis de translatione corporis S. Benedicti asserta transegerit, Petrus Diaconus Cassinensis narrat¹. Sed vacillat fides ejus ex Eugenii papæ Tertiæ et successorum Pontificum Diplomatum, editis nuper ex promptuario Floriacensi omni fide a Joanne a Bosco, monacho Celestino, optime merito de monastica antiquitate ordinis S. Benedicti. « Autumni vero tempore ex Gallia Paschalis Pontifex Romam rediit, et a Romanis », inquit Urspergensis, « tantis tripudiis excipitur, ac si emortuus redivivus crederetur ». Post hæc autem eodem hoc anno ait Petrus pervenisse ad ipsum Paschalem Cassinenses monachos, agentes adversus Ottonem ipsorum abbatem: quos ubi redarguit, ad monasterium reverti jussit; sed paulo post defuncto eodem Ottone kal. Octobris, subrogari in ejus locum sanctum Brunonem ex Signiensi episcopo monachum Cassinensem, inde vero legatum Apostolicum in Gallias comprobavit. Hæc omnia pluribus Petrus Diaconus in Chronico Cassinate.²

6. *Henricus Angliæ rex rebus Ecclesiæ compositis, debellat hostes, potitur Northmannia.* — Quo anno (ut Sigebertus tunc temporis res gestas scribens enarrat) Henricus Angliæ rex contra Robertum Northmanniæ comitem germanum suum, qui jam pridem ex Hierosolymitana expeditione redierat, ut regnum sibi jure debitum, quod natu major frater esset, acciperet, pugnans obtinuit eum, et Northmannia potitus, potentiores oppressit, qui Robertum secuti fuerant. Hanc autem sibi victoriam paravit rex per pacem, quam ante bellum concessit S. Anselmo archiepiscopo Cantuariensi, hactenus in Gallia exulanti: nam audi Edinorum³ qui præsens aderat, atque ista scribebat: « Dehinc in Assumptione B. Dei genitricis et perpetuæ Virginis Mariæ rex Henricus Becum adveniens, omnia quæ inter se et Anselmum de prædicto negotio resederant, moderante Sedis Apostolicæ sanctione deleivit, atque de singulis, ad quæ tendebat, suæ illum voluntatis competentem fecit ». Et inferius post narratum reditum S. Anselmi in Angliam, hæc de bello: « Inter hæc rex in Northmannia positus, valde lætatur (sicut ferebant hi qui ad nos veniebant) quod fuerat Anselmi pace potitus. Unde etiam sibi firma spe applaudebat, suo se dominio totam Northmanniam subjugaturum: quod et factum est. Nam conserto gravi prælio, fratrem suum Robertum Northmanniæ comitem, et alios principes qui contra illum in

¹ L. XI, ff. de nupt. et L. XII, C. de ritu nupt. — ² Cant. II. — ³ Gen. XXX. — ⁴ Ivo Ep. GCH.

¹ Pet. Diacon. Chr. Cass. l. IV, c. 31, 32, 33. — ² Ibid. c. 34. — ³ Edm. in Vita S. Ansel. l. II, apud Sur. tom. II, die XXI Apr.

bellum venerant cepit, innumerisque peremptis, totam terram victor obtinuit, idque per litteras Anselmo gaudenter et gratus mox intimavit. Omnes vero qui hæc gesta tunc temporis audire, ea meritis concordiae, quam rex cum Anselmo fecerat, adscribere. Hæc Edinernus. Litteras autem tunc scriptas a rege ad S. Anselmum recitat Willelmus Malmesburiensis his verbis¹:

7. « Henricus rex Anglorum, Anselmo Cantuariæ archiepiscopo, salutem et amicitiam.

« Paternitati et sanctitati vestræ significamus, Robertum comitem Northmanniæ cum omnibus copiis militum et peditum, quos prece et pretio coadunare potuit, die nominata et determinata mecum ante Tenebrachium acriter pugnasse, sed tandem sub misericordia Dei vicimus, et sine ulla cæde nostrorum. Quid plura? divina misericordia ducent Northmanniæ, et comitem Moretoui, et Willelmum Crispinum, et Willelmum de Ferreris, et Robertum de Stutevilla senem, et alios usque ad quadringentos milites, et ducent peditum in manus nostras, et Northmanniam dedit, de illis autem quos gladius peremit, non est numerus. Hoc autem non elationi vel arrogantiae, nec viribus meis, sed dono divinæ dispositionis attribuo. Quocirca, Pater venerande, supplex et devotus genibus tuæ sanctitatis advolutus te deprecor, ut superum Iudicem, cuius voluntate et arbitrio triumphus iste gloriosus et utilis mihi contigit, depreceris, ut non sit mihi ad damnum et detrimentum, sed ad initium bonorum operum et servitii Dei, et ad sanctæ Ecclesiæ Dei statum tranquilla pace tenendum et roborandum, ut amodo libera vivat, et nulla concutiatur tempestate bellorum. » Insuperque regis Epistola. Pergit auctor: « Hinc est contemplari, quanta materia boni in regis pectore fuerit, si quis tam ingenuæ fidei scintillas fomento verborum animaret, et in majores vires bonis admonitionibus excitaret.

8. « Venit igitur rex sublimi trophæo splendus, et triumphali gloria Angliam invectus, investitorasque Ecclesiarum Anselmo in perpetuum in manum remisit, eodem concedente, ut propter hominum regi factum nullus arceretur a benedictione. » Hæc Willelmus. Itaque conventum inter Paschalem papam et regem Angliæ per legatos, idem auctor sic superius: « Directi Romam legati Willelmus de Warlewast et Baldwinus monachus, controversiam tot annis agitatam singulari probitate sedarunt. Concessit siquidem papa ut rex homagia de electis acciperet, sed nullum per baculum et annulum investiret. Subdit regem quoque monitu Anselmi correxisse quod deliquisset, dum pecunia moletasset presbyteros fornicarios. « Scripserat enim, inquit, ad regem, ut ab hac exactione temperaret: quod Ecclesiasticorum ministrorum vitia, episcoporum, non secularium corripi deberent instantia. » Quod et factum esse, et per om-

nia S. Anselmo satisfactum, idem auctor affirmat.

9. *Status infelix Ecclesiæ Northmanniæ.* — At sicut religionis cultus, et erga Catholicam Ecclesiam obedientia et observantia fecerunt (ut audisti Henricum regem esse victorem; ita Robertum comitem Northmanniæ, rerum divinarum contemptus, et Ecclesiasticarum incuria, despectio atque depressio depresserunt, comitatu privarunt atque in vincula redegerunt. Quam enim infelix fuerit sub eodem principe status Ecclesiæ Northmanniæ: Ivo Carnotensis episcopus his litteris significavit, scribens ad Paschalem Romanum Pontificem¹:

10. « Paschali summo Pontifici Ivo humilis Ecclesiæ Carnotensis minister, debitum cum omni subjectione famulatum.

« Cum status Ecclesiæ pene ubique terrarum ruinas lamentabiles patiatur, quisque dilector domus Dei dehonestationes ejusdem domus quanto vicinius sentit, tanto uberius plangit; quoniam ignis viciniore comburit. Quod ideo majestati vestræ prælibavimus, quoniam cum in aliis locis unusquisque domus Dei prostituta malitiam suam aliquo velamine tegere molitur: in terra Northmannorum ita manifeste prostituta est Ecclesia, ut de ea illud propheticum dici possit: Peccatum suum sicut Sodoma prædicaverunt, nec absconderunt. » Cur autem ista præmiserit, subjicit de Ecclesia Lexoviensi ejusmodi detestandum exemplum: « Quod in Ecclesia Lexoviensi paternitas vestra poterit agnoscere, quam jam per plures annos Ranulphus, agnomine Flammardus, Dunelmensis episcopus, inaudito invasionis genere occupavit, qui duos filios suos vig duodennes, accepto pastoralis baculo a comite Northmannorum, prædictæ Ecclesiæ intrudi fecit, ea conditione ut si primogenitus moreretur, Judaico more in episcopatum alter alteri subrogaretur. Quod cum partim dolentibus partim deridentibus plurimis diu perpressa esset Ecclesia, monito quorundam religiosorum graviter redargui solo charitatis intuitu Rothomagensis archiepiscopus, ad cuius diocesium pertinet prætaxata Ecclesia, quod ex adverso non staret, qui pro domo Israel murum opponeret. Ille idem feci aliis episcopis ejusdem metropolitani suffraganeis. Tandem cum comes terræ illius periculo amittendi principatus sui urgeretur, quasi penitentia ductus, monente Eborencensi episcopo cum metropolitano suo, præcepit ut prædictus Dunchmensis episcopus de Ecclesia cum sua sobole ejiceretur, et episcopus ibi canonice eligeretur. Sed quomodo electus adhuc possidere Ecclesiam ab eodem impediretur, cuius rei causa ad auxilium ferendum Paschalem Pontificem provocat, longiorum textu narrationem: sed hæc de his satis. Cur autem non sicut rex Angliæ, comes Northmanniæ penitens veniam cum victoria est consecutus: ex penitentia falsæ Saul et Antiochi regum ac David vere penitentia disci-

¹ Will. Malmesb. de gest. Pont. Angl. l. II.

¹ Ivo Ep. CLXXXI.

minc, possumus æque horum principum facta pensare ».

11. Extant ejusdem Ivonis ad archiepiscopum Rothomagensis eodem argumento alie conscriptæ litteræ, quibus vehementer insectatur scelus, cum unus episcopus duabus est præfectus Ecclesiis; ait itaque: « Cum enim ab ipsa infantia mundi in Lamech carnalis bigamia sit culpata: quomodo poterit in sponsa Christi, quæ est Ecclesia, laudari, quæ et sacramento et in veritate sacramenti uni debet viro desponsari? eliminetur ergo de Lexoviensi Ecclesia Ranulphus Dunelmensis episcopus, ut bigamia non admittatur: elinimentur pueri ejus, ut Neophytorum hæresis extirpetur etc. ». Perseverante autem eadem causa, ubi rex Anglorum Northmannia potitus est, ad præfectum ejus provincie idem Ivo eodem argumento alias dedisse litteras reperitur¹, quibus admonetur, ne plus regi quam Deo in ea functione placere studeat. Ubi in fine aurea hæc sententia: « Non enim ad hoc instituuntur reges ut leges frangant, sed fractores legum gladio, si aliter corrigi non possunt, feriant ».

12. *Henricus rex Angliæ mutatus in tyrannum Hildebertum episcopum Cenomanensem persequitur.* — Sed et ex his docemur, quam mutabiles sint principes atque lubrici ad malum, quamque facile fiant desertores virtutum, atque veloces ad vitia transfugæ. Ecce tibi, quem ex suis ipsius litteris audisti regem maxime pium, mox auditurus eris in tyrannum conversum ipsum Henricum regem Anglorum. Nam audi Hildebertum Cenomanensem episcopum, talia tantaque ab ipso patientem, ut ad dimittendum episcopatus onus, intolerabilibus pressus angustiis, Romam se ad Paschalem Pontificem conferre compulsus fuerit; sic enim ipse Epistola sua²: « Longum est enarrare quam constanti tyrannide rex Anglicus in eos sæverit, qui temperantia regis abjecta decreverit non prius pontifici parendum quam pontificem compelleret in sacrilegium. Quia enim turres Ecclesie nostræ dejicere nolimus; transmarinis subijciendi judiciis coacti sumus injurias pelagi sustinere, singularem scilicet molestiam itineris, atque unicam totius humanæ compinginis dissolutionem. Tantis igitur agitati turbinibus, ad Apostolorum Limina decrevimus proficisci, magnum novæ tribulationis arbitrati remedium, si Romani Pontifex nobis et consilio subvenerit et auxilio ». Hæc de sua in Urbem protectione. Quid autem egerit, in Epistola alia; qua agit de redivit meminit quæ sic se habet³:

13. « Maximum duco atque habeo, quod mihi vestræ sacrarium familiaritatis aperuistis. In eo suscepi multis et magnis expertus sum periculis, quantum valeat deprecatio justî assidua. Huic et soli debeo, quod insidias mihi Roma redeunti dis-

positas intactus pertransii, quod ingentes et urgentes maris procellas illæsus evasi, quod non incidi in Barbaros piratas larvati forma deformes, ferina crudelitate hominem diffidentes, super omnia etiam gudentes, nulla se cum Christianis habere consortia. Ii Catholice religionis expertes et hostes in insulam beatissimi Honorati, sacratissimo die Pentecostes in multis navibus delati sunt. Ibi ad fundamentum monasterio penitus everso, plurimi monachorum gladio percussi ceciderunt, reliquis, et latibulis, et turre proxima consultum. Eadem die de præfata insula felix me ventus expulserat, et ita ipsis pæne leonum faucibus evulsus auspicio cursu Magalonem navigavi. Hæc ideo, sanctissime pater, apposui, ne quis ignoret quantis oratione vestra periculis ereptum me confitear. Habeo igitur atque ago vestræ gratias religioni, cujus sinum, quasi reus aram, jandudum complexus essem, si consultus papa pontificis onus amoliri permisisset. Ille dum me remisit ad laborem, invidit gloriam; non imputet ei Dominus. Interim in umbra alarum tuarum sperabo, donec educar de lacu miserie, et de luto facis, atque dicam: Ecce venio, ut faciam voluntatem tuam, Deus meus ». Hæc Hildebertus, anhelans ad monasterium, atque invitus jussu Paschalis papæ rediens ad episcopatum, in quo adhuc acerbissima pati coactus est, quæ quidem magna animi constantia tulit.

14. In carcerem enim aliquando detrusus causa tuendæ libertatis Ecclesie, hæc ad episcopos et clericos omnes¹: « Oro vos orare pro me, curam agere de me, compassione esse juxta me. Nam de redemptione nihil ago, semel Christi sanguine redemptus, iterum redimi non requiro: sanguis ille redemptionis meæ, sanguis ille pretium meum. Indignum est, ut sub pretio rediger, cujus pretium sine pretio est. Præterea infamis est redemptio, qua libertas perit Ecclesie, qua servitus comparatur. Necesse est enim, ut membra serviant, si caput humiliatur sub tributo etc. » Extat ad eundem Ivonis episcopi Carnotensis Epistola, cum a rege Anglorum dira pateretur, cujus hic titulus²: « Ivo Dei gratia Carnotensis Eccl. minister, Hildeberto Cenoman. episcopo in tribulatione patientiam, in patientia tolerantiam, in tolerantia perseverantiam ». Qua monet ipsum consulentem, ne probatione per ignem quam rex ab eo exigebat, veltet ullo pacto suam probare innocentiam, quod hoc esset in Ecclesia Dei per plures vetitum canones et decreta Pontificum.

15. *Concilium Hierosolymitanum in quo Gibelinus episcopus Arelatensis legatus eligitur patriarcha: unde litteræ ipsius et Paschalis ad Arelatenses.* — Quod ad res pertinet Orientis, hoc anno, misso per Paschalem papam Gibelino Arelatensi archiepiscopo, Hierosolymam, Concilium ibi colligitur, in quo deponitur Ebremarus intrusus patriarcha. Quomodo autem ista se habuerint, sic

¹ Ivo Ep. CLXXVIII. — ² Ivo Ep. CLXIX. — ³ Ibid. Ep. XX. tom. III. Bibl. sanct. — ⁴ Ibid. Ep. XXIV.

¹ Ibid. Ep. XXXIX. in fin. — ² Ivo Ep. XCI.

accipe ex Willelmo Tyrio ¹: « Interea dominus Daibertus Hierosolymorum patriarcha, post longam expectationem, qua eum detinuerat dominus Paschalis Papa, et Ecclesia Romana, volens plenius edoceri, utrum rex Hierosolymorum et qui eum expulerant, vellent contra eum aliquid allegare, unde hoc videri possent de jure fecisse: postquam nemo comparuit, qui contra eum aliquid diceret, nec in ejus facto aliquid aliud notari poterat, nisi quod regia expulsus esset violentia; cum plenitudine gratiæ et Apostolicarum litterarum prosecutione nisus est ad propria redire, et sedem recipere debere, de qua fuit indebite deturbatus. Qui tandem, in Siciliam veniens, et apud Messanam moram faciens necessariam, transitum expectans, gravi correptus ægritudine, XVI kalend. Julii viam universæ carnis ingressus est. Sedit autem in pace annis quatuor, in exilio vero tribus. Ebremarus vero ejusdem sedis incubator, audiens quod prædictus dominus Daibertus eum plenitudine gratiæ revertebatur sedem suam recepturus, antequam de obitu ejus instrueretur, ad eandem Romanam transfretare Ecclesiam decrevit, allegaturus de sua innocentia, quomodo invitum et renitentem in eandem sedem illum locaverant. Quo perveniens, nihil impetrare potuit, quam ut eum eo dirigere-
tur legatus, qui de causa ejus, Hierosolymis constitutus, plenius posset cognoscere.

16. « Designatus est autem ad id muneris prosequendum dominus Gibelinus, vir senex et grandævus, Arelatensis archiepiscopus, qui de mandato domini papæ Hierosolymam profectus, convocato episcoporum regni Concilio, de causa domini Ebreuarii cognovit plenius. Cumque ei constitisset per testes idoneos sufficientes et majores omni exceptione, quod dominus Daibertus absque causa legitima Arnulphi factionibus, et regia violentia fuerat expulsus, et quod Ebremarus adhuc viventis pontificis et Ecclesiæ habentis communionem sedem occupaverat: auctoritate qua præeminebat, eum a patriarchatu deposuit. Sed considerans multam viri religionem et simplicitatem miram, Cæsariensem quæ tunc vacabat Ecclesiam ei concessit habendam. Postmodum vero dum de substituendo Ecclesiæ Hierosolymitanæ patriarcha clerus et populus disceptaret: constituta ad hoc specialiter die, ut super eo negotio de more tractaretur: post multas hinc inde deliberationum partes, in dominum Gibelinum Apostolicæ Sedis legatum unanimiter conveniunt, et eum in sede locant patriarchalem. Hoc etiam prædictus Arnulphus malitiose dicitur construxisse, ut homo senex et decrepitu in illa sede diu vivere non posset ». Hucusque Willelmus ², qui hoc anno ista actitata esse, interius docet.

17. Gibelinus igitur, ubi novit se nolentem invitumque electum Hierosolymorum patriarcham, omni ad suos Arelatenses amplius redeundi spe

destitutus penitus, has ad eos non sine lacrymis litteras dedit, quas nos acceptas a Francisco Claret nostro amico fideli, ejusdem Arelatensis Ecclesiæ archidiacono, hic describendas esse operæpretium duximus; sic se habent:

18. « Gibelinus Hierosolymitanus episcopus, charissimis in Christo fratribus Arelatensis Ecclesiæ suffraganeis episcopis, domino Ariperto et aliis, et omni clero et populo salutem et benedictionem.

« Intelligere potestis, fratres charissimi, quam incerta est vita ista qua vivimus, cum illud cito eveniat quod in cor hominis non ascendit, et hoc divina providentia faciat quod humana mens cogitare non potuit. Scitis enim qua ratione egressus sum de terra mea et de cognatione mea; quomodo a Romana Ecclesia ad Orientales Ecclesias fui missus: modo factus incola, qui veneram peregrinus. Nam dominus papa Paschalis, qui ad visitationem Orientalium Ecclesiarum me destinaverat, per litteras et per venerabilem Prænestinæ civitatis episcopum mihi mandavit, ut curam Hierosolymitanæ Ecclesiæ susciperem exemplo illius qui exivit a Patre et venit in mundum, ut faceret voluntatem ejus qui misit eum: et ego inclinavi aurem meam, et oblitus sum populum et domum patris mei. De cætero, fratres, de ordinatione Ecclesiæ vestræ cogitate, et episcopum vobis secundum Dominum eligite. Et si hactenus tam nobilis Ecclesia pastorem qualem deceret non habuit; modo talis eligatur, in quo per Dei gratiam totum impleatur quod defuit.

19. « Multa vobis scribere disposueram, sed cogitanti mihi de vestra amicitia, magis flere libet quam aliquid dicere. Dum enim ad memoriam redeo quantam dilectionem erga me habuistis, quam patienter hominem nullius utilitatis sustinistis: nulla temporalium rerum delectatione possum gaudere, sed multoties sunt mihi lacrymæ meæ panes die ac nocte. Nec mirum, quia sicut manifestum est, nec pretio nec precibus me dilexistis, sed sola nobilitate, quæ in vobis est, et moribus et genere, in me benignitas vestra semper apparuit, et nobilitas vestra se celare non potuit. Nunc itaque, dilectissimi, solita dilectione vos deprecor, ut mei memoriam habeatis, quatenus ille qui vestris orationibus fuit in viaductor meus, sit modo vestris precibus adjutor meus, et in fine susceptor meus, qui est in omni terra Deus meus ». Hucusque Gibelinus ad suos.

20. Accepi ab eodem cum his et litteras Paschalis papæ ad eosdem Arelatenses, pro electione successoris, quæ sic se habent:

« Paschalis episcop. servus servorum Dei, clero et populo Arelatensi, salutem et Apostolicam benedictionem.

« Pro negotiis et scandalis, quæ in Hierosolymitana Ecclesia fuerant, venerabilem fratrem nostrum Gibelinum, quondam Ecclesiæ vestræ antistitem ad partes illas cum nostra legalione direxi-

¹ Will. Tyr. l. XI, c. IV. — ² Ibid. c. 6.

mus, cujus nimirum persona ita in omnibus placuit, quod cum clerus et populus ejusdem Ecclesiae unanimi voto, communi desiderio in patrem sibi et pastorem elegerunt. Nos enim, quoniam diu episcopali regimine fuerant destituti, electionem ipsam assertionem nostram firmavimus. Vestram itaque dilectionem litteris praesentibus praemonemus et hortamur in Domino, ut et vos canonicum pastorem vobis eligere properetis, nec vobis grave et durum vehementius videatur. Illum enim tanto zelo, tanto ardore Hierosolym. suscepit Ecclesia, quod cum (etsi nos omnino velimus) vobis reddere nullo modo possimus. Data Laterani, quarto nonas Januarii. Ulque anni sequentis exordio. At ista satis.

Verum quod spectat ad alterum legatorum, cujus meminit in recitata supra Epistola Gibelinus, episcopum Praenestinum, hic dictus est nomine Bernardus, sive Bernardus, cujus est mentio in praedecessore Paschalis Urbano papa, anno ejus Pontificatus quinto, in Privilegio Cluniacensibus dato. Qui fama conspicuus, ubi hoc anno reversus est Hierosolymis, statim ex hac vita migravit : cui Alfani archiepiscopus Salernitanus ejusmodi Epitaphium scripsit :

Bernardus (al. Berardus) nomen, Beneventum patria, sedes
Praenestis, celebris laus mihi Roma fuit :
Hostes Ecclesiae contrivi, cuncta relinquens
Ivi Jerusalem solvere crimen idem.
Jamque dies mensem retinebant quinque Decembrem,
Cum rediens illic, mortuus hospitis hic.

Hactenus Epitaphium inter vetera Alfani monumenta repertum. Quod igitur ad verba illa spectat : « Solvere crimen idem » ; ad illud alludit, quod

perreerat scilicet Hierosolymam ad depositionem Ebrema patriarchae intrusi, ut superius est pluribus enarratum.

Inter haec autem cum absolutus Gerardus archiep. Eboracensis recusaret professionem facere archiepiscopo Cantuariensi, deque his admonitus Paschalis Pontifex esset, has ad eum litteras dedit :

« Paschalis papa, servus servorum Dei, venerabili fratri Eborac. archiep. Gerardo, salutem et Apostolicam benedictionem ¹ : Quanquam prave contra nos, imo contra matrem tuam sanctam Romanam Ecclesiam te non ignoremus egisse : praesentibus tamen tibi litteris mandamus, ut professionem venerabili fratri nostro Anselmo Cantuariensi archiepiscopo facere non negligas. Audivimus enim Thomam quondam praedecessorem tuum ex hac eadem re contentionem movisse, et cum in praesentia domini Alexandri papae Secundi ventilata esset, ex praecepto ejus definitione habita, post varias disquisitiones Lanfranco praedecessori suo, et successoribus suis eandem professionem fecisse. Unde et nos, quod tunc temporis definitum est, votum, auctore Deo, firmum illibatumque servari ». Subjicit ista his Willelmus : « Hanc Epistolam directam sibi Gerardus non legit, quia necesse non fuit. Praevenerat ipse jussum Apostolicum et hortatu regis Anselmo in manum dederat servaturum se ipsi eandem professionem etc. sed haud post multum eodem Gerardo defuncto cum alius Thomas illi subrogatus esset, qui etiam detrectans profiteri, ab eodem sancto Anselmo publicis per Angliam datis litteris, quae extant, excommunicatus est donec pareret, quod tandem coactus fecit ».

¹ Will. Malm. de Gest. Pont. Angl. l. III.

Anno periodi Graeco-Romanae 6600. — Anno Aerae Hispan. 1145. — Anno Hegire 501, iachato die 22 Aug., Fer. 5. — Jesu Christi 1107.

— Paschalis II papa 9. — Henrici V reg. 2. Alexii Comneni imp. 27.

1. *Paschalis II in Galliam venit.* — A num. 1 ad 6. Anno superiori diximus, Paschalem II Natale Domini in monasterio Cluniacensi celebrasse, nunc ejus Itinerarium ex Sugerio in Vita Ludovici VI Francorum regis cap. 9, aliisque monumentis describendum : « Venit itaque », inquit Sugerius, Cluniacum, a Cluniaco ad Charitatem (ubi hodie oppidum est Nivernensis provinciae ad Ligerim fl. non longe a monasterio positum), ubi celeberrimo

archiepiscoporum et episcoporum et monastici ordinis conventu eidem nobili monasterio sacram dedicationis imposuit. Affuerunt et nobiliores regni proceres, etc. cui consecrationi et nos ipsi interfuimus ». In Chronico Fiscannensi tom. I Biblioth. Labbei ad an. mcv legitur : « Dedicatio de Charitate a Paschali papa, VIII idus Martii » ubi tamen auctor, vel potius librarius in anno rei gestae errat ; ea enim anno mcv more Gallicano annum a Pas-

chate exordiente peracta. Sed ante eum diem aliæ dedicationes ab eodem Pontifice factæ; in monasterio enim Besuensi in diœcesi Lingonensi sito, *ubi usque in diem tertium demoratus est*, altare SS. Petri et Pauli in honorem eorumdem consecravit, ibique missam solemniter celebravit, ut legitur in Chronico Besuensi pag. 638, ubi et dicitur, id factum esse *die XII kalend. Martii*. Imo Chiffletius in Probationibus ad Diatribam *de illustri genere sancti Bernardi abbatis*, pag. 428, hæc refert ex autographo sancti Benigni Divionensis: « Anno Dominicæ Incarnat. mvi (qui nobis est mcvii), quartodecimo kalendas Martii, quo anno et die venerabilis papa Paschalis Divionensem consecravil Ecclesiam, adhaerentibus et obsequentibus sibi Richardo Albanense episcopo, etc. » quod etiam legitur in Chronico Divionensi ibidem apud Labbeum. His addo, in Chronico Dolensi, seu monasterii Dolensis in archiepiscopatu Bituricensi positi, apud eundem Labbeum haberi hoc anno: « Consecrata est Ecclesia Dolensis a domino papa Paschali, quo jubente altare B. Mariæ consecratum est ab episcopo Placentino, etc. ipse vero papa Apostolorum Petri et Pauli consecravil ». Sed redeo ad Sugarium, prætereoque varias dedicationes et concessiones ab eo in aliis urbibus per quas transivit factas.

2. *Summo honore excipitur.* — Pergit Sugarius: « Cumque Turonis apud S. Martinum, ut mos est Romanus, Frigium (Phrygium, præcipuum capitis summi Pontificis ornamentum, quod hodie triplici corona insigne est, vulgoque *Regnum* a scriptoribus appellatur, quo in solennibus ceremoniis utitur) ferens. *Latare Hierusalem* celebrasset, (id est Dominicam quartam Quadragesimæ) ad venerabilem beati Dionysii locum (seu monasterium) tanquam ad propriam B. Petri Sedem, benevolus et devotus devenit, etc. Occurrit itaque ei ibidem rex Philippus (qui ideo anno superiori mortuus non est, ut credidit Baronius) et dominus Ludovicus filius ejus gratanter et votive amore Dei majestatem regiam pedibus ejus incurvantes, quemadmodum consueverunt ad sepulchrum piscatoris Petri reges submisso diademate inclinari (vides Bertradam non fuisse in aula, ideoque et antea regem eam reliquisse). Quos dominus papa manu erigens tanquam devotissimos Apostolorum filios, ante se redire fecit.

3. *Petit auxilium adversus Henricum imp.* — « Cum quibus de statu Ecclesiæ, ut sapiens sapienter agens, familiariter contulit, eosque blande demulcens beato Petro sibi que ejus vicario supplicat opem ferre, Ecclesiam manu tenere, et sicut antecessorum regum Francorum Caroli M. et aliorum mos inolevit, tyrannis et Ecclesiæ hostilibus et potissimum Henrico imperatori audacter resisterent. Qui amicitie, auxilii, et consilii dextras dederunt, regnum exposuerunt (id est, ut puto, coronam regalem) et qui cum eo Catalanum imperatoris legatis occurrere festinent, archiepiscopos et episco-

pos et abbatem S. Dionysii Adam, cum quo et nos fuimus, conjunxerunt. Ubi cum dominus papa aliquantisper demoraretur », venerunt legati Henrici imp. et dixere, hoc ad jus imperii pertinere, in omni electione requiri assensum imperatoris, ut electus annulo et virga investiat. Respondit summus Pontifex episcopi Placentini voce: « Ecclesiam pretioso J. C. sanguine redemptam et liberam constitutam, nullo modo iterato ancillari oportere ». Cumque hæc et his similia legati audissent: « Non hic, inquit, sed Romæ gladiis determinabitur querela ». Summus Pontifex viros misit ad cancellarium imperatoris, qui eum exoraret, ut paci operam daret. Hæc Sugarius, qui non dicit qua in urbe papa Pascha pegerit, sed illud nos docet Ordericus lib. 14, pag. 810. « Tunc venerabilis Ivo, Carnotensæ urbis episcopus, inter præcipuos Franciæ doctores eruditione litterarum tam divinarum quam sæcularium floruit: a quo invitatus papa solemnitatem Paschæ apud Carnotum celebravit. Adela quoque comitissa largas ad ministerium papæ impensas contulit, et benedictionem sibi dominique (legendum, domnique) suæ in æternum a Sede Apostolica promeruit ».

4. *Concilium Treccis celebrat.* — Postea Paschalis II circa *Ascensionem Domini Concilium non modicum apud Treccas habuit*, ubi inter alia sententiam de libera pastorum electione promulgavit, ut refert Baronius ex Urspergens. In Chronico Divionensi Sancti-Benigni, tom. 1 Biblioth. Labbei, Concilium illud *idibus Maii* dicitur coactum, ideoque hæc epocha recte ab Urspergens. notata. In eo Paschalis papa « inter alia, cum ageret de Guilbertinis, fertur dixisse: Richardum Virdunensem, qui se tradidit regiæ curiæ, et nos tradimus cum satanæ; inde archiepiscopo Trevirorum aliisque denuntiavit eum excommunicatum », inquit Laurentius de Leodio in Hist. episc. Virdunen., tom. xii Spicilegii Dacheriani. *Per septem annos* Richardus sine benedictione episcopali fuit, et sub anathemate Sedis Apostolicæ degit, mortuus apud Casinum Montem anno vii quo Virdunensis Ecclesiæ erat electus, necdum tamen consecratus episcopus, dum petitam veniam a papa et impetratam expectaret. Præterea, ut inquit chronographus Senonensis, « in eo intento Paschalis papæ maxima fuit de Hierosolymitano itinere, et de treuva Dei, (id est, de treuga in bellis quæ inter privatos gerebantur, quo spectant ista quæ hoc anno in Chron. Mattheicensi leguntur). Ibi quoque decretum ut per nullam guerram incendia domorum fierent, nec oves aut agni raperentur ». Postea Paschalis II, « autumni tempore, ex Gallia Romam rediit », inquit Urspergens.

5. *Normannia Angliæ adjuncta.* — A num. 6 ad 12. Non hoc anno, ut putavit Baronius, sed præcedenti, *Henricus Angliæ rex* Normanniam occupavit, sicut anno superiori ex Eadmero in lib. 4 Novorum insinuavimus. Henricus rex, inquit Dunelmensis ad annum mvi, « ante Augustum men-

sem transiit mare, vadens in Normanniam, cui fere omnes primi Normannorum se dederunt, paucis exceptis, qui se tenebant cum comite Rodberto ». Postquam Henricus rex S. Anselmum apud Becum monasterium visitavit, congregato exercitu, ad quoddam castrum « quod vocatur Tenercebrei perrexit, et obsedit illud. Interim dum ibi moratur, venit comes frater regis Rodbertus super eum cum exercitu suo in vigilia S. Michaelis », sed ius et victoria facta est regis. *Ibi captus est Rodbertus comes Normannie*, et plures alii cum eo. *His ita gestis, rex subegit sibi totam Normanniam*, et hoc per litteras Anselmo indicavit. Eas recitat Baronius num. 7. « Idem dies », inquit Malmesburiensis in Henrico I, pag. 158, loquens de vigilia S. Michaelis, « ante quadraginta annos fuerat, cum Willemus primus Hastings appulit : provide forsani Dei iudicio, ut eo die subderetur Angliæ Normannia, quo ad eam subjungendam olim venerat Normannorum copia ». Willemum autem conquestorem an. *MLXVI* in vigilia S. Michaelis in Angliam appulisse, eo Christi anno ostendimus, ideoque anno præcedenti juxta Malmesburiensem Normanniam ab Anglis capta, quod et testantur Gemmeticens lib. 8, cap. 13, Radulfus de Diceto in Abbreviat. Chronicorum, Mathæus Parisiensis, aliiq. Post hæc Henricus Anglorum rex et Normannorum dux appellatus.

6. *Concilium Londinense.* — Hoc vero anno Anselmus in Anglia totus fuit in componenda Anglicana Ecclesia, quia induciarum tempus effluerat ad kalendas Augusti : quod tempus episcoporum conventui et negotiis ibi tractandis Henricus rex præfixerat. Rem gestam narrat Eadmerus, qui conventui sem Concilio Londinensi adfuit, lib. 4 Novorum : « In kalendis ergo Augusti conventus omnium episcoporum, abbatum et procerum regni, Landonie in palatium regis factus est. Et per tres continuos dies, absente Anselmo, inter regem et episcopos satis actum de Ecclesiarum investituris : quibusdam ad hoc nitentibus, ut rex eas faceret more patris et fratris sui, non juxta præceptum et obedientiam Apostolici. Nam Paschalis papa, in sententia quæ exinde promulgata fuerat firmus stans, concesserat hominia quæ Urbanus papa æque ut investituris interdixerat : ac per hoc regem ibi de investituris consentaneum fecerat. Dehinc præsentem Anselmo, adstante multitudine, annuit rex et statuit, ut ab eo tempore in reliquum nunquam per donationem baculi pastoralis vel annuli quisquam de episcopatu vel abbatia per regem vel quamlibet laicam manum investiretur in Anglia ; concedente quoque Anselmo, ut nullus in prelationem electus pro hominio quod regi faceret, consecratione suscepti honoris privaretur. Quibus ita dispositis, pæne omnibus Ecclesiis Angliæ, quæ suis erant pastoribus diu viduata, per consilium Anselmi ac procerum regni sine omni virgæ pastoralis aut annuli investitura, patres a rege sunt instituti. Instituti quoque sunt ibidem et eodem tempore ab ipso rege quidam ad regimen

quarundam Eccl. Normanniæ, quæ similiter suis erant patribus destitute ». De hoc Concilio legendus Petrus Blesensis in Continuat. Ingulphi, pag. 126 : « Quantum tunc, inquit, gaudium agitabat clerus, quam devotus aridebat populus, quam solemniter et sancte omnes et singuli regis animum ad sidera extollebant, nullus ediceret, nec Tullius edoceret ». Subjungit S. Anselmum, assistente sibi Gerardo archiep. Eborac., *uno die* sex episcopos a suis Ecclesiis canonice electos consecrasset.

7. *Hildebertus episc. Cenomanensis a Wilhelmo II Angl. rege vexatus.* — A num. 12 ad 15. *Hildebertus* Cenomanensis episcopus celeberrimus, non ab Henrico Angliæ rege, ut arbitratus est Baronius, sed a Wilhelmo II ejus decessore in carcerem conjectus, maleque habitus ; idque initio episcopatus ejus, et ante annum millesimum centesimum. Nam Hovedenus part. 1, ad annum *MXCVII*, ait : « Ætatis tempore, Willemus rex Anglorum junior, civitatem, quæ Cinomannis dicitur, magnamque partem illius per vim suæ ditioni subegit », illius nempe *provinciæ*, ut habet Simeon Dunelmensis, qui idem refert. Auctor tamen novæ Chronologiæ Saxonice, cujus major est fides, cum coævus sit, ait id contigisse anno *MXCIX*. Nunc audiendi Hildebertus et auctor anonymus de Gestis episc. Cenomann. Hildebertus in Epistola *xx* ad Paschalem II ait : « Longum esset narrare quam constante tyrannide rex Anglicus in nos sevierit ». Alfordus anno *MXCVII*, num. 30, integram illam Hildeberti Epistolam recitat, atque : « Guillelmum intelligi opinarer, nisi Baronius ad Henricum I retulisset ». Verum vetera Acta Cenomanensium episcoporum, a Mabillonio tom. III Analect. publicata, cap. 33, narrant quanta passus sit Hildebertus a rege Angliæ, qui *Heliam* comitem Cenomansensem ex ea urbe expulserat, eamque sibi subjecerat, petens ab Hildeberto ut turres Ecclesiæ diuini præciperet, ex qua eversione præsent clarissimus grande periculum Ecclesiæ suæ imminere prævidebat. Minabatur rex urbem incendere, jamque clericos ab urbe eliminaret. Sed dum *Hildebertus* Dei clementiam jugiter precaretur, ut ab Ecclesia et populo sibi commissio iram indignationis suæ dignaretur avertere, rex ille « dum quadam die in silvam venandi gratia perrexisset, ab uno ex militibus qui secum ierant sagitta percussus interiit », inquit auctor anonymus Actorum illorum, quem manifestum est intelligere *Guillelmum II*, anno ac in venatione interemptum. Post ejus mortem civitas hostibus erepta, et ab Helia occupata. Ivo Carnotensis, Epist. *LXXIV* ad Hildebertum data, significat eum de prodizione urbis nuper facta insinuatam fuisse apud regem, qui volebat illum hujus proditionis immunes credere, nisi « igniti ferri examinatione innocentiam suam demonstraret » ; ad quod cum paratus esset Hildebertus, Ivo qui ab eo consultus fuerat, scripsit : « Monomachiam et ferri calidi examinationem, nec consuetudo Ecclesiastica in discutiendis causis Ecclesia-

sticis recipit, nec canonica auctoritas instituit », quod variis decretis demonstrat. Ea Epistola vel anno MCCCIX vel insequenti scripta.

8. *Romam petit.* — « Pacata igitur civitate », inquit anonymus laudatus, « et hostilibus inde effugatis, Hildebertus Romam proficiscitur; quem Paschalis papa in notitiam suam attentius accepit et familiaritatem. Deinde illo Apuliam Siciliamque progressus, sibi universi, quasi Angelo Dei, honorem exhibebant et reverentiam. Dux enim Apulie, et avunculus ejus comes Sicilie Rogerius, audita fama scientie præsulis et honestatis, illum cum maximo honore et incredibili reverentia susceperunt ». Quibus ex verbis intelligimus, Hildebertum ante mensem Julium anni MCI protectionem illam Italiam suscepisse, cum is mense et anno Rogerius comes Sicilie, a quo tunc cum honore exceptus est, obiit; huic enim malter Rogerius, Roberti Guiscardii filius, Apulie dux, nepos fuit. Scripsit Hildebertus ad Paschalem II Epistolam, a Baronio num. 13 recitatam, dum in Galliam rediret, quam ejus sæculi hujus initio datam oportet. At in ea se ideo orationibus debere, quod in Barbarorum manus non inciderit, quod nomine Saracenos intelligit: « si Catholice, inquit, religionis expertes et hostes, in insulam beatissimi Honorati sacratissimo die Pentecostes in multis navibus delati sunt. Ibi ad fundamentum monasterio penitus everso, plurimi monachorum gladio percussi ceciderunt, reliquis et latibulis et turre proxima consultum, etc. »

9. *Monasterium Lerinense a Saracenis sæpius eversum.* — Vincentius Barralis in Chronologia insulæ Lericensis, part. 2, textil catalogum abbatum Lerinensium, et pag. 157 loquens de *Aldeberto II*, abbate Lerinensi, ait cum anno MCI, *imminente secundo*, mortuum esse; et quia non legerat laudatam *Aldeberti* Epistolam, de hac Lericensis monasterii eversione nullam mentionem facit, imo aliam quæ eandem jam a multis annis præcesserat, fictitiam credit; pag. enim 152, loquens de *Aldeberto* hujus nominis I, anno MXLVI abbate creato ait « in quodam catalogo Codicis perantiqui monasterii Lerinensis », in quo omnes abbates ab eo anno usque ad annum MCCCX recensentur, legi, *Aldeberto I* abbatiam administrante, « destructum fuisse primo anno ordinationis illius monasterium Lerin et non reedificatum neque creclum, ni post annos XLII ab illius successore *Aldeberto II* », sed huic ruine se non *de facile* assentiri, *cum nullo exprimat invasores*. Verum frivolum hoc argumentum negativum; præsertim cum ipsemet, pag. 157, scribat *Aldebertum II* anno MXXXVIII monasterium et Ecclesias reparasse et cultui divino iterum dedicasse, ideoque anno XLII ab eversione quæ sub *Aldeberto I* contigerat. Præterea ipsemet pag. 164, ait Ecclesiam Lerinensem anno MCLIX perfectam, et solemniter consecratam esse, quod ex Actis monasterii demonstrat. Quare Ecclesiam et monasterium Lerinense circa hujus

sæculi initium Saraceni destruxerant. In eo etiam fallitur Vincentius Barralis, quod tradit *Aldebertum II* condidisse monasterium hodiernum ad repellendos Saracenos turris instar ædificatum; id enim nonnisi Lucio III Ecclesiam Romanam regente contigit, ut sub ejus Pontificatu demonstrabimus. Huic historicum decepti Rescriptum Honorii papæ, a se pag. 159 recitatum, in quo Pontifex fideles hortatur, ut auxilium porrigant monachis Lerinensibus *ad construendam contra Saracenorum impetum munitionem*. Illud enim non hoc sæculo ab Honorio II, sicut ipse cumque seculus Bouchæus in Hist. Provincie tom. II, pag. 110, arbitrati sunt, sed sæculo sequenti ab Honorio papa III emissum, ut ejus lectio perspicuum reddit; cum in eo mentio sit remissionis peccatorum concessæ ab *Eugenio papa* Jerusalem pergentibus, quam extendit ad fideles Lerinenses in hoc pio opere adiutores: nam is *Eugenius* alius esse non potest quam *Eugenius III*, qui hoc sæculo aliquot annis post Honorium II Ecclesie Romanæ præfuit.

10. *Gesta in expeditione Hierosolymit.* — Ad num. 15 et seqq. Daiberto Hierosolymorum patriarcha XVI kal. Julii demortuo, in ejus locum substitutus est *Gibelinus* Arclatensis archiepiscopus, ut narrat Baronius ex Wilhelmo Tyrio lib. 11, c. 4. Hoc etiam anno, ut inquit Fulcherius in Hist. Hierosol. lib. 2, « postquam Boamundus de Galliis regressus est, congregata gente quantumcumque potuit, in portu Brundisino, qui est in Apulia, classem suam paravit. Qui cum tempus ad transfrelandum exspectasset opportunum, VII idus Octob. naves ingressi Bulgariam navigaverant, et Avalonis portu applicuerunt. Et Avalone citissime capta, Duratium urbem ademptes, III idus Octob. obsederunt. Sed quia civitas illa tam hominibus quam victualibus satis erat munita, illa obsessores diu fatigavit, etc. Erat quidem imper. Constantinopolitanus, Alexis nomine, genti nostræ tunc contrarius, et Hierosolymam peregrinantibus vel fraude clandestina, vel violentia manifesta tam per terram quam per mare perturbator et tyrannus. Quapropter Boamundus, collecto, ut dictum est, exercitu, terram illius intravit; civitates et oppida comprehendere nitens ». At Duratium expugnare non potuit.

11. *Moritur Isabella IV uxor Alfonsi VI.* — Sandovalius in Alphonso VI refert, *Isabellam* Alfonsi VI Castellæ et Legionis regis quartam uxorem e vivis excessisse, quod probat ex hujus reginæ Epitaphio ejus sepulchro apud S. Isidorum Legionensem litteris Gothicis in-scripto: « H R (id est, hic requiescit) regina Elisabet, filia Ludovici regis Francie, uxor regis Alfonsi, qui cepit Tole-tum. Obiit Æra MCXL », sed legendum, « MCXLY ». At Epitaphium istud a quodam imperito longe post hujus reginæ mortem positum. Nullus enim hoc anno Ludovicus in Francia regnabat, præter Ludovicum Philippi regis filium in consortium regni adscitum, qui junior erat quam ut posset Isabellæ

pater esse. Quod hic observandum duxi, ut principium a me non semel ineditatum magis corroborarem, plura nempe Epitaphia, principum vel magnorum virorum tumulis inscripta, nova esse, ideoque suspecta fidei. Ceterum Isabella mors hoc anno non contigit, cum Sandovalius ibidem Chartam laudet, integram a se in Historia sua Salmanticensi recitatam. Data ea *Æra* MCLV, die XXIX mensis Decemb., in qua Alfonsus VI testatur, *Isa-*

bellam conjugem eam confirmare; quod si ea die illo corpore valebat, verosimile non est, die xxx aut insequenti naturæ debitum solvisse. *Isabella* itaque hyeme anni sequentis demortua, statimque *Alfonsus* Beatricem, cujus familia ignoratur, sibi copulavit; Sandovalius enim fol. 96, Chartam aliam exhibet, in qua ea die xxviii mensis Maii regina dicitur, et uxor Alfonsi regis.

PASCHALIS II ANNUS 9. — CHRISTI 1108.

1. *Paschalis compescit rebelles.* — Redemptoris annus millesimus centesimus octavus Indictione prima incipit, quo Paschalis papa rursus tumultuantibus quosdam Romanorum usurpatores rerum Ecclesiæ aliosque ad defectionem populum permoventes compescuit. Scribit ista Willelmus Bibliothecarius, atque horum principes fuisse Ptolemæum comitem Tusculanum, necnon Petrum de Columna Farfensem abbatem, qui diversis invasionibus diversa oppida tentaverunt, quæ Paschalis papa non sine magno labore ab eorum tyrannide liberavit, cum ipso Paschale Petro Leonis et Leone Frangipane fideliter laborantibus.

2. *Conc. Beneventanum sub Paschale papa.* — Quo pariter anno, Octobris mense, idem Paschalis papa Beneventum perrexit, ut illic Synodum celebraret, de qua ista breviter Petrus Diaconus in Chronico Cassinate¹: « Mense autem Octobrio advenit huc idem Apostolicus, adjunctoque sibi abbate nostro (Brunone videlicet), Beneventum celebrandæ illic Synodi causa perrexit. In qua prædecessorum vestigia secutus constituit, ut si quis Ecclesiastica beneficia de manu laicorum acciperet, uterque communione privaretur, et qui scilicet daret et qui acciperet. Vestimenta secularia et pretiosa reprehendit, et eis uti clericis vetuit.

3. « Cum autem Capuam devenisset, rogatus ab eodem abbate Brunone, Ecclesiam S. Benedicti, quam Desiderius abbas intra eandem civitatem renovaverat, solemniter dedicavit: in qua etiam de vestimentis sanctissimi patris Benedicti recon-

didit. Sicque ad hoc monasterium Cassinense veniens, reversus est Romam ». Illicque Petrus. In Chronico autem monasterii Sancti Vincentii, ad fontes Vulturii positi, a Joanne ejusdem monasterii monacho scripto, mentio habetur, quod dum in his regionibus idem Paschalis Pontifex versaretur, inivit ipsum S. Vincentii celebre monasterium, ubi cum comperisset ab eodem quoque monacho Joanne scribi ceptam historiam Ecclesiasticam, laudavit ejus studium Pontifex, et cum laudasset amplexatus cum hæc adjecit: « Bene, inquit, o fili, magnum opus ceepisti, sed bene cepta melius prosequi stude ». Hæcque præsentem Benedicto ejus monasterii abbate, ad quem idem auctor Joannes nuncupatoriam scripsit Epistolam. Laudatum quoque idem tradit ceptum opus a Joanne Cancellario, qui postea Paschali in Pontificatu succedens, dictus est Gelasius papa Secundus: hæcque omnia in dicto Chronico scripta leguntur; sed præter historiam ejus monasterii nihil ab eo scriptum reperitur. Jam vero quæ reliqua sunt anni hujus videamus.

4. *Concilium Londoniense de libertate Ecclesiæ et castitate clericorum.* — Quod autem Henricus Angliæ rex plura pollicitus fuerat, instante Paschali papa, de restituendo in suam libertatem Anglicanam Ecclesiam, præstitit hoc anno, cum celebratum est in Anglia Concilium Londoniense, cujus meminit Edinerus; de quo ista Rogerius in Annalibus eodem anno millesimo centesimo octavo¹: « In kalendis Augusti conventus omnium episcoporum, abbatum et procerum regni Londoniæ

¹ Pet. Diacon. Chron. Cass. l. iv. c. 34. in fin. et 35.

¹ Roger. in Annal. hoc anno.

factus est, et per tres dies, absente Anselmo archiepiscopo, inter regem et episcopos satis actum est de Ecclesiarum investituris, quibusdam ad hoc nitentibus ut rex eas faceret more patris et fratris sui, non juxta præceptum et obedientiam Apostolici. Nam Paschalis papa in sententia quæ inde promulgata fuerat firmus stans, concesserat omnia quæ papa Urbanus, qui æque investituris interdixerat, ac per hoc regem sibi de investituris consentaneum fecerat.

5. « Dehinc præsentem Anselmo, adstante multitudine, annuit rex et statuit, ut ab eo tempore in reliquum nunquam per donationem baculi pastoralis vel annuli, quisquam de episcopatu aut abbatia per regem vel quamlibet laicam manum in Angliam investiretur; concedente quoque Anselmo, ut nullus in præfationem electus, pro hominio quod regi faceret, consecratione suscepti honoris privaretur ». Et post restitutos episcopos suspensos in suas sedes et ab excommunicatione absolutos, quos subjecit, hæc in eodem Concilio Londoniensi statuta fuisse idem Rogerius sic narrat:

6. « Hæc sunt statuta de archidiaconibus, presbyteris, diaconibus, subdiaconibus et canonicis in quocumque gradu constitutis, quæ anno Dominicæ Incarnationis millesimo centesimo octavo statuerunt Anselmus Cantuariensis archiepiscopus, et Thomas Eboracensis archiepiscopus electus cum eo, omnesque alii episcopi Angliæ in præsentia gloriosi regis Henrici assensu comitum et baronum suorum. Statutum est ut presbyteri, diaconi, subdiaconi caste vivant, et feminas in domibus suis non habeant, præter proxima sanguinitate sibi iunctas, secundum hoc quod sancta Synodus Nicæna definiuit. Illi vero presbyteri, diaconi, subdiaconi, qui post interdictum Londoniensis Concilii feminas suas tenuerunt vel alias duxerunt, si amplius missas celebrare voluerunt, eas omnino a se sic faciant alienas, ut nec illæ in domos eorum nec ipsi in domos earum ingrediantur: sed nec in aliqua domo scienter conveniant, neque huiusmodi feminae in territorio Ecclesiæ habitent. Si autem propter aliquam honestam causam eos vel eas colloqui oporteat, cum duobus legitimis testibus extra domum colloquantur. Si vero in duobus aut tribus legitimis testibus vel publica parochianorum fama aliquis eorum accusatus fuerit, quod hoc statutum violaverit: purgabit se adductis secum ordinis sui idoneis testibus sex, si presbyter fuerit; si autem diaconus, quatuor; si subdiaconus, duobus. Cum autem hæc purgatio defecerit, ut transgressor statuti sacri iudicabitur.

7. « Illi autem presbyteri, qui divini altaris et sacrorum ordinum contemptores, præceperunt cum mulieribus habitare: a divino officio remoti omni-que Ecclesiastico beneficio privati, extra chorum ponantur, infames pronuntiati. Qui vero rebellis et contemptor feminam non reliquerit, et missam celebrare præsumperit, vocatus ad satisfactionem, si neglexerit, excommunicetur. Eadem sententia

archidiaconis et canonicos omnes complectitur, et de mulieribus relinquendis, et de vitanda earum cohabitatione, et de districtione censuræ, si statuta transgressi fuerint. Jurabunt etiam archidiaconi omnes, quod pecuniam non accipiant pro toleranda transgressione huius statuti, nec patientur presbyteros, quos sciunt feminas habere, missam cantare, vel vicarios habere. Similiter et decani jurabunt. Archidiaconus vero, vel diaconus, sive decanus, qui hæc jurare noluerit, archidiaconatum, vel decaniam perdet. Presbyteri vero, qui relictis mulieribus, Deo et sacris altaribus servire elegerint, quadraginta diebus ab officio cessantes pro se interim vicarios habebunt, inuncta eis penitentia secundum hoc quod episcopis eorum visum fuerit ». Illuciusque Rogerius ex Concilio Londoniensi hoc anno celebrato.

8. *Paschalis papæ litteræ gratulatoriæ ad S. Anselmum.* — Post hæc autem reddita (ut audisti) Anglicanæ Ecclesiæ pace, Paschalis papa gratulatorias dedit has litteras ad S. Anselmum, quas Wilhelmus in Gestis regum Anglorum recital hisce verbis¹:

« 9. Paschalis Anselmo.

« Quod Anglici regis cor ad Apostolicæ Sedis obedientiam omnipotentis Dei dignatio inclinavit, eidem miserationum Domino gratias agimus, in cuius manu corda regum versantur. Hoc nimirum tuæ charitatis gratia, tuarumque orationum instantia factum credimus, ut in hac parte populum illum, cui tua sollicitudo præsidet, misratio superna respiceret. Quod autem et regi et his qui videntur obnoxii adeo condescendimus, eo affectu et compassionem factum noveris, ut eos qui jacebant erigere valeamus. Te autem, in Christo venerabilis et charissime frater, ab illa prohibitione, sive (ut tu credis) excommunicatione absolvimus, quam ab antecessore nostro sanctæ memoriæ Urbano papa adversus investituras aut hominia factam intelligis. Tu vero eos qui aut investituras accepere, aut investitos benedixere, aut hominia fecere, cum ea satisfactione, quam tibi per communes legatos Wilhelmum ac Baldwinum viros fideles et veridicos significamus, Domino cooperante, suscipito, et eos vice nostræ auctoritatis absolvito: quos vel ipse benedicas, vel a quibus volueris benedicti præcipias, nisi in iis aliud forte reperias, propter quod a sacris honoribus sint repellendi. Si qui vero deinceps præter investituras Ecclesiarum prælationes assumpserint, etiamsi regi hominia fecerint, nequaquam ob hoc a benedictionis munere arceantur, donec per omnipotentis Dei gratiam ad hoc omittendum cor regium tuæ predicationis imbris molliatur. Præterea super episcopis qui falsum (ut nosti) a nobis rumorem retulerunt, cor nostrum commotum est vehementius, quia non solum nos leserunt, sed multorum simplicium animas deceperunt, et re-

¹ Williel. Malmesb. de gest. reg. Angl. l. v.

gem adversus charitatem Sedis Apostolicæ impulerunt. Unde et inultum eorum flagitium, Domino cooperante, non patimur: sed quia filii nostri regis instantia pro iis nos pulsant attentius, etiam ipsis communionis tuæ participium non negabis. Sane regem et conjugem, et proceres illos qui pro hoc negotio cum rege ex præcepto nostro laboraverunt, quorum nomina ex supradicti Willelmi suggestione cognoscēs, juxta sponsonem nostram a peccatis et poenitentis absolves. Rothomagensis episcopi causam tuæ deliberationi committimus, et quod ei induleris, indulgemus ». Hæc Paschalis ad S. Anselmum, quem hoc anno lucubrationem illam perdifficilem de concordia præsentis et prædestinationis habuisse præ manibus, Edinerus affirmat, qui præsens aderat.

10. *De Hierosolymitana Ecclesia amplianda Paschalis litteræ.* — Cui autem totius Catholicæ Ecclesiæ cura a Deo credita est, Paschalis papa ita Ecclesiis in extrema Occidentalis orbis parte positis incumbens, pastoralis cura prospexit, ut Orientalibus non deesset officio. Quamobrem Balduino regis Hierosolymorum petitionibus annuens, quæ postulabat benigne concessit. Ubi enim Gibelinus in sede Hierosolymorum anno superiori est electus antistes, ad sedem Hierosolymorum amplioribus augmentis illustrandam apponit animum, simulque agit apud Pontificem de finibus dioceseos ejus sedis ampliandis: ea de re idem rex legationem misit Romam ad Paschalem Pontificem. Quid autem illius petitionibus annuens Paschalis papa concesserit, ejus litteræ ad eum datæ significant, atque primum ad ipsum Balduinum regem, quæ sic se habent¹:

11. « Paschalis, servus servorum Dei, glorioso Hierosolymitano regi Balduino salutem et Apostolicam benedictionem.

« Ecclesiarum quæ in vestris partibus fuerunt vel sunt terminos atque possessiones diutina infidelium possessio tyrannisque confudit. Cum itaque certos ejus fines assignare deliberatione nequeamus, tuis precibus non immerito duximus annuendum: ut quia pro Hierosolymitanæ Ecclesiæ sublimatione personam tuam extremis periculis exponere devovisti, quascumque infidelium urbes ceperis vel cepisti, ejusdem Ecclesiæ regimini subjaceant. Porro earundem civitatum episcopi patriarchæ tanquam metropolitano obedientiam exhibere procurent, quatenus et ipse illorum fultus suffragiis, et ipsi ad invicem ipsius unanimis auxilio vegetati, sic in Hierosolymitanæ Ecclesiæ exaltatione proficiant, ut de illorum protectibus omnipotens Deus gloriatur. Data Laterani, quinto idus Junii ». Ad patriarcham vero eodem argumento has litteras dedit:

12. « Paschalis episcopus, servus servorum Dei, reverendissimo fratri Hierosolymitano patriarchæ Gibelino, et successoribus ejus in perpetuum

canonice promovendis, salutem et Apostolicam benedictionem.

« Secundum mutationes temporum transferuntur etiam regna terrarum. Unde etiam Ecclesiasticarum parochiarum fines in plerisque provinciis mutari expedit et transferri. Asianarum siquidem Ecclesiarum fines antiquitus fuerunt definitionibus distributi, quas distributiones diversæ fidei gentium confudit irruptio. Gratias autem Deo, quod nostris temporibus et Antiochia et Hierosolyma civitates cum suburbanis suis et adjacentibus provinciis in Christianorum principum redactæ sunt potestatem. Unde oportet nos divinæ mutationi et translationi manum apponere, et secundum tempus quæ sunt disponenda disponere, ut Hierosolymitanæ Ecclesiæ urbes illas et provincias concedamus, quæ gloriosi regis Balduino ac exercituum cum sequentium sanguine per Dei gratiam acquisitis sunt. Præsentis itaque decreti pagina tibi, frater charissime et coepiscopo Gibelino, tuisque successoribus, et per vos sanctæ Hierosolymitanæ Ecclesiæ patriarchali sive metropolitano jure regendas disponendasque sanctimus, civitates omnes atque provincias, quas supradicti regis ditioni aut jam restituit, aut in futurum restituere gratia divina dignabitur. Dignum est enim, ut Sepulchri Domini Ecclesia, secundum fidelium militum desideria competentem honorem obineat, et Turcorum seu Sarracenorum jugo libera, in Christianorum manu abundantius exaltetur etc. » Hæc Paschalis ad patriarcham Hierosolymorum.

13. *Patriarchæ Antiocheni querelas compescit papa.* — At quoniam concessio ista in magnum præjudicium Antiochenæ Ecclesiæ vergeret, turbatus admodum Antiochenus patriarcha Bernardus, legatos Romam misit ad Paschalem Pontificem, per eos expostulans de imminuta valde per eam concessionem diocesi patriarchatus Antiocheni, justa petens, ut descripti termini cujusque patriarchatus per sacrosanctum illud magnum Nicaenum Concilium immobiles permanent. Paschalis vero, ne schisma aliquod ea occasione in illa Eccl. fieret, his litteris animum ejusdem patriarchæ Antiocheni placare magnopere laboravit:

14. « Paschalis episcopus, servus servorum Dei, venerabili fratri Bernardo Antiocheno patriarchæ, salutem et Apostolicam benedictionem.

« Quamvis inter cæteras Sedes Apostolica illa Sedes emineat, quam Petri Apostoli morte in corpore dignatio superna clarificavit: inter Romanum tamen et Antiochenum episcopos tanta quondam legitur charitas exstitisse, ut nulla inter eos diversitas videretur: eadem Petri persona utrasque illustravit Ecclesias. Multa posthac tempora transierunt, quibus infidelium dominatio unitatem hanc in personis præsentium impedivit. Gratias autem Deo, quod temporibus nostris Christianorum principatum in Antiochena civitate restituit. Dignum est igitur, charissime frater, ut ejusdem charitatis unitas firma permaneat, nec de nobis

¹ Extant apud Tyr. l. i. c. 28.

menti tuæ opinio illa subrepat, quod Antiochenam Ecclesiam deprimere aut inhonorare velimus. Si quid ergo vel Antiochenæ vel Hierosolymitanæ Ecclesiæ aliter fortasse quam oportuit, de parochiarum finibus scripsimus, nec levitati est nec malitiæ adscribendum; nec propter hoc apud nos est scandalum concitandum: quoniam et locorum longinqua prolixitas, et antiquorum nominum commutatio, quæ civitatibus vel provinciis accendit, magnam nobis ambiguitatem vel ignorantiam in-

tulerunt. Cæterum et optavimus et optamus non scandali sed pacis fomitem fratribus ministrare, suum jus et honorem quibuscumque Eccl. conservare. Data Laterani sexto idus Augusti ». Sicque hæc exhibita spe emendationis eorum, quæ contra jus Ecclesiæ Antiochenæ scripsisse idem Pontifex visus esset, res ita transierunt usque ad obitum Gibellini patriarchæ Hierosolymitani. Quomodo vero ista postea tractata sint, suo loco dicturi sumus.

Anno periodi Græco-Romanæ 6601. — Anno Ære Hispan. 1116. — Anno Hegiræ 502, inchoato die 11 Aug., Fer. 3. — Jesu Christi 1108.

— Paschalis II papa. 10. — Henrici V reg. 3. Alexii Comneni imp. 28.

1. *Concilium Beneventanum.* — Ad num. 2 et seq. Illis quæ Petrus Diaconus in Chron. Cass. lib. 4, cap. 34, de Concilio Beneventano refert, addendum quod scribit Falco Beneventanus in Chron. anno mci inchoato, et usque ad annum mclx perducto: « Anno mcv, Indict. xiv, (his annus nobis est mcv, quia a kalendis Martii Falco annum inchoat) mense Januario et Februario nix magna fuit et fluminum inundatio, stella cometas ad occasum apparuit: triduo enim post venit papa Beneventum. Sequenti anno (nempe mcv), obiit Henricus Teutonicorum rex (hujus nominis IV). Anno mcvii, Indict. ii (a Septembri inchoata), papa Paschalis venit Beneventum, qui mense Novembri ordinavit Landulfum archiepiscopum ». Hæc ad aliquas Paschalis II litteras suis annis reddendas conducere poterunt. Porro hoc Concilium adversus investituras celebratum.

2. *Concilium Londoniense.* — A num. 4 ad 10. « Rex Henricus », inquit Eadmerus lib. 4 Novorum cap. 3, « considerans pene totum regnum (nempe Angliæ) in gravem ærumnam multis ex causis decidisse, per consilium Anselmi et procerum regni operam dare instituit, qualiter aliquo modo mala quæ pauperes maxime deprimebant mitigarentur: cuius boni exordium gnarus a sua curia cœpit ». Paulo post: « Divina nihilominus Officia quoniam indigne per quorundam sacerdotum manus eo usque tractabantur, sollicitus institit, ut ipsa suo ritu caste celebrarentur. Multi nempe presbyterorum statuta Concilii Londoniensis, necnon vindictam quam in eos rex exercuerat, quorum superius mentionem fecimus, postponentes, suas feminas retinebant, aut certe duxerant quas prius non habebant. Quod incontinentiæ crimen

rex subvertere cupiens, adunatis ad curiam suam in solemnitate Pentecostes apud Lundeniam cunctis majoribus regni, de negotio cum Anselmo archiepiscopo et cæteris episcopis Angliæ tractavit, eosque ad malum illud extirpandum regali auctoritate atque potentia fultos roboravit ». Deinde refert Anselmus decreta pro extinguendo usu concubinarum, inter viros sacros in illo Concilio Londoniensi condita, graves penas in transgressores decretas, necnon in decanos aut archidiaconos cum eis conviventes.

3. *In Normannia incontinentia inter clericos grassatur.* — Nec minus in Normannia inter clericos incontinentia grassabatur. Gaufridus enim Grossus, monachus Tironiensis, in Vita beati Bernardi abbatis ejusdem monasterii, cujus discipulus fuit, cap. 6 scribit: « Porro pro consuetudine tunc temporis per totam Normanniam hoc erat, ut presbyteri publice uxores ducerent, nuptias celebrarent, filias ac filios procrearent, quibus hereditario jure post obitum suum Ecclesias relinquerent; filias suas nuptui tradentes, multoties, si alia decesset possessio, Ecclesias dabant in dotem. Dum autem uxores acciperent, antequam sibi eas conjungerent, in præsentia parentum jurabant quod nunquam eas desererent. Hoc itaque facientes juramento se alligabant quod nunquam fornicatores esse desinerent, nunquam ad Christi corpus et sanguinem nisi rei et indigne accederent, et indigne accedentes iudicium sibi manducarent et biberent. Contra hanc mortiferam consuetudinem servus Dei Bernardus in conventiculis sacerdotum studiose disputabat, et ut eam relinquerent magnopere satagebat. Quosdam itaque abstravit: maximam tamen partem illorum ab hujus mortis

abstrahere nequivit baralhiro; unde factum est, ut uxores presbyterorum metuentes ab eis disjungi, cum suis auxiliariis eum perimere quærent, ipsi quoque sacerdotes insidias pararent, deterrendo eum ut a prædicatione revocarent; quod tamen frustra fuit.

4. *Concordia inter Alexium imp. et Boamundum Antiochiæ princ. constituta.* — Ad num. 10 et seqq. Hoc anno concordia per internuntios inter Alexium imp. et Boamundum Antiochiæ principem constituta. « Juravit enim Boamundo imperator super reliquias pretiosissimas, peregrinos tam in terra quam in mari, quanto latius imperium ejus extendebatur, ab illo die deinceps se salvaturum et conservaturum: ne quiseorum diriperetur, vel male tractaretur. Ille quoque imperatori juravit pacem et unitatem omnimodo tenendam. Qui postmodum occasione habita, Apuliam remeavit, partem exercitus sui minorem secum ducens », inquit Fulcherius lib. 2 Hist. Hierosol., cui suffragatur Willelmus Tyrinus lib. 11, cap. 6, et uterque addit, *Philippum* Francorum regem hoc anno e vita migrasse.

5. *Instituitur Congregatio Tironiensis a B. Bernardo.* — Chronographus Malleacensis ad præsentem Christi annum scribit: « Bernardus abbas (monasterii sc. S. Cypriani in prospectu Pictaviensis urbis alias constructi) in Pertico (regio inter Carnotenses, Cenomanenses, Viindocinenses et Eboricenses sita, vulgo *Le Perche* cepit suum cœnobium ædificare in loco qui vocatur Tiro (erat locus silvestris in prædio Carnotensis Ecclesiæ) in honore S. Mariæ, ubi plus centum monachorum insimul habuit ». Ex his tamen quæ leguntur in ejus Vita, scripta a Gaufredo Grosso, qui sub ipso monachus Tironii vixerat, ad diem xiv mensis Aprilis in Actis SS. Bollandianis recitata, cap. 8 apparet, Congregationis beati Bernardi initium ad sequentem annum differendum esse. Ibi enim legitur, *Bernardum* venientem ad silvam diœcesis Carnotensis, *quæ Tiro dicitur*, eam peragrarè curasse, eique loci planitiem placuisse, ac ad discipulos, qui in Britannia ac Normanniæ finibus remanserant, remeasse, ut eos ad se colligeret: « Et secum Tironum adducens, ibi cum eis deinceps habitavit. Anno igitur Incarnati Verbi mxcix, aggregatis discipulis, accepta benedictione a bonæ memoriæ domino Ivone, Carnotensis Ecclesiæ tunc temporis pontifice, primam missam celebravit in die sancto Paschæ, in monasterio ligneo jam ædificato, in possessione quam sibi memoratus princeps Rotrocius donaverat ». Rotrocius in Vita beati Bernardi dicitur *consul* seu comes Pertici, hæc enim vocabula jam ante ista tempora pro uno eodemque usurpata. Ibidem etiam num. 52, Congregationi beati Bernardi dicuntur subfuisse *centum cellæ*, sive eæ fuerint abbatie, sive præposituræ. Regula S. Benedicti in eo servata.

6. *Duces Alfonsi VI ab imperatore Almorabitum victi.* — Toletanus lib. 6 de Reb. Hisp. cap. 33, refert prælium habitum inter *Halim* amironenium Saracenorum Africae, et duces Al-

fonsi VI Castellæ et Legionis regis, quod Christianis infaustrissimum fuit. Illud die trigesima mensis Maii, Æra mclxvi, currenti sc. Christi anno, commissum esse docet antiquus Codex Mss. In eo occisus *Sanctius* infans Alfonsi regis filius unicus; occisi et magnates septem, fusæ copiæ, amissaque Concha cum *Uclesio* et quique aliis munitis oppidis. Pugnatum ad *Uclesium*, quod Toletum inter et Concham positum est, et tunc ab Hali amironenino obsidebatur. Fusc hoc prælium refert Sandovalius in Alfonso VI, sed non in paucis fallitur. Ait enim *Zaidam* puellam Sarracenam legitimam conjugem fuisse Alfonsi VI, qui ex ea *Sanctiam* hoc anno demortuum suscepit; verum Pelagius Ovetensis ab ipsomet Sandovalio publicatus discrete contrarium scribit: « Hic (sc. Alfonsus VI) habuit quinque uxores legitimas; primam Agnetem, secundam Constantiam reginam, ex qua genuit Urracam reginam, conjugem comitis Raymundi: de qua ipse genuit Sanctiam et Adelfonsum regem: tertiam Bertam Tuscia oriundam: quartam Elisabeth, ex qua genuit Sanctiam comitis Roderici, et Geloiram quam duxit Rogerius dux Siciliæ: quintam Beatricem, quæ mortuo eo repedavit in patriam suam. Habuit etiam duas concubinas, tamen nobilissimas: priorem Semenam Munionis, ex qua genuit Geloiram uxorem comitis Raymundi Tolosani (qui vulgo vocabatur comes S. Egidii), patris ex ea Adelfonsi Jordanis: et Theresiam uxorem Henrici comitis, patris ex ea Urracæ, Geloiræ, et Adelfonsi. Posteriorem nomine Ceidam filiam Abenabeth regis Hispalensis, quæ baptizata Elisabeth fuit vocata. Ex hac genuit Sanctium, qui obiit in lite de Ocles », id est in prælio hoc anno apud Uclesium habito. Sandovalius, ut hujus historici cœvi testimonium eludat, contendit Alfonsum VI, post Bertam et ante Elisabetham, Zaidam conjugem duxisse, et Sanctium exercitui paterno hoc anno præfuisse; sed cum *Sanctius* annos tantum undecim natus fuerit, quando præfatum prælium ad Uclesium gestum, hæc sententia rejicienda, licet auctor anonymus Fragmenti Historiæ a Roberto ad Philippum I regem, apud Duchesnum tom. iv, pag. 83, idem in litteris miserit. Ad hæc Alfonsus VI ante annum mxi Zaidam concubinam habebat, cum eo Christi anno Saraceni cœperint « Avenabeth gravius infestare; adeo quod eum in quodam prælio peremerunt: reputabant enim eum, quia filiam (nempe Zaidam), et castra Christiano (sc. Alfonso VI) dederat, Christianum », inquit Rodericus lib. 6, cap. 31, loquens de primo ingressu Joseph Tacsin regis Maroci in Hispaniam. Vide quæ de illo eo anno dixi. Sandovalius itaque perperam scribit, *Alfonsum VI* post Bertam Zaidam uxorem duxisse.

7. *Epitaphium Zaidæ a quopiam imperito scriptum.* — At, inquit Sandovalius, Pelagium Ovetensem errasse, evincit *Zaidæ* Epitaphium ejus sepulchro apud S. Isidorum Legionensem inscriptum, in quo legitur: « H. R. (hic requiescit) re-

gina Elisabet, uxor regis Alfonsi, filia Berabet regis.... quæ prius Zaida fuit vocata ». Verum Epitaphium istud ejusdem farinae ac Epitaphium alterius reginæ Isabelkæ, de quo supra, quod in eadem S. Isidori Ecclesia reperitur; quod eo manifestius, quo Toletanus lib. 6, cap. 35, tradat, *Alfonsum* VI sepultum fuisse in monasterio S. Fandi cum suis uxoris superius nominatis.

8. *Pactum inter Raimundum et Henricum comites de partiendo regno Aragoniæ.* — Quia *Sanctius* Zaidæ filius erat, eo in honore non habebatur quo legitimus coronæ successor; sed cum multis ei adhererent, *Raimundus comes* pactum pepigit cum *Henrico* comite sororio Urracæ, regni Aragonici potentissimo principe, quod referatur tom. in Spicilegii Dacheriani pag. 122. Ex eo manifeste eruitur *Henricum* comitem jus aliquod in regnum prætendisse, cum *Raimundus* comes juret se post mortem regis Alfonsi illi *daturum Toletum*, eumque adstringat, ut sibi dimittat *omnes terras de Leon et de Castilla*. Adeo autem verum est *Henricum comitem* jus illud sibi asseruisse, ut Alfonso VI demortuo bellum Urracæ et *Raimundo* comiti intulerit, et regnum invadere tentarit, ut narrant scriptores Hispanici, qui tamen non vident præfatum fœdus amicitiae inter utrumque initæ, et pactorum de partienda successione socii sui ejusdem Alfonsi Castellæ ac Legionis regis, quod ad S. Hugonem abbatem Cluniacensem misere, cujus opera constitutum fuerat, ut in eo legitur. *Raimundus* comes anno mcvii demortuus, *Sanctius* vero Alfonsi regis filius hoc anno occisus, uti mox diximus; sed annus, quo pactum istud juratum, magna caligine involutus. Dacherius arbitratur hæc contigisse circa annum mxcii, quod verosimile non est, propter hæc verba in pacto contenta: *Raimundus comes, ejusque filius*, nempe *Alfonsum*, qui tamen nondum in lucem prodierat. Existimo itaque pactum illud peractum circa annum xcn, quia ab eo tempore Alfonsi infantis nomen in Actis publicis legitur, ut asserit Sandovalius in Vita Alfonsi VI, indeque refelluntur qui hujus principis natiuitatem cum anno mcvii connectunt.

9. *Almorabites seu Almoravides cum Almoadibus non confundendi.* — Errat porro Sandovalius fol. 67, ubi habet, *Almorabitas* Africæ omnes Hispaniæ Ecclesias, omniaque monasteria in locis sibi subtiliter edificata penitus diruisse, et Christianos Mosarabas morti tradidisse; sequitur enim chronologos, qui *Almorabitas* seu *Almoravides* cum *Almoadibus* confundere, antequam enim *Almoades* in Hispania regnarent, Christiani, qui a religione sua decedere noluerant, cum Barbaris permixti vixerant, idque a tempore Hispaniæ in Saracenorum potestatem redactæ, ut ipsemet Sandovalius in Alfonso VII, fol. 194 et 200 affirmat. Verum *Almoades*, postquam in Hispania regnarunt, Christianorum Ecclesias everterunt, omnesque qui religionem Christianam deserere noluerunt, inter necem deleverunt; quod quando contigerit diligenter exponemus. Ceterum

Sandovalius recte refellit Marianam, qui lib. 10 de Reb. Hisp. varias Saracenorum *Almorabitarum* expeditiones in Hispaniam variis annis susceptas inter se confundit; sed ipsemet fol. 97, rem falsam et fabulosam in medium profert; asserit enim *Alfonsum* VI consilio *Mahomadi Abenhabet* regis Hispalensis socii sui, numerosum Africanorum *Josepho Tachin* Almorabitarum imperatori subditorum exercitum in Hispaniam accersisse, et *Josephum* eidem unum ex suis ducibus *Halim Hamahum* præfecisse. Addit, *Halim*, postquam a Saracenis Hispaniæ receptus fuit, a supremo Africæ imperatore defecisse, et summum Hispaniæ Amiralmenem sese dixisse; deinde fuisse ac occidisse Hispalensem regem, et Alfonsi VI copias ad *Uclesium* prolifigasse.

10. *Almorabites hoc tempore Hispaniæ Saracenicæ monarchæ.* — At hæc magna ex parte commentitia; falsum enim Saracenos Hispaniæ a Saracenis Africæ divisos fuisse, quando ad Uclesium hoc anno pugnatum. Præterea anno mcv, quo ad *Rodam* iterumque *prope Badalloz* bellum inter *Alfonsum* VI et Saracenos Hispaniæ habitum, Africani in Hispania Saracenica dominabantur, et jam ab anno mxcii Hispalensis rex captus fuerat. Anno quidem mcv, Africæ Agareni cum suo amiramonino in Hispaniam venerunt, uti Sandovalius alique historici Hispaniæ narrant, et Cesarangustam sibi subjecere, eorum exercitum ductante *Abenjufaz*; sed is rex appellatur, quia nomen illud præfectis Saracenorum tribuebatur. Nullus tunc Saracenis monarcha præerat præter *Josephum Tachin*: *Halis* vero, qui cum Christianis ad Uclesium pugnavit, non rebellis, sed filius ejusdem *Josephi* fuit, eique in monarchiam successit. Hic obiter lectorem monebo, in variantibus lectionibus Pelagii Ovetensis, in exemplari Bibliothecæ Mozariæ annotatis, legi hæc verba, quæ desunt in Codice Pampelone impresso, fol. 96, col. 2: « Fecit etiam bellum in campo de Sacralias (prope Badalloz, quæ de re Rodericus lib. 6, cap. 32, et in Hist. Arab. cap. 47) cum rege Hytchef », qui alius non est a præfato Abenjufaz, nec prælium illud ab eo quod anno mcv commissum, diversum est.

11. *Urraca Alphonso regi Aragoniæ uxor tradita.* — Proceres regnorum Castellæ et Legionis videntes *Alfonsum* VI « dolore et senio tendere ad defectum, in pago quodam conveniunt, tractaturi, ut Urracæ regis filia, quæ mortuo *Raimundo* comite viro suo adhuc vidua permanebat, nupti tradereetur », inquit Rodericus lib. 6, cap. 34. Optabant, ut comiti Gomezoni, dicto postea de *Campoospor*, matrimonio jungeretur; sed *Alfonso* VI, vocato Bernardo Toletano primate, et ceteris episcopis et abbatibus regni sui, decrevit cum eis, ut *Alfonso* regi Aragoniæ copularetur, quo « omnes unius legis moderamine regerentur », inquit Rodericus citatus.

12. *Victoriæ Alfonsi VI de Saracenis post*

cladem ab eis acceptam. — Sandovalius, fol. 99 et seqq., refert narrationem postremi belli ab Alfonso VI adversus Saracenos gesti, et a Petro episcopo Legionensi scriptore coetaneo descripti. Hoc opus non solum hactenus typis mandatum non fuit, sed ne quidem ejus meminit Nicolaus Antonius in Bibliotheca Hispanica. Rem paucis expedio. *Alfonso VI*, utdemorte *Sancii* filii vindictam sumeret, magnum exercitum congregavit, cum quo *Cordubam* adortus est, ex qua cum *Abdalla* urbis praefectus erupisset, captus fuit cum xxii aliis ducibus, in conspectu urbis jussu Alfonsi combustis. Civitas Christianis dedita, bonaque Almorabitarum cum mccc Christianis captivis Alfonso VI tradita. Hoc cum accepisset amiromoninus, ex Africa rediit, adversus quem cum processisset *Alfonso* rex, amiromoninus in Africam transfretavit, et Hispanenses ab eo deficientes nepotem ex filio postremi sui principis regem elegerunt, seseque Alfonso vectigales fecere, quorum exemplum Giennenses imitati sunt. De *Hispani* adhuc ab Almorabitis stante invadenda cogitabat *Alfonso*, sed cum morbi quaedam initia sentiret, Toletum secedere coactus fuit. Interim Castellani *Concham* die xxiii Maii insequentis expugnaverunt, et *Ocania* sese eis dedit; quibus in urbibus fere tria millia Christianorum servitute liberati. Parte alia novus Hispanis rex a Genuensibus adjutus naves armamentis et ministris instruxit, et Tunetum usque mare infestum habuit. Ilac de re hujus urbis rex qui Almorabita non erat, apud *Alfonsum VI* questus est, et Maroci imperator misit, qui suo nomine trium annorum inducias ab Alfonso peterent; sed nihil ab eo obtinuit, quia decem annis breviores concedere noluit. Eodem anno, die Assumptionis Beatae Virginis, Judaei a Christianis Toleti cruciati. Ilac

summarie ex Petro Legionensi episcopo laudato.

13. *Institutio Communitarum in Francia ad defensionem publicam.* — Hoc anno mortuus est Philippus rex Francorum, cui successit Ludovicus filius hujus nominis VI, Grossus cognominatus, ut an. mcvii demonstravimus. Notabilia sunt quae de utroque scribit Ordericus lib. 11, pag. 836: « Quia senio et infirmitate rex Philippus a regali fastigio deciderat, et principalis erga tyrannos justitiae rigor nimis elanguerat, Ludovicus, imprimis ad comprimendam tyrannidem praedonum et seditiosorum, auxilium totam per Galliam deprecere coactus est episcoporum. Tunc ergo communitas in Francia popularis statuta est a praesulibus, ut presbyteri comitarentur regi ad obsidionem vel pugnam cum vexillis et parochianis omnibus ». Erat vero *Commune*, vel *Communia*, vel *Communio*, vel *Communitas*, vel *Communa*, vel *Communantia* (totidem enim nominibus apud auctores vocatur, ut videre est in Glossario Ducangii) incolarum urbis aut oppidi universitas, domino vel rege concedente, sacramento invicem certisque legibus adstricta. Fuere primo Communitas in oppidis regi ipsi obnoxii duntaxat, sed postmodum, regibus concedentibus, in aliis quae episcoporum erant inductae sunt. Imo regii vassalli in suis oppidis *Communia* pariter statuerunt, quibus institutionibus eo magis assensum Francorum reges praebuere, quod in bellis opem ab iis exposcere licebat. Hinc crebro legimus in praелиis adfuisse et dimicasse urbium *Communitas*, quibus praevii erant ipsi presbyteri seu curiones cum vexillis Ecclesiae, quod testantur Ordericus pag. 835 et seqq., et Sugerius in Vita Ludovici VI, cap. 18, quorum loca refert Ducangius ibidem.

1. *Paschalis inhabet incestuosum conjugium Alphonsi Aragoniae regis, unde Burdini episcopi Bracharensis mala initia.* — Millesimus centesimus nonus Christi annus secunda incipit Indictione, quo Paschalis papa, audito incestuoso conjugio inter Uracam reginam filiam Alphonsi regis Castellae, nuper eodem anno defuncti kalendis

Julii, et Alphonsum Aragoniae regem, tertio gradu consanguinitatis inter se conjunctos: Apostolica auctoritate, poena excommunicationis atque regni privatione indicta, ejusmodi conjunctionem statuit divellendam, datis litteris ad Didacum Compostellanum episcopum, his verbis:

2. « Paschalis, servus servorum Dei, venerabili

fratri Didaco Compostellano episcopo, salutem et Apostolicam benedictionem.

« Ad hoc te omnipotens Deus populo suo praeesse constituit, ut eorum peccata corrigas, et Domini annunties voluntatem ». Et infra: « Stude igitur secundum datam tibi divinitus facultatem tantum incesti facinus, quod a regis filia perpetratum est, debita ultione corrigere; ut vel a tanta praesumptione desistat, vel Ecclesiae consortio et saeculari potestate privetur, etc. » Haec tantum ex Paschalis papae litteris descripta invenimus¹. Ceterum, cum non paruisset Apostolicis jussis, Deum vindicem sunt experti. Uraca siquidem, morte subitanea medium cum crepuisset, extincta est, et Alphonsus in Saracenico bello peremptus, prout uterque Rodericus affirmat. In episcopos autem litteris Apostolicis obsequentes persecutionem excitatam ex eisdem constat, cum Bernardus episcopus extra diocesim exulare per biennium est coactus: qua occasione captata, Burdinus episcopus Bracharensis Romam venit, Paschalem Pontificem adit, atque oblati pecunia petit in Bernardi locum intrudi, sed repulsus. Ille ille, de quo Rodericus Toletanus meminit atque ait²: quod dum idem Bernardus Toletanus archiepiscopus Romam venit tempore Urbani papae, atque ejus jussu reversus est in Hispaniam, per Gallias transiens, Lemovicis Burdinum inventum secum duxit, atque creavit archidiaconum Ecclesiae Toletanae, deinde Coinbricensis, postea vero Bracharensem episcopum, cum ipse loco Burdini se Mauritium voluerit nominari. Hic igitur cum execratione rejectus a Paschali Pontifice, se contulit malorum auctor ad Henricum regem, quem eidem jam coepisse adversari intellexisset, eumque calcaribus impolit per abrupta, homo vaferissimus, versipellis, ad insinandum, se principibus audacissimus, atque ad decipiendum applissimus: qui nec quievit quousque nisibus ejusdem Henrici Apostolicum thronum invasit. Quomodo autem, suo loco dicturi sumus.

3. *Obitus S. Anselmi et Hugonis abbatibus Cisterciensis.*—Hoc eodem anno ex hac vita ad aeternam gloriam transitit S. Anselmus archiepiscopus Cantuariensis, cujus certamina pro sancta Ecclesia Catholica exallata saepe superius suis sunt locis pro ratione temporum enarrata; de ejus vero obitu tempore Edinerus, qui res ab eo gestas praesens inspector scripsit, haec habet³: « Transit autem illucescente aurora quartae feriae praecedentis Coronam Domini, quae erat undecimo kalend. Maii, anno videlicet incarnationis Dominicae millesimo centesimo nono, qui fuit annus pontificatus ejus decimus septimus, vite vero septuagesimus sextus »: cum, ut idem ait, haberet praemanibus de Origine animae scriptiorem, quam morte praeventus minime absolvere potuit. Illustravit plane Anglicanam Ecclesiam doctrina, illustravit et sanctitate, ceteris

sanctissimis Patribus Christi confessoribus, quos Ecclesia veneratur minime impar. Claruit miraculis vivens atque defunctus, lucidum sidus Ecclesiae Anglicanae, multiplici fulgore coruscans omnibus intuitibus in tanta noctis obscurae caligine.

4. Quo pariter anno post dies octo, sanctus Hugo abbas Cluniacensis, cujus labores pro defensione Ecclesiae sanctae susceptos contigit saepe superius recenseri, teste Sigeberto hujus temporis scriptore, ex hac vita migravit die vicesima nona mensis Aprilis. Utinam sicut Anselmus, ita et Hugo suum habuisset Edinerum, qui res ab eo gestas accuratius conscripsisset, quas mea sententia qui scripsit Hugo monachus vix attingisse dicendus erit, si quis conferat eas cum iis quas oblata occasione Annalibus inteximus, in negotiis Ecclesiasticis Sedis Apostolicae obeundis.

5. *Godofredus episcopus Ambianensis agit Romae cum Paschale papa de suis juribus.*—Quod autem in fine sancti Godofredi episcopi Ambianensis, idem auctor visionem de transitu Hugonis divinitus olensam, cum Romam pergeret, narrat: pariter ex iis insinuat certum tempus ejusdem Godofredi adventus Romam ad Paschalem Pontificem, nempe hoc ipso anno, quo (ut ejus Vite fidelissime scripta habent Acla) Rhemis Synodus celebrata est frequenti concursu episcoporum ac procerum. In qua inter alia actitatum reperitur⁴, quod idem Godofredus episcopus Ambianensis redarguit falsifatis Diploma Apostolicum, quod ad suam ipsorum exemptionem a subjectione episcopi Ambianensis ediderant pseudomonachi, dum appellantes ad Sedem Apostolicam, illum eundem traxerunt sanctum episcopum. Praecurrentes enim monachi illi, caudicicos iniquos, paratos pro pecunia quamlibet causam sive justam sive injustam defendere, nacti eorumque patrocinio apud Paschalem Pontificem fieri voti compotes; alique victores iniqui ad propria redire in sanctum virum probra jactantes. At quae tunc Romae Godofredus apud Paschalem egerit, hic ex ejusdem temporis auctore sunt recitanda, nempe Nicolao monacho Suessionensi, qui ea quae de sancto viderat, vel certa fide audierat, se de eo scripsisse testatur; ait igitur:

6. « At vir Dei Romam ingressus, limina beatissimorum Apostolorum Petri et Pauli religiose invisit, ac deinde ad Paschalem Pontificem se confert. Mox advolant caudicidi, sperant ab illo quoque se accepturos munera largissima. Sed Godofredus, qui non confidebat in homine, nec ponebat carnem brachium suum, ut a Domino recederet cor ejus: quia causa tam difficile et longinquum suscepisset iter, absque ullis vel verborum fucis, vel numerum pollicitationibus simpliciter edidit. Sed contradicunt caudicidi; aiunt monachos ab eo injuste vexari. Dumque nulla sperant ab eo munera, causam malam enim fovere affirmant. Videns

¹ Apud Joan. Marian. l. x. c. 8. — ² Rod. Tolet. l. vi. c. 27, 28.

— ³ Extant apud Sur. tom. ii. die XXI April.

⁴ Nic. in Vit. Godofredi episc. l. ii. c. 11. 12. 13. apud Sur. l. vi. die VIII Novemb.

ergo vir Dei se humano patrocinio destitutum, calumniantium cuncta forti et excelso animo contemnens, exclamat : O pastor orthodoxæ matris Ecclesiæ, ea causa Christus te voluit suo loco illi præesse, ut lucem a tenebris, verum a falso discerneres. Ut enim a capite membra reguntur, ut ad illius nutum membrorum vitia corrigantur : sic etiam a te Christianorum omnium non facta duntaxat, sed etiam malæ voluntates comprimendæ sunt. Sed quia nunc cerno justam quandoque crimen inique occulto Christi iudicio perire, malim privatus vivere quam admittere ut Ecclesia Ambianensis, me præsule, jus amittat summum. His dictis, Pontifici valefecit, et in Barensem urbem ob invisendum beati Nicolai reliquias ardenti studio proficiscitur.

7. « Postquam abiit, Pontifex diligenter perquisivit, quæ vitæ ejus sanctitas, quæque illius auctoritas esset, qui tanta dicendi libertate uteretur. Ita qui antea citra Alpes celebre sanctitatis nomen fere ubique obtinuerat, etiam Romæ Urbi præclare innotuit. Nam interroganti Pontifici indicatum est, quod ab ipsis pæne incunabulis Ecclesiasticis disciplinis imbutus sit, et qui pro virtutum incremento ad altiora proventus, primo abbas, deinde episcopus evasisset; quod ejus egregia sit religio, jureque cunctis sacerdotibus anteponendus videatur; quod pauperum et viduarum magnam curam gerat; quod Galliæ proceribus notissimus et cunctis fere charissimus sit : denique quod omnibus divinis charismatibus abundet. His auditis, Pontifex seipsum graviter reprehendit, quod talem ac tantum virum vel ad momentum leviter exacerbasset, quod non magno studio et benevolentia eum excepisset, et ejus votis annuisset. Imperat itaque suis, ut si quando ad Urbem eum redire contingat, mox eum ad se perducant ». Post hæc auctor in his versans quæ contigerunt in ejus peregrinatione, quæ admiranda de oleo ex corpore sancti Nicolai accepto ab eo ejus loci episcopo narrat, nos brevitate causa omittimus : hæc tantum de reditu Romam et ad Paschalem accessu, ex ejusdem verbis hic reddimus : « Mox a Paschalis Pontificis familia in ejus conspectum perducitur.

Pontifex ei reverenter assurgit, humanissimeque eum osculatur et secum assidere compellit. Volens autem certius explorare quæ de ejus prudentia jam ante ab aliis didicerat, multas tum divinarum tum politicarum rerum ei quæstiones proponit, atque ad difficiles solvendo nodos haudquaquam imparatum eum offendit. Cernens ergo Pontifex multa eum prudentia et pietate pollere, orat ne gravate accipiat, quod antea non sic, ut fidelem dispensatorem par erat, ab ipso acceptus et exauditus fuerit : cogitet animum innumeris causis distractum haudquaquam ad singula posse sufficere. Beatus vir facile ignovit. Tum Paschalis litteras ei tradidit, quibus inter alia continebatur, abbatem Sancti-Udalrici cum monachis suis Ambianensi episcopo perinde ac patri et pastori in omnibus parere debere. Ille igitur Apostolica auctoritate et benedictione munitus redit ad civitatem suam ». Hactenus de his ille.

8. *Pontius abbas Cluniacensis.* — Quod autem ad Cluniacenses spectat, post S. Hugonem substitutum fuisse Pontium, idem qui supra Sigebertus affirmat, longe impari prædecessori : imo e contra, sicut ille egregia claruit sanctitate, ita iste incredibili nequitia præditus, non abbas sed prædo, non pastor sed lupus, neque pater sed tyrannus jure dicendus : de quo inferius suis locis opportunior sermo erit.

9. *Egino abbas S. Udalrici Augustæ Vindelico-rum.* — Eodem anno Egino confessor illustris, pro Catholica Ecclesia adversus schismaticos inhærens Gebehardo minister indefessus, eligitur legitime a Catholicis abbas monasterii Sancti-Udalrici, sponte cedentibus tribus abbatibus a schismaticis intrusis : idemque electus ad obitum usque ab Hermanno Augustano episcopo schismatico persecutionem passus est. Hæc omnia pluribus scripsit fideli stylo comes peregrinationis ejus Udalscalcus, cujus Commentarium jam csum habemus industria Henrici Canisii Noviomagi¹, scriptum ad fratres Sancti-Udalrici et S. Afræ.

¹ Henric. Canis. tom. II. Antiq. lect. in Egn. c. 4. 2.

Anno periodi Græco-Romane 6602. — Anno Æræ Hispan. 1147. — Anno Hegiræ 503, inchoato die 31 Julii, Fer. 7. — Jesu Christi 1109.

— Paschalis II papa 11. — Henrici V reg. 4. Alexii Comneni imp. 29.

1. *Obitus Alphonsi VI Castellæ et Legionis regis.* — Ad num. 1 et seq. Cum rerum Hispanicarum Historiam hoc præsertim et præcedenti sæculo Baronius tantum delibavit, operæpretium duxi nobilem hanc Annal. Eccl. partem, quanta tamen fieri poterit brevitate, supplere, quæ hic uno tenore referuntur, cum suis annis illigare Baronius et passim alii, *Alphonsi Castellæ et Legionis regis*, hujus nominis VI, mortem hoc anno collocant; neque hoc in dubium revocari potest, cum Pelagius Ovetensis, qui eum videre potuit, de eo scribat: « Vixit LXX annis, et annis XLIII et sex mensibus ex eis in regno (a morte scilicet Ferdinandi M. patris, primi hujus nominis Castellæ regis). Obiit kalendas Julii in Toletis », et quidem nocte inter diem xxx Junii et primum mensis Julii interjecta. Sandovalius enim in *Alphonso VI*, fol. 102, notat plures ex antiquis scripsisse eum die Mercurii ultima mensis Junii Æræ MCLXVII naturæ debitum solvisse. Sepultus est in monasterio Sancti-Facundi, ubi ante annos XXVIII sepulturam elegerat, ut patet ex Charta aut testamento ab eo in favorem hujus monasterii emisso, in quo sese Hispaniæ imperatorem indigitat: « Elegi, ut post mortem meam ibi tumulatus requiescerem, quatenus qui in vita nimio amore dilexi, etiam defunctus loherem (loco, foverem). Datum hoc testamentum die sabbatum, III idus Decemb., Æræ MCLXVII », id est, anno Christi MCLXXX. Pelagius Ovetensis, pag. 76, mira de ejus justitia ac pace quam in regnis suis, non obstantibus bellis ab eo adversus infideles gestis, conservabat, refert, et inter alia ait: « Iste Adefonsus fuit pater et defensor omnium Ecclesiarum Hispaniensium. Ideo hæc fecit, quia per omnia Catholicus fuit ». Et successit Alphonsus Aragoniæ rex, maritus Urracæ Alphonsi VI filiæ. Pelagius Ovetensis usque ad hunc annum Historiam suam perduxit, a Sandovalio editam. De Pelagio pluribus agit Nicolaus Antonius lib. 7, cap. 3 Biblioth. Veteris Hispaniæ.

2. *Concilium Placentinum II.* — *Alphonso VI* regnante, duo Concilia apud Sanctam-Mariam de Fusellis, oppidum vulgo *Husillos* dictum, prope Palentiam urbem situm celebrata, quæ Palentina dici solent. De priori, anno MCLXXVIII, quo congre-

gatum fuit, egimus cum Sandovalio, qui ejus Acta vidit; sed cum ejus tempore Vita *B. Geraldii* archiep. Bracarensis lucem nondum vidisset, hujus secundi Concilii Palentini notitiam non habuit. Scribit itaque Bernardus in Vita *B. Geraldii* archiepiscopi Bracarensis, cujus discipulus fuerat, *Bernardum* archiepiscopum Toletanum, sedente Urbano II, Roma reducem secum adduxisse ex Aquitania Toletum Geraldum, et in ea Ecclesia eum præcentorem constituisse: vacante vero Ecclesia Bracarensi, unanimi Bracarensium consensu electum fuisse episcopum, et a Bernardo apud Sanctum-Facundum consecratum: deinde, ut metropolitancam dignitatem Ecclesiæ suæ restitueret, Romam petisse ad Paschalem II, et ab eo pallium impetrasse, ac postea Concilio Palentino, cui præfuit *Richardus* cardinalis, exhibuisse Privilegium Ecclesiæ suæ Roma allatum. Hæc verba Bernardi in beati præsulis Vita: « Ut *B. Geraldus* sedi Bracarensi propriam dignitatem restitueret, Romam petiit, et a domino papa Paschali honorifice susceptus, pallium et Privilegium et auctoritatem Ecclesiæ suæ inde apportavit. In concilio enim PALentino, quod venerabilis *Richardus* cardinalis Romæ celebravit, episcopis et abbatibus et optimis clericis Hispaniæ circumsedentibus, Romanum Privilegium in auribus omnium recitatum est: et juxta tenorem ipsius Privilegii, Bracaræ metropolis suffraganei pontifices venerabili Geraldò Bracarensi metropolitano, justitia dictante et cardinali præcipiente, obedientiam et reverentiam promiserunt ». Annus restitutionis Ecclesiæ Bracarensis in archiepiscopalem incertus; incerta et epocha hujus Concilii; sed cum *Burdinus*, ut anno MCLXVII vidimus, ut anno MCX *B. Geraldus* deimortuo successerit, liquet Concilium Palentinum aliquot ante præsentem annos congregatum fuisse, et Bracarensem metropolim institutam. Nec aliud in hoc Concilio gestum ad nos pervenit. *Richardus* itaque cardinalis non solum priori Concilio Palentino, ut ex ejus Actis liquet, sed etiam posteriori præfuit.

3. *Ei succedit Alphonsus Aragoniæ rex.* — Post Alphonsi VI mortem, Sarraconi Africæ in Hispaniam transfretarunt, et quæcumque antea amiserant, recuperarunt; adeo ut Christiani ingenti

timore percussi *Toletum* deseruissent, nisi solius *Bernardi archiepiscopi* Toletani virtus celebrem hanc civitatem Christianis servasset. Mirum profecto dissensiones, quæ post *Alphonsi VI* mortem Castellanos inter et Aragonios existerent, Saracenis majori non fuisse emolumento. Regna enim *Alphonso*, successori ejus, Castellæ, Legionis, Aragoniæ et Navarræ regi subdita, in tres factiones divisa : Castellæ regnum ad *Urracam* ejus uxorem jure devolvebatur, eaque ex prioris conjugio cum *Raimundo comite* inito *Alphonsum Infantem* suscepit, qui postea sub nomine *Alphonsi VII* et imperatoris Hispaniæ regnavit. Cumque pervicax regiænæ animus ab *Alphonso* rege vix flecti posset, isque Castellanis, qui ab eo matrimonio aversi fuerant, dissidens, prefectos ex Aragonia gente daret, alii *Urracæ* regiænæ, alii *Alphonso* ejus conjugii, aliique *Alphonso Infanti*, quem regem optabant, toto animo adhaerebant. *Alphonso* Urracæ uxorem e patre tertio propinquitatis jure attingebat, indeque conjugium illud illegitimum injustumque a plerisque censebatur, adeo ut Paschalis II illud penitus improbatum. Quare in regnis *Alphonso* subjectis omnia passim perturbate agebantur, quod ex dicendis liquet.

4. *Obitus S. Anselmi archiep. Cantuar.* — Ad num. 3. *Eadmerus* lib. 4 *Novorum* cap. 4, sancti *Anselmi* Cantuariæ archiepiscopi mortem hoc modo narrat : « Post hæc, XI kal. Maii defunctus est Cantuariæ in metropoli sede gloriosus pater *Anselmus*, et die sequenti (quæ fuit Cœna Domini) in majori Ecclesia ad caput venerandæ memoriæ *Lanfranci* prædecessoris sui honorifice sepultus, anno Incarnati Verbi millesimo centesimo nono, regni vero *Henrici* gloriosi regis Anglorum nono, Pontificatus autem ipsius *Anselmi* decimo sexto, ætatis vero septuagesimo sexto ». *Gerberonius* opera ejus quæ reperiri potuerit ab aliquot annis in lucem emisit, cum *Historia Novorum* *Eadmeri*, quæ *Baronii* tempore non extabat. *Eadmerus* *Anselmi* auditor, convictor, et laborum ac exiliorum individuus comes fuit, Vitamque ejus scripsit in illa *Historia*, ad hoc maxime attentus, ut ea quæ inter reges Angliæ et sanctum *Anselmum* gesta sunt, inconcussa veritate designet. De genuinis ac spuris sancti *Anselmi* operibus legendus idem *Gerberonius*.

5. *Obitus S. Hugonis abbatis Cluniac.* — Ad num. 4. *Sanctus Hugo* abbas Cluniacensis, in Gallia, octavo die, postquam e vita sanctus *Anselmus* migravit, mortuus est, ut narrat *Ordericus* lib. 11, pag. 839 : « Venerandus *Hugo* Cluniacensis abbas, postquam passionem Christi et Resurrectionem celebravit, feria secunda ægritudine tactus in lectum decidit, et per tres dies iter ad Dominum confessione et oratione præparavit. Ipse conventui ut successorem eligerent imperavit, electumque juvenem nomine *Poncium* testimonio auctoritatis suæ corroboravit. Deinde in domum infirmorum inter manus fratrum portari se fecit, ibique

feria iv grandævus heros ad Christum, cui a pueritia militaverat, migravit. Hic, ut fertur, sexaginta quatuor annis Cluniacense cœnobium gubernavit, et plusquam decem millia monachorum ad militiam Domini Sabaoth suscepit, et post obitum in Basilica sepultus est, quam ipse a fundamento inchoavit. Sic duæ Ecclesiarum columnæ de terrestri Hierusalem, quæ adhuc inter alio phyllos peregrinatur, translate sunt, ac, ut credimus, pro diuturna sanctitate in superna Sion immobiliter plantate sunt. Gloriosus archipræsul Doroberniæ *Anselmus* ante Pascha obiit, et curiam omnipotentis Adonai feria iv infulatus adivit : et in ipsis Paschæ solenniis charus amicus ejus *Hugo* abbas feria iv similiter e mundo transivit ». *Philippo* Francorum regi, hujus nominis I, et quibusdam aliis principibus impense clarus extitit. Arcta ei fuit cum beato Petro Damiani necessitudo, et cum *Desiderio* abbate Casinensi, postquam ad Pontificatum Romanum evectus fuit *Victore III* appellato. Denique plures illustres viri ex ejus schola prodire, inter quos *Urbanus II* et *Gregorius VII* summi Pontifices.

6. *Obitus B. Roberti fundatoris ordinis Cisterciensis.* — Hoc circiter anno beatus *Robertus*, primus abbas *Molismensis*, ac fundator ordinis Cisterciensis, XV kalendas Maii spiritum Deo reddidit, qui dies ab auctore monacho Molismensi anonymo, qui sub Adone seu Odone abbate hoc seculo floruit, notatur, in ejus Vita in Actis SS. *Bollandianis* ad diem xxx Aprilis recitata. *Baronius* in *Notis* ad *Martyrologium* Romanum hanc mortem cum anno mxcvii secutus, ut ait, *Siebertum* in *Chron.* conjungit, sed memorie lapsus; eo enim anno ordinis Cisterciensis foundationem, non vero fundatoris mortem *Siebertus* narrat, nosque de illa fundazione eodem anno egimus. Annus itaque hujus mortis incomptus, certumque tantum eum anno mcv adhuc in vivis fuisse; cum eo anno apud *San-Marthanos* cuidam *Chartæ* subscripserit. Porro *Molismus* sylvæ erat in episcopatu *Lingonensi* sita, ubi *Robertus* cœnobium condidit, et « discipulos magnæ religionis aggregavit », inquit *Ordericus* lib. 8. *Honorius II* litteris anno vi Pontificatus sui datis potestatem fecit *Molismensibus* Officium de illo celebrandi, in ea qua sacra ejus ossa recondebantur Ecclesia.

7. *Monachi Samualarienses nolunt subijci S. Godefredo episc. Ambianensi.* — A num. 5 ad 8. *Nicolaus* monachus *Suessionensis*, in Vita *S. Godefridi* episcopi *Ambianensis*, recitata a *Surio* ad diem vi mensis Novemb., in qua quæ de sancto præsule viderat vel audierat se scripsisse testatur, lib. 2, cap. 9 et duobus seq. narrat, *Godefridum* male acceptum a monachis *S. Walerici*, immunitatem suam jactantibus, ad *Manassem* archiepiscopum *Rhemensem* commentitia fingentem Privilegia *Rhemos* venisse, ubi tum celebravimus procerum *Galliæ* conventus habebatur. Ibi *S. Godefridus*

Privilegia illa plane recentia esse probavit. *Monachi pudefacti ad Romanum Pontificem* provocant, Romanque illico proficiscuntur. Refert postea Nicolaus *Godefridum* Romam ad Paschalem II venisse, huncque præcepisse, ut abbas S. Valerici et monachi Ambianensi episcopo, perinde atque patri et pastori parerent. Ita ille cap. 21 ejusdem libri.

8. *Epocha Conc. Rhemensis.* — Erat tunc episcopus Rhemorum *Manasses*, uti scribit Nicolaus Snessionensis lib. 4, cap. 26, quem ex Chartis authenticis Marlotus in Metropoli Rhemensi lib. 2, ostendit eidem sedi præfuisse usque ad annum millesimum centesimum septimum. Quare Synodus Rhemensis ante illum Christi annum congregata, idque anno millesimo centesimo quinto, ut eruo ex membrana Dotationis, quæ extat apud Miræum in Codice Donationum, scripta anno millesimo centesimo octavo, episcopatus Odonis, in hoc Concilio Rhemensi præsulis Cameracensis consecrati, anno tertio. « Dominus Manasses », inquit Herimannus, in Narratione restorationis abbatæ S. Martini Tornacensis, tom. xii Spicilegii pag. 444, « Rhemorum archiepiscopus, ad Concilium generaliter mandans alios abbates, inter alios nominalim evocavit Odonem abbatem Sancti-Martini Tornacensis, eumque exinde admirantes quid de Concilio nobis referretur, altoniti et suspensi expectaremus, ecce repente audimus ad Cameracensis sedis episcopatum eum fuisse electum, et sine mora ab archiepiscopo et comprovincialibus episcopis consecratum. Quis eo die luctus totum conventum nostrum repleverit, quis singultus pectora nostra conculcasset, nullus facile explicare poterit. Vix tamen octo dies transierant, et rursum nobis quadam redditur consolatio, quoniam ipse, rebellante ac resistente Galchero episcopo (qui dignitate depositus fuerat, quod Henrici imp. partibus adhereret), pacifice ingredi non valens Cameracum urbem, rursum nobis ab archiepiscopo remittitur, et per annum integrum nobiscum demoratur ». Tum pag. 447: « Mortuo patre Henrici (hujus nominis V) Henrico seniore (anno nempe mcv. kalendis Augusti) non quidem armis, sed tristitia cordis, filius ejus, jam optato regno potitus, mandavit Cameracensibus, ut Gualcherum excommunicatum ab urbe pellerent, dominum Odonem reciperent; tuncque primum dominus Odo urbem sedis suæ pacifice ingrediens, præcepit nobis ut abbatem eligeremus ».

9. *Illud Concilium fictitium non est.* — Si itaque Odo Cameracensis sedis possessionem iniiit post mensem Julii anni mcv, annoque integro post suam in Concilio Rhemensi ordinationem, perspicuum est illud an. mcv congregatum, et tertium sedis exeuntem in annum mcvii convenisse. Marlotus citatus cap. 23, ait Historiam, quam refert Nicolaus Snessionensis, ubi *sanctus Godefridus* falsitatis arguit Diploma Apostolicum, quo se tueri et eximere conabantur Sanvalaricenses mona-

chi a subjectione ejusdem Godefridi, egregie per partes excussisse Lucam Dacherium, et Robertum Quatremarium Benedictinos, quibus ipse adhæret, eosque mirari tot summæ eruditionis viros in ea cæcutuisse, « cum nullus per id temporis conventus talis legatur in Chartophilacio Rhemensi ». Verum frivola hæc ratio, eaque Historia certæ et indubitatae fidei, et Concilium Rhemense, cujus in ea mentio, aliud non est, quam quod mox memoravimus.

10. *Nec differri potest in annum mciix.* — Baronius illud hoc anno consignavit, quod *sanctus Godefridus* præsentī anno Romam profectus sit, uti constat ex Epistola Hugonis monachi Cluniacensis ad Pontium abbatem Cluniacensem data, et in Biblioth. Clun. pag. 426 relata, in qua dicitur, *Godefridum*, dum sanctus Hugo Cluniacensis abbas ad Deum migravit, fuisse *tum in Italia apud Papiam*, et sociis mortem ejus revelasse, quam die xxix mensis Aprilis hujus anni contigisse inter omnes convenit. Verum hæc profectio Romana sancti Godefridi et revelatio mortis sancti Hugonis abbas nihil commune habent cum Concilio Rhemensi, quia illud ante aliquot annos congregatum fuerat, anno nempe mci, idque non Rodulpho Viride, sed Manasse ejus decessore Ecclesie Rhemensis presidente. Quare fallitur cardinalis doctissimus num. 5, quando ait, Acta *sancti Godefridi* insinuare eum Romam profectum esse, et Rhemensem Synodum coactam eo anno quo illa visio accidit; illa enim produnt Synodum Rhemensem habitam (Manasse episcopatum administrante, qui tamen biennio ante sanctum Hugonem abbatem mortuus est. Tom. x Concil. hæc Synodus cum præsentī anno copulatur, et Cossartius ibidem ait, Baronium Concilium appellare *cœtum*, quem Nicolaus monachus *conventum* vocat. At horum temporum scriptores Concilium sæpius conventum appellant, in quo de rebus Ecclesiasticis agitur, vel cui episcopi intersunt. Petit deinde Cossartius, uter peccet, an Nicolaus, qui Manassem tum Rhemensem episcopum fuisse tradit, an Baronius, qui illud in annum currentem confert. Sed certum et indubitatum imposterum esse debet, Nicolaum accurate notas Concilium istud sedente *Manasse* celebratum, et mortem sancti Hugonis abbas, ac ejus revelationem extra rem ad Concilium Rhemense trahi.

11. *Annus emortualis Odonis Cameracensis ep.* — « Odo, quia virgam et anulum, quæ consecratus ab Ecclesia acceperat (ut ipsemet scribit lib. de Blasphemia in Spiritum sanctum) iterato ab Henrico IV imp. accipere noluit », sede sua pulsus, Aquicincti, quod monasterium est Benedictinum, secundo lapide a Duaco, in exilio decessit anno millesimo centesimo decimo tertio, uti habet Miræus lib. de script. Eccles. in Henrico Gandavensi, pag. 162, qui addit, eum scripsisse Commentarium in *Canonem missæ*, Dialogum de *Mysterio Domini-nice Incarnat.* contra Leonem Judæum, aliæque

opuscula, quorum nonnulla in Biblioth. Patrum referuntur, præter varia opera adhuc inedita in variis monasteriis asservata, ut ibidem Miræus. Videnda quæ anno MCM de *Odone* jam diximus, et tomus II Spicilegii Dacheriani pag. 525 et seqq., ubi referuntur septem Epistolæ Odonis canonici regularis ad varios fratres canonice professionis, in quibus agit de regulari eorum observantia quam in professione promissere; canonici enim regulares vere monachi erant, ut alibi ostensum.

12. *Conc. Lausdunense.* — Girardus Engolismensis episcopus et sanctæ Romanæ Ecclesiæ legatus, Concilium hoc anno celebravit *Lausdun*, quod oppidum est Pictaviensis provinciæ, decem leucis ab urbe Pictaviensi dissitum. In eo aliqua peculiari Ecclesiarum negotia pertractata, ut tom. X Concil. pag. 762 legere est. In Codice Ms. de Gestis pontif. Engolismensium, de Girardo dicitur: «Gerardus Engolismensis episcopus, cum domno Paschali papæ adhaesisset, qui ad partes Galliarum venerat, cognita honestate et præclara sapientia, vices suas prius in Britannia, et deinde in Turonensi, Burdegalensi, Bituricensi, Auxitanensi provinciis commisit. Præter cætera, quæ in legatione eximie fecit, octo Concilia celebravit». Sed Lausdunensis tantum memoria superest, et *Gerardus* Anacleto antipapæ postea adhaerens, quam antea sibi compararat gloriam commaculavit.

13. *Barcinona auxilium Ludovici Francor. regis adversus Barbaros implorat.* — In Chronico Sancti-Petri-Vivi ad annum MCM, hæc referuntur: «Venerunt aliene gentes exeuntes de finibus suis transmarinæ, quas quidam Amoræos, quidam Amiraless vocabant, et fecerunt de se tres partes: quarum una telendit super Sarracenos, duæ super Christianos: et venerunt non longius quam est iter trium aut duorum dierum a civitate Barcinona. Verum consilio accepto, Barcinonenses, comes scilicet et episcopus, et proceres, et compatriotæ, quibus incumbere necessitas, reclamaverunt adocationem regis (sc. Francorum) Hludovici, et miserunt ad eum causidicos suos, episcopum sc. ipsius civitatis, cum paucis nuntiis. Qui querimoniam suorum civium et compatriotarum suorum ipsi Franci regi referentes, invenerunt cum variis militiæ bellis implicitum, scilicet versus regem Anglorum, ducem Normannorum, qui contra ius et fas denegabat facere hominum, quod debebat et debet regibus Francorum. Similiter et consul Pictavorum, et dux Burgundionum, et multi alii consules, qui sunt sub rege Francorum. Cum quibus omnibus pro instanti necessitate pacem fecit supradictus rex, quibusdam inducias et trevas dando, de quibusdam hominum debitum accipiendo. Unde confidens plurimum rex spopondit legatis supradictis se vere preparaturum ad ferendum illi patrie auxilium. Et ad curiam suam, quæ in Pentecostes futura erat (nam hæc fiebant in diebus præcedentis Quadragesimæ) dixit se suum consilium, ut dignitatem regiam decebat, acceptu-

rum. Inde supradictus episcopus cum sociis suis lætus cum regis gratia retrogradum iter arripuit».

14. *Quo anno in agrum Barcinon. Barbari irruerunt.* — In Appendice ad Marcum Hisp. num. 340, Baluzius refert narrationem de *vastatione quam Arabes intulerunt in Marcam Hispanicam anno MCM*, sed numeri in Instrumento expressi corrupti sunt. Illud enim in fine habet: «Actum est hoc VI kal. Decemb. anno primo Ludovico regnante», ideoque anno Christi superiori. Et tamen illud his verbis inchoatur: «Anno Dom. Incarnat. cxi post millesimum, Indict. xv, pridie kal. Septemb. etc., ingens multitudo Moabitum cæterorumque paganorum ingressa est partes nostræ patriæ, scilicet in Penitense», additurque eos plures Ecclesias evertisse, et non minimas Christianorum strages edidisse. Tum dicitur, *Raimundum* Barcinonensem comitem jussisse, ut reedificaretur castrum Olerdula, a paganis eversum jam a pluribus annis. Porro pagus, qui inter Tarracoenem et Barcinonem interjacet, Penitensis, et vulgo *Panades* appellatus, ut notat Baluzius ibidem ad annum MCM. Chronographus S. Petri-Vivi dicit, se accepisse quæ hæc de re scribit ab episcopo et sociis ad regem in Galliam missis, dum ipse esset in Alvernia, subditque: «Addiderunt etiam et dixerunt, quod superscripte gentes a Montepessulo non longius erant quam itinere quinque dierum, similiter et de S. Egidio». Quibus inter se collatis, cum paganorum illorum irruptionem anno superiori factam esse, currenti vero legationem illam missam oportet; cum irruptio exeunte mense Augusto contigerit, ut ex præfata narratione liquet, et legati ad regem missi, in diebus *Quadragesimæ*, ut prodit chronographus, ab eodem auditi fuerint. Quare loco, *anno Dom. Incarnat. cxi post millesimum, Indict. xv*, legendum *anno Dom. Incarn. cxi post millesimum, Indictione prima*.

15. *Tripolis a Crucesignatis capta.* — Hoc anno *Tripolis* a Balduino Hierosolymorum rege, adhibitis Genuensibus, qui cum classe navium fere LXX illuc venerant, subacta, uti narrat Fulcherius lib. 2 Hist. Hierosol.

16. *Moritur Ingulphus abbas.* — Petrus Blesensis, in Continuatio Historiæ ab Ingulpho abbate Croylandensi scriptæ, tradit eum «XVI kal. Januarii, scilicet anno Domini MCX, regis Henrici anno idem IX», ætate valde provecutum e vita excessisse. Natus erat Londini, et licet præcipuus ejus scopus sit monasterii sui Historiam representare, tamen et genus suum et varia in Anglia gesta ei intexuit. Ejus Continuatio a *Petro Blesensi* edita, mutila ad nos pervenit. Tam Historia quam Continuatio correctius impressæ Oxonii anno MDCLXXXIV.

17. *Thomas Ilharanita Monothelismum apud Maronitas inducere tentat.* — Hoc circiter tempore, *Thomas Ilharanita* Syrus, episcopus Kfartabensis, Maronitarum fidem Monothelismo labefactare conatus est, uti narrat Faustus Naironus in Dissert.

de Origine ac Religione Maronitarum, num. 49 et seqq., probatque ex eorundem Maronitarum Chronicis, ac præsertim ex *Gabriele Olais*, inter eosdem doctrina ac sanctitate illustri. Gabriel nonnulla de Sacramentis opera, soluta oratione, aliaque de Orientalium Historiis carmine exaravit, et in Poemate in quo recenset hæreticos qui aliquem errorem inter Maronitarum gentem disseminare voluere, nominat præfatum Thomam Iharanitam, aitque: « Quos secutus est Thomas ex Iharan, qui in provincia Aleppensi erat metropolita ». Hic quamvis natus et educatus fuisset in civitate Maredin in Mesopotamia ad Tigrim fluvium (quæ urbs Jacobitarum est patriarchalis sedes, etsi in ea nonnulli Nestoriani extent, ut in eodem Poemate idem auctor subdit: Dixisti mihi illum fuisse ex Maredin: Maredin enim est habitaculum dæmonum, habitantibus in ea Nestorio et Jacobo), nihilominus patria religione relicta, Monothelismum amplexus est tanto animi ardore, ut Joannes patriarcha Græcorum Antiochenus, ne is error qui tunc extinctus in Syria videbatur iterum revivisceret, utque imminenti malo consulere, contra præfatum Thomam variis scriptis insurrexerit, illique miserit Epistolam, in qua reprobata ex Sanctorum Patrum ac Conciliorum auctoritate Thomæ sententia de unica tantum in Christo voluntate, illum anathemate percussit.

48. *Refellit eum Joannes patriarcha Antioch.*

— Hanc controversiam anno circiter xcvi inter eos ceptam existimal Naironus citatus num. 51, quod in Præfatione decem propositionum, quas Thomas adversus eundem Joannem patriarcham compilavit, legitur: « Anno Alexandri filii Philippi Græcorum 1400, Epistolæ ac scripta mutuo processerunt Antiochiæ inter Joannem patriarcham Græcorum, et Thomam archiepiscopum Kfartab diocesis Aleppensis, eratque quæstio circa professionem duarum voluntatum in duabus naturis in Incarnatione Domini nostri, cumque inter eos multiplicata fuissent Epistolæ, Joannes patriarcha Antiochiæ scripsit Epistolam prolixam, eamque misit cum nuntio ad Thomam, in qua defendendo se, demonstrat eum qui non proficitur in Domino nostro Jesu Christo duas voluntates, deficere a fide, et execratur professionem Thomæ unius voluntatis in Domino nostro Jesu Christo ». Sed fallitur vir doctissimus, annus enim Alexandri m^o non concurret cum anno Christi xcvi, sed incipit kalendis Octobris anni Christi mxxxviii; quare cum hæc controversia ferveret eo tempore, quo Thomas ad montem Libanum profectus est, et protectio illa ad annum xcix pertineat, ut mox dicetur, in Præfatione illa, loco, *anno 1400 Alexandri*, legendum puto, *anno 1420 Alexandri*, qui inchoatur kalendis Octobris anni xcvi.

49. *Thomas respondet ad eundem Joannem.*

— Thomas igitur, pro responsione ad hanc Epistolam, ac pro suæ sententiæ confirmatione, aliam scripsit in decem propositiones divisam, quæ extat

inter libros Abrahami Ecchelenis Maronitæ eruditissimi, in qua Scripturarum ac sanctorum Patrum fultus, ut sibi videbatur, auctoritate, unicam in Christo Domino voluntatem et operationem probare contendit, eamque per nuntium ad præfatum misit patriarcham, qui ne venenum hoc per ipsius serperet diocesim, jussit illam igni publice dari, ut habetur in eadem Præfatione: « Eamque cum nuntio expresso misit Antiochiam in manus patriarchæ, ibique tunc aderant duo viri prudentes, Georgius scilicet filius Alsciatui, et Socrates filius Philippi. Inssit patriarcha eam comburi, ut eam prorsus de medio tolleret, ne corrumpere fides populi ».

20. *Fingit se esse Maronitam.* — Cum autem hoc Thomæ nuntiatum fuisset, eodem Tractatu de novo compilato et in meliorem formam redacto, ac ad valvas Ecclesiarum affixo, se ad montem Libanum contulit, ut ibidem legitur: « Et cum nuntiatum fuisset Thomæ, Joannem ejus Epistolam igni dedisse, eam in meliorem formam rescripsit, cumque illam ad valvas suæ Ecclesiæ affixisset, ad montem Libanum se contulit ». Et infra: « Profectus est pater Thomas ad montem Libanum, ratus se ibi per medium annum diutaxat permansurum; sed evenit statim ut Franci tunc aggredirentur Tripolim Syriæ ut eam expugnarent, prout eam expugnaverunt; permansit Thomas per quatuor annos in Giobbet Januhb, et postea rediit in Giobbet Bsciarrai, ubi mansit per biennium ». Ex quo patet protectionem Thomæ ad montem Libanum ad currentem annum pertinere, quo Tripolis mense Junio a Francis capta, ut num. 15 diximus. Hac igitur periculosâ occasione, curavit diabolico excogitatu aggredi Maronitas, quos ut facilius in suam sententiam adduceret, dixit se esse Maronitam, et Maronem ejusdem secum fuisse opinionis, idque Eutychie Alexandrini auctoritate probabat, quemadmodum legitur in ejus tertia et quarta propositione, subdique divum Maximum auctorem fuisse opinionis duarum voluntatum in Christo Domino, sub imperio Marciani, uti recenset in quarta propositione: « Stetit Maximus coram imperatore Marciano ac ejus fratre, eisque consilium dedit, dicens: Necessè est ut addamus aliam voluntatem, ut sint duæ voluntates in duabus naturis »; atque ut Maximum apud Maronitas in contemptum vocaret et odium, genealogiam ei finxit perdidicula, illamque, auctore Eutychio Alexandrino, per fraudem et mendacium ei attribuit: « Dicitur de eo in Eutychio filio Patricii, ipsum in civitate Tiberiade natum fuisse ex quadam femina oriunda ex Perside, quam Judæus nomine Sadoc, ex proge Samaritanorum, fornicarie cognoverat; et cum ex his natus fuisset præfatus filius fornicationis, vitam duxit fraudibus malisque operibus plenam, et postea ex Tiberiade se contulit Constantinopolim ».

21. *Et S. Maximum excogitasse duas voluntates in Christo.* — His etiam non contentus, Tho-

mas, ut eosdem Maronitas, quos Romano Pontifici adherere videbat, in suam facilius reduceret sententiam, subdit ibidem Heraclium, Leonis papæ auctoritate, Maximum insectatum fuisse: « Scripsit Heraclius ad patriarcham Leonem, papam Romanum, et accusavit Maximum de nova ejus assertione absque ulla vera auctoritate. Cum igitur hæc Epistola ad patriarcham pervenisset, responsum dedit Heraclio: Benedicat Dominus noster imperium Heraclii, ejusque augeat fidem. Quicumque hanc assertionem emisit et sparsit, corruptique fidem rectam, et scissionem ac schisma iniecit inter fratres fideles, dignus est cui lingua ac manus abscindatur. His patriarchæ rescriptis quæ Heraclius summo receperat cum honore, Maximum ad se coram adduci jussit, eique amputari linguam ac manum, eumque in insulam quæ vocatur Rachie ablegavit, quæ enarratio scripta est apud nos et vos in libro Eutychie filii Patricii ».

22. *Eam in rem falso Eutychie adducit.* — Verum etsi multa perabsurde retulerit *Eutychie*, nihil tamen simile vel scripsit vel somniavit, uti ejus opera legentibus patebit: nam *Maximus* natus est centum circiter et quinquaginta annis post Marcianum imperatorem, anno sc. DCXV, juxta Baronium; *Marcianus* autem tenebat imperium anno DCII, quo celebratum fuit Concilium generale Chalcedonense adversus Eutychem ac Dioscorum, qui duas in Christo negabant naturas; et tunc voluntatum controversia nequaquam emanaverat. Neque Eutychie temere a *Thoma* citatus, de divi Maximi Genealogia ac vite moribus asserit, quæ ipse mendose refert; imo oppositum legitur tom. II Annalium ejusdem Eutychie in califatu Moraviæ, in imperio Constantini, ubi de Maximo scribit: « Erat tunc temporis monachus quidam sanctus, nomine *Maximus* ». Et haudquaquam in ejus Annalibus legitur, ab Heraclio pro Monothelitarum causa vel *Maximo*, vel quemquam alium male habitum fuisse, vel ultum eo imperante Leonem papam extitisse: Eutychie vero cum aliis convenit scriptoribus, Theophane cæterisque Græcis, hanc insectationem evenisse sub Constantis imperio Heraclii nepotis, ab aliis Constantini etiam vocati, ut ait Baronius anno DCXII, quo etiam nomine illum Eutychie vocat. Neque hic recenset Maximum opinionis duarum voluntatum auctorem fuisse; ait enim passim in tomo II Annalium, Sophronium Jerosolymitanum, qui illum præcesserat, Cyro Alexandrino adversatum fuisse, qui in Conciliabulo Alexandriæ coacto, unam in Christo voluntatem affirmaverat.

23. *Thomas sectatores invenit.* — Hæc igitur Thomæ errata animadvertens *Gabriel Qlai*, in hæc verba cum derisione adversus ejus scripta prorumpit: « In ejus Historia rei patet veritas, at

sedes ejus non erat Simonis ». Sensus est, si vis scire fidem Thomæ, patet rei veritas ex mendaci ejus Historia: ex eoque sedes ejus non erat fundata super fidem Simonis Petri, sed erat extra Ecclesiam a Christo fundatam super Petrum. Hoc libello ex mendaciis ineptissimis contexto, aditum ad plebem imperitam et ad quosdam etiam e clero viros minime eruditos sibi reperit, ac præcipue placuit archipresbytero cuidam *Farsiaie*, diocesis *Bsciarrai*, qui ab ipso summis precibus postulavit, ut suum tractatum decem propositionum rursus in lucem ederet, quemadmodum habetur in præfata Præfatione: « Et regressus est in diocessim Bsciarrai, ubi moratus est per duos annos; tunc temporis illi adfuit archipresbyter quidam *Farsiaie*, illumque instantissime rogavit ut suam Epistolam renovaret ».

24. *Post ejus mortem patriarcha Maronita ejus doctrinam amplectitur.* — Ex quo factum est ut ejus assecræ data opera inter Maronitas exemplaria aliqua disseminarint, multosque eorum Ecclesiasticos libros, varia in illis addendo atque delendo corruerint, ut asserit *Gabriel Qlai* in suo de Hæreticis Poemate, ubi post præfati Thomæ mentionem deinde ait: « Post illum in lucem emerit Ebn Sciehban; et cepit scribere, et docere pueros, seminavit inter Maronitas errores, eorumque libros zizaniis implevit ». Et rursus in eodem Poemate: « Filius Ihsosin erat ex Ihsatci (est quoddam Libani oppidum in Giobbe) deceptit populum Kfariasci (est aliud Libani oppidum,) scripsit, et mutavit preces »; et brevi temporis intervallo in aliis oppidis idem venenum diffusum est, quæ eadem lue ipsemet patriarcha infectus videbatur, uti legitur in Chron. Maronitarum: « Quoniam patriarcha venenum hauserat, missis ad labefactandum ipsum muneribus, quantum ore capere voluit ». Quapropter inito inter Maronitarum primates tam Ecclesiasticos quam sæculares consilio, decreverunt una sententia omnes ab ejus se communione sejungere; « ejus subditi », prosequitur idem Chronicon, « ac regiones patriarcham a suo segregaverunt consortio, nec postea præstiterunt ei obedientiam, nec illum in regionibus acceptarunt ». Imo eo pervenit eorum fidei zelus, ut illum deposuerint, aliumque in ejus locum suffecerint. Quæ novitate ira perciti assecræ depositi patriarchæ, in novum patriarcham insurrexerunt, eumque interfecerunt, ignique ejus corpus dederunt, ut ibidem habetur: « Præfatus patriarcha mortuus est depositus, et elegerunt patriarcham Ihsigula; mortuus est martyr interfectus, eumque combusserunt: testificati sunt contra eum quadraginta Christiani, fidem ejus non fuisse rectam, aliaque falsa protulerunt ». Quid postea configerit, ex eodem Fausto Nairono anno MCLXXXII referemus.

PASCHALIS II ANNUS 11. — CHRISTI 1110.

1. *Henrici regis adventus in Italiam, et pacta conventa inter ipsum et Paschalem papam.* — Annus agitur millesimus centesimus decimus, Indictione tertia, quo Henricus Germaniae rex in Italiam veniens, sub pacis involucri bellum acre, et sub velamine religionis dura vincula in Romanam Ecclesiam intulit : quae omnia subodoratus Paschalis Pontifex, quo poluit studio cuncta, quae expedirent ad imminentem cladem avertendam, subsidia comparavit : de eo enim haec Petrus Diaconus habet¹ : « Anno Domini Incarnationis millesimo centesimo decimo, Indictione tertia, mense Junio, sexta ipsius mensis die cometes apparuit. Eo etiam tempore, jam dictus Paschalis egressus Urbe ad has partes advenit, et ducem ac principem, omnesque Apuliae comites evocans, cum eis paciscitur, ut si opus esset, contra imp. Henricum dimicent. His ita peractis, rediens Romam, omnes Romanorum proceres simili sacramento conscripsit. Interea imperator immenso coacto exercitu, intravit Italiam praedecessorum suorum dignitates et jura simul, et imp. coronam ab eodem Pontifice Romano accipiens » : seque fidelem filiumque profitebatur esse velle S. Petri. Hinc Dominico in Mathilde de legatione tunc missa ab eodem ad Paschalem Pontificem :

Mille decem centum Christi dum tempora crescent :
Pontifices magnos, comites direxit et altos
Magnificam Romam pro regni quippe corona,
Filius esse Petri si vult rex atque fidelis.

Et inferius, in eodem scilicet anno :

Cum multis galeatus in ortu
Autumni venit, Longobardosque peremit.
Ardens, devastans illorum maxima castra,
Urbes munitas ejus perterritus ira.

Subjicit de miserabili excidio Novariae, quae ei resistere coepit, et de adventu ejus in Tusciam :

Transivit certe tunc, incipiente Decembre,
Montem Bardonis, Tuscanas fluxit in oras.

Cum Florentinis celebravit denique Christi
Natalem.

Agit et de excidio Aretii, igne ferroque consumpti. Inter haec legationes ultro citroque currunt, quibus agebatur de pactis firmandis, antequam se imperator in Urbem infunderet. Quae autem inter absentes transacta fuerint, Petrus Diaconus ita narrat¹ :

2. « Erat autem hiems, cumque in Tusciam devenisset, missis Romam nuntiis inter illos et Petrum Leonis, et ceteros Pontificis nuntios, in porticu Sancti-Petri convenit :

« Ut imperator die coronationis suae omne male usurpatum Ecclesiasticum jus in manibus Pontificis, adstante clero et populo, perscriptum deponeret, cum hoc ipsum papa de negotiis regalibus fecerit, idque sacramento firmaret.

« Dimitteret Ecclesias liberas cum oblationibus et possessionibus suis, quas ad regni non pertinere jus constare potest.

« Absolveret a juramentis populos, quae contra episcopos facere compulsi sunt.

« Patrimonia possessionesque beati Petri restitueret, sicuti a Carolo, Ludovico, Henrico aliisque imperatoribus concessa sunt libera, servaretque ea beato Petro pro viribus.

« Nihil aut faceret aut diceret, ut papa Pontificatum amittat, nihilque ipse patiat in vita, vel in membris, vel capiat mala captione, aut per se, aut per suspectam personam, nec ipse, nec fideles ejus qui pro ipso fidem ei dederint, id est, Petrus Leonis cum filiis suis, quorum bona nullum patiantur detrimentum, et si quis eis malum fecerit, rex fideliter ipsos adjuvaret.

3. « Pro hujusmodi observandis, Pontifici praededit Fridericum sororis suae filium, Engelbertum et Theobaldum marchiones, Hermannum et Godefredum comites, Fridericum palatinum comitem Saxonum, Berengarium de Bajoaria, Fridericum Saxonem, Albertum cancellarium, Cononem Berengarii fratrem, Sicbotho Bajoarium,

¹ Pet. Diacon. Chr. Cass. l. IV. c. 37.

¹ Pet. Diacon. Chr. Cass. l. IV. c. 37.

Henricum Carinthiae ducem, Bertulfum Bertulfi ducis filium, qui jurabunt papae securitatem de vita, de membris, de papatu, de captione. Qui, nisi imperator ista servaret, apud Romanam se Ecclesiam cum suis honoribus (obnoxii)..... tenerentur.

« Obsides pro securitate Pontificis rex dare pollicitus est proxima quinta feria, eosque secure ad insulam Tiberinam mittere in potestatem papae, Fridericum ducem nepotem suum, Brunonem episcopum Spirensem, Conradum nepotem comitis Herimanni, et filium ejus, et Henricum Friderici comitis fratrem. Obsides si recepisset, redderet in die coronationis suae, sponte transmissio. Et si forte coronatus non fuisset aut non transisset, similiter redderet apud castellum S. Angeli.

« Legatos, quos ad eum papa dirigeret, dum irent et redirent, securos a se suisque redderet. Et si eis scierent aliquid injuriae illatum esset, emendatum fideliter.

4. « Quae omnia postquam impleverit rex, papa juberet episcopis adstantibus in die coronationis ejus, ut regalia imperatori dimitterent, quae a temporibus Caroli, Ludovici, Henrici aliorumque praedecessorum ad regnum pertinebant.

« Scripto firmaret sub anathematis poena, auctoritate sua, ne quis eorum, vel praesentium, vel absentium, vel successores eorum regni se intromitterent juribus, neque invaderent civitates, ducatus, comitatus, monetas, vectigalia, mercata, advocaciones imperii, centurionum jura. Curtesque essent imperii cum pertinentiis suis, militia imperii castra.

« Nec ipse papa imperatorem nec Romanum imperium super his ulterius inquietaret : et privilegio sub anathemate ista confirmaret, ne posterius ultra inquietare praesumerent.

« Imperatorem benigne et cum honore susciperet, et more praedecessorum ipsius Catholicorum imperatorum scierent et non subtracto (sub tecto) coronaret, et ad tenendum imperium officii sui juvaret auxilio.

« Hoc si papa non impleverit, Petrus Leonis cum suis omnibus se ad imperatorem teneret.

« Obsides, nisi effugerent, altero post coronationem die restitueret. Si ex ipsius papae parte remanserit, ut non coronaretur, similiter redderet.

5. « Haec ita constituta jurejurando firmavit imperator, Albertus cancellarius, Hermannus, Fridericus, et Godefredus comites, Fridericus Saxo, Cono Berengarii frater, Siecboto de Bavaria, Henricus Carinthiae dux, Bertulfus Bertulfi ducis filius. Hi omnes post imperatorem eo ordine jurarunt, ut si imperator haec implere nollet, ipsi cum omnibus suis cum Romana Ecclesia tenerent ». Hactenus pacta conventa inter Henricum regem atque Paschalem Pontificem, a Petro Diacono ex scripto recitata quae extant. Idem statim pergit¹ :

6. « Iis ita formatis, idem Apostolicus ad eum

litteras dirigit, mandans illi, ut illuminatori omnium gratias referat, qui cordis ejus oculos aperire dignatus est, ut patris ejus nequitiam toto jam orbe vulgatam et interim agnosceret, et gravius abhorreret. Apostolica namque Sedes eum ad aeterni Patris viscera confugientem paterna benignitate susceperit, et inter matris Ecclesiae filios familiariter confoveret. Si enim, sicuti suarum litterarum serie pollicebatur, plena mentis devotione sibi suisque legitimis successoribus obedientiam exhibere curasset, quam reges imperatoresque Catholicis suis praedecessoribus exhibuerunt : ipse profecto eum ut Catholicum imperatorem esset habiturus, honoremque ejus per Dei gratiam servandum augendumque curaturus. Nam si in cepta obedientiae probitate persisteret, magnam Romano imperio salutem obvenituram. Quam ob causam non solum in partes illas venire, verum extremis quoque personam suam exponere paratus esset. Ceterum, quoniam in praesentiarum se ad eum neque Urbis qualitas, neque conditio tempore ire patere, invicem sibi per intermundios voluntates suas aperirent ». Hactenus argumentum litterarum, quas ad Henricum regem Paschalis papa tunc scripsit. Subjicit vero ista de alia ejus principis petitione :

7. « Postulat deinde imperator, ut patris sui corpus in Ecclesia sepeliri permitteret. Ad hoc ille respondit : Sanctorum scripturarum his obsistit auctoritas, divinorumque miraculorum reverentia prohibet. Ipsos enim Dei martyres jam in caelestibus positos id terribiliter jussisse, scilicet ut sceleratorum cadavera de suis Basilicis ejicerentur. Neque quibus viventibus non communicavimus, mortuis jam communicare possumus ». Ista Paschalis. Quae autem post haec secuta sint, suo loco anno sequenti dicturi sumus.

8. *Urbs Bethleem erigitur in episcopatum.* — Ubi autem locorum facta ista fuerit acceptio legatorum Apostolicae Sedis, et decreta a rege legatio ad Pontificem, et conventiones istae tractatae, ita Urspergensis, qui iisdem poterat interesse, narrat : « Ex Aetio ad Aquampendentem progressus, legatos suos dudum ab Aetio missos ab Apostolico boni nuntii bajulos reperit. Remissisque aliis nuntiis cum Romanorum legatis scilicet, qui supplices illic sibi occurrerant, paulatim Sutrium processit. Ibi legati Apostolici cum missis regis advenientes, promptum esse papam ad consecrationem, et omnem regis honorem et voluntatem, si tamen ipse sibi annueret libertatem Ecclesiarum, laicam ab illis prohibens investituram : recipiendo nihilominus ab Ecclesiis ducatus, marchias, comitatus, advocacias, monetas, telonia, caeterorumque regalia quae possident summam. Praebuit rex assensum, sed eo pacto, quatenus haec transmutatio firma et authentica ratione, consilio quoque et concordia totius Ecclesiae, ac regni principum assensu stabiliiretur ». Haec antequam perveniret Henricus ad Urbem : reliqua autem anno se-

¹ Pet. Diacon. l. iv. c. 38.

quenti, quo et eadem pacta conventa sunt repetita.

Quod ad res pertinet Orientales, hoc eodem anno, auctoritate Paschalis papæ id agentis per legatum suum, Bethleem erecta est in sedem episcopalem, et a Balduino rege dotem accepit: de

cujus dotis conventionem extat ejusdem Balduini Diploma, recitatum in Historia de bello sacro a Willelmo Tyrio¹.

¹ Will. Tyr. l. xi. c. 11.

Anno periodi Græco-Romanæ 6603. — Anno Eræ Hispan. 1118. — Anno Hegiræ 501, inchoato die 20 Julii, Fer. 4. — Jesu Christi 1110.

— Paschalis II papæ 12. — Henrici V reg. 5. Alexii Comneni imp. 30.

1. *Henricus imp. Romam pergit.* — Ad num. 1 et seqq. Chronographus Hildensheimensis ad annum mxc scribit: « Archiepiscopus Coloniae Fridericus, Bruno Treverensis, cancellarius Adelbertus, comes Herimannus de Wincelburch, alique principes satis clari, Romam cum pompa non parva vadunt, inter dominum Apostolicum et regem (Henricum sc. V, qui tamen a Sugerio in Ludovico Grosso rege cap. 9 dicitur imperator, licet nondum Romæ coronatus fuisset juxta morem qui obtinebat) concordiam facturi. Dominus Apostolicus omni paternitate, omni mansuetudine cum se expecturum spondet, si ipse se ut regem Catholicum, ut Ecclesiæ filium et defensorem, ut justitiæ amatorem S. Romanæ Sedi exhiberet ». Tum ad annum mxc: « Nonis Martii, Synodus gloriosa in Lateranensi Ecclesia presidente domino papa Paschali celebratur. (Tom. x Concil. ex Chronico Ms. Sancti-Petri-Vivi dicitur Concilium illud adversus investituras celebratum). Prædicti legati Leodium ad regem veniunt, responsum papæ referentes. Ibi rex Anglici regis (Henrici nempe) filiam (Mathildem appellatam) sponsam suscepit, quam in Pascha apud Trajectum regio more dotavit. Expeditio in Italiam ab universis Occidentis principibus Trajecti collaudatur ». Paucis interpositis: « Circa Assumptionem sancte Mariæ rex regio apparatu Italiam ingreditur. Omnes civitates munitæ, omnia castella regi subduntur. Rex Natalem Domini apud Florentiam celebrat ». Inde nuntios Romam mittit, inter quos et Paschalem II papam quedam conventa, a Baronio num. 2, ex Petro Diacono lib. 4, cap. 37, recitata.

2. *Grosulanus archiep. Mediolanensis profectio Jerosolymitana.* — Hoc anno, ut narrat Landulphus Junior cap. 17, apud Puricellum lib. 4, de SS. Arialdo et Berlemb. cap. 90, cum Grosulanus archiep. Mediolanensis arcem Aconæ quam invaserat dedere coactus fuisset, fantorum et amicorum consilio de peregrinatione Hierosolymitana

suscipienda cogitavit. Puricellus quidem ibidem cum anno mxi hæc copulat, et in Monum. Basilicæ Ambrosianæ num. 308, ante libros illos editis, hanc peregrinationem ad annum mxc retulerat. Verum eam ad currentem pertinere certum existimo, nam statim post ejus discessum mense Aprili, *Otricus* et quatuor metropolitane Ecclesiæ canonici Quatuor Temporibus Pentecostes sacros ordines acceperunt, quæ eo anno configere *ineunte Junio*, ut inquit Landulphus citatus. Quare *Otricus* et socii die iv Junii, qui hoc anno cum sabbato Quatuor Temporum concurrebat, Genuæ ordinati sunt, et *Grosulanus* mense Aprili currentis anni, qui Henrici imp. in Italiam adventum præcessit, in Terram-Sanctam profectus est; quæ quidem peregrinatio pro abdicatione habita fuit *in hac manifesta depositione*, inquit Landulphus. In Catalogo episcoporum Mediolanensium in Archivis metropolitane Ecclesiæ ejusdem urbis asservato, et a Puricello lib. 4 de SS. Arialdo et Berlembaldo cap. 90 citato, legitur: « Grosulanus episcopus sedit annos septem, et menses quatuor, sepultus est Romæ ad Sanctum Saba », sique mense Decembris anni mxi ab episcopatu Savonensi ad Mediolanensem translatus fuerat, et mense Aprili currentis anni in Orientem perrexit. Auctor Catalogi episcoporum Mediolanensium a Papebrocio publicati, qui ait: « Grosulanus hanc sedem annos ix et menses iv perturbavit », annos illos novem a mense Decembris anni mc repetit, ab illo enim mense usque ad Aprilem hujus anni hoc temporis spatium fluxit.

3. *Coronatio Henrici Mediolani commentitia est.* — Galvancus Flamma in magno suo Chronico cap. 251, auctor Chronicæ cui titulus *Flos florum*, fol. 136, annalista Modociensis lib. 1, cap. 37, et alii recentiores apud Puricellum in Monument. Basil. Ambros. num. 310, quos Sigonius lib. 10 de Reg. Italiæ sequitur, asserunt, *Grosulanum* seu *Chrysolaum* Henrico imp. regium insigne Modoe-

tiae vel Mediolani dedisse; sed cum Landulphus Junior, qui tunc Mediolani erat, hujus coronationis mentionem non faciat, sicuti nec Siebertus, nec Otto Frisingensis, nec Urspergensis abbas, ea commentitia habenda; cum ex dictis *Grosulanus* mense Aprili currentis anni Mediolanum reliquerit, et Henricus imp. ineunte autumno, teste Donnizone in Mathilde, in Italiam venerit.

Cum multis galeatus in ortu
Autumni venit, Longobardosque peremit.

Henricum porro male sese in suo itinere gessisse, præter Donnizonem testatur Landulfus auctor Vitæ Paschalis II: « Civitates multas et castra in itinere, dolo pacem ostendendo, subvertit; Ecclesias destruere non cessavit, religiosos ac Catholicos viros capere, quos invenire poterat, quos vero habere non poterat, a propriis sedibus expellere non desistebat... Sic impie agendo per Longobar-

diam et Tusciam usque pervenit ». Ita Pandulfus.

4. *Toletum a Saracenis frustra obsessum.* — Hoc an. *Hali* Saracenorum Africæ et Hispaniæ rex seu imp. *Toletum* diebus octo omnibus machinis impugnavit, tandemque *Madrito* et *Talavera* direptis, ingenti præda onustus in Africam rediit, uti refert Sandovalius, qui ait nescire se quis sit iste *Hali*; sed jam diximus eum fuisse filium *Josephi Techfin*, Maroci regis et imperatoris Amorrabilium. Ipsemet postea fol. 119, citat Historiam Ms. Toleti, ubi legitur *Halim* fuisse potentissimum Maroci regem. Mariana lib. 10, cap. 8, de hac *Toleti* obsidione loquitur, sed quis fuerit *Hali*, præcise non designat. Garibayus etiam nihil de *Hali* dicit, et tantum de *Conchæ* recuperatione verba facit, quod quidem verum est; nam non tantum oppidum illud a Saracenis tunc captum, sed etiam universum Toleti regnum, ipsa civitate primaria excepta, a *Bernardo* archiepiscopo Toletano servata, ut anno superiori indicavimus.

PASCHALIS II ANNUS 12. — CHRISTI 1144.

1. *Quæ Henrici regis ingressum in Urbem præcesserunt.* — Anno sequenti, eodemque millesimo centesimo undecimo, Indictione quarta, Henricus rex Germaniæ Romam ingressus est, pactis conventis accipere coronam imperii. Quo tempore quove ordine facta sint ista, ex ejusdem temporis scriptoribus, qui ea vidisse perfacile potuerunt, hic sunt per singula describenda. Petrus Diaconus hæc de his in primis habet¹: « Mense autem Februario, Cæsar castra concite movens, ad Urbem tendebat. Pontifex autem hortatorias litteras illico disseminans, Northmannos ac Longobardos monebat in Romanæ Ecclesiæ fide ac devotione persistere: frustra id quidem. Post hæc imperator pervenit ad Urbem tertio idus Februarii, sabbato ante Quinquagesimam, Romanis autem insistentibus ut honorem ac libertatem Urbis sacramento firmaret, calide illos Cæsar fallere cupiens, Teutonica lingua quod volebat ipse juravit. Ille plerique ex Romanis agnito, fraudem in negotio esse proclamantes, sese in Urbem receperunt. Utigitur Pontifex imperatorem

advenisse cognovit, missis nuntiis securitatem ab eo obsidesque expetebat. Cæsar obsidibus datis vicissimque receptis, jurjurando firmavit de Apostolici ipsius vita, de honore, de membris, de mala captione, de regalibus et patrimonii B. Petri, et nominatim de Apulia et Calabria, et Sicilia, Capuanoque principatu, tactis sacramentis, quod omnes jus Ecclesiarum, omnesque illarum res quietas omnino dimitteret ». Ilæc facta sunt pridie ejus diei quam ingrederetur in Urbem. Sed hic antequam ulterius progrediamur, repetenda sunt Acta Sutrina, prout scriptis mandata reperiantur in scripto Codice Vaticano ab auctore qui aderat, eademque scriptis mandata servavit. Post illa autem quæ sunt recitata anno superiori ex Petro Diacono, ista ibi leguntur:

2. « Forma juramenti baronum Henrici imp. facta domino Paschali papæ.

« Ego Albertus cancellarius.

« Ego comes Hermannus.

« Ego comes Fridericus.

« Ego comes Godfredus.

« Ego Tolmarus, juro vobis, quia dominus rex

¹ Petr. Diacon. Chron. Cass. I. IV. c. 38, 39.

proxima quinta feria jurabit et principes jurare faciet, et obsides dabit, sicut in conventionis Charta scriptum est : et sic observabit domino papæ sine fraude et malo ingenio, si dominus papa proxima die Dominica sic adimpleverit regi, sicut in alia conventionis Chartula scriptum est :

« Conventio ex parte Paschalis papæ.

« Si rex adimpleverit papæ, sicut in alia conventionis Chartula scriptum est : Dominus papa præcepit episcopis præsentibus in die coronationis suæ, ut dimittant regi et regno, quæ ad regnum pertinebant tempore Ludovici, Henrici, et aliorum prædecessorum ejus, et scripto sub anathemate confirmabit auctoritate suâ, vel justitiâ, ne quis eorum, vel præsentium, vel absentium, vel successores intrinsecent se, vel invadant eadem regalia, id est, civitates, ducatus, marchias, comitatus, monetas, mercatum, advocatias, et curtes, quæ manifeste regni erant cum pertinentiis suis, militiam et castra regni ; nec ipsum regem et regnum super his ulterius inquietabit, et privilegio sub anathemate confirmabit, nec posterius sui inquietare præsumunt. Regem benigne ac honorifice suscipiet, et more prædecessorum ipsius Catholicorum, scienter et non sub tecto coronabit, et ad tenendum regnum officii sui auxilio adjuvabit. Si dominus papa hoc regi non adimpleverit, ego Petrus Leonis cum tota præsentia et potentia mea tenebo me ad regem, obsides autem nisi effugient, reddemus die altero post coronationem regis. Si per papam remanserit, ut non coronetur, similiter reddemus die Dominico, cum dominus rex ad processionem receptus fuerit. Obsides dabo aut per me, aut per nuntios meos, Gratianum filium meum, et filium Hugonis filii mei, vel filium sororis meæ, si cum habere potuero (nisi per regem remanserit) pro securitate regis, ut secure transeat Castellum et pontem.

3. « Juramentum Petri Leonis factum imperatori Henrico, ex parte domini Paschalis papæ Secundi.

« Ego Petrus Leonis juro vobis, quod dominus papa proximo die Dominico adimplebit regi (nisi a rege remanserit) quod in conventionis Chartula scriptum est, si rex observabit domino papæ, sicut in alia conventionis Chartula scriptum est. Datum nonis Februarii in atrio S. Petri, in Ecclesia Sanctæ Mariæ, quæ dicitur in Turri ».

Petrus autem iste Leonis, a patris nomine sic appellatus est, unde et origo familiæ Petri Leonis dicta. Porro ipse Leo magnopere laudatur in Epitaphio quod ejus sepultura scripsit Alphanus archiepiscopus Salernitanus, cujus est inscriptio in scripto Codice versuum ejus, qui asservatur in Cassinensi bibliotheca : Leonis Romanorum nobilissimi Epitaphium, scriptum ab Alphano archiepiscopo Salernitano :

Romæ natus, opum dives, probus, et satis alto
Sanguine materno nobilitatus erat.
Prudens et sapiens, et cælo pene sub omni
Agnitus et celebris semper in Urbe manens.
Virgo ter senis fuerat cum sole diebus
Quando suum vitæ finierat spatium.

Pergunt vero Acta :

4. « Post hæc misit papa nuntios Sutrium, coram quibus rex juravit in hæc verba : Juramentum Henrici regis factum domino Paschali papæ Secundo.

« Ego Henricus rex, ab hac hora in antea non ero in facto aut consilio, ut dominus Paschalis papa Secundus perdat papatum, vel vilam, vel membra, aut capiatur mala captione, vel per me, vel per submissam personam, nec ipsi, nec fidelibus suis, qui pro ipso mihi securitatem lecerunt vel fecerint, id est, Petro Leonis cum filiis suis, et Godofredo, quorum bonis studiose non potiemur, vel aliis quos dominus papa mihi significaverit. Et si quid dominus papa fecerit eis, ego eos fideliter adjuvabo. Sic observabo domino papæ sine fraude et malo ingenio, si dominus papa proxima die Dominica sic adimpleverit mihi, sicut in conventionis Chartula scriptum est.

« Aliud juramentum, quod fecerunt principes Henrici regis domino Paschali papæ Secundo. Post hæc sic etiam principes et ipsi juraverunt :

« Ego Fridericus dux.

« Ego Guibertus marchio.

« Ego Hermannus comes de Saxonia.

« Ego Berengarius comes de Saxonia.

« Ego Godericus comes.

« Ego Fridericus Saxo.

« Ego Cono frater Berengarii.

« Ego Sigilbornus ¹ de Bavaria.

« Ego Henricus de Nenincia. ²

« Ego Bertoldus ³ filius ducis Bertoldi.

« Ego Albertus cancellarius. Non ero in facto aut in consilio, ut dominus Paschalis papa Secundus perdat papatum Romanum, vel vitam, vel membra, vel capiatur mala captione. Et si rex juramentum hoc, et ea quæ in Charta conventionis scripta sunt non observaverit, ego cum honore meo ad dominum papam et ad Romanam Ecclesiam me tenebo : sic observabo domino papæ sine fraude et malo ingenio, si dominus papa sic adimpleverit domino nostro regi proximo die Dominico, sicut in conventionis Chartula scriptum est. Actum Sutrii in burgo, quinto idus Februarii.

5. *Introducto rege in Basilicam S. Petri, post varios tractatus Romanos inter et Germanos bellum oritur, fit cædes.* — « Post hæc idem rex Romanam accessit tertio idus Februarii, in sabbato videlicet ante Quinquagesimam.

« Postera die, id est, pridie idus Februarii, Pontifex misit in occursum ejus in montem Gaudii, qui et Marii dicitur, bajulos cereostatarios, candi-

Hoc jacet in tumulo Leo vir per cuncta fidelis
Sedis Apostolicæ tempore quo viguit.

¹ Siceboth ut supra. — ² Carinthia. — ³ Bertulfus filius ducis Bertolfi.

datos, defensores, stratores, populique infinitam multitudinem cum floribus atque arborum ramis et palmis ». Addit ad pompam Dominizo :

Monache quoque centum,
Lampadibus multis cum claro lumine sumptis,
Antiquo more processio regis honore
Facta sit, et certa nummis via comperita, etc.

Rursum Acta : « Dno iuramenta ex more fecit, unum iuxta ponticulum, alterum ante porticus portam populo fecit. Ante portam a Judæis in porta a Græcis canentibus exceptus est. Illic omnis Romanæ Urbis clerus Pontificis præcepto convenit qui eum equo descensum ad Sancti-Petri gradus cum laudibus deduxerunt.

6. « Cum autem ad superiora graduum ascendisset, illic dominus papa cum episcopis pluribus, cum cardinalibus, presbyteris et diaconibus, cum subdiaconibus et cæteris scholæ cantorum ministris affuit. Ad cujus vestigia cum rex corruisset, post pedum oscula elevatus est. Ter se invicem complexi, ter se invicem osculati sunt, et sicut mos, dexteram Pontificis tenens cum magno populi gaudio et clamore ad portam venit Argenteam. Ibi ex libro professionem imperatoriam faciens, a Pontifice designatus est imperator, et iterum a Pontifice osculatus, mox super eum orationem primam (sicut in ordine continetur) Lavicanus episcopus dixit.

7. « Post ingressum Basilicæ, cum in rotam porphyreticam pervenisset, positus utrinque sedibus, conloserunt. Pontifex instaurari Ecclesiasticum jus, refutationem investituræ, et cætera quæ in conventionis Charta scripta fuerant, petiit. Ille cum episcopis suis atque principibus secessit in partem juxta secretarium : ibi diutius quod eis placuit tractaverunt. In quo tractatu interfuerunt episc. Longobardi tres, Bernardus Parmensis, Bonus senior Reginus, et Aldo Placentinus. Cum autem longior se hora protraheret, missis nuntiis Pontifex, conventionem supradicti tenoris repetiit adimpleri. Tunc episcopi Transalpini ad papæ vestigia corruerunt, et ad oscula surrexerunt. Sed post paululum familiares regis dolos suos paulatim aperire cœperunt dicentes : scriptum illud, quod conditum fuerat, non posse firmari auctoritate et justitia ; quibus Evangelica et Apostolica auctoritas objiceretur, scilicet quia reddenda sunt Cæsari, quæ sunt Cæsaris, et : Nemo militans Deo, implicet se negotiis sæcularibus, eum armorum usus (secundum Ambrosium) ab episcopali officio alienus sit. Cum ad hæc et alia illis Apostolica et canonica capitula objicerentur, illi tamen in dolositate sua et pertinacia permanebant ». Quæ sequuntur non sicut in Actis, sed Petrus Diaconus habet ¹ :

8. « Interea imperator, cupiens Pontificem suis assertionibus fallere : Volo, inquit, ut discordia quæ inter te et Stephanum cognomento Northman-

num hactenus fuit, jam finem accipiat (multa enim imperatoris gratia pericula Stephanus ipse subierat). Ad hæc Pontifex : Dies, inquit, magna ex parte præterit, officiumque prolixum erit hodie, ideoque, si placet, quod vestrum est prius impleatur. Unus autem ex his qui cum imperatore venerant, continuo in medium surgens : Quid, inquit, tam multis agimus verbis ? Scias, dominum nostrum imperatorem imperii coronam ita velle suscipere, sicut illam Carolus, Ludovicus, Pipinusque sumpserunt. Quod cum papa minime implere posse dixisset : Cæsar iratus, Maguntini archiepiscopi Saxonisque episcopi consilio seductus, non veritus est Pontificem armatis circumstare turmis ». Hucusque ex Petro. Pergunt Acta :

9. « Sed cum dies jam declinaret ad vesperam, consultum est a fratribus, ut imperator eodem die coronaretur, reliquorum tractatus in diem sequentem differretur. Illi id quoque adversati sunt. Inter hæc tam Pontifex quam omnes qui cum eo erant, a militibus armatis custodiebantur. Vix tandem ad altare B. Petri pro audiendis missæ officiis conscenderunt, vix ad sacramenta divina conficienda vinum et aquam invenire potuerunt. Post missam, ex cathedra descendere compulsus Pontifex, deorsum ante Confessionem beati Petri cum fratribus sedit, ibique usque ad noctis tenebras sub armatis militibus est custoditus. Inde ad hospitium extra Ecclesiæ atrium deductus est cum fratribus, capta est cum eo clericorum et laicorum copiosa multitudo. Pueros item ac diversæ ætatis homines, qui obviam ei cum floribus et palmis exierant, alios obtruncari, alios expoliari, partim cædi, partim vinciri jussit. Joannes interea Tusculanus et Leo Ostiensis episcopi, ubi papam captum persenserunt, sub plebeio habitu sese in Urbem receperunt ». In alio scripto Vaticano Codice, qui item asseritur Bibliothecarii, ista leguntur : « Hæc vero acta sunt mense Febuario, pridie idus, anno Dominicæ Incarnationis millesimo centesimo undecimo, Indictione quarta, eodem die Dominico quo legebatur Evangelium : Assumpsit Jesus duodecim discipulos suos secreto, et ait illis : Ecce ascendimus Hierosolimam, et consummabuntur quæ scripta sunt de filio hominis ; tradetur enim gentibus, et illudetur, et flagellabitur, et conspuetur. Hæc sicut in Christo, ita in ejus Vicario sunt impleta usque adhuc : a predicto namque die pridie idus Februarii usque ad quintum kalendas Maii, devotus Dei Pontifex multis affectus est cruciatibus ». Hæc ipse qui aderat : Pergunt vero Acta, ex quibus et exscripsit ista Petrus Diaconus ¹ :

10. « Romani igitur cum audissent papam esse captivum, tantus eorum animos tumultus et dolor indignatione pervasit, ut protinus Alemanos omnes, qui vel orationis causa, vel alterius cujuscumque negotii Urbem ingressi fuerant, necarent. Postera die egressi Urbem concerta pugna

¹ Ex Pet. Diac. Chr. Cass. l. IV. c. 40.

¹ Petr. Diac. l. IV. c. 41.

plurimos de imperatoris exercitu obtruncant, et eorum captis spoliis, adversus Tentones acriorem ineunt pugnam, adeo ut eos porticu pæne propellerent, ipsumque imperat. equo deiecerent, atque in faciem vulnerarent. Hoc ubi Otto Mediolanensis comes aspexit, pro imperatore se obijciens morti, equum illi suum ut evaderet tradidit; qui, nec mora, a Romanis capitur, atque in Erbem inductus minutatim concisus est, et carnes ejus in platea canibus devorandæ relicte sunt. Imperator ubi Romanos superiores evadere suosque concidi animadvertit, clamavit et dixit: Videtis me, milites mei, a Romanis circumfundi, nec me defenditis? Ad hanc vocem cerneret Alemannorum Romanorumque micare gladios, ac nimio ardere fervore pugnam, nullamque esse occumbentium requiem. Perniciosissima profecto et atra Romanis et hostibus fuit ea dies, cum hinc et inde tot hominum millia ruerent, ipseque Tiberis casorum cruore tingeretur. Jam dies declinabat in vespere, cum Teutones resoluti bello, a pugna se subducere cœperant. Virtus enim eorum (ut ait Eutropius) sicuti primo impetu major quam aliorum est, ita sensim languescens fit imbecillior quam feminarum: habent namque aliquid simile cum nivibus suis; mox enim cum calore tentari cœperint, in sudorem conversi deficiunt, et quasi a sole solvantur. Romani vero, ut Teutones bello cessisse viderunt, ad spolia prædasque conversi, onusti in Urbem remeare cœperunt. Hoc ubi Cæsar advertit, imperat suis, ut Romanos onustos spoliis jamque Urbem subeuntes uno impetu adorirentur. Quod cum factum esset, plures adinvicem quam ab hostibus percipiunt. In tanta igitur perturbatione rerum varia fortuna utrinque fuit. Tentonici cum ad Crescentianum castrum pervenissent, Romani noviter emissi, atque integri lessos adorti, in fugam convertunt. Alemanni rebus certis admoniti, cum se premi a Romanis cernerent, sese in castra receperunt; tantusque illos invasit terror, ut biduum integrum in armis essent.

11. « Adveniente nocte, Joannes Tusculanus episcopus omnem Romanum populum advocans, ita alloqui cœpit: Licet, charissimi filii, avaritati virtutisque vestre stimuli adhortationum admoventi non sint, cum verbis neque ex imbecillo strenuus, neque robustus quispiam reddatur ex timido: omnisenim vobis est pro vita et pro libertate, pro gloria, pro defensione Apostolicæ Sedis pugna, omneque certamen est, hæc omnia in manibus vestris sunt constituta. Nam qui pacem desiderat, præparet bellum. Filii vestri contra jus omne, contra fas tenentur in vinculis: Petri Apostoli Basilica toto orbe terrarum venerabilis, armis, cadaveribus, sanie et errore plena est. Quid autem ex hoc summam omnium malorum conjicere possumus? Quæ unquam audita est immanior pestis? Pontifex Apostolicæ Sedis a barbaris hominibus tenetur in vinculis, omnis sacerdotalis ordo, tota Ecclesiastica dignitas carceri ac tenebris ad-

dicta est: lugent ministri Domini, altaria sancta lacrymis madent; ipsa prorsus mater Ecclesia attrita gemit imploratque opem vestram: filios, ut se tantis cladibus eruant, mœrens orat et obsecrat. Quocirca rogamus affectu quo possumus, periclitanti succurratis, et ad ulciscendam matris injuriam toto animo, totis viribus incumbatis. Nam si adsint qui obstant, fugere hostes quam consistere paratiores erunt. Itaque ut alacriores insurgatis ad tantum ulciscendum scelus, de Domini nostri et beatorum Apostolorum Petri et Pauli misericordia confidentes, ab omnibus vos peccatis absolvimus.

12. « Hæc oratione Romani vehementer animati, omnes adversus imperatorem se sacramento constringunt, et qui se adjuvarent, pro fratribus habendos decernunt ». Hæc Petrus Diaconus. Sed antequam ulterius progrediamur, recitanda hic est brevis Epistola ab eodem Joanne episcopo Tusculano tunc data ad Richardum cardinalem episcopum Albanensem, de quo sæpe superius, tunc absentem; quæ sic se habet¹:

13. *Epistola Joannis cardinalis Tusculani de rebus gestis.* — Joannes Dei gratia Tusculanus episcopus, agens vices domni Paschalis papæ victi Jesu Christi, venerabili fratri Richardo Albano episcopo in Domino salutem.

« Quoniam, sicut ait Apostolus², unum corpus sumus in Christo, et si patitur unum membrum, cætera membra compatiuntur: quæ de capite nostro et de tota fere Ecclesia gesta sunt, fraternitati tuæ significamus. Cum igitur Henricus Teutoniarum rex Sutrinum pervenisset, legatos quosdam Roman direxit, qui jurejurando firmaverunt domni papæ Paschalis legatos secum ducere ac reducere, et regem ipsum sacramento firmare, omnem Ecclesiarum investituram penitus abdicare, obsides etiam dare, ne ad hoc flagitium iterum rediret, et res Ecclesiasticas, et regalia, ac beati Petri patrimonia libera et quieta omnino dimittere, obsides etiam dare pro securitate, cum ad coronandum eum ad beati Petri Basilicam exiret. Postea ex parte Ecclesiæ a laicis viris firmatum est, si ista quæ promissa sunt jam dictus rex observaret, quod dominus noster eum benigne susciperet, et diadema regni imponeret: et coronatus, si vellet, Urbem intraret. Pro transitu etiam pontis obsides accepit, pro quibus sacramentum exhibuit, quod in ipso die Dominico si pontem transiret, eos in liberam nostrorum restitueret potestatem. His igitur omnibus sacramentis ex utraque parte peractis, et obsidibus datis, cum ad coronandum eum ad Ecclesiam beati Petri papa exiret; postpositis sacramentis et dimissis obsidibus, eum in ipsa Ecclesia cum episcopis et cardinalibus et multis Romanis violenter cepit, et in captione archissima detinet. Romani vero post alterum diem collecti, in hostes Ecclesiæ impetum facientes, de porticu fugere

¹ Papyr. Mass. in Not. ad Ivon. — ² Rom. XII.

compuerunt, interfectis multis de suis, et perditis equis, tentoriis, pecuniis et infinita suppellectili. Post hæc omnes unanimis contra eum juraverunt, uno animo, una voluntate pugnare. Tu igitur prudenter vigila, et quanto amplius necessarium conspicias, tanto magis elabora, et matrem Ecclesiarum omnium adjuvare ne desinas. Orationes pro liberatione domini nostri, imo pro ipsa Ecclesia, ubicumque polueris fieri, facias. Vale. Hoc autem factum est anno Domini millesimo centesimo undecimo, Indictione quarta, pridie idus Februarii, in Basilica S. Petri Apostolorum principis, die Dominica, ante caput jejunii ». Hactenus Joannis episcopi Tusculani Epistola, quam Papyrius Massonus cudit cum aliis ad hæc spectantibus antiquis monumentis in Notis editis ad Ivonis Epistolas. Pergit autem Petrus Diaconus :

14. *Paschalis papa captivus tractus ab Henrico cogitur cum eo de investituris agere, eumque coronat.* — « Hæc ubi imperatori nuntiata sunt, (de apparatu Romanorum ad bellum gerendum jurata confœderatione), eadem nocte, eundem Apostolicum secum abducent, tanto metu cum omni exercitu profugit ex porticu, ut non modo sarcinas, verum et socios plurimos in hospitibus relinqueret. Post duos autem dies advocans milites, Pontificem sacris vestibus exui jussit. Quod cum factum esset, vinctum secum pertraxere. Dehinc Soradem usque pergentes, juxta beati Andreæ monasterium alveum amnis transierunt, et in Sabinos ad Lucanum pontem iter agentes, ultiores Romanæ Urbis partes aggressi sunt. Trahebantur interea clericorum laicorumque plurimi vincti funibus. Pontifex autem cum duobus episcopis Sabinense ac Portuense, et cardinalibus quatuor apud castrum Torbicum, ceteri vero cardines apud Corcodisum in custodia tenebantur. Latinorum nullus audebat cum eodem Pontifice colloqui, custodiebatur autem a magnatibus imperatoris, a quibus etiam illi ministrabatur. Postremo tam suspitionis quam et concordie gratia in castra reductus est. Fuit autem idem Apostolicus in eodem ergastulo sexaginta et unum dies. Enimvero Joannes Tusculanus episcopus fidelium animos ad opem Ecclesiæ ferendam nunquam excitare litteris desistit.

15. « Tunc princeps (Capuanus videlicet), Palernarium cum suis profectus, electos milites fere trecentos Romanis auxilio misit. Qui cum Ferentinum venissent et Ptolemæum, et omnes fere illarum partium procures favere imperatori comperissent, imperatoremque cum exercitu jam transisse Tiberim, neque jam Urbem ingredi possent, Capuam reversi sunt. Ea perturbatione durante, Rogerius dux cum Boamundo fratre defungitur. Horum itaque mors ut Nortmannis magnum incussit metum, ita imperatori ejusque exercitui, et Longobardis omnibus extulit animos. Verebantur

enim illi, ne imperatoris adventu sedibus suis et principatu pellerentur : quocirca Apuliæ et Calabriae munitissima quæque loca eligentes, sese contra imperatoris adventum præparabant. Princeps autem Capuæ ex consilio suorum legatos ad imperatorem dirigens, pacem ab eo securitatemque poscebat. Itaque cum et Romanorum agros imperator popularetur in dies, ipsorumque animos pecunia dolisque tentaret : tantam Deus populo constantiam tribuit, ut nihil cum eis pacisci, ne papæ quidem cardinaliumque promissa liberatione potuerit.

16. « Variis mens ejus (Henrici) distracta consiliis, nihil ubi requiesceret invenire poterat. Nam perpetrati sceleris conscius, nihil sibi jam tutum fore apud populum arbitrabatur. Cernens itaque sibi secus quam putabat contigisse, cepit iurejurando firmare, nisi Pontifex illi morem gereret, et ipsum et omnes quos habebat in vinculis, partim occisurum, partim amputatis membris quibusque debilitaturum. Sed cum ad id nequiret constantiam Pontificis flectere, in hoc tandem plena deliberatione convenit, ut omnes quos ceperat, liberos faceret, dum tamen sibi in posterum apud Pontificem prospicere posset. Hoc per principes suos, hoc per clericos, hoc per laicos civesque Romanos sollicitè satagebat. Ceterum Pontifex vitam ponere quam jura Ecclesiæ violari malebat¹, quamvis ille non Ecclesiæ jura, non officia quolibet, sed regalia sola se dare assereret. Proponebantur Pontifici captivorum calamitates, qui amissis liberis, uxoribus, domo, patria exules duriobus compedibus coercerantur : proponebatur Ecclesiæ Romanæ desolatio quæ pæne omnes cardinales amiserat : proponebatur gravissimum schismatis scandalum, quod pæne omni Rom. Eccl. imminebat. Victus tandem lacrymis alque suspiriis filiorum, totus in lacrymis solvitur : En cogor, inquit, pro Ecclesiæ pace et liberatione id perpeti, quod ne paterer, vitam quoque cum sanguine profundere paratus eram.

17. « Huic confirmando negotio episcoporum cardinaliumque consensus expetitur, neque aliter vel captivos relaxari, vel pacem rebus Ecclesiæ dari posse asseveratur. Cum igitur Albertus comes et ceteri principes juramenti conditiones præscribi non sinerent, Pontifex : Quandoquidem, inquit, conditiones præscribi non vultis, verbis apenam : Juramenta hæc, ait, idcirco facimus tibi, ut vos illa quæ polliciti estis observetis. Quod imperator cum suis omnibus letissime ac perlibenter annuit. Ex verbo igitur papæ Paschalis sic a cardinalibus juratum est in agro juxta pontem Mammeum, qui Rom. a Teutonicis dirimebat : Dominus Paschalis papa non inquietabit reg. presentem Henricum, neque de investitura episcopatum ejus regni aut abbatiarum, neque in his se intromittet, neque de injuria sibi illata et suis in persona et bonis, neque malum redditum reddet ei,

¹ Pet. Diacon. l. IV. c. 41. 42.

¹ Post Acla Sutrina C. M. S. et Pet. Diacon. l. IV. c. 50.

neque alicui personæ pro hac re et penitus in personam regis nunquam anathema ponet, neque remanebit in domino papa quin coronet eum, sicut in ordine continetur; et regnum et imperium officii sui auxilio cum tenere bona fide adjuvabit; et omnia supplebit dominus papa domino regi præsenti Henrico sine fraude et malo ingenio: sic me Christus adjuvet etc. » Hæc Petrus. Sed præstat ista reddere ex scripto tunc juramento firmato, quod sic se habet aliquanto locupletius his verbis ex Paschalis papæ Vite Actis:

18. « Concessio papæ de investituris episcopatum.

« Dominus papa Paschalis concedit domino imperatori Henrico et regno ejus, quod privilegio suo sub anathemate et confirmabit et corroboravit. Episcopo vel abbate libere electo sine simonia assensu imperatoris, quod dominus imperator eos annulo et virga investiat. Episcopus autem vel abbas ab imperatore investitus, libere accipiat consecrationem ab episcopo ad quem pertinet. Si quis vero a clero et a populo eligatur, nisi ab imperatore investiat, et a nemine consecratur, et archiepiscopi et episcopi libertatem habeant consecrandi ab imperatore investitos. Super his etiam dominus papa Paschalis non inquietabit regem Henricum, nec ejus regnum et imperium ». His hæc subiunguntur:

19. « Sacramentum ex parte papæ.

« Dominus Paschalis non inquietabit dominum imperatorem Henricum, nec ejus regnum investitura episcopatum et abbatium, ut superius: quibus inhærent subscriptorum cardinalium nomina his verbis: Hæc sunt nomina illorum episcoporum et cardinalium, qui præcepto domini papæ Paschalis pactum et amicitiam sacramento confirmaverunt domino imperatori Henrico:

« Petrus Portuensis episcopus.

« Continus Sabiniensis episcopus.

« Robertus cardinalis Sancti Eusebii.

« Bonifacius cardinalis Sancti Martini.

« Ascanius cardinalis Sancti Clementis.

« Gregorius cardinalis Sanctorum Apostolorum.

« Gregorius cardinalis S. Chrysogoni.

« Joannes cardinalis Sanctæ Potentianæ.

« Richus cardinalis S. Laurentii.

« Rumerus cardinalis Sanctorum Petri et Marcellini.

« Vitalis cardinalis Sanctæ Sabinae.

« Donuizo cardinalis Sancti Cyriaci.

« Theobaldus cardinalis Sanctorum Joannis et Pauli.

« Joannes diaconus Sanctæ Mariæ in schola Græca.

« Leo diaconus S. Viti martyris.

« Abbo diaconus SS. Sergii et Bacci ». Quæ autem Henricus rex servanda promiserit Paschali papæ, sic se habent:

20. « Ego Henricus liberos dimittam quarta

vel quinta feria proxima dominum papam Paschalem, et episcopos et cardinales, et omnes captivos et obsides qui pro eo et cum eo capti sunt: et liberos perducere faciam intra portam Transtiberinæ civitatis, nec ulterius capiam aut capi faciam eos, qui in fidelitate domini papæ Paschalis permanent, et populo Romano ac Transtiberinæ insulæ civitatibus pacem et securitatem servabo tam per me, quam per meos, et in personis et in rebus eorum, qui pacem mihi servaverint. Patrimonia et possessiones sanctæ Romanæ Ecclesiæ, quæ abstuli, restituam, et cuncta quæ habere debet, more antecessorum meorum, recuperare et tenere adjuvabo bona fide, et domino papæ Paschali obediām, salvo tamen honore regni et imperii, sicut Catholici imperatores Catholicis Pontificibus Romanis. Hæc omnia observabo bona fide sine fraude et malo ingenio.

21. « Isti sunt iuratores ex parte imperatoris Henrici. Fridericus Coloniensis archiepiscopus, Gebhardus Tridentinensis episcopus, Bruno Spirensis episcopus, Burchardus Monasteriensis episcopus, Albertus cancellarius, comes Herimannus, comes Berengarius, Fridericus comes Palatinus. Item Fridericus comes, Bonifacius marchio, Albertus comes de Blandriaco, Godfredus comes, Warnerius marchio. Posita super Evangelium hujus juramenti chartula, sic ex præcepto regis jurata, sicut in hac clausula scriptum est: Sic dominus rex præsens observabit domino papæ Paschali præsenti sine fraude et malo ingenio. Sic me Deus et sacrosancta Evangelia adjuvent. Actum tertio idus Aprilis tertia feria post octavas Paschæ, Indictionis quartæ ». Pergunt Acta:

22. « Restabat illa exactionis et extorsionis portio, ut de investituræ permissione privilegium imperatori scriberetur, ipso præsente. Nec ipse igitur, neque ipsius principes differri passi sunt ipsam scripturam, donec intra civitatem veniretur, ubi Pontificis sigillum remanserat. Die igitur altero, in eodem campo, qui Septem Fratrum dicitur, dum castra moverent, dictari illud oportuit, et transmissa juxta pontem Salarium Tiberis fluvio, jam locatis castris, accitus ex Urbe scriniarius scriptum illud inter tenebras nocturnas exaravit, cui invitatus licet Pontifex subscripsit, quod sic se habet:

23. « Privilegium Paschalis papæ, quod fecit imperatori Henrico de investituris episcopatum et abbatium.

« Paschalis episcopus, servus servorum Dei, charissimo filio Henrico Teutonicorum regi, et per Dei omnipotentis gratiam Romanorum imperatori et Augusto, salutem et Apostolicam benedictionem.

« Regnum vestrum sanctæ Ecclesiæ singulariter adherere, dispositio divina constituit, et prædecessores vestri probitatis et providentiæ amplioris gratia Romanæ Urbis coronam et imperium consecuti sunt. Ad ejus videlicet coronæ et imperii dignitatem, tuam quoque personam, fili cha-

rissime Henrice, per nostri sacerdotii ministerium Majestas divina provexit. Illam igitur dignitatis prerogativam, quam predecessores nostri vestris predecessoribus Catholicis imperatoribus concesserunt, nos quoque tue dilectioni concedimus, et presentis privilegii pagina confirmamus: Ut regni tui episcopi et abbatibus libere præter violentiam et simoniam electis investituram virgæ et annuli conferas: post institutionem vero canonice factam consecrationem accipiant ab episcopo ad quem pertinuerit. Si quis autem a clero et a populo præter tuum assensum electus fuerit, nisi a te investiat, a nemine consecratur. Hanc episcopi et archiepiscopi libertatem habeant a te investitos episcopos et abbates canonice consecrandi. Predecessores enim vestri Ecclesie regni sui tantis regalium suorum beneficiis ampliaverunt, ut regnum ipsum episcoporum maxime et abbatum præsidis oporteat communi, et populares dissensiones quæ in electionibus contingunt, regali oporteat majestate compesci. Quamobrem prudentiæ et potestati tue cura debet sollicitius imminere, ut et Romanæ Ecclesiæ magnitudo et cæterarum salus, præstante Domino, regiis beneficiis et servitiis conservetur. Si qua vero Ecclesiastica vel sæcularis potentia aut persona hanc nostræ concessionis paginam contemnens, contra eam temerario ausu venire tentaverit, anathematis vinculo innodetur, honorisque ac dignitatis suæ periculum patiat. Observantes autem misericordia divina custodiat, et personam ac majestatem tuam feliciter imperare concedat. Hactenus Privilegium, jure dictum a pluribus Privilegium. Ad hæc Petrus¹:

24. « Porro cum ibidem Chartam ipsam imperator accepisset, postquam tamen in Ecclesia beati Petri coronatus fuerat, eam de manu Pontificis, contra jus, voluntatem, omnemque consuetudinem suscipere voluit. Coronatur autem idem imperator, post omnibus Romanæ Urbis, ne quis civium eo adveniret, obseratis. Cumque in missa ad hostiæ confectionem venisset papa, partem ipse sumens, reliquam imperatori tradidit, dicens: Sicut pars ista vivifici corporis divisa est, ita divisus sit a regno Christi et Domini, qui pactum istud rumpere ac violare tentaverit ». In Notis autem Massoni ad Ivonis Epistolas, hæc ita scripta ex antiquo Codice leguntur: « Hæc sunt verba, quæ dixit dominus Apostolicus domino imperatori Henrico in communionem Corporis et Sanguinis Christi die coronationis suæ: Domine imperator Henrice, Corpus Domini, natum ex Maria Virgine, passum in cruce pro nobis, sicut sancta Catholica tenet Ecclesia, damus tibi in confirmatione veræ pacis et concordie inter me et te. Amen. Anno Verbi Incarnati millesimo centesimo undecimo hoc confirmatum est in Basilica Sancti Petri decimo sexto kalendas Martii², regnante in cælis Domino nostro Jesu Christo cum Patre æterno et Spiritu sancto. Amen ». Hactenus

musibi. Adduntur ista ex Actis: Post consecrationem et coronationem, finitis missæ solemnitatibus, ipse statim rex ad castra, ad campum egreditur. Pontifex tunc tandem cum episcopis et cardinalibus liber in Urbem regreditur, tanta frequentia populi occurrentis et Deum laudantis excipitur, ut vix circa vespas ad hospitium potuerit pervenire. Actum idibus Aprilis, quinta feria post octavas Paschæ, Indictionis quartæ. Hæc sicut passi sumus, et oculis nostris vidimus, mera veritate conscripsimus ». Hactenus de his ibi.

25. *Conradi archiepiscopi Salisburgensis constantia contra Henrici sacrilegium perperam ab aliquo defensum.* — Cæterum redditus his ex sincerissimis Actis ab aliquo eorum qui interfuerunt conscriptis, reliquum est ut ad plenioram tantæ rei cognitionem, quæ ab aliis ejusdem temporis scriptoribus reperiuntur asserta his inlexamus; velut illud memoria dignum, quod Otto Frisingensis sic scribit de constantia Conradi archiepiscopi, cum delectaretur vehementer ejusmodi regis Henrici scelus¹: « Videns hoc venerabilis Juvaniensis Ecclesiæ archiepiscopus Conradus, qui cum rege venerat, zelo æquitatis vicem Dei dolens, factum hoc improbavit. Cui dum quidam ex ministris regis Henricus, cognomento Caput, evaginato gladio mortem interminaretur: tanquam pro justitia mori optans, jugulum præbuit, malens si minas ille ad effectum perducere voluisset, temporalem vitam finire, quam tanti piaculi scelus dissimulare ». Hæc Otto.

In Actis sancti Gebhardi Juvavensis, sive Saltzburgensis (idem est) archiepiscopi, antiquitus scriptis ab auctore ejus temporis, hæc de S. Conrado ejusdem Ecclesiæ archiepiscopo narrata leguntur, quæ ab hoc anno et eadem ex causa cum secuta sunt mala: « Exinde odium imperatoris et ejus fautorum in tantum incurrit, ut in ejus persecutione, sicut de beato quondam Athanasio legimus, totum pæne conjuraverat regnum, et commoti sunt principes terræ; nec ei ullus locus tutus supererat ad latendum, dum ad investigandum eum omnes moverentur. Infra vallem Andantensem in cujusdam spelunca mentis dimidium pæne annum est occultatus. Rursus ejusdem infra monasterii cellule ambitum in cellario subterraneo xvi hebdomadibus latitavit. In cujusdam gurgite annis usque ad mentum immersus diem integrum exegit. Inde clandestino discessu Saxoniam petens, a Magdeburgensi archiepiscopo venerabili, Adilgoz nomine, officiosissime susceptus est et retentus; qui etiam, quotquot ad ipsum patrem nostrum Conradum Saltzburgensem episcopum occulte ob metum Cæsareanorum pedites veniebant, multis muneribus honoratos equites remittebat. Miseratione demum divina pace redintegrata Ecclesiæ, a Luitpoldo Styrensi marchione in manu forti requisitus, ad suam honorifice post novem annos redu-

¹ Act. ipsa ex Pet. Dia. l. iv, c. 42. — ² Inferius diverse.

¹ Otto l. vii, c. 44.

ctus est sedem. Rursum Ecclesiae propriae strenue invigilavit, et inter ceteros ejusdem Salzburgensis Ecclesiae dignos per ipsum profectus majoris Ecclesiae clericorum vitam in melius informavit, et communem vitam canonicorum S. Augustini ibi initiavit. Anno Dominicae Incarnationis MCCCXI. Et inferius de monasterio ab eodem Conrado erecto ipsum a Conone cardinali episcopo Praenestino consecratum fuisse tradit. Quod rursus ad eandem ab Henrico imperatore excitatam persecutionem pertinet, ejusdem temporis scriptor, idemque notarius imper. Goffridus Viterbiensis, inter temporis hujus scriptores clarus, descripsit omnia ista metro, historice tamen, non poetice, simulque attexit, quibus se pars utraque in ejusmodi quae tunc versabantur disceptationibus tueretur rationibus; sic enim se habent ¹:

Papa caret manto, captus ab hoste suo.
 Quaestio nunc oritur, cur carcere papa tenetur?
 Respondetur eis: Quia sustulit omnia praesul,
 Abstulit imperio pontificale decus,
 Nam bona pontificum, quae nuntius ipse tenere,
 Contulit imperium, quae debet Caesar habere;
 Anodo qui tenet, Caesare dante, feret.
 Annulus et baculus de nostro munere venit,
 Undique pontifices regnum sunt auferre pleni,
 Caesaris officium quomodo papa gerit?
 Retulit Ecclesia: si quartius aqua fateri,
 Annulus et baculus nunquam de Caesare venit,
 Nam Deus Ecclesiis calidus ista dedit,
 Omnia quae rebus per tempora praeca dederunt,
 Non modo sunt regum, sed cui data iure fuerant,
 Nec Deus hoc palitur, nec tua jura ferunt.
 Cum tua sit regni, tua sit custodia juris,
 Carceribus nostris mala das exempla futuris,
 In sanctum Domini dum fertate furis.
 Conditor es juris, qui spernere jura videris,
 Jam neque jura Dei, neque regia jura vereris,
 Ecclesiam crucias, qui cruciandus eris.
 Dedecus est, fontem juris confundere legem,
 Et magis est limidum, calorum spernere Regem,
 Cum sacra jura negres, trista regna reges.
 Cur laicus quaerit tradi sibi munera caeli?
 Ut Deus instituit, electio consona clemi
 Judio caeli libera semper erit.
 Tu tua si repelis, repetes quae tu tribuisti,
 Illoc cum non dederis, cur tollere proposuisti?
 Tradere te decuit, tollere nulla mihi.
 Si quodcumque datur, ratio monet ut repetatur,
 Dos tua tollatur, nobis quoque nostra feratur,
 Ille ita si cupias quatinus esse ratum.
 Imperium dedimus, tu pauca dedisse videris,
 Ex ope Pontificis Caesar Romanus habebis,
 Vincula Pontifici qua ratione geris?
 Quidquid agat praesul, quid sacra turba fatetur,
 Recedere cogetur, quod Caesaris esse videtur
 Illud et in scriptis firmat uterque seors.
 Annulus et baculus, vel cetera quae memorantur,
 Caesaris ad jussum penitus redolenda parantur,
 Papaque Paschalis sic spoliatus abit.

Addit et his ista:

Curia papalis contendit et imperialis,
 An sit inaequalis, vel debet aequipari,
 Partibus oppositis. Curia regis ait:
 Spiritus est papa, carnis velamine clausus,
 Illic quasi terrenum describere quis foret ausus?
 Terra cum superis qua paritate gerit?
 Est quoque par superis, caelum datur uic tenere,

Qua ligat et solvit, qua regna videtur habere,
 Carnis in exilio spiritus astra tenet.

PRO IMPERATORE.

Caesar lex viva stat regibus imperativa,
 Legeque sub viva sunt omnia jura dativa,
 Lex ea castigat, solvit, et ipsa ligat.
 Conditor est legis, neque debet lege teneri,
 Sed sibi complacuit sub lege libenter haberi,
 Quidquid ei placuit juris ad instar erit.
 Qui ligat ac solvit Deus, ipsum protulit orbi,
 Divisit regnum divina potentia secum,
 Astra dedit superis, cetera cuncta sibi.

PRO ECCLESIA ROMANA.

Pars quoque papalis sic obviat imperiali,
 Sic regnare damus, quod Petro subjiçiaris,
 Jus etiam nobis Christus utrumque parit.
 Spiritus et corpus mihi sunt subiecta potenter,
 Corpore terrena teneo, caelestia mune,
 Unde tenendo potum, solvo liquoque solum.
 Aethera pandere, carica tingere papa videtur,
 Nam dare, tollere, neclere, solvere, cuncta meretur,
 Cui dedit omne decus lex nova, lexque vetus.
 Annulus et baculus quamvis terrena putantur,
 Sunt de jure poli, quae significare videntur,
 Respice jura Dei, mens tua cedat ei.
 Reddit Apostolico Caesar quaecumque rogavit,
 Pax bona conficitur, sublata deo reparavit,
 Jura suae partis latus uterque trahit.

Sed haec postea sub Callisto papa. Cetera quae subijcti de Romano Concilio, suo loco dicenda erunt.

26. Inter omnes hujus temporis scriptores tantum sacrilegium detestantes, unus ille plane ridendus Urspergensis abbas, qui nervis solutus profundae liberae veritatis, ob privatum erga Henricum imperatorem affectum, sacrilegium adeo immane convertere nititur in pietatem, comparans eundem Henricum patriarchae Jacobi ¹, quod sicut ille detinuit angelum, et non dimisit nisi benediceret ab eo, ita iste Paschalem papam tenuerit, et detinuerit sancte pique, quousque ab eo quam petebat benedictionem acceperit. Addit vero, quod dum adhuc Henricus Paschalem apud se retineret, accepisse ab eo liberam facultatem sepeliendi in Ecclesia Henricum parentem suum, parentandique more Catholico, cum sacerdotes Germaniae testati essent, cum peccatorum suorum poenitentiam clausisse diem extremum. Quo obtento, ut reversus est idem imperator, sumptuosissimo funere eundem patrem suum in Ecclesia sepelivit. Haec ipse, qui et addit: « Nec multo post, Henricus imperialia munificens liberalitate, tam spirituali papae suo Paschali quam singulis ejus episcopis cardinalibus clericisque majoribus ac minoribus, dona tot tanta et talia dispartivit, ut absentibus omnino memoratu incredibile sit ». Quae quidem magis scandalum auxerunt, et ut in Pontificem et cardinales linguarum jacula majori impetu jactarentur, et in eum acrius invehentur adversarii effecerunt, ita plane vulnere gravi in capite accepto Catholica ubique Ecclesia languebat. Tunc autem proxime juncta capiti membra, dum acriori dolore

¹ Goff. Vit. Chr. part. 17.

¹ Gen. XXXI.

punguntur, ad caput ipsum confricandum acrius convertuntur; nam audi:

27. *Conventionis Paschalis adversantur multi, et maxime S. Bruno episcopus Signinus per litteras.*

— Ubi autem in Urbem Paschalis cum suis reversus est, inventis ibi aliis sancte Romanæ Ecclesiæ cardinalibus, iisdemque valde improbantibus quod Henrico imperatori concesserat: contra vero ipso cum cæteris cardinalibus, qui cum ipso captivi ducti fuerant, excusante quod factum esset ob liberandam Urbem atque universam Ecclesiam ab imminenti cladibus: ex mutuis altercationibus quasi schisma conflatum est, cum nollet isti acquiescere, atque ullo modo consentire iis quæ contra decreta Gregorii papæ Septimi atque Urbani, prædecessorum ipsius, quovis respectu Paschalis ipse tentasset. Quamobrem postmodum seorsum absente Pontifice, convenientes in unum simul cum Joanne cardinale episcopo Tusculano, roborant atque confirmant, quæ a dictis prædecessoribus Pontificibus contra laicorum investituras statuta pluribus Conciliis essent, nihilque roboris obtinere decernunt, quidquid adversus ea ab ipso Paschali et ipsi inhaerentibus cardinalibus quovis prætextu actum fuisset. Paschalis autem papa, qui paulo ante ab Urbe recesserat Campaniam versus, ubi Tarracinam pervenit, et quidquid ab eis tentatum in Urbe esset audisset, has ad eos litteras dedit, quas inventas in eodem scripto Vaticano Codice post Acta superius recitata, hic describendas esse putavimus, quæ sic se habent:

28. « Paschalis episcopus, servus servorum Dei, venerabilibus fratribus Joanni Tusculano et Leoni Vercellensi episcopis, et cardinalibus in unum congregatis, consortium et pacem in Christo.

« Id quod in personam nostram, imo in patrem vestrum, præter ipsius Ecclesiæ iudicium atque præsentiam vos egistis, etsi vobis ex zelo Dei visum, sit non tamen, ut mihi videtur, canonico tramite incessistis. Non enim charitas, sed æmulatio id dictasse perspicitur. Quocumque tamen modo factum sit, nos tamen confisi de misericordia divina, pro animæ nostræ salute cogitavimus, et commissum, quod pro fratribus atque filiis, pro excidio Urbis et universæ provincie fecimus, emendare curabimus, ut quod terreni in me quoque correxisset, ostendatur Ecclesiæ. Vos autem pro Ecclesia in Ecclesia agite, ut illum Ecclesiæ Dei zelum quem habetis, et habere ostenditis, ipsa exepariat Ecclesia. Valete in Domino. Datum Tarracinæ tertio nonas Julii ». Ille Paschalis, scite quidem atque prudenter admodum occurrens schismati, quod eo modo inchoari jam videbatur. Sed non sedatur tumultus mirum in modum concitatus.

29. Iisdem enim ferme diebus, concertatio illa habita est inter S. Brunonem Cassinensem abbatem Signinum episcopum, et eundem Paschalem papam, quæ a Petro Diacono ita describitur¹:

« Præfatus autem abbas Bruno adjunctis sibi Gault Rhegino episcopo, et Roberto Papiensi, aliisque cardinalibus, memorato Pontifici omnino imminabat, ut privilegium quod imperatori fecerat rumperet, eumque anathematis vinculo innodaret. Illi autem, qui cum illo in vinculis fuerant, dicebant: Quod ante diximus, dicimus, damnamusque quod ante damnavimus. Alii non modo non damnabant quæ contra Catholicam Ecclesiam fuerant gesta, verum impudenter satis tueri nitebantur. Igitur dum Insupermodi dissensionibus Apostolica quateretur Ecclesia, relatum est Pontifici, memoratum virum Brunonem illius dissidii et scandali ducem atque signiferum fuisse. Quod ubi abbas Bruno audivit, temporis opportunitate captata, dixit ei: Inimici mei dicunt tibi, quia non te diligo et male de te obloquor: sed mentiuntur. Ego enim sic te diligo ut patrem ac dominum meum; neminemque alium, te vivente, volo habere Pontificem, sicuti cum multis aliis tibi promisi. Audio tamen Salvatorem meum dicentem mihi²: Qui amat patrem aut matrem plus quam me, non est me dignus. Unde et Apostolus³: Si quis, inquit, non diligit Dominum JESUM, anathema sit. Debeo igitur diligere te; sed plus illum diligere debeo, qui et te fecit et me: huic enim tanto amori nihil unquam præferendum est. Fœdus autem illud adeo fœdum, tam violentum, tam cum proditiōne factum, tam omni pietati religionique contrarium ego non laudo. Quis enim illud laudet, in quo violatur fides, Ecclesiæ libertas amittitur, sacerdotium tollitur, unicum et singulare ostium Ecclesiæ clauditur, multa ostia aperiantur, per quæ qui intrat, fur est et latro? Habemus canones, habemus sanctorum Patrum constitutiones ab Apostolorum temporibus ad te usque productas. Via regia incenduntur, neque ab ea in aliquam partem declinandum. Apostoli illos omnes damnant, et a fidelium communione se jungunt, qui per secularem potestatem Ecclesias obtinent. Laici enim quantumlibet religiosi sint, nullam tamen disponendæ Ecclesiæ facultatem sunt consecuti. Ille enim Apostolorum constitutio sancta est, cui qui contradicit, Catholicus non est; omnis autem qui hæresim tuetur, hæreticus est. Nemo hanc non esse hæresim dicere potest, quam sancta et Apostolica Ecclesia in multis Conciliis hæresim nominat, et cum suis auctoribus damnat⁴. At ista quæ Petrus de mutua allocutione Bruni sive Brunonis cum Paschale affirmat esse transacta, potius litteris quam ab eo præsentè tractata fuisse; nam ipsæ S. Brunonis totidem verbis ad Paschalem datæ, eademque prolixiores extant litteræ, una cum aliis ipsius litteris eodem argumento tunc datæ ad episcopum Portuensem, quas ambas ex Cassinensi Bibliotheca depromptas hic totidem verbis reddere, et dicta repetere non pigebit, ut habeas eas sicut se habent:

30. « Paschali summo Pontifici Brunus pec-

¹ Pet. Diacon. Chr. Cass. l. IV. c. 44.

² Matth. x. — ³ 1 Cor. xvi.

cator episcopus, B. Benedicti servus, quod tanto domino et patri.

« Inimici mei dicunt tibi quia te non diligo, et quia de te male loquor, sed mentiuntur. Ego enim sic te diligo, sicut patrem et dominum diligere debeo, et nullum alium, te vivente, Pontificem habere volo, sicut ego cum multis aliis tibi promisi. Audio tamen Salvatorem meum mihi dicentem : Qui amat patrem aut matrem plusquam me, non est me dignus. Unde et Apostolus dicit : Si quis non diligit Dominum Jesum, sit anathema maranatha. Debeo igitur diligere te, sed plus diligere debeo illum qui te fecit et me : huic enim tanto amoris nihil unquam preferendum est. Fœdus autem illud tam fœdum, tam violentum, cum tanta proditione factum, tam omni pietati et religioni contrarium ego non laudo : at vero neque tu, sicut pluribus referentibus audio. Quis enim illud laudare potest in quo fides violatur, Ecclesia libertatem amittit, sacerdotium tollitur, unicum et singulare ostium Ecclesiæ clauditur, aliaque multa ostia aperiuntur, per quæ quicumque intrat, fur est et latro ? Habemus canones, habemus sanctorum Patrum constitutiones a temporibus Apostolorum usque ad te. Via regia incedendum est, neque ab ea in aliquam partem declinandum. Constitutio tua et constitutio Apostolorum una est, et ipsa quidem multum laudabilis. Apostoli enim omnes illos damnant et a fidelium communione segregant, quicumque per sæcularem potestatem Ecclesiam obtinent. Laici enim quamvis religiosi sint, nullam tamen disponendi Ecclesiam habent facultatem. Similiter et constitutio tua, quæ de Apostolico fonte manavit, omnes illos clericos damnat et a fidelium communione separat, quicumque de manu laici investituram suscipiunt, et quicumque eis manum imponunt. Hæc namque Constitutio Apostolorum et tua sancta est, Catholica est : cui quicumque contradicit, Catholicus non est. Illi enim sunt Catholici, qui Catholice Ecclesiæ fidei et doctrinæ non contradicunt. Sicut contra illi sunt hæretici, qui Catholice fidei et doctrinæ obstinato animo contradicunt. Hanc igitur tuam et Apostolorum Constitutionem, pater venerabilis iterum, confirma; hanc in tua Ecclesia, quæ omnium Ecclesiarum caput est, palam et cunctis audientibus prædica. Hanc hæresim, quam tu ipse hæresim esse sæpe dixisti, Apostolica auctoritate damna, et mox videbis totam Ecclesiam tibi esse placatam; mox omnes videbis ad tuos pedes confluentes, et in magna lætitia sicut patri et domino obediens. Miserere Ecclesiæ Dei, miserere sponsæ Christi, et per tuam prudentiam suam recuperet libertatem, quam modo per te amisisse videtur. Ego autem illam obligationem, et illud juramentum, de quo jam superius diximus, parvipendo, neque pro ejus violatione minus unquam tibi obediens ero ». Sic hortatus eum rescindere quod per juramentum Henrico imperatori promiserat. Ad episcopum vero Portuensem sic scripsit :

31. « P. venerabili Portuensi episcopo, Brunus peccator episcopus, B. Benedicti servus, salutem.

« Audivimus quod quidam de fratribus nostris non solum non damnant ea quæ modo contra sanctam Ecclesiam facta sunt, verum etiam satimpudenter defendere conantur; omnis autem, qui hæresim defendit, hæreticus est. Nemo autem hanc non esse hæresim dicere potest, quam sancta et Apostolica Ecclesia in multis Conciliis hæresim nominavit. Et illæ quidem specialiter dicuntur esse hæreses, quæ in Conciliis judicatæ et damnatæ sunt. Unde et Guibertus non immerito hæresiarcha dictus est, simulque cum suis sequacibus damnatus et excommunicatus. Quicumque igitur Catholicam Ecclesiam relinquentes ad partem Guiberti transierunt, et ejus impiam hæresim defendunt et tenent : eos hæreticos excommunicatos, et Apostolicis vinculis ligatos esse non dubium est. Qui vero excommunicati et ligati sunt, neque seipsos, neque alios vel solvere, vel ligare possunt ». Hucusque Epistola. Post hæc ipse idem hæc subjicit quæ sequuntur, his verbis : « Has litteras misi ego Portuensi episcopo, in quibus nullum alium hæreticum esse dixi, nisi eos tantum, qui hæresim defendunt et tenent, et eos quidem fugiendos esse judicavi, etiam si affectu parentum et oculorum et manuum eos diligamus. Dictum namque fuerat nobis, quod illi, qui impij regis prehensione capti fuerant, omnes præter paucissimos una et consona voce dicebant; quod prædicavimus prædicamus : quod damnavimus, damnavimus. Eos autem qui hoc dicunt, quis dubitat non esse Catholicos ? » Hucusque S. Bruni Epistola. Pergit vero Petrus Diaconus :

32. « Talis allocutio inter Pontificem et abbatem invidiæ et odij fomite ministravit. Inter cætera vero quæ tunc Pontifex in abbatem Brunonem locutus est, ait : Nisi illum a monasterii administratione removero, ipse suis argumentis Ecclesiæ mihi regimen tollet. Quapropter eidem Bruno abbati direxit Epistolam, qua vetuit, ne ultra episcopus simul esset atque abbas : neque enim ultra ferre Apostolicam Sedem, episcopum alicquem monasterio præesse tam celebri. Fratribus etiam per Leonem Ostiensem episcopum et hujus cœnobij monachum litteras misit, mandans, ne ipsi viro ulterius obedirent, sed secundum Deum regulariter sibi abbatem eligerent : sin autem secus agerent, in omnibus monasterii cellis abbates ipse statueret ». Pergit Petrus dicere de tumultu tunc oborto contra Brunum, alium in suum locum abbatem subrogare studentem, monachis renitentibus; ad quos S. Brunus : « Nolo, inquit, ut propter me inter vos et Romanum Pontificem scandalum oriatur, virgamque pastorem super altare ponens : Accipite, inquit, virgam quam mihi tradidistis, absolutioneque fratribus facta, ad episcopatum suum rediit. Ubi in sancta conversatione usque ad Odersij Secundi abbatis

tempora vivens, feliciter migravit ad Dominum pridie kalendas Septembris. Sepultus est in civitate Signina, in Ecclesia sanctæ Dei Genitricis et Virginis Mariæ: ad cujus memoriam hodie quoque Dominus miracula patrare dignatur, ipsius interventibus meritis». Hactenus Petrus.

33. *Paschalis suum factum damnans recusat ipse damnari.* — Ceterum quod ad Paschalem Pontificem spectat, sic comparatus erat, ut perpetram a se factum excusaret potiusquam defenderet, imo postea etiam condemnaret, quod anno sequenti (ut suo loco dicitur) in Synodo abundantius præstitit. Verum in eos (ut vidisti) constanter egit, qui sibi ejusmodi iudicium adversus Pontificem sumerent, cuiquam hactenus in Ecclesia inconcessum. Constat autem ipsum hoc anno, mox ut est regressus in Urbem, ad universum Catholicum orbem dedisse litteras de his quæ gesta essent, quibus se excusaret, quod ad evitanda imminencia mala et ad redimendam pacem Ecclesiæ ita cessisset ad tempus. Harum litterarum est mentio in Ivonis episcopi Carnotensis Epistola, reddita ad Henricum abbatem, qui ipsum de his antea consulisset, ex qua, quomodo ab eo accepta fuerunt ista perperam facta Paschalis, intelliges; sic se habet¹:

34. « Ivo Dei gratia Carnotensis Ecclesiæ minister Henrico abbati Angeliacensis monasterii, salutem et mutuum orationum munus.

« De investituris Ecclesiarum, quas laici faciunt, sententiam præcedentium Gregorii et Urbani, quantum in me est, laudo atque confirmo. Quocumque autem nomine talis pervasio proprie vocetur, eorum sententiam, qui investituras laicorum defendere volunt, schismaticam iudico. Nec ista contra domnum papam dico, quia quibusdam litteris mihi scripsit, se coactum fecisse quod fecit, et adhuc se prohibere quod prohibuit, quamvis quædam nefanda quibusdam nefandis scripta permiserit. Et quia verenda patris debemus potius velare quam nudare²: familiaribus et charitatem redolentibus litteris admonendus mihi videtur, ut se iudicet, aut factum suum retractet. Quod si fecerit, referamus Deo gratias, et gaudeat nobiscum omnis Ecclesia, quæ graviter languet, dum caput ejus laborat tanta debilitatum molestia. Si autem in hoc languore insauabiliter egrotaverit, non est nostrum judicare de summo Pontifice. Habemus enim Evangelicam sententiam, quæ securos nos facit³: Super cathedram Moysi sederunt Scribæ et Pharisei: quæ dicunt, servate et facite: secundum vero opera eorum nolite facere. Vult enim hæc sententia, præcepta præsentium ad cathedram pertinentia obedienter impleri (etiãsi tales sint quales erant Pharisei), non eos factiosa conspiratione a suis sedibus removeri. Si vero ea præcipiant quæ sint contra doctrinam Evangelicam vel Apostolicam: ibi non esse eis obediendum, exem-

plo docemur Pauli Apostoli⁴, qui Petro sibi præfato non recte incedenti ad veritatem Evangelii, in faciem restitit, non tamen eum abiecit. Ubi enim succumbunt humana iudicia, divina est expetenda misericordia: quatenus insitorum conservata pæcorum, et ipsi qui præcisi sunt unitati Ecclesiæ studeant reformari, et insitorum ramorum societate letari: alioqui nec præcisi inferentur, nec inserti fructificare aut florere in tanta turbinum concussione permittuntur. Hæc de proposita questione respondeo, majorum sententiis non præjudicans quæ pacis Ecclesiæ consulant». Hæc Ivo, qui spiritu charitatis, quæ operit multitudinem peccatorum, capitis vulneri sic moderi laborat, ut si fieri possit, absque chirurgico ferro ipsum perfecta sanitas consequatur.

35. *De Paschale inter episcopos altercatio et maxime inter Ivonem et archiepiscopum Lugdunensem.* — Contra vero, alii zelo offensæ Ecclesiæ æstuantes indictum acriter capiti vulnus hand ejusmodi esse putarunt, ut leni olei possit unctione curari: cum præsertim res esset agenda adversus sacrilegum, furore flagrantem adolescentem imperatorem et alios principes in ipsum cupientes; sed opus esse obstrepente tubarum sacerdotalium clangore, ad martyrium convocare fideles potius, quam tale probum in Ecclesia tolerare. Fuit ex eis inter alios Joannes archiepiscopus Lugdunensis, Galliarum primatem agens, qui ad hoc omnium sibi subjectarum provinciarum episcoporum convocandum putavit esse Concilium, ad quod inter alios eundem qui supra vocavit Ivonem, significans in eo tractandum esse de fide atque laicorum investituris, sed litteris ipse se excusans ire noluit, negans se ad hæc præstanda teneri. Quibus de investituris; per Paschalem papam concessis, ejusmodi disputationem intexitur pro Paschali, ubi de jure primatus antea plura disseruisset, hæc subdens⁵:

36. « Præterea, quia in hoc Concilio de investituris laicorum, quas quidam inter hæreses computant, tractare disponitis: potius pudenda patris nostri nudabitis, quæ publicanda non essent in Geth nec in campis Ascalonis⁶, deridenda exponetis, quam post dorsum ea velando, benedictionem paternam vobis acquiratis. Quod enim propter vitandam populi stragem paterne in se admisit summus Pontifex, coegit necessitas, non probavit voluntas. Quod inde constat, quia postquam evasit periculum, sicut ipse quibusdam nostrum scripsit, quod jusserat jussit, quod prohibuerat prohibuit: quamvis quibusdam nefandis urgente periculo quædam nefanda scripta permiserit. Sic Petrus binam negationem trina confessione purgavit⁷, et Apostolus mansit. Sic Marcellinus papa deceptus a profanis, coram profano thurificavit, et tamen a fratribus minime iudicatus, post paucos dies martyrio coronari promeruit. Sic

¹ Ivo Ep. CCXXXV. — ² Genes. IX. — ³ Matth. XXIII.

⁴ Galat. II. — ⁵ Ivo Ep. CCXXXVIII. — ⁶ 2. Reg. I. — ⁷ Joan. XXI.

Aaron in cremo ¹, moram faciente Moysse in monte, propter importabilem populi seditionem vitulum finalem fieri permisit, quem populus insipiens adoravit, cum tamen non esset seductus a populo, ut Dominum esse crederet, vel divina cultura reverentiam ei exhiberet. Meruit tamen veniam tantus excessus, et Domino iubente, per manum Moysi ad summum sacerdotium esse sublimatus. Sic Moyses ipse, qui cum Domino loquebatur sicut ad amicum amicus, Dominum tamen offendit, cum propter murmur populi dicentis ²: Numquid poterit nobis ejicere aquam de petra hac? dubitare coactus est, et aquam cum disceptatione a Domino postulare. Sic Doctor Gentium, qui in synagoga publice clamabat ³: Circumcisio nihil est: et Christus nihil vobis proderit, si circumcidamini, propter scandalum Judaeorum circumcidi permisit Timotheum ⁴, ut hac condescensione Judaeos lucrificeret. Haec infirma probabili necessitate, vel provida dispensatione passi sunt summi et sancti viri, Deo bene utente malis nostris: ut per hoc doceret eos seipsos agnoscere quatenus discerent infirma sua sibi adscribere, et bona sibi collata ad Dei gratiam referre. Nec ad hoc ista scripta sunt ut in exemplum vivendi ducantur, sed ut ex lapsu majorum discant timere minores, ne similes lapsus incurrant; et si forte ceciderint, summa celeritate resurgant.

37. « Quod si papa adhuc in Teutonicum regem debitam severitatem non exercet, credimus quia consulte differt secundum quorundam doctorum judicia, qui consulunt quaedam admittenda pericula, ut possint vitari majora. Unde dicit Augustinus in tertio libro contra Parmenianum Donatistam ¹: Hoc sanitas observat Ecclesiae, ut cum quisque fratrum, id est, Christianorum, intus in Ecclesiae societate constitutorum, in aliquo tali peccato fuerit deprehensus, aut anathemate dignus habeatur: fiat hoc ubi periculum schismatis nullum est. Atque id cum ea dilectione fiat, de qua ipse Apostolus alibi praecipit dicens ²: Ut inimicum eum non existimetis, sed corripite ut fratrem. Et satis ostendit, cum metus iste non subest, sed omnino de frumentorum certa stabilitate certa securitas manet, id est, quando illa cuiusque crimen notum est et omnibus execrabile apparet, ut vel nullos prorsus, vel non tales habeat defensores, per quos possit schisma contingere, non dormiat severitas disciplinae. In qua tanto est efficacior emendatio pravitatis, quanto diligentior conservatio charitatis. Tunc autem hoc sine lae pacis et unitatis, et sine laesione frumentorum fieri potest, cum congregationis Ecclesiae multitudo ab eo crimine quod anathematizatur aliena est. Nec enim potest esse salubris in multis correctio, nisi cum ille corripitur, qui non habet sociam multitudinem. Cum vero idem morbus plurimos oc-

cupaverit, nihil aliud bonis restat quam dolor et gemitus: ut per illud signum, quod Ezechieli ¹ sancto revelatur, illaes evadere ab illorum vastatione mereantur. Si quis enim frater in aliquo caeteris dissimili crimine nominatur, et revera si contagio peccandi multitudinem invaserit, divinae disciplinae severa misericordia necessaria est. Nam consilia separationis et inania sunt et perniciosa, atque sacrilega, quia et impia et superba fiunt, et plus turbant infirmos bonos, quam corrigant animos malos.

38. « Ad haec non videtur nobis utile consilium, ad illa Concilia convenire, in quibus non possumus eas personas, contra quas agitur, condemnare vel judicare; quia nec nostro, nec ullius hominum probantur subjacere iudicio. Unde nos constat esse immunes, si facta eorum oris gladio ferire formidamus, cum ipse Mediator obedire eis praecipiat, etsi tales sint quales erant Pharisei, si ea quae ad cathedram pertinent recte praecipiant, ea vero quae contra cathedram faciunt minime faciant. Ex quibus omnibus hoc constare videtur, quatenus feminalia sacerdotalia pudendis supponamus, ne verenda nostra deridenda insidiatoribus nostris exponamus, et unde querimus reformare Ecclesiae fortitudinem, in majorem incurramus debilitatem. Haec dicentes, non instruimus prudentiam vestram, sed excusamus innocentiam nostram, qua et principales Ecclesiae claves nolumus potestate sua privare, quaecumque persona vices Petri habeat, nisi manifeste ab Evangelica veritate discedat. Haec dicentes, non tollimus quin possint quique metropolitani episcopi secundum jus antiquum convocare, provincialem Synodum, salva reverentia Romanae Ecclesiae, celebrare. Quae si ad praesens non potest satanam sternere sub pedibus suis, non obviat tamen salubribus dispositionibus vestris, in quibus secundum quod in praetaxato libro legitur: Quisquis vel quod potest arguendo corrigit, vel quod corrigere non potest salvo pacis vinculo excludit, vel quod salvo pacis vinculo excludere non potest, aequitate improbat, firmitate supportat: hic est pacificus, et ab isto maledicto quod Scriptura dicit ²: Vae his qui dicunt quod nequam bonum est, et quod bonum est nequam, qui ponunt lucem tenebras et tenebras lucem, qui ponunt quod amarum est dulce, et quod est dulce amarum: omnino liberi, prorsus securus, penitus alienus. His Catholicorum Patrum terminis contenti, quae possumus secundum decreta Patrum, salvo charitatis vinculo, corrigere volumus; quae autem corrigere non possumus, usque ad messem si necesse sit, Domino docente, tolerare decrevimus.

39. « His verbis excusatos nos credimus, quod a laceratione domini pape linguas nostras reprimimus, et si quid contra sententiam suam suorumque praedecessorum de remissis Germanico

¹ Exod. xxxii. — ² Num. xx. — ³ Gal. v. — ⁴ Act. xvi. — ⁵ Aug. contra Ep. Parmen. l. iii. c. 2. — ⁶ Thess. iii.

¹ Ezech. ix. — ² Isai. v.

regi investituris fecisse videtur, filiali charitate excusamus. Non enim prævaricator est legis, qui delinquit in legem aliqua fallente surreptione, vel impellente necessitate; sed qui legem impugnât studiose, et delictum suum non curat agnoscere. Unde hunc excessum ejus non tantum non accusamus, sed dictante ratione approbamus, si imminente strage populi, paternâ charitate, cum non nullo vulnere suo se tantis periculis voluit obicere, ut majoribus morbis posset sincera charitate subvenire. Nec ipse primus, nec solus factus est dispensator Dominicorum præceptorum, quia mediator Dei et hominum, cujus vita in terris disciplina fuit morum, primo præcepit discipulis, ut non ferrent sacculum neque peram, quia tunc urgebat nulla necessitas. Imminente vero tempore passionis sue, sciens eos penuriam panis passuros cum transirent de loco in locum, temperavit præceptum, dans eis licentiam ut ferrent peram et sacculum, non jam imperans (obtemperans) cupiditati, sed indulgens necessitati. Ita cum hæreses diversi generis pullarent per diversas partes mundi, ut Catholici territi severitatis sententiæ hæreticorum seductiones caverent, severissime præceptum est, ut revertentes ab hæresi, vel clerici non fierent, vel clerici non manerent. Pro cuius rigore decreti, cum Ecclesia maxima damna pateretur, prudens discretio religiosorum voluit et docuit mutandum esse sententiam; et ab hæresi revertentes et Catholicam unitatem profitentes fraternaliter suscepit, et in honoribus suis manere concessit: iudicans melius esse, ut fieret aliquod vulnus in cortice matris arboris, quod charitas sanaret, quam Ecclesia de omnibus quos posset sua membra non colligeret.

40. « Postremo, quod quidam investituram hæresim vocant, cum hæresis non sit nisi error in fide. Sicut enim fides cordis est ad iustitiam, oris autem confessio ad salutem: ita hæresis error est ad impietatem, professio vero ejusdem erroris est ad perniciem; et fides et error ex corde procedunt. Investitura vero illa, de qua tantus est motus, in solis est manibus dantis et accipientis, quæ bona et mala agere possunt, credere vel errare in fide non possunt. Ad hæc si investitura hæc hæresis esset, ei renuntians sine vulnere ad eam redire non posset. Videmus autem in partibus Germaniarum et Galliarum, multas honestas personas, purgato isto nævo per quamlibet satisfactionem, pastorales virgas reddidisse, et per manum Apostolicam refutatas investituras recepisse. Quod summi Pontifices minime fecissent, si in tali investitura hæresim et peccatum in Spiritum sanctum latere cognovissent. Cum ergo ea quæ æterna lege sancita non sunt, sed pro honestate et utilitate Ecclesiæ instituta vel prohibita, pro eadem occasione ad tempus remittuntur pro qua inventa sunt: non est institutorum damnosa prævaricatio, sed laudabilis et saluberrima dispensatio. Quod cum multi minus studiosi minime attendant, ante tempus ju-

dicant, spiritus mobilis et spiritus immobilis non intelligentes differentiam. Si quis vero laicus ad hanc prorumpit insaniam, ut in donatione et acceptione virgæ putet se tribuere posse sacramentum, vel rem sacramenti Ecclesiastici, illum prorsus iudicamus hæreticum, non propter manuales investituras, sed propter præsumptionem diabolicam. Si vero congrua volumus rebus nomina dare, possumus dicere quod manualis illa investitura per laicos facta, alieni juris est pervasio, sacrilega præsumptio, quæ pro libertate Ecclesiæ et honestate, salvo pacis vinculo si fieri potest, funditus abscindenda est. Ubi ergo sine schismate auferri non potest, cum discretâ reclamatione differatur. Nihil enim tali pervasione demittitur sacramentis Ecclesiasticis, quominus sancta sint, quia apud quoscumque sunt, ipsa sunt, sive apud eos qui intus, sive apud eos qui foris sunt. Hæc scripsimus dilectioni vestræ, parati refelli siue contumacia, si melius his quæ scripsimus nos docuerit prudentia vestra, quod munimus sit scriptura canonica ». Hactenus Ivo ad Lugdunensem archiepiscopum, qui ad eum rescribens, asserta ab illo multa refellit, et omittimus ea quæ ad jura primatum spectant in sibi subditos episcopos ad Concilium convocandos: de his quæ Ivo dixerat, reges non posse ab episcopis condemnari vel iudicari, ita scribit dicens¹:

41. « Quod si reges aut imperatores a pontificali iudicio eximere tentaveris, recurre ad magnum imp. Constantinum, qui in Nicæno Concilio, præsentē papā Silvestro, per legatos huiusmodi verba legitur habuisse: Vos, inquit, episcopi a solo Domino iudicandi estis. Non ait: Ego et vos a solo Domino iudicandi sumus. Cum enim solos excludit episcopos, se proculdubio et omnes reges Ecclesiasticos subdit iudicio. Numquid culpas factum clarissimi doctoris Ambrosii, qui Theodosium imp. ob suam culpam excommunicavit? Numquid incensas Gregorium Septimum, qui regem Henricum ob sua scelera damnavit? Addidisti te vereri, ne forte patris nostri pendenda in colloquio nostro revelarentur, timuisti certe ubi non erat timor. Malumus enim absque dubio cum pietate reverendorum filiorum benedici, quam cum inverecundia irreverentis filii maledici. Atque utinam ipse pater pendenda (ut dicis) ista pro voluntate nostra conlegi pateretur! Causatus es præterea periculosa tempora; causatus es adversariæ partis robur ac multitudinem; causatus es nostræ partis debilitatem ac paucitatem. Et profecto quanto periculosiora sunt tempora, tanto fortius servis Dei est annitendum, ne cum abundante iniquitate refrigescit charitas multorum, refrigescat et paucorum. Nonne recordaris, quod paucis discipulis Christus dixit²: Confidite, inquit, ego vici mundum? Si ergo doces diffidendum, victoriam mundi prædicas. et Christi victoriam pro-

¹ Apud Ivo, Ep. CCXXXV. — ² Joan. XVI.

sternis. Novum et inauditum philosophandi genus, hortari contra fortes timidos, contra importunos desides, fieri in bello fugaces, in pace vero andaces, fieri in bello securos, in securitate providos. Detestabilis magister navis, qui in tranquilla serenitate artis suae fastigium exerceat, in tempestate vero clavum et cætera armamenta remittit. Ne verearis, frater; bonum semen seminavit Christus in agro suo: noli superseminare zizania, quæ ultro crescent, et bonum semen suffocare nituntur. Multiplicatur numerus malorum, abundant filii diffidentiae; sed potens est Christus suos confortare et adversarios prosternere. Quid enim ait Apostolus? Omnia enim possum in eo qui me confortat. Numquid in eo solo erat Christus? Numquid in eo solo omnia poterat? Credimus et confitemur, quia in omnibus et singulis fidelibus omnia potest: Ecce ego, inquit¹, vobiscum sum omnibus diebus.

42. « Quod autem eum arguis, qui investituræ Ecclesiasticarum dignitatum per laicos factas inter hæreses computant: non satis efficaciter facere videris. Quamvis enim sicut Catholicæ fides in corde, ita et hæreticus error in corde maneat: tamen sicut ex Catholicis operibus Catholicum sentimus, ita ex hæreticis operibus hæreticum cognoscimus. A fructibus enim eorum, inquit Dominus, cognoscetis eos; et unaquæque arbor ex fructu suo cognoscitur. Et licet exteriores investituræ per laicos factas non satis propriæ hæresis nomine censeamus: sentire tamen, ac defendere qui debere, indubitata hæresis est ». In his resolvitur omnis questio, quando in hoc peccasse hæresis sit, cum videlicet, investituræ a laicis jure dari, ut dogma defenditur; quo sensu reperiuntur esse locuti sancti Pontifices, et alii, qui eam opinionem hæresim esse dixerunt, et hæreticos dici debere, qui eam essent secuti sententiam. At huic assertioni Paschalis cum semper, ut vidimus, fuerit adversatus: procul abest ut hæreticus dici poterit, quamvis investituræ ex causa concesserit. Sed de his rursum inferius.

43. Ex his plane satis apparet, quod sicut Romæ, ita et in provinciis altercatum, aliis pro Paschali papa in excusationem ipsius laborantibus, aliis ex adverso surgentibus, non tamen in Paschalem Pontificem, qui idem ipse, ut videlicet, est detestatus quod fecerat, et paratum se emendare, ad diversos jam (ut audisti ex Ivone) episcopos scripserat, quam adversus regem Henricum, quem excommunicandum esse clamarent. Quod tamen anno sequenti in diversis provinciis esse factum in diversis Conciliis, suo loco dicitur. Porro quod ad Ivonem spectat, ipsum acquievisse scriptis a Joanne archiepiscopo Lugdunensi, inde summum argumentum, quod cum in fine suæ Epistolæ Joannes ista posuerit: Hæc tuæ dilectioni sub brevitate rescripsimus, adversus quæ si quid parare volueris sive cominus sive eminus, audire et respondere parati sumus. Ipse

nihil respondisse reperitur: imo (quod in aliis hactenus non fecisset) adversarii Epistolam perire nolens, cum suis consuit, ut cum eis perpetuo servaretur, judicans illam dignam memoria sempiterna.

44. *Henricus ubique damnatus.* — Porro languesciente capite, nequaquam pariter cum eo infirmata sunt omnia simul membra, sed mirum in modum adversus proditorem et sacrilegum principem insurrexere ipsi legati potissimum, qui in diversis provinciis vice Pontificis munere legationis Sedis Apostolicæ fungebantur. Inter quos sicut Romæ Joannis cardinalis episcopi Tusculani (ut vidisti) virtus enituit, ita in Oriente Cononis sive Canonis cardinalis episcopi Prænestini legatione functus ingens animi fortitudo pluribus exemplis est declarata. Qui ubi Hierosolymis existens hæc audivit, nulla interposita mora, collecto ibi hoc anno Concilio, Henricum ut impium, dirum, sacrilegumque tyrannum, anathemate condemnavit: moxque advolans in Occidentem, eodemque legationis munere Græciam Borealesque lustrans circumquaque provincias, in singulis collecta Synodo, ubique eundem Henricum anathemate percudit. Constant hæc ipsa ex Actis ullius sub Paschale celebrati Concilii Lateranensis, ubi ista leguntur¹: « Et dominus Prænestinus consequenter subjunxit, qualiter pro sedis illius legatione Hierosolymis audierit regem Henricum post sacramenta, obsides, et oscula, in ipsa B. Petri Ecclesia dominum papam tenuisse captum, indigne tractatum, potiora Ecclesie membra, cardinales videlicet, exutos, tractos, et male tractatos: nobiles quoque Romanos occisos et captivos, et populorum stragem factam, et audiens ingemuerit, et pro hujusmodi facinoribus, Ecclesie Hierosolymitanæ consilio, zelo Dei animatus, excommunicationis sententiam in regem dictavit, et eandem in Græcia, Hungaria, Saxonia, Lotharingia, Francia, in quinque Conciliis, consilio prædictarum Ecclesiarum renovando confirmavit, etc. » Quæ omnia voluit per eundem Paschalem Pontificem in dicto Lateranensi Concilio confirmari, de quo suo loco dicturi sumus. Summam itaque in tanto naufragio Romanæ Ecclesie ex sacerdotali constantia Conon sibi gloriam comparavit, laudemque peperit immortalem. Ita Deo mirabili modo operante, ut quod deficit in capite robor, in coherentibus membris magis ac magis accreverit ad alligandum perfidum regem in compedibus anathematis, et nobiles ejus in maledictionibus sempiternis, ut anno sequenti dicitur.

45. *Obitus Boamundi principis Antiochiæ.* — Quod autem superius obiter facta est mentio obitus Boamundi principis laudatissimi, in his præsertim quæ spectant ad militarem fortitudinem, non pertranscat is absque memoria antiquæ laudis ejus monumentis perpetuis consignatæ. Velut

¹ Phil. iv. — 2 Matth. xxviii.

¹ Tresp. an. Dom. 1116.

etiam Chronicon Romualdi archiepiscopi Salernitani, eodem anno ejus recenset obitum. Petrus Diaconus quoque sub iisdem Paschalis papæ pressuris Boamundum diem obiisse testatur¹. Sepultus fuit Canusie in Apulia, in Ecclesia S. Sabini; ad cujus sepulchrum ejusmodi hactenus inscriptiones in tabulis æreis leguntur, ut ferebant pedestres musæ hujus temporis infelicis :

Magnanimus Syriæ, jacet hoc sub tegmine princeps,
Quo nullus melior nascetur in orbe deinceps.
Græcia vieta quater, pars maxima Parthia mundi
Ingenium et vires sensere diu Boamundi.
Hic acie in dena vicit virtutis habena,
Aguina millena, quod et urbs sapit Antiochena.

In januis autem æreis ista :

Unde boat mundus, quanti fuerit Boamundus
Græcia testatur, Syria dinumerat.
Hanc expugnavit, illam protexit ab hoste,
Hinc ridet Græci, Syria, damna tua.
Quod Græcus ridet, quod Syrus lugeat, uterque
Juste vera tibi sub, Boamunde, salus.

Ex alio latere :

Vicit opes regum Boamundus, opesque potentum.
Et meruit dici nomine jure suo.
Intonat terris, cui non succumberet orbis?
Non hominem possum dicere, nolo Deum,
Qui vivens studuit, ut pro Christo moretetur,
Promeruit quod ei morientis vita daretur.

Rursum utrimque distichon :

Hoc ergo Christi clementia conferat isti,
Millet ut caelis suis hic athleta fidelis.

Ex alia parte :

Intrans cerne fores, videas quid scribitur, ores
Ut caelo detur Boamundus, ibique locetur.

Deorsum vero :

Melfæ Campan. Rogerius fecit has januas et candelabrum. At de Boamundo hactenus, cui successit filius, itidem Boamundus nuncupatus, sed non ita felix, sicut nec fortis: de quo consule Willelmum Tyrimum.

46. Berytus et Sidon captæ. — Hoc eodem anno (quod ad res Orientales spectat) vicesima tertia mensis Aprilis Berytus capitur a Balduino. In fine vero ejusdem anni, nempe decima nona mensis Decembris, Sidon adjumento Danorum et Norvegiæ regis classis ab eodem rege Balduino capitur. Qua capta Dani cum sociis victores ad propria reversi sunt. Hæc autem Tyrius pluribus narrat².

47. De certitudine resurrectionis miraculum. — Demum vero claudamus præsentem annum egre-

gio et probe testato divino miraculo, ab ejusdem temporis scriptore in lucem prodito. Hoc nempe anno quid mirandum acciderit in Leodiensi monasterio, Rupertus abbas Tuitiensis, fama celebris, ita narrat in Commentario quem tunc scribebat de Divinis officiis, istis verbis¹ : « Sed ecce, inquit, dum hæc scribimus, jucundo per quemdam fratrem nostrum gratia resurgentis nobis arridet miraculo. Testor illam beatam ac deliciosam noctem, in qua Christus ab inferis victor ascendit, me nihil super hoc mentiri; nisi ille tam sacrilegus sit, ut de ejusmodi re quidpiam fingere ausus fuerit, quod vita ejus, vel propositum, omnino prohibet vel suspicari. Fratris tamen ejusdem nomen tacebitur, quoniam et hoc obnixè precatur. Nam factum quidem lucere coram hominibus cupit, ut gloriificetur Pater qui est in cælis; se autem videri non vult, nec suis reputari meritis miraculum, cujus sola Dei gratia (quo judicio nescimus) operatrix est. Res hujusmodi est :

48. « Hoc sancto Paschæ sabbato, quo cereo (de cujus quoque præconiis superius aliqua diximus) annus ab Incarnatione Domini millesimus centesimus undecimus inscriptus est, in Ecclesia S. Laurentii ad præcedentes ejusdem diei matutinos, extinctis de more cunctis luminaribus, dum eorum ultimum extingueretur, et ad canticum Evangelii hæc antiphona a domino abbate Berengero imponeretur: Mulieres sedentes ad monumentum, ecce repente ante pedes illius projectum cecidit ipsius, quo firmiter substrictus erat, cingulum. Ille solum esse et cecidisse suspicatus, quod tamen mirum fuisset, quia non delapsus fuerat, neque circum crura pedesque descenderat, sed ante pedes, quasi projectum (ut dictum est) exiliverat, inclinavit se, ut tollens illud rursum sese accingeret. Cumque manus injecisset, ut illud sibi circumdaret: nodum, ut erat fortiter astrictum, non cedere sibi, ultra quam dici potest, admiratus est. Intendenti, et secum cum stupore magno reputanti quidnam hoc sibi vellet, ecce vox facta est, et sibilum tanquam auræ tenuis audivit dicentem sibi :

Sic potuit clauso Christus prodire sepulchro.

Siquidem hæc (ut ipse referens testatus est) admiratio mentem ejus persæpe subibat, quomodo verum Domini corpus (unde ipse nullatenus dubitabat) clauso resurgere monumento, clausis potuit januis ingredi ad discipulos. Mox ergo illi ad memoriam simile illud rediit, quod Augustinus refert in libro de Civitate Dei factum per quamdam Petroniam clarissimam feminam, quæ mirabiliter ex magno atque diutino, in quo medicorum adjutoria cuncta defecerant, dolore sanata est. Hæc a quodam Judæo dixit sibi fuisse persuasum, ut anulum capillitio vinculo insereret, quo sub omni

¹ Petr. diac. Chr. Cass. l. iv. c. 11. — ² Will. Tyr. de bell. sacr. l. xi. c. 13. 14.

¹ Rupert. ab. de Divin. off. l. viii. c. 3.

veste ad nuda corporis cingeretur, qui annulus haberet sub gemma lapidem in renibus inventum bovis. Hoc alligato quasi remedio, ad sancti martyris Stephani limina veniebat. Sed profecta a Carthagine, cum in confinio fluminis Bagradæ in sua possessione mansisset, surgens ut iter perageret, ante pedes suos illum jacentem annulum vidit, et capillitiam zonam, qua fuerat alligatus, mirata tentavit. Quam cum omnino suis nodis firmissimis, sicut erat, comperisset adstrictam, crepuisse atque exilivisse suspicata est. Qui etiam ipse cum integerrimis fuisse inventus, tuturæ salutis quodammodo pignus de tanto miraculo se accepisse presumpsit, atque illud vinculum solvens simul cum eodem annulo projecit in flumen. Non credant hoc, inquit idem Augustinus, qui etiam Dominum Jesum per integra virginalia matris enixum, et ad discipulos clausis ostiis fuisse ingressum non credunt.

49. « Comparentur nunc duo hæc tam insignia divinæ pietatis miracula, recens hoc, quod hominem cingulum renum ejus firmiter obstrictum et indissolutum transit et exilivit; et illud antiquius, quod zonæ insertus, nodo integro persistente erupit annulus. Nescio quid mirer amplius, nisi quod hic pariter (ut supra dictum est) vox divinitus audita est :

Sic potuit clauso Christus prodire sepulchro.

Hoc igitur, ubi accepi (mane quippe, ubi primum loquendi copia fuit, duobus tantum fratribus, quorum unus extiti, attonitus adhuc frater ille rem gestam retulit, obnixè postulans ut creditum nobis secretum nunquam cum suo nomine proderemus) ubi, inquam, hoc accepi, tanquam meis maxime oblatum a Deo usibus miraculum lætus arripui. Siquidem eadem nocte et eandem

paululum ante horam qua illud accidit, supradictam similitudinem ruminare cœperam, scilicet quod hi qui fidei resurrectionis detrahunt, et ideo non veram carnis naturam credunt resurrecturam, quia Dominus clauso sepulchro surrexit, vel quia clausis ad discipulos ingressus est januis; similes sunt illis, qui terram quam inspexerant detraxerunt apud filios Israel, dicentes : Terra quam lustravimus, devorat habitatores suos. Non igitur importune longior nunc trahitur sermo de resurrectionis gloria, etc. » Hæc Rupertus abbas, tunc monachus sub Berengero sive Berengario abbate in monasterio S. Laurentii, in monte Leodii constituto, ut ipse testatur in Epistola nuncupatoria ad Canonem abbatem Sigebergensem, ante Commentarium in Genesisim posita, qui Berengario moriente abbate ab eodem commendatus fuit eidem Cononi, cujus prefecturæ anno duodecimo, quem notat fuisse annum Redemptoris millesimum centesimum decimum septimum cum Indictione decima, suos cepit a se scriptores edere Commentarios, sub ejus vivens patrocinio a persecutione falsorum fratrum invidia tabescentium. Felix progressus, sed non inoffenso penitus pede : nam in errorem illum impegit incaute, quo asseruit, in sacratissimo Eucharistiæ sacramento ita inesse vere ipsum integrum corpus et sanguinem Christi, ut tamen substantia ipsa panis et vini etiam integra remaneret¹. Qui error damnatus est in Concilio Lateranensi sub Innocentio papa Quarto. Porro quod spectat ad lucubrationes ipsius, numerat ipse eas in Epistola nuncupatoria ad eundem Canonem jam creatum episcopum Ratisponensem, conscripta ultimo loco, cum primitias laboris sui diutius apud se retentas eidem dedicat libros hoc anno scriptos de Divinis officiis. At hæc de Ruperto ad institutum satis.

¹ Rupert. Abb. in Exod. l. II. c. 10, in fin.

Anno periodi Græco-Romanæ 6604. — Anno Ære Hispan. 1149. — Anno Hegiræ 505, inchoato die 10 Julii, Fer. 2. — Jesu Christi 1111.

— Paschalis II papæ 13. — Henrici V reg. 6. imp. 4. Alexii Comneni imp. 31.

1. *Henricus Germaniæ rex Romanam pervenit.* — A num. 1 ad 45. Baronius fuse narrat, quæ hoc anno Romæ, quo illic Henricus imp. adventavit, contigere. Quare his tantum addo, quæ in Vita Paschalis II Pandulfus Pisanus hanc in rem refert : « Suscepit a summo Pontifice non prius Eccle-

siam intrare voluit, quam eam suo jure suoque dominio a suis fidelibus detineri vidisset. Deliberata est itaque ei Ecclesia, et omnes munitiones circumquaque sitæ : et in hac deliberatione obsides dedit, videlicet nepotem suum et alios barones, ostendendo fidem servaturum, quam penitus male

^servavit. Dominum papam Paschalem dolo et fraude, cum episcopis et cardinalibus, cæterisque ordinibus, et cum proceribus quamnullis apprehendit: de aliis vero maximas strages fecit: clericos vero, archipresbyteros, presbyteros expoliavit, planctas et thymiamata eis auferendo: et proprias vestes, ex quibus vestiti erant, minime dimittebat, nec etiam subalaria atque femoralia eis habere permittebat. Hæc vero acta sunt mense Februarii, II idus, anno Dom. Incarnationis MCI, Indict. IV, eadem namque die Dominica, qua legebatur Evangelium: Assumpsit Jesus duodecim, etc. Et ait illis: Ecce ascendimus Hierosolimam, et consummabuntur omnia, quæ scripta sunt per Prophetas de Filio hominis, quoniam tradetur gentibus et illudetur, et flagellabitur, et conspnetur.

2. *Paschalem II captivum detinet.* — Ascensio ista descensio fuit: quoniam ut Dominus a malignis perpressus est injuriam, sic et iste a Barbaris malitiose captus est. Consummata sunt in Christo, quia a Prophetis prænuntiaturum est eum passurum Hierosolymis: in isto, quoniam jam multis vicibus dictum erat non iturum; si vero ivisset, non prius rediturum quam omnia quæ vellet faceret. Traditus fuit videlicet a suis, et non ab extraneis: flagella multa que opprobria diu ab eis perpressus est. A prædicto namque die, videlicet a II idus Februarii usque in V kal. Maii, devotus Dei Pontifex multis est affectus cruciatibus ».

3. *Ab eo coronatur imperat.* — Verum loco V kal. Maii, legendum V idus Aprilis, ut habet Malmesburiensis lib. 3, pag. 167, qui ait narrare se gesta in coronatione Henrici imp. ex Davide Scoto Bancorensi episcopo tunc vivente, et a partibus ejusdem imperatoris stante. Cum enim, ut habet idem Malmesburiensis, Henricus coronatus fuerit VI idus Aprilis Dominica, quasi modo geniti, id est Dominica in Albis, quæ hoc anno incidit in V idus Aprilis, non vero in IV idus Aprilis, ut errore librariorum ibidem legitur, manifestum est, ultra diem illum Paschalem II ab imperatore detentum non fuisse, et locum præfatum eo quo diximus modo corrigendum. Corrigendum est alter ejusdem Malmesburiensis locus, qui est de concessione investiturarum a papa imperatori facta: « Privilegium et conventionem violenta trium septimanarum captione a papa extorta veraciter inseram »; loco enim trium septimanarum, legendum octo septimanarum; Pandulfus quippe in Vita Paschalis II refert eum II idus Februarii captum fuisse, die sc. XII ejusdem mensis, indicatque Dominicam Quinquagesimæ cum illo die concurrisset, cum dicat hæc accidisse « die Dominico, quo legebatur Evangelium: Assumpsit Jesus XII discipulos », a quo die ad Dominicam in Albis fluxere septimana octo, non vero tres. Ex quibus emendandus etiam Petrus Diaconus, a Baronio num. 44 laudatus, lib. 4, cap. 41, ubi ait Paschalem II in ergastulo fuisse sexaginta et unum dies. ut numeranti patet. Scriptum erat in

apographo XVI dies, et librarius legit LXI dies. Norunt enim qui in Mss. legendis versati sunt, numerum X cum numero V a libris sæpe confusum fuisse. Mitto alios errores minoris momenti, qui cubant in aliquibus aliis locis a Baronio, qui arbitratus est Henricum idibus Aprilis imperatorem coronatum esse, hoc anno recitatis; sed cum præterire non possum, qui extat in Chronico Urspergensis, dum de Henrici imp. coronatione verba facit, et quidem ex citato a se Davide Scoto; postquam enim retulit Paschalem II detentum fuisse, subdit: « His ita in Dominica Quadragesimæ transactis », loco enim Quadragesimæ, legendum Quinquagesimæ. Cum vero postea asserit, Paschalem II post octavas Paschæ Henricum coronasse imperatorem, non discrepat a Malmesburiensi, qui tradit id factum in Dominica in Albis, seu in die octava Paschatis, quia post octavas Paschæ, idem est ac in octavis Paschæ, sicut post diem tertium, idem sæpe significat ac die tertio, ut alibi demonstravi. Porro David Scotus in aulam ab eodem imperatore adscitus, hujus expeditionis seriem tribus libris scripsit, ut prodit Urspergensis, qui addit Henricum sibi eum capellanum assumpsisse. Quare non mirum si Malmesburiensis laudatus moveat Davidem « in regis gratiam, magis quam historicum deceret, proclivem fuisse ». Sed illa Historia vel periit, vel adhuc in tenebris latet.

4. *Quinto idus Aprilis.* — His ita juxta criticæ regulas discussis perspicuum est, Labbeum in Chronico recte observasse Robertum de Monte in germano suo Chronico diem coronationis Henrici imp. annotasse, dum Bullam Paschalis II eodem die datam recitat. Hæc Roberti verba: « Die Paschæ Henrico in imperatorem coronato, tradidit ei post lectum Evangelium papa Paschalis, qui et Raginerius, ante altare Apostolorum Petri et Pauli, in oculis omnium principum, Privilegium de investitura episcopatum et abbatiarum, etc. Datum est idus Aprilis, Indictione quarta ». Ad quæ verba Labbeus observat numeros duos, vel a libris omissos, vel diuturnitate temporis in autographo deletos fuisse, nempe viii, inter illa verba, die Paschæ, et v, ante idus Aprilis; hoc enim anno nullus iduum dies concurrere potest cum die Paschatis, quod celebratum est quarto nonas Aprilis; et parte alia dies iduum in Dominicam non incidit. Quare error, qui in Roberti Chronicon irrepsit, ex ipsomet emendandus. Idem errores irrepere in editionem Siegebardi Francofurti curatam; in Ms. enim Gemblacensi, quo Miræus in correcta sua editione usus, diei Paschatis nulla mentio, sed tantum in fine Privilegii legitur, « datum est id. Aprilis (loco V idus Aprilis) Indictione IV ». Sed cum Siegbertus hoc ipso tempore vixerit, neque ignorare potuerit diem Dominicam hoc anno cum die iduum Aprilis non concurrisset, et hanc ceremoniam die Dominicali fieri oportuisse, ea diei v iduum omisso ei adscribi non potest. Sed nondum errorum finis. Baronijs enim num. 24 refert ex vetere

Codice verba dicta a Paschali papa in die coronationis Henrici, in quibus legitur : « Anno Verbi Incarnati MCCI, hoc confirmatum est decimo sexto kalendas Martii », qui mensis et dies manifeste corrupti. Tum ex Actis Paschalis II: Actum ipsis Aprilis, v feria post octavas Paschæ, Indictionis IV, quæ ex dictis constat subsistere non posse. Denique in Chron. Hildensheimensi accurate dicitur Henricum II *idibus Februarii Romæ ab Apostolico exceptum*, sed perperam subditur, eum *id. Aprilis* a papa consecratum.

5. *S. Gebardus archiep. Salisbur. factum imperat. improbat.* — Baronius num. 25, mentionem facit *sancti Conradii* archiepiscopi Salisburgensis, cognomento Gebhardi. De eo in Vita ejus tom. VI Causii recitata dicitur Henricum V « cum exercitu copioso circiter xxx millia equitum electorum » Italiam ingressum esse, habentem in comitatu suo *Chunradum* archiep. Salisburgensem, ut benedictionem imperialem a Paschali papa susciperet; sed regem quorundam sceleratorum consilio, Paschalem captivasse, et Chunradum factum hoc improbasse. Exinde imperator, inquit anonymus, ejusque sequaces in eum commoti, nullus ei locus tutus erat ad latendum. Tandem *post novem annos* in sedem suam reductus est. « Quadragesimo secundo episcopatus sui anno, senex et plenus dierum v idus Aprilis felici fine quievit, anno Incarnat. Domini MCLXV ». Factum vero Paschalis II improbavit *sanctus Bruno*, abbas Casinensis et episcopus Signinensis, ut videre est apud Baronium a num. 29 ad 33, ubi ait eum pridie kalend. Septemb. animam Deo reddidisse, anno non expresso, quem infra videbimus fuisse annum Christi MXXV. Baronius in Addendis et corrigendis ad tomum XII suorum Annal. ex Vita S. Gebhardi, scripta ab auctore hujus temporis, alia refert huc transferenda.

6. *Investituras ab eodem extorquet.* — « Tunc papa », inquit Ordericus lib. 10, pag. 762, « solerti

custodia detentus, omnique solatio destitutus, imperatori quicquid petierat concessit. Unde ab illo dimissus, multis postmodum vilior extitit. Nam Rodbertus Parisiensis, Gualo episcopo Leonensis, et Pontius abbas Cluniacensis, alique plures de cardinalibus et prælatis Ecclesiarum papam redarguebant, et quicquid imperatori verbo seu scripto concesserat irritum esse debere indubitanter censebant. Asserebant enim, quod pro veritate et justitia debuisset optare mori, et usque ad mortem innocentem Christum sequi : satiusque male vincula et flagra perpeti, quam aliquid contra jus et statuta Patrum potestati annuere sæculari. Ille vero reprehensiones sophistarum patienter tolerabat, et assertiones eorum legitimas ac veraces esse allegabat ». Sophistarum nomine quicumque cæteris doctiores esse putarentur appellabantur, indeque Lanfrancus et Anselmus *profundi sophistæ* dicti (1).

7. *Duæ philosophorum et theologorum sectæ in schola Parisiensi.* — Porro *Robertus*, quem in significatione Ordericus *sophistam* vocat, fuit theologus Parisiensis Urbano II ac dein Paschali II acceptissimus. Auctor Historiæ *a Roberto rege ad mortem Philippi I*, apud Duchesium tom. IV, de eo scribit : « In dialectica hi potentes extiterunt sophistæ : Joannes, qui eandem artem sophisticam vocalem esse disseminat, Robertus Parisiacensis, Roscelinus Compendiensis, Arnulphus Laudunensis ». Occasione enim altercationum Berengarii hæresiarchæ tempore excitatarum, ortæ sunt in schola Parisiensi duæ philosophorum et theologorum sectæ; primi in vocibus seu nominibus omnia reponebant, alii vero in rebus; indeque priores *Nominales*, alii *Reales* vocati. Materia communis titulus disputationis erat *Universale Logicum*; vetus opinio naturam ipsam realem esse defendebat; nova vero contendebat nullam dari universalem, sed quicquid est, esse singulare, solasque voces seu nomina universalia dici posse. Dissidium illud, inquit Eulæus in Hist. Universi-

(1) In amplissima Conciliorum Collectione Veneto-Labbeana, tom. XII, col. 1553, anno huic assignatur Concilium quoddam generale Capuæ habitum a Paschali, in quo celebræ illud Privilegium de investituris ab Henrico extortum, ab eodem Paschali revocatur. Synodus ista exculpta est ex litteris Friderici Leodiensis episcopi ad Ecclesiam Mechliniensem datis, vulgatisque in Collectione Monum. Marteni tom. I, col. 653, in quibus sacramentum vi extortum nulla religione obligare probatur exemplo Paschalis, qui *nostris temporibus*, ait coactus investituras jurato concedere, Privilegium hac de re concessum in generali Concilio Capuæ habito soluit, *non jam Privilegium sed prævilegium id vocari decrevit*. Verum licet id asserat Fridericus, in Epistola non longe post hæc temporis data, nullum tamen Concilium Capuæ celebratum a Paschali ea occasione fuisse credo. Id autem etiam primo, ex eo quod assent Fridericus in eo Concilio *Privilegium* habitum et reputatum fuisse : quæ verba desumpta sunt ex Actis Concilii claudunt, ut constat ex eorum excerptis a cardinali Aragonio datis, et ex altero eorumdem Fragmento quod Concilio Guastalliensis subiectum in Ms. Codice reperit vulgavitque Martenus in Anecdotis tom. IV, pag. 127, secundo; id colligo ex silentio scriptorum omnium non coævorum tantummodo, sed qui Campaniæ vana loca incolentes, res illarum regionum diligentissime adnotarunt. Silet enim de illo præter anonymum Casinensem et Lupum Protospatulæ, qui postremus ad exordium usque sequenti sæculi Chronicon suum prosecutus fuit; ille vero Chronologum suum ab hoc usque tempora deluxit, eandemque succedens alius chronista usque ad sæculum sequens continuavit; silet, inquam, Romanulus Salernitanus, eorum temporum et locorum scriptor, silet Petrus Huconius in continuatione Chronici Casinensis, ac denique nihil de illo memorat anonymus auctor Chronici Beneventani, apud Muratorum Antiq. Ital. tom. I, col. 262, legendus, qui opus suum cum anno MXXIII claudit. Tres hi scriptores per hæc tempora vixisse videntur, et controversiam Paschalis cum Henrico diligentissime prosequuntur, asserunt vero communem testimonio pactum a Paschali cum imperatore initum in Romana Synodo anni sequentis dissolutum fuisse : nihilque de Synodo Capuana, quæ Romanam processerit, et de Synodo præsertim generali in qua revocatio ista primum decreti fuerit commemorant. Quis tantum oscitantiam non un vel alteri, sed tribus scriptoribus diligentissimis circa res sui temporis et locorum propinquitate cognitais obtulerit? Insuper si revocatio ista investiturarum decreto Concilii generalis Capuani stabilita fuit, cur postea in Romana Synodo, ex isdem qui Concilio Capuano assistisse debuerant Patribus constante, nempe archiepiscopus Capuanus, Beneventano, Amalfitano, Regno, Ydruntino, quorum nomina extant in duplici Fragmento ejusdem Romane Synodi supra a vobis laudato; cur, inquam, Patres illi ambigui hærebant cum pactum illud sacramento a Paschali firmatum dissolvendum esset, nec antea fluctantes animi quæverunt, quam Gerardus Engolismensis consilium illud suggestit apud Paginam ad A. MXXII, num. 2, legendum. Ille igitur nature liberris, censens Concilium Capuanum, de quo I. dicitur, ipsissimum esse Romanum quod vel memoria lapsu Capuanum Fridericus appellavit, vel forte in ejus textum *Capuæ pro Romæ* amanuensum oscitantia itrepit.

tatis Parisiensis, ad annum *MLXVII* diu et per multa sæcula in Academia Parisiensi vixit.

8. *Moritur Boamundus Antiochiæ princeps.* — Ad num. 45. Boamundi Antiochiæ principis mortem Baronius accurate hoc anno consignat, et Ducangius, in *Notis* ad lib. 14 *Histor. Annæ Comenæ* perperam contendit, eam uno aut altero ante præsentem anno accidisse. Hæc de Boamundo Ordericus lib. 9: « Anno ab Incarnat. Dom. *MCXI*, Indict. iv, Marcus Boamundus post multos agones et triumphos in nomine Jesu Antiochiæ obiit », ubi tamen in loco mortis fallitur. Eum enim in Apulia demortuum certissimum, idque anno currenti, ut etiam produnt Albertus Aquensis lib. 11, cap. 48, chronographus Malleacensis, ac Falco Beneventanus, qui extinctum tradit mense Februario anni Christi *MCX*, Indict. iv. Falconem citat Ducangius, et observat solemne esse huic scriptori annos Christi a mense Martio auspicari, ideoque existimare eum vita functum mense Februario anni Dionysiani *MCXI*. Ceterum quantus vir fuerit *Boamundus*, vel ex his *Annæ Comenæ* lib. 13 verbis intelligi potest: « Illic talis ac tantus fuit, ut uni omnium qui tunc erant hominum imperatori Alexio secundus, uni duntaxat illi fortuna, vi dicendi, consilio, cæterisque naturæ dotibus esset inferior; plane invictissimus futurus, nisi cum ætas sua, rerumque ac spei rationes cum patre meo commisissent ». Eum hoc anno vitam cum morte commutasse, testatur etiam Petrus Diaconus lib. 4, cap. 42, cujus verba Baronius num. 15, refert: « Ea perturbatione durante », inquit hic auctor, « Rogerius dux cum Boamundo fratre defungitur ». Rogerius dux erat Apuliæ, cui in principatum successit Guillelmus filius, Boamundo vero in principatum Antiochiæ Tancredus, nepos dux etiam celeberrimus. Erant *Rogerus* et *Boamundus* filii Roberti Guiscardi, de quo sæpe a nobis sermo habitus.

9. *Floret Rupertus abbas Tuitiensis.* — Ad num. 46 et seqq. Florebat hoc tempore *Rupertus* abbas monasterii Tuitiensis, in opposito civitatis Coloniensis juxta Rhenum, quod alias diximus a sancto Heriberto Coloniensi archiep. constructum. Fuerat antea monachus cœnobii Sancti-Laurentii in publico Monte Leodii, de quo *Rennerus* ejusdem monasterii monachus, lib. *de Viris Illustribus sui*

cœnobii. Multa opera tam in juventute, quam jam ætate provector in lucem emisit, inter quæ libros 12 *de Divinis Officiis*, quos ejus genuinum fœtum esse male a quibusdam negatum, nli demonstrat Gerberonius in *Apologia pro Ruperto*. Eum in gravissimum errorem circa Eucharistiæ Sacramentum impegisse putarunt Baronius n. 49, Bellarminus lib. de Script. Ecclesiast., aliique utrumque sæculi, quod scilicet unionem hypostaticam panis et vini Eucharistici cum Verbo admiserit, cui opinioni ipsemet locum dedit durioribus et subobscuris suis locutionibus; adeo ut hæretici eum inter suos connumerent. Verum immerito, cum in Epistola dedicatoria libris illis præfixa, clare Berengarianam hæresim impugnet, suamque mentem Catholicæ fidei conformem explicet. Legendus Gerberonius loco citato, et Natalis Alexander part. 1, Sæc. XI et XII. Obiit *Rupertus* an. *MCXXXV*. Porro *Rennerus* hoc ipse tempore vivebat, scripsitque etiam Gesta S. Lamberti episcopi Leodiensis, quæ extant apud Chapeavillam tom. 1.

10. *Initium dissidii Alphonsus inter regem et Urracam uxorem exorti.* — In Hispania dissensiones inter Alphonsum regem et Urracam conjugem in apertum hoc anno erupere. Sandovalius fol. 120 et seqq. Chartas varias laudat, quibus liquet *Urracam* anno superiori adhuc cum Alphonso marito fuisse, uti Privilegium in favorem monasterii Sanctæ-Mariæ de Balvanera emissum. « Æra *MCXLVIII*, una cum conjugē Urraca nomine strenuissimo rege Adefonso suo existente genitore, mihi quoque quodammodo juncta consanguinitate, a Pyrenæis montibus usque ad refluxus Oceani regali auctoritate dominantibus ». Eo etiam Christi anno, Æra *MCXLVIII*, Urraca die Decembris sancto Stephano Protomartyri sacra donationem quandam facit, in qua habetur: « Adefonsus rex Confirmat Urraca totius regina Hispaniæ ». Quare Alphonsus et Urraca adhuc eo anno conjunctim regnabant, nondumque Alphonsus infans, prioris mariti Urracæ filius, rex proclamatus fuerat, ut eruitur ex Instrumento Ecclesiæ Vallisoletanæ, ubi Bernardus dicitur *archiepiscopus Toletanus*, Urraca *regina Legionis*, Petrus Trava comes Gallicie præfectus et Comesius Castellæ. Petrus autem Alphonsi infantis gubernator erat.

PASCHALIS II ANNUS 13. — CHRISTI 1112.

1. *Indicitur Concilium Lateranense Paschalis litteræ suum factum improbantis præcedit.* — Sequitur annus Redemptoris millesimus centesimus duodecimus, Indictione quinta, quo Paschalis papa ad instaurandum grave damnum illatum Ecclesiæ, scandalumque curandum quod intulisset ubique fidelibus, ac denique ad restituendam sanctam Ecclesiam in pristinam libertatem, Apostolicis indictum litteris generale Concilium in Laterano celebrandum habuit. De occasione autem hujus indicendi Concilii sic Urspergensis hoc anno: « Eo tempore, dominus Apostolicus multas a Romana Ecclesia passus est injurias, objicientibus ei (adversariis), quod contra instituta totius Ecclesiasticæ disciplinæ regem Henricum tyrannum, reipublicæ vastatorem et Ecclesiarum destructorem, imperiali benedictione sublimasset, insuper privilegio sacrilegio condonasset. Inde coactus est in Concilio decimo quinto kalendas Aprilis habito Laterani in Ecclesia Constantiniana, ultima die Concilii, facta coram omnibus professione Catholicæ fidei, ne quis de fide ipsius dubitaret, dixit: Amplector, etc. » De his acturi, in præsentis quod ad tempus spectat, corrigendi sunt Codices illi, qui habent idem Concilium habitum anno sequenti; id enim non ex Urspergense tantum, sed ex Actis Viennensis Concilii habiti hoc pariter anno, Indictione quinta, redditum manifestum, dum in eis mentio habetur ejusdem Lateranensis Concilii, dicta die mensis Martii celebrati: adeo ut nulla remaneat dubitatio, hoc ipso anno idem Concilium celebratum; quod etiam ex Petro¹ Diacono potest intelligi in Chronico Cassinensi.

2. Ante Concilium autem idem Paschalis papa suam causam præjudicavit, cum universo Catholico orbi innotescendum curavit per legatos Apostolicæ Sedis, datis ad eos litteris, quomodo coactus læcisset, quod Henrico de investituris concessisset. Caterum se ea omnia invalida reddere et confirmare quæ a prædecessoribus Romanis Pontificibus de his statuta fuissent. Extant eodem

argumento ejusdem Pontificis litteræ, hoc anno scriptæ ad Guidonem Viennensem archiepiscopum, cujus generis et reliquæ erant ad legatos cæteros datæ. Reddamus igitur quæ extant ad Viennensem, ut ex his reliquis quæ non extant intelligamus; sic se habent:

3. « Paschalis episcopus, servus servorum Dei, venerabili fratri Viennensi archiepiscopo Guidoni et Apostolicæ Sedis legato, salutem et Apostolicam benedictionem.

« Si constantiam tuam sæva illa barbaries minis, blandimentis, aut aliis modis tentat inflectere, prudentia tua immobilis perseveret. Si enim in viridi ligno sic factum est, quid fiet in aliis? Si in capite sic perpetratum est, quid fiet in membris? Igitur, frater charissime, in tuo bono incepto constanter et viriliter, Deo præstante, permaneas. Minæ, vel blandimenta, vel alii suasionis aut dissuasionis modi providentiam tuam non moveant, sed ita Domino auxiliante, perdura ut aliis tua constantia salutaris perseverantiæ sit exemplum. Quæ cognoscere postulasti, hæc sunt: scripta, quæ in tentoriis, in quibus cum multitudine clericorum et civium Urbis et totius provinciæ custodiebamur, pro libertate Ecclesiæ, et pro absolutione captivorum omnium, et pro excidio quod Ecclesiæ, Urbi et universæ provinciæ, superincumbente indigne gladio, imminere videbatur, de electione, seu de investituris personarum facta sunt, videlicet: ut electione libera facta sine vi et simonia consensu regis, facultatem habeat rex investiendi per virgam et annulum, et electus a clero et populo non consecratur, nisi a rege investatur: ego canonica censura cassa omnino et irrita judico, et sub damnatione perpetua permanere decerno, ut nullius unquam auctoritatis sint, et nullius bonæ memoriæ. Ea vero quæ sacri Apostolorum canonibus, et Antiochenum, ac universa Concilia et prædecessores nostri, et præcipue felicis memoriæ domnus Gregorius et Urbanus de his prohibuerunt, damnaverunt, stauerunt, et firmaverunt: ego prohibeo, damno, constituo et confirmo, et me illorum sanctiones profiteor servaturum. » Hucusque Epi-

¹ Pel. diac. Chr. Cass. I. IV. c. 47.

stola Paschalis. Legimus eam in pluribus veteribus Codicibus scriptis: demum vero habetur cusa in Notis ad Ivonis Epistolas. Eodem quoque argumento scripsisse ad Gerardum episcopum Engolismensem, itidem Sedis Apostolicæ legatum, testantur litteræ Viennæ redditæ ad eum Paschalem Pontificem. Sic igitur ejusmodi ab Apostolica Sede tonitru in universum Christianum orbem perstreperente, apud omnes innotuit, cujus esset fidei Pontifex atque constantia, in conservandis prædecessorum decretis de investituris saucitis.

4. *Celebratio Concilii Lateranensis.* — Post hæc autem ubi dicti Concilii tempus advenit, collecti sunt in unum duodecim archiepiscopi, centum et quatuordecim episcopi, quindecim presbyteri cardinales, et octo diaconi cardinales, abbates plures, et clericorum diversi ordinis innumera multitudo. Dies Concilii varia diversorum Codicum lectione, diversa scripta esse reperitur. Alicubi legitur quinto kalendas Aprilis, decimo quinto alibi, rursum alibi decimo octavo kalend. ejusdem. Porro quæ extant ejus Acta, quæ et Nicolaus Aragonius in suum transtulit Codicem in Vita Paschalis, sic se habent:

5. « Anno Incarnationis Dominicæ millesimo centesimo duodecimo, quinto kalendas Aprilis, celebrata est Synodus Lateranensis a domino Paschali papa in Basilica Constantiniana. Ubi episcopi complures ex Italicis provinciis interfuerunt, a Transalpinis duo. In qua nimirum Synodo de Guibertinis die quarta est facta quæstio, quod referrentur, quasi ex permissione papæ interdicta officia celebrare. Tunc Pontifex ait: Nec excommunicatos (sicut aiunt quidam) generaliter absolvi. Constat enim neminem nisi pœnitentem et satisfaciētem absolutionis gratiam consequi. Guibertinis nec officia interdicta restitui, imo Ecclesiæ sententiam in eos editam juxta prædecessorum nostrorum deliberationem laudamus et confirmamus.

6. « Die autem quinta, idem Pontifex narravit omnibus qualiter ab Henrico Teutonicorum rege cum episcopis quibusdam et cardinalibus, tam presbyteris quam diaconibus, et cum magna tam Romanorum quam aliorum qui tunc secum convenerant multitudine captus fuerit. Quodque coactus fuerit contra deliberationem suam, pro redemptione captivorum, pro pace populi, pro liberatione Ecclesiæ, ut supradicto regi de investituris, quas sæpius prohibuerat scriptum concessionis daret, et iuramenta per episcopos seu cardinales fieri præceperit, quatenus nec de investituris deinceps eum inquietaret, nec in personam regis anathema poneret. Quamvis autem conditio iuramenti imposita ab ipso et suis minus observata sit (neque enim servaverunt nobis quod ab ipsis iuratum fuerat): ego tamen eum nunquam anathematizabo, et nunquam de investituris inquietabo quod (sed quoniam) jam nostræ commonitionis instantiam repulerunt, habebunt judicem Deum. Porro scriptum illud, quod magnis necessitatibus coac-

tus, non pro vita mea, non pro salute aut gloria, sed pro solis Ecclesiæ necessitatibus, sine fratrum consilio, aut subscriptionibus feci, super quo nulla condicione, nulla promissione constringimur: sicut prave factum cognosco, ita prave factum confiteor, et omnino corrigi, Deo præstante, desidero: cujus correctionis modum fratrum qui convenerunt consilio iudicioque constituo, ne forte per hoc in posterum detrimentum aliquod Ecclesiæ aut animæ meæ præjudicium relinquantur. Tunc enim communi omnium favore laudatum est, ut fratres omnes qui donum a Deo sapientiæ scientiæque perceperant, maturius super hoc consilium communi collatione susciperent, quid sequenti die per inspirationem Spiritus sancti responderent.

7. « Die itaque sexta, quæ et ultima Concilii fuit, fidei suæ veritatem sanctis Patribus per omnia congruentem dominus papa Paschalis in audientia totius Concilii exposuit, asserens se Scripturas sanctas veteris et novi Testamenti, et Concilia universalis veneranda suscipere ac venerari, quæ Catholica Ecclesia suscipit et veneratur, ita dicendo: Amplector omnem divinam Scripturam, scilicet veteris et novi Testamenti, legem scriptam a Moyse et a sanctis Prophetis: amplector quatuor Evangelia, septem canonicas Epistolas, et Epistolas gloriosi doctoris beati Pauli Apostoli, sanctos canones Apostolorum, quatuor universalis Concilia, sicut quatuor Evangelia, Nicaenum, Constantinopolitanum, Ephesinum et Chalcedonense¹, decreta sanctorum Patrum Romanorum Pontificum, et præcipue decreta domini mei papæ Gregorii, et beate memoriæ papæ Urbani. Quæ ipsi laudaverunt, laudo: quæ ipsi tenuerunt, teneo: quæ confirmaverunt, confirmo: quæ damnaverunt, damno: quæ repulerunt, repello: quæ interdixerunt, interdicto: quæ prohibuerunt, prohibeo in omnibus et per omnia: et in his semper perseverabo.

8. « In calce etiam hujus professionis ex ore omnium, qui ad consulendum hesternæ deliberatione convenerant, Engolismensis episcopus Gerardus hanc in scriptis sententiam recitavit:

« Privilegium illud, quod non est Privilegium (neque vero debet dici Privilegium, sed *privilegium*) pro liberatione captivorum et Ecclesiæ a domino papa Paschali per violentiam Henrici regis extortum, nos omnes in hoc sancto Concilio cum eodem domino papa congregati canonica censura et Ecclesiastica auctoritate, iudicio sancti Spiritus damnamus, et irritum esse judicamus, atque omnino cassamus, et ne quid auctoritatis et efficacitatis habeat penitus excommunicamus. Quod ideo damnatum est, quod in eo Privilegio continebatur, quod electus canonice a clero et populo, a nemine consecratur, nisi prius a rege investiat, quod est contra Spiritum sanctum, et canonicam institutionem.

¹ Aliqui textus habent et Antiochenum.

9. « Perlecta vero hae Charta, acclamatum est ab universo Concilio : Amen, amen. Fiat, fiat. Archiepiscopi vero et episcopi quoque et presbyteri cardinales qui interfuerunt ipsi Concilio, hi sunt, videlicet :

- « C. Sabinensis.
- « C. Portuensis.
- « L. Ostiensis.
- « C. Prænестinus.
- « I. Tusculanus.
- « Patriarcha Venetus.
- « L. Capuanus.
- « L. Beneventanus.
- « A. Amalphitanus.
- « H. Rheginensis.
- « Hydruntinensis.
- « Brundusienſis.
- « Cosentinus.
- « Geruntinensis.
- « Rossanensis.
- « Segobienſis.
- « G. Legionensis.
- « Legatus pro Bituric.
- « G. Viennensis archiepiscopus.
- « R. Volaterranus.
- « G. Senensis.
- « R. Popubre.
- « G. Tarracinensis.
- « G. Syracusanus pro omnibus Siculis.
- « G. Vorrrianus (Verulanus).
- « B. Signiens. et alii fere centum episcopi ».

PRESBYTERI CARDINALES

- « B. cardinalis tit. S. Marci.
- « R. card. tit. S. Clementis.
- « R. card. tit. S. Priscæ.
- « G. card. tit. SS. Apostolorum XII.
- « B. card. tit. S. Petri ad Vincula.
- « R. card. tit. S. Eusebii.
- « R. card. tit. S. Laurentii in Damaso.
- « I. card. tit. S. Cecilie.
- « B. card. tit. S. Martini.
- « F. card. tit. S. Chrysogoni.
- « R. card. tit. SS. Petri et Marcellini.
- « V. card. tit. S. Xysti.
- « A. card. tit. S. Susanne ».

CARDINALES DIACONI OCTO.

- « Abbas Sublacensis.
- « Joannes abbas Cajetanus.
- « Abbas S. Andreæ.
- « Leo.
- « Gregorius.
- « Aldo.
- « Theobaldus.

« Rosimanus, qui in damnationem dicti privilegii consenserunt cum abbatibus aliis et multi-

tudine innumerabili tam clericorum quam laicorum ». Et post hæc ita in Codice :

10. « Hæc Charta lecta est a Gerardo Engolismensi, Leone Ostiensi, Galone Legionensi episcopis, Roberto card. tit. S. Eusebii, et Gregorio card. tit. SS. XII Apostolorum, de communi aliorum consensu ». In alio Codice post *Amen, amen; Fiat, fiat*, hæc legebantur : « Tunc surgentibus ex consensu fratribus, gratiæ Deo et Pontifici actæ sunt, quia patefacta liquidius veritate, de medio ablata sit scandali et dissensionis occasio. Et consenserunt duodecim archiepiscopi, centum et quatuordecim episcopi, et quindecim presbyteri card., octo diaconi card. Qui omnes in damnatione prædicti privilegii consenserunt cum abbatibus, et innumerabili multitudine tam clericorum quam laicorum ». Ilucſque in Codice Vaticano, facta collatione cum aliis exemplaribus.

11. Sed describamus hic carmina Gotfridi Viterbiensis notarii imp. quibus per Pontificem gesta usque ad finem Concilii alia pleraque sic narrat ¹ :

Papa dolens lamenta movet, totumque per orbem,
Ecclesiam sua charta vocat propter artem ad Urbem.

Hæc ubi concedit, Caesaris Acta dedit.

Tunc ait : O Patres, a Cesare scripta notate,
Et quodcumque placet super his decreta parate :

Me quoque Pontificem non fore, jussa date.

Peccati mala vestra meis venisse notavi,

Officiis me destitui dignum reputavi,

Me quoque deposui, ne pereratis, ait.

Hæc ait, et mitram rejecit, mantumque relinquit,

Ordinem Ecclesie sine me, quidquid placet, inquit,

Moreque Pontificis iudicet ipsa sibi.

Scripta legunt clerici : Rex Pontificalia quærit,

Annulus et baculus sub Cesare fertur haberi.

Copia pontificum : non ita (dixit) erit.

Extortum papæ scriptum contra rationem

Urit; et priscum tibi conciliamus honorem.

Tolle pater mantum, Curia tota monet.

Rursus in Henricum ² Quantum nova bella geruntur,

Prisina mota patri sibi jam tormenta moventur,

Ut pater ante fuit, sic anathema huius.

Littera papalis simul et papale sigillum,

Missa per imperium gravis excommunicat illum,

Et cunctos proceres, qui sua jussa tenent.

Hæc ipse.

12. *Concilium Viennense investituras damnans, ejus confirmationem Paschalis papa differt.* — At licet hæc ita stabilita in Concilio videri potuissent : tamen haud est sopita discordia, quod videlicet ipse Paschalis papa noluerit per seipsum datum Henrico Privilegium condemnare, et ipsum excommunicare, neque concessas investituras eidem revocare, ut ex verbis ejus audisti superius ita dicentis : « Ego tamen cum nunquam anathematizabo, nunquam de investituris inquisitebo ». Ipsum vero damnari per Concilium potius quam per seipsum concessum illi privilegium permisit. Imo ex eo quod amicitiam cum eodem imperatore retinuerit, atque litteris coluerit, et offi-

¹ Gotfrid. Viterbiens. Chro. par. XVII. — ² Regem scilicet, sed imp. IV.

ciis frequentaverit: exulcerabat animos Orthodoxorum pro libertate Ecclesiae aestuantium. Quod patet ex litteris Guidonis archiepiscopi Viennensis, qui fuit postea Callistus papa, modo autem legatus Apostolicæ Sedis, qui Viennæ hoc anno contra isthæc ab Henrico scelera perpetrata Concilium celebravit decimo septimo kalendas Octobris, cui inter alios episcopos interfuit, inno et præfuit pro legato (quod impeditioris esset lingue) S. Godfredus episcopus Ambianensis, ut testatur ejus temporis scriptor Nicolaus in Vita ipsius¹. Sed et interfuit huic Concilio Viennensi sanctus Ilugo episcopus Gratianopolitanus, inquit Guido abbas Carthusiæ in Vita ipsius, « qui præ cunctis, ut Henricus, qui sic enormiter in Paschalem papam peccasset, excommunicaretur, in eodem Viennensi Concilio effectus. Porro ibidem ista decreta scripta esse reperiuntur:

13. « Investituram episcopatum et abbatiarum et omnium ecclesiasticarum rerum de manu laica, sanctæ Romanæ Ecclesiæ auctoritatem sequentes, hæresim esse judicamus.

« Scriptum illud seu privilegium, quod a domno Paschali papa violenter Henricus rex de investituris, de anathemate in persona sua non sponte extorsit: in virtute sancti Spiritus damnatum, atque irritum esse et nullius beate memoriæ judicamus fieri

« Henricum Teutonicorum regem, qui simulata pace Romam veniens, post data sacramenta domno papæ Paschali vitæ, membrorum, malæ captionis, refutationis investiturarum, eundem domnum papam in Sede Apostolica ante corpus beati Petri, post osculationem pedis, oris et faciei, prodicione, perjurio et sacrilegio, velut aller Judas, cum cardinalibus episcopis et archiepiscopis, et multis Romanorum nobilibus tradidit, cepit et raptum in castra insignibus Apostolicis exiit, et indigne atque inhoneste irrisum tractavit, et ab eo nefandissimum et detestabile scriptum violenter extorsit: excommunicamus, anathematizamus, et a gremio sanctæ matris Ecclesiæ sequestramus, donec his omnibus abrenuntiatis, plenam satisfactionem Ecclesiæ exhibeat ». Hactenus decreta Concilii Viennensis, quæ archiepiscopus legatus Romam confirmanda misit, his tunc ad eundem Paschalem Pontificem litteris synodalibus datis:

14. « Domno sancto et dulcissimo patri Paschali, Guido Viennensis archiepiscopus, et Apostolicæ Sedis legatus, et ceteri omnes episcopi et abbates, qui Viennensi affuimus Concilio, debitam subjectionem et obedientiam.

Sanctæ paternitatis vestre mandata sequentes, apud Viennam convenimus, ibique cooperante gratia Spiritus sancti, de investituris, de captione vestra et vestrorum, de perjuriis regis, de pessimo illo pacto et privilegio, quod a vestra majestate violenter extorsit, tractare diligenter curavimus. Af-

fuere legati regis, litteras bullatas, quasi de parte vestra ad eum missas, audacter prætendentes, in quibus erga eum vester bonus affectus pacis et concordie et perfectæ amicitie significabatur. Quas nimirum post Concilium, quod in præterita ultima Quadragesima Romæ celebrastis, se recepisse, et sibi missas idem rex testabatur. Cumque super his multa nobis incenteretur admiratio, memores tamen litterarum illarum, quas humilitati nostræ, illarum etiam, quas Gerardo Engolismensi episcopo et vestræ Sedis legato de bona justitiæ perseverantia miseratis: totius sanctæ Ecclesiæ et nostræ fidei ruinam evitare cupientes, ad Dei honorem et vestrum animam, canonicam viam aggressi sumus.

15. « Igitur dictante sancto Spiritu investituram omnem rei Ecclesiasticæ de manu laica hæresim esse judicavimus.

« Scriptum illud, quod rex a vestra simplicitate extorsit, damnavimus.

« In ipsum etiam regem nominatum, et solemniter, et unanimiter sententiam anathematis injecimus. Et nunc, domne pater, vestram, sicut dignum est, majestatem suppliciter exoramus, ut quod pro sanctæ Ecclesiæ fidei robore, pro Dei et vestro honore fecimus, auctoritate Apostolica solemniter confirmetis. Cujus confirmationis argumentum per apertas nobis litteras significare dignemini, quas etiam (ut gaudium nostrum sit plenum) alteri alteri destinare possimus. Et quoniam principum terræ pars maxima, et universi fere populi multitudo in hac re nobiscum sentit: in remissionem peccatorum suorum omnibus injungatis, ut si necesse fuerit, auxilium nobis, et patriæ unanimiter ferant.

16. « Illud etiam cum debita reverentia vestræ suggerimus pietati, quod si nobiscum in his steteritis, si hoc sicut rogamus, confirmaveritis; si deinceps ab ipsius crudelissimi tyranni et nuntiorum ejus litteris, locutione, muneribus abstinueritis: unanimiter nos, sicut decet, habebitis filios et fideles. Si vero (quod minime credimus) aliam viam aggredi ceperitis, et nostræ paternitatis assertiones prædictas roborare nolueritis: propitius sit nobis Deus, quia nos a vestra subjectione et obedientia repellitis. Valet ». Istis hæc in Codice subjecta leguntur: « Anno ab Incarnatione Domini, millesimo centesimo duodecimo, Indictione quinta, decimo septimo kalendas Octobris, Concilium hoc Viennense celebratum est ». Quod autem ad confirmationem spectat, Paschalis papa confirmare distulit; vixque impulsu Cononis Prænestini episcopi cardinalis post annos quatuor, nempe Redemptoris anno millesimo centesimo decimo sexto, in Lateranensi Concilio confirmavit omnia, quæ per legatos gesta essent, nominalim vero per eundem archiepiscopum Viennensem, ut suo loco patebit.

17. Sic igitur Paschalis papa, qui hactenus summa gloria Pontificatum universalis Ecclesiæ

¹ Nic. in Vita S. Godfr. I, tit. c. 7. die VIII Nov. apud Sur. lom. VI.

administrasset : ab anno superiori, quo ea quæ vidimus perpetravit, Apostolicæ constantiæ succis nervis, visus est languescere et hebescere, cum nec tot undique, sive ab his qui essent Romæ, sive in provinciis, stimulis agitatus, in Henricum sacrilegum insurrexerit eundemque anathemate condemnaverit, nimis tenax custos præstiti imo per vim et metum extorti juramenti. Sed et quod ejusdem proditoris usum amicitiae retinuerit, et quod ex adverso undique magno animo insurgentes (ut vidisti) et zelo Catholicæ Ecclesiæ libertatis læsæ æstuantes Patres represserit : magnam ipse sibi notam inussit ; summam vero laudem sibi pepererunt cardinales atque legati cum cæteris, qui se ipsum per tot annos admonitionis stimulis agitariunt, sicque renitentem patientissime tolerarunt, ut nullum sint passi conflari schisma, nec in Ecclesia adeo inmane scelus inultum relinqui in perpetuam Sedis Apostolicæ ignominiam. Ita divina providentia in eadem sacrosancta Sede Apostolica dispensante, ut cum languescit caput, membra ad defensionem fortius roborentur, nec sinant tyrannos irrumperere, vel quæcumque adversa in Ecclesiam prævalere.

18. Ceterum, quod audisti in eodem Concilio Viennensi statutum, hæresim esse de manu laica investituram accipere : sic intelliges, secundum ea quæ ex epistola Joannis archiepiscopi Lugdunensis sunt superius recitata, non scilicet quod sit hæresis, ipsas investturas dispensando concedere, sed asserere atque defendere de jure esse et debere fieri per laicos investturas, id hæresim esse, cum id sit falsum dogma, bonis moribus et sacris Patrum institutionibus repugnans, in Ecclesiam introducere. Quod tamen crimen nihil penitus est, quod jure Paschali papæ objici aliquo modo poterit, cum sive litteris ad diversos datis, sive verbis in Conciliis semper testatus atque professus sit, se de investituris firmiter tenere, quæ prædecessores Gregorius Septimus atque Urbanus constituisset.

19. *Adalbertus archiepiscopus Moguntinus mutatus pro Pontifice contra Henricum.* — Quod vero non cardinales tantum, sed et in provinciis episcopi (ut vidisti), pro defensione Ecclesiæ adversus imperatorem uno juncti spiritu insurrexerint : fuit summa laude dignum. Quod vero etiam hostes qui tantorum malorum auctores fieri, adversus imperatorem pro Ecclesia steterint : id quidem omnem superavit admirationem ; ut plane illud Davidicum de re tanta usurpare licuerit : « Illic est mutatio dextere Excelsi ». Cum ille ipse imperatoris cancellarius Albertus, cujus consilio potissimum usus imperator, tot tantaque indigna in Paschalem Pontificem perpetraverat : idem, inquam, ipse, qui ob mercedem impietatis, anno superiori archiepiscopatum Moguntinum acceperat : hic tantus simul ac infatus accepit episcopales,

mutatus in virum alterum, veritatem propugnare aggressus sit et pugnare contra Pontificis Romani persecutores ; in primis vero contra ipsum imperatorem quoad vixit, in dies magis magisque constanter minime prætermiserit ; nec destitit aliquando, quamvis extrema quæque sit pati coactus, donec victoriam de recuperata prodita libertate sancta Ecclesia fuerit consecuta. Urspergensis hujus temporis historicus quamvis favens Henrico, huncque sugillans, ut in imperatorem infidum, per singulos ferme annos res ab Adalberto gestas, detrahendo licet potius quam laudando, commemorat.

20. Atque primo de archiepiscopatu Moguntino eidem collato anno superiore post scelus admissum sic : « Habita post hæc Moguntie curia, Adalbertum cancellarium suum dudum in eandem cathedram electum baculo et annulo investivit ». Ita ipse. Hoc autem anno agens de Viennensi archiepiscopo, per Germaniam anathema in imperatorem declamante et plurimos commovente : inter alios eundem Adalbertum Moguntinum archiepiscopum in imperatorem concitasse tradit ; cujus rei causa idem Moguntinus ab eodem Henrico fuerit detrusus in carcerem, ubi triennio detentus, et usque ad ultimum fere spiritum cruciatus demum Moguntinorum in imperatorem insurgentium violentia coactus est imperator cum dimittere, ut suo loco dicetur. Egressum vero de carcere ea tantum curasse, quæ Romanus Pontifex per legatos monuisset, idem auctor per singulos ferme annos, ut dixi, res ab eo gestas narrans, pluribus exemplis ostendit, nosque suis locis pro temporis ratione dicemus. Sicque vides quasi miraculo factum, ut cum is, qui positus est in Sede Petri defensor veritatis, ex humanæ miseriæ conditione infirmus apparet : Deus ad defensionem ejus hostes ipsos quoque convertens, majoribus auxiliis comparatis ipsam defendat Ecclesiam.

21. *Alexii imperatoris Orientis legatio Romam.* — Præter hæc autem ad acerbissimum casum Romanæ Ecclesiæ, cujus fama pervasit quoque Orientem, permoti sunt etiam ejus æmuli ; ac insuper adversarii, quorum præcipuus imperator Alexius (ut auctor est Petrus Diaconus ¹) hoc anno misit legatos Romam ad Romanos ipsos, quibus condoleret ipsis, eisdemque omne quod posset sponderet auxilium et favorem. Res tum gesta sic ab ipso narratur : « Eodem anno (quo scilicet dictum Romanum Concilium celebratum est), Alexius imperator, cujus supra meminimus, strenuissimos ex suo imperio viros Romam cum suis litteris misit, quibus de injuria ab imperatore illata Pontifici atque Romanis, dolenter audisse significans : agebat postmodum gratias eosque laudabat, quod viriliter illi obstitissent. Atque ob id, si illorum animos paratos promptosque sensisset (ut sibi jam dudum nuntiatum fuerat) velle vel se, vel Joan-

¹ Psal. LXXVI.¹ Pet. Diacon. l. IV. c. 45.

nem suum filium, juxta morem priscorum fidelium imperatorum, a summo Pontifice Romæ coronam imperii sumere Romani : se omnino fore paratissimos ad ipsius nutum, per eosdem nuntios mandant. Mense autem Maio, elegerunt ex suis fere sexcentos ad imperatorem conducendum ; qui Casinum venientes, ab abbate honorifice excepti sunt, cum quibus legatos ad imperatorem ipse quoque direxit, servitium ei et orationis suffragia spondens. Igitur Constantinopolim profecti, cum imperatori una cum Romanis quid sibi abbas noster mandaverat exposuissent, censuit illum imperator inter amicos imperii habendum, ac per hujus cœnobii fratres octo libras solidorum, palliumque triacontasimon beato Benedicto direxit. Mandavitque insuper abbati ipsi, ut cum ipse Romam coronandus accederet, obviam illi Dyrrachium pergeret, atque cum eo ad Urbem usque properans, in ejus permaneret obsequio ». Hæc Petrus. Sed ista omnia in auras inanes evanuerunt, quo aliquo prætextu visa sunt fuisse tentata sub ejusmodi insuetæ legationis involucro.

22. *Causa Herimanni episcopi Augustani ad Paschalem papam delata.* — Hoc eodem anno qui numeratur quintus exactus, sextus vero inchoatus a tempore Concilii Guastaldensis, ad Paschalem papam querelæ antiquæ renovatæ, et aliæ innovatæ perlatae sunt adversus Herimannum intrusum episcopum Augustanum, qui (ut vidimus) ut lupus ingressus ad mactandum et perdendum oves aditum sibi paravit, ut vulpes vero venatores elusit; demum cum ut suis cuncta etiam sancta libidine conspurcasset : defertur rursus ad Paschalem Pontificem. Cujus rei gestæ historia ita ab Udalscalco, qui aderat, scripta narratur : « Deprehensus jam crebrius in stupri fœditate dictus Herimannus episcopus, post monialium seu aliarum meretricum scortum, perpetrasset in Ecclesia diffamatur adulterium. Cujus videlicet uxoris maritus, cum esset fortitudine ac bonitate conspicuus, facile totam civitatem potuisset in adulteri concitare necem; sed malens gladio spiritali iudicium sibi fieri quam materiali, Sedem petivit Apostolicam, de crimine facturus querimoniam. Augustensis vero Ecclesia tanto scelere quasi de gravissimo erroris somno expectrecta, ad eandem Sedem litteras dirigit, quid super tali episcopo sentire debeat, inquit, quæ infra positis informatur scriptis.

23. « Paschalis episcopus, servus servorum Dei, dilectis filiis Augustensis Ecclesiæ clericis, salutem et Apostolicam benedictionem.

« Pro querelis quibusdam, quæ super episcopo vestro ad audientiam nostram ante quinquennium pervenerunt, nos ei tunc temporis officium episcopale interdixisse meminimus, quia et a nostro id temporis legato bonæ memoriæ Richardo Albano episcopo sicut vestris significatur litteris, invitatus, et nostra præceptione præmonitus, nequaquam ad statutum terminum ante hos curavit occurrere, aut purgationis debitum exhibere. Ex illo namque

tempore nunquam interdicti remissionem nos ei fecisse meminimus... » Itucusque ex litteris Paschalis, quæ enim sequuntur, ex clericorum potius ad Paschalem papam Epistola esse noscuntur : quæ sic se habent : « Latorem præsentium Apostolicæ Sedis auxilium postulantes vestræ fraternitati (palernitati) commendamus, ut in querela quam adversus eum episcopum gerit, vos ejus justitiam tueamini. Datum Romæ, nono kal. Decembris ». Ita interversa legebantur in Codice : nam hæc de tempore datæ Epistolæ ad sequentem Epistolam pertinere noscuntur, quæ scripta legitur data ab eodem Pontifice ad archiepiscopum Moguntinum, his verbis :

24. « Paschalis episcopus, servus servorum Dei, Arnoldo venerabili fratri Moguntino archiepiscopo, salutem et Apostolicam benedictionem.

« Super cætera horrenda et infamia, quæ de persona Augustensis jamdudum ad Sedis Apostolicæ audientiam perlata sunt, nuper querelam Adalberti Augustensis civis lacrymabili suggestionem suscepimus. Quam nimirum personis Ecclesiasticis dicere et audire turpe est, sed ex ipsis Adalberti poteris relatione cognoscere. Tibi ergo, ad quem hujusmodi discussio pro metropolitanae dignitatis debito attinet, litterarum præsentium præceptione injungimus, ut hujusce negotii veritatem, convocatis fratribus, sollicita inquisitione discutias, et quod justitia exegerit decernas. Quod enim a vobis juste et rationabiliter, auctore Deo, statutum fuerit, nos ratum habebimus ». Itucusque Paschalis Epistola ad archiepiscopum Moguntinum, qui vocatum ad Synodum ad dicendam causam episcopum Augustanum, nec venientem excommunicavit, et cum adultero adulteram quoque pari sententia anathematis condemnavit, ut ex ejusdem archiepiscopi litteris Acta, quæ recitantur inferius, docent. Cæterum rursus ad imposturas, ad fraudes iterum recurrit episcopus, qui mendacium posuit fiduciam suam, atque usus comministro commenti Conrado canonico Augustanæ Ecclesiæ, fingit litteras ad Paschalem Pontificem : ait enim Udalscaleus : « Spreto episcopus salubriori consilio, et criminis conscius, solito mendacii armatur præsidio. Litteræ siquidem tanquam ex Augustensis Ecclesiæ persona finguntur per canonicum Conradum, et dictum fratrem Ratpolumem Apostolico diriguntur » ; quibus scilicet petebatur, ut causa ipsa cognoscenda ab eodem Paschali Pontifice Curienti injungeretur episcopo viciniore, prout apparet ex redditis litteris Paschalis ad eos quæ sic se habent :

25. « Paschalis episcopus, servus servorum Dei, dilectis filiis D. decano et cæteris Augustensis Ecclesiæ canonicis, salutem et Apostolicam benedictionem.

« Diu est quod frater noster Herimannus episcopus vesler de tribus apud nos fuit capitulis impetitus, de pravo videlicet electionis et consecrationis accessu, de conversatione perversa, et de

rerum Ecclesiasticarum distractione. Pro quibus ipso ab episcopali officio suspenso, terminus constitutus est, quo pars utraque ante nostram deberet presentiam convenire. Infra quem nimirum terminum confrater vester et concanonicus Conradus ad nos venit, et sicut ipse asserit, a vobis accepit quod episcopus liber esset, nisi illi constituto termino convenirent. Cum itaque nuper ante nos et de quibusdam aliis gravibus idem diffamaretur episcopus : cum his ad memoriam nostram etiam illa præterita redierunt. Unde opportunum duximus, causam ipsius, ne diutius Ecclesie detrimentum afferat, terminare. Sed quoniam propter difficultates itinerum et personæ infirmitatem, nostro nequit se offerre conspectui : confratri nostro Wido Curienti episcopo negotium istud providimus injungendum. Præcipimus ergo, ut ipse causam omnem diligentius audiat. Et si episcopus vester de rerum Ecclesiasticarum et de perverse conversationis vita emendationem fecerit, et de aliis quæ objecta sunt, tertia episcoporum, vel quinta presbyterorum manu se purgaverit, restitutionem interdicti sibi officii consequatur. Datum Benedicti kal. Aprilis ». Ita Paschalis, si tamen Paschalis, imo potius Paschalis nomine conficta a Conrado atque collega fuerunt : de quibus admodum idem, qui ista describebat, conquiretur Udalscalculus, qui inferius ait, Curientem hunc episcopum fuisse fratrem Conradi fraudis ipsius compositoris. Vides igitur iterum scriptis surreptiliis apud Paschalem, nefandum hominem ut innocentem in Ecclesia illa episcopum permansisse. Reliqua de eo sub Callisto papa actitata suo loco dicenda erunt. Sed quæ insuper ad hunc annum spectant memoriæ de rebus gestis sub Paschali, hæc habentur in titulo Sancti-Laurentii in Lucina :

26. *Craticula S. Laurentii educta, et aliæ SS. reliquæ inventæ Romæ.* — « Tempore domini Paschalis Secundi papæ, anno ejus xiii, millesimo centesimo duodecimo, Indictione quinta, sexto kal. Februarii, per manus ejusdem Pontificis craticula, super quam proculdubio beatus Laurentius emisit spiritum; de quodam altari veteri educta est, cum duabus ampullis vitreis mediis sanguine ejusdem martyris, quæ cum nonnullis diebus videretur a Romano populo, coram ejus multitudine per manus Leonis Ostiensis episcopi, sub hoc novo altari, IX kalendas Febr. recondita est.

« Ex sede vero marmorea sancti Laurentii in Lucina retro altare primum, ac rursum in tabula marmorea ejusdem Ecclesiæ (quæ item ad

præsentem annum spectant) hæc habentur quæ sequuntur :

27. « Anno Domini millesimo centesimo duodecimo, Indictione quinta, in kalendis Februarii, dedicatum est hoc altare per manus Leonis Ostiensis episcopi. Reliquiæ sanctorum martyrum in hoc venerabili loco hæc reconditæ sunt : S. Cornelli papæ, S. Dionysii papæ, Epiphani archiepiscopi, Paterniani episcopi, Concordii episc., Stephani protomartyris, Leonardi, Sisinii, Laurentii, D..... Potentiani, Eusebii, Vincentii et Peregrini, Romani, Marci, Marcelliani, Gervasii, Protasii, Eustabii, Agathæ, Cyriacæ, Martinæ, Sophiæ, Pistis, Elpis, Agapæ. A + α » Insuper ibidem hæc sequuntur.

28. « Anno Domini millesimo centesimo duodecimo, Indictione quinta, mense Octobri, die xv, anno vero xiii domini Paschalis Secundi papæ, quidam presbyter hujus Ecclesiæ, nomine Benedictus ducens secum quosdam laicos adiit Ecclesiam S. Stephani, in loco qui dicitur Aqua transversa, ubi sub altari inventi corpora sanctorum martyrum Pontiani, Eusebii, Vincentii et Peregrini : quæ inde auferens suis cum sociis in hanc Ecclesiam transtulit, et domno papæ Paschali, sicut res acta fuerat, intumavit. Quo audito, venerabilis Pontifex præcepit, ut in altari majori S. Laurentii sub craticula conderentur ; quod et factum est. Eodem quoque anno, idem presbyter invenit corpora sanctorum in via Ardeatina, Cordiani videlicet martyris, et Feliciæ virginis et martyris, et in majori altari jussu prælati Pontificis superpositus ». Hæc ibi de his quæ ad præsentem annum spectant : reliqua inferius suo loco.

29. *Arnulfus patriarcha Hierosolymitanus.* — Hoc eodem anno defuncto Gibelino Hierosolymitano patriarcha, eligitur archidiaconus ejus Ecclesiæ Arnulfus nomine, de quo sæpe superius, cujus detestabiles mores, opera nequissima Wilhelmus Tyrinus narrat¹. Ita plane cum ejusmodi eligerentur in episcopos, numen redditur Christianis infensum. Moritur vero eodem anno Tancredus princeps Antiochiæ insignis armis, sed præstantior pietate, qui habuit Rogerium successorem, et moribus plane degenerem.

Quo pariter anno, die duodecima Septembris illustris meritis S. Guido confessor post Hierosolymitanam peregrinationem iterum repelitum ex hac vita migravit, ut ejus Vitæ Acta scriptis data testantur. De eodem est mentio ea die in Romano Martyrologio.

¹ Will. Tyr. l. xxi. c. 15. 28. 29.

Anno periodi Græco-Romana 6605. — Anno Ære Hispan. 1150. — Anno Hegiræ 506, inchoato die 28 Junii, Fer. 6. — Jesu Christi 1112.

— Paschalis II papæ 14. — Henrici V reg. 7. imp. 2. Alexii Comneni imp. 33.

1. *Concilium Lateranense.* — A num. 1 ad 12. Concilium Lateranense, quod revocavit Privilegium a Paschali II Henrico imperatori concessum, celebratum hoc anno, non *V kalendas Aprilis*, ut per errorem amanuensium legitur in Actis hujus Concilii, a Nicolao Aragonio editis, sed *decimo quinto kalendas Aprilis*, uti habent Urspergensis in Chron. et Simeon Dunelmensis in Hist. de Gest. Reg. Angl. Paschalis II, inquit Trithemius in Chronico Ilirsaugiensi, clericorum suorum importunitate compulsus, Romæ apud Sanctum-Joannem Lateranensem « in medio mensis Martii Concilium cxxv episcoporum celebravit », in quo episcopi omnes, qui fuerunt presentes, uno ore unaque sententia Privilegium illud, quod papa compulsus imperatori tradiderat super investitura episcoporum, condemnaverunt. « Perfecta Charta, acclamatum est ab universo Concilio : Amen, amen », inquit Aragonius cardinalis, qui subdit : « Hæc Charta lecta est a Gerardo Engolismensi, Leone Ostiensi, Galone Legionensi episcopis, Roberto cardinali tit. S. Ensebii, et Gregorio cardinali tit. SS. xii Apostolorum, et communi aliorum consensu ». Sed tam tom. x Concil. quam apud Baronium num. 10, loco *Galone*, vel *Galone Legionensi* episc., legendum *Galone Leonensi* episc. Is enim episcopus erat *Leonii* in Minori Britannia sub archiepiscopatu Turonensi, quod oppidum nunc vulgo vocatur *S. Paul de Leon*. Obiter observa diem xviii Martii incidere hoc anno in feriam secundam, qua de more Concilia inchoabantur.

2. *In eo Investituræ prohibitæ.* — Labbeus tom. n Biblioth. pag. 249, recitat Historiam pontificum et comitum Engolismensium ab auctore anonymo qui vixit anno mclix scriptam, in qua de Gerardo episcopo Engolismensi cap. 35, inquit : « Cum Romam tenderet, audito quod Paschalis papa Concilium congregasset maximum diebus illis, ad jubileum telendit (sed legendum cum alio exemplari correctiori, maximis diebus ad Urbem telendit), in quam, quamvis facile venit, tamen residentes episcopi cum domino papa in Concilio invenit. Causa siquidem qua convenerant, talis fuit. Imperator siquidem Henricus papam Paschalem, cardinales et nobiles Romanos ceperat. Hac occasione, papa

reliquit investituram imperatori, quæ fiebant per anulum et virgam, et super sacrosancta juravit propria manu et curia ejus imperatorem se non excommunicare pro investituris. Quia vero papa rem illicitam fecerat, deponere se a papatu promiserat ; et ad Poncias insulas habitu religioso exul ire disposuerat, si investituram salvo sacramento ad pristinam libertatem, etc. In qua re nullum remedium a toto Concilio inveniri poterat. Gerardus episcopus requisitus, tandem tale consilium dedit, quod investituræ revocari poterant salvo sacramento (a Paschali scilicet II facto) ita tamen quod imperator dans investituram non excommunicaretur. Quod consilium omne Concilium laudans dixit : Non tu locutus es, sed Spiritus sanctus in ore tuo. Placuit itaque papæ et toti Concilio, quatenus Gerardus episcopus, per quem Deus Ecclesiæ suæ tale consilium reseraverat, cum quodam cardinale Diviniaco, vel Dunciaco (nomen illud corruptum) ad imperatorem dirigeretur, qui voluntatem imperatoris consuleret, quatenus Ecclesiæ Romanæ investituram exponeret (forte responderet), alioquin habitum consilium revelaretur. Quod cum in præsentia imperatoris supradictus pontifex Gerardus mirabiliter perorasset, et a cancellario imperatoris, qui illius interpres erat, singula exponerentur, vehementer tumultus ortus est in curia, ita quod Coloniensis archiepiscopus, qui eum solemniter in hospitio suo susceperat (in Galliis namque discipulus Gerardi fuerat), de vita illius dubitans, dixit : Magister, maximum scandalum generasti in curia nostra. Indignans autem Gerardus respondit : Tibi sit scandalum, mihi est Evangelium. Dedit tamen Gerardo pontifici imperator multa munera ». Addit Petrus Blesensis in Continuat. Ingulphi pag. 128, ubi de hoc Concilio agit, Gerardum tunc fuisse in *Aquitania* Sedis Apostolicæ legatum.

3. *Sed Henricus V excommunicatus non fuit.* — Gerardi consilium secutum est Concilium Lateranense, in quo, ut habet Baronius ex Aragonio card. num. 8. Patres non Henricum imp., sed Privilegium ab eo extortum excommunicarunt : « Nos omnes in hoc S. Concilio cum eodem domino papa congregati, canonica censura, et Ecclesiastica au-

cloritate, iudicio S. Spiritus damnamus et irritum esse iudicamus (nempe Privilegium illud), atque omnino cassamus, et ne quid auctoritatis et efficacitatis habeat, penitus excommunicamus.

4. *In Concilio Viennensi excommunicatus.* — A num. 12 ad 19. Concilii Viennensis hoc anno habiti meminit chronographus Malleacensis, illudque *XVII kalendas Octobris* celebratum, ut habet Codex a Baronio num. 16 citatus. In eo investitura episcopatum et abbatiarum, de manu laica suscepta, haeresis iudicata est, et Henricus Germaniae rex excommunicatus, quod Paschalem II indigne tractasset, ac detestabile scriptum violenter extorsisset. Patres in Synodali Epistola ad Paschalem II data, et a Baronio num. 14 relata, testantur, legatos Henrici regis ad illud Concilium venisse; sed hunc in eodem excommunicatum esse. Pertinet ad istud Concilium, quod Sugerius in lib. de Vita Ludovici regis hujus nominis VI, cap. 9 scribit: « Verum si quaerit quis, quare dominus ita tepide fecerit, noverit, quia Ecclesia, percusso pastore et collateralibus, languebat, et paene eam tyrannus ancillans, quia non erat qui resisteret, tanquam propriam occupabat. Cui certum facto dedit experimentum, quod cum fratres Ecclesiae columnas ad tuitionem et Ecclesiae reparationem, quomodoecumque solvi fecisset, pacemque Ecclesiae qualemcumque reformasset, ad eremum solitudinis confugit, moramque ibi perpetuam fecisset, si universali Ecclesiae et Romanorum violentia coactum non reduxisset. Verum Dominus J. C. Redemptor et defensor Ecclesiae suae, nec eam diutius conculcari, nec imperatorem impune ferre sustinuit. Qui etenim nec tenti, nec fide obligati fuerant, causam Ecclesiae fluctuantis suscipientes, domini designati Ludovici (nempe Ludovici hujus nominis VI) suffragio et consilio in Gallicana celebri Concilio collecta Ecclesia (sc. in urbe Viennensi) imperatorem tyrannum anathemate innodantes mucrone beati Petri perferendum. Malmesburiensis lib. 3 de Reg. Angl. ait, omnem Galliam Ecclesiastici zeli vigore intentasse in Henricum imp. nec dissimulasse execrari. Tom. 10 Concil. pag. 786, recitatur Epistola Paschalis II *Guidoni Viennensi archiep. Sedis Apostolicae vicario*, et cæteris archiep. episc. et abbatibus *Viennae congregatis*. Data *Laterani XIII kal. Novemb.*, qua Paschalis II quæ *statuta sunt ibi, rata suscepit et confirmat*. Denique Guigo prior Carthusiensis in Vita sancti Hugonis episc. Gratianopolitani Innocentio papæ hujus nominis II dicata, cap. 5 de hoc sancto præseulo scribit: « Ipse præ cunctis, ut apud Viennam excommunicaretur, effecit ».

5. *Obitus Gibelini patriarchæ Hierosolym.* — Ad num. 29. Guichenonus in Biblioth. Sebustiana refert Epistolam A. Hierosolymitani patriarchæ, datam A. Fructuariensi abbati, in cuius fine legitur: « Dominus Gibellinus pater pastorque, patriarcha noster, vir piissimus, obiit VIII idus Aprilis. Hoc scriptum nostrum confirmatum est in Capi-

tulo S. Sepulchri Jerusalem VI kal. Maii, anno Dominicæ Incarnat. MCM, Indict. v, captionis Jerusalem a Christianis anno XIII, domini Arnulphi patriarchæ anno 1, præsidente in Jerusalem domino Balduino rege invictissimo anno XII, regnante Domino nostro Jesu Christo ». Ita Guichenonus ex Archivo monasterii Fructuariensis Cent. 2, cap. 73.

6. *Canonici Mediolanenses Grosulanum archiep. munere suo dejiciunt.* — Puricellus in Monum. Basilicæ Ambrosianæ refert ex Landolfo Juniori in Chron. depositionem Grosulani ex archiepiscopatu Mediolanensi, quem per tot annos turbaverat: « Mane facto, videlicet kalendis Januarii (currentis Christi anni) Ardericus idem cum vic domino et cæteris sibi conjuratis, in abijciendo Grosulanum, vel in suscitando aut in alium erigendo archiepiscopum, catholice pulpitem ascendit (in publico sc. cœtu), et facto silentio in populo, coram illa maxima multitudine loquens dixit: Nos, salva reverentia papæ, secundum auctoritatem et justitiam canonum dicimus, quod Grosulanus non potest esse archiepiscopus Mediolani (mirum Ecclesiasticos summi Pontificis iudicium abrogasse). Isto dicto et confirmato, illico presbyterum Jordanum de Clivi elegit in archiepiscopum. Hoc cum presbyter Liprandus audivit, agrotus a lecto surrexit, et in altero die illi electo piscem obtulit dicens: Gratias Deo, quod nunc mihi testimonium perhibetis; sed hi qui te elegerunt in archiepiscopum, male fecerunt, et Deus illis misereatur; quia tu posses esse unus bonus presbyter de clastro; nunc autem masculus esto (id est, virum te præbe). Cum autem electus ille, nec aliquis de tot circumstantibus ipsi presbytero respondisset, presbyter ipse propinquius accessit, et osculatus Jordanum sicut unum de cæteris sacerdotibus reliquit ».

7. *Paschalis II Grosulani causam tuetur.* — Landulfus cap. 23 fuse narrat ordinationem Jordani factam ab ejus suffraganeis Arialdo Genuensi, Mamardo Taurinensi, et Landolfo Astensi; qua de re a multis murmur excitatum: « In quo murmure », inquit Landulfus, « episcopi Azo Aquensis et Ardericus Laudensis (veteres Grosulani amici) videntur fuisse. Vigilante (id est, vigente) itaque hoc murmure, Mamardus Taurinensis illico Romam adivit, et stolam petiit, (a Paschali II, qui jam in Grosulani favorem sententiam dixerat), et rediens inde, stolam et chartam continentem sacramentum quod papa poscebat a Jordano, attulit; alioquin stolam dari Jordano papa prohibuit, sicut idem Mamardus notavit. At Jordanus per sex menses jejunos fuit, et stolam non habuit ». Sequentibus capitulis Landulfus refert, Liprandum avunculum suum contestato denuntiasset, se jure adversus Grosulanum egisse; cumque in extrema versaretur ætate, Mediolano egredi statuit, ne inter eos moreretur, qui animum obfirmarant in defensionem hominis, cujus causam Deus reprobase videretur: « Delatus est ipse presbyter », inquit

Landulfus cap. 24, «ad Pontidii monasterium (in diœcesi Bergamensi silum), me nesciente. In quo monasterio coram monachis et fratribus a festo S. Nicolai sc. a die vi mensis Decemb.) usque ad festum Epiphaniæ Domini splendide vixit». Liprandum usque ad annum MCXIII vitam prorogasse, certis testimoniis liquet, sicque, quod notandum, unico tantum mense in eo monasterio fuit.

8. *Liprandi presbyteri miraculis clari obitus.* — Pergit Landulfus cap. 25 apud Puricellum in Monum. Basilic. Ambros. num 17, et lib. 7 de SS. Arialdo et Herlemb. cap. 90 : « Igitur presbytero Liprando in Pontidii monasterio fama de Grosulano redeunte a Hierosolymis, aures Jordani et ordinariarum ejus implevit, et Mamardus Taurinensis episcopus iterum Mediolanum venit : atque stolam quam in præcedenti (legendum *præsenti*, Landulfus enim de anno MCXII, qui Liprandi obitum antecessit, verba facit) siue sacramento Jordano dare noluit neque dedit; nunc videlicet in festo S. Nicolai, quando presbyter Liprandus Pontidium intravit, super altare S. Ambrosii posuit : et Jordanus osculans eam, de ipso altari assumpsit, que positio et assumptio absentibus ordinariis et primiceriis facta fuit ». Puricellus in priori loco laudato, ut ostendat nihil mutandum esse in hoc loco, *quam in præcedenti*, ait Landulfum annum a die XXV mensis Martii exordiri, et Mamardum episcopum Taurinensem ante diem XXV Martii Jordanum pallium dare noluisse, ideoque *in anno præcedenti*. Sed vanum illud effugium; præterquam enim quod Landulfus annum a kalendis Januariis auspiciari videtur, disertæque assertit, a Mamardi reditu cum pallio Jordanum eo per sex menses tantum privatum fuisse, a die XXV Martii ad diem VI mensis Decemb. quo S. Nicolaus colitur, menses novem intercurrunt. Landulfus cap. 24, *Liprandi* presbyteri in vita et post mortem miraculis clari, sed in sanctorum numerum non relati obitum narrat, et inquit : « Spiritum emisit in ejusdem (Epiphaniæ) nocte », anno sc. MCXIII.

9. *Obitus Henrici patris Alphonsi Primi Lusitanæ regis.* — Hoc anno mortuus est Henricus Portugalliæ comes, qui *Tarasiam* filiam Alphonsi VI Castellæ regis ex contubernio cum Semena Munionis, uxorem duxerat. Eum Mariana lib. 1 de Reb. Hisp. cap. 4, aliique usque ad nostra tempora e domo Lotharingica proditisse tradidere, licet Rodericus lib. 6, cap. 24, diserte scripsisset, eum fuisse « ex partibus Bisontinis, et congermanum Raimundi comitis patris imperatoris », Alphonsi scilicet VII. Verum nunc inter eruditos convenit Henricum, cujus filius *Alphonsus* primus Portugalliæ rex fuit, ut suo loco videbimus, ex Burgundiæ ducibus originem traxisse. Audiendum anonymus, cujus Historiæ a Roberto ad mortem Philippi I regis fragmentum recitat Duchesuius tom. 4, qui loquens de Alphonso VI Castellæ rege scribit : « Hic filium Roberti ducis Burgundionum (fratris Henrici I Francorum regis) duxit in uxorem, nomine

Constantiam, de qua suscepit filiam (Urracam appellatam, quæ mater fuit Alphonsi VII Castellæ regis) quam in matrimonium dedit Raimundo comiti, qui comitatum trans Ararim tenebat. (Raimundus iste filius fuit Guillelmi II Burgundiæ comitis, ubi Vesontio sita). Alteram filiam (nomine Tarasiam), sed non ex conjugali thoro natam, Anrico uno filiorum filii ejusdem ducis Roberti dedit. Illosque ambos in ipsis finibus Hispaniæ contra Agarenorum collocavit imperium ». Quare ex Roberto Burgundiæ duce natus est Henricus, et ex Henrico Henricus alter Portugalliæ comes, de quo hic sermo, cujus successores ad solium regium evecti fidem Christianam in remotissimas nationes intulerunt. Porro Henricum Portugalliæ comitem exeunte æstate currentis anni, die incerto, vita functum esse, sepultumque Bracaræ Æra MCL, testatur *Petrus Comodus Bonelus*, Portugalliæ princeps, qui id ante tria sæcula litteris mandavit, et ex eo exscripsit Faria auctor Lusitanicæ Europæ tom. II. De præliis adversus Saracenos, tam ab Henrico, quam a Raimundo comitibus gestis, legendus Sandovalius in Alfonso VI.

10. *Comitatus Provinciæ videtur Barcinonensis.* — Victoriis de Saracenis reportatis inclauit etiam hoc tempore *Raimundus* Berengarii comes Barcinonensis, hujus nominis III, non vero IV, ut perperam Boucheus lib. 9. Hist. comitum Provinciæ cap. 1, qui et primus ex ea gente Provinciæ comes fuit : « Habuit uxorem », inquit anonymus de Gestis comitum Barcinon. cap. 16, « filiam Girberti (melius, Gilberti) comitis Provinciæ, nomine Dulciam, et ipsum comitatum Provinciæ, et Amiliani (id est, Æmiliani comitatus in Linguadocia positi, gallice Milhaud), cum ipsa acquisivit ». Gilberto enim comite Provinciæ incerto anno demortuo *Gerberga* uxor ejus *Dulciam* utriusque filiam Raimundo Barcinonensium comiti currenti anno in matrimonium dedit, ut liquet ex Instrumentis a Baluzio in Appendice ad Marcum Hispanicam cap. 347, et duobus aliis capitibus sequentibus recitatis. Hæc verba prioris *kal. Februarii* scripti : « Ego Girberga comitissa dono tibi Dulciæ filiæ meæ omnem honorem, quem habeo, vel habere debeo quocumque modo, comitatum videlicet Provinciæ et Gavaldensis, et Carladensis, et illum honorem qui est in comitatu Ruthenensi. Quæ omnia advenierunt mihi voce parentum meorum et largitione viri mei Girberti comitis patris tui ». In secundo Instrumento, *III nonas Febr.* hujus anni dato legitur : « Ego Gerberga comitissa Arelatensis tradeo tibi Raimundo Berengarii comiti filiam meam in conjugium, nomine Dulcem, cum omni honore meo, et cum illo honore, qui fuit Girberti comitis patris puellæ, nominatim Provinciam, quod ibi habeo et habere debeo, et comitatum Gavallanensem, et vicecomitatum Garladensem, et omnem honorem quem habeo in comitatu Ruthenense, sicut fuit Girberti comitis, etc. Advenierunt autem mihi comitissæ Gerbergæ præscripta omnia,

partim voce parentum meorum, partim largitione viri mei Girberti comitis ».

11. *Matrimonio Dulciæ cum Raimundo comite Barcinonensi.* — In tertio, *idus Januarii* hujus etiam anni scripto, habetur: « Ego Dulcia Barcinonensis et Provinciæ comitissa, per hanc scripturam omnibus innotescere volo qualiter tibi venerabili Raimundo, quem Dei dispositione mihi justo matrimonio copulavi, dono atque concedo totum meum honorem, quem habeo vel habere debeo per paternam sive maternam hæreditatem, vel alio modo in Provincia et in Rutbenensi comitatu vel ubicumque sit, etc. » Fuit Gilberto et Gerbergæ altera filia *Stephania* appellata, quæ antea nupserrat *Raimundo de Baucio*, cujus mentio in Instrumento anno MCL scripto, et in eadem Appendice

cap. 410 relato, in quo dicitur: « *Stephania* uxor Raimundi de Baucio filii sui partem et hæreditatem in comitatu Provinciæ requirebant; sed præfatus comes Berengarius (filius Raimundi et Dulciæ) nihil se inde eis dare debere recognoscebat, quia Gilbertus comes pater suus, et mater sua Gerbergæ comitissa eam maritaverant et hæreditaverant ». Quibus ex actis tria, quæ hactenus tenebris involuta fuere, in apertam lucem educuntur. Primo, *Dulciam* comitissam Barcinonensem Gilberto et Gerbergæ comitum Provinciæ filiam extitisse: secundo, *Dulciam* sororem habuisse nomine *Stephaniam*, et denique *Gilbertum* Provinciæ præfuisse ac Gilbertum II comitem Provinciæ fictitium esse. Quæ ad illustrationem Historiarum comitatum Barcinonæ et Provinciæ obiter dicta sunt.

PASCHALIS II ANNUS 14. — CHRISTI 1113.

1. *Paschalis papa Beneventi dat litteras patriarchæ Antiocheno et Balduino regi.* — Millesimus centesimus decimus tertius annus jam incipit, Indictione sexta, quo Paschalis papa pergens Beneventum, ibi Synodum celebravit, in qua quæstiones provinciales, et alia judicialia definivit. Agit de his Petrus Diaconus.

Quod ad res Beneventanas pertinet, locuplex nacti sumus monumentum rerum temporis hujus, nempe Chronicon Beneventanum ad nos missum a Maximiliano a Palombaria Beneventano archiepiscopo, amico charissimo, in quo res gestæ ab hoc anno narrantur usque ad annum Redemptoris millesimum centesimum quadagesimum, continuens annos duntaxat viginti septem, sincera plane et integra fide conscriptum, utpote qui scripsit ea, vel vidit, vel ab iis qui viderunt audivit. Auctor Folens nomine dictus est, quem etiam Beneventanum patria fuisse liquet ex ejus scriptis, et in eadem Beneventana Ecclesia clericatus munere functum; ex quo quidem pleraque sunt Annalibus inserenda. Et quod ad præsentem annum spectat, idem auctor pluribus narrat ab eodem Paschali papa eidem civitati titulo comestabuli præfectum fuisse Landulphum, cognomento de Græcia, insignem fortitudine et audacia militem, qui cives tueretur

a frequentibus Northmannorum vicinorum incursionibus, idque plus satis ab eo præstitum, adeo ut non satis ipsi fuerit tueri sua, sed etiam invaderet aliena, castra eorum capiens atque succendens. Quorum gratia accidit, ut Northmanni magis magisque concitarentur in Beneventanos, et conflatis militum copiis, agrum Beneventanum assiduè grassationibus in magnum pauperum detrimentum infestarent. Quæ omnia pluribus auctor narrat.

2. Dum autem adhuc Beneventi Paschalis papa moraretur, ab Antiocheno patriarcha legationem accepit de conservandis antiquis juribus ejusdem Ecclesiæ, quibus in diœcesi videretur imminuta ex concessione facta ab eodem Pontifice Ecclesiæ Hierosolymitanæ.

Hæc accepta legatione, Paschalis papa, quod nunquam eo animo fuisset, ut quod minimum inferret præjudicium Antiochenæ Ecclesiæ, prout superioribus a se datis litteris ad eundem patriarcham Antiochenum significarat; tamen expressius id voluit declarasse, ne aliquis in mente ejus scrupulus remaneret. Quamobrem ad eum hæc litteras dedit pacis et unitatis conciliatrices¹:

¹ Apud Tyr. de hel. sacr. I. XI. c. 28.

« Paschalis episcopus, servus servorum Dei, coepiscopo Bernardo Antiocheno patriarchæ, salutem et Apostolicam benedictionem.

« Sicut aliis litteris fraternitati tuæ scripsimus, nos et personam tuam, et Ecclesiam tibi commissam plena caritate diligimus; nec ullo modo volumus honorem vestræ dignitatis imminui, quin Antiocheni patriarchatus prælatio, sicut præteritis temporibus conservata est, ita etiam in futurum integra, præstante Domino, conservetur. Illud autem, quod filio nostro Balduino Hierosolymitano regi per nuntios suos intercedentes concessimus, charitatem vestram omnino conturbare non debet; sic enim in eis scriptum est: Ecclesiarum, quæ illis in partibus fuerunt vel sunt, terminos atque possessiones diutina infidelium possessio tyrannisque confudit. Cum itaque certos ejus fines assignare præsentis deliberatione nequeamus, tuis non immerito precibus duximus annuendum; ut quia pro Hierosolymitanæ Ecclesiæ sublimatione personam tuam extremis periculis devovisti, quascunque infidelium urbes ceperis vel cepisti, ejusdem Ecclesiæ regimini dignitatisque subjacere. Eodem sensu etiam illa verba discutienda sunt, quæ felix memorie Gibelino Hierosolymitano patriarchæ de civitatibus atque provinciis scripsimus, quæ supradicti Balduini regis prudentia, exercituum cum sequentium sanguine per Dei gratiam acquisita sunt. Siquidem Ecclesias illas, quibus certi fines assignari possunt, quarum termini ac possessiones diutina possessione ac tyrannide confusi non sunt, et ipsarum Ecclesiarum urbes illi volumus Ecclesiæ subjacere, ad quam ex antiqua sciuntur justitia pertinere. Non enim volumus aut propter principum potentiam Ecclesiasticam minui dignitatem, aut pro Ecclesiastica dignitate principum potentiam mutilari. Data Beneventi decimo quinto kalendas Aprilis ».

3. Ad Balduinum autem de iisdem sic scribit:

« Paschalis episcopus, servus servorum Dei, clarissimo Balduino illustri Hierosolymitanorum regi, salutem et Apostolicam benedictionem.

« Concessio illa, quam nos petitioni tuæ accomodavimus, ut quascunque infidelium urbes ceperis vel cepisti, Hierosolymitanæ Ecclesiæ regimini dignitatisque subjaceant, non parum cum fratrem nostrum Bernardum patriarcham, tum universam Antiochenam turbavit Ecclesiam. Cum enim nos concessionem tibi super Ecclesiis indulerimus, quarum terminos et possessiones diutina infidelium possessio et tyrannis confudit, illi eas Ecclesias a Hierosolymitano patriarcha, te connivente invasas, conqueuntur, de quibus ambiguitas nulla sit, quin eas etiam Turcorum vel Sarracenorum temporibus sedes Antiochena possederit, et eorum episcopi etiam infidelium oppressi tyrannide, Antiochenorum patriarchæ obedientiam exhibeant. Porro nos litteris ad supradictum patriarcham missis Antiocheni patriarchatus prælationem, sicut ab antiquis patribus distributa et

præteritis temporibus conservata est, ita etiam in infinitum integram servari sanximus. Tuam igitur strenuitatem monemus, et monentes præcipimus, ne a te invasiones hujusmodi fieri (ut manifesta est veritas) permittantur, sed unaquæque Ecclesia justitiæ suæ limitibus perfruatur. Nec enim possumus manifeste sanctis Patrum nostrorum constitutionibus obviare, nec omnino volumus, aut pro principum potentia Ecclesiasticam minui dignitatem, aut pro Ecclesiastica dignitate principum potentiam mutilari; ne apud nos occasione alterutra pax turbetur Ecclesiæ. Clericis quoque Hierosolymitanis per præsentia scripta præcipimus, quandoquidem paternas possessiones et patriam pro Ecclesiæ (ut creditur) exaltatione, pro religionis observantia reliquerunt, ut Hierosolymitana Ecclesia sint contenti, nec injuste aut procaciter ea usurpare contendant, quæ certo sciuntur ad jus Antiochenæ Ecclesiæ pertinere. Omnipotens Dominus sua te in omnibus dextera protegat, de hostibus Ecclesiæ triumphare concedat. Data Beneventi decimo quinto kalendas Aprilis ». Hæcenus Paschalis litteræ. Inde reversus est Romam: ubi manens, excommunicavit Robertum comitem, quod castellum contra Beneventanos erexisset, et monitus non destitisset: qui tamen, suadente Landulpho Beneventano comestabulo, illud est demolitus; sicut ab ipso Paschali absolvi meruit.

4. *Balduini illicitum conjugium.* — Quod autem ad res Hierosolymitanas pertinet, hoc anno execrabile illud facinus perpetratur, ut Arnulpho Hierosolymitano patriarcha agente, Balduinus, vivente adhuc prima conjuge, duceret in uxorem comitissam Siciliæ, quæ uxor fuerat Rogerii comitis. Ita infenso numine, res Christianorum cœperunt in deterius labi. Hæc pluribus Tyrius¹. Quomodo autem per Paschalem papam legato misso, ab eo Arnulphus fuit depositus, suo loco dicetur. Quo anno Turcæ, qui Hierosolymam capturi advenerant, re infecta recedentes, monasterium Christianorum in monte Thabor constitutum everunt, et monachos omnes occidunt. Hæc in Appendice ad Sigebertum hoc anno. Erant isti sanctissimi viri germina Cluniacensium, vitæ religiosæ observantissimi, ad quos extat Petri Cluniacensis abbatibus Epistola², qua eorundem commendatur monastica observantia. Quamobrem jure æstimare liceat, quot monachos casos, tot laureatos martyrii coronam assumptos in celum.

Hoc item anno Paschalis papa restituit Ecclesiam S. Bartholomæi in Tiberina insula. Docet hoc inscriptio superius recitata, cum de ejusdem Apostoli corporis translatione egimus in fine decimi Annalium tom. Ibi post tetrastichon hæc verba adhuc sculpta leguntur: « Tempore Paschalis Secundi papæ, anno Dominicæ Incarnationis millesimo

¹ Wil. Tyr. l. xi. c. 21. — ² Pet. Clun. l. iv. Ep. LXIV.

centesimo decimo tertio, Indictione septima, mense Aprilis, die quarta ».

5. *S. Bernardi a sæculo conversio.* — Ille insuper est annus, qui S. Bernardi conversione a sæculo ad Cisterciensium Ecclesiæ Dei extitit memorabilis: cum ipse doctrina, vitæ exemplo, sanctorum fecunda sobole magnopere Ecclesiam illustravit. De eo enim ita Willelmus abbas S. Theodorici, sancti viri sanctus collega in Vite ipsius primordiis: « Anno ab Indictione Domini millesimo centesimo decimo tertio, a constitutione domus

Cisterciensis decimo quinto, servus Dei Bernardus annos natus circa viginti duos, Cistercium ingressus cum sociis amplius quam triginta, sub abbate Stephano, suavi iugo Christi collum submisit. Ab illa autem die dedit Dominus benedictionem, et vinea illa Domini Sabaoth dedit fructum suum, extendens palmites suos usque ad mare, et ultra mare propagines suas etc. » Quantum enim proficua fuerit Dei Ecclesiæ sancta ista plantatio, haud facile est verbis assequi.

ANNO periodi Græco-Romanæ 6606. — Anno Æræ Hispan. 1151. — Anno Hegiræ 507, inchoato die 17 Junii, Fer. 3. — Jesu Christi 1113.

— Paschalis II papæ 5. — Henrici V reg. 8, imp. 3, Alexii Comneni imp. 33.

1. *Collectiones duæ scriptorum rerum Beneventi gestarum.* — Ad num. 1. Baronius partem tantum Chronici Beneventani res in ea urbe ab hoc au. ad mxi gestas complectentem vidit; verum post ejus mortem duæ antiquorum Chronicorum, in quibus recensentur acta a principibus Beneventanis et Capuanis, Collectiones prodierunt. Prior Neapoli in-quarto ab Antonio Carraciolo anno mxcxvi, alteraque in eadem urbe etiam in-quarto anno mxcxlii a Camilio Peregrinio publicata, hæcque auctior et notis chronologicis ac Dissertationibus illustrata. Complectitur ea Collectio Historias Lupi Protospatæ, Heremperti, anonymi Cassinensis, et Falconis Beneventani, eaque magno nobis usui fuit. Verum *Falco*, non ab hoc anno, sed ab anno mci usque ad mxi. Chronicon suum exorditur, et anni initium repetit a die prima mensis Martii, non vero a die vicesima quinta ejusdem mensis, ut alii qui ab eodem mense annum auspicantur, quod Peregrinius pag. 152 et seq. compluribus exemplis demonstrat. Ille auctor res sui temporis, easque præcipue quæ Beneventi contigerunt, fuisse et accurate describit.

2. *De Falcone ex illis scriptoribus uno.* — Baronius ait, *Falconem* in Beneventana Ecclesia clericatus munere functum esse; sed Peregrinius citatus pag. 148, ostendit eum ea in re deceptum, et *Falconem* ex laicali munere notarii et scribæ sacri Beneventani palatii in iudicem Beneventanum adscitum fuisse, jamque Notarium suarum initio scripserat: « Chronologus Falco nostratum (Neapolitanorum seu Italarum) mediæ ætatis ob fideliem nec prorsus ineptam diligentiam facile

princeps, munere, ut ipse de se tradit ad annum mxxxiii et mxxxvii, notarius et scriba sacri Beneventani palatii, tandemque in sua eademque patria judex. Chronicon illud principio et fine mutilum ad nos pervenit. Pag. 149. Peregrinius, p. 149, hanc vocem *judex* his verbis explicat; judex haud prætorem definiendis libris constitutum, sed in decurionum, sive dicas senatorum, album credas relatum, qui per ea tempora plerisque in locis iudices appellabantur ». Ita ille.

3. *Paschalis II anno superiori exeunte Beneventum venit.* — « Anno mxi, vi Indictionis mense Martio », inquit Falco, sed ibi annus recte descriptus, et Indictio vitiose, legendumque v *Indictionis*. In ejus enim Chronico Indictione sexta præsens annus recte notatur, et annis sequentibus tam Indictiones quam anni accurate collocantur. Amanuenses turbavit exemplar Falconis, ubi ad annum mxi habetur, v *Indictionis*, sine ulla narratione. Anno itaque Christi mxi, « papa Paschalis faciens Romæ Synodum », inquit Falco, « fregit pactum quod fecerat cum Henrico rege » (mense sc. Aprilis anno mxi, ut ibidem ostendimus). Pergit Falco: « Apostolicus hæc audiens (nempe seditiones a Beneventanis exeunte anno mxi, excitatas), nec mora, secundo die instante mensis Decembris adventi Beneventum ». Causa tumultuum hæc erat, « quod alii Landulphum Burellum, alii Ansonem civitatis rectorem sine domini papæ voluntate constituere satagebant ». Fallitur itaque Baronius, quando scribit Paschalem hoc anno Beneventum adventasse, cum eam in urbem mense Decembri anni superioris pervenerit.

4. *Ibi Synodum celebrat, et seditiosos coerces.*

— Cum in ea urbe hoc anno versaretur, « mense Februario Synodum constituit. Synodo autem facta, cum in sacro Beneventano palatio assisteret, prædictamque conspirationem factam pro parte illius Landulphi Borelli deprehendens concives vocari iussit, (ubi loquitur Falco de proditiōne ad urbem occupandam tunc detecta) et quod quidam civium pro ipsius Landulphi auxilio turres Portæ summæ noctu cepissent, indeque munitionum ipsarum custodes ejicientes, una tantum nocte eas virtute tenuerunt. Tandem Deo opitulante et Beneventanorum complurium fidelium solatio, quorum mens erat sanior, turres ipsæ vindictæ sunt, et B. Petro restitutæ. At cives ipsi tale domino papæ dedere responsum, ut quos suspectos haberet vocaret, et ab eis pleniter justitiam sumeret. Quid plura? Curia ordinata vocantur malorum fautores, vocantur suspecti, tandemque legitime sententia extensa quosdam captos vidimus, quosdam ejectos, et domos quorundam fisco deditas, quorundam destructas.

5. *Securitati urbis consulit.* — « Istit taliter actis (mense scilicet Februarii anni mxcxiii), xiv anno Pontificatus supradicti domini papæ, mense Martio, vi Indictionis, (præfata Falco cum anno mci, labente scilicet, copulavit, sequentia cum mense Martio hujus Christi anni, juxta eam quam servat methodum) dominus ipse Apostolicus, civitatem Beneventanam variis prædorum persecutionibus ex omni parte oppressam adspiciens, et civium bona (a Normandis undique vicinantibus quotidie) distrahi et confundi, cognoscens consilio habito Landulphum de Græcia militem præstantem et solemem, Comestabulum Beneventanorum instituit, quatenus..... civitas..... secunda..... persisteret ». Ad quæ verba Peregrinus hæc notat: « His consonat Petrus Diaconus in Auctario ad Ostiensem lib. 4, cap. 50, qui præsentem adventum Paschalis in has partes numero facit secundum, priorem statuens in anno mci, mense Octobri, ut tradit libro eodem, cap. 33, assertoremque habet nostrum Falconem, dicentem tunc illum mense Novembri ordinasse Landulphum archiepiscopum Beneventi ». Ita Peregrinus. De priori Paschalis II Beneventum accessu anno mci cum eodem Falcone eginus.

6. *Varie Paschalis II litteræ in Orientem missæ.* — Ad num. 2 et seq. Wilhelmus Tyrius lib. 11 cap. 27, narrat, Balduinum Hierosolymorum regem per nuntios a Paschali II petisse, ut quascumque urbes « sibi posset vindicare, omnes ditioni et regimini Hierosolymitanæ Ecclesiæ subjacerent »; quod obtinuit rescripto dato *Laterani V idus Julii*. Ad petitionem quoque Balduini regis Paschalis II *Gibelino* patriarchæ Hierosolymorum scripsit, eique concessit urbes et provincias, « quæ gloriosi regis Balduini, ac exercituum eum sequentium sanguine, per Dei gratiam acquisitæ sunt ». Eæ litteræ nullo die aut mense notatæ.

Quod cum accepisset Bernardus Antiochenorum patriarcha, de illata Ecclesiæ suæ manifesta injuria plurimum conquestus est apud Paschalem II, qui litteris *datis Laterani, VII idus Augusti*, et a Tyrio ibidem recitatis, respondit, actum id esse propter ignorantiam et locorum prolixam longinquitatem, seque jus et honorem quibusque Ecclesiis conservaturum. Et volens hanc mentem suam interpretari, litteras dedit ad eundem Bernardum Antiochenum patriarcham, a Baronio num. 2 recitatas, quæ dicuntur *datæ Beneventi XV kalendas Aprilis*. Eadem die Balduino Hierosolymorum regalias litteras dedit, a Baronio num. 2 relatas, mandataque, « ut Hierosolymitanæ Ecclesiæ sint jure contenti; nec injuste aut præciter usurpare ea contendant, quæ certo sciuntur ad jus Antiochenæ Ecclesiæ pertinere ». His relatis Baronius scribit eas litteras, *postquam Benevento reversus est Romam*, Paschalem II dedisse. Verum, uti observat Peregrinus in Notis ad Falconem pag. 154, Paschalis II una eademque die, nempe *XV kalend. April.*, utrasque litteras Beneventi et Romæ scribere non potuit.

7. *Suis annis redduntur.* — Conatus est Peregrinus præfatas litteras uno tenore a Wilhelmo Tyrio recitatas suis annis reddere; sed cum animus non advertisset ad errorem, qui cubat in subscriptione litterarum a Paschali II ad Balduinum regem datarum, oleum et operam perdidit. Litteræ itaque Paschalis, *datæ Laterani V idus Julii*, aliæque ad Gibelinum patriarcham Hierosolymorum sine loco et die scriptæ, ad eundem annum eundemque diem pertinent; cumque Gibelinus anno mxcii, VIII idus Aprilis e vivis excesserit, utraque Epistola, *V idus Julii*, uno aut altero anno ante Gibelini obitum proculdubio data. Baronius, qui annum emortualem *Gibelini* recte notarat, litteras ad eum a Paschali II directas et a Tyrio anno mxcv, sicuti omnes jam memoratæ, relatas prætermisit, quia, uti existimo, hunc nodumolvere non potuit. Tum cum Bernardus patriarcha Antiochenus questus esset apud Paschalem II de concessione illa patriarchæ Hierosolymitano in suum præjudicium facta, Paschalis II Epistolam ad eum scripsit, quæ dicitur *data Laterani VII idus Augusti*, idque anno mci aut insequenti. Currenti vero anno, dum Beneventi esset, ad Bernardum Antiochenum patriarcham iterum scripsit, atque se jam revocasse concessionem factam *felicis memoriæ Gibelino Hierosolymitano patriarchæ*. Quare Paschalis II *litteræ XV kal. Aprilis Beneventi*, ubi in versabatur, indubitanter data, eademque die ac in eadem urbe de prioris concessionis a se in præjudicium Ecclesiæ Antiochenæ factæ revocatione ad Balduinum Hierosolymorum regem scripsit; sed librarium errorem hæc litteræ dicuntur *datæ Laterani XV kal. Aprilis*, loco *Beneventi XV kal. Aprilis*, qui error manifestus est: cum uno eodemque die Paschalis II Romæ et Beneventi esse non potuerit. Tyrius vero cum lib. 11, cap. 26,

cum de legatione a Paschali II adversus *Arnulphum* patriarcham Hierosolymorum *ad partes Syriae*, anno *mcxv* directa verba fecit, capitibus sequentibus ejus occasione litterarum ejusdem papae tam ad Gbelinum, quam ad Bernardum patriarchas, mentionem habet.

8. *Beneventani a Roberto Sclavo et a Normannis vexati.* — Interim cum *Robertus Sclavus*, qui castellum ad montem Sabletam contra Beneventanos erexerat, nollet illud diruere, et eosdem vexare non cessaret : « Prædictus Apostolicus hæc Romæ audiens (Benevento sc. redux) illum excommunicavit, donec castellum illud civitati contrarium delevisset, quod facere ipse Robertus contempsit », inquit Falco, qui addit, Landulphum Comestabilem cum Roberto ea de re egisse, et castellum illud evernisse : « Castellum illud destruxit, et fronditus delevit, duobus videlicet equis optimis et ducentis solidis datis ». Quod cum Normanni accepissent, sævius in Beneventanos grassati sunt, ut Baronius num. 1 narrat ex Falcone.

9. *Infauste nuptiæ Balduini regis Jerosolymorum cum comitissa Siciliæ.* — Ad num. 4. Willelmus Tyrius lib. 14, cap. 21, loquens de rebus hoc anno gestis ait, comitissam Siciliæ viduam Rogerii Roberti Guiscardii fratris et comitis Siciliæ, matrimonium inisse cum *Balduino* Hierosolymorum rege, consilio et consensu Rogerii filii sui, qui postea Siciliæ rex declaratus fuit; sed eas nuptias Arnulphi patriarchæ Hierosolymorum malitia factas infelicem exitum sortitas esse, quia prior Balduini uxor apud Edessam *adhuc in rebus agebat humanis*. Ea Siciliæ comitissa erat *Adelais de Monteferrato*, tertia uxor Rogerii, dimissa postea a Balduino rege, ut infra referemus.

10. *Ad reditum Grosulani ex Oriente, Mediolani tumultuation.* — Hoc anno Mediolani, *Grosulano* ex Oriente reduce, rursus tumultuatum, ut narrat Landulphus Junior cap. 26, apud Puricellum in Monumentis Basil. Ambros. num. 326 : « In Augusto, qui fuit octavus mensis ab illo in quo presbyter Liprandus obiit; in isto enim mense Grosulanus a Hierosolymis rediit, et prius post legem factam de eo ignitam intravit Mediolanum (Grosulanus enim bis mense Augusto Mediolanum rediit : primo, anno *mcv*, postquam a Paschali II in sedem Mediolanensem restitutus fuit, et secundo, hoc anno, post suum e peregrinatione Hierosolymitana reditum), ibique tunc ad locum, ubi sanctus Victor carceratus fuit, suos labores, suosque thesauros sacerdotibus, et viris quos sibi putabat fideles, explicavit : et explicando induxit benignitatem, qua pavit et induit Jordanum, quem fecerat subdiaconum. Videbat etiam instare adversus Jordanum; eo quod dicebat eum sibi jurasse, et degerasse (tuerat Jordanus unus ex ardentioribus Grosulani fautoribus, ut indicat Landulphus cap. 24 de sequenti miraculo a Liprando perpetrato sermonem habens) ipso quoque presbytero Liprando existente in vita, cum Jordanus et ceteri Grosula-

nistæ calumniabantur eum et suam legem, nobiles milites Placentinus de faucibus mortis ad laudem ejus ereptus est ».

11. *Grosulanus Mediolano exire coactus fuit.* — Jordanus qua vi, qua pecunia sibi possessionem archiepiscopatus Mediolanensis asseruit, uti narrat Landulphus cap. 26, apud Puricellum citatum n. 320 : « Quod fortis et valida turba Jordani non sustinuit : sed assumptis armis maximum insultum in Grosulanum fecit. Ipsius autem Grosulani caterva undique concurrens, ferendo et inferendo vulnerationes, orbitationes, et occisiones multas in equis et in hominibus fortiter et prudenter ipsum Grosulanum per quindecim dies in turribus de porta Romana servavit ». Paucis interpositis : « Plurima igitur utrinque strages Anselmus de Pustella suadet, ut legitima Synodus dirimendæ liti congregaretur; sed in hujus consilii mercedem a Jordano excommunicationem reportat ». Ex eodem Landulpho cap. 27 discimus, Grosulanum a Jordano accepta ingenti pecunie summa, non tantum cum suis, sed etiam cum Jordanistis communicasse. Tandem Grosulanus « Mediolano exivit, atque Placentiam adivit, ibique in monasterio Sancti Marci, quod est congregationis Vallis-Umbrosæ hospitalus est ». Cumque Grosulanus ad archiepiscopatum Mediolanensem rursus animum adjecisset, Paschalis II ad causam hanc dirimendam Concilium Romæ indixit, ut anno *mcxvi* videbimus.

12. *Moritur Sigebertus chronographus.* — Obiit hoc anno *Sigebertus*, Gemblacensis in Brabantia monachus, vir in omni scientia litterarum incomparabilis ingenii, inquit Robertus de Monte ejus Chronici continuator, qui tamen in schismaticorum castris militavit. De anno ejus emortuali inter omnes convenit, dies vero notatur in brevi ad Sigeberti Chronicon Appendice ab anno *mcxiii* ad *mcxlii*, tom. I Biblioth. Labbei, in qua ad annum *mcxiii*, dicitur, *quarto nonas Octobris obiit*. Chronicon ejus a Miræo juxta antiquum Codicem Gemblacensem editum; ad hunc usque annum perducitur eo excluso. Quare *Sigebertum* bis illud opus publicasse oportet, cum Robertus de Monte qui illud continuavit asserat *Sigebertum* Chronicon suum perduxisse « usque ad annum Incarnat. *mc*; ego exinde », inquit : quod et Matthæus Parisiensis ad annum Christi *mc*, et Radulfus de Diceto in Abbreviat. Chronicorum etiam tradunt. In libello de Gestis abbatum Gemblacensium, tom. vi Spicillegii Dacheriani, ejus virtutes, scripta, dies et annus mortis exacte narrantur. De ejus etiam Operibus legendus Labbeus in dissert. de Script. Ecclesiast.

13. *Floret in Gallia Petrus Abaelardus.* — Florebat hoc tempore in Gallia *Petrus Abaelardus* Nannetensis, qui calamitatum suarum Historiam composuit in sua prima Epistola ad *Amicum* scripta. Natus ad litterarum disciplinam, ut ipsemet asserit, facile eam didicit, præsertimque Dialecti-

cam, cujus discendæ percupidus diversas disputando perambulavit provincias. Parisios venit ad Guillelmum Campellensem, *in hoc tunc magisterio re et fama præcipuum*, cui primo acceptus, sed postmodum gravissimus fuit, quod nonnullas ejus sententias refelleret, et de suo ingenio nimis præsumens, adhuc adolescentulus Meloduni paucis lencis Parisiis dissiti, et Campello vico, ubi *Guillelmus* in lucem venit, scholas aperuisset: « Et ab hoc », ait Abaelardus, « scholarum nostrarum exordio, ita in arte Dialectica nomen meum dilatari cæpit, ut non solum condiscipulorum meorum verumetiam ipsius magistri fama contracta paulatim extingueretur. Hinc factum, ut de me amplius ipse præsumens, ad castrum Corboli, quod Parisiæ urbi vicinus est, quantocius scholam nostram transferrem: ut inde videlicet crebriores disputationis assultus nostra daret importunitas »; sed legendum videtur, inquit Duchesnius mox citandus, *opportunitas*. Interim Guillelmus Campellensis currenti anno, ut docet Albericus in Chron., episcopus Catalaunensis creatus, a consueto Philosophiæ docendæ studio non destitit, et ad ejus scholam *Abaelardus* Corbolio Parisios venit. Sed cum rursus magistro gravissimus esset, Dialecticæ docendæ ipsemet operam dedit, et post aliquod tempus *Melodunum* reversus scholas ibi rursus aperuit. Tandem *Parisiis* sacram Scripturam legit, et *Petrus Lombardus* postea episcopus Parisiensis, ejus Theologia usus in compositione Sententiarum, ut prodit Joannes Cornubiensis, ipsius Lombardi discipulus, in suo Eulogio ad Alexandrum III papam.

14. *Ejus et Heloissæ amores.* — *Fulbertus* canonicus Ecclesiæ Cathedralis Parisiensis eum rogavit, ut succisivis horis *Heloissam* nobilem virginem neptem suam, forma præstantem, doctrina præstantiorem, et tota Gallia ob eruditionem, eximias animi dotes, et peritiam Hebraicæ, Græcæ et Latinae linguæ postea celebrem, tam linguis quam philosophicis, aliisque liberalibus artibus imbueret. Verum *Abaelardus* amoribus ejus illaqueatus, ipsam quoque suis illaqueavit, et ex ea

concepit filium nomine *Astrolabium*; quod scelus honestis nuptiis, consentiente *Fulberto*, immnuere voluit, et dum interim scholis vacaret, *Heloissam* cum Argentoliensibus monialibus reclusit, monitam tamen ne velum indueret. At *Fulbertus* et *Heloissæ* consanguinei eum sibi illisisse putantes, qua parte peccaverat crudeliter mutilarunt, et eunuchum effecerunt; indeque ipse pudore suffusus, monachum in monasterio Sancti-Dionysii juxta Parisios induit, ipsa vero ab episcopo velum accepit in monasterio Argenteolensi Lutetia vicino, in quo postmodum priorissa et abbatissa fuit.

15. *Ejus schola celeberrima.* — Cum non desisterent scholares ad eum accedere, et tam intra quam extra Galliam ejus fama dilataretur, rogatus est *Adamus* Sancti-Dionysii abbas, ut eum docere permitteret, quod et ab eo obtinere: « Vix autem de vulnere adhuc convalesceram », inquit Abaelardus, « cum ad me confluentes clerici tam ab abbate nostro, quam a me ipso continuis supplicationibus efflagitabant. quatenus quod hactenus pecunia vel laudis cupiditate egeram, nunc amore Dei operam studio darem ». Notat Abaelardus San-Dionysianos monachos eo tempore licentiori vitæ fuisse deditissimos: « Quorum quidem intolerabiles spurcicias ego frequenter atque vehementer, modo privatim, modo publice redarguens, omnibus me supra modum onerosum atque odiosum effeci. Qui ad quotidianam discipulorum nostrorum instantiam, maxime gavisus occasionem nacti sunt, qua me a se removerent ». Sed dum magnorum et parvorum odiis in eum ardentibus ipse nimis ingenio suo indulget, aliosque despicit, sicut manus ejus contra omnes, sic manus omnium contra eum armanur, et variis erroribus insimulatur, uti anno mxxi, de Concilio Snessionensi, annoque mxxi, de Senonensi verba facientes videbimus. Quæ paulo fusius nobis tractanda fuere, quia ejus opera nonnisi post mortem Baronii, annoque mxxvi ab Andrea Duchesnio e tenebris eruta et Notis illustrata. Vide quæ ad. mclxvi de Gozino abbate Aquicinctensi dicemus.

PASCHALIS II ANNUS 15. — CHRISTI 1114.

1. *Synodus habita Ceperani.* — Sequitur annus Christi millesimus centesimus decimus quartus, Indictione septima, quo Paschalis papa Ceperani ad ripam fluminis Liris Synodum habuit: de qua Petrus Diaconus meminit¹. In ea conquestus est archiepiscopus Cosentinus adversus Rogerium Siciliae comitem, quod ab eo archiepiscopatu dejectus, coactus fuit monachus fieri Cassinensis. Ubi autem Paschalis ad Cassinensem abbatem pertinere ex privilegio ista cognovit, per eum dirimi voluit controversiam. Qui ad pedes Pontificis eum vestes monasticas deponere iussit, sicque liber est permissus abire. « In eodem Concilio (pergit Petrus) idem Apostolicus Willelmum ducem Apuliae Calabriaeque constituit. Ibi etiam cum Landulphus Beneventanus archiepiscopus accusatus fuisset, nec se purgare valeret, ad objecta refellere, ad hoc monasterium fugit. Sed quo pacto nostrae congregationis interventu et episcopatus ordinem, et papae gratiam recuperaverit, suo loco dicemus ». Hucusque de Synodo Petrus.

2. *Legationes a papa Beneventum ad turbas sedandas.* — Quae autem hoc anno eandem Synodum facta praecesserint, ac etiam quae pertinent ad causam Beneventani archiepiscopi cum Paschali Romano Pontifice, ex vetere scripto Codice Chronici Beneventani omnia hic describenda sunt, nempe de legatione missa ad Paschalem papam pro pace cum Northmannis incunda, dum nimis eorum armis infestarentur agri, de qua legatione ita ibi: « Miserunt ad predictum papam Landulphum archipraesulem et Rachiisium S. Modesti abbatem, ut ei necessitatem ex omni parte quam patiebantur intimarent. Ipsi autem abeuntes, quam viderant afflictionem domino papae patefecerunt, cum lacrymando precales, ut gregi commisso, sicut pastor bonus, subvenire dignaretur. Necessitate enim domnus papa, cogente scilicet, eis praecepit, ut pacem civitati, prout melius possent, facerent, et pauperibus subvenirent, ne Petrus Apostolus civitatem acquisitam occasione ista perderet: quidquid autem de pacis consilio invenissent, ipsi remitte-

rent. Archiepiscopus vero Roma reversus aliter quam acceperat faciens etc. » Missum fuisse cum archiepiscopo Petrum Portuensensem episcopum et Romanulum diaconum, cardinales, inferius auctor narrat. Verum archiepiscopum non quae erant pacis, sed quae belli operatum constat; nempe, ut nec pacem cum Northmannis componeret, sed civile acerrimum bellum contaret, ut pluribus ibi narratur, quae brevitatis causa omittimus; quorum haec est summa. Quod reversus Beneventum, conatus sit Landulphum comestabulum eidem civitati ab eodem Paschale Pontifice praefectum in ordinem redigere; quo facere denegante, cives qui stabant pro archiepiscopo ad arma conversi sunt, quos placare studens, habuit coram omnibus concionem, sed frustra, reclamante populo et invadente iudicis domum. Legati vero cum nequidquam proficerent, relicto in munitione palatii comestabulo, recessere. Cum interim non patiente comestabulo se ab honore deponi, pugnatum est utrimque: de qua pugna auctor Chronici qui aderat, ait: « Quosdam, inquit, ex utraque parte vidimus vulneratos, etc. » Et inter alios idem comestabulus graviter sanciat, cum ab universo populo in palatio obsideretur, nec evadendi alia ratio esset, abdicavit se magistratu illo; atque pollicitus est juramento, quaecumque populus preceperit implere. Itaque coactus recessit, inde se conferens ad montem Fuscum.

3. Quomodo autem, ubi ista audivit Paschalis papa, rursus aliam legationem miserit Beneventum, sic auctor narrat: « Cumque huiusmodi facti ultra quam credi potest nefandi, predicti Apostolici aures fama tetigisset, tactus dolore inbrinsecus super dilecti filii sui comestabuli expulsionem, lacrymis, sicut audivimus, manantibus, spiritus infremuit, atque confestim archipraesulem Landulphum ab omni, quod acceperat a Sede Romana, officio coram omnibus deposuit, simulque omnes suos sequaces anathematis vinculo donec satisfacerent alligavit. Sed si lectoris charitati asperum non videbitur, quid post illorum excommunicationem actum Beneventi sit, non praetereundo exarabo. Dominum enim testor, nihil aliud posuisse preter

¹ Petr. Diacon. l. IV. c. 51.

quod viderim, et quod audierim scripsisse. Tali igitur anathematis sententia in B. Petri adversarios longe lateque divulgata, delegavit præfatus Apostolicus Beneventum Anastasium Albanensem episcopum, cardinalem Romanæ Sedis idoneum, cupiens quod Beneventanus populus deberet se recognoscere. Cardinalem enim, ipso hospitato triduo post, cæsus omnis Beneventanorum in sacro palatio convenit; ubi enarratis omnibus quæ accidissent, Anastasius in verba ista prorumpens, inquit: Ad videnda, domini et fratres, quæ Romæ audierat dominus noster papa negotia et investiganda, nos pro certo sciatis esse delegatos. Deinde prout melius, Deo annunte, poterimus, circa pacis et utilitatis vestre proficuum nos die nocturne consilium et auxilium præbebitis. His et similibus taliter prolatis, unusquisque ad propria remeavit. Mansit ibi legatus, quousque cuncta componeret, populumque obsequentem Pontifici redderet: indeque ad Paschalem papam, a quo missus fuerat, reversus est. Quæ autem hæc secuta sint de Concilio eodem habito Ceperani, ita idem auctor enarrat:

4. *Quæ acta in Synodo Ceperani habita.* — « Cumque cardinalis ipse Anastasius Romanam peteret, domnus papa Paschalis archiepiscopis, episcopis et abbatibus congregatis, mense Octobri primum post ejus regressum adveniente, Ceperani Concilium constituit. Ad cujus sacri conventus frequentiam Willelmus dux et Robertus princeps mille fere equitum numero congregato, perrexere. Landulphus vero de Græcia comestabulus, qui fuerat Benevento expulsus, litteris domni papæ specialibus ad idem sacrum Concilium accersitus honorifice commovevit; qui a domno papa officiosissime susceptus est. Ille namque fraudem devitans Northmannorum, navigio quodam secure transfretavit. Jordanus autem comes timens, multorum suorum pondere delictorum oneratus, ad tale tantumque Concilium pergere, legatos suos direxit. Archiepiscopus autem Landulphus, suffraganeis suis convocatis, innumeraque auri et argenti copia congregata, cum comite Roberto ad conventum illum tetendit. Talibus igitur et tantis Patribus proceribusque congregatis, in medio conventus ipsius, die videlicet sabbati, ducatum Italiæ, Calabriae et Siciliæ, duci præfatus Apostolicus concessit.

5. « Concilio itaque mirabiliter ordinato, Apostolicus ipse coram omnibus super Landulpho Beneventano archipræsule lacrymabiliter, quomodo comestabulum suum expulisset, condolens conquerebatur. Ipse vero archipræsul nolens, imo timens conventum illum sine loci et officii restitutione ingredi, apud insulam Ceperano proximam hospitatus est. At ubi Apostolicum querentem ipse comperit, quosdam Romanorum, præfectum etiam vocari jussit, videlicet, utcumque potuissent, veniam pro eo a domno papa impetrarent. Quin etiam dicebat archiepiscopus, se domino papæ de

omnibus illatis querimoniis iustitiam facturum, satisfacturum scilicet, dummodo ut locum in Concilio et officium restitueret. Hoc Apostolicus audito, Concilio habito, locum et officium ei redintegravit. Cumque taliter restitutus fuisset, sine mora conventum illum, die videlicet Lunæ, cum comite Roberto adivit. Quid plura? eo redintegrato, per diaconum quemdam ad faciendam iustitiam in præsentiarum Apostolicus vocari præcepit. Qui continuo surgens, voce lacrymabili coram omnibus respondens, inquit: Primitus gratias ago Deo, et beato Petro, et tibi domine pater, vestram implorans paternitatem, ut misericordiam super me, quem sanctitas vestra apud Beneventanam sedem plantavit, habeatis. Apostolicus autem hæc audiens: Unde vis, inquit, ut misericordiam super vos habeamus? Et archipræsul: Domine, quia adivi vos erga me indignatos fuisse, cum me litteris vestris accersiri jussistis, et ad curiam vestram non adveni. Et Apostolicus: Quare, inquit, ut ipse asseris, vocatus ad curiam non advenisti? Archiepiscopus ad hæc: Domine, inquit, pater, timore coactus vestre indignationis, et quorundam minantium, non adveni vocatus, eo quod legatos meos episcopos non accepisti, et alium quemdam, quem prius direxeram, adversarii nostri verberibus afflixere. Ad hæc Apostolicus: Legatos tuos, quos dicis, episcopos non audivi, quia iustitiæ faciendæ, satisfaciendæ videlicet, verba non dixerant, imo mercedis causa pro vobis et non pietatis venerant. Legatum autem alium, quem verberatum profiteris, nec vidi, neque ejus fama ullo modo ad nos pervenit. Cumque archiepiscopus ipse ex omni parte detentum se videret, si veris rem egisset responsionibus, aliam adinvenit excusationem, dicens: Domine pater, terminum competentem mihi veniendi non tribuisti: unde si placeret venire, non potui, nec (ut dixi) metu compulsus ausus fui. Et Apostolicus: Sed quia litteras nostras contempsisti, asseris nunc, te non per contemptum, sed metu tantum ad nos non venisse. Competentem terminum veniendi proculdubio largitus fui, ab idibus scilicet Aprilis, et sex mensium spatio interposito. Inde litteras vocationis in medio legi præcepit. Verumtamen isti fratres (subdit Apostolicus) deliberent, et quam opponis excusationem, canonicam fuisse decernant. Et præcepit quibusdam cardinalibus et archiepiscopis Romanæ Sedis iudicibus, ut in partem semoti, super inijuncti excusationem archiepiscopi sententiam extenderent. At ipsi in partem euntes, sententiam illam diu ventilantes, taliter in conspectum omnium regressi iudices ipsi protulerunt:

« Domne archiepiscope Beneventane, quoniam non pro contemptu, sed pro metu asseris vocatus ad curiam te non venisse, dicimus et iudicamus hanc canonicam non esse excusationem. Iudicio autem talium tantorumque patrum extenso, capitula sanctorum Patrum prædecessorum coram omnibus exhiberi et legi Apostolicus præcepit,

confirmata scilicet in conventibus et super contemploribus ordinata. His itaque perfectis, super tanto et tali negotio a cardinalibus et episcopis diu ventilatum est. Sed quid plura? Diaconus eum iterato ad iustitiam faciendam, satisfaciendum videlicet, vocavit. Qui continuo assurgens: Unde, inquit? Et Apostolicus: Quia suscepisti regalia B. Petri extra nostram voluntatem, et claves tenuisti portarum, et palatium invasisti, et Landulphum expulisti, et galeam sumpisti et clypeum, et Fulconem illum ad sacramentum compulisti, Northmannos introduxisti, et alia. Hoc ipse archiepiscopus audito respondit: Vere regalia B. Petri non alia de causa accepi, sed vestra pro fidelitate. Nam, cum Beneventi aderas, civitatem mihi commendasti: portarum vero claves non ego suscepim; hunc sane qui eas retinet, fidelem tuum omnino confitemur. Clypeum profecto non accepi: galeam quidem tui pro capitis munitione ne lapide aliquo opprimeret. Northmannos (ut dixisti) non introduxi, Longobardos vero sexdecim pro auxilio populi civitatem ingredi feci. Sacramentum Fulconis jussu suo factum fuisse, et populi injurandum, denegavit.

6. « His omnibus Apostolicis auditis, cardinalibus iterum et prefatis iudicibus precepit, ut super omnibus istis, et contemptis, sententiam exprimerent. Cumque archiepiscopus ipse huiusmodi preceptum (et ut ita dicam) terribile audisset: Willelmum ducem supra memoratum, et Robertum principem, et Petrum filium Leonis, necnon et episcopos exorabat, dicens: Domini proceres, et episcopi confratres, dominum nostrum papam Paschalem, precor, orate, ne me in conspectu omnium taliter confundat, et dedecoratum dimittat. Si vero ejus clementie placuerit, exilium petam et mare transfretabo. Tunc proceres ipsi euntes, pedibus domini papae advoluti, sicut archiepiscopus rogaverat, deprecati sunt: quod minime obtinere valuerunt. At ipsi iudices ex precepto euntes, licet dolendo et protelando, reversi sunt, ne tale super Landulphum archiep. darent iudicium. Iudicibus tamen ipsis adhuc, ut dixi, moram facientibus super sententiam, Apostolicus adiuvando precepit, ut per fidem quam B. Petro et ipsi deberent, quid canonicum esset dicendum dicerent.

7. « At episcopus Portuensis primus omnium, licet agere, et tante sententie dolore turbatus, ait: Quoniam regalia beati Petri suscepisti, et claves portarum tenuisti, et palatium invasisti, et Landulphum expulisti et ad curiam venire vocatus contempsisti, iudicamus super vos depositionis sententiam, et contra beatum Petrum et dominum nostrum papam fecisse.

8. « Ipsium Capuanus archiepiscopus et Gregorius cardinalis affirmavere. Volentibus autem aliis iudicibus eandem confirmare sententiam, Landulphus ipse jam archiepiscopus Beneventi e medio conventus illius, timore coactus, et senten-

tiae talis gladio percussus, surrexit. O qualem (si interesset, lector) fletum videres, et Landulphi illius pallidum aspiceres vultum, cum, ex ore tantorum iudicum qui decoratus erat Beneventana sede, et prae aliis gloriosus ubique fuerat, deponeretur! Quid dicam? subsellio ejus levato, metuentem illud Concilium, ut mente captus, dereliquit». Hactenus de his Chronicum Beneventanum: quae Petrus Diaconus in Chronico Cassinate narrare subterfugit. At reliquas in remotioribus partibus res gestas anni huius Paschalis papae videamus.

9. *Pallium papa ad Radulphum archiepiscopum Cantuariensem mittit.* — Cum hoc anno, quinquennio jam exacto vacationis sedis Cantuariensis in Anglia, tandem ei Radulphus fuisset episcopus ordinatus, indulgentia Paschalis Pontifex pallium quod Romam veniens accepturus erat misit ad eum per legatum Anselmum, nepotem ex sorore S. Anselmi praedecessoris: ad quod impetrandum haec praevenerunt Ivo[nis] Carnotensis episcopi ad eundem Pontificem litterae¹:

« Paschali summo Pontifici, Ivo humilis Ecclesiae Carnotensis minister, devotam ut patri obedientiam, et debitam ut domino reverentiam.

« Quoniam in oculis Apostolicae maiestatis aliquam pie praesumo habere me gratiam, ea praesumptione aliquando cum aliqua spe peto ab eadem Sede Apostolica ea quae videntur esse contra rigorem Apostolicum, si non sint contra honorem Apostolicum, quia non est indecens Sedi Apostolicae cantare Deo misericordiam et iudicium. Cum ergo opportunum est, securus pulso ad thronum misericordiae. Iudicium sine ulla disceptatione debet omnis iudex; de misericordia vero deliberandum est, utrum expediat an non expediat. Haec non ignorantibus scribo, sed ad haec ista praemitto, ut in quancumque harum partium se vertat postulatio mea, ut petenti iustitia non negetur, aut pie pulsanti misericordiae janua non claudatur. Quod bene discernere poterit vestra paternitas, cum summam nostrae petitionis audieritis, et per praesentes legatos adventus sui causam cognoveritis. Novit enim vestra paternitas, quanto tempore post mortem bonae memoriae Anselmi archiepiscopi Cantuariensis Ecclesiam pastore viduata languerit, quomodo rex Anglorum bona episcopalia in usus saeculares usurpaverit, quanto studio episcopalem electionem ibi fieri non permiserit. Nunc vero post increpationes vestras, post multas episcoporum dioecesanorum admonitiones, praetaxata Ecclesia consensu episcoporum, rege tandem connivente, elegit sibi in archiepiscopum Radulphum Roffensem episcopum, virum religiosum et honestum, scientia et moribus clarum.

10. « Ille in propria persona Sedem Apostolicam visitare secundum majorem instituta deliberravit, sed cum partim corporis debilitas impedit, partim periculum Romani itineris deterruit. Multis

¹ Ivo Ep. CCLIII.

itaque prædicta Ecclesia vice electi sui religiosas personas, et dictis et scriptis obnixè postulantes, ut prædictum electum Cantuariensi archiepiscopatui confirmetis, et dignitatem ei pallii concedatis. Ego quoque affectu fraternæ charitatis, et ansu paternæ dilectionis consulendo rogo, et rogando consulo, ut etiam si aliter fieri non potest, cum aliqua tamen dispensatione languenti Ecclesie subveniatis; et propter Ecclesie necessitatem, deinde propter utilitatem et honestatem personæ, petentium supplicationibus aurem misericorditer inclinetis. Nisi enim medicinalis manus cito subveniat, prædicta Ecclesia in veteres ruinas relabatur, et vox dilatoria potentium sine modo ultra modum protelabitur. Cum enim Dominus noster, qui institutor erat sabbati, misericordiæ opera faceret in sabbato, et redargueretur a Phariseis quod solveret sabbatum, spicas discipulis vellentibus, eorum murmurationi respondit: Si intellexissetis¹: Misericordiam volo et non sacrificium, nunquam condemnassetis innocentem. Alibi²: An nescitis, quia filius hominis dominus est etiam sabbati? Per hoc doctores informas, quia tunc possunt legum rigorem propter necessitates Ecclesiasticas temperare, quando ipsa legum remissio nihil continet contra fidei veritatem vel morum honestatem. His exemplis admoniti, secure pulsamus ad janua misericordiæ, credentes non esse indignum, si Apostolicus preceptum mittentis sequatur aut exemplum. Postremo quantum potest mens humana de alieno corde pensare, sanum nobis esse videtur consilium, ut eum patenter suscipiatis; quatenus vos liberalem filium et fidelem vobis adoptasse gaudeatis. Hucusque Ivo ad Paschalem papam, ne scilicet cogeret recens electum ex Anglia Romam se conferre, cum jam tum legibus sacris, tum usu, non nisi præsentibus atque petenti cuiquam archiepiscopo pallium dari consueverit. Annuit, ut audisti, Paschalis papa, palliumque ad ipsum in Angliam misit.

11. *Synodus Bellovacensis, in qua Godefredus ad suam redire Ecclesiam Ambianensem iubetur.* — Hoc eodem anno (ut habet Appendix ad Sigebertum) in civitate Bellovacensi a Sedis Apostolicæ legato Conone Concilium celebratur. De Conone S. R. E. cardinali dictum est superius, quem idem auctor ex eremo protractum asserit. Porro adversus Henricum imperatorem ejusmodi Synodum congregatam, et in eum sententiam anathematis pronuntiatam, ea quæ superius dicta sunt, satis ostendunt. Præter hæc autem inter alias causas itidem acutitas, querela illata est ab Ambianensibus adversus Godefredum suum episcopum, qui relicto episcopatu Carthusiam petisset: de quo ista Nicolaus monachus præsens rerum inspector³: « Iuterim Conon cardinalis, Pontificis maximi legatus, et Radulphus Rhemensis archiepiscopus, apud Bellovacum Synodum celebrant, et ad eam acce-

dunt Ambianensium legati, conqueruntur se destitutos optimo pastore suo. Ad quos Rhemensis archiepiscopus: Qua fronte, inquit, hæc apud nos proponere ausi estis, qui virum pudicum, orthodoxum, virtutibus cunctis ornatum, vestra improbitate e sua sede expulistis? Quem illi parem, nedum sanctiorem unquam habituri estis sacerdotem? o vos miseros, qui tanto pastore vel ad momentum caruistis! Num vos illum turpia lucria sectantem, libidini vacantem, Ecclesiastica beneficia venundantem unquam deprehendistis? Illis respondentibus ab his illum plane immunem esse, subiecit archiepiscopus: Ille ergo, et tam peritum ovilis Domini custodem perquirite, et inventum vobiscum adducite. Testor enim Dominum Jesum, donec ullus erit in Godefredo vitalis spiritus, nullum alium vos episcopum habituros.

12. « Dum hæc geruntur, en adsunt nuntii apportantes litteras B. Godefredi, quibus ille significat se episcopatu abdicasse: hortatur ut alium patrem sibi querant; se nunquam rediturum affirmat. Ostendit se ineptum et inidoneum qui episcopi munere fungatur: se quidem verbis docuisse subditos suos, sed mala vita corripisse et perdidisse. Quæ cum legerentur, pæne omnes lacrymati sunt, admirantes tanti viri humilitatem, qui cum esset meritis summus, inter omnes minimos se abicere videretur. Sane cum interdum de his quidam reverendissimi Patres, qui tum præsentibus affluere, inter se colloquerentur, vidi eos lacrymas tenere non posse, adeo illorum animis affixa est Epistola illa, in qua tantum se vir tantus extenuavit. Tandem statuunt Patres apud Successiones ad Domini Epiphaniam convenire, et quid faciendum sit deliberare.

13. « Ubi eo ventum est, jubente Ludovico Francorum rege, accitus est Henricus abbas S. Quintini, in quo monasterio vir Dei Godefredus ad ipsam pæne incunabulis sobrie et pie educatus ad ipsum virtutis apicem pertigerat. Vocatus est etiam Hubertus magnæ auctoritatis vir et celeberrimi monasterii, quod Cluniacum vocatur, monachus. Hos duos cum suis litteris mittunt ad fratres Carthusiæ, orant, imo imperant, ne Godefredum Ambianorum præsulē apud se diutius morari sinant, sed ad sedem suam oculus redire compellant. Addunt mandata ad ipsum Godefredum, ut celerrime ad desolatam suam gregem se recipiat. Ostendunt non debuisse illum semel susceptam Ecclesiam tam facile deserere. Plus enim apud Dominum demereri, dum sint per abrupta vitiorum præcipites ire oves suas, quam possit promereri, dum privatim in quantumvis remota solitudine vivit etiam severissime. Tum quoque docent sacros vetare canones, ne quis episcopo viventi subrogetur, nisi vel infirmitate cogente id ipse petat, vel ob crimen deponendus sit. Hæc ubi Godefredus accepit, animo valde consternatus, ad pedes monachorum se prostravit, cum multis lacrymis orans ne sinerent ipsum a se evelli. Flent

¹ Matth. ix. — ² Ibid. xii. — ³ Nic. in Vita Godefridi l. iii. c. 9. 10. 11. apud Sur. tom. vi. die viii Nov.

pariter etiam illi. Attamen multis eum consolantur modis, et quia regie et episcoporum auctoritati resistere non poterant, in pace illum a se dimittunt ». Et inferius :

14. « Porro cum beatus Godefredus a Carthusia non tam sponte sua, quam vi propemodum abactus esset, exiens crebro ad eam reflectebat oculos lacrymis madentes, se miserum et infelicem summo animi dolore proclamans, cui in illo angelico contubernio non licuerit usque ad supremum vite diem permanere, et soli Deo divinæque contemplationi vacare. Fuit autem in Carthusia a sacris feriis B. Nicolai episcopi, quæ aguntur octavo idus Decembris usque ad Quadragesimæ initium, admodum interim exultans in Domino, quod a terrenis curis absolutus, optata quiete frueretur. Multa illie reliquit virtutis et sanctitatis exempla, ut hodieque de illo inter se crebro conferunt. Profectus inde, venit ad Rhemorum urbem, ubi tum Cono cardinalis et legatus frequentissimam Synodum habebat. Adduxit autem eum in Synodum Radulphus Rhemorum archiepiscopus, jejuniis, vigiliis, aliisque sanctis exercitiis adeo extenuatus et confectus, ut vix pedibus consistere posset. Quem ut viderunt Patres, valde mirabantur, adeo illum se mundo, sibi mundum crucifixisse, ut nec mundum ipse diligere, nec mundus illum amare posse videretur. Buriuscule eum tunc appellavit Cono legatus, quod injunctum munus reliquisset. Deinde admonuit, ut propriæ utilitati multorum salutem anteponebat, Ambianos rediret, et suo officio fungeretur, rectius sibi consulturus, si non sua unius salute contentus, plurimos Christo lucrificare conaretur, et tandem a Christo audire mereretur¹ : Enge, serve bone et fidelis, quia super pauca fuisti fidelis, super multa te constituam, intra in gaudium Domini tui. Cum non posset vir Dei illius aliorumque episcoporum auctoritati oblectari, ad suam redit Ecclesiam, et ab omnibus cupidissime excipitur ». Hactenus Nicolaus. Ex quo etiam audisti, quam frequens multæque Cono legatus in Synodis esset, dum moraretur in Galliis, in quibus omnibus in Henricum

imperatorem anathema inclamaretur : ad quem in Galliis morantem data extant quatuor Ivonis episcopi Carnotensis Epistole¹, quibus cum se infirmitate corporis gravatum, quod eum non adeat, excuset, ipsæque Epistolæ ad finem Codicis positæ inveniantur : haud diutius ipsum Ivonem superfuisse putandum, nec excessisse tempora Paschalis papæ ; nam post eum non Ivo, sed Godefredus alius legitur fuisse Carnotensis episcopus, ad quem complures extant datæ Epistolæ sancti Bernardi.

15. *Privilegium datum monachis Vallumbrosianis.* — Hoc item anno Henricus imperator monasteria monachorum Vallumbrosianæ suo hujusmodi munivit privilegio : licet ab excommunicato imperatore ista petuisse dedecus fuerit.

« In nomine sanctæ et individue Trinitatis, Henricus, divina favente clementia Romanorum imp. Aug. Cum omnium fidelium petitionibus et necessitatibus subvenire debeat imperialis majestas, multo magis his est impertienda ejus beneficii clementia, quos religionis præcipue exuberare fecit gratia. Quapropter notum sit omnibus imperio nostro subjacentibus, quod petitione venerabilis viri Bernardi Parmensis episcopi, et dilectissimi cognati nostri Pontii Cluniacensis abbatis, cuncta monasteria Vallumbrosianæ congregationis ubilibet posita, sub nostri imperii tuitionem ac defensionem susceperimus. Statuimus itaque, ut nullus archiepiscopus, episcopus, dux, marchio, comes, vicecomes, nulla civitas, nulla alia sive magna sive parva persona Ecclesiastica secularisve, prædicta monasteria inquietare audeat, vel eorum possessiones, seu reliqua bona auferre, minuere, quoquo modo vexare præsumat, etc. » Datarium autem ita in fine subjicitur : « Actum est hoc anno ab Incarnatione Domini millesimo centesimo decimo quarto, Indictione septima. Datum Boccen. nonis Augusti. Hoc etiam Willelmus Prænестinus episcopus cardinalis sua corroboravit præsentia ». Accepta sunt ista ex archivo Vallumbrosiano. Sed non Willelmus, sed magnus ille Conon erat hoc tempore episcopus Prænестinus, inimicissimus imperatori.

¹ Matth. xxv.

¹ Ivo Ep. CCLXVII. CCLXVIII. CCLXXV. CCLXXVII.

Anno periodi Græco-Romanæ 6607. — Anno Æræ Hispan. 1152. — Anno Hegiræ 508, inchoato die 7 Junii, Fer. 1. — Jesu Christi 1114.

— Paschalis II pape 16. — Henrici V reg. 9, imp. 4. Alexii Comneni imp. 30.

1. *Beneventani a Normannis hostiliter pressi.* — A num. 4 ad 9. Beneventani a Normannis in angustias compulsi, legatos ad Paschalem II misere, rogaruntque, « ut gregi commisso, sicut pastor bonus, subvenire dignaretur. Necessitate enim domnus papa cogente scilicet, eis præcepit, ut pacem civitati, prout melius possent facerent », inquit Falco apud Baronium num. 2. In Codice a Caracciolo impresso legitur : « Necessitate autem domino papæ ostensa eis præcepit, ut pacem etc. » Peregrinus in Notis ad hunc Falconis locum observat, Baronium a fide sui exemplaris alieni discessisse, aliquantoque concinnius, et ad Latinam magis normam dictionem composuisse. Landulphus Beneventanus archiepiscopus conatus est armis Landulphum comestabulum in ordinem redigere, uti narrat Baronius num. 2.

2. *Willelmus Calabriae et Apuliæ dux a Paschali II constitutus.* — In Concilio apud Cyperanum, ad fluvii Liris ripam positum, hoc anno habito, « Apostolicus », juxta Falconem a Baronio num. 4 citatum, « ducatum Italiæ, Calabriae et Siciliae duci præfato (nempe Willelmo) concessit ». In Codice quidem Falconis impresso, loco, *ducatum Italiæ*, habetur, *ducatum Apuliæ*; verum Peregrinus laudatus pag. 156 asserit, quam secutus est lectionem Baronius, reperiri in antiquo Codice M. Falconis. Quod si quis dicat, sequi inde universam Italiam Willelmo duci in Concilio Cyperanensi concessam, respondet Peregrinus, quia id apertum videbatur mendacium librario persuasisse, ut expuncto *Italiæ* nomine, alterum *Apuliæ* induceret, vel ob id maxime, quod fortasse observasset, Petrum Diaconum in Auctario ad Ostiensem lib. 4, cap. 49, pro illa sua stare lectione : « In eodem Concilio », inquit Petrus, « idem Apostolicus investivit Willelmum ducem de ducatu Apuliæ et Calabriae ». « At nescius erat », ait Peregrinus, ex Græcorum tunc idiotismo nostratibus etiam Italis ob mutuum cum suis consuetudinem usurpato, communi *Italiæ* vocabulo a Falcone *Apuliam* solummodo demonstrari, quam Langobardis perindeque Italicis dynastis ipsi subtraxerant; nec noverat ob id recentem Calabariam. sitam ad mare inferum, tunc comprehensam sub eo vocabulo non

fuisse, quoniam ea a Græcis nunquam amissa fuerat, nec Italis unquam post Justinii Junioris tempora possessa ». Ita Peregrinus, qui variis Falconis locis hunc loquendi modum usitatum fuisse probat. Hoc itaque anno *Willelmus*, Rogerii Apuliæ et Calabriae ducis filius ac Roberti Guiscardii nepos, dux eorumdem ducatum a Paschali papa constitutus est in Synodo apud *Cyperanum*, cui ille postea fidei sacramentum præstitit, uti narrat Petrus Diaconus lib. 4, cap. 51. Cinnamus lib. 3, cap. 1, hunc Willelmum *Longobardiæ* ducem appellat, quia ea regio a Græcis *Longobardia* vocabatur; qui loquendi modus etiam observandus.

3. *Fides Christiana hoc tempore nondum in Africa exstincta.* — Petrus Diaconus, postquam de Concilio *Cyperani* indicto verba fecit, capite insequenti de quibusdam Casinensibus monachis a *Saracenis* captis sermonem instituit, meminitque Ecclesiarum Christianarum Africæ; quæ sæculi xii initio antequam *Almoravidum* secta in ea exurgeret, adhuc perstabant. Illi enim omnes Christianorum seu Mozarabum Ecclesias, tam in Africa, quam in Hispania demoliti sunt, uti infra narrabimus. Petrus itaque Casinensis cap. 50, secundum novam editionem, vel cap. 52, secundum veterem, refert *Azzonem* monasterii Casinensis decanum, ac quosdam alios monachos e Sardinia in Italiam navigantes, a piratis captos, in Africam ac in civitatem Calamensem, quæ a *Saracenis Alchila* dicitur, deductos fuisse. Urbs hæc alia non est quam *Alkala* vel *Kala Amad*, id est, *arx Hamad*, a nomine conditoris e familia Ziridum sic appellata *Kala Amad*, uti per corruptionem vocatur a scriptoribus in Geographia parum versatis pro antiqua *Calama* usurpata fuit; verum urbs hæc longe ante hæc tempora eversa, et *Calad Hammad* nova civilis erat.

4. *Id insigni Petri Diaconi loco probatur.* — Jam *Azzo* hujus monasterii decanus in eadem captivitate vita excesserat, inquit Petrus Diaconus cap. 51 secundum novam editionem, qui capite insequenti subdit : « Corpus ejus in Ecclesia beatæ Mariæ ante altare conditum est », jamque dixerat eum in eadem provincia defunctum fuisse, patrata in ejus sepulchro miracula ab eodem chronogra-

pho recitata, quæ a Saracenis visa sunt, sed quæ eorum rex putavit a Christianis conficta. « Rex suorum talia dum audisset ab ore, dictis derogans fidem, lampadem exstingui, et Ecclesiam, sicut prius, custodiri præcepit, exurgensque ad domum callifæ, quæ ad Ecclesiam liminabat, perrexit ». Ad quæ verba Angelus-a-Nuce, novæ editionis auctor, recte notavit hunc callifam non fuisse regem, « quod rex Calamensis », inquit, « accessisse dicitur ad domum callifæ, diversus ergo a rege Callifa ». Idem Angelus ac Ducangius in Glossario voce, *Chalifa*, animadvertunt, *Callifæ* nomen non tantum supremis sacerdotibus, sed quibuscunque etiam aliis a Saracenis principibus attributum fuisse. At cum ex hoc Petri Diaconi loco appareat, *Callifæ* domum Ecclesiam liminasse, seu eidem adjecisse, verosimile non est sermonem ibi esse de præcipui doctoris aut presbyteri Mahometani domo, sed de domo pastoris aut episcopi Ecclesiæ Christianæ, qui Arabico nomine et more recepto Saraceno *Callifa* nuncupabatur. Hoc enim tempore *Califæ* Babylonenses et Bagdadenses omnem auctoritatem amiserant, eisque pontificatus tantum umbra supererat. Hæc annotare visum, quia extinctionis fidei Christianæ in Africa tempus hactenus non satis explicatum. Porro, ut habet Noweiri hoc anno, Calamensis rex *Al Aziz bellach* vocabatur, et pronepos erat *Anasiris* regis, qui Christiani favit, Gregorio XII Ecclesiam Romanam regente, uti anno MLXXVI monstravimus.

5. *Concilium Vindsoriense*. — Ad num. 9 et seq. Hoc anno Vindsorii seu Vinsorii (oppidum est a Londinio xx mille passuum, in quo reges Angliæ inaugurari solent) *sexto kalendas Maii* habitum Concilium, cui episcopi et proceres Angliæ interfuerunt, ut archiepiscopus Ecclesiæ Cantuariensi præficeretur. Voluntas regis erat, inquit Eadmerus, qui præsens fuit, lib. 5 Novorum, ut abbas Abendonie archiepiscopus eligeretur: « Animus tamen episcoporum, et quorundam magnatorum in aliud vergebat, præoptantium videlicet, aut quemlibet episcopum de ordine clericali, aut clericum aliquem de capella regis, in opus illud adscisci. Verum ubi eis obiectum est, nullum a beato Augustino, nisi de monachico ordine nunquam pontificatum Cantuariensi præsedisse, uno duntaxat excepto (Sligando scilicet), qui et ob hanc præsumptionem, et alia quadam perverse ab eo commissa, depositus per Romanum Pontificem fuit, (nempe per Alexandrum II, anno MLXX), et ea tam antiquam et authenticam consuetudinem, cum nulla ratio vel necessitas exigeret, subverti non oportere; desistere cæpto, quod plurimo conatu perficere laborabant, compulsi sunt ». Henricus rex cum videret omnium sententias in Rodolphum Rolfensem episcopum inclinare, mentem mutavit, eamque in Rodolphum transtulit, qui ideo in primatem totius Britanniæ constitutus est. « Andries (si adesdes) multos una condemnare: Vere cor regis in manu Dei: quocumque vult, inclinât illud. Acta sunt

hæc anno Incarnat. Dom. MXXIV, sexto kalendas Maii, quinto die peracto quinquennio a transitu gloriosissimi patris Anselmi », inquit Eadmerus laudatus.

6. *Henricus Angliæ rex Walliam sibi subiecit*. — Cum vero *Britanni*, Cambri et *Wallenses* dicti, conterminis Anglorum finibus graves, *Henrici* regis curam exercerent, is militem colligit, aciem trifariam dividit, et tertiam ipse totius exercitus imperator ducit. Hoc bellico apparatu territi Britanni, provinciam victori regi reliquerunt, qui præsidia per loca disponens, Britannis servitutis jugum, quod prius subire noluerant, imposuit, ut colligitur ex Hovedena, pagina 473, Huntindoniensi pag. 380, Malrosensi in Chron., Joanne Brompstone in Chron., Alfordo in Annual. Eccl. Angl. et aliis. Matthæus Paris hæc ad annum præcedentem refert.

7. *Concilium Belvacense*. — A num. 11 ad 15. « Anno Domini MXXIV, VIII idus Decemb. Cono Prænестinus episcopus, et Apostolicæ Sedis legatus, regem Henricum (sc. Germaniæ) apud Belvacum anathematizavit in Concilio suo », uti legitur in Codice Ms. Montis-Dei, et in alio a Jureto in Notis ad Epistolam Ivonis CCXXXVI memorato. In eo Concilio questi sunt Ambianenses destitutos se esse optimo pastore suo, nempe S. Godefredo, qui relicto episcopatu Carthusiam petierat, ut narrat Nicolaus monachus in ejus Vita, qui præsens rerum quas refert inspector fuit. Interim attulerunt litteræ sanctissimi præsulis, quibus significat se episcopatum abdicasse, sequæ « ineptum et indoneum qui episcopi munere fungatur ». Statutum fuit, Patres « apud Suessiones ad Domini Epiphaniæ convenire, et quid faciendum sit deliberare ». Tum anno sequenti *Concilium Suessionense* congregatum, missique Henricus abbas S. Quintini, et Hubertus monachus Cluniacensis ad Carthusianos, petunt, ut Godefredum Ambianorum præsulem ad sedem suam ocis redire compellant. Hæc ubi Godefredus accepit, « ad pedes monachorum se prostravit, cum nullis lacrymis orans, ne sine rent ipsum a se evelli »; sed quia « regiæ et episcoporum auctoritati resistere non poterant, in pace illum a se dimittunt », inquit Nicolaus monachus. Illius etiam Concilii Belvacensis meminit pseudo-Robertus de Monte in Chron. ad hunc annum, et tom. II Spicilegii Dacheriani pag. 594 referuntur varia decreta in eo recepta, diciturque *ex Gestis ejus* nunc deperditis, et interfuisse archiepiscopos Rhemensem, Bituricensem ac Senonensem, necnon et suffraganeos eorum, multosque alios synodales viros.

8. *Ieo episcop. Carnotensis usque ad annum MXXVII in vivis fuit*. — Baronius num. 14 meminit quatuor Epistolarum ad *Cononem* Prænestinum episcopum et Apostolicæ Sedis in Gallia legatum ab Ivone episcopo Carnotensi scriptarum, quæ juxta novum ordinem sunt CCLXVI, CCLXVII, CCLXXII et CCLXXV, quas cum ante hujus anni finem datas

arbitretur, *Ivonem* postea superstitem non fuisse suspicatus est. Verum *Conon* anno sequenti tribus Conciliis in Gallia celebratis præfuit, ipseque *Ivo* Epistolam cclxxv anno tantum mcxvi, eoque in exitum vergente misit, ut infra videbimus. Quare communis opinio, quæ *Ivonem* an. mcxv demortuum tradit, an. mcxvii valde conflabitur, constabitque eum illo Christi anno e vita migrasse. In Epistola quidem cclxviii scribit *Ivo*, se *viginti quinque annis* jam in episcopatu esse, ejusque sedis annus xxv hoc anno absolvitur; sed non inde sequitur, eum eo sedis suæ anno vivendi finem fecisse. Imo in sententia Baronii episcopatus ejus initium cum anno mcxiii conjungentis, annus ejus xxi hoc anno absolvitur. Præterea ea Epistola vulgarem opinionem, quæ eum episcopum anno mcxiii creatum, et anno mcxv demortuum statuit, plane etiam convellit. Sed de *Ivonis* morte anno mcxvii sermo erit.

9. *Alexius imp. convertendis ad fidem Manichæis operam dat.* — *Manichæi* in Oriente grassabantur, et *Alexius imp.* in iis ad veram religionem convertendis omnem operam adhibebat. Anna enim Comnena lib. 14 *Alexiados* pag. 449 refert, *Alexium* patrem *Indictione octava, mense Novembri*, profectum esse ex urbe regia, ut Comanos repelleret, interimque dum Philippopoli moraretur, pro militari quam susceperat, Apostolicam expeditionem religiosiis certaminibus gessisse. « Cum nondum illi limitem intrasset (nempe Comani, inquit Anna pag. 453), ne sibi periret illud otium, opus ex occasione moliri cepit, eo ipso utilis et majus, quod ex professo agebat, et cuius præcipue causa venerat. Deducere nimirum Manichæos aggressus est a corruptis et amaris quibus se ingurgitare consueverant prævæ doctrinæ lacubus; quod eos ad puros et suaves Catholice doctrinæ fontes salubriter sitiendos, jucundeque hauriendos converteret. In eo erat, id agebat totos dies. Vidisses a primo diluculo ad pomeridianam horam, aut etiam ad vespem; interdum ad secundam et tertiam noctis custodiam continuo vacantem uni rei; audientem nimirum patientissime, ac vicissim alloquentem quos subinde accerschat erroribus implicitos. Ibi eos docebat fidem rectam; ibi pravitatem hæreseos eorum invictis argumentis confutabat, convincebatque ineluctabiliter. Aderant vel testes vel adjutores præclari operis Eustratius et Nicææ antistes (celeberrimus Aristotelis interpres de quo Philippus Labbeus in brevi Conspectu Græcorum Aristotelis interpretum Parisiis anno mœcxlvi edito) vir et sacris et externis cumulatissimis litteris; præstanti vero potissimum pollens colloquiorum ac congressuum consenserendorum facultate: adeo quidem ut in ista disceptandi coram dexterritate vivida copiaque disputandi, eos etiam antecelleret, qui in Zenonis porticu, aut Academi spatii hoc unum tota vita meditabantur. Nec ipse videlicet deerat Philippopolitanus archiep. Sed ante omnes et præ omnibus unum imperator sibi ad hanc

pugnam commilitonem auxiliarem adjunxerat Nicephorum meum Casarem (Annæ maritum) quem jusserat in divinis libris bene jam antea versatum, colligere ad præsentem usum, habereque in promptu atque in tempore suggerere testimonia sacrorum oraculorum, quæ aperte revincendis Philippopolitanorum erroribus apta essent.

10. *Innumeros ab errore avocavit.* — « Fructus exitit operæ magnus. Plurimis Manichæorum pertinacia et dubitatio omnis exempla est. Ibant persuasi exuto errore ad sacerdotes, et ab iis peccata ultro ipsi sua fatentes, damnautesque, divini baptismi fiebant participes. (Ut enim testatur Cedrenus in Constante imp. Heraclii filio pag. 434, Manichæi pro baptismo habent verba Evangelii, quia Dominus dixerit se esse aquam vivam). Multos tamen videre erat eodem tempore perversa constantia veram illam et sanctam Machabæorum æmulantes, imo superantes; etenim ut illi pro sacra divinaque religione, ita hi pro suo nefario errore propugnabant, perstantes in eo: proferentes, quin etiam auctoritates et sententias librorum divinorum, quibus suum disputabile firmari dogma credebant. Verum et horum plerisque istam ad extremam contumaciam quotidianæ allocutiones imperatoris, et illa miseres admonendi adhortandique perseverantissima dignatio eripuit: ut jam et credere, et sacro baptismo initiari convicti vellent atque ultro poscerent; quorum salus abunde magna tot laborum merces Augusto videbatur: tantique illi erant ærumnosissimorum congressuum exorbere longa tedia, solis ab ortu primo ad profundissimam sæpius noctem curantium, a quibus ne memoria quidem eum aut necessitas curandi avellere corporis poterat, totos perosque impastum dies in illis fastidiosissimis jurgiis perseverantem, idque per æstum sub sole ardentem, nam ista colloquia in subdivali tabernaculo fiebant ». Paulo post subdit multitudinem conversorum Manichæorum in multa millia ac myriadas excrescere numerum. Istorum Manichæorum secta infecit postea Ecclesiam latinam, ex iisque exorti Albigenes, et alii diversis nominibus appellati.

11. *Expediit in Baleares et Ebusum insulas.* — Pandulfus Pisanus, auctor Vitæ Paschalis II, de Bello Balcarico hoc anno inchoato hæc scribit: « Quid egregia Pisanorum industria et admirabilis pertinacia per eundem dominum papam Balearibus insulis Eliæ et Majoricæ contulerit; quem apparatus, quas copias supplementumque, quemve legatum ipsi babuerint, quo consule, sub quo imperatore militaverint, quisve eorum fortiter (fecerit) quot navibus et quomodo ierint, quid naufragii, quidve laboris in reficiendis ratibus passi sint; illud etiam gloriosum admirandumque subsidium quod non desperaverint; quomodo etiam evulsis captivis, direptis spoliis, subversis urbibus, victores redierint, quia digno volumine comprehendere disposui, suo loco et suo tempori distuli ». Verum vel is auctor cœvus Historiam illam postea non

elaboravit, vel ea ad nos non pervenit. Hoc tamen bellum fuisse descriptum a Laurentio Veronensi, Petri tunc archiepiscopi Pisani diacono, auctore etiam contemporaneo, in suo Poemate in septem libros diviso, editoque ab Ughello in Appendice ad tom. III Italicæ Sacre cum antiquis Chronicis Pisanis. Illud etiam bellum narrat Diagus in lib. 2 Hist. comitum Barcinonensium, cap. 88 et seqq.

12. *Saracenorum in urbem Barcinensem irruptio.* — Porro *Baleares* insulæ ab Hispania vix LXX milliariibus, et inter se XXV mille passibus dissite sunt. Sæpius a Pisanis, quod gravia damna ab illis ferrent, vastatæ fuerant, nuperque frustra obsessæ. Paschalis II serio perpendens mala, quibus a piratis illis Saracenis Christiani affligebantur, ut illic arma rursus converterent, Pisanos adegit, iisque *Raimundus Berengarii* hujus nominis III, Barcinonæ et Provinciæ comes, sese adjunxit. In Majoricam insulam comes extensionem fecit ac præcipuum oppidum oppugnavit; verum cum cives illud fortiter propugnarent, ipseque accepisset Mauros seu Saracenos cum ingenti exercitu *Barcinonam* venisse, obsidionem solvit, et tam ad majores copias colligendas quam ad auxilium Barcinonæ ferendum, ad eam urbem rediit. Diagus citatus cap. 91 hæc verba refert ex lib. 2 Antiquitatum Mss. archiepiscopus Barcinonensis quæ ad hunc annum referenda: « Sequenti tempore exercitus magnus Moabitarum (legendum videtur Morabitarum) qui biduo civitatem Barcinonam obsedit, ipsam Ecclesiam violavit, et altare suffodit et fregit ». Addit Diagus, Saracenos, cum urbem occupare non possent, Ecclesias spoliassæ, altaria fregissæ, et inauditas crudelitates exercissæ. Interim *Raimundus* comes ex insulis Balaribus cum classe adventavit, et tantam Barbarorum stragem edidit, quanta maxima alias facta fuisset.

13. *Ebusus insula Saracenis erepta.* — Dein *Raimundus* comes sublati velis Barcinone solvit, et per Provinciam Genuam ac Pisas ad utrumque Reipublicæ auxilium implorandum tendit, quod illi promissum fuit. Sed antequam Pisani adventarent, *Raimundus* comes *Majoricam* aggressus est. *Pisani* optatum iter contra Majoricam susceperunt cum Petro Pisanorum archiepiscopo, atque cum Bosone cardinali, Romanæ Sedis legato. Illic in Chronico Mauriniaciensi, quod extat tom. IV Duchesnii, memoratur his verbis in narratione dedicationis Ecclesiæ Mauriniacensis, a papa Callisto II anno Incarnationis Pisano MCXX peractæ: « Bosco de titulo S. Ana-

stasiæ totius Hispaniæ legatus, cujus ope et industria Majorica insula et Cesar Augusta nobilissima Hispanorum civitas subacta est ». Sed fallitur iste anonymus; *Boso* enim cardinalis erat tit. Quatuor Coronatorum, *Theobaldus* vero Buccapetus cardinalis presbyter tit. S. Anastasiæ, qui anno MCXXIV, sub Cælestini II nomine Pontifex creatus, eodem die abdicavit, ut videre est apud Baronium eo anno num. 7, Ciaconium et alios. Antiquus chronographus Pisanus laudatus de Bosone legato et Petro Pisanorum archiep. ait: « Divina disponente gratia, prius ad insulam Evisum (seu Ebusum) quæ non longe a Majorica distat applicuerunt. In ipsa enim insula ejusdem nominis civitas, in arduo cita, etc. Hæc per mensem obsessa capta est in sancti Laurentii festo (currenti scilicet anno). Ejus mœnibus destructis et cassare (id est, arce) cum ejusdem urbis gardo (id est, præfecto) catenis adstricto in festo S. Bartholomæi Apostoli ad insulam Majoricam applicuerunt (1) ». Describit postea iste chronographus quæ tam autumno, quam hyeme sequentis Christi anni, quo Majorica urbs capta, ab exercitu Christiano gesta sunt. *Ebusus* ab Hispanis hodie *Teita* appellatur.

14. *Occisi in obsidione Majoricæ Massiliæ sepulti.* — Cum post primam *Majoricæ* oppugnationem *Raimundus* comes ad repellendos Barbaros Barcinonem redire coactus fuit, et insulam relinquere, *Pisani* occisorum, quorum non parvus erat numerus, cadavera navibus imposuere, et Massiliam pervenientes in ea Ecclesiæ Sancti-Victoris sepeliere, ut produnt citata Chronica Pisana, in quibus refertur eorum Epitaphium, quod etiamnum in ea visitur, sicuti et apud Volaterranum lib. 5 Geographiæ:

Verbi incarnati de Virgine mille peractis
Annis, his centum his septem connumeratis,
Vincere Majoricas Christi famulis inimicas
Tutant Pisani Mahometti regna profani.
Morte neci dantur multi, tamen hi sociantur
Angelicæ turbe, calique locantur in urbe.
Terra destructa classis redit aquora ducta,
Et vi divina redit victrice carina.
O pia victorum bontis! defuncta suorum
Corpora classe gerunt, Pisasque reducere querunt.
Sed simul adductas ne turbet gaudia luctus,
Cusi pro Christo tumulto clauduntur in isto,

15. *Gesta ab Alphonso Aragoniæ rege adversus Saracenos.* — Nec minus valide *Alfonso*, Aragoniæ et Castellæ rex, Saracenos in Hispania premebat Castellanis et Aragonensibus communi

(1) Apud Bollandistas in Vita B. Oldegarii episcopi Barcinonensis, cujus festa dies celebratur sexta Martii, recitatur Bulla Paschalis II data apud Tiburim Indictione nona, Incarnationis Dominicæ anno MCXXVI, Pontificatus autem D. Paschalis II anno XVI, die X kal. Junii; in qua hæc inter cetera ad rem nostram leguntur: « Venerabili fratri nostro Bosono S. R. E. presbytero cardinali quem, in Hispaniæ partibus legatum dirigitum Apostolicum etc. » Ex hoc autem inferas Bosonem legationem hanc serio assignandam esse, sicut et obsidionem Majoricam, quam Boso ipse perfect, testibus scriptoribus a Pagio laudatis, non citius quam anno MCXVI compleri potuisse.

Falli etiam Pagium hic constat, cum vocat Bosonem presbyterum cardinalem tituli SS. Quatuor Coronatorum; nam *Boso tituli S. Anastasiæ presbyter* subscriptus legitur Bullæ Paschalis II in causa Bisuntina Ecclesiæ agitata atque definita in Concilio Lateranensi IV. Data est Bulla legenda apud Labbeum tom. XII Venetæ editæ, « Laterani IX kal. Aprilis, Indict. IX, Incarnationis Dominicæ anno MCXVI, Pontificalis autem domini Paschalis II papæ anno XVII ». Ex hac igitur anonymi Pisani auctoritas confirmatur, patetque Bosonem non tituli Quatuor Coronatorum, sed S. Anastasiæ presbyterum in Hispanias nominis anno MCXVI venisse. Si ergo Theobaldus Buccapetus titulum tunc S. Anastasiæ prætulit, ut ex Baronio Pagus notat, cum sibi assumpsisset titulum oportet, et forte etiam ad cardinalatus dignitatem promotus fuit post obitum Bosonis, qui anno MCXX adhuc vivebat, ut ex Pagio hic constat.

MANST.

utilitate odium et dissidium, quo ab invicem dissidebant, ad tempus deponentibus. *Cæsaraugusta*, nuper mortuo rege, nonnisi a præfectis a Marochiorum rege ex Africa missis regebatur, et *Osea* ac munitiorum oppidorum, eorumque vicinorum expugnatione fere circumvallata erat. Quare eamdem obsidione cingere decrevit, de eximia multorum procerum Francorum erga se voluntate certus. *Mense Januario* præsentis anni copias in loco a *Cæsaraugusta* quinque tantum leucis distante collegit, uti narrat Surita in *Annal.* lib. 1, et quia Saraceni, qui circumvicina loca obtinebant, exercitum Christianum graviter vexabant, *Rotrocius* hujus nominis II, *Pertensis* comes, *Tutelæ* florentis civitatis ipsoque situ opportuna occupande consilia inivit. Posita ea ad annem Iberum, sexdecim tantum leucis a *Cæsaraugusta* dissita, quam cum tandem *Rotrocius* comes expugnasset, *Alfonsus* rex eandem ei in fortitudinis præmium dedit, supremo sibi jure reservato. Deinde leges et privilegia eidem urbi concessit. Chartam ab eo tunc emissam refert *Moretus* lib. 3 *Investigat. Navarr.* pag. 539, quæ data dicitur *Æra MCLII*, et in *Archivis Ecclesiæ* collegialis *Tutelæ* asservatur. Hæc verba in ea leguntur: « Et capta fuit *Tutela* ab illustri rege *Alfonso* cum Dei gratia, et auxilio virosum nobilium terræ et comitis de *Pertica*..... *Æra MCLII* », hoc scilicet Christi anno.

16. *Gallis pro eo præstantibus.* — *Ordericus* initio libri 13, varia in medium adducit, quibus Gesta in Hispania Christianos inter et Saracenos eo majorem lucem accipere possunt, quo ejus *Historia* anno *MCXCIX* *Parisiis* ab *Andrea Duchesnio* primum publicata fuerit. Et licet *Ordericus* semper annos non definat, resque suo ordine narret, ac in nonnullis erret, id tamen sincero scriptori in *Normannia* scribenti condonandum. Is re quæ anno *MC* accidit relata, subdit: « Non multo post *Ildefonsus* *Aragonum* rex graviter a paganis impeditus est, et crebris certaminibus, multisque detrimentis nimium vexatus est. Unde *Rotroni* consanguineo suo legatos destinavit, eique humiliter mandavit, ut sibi contra *Ethnicos* dimicanti subveniret, et auxilia Francorum, qui multis in necessitatibus laudabiliter experti sunt, secum adduceret. Promisit etiam se daturum suffragantibus *Gallis* larga stipendia, et secum remorari volentibus opima prædia. Protinus comes probissimè commilitones ascivit, cognato regi suppedit adduxit, sine dolo et fictione adjuxit: sed integrum *Hiberorum* (seu *Hispanorum*) fidem non invenit. Nam dum in multis strenuo cum sociis et comprovincialibus suis egisset, et eorum administrum *Saracenos* admodum terruisset et *Hispani* dolum in illos machinati sunt, et de morte suorum auxiliorum consensu regis, ut opinantur, tractaverunt. Quod facinus ut ab eorum complicitibus detectum *Gallis* patuit, *Rotro* cum consodalibus suis regem cum proditoribus *Hiberis* reliquit, et in nullo digne pro tantis laboribus remuneratus, in

Gallias remeavit ». Ita *Ordericus*. At licet *Tudelæ* obsidione in longum protracta, ob continua, quæ *Saracenis* a *Fragæ* et *Leridæ* regulis submittebantur subsidia, complures e *Gallis* exercitum reliquerint, quia pecunia eis promissa non solvebatur, ut scriptores *Hispani* fatentur, nulla tamen intervenit perfidia, ut tam præfata donatio quam conjugium neptis *Rotroci* cum *Garcia Ramire* insinuant.

17. *Tutela Saracenis erepta datur Rotroco II, Pertensi comiti.* — Hoc enim circiter tempore idem *Rotrocius* comes *Margaritam* seu *Mergelinam* neplem *Garsie Ramirez*, postea regni *Navarrici* restauratori, in matrimonium collocavit, eique in dotem *Tutelam*, et loca ab ea dependentia dedit. Hanc *Toletanus* lib. 7, cap. 12, *Marca* lib. 5 *Historiæ Bearnensis* cap. 18, *Garibayus* et passim *Hispaniarum* historici *Rotroci* *Pertensis* comitis filiam faciunt; sed hunc vulgarem errorem *Ægidius Bry* lib. 3, cap. 7 *Historiæ comitum Perticæ* et *Alenconii* *Parisiis* anno *MCXX* in-quarto impressæ primus refellit, et post aliquot annos *Oihenartus* in *Notitia* utriusque *Vasconiæ* manifesto plagio hoc inventum sibi adscripsit. Uterque inter alia refert testimonium *Margaritæ*, *Guillelmi* *Siciliæ* regis uxoris et *Garsie Ramirez* filiæ, quo ipsamet *Margarita* regina asserit, opera *Tutelæ* *Ramire* patrem in regni *Navarrici* possessionem rediisse. Ea apud *Hugonem Falcendum*, libro *de Siciliæ calamitatibus*, illius regni optimates his verbis alloquitur: « Nec enim aliter quam fratres proprios diligere quidem et honorare debeo filios comitis *Perticensis* per quem (ut verum fatear) pater meus regnum obtinuit. Nam idem comes patri meo terram amplissimam cum NEPTE SUA MATRE MEA dolum dedit, quam in Hispania multis periculis ac diuturnis laboribus expugnatam *Sarracenis* obtulerat. Nec ergo mirari debetis, si filium ejus matris meæ consobrinum, loco mihi fratris habendum censeam, et de remotissimis partibus ad me venientem gratanter excipiam ». Locum illum, aliaque in hanc rem refert etiam *Moretus*, qui cum *Oihenartum* tantum legisset, excusatione dignus, si prælati auctoris *Historiæ* comitum *Perticæ* nomen tacuerit. Quoad obsidionem urbis *Cæsaraugustanæ*, ea ob quæ *Alfonso* regi supervenere negotia, et ob multorum Francorum ab exercitu discessum, ante an. *MCXVIII* felicem exitum non habuit.

18. *Matrimonium Henrici imp. cum filia regis Angliæ.* — « Anno *MCXIV*, *Henricus Romanorum* imperatori filia regis *Anglorum* *Henrici* (*Mathildis* appellata) VII idus *Januarii* *Mognutiæ* desponsata et in imperatricem est consecrata », inquit *Simeon Dunelmensis* in *Hist. de Gest. reg. Angl.* Idem habet *Urspergensis* in *Chron.*, qui addit, *Frisones* et *Colonienses* adversus *Henricum imp.* rebellasse, ab eoque *Saxones* anno sequenti etiam defecisse.

19. *Moritur Colomanus Hungariæ rex.* — *Joannes Turocius* in *Chron. Hungarorum* cap. 62 scribit, *Colomanum* *Hungariæ* regem exccrasse

Almum fratrem suum et filium ejus Belam adhuc infantulum, ac postea migrasse ex hoc seculo currenti anno, tertio nona Februarii, feria tertia. Ei successit Stephanus, hujus nominis II, filius ejus.

« Timebant omnes reges », inquit idem chronographus. « Stephanum regem, tanquam ictum fulminis : unde infantes vagientes comminatione nominis regis Stephani quiescere compellebantur. »

PASCHALIS II ANNUS 16. — CHRISTI 1115.

1. *Ob novi præfecti electionem turbæ Romæ quibus sedandis Paschalis papa laborat.* — Annus sequitur millesimus centesimus decimus quintus, Indictione octava notatus, quod defuncto Petro Urbis præfecto, eum in seio Pontifice ejus filius a factiosis civibus præfectus acclamatus esset, turbarum complurium ab iisdem manavit occasio : quibus ut occurreret Paschalis papa plurimum laboravit. Res gesta describitur ab eo qui aderat Petro Diacono cardinali bibliothecario in Vila Paschalis, his verbis :

« Anno decimo sexto Pontificatus domini Paschalis papæ Secundi, anno pacis quinto, mense primo, Martii scilicet vicesima sexta die mensis, die Paschæ, id est, transitus, in Cœna Domini, ira calicis de manu ejus in terram descendit. Petro urbis præfecto defuncto, homines seclerali, seditiosi, prompti ad malum, privatis male, publicis negotiis pessime providentes.... partibus (Patribus) primoribus, puerum adolescentem in Urbe præfectum eligunt. Hujus modus, imo excessus hic est. Dum in domicilio pater præfectus moritur, extra in gradibus ejus filius præfectus eligitur. Patris cadaver ad Ecclesiam ducitur ; et filii fastus ad loca præfectoria destinatur. Patri exequiæ funeris in Ecclesia ; filio laudes præfectorio in atrio aplaudunt. Illi patrem rationem Deo redditurum in sepulchro deponunt, isti filium juraturum populo in ambonem sublevant. Miserabilis casus utrorumque. Et tu exequias funeris pro comitiis filii, perdidisti, pater ; et tu comitiorum plausum pro patris exequiis amisisti, fili. Concludat igitur qui vult, dicatque, patrem malo terminasse exitu, cujus in morte uxor gaudeat, filius lætetur, domus tota exultet ; filium principium inchoasse nequam, cujus in comitiis mater laceratis crinibus plangat, filius scissis vestibus gemat, domus tota tristetur.

2. « Turbavit domnum papam curiamque simul mors patris et excessus filii, initoque consilio : Quia nostra, inquit, ante tempus occupant, merito et non sua in tempore perdant. Vade, Petre, et tu Constantine, et ex omnibus quæ ad præfecturam pertinent, ad curiæ commodum, in testimonio venerabilis hujus nostri diaconi te investias. Paruit jussis Petrus, in reditu tumultum insidiasque in domini necem persentit. Providit auxilium, subsidiis positis loco et tempore egregie facturis, inde sibi affuturum fore denuntians. Jamque ille cum tumultu populi plebisque Constantinianæ Basilicæ pede limen tetigerat : cum subito oleum consecrandum in chrisma, jam infectum balsamo confectumque, fracto vase diffusum est. Turbati Patres, mirari Domini non cessabant prodigium, eo quod in prosperitate positi, nullum periculi casum affuturum timebant. Sic iterum alio oleo confecto, dominus Pontifex ad exsequendam tante solennitatis mysterium (ministerium), ad altare ascendit. Jamque ex tribunalis sede orationem : Deus a quo et Judas reatus sui pœnam, et latro confessionis præmium sumpsit, incœperat, cum illi Petrum scissis vestibus inter altare et tribunal ipsi supponunt : confirmari eum in Urbis præfectum petunt. Cumque (ul ejus domini moris erat) ob reverentiam incœpti officii respondere differret, irasci illos magis inclamare vocibus, Dominum sibi testem facere, in vota jurare, ni respondeat, aliterque si senserit, atrocis facti miseras eo die visurum. Tandem dominus : Quid, inquit, confirmari eum in præfectum petitis, quem nec nos digne dare, nec vos hodie honeste petere potestis, domus vos hodierni funeris exequiæ ex comitiis merito subtrahant, et nos solennis diei chrismata ab hujusmodi juste removeant ? quibus peractis, respondetur digne. Et illi pro velle rebus jam depositis, cum fremitu tumultuantisque discedunt,

Feccissent quod disposuerant in via, nisi eorum audacia, quæ ita tumuerat, nostrarum copiarum timore enervaretur.

3. « Die altero, die Parasceves, cum omnium civium hujus Urbis maxime vetusti moris sancta devotio per loca sancta, per martyrum cœmeteria, per votiva solemnia pedibus discaleatis in Urbe suburbiiisque confertim diffunderetur : illi simplicem populum plebemque in factionis suæ Charybdim sub armis jurare compellunt. Eisdem die magni Sabbati, die Paschali. Secunda feria eunti domnoad Basilicam beati Petri, juxtaradicem pontis Trajani (Hadriani), cum tumultu se puer ille opposuit, confirmari petiit. Quod quia adeptus non est, sequentis familiæ alios cepit, alios affecit injuriis. In reditu cum coronato domno papa (ut ejus diei mos est) Patribus solemniter procedentibus in curiam, ex Capitolio strepitu, clamore, laqueis eos persequuntur. Nec adhuc satis, delegant post eum. Nec antea vestes sacras eum exuere licuit, quam respondere oportuit; sequentis sexta feria de confirmatione communi consilio deliberandum. At ille non contentus termino, ea die præfectoralia, a quibus potuit, in se compleri fecit. Feria sexta in tantam exarsit audaciam, ut eorum domos subverleret, quorum religio fidei in domnum papam perfide agere noluisset. Providens autem domnus, huic ruinae absque multa cæde resisti non posse, in Albanam secessit¹. Furor illius, fautorumque, in Ecclesiam et domum Petri Leonis, et eos qui eam tueri videbantur, omnimodo conversus est. Quæ nec posset pati, nisi reverso eo, suorum fulciretur auxilio.

4. « Reversus Petrus Leonis tanto copiosius principibus curiæ largitus est dona, quanto laboriosius bellicis sudoribus pro se suscipiendo opus fore cognoverat. Ptolemæo donavit Aricim, cæteris autem et argentum, et allerius suppellectilis copiam. Nostri secuti (securi) ad congregiendum cis Tiberim copias exponunt, præsto fit prælium. Et cum Urbis totius milites cum collectitiis nostris paucis belli fortunam experiri debuissent : magno ausu, sed subito, nostri victores illorum alios jurisjurandi religione in actionem domni papæ reversuros astringunt, alios, ut secum puerum, secum captivos ducant. Jam nostri Funmonem properantes, Albanam transierant. Jam terram Ptolemæi uti securi, molles, dissoluti, inermes intraverant, in Algidum jam devenerant : cum Ptolemæus irruens in eos et captos abstulit, et capientes cepit, non veritus domnum papam, nec novit susceptum beneficium triplicata jurisjurandi religione. At Ptolemæi perfidia in exemplum suscepta perjurii contagio omnes infecit, adeo ut ob participationem consortibus sceleris in Urbe et cæteris hinc inde, perjurium nec infamia nec crimen haberetur. Execrabile dicta, horribile auditu, hoc ausu, hac indulgentia criminis, Sermonetam, Nymphas, Tiberium, et omnem oram maritimam enormitas defe-

ctionis involvit, simul et totam Urbem (ut vix unus in multis esset, quem factionis reum dicta vel facta verisimilibus indicis non demonstrarent) ebullire machinis et tormentis ea ex parte, qua Capitolii rupes ædibus Petri Leonis imminet, continue ordinatis, quidquid armis et igne majus inferre poterat, invidia magis quam ratio moliebatur. Factumque ut solus ex parte pateretur in toto, quidquid undique ab omnibus poterat inferri malorum. Hujus tandem impetus fluctus cepit detumescere divinis auxiliis, in operibus rusticianis pro maturitate illius temporis omnibus ferme instantibus ». Hactenus auctor de turbis Urbanis, occasione novi præfecti electionis obortis.

5. *Concilium Trojanum.* — « Hoc eodem anno Paschalis papa, Augusti mensis tempore in Apuliam profectus, Troje Concilium habuit, de quo ista in Beneventano Chronico ab auctore qui aderat : His omnibus, et aliis ita peractis, Apostolicus ipse nono kalendas Septembris Trojam tendit, ibique Concilium statuit, et firmavit. Ad cujus sacri conventus præsentiam fere omnes Apuliæ proceres, archiepiscopi et episcopi conveniunt. Conventu itaque sancte ordinato, inter cætera quæ ibi posita sunt, Tregna Dei statuta est. Adeo quod comes Jordanus, et comes de Loritello, et alii barones Apuliæ sacramento in præsentiarum firmaverunt Tregnam Dei ex tunc per spatium annorum trium fore tenendam : sique confirmato Concilio, et pie finito, papa Beneventum tertio die intrantis mensis Septembris reversus est. Deinde Apostolicus ipse civilis negotia quæ immincebant judicans, Romam reversus est septimo kalendas Octobris; ubi tunc erat monasterium Sancti-Vincentii dedicavit ». Hæc ibi. Sed Petrus in Chronico Cassinate ponit anno 1117.

6. *Moguntini in imperatorem insurgunt pro suo archiepiscopo.* — Quod ad statum rerum Ecclesiæ Germanicæ spectat : Deo propitio magis ac magis Catholici invalescunt. Etenim Moguntini in ipsum Henricum imperatorem zelo justitiæ conspirantes, et in eum insurgentes, coegerunt dimittere liberum suum ipsorum archiepiscopum, quem diu (ut audisti) in carcere detinuerat : qui dimissus adversus eundem imperatorem pro Romana Ecclesia usque ad ejusdem imperatoris occasum viriliter egit. De his autem ita Urspergensis hoc anno : « Ita sedato vix militum plebisque ferventissimo furore, Cæsar ab urbe secessit, et post paucos dies Adalbertum (archiepiscopum Moguntinum), quem jam per annos tres arctissime mancipaverat custodia, vix nimirum ossibus hærentem, ut coactus promiserat, cathedræ suæ remisit. Hic igitur non multo post Sedis Apostolicæ legato Dieterico se nuntiis et litteris subjiciens, ipsum sibi cæterisque non paucis præsulibus Coloniam occurrere postulavit. Ubi et mandata papæ, quæ sibi detulerit, communiter percipi, et ille suam consecrationem diu scilicet interclusam tanta auctoritate consequi possit. Qui conventus (Coloniensis schilcet), instante festo

¹ Albanum hodie.

Natalis Domini factus est non absque indignatione imperatoris ». Hæc de Adalberto, qui ex infestissimo hoste Romanæ Ecclesiæ (ut audisti) Dei summa potentia, eidem est redditus addictissimus.

7. *Dietericus cardinalis legatus*. — Quod vero ad Dietericum Sedis Apostolicæ legatum spectat, de ipso ista Urspergensis paulo superius : « Saxonium vero consensus ad resistendum imperatori magis ac magis roboratur. Ad hæc quemdam cardinalem Romanum, nomine Dietericum, legatione in Pannonias functum per nuntios adsciscunt, quo etiam præscripti Concilii actionem, et per ipsam imperatoris excommunicationem prædicante, tam archiepiscopus Magdeburgensis quam cæterarum Ecclesiarum præsules reconciliationem recipiunt, etc. » Subjicit de nuntis ex Italia ad imperatorem venientibus, et Mathildis comitissæ obitum nuntiantibus.

8. *Mathildis comitissæ obitus*. — Mortua enim est hoc anno ipsa Mathildis comitissa, cujus obitus tempus ejus Vitæ scriptor Dominzæ ita versibus istis consignatum reliquit :

Quam bis quarta manet indictio, juncitur atque
Virginei partus qui currere coeperat annus
Mille annis quintusdecimus centesimus, illum
Natalem Christi voluit celebrare Mathildis.

Et de ætate ipsius, mense dieque obitus sic :

Sex deciesque novem vivens annos in honore,
Julius ante dies octo quam del prope finem,
Scilicet ante diem celebrem Jacobi Zhebædæ,
Corpus ei Christi, pariterque crucem Crucifixi
Porrexit præstui Regius corde serenus,
Quique Bonus senior proprio sit nomine dictus.
In manibus ejus comitissa Mathildis ab hujus
Armonia sacri jupiter memoranda recedit.
In cruce nam Christi sua fideus oscula dixit :
Te colui semper, mea nunc, rogo, etiamna terge.
Accipiens Christi corpus venerabile, dixit :
Semper domi vixi, Deus, hoc scis, spem tibi fidi :
Nunc in fine meo me salvans, suscipe quæso.
Sic orans migrat mox hæc sapiens comitissa, etc.

Quid autem actum de bonis Mathildis Ecclesiæ Romanæ relictis, ignoramus an possessionem eorum Paschalis papa adeptus sit. Nam Urspergensis abbas hoc anno agens de ipsius Mathildis obitu, hæc ait : « Interea directi ab Italia nuntii obitum illius inclytæ Mathildis nuntiant, ad ejusque prædiorum terras amplissimas hæreditario jure possidendas Cæsarem invitant ». Qui anno sequenti in Italiam se contulit.

9. *Concilium Hierosolymitanum in causa Arnulphi patriarchæ*. — Quod ad res pertinet Orientalis, cum accusationes pleræque adversus Arnulphum patriarcham Hierosolymitanum Romam ad Paschalem papam delatæ essent, et ipse Pontifex legatum hæc de causa in Orientem misisset, illic Concilio celebrato, idem Arnulphus sede omnium consensu deponitur : qui ad Sedem Apostolicam provocavit. Hæc enim ita Willelmus Tyrus habet ¹ : « Eodem tempore dominus papa, auditis enormitatibus Arnulphi patriarchæ, et de ejus immunda conversatione plenius edoctus, legatum dirigit ad partes Syriæ quemdam virum venerabilem et multa religione conspicuum, Arausicensem episcopum, qui ad partes nostras perveniens, convocato universi regni episcoporum Concilio, prædictum Arnulphum coram se astare præcepit : tandemque meritis exigentibus, auctoritate Sedis Apostolicæ, ab officio pontificali deposuit. Ille autem adhuc fiduciam habens in suis præstigiis, quibus pene universorum subvertebat animos, transfretare coactus, ad Romanam perrexit Ecclesiam : ubi domini papæ, et totius Ecclesiæ blandis verbis et larga muneratione profusione religionem circumveniens, cum gratia Sedis Apostolicæ remeavit ad propria, sedem obtinens Hierosolymitanam, eadem vivendi licentia, qua prius meruerat depositionem ». Hæc summam Willelmus.

¹ Wil. Tyr. l. xi. c. 26.

1. *Anno sequenti Romæ tumultuatum*. — A num. 1 ad 5. Baronius in narrandis tumultibus, qui Romæ post mortem Petri Urbis præfecti accidere, usus est Codice variis in locis corrupto Pandulfi auctoris Vitæ Paschalis II a P. scriptæ, seu,

ut ipsemet interpretatur, a Petro Diacono cardinali bibliothecario. Ait itaque auctor Vitæ Paschalis : « Anno xvii Pontificatus dicti domini papæ (hoc anno mense Augusto inchoato) anno pacis x, (legendum *anno pacis* v, pax enim Pontificem inter

et Henricum imp. anno m^oxi constituta, ideoque exemplar, quod nactus est Baronius, recte habet, *anno pacis v*) mense primo (id est, Martio) xxvi die mensis, die transitus Domini (legendum in Cœna Domini; Codex Baronii habuit die Paschæ, id est, transitus in Cœna Domini) ira Dei de manu calicis ejus in terram descendit». Quare Falco Be-neventanus, qui non minus quam auctor Vitæ Paschalis II coetaneus est, accurate scribit, hæc contigisse «anno xvii Paschalis, Indictione ix, mense Martio». Auctor enim Vitæ Paschalis, aliique omnes Falconi in eo consentiunt, quod seditio hæc mense Martio, non vero mense Aprili excitata fuerit; anno autem m^oxvi, qui Paschalis II decimus septimus est, Pascha in diem secundum Aprilis, et feria quinta in Cœna Domini in diem trigesimum mensis Martii incidit. Minime itaque dubitandum, quin proluxa ista auctoris Vitæ Paschalis II narratio in annum sequentem Indictione ix nota-tum differenda sit, de qua ideo ibidem agemus.

2. *Treuga Dei confirmata in Concilio Trojanano.* — Ad num. 5. Narrat Baronius ex laudato Falcone Concilium *Trojanum* in Apulia mense septembri celebratum, in quo inter cætera, *Treuga Dei statuta est*. Ex quo intelligis, Treugam Dei, seu pacem inter privatos homines et communitates, de qua sæculo superiori locuti sumus, a sacris Conciliis approbatam fuisse.

3. *Concil. Trenorciense.* — Lalbeus tom. 4. Concil. refert, *Trenorci* a Guidone Viennensi archiep., Sedis Apostolicæ legato, celebratum fuisse Concilium in causa Ecclesiarum Vesontionensium S. Joannis et S. Stephani, quæ utraque se cathedralem jactabat: cum archiepiscoporum sedes diutius quidem in Sancti-Joannis, nonnunquam vero in S. Stephani Ecclesia fuisset. Fusius jam de illa controversia egerat Chiffletius in Historia Trenorciensi, et uterque refert varia rescripta Apostolica ad componendam hanc controversiam emissa. In uno a Paschali II *Guidoni* Viennensi archiep. S. Sedis Apostolicæ vicario scripto, reprehendit Pontifex *Guidonem*, quod Sancti-Stephani clericorum testimonium in Ecclesiæ suæ causa admittere noluerit, ex eoque discimus, Synodum Trenorciensem currenti anno habitam; datum est enim «Troje, ix kal. Septemb., Indict. viii», hoc scilicet anno. In alio, dato *Laterani X kalendas Maii*, Paschalis hæc Guidoni legato suo mandat: «Præcipimus sollicitudini tuæ, ut pro hoc negotio peragendo, et tanti scandali lite sedanda, adhibitis tecum sapientibus et religiosis fratribus, vel Divione, vel ad alium competentiorum locum convenias, quo possint sine gravamine personas sibi necessarias adducere, etc.»

4. *Concil. Divionense.* — *Guidonem*, juxta Paschalis II mandatum Concilium ad hanc litem dirimendam *Divione* coegisse, docet antiquum monumentum in parvo Chronico Bonævaliensi a Manrico in Annal. Cisterc. anno m^oxvii, capite 3 recitatum, cujus nulla, neque tomo x Concil.,

neque in Historia Trenorciensi mentio, quod ideo hic a nobis referetur: «Anno ab Incarnatione Domini millesimo centesimo decimo septimo, cum dominus Guido S. R. E. legatus, Viennensis Ecclesiæ archiep., nunc autem papa Catholicus (sub Callisti II nomine) rediret a Concilio, quod ad Divionense castrum, cum multorum episcoporum et abbatum, aliarumque religiosarum personarum conventu celebraverat, veniens ad novum monasterium, quod usitato vocabulo Cistercium nuncupabatur, rogavit dominum Stephanum abbatem illius loci, ut in Viennensi suo archiepiscopatu monasterium construeret; ubi monachi sub regula et abbate viventes, pro se et omni clero et populo sibi commisso, misericordiam Dei devote exorarent. Cujus petitioni idem abbas, communicato monachorum sibi commissorum consilio, annuens venit Viennam, et consilio et adjutorio præscripti domini papæ Callisti, in valle quadam cepit cœnobium edificare, quod Bonam-Vallem idem papa dictavit vocari. Et sciendum, quod omnes sumptus ad hoc opus necessarii ejusdem papæ providentia seu administratione provenerunt». De eo monasterio infra. Hoc Concilium Divionense in altera Conciliorum editione locum habere debet.

5. *Finis controversiæ in Conc. Trenorciensi et Divionensi agitate.* — Cæterum controversia illa de sede metropolitana Vesontionensi inter canonicos S. Stephani et S. Joannis, sedentibus Paschali II et Callisto II, magna animorum contentione agitata, omnino compressa non fuit, donec anno m^oclm, *Hugo* cardinalis, qui de *S. Caro* dictus est, tum per Germaniam legatus Apostolicus, utrisque consentientibus canonicis, sic illas Ecclesias univit, ut una in posterum esset Ecclesia, unum capitulum, unum ærarium, sigillumque unum, cum hac epigraphæ: *Sigillum Ecclesiæ Bisuntinæ*. Iisdem horis divinum Officium, iisdem ritibus peragitur, canonicorum aliis ad S. Joannis, aliis ad S. Stephani consedentibus: quod discrimen ipsæ, quas incolunt, domus faciunt. Utrobique suam habet sedem episcopus: penes ipsum est optio. Hæc Chiffletius tam in Historia Trenorciensi cap. 39, quam in Probationibus ejusdem Historiæ, et ex eo alii.

6. *In Germania turbæ exortæ.* — Ad num. 6 et seq. Germania tumultibus hoc anno concussa, ut refert Urspergensis in Chron. et ex eo Baronius. Saxonum consensus ad resistendum imperatori magis roboratus fuit, et Dieterico cardinali Romano ac Sedis Apostolicæ legato hoc anno misso, pro eo segnerit agente «tanti archiepiscopus Magdeburgensis, quam cæterarum Ecclesiarum præsules reconciliationem recipiunt, sicut scisso iterum regno, undique novæ res oriuntur, sic contraria quælibet invicem partes utraque moliantur», inquit Urspergensis, cui chronographus Hildensheimensis suffragatur.

7. *Obitus Mathildis comitissæ.* — Ad num. 8.

Mathildis comitissa, cui tantum Romana Ecclesia debet, die xxiv mensis Julii, anno ætatis lxxix, in castello Bondeni octo miliaribus ab urbe Ferraria distante, spiritum Deo reddidit, ejusque corpus, ut ipsa vivens constituerat, ad monasterium S. Benedicti, quod de *Padolirone* dicitur, et quindecim miliaribus Mantua dissitum est, translatum. Urbanus VIII anno mdcxxxv Mathildis ossa Romam asportari jussit, ac sepeliri prope sacellum Gregorianum. Ejus Vita a Donnizone auctore cœvo scripta, et hoc sæculo Franciscus Maria Fiorentinus Commentaria rerum ad Mathildem comitissam pertinentium lingua Italica in Urbe Lucensi publicavit, cujus Opere in hac Critica sæpius usi sumus. Quantis ipsa eminuerit virtutibus, ex Annalibus satis patet.

8. *Varia Concilia in diversis locis coacta.* — Ad num. 9. Non tantum Concilium *Hierosolymitanum*, in quo *Arnulfus* patriarcha Hierosolymitanus sede depositus est, ut narrat Baronius ex Tyrio lib. 41, cap. 26, sed etiam *Rhemense* hoc anno celebratum. De eo tom. x Concil. ex Codice Ms. Montis-Dei hæc referuntur: « Cono Prænstinus episcopus, et Apostolicæ Sedis legatus, in Quadragesima proxima (sc. post Bellovacense coactum mense Decembri superioris anni) *Lectare Hierusalem* (sc. Dominica quarta Quadragesimæ) V kal. April. Rhemis celebrato Concilio, eundem Henricum (sc. imperatorem) damnavit ». Habitu preterea Concilium *Suessionense*, ut anno superiori jam diximus, in eoque decretum, ut sanctus *Godefridus* Ambianensis episcopus e Carthusia, quo secesserat, revocaretur. Verum, ut narrat Nicolaus monachus in ejus Vita, Godefridus a profectus inde venit ad Rhenorum urbem, ubi tum Cono cardinalis et legatus frequentissimam Synodum habebat ». In eo Cono legatus eum admonuit, « ut propriæ utilitati multorum salutem anteponeas, Ambianos rediret. Cum non posset vir Dei illius aliorumque episcoporum auctoritati oblatari, ad suam rediit Ecclesiam ».

9. *Duo Concilia Coloniaensia adversus Henricum imp.* — Duo alia Concilia *Coloniæ* congregata; alterum die decima nona mensis Aprilis, seu feria secunda Paschalis; alterum instante festo Natalis Domini. De priori in Codice Ms. Montis-Dei hæc leguntur: « Item Cono (legatus Sedis Apostolicæ in Gallia) feria ii proximi Paschæ, regem Henricum (coronatum imperatorem) damnavit Colonia in templo Sancti-Gereonis ». De posteriori Urspergensis verba faciens de Alberto Moguntia archiepiscopo, qui Henrici imp. partes secutus fuerat, scribit: « Hic non multo post Sedis Apostolicæ legato Dieterico (seu, ut eum Trithemius in Chron. Hirsaug. vocat, Theoderico) se nuntiis et literis subjiciens, ipsum sibi cæterisque non paucis præsulis Coloniam occurrere postulavit, ubi ei mandata papæ, quæ sibi detulerit, communiter percipi, et ille (sc. Adelbertus) suam consecrationem, diu scilicet interclusam (quia, ut tradit

Urspergensis in Chr. ad annum mxxi, annulum et virgam pastorem suscepit ab Henrico imp.) tanta auctoritate consequi possit. Qui conventus instante Festo Natalis Domini (seu, ut loquitur Trithemius qui idem narrat, circa finem Decembris) factus est, non absque indignatione imperatoris, qui necdum plene voluntarius erat in consensu ejusdem ordinationis. Anno Domini mxxvi, (qui nobis annum a kalendis Januarii incipientibus est adhuc annus mxxv,) imperator Natalem Domini Spiræ cum paucis episcopis et principibus celebrans, ea quæ interim Colonia gerebantur, graviter tulit. Audivit enim quampluribus ibi convenisse, non solum metropolitanos, sed etiam alios episcopos, uti optimates regni, causa præcipua verbum excommunicationis in se manifestandi, quamvis ipse cardinalis (sc. Dietericus, seu Theodericus), cujus hæc initiabantur auctoritate, in itinere defunctus, illo ad sepulturam potius, quam ad actionem delatus esset Concilii. Missus tamen ab eo illic præsul Wirtzburgensis, audientiam vel communionem, nonnisi reconciliatus habere meruit ». Idem narrat Trithemius citatus ad annum mxxv, sed Tomo x Concil. hoc secundum Concilium Coloniaense male in annum sequentem dilatum, quod in altera Conciliorum editione corrigendum erit.

10. *Concilium Catalaunense.* — Denique indictum Concilium *Catalaunæ*, quæ urbs Gallia Belgicæ in Campania ad Matronam fl., ut habet laudatus Codex Ms. Montis Dei: « Calalaunis Cono quarto habito Concilio prædictum regem (sc. Henricum imp.) damnavit IV idus Julii; » quod tamen Concilium *V idus Julii* in Chron. Sancti-Petri-Vivi dicitur celebratum. Sermonem etiam de hoc Concilio habet Simeon Dunelmensis in Hist. de Gest. Reg. Angl. ad annum mxxv: « Wilfridus episcopus de Sancto-David in Walonia obiit. Usque ad illum episcopi extiterunt Brittonici. In octavis Apostolorum (seu pridie nonas Julii) magnum Concilium a Cono Romanæ Ecclesiæ cardinali Catalaunis celebratum est. In quo excommunicavit episcopos, qui Concilio non interfuere, quosdam vero degradavit, et plurimos abbates baculis privatos deposuit de sedibus, Ecclesiasticum illis interdicens officium ». Paulo post: « Bernardus reginæ cancellarius ad Ecclesiam S. David in Walonia præsul eligitur ». Videtur Concilium Catalaunense circa initium mensis Julii inchoatum, et quæ mox narravimus, diversis diebus in illo gesta esse. Porro Henricus rex Angliæ, Wallia subjugata, cupiens Ecclesiam Sancti-David, seu Menevensis, et alias Walliæ Ecclesias suffraganeas Menevensis Ecclesiæ subjicere metropolitæ Cantuariæ, voluit *Bernardum* a Cantuariensi archiepiscopo consecrari; verum *Bernardus*, Henrico rege defuncto, super jure Ecclesiæ suæ Menevensis, seu Sancti-David quæstionem movit contra *Theobaldum* Cantuariensem archiepiscopum, de qua anno mxxl verba facimus.

11. *Gesta in eo Henrici Angl. regis animum conturbavit.* — Episcopi in Concilio Catalaunensi depositi subditi erant Henrici Angliæ regis, et in Normannia, quæ ei parebat, sedes suas habebant. Quare Eadmerus lib. 5 Novorum ait, id regem valde commovisse. Hæc ejus verba : « Rex adhuc consilio cum episcopis habito, quid super his et quibusdam aliis, quæ animum suum plurimum offendeant, papæ responderet, placuit in commune ut suos nuntios mitteret ; per quos quæ vellet, securius papæ mandaret : nam ante hos dies, quidam Romanæ Ecclesiæ cardinalis, functus legatione Apostolicæ Sedis, Cono nomine, Franciam venerat : et ibi juxta suæ legationis officium, generalia Concilia celebrans, episcopos Normanniæ ab episcopali officio suspensos excommunicavit (nempe in Concilio Catalaunensi) : eo quod Conciliis (hoc anno celebratis) tertio vocati, interesse noluerant. Quæ episcoporum excommunicatio animum regis valde reddidit conturbatum : et rationis esse duxit, super his papam convenire. Maxime quod in hujusmodi visus sit privilegia patri (Willelmo sc. I Angliæ regi) et fratri suo (Willelmo sc. II) sibi quæ a Romana Ecclesiâ jam olim collata, se non promerente, scidisse. Ad hæc itaque agenda, directus est Willelmus antistes Exoniensis, papæ notissimus : utpote qui sæpe ad eum, tempore gloriosi patris Anselmi, pro negotiis quæ tunc inter reges Angliæ et eundem patrem versabantur, ab ipsis fuerat regibus destinatus. Nec enim cæcitas, quæ visum ei tulerat, ab ipso itinere illum poterat excusare : quia præterita gesta ejus fiduciam regi præbebant, illum per posse, juxta morem suum, suæ causæ fideliter velle insistere ». Quia vero Paschalis papa ultra non processit, videtur eidem, Oxoniensis episcopi oratione satisfactum.

12. *Querela inde nata cito et prudenter sopita est.* — Priora Eadmeri verba, quibus asserit, Henricum regem cum episcopis regni sui consilium habuisse, quid Paschali II respondendum esset, respiciunt litteras ejusdem Pontificis, datas *Laterni, kal. Aprilis, Indictione viii*, hoc scilicet anno, ab Eadmero ibidem recitatas ; in quibus queritur apud regem, quod se inconsulto episcoporum negotia definiat, oppressis Apostolicæ Sedis appellationem subtrahat, præter conscientiam suam Concilia Synodalia celebret, et episcoporum mutationes presumat ; quod, inquit, « sine sacrosanctæ Sedis Romanæ auctoritate ac licentia, fieri novimus omnino prohibitum ». Jam dixerat : « Usque ad nos, licet indignos eorum (nempe Apostolorum) vicarios hæc consuetudo pervenit : ut per nostræ Sedis vicarios graviora Ecclesiarum per provincias negotia pertractarentur, seu retractarentur ». Hæc ergo litteræ regis animum pupugérant, qui postea magis commotus fuit, cum accepit *Cononem* legatum a Paschali papa in Galliam missum Normanorum episcopos in Concilio Catalaunensi suspensisse. Sed cum Eadmerus, qui eas Paschalis II

litteras nobis conservavit, de hac inter Pontificem et regem simultate nihil amplius dicat, apparet brevi prudenterque hanc querelam sopitam fuisse.

13. *Quatuor priores Ordinis Cisterciensis abbatie.* — Ordo Cisterciensis per hæc tempora mirifice propagatus est ; anno enim *mcxiii, Firmitas* ad Gronam fl., Gallicæ *La Ferté*, prima Cistercii filia in diocesi Cablotensi fundata fuit ; *Pontiniacum*, vulgo *Pontigny*, secunda Cistercii filia quatuor ab Antisiodoro leneis anno *mcxiv* condita, et currenti anno *Clara-Vallis* et *Morimundus*, tertia et quarta Cistercii filie, in diocesi Lingonensi institutæ. Quatuor hæc abbatie sunt quasi totidem Cistercii filie primigeniæ, ex quibus inde cæteræ omnes exortæ sunt, ut videre est apud Manrique in *Anal. Cister.* qui de illis omnibus fuse agit.

14. *Majorica a Pisanis capta.* — Hoc anno Majorica in Christianorum potestatem venit, ut his verbis refertur in *Chronici Pisanis* : « Octavo idus Februarii novam urbem præliando capiunt.... factum est, ut conventus et..... consilia comitis Barcinonensis, et Sarracenorum regis, de Domini inspiratione et Pisanorum archiepiscopi, et Romani legati, Ecclesiæque Pisane canonicorum probitate atque prudentia penitus dissiparentur, et penitus fierent irrita ; cum enim archiepiscopus et Romanus legatus cum clero et Barcinonensi comite, aliisque principibus ad prædicta consilia audienda convenissent, Petrus Albithonis nobilis Pisanus miles celer advenit, et Pisanos urbem expugnare acclamans conventum diremit, cleroque atque aliis, qui convenerant, ad bellum festinantibus, prædictus comes tristis remansit ; et quia pro consilio creditum non fuerat, se præliatorum negavit, suosque pugnare prohibuit. Sed divina providentia providens fervorem Pisanorum, et volens misereri captivorum, urbem in solemnitate Cathedræ Apostolorum principis (mense Februario) per manus Pisanorum civium capi concessit, multis Sarracenorum utriusque sexus interfectis, atque plurimis in captione retentis. Ibi quæ Sarracenorum thesaurorum maximas copias invenientes, et eas quique recollectentes ad carcerem perveniunt captivorum, et inde eos extrahentes.... ad tertiam civitatem perveniunt, quæ fuerat regis Mortadæ. Veniunt, et eam, murum rumpendo et portas ferreas frangendo, capiunt quarto nonas Martii. Capta ibi regis Mortadæ sorore cum filiis et filiabus et nepotibus, et cum maxima copia auri, argenti atque pallionum. Sed quoniam ipsa in captivos, eis testantibus, omnemque Christianum illic perveniens miserericordissima fuerat, cum sua progenie est reddita libertati. Factumque est, ut in ipsa insula Majorica remanente filia sua, regina cum fratre suoque filiolo cum Pisano exercitu Pisam sponte venerit, ibique abrenuntians paganismo, Christianum nomen cum suo parvulo filio suscepit.

15. *Non multo post Majoricani ad infideli-*

tatem redeunt. — « Quarta vero civitatula (id est, pars civitatis) quæ circa regiam Sudam, quæ casarum (id est, arx) dicitur, erat constructum, per manus Pisanorum capta est sexto idus Martii. Præter casarum autem duæ remanserunt turres, quas.... obtinuerunt XIV kalend. Aprilis.... Rex Burabe, quem Saraceni, defuncto rege Nazara-dech, sibi dominum fecerant.... tentavit evadere, sed ingrediens in naviculam illico captus est.... Ex castellis ergo supereminentibus (lignea erant castella) Christiani pontem super casarum posuerunt. Per pontes Pisani transeunt in casarum.... Ipsius autem cassari captio, et tanti laboris consummatio tertio nonas Aprilis. Destructo itaque cassaro, omnique Majoricæ munitione in ruinam data, Pisani cives campum faciunt, et destructæ urbis grandia et innumera spolia inter se dividunt.... His itaque peractis omnibus, Pisani cives et totus exercitus captis spoliis naves onerant.... et ad sua remeant ». Laurentius Veronensis, cui egregie convenit cum his antiquis Chronicis Pisanis apud Ughellum Tom. III, in fine sui poematis ait, Pisanos, postquam Majoricam evertissent, Pascha, quod hoc anno in diem xviii Aprilis incidit, celebrasse :

Et facta præda muri sternuntur et aedes.
... Pascha celebratur, Barales de nexibus exit.¹
Cujus dat nato Pisana potentia regnum.
Denique victores, felici classe parata,
Ad sua quique meat, hos et de litore spectans,
Et miranda caesit Christi magna gentes.
Pisanum tandem Burabe² traductus in urbem
Præbuit Italice sese spectabile monstrum.

Regina, quæ fidem Christianam amplexa fuerat, Pisis sepulta, ubi tempore chronographi adhuc extabat. Addit chronographus hujus reginæ filium sacro baptismo initium in patriam remissum, ut ibi regnaret; sed cum tunc nulla in eam insulam Christiana colonia missa sit, religio Christiana ibidem paulo post extincta, et Majoricani ad infidelitatem et rapinas rediere.

16. *Concilium Ovetanum.* — Celebratum hoc anno Oveti Concilium, a Sandovalio in Vita Urracæ reginæ integrum recitatum lingua Hispanica, quod cum prætermisum fuerit in editione Conciliorum Labbei, ejus versionem hic exhibebo : « Era mclm, celebratum fuit Concilium provinciale in civitate Oveti cujus tunc erat episcopus Pelagius, in quo sancta fuerunt decreta contra predones, sacrilegos, violatores templorum et ceteros maleficos. In istis vero decretis constitutum fuit, quod nullus posset a templo vi abstrahere, neque a spatio septuaginta passuum circum, rem ullam vel rem, nisi esset qui confugisset in azylum manifeste servus, vel latro publicus, vel proditoris alicujus convictus, aut publice excommunicatus, vel monachus fugitivus, vel monialis, vel violator templi. Quod autem quicumque deceptus a diabolo eriperet aliquid a templo, et ab ejus coemeterio usque ad duodecim

passus, restituere teneatur quadruplum, poenitentiamque agere prout jubent sacri canones, vel monachum profiteretur sub regula S. Benedicti, aut fiat eremita quandiu viveret, vel servus fieret Ecclesie, qui damnum intulisset, aut peregrinationem perpetuam susceperet, etc. »

17. *A presulibus et laicis subscriptum.* — Pelagius episcopus Ovetensis, qui hoc Concilium indixit, auctor est historiae, quæ adhuc extat. Sandovalius nihil aliud de eo Concilio refert nisi subscriptiones eo qui sequitur modo : « Confirmat regina domina Urraca istud Concilium cum omnibus suis filiis et filiabus, in ejusque Constitutiones juravit, jurareque alios præcepit, utque servarentur ab omnibus in regno suo tum clericis, cum laicis. Sorores vero ejus istud confirmarunt, nempe domina Elvira cum omnibus suis filiis et filiabus, omnibusque suis subditis. Infans domina Teresia cum omnibus suis filiis et filiabus et omnibus suis subditis idem jurarunt, et confirmarunt comes dominus Suerus, qui sepultus est in coemeterio Cornelianense, Gonsalvus Pelagii, Alfonsus Veremundi, Petrus Alfonsi, Didacus Ferdinand, Gonsalvus Assurez, Gonsalvus Froyla ». Sandovalius ait, post has subscriptiones alias haberi cum hac divisione juxta diversas terras : « Ex Camoris et Campi Tauri comes Gomez Pelagii, comes Ferdinandus Ferdinandi. Ex territoriis Gallacæ comes Pelagius, comes Monius Pelagii, comes Alfonsus Numii, comes Gutierre Vermudi. Ex territoriis Castellæ comes Petrus Gonsalvi, comes Rodericus Gomez, comes Bertrandus, comes Hermengandus, comes Lope Didaci. Ex territorio S. Julianæ Camargo Trasmiera, Egumna cum cæteris terris, comes Rodericus Gonsalvis Giron, ortus ex Asturibus Santillanensibus ». Confirmant alii multi milites et præsules : « Dominus Bernardus archiepiscopus Toletanus et legatus Romanæ Sedis, Pelagius archiepiscopus Bracharensis, dominus Didacus episcopus Yriensis, Munius episcopus Mindoniensis, Didacus Oriensis, Alfonsus Tudensis, Hugo Portuallensis, Pelagius Asturicensis, Gonsalvus Gonimbricensis, Petrus Segobiensis, Bernardus Seguntinus, Paschalis Burgensis, Sanctius Abilanus, Munus Salamanticensis, Bernardus Camorensis ». Addit Sandovalius, Instrumentum habere, hanc Constitutionem non ab hominibus statutam fuisse, sed a Deo omnipotenti, qui eam in universum orbem disseminavit, et postquam audita fuit, non solum Christianos omnes, sed etiam paganos ac Judæos letitia triumphasse.

18. *Aragonenses vexant Saracenos.* — Hoc anno, Era mclm, ut narrat Sandovalius ex antiquis Chronicis, Christiani magnam in Almorabitis irruptionem fecere, eisque mense Januario *Moriellam* munitionem oppidum eripere. Illud ad Valentie limites positum, et Christiani illi alii non sunt ab Aragonensibus.

19. *Ludovicus Francie rex in seditiosos pugnat.* — Ludovicus rex Franciæ, inquit Guillelmus Nan-

¹ Soror hæc erat Mortada regis. — ² Rex Maurus.

gius ad Chron. ad annum MCXIV, « obsedit castrum Gornai super Matronam fluvium situm contra Hugonem de Pompana dominum Creciaci, qui rapinis intentus, mercatorum naves per fluvium transcurrentes expoliabat, et apud Gornaium spolia deducebat. Venit autem ad auxilium Hugonis Guido Rubens dominus de Rupeforti, pater ipsius Hugonis, et comes Campaniæ Theobaldus. Sed rege viriliter decertante eos ad fugam compulsi, et castrum in deditionem accipiens Garlandensibus commisit ». Idem narrat Sugerius in Vita Ludovici Grossi cap. 10, qui cum annos rerum gestarum non memoret, hæc epocha ad alia multa suis temporibus reddenda conducere poterit. *Gornaium* seu Gornacum, gallice *Gournai*, situm erat in agro Parisiensi, ut videre est apud Hadr. Valesium in Notitia Gall. et Theobaldus Campaniæ comes idem est ac Theobaldus Blesensis comes, de quo mox.

20. *Iterum in eosdem dimicat.* — Tum Nangius ad annum MCXV : « Ludovicus rex Franc. circa idem tempus fuit a vicinis baronibus suis et militibus sic arctatus, quod vix ab urbe Parisius secure egredi posset. Sed tandem Dei virtute, et auxilio BB. martyrum, etc. contra hostes armatus Hugonem de Puisaco in Blesia, et comitem Blesensem Theobaldum potentissime subiecit, castrum Puisaci funditus evertens, deinde Odonem Corbolicensem comitem et Hugonem de Creciaco, Guidonem de Rupeforti, et Thomam de Marla tyrannum sibi adversantes perpetuo exhaeredavit, etc. » Idem narrat Sugerius loco laudato cap. 48, et duobus sequentibus, ubi castrum, quod Nangius Puisacum, ipse *Puteolum* appellat, quod dicit fuisse in Belsa, gallice *la Beausse*. Quare suspicor apud Nangium loco *in Blesia*, legendum esse in Belsa, vel econtra. Denique Ordericus hujus temporis scriptor, idem ac Sugerius et Nangius, de hoc bello habet lib. 11, pag. 813, et castrum quod alii *Puteolum*, vel *Puteacum*, vel *Pusatium*, vel *Pinsacum*, ipse *Pusacum* vocat, illudque vulgo nunc nuncupatur *le Puiset*, ut videre est apud Valesium laudatum, pag. 459.

21. *Tanchelinus hæreticus occiditur.* — In Chronico Anselmi Gemblacensis ad hunc annum hoc additamentum legitur : « Tanchelinus hæreticus, qui Andoverpian (sen Antuerpian) Walagram, et circumjacentes insulas, et maritima loca in partibus illis, multis hæresibus infeceat, occiditur ». Quod hoc etiam anno Meyerus in Annal. Flandriæ narrat.

22. *Obitus Petri Eremitæ.* — In eodem Chronico ad hunc annum legitur hæc additio : « Petrus Eremita ex Syria reversus apud Huyum moritur, et sepelitur in monasterio a se fundato ad Mosam

fluvium ». Huyum seu Huyum aut Huionum oppidum est quinque leucis ab urbe Leodiensi distans. Ægidius Auræ-Vallis religiosus in Continuatione episcoporum Leodiensium cap. 16 : « Illis diebus, inquit, dominus Petrus Eremita, qui cum Godefrido duce Hierosolymam profectus fuerat, acceptis reliquiis a domino Arnulpho Hierosolymitano patriarcha, de sepulchro sc. Domini, et de reliquiis B. Joannis Baptiste, cum privilegio Crucesignatorum, domino Oberto Leodiensium episcopo transmissis, ad partes Leodienses revertitur; ubi fundavit Ecclesiam Hoy, novi monasterii in honore S. Sepulchri, et B. Joannis Baptiste, in qua vir vitæ venerabilis, sumptis aliquantis viris religiosis, plantavit regulam sanctissimi patris Augustini. Consummato autem vitæ suæ curriculo, in bona senectute diem clausit extremum VIII idus Julii, cujus corpusculum digne mandatur sepulturæ a toto clero et populo Hoyensi in latere Ecclesiæ ». Ait postea Ægidius in sua marginali annotatione eum translatus *solemniter* fuisse *a loco extra Ecclesiam, ubi olim sepultus fuerat, in cryptam præfectæ Ecclesiæ*, et ibi honorifice reconditas ejus reliquias *XVII kalend. Novembr. anno gratiæ MXXLII*.

23. *Fundavit monasterium canonicorum regularium apud Huyum.* — Jacobus de Vitriaco in Hist. Orientali cap. 16 dicit, *Petrum* inspiratum fuisse a Deo, ut Hierosolymam adiret, et ut in reditu *Urbanum II* conveniret, de liberatione Terræ-Sanctæ cum eo acturus. Ait etiam eum fuisse pauperem et religiosum hominem *in Ambianensi episcopatu vitam creniticam agentem*. Denique auctor magni Chronici Belgici pag. 134, annum fundatæ a Petro Eremita apud Huyum Ecclesiæ his verbis aperit : « Anno ejusdem domini Oberti (episcopi Leodiensis, successoris Henrici, pridie kalend. Junii anno MCXI demortui, ut habet Ægidius laudatus) decimo tertio incepit fundari Novum-Monasterium in suburbio Hoiensi canonicorum regularium, etc. in honorem Sepulchri Domini, et S. Joannis Baptiste, assumptis eo viris religiosis secundum regulam B. Augustini, et ibi prædictus Petrus sepulturam accepit ». Quare cum monasterium illud redux ab expeditione Hierosolymitana *Petrus* fundaverit, ut refert ibidem hic chronographus, ejus e Syria in Occidentem reditus, et Novi-Monasterii ædificatio pertinent ad annum MCXI. Vita hujus servi Dei hoc sæculo a Petro D'Outremanno Belga e societate Jesu edita. Porro anno MCXI *Daimbertus* quidem versus Hierosolymorum patriarcha erat, sed *Arnulphus* sedem invaserat, ut narrat Tyrius lib. 10, cap. 26 et seqq.

PASCHALIS II ANNUS 17. — CHRISTI 1116.

1. *In Concilio generali Lateranensi Paschalis papæ nobilis pœnitentia et retractatio pro rebus cum Henrico imperatore gestis.* — Millesimus centesimus decimus sextus annus sequitur, Indictione nona, quo a Paschali papa agitur Romæ generale Concilium in Basilica Lateranensi, cujus Acta per singulos dies digesta Urspergensis sic narrat: « Eodem igitur anno, qui est decimus septimus (nondum absolutus) ordinationis domini papæ Paschalis Secundi, pridie nonas Martii, Romæ in Sede Lateranensi, in Ecclesia Sancti-Salvatoris, quæ appellatur Constantiniana, celebrata est Synodus universalis Concilii, congregatis ibidem ex diversis regnis et provinciis episcopis, abbatibus, catholicis, doctibus et comilibus, legatis universarum (diversarum) provinciarum quamplurimis.

« Prima itaque die, quæ secunda feria tertiæ hebdomadæ Quadragesimalis inter Mediolanenses episcopos Grosolanum (Chrysolanum), et Jordanem, in alterum, de invasione, in alterum, quod Ecclesiæ suæ deserere extiterit, ventilata est controversia: hanc causam dominus Apostolicus cardinalium episcoporum consilio tractandam distulit.

« Sequenti die in eadem causa plurima tractata sunt, sed res non finita.

« Quarta vero feria Lucensis episcopus de invasione terræ juris Ecclesiæ suæ Pisanos impetebat. E contra dum Pisanus suos defenderet, inter utramque jus partem utriusque populi suffragio longo litigio disceptatur.

2. « Tunc quidam episcoporum de medio Concilii surgens, ita exorsus est: Dominum patrem papam recordari decet, quare illius (huius) præsentis et generalis Concilii multitudo sancta per omnia periculorum genera, mari terraque convenit invitata, ubi non de spiritualibus vel ecclesiasticis, sed secularibus, ordine præpostero tractatur negotiis. Expediendum prius, propter quod principaliter convenierint, ut evidenter pernosceretur, quid dominus Apostolicus sentiat; quidque in Ecclesiis suis reversi (episcopi scilicet), prædicare

debeant. Tunc Apostolicus causam Concilii, et animi sui intentionem his verbis exposuit:

« Postquam Dominus de servo suo fecit quod voluit, et me populumque Romanum tradidit in manus regis, videbam quotidie passim fieri rapinas et incendia, cædes et adulteria. Hæc et huiusmodi mala cupiebam avertere ab Ecclesia et populo Dei: et quod feci, pro liberatione populi Dei feci. Feci autem ut homo, quia pulvis sum et cinis. Fateor me male egisse: sed rogo vos omnes, orate pro me ad Deum, ut indulgeat mihi. Illud autem malum scriptum, quod in lentoriis factum est, quod pro pravitate sui privilegium dicitur, condemno sub perpetuo anathemate, ut nullius unquam sit bonæ memoriæ, et rogo vos omnes, ut idem faciatis. Tunc ab universis conclamatum est: Fiat, fiat.

3. « Brunus autem Signinus episcopus altius exorsus est: Gratias agamus omnipotenti Deo, qui dominum papam Paschalem, qui præsentī Concilio præsidet, audivimus proprio ore damnantem illud privilegium, quod pravitatem et hæresim continebat. Ad hæc quidem cavillatorie subjunxit: Si privilegium illud hæresim continebat, qui illud fecit, hæreticus fuit. Joannes autem Cajetanus episcopus ad hæc commotus, Signino respondit: Tunc hic, et in Concilio, nobis audientibus, Romanum Pontificem appellas hæreticum? Scriptum quod fecit dominus papa, malum quidem fuit, sed hæresis non fuit. Et alter quidam adjecit: Imo nec malum dici debet, quia si liberare populum Dei bonum est, quod dominus papa fecit bonum fuit. Sed liberare populum Dei bonum est auctoritate Evangelii¹, qua præcipimur animas quoque pro fratribus ponere.

« Ad hæc patientia domini papæ horrendo hæresis nomine pulsata expergefata est, et manu silentium indicens, dissidentium clamores et murmura tali oratione compescuit: Fratres et domini mei, audite: Ecclesia ista nunquam habuit here-

¹ Joan. xv.

sini; imo hic omnes hæreses conquassate sunt. Hic Ariana hæresis, quæ per trecentos fere annos vixit, annullata est. Ab hac sede hæresis Eutychiana et Sabelliana contrita, Photinus, cæterique hæretici destructi sunt. Pro hac Ecclesia Filius Dei in passione sua oravit, cum dixit: Ego pro te rogavi, Petre, ut non deficiat fides tua.

« Quinta feria papa in Concilio non sedil, multis et maxime regiis negotiis per dominum Cluniacensem, Joannem Cajetanum, et Petrum Leonis Urbis prefectum, cæterosque illius partis fautores impeditus.

4. « Sexta feria Apostolicus in generalem omnium Ecclesiarum causam animum advertit, et Joanne Cajetano cum Petro Leone, cæterisque regis fidelibus in faciem resistentibus prædicto Cononi Prænestino, sæpius verbum excommunicationis exponere cupienti, murmur hujusmodi verbis et manu ita compescuit. Ecclesia primitiva martyrum tempore floruit apud Deum, et non apud homines. Dein ad fidem conversi sunt reges, imperatores, Romani principes, qui matrem suam Ecclesiam, sicut boni filii, honestaverunt, conferendo Ecclesie Dei prædia et allodia, seculares honores et dignitates, regalia quoque jura et insignia, quemadmodum Constantinus cæterique fideles: et cepit Ecclesia florere tam apud homines quam apud Deum. Habeat ergo mater et domina nostra sibi a regibus sive principibus collata: dispenset et tribuat ea filiis suis sicut scit, et sicut vult. Privilegium investituræ, quod in lentioris concessiss: videbatur, obliterare volens, iterans sententiam papæ Gregorii Septimi, investituram Ecclesiasticarum rerum a laica manu rursus excommunicavit sub anathemate dantis et accipientis.

5. « Cardinalis vero dominus Conon Prænestinus talem papæ fecit inductionem legationis suæ, et contra disturbatores præsentis negotii compellentem, quæ recitata superius ex parte, hic itidem repetenda: Domine pater, si tuæ placet majestati, si vere tuus fui legatus, et quæ feci tibi placent esse rata, in auribus sancti hujus præsentis Concilii ore tuo edicto, et legationem meam tua auctoritate corrobora, ut sciant omnes quia tu me misisti. Ad hæc Apostolicus respondens, ait: Vere legatus ex latere nostro missus fuisti, et quidquid in cæterisque fratres nostri cardinales episcopi, legati Dei et Apostolorum Petri et Pauli, hujus Sedis nostra auctoritate fecerunt, confirmaverunt, probaverunt, ego quoque probō et confirmo: quidquid damnaverunt, damno. Et dominus Prænestinus consequenter subjunxit, qualiter pro Sedis illius legatione Hierosolymis audierit regem Henricum post sacramenta, obsides et oscula in ipsa beati Petri Ecclesia dominum papam tenuisse captum, indigne tractatum, potiora Ecclesie membra, cardinales videlicet exutos, tractos, et male tractatos; nobiles

quoque Romanos occisos et captivos, et populorum stragem factam, et audiens ingemerit, et pro hujusmodi facinoribus Ecclesie Hierosolymitanæ consilio, zelo Dei animatus excommunicationis sententiam in regem dictavit; et eandem in Græcia, Hungaria, Saxonia, Lotharingia, Francia, in quinque Conciliis, consilio prædictarum Ecclesiarum, renovando confirmavit. Orare se demum, ut sicut dominus papa legationem suam confirmasset, ita præsentis Concilii patres et episcopi concorditer annuerent. Ad eundem modum legati, et litteræ domini Viennensis postulabant.

« Dum tali ratione et ordine tam variis dissonæ multitudinis assensus exquiritur, a saniori parte veritati, et apertæ rationi nihil contradicendum: a paucis submurmuratum: ab episcopis vel abbatibus nullo modo reclamatum ». Sic videas, quali ambitu, ut dictum est, oportuerit excommunicationem Henrici imperatoris sæpius a legatis in Conciliis actitatum et promulgatam, demum in Concilio universali probante Pontifice confirmari. Pergunt Acta:

6. « Sabbato denique inter Mediolanensium episcopos controversia tali dispensatione terminata est, Apostolico Paschali docente, translationes episcoporum duobus fieri modis, necessitate vel utilitate. Hujus autem translationis Grossolani (Chrysolani), quæ videbatur in utilitatem, in animarum et corporum damna conversam, Grossolanum (Chrysolanum) quidem in locum unde translatus fuerat restituit; Jordanem vero Mediolanensibus concessit ». Hæc de Mediolanensi archiepiscopo, quem Grossolanum nominat, alii vero Chrysolanum appellant. Pergit vero: « Illis autem, qui propter Concilium, et animarum suarum remedium, Apostolorum Limina visitarent, qui de capitibus penitentiam agerent, quadraginta dierum penitentiam indulsit ». Hactenus de Romano Concilio Urspergensis. Porro licet Paschalis papa (ut vidisti) nunquam adduci potuerit, ut excommunicaret Henricum, tamen per legatos illatam in eum excommunicationem in Concilio confirmavit: quem nec sine Concilio absolvere unquam voluit. Nam audi quid anno sequenti idem auctor affirmet: « Illis et hujusmodi cladibus rex Henricus corde tenus sancitatus, non cessat legationes satisfactorias ad Apostolicam Sedem, licet ipse multum infestationibus italicis insudans, destinare, quas tamen constat minime profecisse. Nam dominus Apostolicus propter securitatem, quam regi, licet coactus, fecerat, diffidetur se illum anathematis vinculo colligasse, ab Ecclesie tamen potioribus membris excommunicationem connexam, nonnisi ipsorum consilio denegat se posse dissolvere, concessio nimirum utrinque synodalis audientie jure ». Hæc Urspergensis, qui adventum Henrici rursus in Urbem sequenti anno contigisse tradit post Paschalis obitum. Spectat fortasse etiam ad ejusdem Concilii Acta, quod hoc anno Landulphum olim archiepiscopum Beneventanum a Paschali

¹ Luc. XXII.

papa in suam pristinam sedem restitutum, habet Chronicum Beneventanum.

7. *Chrysolani episcopi Mediolanensis ad Alexium imp. legati docta disputatio de Processione Spiritus sancti.* — Quod autem de Grosolano, sive potius Chrysolano archiepiscopo Mediolanensi aliunde ad eam Ecclesiam gubernandam translato, mentio facta est: hic ad finem anni huius egregium viri doctissimi Fragmentum, ne pereat, describendum est. Jam enim quod a Latinis prorsus exciderat, Græcia utcumque mutilum conservavit, quod multum præ manibus habuit ut impugnaret, cum videlicet ex eo Græci schismatici urgerentur in quæstione illa de Spiritu sancto, quem non sicut Latini, illi assererent de Patre Filioque procedere. Cum enim Chrysolanus vir esset doctissimus, in primis vero litteris Græcis esset excultus, opportunus dignusque iudicatus est, cui Paschalis papa onus legationis crederet in Orientem ad Alexium Comnenum imperatorem. Quænam autem huius decernendæ legationis causa potissimum intercesserit, nobis hactenus incompertum, sed illud satis perspectum, Chrysolanum ipsum, Constantinopolim cum pervenisset, sive hoc in primis faciendum suscepisset, sive occasione aliqua obiter oblata, adversus Græcos de Spiritu sancto disputationem instituisse coram ipso Alexio imperatore; quam quidem ipsi græce scriptam reliquit. Nos vero ex eis mutuati sumus, quam hic describendam putamus, ne pereat omnino. Habetur textus græcus in Vallicellana, quæ nobis est usui libero, bibliotheca. Porro ipsam disputationem latinitate donavit noster consuetus interpres Federicus Melius, episcopus Thermularum. Pulo autem ad convincendos Græcos dedita opera hunc missum legatum Constantinopolim, non invito Alexio imperatore, quem quidem Euthymius in Panoplia sua Catholico nomine laudat, cuius esset studium in colligendis fidei orthodoxæ decretis. Disputatio autem, sive oratio (hic est ejus titulus) sic incipit:

8. «Chrysolani episcopi Mediolanensis oratio ad imperatorem dominum Alexium Comnenum». Quæ sequuntur addidit græcus librarius: quæ demonstrat (ut auctor putat) Spiritum sanctum procedere a Patre, pariterque a Filio.

« Audi et intellige quæ tibi dico, sapientissime et clementissime, potens pariter, et mitissime imperator Alexi, de Spiritu sancto: neque respicias me, licet sit omnium servorum postremus, sed potius ad illum respice, de quo loquor, Dominum videlicet Jesum Christum, qui est imperator imperatorum, et omnibus imperatoribus major¹: Per ipsum enim reges regnant, et legum conditores justa decernunt. Pro ipso itaque, et de ipso ego illius servus, licet indignus et inutilis, tecum verba facio. Ne ullo pacto sinas in regno tuo aliquam ipsi fieri contumeliam, ne etiam et ipse graves et quas decet imperatores, a te exigat pœnas in regno

suo. Et quomodo contumeliam Filio Dei ille non infert, qui dixerit, quod Christus Dominus non sit æqualis Patri? Dum Apostolus de ipso affirmat¹: Qui cum in forma Dei esset, non rapinam arbitratus est se esse æqualem Deo. Ecce igitur quomodo Filius arbitratur seipsum Deo Patri æqualem. Sed quicumque dicit: Spiritum sanctum non procedere a Filio, opinatur Filium non esse æqualem Patri. Quomodo enim Filius Patri erit æqualis, nisi æqualem cum Patre gloriam obtineat? Gloria enim Patris est, ut Spiritus Patris a Patre procedat: quæ si non reperitur itidem in Filio, ut Spiritus Filii a Filio etiam procedat: aperte patet, quod Patris gloria longe est major, quam gloria Filii. Si igitur Patris gloria est major, et Filii gloria minor: utique patet, quod non sit æqualis gloria Patris et Filii. Si vero Patris et Filii non est æqualis gloria, non erit æqualis potestas, nec una deitas, nec una majestas.

« Sed quamvis de causa non datur filio Dei, ut suus Spiritus ab ipso procedat, dum confitemur, Spiritum sanctum ab ipso mitti, et ab ipso largiri? Spiritus itaque sanctus, Spiritus filii existit, et Filii missio, et donum Filii, quemadmodum idem Spiritus est Patris missio, et donum Patris. Ad perfectionem itaque Filii pertinet, ut quicumque crediderit, quod Spiritus Sanctus a Patre et a Filio ex utroque æqualiter mittitur et largitur, ut idem ipse credat, quod Spiritus sanctus Patris et Filii ex utroque æqualiter procedat. Quicumque vero illud crediderit, et hoc non credit: non est perfecte fidelis.

9. « Sed fortasse dicet ille: Caveo equidem ne quo pacto Patris gloria et Spiritus sancti, aliquod detrimentum et immutationem patiantur, si Spiritus sancti ita a Filio, quemadmodum a Patre procedere ostendatur: absit hoc. Gloria enim Filii gloria Patris existit, sicut e contra Patris gloria est gloria Filii. Nullam enim unquam singularem gloriam quærit Pater a Filio segregatam, neque Filius sibi gloriam quærit segregatam a Patre, præter illam solam, quæ ipse Pater est; ita etiam quæ Filius ipse Filius est; secus enim communis est, sed non singularis. Singularis igitur gloria Patris ea est, quæ Pater existit; sed potius etiam illa quodammodo gloria Filii est, quoniam Pater hæc in re magis glorificatur: Filius enim ille ipsius Patris existit. Quod vero dicimus de gloria Patris et Filii, hoc etiam fideliter sentimus et de gloria Filii, et Spiritus sancti. Spiritus enim sancti gloria Filii etiam gloria existit; nec habent inter se aliquam singularem gloriam et privatam, nisi quod ille talis est, a quo Spiritus sanctus procedit, et iste talis, qui a Filio procedit. Similiter dicimus et sentimus de gloria Patris et Spiritus sancti. Gloria enim Patris, Spiritus sancti est gloria, et Spiritus sancti gloria est Patris gloria. Tamen hanc singularitatem et distinctionem habent inter

¹ Prov. VIII.

¹ Phil. II.

se, quod Pater talis est, a quo Spiritus sanctus procedit, et Spiritus sanctus talis est, qui a Patre procedit.

10. « Ut vero apertissime appareat, quorsum hæc nos dicamus : ita brevis quæ superius dicta sunt colligamus et perpendamus. Ostendimus igitur supra, quod sicut Pater duas habet (ut ita dicamus) singulares glorias, alteram quidem quo ad Filium, alteram quo ad Spiritum sanctum ; ita etiam Filius duas habet glorias : alteram, quo ad Patrem, alteram, quo ad Spiritum sanctum. Spiritus quoque sanctus similiter duas habet glorias, alteram quo ad Patrem, alteram quo ad Filium. Quicumque igitur dixerit, Spiritum sanctum procedere a Patre, et non a Filio : duas quidem glorias relinquit ipsi Patri, sed unam aufert Filio, sicut et Spiritui sancto ; quibus refragatur Catholica fides, et repugnat communis omnium consensus. Fides enim Catholica, Patris, et Filii et Spiritus sancti gloriam æqualem esse confirmat. Æqualis enim est gloria Trinitati in Unitate, et Unitati in Trinitate, in omnibus aliis juxta omnia integra permanente proprietate Patris in Patre, et proprietate Filii in Filio, et proprietate Spiritus sancti in Spiritu sancto ; ita ut nullus affirmare posset aliquid de Patre, per quod Pater vel genitus vel procedens esse cognosceretur ; neque quidquam de Filio per quod Filius, vel procedens, vel genitor ostenderetur ; ita etiam de Spiritu sancto nullus aliquid posset affirmare, propter quod Spiritus sanctus, vel genitus vel genitor appareret.

11. « Ecce igitur, sapientissime et clementissime imperator, quomodo iis quæ supra diximus, divina favente ope, ostendimus, quod æqualis gloria in tribus sit divinis personis, et singularis in singulis absque ulla confusione generationis et processionis. Ostendimus præterea, quod quicumque dixerit, Spiritum sanctum a Filio procedere, nullum detrimentum infert Spiritus sancti gloriæ ; sed ille potius qui dixerit, Spiritum sanctum non procedere a Filio, Filii et Spiritus sancti gloriæ aliquid ipse subtrahit, et in Filium, et in Spiritum sanctum pariter delinquit : nec illi remittetur nec in præsentem, nec in futuro sæculo, nisi pœnitentia ductus crediderit et confiteatur, Spiritum sanctum a Patre et a Filio procedere. Hoc enim tibi pateat manifestum, quod sicut in hac Trinitate nihil majus aut minus existit, ita in eadem nihil prius aut posterius intelligi debet : tota enim Trinitas æquali honore est veneranda, et cœterna existit : neque enim Pater præcessit Filium, neque Pater aut Filius Spiritum sanctum. Similiter neque Pater major est Filio, neque Pater aut Filius Spiritu sancto major est : quoniam in Trinitate Pater omnino æqualis est gloriæ cum Filio et Spiritu sancto, et omnino sunt æquales gloria cum Patre, et Spiritus sanctus, et Filius. Quapropter aliter intelligi omnino nequeunt, nisi intelligatur Spiritus sanctus a Patre procedere simul et a Filio.

12. « Sed, inquit aliquis, in Evangelio repe-

ritur¹, Spiritum sanctum a Patre procedere, non tamen legitur, et a Filio : sed hoc quidem nolo silentio præterire, sed potius diligenter quærere, ut ipse discam, si quo pacto, Deo docente, valeam invenire absque ulla dubitatione, quid fidelis homo de hac re sentire debeat. Veritas itaque dicit, Spiritum sanctum a Patre procedere ; sed Græcus addit præterea, et dicit, Spiritum sanctum procedere a Patre solo. Latinus addit etiam ipse, et dicit Spiritum sanctum procedere a Patre, et a Filio. Addit igitur Græcus, addit et Latinus, quoniam in prædictis Evangelii verbis non invenitur, neque ex solo Patre, neque ex Filio. Si igitur vera sunt quæ dicit Græcus, mendacia essent proculdubio quæ dicit Latinus. Sed a verbis quæ habentur in Evangelio, neque Græcus dissentit, neque Latinus ; sed ab ea additione, quam addit Latinus, dissentit Græcus. Tu igitur, sapientissime rex, ascende benigne ad tribunal cordis tui, et sedens quasi iudex in solio mentis tuæ judica judicium justum ; neque (ut fieri solet) Græcos, quasi peculium tuum foveas. Familiaritas enim plerumque a veritate declinare facit iudices. Pone igitur utrorumque rationes, et non sit apud te pondus et pondus², vel mensura et mensura : utraque enim abominatur Deus. Audi igitur ingenio corde tuo, quam de causa addat Græcus illud, A solo, et qua iterum de causa addat Latinus, Et a Filio, Spiritum scilicet sanctum procedere ; et ubi videris cum ratione additionem appositam, ibi mente acquiescas tua, et illi additioni teipsum adjungas, ubi vero videris additionem a ratione alienam : tu quidem rationi adhæreas, ab ea additione te ipsum segrega. Volo equidem argumentum Græci et Latini in medium afferre, ut utroque argumento per te perpensis, veritas a te dignosci valeat circa utramque additionem.

13. « Græcus inquit : Ego recte credo, Spiritum sanctum a Patre procedere, et non ab alio : et quoniam inibi, in Evangelio scilicet, non est additum, A Filio, vel ab alio, hac de causa nolo dicere, ab alio, sed a Patre solo intelligere. Si enim veritas ab alio etiam procedere intellexisset : nti-que ab alio esse, omnino dixisset. Ad hæc ego respondeo, Latinus tutatus : Non est necesse hoc in loco hac de causa intelligere a solo Patre Spiritum sanctum procedere, quoniam solum Patris nomen in Evangelio ponitur : multis enim in locis et sententiis sacræ Scripturæ solum Patris nomen ponitur : nihilominus non hac de causa solus Pater intelligitur, ut non magis Filius etiam congrue ibidem intelligatur, quemadmodum in illis Evangelii verbis³ : Non enim vos estis qui loquimini, sed Spiritus Patris vestri, qui loquitur in vobis. Ecce enim Veritas, solo Patris nomine posito, dicit hæc duo, Spiritus videlicet sanctus a Patre procedit, et Spiritus Patris vestri qui loquitur in vobis : cum tamen eadem Veritas Filius dicat iisdem di-

¹ Joan. xv. — ² Prov. xx. — ³ Matth. x.

scipulis¹ : Ego enim dabo vobis os et sapientiam, cui non poterunt resistere, et contradicere adversarii vestri. Per os et sapientiam nihil nisi Spiritum quem accepturi essent credentes, intellexisse, palam facit idem Evangelista in Actis Apostolicis², dum ait Stephano : Non poterant resistere sapientiae, et Spiritui qui loquebatur. Idem ergo Spiritus Patris, et Filii, a Patre dari dicitur, et a Filio et non Patre solo, licet dixerit, Spiritus Patris vestri. Debemusne igitur ita intelligere, Spiritum sanctum Patris vestri, et non Filii, quemadmodum Graecus intelligit, Spiritum inquiring, a Patre procedere, et non a Filio? Si vero Spiritus Patris non est Spiritus Filii, quid est igitur quod inquit Apostolus³ : Nisi Deus Spiritum Filii sui in cordibus nostris. Et iterum⁴ : Nisi quis Spiritum Christi habuerit, hic illius non erit? Num Veritas dicit, Spiritus Patris, et non erit veritas, quod dicit Veritatis Apostolus, Spiritum sanctum Filii esse Spiritum et Christi? Si vero utraque vera sunt hoc in loco et quod Veritas dicit, Spiritum Patris, et quod Veritas tacet, Spiritum Filii : quam de causa non similiter, utraque vera sunt : illa in illo loco magis ubi Veritas dicit Spiritum sanctum a Patre procedere? Porro iterum alia duo exempla ex Evangelio proferam, in quibus solum nomen Patris ponitur, solus tamen Pater absque Filio non intelligitur. Ut vero in ore duorum vel trium testium stet omne verbum, Dominus Jesus dixit discipulis suis in Evangelio⁵ : Si remisistis hominibus peccata ipsorum, remittet vobis Pater celestis delicta vestra. Alio etiam in loco dixit⁶ : Quicumque fecerit voluntatem Patris mei qui in caelis est, ille est frater meus. Ecce in his duobus locis solius Patris nomen ponitur. Catholica tamen fides non patitur, ut solus Pater absque Filio in illis intelligatur, quoniam in voluntate solius Patris nomen ponitur, sed solus Pater nunquam intelligitur, et voluntas Patris est Filii voluntas, et peccatorum remissio, quae est a Patre, eadem est a Filio. Similiter quando dictum, Spiritum sanctum a Patre procedere, si fortasse solius Patris nomen ponatur, Christianorum tamen fides non tolerat neque patitur, ut solus Pater absque Filio intelligatur.

14. « Hoc autem intelligendum, ut quando solum nomen Patris ponitur, et solus Pater intelligitur, ut in Evangelio⁷ : Vox Patris audita est : Ille est Filius meus dilectus; ecce hoc in loco, potest Graecus dicere, vocem Patris intelligendam, non vocem Filii : vox enim ex Patre audita est, non autem ex Filio : nihilominus ex ipso hoc dicere non potest, quoniam solum nomen Patris illud loquitur, sed potius ab hoc ipso, quod haec vox ea est, quae ad solum Patrem refertur : Ille est Filius meus. Diligenter itaque est animadvertendum in unaquaque propositione et significatione, quia

solum nomen Patris ponitur, qualem sit illud quod proponitur. Si enim tale est, ut ad solum Patrem referatur : et Graecus, et Latinus, et Christianus omnis debet de solo Patre illud intelligere. Si vero tale extiterit quod proponitur, ut ad Patrem et ad Filium simul referatur, non debet eo in loco Christianus homo Patrem a Filio, et Filium a Patre segregare, sed simul intelligere et Filium. In hac vero propositione et significatione, qua dicit Spiritum sanctum a Patre procedere, tum Graeco, tum etiam Latino est considerandum, utrum processio Spiritus sancti soli Patri, vel simul Patri et Filio tribuatur. Ex ipsa igitur simplici significatione nullus aperte potest intelligere, an a Patre solo, vel a Patre et Filio Spiritus sancti processio intelligere debeat. Si igitur Graecus voluerit, ut nos eo in loco a solo Patre intelligamus, necesse est, ut auctoritatem aliquam in medium afferat, vel rationem aliquam ostendat congruentem, per quam hoc credere debeamus. Si vero auctoritatem nullam, vel testimonium de hoc poterit demonstrare, aperte patet, quod non debet in illo loco, a solo Patre procedere Spiritum sanctum, intelligere. Non igitur rationi congrua est illa causa, quam superius diximus pro Graeco, nisi alia fortasse congruenter afferatur ». Hucusque in Graeco Codice, in quo decurtatam disputationem hanc poni nemo non videt : nam carere saltem peroratione habitam coram imperatore orationem, quis non intelligit? Certe ejusmodi fuisse, ut pluribus Graecorum, qui sapientiores esse videbantur, laborandum sudandumque tribuerit, iidem ipsi fateri videntur.

15. Etenim contra Chrysolanum episcopum Graeci complures quasi indicto bello, structa acie castra moverunt. Inter alios autem quidam monachus Joannes nuncupatus, et Nicolaus Methones adversus eum pugnasse noscuntur, de quibus Gennadius Scholaris in Apologia Concilii Florentini adversus litteras circulares Marci Ephesini saepius verba facit, eosque schismaticos, Photii discipulos, et Marci Ephesini doctores appellat, a quibus tanquam malis corvis, malum ovum Ephesinum ortum habuisse inquit, Scripsit praeterea contra Chrysolanum Eustratius archiepiscopus Nicenus. Quorum scripta, quales isti fuerint, satis indicant, quod digna sint suis patellis opercula. Hos omnes etiam iisdem temporibus floruisse, ex eorum scriptis aperte constat, dum coram illo egisse affirmant, vel ab aliis accepisse qui cum Chrysolano egerunt. Scripsit quoque Blemmides, cognomento Sapiens, adversus Chrysolanum, haud tamen puto, quod is fuerit Nicephorus ille Blemmides magni nominis vir, quem Latinorum veram doctrinam seclatum potius, quam Graecorum levitatem et errores, apparet ex ipsomet Gregora, qui libro quinto, capite secundo, haec habet de Blemmide, quod acuminis ingenii, et eloquentia, et Ecclesiasticorum dogmatum usu ita alios superabat, ut cum illo collati, quasi pueri viderentur.

¹ Luc. XXI. — ² Act. vi. — ³ Gal. iv. — ⁴ Rom. viii. — ⁵ Joann. XX. — ⁶ Matth. xii. — ⁷ Matth. i. i.

Qui Blemmides (ut idem Gregoras ibidem asserit) cum divinarum rerum esset peritissimus, et in otium se contulisset, multa e sacra Scriptura testimonia, quæ dogma Latinorum confirmare videntur, colligere et conscribere cepit. Quibus scriptis Græcus quidam, qui deinde Constantino-politanam rexit Ecclesiam, adductus est, ut Latinorum sententiæ adhaereret. Quamobrem a schismaticis, vel invito Michaelē Palæologo imp., e patriarchali solio fuit deturbatus. Blemmidis itaque adversus Chrysolanum scripta pseudoepigrapha sunt, non germana Nicephori illius Blemmidis sapientiæ nomine insignis, de quo supra; sed alterius Blemmidis Junioris schismatici potius, cum præsertim ea tanti nominis viro indigna, quivis illa pereurrens facile judicaverit. Cæterum quod ad rem spectat, sane quidem infelicem Ecclesiam Græcorum ex hujusmodi legatione Chrysolani a Paschali papa missa nullum lucrum consecutam esse, declarant eventa, cum post hæc in eodem errore perseverasse, majorum monumenta

demonstrent, quamvis imperator se cum Romana Ecclesia communicare, ostendi ipsi voluerit.

16. De eodem autem Chrysolano ad postremum accipe quæ Trithemius habet loco non suo: nam post Alexandrum Tertium ponit, quem constat vixisse hoc tempore sub Paschali papa vivente Alexio imperatore; ait enim: « Chrysolanus, Ecclesiæ Mediolanensis archiepiscopus, vir in divinis Scripturis eruditissimus, et in sæcularibus litteris nobiliter doctus, græca et latina eloquentia insignis edidit, quædam magnæ auctoritatis opuscula, quibus nomen suum ad nolitiam posteritatis cum gloria transmisit, de quibus ad manus nostras nullum pervenit. Fertur ejus de Spiritu sancto contra Græcos liber unus, de sancta Trinitate liber unus, Epistolæ, Sermones, et alii Tractatus, qui mihi incogniti sunt ». At periire ista omnia, ut vix quod latinitati reddendum e Græcis curavit monumentum, idemque decurtatum supersit.

Anno periodi Græco-Romanæ 6609. — Anno Æræ Hispan. 1116. — Anno Hegire 510, inchoato die 13 Maii, Fer. 2. — Jesu Christi 1116.

— Paschalis II papa 18. — Henrici V reg. 11. iup. 6. Alexii Comneni imp. 36.

1. *Conc. Lateran.* — A num. 1 ad 6. Acta Concilii Lateranensis hoc anno celebrati fuisse Baronius ex Urspergensis in Chron. recitat, illud inchoatum secunda feria tertiæ hebdomadæ Quadragesimalis, *pridie nonas Martii*, et per sex dies congregatum, adeoque conclusum sequenti sabbato, V idus Martii. In eo Paschalis II retulit se Privilegium lavestiturarum Henrico imp. per vim concessisse, et ut multa mala ab Ecclesia et populo averteret; sed se illud condemnare sub perpetuo anathemate, et rogare omnes, ut idem faciant. « Tunc ab universis conclamatum est: Fial, fiat », inquit Urspergensis. Vides Concilia feria n ut plurimum inchoata fuisse.

2. *Deposito Grosulani ab archiepiscopatu Mediol. in eo agitata.* — Ad num. 6 et seq. Acta in causa Grosulani ab archiepiscopatu Mediolanensi depositi, et Jordani in ejus locum subrogati narrat Baronius ex Urspergensis laudato, sed Puricellus in Monumentis Basilicæ Ambrosianæ n. 322, refert verba Landulphi a Sancto-Paulo in Chron. cap. 29, qui huic Concilio interfuit: « Ego itaque mœrens de hac intrusionē (quippe Nazarius Muri-

cula, jam factus primicerius, alterum Landulphi intruserat in Ecclesiam S. Pauli in Compito, ut notat Puricellus), et omnis Ecclesiastici beneficii in me facta expoliatio, ivi ad Synodum, quam papa Paschalis pro causa Grosulani et Jordani Romæ celebravit, in qua supradictus Anselmus de Pusterla secundum suam dignitatem honestum locum habuit, et sedit. Sed neque pro Grosulano, neque adversus Jordanum verbum bonum aut malum protulit. Jordanus vero a principio Synodi usque in finem sedens, et silens a dextra Apostolici nullo mediante in Synodo fuit (notabile est, quod Mediolanensis episcopus primum locum habuerit). At Grosulanus ibi stando et sedendo inter archiepiscopos et episcopos, cum vir prudens intendebat ad destruendam Jordani impositionem (id est, electionem aut inthronizationem) et conversionem (id est, eorum mutationem qui Jordanum archiepiscopum crearent, licet antea Grosulaniste fuissent) eorum qui ipsam fecerant impositionem: et intendendo ad ista, egregie loquebatur de positione et restitutione sua, quæ positus et restitutus fuit in Mediolanensi Ecclesia. Cui viro (sc. Grosulano)

homo, qui in ista Synodo sive in Lateranensi palatio contradixerit, certum locum non habuit », id est, in presenti Synodo.

3. *Grosolanus ad episcopatum Savonensem redire jussus.* — Ut hæc locutus est Grosolanus, nullus qui ei contradiceret comparuit, « sed dominus papa Paschalis, qui affectans reddere illum placabilem Deo et sibi, ejus scientiam ejusque facundiam commendabat, atque labores quos ipse papa per se suosque legatos Romæ et per Longobardorum provinciam pro ipso Grosulano sustinuerat, coram Synodo referebat, et ad leniendam duritiam et asperitatem eorum, qui nec positionem, nec restitutionem Grosulani susceperant, vel suscipiebant, non solum de presbytero Liprando, ejusque lege mentionem faciebat, sed ruinam gabute (id est, pedi pontificii, quod in ipso Concilio Romano anno mcv coacto et Grosulani manibus cecidit) introducebat. Quæ ruina tunc apparuit, quando ipse Grosolanus juravit, et ad accipiendam restitutionem ascendit. Insuper inferere (sc. Paschalis II) quod Grosulani translatio de episcopatu Savonensi ad archiepiscopatum Mediolanensem utilitatem non contulerat. Quos casus Grosolanus clypeo Ecclesiasticæ consuetudinis et legis a se quodammodo repellere. Verumtamen domnus papa, nec Synodus, neque in prima, neque in secunda, neque in tertia, sive in quarta die Synodi Grosulano per singulos dies pro se, suaque causa in palatio et Synodo agendi, non satisfecit. Sed Grosolanus in quinta die (Puricellus notat fuisse diem sabbati, eo quod feria quinta Pontifex in Concilio non sedisset, uti Urspergensis narrat) qui fuit ultimus illius Synodi, Apostolico instanti suis cum predictis objectionibus ille inquit : Domine, domine, veniam ad vos; quamvis ii, quibus dedisti potestatem judicandi causam meam, me non diligant. Tunc Portuensis Petrus episcopus se et ceteros habentes hanc potestatem de malevolentia habita in Grosulanum honeste et sufficienter excusavit. Et cum excusasset, in communi concordia illius excusantis, et ceterorum habentium potestatem istam, prolata fuit sententia, quæ prohibuit Grosulanum Mediolanensem Ecclesiam inquietare, et ad episcopatum (Savonensem) dixit ei redire ».

4. *Grosolanus Romæ toto vitæ tempore remansit.* — Hanc narrationem prosequitur Landulphus Junior cap. 39, apud Puricellum citatum : « Jordanus vero audita et publicata illa sententia de redeundo Grosulano ad episcopatum (nempe Savonensem) coram ipsa Synodo theatrum ascendit (supra quod erat Paschalis II thronus), et ibi ad pedes Apostolici stratus grates illi reddidit : et elevatus ab ipso Apostolico gratias et virgam pontificalem in ipso theatro suscepit. Altera vero die (sc. Dominica IV Quadragesima) ipse Jordanus archiepiscopus » ordinavit Brixiansem electum in episcopum, nomine *Vitalianum*, sicuti refert Landulphus. Mandavit Grosulano Concilium Romanum, ut ad suum

episcopatum Savonensem rediret; verum, uti habet Landulphus, « ipse autem non ad Savonam ivit, sed in ipsa Urbe (sc. Roma), apud monasterium, quod dicitur Sancti-Sabbathii (legendum *Sabæ*, sicuti recte notatur in antiquo archiepiscoporum Mediolanensium Catalogo in Archivis metropolitane Ecclesiæ asservato. Monasterium illud Romanum Sancti-Sabæ monachi Græci incolebant) per annum unum et menses quatuor, ut episcopus vixit, (neque enim episcopatum deseruerat, aut monachum induerat) atque ibi sepultus est octavo idus Augusti. Galuancus Flamma in suo magno Chronico, aliique recentiores Mediolanenses, qui eum sequuntur scriptores, hunc præsum in Ecclesia Sancti-Sebastiani sepultum asserunt; sed solide a Puricello laudato hæc in re refelluntur.

5. *Scriptum Tractatum de Processione Spiritus sancti.* — Grosulanus, ab aliquibus *Grisolanus*, ab aliis *Chrysolanus* appellatus, doctrina et eloquentia pollebat, ut mox vidimus Synodum Romanam explicantes. Trithemius lib. de Script. Eccles. cujus verba recitat Baronius num. 16, valde laudat Tractatum ab eo editum de Spiritu sancto contra Græcos, quem Baronius periisse existimans prolixum Fragmentum ex eo excerptum num. 8 et seqq. recitat. Verum asservatur ille Ms. in Bibliotheca regia sub titulo *Petri Grosulani episcopi de Processione Spiritus sancti*, indeque Ughellus in episc. Mediolanensibus eum *Petri* prænomen tulisse deducit. Existimat num. 7 Baronius Grosulanum a Paschali II ad Alexium imp. legatum missum fuisse ob causam sibi incognitam, et dum Constantinopoli esset adversus Græcos disputationem de Processione Spiritus sancti instituisse coram ipso imperatore. Baronium secutus est Allatus lib. 2 de Consensione Eccles. Occid. et Orient. cap. 10, et utrumque passim alii. Verum legatio hæc cujus antea nullus mentionem fecerat, plane commentitia. Cumque ex Landulpho Juniori anno mcv a nobis laudato constet, *Grosulanum* eo anno in Orientem profectum esse, indeque nonnisi post biennium rediisse, perspicuum est, intra tempus illud *Grosulanum* Constantinopoli adversus Græcos disputasse, et Tractatum, de quo mox, tunc elucubrasse.

6. *Seditio Romæ hoc anno excitata.* — Baronius num. 6 suspicatur, *Landulphum* archiepiscopatu Beneventano alias a Paschali II depositum, in Concilio Lateranensi in pristinum statum restitutum fuisse, illudque indicare Falconem in Chronico Beneventano. Verum iste chronographus contrarium insinuat, cum eum mense Augusto dignitatem recuperasse prodatur, et Concilium Lateranense mense Martio inceptum et absolutum fuerit. Hæc Falconis ad hunc annum verba, quibus seditio, quam Baronius anno superiori, ut ibidem dictum contigisse putavit, anno suo redditur : « Dominus noster predictus Apostolicus Romæ Synodo, statuit (ubi de alio Concilio, quam quod hoc anno celebratum est, verba non facit) et hoc

anno præfectus Urbis Romæ mense quidem Martio obiit, post cuius mortem civile bellum terribiliter ortum est, eo quod Romani audierant, quod Petrus filius Leonis, Apostolici consilio, filium suum præfectum ordinare vellet. Unde Romanorum populus præfecti defuncti filium ad præfecturæ honorem evexerunt. Quo ordinato, ad prædictum papam Paschalem miserunt suppliciter postulantes, quatenus eorum ordinationi assensum ipse præberet et corroboraret. Apostolicus autem nullo modo eis assensum tribuit. Romani itaque hæc agnoscentes, conjuratione facta, mirabilia domorum ædificia et turres complures radicibus prostraverunt, eorum quidem qui cum Petro Leonis ad id faciendum conjurabant. Unde factum est, ut Ptolemæus præfecti avunculus, et alii barones Apostolici castra invaderent et tenerent; contigit autem die quadam quod præfectus ipse militum fere quinquaginta collegio stipatus ad explorandum milites, quos Apostolicus miserat, extra Urbem perrexisset. Comestabulus autem Apostolicus hoc deprehendens ex improvise eos aggreditur, prostravit et præfectum comprehendit. Ptolemæus igitur memorati nepotis captivum audiens, absque mora militibus sumptis, papæ præfatum comestabulum invadens, nepotem, qui captivus ferebatur, absolvit, et secum gaudens ad propria perduxit.

7. *Paschal. II Landulphum in archiepiscopat. Beneventi restituit.* — « Dum hæc et alia Romæ agerentur, præfatus Apostolicus Urbem exivit, qui apud castrum quoddam, Setion nomine (italice, *Sezza* in Campania Romana, ditionis Pontificiæ) commoratus est; viderat siquidem seditionem illam magis ac magis inflammari, et Petrum Leonis de die in diem acriter expugnari. Diebus autem non nullis elapsis, Apostolicus ipse seditionem illam placari et minui adspiciens, consilio accepto, militibus collectis, Romam ingressus est; deinde palatium Lateranense ingreditur, ibique Missarum solemniam decantavit. Cum autem ipse Urbem ingressus fuisset, Romanorum cœlus, qui ei rebellis extiterat, fere ad ejus imperium et voluntatem conversus est; sicutque Apostolicus ipse, tranquillitate inventa, Romam securus habitavit. His taliter actis, prædictus Apostolicus LANDULPHUM, quem deposuerat, undecimo die intrante mensis Augusti reintegravit ad archiepiscopatum », videlicet Beneventanum. His adde quæ Baronius anno superiori num. 1 et seqq. de hac seditione loco non suo habet.

8. *Saraceni a Raymundo III comite Barcinonensi bello vexati.* — Paschalis II litteris ad Raymundum III Barcinone, Bisulduni, et Provinciæ comitem datis « apud Transiberim per manum Joannis S. R. E. diaconi cardin. ac biblioth. X kal. Junii, Indict. ix, Incarnat. Dom. anno mcxvi », Pontificatus autem sui anno xvii, ejus personam, ut comes petierat, uxoris ejus ac filiorum in Sedis Apostolicæ tutelam suscipit, atque: « Non parvum tuæ nobilitati meritum labor ille conciliavit, quo

per anni longitudinem (per annum nempe mcxiv), in Balearibus insulis contra hostes Christiani populi desudasti: cui tuo tuorumque consortium glorioso præcinctui Omnipotens Deus gloriosam de hostibus suis victoriam conferre dignatus est. Super hoc ad expugnandos Mauros ac Moabitas in Hispaniæ partibus, et Tortosam eorum præsidium obsidendam animi nobilis industriam paras ». Ad quæ postrema verba referendum quod anonymus in Gestis comit. Barcin. cap. 16, de Raymundo scribit: « Tributa ab eorum (nempe Saracenorum) principibus, Valentia scilicet, Tortosæ et Herdæ accepit ». Cæterum *Tortosa* nonnisi a Raymundo Berengarii hujus nominis IV, ejus filio et successore, Saracenis erepta, ut suo loco dicitur. Eas litteras refert Diagus in Hist. comit. Barcin. lib. 2, cap. 95.

9. *B. Oldegarius fit episc. Barcinonensis.* — Eodem die Paschalis II scripsit ad *Oldegarium*, abbatem Sancti-Rufi electum Barcinonensem, atque se a canonicis Barcinonensis Ecclesiæ accepisse, eum cleri et populi desideriis concurrentibus episcopum Barcinonensem electum fuisse; ipsumque eo cognito in suam diffugientem abbatiam, omnium expectationes fefellisse, ita ut Spiritui sancto resistere videatur. Quare se illum a regimine monasterii Sancti-Rufi absolvere, eique præcipere, ut ad prælatam Ecclesiam Barcinonensem accedat. « Quod si, quod absit », subdit Paschalis II, « huic nostræ præceptionis paginæ obedientiam impartiri renueris, venerabili fratri nostro Bosono, S. R. E. presbytero cardinali, quem in Hispaniæ partibus legatum dirigimus Apostolicum, per Apostolica scripta præcipientes mandamus, quatenus te, ut Barcinonensis Ecclesiæ præfatæ, ad quam te electum dignoscimus, gubernacula sumas monitione præmissa, appellatione remota, nullisve litteris a Sede Apostolica impetratis, veritati et ratione præjudicantibus, per censuram Ecclesiasticam, donec pareas, cogere non desistas ». Eas litteras Tanayus in Hispanico Martyrologio persere. Natus erat beatus *Oldegarius* in Catalonia, et adhuc puer oblatus est a parentibus Ecclesiæ Barcinonensi una cum aliquibus possessionibus; et postquam sacerdos ac prepositus Ecclesiæ Barcinonensis creatus fuit, eum Catholici regulares monasterii Sancti-Rufi juxta Avenionem siti abbatem sibi præfecere. Cum vero anno mcxiv, *Raymundus Guillelmus* Barcinonensis episcopus, in expeditione Majoricana, ad quam jubente Paschali II profectus est, occisus fuisset, clerus et populus Barcinonensis, curante *Raymundo comite*, eum in demortui locum subrogarunt: quod ubi ille factum cognovit, ut erat singulari vir humilitate, propterea in Provinciam, ubi Sancti-Rufi monasterium positum, navigavit.

10. *Duo proximi ejus successores in abbatiam S. Rufi.* — Beato *Oldegario* in abbatiam San-Rufensem successit *Wilhelmus*, in Catalogo abbatum San-Rufensium a San-Marthanis omissus. Jacobus

enim Petitus in Appendice ad Penitentiale Theodori pag. 634, recitat donationem Ecclesie Ordinatis cum permissu et concessione Pontii episcopi Bellicensis factam Willelmo Sancti-Rufi abbati et ejus successoribus, in cujus fine legitur : « Facta est Charta ista anno ab Incarnat. Domini mxx, apud Portas (quæ domus est Carthusiana) præcipiente domno Pontio Turrensi Bellicensi episcopo ». San-Marthani in episcopis Bellicensibus plura habent de illustri hoc præsulè, qui ante episcopatum fundavit Carthusiam *Mayoræi* in Bugezio, et huic Ordini nomen dedit. Postea sedente Innocentio II Pontifice Romano, abdicato episcopato, monasterium suum repetiit, in eoque sancto fine quievit. In Actis a San-Marthani citatis vir nobilitate clarus vocatur *Pontius de Balmeto*. Post Willelmum San-Rufensem abbatiam administravit *Pontius*, cui et successoribus ejus « Petrus Viennensium archiepiscopus et Apostolicæ Sedis legatus » confirmat donum, quod Ecclesie Sancti-Rufi prædecessor suus Guido Viennensis archiepiscopus fecit de Ecclesia Sancti-Martini Viennensis, aliæque memorata in confirmatione recitata a Jacobo Petito laudato pag. 631, in cujus fine legitur : « Actum est anno ab Incarnat. Domini mxxv. Præfate vero donationis actores fuerunt et testes domnus Petrus archiepiscopus, etc. » Tam Pontius abbas, quam Petrus archiepiscopus, Viennensis a San-Marthani omisi, et post Guidonem, Callistum II in summo Pontificatu vocatum, nullum archiepiscopum Viennensem ante annum mxxlvi exhibent, aientes : « De Petro quem nonnulli ex canonico Podiensi, ad Viennensem metropolim subiectum referunt », nullam in *diptychis* mentionem haberi. Quare diptycha illa, sicuti et variarum Gallie Ecclesiarum, per hæc tempora suppleri debent.

11. *Severus abbas S. Rufi.* — Prætermisus et a San-Marthani *Severus* abbas Sancti-Rufi, quem Pontio successisse oportet, cum Stephanus Diensis episcopus litteris suis apud Petitem citatum pag. 633, donationem Ecclesie de Taullinaco factam Ecclesie Sancti-Rufi confirmet in *monu domini Severi abbatis Sancti-Rufi*, et in earum calce legatur : « Acta hæc charta est anno ab Incarnat. Domini mxxvii, Indict. v, mense Aprilis, octavo kalendas Maii, luna decima, anno vii episcopatus domini Stephani prædicti Episcopi », nempe Diensis.

12. *Henricus Angliæ rex Willelmum filium regni hæredem dicit.* — In Anglia Henricus rex *Guillelmu*m unicum filium, quem prius Normannie ducem crearat Angliæ regni hæredem ac principem colli senatusconsulto decrevit : « Decimo tertio kal. Aprilis », inquit Eadmerus lib. 5 Novorum, « factus est conventus episcoporum, abbatum et principum totius regni apud Serberiam : cogente eos illic sanctione regis Henrici ; siquidem Normanniam se proxime transfretaturum disposuerat. Et quid sibi eventurum esset ignorans,

Willelmum, quem ex ingenua conjuge sua filium susceperat, hæredem regni » sibi substituit.

13. *Anselmus legatus Sedis Apostolicæ Angliam ingredi prohibitus.* — Interim *Anselmus Junior*, qui nuper pallium Radulpho archiepiscopo Cantuariensi tulerat, iterum legatus Sedis Apostolicæ rediit, *Henricum* regem in Normannia repetit, et regis in obeundo munere patrocinium postulavit. Verum Henricus rex magnum inde nasci Cantuariensi Ecclesie præjudicium prævidens, regni episcopos convocavit currenti anno : « Ipso anno », inquit Eadmerus citatus, « circa mensem Augustum, reversus a Roma super memoratus Anselmus, venit Normanniam ad regem Henricum, litteras Apostolici deferens, quæ sibi vices Apostolicas in Anglia administrare concedebant : quod regno Angliæ brevi innotuit. Admirati ergo episcopi, abbates et nobiles quique Lundeniæ adunati sunt, super his et quibusdam aliis, præsentem regina (Mathilde) communi consilio tractaturi. Quid multa ? Placuit omnibus, archiepiscopum Cantuariensem, quem res hæc maxime respiciebat, regem adire, et exposita ei antiqua regni consuetudine, simul ac libertate, si consuleret, Romanam iret, et hæc nova annihilaret. Amplectitur ille consilium, et amore quam maximo visitandi Apostolorum Limina ardens, mare transit, et regem Rotomagi reperit. A quo, et Ecclesie Pontificatus illius civitatis, summo gaudio et honore susceptus, per plures dies in eadem civitate, ab ipso rege detentus est. Supra memoratum quoque Anselmum ibi reperimus, transitum in Angliam, gratia legationis suæ exercendæ, præstolantem. Sed rex Henricus antiquis Ecclesie consuetudinibus præjudicium inferri non sustinens, illum ab ingressu Angliæ detinebat, et ei utpote nuntio B. Petri, largiter et officiose ministrari faciebat ». Reliqua ad hunc annum non pertinent.

14. *Causa discordiæ inter Franciæ et Angliæ reges.* — Hæc vero causa *Henricum* regem in Normanniam traxit, ibique eum detinuit. *Theobaldus* Blesensis comes, Adele Henrici Angliæ regis sororis filium *Ludovicum* 17 Francorum regem offendens, belli facem accenderat. Quare *Henricus* rex nepotis causam agere, et adesse, si opus foret, decrevit. Hinc utrinque iræ, malaque quæ plures annos tenuere. El licet interdum ab armis cessatum sit, uterque tamen colligendo tantum vires respirasse videntur, ut fortius insurgerent.

« Cum rex ad Pascha transfretasset in Normanniam », inquit Huntindoniensis pag. 380, « fit maxima discordia inter eum et regem Francorum. Causa autem hæc erat. Theobaldus, consul Blesensis, (vides *consulis* et *comitis* nomen jamdiu pro uno eodemque sumptum fuisse) nepos regis Henrici contra dominum suum regem Francorum arma promoverat. In cujus auxilium rex Anglorum duces suos, militumque suam misit, et regem Ludovicum non medioeriter afflixit ». Quod ad

hunc annum perlinere ostendit Mathæus Parisiensis, qui ad an. mxcvi idem narrat.

15. *Ex rebellione Theobaldi Blesensis comitis repetenda.* — Audiendus etiam Malmesburiensis lib. 5 de Reg. pag. 459, de utroque rege verba faciens, sed aliorum scriptorum Anglicorum more, Ludovico regi parum æquus : « Postea simulatas inter eos exorta est pro Theobaldo, comite Blesensi, filio Stephani, qui apud Ramulam occubuit (qui Theobaldus susceptus erat Stephano ex Adala, filia Willelmi magni). Din igitur ex parte regis nostri labores viarum consumpserunt nuntios, ut dignaretur Ludovicus satisfactionem Theobaldi. Ille vero parvificiens preces, Theobaldum ab Apostolico denotari fecit, quasi arrogantem, et Deo rebellem : qui præter austeritatem morum, quæ omnibus videbatur intolerabilis, ferebatur dominum suum fraudare avitis possessionibus ».

16. *Ludovicus rex Franciæ de Theobaldo queritur.* — Ludovicus Francorum rex anno mxcix, Synodum Rhemensem, cui Callistus II papa præerat, introivit, plurimumque questus de Henrico Anglorum rege, et de injuriis ac infestationibus sibi suisque hoc anno ingestis, dixit : « Theobaldus comes (nempe Blesensis) homo mens est, sed instinctu avunculi sui (sc. Henrici regis) contra me nequiter erectus est. Ejus enim divitiis et potentia inflatus, in me rebellavit, et infidus mihi atrocem guerram fecit, regnumque meum ad detrimenta multorum conturbavit. Legitimum bonumque virum Guillelmum Nivernensem, quem bene nostis, remeantem de obsidione castelli cujusdam excommunicati furis, ubi vere spelunca latronum et fossa diaboli erat, comprehendit, et usque in hodiernum diem carceri mancipavit. Religiosi præsules Thomam de Marla seditionum prædonem (legendum præconem) totius provincie merito adversati sunt. (In Concilio sc. Belvacensi anno mxciv, præside Conone cardinali Prænestino coacto, ubi ob immania scelera excommunicatus fuit, uti refert Sugerius in Vita Ludovici regis VI). Ideoque mihi generalem inimicum peregrinorum et omnium simplicium obsidere præceperunt, et ipsi mecum, legitimeque barones Gallie ad comprimendos exleges conveniunt, et cum communi collectione Christiani exercitus (intelligit communia, de quibus anno mxcviii, num. ult., locuti sumus), pro zelo Dei certaverunt. Inde præfatus heros (Guillelmus comes Nivernensis) cum mea licentia pacifice regrediens captus est, et a Tedbaldo comite usque hodie retentus est : licet eum multitudo procerum ex parte mea sæpe pro liberatione comitis suppliciter requisierit, et tota terra ejus ab episcopis anathematizata sit ».

17. *Ob captionem Guillelmi II Nivernensis comitis.* — Guillelmus iste, secundus hujus nominis Nivernensis comes, qui anno mxcxvii sub finem vite Carthusiano Ordini nomen dedit, hoc anno captus est, ut tam Chronicon Fisanense quam Vezeliacense Tom. I Biblioth. Labbei fidem faciunt,

et in Vezeliacensi additur eum captum *apud Avalum*, Burgundiæ oppidum inter Augustodunum et Autissiodorum, ut anno mxcxii, num. 6 diximus. Cum vero *Thomas de Marla*, sen *de Marla*, ut etiam appellabatur, a rapinis et incendiis non desisteret, Galliarum episcopi *Ludovicum* regem precati sunt ut eum armis aggrediretur, et idem *Cono* legatus Apostolicus eundem et complices anathemate percudit, et quidem hoc anno, ut demonstrat Ivonis Epistola cclxxv *Cononi Prænestino episcopo, Sedis Apostolicæ legato*, scripta; cum enim capti comitis Nivernensis mentionem in ea faciat, isque hoc tantum anno in hostium potestatem venerit, non dubium quin ea ad præsentem annum pertineat, licet Baronius anno mxciv, num. 44 putarit, nullam Ivonis post eum annum superesse datam ab eo Epistolam : « Nuper accepi », inquit Ivo, « litteras vestras, continentes excommunicationem eorum, qui Nivernensem comitem ceperunt, vel captioni ejus interfuerunt, vel de spoliis ejus aliquam partem acceperunt, vel auxilium in hoc dederunt, excepta sola persona Theobaldi comitis, cui inducias usque ad Octavas Omnium Sanctorum donastis. Et tamen nisi interim comitem Nivernensem reddat, ex tunc eum excommunicationi subjecistis ». Paucis interpositis subiungit Ivo : « Auditis ejus (sc. Theobaldi) responsionibus, consilium mihi fuit, ut religiosas personas religioni vestræ transmitterem, qui verba comitis, et hæc et alia vobis referrent : ut de his cum domino rege (sc. Ludovico) tractetis, et inter eum et comitem pacem componere studeatis, etc. Communicato itaque consilio cum episcopis et iudicibus pacis, ita hanc controversiam sedare studeat, ut qui ex adverso stat, non debeat quod reprehendat ; et pax Ecclesiarum et quies pauperum in sua stabilitate permaneat », ubi loquitur de *Treuga Dei*, cujus violatores excommunicari soliti erant, ut liquet ex Epistola lxi Ivonis, qui cum subtilis esset Theobaldi Blesensis, Carnotensis et Campaniæ comitis, in Epistola cclxxv in partes ejus propendere videtur.

18. *Ivo Carnotensis episc. usque ad initium anni sequentis in vivis fuit.* — Ex his evidenter deducitur, summopere deceptos fuisse viros doctissimos, qui *Ieonem* Carnotensem episcopum anno superiori demortuum statuerunt. In Vita beati Roberti de Arbrissello, Ivoni summa amicitia conjuncti, a monacho Fontis-Ebraldi coevo scripta, cap. 3 dicitur *Robertum* paulo antequam animam Deo redderet, Ivonem et Bernardum abbatem Bonavallis graviter dissidentes inter se conciliasse : « Quadam die in territorio Carnotensi ad vicum Bonavallis, in quo quedam monachorum abbatia erat, hospitalitatis gratia conveniunt (sc. Robertus cum quibusdam sanctimonialibus Ordinis a se fundati) eodem tempore quo Carnotensium episcopatum regebat Ivo, qui adeo pro quibusdam causis cum Bernardo hujus Bonavallis abbate discordatus fuerat, ut propemodum irreconciliabilis esset

eorum discordia, etc. Postquam vero pius magister tantam discordiam invitatus audivit, discordantibus illis valde condoluit, atque qualiter eos pacificare posset, apud se cogitare cepit. Præmisit ergo ante se per Angardium religiosam monacham, quæ Fontis-Ebraldi tunc priorissa erat, sanctimonias suas ad locum destinatum; ipse vero concilio sibi Bernardo (Ordinis Tironiensis fundatore) abbate religioso, atque Petronilla abbatiissa sua, propter prædictæ discordiæ reconciliationem festinat, accurrit Carnotum, etc. et ut verum fatear, postquam prudens concionator charitate conductus Carnotum advenit, licet multum laboraverit, non solum illam tam dæmoniacam discordiam funditus dissipavit; verumetiam, quod multi jam incredibile suspicabantur, in antiquam amicitiam illos restituit». Subdit Robertum. «appropinquante Dominica Nativitate ad Altæ-Brugerie locum», qui paucis leucis Carnoto distat, perrexisse, ibique *Dominicam Nativitatem* celebrasse.

19. *Henricus hæreticus agnoscitur in vicinia Cenomani.* — Auctor de Gestis episcoporum Cenomanensium tom. III Analect., a Mabilonio publicatus, pag. 312, postquam rem fiera Paschatis in gestum retulit, duo hæcenus ignota nos edocet, *Hildebertum* nempe episcopum Cenomanensem, qui hujus sæculi initio, tunc jam ostendimus, Romanam profectus est, iterum hoc anno illud perrexisse, et sequenti rediisse. Secundum, *Henricum* hæreticum, quem divus Bernardus Epist. cxxi. apud Baronium anno mclxvii, num. 16, testatur, Lansanum, Cenomanos, Pictavos, et Burdegalam spurcitiis suis fœlasse, annis quibus hæc accidere non expressis, currenti primum *Cenomanis* visum esse. Cujus auctoris, qui narrat quæ suo tempore sub Hildeberto episcopo contigere, vel saltem quæ ab iis qui viderunt accepit, verba, licet longiora, non possumus non transcribere, quia Annales Ecclesiasticos mire illustrant: «Per idem fere tempus in adjacentium finibus regionum surrexit quidam hypocrita, quem propria actio, mores perversi, dogma detestabile scorpionibus et parricidalibus dignum protestantur suppliciis. Is enim ovium spoliis lupi rapacis rabiem occultans, vultus et oculorum incitatione mari conformis naufragoso, coma succinctus, intonsus barba, corpore procerus, pernix incessu, nudis humo, bruma delibacchante, serpens vestigiis, expeditus affatu, terribilis sono, juvenis ætate. Nullus ei nitor in vestitu, victus ejus a publico in promptu dissimilis, hospitium in ædibus burgensium, mansio in porticu, cæna, cubile in cenaculo, minime siquidem ad instar Danielis Prophetae, sed juxta illud, *Mors intravit per fenestras restras*». Quid multa? idem namque miræ sanctitatis et scientiæ circumquaque tumore, non merito; falsitate, non vero habitu erat celebrior, non moribus, non religione, sed opinione.

20. *Ejus presentia a Cenomanensibus expe-*

tita. — «Matronæ etiam atque impubes pueri (nam utriusque sexus utebantur lenocinio) pro varia vice huic accedentes, excessus suos profulerunt; sed augmentant, plantas ejus, clunes, ungua, tenera manu demulcendo. Isti plane tanti viri lascivia ex hilarati, et adulterii enormitate, publice testabantur, nunquam se virum attreccasse tantæ rigiditatis, tantæ humanitatis et fortitudinis: cujus affatu cor etiam lapideum facile ad compunctionem posset provocari. Hujus itaque religionem et cœlebem vitam monachi et viri anchoritæ, et universi regulares deberent imitari. Asserebant quoque sibi a Domino Deo antiquam et authenticam prophetarum collatam fuisse benedictionem, et spiritum quo mortalium excessus cæteris incognitos, visa tantum eorum facie cognosceret et proderet. Cum hujusmodi fama nostram afflaret regionem, populus propria levitate proprio applaudens detrimento, quotidie et tota die illius illudi confabulationibus suspirabat, et ejus adventum, quod citius posset hæresis suæ consors in remotis (loco in, legendum non) fieri et particeps. Solet enim accidere multoties, quod plerisque ea sunt gratiora, quæ sibi magis officiant.

21. *Duos ex discipulis suis Cenomanum mittit.* — «Cæterum hoc volenda dies in attulit ultro. Ipse enim nostros compatriotas viperino afflatu suo disponens inficere, eidem episcopo (nempe Hildeberto) duos ex discipulis suis, tam vita quam habitu sibi similes, ad instar Salvatoris ante faciem suam destinavit. Qui cum die Cineris nostræ suburbia civitatis attigissent, eos plebs universa malo fervens proposito, tanquam domini universitatis angelos susceperunt. Gerebant ex doctoris consuetudine baculos, vexillum crucis, in quorum vertice ferro fabricatum erat infixum, colore et exteriori conversatione speciem prætendentes penitentium. Hos idem pontifex vir maximæ pietatis minus Argolici quæ formidans insidias, blande recepit et devote eisdem hilarum frontis gratiam exhibuit et liberalitatis. Et quamvis Romanum iter assumpsisset, tamen inter cætera suis injunxit archidiaconis, ut illi pseudo-eremite HANRICO (hoc enim nomine vocabatur hæreticus) pacificum ingressum, et licentiam sermocinandi ad populum permitterent.

22. *Cenomanum venit, et hæresim suam prædicat.* — «Quo mœnia civitatis ingresso, vulgus solito more (ut diximus) applaudebat novitati, ut potius personam mirabatur incogniti, quam probati. Quid mirum? Estimabant illum suam honestate famam excedere, cui rumor præconio quo frequentius utitur, exercebat; cujus schismate, factionibus, privatis largitionibus plerique clericorum excecati, plebecula declinationibus alimentis ministrabant, tribunal præparantes unde concionator ille turbas alloqueretur obsequentium sibi populorum. Cæterum dum orationem haberet ad populum, eisdem clericis ad pedes ejus residentibus et flentibus, tali resonabat oraculo, ac si dæ-

monum legiones uno hiatu ejus ore murmur exprimerent. Verumtamen mirum in modum facundus erat, cujus sermo ita mentibus vulgi per aures infusus hærebat, quasi recens venenum interius membris indagatis, circa vitalia totis collectis viribus, cum vita inexorabile exercens odium : se inflectit avidius jugiterque degrassatur.

23. *Plebem adversus Clerum commovet.* — « Qua hæresi plebs in clerum versa est in furorem, adeo quod famulis eorum minarentur cruciatus, nec eis aliquid vendere vel ab eis emere voluissent : imo habebant eos sicut ethnicos et publicanos. Præterea non tantum ades eorum obruere et bona dissipare, sed illos lapidare aut affligere patibulo decreverunt, nisi princeps et optimates ejus, cognita illorum nequitia, nefandis ausibus suis, vi potius quam ratione (bellua enim rationem non admittit) resisterent. Quidamque ex clericis in eadem urbe manentibus, Hugo scilicet de Osello, et Willus, Qui-non bibit-aquam, et Paganus Aldricus cum quadam die ad eum gratia disceptandi accessissent, vehementer verberati et in buccis, in luto et in cæno contumeliose obruti et sordidati, vix sine mortis discrimine impetum furiosæ plebis potuerunt sustinere, imo postquam evaserunt periculum, eorum profectio similis fugæ videbatur. Illi enim ab ipsis comprehensi nullatenus evasisent periculum, nisi comitis et optimatum ejus patrocinio latebras subire potuissent. Nam (sicut dictum est) princeps civitatis illorum errori resistens, nullatenus a clericorum tuitione volebat resilire. Clerici vero per quemdam canonicum eidem hypocrite litteras, quia viva voce cum eo loqui non audebant, in hunc modum transmisere :

24. *Excommunicatur a clero.* — « Ecclesia nostra te et socios tuos in vestimentis ovium venientes, sed intrinsecus lupi rapacis molientis insidias, cum pace recepit et honore. Ipsa etiam tibi affectum et effectum fraternæ charitatis exhibuit, existimans quod populum de salute animarum fideliter commoneret, et semen verbi Dei in cordibus eorum sinceriter seminares : sed tu pro pace iram, pro honore opprobrium, pro charitate odium, maledictionem pro benedictione perverso ordine reddere, et Ecclesiam Dei fallacia tua perturbare præsumpsisti. Nam inter clerum et populum discordiam seminasti, ac seditiosæ plebis multitudinem cum gladiis et fustibus adversus matrem Ecclesiam traditione DECES iterata commovisti : nobis osculum Judæ porrexisti, nosque et universum clerum publica injuria hæreticos appellasti. Insuper (quod pejus est) multa contra fidem Catholicam, quæ fidelis Christianus retractare exhorrescit, perniciose et infideliter protulisti. Igitur ex auctoritate summæ et individuae Trinitatis, et totius orthodoxæ Ecclesiæ, et sanctæ Dei Genitricis Mariæ, et S. Petri Apostolorum principis, et vicarii ejus reverendi patris nostri Paschalis papæ, atque antistitis nostri Hildeberti, tibi socisque tuis male et damnose errori tuo blandientibus penitus pro-

hibemus, ne in toto Cenomanensi episcopatu ulterius nec privatim, nec publice prædicationem facere, nec perversorum dogmatum ineptias propagare præsumas. Si vero contra tantam auctoritatem usurpaveris nefandis faucibus tuis debiscen-
tibus denno virus elicere, eadem auctoritate, ejusque privilegio suffulti, excommunicamus te, omnes complices, fautores et adjuutores tuos, et ipse cujus Divinitati non desinis contraire, te in die districti judicii æterna maledictione faciat mancipari.

25. *Pergit in erroribus disseminandis.* — « Ille vero apices minime recepit, sed Willus Musca seriem litterarum coram eo retulit. Huic sane supplicium adstantes minabantur : nam in propatulo, ut sibi visum fuerat, Hanrico audacter opprobria ingerebat. Hanricus plane singulis litterarum distinctionibus caput mutando : Mentiris, iterabat. Sane nisi dapifer consulis (id est comitis) illic adesset, cujus conductu Willelmus iter illud sumperat, nunquam vivus ad matrem remearet Ecclesiam. His ita gestis, nec minus apud Sanctum-Germainum, et Sanctum-Vincentium sacrilegos agebat conventus, ubi dogmatizabat novum dogma, quod feminae quæ minus caste vixerant, coram omnibus vestes suas cum crinibus nude comburerent ; nec quilibet amplius aurum, argentum, possessiones, sponsalia cum uxore sumeret ; nec illi dotem conferret : sed nudus nudam, debilis ægrotam, pauper duceret egenam ; nec curarent sive caste, seu incestu connubium sortirentur. Dum ca, sicut impostum dixerat, ageretur, ille quid singula haberent venustatis mirabatur, quæ cæteris candore excelleret, vel nitore corporis splendidior haberetur. Ex jussu tamen illius plebis actio pendebat universa, et affectus.

26. *Et in moribus corrumpendis.* — « Tanta auri, tanta argenti affluentia, si vellet, redundaret, ut opes omnium solus videretur possidere. Licet plane multa reciperet, tamen parcebat cupiditati, ne nimis ambitiosus videretur. Verumtamen plura sibi retinens, pauca ad restaurationem pannorum, qui (sicut dictum est) incensi fuerant, conferebant. Ejus quoque admonitu, multi juvenum ducebant venales mulieres, quibus ipse pannos pretio quatuor solidorum enebat, quo nuditatem suam tantummodo supertegerent. At verus Judex, opibus quassatis hæretici, cæteris innoluit qualis esset arbor, folia proferens sine fructu : quæ tamen occupat terram, et quæque circumquaque germinantia exstinguit, nesciens expectare hyemem, sed æstate crescit et moritur. Juvenes enim qui nequam ejus consilio uxores acceperant, parvo temporis dilapso curriculo, aut fame aut stupro compulsi mulierum, ad alias partes transvolabant, feminas relinquentes totius egentes auxilii. Sicque illi aliis in adulterio adhærebant, et ipse adhuc maritis suis superstitionibus, atiorum connubia illicite expectabant. Nemo enim ex illis qui ejus exhortatione conjugium inierunt, cum multi essent, un-

quam uxori suæ, vel viro conjux fidem exhibuit vel reverentiam; vel quælibet alia mulier quæ fornicationi, deliciis vestimentorum, jurejurando abrenuntiasset, potuit se continere: sed in dies augmentando facinora, in deteriora delapsa est.

27. *Henriciani adversus episc. Cenomanensem rebellant.* — « Hæc et multa his similia exactor ille jugiter perficiens, adventu cognito antistitis (id est Hildeberti) qui (sicut prælibavimus) Romam profectus fuerat, secessit in castrum Sancti-Karilefi: ibique et in locis circumpositis morabatur, nequaquam incepto desistens, sed quotidie ad quæque pessima innovatus. Nam sacratissimo die Pentecostes, cum etiam parvuli fidei officiis soleant divinis devoti interesse, ipse miserrimus omnium, adscito sibi quodam adolescente clerico, cujus indicio postea tota illius petulantia denudata est, clam secreto noctis silentio ad domum ejusdam militis proficiscitur, ibique cum matrona domus in thalamo luxuriose tota die usque ad meridiem immoratur. Sic nec timore divino, nec pudore hominum lasciviæ suæ voluit temperare, donec enormitatem sui facinoris finitimis et exteris populis innotesceret. His ita pertractatis, et præfato pontifice nulla, maximaque clericorum numerum stipante caterva, suburbia civitatis ingresso, et signum Dei vivi paterno affectu ore et manu pingente in populum, felle cordis et sermonis in injuriam Creatoris commoventur, ejus signaculum et pontificalem respuentes benedictionem. Nolumus, inquit, scientiam viarum tuarum, nolumus benedictionem, cœnum benedicere, cœnum sanctificari; nos habemus patrem, habemus Pontificem, habemus advocatum qui te excedit auctoritate, excedit honestate, excedit scientia. Huic clerici tui adversantur, ejus doctrine contradicunt, hunc quasi sacrilegum detestantur et respuunt, verentes quod eorum scelera demeraret prophético spiritu, et hæresim suam et corporis incontinentiam privilegio condemnaret litterarum. Sed hæc omnia sine dilatione in eorum capita redundabunt, qui sancto Dei vocem cœlestis prædicationis, nescio qua confisi audacia, interdicere presumpserunt.

28. *Henriciani inscitiam episc. Cenomenensis in apertum profert.* — Episcopus autem misertus erroris eorum et inscitie, opprobria ab eis sibi illata clementer sustinuit, Deum majestatis assidue exorans, ut plebis errorem admixtum elationi compesceret, ne Ecclesiæ suæ schisma inferre potuissent. Sed juxta vocem Psalmistæ pro salute delinquentium exorantis, *imple facies eorum ignominia, et quærent nomen tuum, Domine*; idem Dominus Deus repentinò incendio maximam partem suburbiorum civitatis permisit comburi, ut saltem temporali jactura malum propositum suum deponerent, et nomen sanctificationis, nomen Dei vivi invocarent. Pontifex vero illud Prophætæ recitans: *Quam magna multitudo dilectionis tuæ, Domine, quam abscondisti timentibus te*, paucis evolutis diebus, seductorem adit, et ejus impieta-

tem divina auctoritate continuit. Cum vero simul inirent colloquium, episcopus sciscitatur, cujus meriti sortitus esset professionem. At ille ignorans quid esset professio, obmutuit. Denuo requirente episcopo, cujus Ordinis fingeretur officio? Ait ille: Diaconus sum. Tunc episcopus: Profer igitur si hodiernis interfusti mysteriis. Respondit: Non. Pangamus ergo Domino Deo hymnos matutinales; quibus inceptis Henricus proficitur, se dictam ignorare, (id est, cursum Ecclesiæ ordinarium seu Officium, quod quotidie celebrari solet in matutinis horis, ut videre est in Glossario Ducangii.) Episcopus tamen volens omnino ejus reserare inscientiam, Dei Genitrici solitos psalmos canere cœpit. Horum quoque nec versus noverat, nec seriem. Sicque rubore confusus, vitam suam, genus dogmatizandi et presumptionem proficitur. Revera lixa erat, nullam adeptus scientiam, sed totus deditus petulantiae: tamen sermocinandi ad populum et tessaras insciendi notitiam prosectus. Hinc scriptum est: Vera gloria radices agit atque propagatur: ficta omnia celeriter transeunt, et tanquam flos feni decidunt, nec quicquam simulatum potest esse diuturnum.

29. *Eum e diocesi sua expellit.* — Verumtamen episcopus cognita levitate et impietate Henrici. Apostolica sibi prohibuit auctoritate, ne ipse amplius in episcopatu suo permaneret: sed ad alias partes, nostris parens, gressus dirigeret. Ille vero convictus industria pontificis, clam aufugit; et cæteras regiones nisi orior esset fama, simili modo perturbaret, et viperino hiatu suo inficeret. Hæc de Henrico adnotavi et gestis Hildeberti inserui ad commodum et doctrinam posterorum; ut caveant, ne Ecclesia Christi aliquando ejusmodi erroribus valeat perturbari. Denique idem Hildebertus modis omnibus procuravit, qualiter furorem plebis ratione pariter et humilitate mitigaret, quam Henricus contra clerum seditiose concitaverat. Eos enim Henricus sic sibi illexerat, quod vix adhuc memoria illius et dilectio a cordibus eorum deleri valeat vel depelli. Hæc anonymus de Gestis episcoporum Cenomanensium. Porro Hildebertus Romanam perrexit ad *generale Concilium* a Paschali II in Urbe celebrandum, illucque hymene profectus est, ut ipsemet in Epist. lxxvi ad quemdam episcopum data affirmat. Ille etiam revocanda Epistola lxxvii Hildeberti omnibus archiepiscopis et episcopis scripta, qua significat Cyprianum et Petrum in hæresim Henrici prolapsos, in sinum Ecclesiæ nunc redisse. Ubi Henricus ab eo appellatur « magnus diaboli laqueus, et celebris armiger Antichristi », atque eam pestem sic suam hæresim infecisse, « ut renitens ei clerus vix inter parietes Ecclesia suam tueretur libertatem ».

30. *Alii hæretici in diocesi Trevirense detecti.* — Jam antea Brunone Ecclesiam Trevirensensem regente, anno sedis ejus, quam initio anni Christi xci init, incerto, res memorabilis contigit, cui auctor anonymus Historie Trevirensis tom. xii

Spicilegii Dacheriani pag. 243, se interfuisse scribit : « Ivodii, inquit, quod Trevericæ diocesis appenditium est, fuerunt eo tempore heretici, qui substantiam panis et vini, quæ in altari per sacerdotes benedicuntur, in corpus Christi et sanguinem veraciter transmutari negabant, nec baptismi sa-

cramentum parvulis ad salvationem proficere dicebant, et aliæ perplura profitebantur erronea, quæ memoriæ tradere nefas duxi. De his quatuor oblatis sunt ei, quorum duo presbyteri, reliqui vero duo erant laici ». Quid egerit Bruno, ut pestem illam eliminaret, ibidem legendum.

PASCHALIS II ANNUS 18. — CHRISTI 1117.

1. *Henrici adventus in Urbem, absente Paschale papa.* — Sequenti anno millesimo centesimo decimo septimo, Indictione decima, Paschalis papa », inquit Petrus Diaconus ¹, « mense Maio ad Cassinense monasterium venit, indeque assumpto ejusdem cenobii abbate, Trojam pergens illic Concilium celebravit ; inde vero regrediens, Ecclesiam S. Vincentii monasterii ad ripam Vulturni ædificatam ritibus solemnibus dedicavit ». Hæc de rebus gestis a papa, sed de imperatore hoc anno ista subjicit ² : « Anno Dominicæ Incarnationis millesimo decimo septimo, imperator congregato exercitu Romam advenit. Quod ubi papa Paschalis didicit, sese ad hoc monasterium contulit, atque ab omni congregatione rogatus, Landulphum Beneventanum archiepiscopum quem fuisse depositum supra retulimus, in gradum suum restituit, sicque Beneventum perrexit. Interea imperator ingressus Urbem, cum Pontificem discessisse cognoverit, consules, senatores et proceres, partim donis, partim promissis ad se attrahens, Ptolemæo illustrissima Octavia gente progenito, Ptolemæi magnifici Romanorum consulis filio filiam suam in matrimonium junxit, ei que oblatis plurimis donis, quiddam avus ejus Gregorius, alique parentes habuerant, sive detinuerant, Ptolemæo ipsi ejusque hæredibus auctoritate sua in perpetuum tradidit. Agit interim papa cum principibus aliisque Romanis, ut adversum imperatorem conglobati illi obsistere pergant ; sive contra prædictum Ptolemæum Romanorum consulem, ipsius generum prædicto Pontifici auxilium ferant. Henricus præterea in Urbe Romana persistens Paschalis diei solemnitatem ingenti gaudio senatus populique Romani celebravit. Et quia Pontificem minime in-

venit, nec poterat per internuntios res inter utrumque agitari, coactus fervore ætatis secessit ad frigidiora loca, pollicitus prima temperie se reditum ». Hæc de rebus gestis per Henricum in Urbe Petrus. Subjicit vero de inani conatu Northmannorum contra eundem Ptolemæum comitem Tusculanum.

2. Cæterum in Bibliothecario plura sunt alia quæ in Petro desiderantur. Atque primum de causa sui adventus, quam idem Henricus prætexnerat, nimirum quoniam in proxima Synodo Lateranensi hostis Ecclesiæ fuerat declaratus, denuntiatusque excommunicatus, ob idque cuncta collata in ipsum ab Ecclesiæ beneficia, exhibitaque officia nullius essent momenti, quæ per vim et metum exorta fuissent : Henricus pœnitentem se Romam venturum significavit, utque ea sponte, et cum pace, libereque absque metu persolverentur a Pontifice libero. Ista quidem fama ferebat ; cæterum res ipsa contrarium demonstrabat. Nam audi Bibliothecarium ejusdem temporis auctorem, qui isthæc sigillatim ita describit : « Allero namque a sequenti anno rex Henricus in Italiam rediit manifestus hostus Ecclesiæ, tantoque infestior bonis ac religiosis, quanto benignior malis seditiosisque. Hujus consilarii familiaresque erant abbas Farfensis, qui ob sacrilegium factionemque in Ecclesiam, bis terque capite damnatus fuit, Joannes maledictus, et Ptolemæus. Horumque favore tunc simulatque in Latium intravit, beati Petri fidelibus bellum indixit, magna conatus est, famosa fecit, sed prava. Ob cujus victoriæ gloriam, quam fecerat, videlicet quia apprehenderat quædam castra, plebs populusque Romanus triumphum ipsi instituit : Coronata Urbe, rex et regina transivit per medium ; magnus apparatus, magna gloria, parva huic visa ; nullus Patrum, nullus episcoporum, nullus Catholi-

¹ Petr. Diac. l. iv, c. 57. — ² Ibid. c. 63.

cus sacerdos occurrat. Fit ei processio, empta potius, quam indicta. Iturus ad basilicam beati Petri navi transiit, non ponte trajectus, coronari expetit, respondetur: In ea Eccl. coronandus a papa cum Patribus coronari debet: aliter nequit. Quod si velit ab eis fore petendum ». Quæ autem tum ad eos peroravit Henricus, sic recitat:

3. Si divinitus datum foret, Patres conscripti, rerum publicarum statum digno moderamine gubernari; digna reverentia earum rectores alter ab altero præveniretur: pax foret, nec imperialibus comitiis Urbis abesset Pontifex, nec in Pontificalibus orbis abesset imperator, alter alterius gloria fulciretur; gloria alterius gloria utriusque foret, et robur utrorumque timor omnium, amoreque in utroque tota se converteret civitas: nos patres, nos consules, nos primores, nos omnes boni Urbis et orbis intuerentur; Gothi, Galli, Hispani et Afri, Græci et Latini, Parthus, Indus et Arabs, aut timerent nos aut diligerent. Nunc autem dum secus agitur, sit aliter. Dimissis cæteris, dum in invicem agimus, invicem agitur ab omnibus: merito hæc patimur, maledicimur, impugnamur, exterminamur. Convertimini igitur, et mei licet peccantis votum correctionemque suscipite; nedum per vos nimia rigescit justitia, multiplicatis sceleribus, malum sine me qualiter rigescat non habeat. Ecce a Patre Romane Ecclesie domino Paschali papa e Galliis coronandus adveni in Urbem: eum abesse infortunius meis deputo. Nunc autem id a vobis exopto; tantoque si id recipiam, mihi licet gratius, quantum ut mihi licet, gravius elaboravi. Solent accuratius excolere homines, quod diu questum periculis adinventum. Sit pax, et quidem erit, si velitis. Sine crimine loquor, profecto sedatis ventis, quiescent maria ». Hæc rex.

4. Ad hæc Ecclesia quæ erat in Urbe: « Inhonestum satis et indignum nostri arbitramur, rex, ut aliquando nos dulcibus dictis convenias, quos infelicibus actibus in dies circumvenire contendis. Credisne credamus, rex, te ad penitendum satisfacturum venisse, per quem acerba ira continuas atque acerbas irruptiones Barbaricas, rapinas sacrilegas; ordinationes sacrilegas et execrabiles, impias seditiones assiduo constari ferique cernamus? Simul ac Latium intrasti, rex, beati Petri fidelibus bellum injecisti. Si non successit ex voto, Deo, non regi gratiæ debentur. Age qui sunt, pro quibus agitur? Abbas Farfensis, et Ptolemæus, uterque anathematizatus. Qui sunt contra quos agitur? Beatus Petrus et beatus Paulus, uterque Apostolus. Quibus in locis agitur? In eorum patrimoniis, in domo propria. Oblitus horum, rex, illis ducibus audax, audacter Ecclesiam beati Petri intrasti cum omnibus clericis, quibus patribus? cum quibus episcopis? quomodo silendum? quomodo agendum est? Adde qui sunt nunc, qui ante ejus fores excubant? nonne seditiosi? Qui sunt qui nunc æs thesauri custodiunt? nonne sacrilegi? Qui sunt qui ejus altari deserviunt? nonne hære-

tici? Heu, heu! expulsis Catholicis, reverendam cunctis orbis populis beati Petri Ecclesiam per te hæretici occupant. Illeccine illa vita, rex, per quam penitens veniam merearis? satisfactio, qua Ecclesie conformeris? pax, qua bella quiescant, seditiones cessent, venti sedentur, mare detumescat? Profecto ni conversus, immemor mali, aliter cum Deo senseris, rex, aliter Rex regum cum rege sentiet Deus. Comitari cum excommunicatis, rex, nosti nos non debere, nec posse, eo maxime, cum comitiis tuis interesse non liceat, dum contingat abesse, qui omnium nostrum debuit interfuisse primus.

5. « Diffusus his rex, accito Mauritio Bracharensi archiepiscopo, qui ob superbiam levitatemque curialis effectus, per biennium extra parochiam propriam opulentissime cultu regio hac et illac molliter dissoluteque vagaverat: ante corpus beati Gregorii coronari se fecit, sicque ab Urbe comitatus abcessit ». Et infra de Paschali papa ista subiungit:

« Dominus papa, celebrato Concilio quod in partibus Apuliæ congregaverat, rediens cum Northmannorum exercitu in Campaniam, Pillum, Pullanumque in maritimis oppidum Sancti-Silvestri in sui deditionem convertit. Jamque Autumnus instabat, cuius calore vel aestu exterius constipatus, interius dissolutus uti senex, et qui erat in castris debilior Anagnin se contulit. Hicque adeo infirmitas eum oppressit, ut qui aderant medici, morti eum magis quam vitæ adjudicarent. Sed auctor vite Deus vitam ejus produxit in longum, dum dissolutis interius membris compaginis soliditatem adjecit, et exhaustis viribus interius fomenti robur diffudit. Factumque est, ut qui antea in lecto alterius auxilio sustentus, vix sedere poterat, postmodum ante altare per se erectus missarum solennia celebraret. Hæc valetudine venit Præneste, et beati Agapiti Ecclesiam ibidem dedicavit, et Nativitatis Domini Vigiliis Romani ordinis missas, et Matutinum post missam, et iterum missam, et post missam processionem cum omni voto et solemnitate illi diei debita celebravit ». Quæ autem post hæc secuta sint de ejus obitu, qui contigit mense Januarii, anno sequenti dicturi sumus.

6. *Henricus imperator legationes ad Paschalem frequentat pro absolutione obtinenda.* — Cæterum Henricus imperator perterritus prodigiis et portentis, multisque irati numinis signis, quæ hoc anno in Germania contigerunt, ad absolutionem impetrandam (ut Urspergensis ait) diligenti cura laborat. Erant ista terribimenta inter alia, quod magnus ille sanctus Benno Misnensis episcopus, qui ante decem annos ex hac vita migrarat, multiplicitate miraculorum contra hæresim Henrici pugnabat, qui vivens, quadraginta annis quibus sedit episcopus, adversus eandem contra Henricum patrem ejus infatigabili labore certaverat. Terribilis namque post mortem est redditus hostibus Ecclesie

persecutoribus sanctus, quod ipsum tunc imperatorem provocans ad Dei iudicium moriens, traxerit paulo post secum certaturum ad divinum tribunal; et quod eodem anno apparens post mortem Ottoni Misnensi marchioni, a quo acceperat alapam, die quo vivens prædixerat sanctus, idem ipse spiritu oris sui interfecerit impium, prout Vite ipsius Acta testantur¹. Quem quidem vivere Ecclesiæ sanctæ vindicem, et vigilare adversus ejus persecutores, crebra quæ ad sepulchrum ejus miracula edebantur, significabant, quæ sicut Catholicis summæ consolationis erant, ita schismaticis maximo terrore et metu.

7. « Hisce prodigiis et aliis », inquit Urspergensis hoc anno (quod dictum superius repetimus), « rex Henricus cordetenus sanciat, non cessat legationes satisfactorias ad Apostolicam Sedem, licet ipse multum infestationibus Italicis insudans, destinare; quas tamen constat minime profecisse. Nam dominus Apostolicus propter securitatem, quam regi licet coactus fecerat, diffiletur illum se anathematis vinculo colligasse; ab Ecclesiæ tamen potioribus membris excommunicationem connexam, nonnisi ipsorum consilio denegat se posse dissolvere, concessio nimirum utrinque synodalis audientie jure. Ad hoc etenim Ultramontanis affirmat, se quotidie litteris impelli, et maxime metropolitani Moguntini ». Ille ipse, quibus vides præ cæteris Adalbertum archiep. Moguntinum adversus imperatorem pro Romani Pontificis jure propensius laborasse, quem antea auctorem vidimus violentiæ in Paschalem per eundem Henricum exhibite.

8. *De legationibus in Angliam mittendis controversia apud Paschalem papam.* — Hoc item anno, quo Henricus imperator reversus est Romanam, contigit a rege et episcopis Angliæ legatio Radulphi archiepiscopi Cantuariensis, et Hereberti episcopi collegæ ad Paschalem papam. Illius autem decernendæ legationis occasio ea præcessit, quod permota est ibi quæstio occasione legatorum Apostolicæ Sedis, sua, non quæ sunt Jesu Christi quærentium, et proxime ob Petrum Leonis cardinalem, legatione ibi male perfunctum, adeo ut Henricus rex provocandum pulaverit ad antiqua privilegia, quod scilicet Cantuarienses archiepiscopiINGERENTUR legatione Sedis Apostolicæ, ex privilegio S. Gregorii papæ illi Ecclesiæ concessio, ob idque diceret in Angliam alium non esse mittendum legatum, sed satis esse debere, vice Pontificis Romani esse ibi semper legatum ipsum Cantuariensem archiepisc. Ad hæc igitur conservanda sibi jura, et ad propulsandam legatorum ingruentium rapacitatem, Henricus rex Romanam magni ponderis legationem credidit Radulpho Cantuariensi archiepiscopo, cui additus nomine episcoporum, et regis legatus Herebertus, episcopus Norwicensis; qui cum Romanam pervenissent, Pa-

schalem papam ibi non invenerunt. Nam, ut tradit Willelmus hujus temporis auctor¹, « absens tunc erat, Beneventique morabatur. Obsederant enim, inquit, imperatoris satellites, qui tunc secundo Romam armis terribat, medios calles; nec potuit archiepiscopus potiri papæ colloquio nisi per inter-nuntios. Illi quid apud papam egerint, Epistola manifestabit »; quæ sic se habet:

9. « Paschalis episcopus, servus servorum Dei, venerabilibus fratribus Angliæ episcopis, et charissimò filio Henrico illustri regi, salutem et Apostolicam benedictionem.

« Veniente ad nos charissimo et reverendissimo fratre nostro Radulpho archiepiscopo, vestram ad nos missam legationem per venerabilem episcopum Herebertum Norwicensem cognovimus. Et quidem gravibus infirmitatibus molestiis impediti, iidem fratres et coepiscopi pervenire ad nostram præsentiam minime potuerunt. Sed nuntiorum honestis venerabilibusque personis pervenientibus, eorum scripta suscepimus: in quibus et ipsorum postulationes, et vestræ legationis vota perspeximus. Id enim oplabatur, id posebatur, ne Ecclesia Cantuariensis temporibus nostris sua dignitate privetur, ne nos eandem dignitatem minuamus aut minui sinamus, qua videlicet polita est, ex quo a B. Gregorio per beatum Augustinum fundata est. Præter hæc litterarum indicia, legati qui ad nos missi sunt ut sapientes ac strenui viri, assertiones suas prudenter, instanter et efficaciter executi sunt. Nos profecto et legatorum personas, et assertiones, et vestrum omnium legationes tanquam charissimorum fratrum benigne hilariterque suscepimus: quod vobis in Domino, propter Dominum placere optamus. Vestræ ergo dilectioni notum habere volumus, quod Cantuariensis Ecclesiæ dignitatem nec imminuimus, nec imminuere desideramus. Beatum namque Gregorium Apostolicæ Sedis Pontificem, tanquam præcipuum Christi Domini membrum, tanquam Christiani populi pastorem et doctorem, et tanquam salutis æternæ ministrum in omnibus veneramus, et rata esse cupimus quæ ab ejus institutionibus processerunt. Illam ergo dignitatem, quam ab eo per beatum Augustinum Cantuariensis suscepit Ecclesia, et quam sanctæ memoriæ frater noster Anselmus jure ac possessione legitima tenuisse cognoscitur, nos profecto nullatenus imminuimus; sed in eo statu esse Cantuariensem Ecclesiam volumus, ut authentica ejus privilegia juxta canonum sanctiones nullis perturbationibus violentur. Data Beneventi, nono kalendas Aprilis »; anni sequentis scilicet, quousque legati Romæ detenti sunt ob malam valetudinem Cantuariensis archiepiscopi, et (ut audisti) ob difficultates itineris conveniendi Pontificis Beneventi commorantis. Nam, inquit idem auctor, « ita circa Romanam plures dies Radulphus commoratus, modo in imperatoris exercitu, papæ dum-

¹ Extant apud Sur. tom. VII. die III Junii.

¹ Will. Malin. de gest. pont. Angl. l. 1.

taxat concessu, modo in Sutrio colloquium opperiebatur papæ, quem rumor disperserat, jamjamque affore. Qua ille expectatione suspensus, perdidit impensam». Passi sunt autem præterius scandalum ex Anglis nonnulli, quod papa quærens authentica Privilegiorum, ita negotium dimisisset infectum; perinde ac si in re tanta fuisset præcipitanda sententia, cum præsertim in legationibus in Angliam assidue mittendis Sedes Apostolica antiqua potiretur possessione.

10. *Causa Turstani archiepiscopi Eboracensis.* — Hinc etiam nuper electus archiepiscopus Eboracensis Turstinus sive Turstanus, cum cogeretur ab archiepiscopo Cantuariensi ad professionem, ex privilegio ejus Ecclesie impulsu clericorum suorum Romam veniens, has ab eodem Paschali papa ad regem litteras impetravit¹:

« Paschalis episcopus, servus servorum Dei, Henrico illustri regi Anglorum, salutem et Apostolicam benedictionem.

« Nos auctore Deo, de probitate tua non tantum bona, sed meliora confidimus. Idcirco moneamus excellentiam tuam, ut divinæ gratiæ memor semper existas, qui tibi et regni pacem, et justitiæ notitiam tribuit. Honorem igitur Dei et Ecclesiarum ejus in regno tuo diligenter observa, et justitiam efficaciter exequere: quia per honorem Dei tuus profecto augebitur. Audivimus electum Eboracensem, virum sapientem et strenuum, sine judicio ab Eboracensi Ecclesia sequestratum, quod nimirum divinæ justitiæ et sanctorum Patrum institutionibus adversatur. Nos quidem neque Cantuariensem Ecclesiam minui, neque Eboracensem volumus præjudicium pati; sed eam constitutionem, quæ a beato Gregorio Anglicæ gentis Apostolo inter easdem Ecclesias constituta est, firmam consensum illibatamque servari. Idem ergo electus, ut justitia exigit, ad suam Ecclesiam omnimodis revocetur. Si quid autem questionis inter easdem Ecclesias nascitur, presentibus utriusque partibus, in nostra præsentia pertractetur». Hæc Paschalis pro Turstano, qui absque judicio (ut audisti) fuisset a sua Ecclesia separatus; cum tamen alias (ut vidimus) Anselmi temporibus, causam Cantuariensi adjudicasset contra Gerardum Eboracensem. Sed quæ postea obtinuerit idem Turstanus a Callisto papa, suo loco dicitur.

11. *Terræ motus in Longobardia prodigia.* — Eodem anno cum ingens terræ motus universalem Italiam quateret, inter admiranda, quæ tunc accidisse, tum Petrus Diaconus² Cassinensis, tum alii ejusdem temporis scriptores narrant, satis illud Annalibus inseruisse, quod item ab ejusdem sæculi scriptore Rogerio sic traditur³: «Apud Longobardiam magno terræ motu facto, et ut testati sunt qui novere, quadraginta dierum spatio durante, plurima domorum ædificia corruerunt. Et quod

visu dictuque constat mirabile, villa quædam prægrandis mota est repente de statu proprio, jamque ab omnibus in loco longe remoto consistere cernitur». Sed non hoc est, quod adeo dignum Annalibus Ecclesiasticis putem, cum de his licet mirandis, alia tamen exempla apud Gentiles quoque scriptores legantur; sed quod ibi sic sequitur: «Viri Mediolani Patriciæ dignitatis, dum de Republica tractantes sub una residerent turri, auribus omnium vox foris insonuit, unum ex illis nomine vocans, et festinato exire rogans. Quo tardante, persona quædam apparuit, quæ vocatum virum, ut egrederetur, prece obtinuit. Exeunte illo, turris repente cecidit, et omnes qui ibidem erant, casu mirabili oppressi». In quo quidem renovata quis non videat antiqua miracula, idque illi simile, cum Angelus, ne periret justus cum iniquis, Loti illasum cum suis eduxit e Sodomis¹? Quibus discant homines, nonnisi ex divina providentia, casu vero vel fato nunquam in communibus cladibus hunc perire, illum vero ex insperato salvari.

12. *Origo historica et progressus monasterii Fontis-Ebraldi.* — Hoc eodem anno mortuus asseritur vir insignis Robertus, auctor monasterii Fontis-Ebraldi. Qui enim eduxit populum suum de Ægypto, et deduxit per desertum in adinventionibus suis, idem ducens populum Christianum per deserta loca sæculi hujus ad terram felicioris promissionis ipsum regnum cælorum, novam in Gallia religiosorum instituit vivendi formam per servum suum Robertum Parisiensem, in monasterio quod crexit, dictum Fontis-Ebraldi, in quo etiam viri tanquam Dei Genitrici, abbatissæ parent. Hæc ut accipias, præsciendum, quod monasterium Fontis-Ebraldi nomen duxit a fonte loci in quo situm est. Ferunt enim Ebraldum quendam juvenem, genere nobilem, sed moribus corruptis, magna sciariorum manu stipatum, adjacentes vias regias latrocinii olim infestasse, silvasque tunc temporis frequentes insedis, quarum hodieque reliquæ manent non parvæ. Post hæc theologum quendam Parisiensem, eximie doctrinæ virum, divinique verbi concionatorem insignem, Robertum de Abruscellis nomine, eo adventasse, sanctisque exhortationibus suis non modo juvenem illum, ut mores vitæque mutaret, impulsisse, sed multos præterea omnium generum homines ad despiciendam sæculi vanitatem, austeriorisque vitæ leges subeundam permovisse; ad quorum habitationem distincta iisdem in septis monasteria condidit, sua seorsim viris, virginibus, ægrotis et mulieribus reliquis ædificando. Universe porro Congregationi abbatissam præposuisse, quæ in omnes tum viros, tum feminas jus summum obtineret, statuens ut viri, sancti Joannis Evangelistæ exemplo, virginibus seu mulieribus parent, et hæc vicissim B. Virginis exemplum sequentes, religio-

¹ Will. Malmesh. de gest. Angl. Pont. I. III. — ² Petr. Diac. I. IV. c. 64. — ³ Rog. Annal. hoc anno.

¹ Gen. IX.

sos tanquam filios amplecterentur. Statuta denique et Constitutiones pro utriusque separatim perscripsit.

13. Cum ergo ad hunc modum recte institutum fuisset monasterium Fontis-Ebraldi, reges et principes cæterique dynastæ, magna mox veneratione illud prosequi, et diversa ei bona largiri cœperunt; nonnulli etiam hujus congregationis conventus in suis terris expetierunt, ita ut ex omnibus illis conventibus constitutus fuerit Ordo, cujus caput esset idem monasterium Fontis-Ebraldi: quem quidem authenticis bullis multi Pontifices approbarunt, docentes Ordinem hunc ab illis verbis Christi¹: « Ecce filius tuus, ecce mater tua », institutionis suæ originem, rationemque petiisse.

Mortuum tradunt Robertum regulæ auctorem, anno millesimo centesimo decimo septimo et S. Bernardo familiarem fuisse. Statuisse autem, ut cum abbatissa quam crearat, diem suum clauderet, ea illi succederet, quam religiosæ ipsæ suis suffragiis elegissent. Quod ab illis semper observatum est, quamdiu electionum usus in monasteriis permansit. Cæterum et quamdiu stetit eligendi potestas, et postquam auctoritate Pontificis constitui abbatissæ cœperunt, optimas semper easque memorabiles abbatissas sortitæ sunt, vitæ integritate ac sanctitate quam genere illustriores, tametsi pleræque regum et principum, aut nobilissimorum certe equitum filiæ fuerint. Inter quas eluxerunt Mathildis comitis Andegavensium filia; Guillelmi vidua, Henrici Primi Anglorum regis filia; Mathildis altera filia Theodorici comitis Flandriæ, vidua item ducis Burgundiæ, Aloysia Ludovici Junioris Francorum regis filia; Joanna de Brenna neptis Roberti filii Ludovici Crassi Francorum regis; Elisabetha soror Philippi Valesii regis; Maria de Britannia, Aurelianensis et Britanniæ ducum neptis; Anna Aurelianensis Ludovici XII regis soror; Renata de Borbonio, filia Joannis comitis Vindocini; Ludovica de Borbonio, soror primi ducis Vindocini, et Eleonora de Borbonio ejusdem ducis et Franciscæ Alinconiæ filia, amita Henrici Quarti Christianissimi regis Francorum et Navarra: quæ monasterium, in quo ducentæ præter cæteros religiosos Deo dicatæ moniales numerantur, Ordinemque universum moderatur magna pietatis, prudentiæ, sanctitalisque apud omnes opinione.

14. Observandum est, Mariæ Britannæ abbatissæ temporibus, ipsa procurante, factam fuisse Ordinis reformationem juxta regulam S. Benedicti, et statuta Roberti institutoris, Xysti IV Pontificis maximi auctoritate, qui archiepiscopos Lugdunensem et Bituricensem delegavit ad eandem reformationem exequendam: quæ nunc etiam in Fontis-Ebraldi monasterio, prioratibusque circiter sexaginta, qui ab illo pendent, studiosè observatur. Extat Epistola D. Bernardi² ad episcopum Andega-

vensem, de querela inter ipsum et abbatissam Fontis-Everardi, ubi legendum Ebraldi; de hoc enim loquitur monasterio, quod in diocesi quidem Pictaviensi positum est, sed contiguus cum Andegavensi fines habet.

Sed et Petrus Venerabilis, Cluniacensis abbas, ejusdem Roberti meminit magno præconio³, utpote qui fuerit institutor matris suæ B. Raingarde in vita spiritali, quæ viro defuncto professæ est monasticam regulam in Marciacensi monasterio. Cujus res præclare gestas, post ejus obitum ipse Epitaphio est prosecutus, ubi pariter corrupte legitur monasterium ad Fontem-Ebraudi, loco Ebraldi; meminit et ibidem de ejusdem Roberti ex hac vita decessu.

15. *Balduni regis pœnitentia.* — Quod ad res pertinet Orientis, de pœnitentia Balduni regis hæc Tyrinus narrat⁴: « Hierosolynam rediens, gravi ex insperato correptus est ægritudine, qua cum supra vires defatigaretur, et timeret deficere, læsam habens conscientiam super eo quod, legitima uxore injuste abjecta, aliam superduxerat, corde compunctus et facti pœnitens, viris religiosis et Deum fimentibus aperiens conscientiam, reatum confessus est, satisfactionem promittens. Cui cum pro consilio daretur, ut reginam quam superduxerat a se dimitteret, abjectam vero ad regiam unde deciderat revocaret dignitatem, acquievit: et quod ita laturus esset, si vita ei concederetur producit, voto se obligavit ». Quod præstitit, dum reginam quam superinduxerat in Siciliam dimisit. Verum quod prior dimissa fuerit revocata, non legimus. Mortuus est autem idem rex anno sequenti, cum bello vexasset Ægyptum.

16. *Obitus Muzalonis patriarchæ Constantinopolitani.* — Eodem anno moritur Nicolaus Muzalon, patriarcha Constantinopolitanus, cum sedisset annos viginti septem, ut testatur Zonaras, qui his erat præsens, atque ejus funus imperatorem magnificis honoribus prosecutum fuisse. Ejus jussu restituta fuisse Acta sanctæ Parasceves, quæ Callistratæ colebatur, testatur Theodorus Balsamon⁵, qui et ejusdem citat synodalia responsa⁶. Extat ejusdem Muzalonis⁷ decretum de sponsalibus duorum consobrinorum, necnon decretum⁸ de canonica præstatione suscipienda ab iis qui initiatur sacris ordinibus. Ejusdem extat synodalis Epistola, continens rescriptum Alexii Comneni. Successit autem in locum ejus, ut idem Zonaras ait, unus ex diaconorum ordine, patria Chalcedonensis, nomine Theodorus. Quantum autem hic sederit, in serie Græca, quæ ponitur Constantinopolitanorum patriarcharum, quæ habetur cura in Codice Juris Orientalis, non legitur, sicut nec ejus successorum, scilicet Neophyti Inclusi, Constantini, et Luce Chrisoberges, quorum nec nomina quidem est

¹ Joan. XIX. — ² Bern. Ep. CC.

³ Petr. Clun. I. III. Ep. XVII. — ⁴ Willel. Tyr. I. II. c. 29. — ⁵ Theo. Bals. in Synod. Titul. c. 63. — ⁶ In Synod. Carth. c. 41. et Nom. Phot. tit. XVII. c. 2. in Concil. Antioch. c. 3. — ⁷ Cod. juris. Orien. I. III. — ⁸ Eod. cod. I. III.

aliqua mentio apud Nicetam Chronitam, ut plane divinare convincantur, qui textentes in fastis seriem Constantinopolitanorum patriarcharum, mul-

lis omissis, loca certa singulis, quos recitant, tribuisse inveniuntur.

Anno periodi Græco-Romanæ 6610. — Anno Æræ Hispan. 1155. — Anno Hegiræ 511, inchoato die 5 Maii, Fer. 7. — Jesu Christi 1117.

— Paschalis II papa 18. — Henrici V reg. 12, imp. 7. Alexii Comneni imp. 37.

1. *Conc. Trojanum anno mcxv celebratum.* — A num. 1 ad 8. Petrus Diaconus lib. 4 Chron. Casinensis cap. 56, de rebus anno superiori gestis disertum sermonem habet. Tunc his verbis caput 57 exorditur: «Sequenti anno, mense Maio, jam dictus papa Paschalis ad monasterium venit: abbatemque secum adducens Trojam, Concilium ibi celebraturus accessit.» Baronius num. 1 textum illum corripit, legitque *sequenti anno millesimo centesimo decimo septimo*, sed contra mentem Petri Diaconi, indeque Concilium Trojanum fingit, quod nunquam fuit, certumque illud hoc anno Beneventi habitum. Peregrinus enim in Notis ad Falconem, postquam observavit, ipsummet Baroniū Concilium Trojanum anno mcxv copulasse, hæc scribit: «Paschalis, ut Petrus Diaconus perhibet in laudato non semel Auctario lib. 4, cap. 57, mense Maio Roma egrediens venit ad monasterium Casinense, ejusque abbatem tunc Girardum secum ducens, Synodum celebraturus Trojam perrexit, indeque regrediens Ecclesiam Sancti Vincentii juxta ortum Vulturni fluminis solemniter dedicavit». Sic ille. Et Falco insuper post prædicta subdit: «Confirmato autem Concilio et pie finito, papa Beneventum tertio die intrante mensis Septemb. reversus est. Deinde Romam reversus est septimo kal. Octob. Qui tunc monasterium S. Vincentii (hoc jam a Petro etiam intellexeramus) dedicavit». Igitur Paschalis a mense Martio in anno mcxv Roma absens, moratus in his est locis per quatuor fere menses, cum Synodum habuit Trojanam; recitata namque Petri verba de alia Synodo in præfata urbe congregata, quam de exposita a Falcone, haud sunt intelligenda: quod amborum auctorum de celebrata tunc a Paschali dedicatione Ecclesie Sancti-Vincentii concursus assertio manifeste probat.

2. *Concil. Beneventanum hoc anno coactum.* — Et præterea, ut in Castigationibus ad Anonymum Casinensem ad annum mcxiv observam, Petrus dicens papam Paschalem sequenti anno, postquam Cassinenses monachi castellum suum recupera-

runt, quod cap. 54 accidisse perhibet in anno mcxv. Sic enim ejus scriptus Codex et editio præfert Neapolitana (nempe quæ ab Angelo de Nuce curata fuit) statuens, inquam, papam Roma discessisse *sequenti anno*, hoc est, Christi mcxvi, Trojanum Concilium celebraturum, communem Epocham Christi nati observatam a Falcone, anno certe præit (nempe Petrus Casinensis) observandumque, Concilium Trojanum anno mcxv certo celebratum fuisse. Quo fit, ut Falconi de tempore præfati Concilii non adversetur. Qui insuper spontanea confessione coactum illud detegit in anno mcxv, cum cap. 60 et 61 ait, *Paschalem*, sociato sibi abbate Casinensi, reversum ex Synodo nimirum jam dicta disposuisse *mediante Quadragesima*, alteram ibi Synodum celebrare (sequenti anno mcxvi,) ac deinde loco cessisse ob turbas a Romanis motas (exante Martio anno mcxvi) occasione præfati se invito instituti, tandemque in anno mcxvii Urbem egressum (ad eam enim prius ipse iterum se contulerat, ut fatendum est, idque Falco non tacet) Beneventum recessisse, ut Romam advenientem regem devitaret Henricum. Paschalis, inquam, præfati regis occursum sic in dicto anno mcxv declinavit, in quem cæteri etiam omnes id conjiciunt auctores, et præsertim Falco, qui illum mense Aprili Beneventi constitisse affirmat, utique postquam Concilium in Quadragesima antecedentis anni mcxvi Romæ habuerat, eam deseruerat, repetiveratque Urbem: ac subinde in anteacto anno mcxv Troiæ, ut prædictum est, præsens fuerat. » Hæc Peregrinus, Hoc itaque an. Concilium a Pasch. II non Troje, sed Beneventi congregatum, sed altum ibi de rebus in hoc Concilio gestis silentium. Hæc Falconis de eo verba. «Anno mcxvi Dominice Incarnat., et xvii Pontificalis domini Paschalis, mense Aprili, ipse Synodum Beneventi celebravit».

3. *Italia Transiberina Apulia quandoque.* — Petrus Diaconus laudatus apud Baronium num. 5, urbe in qua Concilium celebratum, non expressa, de eo loquitur, atque tantum coactum fuisse in

partibus Apuliæ, quæ verba Baronio labendi causa esse potuerit. Sed Peregrinus p. 163, recte ea exponit: « Nec turbet te, inquit, quod dicat in *Apuliæ partibus* Concilium illud congregatum, in quibus haud censetur *Beneventum*. Nam tunc et aliquanto etiam post, passim unius *Apuliæ* absoluto nomine cunctam Italiam cis Tyberim (nota, qui loquitur, Neapolitanum esse) exteri Occidentales nuncuparunt, exque illorum usurpatione etiam incolæ; quandequidem Normanni ob res primum in Apulia præclare et feliciter gestas longinquorum ora ad se solos, et ad unam Apuliam converterant. »

4. *Henricus a Burdino archiep. Bracarensi Romæ imperator coronatur.* — Adventum *Henrici* Romam accurate refert Baronius ex Pandulfo Pisano, auctore Vitæ Paschalis II. Petrus Diaconus cap. 63 ait tantum imperatorem *congregato exercitu* Romam adventasse, ac Paschalem II Urbe egressum Beneventum perrexisse. Et quia Pontificem ibi minime invenit (nempe Henricus), *nec poterat apte per intermunitas res inter utrumque agitari, coactus fervore æstatis secessit*. Verum auctor Vitæ Paschalis II quid Henricus antequam Urbem relinqueret egerit, hoc modo narrat: « Diffusus hic rex, accito Mauritio Bracharensi archiepiscopo, qui ob superbam levitatem curialis effectus, per biennium, extra Ecclesiam propriam, opulentissimo cultu et regio, hac et illac dissolute vagabatur, ante corpus B. Gregorii coronari se fecit, sicque ab Urbe comitatus abscessit. » Baronius anno mxi, num. 2, de Mauritio, vulgo *Burdino* appellato, jam locutus fuerat, sed ibi aliqua in medium adducit, quæ nobis hic illustranda, corrigendaque ex Vita ejusdem Burdini a Baluzio lib. 3 Miscel. pag. 471, ex variis Antiquis collecta. *Bernardus* archiepiscopus Toletanus ac Sedis Apostolicæ per Hispaniam legatus, cum anno mxcv post celebratum Concilium Claromontanum in Hispaniam rediret, ducit secum e provincia Lemovicensi Burdinum, litteratum, curialem et eloquentem virum, ut eum vocat auctor Chronici Maurimacensis, illumque primum Toletanum archidiconum, dein episcopum Conimbricensem constituit. Tum defuncto *santo Gerardo* Bracare archiepiscopo, quem ex monasterio Moysiacensi in Aquitania prima Bernardus in Hisp. adduxerat, *Burdinus* ei, juxta quod S. Gerardus, ut in Vita ejus cap. 16 apud Baluzium libro citato, olim prædixerat, suffectus est communibus cleri suffragiis anno mxc, ut tradit Rodericus a Cunha in Hist. Ecclesiast. archiepiscoporum Bracharensum; et quia translationes episcoporum sine interventione auctoritatis Romani Pontificis fieri non possunt, ad Sedem Apostolicam accessit.

5. *Dissensio inter Bernardum Toletan. primate et Burdinum archiep. Bracare.* — Primum quidem a papa *Paschali* obtinuit, ut postulata cleri Bracharensis valerent; postea vero pallium accepit per manus Joannis Cajetani, diaconi cardinalis et cancellarii. *Bracaram* reversus, tenacior fuisse vi-

detur in vindicando antiquo sedis suæ gradu, quam ut *Bernardo* patrono suo placere posset. Nam is tota mente incumbebat, ut quia Toletanæ Ecclesiæ collatus recens fuerat primatus per universam Hispaniam, subiceret Tolecto universas Hispaniarum Ecclesias. Intercessit *Burdinus*, appellavitque Paschalem Romanum Pontificem, qui sæpe monuit *Bernardum*, ut abstinere ab inferendis injuriis archiepiscopo Bracharensi; sed cum tunc magna esset legatorum auctoritas, *Burdinus* perrexit in Italiam, ut a Romano Pontifice afflictis rebus remedium peteret. Hanc ejus in Italiam protectionem anno hujus sæculi decimo quinto contigisse, ex eo colligit Baluzius, quod Pandulphus in Vita Paschalis II, loquens de coronatione *Henrici imper.* quæ hujus anni initio Romæ peracta est a Burdino, scribat eum biennio non introisse provinciam Bracharem; quod evincit eum de ea decessisse anno mxcv. *Paschalis II*, auditis quæ adversus *Bernardum* proponebantur, terminos posuit legationi ejus, et *Burdinum* Bracharem archiepiscopum, universamque provinciam ab illius jurisdictione liberavit; simulque Conimbricensem diœcesim, quam *Bernardus* subtrahere conabatur metropoli Bracharensi, ad eam pertinere pronuntiavit.

6. *In favorem Burdini a Paschali II dirempta.* — Horum papæ *Paschalis* decretorum mentionem facit Innocentius III, lib. 2, Epist. cxxvi, occasione controversiæ, qua sub Pontificatu ejus fuit de diœcesi Conimbricensi inter Bracharem et Compostellanum. Nam Conimbricam uterque contendebat ad metropolim suam pertinere. Bracharensis ergo, ut jus suum tueretur, allegavit decreta papæ *Paschalis*, quæ Conimbricensem diœcesim adjudicant archiepiscopo Bracharensi. Laudat Innocentius III Epistolam *Paschalis II*, quarum prior edita est tom. in Monarchia Lusitanæ, posterior a Roderico a Cunha in Tractatu de *primatu Bracharensis Ecclesiæ in universa Hispania*. Utraque data est *Anagninæ, III nonas Novemb.* et in posteriori *Bernardo* Toletano archiep. Apostolicæ Sedis legato ait *Paschalis*: « Pro injuriis confratris nostri Mauritii Bracharensis archiep. fraternitatem tuam sæpe movimus; sed adhuc se vehementer a te gravari conqueritur. Conimbricensis enim episcopi obedientiam ei contra Romanæ auctoritatis privilegia subtraxisti etc. Nos autem in his vehementer regniurbationem et ætatis tuæ gravitatem infirmitatesque pensamus. Idecirco te ab injecta super archiepiscopum et provinciam Bracharem cura legationis absolvimus, ut liberius ipse valeat in provincia sua justitiam exercere ».

7. *Burdinus a Paschali II excommunicatus quod Henricum coronasset imperat.* — Tanti autem *Burdinum* *Paschalis* papa fecit, ut cum hoc anno *Henricus* imp. Romam venit infenso erga se animo, eundem Burdinum *super tractanda pace legatum* ad eum miserit, ut inquit *Gelasius II*, successor ejus, in litteris anno sequenti Cajetæ *ad clericum et ple-*

hem Romanam datis, tom. x Concil. pag. 818 recitatis. Sed ipse a papa deficiens Henricum imperat. coronavit. Neque enim alia de causa defectus ad id facinus, quam quia Romani Pontificis vices obtinebat apud Augustum, pacis ac concordie interpres. Alioquin, inquit Baluzius citatus, num. 12, cur non potius Germani cunuspiam episcopi ministerio *Henricus* usus fuisset; *Paschalis*, qui tum agebat in partibus Apulie, ut ex Falcone jam diximus, incanduit adversus *Burdinum*, uti proditorem ac perfugam, Synodumque congregavit apud *Beneventum*, in qua eum publice ob eam causam excommunicavit, ut asserit Gelasius II in Epistola ad Gallos, quæ prima est inter ejus Epistolas. Ex aliis litteris ejusdem Gelasii ad *Bernardum* Toletanum et cæteros Hispaniarum episcopos discimus, non solum excommunicatum in ea Synodo fuisse *Burdinum*; sed etiam *Paschalem* Bernardo Toletano archiepiscopo et Hispaniæ primati mandasse, ut alium in locum *Burdini* eligendum curaret, ipsumque excommunicatum fuisse, cæteris Hispaniarum prælatis significaret.

8. *Antea ab eodem papa officio episcopali interdictus fuerat.* — Em. Cardinalis de Aguirre tom. in Concil. pag. 319 et seqq. refert aliqua Fragmenta Concilii Palentini, præside Bernardo archiepiscopo Toletano anno mxciv celebrati, sub die VIII kalend. Novemb. quæ quando Baluzius præfata de *Burdino* scripsit, nondum e tenebris exierant. Inter ea extat Epistola *Paschalis* II ad *Burdinum Laterani XII kalend. Maii, Indictione VII*, anno sc. Christi mxciv data, cujus hic tenor est: « Inter querelas alias quæ de te ad Sedem Apostolicam delatæ sunt, Legionensis Ecclesiæ invasio et confrictio nos gravius contristavit. Super quæ ex nostris litteris monitus, et a vicario nostro Bernardo Toletano ad Concilium evocatus, et venire et satisfacere contempsisti (illius Concilii Acta deperdita, et locus in quo celebratum ignotus). Ad hæc pro hujus nequitia et inobedientia, per eum, tam a sacerdotali quam ab episcopali officio interdictus, eadem officia celebrare pertinaciter præsumpsisti. Nos igitur, auctore Deo, tantum superbiæ et nequitie facinus ulciscens, et eadem tibi officia, et Bracarensis Ecclesiæ obedientiam interdiximus, donec respiciens obediens, et plenius satisfacias ». Quibus ex litteris liquet primo, *Burdinum* ante initium anni mxciv non solum Ecclesiam Legionensem invasisse; sed et a Bernardo Toletano archiep. S. Sedis legato ab officio episcopali interdictum fuisse. Secundo, ante presentem annum resipuisse, et plenius satisfacisse, cum *Paschalis* II, eo currente, cum legatum pacis ad *Henricum* imp. miserit.

9. *Fabulæ de Bernardo et de Burdino confictæ refelluntur.* — Baronius anno mxcv, num. 2, refert ex Mariana lib. 10, cap. 8, *Alphonsum* Aragoniæ regem *Bernardum per biennium* in exilium misisse. Verum cum hoc in aliis Hispanis scriptoribus non legatur, suspicor biennium illud, quo auctor Vite

Paschalis II affirmat, *Burdinum* a suo episcopatu abfuisse, errandi causam Mariane dedisse, eumque inde intulisse *Bernardum* ab *Alphonso* rege per biennium relegatum esse. Secundo, Baronius ibidem ait, *Burdinum* illius exilii captata occasione Romanam venisse, atque oblata pecunia petiisse a *Paschali* II in *Bernardi* locum intrudi, sed cum execratione rejectum a *Paschali* II, se contulisse ad *Henricum* imp. quem eidem jam cæpisse adversari intellexisset. Quam in rem laudat *Rodericum* lib. 6, cap. 27 et 28, et citare potuisset *Romualdum* archiepiscopum Salernitanum, acerrimum Toletani primatus defensorem, qui nundinationem illam commemorat, licet non illo tempore, quo Baronius pronuntiat ista evenisse. Verum tot contradictionibus implicata est narratio illa apud *Rodericum*, ut fabulæ simillima videatur. Nam tradit *Rodericus* id evenisse statim post mortem *Urbani* II, cum tamen eo tempore *Burdinus* nondum archiepiscopus esset, nullaque hactenus controversia versaretur *Paschalem* inter et *Henricum*, nulla *Bernardum* inter ac *Burdinum*. Secundo vanitas istius *Rodericianæ* scriptiõis ex eo deprehenditur, quod illic scriptum sit *Burdinum* ad Sedem Apostolicam evectum ab imperatore eo ipso tempore, quo *Paschalis* papa in custodia regia erat; denique quod affirmet *Paschalem* diem suum obiisse apud *Cajetam*, et imperatorem illum *Ottone*m appellet; quæ omnia a veritate aliena. Neque falsum est quod ait *Romualdus*, *Burdinum*, defuncto Toletano archiepiscopo, largita *Paschali* papæ thesauri copia petiisse ab eo Toletanum archiepiscopatum, sed obtinere non potuisse, licet *Paschalis* pecuniam accepisset. Quippe *Bernardus* superstes fuit *Paschali* II, quem aliunde constat *Burdino* postea gratificatum esse, cum adversus vim *Bernardi* defendisse, suumque legatum constituisse, ut concordiam procuraret inter sacerdotium et regnum.

10. *Paschalis II Ecclesiæ Cantuarien. Privilegia confirmat.* — A num. 8 ad 11. *Radulphus* Cantuariensis archiepiscopus, qui pro Ecclesiæ suæ causa Romanam petebat, *Paschalem* II ex Urbe fugatum, nonnisi Beneventi convenire potuit: « Quoniam », inquit *Eadmerus* lib. 5, « dominus papa, propter discordiam, quæ illis diebus inter ipsum et imperatorem erat, et Romanos, Beneventi morabatur, nec *Radulphus* usque ad eum partim propter corporis sui imbecillitatem, partim propter præfatam discordiam, cujus causa omnibus ad papam ire volentibus, graves insidiæ ab incolis struebantur, nullatenus accedere poterat: missis nuntiis cum litteris, innotuit ei et adventum et adventus sui causam usque Romam: quod ille benigne suscipiens, et verba eorum moderata æquitalis lance perpendens, juxta negotii modum scripsit episcopis Angliæ et regi ». Refert postea *Paschalis* II litteras episcopis Angliæ et *Henrico* regi, *Beneventi, non. kalend. April.* datas, quibus Pontifex rescribit, se Cantuariensis Ecclesiæ privilegia confirmare. Hujus legationis substantia fuit lega-

torum rapacitas. Verum non *Petrus*, uti scribit Baronius, sed *Anselmus* vices Apostolicas in Anglia administrare jussus fuerat; *Petri* enim legatio ad annum MCXXI pertinet, ut ibi videbimus.

11. *Anselmus legatus papae in Anglia Rotomagi remanet.* — Interim *Anselmus*, qui legationem suam rege impediende exercere non poterat, cum Rothomagi moraretur, rogavit regem, ut sibi saltem liceret, Petri denarios Romae pendi solitos, per insulam colligere: « Memoratus Anselmus », inquit Eadmerus, « eo usque morabatur Rothomagi cum rege, pecuniam, quæ B. Petro de Anglia quotannis pendi solet, Romam reversus cupiens secum habere. Ut autem ipse in Angliam pro exercenda legatione sibi injuncta transiret, rex, ut diximus, consentire nolebat, ratione quam prælibavimus, et aliis non minus rationalibus usus ». Factam tamen denariorum collectionem, illique pecuniam consignatam dubitandum non videtur, sed incertum, inquit Alfordus hoc anno num. 9, an ad illam colligendam mare trajecerit legatus.

12. *Terræ motus et Conc. Mediolanense.* — Ad num. 11. « In Oclavis », inquit chronographus Hildensheimensis ad hunc Christi annum, « sancti Joannis Evangelistæ lile per orbem terribili et inaudito hactenus terræ motu terra concutitur. Maxime vero in Italia minax hoc periculum per multos dies continuo desævī, etc. » Sigonius lib. 10 de Regn. Ital. ait, illum terræ motum *nonas Januarii* Italiam concussisse, et fere modo quo Sigonius, describit illum Landulphus Junior cap. 31, apud Puricellum in Monument. Basil. Ambros. num. 325. Landulphus addit, Jordanum Mediolanensem archiep. Concilium provinciale in eadem urbe convocasse: « Longobardorum civitates, et earum pontifices, audita legatione Jordani archiepiscopi et consulum ejusdem urbis, in statuta die convenerunt Mediolanum in Prato sancto, quod dicitur Brolum, ubi archiepiscopus et consules duo theatra constituerunt. In uno archiepiscopus cum episcopis et abbatibus et Ecclesiarum prælatis stetit et sedit: in altero consules cum juris legum et morum peritis. Atque in circuitu eorum affuit innumera multitudo clericorum et laicorum, mulierum quoque et virginum, expectantium sepelitionem vitiorum, et suscitationem virtutum ». Quid in hoc Concilio, cujus in Collectione Conciliorum nulla mentio, statutum fuerit, incomperitur. Subjungit Puricellus: « Hæc autem atque hujusmodi alia hoc ipso terræ motus tempore agebantur Mediolani non ultra decem menses ac dimidium, antequam Paschalis papa moreretur, sicut constat ex ejusdem Landulphi cap. 32. Mortuus autem ille fuit anno MCXVIII, medio mense Januario. Quamobrem Concilium illud et terræ motus incidere in superiorem annum MCXVII, circa finem Februarii ».

13. *Mortuus Ivo episc. Carnotensis.* — A num. 12 ad 15. Anno superiori ex Vita beati Roberti de Arbrissello fundatoris Ordinis Fontis-Ebraldi, a

monacho ejusdem Ordinis elucubrata, et ad diem xxv Februarii a Bollandi recitata cap. 3, ostendimus, Robertum, postquam Ivoem episcopum Carnotensem, et abbatem Bonevallis inter se dissidentes reconciliavit, celebrasse *Dominicam Nativitatem*, quæ tunc appropinquabat, *Alto-Brugeræ*, cænobia a Carnotensi urbe parum dissito. Nunc vero ex eadem Vita addendum: « Peracta in eodem loco Dominicæ Incarnationis festivitate, dispositaque interius et exterius ejusdem loci Dominici ovilis societate, iterum Carnotum rogatus advenit. Defunctus quippe jam fuerat Carnotensis antistes, quem superius prænotavimus ». Quare a recentioribus criticis Ivois Carnotensis episcopi, doctrina et sanctitate illustris, mors aut cum anno MCXV, aut cum anno MCXVI male hactenus alligata fuit; cum scriptor laudatus Vita B. Roberti, qui hoc tempore vixit, diserte indicet, Robertum, quem hoc anno exeunte mense Februario demortuum constat, uno aut altero mense Ivois superstitem fuisse. Accurate itaque Ivois obitum tam Robertus de Monte (cujus germanum Supplementum ad Sigeberti Chronicon Dacherius publicavit cum Operibus Guiberti de Novingento), quam Matthæus Parisiensis in Chron. cum præsentī anno copularunt. Utrique suffragatur priscum Kalendarium Sancti-Quintini Belvacensis, in quo ipse Ivo abbas ante suum episcopatum fuerat, et varia moriens eidem donavit; in eo enim legitur: « Kalend. Januarii obiit venerandæ memoriæ magister Ivo, præ aliis sui temporis doctor insignis, primus abbas hujus Ecclesiæ, postea Carnotensis episcopus ». Paulo post: « Obiit autem tantus vir iste anno Incarnationis Christi MCXVI, pro cuius anima damus ad eleemosynam unum frumenti modium », ubi annus ille MCXVI a Paschale superioris anni exorditur. In Martyrologio quidem Ecclesiæ Carnotensis Ivo mortuus dicitur *idibus Decemb. anno Incarnat. Dom. MCXV*, sed ex dictis, tam præsentī quam superiori Christi anno, illud falsum esse convincitur, sicuti et quod inscriptum est Kalendario Ecclesiæ S. Joannis Carnotensis in Valle, eum obiisse *X kal. Januuar. anno ab Incarnat. MCXV*, utrumque enim Kalendaris laudatis, ut sæpe fit, post aliqua sæcula ab Ivois morte insertum; neque video hoc impossibilem in controversiam venire posse. San-Marthani in episcopis Carnotensibus referunt quoddam Ivois Epitaphium in quo is dicitur sedisse *annos xx*, sed hujusmodi Epitaphia plerumque multis sæculis post eorum mortem, in quorum honorem efformata, composita sunt; Ivoem enim annum Sedis xxvii inchoasse, me demonstrasse arbitror.

14. *Ejus elogium.* — Sed præstat audire Robertum de Monte in vero suo Chronico ad annum MCXVII: « Mortuus est hoc anno vir religiosus et magnæ litteraturæ Ivo Carnotensis episcopus. Hic dum esset juvenis audivit Magistrum Lanfrancum priorem Becci (in Normannia) de sæcularibus et divinis litteris tractantem in illa famosa schola

quam Becci tenuit, in qua et multi et nobilitate seculari, et honestate morum convenerunt viri præditi, et qui postea ad summum apicem Ecclesiasticæ dignitatis et religionis attigerunt; postea vero idem Ivo aliquando præfuit et profuit conventui canonicorum S. Quintini Belvacensis. Ad ultimum factus est episcopus: rexit Ecclesiam Carnotensem viriliter et religiose fere annos viginti tres. (Legendum viginti sex, scriptum erat xxvi, et progressu temporis extrema parte penultimi numeri deleta, relictum est xxiii, quod sæpius contigisse suis locis observavimus.) Reliquit autem multa monumenta industriæ suæ, religionis et sapientiæ, ædificando scilicet monasterium canonicorum S. Joannis de Valle, in quo et sepultus est, et domus episcopii faciendo: et a malis consuetudinibus et exactionibus comitis Carnotensis idem episcopium liberando et multa utilia scribendo ».

15. *Auctor fuit Decreti Juris.* — Pius V Pontifex Romanus canonicis Regularibus Congregationis Lateranensis, bulla anno mclxx emissa, testum ejus celebrare concessit die xx mensis Maii. Ejus Decreto ante Gratiani tempora per sexaginta circiter annos nisi sunt Juristæ, illudque ab eo editum anno mxc, ut docet Radulphus de Dileo in Abbreviat. Chronic. ad annum mxc, ubi ait: « Ivo Carnotensis episcopus Regularum Exceptiones Ecclesiasticarum in unum corpus adunavit hucusque », id est, usque ad illum Christi annum. Prologus enim hujus Operis his verbis incipit: « Exceptiones Ecclesiasticarum Regularum, partim ex Epistolis Rom. Pontificum, etc. » In ultima quidem editione Decreti Ivonis vox *Exceptiones* mutata fuit a Jureto in vocem *Excerptiones*, sed ipsemet in Notis ad illum Prologum eam mutationem recipiendam non esse his verbis satis declarat: « In præcedenti editione et in codice Ms. S. Victoris Parisiensis, sicut etiam in omnibus Pannormiæ et Epistolarum Ivonis Mss. et editis habetur *Exceptiones*. Sed quia recentiores, dum illum citant, ut Antonius Augustinus et alii posuerunt *Excerptiones*; ex quorundam judicio hic editum est ». Ita Juretus. Verum judicium illud non sequendum, sed rejiciendum erat; nam præter Codices Mss. citatos et præcedentes editiones, Radulphus de Dileo laudatus, Sigebertus lib. de illust. Ecclesiæ Script. cap. 168 et Codex Ms. Vaticanus num. 1358 habent: *Exceptiones*, non vero *Excerptiones*, et *excipere aliquid memoria dignum ex sermone alicujus phrasæ Ciceroniana est*, ut liquet ex lib. 1 de Oratore 48. Denique Gallerus, qui hoc ipso tempore episcopus Magalonensis erat, in Epistola ad Robertum præpositum Insulanum loquens de Floribus Psalmorum a Leberto Sancti-Rufi abbate collectis ex expositionibus super Psalmos ab Augustino ac Cassiodoro et aliis doctoribus editis, ait se illos transmittere « sicut ab illo sancto viro (sc. Leberto) flores excepti sunt », ex illis nempe expositionibus. Imo Hildebertus archiep. Turonensis Collectionem Canonum a se factam inscripsit,

Exceptiones Ecclesiasticarum regularum, ut ipsemet prodit in Epist. lxxxiii. Vera itaque Ivonis lectio *Exceptiones*, non vero *Excerptiones*.

16. *Sed non ejus Epitomes.* — Exstant duæ canonum ac decretorum Collectiones antiquæ Ivoni attributæ, quarum una *Decretum Ivonis* vulgo vocatur, altera *Pannormia*, utraque eandem habens Præfationem a voce *Exceptiones* incipientem, sed Pannormia non est Ivonis opus, sed Hugonis ejusdam *Catalaunensis*, qui decretum in Compendium redigit, teste Vincentio Bellovacensi qui lib. 25 Speculi Historialis cap. 84 de Ivone et ejus abbreviatore scribit: « Hic inter alia laudabilia quæ fecit, Decreta Apostolica abbreviando compilavit et ordinavit. Quod quidem prius Isidorus in unum maximum volumen redegerat, nec sine magno sumptu transcribi poterat. Hic autem et ipsa Decreta Apostolicorum abbreviavit, et per capitula distinxit, et multas sanctorum doctorum sententias ad capitula pertinentes pariter interseruit. Hic liber Decretorum Ivonis apud nos pluribus locis reperitur, qui, quoniam ipse quoque non parvæ quantitatæ, non est facile portatilis. Eodem Catalaunensis (legendum Catalaunensis) ex eodem volumine abbreviato libellum portatilem legitur composuisse, qui et ipse apud nos est, et Summa Decretorum Ivonis appellatur ». Baluzius V. Cl. in Præfatione ad Dialogos Antonii Augustini de Emendatione Gratiani, notationibus eruditissimis a se illustrato, existimavit, Vincentium loqui de quodam alio Opere quo careamus, et *Ivonem* primo scripsisse *Pannormiam* et Præfationem eodem tempore confecisse, quæ postea magno Decretorum volumini præfixa fuerit, cum ab una eademque Præfatione *Decretum*, ejusque Abbreviatio initium sumat.

17. *Refellitur contraria sententia.* — Sed hac in re viro doctissimo assentiri non possum, cum *Vincentius* Bellovacensis sæculo sesquimedio post *Ivonem* obierit, diserte testetur, se *Hugonis* Epitomen habere, et conjecturæ quæ ad eam Ivoni vindicandam in medium adducuntur, rem non evincant. Quod enim dicitur, hanc Epitomen diversam esse a *Pannormia*, quod Summa Decretorum Ivonis inscripta fuerit, et *Pannormia* in Codicibus tam editis, quam Mss. nunquam *Summa Decretorum* appelletur, parum urget; cum iisdem libris vari quandoque tituli appositæ fuerint. Ex eo vero quod pauca sint, in quibus hæc duæ Collectiones inter se conveniant, non sequitur, *Pannormiam* non esse Epitomen Decretorum Ivonis, sed *Pannormiam* seu Epitomen, ac Decreta duorum esse auctorum. Denique Sigebertus, qui eodem quo Ivo tempore vixit, loco laudato unius tantum operis de canonicis ab eo editis mentionem facit, quod aliud esse non potest, quam ejus *Decretum* in libros 17 divisum: « Composuit, inquit, insigne volumen canonum ».

18. *Decretum et Epitome eodem quandoque nomine appellantur.* — Tam Decretum quam ejus

Summa seu Epitome *Pannormie* nomine appellata reperiuntur; Epitome enim, quæ in Bibliotheca Vaticana, uti jam monui, servatur, *Pannormia Ivonis* inscribitur, et hoc ejus initium: *Exceptiones Ecclesiasticarum regularum*, etc. liber autem 8 et ultimus Pannormie in eo Codice his verbis finitur: *Templum Dei sanctum est, quod estis vos*, estque sexcentorum annorum, quod cum ex characterum forma dignoscitur, tum ex imperatorum et Romanorum Pontificum Catalogis eidem præfixis aperte colligitur. Illi enim eadem veteri manu, qua *Ivonis Pannormia*, sunt exarati, et prior desinit in Conrado II, id est, in Conrado Salico, alter vero in Joanne XIX, ut me per litteras monere dignatus est eminentissimus card. Casanata. Quo ex Catalogo Rom. Pontificum, ut id obiter observem, colligimus, Joannem, qui imperante Conrado Salico Ecclesiam Romanam rexit, appellatum fuisse Joannem XIX, non vero Joannem XX, ut eum Baronius vocavit. Decretum vero Pannormiam etiam dictum fuisse ostendit Trithemius in lib. de Script. Eccles. qui de Ivone ait: « Scripsit post Burkardum Wormaciensem episcopum ex canonibus sanctorum compendiosum decretum, quo ante Gratiani tempora utebantur juriste, quod prænotavit Pannormiam libris 10 », ubi legendum, *libris* 17. Neque enim Trithemius de Ivonis Epitome intelligi potest; cum non ea, sed Decreto ante Gratianum uterentur *Juriste*, et incredibile sit, Trithemium Epitomen memorasse, et Decreti mentionem non fecisse.

19. Præter *Ivonem* duo alia fulgentissima Galliarum luminaria hoc anno extincta, beatus nempe *Robertus* de Arbrissello, et *Bernardus* Tironii abbas, cujus societas Roberti semper gratissima fuerat, ubi scribit monachus Fontebraldensis in Vita ejusdem Roberti, qui postquam narravimus Natale Domini in loco Alta-Brugerie dicto celebrasse, subdit Robertum iterum rogatum fuisse Carnotum venire; « Defunctus quippe jam fuerat Carnotensis antistes (sc. Ivo) quem superius prænotavimus, et in loco ejus communi clericorum electione alius inthronizatus (Goffridus nempe des Lieves II). Tanta autem seditio inter clericatum et comitem illius civitatis (nempe Theobaldum Carnotensem et Blesensem comitem) versabatur, ut etiam nonnulli canonicorum, amissis facultatibus suis, jussu comitis trucidari timerent ». Subjungit idem monachus, illic etiam venisse *Bernardum de Tironio*, et comitem per Roberti monium *clericis universa quæ abstulerat* reddidisse, et novi episcopi electioni acquiescentem, ad urbem redire concessisse.

20. *Moritur*. — Tum cap. 4 subdit: « Carnotensibus itaque pacificatis, fidelis verbi Domini dispensator Carnotensem urbem, nunquam ad eam postea remeaturus, reliquit, conjunctoque sibi Bernardo Tironii abbate venerabili, cujus societas semper sibi gratissima fuerat, ad castellum quod populariter Blesis dicitur (gallice, *Blois*) ambo insimul pervenerunt. In eodem vero castello Wilhelmus Nivernensis religiosus comes (hujus

nominis secundus) incarcerationis tenebatur (ab anno sc. superiori, ut ibidem ostendimus) eo quod Ludovici regis Franciæ partes pro pace tenenda adversus Carnoti comitem ipse tueretur. Ille etiam Wilhelmus, exigentibus vitæ suæ meritis, utrique clarus habebatur, etc. Visitato itaque sibi dilecto comite, atque plusquam carceralis pœna exigebat, confortato, duo illi visitatores, nunquam posthac in hac vita sese visuri, inseparabiliter, ut ita dicam, sunt separati ». Quod exeunte circiter mense Januario currentis anni factum fuisse præfatus monachus indicat. Qui paulo post narrat, *Robertum* Ursanum sui Ordinis monasterium non longe Carnoto et Fontebraldo dissitum venisse. Tum refert quid Robertus egerit *sexta feria*, die nempe decima sexta mensis Februarii, dein quæ *sabbato*, die videlicet xv ejusdem mensis, *secunda feria*, sc. die xix, *tertia feria*, die nempe xx, et denique *quarta feria ante obitum suum*, die sc. xxi. Cumque post hæc de ejus morte verba faciat, apparet eam incidisse in eandem feriam quartam, diemque xxi mensis Februarii, sive IX kalendas Martii.

21. *Annus mortis ejus ac dies*. — Honoratus quidem Nicquetius in Vita Gallica B. Roberti cap. 33 ait, juxta monasterii Ordinisque Fontebraldensis traditionem, eum die xxiv mensis Februarii demortuum; Henschenius vero ad diem xxv ejusdem mensis, Pavillonus in Vita Gallica ejusdem inelyti fundatoris, passimque omnes alii diem insequentem eligunt; sed auctori anonymo coætaneo, qui ejus Vitam scripsit, manifeste contradicunt; is enim diserte docet, eum feria quarta spiritum Deo reddidisse, ideoque die xxi mensis Februarii. Præterea evidens est corpus ejus non nisi post aliquot ab illius obitu dies terræ mandatum fuisse, utpote de longinquo adductum. San-Marthani enim in archiep. Bituricensibus de Leodegario archiep. Bituricensi verba facientes, referunt Chartam ex Tabulario Fontebraldensi extractam, currentique anno ipsoque die quo B. Robertus sepulture mandatus, scriptam in qua dicitur: « Eodem die quo magistri Roberti de Arbressello corpus (Dei gratia DE LONGINQUO ALLATUM) in loco Fontis-Ebraldi, quem Deo auxiliante fundavit, humatum fuerat, non minima multitudo religiosarum personarum ad tanti viri funeris obsequium illic congregata fuerat, etc. » Denique Robertus in Monasterio *Ursani*, leucis circiter quatuordecim a Cari fluvio dissito, hominem exiit, corpusque ejus, ut ad Fontem-Ebraldum commodius devehere, navi impositum, solo corde Ursani relicto. *Caris* infra Turonas in Ligerim sese exonerat, ad quem fluvium positus est Candacensis vicus ubi divus Martinus Turonensis episc. ultimum diem clausit. Locus ille Gallica lenca a Fontebraldo distat, ut videre est in chartis Geographicis, et e Candacensi vico, gallice *Cande*, sacrum pignus terrestri itinere ad Fontem-Ebraldum devehctum est, ad quod iter tam navale quam terrestre conficiendum tres aut quatuor dies insumpti.

Quare *Robertus* nec die xxiv, nec die xxv Februarii vita functus est, et tam in Chronico Andegavensi tom. I Biblioth. Labbeanae, quam in Chronico Malteacensi, tom. II ejusdem Biblioth. obitus nomine dies exequiarum intelligendus. In posteriori Chronico ad annum mxxvi legitur : « Obiit Robertus de Abrisello, fundator Fontis-Euraudi, VI kalend. Martii »; in priori ad eundem Christi annum, « obiit Robertus de Arbrissellis quinto kal. Martias, ipse fuit fundator monasterii Fontis-Ebraudi ». Ex utroque eruo, corpus Roberti die xxiv Februarii ad Fontem-Ebraudi pervenisse, et die insequenti seu V kalend. Februarii sepulture mandatum fuisse. Festo quidem S. Matthiae iste in diem sequentem in Martyrologio Ordinis Fontis-Ebraudi preleguntur : « Eodem die in Biturica patria, apud Ursanum, præclara dormitio reverendi domini Roberti de Arbrissel, doctoris theologi, venerabilis presbyteri, ac charissimi patris nostri, etc. » sed ea a paucis sæculis scripta, cum hoc tempore titulus iste, *Doctor Theologus*, nondum auditus esset. Certum itaque et indubitatum esse debet, *Robertum*, die xxi Februarii jam inchoato ac currenti anno ad Deum migrasse, et utrumque chronographum citatum a die Paschatis annum inchoare. Præter monachum Fontis-Ebraudi, qui creditur esse Andreas Roberti discipulus, ejus Vitam scripsit *Baldricus Dolensium* episcopus anno mxxxi demortuus.

22. *Purgatur a calumnia in eum conficta.* — Licet *Robertus* Ecclesiam universam sanctitate sua vivens et mortuus illustrari, calumniam tamen passus est a *Roscelino* hæretico et a quibusdam æmulis. Imo *Goffridus Viudocinensis* abbas, *Roberto* amicus, ad eum scripsit Epistolam XLVII libri 4, in qua ait : « Feminarum quasdam, ut dicitur, nimis familiariter tecum habitare permittis, quibus privata verba sæpius loqueris; et cum ipsis etiam et inter ipsas noctu frequenter cubare non erubescis, etc. » *Goffrido* suppositam fuisse hanc Epistolam credere *Sirmondus* editor Epistolarum ejusdem *Goffridi*, *Bollandus* in Comment. prævio ad Vitam B. Roberti, et *Joannes a Mann-Firma* Fontebraldensis monachus in Dissert. duplici de *Epistola contra B. Robertum de Arbr. conficta*. Verum legitur ea in antiquissimo Codice Ms. Cenomanensi, eadem manu scripta quæ ceteræ; extat pariter Florentiæ in Bibliotheca Sanctæ-Crucis, quæ domus est Ordinis nostri, ubi eam legi, quamque nuper examinavit etiam *Mabilionius* in Museo Italico tom. I, pag. 164, qui testatur illarum Epistolarum Codicem scriptum esse auctoris ætate. Jam pag. 34, loquens de Bibliotheca reginæ Succie dixerat, se in ea vidisse alterum Codicem complectentem Epistolas ejusdem *Goffridi* ipsius ætate scriptum, et has inter Epistolam ad Robertum de Arbrissello, cujus nomen sola prima littera R. designatur. Sed nec ea Epistola, neque alia *Marbodi* episcopi Redonensis, officium Roberti sanctitati; utpote quæ falsos tantum rumores con-

tinent, a malevolis in eum sparsos. Etenim piissimum virum, inculpata vita, alia auctorum æqualium testimonia, cæteraque omnia ab his calumniis abunde purgant, ut fuse demonstrat Natalis Alexander part. II Sæculi XI et XII, in Dissert. V « de *Goffridi Viudocinensis* abbatis, et *Marbodi Redonensis* episcopi Epistolis Roberto de Arbrissello inscriptis ».

23. *Viri pii falsis relationibus aliquando decepti.* — Mirum tamen videri non debet, *Goffridum*, virum egregiis monumentis ad omnem memoriam commendatum, quique tanto in numero fuit apud *Ludovicum VI* Francorum regem, *Urbanum II*, et *Callistum II*, mendaciis in Robertum confictis fidem adhibuisse, cum sanctus Bernardus abbas Clarevallensis, cujus major fuit existimatio apud reges et summos Pontifices, et non minor in maximis rebus et gerendis et sustinendis exercitatio, factioni adversus sanctum *Willelmum*, electum et consecratum archiepiscopum Eboracensem innocecenter adhæserit, et insontem præsulatu mulctari curarit. Mortuo archiepiscopo Eboracensi, pars major *Willelmum* thesaurarium elegit episcopum, et *Henricus Viudocinensis* episc. sancte Sedis legatus, vir tam natalibus quam religione et pietate illustris, illum consecravit. Sed *Osberto* archidiacono ejusdem Ecclesiæ, homine turbulento et factioso intercedente, variæ sparsæ per Angliam adversus *Willelmum* criminationes, quæ sanctum Bernardum seduxere, et effecere ut pessime de illo sentiret et scriberet, non solum *Innocentio II*, sed etiam *Celestino II*, *Lucio II*, et *Eugenio III* sedentibus. In Epistola cccxxv ad Celestinum II data, quæ alias erat cccxxiv, ait *Willelmum* « sibi vindicare electionem in præfata Ecclesia impie » cupere, et eum « de plurimis et pessimis » pulsari. *Willelmum* appellat *idolum Eboracense*, atque eum, cum non posset per ostium, fodisse argenteo, ut aiunt, sarculo, et intrusum fuisse. Subdit : « Hen! Notus est orbi triumphus diaboli. Ubique per tonat plausus incircumcisorum et planctus bonorum, pro eo quod videatur sapientiam vicisse malitia. Monstratur digito matris Ecclesiæ turpitude : patris *Innocentii* (nempe *Innocentii II* papæ) verenda irriduntur, denudata a servo nequam (nempe a *Willelmo*) quoniam mortuum putat; sed vivit in vobis. Si is exitus imminabat, cur e longinquo Romam est pertracta causa spurcissima, umbra magis et angulo digna? etc. » Non dissimilia scribit sanctus abbas adversus sanctum præsulem *Willelmum* in Epistolis cccxxviii, cccxxix, ccxli, ccxlii, cccxlii, et in Epistola cccclx, ubi *Willelmum pestem communem* vocal. Et tamen tunc Anglia sanctiorem præsulem non habebat, neque majori apud alios multos viros piissimos existimatione pollentem, ut infra visuri sumus. Magni itaque ac piissimi viri falsis relationibus quandoque decipiuntur, et trahuntur in sententias a veritate alienas. Sed sicut criminationes adversus *Willelmum* Eboracensem excogitate non obstitere, quominus *Honorius III* cum sanctorum catalogo adscriberet;

ita sperandum sanctam Sedem Roberto de Arbrissello sanctorum honores, cultumque tandem decreturam. Infra videbimus B. Joachimum, Congregationis Florentis in Calabria fundatorem, prophetiae dono clarum, durius habitum fuisse.

24. *Moritur B. Bernardus fundator Congregationis Tironiensis.* — B. Roberto superstes fuit B. Bernardus fundator Congregationis de Tironio, ut jam diximus hujus anni initio, et fidem facit chronographus Malleacensis, qui hoc tempore vixit, quique annum a Paschale exordiens, ad annum MCVI narrata B. Roberti morte, ait: « Eodem anno obiit Bernardus, fundator cœnobii Tironis, quod est in Pertico, septimo kalendas Martii », qui tamen colitur in monasterio Tironensi die XIV mensis Aprilis, ad quem diem Henschenius recitat ejus Vitam a Gaufrido Grosso monacho Tironensi et B. Bernardi discipulo elucubratam. Tironensium monachorum religionem laudat Jacobus a Vitriquo in cap. XX Histor. Occidentalis, et Tironense monasterium in diœcesi Carnotensi constructum subest Congregationi S. Manri.

25. *Floret B. Vitalis fundator Congregationis Saviniacensis.* — Guillelmus Neubrigensis hujus sæculi eximius scriptor, Roberto et Bernardo addit Vitalem Saviniacensis cœnobii in confinio Normanniæ, Armoricæ et Cenomannorum anno MCXI conditorem; qui tres viri cum Petro, Pictaviensi episcopo celeberrimo, anno MCXV juxta Chronographum Malleacensem vita functo, non modo litteris, sed omnibus quoque virtutibus eminuerunt, sui que singuli monasterii, quasi de conducto fundatores extiterunt. Hæc Neubrigensis lib. 1, cap. 15: « In transmarinis partibus, sicut a majoribus accepi (erat enim Anglus) tres memorabiles viri uno tempore fuere, scilicet Robertus cognominatus de Arbusculo, Bernardus et Vitalis. Ili non ignobiliter eruditi et spiritu ferventes, circuibant per castella et vicos, seminantesque secundum Esaïam super omnes aquas, de conversione multorum fructus uberes colligebant, pio inter se placito constituto, quod Robertus quidem feminarum communi labore ad meliora conversarum sollicitudinem gereret: Bernardus vero et Vitalis maribus propensius providerent. Robertus itaque famosissimum illud monasterium feminarum de Fonte-Elbraudi construxit, et regularibus disciplinis informavit. Bernardus vero apud Tironiam, et Vitalis apud Saviniacum monachis regulariter institutis, suos quisque ab aliis per quasdam præceptorum proprietates distinxit ». B. Vitali quartus in abbatiam successor fuit Serlo, qui se cum triginta abbatibus sibi subditis, præsentē sancto Bernardo Cisterciensibus subjecit, ut sub Eugenio Tertio Pontificatu videbimus. Baluzius lib. 2 Miscell. pag. 310, refert Chronicon *Saviniacense*, quod his verbis inchoatur: « Anno Domini MCXII, beatus Vitalis eremita optimus seminivertibus (id est, verbi divini seminator) in confinio Normanniæ et minoris Britanniæ ædificavit monasterium istud, quod dicitur

Saviniacum. Hic beatus vir modernas institutiones in aliquibus Cisterciensibus similes monachis suis imposuit, virtutibus et miraculis claruit, etc. Rexit abbatiam annis X, et anno Domini MCVII gloriose migravit ad Dominum », et quidem XVI kalend. Octob. ut in eodem Chronico legitur. Denique Baluzius Tom. IV Miscell. pag. 536, refert elogium B. abbatis in quo dicitur: « Canonici primo, post eremita bonus, cœnobium Savineii construxit », nempe in diœcesi Abrincatensi.

26. *Adelais dimissa a Balduino reg. Hieros.* — Ad num. 15. *Balduinus* Hierosolymorum rex, qui vivente adhuc uxore, *Adelaidem*, Rogerii hujus nominis Primi comitis Siciliæ viduam, superinduxerat, eam hoc anno dimisit, quæ « septem cum navibus in comitatu suo Siciliam transfretavit », inquit Fulcherius lib. 2 Hist. Hierosol.

27. *Moritur Nicolaus III, patriarcha Constantin.* — Ad num. 16. *Nicolaus Grammaticus* patriarcha Constantinop. anno millesimo centesimo undecimo e vita migravit, cum, uti suo loco monstravimus, patriarchale solium anno MXXXIV ante mensem Septembrem conscenderit, et Zonaras in Alexio imp. scribat: « Patriarcha Nicolaus, Ecclesia per annos viginti septem gubernata, senex admodum decessit: cujus funus imperator magnificis honoribus prosecutus alium in patriarchico solio collocavit, ex fratre nepotem ejus, qui tum Chalcedonensi præerat Ecclesiæ, in litteris tum profanis, tum sacris ab inenunte versatum ætate, quem ipse imperator in Ecclesia declaravit ». In lib. 4 Juris Græco-Romani, ubi refertur *Series episcoporum Byzantii*, Nicolai successor appellatur *Joannes Hieronemon*, cognomento *Chalcedoni*. Extant in Bibliotheca regia Cod. 912, monachorum quorundam extra civitatem Acomuniorum Questiones, et ad eas responsa Synodi coactæ sub Nicolao patriarcha et Alexio imp. Ejusdem Operis aliud Exemplar Ms. asservitur in Bibliotheca Casarea, ut monet Lambecius tom. II Biblioth. Cæs. Porro iste Nicolaus tertius hujus nominis fuit. *Nicolaus* vero *Muzalo*, quem cum eo confundit Baronius, quartus hujus nominis appellandus, et de eo infra sermo erit. Illic retrahenda quæ anno sequenti Baronius de damnatione *Bogomilorum*, sedente Nicolao patriarcha facta, litteris mandavit.

28. *Obitus magistri Anselmi Laudunensis.* — Hoc anno e vivis excessit *magister Anselmus*, Laudunensis decanus, qui Lutetia et Lauduni per quadraginta et amplius annos Theologiam publice professus est. Dacherius enim, qui Guiberti abbatis B. Mariæ de Novigento Opera publicavit, catalogum decanorum Laudunensium ex Tabulariis eruit, et iisdem Operibus annexuit, hoc anno mortem ejus consignat. Habuit discipulos celeberrimos et magistros insignes, Willelmum de Campellis postea Catalaunensem episcopum, Petrum Abaelardum, Gaufridum Britonem, dein Rothomagensis archipræsulem, aliosque. Hugo Metellus canonicus regularis Ordinis S. Augustini in abbatia

Sancti-Leonis Tullensis, qui hoc ipso tempore floruit, scripsitque « Epistolas plures ad viros sui temporis scientia vel dignitate illustres », nondum publici juris factas, in Epistola IV ad Innocentium, de eo ait : « Mortuo Anselmo Laudunensi et Guilhelmo Catalaunensi, ignis verbi Dei in terra defecit », indeque Joannes canonicus S. Victoris Parisiensis in Chronico Ms. de eo, inquit, dixisse fertur Eugenius III : « Deum spiritum ejus suscitasse, ne Scriptura periret ». Glossam interlinearem aliaque reliquit ingenii sui monumenta, quo-

rum pleraque adhuc inedita, quæ Natalis Alexander Sæc. XI et XII, parl. 1, cap. 6, art. III enumerat. Porro Anselmum hoc anno obiisse præter Pseudo-Robertum de Monte tradit auctor synchronus, ejus verba Marlotus in Metrop. Rhemensi lib. 2, cap. 33, refert, et *Anselmum* plurimum laudat. Dachérius in Notis ad Gubertum de Novigento pag. 642, elogium Anselmi, et annum ejus mortualem descripsit ex Chronico canonici Laudunensis coævi hactenus inedito, et Nangius in Chron. eundem annum pariter signat.

GELASII II ANNUS 4. — CHRISTI 1118.

1. *Paschalis papa in Urbem reversi obitus, cui Gelasius II successurus.* — Millesimus centesimus decimus octavus annus sequitur, Indictione undecima, quo Paschalis papa moritur. Quomodo autem id acciderit, hæc ex Bibliothecario accipe : « Præneste, octavas Nativitatis Domini, atque etiam Epiphaniam devotissime celebravit, et data licentia legis Joannis imper. Constantinopolitani, quos ibidem receperat Præneste, quibus et in mandatis dedit, ut imperatorem adversum Sarraenos vehementer animaret : liberaturus beati Petri Basilicam incautis hostibus, Roman in porticum venit. Ob ejus inopinatum subitumque adventum tantus terror Ptolemæum et Farfensem abbatem invasit, ut antequam dominus papa daret pacem peterent, sed desperantes de gratia, dimissis laribus in Urbe, latitare pararent. Jamque bonus Pontifex ad perficiendum quod inciperat, machinas et tormenta, et quæque necessaria bello incredibili agilitate per biduum per suos parari fecerat, ut viceret eum potius diceret, quam victurum. Sed dum quod voluit fecit, Dominus vitam ejus, quam ob gratiam distulit, ob debitum terminavit. Biduo post reditum, tanto arctius ob laborem itineris populi frequentiam infirmitas in eum convaleuit, quanto remissius, et quietis assiduitate, et sedulitate obsequii ante defecerat, vir sanctus moriebatur et operabatur. Convocatis Patribus, ut in constantia fidei et sinceritate veritatis Deum sequerentur, inunxit : ut caverent dolos ab his, qui intus erant et extra in execratione Guibertinorum, ac enormitatis Teutonice : se invicem diligenter,

et invicem idem dicerent, et ipsum verum quem diligenter in omnibus Deum tenerent.

2. « Post hæc unctus oleo sacro, facta confessione, peractis in eo omnibus, prout decuit, secundum sanctæ Ecclesiæ ritum, psallendo cum psallentibus, media nocte, ut qui de tenebris properabat ad lucem senex honestus, carnis debitum solvit, decimo quinto kalendas Februarii. Corpus ejus balsamo infectum, et ut habet ordo, sacris indutum vestibus, cum exequis debitis, et honore digno, cum frequentia cleri et populi deportatur. Non evulsi tanta gleba imposita est deportanda, sed ab ipsis Patribus honorifice est deportata in Basilicam Salvatoris, sede propria in patriarchio, dextero latere templi in mausoleo purissimi mar-moris thalapsico opere sculpto, undecimo kalendas Februarii collocatus est, cum sedisset annos decem et octo, menses quinque, dies quatuor. Qui beatissimus complures fecit ordinationes per diversos menses, creavit presbyteros quinquaginta, diaconos triginta, episcopos vero centum, consecravil Ecclesias viginti, Rome vero Ecclesiam Sancti-Badriani in Tribus Foris secundo anno Pontificatus sui dedicavit, et Ecclesiam S. Mariæ positam in regione Areole, in loco qui vocatur Monticelli, similiter consecravil. Verum et Ecclesiam sanctorum Quatuor-Coronatorum, que tempore Roberti Guiscardii destructa erat, a fundamentis refecit, et consecravil anno Pontific. sui decimo septimo, mense Januarii, die vicesima. Cessavit episcopatus ejus dictus tribus ». Hucusque Bibliothecarius. Porro de eodem in archivo sanctæ Lateranensis

Ecclesiæ mentio est, quod idem Paschalis papa Secundus ordinem canonicorum regularium in Ecclesia Lateranensi renovavit.

3. Inter alia monimenta Paschalis papæ exlat Epistola data ad Pontium abbatem Cluniacensem, de non porrigenda communione intincta, sed seorsum in specie panis, et specie vini seorsum. Hæc ut accipias, consulendus est tibi Micrologus, ejus auctor, ut dictum est, claruit sub Gregorio Septimo : iste enim de vitanda intinctione scripsit capitulum, in ejus exordio¹ : « Non est autem, inquit, authenticum, quod quidam corpus Domini intingunt, et intinctum pro complemento communionis populo distribuunt. Nam Ordo Romanus contradicit, etc. » Cum autem nec sic quidem reprehensus pravus subintroductus usus in communionem cessaret, Paschalis Apostolicam adhibens auctoritatem, de his cavendis, et revocando usu pristino scripsit ad Pontium abbatem Cluniacensem hanc Epistolam, quam reperimus in scripto Chronico Cluniacensi verbis istis :

« Paschalis episcopus, servus servorum Dei, charissimo filio suo Pontio Cluniacensi abbati, salutem et Apostolicam benedictionem.

« Scribens ad Cæcilium beatus Cyprianus ait : Quando aliquid, Deo inspirante et mandante, præcipitur, necesse est Domino servus fidelis obtemperet, excusatus apud omnes, quod nihil sibi arroganter assumat, ne aliud fiat a nobis, quam quod pro nobis Dominus prior fecit. Igitur in sumendo corpore et sanguine Domini juxta eundem Cyprianum Dominica traditio servetur, nec ab eo, quod Christus magister et præcepit et gessit, humana et novella institutione discedatur. Novimus enim per se panem, per se vinum ab ipso Domino traditum. Quem morem sic semper in sancta Ecclesia conservandum docemus atque præcipimus, præter in parvulis, ac omnino infirmis, qui panem absorbere non possunt », quibus satis communicari in sanguine. Sed quod nec sic cessaretur ab usu introducto intinctionis : communionem sub una tantum specie panis, sancta frequentare postea cepit Ecclesia. Sed transeamus ad Paschalis successorem.

Quæ autem sequuntur in Codice Vaticano Acta successoris, scriptis mandata sunt a Pandulpho subdiacono, qui præsens aderat cum ea fierent, atque in primis a primordiis ipsius Gelasii Junioris, qui Paschali successit, est exorsus orationem. Hunc quidem natione Campanum, patria Cajetanum, Joannem nomine nuncupatum, professione monachum Cassinensem, ordine diaconum S. R. E. cardinalem, munere cancellarium fuisse, omnes affirmant. Pandulphus, qui res ab eo gestas ab ortu describit, cum suo Oderisio abbate monasticis institutis imbutum narrat, ab Urbano papa ad munus cancellariæ adscitum, a Paschali autem papa diaconum cardinalem creatum Diaconie Sanctæ-

Mariæ in Cosmedin appellatæ. In quo munere cum innocentissime sicut et vigilantissime se gessisset, dignus est habitus inter tot cardinales, qui Romanus Pontifex crearetur. Sane quidem magnopere laudatus habetur Gelasius etiam Germanorum Scriptorum elogiis. Nam Urspurgensis hæc de eo : « Pro quo (Paschali) Joannes Cajetanus, vir prudens et venerandus, in Romana semper Ecclesia irreprehensibiliter eidem Apostolico collaborans eligitur, etc. » Quomodo contigerit ejus electio, et quanta pati eum oportuerit a schismatici imperatoris fautoribus, exacte Pandulphus describit, alique :

4. *Gelasii papæ electio, captio et fuga, persequentibus schismaticis.* — « Interim autem, Paschali papa defuncto, venerabilis pater dominus Petrus Portuensis episcopus, qui primum post papam per longa jam diutius tempora detinuerat, cumque eo omnes presbyteri ac diaconi cardinales de eligendo Pontifice, et in commune communitur, et singulariter singuli pertractare cæperunt pro domino cancellario in monasterio Cassinensi commanente. His sic gestis, modis omnibus, ipso inscio, nuntius derepente comparuit, qui cancellarium ipsum juxta quod acceperat in mandatis, ad cardinales Romanæ cum omni faceret celeritate redire. Quid moror? Tristis frater Joannes morte tanti patris sui protectoris, ac mœrens, prout obedientie filius, poscit mulum, ascendit, maturoque itinere Urbem intravit, fratres ac filios adunavit, commouit. In crastinum vero, secundum quod condixerant, honorabilis pater prænominatus dominus Portuensis, Cencius Sabinensis, Vitalis Albanensis, Lambertus Ostiensis, episcopi, Domnizo sancti Martini, Bonifacius sancti Marci, Desiderius sanctæ Præxedis, Joannes de Cervia sancti Chrysogoni, Petrus Pisanus sanctæ Susannæ, Saxo de Anagnia sancti Stephani in Cælio monte, Amicus sanctæ Crucis, Sigizo sancti Sixti, Amicus sanctorum Nerei et Achillei, L. sanctæ Cæciliæ, Deusedit sancti Laurentii in Damaso, Anastasius sancti Clementis, Rainerius SS. Marcellini et Petri, Benedictus sancti Petri ad Vincula, Conradus sanctæ Prudentianæ, N. sanctorum Joannis et Pauli, Thebaldus sanctæ Anastasiæ, Gerardus sanctæ Priscæ, Guido sanctæ Balbinæ, Gregorius sancti Laurentii in Lucina, et sex alii presbyteri cardinales : nam Hugo de Alatro presbyter cardinalis, qui arcem Circæam pro Paschali papa tenuerat, paulo post rediit : item Gregorius sancti Eustachii, qui et abbas sancti Andree, Oderisius sacristanus sanctæ Agathæ, qui postea abbas Cassinensis effectus est, Rosimannus sancti Georgii, Henricus sancti Theodori, qui et Mazariensis decanus, Aldo sanctorum Sergii et Baschii, Petrus Leonis sanctorum Cosmæ et Damiani, Comes sanctæ Mariæ in Aquiro, Chrysogonus sancti Nicolai in carcere Tulliano, et Stephanus sanctæ Lucie in Silice, Gregorius sancti Angeli aderant, et octo alii diaconi cardinales : itemque Nicolaus primicerius scholæ cantorum, et subdiaconi palatii, et alii minoris ordinis clerici

¹ Micr. c. 19.

multi Romani, de senatoribus ac consulibus aliqui, præter familiam nostram.

5. « Hi omnes vitantes scandalum, quod in huiusmodi solet electionibus pro peccatis nostris accidere, non secus ac postea rei probavit eventus, ad locum tutissimum, veluti qui curie cedit, in monasterio quodam, quod Palladium dicitur, infra domos Leonis et Cencii Frangipanis pariter convenerunt, ut juxta seita canonum de electione tractarent.

« In quo loco videlicet post disceptationem diutinam, ac voluntates diversas, nunc hæc, nunc illa petentes, tandem aliquando, communicato consilio, illo etiam mediante qui facit utraque unum, pari voto ac desiderio in hoc unum unanimiter concordarunt, ut dominum Joannem cancellarium in papam eligerent et haberent. Nec mora, raptus ab omnibus, laudatur ab omnibus, approbatur ab omnibus, necnon etiam ab episcopis quorum nulla est prorsus alia in electione præsulis Romani potestas nisi approbandi, vel contra, et ad communem omnium cardinalium primum, et aliorum petitionem, electo manus solummodo imponendi. Sicque invitus ac renitens dominus Joannes Cajetanus, qui hodie est Gelasius, in papam, Spiritus sancti gratia mediante, electus est, et ab omnibus communiter in summa Sede locatus, cunctis Dei magnalia collaudantibus ». Hactenus de legitima electione Gelasii Pandulphus. Sed quæ læta ista tristitia admodum, et sancta ista sacrilega sint secuta, quæ sicut calamus scribere, ita aures horrescant audire : sic ab eodem auctore, qui aderat accipe :

6. « Hoc audiens inimicus pacis atque turbator, jam fatus Cencius Frangipanis (erat hic inherens factioni Henrici schismatici imp.) more draconis immanissimi sibilans, et ab inis pectoribus trahens longa suspiria, accinctus retro gladio, sine mora currit, valvas ac fores fregit, Ecclesiam furibundus introit, inde custode remoto, papam per gulam accepit, distraxit, pugnis, calcibus percussit, et tanquam brutum animal intra hmen Ecclesie acriter calcaribus cruentavit, ut latro tantum dominum per capillos et brachia, Jesc bono interim in navi dormiente, detraxit, atque domum usque deduxit, ubi eum catenavit et clausit. Tunc de præfatis episcopis, cardinalibus ac clericis et multis de populo qui convenerant, alii ab apparitoribus Cencii modo simili vinciuntur, alii de caballis ac mulis, capite verso precipitantur, expoliantur, et inauditis undique miseriis affliguntur, donec aliqui semivivi in domum tandem propriam remearunt : malo suo vent, qui fugere cito non potuit.

7. « Facta autem hac voce, convenit multi-tudo Romana, Petrus præfectus Urbis, Petrus Leonis cum suis, Stephanus Northmannus cum suis, Stephanus de Thebaldo cum suis, Stephanus de Berizone cum suis, Stephanus Quadratis cum suis, Buccaporcina cum suis, Bovisco cum suis, Berizati

cum suis. Regiones duodecim civitatis Romanæ, Transtiberini et Insulani arma corripuiunt, cum ingenti strepitu capitolium scandunt, nuntios ad Frangipanes iterato remandant, papam captum repetunt et exoptant. Nihil moræ. Territus Frangipanis, præsertim dominus Leo, impietate subdola pius, papam illico red-fidit, pedes ejus amplexans, clamat irremissius : Domine, miserere. Et sic pacatis inimicis urgentibus, ut iterum Ecclesiam duris cornibus ventilaret, exavit.

8. « Tunc sanctus papa levatur, niveum ascendit caballum, coronatur, et tota civitas coronatur cum eo ; per sacram viam gradiens, Lateranum ascendit, banis et insignibus aliis eum precedentibus pariter, atque juxta Romanum ritum morenque sequentibus. Sedit itaque papa (ut videbatur) in pace. Frequentabant eum comites et barones, et qui pro responsis aliquibus veniebant, recipiebantur benigne, donec finito negotio, pro quo cuncti convenerant, accepta benedictione, redirent : tanquam a patre filii benignius per omnia tractabantur. Itaque curia tota in pace habebat omnia, quæ per Dei gratiam possidebat. Rediit omnes hinc et illinc extra Urbem morantes. Rediit et inter alios Hugo Magnus ac nimium honorabilis Apostolorum presbyter cardinalis a Circæ arce, quam ei ob rabiem Tentonicam præcavendam, ad omnia providus quondam Paschalis papa homini nobili et illustri noviter commendaverat, quamque papa novus (quod utinam non fecisset, nam paulo postmodum penituit) reddi Tarracinesibus, per nuntios apicesque mandavit. Omnibus igitur congregatis, undique conferebatur ab illis, quando certis temporibus papa, et promoveri pariter et consecrari deberet : equidem diaconus et non presbyter erat.

9. « Sed antiquus hostis, sicut fecerat olim in cælo, pacem tantam in longum nulla durare penitus ratione permisit. Nam dum hæc ageretur, quidam intempestæ noctis silentio ad jam fatum egregium dominum Hugonem cardinalem directus est, ab uno videlicet, cui exinde non parva copia inerat amicorum, qui Henricum, dictum imperatorem Romanum, armatum contra papam ad Sancti-Petri porticum diceret adventasse. Quod moraretur, non opus esse, papa per cardinalem præsevit. Et sicut jam pene senio et infirmitate confectus, fugere tum repente non poterat, manibus abducitur famulorum, et sic caballo ejectus, ad domum (domum) Bulgamini, in nocte ipsa confugiens latuit ». Henricum autem imperatorem consensisse primum electioni Gelasii, inde vero mutatum refragatum esse, atque eum persecutum, ut vides, Urspergensis affirmat. Pergit vero Pandulphus : « Fugimus et omnes cum eo. Mane autem facto, turbati omnes et stupefacti, quia neque tute manere in Urbe, neque per terram undique spiritus septam fugere poteramus, fit nempe consilium, ut fugam caperemus per mare : quod et factum est. Siquidem in flumen Tiberis maturato intravimus, et per galeas

duas in Portum usque descendimus : ibique cælum, terra, mare, et pæne omnia quæ in eis sunt, adversum nos pariter conjurarunt. Nam cælum graves pluvias, grandines, tonitrua, coruscationes, et fulmina frequentabat : mare simul et Tiberis jam diris tempestatibus vicario rebellabant, ut vix in portu vivi remanere possemus, nedum mare intrare. Interea seiva superbia per ripam Alemannorum barbaries tela contra nos mixta toxico jaciebat ; minitabantur etiam nos inter aquas natantes piceo igne cremare, nisi papam, et nos in eorum manibus dederemus. Et credo, capti essemus, si nox et ira fluminis illos non impedivisset. Quid adhuc? Quid miserrimi facerent? Ceperunt, imo cepit dominus Ilugo cardinalis et presbyter papam nostrum in collum, et ad castrum S. Pauli Ardeam sic de nocte portavit ». O immensa pietas, ubique et semper laudibus celebranda! nec coloribus tantum, sed signis æreis, imo auris expressa, perpetuæ memoriæ consecranda! Pergit auctor :

10. *Intrusio Burdini Bracharensis episcopi in Petri Sedem, unde Gelasii Epistolæ circulares.* — « Die vero altero, in aurora rediere Teutonici prædantes de nobis facere gestientes. Juratum est eis tandem, quia papa fugisset; et sic, Deo gratias, recesserunt a nobis. Interim retentavimus, si mare adhuc valeremus intrare : papam nocte deduximus. Cum non sine periculo marinos fluctus attingimus, die tertio ripæ Taracinensi vivi vix applicavimus, et in quarto portum Cajetæ intravimus : ubi ab illis hominibus nimis honorifice suscepti fuimus, et benigne tractati ». Ita fuga lapsu Pontifice, imperator mox intrudit in Sedem Petri Mauritium Burdinum. Quod cum Gelasius accepisset, has litteras in Gallias dedit ¹ :

« Gelasius, servus servorum Dei, archiepiscopus, episcopis, abbatibus, clericis, principibus, et cæteris per Galliam fidelibus, salutem.

« Quia vos Romanæ Ecclesiæ membra estis, quæ in ea nuper acta sunt, dilectioni vestræ significare curamus. Siquidem post electionem nostram dominus imperator furtive et inopinata velocitate Romam veniens, nos egredi compulsi. Pacem postea et minis et terroribus postulavit, dicens quæ posset se facturum, nisi nos ei juramento pacis certitudinem faceremus; ad quæ nos ista respondimus : De controversia, quæ inter Ecclesiam et regnum est, vel conventioni vel justitiæ libenter acquiescimus, loco et tempore competentis, videlicet Mediolani, vel Cremonæ in proxima beati Lucæ festivitate, fratrum nostrorum judicio, qui a Deo sunt iudices constituti in Ecclesia, et sine quibus hæc causa tractari non potest. Et quoniam dominus imperator a nobis securitatem quærit, nos verbo et scripto eam promittimus, nisi ipse eam interim impediat; alias enim securitatem facere, nec honestas Ecclesiæ, nec consuetudo est. Ille statim die post electionem nostram

quadragesimo quarto Mauritium Bracharensem episcopum, anno præterito a domino prædecessore nostro Paschali papa in Concilio Beneventi excommunicatum, in matris Ecclesiæ gremium ingessit. Qui etiam cum per nostras ofim manus pallium accepisset, eidem domino nostro, et Catholicis successoribus (quorum primus ego sum) fidelitatem juravit.

« In hoc autem tanto facinore nullum de Romanis dominus imperator (Deo gratias) socium habuit : sed Guibertini soli, Romanus de Sancto-Marcello, Gencius, qui dicebatur de Sancto-Chrysgono, Tonto qui multo per Daciam (Latium) debacchatus est tempore, tam infamem gloriam celebraverunt. Vestræ igitur experientiæ, litterarum præsentium perceptione mandamus ut super his per Dei gratiam communi deliberatione tractantes, ad matris Ecclesiæ ultionem communibus, præstante Deo, auxiliis, sicut oportere cognoscitis, accingamini. Datum Cajetæ decimo septimo kalendas Aprilis ». Hactenus Gelasii ad Gallos data Epistola circularis. De qua illud animadvertendum, dum ait, nullo sensisse de Romanis adversarios, sed tantum Guibertinos se passum esse persecutores : per Romanos Catholicos intelligere, sicut per Guibertinos significare schismaticos. Reperimus et alias eodem argumento datas ab eodem Gelasio papa tunc litteras in Hispanias ad Toletanum archiepiscopum Bernardum, acceptas ex libro primo Registri Epistolarum ejusdem Gelasii, his verbis :

« Gelasius episcopus, servus servorum Dei, venerabili fratri Bernardo archiepiscopo Toletano et Hispaniarum primati, salutem et Apostolicam benedictionem.

« Non latere credimus fraternitatem tuam qualiter frater quondam Mauritius Bracharensis episcopus se jamdiu habuerit, qualiter Ecclesiam suam dimiserit, et quomodo regi excommunicato adhæserit, et contra statuta canonica in eubile Romanæ Ecclesiæ se ingesserit. Nec eum miramur debitam tibi obedientiam, et antiquum primatus honorem Ecclesiæ tuæ penitus negasse, qui Romanam Ecclesiam, quæ omnium Ecclesiarum mater est et magistra, non solum denegare, sed destruere quodammodo conari, etc. Monemus itaque, atque præcipimus, ut juxta mandatum prædecessoris nostri ad electionem in Bracharensi Ecclesia faciendam sollicitudine charitatis debitæ, operam et opem præbeas cum effectu. Ipsum vero Mauritium excommunicatum, perjurum, et matris Ecclesiæ constupratorem publicum cæteris Hispaniarum prelatiis etc. Dat. Cajetæ, etc. » Hæc nuntianda misit Hispanis. Scripsit et ad Romanos item de his Epistolam : quæ et commendat eorundem constantiam adversus intrusum pseudopontificem, quæ sic se habet :

« Gelasius episcopus, servus servorum Dei, dilectis in Christo filiis clero et populo Romano, salutem et Apostolicam benedictionem.

¹ Willél. Malinesh. Reg. Angl. l. v.

« Dilectionis vestre Domino gratias agimus quod unanimiter persistentes communicare tenebrarum operibus noluistis. Audivimus etiam quondam (quomodo) ille amicus noster dominus imperator familiarem nostrum Mauritium Bracharensem archiepiscopum, antea sibi super tractanda pace legatum in nostram Ecclesiam ingressus. De quo scialis, quod dicitur, olim secundum consuetudinem confirmatione, consecratione pallium accepisset a nobis, et nos ab ipso secundum statuta canonum iuramentum fidelitatis et obedientie recepinus etc. Rogamus ergo dilectionem vestram, atque præcipiendo mandamus, ut ab eo vos tanquam ab excommunicato, perjurio, invasore, et sancte matris Ecclesie ac fidei Catholicae constupratore abstineatis, etc. Datum Cajetæ, etc. »

Sed redeamus ad Pandulphum, qui ceptam semel orationem de rebus tunc gestis ita persequitur :

11. *Gelasius Romam reversus iterum impetitur et multa passus rebus bene dispositis in Gallias navigat.* — « Discurrit fama per terras, et per viciniam illam : conveniunt archiepiscopi, Sennes Capuanus, Landolphus Beneventanus, Alphanus Salernitanus, Marinus Neapolitanus, Riso Barisanus, Hubaldus Transensis, L. Sipontinus, Cailhardus Brundisius, L. S. Severinæ, et quamplures alii de Apulia et Calabria cum Willelmo Trojano, et diversarum regionum episcopis, Geraldus abbas Cassinensis, Seginolphus de Caneis cum abbatibus aliis. In quorum præsentia idem dominus papa consecratus est per manus Lamberti Ostiensis, Petri Portuensis, Vitalis Albanensis episcoporum, cooperantibus archiepiscopis et episcopis multis, assistantibus aliis viris religiosis, et cum eis Willelmo duce Apuliæ, Roberto principe Capuano, Richardo de Aquila, aliisque baronibus plurimis, qui tunc ei omnes fidelitatem fecerunt ». Romualdus archiepiscopus Salernitanus in suo Chronico formulam recitat, qua Gelasius papa investivit de Apuliæ et Calabriae ducatu Willelmum ducem, quæ sic se habet : « Quemadmodum Gregorius papa tradidit illam Roberto Guiscardo avo tuo; et sicut Urbanus papa cum Rogerio patri tuo tradidit, et sicut Paschalis papa eidem Rogerio patri tuo prius et postea tibi tradidit, sic et ego trade tibi eandem terram cum honore ducatus per illud idem domum atque consensum etc. » Hæc ibi. Pergit vero Pandolphus de eadem consecratione Gelasii : « Consistente clero et populo infinito, sancto dictante Spiritu, effectus est presbyter, et in papam Gelasium infra kal. Martii consecratus. Ibi Petrum Rufum diaconum cardinalem, baronem subdiaconum, et me Pandulphum ostiarium, qui hæc scripsi, in lectorem et exorcistam promovit, et plures alios in minoribus gradibus ordinavit. Lætum nomine, Verulanum episcopum a domino Paschali papa factum et depositum, suæ dignitati ac loco restituit, Chrysogonum diaconum cancellarium fecit, ibique per totam Quadragesimam

demorantes, festivitatem Paschæ Capuæ solemniter celebravimus.

12. « Nobis vero sic jam quomodolibet respirantibus, supervenire qui dicerent (quod Cajetæ etiam per susurrum primitus senseramus), Henricum illum barbarum, quemdam Mauritium nomine, Bracharensem archiepiscopum, quasi novum simulacrum in loco papæ statuisse, et illum sic intrusum papam suum, Gregorium nominasse. Ecce recidivo vulnere recidimus in typum antiquum. Addidit idem nuntius, quod castrum prope Turriculam a fratribus abbatiæ S. Andreae retentum idem barbarus obsideret. Resumpsit papa vires, ac duci Willelmo, ac principi Capuano Roberto, aliisque baronibus dedit firmiter in mandatis, ut omnes contra barbarum arma compararent. Dixit, et factum est. Paratur papa ad reditum, redeunt barones cum eo; inde ad S. Germanum, videlicet Cassinense cœnobium deveniunt, ubi Willelmum ducem per aliquot dies expectavimus. Interim Lando dominus de Turricula, Odo, Costus, et Gilulphus fratres ejus cum eo, acriter pugnant cum Henrico rege. Faciunt contra machinas, vineas, balistas, et arcus. Ibi primum rete¹ contra petrias ad rupes (ripas) operiendas ab astuto illo tyranno in damnum plurimorum, et proficuum nullis ingenio exquisito inventum est ». Subdit de cane, tabellarii tunc munere fungente, ab obsessis accipiente litteras et reddente; atque de obsidione soluta, et Henrici fuga ac reditu in Germaniam, sic pergens :

13. « Venit dux Willelmus ad papam interea. Tunc cœperunt reditum simul maturare. Quod Henricus persentiens, infecto negotio a castello remotus, via ipsa qua venerat, irato ipsi Domino, in Alemanniam rediit, idolo quod plasmaverat in Urbe relicto. Tunc papa doluit multum, quod reddi nimis inconsulte præceperat Circæam arcem, quam vellet habere. Igitur dux et principes cum baronibus rediere, papa in propria Sede in Campaniam veniente, sui cum non sine pretio receperunt; et ita pedetentim magis ut peregrini quam domini, Romam (sicut Deus novit) intravimus. Latuit Dominus papa melius, quam hospitalis sit in Ecclesia quadam, quæ Sancta-Maria in secundo Cereio dicitur, intra domos illustrissimorum virorum Stephani Northmanni, Pandulphi fratris ejus, et Petri Latronis Corsorum. Ibiq; de imminentibus periculis, præsertim de intrusione Bardini cum tota simul Ecclesia diligentius conferebat. Eam quidam de cardinalibus, Desiderius Sanctæ-Præedis, cujus proxime erat festivitas (quod non utinam cogitasset) ad cantandum in ipsamet Ecclesia missam, simpliciter quodam vespere invitavit, sed nimum simplicius est a domino papa concessum. Die autem crastina (etsi displicuerit plurimis) quia Ecclesia esset in fortis Frangipanum, fredi tamen Stephani, Northmanni et Crescentii Cajetani ejus-

¹ Locus obscurus.

dem papæ nepolis antiquis strenuitatibus, itum est ad cantandum. Necdum adhuc celebratis officiis, ecce cum non parva manu militum ac peditum, et aliorum procacium, impij Frangipanes apparent : irruunt, lapides et spicula mittunt, nostros alligunt, multi paucos atterunt. Resisit miles Northmannus et Crescentius gloriosus cum eo, resistunt undique nostri, jacula mandata remandant, ensis atteritur ense, lancea retusa retundit : hinc pedites, illinc milites cadunt, undique strati, undique pugna gravis : papam cœpit iste tenere, iste tuctur cum : miles utrimque cadit, turbæ ruunt, pedites scandunt muros, capiuntur ex nostris aliqui, non tamen eximij. O quantus luctus omnium ! quanta præcipue lamenta matronarum, quæ papam solum, tanquam securam per campos, sacris pro parte vestibus revestitum, quantum equus poterat fugientem videbant ? Hunc crucifer sequitur, cecidit, muliercula quem tunc invenit, abscondit, in sepe crucem recondit, et in sero rediit. In quarta parte diei acriter est ab utrisque pugnatum. Cum Stephanus Northmannus credens papam jam in tuto fuisse, taliter Frangipanes alloquitur :

14. « Quid, inquit, facitis ? quo ruitis ? papa quem quaritis jam recessit, jam fuga elapsus est. Numquid et nos perdere cupitis ? Et quidem Romani sumus similes vobis, et si dici liceat, consanguinei vestri. Recedite ergo, recedite, ut et nos fessi pariter recedamus. Ad hanc itaque vocem nepos ejus Frangipanis gemebundus dolens papam eundem liberatum, cum insano fratre Cencio aliisque recessit. Redierunt et nostri, non omnes. Interim papa utrobique quæsitus, demum intra campos Sancti-Pauli Ecclesie adjacentes fessus, tristis et ejulans, inventus est et reductus : die illa prandium cum cœna fit unum, et spem et metum animi cunctorum nutabant dolentes, et quantum ad diem per longa tempora memorabilem, consiliatum est, mox consilium diremit.

« Sane die altero quique hæc et illa dicentes : Papa post omnium sententias dixit : Viri fratres et filii, sicut nec longe malum, ita nec longo opus est, nec novo sermone : sequamur patres nostros, quoniam valde bonum est, antiquos sequi parentes. Sequamur nihilominus Evangelium ¹. Quandoquidem vivere in civitate ista non possumus, fugiamus in aliam, fugiamus Sodomam, fugiamus Ægyptum, fugiamus novam, juxta verbum propheticum, Babyloniam, civitatem sanguinum fugiamus. Veniet (credite mihi) veniet aliquando tempus, cum vel omnes pariter, vel quos Deus permiserit, stante Austro, redibimus, et tempora meliora redibunt. Ego coram Deo et Ecclesia dico : Si unquam possibile esset, mallem unum imperatorem quam tot. Unus saltem nequam perderet nequiores, donec de illo quoque evidentem justitiam imperatorum faceret omnium imperator. Ad hæc omnes una voce clamavere : Fiat, sic fiat, jungen-

tes tertio fiat. Amen. » Ita quidem bene provocat Gelasius, ut audisti, ad antiquitatem. Siquidem unicum illud usitatum, tutum, certumque refugium fuit semper Romanis Pontificibus persecutione vexatis, regnum Francorum, ipsos Francorum reges adire, a quibus et digne consuevisset suscipi, dignius retineri, atque dignissime, cum facultas adesset, compressis hostibus, ad Romanam Ecclesiam revocari. Adeo ut si quis dicat, portum Romanæ Ecclesie fluctuantis naviculæ Petri Galiliam esse, non mentietur. Hinc Sugerius abbas S. Dionysii in Ludovico hæc de nostro Gelasio : « Cum tyrannide imperatoris per Romanos a sancta Sede Romanæ Ecclesie arceretur, ad protectionem serenissimi regis Ludovici et Gallicanæ Ecclesie compassionem, sicut antiquitus consueverunt, confugit ». Hæc Sugerius ejus temporis scriptor.

15. Pergit vero Pandolphus de facta ab eodem Pontifice dispositione rerum antequam recederet, istis verbis : « Singula itaque singulis, juxta modum omnium ac mensuram, omni tarditate seposita, Ecclesie ministeria personis assignata sunt vel concessa. Venerabilis pater dominus Petrus episcopus Portuensis loco papæ vicarius constitutus, cardinales aliqui ei sunt in auxilium sociati. Viro reverendissimo et sagaci domino, et avunculo meo Hugoni cardinali Sanctorum-Apostolorum Beneventanæ urbis custodia (prout postea vidimus) non sine sancti Spiritus est oraculo commendata. Nam paulo post deficiente papa, nisi ipse restitisset, et mille modis sagaciter obviasset, Northmanni illam hodie, et non papa teneret. Nicolao Seni cantorum scholam concedit. Petro dicto Præfecto, per quem domino nostro sanctæ memoriæ papæ Paschali mala plurima provenerunt occasione ista, (cæterum aliter vix fuisset) præfectura Urbis nequam et indignissimo homini esset stabilita. Princeps, clypeus omnium pariter curialium Stephanus Northmannus, collaudantibus omnibus, protector et vexillifer in Dei Patris nomine nimis efficaciter ordinatur, et ad Urbis custodiam cum jam dictis aptatur ».

Pridie autem antequam ab Urbe recederet, ipsis nempe kalend. Septembris, idem Gelasius papa Ravennatem Ecclesiam, una cum suo archiepiscopo ab eis electo Gualterio, jam diu ante schismate ab unitate Catholica scissam Romanæ Ecclesie uniens, quæcumque in penam criminis ab ea abstulerat, reddidit, atque etiam pallium misit. Extant de his omnibus Apostolicæ litteræ apud nos, quas hic tibi describendas curavimus. Sic se habent :

« Gelasius episcopus, servus servorum Dei, venerabili fratri Gualterio Ravennatium archiepiscopo, salutem et Apostolicam benedictionem.

« Unitati divinæ Trinitatis gratiæ agendæ sunt; quæ per suæ charitatis Spiritum divina conjungit, et multos in se animos unum facit. Ecclesia siquidem Ravennatum, per multa jam tempora ab Apostolicæ Sedis unitate discissa, multas eidem

¹ Matth. x.

Sedi Apostolicæ persecutiones intulit, et Ecclesiis multis perversi schismatis fomitem ministravit. Quapropter ad cuius nequitiam subiectarum ei Ecclesiarum quasdam sibi Apostolica Sedes assumpsit, ut vel sic eam ad humilitatis et unitatis tramitem revocaret. Sed cum tandem divine Majestati placitum fuit, eandem Ravennatum Ecclesiam, misericordiæ suæ gratia, ad unitatem et obedientiam matris suæ Romanæ Ecclesiæ revocavit. Iniquitatem namque suam illius tibi recognoscentes, delicta patrum corrigere probaverunt, ut qui præteritis temporibus per tyrannidem regiam præsules regibus placentes accipiebant, nunc demum secundum canonicas sanctiones episcopum Deo placentem eligerent, et schismate abdicato, in Catholice congregationis gremium repedarent. Te siquidem, reverendissime frater Gualtere, a disciplina fratrum regularium violenter assumptum pro religionis ac sapientiæ prærogativa in beati Apollinaris cathedra communi voto ac desiderio posuerunt, et in Apostolicæ Sedis obedientiam unanimiter redierunt. Unde nos divine Trinitatis unitati gratias agentes, personam tuam pro jure nostræ Ecclesiæ ad episcopale ministerium cooperante Domino consecrantes, tibi, et per te Ravennatum Ecclesiæ, dignitatem omnem, quam ante illius divisionis tempora per Romanam Ecclesiam possederat, restitimus, et per præsentem privilegii paginam, salvo in omnibus jure atque auctoritate Sedis Apostolicæ, concedimus tibi tuisque successoribus in ejusdem Sedis Apostolicæ fide atque obedientia permanentibus, episcopatu Æmiliæ provincie, id est, Placentiæ, Parmæ, Regii, Mutinæ, Bononiæ, Ferrariæ, Adriæ, Comacii, Imolæ, Faventie, Forilivii, Foripompilii, Bobii, Casenna, Ficoctæ. Confirmamus etiam vobis ducatum Ravennæ, et monasteria S. Adalberti, et Sancti-Hilarii Galliata, seu cætera monasteria, et possessiones, per authentica privilegia ab antecessoribus nostris, et a Catholicis regibus tradita. Pomposiani quoque monasterii curam religioni tuæ, salvo Ecclesiæ nostræ jure, committimus, ut regulari disciplina per tuam industriam, largiente Domino, reformetur. Præterea fraternitati tuæ palium, pontificalis videlicet officii plenitudinem, liberaliter concedimus, quo fraternitas tua secundum Ecclesiæ tuæ morem ex Apostolicæ Sedis concessione permissum, se noverit induendum, cuius inimicum (amicum) pallii volumus te per omnia genium vendicare. Hujus siquidem indumenta, honor, humilitas, atque justitia est. Tota ergo mente fraternitas vestra se exhibere festinet in prosperis humilem, et in adversis, si quando eveniunt, cum justitia erectam, amicam bonis, perversis contrariam, nullius unquam faciem pro veritate loquentem premens, tum operibus juxta virtutem constantie insistens, tum insistere etiam supra virtutem cupiens, infirmis compatiens, bene valentibus congaudens, de alienis tanquam de propriis exultans gaudiis, in vitiis corrigendis pie sæ-

viens, in fovendis virtutibus auditorum animum demulcens, in ira judicium sine ira tenens, in tranquillitate autem severitatis justæ censuram non deserens. Hæc est, frater charissime, pallii accepti dignitas, quam si sollicitè servaveris, quod foris accepisse ostenderis, intus habebis.

« Ego Gelasius Ecclesiæ Catholice episcopus. † Signum manus meæ Gelasii, Deus in loco sancto suo. Datum Romæ per manum Chrysogoni S. R. E. diaconi cardinalis, kalend. Septembris, Indictione duodecima, anno Dominicæ Incarnationis MCMX, Pontificatus autem D. Gelasii Secundi papæ anno primo ». Ita Indictio una cum mense Septembris duodecima inchoatur, sicut et annus Redemptionis ab Incarnatione post millesimum nonndecimus jam inceptit. Sed de ejus ab Urbe discessione, et in Gallias navigatione Pandulphum audiamus, qui sic pergit :

16. « Navibus interea pluribus, et aliis optime pro tempore præparatis, quia per terram non poterat, bonis ventis vigentibus papa mare intravit (die secunda mensis Septembris, ut habet Chronicon Beneventanum) atque post dies aliquot Pisas prospere applicuit. Exierunt cum eo dominus Joannes Cremonensis, Guido Sanctæ-Balbinæ, et de diaconis cardinalibus dominus Petrus Leonis, Gregorius Sancti-Angeli, Rosimanus, atque Chrysogonus. Sed et de Romanis nobilibus Petrus Latro, et Joannes Bellus, fratres Petri præfecti, et quidam minores alii clerici sive laici, præter ipsorum domesticos et custodes. Hi omnes cum papa simul honorifice satis atque solemniter ab innumera cleri et populi multitudine Pisis recepti sunt et tractati. Ubi idem papa inter alia multa super verbo Psalmistæ ¹ : Dixi, pronuntiabo adversus me in justitias meas, et tu remisisti impietatem cordis mei, sermonem talem habuit, qualem certe vix Origenes in carne habuisset. Ibi igitur aliquandiu commorans, pro sui officii libertate plenaria tractans, mare iterum intravit, et sic ducente Domino portum Villæ Sancti-Ægidii sanus cum suis omnibus et incolomis atigit. Ubi venerabili abbate Hugone, et ejusdem monasterii fratribus undecumque confluentibus, cum maxima laude est et honore susceptus; qualiter autem inibi, quam bene, quam largissime ab eis fuerit diutius pertractatus, satis manifestum est. Illic omnes episcopi, abbates et monachi, nobiles et ignobiles ejuscujusque ordinis pari modo conveniunt, quicque suo modulo ei servire parati. Abbas Cluniacensis dominus Pontius adveniens cum munusculis aliis, triginta ei equitaturas præparavit, decem vero abbas Sancti-Gordii cum donariis aliis : cum quibus, et cum aliis equitavit dominus papa per terram illam ». Inter alios autem, qui ad S. Ægidium occurrerunt Pontifici, fuit Norbertus auctor Ordinis Præmonstratensis, qui a Pontifice munus prædicandi Evangelium impetravit. Cumque idem Pontifex voluisset

¹ Psal. XXXI.

eum apud se retinere, non acquievit. Ista pluribus Hugo in Vita ipsius ¹. Ibi enim esset apud S. Ægidium idem Gelasius papa, privilegium dedit Ecclesie Toletane, de quo ista tantum mutilata, sed ex Registro accepta Gelasii, habentur his verbis :

« Gelasius episcopus, servus servorum Dei, reverendissimo fratri Bernardo Toletano primate, ejusque successoribus canonice substituendis in perpetuum.

« Charitatis est bonum proprium congaudere profectibus aliorum, etc. Idcirco prædecessorum nostrorum sanctæ memoriæ Urbani Secundi, et item Paschalis Secundi vestigiis inhærentes, tibi tibi, quam tuis successoribus Toletanæ Ecclesiæ cathedram illustrantibus, totius Hispaniæ primate, largiente Domino, confirmamus; salva tamen Romanæ Ecclesiæ auctoritate, et metropolitano privilegio singularum, etc. » Post hæc subscriptio, et tempus date, his verbis :

« Ego Gelasius Catholice Ecclesiæ episcopus subscribo. † Signum manus meæ, Deus in loco sancto suo. Datum apud S. Ægidium, per manum Chrysogoni, S. R. E. diaconi cardinalis, VII idus Novembris, Indictione XII, anno Dominicæ Incarnationis MCLXIX, Pontificatus autem Gelasii Secundi papæ anno primo ». Illicusque in Codice. Pergil vero Pandulphus de aliis per eum tunc rebus gestis his verbis : « In vicinis quoque illis, cooperantibus plurimis urbi episcopis, Ecclesiam S. Cæciliæ de Stigello, Ecclesiam Sancti-Silvestri de Tillano, Ecclesiam Sancti Stephani de Tornaco dedicavit, et terminos lapideos præterea infixit, quos absque maledictione perpetua nulli unquam ad damnum vel loci, vel alicujus rei transgredi quandoque licebit ». Hactenus de Gelasii navigatione, appulsu, atque progressu in interiores Gallias. Quæ autem auctor post hæc subiicit, ad annum sequentem spectant, quæ nos suo loco reddiduri sumus.

17. *Galli liberales erga exulem Pontificem, qui consecrat episcopum Cæsaraugustanum, et dat litteras de indulgentiis.* — Porro Sugerius abbas Sancti-Dionysii qui unus fuit ex iis, quos Ludovicus rex misit in occursum ejusdem Pontificis, in Vita ejusdem regis quam scripsit, tradit, obtulisse eidem Pontifici extrema inopia laboranti primitias regni; ab eo vero Apostolica benedictione donatos fuisse; paratum vero Ludovicum ipsum adire Cluniacum, si ejus vita superstite licuisset. Porro auctor hujus temporis Folco in Chronico Beneventano testatur, ingenti studio Francos ad exulem Pontificem confluisse, eorumque munificentia ingentem vim argenti et auri fuisse collectam ex spontaneis fidelium suas domos evacuantium oblationibus, ut exuli Pontifici subvenirent.

18. Eodem tempore ab eodem Gelasio papa consecratur Petrus episcopus Cæsaraugustanus primus post recuperatam eam civitatem per Ilde-

fonsium regem, anno millesimo centesimo decimo quinto, ut ejusdem regis Diplomate reddidit exploratum Hieronymus Blanca, historicus accuratissimus. Bello siquidem devictis Sarracenis, ipsaque nobilissima civitate ac perillustri antiquis memoriis sanctorum Martyrum, e Sarracenorum manibus vindicata, idem rex maxime pius, valde sollicitus, ut Christianæ religionis cultus diu exul cum honore postliminio redderetur, ad Romanum Pontificem Gelasium mittit consecrandum eundem electum Petrum. Quem suscipiens, benigno promptoque animo idem Pontifex episcopum consecravit, eundemque ad suam dimittens Ecclesiam, has illi litteras dedit :

« Gelasius episcopus, servus servorum Dei, exercitui Christianorum civitatem Cæsaraugustanam obsidenti (obtinenti), et omnibus Catholice fidei cultoribus, salutem et Apostolicam benedictionem.

« Litteras devotionis vestræ inspeximus : compellenti, quam pro Cæsaraugustano electo ad Sedem Apostolicam duxistis, (direxistis) favorem libenter accommodavimus. Eundem ergo electum, nostris tanquam beati Petri manibus, largiente Domino, consecratum remittentes ad vos, benedictionem vobis Apostolice visitationis impendimus, æquam omnipotentis Dei misericordiam implorantes, ut per sanctorum preces et merita, opus suum ad honorem suum et Ecclesiæ suæ dilationem vos faciat operari. Et quoniam et vos ipsos et vestra extremis obicere periculis decrevistis : si quis vestrum accepta de peccatis suis poenitentia, in expeditione hac mortuus fuerit, nos eum sanctorum meritis, et totius Catholice Ecclesiæ precibus a suorum vinculis peccatorum absolvimus. Cæterum, qui pro eodem Domini servitio vel laborant vel laboraverint, et qui præfate urbis Ecclesiæ a Sarracenis et Moabitibus dirute, unde reficiatur, et clericis ibi Deo famulantibus, unde paseantur, aliquid donant vel donaverint, secundum laborum suorum et beneficiorum suorum Ecclesiæ impensorum quantitatem, ad episcoporum arbitrium in quorum parochiis degunt, poenitentiarum suarum remissionem et indulgentiam consequantur. Data Alesti, quarto idus Decembris ». Illis acceptis idem Petrus ordinatus episcopus Cæsaraugustanus, suis additis litteris ejusmodi indulgentiarum Diploma per universum Christianum orbem promulgandum studuit, ista scribens :

19. « Universis mundi Ecclesiæ fidelibus, archiepiscopis, episcopis, abbatibus, presbyteris, omnibus Catholice fidei cultoribus, Petrus, licet indignus, Cæsaraugustanus episcopus, salutem et obedientiam.

« Divina favente clementia, vestrisque precibus, et fortium virorum audacia, Cæsaraugustanam urbem Christianis manibus subjungari, ac beate et gloriose Virginis Mariæ Ecclesiæ, quæ diu (proh dolor !) subjacuit Sarracenorum ditioni, liberari, satis audivisti : quam beato et antiquo

¹ Hugo in Vita Norb. c. 9. 16. apud Sur. tom. III. die vi Jun.

nomine sanctitatis ac dignitatis pollere novistis. Adhuc tamen priori captivitatis mœrore confectam, omnibus pœne egere sapitis; tum quia non habent, unde dirutæ Ecclesiæ præfate parietes et ornamenta restitui valeant; tum quia clerici ibidem divino famulatu die nocteque vacantes, unde vivant non obtinent. Vestram itaque deprecamur clementiam, quod si corporali præsentia illam visitare nequitis, saltem elemosynarum vestrarum oblatione clementer visitetis, illud Psalmographi recolescentes¹: Beatus qui intelligit super egenum et pauperem, in die mala liberabit eum Dominus. Illis vero, qui præfate Ecclesiæ necessariorum solatio destituta atque sive paupertatis gemitibus condolerint, et unum denarium, vel quot valeant, ad ejus restorationem miserint, nos ejus divina clementia ac domini Gelasii papæ auctoritate freti (exemplar litterarum crucis, quas in nostra Ecclesia signatas habemus, in superscripta pagina scriptum invenietis) atque domini Bernardi archipræsulis Toletani et sanctæ Romanæ Ecclesiæ legati, ac omnium episcoporum Hispaniæ... penitentiae remittimus. Alii equidem juxta beneficiorum suorum quantitatem, et operum suorum meritum delictorum suorum consequantur remissionem. Qui hunc nostrum archidiaconum nomine Miorrandum, et socios suos præsentium litterarum fautores benigne susceperint, vel eis consuluerint, a Domino vitam consequantur æternam. Valete ». Ita Petrus episcopus Cæsaraugustanus, qui (ut audisti) una cum his et litteras Apostolicas misit, hasque omnes subscriptione munitas, tum Bernardi archiepiscopi Toletani, tum aliorum Hispaniæ episcoporum in hunc modum:

« Ego Bernardus Toletanæ Ecclesiæ archipræsul, hanc absolutionem facio et confirmo.

« Ego Suboscitanus episcopus, hanc absolutionem facio et confirmo.

« Ego Sanctius Calaguritanus episcopus, hanc absolutionem facio et confirmo.

« Ego Guido Lascurrensis episcopus hanc, absolutionem facio et confirmo ».

Subscriptus quoque his reperitur Apostolicæ Sedis legatus, qui tunc morabatur in Hispania, hoc itidem modo:

« Ego Boso S. R. E. cardinalis hanc absolutionem facio ac confirmo ». Hactenus venerande antiquitatis monumenta, Hieronymi Blancæ industria in lucem prodita in commentariis rerum Aragouensium ex Cæsaraugustano Tabulario, quibus indulgentiarum promulgandarum pristinus mos referatur, pariterque antiquus cultus religiosissimæ Ecclesiæ beatissimæ Virginis de nam mancipate, quæ hactenus non solum Hispanorum populorum, sed externorum etiam visitatione frequentatur, universo Christiano orbi illustri fama notissima.

20. *Conon legatus Apostolicus in Germania.*

— Cum autem pervenisset in Gallias Gelasius papa, ad continendos Catholicos Germanos in fidem Apostolicæ Sedis, legat ad eos Cononem episcopum Prænestinum bene notum, ut qui antea sub Paschali prædecessore ea summa cum dignitate fuerat legatione perfunctus. Qui instar fulguris concusantis abiens et rediens, excommunicationis fulmen in imperatorem, in duobus quæ congregavit Conciliis, magna animi constantia explosit intrepidus. De his enim Urspergensis abbas in primis hæc habet: « His temporibus Cono Prænestinus episcopus cardinalis adhuc legatione Gelasii functus, Synodum Coloniae cum Teutonicis habuit, ubi imperatoris omnimodis excommunicationem promulgavit. Huic Concilio interfuit Norbertus, postea Præmonstratensis Ordinis institutor, tunc autem noster conversus in peregrino habitu. Ibiq; ab omnibus in multis accusabatur, de quibus se prudenter excusabat, unde et scriptum legitur de eo, quod de Ismael¹: Quia manus horum omnium contra eum, et ipse contra hos omnes ». At de causa Norberti in Vita ipsius Hugo² abbas pluribus agit. Pergit auctor: « Alteram quoque Synodum in Fritelsar idem Cono Prænestinus eadem pro causa indixit, qua et habita, eandem quam prius excommunicationem confirmavit (adversus imperatorem scilicet). Imperator his auditis, insuper etiam, quod principum consensus generale, vel curiale colloquium non multo post apud Wirceburg institueret proposuisset, ubi ipse aut præsens ad audientiam exhiberi, aut absens regno deponi debuisset, efferatus animo, Italiæ suis copiis cum regina relictis, Germanicis se regionibus nimis insperatus exhibuit ». Quæ autem ista secula sint, quoniam spectare noscuntur ad Gelasii successorem, suo loco dicentur.

21. *Templariorum institutio.* — Eodem anno institutus est Ordo militiæ Templariorum, de quibus ista Willelmus Tyrius³: « Eodem anno », nempe millesimo centesimo decimo octavo, quidam nobiles viri de equestri ordine Deo devoti, religiosi et timentes Deum, in manu domini patriarchæ Christi servitio se mancipantes, more canonicorum regularium, in castitate et obedientia, et sine proprio velle perpetuo vivere professi sunt. Inter quos primi et præcipui fuere viri venerabiles Hugo de Paganis, et Galfredus de Sancto-Ademaro. Quibus quoniam neque Ecclesia erat, neque certum habebant domicilium, rex in palatio suo, quod secus templum Domini ad Australem habet portam, eis ad tempus concessit habitaculum; canonici templi Domini plateam, quam circa prædictum habebant palatium, ad opus officinarum certis quibusdam conditionibus concesserunt. Dominus autem rex cum suis proceribus, dominus quoque patriarcha cum prælatis Ecclesiarum de propriis dominicalibus certa eis pro victu et amictu bene-

¹ Psal. XL.

² Gen. XXVI. — ³ Apud Sur. die vi Jun. tom. III. — ³ Will. Tyr. de bell. sac. I. III. c. 7.

ficia quædam ad tempus, quædam in perpetuum contulerunt. Prima autem eorum professio, quodque eis a domino patriarcha et reliquis episcopis in remissionem peccatorum inunctum est, ut vias et itinera maxime ad salutem peregrinorum contra latronum, et incursantium insidias pro viribus conservarent ». Hæc de institutione. Quomodo autem post novem annos in Galliis in Concilio Trecenti confirmatus est Ordo per Apostolicæ Sedis legatos, suo loco dicendum erit. In quo illud observandum, quod et Tyrius ait, per novem annos, cum totidem ipsi essent novem numero, nequaquam potuisse multiplicari. Ubi autem comprobatio accessit Apostolicæ Sedis, aucti sunt in immensum.

22. *Baldvini regis obitus.* — Quod item pertinet ad res Orientales, moritur hoc anno, Quadragesimæ tempore, Balduinus ¹ Hierosolymorum rex, dum in expeditione esset, sepeliturque Dominica Palmarum Hierosolymis sub Calvarie loco. Substituitur ab eo vivente Balduinus de Burgo affinis ejus, miles egregius, pietate præstantior, coronatur die Paschatis. Sed cum interea ² Eustachius comes Bolonensis, frater defuncti regis, ab aliis in regem assumeretur, ne bellum civile inter Christianos in Terra-Sancta apud infideles maximo damno Christianæ religionis constaretur, sponte magna animi constantia, religione non impari, magna omnium admiratione, majori laudatione cessit Balduino regnum, memorandum posteris præbens exemplum, non quæ sua sunt quærendi, sed quæ plurimorum causæ faverent. Ad hunc autem recens regem electum extat Epistola Petri abbatis Cluniacensis, officii plena ³.

Quo anno pariter defuncto Arnulpho Hierosolymorum patriarcha, dignitate sedis potiusquam moribus memorando, successit in locum ipsius Guarimundus, natione Francus, diocesis Ambianensis, virtutibus pollens. Ad quem etiam extat ejusdem Petri Cluniacensis abbatis Epistola, cum scivit ipsum creatum esse patriarcham Hierosolymitanum.

23. *Alexius imperator Orientis moritur Catholicus censendus, hæresim propulsator, in aliis laudandus, in aliis vituperandus.* — Moritur hoc pariter anno, decimo octavo kalendas Septembris, Alexius imperator, ubi regnasset annos triginta septem, et trigesimum octavum per menses quatuor et dies aliquot inchasset. Præcesserat illud loco prodigii habitum, quod vehementissimo ventorum turbine statua Constantini ænea, sita super celeberrimam columnam porphyreticam in Placoton collocatam, divulsa in terram, prostrata est atque contrita, cujus et immensa ruina plurimos necari contigit. Meminit ejus rei adeo admirandæ Zonaras tum in Constantino Magno, tum etiam in ipso Alexio Commeno. Plures adhuc

eiusdem imperatoris extant constitutiones ab eo sancite, etiam ad res Ecclesiasticas spectantes, quas recitat Theodorus Balsamon diversis in locis. Habet et has Codex Juris Orientalis duobus tomis intextas.

De eodem Alexio, quod fuerit Ecclesiæ Romanæ communionem conjunctus, plura sunt quæ significant. Constat in primis eundem Alexium imp. frequentasse oblationibus Ecclesiam Sancti-Benedicti cœnobii Cassinensis. Quod si non fuisset Catholicus, nec ipse misisset, nec missa ab eo accepta fuisset, id prohibentibus legibus Ecclesiasticis. De legationibus cum oblationibus missis ad Cassinense monasterium, meminit Petrus Diaconus his verbis ¹: « Alexius vero Constantinopolitanus imp. transmisit beato Benedicto per Joannem, europolitam suum, vestem oxii....deauratam. Suscepit eum legatum abbas noster honorifice, ipsumque imp. bonorum omnium, quæ hic gerebantur, participem perpetuo esse constituit ». Et inferius: « Secundo idem imperator octo miche-latorum libras, et pallium triacontas pro altari nostræ misit Ecclesiæ ». Et inferius idem auctor ²: « Hoc item anno Alexius Constantinopolitanus imp. per apocrisarios imperii sui misit beato Benedicto purpureum pallium optimum, de quo idem abbas pluviale faciens aureis listis ornavit ». Et inferius insuper ³: « Per hujus, inquit, cœnobii fratres octo libras solidorum, palliumque briacontasimon beato Benedicto direxit ». Testatur insuper Petrus Cluniacensis in Epistola ad ejus successorem data ⁴, proxime recitanda, eundem imperatorem etiam Ecclesiæ Transalpinas oblationibus locupletasse, et alia communionis Catholicæ signa edidisse, ut plane procul a schismate ipsum fuisse appareat. Sed et legatio, quam misit ad Paschalem papam, ejusdem communionis haud dubius habetur interpres, cujus idem Petrus Diaconus meminit ⁵.

24. Perdomuit Alexius Pexinacas Barbaros in imperium irruentes, sed tunc, cum suis desperantes viribus milites ad supernum a Deo implorandum auxilium, projectis armis, humi strati misericordiam flagitarent, cumque vasa sacra quæ couflaverat, eadem restituenda, sacra edita sanctione promississet, ut suo loco pluribus dictum est. Fuit et illud in Alexio commendatum, quod scholam Grammaticorum constituit, in qua pauperes erudirentur, victu tam magistris quam discipulis constituto. Cæterum etsi fuerunt in eo pleraque laude digna, quæ recitat Zonaras, nonnullis quæ reprehenduntur vitii non caruit, quæ Cosmus patriarcha cum emendare frustra tentasset, maluit se abdicando carere sede, quam ejus rapinas exerescentes in cives videre et pati. At pene Latinos illud magis magisque in eo reprehenditur atque damnatur, quod invidens

¹ Wil. Tyr. de Bel. sac. l. XI. c. ult. et l. XII. c. 1. 2. 3. — ² Ibid. l. XII. c. 3. — ³ Petr. Clun. l. IV. Ep. XLVI. XLVII.

⁴ Petr. Diac. Chr. Cass. l. IV. c. 17. — ⁵ Ibid. c. 25. — ⁶ Ibid. c. 18. — ⁷ Petr. Clun. l. IV. Ep. XXXIX. — ⁸ Petr. Diac. Chr. Cass. l. IV. c. 48.

gloriæ Francorum, adversus Sarracenos et Turcas feliciter militantium, primum proditione illis obesse curavit, inde vero contra eos cum Christianæ fidei hostibus fœdus inivit, timens imperio per Francos sibi eripiendo, si eos secum dominos in Oriente coalescere pateretur.

25. At in quibus rursum laudem meruerit, Euthymius Zigabenus in exordio Panoplicæ pluribus narrat, et inter alia de his quæ spectant ad pietatem, sic habet : « Celebrandum est studium atque consilium, quo Orthodoxæ fidei decreta colligenda curavit; nec quavis tam multis mundi molestiis, innumerabilibusque negotiis, et gravissimis occupationibus assidue distringeretur, partem hanc sibi negligendam duxit, ut ex imperatoribus multi, quibus id satis fuit, quod plerisque vel illius, vel huiusce temporis hominibus satis est, nempe brevis fidei confessio, religionis continens elementa, quod sacrum Symbolum appellatur. At ipse cum experimento cognitum atque perspectum haberet, pestiferas rursus et impias opiniones multis Romani imperii partibus irrepsisse, et propter longum fortasse diuturnumque hostium dominatum inter bonum triticum mala luxuriantis hæreticorum doctrinæ, que nonnisi ad comburendum utilis est, zizania fuisse sparsa ac disseminata; eaque ut vigerent et crescerent, turbidis sermonum rivulis ab ipsorum doctoribus irrigari: animo commotus, atque ob insignem eorum audaciam atque dementiam inflammatus, tanto malo sibi occurrentum, ac remedium adhibendum existimavit.

26. « Itaque cum a publicis negotiis, gravissimisque reipublicæ muneribus et curis superesset aliquid temporis: id omne in divinarum Scripturarum voluminibus accurate perlegendis consumebat; deque eis cum viris eximii, quorum egregia multitudo regia semper referta esse solet, colloquebatur, approbatus in primis sermones colens, quorum ingenti quodam amore animus ejus incensus ardebat. Ex quo factum est, ut talium sermonum consuetudine linguam exacuens, tanquam ferrum ignitum aqua frigida confirmatum atque gladius utrinque acutus ad detestabiles opiniones atque doctrinas excidendas, vel ut Scripturæ verbis utar¹: « Mallens conterens petras, asperam minirum et duram, atque omni sensu earentem putritiam impiorum eraserit. Id quod ego testari possum, qui rem animadverti, et annotavi, cum ei disputanti fortuna bis mihi contigerit interesse ». Et inferius: « Qua sane in re non sibi pontificum munus arrogavit, sed exemplo suo pontifices excitavit, seque illorum socium et adiutorem adjunxit etc. » Ejus namque et jussione se Panopliam scripsisse idem Euthymius testatur adversus omnium hæreticorum errores.

27. Præcipuam vero laudem inde sibi idem imperator Alexius comparavit, quod quemdam hujus temporis nefandum hæresiarcham, Basilium,

auctorem hæresis Bongolimorum, detexit, atque non sine labore detectum eundem flammis comburendum tradidit. Extant nefandissimi hominis errores isti ex Euthymio deprompti, qui de his locupletissime agit.

Trinitatem negavit existere. Rejecit libros Moysi, septemque tantum divinæ Scripturæ libros recepit. Deum humana forma præditum dixit. Mundum creatum ab angelis, malis scilicet. Michaellem archangelum fuisse incarnatum. Iconoclastiam amplexus, sanctorum cultores imaginum reprobos et idololatrias esse affirmavit. Crucem despexit, quod in ea Salvator occisus sit, quam daemones fide timere atque fugere videntur. Baptismum Ecclesiæ esse baptismum Joannis, suum vero esse baptismum Christi. Incontinentium sacrificium contemnendum. Eucharistiam esse Dominicam orationem. Omnes orationes præter Dominicam vaniloquia esse. Insuper delirans dixit suos omnes concipere Verbum Dei, et parere sicut beata Virgo peperit, nullamque aliam esse resurrectionem præter poenitentiam et vitam Evangelicam. Hæc ex Euthymio et aliis. Quomodo autem imp. Alexius nefarium hominem ultimo supplicio affecit, ita describit Zonaras: « His temporibus secta nefaria Bongolimorum exstitit, cujus præco doctorque primarius fuit quidam Basilus medicus, habitu monachus, sed ipso potius satana indutus. Qui cum annis quindecim erroris illius perniciose dogmata didicisset, quinquaginta duos docuisset, totum fere orbem sua pestis implevit. Tandem etiam urbem imperatricem ingressus, in manifesto crimine est veritatis inimicus deprehensus. Nam imperator ejus impietate cognita, simulavit se fidem habere homini infelici, et magistrum appellavit, et salvatorem errantium animarum. His et pluribus aliis ægre quidem et tarde, sed tamen effecit tandem, ut homo pestifer evomeret virus suæ improbitatis. Sed fera cassibus irrelita, doctrinam ejus divulgavit, et dogmata contempsit: communique suffragio in equestri theatro impostorem comburi jussit ». Hic ejus finis, homine sacrilego dignus. Quo supplicio afficiendos novatores cum Basilio sentientes, candidus lector jure consentiet. Alexio imperatore defuncto, filius ejus major natus Calo Joannes, sic vulgo dictus, habenas imperii moderandas suscepit.

28. *SS. Godefridi episcopi Ambianensis, et Lidgani abbatis Ordinis S. Benedicti in agro Setino obitus.* — Ad postremum citra finem anni hujus, nempe sexto idus Novembris, sanctus Godefredus episcopus Ambianensis, de quo sæpe superius dictum fuit, diem obiit, cujus, res præclare gestæ scriptæ extant a Nicolao monacho ejus æquali¹. Ipsius vero Sepulchro hoc fuit inscriptum Epitaphium:

Gloria pontificum, cleri decus, ac monachorum

¹ Hier. xxiii.

¹ Apud Sur. tom. vi. die vi Novemb.

Forma, gregis dux, exemplar morum Godefredus
hic jacet, astra petens octava Ince Novembris.

Et non solum est ejus sepulchro incisum Epitaphium, sed veneranda ejus imago pariter collocata.
Moritur et eodem tempore S. Lidganus abbas

Ordinis S. Benedicti, qui in monasterio S. Cæciliæ in agro Setino vitam duxit ad sanctitatem accomodatam, claruitque vivens et post mortem miraculis. Scripsitres ab eo gestas Dionysius monachus Cassinensis, sed eas mendis obsitas legisse nobis contigit.

Anno periodi Græco-Romanæ 6611. — Anno Æræ Hispan. 1156. — Anno Hegiræ 512, inchoato die 24 April, Fer. 4. — Jesu Christi 1118.

— Gelasii II papæ 1. — Henrici V reg. 13. imp. 8. Joannis Comneni imp. 1.

1. *Moritur Paschalis II papæ.* — Ad num. 1 et seq. Paschalis II, uti refert Pandulfus Pisanus in ejus Vita apud Baronium, qui cum Petrum Bibliothecarium perperam credit, cum morbo affectus esset, « venit in Præneste, et B. Agapiti Ecclesiam ibidem dedicavit. Nativitatis Domini vigiliis Romanæ » celebravit. Tandem « carnis debitum solvit XV kalendas Februarii », sed dies ille proculdubio corruptus, uti ex ipso Pandulpho eruitur, qui subdit, post Paschalis II obitum episcopatum cessasse *diebus tribus*, quemadmodum videre est apud Baronium num. 2, et apud Papæbrocium in conatu Chronico-Hist. in Paschali II. Fieri enim non potest, ut Paschalis XV kalendas Februarii, seu die xviii mensis Januarii e vivis excesserit, et die xx vel xxi ejusdem mensis *Gelasius II* ejus successor electus fuerit, cum hujus mors contigerit anno sequenti, die xix mensis Januarii, postquam sedisset annum unum et dies quatuor vel quinque, ut ibidem videbimus; aliquin Sedes vacasset, non dies iii, sed dies vii. Loco itaque *XV kalend. Februarii*, legendum *XII Februarii*, quo die Paschalem II victa functum esse recte scripsere Petrus Diaconus lib. 4, cap. 66, et chronographus Malleacensis. Hanc nostram emendationem certam reddit ipsemet Pandulphus, qui narrata ejus morte ait: « In sede propria, in patriarchio, in dextro latere templi, in mausoleo purissimi marmoris mirifico opere sculpto, XI kalendas Februarii collocatus »; indicat enim Paschalem II die præcedenti, nempe XII kalend. Februarii, e vivis abiisse, sequentique die terræ mandatum esse. Hinc Falco, qui annum a die prima mensis Martii incipit, diem sepulturæ cum die mortis, ut sæpe fit, confundens, scribit: « Hoc anno mxcviii, Paschalis papa obiit XI kal. Februarii, et Gelasius papa eligitur ». Dies mortis Paschalis II etiam corrupte descriptus apud Simeonem Dunelmensem in Histor. de Gest. Reg.

Angl. Hovedenum p. 474, et Bromptonum p. 1007, ubi traditur, Paschalem *XIV kal. Februarii* demortuum, sicuti et in Chron. Walteri Hemmingford tom. ii Collect. Oxoniensis.

2. *Duratio Sedis ejus et interpontificii.* — Cum itaque *Paschalis II* die xiv mensis Augusti anni mxcix Pontifex Rom. ordinatus fuerit, Ecclesiam Romanam rexit annos xviii, menses v, dies vii, si dies emortualis excludatur, ut habent auctor Magni Chronici Belgici ex Bernardo Guidonis, Joannes Ceccanus in Chronico Fossæ-Novæ apud Ughellum tom. i Italie Sacræ, Martinus Polonus in Chron., Wernerus in Fasciculo temporum, et duo ex nostris Catalogis; vel dies viii, si dies emortualis includatur, ut in uno ex iisdem Catalogis dicitur. Verum quidem est, Baronium num. 2 referre locum Pandulphi hoc modo: « In mausoleo purissimi marmoris thalapsico opere sculpto, undecimo kalendas Februarii collocatus est; cum sedisset annos xviii, menses v, dies iv »; sed locus ille tam a librario, quam ab interpolatore corruptus; loco enim *thalapsico*, legendum *mirifico* et rejicienda hæc verba, *cum sedisset*, etc. quæ in aliis Pandulphi exemplaribus non extant, et veritati contraria sunt. Ex quibus consequens est Papæbrocium citatum perperam scripsisse *Paschalem II* e vivis excessisse xviii die Januarii, sedisse annos xviii, menses v, dies v, et Sedem post ejus mortem vacasse dies xii: recte vero Onuphrium in Chron. Eccles. qui Vitam Paschalis II a Pandulpho scriptam viderat, uti anno mc indicavimus, litteris mandasse, Paschalem II *duodecimo kalend. Februarii* animam Deo reddidisse, cessasse Sedem dies iii, et Gelasium II ejus successorem electum fuisse octavo kalendas Februarii. Hunc enim electum esse die xxv mensis Januarii, non vero xxxi ejusdem mensis, ut arbitratur Papæbrocius, ex dicendis in morte ejus apparebit. Non hinc disce-

dam, qui monuero. chronographum Sancti-Petri-Vivi apud Dacherium tom. II Spicilegii, qui die non memorato ait *Paschalem II* obisse an. *mcxvii*, annum a Paschate inchoare, quod aperte liquet ex donatione quadam ab eo anno *mcxvii* summarie recitata, in cuius calce dicitur : « Factum est hoc in fine istius anni de quo agitur, VII scilicet idus Martii »; eo enim anno, qui nobis est *mcxiv*, Pascha die *xxix* Martii celebratum, et ab eo tantum chronographus ille annum *mcxiv* exorsus est.

3. *Ejus sepultura.* — Joannes Diaconus Junior Basilicæ Salvatoris Patriarchii Lateranensis canonicus, in libello suo de Ecclesia Lateranensi a Mabillonio tom. II Musei Italici vulgato, refert retro sub absida esse sepulturas Apostolicorum, inter quos istos numerat : « Ibi prope jacet Leo papa V, et Agapitus papa II, juxta sepulchrum ejus. Inde, per directum ad dexteram jacet Paschalis papa II, qui salubri providentia ac studio renovavit Ordinem canonicum in ista Ecclesia : juxta quem jacet Callistus papa II etc. Secus ipsum requiescit Honorius papa II, ac deinde penes istum Cælestinus papa II ». Joannes autem Diaconus Junior libellum suum Alexandro papæ III dicavit ; licet enim quotus hujus nominis Alexander ille fuerit, non memoret, evidenter tamen se de eo loqui pag. 570 insinuat, quando ait, in una absida esse « altare sanctarum virginum Rufinæ et Secundæ, sub quo recondita sunt pretiosa earundem corpora, quæ inventa sunt ab Anastasio papa IV felicis memoriæ, antequam Apostolica dignitate sublimaretur, et post ipsarum inventionem fabricato altari ad honorem earundem propriis manibus consecravit ipsum altare adstantibus nobis omnibus, et præsentibus canonicis Basilicæ Salvatoris, etc. » Faletr tamen Joannes Diaconus in præfata Epistola dedicatoria libellum illum antiquum esse, seque tantum addidisse, quæ vel propriis oculis vidit, vel ab antecessoribus veridica relatione cognovit. Sed post Joannem Diaconum libellus ille rursus interpolatus, cum in eo pag. 570, paulo scilicet antequam de Anastasio IV verba faciat, referat Decretum consecrationis cujusdam altaris, de *mandato domini Bonifacii papæ VIII* factæ, imo et in eodem libello pag. 569, sermo sit de sepultura ipsius Alexandri III, et aliquot successorum ejus.

4. *Gelasius II eligitur Pontifex Rom.* — A num. 3 ad 17. Paschali II successit *Gelasius*, hujus nominis II, Campanus, patria Cajetanus, antea Joannes Cajetanus, S. R. E. archidiaconus, cujus Vitam scripsit Pandulphus Pisanus familiaris ejus, quam Papebrocius laudatus ex Ms. Antuerpiano integram exhibet, et Pandulphum perperam *Aletrinum*

vocat. Eam Constantinus abbas jam an. *mdcxxxviii*, Romæ cum prolixis Commentariis ediderat, Baronius complura ex eadem hic recitat ; sed cum Falco hujus temporis scriptor de Gelasio II electione etiam sermonem habeat, nobis ejus verba ad Annalium Eccles. illustrationem referenda : « Factum est », inquit Falco, « cum præfatus Pontifex Gelasius ad Pontificale solium fere totius populi Romani unanimi voto et concordia eligeretur, archiepiscopis, episcopis et abbatibus, circa Romanam Sedem morantibus, missos Apuliæ quoque partibus delegavit, ut ad ejus consecrationis diem convenirent. Erat quippe, ut retulimus, cum electus fuit, diaconus et cancellarius, qui quidem nonnisi in canonico jejunii tempore constituto consecrari poterat (quia presbyteratus in quatuor temporibus conferebatur, et nullus tunc Romæ aut papa, aut episcopus aut presbyter unica ordinatione, ut alias factum fuerat, sacerbatur). Legatione itaque accepta, episcopus Trojanæ, archiepiscopus Sipontinæ civitatis, et alii complures ad ipsius consecrationis solemnitatem properaverunt ; sed priusquam memoratus electus Gelasius consecrationis acciperet dignitatem, rex præfatus Henricus, instructis insidiis, noctis silentio Romam ingreditur, mensis Martii secundo die ingrediente. Apostolicus itaque regis ipsius sic latenter deprehendens, reminiscens qualiter rex ipse dominum papam Paschalem ejus predecessorem et cardinales fraude et dolo cepisset, absque mora cardinalibus convocatis fluvium Tiberis ingressus est. Deinde prosperis ventis mare salubantes pervernerunt Calenum » ; sed cum Calenum neque portum habeat, neque in mari positum sit, legendum *Cajetam*, quo juxta Pandulphi citati testimonium Gelasius appulit, et aliquo tempore moratus est.

5. *Adveniente Henrico imp. Roma fugit.* — « Rex autem Apostolici egressum cognoscens, ei apud Calenum (Cajetam) delegavit, quatenus Urbem reverteretur, quoniam ad ejus consecrationem libentissime interesse et corroborare desideraret. Pontifex autem Gelasius nequitiam ejus et perfidiæ telum longe lateque cognoscens : Miramur, inquit, super talis tantique viri legationibus, cum ad nos venturum se die Resurrectionis (Paschatis) nuper transmisit. Nunc vero nocturno tempore, et ante conductum tempus compervenit cum adventasse. Ego vero, Deo annuente, consecrationis accipiens firmitatem, etc. Deinde electus ille Gelasius die constituto (die sc. quatuor temporum Martii, uti supra) a cardinalibus, qui cum eo exierant, canonicæ et ordinate consecratus est apud Calenum (lege Cajetam) mense Martio superius nominato (1) ».

(1) Cum Falco Beneventanus mendosus et mancus in rebus anni hujus sit, juvat illum supplere, et in nonnullis corrigere ex Epistola Gelasii ad Cononem Prænestinum, Apostolicum per Germaniam legatum, quæ est Epistola cccxvii Codicis Udalrici : « Post electionem nostram diaconus imperatoris furtive et inopinata celeritate Romam veniens nos egredi compulit, Pacem postea nimis et terroribus postulavit, dicens se facturum quæ posset, nisi nos ei sacramento pacis certitudinem faceremus. Nos ei, fratrum nostrorum consilio, pacem obtulimus. Ille statim de post electionem nostram quarta, Bracarensem (Bracarensem) episcopum, qui Burdinus a Normannis dicitur, anno præterito (sicut nosti) a domino predecessori nostro Paschali papa in Concilio Beneventi excommunicatum, in matris Ecclesie invasionem ingressus ». Et post pauca : « Sane nos cum fratribus nostris, et episcoporum Collegio in præterito Palmarum die Capuæ regem ipsum cum idolo suo excommunicavimus ». Hæc sunt litteræ illæ Capuæ, *idibus Aprilis*. Ex his litteris intelligimus quot abierint dies ab electione Gelasii ad Burdini as-

6. *Ordinatur Pontifex Rom.* — Baronius quidem, num. 11, ex Pandulpho citato ait : « In papam Gelasium infra kal. Martii consecratus », quod et exemplar, quo usus est Papebrocius, etiam habet, eandemque lectionem alii passim sequuntur. Verum textus Pandulphi eo in loco corruptus, sicuti et in exemplari Constantini Cajetani, quod habet *infra Octavas idus Martii*, legendum enim *infra Octavas idus Martii* seu *Octavas idus*, ut loquitur Horatius serm. 1. Satyr. VI, indeque intelligimus, postridie, seu die nona mensis Martii, *Gelasium* presbyterum ordinatum, dieque decima quæ Dominicali fuit Pontificem consecratum. Inter episcopos qui Gelasii inaugurationi adfuerunt, Pandulphus Risonem Barensen archiepiscopum numerat, et tamen in Chronico Falconis ad annum mxcvii scriptum reperitur : « Hoc anno Riso Barensis archiepiscopus ab Argivo cive Barensi trucidatus est in via Canusina ». Verum Falconis Chronicon eo Christi anno partim mutilatum, partim depravatum, ut observat Peregrinus in Castigat. pag. 163.

7. *Burdivinus fit antipapa.* — Pergit Falco : « Pontificis ipsius responsum audiens (nempe Henricus imp.) pestifero invento consilio, archiepiscopum quemdam Hispanum (nempe Burdivinum archiep. Bracarensem) in Pontificem, et, ut ita dicam, invasorem Ecclesiæ constituit et consecravit ». Quod pluribus Romanis displicuit : « Romanorum igitur complures, quorum mens erga Ecclesiæ fidelitatem fixa manebat, visa ejusmodi hæresi et cognita, aiebant : Heu ! heu ! miseri, cum nos ex loco nostrorum patrum vetusto ritu, sine alicujus regis adventu et licentia, pastorem eligebamur, consecrabamus quem volebamus. Nunc autem sine regis permissu jam amplius alium neque eligere, neque consecrare ausi erimus ». Quare plures e nobilitate « Gelasio canonice ordinato apud Calemum (legendum Cajetam) legaverunt, dicentes : Vestræ notescat paternitati, pater et domine, nos et nostros amicos consecrationi illius excommunicati viri in Pontificem scelestum constituti, nullatenus consilii et auxilii manus dedisse ». Hoc in loco Falconis Chronicon valde mutilatum et corruptum; jam enim narrat Gelasium II Paschatis tempore Cajetam venisse, inde Romam, et Roma Pisas.

8. *Henricum coronat imperat.* — *Burdivinus*, seu *Gregorius VIII* antipapa, postridie kalendas Junias, ipso Pentecostes die *Henricum* imperatorem ut papa coronavit, quem jam anno præcedenti ut legatus Paschalis II coronaverat. Hoc enim docet Petrus Diaconus in Chron. Casinensi lib. 4, cap. 64 :

« Imperator interea cum oppidanis (nempe Turricule) fœdus iniens, Romam rediit, ibique diebus Pentecostes ab eodem heresiarcha coronatus, Liguriam rediit ». Gelasius vero II, postquam Henricus Roma digressus est, in eam Urbem clam venit : « Magis peregrini quam domini », inquit Pandulphus, « Romam, sicut Deus novit, intravimus. Latuit dominus papa, melius quam hospitatus est in Ecclesiola quadam, quæ Sanctæ Mariæ in Secundo-Cereo dicitur ». Narrat postea Pandulphus Gelasium II, cum nimis facile ad festum sanctæ Praxedis, quod Romæ die xxi mensis Julii celebratur, sese exposuisset, denuo invasum ab Henricianis, acriterque utrimque pugnatum esse; Henricianos deinde ab Urbe recessisse, et Gelasium II illuc rediisse. Et quia Ravennates eorumque archiepiscopus *Gualterius* ejus partes perpetuo secuti sunt, antequam Roma discederet, eorum voluntatem prolixè laudavit, et restituit archiepiscopo eos episcopatus, quos Paschalis II Ravennati Ecclesiæ in Synodo ad Guastallum anno xlvj coacta ademerat. Gelasii Diploma refert Rubeus lib. 5 Hist. Raven. in cujus fine legitur : « Dat. Romæ per manum Chrysologi S. R. E. diaconi cardinalis, VII id. Augusti, Indict. xi, (ideoque hoc Christi anno) anno Dominicæ Incarnat. mxcix, Pontificatus autem domni Gelasii Secundi papæ anno primo ». Refertur etiam illud Rescriptum tom. x Concil. pag. 818, sed ea subscriptio ibidem corrupta; loco enim *VII id. Augusti, Indict. xi*, ibi habetur *kalendis Septembris, Indict. xii*. Rubeus enim, qui autographum viderat, hac de re nos dubitare non patitur, præterea annus ille Incarnationis Pisanus est, non vero communis.

9. *Gelasius II Ecclesiæ Ravenn. pristina jura restituit.* — In Concilio Guastallensi statutum fuerat, « ut Emilia tota cum suis urbibus, id est, Placentia, Parma, Regio, Mutina, Bononia, nunquam ulterius Ravennatensi metropoli subjacerent. Hæc enim metropolis per annos jam pæne centum adversus Sedem Apostolicam exerebat se; nec solum ejus prædia usurpavit, sed ipsam aliquando Romanam invasit Ecclesiam Guiberti ejusdem metropolis incubator », inquit Cencius Camerarius apud Baronium anno mxcvi, num. 32. « Sed cum tandem », inquit Gelasius II in laudato Rescripto, « divinæ majestati placitum fuit, eandem Ravennatensem Ecclesiam misericordiæ suæ gratia ad unitatem et obedientiam matris suæ Romanæ Ecclesiæ revocavit ». Quare Gelasius Gualtero Ravennatensi archiepiscopo, et per eum Ravennatum Ecclesiæ « dignitatem omnem quam ante illius di-

sumptionem. Licet enim in litteris Gelasii ad Galliarum archiepiscopos etc. a Baronio recitalis, et a Pagio hic num. 13 memoratis, schismaticum Pontificem die ab electione Gelasii 14 constitutum ferunt, illas tamen litteras in multis pravam exhibere lectionem constat; ut, cum legunt nullum de Romanis schismaticæ electioni fuisse, cum gemina lectio, quam etiam Epistola nostra proferi, habeat : *Nullus de Romano clero*. Insuper Teuto schismaticæ electionis fautor multo tempore per *Docianum* delatæctus in litteris illis Baronianis assentur; in nostris melius habetur per *Italiam*. Quid igitur et in diebus numerum mendum irrepsisse poterit? Cum præsertim electio illa statim ab egressu Pontificis facta in litteris illis assatur. Denique in litteris non obscure designatur Concilium quoddam Capuæ hoc anno celebratum die Palmarum, vii Aprilis, in quo Henricus et Burdivinus anathemati devoti fuerunt. Hujus quidem Concilii mentio habetur apud Urspergensem ad hunc annum, qui id rescisse ex litteris Euclypici ejusdem Pontificis assent. Mirari autem subit nullam hujus mentionem a Pandulpho qui Pontifice tunc comitabatur, fieri. Idem etiam tradit annalista Saxo ad hunc annum.

visionis tempora per Romanam Ecclesiam posse-
derat », restituit, et Gualtero pallium concessit.
Baronius in Appendice ad hunc annum Epistolam
Gelasii II *Gualtero* Ravennatum archiepiscopo
datam recitat, sed depravato exemplari usus, scri-
bit, eam datam *kalend. Septembr. Indict. xii*, ad-
ditque Indictionem illam *xii*, sicuti et annum
Incarnat. *mcxix* cum mense Septembri in ea Epistola
inchoari. Verum certum, illum Christi annum
Pisanum esse, et Gelasium II *Aram* illam, non a
die *xxv* mensis Martii, ut Pisani, sed a die Paschatis
exorsum esse, uti mox monstrabo. Tum relicta
Roma, Pontifex *Pisas* venit, ubi diu moratus est, et
Ecclesiam metropolitanam dedicavit.

10. *Pisanam Ecclesiam metropolim facit.* —
« Hoc anno », inquit Falco, « praedictus papa Gela-
sius Gallias ivit secundo, die mensis Septemb. in-
trante, et *Pisas* applicuit, (hoc in loco est hiatus).
Cumque, sicut relatum est, Pontifex Gelasius apud
civitatem Pisanam ivisset, et archiepiscopum civi-
tatis consecrasset ». Hoc in Chronico Falconis hodie
non legitur, et haec verba, *archiepiscopum civitatis*
consecrasset, mutilata et corrupta. Petrus enim II,
archiepiscopus Pisanus, qui hoc tempore vivebat,
jam ab anno *mciii*, ut legitur apud Ughellum
tom. iii, col. 427, consecratus fuerat, *Daiberto*
ejus decessore patriarcha Hierosolymitano consti-
tuto, qui juxta Fulcherium in Hist. Hierosolymo-
rum lib. 2, anno *mciv*, Romam venit, ut de Hiero-
solymorum rege apud Paschalem II quereretur, et
rediens Hierosolymam, obiit die *xvi* mensis Maii,
anno Pisanu *mcvi*, aut anno communi *mcv*, secun-
dum antiquum Chronicon Pisanum, apud Ughellum
tom. iii, col. 426, ideoque Petrus a Gelasio sacerdos
non fuit. Legendum itaque, *archiepiscopatum et*
Ecclesiam civitatis consecrasset. Daibertus totius
insulae Corsicae ab Urbano II archiepiscopus consti-
tutus fuerat, juxta Rescriptum ab Ughello col. 429
relatum, emissumque « *Anagninae X kal. Maii*, In-
dict. *xv*, anno Dom. Incarnat. *mcxii*, Pontificatus
vero D. Urbani pape II anno *v* ». Daibertus tamen,
nec Petrus ejus successor eo jure uti ante hunc
annum, quo Gelasius *Pisas* adventavit. Tunc enim
juxta antiquum Ecclesiae Pisanae Codicem *Ms.*
col. 434, apud Ughellum citatum, « *Gelasius* no-
vam Pisanorum Ecclesiam in honore gloriosissimae
semperque triumphatricis Virginis Mariae conse-
cravit..... Romanus igitur Pontifex inter missa-
rum sollemnia ipsius dedicationis die ipsam san-
ctam Pisanam Ecclesiam tam privilegio, quam ore
proprio, coram innumerabilibus turbis Tusciae in
metropolitanam confirmavit sublimitatem etc. »

11. *Corsica metropoli Pisanae subjicitur.* —
Auctor anonymus de Gestis Pisanorum apud Ughel-
lum col. 413, ait : « Post decessum (seu abitionem
ac discessum) venerabilis pape Gelasii Petrus Pisa-
norum archiepiscopus cum Petro cardinali Eccle-
siae Romanae legato, et cum Ecclesiae Pisanae cano-
nicis, atque cum Ildebrando iudice, et Pisanorum
tunc consule, aliisque Pisanis civibus in Corsicam

ivit, ibique honorifice receptus in conspectu cleri
et populi Marsicani Maranensem electum et ipsius
Ecclesiam consecravit, aliorum Corsicae Pontificum
obedientiam et fidelitatem recepit anno Incarnat.
Dom. *mcxix*, (more Pisano, et nobis anno *mcxviii*.)
Post eorum igitur honorabilem redditum velox fama
Tusciae et Longobardiam continuo replevit, re-
sonans Ecclesiam Pisanam metropolitanam digni-
tatem assecutam in Corsicam ivisse ». Quod Ge-
nuensium animos valde exasperavit, inquit idem
anonymus. Alius antiquus scriptor Pisanus apud
Ughellum col. 434, de dedicatione Ecclesiae Pisanae
et metropolitico jure eidem a Gelasio II concesso idem
refert : « *Pisas* venit, et consecravit majorem Ec-
clesiam Pisanorum, et concessit archiepiscopatum
civitati Pisanae, et dedit, quia usque tunc tantum
episcopopus erat », quia sc. Urbani II Rescriptum
executioni mandatum non fuerat. Ea dedicatio se-
cundum veterem Codicem *Ms.* jam laudatum per-
acta anno Pisanu *mcxix*, communi vero *mcxviii*,
Indict. xii kalend. Octob. qui dies hoc anno in
feriam tertiam cadebat.

12. *Gelasius II Genuam venit.* — Pisis Gela-
sius II *Genuam* profectus est, ubi Sancti-Laurentii
Ecclesiam dedicavit juxta antiquam tabulam in
ejusdem Cathedralis sacrario servatam, ut notat
Cajetanus abbas in Commentario ad Pandulphum
pag. 144, ubi hanc inscriptionem refert : « *Sexto*
idus Octobris, anno Domini Incarnat. *mcxviii*,
Indict. xii, dedicatio Ecclesiae beatissimi Laurentii,
atque sanctissimi Syri Januensis episcopi : quae
consecrata fuit a domino Gelasio primo anno epi-
scopatus sui, cum pluribus episcopis, cum Ottone
videlicet Januensi, etc. » Refert ibidem Cajetanus
Gelasii Rescriptum in quo legitur : « Anno Dom.
Incarnat. *mcxix*, *Indict. xii*, (ubi annus Incarnat.
mcxix Pisanus est) *sexto idus Octobris*, D. Gelasius
papa II altare hoc et oratorium consecravit, Pon-
tificatus sui anno primo ». Quare cum haec dedicatio
feria quinta, Pisana vero feria tertia facta fuerit,
diei Dominicae ratio non habita. Inde Gelasius II
post omnium sententias imperatoris persecutionem
fugiens in Galliam venit, uti narrat Pandulphus
laudatus. Sed antequam de protectione Gallica
Gelasii II loquamur, monendus lector annum In-
carnationis Pisanum a Curia Romana aliquando
usurpatum, a Paschate, quod kalendas Januarii
novem mensibus praecedit a Gelasio II inchoatum,
Indictionem vero kalendis Septembris, qui eum-
dem mensem Januariarium, a quo annum Dionysia-
num incipimus, anteverit, licet Pisis non a Pa-
schate, sed a die *xxv* Martii inciperetur. Vide
hujus probationem post duos numeros sequentes.

13. *Intrusionem Burdini Gallicae episcopi si-
gnificat.* — Gelasio II die *xxv* mensis Januarii
Romae in Pontificem electo, *Henricus imp.* qui jam
a multis annis Ecclesiam Romanam vexabat, *Bur-*
dinum Bragarum archiepiscopum in Ecclesiam intru-
sit, bique « suis a fautoribus Gregorius VIII
vocitatus est », inquit Ordericus lib. 12. Gelasius,

qui *Cajeta* tunc versabatur, ut primum eam electionem et ordinationem audivit, litteras dedit ad Galliarum archiepiscopos, ceterosque per Galliam fideles constitutos, a Baronio num. 40 recitatas ex Malmesburiensi lib. 5 de reg. Angl. in quibus ait, Henricum, die post electionem suam *quadagesimo quarto*, Bracarensem episcopum in matris Ecclesie invasionem iniecisse, subditque: « In hoc tanto facinore nullum de Romano clero, Deo gratias, imperator socium habuit, sed Guibertini soli ». Ita habet editio quæ extat apud Eadmerum, lib. 5 Novorum, et Simonem Dunelmensem in Hist. de Gest. reg. Angl. ut recte observat Baluzius lib. 3, Miscell. in Vita Mauricii Bordini archiep. Bracarensis; lectio enim Malmesburiensis et Hovedeni, quam sequitur Baronius, et quæ habet, « nullum de Romanis dominum imperator, Deo gratias, socium habuit » manifeste mendosa, cum certum sit multos nobiles Romanos, et in his Frangipanem in partes Henrici transgressos esse, et a Gelasio II secessisse. Vidit difficultatem Baronius, atque *Gelasium* per Romanos Catholicos, et per *Guibertinos* intelligere schismaticos. Sed cum tam Gelasiani, quam Gregoriani, ejusdem Urbis Romane cives fuerint, licet partibus ac studiis diversi, eam interpretationem Baluzius jure merito rejecit. Cum ergo *Gelasius II* die xxv mensis Januarii Pontifex dictus fuerit, perniciosum hoc schisma die nona aut decima mensis Martii inceptum, corruptaque hæc earundem litterarum Gelasii II ad Gallos subscriptio: « Datum *Cajeta*, XVII kalendas Februarii »; eo enim die nondum Paschalis II e vivis abierat, et schisma, cujus in iis mentio, nonnisi mense Martio inchoatum. Legendum itaque, *datum XVII kalend. Aprilis*, seu die xvi mensis Martii. Librarii mensem unum in alium, et kalendas in idus, dum minus attendunt, quandoque mutant, ut variis exemplis liquet, et observare operæpretium est.

14. *In Galliam venit.* — Sed redeo ad professionem Gelasii II in Galliam. Pandulphus in ejus Vita prodit, enim *portum Sancti-Egidii* attigisse, et in vicinis varias Ecclesias dedicasse, ut videre est apud Baronium num. 16. Sed fanum Sancti-Egidii in Occitana provincia positum una lenca a Rhodano fluvio distat, ideoque Gelasius ad Rhodanum apulit. « VII idus Novemb. apud Sanctum-Egidium » erat, ut liquet ex Rescripto ibidem ab eo dato, et a Baronio in Appendice ad hunc annum recitato, in *Addendis se. et Corrigendis*. Inde *Magalonam*, civitatem nunc extinctam, cui Mons-Pesulanus successit, venit, ubi Sugerius a Ludovico VI Francorum rege missus eum convenit, ut ipsemet Sugerius narrat in Vita ejusdem regis, qui addit,

Pontificem, cum *rex ei occurrere maturaret*, mortuum esse, videlicet sub finem mensis Januarii sequentis Christi anni, ut ibi narrabimus. Falco vero de accessu Gelasii II in Franciam loquens, ait: « Continuo archiepiscopi omnes et episcopi, proceresque alii gaudio cum ineffabili et honore immenso eum susceperunt. Taliter igitur Gelasius accessus cum prædicto Anglorum rege confabulatus est ». Peregrinus in Castigat. pag. 165, notat in Codice Falconis ibi lacunam esse, ac Henricum Angliæ regem, cum Gelasio per legatos colloquium habuisse. Ordericus lib. 12, pag. 846, refert, *Indictione XI, nonis Octobris* Concilium congregatum esse Rothomagi, cui interfuerunt varii episcopi et abbates ibidem designati, subditque: « Ibi tunc Conradus Romanus clericus, Gelasii papæ legatus, eloquentissimo sermone, utpote laicali (legendum Latiali) fonte a pueritia inebriatus, querimoniam fecit de Karolo imperatore (Henricus enim Karolus Henricus nuncupabatur), Paschalis papæ bonorum et ædificiorum pravo destructore, et Catholicorum diro persecutore. Addidit etiam planctum de Burdino pseudopapa, Apostolicæ Sedis invasore, et de multimoda in Tuscia partibus Ecclesiæ tribulatione. Retulit etiam Gelasii papæ, qui jam cis Alpes venerat, insurgentibus procellis, exilium, et a Normannica Ecclesia subsidium petit orationum, magisque pecuniarum ». Denique Pandulphus scribit, papam per *Podium* in Franciam properasse, et Cluniacense monasterium adiisse, ubi anno sequenti mortuus est. Sed cum ex jam dictis constet, *Gelasium II* mensis Octobris initio Pisis et Genuæ fuisse, Concilium Rothomagensis, in quo adventus ejus in Franciam nuntiatus, *nonis Octobris* celebrari non potuit, ideoque legendum *nonis Novembris*, hincque apparet, verum esse quod mox dixi, librarios nempe unum mensem in alium quandoque mutasse, et Ordericum Indictionem a Januario incipere (1).

15. *Varis in urbibus Gallie fuit.* — Gelasius II litteris ad Pontium abbatem Cluniacensem datis « Capuæ, II idus Aprilis, per manum Grysgoni S. R. E. cardinalis anno Dom. Incarn. mxcviii, Indict. xi, hoc scilicet anno ante Pascha, quo Romani Pisanum annum Incarnat. mxcix auspicaturi erant, ei et successoribus ejus confirmavit quidquid sanctus Hugo abbas Cluniacensis, quiete ac sine lite possidebat. Tum aliud ei in monasterii Cluniacensis favorem Privilegium largitus est, in cujus fine legitur: « Datum Avenioni per manum Chrysogoni S. R. E. diaconi cardinalis, XVIII kal. Januar. Indict. xii, Dom. Incarnat. anno mxcix, (computo Pisanorum) Pontificatus autem domini Gelasii II papæ anno i ». Iluc etiam revocandum

(1) Optandum foret Pagium tenaciorem esse regularum quas statuit; has enim si attendisset, utique Concilium Rothomagensis e sede sua, nonis nempe Octobris, in nonas alterius mensis Novembris non trausulisset. Namque nonis Octobris tunc in feriam II, qua hebdomada die iniri solebant Concilia, incidebant, cum nonis Novembris in feriam tertiam caderent. Quibus admissis, oportet utique errasse legatum Pontificium cum assensu per Concilio Pontificem jam transisse Alpes. Forte enim Pontifex perbreven se tractum moram Genuæ in litteris ad legatum suis significavit; sed eo diutius quam pro voto ibi subsistente, forte ob consecrandas Ecclesias, id cum uesciret legatus, reputabat Pontificem jam Alpes transisse, cum revera Genuæ adhuc moraretur.

quod Hugo monachus Cluniacensis scribit ad Pontium abbatem Cluniacensem, et habetur in Biblioth. Cluniac. pag. 463. « Illic (nempe Gelasius papa) Henrico IV Romanorum imperatore contra Ecclesiam saviente, declinans ad mare descendit, navigio Gallias expetivit, tibi que primum, cursore a Pisis emissio, suum prænuntiari fecit adventum..... Huic apud Sanctum-Ægidium occurristi; huic et multo comitatu suo equituros, et alia quam maxima elegantissime ministrasti. Hunc pro maris molestia infirmatum in tuæ solo navitatis, quod pater tuus Petrus potens et nobilis comes Merguliensis iuri Apostolorum Petri et Pauli contradidit; et inde accepit, tu papam officiosissime confortasti. Qui denuo convalescens, et Cluniacum suum pervenire desiderans, Lugdunum Galliæ pertransit, Matisconam descendit, ubi gravissima ægritudine confectus, se Cluniacum perferri instantissime præcepit ». Erat Mergurium oppidum maritimum Occitanie, prope Magalonam et Montem-Pesulanum situm, quod hodie Gallicæ *Mauquo* appellatur, pertinetque ad episcopum Montis-Pesulani.

16. *Cæsaraugusta ab Alphonso Aragoniæ rege obsidetur.* — Ad num. 18 et seq. *Alphonsus* rex Aragoniæ arma consiliaque omnia ad Mauros debellandos convertit, et *Cæsaraugustam* urbem Hispaniæ Tarraconensis, ad Iberum fluvium positam, ex quo identidem in vicinos Christianorum agros excursiones faciebant, obsidione cinxit, quæ adhuc durabat die decima mensis Decembris, ut demonstrat Epistola Gelasii II ad exercitum Christianorum civitatem Cæsaraugustanam obsidentem, *data Alesti*, (non longe a fano Sancti-Ægidii) *quarto idus Decembris*, et a Baronio relata. Ea Pontifex omnibus ad eum aliquid conferentibus indulgentiam largitur, significaque se *Petrum*, quem consecravit episcopum Cæsaraugustanum, ad eos remittere. Quare cum *Gelasius* mense Januario currentis anni Pontifex Romanus creatus fuerit, eodemque mense anno sequenti obierit, valde mirum Blancam, qui eam Epistolam legerat, in Comment. Rerum Aragonensium, *Cæsaraugustæ* expugnationem cum anno mcxv copulasse, biennio nempe antequam *Gelasius* ad summum Pontificatum evelletur esset. Baronius ait, Blancam opinionem suam documentis publicis probasse, eique adhaeret; verum Blanca Baronioque adversantur Surita lib. 1 Annal. cap. 44, Garibayus t. 3 Compendii Historialis lib. 23, cap. 7, et Sandovalius in Alphonso VII, qui non minus quam Blanca monumenta Ecclesiæ Cæsaraugustanæ perlegerant, quique testantur celeberrimam illam Hispanorum de Saracenis victoriam die decima octava mensis Decembris, cum feria quarta tunc concurrente, qua festum Expectationis beatissimæ Virginis in variis Ecclesiis Hispaniæ celebratur, reportatam fuisse.

17. *Expugnatur.* — His suffragatur chronographus Malleacensis hujus temporis auctor, qui

ad præsentem Christi annum ait: « Tertio idus Junii subactum est castrum juxta Cæsaraugustam. Octavo idus Decembris fuit bellum in Hispania inter Ildefonsum et reges plures et Aucoetas, et contra innumerabiles Moabitas. Rex Marroch fuit unus, rex Granada unus, rex Tami frater alii (legendum videtur, Ali Marochii regis) qui fugit, et omnes alii victi, et capti, et occisi sunt in bello. Tertio idus Decembris (qui in feriam quartam incidebat) subacta est Cæsaraugusta, et post eam reddiderunt se alie civitates octo, Tudela, Vautera, Auteis, Aragon, Terracona, Sarannna, et plurima castella ». Chronographus urbium captarum nomina corruptit, et librariorum duas ex illis omisit, sed de his legendi historici citati, qui diserte hæc narrant, asseruntque *Tamit* regem initio mensis Decembris frustra lentasse annonam in urbem Cæsaraugustanam inferre. Citatis historicis adde auctorem anonymum Chronici Massiliensis tom. 1 Biblioth. Labbei, qui ad annum mcxviii habet: « Cæsaraugusta capta est a rege Aragonensi ».

18. *Urbis captae annus et dies.* — Difficultas tantum potest esse de die, cum de anno, mense, ac feria quarta inter omnes conveniat; dies enim III idus Decemb. seu dies xi ejusdem mensis in feriam quartam cadebat, ubi jam dixi; cum tamen chronographus Malleacensis in Aquitania vixerit, domesticis testibus major hac in re fides habenda videtur. Expugnata *Cæsaraugusta*, Alphonsus sese Cæsaraugustæ regem dixit, in ea imperii sui sedem fixit, et *Gastonem* vicecomitem Bearnensem, quod expugnationis urbis auctor fuisset, *Cæsaraugustæ* dominum sub certis conditionibus constituit, ut ostendit Marca lib. 5 Hist. Bearn. cap. 20, ubi fuse et accurate de urbis hoc et frequentibus annis ab *Alphonso* rege Saracenis ereptis disserit, et præfatum Blancæ errorem emendat. Blancæ tamen diligentia laudanda; is enim, ut capte urbis annum cerlo defegere posset, Archiva Cæsaraugustana magistratibus presentibus inivit; cumque in autographo Privilegii ab Alphonso rege civibus Cæsaraugustanis concessi legisset, illud datum fuisse « sub Æra mclm, (id est, anno Christi mcxv), in illa Acuda (id est, palatio regio) civitatis Zaragoca in mense Januario, in ipso anno quando fuit capta prædicta civitas Zaragoca », non dubitavit, quin ea anno mcxv in Alphonsi regis potestatem venerit. Sed cum Privilegium illud mense Januario scriptum sit, melius ex eo intulisset, urbem anno antecedenti, Christi sc. mcxiv captam fuisse. Dicendum itaque in Charta illa scriptum fuisse, *sub Æra mclvii*, sed temporis lapsu numeri v lineola detrita, visum fuisse Blancæ Chartam habere *sub Æra mclm*. Similes errores a librario in Chartis describendis admissos subinde notavimus. Conatur quidem Blanca opinionem suam tueri; sed cum jam de re constet, ejus argumentis refellendis non immorabor.

19. *Petrus Librana ei episcopus præficitur.* — *Cæsaraugusta* expugnata, *Petrus de Librana*, Vasco

natione, Encyclicam Epistolam universis Christi fidelibus misit, et fretus auctoritate Gelasii papæ et Bernardi archiep. Toletani, legati Apostolici, indulgentiam largitus est iis qui Ecclesiæ suæ solatio destitutæ elemosynas mitterent. Litteræ, sine die ac mense datæ, a Baronio recitantur. His addendum quod Marca lib. 5 Hist. Bearn. cap. 22 refert, *Guidonem*, nempe episcopum Lascurrensem in Aquitania, et *Pontium* abbatem Cluniacensem, qui de quarundam Ecclesiarum decimis litigabant, coram Gelasio II de iuribus suis transexisse in urbe Alesia seu Alesto, *die II idus Decemb.* ut legitur in Chartario Lascurrensi, presentibus Gerardo episcopo Engolismensi Sedis Apostolicæ legato, tribus cardinalibus, Petro episcopo Cæsaraugustano, aliisque.

20. *B. Oldegarius archiep. Tarraconensis dictus.* — Parte altera, Raimundus III Barcinonensis et Provinciæ comes, de Tarracona, celeberrima alia Tarraconensis Hispaniæ urbe, diversa ab ea ejusdem nominis quam Alphonsus Aragoniæ rex Saracenis eripuit, ut infra videbimus, restauranda cogitabat. Ea enim jam a multis annis a Saracenis eversa fuerat, et nunc sine incolis erat. Quare litteris *anno Incarnat. Dom. MCMVII, decimo kalendas Februarii* datis, B. Oldegario Barcinonensi episcopo, ejusque successoribus libertatem dedit congregandi undecumque posset homines, « ejuscumque dignitatis et mediocritatis, ad incolendam terram illam, et regendi et judicandi eos ad honorem Dei, et utilitatem ipsius civitatis ». Gelasius vero II litteris datis « Cajetæ per manum Chrysogoni S. R. E. cardinalis, XII kal. April., Indict. XI, anno Domin. Incarnat. MCMVIII », considerans prædecessores suos, præsertim Urbanum II plurimum laborasse ad restitutionem insignis olim hujus Ecclesiæ metropolitane, beatum Oldegarium Barcinonensem episcopum ejusdem Ecclesiæ antistitem constituit, et pallum ei concessit, metropolitani dignitate in eum collata. Addit Gelasius: « Sane Dertosam (aliquot passuum millibus a Tarracona distantem, vulgo dictam Tortosam) si divina clementia populo Christiano reddiderit, in suburbanam parochiam metropoli Tarraconensi concedimus; donec præstante Deo, Tarraconensis Ecclesiæ robur status sui recipiat; mox Dertosa ipsa proprium pastorem obtineat ». Utrasque litteras recitat Bollandus ad diem vi mensis Martii in Vita B. Oldegarii cap. 4. Quando *Dertosa* a comitibus Barcinonensibus occupata fuerit, suo loco dicemus.

21. *Varia Concilia hoc anno habita.* — Ad num. 20. Anno tantum sequenti coacta Concilia *Coloniense* et *Fritslariense* in Germania, *Conone* episcopo Prænestino Sedis Apostolicæ legato præside celebrata, in iisque *Henricus imp.* excommunicatus fuit, ut an. MCMIX narrat Urspergensis in Chronico. Baronius eodem chronographo perperam citato utrumque cum currenti anno connectit, indeque Labbeus Tom. X Concil. re non examinata

duo illa Concilia anno suo non reddidit, et Baronium hac in re exscripsit. Trithemius in Chronico. Hirsang. ad annum MCMIX recte observat, utrumque Concilium post Gelasii papæ obitum congregatum fuisse a *Conone* Prænestino episc., adhuc legatione fungente, ab illo, dum adhuc viveret, sibi commissa; quod et indicat Urspergensis abbas ad annum MCMIX, dum de utroque Concilio locuturus post Callisti II electionem narratam, ait: « His etiam temporibus, Conone Prænestinus adhuc legatione Gelasii functus, Synodum Coloniae, etc. » Denique interpolator Chronici Anselmi Gemblacensis ad annum MCMIX disertam Concilii Coloniensis mentionem facit. Auctor Vitæ S. Norberti apud Surium ad diem vi Junii cap. 7, Concilii *Fritslariensis* in Hlassia meminit, atque hunc sanctum tunc presbyterum coram *Conone* Concilii præside ab episcopis qui aderant accusatum fuisse, quod ipsos in suis concionibus verbis et conviciis acriter insectaretur, habitum religionis præ se ferret, cum in nullo religio et proprietas convenirent, et pretiosas vestes abiecerisset contra morem nobilium ipsius terræ, qualis ipse esset. Urspergensis, quem Baronius num. 20 sequitur, dicit frivolum hanc accusationem factam in Concilio Coloniensi, sed Hugo abbas in hujus sancti Vita, auctor cœvius, Urspergensium hac in re deceptum ostendit. Itaque, ut jam monui, tam utraque Synodus, quam conventus principum, apud *Wiceburg* seu *Herbipolim* coactus, de quo ibidem Baronius, pertinet ad annum sequentem; ad hunc vero Concilium *Tolosanum* occasione sacræ expeditionis a Christianis adversus Saracenos Cæsaraugustanam civitatem inhabitantes susceptæ. Hujus urbis obsidioni plures Francorum proceres adfuerunt, ut refert Marca citatus, et uti habet chronographus Malleacensis ad hunc annum: « Tolosæ fuit Concilium, in quo confirmata est via de Hispania ». Nec plura de hoc Concilio supersunt. Præterea coactus *Rothomagi* Concilium, teste Orderico lib. 12, non quidem *nonis Octobris*, sed *nonis Novemb.*, ut monuimus num. 14, et Gelasii papæ legatum ad illud venisse diximus. « Addidit etiam (nempe legatus Pontificius) planctum de Burdino pseudo-papa, Apostolicæ Sedis invasore, et de multimoda in Tusciæ partibus Ecclesiæ tribulatione », inquit Ordericus.

22. *Templariorum origo.* — Ad num. 21. Baronius *Templariorum* originem cum Guillelmo Tyrio lib. 12, cap. 7, hoc anno alligat, et ad eundem Christi annum Matthæus Paris scripsit, *circa dies istos* Ordinem illum fundatum. Baronii opinionem passim viri docti secuti sunt præter Mabillonium, qui in Chronolog. Bernardina hujus Ordinis exordium in annum millesimum centesimum vice-simum rejecit. Fons erroris, modus annos Incarnationis numerandi a Tyrio usurpatus; cum enim quandoque eos vel a die vicesima quinta Martii, vel a die Paschatis exordiat, ut anno millesimo centesimo septuagesimo nono ex ipsomet demonstra-

bimus, evidens est hanc foundationem ad annum sequentem pertinere; cum ipsemet asserat nono ab ea anno confirmatam esse in Concilio Trecensi, initio anni Christi Dionysiani mxxviii celebrato. Baronius quidem Concilium Trecense cum an. mxxviii connectit; sed cum hac in re deceptum esse infra ostendimus. Primi institutores fuere duo equites, *Hugo de Paganis* et *Godefridus de S. Audomaro* qui cum certum domicilium non haberent, *Baldunus II*, Hierosolymorum rex, de quo mox, locum in palatio, quod secus templum Domini ad Australem plagam situm erat, eis ad habitandum concessit. Inde « Fratres militiæ templi dicuntur », inquit *Matthæus Parisiensis*, « et cum diu in honesto starent proposito, nunc adeo professionis suæ humilitate neglecta, domino patriarche, a quo Ordinis institutionem et prima beneficia susceperant, se subtraxerunt, obedientiam et Ecclesiis Dei decimas subrahentes, facti sunt cunctis valde molesti ».

23. *Obitus Balduini I, Hierosolymorum regis.* — Ad num. 22. *Baldunus* Hierosolymorum rex, post varias victorias de Saracenis reportatas, hoc anno in Quadragesima mortuus est, sepultus « in Gulgota, juxta Godefridum regem germanum suum », inquit *Fulcherius lib. 2*. IIst. Hieros. « Eo defuncto, ne rege carentes æstimarentur debiliores, creaverunt sibi regem Baldunum, comitem videlicet Edessenum, regis defuncti cognatum. Communiter electus, die Pasche est consecratus », subdit idem *Fulcherius lib. 3*. Mortuus vero Balduino I et Arnulpho patriarcha Hierosolymitano, et Balduino II in regem uncto, « *Germundus*, vir bonæ conversationis ab omni clero et populo in patriarcham eligitur », inquit *Albertus Aquensis lib. 12*, num. 30. *Germundum* aliqui *Carinandum* appellant.

24. *Moritur Alexius imp.* — A num. 23 ad 28. *Alexius Comnenus* Orientis imperator hoc anno, die xv Augusti, Indict. xi, e vix excessit, postquam vixisset annos circiter septuaginta, et imperasset annos xxxvii, menses quatuor, dies quindecim, ut *Zonaras*, qui in eo *Annales* suos absolvit, *Nicetas Choniates*, qui eodem prosequitur, *Anna Comnena* ejus filia, alique produnt. *Alexii* sepulchrum etiamnum superesse in templo quod patriarchium vocant, scribit *Laure Crusius* in *Turcogracia*. *Bellica* quidem laude clarissimus fuit, sed in bello sacro Latinos fraudibus primum, deinde aperto Marte infestavit. Ipso belli initio « *Boamundus* et *Raymundus* comes Sancti-Egidii ac *Godefridus dux*, *Robertus*que comes *Normannie*, atque *Robertus* comes *Flandrensium* et comes *Bolonie* », nempe *Eustachius*, hæc ad *Urbanum II* scripsere : « Tu nos filios per omnia tibi obediētes, pater pii-sime, debes separare ab injusto imperatore, qui multa bona promisit nobis, sed minime fecit. Omnia enim mala et impedimenta quæcumque facere potuit, nobis fecit. Hæc *Charla* fuit scripta xi die intrante Septembrio, Indictione iv,

sed loco iv, scribendum vii, ut notat *Baluzius lib. 1. Miscell.* ubi eam Epistolam refert, indeque confirmatur, quod jam hoc anno diximus, librariorum in hujusmodi numero exprimendo non raro errasse. Ea itaque Epistola anno mxxviii data.

25. *Alexius uti uxor et filia litteris excultus.* — Quamvis *Zonaras* de *Alexio* scripserit : « Eruditionem, non ut conveniebat, sed utcumque colebat », exstant tamen *Alexii Comneni* *Monita ad Spaneam nepotem*, versibus politice Græco-barbaris scripta, et publicata Venetiis a *Christophoro Zaneto*, sed sine versione Latina et absque mentione anni impressionis. Cujus Operis exemplar Ms. in Bibliotheca Cæsarea exlare testatur *Lambecius lib. 5*, pag. 262, aliudque in bibliotheca regia asservari monet *Ducangius Tom. II Glossarii Mediæ Græcilitatis*, in Indice auctorum Græcorum ineditorum, qui in eo laudantur. Ad hæc in *Analectis Græcis Parisiis* anno mdcclxxxviii, a monachis *Beneditinis* *Congregationis S. Mauri* publicatis referuntur *Antiquum Rationarium Augusti Cæsaris*, et *Novum Alexii Comneni imperatoris*, et in priori narratur, quoniam modo et quæ olim vectigalia exigebantur; in posteriori vero exponitur, quomodo Antiquum ob varios abusus, qui irrepserant, emendaverit *Alexius Comnenus*, et Novum illud litteris mandavit. *Irene Dueena* *Alexii* uxor, litteris etiam exculta fuit, cujus studia et litterarum patrocinium mire exollit *Anna* filia in *Alexiade lib. 5*, pag. 147. Sub vitæ exitum monachæ habitu sumpto, *Nene* dicta est, ut legitur in *Menæis* ad diem xii mensis Augusti. In iisdem *Analectis* refertur *Typicum* sive Regula monasterii monialium Græcarum capitibus lxxx constans. Monasterium illud *Irene* a fundamentis extruxit, et regulam illam monialibus composuit, etiam verba ipsa suggerens. Denique *Anna Comnena*, *Alexii* et *Irene* filia, omni scientiarum laude clara fuit, ut testantur libri xv *Alexiadis*, quibus *Alexii* patris vitam exposuit. Nupta fuit *Nicephoro Bryenni* Cæsari, omni etiam disciplinarum genere instructo, qui rerum sui temporis Historiam a *Petro Possino* c. tenebris erutam elucubravit. *Joannes Comnenus* *Calojoannes* etiam a quibusdam dictus, qui jam cum patre imperabat, post ejus mortem solus imperium administravit. Jam uxorem duxerat *Irenem*, *Ladislai* *Hungariæ* regis filiam, ut testatur *Zonaras*, et ostendit *Ducangius* in *Familiis Augustis Byzantinis*. Is Latinis patre æquior fuit.

26. *Nilum hæretic. ad sanam doctrinam reducere conatur.* — Imperante *Alexio*, *Nilus* monachus Ecclesiæ invadens, de Christi æconomia, varia ex Armenorum hæresibus orta disseminavit; diligentia tamen piorum hominum deprehensus, cum hæresi sua damnatus fuit, uti narrat *Anna Comnena lib. 10* : « Cum Ecclesiam, inquit, tanquam improbitatis fluvius, *Nilus* ille inundans, summo pere omnium animos perturbaret, non longe post ab Italis (de quo suo loco egimus) hæ-

resibus condemnatis apparens, multis sui erroris turbinibus complures demersit, etc. Hinc nostri mysterii secundum hypostasim unionem ignorans, neque quid unio sit omnino capere valens, neque penitus quid hypostasis sit sciens, neque separatim hypostasim aut unionem intelligens, neque rursum secundum hypostasim unionem, neque quomodo assumptum deificatum sit a Patribus edoctus, longe a veritate avulsus natura illud Deificatum fuisse, multum aberrans, existimabat. Id non latuit imperatorem, et statim ac de eo certior factus est, opem promptissime excogitat; cumque virum accersisset, multum de inscitia atque audacia arguit, refellensque eundem enixe secundum hypostasim unionem Dei et hominis Verbi aptissime exponebat, et retributionis modum ostendebat, et quomodo assumptum deificatum sit ex superiori gratia instruebat. Ille prave suæ sententiæ mordicus inhærebat, et vexationem omnem, torturam et compedes sufferre, excarnificari quoque atque confici promptius se exhibebat, quam ab eo abstinere, ne doceret natura assumptum deificatum fuisse.

27. *Synodum adversus eum cogendam curat.* — « Hinc frequentes ordinationes ad Ticeranem Arsacemque; quos ante alios Nili dogmata ad impietatem irritabant. Quid inde? Impietate multorum depopulari animos conspiciens imperator, et Armeniorum Nilique decreta simul innecti, necnon ubique natura deificatum assumptum clara voce vulgari, pessumdari vero sanctorum Patrum de eo scriptiones, et secundum hypostasim unionem ignorari; noxæ impetum quam longissime ejaculari cupiens, Ecclesiæ primatibus in unum coactis, Synodum de eo celebrandam una cum aliis determinavit. Convenerunt tunc omnes præsulnes et patriarcha ipse Nicolaus, Nilusque stabat in medio cum Armeniis, illiusque dogmata explicabantur. Ille clara voce illa docebat, illisque enixe pluribus adhærebat. Quid inde? Synodus, ut multorum servaret animas a noxia illius doctrina, sempiterno eundem anathemate ferit, et unionem secundum hypostasim, ad traditiones Patrum, manifestius evulgat. Post hunc, ino cum hoc Blachernita quoque proscriptus est, impia et ab Ecclesia aliena sentiens, licet in sacris esset. Namque cum Enthusiasticis congressus, illorum perniciem contracta, multisque illudens, et magnas in Urbe domos suffodiens, et impietatis dogmata tradens, cum sæpe sæpius accerseretur, docereturque ab imperatore, nec ejuratis pravis ejus opinionibus respiceret, ad Ecclesiam ab imperatore mittitur, ubi magis ac magis examinatus, ut ignavissimus repertus est, ipseque et dogmata ipsius perpetuo anathemati subijciuntur ». Allatus lib. 2 de Conensione Eccles. Occident. et Orient. cap. 10 illius anathema legi in Tridiod, Dominica Orthodoxiæ observat. Cum vero *Nicolaus III*, patriarcha CP., anno MCCI et vivis excesserit, hæc ante illum Christi annum gesta esse oportet, sicuti et sequentia quæ

de Bogomilis habet Anna Comnena, sed anno incerto.

28. *Bogomilorum hæresis in Oriente grassatur.* — *Alexii imp.* etiam tempore *Bogomilorum* hæresis grassata est. Illius primarius auctor fuit *Basilus Medicus*, monachi habitu incedens. Is Byzantium ingressus, et in manifesto hæresis crimine deprehensus, condemnatus fuit. Nam imperator simulavit se fidem habere homini, et magistrum appellavit, et servatorem errantium animarum: quibus effecit, ut ille evomeret, doctrina vulgata, virus suæ improbitatis, in qua postea cum pertinax perseveraret, in Theatro exustus est, ut refert Zonaras in Alexio. Non pœnitebit tamen rem totam ex Anna Comnena, quæ rebus interfuit, illius verbis, licet prolixioribus, cum post Baronii mortem ejus Historia edita fuerit, audire. Anna lib. 15 ait: « Post hæc maxima insurgit hæreticorum nebula. Hærescos genus novum, nunquam antea in Ecclesia compertum: namque duo dogmata pessima impiissimæque in unum convenere, superioribus temporibus cognita, Manichæorum, ut quidam diceret, impietatis, quam nos Paulicianorum hæresim vocamus, et Massalianorum abominatio. Tale est Bogomilorum dogma, ex Massalianis et Manichæis conflatum. Et, ut verosimile est, fuerat etiam ante patris mei tempora, verumtamen latebat. Namque Bogomilorum gens, ad dissimulandam virtutem aptissima est, et capillum quidem sæcularem nunquam reperias Bogomilorum sectam sequentem; sed malum hoc sub pallio cuculloque occultatur; tristisque est Bogomilus et ad nares usque cooperitur, et incurvatus incedit, et ore submurmurat, intus vero lupus est effrenis. Et hanc nationem, talis cum esset, placabilem, veluti serpentem in latibulis immorantem, incantamentorum illecebris, quæ verbis exprimi nequeunt, pater meus in lumen evocavit, eduxitque. Recens enim immodica rerum Occidentalium Orientaliumque cura deposita, spiritualioribus sese exercebat etc.

29. *Basilii monachus lujus sectæ auctor.* — « Vi vero ubique Bogomilorum rumor invasit. Basilii enim quidam impietate monachus, duodecim habens discipulos, quos et Apostolos nuncupabat, secumque una discipulas adducens mulierculas quasdam pravis ac improbissimis moribus, per omnes partes malum profudit; multasque animas, perinde ac ignis, pestis absumpsit. Ægre fert hoc imperator. Quare de hæresi inquirere cepit, et ex Bogomilis nonnulli in aulam asportantur, omnesque Basilium quemdam, primumque Bogomilicæ hærescos auctorem esse denuntiabant. Ex his Diplatus quidam comprehensus, cum interrogatus confiteri renneret, tormentis deditus, tum dictum Basilium confitebatur, et quos ille creaverat Apostolos. Quare illius perquisitionem multis imperator commisit. Et tandem comparet Satanæ archisatrapa Basilus, habitu quidem monachus, facie macilentus, mento glaber, sta-

tura procerus, ad impietatem pertractandam callidissimus; statimque imperator, quod occultabatur, suasionibus ac illecebris, foris educere avens, et cum omni obsequio hominem accersit: namque et sedens assurrexit homini, et sedis illum mensaque participem fecit, et hanc prædæ, omnibus cæcis onustum, universum ceto huic voracissimo laxavit deditque glutiendum; venenumque huic monacho et improbitate conspicuo, omne propinavit, per omnia simulans se illius discipulum fieri velle: nec ipse solum, sed et germanus illius frater Isaacius Sebastocrator; et omnia, quæ ab illo dicebantur, veluti divina oracula æstimare, et in omnibus illi subditi, si tantummodo sibi animæ salutem pessimus ille Basilius procurasset.

30. *Qua arte Alexius imp. prava ejus dogmata detexerit.* — « Et ego quidem, ait, pater honorandissime (hisce namque dulcibus poculum imperator inungebat, ut demonibus ille obsitus atram bilem quam intus habebat evomeret) virtutem tuam admiror, postuloque addiscere quæ a tua reverentia inducuntur, cum nostra tantummodo prava sint nihilque ad virtutem conducant. At ille primum quidem simulabat, et pellem leoninam, qui vere asinus erat, quacumque ex parte trahebat, et ad dicta subsultabat; nihilominus tamen laudibus inflabatur: namque enim sibi convictorem effecerat. Aderat vero his omnibus, et namque simul scenam volvebat imperatoris frater et Sebastocrator. Ille vero hæreses dogmata eructavit; at quamvis ratione? Verum Gynæcium et imperatores veluti muris dividebat: sic exorando hæc omnia, ut illi animo insederant, eructante palamque enuntiante, scriba intra velum dicta scripto excipiebat. Et fatuus ille, ut sibi videbatur, magister erat; imperator instrui se simulabat, scribebat doctrinam notarius. Omnia autem fanda infandaque vir ille ominosus exaggerabat, nullique exorando dogmati peperit: quinimo et Theologiam omnem nostram contempsit, et æcononiam imaginariam fuisse asseruit; templaque sacra, heu miserum! templa dæmonum appellavit, et quæ a nobis conficiuntur, caro et sanguis, primi et antistitis et sacrificii, nullo loco habuit. Quid inde subsecutum est? Scenam aufert imperator, et aperit. Senatores omnes coguntur, militaris Ordo accurrit, et venerandi Ecclesiæ Patres adsunt.

31. *Basilius in impietate animum obfirmat.* — Præsidet itaque tunc temporis in regie urbis throno beatissimus patriarcha dominus Nicolaus Grammaticus, et deo exosa dogmata percurrerantur, et probatio calumnia vacat: neque id negabat adversarius, imo aperto capite ad defendendum se preparabat, et igne et verberibus, et sexcentis mortis generibus se afflictiari velle promittebat. Firmiter namque credunt falsi isti Bogomili, omnem sine dolore penam subire se posse, quasi Angeli ipsos ab igne erepturi sint. Multis itaque eorum omnium improbitatem exprobrantibus, iis

etiam, qui illius pestis participes Inerant, Basilius ipse immutabilis erat, Bogomilus generosissimus: et licet illi uestionem minarentur, et aliorum tormentorum genera, mordicus ipse dæmoni inhererebat, Satanaelemque suum amplectebatur. Custodiis vero sæpius mancipatus, accersitusque ab imperatore, sæpiusque exoratus, ut impietatem ejuraret, eodem modo se gerebat ad adhortationes. Sed finem illius ne prætereamus. Antequam enim illum imperator torvis intueretur, post impietatis confessionem, in adiculam quandam regio palatio contigiam, tum primum propter eundem exstructam secessimus. Sero erat et stellæ sereno celo desuper affulgebant, et luna post conjunctionem emicabat. Monacho cellam ingresso, nocte media saxa ex sese, ad instar grandinis, in cellam jaciebantur, manu nulla lapides projiciente, nulloque alio dæmoniaco hunc abbatem lapidibus petente. Videbatur vero esse dæmonum, qui Satanaeli inserviebant, ita furentium indignatio, ægre ferentium, quod ille arcana imperatori manifestaverat, et persecutionem apertam contra errorem induxerat.

32. *« Dogmatica Panoplia jussu Alexii imp. adversus hæreticos composita.* — « Et hæc quidem Parasceves quidam nomine, dæmoniaco illius senis custodiæ destinatus, ne ille cum aliis sermonem consereret, et pestis suæ participes faceret, horribilia hæc se vidisse, jurejurando affirmavit, audisseque projectorum lapidum, et in terra et in tegulis strepitum, vidisse vero spissos crebrosque lapides, neminem vero uspiam, qui illos projiceret, conspexisse. Lapidum enim projectionem subquebatur illico terræ motus, et pavimentum concutiebatur; et quæ circa lectum erant, stridebant. Parasceves itaque antequam perciperet dæmonum opus illa esse, non despondebat animum, ut ipse aiebat; sed videns postea saxa desuper, veluti imbrem deferri, et senem illum hæreseos auctorem ingredi abscondique, dæmonum opera id esse factum ratus, hærebat animo, nec quid facturum esset sciebat. Et prodigii hujusce narratio hic finem habeat. Erat interim animus universam Bogomilorum hæresim percensere; sed me pudor impedit, ut alicubi dixit bella Sappho, quod scriptor ipse mulier sim, et purpuræ pretiosissimum, et primus Alexii sarculus; et quod illa quæ in multorum aures venere, silentio digna sint. Et vellent equidem scribere, ut plena Bogomilorum hæreses notitia habeatur; verumtamen, ne linguam delurpem, prætereo. Mitto vero eos qui universam Bogomilorum hæresim cognoscere avent, in librum qui dicitur Dogmatica Panoplia, jussu patris mei conscriptum. Namque ille monachum quemdam Zigadenum dictum Desponæ cognitum, et ex parte matris aviæ, omnibusque qui sacro catalogo nomina dederunt, Grammatices instructissimum, et Rhetoricæ etiam studiis exercitum, dogmatumque, si quisquam alius, gnarum, accersivit, jussitque illi, ut hæreses omnes, singulas

quasque separatim exponeret, et in unaquaque sanctorum Patrum refutationes conscriberet, ipsorum etiam Bogomilorum hæresim, uti impius ille Basilus edocuerat. Librum hunc Dogmaticam Panopliam imperator nuncupavit, et ad hæc usque tempora libri illi ita appellatur.

33. *Ab Euthymio Zygabeno qui schismaticus fuit.* — Damnatio Basilii et sociorum apud Annam Comnenam, quæ omnia etiam minutissima prosequitur, legenda. Alexius imp. in revocandis ad fidem Bogomilis plurimam operam posuit, multique resipere; qui vero animum in errore obfirmarunt, Crucem in morte quoque adversati sunt. Basilium viviconburio damnatus, et Bogomili ad incendium a plebe postulati, sed iis imperator resipiscendi spatium in carcere indulsit. Natalis Alexander, part. 4 sæculi xi et xii, pag. 317, Bogomilorum hæreseos capita sigillatim exponit, apud quem legi potuerunt. Lambecius lib. 3 Biblioth. Cæs. pag. 170, refert inter Mss. Græca in ea Bibliotheca asservari Panopliæ Dogmaticæ Euthymii Zygabeni Appendicem, qua continentur « anathematismi quatuordecim contra Massalianorum et Bogomilorum hæresim, et triumphus de eorundem repressione per imp. Alexium Comnenum, cujus jussu Basilus hæresiarcha, professione quidem medicus; habitu autem monachus, in Hippodromo Constantinopolitano vivus combustus est ». Notat Lambecius opus illud prælo dignissimum esse, ut historia originis illarum hæreseon suppleatur et illustretur. Priores ipse tres anathematismos exhibet, in quorum priori *Petrus* sive *Lycopetrus* hæreseos Massalianorum primus auctor dicitur, cujus tamen nec apud S. Epiphanium in Panario omnium hæresium, nec apud Photium in Biblioth., nec apud Harmenopulum in libro de Sectis, nec apud alios, qui de hæresi Massalianorum agunt, mentio occurrit, ideoque Appendix illa res notabiles docere potest. Porro *Euthymium* schismaticum fuisse, probat Allatus laudatus ex Tractatu Ms. Bibliothecæ regie, cujus hic titulus est : *Εὐθυμίου μοναχίου* etc. id est, Euthymii monachi Zygabeni adversus Romæ veteris cives, sive Italos, capita duodecim, demonstrantia non ex Filio procedere Spiritum sanctum, seu « Euthymii monachi Zygabeni contra Latinos duodecim capita de processione Spiritus sancti ». Denique Lambecius tom. v Biblioth. Cæs. pag. 134, ait, in ea asservari Ms. cujus inscriptio est : « Euthymii Zygabeni, monachi monasterii Constantinopolitani, cognominati τῆς περιβρίτου, Epistola adversus Phundagiagitas sive « Bogomilos et Massalianos, ut et contra Armenios cæterosque hæreticos, Constantinopoli in suam patriam missa ». Ex quibus patet *Bogomilos* minus recte a Baronio num. 27, vocari *Bogomilos*.

34. *Moritur S. Godefred. episc. Ambianensis.* — Ad num. 28. Nicolaus monachus in Vita S. Godefredi episc. Ambianensis, scriptor cœvus, ejus mortem his verbis refert : « Excessit e vivis VI idus

Novemb., hora diei nona, anno sacerdotii sui undecimo, (verum, ut ex dictis liquet, legendum anno sacerdotii sui quindodecimo) ætatis quinquagesimo, regnante Ludovico, Philippi Francorum regis filio, anno regni ejus decimo octavo, incarnati autem Verbi mcmviii ». At anno Christi mcmviii, Ludovicus rex mense Novembri annum regni xi numerabat, ideoque hunc numerum librarius per errorem ejus episcopatu attribuit. Neque enim dici potest, annum illum a priori regni Ludovici Epochâ proficisci, cum post patris mortem anni regni ejus a priori Epochâ numerati non reperiantur; licet Philippus pater ejus a sua inauguratione, vivente patre facta, regni sui annos quandoque duxerit, ut liquet ex Charta a Mabilonio lib. 6 de Re Diplom. pag. 589 recitata.

35. *Obitus Mathildis reginæ Angliæ.* — Hoc anno mortua est Mathildis Angliæ regina, Henrici regis conjux, piissima femina, quæ ei peperit filium *Wilhelmum* nomine, filiamque sibi cognominem. De ea Eadmerus lib. 5 Novorum hæc habet : « His diebus, gravi damno Anglia percussa est in morte reginæ. Defuncta siquidem est apud Wesmonasterium, kalendis Maii, et in ipso monasterio decenter sepulta. Quo autem judicio Dei ignoramus. Illico post hæc, plures Normannorum, quam regi juraverunt fidelitatem postposuerunt, et in regem Franciæ (sc. Ludovicum VI) principesque ejus adversarios, scilicet ipsius naturalis domini sui, non veriti justitiam, se transtulerunt. Unde quæ et quanta mala emergerunt, cogitatu ne dicam, dictu scimus esse difficile ». Hæc de Mathilde Petrus Blesensis in Continuât. Ingulphi pag. 129 ad hunc Christi annum : « Mathildis Anglorum regina et Scotorum gloria, pauperum alumna, et omnium miserorum refugium, Croylandensis Ecclesiæ ac abbatis Jofridi specialissima patrona, hoc tempore obiit ». Erat Jofridus abbas Croylandiæ, qui hoc anno cum Gilberto Westmonasterii abbate legatus missus est ad Ludovicum Franciæ regem ob dissensionem, quæ inter ipsum et Henricum regem versabatur. Erant legati isti in Francia geniti, in septem liberalibus artibus insignes doctores, inquit Petrus Blesensis. Hærebat tunc Henricus Angliæ rex in Normannia, et Ludovicus Franciæ rex contendeat Normanniæ ducatum, si non Roberto, Henrici regis fratri, in vinculis detento, ejus tamen filio, *Guillelmo* nomine, hæreditario jure deberi. Hinc crudele bellum exarsit, eo funestius quo exulceratæ mentes diuturnitate temporis plus virum collegerant. De eo bello legendus Alfordus in Annal. hoc anno, Sugerius in Vita Ludovici Grossi regis, et Ordericus lib. 12.

36. *Elnacinus Historiam Saracenicam absolvit.* — Obiit etiam *Mustadirus Billa* califa Habbasida, postquam califatui præfuisset annis xxiv et aliquot mensibus, ut tradit Georgius Elnacinus, qui in eo Historiam suam Saracenicam absolvit. Nam e lingua Arabica in Latinam vertit *Thomas*

Erpenius, et post mortem ejus *Jacobus Golius* ex illius testamento in lucem edidit. *Elnacinus*, ut notat Golius in Prefatione, Chronologiam potius Muhammedici imperii, quam Historiam contexit, paucisque perstringit quæ gesta sunt in Arabia, Ægypto et Perside. Natus est in Ægypto sæculo xiii ineunte, eoque velut notario principes imperii Saracenici usi sunt ad secretiora consilia, quem dignitatis gradum sub Muhammedico jugo, nonnisi per summas virtutes, via patet homini Christiano. Qualem fuisse *Georgium Elnacinum*, liquido constat, tam ex ipso nomine, quam etiam quod solemnī præfatione ablineat, qua religionem Mahumetanī suam profleri superstitione solent. Huc accedit, quod res Christianorum, Ecclesiasticas præsertim, in Annales suos tam diligenter referat. In his condendis præclaris rerum Orientalium scriptoribus, quales sunt *Abulfeda* geographus, *Abugiafarus* Tabarita, et *Mircondus* Persicus, auctor celeberrimus, inixus est. Vide quæ de eo, anno dcxxii, in medium attulimus. Porro *Mustadiro Billæ* successit *Atmostashed* filius ejus, ut tradunt *Abulpharajus* in Hist. Dynastiaram, et auctor anonymus Chronici Orientalis ab Abrabamo Ecdhellensi e tenebris erulus.

37. *Mediolanenses in gratiam Henrici imp. congregantur.* — Mediolanenses, qui Henrici imp. partes defendebant, hoc anno conventum coegere, de ejus excommunicatione acturi: « Marchiones et comites Longobardiæ », inquit Landulphus Junior cap. 34, apud Puricellum num. 329, « in hac tempestate convenerant Mediolani, ut ibi coram episcopis suffraganeis et comprovincialibus explicarent imperatoris innocentiam, et ipsum imperatorem perducerent in archiepiscopi (nempe Iordani), et episcoporum benevolentiam. Episcopi itaque consedentes in palatio Mediolanensi una cum archiepiscopo attente audierunt marchiones, et comites fideliter loquentes de domino suo: propter quorum verba quamplures arbitrati sunt imperatorem esse alienum ab excommunicationis culpa.

Sed cum archiepiscopus et episcopi contentiose adversus marchiones et comites, duces et reges (id est, jura præfensa a regibus Longobardiæ) disputarent, milites et cives Mediolani in atrio Ecclesiæ jurabant facere guerram Cumanis (id est Comensibus) donec Vicum et Coloniolum destruerent, civitatem quoque ipsam dissiparent ».

38. *Comensibus bellum indicunt.* — Finito conventu, cœptum decennale et exitiosum bellum adversus Comenses, quod Puricellus recte observat male a Sigonio in Hist. de Reg. Ital. lib. 2, in annum mxxx differri. Narrat bellum istud Landulphus loco laudato: « Ubi imperator, inquit, a Roma exivit (quod hoc anno contigisse certum), et se a prædicto papa Gregorio sive Burdino, prolongavit; mox manus Guidonis Comensis episcopi (Gelasio II addicti, et ab Henrico imp. alieni), ejusque militum et civium violenter apprehendit Landulphum Carcanensem, Mediolanensis Ecclesiæ clericum ordinarium et ministrum: et in ipsa apprehensione interfecit Othionem, ejusdem Landulphi nepotem, et urbis Mediolanensis egregium capitaneum. Hinc Jordanus pontifex Mediolanensem concionem militum, et civium clamantium in Cumanos (seu Comenses) intravit, ibique connumerando et lamentando quamplura mala, quæ Cumani fecerant in rebus etiam Mediolanensis archiepiscopatus, ipsam turbam concionis ad faciendam vindictam inflammavit. Eodem quoque tempore pontifex Jordanus obseratis januis Ecclesiarum, suo populo negavit introitum, nisi materiali gladio vindicaret malitiam Cumanorum. Demum ad sonitum vocis, et jussu hujus pontificis Mediolanensis populus cœpit facere guerram Cumanis: atque in primo exercitu, quo Mediolanenses castrametati sunt in Canneto, civitatem ipsam Cumanam occupaverunt: ipsique Landulphum, qui investituram Cumani episcopatus a rege, et ordinationem a patriarcha Aquileiensi suo metropolitano susceperat, de captione liberaverunt.

CALLISTI II ANNUS 4. — CHRISTI 449.

1. *Gelasius papa Cluniaci moritur, successore designato.* — Sequitur annus millesimus centesimus undevicesimus, Indictione duodecima, quo Gelasius papa Secundus (inquit Urspergensis abbas hujus temporis auctor) apud Viennam Synodum congregavit, eaque transacta, post paucos dies in monasterio Cluniacensi vitam præsentem in Domino finivit ». De hospilio Cluniacensi, quo susceptus est honorificentissime, hæc Pandulphus habet: « Cluniacense adiit monasterium, in quo juxta beati loci potentiam, et secundum quod Apostolicum virum condecuit, et receptus est pariter et benigne tractatus, omnesque bene et optime, qui intraverunt cum eo archiepiscopi et episcopi terræ. Sed et reges et principes, tanquam si Petrum viderent, tam per se quam per nuntios eum non parvis muneribus sedulo frequentabant. Qui omnes unanimiter a tanto patre ac domino plenioribus brachiis charitatis amplexi, ex lætis qui veniebant, lætiores effecti, domum cælestibus ferculis medullitis epulati redibant. Tractabat vir sanctissimus qualiter et de his quos secum duxerat, et quos in Urbe reliquerat, in omnibus et per omnia provideret. Et quidem multa jam ad libitum, Domino juvante, peregerat, cum jam quasi ad portum fore se deductum congaudens, subita passione correptus, quam Græci pleurisim appellari jusserunt, suis et multis fratribus undique convocatis, facta confessione, corpore cum sanguine Redemptorem accepit, ac juxta normam monasticam strato terræ corpusculo, sancta illa anima carne soluta est. Hinc ad cælum, Petro duce, conscendens, corpus honorabiliter intra limen Cluniacensis cænobii requiescit in pace. Amen. Quem Romani qui aderant, et qui Romæ remanserant, clerus omnis ac populus defleverunt, et quasi Patrem justitiæ nolentes consolari deflebant. Sedit autem annum unum, et cessavit episcopatus ejus dies decem et quinque ». Hucusque verba Pandulphi de Gelasio.

2. At vero ante obitum, cum se lethali morbo affectum, convalescere penitus desperaret sanctissimus Pontifex, consulere Ecclesiæ periclitanti

minime prætermisit, cupiens aliquem sibi succedere, qui in tanto ventorum conflictu naviculam fluctuantem regere posset: ad hoc virum alium præter Cononem Prænestinum episcopum, cum neminem sciret esse magis idoneum, cum his qui aderant cardinalibus, ut ipse eligeretur, cœpit exhortationibus agere. Sed quomodo idem vir insignis Prænestinus episcopus his se liberarit, ex Be-neventano Chronico, ab auctore qui tunc hæc scribebat, sic accipe: « Gelasius confestim se infirmitatis valide dissolutione teneri præsentens, cum aliis cardinalibus qui aderant, Prænestinum acciri jussit episcopum, qui cum ipso in Gallias navigavit, et imponi illi tanti honoris culmen Romanæ Sedis satagebat. Audiens itaque episcopus ejusmodi verba Pontificem proferentem: Absit, inquit, omnino absit, ut tanti honoris culmen, onerisque pondus indignus ego et infelix suscipiam, præcipue cum auxilio et seculari virtute divitiarum Romana Sedes temporibus nostris sub persecutionis flagello afflictæ defendi oporteat et muniri. Si vero meis acquiescere velitis consiliis, Viennensem archiepiscopum, virum ulique religiosum, prudentiaque animi, potentia et nobilitate seculari pollentem, ornatum virtutibus, ad tale tantumque patrocinium eligamus. Dei namque consilio, et beati Petri meritis, et vere hujus solatio Romanam Sedem sub tante persecutionis periculo diutissime oppressam credimus ad serenitatem atque triumphum sublevandam. Quid multa? Gelasio ægrolanti, et aliis cardinalibus, ac cæteris qui aderant sermo placuit. Nec mora, archiepiscopum illum accersiri jubent; et ut dicta factis compleant, perseverant. Qui vocatus, cum parasset profectionem suam, et se in itinere posuisset, adhuc in via dum esset, audivit magno suo dolore ipsum Pontificem ex hac vita migrasse. Siquidem die quarto kalendas Februarii Gelasius Pontifex in eodem monasterio feliciter ex hujus corporis ergastulo migravit ad Dominum ». Hæc ibi de Callisto, tunc vivente Pontifice, non electo, sed tamen consensu omnium designato præter consuetudinem, quod sic videbatur ejus temporis necessitas postulare, cum tamen ea

omnia ipsi essent incognita penitus. Dicta itaque die, quarto kalend. Februarii defunctum esse Gelasium, cæteri omnes æque consensunt. Quo quidem post martyres, qui fuso sanguine martyrium consummarunt, haud facile inter Romanos Pontifices aliquem quis invenerit, qui breviori vitæ tempore majora sit passus, ob idque præclariori corona donandus, atque celebrioribus fuerit præconiis celebrandus. Porro cum diem ejus transitus contigisse quarto kalendas Februarii ejus temporis scriptores tradant, dicendum est, post annum adhuc vixisse dies quatuor a tempore creationis suæ. Verum nec annum integrum absolvisse, sed duobus minus diebus sua periodo revolutum, ejus sepulchro inscriptum testatur Epitaphium quod sic se habet, a Petro Pictaviensi his versibus cloratum :

Vir gravis et sapiens, actu verboque Joannes,
Cum prius ex monacho pro multa strenuitate
Archilevita foret, et cancellarius Urbis,
Præsule Paschali meritis ad sidera raptus,
Promeruit tandem sacram conscendere Sedem,
Dignus post primum Gelasius esse Secundus.
Sed quia rege fuit non præcipiente levatus,
Horrendum fremitu principes. Et filia dulcis
More suo profugum suscepit Gallia patrem.
Si licuisset ei (pro certo crede) sub ipso
Virtus et pietas, et honestas cresceret omnis,
Et pax Ecclesæ toto floreret in orbe.
Nam rapuit mors atra virum, cum Pontificatus
Vix ageret primum pastor venerabilis annum,
Bina dies jam restabat, cum Cluniacensi
Dormit in proprio Romani juris asylo.
Hic igitur positus dilectos inter alumnos
Cum patribus sanctus requiescit, et optat et orbis
Conditor et Juxta veniat quandoque potenter,
Et cures lapsos in pristina membra reformet.
Felix inde munus semper, Cluniacæ, manebis,
Quod pater orbis Apostolicus summusque sacerdos
Ecclesæ, matrisque tuæ specialis, apud te
Transit ad superos, in te requiescit humatus.
Nec minus hic etiam felicem credimus illum,
Cui dedit ipse pius magno pro munere Christus,
Ut monachi monachum, Patrem quoque pignora chara
Jugiter aspici erent, lacrymisque rigando sepulchrum
Sacris in precibus specialem semper haberent.

Ilucisque Epitaphium, quod invenitur ante libros Epistolarum Petri Cluniacensis.

3. Cæterum non ista tantum versibus Petrus Pictaviensis tunc in laudem Gelasii papæ scripsit, sed funebrem quoque orationem dixit, quam adhuc extare, qui viderunt eam, affirmant. Erat ipse Petrus tunc ejusdem monasterii Cluniacensis monachus. Porro stemma Gelasii ex comitibus Cajetanis deductum, summo labore a Constantino Cajetano monacho Benedictino exaratum vidimus. His de Gelasii obitu atque funere dictis, jam ad ejus successoris creationem convertamus orationem.

4. *Callisti papæ II creatio, quæ Romæ et Germaniæ rite innotescit.* — Fuit iste Guido, natione Francus, archiepiscopus Viennensis, sanctæ Romanæ Ecclesiæ cardinalis, qui longo tempore sub Paschali legatione Apostolica honestissime functus adversus schismaticos omnes, ut quæ de eo

contigerunt sæpe superius dici declarant, ex regibus genus ducens, imo (ut Sugerius ait in Ludovico) imperialis et regiæ celsitudinis derivativa consanguinitate generosus, magnum tempore schismatis fuit Catholicæ Eccl. propugnaculum. « Hic », inquit Pandulphus, « a cardinalibus qui cum papa Gelasio, jam in Cluniaco sepulto, ab Urbe in Franciam venerant, dum esset ante archiepiscopos Viennensis, in papam Callistum electus est. Qui se indignum iterato reclamans, illiccir modis omnibus resistebat, quia et incertum habebatur a multis, utrum Romæ ratum factum inijusmodi teneretur. Propter quod vix cappa rubea amictiri sustinuit, donec nuntii redeuntes Roma per dominum Petrum tunc vicarium episcopum Portuensem, per cardinales omnes, per dominum Petrum Leonis (nam iste nimum laboravit in verbo propter diaconum filium summi Petrum Leonis, qui potissimum in Francia id peregerat) per præfectum, et consules, per clerum et populum viva voce ac litteris, electionem ipsam canonicè jureque firment ».

Sed quid de sua electione ei fuerit per visum divinitus præmonstratum, sic narrat Sugerius in Ludovico : « Cum in somnis proxima nocte, apto satis, licet ignoto præsagio, vidisset sibi a persona præpotente lunam sub chlamyde repositam committi, ne causa Ecclesiæ transitu Apostolici periclitaret, ab ea quæ aderat Romana Ecclesia in summum Pontificem electus, visionis veritatem enucleatius animadvertit ». Quod magis magisque perspicuum reddiderunt eventa; siquidem diuturnum bellum ob investituræ conflatum, diu multumque Ecclesiam fatigans et lacerans, cedente tandem imperatore, ab eodem Callisto papa felicissime compressum est.

5. Inter hæc autem ita Callistus electus de sua electione sicut ad alios, ita ad Adalbertum archiepiscopum Moguntinum has litteras dedit, quas recitat Urspergensis :

« Dominus noster felix memoriæ Gelasius a Vienna discedens, injunxit mihi, ut ad ejus præsentiam festinarem, postquam ipse Cluniacum pervenisset. Quod cum post dies aliquot implere satagerem, in itinere de ejus obitu mihi nuntiatus est. Ego ut fratribus, qui cum domino eodem venerant, prout ratio exigebat, solatium exhiberem, Cluniacum cum gravi dolore perrexi. Dum autem super eorum consolatione attentius cogitarem, ipsi gravissimum mihi onus, et vires meas omnino transcendens, imposuerunt. Congregati namque in unum die altero post adventum meum episcopi cardinales, et centum clerici et laici Romanorum, invitum me penitusque renitentem in Romanæ Ecclesiæ Pontificem Callistum unanimiter assumpserunt ». Ilucisque ex Urspergensis Epistola novi Pontificis; pergit vero Pandulphus :

6. « Facto igitur hoc omnium subscriptionibus optime roborato, tunc papa solemniter a Lamberto Ostiensi episcopo et aliis quamplurimis in Dei no-

mine consecratur ». Pergit de ejus in Urbem instituta protectione. Sed de his quæ gesta sunt Romæ, ubi de his omnibus litteras accepere, ex sæpe citato Beneventano Chronico ista accipe : « Cardinales qui aderant, Petro Portuensi episcopo, quem Pontifex Gelasius Romæ vicarium dimiserat, de ejusdem Gelasii obitu, et qualiter archiepiscopum Viennensem in Pontificem Callistum elegerant, studiose delegaverunt. Portuensis autem episcopus, his litteris acceptis, super ipsius Apostolici obitu lacrymis manantibus valde se contristatum ostendit; et illico Capitolium ascendit, et litteras ostendit Romanis, quibus lectis, una voce et concordia Dominum laudare omnipotentem, qui eis virum prudentem et ornatum moribus Pontificem largitus esset. De obitu vero Gelasii Apostolici valde turbati sunt. His ita gestis, idem Portuensis episcopus Hugoni cardinali legato relicto Beneventi, et Landulpho Beneventano antistiti, clero et populo suis litteris eadem significavit. Quibus auditis, continuo Landolphus antistes cives, presbyteros omnes et clericos, ad sacrum fecit convocari palatium, ut eis ordinem rerum renunciaret, quibus acceptas litteras jussit legi. Nec mora, prædicti Callisti electionem unanimiter laudantes firmaverunt, deinde in *Te Deum laudamus*, canendo prorumpunt. Sicque archiepiscopus ipse et Hugo cardinalis, clericorumque turba copiosa, et civium multitudo a prædicto sacro palatio usque ad episcopium cantando descendimus. Postea vero eminentiorem locum antistes ascendens, cives hortatus est, ut fidelitatis manum erga Romanam Sedem perpetuo conservarent. Quo facto, ad propria remeavimus ». Hactenus ibi ex Chronico Beneventano. Pergit vero Pandulphus :

7. « Missi sunt autem ab Urbe legati, secum ferentes confirmationem papæ Callisti, quam non in Galliis tantum, sed etiam per Germaniam innotescere voluerunt, præsertim in collecto tunc conventu Triburiensi contra Henricum imperatorem, de quo habet ista Urspergensis abbas hoc anno : « Henricus totius regni et sacerdotum atque procerum nuntiis compulsus, generalem fieri apud Triburium conventum assensit. Ubi de omnibus quæ sibi imponerentur, juxta Senatusconsultum se satisfacturum spondit. Quo scilicet conventu Rhenanis in partibus habito, tam adversarium quam amicorum imperator concorditer usus consilio, unicuique per totum regnum suis rebus spoliato propria concedi præcepit; cunctaque regum antiquorum fiscalia suam in ditionem interim recepit, pacque per universas provincias ab omnibus haberi collaudatur, sed parum profecisse reipsa comprobatur. Aderant etiam legati, tam Romanorum quam Viennensium, imo diversarum Ecclesiarum missi, confirmantes electionem domini Callisti. Cui profecto dum universi nostrates episcopi obedientiam professi, Synodum quæ juxta festum S. Lucæ indiciebatur, collaudasset fieri, ipse rex semetipsum ibidem pollicebatur, ob

reconciliationem universalis Ecclesiæ præsentandum iri. Id enim Catalaunensis episcopus et Cluniacensis abbas apud Argentinam ipsum convenientes multis ratiocinationum conatibus obtinuerunt.

8. « Ejusdem tamen actionem Rhemensis Concilii, si quis plenarie cognoscere quærit, in litteris ejusdam scholastici, nomine Hessonis, eleganter enucleatum reperire poterit, id est, qualiter rex inter regnum et sacerdotium de concordia facienda consenserit. Insuper eidem Concilio, cui videlicet decimo tertio kalendas Novembris prædictus papa Callistus Secundus, vallatus quadringentis viginti sex Patribus, coram innumera multitudo cleri ac populi præsedit, non adeo se præsentem Henricus, vicinum tamen exhibuerit, ubi et colloquio suo domini papæ legatis concessio tandem inducias denuo quaesierit propter generale colloquium cum principibus habendum, pro investituris scilicet Ecclesiasticis, quas tantopere cogebatur amittere. Ad ultimum vero idem Apostolicus, inita inter se et regem concordia, synodalia prædecessorum decreta confirmaverit, aliaque nonnulla, quæ res exigebat, naviter addiderit; sicque post dies fere duodecim in virtute Spiritus sancti rite finito Concilio, cunctos Apostolica benedictione confirmatos ad propria redire permisit unumquemque cum gaudio ». Hæc ipse summam.

9. *Concilium Rhemense et Henrici imperatoris excommunicatio renuentis dimittere investituras.* — Fuit quidem ista Synodus Rhemis congregata valde celebris, cujus licet citata ab Urspergensis per Hessonem scripta non extet, tamen de ea frequens habetur in ejus temporis scriptoribus mentio. De ipsa autem paucis Sugerius agit in Ludovico his verbis : « Sublimatus itaque tantæ celsitudinis dignitate gloriosus, humiliter sed strenue Ecclesiæ jura disponens, amore et servitio domini Ludovici regis, et nobilis Adelaïdis reginæ neptis, aptius Ecclesiasticis providebat negotiis. Rhemis itaque celeberrimum celebrans Concilium, cum legatis imperatoris Henrici pro pace Ecclesiæ sedere differentibus, in marchiam versus Mosonum occurrisset, nec profecisset, quemadmodum et antecessores fecerant, ipsum Henricum anathematis vinculo pleno Francorum et Lotharingorum Concilio innodavit ». Hæc de excommunicato iterum imperatore per Callistum papam in Rhemensi tunc celebrato Concilio Sugerius. Rogerius autem in Annalibus Anglicanis hujus, cum meminit Rhemensis Concilii, plerique ab aliis prætermissa recenset, et hæc inter alia : « Numeratæ sunt ibi personarum pastoralium virgæ quadringente viginti quatuor, inter quos et Turstinus Eboracensis archiepiscopus, qui ibidem ab Apostolico est consecratus. Postera, inquit, die, residentibus ordine in Concilio Ecclesiasticorum graduum personis, assidente quoque rege Francorum Ludovico, multisque aliis principalibus viris, ex consensu cunctorum Patrum renovantur statuta de statuen-

dis, et rescindenda de rescindendis, quorum hæc sunt quinque Capitula :

10. « Quæ sanctorum Patrum sanctionibus de pravitate simoniaca stabilita sunt : nos quoque sancti Spiritus iudicio et auctoritate Sedis Apostolicæ confirmamus. Si quis ergo vendiderit aut emerit, vel per se, vel per quamlibet submissam personam, episcopatum, abbatiam, decanatum, archidiaconatum, presbyteratum, præposituram, præbendam, altaria, vel quælibet Ecclesiastica beneficia, promotiones, ordinationes, consecrationes, dedicationes Ecclesiarum, clericalem tonsuram, sedes in choro, aut quælibet Ecclesiastica officia : et vendens et emens dignitatis et officii sui ac beneficii periculo subiaceat. Quod nisi resipuerit, anathematis mucrone perfoctus, ab Ecclesia Dei quam lēsit, modis omnibus abscondatur.

« Episcopatum, abbatiam, aut quæcumlibet Ecclesiasticarum possessionum investituram per manum laicam fieri penitus prohibemus. Quicumque igitur laicorum deinceps investire præsumpserit, anathematis ultioni subiaceat. Porro qui investitus fuerit, honore quo investitus est, absque spe recuperationis omnimodo careat.

« Universas Ecclesiarum possessiones inconcussas in perpetuum et inviolatas esse decernimus. Quod si quis eas abstulerit aut invaserit, aut potestate tyrannica detinuerit, iuxta illud beati Symmachi Capitulum, anathemate perpetuo feriat.

« Nullus episcopus, nullus presbyter, nullus omnino de clero Ecclesiasticas dignitates vel beneficia cuiuslibet et quasi hæreditario jure derelinquat. Illud etiam adjicientes præcipimus, ut pro baptismatis, chrismatis, olei sacri, ac sepulture acceptione nullum omnino pretium exigatur.

« Presbyteris, diaconibus, subdiaconibus, concubinarum et uxorum contubernia penitus interdiciamus. Si qui autem hujusmodi reperti fuerint, Ecclesiasticis et officiis priventur et beneficiis. Sane si neque sic immunditiam suam correxerint, communione careant Christiana». Illicusque quinque Concilii canones. Pergit auctor narrare quæ post hæc sunt in Synodo per eundem Pontificem actitata :

11. « Hæc Concilii decreta Henrico imperatori, cum non longe abesset, ex Concilio primum per honestas personas, ad ultimum per ipsum Apostolicum mandantur, ut ante separationem Concilii notum esset, utrum Ecclesiis per regnum et singulas quasque sibi subjectas provincias consentiat canonicas electiones, videlicet ut episcopi et abbates eligantur ab Ecclesia, et liberas consecrationes, ut ubi et a quibus oporteat electi consecrentur, ut non per investituram pastoralis virgæ et annuli, sed per ostium, id est, Christum ingradientur, et investituram rerum Ecclesiasticarum nihil omnino sibi laicalis exeat persona. Ad hæc ille respondit, nihil in his se prætermisurum, quod sui juris esset, suorumque sibi confutit antiqua consuetudo progenitorum. Quandoque tamen flexus auctoritate

generalis Concilii, tria illa priora concessit ; ultimum vero, scilicet investituram rerum Ecclesiasticarum, concedere noluit. Quapropter reverso ad Concilium papa, Henricus excommunicandus decernitur. Quod cum quidam in Concilio ægre ferrent, sententiam protulit Apostolicus, ut qui in hoc scandalizarentur, exeuntes, a fratrum consortio separarentur, proposito de illis septuaginta discipulis exemplo ¹, qui cum de carne Domini manducanda, et sanguine bibendo scandalizarentur, retro abierunt, et jam cum illo non ambulabant. Et quoniam, inquit ², qui non colligit cum Domino spargit, et qui non est cum eo, adversus illum est, illam inconsultum tunicam desuper contextam, scilicet sanctam Ecclesiam, qui nobiscum sentiendo indiscissam servare nolunt, dissentiendo a nobis discindere contendunt. Talia sermoinante Apostolico, illico omnes in eundem consensum reducti, in imperatorem Henricum excommunicationis sententiam jaculantur ». Hæc gesta esse contra imperatorem, ex Actis Rogerius in Annalibus tradit.

12. *Congressus regis Anglorum cum Callisto papa.* — His autem subjicit ea, quæ post Concilium ab eodem Pontifice cum Anglorum rege, qui in Gallias venerat, tunc sunt actitata, occasione consecrati ab eodem Callisto papa archiepiscopi Eboracensis, atque : « Tandem post dies aliquot dissoluto Concilio, Henricus rex Anglorum offensus Turstino archiepiscopo, quod præter consensum suum, non uti mos antiquus exigebat, se consecrari fecisset, interdixit ei reditum in omnem dominationis suæ locum. Post hæc Callistus papa Gisortium venit, quo ad ejus colloquium rex Anglorum occurrit. Acta sunt multa inter illos, quorum gratia præ erat tantas convenisse personas. Inter quæ rex a papa impetravit, ut omnes consuetudines, quas pater suus in Anglia et in Northmannia habuerat, sibi concederet ; et maxime, ut neminem aliquando legati officio in Anglia fungi permetteret, si non ipse (aliqua præcipua querela exigente, quæ ab episcopis regni sui terminari non posset) hoc fieri a papa postularet ». At non ista simpliciter, sed tantum licita concessisse, docent acta cum S. Thoma, inferius enarranda.

13. « Quibus omnibus pro statu temporis definitis, papa rogat regem Turstino amicum fieri ; eumque pontificatui, ad quem ipsum consecraverat, pro amore suo restitui. At rex hoc se, dum viveret, non facturum, in sua fide spontundisse confessus est. Et ille : Ego Apostolicus sum, et si feceris quod postulo, ab hac fide sponsione te absolvam. Tractabo de hoc, ait, et quod consilii mei tenor invenerit, tibi notificabo. Hinc a papa recessit, cui per intermuntios de negotio ita respondit : Pro amore vestro, qui tantopere postulatus, ea conditione Turstinum admitto in pontifica-

¹ Matth. xv. — ² Luc. xi.

tum, ut subjectionem, quam prædecessores ejus fecerant Ecclesiæ Cantuariensi, faciat; aliter me regnante Ecclesiæ Eboracensi non præsidebit. His ita gestis abeunte Apostolico, Turstinus remansit in Gallia ». Et inferius de Epistola ab eodem Callisto papa pro Turstino in Angliam scripta hæc habet : « Epistola Callisti pape super Turstino directa ad regem Henricum, et Radulphum Cantuariensem archiepiscopum. Ipsi sacerdotale et episcopale interdictum officium, et tam in matrice Cantuariensi, quam in principali Eboracensi Ecclesia, cum suis parochiis divina omnia celebrari officia cum sepultura mortuorum prohibet, præter baptisma infantum, et penitentias morientium, nisi infra unum mensem post acceptionem ipsius Epistolæ Turstinus sine exactione professionis in suam restitatur Ecclesiam. Quamobrem a rege mox revocatus in Angliam, reducit in archiepiscopatum suum ». Illicque de causa Turstini, a papa Rhemis ante Concilium consecrati.

14. *Callistus Rhemis Norberto munus prædicandi confirmat, Ecclesiam dedicat, Cistercienses ornat Privilegio.* — Revocemus autem orationem ad Rhemensia Acta Pontificis, ne quid omitteremus de rebus gestis tunc Rhemis ab eodem Callisto papa. Dum meminit hujus quoque Concilii Rhemensis, per Callistum Pontificem celebrati ¹, Hugo in Vita Norberti ordinis Præmonstratensis institutoris, illuc ipsum Norbertum accessisse pro confirmatione muneris Evangelii prædicandi, quod ab ejus prædecessore Gelasio impetrarat, tradit; quod obtinuit, imo commendavit cum episcopo Laudunensi, sub quo proficeret. Paulo post vero Præmonstratum locum ita dictum abiens, ibi suæ institutionis ex præscripto regulæ S. Augustini fundamenta jecit. Insumpsit in his annum Callistus papa, qui Romam se contulit anno sequenti, ut suo loco dicemus. Quomodo autem Henricus imperator ex eo, quod Rhemis in Concilio magno cum dedecore excommunicatus esset, eandem Rhemensem civitatem penitus exscindere statuerit, sed Deo prohibente, et sanctis repugnantibus, cum ignominia regredi sit coactus, dicturi sumus inferius.

15. Inter alios episcopos huic Rhemensi Concilio interfuit Adefonsus episcopus Salmanticensis in Hispania, qui reversurus ad propria, Cluniaci vivendi finem fecit, ibique sepultus, hac inscriptione ejus sepulchrum est insignitum :

Urbs est Hispaniæ regionis quam Salamancam
Indigenæ dicunt, hanc ordine pontifici
Rexit Adefonsus, tumulo præsentem sepultus,
Qui de Concilio Rhemensi dum remearet,
Hic finem fecit panter vitæque viæque.

Habetur apud Petrum Cluniacensem ante libros Epistolarum.

16. Antequam autem e Gallia Callistus papa

recederet, constat tres saltem Ecclesias dedicasse, nimirum Ecclesiam Sancti-Mauri, de qua hæc Petrus Diaconus ¹ : « Callistus una cum episcopis et cardinalibus ad beati Mauri monasterium in Glanofolio situm, et huic Cassinensi cœnobio subditum pervenit; rogatusque a cardinalibus qui secum aderant, et monachis, et ab ipso abbate Girardo, ejusdem confessoris Christi Mauri Ecclesiam solemniter dedicavit. In qua etiam corpora sanctorum Antonii et Constantiani, qui de Cassinensi cœnobio ad Gallias cum beato Mauro perrexerant, cum magna reverentia posuit ». Hæc Petrus. Pandolphus insuper addit in Provinciâ dedicasse Ecclesiam Sancti-Juliani. Sed et illud pariter exploratum habetur in historia Antoniana ², eundem Pontificem Callistum dedicasse in sua provincia Viennensi Ecclesiam S. Antonii Magni, sitam apud montes Desiderii, tum temporis frequentii populorum concursu celebrem.

17. Eodem quoque tempore, Callistus papa ejusmodi Privilegio munire voluit suos, quos magno opere diligebat, Cistercienses; sic enim se habet in eorum institutionis antiquioribus monumentis :

« Callistus episcopus, servus servorum Dei, charissimis in Christo filiis Stephano venerabili Cisterciensis monasterii abbati, et ejus fratribus, salutem et Apostolicam benedictionem.

« Ad hoc in Apostolicæ Sedis regimen, Domino disponente, promoti conspiciuntur, ut ipso præstante religionem augere, et quæ recte atque ad salutem animarum statuta sunt, nostri debeamus auctoritate officii stabilire. Idcirco, filii in Christo charissimi, petitioni vestræ charitate debita impertimur assensum, et religioni vestræ paterno congratulantes affectu, Dei operi quod cœpistis, manum nostræ confirmationis apponimus. Siquidem consensu et deliberatione communi abbatum et fratrum monasteriorum vestrorum, et episcoporum, in quorum parochiis eadem monasteria continentur, quadam de observatione regulæ beati Benedicti, et de aliis nonnullis, quæ ordini vestro et loco necessaria videbantur, capitula statuistis; quæ nimirum ad majorem monasterii quietem, et religionis observantiam, auctoritate Sedis Apostolicæ petitis confirmari. Nos ergo vestro in Domino profectui congaudentes, capitula illa et constitutiones auctoritate Apostolica confirmamus, et omnia in perpetuum rata permanere decernimus. Illud nominatim omnimodo prohibentes, ne abbatum aliquis monachos vestros sine regulari commendatione suscipiat. Si quæ igitur Ecclesiastica secularisve persona nostræ confirmationi et constitutioni vestræ temeritate aliqua obviare præsumperit, tanquam religionis et quietis monasticæ perturbatrix, auctoritate beatorum Petri et Pauli et nostra, donec satisfaciatur, excommunicationis gladio feriatur. Qui vero conservator extiterit, om-

¹ Hugo in Norber. c. 16. 17. apud Sur. tom. III, die VI Julii.

² Pet. Diacon. Chr. Cass. l. IV, c. 66. — ² Hist. Anton. p. 2, c. 37, 38.

nipotentis Dei et Apostolorum ejus benedictionem et gratiam consequatur. Interdicimus autem, ne quis conversos laicos professos vestros ad habitandum suscipiat. Ego Callistus Catholicæ Ecclesiæ episcopus, confirmavi et subscripsi. Datum Sodaloci per manum Chrysogoni S. R. E. diaconi cardinalis ac bibliothecarii, decimo kal. Januarii, Indict. xii, Incarnationis Dominicæ millesimo centesimo decimo nono, Pontificatus autem domini Callisti II papæ anno primo ».

18. *Petri Cluniacensis litteræ ad imperatorem Constantinopolitanum et patriarcham pro restitutione cænobii.* — Quod pertinet ad res Orientis, Joannes imp. ubi imperii habenas moderandas suscepisset, et hoc innotuisset in Occidente, Petrus abbas Cluniacensis pro restitutione Cluniacensium cænobii, quod erat Constantinopoli, ad eum has litteras dedit ¹:

« Glorioso principi, et magnifico Constantinopolitanae urbis imperatori, Joanni Calo, frater Petrus humilis Cluniacensis abbas, salutem ab eo qui dat salutem regibus.

« Gratias omnipotenti Regi regum, cujus regnum est omnium seculorum, qui imperatoriam majestatem vestram super omnes Christiani nominis principes exaltavit, et ad tuendam toto orbe Ecclesiam suam, velut in medio Orientis, Occidentis, Aquilonis constituit, unde olim Aquilonaribus barbaris, sed et ultimis ac pessimis Christiani nominis inimicis Arabibus, in occiduas et meridianas plagas irruentibus, regni vestri partes, etsi oppugnari, nunquam tamen expugnari permisit; sed in vos magni illius Romani imperii gloriam nomenque transfudit. Voluit ut sicut potestas, sic et vocabulum ad vos transmigraret, ac religione mutata, imperio translato, sicut a pagano Romulo Roma dicebatur, sic a Christiano reparatore Constantino vestra urbs Constantinopolis vocaretur. Hanc, ut dixi, velut metam intransmeabilem, velut invictum obicem, velut præfixum quem nunquam liceat transgredi terminum, omnia providens supernus oculus, paganis regibus, Barbaris gentibus posuit, quo Oriens terreatur, Boreas subdatur, Occidens defendatur. Isto plane regni vestri obice repulsi, et antiqui erroris si qui supersunt pagani, et novi hostes Christiani nominis, Turci sedibus propriis contenti in seipsos reprimuntur, ut nec aliena invadere audeant, et divini brachii virtute, inanimæ potentia vestra roborante, sua etiam plerumque amittant. Super quibus regali magnitudini nos quidem licet humiles gratias agimus, a Deo vero æterna vos decorandum corona, si in his fideliter permanseritis, nec in modico dubitamus.

19. « Præter hæc pro Hierosolymitano rege, pro Antiocheno principe, pro universis denique Callis nostris fidem vestram et nobilitatem rogamus, ut quia ipsi magnis urbibus, prædiis, paren-

tibus, et locuplete patria, Domini Jesu Christi amore dimissis, loca redemptionis humanæ, non altero quam sui sanguinis pretio mercati sunt, et proprio assidue periculo defendunt: vos ejusdem Christi nostri amore eos sustentetis, foveatis, juvetis, ne tanto zelo fidei, tantisque laboribus parta (quod absit) pereant. Erit illud non tantum merces fidei vestra, sed etiam tutela non parva imperii vestri, quando sitis vos Aquilonis, sic et illi impetus Orientis obtundent. Fecit hoc inter egregios principes recensendus Alexius pater vester, cui sicut in regno feliciter successistis, sic deest, ut in tam bono opere felicius succedatis. Qui inter multa laudabilia quæ gessit, non passus Græciam suam suâ universa bona includere, ad remotissimos manum beneficii sui extendit, et non solum transmarina, sed etiam transalpina loca copiosis muneribus et pretiosis ornamentis ditavit. Inter quæ Cluniaco monasterio, omnibus Latinis regibus et gentibus notissimo, eique subito magno et religioso loco, qui Charitas dicitur, monasterium juxta ipsam regiam civitatem, quod Civitot vocatur, dedit, et in perpetuum abbatibus Cluniacensis et prioris de Charitate obedientie subiecit. Quod nostris aut mortuis, aut recedentibus, aut expulsis, alieni monachi invaserunt, et jam, ut audivimus, fere per triennium abstulerunt. Oro igitur, et mecum universa Cluniacensis congregatio majestatem et pietatem regiam deprecatur, ut nobis et loco de Charitate, per harum litterarum latores monasterium ablatum restitui faciat, et pro æterna animæ suæ salute servos Dei ibidem habituros ab injuriis defendat, et in pace custodiat.

« Et ut aliquid beneficii spiritualis vobis ista facientibus rependamus: sicut prædecessores nostri, et nos ipsi, reges Francorum, reges Anglorum, reges Hispanorum, reges Germanorum, ipsos imperatores Romanorum, ac vicinos vobis reges Hungarorum, confratres et comparticipes omnium beneficiorum Cluniacensis congregationis fecimus, ita sublimitatem vestram ex parte omnipotentis Dei, et beatissimæ Mariæ semper Virginis Dei genitricis, et sanctorum Apostolorum et omnium sanctorum in iisdem spiritualibus beneficiis plene et perfecte (in quantum licet) suscipimus: ut omnipotens Salvator et hic temporale regnum vobis adaugeat et conservet, et in futuro cum sanctis regibus vos ad sempiternum perducatur. Amen ». Hæc ad imperatorem. Scripsit et eadem ex causa ad patriarcham Constantinopolitanum litteras quæ sequuntur ¹:

20. « Venerabili et magno pontifici Dei Constantinopolitano patriarchæ, frater Petrus humilis Cluniacensis abbas, æterni pontificii stola indui, et gloria et honore coronari.

« Quamvis et terrarum remotio et linguarum divisio nobis invicem et vultus invident et verba subducant, tamen unus Dominus, una fides, unum

¹ Petr. Clun. I. IX. Ep. XXXIX.

¹ Lib. IV. Ep. XL.

baptisma, una caritas, et divisa conjungere, et affectus unire, et sermones debent aliquando communicare. Debemus eo glutine niri in terris, quo nunquam dissociandi coherere expectamus in cælis, ut illud in miseriis sit nobis refrigerium, quod in beatitudine perfectum erit præmium. Utinam posset in me corpus, quod concupiscit spiritus, ut urbem a cæli Rege Jesu Christo, et a principe terræ Constantino in Christo fundatam videre, et in ea non ædificia vel ornatus, sed fidem Deo subditorum principum et prophetarum, Apostolorum, Evangelistarum ac multorum martyrum, de diversis mundi partibus illuc translatorum, velut commune cœmeterium videre et adorare possem : funderem qualescumque preces ad sanctos illos, fidei et spei nostræ patres; magnaue mihi spes consequendæ gigneretur salutis, si quos ejus habui prædicatores, habere mererer et pro ea intercessores. Videreim et optabilem faciem vestram, et in vobis beatos urbis vestræ pontifices venerarer, et ex eorum beatitudine multiplicem miseriam meam, ut par esset, deferrem; inirem fœdus nunquam dissolvendum, et in mutuum ac spiritualem amorem, nisi forte sperneretis, jurarem. Orarem

præsens, quod et absens rogo, ut me et Cluniacensium fratrum ovile in vestris popultique vestri precibus spirituali charitatis dono susciperetis : quod et a nobis, quod et ad nos vel nostros pertinet, pari affectu consequeremini. Rogarem post illa, quod et nunc rogo, ut Cluniacensi Ecclesiæ, et monasterio de Charitate, locum, qui Civitot dicitur, juxta Constantinopolim positum, restitui juberetis, ac dominum imperatorem, si necesse esset, pro eo restituendo rogaretis. Dedit illum Cluniaco, et monasterio de Charitate etiam apud nostros magni nominis et gloriæ imperator Alexius pater ejus, cui sicut in regno, sic multo magis in justitia et pietate illum deest succedere. Commendamus ergo excellentiæ Pontificali monachorum et fratrum nostrorum humilitatem, ut per eum nobis nostra restitui faciatis, quatenus et justitia quod suum est consequi, et a patre filii mereamur exaudiri». Illicque Petrus; quæ ad significandam inter Latinos et Græcos conservatam hactenus communionem, hic oportuit recitasse : cum alioqui nostri historici melius habitos Latinos Christianos sub Joanne filio, quam sub Alexio patre testentur.

Anno periodi Græco-Romanæ 6612. — Anno Æræ Hispan. 1157. — Anno Hegiræ 513, inchoato die 14 April., Fer. 2. — Jesu Christi 1119.

— Callisti II papæ 1. — Henrici V reg. 14. imp. 9. Joannis Comneni imp. 10.

1. *Concil. Viennense sub Gelasio II commentitium.* — A num. 1 ad 5. Urspergensis in Chron. tradit, *Gelasium II* apud *Viennam* Synodum congregasse, et post paucos dies in monasterio Cluniacensi obiisse. Urspergensem secuti sunt Baronius num. 1, Labbeus tom. x Concil. pag. 825, Constantinus abbas in Commentario ad Pandulphum Pisanum, Ciaconius, alique. Verum eos hallucinatos esse, Gelasiumque II nullum Viennæ Concilium coegisse, apud me certum. Falco enim in Chron. ad finem anni mxcviii, quo annum mxcix inchoamus, ait : « Dehinc Apostolicus ipse stabilivit, ut in sequenti mense Martii Synodum cum Patribus Franciæ, Teutonicisque celebraret, ibique de sacerdotii et de regni dissidio longe lateque habito, Spiritu sancto mediante, loquerentur, etc. Sed antequam terminus statutus Synodum celebrandi advenisset, apud monasterium Sancti-Petri, quod vocatur Clunia, ubi diligenter morabatur, ægritudinis mole detentus est », quod ex Falcone

Baronius num. 2 narrat. Præterea Pandulphus, qui Gelasium II comitabatur, hujus Concilii non meminit, sicuti nec Hugo monachus Cluniacensis in Epistola ad Pontium abbatem suum, ubi refert quæ Gelasius II in Gallia egerit. Ejus narrationis partem anno superiori retulimus, et mox reliquam describemus.

2. *Gelasius II Conc. Rhemis celebrare decreverat.* — Verum quidem est, Gelasium II proposuisse Concilium in Gallia celebrare; sed ad id urbem Rhemensem elegerat, ut testatur Eadmerus hujus temporis scriptor lib. 5 Novorum : « Papa Gelasius per mare Burgundiam venit, et adventus ejus mox Galliæ toti innotuit. Excitati sunt quique potentes cum mediocribus ei occurrere, et certatim parabantur interesse Concilio, quod ipse disponebat se media Quadragesima Rhemis celebraturum. Rodulphus quoque (Cantuariensis) archiepiscopus, audito papæ adventu de Rotomago, ubi eo usque morabatur, egressus, impiger ei occurrere statuit.

Sed ubi aliquantum itineris confecit, accepit a quibusdam ipsum papam longius discessisse, et versus Hispanias ire proposuisse : et postea mortem ejus narrat. Idem habetur in Chron. Mauriniacensi lib. 2 tom. iv Duchesnii : « Apud Remim metropolim regni Concilium disponebat, in quo se magna dispositurum credebat; sed divino judicio, quod occultum nunquam tamen injustum est, aliter disponente, preventus ægritudine gravissima etc. » et dein chronographus ejus mortem recitat; qui tamen de Callisto II post pauca interposita verba, nolat eum *Tolosæ* primum, *Rhemis* secundo Concilium celebrasse, sed nec ipse, nec ullus alius ex antiquis præter Urspergensem ac Nangium in Chron., Gelasium II aliquam Synodum in Galliis habuisse memorarunt. Quare non dubitandum, quin Urspergensis hallucinatus fuerit, et Nangium in errorem induxerit. Is tamen non Viennæ, sed Rhemis Concilium coactum voluit.

3. *Moritur Gelasius II.* — Hugo monachus Cluniacensis citatus de Gelasio II ait : « Qui denuo convalescens, et Cluniacum suum pervenire desiderans, Lugdunum Galliarum pertransit, Matisconam descendit, ubi gravissima ægritudine confectus, se Cluniacum perferri instantissime precepit. Quo deportatus, summaque reverentia susceptus, completo episcopatus sui anno i et diebus iv, in medio fratrum, circumstantibus episcopis cardinalibus, in propria domo proprius pastor in pace Cluniaco quievit ». Cum vero Callistus II apud Baronium hoc anno num. 5 dicat : « D. N. Fel. memorie Gelasius a Vienna discedens, injunxit mihi, etc. », et statim mortem ejus referat, apparet *Gelasium II* Avenione Viennam, ex ea urbe Lugdunum, indeque Matisconam et Cluniacum venisse, sed Viennæ moram facere non potuisse. Obiit autem Cluniaci *IV kal. Februarii*, uti scribunt Falco apud Baronium n. 2, Ordericus l. 12, Fulcherius Carnotensis lib. 3 Hist. Hierosol. aliique. Quoad durationem Sedis ejus, fuit ea anni unius et dierum iv vel v. Nam Hugoni monacho Cluniacensi laudato consentiunt omnes nostri Catalogi, et ille qui habet eum sedisse annum unum, dies quatuor, excludit diem emortualem, qui etiam non numeratur ab Hugone monacho. Martinus vero Polonus et auctor Fasciculi Temporum, qui habent dies quinque, diem emortualem includunt. In Chronico Gotfridi Viterbiensis, hujus temporis scriptoris, nonnisi libriorum errore legitur eum sedisse *annum unum, dies sex*. Ex quibus consequens est, Gelasium Pontificem Romanum anno superiori electum fuisse *VIII kal. Febr.*

4. *Sedis ejus duratio.* — Baronius quidem num. 2 refert Epitaphium Gelasii II a Petro Pictaviensi versibus elaboratum, in quo dicitur eum sedisse *annum unum, duobus diebus exceptis*, et numero sequenti tradit eum quoque funebrem Orationem dixisse, « quam adhuc extare, inquit, qui viderunt eam, affirmant ». Indeque Papebrocius in Conatu Chronico-Hist. ait, Gelasium II se-

disse menses xi, dies xxix. Verum licet Petrus Pictaviensis monachus Cluniacensis fuerit, tamen illud Epitaphium, ab aliquo imperito serius editum, male illi attribui apud me certum; cum Gotfridus Viterbiensis, qui hoc sæculo floruit, Bernardus Guido citatus in magno Chronico Belgico, Wernerus in Fasciculo Temporum, omnesque Catalogorum quos mihi videre licuit auctores, Hugoni Cluniacensi suffragentur; nullus vero fictitio illi Petro Pictaviensi. Quod si Epitaphium illud antiquitus Gelasii II sepulchro insculptum fuisset, non deessent ex veteribus, qui ejus meminissent. Denique Petrus Marrierus, monachus Ordinis Cluniacensis, auctor Bibliothecæ Cluniacensis, pag. 594, ait Petrum Pictaviensem plures scripsisse Epistolas ad Petrum Cluniacensem, « et multa alia, inquit, quæ apud nos sunt omnia », et tamen pag. 607 et seqq. profert Panegyricum ab eodem Petro Pictaviensi Petro Venerabili abbati Cluniacensi dictum, Epitaphium Gelasii Petro Pictaviensi falso attributum, aliæque ejusdem Petri Pictaviensis Opuscula, sed ne verbum quidem habet de *Oratione funebri*, quæ ab eo dicta vel composita fuerit in laudem Gelasii II. An vero Constantinus Cajetanus, qui stemma Gelasii II elucubravit, Orationem illam apud se habuerit, fateor me ignorare; sed quidquid de ea re sit, non video auctorem illius Epitaphii Hugone monacho Cluniacensi fide digniorem esse.

5. *Gelasio II succedit Callistus II.* — Gelasio II post interpontificium dierum duorum successit *Callistus II* electus, non *IV nonas Februarii*, sicut habet Ordericus lib. 12, id est, die secunda mensis Februarii, neque quarta die ejusdem mensis, ut statuit Papebrocius in Callisto II, sed *kalendaris Februarii*, uti Onuphrius in Chron. Eccles. et Sigonius lib. 10 Hist. de Reg. Ital. habent, et ex iis, quæ in morte ejus in medium afferemus, perspicuum fiet. *Callistus II* ante Pontificatum *Guido* appellabatur, eratque archiepiscopus Viennensis. Patrem habuit Willelmum Burgundiæ comitem. « Sublimatus », inquit Sugerius in Vita Ludovici VI regis, « tantæ celsitudinis dignitate, gloriose, humiliter, sed strenue Ecclesiæ jura disponens, amore et servitio domini Ludovici regis, et nobilis Adalaidis reginæ neptis, aptius Ecclesiasticis providebat negotiis ». Callisto enim II soror fuit nomine *Gilla*, quæ Humberto II comiti Mauriniacensi seu Sabaudie nupta, Adalaidem peperit, Ludovico VI Francorum regi anno mxcv in matrimonium collocatam, ut videre est in Chronico S. Petri-Vivi, qui ibi habet : « Accepit rex Illudovicus uxorem suam, nomine Adalaidem ». Porro Anselmus Gemblacensis in Chron. ad hunc Christi annum, ait : « Consensu omnium episcoporum tam Germaniæ quam Galliæ cum Romanis habito, dominus Guido Viennensis archiep. in papam eligitur, et Callisti nomine designatus, Cluniaci benedicitur ». Sed cum benedictionis episcopi aut pape nomine veleres consecrationem intelligant, ut videre est in Lexico Ducangii voce *benedictio episco-*

porum, Anselmus perperam dicit Callistum Cluniaci benedictum fuisse, ut ex mox dicendis manifestum fiet.

6. *Viennæ die 19 Febr. coronatur.* — Callisti II consecratio, quam Pandulphus magna solemnitate peractam testatur, differri non potest ultra diem *V idus Februarii*, seu diem nonam ejusdem mensis, cum ea in Dominicam inciderit. Quod, postquam hæc litteris mandavi, dum minus cogitarem, reperi in lib. 4 Hist. Vezeliacensis, tom. II Spicilegii Dacheriani, ubi refertur Epistola Cononis Prænestini episcopi, Apostolicæ Sedis legati, Hugoni Nivernensi episcopo sine die et mense data, in qua ait : « Die ipsa qua ab invicem discessimus, cum electo nostro duce misericordia Dei ad partes Lugdunensem properavimus. Antequam autem Lugdunum perveniremus, dominus Lugdunensis archiepiscopus (Humbaldus sc.) electioni nostræ assensit, et Lugduni subscripsit. Ibi facta processione solenni, dominum papam Callistum et nos honorifice suscepit. Nam et Engolismensis episcopus, antequam a nobis discederet, subscripserat, et domino papæ humiliter se subdiderat (nempe Gerardus). Inde venimus Viennam, ubi in Dominica Quinquagesimæ, (quæ hoc anno in diem 19 mensis Februarii convenit) dominus papa coronatus est ». Cluniacum, ubi Callistus II Pontifex Rom. electus, quatuor leucis distat a Matiscone, et hæc civitas leucis sexdecim a Viennensi, ideoque Matisconem inter et Viennam est tantum iter dierum duorum, quod navi breviori tempore confici potuit. Papærocus laudatus perperam credidit, Callistum II Cluniaci coronatum fuisse, « post reditum nuntiorum Roma, adulto Martio, aut fortassis ipso die Paschatis, xxx ejusdem ». Recte tamen observavit, cum Pontificatus annos a die suæ electionis deduxisse. Addo, *Callistum II* anno Incarnationis Dionysiano et Pisano indifferenter usum fuisse, quod compluribus viris eruditissimis erandi causa fuit. Porro Falco in Chron. refert, *Gelasium*, cum convalescere penitus desperaret, cardinales hortatum esse, ut *episcopum Prænestinum*, tanquam magis idoneum sibi substituerent, sed eum Pontificatum recusantem proposuisse *Guidonem* archiep. Viennensem, qui et electus fuit, ut narrat Baronius num. 2, qui tamen episcopum illum Prænestinum *Odonem* male interpretatur; cum certum sit, fuisse *Cononem*, de quo jam supra sæpius mentionem fecimus rursusque faciemus.

7. *Concil. Tolosanum.* — A num. 7 ad 12. Callistus II post suam in Pontificem Romanum consecrationem, « Viennæ reversus, rebusque dispositis, per Gallias transitum faciens, Tolosæ primo, Rhemis secundo celebrato Concilio, Romam cum maximo tripudio, sicut decebat, intravit », anno scilicet sequenti, inquit chronographus Morigniacensis lib. 2. Prioris Concilii Baronius non meminit, sed ejus summarium refert Catellus, lib. 2 Comitum Tolosæ cap. 3, ex Bernardi Guidonis in

parvo Tractatu *De temporibus et annis generalium et particularium Conciliorum*, in quo legitur : « Ille Callixtus papa Pontificatus sui anno primo, VIII idus Junii celebravit Concilium Tolosæ una cum cardinalibus, archiepiscopis, episcopis et abbatibus Provincie, Gothiæ, Gasconie, Hispaniæ et ceterioris Britanniæ, in quo Concilio, inter cætera quæ gesta sunt in eodem, fuerunt damnati hæretici et depulsi ab Ecclesia, qui religionis speciem simulantes, Dominici corporis et sanguinis sacramentum, baptismum parvulorum, sacerdotiumque, et omnes Ecclesiasticos ordines, et legitimarum damnabant fœdera nuptiarum. Primitiæ quoque et decimæ, et oblationes, et bona deficientis episcopi et clericorum, fuerunt principibus et quibuscumque laicis sub pœna sacrilegii interdicta ». Labbeus, ad hunc Bernardi Guidonis episcopi Ludovensis locum animum non adverterat, et tom. X Concil. Acta Concilii Tolosani Decretis decem constantia profert, quorum hæc Præfatio est : « Anno ab Incarnat. Domini MCCCX, Indictione XII, Æra MCLXVIII, epacta VII, concurrente II, VIII idus Junii, presidente venerabili Callisto papa II, anno Pontificatus sui primo in Concilio Tolosano, etc. » In margine vero Labbeus ait : « Mendose scriptum erat MCCCX, quod refellit Indictio, et notatus Callisti annus primus ». Ita ille. Verum si vir doctissimus animadvertisset, annum Pisanum, quo aliquando Callistus II usus est, non differre ab anno Æræ vulgaris, nec in Indictione, nec in anno Pontificatus, et in aliis notis temporariis, sed tantum nostrum unitate superare, et Pisanos numerare annum MCCCX quando nos annum MCCCIX, ita rationatus non fuisset. Annus itaque ille MCCCIX annus est Dionysianus, ut demonstrat Epistola Synodalis Callisti II qui Concilio præfuit; scripta enim illa « idibus Julii, Indict. XII, Dom. Incarnat. anno MCCCIX, Pontific. autem domini Callisti II papæ an. I ». In Præfatione Concilii legitur, « in Concilio Tolosano una cum cardinalibus, etc. abbatibus provinciæ Gothiæ, Gasconie, etc. hæc sunt recitata capitula ». Verum loco *provinciæ Gothiæ*, legendum *Provinciæ Gothiæ*, uti recte Catellus et Baluzius lib. 8 de Concordia cap. 48 et demonstrat Epistola synodalis subscripta ab Atono Arelatensi, et Fulcone Aquensi, archiepiscopis.

8. *Callistus II Tolosa Rhemos venit.* — Tolosa per Pictavensem provinciam transiens Callistus II Andegavos, indeque Turonos venit; tom. enim I Biblioth. Labbei in priori Chronico Andegavensi ad hunc Christi annum legitur : « Callixtus papa venit Andecavam ». Ibi majus altare Ecclesiæ monialium monasterii *Roncerei* in vigilia Nativitatis B. Virginis, seu die VII mensis Septembris, dedicavit, ut patet ex Instrumento a San-Marthanis tom. IV Galliæ Christianæ pag. 794 relato, et ibidem de abbata Fontebaldensi verba facientes, recitant Rescriptum Callisti II, in cuius fine legitur : « Dat. Turoni apud Majus-Monasterium per manum Grisogoni S. R. E. diaconi card. ac bi-

bibliothecarii, XVII kal. Octob. Indict. xiii, Dominica Incarnationis anno mxcix, Pontificatus autem domini Callisti II papae anno primo », ubi utitur Æra communi Incarnationis. In eo Rescripto Pontifex ait : « Cum per Pictavensem parochiam pro Ecclesie servitio transitum haberemus, venerabilis frater nostri Willelmi Pictavensis episcopi suggestione ad B. Mariæ de Fontle-Brandi monasterium declinavimus, etc. In honore beatissimæ et gloriosissimæ Dei Genitricis, semperque Virginis Mariæ Oratorium dedicavimus etc. omnibus autem, cooperante Deo, solemniter celebratis, ad populum, cujus undique illuc multitudo effluerat, verbum ex more habuimus ». Turonis Callisto II venit ad monasterium Morigniacense, in diocesi Senonensi prope Stampas situm, uti habet chronographus Morigniacensis : « Anno Incarnati Verbi mxcx dedicata est Ecclesia Maigniacensis cœnobii a domino papa Callisto II, V nonas Octob. etc. Inter eas venerabiles personas, quæ huic sanctæ dedicationi adfuerunt, venerabiliores fuerunt Cono Prænestinus episcopus, totius Franciæ ac Teutoniæ, Alemanniæ ac Saxonie legatus, etc. » Sed annus mxcx Pisanus est; Callistus enim anno mxcx, aliquot mensibus ante Octobrem jam Romanam pervenerat; ideoque chronographus annum illum mxcx eruit ex Charta tunc edita et anno Incarnationis Pisano notata. E monasterio Morigniacensi Parisios venit, ubi l'III idus Octob., Indict. xiii, dedit Privilegium quoddam monasterio Vindocinensi, tom. xxi Biblioth. Patrum edit. Lugdunensis pag. 101 recitatum. Tandem Rhemos profectus est, ubi eodem mense Octobri Concilium celebravit.

9. *Concil. Rhemense.* — Refertur illud tom. x Concil. in eoque conditi canones quinque, quorum primus est de *damnatione simoniacæ heresis*, secundus de *investituris per manum laicam non faciendis*. Hæc ejus Præfatio : « Anno Incarnationis Dom. mxcix, Synodus Rhemis in Ecclesia metropolitana, die xii (legendum, ut habet Ordericus, *Indictione* xii, a kalendis Januarii more Gallicano inchoata) XIII kal. Novemb. a Callisto papa II celebrata est: in qua fuerunt archiepiscopi xii, et plusquam cc episcopi, cum multis abbatibus, et aliis Ecclesie dignitatibus. Postrema die adsidendo quoque in Concilio rege Francorum Ludovico, etc. » Acta ejusdem Concilii ex Rogerio Hovedeno, num. 9 a Baronio relata habent : « Numeratæ sunt ibi personarum pastoralium virgæ quadringentæ viginti quatuor »; quæ etiam apud Simconem Dunelmensem in Hist. de Gest. Reg. Angl. referuntur. Ordericus lib. 12, ubi fusa de Concilio Rhemensi agit, ait : « Anno ab Incarnat. Domini mxcix, Indict. xii, in Octobris medio, Callistus papa cum Romano senatu Rhemis venit, ibique xv diebus demoratus Concilium tenuit, et de utilitatibus Ecclesie cum pastoribus Dominici gregis solerter tractavit. Ibi nimirum fuerunt xv archiepiscopi, et plusquam cc episcopi, cum multis abbatibus, et aliis Ecclesie dignitatibus. Apostolico

enim jussu evocati de Italia et Germania, de Gallia et Hispania, de insulis Oceani et cunctis Occidentibus provinciis, congregati sunt pro amore Salvatoris. » Ili auctores inter se non discrepant quoad Patrum numerum, cum baculus episcopalis et abbatialis *virgæ* nomine ab antiquis designetur, ut videre est in Glossario Ducangii.

10. *In eo Henricus imp. et Burdinus antipapa excommunicati.* — Narrat postea Ordericus *Ludovicum* Francorum regem Synodum introisse, et de *Henrico* Anglorum rege questum esse, quod *Robertum* Normanniæ ducem beneficiarium suum, et *Guillelmum* ducis filium male tractaret, *Guillelmum* comitem Nivernensem in carcere detineret, aliaque in medium adduxisse, de quibus an. mxcvi, num. 16, mentionem fecimus. *Callistus II* Francis Anglisque pacem summo opere commendavit, *Treugom Dei*, sicut eam Urbanus II in Concilio Claramontano statuerat, tenendam præcepit, jussitque omnibus episcopis et abbatibus, ut eum præstolarentur, dum Mosonem castrum adiret, pacemque eum imperatore Alemannorum ad utilitatem Ecclesie tractaret. « In crastinum », inquit Ordericus, « feria quarta, cum insigni comitatu Mosonem profectus est, et Dominica sequenti, præ labore et metu lapsus et æger Rhemis regressus est. Dein feria secunda, postquam papa consedit », Joannes Cremensis, eloquens presbyter, « peracti eventum itineris feriatim » narravit, atque imperatorem cum ingenti exercitu ad prædictum locum advenisse, et quasi pugnaturum armatorum fere xxx millia secum habuisse. Pontifex vero dixit, memorem se quam fraudulenter idem imperator Paschalis II tempore Roman intrarit, huncque cepit, repedandi consilium velociter inivisse. « In novissimo Concilii de Barcinonensi episcopus (qui erat beatus Oldegarius, cum Tarraconensis archiepiscopus anno superiori dictus) subtilem, satisque profundum sermonem fecit de regali et sacerdotali dignitate, etc. Tunc papa, Carolum Henricum imperatorem Theomachum, et Burdinum pseudopapam, et fautores eorum, mœrens excommunicavit, etc. Deinde sacrum illud collegium solum est », inquit Ordericus, cujus fusa de hoc Concilio narratio tom. x Concil. legi potest, quemadmodum et Acta ejusdem Concilii descripta ab *Hessone Scholastico*, quæ Baronii tempore in tenebris latebant.

11. *Angliæ episcopi ad Concilium Rhemense venire permisi.* — A num. 12 ad 17. Henricus Angliæ rex ad Concilium Rhemense episcopos et abbates Normanniæ, et insuper episcopos Angliæ, « qui tunc temporis in Normannia cum illo degebant », misit, inquit Eadmerus lib. 5 Novorum, qui subdit, *Thurstanum* archiepiscopum Eboracensem illuc eundi a rege licentiam obtinere non potuisse, quia *Turstanus* a Callisto II sacrari volebat, et rex jura Ecclesie Cantuariensis, ad cujus præselem pertinet ordinatio Eboracensis, illa cupiebat. Cum tamen promississet se a Callisto II

episcopalem benedictionem non suscepturum, ad Concilium Rhemense sese conferendi facultatem ab Henrico rege impetravit, sed *posthabita fidei sponsione* a papa consecrari obtinuit. « Quæ ut regi certo innotuerunt », ait Eadmerus, « mandat omnibus modis Thurstano et suis interdixit, redire in Normanniam et Angliam, et in omnem locum dominationis suæ. Ratum ex his quique audientium habuere, præter consensum regis, quæ fuerunt facta fuisse ».

12. *Colloquium inter Callistum II et Henricum Angliæ regem.* — Hæc postea Eadmerus ibidem habet : « Post hæc Callistus Gisortium venit, et rex Henricus illic ei locuturus accessit. Acta igitur sunt multa inter eos, quorum gratia par erat tantas personas convenisse. Inter quæ rex a papa impetravit, ut omnes consuetudines, quas pater suus (nempe Guillelmus II) in Anglia habuerat et in Normannia, sibi concederet : et maxime, ut neminem aliquando legati officio in Anglia fungi permitteret, si non ipse aliqua præcipua querela exigente, et quæ ab archiepiscopo Cantuariorum, cæterisque episcopis regni, terminari non posset, hoc fieri a papa postularet ». Hoc ideo a rege postulatum, quia crebræ ex Urbe legationes Anglorum animos accenderant; alia enim quam quæ Ecclesiæ essent, quæri causabantur : « In principio regni Henrici », inquit Malmesburiensis, lib. 1 de Pont. pag. 231, « venerat Angliam ad exercendam legationem Guido Viennensis archiepiscopus, qui postea Apostolicus fuit. Tunc Anselmus, nec multo post quidam Petrus (legati in Angliam missi) omnesque reversi nullo effectu rei, grandi præda sui; Petrus maxime, quod omnes incendere caverent, qui esset filius Petri Leonis, summi Romanorum principis. Crebra ergo ad Angliam meabat legatio Romanorum insidiantium imbecillitati Radulphi (Cantuariæ archiepiscopi). Sed effugabantur omnes cautela Henrici. Notebat enim ille in Angliam, præter consuetudinem antiquam, recipere legatum nisi Cantuariensem archiepiscopum : illique libenter refringebant impetum propter violentiam denariorum ».

13. *Callistus II anno Incarnat. Pisano aliquando utitur.* — Porro supra diximus, Callistum II anno Pisano quandoque usum esse, quod hic ostendere juvat ex ejus Epistola ordine xii ad canonicos Bisuntinæ Ecclesiæ S. Joannis; in fine enim ejus legitur : « Datum apud Magalonam, per manum Chrysogoni S. R. E. diaconi card. ac biblioth., II kal. Julii, Indict. xii, Dom. Incarn. anno mxcx, Pontificatus autem Callisti II papæ anno 1 », ideoque hoc Christi anno, qui nobis est mxcix. Callistus II varias Ecclesias in Galliis dedicavit : « Ventum est in Provinciam », inquit Pandulphus, « in qua S. Juliani Ecclesiam, cellam Psalmodiensis cœnobii idem papa nimium celeriter dedicavit ». Ecclesia S. Juliani sita est in urbe Arelatensi, bodieque dicitur Parochia S. Antonii abbatis. *Psalmodium* vero ab Aquismortuis semi-

leuca tunc distabat, nuncque est Ecclesia collegiata.

14. *Itinerarium ejus post Concilium Rhemense.* — Sed ut varia suis annis reddi possint, et quæ loca Callistus II dum in Italiam rediret transierit innotescat, juvabit observare eum Rhemis iterum Parisios, indeque Corbolum venisse, ut habet Moriniacensis chronographus, qui ait : « Celebrato namque Rhemis maximo generalissimoque Concilio, dominus papa cum omni comitatu suo Burgundiam ingressurus Romanque profecturus de Parisiis Corbolum advenerat ». Corbolio sex circiter leucis a Lutetia dissito Melodunum venit, « ad quem locum rex et regina a domino papa discessuri valeque facturi, proceres atque pontifices, multaque personæ confluerant », inquit laudatus chronographus, qui Callistum Meloduno Senonas venisse his verbis asserit : « Algrinus juratus atque publicatus hostis monachorum etc. dominum papam Senones insequitur », unde chronographus Sancti-Petri-Vivi ad annum mxcix scribit : « Postquam celebratum est Concilium Rhemis, venit dominus papa Senonas, quem adiit abbas Arnaldus, et ostendit litteras, quas habet Ecclesia Sancti-Petri de duabus sororibus S. Ebbonis, Ingoara sc. et Leotheria, quas confirmavit Epistola data Senonis nonis Decembris » ad episcopum Lingoniensem.

15. *Joannes imp. adversus Persas bellum movet.* — Ad num. 48 et seqq. Historiam Zonaræ continuantur Nicetas Choniates usque ad annum mcccv, et Joannes Cinnamus imperatoris grammaticus, qui ab excessu Alexii Comneni imp. Historiam suam exorsus, resque a Joanne imperatore ejus filio carptim et libro unico complexus, eas polissimum Joannis filio imperante accidere, quibus ipse interfuit, et in omnibus quas Manuel obiit expeditionibus, fidelissimus comes extitit. Joannes imp. rebus politicis, prout sese obtulerat occasio, rite compositis, in Asiam transit. Nam « cum Persas fœdus cum palre suo initum nihili facientes, urbes Phrygiæ, et ad Mæandrum fluvium sitas, magnis copiis incursare cerneret, primo vere egreditur, multisque præliis victor Laodicæam capit, et mœnibus cingit, ejecto Alpichara, qui urbi cum præsidio præerat : cæterisque rebus ordinatis, domum rediit », inquit Nicetas, quæ Cinnamus paulo fusius habet.

16. *Concil. Beneventanum.* — Falco in Chronico de Landulpho archiepiscopo Beneventano hoc anno scribit : « Mense Martio, xii Indictionis, prædictus Beneventanus archiepiscopus videns civitatem variis prædarum afflictionibus ex omni parte confundi et devastari, suæque parochiæ Ecclesias a raptoribus vexari quotidie, Synodum decima die intrante ejusdem mensis Martii celebravit. Ad ejus sacri conventus præsentiam Tusculanum adfuit episcopus, et Ugo supra nominatus cardinalis, et cardinalis alius, et Beneventanæ sedis suffraga-

neorum circiter viginti, monasteriorum abbates sex adfluere. Inter cetera vero, quæ in ipso conventu statuta sunt, malefacientes Beneventi omnes, et disturbantes mercatores ad civitatem venientes et redeuntes, sub anathematis vinculo alligavit. Conventu itaque pie et ordinate finito, unusquisque ad propria repeditavit. Baronius num. 6 alium Falconis locum refert, in quo Ugonis cardinalis legati mentio; sed hujus Concilii non meminit. Fuse describit Falco translationem die xv mensis insequentis a Landulpho factam corporum sanctorum *Martiani*, et aliorum ibidem nominatorum, quæ prisco tempore non honeste tumbarum jacuerant. Quam ceremoniam prolixè narrat, additque Landulphum hoc anno obiisse, et *Rofridum* in locum ejus electum esse.

17. *Moritur B. Petrus de Honestis.* — *Petrus de Honestis*, qui canonicos regulares in Ecclesia Sanctæ-Mariæ in Portu in agro Ravennate instituit, mortuus est hoc anno, *quarto kal. April.* Ravennæ, in Portuensi a se extructo cœnobio, ibique sepultus, ut testatur Rubeus lib. 3 Hist. Ravenn. Peculiarem regulam canonicis quibus præerat scripsit, quam *Paschalis II*, X kal. Januarii, anno mxcvi confirmavit. Ea edita ad calcem Operum *Petri Damiani*, cum quo aliqui perperam Petrum de Honestis confundere, quos tam Rubeus, quam Pennotus lib. 2, cap. 48, confutarunt. Petrus quidem de Honestis, sicut Petrus Damiani, *peccatorem* se appellabat, sed mos tunc inoleverat, ut ob animi demissionem, aliqui sese *peccatores* inscriberent, quod illorum temporum monumenta declarant. Petrum de Honestis in Italia imitati sunt canonici Sancti-Frigidiani Lucensis, Lateranenses et quidam alii. Nunc canonici Portuenses subsunt Congregationi *canonicorum Lateranensium*, quæ inter plures alias Italiæ præcipua est. In Actis SS. Bolland. ad diem xxix Martii Petrus de Honestis memoratus inter *Prætermisos*, quod ab aliquibus *beatus*, ab aliis *venerabilis*, ab aliquibus vir *pie memorie* appelletur. Juvabit legere Miræum in *Originibus canonicorum regularium Ord. S. Augustini*, in libro singulari de *Congregationibus clericorum in communi viventium*, et in alio de *Collegiis canonicorum*.

18. *Maurorum Hispaniæ et Africæ rebellio.* — Maurorum Africæ et Hispaniæ res malo in loco erant; *Ali* Almorabitarum imperator magno contemptui erat; tantum enim abest, ut ex dissidiis inter Christianos exortis emolumentum aliquod hausset, ut *Alphonso* Castellæ et Aragoniæ rex anno superiori *Cæsaraugustam* expugnavit, et hoc sequentique anno varia munita oppida cisdem eripuit. Rodericus in Hist. Arab. cap. 49, de isto Almorabitarum imperatore scribit: «Et fuit inventus debilis et ignavus, nec regni continia defendebat». Quare Saraceni *Cordubam*, quæ primaria eorum urbs citra mare, incolentes, aperte in eum rebellavit. Tunc tandem *Ali* animum fractum ac demissum excitavit, congregatoque exer-

citu mare trajecit, inquit Noweirius et Andalusios seu Vandalicios (ita enim Hispaniarum Saraceni appellabantur) ad obedientiam compulsi, tantumque terrorem Cordubensibus civibus incussit, ut ejus misericordiam implorarent. *Ali* cujus imperium *Musmudes* aut *Musmites*, vel *Mazmutes*, ut Hispani hanc vocem pronuntiant, detrectabant, lubenter eis veniam tribuit; in Africam enim illi transfretandum erat, quia *Musmudes* Atlantem montem, seu, ut Hispani loquuntur, *Montes Claros* habitantes in Susa Provincia ad Marochii meridiem sita, ducem sibi præfecerant *Mahometem* Tumartii filium, eodem populo prognatum, qui tantam multitudinem Maurorum sibi conciliarat, ut domum *Ali*, omnemque Almorabiticam sectam, ac religionem Christianam, tam in Africa quam in Hispania, tandem exterminavit. Quare ad Annalium Ecclesiasticorum supplementum de eo nobis necessario agendum.

19. *Mahomet Eben Tumart Mahometanus in Africa reformat.* — Erat *Mahometes Eben Tumart* a tribu Harge, nationis Musmudarum ex illustribus una. In Orientem profectus, variis doctrinis animum excoluit, et ad Mecam peregrinationem obivit. Ex Asia in patriam itinere maritimo rediens, cepit pœnitentiam prædicare iis qui in eadem navi erant, adeoque eorum animos dementavit, ut eum pro sancto habuerint; sed ubi Africam attigit, Mahometici cultus promovendi studio magis exarsit. Cumque sanctitatis ejus fama undique dilataretur, et a prædicando Alcorano non desisteret, non longe a Bugia urbe, alias Mauritanie Siftensis, nunc regni Algerii provinciæ cognominis capite, obvium habuit hominem *Abdelmumen* dictum, filium, declaravitque hunc ad conservandam restituendamque in Africa religionem a Deo electum fuisse, idque a Mahomete propheta prædictum. Ipsemet Mahomet Eben Tumart sibi attribuit nomen *Almohadi*, vel ductoris, vel directoris, quod ante ducentos annos *Obejdallah*, cum califatum Africæ usurpavit, sumpserat. Quare deceptus est Rodericus lib. 7, cap. 10, cum postquam Eben Tumart tanquam Astrologum exhibuit, ait: «Aventuræ autem ascrivit quemdam, qui Almohadi vocabatur, et erat in Mahometi doctrina valde peritus, et cepit librum Mahometi, qui dicitur Alcoranus, exponere et docere; Mahometes enim filius Tumert vel Aben Tumert idem fuit ac Almohadi.

20. *Marochii, quæ urbs regia erat, Alcoranum prædicat.* — Noweirius ait, præteritum hunc prophetam *Marochium* tandem pervenisse, ibique publice in vitia pravosque mores invectum esse. Cumque benevolos auditores invenisset, eo insolentia processit, ut cum videret imperatoris *Ali* sororem magnifice vestitam, et generoso equo insidentem, eam ex eo dejecerit, exclamans indignum esse, ut in Musulmana femina hæc vanitatis notæ apparerent. Hoc enim accepisset *Ali* Almorabitarum imperator, hominem vocavit, isque ad eum auda-

cter responsit, ac vi rationum suarum et argumentorum sublimitate doctores ejus ita perculit, ut quid contra dicerent non habuerint. Consilium imperatoris tulit, ut innovatorem morti traderet; sed imperator consilium illud aspernatus est, interimque pseudo-propheta e manibus ejus clapsus *Marochio* egreditur, et apud populares suos in *Suzam* provinciam secedit. Ibi cum adversus vitia ac præsentem rerum statum vehementer declamaret, agrestem illum populum ad defectionem commovit: « Cœpit calife de Baldac » seu Badadi, inquit Rodericus, « contraria prædicare, similiter contra Almoravides, qui tunc culmen regni in Africa obtinebant, rebellia adhortari ».

21. *Origo Almohadum.* — Neque enim patiebatur *Eben Tumart*, ut califa Bagadensis agnosceretur, nec ut principibus Almorabit, qui ab eo investituram accipiebant, mos gereretur. Hoc interim spatio *Mahometem* hunc, inquit Noweirius,

filium *Eben Tumart* ducem sibi præficiunt, existimantes esse verum directorem a *Mahomete* legislatores prædictum, et religionem Mahumeticam per totum orbem restauraturum. Rebus sic stantibus, *Almohadi* sectatores suos *Almo-Wabbedinos* appellavit, id est, viros, qui doctrinam de unitate Dei in essentia, substantia et persona solide constituerent. Et licet hoc dogma omnibus Mahometanis commune sit, ac Musulmanicæ religionis fundamentum, nihilominus *Almowabbedini*, seu *Almohades* magis reformatos aliis videri volentes, ac studio inflammatorii accensos, nomen istud elegere, quasi bellum implacabile iis indicerent, qui doctrina contraria imbuuntur, aut plures deos, uti idololatras, vel plures in Deo personas, uti Christiani statuunt. Quare licet sectarii alii omnes Christianos apud se manere passi essent, *Almohades* tamen nullum penitus tolerarunt, sicuti ex dicendis liquebit.

CALLISTI II ANNUS 2. — CHRISTI 1120.

1. *Quæ Callistus papa Ecclesiæ contulerit Viennensi.* — Millesimus centesimus vicesimus, decima tertia Indictione, annus sequitur, quo Callistus papa Romam cogitans, antequam protectionem aggrederetur, Ecclesiam suam Viennensem munitam et honestatam relinquere voluit Sedis Apostolicæ privilegiis. Quenam autem fuerint ista, in ejus Diplomate leges, quod ex ejusdem nobilissimæ Ecclesiæ monumentis nuper in lucem edidit Joannes a Bosco Cælestinus.

« Callistus episcopus, servus servorum Dei, dilectis filiis Petro decano, et canonicis sive clericis Viennensis Ecclesiæ, tam præsentibus quam futuris in perpetuum.

« Elsi Ecclesiarum omnium cura nobis ex Apostolicæ Sedis administratione immineat, Viennensi tamen specialius convenit charitatis studio providere. Ipsa enim primum, disponente Deo, sollicitudini nostræ commissa est, et ad ejus regimen nos episcopalis gratiam consecrationis accepimus. Ex communis igitur et singularis dilectionis debito incitati, matrem vestram, filii in Christo charissimi, sanctam Viennensem Ecclesiam dili-

gere, honorare, et beati Petri patrocinio decrevimus confovere. Omnem itaque dignitatem et munitiorem, ac liberalitatem, quam vel per authentica prædecessorum nostrorum Silvestri, Nicolai, Leonis, Gregorii, et cæterorum Romanorum Pontificum privilegia, vel per imperatorum, regum, principum et cæterorum fidelium largitionem concessam obtinet, nos quoque, auctore Deo, concedimus, et præsentis privilegii pagina confirmamus. Ut videlicet super septem provincias primatum obtineat: super ipsam Viennensem, super Bituricam, Burdegalam, Auxitanam, quæ Novempopulitana dicitur: super Narbonam, Aquisensem, et Ebrundensem. Et in eis Viennensis archiepiscopus Romani Pontificis vices agat, synodales conventus indicat, et negotia Ecclesiastica juste canoniceque definiat. Porro illa sex oppida vel civitates, Gratianopolis videlicet, Valentia, Dia, Alba, Vivarium, Geneva, Maurienna, in ejus tanquam in proprii metropolitani obedientia et subjectione permanent. Tarantasiensis autem archiepiscopus, licet aliquibus habeatur ex Apostolicæ Sedis liberalitate prælatus, Viennensi archiepiscopo tanquam pri-

mati suo subjectus obediat. Sane in Salmoracensi archidiaconia consecrationes, vel ordinationes, et quidquid ad pontificale officium pertinet, Viennensis Ecclesia, præter alicujus inquietationem seu diminutionem habeat. Abbatia quoque Sancti-Petri foris portam Viennæ sita, et intra eandem urbem abbatia S. Andreae, una monachorum, altera sanctimonialium, abbatia Sancti-Theoderii, et abbatia Sanctæ-Mariæ de Bonavalle, quæ, præstante Deo, nostris sumptibus et nostris est fundata laboribus : in jam sæpe dictæ Viennensis Ecclesiæ jure ac subjectione persistent.

2. « In ipsa etiam Romanensi Ecclesia, quamvis Romanæ se faciat libertatis, visis tamen prædecessorum nostrorum privilegiis, et imperatorum præceptis, tam in secularibus quam in regularibus clericis et canonicis iuxta ordinatis vel ordinandis, pontifices Viennenses omnem habere decernimus potestatem. Similiter in Ecclesia beati Donati, beati Valerii, et in Ecclesia beati Petri de Campania, et beate Mariæ de Annoniaco. Castra præterea, quæ per nos recuperata sunt vel acquisita, scilicet Pompeiacum, Sasserlum, et castrum de Malavalle, Viennensi Ecclesiæ in perpetuum confirmamus. Cæmenterium vero, quod dominus prædecessor noster sanctæ memoriæ Paschalis papa, circa beati Mauricii Ecclesiam consecravit, liberum esse sancimus, ut eorum qui illuc sepeliri deliberaverint, devotioni et extreme voluntati, nisi forte excommunicati sint, nullus obsistat : salvo nimirum propriæ jure parochiæ. Ad hæc, pro ampliori Viennensis Ecclesiæ dilectione, ante Viennensem archiepiscopum per provinciam suam crucem deferri concedimus ; et Viennensem Ecclesiam alieni subjacere legato nisi cardinali, vel alii de Romana provincia, qui a Romani Pontificis latere dirigitur, prohibemus. Porro in Ecclesiis, quas in Viennensi episcopatu, post assumptum Apostolicæ Sedis ministerium consecravimus, Viennensis archiepiscopum eandem quam habuerat ante, interdicens ac ordinandi habeat potestatem. Sane intra claustrum ambitum, ubi clericorum mansiones continentur, nullus omnino laicorum deinceps habeat mansionem, aut assultum, vel rapinam facere, seu corporalem cuilibet audeat injuriam irrogare. Si qua igitur in futurum Ecclesiastica secularisve persona hanc nostræ confirmationis vel concessionis paginam sciens, contra eam temere venire tentaverit, secundo tertiove communita, si non satisfactione congrua emendaverit, potestatis honorisque dignitate careat, reamque se divino judicio existere de perpetrata iniquitate cognoscat : et a sacratissimo corpore ac sanguine Dei et Domini nostri Redemptoris Jesu Christi aliena fiat, atque in extremo examine districtæ ultioni subjaceat. Cunctis autem eidem Ecclesiæ justa servantibus sit pax Domini nostri Jesu Christi : quatenus et hic fructum bonæ actionis sentiant, et apud districtum Judicem præmia æternæ pacis inveniant. Amen, amen.

« Ego Callistus Catholicæ Ecclesiæ episcopus.
« Datum Valentini V kal. Martii, Indictione xii, Incarnationis Dominicæ anno mccc, Pontificatus autem domini Callisti II papæ anno secundo ».

3. *Callisti papæ iter et ingressus triumphalis in Urbem.* — Post hæc autem dispositis rebus Gallicanarum Ecclesiarum, Romam se contulit. De hoc itinere in ejus Vita hæc leguntur in Ms. Vaticano ex Pandulpho : « Habito itaque consilio communi cum Ecclesia Gallicana, ut ad Romanam Urbem et Sedem Apostolicam festinare deberet, dispositisque aliis quæ ad Ecclesiæ statum spectare videbantur, iter suum versus Italiam Domino direxit auctore. Et veniens ad Montem-Pessulanum, processit ad Sanctum-Egidium, peragratisque Provinciæ partibus, et Alpium difficultate transcendens, ad Sanctum-Ambrosium cum jucunditate pervenit. Undique igitur ad eundem Pontificem conflente multitudine populorum, cum tanquam Christi vicarium eximio prosequerentur affectu, ad ejus vestigia certum se devotissime prosternebant. Descendens autem ad populosas Longobardiæ civitates, in quibus non minus honorifice recipiebatur, et per quam devotissima veneratione tractabatur, per montem Bardonis transivit in Tusciam. Appropinquante autem ipso Pontifice ad civitatem Lucanam, occurrit ei a longe decora ipsius civitatis militiæ, et deductus est a clero et populo in gaudio et exultatione ad majorem Ecclesiam, et ad papale palatium. Post triduum vero a Pisanis cum jucunda et gloriosa processione nihilominus est receptus atque tractatus. Rogatus autem ab ipsis Pisanis, et magna instantia postulatus, majorem Ecclesiam ad honorem beate Mariæ, tota ibidem Tuscia concurrente, dedicavit solemniter. Deinde de jucundo et desiderato nimirum papæ adventu communis fama et frequens rumor aures Romanorum pulsavit. Et cum tota civilis ad ejus receptionem anhelaret, et vehementi desiderio ferretur, schismatici, qui tunc eidem Urbi per imperatoris violentiam incubabant, sunt territi, et omnino in semetipsis confusi. Quocirca languidum caput, Burdinus hæresiarcha, in desperationis lubrico positus, sperans se ab ipso imperatore fovendum, apud Sutrium confugium fecit, ejusque se munitione continuit ». Hæc in rebus gestis ipsius Callisti ex Pandulpho.

4. Hic vero inlexenda Epistola est Eginonis abbatis S. Udalrici Augustani, qua Callisti papæ occurrit, et in Urbem narratur ingressus. Qui charitate impulsus Augustinæ Ecclesiæ, adhuc sub Herimanno pseudoepiscopo laborantis quatuordecim annorum jam curriculo, ad Callistum Pontificem Romam adventantem se contulit, quem in Tuscia repertum est secutus in Urbem. Rebus autem bene satis ex sententia gestis, Pisis, de cunctis quæ accidissent, quasi itinerarium scripsit, his verbis :

« Reverendæ paternitatis ac diligendæ fraternitatis cunctis utriusque sexus in Christo fidelibus,

Egino ille, cujus incolatus est super terram prolongatus, cælestis patriæ associari civibus.

« Quoniam Deus charitas est, et qui manet in charitate, in Deo manet, et Deus in eo: omnis qui manet in Deo, imo in quo manet Deus, nimirum Spiritu charitatis est repletus; ex fonte vero dilectionis rivulus emanat compassionis. Ille igitur salubri fonte redundantibus necessarium duxi paucis absolvere, quibus subjacerim casibus, præmissa causa quæ tot provocavit adversa, ut virtus compassionis crescat ex causa justitiæ et veritatis. Quamvis enim peccator indignus, officio regiminis, ut multi vestrum noverunt, cœnobii fungebar Augustensis, ubi quanta Deus nostris temporibus non dico meritis fecerit, quod videlicet religiosos

iros inibi coadunaverit, quamque virtutibus, rebus quoque exterioribus locus illi in brevi succreverit, non modo vicinos et contiguos, sed etiam remotos latere minime potuit. Verum quia juxta egregium Prædicatorem¹, oportet hæreses esse, ut qui probati sunt manifesti fiant: expetente satana, ut cribraret nos sicut triticum², quem defensorem ac propugnatorem sperabamus, utpote gregis Domini pastorem, Augustensem episcopum crudelem sensimus persecutorem. Qui cum a beate memoriæ papa Paschali pro diuturna inobedientia in omni pontificali officio fuisset interdictus, atque a successore ejus Gelasio Secundo, necnon a sancto adhuc superstitute papa Callisto Secundo absque spe ejusdem recuperandi officii sit damnatus, et ab ipsa Apostolica Sede hoc acceperimus mandatum, hujusmodi vitare ut mortiferum: nos tamen ut minus perfecti, non statim ad hæc implenda convaluimus, cum Petro scilicet ad ancillæ carnis vocem adhuc pertinuimus, cum tam nefanda, potius humana sapientibus acquiescendo, quam divinis et Apostolicis præceptis obtemperando, dissimulavimus.

5. « Denique ipso contra jus fasque omnibus modis gra-sante, adeo ut Catholicum papam respueret, Burdunum reciperet, nomenque ejus in Cerei Paschalis benedictione recitari præciperet, ac plebem sibi subjectam tanti hæresiarchæ litterarum salutatione pollueret, nos etiam in his omnibus secum contaminari cogeret, tandem ut arcus fortium superaretur, nos hactenus infirmi, divino robore accingimur, in medium progredimur, cum Apostolis³, etsi longe impares, protestamur: Obédire oportet magis Deo quam hominibus. Ilac voce, non minori quam Scribæ et Pharisei, pontifex iste commovebatur furore, dum mox vincula et carcerem minatur et exilium; nec unquam cessaverit, quousque ego et fratres mei, qui cum duodecim Christum sequebantur, aliis retro abeuntibus, a monasterii quiete proturbamur. Nec tamen huic præsul post innumeras contumelias et injurias nostri sufficit expulsio, quin in omnes terræ fines nos ejus pro posse sequeretur persecutio. Quam-

obrem cum archiepiscopum nostrum, necnon magnum episcoporum, abbatum, seu principum Catholicorum adirem colloquium, expositas querelas in commune pro scelæris immanitate mirantur et lamentantur.

6. « Proinde communicatio prudentiorum consilio, ad Romanam dirigor Sedem, tum pro speciali nostra necessitate, tum pro communi Ecclesiæ utilitate. Quod iter cum arriperem ex hostium insidiis periculosissimum, potius per devia quam regia via ultimumque perveni Placentiam. Ubi dum puer meus, quem ab infantia nutrieram, cum omnibus rebus nostris, exceptis equitaturis, nocte aufugisset, qui in paucis sapius de itineris perfectione diffidebam, in nihili jam de ejus qui cuncta creavit ex nihilo, misericordia præsumebam. Quid plura? per abrupta montium, per vastissimam eremum, per terram famis et sitis, ubi vestigium non inveniebatur hominis, transivimus, sed quasi in pretium tanti laboris domnum Apostolicum in maritimis locis, videlicet apud Rosellam civitatem invenimus. A quo hilarissimo (ut est) vultu recipimur, Romam una secum deducimur, relaturi terre nostræ (ut ipsius verbis utamur) triumphum Ecclesiæ.

« Jam enim quis illius terre concursus, quantus omnis sexus et ætatis apparatus, militiæ quoque Romanæ ultra trium dierum iter occurrentis quam jucundum fuerit comitatus, Cæsar si superesset, indignans miraretur, Tullius forsitan attraheretur, dum vexillo Crucis omnium consulum et imperatorum superari trophea conspiceretur. Appropinquante vero summo Pontifice ad Urbem, puerorum et infantium cum ramis omni-genarum arborum occurrentium excipitur laudibus. Quos ne quis opprimeret vel abigeret, cum Jesu benedicens, aiebat¹: Sinite parvulos venire ad me, talium est enim regnum calorum. Deinde coronatus, ut regali sacerdotio Ecclesiam credas potiri, per medium deducitur civitatis, plateis auro, gemmis, pretiosissimis palliis undique adornatis. Nec defuere Græcorum et Latinorum concentibus confusi Judæorum plausus, ut cæca gens vel invita confiteatur, unde magis puniatur. Vix hora decima cum esset, tertio nonas Julii, a mane protracta, rarescit processionum frequentia, quando et idem pater universalis a Lateranensi exceptus sede, in palatium, ut moris est, judicium legali perducitur carmine. Abhiuc usque in kalendas Julii præsentia jugiter tante sanctitatis perfruebar viri, hac instantia nesciente fastidium, quia semper in majus accendebatur desiderium. Siquidem hilaris vultus sub morum gravitate, dulcedo affabilitatis sub verborum pondere, jejuniorem, seu vigiliarum discretio absque eo quod intrinsecus latet, cunctis intuentibus in eodem patre, uno atque eodem spiritu operante, mirabili effectu patet. Laus omnis inferior, dum vir iste revera

¹ 1. Cor. XI. — ² Luc. XII. — ³ Act. V.

¹ Matth. LVI.

Apostolicus, virtutibus et miraculorum signis comprobetur sublimior. Quæ quia tota Francia, Longobardia, Thuscia, atque Apulia prædicat, hujus angustia chartulæ supersedeat.

7. Igitur percepta a sanctis ejus manibus Dominici sacramenti communione, et inter crebra oscula largissima benedictione, iter rediturus arripui, navimque per mare transiturus apud Ostiam civitatem cum Aquensi episcopo intravi. Quæ cum socium laboris nostri fratrem Udalscalcum præ hominum multitudine capere non posset, alteram, quæ tamen cum nostra erat itura ascendit; sed mox pelago turbato, naves in tantum sunt disjectæ, quod infra quatuordecim dies nec loqui invicem potuimus nec videre. Cæpi ultra modum de amisso fratre contristari, ex tristitia infirmari, vixque Pisas valebam deportari. Ubi qualiter frater me invenerit, quidve postea de me factum sit: ipse fideliter referat, animamque meam vestris orationibus commendet. Hæc Egino abbas in ægritudine positus scripsit, qui et ibidem extremum diem obiit eodem ipso die nempe idibus Julii, sepultusque est in S. Michaelis monasterio magno cum honore, ut ejus peregrinationis socius Udalscalcus enarrat, qui ei assistit morienti, eadem die qua obiit Pisas adveniens, et patrem adhuc spirantem inveniens, ejus extremam salutationem post oscula et amplexus habere commovit.

8. *Callistus Beneventi investituram dat Wilhelmo duci, et monasterio Cassinensi consulit.* — Sed ad Callistum Pontificem redeamus, cui superandi Burdini munitione se continentis ingens adhuc superfluit labor. Verum quod exercitu opus erat ad locum illum expugnandum, eo relicto, et ad aliud tempus expugnatione opportunius reservata, haud diu Romæ permansit, sed Beneventum direxit iter, ubi Northmannos ad expugnationem Sutrinæ munitionis hortaretur. Porro ejus iter ab Urbe Beneventum et in Apuliam ita apud Petrum Diaconum in Chronico Cassinense relegitur¹: « Sub idem tempus præfatus papa Callistus ex Urbe ad hoc monasterium Cassinense perveniens, ab abbate nostro cum ingenti honore susceptus, illo missam solemniter celebravit, et in hac terra duos ferme menses renoratus est. Quem abbas noster honorifice valde habuit, et in omnibus illi necessariis strenue semper ministrare curavit. Inde vero Beneventum veniens, in Apuliam usque descendit, et more priorum Pontificum a duce Wilhelmo fidei sibi præstito juramento etc. » At Romualdus in Chronico hæc paulo fusiis verbis istis: « In Beneventanum palatium Wilhelmus dux Apuliz atque Calabriz devenit, ligus homo pape Callisti factus per directum contra omnes homines. Et ipse pape statim eidem duci donavit et concessit, et per vexillum tradidit omnem terram ipsius ducis cum toto honore ducatus ipsius, dicens:

9. « Ad honorem Dei, et beati Petri Apostolo-

rum principis, necnon et Pauli, fidelitatem quoque Romani Pontificatus, et nostram, nostrorumque successorum canonicè intrantium, donamus et concedimus tibi terram et omnem honorem, et quæcumque nostri prædecessores, videlicet papa Nicolaus et Alexander, atque Gregorius donavere olim Roberto Guiscardo avo tuo, atque deinde Urbanus papa et Paschalis ejus successor donavere duci Rogerio patri tuo, idemque Paschalis postea atque Gelasius papa donaverunt tibi etc. Eodem vero mense, idem papa Callistus Trojam venit. Audiens itaque Wilhelmus dux ejusdem Pontificis adventum, obvius ei festinanter extra civitatem advenit cum principibus suis. Cui vice stratoris ipse juxta sellam obambulans, usque ad Ecclesiam episcopatus ejusdem civitatis ingenti cum honore deduxit ». Hæc ipse hoc anno. Porro comparatas copias ex Northmannis ad expugnationem anti-pape Burdini perduxisse Roman, annoque sequenti eundem duxisse captivum, quæ suo loco dicentur ostendent. Ita plane magna Dei providentia factum, ut deficientibus ingratis filiis, Deus e longinquo vocaverit in Italian Northmannos, eisque regiones illas dederit incolendas, quorum sæpe uteretur auxilio adversus schismaticos Romanos, tyrannos, et perfidos imperatores, pro Ecclesie Romanæ præsidio, ejusque libertate luenda.

10. Quæ autem præter hæc, dum Beneventi adhuc esset Callistus Pontifex, egerit, idem Petrus Diaconus narrat², nempe definivisse controversias monasterii Cassinensis, reintegrando ipsum iuribus diversorum bonorum eidem monasterio debitorum, quibus injuste fuerat spoliatus sive a principibus, sive ab episcopis et archiepiscopis, quos idem auctor ibi recenset. Sed nullum expertus est idem Pontifex magis arduum negotium ibi, quam quod cum abbatisa monasterii S. Mariæ Capuæ fuit agendum: cum eam refractariam ac inobedientem penitus Apostolicis litteris semper inveniret, adeo ut post omnes adhibitæ admonitiones, comminationes interpositas, perendnationes superadditas, opus fuerit eam excommunicatione mulctare, et monasterium ejus subicere interdicto. Verum nec sic quidem ipsa paruit, sed Rainulphus comes intercessit, qui Cassinense monasterium de bonis amissis, ipsa licet invita, in integrum restituit coram Joanne cardinali tituli Sancti-Eusebii, et Hermanno S. R. E. subdiacono. Ut plane eidem Callisto contingerit reperire feminam pertinaciorē, contumaciorēque imperatore schismatico, quem ut dicemus, reddidit tandem Romanæ Ecclesie obsequentem.

11. *Legatio Ludovici regis ad Callistum papam.* — Rursus autem, cum Benevento in Apuliam tunc temporis perrexisset Callistus papa, resque Romanæ Ecclesie usurpatas recuperasset, convenit cum legatio Francorum regis Ludovici per Sugerium abbatem, qui in Vita ejusdem regis

¹ Pet. Diac. Chron. Cass. l. iv. c. 70.

² Petr. Diac. Chron. Cass. l. iv. c. 70, 71, 72.

quam scripsit, de his sic meminit : « Domino illaque Callisto gloriose presidente, et raptore Italiae et Apuliae perdomante, Pontificalis Cathedrae lucerna non sub modio, sed superposita monti, clare lucebat; beati Petri Ecclesia, et reliquae item Ecclesiae Urbis et extra amissa recuperantes, gratissimo fruebantur patrocinio. Cui cum in Apulia apud civitatem Bitontum missus a domino rege Ludovico pro quibusdam regni negotiis occurrissem, vir Apostolicus, tam pro domini regis, quam pro monasterii nostri (Sancti-Dionysii scilicet), reverentia, honorifice nos recepit, ita ut diutius retinere vellet, si Ecclesiae nostrae amore, et sociorum, abbas Sancti-Germani socii convocantis, et aliorum persuasione non devocemur ». Subjicit his historiam de sua tunc absentis in abbatem Sancti-Dionysii electione. At de rebus Callisti papae in Apulia gestis hactenus.

12. *Præmonstratensis Ordinis initium.* — Contigit hoc anno, Norbertus, qui auctoritate Romanorum Pontificum Gelasii et Callisti licentiam prædicandi acceperat, collectis sociis, regulam sancti Augustini servandam suscipiens, aucter fuerit Ordinis a loco dicti Præmonstratensis. Haec Hugo in Vita ipsius pluribus narrat¹. In Saxonia autem, Deo prodigiis populos terrente, fides Catholica ablegato schismate, atque schismaticis, propagatur, ipso Deo ulcescente in eos, qui imperatorem schismaticum sequerentur, Friderico comite palatino, qui in eo schismate inhærebat Henrico, jam mortuo, et ad inferos (ut revelatum est) ad penas aeternas condemnato. Haec omnia Urspergensis hoc anno pluribus.

¹ Apud Sur. tom. III, die vi Jun.

13. *Rogerus princeps Antiochenus occisus.* — Quod ad res pertinet Orientis, male pugnatum est a Rogerio, qui principatum Antiochenum sibi injusto titulo usurpaverat, cum homo aliqui vita turpissimus, qui in eodem bello interemptus occubuit, hoc divino munere sit consecutus, ut antea confessione peccatorum habita, vere poenitentis speciem ederet. Ita plane renovata in Orientalibus illis praeliis noscuntur divina miracula, ut si cultores essent iustitiae principes, nullo ferme negotio de hostibus quamlibet numero viribusque superioribus victores existerent; contra vero vincerentur ab illis, si iniquitas prævaleret in ipsis, quam divina ultio sequeretur, secundum illud¹ : « Anathema in medio tui, Israel, idcirco traditus es in manus inimicorum tuorum ». Interfecto autem Rogerio cum exercitu, Balduinus rex una cum comite Tripolitano, prævio sacratissimo ligno sanctae Crucis, ingentem de Turcis est victoriam consecutus hoc anno in Vigilia Assumptionis sanctae Mariae, cum post hæc sancta Crux solemniter ritu reportata est Hierosolymam, die Exaltationis ejusdem. Hæc vero pluribus describit Willelmus Tyrius², qui addit, hoc eodem anno a patriarcha Hierosolymorum et episcopis sibi subditis, esse celebratum Concilium in civitate Neapolis (quæ est Samaria) ibique pro correctione morum, et conservanda Ecclesiastica disciplina, statutos esse canones viginti quinque. Non caruit fructu publica ista correctio: siquidem anno sequenti Turcarum princeps magno apparatu contra Antiochiam rediens, pugnante Domino, apoplexia percussus interiit.

¹ Jos. vii. — ² Will. Tyr. l. xii, c. 40, 41, 42, 43.

Anno periodi Græco-Romanæ 6613. — Anno Æræ Hispan. 1158. — Anno Hegiræ 514, inchoato die 2 Apr., Fer. 6. — Jesu Christi 1120.

— Callisti II papæ 2. — Henrici V reg. 15. imp. 10. Joannis Comneni imp. 3.

Itinerarium Callisti II. — Ad num. 4 et seq. Callistus II litteris anno superiori *Senonis, nonis Decembris* datis, et tom. x Concil. pag. 834 recitatis *Josceranum* Lingonensem episcopum judicem constituit litis, quæ inter abbates Sancti-Petri-Vivi Senonensis, et Molismensem versabatur. Thomas Stubbs in Actis pontif. Eborac., narrans quam honorifice Turstinus Archiepisc. Eboracensis a Callisto II quem in Gallia adiit exceptus fuerit, ait :

« In solemnibus processionibus equitando factis, quando more Apostolico coronatus fuit, sicut in die Natalis Domini, Augustodunum, et die Epiphaniæ Cluniaci episcopus Ostiensis, qui magister inter eos et dignior erat, cum parem esse voluit ». Quare Senonis Augustodunum et Cluniacum descendit, indeque Trenoricum oppidum utrique vicinum profectus est, ubi die undecima mensis Januarii currentis anni dedicavit Ecclesiam Trenoricensem,

ut fidem faciunt tam hujus Pontificis Epistolæ xvi et xix, quam vetustum Kalendarium Trenorciense a Chittletio in Probationibus ad Hist. Trenorciensem pag. 308 relatum. In eo quidem dies tantum et mensis notantur; sed cum in Epist. xviii hujus dedicationis mentio sit, et in ea legatur : « Datum Matiscone, XIX kal. Febr., Indict. xiii », apparet eam tertio post dedicationem die scriptam, et Callistum II Trenorcio Matisconem venisse.

2. *Augustodunet Cluniaci fuit.* — Callistum II Bruno archiepiscopus Trevirensis, dum Augustoduni esset, convenit, quod Adelbertus archiep. Moguntinus, qui legationem Apostolicam ab ipso papa dudum acceperat, ut ait Urspergensis in Chron. ad annum mxxi, jura Ecclesiæ suæ cederet. Rem narrat scriptor anonymus Historiæ Trevirensis, qui hoc tempore vivebat, tom. xii Spicilegii Dacheriani pag. 248 : « Anno, inquit, ordinationis suæ decimo nono (legendum *decimo octavo*, juxta dicta anno mciiv, num. 11), placuit Romam tendere, ut renovaret Privilegia sedis suæ, indignatus super protervia Adelberti Maguntiensis episcopi, de legatione Romanæ Sedis sibi concessa superbe se efferentis, maxime cum ex concessione priorum Apostolicorum episcopus Treverorum nulli nisi soli Apostolico, vel a latere ejus misso ad præsens debeat obediare ». Paulo post : « Cum igitur propter causas supra memoratas supradictus Bruno versus Romam iter faceret, et Augustodunum usque processisset, Callistus papa ibi ei occurrit, et cum amice suscepit, et cum eo in eodem loco Natalem Domini celebravit (anno nempe superiori). Transactis autem diebus sollemnibus, pariter iter Cluniacum dirigunt, ubi Bruno causas adventus sui aperuit, prolatisque coram sedis suæ Privilegiis, eadem sibi et Ecclesiæ suæ Apostolicæ subscriptionis firmamento stabiliri postulavit, et obtinuit ». Refert deinde historicus litteras ei a Callisto II concessas, datas *Cluniaci, tertio nonas Januarii*, quibus Pontifex personam ejus *a cuiuslibet legati potestate* absolvit, nisi forte a suo latere dirigatur.

3. *Deinde Romanis.* — Sed Callistum II Romam pergentem sequamur. Matiscone *Romanum*, oppidum in Delphinatu hodierno Valentiniæ urbi proximum, profectus est, ubi die xv mensis Februarii confirmavit bona et Privilegia Ecclesiæ Bisuntinæ Sancti Joannis, ut docet ejus Epistola ordine xiii, data « Romanis XV kal. Martii, Indictione xiii, Incarnat. Dom. anno mxxv, Pontificatus autem domini Callisti II papæ anno secundo ». Pridie ejus diei monasterium Sancti Cucuphatis martyris, Ordinis sancti Benedicti, vulgo *Saint-Ultag*, suscepit sub protectione Sedis Apostolicæ, eique omnia bona ac privilegia sua confirmavit, ut discimus ex Rescripto ejus, a Baluzio in Appendice ad Marcum Hispanicam pag. 1253 recitato, quod dicitur, « Datum Romæ per manum Cryzogoni, S. R. E. diaconi card. ac biblioth., XVII kal. Martii, Indict. xiii, anno Incarnat. Dom. mxxv, Pontificatus autem domini

Callisti II papæ anno secundo », sed corrigendi errores duo a librariis admissi, et loco *Romæ*, legendum *Romanis*, loco *XVII kal.*, legendum *XVI kal.*; mensis enim Martius tot dies ante kalendas non habet.

4. *Callistus II primum in septem provincias Viennensi archiep. concecit.* — Cum vero inde *Valentiam* se contulisset, *VIII kal. Martii* Privilegium quoddam Ordinis Cluniacensis ratum habuit, ut patet ex ejus Epistola ordine xii, et *quinto kal.* ejusdem mensis Viennensi Ecclesiæ, ejus episcopus fuerat, tribuit primatus auctoritatem in septem provincias, Viennensem, Bituricensem, Burdigalensem, Ausclanani, Narbonensem, Aquensem, et Ebredunensem, cum potestate Synodos indicendi, et negotia Ecclesiastica canonice dirimendi. Occasionem arripuit subjiciendi septem illas provincias Ecclesiæ Viennensi, inquit Marca in Dissert. ad Concilium Clavomontanum anno mxcv celebratum, num. 123, quia in Notitia in capite illarum septem, descripta est Viennensis provincia una cum ejus metropoli, quæ est *civitas Viennensium*. Quare conjecit tam sibi liberum esse, ut Viennam septem provinciis præficeret, quam decessoribus suis fuerat, Lugdunum præficere iis provinciis quæ Lugdunenses dicebantur in Notitia. Et ne nova videretur hæc institutio, a Silvestro I et aliis Pontificibus Romanis ejus originem accessit, quorum supposititia Rescripta edita sunt a Joanne Bosco, ubi ex Romano Catalogo septem provinciæ subjici dicuntur *Viennæ*, ut notatur in calce supposititii Rescripti Silvestrii. *Tarantasiæ* autem archiepiscopum, qui præpositus erat provinciæ Alpium Penninarum extra septem illas positæ, subjecit Viennensi, ut primati, exemplo Leonis I et Symmachi.

5. *Origo octo Viennensium provinciarum in Notitiis.* — Existimat Marca ex hoc *Callisti* decreto initium sumpsisse divisionem illam, quam aliquot exemplaria *Notitiæ* præferunt, in octo Viennenses provincias : ita ut viris eruditissimis laborandum non sit in alia ratione ejus divisionis quærenda, cum Scaligero, qui vicarium præfecti prætorio Galliarum *Viennæ* quondam constituisse, et in octo illas provincias jus dixisse, sibi, dein cæteris, sine ullo argumento, imo etiam contra veteris Historiæ fidem persuasit. Cum itaque beneficio Callisti, *Bituricensis* Ecclesia, quæ primatu in Aquitania potiebatur, et *Narbonensis*, quæ ex Urbani II decreto primas erat provinciæ Aquensis seu Narbonensis secundæ, subjectæ essent primati Viennensi, ipse sibi *primatis primatum* nomen indidit; et monete quam cudi curabat Viennæ, hanc inscriptionem adjecit : *M axima sedes Galliarum*. Sed nulla plane auctoritate in vim ejus Rescripti, quod per subreptionem elicuit, veterum primatum inauditorum jura convellebat, archiepiscopus Viennensis potitus est. Attamen Viensem, et Albensem, seu Vivariensem episcopatum, vi Rescripti illius ab Arclatensi provincia distractos, Viennensis archi-

episcopus in suam provinciam adscivit, cujus etiam-nam partes sunt. Callistus II diffinivit Ecclesiam Eboracensem liberam esse a professione, quam petebat Radulphus, archiep. Cantuariæ: « Hoc apud Vapingum in Capite jejunii Apostolico Privilegio confirmatum est », inquit Thomas Stubbs in Actis pontificum Eborac. apud Seldenum tom. II, pag. 1716.

6. *Callistus II Rom. pergit.* — A num. 3 ad 8. Callistus II, dispositis Gallicanarum Ecclesiarum rebus, « veniens ad Montem-Pessulanum », inquit Pandulphus, « processit ad Sanctum-Egidium, peragratisque Provinciæ partibus, et Alpium difficultate transcensa ad Sanctum-Ambrosium cum jucunditate pervenit ». Oppidum Sancti-Ambrosii paucis milliariis ab urbe *Susa* dissitum est. Inde Romam perrexit, ubi *tertio nonas Junii* magno honore exceptus fuit, inquit Eginus abbas, cujus Epistolam ad omnes fideles tunc scriptam refert Baronius. Malmesburiensis in lib. 5 de Gest. reg. Angl., de Callisti II Romam adventu ait: « Libenter a civibus (nam jam imperator discesserat) receptus est. Tum Burdinus in medio relictus Sutrium effugit, multis peregrinorum calamitatibus papatum suum fovere meditatus »; proceres enim, qui ejus partibus adhærebant infestas latrocinii vias habebant, eosque qui Romam tenderent spoliabant. Porro Udascaleus monachus Sancti-Udalrici scripsit narrationem « de controversiis inter Hermannum episcopum Augustanum et Eginonem abbatem S. Udalrici », quæ extat tom. II Antiq. Lect. Henrici Canisii, complectiturque Epistolas quinque Paschalis pape II, tres Arnolci archiep. Maguntini, ac tres Eginonis abbatis.

7. *Jordanus archiepiscopus Mediolanensis papa Rom. venienti occurrit.* — Jordanus archiepiscopus Mediolanensis a Callisti II partibus stabat, et, ut inquit Puricellus, Pontifici occurrerat propter eos qui insidiabantur gratiam imperatoris; et Pontifex ipse eum convenire cupiebat, quemadmodum prospere et prospere Romam adiret, Sedemque ibi Apostolicam obtinere valeret, uti narrat Landulphus Junior cap. 35 apud Puricellum, num. 333, ubi ait: « Guerra Comanorum (id est, Comensium) et Mediolanensium durante, atque eorum pontificum et consulum, vidi dominum papam Callistum, et Jordanum archiepiscopum cum pluribus Ecclesiasticis et sæcularibus viris illustribus consedere in Terdonensi palatio; in quorum præsentia querelæ meæ causam protuli, scilicet de domino Jordano », a quo Landulphus vexabatur, qui paulo post subdit: « Jordanus itaque, ejusque cætus locutus de sua opulentia in illa vespertina hora, et die altera palatium descendit: atque in tertia quæ dies fuit Dominica de Ramis Palmarum, in Ecclesia Sancti-Martiani cum suis suffraganeis, Petrum Terdonensem electum, licet modo abjectum, in episcopum ordinavit, etc. In die autem altera, quæ fuit secunda feria, dominus ipse electus papa Terdonam exivit: cum quo Olricus (id est, Henricus) vicedo-

minus Mediolanensis, Jordano archiepiscopo reverente Mediolanum, usque Placentiam ivit ».

8. *Jordano demortuo succedit Olricus.* — Tum Landulphus cap. 36: « Deus omnipotens neque per litteras domini Gelasii, neque per legatum Callisti (qui tunc erat vice-dominus Olricus) Jordanum mihi suavem sive benignum fecit. Sed de mundo illum tulit et gratia presbyteri Nazarii prunicerii, et cæterorum, quos suspectos habebam et habeo, Olricus vicedominus Jordano successit, qui fere simili modo me gravavit, ut Jordanus ». In antiquo Catalogo episc. Mediolan. apud Mabillonium in Museo Italico et apud Papebrocium tom. VII SS. mensis Maii legitur: « Dominus Jordanis archiepiscopus sedit annos VIII et menses IX et dies III, Obiit IV nonas Octob. » Quæ computatio certa, a die enim prima mensis Januarii anni MCMXII, quo cum electum fuisse vidimus, ad diem IV mensis Octob. currentis anni, spatium illud intercurrit. Olricus seu Henricus die XVII mensis Novemb. electus est archiepiscopus juxta eundem Catalogum, in quo de eo habetur: « Sedit ann. V, et menses VI, diesque XI. Obiit V kalendas Junii ». Sed quia certum est mortem ejus incidisse in annum MCMXII, loco annos V, legendum *annos II*, qui error sæpe in Mss. occurrit. Olrico eodem anno MCMXII successit Anselmus, hujus nominis V.

9. *Olricus archiep. Mediolan. instituit festum mortuorum.* — Isle Olricus primum instituit Mediolani Commemorationem omnium fidelium defunctorum, idque sedente Jordano, cum ipse adhuc archipresbyter esset, ut ostendit vetus Catalogus archiepiscoporum Mediolanensium apud Puricellum in Dissert. Nazariana cap. 96, num. 3. In eo enim Catalogo legitur: « Istius (nempe Jordani) tempore, Olricus archipresbyter et vicedominus Ecclesiæ Mediolanensis ordinavit festum mortuorum sequenti die post festum Dedicationis ». Idem Puricellus num. 10, hæc verba refert ex kalend. Ambros. an. MCCCXXXII in pergamento scripto: « Nota quod Dedicatio Ecclesiæ Mediolani est semper tertia Dominica Octobris et festum mortuorum est die Lunæ sequenti ». Beroldus Jordano et Olrico cœtaneus, ut demonstrat Puricellus, c. 97 Dissert. Nazarianæ, composuit Manuale adhuc Ms. asseritque Dedicatorem Ecclesiæ Mediolani celebrari Dominica III Octobris, et addit: « Feria secunda post Dedicatorem Ecclesiæ instituit dominus Olricus bonæ memoriæ archiepiscopus (quia post illam institutionem eam dignitatem adeptus est) Commemorationem et Officium fieri omnium fidelium defunctorum in Ecclesia Mediolanensi pro animæ suæ remedio; quod hoc ordine celebratur. Finito itaque Matutino supradicti diei, omnia tintinnabula Ecclesiarum pulsantur, et Matutinum defunctorum publice cantatur. Simili etiam modo, facto mane, missa ubique defunctorum tantum voce excelsa celebratur, etc. »

10. *D. Carolus usum Ecclesiæ Romanæ in Mediolanensem introducit.* — Cæterum institutio

eiusdem festi, facta ab *Odilone* abbate Cluniacensi, quam Ecclesia Romana ad diem secundam mensis Novembris amplexa est, in Mediolanensem introducta non fuit ante initium sæculi proxime præteriti. Nam in Calendario Missalis Ambrosiani anni MDV, legitur: « Dedicatio Ecclesie Majoris Mediolani semper celebratur in tertia Dominica hujus mensis (nempe Octobris) et festum mortuorum est die Lunæ sequenti ». Idem legitur in editione anni MDXXII, cum hoc discrimine, ut uterque usus in ea ponatur, et ad diem II Novembris legatur: « Commemoratio omnium fidelium defunctorum secundum Romanos ». Idem legitur in editione anno MDXLVIII facta. Sed postea solemnitas festi Mediolani instituti paulatim abolita fuit, et *ad libitum* relicta, idque in Breviario anno MDLVI impresso, in quo legitur: « Et nemo tenetur, nisi qui vult ». In editione anni MDLX facta, tantum mentio festi mortuorum ad diem II Novembris, tandemque divus Carolus archiep. Mediolanensis in suo Breviario anno MDLXXXII impresso, omnibus presbyteris et clericis præcepit, ut quoad festum mortuorum sese Ecclesie Romanæ conformarent.

11. *Romæ magno gaudio excipitur.* — A num. 8 ad 11. Brevi tempore *Callistus II* Romæ remansit; ut enim Normannos ad Sutrii expugnationem hortaretur, *Beneventum* se contulit, uti narrat Baronius. Porro *Sutrium* oppidum est rupibus undique cinctum, ab urbe Romana XXV mille passibus dissitum, ubi *Burdinus* ab imperatore derelictus sese continebat, et sine exercitu expugnari non poterat. Sed præstat audire Falconem in Chron., Petro Diacono et Romualdo Salernitano archiep. a Baroniō citatis antiquiorem, cum de rebus hoc anno in Italia gestis verba facit: « Hoc anno », inquit Falco, « supra memoratus papa Callistus ab ultramontanibus partibus reversus est, et nono die intrante mensis Junii Romam ingreditur. (Egino, ut supra vidimus, scribit Callistum II Romam III nonas Junii introisse, et in Chron. Falconis numeri sæpe depravati. Quare loco *nono die*, legendum *tertio die* et error ille librariis adscribendus). Unde factum est, ut Petrus Portuensis episcopus tunc vicarius, cum aliis cardinalibus Romæ manentibus aliisque clericorum turmis et viris utriusque sexus, obviam Pontifici illi properavit. Gaudium igitur populi Romani et lætitiā, si lector aspiceres, diceret admirans præ gaudio tanto sub honore triumpho Pontificem quempiam Urbem ingressum non fuisse. Audiens itaque Hugo cardinalis, qui tunc Beneventanā civitatem regabat, Apostolici adventum, Romam festinus tetendit, et cum illo cives quamplures adierunt, etc.

12. *Beneventum profectur.* — « Hoc anno Bernardus abbas monasterii S. Sophiæ, (in urbe sc. Beneventana) III kal. Aug. migravit ad Dominum. Post obitum vero ipsius abbatis quædam monachorum pars nullo die stante mensis Julii monachum quendam, Ademarium nomine; abbatis Madchini nepotem, in abbatem elegerunt, ad cujus

electionem Joannes venerabilis decanus, etc. alii que monachorum sapientium non consenserunt: unde factum est, quod discordia ineffabilis inter eos habita est. Hoc anno dominus noster papa Callistus accepto consilio Beneventum advenit, et octavo die intrante mensis Augusti civitatem ingressus est. Audiens itaque Beneventanus populus ipsius adventum longe lateque optatum, extra civitatem duorum millium spatio gaudio magno repletus egrediebatur: Apostolicus ipse a clericis et monachorum turba, et a presbyteris, civibusque omnibus, gloria et gaudio magno suscipitur. Præterea Amalphytani omnes, plateas cunctas vestibus sericis, pallisque et ornamentis pretiosis in adventu illius ornaverunt; infra ornamenta vero thuribula aurea et argentea cum odoribus et cynamomo posuerunt. Pedes vero Apostolici et habenas equi cives quatuor a ponte Leproso usque ad portam Sancti-Laurentii ducebant; deinde quatuor alii usque ad episcopium, ab episcopo autem quatuor iudices, etc. usque ad sacrum Beneventanum palatium detulerunt. In comitatu Apostolici si adesces, et tympana percussa, cymbula tintentia, et lyras sonantes aspiceres, revera affirmares, Apostolicum alium tali sub triumpho et gaudio ingressum non fuisse civitatem.

13. *Gesta Beneventi hoc anno.* — « Diebus autem non multis decursis, complures civium, qui amici Landulphi (cognominati a Græca Pont. Rom. addictissimi) quondam comestabuli, stiterant, Apostolicum precantur, quatenus ei copiam habitandi tribueret in civitate: comestabulus vero per triennium Montem Fuscum habitaverat. Apostolicus igitur fidelium suorum precibus favens, sicut postulaverant, licentiam impendit, etc. Audiens autem Callistus Pontifex discordiam illam, quæ inter fratres monasterii Sanctæ-Sophiæ pro electione facta supradicti Ademarii regnabat, monasterium advenit, et quia electio illa canonica et regularis non esset, a Petro Portuensi episcopo cæterisque cardinalibus qui illuc convenerant, irrita et fracta iudicata est. Confestim id a Pontifice Callisto confirmatur. Quid multa? licentiam fratribus dedit, ut quem vellent abbatem eligerent. Quo facto, ad palatium Apostolicus reversus est. In crastinum autem quartodecimo die intrante mensis Augusti etc. fratres numero quinquaginta personam Joannis Grammatici, virum prudentem et ornatis moribus, comprehenderunt, et cum invilum et renuentem cathedram supersedere fecerunt, etc. Audiens igitur Apostolicus quod regulariter electio illa fieret, complacuit et confirmavit. Diebus autem non multis excursis, predictus Pontifex Callistus monasterium S. Sophiæ advenit, et inter missarum solemnias XIV kal. Septemb. prælatum Joannem etc. consecravit. Die vero ipsius consecrationis dedicatio altaris B. Mercurii celebratur in S. Sophia. Diebus autem non multis elapsis, prius ad prædicti Rothridi electionem Pontifex Callistus inducias posuit, ut ad constitutum tempus jejunii mensis

Septembris consecraretur ». Anno superiori Rodfridus archiepiscopus Beneventanus electus fuerat.

14. *Obitus duorum comitum Capuae.* — Haec etiam praesenti anno Falco narrat: « Hoc anno quinto die stante mensis Maii, Capuani constituerunt principem Richardum, filium Roberti principis, dominum eorum, eo quod princeps genitor ejus infirmabatur, et eo constituto, Capuanus archiepiscopus, convocatis episcopis aliisque viris prudentibus, et Rodfrido Beneventano electo, die Ascensionis Domini, v die ipsius Maii stante, principem eum consecravit ». Habemus hic egregium exemplum, quo evincitur Apuliae scriptores per mensem *stantem, instantem, vel astantem* intellexisse mensem exeuntem; hoc enim anno, quo Pascha die xviii mensis Aprilis celebratum, Ascensionis festum in diem xxvii mensis Maii incidit, et Falco disertè asserit festum Ascensionis fuisse diem quintum ipsius mensis Maii *stantem*; ad quem loquendi modum cum varii critici emunctae naris animum non advertissent, quandoque Chronologiam perturbarunt. Refert postea Falco Rodfridum Beneventanum electum, inducias sanxisse cum Ranulpho comite: « Coram omnibus fide data et accepta, trevum a septimo die stante mensis Maii (sc. a die xxv mensis Maii, juxta ea quae mox diximus) usque ad kalendas Septembris firmiter confirmaverunt ». Addit Falco Robertum principem Capuanum octavo die post filii sui consecrationem e vita migrasse: « quo defuncto Jordanum praedicti Roberti principis fratrem constituerunt in principatus honorem ». Ad quae verba Peregrinus in Stemmatibus principum Capuae haec notat: « Cui (nempe Falconi) standum, auctori rem minutissime exponenti, non autem Petro Diacono lib. 4, cap. 65, nec anonymo Casinensi, perhibentibus ipsum unctam (retinere enim Normanni Capuae principes se sacro oleo perungi) post patris mortem. Nec consentiendum Romualdo Salernitano, qui ait, Roberto successisse fratrem ejus Jordanum ». Jordanus II princeps Capuae post nepotem Richardum III inunctus nonis Julii anno mxxx, secundum Falconem et Chronicon Cavense. Callistum II Trojam profectum esse, ibique honorifice a Wilhelmo Apuliae duce exceptum, tradit Romualdus Salernitanus archiepiscopus in Chron. apud Baronium, num. 8.

15. *Callistus II Romam redit.* — Pandolphus in Vita Callisti II loquens de eo e Gallia Romam reduce, ait: « Ibi aliquandiu commorans, Hugonem cardinalem a Benevento vocavit. Idem D. Hugo Beneventum tenebat: cum quo simul et aliis pariter per Campaniam et Casinense caenobium ipsum addit Beneventum, (die scilicet octava mensis Augusti). Venerunt ad eum illico Guillelmus Apuliae dux, princeps Capuae urbis, Jordanus comes, etc. et innumeri alii, qui eidem ibi hominum fidelitatem fecerunt. His ita dispositis, paulo post Romam per maritum rediit », vel exeunte hoc anno, vel ipso sequentis initio. Haec de prima

Callisti II in Apuliam protectione, ad quam revocari non potest legatio Sugerii, de qua statim ago.

16. *Legatio Sugerii ad Callistum II ejusque in abbate consecratio.* — Ad num. 41. Legationem Sugerii monachi San-Dionysiani nomine Ludovici VI Francorum regis ad Callistum II, dum in Apulia esset, quam ipsemet in Vita ejusdem regis memorat, neque hoc anno, ut putavit Baronius, neque anno mxxii aut insequenti, ut omnes alii arbitrati sunt, sed anno millesimo centesimo vicesimo primo obitam, ex ejusdemmet relatione certo deduci puto. Baronii opinio suslineri non potest, cum *Sugerius* pag. 310 disertè asserat se ad eam destinatum, postquam *Burdunus* perpetuo carceri damnatus fuit, quod anno tantum sequenti, exeunte mense Aprilis, accidisse videbimus. Quo narrato subdit Sugerius: « Cui (nempe Callisto II) cum in Apulia apud civitatem Botuntum (legendum *Bituntum*, vel *Butuntum*, quod oppidum est a Benevento aliquot miliaribus distans) missus a domino rege Ludovico pro quibusdam regni negotiis occurrissem, etc. » Ait postea, cum viæ se dedisset ut in Franciam rediret, sese mortem *Adæ* abbatis Dionysiani accepisse, et *communem* de persona sua *factam electionem*; sed *quia inconsulto rege factum fuerat*, eum meliores fratrum et milites nobiliores castello Aurelianensi inclusisse. Sese etiam ad regem unum de suis premisisse, ut sciret *quem finem turbati negotii confusio reperisset*; sed dum eum subsequitur, *inopinate rediisse, quia regis pacem, captorum solutionem, electionis confirmationem reportant*, et denique cum ad Sanctum-Dionysium pervenisset, archiepiscopum Bituricensem, *sequente die, sabbato scilicet Medianæ*, se presbyterum ordinasse, et *sequente Dominica* abbatem consecrasset. Paulo post indicat, se Romam profectum esse, et sequente *ordinationis suae anno* Concilio generali Laterani habito interfuisse. Haec Sugerius.

17. *Utriusque epocha.* — Concilium Lateranense I anno mxxiii qui annum Sugerii ordinationis sequebatur, die xxv mensis Martii celebratum, anno mxxii, *sabbato Medianæ*, seu sabbato ante Dominicam Passionis, die sc. xi mensis Martii presbyter, et Dominica insequenti abbas consecratus fuit, qui reliqui sunt menses duo et dies aliquot ejusdem anni mxxii vix sufficient, ut Parisios mittere illucque ipsemet pervenire posset. Ex quibus consequens est, *Sugerium* ultimis mensibus anni millesimi centesimi vicesimi primi ad Callistum II legatum missum fuisse; paucis postquam cum eodem Pontifice collocutus est diebus, mortem *Adæ* abbatis Dionysiani accepisse: hancque accidisse ipso initio anni mxxiii, cum ab illo tempore ad diem quo presbyter ordinatus fuit, fluxerint tantum menses duo et aliquot dies, in eundo Parisios, indeque redeundo consumpti. Quare in parvo Chronico Sancti-Dionysii in fine tom. II Spicilegii Dacheriani edito, accurate ad annum mxxiii scriptum: « Obiit Adam abbas. Ordinatio Sugerii abbatis ». Anonymo vetera Instrumenta suffragan-

tur, et Nangius in Chron. Verum quidem est, initio Operum Sugerii pag. 280, ex vetere Codice Ms. Ecclesie Sancti-Dionysii dici *Sugerium* anno Domini mxxiii in abbatem monasterii electum esse, sed illud ex mox dictis seipso corrumpit, sicuti et quod ex Chronico Nangii ad annum mxxiii refert, et sequitur Mabillonius in Nota ad Epist. lxxviii sancti Bernardi et in Chronologia Bernardina : « Sugerius Sancti-Dionysii in Francia monachus, etc. a Roma regrediens, quo fuerat a rege Francie Ludovico missus, abbate suo Adam defuncto, cligitur in abbatem, qui reversus, primo presbyter ordinatur, et post presente rege, a Bituricensi archiepiscopo in sua Sancti-Dionysii Ecclesia in abbatem benedicitur » ; Sugerius quippe, ut ex ipsomet Sugerio ostendimus, tempore Quadragesimali anni mxxiii non in Francia, sed Romæ erat, et Concilio Lateranensi I assistebat.

48. *Magis confirmatur.* — Callistus II anno mxxxi medio mense Septembri *Salerni* versabatur, et eodem mense exeunte *Beneventi* fuit, ut eo anno videbimus. Quare ex alterutra urbe *Bituntum* se contulit, ibique *Sugerius* ante ejusdem anni finem cum convenit, et negotia pro quibus missus fuerat, exposuit. Ea itaque legatio nec hoc anno, nec anno mxxii aut insequenti peracta, nec aliquid contra hanc nostram sententiam alicuius momenti afferri potest ; cum contra aliæ ipsimet Sugerium contrarium habeant, ut ex dictis patet, et magis mox liquet. In patriarchio quidem Bituricensi cap. 62 dicitur, *Vulgrinum* Bituricensem archiep. tertio adepti pontificatus anno Sugerium in abbatem Sancti-Dionysii benedixisse, illumque *Leodegario* anno mxx mense Martio demortuo in archiepiscopatum successisse. Verum anonymus, qui illud opus composuit, seculo precedenti vixit, et nisi annos Julianos numeret, ut sepe fit, hac in re non audiendus, sicuti nec in multis aliis passim a viris doctis rejectis. Duchesnius in Notis ad Hist. calamitatum Petri Abaelardi, pag. 1173, ut probet *Adamum* an. mxxiii demortuum, ait ipsomet Sugerium in veteri Charta annum Christi mxxv administrationis suæ tertium numerare, his verbis : « Actum in monasterio B. Dionysii in generali conventu, presidente domino Snggerio venerabili abbate ejusdem monasterii, tertio administrationis ejus anno, Incarnat. autem Dom. mxxv, die Dominica, idus Martii, Luna vii, Indict. iii, Epacta xiv, concurrente iii, regnante Ludovico glorioso et illustri Francorum rege, xvii administrationis suæ anno, et præsentem condonationem confirmante, etc. »

49. *Corrigitur locus mendosus Constitutionis Sugerii.* — Verum locus ille, qui sæculi nostri criticis in errorem induxit, mutilus est, et loco *die Dominica, idus Martii*, legendum *die Dominica, VIII idus Martii*; seu die viii, non vero die xv mensis Martii; Sugerius enim, qui anno mxxiii, die xxv mensis Martii Concilio Lateranensi Romæ interfuit, non potuit eodem anno, die prima Apr-

lis apud S. Dionysium in Francia abbas consecrari, quod tamen necessario sequeretur, si præfata subscriptio pura non esset, quia Sugerius consecratus fuit Dominica sabbatum *Mediæ* subsequente, quæ anno mxxiii in diem primam Aprilis incidit. Dominicam enim Passionis *Medianam* appellatam fuisse certum, et Sabbato antecedenti sacros ordines conferri solitos, docet Durandus lib. 6 Rational. cap. 59, num. 2. Hanc nostram emendationem confirmant Constitutiones duæ Sugerii ab ipsomet Duchesnio tom. iv, pag. 346 recitate, in quarum una ordine iii, Sugerius ait, eam datam esse « XV kalend. Julii, anno incarnati Verbi mxxxxvii, Indict. xv, anno vero administrationis nostræ xvii », et in altera ordine ix. « Actum est hoc et hæc Charta anno ab Incarnat. Domini mclxviii, regnante Ludovico rege Francorum et duce Aquitanorum, anno regni sui xviii, abbatæ vero nostræ xxvii ». Quæ subscriptiones veræ esse non possunt, nisi Sugerius abbatæ suæ annos ab anno mxxii deduxerit. Postquam hæc scripseram, legi apud Doubletum in Antiquit. monasterii Sancti-Dionysii p. 852 Diploma emissum a Ludovico VI Francorum rege in gratiam Sugerii tunc abbatis Sancti-Dionysii, datum « Parisiis publice an. incarnat. Verbi mxxiii, regni nostri xiv, Adelaidis reginæ vii, etc. » Ex quo Diplomate liquet etiam novo exemplo, Adelaidis reginæ annos numeratos fuisse, non quidem in omnibus ejusdem regis litteris, sed in multis, quæ adhuc supersunt. Incipiunt hujus reginæ anni anno Christi mxxv, cum primus connexus reperitur cum anno mxxvi et tertius cum anno mxxviii.

20. *Institutio Ordinis Præmonstratensis.* — Ad num. 12. In vulgari Chron. Roberti de Monte ad hunc annum legitur : « Vir Dei Norbertus a papa Callisto Bartholomæo Laudunensi episc. specialiter commendatus (anno sc. superiori, quo post celebratum Concilium Rhemense Callistus II Laudunum venit, ut refert Ilugo in Vita sancti Norberti cap. 17) cum ei Ecclesia B. Martini a predicto episcopo offerretur, tum propter urbis viciniam, tum quia ejusdem Ecclesie clerici propositi et vite ejus austeritatem horrebant, eam reliquit, et ab episcopo diversis ejusdem provincie locis congruentibus sibi ostensis, tandem divinitus in loco Præmonstrati resedit, ibique solitarii religiosam vitam agere cepit, et tempore Quadragesimæ ad colligendos socios solus egressus, ante Pascha cum tredecim sociis rediit, et cum his in Præmonstrato loco secundum canonicæ institutionis normam, ad tenorem regulæ B. Augustini Deo militare cepit ». Berinannus, qui hoc tempore vivebat, ex monacho Laudunensi Sancti-Vincentii, factus postea abbas S. Martini Turonensis, in Hist. Restaurationis abbatie Sancti-Martini Tornacensis, tom. xn Spicilegii Dacheriani de hoc Ordine scribit : « Sic per Dei gratiam brevi tempore profecit, ut nullum præter Apostolos videamus hodie tantum fructum in Ecclesia fecisse. Nam cum necdum conversionis ejus trigesimus annus sit, jam fere centum mona-

steria a sequacibus ejus per diversas orbis partes constructa audivimus; ita ut etiam in Hierusalem usque regula eorum servetur ».

21. *Gerardus episc. Engolismens. fit legatus Aquitanie.* — Hoc anno Callistus II litteris *Beneventi XVII kal. Novembr.* datis, Gerardo episc. Engolismensi commisit legationem Sedis Apostolicæ « per Bituricensem, Burdigalensem, Auscitanam, Turonensem, et Britanniam provincias », atque se id facere exemplo Paschalis; qui cum nullam Gelasii II mentionem faciat, Baluzius in Supplem. ad lib. 5 Concordiæ cap. 47, ubi eas litteras refert, recte inde deducit, *Gerardum* hac auctoritate instructum non fuisse a Gelasio II, præsertim cum *Cono* episc. Prænестinus ad Hugonem episc. Nivernensem scribens litteras supra a nobis memoratas de electione Callisti II dicat, Gerardum Engolismensem episc. in partes ejus transiisse, et indicare videatur illum quodam modo alienatum fuisse a Curia Romana tempore electionis Gelasii II. Ait enim: « Nam et Engolismensis episcopus, antequam a nobis discederet, subscripserat, et domino papæ humiliter se subdiderat ». Data itaque viro præpoto litteris Aquitanica ad mitigandum ejus animum. Eam autem quam præfatus provinciis comprehensam fuisse jam supra ostendimus, laudatæ Callisti II litteræ demonstrant. Hujus tamen legationis terminos, contractos aut dilatatos fuisse pro libito summorum Pontificum probat ibidem Baluzius citatus.

22. *Concilium Bellovac.* — « Anno MCXX », inquit auctor Chronici Sancti-Petri-Vivi, « celebratum est Concilium IV kal. Novembris a domino Conone Prænestino episcopo, qui tunc legatus dicebatur trium provinciarum Rothomagensium, et Senonensium, atque Rhemensium. Ad quod Concilium cum archiepiscopi cum suffraganeis suis, tam episcopis quam abbatibus, Belvaco harum invitarentur provinciarum, dominus Daimbertus Senonensis archiep. invitatus, molestia corporis defensus venire non potuit ». Subjungit hujus Chronici auctor Daimbertum invitasse Arnaldum abbatem S. Petri-Vivi ad iter illud peragendum, sed illum cum iter suscepisset, in morbum incidisse, « Mox quemdam monachorum suorum nomine Clarium, ut se excusaret, ad Concilium transmisit. Monachus vero ille ad Concilium veniens, abbatem Arnaldum dominum suum veris rationibus excusavit », inquit chronographus. Dacherius in margine habet, Clarium istum auctorem esse ejusdem Chronici Sancti-Petri-Vivi; quod confirmat in Præfatione ad lectorem, num. 7, scribitque *Clarium* Floriacensem primum, post ejusdem abbatie Sancti-Petri monachum fuisse et *Godfridum a Colone* monachum ilidem Sancti-Petri-Vivi, de Concilio Belvacensi in Tabulis Chronologicis agentem tradere: « Pro domno Senonensi archiepiscopo, et pro se misit (nempe abbas) monachum nomine Clarium, valde bene litteratum: qui monachus bene illos excusavit ». Mathoudus

in Dissert. de Vera Senonum Origine Christiana cap. 2, § 2, Clarium auctorem Chronici Sancti-Petri-Vivi statuit, ostenditque Gaufridum Prædicationis libri sui lemma subjecisse, quo testatur, se tibellum suum scripsisse *anno Domini millesimo ducentesimo nonagesimo tertio*. Dacherii opinionem omnes etiam alii secuti sunt.

23. *Clarius non est auctor totius Chronici Sancti-Petri-Vivi.* — Verum ipsemet Dacherius in Præfatione laudata ad tom. II Spicilegii num. 5, refert verba Lisiardi Suessionensis episcopi « in Vita Ms. sancti Arnulphi decessoris sui cap. 15, de Elevatione corporis ejus », quæ demonstrant non solum auctorem Chronici Sancti-Petri-Vivi deceptum fuisse in die celebrationis Concilii Belvacensis, et in delegatione tam Arnaldi abbatis, quam Clarii monachi ad eam Synodum; sed etiam Clarium non esse legitimum parentem ultimum annorum præfati Chronici. Ait enim Lisiardus Concilium Belvacense *XV kalend. Novembris* congregatum fuisse, subditque: « Intererant ibi episcopi Francorum Guillelmus Catalaunensis columna doctorum, Gaufridus Carnolensis episc., Daimbertus Senonensis archiepiscopus, Aurelianorum episc., Parisiorum episc., Lisiardus ego indignus Suessionensis episc. etc. » Quare Lisiardus, quem constat ex Chron. Rhemensis anno MCXX vita functum, hac in re falli non potuit, et auctor qui Chronicon S. Petri-Vivi usque ad annum MCXXIX perduxit, non potest esse *Clarius*; is enim non assereret, *Daimbertum* morbo affectum ad Bellovacense Concilium non venisse, et Clarium, seu semetipsum, ejus loco missum esse. Certe parum verosimile est chronographum post annos sexaginta a celebratione Concilii, cui ipse interfuisse, manum operi admoveisse. Cæterum Surius ad diem XV mensis Augusti recitat Vitam S. Arnulphi Suessionensis episc. a Lisiardo scriptam, in capitulis contentam, quæ in morte ejus definit, nihilque habet eorum quæ Dacherius refert. Unde suspicor, Surius prætermisisse Historiam miraculorum et Translationis sancti Arnulphi, et ex ea, non vero ex ejus Vita, Dacherium exscripsisse quæ refert, quæque nunc tomo X Concil. ubi sermo est de Concilio isto Bellovacensi, leguntur. Anno MCXX jam indicavi, Chronicon Sancti-Petri-Vivi post annum circiter XC continuatum fuisse ab alio auctore, sicut Chronicon Hil-densheimense. Opus est trium auctorum, sub unius nomine editum.

24. *Translatio S. Arnulphi episc. Suession.* — Concilium Bellovacense currenti anno coactum fuisse, ex Fragmento illo Dacheriano certo eruitur; ibi enim dicitur, auditis miraculis in variis regionibus a sancto Arnulpho post mortem ejus patrat, decretum fuisse, ut corpus ejus *kalendis Maii* de humo levaretur, subditurque: « Itemque cap. 18, annus quo gesta sunt isthæc, nempe paulo post peractum Concilium, designatur. Facta est autem hæc sancti Arnulphi Translatio prima die Maii, Indict. XIV, sub anno Dominicæ Incarnat. MCXXI,

Francorum scepra tenente Ludovico filio Philippi annis quatuordecim ». Decretum itaque in Concilio Bellovacensi mense Octobri currentis anni conditum, anno sequenti, die qui designatus fuerat, executioni mandatum. Cumque *Guillelmus* Catalaunensis episcopus, quem certum est mense Januario obisse, huic Concilio interfuerit, manifestum est lapsos esse viros doctissimos, qui mortem ejus cum an. *mcix* alligarunt, et quæ chronographus Mauriniacensis de Conone et Willelmo Catalaunensi episc. scribit præsentī anno contigisse : « Divina providentia factum est », inquit chronographus iste, « ut rursus dominus Cono Prænestinus episcopus et Apostolicæ Sedis legatus apud nos hospitandi gratia divertisset, habens secum velut auxiliatorem magnum Willelmum Catalaunensem episcopum, qui sublimes scholas rexerat, et tunc zelum Dei habens super omnes episcopos totius Galliæ divinarum Scripturarum scientia fulgebat ».

25. *Moritur Gerardus fundator Ord. Hospitaliorum.* — Hoc anno *Gerardus* primus institutor Ordinis equitum Hospitaliorum e vita migravit, teste chronographo Malleacensi, qui hoc tempore vivebat, quique ad annum *mcxx* inter alia habet : « Giraudus Hospitalis de Jerusalem eodem anno obiit in sancta conversatione ». Bosius quidem in parte II Historiæ hujus Ordinis lib. 1, pag. 2, mortem ejus in annum *mcxv* confert, sed nullo teste. Ipsemet pag. insequentī narrat extare donationem quamdam, ab *Attone* comite Aprutii anno *mcxx* Hospitali Hierosolymitano factam, ex qua quidam deducunt, *Rogerium*, qui in ea Donatione dicitur præfectus Hospitalis Hierosolymitani, et fratrum ejus Gerardo in eo munere successisse, non vero *Raimundum de Podio*, quod Bosius jure merito in dubium revocat. Error inde processit, quod cum notarius magistri Hierosolymitani nomen sola littera R. expressisset, imperitus exscriptor loco *Raimundi Rogerium* legit, cum in nulla Histōria Rogerii mentio sit. Raimundus electus Ordinis magister, regulam edidit, ab omnibus Hospitalis Hierosolymitani religiosi in posterum observandam, quæ postea interpolata fuit, ut idem Bosius tradit. Sæculo decimo sexto Rhodo à Turcis capta, quidam equites Hierosolymitani corpus Gerardi Militum et inde in domum suam Manuascæ, quod oppidum est Provinciæ in diocesi Sistaricensi situm, detulerunt, uti refert Columbius Manuascensis lib. 3 Hist. Manuascæ, qui subdit : « Gerardus est in præcipua Manuascensium veneratione, et septennumero pluviam arentibus agris rogatus concedit ».

26. *Pax Francos inter et Anglos sancita.* — Gesta hoc anno in Anglia Simeon Dunelmensis in Hist. de Gest. reg. Angl. hoc modo narrat : « Anno *mcxx*, rex Anglorum Henricus et rex Francorum Ludovicus, post multa suarum partium detrimenta, die præstituta ineunt colloquia. Quo ex consensu concordiæ peracto, jussu regis

Henrici, filius ejus Willelmus, facto regi Francorum hominio, Normanniæ sub illo suscepit principatum. Ita redeuntibus in pacem regibus, tota tumultuantis Normanniæ seditio comprimitur, etc. Ad hoc Epistola Apostolici ad regem jam paratam redire in Angliam directa, Turstinum archiepiscopum (sc. Cantuariæ) suscipere, et in suam præcepit Ecclesiam omni postposita excusatione restituere. Sed ad hoc præceptum quid potissimum respondeat rex, distulit donec rediisset in Angliam.

27. *Willelmus Angliæ rex declaratus naufragio perit.* — « Itaque rex, omnibus qui contra se insurrexerant vel devictis vel repacatis, cunctisque ad votum prospere peractis, quinto protectionis suæ (sc. in Normanniam) anno ne dum completo, lætior solito in Angliam multo (navigio) revelitur. Delegaverat autem filio cuneloque illius comitatui, navem qua nulla in tota classe videbatur melior, sed ut eventus ostendit nulla infelicio. Patre namque præeunte, paulo tardius, sed infelicio sequebatur filius. Nave quippe non longe a terra in ipso vellificationis impetu super scopulos in ipso exitu delata ac dissoluta, filius regis cum omnibus qui secum erant interit VI kal. Decembr. (legendum VII kal. Decemb. ut Ordericus lib. 13, et Malmesburiensis pag. 165 habent, et feria demonstrat) feria V, noctis initio apud Barbatot. Mane facto, thesaurus regis, qui in navi fuerat, invenitur per arenas, corpora vero pereuntium nulla ». Ordericus laudatus reditum Henrici Angliæ regis in regnum suum, et mortem Willelmi filii in annum præcedentem male retrahit, refragantibus aliis scriptoribus Britannicis, præsertimque Eadmero lib. 5 Novorum, viro in Chronologia accuratissimo. Venerat in Normanniam *Henricus* rex anno *mcxvi*, ut Eadmerus aliique produnt, et ab eo tempore variæ pugnæ inter eum et Ludovicum Francorum regem habitæ sunt, de quibus anonymus in veteri membrana Ms. apud Duchesnum, Tom. iv, pag. 323 ita loquitur : « In bello quoque contra Henricum regem Angliæ sæpe vario eventu pugnavit, nunc victor, nunc victus : tamen victoriam sæpius reperavit. Et tandem ad invicem pacificati sunt ».

28. *Ordo militaris S. Sepulchri instituitur.* — Alphonsus Aragoniæ rex, postquam *Darocam* minutum oppidum Aragoniæ ad Xilocam Fl. *Mauris* eripuit, animadvertens a Daroca Valentiam usque villas omnes et vicos desertos, agrosque incultos ob continuas *Maurorum* incursiones, certum locum elegit, ubi *Montem-Regalem* ædificandum curavit, conventumque equitum militarium, Hospitaliorum instar, designavit, ut nova hæc militia Christianos circumvicinos a Mauris tutaretur, et ad Valentiam Muricæque regna Mauris eripienda aditum panderet. De hujus Ordinis institutione loquitur Surita lib. 1 Annal. cap. 45, atque *Gastonis* vicecomitis Bearnensis, et regni sui procerum consilio factam esse, amplos his equitibus ab Alphonso rege reditus destinatos ;

pium opus per universum Aragoniæ regnum tam a *Guillelmo* archiepiscopo Auscensi, quam ab Aragoniæ episcopis promulgatum; sed obreis mortem rem effectum sortitam non esse. Equites isti *sancti Sepulchri equites* nominati, et ab uno Orderico lib. 13, *Frates de Palmis* nuncupati, quod, ut recte conficit Marca lib. 5 Hist. Bearniæ cap. 21, pro insignibus palmam elegissent. Joannes Briz Martínez in Historia Sancti-Joannis Pennatensis lib. 5, cap. 24, hos equites a *Templariis* diversos fuisse optime demonstrat, sed in eo fallitur, quod eosdem cum Sancti-Joannis Pennatensis equitibus confundat. De victoriis ab *Alphonso* rege de Mauris in Hispania reportatis legendi Surita, Joannes Priz Martínez et Marca citati.

29. *Almohedi ad universam Africæ imperium inhiat.* — Postquam *Ali* Almorabitarum imperator Africanos sibi rebelles vidit, ut *Almohedi* rebellium ductoris factionem in ipso ortu præfocaret, ex Hispania exercitum misit, sed is animo imperterritus se victorem fore suis prædixit, quod cum revera contigisset, montis *Timmerlæ* incolæ legatos ad eum misere, ejusque dominium agnovere, ac fœdus cum eo pepigerunt. Cum ad montem illum *Almohedi* perrexisset, veritus ne ab agresti populo isto proderetur, quo illos hac rebellione magis illigaret, auctor eis fuit, ut quos *Ali* imperator ad colligenda tributa mitteret, interficerent; quod et factum fuit; omnes enim officiales et a principe delegati interecione deleti, eorumque bona ab *Almohedi* suis distributa. Multo hic crudelitates et dolos, quibus vir multiplici ac tortuoso ingenio usus, ut apud rebelles auctoritatem nancisceretur; hoc solum dicam, cum anno *Hegiræ* dxiv, quo hæc accidere, exercitum quadraginta millium pugnatorum ad *Marochium* Marochiani imperii metropolim obsidendam misisse, ut absolutum in Africa dominatum exercere posset. Verum, uti refert Noweirius Arabs, consilium hoc ei infeliceiter cessit, exercitusque ille fusus fugatusque. Sandovalius scribit, Chronica Documentaque Hispanica a se visa fidem facere, Christianos ad hanc *Musmitum* aut *Musmudum* cladem plurimum contulisse. «*Marochium*», inquit fol. 120, «refertum erat Christianis captivis, inter quos *Rebeter* eques Catalanus bellica laude clarissimus, cui *Ali* imperator confidebat, eumque multum faciebat. Ab *Ali* prorsus abhorrebant Assyrii, Musmitæ appellati, qui hanc Africæ partem habitabant, quam *Montes Claros* vocabant. (Hæc Musmudum origo ab Assyriis deducta manifeste falsa; sed antiquis Hispanis parendum, si de originibus Arabicis satis edocti non fuere). *Ali* imp. hoc negotium omne *Rebetero* commisit, eique facultatem fecit, ut servos omnes Christianos Marochii existentes, et arma ferre valentes secum duceret. Faustum fortunatumque fuit *Ali* imp. quod talem virum elegisset; quia ejus et militum Christianorum fortitudine *Rebeter* præclaras de inimicis victorias reportavit». Ita Sandovalius.

30. *Ejus dominatus initium a sequenti anno*

repetendum. — *Ebn Tynart*, inquit Noweirius, ac propheta ille et Almohedi moriens suis commendavit, ut in principem eligerent *Abdelmooumen*, quod ante finem anni Hegiræ dxiv ab illis præstitum, ideoque initio sequentis Christi anni. Hæc epocha initii dominatus et imperii *Almowahedinorum*, a quibus Christiani in Africa et in Hispania dire habiti. Scriptores Hispanici *Amowahedinorum*, aut *Almohadum* nomen corrumpere, indeque hujus nominis etymologiæ magnas tenebras offudere. Testatur Rodericus plures eam a propheta Mohadi deduxisse. Verum hanc derivationem linguæ Arabicæ periti, quos consului, plane rejiciunt. Addit Rodericus, alios arbitratos *Almohadis* vocem *Unitos* designare, qui licet falsi sint, veritati tamen proxime accedere; *Almohadi* enim Latine sunt *Unitarii*, seu unitatis defensores. Subdit Noweirius, *Abdelmooumen* a montium incolis regem electum, nomen *amiral Mumeni*, id est, fidelium imperatoris sibi attribuisse, calipharum instar, et *Omarum* ex ejus ducebus unum, imperii successorem designatum esse.

31. *Victoria de Saracenis ab Alphonso Aragonæ relata.* — In Chronico Malleacensi ad annum mxxi, narratur victoria ab Alphonso VI Aragoniæ rege de Saracenis ad *Cutandam* reportata; Cutanda autem castrum est Dorocæ proximum, in regno Aragoniæ situm. Hæc hujus chronographi verba: «Quinto-decimo kal. Julii, comes Willelmus (sc. Pictaviensis hujus nominis VIII), et dux Aquitanorum, et rex Aragundiæ pugnaverunt cum Abraham, et aliis quatuor regibus Hispaniarum in campo Cotantiæ, et devicerunt, et occiderunt quindecim millia Moabitum, et innumerabiles captivaverunt: duo millia camelorum ceperunt, et de aliis bestiis sine numero, et plurima alia subjugarunt castella». Joannes Briz in Historia Pennatensi recte refellit Suritam hoc prælium ante Cæsaraugustæ expugnationem collocantem; sed perperam tradit, *Willelmum* comitem Pictaviensem eidem non interfuisse. Fundatur hic historicus in Charta in Archivis suæ abbatiæ S. Joannis Pennatensis servata, dataque æra mclviii, hoc scilicet Christi anno, in cujus fine Willelmi comitis adventus his verbis narratur: «Facta Charta feria iii, postera die de Maio, quando venit comes Pictaviensis in Hispaniam». Ipse autem autumnal prælium ad Cutandam nominis circa annum mxxii habitum esse. Verum Charta illa demonstrat chronographum Malleacensem hujus prælii annum et diem accurate constituisse; dies enim primus mensis Junii, qui posterus est dies *de Maio*, seu qui sequitur mensem Maium, incidit hoc anno in feriam tertiam, et prælium die xvi mensis Junii commissum, ut mox diximus ex chronographo Malleacensi. Martinus Carillus in Catalogo episcoporum Tarraconensis ait, incertum esse an episcopus *Tarraconensis*, restitutus fuerit, et urbs Saracenis erepta hoc vel sequenti anno; sed cum prælium ad Cutandam ad præsentem annum pertineat, non videtur dubitandum, quin ea restitutio

ad hunc etiam annum referenda sit. Porro Tarracona hæc ab Alphonso Aragoniæ rege cum aliis septem oppidis capta, ut anno *mcxviii* indicavimus, diversa a Tarracone vel Tarragona Catalanniæ urbe; illa enim in Celtiberia et in regno Aragoniæ sita, ut ostendit Surita lib. 1. *Annal.* cap. 43, ubi fuse de hac Tarracona agit, docetque primum episcopum post sedis restitutionem fuisse *Michaelen*,

qui ideo coævus fuit B. Oldegario archiepiscopo Tarragonensi et episcopo Barcinonensi. Denique Tarracona Aragoniæ scribitur cum circuli parte ab Hispaniis *cedilla* dicta; indeque Tarracona a Surita laudato appellata ab Hermanno Monacho dicitur *Tarrassona* seu *Tarassona* ratione inferioris semicirculi explicati. Hermanni verba anno *mcxxxiv* referam.

CALLISTI II ANNUS 3. — CHRISTI 1121.

1. *Burdino antipapa sublato, Ecclesia liberatur: unde Callisti papæ litteræ circulares.*— Sequitur annus millesimus centesimus vigesimus primus, Indictione decima quarta, quo Romana Ecclesia, expugnata, capto atque in custodiam detruso antipapa Burdino, pristinam recipit libertatem. Hæc quidem hoc ipso anno contigisse, qui per annos singulos res gestas digerunt, certa assertione consignant, quæ Petrus Diaconus his paucis absolvit¹: « Hinc vero Callistus exercitum congregans, Mauritiū hæresiarcham in civitate Sutrina obsidens cepit, et in arce hujus monasterii, quam abbas noster construxerat, relegavit ». Pandulphus autem, qui erat hæc spectans, sic paulo fusius habet: « Interea Bordinus in Sutrio prope Romam Ecclesiam persequi, peregrinos prædari, in papam et alios maledicta congerere, quæque alia hujusmodi poterat, tam per se quam per alios facere non cessabat. Tunc papa factus, abunde jam ab omni parte securus, paravit magnum exercitum, et cum eo Joannem Cremonensem cardinalem Sancti-Chrysogoni Sutrium contra Burdinum præmisit: ipse cum e vestigio sequitur, demum Sutrii conveniunt. Pugnatur attentius, vincitur capiturque Bordinus, abducitur, sed tamen camelo subvectus ». In scripto codice Vaticano asseritur, quod a Sutrinis, cum eorum quaterentur mœnia, Burdinum militibus deditum: qui ejusmodi eum exposuere ludibrio: « Primum omnium cum incescere blasphemii, altis vocibus conclamantes: Maledicte, maledicte, per te tam grave scandalum venit. Addebant alii: Tu es qui Christi tunicam attentasti dividere,

dilacerare Catholicam unitatem præsumpsisti. Tunc præparato camelo pro alto caballo, et indutus pilosa pelle vervecis pro chlamyde rubea, positus est ex adverso super camelum, dataque est ei in manibus pro freno cauda cameli. Ita in Urbem introductus est in exemplum aliorum, ne similia quis ultra auderet tentare. Inde in arcem Fumonis primum, inde vero est in monasterium Cavense translatus ad pœnitentiam, sed in sua rebellione perseveravit incautus (in cunctis) ».

2. Commendatur autem modestia Callisti papæ ab Urspergensi abbate, qui seriem rerum gestarum anni hujus dum prosequitur, hæc obiter ait: « Auditur interea, necnon et nuntius a Roma venientibus approbatur, illum pseudopapam Burdinum in castello Sutrii, quo miserrimo suo inserviens officio residebat, per Romani exercitus zelum destructo, captum, et post plures a vulgo sibi contumelias et illusiones illatas, vix a manibus eorum domino Apostolico illum eripiente, ob agenda pœnitentiam exilio relegatum. Sunt etiam, qui talibus eum asserant deprehensum flagitiis, quæ nostris indignum duximus tradere scriptis ». Hucusque Urspergensis. Quem ergo post exhibitum de pseudopapa ludibrium populus Romanus necaturus erat, ut servaretur ad pœnitentiam, Pontificis clementia vix obtinuit. Quod etiam Sugerius² abbas et ipse hujus temporis auctor affirmat, simulque ejusdem antipapæ tyrannidem Sutrii, dum permaneret, pariter narrat, atque alia ab aliis prætermissa, ne quid desit ad triumphum bestię per imperatorem exaltate, sic tradit: « Romani

¹ Petr. Diacon. l. iv, c. 70.

² Sug. in Ludovico reg.

Callisti papæ tam nobilitati quam liberalitati faventes, intrusum ab imperatore schismaticum Burdinum, apud Sutrium sedentem, et ad Limina Apostolorum transeuntes genuflectere compellentem, expugnatum tenuerunt, tortuoso animali camelo tortuosum antipapam, imo antichristum erudis, imo sanguinolentis pellibus capris amictum, transversum superposuerunt, et ignominiam Ecclesiæ Dei ulciscentes, per medium civitatis via regia, ut magis publicaretur, deducentes, impetrante domino papa Callisto, perpetuo carcere in montanis Campaniæ prope Sanctum-Benedictum captivatum damnaverunt: et ad tantæ ultionis memoriæ conservationem, in camera palatii sub pedibus domini papæ conculcatum depinxerunt. Hæc Sugerius in Ludovico.

3. Ad postremum hic describende sunt litteræ ipsius Callisti papæ in Gallias datæ post expugnatum Sutrium, Burdinumque captum, quæ recitantur a scriptoribus rerum Anglorum Willelmo Malmesburiensi, atque Rogerio in Annalibus. Sic se habent ¹:

« Callistus episcopus, servus servorum Dei, dilectis fratribus, et filiis archiepiscopis, episcopis, abbatibus, prioribus et cæteris tam clericis quam laicis, beati Petri fidelibus per Gallias constitutis, salutem et Apostolicam benedictionem.

« Quia dereliquit populus legem Domini, et in iudiciis ejus non ambulabat: visitat (visitavit) Dominus virga iniquitates eorum, et in verberibus peccata eorum. Paternæ tamen conservans viscera pietatis, de sua confidentes misericordia non relinquit. Diu siquidem peccatis exigentibus, per illud Teutonicorum regis idolum, Burdinum videlicet, fideles Ecclesiæ conturbati sunt, et alii quidem capti sunt, alii usque ad mortem carceris maceratione afflicti sunt. Nuper autem festis Paschalibus celebratis, cum peregrinorum et pauperum clamores ferre penitus non possemus, cum Ecclesiæ fidelibus ab Urbe digressi sumus, et tam diu Sutrium obsedimus, donec divina potentia et supradictum Ecclesiæ inimicum Burdinum, qui diabolo nidum ibidem fecerat, et locum ipsum omnino in nostram tradidit potestatem. Rogamus itaque charitatem vestram, ut pro tantis beneficiis una nobiscum Regi regum gratias referatis, et in Catholica Ecclesiæ obedientia et servitio constantissime maneatis, retributionem debitam in præsentem et in futuro ab omnipotenti Domino, per gratiam ejus recepturi. Rogamus etiam, ut has litteras alter alteri præsentari, omni remota negligentia, faciatis. Datum Sutrii quinto kalendas Maii », sexto legitur apud Rogerium.

4. *Cupiditas Romanorum colibita et pax Ecclesiæ restituta.* — Inferius vero hæc Malmesburiensis de rebus gestis in Urbe per Callistum papam: « Processit, inquit, ulterius in augendo bono laudabilis papæ magnificentia, ut illam ef-

frænem et ingenitam Romanorum cupiditatem coliberet. Nullæ ipsius tempore viantibus circa Romanam insidiæ, nullæ Urbem ingressis injuriæ. Oblationes apud Sanctum-Petrum, quas pro petulantia proque libidine potentes diripiebant, anteriores Apostolicos, qui vel nutrire audent, indignis afficientes contumeliis, Callistus revocavit ad medium, scilicet ad Apostolicæ Sedis rectoris publicum usum. Nec quidquam in ejus pectore pecuniarum vel habendarum ambitus, vel habitatum amor, operari bono obhorrens potuit. Adeo ut Anglos peregrinos magis ad sanctum dictum, *Jacobum Compostellanum videlicet*, quam Romam pergere admoneret, pro viæ longitudine ad illum locum bis euntibus idem benedictionis refundendum commodum, quod habent qui semel Romam irent ». Hæc ipse. Fuit plane Callistus studiosissimus Sancti-Jacobi Compostellani, et de ejus miraculis volumen confecit, quorum nonnulla recitat in suo Speculo historiali Vincentius Bellovacensis.

5. Ad pacem autem perpetuo conservandam, eundem Pontificem turres encii Frangipanis, quæ erant officinæ iniquitatum et præsidia tyrannorum, demolitum esse, alias vero Ecclesiæ proficiuas erexisse, Pandulphus affirmat, domisseque comites nonnullos rerum Ecclesiæ invasores. Sic igitur divina potentia factum, ut Ecclesia Romana imperatoris schismatici oppressa tyrannide, schismatici papæ labefacta dedecore, nobilium insuper Romanorum oppressione calcata, et ignominia deturpata: brevi temporis spatio gloriose de hostibus triumphans, ex insperato surrexerit, et pacem simul cum libertate, Deo volente, receperit. Quomodo autem his compositis, anno sequenti, Lateranense generale Concilium celebraverit, suo loco dicitur.

6. *Legatio archiepiscopi Moguntini pro conversione Henrici imperatoris.* — Ubi autem Callistus papa Urbana bene disposuit, ad externa moderanda convertit animum. Quod enim probe nosset, infestissimum esse Ecclesiæ hostem imperatorem, adversus eum decernit legationem Alberto sive Adalberto archiepiscopo Moguntino, quem sciret esse adversarium ejus, et in Saxonia contra eum populum commoturum. Ille autem ab eo suscepta legatione, quam naviter implevit officium, sic accipit ab Urspergensis hoc anno, dum ait: « His auditis, præsul Adalbertus totam Saxoniam, ubi tunc manebat, commovet. Et quia legationem Apostolicam ab ipso papa dudum acceperat, hac auctoritate pontifices et principes ipsis provinciæ pro utilitatibus matris Ecclesiæ frequenter convocat. Ubi vir eloquens, et primum in Cisalpinis partibus multiformiter tenens. ad defensionem totius Germaniæ metropolis, (nempe Moguntiæ), animos omnium Catholicorum obedientiam profitentium accendit. Huc etiam accessit, quod episcopi Spirensis et Wormatiensis, et si qui alii resistere (Henrico) non valentes, tamen Apostolicam obedientiam professi, pulsi suis sedibus vagabantur

¹ Will. Malmesb. de gest. reg. Angl. l. v.

extorres : quos proprio quemque loco restituere disponebant iidem principes pro Domino Deo exercitum zelo zelantes ». Subjicit de ingenti apparatu armorum, quem archiepiscopus Moguntinus colligebat adversus imperatorem, et procinctus ejusdem in eum. « Cum », ut subdit, « precibus assiduis fidelium factum, ut cum propinqui inter se utriusque partis essent exercitus, magno Dei beneficio non ad pugnandum, sed ad consulendum de pace inter imperium et sacerdotium, duodecim ex utraque parte primates electi convenerint Wirceburgi in festo S. Michaelis, mense Septembris, ubi interfuit ipse imperator Henricus, et septem diebus iteratis comitiis, tantummodo de tollendo schismate, regniue concordia eos est diceptatum; conclusum vero, ut omnino pax firmissima sanciretur, parceretque imperator iis quæ ab ipsis in eo conventu decernerentur : qui eadem se servatum promisit. Decernitur etiam communi consensu ad ea cuncta perficienda legatio ad Apostolicam Sedem, delectique legati episcopus Spirensis et abbas Fuldensis, viri inter primos annumerati, qui Romam hæc omnia deferrent, quatenus indicto per auctoritatem Apostolicam generali Concilio, quæcumque humano non possent, Spiritus sancti iudicio terminarentur. Quid autem Romæ actum sit, non sequenti suo loco dicetur ». Hæc omnia Urspergensis pluribus.

7. *S. Erminoldi abbatis Prufenigensis prope Ratisponam transitus et res gestæ adversus Henricum imperatorem.* — Moritur hoc anno S. Erminoldus abbas monasterii Prufenigensis, unius ex illis, quæ S. Otto episcopus Bambergensis crexit, apud Ratisponam positi; cuius res præclare gestæ scripte leguntur tomo secundo antiquarum lectionum, a Canisio editarum. De quo hic loco Epitaphii sepulchralis non prætereundum egregium facinus, memoria dignum, ad rerum gestarum memoriam præsentis temporis spectans, quod sic se habet : « Henricus aliquando imperator, cum propter excessus suos papalis excommunicationis sententiam incidisset, et tamen a religiosis ac magnis etiam prælatis Ecclesiæ, imperatorie dignitatis intuitu, honor sibi ac solita reverentia deferretur, ob fundatoris nostri præmemorati, quem non modice diligebat, honorem pariter et amorem, cum ipso fundatore, grandem sibi demonstraturus affectum, ad novellam ejus Ecclesiam visitandam, cum nobilium et magnorum pompa multiplici, sicut mos est regius, advenabat. Jamque beatus Erminoldus, pater videlicet monasterii, iam propter imperatorie celsitudinis claritatem, quam propter concomitantis cum eo, et invitantis reverentiam fundatoris, cum compulsionibus campanarum, fratrumque processione canora, et reliquiarum ac vexillorum multiplici apparatu, longe insuper extra septa cœnobii excepturus Cæsarem credebatur : sed servus Dei talium se favori dissimilem demonstrabat. Non enim cogitationes suæ cogitationes eorum, neque viæ suæ viæ illo-

rum, qui consuunt pulvillos sub omni cubito manus, et prælii parietem liniunt adulando, et propter hoc in regum domibus mollibus vestiuntur¹. Cæterum iste, non ut arundo, nec terroris, nec favoris vento quolibet agitata, sed ut columna immobilis, nec metu impellebatur, nec inclinabatur gratia qualicumque, ut ei vel occursu solemni, vel blanditiis salutationis applauderet, quem per sententiam Apostolicam communione novit Ecclesiastica tunc privatum.

8. « Proinde cum adventum imperatoris per prænuntios comperisset, omnia monasterii ostia obserari præcepit, ne vel Augusto, ejusve comitibus ulla introeundi via pateret : firmiter prohibens et districte, ne quis egrederetur ad salutationem sibi, exceptionisve aliquam reverentiam exhibendam. Ipse vero, imperatore adveniente ad eum, ante claustrum septa procedens, ne vel ex fastu aliquo, vel contemptu hoc agere crederetur, eo insalutato : Libenter, inquit, et officio salutandi, et exceptionis congrua reverentia honorem tibi impenderem regium, imperator, si te communione privatum Apostolicæ Sedis auctoritate nescirem. At imperator ratus, cum hæc non justitiæ zelo, sed ex cordis odio vel rancore proferre, tanquam offensum pro eo, quod quondam ab ejus fratre munera recepisset, propter quod Lorschensem resignaverat abbatiam : Nimis, ait, inconsulte ac præcipitanter honore vos tanto privastis. Cui suspicioni Dei servus occurrens, columbina, ut erat simplicitate, respondit : Novit Deus omnipotens, corda scrutans et renes, non me hujus, si dici posset, injuriæ memorem vel ultorem : sed me fecisse hæc et dixisse, justitiæ defendendæ intuitu pro papalis observatione mandati. At venerabilis Otto episcopus medium se utrilibet interponens : Neminem, ait, devitare debemus et tenemur, de cuius nobis excommunicatione non constat. Quo contra vir Dei fortitudinis, quo plenus erat, spiritu roboratus, nec gratiæ fundatoris, nec imperatorie deferens majestati, quin veritatem libere testaretur : Non possum, inquit, sententiam ignorare, quam ore meo memini promulgatam. Talia perstabat memorans, fixusque manebat, a justitiæ suæ proposito non recedens ». At quod potens sit veritas, non modo imperator se cohibuit, ne furore percitus faceret quod facere solent principes iracundia agitati, sed alios, ne quid molestiæ inferrent ejusdem monasterii fratribus, regia auctoritate compressit. Nam paulo inferius hæc ibidem : « Cum non multo post idem princeps transitum faceret ante cœnobium cum multitudine militari, fratres ad opera manuum juxta morem hortum forte intraverunt, quem vilis tunc sepes ambivit. Milites igitur qui præbant et qui sequebantur imperatorem, cum fratres in horlo viderent, arbitrati principem memorem sui contemptus, sibi que placere volentes : Ecce, in-

¹ Matth. xi.

quiui, cucullati, qui dominum nostrum temere despexerunt, nec imperialem sibi dignati sunt exhibere reverentiam; ipsum insuper suis foribus præsumpserunt excludere cum contemptu. Dent ergo poenas opprobrii et proterviae, quas merentur, luant ausus enormes, non lerant impune sprevisse Caesarem diadema. Et milites quidem hæc dixerunt, et invalescebant voces eorum, odioque pastoris dentes lupinos in ejus oviculas

acuebant, jamjamque insultum facturi in pusillum gregem Domini videbantur. Sed evenit aliter quam putabant. Nam exiit edictum a Cesare non speratum, ne fratres videlicet illius omnino præsumerent molestare, vel verbo turbare, vel facto ». Hæc tunc gesta, ex quibus veluti ex ungue leonem, virtutes S. Erminoldi considera, vel his provocatus, lege reliqua ejus Vitæ Acta.

Anno periodi Græco-Romanæ 6614. — Anno Æræ Hispan. 1159. — Anno Hegiræ 515, inchoato die 22 Martii, Fer. 3. — Jesu Christi 1121.

— Callisti II pape 3. — Henrici V reg. 16, imp. 11. Joannis Comneni imp. 4.

1. *Burdinus a Callisto II captus.* — A num. 1 ad 6. Falco in Chron. hoc anno habet : « Pontifex Callistus, exercitu congregato, super civitatem nomine Sutrin tendit; Gregorius autem ille (id est, Burdinus antipapa, Gregorius VIII dictus) quem prædictus rex (nempe Henricus imp.) in Pontificem statuerat, civitatem ipsam obtinebat. Viribus sumptis civitatem illam comprehenderunt, et Gregorium illum turpissime, ultra quam credi potest, injuriis afflictum ligaverunt. Deinde illum super camelo imponentes Romam taliter captivum, et vestibus propriis exutum perduxere IX kalendas Majas. Pontifex igitur Callistus Deo et Petro Apostolo gratias agens, gaudio magno repletus, Urbem triumphans ingressus est : deinde consilio invento, ad monasterium Sanctæ-Trinitatis, quod Cave dicitur, illum delegavit ». Baronius num. 3 refert Epistolam, quam Callistus II post Burdinum captum ad episcopos et fideles per Gallias constitutos scripsit, sub *datum Sutrii quinto kalendas Maii*, apud Mahesburiensem lib. 5, de Gest. reg. Angl. vel sexto kalend. apud Rogerium Hovedenum in Annal. et Simeonem Dunelmensem lib. de Gest. Reg. Angl. Verum utrobique numeri mendosi ; cum enim Burdinus IX kal. Maii Romam perductus fuerit ; et illic statim *Callistus II* sese contulerit, litteræ illæ, nec V nec VI kalend. Maii Sutrii scriptæ fuere, nisi in ipsomet Falcone numeri depravati sint, ut non raro alibi in præclaro illo Opere. *Burdinus* ita sub Gregorii VIII nomine tricenno integro Ecclesiam perturbavit, aliis ei adhaerentibus, aliis vero *Gelasium*, et post eum *Callistum II* verum Pontificem agnoscentibus.

2. *Ab aliquibus in Anglia Pontifex Romanus agnitus.* — Rem adeo memorabilem magis explico.

Eadmerus, auctor accuratus in rerum et temporum circumstantiis, lib. 6 Novorum, postquam de iis quæ hoc anno in Anglia ad res Ecclesiæ bene componendas gesta sunt, sermonem habuit, ait : « Dum hæc isto ordine in Anglia disponuntur, famæ certitudo illic usque perlata est, papam Callistum, viribus undecumque collectis, Mauricium, cognomento Burdinum, quem vocatum Gregorium, in Sede Apostolica imperator cum suis fautoribus papam constituerat, cepisse ; cumque suis omnibus spoliatum, monasterio, ut monachus esset, contumeliose intrusisse ». Antea de gestis anno MCXIX Eadmerus scripserat : « Dum hæc Ecclesiastica ita in Burgundia disponuntur, Apostolatus Romanæ Ecclesiæ præfato Gregorio Sede beati Petri præside administratur. Super his ergo multis rumoribus Anglia concussa est, aliis hunc, aliis illum, aliis neutrum Ecclesiæ Dei jure prælatum asserentibus. Galli tamen et rex Anglorum cum pontifice Cantuariorum in Callistum se transtulerunt, et eum, præto Gregorio, pro Apostolico susceperunt ». Certe Matthæus Parisius, qui Anglus erat, Gelasium antipapam appellat : « Anno, inquit, MCXVII, defuncto papa Paschali, Gelasius antipapa anno uno succedit, cui successit orthodoxe Callistus ».

3. *Refellitur fundamentum schism.* — Fundamentum schismaticorum erat, ut pluribus ostendit Baluzius lib. 3 Miscell., in Vita Burdini n. 16 et seq. quod secundum constantem consuetudinem, quoties Romani cujuscumque Pontificis obitus eveniebat, mitterent Romani legatos ad imperatorem, ut ipse suos Romam mitteret, coram quibus novus Pontifex Romanus consecraretur. Verum jam a Gregorii VII morte Ecclesia hoc jugum imperatorum excusserat, et pristinam libertatem recuperarat,

ideoque prudenter cardinales præcens illius juris imperatorii nullam rationem habuerant. Tandem capitis *Burdinus* per medium civitatis in triumphum deductus fuit, et *Callistus II* ad exemplum veterum Romanorum, qui devictorum regum ac populorum nomina titulosque marmoribus inscribi curabant, eam Historiam in antiqua camera palatii Lateranensis depingi curavit cum hac Inscriptione, quam sua quoque ætate superfluisse docet Onuphrius :

Eecce Callistus honor patriæ, decus imperiale,
Burdinum nequam damnat, pacemque reformat.

Plura hac de re Baronius num. 1 et seq. habet, quibus addi potest, quod de eadem tradit Willelmus Tyrinus lib. 12. num. 8. ubi tamen perperam de Callisto ait : « Hic domini imperat. Henrici, cuius consanguineus erat, consecutus gratiam, et ejus fretus auxilio, in Italiam cum cardinalibus et universa curia descendens, apud Sutrinum urbem Romæ conterminam, amulum et hæresiarcham Burdinum violenter cepit, etc. » Ex iis enim quæ Baronius hoc anno alique scribunt, constat, nondum eo tempore papam inter et imperatorem pacem constitutam fuisse, illumque, non ab imperatore, sed a Normannis aliisque proceribus sibi addictis copias obtinuisse.

4. *Burdinus in monasterium detrusus.* — Ergo dejectus ac triumphatus *Burdinus*, subiungit Baluzius num. 40, missus est cum nulla ignominia, ut Willelmus Tyrinus ait, ad Cavense monasterium, quod juxta Salernum situm esse dignoscitur, sive reclusus in Caveam, ut refert Joannes Salisburiensis lib. 8 Pollicitar. cap. 23, ibique habita monachali indutus, ut idem Tyrinus, Radulfus de Diceto, et auctor Chronici Maurigeniaci referunt, vitam compulsus est lege loci ducere cœnobiticam, indeque Baluzius recte deduxit, eum redire jussim ad illud vitæ institutum, quod olim susceperat in monasterio Uscensi, et antequam ad archiepiscopatum Bracarensem eveheretur, vitam monasticam professum esse. Nicolaus enim II statuerat, ut si quis « per seditionem, vel presumptionem, aut quolibet ingenio electus, aut etiam ordinatus seu inthronizatus fuerit, ab omni Ecclesiastico gradu, in quocumque fuerat prius, sine retractatione reponatur », id est, ad illud vitæ institutum reducatur, in quo existeret antequam gradus Ecclesiasticos assumeretur. Anno sequenti idem Callistus *Burdinum* de Cava extractum, in Janula, quæ arx est in rupe imminente civitati Sancti-Germani, custodiendum tradit, auctore anonymo Casinensi a Caracciolo edito. Denique hinc deductus ab Honorio II anno mccciv, in arcem *Fumonis* non longe ab Alatro civitate in Henricis translatus est, in eam nimirum arcem, in quam postea Bonifacius VIII conjecit S. Petrum Murronem, dictum antea Celestinum V. Illic ad supremum usque senium vixit, ibique mortuus est, non vero in monasterio Casinensi, unde recesserat.

5. *Secunda profectio Callisti II in Apuliam.* — Falco iis narratis quæ supra ex eo retulimus, subdit : « His ita peractis, Pontifex Callistus consilio invento Salernum ivit quinto die intrante mensis Septembris, ut pacis firmamentum cum duce (nempe Apuliæ) Willelmo et Rogerio comite (sc. Siciliæ) confirmaret ». Salerni adhuc erat mense *Septembri* mediante, ut testatur idem Falco, qui et habet : « Hoc anno IV kal. Septemb., archiepiscopus Salernitanus nomine Affanus (qui poeta erat) defunctus est. Quo defuncto, Callistus supra memoratus Pontifex Romualdum diaconum cardinalem archiepiscopum (diversus est a Romualdo archiep. Salernitano, qui Chronicon adhuc ineditum litteris mandavit) Salerni consecravit mense Septembris mediante ».

6. *Ante suam Roma discessum legatos in Germaniam mittit.* — Hæc est secunda Callisti II in Apuliam profectio. Quid vero ante suam Roma discessum egerit, hoc modo narrat Pandulphus in ejus Vita : « Romam per maritimam rediit (nempe post primam ejus in Apuliam profectionem, de qua anno superiori). Tunc a Spiritu sancto admonitus, Lambertum Ostiensem episcopum, D. Saxonem, cardinalem presbyterum S. Stephani in Cælio-Monte, et Gregorium diaconum S. Angeli, ut pacem in regno et Ecclesia reformarent, ad Henricum imperatorem in Alemanniam delegavit. Sed quid plus ? Inio totum volo dicere verbo. Legati missi in scriptis pacem offerunt : et quemadmodum in Lateranensi palatio tabula privilegio representat, pax ad velle papæ ab imperatore simul et recepta est, et perpetuo, annuente Domino, stabilita ». Hi legati e Germania Romam rediere ante mensem Septembrem, quo Callistus II iterum in Apuliam perrexit. Pandulphus enim post laudata verba statim scribit : « Inde in Apuliam legatis jam ad Urbem regressis, iterato descendit. Nam comes Rogerius de Sicilia tunc, nunc autem Italiæ rex (quando nempe Pandulphus Vitam illam scribebat) Calabriam et Apuliam ideo licenter intraverat, quoniam Guillelmus Apuliæ dux, ut acciperet Alexii quondam imperatoris Constantinopolitani (quæ postea ei data non est) in uxorem, Constantinopolim ierat, et terram quæ ei competit domino papæ in eundo commiserat. Cumque jam dictus comes arcem de Calabria, quæ Miceforis dicitur (legendum cum Collettio lib. 3 Hist. Neap. Nicephori) obsideret, dominus papa ad eum, ut ab obsidione cessaret, domnum Hugonem cardinalem direxit. Ivit cardinalis, et infecto negotio rediit. Papa autem in comitem tali omine surgit, quali et Barenses post eum, sicuti ipsi vidimus, erant insurrecturi : nam fere omnes cardinales meliores, quos habuit in temporibus illis, sed et magnum Hugonem cardinalem nobilem et industrium, mortuos cum non paucis ex domesticis perdidit, et demum quicquid voluit ipse comes Rogerius cum papa semivivo peregit. Rediit ad Urbem, in lecto evasit ». Quæ ultima verba ad annum sequen-

tem referenda, quo Romam rediit et aegrotavit, ut ibidem videbimus. Porro Lambertus fuit postea papa sub Honorii II, et Gregorius post eum sub Innocentii II nomine.

7. *Willelm. Apulie dux Constantinop. petit.* — Collenutius laudatus ait, *Rogერი* Siciliæ comitem, ex hoc Pontificis morbo occasione sumpta, universam Calabriam, atque Apuliam sibi subiecisse, et *Guillelmum* in Italiam ex Oriente reversum, imperium suum a *Rogero* occupatum invenisse, nec multo post e vita migrasse. Ritius lib. 4 de Reg. Siciliæ, alique quidam rerum Sicularum recentes scriptores idem fere tradidere. Cinnamus vero initio lib. 37 *Guillelmum*, non Constantinopolim, sed Hierusalem profectum esse dicit: « Ille (nempe *Rogerus*) *Guillelmo* Longobardiæ duci in Palestinam eunti, pecunia favori data Longobardiæ (id est Apuliæ) principatum eo nomine sibi oppigneratum refinuit ». Verum Cinnamus de rebus in Italia gestis male edoctus fuit; neque enim *Willelmus* ditiones suas *Rogero* patre in pignus dedit, sed *Callisto* II commendavit, ut mox diximus ex *Pandulpho*, qui cum tunc Romæ cum eo esset, id ignorare non potuit. Præterea verum non est, *Rogeriū Willelmi* ditiones retinisse; cum, ut ex eodem *Pandulpho* mox vidimus, in eandem quidem irruptionem fecit, sed *Willelmus* paulo post suum reditum omnia recuperavit, et usque ad mortem obtinuit, ut anno sequenti ex *Falcone* constabit, et in morte magis ejus confirmabitur. Sed nec veram hujus profectionis causam *Pandulphus* scivit; certum enim, ut demonstrat *Sumontius* in Hist. Neapol. Tom. 1, lib. 4, pag. 489, *Willelmum* jam ab anno mxcvii matrimonio junctum fuisse cum *Gaittegrina*, Jordani principis Capuæ sorore, eamque marito supervixisse, quod ex Actis publicis a *Sumontio* laudatis extra omne dubium ponitur. Illius itaque profectionis *Willelmi* causa prorsus latet, sed verosimile est *Willelmum*, ut eam celaret, consentiente Pontifice rumorem illum de alia uxore a se ducenda sparsisse. *Willelmus* jam mense Septembri in Apuliam redierat, ut ex mox narratis constat. Porro dum *Callistus* II in Apulia esset, *Sugerius* a *Ludovico* VI Franciæ rege legatus ad eum missus est, ut anno superiori ostendimus. Adventus enim *Sugerii* male a *Baronio* ad primam profectionem *Callisti* in Apuliam relatus.

8. *Agitur in Germania de schismate tollendo.* — Ad num. 6. « Interim », inquit *Urspergensis* in Chron. « *Henricus* imp. inito fidelium suorum consilio, rebelles sibi *Moguntinos* affligere tractavit, etc. His auditis, præsul *Adelbertus* totam Saxoniam, ubi tunc manebat, commovet: et quia legationem Apostolicam ab ipso papa dudum acceperat, hac auctoritate pontifices et principes ipsius provincie pro utilitatibus matris Ecclesiæ frequenter convocat ». Paulo post: « Quid plura? Eo usque *Spiritus* Jesu pro pretio sanguinis sui filius sponsæ suæ dimicans, spiritui superbie et maligno præva-

luit, ut mentibus universorum jam, imo divinæ voluntatis assensu connexis, ipsorum consilio, suasionē ac obsecratione, regis (sc. *Henrici* imp.) indignatio in tantum mitigaretur, ut ipse præsens negotium, non suo, sed optatum utriusque partis arbitrio terminandum decreverit ». Subdit *Urspergensis* ad hæc determinanda indictum fuisse conventum principum imperii apud *Wirciburg*, seu *Herbipolim* ad festum sancti Michaelis. Idem habet *Chronographus Hildensheimensis* qui ait: « Circa festum sancti Michaelis in sede episcopali *Wirciburg* (seu *Herbipolensi*) imperator et totius regni proceres conveniunt, et in concordiam redeunt: iudicio et consilio domini Apostolici causam imperatoris determinandam reservantes ». Denique idem *Urspergensis* acta in hoc conventu hoc modo refert: « Quidquid scandalī, quidquid perturbationis usquequaque per regna Germaniæ inimici seminario succreverat, omnimodis eradicari decretum est ».

9. *Duplex legatio Callisti II in Germaniam.*

— Licet autem *Pandulphus*, cujus verba num. 6 in medium attulimus, innuere videatur concordiam sacerdoti et imperii hoc anno ante *Callisti* II ex Urbe Romana discussum initam esse, certum tamen et indubitatum, eam anno tantum sequenti sancitam, ideoque et *Pandulphum* rem una serie abbreviatorum more retulisse. Cumque *Pandulphus* tradat, Pontificem in Apuliam iterato profectum non esse, nisi post reditum trium suorum legatorum ad imperat. missorum, et *Urspergensis* scribat, eosdem tres legatos anno sequenti in Germaniam ivisse, eosdem legatos bis in Germaniam a *Callisto* II missos oportet. Neque enim existimandum, *Urspergensem* anno mxcxii ubi id refert errasse; cum quæ de pace inter Pontificem et imperatorem pacta narrat, ex Actis publicis acceperit. Multo minus id sentiendum de *Pandulpho*, qui Romæ cum *Callisto* II agebat. Porro cum *Pandulphus* iste *Paschalem* II aliquando comitatus fuerit, eumque *Gelasius* II lectorem et exorcistam, *Callistus* vero II subdiaconum fecerit, uti ex jam dictis liquet, exeunte saltem sæculo precedenti natum fuisse oportet, ac errasse *Oldoinum* in Hist. card. qui loquens de *Pandulpho* *Masca*, a *Lucio* III cardinali creato, unum et eundem cum *Pandulpho* subdiacono esse censet, licet ipsemet asserat *Pandulphum* subdiaconum diplomatis anno mcci ab *Innocentio* III datis subscripsisse; sic enim centenario major tunc fuisset, quod ex ejus opinione in sola nominis similitudine innixa necessario sequitur. Ipsemet ibidem recte reprehendit *Godwinum*, quod in præsulibus *Norwicensibus* *Pandulphum* *Norwicensem* episcopum cum *Pandulpho* *Masca* S. R. E. cardinali confuderit, licet in eo cum *Godwino* erret, quod *Pandulphum* *Norwicensem* cardinalem faciat eo fundamento, quod in variis monumentis dicatur legatus Angliæ; is enim in iisdem sæpius quidem legatus in Angliam missus dicitur sed nunquam cardinalis, ut videre

est apud Warlonum, tom. 1 Angliæ Sacræ pluribus in locis. Quæ obiter dicta sunt.

10. *S. Erminoldus abbas occiditur.* — Ad num. 7 et seq. Sanctus Erminoldus, qui a sancto Ottone episcopo Bambergensi abbas dictus fuerat canobii Prufeningensis, a se conditi prope Ratisponam, cum delinquentes corripere, occisus est ab iis qui nolebant a suis se voluptatibus coerceri, *in sancto Epiphaniarum die*, inquit anonymus, qui ejus Vitam scripsit, nunc in Actis SS. Bollandianis ad diem vi Januari recitatam, qui addit : « Transit autem anno Domini mxxi, septimo vero postquam de Hirsangia mense Augusto vocatus est, et ad Prufeningensem electus Ecclesiam. » Ejus virtutes et miracula fusc ab eodem anonymo descripta, qui in Prefatione ait, se anno mclxxxi Vitam illam elucubrasse.

11. *B. Fredericus ep. Leodii necatur.* — Occisus et hoc anno B. Fredericus *simoniacæ hæreseos damnatione et Catholicæ fidei defensione*, ut loquitur Lambertus Parvus, et cum eo scriptores qui beatum Fredericum episcopum Leodiensem martyris titulo exornant. Annum ejus mortualem notatur Dodechinus abbas in Chron. Anselmus Gemblacensis auctor Chronici Leodiensis, tom. 1 Biblioth. Labbei, aliique; Renerus enim monachus monasterii Leodiensis S. Laurentii, auctor cœvus, qui scripsit Vitam ejus in Actis SS. Bollandianis ad diem xxvii mensis Maii recitatam, obitus ejus annum tacuit. *Alexander* archidiaconus Leodiensis episcopus illius Ecclesiæ electus fuerat, et investituram ab Henrico imp. contra summi Pontificis præceptum suscepit. Quare archiepiscopus Coloniensis, cui Leodium subest, alium eligi curavit, et Fredericus majoris Ecclesiæ præpositus electus, « a Callisto papa in Concilio Rhemensis consecratus, nudis pedibus repatriavit : et processit ei obviam totius cleri et populi multitudo, factaque est lætitia magna in populo », inquit Renerus. Interea Alexandrifantes nullam, quam ei inferre possunt, molestiam prætermittunt : « sed cum jam omnia pacata esse viderentur, anno secundo ordinationis sue migravit ad Dominum », inquit Renerus. Aliqui qui de eo verba fecerunt, post mortem Godofredi Barbatii ducis Lovaniensis, et ejusdem Alexandri, postea Leodiensis episcopi renuntiati, tradidere, beatum *Fredericum* veneno potatum fuisse, quia tunc liberior eis facultas fuit verum scribendi.

12. *Moritur Guillelmus ep. Catalaun.* — Albericus monachus, qui anno mxxi in abbacia Trium-Fontium in diocesi Catalaunensi sita, Chronicon suum, adhuc ineditum, scribebat, ad hunc Christi annum de Eballo Guillelmo de Campellis in episcopatum Catalaunensem decessore loquens, ait : « Obiit episcopus Catalaunensis, succedit Ebalus ». Guillelmi mortem etiam hoc anno consignat Simeon Dunelmensis in Hist. de Gest. Reg. Angl. Hovedenus in Annal. et Anselmus Gemblacensis in Continuatione Sigeberti, quibus suffragantur Chronicon Catalaunense tom. 1 Biblioth.

Labbei, vetera Monumenta Ecclesiæ Catalaunensis, et Acta episcoporum ejusdem Ecclesiæ apud Carolum Rapineum Ordinis Recollectorum, qui lingua gallica de episcopis Catalaunensibus scripsit. Cumque certum sit, *Willelmum* anno superiori Concilio Bellovacensi interfuisse, et ibidem ostendimus, certo etiam liquet, deceptos eos qui Guillelmi mortem cum anno mxxix connexuere. Simeon Dunelmensis et Hovedenus enim *XV kal. Februarii* vitam functum tradunt ; sed cum in Necrologio Sancti-Victoris Parisiensis, et in altero Corboliensi a Joanne Picardo memorato legatur : « Octavo kal. Febr. anniversarium Guillelmi Catalaunensis episcopi, et nostri canonici », dies mortis ejus non satis compertus. Non dubito tamen quin verum sit, quod habet Simeon Dunelmensis et ex eo Hovedenus : « viii diebus ante exitum, suscepto habitu monachico vita decedit » ; testatur enim Rapineus sepultum eum apud Claram-Vallem, in sacello a se dum viveret extructo, et quia mos erat illorum temporum, ut plures in lecto morti proximi decumbentes habitum monachicum induerent. Mauricus in Annal. Cisterc. ad annum mxxix, quo perperam mortem ejus recitat, Guillelmi monachatum dubium aut forte falsum fuisse dicit, asserens se neminem vidisse eum ex episcopo in monachum, et ex Catalauno in Claram-Vallem transisse, indicatque se neque Hovedenum, neque Simeonem Dunelmensem legisse. Quare argumentum ejus negativum, et Guillelmi monachatus interpretatio nullum robur habent.

13. *Ejus scientia et virtutes.* — Willelmus a Campello, oppido Briegii haud procul Meloduno, ubi natus erat, *Campellensis* dictus est, factusque archidiaconus Ecclesiæ Parisiensis, magna celebritate in schola ejusdem Ecclesiæ Dialecticam publice docuit : « Pervenit tandem Parisios », inquit Abaelardus in Epistola calamitatum suarum declarativa, cap. 2, « ubi jam maxime disciplina hæc (nempe Dialectica) florere consueverat, ad Willelmum scilicet Campellensem præceptorem meum, in hoc tum magisterio, re et fama præcipuum ». Paulo post scholam illam episcopalem reliquit, et in suburbanis urbis Parisiensis monasterium regularium canonicorum condidit ; ubi litteras, quemadmodum prius in urbe solitus erat, docere instituit. Haud diu tamen novam illam Augustinianam Congregationem rexit ; ut enim fidem facit Albericus in Chron. anno mxxii, episcopus Catalaunensis renuntiatus est. Sed antequam ordinaretur episcopus, a rege Ludovico VI litteras obtinuit, quibus Victorina Congregatio regia auctoritate munita consisteret, abbatem canonicorum suffragiis et votis electum haberet, et ex regia donatione possessiones et terras obtineret. Litterarum regiarum hæc subscriptio est : « Actum Catalauni in palatio publice. Anno Incarnat. Dominicæ mxxii, anno vero regni nostri v ». Paschalis II, litteris anno insequenti datis, Præceptum regium confirmavit. Magna ei fuit cum sancto Bernardo abbate

Clarevallensi necessitudo, ut ex ejus Epistolis ac Vita immolescit. Sanctus doctor in Epist. LVII Ebalo præfatus, Willelmum jam ab aliquot annis demortuum imitandum proponit, testaturque cum duobus monasteriis Sancti-Petri et Sancti-Urbani præfectos dedisse, contemptis longi itineris labore et hyemis asperitate; quæ monasteria Ordinis Sancti-Benedicti fuisse, et etiamnum esse, notat Mabillonius in Notis ad eandem divi Bernardi Epistolam. De ejus scriptis videndus Oudin in Supplement. de Script. Eccl.

14. *Epocha Concilii Suessionensis* — Morte Willelmi Catalaunensis episcopi suo anno reddita, Concilium Suessionense adversus Petrum Abaelardum hoc anno congregatum fuisse, non vero anno MCXIX, ut plures existimant, vel anno MCXX, cum quo Tom. X Concil. conjungitur, certo constat. Ipsemet enim Abaelardus in Epistola, in qua suas calamitates describit, ait: « Æmuli mihi vehementer accensi Concilium congregaverunt, maxime duo illi antiqui insidiatores, Albericus scilicet et Lotulfus, qui jam defunctis eorum magistris et nostris, GUILLELMO scilicet atque Anselmo (Guillelmo nempe episcopo Catalaunensi, et Anselmo Laudunensi, viro per hæc tempora celeberrimo) post eos quasi regnare se solos appetebant, atque etiam ipsis tanquam hæreses succedere. Cum autem utrique Rhemis scholas regerent, crebris suggestionibus archiepiscopum suum Radulfum adversum me commoverunt, ut adseito Conone Prænestino episcopo, qui tunc legationeungebatur in Gallia, concilium quondam sub nomine Concilii in Suessionense civitate celebrarent, meque invitarent, quatenus illud opus clarum, quod de Trinitate composueram, mecum afferrem, et factum est ita ». Neque Concilium hoc in annum sequentem differri potest, cum Cono sub hujus anni finem *Petrum* in legatione Gallica successorem habuerit, et *Adam* abbas Sancti-Dionysii ad quem Abaelardus post celebrationem Concilii Suessionensis scripsit, vel sub hujus anni finem, vel sequentis initio vivere desierit, ut infra videbimus.

15. *In eo Abaelardus damnatur.* — Non omitenda, quæ Gaufridus sancti Bernardi abbas Clarevallensis notarius in Epistola ad Henricum cardinalem et episcopum Albanensem scribit apud Duchesnum in Notis in Abaelardum: « Audivi etiam, quod super damnatione Petri Abaelardi diligentia vestra desiderat plenius nosse similitur veritatem: cujus libellos pie memoriæ dominus Innocentius papa II in Urbe Roma, et in Ecclesia B. Petri incendio celebri condemnavit, Apostolica auctoritate hæreticum illum denuntiavit. Nam et ante plures annos venerabilis quidam cardinalis et legatus Romanæ Ecclesiæ, Cono nomine, regularis quondam canonicus Ecclesiæ S. Nicolai de Avarsia (id est, Aorasia in diocesi Attrebatensi), Theologiam ejus, Suessione Concilium celebrans, similiter concremaverat, ipsum Petrum præsentem arguens,

et convictum de hæretica pravitate condemnans. Unde vestro si placuerit desiderio, per libellum de Vita sancti Bernardi, et per ejus Epistolas missas ad curiam satisfacies ». Vocatus ad Concilium Abaelardus nulla, si ei in propria causa adversus æmulos loquenti fides sit habenda, prævia interrogatione, sine ullo libelli examine, sed hoc solo capite, quod in eo scripsisset, *solum Deum Patrem omnipotentem esse*, jussus est manu propria librum a se de Trinitate compositum in ignem conjicere, et symbolum Athanasii recitare. Tum in custodiam Anselmo S. Medardi Suessionensis abbati traditus est, ut ipsemet in Epistola laudata cap. 10 hoc modo narrat: « Vocatus statim ad Concilium adfui, et sine ullo discussionis examine incipsum compulerunt propria manu librum memoratum meum in ignem projicere. Et sic combustus est. Ut tamen, cum nihil dicere viderentur, quidam de adversariis meis id submurmuravit, quod in libro scriptum deprehenderat, *solum Deum Patrem omnipotentem esse*. Quod cum legatus subintelligisset, valde admirans ei respondit, hoc ne de puerulo aliquo credi debere, quod adeo erraret, cum communis, inquit, fides et teneat et profiteatur, tres omnipotentes esse. Quo audito Terricus quidam scholarum magister irridendo subintulit illud Athanasii: Et tamen non tres omnipotentes, sed unus omnipotens ».

16. *Conjicitur in carcerem.* — Cum autem Radulfus archiepiscopus Rhemensis sententiam legati confirmasset, aiens revera Patrem esse omnipotentem, omnipotentem Filium, omnipotentem Spiritum sanctum, eosque qui secus sentirent hæreticos esse censendos, existimarunt necesse esse, ut Abaelardus ipse super his mentem aperiret, fidemque suam coram omnibus exponeret: sed obstantibus adversariis, legit solummodo symbolum Athanasii; quod ut potuit, recitavit: « Inde », inquit Abaelardus, « quasi reus et convictus abbati Sancti-Medardi, qui aderat, traditus, ad claustrum ejus tanquam ad carcerem trahor, statimque Concilium solvitur ».

17. *Retraclat suam de S. Dionysio Areopagita sententiam.* — Gravissimas a suis fratribus et æmulis Alberico et Lotulfo persecutiones Abaelardum passum, dubitandum non videtur. Isti, quos urebat tama quam liber de Trinitate ei pepererat, eum ubique velut hæreticum et trium Deorum assertorem infamarunt. Insuper etiam ei fuere monachi Dionysiani quod sæcularem ipsorum vitam moresque irreligiosos liberius argueret. et in privato colloquio vindicaret Bedæ sententiam, qua asseruit, *Dionysium Areopagitam* Corinthiorum potius quam Atheniensem fuisse episcopum. Inde enim sequi videbatur, *Dionysium* Galliarum Apostolum Areopagitam non esse, cum ejus Acta eum Atheniensem episcopum faciant. Cono legatus post Concilium Suessionense eum in suum Sancti-Dionysii monasterium reduci jussit, ubi ut prius veterum auctorum lectioni se applicuit, et quibus-

dam monachis dixit, veriolem sibi videri *Bedæ* quam *Hilduini* sententiam. *Adam* abbas Sancti-Dionysii non tantum cœnobium suum lesum, sed regiam quoque ipsam majestatem imminutam ratus, sese nomen Abaelardi regi delaturum minatus est, sed is commodam et opportunam nactus occasione, custodes incautos et incogitantes fallit, atque ad *Theobaldum Magnum*, Tricassinæ civitatis et Pruvini dominum, cui sciebat suas displicere miseria, confugit, et apud Pruvinum in cella Sancti-Egultii cum monachis Sancti-Petri Trecentis, volente ejus loci priore, commoratur, donec cum *Adamo* abbate suo in gratiam redire posset. Hic vero fraudem sibi a monacho suo factam ægre ferens, comminatur, ni redeat, se illum excommunicationi subjecturum. Præterea ad reparationem injuriæ monasterio Sancti-Dionysii latæ, jubet palinodiam cantare, et Dionysii Areopagite Historiam ab *Hilduino* editam scriptis suis confirmare. Jussus ille acquiescit, seu volens seu invitus, Epistolamque dirigit abbati suo cum hac inscriptione: *Adæ dilectissimo patri suo, abbati D. G. gloriosissimorum martyrum Dionysii, Rustici et Eleutherii ibidem corpore quiescentium, unaque fratribus et communachis suis charissimis, Petrus habitu monachus, vita peccator*. Dum autem inter abbatem et priorem cellæ Sancti-Petri Trecentis atque ipsum *Abaelardum* de reditu tractatur, obiit *Adam* abbas anni sequentis initio, ut ibidem videbimus. Ad majorem condemnationis *Abaelardi* in Concilio Suessionensi notitiam, legenda quæ de ea Tom. X Concil. pag. 885, ex *Ottone Frisingensi* lib. 4 de Gestis *Friderici* cap. 47 referuntur.

18. *Callistus II primatui Lugdunensi amplificando studet.* — *Ludovicus VI* Francorum rex, cum accepisset *Callistum II* metropolitanum Senonensem primatui Lugdunensi subjecisse, hac de re questus est apud eundem Pontificem, qui in ejus gratiam Decretum suum suspendit. Sed quia illud ad tempus tantum relaxatum erat, rursus ad *Callistum II* scripsit *Ludovicus* rex, atque se passurum potius totius regni sui incendium et capitis etiam sui periculum, « quam hujus subjectionis et abjectionis opprobrium ». Rogat eum, ut recorderetur, se *Rhemensi* Concilio cum labore suo, sed cum honore ejusdem Pontificis interesse studuisse: et plus honori ejus, quam suo dominio consuluisse: « Videat », subdit, « dulcissime pater, discretia vestra, ne civitas Lugdunensis quæ de alieno est regno, de nostro floreat detrimento, nec subijciatur amicus amico ». Recitantur hæc litteræ sine die et mense datæ Tom. X Concil. pag. 855, sed eas presentis anno datas, hæc prima ejus verba demonstrant: « Scripsit nobis sublimitas vestra de captione illius apostatæ *Burdini* ». Quare quando *Callistus II* exeunte Aprili ad *Galliarum* episcopos litteras dedit, alias etiam ad regem scripsit quæ perire, harumque hæc responsio fuit. Legendus liber *Joannis-Baptiste Brioti*

canonicus *Senonensis*, de primatu metropolitani *Senonensis*.

19. *Secundæ Henrici Angliæ regis nuptiæ.* — In *Anglia* *Henricus* rex pie *Mathildis* uxoris demortuæ loco aliam hoc anno substituit, scilicet *Adelizam*, ut eam appellat *Gemmeticensis* lib. 8, cap. 29. seu *Atheleidem*, de qua *Eadmerus* lib. 6 *Novorum* hæc litteris mandavit: « Rex, legalis conjugii nexu olim solutus, ne quid ulterius inhonestum committeret, (naturali enim spuriaque prole abundabat) consilio *Radulphi Cantuariorum pontificis*, et principum regni, quos omnes in *Epiphania Domini*, sub uno *Londoniæ* congregavit, decrevit sibi in uxorem *Atheleidem*, filiam *Gottfredi*, ducis *Lotharingiæ* (sc. *Gottfredi Barbatii Lovaniensis*, seu *Lotharingiæ ducis*), puellam virginem, bonis moribus, et decore modesti vultus decenter insignitam ». Quam narrat postea a *Radulfo Cantuariæ archiep.* coronatam fuisse. Ea « xv annis in regno floruit; sed aliis rebus abundans, opata sobole lucusque caruit », inquit *Ordericus* lib. 12, qui tamen hoc matrimonium cum anno mxx perperam conjungit, quod *Willelmi filii Henrici* regis mortem anno uno serius collocauit. Quibus ex verbis intelligimus *Ordericum* librum illum duodecimum ante *Henrici* regis obitum scripsisse.

20. *Eboracensis archiep. professionem Cantuariensi facere recusat.* — Interim vetus controversia, quæ inter *Cantuariensem* et *Eboracensem* archiepiscopos versabatur circa ordinationem archiepiscoporum *Eboracensium*, quam *Henricus* rex a *Cantuariensi* fieri volebat, multorum motuum causa fuisset, nisi regis pietas *Romani Pontificis* auctoritati cessisset. « Cum hæc ita administrantur », ait *Eadmerus*, « conventu principum, qui pro occursum regiæ factus fuerat, nondum soluto, magnus sermo habitus est de dissidio, quod cœque versabatur inter *Radulfum Cantuariensem archiep.* et *Thurstanum Eboracensem*. Siquidem ipse *Thurstanus* a *Callisto* episcopus ordinatus (ne a *Radulfo* ordinaretur) litteras ab ipso *Callisto*, more quo cuncta *Romæ* impetrantur, adeptus fuerat. Quibus jubebatur, ut ipse *Thurstanus* episcopatu suo potiretur, aut rex anathemate, et *Radulfus* suspensione pontificalis officii plecteretur. Ad quod recitate sunt sententiæ *Privilegorum*; et quam digne hæc *Apostolica* disponentur, intellectum est ab omnibus. Tamen ne prætermissemus intentio pœnæ regem vel pontificem aliquatenus conturbaret, ex communi consilio permissus est idem *Thurstanus Angliam* redire, et *Eboracum* regia via venire. Quod et factum est, ea dispositione ut nullatenus extra parochiam *Eboracensem* divinum officium celebraret, donec *Ecclesiæ Cantuariensi* de injuria, quam ei intulerat, abjurata cordis sui obstinatione, satisfaceret. Verum *Thurstanus* a rege in *Angliam* revocatus, mox in suum reductus est archiepiscopatum, nec legitur aliquam satisfactionem ab eo factam; imo « sine exactione professionis in suum

mox recipitur archiepiscopatum», ait chronographus Mailrosensis.

21. *Petrus Leonis legatus in Angliam et Galliam missus.* — Extincto schismate, Callistus II, « Apostolici culminis securitate potius, inquit Eadmerus, libera auctoritate, qua Romanum Pontificem niti æquum esse probatur, quaquaversum per legatos suos utebatur. De quorum numero, quidam Petrus nomine, Rom. genere, monachus Cluniacensis professione, venit in Galliam, missus ab ipso Pontifice, functurus, ut ferebatur, legatione Gallie, totius Britannie, Iibernie quoque et Orcadarum insularum. Supercreverat autem fama istius famam omnium, ante eum in has partes a Romana Sede destinatorum. Et abbates et nonnulli alii, viri videlicet honorati, ejus adventum Angliæ præconaturus ab eo præmittebantur. Erat enim filius Petri, præclarissimi ac potentissimi principis Romanorum : cujus fides et actio, magni consilii et fortitudinis esse solebat, iis qui in Sede Apostolica canonice constituti, patres orbis habebantur. Attonita igitur tota terra in expectatione quasi tanti adventus : direxit rex Henricus Bernardum episcopum S. David de Walis, et Joannem filium patris sui clericum trans mare; ubi eo usque idem Petrus morabatur, regis Anglorum de introitu suo in Angliam voluntatem jussumque operiens, quatenus illum ad se perducerent. Quibus etiam ipse rex, prudenti usus consilio, injunxit, quatenus iter ejus ita disponerent, ut post ingressum Angliæ, nec Ecclesias, nec monasteria quælibet, ad se tendens, hospitandi gratia ingrederetur, nec aliunde quam de suis victui necessaria ei ministrarentur. Perductus igitur ad regem, digne ab eo susceptus est. Et exposita sui adventus causa, rex, obtenta expeditione, in qua tunc erat (nam super Walenses ea tempestate exercitum duxerat) dixit, se tanto negotio operam tunc quidem dare non posse; cum legationis illius stabilem auctoritatem nonnisi per conventum episcoporum, abbatum et procerum, ac totius regni conventum roborari posse constaret. Super hæc sibi patrias consuetudines, ab Apostolica Sede concessas, nequaquam se æquanimiter amissurum fore testabatur (in quibus hæc et de maximis una esset, quæ regnum Angliæ liberum ab omni legati ditione constitueret), donec ipse vitæ præsentis superesset. His horumque similibus regali facundia editis, præfatus Petrus assensum præbere utile judicavit et annuit.

22. *In Angliā honorifice exceptus, sed non admissus.* — « Quapropter larga regis munificentia magnifice honoratus, omni modo (legendum nullo modo) se illi quidquam antiquæ dignitatis derogaturum, imo ut dignitatis ipsius gloria undequaque

argumentaretur (legendum *augmentaretur*), spondit plena fide elaboratum. Pax itaque firma inter eos firmata est : et qui legati officio fungi in tota Britannia venerat, immunis ab omni officio tali, cum ingenti pompa, via qua venerat, extra Angliam a rege missus est. Dofris itaque transfretaturus, Cantuariæ hortatu regis et archiepiscopi magnifice a fratribus susceptus est, et inter eos triduo cum jucunditate conversatus. In quo temporis spatio, querimonia apud eum deposita est pro gravi injuria, qua papa Callistus Ecclesiam Cantuariensem in causa Thurstoni Eboracensis humiliare non veritus est, et suis litteris eandem humiliationem, omnia omni justitie consideratione roborare. Quæ ipse leni vultu et miti mente suscipiens, privilegia ab antiquis Patribus olim a Romana Sede possessa (legendum concessa) ostendi sibi postulavit : et si rata esse probarentur, quæ noviter instituta erant, se promisit elaboraturum ut in nihilum redigerentur. Prudentem igitur ratione virorum probatum est bullas antiquitus Chartas incendio, quod totam Ecclesiam, necdum transitis quinquaginta annis, omnino consumpsit, esse consumptas : paucis illarum in antiquis schedulis, seu veteribus libris, quoquo modo raptim transcriptis atque retentis. Quarum veritas et Romani stylo eloqui, et auctoritate jam per quadraginta, et eo amplius annos ab ipsa Ecclesia inconcusse possessa declaratur : quibus ille perspectis atque perpensis, testatus etiam ipse est, Ecclesiam Cantuariensem grave nimis et immoderatum judicium esse perpassam : et quatenus hoc velocius corrigeretur, se modis omnibus opem adhibiturum pollicitus est. Post hæc Angliam egreditur, prospero cursu procellosum mare evectus ».

23. *Erat tunc cardinalis S. R. E. — Petrus* mense Octobri legatus in Galliam et Angliam missus, cum jam presbyter cardinalis esset, ut docet Epistola Callisti II ad Ludovicum VI Francorum regem data, quam Dacherius tom. 3 Spicilegii pag. 146, e tenebris eruit : « Sane charissimum, inquit, filium nostrum P., Sedis nostræ presbyterum cardinalem, nobilitati tuæ attentius commendamus. Nos enim a latere nostro cum secundum antiquam Apostolicæ Sedis consuetudinem ad terram potestatis tuæ pro corrigendo et confirmando quæ corrigenda et confirmanda fuerint, delegamus etc. Datum Beneventi pridie kalendas Octobris ». Ex his manifestum est, Baronium anno mxcvii n. 8. Petri in Galliam et Angliam legationem ad illum Christi annum male retraxisse. Petrus iste, *Petrus Leonis* cognominatus, postea antipapa fuit sub Anacleti nomine.

CALLISTI II ANNUS 4. — CHRISTI 1122.

1. *Concilium generale Lateranense cum singulis canonibus : in quo auditi legati imperatoris de pace acturi.* — Annus Redemptoris millesimus centesimus vicesimus secundus, Indictione decima quinta, sequitur Deo acceptus placabilis, pacificus, quo a Callisto papa ad plenissimam instaurandam Ecclesie pacem, revocandamque exulem diu longiusque propulsatam concordiam, Laterani indicium generale Concilium celebratum est tempore Quadragesimæ, cui interfuisse trecentos et amplius episcopos testatur, qui præsens extitit Sugerius ¹ S. Dionysii abbas. Porro adeo nobilis conventus Patrum in eo multus fuit, ut Ecclesiam Dei diuturnis schismaticorum factionibus labefactatam in pristinam restitueret disciplinam. Quenam autem in hoc Concilio statuta fuerint, reperimus in Codice Vaticano, qui continet Collectionem Anselmi, in quo post caput quinquagesimum quintum, tanquam Appendicem habet notatos hujus Concilii canones decem et septem, quorum maximam partem Gratianus, qui hoc sæculo claruit, in suum Decretum transtulit, nempe ² primum ³, secundum ⁴, tertium ⁵, quartum ⁶, quintum, quos apud eum require : qui autem ab eo non ponuntur, nos hic describemus eodem ordine, quo reperiuntur in dicto Codice, ut sextum ejusdem Concilii canonem, qui sic se habet :

2. « Ordinationes, quæ a Bardino hæresiarcha, postquam a Romana Ecclesia est damnatus, quæ et a pseudoepiscopis per eum postea ordinatæ (factæ) sunt, nos esse irritas judicamus ».

Septimum vero apud Gratianum invenies ⁷. Caput octavum in eodem Codice sic : « Ad hæc sanctæ Romanæ Eccles. possessiones quietas servare per Dei gratiam cupientes, præcipimus, et sub distinctione anathematis interdicimus, ne aliqua persona Beneventanam beati Petri civitatem præsumat invadere, aut violenter tenere. Si quis aliter præsumperit, anathematis vinculo tradatur ».

« Caput autem nonum sic : « A suis episcopis excommunicatos, ab aliis episcopis, abbatibus vel clericis in communionem recipi, proculdubio prohibemus ».

Decimum apud Gratianum reperies ¹.

Undecimus sic se habet : « Eis qui Hierosolymam proficiscuntur, et ad Christianam gentem defendendam, et tyrannidem infidelium debellandam efficaciter auxilium suum præbuerint : suorum peccatorum remissionem concedimus : et domos, familias, atque omnia bona eorum in beati Petri et Romanæ Ecclesie protectione, sicut a domino nostro papa Urbano statutum fuit, suscipimus. Quicumque ergo ea distrahere vel auferre, quamdiu in via morantur, præsumperint, excommunicationis ultione plectantur. Eos autem, qui pro Hierosolymitano, vel pro Hispanico itinere cruces sibi in vestibus posuisse noscuntur, et viam postea dimisisse, cruces iterato assumere, et viam ab instanti Pascha usque ad proximum sequens Pascha perlicere, Apostolica auctoritate præcipimus : alioquin ex tunc eos ab introitu Ecclesie sequestramus, in omnibus terris eorum divina officia, præter infantibus baptismata, et morientibus pœnitentiam, interdicimus ».

Duodecimum quod sequitur synodale Decretum sic se habet : « Illam vero pravam defunctorum porticanorum consuetudinem, quæ hactenus ibi fuit, ex fratrum nostrorum et totius curiæ consilio, necnon et voluntate et consensu præfecti, removendam censuimus, ut porticanorum habitatorum sine hæredibus morientium bona, contra morientium deliberationem minime pervadantur ».

Decimus tertius ejusdem Concilii canon sic sequitur : « Si quis Tregnam diffrigerit, usque ad satisfactionem ab episcopo admonetur. Quod si tertio admonitus satisfacere contempserit, episcopus, vel metropolitanus cum duobus aut uno vicinorum episcoporum in rebellem sententiam anathematis dicat, et per scripturam episcopis circumquaque denuntiet ».

¹ Sug. in Vita Ludovic. reg. — ² I. q. 1. c. 10. — ³ Dist. LX. c. 10. — ⁴ Dist. XXVII. c. 8. — ⁵ XVI. q. VII. c. 25. — ⁶ XXXV. q. II. c. 2. — ⁷ XVI. q. IV. c. 14.

¹ Dist. LXI. c. ult.

Decimum quartum canonem apud ¹ Gratianum invenies.

Decimus quintus iste : « Si quis monetam falsam scienter fecerit, aut studiose expendit, tanquam maledictus et pauperum virorum oppressor, necnon et civitatis turbator, a fidelium consortio separetur ».

Decimus sextus extat itidem apud Gratianum ², sicut et decimus septimus ³ : reliqui autem, qui in eodem Anselmi scripti sunt Codice, Urbani papæ Secundi titulo apud Gratianum leguntur. Hæc sunt quæ spectant ad canones Romani Concilii sub Callisto Secundo. Quod autem spectat ad alias in eodem Concilio res gestas, sic accipe.

3. In eodem Concilio auditi sunt legati Germanorum, assensu imperatoris ab episcopis et principibus Germaniæ missi anno superiore, Spirensis nimirum episcopus, atque Fuldensis abbas, exhibentes quæ imperator præstare paratus erat, nempe remissionem investiturarum Ecclesiarum, quarum causa diu multumque inter imperium et sacerdotium fuerat, magno Christiani orbis scandalo, disceptatum. Auditi sunt iidem legati libenter, et collaudati magnifice illo divinæ Scripturæ præconio ⁴ : « Quam speciosi pedes evangelizantium pacem, evangelizantium bona », sive illo ⁵ : « Bonum nuntium de longinquo tanquam aqua frigida in æstate ». Atque ex illorum petitione concessa legatio mittenda a Sede Apostolica in Germaniam, quæ sicut ab imperatore renuntiationem investiturarum acceperet, ita nomine Apostolicæ Sedis eidem ab excommunicatione absolutionem impenderet, et quæ Callisti papæ nomine essent exhibenda proferret. Decretum est tantum legationis pondus primario viro Lamberto cardinali episcopo Ostiensi, atque duobus aliis cardinalibus, qui profecti statim sunt una cum legatis e Germania missis, Spirensi episcopo, atque abbate Fuldensi. Hi ubi in Germaniam pervenerunt, ad eos audiendos decrevit Concilium tam episcoporum, quam principum, cui etiam imperator adesset, Wicburgi celebrandum solenni die Natalis Apostolorum Petri et Pauli. Quid autem tunc per legatos actum Urspergensis abbas exacte recenset, a quo sunt ista petenda utpote ab auctore, qui potuit tunc his omnibus cum aliis præsulibus interesse.

4. *Legati ex Concilio in Germaniam missi, per quos reconciliatio imperatoris et libertas Ecclesiæ firmata.* — Recenset in primis altercationem, quam excitatam invenerunt legati inter imperatorem et principes Saxonie, et Moguntinum archiepiscopum ob electionem Wicburgensis episcopi, cum defuncto ejus episcopo tertio kal. Januarii, Henricus imper. elegisset nobilem quemdam Gebhardum; senior autem pars cleri atque populi Ruggerum ejusdem Ecclesiæ canonicum promovendum proposuisset, quorum votis aspirarent

Saxonie principes cum archiepiscopo Moguntino. Cum ista in medio verterentur dissidia, ex quibus non solum sperata concordia longius abjici timeretur, sed effugata discordia revocanda, et intermissum bellum ardentius repetendum fore, videri posset, ecce legatio e Romano Concilio missa advenit, de qua ista Urspergensis abbas : « Ipso etenim tempore episcopus Spirensis et abbas Fuldensis, legatione totius regni apud Apostolicam Sedem peracta, redierant, ducentes secum Ostiensem episcopum, vicem domini Apostolici per omnia tenentem, cum duobus cardinalibus, qui nihilominus a Sede S. Petri ob reconciliationem regni et sacerdotii missi fuerunt. Ilac de causa iterum colloquium curiale per provincias indictum est, cui locus Wircburg, tempus festum sancti Petri definitum est ». In quo quidem conventu, cum archiepiscopus Moguntinus, et cum eo Apostolicæ Sedis legati consecrassent contra electionem imperatoris ejus loci diaconum Ruggerum in episcopum, cuius potiora jura esse scirentur, omnis spes rerum componendarum videri poterat penitus esse proscripta, et majorum paratus fomes incendiorum, cum jam ita soluto conventu illo, quisque esset dimissus ad propria, legati autem Apostolicæ Sedis Moguntiam petiissent. Quomodo autem ita desperatis rebus, rursus sit instauratum per legatos de universali pace negotium, idem qui supra auctor sic narrat :

5. « At benignus et amator hominum JESUS per industrium servorum suorum Sedis Apostolicæ legatorum, qui tunc Moguntiam morabantur, imo per inhabitantem in eis Spiritum suum, spiritum principum paci (contrarium curavit) contraxit auferre, charitatem quoque nihilominus in eorum cordibus diffundere cepit. Quia nimirum, ut vere creditur, post tot Christi tunicæ scissuras, post tot Christianorum intestina bella, tempus miserendi Sion, id est, Ecclesiæ, licet sero jam venit. Facto igitur universali conventu apud urbem Wangionum, quæ nunc Wormatia dicitur, sicut longum, ita et incredibile memoratu est, quam prudenti, quam instanti, quamque per omnia sollicito cunctorum procerum consilio, pro pace et concordia, per unam vel amplius hebdomadam certatum sit; donec ipse, in cujus manu cor regis est, omnem animositatem Augusti sub Apostolicæ reverentiæ obedientiam causa matris Ecclesiæ, etiam ultra spem plurimum inlexit. Mox tamen ab Apostolicæ Sedis apocrisiariis in communionem receptus tam ipse imperator, quam universus sibi subjectus exercitus. Imo generali absolutione cunctis hoc schismate pollutis per auctoritatem Apostolicam facta, qualiter Ecclesiasticas investituras, cæteraque spiritualia negotia, quæ tanto tempore reges Teutonici administraverant, quaque ipse, ne regni diminueretur honor, nunquam vita comite se dimissurus proposuerat humiliter pro Christo, coram multitudine maxima abnegaverit, et in manus domini episcopi Ostiensis, ac per ipsum

¹ X. q. I. c. 24. — ² XXIV. q. III. c. 23. — ³ XVI. q. I. c. 11. — ⁴ Rom. X. — ⁵ Prov. XXV.

Domino nostro JESU Christo, suæque in perpetuum jus Ecclesiæ dimiserit : rursumque qualia sibi ob honorem regni observandum auctoritas Apostolica concesserit, utriusque partis melius docebunt subter annotata scripta ».

6. Quæ habentur unciis inclusa, sunt ex autographo in Codice Vaticano :

[In nomine sanctæ et individuæ Trinitatis.]

« Ego Henricus Dei gratia Romanorum imp. Augustus, pro amore Dei et sanctæ Romanæ Ecclesiæ, et domini papæ Callisti, et remedio animæ meæ, dimitto Deo, et sanctis ejus Apostolis Petro et Paulo, et sanctæ Catholice Ecclesiæ omnem investituram per anulum et baculum, et concedo in omnibus Ecclesiis (quæ in regno vel imperio meo sunt) fieri electionem, et liberam consecrationem. Possessiones et regalia beati Petri, quæ a principio hujus discordiæ usque ad hodiernam diem, sive tempore patris mei, sive etiam meo, ablata sunt, quæ habeo, idem sanctæ Romanæ Ecclesiæ restituo, quæ autem non habeo, ut restituantur fideliter juro. Possessiones etiam omnium aliarum Ecclesiarum, et principum, et aliorum tam clericorum quam laicorum consilio principum, et justitiæ, quæ habeo, (reddam, quæ non habeo) ut reddantur fideliter juro. Et do veram pacem (domino papæ) Callisto, sanctæ Romanæ Ecclesiæ, et omnibus qui in parte ipsius sunt vel fuerunt; et in quibus sancta Romana Ecclesia auxilium postulaverit, fideliter juro ». Hucusque apud Urspergensem promissio imperatoris. In Codice Vaticano ex autographo adduntur ista : « Et in quibus mihi querimoniam fecerit, debitam sibi justitiam faciam ». Insuper et quæ sequuntur :

« Hæc omnia acta sunt consilio et assensu principum, quorum nomina subscripta sunt.

« Adalbertus Moguntinus archiepiscopus.

« Fridericus Coloniensis archiepiscopus.

« Otto Bambergensis episcopus.

« B. Spirensis episcopus.

« A. Augustensis episcopus.

« G. Trajectensis episcopus.

« V. Constantiensis episcopus.

« E. abbas Fuldensis.

« Northmannus dux.

« Fridericus dux.

« Bonifacius marchio.

« Theobaldus marchio.

« Cynulphus comes Palatinus.

« Othertus comes Palatinus.

« Berengarius comes.

« Godfredus comes.

« Ego Fridericus Coloniensis episcopus et cancellarius recognovi.

« Hoc autem Privilegium aureo sigillo ipsius imperatoris munitum in archivis Romanæ Ecclesiæ tenetur reconditum ». Hucusque Vaticanus Codex. Subjicitur verò promissioni Henrici ab Urspergensis ejusmodi Callisti facta imperatori concessio :

7. « Ego Callistus, servus servorum Dei, dilecto filio suo Henrico, Dei gratia Romanorum imperatori Augusto, concedo electiones episcoporum, et abbatum Teutonici regni, quæ ad regnum pertinent, in præsentia tua fieri absque simonia et aliqua violentia : ut si qua inter partes discordia emergerit, metropolitani et provincialium consilio vel judicio, saniori parti assensum et auxilium præbeas. Electus autem regalia per sceptrum a te recipiat, exceptis omnibus quæ ad Romanam Ecclesiam pertinere noscuntur; et quæ ex his jure tibi debet, faciat. Ex aliis vero partibus imperii consecratus, infra sex menses regalia per sceptrum a te recipiat. De quibus vero mihi querimoniam feceris, secundum officii mei debitum, auxilium meum prestabo. Do tibi veram pacem, et omnibus qui in parte tua sunt vel fuerunt tempore hujus discordiæ. Data anno millesimo centesimo vicesimo secundo, nono kalend. Octobris ». Hactenus Callisti papæ concessio. Extant eadem ipsa monumenta apud Willelmum Malmesburiensem. Pergit vero Urspergensis :

« Hujusmodi scripta atque rescripta propter infinite multitudinis conventum, loco campestri juxta Rhenum lecta sunt, data et accepta, postque multimodas laudes rerum gubernatori redditas, celebratis a domino Ostiensi divinis sacramentis, inter quæ dominum imperatorem cum pacis osculo sanctaque communione plenissime reconciliavit, discessum est ab omnibus cum letitia infinita.

8. « Alterum quoque non multo post, id est, in festo S. Martini, colloquium imperator cum principibus, qui priori non aderant, Babenberg habuit : ubi et cunctis in sua vota concordantibus, inter multa, quæ tam ad regni quam sacerdotii congruebant honorem, more majorum composita, legatos proprios cum Romanis destinavit, et utrosque nuntia simul et munera ferentes honorifica, domino Apostolico Callisto, consanguineo scilicet, jam sibiimet unitissimo direxit ». Hucusque Urspergensis. Atque hic tandem dirissimorum certaminum finis, quæ per annos plurimos vi barbarica tyrannis imperatoria contra sanctam Ecclesiam excitavit, sive armis pugnando, sive (quod acerbius visum est) ipsos filios Christi fideles, potissimum vero Romanos cives ab ipsa diro schismate separatos, in ipsam impiè concitando, sive funestissimos antipapas, horrenda monstra in sacrosanctam Apostolicam Sedem Angelis reverendam, cunctisque mortalibus venerandam tanto totius orbis scandalo intrudendo. Ut plane omnibus perspicue clareque constiterit, non fuisse humanæ potentia, tot tantosque simul in Petri naviculam concitados fluctus ad perdendam eam potuisse vitari, illisque non mergi deorsum, sed sublimius majori gloria tolli atque firmari; neque humanarum virium, tot item tantosque simul in eandem eodem impetu flantes ventos et portis inferi per angelos malos inmissis simul compe-

scere; sed illius fuisse potentiae, cui mare atque venti simul obediunt, illius virtutis, qui fluctus ad perdendum ne fluant, obdurat in petram, et Petro dixit ¹: « Tu es Petrus, et super hanc petram aedificabo Ecclesiam meam, et portae inferi non praevalent adversus eam ». Ut merito tanta victoria triumphans Ecclesia concinuerit canticum Annae ²: « Exultavit cor meum in Domino, et exaltatum est cornu meum in Deo meo. Dilatum est os meum super inimicos meos, quia laetata sum in salutari tuo. Non est sanctus ut est Dominus: neque enim est alius extra te, et non est fortis sicut Deus noster »: reclinueruntque filii omnes propheticum carmen ³: « [Exulta et lauda, habitatio Sion, quia magnus in medio tui Sanctus Israel ».

9. Pontius abbas Cluniacensis temere se abdicit, Hierosolymam pergit. — Sed jam ad reliquas res gestas in Romano Concilio redeamus, quae germe omnes tantae molis operis respectu visae sunt negligi, nec scriptis conservatae, siquae sepultae silentio remansisse. Nam Sugerius abbas Sancti-Dionysii Parisiorum, qui eidem Concilio (ut ipse testatur) interfuit, plura tunc negotia tradit se ad Sedem Apostolicam detulisse, de quibus nusquam mentio aliqua. Tunc et Pontius abbas Cluniacensis, hospes Romanorum Pontificum Gelasii atque Callisti, suorum monachorum clamoribus fatigatus, non tam ad defendendam causam Romam se contulit, quam ut se abdicaret onere praefecturae: quod fecit, licet contradicente Callisto. At quoniam diu multumque ejus causa Apostolicam Sedem tempore successoris ejusdem Pontificis tenuit occupatam, de eoque sub Honorio papa agendam pluribus, hic ejus tantum exordia sunt referenda. Fuit haecenus ejusdem Pontii abbatis successoris S. Hugonis fama laudabilis, ad quem duae extant Ivonis episcopi Carnotensis Epistolae ⁴, deque ipso mentio habetur in rebus gestis Godefredi episcopi Ambianensis ⁵, et apud Petrum Diaconum ⁶ in Chronico Cassinate, in hisque omnibus absque reprehensione. Sed mutatus in virum alterum, ingens plane scandalum universae invexit Ecclesiae.

10. Accipe itaque rei gestae seriem ex Petro Cluniacense abbate, et ejus primordia et res gestas sub Callisto ita scribente ⁷: « Hic valde juvenis a fratribus Cluniacensibus, spe bonae indolis ejus

inductis, in abbatem electus, magno illo et famoso viro jam dicto patri Hugoni successit. Qui primis assumptionis suae annis satis modeste et sobrie conversatus, procedente tempore mores mutavit, et multis ac diversis casibus et causis fratrum paene universorum animos exasperando, eos paulatim contra se concitavit. Dissidentes illi ab eo, et quod multa nobilitate et levitate animi, nullis honorum consiliis acquiescendo (ut dicebant) res monasterii pessumdaret, inter se nunc pauci, nunc plurimi tandem paene universi murmurabant. Mansit autem res aliquandiu tecta inter eos, nec ad aures saecularium per decennium fere pervenit. Pervenit tandem eo usque his occulta diu, ut non solum ad circumpositos, sed insuper ad remotissimos quosque hujus dissensionis malum pertingeret, et ipsas summi Pontificis et Romanae curiae aures impleret.

11. « His rumoribus dominus Pontius provocatus, indignationis impetum, quem in alios fortassis derivare debuerat, in seipsum retorsit, et Romam velut praecipiti ausu adiens, ut curae pastoralis sollicitudine solveretur, dominum papam instanter oravit. Praeerat tunc Romanae Ecclesiae regii sanguinis nobilitate insignis, sed moribus, probitate, ac liberalis animi magnificentia longe insignior, qui prius Viennensi Ecclesiae praefuerat, Callistus papa Secundus. Is in primis abbatibus Pontii voluntati et petitioni omni exhortationis nisa resistens, postquam cum non posse flecti a proposito vidit, ab omni cura Cluniacensis Ecclesiae ut postulabat, absolvit. Absolutus inde ejusdem papae permissione, Apuliam petiit, indeque mare transmissio, Hierosolymam, semper, ut proposuerat, ibidem mansurus pervenit. Papa fratribus Cluniacensibus quod factum est mandans, ut sibi patrem eligerent, auctoritate Apostolica praecipit etc. » Quomodo autem Hierosolymis rediens invasit praedonum manu Cluniacense caenobium aliaque nefanda patravit, quorum causa excommunicari meruit, suo loco dicetur.

12. Obitus S. Berardi episcopi Aprutini. — Hoc eodem anno, XIV kalend. Januarii, migravit ex hac vita S. Berardus episcopus Aprutinus, seplimo sui episcopatus anno, hujus temporis lucerna super candelabrum posita, ardens et lucens in Ecclesia Dei. Hic enim ex monacho Benedictino ad episcopatum invitatus assumptus, egregia claruit sanctitate illustratusque est miraculis, ut ejus res gestae tunc scriptae declarant.

¹ Matth. xvi. — ² 4. Reg. ii. — ³ Is. xii. — ⁴ Ivo ep. ccxxxiii. ccxxxvi. — ⁵ April Sur. l. vi, die viii Novemb. in Godef. l. iii c. 7. — ⁶ Pet. Diac. Chron. Cass. l. iv. c. 77. — ⁷ Pet. Cluniac. Mirac. l. ii. c. 12.

Anno periodi Græco-Romanæ 6615. — Anno Afræ Hispan. 1160. — Anno Hegiræ 516, inchoato die 12. — Jesu Christi 1122.

— Callisti II papæ 4. — Henrici V reg. 17. imp. 12. Joannis Comeni imp. 5.

1. *Conc. Lateran. generale.* — A num. 4 ad 3. Concilium Lateranense I quod generale fuit, anno tantum sequenti celebratum, ut certis argumentis constat, cumque aliqua ex illo pendeant prius necessario narranda, ejus tractationem in eundem annum differendam censuimus.

2. *Conventus Wormatiensis.* — A num. 3 ad 9. Anno superiori e Germania Romam legati missi fuerant, qui de pace Ecclesiæ et imperii cum *Callisto II* agerent, ut generali Concilio, si aliter fieri non posset, omnia terminarentur. Ille vero anno, ut Urspergensis in Chron. refert, « episcopus Spirensis et abbas Fuldensis, legatione totius regni apud Sedem Apostolicam peracta, redire, ducentes secum Ostiensem episcopum, vicem domini Apostolici per omnia tenentem, cum duobus cardinalibus, qui nihilominus a Sede Sancti-Petri ob reconciliationem regni et sacerdotum missi fuerant ». Post pauca interposita : « Facto igitur universali conventu apud urbem Vangionum, que nunc Wormatia dicitur, sicut longum, ita et incredibile memoratu est, quam prudenti, quam instanti, quamque per omnia sollicito cunctorum procedum consilio, pro pace et concordia per unam vel amplius hebdomadam certatum sit, donec ipse, in cuius manu cor regis est, omnem animositatem Augusti sub Apostolicæ reverentiæ obedientiam, causa matris Ecclesiæ, etiam ultra spem plurimum, inflexit », et cetera a Baronio narrata.

3. *In eo facta concordia sacerdotum et imperii.* — Dimisit imperator investituram per annum et baculum, et permisit in omnibus Ecclesiis fieri electionem, et liberam consecrationem. Callistus vero II litteris *IX kal. Octob.* datis concessit, ut electiones episcoporum et abbatum Teutonici regni, in præsentia imperatoris absque synodo fierent, et ut electus regalia per sceptrum ab imperatore reciperet. Ita concordia Ecclesiæ inter et imperium restituta. Idem habet Anselmus Gemblacensis in Chron. ad hunc Christi annum, qui notat conventum Wormaticensem celebratum *in mense Septembri in Nativitate sanctæ Mariæ.* Concilium vero Lateranense in annum sequentem indictum fuisse, docet his verbis Simeon Dunelmensis in Hist. de Gest. Angl. ad annum *mccxii* :

« Hac concordia per gentes et populos ubique divulgata, mittuntur etiam litteræ ab Apostolico omnibus archiepiscopis et episcopis per regiones et provincias, ut omni excusatione postposita, festinent occurrere ad Concilium, quod dominus Apostolicus Romæ celebraturus erat *XV kal. Aprilis* ».

4. *Gesta in Apulia.* — A num. 9 ad 12. Hic prætermittenda quæ præcessere res a Baronio relatas. Falco in Chron. ad annum *mccxi* ait : « Dux Guilelmus (nempe Apuliæ) filius Rogerii ducis, ad Rogerium comitem (nempe Siciliæ) filium Rogerii comitis Siculorum descendit, conquerens de Jordano comite Arianiensi, etc. Medietatem suam Palermitanæ civitatis et Messanæ, et totius Calabriæ dux ille eidem comiti concessit, ut ei auxilium largiretur. Continuo sexcentos milites et quingentas uncias auri ei largitus est. Dux ille adveniens, etc. castellum Apicis, ubi comes ille morabatur, obsedit. Ad ducis namque auxilium Crescentius cardinalis, tunc rector Beneventanus, cum Beneventanorum cætu festinavit. Quid multis? Comitem illum et castrum Apicis suæ obtinuit potestati. Comes itaque Jordanus, ducis pedibus, sicut ipsi vidimus qui aderamus, prostratus, misericordiam ei postulavit. Dux autem precibus multis coactus, præcipue comitis Rainulphi qui aderat, liberum eum, et, ut vellet, abire permisit ». Post aliqua bellica facinora subdit Falco : « Dux ille milites, quos a comite Rogerio acceperat, ei remisit » ; cumque interim Jordanus comes arma iterum sumpsisset, « castellum Paludis comprehendit. Audiens autem dux prænominatus castellum illud captum fuisse, exercitu aggregato castrum illud obsedit tribus mensibus. Tandem, etc. principem Jordanum Capuanorum rogavit, ut ei auxilium præberet, et pro auxilio ferendo castellum Apicis et Acernum ei largitur, etc. Præterea dux ipse Beneventanis mandavit, ut neque sibi, neque comiti Jordano auxilium præstarent, etc. quod Beneventanis complerit ; cumque comes ille Jordanus taliter se coactum aspiciens in manus prædicti principis (sc. Capuani) se et castellum Paludis summisit, etc. comes Jordanus castrum Marionis ingressus est ; et sic firmata pace princeps ipse Capuanus revertens, temporibus multis castrum Apicis et Acerni obti-

noit. Deinde dux ille (nempe Guillelmus) super castrum Morionis milites et peditum catervas opposuit, cogitans et comitem et castellum illud suae obtinere ditioni, quod facere minime potuit. Deinde dux praefatus Salernum adivit, et de multis variisque sudoribus, quos perperussus erat, requiem adeptus est; sieque usque ad diem obitus terra sui ducatus a bellorum turbinibus siluit et quievit».

5. *Dissidium inter abbatissas S. Mariae et S. Petri dirimitur.*—Hoc anno, mense Februario, Callistus II Beneventi, quo ex urbe Salernitana sese contulerat, sententia sua confirmavit iudicium cardinalium in gratiam *Bethleem* abbatissae monasterii S. Mariae adversus *Agnetem* abbatissam monasterii S. Petri, quae monasterium illud Sanctae-Mariae tanquam appendicem monasterii Sancti-Petri petierat, «salvo tamen censu, quem pars ipsius monasterii persolvat annualiter ad praedictum monasterium Sancti-Petri, etc. Summus Pontifex hanc litem commisit Dionysio episcopo Tusculano, Chrysogono cancellario, aliisque cardinalibus, quia tunc Apostolicus valde infirmabatur, et curiam ante se congregare non poterat. Erat tunc in sacro Beneventano palatio, quo Agnes abbatissa venit, istaque acta septima die kalendarum Martiarum, ut notat Peregrinus, desinente anno Falconiano MCXXI, inchoato autem communi MCXXII, coram Callisto II Beneventi tunc degente.

6. *Petrus Venerabilis fit abbas Cluniacensis.*—«Anno Domini MCXXI, domnus Pontius pro quibusdam negotiis hujus Ecclesiae agendis Apostolicam Sedem adiit, in manu domni Callisti II papae, abbatiam Cluniacensem sponte resignavit et Hierosolymam devotus petiit», ut legitur in Chronico Cluniacensi. Ilugo secundus prior sanctimonialium de Marcigniano ei in abbatiam substituitur, fuitque II hujus nominis, et obiit VIII idus Julii postquam per tres tantum menses monasterium rexisset. Petrus primus, abbas nonus Cluniacensis electus est in Octavis Assumptionis B. Dei Genitricis Mariae. Ille cognominatus fuit *Venerabilis*, ex nobilissimis Arvernæ magnatibus originem dicens, quia ipsi infantie cunis a parentibus Deo sub monastica observatione militaturus oblati fuerat, et a S. Ilugone in extremum vitae suae monachali benedictione insignitus, inquit idem Chronographus. De Petro S. Bernardus in Epist. cclxv ad eundem data: «Quis mihi det tantae humilitatis insigne tam imitari posse quam admirari? Quis mihi tribuat sanctae et desiderata praesentia tua, non dico semper, non dico saepe, sed vel semel in anno frui? Puto quia nulla vice reverterer vacuus». Porro Pontium hoc anno abbatiae Cluniacensi renuntiassae demonstrat praefectura ejus duratio; annos enim tredecim cum abbatiae Cluniacensi praefuisse, praeter alios testatur Gaudridus prior Vosiensis hujus temporis scriptor, cui consentit Simeon Buelmensis, qui hoc etiam saeculo in Hist. de Gest. reg. Angl. ad annum MCXXII, ubi narrata ejus abdi-

catione statim de ejus protectione Hierosolymitana verba facit.

7. *Initium legationis Gallicae Petri Leonis et Gregorii card.*—Petrus Leonis cardinalis presbyter Sanctae-Mariae trans Tiberim, qui anno superiori in Galliam et Angliam Sedis Apostolicae legatus missus fuerat, et ab Henrico Angliae rege non receptus, Romam, ut conjicere licet, redierat, hoc anno iterum in Galliam reversus est una cum Gregorio de Sancto-Angelo diacono cardinali. Ille discimus ex Orderico lib. XII, ubi loquens de Serlone episcopo Sagiensi, seu, ut ipse loquitur, Salariensi, ad annum MCXXII ait, inclytum praesulem, postquam Salariensem episcopatum «XXXII annis rexisset, VII kal. Novemb. (seu die XXVI mensis Octob. qui hoc anno in feriam quintam incidebat) missa a se cantata, clericis suis mortis suae tempus praedixisse, et sepulchri sui locum designasse. In crastinum feria VI, (scilicet die XXVII Octob.) in Basilicam venit», cumque trementibus membris missam celebrare non posset, capellanus ejus id officium explevit. Tum hora nona ad mensam venit, sed «superius jam anhelans», de praesentibus nihil comedit. «Surgere de mensa post refectorem paratis nuntius affuit, qui cardinales Romanos Petrum et Gregorium adesse retulit. Vigilia quippe SS. Apostolorum Simonis et Iudae tunc agebatur. Mox praesul clericis dispensatoribus suis dixit: Velociter ite, et diligenter Romanis servite, abundanter eis omnia dantes quae necessaria sunt, quia legationem domini papae, qui post Deum universalis pater est, deferunt, ipsique qualescunque sint, magistri non sunt. Solers itaque senex in occursum eorum clientes suos destinavit, et ipse sine dolore seu manifesta aegritudine, ut solebat, in cathedra sedens solus remansit», et in ea paulo post animam Deo reddidit. Legatio itaque Petri Leonis et Gregorii de S. Angelo cardinalium, hoc anno inchoata, et anno MCXXIV, quo ea adhuc durabat, absoluta. Mabillonius quidem in Praefat. ad editionem Operum S. Bernardi abbat. § 4, num. 39, hujus legationis initium cum an. MCXXIV connectit, citatis Orderico ibidem et Vincentio Bellovacensi in lib. 2 de Vita S. Stephani Grandimontensis, ubi loquens de sancti hujus fundatoris morte, quam cum anno MCXXVI copulat, refert Petrum et Gregorium Sedis Apostolicae cardinales et legatos, sanctum virum paulo ante mortem ejus convenisse. Verum Ordericus, utrumque legatum hoc anno in Galliam venisse disertè assertit, et Vincentius Bellovacensis annum mortis sancti Stephani biennio serius collocavit ut suo loco monstrabimus.

8. *Alfonsi VII cum Urraca matre dissidium.*—Hoc anno Urraca Castellae regina, ab Alfonso Raimundo filio regno spoliata, isque ab omnibus regni magnatibus ut princeps legitimus agnitus, uti Sandovalius fol. 129 et seq. alique scriptores Hispanici tradunt. Pacem tamen matrem inter et filium postea constitutam fuisse, apparet ex Instrumento Aera MCCLXI, Christi nempe MCXXIII scripto,

in quo regum Legionis et Toleti nomen utrique tribuitur; cum tamen penes unum *Alfonsum* tota auctoritas esset.

9. *Eadmerus absolvit libros vi Novorum.* — « Eodem anno », inquit Eadmerus, qui fuit annus ab Incarnat. Domini mcccii, et ex quo ab episcopatu Rossensi in patriarchatum Cantuariensem translatus est, annus nonus, defunctus est Cantuarie in metropoli sede Radulfus archiepiscopus, XIII kalendas Novembr., presentibus filiis suis, glorioso scilicet

agmine monachorum ejusdem loci, et tertio die abhinc in medio aule majoris Ecclesie decenter sepultus; quibus verbis Eadmerus librum vi Novorum absolvit, et forsitan vitam; nulla enim posthac ejus mentio. Fuit monachus Ecclesie Cantuariensis, ut ipsemet lib. 3 Novorum affirmat. Ejus libri Novorum post Baronii mortem, Joannis Seldenii opera, magno historice veritatis compendio, in lucem prodierunt, est enim auctor in Chronologia accuratus.

CALLISTI II ANNUS 5. — CHRISTI 1123.

1. *Monasterio Cassino et Ecclesiis Compostellanæ et Bracharensi Callistus papa consulit.* — Anno Redemptoris millesimo centesimo vicesimo tertio, Indictione prima, Callistus papa se iterum contulit Beneventum, antea autem Cassinum petiit, rursumque ejusdem monasterii monachos e manibus vindicavit potentium, excommunicans Godfredum usque ad satisfactionem. Narrat ista pluribus Petrus Diaconus in Chronico Cassinate¹. Vidi ejusdem Pontificis quatuor Epistolas datas pro monachis Cassinatibus, in causa Cinglensis abbatie eidem monasterio restituendæ.

« Reversus Romam (habet vetus Codex de Romanis Pontificibus ab auctore temporis hujus scriptus) idem Pontifex Compostellanum episcopum pro reverentia corporis B. Apostoli, quod ibi repositum esse dignoscitur, de novo metropolitani constituit, subiciens ei totam illam provinciam tunc ob Sarracenorum hostilitatem penitus desolatam. Lucanum quoque episcopum, quoniam ipsa Ecclesia gratiam Sedis Apostolicæ promeruerat, ampliori dignitate pallii deceravit ». Hæc ibi. Fuit enim, ut dictum est, idem Callistus Pontifex studiosus ac sedulus cultor Jacobi Apostoli, in Ecclesia Compostellana sepulti, atque totius Occidentalis orbis peregrinatione celebris. Sed et confirmavit restitutionem Ecclesie Bracharensis, factam per Paschalem Romanum Pontificem, atque eandem Ecclesiam ejusmodi Privilegio,

litteris Apostolicis datis ad Pelagium ejusdem Ecclesie archiepiscopum, his verbis¹:

2. « Bracharensis metropolim insignem quondam fuisse, atque inter Hispaniarum regna multis et dignitatis, et gloriæ titulis claruisse, tam antiquæ nobilitatis indicia, quam et veterum scripturarum testimonia manifestant. Verum quia consistentis in ea populi peccata corrigere divine dispositioni complacuit, irruentibus Mauris seu Moabitibus, et metropolis dignitas imminuta, et parochiarum lermiini sunt confusi. Sane post longa temporum interstitia divina rursus miseratio metropolim restituere, atque parochias ex parte maxima dignata est ab infidelium tyrannide liberare. Unde dominus prædecessor noster sanctæ memoriæ, Paschalis papa, pristinam ei dignitatem redintegrans, sua quæque membra ei per Apostolicæ Sedis Privilegium cœnivit. Ejus itaque nos vestigia subsequentes, charissime frater et coepiscopo Pelagi, Bracharensi Ecclesie, cui Deo auctore præsidet, integram ipsam urbem Bracharam cum cauto illo integro, quod comes Henricus et uxorem ejus Therasia eidem Ecclesie contulerunt, et cum terminis Bracharensis episcopatus, sicut in descriptione prædicti domini continentur, præsentis Privilegii pagina confirmamus: et idem Bracharensi metropoli Galliciam provinciam, et in ea episcopatum cathedralium urbes redintegramus. Item Asturica, Lucum, Tudam, Mindunium, Auram,

¹ Pet. Diacon. l. iv, c. 82-84.

¹ Apud Joan. Marian. Hist. Hispan.

Portugale, Colambriam, et episcopalis nominis nunc oppida, Visum, Lamecum, Egilaniam, Britoniam cum parochiis suis ». Ilac Callistus. His visis, jam describamus quæ extant vetera monumenta Pontificalium functionum, quas idem papa Callistus hoc anno in Ecclesiæ et altarium dedicatione Romæ exercuit, atque primum hujusmodi de Ecclesiæ S. Agnetis in Agone dedicatione :

3. *Dedicationes Ecclesiarum in Urbe.* — « Anno Domini mxxiii, Indictione prima, mense Januario, die vicesima octava, hæc Ecclesia S. Agnetis dedicata est a domino Callisto papa, cum remissione annuatim dicta die unius anni et quadraginta dierum. Hæc sunt reliquiæ in altari positæ, scilicet indumentum quod Angelus detulit beate Agneti. De capillis et velo beate Mariæ Virginis. De sancti Pauli Apostoli panno oculis ejus appositus in decollatione ejus. Brachium sancti Callisti papæ et martyris, S. Agnetis, S. Anastasii, S. Eustachii. De baltheo S. Gregorii papæ, S. Tryphonis, S. Sebastiani, sancti Hermelis, sancti Alexandri papæ et martyris, et sancti Cornelii papæ ». Hæc in tabula marmorea ad fores ejusdem Ecclesiæ.

In diaconia autem S. Mariæ in Cosmedin, hæc illidem in marmore incisa leguntur :

« Anno mxxiii, Indictione prima, dedicatum fuit hoc altare per manus Callisti papæ Secundi, sui Pontificatus anno quinto, mense Maio, die sexta, Alphano camerario ejus dona plurima largiente ». Et de sanctorum reliquiis ibidem reconditis, in alia Inscriptione in eadem Ecclesia posita ista leguntur :

4. « Anno quinto Pontificatus domini Callisti Secundi papæ, mense Maio, die sexta, dedicatum est hoc altare per manus ipsius, ubi reconditæ sunt hæc reliquiæ. De sepulchro Domini. De veste et sepulchro S. Mariæ. De lapidibus sancti Stephani. De craticula et sanguine sancti Laurentii. De reliquiis sancti Sebastiani. Unum de capitibus sanctorum quatuor Coronatorum. Brachium sancti Hippolyti martyris. Brachium sancti Bonifacii papæ Quarti, Cornelii papæ, Felicis papæ, Agapiti martyris, Anastasii martyris, Secundini martyris, Pimenii presbyteri et martyris, Felicis et Adaucti, Processi et Martiniani, Cosmæ et Damiani, Marci et Marcelliani, Cesarii et Juliani, Marcellini et Petri, Abaeyri, Joannis, Abundii, Irenei, Chrysanthi et Dariae, Marii et Marthæ, sanctorum Septem fratrum, Quadraginta martyrum, Cypriani et sociorum ejus, Cæciliæ virginis et martyris, Priscæ martyris, Sabinæ martyris, Armeniæ martyris, S. Serenæ. De reliquiis cœmeterii Sanctæ-Mariæ ad Martyres, et reliquiæ de veteri altari, et aliorum plurimorum sanctorum, quorum nomina Deus scit. Anno millesimo centesimo vicesimo tertio, Indictione prima ». Ilac ibi. Quibus vides sanctum Pontificem divino cultui addictissimum, ejusmodi sacras functiones per seipsum potius quam per episcopos suffraganeos obire voluisse.

5. *Venetorum victoria in Turcas.* — Quod ad res pertinet Orientis, cum jam capto in itinere a Turcis Balduino rege Hierosolymorum, luctuosus admodum esset status Christianorum, Dei misericordia factum est, ut inexpectato classis Venetorum adventu res in meliorem statum statim collocarentur : cum videlicet Veneti suo adventu Ægyptiorum classem, infestantem littora Palestinæ¹, apud Joppen in obsidione ejus civitatis repertam, quamvis navibus superiorem magnis animis aggressi, gloriose vicerunt : ex qua victoria ingentem sibi immortalēque laudem pepererunt. Qui magno amore ab indigenis, ut liberatores Terræ-Sanctæ accepti, Hierosolymis digne sunt habiti, plurimisque privilegiis aucti ; quorum Diploma adhuc integrum extat, datum hoc anno, subscriptione munitum. Recitatur ipsum a Willelmo Tyrio², licet mendosum nonnihil, quod tu pro arbitrio consulere poteris. Porro eorundem Venetorum auxilio capta est anno sequenti, tertio kal. Julii, Tyrus inexpugnabilis civitas.

6. *Comnenus imperator Orientis, victis hostibus ope B. M. Virginis, ei dicat triumphum.* — Quo pariter anno cum Joannes Comnenus imperator ageret annum quintum in imperio (ut de eo scribit Nicetas Chroniata) ope Dei Genitricis Mariæ de barbaris Scythis trans Istrum habitantibus, et ingenti agmine Thraciam invadentibus, victoriam obtinuit : de quo post alia, quæ in prælio dura et ardua Romanorum exercitui contigerunt, ista Nicetas : « Cum Romana phalanges, urgentibus hostibus et audacius se inferentibus, laborarent imaginem, Dei Genitricis cum gemitu et miserabilibus gestis imperator intuens, lacrymas bellicis sudoribus calidiores fundebat ; neque id frustra. Statim cælesti robore armatus, Scythicam aciem prolitag, quemadmodum olim Moyses extensione manuum Amalechitarum turmas dissipavit. Assumptis igitur armigeris qui clypeis oblongis et prominentibus galeis instar muri inexpugnabilis muniuntur, cum Scythiis congreditur. Qui cum dissoluta illa currum serie ad manus venirent, in turpem versi fugam, a Romanis acriter persequentibus magno numero cæduntur Hamaxobii illi, castrisque direptis, innumerabiles capiuntur. Sed et transfugæ desiderio captivorum popularium confluebant, adeo ut in Occidentali quadam provincia Romana pagi ab eis conderentur, quorum adhuc reliquiæ supersunt, nec pauci in sociorum cohortes referrentur, et major turba ab exercitu capta videretur. Ilac de Scythiis parta victoria, et illustri edito facinore, Joannes vota Deo persolvit, quod festum Pazzinacorum nostro tempore dicitur, in rei gestæ monumentum, et grati animi testimonium. Non multo post contra Triballus, etc. » Subjicit etiam de aliis per eundem imperatorem victoriis obtentis ope pariter sanctissimæ Dei Genitricis Mariæ, cui

¹ Will. Tyr. l. xii. c. 21. 22. 23. — ² Ibid. c. 25.

ut unice victrici religiosum paravit triumphum, qui ab eodem Nicetaita describitur :

7. « Byzantium reversus triumphum indicit, et currum argento interpunctum compingi jubet, opus admirabile, et gemmis pretiosissimis ornatum. Cum dies supplicationis adesset, omnis generis tapetes auro et purpura intexti vicos exornabant, nec deerant Christi et sanctorum effigies in iis ad vivum expressæ; erant et tabulata utrinque propter spectatores structa, digna admiratione. Fuit autem locus urbis sic instructus, qui ab Orientali porta usque ad magnum palatium pertinet. Qua-

drige a quatuor equis nive candidioribus trahebantur. Imperator vero non conscendit, sed Dei Genitricis imaginem in eo collocavit, ob quam lætitia exultabat, et animo pæne delinquebatur: cui victorias ut collegæ imperii invictæ acceptas ferebat. Habenas viris potentissimis moderandas, et cognatis suis currum curandum dedit. Ipse crucem manu gestans, pedes antecessit: et Dei Sapientiæ templum ingressus, atque in conspectu omnis populi ob successus gratiis Deo actis, in palatium abiit ». Ilucisue Nicetas.

Anno periodi Græco-Romanæ 6616. — Anno Æræ Hispan. 1116. — Anno Hegiræ 607, inchoato die 1 Martii, Fer. 5. — Iesu Christi 1123.

— Callisti II pape 5. — Henrici V reg. 18, imp. 13. Joannis Comneni imp. 6.

1. *Conc. generale Lateranense primum.* — A num. 1 ad 5. Concilium *Lateranense* generale primum, de quo Baronius anno MCXXII, num. 1 et seq. agit, currenti tantum anno congregatum, recteque lom. x Concil. suo anno restitutum; Falco enim auctor coævus in Chron., Simeon Dunelmensis in Hist., Anselmus Gemblacensis, passimque scriptores, qui hoc seculo vixere, illud cum hoc Christi anno illigant, nihilque in contrarium afferri potest. Opinionem suam Baronius ex Onuphrio in Chron. Eccles. hausit, neuterque celebrati Concilii diem notavit, qui et omissus fuit in Collectione Conciliorum, et a paucis et antiquis memoratur. Simeon tamen Dunelmensis, tam hoc anno quam superiori, chronographus Mailrosensis et auctor magni Chronici Belgici ex Bernardo Guidonis produnt illud habitum *XV kalend. Aprilis*, quod confirmat Landulphus apud Puricellum in Mon. Bas. Ambros. num. 334, cum ait Synodum *in secunda feria* inchoatam fuisse, nempe *XIV kalend. Aprilis*; diebus enim Dominicis Synodos generales primum sessionem non incepisse sæpius insinuat.

2. *Duabus sessionibus constat.* — Hæc verba Landulphi a Sancto-Paulo, ex quibus etiam erui-mus Synodum duabus sessionibus absolutum esse: « Olrico archiepiscopo Mediolanensi sedente in Roma, tunc cum papa Callistus Synodum Romæ celebravit, ego ab Ecclesia mea exturbatus, et propriis meis rebus et alio diebus expoliatus, coram domino papa Callisto ejusque curia consedente in Lateranensi palatio, causam meam notavi; et ut eam explicarem in Synodo, Synodum intravi. In-

qua Synodo, gratia antiquæ honestatis Mediolanensis Ecclesiæ, et condiscipulatus Olrici, valde condolui in perturbatione, quam Ravennas archiepiscopus faciebat sibi. Poscebat enim Ravennas locum sedendi in Synodo ad dexteram Apostolici, nullo mediante: quem locum Grosulanus possedit, quando restitutus fuit; Jordanusque, qui Grosulano successit, eundem locum habuit tunc, quando idem Grosulanus eundem Jordanum deponere studuit. Hæc itaque ratione, et multis aliis quæ tunc in memoria non habebantur, domnus Olricus Mediolanensis archiep. locum illum obtinere non dubitavit. Sed tamen ipse Mediolanensis Olricus, in secunda feria, qua incepta et celebrata fuit Synodus, loco vacante, neque in palatio, neque in Synodo apparuit. Synodus vero tunc in tertia feria non fuit, et idem Mediolanensis palatium non intravit. Sed in quarta feria dum Synodus celebrata fuisset, Olricus idem Mediolanensis archiep. ad dexteram Apostolici Callisti nullo mediante sedit ».

3. *Finitum fuit die xxi mensis Martii.* — Post aliqua interposita pergît iste historicus: « Ego expectans alterum diem convenientem meæ causæ meæque querelæ, ex improvise vidi et audivi, quod domnus papa gratia consecrandi altare dissolvit Synodum in ipsa die Mercurii, nec ultra ab eo Synodum celebrari audivi, nec vidi; sed sperans in Domino præsens, quod domnus Olricus Mediolan. archiep., prout moris et legis consuetudo exigat, pro rege Henrico oravit, et ei ramos Palmarum per Landrianensem Thealdum Mediolanensis Ecclesiæ egregium notarium in Germaniam misit ».

4. *Quæ præcipue in eo gesta, summarie nar- rantur.* — Quæ præcipue in eo Concilio gesta hoc modo narrat Falco in Chronico : « Anno mxxiii Dom. Incarnat. et quinto anno Pontificatus domini Callisti II summi Pontificis, et universalis papæ, mense Martio, primæ Indictionis, supradictus Callistus Pontifex consilio salutis accepto, Ultra- montanos omnes fere episcopos et archiepiscopos, et abbates, et totius, ut ita dicam, Italiæ Ecclesiarum pastores accersiri præcepit, quatenus sancta Synodali confabulatione firmata pactum cum imperatore Henrico positum (anno sc. superiori) perpetuo confirmaret. Ad cuius sacri conventus præsentiam Rofridus Beneventanus antistes honeste properavit. Ordinato itaque Concilio tali ac tanto, Apostolicus ipse sacramenti Privilegium, quod prædictus imperator constituerat pacis, in conspectu omnium qui convenerant adduci et legi præcepit. Continuo ab omnibus confirmatum est et commendatum. Inter cetera vero, quæ ibi statuta sunt, treugam Dei tenendam posuerunt. Item vinculu anathematis alligavit Apostolicus ipse, si quis Beneventanam civitatem ex B. Petri potestate auferre tentaret, et alia multa quæ huic opusculo affigere longum visum nobis est : excogitans quidem me fastidia addere, si libello tali universa componerem. Alia vero scripta omnia et notata invenietis. Audivimus autem, et quod revera est, comperimus tale tantumque pacis firmamentum infra Romanam Urbem temporibus prædicti Apostolici advenisse, quod nemo civium, vel alienigena arma, sicut consueverat, ferre ausus est ».

5. *Numerus episcoporum presentium, et canonum editorum.* — Quoad episcoporum qui Concilio interfuerunt numerum, Nangius in Chron. ait, *Concilium trecentorum aut amplius episcoporum* fuisse, quod diu ante eum Sugerius, qui Concilio interfuit, in Vita Ludovici VI Francorum regis his verbis retulerat : « A domino papa Callisto, et tota curia honorifice valde recepti per sex menses, cum apud eum demorando magno Concilio trecentorum aut amplius episcoporum Lateranis compositioni pacis de querela investiturarum adstissemus ». Pandulphus in Vita Callisti II ait, Concilium fuisse *cxxxviii episcoporum sive abbatum numero*, sed numeros corruptos existimo. Quoad vero canones in eo editos, referuntur ii Tom. x Concil. ex Baluzio ad lib. 8 de Concordia sacerdotii et imperii, eruti ex vetusto Codice Ms. monasterii Anianensis, qui conferri poterunt cum decretis ejusdem Synodi a Simeone Dunelmensi in sua Historia memoratis, ubi et Concilium istud appellat *Concilium ccc episcoporum*, et decretis hæc verba subnectit : « His Synodalibus decretis subscriptis et confirmatis, imperatorem per legales suos et scripta secundum præmissum scriptorum tenorem promittentem se sanctæ Romanæ Ecclesiæ justa servaturum, generalis Concilii sententia ab excommunicationis absolvit vinculo, quo in Rhemensi Concilio fuerat ligatus ». Constat enim ex iis quæ

Baronius anno mxxii, num. 7 et seq. refert, Henricum imp. eo anno, quo pax constituta, ab excommunicatione absolutum non fuisse. Natalis Alexander Sæc. xi et xii, part. ii. Dissert. iv, art. xx, canones xvii in hoc Concilio inter Œcumenica non conditos percurrit et exponit, apud eum legendos.

6. *Oldegarus creatur S. Sedis legatus in Hispania.* — In canone xi *Callistus II* peccatorum remissionem concedit iis, qui *Ierosolymitanam vel Hispanicam iter suscipiunt* ad Christianam gentem defendendam, et tyrannidem infidelium debellandam. Diagus in Hist. comitum Barcinonensium lib. 2, cap. 103, refert litteras Callisti II omnibus episcopis, regibus et principibus datas statim post Concilium Lateranense, principibus nempe Hispaniarum, eisquæ significat se omnibus adversus paganos Hispaniæ Ecclesiæ opprimentes militantibus eandem peccatorum remissionem, quam Orientalis Ecclesiæ defensoribus concedere, subditque : « Verum, quia exercitum vestrum per nos, ut desideramus, visitare nequimus, charissimum fratrem nostrum Oldegarium Tarraconensem archiepiscopum, ad ipsum ex latere nostro delegare curavimus, nostras ei vices in hoc specialiter committentes, ut ipsius consilio et dispositione corrigenda corrigantur, et confirmanda cooperante Domino confirmetur. Si quæ vero dubia in exercitu eodem emergerint, ipsius experientia terminentur ». In fine legitur : *Dat. Lateran. IV non. Aprilis*, paucis scilicet diebus post celebratum Concilium Lateranense ; neque enim annus in eis legitur. Eas litteras eruit Diagus ex Archivis Ecclesiæ Barcinonensis, et Bollandus ad diem vi Martii recitat in Vita B. Oldegarii.

7. *Tertia profectio Beneventana Callisti II.* — In primo canone simoniacæ ordinationes et promotiones modis omnibus prohibentur ; simonia enim per hæc tempora grassabatur. Audiendus Falco in Chron. qui postquam de Concilio Lateranensi primo sermonem habuit, subjungit : « Concilio celebrato, Beneventum venit prædictus Apostolicus Callistus (hæc tertia ejus profectio Beneventana) et quædam negotia Beneventanorum tractavit. Eodem anno Landulphus de Græca supra nominatus (fuerat is Beneventi comestabilis) XII kalendas Decembris obiit, et ad Ecclesiam suam Sancti-Maximi sepultus est. Cumque prædictus Pontifex Callistus Beneventum venisset, vocari fecit præfatum Rofridum archiepiscopum, ut audiret quorundam civium accusationes, quæ ei inferebantur ; accusator enim fuerat, quod simoniacæ archiepiscopatus honorem accepisset. Tunc præsul ipse, vocatis quibusdam suffraganeis suis et presbyteris civitatis, sacrum ascendit palatium, et accusatoribus auditis inducias postulavit, et acceptis induciis respondit : Paratus sum, pater sanctissime, juxta canonica instituta ab his purgari accusationibus, et vestram sequi jussionem. Tandem juravit ipse primum cum duobus episcopis et tribus presbyteris simoniacæ non fuisse ingressum.

8. *Compostella metropolica dignitate aneta.*

— A rebus Beneventanis ad Hispanicas transeo, quia Baronius num. 1 et 2 de erectione metropolis Compostellane, et de confirmatione Privilegiorum metropolis Bracarensis verba facit. *Alphonsus VII*, Castellæ rex in Charta .Era mclxvii, quinto idus Aprilis scripta, anno sc. Christi mxxix, ait, Callistum II patrum suum dignitatem archiepiscopatus Emeritensis Ecclesiæ in Compostellanam transulisse; sed cum annum quo hæc facta sunt in ea non expresserit, Sandovalius in Alphonso VII hanc erectionem Ecclesiæ S. Jacobi in metropolim cum anno mxxv copulat. Verum vir in antiquitatibus Hispanicis versatissimus nihil suorum studiorum Chronologiæ Pontificiæ impertierit; ideoque Baronio standum, qui ex veteri Codice de Romanis Pontificibus ab auctore hujus temporis scripto refert, id hoc anno factum esse. Sandovalius scriptorum Hispanicorum episcopos omnes Galliciæ metropolis Compostellane suffraganeos constituentium errorem recte detexit, asseritque, cum ipsemet episcopus Tudensis creatus fuit, se in archivis illius Ecclesiæ in Gallicia positæ reperisse, annos ducentos a Callisti II obitu archiepiscopos Bracarense a Calliis metropolitas agnitos confirmasse electiones episcoporum Tudensium, ab hujus Ecclesiæ cathedralis canonicis factas.

9. *Suffraganei eidem subjecti.* — Addit, in archivis Ecclesiæ Bracarensis diversa asservari Documenta, quibus constat, eundem archiepiscopum jus illud exercuisse in Ecclesiis cathedrales Astorgæ, Auricæ, Luci et Mindonii; quod confirmat Rescriptum Callisti II in gratiam Ecclesiæ Bracarensis, eo tempore datum, quo Compostellæ metropoliticum jus attribuit; ut enim videre est apud Baronium num. 2, *Callistus* confirmans restitutionem antiquæ metropolis Bracarensis a Paschali II papa (ignotum quo anno) factam, huic Ecclesiæ nominatim conservat jus metropoliticum in Acturiam, Lucum, Tudam, Mindunium, Aurium, Portugale, et Colimbriam. *Callistus* itaque II Ecclesiæ S. Jacobi antiqua jura, eodemque suffraganeos attribuit, qui antiquæ metropoli Emeritensi, cujus episcopus Lusitanie primas erat, alias attributi fuerant. Et tamen hoc ipso anno *Callistus II* reservavit in antiqua Lusitania metropoli Bracarensi Ecclesiæ Conimbricæ, Lameci, Egitanicæ, Visei et Britoniciæ, in veteri Emeritensis Ecclesiæ districtu positas; et quod rarius factum, episcopatus antiquæ provinciæ Emeritensis dantur præsulibus, qui nunquam metropolita fuerat, et cujus Ecclesiæ continebatur limitibus alterius provinciæ, Bracarensis scilicet aut Galliciæ. Volens *Callistus II* Ecclesiam Sancti-Jacobi sine præjudicio Bracarensis jure et majestate augere, contulit in Compostellanam a nullo metropoli dependentem jura metropolis devastatæ, et quæ jamdiu sine titularibus, sine Ecclesiis, et sine episcopis erat.

10. *Victoria Alfonsi Aragoniæ regis de Sarac.*

— Inter hæc *Alfonsus* Aragoniæ rex incredibili

perseverantia Mauros lacescebat, plurimasque de illis victorias reportabat, uti narrant Surita lib. 1 Annal. cap. 47, et Sandovalius fol. 131. Hoc enim anno *Valentia* regnum cum ingenti exercitu ingressus, vastavit, incendit evertitque loca omnia quæ repugnabant. In antiquis Documentis legitur, eum tantum secum in hac expeditione habuisse *Gastonem* vicecomitem Bearnensem, *Petrum de Librana* episcopum Cæsaraugustanum, et *Stephanum* Oscensem episcopum, licet verosimile sit, inquit Surita, plures alios magnates in hoc arduo bello regi operam suam commodasse. Exercitus iter continuans trajecit *Suconem* fluvium, Valentia regnum rigantem, *Xucar* hispanice appellatum; vastavit agros *Dianii* oppidi inter ostia Suconis et Artemisium promontorium siti, et in regno *Murcie* variis in locis strages edidit. Sed his non contentus, *Granate* regnum ingressus Andalusiam usque excurrit, et *Cordubam* Maurorum urbem regiam obsidione cinxit. Quod cum Cordubensis rex vidit, omnium Maurorum copias coegit, et acie cum Alfonso rege confligit. Pugnatum ad locum ab Aragonensibus *Aricol*, et a Castellanis *Aranseuel* dictum; Mauri profligati et undecim eorum reguli internecone deleti, uti refert Surita. Sandovalius memorat antiquum Documentum, in quo idem dicitur, additurque Mauros *Montieli* dominum suum occidisse mense *Junio* .Era mclxi, currentis sc. Christi anni. De hoc bello legendus etiam *Marca* lib. 5 Hist. Bearn., cap. 21.

11. *Alfonsus VII Castellæ rex adversus eum bellum movet.* — Parte altera *Alfonsus VII* Castellæ rex, Burgos Castellæ veteris caput profectus, a civibus exceptus est, solumque castellum Alfonsi Aragoniæ regis causam tuendam suscepit. Castellani milites civibus, præsertimque Judæis adjuti ita, fortiter pugnarunt, ut cum oppidi præfectus lethali plaga sauciatus fuisset, obsessi castellum dediderint. Sandovalius fol. 132, Chartam in Ecclesiæ cathedrali Burgensi conservatam, et .Era mclxi, currenti nempe Christi anno, datam laudat, in qua legitur, *quando Deus castellum de Burgis regi Hispaniæ dedit*. His ad *Alfonsum* Aragoniæ regem perlatis, is copias in Nariaræ urbem immisit, alia quæ tam in regno Castellæ, quam Legionis tenebat oppida, munitionibus instruxit, et postea cum exercitu in Castellanos ditiones irrupit; sed *Alfonsus* rex Castellæ socio occurrit, ambo exercitus ad Tamaram in conspectum venire, seseque ad duorum principum querelam prelio dirimendam compararunt; utriusque tamen partis episcopi intercessionem interposuere, eaque conditione pacem faciendam proposuere, ut Aragonensium rex intra quadraginta dies genero redderet oppida ad ipsum pertinentia. Verum tractatio ista effectum sortita non est, rursumque ad arma ventum, ut anno sequenti, quo pax tandem ad exitum perducta, narrabimus. Chronographus Mallacensis hujus belli ad hunc annum meminit.

12. *B. Oldegarnus totus est in restauranda*

Tarracona. — *B. Odegaris*, de quo mox locuti sumus, totus in restauranda civitate Tarraconensi, cujus archiepiscopus erat, pellendisque Saracenis a finibus ejus incumbebat. Ille Ordericus hujus temporis scriptor, lib. 13, pag. 891 et seq. de illo habet : « Tarracona (legendum *Terracona*) metropolitana sedes erat, et Odelricus (legendum *Oldegarius*) eruditissimus senex archiepiscopus florebat, et in vicis burgisque diocesis suae officium sibi injunctum exercebat. In episcopali quippe Basilica quercus et fagi, aliæque proceres arbores jam creverant, spatiumque interioris intra muros urbis a priscis temporibus occupaverant, habitatoribus per immanitatem Saracenorum peremptis seu fugatis, qui eandem dudum incolerant. Denique Robertus instinctu præsulis Honorium papam (qui anno sequenti sedere cepit) adiit, velle suum ei denudavit, Tarraconensem comitatum ab omni exactione seculari liberum dono papæ recepit; et reversus, validis sodalibus quaesitis, sibi que adjunctis, usque hodie custodit, Ethnicisque resistit ». Jam dixerat Ordericus, Robertum de Culeio equitem Normannum post prælium ad Cutandam anno MCCI datum, cui ipse interfuit, sedem Tarracone fixisse. Hunc scriptores Hispani vocant *Robertum Aquilonium*, quem ortum esse ex nobilissima gente de *Tria* in Normannia, ostendit Baluzius in Supplem. ad Marcam Hispanicam lib. 4, pag. 489. Porro loco *Odelrici*, legendum esse *Odegaris*, certo deducitur ex Diago, lib. 2 Hist. comit. Barcinonensium cap. 100, ubi ait *Oldegarium* in archiepiscopatum Tarraconensem successisse *Berengario* demortuo, qui Ausonensis episcopus, et Tarraconensis episcopus titularis fuerat. Locus ille Orderici decepti Mabillonium in brevi Nota ad Epist. cxxvi. sancti Bernardi, ubi dicit *Oldegarium* juxta Ordericum *Odelrico* successisse. Præterea corrigendus hic error Orderici, qui ibidem scribit de Roberto : « Tarraconensem comitatum ab omni exactione seculari liberum dono papæ (scilicet Honorii II) recepit ». Diago enim lib. 2 Hist. comitum Barcinon. cap. 111, tradit constare ex Instrumentis in archivis urbis Barcinonensis a se visis, Tarraconam *Roberto de Aquilone* die xiv Martii anni Incarnat. MXXVIII, ab Oldegario archiep. Tarraconensi in feudum datam fuisse. Ditionem autem illam a comite Barcinonensi archiepiscopos Tarraconenses dno obtinuisse, Acta publica docent.

13. *Tarracona a femina defenditur.* — De Roberti, qui et cognominabatur *de Bordet*, uxore, hæc subdit Ordericus : « Interim dum pergeret (nempe Robertus) Romam, itemque pro colligendis sodalibus rediisset in Normanniam, Sibylla uxor ejus, filia Guillelmi Capræ, servavit Tarraconam. Ille non minus probitate quam pulchritudine vivebat. Nam absente marito pervigil excubabat, singulis noctibus loriceam ut miles inducat, virgam manu gestans murum ascendebat, urbem circumibat, vigiles excitabat, cunctos ut hostium insidias caute præcaverent, prudenter admonebat.

Laudabilis est juvenis hera, quæ marito sic famulabatur fide, et directione sedula, populumque Dei pie regabat pervigili solertia ».

14. *Pax Venetorum cum imp. Orientis, et victoria de Saracenis.* — Ad num. 5. *Alexio imperatore* Orientis demortuo, *Joannes* filius ac successor cernens Venetos ex Privilegiis paternis opibus abundare, eorum maritimam potentiam suspectam habuit, et Privilegia confirmare renuit. Inde, inquit Joannes Lucius in Hist. de regno Dalmatiæ lib. 3, cap. 10, simultatibus primis Venetos inter et Græcos orlis, illi tertiam expeditionem in Terram-Sanctam facientes, Græcorum loca infestant; sed duos Venetiarum vigetricem classem reducents, et Græcorum loca in Ægeæ vastavit, et Dalmatiam recuperavit, et imperator Privilegia paternis confirmare persuasus fuit; a quo tempore *Veneti* navigationes quietas prosecuti sunt. Quid vero hoc anno adversus Christiani nominis hostes in Syria Veneti egerint, narrat Baronius ex Tyrio lib. 12, eaque de re legendis etiam Fulcherius Carnotensis, qui tunc Hierosolymis erat, lib. 3, qui ait classem eorum fuisse navium cxx, « exceptis carinis vel carabis, quarum aliæ quidem rostrate, aliæ onerate, aliæ vero trirèmes fuerunt ». Cum Saraceni naves octodecim de classe Venetica perspicerent, et se appropriare, pugnam audacter adversus eos suscipiunt, sed Veneti in eos irruunt, omnesque detrahunt : « Fide caret », inquit Fulcherius, « quod ultra humanum auditum navibus vases occidentium sanguine fluido fingerentur. Itaque naves multis onustæ opibus capiuntur. Corporibus quidem extra naves tunc jactatis, usque ad quatuor millia passuum salum rubescere circumquaque videretis ».

15. *Baldvinus rex capitur et infideles victi.* — Refert ibidem Tyrius cap. 21, Christianos manu valida Ægyptios repulisse, eodemque prælio septem millia ex eis occidisse. Qua de re Anselmus Gemblacensis in Chron. hoc anno scribit : « Baldvinus Hierosolymorum rex a Saracenis capitur. Qua de re mente excedentes undiqueversum evocati, ad sexaginta millia conglomérantur, ut Christianos a finibus suis exterminarent, etc. Dies pugnae indicitur. Procedunt Christiani cum militibus et peditibus vix ad tria millia æstimati, etc. Abbas olim Cluniacensis Pontius profert lanceam transfixam in latere Christi ». Perire septem millia infidelium, omnes vero Christiani incolumes reversi sunt. Baldvinus anno sequenti in libertatem assertus, ut ibidem dicitur.

16. *Victoria Joannis imp. de Hungaris.* — Ad num. 6 et seq. Nicetas Chroniata loquens de gestis a Joanne Commeno quinto imperii ejus anno, ait cum educto Beræ, ubi castra habebat, exercitum, Scythas aggressum esse, et illustrem de illis victoriam reportasse : « Ille de Scythiis parta victoria », subdit Nicetas », et illustri edito facinore, Joannes vota Deo persolvit, quod festum Pazinacorum nostro tempore dicitur, in rei gesta monumentum,

et grati animi testimonium ». Quibus ex verbis intelligimus, Seythas illos alios non fuisse quam *Hungaros*, Pazynacas seu Patzinates a scriptoribus Græcis vocatos, ut alibi observabimus. Hæc præsentis anno, qui imperii Joannis quintus est, gesta.

17. *Genus triumphi in imperio Orientali usitatum.* — Sed triumphus beatissimæ Virginis Mariæ, quem Baronius num. 7, ex eodem Niceta recitat, aliquot post hunc annis Constantinopoli exhibitus. Scribit enim Nicetas, *non multo post Joannem imp. contra Triballos seu Servios expeditionem suscepisse, eosque acie victos ad pacem coegisse.* Narrato deinde bello Hunnicco subdit, *succedenti tempore*, copias coegisse, et naves expeditas comparasse, iisque per Pontum in Istrum trajectis, hostes terra et aqua adortum esse, et post varias dimicationes pace cum Hunnis cæterisque Barbaris facta, de hostibus remotioribus subigendis cogitasse, et *Italiam maritimam* sibi conciliasse. Tum traducto in Orientem exercitu, *Persarmenios* aggressum eos superasse, et Byzantium reversum triumphum indixisse. Describit triumphum illum, atque quadrigas a quatuor equis tractas fuisse, et currum argento inter punctum non imperatorem conscendisse, sed Dei genitricis imaginem in eo collocasse, « cui victorias, ut college imperii invictæ, acceptas ferebat ». Cinnamus lib. 1, pag. 7, postquam eundem triumphum retulit, ait : « Res miraculi instar a Byzantinis visa, quod a nemine, ut opinor, facilitatum noverant, ex quo Heraclii et Justiniani imperium obtinere ». Verum, ut observat Ducangius in Notis ad Cinnamum, facile refellitur historicus iste ex Curopalata et Zonara, tradentibus Joannem Zimisce, devictis Bulgaris, ita triumphum duxisse, ut totam rerum bene gestarum gloriam Deiparæ adscripserit, cujus imaginem in curru collocatam ipse subsecutus est. Vide quæ de hoc triumpho ex Leone Diacono hactenus inedito de Zimisce loquentes diximus. Idipsum postea imitatum *Manuelem*, Joannis in imperium successorem, debellatis Pannonibus, tradit Nicetas lib. 5, num. 3.

18. *Archiep. Cantuariensis e monasteriis de more assumpti.* — Ordericus lib. 12, pag. 873, narrata Radulphi archiepiscopi Cantuariensis morte, quæ anno superiori, ut ibidem diximus, non vero currenti, ut ipse per hæc tempora in Chronologia parum certus affirmat, contigit, de ejus successore hæc scribit : « Cui Willelmus Curbuliensis canonicus regularis post aliquot annos successit. Ecce antiquus mos pro invidia, qua clerici contra monachos urebantur, depravatus fuit. Augustinus enim monachus, qui primus in Anglia Christum prædicavit, ac Edelbertum regem, et Sabertum nepotem ejus cum populis Cantuæ et Lundoniæ ad fidem Christi convertit, jussu Gregorii pape primas metropolitanas totius Britannia floruit. Omnes exinde usque ad Radulphum Doroberniæ archiepiscopum præter Frigardum, et Odam atque

Stigaudum, fuerunt monachi. Frigeardus quippe capellanus Lotheri regis ad præsulatum fuit electus, et Romam ut ab Agathone papa consecraretur destinatus, deinde datis a papa induciis decem dierum, expectans benedictionem, interea decidit in lectum, et sine præsulatus unctione exhalavit spiritum.

19. *Nonnisi ter e clero.* — « Oda vero pro nobilitate et morum benignitate, de clero assumptus et archipræsul est consecratus. Qui postquam omnes antecessores suos monachos fuisse comperit, libenter ac devote habitum mutavit, et religiosus monachus ac archipræsul usque ad mortem Deo militavit ». (Eadmerus, qui idem ac Ordericus narrat, ut anno mxciv, num. 5 vidimus, neque Frigeardum, neque Odam inter archiepiscopos ex clero assumptos numerat, quia primus ante suam ordinationem mortuus, alterque monachum postea induit). « Stigaudus autem Emmæ, reginæ capellanus, admodum secularis et ambitiosus extitit, qui primum Lundoniæ, postmodum Cantuariæ cathedram invasit. Verum a Romano papa nunquam pallium habuit, imo ab Alexandro papa interdictus Haraldum profanavit, dum in regem benedicere debuit. Quapropter idem, sicut a se exaltatus intumuit, sic a Deo humiliatus et confusus ingenuit. Nam Guillelmo Primo in regno confirmato, clarescentibus culpis, judicio Synodi depositus est : unde nec in Catalogo pontificum computandus est. Angli monachos, quia per eos ad Deum conversi sunt, indesinenter diligentes honoraverunt : ipsique clerici reverenter et benigne sibi monachos præferri gavisi sunt. Nunc autem mores et leges mutatas sunt, et clerici ut monachos confutent et conculcent, clericos extollunt ». Ita Ordericus Uicensis in Neustria monachus.

20. *Obitus Marbodi Redonensis episcopi.* — Hoc anno *Marbodus* episcopus Rhedonensis vitam eum meliorem commutavit, ut testatur chronographus Andegavensis lom. i Bldlioth. Labbeanæ, qui ingressurus viam universæ carnis, pontificali onere deposito, sancti Benedicti habitum suscepit, et B. Albino se tradidit, pauperem Christum pauper et ipse secutus, ut legitur in Chartulario Sancti-Albini. Varia scripsit opera, ex quibus plura perire ; sed tum deperdita, quam impressa et Mss. enumerat Oudin in Supplement. de Script. Eccles. Circumfertur sub ejus nomine Epistola *ad Robertum de Arbrissello* qua eum portentosis criminibus accusat, sed quodnam de ea judicium ferendum sit, jam anno mxcvii diximus. Ejus Elogium ex veteri Chartulario mox citato Sancti-Albini Andegavensis referunt San-Marthani, ex quo liquet, eum die xii Septemb. animam Deo reddidisse, extatque tom. xiii Spicilegii Marbodi Epistola ad *Hilbertum Cenomannensem episc.* qui illum consuluerat de viro a quo uxor debitum tori postulabat, licet ipse votum monasticæ vite consensu ejus emisisset.

21. *Concil. Bituric.* — Simeon Dunelmensis in Hist. de Gest. reg. Angl. Concilii Bituricensis

his verbis meminit : « Habitu est Concilium apud Bituricas V idus Decemb. », sed nihil ejus superest. In eum diem hoc anno Dominica cadebat. Quare Concilia particularia, sicuti mox vidi-

mus de generalibus, a feria secunda saepe exor-
diebantur, post rem divinam die Dominico rite
procuratam.

CALLISTI II ANNUS 6. — CHRISTI 1124.

1. *S. Otto episcopus Bambergensis Apostola-
tum ad Pomeranos suscipit, eosque optime instituit.*

— Sequenti anno, qui est Redemptoris millesimus centesimus vicesimus quartus, Indictione secunda, Otto episcopus Bambergensis, de quo saepe superius dictum, a Callisto papa accepit Apostolatam ad Pomeranos. Quae hujus subditus abbas Urspergensis, qui ista tunc scribebat, fuisse prosequitur. Convertit enim populos illos, meruitque dici Apostolus Pomeranorum. Antequam autem ad eos proficisceretur, amplas donationes suae Ecclesiae contulit, quindecim monasteria, quae crevit non sine aulicorum invidia, qui ad imperatoris subsidium potiusquam in monachorum alendorum super vacaneam impensam, divitiis erogandas esse jactarent. Quae omnia Callisti papae Privilegiis mun-
dienda curavit, atque primum pro eorum immunitate ab eodem Pontifice hoc accepit Privilegium :

« Callistus episcopus, servus servorum Dei, venerabili fratri Ottoni Babergensi episcopo, salutem et Apostolicam benedictionem.

« Bonis fratrum nostrorum studiis non solum favere, sed ad ea ipsorum etiam debemus animos incitare. Tuis ergo, clarissime et venerabilis frater Otto, Babergensi episcope, supplicationibus inclinati, monasteria quae ipse propriis sumptibus extruxisti, et Babergensi Ecclesiae conferens, Apostolicae Sedis roborari munimine quasivisti, in B. Petri ejusque Romanae Ecclesiae protectione suscipimus contra pravorum hominum nequitiam defensanda. Statuimus ergo, ut possessiones, praedia, et bona omnia, quae et fraternitas tua ejusdem monasteriis divini amoris intuitu contulit, quaeque aliorum fidelium iusta oblatione concessa sunt, aut in futurum iuste legaliterve acquiri vel offerri contigerit, firma eis et illibata Domino auctore permanent. Ordinationes sane abbatum vel monachorum suorum a Catholicis episcopis diocae-

sanis accipiant. Rerum vero ipsorum monasteriorum curam et administrationem in tuo tuorumque successorum arbitrio et potestate remanere censuimus. Nulli itaque hominum facultas sit eadem monasteria perturbare, aut eorum possessiones auferre, vel ablatas retinere, minuere, vel temerariis fatigationibus vexare; sed omnia integra conserventur eorum, per quorum sustentationem et gubernationem concessa sunt usibus commodis profutura. Si qua igitur Ecclesiastica, saecularisve persona, hanc nostrae constitutionis paginam sciens, contra eam temere venire tentaverit, secundo tertiove commonita, si non satisfactione congrua emendaverit, potestatis honorisque sui dignitate careat, reamque se divino iudicio existere de perpetrata iniquitate cognoscat, et a sacratissimo corpore et sanguine Dei et Domini Redemptoris Iesu Christi aliena fiat, atque in extremo examine districtae ultioni subjaceat. Cunctis autem eisdem monasteriis iusta servantibus, sit pax Domini nostri Iesu Christi, quatenus et hic frenetum bonae actionis percipiant, et apud districtum Iudicem praemia aeternae pacis inveniant. Scripta per manum Gervasii scribarum regionarii et notarii sacri palatii». Desiderantur annus et dies; sed sequenti pro rebus donatis Ecclesiae Babenbergensi annus utique praesens apponitur, quod sic se habet :

2. « Callistus episcopus, servus servorum Dei, venerabili fratri Ottoni Babergensi episcopo, salutem et Apostolicam benedictionem

« Sanctorum Patrum praeceptis et canonicis sanctionibus demonstratur, quod praedia et possessiones Ecclesiarum, quae vota fidelium, pretia peccatorum, et pauperum patrimonialia nuncupantur, vendi vel alienari non debeant. Quae enim divinae majestatis obsequio, et coelestium secretorum usui sunt dicata, non decet in alienum jus redigi, vel in alterius servitii formam transmutari. Nempe (ut B. Symmachi papae verbis loquamur)

possessiones quas unusquisque Ecclesiae propriae dedit aut reliquit arbitrio, alienari quibuscumque titulis aut distractionibus vel sub quocumque argumento non patimur. Eapropter nos tuis iustis postulationibus annuentes, mansos, qui episcopalis mensae tuae servitio dediti sunt, in eodem statu, in quo bene a te dispositi cognoscuntur, futuris temporibus permanere, praesentis scripti nostri confirmatione sancimus: statuentes, ut nulli successorum tuorum, vel alieni hominum liceat eos vendere, sive in laicorum beneficium tradere, vel in usus alios commutare. Sed sicut a te dispositum est, de unoquoque praedictorum mansorum denarius unus annis singulis Babergensi Ecclesiae pro anima imperatoris Henrici fundatoris ejus, ad concinnanda luminaria conferatur. Abbas vero, et regulares canonicas per industriam tuam in religionis ordine stabilitas, et alia a te recte constituta, nulli hominum facultas sit in posterum immutare. Si quis autem contra hanc confirmationem venire temerario ausu praesumpserit, excommunicationis vinculo subjacebit. Data Laterani, idibus Aprilis, Indictione secunda ».

3. His ita dispositis et stabilitis, ad Apostolatus suscepit munus divini Spiritus roboratus gratia se accinxit, cum jam ante a Polonorum duce Bolizlao his litteris fuisset invitatus :

« Domino suo et patri amantissimo Ottoni venerabili episcopo, Polizlaus dux Polonorum, filialis obsequii humilem devotionem.

« Quia in diebus juventutis tuae apud patrem meum decentissima le honestate conversatum meminimus, et nunc quoque hominibus tecum est, firmans te, et benedicens tibi in omnibus viis tuis : si tuae non displicet dignitas, veteres tecum renovare amicitias, tuoque consilio simul et auxilio uti, ad Dei gloriam promerendam ipsius gratia coadiuvante cupimus. Nos enim, ut arbitror, quomodo Pomeranorum cruda barbarie, non mea quidem, sed Dei virtute humiliata, societati Ecclesiae, per baptismi lavacrum se admitti petunt. Sed ecce per triennium laboro, quod nullum episcoporum, vel sacerdotum idoneorum mihi affinium ad hoc opus inducere queo. Unde quia tua sanctitas ad omne opus bonum prompta et indefessa praedicatur, rogamus, pater amantissime, non te pigeat, nostro comitante servitio, pro Dei gloria tuaque beatitudinis incremento id laboris assumere. Sed et ego tuae paternitatis devotus famulus impensas omnes, et socios itinerum, et linguae interpretes, et coadjutores presbyteros, et quaecumque necessaria fuerint, prebebo. Tu tantum, sanctissime Pater, venire dignare ». Hactenus ducis ad Ottonem Epistolae de Apostolatu ad Pomeranos suscipiendo. Sunt Pomerani populi Slavici, ita dicti, quod juxta mare sint positi.

4. Quod autem idem vir Apostolicus Otto probe sciret, non esse alterius ejusmodi, aut ab animi alienius arbitrio pendere sibi sumere ad gentes Apostolatum, quamvis invitatus sit a secularibus

dominis, sed esse primariae Sedis Apostolicae auctoritatis, Petri successoris, et Christi vicarii duntaxat; ne in vacuum curreret, sciens quod quae a Deo sunt, ordinata sunt, primum omnium a Romano Pontifice facultatem hujusmodi impartiri sibi per litteras procuravit, quam hoc ipso anno a Callisto papa impetrasse, Urspergensis abbas rem ipsam oculis intuens, ita testatur :

« Anno Dominicæ Incarnationis millesimo centesimo vigesimo quarto, Indictione secunda, Callisto papa Secundo Romanæ Sedi presidente, Otto Dei gratia Babenbergensis Ecclesiae episcopus, divino admonitus instinctu, praedicti Apostolici auctoritate et assensu roboratus, partes Pomeranorum paganorum cum quibusdam civitatibus terre Lutitiae aggressus est, ut eos ab errore suo revocaret, et ad viam veritatis, et ad agnitionem Filii Dei perduceret, etc. » Quomodo autem feliciter actum ut praedicans verbum Dei Domino cooperante, et sermonem confirmante sequentibus signis (ne quid minus habere videretur ab antiquis Apostolis) gentem illam ad Christianam fidem suscipiendam praedicatione Evangelica sit hortatus, factusque voti compos, eos omnes reddiderit Christianos, qui res ab eo gestas ejus temporis scriplor tribus libris exacte conscripsit pluribus narrat; quem nuper editum auctorem a Canisio secundo tomo Antiquae lectionis quivis pro arbitrio consulat. Quod vero (ut dictum est) Urspergensis hoc anno sub Callisto papa, et auctoritate ejusdem id factum affirmet, auctor vero Vitæ Ottonis totum id tribuat Callisti successoris Honorio papæ; haud puto adeo inter se diversa sensisse, ut invicem conciliari non possint. Cum facile potuerit evenisse, ut quod a Callisto papa concessum idem Otto de quo agimus accepisset, idipsum per ejus successorem voluerit confirmari.

5. At vero, praeter Catholicam fidem, quam eos inviolatam servare docuit, quibus sacris ritibus eosdem Pomeranos imbuerit, idem Urspergensis recensere sigillatim minime pretermisit, Deo id volente ad novatorum perfidorum sugillationem; ait enim : « Quibus baptizatis et conversis, Ecclesias construxit et consecravit, et haec secundum sanctorum Patrum instituta eos servare docuit, scilicet ut sexta feria abstineant a carne et lacte, more ceterorum Christianorum. Dominica die vacent ab omni opere malo et ad Ecclesiarum divinum Officium audituri veniant, ibique orationibus studiose insistant. Solemnitates sanctorum cum vigiliis, vel secundum quod eis indicatum fuerit, cum omni diligentia observent. Sacrosanciam Quadragesimam jejunis, vigiliis, eleemosynis, et orationibus diligentissime observare student. Infantes suos in sabbato sancto Paschæ et Pentecostes cum candelis et cappa, quæ dicitur vestis candida, et patris comitantibus, ad baptismum deferant, cosque veste innocentiae indutos per singulos dies usque in octavum diem ejusdem sabbati ad Ecclesiam deferant, et celebrationi divini officii interesse satagant. Hoc etiam injunxit, ne filios suos necarent, quod nefas

maxime inter eos vigeat. Ne etiam filios suos et filias ad baptismum teneant, sed sibi paternos querant: patris etiam fidem et amicitiam, ut carnalibus parentibus servant. Indixit etiam ne quis commatrem suam ducat in uxorem, neque propriam cognatam suam usque in sextam et septimam generationem et unusquisque contentus sit una uxore. Ne sepeliant mortuos Christianos inter paganos in silvis, aut in campis, sed in cœmeteriis, sicut mos est omnium Christianorum. Ne fustes ad sepulchra eorum ponant, omnem ritum et pravitatem paganam abiciant, domos idolorum non construant, pythionissas non adent, sortilegi non sint, ne quid immundum comedant, non morticinum, non suffocatum, neque idolothytum, neque sanguinem animalium: ne communicent pagani». Sed hæc ex ritu Græcorum potius quam Latinorum. Pergit: «Ne cibum aut potum cum eis, aut in vasculis eorum sumant, ne in his omnibus consuetudinem paganam repetant. Injunctum etiam eis, ut dum sani sunt, veniant ad sacerdotes Ecclesiæ, ut confiteantur peccata sua: in infirmitate autem sua vocent presbyteros ad se ut confiteantur peccata sua: et corpus Domini accipiant. Injunctum etiam, ut de perjuriis, de adulteriis, de homicidiis, et de cæteris criminalibus secundum canonum instituta poenitentiam agant, et in omni Christiana religione et observatione obediens sint. Mulieres post partum ad Ecclesiam veniant, et benedictionem a sacerdote (sicut mos est) accipiant». Hucusque Urspergensis. At in Vita ipsius ista pluribus¹, præsertim de catechesi circa septem Ecclesiæ sacramenta, quam discessurus illis pro concione tradidit. Quæ cuncta non ut ab homine, sed a Deo ipso accepta fidelissime custodierunt, utpote ea cuncta Domino confirmante (ut dictum est) sequentibus signis.

6. *Obitus Callisti papæ, et ejus munificentia erga Urbis Ecclesias.* — «Ad finem autem vergente anno, febre correptus Callistus papa, (ut Pandulphus habet), moritur, sepeliturque in Basilica Lateranensi juxta Paschalem papam, in festivitate sanctæ Lucæ virginis». Alibi vero hæc ita: «Moritur decimo quarto kalendas Januarii, cum sedisset annos quinque, menses decem, et dies.... sepeliturque in Basilica Lateranensi». Et in alio Codice Vaticano ista: «Illic fecit ordinationem per mensem Decembrem, diaconos, presbyteros, et episcopos plurimos creavit, quos per diversa loca distribuit». Pandulphus autem Pisanus nominat aliquot ab ipso ordinaros, atque: «Primum dominum Petrum Leonis cardinale presbyterum ordinavit Sanctæ-Mariæ trans Tiberim, ubi oleum fluxit: dominum Crescentium presbyterum card. SS. Petri et Marcellini: Robertum presbyterum cardinalem Sancti-Clementis, cum aliis presbyteris cardinalibus: sed et creavit diaconos cardinales, Jonatham Sanctorum-Cosmæ et Damiani, Mattheum Sancti-Hadriani, Americum Sanctæ-Mariæ-

Novæ, Angelum Sanctæ-Mariæ in Dominica, sive Domnica, Gregorium, qui et Tarquinius dicitur, S. Sergii, Joannem Daufferii virum nobilem de Salerno, S. Nicolai in carcere Tulliano. Subdiaconos aliquot, meque Pandulphum usque ad subdiaconatum promovit, et innumeros fere minoris officii clericos ordinavit». Hæc de ordinationibus; pergit autem: «Nemo hunc vidit beati Petri Basilicam absque donis intrare, nec missam ibi, nisi assignato dono, cantare». Et paulo post: «Ad honorem sancti Petri adjunxit cortinas multas, et pallia, et candelabra de argento, campanas et pavimenta, fundos et casalia beato Petro donavit, et multa per Ecclesias alias beneficia contulit. Aquam ad Urbem reduxit, molendina cum vineis juxta lacum aptavit, Ecclesiam Sancti-Nicolai in palatio fecit, cameram ampliavit, et pingi fecit, sicut apparet hodie miro modo». In alio vero Codice sæpe citato hæc ita dilucidius: «Hic a fundamento construxit in palatio Lateranensi capellam S. Nicolai ad assiduam Romani Pontificis usum, juxta quam ædificavit duas cameras contiguas Tito Vespasiano, quarum una cubicularis, altera pro secretis Concilii. Illic etiam derivavit aquam de antiquis Formis, et ad portam Lateranensem conduxit, ibique lacum pro adaquandis equis fecit, plurimamque molendina per eandem aquam construxit, et multas vineas cum fructiferis arboribus secus ipsum lacum plantari studiosissime fecit». Hæc ibi. Et apud Vegium in antiquis monumentis Basilicæ Sancti-Petri de eodem Callisto ista leguntur: «Beatæ recordationis Callistus papa Secundus, quoniam decorem domus Domini sicut propheta plurimum dilexit, altare B. Petri, quod nimia vetustate et lapidum percussionebus quodammodo violatum videbatur, optimis marmoribus vestivit et decoravit. Et in festo Annuntiationis beatæ Mariæ cum toto Concilio lapidem altaris satis honorifice et devote consecravit. In qua videlicet consecratione (ut invenimus in libris nostris scriptum) fecit remissionem trium annorum, annualiter ad eam devote venientibus». Hæc ipse. Sicque ut posuit Callistus, permansit sancti Petri altare usque ad Clementem Octavum, a quo absque Callisti altaris demolitione, id exigente nova templi structura, aliud magnificentius superpositum est, nobisque videtibus, sacris ritibus ab eodem Pontifice consecratum est. At beati Callisti papæ memoria summa cum benedictione in Ecclesia Catholica perseverat, utpote sanctissimi Pontificis, cui Deus dederit, brevis licet temporis Pontificatu, adeo gloriosam peragere, et prædecessoribus inconcessa perficere, Ecclesiamque imperatorum tyrannide servitutis jugo depressam vindicare in perpetuum libertatem.

7. *Electio Honorii II per dolum peracta deinde validatur.* — Ubi autem sepultus est Callistus papa, de electione successoris agi ceptum, sed non sine formidine, cum cardinales memores essent tyrannidis Fraugipani, quam adversus

¹ V. Otto. l. I, c. 8.

Gelasium ante septennium tanto Apostolicæ Sedis opprobrio exercuissent, quorum adhuc vigere vires, animositatemque magis magisque incaluisse cognoscerent. Sed etsi perditissimus ille malorum auctor animum non mutavit, vim tamen aliam aggressus est, nimirum ut non violentia, sed dolo atque fallaciis ageret; paratus etiam, si opus esset, agere violentia, si suo ipsius conatu qui resisterent, invenisset. At rem gestam a Pandulpho subdiacono qui interfuit audiamus, et si quæ ab eo sunt prætermissa, ex aliis ejusdem temporis scriptoribus suppleamus. Ait ipse: « Lambertus Ostiensis episcopus, de mediocri plebe comitatus Bononiensis genitus, bene tamen litteratus, a domino papa Paschali receptus est, et in episcopum Veltrensem promotus. Religiosæ autem memoriæ Callisto papa defuncto, omnes patres de curia cardinales, et alii, præsertim vero Petrus Leonis et Leo Frangipanis, pariter condixerunt, ut usque ad diem tertium una simul juxta scita sacrorum canonum pertractarent, interim de electione nulla mentio haberetur. Hoc idcirco potissimum Leo Frangipanis condixerat, ut infra datum spatium, quod de Lamberto diutius cogitaverat, aliquando quiete perliceret: nam totus populus Saxone (Saxum) Anagninum Sancti-Stephani in monte Cælio cardinalem papam fieri petebat: quos ut deciperet idem Leo Frangipanis, itidem velle simulabat. In sero autem præsentem idem Leo per nuntios unumquemque seorsum de capellanis cardinalium præmonet, ut mane summo diluculo cum pluviali rubro sub cappa nigra venirent, et ita non ignorante domino, eundem suum dominum introducerent. Istud vero propter hoc ingenium adinvenit, quatenus singulos pro accipiendo de manibus ejus papatu attentione redderet, et sic saltem absque timore venirent. Etenim quod est factum Gelasio recordantes, convenire timebant. Tandem in crastinum ita illecti papam facturi conveniunt ad beati Joannis Basilicam et in Ecclesiæ oratorium, quod Sancti-Pancratii dicitur, intrarunt. Ubi post aliquot verba, Jonathas Sanctorum-Cosmæ et Damiani diaconus cardinalis, collaudantibus omnibus, ipso etiam domino Lamberto episcopo, Theobaldum cardinalem presbyterum Sancte-Anastasiæ cappa rubea indnit, et Cælestinum appellat, ut cælitus missum: non patitur Cælestinus (ego nescio cur aliquandiu noluerit (inceptum est *Te Deum laudamus* cani gaudentes, Lamberto episcopo Ostiense pariter nobiscum canente. Non tamen dimidiato adhuc, Robertus impius Frangipanis verti fecit in luctum citharam. Etenim ipse cum quibusdam consentaneis suis, et aliquibus de curia Lambertum Ostiensem episcopum papam acclamaverunt. Deinde in sinu, quæ ante oratorium beati Silvestri site sunt, sine mora eum composuerunt. Unde licet maxima discordia et tumultus emergeret, tamen postea, pacificatis omnibus et ad concordiam reductis, Lambertus cardinalis Ostiensis in Honorium papam sublimatur ». Iluc-

usque Pandulphus. Ita plane sicut summa laude dignus est habitus Theobaldus, qui electus noluit consentire; ita suæ existimationi turpissimam notam inussit episcopus Ostiensis, quod post ejus electionem se eligi et Pontificalibus indui passus sit.

8. Verum quomodo ista purgari, atque remittendo abluere, ex sæpe citato Codice Vaticano sic accipe. Hæc enim ibi in Honorio totidem verbis leguntur: « Sed quia electio Honorii minus canonicè præcesserat: post septem dies, nempe vice-sima octava Decembris, in conspectu fratrum sponte mitram et mantum refutavit atque deposuit. Fratres tam episcopi quam presbyteri, et diaconi cardinales videntes ipsius humilitatem, et prospicientes in posterum, ne in Romanam Ecclesiam aliquam inducerent novitatem, quod perperam factum fuerat, in melius reformarunt, et eundem denuo advocantes, ad ejus vestigia procederunt, et tanquam pastori suo, et universali papæ, consuetam obedientiam exhibuerunt ». Hæc ibi, at plane magna cum laude, cum, sententia sanctorum, extrema quæque pati quisque inducere debet in animum magis quam Catholica scindatur Ecclesia; narrat eadem totidem pæne verbis Willelmus Tyrus¹.

9. *Ingens et insperata victoria divinitus ob-tenta in Sarracenos.* — Quo anno Sarraceni ob captum Baldwinum redditu audaciores (inquit ista scribens Robertus de Monte in Appendice ad Sigebertum) « mente excedentes, undiqueversum evocati ad quadraginta millia conglomerantur, ut Christianos a finibus suis exterminerent, et apud Ascalon impedimentum sua commendarent. Christiani vero in arcto positi, nihil spei nisi in Deo habentes, exemplo Ninivitarum utrique sexui jejunium indicunt, pueris etiam, lactantibus infantibus, universo quoque pecori pabula negantur. Dies pugnae indicitur, procedunt Christiani cum militibus et peditibus vix ad tria millia aestimati. Principes gradiuntur in fronte, scilicet patriarcha vexillo effereus Crucem Christi, abbas Cluniacensis Pontius præferens lanceam transfixam in latere Christi, episcopus Bethleemites ferens in pyxide Iac S. Mariæ Virginis. Sarraceni vero quaquaversum effusi ex omni latere in orbem circumcingunt Christianos, ne quis posset evadere. Dum ita in procinctu hærent Christiani, vident, Deo sibi auspice, splendorem scisso aere super paganos subito cecidisse, sed non prosperum, verum satis nocivum, quamvis hunc ipsi Sarraceni non viderint. Illico enim omni virium robore encrati, passim fugientes cedunt, non solum a viris, sed etiam a pueris et feminis. Perierunt in bello septem millia, submersi sunt in aquis quinque millia, omnes vero Christiani incolumes reversi, summum et dulce epinicium reboant Deo in excelsis ». Iluc-sque Robertus. Quo anno captam a Christianis Venetis civitatem Tyri asserit Willelmus Tyrus.

¹ Will. Tyr. l. XII c. 15, in fin.

10. *Ecclesia Hibernensis languescens per S. Malachiam restituta; et Belgica per S. Norbertum ab heresi purgata.* — Hoc eodem anno, secundum illud propheticum¹: « Populus qui ambulabat in tenebris, vidit lucem magnam: habitantibus in regione umbræ mortis lux orta est eis ». Etenim florentissima olim Hibernorum Ecclesia, per multa sæcula nulla plane legitima successione episcoporum exulta, omnino inculta evaserat, atque penitus deserta et inculta remanserat. « Quindecim enim (teste sancto Bernardo²), generationum curriculum evolutis, acciderat, ut primæ sedis archiepiscopatum hæreditaria successione una familia tyrannica possessione possideret invasum. Mos enim », inquit sanctus Bernardus, « pessimus inoluerat quorundam diabolica ambitione potentum, sedem sanctam obtentum iri hæreditaria successione; nec enim patiebantur episcopari, nisi qui essent de tribu et familia sua. Nec parum processerat execranda successio, decursis jam in hac malitia quasi generationibus quindecim, et eo usque firmaverat sibi jus pravam, imo omni morte puniendam injuriam generatio mala et adultera, ut etsi interdum defecissent clerici de sanguine illo, sed episcopi nunquam. Denique jam octo existerant ante Celsum viri uxorati et absque ordinibus, litterati tamen. Inde tota illa per universam Hiberniam, de qua multa superius diximus, dissolutio Ecclesiasticæ disciplinæ, censuræ enervatio, religionis evacuatio; inde illa ubique pro mansuetudine Christiana sæva subintroduta barbaries, imo paganismus quidam inductus sub nomine Christiano etc. » Hæc Bernardus.

11. At quomodo in tantis tenebris lux ex insperato refulsit, idem sanctus enarrat, cum videlicet sanctus Malachias præstantissimus monachorum, coactus licet renitensque, eligitur episcopus Conneretensis, agens annum ætatis suæ trigessimum, hoc nempe Redemptoris anno. Etenim qui anno suæ ætatis quinquagesimo quarto obiit, anno Redemptoris millesimo centesimo quadragesimo octavo (ut idem sanctus Bernardus affirmat) natum esse oportuit anno Domini millesimo nonagesimo quarto, a quo tempore ejus ætatis annos enumerando, hunc invenies esse trigessimum, quo est creatus episcopus. Sic igitur super candelabrum exaltata lucerna, sua luce mox deusas illas tenebras illustravit. « Siquidem », inquit Bernardus, « cessit duritia, quievit barbaries, et domus exasperans paulatim leniri cepit, paulatim correctionem admittere, recipere disciplinam. Fiunt de medio barbaricæ leges, Romanæ introducuntur, recipiunt ubique Ecclesiasticæ consuetudines, contrariæ rejiciuntur. Reædificantur basilicæ, ordinatur clerus in illis, sacramentorum rite solemnia celebrantur, confessiones fiunt, ad Ecclesiam conveniunt plebes, concubinatus honestat celebritas nuptiarum. Postremo sic mutata in melius omnia,

ut hodie illi genti conveniat, quod Dominus per Prophetam dixit¹: Qui ante non populus meus, nunc populus meus ». Hæc Bernardus de Hibernorum Ecclesia. Quomodo autem accensa semel lux crevit usque ad perfectum diem, suis locis dicitur inferius pro temporis ratione.

Hoc eodem anno, infausta hæresi Tanchelini Belgicam Ecclesiam labelectante, adversus eam inmissus est a clericis Antuerpiensibus S. Norbertus Præmonstratensium patriarcha, cui Ecclesiam Sancti-Michaelis ad hoc ipsum ejus canonici concesserunt. Est de his vetus monumentum, ab Alberto Miræo canonico Antuerpiensi ad nos missum, quod sic se habet :

« Antuerpiæ illustis abbatia S. Michaelis, ordinis Præmonstratensis, quam Basilicam canonici Antuerpienses anno 1124 cesserunt beato Norberto ejusque sodalibus, in Sacramentaria atque Adanitica Tanchelini hæresi profliganda laborantibus ». Extat ipsum, quod sic se habet, Diploma cessionis :

« In nomine sanctæ et individue Trinitatis. Ego Hildolphi præpositus S. Michaelis in Antuerpia, tam futuris quam presentibus in perpetuum. Qualiter præfata Ecclesia nostra ad usus canonicorum Præmonstratensis ordinis transierit, et qua de causa assensus Capituli nostri eis datus fuerit, præsentis scripti attestatione notificamus : Cum in diebus nostris quidam hæreticus, Tanchelinus nomine, in partibus nostris advenisset, et venenosum sermonem a fide, et a Sacramentis Ecclesiæ plurimos avertisset, hac de causa, ut illa hæresis, quæ provinciam nostram occupaverat, funditus extingueretur, consilio domini Burchardi episcopi et totius populi, et assensu capituli nostri dominum Norbertum, virum nostris temporibus spectabilis religionis, accessiri curavimus, et cum suis fratribus, regulam beati Augustini servantibus, suamque institutionem exsequentibus, supradictam Ecclesiam cum capellis in ejus cæmeterio fundatis, et tribus curtilibus, et jugero terre eidem cæmeterio adjacentibus, cum quatuor præbendis, per manus memorati episcopi tradidimus, circumspectione vigiles, digneque perpendentes, quod eorum saginaremur orationibus et bonis spiritualibus, si eos sustentaremus beneficiis temporalibus. Nos vero prius numero duodecim, numerum nostrum in octo terminavimus præbendis, et cum his et præposituræ nostræ integritatem ad Ecclesiam beate Mariæ in eadem villa transtulimus. Cæteras vero quatuor præbendas, per omnia eis consimiliter participantibus proprio nostro arbitrio dedimus. Excepto quod allodia et mancipia, quæ usque ad hæc tempora Ecclesia illa possederat, in nostros singulariter usus segregavimus. Baptismus vero celeberrimi temporis, videlicet Paschæ et Pentecostes, in Ecclesia illa observabitur; reliquo autem tempore parochianus noster baptizandis pro-

¹ Isai. ix. — ² Bern. in Vita S. Malac. c. 3.

¹ Ose. i. 4. 2. Pet. ii.

videbit. Infirmos autem visitare et communicare oleoque inungere, confessiones audire, mortuos sepelire, omnibus hæc ab eis quærentibus libere concedimus. Ut autem tam præclaræ beneficentiæ fœdus inviolatum et inter nos et ipsos semper permaneat, hoc definitum est, ut quodcumque munus infirmus et moriens parochianus, sive in terra, sive in alia substantia cujusvis Ecclesiæ aliquid obtulerit, aut pro se offerri instituerit, per medium dividatur. Quod vero alienus sanus, vel infirmus, aut parochianus incolumis dederit, Ecclesia, cui hoc datum fuerit, absque partitione possideat. Ipsæ vero Ecclesiæ sedulas in invicem iuges sibi debebunt fraternæ charitatis orationes, in omnibus necessitatibus sese supportantes. Pro commemoratione vero suæ libertatis utraque Ecclesia persolvat Cameracensi præsuli aureum nummum Antuerpiensis monetæ et ponderis, singulis annis in festo S. Lucæ. Ut autem hæc rala et inconvulsa permaneant, sigilli nostri impres-

sione et testium subscriptione, qui interfuerint et hoc donum dederint, annotari curavimus. Ego Hildolphus, præpositus Sanctæ-Mariæ, Anselmus canonicus, Bernardus canonicus, Giselbertus Boreus, Raduandus canonicus, Oyo canonicus, Raduandus scriptor, Rogerus canonicus, Hildevuinus parochianus. Actum autem est hoc anno Verbi incarnati 1124, Indictione secunda, epacta tertia ».

12. *Constitutio Joannis imperatoris Orientis.* — Hoc eodem anno (ut res Orientalis imperii attingamus) Indictione secunda, Joannes imperator Constantinopoli Constitutionem edidit saluberrimam adversus provinciarum præsides, vel alios, qui defunctorum episcoporum bona relicta invaderent; quod ne amplius fieret omnino, pœnis cohibuit. Extat in Codice juris Græcorum; incipit: « Quidnam facere majestas mea majus operæpretium etc. »

Anno periodi Græco-Romanæ 6617. — Anno Æræ Hispan. 4462. — Anno Hegiræ 518, inchoato die 18 Febr., Fer. 2. — Jesu Christi 1024.

— Honorii II papæ 1. — Henrici V reg. 19. imp. 14. — Joannis Comneni imp. 7.

1. *Boleslaus III Poloniæ dux sororem Henrici imp. uxorem ducit.* — A num. 4 ad 6. Anonymus, qui Vitam sancti Ottonis Bambergensis episcopi, ab Henrico Canisio tom. II Antiq. Leet. recitatam, non multo post hujus sancti præsulis mortem litteris mandavit, ait in Præfatione cum ante episcopatum in Polonia scholam puerorum accepisse, et magnam in ea regione famam sibi comparasse, « cumque aliquot annos probe et sapienter ibi mansisset, uxor ducis defuncta est », Boleslai nempe Poloniæ ducis hujus nominis III, qui primis nuptiis sibi copularat, ut Chromerus lib. 5 de gestis Polon. refert, *Sbislaram* Kiovensium principis filiam. Otto, ut subdit idem anonymus, Boleslao duci auctor fuit, ut si vellet ad alios toros venire, acciperet uxorem in partibus Tenticis, cum nihil ei quærendum esset, « nisi amicos, genus, potentiam utpote, cui opes abunde suppedirent ». Hanc in rem ipsemet sanctus Otto legatus cligitur: « Eo tempore soror imperatoris in contubernio ejus manebat », de qua Otto felices nuptias expectabat. « Duce igitur optatis thalamisposito, major iterum gratia Ottoni accessit, suique paranympia domina oblita non est. » Idem Chro-

merus, cujus tempore hic anonymus in tenebris latebat, eam *Adelaidem* appellat.

2. *Conversio Pomeranorum per S. Ottonem episc. Bamberg.* — Postquam *Boleslaus III* variis præliis *Pomeranos* sibi subiecit, de fide Christiana in illam gentem referenda cogitavit, litterasque dedit ad Ottonem episc. Bambergensem, nullo temporis caractere notatas, et a Baronio num. 3 relatas, quibus cum rogavit, ut quia *in diebus juventutis* ejus apud patrem suum *decentissima honestate* conversatus esset, ipseque *per triennium* frustra laborasset ad sacerdotes huic operi idoneos inveniendos, eum non pigeret, id laboris assumere et ad se venire. Anonymus, lib. 2 Vitæ hujus Apostoli Pomeranorum, de his quæ ibi hoc et sequentis anni initio gessit fuscè loquitur. *Uratistslaus* Pomeraniæ dux, amboque ejus filii a sancto Ottone baptizati, et *Adelbertus* Pomeraniæ episcopus renuntiatus sedem posuit Vollini quod oppidum est insulæ Julini ad ostia Oderæ fluvii, sed ea anno MCLXXV Caminum translata. « Ante diem Palmarum ad sedem suam sanctus Otto reversus est », ait anonymus, et gaudium Paschale duplicavit, quod et suam præsentiam civibus exhiberet, et tanto cum fœnore tot

animas Christo lucratus esset. Helmoldus in Chron. Slavorum lib. 4, cap. 41, hanc sancti Ottoni missionem cum anno sequenti coniungit, quia ad finem ejus respexit. Auctor vero anonymus præfatus eam Honorio II attribuit, quia is hoc anno ad culmen Apostolicum evehctus est. De secundo sancti Ottonis in Pomeraniam, et in Leutitiam seu Liutitiam itinere anno mxxviii sermo crit.

3. *Legatio Gallica Petri Leonis cardinalis.* — A num. 6 ad 9. In Chronico Malleacensi ad annum mxxiv legitur: « Fuit Concilium Carnoti, etc. fuitque aliud Clermundo Concilium, et aliud Belvago: alterum quoque Viennæ ». Quod in iis gestum ignoratur; sed chronographus Maurigniacensis pag. 376 testatur, Petrum Leonis S. R. E. cardinalem, quem jam diximus anno mxxii Sedis Apostolicæ legatum in Franciam missum esse, Carnotensi et Bellovacensi Conciliis præsedisse; et quia is postea sub Anacleto nomine antipapa fuit, juvabit hic referre, quæ de eo chronographus iste in medium adducit: « Fuit hic Petrus Petri filius, filii Leonis. Leo vero a Judaismo Pascha faciens (id est, transitum, quod vox illa Hebraica significat) ad Christum a Leone baptizari, et ejus nomine meruit insigniri (Leonem hunc c Judaïs prognatum scribit etiam Arnulphus Sagiensis archidiaconus, et postea Lexoviensis episcopus, in Tractatu de Schismate orto post Honorii papæ decessum). Ille vir, quia scientissimus erat, in curia Romana magnificus effectus, genuit filium nomine Petrum, magnæ famæ magnæque potentie post futurum. Ea tempestate inter regem Theutonicorum, qui ex successione Karoli Magni Romanorum patricius erat, et Ecclesiam Romanam illa turbulentissima de Investituris orta est seditio. In qua vir ille in tantum armis strenuus, consilio providus, et Ecclesie Romanæ fidelis exstitit, ut ei cum cæteris munitionibus, quæ Romæ sunt, illam quoque, quæ illius Urbis videtur obtinere similitudinem, turrim dico Crescentii (seu arcem Sancti-Angeli) quæ a parte Galliarum in capite Tiberini pontis sita est, papa committeret, et eum præ cæteris familiarem haberet.

4. *Duo Concilia celebrat.* — « Ille occasione mirabiliter excrecens, quotidie sui melior efficiebatur, et divitiis, possessionibus, honoribus augmentabatur. Inter cæteram sobolem, cujus plurima multitudo sexus utriusque a quibusdam antichristus gloriabatur, genuit hunc Petrum, de quo sermo nunc est, qui litteris traditus, a quibusdam antichristi præambulis appellabatur. Iste studii gratia Gallias atque Parisius adiit, et cum repatriaret, apud Cluniacum ditissimum atque sanctissimum cœnobium monachilem habitum induit. Aliquantisper inibi regularibus institutionibus imbutus, a papa Paschali II patris admonitione retrahitur ad Curiam, et cardinalis effectus, tempore Callisti papæ cum eodem Gregorio legatus missus ad Gallias, Carnoti Belvacique Concilia celebravit », currenti scilicet anno, uti mox insinuavimus. Ille chronographus Maurigniacensis.

5. *A Paschali II cardinalis creatus.* — Mabilionius in Prefatione generali ad novam editionem Operum sancti Bernardi a se curatum § 4, ait, nullam in memorato loco chronographi Maurigniacensis mentionem esse de titulo *diaconi cardinalis*, quem titulum Petro Leonis a Paschali II concessum fuisse Onuphrius tradit, eaque in re potius esse auctoritatem chronographi Maurigniacensis, ejus temporis æqualis; verum virum doctissimum deceptit, vel Duchesnius, qui Chronicon illud tom. iv publicavit, vel potius librarius, qui omnia interpunctione locum hoc modo edidit: « A papa Paschali II patris admonitione retrahitur ad curiam, et cardinalis effectus tempore Callisti papæ, cum eodem Gregorio etc. » cum ponere debuisset, retrahitur ad curiam et cardinalis effectus, tempore Callisti papæ cum eodem Gregorio etc. » ita ut non tantum ad curiam evocatus fuerit a Paschali II, sed etiam ab eo cardinalis creatus; quæ emendatio certa, sicuti et Onuphrii opinio, cum, ut videre est apud Baronium anno mxxviii, num. 16, Pandulphus in Vita Gelasii II, inter eos qui secuti sunt hunc Pontificem Roma egredientem, ut persecutionem fugeret, numeret *Petrum* istum, scribatque et de *diaconis cardinalibus dominus Petrus Leonis, Gregorius Sancti-Angeli* etc. qui Gregorius postea sub Innocentio II nomine Ecclesiam Romanam rexit. Porro cum is hoc anno in Francia, ubi duæ legationes erant, ut alibi ostendimus, legatus etiam Sedis Apostolicæ fuerit, ut anno mxxvi demonstrabo, existimo, eum Conciliis *Claramontano* et *Vienensi* a Chronographo Malleacensi memoratis præfuisse, cum Petrus Bellovacensi et Carnotensi tantum præsederet.

6. *Callistus II reprobat conjugium filii Roberti comitis Normanniæ.* — Hoc anno, ut narrat Simeon Dunelmensis in Hist. de Gest. Reg. Angl. Fulco comes Andegavensium « aliam filiam suam dedit uxorem Wilhelmo filio Roberti comitis Northmannorum fratris regis (nempe Henrici regis Angliæ, qui Robertum fratrem Normanniæ comitem captivum tenebat) promittens juveni auxilium, ut quacumque in parte paterni honoris fieret hæres ». Post illud matrimonium Guillelmus crebras irruptiones in ditones Henrici regis fecit, earumque occasione « gravibus Anglia est attrita exactionibus pecuniarum », ut subdit Dunelmensis. Verum Callistus II, « post susceptam idoneorum testimonium de parentela probationem, ubicumque Guillelmus filius Roberti comitis fuerit, prohibuit officia celebrari, nisi utique ad datum a se terminum conjugium idem dissolveret », inquit Callistus II in suis litteris, datis *Laterani, VII kalendas Septemb.*, tom. iii Spicilegii pag. 148 relatis, asserens se causam illam Joanni presbytero cardinali commississe finiendam. Est is *Joannes Cremenensis* ab eo legatus in Angham missus, qui in eam venire non potuit, nisi « cum diu in Normannia retentus esset a rege », inquit idem Dunelmensis ad an. mxxv.

Interim Callisto II mense Decembri hujus anni, ut statim narrabimus, demortuo, anno sequenti Honorius II ejus successor, litteris *Laterani, pridie idus Aprilis* datis, et in eodem tom. in Spicilegii relatis, scripsit ad canonicos Ecclesiæ Turonensis, *Willelmum*, post dissolutum a Joanne cardinali presbytero Apostolicæ Sedis legato illicitum illud matrimonium, non solum non paruisse; sed legati nuntios ad eum directos cepisse, *in arcta custodia per duas septimanas retinuisse, barbas eorum et capillos flammis exussisse, et litteras in conspectu hominum sub dio cremare præsumpsisse*. Quare Honorius II canonicos Turonenses monet, se excommunicationem in personam ejus, et interdictionem in propriam comitis terram a suo legato latis confirmare. *Guillelmus* aliam postea uxorem accepit, et mandatis Pontificiis paruit, ut infra videbimus.

7. *Moritur Callistus II PP.* — Nunc ad *Callisti II* mortem veniamus. Hanc Pandulphus in ejus Vita exacte consignarat, sed librarii locum corrumpere. Hæc Pandulphi verba : « Jam Christus continue in mentibus fidelium nascebatur (id est, Ecclesia Adventum ejus celebrabat) dum febris inopina proveniens, papam repente consumit, et caput nobis omnibus in solo papa cecidit. Nec mora, confessus et ordinatus (hæc ultima vox corrupta) omnibus ululantibus obdormivit in Domino; et sic pacis pater cum ipsa pace recedit. Sepultus est Laterani juxta dominum Paschalem in festività sanctæ Lucie ». Sed cum certum videatur, Callistum II postidie festivitatis sanctæ Lucie, die nempe xiv mensis Decembris, sepulture traditum fuisse, legendum : « Et sic pacis pater cum ipsa pace recedit in festività sanctæ Lucie. Sepultus est Laterani juxta dominum Paschalem ». Corruptus et Falco, cum Callisti II mortem his verbis narrat : « Papa Callistus duodecimo die stante mensis Decembris migravit ad Dominum. » Sic enim mortuus fuisset die vicesima mensis Decembris; cum, ut jam alibi diximus, Falco dies stantes alienjuss mensis, non a primo ejus die, ut eum perperam Papebrocius in Conatu Chronico-Hist. interpretatur, sed a die mensis ultima usque ad diem iduum retrocedendo numeret, ita ut dies xiv mensis Decembris ei sit dies xviii stans mensis Decembris. Quare loco *duodecimo die stante mensis Decembris*, legendum *decimo tertio die intrante mensis Decembris*, nisi forte Callistus II nocte inter diem xii et xiii interjecta et vivis abierit. Quo casu scribendum fuisset, *duodecimo die intrante*. Callistus itaque die quidem iduum Decembris demortuus, sed post idus sepultus, ut tot scriptorum loca demonstrant, neque hic nodus doctorum virorum ingenia amplius torquere debet.

8. *Dies ejus emortualis.* — Emendationem nostram in dubium revocandam non esse ostendit Necrologium monasterii Casinensis, a Caracciolo in fine quatuor antiquorum chronologorum, scilicet Heremiperti, Lupi Protospate, anonymi Casinensis,

et Falconis Beneventani, Neapoli anno mxcxxvi publicatum. In eo enim habetur : « XIX kal. Jan. ob. Callistus II papa ». Dies autem in illo Necrologio notati vel dies mortis vel dies sepulture Pontificum Rom. certo designant, ut singulos in eo contentos percurrenti patebit. Cum itaque dies xix kalendarum Januariarum, seu dies xiv mensis Decembris, ad diem emortualtem Callisti II referri non possit, non nisi de die sepulture interpretandus. Secundo, Joannes Ceccanus in Chron. ad hunc Christi annum scribit : « Obiit Calixtus papa XIX kal. Januarii ». Idem legitur in Chronologia Saxonica nuper Oxonii vulgata, cujus auctor hoc ipso tempore in Anglia florebat. Tertio, Fulcherius Carnotensis, qui hoc ipso tempore vivebat, lib. 3 Hist. Hierosol. ad hunc Christi annum ait : « Callistus papa obiit XII kalend. Januarii, sed loco *XII kalend.*, legendum *XV kalend.* Bongarsius, qui tres illos libros in lucem emisit, fatetur exemplaria quibus usus est nec integra nec satis emendata fuisse. Miræus in Auctario de Script. Eccles. pag. 247 monet, Brugis in Collegio Soc. Jesu inter reliquias Bibliothecæ Pamelianæ extare plenos et integros, iisque jam editos corrigendos esse. Quarto, Baronius num. 6 recitat verba antiqui scriptoris inediti, qui ait : « Moritur decimo quarto kalend. Januarii », ubi etiam legendum, *decimo nono kal. Januarii*. Quamobrem Simeon Dunelmensis hujus temporis scriptor in Hist. de Gest. Angl. ad annum mxcxiv recte habet, Callistum II *idibus Decemb.* seu die xiii ejusdem mensis diæ Lucie sacra obisse; et id confirmant laudati scriptores, qui non de die mortis, sed de die sepulture intelligendi, et quorum opera transpositio, quæ extat in textu Pandulphi, emendanda.

9. *Sedis ejus duratio.* — Cum *Callistus* kalendis Februarii anni mxcix Pontifex Romanus electus fuerit, sedit *annos v, menses decem, et dies duodecim*, ut in duobus ex nostris Catalogis legitur, in quibus dies emortualis excluditur; in magno vero Chronico Belgico, ubi refertur ex Bernardo Guidonis eum sedisse annos v, menses decem, et dies tredecim, dies obitualiis includitur, sicuti et in Chron. Martini Poloni. Idem de mensibus ac diebus habent Matthæus Parisius in Chron., Sigonius lib. 10 de Reg. Ital. et Ouphrinus in Chron. qui tradunt, Callistum *kalendis Februarii* Pontificem electum, et *idibus Decembris* demortuum. Sed in Chron. Godefridi Viterbiensis, hujus temporis auctoris, numerus mensium corruptus; cum ibi legatur, eum sedisse menses vi et dies xiii. In Fasciculo Temporum menses decem recte notati, sicuti et in Chron. Hirsaugiensi; in priori tamen, loco dierum xiii, perperam scriptum habetur *dies xi*. Ex quibus errores recentiorum scriptorum referendi. Varia Callisti II opuscula adhuc Mss. supersunt in variis Bibliothecis, recensita a Ludovico Jacobo in Bibliotheca Pontificia.

10. *Honorius II ei succedit.* — Successoris *Callisti II* electionem breviter, sed accurate narrat Ceccanus in Chron., ubi postquam dixit eum de-

mortuum, seu, ut jam exposuimus, sepultum XIX kal. Januarii, subdit: «Consensu omnium clericorum Romanorum, post septem dies ordinaverunt Lambertum Ostiensem episcopum in Ilonorium papam», qui hujus nominis secundus fuit. Quare Honorius II Pontifex Romanus electus est die vicesima prima mensis Decembris, quæ cum hoc anno Dominicalis fuerit, non videtur dubitandum, quin eadem etiam consecratus sit. Sed hæc magis explicanda. Baronius num. 7 refert ex Pandulpho subdiacono in Vita Honorii II Leonem Frangipanem, mortuo Callisto II, dolo et fallacis usum, ut successoris electionem turbaret: «Religiose memoria», inquit Pandulphus, «Callisto papa defuncto, omnes patres de curia cardinales, et alii, præsertim vero Petrus Leonis, et Leo Frangipanis pariter condixerunt, ut usque ad diem tertium una simul juxta scita sacrorum canonum pertractarent, interim de electione nulla mentio haberetur, etc. In sero autem præsentem idem Leo per nuntios unumquemque seorsum de capellanis cardinalium præmonet, ut mane summo diluculo, cum pluviali rubeo sub cappa nigra venirent, et ita, non ignorante domino, eundem suum dominum introducerent, etc. Tandem in crastinum ita illecti, papam facturi conveniunt ad B. Joannis Basilicam, et in Ecclesiæ oratorium, quod Sancti Paneratii dicitur, intrarunt. Ubi post aliqua verba, Jonathas Sanctorum-Cosmæ et Damiani diaconus cardinalis, collaudantibus omnibus, ipso etiam domino Lamberto episcopo (nempe Ostiensi, patria Bononiensi) Theobaldum cardinalem presbyterum S. Anastasiæ cappa rubea induit, et Cælestinum appellat, ut cælitus missum. Non patitur Cælestinus (ego nescio cur aliquandiu noluerit). Inceptum est *Te Deum laudamus* cani gaudent, Lamberto episcopo Ostiense pariter nobiscum canente. Non tamen dimidiato adhuc, Robertus impius Frangipanis verti fecit in luctum ciitharam. Etenim ipse cum quibusdam consentaneis suis, et aliquibus de curia Lambertum Ostiensem episcopum papam acclamaverunt. Deinde in Sinis, quæ ante oratorium B. Sylvestri site sunt, sine mora eum composuerunt. Unde licet maxima discordia et tumultus emergeret, tamen postea pacificatis omnibus, et ad concordiam reductis, Lambertus cardinalis Ostiensis in Ilonorium papam sublimatur». Discordia itaque et tumultus aliquot dies durarunt, septem nempe, uti Ceccanus in Chron. recte notavit.

11. *Post dierum vii interpontificum.* — Idem dierum numerus in Codice Vaticano a Baronio num. 8 relatius, etiam notatur; sed vel Baronius aliqua de suo addidit ad majorem explicationem, vel librarius numeros corruptit. In eo enim Codice habetur: «Quia electio Honorii minus canonice præcesserat (legendum *processerat*), post septem dies, nempe xxviii Decemb. (sed hæc ultima verba vel additicia, vel legendum, nempe xxi Decemb.) in conspectu fratrum sponte milram et mantum refutavit, atque deposuit. Fratres tam episcopi

quam presbyteri et diaconi cardinales, videntes ipsius humilitatem, etc. ad ejus vestigia prociderunt, et tanquam pastori suo, et universali papæ consuetam obedientiam exhibuerunt», seu eum coronarunt, non die xxviii Decemb. ut habet Baronius, aut eo die, aut iv Januarii insequentis, ut vult Papebrocius in Conatu Chron. Hist. sed XVII kalend. Januarii, seu die xxi Decemb. ut recte Onuphrius in Chron. et jam ex Ceccano diximus. Postquam hæc scripseram, vidi Papebrocium laudatum referre ex Baronio memorata Codicis Vaticani verba, sed sine ista nota temporaria, nempe xxviii Decembris. Quare non dubito, quin ea Baronii sit, non vero anonymi Vaticani ab eo citati. Ut ego editione Coloniensi Baronii, et cum dubitare cœpi, an ea verba Baronii essent vel anonymi, legi editionem Moguntinam, in qua etiam ea verba eodem caractere, quo locus anonymi exarata sunt, indeque mendum in librum refudi. Chronotaxim enim Paschalis II, Gelasii II, Callisti II, et duorum præsertim sequentium Pontificum diu multumque examinavi.

12. *Non vero dierum xii.* — Baronius num. 8, narrato anonymi Vaticani loco, jam in medium adducto, subdit: «Narrat eadem totidem pæne verbis Willelmus Tyrius lib. 12, cap. 15, in fine»; in editione tamen a Bongarsio curata, et an. mdcxii Ilanoviae publicata, ea verba non libro 12 sed libro 13 in fine capitis 15 leguntur; verum loco post septem dies, ibidem habetur post duodecim dies, quos ex eo exscripsisse videtur Sigonius lib. 10 Hist. de Reg. Ital. Indequè Papebrocius dubitat, an Honorius II die iv Januarii sequentis anni coronatus fuerit. Al sive Tyrius dies illos xii exhibeat, sive hi ejus operi additi fuerint, eos rejiciendos certum, ut tam ex dictis quam ex dicendis in morte Ilonorii II planum fiet.

13. *Gesta in bello Hierosolymitano.* — Ad num. 9. Fulcherius lib. 3 Hist. Hierosol. refert Tyrium a Venetiarum duce cum navibus suis et a Germundo vel Garimundo patriarcha cum subditis suis XV kal. Martii obsidione cingi cœptam esse, et novis Julii certis conditionibus Christianis deditam: «Videns rex Damasci Turcos suos et Saracenos, qui erant in urbe circumclusi, nullo modo posse de manibus nostris evadere, maluit cum aliquo dedecore vivos eos redimere, quam mortuos plorare», inquit Fulcherius, qui post aliqua interposita subdit: «Omnipotente Deo favente, de Turcorum custodia Hierosolymorum rex (nempe Balduinus II) IV kal. Septembris exiit, cum mensibus xii, pauloque magis, sub eorum vinculis detentus esset». Quare fallitur vulgatus Robertus de Monte, quem Baronius sequitur, quando in Chron. ad hunc Christi annum scribit: «Balduinus rex Hierosolymorum a Saracenis præventus capitur». Fulcherius enim, qui tunc Hierosolymis erat, hoc ignorare non potuit. Ad hæc victoria a Crucisignatis de Saracenis reportata, quam ex eodem Roberto de Monte recitat Baronius, ad annum præce-

dentem pertinet, cum quo idem Fulcherius eandem copulavit. Tyrus lib. 13, cap. 13, loquens de gestis hoc anno, libertatis Balduino regi reddite tempus signantius designat, atque: « IV kalend. Septemb. cum quasi mensibus decem et octo, vel amplius aliquid, apud hostes detentus fuisset, in vinculis, pacta pro se pecunia, obsidibus datis, libertatem pretio interveniente consecutum esse ».

14. *Floret in Hibernia S. Malachias*. — Ad num. 11. Florebat hoc tempore in Hibernia sanctus *Malachias*, monachorum præstantissimus, cujus Vitam et res gestas sanctus Bernardus abbas Claravallensis in litteras misit. Ortus Hibernia de populo barbaro, « de natali barbarie traxit nihil, non magis quam de sali materno pisces maris ». Erat in civitate Ardmacha, in qua ille alitus, magnæ sanctitatis vir, ad quem se contulit, formam vitæ ab eo accepturus; visus dignus *Celso* metropolitæ Armachano, qui ad diaconi gradum promoveretur, ad ministerium illud coactus accessit hoc indefesse exercuit. « Erat autem, cum sacerdos ordinatus est, annos natus quasi viginti quinque, in qua ejus utraque ordinatione, sicut præter canonum formam processisse videtur, ut vere videtur, (siquidem infra vicesimum quintum annum Leviticum ministerium, infra trigesimum adeptus est sacerdotii dignitatem) donandum sane tum zelo ordinatoris, tum meritis ordinati », inquit divus Bernardus. Quare cum ex decendis in morte ejus, anno MXXIV in lucem prodierit, anno MXXVIII aut insequenti presbyteratu insignitus est. Interim obiter observabis divi Bernardi tempore canones illos, quibus cautum erat, ne quis episcopus et presbyter ante triginta annos ordinaretur adhuc viguisse, licet sæpe ab episcopis in gratiam piorum virorum dispensatum fuisse reperiatur. Benchorense monasterium olim florentissimum, sed a piratis jamdiu destructum, Malachias amplexus est, illucque veniens cum decem circiter fratribus, illi tempore aliquanto præfuit, « ipse rector, ipse regula fratrum ». Jamdiu episcopus *Conneretensis* vacabat, et licet nolens ad illum electus est: « Trigesimo ferme ætatis sue anno Malachias consecratus episc. Connereth », subdit Bernardus; erat autem Conuria, vulgo *Coner*, urbs Ultonie provincie, nunc in vicum redacta, cujus hoc anno Malachias episcopus constitutus, ut accurate scripsit Baronius. Nusquam adhuc tales expertus fuerat *Malachias* in quantacumque barbarie, Christianos nomine, re paganos, ut apud S. Bernardum legere est.

15. *Tanchelinii sectatores Antuerpiæ grassantur*. — Baronius in Appendice ad annum MXXIV refert ex Miræo Diploma, quo canonici Antuerpienses consilio Burchardi episcopi concedunt Norberto institutori canonicorum Præmonstratensis Ordinis Ecclesiam Sancti-Michaelis « anno Verbi incarnati MXXVI, Indictione II, Epacta tertia ». Præpositus vero Sancti-Michaelis in Antuerpia, ubi nunc illustis abbatia Sancti-Michaelis, in eo Di-

plomate hujus concessionis causam his verbis enuntiat: « Cum in diebus nostris quidam hæreticus, Tanchelinus nomine, in partibus nostris advenisset, et venenosus sermone a fide et a Sacramentis Ecclesie plurimos avertisset, hac de causa, ut illa hæresis, quæ Provinciam nostram occupaverat, funditus extingueretur », Norbertum, virum nostris temporibus spectabilis religionis, accessiri curavimus, eique præfatam Sancti-Michaelis Ecclesiam tradidimus. De hoc hæretico jam locuti sumus, annoque MXXVI rursus verba faciemus.

16. *Moritur Guibertus abbas Novigenti*. — Dacherius, qui opera *Guiberti* abbatis Novigenti in diocesi Laudunensi in lucem emisit, in Synopsi ejus Vitæ, ac in Catalogo abbatum B. Mariæ de Novigento prodit, piissimum abbatem currenti anno ad Deum migrasse; et licet mirum sit, virum pereruditum rem singularem nulla in medium adducta probatione asserere, existimandum tamen illum aliquo fundamento innixum fuisse. Inter alia multa Guibertus scripsit libros octo *Gestorum Dei per Francos*, sive Hierosolymitanæ expeditionis, libros tres de *Vita sua*, et quatuor de *Pignoriibus sanctorum*; quo in ultimo opere de sacrarum reliquiarum suppositione fuse disserit, et circa ipsas pæne infinitos errores facti contingere ait. Non probat quod sacræ reliquie auro aut argento ad quæstum includantur, cum Christi corpus sepulchro conditum fuerit, et gravissime puniti, qui corpora S. Pauli Apostoli et S. Laurentii martyris Gregorii Magni tempore inscii conspexerant. Verum pius abbas abusus et avaritiam, non vero pietatem improbat, qua ab antiquis temporibus sanctorum corpora argento, auro et gemmis circumvestire et adornare mos fuit. De ejus operibus legendi Oudinus in Supplem. ad Script. Eccles. et Natalis Alexander Sæc. XI et XII, part. I, cap. 6, art. VI.

17. *Translatio S. Barbatii episc. Beneventani*. — Facta hoc anno translatio sancti Barbatii episcopi Beneventani qui an. circiter DCLXXXI spiritum Deo reddidit. Describit eam Falco Beneventanus in Chron. atque: « Anno MXXIV Dom. Incarnat. et XI anno Pontificatus domini Callisti papæ, Rofridus Beneventanus antistes, consilio accepto, corpus sanctissimi patris nostri Barbatii, Beneventani præsulis, ex altaris tumba, qua per multa annorum curricula quieverat, abstraxit. Die itaque octavo adveniente, pridie kalendas Junii sub altari lapideo corpus B. Barbatii, duobus secum adhibitis episcopis locavit »: et loco eminenter ascendens, « ut videri et audiri ab omnibus posset, peccatorum partem, divina favente clementia, condonavit. Donavit item aliis omnibus, qui usque ad octavum diem festivitatis SS. Apostolorum Petri et Pauli ad dedicationem illam devote concurrunt ». Narrat Falco miracula in ista translatione patrata, quorum ipsemet testis oculatus fuit, et inter alia ait Joannem Sutorum, qui in brachio et manu gravi dolore torquebatur, liberatum fuisse: « Manum

illius », inquit Falco, « cum brachio curatam scriptor ego palpavi : vicini namque illius testabantur, quod tempore longo eum infirmari cognovissent ».

18. *Pax inter reges Aragoniæ et Castellæ sancta.* — Anno superiori, ut narrat Sandovalius, inter *Alfonsum* Aragoniæ et *Alfonsum* VII Castellæ reges de pace actum, et pacta scripta; sed ea executioni mandari non potuere, quia Castellanus oppida omnia, quæ Alfonsi VI avi fuerant, repetebat, et Aragonius, quæ ab antiquis Navarræ regibus possessa fuerant relinere volebat. Quare inter utrumque regem *Æra* MCLXII, currenti sc. anno, bellum redintegratum, tandemque pax opera *Petri Venerabilis* abbatis Cluniacensis, tunc Najaræ, ubi præcipuum ordinis Cluniacensis monasterium, versantis, conciliata, in qua Aragonius rex *Rioiam*, et quæ fuerant regum Navarræorum, sibi reservavit cum regis Castellæ titulo, sed honorario tantum. Sicque finitum bellum, et ab utroque rege seorsim regna in posterum administrata.

19. *Alfonsi Castellæ regis conjugium cum filia comitis Barcinonæ.* — Hoc etiam anno *Alfonsus* VII Castellæ rex *Berenguelam*, seu *Berengariam* Raimundi Berengarii hujus nominis III, Barcinonis et Provinciæ comitis ac Dulciæ comitissæ filiam, sibi conjugio copulavit, æra MCLXII. Die duodecima mensis Julii matrimonium istud jam contractum fuerat; cum eo die uterque insignem Donationem Ecclesiæ cathedrali Burgensi a Sandovalio fol. 134 relata fecerint. Idem historicus citat antiquissimum Diarium, in quo legitur, « *Alfonsum* (Aragonium nempe) *Æra* MCLXII, mense Julio cepisse Medinam Celi (quam urbem Mauri post Alfonsi VI mortem in ditionem suam iterum redegerant) et Mozarabas Marochium trajecisse ». Non hic prætermittendum quod idem Sandovalius refert, *Sanciam*, sororem Alfonsi VII et Urracæ filiam, donationem quamdam fecisse Petro Cluniacensi abbati, tunc pro pace in Hispania agenti, et monasterio ejus Cluniacensi, a Sandovalio recitatam, ac datum « die VI feria, IX kal. Julii (sed legendum si feria, Gothici enim characteres lectu difficiles, ut observat Sandovalius, et II pro V proclivi errore usurpator) *Æra* CLXII præ millesima, regnante regina Urracha cum filio suo domni Adefonsi regis Hispaniæ ».

20. *Complures Mozarabes ad Alphonsum Aragonem confugunt.* — Ordericus lib. 13, pag. 892, ad annum MXXV de Alfonso VI Aragoniæ rege scribit : « Remotas regiones usque ad Cordubam peragravit, et in illis sex hebdomadibus cum exercitu deguit, ingentique terrore indigenas, qui Francos cum Iliberis (id est, Hispanis) adesse putabant, percussit. Saraceni autem in munitionibus suis delitescabant, sed per agros armentorum pecorumque greges passim dimittebant. Nullus de Castellis in Christianos exierat, sed Christiana cohors ad libitum omnia extra munimenta diripiebat, et depopulatione gravi provincias affligebat. Tunc Mucerani fere decem millia congregati sunt, ac regem

Ildefonsum humiliter adierunt. Nos, inquirunt, et patres nostri hactenus inter Gentiles educati sumus, baptizati Christianam legem libenter teneamus : sed perfectum divæ Religionis dogma nunquam ediscere potuimus. Nunc neque nos pro subjectione infidelium, a quibus jamdum oppressi sumus, Romanos seu Gallos expetere doctores ausi fuimus : neque ipsi ad nos venerunt propter barbariem paganorum, quibus olim paruius. Nunc autem adventu vestro admodum gaudemus; et natali solo relicto, vobiscum migrare cum uxoribus et rebus nostris optamus. Mucerianus (legendum Muceraniis) illaque rex quod petebant annuit. Magna igitur eorum multitudo de finibus suis exivit, et pro sacra legis amore, ingenti penuria et labore afflicta exulavit.

21. *Ob id Mozarabes, qui remanserunt, pessime habiti.* — « Aragonensium enim ut remeaverunt, totam regionem bonis omnibus spoliata inveniunt, nimique penuria et fame, antequam proprios lares contigissent, vehementer aporiati sunt. Porro Cordubenses, alique Saracenorum populi valde irati sunt, ut Muceranios cum familiis et rebus suis discessisse viderunt. Quapropter communi decreto contra residuos insurrexerunt, rebus omnibus eos crudeliter expoliaverunt, verberibus et vinculis, multisque injuriis graviter vexaverunt. Multos eorum horrendis suppliciis interemerunt, et omnes alios in Africam ultra fretum Atlanticum relegaverunt, exilioque truci pro Christianorum odio, quibus magna pars eorum comitata fuerat, condemnaverunt ». Garibayus lib. 23 compendii historialis lingua Hispanica scripti cap. 8, idem paucis verbis narrat ad annum Christi MXXVI, sed quoad rei gestæ annum, præferendum videtur Diarium laudatum. Porro Ordericus Christianos, *Mozarabes* ab historicis Hispanis vocatos, et lingua Hispanica *Mucaraves*, appellat *Muceranios*, quia more scriptorum res externas narrantium, nomen illud depravavit. Ad hæc verum non est quod tradit Ordericus, Mozarabas omnes ab ipso Muceranios dictos, qui mortem vitarunt in Africam ultra fretum Atlanticum missos fuisse; neque enim dubitandum, quin multi in Hispanensi regno remanserint usque ad adventum Almohadum, qui Christianos omnes, ut suo loco videbimus, in Hispania exterminarunt. Existimo tamen eos Valentia, Murcia, Cuenca, aliisque locis in quibus societatem cum Christianis, præsertimque cum Alphonso Aragonie, habere potuissent, expulsos tunc fuisse. Post hæc Ordericus refert *Alphonsum* Aragoniæ regem in suum regnum regressum invenisse *Urracam* conjugem adversum se rebellasse. Verum hæc, atque in eo parographo relata, juxta exactam Chronologiam ad suos annos revocanda.

22. *David Alexandro fratri in regnum Scotiæ succedit.* — *Malcolm* hujus nominis III, Scotiæ rege anno MXXIII occiso, eodemque *sancta Margaritha* ejus uxore vita functa, ut eo anno diximus, tres eorum filii *Eadgarus* vel *Edgarus*, *Alexander*

et *David* in Scotia regnarunt, sed Eadgarus ante annum *mcvii* thronum regium conscendere non potuit, quo mense Januario anni *mcvii*, ut habet Simeon Dunelmensis in Hist. de Gest. Reg. Angl., decedente, *Alexander* frater regnum suscepit, illudque ad presentem usque annum administravit, monasteriorum aedificatione aliisque pietatis operibus clarus. Hoc vero anno, ut scribit Simeon Dunelmensis, « obiit VI kal. Maii, cum regnasset xviii annis et tribus mensibus, cui frater ejus *David* succedens, regnum quod frater suis laboriosissime tenuit, mox ille sine contradictione suscep-

plum quaquaversum inclinum sibi et quietum tenuit ». Loco tamen *xviii annis*, legendum *xvii annis*; certum enim eum Eadgaro fratri mense Januario anni *mcvii* successisse, et presenti vitam clausisse, ut ex duratione regni *Davidis* innoscit. Dunelmensi suffragatur annalista Mailrosensis. Alfordus quidem in Annal. Angl. *Matthæus Parisius*, aliique quidam mortem ejus in annum sequentem differunt, sed ii hæc in re non audiendi. Fuere tres hi reges fratres *Methildis* Henrici Angliæ regis uxoris, piissima femine, a qua ad omnem virtutem erudiri potuere.

HONORII II ANNUS 1. — CHRISTI 1125.

1. *Honorius contumacem abbatem deponit Cassinensem.* — Annus sequitur Redemptoris millesimus centesimus vicesimus quintus, Indictione tertia, quo purgato, quod inerat in electione, facinore, *Honorius* solium Petri scandens, ut legitimus papa ab omnibus colitur, approbata persona (ut *Sugerii* verbis utar) vir gravis atque severus. Qui sui exordio Sedis expertus Oderisium juniorem abbatem Cassinensem contumacem et penitus refractarium, ejus superbiam fregit, ipsumque loco deposuit, aliumque in ipsius locum substituendum curavit. Negotium arduum, atque diuturnioris temporis quam par erat, resistere abbatem Pontifici. Ita plane, qui favore Apostolicæ Sedis adversus tyrannos hactenus prævaluisse, inflatus superbia, eo insanie devenit, ut ipsum Romanum Pontificem parvipenderet. Nihil in suis membris infestius Ecclesiæ patitur, quam religiosos a paternis institutis desciscentes, et amore secularium ad gloriam et lucra turpiter inbiantes. Abbas igitur iste, qui jam antea ipsum tunc cardinalem Ostiensem contempsisset¹, et hospitio excipere noluisse, eum jam creatum Pontificem nihilo magis officiis demereri curavit, sed æque contempsit. Nam creatus Pontifex cum ab eo opem ferri expetisset, tantum abest ut fecerit, quin etiam expostularet, imo et exprobarret, quod ad ejus electionem minime invitatus fuisset. Interea vero oblatam occasionem Pontifex minime prætermisit, nam Aquil-

nam accusationes adversus eum suscepit, sed substitit, ne videretur animo potius ulciscendi rem agere, quam quod justum esset in eumdem decernendi. Interea vero, « eodem anno », inquit *Petrus*, « *Honorius* papa ab Urbe ad monasterium venit, et a supradicto abbate et fratribus honorifica profectione susceptus, super altare B. Benedicti missam solemniter celebrans, sero jam ad civitatem (Sancti-Germani scilicet) rediit ». Subjicit de *Burdino* antipapa deposito, relegato, atque in loca diversa mutato, quæ a nobis superius dicta sunt. Pergit autem : « Ibi in pleno laicorum conventu abbatem *Honorius* evocans, et magno in illum odio sæviens (ita defensor monachorum) vehementi increpatione redarguit, militem, non abbatem, prodigumque substantiæ monasterii frequenter inelamitans, statimque egressus civitatem, Beneventum perrexit ». Hæc *Petrus*.

2. *Honorius Beneventi.* — Habet ad hæc *Chronicon Beneventanum* ab auctore hujus temporis scriptum, *Honorium* se contulisse Beneventum, illicque ex improvviso diro terræ motu vexatum. Sunt hæc verba auctoris ista scribentis : « Hoc primo anno sui Pontificatus *Honorius* papa Beneventum se contulit, ubi die undecima mensis Octobris vehementissimus terre motus factus est per dies quindecim perseverans, cum idem Pontifex properavit ad Basilicam S. Joannis, et terræ tenus prosternitur, et coram altare Salvatoris, Dei misericordiam lacrymis vultum irrigantibus invocavit ». Et inferius : « Præfatus Pontifex *Honorius*

¹ Pet. Diacon. l. iv. c. 83, 85, 87, 88.

cardinalibus vocatis, nudis pedibus magnas super hoc ad Deum lacrymas et preces effundit ».

3. *Excommunicatio abbatis Cassinensis.* — Reversus Romam Honorius, ¹ litteris permotus Athenulphi comitis, abbatem accusationibus perstringentis, per episcopum Tarracinensem ejusdem monasterii olim monachum, ut Romam veniat jubet; sed recusavit ille. Quamobrem quinta hebdomada Quadragesimæ in eum ut contumacem sententiam tulit. Sed nihilominus ille sacro Palmarum die in contemptum Pontificis resedit in cathedra, pastoralis virga decorus. His in eum magis magisque commotus Honorius, die solemni Paschatis eum ipsiusque fautores a liminibus Ecclesie separavit, prohibens ne quis ei obediret, alioqui a sacramentorum perceptione alienus efficeretur. Abbas insaniens adversus populum ipsi contradicentem, contrahere cepit exercitum, sed nequidquam profecit: laicorum enim sententiæ Pontificis Romani faventium violentia foras extruditur, et in ejus locum Nicolaus Tusculanus ejusdem monasterii monachus decanus eligitur, contradicentibus senioribus, et litteras ad Honorium papam adversus ejus electionem scribentibus. Sed antequam electionem Nicolai audiret Pontifex ipse abbatem delegit, quem sciret idoneum ad morum collapsorum restitutionem, ad quem suscipiendum legat Cassinum Gregorium presbyterum cardinal. tituli Sanctorum Apostolorum. Quid autem per eum actum sit, ut singula singulis reddantur annis, suo loco dicturi sumus anno sequenti.

4. *Cluniacensium querelæ adversus Pontium aggressorem ad Honorium papam delatæ.* — Sed rursus in Urbem, non aliunde quam ex monachis, itidem acerbissimæ controversiæ ad Sedem Apostolicam deferuntur peramosissimi in Gallia Cluniacensis monasterii monachos adversus invasorem et tyrannum Pontium ejus olim abbatem, quem querelis exagitatum ante triennium se abdicasse atque Hierosolimam petiisse, suo loco superius dictum est. Illic igitur una cum suis quos duxerat, rediens Hierosolymis, fastu lurgens affectatæ sanctitatis, videri vult sanctus et ab hominibus credi beatus, suos hinc inde socios spargens præcones mendaciorum. Quod enim anno superiori de admirabili contra Sarracenos victoria obenta divinitus acciderat, totum sui Pontio tribuunt, cui et adscribunt falsa miracula, vitam æqualem superare anachoretas, æquare martyres. Decepti sunt plurimi, donec tandem qualis intus esset, erumpente sanie, foris manifestus apparuit; nec diu multumque moratum. Siquidem secundum sacrum illud oraculum ²: « Gaudium hypocritæ ad instar puncti ». Sed audi tu interea ex Petro Pictaviensi ad Petrum Cluniacensem inscriptum victoriæ carmen. Hic enim post Hugonem Juniorem, qui mense quinto suæ præfecturæ de-

cesserat, probante Callisto papa, Cluniacensis abbas creatus fuit, nobilis Aquitanus, patria Arvernensis, usu rerum peritissimus, qui ex militia quam summa gloria ministraverat, Cluniacensibus se addixerat, moribus atque doctrina conspicuus. Petrus igitur Pictaviensis post alia hos de concitata undique sparsaque de Pontio fama habet versus :

Jamque novam sectam vulgaris fecerat error,
Dum putat hunc alique rustica turba Deum.
Iste novum Moysen, hic Daniel, ille Joannem,
Alter Eliseum, vel Salomona vocat.
Alter eum circumdare tenuia brachia ferro,
Martyrique novum fert tolerare genus.
Alter ab humanis epulis omnino sequestrem
Non nisi cœlestem sumere posse cibum.
Quilibet altari nudis assistere plantis
Laudat, et innumeras continuare preces.
At qui majori fuerat phantasmate lusus,
Clamitat in medio Italia verba foro :
Currite, languentes, hominem requirite sanctum,
Currite, Martius ecce secundus adest.
Cui placuit, spretis Cluniacensibus, ut per arenas,
Trans vadit Tyrrhenum quæreret ipse Deum.
Nunc igitur rediens, ut pristina jura reposcat,
Angelico monitu, plurima signa facit.
Forsitan ille prior Martinus in orbe revisit,
Qui solo nutu dissipat omne malum.
Sed quis tot vana, furiosi somnia vulgi
Vel ridere satius, vel memorare potest ?

At quod fama ista in vulgus sparsa jamjam pervadere cepit viros eruditos et sapientes, et in Romanam curiam sibi aditum per Gerardum presbyterum cardinalem patefecerat, qui plurimum deferret homini, ceptum est a Cluniacensibus trepidari.

5. Hinc pergit :

O quoties, electe Deo, trepidavimus omnes ?
Utpote quos verus sollicitabat amor.
Ne levibus augis gravitas Romana faveret,
Verteret et lubricus sobria colla magus.
Non doctos etiam Brutos, rigidisque Catones
Tentaret variis illaqueare dolis.
Triste quidem dictum, sed maximum ille Gerardus,
Proh dolor ! hac potuit caliditate capi.
Quæ forte alterius spes, si sacer ille senatus
Urbisque Quirinalis tota faveret ei ?
Sed procul egregia Deus hoc avertat ab Urbe,
Quæ sub se populos totius orbis habet.
Nil ibi sacra fides damnosum pertulit unquam,
Quo fidei magnus sceptiger ille sedet :
Cujus purpureo fundati sanguine muri
Nec sævas biemes, nec fera bella timent.
Non impar Paulus eadem quæque monia servat ;
Et simul auro tenent imperiale decus.
Tantis principibus commissam cœlitus Urbem
Nullis erroris secta nocere potest.
Vobis ergo, patres, summique Tonantibus amici,
Carmine ac laudis vota referre libet.
Vos etenim spectat spectat ille triumphus,
Quorum pro vestro milite pugna fuit, etc.

Cum videlicet post falsa vulgata miracula, furens Pontius arma quærit, sibi que latrones associans, Cluniacenses invadit, rapit, dispergit monachos atque profligat. Sed audi Petrum ipsum Cluniacensem abbatem ¹, ista in rebus gestis Matthæi cardinalis episcopi Albanensis breviter describentem,

¹ Petr. Diac. l. iv. c. 90, 91. — ² Job. xx.

¹ Petr. Clun. miracul. l. ii. c. 12.

et a regressu Pontii Hierosolymis (quod hoc anno contigit) ita narrantem:

« Tandem jam dictus Pontius transmarinæ habitationis pertæsus, rediens ab Oriente, Occidentem tenebras contra morem invexit. Qui (ut Italiam attigit) divertere Romam nolens, in Ravennatum partibus, hoc est, in episcopatu Tarvisiano sedem sibi constituit, ibi monasteriolo constructo; parvoque in eo tempore demoratus, Gallias repetiit. Explorata demum absentia mea (nam forte tunc in secundæ Aquitanie partibus, Cluniacensibus negotiis insislebam) fingendo se Cluniacum nolle venire, paulatim tamen appropinquabat. Deinde quibusdam fugitivorum sibi adiunctis, armisque vulgariis quos sibi adsciverat constipatus, Cluniacensibus portis improvisus advenit. Quibus effractis, et venerabili sene priore fratribusque aliis ubique dispersis, cum promiscua illa armatorum multitudine, ipsis quoque mulieribus irruentibus, claustrum ingressus est. Ingressus occupat statim omnia, et eos quos reperit, minis, terroribus atque tormentis in suæ fidelitatis cogit sacramenta jurare; nolentes autem expellit, aut duro carceri mancipat. Convertit statim manum ad sacra et anreas cruces, aureas tabulas, aurea candelabra, aurea thuribula, et quæque alia multa multique ponderis vasa invadit, rapit et ipsos calices, maxime sacros, nec thecis, nec scriniis aureis sive argenteis, multorum martyrum ac sanctorum ossa continentibus parit: condat et ex his et similibus auri pondus immensum, et eo circumpositis militibus, vel quolibet auri cupidos ad bellum raptores invitat.

6. « Illis protectus, circumpositis monasterii villas et castra invadit, ac sibi barbarico more religiosis loca subdere moliens, ignibus et ferro, quæ potest, cuncta consumit. Abstinet a nulla bellorum specie, rapinis rerum, cædibus hominum per conductus sacro auro milites ubique dæservit. Consumitur ab ipso initio Quadragesimæ usque ad kalendas Octobris tota in hujusmodi præliis ætas, nec saltem paucis diebus a tantorum malorum calamitate respirat. Manebant jam dictus Bernardus prior, et nobiles religiosi, et magni viri extra Cluniacum, ubi poterant, et in locis tutioribus a tantorum incursu hostium sese pro viribus defendebant. Illic in sancta illa et famosissima Cluniacensi domo, occulto sed justo Dei judicio saltem ad tempus laxatus furebat. » Quid interim ipse Petrus abbas? audi ipsum in Epistola quam scripsit ad S. Bernardum¹: « Assuetus, inquit, sum pati, assuetus et indulgere. Declarat hoc (quod tamen non superbe jactito) de Pontiano schismate, in quod cum innumeri declinaverint, et nefanda ac in ordine monastico inaudita fecerint, nunquam gladium meum, nunquam micronem, nunquam frameam experti sunt; vix unquam verbum aspe-

rum ab ore meo audierunt. Feci hoc tunc, feci et postea sæpe, etsi non de tam gravibus, tamen de gravibus, et juste forsam, nisi tolerantia intercessisset, graviter puniendis excessibus. Facio adhuc frequenter, nec (ut sic dicam) facere hoc assidue cesso, etc. »

7. At quomodo querelis Cluniacensium mala ista perducta sint Romam ad judicium Apostolicæ Sedis, sic idem Petrus¹:

« Decesserat jam e vila suprascriptus venerandus papa Callistus, nec se inferiorem papam Ilonorium acceperat successorem. Illic tantæ Ecclesiæ tantos tumultus audiens, misso de latere suo legato, domino scilicet Petro cardinale, Pontium et Pontianos, qui tunc sic vocabantur omnes, adiuncto sibi Lugdunensi primatæ Hubaldo, terribili anathemate condemnavit: data tamen postmodum die, utramque partem ad subeundum in præsentia sua tanti dissidii judicium, litteris Apostolicis evocavit. Obtemperat statim pars cuncta nostrorum, etc. » Quid autem actum sit Romæ, sequenti anno, servata temporis ratione, dicetur. Jam vero quæ sunt reliqua anni hujus rerum gestarum in medium proferamus.

8. *Rheni liberati a Francis, oppugnante Henrico imperatore qui moritur.* — Henricus imperator memor injuriæ, quod in Concilio Rhemensi a Callisto papa fuisset excommunicatus, in locum ipsum (quod in personas non posset) ulcisci decernit, ipsam Rhemensem civitatem capere, soloque æquare deliberal. At pœnitentia illa post tot sacrilegia perpetrata qualis fuerit, ex ipsis factis agnosce; ut plane nisi Deum esset tandem expertus ultorem, qui eum hoc anno ab humanis abstulit, graviora prelia in Catholicam Ecclesiam ab eo excitanda fuisse, quæ facile conjicere possit. At quomodo rex Francorum Ludovicus, decus Ecclesiæ, precibus potius quam vi armorum tam ingens imminensque periculum evitavit, ex Sugerio S. Dionysii abbate, qui præsens affuit cunctaque scripsit, sic accipe, rem exordiens ab anno superiori:

9. « Ante domini papæ Callisti decessum imperator Henricus, collecto longo animi rancore contra dominum regem Ludovicum, eo quod in regno ejus Rhemis in Concilio domini Callisti anathemate innodatus fuerat, exercitum quantumcumque potest, Lotharingorum, Alemannorum, Bajoariorum, Suevorum et Saxonum, licet ab eis infestaretur, colligit, alioque tendere simulans, consilio regis Anglici Henrici, cujus filiam reginam duxerat, qui etiam regi guerram inferebat, Rhemos civitatem inopinate aggredi machinatur, propensus aut eam subito destruere, aut tanta dehonestatione et oppressione civitatem obsidere, quanta dominus papa in eum agens, læsit sessione. Quod cum domino regi Ludovico intimorum relatione

¹ Petr. Clun. l. vi. Ep. XLVII.

¹ Lib. ii. mirac. c. 13.

innotuisset, tam strenue quam audacter delectum, quem non expectabant, cogit, nobiles adsciscit, causam exponit.

« Et quoniam B. Dionysium specialem patronum, et singularem post Dominum regni protectorem, et multorum relatione et crebro cognoverat experimento, ad eum festinans, tam precibus quam beneficiis præcordialiter pulsat, ut regnum defendat personamque suam conservet, hostibus more solito resistat. Et quoniam hanc ab eo habent prerogativam, ut si regnum aliud regnum Francorum invadere audeat, ipse beatus et admirabilis defensor cum sociis suis, tanquam ad defendendum, altari suo superponatur ¹, eo præsentem, rege scilicet, fit tam gloriose quam devote. Rex autem vix illum ab altari suscipiens, quod de comitatu Vileassini, quo ad Ecclesiam feudatus est, spectat, votive tanquam a domino suo suscipiens, paucam manu contra hostes, ut sibi provideri nolit, ut cum tanta Francia sequatur, potenter invitat ». Et infra post enarratum bellicum apparatus, isla de fuga imperatoris habet :

10. « Publicata igitur tanti et tam tremendi facti deliberatione, tantique delectus fortissimi apparitione, cum hoc ipsum auribus imperatoris innotuisset, simulans et dissimulans, palliata occasione subterfugiens alio tendit, magis eligens ignominiam defectus sustinere, quam imperium et personam ruinâ periclitantem Francorum gravissimæ ultioni suppeditare. Quo Franci comperto, sola archiepiscoporum et episcoporum et religionum prece virorum ab imperatoris regni devastatione et pauperum oppressionem vix se continere valebant. Tanta igitur et tam celebri politus victoria (id enim haud inferius fuit quam si campo triumphasset) Francis repatriantibus rex exultans nec ingratus, adire protectores suos sanctissimos martyres humillime devovit : eisque post Dominum gratias magnas referens, etc. » Subjicit de oblationibus iisdem martyribus datis, de columnis cum cruce erectis in perennem memoriam elusi gratia Christi imperatoris ; insuper et de pio regis obsequio, dum recoudendis sacris reliquiis suppositis humeros lecticis argenteis : atque ad postremum de obitu imperatoris, juxta veterum assertionem, affirmantium usu receptum atque probatum, quod quotiescumque fit ejusmodi publica expositio reliquiarum sanctorum ad malum aliquid evitandum, ejus auctorem intra anni periodum, ulciscente numine, morte mulctatum de medio tolli. Quod contigit Henrico, dum hoc ipso anno, decimo kalendas Junii, ex hac vita migravit, nulla relicta prole mascula, quæ succederet in Germaniæ regnum. Sicque Dei justo judicio defecit Occidentale imperium a Germanis, cum eo ad impugnandam Ecclesiam sunt abusi, et translatus est ad Saxones Romanæ propugnatores Ecclesiæ. Opera enim Alberti archiepiscopi Moguntini, Lotharius dux Saxo-

num regnum accepit, postea vero (ut suo loco dicitur) imperium.

11. *Lotharius regnat.* — Hoc autem anno tertio kal. Septembris, Moguntie rex Lotharius constituitur, præsentibus atque faventibus legatis Apostolicæ Sedis (ut Robertus affirmat) et idibus Septembris coronatur Aquisgrani a Friderico Coloniensi archiepiscopo. Ita Dodechinus, qui et asserit legatos Romam esse missos ad Honorium papam pro confirmatione novi regis Lotharii. Subdit autem hæc Otto Frisingensis episcopus ¹ : « Hic (Lotharius) per omnia progeniem imperatoris Henrici humiliavit, ut plane Dei judicio justo (sicut in libro Regum habes) in peccatis et prævaricatione patrum semen eorum affligi videretur. Unde gravis dissensio regni in multos annos protracta plurimos in anima et corpore periclitari fecit. Unde prædicti Fridericus et Conradus juvenes sororii Henrici imperatoris dum se viderent opprimi, in quantum poterant, reniti conabantur ; ob quam causam a summo Pontifice Honorio, qui Callisto successerat, excommunicantur. Porro Conradus, a fratre ac quibusdam aliis rex creatus, Pyrenæum per jugum Septimi montis, quo Rhenus et Oenus fluvii oriuntur, transcendit, ubi a Mediolanensibus, qui tunc Comanum bellum per decem annos pro afflictione populi utriusque civitatis miserrime protractum, capta ac deleta urbe, prospere consummarunt, honorifice suscipiunt, ac ab eorum archiepiscopo Anselmo Modoici, sede Italici regni, in regem ungitur. At pro his aliisque a summo Pontifice deponitur, et alter in ejus locum subrogatur ». Hæc Otto, additque, quod simul ac Lotharius in Italiam venit, paucis suis quos habebat amissis, vix nec absque sui periculo, in patriam revertendi habuit facultatem. Porro fuisse semper Romanos Pontifices Lothario imperatori eventa declarat.

12. *Joannis Cremensis cardinalis legati in Angliam fama vindicatur.* — Hoc etiam anno decernitur ab Honorio papa legatio in Angliam, quæ credita est Joanni Cremensi presbytero cardinali tituli S. Chrysogoni, a quo pariter mense Septembris celebratum esse Concilium, scriptores rerum Anglicarum affirmant, et aliqui ipsorum magno cum dedecore res ab eo gestas enarrant. Nam præter simoniæ notam, qua ejus æstimationem incurrunt, addunt illud ignominiosum, quod cum in eodem Concilio sancivisset canonem adversus clericos concubinos, in eodemque declamasset, quod magno scelere post celebratum sacrosanctum missæ sacrificium audent se jungere concubine, seu de latere ejusdem surgere ad sacrificium celebrandum, ipse tamen cum eadem die corpus Domini confecisset, post vesperam fuit cum meretrice deprehensus. Scripta hæc reperiuntur primitus ab Henrico Huntidoniense rerum Anglicanarum scriptore ². Rogerius ipso recentior eadem totidem verbis repetit in Annalibus, sed anno se-

¹ Locus obscurus.

¹ Otto I. vii. c. 17. — ² Henric. Hunt. hist. l. vii. hoc anno.

quenti, atque novissime Matthæus Westmonasteriensis de his item agens anno præsentī, addit inanem excusationem ejus, quod scilicet ita in turpitudine deprehensus dixisset, quod non fuerit ipse sacerdos sed sacerdotum corrector. Porro ex tali excusatione convinci mendaciam nemo non videt. Etenim quomodo non sacerdos fuit, quem sacerdotem esse necessitas ipsa coegit, utpote quod esset presbyter cardinalis tituli Sancti-Chrysogoni? vel quomodo non sacerdos, quem dicunt mane incruentum sacrificium celebrasse? certe quidem non numero historicorum veritatem historie consuevimus æstimare, sed quanta fide polleat primus auctor cuiuslibet assertio. Nam reliquos primum sequi auctorem et ejus vestigiis inhærere, frequentiori usu in more positum reperimus. Cum igitur accurate auctorem expendimus, quante fidei esset, qui isthæc primus asseruit, invenimus eum plus æquo, imo inique favere sacrorum ministrorum conjugio, ipsum archidiaconum. Etenim dum ipse agit superius de S. Anselmo, qui in Concilio a se celebrato vetuit conjugia clericorum, mendacissime asseruit, ante illud tempus in Anglia id non fuisse prohibitum, et plures fuisse qui ejusmodi conjugio fuissent. Quod quam falsum sit, nullus ignorat. Itæ dicta sint, ut explorata habeatur auctoris fides. Præterea, si tanto fuisset legatus revera crimine infamatus, quomodo adversarii ejus, ipsi scilicet schismatici fautores Petri Leonis, cum suis scriptis declamasse reperiantur in eos cardinales, qui Innocentium elegerant, inter quorum primos idem Joannes Cremensis habetur annumeratus, tam enorme delictum tacuerunt, ut isti narrarunt, et totidem verbis exprobrare cessarunt? vel quomodo sanctus Bernardus, et alii viri magni nominis ejus temporis scriptores, Innocentique pape fautores, adeo constanter dicere potuissent, sicut numerosiorem, ita et sanctorem cardinalium partem eundem Innocentium elegisse, si tanto scandalo ex eis unus Joannes Cremensis orbem Christianum concussisset? Sed et quod hujus temporis rerum Anglicanarum scriptor Willelmus Malinesburiensis, haud assuetus parcere Ecclesie Romanæ ministris, ejusdem facinoris nullam penitus mentionem fecisse reperiat, nec ibidem diligens auctor, qui adjecit Appendicem ad Florentium, et adeo exacte præ cæteris de singulis rebus gestis in eo Concilio meminuit, perinde ac si eadem interfuisset, hujus evulgati (ut voluit) tantopere criminis aliquid penitus scripserit? certe quidem de eo dubitari verumne sit, vel sparsa calumnia, ut fieri assolet, saltem locum reliquit; quod quilibet amatissimus veritatis non puto negabit. Non vero nec ejusmodi sumus, ut proditiōne veritatis delinquentem quemlibet Ecclesie Romanæ ministrum prodere nolumus, cum nec ipsa sibi hoc vindictæ Romana Ecclesia, ut membra sua et e latere suo legatos missos omni carere turpitudine asserat. Non enim (quod probro ducit Apostolus) amulatur Deum, ut fortior illo sit. Si enim ipse Deus, « qui facit angelos suos

spiritus, et ministros suos ignem urentem », tamen « in angelis suis reperit pravitatem »¹; quid præsumet ipsa, dum angelos suos mittit legatos in mare? secundum illud propheticum²: « Ite, angeli veloces, ad gentem convulsam et dilaceratam », cum sciat ipsa non supernos angelos mittere, sed homines, de quibus est pronuntiatum divinum oraculum, « quod universa vanitas sit omnis homo vivens ». Sed de his satis.

13. *Concilium Londoniense a legato Apostolico habitum.* — Jam vero quæ in eodem Concilio, quod in Anglia per eundem legatum hoc anno est celebratum, fuerint definita, hic describamus, et quidem ex auctore, qui cum adeo exacte præ cæteris res ibidem actitatas recenseat, majorem sibi præ cæteris vindicat fidem, qui a tempore incipiens, sic exorditur orationem:

« Celebratur Synodus Londoniæ, in Ecclesia B. Petri Apostolorum principis, apud Westmonasterium, mense Septembris, nono die ejusdem mensis, id est, quinto idus Septembris, ubi post multarum discussionem causarum promulgata sunt hæc capitula, et ab omnibus confirmata numero decem et septem (xvi). Præfuit autem huic Synodo Joannes de Crema sanctæ et Apostolicæ Ecclesie de titulo Sancti-Chrysogoni presbyter cardinalis, et domini pape Honorii in Anglia legatus, cum Willelmo Cantuariensi et Turstano Eboracensi archiepiscopis, et cum episcopis diversarum provinciarum numero viginti, et abbatibus circiter quadraginta, et cum innumera cleri et populi multitudine. Sunt autem hæc capitula:

« Sanctorum Patrum vestigiis inhærentes, quemquam in Ecclesia per pecuniam ordinari auctoritate Apostolica prohibemus. Interdicimus etiam, ut pro chrismate, pro oleo, pro baptismo, pro penitentia, pro visitatione infirmorum, seu unctione, pro communionem corporis Christi, pro sepultura nullum omnino pretium exigatur.

« Statuimus præterea et Apostolica auctoritate decernimus, ut in consecrationibus episcoporum vel abbatum benedictionibus, seu in dedicationibus Ecclesiarum, non cappa, non tapete, non mantergia, non bacilia, et nihil omnino per violentiam, nisi sponte oblatum fuerit, penitus exigatur.

« Nullus abbas, nullus prior, nullus omnino monachus vel clericus, Ecclesiam, sive decimam, seu qualibet beneficia Ecclesiastica de dono laici sine proprii episcopi auctoritate et assensu suscipiat. Quod si præsumptum fuerit, irrita erit donatio hujusmodi, et ipse canonice ultioni subiacet.

« Sancimus præterea, ne quis Ecclesiam sive præbendam paternam vendicat hereditate, aut successorem sibi in alio Ecclesiastico constituit beneficio. Quod si præsumptum fuerit, nullas vires habere permitimus, dicentes cum Psalmista:

¹ Job. iv. — ² Isa. xlviii.

Deus meus, pone illos ut rotam, qui dixerunt : Hereditate possideamus sanctuarium Dei.

« Adjicientes quoque statuimus, ut clerici, qui Ecclesias seu beneficia habent Ecclesiarum, et ordinari, quo liberior vivant, subterfugiant, cum ab episcopis invitati fuerint si ad ordines promoveri contempserint, Ecclesiis simul et beneficiis earum priventur.

« Nullus in diaconum nisi subdiaconus, nullus in priorem nisi presbyter, nullus in archidiaconum nisi diaconus promoveatur.

« Nullus in presbyterum, nullus in diaconum, nisi ad certum titulum ordinetur. Qui vero absolute fuerit ordinatus, sumpta careat dignitate.

« Nullus abbas, nullus omnino clericus vel laicus, quemquam in Ecclesia ordinatum absque proprii episcopi iudicio præsumat ejicere. Qui autem secus facere præsumpserit, excommunicationi subiacebit.

« Nullus episcoporum alterius præsumat parochianum ordinare aut judicare : unusquisque enim suo domino stat aut cadit. Nec tenetur aliquis sententia, non a suo iudice prolata.

« Nemo excommunicatum alterius præsumat in communionem suscipere. Quod si scienter fecerit, et ipse communione careat Christiana.

« Præcipimus etiam, ne uni personæ archidiaconatus, vel diversi ordinis tribuantur honores.

« Presbyteris, diaconibus, subdiaconibus, canonicis, uxorum, concubinarum, et omnium omnino feminarum contubernia auctoritate Apostolica inhibemus, præter matrem, sororem, amatam, sive illas mulieres, quæ omni carcant suspicionem. Qui hujus decreti violator extiterit, confessus vel convictus, ruinam proprii ordinis patiatur.

« Usuram et turpe lucrum clericis omnibus prohibemus. Qui vero super crimine tali confes-

sus, fuerit convictus, a proprio gradu dejiciatur.

« Sortilegos, ariolos, et auguria quæque sectantes, eisque consentientes, excommunicari præcipimus, perpetuæque notamus infamia.

« Inter consanguineos seu affinitate conjunctos usque ad generationem.... matrimonia contrahi prohibemus. Si qui taliter conjuncti fuerint, separantur.

« Interdicimus etiam, ut viri proprias uxores de consanguinitate impetentes, et testes quos adducunt, non suscipiantur, sed prisca Patrum servetur auctoritas. Placet vobis? Placet. Placet vobis? Placet. Placet vobis? Placet.

« Inde cardinalis, relicta Anglia, Normandiam vadit, ac denuo revertitur Romam. Wilhelmus quoque archiepiscopus, considerans Ecclesiam regni Anglorum in Cantuariensis Ecclesie humiliatione gravi scandalo consternatam, transiit ipse mare, Romam iturus, rebus quæ non æque processerant (ne pari exorbitatione amplius procederent) opem pro posse laturus. Venit ergo Romam, et ab Honorio summo Pontifice, qui Callisto successerat, honorifice susceptus est. Cui idem Apostolicus vices suas in Anglia et Scotia commisit, et Apostolicæ Sedis legatum constituit. Illicque auctor de rebus gestis anni hujus.

Venit quoque Romam hoc anno ad Honorium papam, audita ejus creatione, sanctus Norbertus Præmonstratensium institutor, a quo benigne exceptus est, et antequam recederet, quidquid voluit impetravit de sui Ordinis institutione. In reditu autem idem Norbertus de sua electione in episcopum divinitus emissum oraculum accepit. Hæc pluribus Hugo¹, ejus temporis scriptor, in Vita ipsius.

¹ Hugo in Vita ipsius c. 2. apud Sur. tom. III. die vi Jun.

1. *Pontius olim abbas invadit monasterium Cluniacense.* — A num. 4 ad 8. Questi sunt monachi Cluniacenses *Pontium* eorum olim abbatem, de quo supra egimus, monasterium suum invasisse. De hac invasione Gaufridus prior Vosiensis auctor æqualis, cujus Chronicon Baronii tempore lucem non viderat, hæc scribit, et aliqua singula-

ria de invasore habet : « Contigit Romanum antistitem (nempe Gelasium II) Cluniaco venire, mori ac sepeliri; qui ab abbate (scilicet Pontio) visitatus, aciem oculorum prolixius in illum deflexit (vel defixit) dixitque ei abbas : Quid me aspicias? Æger respondit : Quia video in papatu moriturum. Ex tunc animus Pontii gliscere cepit de præsulatu,

sperans se papam futurum iri. Sed fefellit eum dubia spes. Verumtamen in papatu mortuus est, non ut præsul Romanus, imo captivus et peregrinus. Tumulto Pontifice Cluniaco. archiepiscopum de Vienna (sc. Callistum II) qui erat frater comitis illius ejusdem urbis, summum Pontificem statim cardinales elegerunt. Pontius his contradicere voluit, sed non valuit. Reatum præsul indulsit abbati. Rogatus deinde urbem propriam rediit. Evoluta tempore, quibusdam ex causis Pontius idem adiit papam. Volenti redire Epistolam abbati præsul ostendit, quæ multa de ipso sinistra prodebat. Hæc a Cluniaco delata Romam fuerat nuper, licet occulte. Quam cernens abbas non mediocriter irritatur: etiam renitente Pontifice, domui suæ abrenuntiavit. Roma egressus abiit Hierosolimam. Tunc Cluniaco elegerunt Petrum (cognomento Venerabilem) cujus frater Arnauus prior Cluniacensis, postmodum abbas Magniloccensis, Pontius Vizeliacensis, Jordanus de Casa-Dei exstiterunt. Hi fuerunt de viris nobilibus de Montboissier, quod est castrum in Arvernia.

2. *Honorius II factum illud improbat.* — « Biennii nondum tempore emenso, Pontius ab Hierosolymis rediens expevit Cluniacum. Ejus adventu cognito, Petrus abbas quasdam in partes secessit ad tempus. Bernardus interim abbas, qui fuit quondam Sancti-Martialis, portas monasterii contra Pontium clausit, partibus Petri favebat. Et ecce pars major irrumpit monachorum, Pontiumque suscipiunt januis effractis, Rogerius de Magant (vel Maulant) monachus S. Martialis, et Bernardus vicecomes quondam Combornensis, tunc monachus Cluniacensis, valde sollicitabant animos cæterorum, quatenus de peccatis (alias, pietatis) Pontii recordarentur. Quid replicem cuncta? Tanto pondere debiti laboraverunt Cluniacenses, ut multis Ecclesiæ thesauris exhaustis, aureo non pepercerint Crucifixo. Schismate urgente, audiens ista præsul Romanus (nempe Honorius II, et quidem hoc anno) acciecit utrumque, amboque venere. Pontius Lemovicis veniens abbatem secum Romam ire rogavit. Anlardus Vosias (Vosium monasterium est diocesis Lemovicensis) deveniens in octavis Dei Genitricis, ejusdem Nativitatis octavas ibidem instituit agi, assumptoque Ademaro Vosiensi abbate (qui ideo hoc anno ea dignitate potiebatur, ex quo præcedentium et subsequentium abbatum, quos sine ulla temporaria nota San-Marthani tom. IV Gall. Christ. proponunt, tempora dirigi possunt) Pontium Romæ ambo sequuntur. Et ut breviter multa perstringam, jussu Apostolici Pontius frater comitis de Melgoire sine audientia caplus, in turre, quæ dicitur ad Septem Salas, usque ad obitum, videlicet V kalendas Januarii, in custodia lentus est. Sepultus vero est quasi pauper, imo captivus apud Sanctum-Andream », sed anno sequenti, quo eum vitam clausisse videbimus.

3. *Mittit legatum qui eum excommunicat.* — In paucis a Gaufrido differunt Ordericus lib. 12,

pag. 871, et Petrus Venerabilis lib. 2 de Mirac. cap. 13, cujus verba refert Baronius: « Hic (sc. Honorius II) tantæ Ecclesiæ tantos tumultus audiens, misso de latere suo legato, domino scilicet Petro cardinali, Pontium et Pontianos, qui tunc sic vocabantur omnes, adjuncto sibi Lugdunensi primate Hubaldo, terribili anathemate condemnavit ». Hic Petrus cardinalis diversus a Petro Leonis, quia is cardinalis presbyter erat jam ab an. mccc, juxta Onuphrium, et certo certius an. mccc, ut eo anno vidimus. Petrus itaque legatus a latere, cui causa Pontii ab Honorio II commissa, alius esse non potest, quam *Petrus diaconus cardinalis et legatus*, ad quem divus Bernardus scripsit Epistolam ordine xvn, quia legatio ejus nullo alio per hæc tempora anno peracta esse potuit, quam currenti, ex quo et sequitur eam divi Bernardi Epistolam, quam Mabillonius circa annum mcccvii datam notat, ad hunc omnino annum pertinere. Cumque Epistolæ xvm et xix ad eundem Petrum diaconum cardinalem et legatum a S. Bernardo scriptæ sint, ad hunc annum etiam pertinent, cum anno sequenti *Hubaldus* archiepiscopus Lugdunensis, et *Gerardus* episcopus Engolismensis legatione Gallica functi sint. Mabillonius in Prefat. ad editionem operum S. Bernardi abbatis § 4, n. 39, jam suspicatus fuerat *Petrum* diaconum cardinalem et legatum, cui præfate Bernardi Epistolæ inscriptæ sunt, eum fuisse, qui adversus Pontium abbatem Cluniacensem in Galliam accessit ex mandato Honorii papæ; sed id apud me certum et indubitatum.

4. *Galterus episcopus Magalonensis hoc anno S. Sedis in Gallia legatus.* — Præter Petrum cardinalem, invenio, *Galterum* episcopum Magalonensem fuisse etiam in Gallia sanctæ Romanæ Ecclesiæ legatum; sic enim ipsemet sese appellat in Epistola ad Robertum prepositum insulanum data, et a Mabillonio tom. I Analect. relata, ex qua et annum geste legationis eruo; ait enim Galterus: « Gratia Dei præcedente, per importunum laborem et instantiam nostram, pax inter principes nostros reformata est, unde tota patria nostra letatur », id est, Occitania, quam patriam vocat, quia in ea episcopus erat. Pax autem illa inter Alphonsum Tolosæ comitem et Raimundum hujus nominis III, comitem Barcinonensem ac Provincie, de totius Provincie comitatu inter se decertantes, facta « decima sexta kal. Octobr. Domin. Incarnat. anno cxxv post millesimum », ut dicitur in divisione Provincie inter utrumque comitem tunc peracta, quam exhibent Catellus in Hist. Comit. Tolosæ et Boucheus in Hist. Provincie lib. 9, Sect. 2, cap. 1, quos latuit Galterum episc. Magalonensem ad hanc pacem conciliandam omnem suam industriam contulisse. In ea Epistola Galterus refert Hesselclinum canonicum Insulensem petiisse a se librum, cui titulus, *Flores Psalmorum*, a Leberto compositum. Hesselclinus autem hoc ipso tempore vivebat, ut eruo ex Epist. xxviii D. Bernardi, in qua re-

spondet ad questionem sibi ab Hescelino et Fulcone Sparnacensi abbate factam, « cur ex justis antiquæ legis, solis Macchabeis Ecclesia diem festum decreverit ». Fulco enim : « Octavis Pentecostes, anno incarnati Verbi mxcviii, Indict. v, creatus est primus abbas monasterii Sparnacensis in diocesi Rhemensi siti, quando regula S. Augustini in illud introducta, ut demonstrat Marlotus in metropoli Rhemensi tom. II, lib. 2, cap. 37, ex Instrumento publico, in quo tamen, loco *Indict. v*, legendum *Indict. vi*. Unde Epistola illa divi Bernardi, cujus epocha in novissima editione in margine non notatur, post octavas illas Pentecostes anni mxcviii data. Fuit et hoc anno legatus in Francia *Petrus archiep. Viennensis*, ut patet ex dictis anno mxcvi, indeque unum ex his tribus legatis brevi tempore legationem illam exercuisse oportet.

5. *Henricus imp. bellum movet adversus Ludovicum Francie regem.* — A num. 8 ad 11. *Henricum* imperatorem, non hoc anno, ut autumnavit Baronius, sed superiori adversus *Ludovicum* Francorum regem arma capessisse, docet Sugerius in Vita Ludovici VI Francorum regis, ubi ait : « Ante domini papæ Callisti decessum, imperator Henricus, collecto longo animi rancore contra dominum regem Ludovicum, eo quod in regno ejus Rhemis in Concilio domini Callisti anathemate innodatus fuerat, exercitum quantumcumque potest Lotharingorum, Alemanorum, Bajorum, Sævorum, et Saxonum, licet eis infestaretur, colligit », et cætera, quæ fuscè prosequitur. Chronographus, qui sub Roberti de Monte nomine Francofurti editus fuit, anno mxcv rem summarie his verbis narrat : « Henricus imp. congregata exercitus infinita multitudine, fines regni Francorum irrumpere disposuit. Sed Ludovico Francorum rege cum infinito nihilominus exercitu in occursum ejus properante, consilio principum et episcoporum ab inutili proposito desistit, et hoc factum est mense Augusto ». Meyerus vero in *Annal. Flandr. lib. 4*, ad annum mxcxiv de eodem bello habet : « Profectus est per idem tempus cum exercitu in Galliam Carolus (comes Flandriæ) suppetias Ludovico regi contra Henricum Cæsarem, qui fines ingressus regni, Rhemorum urbem obsidere tentabat ».

6. *Henricus imp. moritur.* — Idem Henricus hoc anno, ut in Chronico Urspergensis legitur, « diem clausit extremum X kalend. Junii. Cujus corpus more regio curatum, Spiram est delatum, et coram multitudine nobilium et inferiorum clericorum atque laicorum, juxta majorum suorum mausolæa honorifice conditum, anno regni sui xx, imperii vero xiv ». Gotfridus Viterbiensis, de quo paulo post, asserit Henricum V obiisse *anno regni ejus xix, imperii vero xiv*, et tamen is in anno imperii xv tunc versabatur. Verum historici annos regni vel imperii incompletos sæpe negligunt; quod quidam critici percrediti non animadvertentes, auctorum loca modo pervertunt, modo ex his quæ

non consequuntur deducunt. Contra vero Urspergensis abbas in annis regni Henrici V numerandis, Julianos eosque non integros recenset, quia in similibus historici nullis legibus adstricti erant. Cunque Henricus V nullos liberos reliquerit, extincta in eo *Liudgarda* Ottonis M. filia propago, ex qua quatuor imperatores orti, Conradus II, Salicus dictus, Henricus III, et duo ejus successores eodem nomine appellati. Urspergensis refert, se eorum Mausolæa Spiræ vidisse, et in quarto sepulchro legisse : « Filius ejusdem (nempe Henrici IV) Henricus V, dictus Junior, Romanorum imperator, anno Dominicæ Incarnationis mxcv, X kalend. Aug. obiit », ubi obitus nomine sepulturam intelligit; quem loquendi modum ab historicis usurpatum esse innumeris exemplis in hoc Opere probavimus, et tanquam unum ex fundamentis Chronologiæ nostræ Pontificiæ proposuimus. Aven-tinus lib. 6 Hist. Bosorum, cui regula illa in mentem nunquam venerat, perperam credidit *Henricum* imperatorem X kal. Augusti mortuum esse.

7. *Mors ejus in annum sequentem differri non potest.* — Ille annus in Falconis Beneventani Chronico vacuus est, et ad annum mxcvii legitur : « Hoc anno imperator Henricus obiit, sed imperiti librarii, quod in anni mxcv fine posuerat, in sequentem translulere, qui error etiam commissus in editione Annalium Fuldensium, ut anno mcccxciv, num. 1 ostendimus. *Henricum enim V*, hoc anno finem vivendi fecisse testantur versus Robertus de Monte, Dodechinus abbas, Anselmus Gemblacensis, Otto Frisingensis, alique. Verum quidem est, Malmesburiensem lib. 1 Hist. Novellæ pag. 175, Matthæum Parisiensem in Chron. auctorem Continuationis Roberto de Monte falso attributæ, Trithemium in Chron. Hirsaug. Helmoldum, Sigonium, aliosque quosdam Henrici V mortem in annum sequentem differre, sed eos falli variæ tabulæ Lothario regnante confectæ demonstrant, uti et quas Rubeus in Hist. Ravenn. lib. 5. Gualterio archiepiscopo sedente scriptas dicit, in quibus legitur : « Anno mxcvi, tempore Honorii papæ et Lotharii regis, die xvi Febr. Indict. iv, Argentæ ». Cum enim omnes de die ac mense, quibus Henricus V mortuus est, inter se conveniant, et mense Februario sequentis Christi anni jam Lotharius regnarit, Henricum V currenti e vivis abiisse oportet.

8. *Tractatur de electione imp.* — Ad num. 11. Electionem *Lotharii* successoris Henrici V narravit Ordericus hoc anno lib. 12, pag. 882. « Eodem anno, inquit, in hebdomada Pentecostes (quod festum hoc anno in diem xvi mensis Maii incidit) Karolus-Henricus V imperator mortuus est, et Spiræ metropoli Germaniæ sepultus est. Imperii vero insignia moriens Cæsar imperatrici Mathildi dimisit, quibus postmodum, quia nulla soboles illi superfuit, Lotharius dux Saxonum generali plebis edicto inthronizatus successit. Moguntinus enim archiepiscopus (nempe Adalbertus), qui potentia et

strennitate pollebat, providentiaque sua, ne schisma vel inordinata surreptio imperii fieret, præcavebat, episcopos et proceres totius regni cum exercitibus suis convocavit, cum quibus una collectis de imperatore constituendo tractavit. Insignia si quidem ab imperatrice procuraverat ornamenta imperii, antequam de tanto presumpsisset negotio fari. Excellentissimi, inquit, barones, qui adsistitis in hac planitie, me, quæso, solerter audite, et prudentem intendentes his quæ dicam obedite. Pro commoditate omnium vestrum et plurimorum qui non adsunt laboro, et nocte dieque anxius cogito. Multis sermonibus hic modo non opus est. Bene nostis, imperator noster sine prole defunctus est: cui Deo fidelis et devotus, Ecclesiæque filiis utilissimus successor sapienter inquirendus est ».

9. *Quatuor ad imper. designantur.* — Refert postea Ordericus *Lotharii* electionem de qua cum non probe edoctum fuisse existimo, eamque addiscendam ab Ottone Frisingensi, et Gotfredo Viterbiensi, horum temporum scriptoribus. Imo Otto Frisingensis frater uterinus fuit *Conradi* ducis Franconia, et *Frederici* ducis Alemannia seu Suevia, qui ad imperium aspirabant. Ut enim tradit Urspergensis abbas in Chron., *Agnes* soror Henrici imp. primis nuptiis juncta fuit *cuidam Friderico nobili de Stophen*, ex qua progeniit Fridericum et Conradum; secundis vero nuptiis sancto *Leopoldo* hujus nominis IV, marchioni Austria, cui inter alios liberos Ottonem, postea Frisingensem episcopum, peperit, qui ideo gesta in hac electione vix ignorare potuit. Otto itaque Frisingensis, quem Baronius sequitur, lib. 7, cap. 17, hæc de electione successoris Henrici V scribit: « Anno ab Incarnat. Domini MCCCXV, defuncto absque hærede Henrico Quinto, principes Moguntia conveniunt (in festo S. Bartholomæi, inquit chronographus Hildesheimensis), ibique habito de successore consilio, quatuor regni optimates, Lotharius dux Saxonum, Fridericus dux Suevorum, Leopoldus marchio Orientalis, et Carolus comes Flandria, ad regnum designantur.

10. *Lotharius eligitur imp.* — « Tandem Lotharius natione Saxo, patre Gebhardo, voto omnium, renitens valde ac reclamans, ad regnum tractus, sub presentia Sedis Apostolicæ legati nongagesimus tertius ab Augusto regnavit. Ille per omnia progeniem imperatoris Henrici humiliavit, ut plane Dei judicio justo, sicut in libro Regum habes, ex peccatis ac prævaricatione patrum, semen ipsorum affligi videretur. Unde gravis dissensio regni, in multos annos protracta, plurimos in animâ et corpore periclitari fecit. Predicti enim Fridericus et Conradus juvenes, sororii Henrici imperatoris, dum se viderent opprimi, in quantum poterant, reniti conabantur. Ob quam causam a summo Pontifice Honorio, qui Callisto successerat, excommunicantur. Porro Conradus, a fratre et quibusdam aliis rex creatus », et cætera de quibus supra. Idem habet Gotfridus Viterbiensis in Chron.

part. 17, qui in Henrico V imp. narrare incipit vel quæ vidit, vel quæ a viris fide dignis accepit, ut ipsemet affirmat Lotharius, ut prodit Dedechnus abbas in Chron. III kal. Septemb. electus, ac Aquisgrani *idibus Septembris inunctus*, rex scilicet Germaniæ; nam nonnisi anno MCCCXIII, Romæ imperator coronatus est. Lotharius secundus hujus nominis fuit. Porro legati a Sede Apostolica missi fuere duo, nempe Eurardus et Romanus, juxta Anselmum Geniblacensem hoc anno. Gesta post comitia his verbis narrat Ordericus citatus:

11. *Fredericus et Conradus duces de tumulibus excitandis cogitant.* — « Dissoluto conventu, exercitus Frederici super Lotharium irrui, ipsumque et plurimos de parte illius vulneravit, et terga vertentes fugavit. Fredericus enim armatorum fere xxx millia secum adduxerat, quia timore vel favore sese regem fore autumabat. Sed quia prohi Pontificis ingenio præventus, ut dictum est, velle suum perpetrare nequivit, per CONRADUM fratrem suum maximam postmodum guerram fecit. Lotharius tamen, auxiliante Deo, prævaluit, meritoque strennitatis et religionis laudabilis jam x annis regnavit ». Ex quibus postremis verbis intelligimus, Ordericum Historiæ suæ librum XII anno MCCCXV elucubrasse.

12. *Concil. Londinense.* — Ad num. 12 et seq. « Imperatrix, defuncto marito, amissis quibusdam quas in dotem acceperat munitionibus, ad patrem (Henricum Angliæ regem), rediit in Normannia. Joannes Cremensis (presbyter cardinalis tit. S. Chrysogoni) accepta ab Apostolico super Britanniam legatione, cum diu in Normannia retentus esset a rege, tandem permissus in Angliam transvehitur, et ab Ecclesiis honorifice excipitur », ait Simeon Dunelmensis in Hist. de Gest. Angl. ad hunc Christi annum, qui postea recitat litteras eidem cardinali ab Honorio II scriptas *Laterani, idibus Aprilis*, in quibus ait se illi committere curam et sollicitudinem eidem a Callisto papa in Angliæ regno commissam. Recitat et alias ejusdem papæ omnibus tam episcopis, quam laicis per Angliam, constitutis *Laterani II, idus April.* datas, quibus monet et præcipit, ut eum tanquam S. Petri vicarium reverentes suscipiant. Super Scotiæ quoque regnum idem Joannes legati suscepit officium, scripsitque Honorius II ad Davidem Scotorum regem, cui rogando mandat, ut episcopos terræ suæ, « cum ab eo vocati fuerint, ad Concilium suum faciat convenire ». Epistola data est *Laterani idib. Aprilis*. « Hac autoritate Joannes predictus » subdit Dunelmensis, « circuei Angliam, etiam ad regem Scotorum David perveni apud fluvium Twedam, qui Northymbriam et Lotham disterminal, in loco qui Rochesbruch nominatur. Ubi officio legationis peracto, rediens apud Londoniam celebravit Concilium », ait Simeon Dunelmensis qui illud recitat, adhibere habitum « anno xxv Henrici Anglorum regis, mense Septembri, nona die ejusdem mensis, et anno ab

Incarnat. Dom. MCXXVI ». Sed legendum MCXXV, et XXVI Henrici Anglorum regis, cum ibidem dicatur congregatum esse *Pontificatus domini pape Honorii II anno primo*. Eidem præfuit idem legatus, interfuere Turstinus Eboracensis, et Willelmus Cantuariensis archiepiscopi, episcopi numero XX, et abbates circiter XL, *cum innumera cleri et populi multitudine*. Conditæ in eo capitula numero XVII, de reformandis pravis Ecclesiæ moribus. His Synodali decreto firmatis *Joannes Cremensis* legatus Romam reversus est. Hoc Concilium cum præsentī anno accurate illigarunt annalista Mailrosensis, Henricus Huntindoniensis in Hist., et novus chronographus Saxo, qui addit illud tres dies integros durasse, et in eo sanctitos eodem canones, quos sanctus Anselmus olim sanxerat, aliosque multos; verum illos *haud diu* mansisse.

13. *Floret B. Carolus Bonus Flandriæ comes*. — *B. Carolus*, cognomento *Bonus*, Flandriæ comes aut marchio, ut etiam appellabatur, hoc tempore florebat, tantumque illi egregiæ quibus exornatus erat virtutes famam pepererant, ut mortuo Henrico V imperatore, plerique Germanorum de eo in locum ejus substituendo cogitarent, ut narrat Galbertus Brugensis, et urbis suæ publicus notarius, ac in plerisque testis oculatus, in Vita ejusdem B. Caroli, a Bollando ad diem II mensis Martii recitata. Narrat enim sapientiores ex clero et populo legatos ad eum misisse «*expostulantes et obsecrantes potentiam et pietatem ipsius, ut imperii honores et dignitates regias cum suis facultatibus pro sola charitate assumeret* ». Verum subditi, qui eum ut patrem venerabantur, ceperunt dolere et discessum ejus delectare. «*Remansit itaque in comitatu suo Carolus comes pro expostulatione suorum dilectorum pacem et salutem patriæ quantum in se erat, omnibus demandans et constituens* ». Addit Galbertus, postquam Balduinus II rex Hierosolymorum a Saracenis captus fuit, milites, «*qui militiæ Christianæ ibidem studuerant* », communi consensu litteras ad Carolum direxisse, ut Hierosolymam veniret, et regnum Judææ assumeret; querebantur enim, quod Balduinus non bene *rexisset populum Dei*, licet scriptores rerum Hierosolymitanarum Balduinum valde laudent. Verum *Carolus* Flandriam deserere noluit, ubi tamen eum a quibusdam traditoribus occisum fuisse post biennium referemus.

14. *Moritur S. Bruno episc. Signiensis*. — Hoc anno mortuus est *S. Bruno* episcopus Signinus, pietate et doctrina clarissimus. Ughellus tom. I Italiae Sacrae hoc anno mortem ejus consignat, sicuti et Angelus de Muce in Notis ad Chronicon Casinense, ubi tamen non annus mortis ejus, sed tantum dies, videlicet *prid. kal. Septembr.* notatur Casini die XVII Julii, quo et in Martyrologio Romano memoratur, colitur. Hic tamen dies non ejus mortis, sed ejus canonizationis. Signiæ hæc Inscriptio adhuc legitur: «*Æternæ memoriæ Brunonis, quem Lucius III Pont. max. cardinalium et*

episcoporum conventu Signiæ in Ecclesiæ B. Mariæ, ubi defunctum corpus quiescebat, inter sanctos jussit adscribi anno ab ejus abscessu LVIII, S. P. Q. S. (Senatus populusque Signinus) », ideoque Bruno anno MCXXXII in sanctorum numerum relatus. Postquam aliquot per annos pastoralis munus gessit, Cassinum migravit ac religiosam vitam professus electus est Cassinensis abbas. Verum ad populi postulationem jussus est a Pontifice Rom. in Ecclesiam suam redire. Varia ingenii sui reliquæ monumenta a Labbeo in Dissert. de Script. Eccles. memorata, qui et observat aliqua ex eis *S. Brunoni* Carthusiani Ordinis institutori adscripta fuisse. Baronius anno MCXI, num. 32. de sancti Brunonis episcopi Signiensis morte mentionem facit, sed annum, quo ea contigerit, non designat.

15. *Franci præliantur sub Alphonso Aragone adversus Mauros*. — Ordericus initio Libri XIII, victoriam Alphonsi VI Aragoniæ regis ad *Penecadel* de Saracenis relatam narrat, sed annum non exprimit, et in aliquibus circumstantiis peccat. Verum antiqua Monumenta Hispaniensia a Sandovalio in Alphonso VI memorata et Marmolus I. 2, cap. 33, præsentem annum discrete signant. «*Saraceni* », inquit Ordericus, «*comperto recessu Francorum, animosiores effecti, rursus aggressi regiones Christianorum, vires suas ostenderunt cædibus multorum. Porro erubescences Aragonii viribus hostium oppressi, Francos iterum accersierunt, eisque pro perpetrata olim contumelia satisfecerunt, et jurejurando terras et honores dando denominaverunt. Comes ergo præteritæ vitæ et injuriæ immemor, amici et consobrini legationem suscepit, et secum ingentem exercitum undecumque collectum adduxit, et contra paganos pugnaturus in terram eorum audacter intravit. Porro Hispani de tanto auxilio gaudentes, Francos alacriter susceperunt, transactosque reatus emendare volentes in urbibus suis Toledo et Tudela, necnon Pampelona, oppidisque suis hospitati sunt, et amplos honores ac possessiones eis tradiderunt. Illi nimirum otia vilantes, in initio æstatis in unum congregati sunt, ethnicosque de suis finibus cruentis ictibus expulerunt, et talionem eis reddiduri terminos illorum pertransierunt. Pro illatis autem damnis et contumeliis, Deo favente, multimodam ultionem exercuerunt: et in regionibus eorum magnam libertatem invenientes victus omniumque rerum, hyemem præstolati sunt ». Hæc Ordericus, cujus narratio, licet quoad sententiam vera, in circumstantiis tamen peccat, cum *Tutela* Francis statim post Rotroci comitis adventum tradita fuerit, ut patet ex dictis anno MCXIV, ubi retulimus quæ paulo ante ibidem Ordericus narrarat.*

16. *Saraceni ad Penecadel victi*. — Pergit Ordericus: «*Tunc Rotro comes Moritornæ cum Francis, et episcopus Casaraugustanus cum fratribus de Palmis et Guazso de Biara (legendum Gastone de Biara, Bearnie vicecomite) cum Gascenis, Penecadel, ubi sunt duæ turres inexplu-*

gnabiles munierunt, et sex septimanis tenuerunt. Tandem pugnantes contra Amorgan regem Valentie, per Satinam (corrige *Sativam*, quæ *Nativa* et *Chatiba*, et *Setabis* appellatur, a Valentia novem leucis dissita) urbem convenerunt: sed pagani antequam ferirentur fugerunt. Relictis autem in munitione Pemecadel LX satellitibus, redierunt. Sed Amoravii et Andeluciani de Africa missi a rege Alis, filio Insted », hic locus a librariis manifeste corruptus; Andeluciani enim Hispani sunt, et Almorabite Africani. Quare legendum, « Almoraviti et Andeluciani de Africa missi a rege Alis, filio Jusset (aut Joseph) etc. eis obviaverunt, triduoque in castro Serranis obsederunt. Christiani vero his tribus diebus peccatorum suorum penitentiam egerunt, jejunaverunt, et Deum invocantes XVIII kal. Septembris pugnaverunt, et adimiculante cælesti virtute post diurnum certamen, dum sol occumberet, vicerunt: sed fugientes paganos, nocturna formidantes pericula, per incognita itinera diu persequi ausi non fuerunt ».

17. *Complures Galli sedes in Hispania figunt.* Prosequitur Ordericus: « Prædie ante generalem pugnam Guarinus Sancio, vir in multis laudandus, cum fratribus DE PALMIS in montana ascendit: ibique Christianis cum virtute Dei præstantibus, Alamannus rex cum CLV milibus peditum victus aufugit. Innumeri de tantis paganorum legionibus perierunt, aut armis persequentium, aut præcipitiis, aut nimia lassitudine, vel siti, vel aliis generibus mortium. Sic Afri, qui suppelias idololatriæ Hiberis (id est Sarracenis Hispanis) venerant, interierunt, et Christianorum telis in Orcum demissi, cum regibus suis gehennæ poenas luunt. Deinde Normannorum quidam et Francorum loca sibi opportuna perquisierunt, et ibidem ad habitandum sedes elegerunt ». De equitibus Ordinis militaris S. Sepulchri, ab Orderico *Fratribus de Palmis* appellatis, qui in hoc prælio magnam sibi gloriam peperere, anno MCXX verba fecimus. Instituti erant Templariorum exemplo adversus infideles in variis Aragoniæ locis, ut Diagus, Buternis, et Joannes Britz in Historia Pennatensi ostendunt.

18. *Fiundatur urbs S. Dominici de Calciata.* — *Æra* MCXLII, hoc scilicet Christi anno, urbs Sancti-Dominici de Calciata, vulgo *S. Domingo de la Calzada dicta*, in qua sanctus Dominicus Calciatensis anno MCIX demortuus quiescit, fundata fuit in Rioja, provincia Hispaniæ, Castellæ veteri annexa, ut refert Sandovalus in Alphonso VII, fol. 138, ubi celebris hujus civitatis, quæ hodie pars est episcopatus Calahorrensis, initium reperit a Diplomate sancti Dominici Calciatensis, ut circa hujus sancti sepulchrum urbem civibus pro-
pagare posset.

19. *Anselmus archiep. Mediolan. dicit se non teneri petere pallium.* — Anselmus anno MCXXIII Mediolanensis archiepiscopus electus fuerat, ut jam diximus, sed Mediolanensibus Ecclesiam suam eatenus Romano Pontifici subijci, sed juris sui

esse prætendentibus, ut pallium Romanus Pontifex petenti archiepiscopo mitteret, Romam sese conferre distulerat; verum hoc anno « secutus consilium quorundam capellanorum et primicerii, Petri quoque Terdenensis episcopi, contra publicum interdictum cleri et populi Mediolanensis (res mira!) Romam ivit », inquit Landulphus Junior in Monument. Basilicæ Ambrosianæ pag. 174. Paulo post subdit Landulphus: « Veruntamen ipse, cœn vir prudens et sapiens, cum papa Honorio et cardinalibus ejus multa contulit; et conferendo Ecclesiasticas consuetudines Ambrosianæ Ecclesiæ, et honores ejus archiepiscopatus et urbis, vivis et bonis rationibus defendit. Unde ipse papa huic prudenti viro dixit: Frater, meditatus et episcopus venisti: sed si vis frui auctoritate archiepiscopi in temporibus meis, necesse est ut stolum suscipias de manibus meis; aut sicut ego suscepî, ad altare sancti Petri. Hinc domnus iste Mediolanensis Robaldus Albensem (episcopum Albæ in Monteferrato) adjuravit, ut sibi consuleret. Tunc Robaldus ille Albensis sic ait, quod prius sustineret nasum suum scindi usque ad oculos, quam daret sibi consilium, ut susceperet Romæ stolum, et Ecclesiæ Mediolanensi præpararet hanc novam et gravissimam, quam Honorius papa dicebat sibi, imponere mensuram.

20. *Purgat se apud Mediolanenses prævaricationis culpa.* — « Mediolanum igitur iste Anselmus archiepiscopus sine stola rediit, et eundem Albensem episcopum secum reduxit. Verum archiepiscopalem sedem non ascendit ». Hinc Puricellus citatus deducit, ideo Anselmum sedem illam non ascendisse, quia tantum electus erat, et non consecratus. Sed ex mox dictis liquet, Landulphum intelligere eum sedem non consecrasset, quia clerus et populus pati volebat archiepiscopum jurium Ecclesiæ suæ prævaricatorem, qualem Anselmum reputabant, ac donec sese purgasset reputarent. Anselmum enim jam ordinatum fuisse, ostendunt prælata verba: « Meditatus et episcopus venisti, donec Ubertus de Meregnano ejus scriba juravit, quod ipse domnus suus Anselmus nullo munimento honoris Ecclesiæ Mediolanensis consensit (qua de re solum tunc agebatur); et quod ipsum Albensis ille episcopus Robaldus auctoritate sua confirmavit. Deinde pontifex iste Anselmum sedem et castella archiepiscopatus, in beneficio cleri et populi recuperavit ». Idem clerus ac populus, qui eum sede archiepiscopali et redditibus spoliarent, ipsimet utrumque ei reddunt, *beneficio cleri et populi*, postquam sese prævaricationis crimine purgavit, tuncque, ut legitur in Catalogo, tam metropolitani archipresbyteri quam urbis secretarii, a Puricello citato, « hic (Anselmus) cum magna comitiva nobilium Mediolanensium in festo S. Michaelis per portam Ticinensem intrans, in sede sua collocatur, ut mos est in talibus ». Quibus ex verbis Puricellus perperam infert eum antea in eadem sede non sedisse. Porro ut videre est apud

Puricellum, prætendebant Mediolanenses ut Romani Pontifices petenti archiepiscopo pallium mitterent, exemplo sancti Gregorii anno dxciv, Joan-

nis XII ann obccccxxx, et Paschalis II anno mc; quis rei exitus fuerit, infra videbitur.

HONORII II ANNUS 2. — CHRISTI 1126.

1. *Legatus Apostolicus missus ad componendas res monasterii Cassinensis : et inde tumultus et rixæ.* — Vicesimus sextus post millesimum centesimum annus adest, Indict. quarta, quo Honorius papa Romæ degens, duorum præcipuorum abbatum, Cassinensis et Cluniacensis, causas cognoscens, eosdem lata sententia condemnavit. Quod autem in primis ad Cassinensem pertinet, præter illa quæ superius dicta sunt, rem sic habelo ex Petro Diacono Cassinense¹ : « Pontifex autem cum Nicolaum electum ignoraret, Gregorium cardinalem tituli Apostolorum ad monasterium dirigens, mandat ut ejusdem consilio Seniorum Capuani monasterii prepositum abbatem fratres eligerent, ex cuius promotione et Deus honoraretur, et religionis status in famoso Cassinensi monasterio roboraretur, bonaque Ecclesiæ tam spiritualia quam temporalia in dies auferentur : ipse pro viribus monasterio favere semper paratus esset. Veniens autem cardinalis ad monasterium, fratribus quid papa præceperit nuntiat. Quod dum fratres audissent, murmur inter eos protinus oritur, dicentes, non debere Cassinensis abbatis electionem in alterius potestatem transire; iniquum et indignum esse, ut Cassinensis Ecclesia, quæ libera semper extiterat, maximo pudore cardinalibus subiceretur ». Dicere veriti sunt papæ, vel addere (quod erat) cardinalibus legatis Apostolicæ Sedis, quibus episcopos, archiepiscopos, et patriarchas parere necesse esset. Ut plane redarguendi fuissent magnæ ingenii tarditatis et imperitiæ, vel mentis nimis elate fastus. At Gregorius cardinalis ratione potius eos vincendos, quam cohibendos auctoritate putavit, cuius tunc ad eos habitam orationem sic recitat Petrus :

2. « Tunc ille, imperato silentio, fratribus dixit : Ego luc neque pro papæ Honorii lucro,

neque pro Romanæ Ecclesiæ honore, sed pro salute animarum vestrarum, si permittatis, adveni. Romana enim Ecclesia vestro auxilio et laude non indiget, quæ præconium laudis in Petro ex ore ipsius Redemptoris emeruit. Quænam autem Ecclesia, vel monasterium, a Romanæ Ecclesiæ non disponatur arbitrio, cuius imperio cælum ipsum aperitur et clauditur? Omnes quippe Ecclesiæ a Pontificibus, imperatoribus, regibus, vel quibuscumque fidelibus condite sunt : Romanam vero Sedem solus fundavit Filius Dei, et super Petri Apostoli erexit fidem, cui etiam terreni simul et cælestis imperii jura commisit : et illud Verbum, quod condidit cælum et terram, Romanam fundavit Ecclesiam. Atque ut omisiss cæteris, ad ea de quibus nunc agitur veniamus : sicut Apostolorum principes Petrus et Paulus Romanam Ecclesiam suo sanguine consecrarunt, ita Cassinense cœnobium per beatum Benedictum, qui Romæ doctus fuerat, et per cives Romanos Maurum et Placidum habuit fundamentum. Neque illud ignoratis, quod destructo a Longobardis monasterio, fratres juxta Lateranense palatium centum ferme et triginta annis habitaverunt. Ac demum Cassinensem Ecclesiam non alii quam Romani Pontifices extruxerunt, Gregorius scilicet et Zacharias. Quæ rursus a Saracenens incensa, iterum a sancto Agapito est restaurata. Cum igitur hujus cœnobii fundatores ex Romanæ Ecclesiæ disciplina prodierint, ejusque instauratores Romani Pontifices fuerint, consequens est juxta sanctorum Patrum instituta, ut Ecclesia Romana mater et domina, Cassinensis autem ejus spiritualis appelletur filia. Revolvite Cassini cuncta monimenta, scrutamini Annales, et an ita se habeant res, ipsi judicate : sin autem se aliter habent, mendacii arguite. Sin vero habent ut dixi, nolite veritati resistere, nolite Romanæ Ecclesiæ repugnare, nolite ejus jussionibus contraire, sed ex cuius uberibus fidei juramenta

¹ Petr. Diacon. l. iv. c. 91.

cepistis (elementa suxistis), ejus jussis per omnia obtemperare curate». Hæc Gregorius, factus tanquam parvulus in medio eorum (ut Apostolus ait ¹), hisce rudimentis eos imbuiere, et demulcere verbis pro viribus studuit animo elatos et iratos, cum illud satis ad justitiam inculcasset. Si quidquid sunt monachi Cassinates, protecto privilegiis Romanorum Pontificum existere convincuntur: quid ergo in eos superbe resilire contenderent? Porro Gregorius ipse revocatus in Urbem, legatur in Gallias una cum Petro Leonis, de quorum legatione inferius in fine anni hujus dicturi sumus.

3. Quantum autem illi Gregorio auditio profecerint, audi ex eodem eorum diacono Petro: «Tunc, inquit, fratres, temporis objecta necessitate, Apostolici voluntatem se impleturos pollicentur, dum tempus opportunum viderint. Sique discessum a capitulo est». At quantum nocuerit non statim capessisse mandata Pontificis, ex iis plane tragicis, quæ subicit idem Petrus, intelliges: cum videlicet duo illi abbates, Olerisius et Nicolaus, acerbissimo contra se invicem odio concitato, ad comparandos armatos omnem monasterii thesaurum dilapidant atque dispergunt. Nam audi spectantem ista omnia Petrum Diaconum ²:

4. «Olerisius vero, cognita Nicolai electione, agiler ad arcem quæ Bantram dicitur penetrat, et pecunias large distribuens, undecumque milites collegit, igni et ferro cuncta Nicolai fœventia castra demoliri solotenus cœpit. Nicolaus hoc agnito, Robertum Jordanis principis filium in suum auxilium evocat, atque ad monasterium dirigens, ad se deferri jussit aquimanilia argentea librarum novem, quæ Savinus (ut supra diximus) beato Benedicto donaverat, aquimanilia argentea Stephani papæ, altare aureum cum gemmis pretiosis, calicem aureum librarum quatuor, calicem magnum Saxonicum, quem Theodoricus Saxonum rex beato Benedicto transmiserat, Epistolarium aureum Desiderii abbatis, textum Evangelii Henrici imperatoris cum gemmis pretiosis, Evangelium aliud, thuribula argentea novem, coronas argenteas totidem, ponderis alias novem, alias duodecim librarum, quas Otto imp., Hugo marchio, alique fideles sancto Benedicto obtulerant; calicem librarum novem, alios calices quinque, conchas librarum septem, candelabrorum paria tria, coronas quatuor, singulas librarum decem et octo; conchas duas librarum octo, cucullum librarum sex, textum Evangelii, scutellum magnum, arcum ducis cum aquimanili suo. Hæc omnia argentea, crucemque auream ab Ecclesia abstrahens, et castrum non recuperavit, et grave contra se odium monachorum excitavit». Quid demum post animositates, bella, incendia atque cedes? «Olerisius», subdit Petrus ³, «cerneus Romanum Pontificem in omnibus sibi adversari, sera ductus poenitentia, Romam perrexil, prostratusque illius

pedibus, abbatiam in manibus ipsius renuntiavit, etc.» Nicolaus non sic, sed in schismate perstitit. De quo idem Petrus inferius:

5. «Comperto Honorius monasterii negotia quotidie in deteriora proficere, eundem Nicolaum ut inutilem ab officio removit abbatibus, fratribusque mandavit, ut si sibi parere suæque ordinationi stare vellent, nobili et antiquo beati Benedicti monasterio tam in spiritualibus quam in temporalibus instaurando tota intentione studeret». Monachi igitur suo damno experti, quam malum et amarum esset reluctari Sedis Apostolicæ obedientiæ, in omnibus Honorio papæ parere deliberant. Nam de eis pergit Petrus: «Fratres, qui Nicolaum ob thesaurum dissipatum et amissam terram jamdudum exosum habebant, venienti ad monasterium janua in faciem claudunt, Honorioque renuntiant ut veniat, se suæque in ejus potestate permittentes. Ille latior factus, Matthæum episcopum Albanensem ad monasterium dirigit, mandatque fratribus, ut quem ipse idoneum ex Romanæ Sedis auctoritate censeret, hunc ipsi omni mora sposita eligerent». Quod et factum. Nam ab Honorio papa propositum abbatem illum Capianum, de quo superius, Senioretem nuncupatum, sibi elegerunt abbatem, quem ipse Pontifex Cassinum pergens, profecturus Beneventum, sacris ritibus consecravit, hæc omnia excessere limites anni hujus: nam Nicolaum sedisse annum unum, mensem unum, et dies sexdecim, idem Petrus affirmat ⁴.

6. *Petri Cluniacensis causa judicata, damnatio et obitus.* — Jam vero quomodo ejusdem Apostolicæ Sedis judicio, hoc anno, Romæ definita fuerit Cluniacensium causa, dicendum. Ipsum enim Pontium invasorem, excommunicatum, vi tractum Romam ad iudicium subeundum, anno superiori dictum est ex Petro abbate Cluniacensi, rem gestam exacte scribente, qui pergit de Cluniacensibus Romam missis, ad dicendam causam vocatis ⁵: «Obtemperat statim pars cuncta nostrorum, et inter innumeros monasteriorum priores, causa cujus hæc interjecta sunt, jam dictus venerandus Matthæus advenit. Adest et Pontius licet invitus cum suis. Et denominata die, ut iudicium subeat advocatur. Præcipitur tamen, ut quia excommunicatus nec agere, nec iudicium canonice subire potest, prius satisficiat, et satisfaciendo se vinculo quo jure virutus fuerat solvat. Mittuntur a papa nuntii, et ex parte mittentis, ut de tantis malis satisficiat jubent. Respuit ille, nec se ab aliquo vivitum anathematis vinculo vinciri posse affirmat: solum esse Petrum in cælis, præter quem nulli hoc licere fateretur. Commoto multo magis tali ejus responso domino papa, totaque simul inde Urbe turbata: non solum excommunicatum, sed et schismaticum euncti proclamant. Et quia (ut dictum est) nisi solutus ad iudicium admitti non poterat, suos qui cum eo venerant, utrumquod ille volebat, illi sal-

¹ 1. Thess. II. — ² Petr. Diac. I. IV. c. 91. — ³ Ibid. c. 91, 92.

⁴ Petr. Diac. I. IV. c. 91. — ⁵ Petr. Cluniac. I. II. Mirac. c. 13.

tem satisfacere vellent, responsum missis dominus papa nuntiis querit. Qui statim pro ejus imperio paratos se esse respondent. Intrant ergo palatium nudis pedibus cuncti, et reos se in conspectu universorum fatentes, protinus absolvuntur. Absoluti causam ingrediuntur, et nihil quod vel sibi, vel illi pro quo agebant suffragari posset, intactum relinquunt.

7. « Assumit sibi ex parte alia vocem universorum venerandus Matthæus, et sapienter de tota causa perorat. Surgit statim auditus partibus papa, et tota Romana curia sibi adjuncta, ad rem examinandam in partem secedit. Moratur diu, redit cum cunctis post aliquot horas ad Sedem; ut inventam ex consilio sententiam ferat Portuensi episcopo jubet. Fert ille jussus sententiam, et ut ipsa ejus verba referam: Pontium, inquit, invasorem, sacrilegum, schismaticum, excommunicatum, ab omni Ecclesiastico honore vel officio sancta Romana et Apostolica Ecclesia in perpetuum deponit, et Cluniacum, monachos, vel cuncta ad idem monasterium pertinentia, abbati qui in presentiarum est, cui injuste subtracta fuerant, restituit. Data sententia, uniuersum qui divisi fuerant, et velut in momento reintegrato Cluniacensi corpore, tantum tanque diutinus malorum turbo sedatur. Irruit post paucos dies tam in victos quam in victores Romanus ille pestifer morbus, et pene omnes tam monachos quam famulos in brevi prosternit. Invadit vix elapso mense et dominum Pontium, paucisque diebus interfectis, exstinguit. De cujus fine Epistolam mihi a supradicto beate memorie papa Honorio directam (si forte ejus nobis utilis judicatur) adjungo.

8. « Honorius episcopus, servus servorum Dei, dilecto filio Petro Cluniacensi abbati, salutem et Apostolicam benedictionem.

« Præterito mense Decembri, Pontius viam universæ carnis ingressus est, qui quamvis de malis Cluniaco illatis sæpe commonitus, poenitentiam agere noluerit, nos tamen pro reverentia ejusdem monasterii, cujus monachus fuerat, eum honeste sepeliri fecimus. Data Laterani ». Ille finis Pontii infelicissimi, de quo, loco Epitaphii sepulchralis, hos tunc cecinit versus Petrus Pictaviensis:

Grande lucrum facinus, quia causa schismatis hujus,
Corruit ex toto perfidus ille draco.
Cumque caput lubricum sustollere nititur anguis,
Rumpitur, et moriens atra venena vomit.
Interrere nigri præstigia sava colubri,
Nec patitur monstrum vivere Roma diem.
Sed mox ancipiti gladio fera colla trucidans
Defendit Petrus ab hoste suum.

9. *Matthæus episcopus cardinalis Albanensis ex monacho Cluniacensi.* — Ex his autem malis tulit illud Ecclesia Romana compendium, ut ex monachis Cluniacensibus Matthæum illum, qui ea de causa Cluniaco Romam venerat, virum sanctissimum acceperit in cardinalem, ejus vitam plane mirandam ipse qui supra

Petrus Cluniacensis abbas scriptis mandavit. Qui enim ob defensionem suorum Cluniacensium cum primarii abbatis præceptum una cum aliis in Romanam curiam intulisset (quod non possit abscondi civitas supra montem posita) cum qualis esset, ipsi Honorio papæ optime innotuisset, eundem statim absoluta causa creavit cardinalem episcopum Albanensem. De cujus promotione, et vilæ monasticæ instituto retento, accipe quid Petrus dicat¹:

« Causa jam dicta Matthæus tractus ad Urbem, ea sic definita, redire cum sociis ad propria festinabat. Sed qui nescientem vocaverat Deus, reditum impedit, et quia super pauca fuerat fidelis, eum super multa ut expertum dispensatorem promovit. Injungit ei cum honore nominandum papa Honorius majoris honoris et oneris pastorem curam, et eum labori suo socium adhibens, in episcopum Albanum consecrat. Profectus ergo ad sublimem pontificalis ordinis gradum, et super Ecclesiæ candelabrum ad lucendum omnibus qui in domo erant, magnifice exaltatus, nihil de monacho quorundam more dimisit, sed sicut de magno Martino legitur, eadem in corde ejus humilitas, eadem in vestitu ejus vilitas mansit. Nihil de officiis, nihil de cantibus, nihil de prolixâ Cluniacensi psalmodia quorumlibet curarum prætextu reliquit. Servabat in palatio instituta claustrum, et mundo expositus, firmo et longo usu velut innato religionis, proposito a sæcularibus se vanitatibus quasi septo firmissimo scecernebat. Cohibebat se intra se, nunquam (sicut de quodam dictum est) magis solus quam cum aliis, nunquam negotiosior quam cum solus erat. Præferebat cunctis operibus suis, omnibusque sanctis studiis sacrificandi Deo illum suum quotidianum usum, a quo nec rei familiaris cura, nec multiplex occupatio, nec ipsa continua post summum Pontificem omnium Ecclesiarum sibi imposita sollicitudo eum retrahere poterant. Conquerebatur inde sæpius papa: et aliis ad curiam mane ex more convenientibus, ipsi ad horam tertiam vix occurrenti, quod plus nimio esset monachus, velut improprie. Nec hoc tantum Romæ, sed etiam ubique terrarum studiose servabat. Urebat sæpe æstivis diebus acriore Italici solis ardore, quod matutinas in his sacris officiis occupans horas, extrahi ab Ecclesia circa sextam quandoque horam vix poterat. Et quia non solum simplex religiosa innocentia, sed et prudens erat singulari sapientia, mittebatur sæpe a magistro ad diversas partes orbis terrarum et vices Apostolicas, in partem ab eo vocatus sollicitudinis, prudenter administrabat. Quorum prima illa fuit legatio ejus, cum mox (ut audisti) ad conciliandos Cassinenses monachos ab eodem Pontifice militum, reque bene et ex sententia gesta, ad ipsum Romam rediit. De reliquis autem suis locis dicetur inferius. Ut plane appareat ex cunctis rebus ab eo bene gestis, ejus in cardinali electione magnopere illustra-

¹ Patr. Clun. l. II. Mirac. c. 14.

tam fuisse Romanam Ecclesiam. Sed de his hactenus.

10. *Quæ inter Cluniacenses et Cistercienses dissidia.* — Hoc eodem accidit tempore, ut inter Cluniacenses et Cistercienses monachos graves dissensiones orirentur occasione observationis regulæ sancti Benedicti, sub cuius stipendiis, licet sub habitu diverso, uterque Ordo militaret, alter¹ alterum² redarguens inobservantia atque prævaricationis ejusdem. Verum non eo processit ista contentio, ut inter eos charitas scinderetur, quinimo magis magisque, ut bene fixa radice arbor ventis consolidatur, inter eos firmata fuerit et stabilita; quamvis humani generis hostis causas plurimas discordiarum diversis temporibus (ut inferius apparebit) subministravit. Fuit inter alia illa prima, qua his diebus sanctus Bernardus valde pernotus est, cum ipsi Cluniacenses pellerent (ut nuntiatur Bernardo fuit ejus affluens monachum Cisterciensem, et seduxissent blanditiis, ut transiret ad Cluniacenses, pro qua re et dispensationem Apostolicam impetrassent. Tulit plane animo indignissimo id factum Bernardus, atque ad revocandum adolescentulum scripsit primam ordine positam Epistolam, quam sicut afflatus Spiritu sancto dictavit; ita Dei esse opus, quod pericere conaretur, miraculi perspicua evidentia est declaratum. Cum enim sub dio dictaret illam sereno caelo, et inter dictandum improvisa oborta pluvia amanuens a scribendo cessaret, et inde recedere vellet ad lectum locum, prohibuit eum sanctus illud usurpans: «Opus Dei est, curat ipse sua. Quo factum est, ut renovatum fuerit miraculum exhibitum Gedeoni, cum undique madente terra densis imbris, charta illa, in qua Epistola scribebatur, neque gutta pluvie ostendi potuit esse læsa.

11. Factum est autem, ut cum eadem Epistola ad Cluniacense perlata esset monasterium, lectaque ab ejus abbate Petro, viro plane religiosissimo, sanctoque Bernardo (quantum humano judicio potest intelligi exscriptis, magisque ex rebus ab eo præclare gestis) charitate non impare: tantum abest, ut ex eis turbatus animo, adversus ipsum indignationem conceperit, quin magis compassus fuerit, ei que indulgendum duxerit, adeo ut non ipsum Robertum solum restituerit, sed et alios concesserit monachos, qui apud se essent, quos sciret eidem sancto Bernardo esse charissimos. Quinam autem isti fuerint, quos benigne ad Cistercienses ex Cluniacensibus redire fecerit, recenset idem Petrus in Epistola quadam ad eundem sanctum Bernardum data³, qua peteret monachum Cluniacensem ad breve temporis spatium ad se mitti, ex monasterio Clarevallensi, sic dicens: «Cur ergo, mi charissime, unus saltem mihi per mensem non conceditur; cum ego Petrum, cum Robertum sanguine proximos, cum Guarnierum, cum quosdam

alios, tractus amore tui, tibi non mense uno, sed perpetuo concesserim? Quot ego abbates, quot monachos alios, ne dicam alienis, Ecclesiis, litteris tuis, vel consiliis victus concessi? Nec me pœnitent amico cessisse: cui et adhuc in pluribus paratus sum cedere, etc.» Sic igitur inter duos sanctissimos abbates istos, supereminente antiquo hoste zizaniam, tantum abest ut creverint ipsa usque ad messem, sed nec siverint ipsi ea in segetem coalescere, quin continuo evulsa quamprimum aruerint: ut ex his, quæ inferius dicturi sumus, perfacile apparebit. At de his modo satis.

12. *Tanchelinus hæresiarcha, in quem pugnat S. Norbertus.* — Quo anno sanctus Norbertus, cum accepisset Romæ ab Honorio papa confirmationem instituti a se Ordinis Præmonstratensis, reversus in patriam, dispositis rebus, vocatur Antuerpiam, ut Ecclesiam illam novi hæresiarchæ opera labefactam adjuvaret. Quinam hic fuerit hæresiarcha, et quæ ejus nefandæ assertiones, sic accipe ab Hugone ejus temporis auctore, qui ait¹: «Non est autem prætereundum, quare vocatus fuerit ad suscipiendam Antuerpiensem Ecclesiam. Est Antuerpia oppidum amplissimum et populosum, in quo unus erat tantum sacerdos, qui curam totius populi ibidem commorantis gerebat: sed præ nimia multitudine et frequenti negligentia non poterat. Nec credebatur ei, quod et ipse quasi in conjugio et copula carnali neptem suam in tertio gradu manifeste sociam sui sceleris haberet. Ilanc ob causam populus ille quasi grex absque pastore per multos errorum anfractus deviahat. Unde contigit, ut hæreticus quidam miræ subtilitatis, et seductor, Tanchelinus nomine, illuc adveniens, in eadem gente locum suæ imposturæ inveniret. Erat is omnium hominum sceleratissimus, deque et omnium sacramentorum ejus, totiusque religionis et Christianæ fidei hostis. Ita ut ministerium episcoporum et sacerdotum nihil esse diceret, et sacrosancti corporis et sanguinis Domini nostri Jesu Christi perceptionem ad salutem perpetuam prodesse negaret.

13. «Itaque illum populum, cui jam per multa tempora horum veritas nuntiata non fuerat, in hos errores induxit. Credebant ei et sequebantur eum circiter tria milia armatorum, nec erat dux, aut episcopus, aut princeps, qui auderet ei resistere vel occurrere, nec ante eum, nisi sectam ejus amplecteretur, apparere. Cum pretioso apparatu, in vestibus deauratis, triplici funiculo crinibus intortis, et auro intexto figamine triplicatis incedebat, verbisque persuasibilibus magnifice conviviorum apparatibus benevolentiam eorum ad seducendos eos exhaurebat. Res mira et stupenda, lotiones ejus bibebant, et reliquiarum loco asportantes recondebant, et cum filias in matrum presentia, sponsasque maritis videntibus corrumperet, opus spirituale i esse asserebat. In tantum, ut infelicem se diceret, qui huic conjunctioni nefarie misceri

¹ Ber. Apolog. ad Willel. abb. S. Theodorici. — ² Petr. Clun. l. III. Ep. XXVIII. et l. V. Ep. XVI. — ³ Petr. l. VI. Ep. XXXVI.

¹ Hugo in Vita Norbert. c. 34. apud Sur. tom. III. die vi Junii.

non meruisset. Hæc turpissima et detestanda hominis impostura, etiam post mortem ejus extirpari nullatenus potuit, licet duodecim clericorum congregatio ab episcopo in subsidium sacerdotis, qui solus erat, in Ecclesia Sancti-Michaelis instituta esset, etc.» Subjicit de laboribus sancti Norberti et clericorum ab eo illuc missorum, ad convellenda zizania, ab homine omnium pessimo seminata. Videant nostri temporis novatores, quibus præcursoribus gloriari possint, et quos se suorum dogmatum habere patriarchas exultent. Eant post eos, quos omnium nefandissimos tunc et semper Ecclesia devovit atque damnavit. Miseros vero Antuerpienses sicut oves sine pastore a lupo vorari facile fuit. Sed audita a Christi præconibus veritate, resipiscentes erroremque detestantes conversi sunt. Sed fuerunt hujus temporis consortes erroris ejusdem vel similibus alii, qui eodem tempore Honorii papæ cogniti asseruntur.

14. *Hæreses Petri Bruisini, vulgo de Bruis, et ejus supplicium.* — Haud dissimilis plane Tanchelino fuit, nec impietate dispar, Petrus de Bruis dictus, qui his item temporibus eisdem ferme errores disseminavit in provincia Arelatensi, et aliis adjacentibus locis, qui per annos viginti impie agens, impie scribens et loquens perduravit. Adversus quem diffuse scripsit Petrus Cluniacensis eam primum Epistolam¹, quam dedit ad Ebredunensem archiepiscopum et alios episcopos, in quorum diocesis nefarius homo hæreses propagavit; et aliam ad alios, nempe Arelatensem et alios, quæ tamen primo loco ab ipso posita legitur. Ubi inter alia de priori atque prolixiori Epistola ista habet: « Scripsi nuper Epistolam reverentiæ vestræ, contra hæreses Petri de Bruis disputantem ». Et paulo post: « Vobis eam mitto, quoniam in partibus vestris, aut circa easdem, stulta illa et impia hæresis more pestis valide multos interfecit, plures infecit, sed gratia Dei concitante et adjuvante vestra studia, a vestris regionibus sese paululum removit. Migravit autem, sicut audivi, ad loca satis vobis configua, et a Septimania vestra, vobis persecutibus expulsa, in provincia Novempopulana, quæ vulgo Gasconia vocatur, et in partibus ei adjacentibus sibi foveas præparavit, in quibus nunc se timore occultans, nunc de ipsis audacia assumpta prodians, quos potest decipit, quos potest corrumpit, et nunc illis, nunc istis lethalia venena propinat. Vestrum est igitur, ad quos præcipue tam ex officio, quam ex singulari scientia in partibus illis cura Ecclesiæ Dei spectat, et quibus ipsa velut fortibus columnis maxime innititur, vestrum est, inquam, et a locis illis, in quibus se latibula invenisse gaudet, et prædicatione, et etiam, si necesse fuerit, vi armata per laicos exturbare ». Et inferius: « Et quia prima erronei dogmatis semina a Petro de Bruis per viginti fere annos sata et aucta quinque præcipue venenata virgulta produxerunt,

contra illa maxime ut potui egi, ut circa ea se animus et verba attentius occuparent ». At quænam ista, inferius ita repetit, dicens:

15. « Primum hæreticorum capitulum negat, parvulos infra intelligibilem ætatem constitutos Christi baptismo posse salvari, nec alienam fidem posse illis prodesse, qui sua uti non possunt.

« Secundum capitulum dicit, templorum vel Ecclesiarum fabricam fieri non debere, factas insuper subruoportere, nec esse necessaria Christianis sacra loca ad adorandum, etc.

« Tertium capitulum, cruces sacras confringi præcipit et succendi, quia species illa vel instrumentum, quo Christus tam dire tortus, tam crudeliter occisus est, non adoratione, non veneratione, vel aliqua supplicatione digna est, sed ad ultionem tormentorum et mortis ejus, omni dedecore dehonestanda, gladiis concidenda, ignibus succidenda est.

« Quartum capitulum non solum veritatem corporis et sanguinis Domini quotidie et continue per sacramentum in Ecclesia oblatum negat, sed omnino illud nihil esse, neque Deo offerri debere decernit.

« Quintum capitulum sacrificia, orationes, eleemosynas, et reliqua bona pro defunctis fidelibus a vivis fidelibus facta deridet, nec ea aliquem mortuorum vel in modico posse juvare affirmat ». Hæc erant Petri nebulonis deliramenta, cujus quis finis extiterit, ita paulo inferius:

16. « Post rogum Petri de Bruis, quo apud S. Aegidium zelus fidelium flammam Dominicæ crucis ab eo succensas, eum concremando ultus est, etc. » igne crematum ostendit, postquam impius atque sacrilegus homo sacrosanctas cruces simul in unum congeatas una combussit. De quo adeo immani facinore agit idem Petrus in priori Epistola, dum adversus ipsum sanctæ Crucis impugnantem cultum insurgit, atque: « Prævenistis scelestis operibus celeritatem verborum, et profundis in religionem odiis (quod vel cogitare scelus fuerat) insigne nostræ fidei tollere attentastis. Quod tunc factum est, quando ad inauditam divinitatis contumeliam, magno decrucibus aggre instructo, ignem immisistis, pyram fecistis, carnes coxistis, et ipso Passionis Dominicæ die Paschalem Dominicam præcedente, invitatis publice ad talem eum populis, comedistis ». Ita impius horum omnium malorum inventor, qui in ignem immisit cruces, ipse est injectus in ignem, et qui ejusmodi ex crucibus igne confecto carnes coxit, et ipsius carnes sunt tradite concremandæ, ita ulciscente numine nefandissima scelestissimi hominis sacrilegia. At quoniam in Henrico apostata impia ejus hæresis revixit, et magis aucta est, cum et ipse Petrus duas has Epistolas scripsit, atque etiam sanctus Bernardus, scriptis et prædicatione sequentibus signis eandem potentissime exagitarunt; quando id contigit post vicesimum annum ab hoc tempore, suo loco pluribus dicturi sumus, et quomodo penitus

¹ Petr. Clun. l. i. Ep. 1. ii.

extincta fuerit, pariter narraturi. In quibus plane videbis recentiorum hæreticorum impia dogmata etiam validissime confutata, prout facile intelliget qui tum ejusdem Petri Cluniacensis duas Epistolas, totidemque sancti Bernardi eodem argumento conscriptas legerit, et edita ab ipso tunc miracula pariter audierit; sed jam quæ sunt anni hujus reliqua videamus.

17. *Stephani abbatis Grandimontensis obitus et sanctitas.* — Hoc eodem anno Redemptoris millesimo centesimo vicesimo sexto, idibus Februarii ex hac vita decessit sanctus Stephanus Arvernensis Grandimontensis Ordinis institutor; quod ex ejus Vita Actis, quæ apud Vincentium¹ descripta fidelissime leguntur, ita colligitur. Cum enim testetur auctor, anno Redemptoris millesimo septuagesimo sexto eundem sanctum cœpisse eremum colere, anno suæ ætatis trigesimo, obiisse vero octogenarium : qui igitur tricenarius erat dicto anno septuagesimo sexto supra millesimum, hoc anno millesimo atque centesimo vicesimo sexto, ad octogesimum oportuit pervenisse suæ ætatis annum.

Quomodo autem paulo ante obitum conveniunt eum Sedis Apostolicæ legati, sic accipe : « Miri odoris fragrantiam cum eo loquentes et adstantes circa eum ex eo procedere sentiebant, utpote in quo suavitatis auctor requiescebat, et in quo virginitas ac mentis ac corporis humilitas eminebat. Excellentissimi quoque cardinales Gregorius et Petrus Leonis, inter quos postmodum de papatu schisma fuit, cum in Galliam missi in partibus Lemovicinis legatione sua fungerentur, ad hunc virum Dei pariter conveniunt, et vivendi

formam hanc a quo didicisset, et cur in loco tam sterili maneret, diligenter inquirentes, verbaque prudentiæ et humilitatis admirantes lætabundi receperunt. Octavo autem die ab eorum recessu, nullo tamen adhuc dolore vexatus, ab exteriori colloquio cœpit vacare. sequæ totum doctrinæ discipulorum et orationi conferre, sciens per Spiritum sanctum, obitum suum appropinquare : tandemque doloribus oppressus, accepta sacra unctione atque viatico, feliciter reddidit Deo spiritum ». Cujus sanctitas pluribus argumentis est declarata, quæ ab eodem auctore narrantur. Hæc modo satis ad nostri rationem instituti.

18. *Godefredi monachi Præmonstratensis diœcesis Monasteriensis obitus.* — Eodem anno beatus Godefredus Westphalus, comes Cappenbergensis, qui una cum germano suo ad prædicationem sancti Norberti sæculum reliquisset, tribus erectis monasteriis, conjuge summo consensu inter moniales proficiente, post multas tribulationes magna animi constantia toleratas, et perseverantiam exactissimam in regulari disciplina, claris meritis ad Deum migravit die decima tertia Januarii, anno suæ ætatis ferme trigesimo. Extant res præclare ab eo gestæ scriptis mandatæ a viro religioso ejusdem Ordinis et ætatis, quas temporis iniquitate oblivione sepultas, revocavit in lucem lucis ipse jubar Germaniæ Ecclesiæ, Nicolaus Serarius, a quo opportune missas accepimus, legimus, et dignam tanti viri amici Dei duximus memoriam, quæ Annalibus Ecclesiasticis intexeretur. Facta recensetur ab eodem auctore reliquiarum ejus translatio anno millesimo centesimo quadragesimo octavo. Clara etiam mentio ejusdem habetur in Vita ejusdem S. Norberti, Præmonstratensis institutoris.

¹ Vincent. Bell. Spec. hist. l. xxv. c. 46, 47, 48, 79.

1. *Obitus Pontii exabbatis Cluniacensis.* — A num. 6 ad 9. Refert Baronius ex Petro Venerabili libro 2 de Miracul. cap. 43, judicium habitum Romæ de Pontio exabbate Cluniacensi, qui anno superiori, magno dedecore monachorum, populi- que scandalo, in monasterium Cluniacense irruit, ut ibidem diximus. Idem ac Petrus Venerabilis narrat Ordericus lib. 12 : « Pontium protinus ac-

cersiit (nempe Honorius II), ad examen Apostolicæ Sedis adstare præcepit, rationem redditurus unde impetitus fuerit. At ille Romanus veniens, papam adire distulit, dieque denominato ad placitum summonitus venire remittit. Romanus igitur Pontifex Petrum (sc. Venerabilem, in Pontii locum abbatem electum) cum apicibus Apostolicis et dignitatibus Cluniacum destinavit, monachisque, ut in

omnibus ei secundum regulam S. patris Benedicti obsequerentur, mandavit. At illi jussa complentes abbatem victoriam elatum susceperunt: cujus imperii jugum divina legis laudabiliter militantes hucusque perferunt. Contemptorem vero Pontium post aliquot dies missis satellitibus suis comprehendit, et in carcerem retrudit. Qui non multo post enormi mœrore affectus aegrotavit, ibique multis illum lugentibus vitam finivit. Igitur, ut quidam dicit :

Principium fini solet inopar saepe videri.

Petrus Venerabilis etiam scribit Pontium Romæ mortuum fuisse, quod et indicat Honorius II in sua Epistola. In Martyrologio Benedictino ad IV kalend. Januariæ, ut videre est in Biblioth. Cluniac. p. 558, legitur : « In monasterio Cluniacensi, depositio sancti Pontii abbatis, doctrina ac sanctitate clari ». Verum litteræ Honorii II mox laudate, et a Baronio recitata, ostendunt fidem hujus Martyrologii hac in parte mutare. Ibidem refertur locus Trithemii in Chron. Hirsaugiensi tradentis Honorium II Pontium cardinalem S. R. E. ordinasse, quod a veritate prorsus alienum. Vide dicta anno superioris, num. 4 et seqq.

2. *Eo abbate inter Cluniacenses dissensio orta.* — Ad num. 10 et seq. Divus Bernardus Epistola sua ordine 1, ad *Robertum* nepotem data, cum ad monasterium Cisterciensem revocare conatus est. *Robertus* enim vel horrore strictioris regule, seu vite laxioris illecebra, vel etiam blanditiis et subdolis aliorum susurris indictus a Cisterciensibus ad Cluniacenses transferat. Rediit postea Claravallensem *Robertus*, restitutus ab abbate Cluniacensi, ac Domus-Dei in diocesi Bisuntina abbas a sancto Bernardo aliquot post annos institutus. Illic ortæ inter utriusque Ordinis monachos dissensiones, ut videre est apud Baronium, qui putavit eam sancti Bernardi Epistolam hoc circiter tempore datam esse, et quando hæc contigere, Petrum Venerabilem abbatem monasterii Cluniacensis fuisse. Verum Mauricius in Annal. Cister. ad annum mxcvii, et ad an. mxxxvi, ac Mabillonius in Notis fusioribus ad Epist. 1 divi Bernardi, ostendunt, *Robertum* et a Claravalle discessisse, et ad eandem reversum esse *Pontio*, non vero *Petro Venerabili*, abbatiam Cluniacensem administrante, et Epistolam illam ante annum mxxv scriptam fuisse.

3. *S. Norbertus adversus Tanchelinum hæreticum Antuerpiam accersitur.* — A num. 12 ad 17. Sanctus *Norbertus*, Ordinis Præmonstratensis fundator, hoc anno Magdeburgensis archiepiscopus creatus fuit, ut ex dicendis anno sequenti, quæ huc revocanda, perspicuum est. Is anno mxxxiv, non vero currenti, adversus *Tanchelinum* hæreticum Antuerpiam vocatus, eique et ejus Ordini Ecclesia Sancti-Michaelis concessa, ut eo anno ex Monumento a Baronio in medium adducto probavimus. Præterea ex Vita sancti Norberti apparet, eum ante hunc annum ad suscipiendam Antuer-

piensem Ecclesiam evocatum fuisse. Quare accurate in Chronico Roberto de Monte attributo ad annum mxxxiv hæc referuntur : « In castro nihilominus Antuerpiensem Ecclesiam ordinandam hac de causa suscepit (nempe Norbertus). Oppidani castri illius a quodam hæretico Tandemo (legendum Tanchelino) seducti, paulatim a fide et bonis moribus desciverant, quia idem hæreticus nimis subtilitatis, cum tamen esset laicus, sed multis etiam disertis clericis in sermone acutior, sacri ordinis ministros et episcopalem ac sacerdotalem gradum nihil esse dicebat, corporis et sanguinis Christi perceptionem sumentibus ad salutem procedere negabat, et in pretioso apparatu et vestibus deauratis incedens, triplici funiculo crinibus intortis, verbis persuasibilibus et conviviorum apparatus, suos qui eum circiter tria millia armati sequebantur illiciebat, et per eos in resistentes sibi cædibus sæviebat, credebant ei, et reverebantur eum, in tantum, ut aquam in qua corpus lavisset liberent, et pro reliquiis asportarent; cum tamen tantæ incontinentiæ et impuritatis esset, ut filias in matrum presentia, sponsasque maritis intuentibus corrumperet, et hoc opus spirituale esse asserebat, qui tandem post multos errores et hæreses cedes, dum navigaret, a quodam presbytero percussus in cerebro occubuit.

4. *Hæreses Tanchelini et Petri de Bruis grassantur.* — « Sed nec post ejus mortem error ipsius tam facile extirpari potuit, propter quod a clericis loci illius Ecclesia cum aliquantulis redditibus per manum episcopi Norberto ordinanda datur, sperantibus quod per ejus salutarem doctrinam hæresis illa de medio tolleretur; quod et factum est, siquidem ipso prædicante, et compuncti viri et mulieres corpus Dominicum quod in cistis et foraminibus per decem annos et amplius reposuerant (quare ante annum mxxv hæresis illa emerarat) attulerunt, et per ejus doctrinam paulatim ad sanctam fidem resipuerunt ». De hoc hæretico et de Petro de Bruis hæc refert Petrus Abaelardus lib. 2 Introductionis ad Theologiam pag. 1066 : « Ad hæreticos venio, qui quanto domesticiores, tanto peiores, civilibus bellis inquietare Ecclesiam non cessant. Atque ut ad nostra veniamus tempora, quibus jam aîunt adeo repressas esse, ut jam nullo fidei fundamento sit opus, nullos in tantam olim insaniam prorupisse hæreticos quisquam audierit, quanta nonnulli contemporaneorum nostrorum debacchati sunt, Tanquelmus quidam laicus nuper in Flaudria, Peirus presbyter nuper in Provincia, ut ex multis aliquos in medium producamus. Quorum quidem alter, Tanquelmus scilicet, in tantam se erexit dementionem, ut se Dei filium vocitari atque decantari, et a seducto populo, ut dicitur, templum ædificari sibi faceret. Alter vero ita lere omnem divinorum sacrorum et Ecclesiasticæ doctrinæ institutionem enervarat, ut multos rebaptizari cogeret, et venerabile Dominicæ signum Crucis removendum penitus censeret,

atque altaris sacramentum nullatenus celebrandum esse amplius adstrueret ».

5. *Stephanus fundator Ordinis Grandimont. ante biennium demortuus.* — Ad num. 17. *Geraldus* septimus prior generalis Ordinis Grandimontensis, in Vita S. Stephani de Mureto ejus institutoris, quæ extat ad diem vii Februarii in Actis SS. Bollandianis, demonstrat eum anno millesimo centesimo vicesimo quarto ad superos evolasse, non vero præsentem, ut male habet Vincentius Bellovacensis, cujus verba recitat Baronius, *Geraldus* enim cap. 2, hujus sancti mortem narraturus, ait : « Cumque duo legati cardinales in Galliam missi ipsum in solitudine Mureti visitassent, et de ejus conversatione diligenter inquisivissent, octavo die ab eorum recessu, pridie nonas Februarii, nullo tamen dolore vexatus, se totum contulit doctrinæ discipulorum suorum et orationi, etc. Et quanta die dolore invasus, etc. octagesimo ætatis suæ anno, in ordine diaconatus, vi feria, VI idus Februarii etc. feliciter migravit ad Dominum ». Anno autem mxcxiv qui bissextilis erat, littera F dominicalis fuit usque ad diem intercalarem, ideoque dies octavus Februarii incidit in feriam sextam. Præterea testatur Carolus Fremonus, ejusdem Ordinis religiosus, in Vita sancti Stephani gallice a se scripta, extare primum Stephani tumulum Mureti, in sacello postea ædificato, in quo legitur ejus Epitaphium :

Nimbosus lucus jam Februs egerat octo
..... Stephani cum spiritus astra petivit;
Anno centeno millesimo, bis quoque deno,
Adjuncto quarto, regno cœli sibi parto.

6. *Hæc opinio confirmatur.* — Quare Bollandus S. Stephani mortem cum anno mxcxiv optime copulavit. Præterea in Vita sancti Stephani a Vincentio Bellovacensi recitata, cardinales duo, qui virum sanctum convenere, dicuntur « Gregorius et Petrus Leonis, inter quos postmodum de papatu schisma fuit » ; certum autem anno mxcxiv duos illos cardinales legatione in Galliis una functos esse, uti jam ostendimus. Quibus addo quod legitur apud Duchesnum tom. iv, pag. 547, in Constitutione Sugerii abbatis Sancti-Dionysii : « Ego Petrus, Sedis Apostolicæ presbyter cardinalis et legatus, laudo et confirmo. Ego Gregorius Sancti-Angeli diaconus cardinalis et Apostolicæ Sedis legatus laudo et confirmo » ; ut enim observavit Onuphrius, *Petrus Leonis* a Paschali II diaconus cardinalis tit. SS. Cosmæ et Damiani, dein a Callisto II presbyter cardinalis Sanctæ-Mariæ trans Tiberim, titulo Callisti, anno mxx creatus fuit, et postea cum Gregorio de Sancto-Angelo diacono cardinali legatus in Galliis missus ; eorum vero legatio jam anno superiori absoluta fuit, et hoc anno *Gerardus* Engolismensis episcopus et cardinalis, ac *Humbaldus* archiepiscopus Lugdunensis in Galliis legati Sedis Apostolicæ erant, ut paulo post videbimus. Ex quibus liquet *sanctum Stephanum* ante annos

duos fuisse demortuum, cum duo, qui illum convenere, legati hoc anno in Galliis non fuerint. Vita S. Stephani a Vincentio Bellovacensi relata eadem est cum Vita a Geraldo scripta, sed interpolata, ut ex ejus lectione intelligitur. Neque enim ea nisi interpolationibus a primigenia diversa. Decreto S. Rituum Congregationis die vii April. an. mxcxvi emisso, Martyrologio Rom. ad diem vii Februar. insertum fuit nomen sancti Stephani de Mureto *abbatis, Ordinis Grandimontensis institutoris*.

7. *Refellitur contraria.* — Labbeus tom. ii. Biblioth. pag. 674 et seqq. Vitam *sancti Stephani de Mureto* ex veteri Codice, in quo nomen auctoris non legitur, recitat, eaque in nullo diversa est ab ea, quam Bollandus eum auctoris nomine refert ex alio Codice. Non viderat Bollandus Labbei Bibliothecam, quia quando Acta SS. mensis Februarii in lucem emisit, ea nondum juris publici facta erat : indeque Bernardi Guidonis in Notis ad sancti Stephani Vitam non meminit, Bernardus Guidonis in Tractatu de *Sanctis, qui orant Lemovicensem diocesim*, qui extat tom. i Biblioth. Labbei, ait, Stephanum anno Christi mxcxvi, ætatis vero suæ anno xxx, in eremum secessisse, et « anno Domini mxcxvi, ætatis vero suæ anno octogesimo » vivendi finem fecisse. Verum Bernardus Guidonis adversus testem domesticum, longeque se antiquiorem non audiendus. Stephanum Clemens III in sanctorum numerum retulit anno mclxxxix in Bulla canonizationis expresso. Bernardus Guidonis interpolatorem secutus est, licet in Tractatu de *Ordinibus Grandimontensis atque Artigior, et monasterio Sancti-Augustini Lemovicensis*, edito tom. ii Biblioth. Labbei pag. 275, de septimo priore generali Ordinis Grandimontensis scribat : « vi prior D. Geraldus Iterii electus in capitulo generali III kal. Octob. mclxxxviii. Procuravit canonizationem et revelationem sancti Stephani mclxxxix. Scripsit gesta ejusdem sancti Stephani ». Bernardum Guidonis Vitam a Vincentio Bellovacensi exhibitam, a Geraldo scriptam existimasse oportet ; alioquin non interpolatam, sed genuinam et primigeniam secutus fuisset. Vide dicta de anno instituti Ordinis Grandimontensis anno mclxix.

8. *Mortuus B. Godefridus Ordinis Præmonstrat.* — Ad num. 18. Auctor anonymus Ordinis Præmonstratensis Vitæ beati Godefridi Capenbergenesis ex comite canonici Ord. Præmonstrat., quæ extat in Actis SS. Bollandianis ad diem xvi mensis Januarii, mortem ejus cap. 10 his verbis narrat : « Debitum Creatori reddidit spiritum, atque idibus Januarii, quo die baptismum Christi sancta recolit Ecclesia, beata illa anima carne soluta, æternæ regenerationis induit candidatum, anno Dominicæ Incarnat. mxcxvi, ætatis autem suæ ferme xxx, migravit ad Christum ». Hæc verba cum legisset Baronius, non dubitavit quin hoc anno mors ea contigerit ; verum, ut observat Bollandus ex Joanne Gamansio in Commentario prævio ad Vitam B. Go-

defridi § 7, annus ille a Paschate exorditur; hic enim calculus Monasterii et Cappenbergæ, quæ in ea diocesi sita, usque ad annum mccc viguit, quo demum abrogatus fuit in Synodo Colonienſi sub Henrico archiepiscopo, ut in sancti Engelberti Vita tradit Gelenius. Sequenti itaque tantum anno *beatus Godefridus* ad superos abiit. Cum enim ante mortem Cappenberga cum fratre Præmonstratum sit missus, ac post annum revocatus ad Norbertum jam archiepiscopum Magdeburgensem, ut dicitur cap. 10 ejus Vitæ, die xii Januarii hujus anni Vita decedere non potuit, cum S. *Norbertus* die xxv mensis Julii hujus Christi anni ordinatus fuerit archiep. Magdeburgensis, ut anno sequenti ostendimus.

9. *Ejus virtutes.* — *Godefridus*, nobilissimis parentibus ortus, cum *sancti Norberti* circumquaque flagraret opinio, una cum fratre germano *Ottone* eum adiit, et uterque paulo post, mutato sæculari habitu, regulam beati Augustini sub Norberto professus est. « Vir Deo dignus Godefridus », inquit auctor Vitæ ejus, « conjugem suam Friderici comitis filiam, sacrum sumere velamen adhortationibus piis ac salutaribus effecit ». Plura Godefridus cœnobita condidit, inter quæ principem locum obinet Cappenbergense in Westphalia, ex quo tanquam primario prodierunt diversa alia. Cum antistes Monasteriensi conaretur impedire, ne castrum *Cappenberg* in partem Præmonstratensium cederet, plurimæque loca beato viro in concambium offerret, respondit se nulla passurum ratione, ut se superstitie deinceps in eo loco mundanæ vanitati serviretur, quin potius id elaboraturum necesse esse, ut ubi hactenus licentiosa militum grassata esset incursio, illic celestis obsequii succederet assiduitas. Porro ejus Vitæ auctor synchronus fuisse videtur. Recitat alias duas Vitas Bollandus, sed ex primigenia deductas.

10. *Quinam hoc anno S. Sedis legati in Gallia fuerint.* — Mox diximus, Gregorium de Sancto Angelo et Petrum Leonis, S. R. E. cardinales, hoc anno non fuisse legatos Sedis Apostolicæ in Gallia, et vulgarem illam sententiam explosimus; nunc nobis ostendendum, *Humbaldum* archiepiscopum Lugdunensem, et *Gerardum* episcopum Engolismensem hoc anno legatione Gallica functos esse. Priorem anno superiori Sedis Apostolicæ legatum non fuisse, demonstrant verba Chartularii S. Stephani Divionensis, recitata a San-Marthanis tom. iv, pag. 846, ubi dicitur, *Herbertus* anno mcccv positus « abbas præsentibus et laudantibus *Humbaldo* Lugdunensi archiepiscopo, *Stephano* Eduensi episcopo » alisque. Quare eo anno non dum Sedis Apostolicæ legatus erat, currenti vero eum munus illud exercuisse, docet concessio cuiusdam præbendæ in Ecclesia S. Petri Bellovacensis canonicis regularibus S. Quintini a Petro episcopo Bellovacensi facta, et a San-Marthanis in episcopis Bellovacensibus ex originali relata, in cuius fine legitur : « Ego quoque *Humbaldus* Lug-

dunensis Ecclesiæ episcopus, et Apostolicæ Sedis legatus, hujus præscriptæ donationis sententiam firmam et inconcussam servari, Apostolica auctoritate præcipio, etc. Actum Incarnationis Domini anno mcccvi, Indict. iv. » Is hoc, vel serius sequenti anno Concilium Aurelianense celebravit, ad quod vocavit *Goffridum* Vindocinensem abbatem, ut patet ex ipsis *Goffridi* Epistola xxix libri primi ad *Humbaldum* Apostolicæ Sedis legatum, in qua ait, se ad illud Concilium venire non posse, quod Privilegiis Romanorum Pontificum interdictum sit, « ne alodiarum B. Petri abbas Vindocinensis ab episcopo, vel a quolibet Apostolicæ Sedis legato ad Concilium vocetur ». Labbeus tom. x Concil. pag. 944, Epistolam illam integram recitat, atque magnam omnium ignoracionem esse, quo anno *Concilium* illud *Aurelianense* coactum fuerit; magnam itidem quid in eo fuerit gestum. At licet hoc postremum verum sit, certum tamen Concilium illud nonnisi hoc vel sequenti anno congregari potuisse, cum anno mcccvii saltem exeunte *Matthæus* episcopus Albanensis cardinalis legatus in Gallia fuerit, et duobus sequentibus annis eodem munere functus sit, ut infra videbimus. Nunc ostendendum, *Gerardum* Engolismensem eodem tempore etiam legatum fuisse.

11. *Girardus episc. Engolism. S. Sedis legatus in Gallia.* — Anno ab Incarnat. Domini mcccv », inquit Ordericus lib. 12, pag. 883, « Indictione iv, pontificali Basilica Sancti-Gervasii Mediolanensis martyris apud Sagium (Normanniæ civitatem) XII kalend. Aprilis (qui dies hoc anno in Dominicam cadebat) dedicata est a domino *Goifredo* Rothomagensi archiep. et aliis quinque præsulibus. Ibi tunc *Henricus* rex Anglorum cum proceribus suis affuit, et eidem Ecclesiæ redditus x librarum pro pote per singulos annos donavit. Ibi tunc interfuerunt *Girardus* Engolismensis episcopus, Romanæ Ecclesiæ legatus, *Joannes* Lexovienſis, *Joannes* Salariensis (seu Sagiensis), *Goifredus* Carnotensis, et *Ugerius* Andegavensis ». Quare cum hoc anno *Humbaldus* et *Giraldus* Sedis Apostolicæ legati in Francia fuerint, obitus S. Stephani de Mureto cum eo connecti non potest, quia paucis antequam e vita decederet diebus, *Petrus* Leonis et *Gregorius* S. Angeli cardinales, Apostolicæ Sedis legati, eum invisere; cumque Epistola sancti *Bernardi* xii *Humbaldo* Lugdunensi archiepiscopo, Romanæ Sedis legato data fuerit, tunc ei in legationis munere adjunctus non fuit *Petrus Fontanensis* cardinalis, ut autumnavit *Mabilionius* in Notis fusioribus ad illam divi *Bernardi* Epistolam; ideoque ea Epistola currenti anno scripta. Quod obiter dictum sit.

12. *Florent Albertus Aquensis et Robertus monachus.* — *Albertus*, Aquensis Ecclesiæ canonicus et sacrista, Historiam Hierosolymitanæ expeditionis in xi libros divisam usque ad hunc annum non perduxit, ut scripsit *Oudinus* in Supplem. de Script. Eccles., sed eandem cum anno secundo

Balduini regis, seu cum anno MCXIX absolvit, ut ex ejus lectione apparet. *Robertus* monachus Sancti-Remigii Rhemensis, qui eidem expeditioni sacrae interfuit, sancti Bernardi abbatis sui jussu eamdem Historiam libris novem descripsit, sed desit in victoria apud Ascalonam anno MCXIX a Christianis reportata. De varia Roberti fortuna legendus Marlotus lib. 2 Metropol. Rhem. cap. 17. Annus emortualis utriusque incertus.

13. *Moritur Urraca Castellæ regina.* — Hoc anno *Urraca* regina, Alphonsi VII Castellæ et Navarræ regis mater, vitam cum morte commutavit, ut Sandovalius in Alphonso VII fol. 131, se in antiquo documento lingua Castellana scripto legisse affirmat, et dicitur in libro Tumbo-Nigro appellato, ubi mors ejus accidisse legitur *Æra* MCLXIV, *VIII idus Martii*, indeque deducit Sandovalius exemplaria Chartarum duarum sibi ostensarum, eam *Æra* MCLXVII adhuc in vivis fuisse supponentium, in numeris mendosa esse, quod, qui ea describere, numeros Gothicos legere nescierint. In Chartis in gratiam monasterii S. Emiliani datis, quas *Æra* MCLXIII, non vero MCLXVII datas esse oportet, asserit Urraca se in Ecclesia seu monasterio Sancti-Vincentii Alphonsi filii et Alphonsi Aragoniæ regis jussu in carcere detentam esse, quod etiam legitur in litteris in gratiam Ecclesiæ S. Jacobi *die* XXV *Martii* emissis ab Alphonso rege, et ab Urraca matre ejus confirmatis, in quibus ea se captivam esse dicit. Sepulta fuit in capella regia S. Isidori Legionensis, ubi Sandovalius scribit se ejus Epitaphium legisse, in quo ea dicitur mater Adelfonsi imperatoris, mortuæque *anno* MCLXIV, *Martio mense*.

14. *Comitia principatus Catalaniæ.* — Hoc pariter anno, juxta Diagum lib. 2 Hist. Comit. Barcinon. cap. 108, Barcinonæ comita generalia totius principatus celebrata, in quibus reipublicæ status reformatus, et secularium adversus Ecclesiastica jura excessus emendati. Peliit id a Raimundo III Barcinonensi et Provinciæ comite *beatus Oldegarius*, ejus desiderio annuit comes, et

in ejus palatio uterque ordo coactus fuit. Ex Ecclesiasticis adfuere, *Oldegarius* metropolitani, *Raimundus* Ausonensis, et *Berengarius* Gerundensis, episcopi, ac Catalaniæ abbates omnes. Ex laicis comes cum Raimundo Berengario filio, post patris mortem Aragoniæ principe, proceres multi, et nobilium multitudo infinita. Inter alia multa in utilitatem Ecclesiæ iis in comitiis statuta, comes ac filius, proceres ac nobiles, *beato Oldegario* restituere Ecclesias omnes ac cæmeteria cum redditibus ac quibuscumque aliis hactenus a se in præjudicium Ecclesiæ possessis : integra libertas iisdem Ecclesiis concessa absque ullius jurisdictionis in eas reservatione. Hæc aliæque a Didaco citato memorata, quæ in novam Conciliorum editionem transferri debent, statuta, inquit Diagus, *die* X *Martii* anni MCXV, sed id errore librarii positum; cum eo Christi anno *Oldegarius* nondum Tarraconensis archiepiscopus fuerit. Quare loco MCXV, legendum, inquit Didacus, *anno* MCXXV, qui annus currentem designat, cum comitia mense Martio habita fuerint, et in Catalaniæ annus vel a Paschate, vel a die XXV mensis Martii secundum usum Gallicanum proficisceretur. Catalaniam enim Francorum regibus hoc tempore paruisse, seu Francorum reges supremos principes ibi agnitos fuisse, sepulchris Actis publicis liquet.

15. *In Catalaniâ infeliceiter adversus Saracenos pugnatum.* — Surita lib. 1 Annal. cap. 49, refert in antiquissimis Annalibus legi, hoc anno in Catalaniâ ad castellum *Corbinense* sanguinolentum prælium commissum fuisse, ubi magnus Christianorum numerus periit, et res eorum in magnum discrimen venerunt. *Alphonsus* Aragoniæ rex statim ad comitem Barcinonensem ejusque filios perrexit, ut eis in hoc bello adversus infideles auxilio esset. Comitatus sunt enim plures episcopi ac proceres ibidem nominati, inter quos duo episcopi Stephanus Osce, et Stephanus electus Rodensis. Porro Corbinum Ballegarium inter et Herdam Ballegario vicinam positum.

HONORII II ANNUS 3. — CHRISTI 1127.

1. *Defuncto Willelmo duce, Rogerius audacter fit dux Apulie, contra quem papa agit in conventu Beneventano.* — Annus sequitur vicesimus septimus post millesimum centesimum, Indictione quinta, quo Honorius papa occasione novarum rerum adversus Rogerium Siciliæ comitem expeditionem parat. Etenim cum hoc anno Willelmus dux Apuliæ et Calabriæ moreretur sine liberis, cumque ducatum ejus invadere tentaret Rogerius comes Siciliæ, Honorius papa, vocatis in auxilium principibus Ecclesiæ fidelibus, contra ipsum proficiscitur in Apuliam. Quomodo autem ista se habuerint, sic accipe ex Chronico Romualdi episcopi Salernitani : « Mortuus est autem Willelmus dux apud Salernum morte communi, major triginta annis, anno ducatus sui vicesimo sexto, anno Dominicæ Incarnationis millesimo centesimo vicesimo septimo, Indictione quinta, mense Julii, in festo sancti Nazarii, sepultusque est apud Salernum in tumulo patris sui, in Ecclesia B. Matthæi Apostoli, quam Robertus dux avus ejus a fundamentis exstruxerat ». Et inferius post descriptos ejus laudabiles mores corporisque habitudinem, hæc habet de Rogerio Siciliæ comite : « Comes vero Rogerius audita morte Willelmi ducis, qui eum heredem instituerat, statim cum galeis Salernum venit, et a Salernitanis civibus honeste susceptus est; quibus tenimenta et possessiones, et antiquas consuetudines conservavit, et eos in suo recepit hominio. Turrin tamen majorem in eorum potestate reliquit. Qui in eadem civitate ab Alphano Caputaquensi episcopo est unctus in principem. Dehinc Rhegium veniens, ibidem in ducem Apuliæ est promotus, et sic in Siciliam rediit ». Hæc quidem hoc anno. Honorius autem papa, audiens eum absque Sedis Apostolicæ auctoritate ducatum Apuliæ sibi sumpsisse, nec more majorum suorum eum ab Apostolica Sede, fidelitate jramento pollicita suscepisse; in eum arma movet ob Ecclesiæ jurium defensionem. Quomodo autem tandem ab eodem Rogerio pacis legatione missa, jurata fidelitate, pax firma sancita est, dicitur anno

sequenti, quo ista esse actitata idem auctor affirmat. Sic igitur una cum Willelmo isto genus Roberti Guiscardi penitus fuit extinctum, quibus rerum humanarum imbecillitas est comprobata. Porro ista omnia locupletius enarrantur in Chronico Beneventano, ab auctore qui spectabat hæc oculis tunc scripto, in quo ista leguntur :

2. « Hoc eodem anno, septimo kalendas Augusti, defuncto Willelmo duce Salernitano, Rogerius Siciliæ comes ejus patruus, consentientibus Salernitanis, in ejus locum successit. Qui et ducatum Amalphitanum in suam redegit potestatem, magnamque Apuliæ partem cum baronibus ejus. Inde reversus in Siciliam, fastidians comitis nomen, præcepit omnibus ut dux nominaretur, misitque legationem ad Honorium papam cum muneribus, petens ab eo, ut ducatus vexillum et nomen ducis ab eo consequeretur, pollicitus si faceret, daturum ei civitatem Trojanam, et oppidum Montem Fuscum prope Beneventum positum. Quod Honorius papa facere abnuit. Quamobrem indignatus Rogerius, per barones sibi subditos in Apuliæ finibus prope Beneventum positos civitatem Beneventanam acriter infestare cepit, multaque eade patrata, agrisque direptis, idem Pontifex his malis consulturus eo venit; inde vero hoc eodem anno Capuam se contulit, tertio kalendas Januarii, ubi a Roberto principe Capuano officiosissime exceptus est. Ubi Honorius episcopos et abbates circumpositos convocavit ad unctionem, quam habiturus esset ejusdem Roberti principis Capuani. Qua solemniter peracta, idem Pontifex in frequenti conventu orationem habuit, qua deploavit cuncta illa, quæ per suos barones Rogerius crudelissime perpetrasset ». Descripta ipsa verbatim ibidem habetur in hunc modum :

3. « Domini et charissimi fratres, sicut vestra cognovit charitas, diu est, quod Romanam Sedem relinquens, apud civitatem Beneventanam, quæ specialiter Romanæ attinet Sedi, pacificus venerim, et omnibus spretis tempestatibus, circa convicanos nostros hospitatus sum. Biduo autem

post nostri adventus presentiam Rogerius comes B. Petri adversarius circa civitatem Beneventanam milites fere quadringentos ad civitatis ruinam, et dedecus inauditum induxit. Qui fere horis omnibus civium bona deprædatis sunt, et eorum possessiones assidue incisioni posuerunt. Nos autem universas illorum sustinentes afflictiones, ut ab illa desisteret pertinacia excogitavimus. Insuper etiam prædictus comes Rogerius cum Hugone infante, et Raone de Ceppaluni pro civitatis Beneventanæ detrimento gravissimo confederatus est, existimans nos timori ejus succumbere, et nefandis petitionibus suis operam dare. Hugo quoque et Rao conjuratione tali allegata, quotidie confinia civitatis igne et ferro consumere ceperant. Nos autem omnia quæ gerebantur aspicientes, solam misericordiam Dei omnipotentis præstolantes, cælestis regis auxilium et beati Petri invocavimus. Deinde ne civitas prorsus defurbaretur Beneventana, talibus commota afflictionibus, militum amicorum depoposci juvamen: sique ut potuimus, obistere cœpimus eorum pertinaciæ. Cumque pro quibusdam imminetibus negotiis civitatem Trojanam adissemus, præfatus Rao de Ceppaluni Beneventanos cives, qui ob vendicandas quas passi fuerant contumelias, die festivitatis B. Martini circa ejusdem Raonis confinia exierant, ira divina et furore calidus adveniente, ductos ferro captivos tenuit, et in imo carceris, denudatis corporibus, alligavit. Deinde quosdam captivorum civium Hugoni infanti viro nefande memoriæ et tyranno horribili, ut cruciatibus et suppliciis afficerentur, donavit. Qui vero Hugo dentibus eorum radicibus evulsis, et membratim dilaceratis, pretio eorum accepto, distravit. Eos vero, quos ipse Rao detinuit, periculo famis et frigoris affligere non destitit. Quid multa? universa quæ excogitari poterant convicia, Beneventanis in captione positus inferuntur. Præterea die nocteque minantur, ut comitem illum Rogerium anathemati traditum super civitatem inducant Beneventanam, et de B. Petri virtute eductam, suæ obtineant ditioni et potestati. Insuper vobis omnibus, qui civitatum dominia, et castrorum vigores tenetis, terroribus multis variisque tempestatibus minitantur, quatenus unicuique vestrum munitiones in quibus conditiis, et arces auferant, et secundum ejus velle vitam vestram disponant, prout vult et quomodo vult, de civibus peregrinos faciat, de viris locupletatis pauperes constituat et egenos.

4. « Nos itaque mentis suæ iniquitatem et cogitationes quibusdam signorum conjecturis, per eos qui hactenus perpassi sunt cognoscentes, longe lateque vitavimus, et pollicitationes suas tanquam virum mortiferum fugientes, nullo modo parvimus, neque (ut ita dicam) auribus percipere dignati sumus. Auri quippe et divitiarum quantas pollicitus est cumulationes, dumtaxat si ei ducatus honorem largiri vellemus? Divitiarum sane illarum multimodas evitans promissiones, tum pro

Romanæ Sedis honestate, quam conservare certavi (curavi), tum pro vestri exilii, quod horis omnibus terrore expavi, Deum omnium factorem sæculorum testor, qui renes scrutatur et corda¹, dejeci et dedignatus sum, pro vestra credatis confusione et expulsionem divitiarum tantas promiserit, excogitans ad ejus libitum me usquequaque devolvere, et consensum vestræ largiri exultationi. Ego vero dilectionis vestræ vinculum amplexatus, mori potius vobiscum elegerim, quam ejus pollicitationibus nefandis adherere. Vitam igitur, mortisque asperitatem, charissimi confratres ac filii, in vestra tenetis electione et voluntate, dummodo pugnare velitis, et vigorem honestatis tueri ad invicem exastuetis. Prudentiam vestram certissimam expertus sum; nihilque restat, nisi omni desidia abjecta, et cordis torpore deposito, Romanæ Sedis dignitatem, quæ pro vobis omnibus assidue intervenit, defendatis, et vobis ipsis quem tenetis vigorem, et filiis vestris conservare concemini. Subvenite itaque, viri fortissimi, et bellatores conspicui, et dum tempus prosperitatis succedit, viribus cunctis justitiæ, quam amplectimur, severitatem (securitatem) ad ardua sublevehimus. Deus enim, qui justitiæ via est et lux veritatis, et B. Petri Apostoli interventio, nos quotidie liberabit, et auxilium a sancto ejus solio, pietate assueta largietur. Illicque ex sermone Pontificis auctor; qui his ista mox subjicit:

5. « Hæc multa his similia Honorio, lacrymis irrigantibus, prædicante, vox una militum populi que omnis qui convenerat efficitur, ac una concordia clamavere, se suaque omnia pro B. Petri fidelitate et sua tradituros. Novissime Robertus noviter princeps statutus coram omnibus taliter pollicetur. En, pater venerabilis, et personam quam aspicias, et totius principatus mei quem tradidisti virtutem tuæ committo ditioni, et ad tuum imperium omnia subiacebunt. Ipsum Rainulphus comes, et multi alii proceres et episcopi, qui convenerant, pollicentur. O quales, lector, promissiones, si adesses, aspiceres, et quæ ex eorum promissis oriebantur lacrymationes, quas universas si enarrare voluissem, fastidium auditoribus generaretur. Audiens autem Apostolicus Honorius multitudinem illam, ad ejus orationem consentaneam dedisse concordiam: salvatori omnium Deo et beatis Apostolis Petro et Paulo gratias egit, qui in se sperantibus subvenit, et quotidianum præbet auxilium. Et continuo, ex auctoritate divina et B. Mariæ Virginis, et sanctorum Apostolorum meritis, talem eis impendit retributionem, ejusmodi videlicet, quod qui delictorum suorum poenitentiam sumpserint, si in expeditione illa morientur, peccata universa remisit. Horum autem, qui ibi mortui non fuerint et confessi sunt, medietatem donavit. Audiens autem præfatus princeps et comes Rainulphus tanti

¹ Loens corruptus.

beneficii gratiam ab Honorio Pontifice prolatam, alacritate ingenti locupletati, cum universis qui convenerant, ad propria recesserunt ». Quæ autem hæc subsecuta sint, sequenti anno, ex eodem autore, suo loco dicetur.

6. *Cardinalis episcopus Albanensis legatus Concilium celebrat Trecense, ubi Ordo Templariorum, agente S. Bernardo, confirmatur.* — Hoc item anno, Matthæus episcopus cardinalis Albanensis in Gallia legationem accepit, ad celebrandum illic Trecense Concilium, quod complures necessitates Ecclesiasticæ exigebant. Hoc quippe anno ab eo celebratum esse ipsum Concilium Trecense, in quo comprobata est institutio Templariorum, nono videlicet anno post primam ejus institutionem Hierosolymis factam, Willelmus Tyrius in historia de bello sacro testatur¹; eundemque legatum duxisse secum duos præcipuos magni nominis abbates, Bernardum Clarevalensem, et Stephanum Cisterciensem, æque confirmat. At non sine magno labore evulsit a monasterio sanctum Bernardum, quippe quod statuisset e monasterio non egredi, nisi necessitate urgente. Nam ad Petrum cardinalem diaconum ista habet²: « Quod ad vos non veni ut mandastis, non mea pigritia, sed causa fuit non contemnenda. Siquidem salva vestra et omnium bonorum reverentia, mihi propositum est, nequaquam egredi de monasterio, nisi certis ex causis, quarum utique nulla se modo obtulit, ut licite possim vestræ in hoc, imo et nostræ satisfacere voluntati ». At vero urgentem magis magisque Matthæum cardinalem optatæ male valetudinis excusatione eludere, ne e claustro extraheretur, frustra existimavit: cujus tandem victus importunitate cessit. Sed audi quam ad ipsum Matthæum Bernardus tunc ea occasione scripserit excusationis Epistolam³:

7. « Ad Matthæum legatum.

« Fuit quidem parere paratum cor meum, sed non æque et corpus meum: sævientissiquidem acutæ febris exusta ardoribus, et exhausta sudoribus, non valuit sufficere spiritui prompto caro infirma. Volui ergo, sed prævolanti voluntati obsistit ea quam dixi occasio. Quæ an justa sit, ipsi judicent amici nostri, qui me omni exclusa excusatione, obediencie rebus circumclusum, quotidie de claustro ad civitates pertrahere moliantur: simulque attendant istam me occasionem non fallaciter advenisse, sed graviter pertulisse; ut vel nunc experiantur, quia non est consilium contra consilium Dei. Quibus si ego respondissem⁴: *Exui tunicam meam, quomodo induam illam? lavi pedes meos, quomodo inquinabo illos?* profecto indignaretur. Nunc autem divino aut succenseant aut acquiescant iudicio, quo factum est, ut etsi velim, non valeam proficisci. Sed grandis, inquit, fuit causa gravisque necessitas. Quærendus ergo fuerat, qui

grandibus definiendis fuisset idoneus. Si me talem putant, ego me talem non esse nequaquam puto, sed scio. Denique sive grandia sint, sive parva, ad quæ me ita perurgent, ego causam non habeo. Quæro siquidem: facilia sunt, an difficilia, quæ ad perturbandum amicum silentium tantopere imponere curatis amico? Si facilia, absque me possunt fieri: si difficilia per me non possunt effici, nisi forte tanti æstimor, cui gaudia et impossibilia reserventur, tanquam ego ea possim quæ nemo alius facere potest. Quod si ita est: Domine Deus meus, quomodo tuum de me solo frustratum est iudicium, poneus sub modio lucernam, quæ poterat lucere super candellabrum? et ut apertius loquar, tentans me facere monachum, et volens abscondere in tabernaculo tuo in die malorum hominem necessarium mundo, sine quo episcopi non possunt sua pertractare negotia? Sed et hoc mei mihi necessarij præstiterunt, ut nunc quoque videar loqui turbatus homini, cujus nunquam nisi serenus, et cum omni jucunditate soleo recordari. Vos tamen, vobis dico, pater, noveritis, quia paratus sum et non sum turbatus, ut custodiam mandata vestra. Vestræ autem indulgentiæ erit parcere mihi, ubi parcendum decreveritis ». Hucusque ad legatum Apostolicæ Sedis Matthæum Bernardus.

8. At tandem importunitas legati prævaluit, coegitque eum Treccas ad Concilium proficisci. Quod constat ex his quæ Willelmus Tyrius tradit⁴, ubi agit de institutione et confirmatione congregationis militum Templariorum. Nam ait: « Novem autem annis post eorum institutionem in habitu fuerunt seculari iidem milites Templi, talibus utentes vestimentis, qualia pro remedio animarum suarum populus largiebatur. Tandem anno nono, Concilio in Francia apud Treccas habito, cui interfuerunt dominus Rhemensis, et dominus Senonensis archiepiscopi, cum suffraganeis suis, Albanensis quoque episcopus Apostolicæ Sedis legatus, abbates quoque Cisterciensis et Clarevallensis cum aliis pluribus, instituta est regula, et habitus assignatus, albus videlicet, de mandato domini Honorij pape, et domini Stephani Hierosolymitani patriarchæ. Cumque jam annis novem in eo fuissent proposito (nonnisi novem erant) ex tunc cepit eorum numerus augeri, et possessiones multiplicabantur etc. » Hæc Willelmus. Porro tantopere requisita est S. Bernardi opera, ut ab eo illis certa præscriberetur forma vivendi. Qui etiam ad eosdem perutilem libellum scripsit, qui tum laudes eorum, tum exaltationem continet, cujus est titulus: Ad milites Templi. Eorum quoque præconia texiit Petrus Cluniacensis⁵ in Epistola ad Everardum Templariorum magistrum. Quæ autem præter hæc gesta sint in eodem Trecensi Concilio, ignoramus: querelas diversorum illic auditas, significant lit-

¹ Willel. Tyr. l. xii, c. 7. — ² Ber. Ep. xvii. — ³ Ibid. Ep. xxi. — ⁴ Cant. v.

⁵ Willel. Tyr. l. xi, c. 7. — ² Petr. Clun. l. vi. Ep. xxvii.

teræ ejusdem sancti Bernardi ad archiepiscopum Senonensem ¹.

9. *Inter episcopum Parisiensem et Ludovicum regem, qui illum bonis expoliaverat, dissidia.* — Præter hæc autem protraxit a clastro sanctum Bernardum alia causa majoris fortasse momenti, cujus occasione fuit ipsi pugnandum cum rege Ludovico ob persecutionem, quam intulit episcopo Parisiensi nulla justa de causa, sed contra jus fasque, cum coleret justitiam, et numeros optimi antistitis absolveret; ob quod bona illius tyrannice abstulerat: quod redundabat in ignominiam archiepiscopi Senonensis et totius provincie episcoporum; in cujus ultionem atque cohibitionem, non cessante rege, fuit subjicienda civitas interdicto. Sed cum nec id sufficeret, agendum fuit sancto Bernardo apud regem litteris, conveniendus fuit præsens, et hortationibus perurgendus, ac denique comminanda in eum ab episcopis excommunicatio, nisi resipisceret. Cum inter hæc rex recursum habens ad Honorium Pontificem, surreptione eum decipiens operatus est, ut litteris Apostolicis interdicti censura penitus tolleretur. Quamobrem ad ipsum Honorium papam tum S. Bernardi, tum episcoporum sunt frequentate querele litteris explicate, quas hic reddendas necessarium duximus, cum nonnisi ex Epistolis habeatur, unde ejusmodi deponi possit historia. Atque primum, quam S. Bernardus ad eum scripsit his verbis ², nomine quoque ablati Pontifici accipe:

10. « Summo Pontifici Honorio, pauperum Christi abbates Hugo de Pontiniao, et Bernardus de Claravalle, quidquid potest peccatorum oratio: « Lacrymabilem episcoporum, imo totius Ecclesie querimoniam nos quoque ejus filii (si tamen digni) dissimulare non possumus. Quæ vidimus loquimur; magna siquidem nos necessitas de clastris ad publicum traxit, ubi et quod loquimur vidimus. Tristes vidimus, tristes eloquimur, honorem Ecclesie Honorii tempore non minime lesam. Jam regis flexerat iram humilitas, vel potius constantia episcoporum, cum ecce a summo Pontifice summa superveniens auctoritas, heu! dejecit constantiam, superbiam statuit. Scimus quidem id vobis per mendacium fuisse surreptum, quod ex vestris litteris palam datur adverti, ut everti tam justum tamque necessarium interdictum juberetis. Sed nunquid non vel tandem deprehensio mendacio mentitam se sentiet iniquitas sibi, non tante utique majestati? Est autem quod miramur: qua ratione judicatum sit de parte, abjudicatum absenti. Quod quidem non vel tandem deprehensio reprehendimus, sed filiali amore paterno cordi suggerimus, quantum ex hoc et superbit impius, et incenditur pauper. Cæterum quamdiu illum pati, quantumve huic compati debeatis, non est nostrum præscribere vobis. Vos vestra hic potius, dulcis-

sime pater, viscera consulite ». Ad eundem sic et Carnotensis episcopus Gaufridus ³, vir laudatissimus, qui defuncto successit Ivoni:

11. « Tristissime historie seriem vobis et causam replicare superfluum est, qua jam quippe paternitatis vestre viscera, scribente religioso Parisiensi episcopo, commota esse non ambigo. Ne tamen fratri et coepiscopo etiam nostrum deesset testimonium, quæ vidi ego et audiui, necessarium duxi breviter intimare. Excepta siquidem tam modesta prædicti episcopi querimonia, Senonensis diocesis universi episcopi una cum venerabili metropolitano nostro, adscitis etiam nobiscum quibusdam aliis religiosis personis, regem super gravi injuria per nosmetipsos humiliter, ut debuimus, convenimus, ut episcopo nihil quidem tale merito sua quæ lulerat restitueret rogavimus, nec impetravimus. Sentiens tandem nos ad arma Ecclesie pro Ecclesia velle confugere, timuit annuitque sese omnia redditurum. Sed in eadem forte hora, supervenientibus litteris vestris, quibus etiam terram ab interdicto absolvi præcepistis, male in malum confortatus, quod bene promiserat minime executus est. Die tamen nominata, qua se id rursus promisit executurum, ejus nos conspectui representantes, sustinuvimus pacem, et non venit; quæsiimus bona, et ecce turbatio. Hoc denique litteris vestris factum est, ut male ablata pejus teneantur, et reliqua passim in dies rapiantur, eo utique secure, quo impune illa retinentur. Soluta nempe ad vestrum imperium episcopi justo, ut putamus, interdicto, nostroque quod parabamus, et quo sperabamus pacem consequi, vestro æque timore suspensio, interim facti sumus opprobrium vicinis nostris. Quousque, vestre viderit pietatis compassio ». Ista Carnotensis episcopus, sive potius nomine ipsius, idem qui supra Bernardus, qui jam, antequam ad Honorium scriberet, nomine senioris abbatis Cisterciensis venerandi Stephani et totius congregationis hisce litteris ipsum Ludovicum regem ompellandum putavit ². Siquidem idem rex cooptatus fuerat ab iisdem Cisterciensibus inter fratres, quoad participationem spiritualium honorum, quæ ab eis fierent ³. Quod moris fuisse tunc fieri etiam a Cluniacensibus, plures Petri abbatis Cluniacensis docent Epistolæ.

12. « Eximio regi Francorum Ludovico, Stephanus abbas Cisterciensis, totusque conventus abbatum et fratrum Cisterciensium salutem, sospitatem, et pacem in CHRISTO JESU.

« Rex cæli et terræ regnum vobis in terra donavit, donaturus et in cælo, si id quod accepistis, juste et sapienter administrare studueritis. Hoc est quod vobis optamus, et pro vobis oramus, ut et hic fideliter, et illic feliciter regnetis. Cæterum vos quoniam consilio eisdem nostris pro vobis orationibus, quas si recolitis, olim tam humiliter requi-

¹ Bern. Ep. IV. — ² Ibid. Ep. XLVI.

¹ Bern. Ep. XLVII. — ² Ibid. Ep. XLV. — ³ Petr. I. IV. Ep. XXIX.

sistis; modo tam acriter repugnatis? Qua enim jam fiducia manus pro vobis levare præsumus ad sponsum Ecclesie, quam ita et sine causa, ut putamus, ausu inconsulto contristatis? Gravem siquidem adversum vos apud eundem sponsum et Dominum suum querimoniam deponit, dum quem acceperat defensorem, sustinet oppugnatorem. Attenditis jam cui ex hoc infensum vos redditis? Non utique episcopo Parisiensi, sed Domino Paradisi, et quidem terribili, et ei qui aufert spiritum principum. Ipse quippe est qui ad episcopos dicit¹: Qui vos spernit, me spernit. Hæc ita vobis et pro vobis audacter quidem, sed amanter intinere curavimus, monentes et rogantes per illam invicem amicitiam nostram et fraternitatem, cui vos satis dignanter sociastis, sed nunc ipsam graviter læsistis, quatenus a tanto malo citius desistatis. Alioquin si non meremur exaudiri, sed condemnimur, et nos fratres et amici vestri, et qui quotidie oramus pro vobis et filiis vestris et regno, ex hoc jam noveritis parvitatem nostram, in quibus valuerit, non posse deesse Ecclesie Dei, et ministro ejus, venerabili videlicet patri et amico nostro episcopo Parisiensi, qui nostram adversus vos humilitatem interpellans, nostras pro se ad dominum papam jure fraternitatis litteras requisivit. Verum nos justum ducentes, his prius litteris vestram excellentiam convenire, præsertim quia idem episcopus per manum omnium religiosorum se ad justitiam offert, si tamen prius (quod quidem eadem ipsa justitia videtur exigere) res ei suæ injuste ablata restituantur: ejus interim petitioni differendo supercedimus. Et si quidem, Deo inspirante, placuerit vobis nostris precibus aurem inclinare, nostro consilio, studioque pacem cum episcopo, imo cum Deo reformare, parati sumus hujus rei gratia fatigari usque ad vos, quocumque vobis placuerit. Sin autem, nos amicum audire, et Dei sacerdoti obedire necesse est. Valet». At his nihil apud regem profecisse sanctos monachos, quibus pulsandæ fuerunt aures Romani Pontificis suis litteris, quæ dicta sunt superius, satis ostendunt. Ipsum vero Pontificem egisse apud regem, ut Parisiensis episcopus integraretur bonis amissis, litteræ posteriores eorundem abbatum ad Honorium papam inferius recitandæ declarant.

13. *Qua causa Ludovicus rex infensus archiepiscopo Senonensi.* — Verum cohibitus rex ab Honorio papa inferre mala Parisiensi, appetit metropolitani ipsum archiepiscopum Senonensem, qui jam suis bene præcesset, et in eis disciplinam Ecclesiasticam restituere laboraret, seseque ad exactam sacerdotalis vite perfectionem componeret; itaque accideret, ut quos discipulos, lubricos, voluptuosos antea idem rex dilexisset episcopos, eosdem ad Deum conversos, meliori frugis redditis, moribus bene compositos, quasi quid novitatis inferentes odio haberet et insequeretur. Profece-

rant siquidem episcopi provincie Senonensis Cisterciensium monachorum exemplo, atque verbis litterisque S. Bernardi, præcipue vero, quem diximus, Parisiensis episcopus atque Parisiensis abbas S. Dionysii, Sugerius, qui monasterium illud monastica penitus disciplina solum, et fibula regularis observantia arcte constrinxerat, quo nomine ipsi S. Bernardus congaudens², gratulatoriam ad eum dedit Epistolam. Quod vero etiam et ipse metropolitani Senonensis archiepiscopus Henricus, æque admonitus litteris S. Bernardi, et quidem prolixioribus³, ad meliorem frugem conversus, ea quæ essent optimi pastoris munera diligenter expleret, eadem ex causa ejusdem principis indignationem incurrit, nec quidem mediocrem, sed plane eam, cujus causa eidem S. Bernardo cum reliquis abbatibus rursus scribendum fuerit eidem Honorio papæ, atque cancellario cardinali, et plane exclamandum, quod ob vitam optime institutam persecutionem paterentur episcopi non quidem ab hostibus, sed ab ipsis principibus Christianis, eo nomine comparandis Herodi, quo quid monstruosius potuisset audiri? Sed quæ ista reformatio, inquis, fuit, quæ adeo displicere regi potuerit Christianissimo? Illa scilicet, quod episcopi assueti prius relictæ Ecclesie, curiæ regis assisere, militiam sectari, jam sese ad Ecclesiam e curia atque militia avocassent, atque etiam subditos sibi clericos pariter revocassent. Erathorum haud exiguus numerus in palatio regis militantium, nec in ipsa palatina tantum, sed et in castrensi militia merentium. Quod deplorat idem S. Bernardus, cum in pluribus locis, tum præsertim (quod ad rem spectat) in Epistola ad Sugerium abbatem Parisiensem, his verbis⁴:

14. « Cujus enim cor non indignatur, cujus vel clam lingua non submurmurat, diaconum contra Evangelium Deo et mammonæ pariter ministrantem? Sic quippe sublimatum honoribus Ecclesiasticis, ut nec episcopis inferior videatur: sic implicatum militaribus officiis, ut præferatur et ducibus? Rogo, quid hoc est monstri, ut cum et clericus et miles simul videri velit, neutrum sit? par satis utrobique abusus, sive quod diaconus mensæ regie deputetur ministerio, sive quod regis dapifer ministeris altaris inserviat. Quis sane non miretur, imo et detestetur, unius esse personæ et armatum armatam ducere militiam, et alba, stolæque indutum in medio Ecclesie promuntiare Evangelium? tuba indicere bellum militibus, et jussa episcopi populis intinere? Nisi forte (quod intolerabilius est) erubescit Evangelium, de quo Vas electionis admodum gloriatur: et confunditur videri clericus, magisque honorabile ducit putari se militem, curiam Ecclesie præfert, regis mensam altari Christi, et calici Domini calicem demoniorum, etc. » Pluribus enim declamat in hujusmodi abusione, cum mi-

¹ Luc. x.² Bern. Ep. LXXXVIII. — ³ Ibid. Ep. XLII. — ⁴ Ibid. Ep. LXXXVIII.

litarent curiæ principum diaconi, archidiaconi, decani, atque præpositi Ecclesiarum. Hæc igitur et alia, de quibus idem sanctus Bernardus scripsit in dicta Epistola ad Henricum archiepiscopum Senonensem, et ad alios, cum corrigere et emendare statuisset episcopi; mox (ut diximus) regius furor in illos exarsit quasi novitatis inventores, quos colere magis debuissent ut Ecclesiasticæ disciplinæ restitutores et correctores.

15. *Pro Senonensi archiepiscopo apud Honorium papam agunt Stephanus et Bernardus abbates.* — Cum igitur non solum in Parisiensem episcopum, ut audisti, eo modo commotus esset, nec tot precibus episcoporum, vel litteris sanctorum monitis corrigeret quod peccasset, sed adiecisset insectari archiepiscopum Senonensem, has idem sanctus Bernardus suo et aliorum abbatum nomine adversus eundem regem litteras declamatorias ad Honorium Romanum Pontificem dedit¹:

« Summo Pontifici Honorio, servi, et si digni judicamur, filii, Stephanus Cisterciensis, Hugo Pontificiacensis, Bernardus de Claravalle, quod reverendissimo domino, quod benignissimo patri.

« Degentes in monasteriis, ad quæ nos nostra peccata compulerunt, non cessamus orare pro vobis, et pro commissa vobis Ecclesia Dei: congaudentes et sponsæ Domini super tam fido custode, et sponsi amico super labore tam fructuosum. Fidenter proinde atque fideliter vestræ paternitati suggerimus, quæ in regno nostro eidem matri nostræ dolentes cernimus adversari. Quantum quidem nos sentimus qui vicini sumus, rex Ludovicus non tam episcopos, quam in ipsis iustitiæ persequitur zelum, pietatis cultum, habitumque religionis. Quod vestræ quoque prudentiæ sanctitatis vel ex eo facile advertere potest, quod qui ante in habitu actusque seculari honorati sunt sublimis, iudiciali fideles, habitus familiares, modo inimici facti sunt dignæ suo sacerdotio conversantes, et per omnia honorificantes ministerium suum. Hinc gravibus contumeliis et injuriis episc. Paris. innocentia pulsata est, sed non quassata, quia Dominus suppositum manum suam, cum vestram opposuit. Hinc et nunc domini hujus Senonensis constantiam continere et labefactare conatur, ut metropolitano (quod absit) ejecto, facile prout voluerit, grassetur in suffraganeos. Postremo quid ambigit non aliud enim, quam oppugnare religionem, quam nimirum aperte sui regni destructionem, suæ coronæ pronuntiat inimicam? Et alter Herodes Christum jam non in cubilibus, sed in Ecclesiis invidet exaltatum. Nec aliud sane credimus eum habere adversus archiepiscopum, nisi quod spiritum, sicut in cæteris laborat extinguere. Denique si fallere de his, quæ attestamus, fallive putamur: vestræ citius inveniet examinationis discussio, si tamen (quod vehementer optamus, et suppliciter

exoramus) de vultu tuo, pater sanctissime, iudicium prodeat, de quo profecto confidimus, quod custodias innocentiam, et videas æquitatem. Alioquin reduci causam in regis præsentia atque potentia, non plane est aliud, quam tradi, heu! hominem in animam inimicorum ejus». Hæc abbates ad Honorium papam, a quo cum nequaquam quod petierant, impetrasset, has breviores litteras ad eundem Pontificem Honorium adjecere²:

16. « Oportebat quidem, si ita vestræ visum fuisset auctoritati, ut in vestri præsentia causa domini Senonensis discenteretur, ne infensus videlicet regi, in regis præsentia et potentia suis pro se adversariis responsurus, traditus homini videretur in animam inimicorum ejus. Sed quoniam ut tunc dum irrefragabiliter quidquid præcipitis, sic sperandum indubitanter bonum de omni re quam decernitis, id solum a vestra, pater, pietate deposcit omnium qui apud nos esse videntur religiosorum humilitas, ut si se ad vultum forte potentis, ut assolet, senserit prægravari, confutgere sibi liceat ad viscera patris: quod ubique hactenus oppresso nemini negatum audivimus. Alioquin videat Joseph vir justus, quid sibi etiam nunc faciendum sit de puero et matre ejus, quia etiam nunc in Senonensi provincia Christus queritur ad perdendum. Nam, ut quod verum est, manifestius proferamus, rex in archiepiscopo ex eo aperte novam persequi religionem dignoscitur, quod eum in antiqua seculari conversatione et habitu sicut promoveri omnimodo voluit, sic ab omni penitus securum infestatione dimisit». Vellabatur autem persecutio ista excitata in Senonensem archiepiscopum alio prælexit, nimirum quod simoniace ordinatus fuisset, ut idem sanctus Bernardus ostendit, in litteris tunc ad S. R. E. cancellarium datis apud quem paulo liberius idem Bernardus agens acrius exclamat hæc scribens³:

17. « Viro illustri Haimérico, sanctæ Romanæ Sedis cancellario, Bernardus abbas dictus de Claravalle, salutem, et si quid valet peccatoris oratio.

« Quousque durat illa sententia⁴, omnes qui volunt pie vivere in Christo persecutionem patiuntur? Quousque relinquitur virga peccatorum super sortem iustorum? Quis dicit, ut stare incipiant iusti in magna constantia adversus eos qui se angustiaverunt? Quis jam ferat tantam inter cælum terramque discordiam ut exultantibus Angelis super emendatione malorum, filii Adam fremant et talescent? Quasi non sit passus Iesus, pacificans in sanguine suo, quæ in terra sunt et quæ in cælo; aut ut in ipso Deus non fuerit⁵, mundum reconcilians sibi. Laudabatur quondam archiepiscopus in desideris animæ suæ, et in seculari vita et habitu benedicebatur: at nunc sub pannis infantie læst queritur simonia, et inter nascentes virtutes emortuorum vel cadavera vitiorum scrutatur curiosa malitia. Videtis et nunc stare IESUM in si-

¹ Bern. Ep. XLIX.² Bern. Ep. I. — ³ Idem. Ep. II. — ⁴ 2. Tim. III. — ⁵ 2. Cor. V.

gnum, cui contradicatur. Per ipsum vos obsecro, pro ipso supplico vobis. Habet siquidem unde et illum revereamini, et unde illi misereamini : stule pro ipso nunc in defensione archiepiscopi, cui quandoque et vos astare habetis in examinatione vestri ». Ille sanctus Bernardus. Porro liberatum fuisse eundem Henricum Senonensem archiepiscopum, nec (ut rex optabat) archiepiscopatu privatum, litteræ post hæc ad eundem archiepiscopum ab eodem Bernardo datæ satis significant ¹.

18. *Concilium Wintoniæ contra clericos concubinos*. — Hoc anno, cum Wilhelmus archiepiscopus Cantuariensis Romæ ab Honorio papa accepisset legationem in Angliā, reversus in patriam, celebravit Wintoniæ generale Concilium totius Angliæ frequenti concursu clericorum et aliorum. Ceptum est tertio idus Maii, pervenitque ad decimum septimum kalendas Junii. Inter multa quæ ibidem sunt salubriter instituta, quæ singula recensetur in Appendice ad Florentium, eademque consentientia iis, quæ in alio Londoniensi Concilio sunt recitata sub Joanne Cremensi Apostolicæ Sedis legato contra clericos concubinos, ad extirpandum penitus ejusmodi scelus in pluribus altis radicibus fixum, hæc statuta reperitur :

19. « Presbyteris, diaconibus, subdiaconibus, et omnibus canonicis, contubernia mulierum illicitarum penitus interdiximus. Quod si concubinis (quod absit) vel conjugibus adhæserint : Ecclesiastico priventur honore simul et beneficio. Presbyteros vero parochiales (si qui tales fuerint) extra chorum ejicimus, et infames esse decernimus. Archidiaconis vero et ministris, quibus hoc incumbit, auctoritate Dei et nostra præcipimus, ut omni studio et sollicitudine procurent, ab Ecclesia Dei hanc perniciem omnino eradicare. Quod si qui in hoc negligentes, vel (quod absit) consentientes inventi fuerint : primo et secundo ab episcopis digne corrigantur, tertio vero canonicè severius corripiantur. Concubinæ vero presbyterorum et canonicorum, nisi ibi legitime nupserint, extra parochiam expellantur. Quod si postea culpabiles inventæ fuerint, in cujuscumque territorio sint, a ministris Ecclesiæ capiantur, et sub excommunicatione præcipimus, ne ab aliqua potestate majore vel minore detineantur, sed libere eisdem ministris Ecclesiæ tradantur, et Ecclesiasticæ disciplinæ vel servitutis, episcopali judicio mancipentur ». Ille et alia ibidem, quæ brevitatis causa prætermittimus.

20. *S. Norbertus archiepiscopus Magdeburgensis*. — Hoc anno ² decernitur ab Honorio papa legatus in Germaniam Gerardus cardinalis, qui postea fuit Lucius papa, qui inter alia ab eo præclare gesta, ubi illuc perveniens invenisset vacare Ecclesiam Parthenopolitanam sive Magdeburgensem, curavit ut in ea eligeretur episcopus S. Nor-

bertus Præmonstratensium Ordinis institutor, qui hoc tempore erat a Domino revera constitutus accusa lucerna, ardens et lucens in Ecclesia.

21. *Wilhelmus archiepiscopus Tyri et S. Gualfardi Augustani obitus*. — Quod ad res spectat Orientis vindicata nobili civitate Tyro ab infidelibus, et reddita Christianis ante annos quatuor ; tandem ¹ hoc anno veris initio primus creatur ejus civitatis archiepiscopus, Wilhelmus nomine, natione Anglicus, ex priore Sancti-Sepulchri, qui impetrandi causa pallium ab Honorio papa, statim Romam se contulit. Quod et accepit, et has litteras impetravit :

« Honorius episcopus, servus servorum Dei, venerabilibus fratribus suffraganeis episcopis, clero et populo Tyri, salutem et Apostolicam benedictionem.

« Venientem ad nos charissimum fratrem nostrum Wilhelmum archiepiscopum vestrum, debita charitate recepimus, et quem canonicè electum, et a venerabili fratre nostro Guarimundo Hierosolymitano patriarcha consecratum accepimus, pallii dignitate, plenitudine videlicet pontificalis officii decoravimus. Quia vero de persona sua maximum fructum matri Ecclesiæ vestræ Tyri, divina suffragante misericordia, credimus proventurum, ipsum cum gratia Sedis Apostolicæ, et nostrarum litterarum persecutione ad vos duximus remittendum. Universitati ergo vestre mandando præcipimus, quatenus cum benigne recipialis, et tanquam proprio metropolitano, et animarum vestrarum episcopo subjectionem, obedientiam, et reverentiam humiliter deferatis ». Ad patriarcham vero Hierosolymorum sic idem Pontifex scripsit :

22. « Honorius episcopus, servus servorum Dei, venerabili fratri, Guarimundo Hierosolymitano patriarchæ, salutem et Apostolicam benedictionem.

« Susceptis fraternitatis tuæ litteris, fratrem nostrum Wilhelmum, quem in Ecclesia Tyri consecrasti archiepiscopum, benigne suscepimus, et eum dignitate pallii, plenitudine videlicet pontificalis officii decoravimus. Suffraganeis etiam Ecclesiæ suæ præcepimus, quatenus ei tanquam proprio metropolitano, subjectionem et obedientiam deferant. Data in territorio Barensi octavo idus Julii. »

Misit etiam et cum eodem archiepiscopo dominum Ægidium Tusculanum episcopum, Apostolicæ Sedis legatum, virum eloquentem et litteratum admodum, cujus usque hodie extant ad Antiochenos Epistolæ valde celebres ». Monuit Honorius papa patriarcham Antiochenum, ut Tyrensi archiepiscopo suos quos detinebat, restitueret suffraganeos. At enim inter cætera : « Unde per Apostolica scripta, et per venerabilem fratrem nostrum Ægidium Tusculanum episcopum, Apostolicæ Sedis legatum, tibi mandamus, quatenus suffraganeos Tyrensis Ecclesiæ sibi restituas. Quod nisi

¹ Bern. Ep. CLXXII. — ² Robert. in Append. ad Sigebo. hoc anno, et Hugo in Vit. S. Norbert. c. 40, 41, 42.

⁴ Willel. Tyr. l. XIII. c.

infra quadraginta dies post earum inspectionem litterarum, quas ad eos direximus, debitam ei subjectionem exhibuerint, nos ex tunc eos ab officio episcopi suspendimus ». Hucusque de causa Tyrensi.

Hoc item anno, pridie kal. Maii, ex hac vita migravit in cælum sanctus Gualfardus confessor, qui natus Augustæ Vindellicorum, apud Veronam vitam exercevit admirandam, cujus sanctitatem Deus pluribus miraculis illustravit. Demum vero opera priorum nobilium Angustanorum diu expellatæ ejus venerandæ reliquiæ translatae sunt Augustam, quas reverendissimus Henricus episcopus Angustanus anno millesimo sexcentesimo secundo, die xxvii Octobris, Ecclesiæ religiosorum Cappucinorum a se dedicate solemnî pompa intulit: in cujus celebritatis memoriam sacrum hymnum tunc editum hic describendum curavimus :

Urbs vetusta Romule
Augusta matris filia,
Attolle cælo verticem,
Et læta cives suscipe.
Potentum quem limina,
Et res perosum terras,
Decora virtus ætheris
Proximit ad cacumina.
Sol mane qualis aureus
Cum nocte gentes dissitas,
Lustravit alio lumine,
Diem reducit pulchrior :
Gualfardus oris laus
Post tot redux nunc sæcula,
Sertis coruscans aureis,
Jubar novum infert patriæ.
Tu magne rerum conditor,
Qui timus unus, annus es,
A quo prorum numerum,
Rivus perennis effluit.
Jura benignè supplices,
Et sanctitatis amulos,
Hæc consequi vestigia,
Cælo assequi da præmia.

Anno periodi Græco-Romanae 6620. — Anno Æræ Hispan. 1165. — Anno Hegiræ 701, inchoato die 17 Januar., Fer. 2. — Jesu Christi 1127.

— Honorii II papæ 3. — Lotharii I reg. 3. Joannis Comneni imp. 10.

1. *Moritur Guillelmus, dux Apuliæ.* — A num. 1 ad 6. « Hoc anno », inquit Falco in Chron., « dux (nempe Apuliæ) Willelmus septimo kalendas Augusti mortuus est (nempe die xxvi mensis Julii). Romualdus Salernitanus a Baronio citatus tradit, eam mortem accidisse *in festo S. Nazarii*, id est die xxviii ejusdem mensis, quo ideo sepultus fuit. « Continuo uxor ejus crines suos, quos pulchros et suaves nutrierat, coram omnibus qui aderant totondit ». Describit postea magnificas exequias Salerni, ubi Willelmus dux demortuus, peractas Baronius num. 1, ait cum Willelmo genus Roberti Guiscardi penitus extinctum fuisse. Verum restabat *Boamundus Junior*, Roberti ex Boamundo filio nepos, anno mxxx occisus, ut ibidem ostendimus. Falco subdit : « Cumque Rogerius comes Siculorum mortem ducis Guillelmi agnovit, navigiis septem paratis, in armis siquidem et omnibus necessariis Salernum advenit, et diebus ibi decem commoratus est, nolens revera de navi descendere, sed nocte dieque in navigio persistens, cives vocari fecit Salernitanos, et archiepiscopum eorum Romualdum, et eis juxta litus omnibus convenientibus comes ille Rogerius exorsus est ». Ostendit in sua oratione principatum illum jure natalium sibi deberi, petitque in principem eligi, et cuicumque alteri

præferri, « me præter quemlibet alium, inquit, diligentes » ; additque : « Cives illi, consilio communicato, civitatem Salerni ejus sub fidelitate commiserunt, etc. Et his actis civitatem ingreditur, et ibi honeste moratur ».

2. *Rogerius Siciliæ comes ei substitui petit.* — Alexander abbas Celesini monasterii, qui vivebat adhuc anno mcliv, in libris complectentibus res gestas hujus Rogerii postea Siciliæ regis, de eodem, antequam Guillelmo consanguineo succederet scribit : « Et cum adolevisset, invaserat, alias insulas, quarum una Malta vocabatur ». Quare non Rogerius pater ejus, ut aliqui perperam in litteras misere, sed ipsemet Melitam insulam occupavit, et quidem ante præsentem annum, annoque circiter mxxii. Primum Melitæ episcopum indicavimus anno mxc. Subjungit Alexander, post istam expeditionem Rogerium de aliis terris occupandis cogitasse : « Cum ad alias iterum occupandas insulas terrasque attentius persisteret, repente audivit præfatum ducem Guillelmum ab hac luce Salerni decessisse : qui doluit valde, quod se ignorante defunctus sit, quodque se ut sibi vivens statuerat, si filium non haberet, hæredem non fecisset. Unde moram non perit, sed præparato navali itinere quantocius Salernum tetendit: cumque non procul

ab urbe constitisset, delegatis nuntiis Salernitanis civibus misit, quatenus eidem subderentur. Nam potius sibi, quam alteri, dominatus ejusdem civitatis, generis successione competeat: quod et Guillelmus dux, si ex conjuge nato carilurus esset herede, vivens ei concesserat. Quibus illi respondentes: Nos nullo modo, inquit, nulla ratione ei subdemur quoniam plura malorum Guillelmo duce ejusque predecessoribus perpassi sumus, quæ etiam ab eodem ipso nobis inferri, si dominatus culmen super nos suscepit, formidamus; cumque hæc et iis similia ab eis superbo ore proferrentur, atque quidem Carolus nomine unus ex illis, qui ex parte comitis verba detulerant, dum contra eos pro hoc ipso verba reddidisset, mox illis in eum furore concitatis, dum fugam evadendi infelix ageret, ferro ab ipsis succisus interijt. Factum hoc a Falcone omissum.

3. *A Salernitanis civibus recipitur.* — Pergit Alexander: « Quæ videlicet cum Rogerio relata fuissent, licet cordis dolore quamplurimum tangeretur, animi sui impetum pro tempore graviter obvolvens, rursus mitebat exorans eos, quatenus quod sibi justum ad habendum erat, non negarent. At illi super hoc iterum atque iterum conloquentes, tandem alia respondentes dixerunt: Concedatur nobis munitio Turris-Majoris ad custodiendum: sique post domino ipsius subdemur. Quo audito, ille, quamquam super hoc periculum aggravaretur, subditiōnem tamen civium accepturus prædictam arcem eis pro nutu ipsorum conservandam annuit. Idem refert Falco: « Juravit statim comes ille Rogerius, quod sine judicio, et sine culpa eos non capiat, neque capi permittat, neque extra dies duos in expeditione illos perducatur, et castellum Turris-Majoris de illorum potestate non auferat; et si quis abstulerit, ejus auxilio sub eorum potestate restituatur. Ex his perspicuum fit, fabulosum esse quod scribunt recentiores rerum Sicularum auctores, Rogerium scilicet Siciliæ comitem Guillelmi Apuliæ ducis Constantinopolim profecti ditiones invasisse, et usque ad mortem ejus retinuisse. Id quidem a nobis anno mxxi confutatum, sed ex Willelmi mortis narratione magis convellitur. Ibidem diximus Willelmi uxorem fuisse *Gaillegrimam*, Jordani principis Capuæ sororem.

4. *Recipitur et in reliqua Apulia.* — Alexander abbas refert, *Ramulfum* comitem, Mathildis maritum, sese Rogerio sororio subdere noluisse, quin vice versa Rogerius comitem Rogerium Oranensem sibi subderet, additque: « Tandem Rogerius abire non passus tam pro conjugali Mathildis copula, quia ei propinquus erat, quam pro strenuitatis suæ nomine, quam sibi in acquirendo Apuliam omnino profuturam sperabat, ejus suscepto hominō subdidit ei præfatam quem proposuerat comitem; deinde cum accepta fidelitate Salernum ingreditur. Amalphitani deinde videntes Salernitanos comiti colla subdidisse, et ipsi itidem ei, re-

tentis munitionibus subjiciuntur. Falco nulla *Ramulfi* comitis mentione facta, ait: « Ille et aliis ita decursis, universum ducatum Amalphitanorum circumquaque comes ille suæ subjugavit potestati, et inde procedens, Trojanam civitatem, et Melphitanam, et totius fere Apuliæ partes obtinuit, etc. » concluditque: « Quibus peractis, victor et exultans Siciliam repedavit ».

5. *Honorius II cum excommunicat.* — Subjungit Falco: « Consilio habito, ad ducatus arripendum honorem animum impulit elatum, et præcepit omnibus in terra sua manentibus, ut ducem Rogerium eum vocarent, quod et factum est ». Alexander vero abbas in eandem rem scribit: « Per idem tempus Romanæ Ecclesiæ Pontificium Honorius papa II administrabat, qui Romæ obitum Guillelmi ducis percipiens, necnon Siciliensium comitem ducale jam ambire regimen cognoscens, doluit valde: atque sine dilatione Urbem egressus Beneventum properat. Deinde missarum celebrans solemniam, ipsum publica voce anathematis jaculo percussit, si ducale obtinere culmen ulterius conaretur, vel quisquis ei ad nanciscendum consilium, auxiliumve tribueret. Unde factum est, ut ipse Ramulfus comes ab eo, quamquam male consultus, penitus averteretur, modis omnibus nitens præpedire eum, ne ducatus quiret conscendere apicem. Verum Rogerius Salerni commorans (quo et Sicilia venerat) eum audisset, quod papa Beneventum venisset, atque in se excommunicationis intorsisset jaculum, misit ad eum orans, ut non ab Ecclesia dominatum ducalemque honorem, generis jure sibi competentem, conscendere prohiberetur. Nam et prout æquitas imperaret, de ejusdem ducatus culmine libenter ipse obsecraturus esset ». Falco vero: « Misit præterea domino papæ Honorio munera multa auri et argenti, pollicitando etiam urbem Trojanam, et Montem-Fuscum, ut ducatus ei vexillum et nomen largiretur, quod nunquam tempore illo prædictus papa Honorius ei concedere dignatus est ».

6. *Ei ducatus Apuliæ datus fuerat.* — Verum jure merito *Honorius II* ducis Apuliæ titulum Rogerio comiti Sicilia negavit. Gualterius enim Ecclesiæ Tarvanensis archidiaconus, in Vita B. Caroli Boni comitis Flandriæ, de cujus martyrio mox sermo erit, cap. 2, narrans Guillelmi ducis mortem, scribit: « Qui ut se periclitari cognovit, Salernitanum archiepiscopum et Trojanum episcopum (nempe Romualdum utrique sedi præpositum, uti jam diximus) advocavit, atque quod antea, dum incolumis esset, fecerat, eorum quoque testimonio desiderans confirmari, quicquid mobilium vel immobilium in terra possidere videbatur, beato Apostolorum principi Petro, ejusque vicario sanctissimo papæ Honorio, ex cujus ore sacro hoc ipsum frequenter audivi (hoc enim tempore Gualterus vivebat) jure perpetuo possidendum delegavit, ac deinde in confessione Domini ab hac luce migravit ».

7. *Nec vi, nec muneribus Honorium II flectere potest Rogerius.* — Alexander tamen idem ac Falco his verbis narrat : « Papa vero illis perceptis (legatione nempe Rogerii) nulla ratione, nullove pacto ejus preceationibus flectitur : imo illum excommunicando terrens expellebat. Porro Rogerius indignationem adhuc ipsius patienter sustinens, misit iterum atque iterum eum suscipiens quod se habere jure decebat, non denegaret. At contra papa eodem modo quo supra, in eum obstinatissimum gerens animum, nullo modo desiderio ipsius assensum præbere volebat ». Alexander abbas, qui Rogerii partes sequebatur, gesta ab eo adversus Honorium II et urbem Beneventanam dissimulat, sed Falco ea narrat : « Audiens autem, inquit, prædictus Rogerius Siculorum comes præfatum Pontificem Honorium petitionibus suis circumflecti non posse, etc. fautoribus suis præcepit, quatenus quot possent captivos perducerent Beneventanorum, et afflictionibus multis civitatem infestarent. Qui vere magis quam fuerat eis injunctum, executi sunt ». Post aliqua interposita : « His taliter omnibus superius narratis evolutis, prædictus Pontifex Honorius nihil utilitatis et virtutis erga civitatem Beneventanam agere deprehendens, consilio salutis accepto, III kalend. Januarii (currentis Christi anni) Capuanam civitatem adivit ; continuo prædictus Robertus (Capuæ) princeps officiosissime illum excipiens, ad palatium episcopi Capuani gaudio magno eum castrametari præcepit ». Princeps hic filius erat Jordanis, XIV kalend. Januarii hujus anni demortui, ut Peregrius in Tabula genealogica principum Capuanorum animadvertit ; Honorius vero antequam Benevento discederet, Troje fuerat, ut ipsemet affirmat in sua Oratione habita in Concilio aut cœtu Capuæ congregato, quam Baronius num. 3 ac seq. refert, quamque ex Falcone excerpit ; « Cum pro quibusdam imminutis negotiis civitatem Trojanam adissemus » ; hinc observandum, Baronium non Falconem, sed ejus Epitomen sequi, aut aliqua pro libitu mutare.

8. *Robertus Capuæ princeps anno sequenti innectus.* — Baronius num. 2 refert ex Falcone unctionem Roberti novi comitis Capuani ; verum cum secundum eundem Falconem Honorius II tertio kalendas Januarii Capuæ exceptus fuerit, et episcopos et abbates ad eam unctionem convocavit, cœtus ille ante initium sequentis Christi anni congregari non potuit : « Honorius », inquit Falco, « archiepiscopos et abbates accersiri præcepit, quatenus ad principis unctionem convenirent, qui eunte die statuto (sed a Falcone non designato) exultatione ingenti ad Capuanam Ecclesiam convenire, Archiepiscopus itaque Capuans juxta prædecessorum suorum Privilegium, præsentem tali ac tanto Pontifice Honorio, cum turba virorum religiosorum quæ convenerat, et episcoporum conventu, prædictum Robertum in principatus honorem intinxit et confirmavit ».

9. *Honorius II in Concilio Trojanæ Rogerium comitem iterum excommunicat.* — Supra dixi Honorium II Trojam sese contulisse ; is autem in Oratione in Conventu Capuano habita, et a Baronio num. 3 relata, dicit Rogerii comitis fautores in cives Beneventanos sævisse *in die festivitatis S. Martini*, eo scilicet tempore quo Honorius II, non Beneventi, sed Trojæ versabatur. Alexander abbas quid tunc gestum fuerit hoc modo narrat : « Post hæc autem prædictus præsul a Trojanis civibus accitus, eorum hominum flagitantibus ipsis accepit (nempe Honorius II) ubi pridem universi Apuliæ ad se venientes magnates adversus Rogerium ita eodem sollicitante, federe ei ununtur, ut non nisi eum penitus expellerent, aut in bello, si possent, de terra necando decerent ; ex quibus fuerunt Grimoaldus Barensium princeps, Gofridus comes Adrensis, Tancredus de Conversano atque Rogerius Orianensis comes, alique complures ; quorum scilicet unanimi et Robertus Capuanorum princeps ejusdem papæ hortatu comitisque Ramnaldi (sorori Rogerii qui ab eo defeceat) instigatione consociatur ». Hoc Honorius II in sua Oratione citata designat paucis his verbis : « Cumque pro quibusdam imminutis negotiis civitatem Trojanam adissemus ». Pergit Alexander : « Nec mora, præfatus Apostolicus Beneventum repedit (hoc sc. anno circa festum S. Martini) ibique non longa intercedente mora rursus Trojam revertitur (verosimiliter sub exitum mensis Novembris) qui ibidem episcoporum celebrans Concilium (quod observatione dignum est) Rogerium iterum, vel quisquis ei ad adipiscendum ducatum consensus seu opem collaturus esset, ab Ecclesia excommunicando eliminavit : eumque his peractis denuo Beneventum remeasset, Rogerius rursus legatione ad eum directa simpliciter precatur, quatenus anathematis sententia remota, ducalique sibi dignitate concessa, servitium ejus susciperet (mense Decembris). At ille rursus in eodem ipso quo supra immobili mente persistens, petitioni suæ nullatenus acquiescit ». Imo Honorius II Capuam perrexit, ut refert Falco hoc anno apud Baronium num. 5.

10. *Honorius II et Rogerius comes sese ad arma parant.* — Pergit Alexander : « Rogerius tantam ipsius (nempe Honorii II) insolentiam, animique inflexibilem spectans, ad Siciliam transvectus navigio redit : quatenus quod humilibus verbis obtinere non poterat, armorum violentia revertens adipisceretur. Cujus abscessu cognito, papa et ipse, quantocius potuit, repetit, ut inde bellicam aciem ducens adversus eum, simul cum præmemoratis principibus obsistere deberet, si forte cum hostili manu ducatum invasurus rediret ».

11. *Concilium Treccense.* — A num. 6 ad 9. Concilium Treccense, cui Matthæus, Albanensis episcopus cardinalis, legatus Apostolicus, archiepiscopi Rhemensis et Senonensis, varique episcopi

interfuere, anno tantum sequenti celebratum; cum in ejus Præfatione Joannes Michaelensis Concilii scriba dicat, illud habitum « in solemnitate sancti Hilarii (nempe die xii mensis Januarii) anno mxxviii ab incarnato Dei Filio, ab inchoatione prædictæ militiæ (nempe Templariorum) ix »; qui annus Incarnationis etiam notatus reperitur in Codice Ms. Bibliothecæ Victorinæ Parisiensis, et in Historia Hierosolymitana Jacobi de Vitriaco. Tyrinus quidem ait Concilium istud Ordinem Templariorum jam a novem annis fundatum confirmasse; sed cum is annus Incar. vel a die xxv mensis Martii vel a die Paschatis ibi incipiat, certumque sit Concilium mense Januario congregatum, Tyrinus non nisi de mense Januario sequentis Christi anni interpretari potest, et male aliqui viri docti, cum ad ejus annos Incarnationis numerandi modum animum non advertissent, vel numeros apud Tyrinum mendose descriptos esse causati sunt, vel ad vanas interpretationes recurrere. Annus itaque Æræ Dionysianæ mxxviii mense Januario erat adhuc annus mxxvii Tyrio, et novus exiens a fundatione Ordinis Templariorum.

12. *In eo regula Templariis data.* — Baronius num. 6 recte asserit *Matthæum Albanensem episcopum* cardinalem huic Concilio præfuisse, et ea occasione Epistolam xxi sancti Bernardi ad eum datam. Sed ad illud Concilium Epistolam sancti Bernardi ordine xvii ad Petrum diaconum cardinalem datam, in qua sanctus abbas excusat quod vocatus non venerit, male revocavit; ibi enim divus Bernardus de alia professione nobis ignota sermonem habet et *Petrus* ille, quilibet a sancto Bernardo vocatur diaconus cardinalis et legatus, anno mxxv legatione Gallica, non vero hoc anno functus est, ut eo Christi anno ostendimus. Regulam a sancto Bernardo ex injuncto Concilio Trecentis Templariis datam, non multo post a Teutonicis receptam fuisse testatur Jacobus de Vitriaco Card. in Hist. Orient. cap. lxxvi. De incremento vero *Templariorum* post regulam acceptam complures libri testes sunt. Porro ex die celebrati Concilii Trecentis die sc. xii Januarii anni mxxviii; intelligimus *Matthæum Albanensem episc.* cardinalem, hoc anno saltem exeunte, legatum Sedis Apostolicæ in Galliam venisse. *Girardum* Engolismensem episcopum in legatione Aquitania continuatum fuisse, ex dicendis anno mxxx intelligitur. Duas enim in Gallia legationes fuisse non semel insinuavimus.

13. *Ecclesia Gallicana dissidiis turbata.* — A num. 9 ad 18. *Stephanus* episcopus Parisiensis *Ludovicum VI* Francorum regem anathemate percussit, quod Ecclesiæ bona nonnulla usurpasset; eamque ob rem litteras ad omnes Ecclesiarum prælatos et abbates, ad ipsum quoque Honorium II dedit, rogans ut suæ se causæ adjungere vellet. Sed tandem rex ablata restituit, et a vexandis præfato Stephano et Henrico Senonensi archiepiscopo Stephani metropolita destituit, uti narrat Baronius ex Epistolis divi Bernardi xliv, xlv, xlvii, xlviii et

xliv, quæ ideo hoc anno datæ sunt. *Bernardus* enim impatienter ferens quæ adversum utrumque præsulæm a rege gerebantur, tam suo quam Gaudfridi Carnotensis episcopi nomine litteras ad Honorium II querimonie plenas dedit. Reconciliationis Stephani cum rege testes sunt litteræ, quibus concedit Ecclesiæ B. Martini Campensis in urbe Parisiensi sitæ Ecclesiæ S. Dionysii de Carcere, ut vocant, quæ usurpata fuerat: « Quapropter », inquit Stephanus, « Ecclesiæ B. Martini de Campis et fratribus inibi Deo servientibus Ecclesiæ S. Dionysii de Carcere, quam diu manus laica injuste invaserat, quæ etiam tempore nostro ad manus regias redacta fuerat, ipsam in manibus nostris redditam ex consensu, petitione et voluntate ipsius domini regis Ludovici, Adelaide regina, filiis etiam Ludovico rege, et Henrico ejusdem Ecclesiæ abbate concedentibus, salvo in omnibus jure Parisiensis Ecclesiæ in perpetuum donavimus ».

14. *Stephanus episc.* *Parisiensis diversus a Stephano Anselmi Dapiferi fratre.* — Manricus in Annal. Cisterc. ad hunc Christi annum cap. 1 autumavit *Stephanum* episcopum Parisiensem fuisse olim regi carum, nunquam invisum, et de eo intelligendum quod scribit chronographus Maurigniacensis: « Defuncto Willelmo, Anselmi Dapiferi germano, Stephanus cancellarius frater amorum, major regie domus effectus est. Hoc retroactis generationibus fuerat inauditum, ut homo qui diaconum fungebatur officio, militiæ simul post regem duceret principatum. Hic vir industrius, et seculari præditi sapientia, tum multis Ecclesiasticorum bonorum redditibus, tum familiaritate regis, quam sic habebat, ut ei potius a quibusdam diceretur imperare quam servire, temporali felicitate supra ceteros mortales nostris temporibus efflorescat, etc. » In ea etiam sententia non pauci eritici versantur. Verum ut animadvertit Duchesnius in Notis ad Hist. *Calamitatum Petri Abaelardi*, pag. 4175 et seq., Stephanus episcopus Parisiensis diversus est a Stephano cancellario Anselmi Dapiferi fratre; cum tabulæ B. Mariæ de Gornaio referant simul et « Stephanum Parisiensem episcopum, et Stephanum Dapiferum Gornaum teneantem »; quem ultimum fratrem fuisse Anselmi, ex documentis publicis liquet. Duchesnius quidem utrumque *Stephanum* cancellarium facit, quia in Stephani Parisienses episcopi Epitaphio, quod apud Victorinos Parisiensis legitur, *cancellarii* dignitas ei attribuitur; at Epitaphia, de quorum antiquitate non constat, nullam fidem in similibus faciunt, ut sæpius insinuavimus, et verosimile est istud ab aliquo e posteris fuisse inscriptum, qui e duobus Stephanis unum fecerit. Quia de re legenda Collectio Documentorum ad notitiam cancellariorum Franciæ conducentium, subjuncta Historiæ comestabilium et cancellariorum Franciæ a Dionysio Godefrido lingua Gallica publicata pag. 72. De causis vero dissidii inter *Ludovicum* Franciæ regem et *Stephanum* Parisiensem episcopum, legendus

Mabillonius in Notis fusiorebus ad Ep. XIV S. Bernardi ad eundem regem datam. Prætermiseram monere *Dapiferum*, majorem domus regie, et senescaleum seu senescallum unius ejusdemque dignitatis nomina fuisse, huiusque curam incubuisse domus regie seu sacri palatii ac aule, idque evidenter demonstrare varia scriptorum Francorum loca in Glossario Ducangii, vocibus *Dapifer*, *Majordomus* et *Senescollus*. Præterea observandum Stephanum de Garlanda, dum cancellarius esset, electum fuisse episcopum Bellovacensem, sed eam sedem nunquam obtinere potuisse, ut San-Marthani in episc. Bellovac. ex Ivone Carnotensi demonstrant. At *Stephanum de Garlanda* deinde electum Parisiensem episcopum, quod volunt Labbeus et Mabillonius pag. 122 de Re Diplom. plane convellitur ex documentis a Dionysio Godefrido citato in medium adductis,

15. *Concilium Londinense*. — Ad num. 48 et seq. Hoc anno in Anglia pro reformandis Ecclesiæ moribus Concilium habitum, non *Wintoniæ*, ut habet Baronius, sed *Londini*, seu Westmonasterii, ut continuator Wigorniensis hujus temporis auctor, Mathæus Parisius in Chron. Huntindoniensi lib. 7, pag. 383, et Hovedenus pag. 478 diserte affirmant. Eidem præfuit Guillelmus Cantuariæ archiep. et legatus apostolicæ Sedis; « sedit autem tribus diebus, id est, tertio idus Maii et die sequenti, tertioque post hoc, qui fuit XVII kalendas Junii », ut dicitur in Prefatione. In eo Ecclesiastica disciplina canonicis XII sancita, et canonicis v, vi et vii, presbyteris et canonicis prohibitum, ne uxores vel concubinas haberent. In eo in Canone vii de concubinis eorum statuitur, « ne ab aliquo potestate minore vel majore detineantur, sed libere eisdem ministris Ecclesiæ tradantur, et Ecclesiasticæ disciplinæ vel servituti episcopali judicio mancipentur ».

16. *S. Norbertus anno præcedenti Magdeburgensis archiep. dictus*. — Ad num. 20. *Sanctus Norbertus* Ordinis Præmonstratensis institutor anno superiori Magdeburgensis archiepiscopus renuntiatus est, ut notavit Dodechinus abbas in Chron., et duratio sedis ejus ab Hugone ejus Vite scriptore cœtaneo memorata demonstrat. Chronographus Magdeburgensis a Meibonio editus tradit, cum, mortuo archiepiscopo Magdeburgensi, electores inter se non convenirent de persona in ejus locum subroganda, eos a legatis Apostolicis Spiram accitos esse, eosdem communicato cum *Lothario* rege Germaniæ consilio, *Norbertum*, quamvis plurimum renitentem, elegisse, et hunc comitatu Halvestadensis ac Brandeburgensis episcoporum Magdeburgum deductum: « Ibidem X kalend. Augusti, ut sequentia evidenter ostendunt, quæ tunc evenit Dominica, magno concursu comitum ac procerum, a clero et populo cum ingenti gloria suscipitur, ab omnibus eligitur, et in sedem suam divina laude attollitur, et octava dein die idem in festo Jacobi Apostoli ab Udone Olensi episcopo, cooperantibus aliis non paucis

qui aderant episcopis, in archipræsulem ungitur, cui et pallium a papa Honorio dirigitur », subjungit idem chronographus. Octava autem die, eaque Dominicalis ante festum sancti Jacobi Apostoli, non in X kalend., sed in XV kalend. Augusti, seu in diem XVII mensis Julii incidit anno præcedenti, quo chronographus iste *Norbertum* creatum archiepiscopum diserte asserit. Hanc sententiam certam et indubitatam esse, quæ in ejus morte dicemus, ostendunt.

17. *Primus episcopus Latinus urbis Tyriensis*. — Ad num. 21 et seq. Willelmus Tyrius lib. 13, cap. 23 refert, *Guillelma* natione Anglicum consecratum fuisse archiepiscopum Tyri urbis a quatuor annis infidelibus ereptæ. Honorius II litteris *interritorio Barensi octavo idus Julii* datis, præcepit, ut suffraganei eidem tanquam proprio metropolitano redderentur, monuitque patriarcham Antiochenum cui parebant, ut post litterarum suarum inspectionem id executioni mandaretur. Fulcherius Carnotensis lib. 3 Hist. Hierosol. ad annum MCXXIV, ait: « Pacificis Deus Antiochenam Ecclesiam cum Hierosolymitana Ecclesia, quæ duæ dissident de Tyria tertia. Illa dicit hanc sibi fuisse subditam sub Græcorum tempore. Hæc dicit se esse communiam Privilegiis a Romano Pontifice ». Iste Guillelmus unus fuit e decessoribus Willelmi Tyrii expeditionis sacræ scriptoris. Fulcherius Carnotensis Historiam Belli Sacri ab anno MCV ad annum MCXXVII libris tribus deduxit, Balduinum Godefridi Bullonij fratrem in protectione Syriacæ secutus, cujus tum erat capellanus, ut ipsemet affirmat.

18. *Mortuus S. Gualfredus solitarius*. — Baronius in addendis et corrigendis ad annum MCXXVII, refert mortem *sancti Gualfredi*, ortu Augustani, qui ex Alemannia Veronam adveniens, postquam totos viginti annos solitarius in vicina urbi silvula uni Deo notus vixisset; in urbem retractus, decem ibi annos juxta prædictam Ecclesiam veluti reclusus Deo servivit, ibique hoc anno *pridie kalendas Maii* mortuus est. De eo plura in Actis SS. Bollandianis ad diem xxx mensis Aprilis, sed non ex veteribus, at ex recentibus monumentis.

19. *Alphonso Henricus Portugallie comes Alphonso VII hominum prestat*. — Hoc anno, uti narrat Sandovalius in Alphonso VI, fol. 141, in regnis Castellæ, Legionis et Galiciæ magnæ turbæ excitatæ; *Alphonso* enim *Henricus* Portugallie comes non contentus fuisse *Alphonso* Aragoniæ regi, et Castellæ rebellibus adversus *Alphonsum VII* Castellæ regem, cujus beneficiarius erat, in bello hoc anno inter utrumque regem gesto, et fuso a Sandovalio descripto, armis etiam vexabat *Theresiam* matrem: *Alphonso* Castellæ rex amicitie patrocinium suscipiens exercitu congregato in Portugalliam intravit; verum accepto in coeundæ vulnere ad sua redire coactus fuit. Cumque *Alphonso* victoria elatus Alphonso regi homagium præstare renuisset, seseque supremum in suo principatu principem dixisset, Alphonso rex

novum statim exercitum collegit Æra mclxv, præsentem nempe Christi anno, cumque in Portugalliam ingressus esset, Alphonsus comes, quo se verteret nesciens, pacem ab *Alphonso* rege postulavit, eique comitatus sui homagium obtulit. Ad hanc conditionem *Alphonsus* rex eo libentius accessit, quo omnibus in Castella perturbatis illuc ei redeundum erat. Præcipui enim inter magnates, et inter eos *Bertrandus comes*, maritus *Elviræ* *Alphonsi* VI neptis, Aragonensis regis partes amplexi erant.

20. *Historicorum Hispanie error correctus.* — Existimat Sandovalius *Bertrandum* hunc esse comitem Tolosanum, sequiturque alios Hispanie historicos, qui tradunt *Bertrandum* hunc nepotem esse *Alphonsi* VI, natum ex conjugio *Raimundi* Sancti-Ægidii comitis cum *Eleira* Infanta. Verum hic error, licet antiquus, cum in veteri Historia Ms. Toleti legatur, solide refellitur a Catello in Hist. comitum Tolosæ, ubi Guilberti abbas de Novingento, et Guillelmi Malnesburiensis auctoritate *Bertrandum* illum *nothum* fuisse demonstrat. Ostendit etiam Catellus *Bertrandum* comitem Tolosanum hoc tempore in vivis non fuisse, et *Alphonsum Jordanum* ante annum mxxi aut insequentem naturæ debitum solvisse. Quare *Bertrandus* comes, *Elviræ* maritus, qui hoc anno arma adversus *Alphonsum* VII cepit, diversus a comite Tolosano. Hispanie historici, ubi de vicinorum principum familiis verba faciunt, cæciliare solent, sicuti vice versa rerum Gallicarum scriptores de externorum principum genealogiis sermonem habentes.

21. *Willelmus Normannus sororem reginæ Franciæ uxorem accipit.* — Hoc anno, « cum Guillelmo exul », inquit Ordericus lib. 12, loquens de Guillelmo filio Roberti Normanniæ ducis, quem Henricus Angliæ rex captivum a multis annis tenebat, « viginti sex esset annorum, et nemo posset ei de paterna hereditate recuperanda suffragari contra patrum suum, Adeles regina (conjux Ludovici VI regis Franciæ) uterinam sororem suam (Joannam nuncupatam) dedit illi in conjugem, Rainerii scilicet marchionis sobolem, etc. Hoc mense Januario factum est, et paulo post ante Quadragesimam Gisortis (vulgo, *Gisors*, oppidum Normanniæ ad Epam fl.) venit cum militari manu Normanniam castruari (id est, in jus vocare, ut videre est in Glossario Ducangii): sed cum Normanni velut dominum naturalem reveriti sunt ». Jam uxorem duxerat Guillelmus unam ex filiabus Fulconis comitis Audegavensis, sed matrimonium istud Callisti II et Honorii II jussu dissolutum fuerat, ut anno mxxiv monstravimus. *Rainerius* vero comes seu marchio erat Montisferrati, uxoremque sibi copularat *Guillam* Burgundam, viduam Humberti II comitis Maurianæ seu Sabaudia, et matrem Adelaide reginæ Franciæ.

22. *B. Carolus Bonus Flandriæ comes occiditur.* — Gualterius archidiaconus Ecclesiæ Morinorum in Vita beati Caroli Boni comitis Flandriæ, quam proximis post obitum ejus mensibus in lucem

edidit, et Bollandus ad diem II mensis Martii recitat, sancti hujus principis, quem Sugerius in Ludovico VI Franciæ rege pag. 315 Ecclesiæ Dei illustrem defensorem, elemosynarum liberalitate conspicuum, et justitiæ tutorem insiguum appellat, eadem his verbis narrat cap. 1: « Anno Verbi Incarnati mxxvii, Indictione V, sexto nonas Martii etc. ipso die in plurimorum perniciem execrabili quorundam scelere interfectus est Brugis in Ecclesiâ S. Donatiani Carolus comes Flandriæ, sili filius Canuti martyris, regis quondam Daciæ (id est, Danie cujus eadem anno mxxxi retulimus) et Adele reginæ, quam postea duxit uxorem Rogerius dux Siciliæ », hujus nominis primus. Sanctus princeps, « cum debitor honoris adepti », inquit Sugerius citatus, qui hoc tempore vivebat, « potentes quosdam genere humiles, opibus clatos, dominio ejus lineam consanguinitatis abscondere superbe inuitentes (erant enim de face conditionis servilis) judicio curiæ convenienter satis repeteret; ipsi, videlicet Brugensis Ecclesiæ præpositus, et sui viri superbissimi et famosi proditores, crudelissime ei insidiabantur », dieque secunda mensis Martii nefarie interfecerunt. Ludovicus VI Franciæ rex « Flandriam animosus intrat, ut nequissimos atrocissime perdat, toto animi et operis nisu exæstuat. Comitem Flandriæ Guillelmum Normannum filium Roberti Hierosolymitani Normanniæ comitis (ad eum enim jure consanguinitatis spectabat) constituit », subdit idem Sugerius.

23. *Willelmus Normannus Flandriæ comes constituitur.* — Gualbertus Brugensis, urbis suæ publicus notarius, et in plerisque testis oculatus, alteram beati Caroli Boni vitam scripsit, et Bollandus etiam publicavit. Ille cap. 11 refert, Ludovicum Galliæ regem XIII kalendas Aprilis Dominica, ex Attrebat ubi versabatur mandasse magnatibus et baronibus, ut alium ducem in locum Caroli nepotis sui eligerent, et pro morte ejus vindicanda omnem suam operam pollicitum esse. Electus præfatus Guillelmus, pluresque ex interfecloribus exquisito mortis genere affecti: « His ergo et diversis ultionum modis et sanguinis multi effusione lota, et quasi rebaptizata Flandria, Guillelmo Normanno comite constituto, rex in Franciam, Deo auxiliante, victor remeavit », inquit Sugerius. Beati Caroli martyris Flandrorum comitis nomen variis Martyrologiis inscriptum, testaturque Molanus in Indiculo sanctorum Belgii ex vulnerato ejus cranio sæpius bibere febricitantes.

24. *Angliæ rex sibi a Willelmo Normanno præcavit.* — Mathæus Parisius in Chron. de Henrico Anglorum rege curiam suam apud Windleshoram tenente verba faciens scribit: « Venerunt ibi ad regem legati dicentes: Carolus comes Flandrensis tibi dilectissimus, a proceribus suis, prodicione nefanda est occisus in templo apud Brugas. Et rex Francorum dedit comitatum Willelmo filio fratris tui, nepoti tuo et inimico, et in quo jam valde roboratus, diversis crucialibus omnes prodi-

tores Caroli interfecit. Super his itaque rex Henricus nimis anxius erat, eo quod esset juvenis ille strenuus satis et animosus, et comminaretur se regi Henrico tam Angliam quam Normanniam ablaturum, quæ sibi, ut dicebat, jure hereditario debebantur. Henricus rex sibi præcavens, Matildem filiam, Henrici V imperatoris viduam, in Normanniam misit « desponsandam Gaufrido filio comitis Andegavensis : et postea secutus est eam ipse rex in Augustam », ait Hovedenus ad annum MCXXVIII; ad hunc vero annum Matthæus Parisius habet : « Fulco comes Andegavensis Hierosolymam

sine animo revertendi profecturus, dedit comitatum suum Gaufrido filio, cognomento Plantagenest, adolescenti elegantissimo : et peregre profectus Hierosolymam cum prosperitate pervenit. De cujus adventu rex Hierusalem (sc. Baldwinus II) valde lætus, dedit ei filiam suam primogenitam, cum spe regni post mortem suam. Quod cum a rege Anglorum Henrico compertum fuisset, transfretavit in Normanniam : et filiam suam imperatricem præfate Gaufrido Andegavensium comiti matrimonio copulavit.

HONORII II ANNUS 4. — CHRISTI 1028.

1. *Rogerus accipit investituram Apulie et fidelitatem jurat Honorio papa.*— Sequitur annus millesimus centesimus vicesimus octavus, Indictione sexta, quo Honorius papa in expeditione positus, adversus Rogerium invasorem ducatus Apulie arma movit; sed ab illo tandem juramento fidelitatis accepto, rebus compositis reversus est Romam. Quomodo autem ista se habuerint, ita describit Romualdus Salernitanus antistes : « Altero vero anno, (presenti scilicet) Rogerius cum magno exercitu Apuliam intravit. Papa autem Honorius, cognito quod præfatus dux auctoritate sua vellet sibi ducatum Apulie usurpare, cujus investitura et dominium sibi prædecessorum suorum jure legitimo pertinebat, Apuliam ingressus cum Roberto Capuano principe, Raimulpho comite Tirole, cognato prædicti ducis, cum Conversanensibus, Grimoaldo principe Barensi, et aliis baronibus Apulie contra eum venit, ut eum de Apulia expelleret. Dux vero Rogerius eruditus et sapiens, pugnandi copiam eis præbere noluit, sed in tutis et munitis locis cum suo exercitu se recipiens, jamdiu eos immorari fecit, quousque altissimi kedio et necessitate compulsi se dividerent, et ad propria remearent. Papa vero videns se a baronibus derelictum, Beneventum rediit. Quem dux Rogerius e vestigio persecutus est, et missis multis, cum eo concordatus est, cui ligum et hominum fecit, et juramentum præstitit : et ab eo in ponte, qui est super Sebelum, per vexillum de ducatu Apulie investitus est. Quo facto, Honorius Romam rediit,

et dux Rogerius in Siciliam est reversus ». Hucusque de rebus gestis anni hujus Romualdus. Eadem habentur, sed fusius, in sæpe citato Chronico Beneventano, ubi de Haimérico cardinali cancellario, et Cencio Frangipane mentio habetur, quorum opera transactum fuerit inter Rogerium et papam, investitura accepta, quod factum dicitur die octava Assumptionis Dei genitricis Mariæ. Hæc et persecutus est etiam Alexander monachus.

Quo tempore misit Petrum presbyterum cardinalem tituli Sanctæ-Anastasiæ Ravennam, ubi congregata Synodo deposuit Aquileiensem et Venetiarum patriarchas. Hæc in veteri Pontificali. Quæ autem causa intercesserit horum condemnationis, non invenimus. Insuper hæc ibidem leguntur : Ille beatus Pontifex civilem Signinam cum pertinentiis suis revocavit sub dominium et prosperitatem B. Petri.

2. *S. Hugo episcopus Gratianopolitanus frustra pro dimittendo laborat episcopatu.*— Eodem quoque tempore, dum adhuc sederet Honorius papa, sanctus Hugo episcopus Gratianopolitanus senio fatiscens, primo per legatos, inde per se ipsum Pontificem adiens et missionem rogans, non impetravit. Sed quomodo ista se habuerint, audiamus Guidonem abbatem Carthusiæ ejus temporis, ista sic narrantem ¹ : « Episcopalem sarcinam modis omnibus exuere desiderabat, qua sententia vel desiderio (sicut in principio diximus)

¹ Guid. in Vit. S. Hug. apud Sur. tom. II, die 1. April.

ab initio suæ promotionis ad mortem usque non caruit. Hac igitur voluntate in dies augmenta sumente, Roman legatos et litteras in hoc ipsum ad venerandæ memoriæ papam misit Honorium. Sed cum legati postulata non impetrassent, imo magis litteras ad eum consolatorias, et ad perseverandum exhortatorias accepissent, ipsemet quamvis morbis ac senectute gravatus, spe tamen in posterum quiescendi roboratus, eundem Romanum Pontificem adire curavit, rogans suppliciter et obtestans, dari senectuti suæ licentiam quiescendi, et Ecclesiæ Gratianopolitanæ meliorem in suum locum pastorem substituendi. Sed nec ipse quamvis multas, ut putabat, justas et animi et corporis alligaret occasiones, impetrare valuit, ut sibi tantum et Deo vacare permitteretur. Creditum est enim, quod sola auctoritate et sanctæ conversationis exemplo plus posset plebi prodesse subiectæ debilis et aegrotus, quam quivis alius robustus licet et sanus. Concessis itaque cæteris quæ petebat, honoratusque a summo Pontifice, consolatus, ut potuit ad propria remeavit : dimittendi tamen episcopatum olim conceptum non deposuit desiderium ». Hæc de rebus gestis cum Honorio papa. Subdit de ejus successore Innocentio, quem venientem in Gallias convenit, et de hoc ipso rogavit, sed non obtinuit. Cæterum voluntatem Dei fuisse, ut vir tantus usque ad obitum fulgeret dignitate episcopali, eventa declaravit. Nam plurimum profuit Ecclesiæ Catholice, schismate Petri Leonis exagitata, ut suo loco patebit. Jam ad res Orientales convertamus orationem.

3. *Stephanus abbas patriarchæ Hierosolymitanus.* — Hoc anno moritur Guarimundus patriarcha Hierosolymitanus Sidone, cui substituitur Stephanus abbas Sancti-Joannis Carnotensis, affinis Balduini regis, sicut nobilitate ita et moribus præstans. De quo ista Willelmus Tyrius : « Ille ejus-

dem civitatis (Carnotensis) ante conversionem suam in equestri ordine et habitu fuerat vicedominus : postmodum seculo renuntians, habitum religionis in prædicto claustro suscepit. Denum suffragantibus meritis ad regimen Ecclesiæ ejusdem promotus est, in adolescentia liberalibus disciplinis convenienter instructus. Qui cum orationis gratia et devotionis intuitu Hierosolymam venisset, ibique transitum expectans moram faceret, contigit, quod post exequias domini Guarimundi patriarchæ, dum clerus et populus de substituendo pastore tractarent, communi omnium voto electus est. Postquam ergo consecratus est, cepit adversus regem questiones movere difficiles, allegans Joppensem civitatem ad jus suum et Ecclesiæ Domini Resurrectionis pertinere : ipsamque sanctam civitatem post captam Ascalonam eodem modo Ecclesiæ cessuram de jure confirmans. Erat autem homo magnificus, in proposito constans, honestæ conversationis, juris sui sollicitus persecutor. Unde inter eum et dominum regem graves exortæ sunt inimicitie, quarum tamen mors immatura finem dicitur fecisse, nam non completo biennio in fata concessit. Opinantur nonnulli eum veneno dato interfuisse, sed nos pro certo id compertum non habemus. Traditur tamen, quod dum in lecto supremæ decubaret ægritudinis, et rex ad eum visitandum esset ingressus, et ab eodem de ejus statu quæreret, ita responderit : Sic est nobis in præsentia, domine rex, sicut vultis ». Hæc Tyrius.

4. *Rogerus excommunicatur.* — Hoc eodem anno Rogerius Siciliæ comes excommunicatur ab Honorio papa, quia non permittebat ut Siciliæ episcopi venirent Romam. Denno excommunicatur etiam ab eodem papa, quod indebitum titulum sibi, nomen ducis scilicet, inconsulto Romano Pontifice arripuisset ». Habet ista totidem verbis Romualdus Salernitanus archiepiscopus hujus temporis auctor in Chronico quod scripsit, a nobis sæpe citato.

¹ Willel. Tyr. l. xiii, c. 23.

Anno periodi Græco-Romanæ 6624. — Anno Æræ Hisp. 1166. — Anno Hegiræ 522, inchoato die 6 Jan., Fer. 6. Anno Hegiræ 523, inchoato die 25 Decemb., Fer. 3. — Jesu Christi 1128, — Honorii II papæ 5. — Lotharii reg. 4. Joannis Comneni imp. 11.

1. *Honorius II relicta Apulia Romam redit.* — Ad num 1. Baronius Honorii II Romam reditus, et Rogerii Siciliæ comitis ex urbe Salernitana in Siciliam discessus non meminit, quem ideo utrumque

ex Falcone in Chron. hic narrabimus. Prodit hic auctor Honorium II, exeunte mense Januario currentis anni Romam reversum esse. Rautulfus comes castellum quoddam, quo rebellis, Ilugo cognomi-

natus, et Guillelmus prefectus Beneventanus sese receperant, obsidione cinxit; et licet hujus civilis incolæ se ei adjunxissent, conatus ille irritus fuit: « Comes Rainulfus », inquit Falco, « pro tempore nivali et periculoso instanti manere excusabat in tanta expeditione, sicque, una cum principe discessit. Rector igitur illorum deprehendens excusationes, ut populus omnis ad civitatem reverteretur, præcepit. Nec mora, jussa sumentes cursu rapido repedaverunt; obsidio autem illa IV kal. Februarii facta est. Præfatus itaque Pontifex, qui apud Montem-Sarculum (vulgo, *Monte-Sarchio*) morabatur, castrum illud sic dimissum fuisse deprehendens, et pollicitationes principis (nempe Capuani) et comitis (sc. Rainulfi) non circa eum prospere commorari, dolore inaudito turbatus, ultra quam credi potest condoluit infremendo, continuo iter arripuens, Romanos fines adivit ». Falco, quia a mense Martio annum exorditur, hæc ad annum præcedentem refert; concluditque Honorium II Apuliæ principum excusationes gratas non habuisse, ac Beneventi regimen *Bauderio* archiepiscopo Tarentino commisisse.

2. *Rogerus e Sicilia in Apuliam redit.* — Cum vero Honorius II Romæ esset, Rogerus Siciliæ comes in Italiam rediens, gessit quæ Alexander abbas refert: « Igitur Rogerus cum apud Siciliam, quo usque ad bella solitum est procedi, demoratus fuisset, coacto nimirum immenso exercitu, fretum Pharense transvadavit, etc. Tarentum perveniens civibus se deditibus mox eam obtinuit. Cujus post obsidionem Hydruntini cives perlimescentes, et civitatem et ipsi seseque submittunt. Hæc quippe urbes Boamundi juris fuerant, quas ipse omnemque terram suam, cum ad potiendum Antiochiæ transmarinum peteret iter, Apostolicæ prius fertur tutelæ commisisse.

3. *Honorius II cum copiis Beneventum venit.* — « Deinde super Brundisium urbem prædicti Tancredi (nempe de Conversano) veniens, eam nimio obsidionis rigore tamdiu oppressit, donec urbiolæ non diu tolerantes, civitatem ei seseque dedere, etc. Honorius itaque papa cognoscens Siculorum comitem mare transmeasse, terrasque Boamundi ac Tancredi ex parte jam occupasse, cum militibus ferme trecentis revertitur, mandans principi Roberto, comitique Rainulfo, caeterisque per Apuliam memoratis principibus, quatenus militariibus collectis agminibus, secum hosti Rogerio jam imminenti armis obviaturi procederent ». Quæ hoc modo Falco hoc anno narrat: « Hoc anno papa Honorius venit Beneventum cum ducentis militibus Romanorum; et invenit Robertum principem Capuanum, et comitem Rainulfum cum exercitu magno, etc. Prædictus Apostolicus Honorius audiens comitem Rogerium Siculorum contra ejus voluntatem quotidie insistere, et Apuliæ partes detinere, Robertum principem nomine et comitem (sc. Rainulfum) submonet, ut exercitu congregato super comitem illum Rogerium festinent. Quid

nulla? Simul cum principe et comite, ille Apuliam descendit prædictus Apostolicus, et Grimoaldum Barensen, et Tancredum vocari præcepit, ut omnes unanimiter adversus comitem Siculorum insistant; quod et factum est ».

4. *Inter Honorium II et Rogerium comitem pax sancitur.* — « Comes Rogerus », inquit Alexander abbas, « comperiens præfatum expeditionem ad se debellandum procurare, movens se ad fluvium Bradanum, ubi vadus Petrosus dicitur, castra figi præcepit. E contrario vero papa cum omnibus suis appropinquat in tantum, ut medius fluxus inter eos ipse dilfluere. At Rogerus, cum dominum papam expeditioni illi interesse percipisset, reverentiam illi ita exhibebat, ut vitaret eum contingere, ne contra Deum, spreto ipsius vicario, repugnare videretur. Quinque etiam ad eum legatione seniel ac iterum facta flagitabat, ut ei anathematis vinculo absoluto ducatum etiam jure generis sibi succedentem liceret accipere. Cumque sic hic et illic sine rerum effectu diutius permanerent, magnates principis Roberti deficientes sumptuum stipendiis egere incipiunt, adeo ut plures eorum chlamydes suas distrabentes cibum mercari compellerentur; unde factum est, ut quidam eorum inedium non ultra ferentes latenter decederent. Apostolicus vero, cognito quod baronum militumque murmur instaret, eo quod multum temporis militare sustinens exercitum egestatem pati cogerentur, vellentque sese dimissos recedere, facto Concilio ad Rogerium clam festinanter præmisit, pollicens illi ducatum annuendum; illa tamen ut prius Beneventum petens, suum ibi hominum subderet; sicque postea ipsum a se ducatum ex more acciperet. Hoc quoque illo annuente, simulque ab utraque parte firmato, Apulienses heroes, comperto hoc, mox dissolutis papilionibus ad sua cum dedecore revertuntur, culpanes præmimum papam, quod sine eorum consensu cum hoste Rogerio concordatus fuisset ».

5. *Rogerus Apuliæ dux ab Honorio II creatur.* — Idem ac Alexander abbas, Falco narrat, sed cum diversis quibusdam circumstantiis: « Comes ilaque Rogerus sentiens Apostolicum cum exercitu valido militum et peditum, et baronibus illis adversus se venientem in montana secessit, devians Apostolici virtutem, ne aliquo modo aliquid sinistrum ei contingeret; et sic per quadraginta dies Apostolicus ille ardenti sole mensis Julii fatigatus comitem illum obsedit. Interim prædictus princeps (sc. Robertus Capuanus), et ille delicatus corporis erat, et laborem sustinere non poterat, coepit a fidelitate Apostolici declinare, excoquilans qualiter castra ejus dimitteret, et ad propria repedaret, et lentoria sua amoveri fecit, et iter arripere conabatur (ideoque ex eorum numero non erat, qui a pace aversi erant). Apostolicus itaque principis fraudem et aliorum baronum deprehendens, pactis intervenientibus, a prædicto comite Rogerio per cancellarium Americum (seu Haymericum,

diaconum cardinalem Sanctæ-Mariæ-Novæ, virum magnæ existimationis, Honorio II et Innocentio II sedentibus, ad quem plures divus Bernardus litteras scripsit) et Cencium Frapapanem se daturum promisit, et ut comes ille circa Beneventum veniret, ibique ducatus honorem ei firmaret ». Quod executioni mandatum fuit; et enim Alexander abbas tradit: « Cum ergo præsul (sc. Honorius) Beneventum redisset, ecce Rogerius adveniens, in montem Sancti-Felcis haud longe a Benevento positum, ascendit, militari quidem cum eo in dexum ejusdem collocato montis. Post diem vero tertium præfatus Pontifex ab eo accitus paululum ab urbe progreditur: ipsiusque, ut moris est, hominibus suscepto, cum vexillo ducale eidem tradidit regimen. At Rogerius Apostolica roboratione dux constitutus, secundum quod inter se jam propositum fuerat, sacramentum fidelitatis ei per omnia servandum exhibuit, quibus peractis, papa ad palatium revertitur ».

6. *Dies et pompa ejus inaugurationis.* — Hujus ceremoniæ diem Falco determinate notavit: « His actis Beneventi Apostolicus ille revertitur, et comes ille, exercitu suo aggregato, Beneventum venit, et in monte Sancti-Felcis castrametatus est. Inde pactis inter se compositis, et promissionibus adimplendis, prædictus Apostolicus in octava die Assumptionis sanctæ Mariæ ducatus honorem comiti illi in conspectu fere viginti millium hominum largitus est, ad pontem scilicet majorem, juxta fluminis ripam, post solis occasum; multis enim negotiis intervenientibus totus dies ille disputando inter se consumptus est. Et quia comes ille civitatem Beneventi introire dubitabat, Apostolicus foris, ut dictum est, ad prædictum pontem exivit, et ducatus ei tribuit honorem; et ducatu accepto, dux ille sacramento juravit non esse in facto vel consensu, ut B. Petrus et dominus papa Honorius, ejusque successores Catholici civitatem Beneventanam perdant, et principatum Capuanum non capiat, nec permittat ad capiendum ». Subjungit Falco: « Et his omnibus actis Salernum revertitur, et Siciliam repedavit ».

7. *Rogerius Apuliam paulatim sibi subjeit.* — Alexander abbas expeditionem a Rogerio comite post suum ex urbe Beneventana reditum, et antequam in Siciliam reverteretur, adversus urbem Trojanam susceptam, quam Falco prætermisit, sic narrat: « Dux Trojanæ festinus obsessurus pergit, quæ quidem etsi strictius obsessa ab eo teneretur, tamen ei a civibus omnino resistebatur; nam Trojanæ præscientes obsidionem ipsam super se venturam, urbem nimium præmunierant: unde eum obsidentem audaciores parvipendebant. Cum ergo dux ibi aliquandiu moratus civitatem etiam munitissimam fore conspiceret, nihilque tunc ad capiendum eam ob hyemem jam imminentem se proficere posse prævideret, remota obsidione, inderim ad recipiendum Melfam, aliasque ducales urbes festinat: quæ jam legatis præmissis ultro

se ei subdendas mandaverunt: quibus receptis, expeditionem bellicam (scilicet universum exercitum) ad propria redire jubet: sique Salernum reversus, ibique parum permoratus, ac Siciliam cum multo inde iterum reversurus exercitu remeant.

8. *Magna seditio Beneventi excitata.* — « Qui dum apud eandem provinciam (nempe Siciliam) morans, Apuliæ absentearetur, Tancredus suis interim persuasionibus civitatem et oppida, quæ invadente eo amiserat, recuperavit ». Honorius II diu Beneventi non remansit post datam Rogerio investituram, Romanque rediit, quo antequam adventaret, civitas Beneventana magna seditione hoc modo a Falcone narrata, perturbata fuit: « Diebus autem non nullis elapsis, prædictus Pontifex Honorius consilio accepto Romam reversus est. Sed priusquam Urbem Romanam ingrederetur, pars quædam Beneventanorum secundo die stante mensis Septembris (id est, die vicesima nona ejusdem mensis, ut hanc loquendi formulam alibi explicavimus), Guillelmum tunc Beneventanum rectorem in sacro palatio Beneventano gladiis eductis occidit. Videlicet miser ille rector furorem partis illius fugere tentans, post altare sancti Joannis de capella palatii fugit: et ibi se occultans infra pedes Joannis presbyteri, qui ibi missam tunc celebrabat, se abscondit, sed evadere non potuit: ibique vero cultus percussus est, et foris eductus de palatio illo projicitur, et pedibus ejus funem ligaverunt, sique per civitatis plateam usque ad Carnariam S. Laurentii, heu miser! lapidibus obrutus, productus est. Et eo defuncto populus civitatis furore arreptus domum Polonis Spitamete, et Joannis et Visitii judicum, et Transonii et Laurentii et Ludovici medici destruxerunt. Ipsi vero et Gauferius juxta, populi caventes superbiæ ad Montem-Fuscum fugiunt. Continuo communitate intra se ordinata populus fere totus juravit, ut extunc et septem annis completis, et quadraginta diebus, non esset habitator civitatis prædictus Poto Spitameta cum aliis supradictis, qui civitatem exierunt.

9. *Honorius II Girardum cardinalem Benevento præficit.* — « Eodem anno, Joannes abbas Sanctæ-Sophiæ octavo die instante mensis Novembris mortuus est, et Franco, qui tunc erat mansionarius, electus est. Audiens autem prædictus Pontifex mortem rectoris illius sic contigisse, dolore turbatus valde, civitati Beneventanæ minatur ultionem pro tali facinore insectari. Continuo consilio accepto, miserunt ad prædictum Pontificem legatos, qui dicerent mortem rectoris per stultos viros et iniquos advenisse, rogantes, ut rectorem idoneum mitteret, ut pacem donaret Beneventanis. Pontifex autem, consilio accepto, dominum Girardum cardinalem rectorem nobis mandavit ».

10. *Concilium Ravennatense.* — Baronius num. 1 ait se non invenisse causam, cur patriarchæ Aqu-

leiensis et Venetiarum ab Honorio II depositi fuerint. Eam nos edocet Bernardus Guidonis in Magno Chronico Belgico, de Honorio II verba faciens: « Papa per legatum cardinalem duos patriarchas, scilicet Aquileiensem et Venetum, qui et Gradenensis nuncupatur, deposuit, quia invenit ipsos schismaticis favorabiles extitisse ». Quare Sigonius lib. 11 de Regn. Ital. recte suspicatus erat, hujus abdicationis causam fuisse, quod schismatico Conrado Franciæ duci adversus *Lotharium imp.* bellum gerenti starent; cum eadem quoque de causa *Anselmo* Mediolanensi archiepiscopo dignitas abrogata fuerit. Baronius ait, se legisse in veteri Pontificali utriusque patriarchæ depositionem in Concilio Ravennatensi factam fuisse. Hujus Concilii non meminit Rubeus in Hist. Ravennatum.

11. *Finis belli decennalis adversus Comenses gesti.* — Mediolanenses finem Comensi bello tandem imponere cupientes, extremum ea in re conatum adhibuerunt, et Comenses sibi subdiderunt, uti narrat Sigonius lib. 2 Hist. de Reg. Ital. qui tamen perperam scribit, bellum hoc anno mxxvii finitum esse, eoque Comenses debellatos. Ceperat enim anno mxxvii, ut ibidem vidimus, et *per decem annos* duravit, ut diserte docet Otto Frisingensis in Chron. Prieterea mense Martio bellum illud profligatum fuisse, inter omnes historicos Mediolanenses a Puricello in Monum. Basil. Ambros. num. 339 citatos convenit, quod nonnisi de mense Martio currentis Christi anni intelligi potest. Quare in antiquissimo Chronico, cui titulus *Flos florum*, ibidem apud Puricellum num. 210 de Anselmo archiepiscopo Mediolanensi accurate scribitur: « Convocans exercitum, civitatem Cumanam invasit et obtinuit: et multi capti sunt, qui dederunt pro sua redemptione altare aureum Sancti-Abundii, et quæcumque pretiosa. Quam violentè obtentam funditus evertit anno Domini millesimo centesimo vicesimo octavo, die quinta vel septima ante kalendas Apriles ». Utrumque diem videtur auctor iste in Actis publicis invenisse, et priorem ad expugnationem urbis referre, posteriorem vero ad ejus eversionem.

12. *Conradus pergit in Italiam ut coronetur.* — Landolphus Junior cap. 39, apud Puricellum in Monum. Basil. Ambros. num. 312 narrat, quomodo *Conradus* Franciæ Sueviæ dux, qui titulum regis assumpserat, hæreditario jure sibi debitum contendens, in Italiam hoc anno profectus sit, et tam Modociæ, quam Mediolani coronam accepit: « Anselmus, inquit, (archiep. sc. Mediolanensis) in castellis (ad archiepiscopatum pertinentibus) habitans intellexit, quod clerus et populus Mediolanensis nobilem principem Conradum cum Ecclesiastica pompa et civili triumpho, conveniente regi naturali, suscepit. Cum autem clerus et populus idem de coronando rege ipso tractaret, pontifex idem Anselmus a Lenco (vulgo *Lecco*, quod oppidum est ad Addnam fl. situm) descendit ad Modociam (vulgo *Monza*, qui est primus locus

coronæ regis Italiæ (quibus verbis invicte refellitur Onuphrius, qui imperatorum coronationem alias ad Modociam fieri solitam inter fabulas recensuit); ibique pernoctavit, et consilium redeundi ad montana suscepit; et post trium dierum interpositionem, castellum, quod dicitur Plebia, ascendit. Ibi plures sonos sonoros de coronando rege Conrado audivit: et ego non in amaritudine ab ipso pontifice audivi, ut citissime Mediolanum adirem, et affectum omnium civium super hujusmodi regale negotium sibi renuntiarem, etc. ad plenitudinem concionis cleri et populi, convocatum et congregatum Mediolani quasi in hora tertia perveni, ubi clerus et populus quasi homo unus amplissime et mirifice claudavit, et exclamavit, ut episcopus veniret et principem illum coronaret etc. Causa itaque ista sic plaudata et statuta, Anselmus de Badagio subdiaconus, etc. ex parte totius cleri et populi legationem de plaudato et coronando rege Conrado pontifici Anselmo contulerunt, etc.

13. *Coronatur ab Anselmo archiepiscopo Mediolanensi.* — « Qui cum esset in castro Plebiæ, et intendisset super horum et meam relationem, festinavit ad urbem. De cætero ipse, quasi consensuens communi omnium gentium voto, in Ecclesia Sancti-Michaelis, quæ est Modociæ, benedixit et unxit, et coronam electo Conrado in festo S. Petri posuit, altero episcopo astante regi coronando. In quo facto ego piger non fui: sed ante ipsum pontificem, ipsumque coronatum, ab Ecclesia S. Michaelis pontificalem virgam, in admirabili pompa, per Dei voluntatem congregata ad honorem illius regis, usque ad Ecclesiam S. Joannis bona cum voluntate portavi, et in S. Joannis Ecclesia solemniter cum rege isto quam optimo missam audivi. Eandem quoque solemnitatem coronationis idem pontifex in Ecclesia S. Ambrosii, me alibi non meo vitio detento, celebravit. Verumtamen quidquid directe est actum in illo domino meo rege dilexi, et diligo. Hunc namque gradientem per comitatus et marchias Lombardiæ et Tusciæ, comites et marchiones enjuseumque nobilitatis, viri potentes et humiles, cum gaudio susceperunt et amaverunt; qui vero rebelles fuerunt, ejus acutissimi gladii fortitudinem senserunt, atque mortem et confusionem, etc. ac sic benigne et fortiter agendo Romanam appropinquavit, sed fortis manus Honorii pape ipsum respinavit, atque in Germaniam, quasi ad sua propria redire fecit.

14. *Ob eam coronationem Anselmus ab Honorio II excommunicatur.* — « Joannes igitur Cremonensis, cardinalis Romanus, episcopos suffraganeos et comprovinciales Mediolanensis Ecclesiæ, ut excommunicaret Mediolanensem archiepiscopum, convocavit Papiæ. Quibus convocatis et cardinali, per plures viros et sacerdotes ipse pontifex Mediolanensis mandavit, ne præsumerent (id est, ut lente procederent), sed ipsum per unius diei spatium expectarent. At Papienses, Cremonenses, Novarienses quoque et eorum episcopi et alia-

rum civitatum, prædicantes hoc regium opus Anselmi, contrarium Deo et magno Lothario regi, nequaquam illius pontificis legationem suscepit; sed ipsum præstante cardinali illo Joanne, excommunicaverunt, et Mediolanensibus protegentibus castrum Cremæ, bellum facere studuerunt. Attanien in maxima parte Mediolanenses Catholicam reverentiam, vivente papa Honorio, huic pontifici præbuerunt », nempe Anselmo archiep. Mediolanensi. Porro Puricellus laudatus non solum loco Landulfi memorato, sed variis aliis etiam innixus, solide consultatui Onuphrium, qui coronationem imperatorum Mediolani et Mo-doctiæ fieri alias solitam, commentum esse sibi persuasit.

15. *Moritur Germundus patriarcha Hierusalem.* — Ad num. 3. Guarimundi seu Germundi patriarchæ Hierosolymorum obitus his verbis consignatur ab Orderico, Willemo Tyrio antiquiori lib. 13. « Anno ab Incarn. Domini mxxviii, Indict. vi, Germundus patriarcha Hierusalem obiit; Stephanus autem Carnotensis post illum sanctam Sion duobus annis rexit: quo migrante Guillelmus Flandrensis successit ».

16. *Synodus Rothomagensis.* — « Indictione vii, Goifredus Rothomagensis episcopus ægrotavit », ut prosequitur Ordericus, « et post diuturnam ag-ritudinem VII kal. Decemb. hominem exivit (legendum *exiit*). Interea dum præfatus archipræsul ægrotaret, et de salute sua sollicitus omnia quæ haberet prudenter erogaret, Matthæus Cluniacensis monachus, Albanensis episcopus (anno mxxv ab Honorio II creatus cardinalis) Romanæ Ecclesiæ legatus Rothomagum ad regem (Angliæ) Henricum venit, et cum eo de utilitatibus Ecclesiasticis tractavit. Jussu igitur regis episcopi et abbates Normanniæ asciti sunt, et in Rothomagensi Capitulo scita præsentis rege audierunt, quæ per legatum Honorii II papæ sic prolata sunt: Ut nullus presbyter uxorem habeat. Qui vero a pellice abstinere noluerit, Ecclesiam non teneat, nec portionem in beneficiis Ecclesiasticis obtineat, nec aliquis fidelium missam ejus audiat. Ut unus presbyter duabus Ecclesiis non deserviat, nec clericus quilibet in duabus Ecclesiis præbendas possideat: sed in illa Ecclesia, cujus beneficiis fruitur, Deo militet, eique pro benefactoribus suis quotidie supplicet. Ut monachi vel abbates Ecclesias seu decimas de manu laicorum non recipiant, sed laici quæ usurpaverant episcopo reddant, et ab episcopo monachi pro voto possessorum oblata recipiant. Ea tamen quæ antea quoquo modo obtinuerant, quiete per indulgentiam papæ possideant: sed ulterius aliquid hujusmodi sine præsulis, in cujus diocesi est, licentia usurpare non præsumant.

17. *Præsentis Henrici Angliæ rege celebrata.* — « Tunc Romanus legatus de transactis transgressionibus omnes absolvit, et sequenti mense, ut jam dictum est, archiepiscopus migravit. Ibi cum legati fuerunt Goisfredus Carnotensis episco-

pus, et Goislenus Rufus Suessionensis episcopus et omnes episcopi Neustriæ (ibidem nominati). Abbates etiam affuerunt plures, Rogerius Fiscannensis, etc. alique plures, quorum fautor rex Henricus affuit, qui nullam eis gravedinem ab episcopis imponi permisit ». Hoc Concilium in Collectionibus Conciliorum non memoratum novæ eorundem editioni addendum erit.

18. *Conventus Attrebatensis præsentis Ludovici Franciæ rege congregatus.* — Neque tantum hoc tempore presbyterorum, sed etiam sanctimonialium incontinentiæ medendum fuit. Hermannus enim Laudunensis monachus, auctor æqualis, qui *Libros tres de Miraculis beate Mariæ Laudunensis*. Bartholomæo ejusdem urbis episcopo obtulit lib. 3, cap. 22, tradit, in monasterio Sancti-Joannis Laudunensis nonnulla sinistrae famæ de illius sanctimonialibus dicta fuisse; cumque frequenter commonitæ emendationem verbo promitterent, sed facto non implerent, Bartholomæus episcopus Rainaldi Rhemorum archiepiscopi, et Ludovici Francorum regis, « ad quem ea Ecclesiæ proprie pertinere dicebatur, (consilio et auctoritate), omnes pariter illas sanctimoniales ex illa ejecit. Assumens quoque virum religiosum domnum Drogonem, cœnobii Sancti-Nicasii Rhemensis priorem, cum ibidem primum abbatem ordinavit, et monachos illic sufficienter ex diversis monasteriis posuit ». Drogo postea cardinalis et episcopus Ostiensis ab Innocentio II creatus est anno mxxxvi, ut probat Dacherius in suis ad Guibertum Notis, cum cujus Operibus libros illos tres Hermanni publicavit. Decreta ea monialium expulsio in comitiis episcoporum, præsentis Ludovico rege, Attrebati habitis *VI idus Maii* currentis anni, quibus interfuerunt Rainaldus Rhemensis archiepiscopus et octo episcopi ibidem nominati. Idem Dacherius pag. 828 et seq. profert Diploma regium, Decretum Matthæi Albanensis cardinalis et legati, ac litteras Innocentii II qui rem gestam confirmavit, alique hujus Historiæ monumenta. Hoc monasterium fundarat *sancta Salaberga*, ut suo loco diximus, et hoc tempore *Adelais* regina Ludovici VI uxor illud, non abbatisse titulo, sed uxoriæ dotis jure possedit. Quo nefando commercii genere regularis observantia sensim tepescere cepit.

19. *Moritur Guillelmus Flandriæ comes.* — *Ludovicum* Franciæ regem Attrebatum venire coegerant turbæ in Flandria ab iis excitatæ, qui anno superiori *Carolus Bonum* Flandriæ ducem interficiendum procurarant. Ut enim narrat Ordericus lib. 12, pag. 883, Guillelmus, cui idem rex ducatum Flandriæ dederat, proditores persequabatur, et variis mortium generibus puniebat: « Interfectorum ergo consanguinei vehementer contristati sunt, et detrimentum illi perniciemque machinati sunt », inquit Ordericus, qui subdit, eos *Theodoricum* Auxensem, seu Elsatium adisse, eumque ut principatum jure hæreditario caperet hortatos esse. Willemus, his auditis, contra hostes

processit : « Erant enim viri potentes et nobiles, audaciaeque et multa probitate laudabiles, divitiis et amicis, et munitionibus et favore contribulum formidabiles ». Tandem Guillelmus hoc anno, dum fortiter in praelio adversus eos pugnabat, graviter sauciatus, *sexto kalendas Augusti, sexta feria* e vulnere lethali expiravit, inquit Gualbertus in Vita B. Caroli Boni cap. 22. Qui addit post multas controversias Theodoricum Alsatium pacificam Flandriae possessionem iniisse, et tam regem Franciae quam regem Angliae grante ei dedisse investituram feodorum, « quae ab ipsis sanctissimus et piissimus comes Carolus obtinuerat ».

20. *Moritur Bernardus Toleti archiep.* — Hoc anno Bernardus archiepiscopus Toletanus, de quo saepius locuti sumus, *Toleti obiit et quidem mense Aprilis, Aera MCLXVI*, ut Sandovalius in Alphonso VII, fol. 433, ex monumentis Toletanis studiose hoc tempore scriptis notavit, qui addit *Raimundum* ejusdem Ordinis ac Bernardus, Benedictini nempe, et Oxoniensem episcopum eum in ea dignitate excepisse. Porro mirum, virum doctissimum in Vita Alphonso VI secunda editone, Pampilonae anno MDCXV curata, fol. 432, Chartam tanquam ex monasterio Sancti-Dominici de Sylos extractam, sibi communicatam inseruisse; ea enim manifeste falsa. Data, ut supponitur, *die XXI Julii, Aera MCLXIII*, in eaque Alphonso Raimundus sese Hispaniarum imperatorem appellans, cum regina *Urraca* facit donationem quandam a Raimundo archiepiscopo Toletano subscriptam; cum tamen hoc tantum anno Raimundus eam dignitatem consecutus sit, idque biennio post Urracae reginae obitum; praeterquam quod *Alphonso Raimundus* ejus filius, ea vivente, nunquam sese imperatorem appellavit. Quare dici non potest, errorem in numeros irrepsisse; cum ipsemet Sandovalius testetur, sub signo crucis legi subscriptionem ipsiusmet *imperatoris Alphonso*, et confirmationem reginae his verbis : *Urraca regina genitrix ejus conf.* et Joannes Ramires notarius reginae se eam scribere dicit, Bernardus « vixit in pontificatu annos quadraginta quatuor », inquit Rodericus lib. 7, cap. 4.

21. *Christiani Hispaniae a Mauris vexati.* — Aera MCLXVI, ut tradunt antiqua monumenta Toletana ibidem a Sandovalio citata, hoc scilicet Christi anno, Mauri cum suo rege seu imperatore *Texusino* in regnum Toletanum irrupere, duo oppida cepere centum octoginta viris interfectis, quae oppida *Ceca* et *Elquelca Fernandez* ibidem vocata. Dein *Bargas* occupavit, et quinquaginta homines peremit. Haec minutiae, quam exacta sint monumenta illa, aperte declarant. Porro *Texusinus* rex alius non est a *Techesino*, ab imperatore Ali patre suo, Almorabitarum supremo capite, rege creato. Horum principum sedes *Marochium* Mauritaniae celebre oppidum. Marmolus lib. 2, fol. 363, refert, ab an. MCCCXVII ad MCCCXXX, Hispaniarum Christianos invicem sese magnis bellis appetisse, sed ex iis

dissidiis Mauros quod inter se discordes essent, emolumenta non perceperisse.

22. *B. Oldegarius Tarraconae restaurandae incumbit.* — Raimundus III, comes Barcinonis et Provinciae litteris anno MCVII, *X kalend. Februarii* scriptis, donavit B. Oldegario archiepiscopo Tarraconensi ejusque successoribus civitatem Tarraconensem, « quae diu per multos annos, inquit, sub destructione et eremo absque cultore et incolata mansit », dominatura et palatio sibi reservatis; Oldegarius vero litteris *pridie idus Martii* hoc anno datis *Robertum Bordetum* militem fortissimum ejusdem civitatis principem constituit, ut Deo et Ecclesiae ejus semper ibi serviat, et suam in defensionem Christianitatis adversus Saracenos militiam exerceat. *Robertus* vicissim promittit, se civitatem ipsam restauraturum ac delensurum, ac pugnaturum adversus quemcumque qui jura Ecclesiae Barcinonensis, ejusque episcopi ac successorum tollere vel minuire tentaverit. Utrasque litteras seu Chartas recitat Baluzius in Appendice ad Maream Hispanicam num. 358 et 373. Vide quae de *Roberto* isto Normanno strenuissimo an. MCCCXIII diximus.

23. *S. Otto Bambergensis episc. Leuticorum conversionem suscepit.* — Videamus nunc quae a sancto *Ottone* Bambergensi episcopo, Pomeranorum Apostolo, in secunda ad Pomeranos et Leuticenses seu Lituitenses protectione egerit; eam enim currenti anno susceptam discimus ex auctore Vitae ejus lib. 3, cap. 1, ubi ait : « Posthinc triennio domi detentus post quadriennium, etc. illam revisere aggreditur », id est, *novellam coloniam*, de qua antea locutus fuerat. Refert autem situm Leucia, in Lexicis Geographicis omissum, et a recentibus Geographicis passim non intellectum hic declarare; *Leutici* in Vita sancti Adalberti episcopi Pragensis, qui martyrium in Prussia fecit, et in variis historicis memorati, ibique ac plerumque alibi male cum Lusaticis a viris doctis confusi. Pergit enim Anonymus : « Per Saxoniam iter disposuit, et apud Hallam (urbem Saxoniae superioris ad Salam fl. qui apud Dessaviam in Albim exoneratur) nares victualibus onerans per Albam (seu Albim) flumen in Habalam perlapsus (quod flumen in Albim ad Verbinum sublus Tangermundam devolvitur) Leuticiae littora usque adductus est ». Inde adverso Hala fl. qui per Havelbergam, Brandenburgum, Spandaviam et Sedenicum labitur, navigans, nares, ut verosimile est, reliquit, et terrestri itinere *Leuticiae littora usque adductus est*, ubi littoris nomine intelligit ripam fluminis, quod Leuticorum terras rigat; nomen enim illud tam pro fluxu quam maris littore usurpatur, ut patet ex Virgilio lib. 7 *Aeneid.* vers. 460. Addit anonymus : « Cunctaque Hallae coempta, et navigio usque in Leuticiam portata (scilicet per fl. Salam, Albim et Havelam) curribus et quadrigis quinquaginta cum annona imponens, ibi per terram Leuticiae usque Timinam civitatem Pomeraniae trans-

portavit». Est Timinuum sive Demminum Pomeraniae Occidentalis oppidum ad Panim fl.

24. *Multos ex eis ad fidem Christianam perducit.* — Ex his perspicuum est, *Leutitiam* fuisse *Timinum* inter et *Zedenicum* ad *Ilavelam*, et occupasse partem *Mekleburgi*, marchiae *Brandeburgicae*, *Vkermark* vulgo dictae, et ducatum *Stetinensem*. Idem auctor de *Demmino* oppido loquens ait: « Quo ubi cum labore et fatigatione ventum esset, multos horrores et pavores illa nocte ibi sustinuerunt »; ejus rei cap. 2 rationem assignat: « Nam dux Pomeranorum populaturus *Leutitiam* cum exercitu eadem nocte illo venturus erat. *Timinenses* autem *Leutitios* audierant ad pugnam ibi ei occursuros, etc. Dux cum exercitu omni ad praedam *festinans* episcopum (nempe sanctum *Ottonem*) videre non potuit; sed missis munitis ibidem (nempe *Timinum*) illum die illa rogavit se expectare. Circa meridiem *Leutitiam* quaquaersum fumigare aspexerunt (quare supra mœnia *Demmini* positi *Leutitiam* videre poterant) ». Paulo post: « Episcopus omnem substantiam suam, ut populi, qui secum erat, *Timine* navibus imponens, per prona fluminis undam (sc. per *Panim*) tribus diebus *Unznoimiam* vecti sunt (oppidum illud, uti *Jahnum*, ubi sedes erat episcopalis, *Arcona* in *Rugia* insula, pluraque alia jamdiu funditus eversa) episcopo itinere terrestri cum paucis gradientes ». Idem anonymus cap. 3 et seq. asserit divum *Ottonem* Evangelium praedicasse *Hologosti*, quod nunc *Volgastia* dicitur, esque in *Pomerania* citeriori ad ostium *Oderis* fl. ejus aquis tanquam parvo mari circumfusum, gandelque arce ducale. Non videtur *Volgastia* ab *Unznoimia* multum dissita fuisse.

25. *Verus situs Leutitiae.* — Haec sedes *Leuticorum*, qui ideo triginta aut quadraginta leucis procul a *Lusatia* habitabant. Quod, ut clarius pateat, legendus *Helmodus* in *Chron. Slavorum* lib. 4, ubi cap. 20 ait: « Est *Panis* fluvius, in cujus ostio sita est civitas *Dimine* », et cap. 21 asserit *Leuticorum* partem *trans* et *cis Panim*, id est, ad hujus fluminis partem Orientalem habitasse, et *Thollenzos* dictos fuisse: « Quatuor, inquit, sunt populi eo-

rum qui *Lutitii* seu *Wilzi* dicuntur, quorum *Kicin*os atque *Circipanos* citra *Panem*, *Riaduros* sive *Tolensos* cis *Panem* habitare constat ». Verum error est in vocibus *citra* et *cis*, ex ipsomet *Helmodo* cap. 2 emendandus, ubi scribit: « Deinde venit ad *Circipanos*, quos a *Tholensis* et *Rederis* (seu *Rederis*) separat flumen *Panis*, et civitas *Dimine*. *Kizini* et *Circipani* cis *PANIM*, *Tholensi* et *Rhedari*, *TRANS PANIM* habitant. Illi quatuor populi a fortitudine *Wilzi*, sive *Lutici* appellantur ». *Thollenzi* populi fluvio ejusdem nominis, qui eorum regionem rigabat, et ad *Deminum Panem* jungitur, nomen dedere.

26. *S. Otto venerationem S. Adalberti episcopi Pragensis restituit.* — Sanctus *Otto* affectum et venerationem sancti *Adalberti* episcopi *Pragensis*, qui, ut suo loco diximus, *Leutitios* fide Christiana imbuiere cupierat, secum tulit, et ad ejus honorem *Pomerania* et *Leutitia* varia templa erexit. *Julinenses*, quos sanctus *Adalbertus* ad fidem converterat, cum vicinis *Stetinensibus* a vera Christi religione ad priorem ethnicismum defeceant; sed sanctus *Otto* pro eorum reductione sollicitus, inibi « Ecclesiam Sancti-*Adalberti* cum fidelibus, *Zelo Zelatis* pro domo Dei visitavit, ac praemissa inibi orationis solemnitate altare abominationis fregit, comminuit et eiecit, factaque reconciliationis emundatione, fracturas Basilicae suis impensis emendari fecit », inquit auctor *Vitae S. Ottonis*, cujus mors in libri tertii calce his verbis notatur: « Ejus corpus tumulatum est ann. Dominicae Incar. MCCCXXXVIII, tertio nonas *Julii*. Nomen ejus Martyrologio Romano inscriptum est ad sextum nonas ejusdem mensis.

27. *Synodus Dolensis.* — Anno MCCCXXXVIII, *Girardus Engolismensis* episcopus et *S. Rom. Ecclesiae* legatus in monasterio Sancti-Gildae *Dolensi* Concilium rexit », ut legitur in *Chronico Kemperlegensi* a *Baluzio* lib. 1 *Miscell.* edito, sed hujus Concilii Acta perire. Hinc confirmatur quod supra diximus, *Gerardum* hoc tempore in *Aquitania* legatum fuisse, ejusque legationem *Turonensem* provinciam complexam esse.

HONORII II ANNUS 5. — CHRISTI 1129.

1. *Honorius papa commotus in Beneventanos.* — Undetragesimus incipit annus post millesimum atque centesimum. Indictione septima, quo Honorius papa Beneventum veniens (ut habet Chronicon Beneventanum) inter alias Apostolicas functiones consecravit abbatem monasterii Sanctæ Sophiæ Franconem nomine, mense Augusti. In Beneventanos autem ob Willelmi rectoris civitatis necem, quam eidem intulerant, commotus, in civitate habitare noluit : quin etiam in eos Rogerium Siciliæ ducem accersendum in sequentem annum curavit, ut de perduellionibus sueretur pœnas. Quod ille facturum se pollicitus est. Sed antequam ista perfici possent, idem Honorius papa e medio sublatus est anno sequenti mense Februarii, ut suo loco dicitur. Post ista in Beneventanos adornata, ipse Pontifex Romam reversus est.

Quo anno ibidem Beneventi veneranda sanctorum martyrum corpora, Januarii, Festi et Desiderii elevari contigit, et deferri in novam Basilicam tunc eisdem erectam a Gualterio archiepiscopo Tarentino, erga sanctos illos studiosissimum.

2. *Legatio in Daniam, Suetiam et Bohemiam.* — Hoc eodem anno, quarto kalendas Januarii, idem Honorius papa decrevit legationem in Daniam, Suetiam atque Bohemiam, per Gregorium diaconum cardinalem, cui ad reges earundem provinciarum has litteras dedit :

« Honorius, servus servorum Dei.... illustri regi Danie, salutem et Apostolicam benedictionem.

« Ecce juxta precum tuarum instantiam, et promissionem nostram, misimus ad te dilectum filium nostrum Gregorium de Crescentio, Sancti Theodori diaconum cardinalem, Apostolicæ Sedis legatum, virum utique prudentia et honestate conspicuum, et nobis inter alios fratres nostros suis exigentibus meritis, specialiter charum, concessio sibi plena legationis officio per omnes terras quæ tuæ jurisdictionis existunt, ut extirpet nociva, et plantet salubria, prout quæque secundum datum sibi a Deo prudentiam viderit facienda. Rogamus igitur regiam celsitudinem tuam, quatenus ipsum,

imo verius nos in ipso recipias hilariter, et honorifice tractes, et a subditis tuis ei facias dignam honorificentiam exhiberi : ut devotio, quam te ad Apostolicam Sedem habere confidimus, clareat in effectu, et nos ac fratres nostri per hoc merito in tua charitate crescamus : idemque legatus, qui per se ac suos, qui magnum locum in Urbe obtinere noscuntur, grata tibi poterit vicissitudine respondere, ad tuam dilectionem perpetuis temporibus obligetur. Datum Laterani quarto kal. Januarii, Pontificatus nostri anno quinto ».

In eundem modum regi Suetiæ et ad regem Boemiæ. Ita in Vaticana Bibliotheca.

3. *De episcopo Virdunensi deposito S. Bernardi litteræ ad papam.* — Hoc eodem anno ipse, quem diximus, sanctæ Romanæ Ecclesiæ cardinalis Mathæus episcopus Albanensis, legatione functus in Galliis, deposuit Henricum episcopum Virdunensem. Ita Dodechinus hoc anno, quo etiam asserit Halberstadensem episcopum a suis canonicis accusatum æque fuisse ab Apostolicæ Sedis legato depositum. Est mentio de Virdunensi episcopo in ordinem redacto in Epistola sancti Bernardi ¹ ad Haimericum Romanæ Ecclesiæ cancellarium, quod postquam a Virdunensi episcopatu ejectus est, conatus sit invadere Catalaunensem Ecclesiam. Ad avertendum ergo imminens periculum ipsius Catalaunensis Ecclesiæ, idem sanctus Bernardus has ad Honorium papam litteras dedit ² :

« Summo Pontifici Honorio, frater quidam professione monachus, conversatione peccator, se ipsum quantillus est.

« Aiunt apud vos plus valere pauperis precem, quam potentis vultum. De qua vestra singulari dignatione tam sancto opinio facit me dignitatis celsitudinem non vereri, quinque audeam loqui ad vos, id præsertim, quod charitas suggerit : de Ecclesia dico Catalaunensi, ejus quantum in me est, nec valeo nec debeo dissimulare periculum. Videmus nimirum, jamjamque imminere, sentimus nos qui vicini sumus, pacem videlicet

¹ Bern. Ep. XLVIII. — ² Ibid. Ep. XIII.

memorate Ecclesie graviter mox esse turbendam, si electionis illustris illius viri, id est, magistri Alberici, in quam utique totus tam clerus quam populus pari voto et voce convenerant et conveniunt, vestrae pietatis assensum impetrare nequiverint. De qua re si et nostra quaritur aut curatur sententia, novimus hominem sanae fidei et doctrinae hactenus extitisse, in divinis pariter et humanis prudentem esse; et speramus in domo Dei (si tamen ipse elegit eum) fore vas in honorem, et utilem futurum non solum illi, sed et omni Gallicanae Ecclesiae. Vestrae jam discretionis est judicare, an merito flagitetur a vobis facienda dispensatio, unde talis potest sperari recompensatio ». Haec Bernardus ad Honorium. Ex quibus intelligis, nullius plane momenti existere consuevisse postulationem sive electionem episcoporum, nisi Romanus Pontifex praeberet assensum.

4. *Scripta S. Bernardi usque ad praesens tempus.* — Egit etiam his ferme diebus idem sanctus Bernardus litteris apud eundem Honorium papam pro monachis Divionensibus, sed modestia incomparabili, ita satisfaciens petentibus, ut non urgeret petulantia ipsum Pontificem, prout litterae ad ipsum ab eo date significant¹. Magnae quidem aestimationis esse coeperat jam ab Honorii Pontificatu sanctus Bernardus in Romana curia apud Pontificem et cardinales, qui eum colebant atque litteris frequentabant, ut ejusdem sancti viri redite ad eos litterae docent: cum jam ex sapore cognita exigebantur ab eo ipsius scripta. At quoniam sint ista, ipse ad Petrum diaconum cardinalem ea exigentem in sine Epistolae his verbis significat²: « Et ut sciatis quid petatis: scio me scripsisse libellum, qui inscribitur: De humilitate, et quatuor homilias in laudibus Virginis Matris, nam hunc habet titulum, super illum videlicet locum Evangelii apud Lucam, ubi dicitur, *Missus est angelus Gabriel*: necnon Apologiam ad quemdam

amicum nostrum, ubi aliqua disserui de Cluniacensibus et nostris, id est, Cisterciensibus observantiis. Sed et paucas ad diversos Epistolas dictavi. Aliqui fratres ex his qui me coram audire loquentem, suo stylo exceperunt, et penes se retinent ». Meminit ibidem de alio libro dicens: « Librum quem quaesitis ad transcribendum, habetis. Quem fuisse librum de Gratia et libero arbitrio, scriptum ad Willelmum abbatem S. Theodorici, testatur in Praefatione libri secundi Vitae sancti Bernardi, Bernardus abbas Bonae-Vallis. Haec de sancti Bernardi lucubrationibus in hanc usque diem editis.

5. *Scripta S. Bernardi usque ad praesens tempus.* — Ceterum quod spectat ad Epistolarum scriptiorem, ita comparatus erat, ut quotiescunque causam Dei urgere videret, idem ipse etiam ad summum Pontificem et cardinales petitis scribere non remueret. Ad Haemicum enim cancellarium scribens, quodnam esset sui animi institutum, paucis his ita declarat³: « Elsi tanti non sum, ut Romae habeam propria negotia, nulla tamen quae Dei esse constiterit, a me duco aliena ». Porro quod ad res ab egestas pertinet, usque in annum sequentem, quo Honorius papa obiit, et subrogatus est Innocentius, primus ejus Vitae liber a Willelmo abbate Sancti-Theodorici scriptus continet. Eo vero eodem tempore vita functo, a tempore creationis Innocentii papae Bernardus Bonae-vallis abbas secundum librum est auspicatus. Erat autem idem S. Bernardus hoc anno Redemptoris millesimo centesimo undetrigesimo agens annum aetatis suae trigessimum octavum. Etenim si anno Domini millesimo centesimo decimo tertio, quando est ingressus monasterium Cisterciense erat sanctus Bernardus natus annos viginti duos, ut idem qui supra Willelmus in ejus Vita testatur: his si addas annos sexdecim, quibus in hanc diem vixit in monasterio, eundem plane numerum annorum conficies.

¹ Bern. Ep. xvi. — ² Ibid. Ep. xviii.

³ Bern. Ep. xx.

1. *Rogerus universam Apuliam sensim sibi subiecit.* — Ad num. 4. Consecratio abbatis monasterii Sanctae-Sophiae, *Franconis* appellati, hoc anno mense Augusto facta, ut legitur apud Baronium, ex

Falcone in Chron. Hic ex eodem chronographo Annales Ecclesiastici supplendi: « Cum tempus », inquit Falco, « egrediendi in hostem opportunum successisset, dux Rogerius, collecta rursus militari

expeditione, fretum, quod Pharium dicitur, transmeavit, etc. Cum ex parte recuperasset oppida, quæ jam Tancredus eo absente resumpserat, tandem iterum Brundisium, ut eam recuperaret, obsessurus vadit; qui cum longa in obsidendo mora traheretur, nihilque tunc ad obtinendum ea posse proficere prævidisset, dimittens eam ad tempus, ad alia interim aggrediendum oppida accelerat. Paulo post: « Alexander, comes Tancredus Grimoaldus Barensis princeps, necnon Godfridus comes Andrensis tantam ipsius potentiam experti, mox ei subiiciuntur, unde Tancredo ipsi, dux animo jam sedatus, terras quascumque abstulerat, reddidit: quibus deinde præcepit, ut post ipsum ad obsidendum secum Trojam celeriter accessuri essent. Porro Trojani percipientes præfatos magnates duci colla jam subdidisse, etc. miserunt ad Robertum Capuanorum principem, quatenus cito veniens dominum super se susceperet, etc. At ille nolebat ad hos venire, etc. Comes Ranulphus, etc. Trojam ingressus civis alloquitur, eos se contra Rogerium protecturum firmissime spondet. Verum cum dux, etc. cum eodem, si Trojam de se concordaturum promississet, confestim ille, Trojanis dimissis, ad castra illius (scilicet ducis) ivit. Deinde, etc. facto concordie constituto comes ad propria regreditur.

2. *Troja atque civitates ab eo subactæ.* — « Dux autem Trojam obsessurus rediit, ad quam videlicet obsidionem supradicti proceres, ut eis imperatum fuerat, accelerarunt. Urbs quippe obsessa in tantum constringitur, ut infra paucos dies vellent, nolenti, duci subderentur. Troja itaque capta, sese urbes ducales, etc. eidem subiiciuntur atque ita omnis ei Apulia sine ulla contradictione submittitur: » Paulo intra: « His quoque peractis dux Meliam properans cunctos Apulie optimates ad se venire iussit, quibus etiam inter cetera edictum dedit, ut in pace permanentes alterutrum non adversarentur, simulque eos jurare compulsi, ut ab ipsa hora et in antea iustitiam et pacem tenebant, etc. » Anonymus Casinensis hanc in rem habet: « Anno mxxxviii, (qui nobis est mxxix.) Rogerius dux cepit Trojam, et fere totam Apuliam et Capuanus princeps illi hominum fecit.

3. *In Siciliam rediit.* — « Cum ergo, dum ibi dux aliquandiu moratur, hæc et sibi similia ad commune proficuum disposuisset, baronibus ad sua redemptibus, Tarentum ipse ingreditur, qui veniens ne Robertus (cognominatus de *Grantenania*, vel *Grantenell*, Normannus Rogerio rebellis) quidquam ei adversi moliri satageret, jurare cum ante discessum compulsi, quatenus ultra montes aliens (nempe in Franciam) ibi in perpetuum degeret, etc. neque jam amplius Apuliam ad inhabitandum requireret; quod cum ille iuramento firmasset, hoc modo liber abscessit. Dux post hæc ad Siciliam remeant.

4. *Honorius II Beneventanis irascitur.* — Hoc anno papa Honorius Beneventum venit,

mense Augusto Francorum abbatem monasterii Sanctæ-Sophiæ consecravit, et precatur Beneventanos, qui communitatem fecerant, ut prædictum Polonem Spitanetam cum jam dictis civibus, quos de civitate eiecerant, in civitatem revocarent Beneventum, quod obtinere non potuit. Unde Apostolicus valde iratus de Benevento exivit, et ad vicum quemdam, qui dicitur Leocabante, secessit, et rogavit prædictum ducem Rogerium, qui ibi morabatur, ut in mense Maio venturo (anni sc. mxxx, ante quem mensem Honorius e vivis excessit) cum exercitu veniret, quod dux ille sacramento iuravit taliter facturum. Inde Apostolicus ad castrum Ceppalmi adivit, et civitatem prædari fecit, et sic valde iratus Romam repedavit.

5. *Rogerus in Apuliam redux omnia terrore complet.* — Falco asserit Rogerium Leocabante tunc versatum esse, quia Pharium hoc anno iterum trajecit, uti narrat Alexander abbas: « Audiens præfatum Robertum (de Grantemenil) violato sacramento reversum, etc. iratus fretum Pharense Siculo- rum exercitum agens transmeavit. Deinde Calabrorum, Apulorumque etiam ascitis agminibus, etc. super illum ivit ». Robertus iste intra paucos dies victus fuit. Deinde Salernum adiens, illud obsidione cinxit, civesque ut Turrim-Majorem, quam vi ab eo extorserant, sibi dederent compulsi. Inde in terram comitis Orianensis tendit, eamque sibi subdidit: unde progrediens Trojam iterum obsidione cinxit. Cives sese dedere coacti sunt, et tam ibi quam Melphie arcem reedificari curavit, quia post Guillelmi ultimi Apulie ducis mortem utraque arx solo æquata fuerat, Melphitana quidem subversa jubente eodem duce. Addit Alexander abbas: « Tunc temporis et Robertus Capuanorum princeps solo nominis sui terrore constrictus suo subditur domino. Nec multo post Salernum rediens ad Siciliam inde remeavit. Nunc itaque in hoc loco primus de ducatu claudatur libellus, quatenus ad ea que jam rex constitutus gessit, commemorandus stylus vertatur », ad secundum nempe librum; Alexander enim libris quatuor Rogerii regis res gestas prosecutus est.

6. *Causa adventus Honorii II in urbem Beneventanam.* — Baronius num. 1, narrata a Falcone in compendium redigens, ex eo scribit Honorium in Beneventanos ob *Willelmi rectoris civitatis necem, quem eidem intulerant*, commotum, in civitate habitare noluisse; verum hoc non dicit Falco, negotium enim ad Guillelmi eadem spectans anno superiori compositum fuerat, tantumque de *Spitaneta* et consortibus a compuni Beneventano in exilium missis revocandis agebatur, et cives nullam postulationis ab Honorio papa supremo eorum domino factæ rationem habere volebant. Falco, postquam Honorium II Romam rediisse retulit, addit: « Hoc anno corpus sanctorum Januarii, Festi et Desiderii Rotfridus tunc archipræsul foras produxit de allari, in quo antiquo

tempore jacuerant; et revera non honeste, sicut decebat, loco illo manebant. Unde in Basilicam, quam Gualterius Tarentinus archiepiscopus pro sanctorum illorum dilectione construi fecerat, magno enim honore et letitia, predicatorum sanctorum ossa collocata sunt, nobis videntibus, et de illorum ossibus osculantibus». Baronius num. 1 nulla Rolfridi mentione facta, hæc omnia Gualterio Tarentino adscribere videtur. Ait enim delatas esse sacras reliquias « in novam Basilicam tunc eisdem erectam a Gualterio archiepiscopo Tarentino». At jam ab anno antecedenti, non Gualterius, sed Girardus cardinalis Beneventanæ civitatis rector erat, ut ibi ex Falcone diximus. Hoc vero anno mxxxix, die 15 Maii, Rogerius erat archiepiscopus Beneventanus, ut constat ex Diploniale a me producto pag. 467.

7. *Legatio Danica in annum precedentem retrahenda.* — Ad num. 2. *Honorius II* Gregorium de Crescentio, Sancti-Theodori diaconum cardinalem, Apostolicæ Sedis legatum, ad regis postulationem in *Daniam* misit. Verum hæc legatio etiam in Baronii sententia anno superiori decreta; Honorii enim litteræ ordine iv ab eo recitate dicuntur, datæ « Laterani quarto kalendas Januarii, Pontificatus nostri anno quinto », Honorius autem juxta Baronii sententiam anno mxxiv, die xxviii mensis Decembris, pastor universalis agnitus, juxta vero nostram die xxi ejusdem mensis, quare anno superiori eæ litteræ scriptæ, die nempe vicesima nona mensis Decembris, quo die quintus Honorii annus jam inchoatus erat.

8. *Concilium Catalaunense.* — Ad num. 3 et seqq. Celebratum hoc anno *Catalaunense* Concilium, cujus nulla in collectione Conciliorum mentio: « Mathæus Albaensis legatus », inquit Albericus in Chron. ad annum mxxxix, « Concilium tenuit apud Catalaunum in Purificatione B. Virginis, ubi de consilio B. Bernardi abbatis, Henricus Virdunensis episcopus episcopatum dimisit, et factus est episcopus per biennium quidam abbas S. Dionysii Rhemensis». Ad istud Concilium revocanda Epistola Honorii II ad Mathæum legatum suum, recitata a Wasseburgio lib. 4 Antiq. Belgic. in qua inter alia legitur: « Tu vero tam prædictum episcopum (Henricum de bonorum Ecclesiasticorum dilapidatione accusatum), quam partem adversariam (Virdunenses canonicos, ut ibidem utrumque exprimitur) ad tuam præsentiam evocas, Catalaunum adeas, ubique adscitis tibi Tre-

virensi archiepiscopo et aliis episcopis, sapientibus etiam et religiosis viris, negotium studiose audias, et diligenti indagatione perquiras. Quod si accusatores et testes idonei apparuerint, communicato fratrum consilio, canonice causam diffinias, etc. (1) »

9. *Epistola prima S. Bernardi ad Honorium II suo anno reddita.* — Baronius ad hanc Henrici depositionem ex episcopatu refert Epistolam xiii divi Bernardi ad Honorium II, qua eum rogat, ut electionem Alberici ad episcopatum Catalaunensem ratam habere velit: « Videmus nimirum », inquit Bernardus, « jamjamque imminere sentinus nos, qui vicini sumus, pacem videlicet memoratæ Ecclesiæ graviter mox esse turbendam », si Alberici electio infirmetur. Verum hæc Bernardi Epistola anno mxxvi, ut observat Mauricus in Annal. Cisterc. ad eum Christi annum, a Bernardo data. Nam ex suppresso ejus nomine, imo ex ipso contextu prima ad Honorium II scripta intelligitur, cui se tunc incognitum Bernardus existimat. Præterea extant atque ad ipsum Honorium II datæ, scilicet xlvii et xlix, quas ipse Baronius reponit ad annum mxxvii et mxxviii, proinde hæc anno superiori, scilicet mxxvi, collocanda, quo *Ebali* Catalaunensis obitum, in cujus locum electus est *Albericus*, Rapinæus in Hist. præsulum Catalaunensis ex Actis ejusdem Ecclesiæ contigisse ostendit. Quod spectat ad periculum, quod Bernardus in ea Epistola dicit imminere Ecclesiæ Catalaunensi, non videtur explicandum de ambitu *Henrici Virdunensis*, quem Baronius, et Mauricus citatus asserunt, invadere voluisse eadem Catalaunensem; sed potius de perturbatione consequenda, si vota et unanimis, tam cleri, quam populi postulatio frustrarentur, quod in consequentibus Bernardus satis insinuat, ut Mabillonius in Notis fusioribus ad eam Epistolam observavit.

10. *Epist. D. Bernardi ad Petrum presbyterum card.* — Neque etiam Epistola divi Bernardi xvi, *Petro presbytero cardinali* inscripta, qua ei monachos Divionenses commendat, ad hunc annum pertinet, sed vel annum mxxvi, uti existimant Mauricus et Mabillonius citati, vel forte ad annum mxxiv aut sequentis initium; hic enim videtur esse *Petrus Leonis* presbyter cardinalis, qui legatus Sedis Apostolicæ in Gallia fuit, et ad quem post suum e Gallia discessum verosimile est, Bernardum in favorem monachorum Divionensium scripsisse; sed nihil certi hac in re diffiniri potest quoad utrumque cardinalem, quia

(1) Majorem apud eruditos gratiam sibi promeruisse tam Pagius, quam Conciliorum collectores, si Concilii hujus notitiam non quidem ab Alberico sæculi xiii scriptore, sed ab auctore concilio Historiæ episcoporum Virdunensium apud Ducherum Episcop. tom. II, pag. 251, nov. edit. repetisset. Narrat ille Henricum Virdunensem ad Pontificem Honorium causam suam detulisse, apud quem nihil definitum, cardinalibus episcopis javentibus. Res igitur integra ad Mathæum Pontificum in Gallias legatum remissa, a quo ad Concilium Catalaunense mox celebrandum revocata. Aut Concilio celebrationem Henricus S. Bernardum Clavallensem consulit, quo suadente « ut priusquam ignominiosa in eum accusatio ad publicam tautorum virorem audiendam veniat, solus omnibus cedat, episcopatum abrenuntiet »: ipse consilio paruit. Igitur « eo probatore astant Concilio dixit se nolle inivis processu. Inde baculum reddidit, ac recessit anno xlii ex quo in se suscepit eum de manu Cesaris », solutus a majoribus Concilio, regente S. Bernardo, decem marcis argenti, *quibus et vadimonium ejus in ea Urbe redemit*. In ejus locum substitutus fuit Ursio abbas S. Dionysii Rhemensis. Adfuerunt Concilio hunc præter Treviscum (i.e. quo Albericus) qui Virdunensis episcopi metropolitani erat, etiam Rhemensis cujus ad metropolim Catalaunum attinebat, ac demum alii plures episcopi cum abbatibus, inter quos S. Bernardus, « cujus consilium », ad anonymum, unde hæc omnia desumptisunt, « regna et Ecclesiæ Galliarum hodieque imitantur ».

Petrus de Fontana cardinalis Burgundus erat, ideoque monachi Divionenses ei chari esse poterant.

11. *Philippus filius Ludovici Iⁱ regis Gallie coronatur.* — « Anno ab Incarnat. Domini mcccix, Indict. vii, Philippus pater a Ludovico patre suo electus est, et in die Paschæ Rhemis a Rainaldo II Rhemorum archiepiscopo rex coronatus est », inquit Ordericus sub finem libri 12, loquens de Ludovico VI Francorum rege, cujus Philippus primogenitus erat. Idem refert Willelmus Naugius in Chron. additque Henricus Angliæ regem huic unctioni præsentem fuisse. De Philippi morte post biennium sermo erit.

12. *Monachæ ex monasterio Argentolii expulsi.* — Hoc anno, ut tom. x Concil. videre est, *Matthæus* Albanensis cardinalis, Sedis Apostolicæ legatus, Parisiis apud *Sanctum-Germantum de Pratis* Concilium celebravit, cui interferebat Rhemensis archiepiscopus et quatuor episcopi, in quo decretum, ut moniales monasterii Argentoliensis tribus circiter leucis ab urbe Parisiensi dissiti, quæ spurca et infami conversatione omnem ejusdem loci astititatem fœdere dicebantur, inde ejicerentur. Quod Honorius II litteris *Laterani, nono kal. Maii* datis, confirmavit, et ad petitionem Ludovici regis monasterium illud San-Dionysiano dedit, quia ex antiquo ad illud pertinebat. Gesta in eo Concilio confirmavit etiam Ludovicus rex litteris hæc subscriptione notatis : « Datum et confirmatum Rhemis in solenni curia Paschæ in unctione domni Philippi gloriosissimi regis, anno incarnati Verbi mcccix, Indict. vii, anno domini et serenissimi regis Francorum Chlodovici xx, Philippi autem filius ejus i ». Verum loco *filius*, legendum *filii*, et loco xx, legendum xxi. *Ludovicus* enim VI mense Julio anni mcccvi regnare cepit. Annos Philippi I in consortium regni a patre adsciti, annosque hujus Philippi pueri et Ludovici fratris ejus, de cujus coronatione infra, numeratos fuisse observare non inutile erit. *Heloïssa* Petri Abaelardi alias uxor, hujus monasterii priorissa erat, ideoque alio migrare coacta, et Abaelardi calamitates auctæ.

13. *Petrus Abaelardus de suis calamitatibus queritur.* — Is, mortuo Adamo abbate San-Dionysiano, opera Stephani regis tunc dapiteri seu majoris-domus, a rege et Sugerio Adami successore obtinuit, ut ad quam vellet solitudinem transiret, dummodo se nulli abbacie subderet : « Hocque in præsentia regis », inquit Abaelardus in Epistola prima cap. 10, « et suorum utrimque assensum est et confirmatum. Ego itaque ad solitudinem quamdam in Trecenti pago mihi antea cognitam me contuli, ibique a quibusdam terra mihi donata, assensu episcopi terræ oratorium quoddam in nomine S. Trinitatis ex calaminis et culmo primum construxi ». Subdit postea Abaelardus, scholares copisse undique ad se concurrere, et parva sibi ibidem tabernacula construere, ultro sibi ab

eis concessis necessariis, ut nulla se a studio domestica cura retardaret. Cum vero oratorium illud in nomine S. Trinitatis esset fundatum in memoriam consolationis alienius, a se ibi profugo acceptæ, ipsum *Paracletum* nominavit. Inde sumpta eum calumniandi occasio, fuerunt enim qui dicerent, « non licere Spiritui sancto specialiter magis quam Deo Patri Ecclesiam aliquam assignari ». In tantis perturbationibus, cum abbatia Sancti-Gildasii Ruensis, in episcopatu Venetensi posita, pastore defuncto desolata esset, abbas a monachis electus fuit; sed indisciplinata eorum vita eum die ac nocte cruciavit. Ipsam abbatiam tyrannus quidam in usus proprios redegerat, sicque Abaelardus foris et intus opprimebatur.

14. *Heloïssa abbatissa monasterii Paracleti constituitur.* — Illis ita se habentibus, *Heloïssa* a monasterio Argentoliensi San-Dionysiano concessio expulsa fuit, quare in oratorium suum reversus, illud *Heloïssæ*, et quibusdam ejusdem Congregationis monialibus concessit et donavit, ipsamque postea donationem Innocentius II *per privilegium in perpetuum corroboravit*. Cumque Abaelardus, ut eis quoquo modo subveniret, ad eas sapius reverteretur, fuere qui dicerent, inquit Abaelardus cap. 14, « me adhuc quadam carnalis concupiscentiæ oblectatione teneri, qui pristinæ dilectæ sustinere absentiam, vix aut nunquam pater ». Interim *Heloïssa* prima monasterii Paracleti dicti primum priorissa, ac dein abbatissa constituta, in omnium amore et admiratione erat. Unde Petrus Cluniacensis abbas ad eam scripsit Epistolam xx libri 5 : « Necdum metas adolescentiæ excesseram, necdum in juveniles annos evaseram, quando nomen non quidem adhuc religionis tuæ, sed honestorum tamen et laudabilium studiorum tuorum (Latine enim, Græcæ et Hebraicæ litteraturæ perita erat) mihi fama immotuit. Audiebam tunc temporis mulierem, licet necdum sæculi nexibus expeditam, litteratoriæ scientiæ, et studio sæcularis sapientiæ summam operam dare. Quo effertendo studio tuo et mulieres omnes evecisti, et pæne viros universos superasti. Mox vero juxta verba Apostoli, ut complacuit ei, qui te segregavit ab utero matris tuæ per gratiam suam, longe in melius disciplinarum studia commutasti, et pro Logica Evangelium, pro Physica Apostolum, pro Platone Christum, pro Academia claustrum, tota jam et vere philosophica mulier elegisti ».

15. *Concilium Londoniense.* — Huntendonensis lib. 7, pag. 384, de Concilio Londoni hoc anno habito ab Henrico Angliæ rege scribit : « Tenuit Concilium magnum ad kalendas Augusti apud Londoniam de uxoribus sacerdotum prohibendis. Intererant siquidem illi Concilio Willelmus Cantuariensis archiep. et Turstanus archiep. Eboracensis, Alexander Lincoliensis episc. etc. Illi communi erant regni et radii sanctitatis hoc tempore. Verum rex decepit eos simplicitate Willelmi archiepiscopi : concesserunt namque regi justitiam de

uxoribus sacerdotum, et improvidi habiti sunt, quod postea, patuit, cum res summo dedecore terminata est. Accepit enim rex pecuniam infinitam de presbyteris et redemit eos. Tunc, sed frustra, concessionis suae penituit episcopos, cum pateret in oculis omnium gentium decepto praetorum, et depressio subjectorum ». Idem habent Matthaeus Parisius et Annales Waverleieneses ad hunc Christi annum. Cossartius Tom. x Concil. in Notis ad hoc Concilium Londinense ait, huius Concilii annum suspectum sibi esse, quod aliqua, quae in eo narrantur, decreta videantur anno **MCXXVII** in Concilio Londinensi tunc habito; indeque concludit, unum illud Concilium in duo distractum fuisse. Verum licet aliqua ad praecedens Concilium Londinense pertinentia male isti affixa sint, certum tamen utrumque Concilium inter se diversum fuisse; nam in priori decretum, ut concubinae presbyterorum non nisi episcopali iudicio manerentur; quod tamen in posteriori regis efflagitatu revocatum est; neque enim duo decreta inter se contraria in uno eodemque Concilio condita. Hovedenus pag. 479, idem ac Huintondoniensis et Matthaeus Parisiensis narrat; sed tam Concilium istud quam Philippi Ludovici Francorum regis filii inaugurationem male in annum sequentem differt. Denique novus chronographus Saxo nuper ab Edmundo Gibson Oxonii publicatus praecedentis Concilii Londinensis non meminit, sed praesenti anno habitum connectit cum *festo sancti Michaelis*, atque in eo actum « de archidiaconorum, et de presbyterorum uxoribus, ut illas dimitterent ante sancti Andreae festum; sed rex iis omnibus », subdit chronologus, « veniam dedit domum redeundi, adeoque domum reversi sunt, nec ullam vim habuerunt illa decreta: cuncti retinuerunt suas uxores regis venia, sicut antea fecerant ». Huic chronologo Saxonico magna fides habenda, cum ipsemet in Guillelmo I Angliae rege se illum vidisse asserat.

16. *Concilium Palentinum.* — Alphonsus Hispaniarum rex. Urracae et comitis Raimundi filius. Concilium in Palentina civitate, prima hebdomade Quadragesimae, Aera **MCXXVII** celebravit, in quo omnes episcopos, abbates, comites et principes invitavit. Illud em. card. Daguirre in Notitia Conciliorum Hispaniae e tenebris eruit, integrumque publicavit. Inter caetera in eo statutum, ut *concubinae clericorum manifeste ejiciantur*. Archiepiscopo Compostellanum petit ab Alphonso rege, ut ea quae ad suum et suorum successorum jus in Emeritana civitate pertinebant sibi conferret, quod et

obtinuit. In Diplomate suo dicit rex civitatem Emeritanam nunc temporis a Saracensis possessione esse, sed se sperare Dei ope devicturum, et ex ea Saracenos expulsurum. Alphonsus Chartam illam hoc modo subscribit: « Ego Adelphonsus praefatus imperator, una cum conjuge mea, quod fieri mandavi, proprio robore confirmo ». Quare is quemadmodum et *Alphonsus VI* Castellae rex avus ejus sese imperatorem vocabat. In eodem Diplomate Alphonsus rex Callistum II papam patrum suum vocat, atque eum archiepiscopatus Emeritensis Ecclesiae dignitatem in Compostellanam transmutasse, idcirco se eam confirmare.

17. *Comitia Palentiae habita.* — Sandovalius fol. 144 de hoc Concilio Palentino loquitur, atque in Historia Compostellana legi *Alphonsum* regem cupientem pacem in regno suo statuere, omnibusque significare se male ab Alphonso Aragoniae rege haberi, quod is nollet sua sibi oppida restituere, et subditiis suis praetextum et auxilium, ut adversum se rebellarent, subministraret, praesulibus suis ac regni magnatibus mandasse, ut congregarentur in civitate Palentina, et episcopos ac abbates aliorum regnorum rogasse, ut iis comitiis assisterent, quo in rebus ad fidem Christianam pertinentibus de reformatione et abusibus agerent, ac leges Dei servitio convenientes stabilirent. Addit Sandovalius Historiam illam narrare primam sessionem, prima Quadragesimae hebdomade habitam fuisse, et in eo Concilio multa statuta, sed eam *res in particulari non referre*. Integrum nunc Concilium illud habemus. Comitia illa usque ad mensem Maium producta; dum enim, ut notat Sandovalius, haberentur, Alphonsus rex die prima mensis Maii Aera **MCXXVII**, quandam exemptionem viris in ea nominatis, quod sibi inservissent, concessit. Tum idem rex ac *Berenguela* uxor dum Astorgae essent, Ecclesiae Cathedrali ejusdem urbis quandam donationem fecere.

18. *Alphonsi Aragoniae regis expeditio adversus Saracenos.* — Alter vero *Alphonsus* Aragoniae et Navarrae rex adversus Saracenos expeditionem suscepit, et, ut testatur Surita lib. 1 Annal., *Molinam*, oppidum Castellae-Novae, ad annum cognominem, in confinio Aragoniae, sibi subjecit; et milites Francos, quorum opera variis in occasionibus usus erat, remunerare cupiens, burgum quemdam Pampilonensis civitatis, ubi habitare possent, eis assignavit mense Septembris sequentis Christi anni, consilio episcoporum Oscae, Pampelonis et aliorum, sicut refert Garibayus lib. 23 Compendii Historialis Hispaniae, cap. 9.

INNOCENTII II ANNUS I. — CHRISTI 1130.

1. *Mortuo Honorio eligitur papa Innocentius II, contra quem antipapa Anacletus exchitur: unde clades et sacrilegia in Urbe.* — Annus incipit Redemptionis millesimus centesimus atque trigessimus. Indictione octava, quo Honorius papa, cum sedisset annos quinque, mensem unum, et dies decem et septem, moritur decimo sexto kal. Martii. De quo ista Pandulphus: « Hic fecit ordinationes in Urbe plures, quibus creavit complures presbyterorum ac diaconorum, et aliorum minorum ordinum, et inter alios Petrum Sanctæ-Anastasie, comitem Sanctæ-Sabinæ, Georgium Sanctæ-Balbinæ, Mattheum diaconum Sancti-Adriani, Hugonem Sancti-Theodori, Guidonem Sanctæ-Mariæ in Via-Lata; præter hos episcopos aliquot. Egrotus autem deferri se fecit ex Lateranensi palatio ad monasterium Sancti-Andree, ibique in pace defunctus est; sepultus vero in Basilica Salvatoris ». In alio autem scripto Codice summatur: « Hic fecit per mensem Decembrem ordinationes... quibus creavit diaconos undecim, presbyteros decem et sex, episcopos triginta et unum, quos constituit per diversa loca ». Hic finis Honorii. Non vocavit sedes: sed eadem plane die, qua defunctus est ipse, successor ejus conclamatus est Innocentius decimo sexto kal. Martii. Ita quidem Chronicon Beneventanum tunc scriptum, quod apud nos extat his verbis: « Die ipso quo Honorius defunctus est, dominus Innocentius est electus, post quem die ipso, ad horam tertiam Petrus Portuensis episcopus Petrum filium Petri Leonis elegit ». Hæc ibi de tempore. De modo autem habet ista Sugerius abbas, hujus temporis auctor magni nominis, in vita Ludovici regis Francorum: « Venerandæ memorie summo Pontifice et universali papæ Honorio viam universæ carnis ingresso, cum Ecclesiæ Romanæ majores et sapientiores ad removendum Ecclesiæ tumultum consensissent, apud Sanctum-Marcum et non alibi, et non nisi communiter more Romano, celebrem fieri electionem: qui et assiduitate et familiaritate propinquiore Apostolici fuere, timore tumultuantium Romanorum illic convenire non audentes, antequam publicaretur domini papæ decessus, personam venerabilem car-

dinalem de Sancto-Angelo diaconum Gregorium summum eligunt Pontificem. Qui autem Petri Leonis parti favebant, ad Sanctum-Marcum, pro pacto alios imitantes convenerunt, dominique papæ morte comperta ipsum eundem Petrum serius cardinalem presbyterum, multorum et episcoporum et cardinalium, et clericorum, et Romanorum nobilium consensu votive elegerunt ». Hæc de electionibus utriusque, quarum quanam potioribus viribus niteretur, dicturi sumus inferius.

2. Quod pertinet ad Innocentium, fuisse ipsum quidem monastici Ordinis, hæc accepimus ex archivo tituli Sanctæ-Praxedis: « Dominus Gregorius monachus Lateranensis cœnobii Sanctorum-Joannis Baptistæ, Joannis Evangelistæ, atque Pancratii, idemque abbas monasterii Sanctorum-Nicolai et Primitivi Ordinis sancti Benedicti, loco qui vocatur Gabis, prope lacum Burranum: qui ab Urbano papa Secundo creatus est S. R. E. cardinalis diaconus Sancti-Angeli, mortuoque Honorio papa in Pontificem legitime electus, Innocentius dictus est. In ejus odium et emulationem, elevatur in thronum a factiosis Petrus Leonis filius presbyter cardinalis tituli Sanctæ-Mariæ trans Tiberim, atque Anacletus Secundus est nominatus ». Qui licet penes aliquos laudatus inveniat, utpote qui olim in Cluniacensi cœnobio monasticum vitæ arripuerit institutum, ut ejus litteræ ad Cluniacenses inferius recitandæ testantur, et Petrus abbas Cluniacensis in Epistola ad Haimericum cancellarium tradit¹; tamen a teste fidei sancto Bernardo in persona ducis Burgundiæ ad Willelmum comitem Pictaviensem ita propriis coloribus pingitur²: « Denique quid boni, quid virtutis, quid honestatis afferunt de summo Pontifice suo, ut et nos provocent ad favorem? Si vera sunt quæ ubique divulgat opinio, nec unius dignus est viculi potestate. Si vera non sunt, decet nihilominus caput Ecclesiæ non solum vitæ habere sanctitatem, sed et famæ decorem ». Hæc ipse. Quibus sane apparet, Anacletum pessime audisse apud omnes. Qui cum contra virum sanctissimum Innocentium a con-

¹ Petr. Clun. l. III. Ep. XLIV. — ² Bern. Ep. CXXVII.

sanguineis sæculari potentia contra jus fasque intruderetur, hinc obortæ factiones, studia, simultates, conspirationes, iræ, rixæ, contentiones, cum in eos, qui jure contradicerent, vis publica ministraret arma bellica. Tunc enim plebs classico excitata potentium eo properat, quo furens vocat ambitio, et provocat spes avida lucri. Sicque ejus, cujus scirent esse horrea oppleta, nummis arcas refertas, promptuaria plena eructantia ex hoc in illud, favent electioni, quam labantem nec subsistentem clamoribus obnixæ sustentant, minis roborant, terroribus stabilunt, ut nemo palam papam alium vel nominare præsumeret, præter eum quem factiosa tyrannus exverat ac metus retinere compelleret. Innocentii nocentibus nomen in crimen est, tabulis proscripta furentium innocentia, sicque ad Innocentium insectandum universa simul conspirant iniquitas. Cedunt furori fideles, domi se continent, vel confugia quaerunt. Martyrum petunt antiquas sedes, abdita cœmeteria, ubi sub alta scrobe pulseant precibus cælum, et compellent Deum vocibus istis ¹: « Domine quis habitabit in tabernaculo tuo, aut quis requiescet in monte sancto tuo? Nonnisi innocens ² manibus et mundo corde, qui non accepit in vano animam suam, nec juravit in dolo proximo suo. Ille accipiet benedictionem a Domino, et misericordiam a Deo salutari suo ».

3. Hoc statu miserando collocata erat tunc temporis Romana Ecclesia, in qua triumphante Antichristo cogerebatur versus Christi vicarius exulare, in templo sancto in Petri throno abominatione sedente. Sed audi ista ab ejus temporis scriptore anonymo, ex Codice Vaticano descripta: « Magna in Urbe discordia facta; nam episcopi et cardinales se in duas partes diviserunt, sed melior et sanior pars cum eodem Innocentio, qui majoribus studiis et meritis juvabatur, adhæsit; omnes subscripti cum ipso constanter steterunt Willelmus Prænestinus, Matthæus Albanensis, Joannes Ostiensis, Conradus Sabinensis, episcopi; Petrus quoque Sancti-Martini in Montibus, Joannes Cremensis Sancti-Chrysogoni, Hubertus Sancti-Clementis, Anselmus Sancti-Laurentii in Licina, Anselmus alius S. Cæcilie, Gerardus S. Crucis, et Petrus S. Anastasie, presbyteri cardinales; Romanus S. Mariæ in Porticu, Gregorius Sanctorum-Sergii et Bacchi, Haimericus S. Mariæ-Novæ, Apostolicæ Sedis cancellarius, Albertus S. Theodori, et Guido Sanctæ-Mariæ in Via-Lata, diaconi cardinales. Tres vero ex illis, qui adversæ parti adhæserunt, Desiderius Sanctæ-Praxedis, Godfredus Sancti-Vitalis et R. S. Sabinæ, ad pap. Innocentium sunt conversi, Petrus autem Leonis cum sectatoribus suis humilitatem Innocentii parvipendens, non posuit Deum adiutorem sibi, sed speravit in multitudine divitiarum, in potentia parentum, in fortitudine munitionum, et hostiliter fecit aggredi domos Frangipanum, in quibus Innocentius se receperat cum suis fratribus.

Sed contra spem sibi accidit, quia et Innocentii partem modicum læsit, et ejus satellites non sine gravi damno ad eum sunt reversi. Unde in indignationem et iram commotus, ad Sanctum-Petrum cum indignatione, maxima cum multitudine equitavit, et ipsam quam cepit Ecclesiam, per violentiam introivit, et per sanctuarium et aureum Crucifixum, pendentes coronas, cum toto thesauro argenti et auri, et pretiosis lapidibus, sive gemmis, quas Romani Pontifices, orthodoxique imperatores in Ecclesia ipsa cum devotione obtulerant, tanquam sacrilegus auferre, et ciborium, quod super altare B. Leo construxerat, detruncare præsumpsit. Sublatis autem et abreptis omnibus, ad patriarchiū B. Mariæ accessit, et Ecclesiam ipsam multo majori thesauro dotatam, exspoliare nihilominus attentavit. Ad alias præterea Urbis Ecclesias manus extendens, quidquid in eis pretiosum invenit, similiter rapuit, et asportavit. Talibus ergo tantisque mercibus inique dotatus, majorem venalis Urbis partem emere studeat, corrumpens vulgus etiam ita sibi astrinxit, ut præter Frangipanum et Corsorum munitiones, papa Innocentius nullum in Urbe subsidium haberet. Cum igitur Pontifex ipse undique ita esset obsessus, ut nemo ad ejus præsentiam sine periculo vite posset accedere, consilium habuit exeundi Urbem, et transeundi in partes Galliarum. Ascendit ergo duas galeas cum omnibus fratribus, qui secum steterant, præter Conradum Sabinensem episcopum, quem vicarium in Urbe reliquit, et faucibus Tiberis cum difficultate transiens, ad comitatum Pisanum cum prosperitate, Deo auctore, pervenit ». Hucusque auctor de recessu ab Urbe legitimi Pontificis Innocentii, eademque reliqui omnes antiquiores horum temporum scriptores.

4. At quod in ore duorum vel trium testium stat omne verbum, ne quis putet quæ ex anonymo sunt recitata, ob nimiam valde deformitatem carere fide, eadem ex Bernardo abbate, auctore tunc vivente hic describamus, viro plane sanctissimo, qui in secundi libri principio Vitæ quam scribebat sancti Bernardi, hæc habet de eadem schismatica factione: « Pars altera infames ausus violentia non ratione corroborans, Petrum Leonis ad hunc apicem aspirantem, fraudulentis machinationibus seorsum et præcipitanter nominavit Anacletum, et cæteris renitentibus ordinavit. Qui vero in parte Catholica erant, electum suum solemniter ordinatum collocarunt in cathedra, et per loca illa, in quibus sessiones habent ex antiqua consuetudine Romani Pontifices, circumduxere, et pro tempore honor debitus Apostolicæ affuit dignitati. Et tunc sane circa Lateranense palatium morabantur; nec erat jam eis tuta in domibus propriis mansio, cum eos acerrime Petri satellites infestarent. Ibi etiam diu resistere non valentes, per confœderatos sibi quosdam ex nobilibus Romanis ad tempus in turribus eorum receptacula habuerunt. Sed nec in eis perseveravit fidelitas. Nam in brevi

¹ Psal. XIV. — ² Psal. XXIII.

aut vi aut formidine temerarie multitudinis, aut pretio corrupti sunt. Nam Petro tam propria generis virtute, quam adhærentium sibi affinitate multitudo tanta erat, ut fere tota eum civitas sequeretur, vel pecunia, vel commodis obligata.

5. « Congregaverat sane opes innumeras, tam in exactionibus curie, quam in legationum negotiationibus, quas ad expectandas nundinas reservaverat. Insuper et paterni census ampla congeries eatenus sigillata, modo distributa in populum, ad fas venalem plebem armaverat. Quibus erogatis, donaria regum in ornamentis Ecclesiæ, ab ipsis evulsit altaribus, et cum calices frangere, et crucifixos aureos membratim dividere ipsi profani Christiani vel timerent vel erubescerent, Indæos aiunt esse quæstos, qui sacra vasa et imagines Deo dicatas audacter comminuerent. Igitur quisque pro modo suo secundum majus et minus conducti ad scelus, sacramentis generalibus publice Petro venderunt assensum, et in omnem sanguinem manus exposuerunt et arma, et quotidianis congressibus partem quæ cum Innocentio erat, maledictis insectabantur et gladiis. Habuerunt igitur servi Dei consilium, et quia via humana se lueri non poterant, cedere elegerunt, et procuratis clam navigiis, de ore leonis, et de manu bestie per Tiberim in Tyrrhenum mare elapsi prosperis ventis carbasia impellentibus ad portum Pisanum feliciter appulerunt ». Illicque de his Bernardus abbas Bonævallis, sed et ipse sanctus Bernardus in Epistola, quam postea dedit ad Romanos sub Eugenio papa, ista adeo probrosa in eodem sic exprobat ¹: « Recordare qua causa, quo fine, per quos et in quos usus non longe ante hos dies, cunctarum quæ in te sunt Ecclesiarum omnis ornatus et census profligatus est, quidquid in altaribus, et in altarium vasis, quidquid in ipsis sacris imaginibus auri et argenti reperiri tunc potuit, manibus impiorum direptum, et asportatum est. Quid ex his omnibus tu in tuis nunc marsupiiis invenis? Porro decor domus Domini irrecoverabiliter periit. Et nunc quid tibi visum est, iterare malitiam, innovare denuo super te dies malos? Hæc S. Bernardus, improperans postea ista tunc temporis, cum a Romanis ab Urbe pulsus esset Eugenius papa. In ultionem autem admissi sceleris, hoc ipso anno summa annonæ penuria laborasse Romanes Acta Innocentii testantur his verbis: « Huius temporibus, primo anno Pontificatus sui tam valida fames Romæ fuit, ut frumenti sextarium quinque solidis denariorum papalium venderetur ». At levis ista, quantumlibet ingens videri poterit, ultio in sceleratos, si cum tam immani atque nefando sacrilegio, et hactenus inaudito, quod schismaticus furor audacissime perpetravit, comparetur: cum, quod hucusque nunquam presumptum a quovis nefario legitur, ab iisdem Christus in imaginibus datus sit in manus Judæo-

rum dilacerandus ac conscindendus. Qualis tunc facies Urbis, in qua non ad cultum, ex more Basilicæ frequentarentur: sed ad rapinam sacrilege invaderentur, expoliarentur, atque turpissime profanarentur? Ex quibus adeo nefariis operibus tenebrarum, secundum Dominicum illud ¹: « Ex fructibus eorum cognoscetis eos ». Et secundum illud ²: « Non potest arbor mala bonos fructus facere, neque arbor bona malos fructus ». Perfacile erat cuique intelligere, quis legitimus, quis vero spurcius esset papa; quis successor Petri, quis synagogæ satanæ antichristus, quis pastor, quis vero fur et latro, qui nonnisi ut perdat et mactet, in ovile ovium intrat.

6. *Antipapæ Anacleti et Innocentii legitimi papæ merita discussa.* — Qui, ne turpissimus, uli erat, a cæteris Ecclesiæ pastoribus atque Christianis principibus haberetur et vitaretur, larvam imposuit monstro, ut quod esset horrendum visu, auditu pavendum, idem simulatione superinducta, mendacio superimposito, hypocrisi superaddita, videretur pulchrum et humanum; studuitque ipse litteris toto orbe terrarum sparsis videri sanctus, justus et maxime pius: quas Dei beneficium hactenus conservatas, tibi, lector, inspiciendas inferius proponemus. Modo autem de sancta Romana Ecclesia per schismaticum pseudopontificem lacinata, S. Bernardi ista audientes audi querelas ³: « Cernitur abominatio stare in loco sancto, quem ut obtineret, incendit igne sanctuarium Dei, persequitur Innocentium, et cum eo omnem innocentiam ». At quid dixeris tu, lector, si præsentis temporis novatores audias hunc S. Bernardi locum male usurpantes, imo eodem abutentes penitus de abominatione sedente in loco sancto, ad probandum Romanum Pontificem esse antichristum? Sed delirant, nescientes, seu potius nescire dissimulantes, non ista de legitimo Romano Pontifice locutum S. Bernardum, sed de schismatico papa Anacleto, cum legitimum Pontificem Innocentium non antichristum, sed vere Christi vicarium, imo Christum ipsum appellet: nam ista de Innocentio paulo superius: « Ecce Christus Domini iste Innocentius positus est in ruinam et resurrectionem multorum. Nam qui sunt Dei, libenter junguntur ei; qui autem ex adverso stat, aut antichristus est, aut antichristus ». En vides, lector, hæreticorum procaciam et impudentiam: cum satis constet, quem S. Bernardus Christum, quem vero nominet antichristum. Qui et in Epistola ad Galfredum de eodem pseudopontifice Anacleto habet ista, comparans ipsum iterum Antichristo ⁴: « Bestia illa de Apocalypsi ⁵, cui datum est os loquens blasphemias, et bellum gerere cum sanctis, Petri Cathedrali occupat, tanquam leo paratus ad prædam ». Rursum de eodem ad episcopos Aquitanie ⁶: « Velimus, nolimus, impleri quandoque necesse est veritatem Spiritus sancti,

¹ Bern. Ep. CXXLII.

¹ Matth. VII. — ² Luc. VI. — ³ Bern. Ep. CXXIV. — ⁴ Ibid. Ep. CXXV. — ⁵ Apoc. XIII. — ⁶ Bern. Ep. CXX.

lierique illam, quæ prophético spiritu prænuntiata legitur in Scripturis discessio : sed vix homini per quem venit. Quis vero ille, nisi homo peccati qui super electum a Catholicis Catholicum et canonicè, locum sanctum invasit ? Quem tamen non quia sanctus, sed quia summus est, affectavit. Invasit, inquam, invasit armis, igne, pecunia, non vitæ merito vel virtutum pervenit in quo stat, et stat in quo pervenit. Nam illa quam jactat juratorum suorum, non electio, sed factio, umbra tantum fuit et occasio et velamentum malitiæ ».

7. Quod autem ad utriusque electionis merita spectat, ab eodem S. Bernardo id sæpe tractante accipe, quam potiora jura fuerint Innocentii De quo primum inquit ¹ : « Fumiculus triplex difficile rumpitur : electio meliorum, approbatio plurium, et quod his efficacius est, morum attestatio Innocentium apud omnes commendat, summum confirmat Pontificem ». Et sequenti Epistola ² : « Merito autem illum recipit Ecclesia, cujus et opinio clarior, et electio sanior inventa est, nimirum eligentium et numero vincens et merito ». Insuper et ad episcopos Aquitanie : ³ « Stat quippe sententia Ecclesiastica et authentica, post primam electionem non esse secundam. Celebrata proinde prima, quæ secundo præsumpta est, non est secunda, sed nulla. Nam etsi quid minus forte solemniter, minusve ordinabiliter processit in ea quæ præcessit, ut hostes unitatis contendunt : nunquid tamen præsumi altera debuit, nisi sane prius discussa ratione, cassata judicio ? Eapropter qui se superingerere festinant, quique temerario temere manus imponere nihilominus acceleraverunt Apostolo prohibente ⁴ : Neminem cito manum imponas, ipsi proculdubio majus peccatum habent, ipsi auctores schismatis, ipsi grandis malitiæ hujus principes extitere ». Et inferius : « Duo itaque sunt, de quibus contenditur : quisnam eorum rectius videatur papa. Quorum primo quidem, si personas compares, et neutri sane vel derogare videar, vel adulari, dicam quod dici passim reperies, et neminem arbitror diffiteri : quia videlicet Innocentii nostri vita vel fama nec æmulum timet, cum alterius nec ab amico tuta sit. Dehinc si electiones discutias, nostri illidem mox occurrit et promotione purior, et ratione probabilior, et prior tempore. Porro de tempore constat : reliqua duo merita probant et dignitas eligentium. Hanc enim, ni fallor, partem saniores invenies, tam episcopos quam cardinales diaconos sive presbyteros, et quorum maxime interest de electione summi Pontificis, et quanti in eligendo juxta Patrum scita sufficiant. Quid et in consecratione ? Nonne Ostiensem, ad quem specialiter spectat, habemus ? Cum igitur et electus dignior, et electio sanior, et actio ordinabilior teneatur, qua isti ratione, imo qua contentione contra jus et fas, et vota omnium bonorum invitæ et re-

nitenti Dei Ecclesiæ præficere alium, et illum deponere tentant ? Horum conatui tam maligno, tam indigno, tam temerario totis certe viribus renitendum esse videtis, reverendissimi et illustrissimi patres ». Hæc sanctus Bernardus ad episcopos Aquitanie.

8. *Petri cardinalis episcopi Portuensis litteræ ad cardinales pro antipapa.* — His visis, jam quod polliciti sumus conscriptas a schismatico papa Anacleto hoc anno litteras ad diversos datas, ad alliciendos in suam partem principes et diversarum provinciarum episcopos, hic describamus, acceptas eas ex Codice Cassinale, quas habuimus ab ejusdem congregationis monacho Constantino Cajetano, de antiquitate Ecclesiastica bene merente. Quæ cum careant titulis, tamen ad quos datas sint, ex earum textu interdum assequi licet. Sed prius vidende sunt litteræ Petri episc. Portuensis, ejusdem Anacleti promotoris, et totius illius factionis antesignani, quæ sic se habent ¹ :

« Petrus Portuensis episcopus, quatuor episcopis Willelmo Prænestino, Matthæo Albanensi, Conrado Sabinesi, Joanni Ostiensi (episcopis cardinalibus partis Innocentii).

9. « Quanta sit pro vobis tribulatio cordis mei, ille solus novit qui omnia novit. Vobis quoque meis litteris cogitum saltem jam ex parte fuisset nisi Ecclesiæ sententia, et communis auctoritas prohiberet. De commendatione, seu vituperatione personarum, de quibus nunc sermonum varietas agitur, non est hujus temporis judicare : est qui querat et judicet. Si tamen quisquam præsto fuerit accusare, præsto erit et qui debeat respondere : præsertim cum in vestro et meo, imo in totius Ecclesiæ conspectu uterque sapienter vixerit et honeste, et quæ officii sui erant plena lucusque exercuerit libertate. Abstinere vos potius convenit a sermonibus odiosis et verbis præcipitationis. Si de rumoribus agitur, longe se aliter habent res, quam vestræ apud me protestantur litteræ. Ad hæc si verba quæ posuistis, si ordinis rationem attenditis (ut salva reverentia vestra loquar) factionem illam vestram qua confidentia, qua fronte electionem vocare præsumitis ? Cur illum vestrum diciis ordinatum, cum prorsus in causa ejus ordo non fuerit ? Siccine didicistis papam eligere ? in angulo, in abscondito, in tenebris et umbra mortis ? Si mortuo papæ vivum succedere volebatis, cur mortuum vivere predicabatis ? Multo melius erat, mortuo humanitatem impendere, et sic de vivi solatio cogitare. Sed ecce dum de mortuo solatium vivo requiritis, et vivum et mortuum pariter suffocatis. Postremo nec vestrum, sicut nec meum fuit eligere ; sed potius electum a fratribus spernere vel approbare.

10. « Quia igitur neglecto ordine, contempto canone, spreto etiam ipso a vocis (vobis) condito anathemate, me inconsulto priore vestro, incon-

¹ Bern. Ep. CXXIV. — ² Ibid. Ep. CXXV. — ³ Ibid. Ep. CXXVI. —

⁴ 1. Tim. v.

¹ Will. Malmesb. hist. Novel. I. 1.

sultis etiam fratribus majoribus et prioribus, nec etiam vocatis aut expectatis, cum essetis novitii et in numero brevi paucissimi, facere præsumpsistis, pro infecto habendum esse et nihil omnino existere, ex ipsa vestra aestimatione potestis advertere. Cito autem nobis Dominus affuit, et viam qua errori vestro contraire possemus ostendit. Fratres siquidem vestri cardinales, quorum praecepta in electione potestas, cum clero universo, expectante populo, cum honoratorum consensu, in luce, in manifesto unanimi voto et desiderio delegerunt dominum Petrum cardinalem in Romanum Pontificem Anacletum. Hanc ego electionem canonicè celebratam conspexi, et auctore Deo, confirmavi. Hunc Ecclesia suscipit et veneratur: hunc per Dei gratiam episcopi, abbates, principes, capitanei et barones, quidam per seipsos, quidam per nuntios suos, videntibus nobis, frequentant.

11. « Deprædationem illam et crudelitatem, quam prætenditis, non videmus. Quicumque ad eum pro responsis, seu negotiis suis veniunt, benigne suscipiuntur, benignius revertuntur. Redite jam, redite ad cor. Nolite schisma in Ecclesia facere ad animarum subversionem, nolite ulterius laborare: teneat vos timor Domini, non pudor sæculi. Numquid qui dormit non adjiciet ut resurgat? Desistite jam mendacis, in quibus impij spem suam ponere consueverunt. Dominus Tiburtius (Tiburtinus) in scriptis suis cum sacramento testificatus est, dicens, quod ego diaconum S. Angeli solum idoneum iudicavi ad Pontificatus ordinem. Videat ipse quid dixerit: ego in occulto locutus sum nihil. Non est aliquis, qui hoc verbum ab ore meo unquam audierit. Hæc fuit sententia mea semper, ut nonnisi sepulto papa de successoris persona mentio haberetur. Unitatem Ecclesiæ levis et tenebo; veritati et justitiæ adherere curabo, confidenter sperans, quod justitia et veritas liberabit me ». Hucusque litteræ Petri episcopi Portuensis.

12. *Anacletus antipapa excommunicat Innocentium papam, et scribit ad Lotharium regem.* — Proximo autem Paschate, in Cæna Domini, ipse pseudopontifex Anacletus solenni ritu excommunicavit Innocentium papam et ei adherentes cardinales, dignitateque privavit et alios plurimos, sed et novos in veteribus titulis substituit cardinales. Hæc enim ex ejus litteris inferius recitandis patebunt, in quibus nomina singulorum recensentur. His tunc Romæ peractis, idem per archiepiscopum Bremensem, quem tunc Romæ adesse contigit, cupiens consociare sibi principes Anacletus, misit ad Lotharium regem has litteras, quas una cum aliis ejusdem pseudopontificis litteris hoc anno ad diversos datis conservat Codex Cassinensis¹.

13. « Veteris amicitiae memores, et ejus praeceptae quæ inter te et bonæ memoriæ patrem meum longo tempore stabili firmitate duravit, dignum

duximus nobilem prudentiam tuam Sedis Apostolicæ litteris visitare, et mutuae affectionis fœdera dignis allegationibus innovare. Quamobrem quanto te arctius charitatis brachiis cupimus amplexari, tanto diligentius de statu Romanæ Ecclesiæ, seu de his quæ penes nos sunt acta, litterarum nostrarum serie dilectionis tuæ intimare curavimus. Obiuncte siquidem piæ memoriæ papa Honorio, fratres nostri cardinales presbyteri et diacones cum omni clero Romano, expetente populo et indefessis vocibus insistente, consentientibus etiam juxta tenorem canonum honoratis, devotis animis, et affectione unanimi invitum me et viribus imparē concorditer elegerunt, electumque postea frater noster Petrus Portuensis episcopus, convenientibus diversarum regionum episcopis, ad altare B. Petri, sub oculis omnium, in Romanum Pontificem celeberrime consecravit.

« Verum quidam de fratribus loco et tempore novitii et paucissimi numero, quorundam perfidorum blanditiis astutiis suffocati, altare aliud erigere, et anathema Jericho in sanctuarium Dei introducere, et simulacrum Phegor de inanibus mulierum insipientium sunt in tenebris fabricare conati. Sed Deus omnipotens, qui consilium Achitophel infatuavit, eorum prava consilia modo destruxit mirabili. De domo namque Leonis¹ Frangapani cujus potissimum viribus videbantur inniti, nocturno tempore fugientes, se trans Tiberim contulerunt, et ibi quasi quodam carcere latitantes, presumptionis suæ ignominiam crebris doloribus flebiliter expeririunt.

14. « Sine clerici omnis Romanus individua nobis charitate cohæret. Præfectus Urbis Leo Frangapanis cum filio et Cencio Frangapane, et nobiles omnes, et plebs omnis Romana consuetam nobis fidelitatem fecerunt. Nos quoque quæ officii nostri sunt, in Urbe, intus et extra libere exercemus: ordinationes cardinalium fecimus, et episcopos largiente Deo consecravimus. Rogamus itaque nobilitatem tuam, ut sicut de te spem firmissimam posidemus, pro Romana Ecclesia consueta debeas instantia laborare, et dilectionis tuæ insignia manifestis nos facias effectibus experiri. Hæc enim agens et Romanam Ecclesiam semper ubnoxiam, et nos tibi de cætero facies debitores. Nec te, charissime, Haimericus quondam cancellarii, prædonis improbi, simonice servi, seu Joannis de Crema hominis turpissimi et incircumcisi et vere Nicolaitæ, monstruosa mendacia moveant; nec fidei tuæ murum eorum vaniloquia, aut venenosæ mendacia pectrent, qui velut Cain a facie Domini fugientes², maledicti a terra, fratricidij signum meretricia cogunt fronte gestare. Datum Romæ apud S. Petrum, kal. Maii (Martii) ». Hæc pseudopapa Anacletus ad Lotharium Romanorum regem.

15. Quod autem exprobat Innocentio papæ fugam, cumque hac de causa Cain appellat, audi

¹ Bibl. Cass. Cod. num. 115. vers. fin. ipsius.

¹ Frangipanis, et sic alibi. — ² Gen. iv.

sanctum Bernardum in Epistola ad Hildebertum ista dicentem ¹: « Fugit ille nimirum a facie leonis, sicut dicit Propheta ²: Leo rugiet, quis non timebit? Fugit secundum preceptum Domini dicentis ³: Si vos persecuti fuerint in una civitate, fugite in aliam. Fugit, et in hoc vere virum se Apostolicum probans, quod Apostolica sese forma insinuerit. Nec enim Paulus cecidit in sporta demitti per murum, et sic effugere manus quærentium animam suam ⁴. Subfugit autem non parens vite suæ, sed dans locum iræ, non ut mortem evaderet, sed ut vitam acquireret. Merito Ecclesia Innocentio concedit ipsius vicem quem per eadem vestigia gradientem cernit. Nec sane otiosa fuga Innocentii; laborat quidem, sed honestatur in laboribus suis. Pulsus Urbe, ab orbe suscipitur; a finibus terræ occurritur cum panibus fugienti, etc. » Hæc Bernardus. Sed reliqua prosequamur.

46. *Schismaticorum cardinalium et aliorum ipsius Anacleti litteræ ad Lotharium regem et reginam.* — At non Anacletus tantum, sed et cardinales ab eodem Anacleto ordinati una cum aliis qui prius erant, eadem insigniti dignitate, universoque clero Romano et episcopis, qui Romæ Anacleto communicantes aderant, ista ad eundem Lotharium scripsere ⁵:

« Serenissimo ac gloriosissimo Lothario Romanorum regi, fratres qui Romæ sunt cardinales presbyteri, et diacones, Bonifacius tituli S. Marci, Gregorius tituli Sanctorum Apostolorum, Amicus tituli Sanctorum Nerei et Achillei, Desiderius tit. Sanctæ Prædixis, Saxo tit. S. Stephani in Cælio monte, Petrus Pisanus tit. S. martyris Susannæ, Petrus tit. S. Marcelli, Sigizo tit. S. Sixti, Crescentius tit. SS. Marcellini et Petri, Comes tit. S. Sabinae, Gregorius tit. S. Balbinæ, Luitfridus tit. S. Vitalis, Matthæus tit. in Eudoxia, Henricus, tit. S. Priscæ, Ordericus tit. SS. Joannis et Pauli, Jonas tit. S. Callisti, Stephanus tit. S. Laurentii in Damaso, Petrus S. Eusebii, Gregorius diaconus cardinales S. Eustachii, Angelus diaconus Sanctæ Mariæ in Dominica, Joannes diaconus S. Nicolai in Carcere Tulliano, Rimandus (Erimandus) diaconus S. Angeli juxta templum Jovis, Silvius diaconus S. Lucæ juxta Heliogabalum, Romanus diaconus S. Hadriani juxta Asylum, Gregorius diaconus Sanctæ Mariæ in Aquiro, Petrus Senex Portuensis episcopus, Egidius Tusculanus episcopus, Transmundus Signinus episcopus, Otto Sutrinus episcopus, cum reliquis Romanæ Ecclesiæ suffraganeis, subdiaconi omnes, primicerius cum omni schola cantorum, Petrus Basilicæ Salvatoris, quæ appellatur Constantiniana, archipresbyter, Rainerius S. Mariæ Majoris archipresbyter, Papa S. Mariæ Rotundæ archipresbyter, cum reliquis Romanæ Ecclesiæ archipresbyteris, et cum omni clero Romano, Anastasius abbas S. Pauli, Joannes

abbas SS. Stephani et Laurentii, et Laurentius abbas S. Gregorii in Clivo Scauri, cum reliquis abbatibus, æternam in Domino salutem ». Hucusque Epistolæ titulus. Porro hic scias annumeratos omnes ab ipso Anacleto nuper ordinatos in diversis titulis atque diaconiis cardinales. Epistola autem sic se habet:

17. « Propter quorundam hominum dolosa figmenta et mendacia venenosa, qui Dei Ecclesiam scindere et simplicium animas evertere moluntur, et sicut Janes ¹ et Mambres Moysi, Philetus et Hermodenes Paulo, Dei veritati resistunt, ad serenitatem tuam, Christianissime principum, universitatis nostræ litteras, sicut ad reliquas Orientis seu Occidentis Ecclesias, pia devotione dirigimus, optantes, ut de his quæ post obitum piæ memoriæ papæ Honorii in Romana Ecclesia emerere, seu de domui papæ Anacleti electione, sitis litterarum serie certiores. Accepimus enim eos suis scriptis impudenter asserere dominum papam non petitione populi, non spontanea cleri electione, nec honoratorum consensu, juxta Synodales regulas, et antiquas patrum nostrorum traditiones ad Apostolatus culmen assumptum, sed vi parentum, potentia fratrum, fustibus et sanguine, nobisque nolentibus subrogatum.

« Sed mirum nobis non est, si hujusmodi mendacia ad tam longinquas dirigant nationes, et veneno suo fere gentes omnes inebrient, et simplices quoque deludant, cum in Romanæ Ecclesiæ gremiis fraudulentis suis Sedem Apostolicam prostituere contentant. Revelata tecum, nobilissime princeps, facie loquimur, et per te toto orbe Romano fieri notissima, hæc quæ scribimus, peroptamus. Decedente de hac vita papa Honorio, nos omnes cardinales presbyteri, et diacones cum subdiaconibus, primicerio, cum omni schola palatii in Basilica B. Marci, qui locus quasi umbilicus Urbis est, concordi voluntate convenimus. Convenere nobiles; etiam innumera ibidem multitudo convenit substituendi Pontificis electionem expectantes. Cumque diutius inter nos de futuri Pontificis esset electione tractatum, dominus papa, tunc cardinalis presbyter primus, libere prorupit in vocem, et quandam de fratribus manu et voce propria assignavit. Cui rei se impotentem frater ille cognoscens, communi omnium nostro consilio, communi consensu expectare (expetente) populo, consentientibus honoratis, eundem dominum papam nobiscum communiter elegit. Sicque in Basilica B. Petri, ad corpus ejus ubi tantum Romani Pontifices consecrantur, est celeberrime consecratus. Nullius profecto nos violentia, nullius nos potentia impulit, sicut fanatici illi suis litteris graviter (garrunt) in Romanum eum Pontificem annotare (eligere). Sed cum proditorum suas et opprobria tegere nequeant, proprii oculi trabe neglecta, in alieno oculo festucam quærunt.

18. « Porro Haimericus quondam cancellarius,

¹ Bern. Ep. CXXIV. — ² Amos, III. — ³ Matth. X. — ⁴ Act. IX. — ⁵ Ex Cod. Cass. Ep. X.

¹ 2. Tim. III.

qui Romanam Ecclesiam quasi vile scortum pro luxuriis et avaritia sua, longo jam tempore habuit prostitutam, qui simoniis, sicut vos ipsi (ut credimus) aliquando fuistis experti, exactionibusque variis Dei Ecclesiam et Dei servos diutius trucidavit, arridente ei egregio viro Leone Frajapane, qui nunc per Dei gratiam nobiscum est, velut alter Sennacherib, in civitatem sanctam et templum improbi consilii sui manum impie præsumpsit extendere, et propria superbia, quibusdam sibi allectis, qui ejus quadra vivebant, viris utique novitiis, et numero quinque, altare aliud in Ecclesia Dei solus est molitus erigere. Verum omnipotens Deus subsannavit eos, et eorum consilia infatuans, in sibilum et fabulam omnium mira ratione redegit. Ipsi tamen ut canes impudentissimi erubescere nescierunt: frons meretricis facta est eis. De quibusdam vero episcopis, quos impostores illi in factione ista sibi applaudere gloriantur, nobis cura ulla non est, præsertim cum nil ad eos de Romani Pontificis electione pertineat.

« Rogamus itaque discretionem tuam, et in Domino commonemus, ut si Romanam Ecclesiam piis optas solatiis et studiis confovare; si imperii tui moderamina per Sedem capis Apostolicam roborari; cum Romana simul Ecclesia sapias, æqua nobis pietate concordes, et dominum papam Anacleto, quem unanimi omnes devotione præfecimus, Catholicum papam feliciter recognoscas, et debitam ei prædecessorum tuorum more, affectionem reverenter exhibeas. Nos quidem aliquando te non sic plene dileximus: sed quia domini papæ amorem uberius circa te fervere cognoscimus, eundem circa te, et circa honorem tuum animum nos gestare cognoscas. Quod si nos fortassis audire distuleris, propitius sit nobis Deus, quia nullis excessibus a tua nos dilectione convelles. Memento etiam, quod Roboam regi illi contigit¹, qui consilio juvenum acquievit, at sacerdotum (seniorum) noluit consiliis obedire». Hactenus cardinalium schismaticorum ad Lotharium regem Epistola. Quibus cum sicut nec scriptis ab Anacleto Lotharius rex responsionem ullam penitus reddidisset, rursus ad eum alias addidit Anacleto, quæ in eodem Codice ita scripte leguntur, missæ per clericum quemdam Argentinensem, ut litteris ad eum a magistratibus Romanæ Urbis datis appareret²:

19. « In ipso nostræ promotionis exordio per venerabilem fratrem nostrum Bremensem archiepiscopum serenitati tuæ litteras misimus, tam de statu Romanæ Ecclesiæ, quam de his quæ circa nos acta fuerant, expressius continentes. Sed nos adhuc nulla clementiæ tuæ rescripta meruimus, nec inter multiplices curas, quibus in Sedis Apostolicæ moderatione constitui comprimimus, nuntiorum tuorum solatio allevari. Nos quidem personam tuam in minoris ordinis administratione constitui,

pro mira tuarum opinione virtutum ample dileximus, et suscepti regni genium pro nostro tunc posse confovimus. Unde proculdubio experientia vestra cognoscat, voti nostri esse, ut quanto magis Sedes Apostolica regni pietate fulcitur, tanto amplius honorem tuum et regnum strictis debeamus brachiis amplectari. Vicissim enim sibi et regalis potestas, et sacra Romana auctoritas mutua debent inter se diligentia respondere. Sane tunc tula erit conditio subditorum, si regnum et Ecclesia, diebus tuis, alterutro titulo compassionis ariserint, et ad culmen imperii regni tui moderatio latius extendetur, si ea de re Dei gratiam pia fueris devotione sortitus.

20. « Porro ut votis tuis satisfacere videamur, quæ circa nos sunt, tunc volumus industria fieri notiora. Nos, Dei gratia et Apostolorum suorum Petri et Pauli meritis, bene et prospere sumus, quæ officii nostri sunt, intus et extra plena libertate dispositimus, in pace sunt omnia quæ possidemus. Fratres nostri cardinales et episcopi, et clerus omnis Romanus individua nobis charitate coherant. Viri illustres, Leo Frajapanis, Hugo præfectus Urbis, et frater ejus filius Leonis Frajapanis et Cencius frater ejus, Stephanus de Petro, Stephanus de Theobaldo filii Henrici de S. Eustachio, nobiles omnes et plebs omnis Romana, capitanei, et comites qui extra sunt, fidelitatem nobis debitam juraverunt, Basilicam B. Petri, Lateranense palatium, et reliquas munitiones Urbis quiete et pacifice detinemus: Conradum regni invasorem, licet ejus nobis pro minino fuerit, in Cæna Domini, Laterani in Basilica Salvatoris sub oculis Ecclesiæ quæ frequens ea die de diversis partibus mundi convenerat, in conspectu ceterum omnium terræ suæ solemniter excommunicavimus.

21. « Rogamus itaque nobilem prudentiam vestram, et in Domino commonemus, ut sicut de te spem bonam et firmam possidemus, nostris debeat successibus congaudere, et tam pro nobis quam pro omni Ecclesia Romana regalem ac piam sollicitudinem gerere et efficacem nobis diligentiam exhibere. Nec vos quorundam veneratorum vaniloquia prava conturbent, qui totam Dei Ecclesiam venerare cupientes, dum taxationes pristinas, et consuetas mercimonias in sanctuario Domini exercere statuebant, testaceum idolum cruentis manibus plasmare conati sunt: quod ejus lapis ille angularis de Domini monte descendens, dura impressione comminuit³. Incolumem te, et nostri memorem, pia Dei dextera a malis omnibus tueatur. Datum Romæ apud Sanctum-Petrum in diebus (idibus) Maii». Junxit his alias ad reginam ejusdem Lotharii conjugem his verbis⁴:

22. « Auditum habemus, charissima in Domino filia, quod vere Christiana sanctitate refulgeas, quod Ecclesias diligas, quod servos Dei piis ubique solatiis foveas; nec minoribus es profecto

¹ 3. Reg. XII. — ² Ex Cod. Cass. Ep. XVI.

³ Ephes. II. — ⁴ Ex Cod. Cass. Ep. XVII.

præconiis attollenda, quod totius regni regimen censura justitiæ de tua potissimum dicitur moderatione pendere. Quæ de beatitudine tua, illustrissima filia, audivimus, incunctanter et credimus; et hæc et alia plura de te nobis bona sæpius nuntiata lætificant, et omnipotentem Deum assiduis precibus exoramus, ut incepta sanctitatis opera, Apostolorum Petri et Pauli meritis, pio et meliori te faciat fine concludere. Hortamur itaque nobilem prudentiam tuam, et in Domino commonemus, ut inter regni curas, et sæcularium negotiorum sollicitudines et sæculi glorias cor tuum semper ad Dominum habeas, et te quandoque cogites morituram; non de piis operibus mundi laudes affectes, nedum hominibus foris placere delectat, Dei intus oculis possis displicere. Virum tuum clarissimum filium nostrum Lotharium Christianissimum regem sedulis suggestionibus adhortare, ut sic terreno regno humana potestate præsideat, quatenus ipsum qui supra nos est, per quem reges regnant et principes iusta decernunt¹, qui transfert regna cum vult, qui facit reges inglorios, et accingit fune renes eorum, caute semper et diligenter attendat. Et licet ipse Romanam Ecclesiam (ut certum habemus) plenis brachiis amplexetur, dilectionem tamen ejus et affectum circa Sedem Apostolicam, et nos qui eam ex longo tempore dileximus, per tuam potius optamus industriam propagari. Porro nos personam ejus propensiori charitate diligimus, et honorem suum, largiente Domino, cupimus conservare, et diligentius et efficaciter ampliare. Quia igitur peccatis meis exigentibus, Ecclesie regimen sum subire coactus, Apostolatus onus cogor in amaritudine animæ meæ portare, sanctorum virorum solatiis ego, ut orationum suarum instantia mihi semper Deum propitium faciant, et gratiam ejus in omnibus ubique opportunitatibus augeant. Et ideo te plurimum deprecamur, ut et Deum debas pro nobis obnixius exorare, et auxiliis et piis consiliis tuis nos crebrius allevare. Vitam et annos tuos omnipotens Dominus Apostolorum suorum et Petri et Pauli meritis in bonis operibus augeat, et post vitæ hujus cursum vitam tibi largiatur æternam. Datum Romæ apud Sanctum-Petrum in diebus (idibus) Maii ».

23. *Magistratus Romani ad Lotharium litteræ pro Anacleto.* — Cum vero Lotharius rex atque regina detestati schismaticum papam, litteras ab eo datas contemnerent, nec ei respondere ullatenus dignarentur, Romani ipsi, quorum potentia pseudopontifex sublevatus inmitteretur, cum seipsos in Anacleto contemni cognoscerent, ad eundem regem litteras postremo dedere, easdemque salibus mordacitatis aspersas: quas in eodem Codice Cassinensi hæcenus conservatas, hic reddidimus. Sic se habent, hujusmodi inscriptione præfixa²:

24. «Domino Lothario glorioso et triumphatori

Romanorum regi, Hugo præfectus Urbis, et frater ejus, Leo Frajapane, et Cencius frater ejus, Stephanus de Thebaldo, Albertus Joannis de Stephano, Stephanus de Beuzio frater ejus, Henricus filius Henrici de Sancto-Eustachio, Octavianus frater ejus, et reliqui Romanæ Urbis potentes, sacrique palatii iudices, et nostri consules et plebs omnis Romana salutem et gloriam, et de hostibus universis victoriam.

25. « Bene olim cana patrum nostrorum et togata gentis sanxit auctoritas, paucis esse principem moderatisque sermonibus alloquendum, ne vel adulationibus cognitis stomachari, vel instantia nimia regio valeat furore retundi. Proinde licet domini papæ litteris, et multorum ad te relatione de ejus electione pervenerit, gratum tamen nobis fuit ad magnitudinem tuam super hac re Urbis litteras destinare. Nos siquidem post papæ Honorii obitum unanimi et spontanea omnium cardinalium voluntate, et concordie electione clericorum omnium, dominum papam Anacleto, virum prudentem et providum, filium Petri Leonis, in Romanum Pontificem Spiritus sancti gratia procreatum, humili spontaneaque devotione suscepimus, et fidelitatem ei debitam de Urbis nostræ more juravimus. In cujus utique promotione tantam cleri et populi concordiam vidimus, ut vere in omnium mentes Spiritus sanctus mirabiliter venisse credatur. Sugerimus igitur clementiæ tuæ, et obnixius deprecamur, ut ei in omnibus debeas regali affectione favere, et auxilii tui et consilii manum nobili devotione porrigere, et ejus et Romanæ Ecclesiæ hostes, sicut et ipse tuos invicta manu repellere. Sane si princeps noster et cleri cupis esse, si Romani imperii optas tibi fasces et gloriam vindicare, necesse est Romanis te legibus coaptari, nec civium tuorum, et magistratus Urbis corda rescindere. Nos quidem te hæcenus non sic de corde dileximus, nec principatus tui ulla nos cura vel affectu demulcere quolibet modo poterat, ut honoris tui augmentum et imperii culmen deberemus ullis rationibus affectare. Sed postquam domini papæ amorem circa personam tuam impensis fervere cognovimus, eadem te sumus diligentia prosecuti, et purpuras tuas dignis honoribus deinceps caputis illustrare.

26. « Cæterum miram valde habemus, et Romanæ republicæ injuriæ deputamus, cum tibi jam bis dominus papa litteras miserit, semel per Bremensem archiepiscopum, secundo per Argentinensem quemdam clericum, qui te de statu Urbis et ejus plenius instruxerunt: cur nulla a discretionem tuam adhuc scripta mernerit. Inde est quod dominus papa nullam adhuc de latere suo personam, clericum aut laicum, juxta consilii nostri, et totius Ecclesiæ conductum ad excellentiam tuam statuit delegare. Viderit itaque moderatio tua, ut domini papæ litteris scriptis et nuntio devotiore moderamine respondere, et quem animum circa domini papæ personam, et circa nos omnes

¹ Prov. viii. — ² Cod. Cass. Ep. ix.

et Romanam rempublicam habeas, certis indiciis declarare non differas: alioquin sic suspensi nos diutius stare non possumus, nec aliquibus in longum volumus dissimulatis (dissimulationibus) protrahi. Acta Romæ feliciter XV kalend. Junii ».

27. *Anacleti antipapæ legatio et litteræ ad regem Francorum et alias.* — Qui iteratis (ut vidisti) litteris antipapæ sollicitat Loharium Romanorum regem ad schisma, si posset, adducere, baud prætermisit alios principes Boreales non litteris tantum, sed etiam legationibus pellicere. Quamobrem eodem plane tempore ad regem Francorum legatum decernit Ottonem episcopum Tudertinum, cui litteras dedit ad ipsum regem et inhærentes illi principes, necnon etiam ad Galliarum antistites, quas in dicto Cassinensi Codice servatas integras hic describemus: atque primum quam ad regem ipsum misit Epistolam, quæ sic se habet ¹:

« Jamdudum ² voluntatis nostræ ac desiderii fuit, ut desiderabilem nobis personam tuam, et totam Gallicanam Ecclesiam tali visitaremus legato, qui Dei et Ecclesiæ honorem, atque salutem tuam nosset, et posset strenue ac fideliter operari. Cæterum nobis erga plurima occupatis, desiderium nostrum hucusque dilatum est. Sane opportunitate habita, quod pro tempore intermisisse conspiciamus, ipso jam debito compellente, perficere non moramur. Multam enim de tua nobili et experta dilectionis constantia fiduciam possidemus, qua personam nostram a puero dilexisti, et dulcedinis tuæ affectione benevola educasti, ut more solito et communem matrem Romanam Ecclesiam honore debito venereris, et nos ipsos personaliter dilectionis tuæ affluentia prosequaris. Eapropter charissimum fratrem nostrum Ottonem Tudertinum episcopum, unum videlicet ex præcipuis Ecclesiæ membris, virum utique honestum et religiosum, et domini prædecessoris nostri sanctæ memoriæ Paschalis papæ plantarium, ad tuam usque præsentiam a nostro latere delegamus, qui te de statu nostro faciat certiore, et in diversis regni tui partibus, quæ correctione seu confirmatione digna fuerint, vice nostra corrigat et confirmet.

28. « Præsentibus igitur litteris nobilitatem tuam rogamus, ut eum et reverenter suscipere, et tanquam nostras præferentem vices studeas honorare. Nobis enim, quidquid obedientiæ, quidquid ei honoris exhibueris, ascribemus. Nos profecto plenius te benevolentie nostræ brachiis amplexamur, et tum tuique filii gloriosi regis Philippi honorem, præstante Domino, cupimus efficaciter exaltare. Porro de promotione per fratres nostros cardinales et episcopos suffraganeos Romanæ Ecclesiæ celebrata, de cleri et populi nobiscum unitate, seu etiam scandalo, a paucis pseudofratribus celebrato, eidem legato nostro injunximus,

tibi et regno tuo plenius intimare. Rogamus ergo, ut pro Ecclesia Dei murum te validissimum opponas, et aures tuas ab illorum mendaciis seu detractionibus omnino avertas, quatenus inter reliquos Christianæ gentis principes, præcipuum te Catholicæ fidei defensorem, sicut semper, ita et nunc tota nobiscum Ecclesia recognoscat. Charissimam filiam B. Petri, dominam reginam benedictione Apostolica salutamus. Omnipotens Dominus Apostolorum suorum Petri et Pauli meritis personam polestatemque vestram custodiat, et per temporalem administrationem æterni vobis regni participium largiatur. Datum Romæ apud S. Petrum kalendis Maii ». Scripsit insuper alias iisdem verbis per eundem legatum ³:

29. « Nobilium factorum tuorum memoria, et antiquarum amicitiarum gratia invitamur, ut desiderabilem nobis personæ tuæ præsentiam inviseremus, tali legato, qui Dei et Ecclesiæ honorem, atque salutem tuam noverit strenue et fideliter operari. Proinde charissimum fratrem nostrum Ottonem Tudertinum episcopum ex nostro ad te latere delegamus, unum videlicet ex præcipuis Romanæ Ecclesiæ membris, virum utique sapientem et religiosum, domini et prædecessoris nostri sanctæ memoriæ Paschalis papæ plantarium, qui te ipsum, et fratres nostros et filios visitet, et quo ordine nos Dominus ad honoris hujus officium promoveri voluerit (quæ nobis etiam per Dei gratiam prospere successerunt) viva voce vobis valeat nuntiare: præterea si qua in partibus illis corrigenda vel confirmanda fuerint, sancto cooperante Spiritu, vice nostra corrigat et confirmet. Præsentibus igitur litteris nobilitatem tuam rogamus ut eum reverenter suscipere, et tanquam nostras, imo B. Petri vices præferentem studeas honorare. Cæterum quorundam pseudofratrium maliloquia et mendosa fignenta dilectionis tuæ constantiam non dimoveant: nam detecta eorum mendacia per legatum nostrum tibi et regno tuo amplius nota fient. Ad hæc plurima liberalitatis obsequia, et prædecessoribus nostris exhibita et nobis ipsis personaliter impensa e memoria nostra non possunt, nec debent excidere: pro quibus, præstante Deo, cupimus æqua tibi et honori tuo vicissitudine respondere. Rogamus itaque ut sicut semper, ita et nunc in B. Petri servitio et amore nostro attentius perseveres, quatenus juxta laudabilem benevolentie tuæ morem te inter reliquos reges et principes præcipuum adiutorem nos, et nobiscum tota Ecclesia, sentiamus. Datum Romæ apud S. Petrum ». Dedit eidem legato alias ejusdem argumenti ad diversos Epistolas, quas sine titulo, ut in Codice descriptæ leguntur, hic reddimus, ne quid te prætereat eorum quæ tunc gesta vel scripta sunt; quæ, sicut leges, magno beneficio antiquitas transmisit ad posteros. Ita se habent:

30. « Dudum desiderii nostri fuerat, idoneum

¹ Cod. Cass. Ep. v. — ² Eod. Cod. Ep. xi.

³ Eod. Cod. Ep. vii.

ad vos a latere nostro nuntium destinare : cæterum nobis erga plurima occupatis desiderium nostrum hucusque dilatatum est. Sane opportunitate habita, unum ex præcipuis Romanæ Ecclesiæ membris, charissimum videlicet et venerabilem fratrem nostrum Ottonem, Tudertinum episcopum, ad partes vestras duximus delegandum, qui vos ex parte nostra plenius visitet, et de statu nostro faciat certiores : si quæ etiam inter vos fuerint pertractanda negotia, sancto cooperante Spiritu, una volissemus vice nostra pertractet. Præsentibus igitur litteris universitatem vestram rogamus, ut eum reverenter suscipere, eique tanquam vicario nostro studeatis assistere et obedire. Hortamur etiam, ne laudabilem fidei vestre constantiam quorundam maliloquia et præstigiola figmenta perturbent, qui utique post concupiscentias suas euntes, altare aliud in Ecclesia Dei erigere, atque in occultis tenebris idolum eruentis manibus fabricare præsumperunt. Quod enim, disponente Deo, circa promotionem nostram factum audistis, non in angulo vel latibulo, sed in luce et in manifesto, ab universo Urbis clero et populo, ex deliberato fratrum consilio, ex communi assensu, et unanimi desiderio celebratum esse noveritis. Nos per Dei gratiam in tota Urbe intus et extra, quæ nostri officii sunt, libertate plenaria operamur. Quæ minus litteris continentur, eidem legato nostro iunximus verbo et scripto plenius referenda. Omnipotens Dominus sua vos benedictione circumtegat, et suo faciat amore ferventes. Datum Romæ apud Sanctum-Petrum, kal. Maii ». Has vero sequuntur istæ ¹ :

34. « Quantam de probitatis tue solertia fiduciam habeamus, quantum te amplioribus benevolentie nostræ brachiis amplexemur, ipse nosti. Promotionis nostræ ordinem jam te credimus accepisse; atque nunc poteris, quæ nobis prospera largitus sit Dominus, indagare. Legatum siquidem nostrum, venerabilem fratrem Ottonem Tudertinum episcopum, unum videlicet ex præcipuis Romanæ Ecclesiæ membris, ad Galliarum partes dirigimus, qui charissimum et gloriosum filium nostrum regem, et teipsum, atque alios fratres nostros et filios visitet, et de statu nostro faciat certiores. Si quæ etiam in partibus istis corrigenda vel confirmanda fuerint, sancto cooperante Spiritu, vice nostra corrigit et confirmet. Ipsum igitur tuæ dilectioni committimus, tuæ potissimum experientie commendamus, rogantes, ut eum pro B. Petri reverentia et dilectione nostra, in omnibus quæ oportere cognoveritis, adjuves et sustentas. Nec solum ei officiose assistas, sed et causæ nostræ curam ipse suscipiens, laboriosum pro nobis sollicitudinis onus collo tu imponere non graveris, sciens quia nos tuæ charitatis obsequiis nunquam experieris ingratos. Obtemperantem monitis nostris fraternitatem tuam Dominus conservare dignetur

incolumem. Datum apud S. Petrum kal. Maii ». Insuper istas eidem legato litteras dedit ¹ :

32. « Et Apostolicæ Sedis auctoritas, et emergentium causarum necessitas nos compellunt, ut fratres nostros circumquaque positos et litteris crebrioribus, et missis a latere nostro nuntiis visitemus : præcipue vero Gallicanum Ecclesiam nostram duximus visitatione dignissimam, quæ inter reliquas Christianitatis Ecclesias nullis unquam cessit erroribus, nulla prorsus potuit schismaticæ pravitate infamia maculari : semper in plena Dei constantia perseverans, Romanæ Ecclesiæ pacem unitatemque tenere, eamque semper studuit magnis obsequiorum exhibitionibus exaltare. Eapropter unum ex præcipuis Romanæ Ecclesiæ membris, charissimum videlicet fratrem Ottonem Tudertinum episcopum in partem nostræ sollicitudinis assistentes (adsciscentes), ad vos duximus delegandum, virum utique sapientem... et religiosum, atque ab ineunte ætate in Romana Ecclesia eruditum; qui Ecclesiam vestram et vos ipsos ex parte nostra visitet, clerum et populum benedicat, vosque plenius de his, quæ nobis per Dei gratiam prospere successerunt, faciat certiores. Cui etiam dedimus in mandatis, ut in partibus vestris Concilia celebrare, ac si qua emergerint negotia, una vobiscum debeat, iustitia mediante, terminare. Rogamus itaque fraternitatem vestram, ut eum reverenter suscipere, et tanquam vicario nostro studeatis assistere et obedire. Nec fidei vestræ constantiam quorundam maliloquia, vel præstigiola figmenta perturbent, qui post concupiscentias suas euntes, altare aliud in Ecclesia Dei erigere, et in tenebris idolum fabricare eruentis manibus præsumperunt. Quod enim circa nos, Domino disponente, factum audistis, non in angulo, vel in latibulo, sed in luce et in manifesto, ex deliberato fratrum consilio, ab universo Urbis clero et in populo celebratum esse noveritis. Nos per Dei gratiam quæ nostri officii sunt, in tota Urbe, intus et extra, libertate plenaria operamur. Quæ minus litteris continentur, idem legatus noster dilectioni vestræ plenius enarrabit. Omnipotens Deus sua vos benedictione circumtegat, suoque semper faciat amore ferventes. Datum apud S. Petrum kalend. Maii ». Audi alias ejusdem argumenti litteras eidem legato datas ² :

33. « Nobiles memorie antecessores tui, sicut viri sapientes et consilio providi, S. R. E. honorare et pro collata a Domino potestate propensius exaltare curarunt, et sicut nos ipsi vidimus et testamur, prædecessoribus nostris nobili devotione servierunt. Inde est quod Sedes Apostolica inter reliquos Galliarum principes ampliori est eos gratia amplexata. Et ideo dilectionem tuam paternis allocuiis visitantes, prudentiam tuam litterarum presentium serie attentius adhortamur, ut nobilium prædecessorum nobilis successor Romanæ Ecclesiæ individua semper charitate cohareas, nec ab

¹ Ex Cod. Cass. Ep. vi.

² Eod. Cod. Ep. viii. — ² Ibid. Ep. xii.

ejus unquam unitate declines. Cui profecto si indefessa fueris devotione prudenter innixus, tuta poteris, præstante Deo, stabilitate regnare. Nos quidem de nobilitate (immobilitate) et fidei tuæ constantia plurimum præsumentes, personam tuam dignis titulis honorare, et honorem tuum paternæ dilectionis affectu omnimodis decrevimus ampliare. De promotione vero nostra, seu de his quæ apud nos acta sunt, venerabilis frater noster præsentium lator Otto Tudertinus episcopus, legatus noster, quem ad partes vestras pro variis negotiis delegavimus, dilectionem tuam faciet certiorum. Ipsum igitur egregiæ probitati tuæ attentius commendantes, rogamus, ut pro amore B. Petri et nostri solita ei liberalitate concurrere, et tuis cum debeas solatiis confovere : quatenus et injunctum sibi mandatum, cooperante Deo, per industriæ tuæ solitum efficaciter exequi valeat, et tuam nos in eo valeamus diligentiam experiri. Datum Romæ apud S. Petrum, kalend. Maii ». Insuper vide ex sequentibus litteris, quam egregie imitetur sanctos in dicendo Pontifices pseudopontifex Anacletus ¹ :

34. « Quod tibi de statu nostro et Romanæ Ecclesiæ tardius scripsimus, frater mi charissime, ne mireris, quoniam et nos gravis de suscepti inopinata cura regiminis molestia occupavit. In tanta bestiarum frementium silva diversis fluctibus pressi, asperis sumus ventorum turbinibus agitati. Tanta quippe me occupationum onera depriment, tantum casuarum flagris illidor, tantis tumultuosæ vite tempestatibus attligor, ut meus me nullatenus ad superna se erigat, et ego recte clamare compellar ² : Veni in altitudinem maris, et tempestas demersit me. Considero namque qui sum et infirmitatem meam plane considerans ad Apostolicæ Sedis cultmen propriis meritis non posse pertingere, onus hoc malui declinare, ne in pastoralis regimine impari administrationis actionibus succumberem. Sed quia Dei disponentis arbitrio contraire non est, obedienter secutus sum, quod misericors de me Omnipotentis manus voluerit operari. Cum ergo Ecclesiæ consuetudo posceret, et beatitudinis tuæ dilectio nos incitaret, curavimus non solum scriptis fraternitati tuæ charitatis et amicitie vota persolvere, sed etiam de promotione nostra, quod desiderabile tibi fuisse credimus, per latorem presentium venerabilem fratrem nostrum Ottonem Tudertinum episcopum, a domino sancto predecessore nostro Paschali papa ordinatum, indicare. Ipse quidem et de his quæ apud nos acta sunt, seu de statu urbis et Ecclesiæ, quanto plenius novit, tanto experientie tuæ poterit verius enarrare. Sane de electione nostra quæ a fratribus nostris cardinalibus, presbyteris, diaconibus et subdiaconibus quoque, et primicerio, et omni schola palatii, ac cuncto clero Romano, expetente omni populo, consentientibus juxta tenorem canonum honoratis, est unanimi voto et concordia moderatione peracta,

ad notitiam tuam multorum relationibus pervenisse jam credimus. Qualiter autem consecratio nostra per venerabilem fratrem Petrum Portuensem episcopum cum diversarum regionum episcopis ad altare B. Petri sit solemniiter celebrata : quomodo enim (etiam) per viam sacram phrygio capiti nostro, prædecessorum nostrorum more, imposito, ad Lateranense palatium venerimus, forsitan non ignoras. Quocirca de suavissimæ beatitudinis tuæ fide et constantiæ impensius præsumentes, te impensius exoramus, ut piis precum tuarum suffragiis apud omnipotentem Deum nobis concurrere, et pro Romana debeas Ecclesiæ consueta instantia vigilare. Qualiter autem debeamus de fraternitatis tuæ charitate præsumere, ex mentis nostræ, quam circa te habemus, qualitate colligimus. Nec te taliter personam nostram, et Apostolicam Sedem diligere, quam ipsi vos diligimus, arbitramur. Datum Romæ apud Sanctum-Petrum kal. Maii ». Haecenus litteræ Ottoni legato ab Anacleto datæ.

35. *Anacleti litteræ frustra ad se Cluniacenses allicientes.* — Præter hunc autem, eodem ipso die, alium legatum decrevit in Gallias idem Anacletus pseudopapa, nempe Gregorium diaconum cardinalem in provinciam Aquitanie, scripsitque officiosissimas litteras ad suos Cluniacenses, penes quos olim ipse adolescens vitam monasticam exerceverat : probe sciens magni ponderis esse, si ad suam communicationem eodem pertraheret Cluniacenses, qui magna æstimatione florebant in Galliis. Litteræ autem ad eos datæ sic se habent ¹ :

« Conversionis mee primordia reducens ad animum, multum me Cluniacensi monasterio invenio debitorem ; propterea quod in eo et monasticum habitum, et conversandi sumpsî, divinæ potentie gratia protegente, principium. Cui licet in omnibus, quæ mihi pleno charitatis ubere pia devotione impendit, æqua redhibitione nequeam respondere, meipsum tamen ei, quod possum, fidelissima servitute substerno. Et ideo de statu nostro, seu de his quæ penes nos, Dei nos respiciente clementia, prospere acta sunt vel aguntur, sanctæ dilectioni vestræ dignum duximus, missis ad vos litteris, infirmare. Decedente siquidem de hac vita domino prædecessore nostro pie memoriæ papa Honorio, cardinales Ecclesiæ Romanæ presbyteri, et diacones, et subdiacones, primicerius cum omni schola et ordinibus palatii, iudices et scriniarii, et clerus omnis Romanus, expetente omni populo, cum honoratorum devotissimorum assensu, in titulo B. Marci me licet indignum in papam Anacletum unanimiter elegerunt, et electum in Ecclesia B. Petri patroni nostri venerabilis frater noster Petrus Portuensis episcopus cum diversarum regionum episcopis celeberrime consecravit.

« Verum quidam falsi fratres, filii Belial, filii

¹ Eod. Cod. Ep. XIII. — ² Psal. LXXVIII.

¹ Eod. Cod. Ep. 1.

pestilentiae, filii Agar¹, sapientiam, quæ de terra est exquirentes, inebriati calice iræ Dei omnipotentis, Dei dispositioni et constitutioni Ecclesiasticæ, ausu improbo visi sunt contraire. Quorum caput est Haimericus quondam cancellarius, avaritiz servus, histrionum et scurrarum delirus incensor, Ecclesiarum expoliator (expilator), servorum Dei improbus exactor, alter Giezi, qui simoniis publicis et privatis lepram Naaman², et maledictionem Dei hæreditario est jure sortitus. Huic Joannes de Crema, homo miserabilis et vere Nicolaïta et inter biathanatos aliquando per papam Honorium et cardinales damnatus, promissionibus vanis inductus, alludit. De Petro cardinali Sanctæ-Anastasie, quod thesauri Cluniacensis assuetis tergiversationibus insatiabilis extitit prælo, et Gozelmo Sanctæ-Ceciliæ silere dignius duximus, quam de eis et de eorum turpissima servitute vobis scribere. Ii Haimerici quadra vivebant, et sicut celebre est apud nos, juramento astricti, iniquitatis suæ caput per omnia sequuntur³. De quibusdam pseudoepiscopis, quos factionis suæ complices prædictus induxit, nullus nobis sermo, nulla nobis cura est, cum nihil ad eos de Romani Pontificis electione pertineat. Porro quia per Dei gratiam omnia nobis prospera sunt, nos in aliquo ledere non valent, maledicta congeminant. Latrant in nos canes impudentissimi, et ore vipereo detrahunt, et fotentem erupulam eructantes, in Dei Ecclesia de sua pessima conscientia multa ore fetidissimo evomunt. Posuerunt quippe juxta impiorum testimonium mendacium spem suam, obtenebratos habentes oculos, nescientes quod iniquitatem in excelso loquantur, et ponant in cælum os suum, ut lingua eorum transeat super terram. Nec mirum, si ab eis cum Dei Ecclesia blasphememur, cum patrem-familias dominum Beelzebub vocaverant patres eorum⁴.

36. « Quocirca, fratres in Christo charissimi, paterno vos alloquio salutantes, dilectionem vestram in Domino commonemus, ut eorum præstigia, si forte vobis arriserint, devitantes, Romanæ Ecclesiæ unitatem constantissime teneatis. Hinc fratres illi, de quibus scripsimus, quod Dei Ecclesiam scindere, et altare anathematis, vel maledictionis titulum sunt fabricare moliti, sancti Spiritus et proprio sunt judicio condemnati. Convenientibus namque fratribus nostris cum omni clero Romano, cum torque quaterque vocati, aut rationem ponere, aut satisfacere concompissent, ab Ecclesiæ gremio digno sunt anathemate resecati. Tradidimus eos satanæ, ut discant non blasphemare. Illorum versutias et præstigiola figmenta quia longum est scribere, lateri præsentium Gregorio, Sedis nostræ diacono cardinali, communissimis indaganda. Rogamus itaque sanctitatem vestram, ut illam quam circa me dile-

ctionem in minoris ordinis administratione visistis exhibere, nunc in Apostolicæ Sedis regimine constituto subtrahere non debeatis. Considerans siquidem infirmitatem meam ad Apostolicæ Sedis culmen non posse sufficere, onus hoc declinare malueram, ne in pastoralis regimine imparis administrationis actione succumberem. Sed quia contraire non est disponentis Dei arbitrio, obedienter secutus sum, quod misericors de me Omnipotentis manus voluerit operari. Domini et principes nostri Petrus et Paulus, quibus in loco sancto assidue deservitis, vobis pro nobis orantibus gaudia æternæ felicitatis obtineant. Datum Romæ apud S. Petrum, kal. Maii ».

37. Sed quam vanus fuerit ejus conatus, Epistola Petri abbatis Cluniacensis ad Haimericum cancellarium ostendit¹, in qua ista leguntur tanquam ab aliis exprobrata : « Ecce, Cluniacenses, habete papam vestrum, (Innocentium scilicet), quem vobis, spreto monacho vestro, elegistis. Talem spem talis digne sequitur merces ». Idemque Petrus de studio suo, suorumque erga eundem Innocentium hæc habet in Epistola ad ipsum data² : « Habetis cum tota Ecclesia vobis a Deo commissa, et me in membris Christi ultimum, vestrumque pariter Cluniacum : qui quamdiu fuerit spiritus in naribus nostris, ad obediendum, ad collaborandum, fortassis etiam ad commoriendum parati erimus. Nulla certe mutabilium rerum permutatio nos mutare, nulla varietas variare, nihil nos a pastore, nihil a Petro, nihil a Christo (quæ omnia in te uno habemus) separare poterit. Sic ubicunque occurrerit, habitatio vestra, manebit ubique vobiscum obedientia et devotio nostra. Quoniam et secundum poetam :

..... Viciis habitante Camillo, illic Roma fuit.

Et Petrus in carcere, Clemens in exilio, Marcellus in catabulo, non minus quam Laterani, Ecclesiæ præfuerunt : et oves Christi eis, ut veris pastoribus obediunt. Recordamini Ecclesiam semper laboribus crevisse, passionibus multiplicatam esse, tolerantia cuncta resistentia evicisse etc. » Hæc Petrus de se suisque Cluniacensibus, quos semper stetit pro Innocentio adversus Auacletum, etiam sanctus Bernardus affirmat³, dum sic numerat ordines monachorum communicantes cum Innocentio : « Itaque Camaldulenses, Vallumbrosani, Carthusienses, Cluniacenses, et qui de majori monasterio sunt, mei quoque Cistercienses, Castemblenses, Cadumenses, Tironenses et Saviniacenses, universitas denique et unanimitas fratrum tam clericorum quam monachorum regularis vitæ, probatæque conversationis, sequentes episcopos tanquam greges pastores suos. Innocentio firmiter adherent, sincere favent, humiliter parent, verum Apostolo-

¹ Baruc. III. — ² 4. Reg. v. — ³ Petr. Clun. I. III. Ep. XXXIV. — ⁴ Matth. x.

¹ Petr. Clun. I. III. Ep. XXXIV. — ² Ibid. Ep. I. — ³ Bern. Ep. CXXVI.

rum successorem fideliter recognoscunt». Hæc sanctus Bernardus. Porro iudicium Cluniacensium tanquam præproperum accusabatur a Reimbardo Ecclesie Leodiensis antistite, cum de his concertatio esset exorta occasione funeris Hervei abbatis, ubi qui favebant Innocentio, propellebant qui sequebantur Anacletum, et e contra isti illos procul rejiciebant. Qua occasione, scribenda fuit ab eodem Reimbardo ejuscemodi circularis admonitio, quæ sic se habet:

38. *Reimbaldi episcopi Leodiensis admonitio circa Ecclesie Romanæ statum.* — « In schismate, quo sub Anacleto et Innocentio non modo universalis, sed et universa laborabat et mutabat Ecclesia (ut mos est Francigenis) a superioribus illis partibus Leodium rotulus allatus est, quo significabatur de recenti abbatis ejusdem obitu Hervei, et de orationibus quas petebant, quorum intererat, pro eo fieri. Nostri Leodienses quisque quod sibi videbatur, apposuerunt ad rotulum. Ego vero Reimbaldus, perfecto ac perspecto tenore illius, funem illum, ut aiunt, fors non incongruis, sed et pernecessariis produxi non restibus, sed piis admodum his ac fraternis admonitionibus:

« Quisquis ille est minimus majoris Ecclesie, quæ est in Leodio, fidelibus universis, ad quos rotulus iste pervenerit, non præcipitare iudicium, sed sic quasi currum, diligenter iudicii sustinere impetum. Sic docet in Evangelio Dominus¹: Nolite iudicare. Et Apostolus²: Nolite ante tempus iudicare. Exponit Apostolus quod quasi sub velamine posuerat Dominus. Docuerat Dominus non iudicandum, suadet Apostolus non quidem non iudicandum, sed ante tempus non iudicandum. Ante tempus iudicat qui præcipiti quadam et temeraria voluntate de re iudicat, priusquam de re comperitum habeat.

« Ab hoc devocat Dominus, ab hoc dissuadet Apostolus. Nequaquam igitur debet sequi, quod nequeat quispiam assequi. Sequitur plerumque, nec assequitur, qui fidem rumoribus adhibet, et apud quem plus opinio, quam rerum experientia obtinet. Quod in his nimirum nunc est evidens, qui cum, ut aiunt, adhuc his sit sub iudice, quasi finitivam jam dederunt sententiam, qui potissimum, unius corporis quasi duobus capitibus in Romana Ecclesia dissidentibus, debeant obedientiam. Sicque, prohi dolor! inconsultem Christi scindunt tunicam, dum quæ una est, in partes, quod in ipsis est, sibi dividunt Ecclesiam. Hoc quasi dicere est³: Ego sum Pauli, ego Apollo, ego vero Cephæ. Amplectitur enim hic Anacletum, ille Innocentium, et ante examen negotii dant iudicium non minus temerarium, quam præproperum. Frustra igitur, ut diximus, in huiusmodi sequitur qui non assequitur, nisi forte recte sequi non dicitur, qui rei non inheret, qui palpat in tenebris, quem opinio lallit, quem rumor decipit. Et tamen

audi quomodo mordeant, quomodo adinvicem sese consumant. Qui Anacletianus est, quasi quodam damnaterum eum inurens cauterio, Innocentianum eum vocat qui partis est contrarie; et e converso, qui Innocentianus est, Anacletianum eum qui partis est oppositæ. Sors misera! Ecce unius corporis quasi duæ acies inter se dimicantes. Miserum est, si schisma hoc efficit ignorantia: miserius an crudelius sit nescimus, si efficit invidia. Cæterum interim de invidia taceamus, ignorantia hic in causa est: quæ quidem quodammodo tolerabilis esset, nisi temeritati commixta, ante tempus ad iudicium prorueret. Hæc est, quæ Cluniacenses ipsos, tam sacrum aliquando, tam solemnem, tam undique oculatum conventum non præterit, sed et per seipsos non modo Occidentalem Ecclesiam infecit, verum etiam Orientalem janjamque inficit: et ut de fortuna legitur quæ cæca depingitur, non solum ipsa cæca est, sed et cæcos reddit quos amplectitur. Audi quomodo Engolismensis Gerardus cardinalis Romanus, et ut audivimus, legatus in Aquitaniam, Northmanniam, Britanniam, Hispaniam, et usque in ultimam Celtiberiam, tante auctoritatis, tante, ut opinantur, sanctitatis vir hoc in rotulo (qua ratione, qua competetia, ipse viderit) ordinem promotionis, et ordinationis horum duorum Apostolicorum diligenter, ut aiunt, digessit, et quia per seipsum manifeste non potuit, hoc saltem involuero, quid in Romana actum sit Ecclesia, circumquaque notum fieri voluit: nescio quid senserint, quid intenderint Cluniacenses.

39. « Id præciderunt, id amputaverunt penitus, et quidquid illud fuit, nec probaverunt, nec improbaverunt, sed domno papæ Innocentio legendum transmiserunt. Si, quod absit, industria vel forte ignorantia verum ille turbaverat, prius super hoc admonendus, arguendus et emendandus erat, nec debuerat huiusmodi inimica sugillare delatio, sed fraterna emendare ac supportare dilectio. Quod si tale illud fuit, ut tolerari nullatenus, vel inultum præteriri posset: cur cæteris S. R. E. filiis hoc absconderunt, ac non potius cum B. Moysè¹, quasi in ultionem vituli conflatis, exerts et districtis verbi Dei gladiis de porta ad portam, de Ecclesia videlicet ad Ecclesiam transeuntes inclamaverunt: Qui Domini est, jungatur nobis? Solius sibi hanc affectaverunt gratiam? si tamen hinc gratiam meruerunt, quod nullam reddiderunt vicissitudinem ei qui forte manum miserat in Christum Domini? quin consensisse visi sunt, dum ad blasphemiam illius velut cingens ipsi extiterunt. Annon audierant non carere eum scrupulo societatis occultæ, qui manifesto facinori non desinit obviare, et quia occurreret veritas, si falsitas displiceret? Sed sancte hinc simplicitati nil sicut delatio placuit; nec quidquam pro ipso vel loqui voluit, pro quo si ita necesse esset, usque ad sanguinem restitisse debuit. O laudabile monachorum silentium, falsa

¹ Luc. vi. — ² 1. Cor. iv. — ³ Ibid. l.

¹ Exod. xxxii.

omnino non refellere, nec qui refellant secum zelo veritatis adsciscere! Quid erat in causa? inscitia, an invidia? Si lecto ac perfecto tenore litterarum Engolismensis, simplicitate, ut ita dictum sit, monachali non comprehenderunt quid intenderet, nec de re incerta certam potuerunt dare sententiam: non tamen omnes nos sic ex se judicare debuerant. Sunt enim multi, gratias Deo, in nobis, qui sciant quid sit inter dexteram et sinistram, qui quemadmodum decipere nolunt, sic et decipi nequeunt, et qui bonam quidem et non cauteriatam habentes conscientiam, quod sentiunt ingenue eloqui non metuunt: et potest adhuc per gratiam Dei inveniri in nobis, quod Scriptura divina dicit: Reliqui adhuc mihi septem millia virorum, qui non curvaverunt genu ante Baal. Auderemus igitur, nec confiteri erubesceremus, si esset hoc canonicum et authenticum, quod ab Engolismensi ad Cluniacenses usque de Anacleto pervenit. Sin autem, quod corporis Christi et Ecclesie est, membra omnia capiti nostro Innocentio compateremur, et tam in fautorem quam in auctorem sceleris et invasionis, velut in adulterum lapidem legis, verbum videlicet offensionis, et contradictionis unanimiter jacularemur. Sola, sola ignorantia est, quæ nos de rei tantæ judicio reticere coegit ne ante tempus factum judicium et dicatur, et vere sit temerarium. Qui sic nos cohilemus, præceptum in hoc exequimur et Dominicum et Apostolicum. Qui aliter et judicant, et ante tempus judicant, et nullam in hoc Domino, vel Apostolo exhibentes reverentiam, quod temerarium est, de re incerta quasi certam dant sententiam.

40. Vide, quæso, quante sit hoc præsumptionis et audaciæ. Qui partis est Anacletianæ, Innocentiano non communicat, et simul cum ipso non orandum, velut cum schismatico judicat. E contra Innocentianus Anacletianum insectatur, et ei, si potest, talionem multiplicat. Hæc, heu! confusione, hoc errore jam pene tota Ecclesia, quasi frenesi quadam circumfertur ac vertigine, in tantum, ut cum orant, religione, imo religioni finitima superstitione, nec loco alius alium vult admittere. Hinc est, quod, ut videre potes hoc in rotulo, cum forte quispiam orat pro patre Hervey, si Anacletianus is est, Innocentianus cum eo orandum non judicat: si Innocentianus, idem de eo Anacletianus æstimat, et quicumque orat cum alterutro, alteruter eum orare dicit cum schismatico. Cæterum nos, charissimi, sic sentimus, sic judicamus, ut quisquis pie, devote ac fideliter oravit, cum schismatico non oraverit; etiam si eadem forte verba cum ipso schismatico protulit. Oremus ergo, et indubitanter oremus pro patre hoc Hervey et si quis forte nuptialem non habens vestem, quasi convivio nostri patrisfamilias pro parte hac nobiscum temere se ingesserit, qui fidelis est, qui castum cor, qui lotam vestem, qui mundam habet

conscientiam, non tamen propter illius præsentiam ipse ad quod vocatus est intermiserit. Nec enim legimus propter eum, qui indecenter se ingesserat, cæteros omnes indumentis nuptialibus ornatos a convivio illius Evangelici patrisfamilias ejectos; imo retentis cæteris, solum illum tandem missum esse in tenebras exteriores, et hoc, non nisi solius indicio et judicio, qui solus nosset, quis vel quid huic suo congrueret, vel non congrueret convivio. Et quis is erat, nisi ille de quo scriptum est, quia¹: Pater omne judicium dedit Filio; et qui per seipsum: Nolite², inquit, judicare: et de quo Apostolus³: Nolite ante tempus judicare, quoadusque veniat Dominus? Ut ergo unde orsa est, inde et desinat oratio, hoc, charissimi, exemplo, hoc magisterio rursum vos admonitos esse volumus de non præcipitando judicio, ut quod agitis, vel huic non causetur temerarium, si quod adsit, fuerit extraordinarium. Hæc Reimbaldus; quod antiquitatis monumentum in Vaticana Bibliotheca asservatur. Sed revertamur ad studia Anacleti, quibus suam intrusionem cogebatur reddere legitimam electionem.

41. *Legatio ab Anacleto data Gerardo episcopo Engolismensi, cujus ambitionem S. Bernardus perstringit.* — Inter alia autem, dedit eidem Gregorio legato a latere misso Anacletus pseudopapa ad diversos Epistolæ, quæ absque titulo leguntur in eodem Codice Cassinensi. At quod perbreves ille sint, quæ de instituto ab eo Gerardo episcopo Engolismensi legato vicario in Aquitania tractent, qui et Concilium cogere debeat, hic eas pariter describendas esse putamus. Sic se habent primæ ad universam Aquitanicæ Ecclesiam:

« Diuturna prædecessorum nostrorum consuetudo, et negotia nuper emergentia nos compellunt, ut legatum ex latere nostro ad vos dirigere debeamus, dilectumque filium nostrum Gregorium, cardinalem diaconum, in partes Aquitanicæ mittentes, ut solita cum pietate pro B. Petri, et nostra reverentia benigne suscipialis, eique quo ordine nos Dominus Apostolicæ Sedi præesse voluit, ac de scandalo, quod a paucissimis in Romana Ecclesia factum audistis, aures vestras sine hesitatione præbeatis. Eiusdem nimirum fidem sacrosancta Romana Ecclesia probatam habet, neque aliud vobis enarrabit, præter id quod veritas docet. Præterea universali vestræ significamus, quod pro morum honestate, prudentiæque efficacia, sicut beate recordationis papa Paschalis nutritor noster, et post eum alii antecessores nostri Romani Pontifices fecerunt, venerabilem fratrem nostrum Gerardum Engolismensem episcopum per vestras provincias ei cooperante Apostolicæ Sedis liberalitate in partem sollicitudinis vestræ vocavimus. Per præsentia igitur vobis scripta mandamus, ut eidem fratri nostro, tanquam Apostolicæ Sedis legato, debitam curetis reverentiam exhibere. Nos

¹ 3. Reg. XIX.

¹ Joan. v. — ² Luc. VI. — ³ 1. Cor. IV.

enim ei ut dilecto filio nostro dedimus in mandatis, ut convocato fratrum collegio, sanctique Spiritus gratia invocata, corrigenda corrigant, et quæ digna fuerint confirmatione corroborent. Datum Romæ apud Sanctum-Petrum kal. Maii ». Ad eundem vero Gerardum episcopum Engolismensem has Anacletus litteras dedit¹:

42. « Pro tua probitate, quam sancta mater Romana Ecclesia longo jam tempore expertam habuit, tanquam charissimum suum præcipuum filium dilexit, et specialius honoravit, dominus quidem et nutritor noster papa Paschalis, et alii post eum Romani Pontifices ob insignia virtutum tuarum suas tibi commiserunt vices in Aquitanie partibus peragendas. Nos igitur dilectionis præteritæ ac sollicitudinis memores, quibus semper matrem tuam Romanam Ecclesiam dilexisti, et propensius adjuvisti, legationem Apostolicæ Sedis liberalitate a prædecessoribus nostris tibi concessam, nos quoque concedimus: et sicut illorum habuisse cognosceris, ita et nostras habere te vices deinceps volumus, et gratis plenoque charitatis intuitu confirmamus. Ad hujus autem nostræ concessionis firmamentum dilectum filium nostrum Gregorium diaconem cardinalem misimus, quem in partibus illis aliquantisper volumus conversari. Tuæ itaque fraternitati mandamus, ut cum eodem filio nostro Concilium studeat convocare, in quo, charitate media confidentes, communicato fratrum consilio, sanctique Spiritus gratia cooperante, corrigenda corrigat, et quæ confirmatione digna sunt confirmet. Per ipsum etiam de promotione nostra, seu de scandalo quod in Romana Ecclesia factum audisti, te reddimus certiores; quatenus dilectio tua et mendacium omne respuere, et veritatis testimonio indubitanter valeat adherere. Datum Romæ apud Sanctum-Petrum kal. Maii ». De eadem legatione Gerardi in Aquitania sub Paschali, meminit Willelmus Malmesburiensis in rebus gestis regni Anglorum. Hæc de legatione credita ab antipapa episcopo Engolismensi. Sed qua occasione, sic accipe ex sancto Bernardo², qui de eo abunde agit in Epistola ad episcopos Aquitanie istis verbis:

43. « Ut enim simplicem referam breviter actionem, primus, aut inter primos *idem episcopus Engolismensis* scribit papæ Innocentio, legationem postulat, non obtinet. Indignatur, resilit ab illo, transit ad alium, ipsius se esse legatum gloriatur. Quod si ab illo ante non poposcisset, aut postmodum non accepisset ab isto, credi poterat, alium quemcumque habuisse in prævaricatione intulitum, etsi non rectum aliquem: nunc autem excusationem non habet de ambitione sua. Denique ponat etiam nunc legati vel vacuum nomen, nam opus amisit: et ego quidem hæc suspicione carebo, si potero: si non suspicabor invitus, et me intemperantiæ reprehendam. Verum difficile persuadebitur ei: ego scio. Nimirum homo diu ma-

gnus habilis inter suos, videri seipso inferior erubescit. Agnoscitur is quem Scriptura loquitur³, pudor adducens peccatum. Annon grande peccatum et delictum maximum superba ista verecundia, qua terram et cinerem pudet non dico subijci, sed non dominari? Propter hoc ergo reliquit homo illum suum patrem sanctum Innocentium (sic enim eum nominabat) et matrem suam sanctam Ecclesiam Catholicam, et adheret schismatiarchæ suo, et sunt duo in vanitate una. Percusserunt fœdus ad invicem, et super populum Dei malignaverunt consilium⁴. Spuma squamæ conjungitur, et spiraculum non est in eis⁵. Iste illum papam, ille hunc vicissim legatum scripserat, ut decipiant ipsi de vanitate in idipsum. Invicem se consolantur, luentur, commendant, quisque tamen pro se, non pro invicem: nimirum homines sunt seipsos amantes. Pari quidem studio conveniunt in unum adversus Dominum et adversus Christum ejus⁶ etc. » Quanto autem fastu et arrogantia abuteretur iste credita sibi ab antipapa legatione, ita mox dicere pergit:

44. « Quid nisi ante oculos vestros conantur, si patimini, proscribere Christum? Jam novos apud vos suo papæ eudit legatus episcopos, ne soli sit sibi papa. Nec mortuis successores, sed vivos invasores tyrannica fretus potentia superintrudit, nactus scilicet de malitia principum occasionem, qui suarum civitatum episcopos odio persequuntur iniquo. Sic sedet in insidiis cum divitibus in occultis, ut interficiat innocentes; per tale ostium intrat in ovile ovium. Numquid autem talia gratis legatus acclit pro papa suo? En ille totam (ut is gloriatur) Franciam atque Burgundiam legationis ejus antiquæ superaddidit. Potest et adjungere si vult, Medos et Persas, et medios fines Decapoleos. Quare non et ultra Sauro-matas, et quemcumque quævis locum calcaverit pes suus, si, quo vel vacuis nominibus gloriatur? O homo non minus sine fronte quam sine mente, nec Dei memor timoris, nec suæ honestatis. Putat se non videri, cum sit subsannatio et illusio omnibus qui in circuitu ejus sunt. Merito quidem. Certe enim pro foro sacrario utitur, et instar hominis negotiatoris queritantis lucra sua, et modo hunc, modo illum explorantis venditorem, ut ab illo demum emat quod amat, a quo vilis impetrare valuerit: ita iste sollicite sibi Ecclesiasticam dignitatem hinc inde perquirens eum tandem pro suo arbitrio delegit habere papam qui se legatum esse consenserit. Ergo nisi tu legatus fueris, Roma papam habere non poterit? Unde hoc tibi privilegium in Ecclesia Dei? Quisnam tibi hanc concessit in Christi hereditate prærogativam? Numquid tu hereditate possides sanctuarium Dei? Donec enim in obtinenda pudenda et impudenti petitione spes tibi ulla promerendi domini Innocentii gratiam esse potuit, sanctus ille, te scribente, et papa fuit.

¹ Eod. Cod. Ep. III. — ² Bern. Ep. CXXVI.

³ Eccl. IV. — ⁴ Psal. LXXXII. — ⁵ Job. XLI. — ⁶ Psal. II.

Quomodo ergo nunc schismaticum criminaris? Numquid cum eadem vana spe tua illius simul et sanctitas evanuit et papatus? Mirum quod potuisti in brevi dulce et amarum ex eodem fonte procedere. Heri Catholicus et sanctus, et summus Pontifex: hodie nequam, schismaticus et turbator. Heri pater Innocentius; hodie Gregorius diaconus Sancti-Angeli. Ita uno quidem ex ore, sed corde profecto duplici contraria processere. Labia dolosa in corde et corde locuti sunt. Et postquam pluribus insecutus est ambitiosum hominem, et cum eo ambitiosos omnes; hæc in eum de his quæ spectant ad ejus legationem:

43. «Cæterum quænam ista præceps est et frontosa libido dominandi, ut pro obtentu vix annuæ (quod certe palam est) legationis, primo quidem suo nec parcat senio, nec deterat sacerdotio; deinde nec lateri Salvatoris, quod in aqua et sanguine colligendi in fidei unitate populi prolulil redemptionem; ut quisquis tentaret dividere quos ille colligeret et inde redimeret, probaret se non Christianum, sed antichristum, reum mortis et Crucis Christi? O impatientis et effrenis turpis quæstus cupiditas! o ardor inlempens! o cæca et pudenda ambitio! Aperte prius frontoseque, ut jam dixi, et ipse, probi pudor! non diffilietur, ad id indigna satis petitione tentare Catholicum; dolensque repulsam, incunctanter ad schismaticum refugit, et accepta de manu sacrilega male capita polestale, latus denuo Domini gloriæ crudeliter confodere non veretur. Et inferius: «Audet (quod et ille dico) inimicus Crucis Christi suis sedibus pellere sanctos¹, qui nolunt bestiam adorare, quæ aperuit os suum in blasphemias, blasphemare nomen Domini, et tabernaculum ejus. Altare contra altare erigere tentat, confundere fasque nefasque non confunditur; abbates abbatibus, episcopos episcopis superintrudere nititur, amovere Catholicos, promovere schismaticos. Miseri et miserandi, qui ita promoveri et ab isto consentiant. Siquidem circuit mare et ardam, ut faciat unum episcopum; et cum fecerit, facit eum filium gehennæ duplo quam se». Hæc et alia de homine perditissimo. Insuper etiam de eo idem sanctus Bernardus ad Hildebertum episcopum Turonensem²: «A finibus terre occurritur cum panibus fugienti, (Innocentio papæ scilicet), etsi furor Semel, Gerardi Engolismensis, nondum ex toto quiescat maledicere David. Vefit nolit peccator qui videt et irascitur, magnificatur in conspectu regum, portans coronam gloriæ». Hæc ipse.

46. *Matthæus cardinalis legatus Innocentii papæ*.—Audisti, lector, pseudoapostolum a pseudo-papa in Galliam missum: audi modo Apostolum ab Apostolico papa in Gallias pariter legatum missum. Fuit iste Matthæus episcopus Albanensis, ab Honorio ob admirabilem ejus vitæ sanctitatem creatus ex Cluniacensi monacho episcopus Alba-

nensis, cujus res præclare gestas Petrus¹, ejusdem monasterii Cluniacensis abbas, exacte descripsit, et quod ad hæc spectat, sic ait²: «Tolam (excepta parte Aquitanie) Galliam, Hispaniam, Angliam, Germaniam, sibi, imo Christo, studio præcipue Matthæi, papa (Innocentius) jam dictus univit, in quibus partibus diu Matthæus cum ipso commoratus, etc.» Ul plane ex qualitate ministrorum, cuinam faveret justitia, posset quisquis facile intelligere. Nam Matthæus quidem sanctissimus, Gerardus nequissimus. De quo S. Bernardus in Epistola ad Gaufridum ait³: «Allera quoque bestia juxta vos sibilat, sicut catulus habitans in abditiis: illa ferocior, ista callidior pariter conveniunt in unum adversus Dominum, et adversus Christum ejus». Sed de interitu bestie hujus (Gerardi scilicet), dicendum suo loco. Nunc redeamus ad Anacleum adhuc Orientales litteris et legationibus pertentantem.

47. *Anacleti antipapæ litteræ ad Orientales*.—Idem quippe Anacletus eodem argumento litteras de sua promotione dedit ad Orientales, ad ipsum in primis Constantinopolitanum imperatorem legatum mittens: quæ etsi non extent, de iis tamen mentio habetur in Epistola ad episcopum Drivestinum his verbis conscripta⁴:

«Suscepti officii ratio nos hortatur, ut ordinationis nostræ primordia et his qui prope et his qui longe sunt fratribus intimemus. Noverit illaque fraternitas tua, quoniam defuncto antecessore nostro papa Honorio, fratres nostri cardinales S. R. E. presbyteri et diacones, cum universo Urbis clero et populo, communi voto et desiderio ad summum nos Pontificatus apicem elegerunt, et electum fratres nostri episcopi Romanæ Ecclesiæ suffraganei ante sanctissimum B. Apostoli Petri corpus celeberrime consecraverunt. Cæterum labores tui et persecutiones, quæ tibi a Barbaris inferuntur quemadmodum graves sunt⁵, ulpote qui et communi charitatis debito, et Apostolicæ Sedis administratione compellimur, ut fratrum omnium passionibus compati, et eorum afflictionibus attentius subvenire debeamus. Bolemus autem, quia hæc quæ pateris, nolis ante hos dies cognita non fecisti, sicut (nam si) ea maturius audissemus, per legatum nostrum, quem ad charissimum filium nostrum imperatorem direximus, pro quiete et subventionem libentius scripsissemus. Hortalur autem dilectionem tuam, ut patienter omnia sufferas, in patientia tua illatas tibi oppressiones æquanimiter tolères. Quatenus beatitudinem illam percipere merearis, quam patientibus persecutionem propter justitiam Dominus pollicetur. Nec unquam persecutio quolibet vel oppressio adeo te perturbet, ut sponsam tuam, Drivestinam videlicet Ecclesiam, deseras, aut ab antiqua Patrum lege ac traditione aliquo modo recedas. Nos autem frater-

¹ Apoc. xiv. — ² Bern. Ep. cxiv.

³ Petr. Clun. l. ii Mirac. c. 14. et seq. — ⁴ Ibid. c. 16. — ⁵ Bern. Ep. cxv. — ⁶ Eod. Cod. Cass. Ep. xiv. — ⁷ Locus corruptus.

nitati tuæ non deerimus quando debita et opportuna tibi tuæque Ecclesie subsidia impendamus. Datum Romæ apud Sanctum-Petrum kal. Maii ». Porro quem imperatorem nominat, non alium quam Orientalem esse, necesse est affirmare, eo quod ipsum Occidentale adhuc vacaret imperium.

48. Sed ad Hierosolymorum regem æque cum litteris nuntium misisse, fragmentum Epistolæ, quod superest, satis ostendit. Nam habet ista :

« Ex quo civitas sancta Hierusalem, et gloriosissimus Dominicæ sepulture locus, Dei nutu Christianis est redditus, ad ejus defensionis tutelam Romana Ecclesia omnimodis laborare non destitit. Quocirca nos, qui in Apostolicæ Sedis specula, divina sumus dispositione promoti, prædecessorum nostrorum Romanorum Pontificum vestigia subsequentes, lamosam illam civitatem Hierusalem, et loca illa ubi steterunt pedes ejus, debita reverentia venerantes, quibus modis per Dei omnipotentis gratiam possumus, exaltare ac nimium honorare decrevimus etc. » Insuper ibi. Gloriatu est autem ipse in Epistola inferius recitata, scripta adversus Rhemensem archiepiscopum, se omnium Orientalium patriarcharum obedientiam consecutum, atque eos habere communicatione conjunctos : sed quam mendaciter ista jactarit, inferius suo loco patebit. Illud namque certum et exploratum, regem Hierosolymorum Innocentium cognovisse revera Catholicum Ecclesie Romanæ Pontificem. Testatur id quidem sanctus Bernardus in Epistola ad Gaufridum, ubi numerans reges Innocentio inhaerentes, hæc ait ¹ : « Alemania, Francie, Angliæ, Scotiæ, Hispaniarum, et Hierosolymorum reges, cum universo clero et populis favent, et adherent domino Innocentio, tanquam filii patri, tanquam capiti membra, solliciti servare unitatem spiritus in vinculo pacis ». Hæc sanctus Bernardus.

49. *Anacleti insignia pietatis et munificentie monumenta ad sibi animos conciliandos.* — Sed ejusdem pseudopontificis reliqua pro confirmanda sibi Pontificia Sede studia, ab eo omni solertia excogitata, in medium afferamus. Pravorum etenim hominum novisse facta, ad prudeniam capessendam adjumentum hand minimum solet afferre. Qui igitur legationibus et litteris usquequoque Sedem sibi Pontificiam visus est stabilire, Pontificaliis quoque functionibus apparere Pontifex affectavit : utpote qui celebravit Romæ Concilium ex sibi coherentibus episcopis, de quo superius dictum est. Creavit mox cardinales, excommunicavit deposuitque, licet absentes, omnes sibi contradicentes et communionem vitantes, præcipue vero ipsum Innocentium papam, et qui illum creavere Pontificem vel venerantur ut papam. Sed imitatione prædecessorum, præsertim vero Callisti Secundi, qui plura in Urbe consecravat altaria, ipse voluit eadem laude digna peragere. Dedicata

namque legimus Romæ nonnulla ab eo et consecrata fuisse altaria, et ædificiorum incuria servatas adhuc Inscriptiones, quas defendas curavimus, quorum unus, quod mense Maio, hoc eodem anno una cum Ecclesia primarium dedicavit altare, licet ipsum demolitum fuisse noscatur, titulus tamen consecrationis tabulæ marmoreæ inscriptus adhuc integer perseverat his verbis : Anno Domini millesimo centesimo trigesimo, anno vero domini Anacleti Secundi papæ primo, Indict. viii, mense Maio, die vicesima quinta, dedicata est hæc Ecclesia B. Laurentii, et in majori altari per manus ejusdem Pontificis recondita sunt corpora sanctorum martyrum Alexandri papæ, Eventii, Theoduli, et Severini, et vestis sancti Sixti martyris et Pontificis, et duæ ampullæ vitreæ cum sanguine et adipe beatissimi et gloriosissimi martyris Laurentii.

50. At extat rei hujus monumentum inter Epistolas ejusdem pseudopontificis Anacleti in saepe citato Codice Cassinensi istis verbis, quibus et donatio ab eo eidem Ecclesie facta describitur ¹ :

« Si Pastoralis officii debitum, quod Deo disponente, suscepimus, mentis velimus integritate pensare : omnibus per universum orbem, sed hujus specialis almae Romæ Ecclesiæ nostræ libertatis munificentiam largius impartire debemus. Sed patenter agnoscimus, tanto nos Urbis Ecclesiis et filiis nostris clericis Romanis debitores existere, quanto per unanime votum et dilectionis eorum integritatem, divina cooperante gratia, summi sacerdotii celsitudinem obtinemus. Vestris igitur petitionibus, dilectissimi filii, clementer annuentes, Apostolicæ Sedis solita largitate donamus, concedimus et remittimus vobis, ac per vos Ecclesie B. Laurentii, cujus venerabile altare nostris per Dei gratiam, tanquam B. Petri manibus, octavo kal. Junii solemniter consecratum est, omnes redditus possessionum, quas usque hodie habetis in Massa de Vestrano, seu Silva-Proba, sita in eadem Massa, videlicet terris, villa, vineis, pratis, silvis, et scrupetis. Rustici quoque qui in eisdem possessionibus habitant, in dominio semper ac ditione vestra permancant, salvo censu duorum marabottinorum, quos ad hujus nostræ donationis indicium in anniversario consecrationis præfate singulis annis Lateranensi palatio persolvetis. Præterea confirmamus vobis Ecclesiam S. Lucie et S. Hippolyti, quam ædificare debeatis in iisdem possessionibus supradictæ Massæ, salvo in omnibus jure episcopali. Statuimus igitur, ut nulla Ecclesiastica sæcularisve persona hanc nostræ constitutionis paginam infringere præsumat. Quod si præsumperit, potestatis honorisque sui dignitate careat, atque in extremo examine districte ultioni subjaceat. Qui vero conservator extiterit : omnipotentis Dei, et Apostolorum ejus Petri et Pauli meritis benedictionem et gratiam consequatur. Datum apud S. Petrum. »

¹ Bern. Ep. cxxv.

¹ Ex Cod. Cass. Ep. xxxii.

51. Voluit prædo sacrilegus quocumque velamento pietatis atque munificentiae factas ab ipso suisque Urbis Ecclesiarum (ut audisti) deprædationibus, expilationibus, direptionibus, atque sacrilegas profanationes earum velare, quod existimare facile posset, ejusmodi adeo detestanda facinora perpetrata piorum omnium a se animos aversione execrabili demovisse, conciliasse vero magis magisque ejus adversario Innocentio, qui Jacob instar consilio matris ab Esau recedentis¹, innocens secessisset ab Urbe. Sed adeo perculerunt fideliū pias aures horrenda auditu de expilatis tanto dedecore Urbis Ecclesiis, ut nec si omnes suas facultates erogasset in cultum Ecclesiarum, abstergere ullaatenus valuisset contractam ex immani scelere ignominiam. Quod ipse sentiens, consilii inops eo confugit, ut poneret mendacium fiduciam suam, nempe scriptis diversis litteris negaret, quæ per adversarios jactarentur.

Cum vero evanescere omnes conatus suos, quos esset meditaturs, intelligeret, aliam aggressus est viam, nimirum ut nundinatione regie dignitatis aliquem Christianorum principum communicationis suæ adjungeret. Quo subdolo mercimonio et malis artibus homo vater Rogerium Siciliæ atque Calabriæ ducem pollicitatione regalis tituli sibi devinxit atque reddidit obsequentem, simulque cum eo episcopos sub ejus dititione degentes. Sed et Casinenses monachi cum ipsorum abbate Rainaldo fœdere juncti sunt eidem Rogerio duci adversus Innocentium legitimum sancte Ecclesiæ Romanæ Pontificem, quem execrationibus plurimis devoverunt, Anacleturnque pseudopapam sacrilege susceperunt: prout constat ex concertatione cum eis postea habita coram Innocentio papa et Lothario imperatore a Petro Diacono scripta². Quomodo autem idem qui supra Rogerius acceperit in mercedem impietatis titulum regni ab eodem pseudopontifice Anacleto, modo dicendum.

52. *Rogerus dux creatus et coronatus rex Siciliæ ab Anacleto: qui auctor fuit Siculæ monarchiæ.* — Beneventanum Chronicon a nobis sæpe citatum superius, eodem tomo in quo per singulos annos ab auctore ejus temporis res gestæ narrantur, post recensita ea quæ spectant ad electionem Innocentii papæ, et intrusionem Anacleti, de qua superius, ista mox subjicit: « Eodem anno, (nempe millesimo centesimo trigésimo), prædictus Anacletus venit Beneventum, deinde Abellinam civitatem ivit, et cum prædicto duce Rogerio stabilivit, ut eum regem coronaret Siciliæ. Et his statutis, Anacletus ipse Beneventum revertitur, et dux ipse Salernum, deinde Siciliam remeavit ». Hæc ibi. Beneventi autem cum esset, de regio titulo Rogerio impertiendo Diploma conscripsit, quod hactenus asservatum in Vaticana bibliotheca, hic mendis nonnihil scatens describendum putavimus; sic se habet, absque principio incipiens:

« Ecclesiam, prædecessorum nostrorum Urbani et Paschalis venerandæ memoriæ Romanorum Pontificum, et innumeris deservivit obsequiis, felix etiam nundinationis mater tua, viri sui nobiliter vestigia subsequens, pro datis sibi a Domino facultatibus eandem Dei Ecclesiam larga liberalitatis manu officiosissime honorare, et sustentare curavit. Tu quoque, ejus divina providentia inter reliquos Italiæ principes amplior sapientiæ et potestatis prærogativa excessit, (quia) prædecessores nostros magnificentiis honorare, et abundantius deservire studuisti, personam tuam, et hæredum tuorum perpetuis gratiæ et honoris titulis adornare et exaltare decrevit (decrevimus). Concedimus igitur et donamus, et auctorizamus tibi et filio tuo Rogerio, et aliis filiis tuis, secundum tuam ordinationem in regnum substituendis, et hæredibus suis, coronam regni Siciliæ et Calabriæ, et Apuliæ, et universæ terræ, quam tam nos quam et prædecessores nostri prædecessoribus tuis ducibus Apuliæ nominatis, Roberto Guiscardo, Roberto ejus filio, dedimus et concessimus, et ipsum regnum habendum, et universam regiam dignitatem, et jura regalia, jure perpetuo habendum in perpetuum et dominandum. Et Siciliam caput regni constituimus. Porro auctorizamus et concedimus, ut per manus archiepiscoporum terre tuæ, quos volueris, juxta tuam voluntatem, assistentibus aliis episcopis, quos volueris, tu et tui hæredes in reges inungamini, et in statutis temporibus coronemini. Item omnes concessiones, donationes, et consensus, quos prædecessores nostri prædecessoribus tuis Roberto Guiscardo, Roberto filio ejus, Willelmo ducibus Apuliæ, et tibi concesserunt, donaverunt et consenserunt, donamus, concedimus et consentimus tibi et filiis tuis, et hæredibus tuis habendum et possidendum in perpetuum. Donamus etiam et auctorizamus tibi et tuis hæredibus principatum Capuanum cum omnibus tenimentis suis, quemadmodum princeps (principes) Capuanorum tam in præsentem quam in præterito tenuerunt: honorem quoque Neapolis, ejusque pertinentiarum, et auxilium hominum Beneventi contra hostes tuos largimur, et confirmamus. Tuis porrectis petitionibus annuentes, concedimus Panormitano archiepiscopo, ejusque successoribus, et Panormitanæ Ecclesiæ, consecrationes trium episcoporum Siciliæ, videlicet, Syracusani, Agrigentini, et Mazariensis, vel Cataniensis, ea ratione, ne supradictæ Ecclesiæ in diocesis, vel possessionibus suis a Panormitano archiepiscopo, vel ab ipsa Panormitana Ecclesia diminutionem aliquam patiantur. De reliquis vero duobus pleniori nostro consilio reservamus. Itæc omnia supradicta, (per) has nostras concessiones sic concedimus, tradimus, et auctorizamus tibi et tuis filiis habenda et possidenda jure perpetuo, dum nobis, nostrisque successoribus homagium et fidelitatem, competentem nobis et vobis, securoque loco facies vel facient, juraveris vel jurave-

¹ Gen. XXVIII. — ² Petr. Diac. Chron. Cass. I. IV. c. 112. et seq.

rint, si in nobis vel nostris successoribus non remanserit, non ideo honoris seu dignitatis, vel terræ suæ patiantur diminutionem. Tu autem censum.... et hæredes tui videlicet sexcentos schifatos, quos annis singulis Romanæ Ecclesiæ persolvere debes, si requisitus fueris : quod si requisitus non fueris, facta requisitione persolvas, nulla de non solutis habita occasione.... si qua sane in posterum Ecclesiastica sæcularisve persona huic nostræ concessionis vel donationi obviare tentaverit, nisi satisfactione congrua respuerit, anathematis gladio feriat. Omnibus vero, has nostras condiciones, concessiones, et consensus servantibus, sit pax Domini nostri JESU Christi. Amen.

« Ego Anacletus Catholice Ecclesiæ episcopus.

« Ego Mattheus presbyter Eudexie.

« Signum manus Petri Leonis Romanorum consulis, et signum manus Rogerii fratris ejus, et signum manus Petri Ugniccionis filii, et signum manus Cencii..... Guidonis; et signum manus Petri Leonis de Fundis et signum manus Abucii, et signum manus Joannis Abdricii et signum manus Milonis. Datum Beneventi per manum Saxonis S. R. E. presbyteri cardinalis, V kal. Octobris, Indictione nona, anno Domini Incarnationis millesimo centesimo trigesimo, Pontificatus domini Anacleti Secundi pape anno primo ». Hæc quidem tunc. At quæ alia eidem Rogerio tribuerit, dicturi proxime sumus.

53. Quæ post hæc eodem secuta sint anno, recitat ita Beneventanum Chronicon ubi supra : « Anno igitur ipso predictus Anacletus cardinalem suum, Comitem nomine, ad ducem illum direxit, quem die Nativitatis Domini in civitate Paenormitana in regem coronavit. Princeps vero Robertus Capuanus coronam in capite ejus posuit, cui indignam retributionem impendit ». Hæc ibi. Quenam autem una cum regis titulo Anacletus tribuerit Rogerio, ut ipsum demereret, atque defensorem schismatis constitueret. Petrus Diaconus Cassinensis, qui tunc vivebat, et his omnibus facile potuit interesse sic narrat¹ : « Petrus autem cardinalis, (qui et Anacletus), Rogerio duci Apuliæ coronam tribuens et per privilegium Capuanum principatum, et ducatum Neapolitanum cum Apulia, et Calabria, et Sicilia illi confirmans, regemque constituens, ad se attraxit, præcipiens, ut episcopi et abbates, qui in suæ ditionis solo manebant, ei obtemperarent ». Ecce tibi, lector, quod Tomo superiori ostendimus, exordium Sicule monarchiæ non ab Urbano Secundo, ut ex falsis ejus litteris aliqui deducere conati sunt; sed a pseudopapa schismatico Anacleto, ut audisti ex Petro Diacono, inchoatum. Quod autem in recitato superius Diplomate multipliciter decurtata ista non legeris, non mireris, cum multa in eo desiderari noscantur; sive potius, quod aliis ejusdem Anacleti litteris ista asserta per Petrum Diaconum fuerint compre-

hensa. Extant illa in eodem citato sæpe superius Codice Cassinensi Epistolarum pseudopontificalis Anacleti anni primi, in quo ad finem ita decurtatæ positæ leguntur litteræ ipsius ad Rogerium, istis verbis¹ :

« Apostolicæ Sedis providentia et benignitate provocamur, ut sacrosanciam Romanam Ecclesiam diligentibus liberalitatis nostræ manum extendere debeamus. Idcirco, fili in Christo charissime Rogeri, Dei gratia Apuliæ dux non immerito magnifice, quia gloriose memoria genitor tuus Rogerius multo sanguine, multisque laboribus totam Siciliam insulam.... » Desunt reliqua, et quidem (ut apparet) ne sciretur, quid per Anacletum eidem fuerit collatum turpiter Rogerio, fuisse decurtata, quis non intelligit?

54. Quos et quot *Anacletus papa illuserit*. — Derisit sanctus Bernardus studia ejusmodi Anacleti, quod cum sciret omnes principes Innocentio adhærescere, unum ducem pretio vani tituli comparasset. In eum enim hæc ait ex persona ducis Burgundiæ ad comitem Picaviensem² : « Habet tamen ducem Apuliæ, sed solum ex principibus, ipsumque usurpatæ coronæ mercede ridicula comparatum ». Sed quod non esset schismatici papæ ista prestare, hinc est, quod idem sanctus Bernardus eundem Rogerium non regem, sed tyrannum Siculum nominat. Ita in Epistola ad Pisanos³, et pluribus in Epistola ad Lotharium imperatorem⁴, in qua Rogerium nominat usurpatorem coronæ regiæ : et scribens ad Januenses⁵, eundem Rogerium, cum de ipso agit, non regem, sed ducem appellat, et ab eo non acceptam, sed invasam coronam affirmat. Verum quem eo modo male contulit antipapa, et sibi sumpsit dux Apuliæ titulum, nunquam deserere voluit : ejus causa adversus Romanam Ecclesiam contigit sæpe bello certare; cogi vero Romanos Pontifices prestare legitime, quod nefarie præstiterat antipapa. Sed de his suo loco dicendum. Redeamus ad Anacletum, de quo illud Psalmistæ occinendum⁶ : « Ecce homo qui non posuit Deum adjutorem suum, sed speravit in multitudine divitiarum suarum, et prævaluit in vanitate sua ». Prævaluit in vanitate, non veritate, prævaluit utique in Urbe, sed non in orbe, quod non tantus esset, qui sicut Urbem, ita orbem agitare violentia, et pecunia corrumpere, ut Roman fecerat, potuisset. Exul enim cum Innocentio veritas prepetibus pennis, veluti miraculo quodam cito citius pervasit omnem Occidentalem Catholicum orbem, et quos non reperit omnino esse rebelles lumini, sed obsequentes numini, eos suæ virtute potentiæ arctissimis vinculis nexuit Innocentio. Si quos autem istis iniitiis veritas non pertigit, quod contigit aliquibus longe positos, illos eo decipi contigit verisimili conjectura, quod scilicet eum existima-

¹ Ex Cod. Cass. Ep. XXXVIII. — ² Bern. Ep. CXXVII. — ³ Ibid. Ep. CXXX. — ⁴ Ibid. Ep. CXXXIX, CXL. — ⁵ Ibid. Ep. CXXIX. — ⁶ Psal. LI.

¹ Pel. Diacon. Chr. Cass. l. IV, c. 99.

rint legitimum esse Romanum Pontificem, quem andirent Romæ in ipsa Petri Cathedra considerare; ad quem litteras miserunt, communicationem Catholicam exposcentes, quem rogare de ambignis consulentes. Sic itaque inter ejusdem Anacleti Epistolæ aliquæ extant ad diversos de diversis respondentes, et inter alias ad Justinopolitanos suum episcopum accusantes¹. Ad quos ista: « Gravissima de vestro episcopo nobis relata sunt, quæ si vera sunt, cum nostra salute inulta dimittere non valeamus. Multos enim laicos et clericos truncatos, multos ejus studio interfectos accepimus. Eapropter præsentibus litteris vos monemus, ut ante festum omnium Sanctorum ad nostram præsentiam veniatis, quatenus vestro auxilio et consilio, Justinopolitane Ecclesie in hoc et in aliis providere possimus. Datum Romæ apud Sanctum-Petrum ». Hæc exempli causa volumus describere, cum sint pleraque id genus², quibus intelligatur, eundem pseudopapam se in omnibus egisse summum Pontificem, respondendo, puniendo, constituendo, consecrando, et reliqua omnia, quæ sunt primarii in Ecclesia sacerdotis, officia obeundo.

§5. Quod igitur istiusmodi ab Orientalibus confingerit accepisse querelas, hinc occasionem oblatam arripiens ipse, gloriabatur sibi universum communicare Orientem. Sed mendacii potentissime redarguit eum S. Bernardus, qui scribens ad episcopos Aquitanie, hæc habet inter alia: « Tuscie, Campanie, Longobardie, Germanie et Aquitanie, Galliarum denique et Hispaniarum omnium, nec non et universe Orientalis Ecclesie tam archiepiscoporum, quam episcoporum, quorum nomina sunt in libro vite, sed Epistolæ brevitatis non admittit. Hi omnes unanimes non conducti pecunia, non seducti fallacia, non illecti privato carnis vel cogitationis amore, non timore compulsi potentie secularis, sed Dei proculdubio voluntatem sicut non ignorantes, ita nec dissimulantes, Petrum Leonis ingenue refutaverunt, ac secure Gregorium in papam Innocentium susceperunt ». Hæc S. Bernardus adversus eum qui mendacio innitebatur. Sed quod scriptum est³: « Congregatio hypocritæ sterilis, et gaudium hypocritæ ad instar puncti », plane accidit, ut conatus omnes istos suos ventus per aera dissiparit, et quis verus esset in Ecclesia Pontifex innouerit.

§6. *Innocentius papa peregrinans obsequiis principum, episcoporum et populorum frequentatur.* — Jam vero relicto pseudopapa Anacleto, ad Catholicum redeamus Pontificem Innocentium, quem una cum suis fugientem ab Urbe reliquimus Pisis. Ubi (inquiunt citata superius Acta) « aliquandiu moram faciens, de guerra quæ inter Pisanos et Gennenses agitabatur, firmam treguam, Domino cooperante, composuit ». Sed hæc potius

in secundo adventu, ut dicitur. Pergit vero: « Quibus rite peractis, iterum mare intravit, et per Genuam transiens, ad S. Egidium prospere applicuit. Pergens autem per Vivarium, et Anicium, Alvernie fines intravit, et apud Claramontem primum Concilium celebravit ». Hæc ibi. Porro prævenit zelus pietatis ac veritatis comprovincialium Francorum antistitum: siquidem complures ex illis ante Concilium Claramontense convenientes Anicii, anathemate damnaverunt Anacletum pseudopontificem. Hujus primi conventus mentio habetur a Guigone ejusdem temporis scriptore in Vita S. Hugonis episcopi Gratianopolitani⁴, qui nullo habito respectu veteris amicitie, quæ intercedebat inter ipsum et Petrum Leonis, in ipsum S. Petri solium tyrannice invadentem magnopere commotus, pro Innocentio stetit robusto animo, in decrepita senectute. Sed audi qui aderat Vitæ scriptorem, Guigonem priorem primæ Carthusiæ: « Defuncto, inquit, Honorio, cum per tyrannicam et schismaticam rabiem non suis meritis, sed cognatorum et fratrum fultus præsidii Petrus Leonis adversus vestram innocentiam (ad Innocentium enim papam scribit) quæ beatæ memoriæ Honorio successerat emerisset, atque hoc vir Dei Hugo certissime comperisset, morbis licet (ut diximus) et ætate consumpisset, zelo tamen domus Dei, ejus diligebat decorem, perrexit Anicium, ut eundem cum aliis episcopis excommunicaret schismaticum. Quæ profecto excommunicatio propter auctoritatem tanti viri contulit multum et profectum Catholicis, et detrimentum schismaticis. Et certe tam idem Petrus, quam frater ejus, sancto viro multas olim venerationes et obsequia præstiterant. Sed beatus homo in tali negotio, id est, ubi periclitabatur justitia, nec amicitia flectebatur, nec potentia terrebatur ». Hæc ipse.

§7. Interea vero, cum Innocentius papa peregrinans esset in via, has ab Alberone Trevirensi archiepiscopo, sed a S. Bernardo conscriptas accepit litteras⁵:

« Voluntas cordis mei, et desiderium satis inquietum adeundi et videndi desideratam beatitudinis vestræ præsentiam, sed et cognoscendi certius quæ circa vos sunt, rursumque qualiter se habeant nostra vobis vicissim diligenter intimandi jamdudum itineris me admonet atque indesinenter sollicitat. Cæterum terræ ac diæ malitia, et præter instantiam meam quotidianam etiam nonnulla vestræ necessitatis causa impeditus, voto facere satis non potui usque adhuc, sed necdum possum. Sed quid? Sanum justumque propositum nunquid omittendum ex toto fuit quia ex toto adimpleri non potuit? Fuit ergo consilii, per hunc venerabilem H. Tullensis Eccl. archidiaconum interim saltem aliquatenus consolari conceptum jam olim desiderium, curamque revelare quam patior. Nec enim fidelior, studiosior, cautiorve illo

¹ Ex Cod. Cass. Ep. XXXI. — ² Eod. Cod. Ep. XXVIII, XXIX, XXX, XXXI. — ³ Job. XV et XX.

⁴ Apud Sur. tom. II. die II Apr. — ⁵ Bern. Ep. LXXXI.

ad manum esse potuit, sive in perferendo ad vos quæ nos illi injungimus, sive in referendo ad nos, si qua vestre dignationi placuerit remandare. Itaque de beneplacito, de statu Curie, ac vestre sospitate personæ; et si quid blandius aura secundior a divina clementia recens forte spiraverit Ecclesie, adversus schismaticorum procacem, sed inefficacem rabiem desudandi: de his omnibus plenius instrui cupimus et supplicamus.

« Porro nostram Citramontanam Ecclesiam tam in nostro quam in Francorum regno noveritis fortem in fide, pacificam in unitate, devotam in vestra obedientia, promptam ad servitium. Nequaquam nos Beneventi, non Capuæ, non ipsius Romæ terret, Deo sic judicante, amissio; scientes Ecclesie statum non armis æstimari, sed meritis. Ipsius quippe, non alterius agnoscimus voces illas in Psalmo ¹: Si consistant adversum me castra, non timebit cor meum: si exurgat adversum me prælium, in hoc ego sperabo. Propterea, et nos, quia de Ecclesia sumus, non timebimus dum turbabitur terra, et transferentur montes in cor maris. Gloriatur tyrannus Siculus quantum vult, gloriatur in malitia, quod potens est in iniquitate: nostra autem virtus in infirmitate perit. Ecclesia quando infirmatur, Pauli magisterio didicit esse potentior ². Didicit e regione et Salomone ³, quod prosperitas stultorum occidit eos. Didicit ⁴ et stultum firma radice cum viderit, statim maledicere pulchritudini ejus. Ideo cum sancto David sese in utroque consolatur, et hostium videlicet casu et liberatione sui. Ait siquidem ⁵: Illi in curribus et in equis: nos autem in nomine Domini Dei nostri invocabimus. Ipsi obligati sunt et ceciderunt: nos autem surreximus et erecti sumus. Hæc pauca vobis consolandi gratia, de quibus certus fui, fidei attestatio intimandum esse putavi, ad relevandam, vel ex aliqua parte eam, quæ vestra viscera incessanter affligit sollicitudo omnium Ecclesiarum. Hoc quoque addo, dominum regem, Deo cum confortante, fervere et accingi ad liberationem Ecclesie, et parare sibi exercitum multum nimis: nos quoque fideliter ad hoc ipsum pro viribus laborare, exhortari et sollicitare quos possumus; et cum tempus advenerit, non expensis, non personæ propriæ parciturum ». Hactenus Trevirensis archiepiscopus ad Innocentium papam de statu Germanie et Francie Ecclesiarum, in favorem ipsius summa concordia unitarum, et viribus et gratia Lotharii regis erga Innocentium ipsum, quem veneretur verum Catholicumque Ecclesie Romanæ Pontificem.

58. At quem, cum pervenit in Gallias, Innocentius habuerit occursum regum, sic accipie a Sugerio abbate S. Dionysii ⁶, tum ista spectante atque scribente: « Cum autem, inquit, Petri Leonis pars, tum parentum suffragio, tum Romanæ

nobilitatis præsidio prævaleret, dominus papa Innocentius cum suis Urbem relinquere deliberat, ut orbem terrarum obtinere prævaleat. Descendens itaque navali presidio ad partes Galliarum, tutum et approbatum elegit personæ Ecclesie post Domini defensionis asylum, regem nobilissimum Francorum, multisque suis ad regem Ludovicum destinatis, personæ Ecclesie opitulari efflagitat. Quo rex (ut eral piissimus Ecclesie defensor) cito compunctus, Concilium archiepiscoporum, episcoporum, abbatum, et religiosorum virorum Stampis convocat, et eorum consilio tam de persona quam de electione investigans (sit enim sæpe ut Romanorum tumultuantium quibuscumque molestiis Ecclesie electio minus ordinarie fieri valeat) et assensum electioni consilio virorum præbet, et deinceps manu tenere promittit. Cum autem et susceptionis et servitii primitias Cluniaci primo rex delegasset, tanto ex hilarati suffragio, cum gratia et benedictione domino regi per nos referentis, ad propria remisit. Ut autem ad S. Benedictum super Ligerim descendit, Dominus rex cum regina, cum filiis ei occurrens, et nobilem diademate sapiens coronatum verticem, tanquam ad sepulchrum Petri inclinans, pedibus ejus procumbit, Catholicum affectum, et devoti servitii affectum ei et Ecclesie promittit. Cujus exemplo et rex Angliæ Henricus ei Carnotum occurrens, devotissime pedibus ejus prostratus, votivam sui suorumque et terræ suæ susceptionem, et obedientiæ filialis promittit plenitudinem ». Hæc Sugerius de rebus gestis usque in annum sequentem: quæ his subjicit, suo loco anno sequenti dicturi sumus.

59. Sed quæ his consentientia scripserint ejusdem temporis auctores (ut veritas ore duorum vel trium testium res ipsas spectantium magis ac magis fortiusque roboretur) adducamus in medium. Bernardus abbas, qui res gestas S. Bernardi accurate conscripsit, de his agens, hæc ait ¹: « Præmissi in Gallias fuerant nuntii, qui Gallicanæ Ecclesie intimarent negotii veritatem, et hortarentur episcopos, ut in ultionem presumptionis accingerentur, et damnata parte schismatica, subscriberent unitati. Necdum vero ad plenum tenor operis innotuerat episcopis, nec privatim quisquam commodare præsumpsit assensum, donec collecto Stampis generali conventu, in commune decernerent, quid reciperent, quid damarent. Neque enim Francia, cæteris regionibus proclivibus ad schismata, aliquando tali factione fœdata est, nec malignorum acquievit erroribus, nec fabricata est in Ecclesia idolum, nec venerata in Petri cathedra monstrum: neque enim talibus in causis principalia aliquando eos tenuerunt edicta, aut generalibus militatibus privata commoda pretulerunt, nec declinantes in partem personis detulere, sed causis. Convocato igitur apud Stampas Concilio, abbas sanctus Clarevalensis Bernardus specialiter ab ipso Francorum

¹ Psal. xxvi. — ² Cor. xii. — ³ Prov. i. — ⁴ Job. v. — ⁵ Psal. xix. — ⁶ Suger. in Lud. reg.

¹ Bern. abb. in Vita S. Bern. l. ii. c. 2.

rege, et præcipuis quibusque pontificibus accersitus, sicut postea fatebatur, non mediocriter pauidus et tremebundus advenit, periculum quippe et pondus negotii non ignorans. In itinere tamen consolatus est eum Deus ostendens ei in visu notis Ecclesiam magnam concorditer in Dei laudibus concinentem, unde speravit pacem sine dubio proventuram. Ubi vero ad locum ventum est, celebrato prius jejuniis, et precibus ad Deum fuis, cum de eodem verbo tractaturi rex et episcopi cum principibus consedisent, unum omnium consilium fuit, una sententia, ut negotium Dei, Dei famulo imponeretur, et ex ore ejus tota causa penderet. Quod ille timens licet et tremens, monitis tamen virorum fidelium acquiescens suscepit, diligenter prosecutus electionis ordinem, electorum merita, vitam et famam prioris electi, aperuit os suum et Spiritus sanctus implevit illud. Unus ergo omnium ore locutus suscipiendum ab omnibus summum Pontificem Innocentium nominavit, et ratum esse, omnes pariter acclamarunt. Ilac Bernardus. Eadem quoque Theobaldus in Vita Willelmi¹. De occursum vero regum idem Bernardus hæc habet²: « In provinciam navigio delatus est, et Burgundiam transiens, Aurelianum pervenit. Ubi occurrentibus episcopis, a rege piissimo Francorum Ludovico alacriter et honorifice susceptus est. Inde a Gaufredo Carnotensi episcopo magnarum virtutum viro Carnotum deducitur, ubi etiam gloriosus Anglorum rex Henricus ei cum maximo episcoporum et procerum comitatu occurrit. Hunc quoque regem venerabilis abbas Bernardus ad eum præmissus adduxit, quem vix persuasit Innocentium recipere, ab episcopis Angliæ penitus dissuasum. Cum enim omnimodis recalcitraret et detrectaret: Quid times, ait? times peccatum incurrere, si obediās Innocentio? Cogita, inquit, quomodo de aliis peccatis tuis respondeas Deo: istud mihi relinque, in me sit hoc peccatum. Ad quod verbum persuasus rex ille tam potens, extra terram suam domino papæ occurrit usque Carnotum. Hæc Bernardus abbas, quibus Willelmus Malmesburiensis addit ista, et ipse sui temporis res gestas scribens: « Illi apud Carnotum ultro manus dedit Henricus rex (Anglorum scilicet) et apud Rothomagum non modo suis, sed optimatum, et etiam Judæorum muneribus eum dignatus est ».

60. Sed et quomodo receptus est in legitimum papam a Lothario Germaniæ rege, sic accipe a Bernardo abbate ubi supra: « Reversi interim de Germania legati domini papæ, tam episcoporum, quam regis assensum et litteras detulerunt, et deprecationem publicam, ut ad eos transiens, suam eis desideratam exhiberet præsentiam. Facile enim persuasi sunt recipere eum, quem jam cæteri recepissent. Sed detinuit eum dilectio et devotio Ec-

clesiæ Gallicanæ, et singuli et omnes visitationem Apostolicam expetebant ». His subiicit de celebrato per Innocentium tunc in Gallia Concilio Rhemensi sed quod id contigit anno sequenti, de eo dicturi sumus inferius suo loco anno sequenti.

61. *S. Bernardi scripta et labores pro confundendis schismaticis.* — Inter hæc autem magno sonitu perstrepsens a Deo parata tuba illa celestis, S. Bernardus, sive litteris, sive sermone adversus schismaticos pro Catholico Pontifice circumquaque in Galliis afflatu Spiritus intonuit bellicum. Quod autem ad Epistolas spectat, extant ex eis nonnullæ tunc temporis datæ, quarum prima ad Hildebertum archiepiscopum Turonensem est scripta¹, cum non adhuc Innocentium in Romanum Pontificem receperat. Ad quem postremo: « Pudet, fateor, quod serpens vetustissimus nova audacia, relictis insipientibus mulieribus, etiam robur pectoris vestri visus est attentare, et tantam Ecclesiæ columnam ausus concutere. Confidimus autem, quia etsi concutit, non dejicit ». Gerardus enim ille Engolismensis episcopus legatus (ut vidimus) antipape, quæque in Aquitania miscens, contra Innocentium Anacletum recipiendum omnibus proponebat. Tunc et idem S. Bernardus magistrum Gaufredum magni nominis Theologum excitavit, virum ita compellans²: « Quid enim? Tu ibi quiescis: et mater tua Ecclesia graviter conturbatur? Hæbit sua tempora quies, et sanctum otium hactenus sua negotia licenter libenterque exercuit. Tempus faciendi nunc ». Et de seipso: « Nos in nostris partibus una cum aliis Dei servis divino igne accensis, Deo cooperante, laboravimus in conveniendo populos in unum et reges, ad diripiendum pravorum consensum, ad destruendam omnem altitudinem extolentem se adversus scientiam Dei, nec infructuose. Alemanniæ, Franciæ, Angliæ, Scotiæ, Hispaniarum, et Hierosolymorum reges cum universo clero et populis favent et adherent domino Innocentio ». Et in fine eum ad conversionem comitis Pictaviensis, per Gerardum Engolismensem legatum in transversum acti his verbis hortatur: « Nec quietis timeas detrimentum, quod non parvæ tuæ gloriæ incremento recompensabitur, si fera illa vicina vobis tuo studio mansuescat, vel obmutescat, et tantam Ecclesiæ prædam, comitem dico Pictaviensem, in manu tua Dei pietas de ore leonis eripiat ». Hæc ad Gaufredum. Sed de comite Pictaviensi inferius dicendum, cum ad eum S. Bernardus est functus legatione.

62. Eodem quoque argumento tunc temporis³ litteras dedit ad episcopos Aquitaniæ, Lemovicensem, Pictaviensem, Petragoricensem, et Xantonensem, et quidem prolixas valde, adversus præsumptionem et arrogantiam ejusdem Gerardi Engolismensis episcopi, qui emerat ab antipapa legationem commercio consensionis in pravitatem.

¹ Theod. in Vit. S. Wil. apud Sur. tom. II. die x Feb. — ² Bern. abb. in Vita S. Bern. I. II. c. 1.

¹ Bern. Ep. cxxiv. — ² Ibid. Ep. cxxv. — ³ Ibid. Ep. cxxvi.

De quo nos superius ex eisdem Bernardi litteris, quibus in eum ferro stylo declamat. Corripit vero omnes ad quos scribit, adhuc schismate ab unitate abscissos, cum iidem eo se prætextu defenderent sic mansuros, quousque universali Concilio audita et cognita causa, cui inhaerendum esset, prolata sententia innotesceret. Quod autem satis sciret S. Bernardus hæc esse eorum verba malitiæ, ad excusandas excusationes in peccatis, hæc argumentis ipsorum redarguit vafrum consilium, artem dolosam, et improperat tarditatem : « Cæterum nunc iudicium expetunt, quod ante debuerant expetiisse; et quam suo loco oblatam remeuerant, tandem iustitiam offerunt : ut videlicet si recusetur, justi vos videamini; et si recipiatur litigantibus inter se partibus dilatio redimat tempus, ei interim fiat aliquid ». Et ex verbis ipsorum : « Quidquid, inquit, hactenus factum sit, modo quærimus audientiam, iudicium sumus subire parati. Tergiversatio est. Quid in omni impio conatu vestro vobis relinquitur aliud, quod afferre queatis ad seducendum simplices, ad armandum malevolos, ad vestram ipsorum palliandam malitiam? Si hoc non diceretis, quid diceretis? Cæterum jam Deus iudicavit quod sero repetit homo. Iudicavit autem operis evidentia, non decreti sententia. Nam quid Dei iudicium audet humana temeritas refractare? Quid si causetur et clamet per Prophetam Deus : Tulerunt homines a me iudicium? Non est consilium contra consilium Domini¹. Velociter currit sermo ejus, in conveniendo populos in unum et reges, ut domino papæ Innocentio serviant et obediant. Quis revocavit? »

63. Quod dicit S. Bernardus, sermone Dei declaratum esse Innocentium germanum Dei Pontificem : quomodo id acceperit, mox ita declarat, quod scilicet præstantiores in Ecclesia sanctitate viri, qui tunc sanctitatis existimatione florent, omnes receperint Innocentium, et recipiendum pariter prædicaverint Innocentium. At quoniam fuerint isti, qui hoc tempore inter tot caliginosas tenebras sanctitate clarent, ita recenset, qui præceteris nominati ore omnium versarentur² : « Dei, inquit, esse iudicium senserunt et conseruerunt, Gallerus Ravennas, Hildegarius Tarraconensis, Norbertus Magdeburgensis, Conradus Salsburgensis, archiepiscopi. Dei esse iudicium cognoverunt et acceperunt episcopi, Equipertus Monasteriensis, Hildebrandus Pistoriensis, Bernardus Papiensis, Landolphus Astensis, Hugo Gratianopolitans, Bernardus Parmensis. Horum gloria specialis, et præcipua sanctitas, et auctoritas etiam hostibus reverenda, facile nobis, qui minorem et meriti et officii tenemus locum, aut errare secum aut sapere persuasit ». Subjicit post hæc de Christianis populis, et monachorum ordinibus, atque principibus Innocentio inhaerentibus : « Et tamen, subdit, adhuc isti, nescio qua contentiosa importunitate,

et importuna contentione reclamant, vocant in causam orbem, et cum sua paucitate universitatem flagitant judicari : et qui præjudicaverunt de electione, de confirmatione rejudicare contendunt, tunc præpropere agentes, modo præpostere retractantes ». His illatis, quam difficile, et quam etiam inutile esset et indignum, universale Concilium cogere, his declarat verbis :

64. « Quis tantos, quæso, in unum cogere queat exercitus utriusque ordinis principum, ne dicam, plebium, et adducere in examinationem? Quis tot saeculorum millibus persuadere sufficiat, quod prius ædificaverint iterum destruere, et abducere semetipsos in prævaricationem? Quis deinde locus omnibus tantus, omnibus totus? universæ quippe Ecclesie negotium est, non unius causa personæ. Videtis quod de impossibili calumniam struitis matri vestræ? imo vobis fovam fuditis, in quam precipitemini, et laqueum neclitis quo teneamini, ne ad gremium revertamini matris vestræ? » Sed ut Roma ipsa ab Anacleto deficiat, cui jam diutius dominetur, quam impossibile esset, etiam si iudicio universali ipsa causa terminaretur, ita subiungit primum de tanti difficultate iudicii : « Mutet consilium suum Deus (secundum hominem dico) revocet sententiam, convocet a finibus terræ Concilium, judicari bis in idipsum (quod ipse non facit) patiat : quosnam, quæso, dabunt iudices sibi? Omnes quippe in parte sunt, et partibus. De iudicio haud facile conveniet : atque ita ad litem magis quam ad pacem tantus conventus fatigabitur. Deinde velim scire, cui ille interim vellet credere Romanam quam tanto amore ex longo tempore concupivit, tanto labore et sumptibus acquisivit, tanto fastu possidet, tanto pudore timet amittere, ne frustra convenisse sæculum omne cernatur, si cum ille cadet a causa (Anacletus scilicet), non tamen cadat Roma? Alioquin quis causam spoliatus ingreditur? nec leges profecto cogunt, nec canones. Et hæc dicimus non de nostra iustitia diffidentes, sed a vestra caventes versutia ». Quomodo namque iustitia præsent, pluribus docet.

65. *Legatio ad comitem Pictaviensem in schismate obstinatum et pessimis moribus.* — Egit litteris, egit et præsens causam Catholice unionis. Siquidem ab eodem Innocentio papa eidem S. Bernardo, necnon episcopo Suessionensi, credita est legatio ad Willelmum comitem Pictaviensem, ducem vero Aquitanie : de qua ista observatione digna habet Bernardus abbas Bonnavallis in Vita S. Bernardi³ : « Ut enim prius gesta breviter repetamus, ubi primum cepit audiri, quid adversus Ecclesiam Dei Gerardus ille machinaretur : ab Innocentio papa adhuc in Galliis demorante missi sunt abbas noster Clarevallensis, et Jollenus venerabilis episcopus Suessionensis, et Pictavium usque venerunt, ut tam ipsum (Gerardum), quam præ-

¹ Psal. CXLV. — ² Bern. Ep. CXXV.

³ Bern. Bonaval. in Vita S. Bern. I. II. c. 6.

dictum principem convenirent. At ille, jam eodem principe persuaso, impudenter in Ecclesiam Catholicam, a qua se præcedebat, convicia jaculari, et pollicitam prius Innocentio subtrahere obedientiam, Anacleto suum electum dignius, et quicumque non obediret, erroneos et acephalos prædicare. Unde factum est, ut animati et armati in insaniam clerici, publice ex ea die persecutionem Catholicis intentarent. Prius tamen quam sic eorum propalata fuisset et obfirmata perfidia, obtulerat abbas sanctus in eorum Ecclesia sacrificium Deo. Post cujus discessum decanus ejusdem Ecclesie altare, in quo divina mysteria celebrabat, impie quidem, sed non impune confregit. Siquidem post breve tempus percussus a Deo, cum animam exhalaret, domum in qua moriebatur plenam vidit daemonibus : et se a daemonibus jugulari clamitans, cultellum a circumstantibus postulabat, quem immergeret gutturi suo, ut extracto demone viveret. Sed diabolus, cui datus erat, cum inter hæc verba extinxit, et pestilentem animam in infernum demersit. Archipresbyter quoque, qui Petri invasoris Pictaviensis Ecclesie Synodum denunciabat, coram ipsis, quos ad conventum perfidie invitabat, a diabolo correptus est. Sed et in alios multos, qui in schismate illo ferventiores exultant, manus divina manifestam exercuerat ultionem. Propter hæc et alia hujusmodi ante homines confundi cœperat Gerardus ; et timens opponi sibi, quæ negari non poterant, conventus publicos evadebat (evitabat)». Hactenus de his ille. Quomodo vero post quinquennium iterata legatione conveniendus fuit Apostolica idem dux Aquitanie Willelmus, quando tandem cedens Deo et ejus vicario Innocentio, manus dedit, dicturi sumus suo loco. Modo autem ex Willelmo ¹ Malmesburiensi bibliothecario, res sui temporis scribente, de ipso aliqua scribenda sunt, atque primum tantæ fuisse potentie, ut in Terram-Sancam secum duxerit ingentem militum copiam, nempe exercitum sexaginta millium equitum, et multo plurimum peditum. Rursus vero tantum fuisse intemperantie, et omnium vitiorum sordibus inquinatum, ut gloriaretur cum malefaceret, et exultaret in rebus pessimis, cuncta condiciens malefacta salibus nugurum et facciarum, ad risum audientium extorquendum. Recitat idem auctor de his plura et obscena valde, quæ libentius præterimus ².

66. Quæ autem in Petrum Pictaviensem episcopum ipsum excommunicantem peccaverit, hic totidem ejusdem auctoris verbis describemus, ait enim : « Cum Petrus præclare sanctitatis Pictavorum episcopus cum liberis argueret, et detrectantem palam excommunicare inciperet, ille præcepti furore percitus, crimem antistitis innotat, strictumque mucronem vibrans : Jam, inquit, morieris, nisi me absolveris. Tum vero præsul, timore

simulato, inducias petens loquendi quod reliquum erat excommunicationis, fidenter peroravit, ita comitem (Pictaviensem) a Christianitate suspendens, ut nec cum aliquo convivari, nec etiam loqui auderet, nisi mature resipisceret. Ita officio suo, ut sibi videbatur, peracto, martyriique trophæum sitiens collum protendit : Feri, inquit, feri. At Willelmus refractor consuetum leporem intulit, ut diceret : Tantum certe te odio, ut nec te meo digner odio : nec cælum unquam intrabis meæ manus ministerio. Verumtamen post modicum vipereo meretricie infectus sibilu, incesti dissuasorem detrusit exilio. Ubi beato fine conclusus, frequentibus et magnis miraculis innotuit mundo, quam gloriose vivat in cælo. Quibus auditus, comes dicebat insolenti non abstulit, professus palam ponere se, quod non ei jamdudum mortem accelerasset, ut ipsi anima sancta grates haberet potissimum, cujus furore cœleste mercata esset commodum». Recitat idem auctor duo epigrammata, alterum vivo, quo ejus sancta vita commendatur; alterum mortuo, quod sic se habet :

Exutus rebus, intentus, pulsus ab urbe
Præsul, pauperiem, vinela fugamque tulit.
Nunc dives, liber, stabilis, sua premia, Christum,
Astra, capit, sequitur, possidet iste Petrus.
Vitam religio, mentem discretio, famam
Lux operum, studium lectio, verba modus :
Judicium jus, justitiam rigor, ora venustus
Ornabant, pietas viscera, virga manum.
Promovit, pravavit eum, profugamque recepit
Papa, comes, Christus ordine, sede, polo.

Hæc auctor de Willelmo ante Innocentii papæ tempora. Nam historiam illam suam de gestis regum Anglorum nonnisi usque ad Callisti papæ tempora perduxit.

67. *Clades Christiani exercitus in Oriente.* — Quod ad res pertinet Orientis, dum Christiani principes aucti novis viribus orbis Occidentalis, cum magno apparatu confidentes in potentia virtutis suæ, obsident Damascum, ab eo qui exallat humiles et dispergit superbos, de cælo pugnatum est contra eos, victique nebulis, imbribus, ventis, favente Deo, his omnibus hostibus, coguntur re infecta, sed malis ipsi confecti ad propria remeare. Rem gestam Willelmus Tyri archiepiscopus scribit¹, atque demum ut rem memorabilem certa temporis nota consignatam reliquat, hæc ait : « Igitur octavo idus Decembris, anno ab Incarnatione Domini millesimo centesimo trigesimo, regni domini Balduini duodecimo; accidit hoc in eodem fere loco, ubi quadriennio prius insignem et cunctis memorabilem de iisdem hostibus idem rex obtinuerat palmam. Mirabile est, et vere mirabile est supra opiniones hominum quod de sua virtute præsumentes humilias, æterne Salvator, et qui in homine confidunt, et carnem ponunt brachium suum, jaculo tuæ maledictionis, meritis exigentibus confodis etc. »

¹ Will. Malmesb. de Will. Secundo l. iv. — ² Ibid. l. v.

¹ Will. Tyr. de Bell. sacr. l. xiii. c. 26.

Post hæc vero admodum deplorata, subjicit idem auctor de obitu Stephani patriarchæ Hierosolymorum, et subrogatione in locum ipsius Willelmi Belge Mechlinia oriundi.

Anno periodi Græco-Romanæ 6623. — Anno Æræ Hispan. 1168. — Anno Hegiræ 525, incognito die 4 Decemb., Fer. 5. — Jesu Christi 1130.

— Innocentii II papæ 1. — Lotharii reg. 6. — Joannis Comneni imp. 13.

1. *Moritur Honorius papa.* — A num. 1 ad 8. Falco in Chron. ad annum MCXXIX, quem usque ad diem primum mensis Martii currentis anni continuat, scribit : « Dominus papa Honorius medio mense Februario viam universæ carnis ingressus est, post quem Innocentium, die ipso ad horam tertiam Petrus Portuensis episcopus, Petrum filium Petri Leonis elegit pro Anacleto. Deinde Innocentii illius electionem damnantes, Anacleti Pontificis electionem confirmabant ». Dies et annus mortis Honorii II in controversiam vocati; Balaus enim tom. II Hist. Universitatis Parisiensis pag. 109, cum anno superiori communi mortaliū fato functum credit, quod, inquit, scriptores antiquiores, Joannes Berardi, qui Chronicon Casanriense seu Piscariense ad annum MCXXXII perduxit, et auctor Chronici Maurigniæensis, qui temporibus istis ad annum usque MCL Chronicon suum scripsit, diserte asserant, *Honorium* eo anno obiisse. Verum decipit virum doctissimum annos Incarnationis numerandi modus ab utroque scriptore usurpatus; tam certum enim eos a Paschate, vel saltem a die XXV Martii annos Christi exorsos esse, quam *Honorium* currenti anno e vivis abiisse. Quoad diem ejus emortualē, Onuphrius in Chron. Eccles. XIV kal. Martii fuisse credidit. At Baronius Falconem laudatum recte interpretatur de die XVI kal. Martii, seu de die decima quarta mensis Februarii currentis anni; nam Christophorus Ceuvoldus anno MDCXI monachii publicavit Chronicon monasterii Reicherspergensis, a scriptore anonymo cum anno MDCIV quo is vivebat, absolutum. In eo autem ad annum MCXXX dicitur *Honorius* defunctus XVI kal. Martii, qui dies omnino retinendus, ut mox magis probabitur.

2. *Sedis ejus duratio.* — Major difficultas est de duratione Sedis *Honorii II*, cum non solum recentiores in ea assignanda inter se non consentiant, sed etiam ab antiquis discrepent, et apud hos numeri corrupti sint. Baronius supra annos quinque, de quibus nulla controversia esse potest, ait cum

sedisse *mensē unum et dies xvii*. Onuphrius *mensēs duos et dies tres*, et Papebroc. *mensē unum, dies xxx*. Gotfridus vero Viterbiensis qui hoc tempore florebat, in Chron. scribit, eum supra annos V Eccl. Rom. præfuisse, *mensibus sex, diebus viginti novem*, nisi quod pag. 580, loco dierum XXIX, habet *dies xxviii*. Denique auctor magni Chronici Belgici pag. 134, Vernerus in Fascic. Temp. pag. 76, et Dodechinus abbas in Chron. habent menses duos, dies octo, et ex nostris Catalogis nihil quod ad rem faciat, erui potest. Unus Ceccanus, qui in Chron. interpontificium, quod post Callisti II mortem fuit, accurate notavit, durationem Sedis Honorii II recte etiam expressit. Ait enim ad annum MCXXIV, uti jam ibidem monuimus : « Obiit Calixtus papa XIX kal. Januarii. Consensu omnium clericorum Romanorum post septem dies ordinaverunt Lambertum Ostiensem episcopum in Honorium papam, qui sedit annos quinque, mensē unum, dies viginti quinque ». Hæc magnis lucusque tenebris fuerant sepulta, quæ ideo diligenter nobis tractanda erant.

3. *Innocentius II papa et Anacletus II anti-papa electi.* — Mortuo Honorio, in papam electus *Gregorius* cardinalis diaconus Sancti-Angeli, qui fuerat « monachus Lateranensis cornubii SS. Joannis Baptistæ, Joannis Evangelistæ, atque Pancratii », inquit Baronius num. 2. Verum Oldoinus in Innocentio II, pag. 969, notat Anastasii IV et Paschalis II Diplomatis constare ab Alexandri II temporibus usque ad Bonifacii VIII, monasterium illud fuisse canonicorum regularium. Et licet temporibus Joannis III et Gregorii III monachi divi Benedicti monasterium illud apud Ecclesiam Lateranensem obtinuerint, tamen aliquot sæculis ante *Alexandrum II* loco excesserant, nec illorum prorsus ulla Lateranensis Ecclesiæ monumentis memoria habetur, ut testatur Onuphrius, qui Lateranense Archivium sæpe scrutatus est. Testatur et Cesar Rasponius in Basilica Lateranensi lib. 2, cap. 1. Denique idem Onuphrius in Notis ad Platinam, recitata Alexandri III Vita, exhibet « Nicolai

Maniacutii canonici regularis Lateranensis ordinis Sancti-Augustini versus de Romanis Pontificibus » usque ad Eugenium III sub quo testatur se vixisse, quos alius usque ad Alexandrum III continuavit. Quare Innocentium II canonicum regularem S. Augustini fuisse, hallucinatumque anonymum a Baronio num. 2 laudatum, qui eum Benedictinum fecit, certum esse debet. In Innocentii II emulationem elevatus est in thronum Petrus, Leonis filius presbyter cardinalis, et *Anacletus* appellatus. Causam festinate electionis hoc modo narrat chronographus Maurigniacensis, pag. 376 : « Cardinales, qui cum cancellario (scilicet Aimerico S. Mariæ-Novæ card.) inibi aderant, et Honorio infirmanti assederant, Gregorium quemdam scientia ac religione præclarum sibi præficiunt, et nimis festinanter, ut a quibusdam dicitur, Pontificalibus induunt insignibus. Id illius gratia dispensationis factum dicunt, ut Petrum quemdam, qui sæculariter ad papatum videbatur aspirare, spe sua frustrarentur ». Paulo post : « Mortuo Honorio, potentissima fratrurn suorum, familiæque quammaximæ numerositate fretus, et Portuensis episcopi ejusdem litteratissimi, et sicut putabatur religiosissimi senis impetu animatus, Pontificatus culmen arripit, cleri populique non parva multitudine sibi consentiente. Id in Ecclesia Dei seminarium maximi schismatis erat ». Priorem Innocentii electionem fuisse, sed preperam, nec ab universis eligentium comitis factam scribit etiam Sugerius, a Baronio num. 1 citatus.

4. *Dies electionis Innocentii II in controversiam vocatus.* — Arnulphus Sagiensis archidiaconus, ac dein Luxoviensis episcopus, qui composuit Tractatum « de schismate orto post Honorii II papæ decessum », in quo ait se nihil scripsisse, quod non vel ipse cognoverit, vel auctore probabili non haberit, *vel quod saltem fama publica non affirmet* ; plura nos edocet de schismate isto, et de tempore electionis Anacleti cap. 4 tradit : « In eo autem quo ordine, sequenti die Petri processisset intrusio, non diutius immorabor, quam ut dixerim virum turpem, fœdatum infamia, publica existimatione damnatum : posterius a (desunt duo aut tria verba) et parentibus esse promotum ». Denique Ordericus in fine lib. 2 ait : « A quibusdam noctu Gregorius diaconus, Papiæ natus, in

papam electus est, et Innocentius nominatus est. Tertia vero die ab aliis Petrus Leonis filius inthronizatus est, et Anacletus appellatus ». Verum præterquam quod Innocentius non Papiensis, sed Romanus erat, ejus electio secreta quidem fuit, at non nocturna (1) ; certumque Ordericum, quando de rebus extra Galliam et Angliam gestis sermonem habet, sæpe de iis male edoctum fuisse. Scribit anonymus Casinensis : « An. mccccxix, (qui nobis est mccccx), obiit Honorius papa, et eo die sunt electi Gregorius Sancti-Angeli in papam Innocentium, et Petrus cardinalis Sanctæ-Mariæ trans Tiberim in Anacletum : et Innocentius ultra montes perrexit, Anacletus in Apuliam ivit, qui ducem Rogerium regem constituit ». Denique Arnulphus laudatus assertit Petrum Leonis altero post Innocentium die intrusum, quod verum existimo. At falsum est papam et antipapam eodem die, quo obiit *Honorius papa*, electos esse, ut statim videbitur.

5. *Certo detegitur.* — Unus itaque annalista abbatie de Margan. tom. II Collectionis Oxoniensis nuper publicatus, non solum confirmat Honorium die XIV Februarii, seu XVI kal. Martii demortuum, sed etiam tam diem electionis quam consecrationis Innocentii II nos edocet. Hæc ejus verba ad annum mccccx : « Hoc anno, XVI kal. Martii, defunctus est papa Honorius apud Sanctum-Gregorium, et in crastino, id est XV kal. ejusdem electus est Gregorius diaconus cardinalis Sancti-Angeli in Apostolatum ; qui et Innocentius nominatus est : et sexta die, scilicet sequenti sabbato post proximum (nempe die XXII Februarii) ordinatur in presbyterum, in die Cathedræ sancti Petri, et in crastino consecratus est in summum Pontificem apud Sanctam-Mariam Novam. Eo die et Petrus Leonis consecratus est in Apostolicatum apud Sanctum-Petrum ». Accurate itaque Onuphrius tradit Innocentium II die XXII mensis Februarii coronatum esse, sed ejus electionem male cum die decima septima ejusdem mensis alligat, quod non advertens Papebrocius ejus sententiam in utroque capite secutus est ; Mabillonius vero in Chronologia Bernardina, ubi de die coronationis mentionem non facit, in die electionis ab Onuphrio non dissensit.

6. *Innocentius II Sedis suæ annos a die electionis repetiit.* — Denique Innocentium II Sedis

(1) Quæ hæc ait Ordericus de Innocentii electione eadem nocte facta, quæ Honorius obiit, falsa quidem sunt ; sed lucem accipiunt ex nuper vulgato a cl. Eccardo, Udalrici Babergensis Codice diplomatico in Corpor. Historiæ Medi-Evi, tom. II, col. 355. Extant ibi litteræ Humberti Lucensis episcopi ad N. Psenopolitanum (Magdeburgensem) episcopum, quibus de electione Innocentii certiorum illum faciens, testatur Honorium decessisse feria VI, initio Quadragesimæ, id est, die XIV Februarii ; sed addit, factionem Petri Leonis, ratam Pontificem obisse atqueam rursus animam efflisset, conventus suos egisse, et Petrum illum elegisse, ac prope abfuisse qui novus electus atqueam prædecessor diei clausisset, prodiret sese populo. Forte igitur nocte diei XIII, cum de obitu Honorii falsus rumor sese diffudisset, exaratum fuit decretum de electione Petri Leonis, quod datum an. mccccx, die XII Februarii, iudicit, octava, in eodem Eccardiano Codice, col. 350 legitur. Hæc autem error Orderici Innocentio tribuens quod Petro Leonis accidit. Nisi forte, ut Epistola Humberti cum decreto electionis constat, reputaverimus Honorium obisse nocte inter diei XIII et XIV, statimque Petri electionem a schismaticis abutram, ut prout de Honorio decessisse die XIII et XIV aique affirmari potuerit, nec mendacii reos se constituerant schismatici si electionis suæ decretum sub die XIII publicaverint. Hinc pariter Orderico locus factus est.

Certum insuper est eadem die quæ Innocentius in solum Pontificium solemni ritu conscendit in Ecclesia Lateranensi hora tertia, eadem pariter, sed hora sexta, in Ecclesia S. Martini cum ceremoniam Petrum Leonis peregerit, ut docent cardinales Romani in sua Epistola ad Lotharium, quæ in eodem Codice Udalrici est cccclii.

sue annos non a die coronationis, sed a die electionis, seu a die xv mensis Februarii deduxisse demonstrat Rescriptum ejus, recitatum a San-Marthiano tom. iv Gall. Christ. pag. 239 et seq., quod dicitur datum « Romæ per manum Aymerici S. R. E. diac. card. et cancellarii XIII kalend. Martii, Indiet, i, Incarnat. Dominicæ mcccxxvi, Pontificatus vero domini Innocentii pape II anno ix », ubi Innocentius II illum Christi annum a die xxv Martii exorditur, ideoque datum Diploma anno mcccxxviii, die xvii Februarii, diebus sex integris antequam Pontificatus ejus annus ix a consecratione ejus dinumeratus inciperet.

7. *Mores Innocentii II ante Pontificatum.* — Baronius num. 7 de utriusque electi meritis agit, sed mira sunt que de Innocentii II moribus et de recusato ab eo Pontificatu Arnulphus laudatus cap. 4 refert : « Si vite consideretur integritas, et a primis annis sub examen omnia redigatur, nihil deformatum crimine, nihil infamia condemnatum. In eo enim nil illiberale pueritia, nil adolescentia fluxum, nil juvenis infamie, nil virilis ætas edidit indecorum. Inconcussa fides operationi bonæ fundamenta perstruxit. Consilio providus, benignus alloquio, facundia celebris, quam nec verborum fastus clamat, nec multitudo faciat effluentem. Tantumque apud omnes bonæ existimationis servabatur et gratie, ut quod alias perrarum est, esset ei ante electionis ejus tempora nullus hostis. Cibi potusque tanta sobrietas, ut illis non fastidium, sed abstinentie modus terminator assistat. Vestitus autem Apostolatus tempori sane conveniens; quem nec professio clericalis excluderet, cardinalatus dignitas non horreret. Quibus enim impresentiarum vestibus induatur, jam non ex ipsis pendet arbitrio, sed sanctorum Patrum antiqua constitutione decretum est. Prædicta vero cardinalatus dignitas, ab ipso non impetrata quidem, sed ob vitam mundioris et scientiæ plenioris meritum, ultro data. Cujus muneris sic gessit officia, ut suis ipsum laudibus ampliaret. Fiebat honos titulis sui possessoris illustrior, nec tantum propria, quantum administrationis sue gloria præfulgebat. Adeoque cæteros egregiæ prerogativa dignitatis excesserat, ut nec restare locus invidia videretur, eoque plane quisque suos ad æqualitatem ipsius aspirare non posse conatus adverteret : neque quicquam eujuslibet laudibus ipsius prælatio derogaret ».

8. *Semel et iterum recusat Pontificatum.* — « Postremo si non ille humani generis perfidus adversator in Petro Leonis Ecclesiæ Dei præstruxisset insidias, nulla jam post papam Honorium de successione questio supresset, cum vir unicuique dignitati divina jam videretur providentia præformatus. Ipsum enim hoc divinitus consilio talis constat esse plasmatum, ut dum adversus Ecclesiam vis hujus persecutionis insurgeret, esset qui se tempestati suæ securus opponeret, et inter fluctus periclitanti naviculæ subveniret. Cumque ipsum ad hoc onus omnium pæne conscientia de-

stinaret, ipse sibi jam adeptæ dignitatis locum nequaquam videbatur explere. De se enim citra suam credere facultatem judicium sapientis esse. Quod ipse de se satis evidenter docuit, dum ipsum eligentium corona clauderet, et ad Apostolatus fastigia vocaretur; instabant precibus, et reclamantem lacrymis obsecrantes, injecto pluviali renitentem manibus etiam comprimebant. Cumque ipse injectam sibi vestem secundo (ut aiunt) totis viribus obsistendo rupisset, illique nihilominus instandum crederent, si quid sanctis electionibus creditur, timuerunt, ne inter manus eorum tanta reluctance et compressione fatigatus obiret; et sullocatam singultibus animam protinus expiraret. Manibus igitur, donec modicum respiraret, inhibitis, dumtertium ex longinquo pluviale requiritur, inter rorantes adhuc lacrymas, et erumpentes usquequaque singultus, sic affatur adstantes :

9. *Quibus rationibus.* — « Expediret instans negotium, exclusa animorum afflictione, tractari, nec charitatem zelus alteruter impediret, et generale commodum odio familiari, vel gratia in oppositum verteretur. Sæpius enim præoccupatas mentes fallit affectio, ut et dignos odia reproben, et indigni suggerente gratia præferantur. Quam quidem gratiam in hoc video vires sibi vendicasse præcipuas, ubi sola obtinere debuerat expensa pari lance ratio meritum. Nam ubi me pari voto contenditis tantæ præficere dignitati, profecto non obtinet examinatio meritum, palamque prævaleat indulgentior gratia, quæ me vobis nunc et hactenus in imperfectis operibus acceptabilem præstat. Per quam etiam olim huic sancto me voluistis inesse consortio, quem dejectum inferius longe morum qualitas amovisset. Quem tamen locum etsi vir nullius virtutis tenuisque scientiæ impleat, vestra infirmitatem meam sapientia supportabat, quos ejusdem sollicitudinis idem Dominus in eadem paritate fecit esse ministros. Verum oportet nunc ex meritis, non ex gratia judicare, nec gratiosum tantum, sed et dignum constituere sacerdotem. Hic enim nullum capietur ex paritate solatium, ubi consortem muneris prerogativa singularis excludit. Excludatur ergo benevolentia, et persona comparetur officio ad quod vocatur : vita probabilem, scientia præditum, celebratum fama tantus honor exposcit; ubi ipsi divinum favorem probabitis vita conciliet, gerendorum facultatem scientia conferat, et nominis celebrata clara comparetur auctoritas. Quales ex hoc ipso numero promptum est inveniri? Quis ego sum, sub cuius arbitrio rerum summa versetur? Quis, inquam, ego sum, quem papam Roma salutet; qui non inter primos duntaxat, sed etiam primorum primus assigner? Indignum qui præficit, afficit injuria dignitatem.

10. *Magis urgetur, ut electioni de se factæ acquiescat.* — « Talia dicentem, et adhuc dicturum plurima si liceret, hoc sermone cætus assistentium desperatus excepit. Excusationum dispendia periculum imminens, et articulus necessitatis excludit.

Stat enim in insidiis leo paratus ad prædam, occasionem, sicut et ipse nosti, præstolatus a puero, cujus si non præveniatur assultus, si non impetus obtundatur, nulla jam libertatis spes, nulla prorsus honestatis disciplina relinquitur. Antiqua Ecclesie Romanæ dignitas occidit, ipsius gloria commutatur opprobrio, et formidata extremis hominum potestas vertitur in contemptum. Si enim est ille, sicut equidem est, vita contemplabilis et pollutus infamia, restat et contemptum potestas ipsa contrahat ex persona. Quis enim bonus subesse non recuset infamæ? Quis ad honestatem coartari inhonestioris arbitrio non refutet? Si autem honor iste deferendus est digniori, profecto apud omnes infinitorum crinuum Petri prælatio nos condemnatur. Arguemur nimirum de nobis turpiora confessi, quam de ipso fama vulgaverit, si nobis ipse quasi dignior antefertur. Estimabitur etiam non displicere nobis, quod nec in altero non damnamus, sed et sustinentes crimen consensus incurere, et rei veritate, et existimatione publica vincemur. Fuit, fuit hæc hactenus hæc Romana Ecclesia caput orbis, penes quam constantissima fides, suprema potestas, honestas incomparabilis, inconcussa severitas, gerendorum summa discretio, et nota toti mundo pietas viginisset, fuit, inquam, fuit hæc olim terror improbis, bonis in tranquillitate præsidium, in necessitate refugium singulare; a cujus integritate minores Ecclesie vires sumerent, et velut ab illaso capite membra sancia suæ sortirentur initia sanitatis. Nunc autem iustat et a fide discessio, et antiquæ desolatio potestatis, et omnium bonorum; ejus casus manifestus apparet, dum homo peccati, perditionis filius revelatur, ut adversetur et extollat se supra omne quod dicitur Deus, aut quod colitur; ut in templo Dei sedeat ostendens se quasi ipse sit Deus ».

11. *Ejus excusationes non admittuntur.* — Post aliqua alia hujusmodi interposita subdit Arnulphus: « Aluit hæc (nempe Ecclesia) te et cum in aliquo tui non egeret, exceptit, ut in summa tranquillitate suis educaret uberibus, et proprio foveret amplexu. Nunc mutuum postulat, et suorum repetit præmia meritum, ut scilicet in necessitate subvenias, et oppresse præstare subsidia non recuses, etc. At vero prætendis ex indignitate tua subterfugii causam, quasi nos prudentiam tuam et singularum partium vitæ tuæ merita nesciremus. Profecto si te dignum crederes, hæc ipsa æstimatione videreris indignus, etc. Revereris etiam pudore laudabili subire tantæ fastigia dignitatis, in quam suprema regni et sacerdotii prærogativa mirabili fœdere copulata conveniunt. At nos, non ad honorem te, sed ad periculum potius invitamus, nec enim sumus ignari, quid adversus nos ille adversarius machinetur. Jam stringit gladios, jam sagittas acuit; nec viam sibi ad Apostolum patere nisi nostri sanguinis effusione confidit. Quantumcumque tamen discrimen nobis mortis imminuat, maluimus sanguinis nostri mer-

cedem de manu divina requirere, quam de manu nostra sanguis Ecclesie requiratur; quamvis te mortis socium quærimus, imo volumus etiam præcursorum.

12. *Innocentius II revitens et invitatus Pontificatum admittit.* — « Exponatur jugulus tuus sicut noster ad victimam, neque enim fas est, ei qui dedit negare spiritum, cum reposeit. Si quid igitur te matris desolatæ calamitas, si quid inundans assistentium fletus, si quis ullus honestatis amor, si quid virtus obedientiæ movet, acquiesce. Si acquiescis, exhibemus obsequia; si recusas, exigimus de inobedientia penam. Eadem enim quæ papæ superstitis est, ipso decedente penes nos præcipiendi et ulciscendi quoque consistit auctoritas, donec alius inducatur.

His dictis, parabant excommunicationis promulgare sententiam. Allatum igitur ex longinquo pluviale præ manibus offerentes. Quid faceret? tentaret ex fuga subsidium? At illud continua seniorum corona clauderat. Postularet inducias? sed quominus impetrarentur, dilationem rei instantia Petri machinamenta negabant. Negaret semper? At illi gladio spiritus imminebant anathematis penam protinus intentantes. Dum ergo sibi videtur inter geminæ mortis conclusus angustias, alterique eorum legi necessitatis obnoxius, discrimen periculi corporalis exceptit; quia dum respuit anathematis experti sententiam, insidiis, imo potentie sese Petri Leonis objecit ». Ita Arnulphus, qui solus nos hæc edocuit.

13. *Mores Anacleti et Leonis avi ejus.* — De moribus et familia Anacleti antipapæ anno mccciv, num. 3 et seq. jam aliqua diximus. Hic audiendus idem Arnulphus cap. 3, de eo et de Leone avo ejus scribens: Cujus avus cum inestimabilem pecuniam multiplici rogasset usura, suscepit circumcisionem baptismatis unda damnavit (erat enim, ut ibidem diximus, Judæus). Pudebat eum impotentie suæ potius quam erroris, ne genus ejus infidelitatis opprobrio confusum perpetua damnaret obscuritas. Suscepit itaque fidei sacramentis, ubi novus civis insitus est, factus dignitate Romanus. Cumque ipsi numerosam progeniem series successionis afferret, dum genus et formam regina pecunia donat, alternis matrimoniis omnes sibi nobiles civitatis accevit, machinante jam humani generis hoste, ut quodam quasi veteri fermento tota Romanæ sinceritatis conspersio corrumpetur. Ex hac itaque diversorum generum mixtura, Girarde, (alloquitur Girardum Engolismensem episc., Anacleti in Gallia fautorem) Petrus iste tuus exortus est, qui et Judaicam faciem præsentet imaginem, et perfidiam voto referat et affectu. Porro ipsum a cunabulis, ab ipsius nutricis nebris, Apostolatus præragas parentum destinavit ambitio; atque post prima litterarum rudimenta docendum delegavit in Galliam, ut illius regni benevolentiam, ipsi morum linguæque conformatio vendicaret. Totis igitur annis pueritiae suæ, ut ho-

nestius inhonesta dicantur, ad omne se quod alteri collibuisse exposuit, metuque Romani nominis importunus exactor alienis adolescere non refugit expensis ».

14. *Anacletus pravis moribus in juventute infectus.* — Paulo post : « At vero postquam adolescentia et peccandi facultatem, et licentiam fecit liberius evagandi, si qua superbia, si qua petulantia, tum vere ipse superbus et petulans omni intemperantiæ sese satis impudenter addixit. Profecto cum in his operibus nec Deum dignatur revereri, nec hominem, tantam sibi suscitavit infamiam, ut ejus ortu, ambitione, vitæque præcognitis, ipsum esse antichristum universas gentium passim crederet, et publice testaretur. Augebat fidem, quod ex Judæis ortus, quod totius mundi dominium Romanæ Sedis auspicabatur obtentu, quod vitis deditus infamiam nulla virtute redimeret, et quod infinitam avi et patris pecuniam possessurus esset etc. Post hæc quoque habitum monachatus excepit, ut vitia mentis ovino velaret amictu, opprobria vitæ præterite Cluniacense nomen obnuberet, et virtutis existimationem bonorum societas quæsitæ referret, etc. Reversus denique Romam, illi venerabilium seniorum sacrosancto conventui, annitente patre fratribusque, conjunctus est; et cardinalis factus, honoratus nomine tituloque ditatus est. Nullus quippe fortassis ad aures summi Pontificis infamiae Petri funus ascenderat, eoque tanti viri sublimitatem singuli reverentes, sanctis auribus perturbare turpia reformidavit, etc.

15. *Legationis Apostolicæ munere pessime functus.* — « Deinde ad diversas partes functus legationis officio, cupiditati suæ potiusquam justitiæ satisfacere studuit, adeo ut illi ea tantum bonos exitus habuisse negotia viderentur, quæ merces adjecta, et marsupii plenitudo subsecuta probaret. Ubi ergo nullis intervenientibus causis, nulla rapinæ præstabatur occasio, tunc exactio blanditiis vel comminatione plena non deerat. Bina singulis diebus sumptu plurimum convivia parabantur, tantusque ciborum luxur et superfluitas erat, ut ad exquisitas ferculorum varietates sollicitari plerumque figulos oporteret, et ignotæ compositionis nova vasa formare, etc. Cumque pauperes episcopos vel abbates profusioribus, quam domi didicerat, vexasset expensis, in ipsa Ecclesiarum ornamenta satis impudenti sacrilegio grassabatur, ut plane sponsam Domini spoliare, suisque privare monilibus ausu temerario videretur.

16. *Impure et flagitiose vixit.* — « Profusa vero convivia tanta libidinum spurcilia sequebatur, ut ab ipso passim quidquid occurreret adiecerat. Sorem Tropeam (sed nec dici fas est) bestiali poluisse narratur incestu; et ex ea abominabili prodigio sustulisse filios, quos nepotes, nepotum pater, filiorum factus avunculus, sic naturæ cura confundit, ut eosdem sibi invicem fratres faceret et cognatos. Jam nec Judæus quidem, sed Judæo etiam

deterior. Nulla sexuum, nulla loci vel temporis, nulla professionum. Sed hæc silere decentius, ne si hæc ipsum indifferenter excepisse protulero, honestius potuisset silentio præteriri. Sic actum domi: nec ab eisdem legationum tempore temperatum. Ut enim turpiora præteream, circumducebatur puella, cui in fraudem viduitum adolescentis speciem vestis et tonsura conferret, quæ singulos æstus toleraret, singulos solaretur affectus. Eo gratior, et quasi quodam novitatis affectata miraculo, quod dum virum facie, reliquis mulierem partibus exhibet, uterque sexus ipsi in eodem corpore videbatur exponi. Testis est Montispessulani populus et circumjecta provincia se vidisse. At ne satietatem præstaret identitas, quærebantur et aliæ, quarum ipse nocturnis fingeretur amplexibus, quibus ipse se papam futurum in ipsa turpi commixtione jactaret. Multæ in Galliis sunt et Aquitania civitates, quæ id apud se dictum certa fide testantur ».

17. *Flagitia Gerardi Engolismensis, legati Anacleti in Gallia.* — A num. 27 ad 47. Baronius num. 46 ait, Innocentium II *Mattheum Albanensem* cardinalem legatum suum in Franciam misisse, huncque, ut scribit Petrus Cluniacensis lib. 2 Mirac. cap. 16, Galliam, Hispaniam, Angliam, Germaniam Christo univisse. Verum Petrus Venerabilis id quidem asserit, sed Mattheum legatum Apostolicum hoc anno missum non dicit. Neque legato opus erat, cum ipsemet Innocentius non multo post suam ad supremum Pontificatum electionem in Galliam venerit, uti mox narrabimus. Sed Anacletum *Girardum Engolismensem* episcopum legatum in Aquitaniam direxisse, constat ex iis quæ Baronius num. 42 et seqq. profert. Girardus Anacleti principalis instrumentum fuit. Erat ille patria Normannus, sed paterne domus inopia coactus, in Galliam venit, ubi episcopus Engolismensis electus, adeo sese male gessit, ut Arnulphus citatus cap. 1, eum alloquens scribat : « Ubi igitur tali in episcopatum sorte proventus es, insolentia, quam ante paupertas represserat, efferris cepisti; petulantia, quam privatus exercere non poteras, bonos quos libuit insectari, rapinis et exactoribus exanare provinciam, judicia sola numerum comparatione formare, commutare rerum omnium status, nobilium labeclatere fortunas, nepotibus tuis, quos natalis soli finibus eadem quæ te causa depulerat, rerum tradere summam, et dignitatibus Ecclesiæ sublimare, quasi Platonem scientia, Catonem moribus, Scipionem genere superarent. Quos illitteratos quidem et ad res illicitas impudentius effluentes, obscuro loco natura produxit, etc. Reliquis autem Ecclesiæ dignitatibus et beneficiis, quæ in unum coacervare non poteras, eisdemque conferre, qui pecuniosior, is dignior habebatur. Non attendebatur honestas, sed manus onustas potius expectabas. Basilicarum dedicationes, benedictiones altarium, sacerdotum constitutiones, eodem quo cætera more tractasti, ut plane

nilil faciendum putares, quod non alicujus emolumenti auspicio praeveniret ».

18. *Ante obitum Honorii II grassatus erat in quinque provinciis Gallie.* — Post multa interposita subdit cap. 2 : « Ad hæc autem, ut his etiam operibus exercendis diffusa materies, libera facultas, inconcussa fiducia non deesset, quasita et impetrata est Ecclesie Romanae legatio. Angebat te hinc læsæ conscientie reatus exuberans, hinc comprovincialium episcoporum nota severitas, hinc Burdegalensis archiepiscopi suspecta prælatio, quem loco confinem tua non semper opera se fecisissent. Ambitio quoque tua quasi quibusdam sibi coactata videbatur angustiis, dum fauces tuas unius episcopatus spolia non impleverent. Ac si ergo omnia in episcopatu tuo compositio plena firmasset, nihilque novi operis casus afferret, effecisti, ut quinque archiepiscopatibus singulari potestate præesses, et in ipsis vices Romani Pontificis exerceress ». Paulo post : « Ab inde igitur inconcussæ prerogativa potestatis armatus, libera in Ecclesiam facultate grassatus es, singulorum vel depopulando quidem vel augendo substantias, infinis summa, summis infina commutando, ut plane quasi fortunarum auctor existeres, ad quem de status sui qualitate vel laudare possent omnia, vel causari, etc.; quid ergo manifestas exactiones? quid familiaria ob periculum justitia suscepta dispendia dicam? quid generales Synodos, quid fatigatas venerabiles ex remota regione personas edisserant, ut Concilio præsidens generali amplitudinem tuæ potestatis gloriabundus inspiceres, et ambitioni satisfaceret contemplatio subjeclorum? in quo opere quam perversa fuerint omnia, promptum est intueri ». Hæc de Gerardo ante Honorii II obitum.

19. *Gerardus ab Anacleto in universa Gallia legatus constitutus.* — Arnulphus cap. 5, postquam retulit Innocentium II in Concilio Stampensi Pontificem Romanum agnitus fuisse, et Anacleto reiectum, ait Gerardum Engolismensem electioni Innocentii assensisse, subditque : « Quam nimirum ratione, cum in papam Innocentium inspirante Domino convenissent (sc. Ludovicus rex clerusque Gallicanus), ipsi statim de obedientia tua, et debita subiectione scripsisti : postulasti tamen ipsius honorari rescritto, et munus legationis habite confirmari : (Quare aliquot annis ante Honorii II mortem, et quo tempore is mortuus est, Gerardus legatus in Aquitania erat). Visum est simoniacum favorem tuum redimere legationis officio : et cum ipse partes illas visitare sub eodem tempore decrevisset, nullus locus poterat sub ipsius præsentia restare legato. Neque enim legatus presentis personæ, sed absentis explet obsequium. Jamque tantus ad Romanas aures male administrationis hujus clamor ascenderat, ut esset de eo quod olim imperaveras (legendum *impetraveras*) poenitentia major, quam ut modo restitueris affectus. Tulisti repulsam graviter, et mutilata potentie tuæ

cornua doliisti. Atque inferioribus antea modo factus inferior, et velut in senectute reputatus inutilis, consueti beneficii finem, rapinae ratus injuriam, temerarie succensus es ultionis affectu, etc. Spreto igitur eo quod recte susceperas, et indiscrete conversus ad aliud, temerarie prioribus contraria concepisti; factumque est, quod in rebus sæpe contigit humanis, ut circa rem propensius affectatam, spem præcipitem desideria concepta firmarent. Misisti legatum Romam, qui eidem quem jam deveneras Petro favorem tuum venalem, pro munere legationis offerret, et similem sibi ministrum Domino fœderaret. Expletum est sine difficultate commercium, et dum te cecitas indiscreta conducit, ministrum te schismatis addixisti, ut inutili Privilegio donareris. Formata est tibi, sed inanis nova legatio, et quidquid ab Alpibus usque ad fines Occidentis interjacet, tue ditioni, sed inefficaci donatione subjectum est. Et ne excedenti ambitioni tuæ fortassis angustior prædictorum finium præscriptio videretur, adjectum est, ut ubicumque calcaret pes tuus, ibi esset legatio tua ».

20. *Episcopos et abbates deponit.* — Gerardus ergo Engolismensis, prælensa sua legatione, totam perturbavit Aquitaniam; nam cum quosdam episcopos sibi resistentes, a propriis sedibus deturbare præsumpsisset, ceteri ad primatem suum *Vulgrinum* Bituricensem archiepiscopum, tanquam ad asylum, confugiendum decrevere. In patriarcho Bituricensi tom. II Biblioth. Labbei cap. 62, recitantur aliquæ Epistolæ ad eundem archiepiscopum datæ, quibus Annales Ecclesiastici illustrari possunt. Nullus quidem temporis character in iis notatur, sed quæ in illis narrantur, lucem affundunt iis quæ mox ex Arnulpho producemus. *Willelmus* Santonensis episcopus litteris suis Vulgrinum monet, Gerardum Engolismensem Ecclesiam Dei in partibus suis adeo perturbasse, ut jam quaratur inter eos, cujus quis professionis sit : « Et quia ipsius prave persuasioni, inquit, nos et comprovinciales episcopi assentire volebamus, Pictavensem (nempe Guillelmum Adelelmum, ut videre est in Gallia Christiana) et *Lemovicensem* (nempe Eustorgium, in cujus locum Gerardus Doratensem abbatem Rainulfum consecravit episcopum, ut in eadem Gallia Christiana ex Chronico Vosiensi refertur) fretus auxilio principis nostri (sc. Wilhelmi IX, comitis Pictaviensis) a sedibus suis expulit, et alios intrusit. Sed quia non habere poterat episcopos, non consecravit illos. Abbatem quoque Angeriensem in nostra diœcesi existentem, a monasterio suo per manum comitis eiecit. Inter nos etiam principemque nostrum tantam seminavit discordiam, pro eo quod intrusos suos consecrare, imo execrare volebamus, quod et nos et canonici nostri a sede nostra, et ab urbe et Ecclesia ob metum et minas principis egressi sumus ». Quando Guillelmus Santonensis episcopus, eas litteras scripsit, *Rainulfus* et *Petrus de Castellagrout*, qui in locum Eustorgii Lemovicensis, et

Guillelmi Adelelmi intrusi fuerant, nondum consecrati erant, sed utrumque postea ordinatum esse episcopum, docet Gaufridus prior Vosiensis in Chron. pag. 301, ubi singularia de utroque intruso habet.

21. *Mensibus aliquot recluditur in carcere.* — Deinde subiungit Guillelmus sceleratum istum præcursorem antichristi, cum quadam die per episcopatum Santonensem transisset, ab Aimaro de Archiaco milite strenuo captum fuisse, et captum modo teneri : « Cuius captio, inquit, Ecclesie nostræ, et omni populo gaudium est et exultatio quam maxima ». Eundem primatui regal, ut litteras transmittat ad Burdegalensem Ecclesiam, *quæ eum in archiepiscopum sibi elegit*, ad episcopos Agennensem, Petragoricensem, Pictaviensem, Lemovicensem et ad se, quibus inhibeat, ne ullus ei honor exhibeat, iubeatque, ut episcopi omnes eum excommunicent; annulet ejus electionem in archiepiscopum Burdegalensem, ipsumque perpetuo deponat. Illis qui *Girardum* ceperunt, gratiam et absolutionem suam impartiunt, et Ausciensi archiepiscopo, et Burdegalensi Ecclesie, et eorum suffraganeis præcipiat ut publice eos excommunicent, « qui duci Aquitanie auxilium impenderint, donec in hac Ecclesia Dei perturbatione permanserit ». Coepiscopis quoque suis præcipiat, ut Aimaro de Archiaco pecunia, auxiliisque aliis subveniant, ut se defendere possit adversum principem suum, scilicet ducem Aquitanie, et Engolismensem comitem, *qui pro deliberando Girardo ei minatur*. Recitatur etiam ibidem Epistola G. *Petragoricensis Ecclesie episcopi* Vulgrino data, qua eum precatur, ut semper eum tueatur, nec de proposita obedientia sine illis aliquid permulet, id est, sine episcopis provincialibus, ubique obtinent litteras a Francorum rege, quibus tuitionem suam promittat omnibus Burdegalensis archiepiscopatus suffraganeis. Episcopus ille Petragoricensis erat *Guillelmus de Naucard*, factione Aquitanie ducis episcopatu pulsus, ad quem aliosve antistites Aquitanie scripsit sanctus Bernardus Epistolam cxxvi, cujus partem Baronius a num. 62 ad 65 recitat, aliamque num. 7.

22. *In archiepiscopum Burdegalensem sese intrudit.* — Scripsit et ad Vulgrinum abbatem suum *Guillelmus Adelelmus* episcopus Pictaviensis, quem Bernardus Bonavallis lib. 2, c. 6 Vitæ sancti Bernardi tradit, et a *Girardo*, et *cardinale adjutore suo*, *quin Petrum abdicabat*, damnatum fuisse. Postulat Willelmus nomine suffraganeorum Burdegalensis Ecclesie, suoque, ut *Gerardum* Engolismensem excommunicatum reexcommunicet, omnesque ejus fautores. Vulgrinus vero primas Ecclesiarum Aquitanicarum scribit Agennesi, Pictavensi, Petragoricensi, Santonensi episcopis, et clero populoque Burdegalensis provincie, hortaturque, ut *minas principum, damna possessionum, vexationes corporum* contemnant : improbat electionem quam de Gerardo jam excommunicato Burdegalenses

clerici fecerunt, atque Gerardum a fructibus suis modo cognosci; « cum antistites Lemovicensem et Pictavensem catholicæ et canonice ordinatos, a sedibus suis indecenter expulerit ». Denique scribit ad episcopos Burdegalensis Ecclesie suffraganeos, lectaturque separatim esse tribulationibus eorum compati, atque nullam subjectionem debere illi, « quem Catholica Ecclesia in Rhemensi Concilio pro schismate damnavit », ideoque ea Epistola post hunc annum data.

23. *Guillelmi IX Aquitanie principis potentia abutitur.* — Arnulphus loco citato cap. 7, Gerardum Engolismensem alloquens in eandem rem habet : « Dum unicuique tibi propositum, unicus urgendi (pro urgendi) labor, unica laboris perseverantia constat, torrentes impetus tuos prævertit modica vis divina, primumque de inefficacia speratæ potestatis argumentum accessit, in ligationem versa legatio. Captus es, et mensibus aliquot reclusus in carcere, donec quos gratia prædestinaverat, plena veritatis agnitione confirmasset, et qui prius de rescripta tibi legatione speraverant, de ligatione postea desperarent. Reserato autem carcere processisti quasi pardus e cavea, cujus rabie carcere diutius et catenis inhibita, si forte liber evaserit, insurgit audacior, nec eum ulla potest sanguinis effusio satiare ». Paulo infra : « Pictaviensis ac Lemovicensis Ecclesie, comitis viribus abutendo, Catholicos ejecisti Pontifices, alios extraordinarie superponens; quorum alterum minus vita probabilem, et nullarum hominum litterarum, et in vulgari etiam sermone fere prorsus elinguem, Romana Ecclesia ab ejusdem Pictaviensis Ecclesie regimine reprobatur, olim canonica decisione removerat, etc. Alter vero nec seculari præditus, nec scientia litterarum famosus, apud omnes adulter, etc. »

24. *Pictavienses et Lemovicenses aspernantur episcopos ab eo intrusos.* — Post aliqua interposita : « Tertia pars Pictaviensis episcopatus, quem posuistis non agnoscit episcopum, eique totus fere nobilium numerus respuit obedire. Adeoque omni conscientia reprobatus abjicitur, ut et frater ejus naturalis excommunicatum ex hoc ipso iudicet, nec ulla ei communione jungatur. Catholicus vero usque ad portas civitatis plena potestate dominatur episcopus, et eum majores persone pontificalis Ecclesie comitantur, ad formam beati Petri relictis omnibus exilium proscutit. Alii fornices civitatis inhabitant, qui super ollas carnum recumbentes, gentis et loci potius quam animæ perditione terrentur. At Lemovicensis ab urbe sua stadio uno vix interjacente remotus, castrum Sancti-Martialis pro foribus urbis inhabitat; unde is qui sedem sibi cathedra pontificalis usurpat, singulis diebus audire possit campanas in sua excommunicatione sonantes. Te quoque pastorem suum Engolismensis patria minime proficitur ubique, sed et ibi multi Catholice partis nomine gloriantur. Distuli circa extremitates orationis hujus de usurpatione Burde-

galensis archiepiscopus apponere, ut ex hoc illa effrenis ambitio tua irrefragabili liqueat argumento. Engolismensis Ecclesie copulatus spirituali connubio tenebaris, impudens tamen dominandi libido contemplatione prænominatæ dignitatis incanduit; et dum descendendum jam rerum tuarum detrimenta non sustines, ad compensationem frustrate legationis in amplexum quasi ditioris adulatione prorupisti; filie sponsus incestu matrem nefario polluere non abhorres, et monstrum biceps, infaustum sæculo prodigium non renuis apparere, etc. » San-Marthani in archiep. Burdegal. scribunt, usque ad annum mxxvi mentionem occurrere *Arnaldi Guirardi* archiepiscopi Burdgalensis, et postea anno mxxvii, *Goufredi de Oratorio*. Quare Arnaldo, dum *Gerardus* prætersam suam legationem exerceret, demortuo, is archiepiscopatum invasit.

25. *Alia Gerardi Engolismensis episc. flagitia.* — Sed non tantum Arnulphus Gerardum episcopum Engolismensem nefarie sese in sua legatione gessisse scribit; verumetiam Goffridus Vindocinensis abbas in Epistola xxi, « Gerardo glorioso Engolismensis episcopo, Apostolicæ Sedis legato », ut præfert titulus, data, ideoque ante hæc tempora, literis mandavit: « Nos quod audivimus », inquit Goffridus, « unde etiam, quod pejus est, cantilenam composuit vulgus, quoniam publicatum est, vobis occultare, nec possumus, nec debemus. Audivimus itaque, el dolenus Andreæ de Vitreo filie sue vobis conjugium vendidisse: illud etiam a vobis filium vicecomitis de Maloleone comparasse; quorum alter quingentos solidos vobis pretium dedit conjugii; alter vero quindecim marcas argenti. Hoc episcopus Pictaviensis et Guillelmus archidiaconus ejus, et quidam alii qui affuerunt, si veritatem sepelire noluerint, non negabunt. Carofensem abbatem non regulariter electum, sed violenter, ut dicitur, intrusum, pro mille solidis barbariorum, barbara nimis auctoritate consecrari, imo, si verum est, execrari fecistis; nolente suo consecratore, et ejus clero modis quibus poterat reclamante, et qui vidit et partem habuit, abbas quidam vester vicinus testimonium perhibuit, et multi dicunt ejus testimonium verum esse ». Post aliquas alias rapacitates, subdit: « Illud itaque quod contra comitem Andegavensem egistis, esset satis, sentio, supprimendum; sed occultari minime potuit, quod multis populis extitit divulgatum. Asserunt quidam vos quasi Balaam alterum, regis Anglici pecunia fuisse corruptum, et ideoque injustam in prædictum comitem excommunicationis protulisse sententiam. Et licet excommunicationis vestra vires etiam unius diei habere non potuerit, amicis tamen Romanæ Ecclesie peperit verendum, et ejus inimicis detrachendi dedit materiam. Hoc solum remedium fuit, quod dominus papa excommunicationem illam confirmare sapienter vitavit: et sic ora clausit detrachendum: et quod a vobis seminatum fuerat, Apostolicæ Se-

dis delevit opprobrium ». Prætereo alia, sed hæc verba præterire non debeo: « Hæc pauca de multis, modica de magnis vobis significavimus, dilectionis videlicet causa; ut si vera sunt, quæ contra vestram astutiam ventilantur, præteritorum transgressio fiat vobis futurorum cautela.

26. *Anacletus frustra conatur principes ad suas partes pertrahere.* — Anacletus Ottonem episcopum Tudertinum legatum in Galliam misit, instructum litteris ad *Ludovicum* Galliarum regem ejusque uxorem, et ad *Henricum* Angliæ regem datis, cum aliis ad quosdam Gallie episcopos et principes viros scriptis, ut eosdem ad se traheret. Scripsit et ob eandem causam ad *Lotharium II* imperatorem et ad imperatricem, sed omnis ejus conatus irritus fuit, ut videre est apud Baronium num. 16 et seqq. Verum quidem est, Epistolam ab eo num. 33 relata, sine titulo haberi in Casinensi Codice, sed ut observat Alfordus in *Annal.* hoc anno num. 5, cum eæ *Romæ* datæ sint *apud Sanctum-Petrum kalendis Maii*, sicut litteræ Ludovico Francorum regi per Ottonem legatum missæ, ad alium regem scriptæ non sunt, quam ad *Henricum*: cum enim in eis *regni* sit mentio, ad regem scribi debuere; cumque etiam rex ille inter Galliarum principes numeretur, conjectura hæc certa videtur, quia Normanniæ ducatum, Cenomanniæ comitatum et affinitate plures alias in Gallia provincias, sub imperio suo *Henricus* Angliæ rex habebat.

27. *Anacletus frustra conatur principes ad suas partes pertrahere.* — Baronius a num. 38 ad 41, refert ex Codice Vaticano *rotulum* ad urbem Leodiensem, fieri preces pro obitu ejusdam *Hervei* abbatis, eaque occasione *Reimbaldus* loquitur de Anacletianis et Innocentianis, monetque præcipiandum non esse judicium, neque ante tempus judicandum. Inde reprehendit monachos *Chauvæenses*, quos dicit præpropere Innocentii causam amplexos esse. Baronius existima, hunc *Reimbaldum* fuisse episcopum Leodiceusem; verum certum est *Alexandrum* hoc tempore Ecclesie Leodiensi præfuisse, ut videre est apud *Chapeavillum* tom. II *Hist. de Gestis Pontificum Leodiensium*, et apud San-Marthanos tom. II Gallie Christ. Præterea *Reimbaldus*, ait: *Ego Reimbaldus perlecto*, etc. ideoque episcopus non erat, sed vel monachus, vel forte præpositus aut decanus alienjus Ecclesie. Porro *rotuli* nomine intelligenda Charta in speciem rotulæ seu rote convoluta, vel etiam Epistola, ut videre est in *Glossario Ducangii* in voce *rotulus*. Postquam hæc scripseram, legi in tomo I *Anaclet.* pag. 348, *Reimbaldum* canonicum Leodiensem duas Epistolas direxisse Waschino priori monasterii Sancti-Laurentii in suburbio Leodiense, quas ibidem *Maillontius* dicit se vidisse in *Alnensi Codice Ms.* in eoque contineri tractatum *Reimbaldi canonici Ecclesie S. Mariæ et S. Lamberti de Vita Canonica*. Quare non dubito, quin is *Reimbaldus* ille sit, de quo hic agitur. Fuit *Reimbaldus* « Ecclesiasticæ disciplinæ studio insignis », inquit Bartho-

Iomæus Fissenus in Floribus Leodiensibus, qui ait eum obisse anno MCXLVII.

28. *Scoti Anacleto adhærent.* — Cæterum Davidem Scotiæ regem antipapæ partibus adhæsisse eruo ex Wulgrino archiep. Bituricensi et primæ Ecclesiarum Aquitanix, qui postquam accepit clericos Burdegalenses Gerardum Engolismensem archiepiscopum Burdegalensem elegisse, ad episcopos Burdegalensis Ecclesiæ suffraganeos litteras in Patriarchio Bituricensi cap. 63 recitatas scripsit, quibus eos hortans, ut ab obedientia Innocentii II sese dimoveri non patiantur, ait: « In hac unitate permanet dominus rex Francorum, similiter et rex Anglorum, rex Alemannorum, rex Hispanorum et rex Hierosolymorum, duces ac principes fere totius orbis terrarum ». Ubi cum Henrici Angliæ regis mentionem faciat, et Davidis Scotiæ regis nomen taceat, clare indicat hunc Anacleti partes secutum esse, et vere Richardum priorem Hagustaldensem, cuius verba an. MCXXXVIII, num. 12 referemus, scripsisse Davidem Scotiæ regem Anacleti apostasie nimium favisse. Sed cum optimus princeps extiterit, eum pravis consiliis seductum fuisse oportet.

29. *Rogerus coronatur rex Siciliæ.* — A num. 34 ad 56. Initium regni Siciliæ cum hoc Christi anno Baronius accurate connexit; sed quia res hæc magni momenti, magis hic nobis elucidanda. Recentes rerum Sicularum et Neapolitanarum scriptores contendunt, Rogerium bis coronatum fuisse, semel anno superiori post Neapolim *idibus Maii* captam, iterumque hoc anno *die Natali Christi*. At cum velint utramque coronationem Panormi factam fuisse, invicte inde refelluntur; Alexander enim Cellesinus abbas testatur verno tempore superioris Christi anni Rogerium Pharam trajecisse, varieque bella in Apulia gessisse. Quare ibi, non vero Panormi, mensibus Aprilis et Maii eum versatum esse oportet. Peregrinus in Notis ad Falconem ait, « Historicis istos contendere Rogerium proprio arbitrio persuasum regia corona aptud Panormum redimilum fuisse per manum quatuor archiepiscoporum, etc. qui ejus narrationis auctorem se habere contestantur ineditum Chronicon compositum a Maraldo nec dicunt quantæ antiquitatis monachi Carthusiani; quibus facile assentiri non possum, tacentibus omnibus antiquis, et præcipue Alexandro Cellesino, qui Rogerii benevolus et familiaris, coronationem ejus summo sumptu hominumque omnis conditionis frequentia, in Dominicis Natalibus (ac perinde in exitu anni MCCC antipapæ Anacleti auctoritate actam, et a Falcone descriptam) litteris consignat; haud antecedentem, vel in ipsius Rogerii gratiam, siluisset; nec pompa, nec antistitum, procerumque minori conventu, quin nullo tunc in Romana Ecclesia vigente, sed Honorio sedente, Rogerii eo temporis momento amicissimo celebratam ». Ita Peregrinus. Profecto Honorius II, qui vix adduci poterat, ut ducis titulum ei adtri-

bueret, otium non tenuisset, si Rogerium regem sese appellasse audisset, et Rogerius, qui mense Augusto antecedentis anni Honorio II auxilium promisit, in colloquio tunc inter utrumque habito regiæ dignitatis confirmationem ab eo sine dubio petiisset.

30. *Duplex ejus coronatio fictitia.* — Id de Honorio II eo magis presumendum, quo constat, Rogerium, postquam hoc anno a Comite cardinale, Anacleti antipapæ legato, corona regia donatus est, non Siciliæ tantum, sed et Italiæ regem sese dixisse. Rogerium vero hoc anno regem acclamatum, præter Falconem Beneventanum et Alexandrum abbatem, produnt Joannes de Ceccano in Chron., Ordericus lib. 43, pag. 893, et auctor Chronici Casauriensis. Sed antea ducis tantum nomen sibi adscripsisse innuunt Falco et Alexander abbas a nobis laudati, et ex utroque refellitur Chronicon Maraldi, cui nimis leviter fidem adhibere Fasellus lib. 7 posterioris Decadis, pag. 406, et Ducangius in Notis ad Historiam Cinnami, p. 446. Rochus Pyrrhus tom. 1 Siciliæ Sacræ citat hoc Chronicon Ms. « apud Ecclesiam Sancti-Stephani de Bosco Calabria, quæ olim Eremitus vocabatur »; additque autographum tunc asservatum fuisse apud Camillum Tutinam Neapolitanum. In eo Chronico legitur: « Vila functo Honorio Pontifice, in pastorem universalem fuit adlectus Gregorius diaconus cardinalis, dictus Innocentius II, qui noluit hanc coronationem Pontificio confirmare Diplomate: et quoniam adversus Innocentium Petrus cardinalis schismate fuit in Pontificem creatus, dictus Anacletus II, Rogerius ab hoc fuit Privilegio confirmatus ». Et tamen Rogerium hoc anno hujusmodi confirmationem ab Innocentio II postulas- se, ex eo falsum esse convincitur, quod Rogerius per aliquot annos Innocentium II pro antipapa habuerit.

31. *Ea fabula magis refutata.* — Chronographus Carthusianus et Fasellus de duplici coronatione Rogerii mentionem non faciunt, nec recentiores auctores jurat, quod Alexander de inauguratione Rogerii Panormi facta verba faciens, nec consensus Anacleti, nec presentia ejus legati meminerit, unde inferunt eum respicere ad coronationem anno superiori factam. Alexander enim, ut ipsemet in Præfatione, alibi lectores suos monet, varias circumstantias omittit, neque illius qui Rogerium coronavit nomen memorat, sed tantum diserte refert inaugurationem a se narratam Panormi in die *Dominici Natalis* factam fuisse. Quare non de coronatione *idibus Maii* a Maraldo et Fasello relata sermonem habet, sed de coronatione in die natali Domini a cardinali de Comitibus pe- racta, ut narrat Falco apud Baronium num. 53.

Ita luensque scripseram, at sententiam mutare cogor, nam Rogerium anno MCXXXIX *idibus Maii* in civitate Panormi Siciliæ regem fuisse coronatum certo discimus ex brevi Historia liberationis Messinæ factæ a Rogerio comite, quam edidit Baluzius

tomo vi Miscell. in ea enim extat Privilegium Mesanensibus concessum, quod sic incipit: « In nomine Dei aeterni et Salvatoris nostri Jesu Christi. Amen. Rogerius, divina favente clementia, primus rex Siciliae, ducatus Apuliae, et principatus Capuae ». Sic vero desinit: « Datum est hoc exemplar originale de nostri mandato..... in urbe Panormi felici, in solemnitate nostrae coronationis, die quintodecimo Maii, sub anno incarnati Verbi mcccix, astantibus reverendis domino Rogerio Beneventano, Joanne Salernitano, et Philippo Capuano praesulibus ».

32. *Universi proceres decernunt ut Rogerius in regem promoveatur.* — Porro universa illa Italiae pars ab Anacleto partibus stabat. Ut enim Falco scribit: « Eodem anno ipse Anacletus consecravit Romae praedictum Landulphum archiepiscopum », nempe Beneventanum, refertque Anacletum Roberto Capuano principe adjutum Beneventanos sibi subjecisse; « eorum communitatem fregit », inquit Falco; quod exeunte hoc anno, vel sequentis initio ante mensem Martium contigit; quo etiam tempore Rogerius, ut habet Falco, « exercitu magno comprehendit Analphiam ». Quoad civitatem Neapolitanam ea sese jam Rogerio subdiderat, et Alexander abbas catalogum texens urbium, principum, et magnatum qui anno superiori Rogerii dominium agnoverunt, nullam in primo suo libro de Neapolitana urbe mentionem facit. Existimandum tamen Roberti Capuae principis caeteris potentioris, qui exeunte antecessenti anno sese Rogerio submiserat, praefectum Neapolitanum exemplum secutum esse. Alexander enim libri secundi initio haec prodit: « Cum Rogerius totas Boamundi terras, omnemque ducatum in integrum potentissime obtinere videretur, necnon Capuanorum princeps, magisterque militum Neapolitanus, omnisque terra, quae erat usque pene fines Anconitanæ urbis, bellorum cunctis contrarietatibus sopitis, subderentur, sepiissime sibi ac familiari quorundam, maxime Henrici comitis avunculi sui, a quo plus aliis diligebatur, cepit suggeri, collocutione videlicet, ut ipse qui tot provinciis Siciliae, Calabriae, Apuliae, caeterisque regionibus, quæ pene Romam usque habentur, dominabatur, nequaquam uti ducalis, sed regis illustrissimi culminis honore deberet ». Quam in rem Salerni comitia coegit, ubi magnates « unanimiter concedunt, decernunt, imo magnopere precibus insistent, ut Rogerius dux in regiam dignitatem apud Panormum Siciliae metropolim promoveri debeat, etc. Istorum itaque dux consilii roboratus Siciliam repetit, mandans, etc. » Suam ergo coronationem cum consensu principum, magnatum, baronum et praetorum, inconsulto Romano Pontifice, decrevit.

33. *Rogerius se Siciliae et Italiae regem appellat.* — Denique Alexander Celestinus nullam in sua Historia Anacleti mentionem fecit, ut ostenderet Rogerium regiam dignitatem fortitudini suæ et vassallorum benevolentiae debere, cum ab eis rex

declaratus fuerit, antequam *Anacletus V* kalendas Octob. Rescriptum a Baronio num. 52 relatum emisisset. *Rogerius* non tantum Siciliae, sed et Italiae regem se appellavit, ut ostendunt ejus Diplomata ab Ughello in archiepiscopis Salernitanis, Brunusinis, et Beneventanis relata, et an. mcccxi et mcccxvii data, quorum hoc initium: « Ego Rogerius D. G. Siciliae et Italiae rex, Christianorum adjutor et clypens, Rogerii Primi comitis filius ». Cinnamus, qui Baronii tempore lucem non viderat, initio libri tertii de Rogerio primo comite, et postea rege verba facit, et Ordericum quem etiam Baronius non viderat, lib. 13, pag. 893, de Rogerio duce Apuliae, rege Siciliae consecrato ab Anacleto, ait, « ejus opo pene totam Italiam sibi associavit », scilicet Anacletus. Sed reliquis fere totus orbis Catholicus Innocentio II adhaesit.

34. *Concilium Stampense.* — A num. 56 ad 65. Innocentius II paulo post suam electionem Pisas venit, ubi majorem currentis anni partem moratus est. Antequam in Galliam veniret, in eam premisit nuntios, qui Gallicanæ Ecclesiae rei gestae veritatem aperirent, et hortarentur episcopos, ut partem schismaticam damnarent, uti narrat Baronius ex Bernardo seu Ernardo abbate in Vita S. Bernardi lib. 2, cap. 1. Arnulphus vero cap. 5, Gerardum Engolismensem de more alloquens hac de re habet: « Nuntiatio in Galliis schismate, dum pro partibus vario favore multi multa loquuntur, fidelisque populus incipiti raptator errore, primus regum Catholicorum princeps rex Francorum Ludovicus occurrit. Is vocatis episcopis et omnibus qui probate religionis in Galliis habebantur, convocato etiam clero, regnique majoribus, Concilium statuit generale (apud Stampas, oppidum Lutetiam inter et Aurelianum situm). Cumque se Petro Leonis ob sua et patris obsequia faleretur obnoxium, nihil tamen super hoc celsitudini regiae voluit arrogare. Episcopis et patribus, qui ex monastica religione convenerant, omni tradita potestate, ut eis et in eos omni diffinitio conferretur; eo quod penes sanctos episcopos Ecclesie dispensatio tota consistit; et abbates, quos divinitatis contemplatio recreat, divina latere consilia non creditur. Cui Concilio quoniam interesse, Girarde, non poteras, cum litteris tue deformitatis imagine consignatis nuntium destinasti. Utramque te novisse personam, et electionis ordinem plenius exquisisse, proculdubio cum Innocentio papa stare iustitiam, eo quod plane vir esset honestatus egregie; et ipsius electio prima tempore, et a praeceptis Romanæ Ecclesiae fuerat celebrata personis. Porro Petrum per opulentam manum Cathedram posterius usurpasse, virum adeo vita reprobatum et nomine, ut si ipsum etiam quolibet electionis forma defenderet, promovere tamen vite qualitas et infamia minime sustineret. Id tibi et tuae largitioni subjectis ratum fore; idque cum Lugdunensem, tum Viennensem Ecclesiam, tum totam fere Italiam ab ipsis urbis mœnibus excepiisse.

35. *In eo Anacletus rejectus.* — « Aderant autem ibidem venerabiles, quæ Romæ fuerant sub eadem tempestate personæ, quæ rerum seriem plane cognoverant, præsertim quæ oculata fide singula percepissent. Habebantur quoque super hoc ipso et aliarum quæ non aderant ultro delegata testimonia : simul et persuasiones personarum, quas spiritum Dei habere certa fides esset, cum tot hominum sensus in eandem forte confluerent voluntatem. Sicut enim una bonorum fides est, sic et spiritus unus : malorum vero spiritus multiplex et voluntas ambigua. Tandem ergo favore divinitatis multis lacrymis implorato, dum utriusque personæ merita et prosequenda partes studia conferuntur, inventus est Petrus indignior adeo, ut ex ipsius comparatione alteri personæ irrogari gravis injuria videretur. Studia vero partium tanta dividebat imparitas, ut Petro nondum extra Urbis mœnia quisquam favor, alterum infra Urbem quidem pars potius elegisset, et extra Urbem usque ad fines terræ tota jam fere Patrem confiteretur Ecclesia. Sumpta igitur ex Magni Leonis papæ decreto sententia, ubi se partium vota dividerant, visus est illis jure canonico præferendus is, qui majoribus studiis juvabatur et meritis. Qua nimirum ratione cum in papam Innocentium inspirante Domino convenissent, ipsi statim de obedientia tua, et debita subjectione scripsisti ». Hujus Concilii epocha a nullo veterum notata, sed illud ante initium mensis Maii celebratum videtur.

36. *Adventus Innocentii II PP. in Galliam.* — Ex Innocentii II in urbem Claromontensem accessu, de quo mox, colligo eum ante mensem Novembrem, et ex statim dicendis paulo ante mensem Augustum in has partes pervenisse. Ernaldus abbas Bonævallii in agro Carnotensi lib. 2 de Vita sancti Bernardi abbatis cap. 1, ait : « Interea dominus papa multis in Pisis et in Tuscia, et in aliis provinciis potestative dispositis, valefaciens Pisanis, et gratias agens, in provinciam navigio delatus est, et Burgundiam transiens Aurelianum pervenit : ubi occurrentibus episcopis, a rege piissimo Francorum Ludovico alacriter et honorifice susceptus est. Inde a Gaufrido Carnotensi episcopo, magnarum virtutum viro, Carnotum deducitur ». Acta vero antiqua a Baronio num. 36 relata habent : « Iterum mare intravit, et per Genuam transiens, ad S. Ægidium prospere applicuit. Pergens autem per Vivarium et Anicium, Alvernæ fines intravit, et apud Claromontem primum Concilium celebravit ». Petrus Venerabilis lib. 2 de Mirac. cap. 16 : « Ad Gallias venit. Ubi primum ab eodem domino papa Innocentio Cluniacensi nova et majori consecrata Ecclesia, ac gemino Concilio, alio Claromonti, alio Rhemis celebrato, etc. » Ordericus lib. 13, pag. 895 : « Gregorius (id est, Innocentius II), ante Pontificatum Gregorius appellatus) cum Quirinali clero Gallias expetit, primoque ab Arclatensibus susceptus, legatos inde Francis direxit. Porro Cluniacenses, ut ejus adventum cognoverunt, xvi

equos sen mulos cum omni apparatu congruo papæ et cardinalibus clericis destinaverunt, et usque ad suam Basilicam favorabiliter conduxerunt. Tunc ibidem xi diebus papam cum suis detinuerunt, Ecclesiamque novam in honore S. Petri Apostolorum principis ab eodem cum ingenti tripudio populique frequentia dedicari fecerunt ». Anselmus Gemblacensis in Chron. ad an. mcccc : « Emenso mari, tandem apud S. Ægidium appulit. Postea venit in Burgundiam, et a Cluniaco excipitur ». Denique Sugerius in Vita Ludovici VI : « Cum et susceptionis et servitii primitias Cluniaci per nos ei delegasset (sc. Ludovicus rex), tanto exhilarati suffragio, cum gratia et benedictione domino regi per nos gratias referentes, ad propria remiserunt. Il autem usque S. Benedictum super Ligerim descendit (id est, usque Floriacum prope Aurelianum situm) dominus rex cum regina et filiis ei occurrentes, nobilem et diademate sæpius coronatum verticem tanquam ad sepulchrum Petri inclinans, pedibus ejus procumbit, etc. »

37. *Consecrat Ecclesiam Cluniacensem.* — Cum mensis et fere dies, quibus Urbanus II majus altare Ecclesiæ Cluniacensis, dum in Galliis esset, consecravit, a nobis detecti fuerint, ut anno mxcv jam diximus, in detegendis mense et die, quibus Innocentius II Ecclesiam Cluniacensem dicavit, et in explicandis quæ de hac protectione Gallica Innocentii II a variis scriptoribus tradita sunt, minus cæcitiemus. Ipsemet enim Innocentius II in Diplomate Valentini VIII idus Martii anno mccccii dato, et in Biblioth. Cluniac. pag. 4381 recitato, ait : « Nos monasterium ipsum, quod specialiter ad jus B. Petri, et S. Rom. spectat Ecclesiæ, per nos ipsos visitavimus. Et eodem die, quo revolutis multorum annorum spatii, prædecessor noster felix memorie papa Urbanus ibidem majus altare consecraverat, cum archiepiscopo et episcopis, qui nobiscum convenerant, cooperante Spiritus sancti gratia, idem monasterium solemniter dedicavimus », ideoque XV kalend. Novemb. seu die xviii Octob. aut aliquo ex vicinioribus, quo alias Urbanus II majus altare consecraverat. Baronius in Addendis et Corrigendis ad annum mccccii, refert aliud Innocentii II Diploma, in quo idem legitur ac in mox laudato, de consecratione monasterii Cluniacensis. Verum hallucinatur cardinalis eruditissimus, dum eam ad præfatum annum revocat, cum illius anni initio *Innocentius II* iter in Italiam direxerit, ut ibidem videbimus. Neque ea etiam in annum mcccci differri potest : cum toto fere mense Octobri ante Suessionem ad Rheinis Pontifex versatus fuerit. Quare nonnisi mense Octobri præsentis Christi anni Innocentius II Ecclesiam Cluniacensem dedicavit, et quidem paulo post suum in Galliam adventum, et ante Concilii Claromontani celebrationem, ut mox ex Petro Venerabili insinuavimus. Perperam itaque in Chron. Cluniacensi pag. 4639 et alibi scriptum, Ecclesiam Cluniacensem anno mcccci dedicatam esse ; quem

tamen errorem in lucem proferre non potuissem, nisi antea tempus, quo Urbanus II majus altare ejusdem Ecclesiae dicavit, e tenebris eruissem.

38. *Concilium Claromontanum celebrat.* — Antequam Ludovicus rex ad Innocentium II venisset, Concilium Claromontanum in Alvernia celebrat. De eo Bernardus Guidonis in libello de Conciliis scribit : « Anno Dom. mxxx, Indict. viii, mense Novembri, apud Claromontem, presidente ibidem Innocentio papa II, cum cardinalibus et archiepiscopis et episcopis et religiosis viris, cum multitudine sapientum et litteratorum virorum, celebrata est Synodus, in qua de fide Catholica et animarum edificatione, ac morum honestate, et malorum eradicatione tractatum est, et obedientia eidem papae Innocentio adstanti ab universis est gratanter promissa. In eadem quoque Synodo concessum est Privilegium clericis, quod habetur in Decretis xvi, q. 4 cap. Si quis suadente ». Ita Bernardus. Otto Frisingensis lib. 7 cap. 48 de hoc Concilio habet : « In civitate apud Claromontem Concilium celebrans (sc. Innocentius II) nuntios Lotharii (imperatoris) Conradum Juvavensem, Eriherum Monasteriensem episcopos, obvios habuit ». Denique in Appendice ad Marcum Hispanicam num. 380 refertur confirmatio Privilegiorum monasterii Cuxanensis ab Innocentio II facta cum hac subscriptione : « Dat. apud Claromontem, etc. IV kal. Decembr., Indict. viii, Incarnat. Dom. anno mxxx, Pontific. vero domini Innocentii II papae primo », sed cum in bulla nulla sit mentio Concilii, post illud celebratum datam puto. Sigonius lib. 11 de reg. Ital. Concilium *per Decembrem mensem* habitum perperam scribit.

39. *Concil. Anicii habitum.* — Per urbem quidem Aniciensem transivit *Innocentius II*, ut mox vidimus, sed cum Petrus Venerabilis supra citatus asserat, cum genium Concilium, nempe Claromontense et Rhemense congregasse, manifestum est, Innocentium II non praefuisse Aniciensi, cujus meminit Guigo hujus temporis scriptor in Vita sancti Hugonis Gratianopolitani episcopi, qui praesentiam papae non tacuisset, qui tamen tantum ait : « Morbis licet, et aetate consumptus (sc. S. Hugo), zelo tamen domus Dei cujus diligebat decorem, perrexit Anicium, ut eundem cum aliis episcopis excommunicaret schismaticum », nempe Anacleum antipapam.

40. *Innocentius II a regibus Franciae et Angliae salutatur.* — *Innocentius II* ante Concilium Claromontanum per Provinciam in Burgundiam delatus jam *Cluniacum* attigerat, et Majorem Ecclesiam celeberrimi hujus per haec tempora monasterii dedicarat, ut ex dictis num. 36 et seq. intelligitur. Eum *Ludovicus* Franciae rex cum *Philippo* filio, rege designato, apud Floriacense conobium septem leucis ab Aurelia urbe dissitum honorificentissime excepit, cumque, ut Christi et Petri vicarium laetus et hilaris veneratus est. Paulo post Ordericus loco citato scribit : « Apud Carnotum Henricus rex An-

glorum ad pedes ejus humiliter corruit, illique reverentiam papae debitam idus Januarii sponte exhibuit ». Haec urbs xviii circiter leucis Gallicis ab Aurelianensis distat.

41. *Gerardus Engolism. regem Angliae in favorem antipapae sollicitat.* — De Henrico Angliae rege Arnulphus Gerardum Engolismensem alloquens cap. 6 scribit : « De circumveniendo rege Anglorum Henrico praecipue laborabas ; et quia cauteriatam conscientiam habens, principi Catholico et sapienti de suscipiendo Petro Leonis manifeste suggerere non audebas, ut neutrum susciperet mirabili solertia suggerebas (ita tamen ut in Petrum tua aliquanto proclivior oratio videretur) : rem stare sub dubio ; multos utriusque partis esse fautores, festinas quosdam, qui jam multa poenitentia ducerentur : Petri Leonis in civitate inexpugnabilem esse potentiam, praesertim qui munitionibus maximis, qui pecunia plurima, qui denique parentum multitudine maxima fulciretur. Asseverare multos ipsum non justitia, sed potius invidia reprobatum, eo quod perspicax ejus ingenium et amplitudinem animi et irrefragabilem potentiam reliqui vererentur : neminem tamen esse, qui posset eum Urbis privare dominio, penes quam caput Ecclesiae semper fuisse, sed et denique reversurum fore nullus ambigeret. Ipsum et eos qui cum ipso erant, sufficientes ex proprio et omnes ad Apostolatum pertinentes civiles redditus obtinere : non oportere ipsum ad alienas inspicere facultates, nec ad invertendum quidlibet rei familiaris inopia compellendum. Si susciperet alterum, onerosum sibi et suo regno fore, et quod regi est etiam damno deterius, dedecus affuturum, si pars altera praevaleret. Nihil esse importabilius indigente Romano, sub cujus sis arbitrio constitutus. Dissimulare igitur, et rerum exitus potius expectaret, quam sera praecipitem sententiam poenitentia subsequatur. Utilius enim esse sine dispendio declinare pericula, quam cum gravi dispendio ipsis ultro periculis obviare.

42. *Ab eo rejicitur.* — « Agnovit rex sapiens latentem in sermone serpentis astutiam, et venenum sub melle reconditum, quia scilicet ipsa non bona fide consulens animo mandaveras, sed fallentis, ut dominus papa prius qualibet arte fraudulenter excluso, ad loquendum pro Petro tibi commodior aditus appareret. Facilius enim ad favendum parti nostrae vacuos vendicamus affectus, quam favore jam partis alterius occupatos. Ille vero non dissimulandum, sed laborantis Ecclesiae necessitatibus adiutor ultraneus credidit occurrendum, ne persuasione tua probaretur acciphalus, et ab uberibus matris tuae fieret alienus ». Quae fusius prosequitur Arnulphus.

43. *Guillelmus VIII comes Pictaviensis a Guillelmo IX distinguendus.* — Ad num. 65 et seq. Baronius *Guillelmum VIII* Pictaviensem comitem et Aquitaniae ducem cum *Guillelmo IX* confundit ; quod mirum videri non debet, cum, ut observat

Castanæus a Rocheposæo Pictavorum episcopus in Notis ad Litanias Pictonicas, quæ tom. II Biblioth. Labbei recitantur, Joannes Beslius, regius apud Fonteniacum consiliarius, qui a paucis annis mortuus est, primus subductis temporum rationibus, Pictorum comites, eosdemque Aquitanie duces inter se distinxit, et in ordinem digesserit. *Guillelmus VIII*, teste chronographo Malleacensi, anno *MLXXXVI* patri in principatum successit, annoque *MCXXVII* nature debitum solvit, teste eodem chronographo, qui annum a Paschate incipiens de eo et Guillelmo IX ejus filio, de quo hic nobis agendum, an. *MCXXVI* scribit : « Obiit Willemus dux Aquitanorum IV idus Febr. et Pictavis civitate apud Novum-Monasterium sepultus est. Ille virtute secularis militiæ super omnes mundi principes mirabiliter claruit : cui successit in principatu Guillelmus filius ejus, qui obiit peregrinus apud Sanctum-Jacobum in Hispania ». Dux igitur Aquitanie, qui Anacleti partes tritus est, et Ecclesiam in illis partibus afflixit, non Guillelmus VIII, sed Guillelmus IX fuit; et Malmesburiensis a Baronio citatus, qui lib. 5 de Gest. Reg. Angl. ait, Guillelmum comitem Pictavorum excommunicatum fuisse a *Girardo* Engolismorum episcopo, jussumque illicitam venerem abjicere, de *Guillelmo VIII*, non vero de *Guillelmo IX*, ut putavit Baronius, verba facit. Ordericus lib. 12 ait, uxorem Guillelmi (sc. VIII) Pictorum ducis questam esse in Concilio Rhemensi anno *MCXIX* habito, et *Callistum II* qui eodem Concilio præerat, certum terminum constituisse, ut Guillelmus legitimam uxorem reciperet. Denique Petrus Pictaviensis episcopus magna amicitia cum B. Roberto de Arbrissellis conjunctus eundem comitem jamdiu ob adulterium sacris arcuerat, et in exilio obierat anno *MCXV*, teste eodem chronographo Malleacensi.

44. Baronius non tantum adulterium, quod Malmesburiensis narrat, *Guillelmo IX* attribuit; sed etiam ait eum ingentem militum copiam in Terram-Sanctam secum duxisse, quod tamen idem Malmesburiensis de Guillelmo VIII refert. Ea expeditio a Guillelmo VIII anno *MCI* suscepta, ut ad eum Christi annum tradit chronographus Malleacensis. Missus est ad Guillelmum IX sanctus Bernardus, ut eum ad partes Ecclesiæ Catholice pertraheret, sed nihil ab eo obtinuit, nisi in iterata legatione post quinque annos peracta, de qua suo loco sermo erit. Arnulphus supra citatus converso ad *Girardum* Engolismensem sermone ait : « Cum, Girarde, regibus Hispanorum Britannorumque principibus eadem suggerendo mandasses (nempe quæ Henrico Angliæ regi), et speratos fructus concinnata tibi mendacia non referrent, cœpisti demerente vesania infra domesticos parietes debacchari. Pictaviensem comitem nactus erroris socium, et schismatici adjutorem; quem etiam Pictaviensis episcopi Catholici senis (nempe Guillelmi Adelelm, cujus depositionem petebat Guillelmus dux hujus nominis IX,) negata depositio et contra sacratissimos canones

non exaudita petitio, indignatum pariter a Catholica repulit unitate ».

45. *Gesta in regno Hierosolymitano*. — Ad num. 67. *Baldwinus II*, Hierosolymorum rex, ut narrat Tyrius lib. 3, cap 26 et seq. *Boamundus* princeps Antiochiæ, comes Tripolitanus, et comes Edessenus fines Damascenorum ingressi sunt; sed confusi exercitus parte amissa, *menfe Decembris* ad propria redire coacti sunt. Mortuus est interim *Stephanus patriarcha* Hierosolymorum, cui successit *Willelmus* prior Ecclesiæ Dominici sepulchri *de eo loco qui dicitur Messine*, sed loco *Messine*, legendum *Mecline*, cum ipsemet Tyrius ibidem asserat, eum Flandrum natione fuisse et Mechlinia in Flandria sita sit. Ordericus lib. 13, ad annum *MCXXXVII*, Hierosolymitanum præsulem *Radulfum* appellat, sed manifesto errore, cum certo constet, post illum Christi annum, Guillelmum Hierosolymorum patriarcham in vivis fuisse. Sumpsit igitur Ordericus Radulfum patriarcham Antiochenorum circa hoc tempus, ut habet Tyrius lib. 14, num. 10, electum pro patriarcha Hierosolymorum, aut manifeste falsus est. Post eam expeditionem Boamundus Balduini regis gener, « hostium irruentes subito multitudo, suis eum destituentibus, gladiis confossus interiit. Magnus princeps, et Deo, si vixisset, amabilis, nisi mors immatura et mors invida humanis eum rebus subtraxisset », inquit Tyrius, qui subdit, eum nullos reliquisset liberos, Balduinum regem Antiochenum principatum iniisse, et filia suæ Boamundi uxori *Laodiceam*, et *Gabulum* urbes maritimas concessisse.

46. *Moritur B. Joannes episc. Morinorum*. — Joannes de Colle-Medio archidiaconus Morinensis in Vita beati Joannis Morinorum episcopi, a Bollando ad diem *XXVII* mensis Januarii recitata, cap. 9, dicit se Epitaphium ejus condidisse, in quo inter cætera ait : « Anno Verbi incarnati *MCXXX*, Indictione octava, VI kalend. Februarii, obiit vir venerabilis, totius amator religionis D. Joannes episcopus, qui Romæ in generali Concilio, Urbano II Pontifice presidente et approbante, in episcopum hujus Morinensis Ecclesiæ, pridie nonas Junii presbyter, XVI kal. Aug. episcopus consecratus est ». Monasteria regularium clericorum, sive monachorum octo fundavit, et Morinensium episc. trigesimus fuit. In ejus Vita auctor testatur eum fuisse canonicum regularem in monasterio, *quod dicitur in monte Sancti-Eligii*, paucis miliaribus a civitate Atrebatensi semoto, ac discipulum extitisse *Ivonis*, postea episcopi Carnotensis. In ea ejus virtutes fuse enarrantur : sed in loco mox ex ejus Epitaphio relato, aliqua verba desiderantur. An enim *MCXXVII*, ex eodem Joanne de Colle-Medio monstravimus, eum in Belgio presbyterum et episcopum anno *MCXIX* ordinatum fuisse.

47. *Mediolanenses Anacletum sequuntur*. — Mediolanenses cum *Anselmo* archiepiscopo suo nulla habita ratione excommunicationis, de qua anno *MCXXVIII* locuti sumus, Anacleti antipapæ

partibus adhæresere, ut refert Landulfus Junior apud Puricellum in Monum. Basil. Ambros. num. 350: « Honorio defuncto, Anacletus papa Romanorum Secundus huic Mediolanensi (nempe Anselmo; hic autem auctor Anacletum papam vocat, quia Mediolanenses Innocentium II papam non agnoscebant). Stolum (id est pallium) per suos idoneos nuntios Joannem Palestrinæ episcopum (quem Anacletus in locum Guillelmi cardinalis Prænestini Innocentio II addictissimi subrogarat, quod in isto schismate in aliis episcopatibus etiam actum), et Beltrammum subdiaconum Romanum mandavit. Quam stolam ipse Anselmus Pontifex (qui eam ab Honorio II non impetrarat), clero et populo Mediolanenses circumstante et collaudante (assumpsit, et) Anacletum papam ejusque legatos et legationem reverenter suscepit: pars vero sibi adverso inde magis detrudere sibi cœpit. At plenitudo cleri et populi ad eum quoque concurrebat, timorem quoque et reverentiam regi Conrado et papæ Anacleto ex dilectione portabat ». Ex quibus apparet, Conradum et Anacletum inter se concordatos fuisse; quæ concordia usque ad Concilium Pisanum anno MCXXXIV celebratum duravit.

48. *Anselmus archiep. Mediolanensis contra se rixas suscitavit.* — Pergit Landulfus Junior: « Et dum hic spes fuit in plenitudine Ecclesiæ et civitatis Mediolani, et venditiones et privilegia, quæ egregii capitanei de Besana et de Porta Orientali atque homagna, et Gregorius papa VII et Urbanus papa II presbytero Liprando fecerunt, vim suam obtinuerunt, et oculis omnium latuerunt (id est, laterent) nulla guerra Mediolanenses ignominia vit, sed Papiensibus, Cremonensibus, Novariensibus, cunctisque suis inimicis late et splendide ipsi Mediolanenses præstiterunt ». Porro Mediolanenses ideo Cremonenses defendebant, quia hi Cremonensi Ecclesiæ contributi sese Mediolanensibus applicuerant, ut refert Sigonius lib. Hist. de Reg. Ital. ubi et recte narrat bellum a Mediolanensibus hoc anno et duobus sequentibus adversus Papienses feliciter gestum; sed felicitas hæc cessavit culpa Anselmi archiepiscopi Mediolanensis, uti tradit Landulfus Junior cap. 41, apud Puricellum laudatum num. 351: « At ubi Anselmus archiepiscopus contra ipsas venditiones et privilegia voluit et fecit (quod accidit anno MCXXXIII, cum anno anteriori adversus Innocentium II et Lotharium imper. adhuc starent Mediolanenses) et multitudo cleri et populi ipsas venditiones et privilegia legere voluit; contigit, quod quidam manipulus militum Mediolanensium captus est a Cremonensibus, etc. »

49. *S. Bernardus episc. Parmensis Conradum ducem excommunicat.* — Puricellus citatus num. 352, perperam credidit sanctum Bernardum Parmensem episcopum et presbyterum cardinalem legatum fuisse Innocentii II, et Mediolanenses excommunicasse, quod secuti essent partes Conradi regis hoc et duobus sequentibus annis; et his non obstantibus eum communicasse cum Anselmo

archiepiscopo Mediolanensi, et ab eo petiisse, ut sibi videre liceret corpus sancti Ambrosii; quia, inquit Puricellus, « tunc non adeo constabat, Innocentiusne, an potius Anacletus esset legitimus Pontifex ». Fundatur vir doctissimus in Vita ejusdem sancti Bernardi Parmensis ab auctore coætaneo, vel fere coætaneo scripta, neque advertit eum ordinem temporum non servare. Hic enim anonymus cap. 46, ait: « Aliquando cum Mediolani pro hujusmodi negotiis (nempe pro pace Ecclesiæ et imperii, ubi neque annum quo hoc contigit designat, neque Pontificem Romanum, qui tunc sedebat) per dies aliquot moraretur: archiepiscopum rogavit, ut sibi beati Ambrosii reliquias videre permitteret », quas nocte sequenti vidit. Idem anonymus cap. 40, refert gesta ab eodem sancto adversus rebellionem Mediolanensium, eorumque schisma, et ait: « Unde cum Mediolanenses contra Romanæ Ecclesiæ inhibitionem Conradum in regem cum suis fautoribus elegissent, vir Dei non formidans terreni imperii principatum, præfatum Conradum, ejusque sequaces excommunicatos publice nuntiavit ». Hæc duo Puricelli fundamenta.

50. *Illa excommunicatio anno MCXXXVII lata.* — Verum hoc accidit anno MCXXXVII, ideoque ante Conradum coronationem, eoque tempore quo Mediolanenses et Anselmus eorum archiepiscopus aversi erant ab Honorio II, non vero ab Innocentio II; tunc enim S. Bernardus Parmensis Mediolanum profectus est, et reliquias S. Ambrosii videre voluit, et deinde Conradum jam regem coronatum, et ejus sequaces excommunicavit. Certe non magnum egisset Bernardus, si excommunicationem illam vibrasset post Decretum Concilii Papiensis anno MCXXXVIII congregati, quod vult Puricellus; sed contra maximopere laudandum quod primus Conradum regem excommunicavit. Quare auctor Vite sancti hujus præsumit in ea narratione temporis rationem non habet.

51. *Martyrium S. Canuti Junioris.* — Hoc anno sanctus Kanutus, rex Obotritorum ac dux Sleswicensis, Erici Boni Daniæ regis filius, a Magno, Nicolai Daniæ regis filio, proditorie occisus est, uti narrat Helmoldus in Chron. Slavorum lib. 1, cap. 50 et seqq. Krantzius lib. 3 Vandalia capit. 23 et seqq. ac Grammaticus Saxo lib. 13, qui tamen nefariæ hujus cædis annum non designant; sed Hieronymus Cypræus citatus ab Adolpho Cypræo in Anal. episc. Sleswicensium cap. 21 et 23, Molanus in Addit. ad Usuardum, Stephanus Stephanus in Not. ad lib. 11 Saxonis Gramm., et Henricus Wolterus in Chronica Bremensi ab Henrico Meibomio Juniore tom. II Rerum Germanicarum publicata, hoc martyrium cum præsentis anno recte illigasse videntur, licet Bollandus ad diem vir mensis Januarii, quo sanctus Kanutus colitur, illud circa annum MCXXXIII distulerit; ex dicendis enim eo Christi anno patebit, eadem illam citius configisse. Ericus Bonus Daniæ rex, proficiscens ad bellum Hierosolymitanum, Nicolao fratri regnum

cum filio *Kanuto* commendavit, « accepto jramento, ut si non rediret, filio suo, postquam adolevisset, regnum contraderet », inquit *Helmoldus*. Mortuo *Erico* rege dum *Hierosolyma* rediret, *Nicolaus* regnum obtinuit, « eo quod *Kanutus* adhuc esset infans ». Erat *Nicolaus* regi filius nomine *Magnus*, cujus insidias *Kanutus*, ubi adolescere coepit, veritus, regnum *Obotritorum* a *Lothario* imperatore emit, seque ejus beneficiarium dixit. Verum post aliquot annos *Magnus* per insidias principem innocentem peremit.

52. *Fuit rex Obotritorum et dux Slevicensium*. — Duo fuere *Kanuti* reges in sanctorum numerum relati, et martyrii gloria coronati. De priori egimus anno *MLXXXI*, diximusque posteriorem, de quo hic sermo, illius ex fratre nepotem fuisse, non vero filium, uti scripsit *Baronius* ad annum *MXLIV*, num. 50, ubi de canonizatione sancti *Kanuti Obotritorum* regis verba facit. Porro *Obotriti* *Mecklenburgicam* ditionem ac *Wagriam* tenuerunt. *Slevicensis* vero ducatus est *Julie Meridionalis Provincia*, quæ *Holsatiæ* ducibus paret, qui etiamnum a *Daniæ* regibus ducatum *Slevici* in feudum accipiunt. *Krantzius* lib. 3, cap. 30 ait, *Lotharium* imp. sancto *Kanuto* coronam regiam decrevisse ac regem appellasse *Obotritorum* : « Ea enim provincia in ejus erat procuracione » ; hac præsertim ratione, « ut illustraret Romanum imperium, quod tum videretur illustrius, si regibus imperaret ». Addit *Krantzius* existimare se nostri sæculi *Danorum* reges inde deduxisse titulum regum *Danorum* et *Vandalorum*, « nam moriens *Kanutus* regium titulum transmisit ad posteros », subdit idem historicus.

53. *Floret Honorius Augustodunensis*. — *Honorius Augustodunensis* Ecclesiæ presbyter et scholasticus, qui scripsit librum de *Scriptoribus Ecclesiasticis*, variaque alia Opuscula, quæ extant tom. xx *Biblioth. Patrum* edit. *Lugdun.* et tom. xii edit. *Coloniens.* hoc anno composuit seriem *Romanorum Pontificum*, hæc enim his verbis clauditur : « *Innocentius II.*, qui fuit Pontifex ordine *CLXV*, Christi anno *MXXXX* ». *Honorium* aliosque scriptores Ecclesiasticos continuavit *Miræus* in sua *Bibliotheca Ecclesiastica* usque ad annum circiter *MXCL*.

54. *Interitus Thomæ de Marla*. — Anno *MXXXX*, « *Thomas* de *Marla*, dominus de *Conciaco*, persecutor Ecclesiæ pessimus, interficitur », inquit auctor *Chronici Sancti-Medardi Suessionensis* apud *Dacherium* tom. ii *Spicilegii*. Fusius hæc mors ad hunc annum narratur in *Chron. Roberti* de *Monte* juxta editionem *Francofurti* curatam. *Sugerius* tamen in *Vita Ludovici VI.*, *Franciæ* regis pag. 316, vocat eum *Thomam de Marla*, atque dominum fuisse *Cociaci*, et eum in diocesi *Laudunensi* habitaret *Cociacum*, castrum omnino inaccessibile, captum et ad mortem sanciatum fuisse a comite *Viromandensi Radulpho*, qui una cum episcopis et regni optimatibus *Ludovico VII.* *Franciæ* regi per-suasit, ut *Laudunum* ad ulciscendum adventaret.

Loquitur postea *Sugerius* de miserabili morte ejus, quam et eodem modo refert *Henricus Huntindoniensis* in *Epistola* ad *Walterum de Mundi Conemptu*, recitata a *Wartono* in fine tomi ii *Angliæ Sacræ*, qui in *Præfatione* ejusdem *Tomi* dicit, eam anno *MXLIV* scriptam esse : « *Thomas* », inquit *Huntindoniensis*, « princeps magnus juxta *Laudunum* in *Gallia* principans, magnus erat nomine ; quia summus erat scelere. Ecclesiis igitur circumjacentibus hostilis, omnes in fiscum suum redegebat. Si aliquem vi vel dolo in captione sua tenebat, non falso dicere poterat : *Dolores inferni circumdarent me* (*Psalmi* 116), cædes humana, voluptas ejus et gloria. Comitissam contra solitum in carcere posuit ; cui crudelis et spurcus, compedes et supplicia diebus, ut pecuniam extorqueret, stuprum noctibus inferebat, ut eam derideret. A carcere in lectum (*Thomæ*), homines crudelissimi quaque nocte ferebant ; a lecto quaque die in carcerem referebant. Pacificè loquens proximum, in corde non sine risu gladio transpungebat. Unde gladium sæpius sub chlamyde nudum ferebat quam vaginatum. Hunc igitur homines timebant, venerabantur, adorabant. Fama omnis *Galliæ* circa illum. Crescebat in dies ejus possessio ; crescebat thesaurus ; crescebat servitus. Audire finem scelerati desideras ? Gladio lethaliter percussus, poenitentiam recusans, et a corpore Domini collum retorquens, sic perit, ut bene dici posset : *Conveniens vitæ mors fuit ista tuæ* ».

55. *Obitus Tarasiæ Portugallicæ reginæ*. — *Æra* *MXLXVIII*, inquit *Sandovalius* fol. 147, juxta Documentum a *Duarto Licentiatio* in *Chronico* reformato *Portugallicæ*, pag. 26 relato, obiit regina *Tarasia*, mater regis *Alphonsi Henrici Portugallicæ* comitis. Ea regina appellabatur, quia filia erat *Alphonsi VI* *Castelle* et *Legionis* regis, imperatoris nuncupati, et nupserat *Henrico* comiti *Portugallicæ*. *Lusitaniam* per sex et decem annos rexit, et duobus ante mortem *Alphonso* filio eam tradidit, seu sponte cedens, ut multi volunt, seu bello victa, ut alii in litteras misere. Ait *Sandovalius* *Alphonsum Henricum* *Tarasiæ* filium quamdam donationem fecisse ; in *Charta* originali exhiberi signum vel notam singularem, intus hæc vocem scriptam, *Portugallicæ*, et hoc tempore nondum gentilitia scuti symbola in usum vocata fuisse. Extat in summa *Chronici Gothorum* memoria obitus *Tarasiæ* ad annum *MXXXX* his verbis designati : « *Æra* *MXLXVIII* obiit regina *Tarasia*, mater *Alphonsi*, kalendas *Novembris*, anno secundo regni ejus », nempe *Alphonsi*, qui tamen nondum rex appellabatur.

56. *Alphonsus Castellæ rex primum in Mauros movet*. — *Alphonsus* *Castellæ* rex, ut tradunt *Garibaius* lib. 12, cap. 2, *Sandovalius* in *Alphonso VII.* fol. 145 et seq. et antiqua *Historia Toleti* ab eodem *Sandovalio* exscripta, primam suam adversus *Mauros* expeditionem suscepit, invitatus a quodam principe *Mauro* ditionibus suis spoliato. Hunc

Alphonsus rex honorifice excepit, et arce magni momenti *Rueda* appellata ab eo accepta, ut par pari redderet, in Legionis, Castellæ et Toleti regnis eidem terras assignavit. *Alphonsus* rex ingenti conflato exercitu, in hostiles terras ingressus vastavit *Illarcon*, vulgo *Alarcos* Castellæ-Novæ oppidum, *Almodavarum* Campi, aliaque oppida. Regem in hac expeditione comitati sunt magnates regni, *Raimundus* archiepiscopus Toletanus, et magna episcoporum pars, qui hoc tempore tenebantur regem ad bellum procedentem sequi.

57. *Obitus S. Isidori Madritensis.* — Hoc circiter anno mortuus est *S. Isidorus* Madritensis, qui fuit simplex agricola, et vitam sanctissimam in matrimonio duxit. Ejus Vita seculo decimo tertio a Joanne Diacono scripta, et in Actis SS. Bollandianis ad diem xv mensis Maii recitata; Gregorius XV, anno mdcxxii, Philippus IV Hispaniarum

regis efflagitatu, eum in sanctorum numerum retulit.

58. *Concil. Herbipolense.* — In Germania Lotharius imp. Wirceburgi seu Herbipoli Concilium convocavit, de quo Chronicon Magdeburgense adhuc ineditum ad hunc annum habet: « Concilium xvi episcoporum mense Octob. a rege Wirceburg congregatur, cui affluit archiepiscopus Ravennæ, Apostolicæ Sedis legatus: ubi Gregorius, qui et Innocentius, qui Petro Leoni in electione prævaluit, a Lothario rege et omnibus ibi congregatis eligitur et confirmatur ». Gualterius enim, qui Ravennatensis archiepiscopus erat, Innocentii II partes cum suis Ravennatensibus perpetuo secutus est, ut habet Rubens lib. 5 Ilist. Ravenn. qui tamen sicuti et Labbeus tom. x Concil. hujus Synodi mentionem non facit.

INNOCENTII II ANNUS 2. — CHRISTI 1134.

1. *Innocentius papa Parisiis Pascha celebrat.* — Sequitur annus Redemptoris millesimus centesimus trigesimus primus, Indictione nona, quo Rhemis in Gallia Concilium celebratur. Ita Codex Vaticanus ubi per annos singulos Innocentii res gestæ scribuntur. Hoc item Sugerius in vita Ludovici regis Francorum, qui post nonnulla quæ præcesserunt Rhemense Concilium, nempe Paschæ celebrationem factam Parisiis, sic narrat de eodem Innocentio papa: « Instantem sancti Paschæ diem apud nos in Ecclesia B. Dionysii, tanquam speciatî filia, affectat celebrare. Hos autem ob timorem Dei et Ecclesiæ matris, et filia gratanter pridie Cænæ Dom. suscipientes, celeberrimam Deo et hominibus perferentes processionem, adventum ejus odî exultationis, collatantes amplexati sumus. Cœna ergo Domini apud nos more Romano et sumptuoso donativo, quod presbyterium nominant, celebrata: venerandam Domini crucifixionem venerando prosecutus, sanctissimæ Resurrectionis Vigiliis honore debito pernoctavit. Summo mane vero extrinseca via ad Ecclesiam matulini instrata, cum multo collateralium collegio quasi secreto communicavit, ibique more Romano seipso preparantes, multo et mirabili ornatu circumdantes capiti ejus Phry-

gium, ornamentum imperiale, instar galeæ, circulo aureo concinnatum imponunt, albo et palliato equo insidentem educunt; ipsi etiam palliati equos albis operturis variatos equitantes, odas personando, festive geminati procedunt. Barones vero Ecclesiæ nostræ ferrati, et castellani nobiles, stratores humillimi pedes eum equitantem freno deducebant. Quidam etiam prævii copiosam monetam ut turbam impediendam removerent, jactitabant. Via autem regia et salicibus et fixis stipitibus pretiosis paleis (aulæis) rutilabat. Cum autem et militia cunei, et populi multi concursus et honoratissime occurreret, nec etiam ipsa Judæorum Parisiensium excæcata defuit synagoga, quæ legis litteram, rotulam scilicet et velatam offerens: ab ore ejus Pontificis scilicet, hanc misericordiæ et pietatis obtinet supplicationem: Auferat Deus omnipotens velamen a cordibus vestris. Præveniens vero ad sanctorum Basilicam coronis aureis rutilantem, argenti et plus centies, auri, pretiosarum gemmarum et margaritarum splendore fulgurantem, divina divine celebrans, Agni veri Paschalis victimas sacratissimas nobis cooperando immolavit. Finita vero missa, erectis in claustrum palustrato mensis, materialem agnum tanquam thoris

accubitati sumerent, cætera nobilis mensæ ferculæ consueti more suscipiunt. Sed et sequenti die eandem ab Ecclesia S. Remigii ad principalem, reciprocam processionem (iterant scilicet). Transactis itaque tribus post Pascha diebus, cum gratiarum actione, et auxilii et consilii promissione, Parisium transiverunt. Exinde Galliarum Ecclesias visitando, et de earum copia inopiæ suæ defectum supplendo, cum per terram aliquantisper deambulasset, Compendii demorari elegit. Subjicit post hæc miserandum easum filii regis nato maximi, cum perterrefactus equus cui insidebat porco obvio, eundem adolescentulum deiecit in terram, desuper ipsum equo ruente, quo et fuit extinctus. Quomodo autem ad leniendum regis mœrorem de obitu primogeniti, suaserunt amici, utungi faceret ab Innocentio papa secundogenitum, idem Sugerius qui aderat historiam narrat: quam et nos paulo inferius subiiciemus, dicturi prius de aliis rebus gestis in eodem Concilio.

2. *Rhemense Concilium in quo consecratus Ludovicus VII rex Francorum.* — Hujus Concilii Acta perire, sed de eo tantum apud Bernardum¹ abbatem Bonevallis hæc habentur in Vita S. Bernardi his verbis: «Perlustrata igitur Francia (Innocentius papa) Rhemis convocavit Concilium, in quo multis ad honorem Dei dispositis, regem Ludovicum vivente patre pro Philippo fratre coronavit in regem. In omnibus his dominus papa abbatem, (S. Bernardum videlicet), a se separari non patiebatur, sed cum cardinalibus in rebus publicis assidebat. Sed et privatim quotquot habebant negotia, virum Dei secretius consulabant. Ipse vero audita referebat ad curiam, et oppressis patrocinia exhibebat. Igitur soluto Concilio etc.» Hæc tantum ibi. Interfuit eidem Concilio una cum cæteris S. Norbertus episcopus Magdeburgensis, ejus meminit auctor, agens de rebus in eodem Concilio gestis²: «Convocatoque Rhemis Concilio, conveniunt undique episcopi de diversis nationibus, advenit et pater Norbertus: ibique illum Petrum intrusum excommunicaverunt, et electione Innocentii approbata, eundem Petrum Leonis leoni rugienti, nisi resipisceret, tradiderunt. Attulit autem Norbertus secum Ecclesiæ suæ Privilegia vetustissima, et fere a verminibus consumpta, quæ cuncta Romano munimine fecit renovari et corrigi, apponens ea quæ receperat, de manibus illorum, qui ea injuste et violenter rapuerant. Addidit præterea aliud Privilegium secreto, ut cum daretur opportunitas, Romana fultus auctoritate, ordinem suæ religionis in episcopali propagaret Ecclesia». Hactenus ibi de rebus in Synodo Rhemensi peractis.

3. In eodem quoque Rhemensi Concilio, rogante Ludovico Crasso Francorum rege, idem Pontifex Innocentius consecravit in Francorum regem, successorumque patris, ejus filium, Ludovicum etiam nominatum, ejusdem nominis Septi-

muum numeratum. At de ista novi regis consecratione Sugerius abbas S. Dionysii, qui eam suasit ipsi regi seniori, ita scribit: «Qui ergo intimi ejus et familiares eramus, formidantes ob jugem debilitati corporis molestiam ejus subitum defectum, consultimus ei, quatenus filium Ludovicum, pulcherrimum puerum regio diademate coronatum, sacri liquoris unctione regem secum ad refellendum æmulum tumultum constitueret. Qui consiliis nostris acquiescens, Rhemos cum conjuge et filio, et regni proceribus devenit, ubi in pleno et celeberrimo, quod dominus papa Innocentius convocaverat, Concilio, sacri olei unctione et coronæ regni deportatione in regem sublimatum, felicem providit regno successorem. Unde multis quasi quodam præsigio videbatur, ejus debere amplificari potentiam, qui tot et tantorum et tam diversorum archiepisc. episc. Francorum, Teutonicorum, Aquitanorum, Anglorum, Hispanorum suscepit benedictionem copiosam. Cumque pater vivi gaudio defuncti dolorem allevians Parisium rediret, dominus papa, soluto Concilio, Antisiodori delegit demorari». Hæc Sugerius præsens cuncta spectans ac scribens.

4. Rursus autem, quod ad idem Rhemense Concilium spectat, extant duo sermones apud S. Bernardum, habiti in Rhemensi Concilio, alter ad clericos, ad episcopos alter, cum tamen ad episcopos, vel potius in episcopos dicti esse reperiantur, quorum vita haud esset consensiens dignitati: qui S. Bernardi nomine evulgati, et inter ejus scripta recensiti, alterius potius auctoris esse, admonuit censura recentior. Nec est quod in alio aliquo Rhemensi Concilio ea prior oratio habita dici possit, cum constet ex ea, jubente Romano Pontifice qui aderat, eam dictam fuisse, ut ex ejus patet exordio ipsis verbis: «Grave est quod mihi injungitur, videlicet, ut doceam doctores, instruum Patres, præsertim cum scriptum sit⁴: Interroga patres tuos, et annuntiabunt tibi. Sed præcipit mihi Moyses iste⁵, cujus manus graves sunt, cui obediendum est non solum a me, sed etiam ab omnibus. Et plusquam Moyses hic. Moysi commissum fuit una plebs Israelitica; isti autem universa Ecclesia. Et plusquam Angelus hic. Cui enim Angelorum dixit aliquando Deus⁶: Quaecumque ligaveris super terram, erunt ligata et in caelis? Secundum officium dico, non secundum meritum. Præter Deum non est similis ei, nec in caelo, nec in terra. Hic est Petrus, qui misit se in mare, cum alii discipuli navigarent ad Jersa. Unusquisque vestrum contentus est navicula sua, hoc est archiepiscopatu suo, abbatia sua, prepositura sua: iste autem misit se in omnes archiepiscopatus, abbatias, preposituras etc.»

5. *Anacleti excommunicati litteræ auctoritatem præsumptam ostendentes.* — Hic vero Rhemensis hujus Concilii occasione describamus Ana-

¹ Vit. S. Bern. l. II. c. 1. — ² Apud Sur. die vi Junii, c. 17.

⁴ Exod. XXVII. — ⁵ Deut. XXXII. — ⁶ Matth. XVI.

cleri antipapæ Epistolam ad unum ex suis, quem habebat in Galliis defensorem (caret enim titulo) in qua perstringit Rhemensem archiepiscopum, cum excommunicatum pronuntiavit ipsum pseudopontificem, et Innocentium papam Catholicum promulgavit, et in ipsum amaro animo amaras vomuit contumelias, verbis istis¹:

« Dilectionis tuæ fervorem, quem penes nos et Romanam Ecclesiam gestare videris, etsi litterarum tuarum series minime testarentur, in corde tamen nostro legimus, quid debeamus de devotione sentire. Proinde quod idiota Rhemensis, truncus inutilis, in te et in Ecclesiam tuam nequiter et impudenter egisse dignoscitur, nequaquam te moror aliquis seu dolor afficiat, præsertim cum in nos et in Romanam Ecclesiam, cui se juramento adstrinxit, quasi ebrius et vino æstuans, histriionum more, multa insolenter vomuerit, ponens quidem in cælum os suum, ut lingua ejus transeat super terram. Tanquam alter Dioscorus Sedem niscus est Apostolicam judicare, dum iniquitatis zeli quod (zelique) plantarium in Dei Ecclesia fovere molitur, et statuam in campo Bura velut alter Babylonius², furiosorum more, quibusque simplicibus suggerit adorare, cum eadem, cui se prostravit, statuam, a lapide de monte succiso, præstante Domino, velociter contereretur. Porro nos latratus ejus et ineptias ceu canum latratus, et energumenum furias judicamus. Fundamentum siquidem Dei immobile perseverat, et cathedra Petri, locusque Pauli nullis præstigiis innumbrari, nullis possunt irrisionibus conentiri. Ecclesia namque omnis Romana, sicut ab initio promotionis nostræ, indivisa nobis charitate coheret, et sacris per omnia concordans canonibus, unum Dei est ovile, et ei unus est pastor. Licet quoque³ Esau per agrestia et abrupta vagetur, ut simpliciter mentes mendacis consuetis evertat, Jacob tamen simpliciter domi habitat, et interveniente matre simplex simplices præparat patri cibos ». At quomodo (ut hæc interseram) non magis Jacob similitudinem exprimit Innocentius, dum fugiens minas Esau, peregrinari consilio matris suadetur ad externas regiones, manente domi Esau licet primogeniti benedictionis expers? Sed pergit: « Ut tibi omnia breviter perstringamus, gloriosus filius noster Rogerius dux (rex) Apuliæ ad pedes nostros humiliter veniens, nos papam Catholicum et legitimum dominum suum, predecessorum suorum more recognovit. Archiepiscopi, abbates omnes Apuliæ, Calabria, sicut omnis etiam Orientalis Ecclesia, Hierosolymitana, Antiochena, et Constantinopolitana nobiscum sunt, et nos visitant et frequentant. Noveritis etiam nos soluto Concilio, quod apud Barum quinto idus Novembris, præstante Domino, celebraturi sumus, Mediolanum properanter ascensuros. Tu itaque, fili mi in Christo clarissime, confortare in Domino, et officium tuum viriliter age, et viru-

lenta verba. seu minas Rhemensis nullatenus formides ». Iluciusque Anacletus.

6. Quod autem S. Norbertus Magdeburgensis episcopus archidiaconum suum, appellatum ad Romanum Pontificem subsecutus non fuisset, nec Romam causam prosecutus ad Anacletum se contulisset: pro archidiacono ad eum ista tum Anacletus, ac si legitimus esset papa, rescripsit⁴:

« Lator præsentium Attiens Ecclesiæ tuæ archidiaconus, ad Apostolorum Limina veniens, a fraternitate tua se vehementius prægravatum, in nostra et fratrum præsentia intimavit. Retulit siquidem te de proditione ipsum coram fratribus impetisse, seque negasse; et tibi canonice satisfactum in Capitulo respondisse. Cum igitur statuta die ad agendum pro eadem causa in tuam et Capituli præsentiam devenisset, teque accusatorem simul et judicem (quod omnino rationi et justitiæ adversatur) apertius intelligeret, Sedem Apostolicam appellavit, et terminum, quo sibi coram Pontifice Romano justitiam faceret, nominavit. Post hanc autem appellationem, sicut ipse asserit, accepta occasione de obitu prædecessoris nostri bonæ memoriæ papæ Honorii, eum ad nos, sicut obtulerat, venientem, beneficiis suis Ecclesiasticis et aliis rebus expoliasti. Perpendat ergo fraternitatis tuæ prudentia, quam grave quamque inconveniens sit, ut illud Sedi Apostolicæ Privilegium coneris auferre, quod ex divino munere, atque antiqua sanctorum Patrum traditione usque nunc per Dei gratiam meruit obtinere, et per Apostolorum principis merita B. Petri, pro quo, ne ejus deficiat fides, ipse Christus oravit, usque ad finem inviolabiliter obtinebit. Eapropter fraternitati tuæ mandamus, et Apostolicæ Sedis auctoritate præcipimus, ut eidem archidiacono quæ abstulisti, cum integritate restituas, et quiete deinceps omnia tenere permittas: proximis autem B. Martini octavis nostro te conspectui representantes, plenam de eo justitiam in nostra et fratrum præsentia recepturus. Per præsentia etiam tibi scripta mandamus (quemadmodum antecessor noster beate recordationis tibi mandavit) ut filios nostros Ecclesiæ Magdeburgensis canonicos ad nos venire volentes prohibere ulterius non præsumas, si B. Petri gratiam et dilectionem vuleris. Nos enim tibi aut honori tuo nihil detrahimus: sed si in te non remanserit, pleno totius charitatis affectu, tam te, quam Ecclesiam tibi commissam diligere, ac præstante Domino, cupimus honorare. Datum Romæ apud S. Petrum XV kal. Julii ». Hæc ad sanctum Norbertum, qui interea temporis sequens Innocentium, in Concilio Rhemensi (ut audisti) et alibi, adversus ipsum antipapam strenue laborabat.

7. *Innocentius papa cum Ludovico rege congre-ditur, et visitat Claramvallem.* — Sed jam quæ secuta sunt Rhemense Concilium videamus. Bernardus Bonævallis abbas sic pergit⁵: « Igitur so-

¹ Ex Cod. Cass. Ep. xxxvi. — ² Dan. iii. — ³ Gen. xxvii.

⁴ Anac. Ep. xviii. ex Cod. Cas. — ⁵ Bern. ab. in Vita S. Bern. I. II, c. i.

luto Concilio, Leodium dominus papa Romanorum regi occurrit; et honorifice quidem susceptus est». Sugerius autem in Vita Ludovici Crassi ponit occursum Lotharii Innocentio papæ factum hoc eodem anno, sed ante Rhemense Concilium, atque his ipsum verbis describit: «Visitando itaque Gallicanam, sicut rex exigebat, Ecclesiam, ad partes se transfert Lotharingorum (ipse scilicet Innocentius papa). Cui cum imperator Lotharius civitate Leodii cum magno archiepiscoporum et episcoporum, et Tentonicis regni optumatum collegio celeberrime occurrisset, in platea ante episcopalem Ecclesiam humillime seipsum stratorem offerens pedes per medium sanctæ processions ad eum festinat, alia manu virgam ad defendendum, alia frænum albi equi accipiens, tanquam dominum deducebat. Descendente vero tota statione eum subbrachiando deportans, celsitudinem paternitatis ejus notis et ignotis clarificavit». Ilæc Sugerius S. Dionysii abbas. Sed quæ ista sint secutæ inter Lotharium et Innocentium contentiones et discordiæ, idem qui supra Bernardus Bonævallis sic narrare pergit: «Sed velociter obnubilata est illa serenitas. Siquidem importune idem rex institit, tempus habere se reputans opportunum, episcoporum sibi restitui investituræ, quas ab ejus prædecessore imperatore Henrico per maximos quidem labores et multa pericula Romana Ecclesia vindicarat. Ad quod verbum expavere, et expalluere Romani, gravius sese apud Leodium arbitrari periculum offendisse, quam declinaverint Romæ. Nec consilium suppetebat, donec murum se opposuit abbas sanctus, (Bernardus scilicet). Audacter enim resistens regi, verbum malignum mira libertate redarguit, mira auctoritate compescuit». Ilæc ipse.

8. Ille tu videas redargui mendacissimum Petrum Diaconum Cassinensem, dum in gratiam ejusdem Lotharii, cui postea (ut suo loco dicturi sumus) inhæsit, adversus tam apertissimam veritatem de investituris, affirmat eas ab Innocentio papa in conventu Leodiensi Lothario fuisse concessas, sic dicens¹: «Innocentius igitur Germaniam ingressus, a Lothario rege juxta Leodium excipitur, virgam ei et anulum antiquo ex more confirmans, et terram comitis Mathildæ condonans». Ilæc ipse Petrus, qui adversus Catholicum papam Innocentium una cum suis pro schismaticorum parte stetit ac laboravit, ut sæpe inferius ex suis ipsis scriptis intelliges. Sed et in eo etiam mendax esse convincitur, dum juxta Leodium donationem terre Mathildæ factam ab Innocentio assertit. Nam Diploma Pontificis de ea re conscriptum Romæ datum legitur, ut anno sequenti suo loco dicturi sumus. Suggestum tantum non exactum de investitura a Lothario, quod petierat, Otto Frisingensis affirmat². Antequam e Galliis recederet Innocentius papa, non invisisse tantum nobile monasterium Cluniacense, sed et insuper

ejus Ecclesiam dedicasse Petrus ejus monasterii hujus temporis abbas affirmat¹. Sed et post ipsum Leodiensem conventum Claravallense cœnobium sancti Bernardi petiisse, qui ejus vitam scripsit, idem qui supra Bernardus Bonævallis, narrat his verbis²: «Rediens autem Leodio, Claravallem dominus papa per seipsum voluit visitare. Ubi a pauperibus Christi, non purpura et bysso ornatis, nec cum deauratis Evangelis occurrentibus, sed pannosis agminibus scopulosam bajulantibus crucem non tumultuantium classicorum tonitruo, non clamosa jubilatione, sed oppressa modulatione affectuosissime susceptus est. Flebant episcopi, flebat ipse summus Pontifex: mirabantur Congregationis illius gravitatem, quod in tam solemnium gaudio oculi omnium humi defixi, nusquam vagabunda curiositate circumferrentur, sed complosis palpebris ipsi neminem viderent, et ab omnibus viderentur. Nil in Ecclesia illa vidit Romanus quod cuperet, nulla ibi supellex eorum sollicitavit affectum, nihil in Oratorio nisi nudos viderunt parietes. Solis moribus poterat inhære ambitio, nec damnosa poterat esse fratribus hujusmodi præda, cum minui non posset asportata religio. Gaudebant omnes in Domino, et solemnitas non cibis, sed virtutibus agebatur: panis ibi autopyrus pro simila, pro careno sapa, pro rhombis olera, pro quibuscumque deliciis legumina ponebantur. Si forte piscis inventus est, domino papæ appositus est, et aspectu, non usu in commune profecit». Ilæc ipse de paupertate et observantia Claravallensium.

9. Quid autem invidia diaboli, unum illorum tunc invadentis, acciderit, sic auctor narrare pergit: «Invidit diabolus et servorum Dei gloriam, quos tanti hospitii nobilitabat præsentia, ferre non valens, dum in choro alacriter psallerent et devote, præsentibus etiam nonnullis ex cardinalibus, qui in auditu et aspectu eorum delectabantur, aliquantos fratrum horribili pavore turbavit. Nam et unus præ cæteris occupatus (a demone scilicet), blasphema quædam verba locutus est: Dicite, inquiens, ego sum Christus. Et alii plures territi et tremebundi ad B. patris vestigia confugerunt. At ille conversus ad cæteros: orate, inquit. Ac deinceps sub silentio eos qui turbati videbantur eduxit, atque compescuit: ut nequissimus ille, qui conventum pietatis transferre conabatur in theatrum, et scholam innocentie in derisum, non, ut putabat, existimationem religiosorum hominum corrumpere posset, sed se proderet, et conatus suos experiretur infirmos. Tanta siquidem celeritate omnia sunt sedata, ut personas illas quæ prope astabant, omnino laterit quod acciderat, et malignus hostis velociter increpatus, non modo scandalum eis quod parabat, inferre nequiverit, sed nec ad illorum notitiam rem perferre. Factumque est ex eo, ut ampliori se custodia fratres munirent, et merito

¹ Petr. Diac. Chr. Cass. l. IV. c. 97. — ² Otto Frising. l. VII. c. 18.

¹ Petr. Clun. l. III. Ep. XXXIV. — ² Vita S. Bern. l. II. c. 4.

et numero et possessionibus deinceps cresceret Claravallis, et multiplicatis conventibus, fere per omnem latitudinem loci illius dilaretur religio: ipse etiam abbas sanctus ex tunc amplius solito miraculis clareret et signis». Hactenus de Claravallensibus Innocentium papam excipientibus.

40. *Privilegium Cisterciensibus de non solvendis decimis.* — At quid tunc ipse Pontifex? cum Cluniacensium divitias adpexisset, atque Claravallensium esset extremam intuitus paupertatem, secundum illud Apostoli¹: «Abundantia vestra illorum inopiam suppleat», statuere placuit, ne Cistercienses monachi, ut hactenus factum esset, decimas persolverent Cluniacensibus, sicque illa dura pensatione eos redditu absolutos. Quo facto vehementer Cluniacenses perturbati sunt, cumque parere cunctarentur, fuerunt censuris Ecclesie compellendi, nempe excommunicatione terrendi, et interdicto mulctandi. Qua de causa eorum abbas Petrus ad eundem Innocentium papam querulam satis scripsit Epistolam², ubi inter alia: «Rogat igitur, venerabilis pater, fidelis et semper subiecta majestati Apostolicæ congregatio vestra, ut ab amore paterno novi filii (nempe Ordinis Cisterciensis nuper exortii) veteres (Cluniacenses scilicet), non expellant. Quoniam etsi novi diligendi, non tamen propter novos, nisi promeruerint, sunt veteres abijciendi. Recordamini, quantum ab antiquis in populo Dei primogenitis deferretur: ut nisi Esau primogenita vendidisset, nunquam ei, licet sanctior Jacob, in primogenitorum dignitate, non dico, preferretur, sed nec etiam conferretur. Si ergo primogeniti sumus, dignum est, ut quod non vendidimus, pro junioribus non perdamus etc.» Sed in Epistola sequenti³, quam eodem argumento ad Haimericum cardinalem diaconum cancellarium dedit, ista fusius pertractavit, digna quæ hic describeretur, nisi cusa reperiretur, quæ possit a cupientibus legi. Porro non a decimis tantum Cluniacensibus persolvendis exempti sunt Cistercienses, sed etiam ab iis, quas sæcularibus clericis solvere soliti erant: quarum gratia querelæ in eos sunt magnopere dilatæ. Extat de his Epistola Richardi archiepiscopi Cantuariensis ad abbatem Cisterciensem, apud Petrum Blesensem⁴, qui in fine sæculi hujus claruit. Sed redeamus ad Petrum Cluniacensem abbatem, qui scripsit tunc etiam querelis plenam ad ipsos Cistercienses de his⁵ Epistolam. Quæ quod a nonnullis in deteriore partem esset accepta, idem Petrus anno sequenti ad eosdem Cistercienses excusatorias litteras dedit, quibus charitas, quæ aliqua ex parte inter eos læsa videri posset, arctiori vinculo, imo insolubili glutino compacta persisteret. Quæ quod brevior sit, nec remorari diu lectorem possit, hic describendam putavimus, sic enim se habet⁶:

41. «Charissimis et venerabilibus fratribus in Christi nomine apud Cistercium congregatis, frater Petrus humilis Cluniacensium abbas, salutem ob quam convenerunt æternam.

«Relatum mihi est a pluribus, quod litteræ, quas præterito anno charitati vestræ mea humilitas destinavit, quosdam vestrorum læserint, et a stabilitate non jam novitiæ, sed antiquæ dilectionis eorum animos paululum commoverint. Quæ postquam didici, ferre non valui, ut tanta tandiu inter nos habita charitatis dulcedo quibuslibet occasionibus vel in modico amarescat. Unde iterato præsentem Epistolam mitto, ut, si illa est ut audivi, læsioni quam prima intulit sequens medeatur, et glutino sancti Spiritus diversa conjungente quantalibet nostrarum scissura mentium uniat. Viderint primæ illius Epistolæ lectores, quo eam spiritu legerint, quo sensu ejus interpretati sint: novi ego me (quod tamen sine fastu aliquo dictum accipite) non superbiæ, sed humilitatis, non discordiæ, sed pacis in dictando spiritum habuisse, et teste eo, quem fallere non possum, charitati quam in cordibus nostrorum decimarum illarum occasione perichitari videbam, eo modo providere voluisse. Et quia vix peccatori dicitur, terram ingredientem duabus viis⁷: nolui juxta Prophetam in corde et corde loqui⁸, nec coram amicis, inter quos omnia nuda esse debent, duplici velamine cor velare, ut dum nodum sine tegmine sapientia vestra videret, communi congregatorum consilio ad dissolvendum efficacius laboraret. Hæc tota fuit causa scribendi: quæ si tunc ignota aliquos scandalizare potuit, nunc saltem, me manifestante, relecta, opto et precor, ut fratribus charissimis ad plenum satisfacere possit. Quiesco enim et quiescam in vobis, delector et delectabor in vobis: etiam læsus non discedam a vobis. Quod tamen tantopere cupio servare vobis; servate nihilominus et nostris et nobis». Hæc Petrus. Quibus videas quales esse consueverint inter sanctos querelæ et dissensiones, in quibus ne charitas, quæ est vinculum perfectionis, dirumperetur, magna in primis adhiberi consuevit industria. Sed quoniam dum hic sumus mortales miseri, non penitus liberi, quos et pertingi interdum a vitiosis sit necesse, inter pares æmulatio solet oriri et contentio, quæ etiam cum Christo manentes exagitavi Apostolos⁹, cum inter eos contentio facta est, quies eorum videretur esse major: inter ipsum Petrum et S. Bernardum quædam sunt absque charitatis læsione oborta dissidia, quorum causa hinc inde ab utroque scribendæ fuerunt elucubratissimæ apologiæ. Sed de his alias.

42. *Innocentius papa in Galliis Lexoviense monasterium restituit, florentibus ubique ordinibus monasticis et piis viris.* — Sed redeamus ad Innocentium papam qui lustrans (ut dictum est) Galliis, præterquam ab Aquitanis, ab omnibus exceptus

¹ 2. Cor. VIII. — ² Petr. Clun. I. III. Ep. XXXIII. — ³ Ibid. Ep. XXXIV. — ⁴ Pet. Bles. Ep. LXXXII. — ⁵ Petr. Clun. I. III. p. 35. — ⁶ Ibid. Ep. XXXV.

⁷ Eccl. II. — ⁸ Psal. XI. — ⁹ Marc. IX. Luc. IX.

est summa cum veneratione, et a Judæis ipsis, quos cum libro legis Parisiis sibi occurrentes non desepxit, sed adspexit Innocentius, dicens : Rogo Deum, ut velamen oculorum vestrorum auferat, ut quæ libris his veritas continetur a vobis intelligatur. Qui autem Innocentium visitantem recipere delectasset, numen ultorem passos esse, auctor, qui ad Sigebertum Auctarium posuit, fidem facit, dum ait, quod hoc anno Novionensis Ecclesia una cum civitate pæne tota prodigiose incendio concremata sit, ob id quod Innocentium cives non recepissent, sed verbis derisorii illum contempnissent.

In visitandis autem provinciis Gallicanis, Innocentius quod maxime doluit, fuit invenisse celeberrimum illud monasterium Lexoviense olim observantia monastica florentissimum, jam penitus moribus delirantibus deformatum, nulla regularis vitæ forma decorum : ad quod in statum pristinum reparandum consilium illud inivit, ut ex Cluniacensi cænobio peteret illis abbatem. Quod ubi Petrus Cluniacensis abbas, litteris Pontificiis admonitus, visus esset implere, frustra se laborasse ad eundem Innocentium papam reddidit significavit litteris istis :

13. « Summo Pontifici et nostro speciali patri domino papæ Innocentio, frater Petrus humilis Cluniacensis abbas, salutem et obedientiam.

« Fratres Lexovienses ad nos venerunt, scripla paternitatis vestræ nobis deferentes, in quibus et destitutio quondam magni Lexoviensis monasterii paterna pietate a vobis delectat, alque ut in eodem loco de fratribus nostris abbatem et officiales necessarios concedamus, nihilominus nobis injungitur, per quos nimirum, secundum litterarum lenorem, omnipotenti Domino ibidem laudabiliter serviat, et tam nobile monasterium in sui status prerogativam et pristinam integritatem, divina cooperante clementia, reparetur. Quod præceptum debita quidem reverentia suscepimus, sed pro sui difficultate non mediocriter formidamus. Nam sicut novit sapientia vestra, in negotio religionis facilius possunt nova fundari quam vetera reparari. Quia secundum B. Gregorium, hominibus aliter institutis durum valde videtur, in mente veteri nova meditari. Qui enim nova tantum ædificat, cum in veterum destructione non oportet laborare. Qui autem vetera reparare nititur, duplici cura constringitur : quoniam illi et veterum destructio, et novorum incumbit ædificatio. Super hæc et vestræ Cluniacensi Ecclesiæ nos qui rem novimus, valde timemus, ne frequenter, sicut sæpe fit ad alias Ecclesias, translati fratribus nostris, quod aliis refrigerium, nobis inferat detrimentum. Postposuimus tamen omnia ista, et fratribus supradictis ad nos venientibus abbatem et officiales necessarios, juxta quod nobis injunctum fuerat, dare parati fuimus. Sed illi nobis valde damna, sibi parum utilia postulantes, acquiescere

nostro consilio noluerunt; et sicut dicebant, die constituta pro eodem negotio ad nos reversuri, ad propria redierunt. Hæc ideo reverentiæ vestræ notificamus, ut si ulterius in his instare voluerint, et de Cluniaco abbatem petierint : nequaquam eligant quod ignorant, sed in nobis, qui melius vultum pecoris nostri agnosceimus, causam suam constituent. Hoc si fecerint, providebimus nos fideliter tales Eccl. ministros, per quos omnipotenti Dom. in monasterio Lexoviensi quantum ipse dederit, laudabiliter serviat; idemque locus, etsi non ad pristinam integritatem, ad meliorem tamen statum, divina cooperante clementia, reparetur. In hanc sententiam, si placet, et nobis et ipsis rescribite ». Hæc ad Innocentium papam Petrus.

14. Sic igitur tam innovatione plantariorum, quam ampliatione vilium sarmentorum Gallicana his temporibus mirum in modum Ecclesia illustrabatur, de qua hæc Robertus in Appendice ad Sigebertum : « Erat, inquit, circa hæc tempora pulchra et decora facies Ecclesiæ diversorum Ordinum et professionum circumdata varietate, dum hinc Præmonstratenses, hinc Cistercienses, inde Cluniacenses monachi, tum et diversi habitus professione sanctimonialis, et mulieres Deo devotæ in continentia alque paupertate sub obedientiæ jugo regulariter viventes, fervore religionis invicem provocarent, et nova certatim diversis in locis monasteria fundarent. Cum his etiam monachi Carthusienses et ipsi paulatim pullulabant, etc. » Porro in Galliis isti plantati etiam trans mare propagarunt palmites suos. Nam ut de aliis dicere prætermittamus, modo de Præmonstratensibus hæc habet idem auctor hoc anno, sed paulo superius : « In Syriam et Palestinam de Præmonstrato fratres missi, nonnullas abbatias ædificarunt ». De quorum una S. Bernardus in Epistola ad Præmonstratenses hæc habet : « Apud Hierosolymam rex Balduinus dum viveret, locum S. Samuelis donavit nobis, et mille aureos simul de quibus ædificaretur. Vos dono nostro et locum habetis, et aureos habuistis ». Sed et ex eadem Francorum gente militares exortæ tunc florebant in Oriente et Occidente religiones, de quibus hic idem qui supra Robertus : « Ad hæc etiam milites Templi Hierosolymitani, fratres quoque de Hospitali sub religioso habitu continenter viventes, ubique se multiplicando diffundeabant, et quæ poterant, vel de laboribus propriis, vel de fidelium elemosynis, ad opus Deo militantium, vel infirmorum quorumque vel pauperum Hierosolymam petebant : sed præsules Ecclesiarum, ac principes sæculi promptissime annuebant, vel etiam sponte offerebant terras, prata, nemora, et cætera quæ monasterii ædificandis erant necessaria ». At de origine Hospitalariorum cæteris Ordinibus antiquiore egit Willelmus Tyrius in Commentario de bello sacro *.

15. Eodem tempore cum in Galliis moraretur

* Petr. Clon. l. III. Ep. XXIII.

* Bern. Ep. CCLII. — 2 Will. Tyr. l. XVIII. c. 4, 5.

Innocentius papa, innotuit ei sanctus Aibertus monachus, cui et audiendi peccatorum confessiones (quod et Paschalis concesserat) tradidit auctoritatem plenamque facultatem: quo ministerio idem sanctus quamplurimos ad meliorem frugem ex immenso peccatorum gurgite Deo adjuvante convertit. Extant res ab eo præclare gestæ a Roberto¹ ejus æquali conscriptæ. Innotuit eidem quoque Pontifici egregia sanctitudo Leopoldi Austriæ marchionis, quam mirificis post obitum laudibus prædicare consuevit: pervenit autem idem sanctus virtutum suarum fulgore consuscus usque ad annum Domini millesimum centesimum trigesimum sextum, ut Acta ejus canonizationis testantur².

¹ Apud Sur. die VII Apr. tom. II. — ² Extant apud Sur. tom. VI. die XV Nov.

46. *Balduini regis obitus.* — Sed et hoc anno Balduinus rex Hierosolymorum, Christi verus confessor, post liberatam a Turcis irruentibus Antiochiam, ægritudine affectus, habitum religionis assumens, et vitam regularem professus si viveret, Deo feliciter spiritum reddidit undecimo kalendas Septembris: in cujus locum gener ejus Fulco comes Turonensium est subrogatus decimo octavo kalendas Octobris, ipsa die Exaltationis sanctæ Crucis: hæc pluribus Tyrius³ de bello sacro. Quo etiam anno moriturus Stephanus rex Hungariæ, in signum penitentiae et ipse monasticum induit habitum, cui successit vir pietate insignis Bela.

³ Will. Tyr. l. XII. c. ult. et l. XIV. c. 2.

Anno periodi Græco-Romanæ 6624. — Anno Æræ Hispan. 1169. — Anno Hegiræ 626, inchoato die 28 Nov., Fer. 2. — Jesu Christi 1131. — Innocentii II papæ 2. — Lotharii reg. 7. Joannis Comneni imp. 14.

4. *Innocentius II Mauriniacum venit.* — A num. 4 ad 15. Protectionem Gallicam Urbani II, Paschalis II, Gelasii II, et Callisti II Pontificum Romanorum suis locis supplēvimus, annoque præcedenti de Innocentii II in idem regnum adventu narravimus. Nunc quæ hoc anno a Baronio ommissa e variis scriptoribus eruere conabimur. Henricus itaque Angliæ rex, qui Normannia, ubi tunc morabatur, Carnotum properavit, die XII mensis Januarii hujus anni, Innocentium II inivit. « Statutum est in curia », inquit chronographus Mauriniacensis, « hinc ad patricium Romanorum, Teutonicorum regem (nempe Lotharium II) iter dirigere, et de Carnoto statione prima Mauriniacum hospitari ». Mauriniacum vero est in suburbio Autissiodori; a monasterio Mauriniacensi aberat abbas, ad quem velociter a monachis nuntius missus. Abbas et prior « accurrunt velociter, et jam pene ingredientem Mauriniacum dominum papam suscipiunt gaudentes, procurant solemniter. Altera vero die (nam biduo apud nos mansit) papam, curiamque abbas supplex adiit, quatenus altare quod erat ante crucifixum consecraret, humiliter postulavit et impetravit. Anno igitur incarnati Verbi MCCCX (anno scilicet a Paschate inchoato), XIII vero kal. Februarii, a domino papa Innocentio II in Ecclesia Mauriniacensis cœnobii consecratum est altare ante crucifixum, in honore

S. Laurentii et omnium martyrum Christi. Inter eas venerabiles personas, quæ huic sanctæ consecrationi adfuerunt, venerabiliores fuerunt episcopi cardinales, Guillelmus Prænstinus, Matthæus Albanensis (qui anno superiori legatus in Franciam missus non fuerat, ut putavit Baronius, ut vel hic locus ostendit), Joannes Ostiensis, Guido Tibrurtinus ». Nominantur postea ibi cardinales presbyteri, et diaconi qui adfuerunt, tum « Bernardus abbas Clararumvallium, qui tum temporis in Gallia divini verbi famosissimus prædicator erat, Petrus Abailardus monachus et abbas (nempe Ruysens in minori Britannia) et ipse vir religiosus, excellentissimarum rector scholarum, ad quas pæne de tota Latinitate viri litterati confluebant, etc. Gaufridus autem Carnotensis episcopus ad populum sermonem fecit. His ita cum maximo tripudio peractis, luce tertia dominus papa cum suo comitatu lætus discessit, ac maximas gratias pro hospitalitate reddens, ad suum colloquium, quod apud Leodium fuit, profectus est ». Quibus ex verbis perspicuum sit, *Gaufridum* Carnotensem episc. nondum Sedis Apostolicæ in Gallia legatum fuisse, ideoque et errasse eruditos, qui martyrium sancti Thomæ prioris monasterii Parisiensis Sancti-Victoris cum hoc vel superiori anno connexuere, cum certum sit, illud contigisse Gaufrido episc. Carnotensi legatione Apostolica in Galliis fungente.

2. *Concil. Leodiense.* — Pergit chronographus : « Ubi Lotharius rex Alamannorum, patricius ac imperator Romanorum, etc. cum omnibus archiepiscopis, episcopis et proceribus regni sui Innocentium papam patremque recognoscit, et se cum eo Romam iturum, et in Sedem propriam restitutum sacramento spondit ». Agebatur tunc de canonizatione sancti Godehardi episcopi Hildensheimensis, anno xxxviii demortui, uti sæculo præcedenti diximus, et auctor anonymus testis oculatus eorum, quæ narrat in Appendice de Miraculis a sancto præsule in vita patris, quæ extat in Actis SS. Bollandianis ad diem iv mensis Maii quo colitur, cap. 1 ait : « In Leodicensem civitatem curia indicta est, ubi Innocentius papa cum Romana Ecclesia, et magna parte Galliæ cum Lothario rege et fere universis episcopis Theoniciæ regionis, conveniunt; ut de violenta Romanæ Ecclesiæ per Petrum Leonis perpetrata, qui tum temporis papatum sibi violenter usurpavit, pertractarent; et qualiter illud idolum, in templo Domini positum, destruerent, elaborarent. Factum igitur est, ut ad Dominicam *Lætare Hierusalem* (Dominicam nempe IV Quadragesimæ, quæ hoc anno in diem xxix mensis Martii cadebat), ad prædictam civitatem multi Catholici viri, tam cum Apostolico, quam cum rege convenirent, et de communi statu Ecclesiæ pertractarent. Inter quos præses noster Bernardus (episcopus Hildensheimensis) cum majoribus nostræ Ecclesiæ assisens, videns opportunitatem ultro sibi collatam, ipsum Apostolicum cum omni curia Romana aggreditur; Viteque pastores nostri coram ipsis recitatur, et ut per eum in Ecclesia Dei canonizetur, devotissime preces funduntur. Sed cum consuetudo sit Romanæ Ecclesiæ in generali Concilio sanctos Dei canonizare, quod tunc temporis in Rhemensem civitatem in festo S. Lucæ indictum fuerat, accepto consilio, petitionem Ecclesiæ nostræ usque in prædictum locum distulit, ibique definiturum certissime promisit ».

3. *In eo Lotharius II imperator coronatus.* — Ægidius Aureavallis monasterii Cisterciensis monachus, qui testatur se Historiam pontificum Leodiensium desisse scribere anno Domini mclli, cap. 27, de adventu Innocentii papæ in urbem Leodiensem hæc habet : « Anno Domini mclxxxi, Gregorius, qui Innocentius dictus est Secundus, multo comitatu episcoporum et abbatum a Francia in Lotharingiam transit, et Dominica IV Quadragesimæ (legendum Dominica III, ut sequentia indicant), quæ est XI kalend. Aprilis, Leodium venit. Ibi a Lothario rege Alemannie, et a domino Alexandro Leodiensi episcopo, et aliis multis episcopis et abbatibus, tam Lotharingis quam Transrhenensibus, muneribus honoratur; tota civitas in obsequio fervet, et Dominica in medio Quadragesimæ (quarta scilicet) ab Ecclesia Sancti-Martini in publico monte usque ad Ecclesiam Sancti-Lamberti publicam et solemnem exhibuit processionem; missam

celebravit, ibi regem et reginam coronavit. Æstimati sunt a quibusdam xxxii episcopi et abbates affuisse, inter quos fuit unus sanctus abbas Bernardus Clarevallensis. Rediens papa a Leodio Claramvallem divertit », quæ est abbatia celeberrima, ubi sanctus Bernardus abbas erat, sita in Campania provincia ad Albulam Fl. tribus leucis a confinio Burgundiæ distans. Anselmus Gemblacensis in Chron. notat Innocentium II, dum Leodii esset, *conjugatos presbyteros* excommunicasse.

4. *Innocentius II Parisios venit.* — Chronographus vero Mauriniacensis præcedentibus ex eo supra in medium allatis subjungit : « Exinde (sc. ex urbe Leodiensi) rediens Innocentius in Galliam, diuque Autissiodoro commoratus, cum tempus convocati Concilii, quod in festivitate beati Lucæ Evangelistæ celebraturus erat, appropinquaret, conciliatio prius apud Turonum Gaufrido Martello nobilissimo et strenuissimo indolis adolescente, comite Andegavensium, Turonorum atque Cennomanensium, rursus per Aurelianensem Stampensensemque rediens provinciam, sua præsentia Parisius illustravit. Ingenti tota civitas obviam ivit. Sic homo ille et comitate vultus et affabilitate sermonis, intuitum mercabatur benivolentiam. A rege Ludovico filioque ejus Philippo favorabiliter excipitur, et egrediens ab urbe honorabiliter educitur ».

5. *Cænâ Domini in monasterio S. Dionysii celebrat.* — Iluc revoco quæ scribit Sugerius in Vita Ludovici regis VI, pag. 218 : « Pace imperii et Ecclesiæ confederata (in urbe nempe Leodiensi) instantem sancti Paschæ diem (nempe xix mensis Aprilis) apud nos in Ecclesia B. Dionysii (duabus leucis ab urbe Parisiensi distante) tanquam speciali filia affectat celebrare. Nos autem ob timorem Dei et Ecclesiæ, matris et filię, gratanter pridie Cænæ Domini suscipientes, celeberrimam Deo et hominibus proferentes processionem, adventum ejus odis exultationis collatantes amplexati sumus. Cæna ergo Domini apud nos more Romano, et sumptuoso donativo, quod presbyterium nominatur (est donativum, quod summi Pontifices distribuere solent, maxime cum inaugurantur, ut multis exemplis ostenditur in Glossario Ducangii in voce *presbyterium*) celebrata, venerandam Domini crucifixionem venerando prosequutus, sanctissimæ Resurrectionis vigiliis honore debito pernoctavit. Summo mane vero extrinseca via ad Ecclesiam martyrum in strata cum multo collateralium collegio quasi secreto commecavit, ibique more Romano seipsos preparantes, multo et mirabili ornatu circumdantes, capiti ejus Frigium (seu Phrygium, præcipuum capitis summi Pontificis ornamentum, de quo vide dicta anno mcvii, num. 2.) ornamentum imperiale instar galææ circulo aureo circumnatum imponunt, albo et palliato equo insidentem educunt, ipsi etiam palliati equos albis operturis variatos equitantes, odas personando festive geminati procedunt. Barones vero

Ecclesiae nostrae feodati, et castellani nobiles, stratores humillimi pedites eum equitantem freno deducebant. Quidam etiam praevis copiosam monebant, ut turbam impediementum removerent, iactabant. Via autem Regia, et salicibus et fixis stipilibus pretiosis pallis rutilabat.

6. *Pascha ibidem celebrat.* — « Cam autem et militiae cunei et populi multi concursus ei honoratissime occurreret, nec etiam ipsa Judaeorum Parisiensium excacata defuit Synagoga, quae legis litteram, rotulam scilicet velatam (vide quae anno superiori num. 27 de *rotulo*, qui idem est ac *rotula*, diximus) offerens, ab ore ejus hanc misericordiae et pietatis obtinet supplicationem: *Auferat Deus omnipotens velamen a cordibus vestris*. Perveniens ergo ad sanctorum Basilicam coronis aureis rutilantem, argenti et plus centies auri pretiosarum gemmarum et margaritarum splendore fulgurantem, divina divine celebrans, Agni veri Paschalis victimas sacratissimas nobis cooperando immolavit. Finita vero Missa, erectis in claustrum pallis strato mensis, materialem agnum tanquam thoris accubiti sumunt, caetera nobilis mensae fercula consueto more suscipiunt. Sed et sequente die eandem ab Ecclesia Sancti-Remigii ad principalem reciprocant processionem. Transactis itaque tribus post Pascha diebus, cum gratiarum actione, et auxilii et Concilii promissione Parisium transievit. Exinde Galliarum Ecclesias visitando, et de earum copia inopiae suae defectum supplendo, cum per terram aliquantisper deambulasset, Compendii demorari elegit, quod oppidum est xvm leucis a Parisiis in Boream distans. Recitat hunc Sugerii locum Baronius, sed ad intelligentiam eorum quae in medium adducimus, hic omittendus non fuit.

7. *Igneus morbus Parisiis miraculose sanatur.* — Anno superiori igneus morbus, seu sacer quidam ignis, populum Parisiensem invaserat, cui sanando medicorum remedia inutilia fuere. *Stephanus* urbis Parisiensis episcopus constituit processionum dies, quibus sanctorum reliquiae ad Ecclesiam Cathedrali beatissimae Dei Genitrici dicatam deportarentur. Tandem ad eandem Basilicam delatae sanctae *Genovefae* Parisiorum patronae reliquiae; statim atque eam ingressi sunt, qui ejus thecam ferebant, omnes, tribus exceptis, sanati sunt, nec ultra id tempus morbus saevit. Auctor anonymus, qui quae viderat refert, apud Bollandum ad diem iii Januarii, quo sancta *Genovefa* colitur, pag. 152, ait: « Venit sequenti anno ad partes istas, felix memoriae Innocentius papa, qui audito miraculo, et virgini (nempe *Genovefae*) gratias egit, ipsumque miraculum tanquam indeficienti laude dignum anniversarii laude donavit. Nulli autem in dubium veniant quae scribimus, quia non audita sed convisa narramus ». Instituta tunc *Excellentia sanctae Genovefae*, seu *festum*

miraculorum, cujus ad diem xxvi Novembris in multis Martyrologiis mentio, ut videre est apud Bollandum citatum. Ad perpetuam hujus rei memoriam aedificata Parisiis est Ecclesia juxta antiquam Basilicam, dicataque Deo sub honore et nomine B. *Genovefae de Miraculo Ardentium*.

8. *Ignis sacer hoc et precedenti saeculo in Gallia saevit.* — Hoc morbo igneo diu vexata est Gallia. Nam *Gaufredus* prior Vosiensis scribit ad annum mxciv, *Aquilaniam* tunc temporis eo atrocissime arsisse: et ex omni parte ad S. Martialem Lemovicensem confluisse populorum ac principum turmas, ejus interventu levamen mali quaerentes: tanquam *Sanctum-Pardulfum* innumeris coruscasse miraculis. Saeculo superiori exeunte, sancti *Antonii abbatis* Congregatio hujus morbi occasione in Delphinatu instituta, annoque mxxviii idem ignis sacer extinctus est Suessione precibus *Deiparae Virginis*, qua de re Magister *Hugo Farsitus* scripsit libellum; quem *Picardus* canonicus regularis Sancti-Victoris, in Notis ad Epistolam xxxv divi Bernardi, testatur inveniri Ms. in Biblioth. Victorina, cujus aliud exemplar Ms. diei se vidisse Oudinum in Supplem. de Script. Eccles. in Hugone Farsito. Editus est libellus iste ad calcem Historiae Gallicae B. Mariae Suessionensis a paucis annis, Parisiis. Scripsit ad Hugonem abbatem incerti loci Epistolam duas sanctus Bernardus. Plures tamen per haec tempora fuisse Hugones Farsitos, ostendit Mabillonius in Nota ad Epist. xxxv divi Bernardi, ideoque incertum, an Hugo iste idem sit cum eo de quo loquimur. Denique Anselmus Gemblacensis in Chron. ait, an. mcccix, hanc plagam ignis divini Carnotum, Parisios, Suessionem, Cameracum, Attrebatum, et alia multa loca pervasisse, et ope Genitricis Dei Mariae extinctam fuisse, quod pluribus narrat.

9. *Innocentius II varias urbes perlustrat.* — Parisiis Rothomagus, indeque Bellovacum Innocentius II profectus est. Nam in Biblioth. Clun. pag. 1393, refertur Rescriptum « datum Belvac per manum Aymerici S. R. E. diaconi card. et cancellarii, XIII kal. Junii, Indict. ix, Incarn. Dom. anno mcccxi, Pontificatus vero domini Innocentii papae II anno ii ». Eo Rescripto confirmat Innocentius donationem centum marcarum monasterio Cluniacensi factam ab Henrico Angliae rege; atque Pontifex: « Haec donatio apud Rothomagus ab eodem filio nostro Illetrico rege, Incarnat. Dominicae an. mcccxi, Indict. ix, mense Maio, die Dominica, in nostra et fratrum nostrorum praesentia facta est ». Tum nomina viii cardinalium praesentium, et aliquot episcoporum ac abbatum referuntur, et nomina Oldegarii Terraconensis archiepiscopi, Gaufridi Carnotensis episcopi, Bernardi Clavallis abbatis, et Sugerii Sancti-Dionysii abbatis (1).

10. *Suessione Ecclesiam S. Medardi conse-*

(1) Ad ea supplenda, quae a Pagio hic omittuntur circa itinerarium Innocentii per Gallias, adnotandum censeo, Pontificem post moram

erat. — In Chronico S. Medardi Suession., quod extat tom. II Spicilegii, ad annum MCCCXIII, legitur : « Ecclesia B. Medardi Suessionis dedicatur a domino Innocentio papa II, prædicto Pontificatus sui anno secundo, in honore B. Mariæ semper virginis, et sanctorum Apostolorum et martyrum, et in honore B. Medardi episcopi et confessoris, idus Octobris. Prædictus siquidem papa ante dicationem Ecclesiæ prædictæ Odonem abbatem B. Medardi, nolente, sed contradicente episcopo Suessionensi, Aurelianus benedixit pridie kalendas Octobris ». Hujus Dicationis ab Innocentio II peractæ meminere et alii.

11. *Concil. Rhemense.* — « Dominum papam Remim proficiscentem, episcoporum, abbatum, litteratorum, nobiliumque clericorum grandis numerus sequebatur », inquit chronographus Mauriniacensis. Loquitur de hoc Concilio Baronius num. 2 et duobus sequentibus, illudque habitum XIV kal. Novembris, teste Dodechino in Chron. In eo Innocentius II Anacletum « et suos fautores excommunicavit, sicque in partibus Germaniæ usque ad septimum annum permansit », inquit Uspersensis in Chron. Sed quoad septennalem Innocentii II in Germania moram, certum est eum falli; septennio enim, quo Roma abiit, non nisi in Gallia et in Italia mansit. « Illic affuerunt XII archiepiscopi, et CCLXIII episcopi, et abbatum ac monachorum et clericorum magna multitudo. Illic rex et regina, et tota nobilitas Franciæ confluxerunt », inquit Ordericus lib. 13, pag. 895. Hujus Concilii Acta perire, sed septemdecim canones in eo conditi leguntur tom. X Concil. In quarto, officio atque Ecclesiastico beneficio privatur, « qui a subdiaconatu et supra uxores duxerint, aut concubinas habuerint »; in quinto præcipitur, « ut nullus missas eorum audiat, quos uxores vel concubinas inducantur habere cognoverit », et in undecimo *Treuga Dei* tempore ibi expresso observari præcipitur. Obiter observa morem Conciliorum, feria secunda inchoatorum.

12. *Innocentius Ludovicum filium Ludovici VI Franciæ regis consecrat.* — « Philippus puer (major natu Ludovici VI, Franciæ regis) nuper in regem unctus, dum in civitate Parisiis equo vehitur, porcus equi pedibus se forte submittere, equum super ipsum præcipientem dedit, et de ejus subita et miseranda morte Francis luctum induxit tertio idus Octobris », inquit Ordericus pag. 895, et Pseudo-Robertus de Monte in Chron. Ludovicus novi regis consecrationem Ludovico VI suavit Sugerius, ut ipsemet in Vita Ludovici VI scribit, qui addit, eum cum Adelaide regina, Philippo filio, et regni proceribus iterum venisse, et Concilio interfuisse.

« Igitur eo die solito clarior sol illuxit », ait chronographus Mauriniacensis, « et rebus agendis suum obsequium præsentare visus est. Papa mane summo de palatio Pontificis egrediens cum suis curialibus et archiepiscopis, episcopis et abbatibus, ad Ecclesiam B. Remigii, ubi rex cum filio hospitatus erat, perrexit, et cum magna devotione atque processione monachorum decentissime suscipitur. Ibiq. Romani Pontificis omnibus insignibus indutus, ac, ut sibi consuetudinis est in sacris magnisque festivitibus, Frigio (seu Phrigio quod præcipuum est capitis summi Pontificis ornamentum, ut an. MCXVII diximus) innumera Ecclesiastici atque militaris ordinis, plebisque multitudine constipatus, ad Ecclesiam matricem, quæ in honore B. Mariæ consecrata est, cum puero consecrando pervenit etc. » Facta ea consecratio a papa Innocentio, octavo kalendas Novembris, ut habent Pseudo-Robertus de Monte laudatus ac Ordericus lib. 13, pag. 895, et quidem accurate; chronographus enim Mauriniacensis jam scripserat factum id fuisse *Dominica die*, quæ hoc anno in diem XXV Octobris incidit. Iste Ludovicus post Ludovicum VI patrem in Gallia regnavit.

13. *Ei imperator et varii reges obedientiam præstant.* — « Domino papæ », inquit chronographus Mauriniacensis, « in Concilio residenti, per quemdam Magdeburgensem archiepiscopum (nempe sanctum Norbertum) præsentate sunt litteræ a Lothario rege Alamannorum, in quibus rursus et obedientia promittitur, et quod se ad expeditionem (nempe Italicam) cum iuribus (legendum *viribus*) omnibus regni sui præpararet, intimatur. Similiter etiam rex Anglorum Henricus per Hugonem archiep. Rothomagensem, et ornatissimas litteras misit, et fidelem obedientiam promisit. Reges quoque ceterioris Hispaniæ, senior Idelfonsus (nempe Alphonsus VI Aragoniæ et Navarræ rex), et interioris junior Idelfonsus (nempe Alphonsus VII Castellæ rex) missis per episcopos suarum provinciarum Epistolis papam salutant, sese filios et obedientes denuntiant, auxilium contra Christiani nominis inimicos, et regionum illarum invasores Morabites suppliciter efflagitant. Fuerunt siquidem et letitiae et admirationi ad id negotium pertinentes excellentissimorum Heremitarum Carthusiensium litteræ, quæ per quemdam venerabilem abbatem de Ordine Cistellensi (id est Cisterciensi) delatæ, et in Concilio per Gaufridum Carnotensem episcopum recitate sunt ». Refert postea Carthusianorum litteras, quas dicunt se mittere *per abbatem Pontiniacensem*, qui erat Hugo primus hujus monasterii abbas, postea episcopus Autissiodorensis, vir

Bellovacensem, iterum se Autissiodorum contulisse, ubi litteras dedit ad Hugonem Rothomagensem archiepiscopum consignatas *Altissiodori VII kal. Augusti MCCCXIII*, quibus illum monet ut abusus quosdam, qui in provinciam Normanniæ gliscere coeperant, reformet. Vulgavit litteras hæc P. Bossin in sua Collectione Concilior. Rothomæ, par. 2, pag. 22. Ex his autem colligo Pontificem seu his visisse Parisios, seu male scripsisse Sugerium a Pagio hic num. 9 retulit, dum asserit Innocentium ad S. Dionysium Pascha celebrasse. Cum enim teste chronographo Mauriniacensi apud Pagium hic num. 4, Leodio Autissiodorum venerit, ibique diutius substiterit; dein Turonum perrexerit, ac tandem « rursus per Aurelianensem Sampsensemque provinciam reliens, sua presentia Parisios illustravit »; et in eo regressu Altissiodoro pertransiens ibi litteras a nobis laudatas VII kal. Augusti dederit; patet utique Parisios vel his vel du post Pascha venisse. Nisi forte reputaverimus postquam Parisios degressus fuisset, et Bellovacum Rothomagumque inivit, iterum Altissiodoro se restituisse.

magnæ sanctitatis, de quo fuse agit Manricus in *Annal. Cisterciens.* variis locis, qui tamen hujus rei mentionem non facit, quia quando *Annales* suos composuit, *Chronicon Mauriniacense* nondum lucem viderat.

14. *Canonizatio Godehardi episcopi Hildesheimensis.* — In Concilio Rhemensi *Godehardus* episcopus Hildesheimensis sanctorum honoribus donatus fuit. *Bernardus* enim ejusdem urbis episcopus, qui hoc petierat ab Innocentio II in Concilio Leodiensi, uti supra narravimus ex auctore anonymo *Historiæ canonizationis et miraculorum sancti Godehardi*, remissus fuerat ab eo ad Concilium nationale, « quod tunc temporis in Rhemensem civitatem in festo sancti Lucæ indictum fuerat », inquit anonymus. Festum sancti Lucæ incidit in feriam I, seu in XV kalend. Novemb. sed *Dodechini* abbas ait, Concilium *XIV kal. Novemb.* habitum esse, quia scilicet postridie festi sancti Lucæ seu feria secunda de more prima sessio coacta, et negotiorum tractatio inchoata. *Bernardus* episcopus Hildesheimensis una cum *sancto Norberto* metropolitano suo ad urbem Rhemensem venit, « dum jam Synodus aliquot dies esset celebrata », inquit idem anonymus, qui paulo post subdit : « Episcopus Tarraconensis, vir religiosus et litterali scientia eruditus, qui ordine translatio fieri deberet, exposuit ». Erat is beatus *Oldegarius* Barcinonensis episcopus et Tarraconensis archiepiscopus. *Henschenius* ad diem IV mensis Maii Vitam sancti *Godehardi* illustrans, pag. 523, anonymum explicat de *Michael*, post expulsos Siracenos episcopo Tarraconensi, ut tradunt *Surita* et alii, verum manifesto errore; *Michael* enim episcopus erat Tarraconæ, in regno Aragoniæ, non vero Tarraconæ aut Tarraconæ in principatu Catalaunensi seu Barcinonensi. *Oldegarius* vero archiepiscopum curiam Innocentii II secutum esse, jam supra indicavimus. In canonizatione sancti *Godehardi* *coadunata Synodus terminatur*, inquit anonymus, qui statim refert litteras Innocentii II *clero et populo Hildesheimensi*, datas *Rhemis IV kalend. Novembris*, quibus significat, se *Godehardum* in sanctorum numerum retulisse. Ex quibus intelligimus, Synodum Rhemensem die vicesima nona Octobris finitam fuisse.

15. *Concil. Rhemense post Leodiense celebratum.* — *Baronius* num. 7, videns *Bernardum*, seu verius *Ernaldum Bonævallens abbatem* scribere, post Concilium Rhemense celebratum esse Leodiense, quoddam ex illis prius coactum fuerit sub dubio reliquit; sed vel solus anonymus non semel hoc anno a nobis citatus, qui hoc tempore vixit, auctorem Vitæ sancti *Bernardi* ea in re hallucinatum esse certo nos edoceret, quando alia testimonia desceant. Recte autem *Baronius* num. 8 redarguit *Petron Diaconum* Casinensem, qui lib. 4, cap. 99 scribit, Innocentium II *Lothario imperatori* investituræ, quas enixe petebat, concessisse; hoc enim prorsus a veritate alienum esse ostendit *Epistola* cl.

divi *Bernardi* ad Innocentium II, qua ejus zelum adversus ambitionem *Philippi*, qui sedem Turonensem invadere tentabat, excitare cupiens, laudat eum ex variis recte factis, et de congressu ejus cum *Lothario imp. Leodii* habito, atque : Sed nec *Leodii* cervicibus imminens micro barbaricus compulit acquiescere importunis, improbisque postulationibus iracundi atque irascentis regis ». *Sugerius* in Vita *Ludovici VI regis*, narrata unctione *Ludovici* novi regis, Rhemis peracta ab Innocentio II, subdit : « Dominus papa soluto Concilio, *Aulissiodoro* elegit demorari ».

16. *Innocentius II Noviomii receptus.* — *Baronius* num. 12, ait Innocentium II *Noviomii* a civibus receptum non fuisse, eamque in rem citat *Pseudo-Robertum* de Monte *Sigeberti* continuatorem. Verum hic historicus hæc tantum dicit : « Ecclesia pæne Sancte-Mariæ in episcopatu, totaque pæne civitas *Noviomensis* incendio conflagravit justo (ut fertur) infortunio, quia summum Pontificem Innocentium verbis irrisoriis multi illorum exhonorerunt ». Porro cum *Noviomum* paucis leucis a *Bellovac* distet, illic mense Maio Innocentius II profectus est, ut ex dictis sequitur.

17. *Floret S. Aybertus monachus reclusus.* — Ad num. 15. *Floret* hoc tempore sanctus *Aybertus* presbyter, reclusus Ordinis sancti *Benedicti*, quem cum *Raynerus* abbas *Crispini* monasterii inter *Valencianas* et *Gisenopolim* *Hannoniæ* civitates positi, itineris *Romani* comitem assumpsisset, ex illa professione reduci factus est monachus *Crispiniensis*. Miro modo in claustro annos viginti quinque vixit, ut narrat *Robertus* archidiaconus *Ostrevandensis* in Belgio, auctor coævus, in ejus Vita, qui asserit se eum viventem et mortuum dilexisse, additque *Aybertum* postea reclusum in eremo sub imperio *Crispiniensis* abbatis viginti et quinque annis vixisse. Ad honorem sacerdotii « promotus est, ut populus ad se venientibus melius consulere et familiarius secreta confessionum audiret. Factus autem presbyter, duas in die celebrabat missas, unam pro vivis, alteram pro defunctis », inquit idem *Robertus*. *Molanus* ad diem II mensis Maii, et *Arnoldus Raissius* canonicus *Duacensis*, qui Vitam sancti *Ayberti* edidit primæva phrasi, quæ nunc legitur in *Actis SS. Bollandianis* ad diem VII April. plura referunt exempla eorum, qui plures missas eadem die celebrarunt. Peractis *quinquaginta* annis, ex quo factus fuit monachus, « ipso sacratissimo die sancti Paschæ quod tunc VII idus Aprilis accidit celebrandum », feliciter obdormivit in Domino, ideoque vel anno MCCCXXV, vel anno MXXL, quo utroque anno Pascha incidit in diem septimum idus Aprilis, seu diem septimum ejusdem mensis. *Henschenius* in *Notis* ad ejus Vitam, refert *Rescriptum* Innocentii II *Ayberto monacho et recluso* concessum *Rhemis, XII kalend. Novemb.*, quo confirmat facultatem a Paschali et *Honorio* ei factam audiendi confessiones, et ostiis apertis missas celebrandi.

18. *Floret S. Leopoldus marchio Austriae*. — Florebat etiam *sanctus Leopoldus*, cognomine *Pius*, quartus ejus nominis, marchio Austriae. Lambecius tom. II Biblioth. Cas. pag. 946, testatur in ea Bibliotheca extare *Chronicon Austriacum Florianense*, sive in monasterio Sancti-Floriani supra *Ansum* Fl. posito, perductum usque ad annum Christi MCCXX, quo auctor anonymus, qui illud edidit, scribit se vixisse. Leopoldus juxta illud *Chronicon* fundator exstitit monasteriorum in Austria *Neumburg*, et *Sancto-Crucis*, duxitque uxorem Agnalem nomine, « filiam Henrici imperatoris Quarti, per quam habuit decem et octo pueros, quorum septem », ut scribit alius anonymus, ejus Fragmentum recitat ibidem Lambecius pag. 631, « tempore infantiae de medio sublati sunt, undecim vero qui supervixerunt, scilicet sex filii et quinque filiae ad honores rerum temporalium non modicos promoti sunt omnes ». Subdit Leopoldum anno MCCXXVI, *decima septima kal. Decemb.* de hac luce subductum fuisse. Anno MCLXXXV, ut eo anno apud Spandam num. I videre est, Innocentius VIII Leopoldum innumeris miraculis clarum, Friderici III imperatoris et principum Germaniae precibus inter sanctos reitit.

19. *Moritur Balduinus II Hierosolymorum rex*. — Ad num. 16. Mortuus est hoc anno, vicesima prima die mensis Augusti *Balduinus II* Hierosolymorum rex, cui successit « Fulco gener ejus, comes Turonensium, Cenomanensium et Andegavensium, cui praedictus dominus rex filiam suam primogenitam Milisendam nomine dederat uxorem », inquit Tyrinus lib. 13 cap. ult. et lib. 14, cap. 4. *Fulco*, ut subdit Tyrinus, uxore defuncta Hierosolymam venerat, et Balduino II gratiam et universorum principum familiaritatem acquisierat; cumque ad propria regressus fuisset, Hierosolymam vocatus fuit a rege, qui et primogenitam suam matrimonio copulavit, et ad regni Hierosolymitani successionem eum destinavit.

20. *Obitus Stephani II Hungariae regis*. — *Stephanus* Hungariae rex, hujus nominis II, filius Colomani regis, cum esset in articulo mortis, « monachalem habitum, relicto regno, suscepit anno regni sui xviii, et sepultus est Waradini. Migravit autem ab humanis anno Domini MCCXXI », inquit Joannes de Thwrocz in Chron. Hungarorum cap. 73. Regnavit post eum *Bela* Cacus, filius ducis *Almi* Cacci qui fuit princeps optimus.

21. *Moritur Raimundus III comes Barcinonensis et Provinciae*. — *Raimundus Berengarius* hujus nominis III, comes Barcinonensis et Provinciae princeps *armis opulentissimus*, hoc etiam anno obiit, ut tradit auctor de Gestis comit. Barcinon. qui subdit : « Rexit comitatus supradictos 1. annis, dimisitque duos filios quos instituit post se haeredes, Raimundum Berengarii videlicet in Barcinonae, Bisuldini et Cerritanice comitatibus, Berengarium namque Raimundi in Provinciae comitatu ». Dominatus est per annos quinquaginta comitatu Barci-

nonensi, sed Provinciae per annos viginti tantum inchoatos. Fuit « vir mente pius, militia strenuus, pacisamator, in bellis ineluctissimus triumphator », inquit idem anonymus, qui tradit etiam Raimundum Berengarii ejus filium, hujus nominis Quartum, *vera probitate, scientia, et ingenio* claruisse. Verum in eo fallitur, quod scribit, Raimundum III in fine vite seipsum *Deo et Hierosolymitanae militiae* obtulisse. Constat enim ex Actis publicis a Diago lib. 2 Hist. com. Barcinon. cap. 114 et seqq. memoratis lectisque, eum habitum *Templariorum* induisse, idque mense Julio paucis ante mortem diebus. Contendit quidem Diagus eum anno superiori demortuum; sed praeterquam quod auctorem Chronici S. Victoris Massiliensis, et omnes scriptores Hispanicos contrarios habet, Baluzius lib. 4 *Maree* Hispanice eum deceptum fuisse ostendit. Ejus testamentum refert idem Baluzius in Append. ad *Mare. Hispan.* num. 381.

22. *Concil. Moguntinum*. — Dodechinus abbas ad hunc Christi annum meminit Concilii Moguntiae habiti, « praesente Lothario rege, presidente Mattheo Albaniensi cum Maguntinensi archiepiscopo », in quo Bruno Argentiniensis episcopus super sua intrusione impetitus, « in manus archiepiscopi et cardinalis Argentinensem recongnovit episc. » Mentionem hujus Concilii facit etiam Trithemius in Chron. Hirsaug. ad hunc Christi annum, atque Innocentium II, qui in Concilio Leodiensi verus papa declaratus fuerat, iterum in Concilio Moguntino verum Pontificem agnitus esse, et *Mattheum Albanensem* episcopum card., Apostolice Sedis in *Germania* legatum, huic Concilio praesedissee. Nominat praeter duos archiepiscopos Moguntin. et Trevirensium, episcopos octo Germaniae, qui eidem interfuere, inter quos S. Otto episc. Bambergensis, dicitque se aliorum multorum nomina ignorare. Ex quo patet. Baronium anno superiori perperam existimasse *Mattheum Albanensem* legatum Apostolice Sedis in Galliam missum esse. Fallitur et Trithemius, quando ait *Mattheum* jam per triennium in Germania legatum praesedissee, cum, ut suo loco ostendimus, an. MCCXXII et duobus subsequentibus legatus in Gallis fuerit.

23. *Moritur Hildebertus archiep. Turonensis*. — Hoc anno mortuus est *Hildebertus* Genomanensis episcopus, et post obitum Hildeberti archiepiscopi Turonensis, ad eam metropolim anno MCCXXV translatus. Ordericus lib. 4, pag. 531 testatur, illam translationem peractam esse anno MCCXXV, *Indict. iv*, et lib. 12, pag. 882, dicit id factum *Indict. iii*, indeque in priori loco corrigenda *Indictio iv*. Ordericus enim Indictionem cum anno incarnationis exorditur. In posteriori loco scribit, « eadem septimana, qua Callistus papa » hominem exuit, Gislebertum Turonensem archiep. « qui pro Ecclesiasticis negotiis Romam perrexerat », illic obiisse, et Turonensis Hildebertum sibi praesentem adscivisse, « et Honorii pape permissu gaudentes in Turonica metropolis cathedram » transulisse.

Verum summopere fallitur, in eo quod utrobique Callisti II mortem cum anno MCXXV connectit, cum certum et indubitatum sit Callistum medio circiter mense Decembri anni antecedentis vivere desiisse. Subdit in posteriori loco Ordericus : « Ibi fere vii annis honorifice vixit, et subjectis profecit » ; in priori vero : « Ibi laudabilibus studiis et actibus adhuc insistit ». Ex quibus duo eruimus. Primum Hildebertum anno MCXXXI vitam cum morte commutasse ; nam Mabillonius tom. III *Analect.* refert Gesta episcoporum Cenomanensium, in quibus dicitur, *Hildebertum* rexisse Ecclesiam Turonensem *sex annis et mensibus sex*, et fuisse vitam ejus *quasi LXXX annorum*. Quare currenti anno Hildeberti mors accidit, cum anonymus ille et Ordericus de duratione sedis ejus in Ecclesia Turonensi conveniant, et perspicuum sit, tam Labbeum in lib. de Script. Eccles. quam San-Marthanos, mortem ejus in annum MCXXXVI male distulisse, eo ut videtur fundamento, quod *Hugonis de Stampis* Hildeberti successoris ante illum Christi annum in Actis publicis mentio non occurrat. Intelligimus secundo Ordericum librum suum quartum, ante annum currentem composuisse, cum de *Hildeberto* adhuc vivente loquatur, et deceptos esse viros doctissimos, qui quod viderent colligi ex libro 13 qui ultimus est, Ordericum anno MCXXXV libri illius elucubrationi incubuisse, scripsere eum Historiam suam anno MCXXXV composuisse ; id enim tantum de parte libri 13 dicendum, non vero de universo ejus opere. Præter *Hildeberti* opera a Labbeo enumerata, plures ejus Epistolæ tom. VI et XIII Spicilegii Dacheriani, et una tom. I *Analect.* editæ sunt. Porro Hildeberto demortuo, canonici Turonenses in partes divisi sunt ; quidam enim quemdam Philippum elegere, *qui non intrans per ostium in ovile ovium*, Petrum Leonis adiit, et sacramento ab eo suscepto *festinanter rediens, sedem Turonensem occupavit*, inquit auctor citatus de Gestis episc. Cenoman. Ad hanc invasionem retrahenda quæ An. MCXXXVII num. 17, Baronii ordinem sequentes, diximus.

24. *Innocentius II monasterio Paracletensi favet.* — *Innocentius II*, quem supra diximus post Concilium Rhemense *Autissiodori* resedisse, in eadem urbe ad petitionem *Heloisse*, uxoris quondam Petri Abaelardi, tunc prioris monasterii Paracletensis in diocesi Trecenti siti, ejusdem monasterii possessiones, impræsentiarum adeptas aut in futurum eidem concedendas, sub Apostolice Sedis protectione suscipit. idque, ut videtur, Petri Abaelardi rogatu et meritis. Refert eas litteras Bukeus tom. II Hist. Universit. Paris. pag. 127, quarum hæc clausula est : « Datum Autissiodori per manum Aldierici (legendum Aymerici) S. R. E. diaconi cardinalis et cancellarii, IV kal. Decemb. Indict. X, Incarnat. Domini an. MCXXXI, Pontificatus vero D. Innocentii pape II anno II ». Abaelardus, qui in oratorio Paracletensi manserat, antequam illud in *Heloissam* et moniales ejus

transferret, in Hist. suarum calamitatum cap. 13 ait : « Et plus (sciat Deus), ut arbitror, uno anno in terrenis commodis sunt multiplicatæ, quam ego per centum, si ibi permansissem. Quippe quo feminarum sexus est infirmior, tanto eorum inopia miserabilior facile humanos commovet affectus, et earum virtus tam Deo quam hominibus est gratior. Tantam autem gratiam in oculis omnium illi sorori nostræ, quæ cæteris præerat, Dominus annuit, ut eam episcopi quasi filiam, abbates quasi sororem, laici quasi matrem diligere, etc. »

25. *Anacletus Beneventi auctoritatem suam communit.* — *Anacletus* antipapa anno superiori exeunte, vel currentis initio *Beneventi* versabatur, et Roberto principe Capuano operam suam conferente, auctoritatem suam ibidem communit ; mense enim Febuario unum e factiosis, *Ratpolt* nomine, e carcere liberavit, qui ut narrat Falco in Chron. « sacramento firmavit, jam amplius communitatem illam (*Beneventanam*), vel aliam nunquam tenendam. Alios vero ejus sequaces sacramentis ligatos de civitate projecit, ut sine ipsius Anacleti voluntate, vel sui rectoris, non ingrediantur civitatem ; quibus omnibus ita pacatis, prædictus Anacletus die kalendarum Martiarum Salernum ivit, deinde consilio accepto Romam redeundi disposuit ».

26. *Beneventani seditionibus assueti.* — *Salerno* Anacletus Capuanus venit, uti refert Falco, tuncque *Beneventana* civitas turbata fuit seditione, a rectore seu præfecto *Crescentio* compressa. Id post kalendas Martias et discessum Anacleti a *Beneventana* urbe accidit, « diebus non multis evolutis, octavo die intrante mensis Maii (legendum mensis Martii, ut sequentia ostendunt). Nam *interea* duo judices *Beneventani*, qui in exilium missi fuerant, « *Roffridus* et *Persicus*, cognoscentes prædictum Anacletum Capuanam civitatem applicuisse, ut Romam reverteretur (scilicet mense Martio currentis anni) civitatē in Capuanam ingrederentur. Idem Robertum principem tunc Anacleti fidelem suppliciter precantur, ut ejus intercessionem amorem Anacleti invenire mereantur. Robertus itaque princeps absque mora Anacletum adiit.... Petitionibus principis Anacletus favens, litteris datis licentiam redeundi et secure habitandi in civitate eis largitur. Ii vero ad portam S. Laurentii pervenerunt, disponentes ad propria, fronte libera, sicut ab Anacleto acceperant, reverti. (*Beneventani* enim Anacleto in omnibus subditi esse volebant, sed consueta agendi licentia uti volebant). Sed turba inimicorum copiosa simul cum prædicto *Crescentio* (*Beneventano* præfecto) insurgens, crudeliter ne introirent minatur. Ipsi vero potentiam eorum et minarum copiam sentientes salutis consilium arripiunt, et ad prædictum sunt reversi Anacletum, qui adhuc Capuæ morabatur, continuo pedibus ejus prostrati, omnia quæ dicta quæque facta super se fuerant, et vestigio retulerunt.

Anacletus igitur super hoc iratus cœpit contra Beneventanos mirabiliter minari. Tandem ex consulto principis eos ad civitatem remisit, dans eis cardinalem suum, ut eo viso et audito fidem da-

rent, eosque pacifice ad propria eorum reverti permitterent. Venerunt igitur cum prædicto cardinali; quo audito, omnique deposito furore, cum civibus cives ipsi permanserunt ».

INNOCENTII II ANNUS 3. — CHRISTI 1132.

1. *Innocentius Cluniacensibus Privilegium confert, et in Italiam iter egreditur.* — Annus sequitur Redemptoris trigesimus secundus supra millesimum centesimum. Indictione decima, quo Innocentius papa, exacta collecta indicta Gallicanis Ecclesiis pro reditu Romam, ingressus est Italiam versus iter. Cum rogatus a Cluniacensibus Innocentius papa dedicasset Cluniacense monasterium, eidem contulit Privilegium, quod acceptum ab eodem monasterio hic describimus :

« Innocentius episcopus, servus servorum Dei, dilecto filio Petro Cluniacensi abbati, ejusque successoribus regulariter instituendis, in perpetuam rei memoriam.

« Libertatis (liberalitatis) laudabile genus est, ut qui se B. Petro et sanctæ Romanæ Ecclesiæ humili devotione exponunt, majorem familiaritatis prærogativam et digniora beneficia sortiantur. Quam gratum Deo Cluniacense monasterium famulatum impendat, et quantum apud homines nitore religionis fulgeat, Ecclesia Dei novit et vehementer exultat. Equitatis igitur postulat ratio, ut idem locus Apostolicæ dilectionis privilegio gaudeat, et tam in capite quam in membris libertatem obtineat. Nos siquidem monasterium ipsum, quod specialiter ad jus beati Petri et sanctæ R. E. spectat, per nos ipsos visitavimus, et eodem die, quo revolutis multorum annorum spatibus prædecessor noster felicis memoriæ papa Urbanus ibidem majus altare consecraverat, cum archiepiscopis et episcopis, qui nobiscum convenerant, cooperante Spiritus sancti gratia, idem monasterium solemniter dedicavimus. Devotioni quoque et humilitati fidei, qui pro amore Dei et ipsius loci reverentia in anniversario dedicationis illuc conveniunt, prospicientes, ipsis quadraginta dies pœni-

tentiæ sibi injectæ, de gratia Dei confisi, beatorum Apostolorum Petri et Pauli auctoritate remisimus. Statuimus etiam, ut immunitas ipsius cœnobii inviolata et integra futuris temporibus conserveatur. Et si quis intra terminos banni, qui ab eodem prædecessore nostro circa Cluniacum constituti sunt, scienler hominem capere, vulnerare, vel res ejus auferre præsumperit, excommunicationis sententia percussatur, quousque ablata restituat, et vobis Cluniacensibus monachis de illata injuria congrue satisfaciat. Ad hæc adjicientes decernimus, ut quicumque Cluniacenses monachos, vel eorum socios ceperint, aut ea quæ portaverint vel conduxerint, excommunicationi subjaceant. Si vero aliqui absque ipsorum monachorum præsentia, ea quæ ad vitam, et vestitum fratrum in Cluniacensi cœnobio Domino servitium pertinent, alicubi deprædati fuerint, nisi infra quadraginta dies commoniti ablata restituerint, eos anathemati subjacere præcipimus. Et intra eorum dominia prohibemus officia celebrari, loca quoque in quibus se receperint, donec præsentis fuerint, a divinis obsequiis præter infantum baptismum, et morientium penitentias cessare jubemus, et nullis eorundem præsumptorum, nisi a Romano Pontifice absolvatur. Porro quisquis præfatis fratribus ubicumque manentibus quolibet alia præter ea, quæ superius annumeravimus, abstulerit, nisi infra quadraginta dies commonitus ablata restituerit, excommunicationi subjaceat, nec absolvatur, donec capitale reddat et congrue satisfaciat. Sane archiepiscopus et episcopi, in quorum parochiis hoc perpetratum fuerit, auctoritate beati Petri et nostræ præcipimus, ut postquam clamor ad aures eorum pervenerit, vel malefactum innoverit, præscriptam sententiam lepiditate seposita faciant observari.

« Ego Innocentius Catholicae Ecclesiae episcopus. Datum Viennae per manus HaimERICI S. R. E. diaconi cardinalis et cancellarii, Incarnationis Dominicae anno millesimo centesimo trigesimo secundo, Indictione decima, Pontificatus domini Innocentii papae II anno tertio, sexto nonas Martii ».

Iis diebus dedicationis Ecclesiae Cluniacensis dedicata sunt altaria intra ambitum ejus consistentia, quae sunt numero XXVI, inter quae fuit consecratum altare Sancti-Jacobi a domino Dalmatio, episcopo ejusdem Sancti-Jacobi Apostoli, qui hujus monasterii Cluniacensis fuerat monachus; de qua re habetur Epigramma in dicta capella, in modum qui sequitur :

« Hoc altare consecratum est a domno Dalmatio Sancti-Jacobi Apostoli episcopo, ac istius loci monacho, in honorem ejusdem B. Jacobi, ac omnium sanctorum. In quo continentur plures reliquiae sanctorum, quorum nomina non sunt scripta, nisi de duobus, videlicet, sanctorum Hemilearii, et Cheledonii martyrum ». Innocentius igitur pro reditu in Italiam collectam induxit in Gallias. Illius collectae meminit Petrus Cluniacensis¹. Hinc inde autem stationes sic accipie ab ejusdem temporis auctore citato superius : « Recedens Gallia venturus Roman, transiens per Sanctum-Aegidium, et per montem Genue (Genevae) fines Longobardiae intravit, et apud Hastam sollemnitate Resurrectionis Dominicae celebrata, Placentiam venit. Ibi convocatis episcopis, et aliis Ecclesiarum praelatis, tam de Longobardia, quam de Ravennatensi provincia, et marchia inferioris partis, tertium Concilium celebravit ». Ad haec peragenda multum temporis insumptum esse, dubitare nemo potest. Ad consolidandam enim titubantem Ecclesiam Cisalpinam, Concilium ab Innocentio papa habitum, et ibi diutius immoratum oportuit. Porro hujus Concilii nonnisi hanc tantummodo brevem mentionem invenire potuimus. Haec prima statio Innocentii in hoc itinere; secunda vero facta Pisis, de qua haec eadem citata superius Acta. Sed primum de Lothario rege ista :

2. *Innocentius papa Pisis.* — « Interea rex Lotharius, sicut promiserat, in Longobardiam cum exercitu venit, et in Roncaliis cum eodem papa et Longobardis generale colloquium de statu Ecclesiae atque imperii habuit. Praeteriens igitur regem Pontifex, et per montem Bardonis in Tusciam transiens, reversus est Pisas, ibique convocatis Genuensibus, et receptis ab utraque civitate sufficientibus juramentis, quod de guerra, quae inter ipsas civitates excitabatur, suo deberent sine contradictione stare mandato : praecipit ut de caetero pacem inter se firmam tenerent et custodirent ». Quibus autem privilegiis easdem honestaverit civitates ob meritum erga Apostolicam Sedem impensa, ita eadem insinuant Acta verbis istis : « Attendens ergo beatus Pontifex filialem devotionem, et plu-

rima opportuna obsequia, quae in multis Ecclesiae necessitatibus praedictae Ecclesiae Romanis Pontificibus grata exhibuerant : eas honorare dignum duxit, et speciali prerogativa exaltare de consuetudine Apostolicae Sedis. Igitur praesulatum Ecclesiae Pisanae concessit super Sardiniae insulam, subjiciens ei et Populonii episcopum, et tres alios episcopos insulae Corsicae, Aleriensem, Autensem..... Genuensem vero episcopum a subjectione Mediolanensis archiepiscopi emancipavit, et specialem de novo metropolitanum..... Sedis Apostolicae episcopum constituit, cui Boliensem episcopum et Portinacensem abbatem, quem creavit episcopum, obedire praecipit. In eadem quoque Corsicae insula tres episcopos eidem nihilominus concessit ». Facta sunt autem haec anno praesenti et sequentis exordio, ibi manens usque dum veniret Lotharius, quo proficiscendum Roman fuit. Quod non ante sequentem annum accidisse, eadem Acta significant, et aliae testificationes pariter docent; agemus igitur de his anno sequenti.

3. *Beneventani, rejecto Anacleto, inhærent Innocentio.* — Eodem anno cum Crescentius, pseudocardinalis pseudopontificis Anacleti, praesidens Beneventanae civitati, eandem proditorie tradere velle Rogerio Siciliae regi compertus esset, impellitus a civibus fugam arripuit, et in loca Rogerii confugiens, quaecumque posset, contra Beneventanos machinari non destitit. Beneventani autem execrati Anacletum, Innocentio papae Catholico inhæserunt : ad quos missus est ab eodem Pontifice Gerardus presbyter cardinalis, qui eisdem Beneventanis praecessit. Quod viriliter implevit, novis creatis in civitate magistratibus, quos fideiorem existimaret. Fuit ei multum vigilandum adversus Crescentii dolosas artes et militares insultus, quibus conabatur perdere civitatem illam : sed Beneventanis magna fiducia in praesidio Apostolorum Petri et Pauli, et Bartholomaei, ipsorum patroni, quorum ope a dolis et persecutione Crescentii, et tanti regis furoris se servaverunt immunes. Haec pluribus hoc anno descripta leguntur in Chronicis Beneventanis, ab auctore (ut saepe dictum est) ejusdem temporis scriptis. Sicque civium decreto Anacletus ut schismaticus papa rejicitur, et Innocentius legitimus suscipiendus decernitur, et relinquitur, quamvis eam ob causam innumera proventura mala non dubitarent : sed pietati omnia posthabenda censuere. At de his anno sequenti.

4. Sed quae ista praecesserunt, cur defecerint Beneventani ab Anacleto atque Rogerio Siciliae rege, sunt breviter enarranda ex eisdem Chronicis Beneventanis. Contigit nimirum hoc anno, ut Rogerius rex tyrannidem meditatus, civitatemque Beneventanam in suam redigere potestatem satagens, principes circumpositos viribus minuire et opprimere laboraverit : atque primum egerit, ut occasione legationis Rainulphum comitem Avellinum a sua civitate dimoveret, mittens eum cum

¹ Petr. Clun. l. III. Ep.

copiis militaribus ad Anacletum pseudopontificem. Quo absente, ejus civitatem Avellinam invasit, uxorem comitis et filium ejus inde abduxit captivos, et in Siciliam misit. Rediens vero et sua repetens, non est auditus, licet per Anacletum id petisset. Quamobrem adversus regem rebellans, secum traxit Robertum principem Capuanum, et alios barones, insuper et Beneventanos infensos Crescentio cardinali, qui a multis civibus juramentum fidelitatis ipsi regi Rogerio extorsisset. Comparato igitur exercitu, Rinaldo etque Robertus cum sociis in Picentinis trans Sarnum fluvium pugnaverunt adversus eundem Rogerium regem, quem et divino implorato presidio superarunt, in fugamque adigerunt exercitu ejus interfectioni dato. Fugit rex Salernum, ubi moratus usque ad octavam diem mensis Decembris, conscensa navi in Siciliam est reversus, paraturus copias trajiciens anno sequenti. Ille stannatim collecta ex dictis Chronicis Beneventanis, ubi et dies tantæ victoriæ notatur, nempe quæ præcedit festam diem S. Jacobi Apostoli. Cujus rei gratia a Beneventanis processiones et pervigilie ob gratiarum actionem sunt frequentate, ut idem qui aderat his omnibus auctor affirmat.

5. *Bruno Coloniensis archiepiscopus electus.* — Eodem anno Willelmus cardinalis episcopus Praenesinus, legatus Sedis Apostolicæ in Germania, consecravat Brunonem archiepiscopum Coloniensem successorem Friderici, qui anno superiori ex hac vita migrarat. Ita Dodechinus hujus temporis auctor. Memoria est dignum, quod cum idem Bruno fuit electus Coloniensis archiepiscopus, consuluit sanctum Bernardum, an acceptare deberet

electionem; ad quem egregia extat reddita Epistola ejusdem Bernardi, hoc exordio¹: « Quæris a me consilium, vir illustris Bruno, an volentibus te promovere ad episcopatum acquiescere debeas. Quis hoc mortalium definire præsumat? Deus forsitan vocat: quis audeat dissuadere? Forte non vocat: quis appropinquare consulat? » Cætera per te legas auditu digna. Adjice et illam, quam ad eundem scripsit hoc anno², cum jam est consecratus archiepiscopus, in qua inter cætera: « Si cunctos, qui vocantur ad ministerium, constat eligi et ad regnum, profecto securus est Coloniensis archiepiscopus. Quod si etiam et Saulem in regno, et Judam in sacerdotio legitur elegerisse non alius quam ipse Deus, et non potest solvi Scriptura, quæ hæc asserit: timeat et necesse est Coloniensis archiepiscopus, etc. »

6. *S. Hugo episcopus Gratianopolitanus moritur.* — Hoc eodem anno magnus ille sanctitate insignis Hugo episcopus Gratianopolitanus ex hac vita migravit. Ita qui res gestas ab eo scripsit jussu Innocentii papæ Guigo Carthusie prior, cum ait: « Anno itaque ab Incarnatione Domini millesimo centesimo trigésimo secundo, ætatis porro sue ad minus octogésimo, mense quarto, consecrationis autem itidem ad minus quinquagesimo secundo, kalendis Aprilis, sexta ante Palmarum Dominicam feria, circa gallicinium beatus Hugo migravit ad Dominum ». Quem Innocentius papa cum rediit in Italiam, Pisis consistens, retulit inter sanctos, ut suo loco dicturi sumus anno sequenti.

¹ Bern. Ep. VIII. — ² Ibid. Ep. IX.

1. *Innocentius II in Italiam redit.* — Ad num. 1. Innocentius II toto anno superiori a Franciam peragravit, et immensam gravedinem Ecclesiis Galliarum ingessit, utpote qui Romanos officiales cum multis clientibus secum habuit, et de redditibus Apostolicæ Sedis in Italia nihil adipisci potuit, inquit Ordericus lib. 13, pag. 895. Hoc vero anno, ut ait idem Ordericus pag. 896, « postquam a Gal-
lis, in quibus obedientiam et ingentem amicitiam repperat, recessit, Italiam expetiit ». Cluniacum

pervenit kalendis Februarii, ut ipsemet scripsit ad Ludovicum VI Francorum regem, litteris *Cluniaci IV nonas Februarii* datis, et tom. X Concil. pag. 955 recitatis. Adhuc Cluniaci versabatur die x ejusdem mensis, quo litteras dedit *Stephano* Cisterciensium abbati, quibus prohibet ne aliquis episcopus vel archiepiscopus cum vel successores ejus, seu aliquem abbatem Cisterciensis Ordinis, « nisi pro fide, ad Concilium vel Synodum venire compellat ». Litteræ datæ sunt « Cluniaci IV idus

Febr. Indict. x, Incarnat. Dom. anno mcxxxii, Pontificatus vero domini Innocentii secundo ». Referuntur eae litterae a Maurico in Annal. Cist. hoc anno cap. 1. E monasterio Cluniacensi *Lugdunum* venit, ubi Rescriptum emisit, in Biblioth. Cluniae, pag. 1394 recitatum, cui subscribit *Matthaeus Albanensis episcopus* cum aliis, et in ejus fine legitur: « Actum est Lugduni anno Incarnat. Dom. mcxxxii, Pontificatus vero domini Innocentii papae II anno secundo », ideoque ante diem xvi mensis Februarii, quo tertium Pontificatus annum ingressus est. Ex his litteris colligere est, *Matthaeum Albanensem*, qui anno superiori legatus in Germania erat, Innocentium II in Italiam pergentem comitatum esse, quod et colligitur ex Epist. ccclii inter Bernardinas, qua Innocentius papa divo Bernardo atque Ordini Cisterciensi amplissima concecit Privilegia ob praecara ejus in Sedem Apostolicam merita: litteris subscribunt Innocentius papa, *Matthaeus Albanensis episcopus*, alique, et in earum fine habetur: « Dat. Lugduni per manum Aimerici S. R. E. diacon. card. et cancellarii, XIII kal. Martii, Indict. x, Incarn. Dom. anno mcxxxii, Pontific. dom. Innocentii papae II anno tertio », ubi Innocentius II annum Incarnat. a die vicesima quinta Martii exorditur, ut Indictio et annus Pontificatus ejus demonstrant, ideoque ea Epistola hoc anno scripta; non vero superiori, ut perperam in margine Mabillonius notavit.

2. *Astae Pascha celebrat.* — Inde *Valentiam* profectus est, ubi controversiam quandam, quae inter Cluniacum et abbatem Sancti-Egidii exorta erat, composuit, litteris tom. x Concil. pag. 964 recitalis, datisque « Valentiae per manum Aimerici S. R. E. diaconi card. et cancell. VIII kal. Martii, Incarnat. Dom. anno mcxxxii, Pontificatus vero domini Innocentii II papae anno iii ». Ille litterae a *Matthaeo Albanensi episc.* etiam subscribit. Valentiae adhuc morabatur *XVII kal. Aprilis*, quo Trencoriensibus Privilegium concessit a Chutleto in Probat. ad Hist. Trencoriensem pag. 418 recitatum. Ex urbe Valentina ad Janum Sancti-Egidii se contulit, ut narrat Baronius num. 1 ex scriptore anonymo hujus temporis: « Recedens Gallia », inquit anonymus, « venturus Romam, transiens per Sanctum-Egidium, et per montem Genuae (legendum Genevae), fines Longobardiae intravit, et apud Astam solemnitate Resurrectionis Dominicae celebrata, Placentiam venit. Ibi convocatis episcopis et aliis Ecclesiarum praetatis, tam de Longobardia, quam de Ravennatensi provincia, et marchia inferioris partis, tertium Concilium celebravit ».

3. *E Gallia discedens, Gaufrid. Carnotensem episcopum legatum suum crevit.* — Placentiae adhuc erat *nonis Novembris*, quo die dedit litteras ad Gaufridum Carnotensem episcopum Apostolicae Sedis legatum, et ad Stephanum Parisiensem episcopum, quibus mandat, ut Aurelianiensi subdecano ac sociis honores et bona ablata

restitui satagant; ut enim scribit Arnulphus Sagiensis archidiaconus in Praefatione ad Tractatum *de Schismate orto post Honorii papae decessum*, Gaufrido Carnotensi episcopo et Romanae Ecclesiae legato dicata: « Cum ad resistendum Petro Leonis in Italia praesentis Romanus indefessus assistat, ad resistendum Girardo (Engolismensis episcopo, qui se Anacleto legatum dicebat) vos reliquit in Gallia, ut sit capiti caput oppositum, et dextera dexterae conferatur. Sicut enim Petrus schismatis hujus princeps et auctor est, sic Girardus ejus inter omnia principalis est instrumentum ».

4. *Lotharius in Longobardiam ad Innocentium II venit.* — Ad num. 2. Chronographus Hildesheimensis, qui hoc tempore vivebat, ad hunc annum ait: « Translatio sancti Godehardi facta est (quarto scilicet nonas Maii, ut narrat auctor canonizationis et miraculorum ejus in Actis SS. Bollandianis ad diem iv Maii, ubi et referuntur complura miracula in ea Translatione patrata). Circa Assumptionem sanctae Mariae profectio regis (sc. Lotharii) in Italiam pro consecratione sua ab Apostolico apud Romam in Caesarem. In quo itinere cum ad urbem Augustanam venisset, eam pacifice ingressus est; sed quorundam civium factione seditio contra regis homines exorta est: et hac de causa repentino igne, ut in tali tumultu fieri solet, civitas fere tota conflagravit, et multi tam gladiis quam flammis perierunt. Rex Natalem Domini in Longobardia apud villam Medicinam dictam celebrat », quem Natalem cum an. mcxxxiii alligat, qui ab eo die annum exorditur. In Longobardia Innocentius II cum Lothario colloquium habuit, a Baronio narratum; indeque *Pisas* reversus est, ubi Genuensem episcopum metropolitanum constituit, et archiepiscopo Pisano aliquot suffraganeos tam in Sardinia, quam in Corsica attribuit, uti refert Baronius ex Actis adhuc ineditis. Pisani autem episcopum jam anno mcxxviii a Gelasio II archiepiscopum creatum fuisse, eo anno demonstravimus. Erravit itaque Mauricus in Annal. Cist. hoc anno cap. 7, qui ex Actis a Baronio relatis deducit civitatem Pisanam hoc anno factam esse metropolim.

5. *Rogerius Siciliae rex totam Apuliam sibi subjicit.* — Ad num. 3 et seq. Alexander abbas narrat Rogerium Siciliae regem Barium expugnasse, ejusque principem Grimoaldum cum Tancredo de Conversano comite sibi subjecisse, quae, quia fusius ab eo tractata, apud eundem legenda. Anonymus vero Casinensis ait: « Anno mcxxxii, (nobis mcxxxii.) Rogerius rex expugnavit Barium, et cum principe et comite pugnavit apud Nuceriam superatur, maxima strage utrorumque. Rex Lotharius Italiam ingressus est ». Denique Falco in Chronico: « Hoc anno praedictus Anacletus venit Salernum, sedem rebellem sibi et resistantem; consilio habito exercitum congregavit, et super castrum Brundisii ejusdem Tancredi festinavit, et illud terra marique obsedit, sicque mirabiliter

expugnatum suae illud obtinuit potestati, et his actis super civitatem Barensis exercitu convocato festinavit. Nec mora, civitatem illam diversis cepit expugnare machinationibus; per quindecim vero dies civitas illa obsessa et expugnata est. Tandem civium Barensium traditione manifestata, civitas ipsa ad regis potestatem tradita est; et civitate ipsa sic comprehensa Grimoaldus princeps, vir valde mirabilis et bellicosi spiritus, a quibusdam concubibus captus est, et ad regis potestatem perductus, quem rex ipse confestim captivum cum uxore sua, ad Siciliam mandavit. Sicque totam Apuliam suae subegit potestati. Falco ait, praelium ad Nuceriam commissum esse in vigiliis B. Jacobi Apostoli.

6. *Proceres hortatur ut in sua permaneant fidelitate.* — Baronius summarium rerum a Falcone hoc anno memoratarum refert, quibus adde Crescentium cardinalem Anacletistam Beneventum in sua potestate habuisse, cumque Beneventanos expulisse, quod civitatem Rogerio regi tradere voluisset. Praeter haec Falco pag. 274 et seqq. inquit: « Hoc anno, duodecimo die intrante mensis Augusti, obiit Landulphus Beneventanus archiepiscopus. Praedictus rex Rogerius, consilio communicato in Apuliam descendit, et apud civitatem Melphitanam diebus non multis moratus est. Continuo quosdam ex baronibus suis vocari mandavit, quos valde praecipiendo admonuit, quatenus in ejus permanerent fidelitate et dilectione, etc. Quibus peractis, Salerno repedavit, ibique procerum suorum frequentia magnificatus de inimicitiis principis Cyprani et comitis Rainulphi », qui Mathildem Rogerii sororem uxorem habebat.

7. *Sergius magister militum Neapolis ab eo deficit.* — Rogerius post Adalphum anno superiori caplam Salernum rediit. « et dum ibi moraretur », inquit Alexander abbas lib. 2, « magister militum Neapolis, Sergius nomine, cernens in Rogerio tantam virtutem exercens potentiam (anno superiori) non quidem belli rigore, sed solum ipsius (nempe Rogerii) timore contreritus, ivit ad illum, ejusque subiecit dominatui; quae videlicet civitas, mirabile dictu, post Romanum imperium (id est, post Justinianum) vix unquam a quoquam ferro subdita fuit: nunc vero Rogerio solo verbo praemissu subdita ». Exeunte anno mxxxix. Sergius Rogerio tanquam magno principi sese modo nec honorario summisit, hoc vero anno ejus clientelam agnovit. Sed cum sibi arcem reservavit, non multo post adversus eum rebellavit, seseque Roberto Capuano principi et Rainulpho comiti, qui quod pessime haberentur a Rogerio defecere, hoc anno fodere junxit.

8. *Mathildis uxor Rainulphi illum deserit.* — Baronius num. 4 ait, Rogerium Rainulphi uxorem captivam in Siciliam abduxisse; sed ea in parte ejus narratio notat, ut enim prodit Alexander abbas, « comitissa Mathildis audiens Rogerium fratrem suum Salernum advenisse de Alleis, ab-

sente et ignorante marito suo Rainulpho comite, ad eum (sc. Rogerium) profecta est, profertis se nulla ratione ad ejus thorum ulterius redituram, etc. Rex, etc. eam apud se pro suo velle manere permisit ». Quod Falco etiam insinuat, cum hoc anno scribit: « Rex deprehendens comitem Rainulphum convicia multa et afflictionibus Mathildi uxori suae inferre, ejusdem regis sorori, quam ultra quam credi potest diligebat (nempe Rogerius) consilio habito, ipsam suam sororem mandavit, quam honeste accipiens eam dulcibus colloquiis consolatur, et eam in Siciliam mandavit. »

9. *Post pugnam ad Nuceriam Rogerius Salernum reversus est.* — Secundo, Baronius ibidem praefatio ad Nuceriam habito narrato, ait: « Rex fugit Salernum ubi moratus est usque ad octavum diem mensis Decembris ». Sed cum hoc Falco non dicat, apographum Falconis Benevento Romam ad eum transmissum parum hac in parte accuratum fuisse oportet. Alexander enim habet: « Porro regi inter haec Salerni moranti nuntiatur, quod Barenses cives ab eo se aversuros jam praepararent, etc. praemunitis oppidis suis quae circa Beneventum erant, Barum petiit. Qui pro eo quod Tancredi seu ceterorum hostilitas immineret, Barensis ad praesens exacerbare populum, quibusdam eorum petitionibus, prudenti consilio usus, consensit: sicque eos pro tempore quietos dimisit. Post haec autem rex omnibus dispositis, contra Tancredum, ejusque conspirationis complices praefaturus, ejusdem omnibus in Apulia urbibus, oppidis praemunitis, Salernum iterum revertitur ». Falco vero pag. 274, eodem praefatio narrato, de Rogerio scribit: « Apud civitatem Melphitanam diebus non multis moratus est, continuo quosdam ex baronibus suis vocari mandavit, quos valde praecipiendo admonuit, quatenus in ejus permanerent fidelitate et dilectione, etc. Quibus peractis », et cetera num. 6 recitat. Neuter itaque historicus Rogerium fugisse asserit.

10. *Willelmus Praenestinus card. legatus S. Sedis in Germania.* — Ad num. 5. Dodechinus abbas in Chron. refert, *Fredericum* archiepiscopum Coloniensem anno superiori e vivis excessisse, et *Brunonem* in ejus locum subrogatum, consecratum fuisse a *Willelmo Praenestino, Apostolici legato*. Mathaeus enim Albaensis cardinalis, qui anno superiori legatione Germanica functus est, currenti in comitatu Innocentii II in Italiam perrexit, uti jam insinuavimus. Magna fuit Brunonis cum sancto Bernardo familiaritas, ut ostendunt tres Epistolae sancti hujus abbatis ad eum date post Concilium Rhemense, in quo eam Bernardus Epist. vi contractam fuisse dicit, quae ideo exeunte anno superiori, vel praesentis initio scripta, non vero anno mxxv, ut perperam notavit in margine Mabillonius. Dedit et ad eundem aliam ordine viii, cum jam *Bruno* Coloniensis archiepiscopus electus esset, in qua cum consultus ab eo fuisset, an sibi acceptandus esset episcopatus, respondit: « Habetis

dominum Norbertum (archiepiscopum Magdeburgensem) quem melius præsentem præsens de talibus interrogare potestis ». Scripsit et Epistolam ix ad Brunonem recens creatum archiepiscopum Coloniensem, qua eum ad timorem inducit, atque amici officium esse terrere *salubriter*.

11. *Moritur S. Hugo ep. Gratianopolit.* — Ad num. 6. Mortem sancti Hugonis episcopi Gratianopolitani accurate collocat hoc anno Baronius ex Guigone quinto priore Carthusianorum, hoc tempore vivente, qui ejus Vitam in Actis SS. Bollandianis ad diem primam Aprilis, qua obiit, recitatum scripsit. Excepit Hugo sanctum Brunonem Carthusianorum fundatorem in sua diocesi, eumque in suo Ordine condendo strenue adiuvit, et « successorem substitutum jam sibi Carthusiensem (sicut diu multumque desideraverat ante) reliquit ». Fuit is alter *Hugo*, indeque duplex error ortus; aliqui enim utrumque Hugonem confundentes, S. Hugonem Carthusiensem fuisse scribere; alii fere plerique, inter quos Henschenius, qui Vitam S. Hugonis Notis illustravit, tradunt eum mox aut altero ante mortem anno scripsisse ad Concilium *Jotrense*, quando B. Thomas prior abbacie Sancti-Victoris Parisiensis crudeliter ab impiis pro justitia occisus est, ac petiisse ut immane illud scelus vindicaretur; cum tamen sanctus martyr anno tantum sequenti peremptus fuerit, et non sanctus Hugo, sed alter *Hugo* Ordinis Carthusianorum successor ejus de cæde illa vindictam petierit, ut an. mcccxxv. Baronii ordinem sequentes, monstrabimus. Hugonem autem, qui S. Hugoni successit, fuisse Carthusianum, ostendunt San-Marthiani in episcopis Gratianopolitanis.

12. *Fundator fuit monasterii Calisiensis.* — Sanctus *Hugo*, qui deposito episcopatu Gratianopolitano, monachus Cluniacensis in monasterio Case-Dei in Arvernia sito factus fuerat, post annum jubente Gregorio VII episcopatum resumpsit, et monasterium Calisiense, vulgo *Chalais*, una circiter leuca a Majori-Carthusia distans, sub sancti Benedicti regula fundavit, ut discimus ex litteris *Guillelmi VI* comitis Forcalquerii anno mcccvii, mensis *Maii die prima* datis, et a San-Marthiani ex schedis Peireskii tom. iv Gall. Christ. pag. 583 recitatis, quibus confirmat Donationem a se alias factam loci de *Lura* diocesis Sistarciensis « ad ædificandam ibidem Ecclesiam in honore Domini nostri Jesu Christi, et gloriose Virginis Mariæ, et ad instituendam ibi abbatiam secundum Ordinem Calisiensem a S. Hugone Gratianopolitano episcopo quondam institutum ». Antea idem vitæ institutum monachi Boscaudunenses in diocesi Ebredunensi amplexi fuerant, et temporis progressu abbatia Boscaudunensis caput extitit duarum aliarum. Mentio est monachorum Calisiensium in Vita S. Hugonis episc. Gratianopol. cap. 7, diciturque sancto præsul in ultima ejus infirmitate tam ex sociis propriis, quam ex Carthusiensi et Calisiensi, necnon et *Excubiensi domibus*, octo vel

novem, et interdum etiam decem inservisse. Tandem abbatia Calisiensis in prioratum redacta, isque a Benedicto XIII, anno mcdviii, litteris die xviii mensis Augusti datis Majori-Carthusiæ unitus. Fundationis monasterii Calisiensis non meminit Henschenius in Notis ad Vitam S. Hugonis, sed præter San-Marthanos laudatos aliqua de ea habet Boucheus tom. ii Hist. Provinciæ pag. 418, 468 et 491.

13. *Floret Hugo Metellus canonicus regularis.* — Floruit sub Innocentio II *Hugo Metellus*, qui cum jam provectæ esset ætatis, factus est canonicus regularis sancti Augustini in abbatia S. Leonis, diocesis Tullensis, ut ostendit Epistola ejus xviii ad *Guillelmum* abbatem. Natus apud Tullum Leucorum auditor fuit Anselmi Laudunensis, variasque litteras scripsit adhuc ineditas, nempe ad Innocentium papam II, *Alberonem* Trevirorum, *Stephanum* Metensium, *Guillelmum* Lingonum, *Henricum* Leucorum, *Embriconem* Herbipolensem episcopos, ac ad Petrum *Abacardum* et *Helvidem* seu *Heloissam* Paracliti abbatissam. Refert hæc Mabillonius tom. iii Analect. occasione Epistolæ Hugonis Metelli ad *Gerlandum*, qui de Eucharistiæ Sacramento non bene sentiebat, additque xv ejus Epistolas adhuc Mss. assertari Parisiis in Biblioth. Claramontana. Porro *Heloissam Helvidem* etiam appellatam, anno mxxlii demonstrabimus.

14. *Moritur Goffridus abbas Vindociensis.* — *Goffridus* abbas Vindociensis et cardinalis B. Priscæ, patria Andegavensis, cujus Epistolæ a Sirmondo observationibus locupletatæ, hoc anno ad cælestia migravit *VII kal. Aprilis*, ut disertè habet *Chronicon Andegavense*, quod et Vindocinense appellatur, a Labbeo tom. i Biblioth. promulgatum. Pergratus fuit Urbano II et Paschali II quos in Francia hospitio excepit, et Callisto II intimus, ut Epistolæ mutuo datæ fidem faciunt. Aliquot etiam Opuscula sermonesque xi composuit, et quod ejus Opera ostendunt, in sacris studiis et canonibus valde exercitatus fuit.

15. *Annus emortualis Algeri Leodiensis' scholasticæ incomptus.* — Ad hunc circiter annum pervenit *Algerus*, ex Leodiensis Ecclesiæ scholastico Cluniacensis monachus, quo nemo melius, clarius et eloquentius, materiam de Eucharistiâ tractavit; Libros enim tres adversus *heresim Berengarii*, de *Sacramento Corporis et Sanguinis Domini* scripsit, et in eo argumento superavit Lanfrancum et Guilmundum, qui ei in eodem stadio præverant, inquit Petrus Venerabilis, initio libri de *Sacrificio*. Edidit etiam insignes Epistolas ad diversas personas et Ecclesias datas, quæ perire; solumque, præter laudatum Opus, superest liber ejus de *Misericordia et Justitia*. Nicolaus ait eum inter cætera ingenii sui monumenta, in clericatu adhuc positum Tractatus duos edidisse, cui primum titulum fecit de *Misericordia et Justitia*, aliumque « tanto nobiliorem », inquit *Nicolaus*, « quanto sublimiorem, utpote de re mirifica et necessaria, de sacramento scilicet Corporis et Sanguinis Domini, de quo varii

errores variaeque proveniebant haereses». Libri *de Misericordia et Justitia*, editionem pollicetur Mabillonius tom. I Analec. pag. 303, ubi et refert ejus Elogium a Nicolao Leodiensi canonico, ejus aequali, compositum. «Annis fere viginti», inquit Nicolaus Scholasticus, «fuit in Ecclesia Sancti Lamberti, usque ad obitum felicitis memorie Friderici episcopi» Leodiensis, pro defensione fidei Catholicae anno mcccxi perempti, ut eo anno narravimus. Post sancti martyris obitum, cum *firmitate corpore valeret*, vitam sub sancti Benedicti regula aggressus est in *Cluniacensi conobio*, subdit idem Nicolaus, Annus mortis ejus incertus. Porro Nicolaus canonicus Leodiensis, quem ex Elogio Algeri constat tempora Friderici martyris episcopi Leodiensis praetergressum esse, scripsit etiam gesta *sancti Lamberti* episcopi Leodiensis et martyris, quae extant tom. I Chapavilli.

16. *Arnaldus archiep.*— Hoc anno, *Indictione undecima, quinto nonas Decembris* factus est Conventus apud villam Creissanam in territorio Narbonensi, «episcoporum, clericorum quoque et laicorum non minus multitudinis nobilium, quam ignobilium, sub potestate domini Arnaldi Narbonae archiepiscopi et Sedis Apostolicae legati, ad celebrandam ejusdem loci Ecclesiae dedicationem in honorem B. Martini», ut legitur in Instrumento dedicationis tom. X Concil. recitato, ex quo liquet praeter Gaufridum episc. Carnotensem, qui super Bituricensem, Burdegalensem, Dolensem et Turo-nensem provincias, ut dicitur in Martyrologio Carnotensi, legatione Apostolica functus est, in alia Galliae parte *Arnaldum* archiep. Narbonensem eandem dignitatem gessisse.

17. *Petrus Venerabilis Cluniacensis austeras leges imponit.*— Petrus Venerabilis Cluniacensis abbas «omnes cellarum priores de Anglia et Italia, regnisque aliis accersit, jubens, ut Dominico Quadragesimae tertio Cluniaci adessent, ut praecepta monasticae conversationis austeriora, quam hactenus tenuerant, audirent», inquit Ordericus, qui eidem Conventui interfuit, lib. 13, pag. 896. Ducenti priores Cluniacum convenerunt, ac mccc et xii fratres ibi adfuerunt. Petrus Venerabilis sub-jectis «auxilium jejunia, abstulit colloquia, et infirmi corporis quaedam subsidia, quae illis moderata

Patrum hactenus permiserat reverendorum ele-mentia». Quidam tamen ei repraesentarunt, Hugonem, Maiolum et Odilonem arctam vitae viam tenuisse, et sufficere debere per vestigia eorum in via mandatorum Dei dilatato corde currere. Petrus «rudibus ausis institit»; postmodum tamen emol-litus, «memoriae discretionis quae virtutum mater est, invalidisque compatiens subvenit, perplura de gravibus institutis, quae proposuerat, intermisit», inquit Ordericus.

18. *Gesta anno superiori in Hispania ab utro-que Alphonso rege.*— Anno superiori, ut refert Sandovalius, *Alphonsus VII*, Legionis et Castellae rex, in regiones Maurorum excurrit, et usque ad Hispalis et Cordubae portas omnia vastavit. *Alphonsus* vero Aragoniae rex *Baionam* permunitum Aquitaniae oppidum rursus obsidione cinxit. Durante obsidione, testamentum condidit mense Octobri, et pleraque oppida et dominia sua in regnis Navarre, Nivariae et Castellae parte posita inter Hispaniarum Ecclesias divisit. Ejus summarium refert Sarita lib. I, cap. 32, et Josephus Moretus in Investigationibus Navarricis pag. 616, testatur se illud legisse in archivis Ecclesiae cathedralis Pampelonen-sis, et in eo haberi: «Facta Charta in Era mclxix, mense Octobri, in obsidione Baionae, anno scilicet superiori.

19. *Gesta hoc anno in Hispania.*— Hoc vero anno *Alphonsus* Castellae rex bellum adversus Mauros continuare non potuit, quia bellum civile, quod superiori caeptum fuerat, praesenti ac insequenti, quo illud finitum, totum regnum conturbavit. Victi tamen rebelles, et *Goncales Pelayz* factionis dux coactus in Portugalliam fugere, ibi morore extinctus est, uti Sandovalius fuse narrat fol. 150 et seq. juxta antiquas Historias a se visas. Antiqua tamen alia Monumenta urbis Toletanae, ut habet idem Sandovalius citatus, asserunt, *Petrum Goncalem Gironum* comitem cum magno exercitu in conspectum civitatis Hispalensis venisse, adversus Mauros pugnasse, eosque occiso Omaro eorum rege aut praefecto superasse. Versa postea fortuna in iisdem enim Monumentis legitur, fusos fugatosque fuisse Christianos ad locum Masakigos dictum, mense Julio, Eraque mclxx.

INNOCENTII II ANNUS 4. — CHRISTI 1133.

1. *Innocentius papa Romam venit cum Lothario, eamque imperatorem coronat, concedens allodium Mathildis.* — Annus Redemptoris millesimus centesimus trigesimus tertius, cœptus Indictione undecima, felix illuxit Catholicæ Ecclesiæ. Nam ipse Innocentius papa in Sedem suam Romæ a Lothario restituitur, et Lothar. ab eo coronatur imperator. De his acturi, in primis quod temporis certitudinem spectat, sine qua labor omnis pro veritate indaganda susceptus penitus evanescit, atque in multiplices errores ferri historicis sit necesse, diligenter est considerandum. Hoc namque anno venisse Lotharium Roman, et coronatum ab Innocentio, auctores hujus temporis aperte testantur, nempe qui Beneventanum Chronicum scripsit Fulco, et Hugo in Vita S. Norberti archiepiscopi Magdeburgensis, dum ejus reditum cum Lothario Romam describit, et post quatuor menses defunctum esse sexta Junii, anno Christi mxxxv asserit; idem quoque in Auctario ad Sigebertum habetur et aliis. Cum igitur substitisset usque in annum præsentem Innocentius papa Pisis, vere adveniente Lothario rege Germaniæ, ambo se Romam contulerunt; de quorum itinere hæc habent citata superius Acta: «Dum hæc agerentur, Lotharius in Tusciam venit, et apud Calciariam, in territorio Pisano cum eodem iterum colloquium habuit. Concordantes igitur, ut ad Urbem festinare deberent, rex per stratam publicam transivit, Pontifex per maritima usque Viterbium: processerunt postea simul per Hortum, et Sabinese, et Farfense territorium, et apud Ecclesiam S. Agnetis castrametati sunt. Occurrentibus autem ei Theobaldo Urbis præfecto, ac Petro Leonis cum aliis nobilibus Romanis et Transiberinis, intraverunt Romam anno mxxxiii. Et Pontifex quidem in palatio Lateranensi hospitatus est, et rex Lotharius in monte Aventino tentoria fixit. Tunc Pisani et Gennenses in auxilium papæ Innocentii cum navali exercitu Romam venientes, civitatem velerem, Iurim Pulveream, et totam Marmoratam eidem Pontifici subjugarunt». Hæc ibi. De his ista leguntur in dicto Chronico

Beneventano sub eodem anno millesimo centesimo trigesimo tertio: «Innocentius papa simul cum Lothario imperatore Romam pervenerunt. Audivimus revera duo tantum millia militum secum duxisse. Apostolicus itaque honeste susceptus, palatium Lateranense ingreditur, ibique magno gaudio et honoris copia supersedit. Imperator autem circa monasterium S. Pauli cum exercitu suo viriliter castrametatur». Quod spectat ad paucitatem militum, quos secum Lotharius duxit: testatur idipsum S. Bernardus in Epistola ad eundem Lotharium jam coronatum imperatorem verbis istis¹: «Ipsius, (Domini scilicet), profecto nuper opus et virtus fuit, quod iter satis laboriosum et meticulosum, pro pace regni et Ecclesiæ liberatione susceptum, in tanta prosperitate pergegisset. Romæ siquidem imperialis culminis plenitudinem gloriosissime assecutus, idque quod majus fuit, in manu non magna, ut animi fideique magnitudo clarius emerit. Quod si ante tantillum exercitum terra tremuit et quievit, quantus, putamus, horror hostium corda invadere habeat, cum ceperit rex procedere in magnitudine brachii sui? etc.» Pergit vero auctor Chronicorum Beneventanorum:

2. «Misit autem, sicut audivimus, ad Anacletum, ut consilio religiosorum virorum communicato adesset, et Spiritu sancto mediante tanti, erroris et homicidiorum magnitudini finem poneret; quod Anacletus ille sicut accepimus, facere contempsit». De adventu insuper Lotharii Romam et ejus coronatione, hæc habet ejusdem temporis auctor in Vita sancti Norberti archiepiscopi Magdeburgensis²: «Cum eo (Lothario) autem et aliis tam episcopis quam archiepiscopis ex præcepto et obedientia Innocentii pastoris Catholici pontifex Norbertus profectus est, transitisque castris et urbibus cum magna turba præeuntis et subsequents exercitus, Romam papam venerabilem Innocentium secum ducentes perveniunt. Ubi cum

¹ Bern. Ep. cxxxii. — ² Vita S. Norb. c. 50. apud Sur. tom. v, die vi Junii.

impetu grandi et manu forti introeuntes, ipsum eundem papam in sancta Sede invitis hostibus et adversariis omnibus collocarunt. Porro Lotharium regem Pontifex in Sede positus, et alii qui conveniant, in Romanum imperatorem consecraverunt. Erat autem vir ille strenuus belli ductor, etc. » Narrare pergit eximias ejusdem imperatoris virtutes. In Vaticanis schedis reperimus ista de coronatione Lotharii : « Hoc est juramentum, quod D. rex Lotharius tempore hæresis filii Petri Leonis D. papæ Innocentio præstitit ante fores Basilicæ S. Salvatoris, quæ Constantiniana appellatur, in die qua coronatus est ab ipso Innocentio, antequam coronam acciperet, D. Cencio de Franpjanis juramentum computante, et Ottone nepote suo ac cæteris nobilibus Romanis ibi existentibus :

« Ego Lotharius rex, promitto et juro tibi domino papæ Innocentio, tuisque successoribus, securitatem vitæ, et in membris, et mæke captivonis, et defendere papatum et honorem tuum, et regalia S. Petri quæ habes manutene, et quæ non habes juxta meum posse recuperare ». Hæc ibi.

3. Quod autem in Lateranensi Basilica præter morem facta sit coronatio Lotharii imperatoris, hanc accipe rationem ab Ottone Frisingensi, qui ait : « Rex plus mente quam milite confidentiam gerens, ad Urbem usque progreditur, ibique quilibet potuit cum paucis strenue peractis, in Ecclesia Sancti-Salvatoris, quæ Constantiniana dicitur, a summo Pontifice Innocentio coronatus, imperatoris et Augusti adeptus est nomen; nempe Ecclesiam B. Petri, ubi mos coronari erat imperatoribus, Petrus Leonis eo tempore occupaverat ». Hæc Otto. Tunc temporis idem Innocentius papa eidem Lothario imperatori concessit allodium comitisæ Mathildis, ut ex ejus Diplomate hic descripto apparet. Quod sic se habet :

« Innocentius papa Secundus Lothario imperatori Augusto et Riget imperatrici.

« Si auctoritas sacra Pontificum et potestas imperialis vere glutino charitatis ad invicem complentur, Omnipotenti debitus famulatus libere poterit exhiberi, et Christianus populus grata pace et tranquillitate gaudebit. Nihil enim in præsentis sæculo est Pontifice clarior, nihil rege sublimius, nihil est quod lumine clariore præfulgeat, quam recta fides in principe, nihil est quod ita nequeat occasui subjacere, quam vera religio. Quæ nimirum omnia tanto manifestius, Deo gratias, in persona tua clarescent, quanto ab ineunte ætate amator religionis, et cultor justitiæ extitisse cognosceris, et novissime diebus istis, nec personæ tue, nec propriæ parcendo pecunie, pro beati Petri servitio multos labores, et immensa pericula perulisti. Cum ergo, testante sacro eloquio, etiam mali patres bona data filiis suis debeant impartire, dignum profecto est, ut nos, qui disponente Domino, universis Catholicæ Ecclesiæ filiis debemus

sollicitudine paterna consulere, personam tuam arctius diligamus, et tanquam specialissimo Ecclesiæ defensori, in his quæ ad statum imperii in suo robore conservandum, et utilitatem ac liberationem Catholicæ Ecclesiæ spectare noscuntur, tam secundum Ecclesiasticum officium, quam temporaliter imperatoriam potentiam augeamus. Hoc nimirum intuitu allodium bonæ memoriæ comitisæ Mathildæ, quod utique ab ea beato Petro constat esse collatum, vobis committimus, et ex Apostolicæ Sedis dispensatione concedimus, atque in præsentia fratrum nostrorum archiepiscoporum, episcoporum, abbatum, necnon principum et baronum, per anulum investimus : ita videlicet, ut centum libras argenti singulis annis nobis et successoribus nostris exsolvas, et post tuum obitum proprietatem ad jus et dominium sanctæ Romanæ Ecclesiæ cum integritate absque diminutione et molestia revertatur. Quod si nos vel successores nostros in eandem terram venire, manere, transire oportuerit, tam in susceptione, quam in procreatione, atque securo conductu, prout Apostolica Sedes decreverit, honoremur. Qui vero arces tenuerit, vel rector terræ fuerit, beato Petro, et nobis, nostrisque successoribus fidelitatem faciant. Cæterum pro charitate vestra nobili viro Henrico Bavariæ duci genero vestro, et filiæ vestræ uxori ejus, eandem terram cum præfato censu, et supradictis conditionibus, Apostolica benignitate concedimus ; ita tamen, ut idem dux hominum faciat et fidelitatem B. Petro, ac nobis nostrisque successoribus juret. Post quorum obitum, prædictum comitisæ Mathildæ allodium ad jus et dominium sanctæ Romanæ Ecclesiæ sicut supra dictum est, integrum et absque diminutione atque difficultate aliqua reducatur : salvo tamen semper in omnibus ejusdem sanctæ Romanæ Ecclesiæ jure ac proprietate. Datum Laterani VI idus Junii ». Hactenus concessio allodii Mathildæ facta ab Innocentio papa Lothario imperatori. Quæ post hæc facta sunt, ita Fulco in Chronico Beneventano.

4. *Beneventani ad Innocentium.* — « Audiens itaque Robertus princeps Capuanus et Rainulphus comes Apostolicus Innocentii et imperatoris Lotharii adventum longe lateque optatum, trecentorum fere militum caterva stipati, simul cum domino Gerardo cardinale, qui tunc Beneventanis rector præfuerat, et civibus quibusdam sapientibus Beneventanis, Romam festinarunt. Qui vero euntes, omnem ordinem afflictionis, quam civitas Beneventana dudum perpessa est, e vestigio intimare lacrymis, orantes, ut civitatem Beneventanam a comite Siculorum Rogerio jugiter oppressam liberaret, etc. » Annuit Pontifex ipsorum petitioni de his, quæ spectabant ad regimen civitatis : cætera bellica tractare laud sibi opportunitum, qui licet esset in Urbe, teneri quodammodo videretur obsessus, dum munitiones et turres omnes in potestate essent adversariorum in Urbe potentium, ac propemodum dominantium ». Hæc de his ibi.

¹ Otto Frising. l. VII, c. 18.

5. *Rogerii crudelitas in Apulos.* — Sed quæ Rogerius rex Siciliæ transfretans cum ingenti exercitu in Apuliam tunc egerit, ab eodem auctore rem spectante sic accipe: « Ex improvise prædictus rex Rogerius Siculorum, exercitu Saracenorum congregato, Pharus transivit, deinde in Apuliam cursu rapido acceleravit. Continuo civitatem Venusiam, quam Tancredus comes Conversanus acceperat, et alias civitates comprehendens, igni ferroque consummavit: viros quoque et mulieres, parvulosque vario mortis genere necavit, quosdam vero eorum comburi fecit. Regem testamur æternum, tanta crudelitate in Christianos ille exarsit, quod vix aut nunquam a seculo sit auditum ». Post hæc autem Tranensem civitatem ab eodem rege devastatam affirmat summa crudelitate, et alia oppida et loca, quæ ab ipso superiori anno defeccissent. Sed illud excedit omnem immanitatem, quod Trojanos cives, qui cum episcopo venerant, excepturi ipsum cum solenni processione, omnes convertit in fugam, civitatemque igni ferroque vastavit. Et paulo post de Roberto principe Capuano narrat, ipsum octavo kalendas Julii reversum Romam ad Innocentium, et inde Pisas profectum ad petenda adversus sævientem tyrannum subsidia. Cui operi eodem Innocentio favente, factum est post hæc, ut adversus eundem Rogerium pararetur classis, fœdere simul junctis Venetis ac Genuensibus. Hæc ibi pluribus, nos suo loco inferius.

6. *Innocentius Pisas revertitur, ad cujus urbis cives S. Bernardi Epistola.* — Quod vero ad Pontificis res spectat, Lotharius ibi coronam, ejus causa venerat, ab ipso Pontifice solenni ritu percepit, quod illie morari et annonæ penuria prohiberet, et expugnare munitiones difficillimi operis esset et temporis diuturnioris: consultius existimavit ab Urbe recedere ad propriaque reverti. Quod et fecit, tempore opportuniore reversurus adversus Siciliæ regem, Beneventanos dure admodum per Crescentium cardinalem schismaticum adflicentem, qui nulla relicta occasione vexandi cives, ad dedicationem eos compellere nitebatur: qui licet durissima passi, in fide tamen Sedis Apostolicæ perstiterunt. Quanta tunc ab eo sint passi Beneventani, idem auctor pluribus est prosecutus:

« Innocentius vero Pontifex etsi Romæ mandandi consilium inisset in sua Apostolica Sede, more prædecessorum suorum, tamen cum sibi non divinis rebus vacandi facultas daretur, sed armis jugiter insistere necessitas imperaret, salubre illud consilium inivit ab Urbe recedendi, Pisasque petendi, potentissimam tunc civitatem, maritimis in primis viribus a principibus quibuscumque timendam, erga Sedem Apostolicam addictissimam. Venit ergo Pisas, ubi magnis est exceptus honoribus, Pisanis ipsum Christum in Petro, et Petrum in Innocentio venerantibus. Si vis autem omnium rerum gestarum usque ad Innocentii papæ adventum Pisas breve audire compendium, accipe illud

ab ejusdem temporis auctore Bernardo Bonævallis abbate, qui habet ista in Vita S. Bernardi ¹: « Longas in Galliis facere moras dominus papa non potuit, sed sicut cum Lothario rege condixerat, Romam ei occurrit; et vi exercitus in Lateranense palatium deductus est. Multi etiam ex nobilibus Romanis fideles Ecclesiæ eum honorifice susceperunt. Verum Petrus Leonis non ponens Deum adiutorem suum, sed confœderatorum stipatum militia, in editoribus et tutioribus turribus manens, Lotharii iudificavit virtutem; et interdicens suis congressus publicos, nec sibi securitatis suæ fecit periculum, nec causam conflictus hostibus dedit, sed tantum liberum eorum discursum machinis superioribus et obstaculis variis impedivit. Vitavit etiam obstinatissime imperatoris colloquium, nec minis nec blandimentis flexus est, nec de statu suo consilium cujuslibet personæ admisit. Relicto igitur Romæ Innocentio, alias imperator digreditur. Petrus vero post ejus discessum crebros movens per Urbem excursus, fidelium cædibus inhiabat. Intelligens ergo Innocentius, Romæ sibi infructuosam eo tempore moram, ne presentia sua illic bestię rabiem efflaret, rursus Pisas revertitur etc. » Que vero hæc secuta sunt, dicentur suo loco anno sequenti. Porro Rogerius, ut audivit Pisanos agente papa Innocentio, favere Roberto principi Capuano, legatos ad eosdem misit, per quos multa est eis pollicitus, ut ipsos ab Innocentio distraheret, atque secum uniret. Sed respuerunt illi ejus promissa, et patrocinium Innocentii et ipsi faventium firmiter statuerunt.

7. Ista autem cum S. Bernardus ejusdem Innocentii studiosissimus audivisset, ad eosdem Pisanos has litteras dedit perpetua memoria dignas ²:

« Pisanis nostris, consulibus cum consiliariis et civibus universis, Bernardus abbas dictus de Claravalle, pacem et salutem et vitam æternam.

« Bene faciat vobis Deus, et meminerit fidelis servitii, et piæ compassionis, et consolationis, et honoris, quæ sponsæ Filii ejus in tempore malo, et in diebus afflictionis suæ exhibuistis et exhibetis. Et quidem hoc jam impletur ex parte, et orationis hujus nonnullus capitur fructus. Digna plane retributio celeri jam compensatur effecta. Jam pro meritis tecum actitat Deus, populus quem elegit in hæreditatem sibi, omnino populum acceptabilem sectatorum bonorum operum. Assumitur Pisa in locum Romæ, et de cunctis urbibus terræ ad Apostolicæ Sedis culmen eligitur. Nec fortuito, sive humano contigit istud consilio, sed cælesti providentia, et Dei benigno favore fit, qui diligentes se diligit, qui dixit Christo suo Innocentio: Pisanam inhabitata, et ego benedicens benedicam ei. Illic habitabo, quoniam elegi eam. Me auctore, tyranni Siculi malitiæ Pisana constantia non cedit, nec minis concutitur, nec donis corrumpitur, nec

¹ Vit. S. Bern. l. II. c. 2. — ² Bern. Ep. cxxx.

circumvenitur dolis. O Pisani, Pisani, magnificavit Dominus facere vobiscum, facti sumus letantes. Quæ civitas non invidet? Serva depositum, urbs fidelis, agnosce gratiam, stude prerogative non inveniri ingrata. Honora tuum et universitatis Patrem, honora mundi principes qui in te sunt, et iudices terre quorum te præsentia reddit illustrem, gloriosam, famosam. Alioquin, signoras te, o pulchra inter civitates, egredieris post greges sodalium tuorum pascere hædos tuos. Sapientibus sat dictum est. Commendo vobis marchionem Engelbertum, qui domino papæ et amicis ejus missus est in adiutorium: juvenis fortis et strenuus, et, si non fallor, fidelis. Habetote eum vestris precibus magis commendatum, quia et ego ei vos amplius commendare curavi, monuique ut vestris potissimum consiliis imitatur». Hucusque S. Bernardi ad Pisanos egregium summæ gloriæ Monumentum.

8. *Diploma Innocentii papæ pro episcopo Pistoriensi.* — Ad finem anni hujus item Pisis datum habetur ab eodem Innocentio papa Diploma de Ecclesiæ Pistoriensis immunitate ejus episcopo Attoni, qui egregia claruit sanctitate, nuperque successit Hildebrando, a S. Bernardo (ut vidimus) commendato. Sic enim se habet:

« Innocentius episcopus, servus servorum Dei, venerabili fratri Attoni Pistoriensi episcopo, ejusque successoribus canonice promovendis in perpetuum.

« Pistoriensis Ecclesia, largiente auctore omnium bonorum Domino, in Tusciæ partibus a longe retro temporibus hujus specialis prerogative munus obtinuit, ut sapientum et discretorum pastorum regimine præfulgeret, et tam in spiritualibus quam in temporalibus per eorum industriam gratum Deo susciperet incrementum. Gaudemus equidem, et debita jucunditate lætamur, quoniam supernæ dispositionis providentia te, venerabilis frater Atto episcopo, sapientem utique virum et in religione probatum ejusdem loci pastorem constituit, et ad gubernandum et instruendum doctrinæ et vite exemplo populum suum miseratione divina vocavit. Quanto igitur vita tua religiosior est, et præfata Pistoriensis Ecclesia, cui auctore Deo præsidet, existit beato Petro devotior, tanto ex injuncto Apostolatus officio magis grata nobis incumbit necessitas, ut præ-nominatam Ecclesiam tibi a Deo commissam auctoritate Apostolica privilegiis muniamus, et ei jus suum illibate et integre observemus.

Ad exemplar igitur prædecessorum nostrorum felicem. Urbani et Paschalis, Romanorum Pontificum, præsentī decreto statuimus, ut universa quæ in præsentiarum eadem Ecclesia juste et legitime possidet, aut in futurum concessione Pontificum, largitione regum vel principum, oblatione fidelium, seu aliis justis modis, præstante Domino, poterit adipisci, firma sint tibi tuisque successoribus, et illibata permaneant. Statuimus etiam, ut diocesis Pistoriensis episcopatus, sicut ejus termini prædictorum nostrorum privilegiis distincti sunt, sic in jure et conditione Pistoriensi episcopo sine alicujus molestia vel inquietudine perseverent. Per quos nimirum terminos subscriptæ capellæ et Ecclesiæ constitutæ esse noscuntur, etc.» Numerat enim prolixa serie cunctas capellas, quæ eidem Ecclesiæ subiecte essent, et bona quæ recuperata essent sub comitissa Mathilde tempore Gregorii papæ Septimi, et aliis juribus et decimationibus. In fine autem hanc habet subscriptionem sanctæ Romanæ Ecclesiæ cardinalium, qui tunc Pisis reperti sunt inherere Pontifici.

« Ego Innocentius Catholicæ Ecclesiæ episcopus subscripsi.

« Ego Willelmus Prænustinus episcopus subscripsi.

« Ego Matthæus Albanensis episcopus subscripsi.

« Ego Joannes tit. S. Chrysogoni presbyter cardinalis subscripsi.

« Ego Gottfredus card. presbyter tit. S. Justinæ subscripsi.

« Ego Lucas presbyter card. tit. SS. Petri (Joannis) et Pauli subscripsi.

« Ego Martinus presbyter card. tit. S. Stephani in Cælio monte subscripsi.

« Ego Gregorius diaconus card. tit. SS. Sergii et Bacchi subscripsi.

« Ego Guido diaconus card. S. Mariæ in Via-Lata subscripsi.

« Ego Odo diaconus card. S. Gregorii subscripsi.

« Ego Joannes diaconus card. S. Nicolai in carcere Tulliano subscripsi.

« Datum Pisis per manum Haimerici, sanctæ Romanæ Ecclesiæ diaconi cardin. et cancellarii, XII kal. Januarii, Indictione duodecima, Incarnationis Dominicæ MXXXIII, Pontificatus vero domini Innocentii papæ Secundi anno quarto».

Anno periodi Græco-Romanæ 6626. — Anno Æræ Hispan. 1171. — Anno Hegiræ 528, inchoato die 1 Nov., Fc. 4. — Jesu Christi 1133.

— Innocentii II papæ 4. — Lotharii reg. 9, imp. 1. Joannis Comneni imp. 46.

1. *Lotharius Roma coronatur imp.* — A num. 1 ad 4. Diem et mensem, quibus Lotharius II ab Innocentio II Romæ imperator coronatus fuit, nobis conservavit chronographus Hildensheimensis, qui a Nativitate Christi an. exordiens, ait : MCCCXIII, rex Natalem Domini in Longobardia apud villam Modoetiam dictam celebrat. Per Italiam pleraque loca munita sibi resistentia capit (Conradus enim Sueviæ dux Modoetiæ et Mediolani, ut supra ostendimus, coronatus fuerat, eique fortiter obsistebat). Tandem II kalend. Maii Romam cum multo favore ingreditur, ibique II nonas Junii, quo tunc dies Dominica extitit, Lateranis in Basilica S. Joannis-Baptistæ a domino Apostolico Innocentio in imperatorem consecratur. Berthardus Patherbonensis episcopus, qui tunc cum rege aderat, usum rationalis in celebrationibus missarum constitutus temporibus et dedicationibus Ecclesiarum, seu ordinationibus Ecclesiasticorum graduum, in proprio tantum episcopatu, sibi suisque successoribus a prædicto papa Innocentio promeruit. Ubi chronographus *rationalis* nomine pallium intelligit, ut ex Glossario Ducangii in voce *rationalis* eruitur. Trithemius in Chron. Hirsang. et Onuphrius, in Chron. eundem diem coronationis Lotharii assignant. Dum Romæ esset Innocentius II, Epistolam dedit ad Petrum Venerabilem abbatem Cluniacensem, in qua ait : « Deus in faciem suam respexit Ecclesiæ, atque nos sanos et incolumes ad Sedem propriam revocavit ». In fine vero legitur : « Quæ ad liberationem Ecclesiæ pertinent, Deo gratias salubriter operamur. Data Laterani X kal. Junii ».

2. *In Germaniam redit.* — Pergit chronographus : « Post hæc imperator in reditu, cum ad locum quemdam venisset, qui propter situs angustiam Clus, quasi præclusus vocatur : quippe ex una parte excelssissimo monte adjacente, ex altera parte profundissimo flumine currente, via in medio, quatuor seu quinque itinerantium simul spatio patente. Et cum ibidem transitus imperatori ab incolis negaretur, ipse miro eventu, et perspicuo Dei auxilio, eundem locum celeriter irrumpendo, fugatis hostibus cum suis pertransiit, et urbem in supercilio ipsius excelssissimi montis positam re-

pentino assultu cepit, et principem ejusdem urbis captivum secum adduxit ».

3. *Promittit Innocentio II se illum in propriam Sedem restitutum.* — Lotharius imperat. Innocentium II anno MCCCXI papam patremque recognovit, « et secum eo Romam iturum, et in Sedem propriam restitutum sacramento spondit », inquit chronographus Mauriniacensis pag. 377. Idem narrat Sugerius in Vita Ludovici VI Francorum regis, pag. 319, sed locus corruptus est; Sugerius enim de Innocentio II in Gallia morante verba faciens, scribit : « Opportunitatem repatriandi nanciscens de imperatoris Ludovici (legendum *Lotharii*, observandumque librariorum aliquando nomina pervertere et in alia mutare, ut non semel in hac Critica vidimus) comitatu, quia cum in manu forti Romam perducere, et Petrum Leonis deponere sponderat, illuc cum eo devenit. Sed cum cum Augustum imperatorem constituisset (hoc nempe anno), Romanis resistentibus, pacem obtinere Petro Leonis (seu Anacleto antipapa) vivente non potuit ».

4. *Innocentius II Pisis usque ad mortem Anacleti moratus est.* — De eadem profectione Romana Innocentii et Lotharii rursus loquitur chronographus Mauriniacensis pag. 383, aitque de Innocentio : « A partibus Galliarum secedens, Romam unde venerat intravit. Sed quia Petrus (id est, Anacletus antipapa) injustus conviciarius, maximam partem sibi sociaverat civitatis, in illo temporis puncto plenitudinem debiti sibi honoris adipisci non potuit. Imo quodam modo bipertito Apostolicæ dignitatis culmine, Innocentius Ecclesiam beati Petri, in qua divini sacerdotii dignitas pendebat, solus per se obtinuit; Petrus vero Lateranensis palatii sedem, ad quam imperialis celsitudo pertinet, occupavit. Exinde cæptæ venenatæ illius dissensionis jam manifestior ubique amaritudo diffundi, et tota civitas evidentioribus odiosi schismatis rivulis dissipari. Jam nunc verum videbatur illud rusticianum proverbium : Difficile est, ut unus habitaculi circulus lupum simul et agnum contineat. Porro quia illa discissio, nisi cito finem susciperet, populo, Urbi, dignitati, maximi damni

occasio fieret, Innocentius violentiæ locum præbens, saniori consilio accepto, Pisam se contulit ». Paulo post : « Innocentius tandem Pisæ demoratus est, quoadusque Petrus Apostolicæ Sedis dignitatem morte terminante reliquit », anno scilicet mccccviii.

5. *Initio Octobris adhuc in territorio Romano versabatur.* — Innocentius II exeunte Septembri nondum Pisas redierat. Brouverus enim lib. 14 Annal. Trevisensium ad annum mcccciv refert Fragmentum Epistolæ ab eo ad Alberonem archiep. Trevisensem scriptæ, in quo legitur : « Data in territorio Romano an. mcccciv, kalend. Octob. » ubi annus ille Pisanus est, non Dionysianus, ideoque respondet anno nostro mcccciii. Innocentium enim Æra Pisana aliquando usum ex dicendis anno mccccv, num. 34, perspicuum fiet. Tum ad annum mccccv recitat Brouverus alias ejusdem papæ litteras, quibus Alberonem legatum suum constituit « per Trevisensem, Moguntinam, Coloniensem, Saltzburgensem, Breinensem, et Magdeburgensem provincias », in quarum fine legitur : « Datum in territorio Romano, sexto nonas Octobris », hoc scilicet Christi anno. Fallitur autem Brouverus quando ad annum mccccvi arbitrat Alberonem eo anno Apostolicæ Sedis legatum adhuc fuisse, quod in Inscriptione ab eo relata dicitur, cum VIII idus Aug. illius anni dedicasse Basilicam Sprinkirsbachensem, dum adhuc Sedis Apostolicæ legatione fungeretur; hæc enim Inscriptio aliæque plures hujusmodi a posterioribus posita; quod de ista negari non potest, cum loco laudato visuri simus Innocentium II Alberoni in suis litteris eo anno datis titulum legati non tribuere. Præterea Baronius anno mccccv, num. 11 et seq. Chartam refert ab Adalberto archiep. Moguntino datam, his verbis inchoatam : « Adalbertus Moguntinensis Ecclesiæ archiepiscopus, et Apostolicæ Sedis legatus »; sed ea, non eo anno, ut putavit Baronius, verum anno mcccciv data, ut anno mccccv videbimus. Quare Alberonis legatio anno mcccciv absoluta. Ad Alberonem inscripta Epistola vi Hugonis Mellii, in qua ait : « Legatio B. Petri tibi commissa quæ aliquand dignitatis et potestatis addit tibi »; sed ea legatio brevis fuit, cum Adalbertus an. mcccciv eum exceperit.

6. *Plures præses Innocentium II Romanam comitati sunt.* — Divus Bernardus, ut anno sequenti demonstrabimus, pluresque magni nominis episcopi Innocentium Romanam proticiscentem comitati sunt. Hic loquitur tantum de sancto Norberto, ejus merito apud Baronium num. 1 obscurior : « Octavo ordinationis suæ anno », inquit chronographus Magdeburgensis a Meibonio editus, « cum rege Lothario, reliquisque principibus in Italiam profectus, et officio cancellarii nulla expeditione functus (legendum in illa expeditione functus); librarius enim locum illum corripuit, uti ex se patet), utpote vir magnæ auctoritatis, consilio providus, apud Romanorum quoque

primos clarus, cum plurima illic de ordinatione ipsius imperatoris, et cæteris regni negotiis composuisset, de Polanorum quoque episcopis ex primitivis privilegiorum Ecclesiæ hujus, scilicet Magdeburgensis, scriptis, subjectionem illi debentibus justitiam exposcens, iterato suscepisset, altero anno (sc. mcccciv), in reversione paulatim infirmam (legendum *infirmari*) cepit et nihiloominus circiter sex menses cum eodem imperatore pro utilitate Ecclesiæ per diversas curias in Germania commoratus. Tandem languore prevalentem Magdeburgum devectus ibidem magnifice ab omnibus in Quadragesima est susceptus ».

7. *Litteræ encyclicæ Lotharii imp. de iis quæ Romæ gessit.* — Ordericus lib. 13, pag. 897, male edoctus de gestis in hac protectione Romana Innocentii II et Lotharii II imp., ut passim de aliis hoc ipso tempore, quo in Normannia vivebat, peractis, ait Innocentium II a Lothario, dum Romæ versaretur, ad placitum vocatum venire recusasse, subditque : « Imperator autem, ut hæc audivit contra Gregorium (scu Innocentium II) indignatus, quæque possidebat dimisit, et negotio imperfecto post hebdomadas septem recessit ». Verum Ordericum refellit ipsemet Lotharius in sua Epistola tom. II Spicilegii Dacheriani pag. 480 relata, quam placitum esset integram hic non exhibere : « Lotharius Dei gratia Romanorum rex, regibus, archiepiscopis, principibus, et universis Dei fidelibus, ad quos litteræ istæ pervenerint, salutem. Majestatis suæ dispensationi et consilio placuit nos patronum et defensorem S. R. E. statuere. Ideoque necesse habuimus pro ipsius liberatione propensius laborare. Cum igitur adscitis nobis archiepiscopis, episcopis, abbatibus, principibus, ducibus, comitibus, et marchionibus regni nostri, episcopos etiam, comites, et alios barones Italiæ nobiscum ducentes, bellico apparatu stipati ad Urbem proficisceremur, nuntios schismatici illius Petri Leonis frequenter habuimus. Qui nimirum ex parte illius justitiam prætendentes, ipsi in ius ire parato non debere audientiam denegari, nec hostilibus impugnationibus molestari, publicis clamoribus asserebant. Dintinis ergo eorum interpellationibus provocati, idipsum episcopis et cardinalibus, qui cum domno papa Innocentio erant, significare coacti sumus. Ipsi vero tanquam canonicarum sanctionum, et institutionum Ecclesiasticarum non ignari, universam Dei Ecclesiam jam super hoc promulgasse sententiam, Petrum Leonis ac complices suos damnasse asserentes, quod erat universalis non debere privatam fieri responderunt.

8. *Sectatores Anacleti reos regiæ majestatis, declarat.* — « Nos autem idipsum cum patientia supportantes, et patrum nostrum papam Innocentium ad Urbem cum gloria duximus, et Lateranensi cathedræ restitimus, atque in monte Aventino castrametati fuimus. Ibi Petrus Leonis aures nostras et principum nostrorum, per Petrum olim Portuensem episcopum et per alios fautores

suos prætereundo justitiam sollicitare non destitit. Qui etiam munitiones et obsides se nobis daturus ad sufficientiam pro servando iudicio, et viva voce et litteris promiserunt. Pacem igitur sine effusione sanguinis reformare in Dei Ecclesia cupientes, quæ nobis illi dixerant, fratribus, qui cum domino papa Innocentio erant, per nos ipsos significavimus. Cæterum, ipsi, ut pacis amatores, de justitia confidentes, tam personas suas quam Leonis et filiorum suorum necnon Cen. Petr. Frajapanis, et Petri Latronis, et munitiones in manu nostra libere obtulerunt. Adversa vero pars dies redimere cupiens, sub velamine fraudulentarum promissionum nos aliquanto tempore a nostra intentione retraxit. Tandem quia ipsi sepe communiter implere quod promiserant noluerunt, tanquam fallaces et perfidi, et tam divinæ quam regie majestatis rei, cum Petro Leonis ejusque complicitibus damnati, et hostes a principibus nostræ curiæ judicati, videlicet Norberto Magdeburgensi cancellario nostro, et A. (nempe Adalberone) Bremensi archiepiscopo, et P. Osenburgensi (sc. Philippo comite de Cadse-nelnhogen episcopo Osnabrugensi,) P. Adelbron-nensi, (legendum B. *Paderbrounensi*, sc. Bernardo episcopo Paderbornensi, qui a papa pallium, uti archiepiscopi, obtinuit, ut videre est apud Krantzium in sua Metropoli, ubi duorum horum præ-sulum mentionem facit), An. Brandenburgensi (seriem integram episcoporum Brandeburgensium invenire non potui, sed non dubito quin legendum sit, Anselmo,) O. Astensi (id est, Ottone episcopo Astensi, de quo Ughellus tom. iv), O. Cremonensi (Oberto seu Uberto, de quo Ughellus in episcop. Cremonens.) et B. Parmensi (nempe Bernardo, de cuius morte paulo post verba faciemus) G. Ippo-nensi (Dacherius in margine corrigi Vibonensæ; id est, Ipponis Vibonensæ, sed magno errore; episcopatus enim ille in Calabria situs jamdiu extinctus fuerat, et omnes Calabriae episcopi Ana-cteliste erant. Manifestum est itaque legendum esse *Ipporiensi*. Eporedia, vulgo *Trece*, Ipporia appellabatur, et ejus episcopus erat Guido, aut Wido, cuius mentio apud Ughellum in Italia-Sacra, ubi Chartæ de more exhibent nomen *Ipporiensis*) episcopis, et abbatibus, Henrico Fuldensi, Alberone Noemburgensi et Lunenburgensi: proceribus Alberone et Henrico marchionibus, Othone Sagifredo vexillifero, Herimanno, Wilhelmo de Lomello, Gothone de Marchuingo, Hildebrando et Tancredo de Prato comitibus, et Alberto de Castello ».

9. *Magnates Apuliæ Innocentio II adherentes petunt auxilium a Lothario imp.* — A num. 4 ad 8. Tancredus de Conversano junctus comiti Ramnulpho, et baronibus Apuliæ, hujus anni initio civitatem Venusiam obsidione cinxit: « Populus itaque civitatis libertatem optatam expectans sub Tancredi de Conversano fidelitate colla submit-sit; deinde alias civitates Apuliæ suæ obtinuit potestati », inquit Falco in Chron. Beneven. qui deinde refert adventum Innocentii II et Lotharii

imp. ad Urbem Romanam, quos Robertus Capuæ princeps cum Gerardo cardinali præfecto Bene-venti, et ejusdem urbis legatis convenit, uti nar-rat Baronius num. 4. Cujus narrationi addendum quod Falco pag. 280, de semetipso loquens tradit, nempe cardinalem statuisse « consilio cum Rolpo-tone comestabulo accepto et abis civitatis sapienti-bus, Falconem notarium, scribam sacri palatii istius opusculi factorem, sicut in principio legitur, judicem civitatis ordinavit »; et infra assertit Inno-centium II munus illud ei confirmasse: « Privile-gio signato misit civitati Beneventanæ per Grego-rium Beneventanum electum (Landulfi successorem) qui Romam ierat, se Falconem præfatum judicem confirmasse Beneventanum ». Sed Robertus Capuæ princeps quod sperabat Romæ non obtinuit; « Princeps itaque et comes (nempe Ramnulphus) Romam euntes, non sicut voluerunt ab impera-tore consecuti sunt. Et eis illic morantibus, ex improvviso rex Rogerius advenit, et omnia igne ferroque consummavit », ut narrat Baronius num. 5, ex Falcone. Alexander abbas protectionis principis Capuani et comitis Ramnulphi verba faciens ait, hec a Lothario honorifice suscepti fuis-sent, adiutorium tamen ejus, quod *speraverant, contra regem Rogerium* obtinere non potuisse: « qui dum Romæ adhuc apud regem commora-rentur (nempe apud Lotharium) audientes regem Rogerium cum immenso militari pedestrique exer-citu fretum Pharensæ jam transmeasse, petita a rege atque accepta, quanquam non grata licentia, quantocius ad propria redeunt ».

10. *Rogerus rex sævit in conjuratos.* — Idem historicus, prætermissa Venusiæ expugnatione, confirmat quod narrat Falco de crudelitatibus a Rogerio rege tunc exercitis in Apulia: « Rex Rogerius eo quod supradictorum adversum se principum (Roberti ac Ramulphi) compererat cum perjurio factam conspirationem, tanta quidem rapitur indignatione, tanque mentis erupit fu-rore, ut non comiti, non magnati, non etiam cui-libet militi, quia ita perjurantes in eum colla erexerant, penitus parceret ». Subjungit eum vi-cisse Alexandrum comitem, ejusque filios cepisse, Gofridum in oppido Matera, et Robertum in oppido Armento, « Gofridum pro suo velle subiciens sibi, ipsum etiam caperet oppidum », scilicet Materam. In Falcone habetur: « Ibi que Giffredum filium Giffredi comitis dominum civitatis (Materæ) alliga-vit ». Verum vel Falco memoria labitur, vel ejus Chronicon hac in parte a librariis corruptum; quia non Giffredus aut Gofridus comes, sed comes Alexander dominus erat Materæ ac pater Goffredi, qui ei præerat: « Devicta Matera », inquit Alexan-der abbas, « rex super Armentum munitissimum oppidum, quo Robertus frater prædicti Goffredi inerat, venit: cui Robertus regia compulsus obsi-dione, statim se et castrum regi subegit. Dein cum obsidem qualem rex posebat, pro se dare renui-set, Siciliam vinculis mancipandus dirigitur. Post

nac vero rex castra movens super quoddam arduum et munitissimum castrum nomine Ausum, (vel Ansam), quo Goffridus comes aderat (comes nempe Giffredus, diversus a Godefrido aut Giffredo Alexandri filio) acceleravit: illudque tamdiu obsidione saevissima circumsegit, quousque comprehensus in Siciliam, exilii retrusionis poena, perjurii culpam luiturus destinatur ». Contra vero in Falconis Chronico hoc oppidum Alexandro comiti attribuitur, illudque cum Armento confunditur.

11. « Quibus ita peractis (post captam Matteredam) civitatem aliam nomine Ansam suae obtinuit potestati revera thesaurum auri et argenti Alexandri comitis invenit ». Addit Rainulphum comitem postquam spoliatus fuit *misere* mortuum esse, quod verum est; sed antea in Dalmatiam trecece- rat, et conatus fuerat ad imperatorem fugere. Ut enim de isto comite Alexander abbas prodit, « in Dalmatiam profugus iens non solum exhaereditur, verumetiam patria exorris cogitur manere: qui non longe post, ut ad imperatorem pergeret, recedens, cum ad quemdam nemorosum locum pervenisset, incidens in latrones omnino cum suis omnibus depraedatus est, qui dein Avellone (Abellini ad Rainulphum pertinentis) potitus, ab iis qui haec ipsa ab ore audita nobis nuntiaverunt, egenus valde pauper visus est manere ».

12. *Aligua funditus evertit.* — His oppidis expugnatis, Rogerius rex Montem-Pelusium, in quo Tancredus comes sese incluserat, obsedit, illumque vi cepit, uti unanimi consensu scribunt Alexander et Falco, qui addunt, *Roctoium de Planco*, praecipuum ducem, strangulatum fuisse, *Tancredum* in Siciliam missum perpetuo carceri mancipandum, ac *Montem-Pelusium* funditus eversum. Alexand. de Trojae Apuliae oppidi excidio, quod Falco fuse narrat, succincte loquitur. Baronius vero qui Alexand. non viderat, hanc cladem n. 5, ex Falcone refert, sed singularem circumstantiam, omittit, Rogerium nempe Trojam, licet tunc sibi fidelem, diruisse: « Rainulphus », inquit Falco p. 281, « missi legatos ad Trojanam civitatem, ut sacramenta, quae comiti et principi promiserant, adimplerent. Trojanus vero populus timore praedicti regis coactus, et verbis regis dolose pacificis fidem attribuens, comitis voluntati favere penitus recusavit. Insuper etiam episcopus civitatis populum omnem suaserat, ut regis fidelitatem non dimitteret ». Asserit Falco Rogerium regem Traniunt ante Montem-Pelusium cepisse; sed Alexander abbas, qui anno mccccvi in gratiam Rogerii regis Historiam suam scribebat, haec antea gesta esse affirmat, praeterea Rogerium regem *Barium* venisse, ejus muros evertisse, ac castellum rediditasse. Inde Trojam protectus est, « quam videlicet civitatem, eo quod ipsa munitissima rebellior ei extiterat, magna ex parte in plures dispersit in cales communit (legendum videtur, *communit*). Et comes Rainulphus audiens tam propinquum regis adventum, suspicans illum super se venturum, ad munien-

dum se acrius accenditur: quamobrem Neapolim ocius pergit, ibique magistrum militum (nempe Sergium) civesque allocutus, in adiutorium sui cunctos sollicitavit ». Inter Falconem et Alexandrum convenit, Rogerium regem post Trojae excidium *Melphum* occupasse; Falco vero ait, cum inde *apud Barensem civitatem* repedasse, forsitan versus Barensem, quia secundum Alexandrum Rogerius ultra Gravinam non processit: « Verum rex Melphiam discedens Gravinam urbem petiit, ibique aliquatenus commoratus Salernum post remeavit ».

13. *Princeps Capuae Pisanorum auxilium adversus Rogerium regem implorat.* — Dum Rogerius rex Apuliam subigebat et devastabat, Robertus Capuae princeps Pisanorum auxilium imploravit, uti habet Falco pag. 284: « Princeps, regis Rogerii ferocitatem, et minas ejus et terrores illatos et vestigio exponens, precatur suppliciter, ut civitas Pisana auxilii manum et consilii ei largiretur pactis eorum intervenientibus, etc. Oclavo quidem kalendas Julii princeps ipse mare ingressus est et Pisas transfretavit », ut etiam refert Baronius, sed ex exemplari parum correcto sibi Romanum n. 5 transmissio, quia ejus tempore Chronicon Falconis nondum typis datum fuerat. Fuse refert Falco quomodo Beneventanis obstinato animo Rogerium regem agnoscere nolentibus, is eorum agros depopulatus est, a Crescentio cardinali Anacletista impulsus. Durante hoc bello et aestate exeunte, Robertus Capuae princeps, postquam cum rebus publicis Italiae de suis commodis egit, Romam perrexit: « Audivimus quoque », inquit Falco p. 288, « duces Venetiarum ad ejus auxilium manum dedisse, ideoque princeps ipse Romam revertitur, et omnia quaecumque cum Pisano et Januensi populo traclavit, domino papae Innocentio e vestigio patefecit: sique cum eodem Pontifice ad pactum illud firmandum Pisas festinare ». Rogerius rex post has expeditiones maritime itinere in Siciliam reversus est: « Post haec », inquit Alexander abbas, « antequam hyemis importunitas subintraret, navigio transvectus Siciliam repetit ». Falco diem notavit: « Siciliam transfretavit XII kalend. Novembris ».

14. *Floret S. Atto episcopo. Pistoriensis.* — Ad num. 8. Refert Baronius Diploma ab Innocentio II Attoni episcopo Pistoriensi sanctitate illustri concessum, quo ejus Ecclesiae privilegia confirmat, in cuius fine legitur: « Datum Pisis per manum Aimerici S. R. E. diaconi card. et cancellarii, XII kalend. Januar., Indict. xii, Incarnat. Dominice mcccciii, Pontificatus vero D. Innocentii papae II anno quarto ». Extat eadem immunitas Ecclesiae Pistoriensis cum eadem Inscriptione tom. x Concil. pag. 947. Papebrocius ad diem xii mensis Maii, quo sanctus Atto seu Atho ex abbate generali Valumbrosano factus episcopus Pistoriensis, in He- truria colitur, de illo Diplomate pluribus disserit, sicut et de sancti Attonis regimine; in eo tamen fallitur, quod existimet temporis characteres in

illa subscriptione expressos inter se non convenire, ut examinanti patebit. Cætera quæ movet dubia ad rem nostram non faciunt. Hujus sancti præsulis mortem cum MCLV connectit. Nomen ejus anno MCLXXX Romano Martyrologio inscriptum fuit.

15. *Seditio adversus Anselmum archiep. Mediolani excitata.* — Hoc anno ceptum Mediolani inimicissime agi cum Anselmo archiepiscopo ob pessimam ejus administrationem, ut refert Landulphus Junior cap. 41 apud Paricellum, in Monument Basil. Ambros., num. 351, ubi ait, quod clero populoque adversus eum commoto, « contigit, quod quidam manipulos militum Mediolanensium captus est a Cremonensibus, et plures de ordinariis ac decumanis ceperunt, nescio quo spiritu, super causa regis Conradi ridere, et causam Anacleti latenter spernere. Ilinc Anselmus archiepiscopus multos sustinens stimulos, tandem presbyterum Azonem, magistrum puerorum canentium principaliter in missa sacerdotum celebrantium corporis et sanguinis Christi sacrificia, et quosdam alios, qui fuerunt dolosi in celebratione coronæ regis Conradi, excommunicavit. Ex cuius excommunicationis radice circumcisi (nempe Judæi Mediolani habitantes) istum Filium Virginis ignorant, et maxima pars Quiritum et Longobardorum auctorem divinæ legis minime amant (est auctor legis, aut Deus veteris Testamenti, qui rejiciebatur a Manichæis, qui tunc in illis partibus multiplicabantur) sine quibus auctoribus (Dei scilicet et Christi) cæli vel terræ pace frui non possumus. En etiam nunc dissensio multa et perniciose nimirum orta est in Mediolanensi populo sub excommunicationis titulo. Quia si archiepiscopus excommunicavit hunc presbyterum, et alios, in pulpito sanctæ Theolæ; et episcopi comprovinciales et suffraganei, (sicut supra dictum est) excommunicaverunt illum Papæ (ut anno MCLXXXV, num. 14 vidimus).

16. *Ab illis quos excommunicarat.* — Ordinarii itaque et decumani sacerdotes, et cæteri faventes papæ Innocentio II, et insidias præparantes hujusmodi archiepiscopo, suas pecunias effuderunt, et ipsas legis et morum peritis atque bellatoribus viris tribuerunt. Unde ipse archiepiscopus compulsus est intrare popularem concionem, ut ibi decertaret cum suis excommunicatis de excommunicatione (hoc valde singulare, ut populus iudex sit excommunicationis). Cumque ille expectaret sagittas de justa aut de injusta excommunicatione, Nazarius primicerius, miræ calliditatis homo, per prolixum sermonem cunctæ concioni fastidium induxit (erat is contrarius Anselmi factioni). Archipresbyter autem Stephanus, qui cognominatur de Guandeca, videns primicerium suum fastidiose fore locutum, vocem suam exaltavit, et contra archiepiscopum sic ait: Tu es hæreticus, perjurus, sacrilegus, et aliis criminibus, quæ non sunt hic notanda, es reus. His auditis ex improvise, archiepiscopus obstupuit. Archipresbyter vero ille habens textum Evangeliorum

ad manum, continuo juravit, quod ipse de istius rebus, quas dixerat esse in isto Anselmo, qui dicitur de Pusterla, in judicio episcopi Novariensis et Albensis, qui sunt de suffraganeis Ecclesiæ Mediolanensis, staret. Consules itaque Mediolani in concordia utriusque partis, statuerunt ut ipsi (nempe duo hi episcopi) et alii suffraganei venirent.

17. *Fugit in domum paternam.* — « In statuta itaque die, non solum suffraganei, sed quamplures, pure induti rudi et inculta lana, et rasi insolita rasura, concurrerunt. Cumque archiepiscopus iste Anselmus vidisset eos constare, et populo (videri) quasi si essent Angeli de cælis, ad ipsum populum ait: Omnes isti, quos videtis cum illis cappis albis et griseis hæretici (sunt). Inde simplices et compositi (id est, omne hominum præsertimque clericorum genus ad expellendum et deponendum (eum) bellum commoverunt (id est, seditionem excitarunt): verumtamen gladio Anselmi in illa die resistere non potuerunt. Sed mediante nocte, per expensam pecuniam manus primicerii et archipresbyteri Stephani fortissima (convenit, quæ) in summo diluculo ipsum Anselmum a sede compulit: qui cum non inveniret quo declinaret, paternam suam domum intravit.

18. *Cogitur urbe excedere.* — « Factoque mane die altera, idem Anselmus, coram humili sua plebe in Ecclesia S. Ambrosii congregata, se præsentem jurare fecit camerarium suum, ne iste dominus suus effugeret iudicium suffraganeorum, et coram eis responderet Stephano Guandeca dicto archipresbytero, de his rebus quas sibi objecerat, remota causa regis Conradi. Joannes autem de Rhode, unus ex consulibus Mediolani reversus ad alteram partem, quæ eum miserat, de juramento isto Anselmi nihil retulit; sed ait: Dominus ille, ad quem me misistis, ad nullam rationem faciendam nobis venire promittit (quod falsum erat, indeque apparet multa ulrinque injuste gesta esse). Tunc qui in concione illa aderant, clamaverunt: Et ipse deinceps sit remotus a nobis. At sic quisque suffraganeus ad sedem suam rediit, nisi Robaldus Albensis, qui in Chrisinate et cæteris episcopalibus officiis Ecclesiæ subvenit. Anselmus autem ille, quasi a cuncto clero et populo abjectus et expulsus, ad solita castella archiepiscopatus exivit: in quibus qualemcumque requiem suscepit». Puricellus ad hæc Landulphi verba ait: « Quorum quidem postrema, sicut ex contextu postmodum a nobis recitando constabit, usque ad xxxiv annum pertinent », ita ut in ejus sententia Anselmus anno tantum sequenti archiepiscopatu depositus fuerit. Verum ex dicendis anno sequenti nihil simile constabit, eamque depositionem, non anno superiori, ut arbitratur Papebrocius in Exegesi de episc. Mediolanensibus, tom. vii SS. mensis Maii præfixa, sed currenti factam, quæ ibi dicuntur ostendunt.

19. *Obitus S. Bernardi episc. Parmensis.* —

Sanctus Bernardus Parmensis episcopus, qui anno mxcvii ab Urbano II factus est cardinalis, annoque xcvi Parmensi sede donatus est, mense Junio Romæ erat cum Innocentio II et Lothario imp. ut hujus imperatoris Epistola encyclica hoc anno a nobis recitata demonstrat. Quare summopere deceptus est Ughellus tom. II Ital. Sacre, qui levis quibusdam ratumculis et conjecturis fretus autumavit, eum, Paschali II Ecclesiam Romanam regente, ad Deum migrasse. Inscriptio vero laminæ plumbeæ ejus tumulo superposita, quam exhibet, non annum ejus translationis, ut ipse putat, sed annum ejus mortualem declarat. Et hæc est :

VENERABILIS PATER
D. Lanfrancus Parmen. episcopus
in arca ista plumbea
posuit corpus
S. Bernardi Parmensis episcopi
Anno mxcxxiii die iii
Decemb.

Inscriptio tamen aræ plumbeæ a Lanfranco ejus successore insculpta non fuit; eum die iii mensis Decemb., quo ex ejus Vita cap. 49 eum e vivis abiisse liquet, *Lanfrancus* nondum episcopus fuerit, qui aliunde *Bernardum sanctum* non appellasset. In ea Vita a scriplore anonymo et forte cœvo edita, annus mortis ejus facitur, sed verosimile non est posteror quorum jussu ea Inscriptio posita, illum ignorasse. Præterquam quod certum est, illum ad hunc annum pervenisse, et nulla post eum ejus mentio occurrit. Fuit *Bernardus* septimus abbas generalis congregationis Vallumbrosanæ, et factus episcopus Parmensis successorem nactus est *sanctum Attonem* seu Atthonem, qui et ipse etiam ad Pistoriensem sedem postea erectus est. *Bernardi* meminit Baronius anno mci, num. 22 et alibi.

20. *Episc. Daniæ et Succie archiepiscopo Hamburgensi subjiciuntur.* — *Adalbero* Hamburgensis archiepiscopus sæpe questus fuerat apud Callistum II et Honorium II, quod *Acerus*, ut habet Saxo Grammaticus lib. 43, (non vero *Acetus*, ut legitur tom. X Concil. mico citando) Lundensis episcopus, aliique Daniæ presules, sibi obedientiam tanquam eorum metropolitano debitam denegarent, contra Privilegia sibi a pluribus Pontificibus Romanis concessa. Callistus vero et Honorius, et postea Innocentius II eis mandarat, ut aut ad Hamburgensem Ecclesiæ obedientiam redirent, « aut, si quam super hoc se confidenter iustitiam habere, ad Sedem Apostolicam venirent preparati ». Sed cum ipsi Apostolici mandatis non obediunt, idem Innocentius II precibus Lotharii imp. ejus Hamburgum metropolis erat, eidem archiepiscopo restituit Lundensis, cæterosque « episcopatus Færie, Suediæ, Norwegiæ, Færiæ, Gronlundie, Halsin-galdie, Islandie, Scridevingie, et Selavorum ». In fine litterarum Innocentii II, tom. IX Concil.

recitalarum, legitur : « Dat. Romæ apud Montem-Aventinum, per manum Aimerici S. R. E. diae. card. et cancellarii, VI kal. Junii, Indict. xi, Incarnat. Dom. anno mxcxxiii, Pontificatus vero domini Innocentii PP. II anno iv ». Eodem die eandem in rem scripsit ad Nicolaum Danorum regem et ad Suedorum regem, quibus rogando mandavit, ut episcopos regnorum suorum ad obedientiam redire, diligenter satagerent adimplere. Ex quibus intelligis, primo *Adalberonem*, quem Lotharius imp. in suis litteris encyclicis supra recitatis vocat *archiepiscopum Bremensem*, ab Innocentio II vocari *archiepiscopum Hamburgensem*, quia jamdiu uterque archiepiscopus unitus fuerat. Secundo, diem coronationis Lotharii vix antiquis historicis observatum, nempe *II nonas Junii*, accurate a chronographo Hildensheimensi notatum fuisse.

21. *S. Canuti Obotritorum regis martyr.* — Sanctus *Canutus* Obotritorum rex et Slevicensis dux martyrium fecit, non *Friderico* archiepiscopatui Bremensem administrante, ut perperam tradit Henricus Wolterus in Chron. Bremensi, sed sedente *Adalberone*, qui teste Chronico Hildesheimensi jam ab an. mxcxxiii Bremensis archiepiscopus erat. Post S. Canuti martyrium contigit quod chronographus Hildensheimensis, qui hoc tempore vixisse videtur, in Chron. ad annum mxcxxiii habet : « Rex Danorum pluribus adversus Teutonicis terram suam incolantibus truncationes membrorum facit. Hac de causa imperator super eum expeditionem movere intendit ». Tum ad annum mxcxxiv : « Imperator Pascha Halverstad (id est, Halberstadii) peragit. Ibi rex Danorum veniens sese in potestatem imperatoris tradit, obsidesque dat, juramentum facit, se successoresque suos nonnisi permissu imperatoris, successorumque suorum, regnum adepturum : et pulchro spectaculo nullis retro temporibus audito, ipso secundo die Paschæ idem rex Danorum regio more coronatus, coram coronato de more imperatore gladium ipsius portat : et sic in gratia imperatoris repatriavit ». Idem legitur ad annum mxcxxiv, tam in Chron. Bremensi citato, quam in Chron. Magdeburgensi a Meibomio editis, et utrobique rex ille Danorum appellatur *Magnus*, quem uterque auctor manifeste insinuat sanctum Canutum ante hunc annum occidisse, de qua cæde vide dicta anno mxcxx.

22. *Mequinenzia ab Alfonso VI. reg. Aragonie capta, et Fraga obsessa.* — « Anno ab Incarn. Domini mxcxxiii, Indict. xi, Hildefonsus Aragonum rex exercitum contra paganos aggregavit, et munitissimum ditissimumque castellum Meschinaz (seu Mequinenzia, vulgo *Mequinenza*, oppidum Aragoniæ ad Secorim fl.) obsedit, et oppidanis turgen-tibus, qui divitiis et ciborum abundantia, inaccessibilibus, ut rebantur, firmitate gloriabantur, præcepit, ut se indemnes dederent, et in pace omnibus secum rebus suis sublatis recederent », inquit Ordericus lib. 13, pag. 333, qui subdit, Alfonso VI, cum illi acriter resisterent et promissa

ejus parvipenderent, validos assultus in oppidum dedisse, eoque capto, et cunctis Saracenis capibus detruncatis, magnum terrorem vicinis intulisse. Surita in *Annal.* lib. 1, cap. 52, notat Mequinienciam mense *Junio* in potestatem regis venisse.

Ail postea Ordericus: « Victor rex inde in civitatem Fragam (oppidum Aragonie ad Cineam fl. in limite Cataloniae, vulgo *Fraga*) exercitum duxit, et annua ipsam obsidione circumvallavit », annoque sequenti ibidem in praelio occisus, uti videbimus.

INNOCENTII II ANNUS 5. — CHRISTI 1134.

1. *Concilium generale Pisarum.* — Sequitur annus salutis millesimus centesimus tricesimus quartus, Indictione duodecima, quo ab Innocentio papa celebratur Pisis Concilium generale ex episcopis Italiae et Transalpinis. De quo ista Bernardus abbas Bonævallis in rebus gestis sancti Bernardi abbatis Cisterciensis¹: « Innocentius rursus Pisas revertitur, ibique aggregatis totius Occidentis episc. aliisque religiosis viris magnæ gloriæ Synodus celebratur. Affuit per omnia et consiliis et iudiciis et definitionibus omnibus sanctus Bernardus abbas; impendebaturque ei reverentia ab omnibus, et excubabant ante ejus limina sacerdotes, non quod fastus, sed multitudo communem prohiberet accessum: et aliis egredientibus, alii introibant, ita ut videretur vir humilis, et nihil sibi de his honoribus arrogans, non esse in parte sollicitudinis, sed in plenitudine potestatis. Actiones Concilii longum est prosequi, summa tamen in excommunicatione Petri, et irregressibili fautorum ejus defectione consistit, et usque hodie hæc sententia perseverat ». Hæc tantum ipse de tam magno Concilio. Subjicit his de legatione ab Innocentio decreta ad Mediolanenses, de qua nos proxime dicturi sumus. Dum adhuc sanctus Bernardus Pisis moraretur, contigit reditus Martini presbyteri cardinalis ex legatione, qua perfunctus fuit in Dania, de cujus continentia in numeribus accipendis hæc digna memoria narrat idem sanctus Bernardus², scribens de Consideratione ad Eugenium: « Dignum nunc ad medium venire factum dulcis memoriæ Martini nostri. Nosti hoc, sed an meminere ignoro. Is cardinalis presbyter, functus aliquando legatione in Dacia (Dania), tam pauper remeavit, ut pene expensis et equis deficientibus, vix perveniret Florentiam. Ibi episcopus loci donavit ei

equum, quo Pisas usque, ubi eramus tunc, pervectus est. Postridie, credo, secutus episcopus (erat enim illi causa cum adversario, et agendi aderat dies) cœpit requirere suffragia amicorum. Cumque per singulos sollicitaretur, ventum est ad Martinum; fiducia erat major in illo, qui non posset immemor esse recentis beneficii. Tum Martinus: Decepisti me, inquit, nesciebam tibi imminere negotium. Tolle equum tuum, ecce in stabulo est; et hora eadem resignavit illi. Quid dicis, mi Eugeni? Nonne alterius sæculi res est, redisse legatum de terra auri sine auro? transisse per terram argenti, et argentum nescisse? donum insuper quod poterat esse suspectum, illico rejecisse? » Illicque de Martino legato Bernardus. Post celebratum Pisis Concilium, antequam dimitterentur, qui congregati illic Concilii causa archiepiscopi et episcopi fuerant, eorum consilio adhibito, Innocentius papa retulit inter sanctos, Hugonem episcop. Gratianopolitanum, quem anno superiori ex hac vita migrasse diximus. Extant de ejus canonizatione ejusdem Innocentii breves litteræ in hunc modum³:

2. *Canonizatio S. Hugonis episcopi Gratianopolitani.* — « Innocentius episcopus, servus servorum Dei, dilecto filio Guigoni priori Carthusiensi, salutem et Apostolicam benedictionem.

« Divinis respondentes beneficiis, cognita vita ejus, et auditis quæ per B. Hugonis merita sunt miraculis, supernæ majestatis clementiam collaudavimus, et archiepiscoporum, episcoporum et cardinalium, atque aliorum qui nobiscum aderant communicato consilio, ipsum inter sanctos et electos honorari præcepimus, et diem ejus assumptionis cum gaudio solemniter celebrari. Quia igitur ipsius vita, quam pie duxit in corpore, et miracu-

¹ Vit. S. Bern. l. II, c. 2. — ² Bern. de Consid. l. IV.

³ Apud Sur. tom. II, die 1 Ap.

lorum conuersatio qua Deus eum facit apud homines præfulgere, tunc maxime dilectioni non exstant incognita, auctoritate B. Petri et nostra tibi mandamus, quatenus ea quæ tibi super hoc nota fuerint, diligenter describendo, posterorum memorie tradas, ut et Deus honoretur in sancto, et clerus legens ac populus audiens gratias agant Domino, atque ipsius intercessione peccatorum veniam percipere mereantur. Orantes pro nobis dilectos filios nostros Carthusienses fratres, per te in Domino salutamus et benedicimus. Data Pisis, decimo kalend. Maii ». Illec de canonizatione S. Hugonis, cuius sæpe superius contigit fieri mentionem.

3. *Episcopi Gallicani a Concilio reuerentes per satellites Conradi regis vexantur.* — His peractis, episcopi dimittuntur. Quid autem acciderit Francis episcopis ad propria redeuntibus, jam dicendum. Infestabatur tunc temporis Italia Conradi tyrannide, quem hactenus Mediolanenses confederatum habuissent contra Lotharium imperatorem. Qui igitur huic favabant, erat illis pro stipendio grassandi licentia; quo fiebat, ut viæ publicæ ejusmodi non militibus, sed latronibus obsiderentur. Illi autem in insidiis latitantes Gallicanos episcopos et abbates ad propria revertentes sunt aggressi in eadem Tusciæ provincia apud Lunam civitatem. Quem tragicum plane casum Petrus Cluniacensis abbas unus ex ipsis deplorans, de his quæ sibi accidissent, scripsit omnium nomine Epistolam ad Innocentium papam, quæ sic se habet¹:

« Summo Pontifici et nostro piissimo patri domino papæ Innocentio, frater Petrus, humilis Cluniacensium abbas, salutem et obedientiam.

« Dies tribulationis et angustiae dies hæc, quæ secundum Prophetam², venerunt filii usque ad partum, et virtus non est pariendi. Venerunt³ nuntii Sennacherib, blasphemantes Deum cæli. Irruit Nabuchodonosor et captivavit populum Dei⁴. Nec defuit Doeg, qui extenderet manum in sacerdotes Domini⁵. Lamentabilem historiam cogor retexere, quam præcordiorum dolore interrompente, lacrymis, velim, nolim, interfluentibus, vix (ut arbitror) potero explicare. Sed quia (prohi dolor!) hoc a martyrum temporibus tam inauditum seculus ne vidisse contigit, silere cum maluissem, loqui invitum oportuit. Regressi ab uberibus vocantis Ecclesiæ, a Concilio pietatis vestræ, ut grex dominicus simpliciter ambulans, luporum morsus incurramus, et nostris sæculis insolita rabie dispersi, captivi, vulnerati, et rebus omnibus pene expoliati sumus.

« Aderat in comitatu nostro non ignobilis, neque ultima pars Ecclesiæ Dei, archiepiscoporum, episcoporum, abbatum, legio monachorum, non parvus numerus archidiaconorum, nobilium clericorum et religiosarum personarum populus. Horribile spectaculum, tantas tamque necessarias

Ecclesiæ Dei personas videre distrahi, dissipari, vulnerari, atque gladii insequentibus, ubi ubi per diversa fugari. Episcoporum et abbatum plurimi ad proxima castra violenter abducti: et quidam eorum post verbera et vulnera, barbarica immanitate incarcerationi sunt. Inter quos dominus Rhemensis, cui nec ætas, nec dignitas adesse potuerunt, post multas injurias et vulnera turri conclusus tenetur. Dominus Petragoricensis similia expertus est. Sed quid ego de singulis quasi solis loquor? Cum Bituricensis et Senonensis suis pene omnibus amissis, vix ad Pontem-Tremulum tremuli et anhelii pervenerint, et ibi cum Hebredu-nensi, Treccensi iectu hastæ de equo dejecto, et inde graviter infirmato, cum Lemovicensi, Atrebatensi, Belicensi, Redonensi, atque aliis episcopis, abbatibus etiam Lemovicensi, Vizeliacensi, S. Michaelis de Clusa, S. Germani Parisiensis, Corbeicensi, Noviomensi, Burguliensi, Sancti-Sulpitii, Sancti-Remigii, Crassensi, S. Joannis de Prato, de monasterio Hender, Melundensi, Salmorensi, et aliis quamplurimis secundo carcere inclusi teneantur? Refertus est burgus ille et consipatus multitudo sanctorum, quæ velut Hierusalem obsessa a Babylonis, pedem ultra protendere non audet. Nulli tutus ingressus, omnibus negatur egressus. Nec multa spes in aliquo, nisi in illo qui educit vincitum de domo carceris, et in vobis, sanctissime pater, qui ejus vices in terra geritis.

4. « Clamat igitur ad vos, sicut ad singulare præsidium nobilis illa Ecclesiæ Dei portio, et sibi celtissime subveniri, sicut filius a patre, precatur. Postulo et ego socius periculorum, per quem vobis ista scribi elegerint, ut quia tanta pro Deo et vobis eos contigit pericula subire, festinet vestra pietas eorum cito periculis subvenire. Postulo, inquam, quia postulandum mihi est, ne sanctos socios, qui itineri nostro quadam charitatis confidentia adhaerant, contempsisse videar. Nam de meis injuriis plura dicere supersedeo. Qui dum cum domino Vizeliacensi abbate armatis hostibus pro pace sociorum obivis occurrissem, primo impetu nostra iectu lanceæ confossa, in partem cedere coacta est. Fratres nostri fugati, famuli capti, res pene omnes ablatae. Ego ad proximam villam me conferens, tandem delitui, donec conducto hospitii nostri ad Pontem-Tremulum, quo alii præcesserant, vespertinis horis et ipse perveni. Inde ergo cum sociis vocem querulæ lamentationis emittens, rogo pariter et consulo, ne rem tantam parvipendendam putetis, si nomini Christi, si honori vestro, si utilitati Ecclesiæ aliquando consulendum esse judicatis. Si enim hoc negligitur, quid curabitur? si rigor justitiæ, si severitas Ecclesiæ in damnis publicis dormit, quando in privatis exiguabitur? Precatur nobiscum et consulit sacer captivitatis conventus, ut non solum in actores nequitie hujus, sed et in toto Lunensi episcopatu Apostolica vindicta mucro resplendeat; quatenus eo sublimiter renitente, non solum prope positi,

¹ Pol. Clun. I. III. Ep. LXXVII. — ² Isa. XXVIII. — ³ 1. Reg. XVIII. — ⁴ 1. Reg. XXIV. XXV. — ⁵ 1. Reg. XXII.

sed etiam in extremis Christianitatis finibus constituti terreantur. Lunensis episcopus nobis in brevi apparet, lunarem eclipsim niniis immature passus est; quem dum per totam diectam nobis lucere credidimus, vix per integram leugam socium habere potuimus. Longus fui; sed ut audacter loquar, in tanta re longior esse debui. Jam si quid minus dictum est, sapientia vestra suppleat et disponat. Hucusque Petrus Cluniacensis abbas. Quæ autem hæc secuta sint, nobis haecenus incomperta. Illud autem ejusdem Petri testificatione asseritur in libro miraculorum¹, ipsum alias antehac evasisse ejusmodi facinorosos Conradi satellites, sed incidisse in eos comitem suum Gerardum, magnæ virtutis virum. Duraverunt hæc tempora mala², ad quæ spectant, quæ idem Petrus habet in alia sua Epistola: « Romam pro injunctis negotiis quemdam priorem summo studio contendere voluisse, nec potuisse, eo quod audisset, quod ait, capi monachos, spoliari episcopos, interfici clericos, nec illis religionem, nec istis dignitatem adesse vel in modico posse. Minera obstructa latronibus, raptoribus campos, gladiatoribus silvas oppletas, ipsumque Latium singularem otium Romanæ gloriæ sedem, non civibus, sed Barbaris et hostibus sævissimis substratum gemere ». Non fuit cum his S. Bernardus abbas, qui cum iisdem ex Galliis ad Concilium venerat. Opportuna namque occasio intercessit, ut mitteretur cum legatione a latere ab Innocentio papa ad Mediolanenses, qui jamdiu expetierant hoc ab eodem Innocentio, ubi cognovissent eundem sanctum Bernardum Pisas ad Concilium convenire: quem legatione atque litteris interpellarunt, ut se Mediolanum conferret, ut ejus opera illa civitas jam abdicate schismate pace reconciliaretur, et compaginaretur sanctæ Romanæ Ecclesiæ. Quod omni officio sibi præstantum post celebratum Concilium, idem sanctus Bernardus tunc redditus ad eos litteris pollicitus fuit; sunt ipsius litteræ perbreves ad clerum conscriptæ. Ejusdem namque cleri opera, absterso errore, eadem civitas revocata fuerat ad unitatem. Sic se habent³:

5. « Benedicti vos a Domino, quorum studio et industria civitas vestra liberata est ab errore, et relicto schismate, ad Catholicam rediit unitatem. Exiit sermo iste inter Catholicos: audivit et lætata est Sion, et est vobis gloria coram Deo et omni populo. Quam lætis amplexibus mater Ecclesia colligit tot et tantorum multitudinem filiorum, quos se amisisse dolebat? Quam læto et sereno vultu Deus Pater recipit hoc sacrificium de manibus vestris? Quod autem et paci terre intenditis, facitis quod filii pacis. Et ego, fratres, particeps et socius gaudii vestri fieri cupiens, juxta petitionem vestram ad vos cum dilectis fratribus nostris, nuntiis vestris veniebam, de quibus mihi scripsistis,

plenius secundum rationem in beneplacito Dei satisfacturus. Sed quia tempus breve est, quo ad Concilium festinamus, non gravet vos usque ad reditum nostrum sustinere ». Hæc tunc ad clerum; ad cives autem Mediolanenses hæc eodem argumento tunc itidem date¹:

« Ut ex scriptis vestris percipio, nonnullus mihi locus gratiæ apud vos est. Et quoniam meum non invenio meritum, divinitus credo datum. Non recuso favorem ingentis insignisque populi. Amplector oblatam gratiam, et obviis manibus gloriose civitatis devotionem devotus excipio, præsertim hoc tempore, quo abjecto errore schismaticorum, ad sinum matris Ecclesiæ cum gaudio totius orbis reversa est. Arbitror tamen non solum mihi gloriandum, quod invitator ad pacem quærendam, et a famosissima urbe, cum sim pauper ignobilisque persona, tanti boni mediator atque minister assumor. Sed vobis quoque per talem nihilominus honor est, flecti ad pacem et concordiam vicinorum vestrorum, quos nec multarum civitatum hostilis impetus (ut bene notum est mundo) cedere aliquando compulsi. Itaque festinans ad Concilium, spero me rediturum per vos, et probaturum de gratia, quam promittitis. Qui autem gratiam dedit, faciat ne in me vacua sit ». Jam autem Mediolani plantata erat Religio Cisterciensis, et feto fecundo propagata: ad quorum sanctam sobolem tunc temporis coalescere incipientem S. Bernardus aliam dedit Epistolam²:

6. *S. Bernardus legatus cum cardinalibus ad Mediolanenses, ad quos et dat litteras.* — Sed jam quid ea legatione ab Innocentio papa a latere missa credita duobus magnæ estimationis sanctæ Romanæ Ecclesiæ cardinalibus, juncto cum eis S. Bernardo, sit actum, videamus. Res gestæ describuntur ab eo qui præsens adspexisse potuit, Bernardo abbate Bonævallens in Vita S. Bernardi abbatis tunc Clarævallensis, dum ait³: « Soluta Concilio, (Pisano scilicet), ad reconciliandos Mediolanenses dominus papa abbatem Clarævallens, quem multis supplicationibus expetierant, et Guidonem Pisanum, et Mattheum Albanensem episcopum a latere suo direxit, qui schisma per Anselmum pseudarchiepiscopum in eadem urbe factum abluerent, et ad unitatem Ecclesiæ devios revocarent. Abbas igitur cum prædictis viris, quos a domino papa collegas acceperat, addidit consortio et communi consilio virum venerabilem Gaufridum Carnotensem episc., cujus innocentiam et sinceritatem in multis probaverat. Et visum est cardinalibus bonum, ut tanto adjutore negotium tanti ponderis fulciretur ». Hunc (ut idem auctor testatur inferius) idem Innocentius papa constituit legatum in provincia Aquitani. ad reducidos schismaticos, qui ibidem invaluissent. De cujus legatione dicendum suo loco anno sequenti. Pergit auctor:

¹ Pet. Clun. mirac. l. i, c. 8. — ² Ibid. l. iv, Ep. XXXIII. — ³ Bern. Ep. CXXXII.

¹ Bern. Ep. CXXXIII. — ² Ibid. Ep. CXXXIV. — ³ Vit. S. Bern. l. II, c. 2.

« Transcenso itaque Apennino, ubi audierunt Mediolanenses abbatem desideratum suis finibus propinquare, longe a civitate milliariis septem omnis ei populus obviat, nobiles, ignobiles, equites, pedites, mediocres, pauperes, quasi de civitate migrarent, proprios lares deserunt, et distinctis agminibus, incredibili reverentia virum Dei suscipiunt. Omnes pariter delectantur aspectu, felices se judicant qui possunt frui auditu. Deosculantur pedes ejus universi, et licet hoc ille moleste acciperet, nulla potuit pronos et devotos ratione compescere, nulla interdictione repellere. Vellicabant etiam pilos, quos poterant de indumentis ejus, et ad morborum remedia de pannorum laciniis aliquid detrahebant, omnia sancta judicantes, quæ ille tetigisset, et se sanctificari tactu eorum vel usu. Præcedentes itaque et subsequentes letabundis acclamationibus applaudebant abbati, et diu intra agminum spissamenta detentum, tandem solemniter reddidere hospitio. Et cum tractatum esset in publico de negotio, propter quod tam vir Dei quam cardinales advenerant, oblita fortitudinis suæ civitas, omni ferocitate deposita, se ita abbati substravit, ut obedientiæ eorum non incongrue ille posset aptari poetæ versiculus :

Jussa sequi tam velle mihi, quam posse necesse est.

7. « Pacatis omnibus, reconciliata Ecclesia, firmatis inter plebes concordie pactionibus, alia cœperant nasci negotia, et insanienti diabolo, et in quibusdam obsessis corporibus debacchanti oppositum est Christi vexillum, et increpante viro Dei de possessis atriis, superveniente eminentiori virtute, territa et tremebunda diffugere demonia. Ecce nova legatio, non Romanum pragma circumferens, sed divinis legibus fidei prægna allegans, prolatis in medium litteris sanguine Christi conscriptis et bulla crucis impressis, quæ figura auctoritate sua terrestria et inferna sibi subdit et curvat ». Nimirum signa Apostolatus ejus per plura miracula subsequenter declarata, quæ idem auctor qui forte aderat quam exactissime describit : quæ si libet, tu consulas ; hæc enim satis ad iustitiam. Porro non solum illustrandi causa viri sanctitudinem, hæc Deus per ipsum miracula fieri voluit, sed ut per ea, penes quem esset Ecclesia, et quis ejus legitimus esset Pontifex, innotesceret. Et ita quidem ex his magna facta est accessio fidelium ad veram Ecclesiam ex schismaticis ad eam reverentibus. De quibus ita inferius idem auctor : « Cum diu sub Anselmo (ejus scilicet archiepiscopi), schismate, qui Petri fuit Mediolanensem occupaverat cathedram, sacerdotes gementes, virgines squalidae, sanctificationes maledictæ, altare pollutum, iram Dei in populum provocassent. At vero in adventu viri Dei, abdicatis Anselmi præstigiis, in Sedis Apostolicæ obedientiam sub Innocentio revocata Ecclesia, impedita est illa demonum licentia, et quotidie dabat locum, et ad preces viri Dei diffu-

giebat diabolus, et si quando resistere conabatur, in ipso conflictu succumbens gloriosius vincebatur ». Hæc idcirco auctor, quod ob schisma plures, qui illic redditii fuerant enervementi, ob redditum ad Ecclesiam per sanctum Bernardum ibidem fuerint liberati.

8. Quod autem ad munus legationis spectat, non solum ad conciliandam cum Sede Apostolica Ecclesiam Mediolanensem, sed ad recipiendum ab eis Lotharium imperatorem, fuit ab Innocentio demandatum : quod et ab ipsis legatis fuit impletum. Testatur id ipse S. Bernardus in Epistola ad imperatricem istis verbis : « Non ante sane Mediolanenses in gratiam domini papæ et Ecclesiæ unitatem recepti sunt, quousque palam Conrado refutato et abnegato, dominum nostrum Lotharium in suum regem et dominum receperunt, et Romanorum imperatorem Augustum una cum toto orbe confessi sunt, et de injuria transacta juxta consilium et mandatum domini papæ digne vobis se satisfacturos esse, tacto sacrosancto Evangelio, spoponderunt, etc. » Rogat enim eam bene habere eodem Mediolanenses. Missus est post hæc pariter idem S. Bernardus ab eodem Innocentio papa ad Genuenses pro pace firmanda cum Pisanis : quod feliciter implevit, ut ejusdem Bernardi litteræ ad ipsos Genuenses significant, date anno sequenti, quas suo loco reddituri sumus. His quidem omnibus ex sententiæ peractis, magna gloria Dei et sanctæ Apostolicæ Sedis, idem S. Bernardus in Gallias rediit, dimissis collegis ejus legationis sanctæ Romanæ Ecclesiæ cardinalibus, Pisas ad Innocentium rediturus.

Cum autem idem sanctus abbas audisset, nescimus qua ex causa, eundem populum Mediolanensis civitatis labantem titubantemque, neque firmiter in proposito permanentem : occurrat quoniam citissime opportuno remedio, scribens ad eos presentem Epistolam, qua illi summa sunt fidei constantia roborati :

« Suis Mediolanensibus, universo videlicet clero et populo, Bernardus abbas dictus de Clara-valle, in Domino salutem.

9. « Bene vobiscum facit Deus, bene vobiscum facit Romana Ecclesia. Facit ille quod pater, facit illa quod mater. Et revera quid vobis debuit facere et non fecit? Si postulastis mitti vobis de curia honorabiles personas ad honorem Dei et vestrum, factum est. Si postulastis confirmari quod unanimis vestra de venerabilis patris vestri electione firmaverat, factum est. Si voluistis licuisse vobis quod illicitum, nisi pro magna quidem necessitate, sacri canones judicant, translationem episcopi scilicet in archiepiscopum, concessum est. Si rogastis crui cives vestros de vinculis Placentinorum (quod utique ego prætermittere nec volo, nec valeo) et hoc factum est. In quo postremo, quæcumque rationabilis

¹ Bern. Ep. cxxxvii. — ² Ibid. Ep. cxxxi.

petitio filiae, non dico repulsam, sed vel moram passa est apud piam matrem? En ad complementum pallium praesto est, plenitudo honoris. Nunc vero audi me, inelyta plebs, gens nobilis, civitas gloriosa: audi, inquam, me (veritatem dico, non mentior) dilectorem tui, zelatorem salutis tuae. Romana Ecclesia valde clemens est, sed nihilominus potens. Fidele consilium, et omni acceptione dignum. Noli abuti clementia, ne potentia opprimaris. Sed dicit aliquis: Debitam ei reverentiam exhibebo, et nihil amplius. Esto. Fac quod dicis. Quia si exhibeas debitam, et omnimodam (exhibebis scilicet). Plenitudo siquidem potestatis super universas orbis Ecclesias singulari prerogativa Apostolicae Sedi donata est. Qui igitur huic potestati resistit, Dei ordinationi resistit. Postest, si nile judicaverit, novos ordinare episcopatus, ubi hactenus non fuerunt. Potest eos qui sunt, alios deprimere, alios sublimare, prout ratio sibi dictaverit: ita ut de episcopis creare archiepiscopos liceat, et e converso, si necesse visum fuerit. Potest a finibus terrae sublimes quascunque personas Ecclesiasticas evocare, et cogere ad suam praesentiam non semel aut bis, sed quoties expedire videbit. Porro in promptu est ei omnem ulcisci inobedientiam, si quis forte reluctari conatus fuerit; denique probasti et tu. Quid enim contulit tibi vetus tua rebellio, et recalcitratio male suasa a pseudopropheta tuis? Quem fructum habuisti, in quibus nunc erubescis? Agnosce potius in qua potestate, gloria et honore suffraganeorum tuorum tam diu privata exististi. Quis pro te valuit obviare Apostolicae auctoritatis justissimae severitati; cum provocata tuis excessibus decrevit, te tuis illis antiquis ac praecelsis ornamentis nudare, mutilare membris? Et hodie confusa et truncata jaceres, si non benignius quam potentius tecum actum fuisset. Quis eam prohibere valebit etiam a gravioribus, si rursus (quod absit) adjucceris provocare? Vide ne patiaris recidivum: quia pro certo, ni fallor, non tam facile denuo poterit inveniri remedium. Si quis itaque dixerit tibi: partim oportet obedire, partim non oportet: cum tu in te experta sis plenitudinem Apostolicae potestatis, auctoritatis integritatem: nonne hujusmodi aut seductus est, aut seducere vult? Sed fac quod dico: nam ego te non seduco. Convertere magis ad humilitatem, ad mansuetudinem. Siquidem et humilibus dat Deus gratiam¹, et mansueti haereditabunt terram. Esto cauta dominae et matris tuae recuperatam servare gratiam. Et sic ei placere studeas de reliquo, quatenus placeat ei non solum servare tibi quae reddidit, sed etiam adficere quae nondum dedit. Ista Bernardus ob id quod in poenam flagitii, Mediolanensis metropolis aliquibus fuerat spoliata sub se positus episcopatibus.

10. *S. Bernardi reditus ad Innocentium.* —

Porro ter configit eundem sanctum Bernardum venire in Italiam ad Innocentium papam, primo hoc anno cum Pisas ad Concilium venit, secundo paulo post eodem anno, ut testatur ejus Vitae auctor his verbis¹: «Cum secundo per Mediolanum eodem anno pater sanctus transiret etc.» Tertius vero fuit adventus, quando Lotharius imperator se contulit in Italiam cum exercitu, et finis est impositus schismati obitu Petri Leonis. Testatur id ipse in Cantico². Qui autem collega fuit in Mediolanensi legatione, Matthaeus cardinalis episcopus Albanensis, reversus Pisas (inquit Petrus Cluniacensis) post aliquot menses longo morbo fatigatus, nempe ab idibus Julii usque ad kal. Decembris, eo die feliciter ex hac vita migravit. Cujus res praecclare gestas idem Petrus scripsit diligentissime, quem tu consulas³. Extat etiam ejusdem Petri de ejus laboribus Epistola ad Innocentium papam⁴.

11. *Rogerus proditio potitur civitatibus.* — Hoc eodem anno Rogerius Siciliae rex, magno exercitu comparato veniens in Campaniam, tentavit classe expugnare Neapolim: sed resistentibus civibus, re infecta recessit. Invaluit autem proditio, cum barones, qui militare promiserant in exercitu Rainulphi, data pecunia ut auxilium promissum praestarent, cum copiis venire desisterint, quo factum est, ut cum non esset qui regi posset obistere, ipse Beneventum obtinuerit. Quo Anacletus quam citissime properavit, et regis nomine vendicavit. Factumque est ex iis, ut Rainulphus comes Rogerio cesserit, seque ei dederit juramento praestito, ne kaderetur: simulque accidit, ut absque obice idem Rogerius politus sit Capua et Aversa, sicque ad finem delabente hoc anno, redierit in Siciliam. Princeps autem Capuanus Robertus apud Innocentium papam, ad quem confugerat, usque in annum sequentem permansit, expectans si posset per Pontificem, Lotharium imperatorem impetrare Campaniae et Apuliae defensorem, quem tunc tam Innocentius papa, quam sanctus Bernardus, ad hoc litteris excitare non cessarunt. Miserunt autem Pisani in auxilium mille milites, qui recepti Neapoli, tutati sunt civitatem. Sequenti anno classe aggressi sunt Melitam nobilissimam civitatem, qua et politus sunt. Porro ista omnia pluribus narrat auctor Chronicorum Beneventanorum, qui se unum fuisse ex civilatis iudicibus asserit, Falconem nomine. Reliqua in sequentem annum.

12. *Obitus S. Norberti.* — Hoc pariter anno Ordinis Praemonstratensis, idemque archiepiscopus Magdeburgensis, quem diximus anno superiori venisse una cum aliis Germaniae episcopis Romam ad introducendum cum Lothario imperatore Innocentium papam in suam Sedem: ubi reversus est in suam Ecclesiam, mira sanctitate,

¹ Vit. S. Bern. l. II, c. 4. — ² Bern. in Cant. serm. xxiv. —

³ Pet. Cl. l. II, de Mirac. c. 1, usque ad c. 19. — ⁴ Ibid. l. IV, Ep. III.

¹ Jacob. IV, Psal. XXXVI.

sicut vixerat, diem clausit extremum. De eo enim hæc Hugo successor archiepiscopus in Vita ipsius ¹: « Cum autem ab Italia reversus esset in civitatem suam Parthenopolim, non diu post gravi aegritudine correptus est, eaque per aliquod tempus, id est, spatio quatuor mensium laboravit, episcopatuque sapienter et fideliter annis octo administrato, plenus Spiritu sancto, cum omni integritate sensus, adstantibus benedictione data, beato fine quievit. Neque enim, ut ait B. Augustinus, poterat male mori, qui bene vixerat. Annus erat Dominicæ Incarnationis millesimus centesimus

tricesimus quartus, feria quarta Pentecostes, octavo idus Junii, Pontif. Innocentii anno quinto, regni Lotharii anno nono ». Itæc de ejus transitu auctor. Porro laudatissimus sæculi hujus sanctitatis et eloquentiæ nomine vir fuit prædicatus a sancto Bernardo, Petro Cluniacensi ¹, et aliis hujus temporis scriptoribus ², cujus Ordinis propagines in Terram Sanctam usque uberi fœtu sunt hoc tempore translatae. Qui de viro sanctissimo plura cupit, eundem qui supra legat Hugonem. Itæc satis ad institutum.

¹ Pet. l. iv. Ep. iii. — ² Apud Sigib. Chr. 1131.

¹ Vita S. Norb. c. 50. apud Sur. tom. III, die vi Jun.

Anno periodi Græco-Romanæ 6627. — Anno Æræ Hispan. 1182. — Anno Hegiræ 529, inepto die 21 Octob., Fer. 1. — Jesu Christi 1131.

— Innocentii II pape 5. — Lotharii reg. 10. imp. 2. Joannis Comneni imp. 17.

1. *Epocha Concil. Pisani.* — A num. 1 ad 9. Nullus antiquorum quem viderim definivit tempus, quo Concilium generale Pisanum ab Innocentio II hoc anno congregatum fuit, præter auctorem anonymum, eumque antiquissimum Chronicorum Pisanorum, quæ Fiorentinus in Comment. de rebus ad comitissam Mathildem spectantibus lib. 2, pag. 347, asserit apud se Mss. esse. Ait enim in his legi: « A. D. mcxxxvi, (legendum mcxxxv, juxta Pisanos, qui .Eram vulgarem anno uno prævertunt; præsertim cum idem Fiorentinus asserat id colligi ex iis quæ sequentibus annis in iisdem Chronicis habentur) III kal. Junii, Pisis est celebratum generale Concilium per papam Innocentium et alios prelatos, in quo Concilio Ingilbertus de marchia Tusciæ investitus est, qui postea defensus a Pisanis, et a Lucensibus ubique offensus, et victus apud Ficecchium in campo Pisas cum lacrymis fugiens a Pisanis vindicatus est ». Fiorentinus nactus erat exemplar corruptum Chronicæ Pisani. Ughellus enim tom. iii Italiæ Sacræ col. 865. idem Chronicon Ms. ad Carolum Strozam Florentinum pertinens laudat; in quo discrete legitur: « A. D. mcxxxv, tertio kalend. Junii », etc. loco *alios prelatos*, legit *alios prelatos sæculi*. Loco *Ingilbertus*, legit *Ingilbertus*. Loco *defensus a Pisanis*, legit *defensus est a Pisanis*, et postea habet « et a Lucanis ubique offensus, et apud Ticecchium ab ipsis Lucanis anno sequenti devictus in campo et Pisanum fugiens, lacrymasque plures effundens a Pisanis vindicatus est ». Ingilbertus ilaque marchionatum

Tusciæ obtinere non potuit, cum Urspergensis ad annum mcxxxv de Henrico Baviaræ duce genero Lotharii imp. scribat: « Henricus per Tusciam exercitum duxit, quam et ab imperatore in beneficio obtinuit ». Baronius anno mcxxxiii, num. 3, refert Diploma Innocentii II quo concedit Lothario imp. *allodium comitisæ Mathildis*, et per eum Henrico Baviaræ duci genero ejus sub certis conditionibus, quia, ut exponit Fiorentinus, Mathildis allodium non solum locis frugiferis, sed etiam locis et arcibus munitis compositum erat.

2. *Causa ejus convocationis.* — Sed redeo ad Concilium Pisanum, quod *III kal. Junii* seu die xxx mensis Maii celebratum esse indicant littere canonizationis S. Hugonis episcopi Gratianopolitani, a Baronio num. 2 recitate, quæ dicuntur datæ *Pisis X kal. Maii*, die nempe xxii mensis Aprilis. Sanctorum enim canonizationes, vel in Conciliis generalibus, vel circa tempus quo ea celebrabantur, sæpe fiebant. Causam celebrati Concilii his verbis docet Bernardus abbas Bonævallensis in Vita S. Bernardi lib. 2, cap. 2: « Actiones Concilii longum est prosequi: summa tamen in excommunicatione Petri (scilicet Anacleti antipapæ), et irreversibili fautorum ejus dejectione constitit ». Ordericus vero lib. 13, pag. 900, licet in anno celebrati Concilii, et in expressione loci peccet, hic tamen audiendus: « Anno ab incarnat. Domini mcxxxv (loco mcxxxiv) Indict. xiii (pro xii), Innocentius papa maximam Synodum apud Picennum (loco *apud Pisas*) tenuit, et de utilitatibus Ecclesiasticis multum tractavit: sed infortuniis præpe-

dientibus omnia pro voto complere nequivit. Hugo Rothomagensis archiep. ipsum summopere adjuvit, et in eodem honoratus primatum super multos pontifices suscepit. Curis itaque Apostolicæ servitutis occupatus, curas proprii præsulatus aliquandiu intermisit, et diutius in Ausonie (id est, *Italia*) partibus demoratus, aliorum negotia solerter expedit, quod regi vehementer displicuit, sc. Henrico Angliæ regi, cui Normannia parebat. Fuit Hugo unus ex illustribus hujus sæculi præsulibus, qui scripsit *Opus de Officiis et ministris Ecclesie*, a Dacherio post Opera Guiberti de Novingento evulgatum, et alia quædam a San-Marthanis in archiep. Rothomagensibus memorata, qui tradunt eum pervenisse usque ad annum mclxiv. Porro Ordericus citatus pag. 908, loquens de rebus anno mxxxvi gestis, in errore perseverat, atque Henricum electum Cantuariensem archiep. legatos *Pice-nam ad Innocentium papam* misisse, cum *Pisas* dicere debuisset.

3. *Ludovicus Francorum rex de Concilio impediendo cogitavit.* — Inter Innocentium II et Ludovicum VI Francorum regem aliquod intercedebat dissidium; indeque sanctus Bernardus Epist. cclv ad Ludovicum regem dedit, monuitque, ne Concilium hoc tempore Ecclesiæ et regno tam necessarium, ipsiusque regis honori cessurum, impediret: « At calor, inquit, nimius est. Quasi nos glacialia corpora habeamus », inquit Bernardus. Quibus ex verbis intelligimus, verum esse quod dicitur in Chronicis Pisanis, Concilium III kal. Junii congregatum fuisse. Paulo post subdit Bernardus: « Tamen si quid ex Apostolicæ auctoritatis rigore processit unde se merito esse turbatam celsitudinis vestræ serenitas arbitretur; qualiter hoc ipsum revocetur, aut temperetur, prout oportet ad honorem vestrum, fideles vestri qui aderunt, totis viribus enitentur. Inter quos nos quoque, si quid possumus, non dissimulabimus ».

4. *In illo Henricus hereticus damnatus.* — In Concilio Pisano Henricus hereticus, qui jam a tempore Paschalis II Ecclesiam Gallicanam turbabat, uti anno mxxvi fuisse exposuimus, damnatus est, ut docent Acta episcoporum Cenomanensium a Mabillonio tom. iii Anal. recitata. Ibi enim pag. 341, postquam narratum fuit incendium, quo universa civitas Cenomanensis hoc anno conflavit, de quo infra, dicitur: « Eo tempore pseudoeremita, de quo scripsimus superius (et nos cum illo prænotato Christi anno) denuo in remotis partibus virus suæ hæresis cepit propagare, et Ecclesiam Dei nequitie suæ atramento corrumpere. Aurem suam tantum historiæ et litteræ Prophetarum accommodans, dogmatizabat perversum dogma; quod fidelis Christianus nec retractare debet, nec erudire. Sed misericordia Dei, qui semper respicit in orationem humilium, et non sprexit precem eorum, ille Henricus ab Aratensi (legendum *Arelatensi*) archiepiscopo captus est, et domino papæ Innocentio Pisis in authentico Con-

cilio præsentatus, ibique iterum convictus, et generaliter hereticus appellatus, ac postremum carcere mancipatur; cui postquam permissio concessa est abeundi ad aliam provinciam, nova secta, novo cursu, novum iter assumpsit delinquendi, quam protinus ita turbavit, quod minime Christiani Ecclesiarum adirent limina; sed divinum contemnentes mysterium, sacerdotibus oblationes, primitias, decimas, infirmorum visitationes, et solitam denegabant reverentiam ». De isto heretico rursus infra.

5. *Mediolanensis. monent S. Bernard. se Innocentium II pap. agnoscere.* — Quia Innocentius II sanctum Bernardum ad Concilium vocavit, Mediolanenses, qui Anaclethum sequebantur, ad hunc sanctum in Longobardiam venientem legatos mittere, qui eum certiores facerent, se Innocentium II verum Pontificem agnoscere, ac rogarent ut eorum pacificationi incumberet, sicut videre est apud Baronium, num. 5, ubi divi Bernardi Epist. cxxxii ad Clerum, et Epistola cxxxiii ad Mediolanenses datas recitat. In Epistola cxxxii ait: « Benedicti vos a Domino, quorum studio et industria civitas vestra liberata est ab errore, et relicto schismate ad Catholicam rediit unitatem »; in Epistola vero cxxxiii: « Amplector oblatam gratiam, et obvis manibus gloriøsæ civitatis devotionem devotus accipio: præsertim hoc tempore, quo abjecto errore schismaticorum ad sinum matris Ecclesiæ cum gaudio totius orbis reversa est ». Denique Bernardus in Epistola cxxxiv nomina legatorum ad se missorum his verbis designat: « Et ego, fratres, tanta letitia provocatus, sed et vocatus a vobis per charissimos fratres Ottonem et Ambrosium, quos ad hoc ipsum direxistis, decreveram simul cum ipsis venire ad vos ».

6. *Depositiio archiepiscopi Mediolanensis firmatur, et Couradi coronatio abrogatur.* — Landulphus Junior cap. 41, apud Puricellum in Monument. Basilicæ Ambrosianæ, numero 360, mentionem facit reconciliationis Mediolanensium cum Innocentio II, atque: « Innocentius papa Pisis Synodum celebravit, in qua, Robaldo episcopo (Albensi) representante, Thealdus de Landriano archiepiscopus Ecclesiæ Mediolanensis (videtur is successor Stephani de Guandea, qui anno superiori Anselmum archiepiscopum Mediolanensem valde vexavit, ut ibidem diximus) Anizo della Sala archidiaconus, Anselmus de Rhode levita, et alii plures ejusdem Ecclesiæ ordinarii, et cum primicerio Decumani sacerdote, contra solitum decus Mediolani et ejus Ecclesiæ Innocentio papæ fidelitatem juraverunt (Mediolanenses enim, qui hactenus antiquam libertatem retinebant, juramentum fidelitatis a Gregorio VII decretum, quod hodie a præsulibus exigitur, decore Ecclesiæ suæ adversari sibi persuadebant). Cremonenses vero propter hanc fidelitatem, nequaquam milites Mediolanenses, quos captos habebant, dimiserunt. Sed papa Innocentius depositionem et expulsionem sæpe dicti

Anselmi de Pusterla (ab episcopatu Mediolanensi) firmavit. Attamen prenominati, qui fidelitatem juraverant, timentes hos casus urbis et Ecclesiae Mediolanensis, differebant redire Mediolanum, nisi haberent protectorem, qui coram populo Mediolanensi confirmaret Anselmi expulsionem, et ad nihilum reduceret Conradi coronationem (anno mxcviii factam) et populum tante urbis convocaret, et confirmaret ad Lotharii imperatoris amorem, et ad ipsius Innocentii unitatem. Ad hæc peragenda papa a Deo idoneum Angelum habuit, sicut Bernardus abbas Clarevallensis fuit.

7. *Gofridus Carnotens, episcopus cum S. Bernardo Mediolanum legatur.* — « Interea princeps Conradus altiori consilio politus, imperatoris Lotharii vexillifer est factus : et prenominate abbas iste (sanctus Bernardus) nihil moratus cum Carnotensi episcopo (Gofrido de Lieues appellato), et Robaldo Albensi (in Monte-Ferrato) Mediolanum intravit : quam civitatem nimirum, prout voluit, firmavit. Ad utrum quidem hujus abbatis omnia ornamenta Ecclesiastica, quæ auro et argento, palisque in Ecclesia ipsius civitatis videbantur, quasi ab ipso abbate despecti, in scriniis reclusa sunt : et non solum masculi, sed etiam mulieres tonsæ sunt : et cilicis et lanis vilissimis induti ad quilibet religiosa convertuntur. Aqua in vinum mutatur, demones fugantur, contracti eriguntur, etiam quacumque infirmitate infirmi similiter sanantur : et quoscumque captivos infirmos Mediolanenses habebant de inimicis suis in custodia abbas ipse solvit, et liberos dimisit : et tantum populum ad amorem imperatoris Lotharii, atque ad obedientiam Innocentii pape per sacramentum pacis, quod abbas porrexit, confirmavit ».

8. *S. Bernardus oblatum sibi archiepiscopatum Mediolanensem recusat.* — Landulphus Junior ibidem apud Puricellum num. 368 refert electionem *S. Bernardi* in archiepiscopum Mediolanensem : « Tandem idem populus, ut haberet abbatem illum in archiepiscopum, ad Ecclesiam S. Laurentii in qua erat hospitatus, cum hymnis et laudibus, et solito suo Kyrie eleison concurrat. Quod abbas ille non tulit, sed ait : Ego in crastinum ascendam palafredum meum, et si me extra vos portaverit, non ero vobis quod petitis ; ac sic Mediolano recessit ». Ad quæ verba Puricellus ait : « Quo quidem responso sanctus abbas Papiam et ipse Ticinumque tendere hinc cupiens, nobis ad illud non obscure videtur allusisse, quod S. Ambrosio contigerat, cum regimen Ecclesie Mediolanensis sibi oblatum recusans, ab ipsa etiam urbe tandem aufugit : egressusque noctis medio civitatem (ut refert Paulinus in ejus Vita) cum Ticinum se pergere putaret ; mane ad portam civitatis Mediolanensis, quæ Romana dicitur, invenitur ». Ita Puricellus. Landulphus Junior, qui Mediolani erat, invicte refellit Sigonium lib. 19 de Reg. Ital. ubi ait, anno mxxiii, Mediolanensi antistite mortuo, eam dignitatem ad sanctum Bernardum delatam

esse ; eo vero repudiante, ad Anselmum de Pusterla. Puricellus in Monum. Basilicæ Ambrosianæ num. 329, Georgium Merulam lib. 3 de antiquitatibus vicecomitum Mediolanensium, Corium in Historia Mediolanensi, et Tristanum Calchum fuscè confutat, qui volunt sanctum Bernardum abbatem anno mxcix Mediolanum venisse ; sed hæc apud eum legenda, præsertim cum seipsis corrunt.

9. *Legatus ad Cremonenses et Papienses pacificandos.* — Mediolano sanctus Bernardus Papiam indeque Cremonam se confulit Innocentii II jussu, ad ipsas civitates inter se pacificandas ; sed a Cremonensibus nihil obtinere potuit, ut produnt Sigonius lib. 11 de Reg. Ital. et Ludovicus Cavellius in Annal. Cremonensibus. Ipsemet S. Bernardus in Epistola cccxvii ad Innocentium II data, quæ in editione Mabilloniana est cccxiv idipsum testatur : « Quod tantis Dei miserationibus, tantis vestris vestrorumque laboribus in populo isto noviter ædificatum est, heu ! quam leviter destrui potest » ; ubi intelligit Guidonem Pisanum ac Mattheum Albanensem, qui ad Mediolanenses ab Innocentio legati sunt cum Bernardo, ex hujus Epist. cxxxi, a Baronio num. 9 recitata, qui num. 6 de utroque legato loquitur. Divus Bernardus, ut habet Bernardus abbas Bonevallis in ejus Vita lib. 2, cap. 4, secundo Mediolanum eodem anno rediit, et ad Richizam imperatricem Lotharii imp. conjugem Epistolam cxxxvii dedit, camque rogavit, ut bene haberet Mediolanenses, sicut ex eadem Epistola Baronius num. 8 observat : « Non ante sanc Mediolanenses », inquit Bernardus, « in gratiam domini papæ et Ecclesie unitatem recepti sunt, quousque palam Conrado refutato et abnegato, dominum nostrum Lotharium in suum regem et dominum receperunt ».

10. *Cistercienses Mediolanum introduxit.* — Baronius num. 3 ait jam Mediolani religionem Cisterciensem fœtu secundo propagatam fuisse, et ad illam coalescere incipientem S. Bernardum dedisse Epistolam cxxxiv, ejus titulus : « Clarissimis fratribus de Mediolano, nuper conversis ad Deum ». Quibus ex verbis Baronius deduxit, jam ante Bernardi adventum fuisse Mediolani aliquod Cisterciensis familie monasterium, cui se novitii isti mancassent. Verum Mabillonius in Nota ad illam Epistolam observat ex Ughello tom. iv Italie Sacre primum Cisterciensium in illa urbe cœnobium esse *Caravallum*, quam secundo ab urbe lapide non ante annum mxcxv conditum probat Ughellus, proindeque hac in Epistola *novitiorum* nomine intelligendos esse eos, qui Bernardi opera ad Pisanum Concilium pergentes, recens conversi, ejus se magisterio ex animo jam devovissent. Hæc epocha de conditu monasterii deducitur ex veteri Inscriptione, et ex primis monasterii instrumentis, in quibus constanter *Caravallis*, non *Clara-vallis* appellatur. Quod vero jam Cisterciensis familia Mediolani plantata fuisset, ppi illi viri anticipato *novitiorum* nomine appellati, quia anticipata fuit

illorum obedientia; alioquin neque consilium, nec auxilium a Bernardo pelerent, exequendo proposito concepto, uti recte scribit Manricus tom. I Anal. Cisterciens. ad annum mcccxiv, cap. 1.

11. *Robaldus eligitur archiep. Mediolan.* — Divus Bernardus in Galliam rediens quosdam ex discipulis suis Mediolani reliquit, uti refert Landulphus Junior cap. 42, apud Puricellum citatum num. 373 : « Sed quidam de discipulis ejus qui remanserunt, per civitatem euntes collectam multam de auro et argento, et rebus multis sibi fecerunt et faciunt ». Subdit Mediolanenses, post repulsam divi Bernardi, de novo archiepiscopo eligendo cogitasse : « Mediolanenses vero ordinarii qui papæ Innocentio fidelitatem juraverant, confortati de hac Mediolanensium conversione, fecerunt Liti-fredum Novariensem, Vidonem Iporediensem, et alios suffraganeos venire Mediolanum : qui in consilio suo sublimaverunt Robaldum Albensem episcopum in Mediolanensem archiepiscopum, habita securitate retinendi, prout dicitur, Albensem episcopatum. Isto sublimato, Mediolanum super Cremonenses exercitum suum admovit. De quo exercitu ipsi Cremonenses apprehenderunt cxxx milites in nocte errantes. Anselmus autem de Pusterla (depositus ab archiepiscopatu Mediolanensi) audiens et intelligens horum militum captionem, nullam suscepit consolationem contra Robaldi sublimationem : neque secundum consilium Alberti de Landriano et amicorum ejus ambulavit ; sed credulus Hugoni suo Naso voluit cognoscere qualiter cum Anacleto papa Romanorum posset procedere. Attamen ipse cum isto suo capellano ambulans Romam in flumine Padi juxta Ferrariam a Goyso de Martinengo captus est, et ad Innocentium papam transmissus. Qui papa in mense Augusti a Pisis illum captum Romam misit : ibique (prout fama est) Anselmus ille in eodem mense, in manu Petri Labri, qui procurator est Innocentii, vitam finivit ».

12. *Obitus Anselmi archiep. Mediolan.* — Anselmus ilaque de Pusterla archiep. Mediolanensis mense Augusto currentis anni vivere desiit, et dubitandum non videtur, quin eum præteritæ vitæ poenituerit, cum in Ecclesia Sancti Joannis Lateranensis, juxta Catalogum episcoporum Mediolanensium a Mabillonio et Papebrocio editum, aliosque antiquissimos ac juxta auctores Mediolanenses sepultus fuerit. Archiepiscopatum Mediolanensem adeptus erat ætate anni mccxxi, ante primum diem mensis Septembris, ut suo loco monstravimus; anno vero superiori, non vero currenti, ut perperam creditur Puricellus, dignitate motus est. Fundatur Puricellus in eo quod Robaldus episcopus Albensis et legati Ecclesiæ Mediolanensis hoc anno ad Concilium Pisanum venire, et ejus depositionis confirmationem ab Innocentio II obtinere. Verum hæc Landulphi Junioris verba anno superiori num. 48 a nobis relata, sit remotus a nobis, et ista, quasi a cuncto clero et populo ab-

jectus et expulsus ad solita castella archiepiscopatus exiit, necessariam inter se connexionem habent et separari non possunt, ideoque loquitur Landulphus de re quæ eodem tempore, anno sc. antecedenti, contigerit; præterquam quod Landulphus statim subdit, *in quibus* (nempe castellis) *qualemcumque requiem suscepit*, et tamen a mense Julio currentis anni ex illis exiit. Quare anno superiori et sede et urbe Mediolanensi expulsus fuit. In laudato quidem Catalogo a Mabillonio et Papebrocio edito legitur : « Ab electione domini Anselmi de Pusterla, usque ad electionem domini Ribaldi, qui tunc erat Albensis episcopus, sunt anni ix et dies xxix ». Quo pacto Robaldus seu Ribaldus anno mcccxxi archiepiscopus Mediolanensis electus esset. Verum recenti manu illic substitutum est, ut testantur idem Mabillonius et Papebrocius, « Anselmus de Pusterla sedit annos x, mensem i, dies xiv, ob. XIX kal. Octob. » ideoque anno mcccxxiii dignitate motus est, non vero hoc anno, aut anno mcccxxii, ut arbitratur Papebrocius. Sed vel Anselmus mortuus non est mense Septembris, in quo solum numerantur dies xviii ante kalendas, non autem dies xix, vel Landulphus quando scribit, eum mense Augusto demortuum fama deceptus fuit; ait enim, *prout fama est*.

13. *Ab hoc anno removeri non potest.* — Nilominus Puricellus observat, duos antiquissimos Catalogos, alterum archipresbyteri metropolitani, alterumque secretarii civitatis Mediolanensis, et historicos omnes inter se convenire, *Anselmum* hoc anno, die xiv mensis Augusti, vitam cum morte commutasse, ideoque in Catalogum a Mabillonio editum, in quo legitur, eum obiisse *XIX kalend. Octob.* error irrepsit, vel ab excerptoribus, vel a typographis admissus. In eodem Catalogo a Mabillonio publicato deprehenduntur aliquot excerptorum errores, uti quando dicitur, *Robaldum* sedisse annis x, mensibus iv, et dies xxvi; obiisse autem V kal. Januarii, anno scilicet mcccxiv, alioquin die tantum tertia Augusti currentis anni electus fuisset archiepiscopus, quod ut dicamus, Landulphi narratio non patitur. Qui error a Papebrocio observatur. Eadem Landulphi narratio refellit Joannem Franciscum Besutium in Hist. Pontif. Mediolanensium, ubi contendit, *Anselmum* poenitentiam egisse, schisma coram Innocentio II ejurasse, et ab eo absolutionem accepisse. Sed contrarium ex dictis sequitur, et mortuum esse in carcere, et apud summi Pontificis procuratorem.

14. *S. Bernardus fundat tertium Ordinem Humiliatorum.* — Quo tempore Bernardus Mediolani versabatur, tertio Ordini *Humiliatorum* regulam dedit. Ii quidem jam ab anno mcccix juxta Tristandum Chalcum huic Ordini initia dederant, sed ante divum Bernardum religiosi non erant. Puricellus citatus num. 375 asserit eos vocatos fuisse *fratres de Convento*, quod et Chalcus etiam in litteras misit, additque Puricellus : « Ejusmodi Ordo fratrum de Convento in hanc urbem usque diem ap-

pellatur, quive in suo ipsius stemmate tutelarem gestat hunc sanctum abbatem». Subdit Puricellus in Bibliotheca Basilicæ Mediolanensis asservari Codicem Ms. continentem Humiliatorum Privilegia, cujus initio habetur: « S. Bernardus venit Mediolanum, et ibi multis miraculis claruit, et monasterium construxit (Claram-Vallem nempe, anno mcccxxv, opera discipulorum, quos Mediolani reliquerat). A quo (nempe Bernardo) quidam magnates et nobiles cives Mediolani divino spiritu incubiali, formam vivendi in habitu religioso cum suis familiis habitando (hoc tunc illorum institutum fuit) sumpserunt. Fuit ergo S. Bernardus Ordinis hujus primus fundator. Unde fratres tertii Ordinis hujus vocantur hodie alicubi *fratres Sancti-Bernardi*. Manserunt autem sic fratres Ordinis hujus per se in habitu Religioso per annos lrv, priusquam concessa eis esset regula ab Ecclesia Romana. Anno autem mcccxcx, penultimo die Maii, data fuit eis regula a domino papa Innocentio III. Quare sciendum est, quod fratres tertii Ordinis hujus fuerunt fundatores primi et secundi Ordinis Humiliatorum ».

15. *Antea Humiliati, nec regulam nec habitum religiosum habebant.* — Galvaneus Flamma cap. 255 magnæ suæ Chronicæ apud Puricellum laudatum, numer. 375 scribit: « Nobilis vir Guido et capitaneus portæ Orientalis fuit specialis adjutor B. Bernardi in fundando monasterio de Charavalle juxta Mediolanum, de divitiis ejus, anno Domini mcccxxv. etc. Et iste Guido tertium Ordinem fratrum de Conventio S. Bernardi in porta Orientali construxit in die S. Vincentii: quem Innocentius III confirmavit, et ab Innocentio III dictus est Ordo tertius. Isti fratres de Conventio fundaverunt Ordinem fratrum Humiliatorum, et ipsum visitabant ». Quod idem Galvaneus, qui sæculo xiv vixit, confirmat in libro cui titulus, *Manipulus florum* cap. 171, apud Puricellum ibidem. Licet autem S. Bernardus et Guido fundatores sint Humiliatorum, qui ante utrumque nec regulam nec habitum religiosum habebant, hæc tamen societas jam ante inceperat, uti Puricellus probat testimonio S. Antonii part. 2 Chron. tit. 15, cap. 23. Raphael Volaterrano lib. 21, Tristano Chalco et aliis. Fallitur itaque Sigonius, qui hujus Ordinis initium cum anno mxxvi illigat, ut videre est in Hist. ejus de Reg. Ital. ad an. mxxvi.

16. *Robaldus electus Mediolanensis pallium noluit recipere.* — Ad num. 9. Robaldus episcopus Aulensis, cupiens ex illo episcopatu ad Mediolanensem archiepiscopatum transferri, et tamen primum episcopatum non dimittere, Innocentium II Pisis convenit, apud quem sacramentum præstitit contra usum Ecclesiæ Mediolanensis, ut refert Landolphus Junior, cap. 43, apud Puricellum citatum, num. 366: « Instantibus igitur iis infortunatis (Mediolanensibus enim bellum adversus Cremonenses infauste præcedebat), et Anselmo, prout dictum est, mortuo, (mense Augusto hujus anni)

Robaldus ejusdem civitatis archiepiscopus Pisis Innocentio papæ juravit, et jurando libertatem Ecclesiæ Mediolanensis (quam illa scilicet præferebat) in contrarium convertit ». Restabat præcipua controversia, quæ circa pallium versabatur. Robaldus Anselmo decessori suo auctor fuerat, ut huic novæ legi sese nunquam submitteret, et de semetipso loquens dicebat, « quod prius sustinuerat nasum suum scindi usque ad oculos », quam novam illam servitutem subire. Quare Puricellus negat Robaldum a priori proposito descivisse, affirmatque hunc præsulem eam ob rem simultatem cum Innocentio II suscepisse. Sine pallio itaque recessit, ostendens in se præstitum non esse, quod sibi debitum credebatur; quod Innocentius II valde exulceravit; parum enim absuit, quin quæ sanctus Bernardus ad Mediolanensium schisma dissipandum tantis laboribus egerat, pessimo exitu clauderentur, et quin Robaldus, qui populi indignationem metuebat, eum rursus commoverit.

17. *Eum excusat S. Bernardus.* — Sanctus itaque abbas, apud quem Innocentius II de Robaldi cunctatione questus erat, tam ad Pontificem placandum, quam ad populum ad constantiam retinendam incitandum, scripsit ad Innocentium II Epist. cccxv, quæ alias erat cccxvii cujus Baronius mentionem non facit. In ea Bernardus Robaldum excusat, et culpam omnem in Mediolanenses rejicit: « O infelicem illum episcopum, qui in Hur Chaldæorum, de quodam quasi paradiso translatus, frater factus est draconum, et socius struthionum. Quid faciet? Obedire vult, et ecce bestię Ephesi frendent in eum dentibus. Dissimulare vult prudenter pro tempore, et omni feritate formidolosam vestram indignationem incurrit. Augustię sunt ei undique, nisi quod tolerabilius judiciali sibi esse sine populo, quam sine domino: pluris habens, ut dignum est, Apostolicam gratiam, quam Mediolanensem cathedram, etc. Parce, pater benigne, parce fideli tuo, etc. parce denique populo acquisitionis tuæ, etc. » Ait postea Christum, Lucæ cap. 13, per tres annos spectasse, ut ficulnea fructum ferret, antequam ei malediceret. « Tu vero », subdit Bernardus, « vix tres expectasti menses, et jam securim paras ». Robaldus mense Augusto post Anselmi decessoris sui mortem Mediolanum rediit, ideoque hæc Epistola post medium circiter mensem Decembrem data, post tertium nempe a discessu Robaldi mense. In suis litteris optat S. Bernardus, ut per hunc annum Innocentius II iram suam inhibeat: « Dimitte et hoc anno, si quo modo forte circumfossa humo ligone penitentię, sterilitati Mediolanensi hic, cui eam credidisti, consulere, et fructum elicere queat ».

18. *Mortatur Mediolan. ad constantiam.* — Ad hæc verba Puricellus ait: « Quibus quidem postrennis verbis S. Bernardus Innocentio suavis videtur, ut exitum potius expectaret opere, quam Robaldus impenderat: cui utique non tantum

crediderat juranti sibi fidelitatem; sed ipsum etiam regimen Ecclesie Mediolanensis crediderat». Ita Puricellus. Postquam sanctus Bernardus responsum ab Innocentio II accepit, dedit ad Mediolanenses Epistolam cxxxi, a Baronio hic relata, verum non hoc anno, ut autumabat card. doctissimus, sed sequentis initio, sicut vidit Puricellus citatus num. 380. Ea enim tunc data cum Mediolanenses Innocentio reconciliati, in officio et obedientia titubare videbantur, quos ideo Bernardus ad retinendam constantiam incitat, et recentia Romanæ Ecclesie erga illos beneficia memorat: « Si postulastis, inquit, confirmari quod unanimitas vestra de venerabilis patris vestri (nempe Robaldi) electione firmaverat, factum est. Si voluistis licuisse vobis quod illicitum nisi pro magna quidem necessitate sacri canones judicant, translationem episcopi in archiepiscopum (translationem nempe Robaldi episcopi Albensis ad Ecclesiam Mediolanensem), concessum est », et cetera apud Baronium legenda, ex quibus facile intelligetur, hanc Epistolam ad annum sequentem referendam, quo et eam Mabillonius in margine consignavit.

19. *Secunda Lotharii imp. coronatio fictitia.* — Puricellus in Monument. Basilic. Ambrosianæ, num. 382, vult, *Lotharium* imperatorem Mediolani et Modocetie a *Robaldo archiepiscopo* coronatum fuisse; « tametsi e manu Pontificis Innocentii diadema imperatorum in urbe Roma ante jam suscepisset », quia inquit, post ejus coronationem Romæ factam Mediolanenses *Lotharium* nondum imperatorem agnoscebant, et scriptores ac historici Mediolanenses unanimi consensu tradunt, eum Modocetie et Mediolani ab Anselmo archiepiscopo Robaldi decessore coronatum esse, quod quidem ipsemet Puricellus falsum et absurdum reputat, sed coronationem vere factam, et quidem a Robaldo, contendit. At Landulphus Junior, qui adhuc in vivis erat, et ultimam manum Operi suo adhibebat eo tempore, quo *Lotharius* in Italia versabatur; inter tot circumstantias a se de protectione Italica hujus imperatoris notatas, istam adeo singularem non pretermisisset. Ad hæc veteres et recentiores Rerum Italicarum scriptores coronationem hanc a Robaldo peractam tacent, ideoque idem de hac coronatione iudicium ferendum, ac de Conradi coronatione, quam commentitium esse suo loco ostendemus. Utraque enim a solis scriptoribus Mediolanensibus memorata.

20. *Tres protectiones Italice S. Bernardi distinguende.* — Ad num. 10. Divum Bernardum ter in Italiam profectum esse, non vero tantum hoc anno, annoque mcxxxvii, ut putavit Baronius, ipsemet Bernardus testatur in Epist. cxliv ad suos Clarevallenses data, quando tertio illic versabatur: « Ecce hoc tertio, nisi fallor, avulsa sunt a me viscera mea, etc. Bonum mihi, domine, magis mori quam vivere est, non tamen nisi inter fratres, inter domesticos, inter charissimos ». Quare

hoc anno, non primum, sed iterum illam peregrinationem suscepit, annoque superiori jam illuc profectus fuerat, quod liquet ex Epistola cli ad Philippum Turonensis Ecclesie invasorem scripta: « Sumus, inquit, Viterbii, et te morari in Urbe adivimus ». Mortuo enim Ildeberlo Turonensi archiepiscopo anno mcxxxi, Philippus, Gisleberti ejus decessoris nepos, sedem favente Anacleto invasit, eaque occasione eas litteras Bernardus ad eum dedit, animi sui dolorem ei significans propter præsulatum illum modis indebitis quasitum. Ex quibus et intelligimus, Hugonem, qui postea a saiori parte clericorum canonice electus fuit, anno mcxxxii nondum pacificam possessionem ejusdem dignitatis iniisse. Denique eodem anno divus Bernardus Epistolam cxxxviii ad Henricum regem Angliæ dedit, in qua ait: « In ingressu Urbis sumus, salus est in januis, justitia nobiscum est: sed Romanis militibus cibus iste non sapit. Itaque justitia placamus Deum, militia terremus hostes », quia Bernardus illuc profectus est cum Lothario imp. Nec refert quod in ejusdem imperatoris Epistola encyclica anno antecedenti a nobis recitata nomen Bernardi non memoretur, licet aliqui episcopi et abbates in eadem nominentur; nam in curia imperatorum et regum episcopi et abbates præsentibus non subscribebant omnes Diplomatis, ideoque nec omnes in iis memorabantur. Quare Marculus in Annal. Cisterc. triplicem ejus protectionem Italicam recte distinxit. Baronius ait, primum hoc anno, cum Pisas ad Concilium venit, primum etiam in Italiam venisse, et secundo paulo post eodem anno juxta Ernaldum in ejus Vita lib. 2, cap. 4, in qua ait: « Cum secundo per Mediolanum eodem anno pater sanctus transiret ». Et tertio, anno mcxxxvii. Verum cum hoc anno Bernardus Mediolano redux in Italiam non redierit, non potest dici eum hoc anno bis in Italiam profectum esse. Denique eum anno superiori in Italiam profectum jamdiu viderunt Pseudo-Robertus de Monte in Chron. et Trithemius in chron. Hirsau. neque hoc in dubium revocandum. Tertia protectio Italica divi Bernardi non anno mcxxxvii, sed anno mcxxxvi contigit, ut infra demonstrabimus. Observandum etiam, Baronium an. mcxxxvii, num. 4, laudatum divi Bernardi Epistolam ad Philippum ad eam Christi annum male revocare; eum, ut mox vidimus, anno mcxxxviii data fuisse.

21. *Princeps Capuanus auxilium a Pisanis et Genuensibus impetrat.* — Ad num. 11. Robertus Capue princeps, qui anno superiori cum Pisanis et Genuensibus, ut auxilium ab eis impetraret, egerat, currenti in Apuliam rediit, ut scribit Falco pag. 288: « Cum consulibus et sapientibus viris civitatis satis abundeque tractavit, ut auxilium navalis exercitus ei largirentur, qui tamen sine populo Januensi hoc promittere noluerunt. Tandem definito consilio (ab anno nempe antecedenti) sacramentis intervenientibus pactum stabilivere, ut circa mensem Martium futurum (hujus nempe

anni) cum centum navigiis paratis armatorum super nefandum regem Rogerium festinent ». Utraque respublica promissis sletit ; ut enim inquit Falco, « anno mcccxxiv, mense Martio, Indict. xii, hoc anno præfatus princeps Robertus cum duobus consulibus Pisanorum, Alzopardo videlicet et Cane, viris sapientibus, et cum aliis fere mille Pisanis ad principatum suum Capuanum revertitur IV kalend. Martii (sed exscriptor hic manifeste peccavit; Falco enim affirmat principem et Pisanos adventasse mense Martio, idque currenti anno, quem a kalendis Martii aspicitur, et tamen dies iv kal. Martii pertinet ad mensem Februarium, ideoque loco *IV kalend.* legendum *IV nonas*, aut *IV idus*, quod postremum probabilius videtur. Similis error sæpe a librariis admissus). Qui diligenter a magistro militum Neapolis et Rainulpho comite susceptus, omnia quæ cum Pisanis et Januensibus firmaverat, coram papa Innocentio prædicta patefacit, et qualiter tria millia librarum argenti Pisanis in auxilium suum venientibus, sacramento mediante, dare debeat.

22. *Rogerus rex Neapolim debellare tentat.* — « Prædictus autem magister militum, et comes Rainulphus hæc audientes gaudio magno gavisus sunt, factisque omnibus a principe recitatam fidem attribuerunt. Nec mora, per Ecclesiam Neapolitanæ civitatis et Capuanæ discursus est, et pecuniam illam argenti cursu celeri congregare. Quid plura ? Thesaurum ipsum argenti ad Pisanos transmiserunt, rogantes, ut cum festinatione ad eorum auxilium subvenirent : in quorum comitatu Gregorius Beneventanum electum cum quibusdam sacerdotibus suis mandaverunt, quatenus afflictionem Beneventanæ civitatis domino papæ, qui illic aderat, et Pisanis intimaret. Quibus ita peractis, rex Rogerius memoratus, navigiis galearum fere sexaginta paratis, Salernum pervenit. Continuo galeas illas ad civitatem Neapolitanam debellandam mandavit, et eis applicantibus usque ad portum Neapolis expugnatum est. Cives Neapolitani armis acceptis, viriliter galeas illas pepulerunt, deinde castella Neapolitanorum ibi contigua deprædati sunt, sicque ad regem remeaverunt ».

23. *Capuæ princeps se ei submittit.* — Referunt postea Falco et Alexander abbas eodem fere modo, Rogerium regem, cum fortiter irruisset in ditiones principis Capuæ et Rainulphi comitis, occupasse. Noceram, Sarunum et pleraque eorum oppida, adeo ut Capuæ princeps « Neapolim properans, Pisas transfretaret », inquit Falco Alexander vero : « Cernens (nempe princeps) Pisanorum auxilium, quod sibi sperabat cito adesse, diu differri, iterum puppim ingressus, Pisam festinus rediit, eos ad præsidium sui quantocius secum minaturus (id est, adducturus) quos jam multarum millium marcarum argenti emolumentum, quas illis promiserat, sibi acceverat ». Cum barones et vasalli Rainulphi Rogerii regis partes amplecterentur, « comes Rainulphus », inquit Falco, « baro-

num suorum nequitiam comprehendens, et quia tanto regi obistere non poterat, sacramento interveniente, sub regis potestate colla submisit ».

24. *Beneventum Rogerius rex occupat.* — Baronius ait, *Beneventi* expugnationem a Rogerio factam, Rainulphum, ut se dederet, coegisse. Verum contra tractatus Rainulphi cum Rogerio rege Beneventanos ad desperationem adduxit : « Audiens autem », ait Falco, « Ropollo Beneventanus comestabulus comitem illum Rainulphum ad regis imperium pervenisse, animo consternatus, die kalendatum Iulii de civitate Beneventana exiens, Neapolim ingressus est, quem comestabulum mille et eo amplius Beneventanorum secuti sunt. Triduo autem post, comestabulus ipse Ropollo timore percussus, navigio parato, ne in manus regis traderetur, cum quibusdam fidelibus suis, et duobus filiis festinavit, et eis navigantibus, iudicio Dei superveniente, navis illa confringitur ; et sic ipse cum uno filio suo, et duobus fidelibus suis, inter procillas maris mortui sunt : alter vero filius evasit ». Nec dissimilia Alexander scribit : « Veniens ad eum (nempe Rainulphus ad Rogerium) genibus flexis pedes ejus osculari voluit ; quem cum ille propriis manibus ab osculatione pedum sublevasset, orisque sui osculo vellet suscipere, comes prius precatur, ut ex corde indignationem funditus abjiceret. Cui rex : Ex corde, inquit abjicio. Et ille : Volo iterum, ut sicut deinceps tibi famulatus fuero, ita me diligas. Cui ille : Et ego concedo. Iterum ait : Istorum sponsonum, quas alternatim fecimus, volo ut testis sit Deus inter me et inter te. At ille : Ita, inquit, fiat. Quibus dictis, rex eum statim osculo suscepit, dique in amplexu ipsius delectari visus est ; ita ut ex oculis quorundam circumstantium ut præ gaudio lacrymæ effundi viderentur. Principem vero (nempe Capuanum) in sua pace hoc tenore suscipiendum pepigit (sc. Rogerius) ut videlicet, ut si ad diem mensis Augusti (pax hæc Rainulphi exeunte Junio constituta) reditum faceret, suo non privaretur honore. Si tamen juxta quod in capitulari scripto statutum erat, subditus vellet parere, relictis siquidem sub proprio dominio quæcumque vi guerre obtinisset. Si autem ei forte animus redeundi deesset, ejus filio parvulo, nomine Roberto, principatum concederet, eo tamen interposito pacto, ut ipse ejus tandem regimen teneret, quousque legitimam ipse consecutus ætatem exercere militiam posset. Quod si et ipse præfatum absentatione sui, terminum præteriret, rex deinceps principatu Capuano, civitatumque herorum hominibus inculpabiliter sub proprio potiretur dominio ».

25. *Capuanæ atque oppidi sibi subjicit.* — Pergit Falco : « Cum ergo civitatem ipsam (nempe Capuanam) jam sibi subditam rex introiturus esset, a præordinata clericorum, totiusque populi processione, honorifice, prout decebat, suscipitur, atque ad archiepiscopium usque cum hymnis et laudi-

bus perducitur ». Postea Rogerius rex Sergium magistrum militiæ Neapolitanæ sibi subiecit ; « qui genibus flexis, manusque suas manibus immittens, suum ei hominum subdidit, fidelitatemque juravit », initio scilicet Julii currentis anni. Anonymus Casinensis a Caraciolo editus pleraque ex his confirmat, additque Rogerium cum principatu Rainulpho reddidisse *comitissam*, sororem nempe suam et Rainulphi uxorem. Asserit Falco regem, captis Capua, Aversa, et toto principatu, Salerno adisse, et Alexander absolvit secundum suum librum expugnatione Beneventi a Rogerio rege facta : « Ibi extra urbem defixis tentoriis, cives ejus fideles juramento, salva Apostolici fidelitate, instituit ». Baronius refert ex Falcone Analectum Rogerii regis nomine Beneventum occupasse. Sed hic historicus hoc non asserit, et nonnisi post discessum Rogerii, qui, ut prodit Falco, circa finem anni in Siciliam repeditavit, Beneventum profectus non est : « Pontifex autem », inquit Falco, « sub Analecti nomine coloratus, cursu rapido (post discessum regis) Beneventum venit, et civitatem illam ipsius regis virtute suæ obtinuit voluntati, et domos quorundam Beneventanorum destrui præcepit ». Certe an. mccccvi Beneventi existens Analectus locum Paradisum dictum Ecclesiæ Beneventanæ et Roscemanno archiepiscopo a se creato dedit, ut docet Diploma ab Ughello tom. viii Ital. Sacræ citatum, datum « Beneventi per manum Matthæi S. R. E. presb. card. et cancell., XII kalend. Novemb. Indict. xv, anno Dom. Inc. mccccvi, Pontificatus autem domini Analecti II PP. septimo ».

26. *Obitus S. Norberti archiep. Magdebur.* — Ad num. 12. *Sanctus Norbertus* Ordinis Præmonstratensis fundator, et archiepiscopus Magdeburgensis hoc anno, *octavo idus Junii* beato fine quievit, ut narrat Baronius ex Hugone in Vita ejus, a Sario ad diem vi Junii recitata ; et de hac epocha inter omnes convenit. Cum vero chronographus Magdeburgensis apud Meibomium scribat, eum *post annos vii et menses x, et dies xx* defunctum, manifestum est fuisse Magdeburgi intronizatum die xviii mensis Julii anno mccccvi, perperamque Baronium intronizationem ejus usque in annum mccccvii distulisse.

27. *Obsidio Fragæ ab Alfonso Aragonie continuata.* — Cum anno superiori Alfonsus VI Aragoniæ et Navarræ rex Fragam annua obsidione circumvallasset, cives, ut refert Ordericus lib. 13, pag. 893, « legatos in Africam statim miserunt, et Alis regi Africæ » (cui reguli sectæ Saracenicæ in Hispania parebant), ut illi succurreret, mandaverunt. At ille Amoraviorum decem millia trans fretum eis destinavit. Protinus Alfonsus rex sanctas reliquias sibi de capella sua deferri præcepit, et coram omnibus juravit, quod obsidionem non dimitteret, nisi civitas sibi redderetur. Tandem Saraceni prostrati, et eorum multi capti et perempti. Cives urbis Fragæ, quam rex obsidebat, pacem

ab eo petierunt, « et subjectionem ei secundum consideratas condiciones sponponderunt. Rex vero annum vecigal ab eis recipere sprexit, seseque illos obsidione obtenturum fore minitatus, jurando confirmavit. Quod audientes Saraceni dira desperatione aciores extiterunt, ad Alin regem Africæ denno legatos miserunt, et ab aliis regibus principibusque gentium in tanto discrimine sibi subsidium summopere procuraverunt ».

28. *Proelio vincitur a Saracenis Alfonsus VI Aragon. rex.* — Hoc vero anno, ut prodit idem Ordericus, « Buchar Alis filius regis Maroch (hic Buchar idem est ac Techesin, dictus etiam Abenali) plures undique bellatorum copias collegit, et in Hispanias contra Christianos pugnare venit ». Ad Fragam inter duo flumina *pugnatum est in mense Julio*. Postquam multi Christiani occisi fuere, rex cum residuis diutius dimicavit, et *ad mortem usque pro Christo configere proposuit*, neque recessisset, nisi episcopus Urgellensis hoc semel et iterum præcepisset : « Ex auctoritate, inquit, Dei omnipotentis tibi præcipio, ut confestim recedas de hoc campo, ne, te cadente, tota paganis subdatur Christianorum regio, et cunctis in hac provincia consistentibus Christianis incumbat publica interfectio ». Rex cum decem commilitonibus vix evasis, præsulemque, qui postea peremptus est, reliquit. Alfonsus rex paulo post ægrotavit, et « post octo dies animam exhalavit » ; inquit Ordericus, cujus narrationem Acta publica confirmant. Moretus in Investigat. Rerum Navarricarum pag. 645. exhibet Chartam authenticam in Archivis cathedralis Ecclesiæ Calahorræ servatam, in qua legitur : « Facta et roborata scriptura de isto cambio *Æra mccccxii, feria v* mediantis Augusti (sc. die xvi Augusti hujus anni littera Domicali G signati) altera die Assumptionis S. Mariæ, post illam nullam et malam mactationem Christianorum in Fraga, in qua fere omnes gladio ceciderunt ; perpauci vero vix inermes per fugam evaserunt cum rege, feria tertia, die sanctorum Justæ et Rufinæ » ; quod festum hoc anno in feriam tertiam incidebat, cum, ut habet Moretus, die xvii mensis Julii celebretur.

29. *Dies ejus emortualis.* — Alphonsi Aragoniæ et Navarræ regis testamentum in Archivis Sancti-Joannis Pennatensis asservatur, in eoque legitur : « Facta Charta in *Æra mccccxi, in mense Septembris, die Martis* ante Nativitatem sanctæ Mariæ apud castrum et populationem, quod vocitatur in Sarignena. Signum Adefonsi regis ». Ideoque conditum illud die quarta Septembris, rexque post sex septimanas a commisso proelio Fragensi nondum obierat. In antiquo Alphonsi VII imperatoris dicti Chronico ab auctore fere coætaneo edito, dicitur regem victum fuisse *sextodecimo kal. Augusti* ideoque die SS. Justæ et Rufinæ ; in calendario vero veteris abbatiæ Legerensis ad diem vii idus Septembris habetur : « VII idus Septembris, obiit Aldefonsus rex mccccxii », et in libro Fororum

Navarre : « Anno millesimo centesimo trigesimo quarto, VI idus Septembris obiit strenuissime memorie Aldefonsus, etc. » Hæsit ad hæc verba Moretus, atque loco *VI idus Septembris*, legendum *VII idus Septembris*. Antequam priorem Criticæ meæ tomum publicarem, in quo anno LXVII, num. 16, ostendi scriptores quando in emortuali die assignando, uno tantum inter se die dissident, alios respicere ad mortem, alios ad sepulturam, seu ad diem sepulture, quem etiam diem obitualem appellant, idque tanquam principium Chronologicum proposui, viri doctissimi passim alterutrum diem corrigebant, et aut mendose descriptum fuisse, aut auctores errasse persuasum habebant. Verum tot exemplis principium illud in hoc Opere comprobavi, ut huiusmodi loquendi modus nemini imposterum negotium facessere debeat.

30. *Laudatur.* — Rodericus lib. 7, cap. 3, succincite de prælio Fragensi et Alphonso VI regis morte loquitur; sed Ordericus, qui paucis post hunc annis e vita excessit, quique ample accurateque de his egit, defectum ejus supplet. Alphonso VI, ob prælia xxix cum Saracenis gesta, *Præliator* cognominatus fuit, et Hermannus S. Vincentii Lauduncensis monachus, postea abbas S. Martini Tornacensis, qui paucis etiam post præsentem annis mortuus est in Historia Restaurationis monasterii S. Martini Tornacensis, tom. xii Spicilegii Dacheriani recitata, hæc de Alphonso in litteras misit : « Fortissimas urbes et castella paganis fortiter præliando abstulit, Christianis reddidit; Cæsaraugustam scilicet B. Vincentii martyris archidiaconatu famosam, Terrassonam quoque et Tudelam, Barbastam et Burgiam, cum aliis multis, totaque pene Hispania sibi subjugata, adeo nominis sui opinionem dilatavit, ut ab aliis alter Julius, secundus ab aliis Carolus vocaretur, ob memoriam illius præclari Caroli Francorum regis, qui quondam Hispaniam victor subegit ».

31. *Ramirus monachus fit rex Aragonie.* — Ordericus Alphonso VI regis morte relata, subdit : « Quo defuncto, quia filium non habuit, turbatio de successore subjectos inter bellicos strepitus aliquandiu detinuit. Denique Aragones Remigium (legendum *Ranirum*) sacerdotem et monachum, qui frater regis erat, elegerunt, et regem sibi constituerant. Navares autem Garsionem satrapam sibi regem præposuerunt ». Quia Ramirus seu Ranimirus « in monasterio S. Pontii de Thomaris (id est, Thomeriensi cœnobio in pago Narbonensi sito) fuit monachus et sacerdos », inquit Rodericus lib. 6, cap. 1; imo quadraginta et amplius annos in illo monasterio monachus vixerat, regnum post Alphonso mortem non potuit tumultibus non turbari. Aragoneses, ut habet ibidem Rodericus cap. 2, quemdam nobilem, qui dicebatur Petrus Tarasie (legendum *Atherosie*) volebant regi mortuo subrogare; verum duo magnates volentes fidelitatem naturali domino custodire, « plurimo-

rum animos a primo proposito revocarunt, et ut Ranimirus monachum a monasterio revocarent, vigilantibus studio procurarunt ». Porro non tantum auctores contemporanei tradunt Ranimirus monachum et sacerdotem extitisse; sed etiam ipsemet in Diplomate originali a Surita viso, ut ipse affirmat lib. 1 Annal. cap. 53, id aperte docet; cum in eo subscribatur *rex et sacerdos*.

32. *Ramirus nec abbas nec episcopus fuit.* — Recentes scriptores Hispanie volunt, eum fuisse episcopum Rodæ et Balbastri, uti Joannes Briz in Hist. Pennatensi, qui sequens monachum Pennatensem in Historia ejus Ms. id asserit; verum Marca in Historia Bearnensi hunc monachum sæpius falli demonstrat, et Surita laudatus jure merito episcopatum illum in dubium revocat. Certe antiqui de illo tacent, et Rodericus citatus opinionem illam evertit verbis suis mox recitatis, et istis cap. 1 relatis : « Statim rex monachus fuit suo monasterio restitutus. Qui tamen dum in regno existeret, monasterium suum Ecclesiis et possessionibus multis ditavit ». Ad hæc Rodericus ibidem de Aragonensibus ait : « Cumque in Montione iterum convenissent, potiorum consilium hoc firmavit, ut Ranimirus monachum fratri mortuo subrogarent; et eductum de monasterio apud Oscam in regni solio collocarunt ». Quare cum *Ranimirus* eductus fuerit e monasterio ut rex fieret, et postea in illud restitutus, quando post susceptam filiam eamque nuptui datam, regnum deposuit, male posteriores scriptores fabulas secuti tradidere, eum fuisse abbatem monasterii Sancti-Facundi, postea episcopum Burgensem et Pampilonensem, et regnante Alphonso VI Rodensem et Balbastrensem; has enim dignitates successive gessisse fabulatores volvere. Auctor de Gestis comitis Barcinonensis, qui sub finem sæculi xii vixisse videtur, nihil simile habet, sed tantum quæ Rodericus in litteras misit iterat. Ad hæc qui mature attenderit ad ea quæ Marca lib. 2 Hist. Bearn. cap. 10, de laudato Pennatensi monacho scribit, his similibusve commentis fidem non adhibebit. Præterea Ordericus in fine libri 1, ait se Historiam Ecclesiasticam usque in hodiernum diem perduxisse, « quo Joannes Augustus Alexii filius præest Constantinopoli. Lotharius vero dominatur Alemanniis, Ludovicus Francis, Stephanus Anglis, et Remigius (legendum *Ranirus*) monachus Hispanis ». Ideoque liber ille ab Orderico ante finem anni mxxxvii elucubratus, ut ex morte Lotharii imp. et initio Stephani Angliæ regis certo constat. Quare cum *Ranirum* non episcopum sed monachum appellet, tam abbatia illi attributa, quam episcopatus in eo accumulati mere commentitii. Jam diximus, Ordericum alibi scribere Aragonenses regem elegisse Ranimirus *sacerdotem et monachum*. Denique idem eruitur ex Gaufredo priore Vosiensi, hujus temporis auctore, in Chron. cap. 48, sed is male de rebus extra Galliam ubi scribebat gestis edoctus, *Garsiam Ranirum* pro Raniro monacho

sumit, atque de Raimundo Berengario hujus nominis IV, Petronillae Ramirum regis et monachi filiae conjugē, qui genuit Adelphonsum : « Iste rex efficitur, eo quod mater illius (nempe Petronilla) foret filia mica Garsiae Reynier (legendum *Ramirum*) monachi, qui Adelphonso fratri occiso in Aragonensi regno successit ». Alphonso itaque seu Adelphonso, non episcopum, sed monachum successorem nactus est. Natalis Alexander Sæc. XII, pluribus contendit matrimonium Ramirum monachi et regis commentitium esse, et Baronius nullam ejus mentionem facit.

33. *Sed monachus.* — Quare juvat quæcumque *Ramirum* monachi matrimonium spectant, testimonio auctoris gravissimi et supparis confirmare. Est is Guillelmus Neubrigensis, qui in Praefatione suorum quinque Rerum Anglicarum librorum affirmat, se anno primo Stephani Anglorum regis in lucem prodixisse. Is lib. 2, cap. 10, ait : « Illustris quidem (legendum *quidam*) rex Aragonum (nempe Alphonso VI), paulo ante nostram memoriam, cum haberet liberos, unum eorum piæ devotionis instinctu Christo dicatum in monasterio tonsuravit (in monasterio Sancti-Pontii in Septimania sito), reliquos pro tempore successores designans. Verum præmortuis, qui successori (legendum *successuri*) sperabant, contigit patrem humanis novissimum rebus excedere. Veriti autem optimales et populus, de successione nepotibus contendentibus, ne regnum discerperetur, propere convenientes, et venienti periculo occurrentes, regis filium (nempe *Ramirum*) claustrum festinanter extractum, sublimaverunt in regem, regnoque disposito, ad procreandos qui succederent liberos uxorem compulerunt ducere, necessitatis obtentu excusantes excessum, et necessitatem legi non esse subjectam allegantes. Denique nata est ei unica filia (*Petronilla* appellata), cumque regnum laudabili moderamine administrasset usque ad annos filiae nobiles (fallitur in hac circumstantia Neubrigensis, ut infra visuri sumus), convocatis nobilibus, et coram se solemniter apparentibus cum universa pæne militia ditionis suæ, taliter eos est allocutus :

34. *Invitis proceribus in monasterium rediit.* « Parcat mihi et nobis (legendum vobis) omnipotens Deus, charissimi, factus sum enim insipiens, vos me coegistis; sed numquid qui cecidit non adjiciet ut resurgat? Numquid quod usurpavit infelix necessitas, quam esse dixistis exlegem, eadem cessante, ratum esse debet quod usurpatum est contra legem? En ex me natam habetis regni hæredem. Provideantur huic puellæ honorabiles nuptiæ, et regno erit consultum. Redeat ergo monachus iterum ad regulam, et saciam de cætero sanet conscientiam. Reclamatum est ab omnibus; sed cum pium felixque propositum dissuaderi non posset, de consilio procerum juveni clarissimo Barcinonensis comitis filio (Raimundo Berengarii Barcinonensi comiti, hujus nominis IV) filiam despondit, regnoque illi cum filia tradito, vir

memorabilis, præcipuusque mundi contemplor pungentes conscientie stimulus ultra non passus, posita purpura cucullam reinduit, et regnum claustrum mutavit ».

35. *Filiam Willelmi VIII comitis Pictav. uxorem ducit.* — Scriptores Aragonenses aiunt Pontificem Roman. cum *Ramiro* dispensasse, ut uxorem accipere posset, sed alii id tribuunt Innocentio II, alii Anacleto antipapæ. Sandovalius vero in Alphonso VII, pag. 152, scribit : « Dicunt hunc monachum *Ramirum* cum dispensatione papæ uxorem accepisse; nescio an illo tempore dispensationes peterentur et concederentur; cum jam viderimus Gregorium VII dispensationem largitum non esse Alphonso VI, et hunc eam non petiisse eo tempore, quo conjugio illigatus erat cum parente prioris uxoris, et Pontifices Romani amplius non egere, nisi ut separarentur, et eodem modo se cum regibus posterioribus gessere ». Ita Sandovalius. Sed ipsemet nescio, an disciplina in Hispania usurpata hoc tulerit; ad illud penes me certum, Pontifices Romanos hoc et præcedenti sæculo de impedimentis matrimonii dispensasse, et *Ivonom* Carnotensem, aliosque Galliarum præsules a Paschali II petiisse, ut erga *Philippum* Franciæ regem, qui Bertradam cognatam dimittere volebat, dispensatione uteretur. Legendæ Epistolæ cxxiv et cxc Ivonis Carnotensis. Ad hæc Robertus de Monte, qui hoc tempore vivebat, in Chron. ad annum mclix ait, Aragonenses « Remelium (pro *Ramiro*) monachum etiam jam senem, licentia Romani Pontificis, a monasterio abstractum regem fecerunt, et ut hæredem haberet, Mathildem matrem Willelmi vicecomitis Toarci illi associaverunt, ex qua genuit unam filiam, quam Raimundus prædictus comes (nempe Barcinonensis hujus nominis IV) duxit ». Ubi hæc verba, *licentia Rom. Pontificis*, non ad abstractionem Ramiri et monasterio, sed ad ejus matrimonium cum Mathilde referuntur, quia statim ad Ramirus monasterium reliquit, Oscam venit, et rex coronatus fuit, antequam id Romanus Pontifex rescire potuerit. Quo etiam testimonio refelluntur scriptores Hispani, a quibus uxor *Ramiri* vocatur *Inez* aut *Agnes*, et confirmatur quod scripsit Rodericus lib. 6, cap. 2, Ramirum conjugem sororem fuisse comitis Pictaviensis, *Willelmi* nempe IX, Willelmi VIII filii, ultimique Aquitanie ducis. *Mathildis* primis nuptiis juncta fuerat Aymerico vicecomiti Toarci, cui peperit Godefridum, ut videre est apud Besium in Hist. comit. Pictaviensium cap. 34. Addit Robertus de Monte : « Ex qua (sc. Mathilde) genuit unicam filiam (nomine *Petronillam*), quam Raimundus prædictus comes duxit, de qua nata est ista puella, quam filio regis (sc. Richardo filio Henrici Angliæ regis) diximus copulandam ». Exemplum conjugii Ramirum in medium allatum est sæculo superiore post mortem *Sebastiani* Portugalliæ regis, quando de Henrico, cardinali presbytero et archiep. Eborensi, legitimo successore maritando ad regnum in familia

conservandum, actum est, ut insinuat Spondanus anno MDLXXVIII, num. 14, et a quibusdam historicis fuisse narratur.

36. *Navarrei Garsiam Ramiri regem eligunt.* — Ex charta a *Ramiro* in castello Balbastri data mense Octobri .Era MCLXXII, constat eum non multo post Alphonsi VI Aragonie et Navarre regis mortem, in Aragonia regnisse. Navarrei enim, qui ab anno MLXXVI, ut ibidem diximus, Aragonie regi parebant, paulo post Alphonsi VI obitum *Garsiam Ramirem* sibi regem prefecerunt; cum in Chronico Alphonsi VII ab auctore contaneo scripto, apud Moretum in Investigat. regni Navarrici pag. 645, post narratam cladem Christianorum ad Fragam .Era MCLXXII, notatissime pugnam incipisse *suumo diluculo, hoc est, XVI kal. Augusti*, subdatur: « Ad ultimum vero fugit rex et cum eo decem milites, et unus ex ipsis militibus erat Garsias Ramiri, etc. Et elegerunt (nempe Navarrei) super se regem nomine Garsiam Ramiri. Ille qui fugit cum rege de Fraga proelio », Garsias enim Ramires legitimus haeres regni erat, utpote qui originem ducebat a Garsia Sanctio filio natu majori Sanctii Majoris, de cuius morte anno MXXXII verba fecimus. Surita et Garibaius genus ejus a Sanctio regem, qui *Penalenius* dictus est, repetunt; verum tam illi quam sectatores hallucinantur; præterquam enim quod uterque hujus regis filius *Garsia* appellati fuere, et in Castella, antequam uxorem duxissent, sine posteritate obiere, Oihenardus lib. 2 Notitiæ Vasconicæ cap. 14, pag. 324, solide demonstrat ex relatione legatorum Sanctii regis, cognomento Sapientis, Garsiam Ramiri originem ducere a Sanctia Sanctio ad Altoportam occiso, et ex verbis eorundem oratorum refellit, qui *Garsiam Ramirem* regni Navarrici restauratorem filium credere Ramiri Infantis, et Garsie Sanctii nepotem, quo in errore versatur Marca in Hist. Bearnice lib. 5, cap. 28, num. 1.

37. *Garsias Ramiri a Sanctio Majore genus ducebat.* — Nultri opinioni ullus ex antiquis suffragatur, et diserte contradicit Rodericus, qui hoc sæculo exente vixit, lib. 5, cap. 24, ubi de Garsia Sanctii Majoris filio scribit: « Rex Garsias habuit duos filios, regem Sanctium, quem sibi ordinaverat successorem, sed fuit occisus in Penaleni, et alium, qui Sanctius similiter est vocatus, apud Rodam fuit proditionaliter interfectus. Hic habuit filium Ramirum Infantem, qui Ramirum duxit uxorem filiam Roderici Didaci, cum Valentia morabatur, et suscepit ex ea filium Garsiam Ramiri, qui primus regnavit in Navarra ». Quæ genealogia plane conformis relationi oratorum Sanctii filii Garsie, quæ exstat apud Hovedenum in posteriori suorum Annalium parte, pag. 564. In eo tantum peccat Rodericus, quod *Sanctium* Sanctii Penalenii fratrem appellat; is enim Infans posterior natu *Ramirus* vocatus fuit, ut ex plurimis, quæ adhuc in Hispania supersunt, Chartis immolescit. Moretus, qui Oihenardum sequitur, aliquas lib. 3 Investigat.

exhibet. Illud plane certum, *Garsiam Ramirem*, regni Navarrici restauratorem, originem traxisse ab Infante apud Rodam occiso, quem liquet non *Sanctium*, sed *Ramirum* dictum fuisse, ut Historici Arabes, a Marmolo in sua Africa descriptione citati et visi, testantur. Neque *Sanctius Infans* fratri supervixit; cum post hujus mortem in nulla quæ supersit Charta ejus mentio sit; cum contra *Ramirus* in quamplurimis memoretur usque ad annum .Era MXXXI, Christi scilicet MXXXII, quo eum occisum constat. Ita plane Rodericus corrigendus, qui tantum in Infantis nomine peccat, *Sanctium* pro *Ramiro* usurpans.

38. *Alphonsus VII Castellæ rex Navarram et Aragoniam ad se pertinere contendit.* — *Alphonsus VII*, Castellæ rex, Aragoniam et Navarram ad se hereditario jure devolutas prædicabat, et *Ramirum* nonnisi vifio Aragonie regem creatum. Ita contractis copiis irrupit in partem veteris Castellæ a regno Navarreo pendente, eamque sibi facile subiecit cum Naiara ejus capite, et omni regione ultra Ebrum Fl. posita. Recentes Hispanie scriptores aiunt, cum *Victorium* obsidione cinxisse, quod verum esse non potest, cum nonnisi diu post ea urbs constructa fuerit. Tum Alphonsus VII exercitum ad Casaraugustam duxit, eamque nullo negotio occupavit. *Ramirus* in montes confugit, firmo sese aggere munivit, ibique per aliquod tempus substitit, ut ex Actis publicis Surita, Joannes Brizius et Moretus ostendunt. Inter has bellorum tempestates *Garsia Ramires* piam quandam donationem fecit a Moreto lib. 3 Investigat. cap. 6, pag. 647 relatum, in qua ait: « Ego Garsia, Dei gratia Pamplonensium rex, etc. » Alphonsus VII regnum Naiaræ seu Navarræ ultra Ebrum sitæ ante mensem Novembrem hujus anni, ut ostendit Sandovalius fol. 152, sibi subdividit, et die decima ejusdem mensis cum *Berengera* regina erat in monasterio S. Emiliani, ubi quandam donationem fecere, anno, ut aiunt, quo Alphonsus Aragonie rex mortuus est, et quo Alphonsus VII Toleti imperator erat.

39. *Obitus Roberti Normanniarum ducis.* — Mortuus est hoc anno in Anglia *Robertus* dux Normanniæ, quem Henricus rex jam a XXVIII annis in custodia detinebat. « Decessit autem IV idus Februarii, anno ab Incarnat. Dom. MCCCXXIV », inquit Gemmeticensis lib. 8 cap. 16, cui Oedericus lib. 13, et scriptores Britannici consentiunt.

40. *Incendium Cenomannense.* — « Anno Domini MCCCXXIV, III nonas Septembris tota Cenomannensis civitas, cum omnibus Ecclesiis quæ intra muros continebantur, exaruit in favillas, etc. Sane ex quo eadem civitas primitus fundata fuit, nec scripto, nec senum relatione me illius tantum recolo infortunium didicisse, quantum in illa die videtur recepisse », inquit auctor de Gestis episcoporum Cenomannensium in Guidone episcopo Cenomannensi cap. 36, qui ideo coævus fuit.

41. *Floret Hugo de Foluto.* — Claruit his

temporibus *Hugo* Corbeiensis in Gallia monachus, de Folieto dictus, S. R. E. cardinalis, qui multa eaque optima scripsit, quæ inter Opera Hugonis Victorini, quasi ejus essent, recensentur. Oudinus in Supplem. Script. Eccl. ex Codicibus Mss. a se visis demonstrat. libros 4 de *Claustro Animæ*, lib. de *Medicina Animæ*, aliosque quosdam Hugoni Victorino perperam attributos, ejus factum esse, et editores ultimos Operum Hugonis Victorini omisisse censuram istorum Operum, quam præcedentes prudenter adhibuerant. Loquitur Trilhemius de Hugone de Folieto in Chron. Hirsang. ad annum superiorem, et aliqua ejus Opera recenset, inter quæ duo laudata Hugoni Victorino adscripta.

42. *Obitus Joannis Chalcedonii episc. CP.* —

Usque ad hunc annum pervenit Joannes Hieronimemon, cognomento Chalcedonii, patriarcha Constantinopolitanus, qui jam ab anno *mcxi* Ecclesiam Constantinopolitanam regebat. In serie enim episcoporum Byzantii lib. 4 Juris Græco-Romani recitata ei tribuuntur anni *xxiii*. *Hieronimemon* vero dignitas erat in Ecclesia Græcica, duodecima a Codino cap. 1 recensita, ubi et munus ejus describit. Eam obiit postea Georgius Pachymeres. De hac voce *hæreticus* plura habet Ducangius in Glossario mediæ et infimæ Græcitat. Joanni Chalcedonio successit *Leo Styopita*, cujus Baronius meminit anno *mcxliii*, qui tamen Joannem ejus decessorem prætermisit; sed Onuphrius in Chron. utriusque mentionem fecit.

INNOCENTII II ANNUS 6. — CHRISTI 1135.

1. *Legatio Gaufredi episcopi Carnotensis in Aquitaniam, socio S. Bernardo, qui comitem Pictaviensem a schismate convertit* — Annus Redemptoris millesimus centesimus trigesimus quintus ordine sequitur, Indictione decima tertia, quo Aquitania provincia, hactenus studio Gerardi episcopi Engolismensis legati Anacleti pseudopontificis, et violentia Willelmi comitis in schismate permanens, Catholicæ Ecclesiæ redditur unitati, suscipiens Innocentium verum Pontificem, detestans omnem schismaticam pravitatem. Facta sunt hæc per Apostolicæ Sedis legatum laudatissimum virum, Gaufredum Carnotensem episcopum, qui anno superiori post Pisanum Concilium, cui interfoit, eo munere legationis ab eodem Innocentio papa insignitus est. Hoc igitur ubi reversus est in Gallias, tanto operi sibi delegato magno studio insistendum considerans, quo illud efficacius promoveret atque perficeret, Claramvallem profectus, inde sibi absque labore S. Bernardum evulsit, atque ad ea peragenda operarum præpotentem adjunxit¹. Antequam autem res per S. Bernardum in hac legatione gestas, quarum causa missus est, enarremus, dicendum prius de ipso primario Sedis

Apostolicæ legato Gaufredo episcopo Carnotensi, cujus virtutes summa cum laude idem S. Bernardus meminit libro quarto de Consideratione ad Eugenium, istis verbis prædicans in primis ejus continentiam in abstinendo in hac legatione a quolibet munerum genere; et ubi de Martino presbytero cardinali legato in Daniam memorabile recitavit exemplum, mox addit²: «Sed, o mihi, inquit, locum suavem, ubi incidit occasio memorandi, et nominandi suavissimi odoris virum (episcopum loquor Gaufredum episcop. Carnotensem) qui legationem in partibus Aquitanie propriis sumptibus strenue administravit, idque annos plures. Rem loquor, quam vidi ipse. Eram cum eo in terra illa, cum a quodam presbytero præsentatus illi est piscis, quem vulgo vocant sturgeonem. Percontatus legatus quanti venierit: Non accipio, inquit, nisi receperis pretium, et resignavit solidos quinque invito et verecundo. Idem cum essemus in quodam oppido, domina illius oppidi obtulit ei pro devotione cum manutergio duas vel tres paropsides pulchras, ligneas tamen. Quas aliquandiu intuens homo scrupulose conscientie, laudavit eas, sed non acquievit accipere. Quando argenteas

¹ Bern. abb. in Vita S. Bern. l. vi. c. 6.

² Bern. de Consid. l. iv.

recepisset, qui ligneas refutavit? Non fuerunt qui possent legato dicere ¹: Dilavimus Abraham. Ipse vero cum Samuele libere concionabatur ad omnes ²: Loquimini de me coram Domino et coram Christo ejus, utrum bovem cujusquam tulerim aut asinum, si quempiam calumniatus sum, si oppressi aliquem, si de manu cujusquam munus accepi, et contemnam illud hodie, vobisque restituam. O si talium daretur virorum copia, quales perstrinximus nunc: Quid te felicius, quid illo jucundius sæculo! Nonne secunda ab æternitate illorum tibi temporum beatitudo videretur, cum te quaquaversum procedens stipatum videres tam inclyto agmine beatorum? Si te novi, hæres; et altum trahens spiritum tecum loqueris. Putas fore posse quod dicitur? Putas hic sumus, quousque hæc fiant? Quis dicit vivere, ut videre contingat? O si viderem in vita mea Ecclesiam Dei talibus innixam columnis! O si Domini mei sponsam cernerem tante commissam fidei, tantæ creditam puritati! etc. » Sed ad ipsius legationis summum negotium redeamus. Quæ autem per eos gesta sint, Bernardus Bonævallensis abbas in Vita ejusdem S. Bernardi Claravallensis abbatis conscripsit, necnon Theobaldus episcopus in Vita Willelmi comitis atque ducis ³. Nos autem ex Bernardo, qui, puto, interfuit, ista omnia quomodo se habuerint describemus, qui res tunc gestas ita fidelissime narrat ⁴:

2. « Audiens hæc », quæ scilicet gesta essent in Aquitania a schismaticis adversus Catholicæ religionis episcopos, « audiens, inquam, hæc et hujusmodi vir venerabilis Gaudfredus Carnotensis episcopus, cui a papa Innocentio Aquitanie legatio fuerat commendata, vehementer indoluit, et succurrendum periclitanti Ecclesiæ, postpositis aliis negotiis, sine ulla dilatione decrevit. Abbatem igitur Claravallensem, (sanctum Bernardum videlicet) petit et obsecrat, ut sibi ad tanta mala eliminanda succurrat. Assensit vir Dei, et se in proximo congregationem monachorum in Britanniam in locum, quem juxta Namnetum comitissa Ermen-gardis paraverat, ducturum intimat, et promittit, disposita illa domo secundum genus et species suas, secum eo in Aquitaniam profecturum ». Subjicit his antem admirabilem curationem mulieris, incubum dæmonem patientis, per S. Bernardum Dei virtute operatam et ea quæ præcesserant in prioribus congressu S. Bernardi cum comite Aquitanie, cum Innocentius esset in Gallis; moxque de his quæ hoc anno sunt gesta sic orationem proseguitur:

3. « Significatum est interim comiti per viros illustres, qui ad eum securius audebant accedere, quod abbas Claravallensis et episcopus Carnotensis, aliique episcopi, et religiosi viri colloquium ejus expectarent, quorum erat studium, ut secum de pace Ecclesiæ et de malo removendo tractarent. Persua-

sumque est illi, ne tantorum virorum devitaret colloquium: quia poterat fieri, ut communicato cum eis consilio, et facile esset quod modo putabatur difficile, et quod videbatur impossibile repentino provenit possibile redderetur. Itaque apud Pertinacium hinc et inde conveniunt, et in primis de divisione Ecclesiæ, et de scissuræ obstinatione, quæ intra Alpes in sola Aquitania, quasi nebulæ corruptela consederat, multis modis, et rationibus a Dei servis comiti intinatum est. Quod Ecclesia una est, et quidquid extra eam est, quasi extra arcam, judicio Dei necesse est interire et dilui. Adducta quoque exempla Dathan et Abiron, quos reatu schismatis terra vivos absorbit; nec tanto malo Dei vindictam aliquando fuisse monstratum. His auditis, comes ex parte sano usus consilio, respondit se in obedientiam Innocentii papæ posse dare consensum, sed in restitutionem episcoporum, quos de sedibus expulerat, nulla ratione induci; quoniam implacabiliter eum offenderant, et juraverat se eorum pacem nullo tempore suscepturum. Diu per internuntios protractus est sermo, et dum vicissim verbis se mutuo occupant, vir Dei efficaciora arma corripiens, ad altare sanctum oblaturus et supplicaturus accedit. Intraverant Ecclesiam, quibus licebat divinis interesse mysteriis: comes sublineabat pro foribus.

4. « Peractis igitur consecrationibus et pace data et diffusa in populum, homo Dei, jam non se agens ut hominem, corpus Domini super patenam ponit et secum tollit, atque ignea facie et flammeis oculis, non supplicans, sed minax foras egreditur, et verbis terribilibus aggreditur dncem: Rogavimus te, inquit, et sprevisi nos. Supplicavi tibi in altero, quem jam tecum habuimus, conventu, servorum Dei ante te adunata multitudo, et contempsisti. Ecce ad te processit Filius Virginis, qui est caput et Dominus Ecclesiæ quam tu persequeris. Adest iudex tuus, in cujus nomine omne genu curvatur, celestium terrestrium, et infernorum ¹. Adest iudex tuus, in cujus manus illa tua anima deveniet. Numquid et ipsum spernes? Numquid et ipsum sicut servos ejus contemnes? Lacrymabant universi qui aderant, et orationibus intenti, præstolabantur exitum rei: et omnium suspensa expectatio nescio quid divinum fieri cælitus expectabat. Videns comes abbatem in Spiritu vehementi procedentem, et sacratissimum Domini corpus ferentem in manibus, expavit et dirigit, membrisque tremebundis metu et dissolutis, quasi amens solo provolvitur. Elevatus a militibus, rursus in faciem ruit, nec quidpiam alicui loquens, aut intendens in aliquem, salvis per barbam defluentibus, cum profundis efflans gemitibus, epilepticus videbatur. Tum vir Dei ad eum propius accedit, et pede pulsans acclivem surgere jubet, et stare supra pedes et Dei audire sententiam.

5. « Præsens est, inquit, Pictaviensis episco-

¹ Gen. xiv. — ² 1. Reg. xii. — ³ Apud Sur. tom. i. die x Feb. in Vita Wil. c. 4. — ⁴ Bern. l. ii. c. 6.

¹ Phil. ii.

pus, quem ab Ecclesia sua expulsi: vade et reconciliare ei in osculo sancto pacis; cum eo jungito fœdera, et ipse ad sedem suam cum reducto, et satisfaciens Deo, redde pro contumelia gloriam; et in universo principatu tuo divisos et discordes ad charitatis revoca unitatem. Subdere Innocentio papæ; et sicut ei universa obedit Ecclesia, tu quoque electo a Deo tanto pare Pontifici.

« Audiens hæc comes, auctoritate Spiritus sancti, et sanctorum sacramentorum præsentia victus, nec audebat respondere, nec poterat; sed statim occurrit, et in pacis osculo recepit episcopum; et eadem qua eum abjuraverat manu, cum totius exultatione civitatis ad propriam salutem rediit. Sed et deinceps abbas cum comite jam familiarius et suavius loquens, paterne cum monuit, ne ad tam impios et tam temerarios ausus ultra exstingeret, ne Dei patientiam tantis irritaret flagitiis, ne pacem factam in aliquo violaret ». Hæc præsens S. Bernardus, qui et absens ejus curam gerere prætermisit.

6. Quod enim malis assuetus, cum recedit ab illis, perdifficile est ita se custodire et integrum conservare, ut inoffenso pede per lubrica mundi pertranseat: hunc eundem labantem interdum brevioribus hinc litteris idem sanctus Bernardus revocavit ad poenitentiam¹:

« In eo animo et in ea voluntate memini me discessisse dudum a te, princeps eximie, ut totis affectibus bene tibi tuisque cuperem, totis nisibus salutem vestram et honorem vestrum, ubicumque possem, juvarem, eo quod non redirem fraudatus fructu adventus mei ad vos, sed latus præter spem multorum reportarem necum pacem Ecclesie cum exultatione universæ terræ. Miror autem quo cuiusve consilio mira illa mutatio dexteræ Excelsi tam subito in deterius est mutata, ut rursum ad injuriam Ecclesie, clericos S. Hilarii de civitate expelleres², et iram Dei in te gravius quam primum excitares³. Quis te fascinavit tam cito recedere a via veritatis et salutis? Profecto iudicium portabit quicumque est ille. Utinam et abscondantur qui vos conturbant! Revertere, quæso, revertere, ne et tu (quod absit!) abscondaris. Revertere, inquam, et revoca amicos tuos ad pacem, et clericos ad Ecclesiam, antequam irreversibiliter reddas tibi adversum terribilem et eum qui aufert spiritum principum, terribilem apud reges terræ». Hæc Bernardus, nec quidem frustra. Siquidem idem princeps vere poenitens, austerissimum vite genus arripuit, et Christianæ perfectionis verticem summum attigit, ut que de ipso suis dicturi sumus locis inferius demonstrabunt. Sane quidem, quod S. Bernardus in angustia anime sue imprecat⁴ est vindictam in eum, qui ipsum revocasset ad malum, illud Apostolicum jaculatus⁵: Utinam abscondantur qui vos conturbant. Pertigit nefarium illum inveteratum dierum malorum Gerar-

dum Engolismensem legatum pseudopontificis Anacleti, qui comitem ipsum Pictaviensem in malum adduxit, et a malo reductum iterum sollicitavit ad lapsum. Nam repentina morte ex hac vita sublatus interiit; audi enim Bernardum in Vita S. Bernardi:

7. *Ultio divina in Gerardum episcopum Engolismensem antipapæ legatum.* — « Pace itaque omni Aquitanicæ Ecclesie reddita, solus Gerardus ille Engolismensis episcopus, legatus antipapæ Petri Leonis, de quo plura superius, perseverat in malis. Sed non multo post, adveniente die iræ in domo sua miserabiliter extinctus est. Et cum dicat Scriptura¹: Est peccatum ad mortem, pro eo non dico ut roget quis: impoens et subito mortuus sine confessione et viatico, de corpore egredientem spiritum ei reddidit, cujus minister usque in finem extiterat. Corpus ejus a nepotibus suis, quos in Ecclesia illa honoribus sublimaverat, inventum in lectulo suo exanime et enormiter tumidum, in Basilica quadam humatum est. Sed postea a Gaufrido Carnotensi episcopo Sedis Apostolicæ legato inde extractum est, alioque projectum. Nepotes quoque ejus ab eadem Ecclesia postea eliminati sunt, et omnis progenies et plantatio a radice avulsa, per externa regna tanti iudicii circumferens querimonias exulavit. Tanto igitur malo obruto, et schismate Gerardi reducto in cineres: vir Dei cum gaudio magno Claramvallem revertitur². Subdit auctor, post hæc ipsum S. Bernardum esse aggressum explanare Cantica Cantheorum.

8. *De martyrio Thomæ prioris S. Victoris Parisiensis.* — Eodem ferme tempore et Joannes Cremensis S. R. E. cardinalis tituli Sancti-Chrysogoni, qui primo steterat a partibus Innocentii, et inde transfugerat ad Anacletum, eum deserens rediit ad Innocentium, cujus rei causa S. Bernardus litteris est ei congratulatus³.

Quo etiam tempore contigit, eundem S. Bernardum⁴ scribere item ad Innocentium papam adversus interfectorem magistri Thomæ Prioris sancti Victoris Parisiensis, quem et ob vitam sanctissime ductam, et mortem patientissime tolerantem martyrem nominat. Scripsit et ad alios cardinales de eodem, et in litteris ad Joannem de Crema cardinalem de reconciliatione ipsius datis. Ob eandem causam etiam Petrus Cluniacensis abbas ad eundem papam Innocentium de iisdem scripsit⁵. Sed aliqua de his depromamus ex Epistolis S. Bernardi, digne suis scriptis necem martyris prosequens, et in sacrilegum homicidam, qui ad Pontificem se contulerat, hæc inclamantis⁶: « Tu filii recentem adhuc cruorem ore rabido ac ferali spumans et masticans, lugs ad sinum matris, patris audes apparere conspectibus? Tamen si poeni-

¹ 1. Jos. II. — ² Bern. Ep. CLXIII. — ³ Ibid. Ep. CLV-II, CLV, CLX, CLXI, CLXII. — ⁴ Petr. Chir. I. III. Ep. VIII. — ⁵ Bern. Ep. CLVIII.

¹ Bern. Ep. CXXVIII. — ² Galat. III. — ³ Ibid.

tentiam petit, neganda ei non est. Quod si audientiam; accipiat illam (si placet) quam vel Moyses induisit populo ante contatide curvantem genu¹; vel Phinees fornicanti Israelite; vel Mathafias demonibus immolanti²; vel certe (ut vobis de vestris aliquem proponamus, quam a B. Petro³ Ananias et Sapphira meruerunt: quam denique audientiam dedit negotiantibus in templo⁴ Salvator. An ignoramus quorundam peccata præcedere ad iudicium? » Hæc ad Innocentium. Moxque hæc apostrophe perstringit auctorem sceleris, dicens:

9. « Nonne vox sanguinis fratris tui clamat adversum te de terra? Credimus et nostri martyris spiritum, quem novissime diebus istis tua crudelitas morti dedit, cum cæteris animabus interfectorum voce valida sub altari clamare et flagitare vindictam, eoque instantius quo recentius ipsius sanguis effusus est super terram. Sed nunquid ego, inquit, occidi eum? Non utique tu, sed tui, et propter te. An et per te, videat Deus et iudicet. Si excusabilis tu es, ejus dentes arma et sagittæ, ejus lingua gladius acutus: proinde nec Judei Christi de morte culpandi sunt, quippe et ipsi manus continere cauti ». Hæc in eum. Pergit v. ro causam illam necis referre his verbis: « Ob illicitas exactiones, quas sibi occasione archidiaconatus in presbyteros minime jam, ut consueverat, usurpare liceret, beati utique Thomæ obviante zelo atque industria, utpote justitiæ amatoris et defensoris, oderat illum, et mortem ei jam ipso odio homicida mittere solebat, etc. » Per nepotes archidiaconi hunc esse necatum obtinendam Ecclesiæ justitiam et libertatem, pluribus disserit et inculcat. De eodem Stephanus ipse Parisiensis episcopus hæc ad eundem Innocentium papam: « Vir⁵, inquit, religiosus, prior Sancti-Victoris, magister Thomas, in obsequio charitatis, in itinere quod indixerat pietas, in opere sancto, in sanctorum comitatu, in Dominico die, certe in sinu meo et inter manus meas crudeliter ab impiis pro justitia excerebratus est, factus obediens usque ad mortem, etc. » Pergit narrare vite merita egregia ejusdem Thomæ, quibus egregia fama vivebat in Ecclesia Parisiensis. Sic igitur hoc sæculo duo occubuere Thomæ pro Ecclesiæ juribus defendendis, Parisiensis alter, doctrina insignis, prior Sancti-Victoris Ecclesiæ Parisiensis, nobile et perutile membrum, et alter in Anglia Thomas archiepiscopus Cantuariensis, de quo suo loco dicendum pluribus.

10. Petrus Cluniacensis abbas scribens de his⁶, et exclamans pro vindicta ad Innocentium papam, non Thomam tantum hunc, sed et subdiaconum Aurelianensem eadem ex causa ab impiis interfectum affirmat: additque horum causa caesorum congregatum fuisse Concilium episcoporum in

Gallia, de quo ista ipse: « Hæc de causa, inquit, nuper in partibus nostris, archiepiscoporum, episcoporum, abbatum, ac multorum religiosorum et sapientum personarum congregatae sunt: et Concilio habito, in hujusmodi sacrilegos severitatis sententiam protulerunt. Continuit ergo, si placet, Apostolica auctoritas, quod ab eis bene actum est: suppleat, si quid minus severe decretum est, ut et impii debita ultione puniantur, et ab eorum imitatione cæteri deterreantur ». Hæc et alia Petrus ad Innocentium. Sed ad institutum satis.

11. *Adalbertus archiepiscopus Moguntinus suos subditos eximit a tributis.* — Hoc eodem anno, magnus ille Apostolicus vere Dei minister Adalbertus archiepiscopus Moguntinus, de quo superius prægna cum laude sæpe mentio facta est, post multa dira et aspera, quæ est passus ab Henrico imperatore, liberatus tandem, suos subditos, qui ipsi compassi erant, ejusmodi privilegio exhilarandos putavit; sic se habet⁷:

« In nomine sanctæ et individue Trinitatis. Amen. Adalbertus Moguntinensis Ecclesiæ archiepiscopus, et Apostolicæ Sedis legatus.

« Quod hujus mundi cursus et gloria mutabilitati assidue subjecta sint, multorum exemplo didicimus. Sive prospera exollatur, vel adversa deiciatur, ejusdum sapientis consolatione admonemur, dicentis: quod viri sit prudentis privilegium, nil in gaudere transitorium. Novit ubique tam præteritorum, quam presentium conscientia, quæ vel quanta in me fecerit Dei misericordia. Cognoscat etiam, quæso, futurorum per me successio, quantos ex alto prosperitatem comitentur casus et dejectio. In medio etenim prosperitatis mee cursu, Henricus Quintus (Quartus), ut nostis, imperator, post multa beneficia, nonnisi propter Romanæ Ecclesiæ obedientiam, carceris etiam mihi captivo tenebras intulit et latibula. Ibi profecto longo moratus tempore, primi pastoris omnium consolationem dicentis: *Si quid patimini propter justitiam, beati*, reduxi memorie. Memini etiam in merore Isaiam incarcerationum, in sectionem serræ servatum, Danielem innocentem de lacu leonum liberatum. Denique post multas tribulationes contritos corde visitans ex alto Deus, corda fidelium Moguntinensis metropolis ad hoc permovit ut suum conaretur liberare captivum. Tamdiu itaque clerici, comites, liberi cum civibus et familia, prælato imperatori Henrico insistentes elaboraverunt, donec me tandem, datis obsidibus charis filiis et propinquis, corpore ex toto attenuatum, vix semivivum, sicut fideles filii patrem, in sua receperunt. Sed quam caute, quam honeste, quam juste obsides haberentur, sine merore nemo loqui poterit. Nam alii membris truncati redierunt, alii laani, alii exilio deputati, alii nuditate et corporis aegritudine præoccupati, perierunt. Hæc et his similia fideles Moguntinensis civitatis cives pro

¹ Exod. xxvii. — ² Num. xxv. — ³ 1. Mac. i. — ⁴ Act. v. — ⁵ Matth. xxi. — ⁶ Apud Sur. Bern. Ep. clxix. — ⁷ Petr. Clun. l. iii. Ep. xvii.

¹ Ex Odon. Linsing. in Append. ad Cont. episc.

justitia passi sunt. Quæ vero in defensionem civitatis suique honoris pertulerunt, satis omni regno patet.

12. « Mihi igitur cogitanti, quid eorum bonis et tantis recompensarem meritis, occurrit, ut sicut ipsi pariter meo communicaverunt labori, sic omnium aliquid conferrem honori et utilitati. Communicato ergo primorum consilio clericorum, dico comitum, liberorum, familiæ et civium, habitantes infra ambitum muri civitatis præfatæ, et manere volentes, hoc jure donavi, ut ad nullius advocati placita vel exactiones extra murum expectarentur, sed infra sui nativi juris essent, sine exactoris violentia: quia cui tributum tributum, cui vectigal vectigal, gratis, nullo exigente, persolverentur.

« Ut autem hæc donatio rata et inconversa ad posteros transeat, sigillo nostro confirmantes, subscriptis testibus, signari jussimus. Huic quidem primæ traditioni interfuerunt viri venerabiles, etc. » Sequuntur complurium nomina testium, et in fine sic:

« Facta sunt hæc anno Dominicæ Incarnationis millesimo centesimo trigésimo quinto, Indictione duodecima (xii), et confirmata regnante domino Lothario imperatore ejusdem nominis tertio, (rege scilicet), anno regni ejus nono, imperii vero secundo feliciter. Amen ».

13. *Adversus Rogerium in Campania debacchantem legatio et litteræ Innocentii papæ ad Lotharium imperatorem.* — Eodem anno afflictum mirum in modum esse Campaniam persecutione Rogerii regis Siciliæ. Etiam, cum Robertus Capuæ princeps Aversam et alia loca, absente Rogerio, recepisset: redeunte ex Sicilia eodem Rogerio, idem tum Aversam, tum alia loca militari potentia recepit, ultusque in eas quæ se principi Capuano dedissent, nobilem Aversanam civitatem solo æquavit, ac reliqua omnia depopulatus est. Principatu vero suo Capuano sic exutus Robertus, confugit ad Innocentium Pisis degentem. Tunc Pontifex, his auditis, mox adornat legationem honorificam ad Lotharium imperatorem adversus Rogerium, tyrannice omnia tum principum, tum Ecclesiæ vendicantem. Delecti sunt ad hoc munus obeundum Gerardus cardinalis, idem ipse princeps Capuanus Robertus, et Richardus germanus comitis Rainulphi. Qui digne ab imperatore excepti, eorumque miseratus, pollicitus est auxilium, eodemque se anno venturum in Italiam, seque accinxit ad iter, exercitu comparato. Hæc omnia Beneventanum Chronicon hoc anno. Eadem plane Chronicon Casertinus verbis istis ¹: « Post hæc, ab Innocentio remorante Pisis crebris litteris Lotharium monitus, ut Romanum imperium ab hostium jugo defenderet, Ecclesiam concussam et laceratam ad unitatem concordiamque revocaret, Cæsar clementissimus anno Dominicæ Incarnat. millesimo centesimo tri-

gesimo quinto, coacto ex omni orbe Romano immenso exercitu, cum uxore Augusta intravit Italiam ». Hæc ibi.

14. Tunc et sanctus Bernardus ad eundem imperatorem Lotharium scripsit Epistolam ¹, hoc ipsum illi suadens, in qua inter alia ista habet: « Animalit insuper honestas cause, imo duplex provocabit necessitas », nimirum periclitantis imperii in rebus Italiæ, et periclitantibus rebus Ecclesiæ, « quas idem tyrannus Rogerius invaserat, Beneventumque sibi subdiderat ». Pergit vero Bernardus: « Non est meum hortari ad pugnam: est tamen (securus dico) advocati Ecclesiæ arcere ab Ecclesiæ infestatione schismaticorum rabiem. Est Cæsaris propriam vendicare coronam ab usurpatore Siculo. Ut enim constat Judaicam sobolem Sedem Petri in Christi occupasse injuriam: sic proculdubio omnis qui in Sicilia se regem facit, contradicit Cæsari ». Hæc et alia S. Bernardus. Reliqua autem in sequentem annum. Sed quod magni fuit momenti, hoc eodem anno reconciliavit idem S. Bernardus Pisanos imperatori, penes quem calumniis detractorum male audire cœpissent. Quæ de causa idem S. Bernardus has ad eundem imperatorem pro Pisanis litteras dedit, recitandas a nobis, eo quod contineant quæ, quantave hoc anno egerint Pisani classe adversus Rogerium tyrannum Siculum. Hoc enim nomine decorare semper eundem Rogerium idem S. Bernardus consuevit. Epistola sic se habet ²:

15. « Minor curpi instinctu vel consilio vigilantie vestre surripit potuerit, ut homines digni certe duplici honore et gratia, contraria a vobis audirent: Pisanos dico, qui primi et soli interim adhuc erexere vexillum adversus invasores imperii. Quam justus in eos regia incanduisset indignatio, qui populum strenuum et devotum quacunque occasione offendere ausi sunt, eo præcipue tempore, quo accincti in multis millibus suis exierant oppugnare tyrannum, ulcisci injuriam domini sui, et imperialem defensare coronam. Ut enim congruentissime assignem huic genti, quod olim de sancto David dicebatur: Quenam, quæso, in omnibus civitatibus sicut Pisa, fidelis egrediens et regrediens, et pergens ad imperium regis? Nonne hi sunt, qui nuper regi illum unicum ac potentissimum hostem ab obsidione Neapolis fugaverunt? Nonne hi sunt, qui etiam (quod pæne incredibile dictu est) uno impetu suo, expugnaverunt Amalfiam, et Rebellum, et Scalum, atque Alturinam, civitates utique opulentissimas et munitissimas, omnibusque qui antehac tentaverunt, usque ad hoc tempus (ut aiunt) inexpugnabiles? Quam dignum, quam æquum, quam plenum ratione et justitia fuerat, ut fidelium terra interim saltem dum hæc actarent, ab omni hoste secunda consisteret, tum pro præsentia summi Pontificis, quem jamdudum exulem Pisani apud se cum

¹ Pet. Diac. Chr. Cass. l. IV. c. 59.

² Bern. Ep. CXXXIX. — ² Ibid. Ep. CXL.

summo honore servabant et servant; tum pro servitio imp. pro quo et ipsi tunc temporis exultabant? Factum est autem per contrarium, ut gratiam, qui offenderunt, et qui servierunt, iram mererentur. Sed vos fortassis adhuc ista nesciebatis. Oportet ergo nunc, quando res est nota vobis, imo et decet et expedit, mutare vos et verbum et animum, ut viri regis magis favoribus et muneribus honorandi, a vestra parte de cetero audiant et recipiant, prout meriti sunt. O quantum memere Pisani; quantum adhuc mereri possunt! Sat est dictum sapienti. Hucusque ad Lotharium imperatorem S. Bernardus.

16. *S. Bernardi litteræ hortatoriæ ad Januenses.* — Quo pariter anno, nempe anno sequenti reditus ad Italia, idem scripsit ad Januenses Epistolam, dignam tam sancto tamque mirifico viro a quo scripta, et ad quam scripta, religiosissimam rempublicam Januensium; quam hic describendam jure putamus, perpetuum monumentum summæ gloriæ ejusdem civitatis. Quod enim Rogerius dux Siciliæ (sic ipse Bernardus, nunquam cum volens vocare regem, quem schismaticus papa tali esset dignatus honore) legatos ad Januenses misisset cum muneribus, timens ne fidelis populus dolo schismatici principis a rectitudine abduceretur in præceptis, his eos voluit litteris admonuisse, quæ sic se habent¹:

« Januensibus suis, consulibus cum consiliariis et civibus universis, Bernardus abbas dictus de Claravalle, pacem et salutem et vitam æternam.

« Quod adventus noster ad vos anno præterito non fuerit otiosus, Ecclesia paulo post in sua necessitate probavit, a qua et missi fuimus. Honorifice nos et suscepistis et tenuistis, exiguum quod apud vos fuimus, et quidem digne vobis, sed supra nostræ humilitatis modum; profecto ut non immemores, sic non ingrati sumus. Vicem rependat qui potest, et qui in causa fuit Deus. Nos enim unde illum recompensemus venerationis cultum, sed obsequium, sed affectum plenum amoris et gratiæ? Non quod nostro delectemur favore, sed vestræ devotioni collectamur. O mihi dies illos festivos, sed paucos! In æternum non obliviscar tui, plebs devota, honorabilis gens, civitas illustris. Vespere et mane et meridie (more utique prophetæ?) narrabam et annuntiabam; et erat tanta audiendi aviditas quanta et audientium charitas. Portabamus verbum pacis; cumque invenissemus filios pacis, requievit super eos pax nostra. Exieram plane seminare semen, non meum, sed Dei, et cadens in terram bonam semen bonum, fructum fecit centuplum et tempestivum. Mira celeritas, quia magna necessitas. Nec tarditatem passus sum, nec difficultatem, una pane die et serens et metens, et reportans cum exultatione manipulos pacis. Hæc quippe messis quam messi. Exulibus, captivis, compeditis et carceratis, evadendi atque repa-

triandi lætam reportavimus spem, metum hostibus, confusionem schismaticis, gloriam Ecclesiæ, orbi lætitiæ. Et nunc quid restat, charissimi, nisi ut admoneamini de perseverantia, quæ sola meretur viris gloriam, coronam virtutibus? Prorsus absque perseverantia, nec qui pugnat victoriam, nec victor palmam consequitur. Vigor virium virtutum consummatio est, nutrix ad meritum, mediatrix ad præmium: soror est patientiæ, constantiæ filia, amica pacis, amicitiarum nodus, unanimi-tatis vinculum, propugnaculum sanctitatis. Tolle perseverantiam, nec obsequium mercedem habet, nec beneficium gratiam, nec laudem fortitudo. Denique non qui cøperit, sed qui perseveraverit usque in finem, hic salvus erit². Saul cum esset parvulus in oculis suis, rex³ est super Israel constitutus: non perseverans in humilitate, et regnum amisit et vitam. Si cautela Samson, si Salomonis devotio perseverantiam retinuisset, nec is profecto privaretur sapientiæ, nec ille viribus. Ille summæ honestatis insigne, hanc totius probitatis unicam fidamque custodem custodiri a vobis firmiter, hortor et precor. Custodite diligenter quod libenter audistis. Mementote scriptum⁴, quia metuebat Herodes Joannem, et libenter eum audiebat. Sed beatus foret, si audita libenter æque servasset. Denique non qui audiunt, sed beati, inquit, qui audiunt, et custodiunt verbum Dei⁵. Servate proinde vos pacem fratribus vestris Pisanis, fidem domino papæ, fidelitatem regi, vobis honorem. Ille enim expedit, hoc decet, hoc justitia requirit.

17. « Audivimus venisse ad vos nuntios ducis Rogerii: quid attulerint, quidve retulerint, nos nescimus. Verum ego juxta illud poetæ (ut verum fatear) semper timui Danaos, et dona ferentes. Si quis forte in vobis (quod Deus avertat) rem tam fœdam committere deprehendatur, extendere vide licet manum ad turpe lucrem, hunc profluvium notate, et judicate hostem nominis vestri, civium proditorem ac venditorem communis honoris et honestatis. Si quis item susurro in populo, diaboli sibi assumens vicem, jurgia seminare, et pacem turbare velle reperiatur, quemadmodum ille discordiæ semper est amator et auctor: huic rigide censuræ remedio citius obviatur, eo quippe pessimæ, quo intine pesti. Hostilis exercitus vastat agros domosque spoliatur: prava autem consilia corrumpunt bonos mores, et modicum fermentum totam massam corrumpit. Scrute, plantate, negotiamini, ut antiqua mala non solum non iteretis, sed etiam de justis laboribus vestris exiari et delectere possitis, scriptum quippe est⁶: Redemptio animæ viri, propriæ divitiæ. Et rursum: Date eleemosynam, et omnia munda sunt vobis⁷. Quod si militare placet, et vestræ fortitudinis ac strenuitatis iterum experiri vires, arma probare delectat, non equidem id præsumendum adversus vicinos

¹ Bern. Ep. CXIX. — ² Psal. LIV.

³ Matth. X. — ⁴ 1. Reg. XV. — ⁵ Marc. VI. — ⁶ Luc. XI. — ⁷ Prov. XIII. — ⁸ Luc. XI.

et amicos : cum magis Ecclesie inimicos expugnare deceret, sed et regni vestri invasum a Siculis defendere coronam. Super illos sane et honestius acquiratis, et iustius possidebitis acquisita. Deus pacis et dilectionis maneat semper cum omnibus vobis. Amen ». Hactenus sanctus Bernardus ad Ianuenses.

18. *Adalbero archiepiscopus Trevirensis consolatur, et S. Bernardus iuste redarguit Innocentium II.* — Eodem anno Adalbero archiepiscopus Trevirensis mittit legatum ad Innocentium papam, archidiaconum Tullensem, cui ad ipsum litteras dedit¹, quibus eum ex iactura Beneventi atque Capuae facta per Rogerium (ut dictum est in fine anni superioris) nonnihil animo consternatum corroborat. Inter alia autem hæc habet : « Porro nostram Citramontanam Ecclesiam tam in nostro, quam in Francorum regno noveritis forem in fide, pacificam in unitate, devotam in vestra obedientia, promptam ad servilium. Nequaquam nos Beneventi, non Capuae, non ipsius Romæ terret (Deo sic iudicante) amissio, scientes Ecclesie statum non armis æstimari, sed meritis. Ipsius quippe, non alterius agnoscimus voces illas in Psalmo² : Si consistant adversum me castra, non timebit cor meum : si exsurgat adversum me prælium, in hoc ego sperabo. Propterea et nos, quia de Ecclesia sumus, non timebimus dum turbabitur terra, et transferentur montes in cor maris. Glorietur tyrannus Siculis, quantum vult, gloriatur in malitia, quod potens est in iniquitate : nostra autem virtus in infirmitate perficitur. Ecclesia quando infirmatur³, Pauli magisterio didicit esse potentior. Didicit e regione et Salomone⁴ quod prosperitas stultorum occidit eos, didicit et stultum firma radice cum viderit, statim maledicere pulchritudini ejus.⁵ Ideo cum sancto David sese in utroque consolatur, et hostium videlicet casu, et liberatione sui. At siquidem⁶ : Illi in curribus, et in equis : nos autem in nomine Domini Dei nostri invocabimus. Ipsi obligati sunt, et ceciderunt : nos autem surreximus et erecti sumus. Hæc paucæ vobis consolandi gratia, de quibus certus fui, fideli attestatione intinandum esse putavi, ad revelandam vel ex aliqua parte eam, quæ viscera vestra incessanter affligit sollicitudo omnium Ecclesiarum. Hoc quoque addo, dominum regem, (nempe Lotharium), Deo eum confortante, fervere et accingi ad liberationem Ecclesie, et parare sibi exercitum multum nimis; nos quoque fideliter ad hoc ipsum pro viribus laborare, exhortari, et sollicitate quos possumus, et cum tempus advenerit, non expensis, non personæ propriæ parciturum ». Hæc archiepiscopus Trevirensis ad Innocentium papam.

19. Quod autem contigisset surreptione malorum ipsum decipi Innocentium, ut præter jus

fasque e manibus ejus Rescriptum eliceretur adversus optime iudicata per eundem Trevirensis archiepiscopum, sanctus Bernardus ea, qua dono Spiritus dicendi libertate imbutus erat, ad eundem Innocentium papam pro eo litteras dedit, in quibus inter alia hæc habet de ira Dei, super Romanam Ecclesiam ob injustitias vigilante; ait enim¹ : « Pro his ac similibus necdum avertitur furor Domini, sed adhuc brachium ejus extentum, et virga illa apud Jeremiam vigilans super peccata nostra². Et quidem iratus est Deus schismaticis, sed Catholicis nequaquam propitiis, etc. » Recenset plura quæ indigerent in Galliis correctione, rursumque additis ad istas alii litteras hæc ait observatione digna de revocandis iudiciis perperam factis et Rescriptis surreptione emissis³ : « Hoc, inquit, solet habere præcipuum Apostolica Sedes, ut non pigeat revocare, quod a se forte deprehenderit fraude elicitum, non veritate promeritum. Res plena æquitate et laude digna, ut de mendacio nemo lucretur, præsertim apud sanctam et summam Sedem ». Ista Bernardus quam sapientissime.

20. *Moritur Henricus rex Angliæ, eique succedit Stephanus qui de libertate Ecclesie reddenda jurat.* — Eodem anno, kalendis Decembris, Henricus Angliæ rex, ubi regnasset annis triginta quinque et mensibus quatuor minus diebus quatuor, ex hac vita migravit. Ita Willelmus Malmesburiensis⁴, idemque recitat scriptam de obitu ejus Epistolam archiepiscopi Rothomagensis ad Innocentium papam his verbis :

« Domino et patri suo Innocentio papæ, servus Hugo Rothomagensis sacerdos, obedientiæ debitum.

« De domino meo rege, non sine dolore memorando, pia paternitati vestræ notificandum duximus, quia subita præventus ægritudine, nos, missis quam citissime legatis suis, ægritudinis suæ solatiis voluit interesse. Venimus ad ipsum, et cum ipso plenum mæroribus conceimus triduum. Prout ei dicebamus, ipse ore proprio sua fatebatur peccata, et manu propria pectus suum percutiebat, et malam voluntatem dimittebat. Consilio Dei, et nostro, et episcoporum, emendationem vitæ suæ observaturum sese promittebat. Sub ista promissione pro nostro officio, tertio eum, et per triduum absolvimus. Crucem Domini adoravit, Corpus et Sanguinem Domini devote suscepit, eleemosynam suam disposuit, ita dicendo : Solvantur debita mea, reddantur liberationes et soliditate quæ debeo : reliqua indigentibus distribuantur. Utinam sic fecissent, qui thesauros ejus tenebant et tenent ! Tandem illi auctoritatem de unctione infirmorum, quam Ecclesia a beato Jacobo Apostolo suscepit, studiose proposuimus, et ipsius pia petitione oleo sancto eum inunximus :

¹ Apud S. Bern. Ep. CLXXVI. — ² Psal. XXVI. — ³ 2. Cor. XII. — ⁴ Prov. I. — ⁵ Job. V. — ⁶ Psal. XIX.

¹ Bern. Ep. CLXXVII. — ² Jerem. I. — ³ Bern. Ep. CLXXX. —

⁴ Willelm. Malm. Hist. Novel. I. I.

sic in pace quievit. Pacem det ei Deus, quia pacem dilexit ». Haecenus Rothomagensis archiepiscopus ad Innocentium papam.

21. Suscepit regnum nepos ejus Stephanus favore et auxilio Henrici fratris sui Wintoniensis episcopi. Apostolicæ Sedis legati in Anglia : « Spe », inquit auctor, « captus amplissima, quod Stephanus avi sui Willelmi in regni moderamine mores servaret, præcipueque in Ecclesiastici vigoris disciplina. Quapropter districto sacramento, quod a Stephano Willelmus Cantuariæ archiepiscopus exegit de libertate reddenda Ecclesiæ et conservanda, episcopus Wintoniensis se mediatorem et vadem apposuit ». Juramentum est hujusmodi tempore coronationis, quæ facta est XI kal. Januarii :

« Ego Stephanus, Dei gratia, assensu cleri et populi in regem Angliæ electus, et a domino Willelmo archiepiscopo Cantuariæ, et sanctæ Ecclesiæ Romanæ legato, consecratus, et ab Innocentio sanctæ Sedis Romanæ Pontifice postmodum confirmatus, respectu et amore Dei sanctam Ecclesiam liberam esse concedo, et debitam reverentiam illi confirmo. Nihil me in Ecclesia vel in rebus Ecclesiasticis simoniacæ acturum, vel permissurum esse promitto. Ecclesiasticarum personarum, et omnium clericorum, et rerum eorum justitiam et potestatem, et distributionem bonorum Ecclesiasticorum in manu episcoporum esse perhibeo et confirmo. Dignitates Ecclesiarum privilegiis earum confirmatas, et consuetudines earum antiquo tempore habitas inviolate manere concedo et statuo. Omnes Ecclesiarum possessiones et tenutas, quas die illa habuerant, quæ Willelmus rex avus meus fuit vivus et mortuus, sine omnium calumniantium reclamacione eis liberas et absolutas esse concedo. Si quid vero de habitis aut possessis ante mortem regis, quibus modo careat, Ecclesia deinceps repetierit, indulgentiæ et dispensationi meæ vel discutendum vel restituendum reservo. Quæ-

cumque vero post mortem regis liberalitate regum, largitione principum, oblatione vel comparatione, vel qualibet transmutatione fidelium collata sunt, confirmo pacem me et justitiam in omnibus facturum, et pro posse meo conservaturum promitto. Forestas, quas Willelmus rex avus meus, et Willelmus II avunculus meus instituerunt et tenuerunt, mihi reservo. Cæteras omnes, quas Henricus rex superaddidit Ecclesiis et regno, quietas reddo et concedo. Si quis autem episcopus vel abbas, vel alia Ecclesiastica persona ante mortem suam rationabiliter sua distribuerit, vel distribuenda statuerit, firrum manere concedo. Si vero morte præoccupatus fuerit, pro salute animæ ejus, Ecclesiæ consilio eadem fiat distributio. Dum vero sedes propriis fuerint pastoribus vacuæ, et ipse et omnes earum possessiones in manu et custodia clericorum, vel proborum hominum ejusdem Ecclesiæ committantur, donec pastor canonice substituantur. Omnes exactiones et mescheningas, et injustitias, sive per vicecomites, vel per alios quoslibet male inductas, funditus extirpo. Bonas leges et antiquas et justas consuetudines in murdris et placitis et aliis causis observabo, et observari præcipio et constituo. Apud Oxeneford, anno Incarnat. Domini millesimo centesimo trigésimo sexto, regni mei primo ». Ita quæ a die Incarnationis Domini, et non a kalend. Januarii annum numerare incipiebat. Porro quæ scriptis præstitit rex, factis transgressus est, involvens se perjuriis; quod auctor malis consiliariis ejus adscribit.

Quod autem in hoc a se præstito juramento testetur regnum Anglorum ipsi esse confirmatum ab Innocentio papa, id scias ea de causa dictum, quod idem regnum esset feudatarium Romani Pontificis, adeo ut quilibet novus rex acciperet confirmationem ab eodem Romano Pontifice. Testatur id etiam suis litteris Henricus Secundus, de quibus suo loco dicemus.

Anno periodi Græco-Romanæ 6628. — Anno Æræ Hispan. 1173. — Anno Hegiræ 530, mchrodo die 11 Octobr., Fer. 6. — Jesu Christi 1135.

— Innocentii II pape 6. — Lotharii reg. 11. imp. 3. — Joannis Comneni imp. 18.

1. *Gotfridus episc. Carnotensis et S. Bernardus comitem Pictavorum a schismate retrahunt.* — Ann. 1 ad 8. Gotfridus Carnotensis episcopus, S. Sedis legatus, videns Aquitanie rebus non satis per litteras provideri, comite S. Bernardo, in eam profectus est : « Simul abbas et legatus in-

grediuntur Aquitaniam », inquit Ernaldus in Vita S. Bernardi lib. 2, cap. 6, « interim Gerardus (Engolismensis episcopus, qui se Anacleti antipapæ legatum dicebat) assensu comitis (sc. Guillelmi IX) Burdegalensem archiepiscopatum occupaverat, et simul Burdegalensem et Engolismensem detinebat

Ecclesiam. Sed effluentibus pecuniis, quas in assentatorum manus injecerat, et magis ac magis cognita veritate, jam defluebant ab eo subsidia principum, et perfidiæ ejus timebant existere defensores. Morabatur itaque in locis illis, in quibus securiorem se putabat, nec jam facile publicis sese conventibus presentabat. Hinc Gerardo absente facilior ad principem aditus fuit.

2. *Obitus Gerardi Engolism. legati antipapæ.*

— Legatus et abbas rationibus et exemplis usi sunt, quibus duritiam Guillelmi IX Pietavorum comitis domuere: «Pace itaque», subdit Ernaldus, «omni Aquitanie Ecclesie reddita, solus Gerardus perseverat in malis: sed non multo post, adveniente die ira, in domo sua miserabiliter extinctus est». Auctor tamen de Gestis Pontif. Engolismensis apud Labbeum Tom. II Biblioth. de Gerardo scribit: «Die proxima mortis sue accepimus, quod in confessione sua sacerdotibus dixerit, si partem Petri Leonis contra voluntatem Dei ignorans manu tenuerit, se confiteri et pœnitere, etc. Sequenti die Dominica migravit a seculo, MCCCXV anno ab Incarnat. Domini». Verum valde dubium, ne per assentationem hæc ab illo anonymo schismatico dicta sint.

3. *Thomas prior S. Victoris Parisiensis nefarie trucidatur.* — Annum, 8 ad 11. *Noterius* archidiaconus Ecclesie Parisiensis, ob res cuidam canonico per archidiaconatum suum iter facienti raptas, totum archidiaconatum interdicto suppositus; sed *Stephanus* episcopus Parisiensis ea de re non admonitus, licet tunc in archidiaconatu illo esset, hæsam putans jurisdictionem episcopalem, interdictum relaxavit. Archidiaconus autem putans episcopum magistri *Thomæ* prioris domus Sancti-Victoris Parisiensis consilio in agendis uti, ipsum destinavit ad necem, tandemque occidi jussit. Cædem et diem, quo ea patrata, Stephanus episc. Parisiensis *Golfredo Carnotensem episcopo et Apostolicæ Sedis legato* significavit litteris quarum initium: *Calamitatis novæ pondus*, in quibus ait Stephanus: «juxta domini Stephani castrum, quod Gorniacum dicitur, subito ab ejus hominibus, scilicet nepotibus Theobaldi (qui et *Noterius* dictus) archidiaconi, insidias mihi in via præstruentibus, assultum passus sum. Cumque nos inermes, utpote die Dominico et pacem ferentes incederemus, subito evaginatæ gladiis irrumpit super nos, et nec Deo nec dei sacræ, nec mihi, nec his qui mecum erant religiosis viris, honorem dantes inter manus nostras innocentem trucidaverunt». Divus Bernardus in Epistola CLIX ad Innocentium II in persona Stephani Parisiensis episcopi scripta idem habet: «Vir religiosus, prior Sancti-Victoris, magister Thomas in obsequio charitatis, in itinere quod indixerat pietas, in opere sancto, in sanctorum comitatu, in Dominico die, certe in sinu meo, et inter manus meas crudeliter ab impiis pro justitia excerebratus est».

4. *Conc. Jotrense ad parricidarum punitionem*

coactum. — *Golfridus* sanctæ Sedis legatus præfatis litteris acceptis ad Claramvallem convolvavit, mandavitque Rhemensi, Rothomagensi, Turonensi et Senonensi archiepiscopis, eorumque suffraganeis, uti certa die apud Jotrum (gallice, *Jouarre*) diœcesis Meldensis, quod concubium est sanctimonialium, frequentes convenirent. Quibus congregatis, acceptæ sunt ab *Hugone* Gratianopolitano episcopo, atque a *Guigone* priore Carthusiensium et a tota ejus familia, litteræ, quibus rogant, ut in sacrilegos homicidas Ecclesiastici rigoris intrepide gladium producerent. Celebrata Synodo, Innocentius II sancti Bernardi litteris invitatus confirmat quæ in ea decreta fuerant, aitque: «Quod ergo a vestra dilectione apud Jotrum nuper judicatum est, Apostolica auctoritate statuimus esse firmatum. Sed quia nimis remissa videtur esse vestra sententia, addendo censemus, ut in quibuscunque locis præfati sanguinarij præsentibus fuerint, divina ibi non celebrentur officia; et si quis sacrilegos illos clericidas, ac cælestis et collegii perturbatores et effusores Domini sanguinis in sæculo remanentes manuteneat et confovere tentaverit, anathematis sententia percussatur». Denique Petrus Venerabilis Cluniacensis abbas, Epistola XVII libri primi ad Innocentium II data post Concilium Jotrense, ait: «Nuper in partibus nostris archiepiscoporum, episcoporum, abbatum, ac multorum religiosorum et sapientum personarum congregatæ sunt, et Concilio habito in hujusmodi sacrilegos severitatis sententiam protulerunt. Confirmet ergo, si placeat, Apostolica auctoritas, quod ab eis bene actum est: suppleat si quid minus severe decretum est, ut et impii debita ultione puniantur, et ab eorum imitatione cæteri deterreantur».

5. *Cædes Thomæ et Concilium pertinent ad annum MCCCXIII.* — Nunc hujus cædis, et Concilii Jotrensis annus variis sedibus jactatus sedulo inquirendus. Joannes Picardus in Notis ad Epistolam divi Bernardi CLVIII, et ex eo Labbeus tom. X Concil., Maricæ in Annal. Cisterc., ac Henschenius ad diem primum mensis Aprilis, in Comment. prævio ad vitam S. Hugonis episcopi Gratianopolitani, hæc anno MCCCX contigisse persuasum habuere. Bulaeus tom. II Hist. Universitat. Parisiensis pag. 121, et Mabillonius in Chronologia Bernardina illa ad annum MCCCXI differunt. Mabillonius tamen in Notis fusioribus ad Epistolam CLVIII divi Bernardi eadem eum anno MCCCXIII, Baronius vero cum præsentibus connectunt. Verum tam eadem S. Thomæ, quam Concilium Jotrense ad annum MCCCXIII pertinere, mihi pene certa stat sententia. Primo, quia *Golfridus* Carnotensis episcopus anno tantum MCCCXIII legatus Sedis Apostolicæ ab Innocentio II ante suum e Gallia discessum constitutus fuit; neque enim præsentem summo Pontifice legato opus erat, uti suo loco ostendimus. Secundo, quia Concilium Rhemense anno MCCCXI tempore Quadragesimæ ad festum sancti Lucae ab Innocentio II indictum fuit, et cædes hæc, ut statim videbimus, mense Augusto

peracta. Quare alio Concilio opus non fuisset. Tertio, ex citatis Petri Venerabilis verbis manifeste liquet, tempore quo hæc accidere, Innocentium II in Galliis non fuisse, sed in Italia; alioquin non diceret sanctus abbas, *nuper in partibus nostris*.

6. *Hæc epocha magis confirmatur.* — Denique in Necrologio Victoriano ad diem xx mensis Augusti legitur: « Anniversarium Magistri Thomæ prioris hujus Ecclesiæ, qui pro defensione justitiæ ab inimicis justitiæ crudeliter interfectus, et vivens et moriens, honestatis et patientiæ dignam atque laudabilem sequacibus suis vite formulam dereliquit, tertio decimo kal. Septembris », qui dies an. mcccxxxiii in Dominicam incidit, eoque constat, sanctum virum non alia die a Dominicali trucidatum fuisse. Verum quidem est, similes annotationes sæpe a posterioribus additis fuisse Martyrologiis ac Necrologiis, ipsosque Victorinos istam parum curasse, cum ab aliquot annis ejus sepulchro inscripserint, eum anno mcccxxxi peremptum esse, licet eo anno dies xx Augusti in feriam quartam ceciderit; sed cum eadem annotatio in Necrologio sancti Ginnaili Corboliensis etiam legatur, et sancti Thomæ martyrium in nullum ex præcedentibus annis competere possit, perspicuum est in utroque Necrologio dici, quo contigit, affixum fuisse.

7. *Innocentius II jubet Thomam honorificentius sepeliri.* — Antequam Synodus Jotrensis congregaretur, Innocent. II, postquam de commisso scelere certior factus est, scripsit *R. Rhemensi, H. Senonensi et corum episcopis*, Rainaldus scilicet et Henrico archiepiscopis, litteras tom. v Spicilegii recitatas, quibus eos acriter urgit, ut parricidas illos et hujus criminis conscios plecerent: « Si quid enim, inquit, a vobis dissimulatum vel omissum fuerit, cognoscetis id ad animarum vestrarum et officii periculum pertinere. Sane quidquid super his prudentia vestra decreverit, B. Petri et nostra erit firmitate subnixum. Sanctorum siquidem Patrum decreta, et novissima et antiqua Conciliorum statuta vos instruant, quid oporteat in hujusmodi casu decerni. Ad hæc mandamus, ut corpus præfati boni viri, qui coram Iudice superno modo de sua justitia et innocentia testimonium perhibet, et sub obedientia vivens in obsequio proprii est interfectus episcopi, in sua Ecclesia honorifice tumuletur. Data Pisis xxi Decembris ». His litteris acceptis, corpus Thomæ in Basilicam elatum ad dexteram summi papæ, idque VII idus Martii, ad quem diem in Ecclesia S. Victoris recitatur rei geste summa in hac sententiam: « Commemoratio domini Thomæ prioris hujus Ecclesiæ, quando corpus ejus præcepto domini papæ Innocentii de claustrum translatum, et in Ecclesia sepultum est ». Joannes Picardus citatus, qui hanc annotationem exhibet, ait Innocentium II sub initium anni mcccxxxi Lutetiam ingressum, mox Sancti-Victoris adiisse cornubiū, et præcepisse corpus sancti viri in honorificentiori quam fuerat

loco collocari. Verum Innocentius II eo Christi anno, mense Martio, Leodii fuit, non vero Lutetiæ, ut suo loco probatum est.

8. *Illud anno mcccxxxiii ab Innocentio II præceptum.* — Bukeus etiam laudatus putavit, prædictas litteras ad utrumque archiepiscopum datas, quia paulo tardiores fuerint in exequenda sententia ad se ab eo missa, indeque Innocentium II aliis litteris eis significasse, quam moleste tarditatem istam ignaviamque ferret. At ex posteriorum harum litterarum lectione manifestissime apparet eas Pontificis sententiam non subsecutas esse, sed præcessisse. Sed cum Bukeus mortem Thomæ cum anno mcccxxxi male copulasset, non potuit in harum posteriorum litterarum epocha non errare, quia *Innocentius II* toto an. mcccxxxi Pisis affuit. Porro nulla ratio afferri potest, quæ Thomæ eadem post annum mcccxxxiii differri debere indicet. Quare non video mortis Thomæ et Concilii Jotrensis epocham amplius in dubium revocari posse; eo enim anno Gotfridus Carnotensis episcopus Apostolicæ Sedis legatus in Gallia erat, ut fidem facit Gautierus monachus Cluniacensis in libello *de Miraculis B. Virginis Mariæ*, tom. I Biblioth. Labbei, pag. 650 relato, in quo is auctor dicit se eo anno primum miraculum, quod in medium adducit, cognovisse « ab uno venerabili Gotfrido Carnotensi episcopo, et Apostolicæ Sedis legato in conventu nobilium personarum referente ». Ex quibus tandem omnibus consequens est, Hugonem Gratianopolitanum episcopum, qui cum Guigone priori Carthusiensium ad Concilium Jotrense adversus parricidas Thomæ scripsit, non esse sanctum Hugonem anno mcccxxxiii, mense Aprili demortuum, ut duarum priorum sententiarum a nobis confutatarum sectatores autumarent, sed alterum Hugonem Ordinis Carthusiani ejus in episcopatum successorem, ut iam Baronius, quam Mabillonius recte viderunt.

9. *Archembaldus subdecanus Aurelian. eodem quo Thomam anno occisus.* — Non solum divus Bernardus anno mcccxxxiii scripsit Epist. clym, clxx et clxx, occasione cædis *magistri Thomæ prioris Sancti Victoris*; sed etiam Epistolam clxxi, occasione cædis *Archembaldi subdecani Aurelianensis*, quum utramque hoc anno patratam esse credebat Baronius, qui num. 8 in margine eandem citat. Verum utramque facinus anno mcccxxxiii commissum; nam Ordericus lib. 13, pag. 896, ad annum mcccxxxi varia, quæ diversis annis accidere, referens, scribit Hugonem decanum Aurelianensem a temerariis hominibus in via percutsum fuisse, additque: « Tunc etiam Sancti-Victoris canonicus, vir magnæ auctoritatis, interemptus est, ejus intersectionem Stephanus Parisiensis episcopus adstans cum ingenti moreore contemplatus est ». Errat tamen Ordericus, licet hoc tempore in Normannia vixerit, dum loco Archembaldi subdecani Aurchanensis, habet Hugonem decanum; divus enim Bernardus in Epist. clxxi ad Innocentium II, aliique, clericum tunc occisum

Archembaldum subdecanum Aurelianensem appellant. Porro utramque caedem eodem fere tempore factam indicat etiam Bernardus in ea ad Innocentium II Epistola: « Vox sanguinis, inquit, Archembaldi subdecani Aurelianensis invaluit. Nam ecce, pro dolor! juxta prophetam: *sanguis sanguinem tangit*, et simul juncti fortius clamant ad vos de Francia. Clamat, inquam, et vociferatur uterque sanguis, etc. Si, inquam, vigor Ecclesiasticus pepercerit istis, Joanni dico (interfectori Archembaldi), et Theobaldo Noterio » Thomae interfectori. Quo ex loco obiter observabis, quantum hallucinati fuerint viri docti, qui Thomae caedem cum anno mxxx vel cum anno mxxxi connexuere; cum duobus illis annis mense Augusto, quo eam confisge diximus, Innocentius II fuerit in Francia, et tamen teste Bernardo, extra eam agebat hujus carnificinae tempore. Perperam etiam Mabillonius in Notis fusiorebus ad Epist. ccm.v S. Bernardi, ex laudato Orderici loco deducit Hugonem decanum in Joannis Aurelianensis episc. locum subrogatum fuisse, et id male ab historicis Ecclesiae Aurelianensis pretermisum, cum Ordericus eo loco non sequendus, sed corrigendus sit.

10. *Breve inter utrumque caedem intervallum fuit.* — Idem Mabillonius in brevi nota ad Epistolam sancti Bernardi cxi, ait Bernardum contrarium esse Petro Venerabili a Baronio num. 8 citato, in lib. 1, Epist. xvi, ubi dicit Petrum insinuare Archembaldum de medio sublatum ante Thomam Victorinum, his verbis: « Quorum impunitas sceleris arma ministrat furoris: ut sicut post Aurelianensem subdecanum ad dominum Thomam Parisiensem, quia prior inultus remanserat, persecutorum gladius se convertit ». At Bernardus indicat tantum spatium, quod inter utramque caedem intercessit, breve fuisse. In Concilio Jotrensi tam de caede Archembaldi, quam de caede Thomae Victorini actum, ut docet Epist. Innocentii II, tom. x Conc. pag. 397, in qua prius Thomae, quam Archembaldi caedes memoratur. Mabillonius in Notis fusiorebus ad Epistolam divi Bernardi cit., refert Epistolam Innocentii II *Gaufrido Carnotensi, Apostolice Sedis legato et Stephano Parisiensi episcopo* datam, qua mandat, ut interfectores Aurelianensi Ecclesiae, quam graviter laesere, satisfaciant. Epistola data *Pisis, VI idus Januarii*, anni sc. praesentis, vel saltem antecedentis, cum ex dictis utrumque flagitium ab anno mxxxiii removeri non possit.

11. *Adalbertus S. Sedis in Germania legatus.* — Ad num. 11 et seq. Floreat hoc tempore in Germania Adalbertus Moguntinensis archiepiscopus post biduum, ut legitur apud Dodecalinum abbatem in Chron. et Serarium in episc. Mogunt., demortuus, cujus Baronius hoc et praecedentibus annis memnit. Verum Charta a Baronio et a Serario in episc. Moguntinensibus relata, qua Adalbertus se gratum Moguntinensibus ostendit, quod sibi olim ab imperatore captivo favissent, in sub-

scriptione mendosa est. Illis enim verbis clauditur: « Facta sunt haec Dom. Incarn. mxxxv, Indict. xii, et confirmata regnante domino Lothario imp. ejusdem nominis III, anno regni ejus ix, imperii vero ii feliciter »; loco enim mxxxv, legendum mxxxiv, ut tam Indictio xii quam annus regni ix et imperii ii demonstrant. Cum vero in ea Adalbertus se Sedis Apostolice legatum appellet, intelligimus legationem Alberonis archiepisc. Treverensis anno superiori finitam fuisse. *Adalberto* in eam legationem successit *Theodinus* S. Rufinae cardinalis, ut ex mox dicendis liquet.

12. *Principes imperii cum Lothario imp. pacem jurant.* — Gesla vero in Germania chronographus Hildensheimensis ad annum mxxxv his verbis narrat: « Dominica ante mediam Quadragesimam, scilicet XVI kal. Aprilis, frequens principum fere totius regni conventus fit apud Bavenberg imperatore praesente. Ibi, Dei gratia aspirante, Fridericus dux Suevorum (qui cum Conrado fratre ad imperium aspiraverat) comitantibus principibus in concordiam cum imperatore sociatur. In festo Pentecostes apud Magadeburgum primum principes regni coram imperatore firmissimam pacem domi forisque ad decem annos juraverunt. In festo sancti Michaelis, in loco qui dicitur Mühlenheim, Conradus frater Friderici ducis imperatori reconciliatur ». Jam anno mxxxiii Conradus cum eo in gratiam redierat, sed aliquod postea dissidium inter utrumque exortum esse oportet. Trithemius in Chron. Hirsaug. principes, qui praefato conventui interfuere nominat, et *Conradi* cum imperatore reconciliationem paulo distinctius refert.

13. *Rogerus Siciliae rex plures uxores habuit.* — Annum 13 ad 16. « Cum rex Rogerius eodem anno », inquit Alexander abbas initio lib. 3, « non multo post corporis langore corripitur (scilicet in Sicilia, ubi hujus anni initio erat), sed cum Deo tribuente citius convalesceret, Alberia regina conjux ipsius, mox infirmitatis tacta incommodo ad extrema pervenit: quae videlicet mulier, dum vixit, religionis gratia atque elemosinarum largitione fertur plurimum enituisse ». Haec regina *Elvira* appellata, Alphonsi VI Castellae et Legionis regis filia erat. Aliqui eam *Isabellam* dictam, et e sanguine regum Franciae procreatam volunt; sed Sandovalius fol. 96, ait id nullo antiquo monumento probari. Illud certum, *Elviram* Isabella Alphonsi regis quartae uxoris filiam extitisse, cum id Pelagius Ovetensis testetur. Cum vero *Elvira* trium Rogerii Siciliae regis filiorum mater existerit, ique jam militarent non multum juvenis esse debuit. Pyrrhus in Historia Siciliae graviter peccavit, cum *Anacleti antipape* sororem priorem Rogerii regis uxorem, secundam vero, quae parvo tempore vixit, *Ayrolidam*, et tertiam, quam anno mxcv demortuam vult, *Elviram* dictam scripsit. Haec enim omnia absurda. *Ayrolidam* conjugem ejus fuisse probat tantum ex libro ducis Gardiae, cujus

utpote recentioris auctoritas fidem non facit; neque hujus reginæ alibi mentio extat. Rogerium tamen Anacleti sororem duxisse, Ordericus lib. 13. pag. 898. nos dubitare non patitur. Fest nomen ejus taceat, quod nec alibi legitur: « Filiam Petri Leonis, inquit, sororem Anacleti Pontificis uxorem duxit, et ab eodem coronatus regium stemma (id est, diadema) nunc gerit », hoc scilicet anno, vel aliquo ex sequentibus, quibus jam diximus, eum librum illum xii composuisse.

14. *Falsus rumor de morte Rogerii magnorum motuum causa.* — « Regina mortua », ut subdit Alexander abbas, « rex ipse ita merore contritus est amaritudine, ut multis se diebus intra cameram recludens, exceptis ejus privatis obsecutoribus non apparuerit; unde accidit, ut fama paulatim diffusa, non solum iis qui longe, verumetiam qui prope erant, vere obisse existimaretur. Quo videlicet rumore princeps Robertus, qui Pisam auferat, sollicitus cum immensa bellicorum Pisanorum manu, navigio advectus in Neapolis urbe excipitur, fivente sibi Sergio ejusdem civitatis magistro, militum qui jam cum eo præmissis alterutrum nuntius conspiraaverat ». Falco vero scribit: « Anno mcccxxv Dom. Incarnat. et sexto anno Pontificatus domini Innocentii, mense Martio, Indict. xii. Hoc anno princeps ipse septimo die stante mensis Aprilis (id est, die xxv mensis Aprilis juxta ejus supputandi modum) cum viginti navigiis Neapolim venit, et comprehendit Aversam et Cuenlum, quibus comprehensis Neapolim princeps ipse revertitur, et ibi moratus est cum Pisanis ipsis. Eodem anno præfatus comes Rainulphus venit Neapolim cum quadringentis militibus, et civitates suas et oppida dimisit ». Fusus hæc refert Alexander, atque, vulgato falso Rogerii regis mortis rumore Rainulphum bellum renovasse: « Comes autem Rainulfus, et ipse eodem rumore deceptus, regis obitum vere contigisse credebat. Qui cum principem cum ingenti armorum multitudine reversum comperisset, corde respirans latrabatur valde, quod rege defuncto ten pus jam accidisse opportunitum videretur, quo et idem princeps Capuam, principatus avissi honorem, et ipse (sc. Rainulphus) terras, quibus deminutus fuerat, recuperare possent. Perjurium itaque contra regem Rogerium perpetrare non timens, sine ulla diurni dilatione donativo suo milites circiter quadringentos collegit; atque cum eisdem ipsis non longe extra muros Capuæ progressus est, expectans si forte quoquo modo civitas ipsa principi restituenda ab eis, qui ampliori ejusdem amore connecti videbantur, sibi redderetur: cuius quoque prodicionem, cum non ad effectum exivisse comperisset, immenso animi merore contritus est.

15. *Bellum in regno Neapolitano renovatur.* — « Deinde aurora illucescente, per campos passim discurrens, copiosam animalium diversarumque rerum rapinam in suburbanis ejus exercuit: sique Capacium munissimum ejus op-

pidum, quo iter assumpserat, limido corde regreditur. Guerra itaque hoc modo adversus regem incepra est, etc. Eodem namque tempore cancellarius regis, Warinus nomine, vir quidem litteris apprime eruditus, et in secularibus negotiis prudentissimus, et Joannes ammiratus cunctam Terram-Laboris tunc temporis procurantes custodiebant, etc. Erat autem in eadem Terra-Laboris civitas quædam nomine Aversa, quam Normanni, cum Apuliam aggredierentur, primitus condiderunt, etc. ad quam cum Joannes ammiratus et Warinus cancellarius venissent, cœperunt, etc. cohabitantes diligenter præmonere, quatenus nullo inquam amore seu timore concessi regiam fidelitatem relinquerent, etc. Igitur princeps Robertus de regis obitu adhuc incertus non desinebat intra mentis suæ volvere aream, quomodo qualiterve principalem et demplum apicem resumere posset. Misit itaque ad Rainulphum comitem, uti ad se quantocius festinaret, etc. Cum ille de regis morte, ut jam dictum est, nequaquam cunctaretur, mox cum ipsa militari, quam collegat acie, ad illum Neapolim sitienter properavit, cuius quoque adventu princeps ipse, Sergiusque magister militum, ad majorem resumiendum audaciam vehementer sunt vegetati, putantes per eum, eo quod vir bellicosissimus esset, ad effectum rei quam desiderabant feliciter perferere.

16. *Aversa a Rogerio rege deficit.* — « Firmata itaque ad invicem conspiratione, hoc tandem apud se firmiter proposuerunt, ut et princeps et comes sua ablata ad integrum sibi restituerentur, et magister militum Neapolim, et cætera quæ jure sibi suppetebant, securiter possideret. At rex sicut et prius, ita et tunc extinctus credebatur, de cujus quoque vita nonnulli fidelium etiam suorum heresitabant, præsertim cum instantibus hostibus plus solito venire moraretur; sed et si quis veniens eum vivere vel venire assereret, jam audiri contemnebatur: cum multis aliis ante venientibus atque id ipsum asserentibus, etc. Jam enim Madius mensis cursus sui metam attingebat ». Aversæ cives a Rogerio deficientes sese Rainulpho dedidere; sed cancellarius et ammiratus Rogerio regi Capuam aliasque arces conservant, ut prodit Alexander, qui addit, principem irritò conatu Capuam insidiis ingredi tentasse, eique adhaerentes delentos fuisse a cancellario, qui eos *Salernum*, ut ibi custodirentur, misit. Parte alia ammiratus ita prudenter se gessit, ut soli defensioni intentus hostes cibari deficientes recedere coacti fuerint. Princeps et magister militum Neapolim profecti sunt, et Rainulfus comes *ad custodiendam Aversam* delegatur.

17. *Rogerus rex summo gaudio excipitur in Apulia.* — Interea, uti habet Falco pag. 297, rex « medio mense Junio venit Salernum ». Quod Alexander testis oculatus clarius narrat: « Dum ergo res ita haberentur, ecce subito rex Rogerius, quem omnes sui sitienter expectabant, quemque

inimici ejus non vivum credebant, reppureis undis adveetus quinto die intraute Junio Salernum ingreditur : cui cum de navi exeunti universus civilis populus unanimes occurrissent, tanto excepti sunt gaudio, ut pro eo Deo gratias omnes exclamarent : cujus adventum et Beneventani audientes ita ipsi immenso sunt exultati tripudio, ut in urbe, meipso præseute et audiente, Ecclesiarum signa simul pulsarentur, et ab archiepiscopo ad monasterium usque S. Sophiæ cum hymnis et laudibus clericalis ordo processerit ». Notat Alexander regem protestatum esse se neque Rainulpho comiti, neque Sergio militie magistro ob eorum perfidiam et perjurium parcere velle, sed principi Capuano veniam obtulisse, quia « iram ejus magis delitescendo fugerat, etc. Si tamen ab inimicis, videlicet magistro militum et comite Rainulpho discedere vellet », sed hunc oblatam clementiam respuit.

18. *Aversam capit evertitque.* — « Cum ergo princeps hoc quod mandatum ab eo fuerat contemnendum elegisset, rex illico coacta in unum quam collegerat militum peditumque innumera expeditione, qua major nulla alia antea ab eo habita est, ad aggrediendum Aversam, qua comes Ranulfus ad custodiendum remanserat, toto animo tendit, cujus aggressionem aspernam Aversani formidantes, cæperunt omnes, quicumque citius poterant, fugam arripere, atque Neapolim ad se ibi tuendum propere. Comes autem cernens se ita fugiendo, ab omnibus præ timore derelinqui, bellum sine dubio regi inferendum sæpe comminatus fuerat, vix tandem cum paucissimis fuga ab eo elapsus est, atque Neapolitanis mœnibus, quibus tunc princeps magisterque militum adhæserant, se nimis confusus recepit, etc. Cum ergo rex super Aversam irruens comitem fuga evasisse comperisset, doluit valde, quod captionis suæ retia evadens ultionem ipsius meritam non fuerit expertus : qui deinde tanto mentis furore accenditur, ut tota urbs prius omnino depopulata ignis post incendio traderetur ». Addit postea de Aversa : « Frumento et vino carnisque edulio ita feracior extiterat, ut fere nullus in ea habitantium in victu egeret; unde contigit, ut præne omnes in ea effrenatus turpi libidini subderentur : ob cujus piaculum, quo se moderari neglexerunt, Deus magis offensus, sic eam, ut aestimo, per Rogerium delere decrevit.

19. *Agrium et suburbana Neapolis depopulantur.* — « Postquam Aversa deleta fuisset, rex postmodum suburbana ipsius concremari jussit. Deinde appropinquans Neapolim, inter oppidum, quod dicitur Cuculum, patriæque lacum, castra dixit : ibique tandiu moratur quouque et cuncta suburbana Neapolis in partibus illis ignis incendium consumeret, segetesque universæ a frumentatoribus suæ expeditionis depopularentur. At princeps Robertus comesque Ranulfus Sergiusque magister militum ita præ formidine ipsius intra urbem in-

truduntur, ut nec de porta bellaturi exire audent. Cumque omnia ibi consumpta fuissent, iterum rex Aversam destructam repetit : qui etiam illic diligenter jubet, ut si quid inter Aversam, Neapolimque, quod comburendum esset, incombustum remansisset, omnino combureretur : ubi quippe moram tandiu fecit, donec et rebus agrariis quæ superfuertant universis consumptis, solum telluris omnino vacuum dimitteretur ».

20. *Neapolim incassum obsidet.* — Aversæ excidium Falco, qui a Rogerio rege abhorrebat, et Innocentii II partes tuebatur, pag. 297 etiam narrat : « Cum rex stragem illam fecisset, super Neapolim venit, et diebus novem eam obsedit ; sed populus civilis, et principes (nempe Capuanus) nihil ex eo trepidabant. Rex autem civitatem illam capere non posse aspiciens, eam dimisit, et Aversam perrexit : et eam reedificari præcepit ». Verum Rogerius Aversæ reedificationem non præcepit, nisi postquam hoc anno circa exeuntem Augustum iterum ad Neapolim castrametatus est. Rogerius rex, postquam Neapoli recessit, ut refert Alexander abbas, fanum Sanctæ-Agathæ, et dein Cajacium, duo oppida munitissima, aggressus est, et capto Alifio, Neapolim obsidione cinxit. « Post hæc coacto in unum exercitu, quem secus fluenta Volturni reliquerat, Neapolim, qua hostes ejus contra se suscepti rebellant, obsessurus properat ». Sed milites ejus « dierum æstum Cancularium non ferentes », ceptum circumvallationem dimisit, indeque elicio Falconem prætermittit Rogerii priori expeditione adversus Neapolim, de posteriori tantum locutum esse, quia nonnisi post hanc Aversam reedificari præcepit : « Quibus ita dispositis », inquit Alexander, « perrexit Cuculum, quod dum ipse a Sicilia moram redeundi faceret, a Pisanis quos secum princeps duxerat incassum, eo quod Neapolitanis jubente ipso adversaretur, ex parte etiam fuerat subversum. Deinde prævidens magis Aversæ restitutione, rebellis Neapolis posse restringi superbiam, perrexit illuc : atque eodem, quo prius fuerat, jussit restaurari situm ; atque ad eam inhabitandam, cunctos, qui prius illam inhabitaverant, redire permisit, etc.

21. *Pisani Amalphiam depopulantur.* — « Cum ergo prædicti principes civitatis conclusionem ita coacercentur, hoc tantum ab eorum solertia providetur consilium, ut oculus Pisam dirigentes, ut etc. quatenus cives, etc. eis celerrimum in extremo jam positus opulacionis succursus impenderent ». Illius ad Pisanos delegationis non meminit Falco, sed tantum hæc habet : « His ita decursis, populus Pisanorum cum aliis viginti navigiis quæ supervenerunt, civitatem Amalphitanam pergunt, et eam comprehendunt, et ejus universa bona diripiunt ; sicque divitiis multis locupletati, Pisas redeunt simul cum principe », nempe Capuano ; sed tacet Falco Pisanos Amalphiam male fuisse habitos, quod Alexander non prætermisit. « Cum ergo, inquit, immensa acies ab eis directa cum

ratibus æquora sulcando Neapolim tendissent, istiusmodi præfirmantur consilio, ut urbem Amalphiam, inchoante auroræ ortu, subito aggredientes, aut prædarentur, aut regi eriperent. Erat autem tunc Amalphia omnibus pene evacuata belligeris viris, etc. Venientes itaque ipsi Pisani, subito inchoante auroræ luce invaserunt urbem, nulloque resistente eam funditus impieque depopulantur. Cumque urbe tota depopulata, universa ad classem spolia transportata fuissent, mox scala oppido cæterisque Amalphie munitionibus invasis, novissimeque quoddam munimen, quod dicitur *Fracta*, expugnare nititur.

22. *In Pisanos Rogerius irruit, et eos male habet.* — « Dum ergo rex Rogerius, ad reparandam Aversam bellica constipatus expeditione sedulus intenderet, intimatum est sibi, quod navalis prædantium manus Pisa adveniens Amalphiam proculdubio invaserat. At ille cognito hoc, concitus, ipsam Aversæ restitutionem pro tempore dimittens, castra movit, Amalphiam violenter de manu excussurus. Quid multa? Dum ergo præfatum munimen, (*Fracta*) sicut jam dictum est, expugnaretur, ecce regis exercitus ex improvise irrumpebat, partem ipsorum cæde prosternunt, partem vero captivos violenta subdunt: quorum videlicet numerus inter necatos et captos mille quingenti fuisse referuntur. Ex consulibus autem ipsorum duo capti sunt: tertius vero percussus interit: qui autem ad puppes remanserant, vel timore coacti ad eas fuerant reversi, innumeris quibus onustati fuerant spoliis, fugam arripiendo evaserunt. Liburnarum vero numerum quidam asserunt fuisse quadraginta tres, alii plures; captivorum autem multitudinem per diversa rex dispersiens loca vinculis mancipandos direxit. Cæterum piratæ ipsi Neapolim redeuntes cum Pisanis, quos princeps secum duxerat, relictis ibi ad custodiam nonnullis ipsorum, simulque etiam cum eodem principe Pisani ingressi sunt, veris tempore in adiutorium Neapolitanorum denuo reversuri. Verum Sergius magister militum, comesque Rannulfus cum filio suo Roberto in urbe defensionis ejus causa remanserunt, etc.

23. *Alia gesta militaria Rogerii.* — « Rex denique, in unum rursus collecto immenso exercitu, Neapolitanorum vitiferas arbores, in quantum propriis accedere potuit, omnes succisurus regreditur. Succisione itaque eadem circumquaque perpetrata, Aversam, quam pro tempore, ut jam dictum est, reedificatione inconsummata dimiserat, consummaturus revertitur ». Expeditionis navalis a Rogerio susceptæ Alexander non meminit, sed eam Falco narrat: « Rex Pisanorum exercitum reverti comprehendens iterum Neapolim obsedit, cumque die quodam in festivitatem Nativitatis S. Mariæ rex ipse navale bellum cum Neapolitanis incipere vellet, ex subito tempestas affuit, et omnes naves illas dimisit, ita quod in profundum mergi putarent, et sic ad portum Puteo-

lanum revertuntur. Tum videns, neque mari neque terra contra civitatem agere, navigia illa reverti præcepit, et ipse Salernum repedavit. Deinde Siciliam ingressus est ». Verum Alexander regressus Rogerii in Siciliam mentionem non facit, sed ait: « Videns (nempe rex) se imminente jam hyeme non ultra diu secum posse retinere exercitum, sibi que quantocius repetendi Siciliam necessarium fore, ejus mox disposita que fienda erat restitutione, ordinatisque usquequaque per oppida ad tuitionem pedestribus ac militariibus excubiis, Beneventum regreditur, figens castra subulis Padulum, oppidum non longe a lumine Caloris (in provincia principatus Ulterioris hodierni): ad quem mox pro parte omnium civium nonnulli ex primoribus Beneventanæ urbis cum archiepiscopo (Roscemanno Anacletista) exeuntes, benigno ac familiarum famine ab eo communiti sunt, ut de ejus penitus amoris nihil hæsitarent æquitate; diligenter pacis vinculo connecti starent, ita ut nullum dissensionis civilis adinventorem sine justa animadversionis censura dimitterent, simulque fidelitatem ipsius, salva Apostolica fidelitate, devotissime contra omnes custodirent ». Omnes delegati isti se nunquam ab Anacleto defecturos polliciti sunt.

24. *Rogerus Alfonsum filium Capuæ principem designat.* — « Postera die rex Rogerius filium suum, nomine Anfusum (id est, Alfonsum) bonæ indolis puerum, cum favore optimatum militumque omnium, Capuanum per vexillum sublimavit principatus honorem ». Anonymus Casinensis juxta Caracoli editionem locat hæc ad an. mccccv, qui nobis est mccccvi, qui ultimus annus notatus reperitur Cod. 199, ut ait Peregrinus, qui de hoc hujus anonymi errore in suis Notis pag. 122 hæc habet: « Quod autem ad consignatum ejusce rei gestæ annum spectat, in Cod. 199, notatur institutum principum Anfusum, imperatoremque Lotharium in Liguriam advenisse uno eodemque anno mccccvi. De Lotharii adventu postea videbimus. Anfusum vero principis dignitate a patre decoratum, statim post urbem Neapolim ab eodem rege terra marique, sed frustra oppugnatam, id in anno contigit mccccv, mense Septembri, auctore Falcone, qui tamen nil de Anfuso; atque antequam idem Rogerius mare ingressus Siciliam cum immensa expeditione veris tempore ad expugnandum rursus Neapolim reversurus, repetisset, credendum oculato est testi Alexandro Telesino libro predicto, cap. 27 et seqq. Nostri itaque anonymi textus hac parte luxatus censendus certe est, novique Campani principis inauguratio ad jam dictum annum mccccv fienda kalendis Octob. vel circa. Quod etiam ex observata in antiquis Chartulis serie annorum ejus principatus clarissime aperitur ». Ita Peregrinus.

25. *De aliis Rogerii regis filiis.* — « Rogerius præter Alfonsum », inquit Alexander, « habebat et alios duos liberos adolescentiores, forma specio-

sissimos, morumque honestate præclarissimos, necnon ad suscipiendum militiæ cingulum jam ntrosque adultos, quorum unum, qui erat primogenitus omnium fratrum, Rogerium nomine, jam ducale honore, alium autem principatu Barensi provexerat. Erant autem ei duo filii minimi, qui sub tenera adhuc pueritiæ ætate degentes sic in regia aula manebant ». Ex duobus principibus illis unus erat *Guillelmus* filius ejus legitimus ex Elvira regina, qui postea ei in regnum successit. Quoad alterum, asserere ausim fuisse *Henricum*, filium Rogerii ex Elvira regina, cujus Romualdus Salernitanus in Chron. meminit, neque enim cum fuisse *Simonem* spurium Rogerii regis filium mihi persuadere possum. Alexander per *liberos* filios intelligit legitimos, et perspicuum est eos, quorum mentionem facit, æquales natalibus, et ætate tantum diversos fuisse. Pyrrhus Capaciarius et Beltrammum reprehendit, qui in suis de regno Neapolitano tractatibus *Tancredum* secundum Rogerii regis filium fuisse tradunt. Verum quidem est, Falcandum et Romualdum Salernit. ejus non meminisse, sed Alexander abbas, testis oculatus et gravis, affirmat *Tancredum* secundum Rogerii regis filium principem Barensium dictum esse; et Peregrinarius in Notis ad anonymum Cassinensem pag. 122, loquens de evocatione *Tancredi* ad principatum Barensium, et Alphonsi ad Capuanum, inquit: « Campanus (id est, Capuanus) itaque principatus post Barensium acquisitus, juniori obligit filio Anfuso, cui ducatus paulo post Neapolitanus est etiam a patre contributus ».

26. *Alexander abbas historiæ suæ finem imponit.* — Rogerius rex, sicut refert Alexander, regni arcis invisens venit ad monasterium ejus, « dum iter ageret Dominum oraturus ad monasterium Sancti-Salvatoris Ceselini divertitur ». Sed juxta Peregrinarius in Castigat. ad Falconem Benevent. pag. 180 et seq., loco *Ceselini*, legendum *Telesini*, quia in pluribus nominibus T mutatum reperitur in C, qui error procedit ex eo quod « Normanni, inducta super majusculum C transversa quadam lineola, facile lectorem fallabant, qui ipsum ab T ob consimillimam formam non distinguebant; unde ipse etiam Alexander, cum esset abbas Telesini cœnobii, reputatus est et dictus abbas Ceselinus ». Alexander abbas ait, se honorifice a rege in monasterium suum, Ecclesiamque veniente exceptum fuisse, « qui cum genibus positus ante altare orationem consummasset, ad capitulum ipsorum (nempe fratrum) pergens brevi tunc allocutione abbatem omnesque fratres familiariter ibidem excepit. Post hæc filius ejus præfatus Anfusus sanctam eorumdem fraternitatem per manus ipsius abbatis præsentem rege accepit, quam rex ipse, ut supra memoratum est, altera vice veniens, suscepit ». Non multo post Alexander abbas Historiæ suæ finem imponit exhortatione quadam ad Rogerium regem, indeque manifestum est, cum initio anni MCXXXVI libros suos quatuor, quibus res ge-

stas Rogerii regis exponit, absolvisse. Opus ejus tom. in Hispaniæ Illustratæ insertum. Hæc ad splendos Annales Ecclesiasticos. Sigonius lib. 11 de Reg. Ital. ad hunc Christi annum nihil de rebus Neapolitanis habet.

27. *Innocentius II Lothar. imp. in Ital. vocat.* — Interim operam suam Innocentius II in hoc conferebat, ut Germanos ad amicorum auxilium in Italiam evocaret. Ut enim scribit Falco pag. 298: « Cum Robertus princeps Pisas reverteretur, consilio domini papæ Innocentii, simul cum domino Girardo cardinali, et Ricardo comitis Rainulfi germano (Roberti Rogerio fidelis patre) ad gloriosum Lotharium imp. festinavit, qui honorifice ab ipso imperatore suscipiuntur, et ei qualiter principatum suum perdidisset, lacrymis multis intimavit. Precatur enim, ut pro amore domini papæ sibi succurreret, et quod injuste perdidit redintegraret. Imperator itaque muneribus multis ei datis promisit se ipso anno venturum ad Romanæ Sedis libertatem, et ejusdem principis (Capuani) restitutionem: et sic princeps ipse reversus domino papæ Innocentio cuncta narravit ». Lotharius tamen nonnisi anno sequenti in Italiam perrexit, aliis forte in Germania negotiis detentus.

28. *Epist. cxxxI S. Bernardi ad Mediolanenses data explicatur.* — Sanctus Bernardus hoc anno, ut notat Puricellus in Monument. Basilic. Ambros. num. 339, Epistolam cxxxI ad Mediolanenses suos dedit, et falsi sunt, qui credere eam ab eo ante Pisanum Concilium scriptam, ut Puricellus ostendit, qui et ab Bernardum eam inscripsisse *suus Mediolanensis* bus, quia Ecclesiæ hujus pontificatus eidem fuerat ante delatus. Quibus gratias a sancta Sede affecti fuissent, ipsis in memoriam revocat: « Si voluistis », inquit Bernardus, « licuisse vobis quod illicitum, nisi pro magna quidem necessitate, sacri canones judicant, translationem episcopi scilicet in archiepiscopum (nempe Roboaldi episcopi Albensis qui ad Mediolanensem Ecclesiam translatus fuit cum hac prærogativa, ut episcopatum Albensem conservaret) concessum est ». Mabillonius in editione Operum S. Bernardi legit, *translationem episcopi scilicet in archiepiscopatum*, et in breviori nota ait, Bernardum intelligere *restitutionem dignitatis archiepiscopalis, quæ isti Ecclesiæ ob schisma a Pontifice abrogata fuerat*. Qua in re sequitur Horstium, qui tamen hallucinatus est. Licet enim Honorius Anselmum Mediolanensem archiep. et Mediolanenses excommunicarit, Ecclesiæ tamen Mediolanensi metropolitancæ dignitatem, qua a tot sæculis exornata erat, non abstulit; neque erectio episcopatus Genuensis in archiepiscopatum huic interpretationi favet. Mediolanensis quidem archiepiscopus, durante schismate, plures ex suffraganeis subditos non habuit, sed hoc personam archiepiscopi schismatici, non vero suæ Ecclesiæ iura respiciebat.

29. *In ea non agitur de restitutione archiep. Mediolanensis in priorem statum.* — Tenor Epi-

stolæ sancti Bernardi ostendit in ea nonnisi de translatione *Robaldi* ad archiepiscopatum Mediolanensem sermonem esse, et hujus temporis documenta demonstrant, suffraganeos hujus Ecclesiæ, excepto Genuensi ad archiepiscopalem dignitate erecto, sedente Anselmo, semper agnovisse se Mediolanensis Ecclesiæ suffraganeos esse, quamvis Innocentio II adhererent, et in quantum ejus suffraganei erant, Anselmum judicasse et dignitate deposuisse, ut suo loco visum. Certe sacri canones prohibebant quidem translationem in alium episcopatum, sed non restitutionem episcopatus extincti in priorem statum. Verosimile autem est, quæstos Mediolanenses de novi archiepiscopatus Genuensis et episcopatus Bobiensis erectione, sicuti de necessitate archiepiscopis Mediolanensis imposita, ut pallium e summi Pontificis manibus acciperent. Bernardus enim eos his verbis hortatur : « En ad complementum pallium præsto est, plenitudo honoris ». Et infra : « Plenitudo potestatis super universas orbis Ecclesias, singulari prerogativa Apostolice Sedi donata est. Potest, si utile judicaverit, novos ordinare episcopatus, ubi hæcenus non fuerunt (quod ratione Bobii ab eo dictum), de episcopis creare archiepiscopos (ubi ad archiepiscopatum Genuensem respicit). Potest a finibus terræ sublimes quascunque personas Ecclesiasticas evocare, et cogere ad suam præsentiam, non semel aut bis, sed quoties expedire videbit ». Ad quæ verba Puricellus ait : « Ut quid ista sapientissimus ac prudentissimus hic doctor, si Robaldum reluctantem Innocentius ad se non evocaverat, et nominatim ad pallium ex ipsius manibus suscipiendum » ?

30. *Mediolanenses in gratiam Innocentii II rediere.* — Verosimile etiam est, Bernardum a dilectis suis Mediolanensibus, quæ petebat obtinuisse, cum in gratiam Innocentii II redierint, et postrema hæc dissensio, in ejus causam Baronius penetrare non potuit, pæne sopita fuerit. Quare *Innocentius II* apud *Lotharium* imperatorem eorum patrocinium suscepit. Et licet Landolphus Junior de pallio nihil in litteras miserit, satis tamen indicat privilegia omnia Ecclesiæ Mediolanensis abolita fuisse. Quibus calamitatibus adventus Lotharii imp. successit, qui Mediolanensibus quidem adversus Cremonenses auxilio fuit, sed ejus exercitus, ut conficere licet, agros eorum vastavit et depopulatus est.

31. *Caravallis monasterium prope Mediolanum fundatur.* — Hoc anno celeberrimum monasterium, Caravallis appellatum, prope Mediolanum fundatum, ejus mentio apud Landolphum Junio-rem, quodve discipuli a sancto Bernardo in sua profectioe Mediolanensi relicti inhabitant. In antiquo Ms. hujus monasterii apud Ughellum t. iv Italiæ Sacræ, et Puricellum citatum num. 384, de eo legitur : « Mediolanenses, cum viderent beatum Bernardum, tum sermone et verbo Dei potentem, tum signis coruscantem, ultro polliciti sunt cæno-

bium de ordine illius in territorio suo a fundamentis erigere. Qua de re missi ab eo ad eandem urbem nonnulli ex ejus monachis, et ibidem per aliquot dies moram facientes in monasterio Sancti Ambrosii se locaverunt. Cernentes autem quod Mediolanenses, frigescente charitate, a promissis deficiebant, arripuerunt iter ad propria. Quod ut primatibus Mediolani in Brolito existentibus factum innotuit (*Broliti* nomine intelligitur parvum septum, aut locus muris clausus; *Brolum* vero vocabatur locus, ubi ad negotia tractanda conventus fiebant, unde natum verbum Venetum *Brolio*, *far Brolio*) hoc in suam infamiam vergere dubitantes, celerime missis multis, prædictos monachos, qui jam Novariam versus advolarant, revocare; iisdem Mediolanum reversis, certatim se illis enixe auxilium præstituros sponderunt, emeruntque quedam mapalia, quæ nostri vocant cassinas, quod tunc Navagianum appellabatur : ubi constructum est monasterium, quod Clarevallis nuncupavere, etc. Acta sunt hæc Redemptionis nostræ anno mxxxv. Puricellus num. 383 notat, in antiqua tabula marmorea parieti insita eundem annum perantiquo caractere notari, et subijungi foundationem factam esse, et tempore S. Bernardi abbatis Clarevallis XI kal. Februarii ». Abbates usque ad annum mclxxv perpetui fuere, et tunc abbatia annualis seu triennis effecta, et Congregationi Etruscæ unita.

32. *Epistola S. Bernardi cxxxix anno mxxxiii data.* — A num. 16 ad 20. Epistola divi Bernardi cxxxix *Januensis* data, et a Baronio recitata, neque ad hunc annum, neque ad annum mxxxiii cui cam affixit Manricus in Annal. Cisterc. eo anno, c. 6, sed ad annum mxxxiii, ut Mabillonius in margine notavit, pertinet. Longa dissidia Januenses et Pisanos turbabant, annoque mxxx, quo Innocentius II in Galliam venit, non pacem, sed inducias inter illos constituit, ut habet Augustinus Justinianus in suis Annalibus, sicut intelligendus est auctor Vitæ Innocentii II, eo anno a Baronio num. 56 laudatus. Sed cum induciæ illæ servatæ non fuissent, idem Pontifex anno mxxxii, aliis propositis conditionibus, harum gentium inter se discordantium animos conciliavit, usus opera sancti Bernardi, qui eo avidius a cunctis audiebatur, quo ferventius animarum salutem incumberebat. Is anno mxxxiii ad eos scripsit : « Servate vos pacem fratribus vestris Pisanis, fidem domino papæ, fidelitatem regi (nempe Lothario), vobis honorem ». Hæc autem Epistolam eo anno scriptam priora hæc ejus verba demonstrant : « Quod adventus noster ad vos ANNO PRETERITO non fuerit otiosus, Ecclesia paulo post in sua necessitate probavit, a qua et missi furcamus ».

33. *Ejusdem Epistola cxxxvi currenti anno scripta.* — Epistolam vero divi Bernardi cxxxvi ad *Innocentium papam* scriptam, et a Baronio num. 18 relata, Manricus et Mabillonius citati cum presentis anno etiam connectunt, et hæc sententia

mihī certa videtur. In ea enim, quam ex persona Alberonis Treverensis archiepiscopi scribit, suum erga Innocentium, et Citramontanæ Ecclesiæ studium et obedientiam declarat, atque : « Nequaquam nos Beneventi, non Capuæ, non ipsius Romæ terret, Deo sic iudicante, amissio; scientes Ecclesiæ statum non armis æstimari, sed meritis ». Paucis interpositis : « Hoc quoque addo, dominum regem, Deo eum confortante, fervere et accingi ad liberationem Ecclesiæ, et parare sibi exercitum multum nimis ». Anno autem superiori exeunte, Beneventum a Rogerio Siciliæ rege captum, et currenti *Lotharius* imp. Innocentii II precibus motus, sese ad expeditionem Italianam paravit, annoque sequenti, ut ibi videlicimus, eam suscepit.

34. *Sicuti et Epistola* CLXXVIII. — Denique Epistola CLXXVIII ad Innocentium II, a Bernardo in persona Alberonis archiepiscopi Trevirensis exarata, qua queritur, perversos quosdam et Ecclesiæ perniciosos homines in exequendis pravis consiliis Pontificia auctoritate muniti; alios interim præsumptuos, zelum Dei habentes, destituit et contemnit, a Browero in *Annal. Trevirensibus* in an. MCXXXIX, et a Mabillonio in ejus margine cum eo dilata. Verum ea serius quam præsentī non data; ait enim Bernardus : « Plorans plorat desolationem suam apud Tullum Ecclesia S. Gengulfi; nec est qui consoletur eam. Quis enim se opponat brachio excelso, torrentis impetui, summæ arbitrio potestatis? » Insignis Ecclesia collegiata S. Gengulfi, vulgo *S. Jangouff* apud Tullum, jam annis superioribus injuste opprimebatur, ut liquet ex Epistola divi Bernardi cxxxix *ad Lotharium* imp. scripta. Tandem facta est concordia inter *Henricum* Tullensem episcopum et *Fredericum* comitem Tullensem, quam Innocentius II Epistola hoc anno eidem Henrico inscripta, et tom. x Concil. pag. 1846 relata confirmavit. Ea « data Pisis per manum Almerici (legendum *Aimerici*) S. R. E. diac. card. et cancel., VII idus Junii, Indict. xiii, Incarnat. Dom. an. MCXXXVI. (Pisano, ut tam Indict. xiii quam annus Pontificatus demonstrant) Pontificatus domini Innocentii papæ Secundi anno vi ». Ait Innocentius se « pacem et concordiam, quæ post multas guerras et labores, atque expensas », inter utrumque facta est, in præsentia « Tituini episc. S. Rufine tunc Apostolicæ Sedis legati, Alberonis Trevirensis archiep. et subtraganeorum suorum confirmare. Ita ut de hospitalitate, seu de consuetudine, quam præfatus comes Fredericus in præbenda fratrum Tullensis Ecclesiæ sibi usurpare contra justitiam nitebatur, nihil sibi deinceps ex debito audeat vindicare ». Ita litteræ D. Bernardi inutiles non fuere.

35. *Moritur Henricus rex Angl.* — Ad num. 20 et seq. Henricus rex Anglorum, dum hoc anno in Normannia esset, « post confessionem, absolutionem et pœnitentiam a sacerdotibus acceptit, oleique sacri unctione definitus, et sancta Eucharistia refectus, Deo se commendavit, sicque kalend.

Decembr. Dominico, incipiente nocte, hominem excessit », inquit Ordericus lib. 13, pag. 901, sed loco *excessit*, legendum *exiit*. Idem habent cæteri Anglorum scriptores nisi quod Gemmelicensis lib. 8, cap. 33, et quidam alii ex eo quod mors hæc contigit nocte inter kalendas Decembr. et IV nonas ejusdem mensis interjecta, eam in hunc posterioiorem diem differunt, quod non raro etiam ab historicis factum existimandum, cum inter se in alienius morte referenda uno tantum die inter se discrepant, quod observare juvabit. Subdit Ordericus, cadaver regis Cadomum perductum fuisse, illicque servatum, « donec post Natale Domini, missis illuc monachis, impositum navi et transvectum est, atque a successore regni, et episcopis ac principibus terræ in Radingensi Basilica honorifice sepultum est ».

36. *Stephan. comes Poloniæ ei succedit.* — Paulo post ait Ordericus : « Stephanus Poloniensis comes, audita morte avunculi sui (filius enim erat Adela Henrici regis sine prole mascula demortui sororis), prolinus transfretavit, a Guillelmo Cantuariensi archiepiscopo, aliisque præsulibus et principibus terræ susceptus, regale fastigium ascendit, et XVIII kal. Januarii coronatus rex, quartus de stirpe Normannorum regnavit ». Sed loco *XVIII kal. Januarii*, legendum *VIII kal. Januarii*. Contra vero Malmesburiensis lib. 1 Hist. Novellæ pag. 178, scribit : « Coronatus est in regem Angliæ Stephanus undecimo kalendas Januarii, Dominica vicesima secunda die post excessum avunculi ». Eundem diem notant Gervasius Dorobornensis in Chron. et Mailrosensis in Chronie. Matthæus vero Parisiensis in Chron. ubi Henrici regis mortem cum die prima Decembr. conjungit, ait eum regem consecratum « vicesimo secundo die post mortem avunculi sui », sed subdit eum coronatum *in die sancti Stephani*. Eundem S. Stephani diem ejus coronationi attribuit Hovedenus pag. 481. At recte Huntindoniensis lib. 7. ait : « Diadematus curiam suam tenuit ad Natale Londoniam », quod et Ricardus prior Hagustaldensis in *Histor. de Gestis regis Stephani et bello Standardii* etiam habet. Novus chronographus Saxo, qui sub ejus successore opus suum scripsit, ait : Accesserunt Willelmum Curbiul archiep. qui consecravit illum in regem die Natalium ». Denique Joannes monachus Majoris-Monasterii in agro Turonensi, qui Ludovici Junioris Galliarum regis tempore vixit, idem testatur in Vita Gaufredi ducis Normannorum et comitis Andegavorum quæ extat in fine Operum Gregorii Turonensis.

37. *Concil. Londoniense.* — Auctor anonymus et coævus de *Gestis Stephani regis Anglorum*, a Duchesno post Historiam Orderici editus, diem ejus coronationis non notavit, sed Concilium Londoniense sequentis anni initio celebratum, quod tom. x Conciliorum prætermisum fuit, hoc modo narrat pag. 932 : « Omnibus summatis regni fide et jurejurando cum rege constrictis, edicto per An-

giam promulgato, summos Ecclesiarum duces cum primis populi ad Concilium Londoniense coniecit. Illis quoque quasi in unam sententiam illuc confluentibus, Ecclesiarumque columnis sedendi ordine dispositis, vulgo etiam confuse et permixtum, ut solet, ubique se ingerente, plura regno et Ecclesie profutura fuerunt, et utiliter ostensa, et salubriter pertractata. De Ecclesie siquidem statu melius componendo, de ejusdem libertate multipliciter restauranda, splendide nonnulla in ipsa regis presentia perorant, asserentes in regis Henrici precipue temporibus Ecclesiam vacillasse, ancillam fuisse dejectam et conculcatam, plurimique dedecoris injuriis affectam. Pastores etenim ejus, spirituales scilicet divini Verbi expensores, qui Dei mensae conjunctius assistebant, placitis et legibus implicare, cujuslibet angarie violenta exactione degradare, munuscula annuaria vice tributi ab eis exigere, ostium Ecclesie Simonis frequentius quam Petri clave claudere vel aperire. Quod Deus acceptavit conjugii bonum perfacili occasione dissolvere adulterina lenocinia, sicut ipse committere, ita et in aliis tolerare, terras Ecclesiarum pastoribus defunctis in proprios usus redigere, altarium nonnunquam oblationes in prepositorum laicorum manus contradere, vel recompensa sibi mercede, quibus jure cedebant, injuste concedere. Si quis autem ex adverso ascendens se murum pro domo Israel vellet obijcere, nefandisque hujusmodi commentis Ecclesiastico rigore occurrere, terrore illius prolinus repressus injuriis impeti, insecutione valida a se suisque ministris tributari, nec ante in postulatione qualibet vel querimonia exaudiri, quam manu ejus innucta reum se presumptionis in publico proclamaret.

38. *Celebratum initio anni sequentis.* — « Super hac igitur inverecunda Ecclesie depressione, alteraque, ut verius dicam, Pharaonis grassatione, in facie regis vehementer conquesti, obnixi eum imploraverunt, quatenus suae Ecclesiam libertati redderet, sui eam juris compotem efficeret, illius instituta legibus saecularium praeponi, illius decreta nulla ratione prevalente pateretur remitti. His autem rex patienter auditis, quaecumque postularant gratuito eis indulgens, Ecclesie libertatem fixam et inviolabilem esse, illius statuta rata et inconcussa, ejusque ministros, cujuscumque professionis essent vel ordinis, omni reverentia honorandos esse praecipit, fecissetque praceptioni suae satis, nisi et conciliatores perversi, qui bonum quandoque pervertunt animum, et ipsa indigentiae necessitas, quae nullam legem vel rationem admittit, ad haec infringenda, sicut in consequentibus declarabimus, eum impulsissent. Et istis quidem tali modo peroratis, in una omnium pace et concordia Concilium est solutum ».

39. *Stephanus rex jurat in eo decreta sese servaturum.* — Ricardus prior Hagustaldensis in Hist. de Gestis regis Stephani pag. 314, juramentum a Stephano rege factum, quod Baronius mu-

tilatum ex Malmesburiensi citato refert, exhibet cum nominibus praetorum multorum qui eidem Concilio interfuerunt, et illud emissum non Londonii, sed « apud Oxenfort anno sc. ab Incarn. Dom. mccccvi, sed regni mei primo », inquit rex. Antequam regis juramentum Ricardus describat, ait : « Illis et aliis modis in regno Angliae confirmatus, episcopos et proceres sui regni regali edicto in unum convenire praecipit; cum quibus hoc generale Concilium celebravit. Ego Stephanus, Dei gratia, assensu cleri et populi in regem Angliae electus, et a Willelmo Cantuariensi archiep. et S. R. E. legato consecratus, et ab Innocentio S. Romanae Sedis Pontifice confirmatus, etc. » Cum vero Innocentius II Pisis, urbe non parum ab Anglia dissita, moram ageret, et praetati convocandi fuerint, Concilium istud nonnisi initio sequentis anni, apud Londonium congregati potuit, et aliquot post dies Oxonii a rege juramentum illud obtineri. Quare Radulphus de Diceto pag. 506, sub anno mccccvi recte scripsit : « Stephanus rex in Paschalis apud Westmonasterium Concilium congregavit, fidelitates exegit, regis Henrici thesauris in nullo pepercit, in muneri largitione nimis effusus ». Addit Radulphus in eo Concilio Anselmum abbatem Sancti-Edmundi a quibusdam canonicis electum fuisse episcopum Londoniensem, praeter consensum Willelmi decani Londoniensis, et tam Concilium quam regem id aegre tulisse. Tum anno mccccviii ait, Anselmum ab Innocentio II ad suam abbatiam abire jussum. Erat Anselmus nepos S. Anselmi archiep. Cantuariensis, ut prodit Dunelmensis ad annum mccccxiii. De ejus legatione Anglica suo loco egimus. Porro Ricardus regis juramentum *Concilium* perperam appellat; cum illud, eo celebrato, apud Oxonium quinquaginta circiter milliariis a Londonio distans, a rege praestitum fuerit. Baronius num. 21 ait, juramentum illud tempore coronationis factae *XI kal. Januarii* a rege emissum esse. Verum manifesto errore; cum *Stephanus* in eo dicat electionem suam jam ab Innocentio II confirmatam fuisse. Neque Malmesburiensis, ex quo juramentum illud Baronius accepit, hoc affirmat, sed tantum regem *XI kal. Januarii* coronatum, qui rectius dixisset, electionem ejus eo die factam, coronationem vero die Nativitatis Christi.

40. *Innocentius II electionem Stephani regis gratam habet.* — Ricardus citatus pag. 313, recitat litteras Innocentii II ad Stephanum Angliae regem transmissas, « quibus eum Apostolica auctoritate in regno Angliae confirmavit », ut ipse ait, et post eas loquitur de Concilio, et regis juramentum refert, quia utrumque praecessit Innocentii II Epistola. In ea Innocentius ait : « Ipso sublato de medio (nempe Henrico rege) prout accepimus, turbata est religio in regno Angliae, et nullum mandatum pacis seu justitiae in adiutorio regali vigeat, abque atrocitate tantorum scelerum committatur impunitas. Ne autem diutius grassando

in populum Dei debacehari posset dira feralitas, inclinata est ad preces religiosorum virorum divinæ miseratione pietatis, et tantis flagitiis potenter occurrens, quemadmodum venerabilium fratrum nostrorum archiepiscoporum, episcoporum eorumdem regionum, et anatorum S. R. E., gloriosi Francorum regis, et illustris viri comitis Theobaldi (Stephani regis fratris) scripta testantur, et industrium virorum nobis indicavit assertio, communi voto et unanimi assensu tam procerum, quam etiam populi, te in regem eligere, et a præsulibus regni consecrari providit. Nos cognoscentes vota tantorum virorum in personam tuam, præsentem divinam gratiam, convenisse, pro spe etiam certa et B. Petro in ipsa consecrationis tuæ die obedientiam et reverentiam promississe, et quia de præfati regis prosapia prope posito gradu originem traxisse dinosceris, quod de te factum est gratum habentes, te in specialem B. Petri et S. R. E. filium affectione paterna recipimus. Litteræ sunt sine die et mense, et prætermisissæ fuere in ultima Conciliorum editione.

41. *Pax inter Hispan. reges constituta.* — In Hispania ante festa Paschalia plures præsules ac magnates ad reges in concordiam adducendos industriam suam interposuere. *Garsias Ramires* Navarræ rex, pace cum Alphonso VII Castellæ rege facta, se ejus beneficiarium dixit, eique quas expugnaverant urbes cessit. Plures recentes historici tradunt *Ramirum* monachum Aragoniæ regem pacem cum eodem Alphonso rege inisse, huncque pacem in Aragonia, uti Casaraugustam, aliasque urbes citra Ebrum fl. silas occupaverat, ei restituisse ea conditione ut se supremum dominum agnosceret. Sandovalius tamen fol. 152, hoc in dubium revocat, quod nullum instrumentum tegerit, in quo *Ramirus* Alphonso imperatoris vassallus dicatur, ut in variis de Navarræ rege et Barcinonensi comite legitur. Verum quidem est superesse quedam Privilegia in quibus Alphonso dicitur Casarauguste et in Aragonia regnare: « sed accidere potuit », subdit Sandovalius, « ut Barcinonensis comes ei tantum subjectus fuerit ratione principatus Aragonensis, quem acquisivit matrimonio cum *Petronilla*, Ramiri regis unica filia et hærede, contracto ». Hanc præsulibus doctissimi conjecturam confirmant Chartæ in Catalaunia tam a Raimundo comite quam a præsulibus et magnatibus subscriptæ, in quibus regum Francorum anni non memorantur; ex eo enim intelligitur, illos se eorum feudatarios amplius non dixisse, licet a trecentis annis, a Ludovico nempe Pio et Carolo Calvo, jus illud Francorum nunquam contentiosum fuisset. Denique verum non est Alphonsum regem Casaraugustam Ramiro regi restituisse: cum hanc urbem Garsia Ramiro Navarræ regi ejus beneficiario effecto tradiderit, qua urbe jam hoc ipso anno Garsias potiebatur. Porro *Garsiam Ramirem* hoc anno cum Alphonso Castellæ rege pacem constituisse, demonstrat Charta a Moreto

in *Investig. regni Navarrici* pag. 631 recitata, quam testatur Alphonso se concedere « in mense Maio *Æra* mclxxii, quando fecit pleito (id est, litem dirempti peritiorum arbitrio, et verosimile est) in Nagera cum rege D. Garsia ».

42. *Alphonso VII Castellæ rex coronatur imperator.* — Alphonso hoc anno Legione imperator Hispaniarum magna solemnitate coronatus fuit, et more imperatorum Occidentalium unctus a *Raimundo* archiepiscopo Toletano. Quæ in ea coronatione singulariter contingere distincte persequitur Sandovalius fol. 156 et seq. juxta antiquam Historiam Toletanam, in qua dicitur, eam peractam IV non. Junii, in die sancti Spiritus, *Æra* mclxxii: « Quod esse non potest, inquit Sandovalius, quia hoc anno littera Dominicalis erat F, et Pentecoste in diem xxvi Maii cadebat. Vidi in abbacia Arlançæ Privilegium authenticum, in quo imperator et imperatrix Beregera confirmant donationes a precedentibus regibus factas, *Æra* mclxxii, VII kalendas Junii, die Pentecostes, quo rex supradictus Legione coronari sumpsit ». Indeque Sandovalius infert, Historiam Toletanam hac in parte mendosam esse. Verum hic error libris adscribendus, non vero archiepiscopo, qui tam diem Pentecostes quam *Æram* recte notavit. Librarios quandoque K pro N et vice versa scripsisse, varia exempla ostendunt. Porro ex Historia illa Toletana refelluntur, qui scripsere *Alphonsum* Toleti coronatum fuisse imperatorem. Civitas Legionensis urbs primaria fuit post Hispaniam amissam, et reges Christiani in ea sedem locarunt, indeque ea *civitas regia* dicta.

43. *Congregat conventum episc. et procerum.* — Prostridie coronationis, ut in eadem Historia Toletana habetur, *Alphonso* imperatoris jussu congregatus conventus procerum et episcoporum, in coque inter alia statutum, ut quæcumque a nobilibus, aliisque monasteriis, et Ecclesiis crepta fuissent, eisdem restituerentur; loca omnia durantibus bellis depopulata in eolis iterum frequentarentur; judicibus mandatum, ut rebus fidei invigilarent, et violentias, abusus, superstitiones et sortilegia impedirent. Denique imperator « ut a Deo illuminatus, voluit in reformatione regni imitari D. Alphonsum V, et D. Fernandum Magnum, et D. Alphonsum VI, qui regna sine legibus, sine rege et sine Deo invenientes, ea reformarunt, sancte et Catholice justitiam in diebus suis servantes. Mandavit prefecto aut alicui Toletano, omnibusque qui limitibus Maurorum præerant, ut eis semper bellum facerent, in eorum regiones excurrentes, et quæcumque possent capientes, omnique diligentia huic rei incumbere. Sanctis his pluribusque aliis legibus decretis solutus est conventus. Huic coronationi interfuerunt omnes principes et magnates Hispaniæ, Gasconiæ ac Occitanæ, et inter alios rex Navarræ, comites Barcinonensis et Tolosanæ, etc. »

44. *Imperator Hispaniæ communi consensu*

agnitus. — His addit Sandovalius externos principes, ipsumque Pontificem Romanum titulum *imperatoris* ab Alphonso sumptum assensu suo comprobasse. Hinc Petrus Venerabilis Epist. viii ad Innocentium II data, de hoc rege verba faciens ait : « Imperator Hispaniæ , magnus Christiani nominis princeps », et divus Bernardus Epistolam cœci scribit *Sancie sorori imperatoris Hispaniæ*. Denique Sandovalius ex illa Historia Toletana eruit, *Garsiam* Navarræ regem in hujus coronationis ce-

remonia sedisse a latere throni Alphonsi, et in sumptuoso convivio episcopis et proceribus tunc exhibito, *regem Navarræ inducasse solum cum imperatore Alphonso*, tanquam primum ejus vassallum. Neque Aragoniæ rex, neque Portugalliæ princeps huic interfuere, quia ab Alphonso aversi erant, et verosimile est, eos neque supremum dominium, neque novum *Alphonsi* titulum agnoscere voluisse.

INNOCENTII II ANNUS 7. — CHRISTI 1136.

1. *Quanta Rogerius mala intulerit monasterio Cassinensi per Guarinum cancellarium*. — Mille-simus centesimus trigesimus sextus agitur Redemptoris annus, Indictione decima quarta, quo imperator cum in Italiam descendisset, occupationibus Longobardiæ detinetur, quominus concitato adventu se conferret pugnaturus adversus Rogerium, qui Apuliam atque Campaniam totam excepta Neapoli occupaverat, quamvis assiduis legationibus Innocentii papæ, et principis Capuæ, et aliorum mirum in modum urgeretur. Quod tamen nonnisi anno sequenti præstandi habuit facultatem. Hæc omnia pluribus Chronicon Beneventanum simul et Cassinense. Reliquæ Rogerius rex Siciliæ Guarinum cancellarium, qui, licet confœderatis ejus, negotium facessivit monachis Cassinensibus. Isti enim haud ex prudentia quæ ex Deo est, sed quæ de terra¹, in gratiam ejusdem Rogerii secuti fuerant una cum ipso in schismate partes Anaclei pseudopontificis, quod ille bene consultum putarent rebus monasterii Cassinati, longe lateque per diversas provincias Rogerio subditas constitutis. Sed Rogerius more tyrannorum, qui confœderatis bene utuntur quousque rem suam agunt, inde vero ut soli regnent, eos de medio tollunt : ad occupandum jure suo subji-ciendum monasterium Cassinense adjecit animum. At ne id tyrannice facere videretur, se absente (quod tyrannorum est) per ministrum suum perfici dolose curavit. Quid igitur ejus cancellarius Guarinus Capuæ residens egerit, audi ex Petro

Cassinense diacono qui aderat, in Appendice ad Leonem Ostiensem rem gestam ita narrante¹ :

2. « Inter hæc regis cancellarius, Guarinus nomine, (Canzolino) qui tum Capuæ præerat, mandat, abbatem, uti ad se advocet, utique capiat venientem. Erat tunc abbas Cassinensis, nomine Senioretus. Abbas ire illuc jam exploratis insidiis noluit. Cancellarius commotus mandat denuo abbati, ut sibi Capuam pergenti festinus occurrat, ut una de regni negotiis tractetur. Abbas tunc gravi morbo laborans distulit; duos tamen fratres ante Nativitatem Domini cancellario Beneventi constituto direxit, morbi aperiens causam. Tunc ille imperat, ut post peractam festivitatem ad se Capuam pergat, alioquin ipse ad illum iret. In festo autem S. Joannis Evangelistæ reversi fratres, quid itinere toto didicerant, pandunt : abbatem si eo pergat, capiendum. Abbas morbum itidem simulat. Cancellarius assumpto secum novo electo Capuano, Cassinum (ut disposnerat) venit. Aquinensis interea electus diaboli stimulis incitatus, cancellario mandat, Cassinensem abbatem ad imperatorem Innocentiumque suscipiendos se præparare : ejus rei ut periculum faciat, Cassinense ab eo monasterium petat. Videat quæ mandat, vera esse non dubilet. Tabellarius abbati omnia pandit, Epistolam tradit. Abbas ea resignata, vera esse quæ ille dixerat reperit. Cancellario itaque apud S. Germanum electus Aquinensis occurrit. Abbati mandat, omni mora postposita, uli ad illos ob regni negotia simul tractanda descendat.

¹ Baruc. III.¹ Pet. Diacon. Chr. Cass. l. iv. c. 119.

Ille morbi causam iterum allegat. Missis tamen senioribus monasterii, Aquinensis electi falsissimam calumniam juste redarguit et confutavit. Cum id electus negaret, ostendunt Epistolam, patefaciunt indices. Confusus ille, quid ad hæc responderet, ignorabat.

3. « Cœperunt his omissis, remissa simulate ira, Cassinenses blande alloqui, nihil ex his quæ sibi dicta fuerant credere, idque sacramento firmare, Cassinensium fidem regi sibi que jampridem exploratam esse. Sed paulo post quid animi habuerint pandunt, dum apprehensum tabellarium suppliciis gravibus excruciatum, privant luminibus. Electus Aquinensis metu perterritus, et civium minas expavescens, deducendo se Canzolino, Aquinum redit. Die altera, in ipsi Epiphaniæ Vigilis ascendentes ad monasterium, post salutationem, verbis plurimis ultro citroque habitis, remotis arbitris, cœperunt cum solo abbate de monasterii deditone agere, sibi que in præsentia tradi, inaudita temeritate deponere; ipsum, cum quibus vellet ex fratribus, sublato monasterii thesauro, cunctaque suppellectili, ad arcem Bantram migrare jubebant; reliquos fratres per cellas monasterii huc illicque pergere; quatuor sacerdotibus cum quatuor monachis qui ad patris Benedicti corpus officia sacra peragerent, illic remanentibus: asserentes se monasterio, regnoque consulere: quippe fore ut imperator et Pontifex comperto ex fama thesauro monasterii, et ipsum spoliaret, et regnum ea commoditate depellant. Sed ficta ista erant, falsa atque fucata. Namque illum (thesaurum scilicet), inter eundem comprehendere, cunctaque diripere machinabantur.

4. « Accepta tam injusta delarique jussione, abbas id se absque fratrum consensu facere posse abnegat. Tum regressus abbas seniores monasterii convocat, verba cancellarii aperit: quid cuique videatur interrogat. Omnium una sententia fuit, Cassinense cœnobiū nulla omnino ratione, nullo pacto tradendum. Mori se malle, quam Cassinense monasterium in jus potestatemque laicorum venire permitterent; extrema paratos esse experiri potiusquam caput monasticæ religionis adeo miserabili conditioni ultra subditum cernere. Id enim si duraret incolūme, facile salutem membra sperarent; sin vero id periret, omnia simul membra peritura. Ilac deliberatione facta, inducto rursus cancellario cum Canzolino, abbas nihil ea de re definiri posse asseruit, pro rei novitate et magnitudine inducias petiit, dum omnes ipsius Congregationis fratres convenirent, sicque simul quid facto opus esset, deliberarent. Cancellarius amaritudinis felle commotus, nullam se deliberationi moram, nullas inducias dare, sed ex regis parte, ut quid statuissent responderent, imperatorique dicerent. Tum abbas percontari pergit hujusce jussionis regis causam. Ille protinus simulatam edicit causam: se os esse et linguam regis, illum per se loqui, et sua jura disponere. Scire se

Lotharium cum papa venturum. Explorare in hoc velle fidem ad regem constantiamque monachorum. Ad hæc abbas, paratos se esse omnia subire pro rege pericula, monasterium adversus regis adversarios tueri. Cum cancellarius inquireret commoto felle, quo illud pacto contra imperatorem defensuri essent, audivit fortiores ex monasterii fidelibus vocandos, et nisi sufficerent, regios milites, sicque regem nulla Cassinensis monasterii causa incommoda esse passurum. Exclamat indignans cancellarius: En quibus defensoribus putat se Cassinensis abbas imperatori obsistere: infidis, perjuris, et qui nunquam B. Benedicto servavere fidem, qui Brunonem, Oderisium et Nicolaum abbates expulerunt, qui Cassinense cœnobiū contra jus omne ceperunt, qui castrum Janulæ destruxerunt, contradicentesque monachos ante B. Benedicti altare percusserunt. His dictis, cepit et abbatem conviciis urgere, monachos et laicos injuriis ac probris afficere, fallaces perfidosque appellare.

5. « Tacentibus omnibus, discessit tandem iratus ac tumidus, mandans ut ipsi deliberarent sibi que responderent. Eo recedente, omnes in unum majores cum abbate conveniunt, causam inter se conferunt, trahuntque longa suspiria. Ignorabant pæne quid mallent, vivere an mori, atque inter angustias dicebant: Si monasterium laicis damus, incurrimus animæ corporisque discrimen; si non damus, non effugimus manus illorum. Sed melius est nobis incidere in manus hominum, quam derelinquere legem Domini Dei nostri, et videre mala gentis nostræ et Sanctorum¹. Hic recordari oportuit malorum horum omnium causam precipuam, ut filios Jacob², nimirum hæc eos merito pati, quod peccassent in Innocentium legitimum Romanæ Ecclesiæ Pontificem, quem in Rogerii gratiam abjecissent, recepissentque ejus amore Anacleum pseudo-pontificem, cujus gratiam interea per Lotharium imperatorem consequi posse sperarent. Pergit vero auctor: « Quæ dum ad cæterorum quoque pervenissent notitiam, contritum est cor illorum; et extemplo contenebrati sunt omnium oculi. Et vere tunc dies festi in luctum conversi sunt, et cantica in lamentationem. Hæc tandem omnium sententia fuit, iste consensus, vitam potius fundendam esse, quam monasterium laicis dandum. Placuit autem omnibus fratres ad cancellarium mitti, induciasque postulare precibus, donec de tanto negotio consultaturi conveniant. Animadversum est a fratribus cancellarium accessisse ad dormitorium, altitudinemque parietis mensum esse, ut scalas parare idoneas posset.

6. « Eo etiam tempore, dum frater quidam, Joannes nomine, naturæ debitum solveret, ac sine motu et voce jamdiu jacuisset, subito in se reversus, vidisse se retulit Benedictum patrem cum

¹ Maech. III. — ² Gen. XLII.

monachorum multitudine in Ecclesia slantem, Rogeriumque regem Ecclesiam ingredientem, omnemque Ecclesie Cassinensis thesaurum adportantem : et cum ad gradus majoris Ecclesie pervenisset, monachos illos impetu facto, illum necasse. Ista cum dixisset, adjecit vera esse : Scietisque dum mox ex hac luce migravero, esse ventura. Hæc ille tunc : Nos omnia jam evenisse perspicimus. Omnis enim ferme thesaurus Ecclesie Rogerii factione sublati est. Facta sunt ista in Vigilia Epiphaniæ¹. Post hæc statuit abbas duodecim ex senioribus monachis, qui nudis pedibus ad cancellarium pergerent, qui apud S. Germanum cum electo Capuano morabatur, inducias ad consultandum de tanto negotio poscerent, ut respondere illi maturius possent. Illo autem abeunte, omnis Congregatio usque ad monasterii januam cum gemitu et luctu subsecuta est. Fratribus autem in Ecclesiam redeuntibus, quantæ illis lacrymæ fusæ sint, referre quis possit? Omnes quippe prostrati humi, tundentes in pavimento capita, misericordiam Domini cum luctu cordisque gemitibus implorabant, ut locum istum respicere ac lueri dignaretur. Inde ad patrem Benedictum conversi, quasi præsentem cernerent, dicebant : Eia! pater honestissime atque sanctissime, tu præsentem tu discipulis fore post carnis excessum, quam si viveres, pollicitus es. Adesto igitur nobis (per Patrem, et Filium, et Spiritum sanctum te adjuramus) protege alumnos tuos, et locum istum ab omni adversitate defende.

7. « Post hæc sumpto Crucis vivificæ ligno et brachio S. Evangeliste Matthæi, sanctique confessoris Christi Mauri, fratres litanias agere per monasterii Ecclesias cœperunt. Cumque in Ecclesia B. Martini vota Domino persolverent supplicationis, et laudis finitis suffragiis, egressi ad Ecclesiam S. protomartyris Stephani diverterent, et dum ad aperiendas Basilicæ januas unus ex fratribus præcessisset, invenit eas clavibus obscuratas. Frater enim qui eandem tenebat Ecclesiam, unus erat ex duodecim, qui ad cancellarium ierant. Reversus qui præcesserat frater, denuntiat januas Ecclesie clausas, primosque redire admonerat. Alibi rursus atque alii currentes, januas clausas reperiunt, fratribusque renuntiare studuerunt. Frater autem, qui cruceam bajulabat, hortatus fratres, ad januas contendit Ecclesie; moxque tactis leviter seris, divinitus aperte sunt. Recreant aliquantum fratres, Deo gratias egerunt; ibique cum omni devotione et contritione cordis, peractis litanie suffragiis, ad patris Benedicti Ecclesiam reversi sunt, siquæ ipsius diei missam cum gemitu et luctu peregerunt ». At dicit aliquis : Si schismatici erant hi, quomodo miraculo illo aperte sunt eis spontaneæ fores Ecclesie? Dicam breviter, non simul ac abbas vel episcopus aliquis schismaticus est, necesse est omnes sibi subditos

pariter esse schismaticos, sed illos tantum, qui certo sciunt suum errare præsumere; ceteros autem non peccare, qui persuasibilibus rationibus putant ipsum recta incedere via, et se verum sequi pastorem : nec tanta inest ipsis doctrina, vel adeo explorata rerum gestarum cognitio, nec facilius exquirendi, cujus potiora sint iura, hosque suo ipsorum bona conscientia reddi crimine liberos. Sicut et tunc evenisse putamus, nimirum quod etsi abbas et ex præfectis aliquis apud Deum et ejus Ecclesias rei fuerint patrati sceleris, simpliciores tamen his subditi bona fide et conscientia pura cuncta gerentes, divinis tantum rebus vacantes, omnis curiositatis expertes, nullo modo (ut canones docent) rei fuerint tanti criminis : quorum numerum haud exiguum fuisse, jure possumus existimare. Sed pergamus ad finem usque inchoatam semel historiam de rebus gestis per cancellarium recensere :

8. « Cancellarius comperto quod fratres cum brachio B. Mauri per sanctorum Ecclesias pergentes, omnipotentis Dei clementiam exorarent, elatus superbia, multum contra monachos fremens minari cepit, incisurum se illis et nares et labrum, vestesque medias usque ad nates. Sicque¹ aller Rabsaces, sive Nicanor², blasphemie verba in Deum et sanctos ejus vomens, cassam fore spem, quam in beatis Benedicto et Mauro habebat, asserbat, perniciemque illis potiusquam salutem allaturam. Post hæc vehementi indignatione concitatus, litteras omnibus per Campaniam, Samnium, Apuliam, Lucaniam, atque Calabriam scripsit, mandans, ut ad capiendum Cassinense monasterium quamprimum variis instructi telis et machinis pergerent ». Et inferius de nisibus Cancellarii³ : « Omnes, inquit, dehinc cellæ monasterii per Apuliam, Campaniam, Picenum, Samnium, Lucaniam atque Calabriam capte, et a nostro jure subductæ sunt ». Ecce quomodo pondus et statera judicia Domini sunt⁴. Qui enim ne ista perderent, sed defensorem horum habere tyrannum Siculum, delegerunt potius ab Ecclesia Catholica divili, et inhaerere schismatico papæ factum, est ulciscente numine, ut ab eodem Rogerio talia tantæque passi sint (siquidem abstulit ipse illa omnia ipsi) sed et ab eo privandi insuper monasterio Cassinensi, in tot ac tantas angustias (quas audis) coniecti fuerint.

9. *Infansit ejusdem Guarini obitus.* — At Deus licet offensus horum ducibus, prudentia quæ de terra est rem agentibus, attendens preces humilium ac innocentium monachorum, et provocatus superbia novi Semacherib, in ejus ultionem exurgens, percussit eum morte, et perpetuis inferni cruciatibus condemnavit. Quod severum judicium voluit haud dubiis signis fieri manifestum. Sed audi primum de morte notarii ipsius, inde sua :

¹ Pet. Diac. Chr. Cas. I. IV, c. 101.¹ 4. Reg. XVIII. — ² 4. Mach. VII. — ³ Pet. Diac. Chr. Cas. I. IV, c. 102, in fin. — ⁴ Prov. XVI.

« Abbas vero, explorato cancellarii consilio de se perpendo et capiendo monasterio, legalis ad Landulphum (erat hic comes Aquinas) imperatoris missis rogat, ut monasterium tueatur. Noctu hæc omnia peracta sunt, factisque utraque ex parte juramentis, die tertia post Epiphaniæ solemnitatem inducti in monasterium Pandulphi milites, munitionesque illis traditæ sunt. Postmodum Landulphus adveniens, abbati ac fratribus constantiam agens, inimicis maximum iniecit metum. Cancellarius enim cognito Landulphi adventu, Aquinum deserens, Lirimque fluvium transiens Minianum perrexit, ibique morbo acerrimo vexatus, notario jussit, ut per omne Rogerii scriberet regnum, ut ad capiendum monasterium cuncti conveniant. Quod ille dum implere satageret, subita morte defungitur ». Hæc de morte notarii, ac de cancellarii sic inferius : « Cancellarius vero, qui tanti mali caput atque auctor fuit, decimo septimo die postquam huc venerat, apud Salernum moriens, clamabat : Benedicite et Maure, cur me occiditis ? Istaque crebro repetens, vita excessit ». Sed post mortem iudicium, ait Apostolus. At quodnam audi ? :

10. « Eo etiam tempore », addit Petrus « frater quidam, Crescentius nomine, natione Romanus, vidit per visum lacum nimiae magnitudinis, igneique coloris, cujus unde ad excelsa ferri videbantur. Inter eas undas vidit ipsius cancellarii animam in aeris alta levari ac postmodum ad ima demergi. Duo juxta lacum assistebant monachi, qui, cujus esset illa anima, interrogare ceperunt. Sed frater se nescire professus est. Ad quem is qui erat senior : Hæc, inquit, anima est Guarni cancellarii, qui quoniam Cassinensi monasterio infestus fuit, hæc talia patitur. Interrogatus a fratre, quisnam esset : Ego, inquit, sum frater Benedictus. Evigilans autem frater, quod vidit recitavit ». Et paulo post hæc de abbate : « Tertio postea die abbas moritur idibus Februarii ». Et ipse ad tribunal Dei vocatus, quam sententiam tulerit, et si scripta a Petro non sit, a sanctis Patribus tamen habetur altius decantata, nimirum, quod qui in terris non novit Ecclesiam Catholicam matrem, nec in cælis cognoscere possit patrem ; et quod qui cum Catholicis hic non communicavit, nec ibi cum Deo et sanctis ejus communicandi ullatenus facultatem habebit.

11. *Ad legatos Cassinenses Lotharii imperatoris responsio.* — Ille autem, dum ista per cancellarium agerentur, abbas qui adhuc vivebat, quid egit ? non quod debuit. Par enim erat ad cor reverti, et causam ipsam tantorum malorum quæ pateretur agnoscere, et penitendo sinuare, ut ea amota jactari penitus desineret. Nimirum ut intelligeret, offenso numine, se suosque in tanta pericula conjecisse, quod jam ecce septennio in schismate perdurasset, nec respicere ullatenus

cogitaret. Sed quid exegit fatua humana prudentia ? Quod sciret in se infensum esse Innocentium papam, quem haecenus despexisset, eundemque pollentem viribus imperatoris fore experturum ultorem, adeo ut si etiam Rogerii manus effugeret, non tamen vitare posset, quem tandem refractaria obstinatione provocaverat ipsum Innocentium papam : illud astuta nequitia est meditata efficere, ut Lotharium imperatorem sibi suisque redderet benignum, et constitueret protectorem, eundem vero adversus Innocentium Pontificem in sua ipsorum causa Cassinensium concitare, quo ea quæ essent juris imperii vendicaret. Siquæ legationem ad ipsum decerneret, qua significaret, Cassinense cœnobium esse cameræ imperii, ad eamque ejus spectare defensionem contra Rogerium tyrannum primo, inde adversus Pontificem ipsum, Cassinenses monachos exagitantem excommunicationibus, omnesque e loco dispergere minitantem. Missos pro hoc ad imperatorem legatos Bertulphum mansionarium, natione Cimbrum, et Adenulphum Marsicanum, monachos Cassinenses, tradit Petrus Diaconus¹, qui et inferius, quæ rescriptis Lotharii imperator ad abbatem et monachos Cassinenses, sic narrat² :

12. « Sed ut ad superiora redeamus, quo tempore imperator Italiam ingressus est, Epistolam Cassinensi abbati scripsit, admonens religiosi Cassinensis Ecclesie nominis, unde religionis exemplum ac forma Occiduum per orbem emanaverit, cujus maxime orationibus negotia regni stare confideret : sic quod ob varios eventus rerum a Romana Ecclesia descivissent, cujuslibet perterriti metu, ad eum quem patrem tota recognovisset Ecclesia, redirent. Se monasterii curam suscipere paratum, quod ab antecessoribus suis imperatoribus sciret fuisse semper observatum. Mandat item, ut cum eo propinquaret, abbas illi cum sapientioribus congregationis occurreret, ut quæ essent monasterio utilia, una tractarent. Scripsit et fratribus, se, quantum in ipso esset, monasterium honoribus et opibus ampliare intendere, ac pro tanti loci reverentia, qui semper singulari floruit præ cæteris religione, Ecclesiam illam ut domum propriam, atque imperii sedem servare disponere. Multum enim cupere (si permittat Deus) memoriale suum apud patrem Benedictum honorisque insigne relinquere. Richiza item Augusta eodem tempore litteras fratribus scripsit, significans, magna se de patris Benedicti domo percepisse : atque ideo memoriam sui in Cassinensi Ecclesia fieri obsecrans, ut Deus ipsorum precibus pacem Ecclesie suis temporibus reddat, se de amplianda semper monasterii dignitate cogitare, modo abbas sibi et Augusto cum sapientioribus monachis tempestive occurreret, ut de his una tractare potuissent ». Hæc Petrus : reliqua inferius, cum imperator se contulit in Apuliam.

¹ Pet. Diacon. Hist. Cas. l. IV. c. 101.

² Pet. Diacon. Hist. Cas. l. IV. c. 101. — ³ Ibid. c. 108.

13. *Schismate inter se divisi Cassinates.* — At licet mortuus fuerit cancellarius, Cassinensium persecutio non cessavit, Canolino vicario rem agente et Capuae iidem commorante, qui morte abbatis audita, monachis illis per litteras praecepit ne abbatem eligerent¹, nisi de omnibus Rogerius certior redditus esset. Quod cum facere renuissent, sed abbatem elegissent Rainaldum Calamentanum, subdiaconum Anacleti pseudopontificis, in schismate tamen contra alium ejusdem nominis Rainaldum Helruncum, adversus eos movit exercitum. Verum cum eo paciscitur idem novus abbas, accipiens ab eo conditiones quas placuit illi prescribere. Sed pars adversa legatione convenit imperatorem Ravennae agentem, quæsta de his quæ ab intruso patretur abbate. Imperator autem consolatus est eos litteris, præmisitque Henricum generum ad Innocentium papam, cuius ope et consilio subveniret laborantibus monachis Cassinensibus. Sed quod Henrici ad Innocentium papam adventus anno sequenti asseritur in Chronico Beneventano ab auctore qui aderat, nos de ipso suo loco agemus.

14. *De Conceptione Dei genitricis Lugduni celebrari capta, et S. Bernardi ea de re sententia.* — Hoc etiam tempore (quantum ex ordine Epistolarum sancti Bernardi licet argumentari) idem sanctus redarguit canonicos Ecclesie Lugdunensis, quod permoti quadam quæ circumferretur revelatione, celebrare cœpissent festum diem Conceptionis sanctissimæ Dei genitricis Mariæ: ea potissimum permoto sancto Bernardo ratione, quod id nondum Romana Ecclesia fecisset, nec faciendum indixisset, et temerarium valde esset, quovis prætextu quemlibet permoveri ad celebrationem dierum festorum, et novi quidpiam inducendum, ipsa Romana Ecclesia inconsulta: quo officio prætermissio, quod necessario præstandum fuisset, jure esset digni reprehensione. Nam post longam scriptis proditam disputationem hæc idem S. Bernardus in fine habet²: « Nam si sic videbatur, consulenda erat prius Apostolicæ Sedis auctoritas; et non ita præcipitanter atque inconsulte paucorum sequenda simplicitas imperitorum. Et ante quidem apud aliquos errorem compereram, sed dissimulabam, parcens devotioni quæ de simplici corde et amore Virginis veniebat. Verum apud sapientes atque in famosa nobilique Ecclesia et cujus specialiter filius sum, superstitione deprehensa, nescio an sine gravi offensa etiam vestri omnium dissimulare potuerim. Quæ autem dixi, absque præjudicio sanc dicta sint sanis sapientis. Romane præsertim Ecclesie auctoritati atque examini totum hoc, sicut et cætera quæ ejusmodi sunt, universa reservo, ipsius, si quid aliter sapio, paratus judicio emendare ». Hæc S. Bernardus, in seipso ostendens, qui sint legitimi Catholici hominis characteres, nimirum ad incudem Sedis

Petri quæque probanda referre, antequam recipiantur in usum.

Porro hoc perfecit S. Bernardus licet diversa senserit, ut res ipsa accuratius examinaretur, atque differretur ad iudicium Apostolicæ Sedis, ubi ex Scripturis sacris proditis in medium testimoniiis, præviis fidelium precibus, Pontificio sanciretur decreto, celebrandam esse in Ecclesia sanctissimæ Dei genitricis Conceptionem. Ita Bernardus in spiritu sapientiæ et intellectus atque consilii eminebat in Ecclesia Gallicana, ut eum consulere quique doctissimi, Parisiensis quoque Academiæ magistri præstantiores: ut inter alios fecisse liquet magistrum Hugonem de Sancto-Victore, qui sicut scientia, ita zelo Catholicæ veritatis ceteris æqualibus antebat. Docet ista ejusdem S. Bernardi Epistola ad ipsum reddita¹. Quem configit eodem quo æstuabat zelo fidei litteris redarguere his ferme diebus Joannem archiepiscopum Hispalensem apostatam, qui urgente dira tyrannide Christianos principe Arabe, ceteris sibi subditis constantissime in fidei Christianæ confessione perstantibus, minis perterritis Barbari truculenti, ejus impulsu fidem negavit, maximo scandalo totius Ecclesie. Et quod deterius, addidit hæresim summæ impietati, dum asserere, et antiquam hæresim ab ipso exordio nascentis Ecclesie condemnatam revocare non erubuit, satis nimirum esse fideli, si Christum, quem ore negaret, corde confiteretur. Quem impium atque blasphemum ipse Hugo de S. Victore, datis ad eum litteris, tum doctrina qua pollebat, tum divino Spiritu quo agebatur, potentibus ac vehementibus redarguit. Extant ipse inter opera ejus antiquitus scripta, quæ hæctenus asservantur Romæ in Bibliotheca Sanctæ-Mariæ super Minervam; quæ sic se habent titulo isto inscripta Epistola:

16. *Hugonis de S. Victorio Epistola ad archiep. Hispal. apostatam.* — « Joanni quondam Hispalensium archiepiscopo, Hugo servus crucis Christi.

« Quid, frater charissime, quid dicam tibi? Si cœperimus loqui tibi, forsitan moleste accipies. Vir ille fortis erat et magnus, et omnium contemptor tormentorum (Job scilicet), et nemo illi loquebatur verbum, quia videbant dolorem ejus esse vehementem. Quomodo igitur nos tibi loqui poterimus in tanti doloris vehementia? Si tamen doles quantum tu dolendus es, quid tibi facimus? Tenebimus conceptum sermonem, quem cor nostrum et anima nostra, non (quomodo in illis) impatience loquendi, sed vehementia dolendi parturire jam cœpit? Ergo tacere poterit charitas, ut non erumpat et clamet in doloribus suis, et in angustia tribulationis suæ. Jam enim gladius pervenit usque ad animam: et venit mors fraudulenta carni parcens, ut spiritum extinguat. Nosti, frater, quid dicere velim? De anima tua causa agitur. Vide quid

¹ Pet. Duce. Ep. c. v. — ² Bern. Ep. CLXXIV.

¹ Bern. Ep. LXXVII.

facias. Christus tibi opponit mortem suam : Christianus redemptionem suam. Querit ille emptum, iste redemptum. Ille se pretium pro te incassum dedisse conqueritur; iste pretio redemptum perditum lamentatur. Sed dicis : Ego conscientiam meam novi, nemo me terreat : Christianum non facit lingua, sed conscientia. Ego Christum diligo, sufficit mihi, non amplius ille querit : quod potissimum meum est, illi dedi. Cor meum habet, illud possideat. Dicant homines quodlibet : ipse Dominus novit, quia invitus nego : lingua hoc dicit, non conscientia : ore quidem nego, sed corde confiteor.

17. « Audi, frater : Scriptura dicit ¹ : Corde creditur ad justitiam, ore autem confessio fit ad salutem. Quomodo ergo salutem te habere putas, si confessionem non habes? Christum negas, et dicis te Spiritum sanctum habere. Quid est ergo quod dicit Apostolus ² : Nemo in Spiritu Dei loquens dicit anathema Jesu. Si dicis anathema Jesu, Spiritum Christi quomodo habes? Si vero Spiritum Christi non habes, utique non es Christi. Qui enim Spiritum Christi non habet, inquit Scriptura ³, hic non est ejus. Audi rursus ⁴ : Qui, inquit, me erubuerit et sermones meos, hunc Filius hominis erubescet, cum venerit in maiestate sua. Sed dicis : Bene : Qui pro erubescencia Christum negat, juste damnatur, juste a Christo non cognoscitur. Parum enim est hoc, verecundiam Christo anteferre. Ego plus habeo quod in excusatione prætendam. Non enim erubesco, sed timeo. Majus est quod me terret. Novit ipse, quia pati non valeo : parcat ergo infirmitati, et condescendat devotioni; non ad vocem attendit, sed respicit ad charitatem ⁵. Nemo carnem suam odio habuit. Timeo pro carne mea, quam odire non possum. O fallax deceptio! Ergo tu carnem amabis, et Creatorem blasphemabis? Quid ergo sibi vult quod ait ⁶ : Qui amat animam suam plusquam me, non est me dignus? Si animam recte plus amare non potes, carnem poteris? Sed ais : Non plus carnem diligo, plus enim Deum meum quam carnem meam diligo. Videamus modo. Quod plus diligis, hoc potius eligis. Dicit Deus tuus ⁷ : Nolite timere eos qui occidunt corpus, animæ vero non habent quid faciant. Hoc ergo dicit Deus, hinc caro contradicit. Vide modo : Quod plus diligis, potius eligis. O qualis pastor!

18. « Et quomodo, quæso, animam tuam poneres pro ovibus tuis, qui nec pro ipsa anima tua animam tuam ponis? Ecce tu pro anima tua dare non vis carnem tuam, et pro ovibus dares animam tuam? O qualis pastor! Non sic fecit bonus ille pastor ⁸, qui animam suam posuit pro ovibus suis, et pro grege suo mori dignatus est. Quid tibi videtur? Si sic ille, ut tu, mortem timuisset, quæ, putas, ovis adhuc a morte erepta fuisset? Putavi

ille bonum pastorem eligere ovibus suis, qui veniente lupo non fugeret, neque sub trepidationis latebra sese ovium periculo posthabito occultaret. Venit lupo, oves rapere non potuit : pastorem non solum rapuit, sed abstravit. Mira res! ovis audet, et pastor trepidat. O qualis pastor! Si talis futurus fuisti, curam ovium quare suscepisti? Si dignitatem accepisti, bonitatem quare non impendis? Bonus pastor animam suam ponit pro ovibus suis.

19. « Sed inquis : Petrus ore negavit ; quia tamen corde non negavit, respexit illum Dominus, et vocatus est nomine suo ad resurrectionis gaudium cum aliis Apostolis. Hoc (ut audio) maximum est quod ad excusationem tuam prætendis. Respexit ergo Dominus Petrum negantem. Quare? nempe ut faceret confitentem. Respexit ad compunctionem, vocavit ad confessionem. Si ergo tu respectum Christi habes, ubi sunt lacrymæ? Si autem lacrymaris, cur non confiteris? Si Petrum sequeris negantem, cur non imitaris et confitentem, et amare flentem? Postremo, frater, si Christianus es, ubi, quæso, signum regis tui? Ego certe video alienum characterem in fronte tua. Scias quid futurum sit super illos, qui bestiae characterem portant. Servi Dei nostri signati sunt in frontibus suis : nec possunt exterminii sententiam evadere, nisi illi tantum qui in figura Thau crucis Christi signaculo muniuntur. Crux in pectore, fides in corde : crux in fronte, confessio in ore. Utrumque debetur, utrumque exigitur : totum Christus sibi vendicat. Cor ad fidem suam, os ad confessionem suam. Sed astat tortor : gladius exemptus est, et minans vibratur. Audi ¹ : Qui amat animam suam, perdet eam. Et : Qui perdidit animam suam in hoc mundo propter me, inveniet eam, et in vitam æternam custodiet eam. Qui perdit propter me, recipiet a me. Ego commendatum servabo, ut melius restituum. Nihil trepidet : capillus de capite tuo non peribit. Quid sollicitaris de anima, qui de capillo etiam securitatem accepisti? Sed forte dicet mihi quod multi hodie intra sinum Ecclesiæ in fide et confessione Christi vivunt, qui, si sic interrogarentur, nullatenus Christum confiterentur. Ad quod ego tibi vix prophetica respondeo, quia judicia Dei abyssus multa. Non licet nobis scrutari profunda et occulta judiciorum Dei, et investigabiles vias ejus penetrare ². Miserebor ³, inquit, qui misereor, et misericordiam præstabo cui misericors fuero. Si ergo in oculis ejus placitum fuerit, ut quibusdam parvulis suis, quos mater Ecclesiæ aut conceptos portat, aut nutrit editos, parcat, et ad istas graviore tentationum interrogationes venire non permittat : tu quis es, qui ei dicas, cur ita facis? Non tuam decet excellentiam, ut te in numero talium existimandum intelligas. Inter magnos servos non quasi parvulus, sed custos et provisor parvulorum, locum acce-

¹ Rom. X. — ² 1. Cor. XII. — ³ Rom. VIII. — ⁴ Luc. IX. — ⁵ Ephes. V. — ⁶ Luc. XIV. — ⁷ Matth. X. — ⁸ Joan. X.

¹ Marc. VIII. — ² Rom. XI. — ³ Exod. XXXIII.

peras. Tibi itaque quasi magno ac forti, et ad primam vel proximam consecutionem idoneo, dixit Jesus ¹ : Sequere me. Te igitur proximum post ipsum locum adeptum, ut eum sequaris adinvenit, quatenus tu postea tuis sequacibus, quibus ad vitam ducatum præbere debueras, fidenter dicere posses cum Apostolo ² : Imitatores mei esote, sicut et ego Christi.

20. « Si ergo Dominus te tanquam servum magnum et fidelem ad imitationis suæ gloriam vocare voluit, vide jam, obsecro, quale hoc sit, ut tu ad pusillos ejus, qui interim fovendi sunt, non premendi, respiciens dicas ³ : Domine, hic autem quid? Dixit hoc ille, quem tu imitari putas, cum tamen per omnia non debeas, non intelligens dignitatem vocationis suæ, nec recte intuens pietatem divinæ dispensationis : et ideo recte incitationis sententiam audivit, ut auscultare disceret, non judicare ⁴. Sic, inquit, eum volo manere, donec veniam, quid ad te? tu me sequere. Hoc est, frater, verbum quod tu intensissime ac diligentissime audire debes, ut regem tuum sequaris et consequaris : sequaris ad pœnam, consequaris ad gloriam. Si pro Christo patiendum est, si se offert occasio, excusationem non habes ⁵. Non enim sunt condignæ passionibus hujus temporis ad futuram gloriam, quæ revelabitur in nobis. Si autem et sine passione negas, non solum dico, non excusaris, sed amplius dico, quod accusaris. Miser, ubi est anima tua ut non recogites qualis factus sis, qualem perdidideris gloriam? ad quantam miseriam corrueris et confusionem? Aspice temetipsum qualis sis. Ubi est corona tua et gloria? Regem tuum dereliquisti. Unaquæque gens deos suos sequitur, et certe ipsi dii non sunt. Tu vero Dominum Deum tuum dereliquisti, et factus es villis, opprobrium pessimorum. O qualis pastor Christianorum! Quomodo pascas tu oves Christi, qui te ipsum perdidisti? Lupo futuro pascende oves datæ sunt. O qualis pastor! Erubescet, miser, et confundere : Christianorum oculi in te versi sunt. De longe videris : latere non potes. Error tuus te notum et manifestum facit. Non potes evadere confusionem, nisi ostendas conversionem ». Hactenus Hugonis ad lapsum archiepiscopum objurgatio. Habetur eadem Epistola jam edita, licet nonnullis immutatis, tom. 3 operum ejusdem Hugonis, lib. 1 Miscellaneorum, tit. 79. Prosequamur jam cætera quæ sunt anni hujus.

21. *Pœnitentia atque obitus Ludovici Crassi regis Francorum, et Willelmi ducis Aquitanie testamentum et obitus.* — Moritur hoc anno hospes et defensor Innocentii papæ, Ludovicus Crassus rex Francorum, quem etsi viventem sanctus Bernardus in Epistola ad Honorium papam valde perstrinxit, quod cum bellici furores in religiosos monachos interdum delinquere adegerunt : pœnitentia ta-

men, qua diem clausit extremum, eum pietate religioneque valde reddidit commendatum. Rem gestam memoria quidem dignam describit Sugerius abbas Sancti-Dionysii, qui iis omnibus præsens erat, vir laudatissimus tum S. Bernardi, tum etiam Petri Cluniacensis abbatis dignis elogiis, qui ejusdem Ludovici res gestas conscripsit, atque : « Qui, ut erat in consilio providus, sibi ipsi consulens, et miseratus animæ suæ, Deo placens, frequentem confessionis et orationis sibi devotione providebat, hoc unum toto animi affectu peroptans, apud sanctos martyres protectores suos Dionysium sociosque ejus, se quomodoocumque deferri (agrotabat diarrhetica) et ante sacratissima eorum corpora regni et coronæ depositione, coronam pro corona, pro regalibus insignibus et imperialibus ornamentis humilem B. Benedicti habitum commutando, monasterium ordinem profiteri. Videant qui monasticæ paupertati derogant, quomodo non solum archiepiscopi, sed et ipsi reges transitorie vitam æternam præferentes, ad singularem monastici Ordinis tutelam securissime confugiant ». Et inferius post enarratam morbi molestiam, quam patientissime perferebat : « Querit, inquit, rejecto omni pudore ob reverentiam divinitatis... et Scottorum et Anglorum, coram devotissime confiteri, et securissimo Dominici Corporis et Sanguinis viatico exitum suum muniri. Cum ipsum præparare festinant, rex ipse inopinate se levans et præparans, vestitus cameram, cunctis adjuvantibus (admirantibus), obviam Corpori Domini Jesus Christi exit, devotissime assistit. Ubi videntibus cunctis tam clericis quam laicis, regem exuens regnum deponit, peccando regnum administrasse confitetur. Filium suum Ludovicum annulo investit, Ecclesiam Dei, pauperes et orphanos tueri, jus suum unicuique custodire, neminem in curia sua capere, si non perpetualiter... ibidem delinquens fide obligat. Ubi etiam aurum et argentum et vasa concupiscibilia et pallia, et palliatia culcitas, et omne mobile quod possidebat et quo ei serviebatur, Ecclesiis et pauperibus et egenis pro amore Dei distribuens, nec chlamydis, nec regis indumentis usque ad camisiam pepercit. Capellam autem suam pretiosam, textum pretiosissimum auro et gemmis ornatum, thuribulum aurum quadraginta unciarum, candelabra centum sexaginta auri unciarum, calicem auro et pretiosissimis gemmis clarissimum, capas de pallio pretiosas decem, pretiosissimum hyacinthum Athanæ regis Ruthenorum filie, quem de sua in manu nostra reddens, ut coronæ spinæ Domini indigeretur, præcepit, sanctis martyribus per nos destinavit, et si quocumque modo subsequi posset, devotissime spopondit.

22. « Ilis igitur exoneratus, et Dei misericordia perfusus, humillime flexis genibus ante sacratissimum Corpus et Sanguinem Domini nostri Jesu Christi (qui enim mox missam celebraverant, illuc et cum processione devote attulerant) in hanc

¹ Joan. XXI. — ² I. Cor. XI. — ³ Joan. XXI. — ⁴ Ibid. —

⁵ Rom. VIII.

oris et cordis veræ et Catholicæ confessionis vocem non tanquam illitteratus, sed tanquam Theologus litteratissimus erumpit :

« Ego peccator Ludovicus confiteor unum et verum Deum, Patrem et Filium et Spiritum sanctum : unam ex hac sancta Trinitate personam, videlicet Unigenitum et consubstantialem et coeternum Dei Patris Filium, de sacratissima Maria Virgine incarnatum, passum, mortuum et sepultum, tertia die resurrexisse, celos ascendisse, ad dexteram Dei Patris considerare, vivos et mortuos extremo et magno judicio judicare. Hanc autem sacratissimi Corporis ejus Eucharistiam illud idem credimus corpus, quod assumptum est de Virgine, quod discipulis suis ad confederandum et unendum et in se commanendum contradidit. Hunc sacratissimum sanguinem illum eundem, qui de latere ejus in Cruce pendens deflavit, et firmissime credimus, et ore et corde confitemur : hocque securissimo viatico decessum nostrum muniri, et contra omnem aeram potestatem certissima protectione defendi peroptamus. Cum autem cunctis admirantibus facta primum peccatorum confessione, devotissime Corpori et Sanguini Jesu Christi communicasset, tanquam illico convalescere incipiens, ad cameram rediit, omniique regalis superbiæ rejecta pompa, sola linea culcita decubuit. Cumque eum de tanto tantillum, et de tam alto, tam humilem, humano more deslere conspiciatur : Noli, inquit, charissime amice, super me flere, quin potius exultando gaudere, quod Dei misericordia præstitit me in eas occursum, sicut vides præparasse ». Subjicit his auctor de ejus adventu ad sanctos martyres Dionysium et socios, deque facta iterum ibi exomologesi :

23. « Interea, inquit, subsecuti sunt eum nuntii Willelmi ducis Aquitanie, denuntiantes eundem ducem ad Sanctum-Jacobum peregre profectum in via demigrasse, sed antequam iter aggrederetur, et etiam in itinere moriens filiam nobilissimam puellam, nomine Eleonoram, ejus filio desponsandam, totamque terram suam eidem retinendam, et deliberasse et dimisisse ». Extat ejusdem Willelmi Aquitanie ducis scriptum, ultimum suæ de his voluntatis Elogium, quod hic describendum putavimus; sic enim se habet :

« In nomine sanctæ et individuae Trinitatis, quæ est una Deitas. Hoc est testamentum, quod ego Willelmus Dei gratia cum domino Willelmo episcopo facio in honorem Salvatoris mundi, et beatorum martyrum, et omnium confessorum, et virginum, et maxime Virginis Mariæ. Cogitans de meis innumerabilibus peccatis, quæ suadente diabolo temerarie perpetravi, et timens tremendi judicii diem, videns bona, quæ videmur tenere, sicut fumum in aere inter manus nostras evanescere, nosmet etiam in hac peregrinatione sine peccato una hora non posse vivere, et satis parvo tempore manere, et omnia quæ putamus possidere esse caduca et suis possessoribus gravamen, com-

mendo me Deo, quem relictis omnibus sequi volo, filias meas regis domini mei protectioni relinquo, Eleonoram collocandam cum domino Ludovico regis filio, si baronibus meis placuerit; cui Aquitaniam et Pictaviam relinquo. Petronilla vero filie meæ possessiones meas et castella, quæ in Burgundia, ut proles Gerardi ducis Burgundie, possideo. Itaque ne videar degenerare, sed imitari sancta vestigia parentum meorum in bono opere, et commendare me Deo et sanctis ejus, et in bonis operibus societatem servorum Dei et benedictionem accipere : do omnibus monasteriis dominationis meæ mille filras terræ distribuendas, prout baronibus meis placuerit. Et quicumque hoc nostrum testamentum disrumpere tentaverit; excommunicatus a Deo et hominibus existat. Qui vero in hoc adjutor fuerit, sit omnibus particeps.

« Signum Willelmi. Signum Eleonoræ. Signum comitis Arvernensis. Signum domini de Thoarcio. Signum Richeldi baronis. Signum Brocardi comitis. Signum Pontii ». Sunt ista excerpta ex Commentariis historicis Gallica lingua scriptis a Joanne Hayano Pictaviensi, Lutetiæ editis anno MDLXXXI.

24. Sed illud mirum est, quod alii scriptores recentiores asserunt hunc ipsum Willelmum ducem Aquitanie, de quo plura superius, post hæc diu multumque supervixisse, atque eremiticam vitam duxisse in Tuscia, illicque sancto fine quiescere : cum idem qui supra Sugerius absque dubitatione aliqua asserat, eundem Willelmum in hac eadem peregrinatione in Hispaniam ad Sanctum-Jacobum, in via esse defunctum, ut nuper audisti. Quod ipsum et idem Sugerius etiam in Vita Ludovici filii testatur istis disertis verbis : « His diebus Willelmus dux Aquitanie apud S. Jacobum iter arripuit, qui volente Deo, antequam ad terminum ad quem suæ peregrinationis accederet, peracta parte itineris expiravit, nullum virilis sexus in ducatu Aquitanie relinquens hæredem. Veruntamen duas filias habuit, etc. » Quid etiam Robertus his temporibus proximus auctor dicat de his magis expresse, sub anni sequentis laterculo, audi : « Comes Pictaviensis Willelmus ad S. Jacobum in Galicia orationis causa proficiscitur, et in sexta feria Parasceves in Ecclesia B. Jacobi moritur, et ante altare sepelitur, etc. » Subjicit de ejus filia Eleonora, ipsius jussu jungenda ejusdem Francorum regis filio, deque patre ipsius, quem eodem anno defunctum tradit. Sunt ex recentioribus nonnulli qui affirmant, eundem Willelmum ducem nequaquam revera esse defunctum, sed ita cum præcipuo suorum domesticorum rem esse transactam, ut per fictionem ea de causa duo mortuus esse diceretur, quo liber ab hoc mundo, posset ubi locorum vellet peregrinari; huncque illum esse Willelmum, qui in Tuscia apud locum, dictum Stabulum Rodis, sancto fine quieverit. Vulgata est historia ista, sed quæ nodos patiatur insolubiles. Atque illum primum, quomodo id potuit ignorasse

Theobaldus episcopus, qui et primordia ejusdem conversionis se accepisse testatur ab ejus discipulo : et tamen verbum nullum habet de simulatione mortis. Alius est ille nodus ex Sugerii scriptis, et aliorum ejus temporis auctorum, maxime strictus : quoniam modo, si post hæc tempora (ut habent ejus Acta) repertus et inventus est a suis vivere Willelmus dux in Palestina, vitam eremiticam ducens, et revocatus in Occidentem, cum res tanta fuerit tanque insolita, et forsitan inaudita, mundo adeo admirabilis in tanto viro, digna mille scriptoribus, tamen nullus hujus sæculi reperiat, quæ istiusmodi catastrophæ memoriæ perpetuæ scriptorum conservaverit monumentis. Cum præsertim Sugerius, qui de ejus morte scripserat, supervixerit diu post obitum ipsius Willelmi ducis, perseverans scribere res Ludovici Francorum regis, et tamen nulla amplius ab eo facta sit mentio de Willelmo, cui, ut sic scipsum corrigeret de eo quod dixerat esse defunctum, necessario id faciendum fuisset. Rursum si vivebat et reversurus erat in Occidentem ; quomodo præmissus ut mortuus a scriptoribus ejus temporis ? cum præsertim gravissima causa illa vereretur de ejusdem ducis filia Eleonora, nupta Ludovico regi Francorum, dum repudiatur ab eodem rege ? Quæ tanta res exigebat ob sui magnitudinem ut revocaretur ad vitam, si licuisset. Idem pater ejus dux Aquitanie, qui eam ipsi nuptui dedisset, quod filia subveniret oppressæ. Sed nulla usquam de his vel levis mentio penes sæculi ejus historicos haud ignobiles qui omnes istiusmodi rem adeo mirandam nec seivisse noscantur. Hæc et alia sunt, quibus redder vehementer suspectus de ejusmodi historie veritate dubitans, ne plures Willelmi per errorem in unum conflati sint a recentioribus ejus auctoribus. Sed prosequamur reliqua. Pergit Sugerius de obitu Francorum regis cætera recensere :

25. « Rex Ludovicus Parisiis recidiva profluvii dyssenteria cum gravissime fatigaretur, omnino deficiebat. Qui nunquam super his improvidus, accito venerabili Parisiensi episcopo Stephano (cui primum antea fuerat adversatus, ut ex S. Bernardi litteris apparet) et religioso S. Victoris abbate Hilduino, cui familiaris contabatur, eo quod monasterium ejus a fundamine construxerat : et confessionem repetit, et exitum suum viatico Domini Corporis muniri devotissime salagit. Cumque se deferri ad Ecclesiam Sanctorum-Martyrum faceret, ut quod votum sæpius spoponderat, humilime persolveret, ægritudinis anticipatus angustis, quod opere non potuit, corde et animo et voluntate complevit. Præcipiens ergo tapetum terre, et cineres tapeto in modum crucis deponi, ibidem manibus suorum depositus, signo S. crucis, præsentiam suam numeris trigésimo regni administrationis, ætatis vero fere sexagesimo anno, kal. Augusti, spiritum emisit, etc ». Agit de sepultura ex opposito Caroli imp. collocata. Sed de his satis ad institutum.

26. *In causa Rudolphi patriarchæ Antiocheni auct. tum Romæ, tum in Oriente per legatos papæ.* — Quod autem ad res pertinet Orientis, hoc anno moritur Bernardus patriarcha Antiochenus, primus Latinorum patriarcharum, cum sedisset (ut Willelmus Tyrius tradit¹, quo fideliores invenimus neminem) annis triginta sex : qui et ipsum creatum tradit an. Redempt. MC. Cumque absque consensu suffraganeorum episc. vel cleri ejus Ecclesiæ intruditur in eam sedem homo militaris, prædices quidam Rudolphus, cognomento Mamistans Francus, dioceseos Cenomanensis, favore populi, quem largitionibus demeruerat, « ejus favore », (inquit Tyrius²) « Ecclesiam et palatium occupans statim sine mora pallium de altari B. Petri, nulla ad Ecclesiam Romanam habita reverentia, sibi assumpsit ». Qui igitur ita cum schismate cepit exordium, in schismate pariter perseveravit, detrectans omnino subijci Ecclesiæ Romanæ Pontifici, quem diceret, non sibi superiorem, sed parem, quod diceret (inquit Tyrius³) utramque Petri esse Cathedram (Antiochenam et Romanam), eamque quasi primogenitum insignem prærogativa ». Ne autem ita temere præsumpta insania invalesceret, Innocentius papa simul ac ista cognovit, ad curandum istiusmodi hominem tanta phrenesi laborantem, decernit legatum a latere in Orientem Albericum episcopum Ostiensem ; de cujus legatione, quæ idem auctor Tyrius archiepiscopus narrat in medium afferemus.

27. Sed quæ ista præcesserunt, ab eodem auctore primum audiamus, quomodo videlicet coactus est venire Romam, supplexque gratiam implorare, qui fastu arrogans se sibi sufficere, nec ullius egere jactabat. Ad humiliandum ergo superbum hunc Deus, cor principis Antiocheni paulo ante erga ipsum propensioris, in eum convertit, qui ex amico in inimicum conversus, nullam prætermisisset voluit ei nocendi occasionem. « Habentes igitur (inquit Tyrius⁴) ejus æmuli tantum studiorum suorum cooperatorem, animosius ejus impugnationibus insistentes, Romam proficiscuntur. Erant autem adversarii ejus Lambertus, vir quidem litteratus, ejusdem Ecclesiæ archidiaconus, et honeste conversationis, sed sæcularium modicum aut nullam habens experientiam, et Arnulphus quidam, Calaber natione, nobilis genere, litteratus, et in secularibus plurimum circumspectus. Ii interpositis appellationis vocibus, consentiente et favente principe, Romam profecti, cum etiam invitum, sed per principem compulsum, eandem viam arripere cogerunt. Factum est itaque quod Arnulphus præcesserat, et in Siciliam compendioso itinere profectus, conjunctis sibi de amicis et consanguineis, quia de Calabria erat oriundus, ubi postmodum fuit Consentinus episcopus (erat

¹ Will. Tyr. l. XIV, c. 10. — ² Ibid. — ³ Ibid. l. XIII, c. 13. —

⁴ Ibid. l. XV, c. 12.

enim valde nobilis, ut diximus) dominum Rogerium Apuliæ ducem, cui notus erat convenerat dicens: Ecce, princeps egregie, in manus tibi optato, sed et gratis datur hostium tuorum immatissimus, Antiochenorum patriarcha, qui tibi et hæredibus tuis in perpetuum Antiochiam abstulit, sublimato in ea viro ignoto, contra juris ordinem. Ecce eum attulit tibi Dominus; et consummata ejus peccata dederunt præsentem. Eia, expergiscere, tracta quomodo eum habeas, certus quia per eum ad hæreditatem jure tibi legitimo successionis debitam, iterum tibi patere poterit introitus, qui tibi per eundem negatus est indebite. His verbis motus Apuliæ dux, sicut vir erat solertissimus, in singulis maritimis urbibus locari præcipit insidias, ut adveniens, statim captus et vinculis mancipatus in Siciliam profectus dirigatur. Ille vero prospera usus navigatione, nihil tale veritus, Brundisium applicans, juxta ducis mandatum, sublatis omnibus, quæ secum tanquam princeps potentissimus detulerat, sed et dispersa familia, victus traditor eidem Arnulpho in Siciliam ante ducem pertrahendus. Ille primum Arnulpho juxta desideria datum est in hostem et impium persecutorem suum pro libero deservire arbitrio, et vices æqua lance reddere pro his quæ de manu ejus acceperat duplicitia. Tandem in præsentia ducis constitutus, habitibus cum eo familiaribus colloquiis, et conventionibus interpositis, sicut vir erat prudens et facundissimus, et honestissimam habens personam, receptis universis cum omni integritate quæ amiserat, sed et familia restituta, spondens quod in reditu per eundem ducem sit habiturus regressum, cum omni honestate Romam pergens dimittitur.

28. « Romam vero perveniens, prima facie difficiles habuit ad dominum papam introitus, tanquam Romanæ persecutor Ecclesiæ, et qui singularem Sedis Apostolicæ primatum comminueret et infringere voluerit, sedem æmulam contra Romanam erigens et parificans Ecclesiam, tanquam læsæ majestatis reus ab ingressu sacri arcendus palatii, et a domini papæ colloquio suspenditur. Porro ¹ tam dominus papa, quam universa Ecclesiæ procliviores erant ad hoc, ut dominum patriarcham sumpta qualibet honesta occasione gravarent; ejusque adversariis plurimum exhibebant favorem. Suspectus enim eis habebatur, eo quod vir dives esset et magnificens, et sedem cui præerat, Antiochenam videlicet, Romanæ subjicere designabatur, sed ei eandem in omnibus paritatem contendebat, dicens: Utramque Petri esse Cathedram, eamque quasi primogenitam, insignem prerogativa. Unde multipliciter ad ejus gravamen nitebantur. Tandem quorundam amicorum usus officio, interventibus tam domini papæ, quam suis familiaribus senitis dirigentibus, admissus est ad domini papæ et curiæ solemniter congregatæ præ-

sentiam, et cum multa susceptus est magnificentia. Porro semel et secundo eo in Consistorium ingresso, sumpta opportunitate, ejus adversarii prodeunt in publicum, et oblati libellis accusatoriis, parati erant cum omni juris solemnitate ad accusandum procedere.

29. « Verum cognoscens tota curia, quod qui ad accusandum prodierant, non erant eatenus instructi, ut domino papæ et ejus assessoribus plenam de objectis possent ibi fidem facere, significatur ambobus, quod interim quiescant, quousque dominus papa aliquem de latere suo ad partes dirigat Antiochenas, qui ibi habita testium et instrumentorum copia, de causa plenius possit cognoscere.

« Interea resignato pallio, quod idem patriarcha de altari Antiochenæ Ecclesiæ sua sibi sumpserat auctoritate, in injuriam ut (dicebatur) Sedis Apostolicæ, et cardinalibus tradito, aliud ei pallium sumptum de corpore B. Petri, more solenni per priorem diaconorum traditur. Sic itaque mora, quantum negotium ejus exigere videbatur, Romæ habita, cum plenitudine gratiæ, salva tamen quæstione, sumpta licentia, ad ducem Rogerium in Siciliam reversus est. Qui redeuntem honorifice suscipiens, postquam mutuis colloquiis sepe et multum ad invicem plura, et quæ sufficere videbantur, familiariter contulerunt, datis eidem a domino duce galeis quotquot ad iter remeandum habuit necessarias, secundis usus flatibus, in Syriam devectus, fauces Orontis attingit, qui fluvius Antiochiam præterfluit, qui locus vulgari appellatione, portus S. Simeonis dicitur, ab Antiochia decem plus minusve modicum distans milliaribus. Postquam ergo, sicut dictum est, dominus patriarcha Colesyriam advenit, et suæ ita vicinus factus est civitati, scribit Ecclesiæ suæ, ut die statuta ei extra civitatem in loco prænomiato cum processione solemniter occurrant. Qui principis favore freli, qui eum (ut prædiximus) odio inexorabili contra fidelitatis debitum, quo eidem tenebantur adstricti, persequerantur, omnino facere, vel ei obedire negant. Sed et introitum civitatis per principis violentiam penitus interdicunt, etc. » Pergit namque auctor narrare, quomodo idem patriarcha, civitate exclusus Antiochena, compulsus sit extra in monasteriis vitam ducere, quousque Edesse comes recepit eum in sua; quodque tandem amicorum interventu princeps Antiochiæ placatus eundem patriarcham Antiochiam revocavit. Ita plane justo Dei judicio, qui sedem ipsam arripuit, ab ea repellitur; et qui in ipso ingressu superbiæ cornua erigens primam desepxit Sedem, ejus supplex petere auxilium coactus fuit, ut posset tuto consistere. Al quoniam sic a curia dimissus est, ut sequeretur eum legatus ab Ecclesia Romana mittendus, qui accusationes adversariorum disquireret: agendum modo de dualibus legationibus, ab Apostolica Sede ea de causa in Orientem adornatis. Quod enim ratione personæ, nempe tanti patriar-

¹ Will. Tyr. l. xv, c. 43.

clia, causa pertractanda esset, æque magni ponderis et dignitatis viro decerneretur istiusmodi legationis munus. Deligitur aut tantum opus archiepiscopi. Lugdunensis, de quo ista Tyrius¹: « Interca legatus Ecclesiæ Romanæ, Petrus nomine, natione Burgundio, Lugdunensis archiepiscopus, missus a domino Innocentio papa, ut causæ prædictæ debitum finem imponat, venit in Syriam, apud Accon applicans. Erat autem vir vitæ venerabilis, simplex ac timens Deum, longævus et iam in senium vergens. Qui statim ex quo Syriam intravit, Hierosolymam devotionis gratia profectus est, unde sub compendio digressus, urgentibus eum prædictis Lamberto (archidiacono Antiocheno) et Arnulpho (Calabro, ejusdem Ecclesiæ decano), ut Antiochiam, uti finem impositurus, acceleraret, Accon iterum pervenit. Ubi gravi correptus ægitudine, antequam procederet, veneno (ut dicitur) in potu ministrato, subito deliquit, in fata concessit. Prænominati autem patriarchæ adversarii Antiochiam properantes omnimodo destituti auxilio, spe quam de adventu legati conceperant frustrati, viæ et laborum, quæ per tot pertulerant tempora, tædio fatigati, per interventores, quos ad hoc reputabant idoneos, pacem supplices postulant, accusationi renuntiare, et parati fidelitatem exhibere. Lambertus in archidiaconatum restituitur; Arnulphus vero nihil humanitatis inveniens, principis iterum fretus auxilio, solita longanimitate rursum ad labores et iter accingitur. Romanque proficiscens, iterum opportune et importune pulsatus. Tandemque precibus proterve insistens, obtinet, ut prædictus legatus, de quo nobis in præsentī sermo est, in Syriam dirigatur; nempe card. Ostiensis, de quo Tyrius²:

30. « Dum hæc in expeditione geruntur, legatus quidam Romanæ Ecclesiæ, Alberticus nomine, episcopus Ostiensis, natione Francus, de episcopatu Belluacensi apud Sydonem applicuit. Quoto anno Redemptoris non dicit. Sic igitur, quod duas istas legationes auctor nullo certo distinguat tempore, tantamque ejusdem intrusi patriarchæ causam, atque per legatum res gestas nulla consignet temporis nota: nec nos id facere præsumimus, sed sub hoc anno cuncta, quæ plurium annorum curriculo esse consummata oportuit, colligimus ex iis quæ sparsim ab eodem auctore reperiuntur conscripta esse. Legatus igitur Apostolicæ Sedis Sydonem appulit eo tempore, quo Panacis civitas obsidebatur a nostris, quo et legatus perrexit, nec inde discessit, quousque a civilis facta deditione, ea politi sunt nostri. « Inde », inquit Tyrius³, « Deo gratias et hostias solennes exhibituri, Hierosolymam dominus rex cum domino principe Antiocheno, cum domino patriarcha (Hierosolymitano scilicet), et domino legato contendunt. Completis autem ibi de more orationibus, et mora per dies aliquot Hierosolymis habita, dominus princeps,

(Antiochenus videlicet), pertentata domini legati mente, quid propositi adversus patriarcham suam (Antiochenum) haberet, et invitans eum, ut non tardaret venire, sed fortis et de ejus auxilio certus veniret, Antiochiam reversus est. Et inferius⁴: « Legatus, completis orationibus, dominum patriarcham (Hierosolymitanum) et universos regni pontifices ad Synodum convocans apud Antiochiam, pridie kalend. Decembris, illuc cum omni celeritate contendit.

31. « Die igitur statuta affuerunt de diecesi Hierosolymitana dominus Willelmus patriarcha, Gaudentius Cæsariensis archiepiscopus, Anselmus Bethlehemita episcopus: affuit et dominus Fulcherus Tyrensis archiepiscopus, S. R. E. multum devotus et fidelis, in quo tota spes legato erat consummationis negotii: erat autem vir magnanimus et discretus plurimum. Affuit quoque cum duobus suffraganeis suis, Bernardo videlicet Sidoniense et Baldino Berytheense. De provincia autem Antiochena, quoniam viciniore erat, affuerunt universi, quorum varia nimis et ab invicem dissona erant desideria. Nam Stephanus Tarsensis archiepiscopus, Gerardus Laodicensis, Hugo Gabulensis archiepiscopus canonicorum contra dominum patriarcham fovebant causam. Franco autem Hieropolitanus, et Gerardus Coritiensis, Serloque Apameensis, licet ei ab initio adversarius fuisset, conversus ad eum, domino patriarchæ suam manifeste præstabat patrocinium. Alii in neutram partem manifeste videbantur declinare. Die ergo præfixa, residentibus archiepiscopis, episcopis, abbatibus, ex more in Ecclesiâ principis Apostolorum, et pontificalibus induti, præsidebat domino legato, et vices domini papæ obtinente, lectus in publico mandatorum domini papæ tenor. Quo peracto diligentius et plenius cognito, prodierunt in publicum accusatores Arnulphus sæpe dictus et Lambertus archidiaconus: qui licet prius cum domino patriarcha convenisset in dolo, et beneficii sui obtinisset restitutionem; tamen conversus in arcum pravam, denuo se constituit accusatorem. Adjunctique sunt eis alii etiam complures, videntes non satis prospere tempora domino patriarchæ respondere. Hinc etiam erat illud manifeste verum deprehendere, quod Naso proverbialiter dicendum tradidit:

Cum fueris felix, multos numerabis amicos:
Tempora si fuerint nubila, solus eris.

Procedentes igitur in publicum auditorium accusatores, paratos se dicunt secundum juris regulas porrectis libellis accusatoriis, ad accusandum procedere, et subijcere, si deficient, talionem. Erant autem capitula, super quibus proposuerant eum impetere, schedulis inscripta. Quædam de enormi

¹ Will. Tyr. l. xv. c. 15. — ² Ibid. c. 11. — ³ Ibid.

⁴ Will. Tyr. l. xv. c. 15. 16.

et indisciplinato, et contra regulas sanctorum patrum ejus in patriarchatum introitu. Quaedam de ejus incontinentia et operibus simoniacis. His instanter postulauit, ut se presentem exhiberet, mittuntur qui eum ad Synodum solemniter invitent; et ut ad objecta veniat responsurus moneant; qui omnino venire refutavit. Ea itaque die nihil amplius processum est in verbo illo, nisi quod exhortatorios habuerunt sermones ad invicem, sicut moris est in talibus.

32. « Secunda iterum die, convenientes denuo et ex ordine residentes, iterum citatorio edicto dominum patriarcham solemniter vocant. Qui sicut et pridie, omnino venire noluit. Interim Serlo Apameensis archiepiscopus in choro pontificum sine veste residens nuptiali (non enim more aliorum indutus erat pontificalibus) a domino legato convenitur, quare reliquis fratribus non consonaret, et quare ad accusandum, sicut aliquando fecerat, non procederet? Respondit: Quod aliquando feci, inconsulto calore et contra salutem animæ meæ, detrahens patri meo, et more maledicti Cham, verenda patris discooperiens, operatus sum: et nunc ab errore devio me auctore Domino revocans, nec eum accusare nec judicare præsumptuose tentabo, sed pro ejus statu et incolumitate paratus sum usque ad mortem decertare. Præcipitur ergo exire, et data in eum sententia excommunicationis simul et degradationis, sive juste, sive aliter, ab omni officio sacerdotali et pontificali depositus est. Tantus enim timor domini principis, in partem legati nimium proclivis omnes invaserat, ut jam nulla contradicendi libertas alicui præstaretur. Incendebat eum principem minus providum et indiscretum quidam Petrus Armenius presidii civitatis custos, vir malitiosus supra modum, sperans quod si patriarcham deponi contingeret, quemdam nepotem suum Haimericum nomine, quem dominus patriarcha in suam perniciem ejusdem Ecclesie decanum fecerat, posset per seductum principem in sedem illam provehere; quod et factum est. Serlo igitur sive de facto, sive de jure depositus, Antiochia egrediens, in suam dioccesim se contulit, perveniensque ad castrum Harenc, ægritudine præventus, et curarum anxius pondere lecto decubuit, et conversus ad parietem, et injuriæ enormitatem non ferens expiravit. Tertia demum die iterum convenientes, et residentes ex ordine, tertio dirigunt qui dominum patriarcham preceptorio citent edicto, et ut veniat objectis responsurus moneant. Qui utrum conscientiam veritus, an contra se Synodum invidiose collectam sciens, et principis violentiam timens, pro certo compertum non habemus; venire, sicut et prius, omnino negavit. Erat autem in palatio suo cum suis familiaribus, multo stipatus equitum et popularium comitatu. Convenerant enim ad ejus subsidium universi de civitate, qui nisi principis timuissent potentiam, legatum, cum universis qui in ejus depositione convenerant,

urbe cum ignominia parati erant depellere. Videns ergo legatus, quod ad se venire nolbat patriarcha, de domini principis confusis patrocinio et viribus, in palatium ascendit, ibique data in eum depositionis sententia, anulum et crucem compulsi violenter resignare. Inde jubente legato, principi traditus et vinculis miserabiliter alligatus, tanquam vir sanguinum ignominiose tractatus, apud monasterium S. Simeonis juxta mare in monte eminentissimo situm carceri mancipatus est. Et infra: « Catenatus in monasterio diu detentus tandem elapsus, Romam profectus est. Ibi aliquatenus gratiam Sedis Apostolicæ assecutus, dum redire maturaret, veneno hausto, sceleris ministro porrigente, nescimus quo, miserabiliter interiiit. Hic tandem fuis hominis infelicissimi, qui sibi ipsi auctor tot ærumnarum fuit. Sed prosequamur ejusdem legati reliquas res gestas in Oriente. Pergit Tyrius: »

33. « Legatus igitur, deposito patriarcha et consummatas apud Antiochiam pro quibus venerat negotiis, Hierosolymam reversus est, ubi usque ad sollemnitatem Paschalem moram faciens, habito prius consilio cum prælatis Ecclesiarum, tertia post sanctum Pascha die, una cum domino patriarcha et episcoporum nonnullis templum Domini solemniter dedicavit. Affuerunt ibi dedicationis die multi tam de partibus Ultramontanis, quam de Cismarinis regionibus magni et nobiles viri, inter quos affuit et dominus Joscelinus junior, comes Edessanus, qui tunc in solemnibus S. Paschæ diebus magnifice nimis in civitate moram faciebat. Qua celebritate completa, convocatis archiepiscopis, episcopis et aliis Ecclesiarum prælatis, una cum domino patriarcha, Concilium celebravit in primitiva et Ecclesiarum matre sancta Sion, tractans ibi cum eis de iis quæ instanti tempore videbantur convenire. Cui Synodo interfuit Maximus Armeniorum pontifex, imo omnium episcoporum Cappadociæ, Mediæ et Persidis, et utriusque Armeniæ princeps et doctor eximius, qui Catholicus dicitur. Cum hoc etiam de fidei articulis, in quibus a nobis dissentire videtur populus ejus, habitus est tractatus, et ex parte ejus promissa est in multis correctio. Quibus rite peractis, prædictus legatus ad Aconensem rediens civitatem, inde parato navigio Romam reversus est. » Hactenus Alberici Ostiensis episcopi totius legationis periodus. Porro ista omnia hoc anno coepta, quo Bernardus patriarcha obiit, propagata esse usque ad annum saltem millesimum centesimum trigesimum nonum oportuit. Nam primum adventum patriarchæ Antiocheni Romam contigisse vidimus eo tempore, quo Innocentius papa pacifice Romæ sederet, quod non ante annum trigesimum octavum factum esse, ex iis quæ dicuntur inferius, apparebit. Sed quoniam haud quæque res gestæ certis annorum limitibus definitæ ab auctore reperiuntur, ut iisdem

nos annis reddidisse potuissemus, continuata eadem omnia una narratione oportuit absolvisse. Porro (quod non prætermittendum) ad eundem Albericum card. episcopum Ostiensem legatum

in Syria, extat tum data Epistola Petri Clunia-censis¹.

¹ Petr. Clun. l. IV. Ep. XLVIII.

ANNO PERIODI GRÆCO-ROMANÆ 6629. — ANNO ÆRÆ HISPAN. 1174. — ANNO HEGIRÆ 531, INCHOATO DIE 29 SEPT., FER. 3. — JESU CHRISTI 1136

— Innocentii II papæ 7. — Lotharii reg. 12. imp. 4. Joannis Comneni imp. 19.

1. *Expeditio Italica Lotharii imp.* — A num. 4 ad 14. Supplendi hic Annales Ecclesiastici narratione rerum in regno Neapolitano hoc anno gestarum. Cœpit annus a redivit *Sergii* præfecti militum in urbem Neapolitanam, quem Falco in Chron., qui annum a kalendis Martii exorditur, cum præcedenti copulat; sed Alexander abbas discessus Sergii mentionem faciens, et reditum ejus in urbem Neapolitanam tacens, ostendit eum post mensem Januarium currentis anni reversum esse. Falco itaque de auxilio a Pisanis Sergio præfecto militiæ promisso ait: « Quorundam inimicorum consilio auxilium inferre, illud promissum destructum est. Unde magister ipse militum vehementer turbatus Neapolim revertitur, et civitatem suam viriliter tenuit ». Lotharium autem imperatorem hoc anno in Italiam descendisse, docet his verbis chronographus Hildensheimensis, qui ad annum mccccvi ait: « Circa Assumptionem sanctæ Mariæ: expeditio imperatoris in Italiam »; quod et Falco in Chron. etiam refert. Ad ejus narrationem Peregrinus hæc: « Lotharii in Liguriam atque in Italiam adventus rectissime quidem in Cod. 499 (nempe anonymi Casinensis) sed ad annum notatur mccccvi ». In Codice vero, quem secutus est Caraciolus, notatur annus mccccv propter perpetuum prochronismum minus anni usque ad mortem Rogerii; quippe mense Novembri, Indictione xv, vergente scilicet præfato anno, positus apud Roncalias; (planus ac patens est campus, non longe a Phacentia super Padum, Othoni Frisingensi in Friderico lib. 2, cap. 12, et Gunthero lib. 2.) legem condidit de *fundo non alienando*, descriptam lib. 2 feudorum, tit. 52, necnon, sub alio tamen titulo lib. 3 legum Longobard. tit. ult. Falco etiam discrete pro ista stat sententia.

2. *Eum illic crebris litteris vocavit Innocentius II.* — « Anno, inquit, mccccvi Dom. Incar. et septimo papæ Innocentii, præfatus imperator Apostolico Innocentio mandavit, ut cum præstolare-

tur qui Domino favente, sicut promiserat, in festivitate S. Jacobi venire despondebat »; ubi Peregrinus legendum censet, *disponerat*. Mox infra: « Princeps Robertus audiens civitatem Neapolim fumis periculo urgeri, cum quinque navigiis ad eandem civitatem venit, et imperatoris adventum firmiter propalavit, et cursu celeri Pisas revertitur, continuo ad imperatorem festinans; invenit eum montes descendisse, et super civitatem Cremonam castra sua posuisse, etc. » Lotharius itaque hoc anno Subalpinam pervenit Italiam, sive in Galliam Transpadanam; est namque trans Padum Cremona, quam anonymus Casinensis more aliis tum suæ, tum aliquanto antiquioris ætatis frequenter usurpato nomine appellavit *Liguriam*; etsi hæc olim ultra Padum non porrigebatur. Petrus quidem Diaconus hujus temporis scriptor lib. 4 Chron. Casin. cap. 99, ait: « Ab Innocentio remorante Pisis, crebris litteris monitus (nempe Lotharius) ut Romanum imperium ab hostium jugo defenderet, Ecclesiamque concussam et laceratam, et ad unitatem concordiamque revocaret, Caesar clementissimus, anno Dom. Incarnat. mccccv, coacto ex omni orbe Romano immenso exercitu, cum uxore Augusta (Richiza appellata) intravit Italiam. Ingens tunc pavor invasit hostes Ecclesiæ: et quid facto opus esset, inter se tractabant ». Verum vel Petrum Diaconum vel exscriptores in anno consignando errasse certum esse debet. Tom. II Bullarii Cassinensis pag. 449, refertur donatio *Lotharii imp.* facta monasterio S. Benedicti de Padalyrone, data « anno Incarnat. Dom. mccccv, tertio nonas Decemb., Indict. xiii, (legendum Indict. xiv) regni regis Lotharii xi, imperii iii. Actum Golarie in Christi nomine », sed loco *Golarie*, legendum *Goslarie*, quæ urbs est Saxonie inferioris. Quare toto anno superiori Lotharius imp. in Germania versatus est.

3. *Vocavit etiam dicum Bernardum.* — Porro sicut anno mccccvi, Innocentius II non solum Lo-

tharium imp., sibi Ecclesiaeque opitulaturum, in Italiam accessit, sed etiam sanctum Bernardum Claravalle agentem; ita et hoc anno eundem sanctum iterum in Italiam vocavit. Baronius quidem, Mairicus in Annal. Cister. omnesque recentes scriptores, qui de hac tertia protectione Italiae divi Bernardi verba faciunt, eam in annum sequentem conferunt, sed Herbertus Turriani Sardiniae archiepiscopus, inter sancti Bernardi discipulos educatus in Claravalle, in libris de Miraculis sancti Bernardi a Chiffletio editis, illam opinionem plane evertit; libro enim 2, cap. 14, ait: « Isdem quoque venerabilis abbas (nempe divus Bernardus) cum aliquando per annos tres moratus fuisset in Urbe Roma, atque in partibus Italicis pro sedando schismate Petri Leonis (in quo videlicet opere eundem famulum suum Christum magnifice honestavit), tandem reversus Claramvallem, statim post factam orationem capitulum fratrum introivit: et quia fatigatus ex itinere, diu loqui non poterat, brevem quidem sermonem, sed plenum consolatione protulit, eis dicens: Benedictus Deus, qui vos mihi reddidit et me vobis. Et ego quidem, filii, quamvis per triennium hoc visum fuero longe remotus a vobis, non tamen putatis me semper absentem fuisse ». Quare cum certum sit, Bernardum an. mcccxxxviii, relicta Italia, Claramvallem rediisse, ita et indubitatum currenti Claravalle in Italiam venisse. Quid ibi egerit duobus consequentibus annis, cum Baronio referemus.

4. *Neapolis a Rogerio rege circumclusa.* — Nihil singularius hoc anno gestum occurrit, quam urbis Neapolitanae circumseptio his verbis a Falcone pag. 298 narrata: « Princeps (nempe Capuanus) ipse audiens civitatem Neapolis famis periculo urgeri, etc. illico pedibus advolvitur, lacrymis rogans, ut sibi exhaeredito subveniret (nempe imperator). Interea ad tantam famis infirmitatem civitas pervenit Neapolitana, quod infantes multi, pueri, adolescentes, juvenes, senes etiam utriusque sexus per civitatis plateas et domos spiritum exhalabant; sed magister militum et ejus fideles, qui libertati invigilabant civitatis, quique antiquorum suorum sequebantur honestatem, mori potius famis morte malebant, quam sub nefandi regis potestate colla submittere. Ille inter praefatus imperator litteras suas signatas propriis legatis suis, magistro militum, et civibus destinavit, consolationis verba describens, ut fidelitatis propositum teneat, quia favente Domino in proximo ad ejus liberationem festinaret. Legati vero illi coram omnibus juraverunt, imperatorem illum ad civitatem Spoletum dimisisse. Diebus autem non multis excursis, cum adest legatus alius ipsius imperatoris litteras ferens, consolationis similiter verba continentes, qui eum dimisisse apud fluvium Piscariam affirmavit. Item in subsequentibus diebus alias transmisit imperator litteras, continentes se in proximo venturum in Apuliam, et Italiam a tanta perditione redempturum. Archiepiscopus

praeterea Marinus civitatis Neapolitanae, et Philippus de Acerra, civis Neapolitanus, vir prudentis ingenii et Rainulphus comes, qui obviam imperatori dudum exierant, similiter litteras suas consolationis magistro militum delegavit. Litteris itaque talibus acceptis coacti, imperatoris tamen illius expectabant adventum ». Ubi Falco adventum imperatoris ad fluvium Piscariam et in Apuliam, quem certum est ad sequentem annum pertinere, uno tenore describit, ut ex dicendis anno sequenti perspicuum fiet.

5. *Bellum Mediolanenses inter et Cremonenses ardet.* — Landulphus Junior in Chron. cap. 43, apud Puricellum in Monum. Basil. Ambros. numero 381, de Lotharii imp. in Italiam adventu haec habet: « Addito quoque isto infortunio (nempe amissione libertatum Ecclesiae Mediolanensis) imperator Lotharius cum principibus cuiuscumque dignitatis venit in Longobardiam. In cuius castris iste (nempe Roboaldus archiep. Mediolanensis) Mediolani cum suis suffraganeis ad nutum imperatoris circumferebatur, et circumferendo excommunicavit Cremonenses; quia non reddiderant imperatori Mediolanenses, Cremonensium vincula et captionem sustinentes ». Bartholomaeus Zucchini in Hist. Modoetiae et Coronae-Ferrae refert Privilegium a Lothario imp. datum, quo canonicos Modoetienses in suum suscipit patrocinium: « Anno Incarnat. Dom. mcccxxvi, Indict. xii, (legendum xiv) anno vero regis Lotharii xi, imperii quarto. Actum apud castrum Sancti-Basiani ». Quare Lotharius jam mense Augusto in Longobardia versabatur.

6. *Lothar. imp. Papienses in suam gratiam recipit.* — Subjungit Landulphus: « Mediolanensium igitur exercitus confortatus praesentia imperatoris et vinculo excommunicationis, Soncinum, Sanctumque-Bassanum, et alia multa castra Cremonensium destruxerunt. Quibus destructis, multitudo Mediolanensium ad civitatem rediit. Archiepiscopus, et quaedam pars incluta militiae Mediolanensium cum imperatore in Roncalia supra Padum castrametati sunt; ibique per plures dies et hebdomadas imperator curiam potestative habuit ». His addit Puricellus: « quocirca idemmet Landulphus historicus ibidem per tres dies praesens suam ipsius de Sancti-Pauli in compito Ecclesia causam peroravit; sed non eo exitu, quem speraverat. Deinde haec ex Landulpho cap. 43 recitat: « Lotharius, postmodum imperator, in quarta die, quae fuit dies sabbati, post meam querelam, secus Papiam est castrametatus ad locum qui dicitur Lardiacus, super flumen Oronam positus. Cumque imperator ibi pernoctasset, et diem Domini-quasi dimidiasset, militia ejus incurrit ad Papienses, qui armati exierant. In praelio illo fortissima manus principis Conradi (qui titulum regis abdicarat, et postea Lothario successit) quamplures de Papiensibus eiecit et apprehendit: neque a praelio se subtraxit, donec Papienses fere ad mu-

ros civitatis conculcavit et appropinquavit. Tunc Papienses valde conferriti, et metuentes hostilem exercitum Mediolanensium concurrentium ad imperatoris triumphum, in primo diluculo secundæ feriæ cum maxima devotione reddiderunt imperatori quotquot habebant de Mediolanensibus in sua captione. Imperator commotus maxima pietate, Papienses eadem die a sua custodia solvit et liberos dimisit : et die altera sua castra amovit, et ad locum qui dicitur Abbiatocrassum (Abbiagrasse) pervenit : et omnis multitudo Mediolanensium, cum suis militibus a captione Papiensium liberans, redit Mediolanum. De cætero imperator Ticinum atque Palum ad suum commodum transivit ».

7. *Bellum Mediolanenses inter et Cremonenses continuatur.* — Innocentius II duritiam Robaldi archiepiscopi adversus Cremonenses improbavit, et excommunicationem ab illo latam relaxavit : « At Innocentius papa », inquit Landulphus Junior cap. 46, quod ultimum est ejus Historiæ, « Cremonenses ab excommunicatione Robaldi archiepiscopi solvit. Verumtamen Mediolanensis exercitus Cremonensibus, nec eorum episcopo pepercit, quia post absoluticnem (sc. Innocentii II) Juvenalem castellum eorum, et alia apprehendit ; et episcopum eorum lorica tum, et hortantem suos ad pugnam, proficientem homicidium, de ipso castello pertraxit, et plures menses in custodia tenuit », usque ad annum mccccvii. De Uberto episcopo Cremonensi, qui ad annum mclxix pervenit, plura Ughellus Tom. iv Ital. Sacræ. Addit Landulphus, hunc præsulē in carcere mansisse « donec Herlembaldus de Bresorio, custos illius custodiæ, contaminatus veneno, prout dicitur, subito in mortem corruit. Et in ipsa nocte, qua ipse custos subito occidit, episcopus de ipsa domo, qua claudebatur, effugit, et liberatus, Papiam, deinde Cremonam pervenit. Hic fortassis episcopus reminiscitur amaritudinis, qua potatus fuit Mediolani in die suæ ordinationis ; sed prout quibusdam placet, non bene. Quia si Jordanus archiepiscopus, ejusque Ecclesia amovit Ugonem de Noceto, nobilem virum, et Parmensis Ecclesiæ quasi archidiaconum ab episcopatu Cremonensi, in quo Cremonenses per suam electionem, et Henricus rex eorum per investituram suæ laudationis et confirmationis ipsum posterant et susceperant per plures annos reverenter, et diu foris et intus tenuerant. Quid mirum, si populus Mediolanensis compulsi istum Ubertum, egregium virum, jurare fidelitatem Ecclesiæ Mediolanensi et archiepiscopo Jordano, quando ipsum Ubertum episcopum consecravit. Quod si forte quis dixerit : Amotio Ugonis fuit justa, sed compulsio Uberti fuit iniqua : nec dicat ejus mortalis auctoritate principaliter est regenda Cremona, ejusque Ecclesia ; si non vero dixerit : Utrumque fuit malum et iniquum ; surgat igitur Deus exercituum, qui Mediolanum et Cremonam corrigat, et ne acolythum oppressum et expulsum, quemadmodum in hac mea copia

continente probos et pravos legitur, in hac gubernat et protegat. Deo gratias. Amen ». Ita finit Historia Landulphi Junioris, in cujus calce librarius quispiam addidit eam completi quæ ab an. mxciv gesta sunt usque ad annum mccccxiii *tempore Robaldi archiepiscopi* ; sed imperite, cum hæc Historia pertingat usque ad annum mccccvii, quo ea elucubrata fuit. Ex ea, si tandem lucem videat, Historia Ecclesiastica magnam lucem accipere poterit. Sigonius, qui lib. xi gesta hoc anno in Italia a Lothario accurate scribit, eum non viderat, ut ex ejus lectione intelligere est.

8. *Ecclesia Lugdun. festum Conceptionis B. Virginis instituit.* — Ad num. 14 et seq. Cum Ecclesia Lugdunensis festum immaculatæ Conceptionis beatissimæ Virginis hoc circiter tempore instituisset, divus Bernardus Epistola clxxv Lugdunenses redarguit, quod eam novitatem in Ecclesiam induxissent, inconsulto Pontifice Romano. Sed non tantum divus Bernardus, verum etiam Potho monachus et presbyter Prumiensis, cujus Opuscula tom. xxi Biblioth. Patrum edit. Lugdunensis recitata, pietatem spirant, lib. 3 de Domo Dei versus finem, in eandem novitatem invehitur : « Sciendum sane, inquit, quod Romani Pontifices semper magis antiqua exequi et observare, quam nova instituere, nisi aliqua rationabilis causa perurgeret, consueverunt ». Tum multis interpositis, librum illum his verbis claudit : « Ecce vita monastica, quæ erat columna et firmamentum religionis, in qua videlicet vigeat disciplina censura, morum gravitas, maturitas consiliorum, auctoritatis pondus, antiquitatis insigne, in Ecclesiasticis Officiis repentinis visa est novitatibus acquiescere, et quadam juvenili passa est decolorari levitate. Miramur ergo satis quod visum fuerit hoc tempore quibusdam monasteriis mutare colorem optimum, novas quasdam inducendo celebritates. Numquid Patribus doctores aut devotiores sumus ? Superba mente præsumimus, quidquid ipsorum in talibus prudentia præterivit. Neque vero nos in hujusmodi aliquid invenire possumus, quod illorum quiverit diligentiam præterisse. Quæ igitur ratio hæc festa celebranda nobis induxit ? Festum videlicet Sanctæ-Trinitatis, festum Transfigurationis Domini. Additur his a quibusdam, quod magis absurdum videtur (quia festa Trinitatis et Transfigurationis in quibusdam Ecclesiis jam a multis annis celebrabantur, a paucioribus vero annis in Gallia, ubi Potho scribebat, tantum in Ecclesia Lugdunensi), festum quoque Conceptionis sanctæ Mariæ. Nos in his omnibus devotioni fidelium minime derogamus, dum rationem quærimus, quæ rationabile obsequium nostrum offerre Domino debemus, ne forte a via recta aberrantes, presumptionis spiritu seducamur ». Verum Conceptionis festum, ut nihil de duobus aliis hic dicam, ubique receptum est sæculo xv, auctoritate Concilii Basiliensis et Sixti IV, et hodie cum Octava celebratur in universa Ecclesia, sicut festum

Assumptionis ejusdem beatissimæ Virginis, de quo etiam diu inter viros doctos contentio fuit. Baronius num. 15 dicit Bernardum ita scripsisse, « licet diversa senserit, ut res ipsa accuratius examinaretur, atque deferretur ad iudicium Apostolicæ Sedis ». Verum incredibile sanctum doctorem in re tanti momenti contra propriam mentem tam asseveranter locutum esse.

9. *Moritur Ludovic. VI, Franciæ rex.* — Ad num. 21 et seq. Tam *Ludovici VI*, cognomento *Grossi*, Francorum regis, et *Guillelmi IX*, Aquitanici ducis obitus, quam matrimonium *Alienore* cum *Ludovico* regis filio qui ei successit, ad annum sequentem pertinent, ut legitur in variis rerum Gallicarum Chronicis veteribus, in *Orderico* lib. 43 aliisque. Neque hæc in dubium revocari possunt, cum *Sugerius* in *Vita Ludovici Grossi*, pag. 320, de eo ægrolante verba faciens scribat, venisse nuntios *Guillelmi* ducis Aquitanie, « denuntiantes eundem ducem ad Sanctum-Jacobum peregre profectum in via demigrasse: sed antequam iter aggrediretur, et etiam in itinere, moriens filiam nobilissimam puellam, nomine *Alienor*, desponsandam, totamque terram suam eidem retinendam, et deliberasse et dimisisse ». Subdit *Sugerius* regem misisse filium suum *Ludovicum* in Aquitaniam, ut matrimonium illud cum *Alienore* contraheret, seque in ejus comitatu fuisse. Tum regis mortem, quæ Parisiis contigit, narrat, alique: « xxx regni administrationis, ætatis vero fere lx anno, kalend. Augusti spiritum emisit ». *Gemmeticensis* Historiam suam absolvit narratione mortis hujus regis, asseritque eam accidisse *kal. Augusti*, anno ab Incarnat. Domini mccccvii. Quare erravit continuator *Aimoini* lib. 5, cap. 32, ubi scribit:

« Trigesimo unctionis suæ anno, ætatis vero lx, Incarnat. autem Dominiæ mccccvi, Parisiis feliciter obiit ». Qui error illi natus, quod *Philippi* regis mortem biennio prævertisset, quod non animadvertens Baronius, mortem *Philippi* regis cum anno mxcvi, mortem vero *Ludovici VI* filii cum præsentis copulavit. *Ordericus* pag. 911, *Ludovici VI* obitum cum die *II nonas Augusti* perpetuam conjunxit, sed recte cum anno mccccvii, addiditque: « Sequenti autem Dominico (die nempe viii, mensis Augusti) *Ludovicus* puer (qui natus erat annos xviii), *Pictavis* coronatus est, et sic regnum Francorum et Aquitanie ducatum, quem nullus patrum suorum habuit, nactus est ». *Ludovicus VI* novo exemplo in suis Diplomatis tam regni sui, quam uxoris annos aliquando numeravit, ut in subscriptione anno mccc, num. 19 recitatu, aliisque videre est; *Ludovicus* vero VI, ejus filius, *Juvenis* cognominatus, novo alio exemplo annos nativitatibus *Philippi*, cognominati *Augusti*, qui ei successit, quandoque memoravit, ut patet ex Diplomate a *Guichenone* in Bibliotheca Sebustiana cap. 36 recitato, in quo dicitur: « Actum publice apud Fontemblaudi, anno Verbi incar-

nali mclxix, regni vero nostri xxxiii, *Philippi* filii nostri nativitate ».

10. *Reg. Francorum strumosos sanant.* — Jam ante *Ludovicum VI* Francorum reges strumosos sanabant. *Guibertus* enim abbas de Novingento anno mccciv demortuus, in libris de Pignoribus sanctorum scribit: « In promptu est in ortu præpotentium principum, ut puta *Alexandri*, *Julii* *Cæsaris*, *Octaviani*, sed et aliorum signa præmissa; et in moribus habuisse *Karolum* et *Ludovicum* filium ejus prognostica. Unde et nostro tempore et *Lotharingorum* seu *Anglicorum* regum occisibus, et innovatione regnorum sæpius cometes emersisse conspeximus. Quid quod dominum nostrum *Ludovicum* regem consuetudinario uti videmus prodigio? Hos plane, qui scrophas circa jugulum aut uspiam in corpore patiuntur, ad tactum ejus superaddito crucis signo vidi catervatim, me ei coherente, et etiam prohibente, concurrere. Quos tamen ille ingenta liberalitate scæva ad se manu obuncans, humillime consiguabat. Cujus gloriam miraculi cum *Philippus* pater ejus alacriter exerceret, nescio quibus incidentibus culpis amisit. Super aliis regibus, qualiter se in hac re gerant, supersedeo. Regem tamen Anglicum nequitiam in talibus audere comperio ». Non dubito, quin hæc gratia gratis data primitus a Deo collata fuerit *Roberto* piissimo Francorum regi *Ludovici VI* atavo; cum *Illegaldus* circa finem ejus Vitæ dicat: « Tantam gratiam in medendis corporibus perfecto viro contulit divina virtus, ut sua piissima manu infirmis locum tangens vulneris et illis imprimens signum sanctæ Crucis, omnem auferret ab eis dolorem infirmitatis ». Idem dominum *S. Eduardo* Anglorum regi collatum, sed ejus successores nonnisi post annum mccciv strumosos sanarunt, ut ex laudato *Guiberti* loco intelligere est.

11. *Moritur Guillelmus IX Aquitanie dux.* — A num 23, ad 26. Quanvis ex *Sugero* laudato constet, *Guillelmum IX* Aquitanie et Pictorum ducem, eodem quo *Ludovicus VI* Franciæ rex, anno sequenti scilicet, mortem oppetiisse, huic tamen jungendus *Ordericus*, cui dem et mensem lib. 13 notavit. Is itaque ad annum mccccvii ait: « Anno ab Incarnat. Domini mccccvi, Indict. xv, ingens in toto orbe siccitas fuit, quantum nemo nostris temporibus vidit ». Paucis interpositis: « Eodem tempore *Guillelmus* *Pictaviensis* dux, memor malorum quæ nuper in Normannia operatus est, penitentia motus, ad Sanctum-Jacobum peregre profectus est. Deinde feria VI Parasceve, V idus Aprilis, sacra communione munitus est, et ante aram beati Apostoli venerabiliter defunctus est. Filiam vero suam *Ludovicum* juveni Francorum regi in conjugem dari præcepit, ipsumque regem totius juris sui hæredem constituit. Quod ita postea factum est ». Ita etiam habent varii hujus temporis scriptores. *Gaudfredus* prior *Vosiensis* pag. 304 de *Willelmo IX* morte, et de conjugio filiae

ejus cum Ludovico rege verba faciens, ait, Ludovicum Lemovicis adventasse die xxx mensis Junii, sed nuptias cum *Eleonora* postea Burdigalæ celebratas.

12. *Guillelmus iste cum S. Guillelmo eremita male confusus.* — Sed quia hoc ipso tempore vivebat *sanctus Guillelmus* nobilissimis parentibus in Pictavia ortus, bellator acerrimus, qui post conversionem suam, spreto nobili prosapia, pœnitentiæ austerrimæ se dedit, processu temporis varii auctores utrumque Guillelmum in unum confundere, et non solum gesta ab uno alteri adscribere, sed etiam utriusque vitam variis fabulis deturparunt. Sanctus *Guillelmus* consilio Eugenii papæ III Hierosolimam profectus est, et cælesti voce monitus venit in Tusciam, ubi sancte vixit, et mortuus est anno millesimo centesimo quinquagesimo septimo, teste Alberto discipulo ejus, qui Vitam sancti Guillelmi eremite cognomento *Magni* scripsit. Ejus mentio in Martyrologio Romano ad diem x mensis Februarii his verbis : « In Stabulo Rodis (quod nomen ejus monasterii fuit) in territorio Senensi sancti Guillelmi eremite ». Henschenius ad diem x Februarii in Commentario prævio ad Vitam sancti Guillelmi Magni eremite § 6, ait, nullum auctorem, de ejus ætate aliquid certo constet, reperiri, excepto forsitan Theobaldo, cui hujus sancti Vita adscribitur, qui intra trecentos circiter ab obitu illius annos, aliquid in medium adduxerit, ex quo colligi possit, unum eundemque virum esse et *Guillelmum IX* ultimum Aquitanie ducem a sancto Bernardo conversum, et *sanctum Guillelmum* Ordinis Guillelmitarum parentem, qui post eremiticam vitam in Stabulo-Rodis in Etruria sancte actam, sacro in Ecclesia cultu honoratur.

13. *Idque a trecentis circiter annis.* — His non obstantibus, opposita opinio, qua illi duo unus idemque censentur, adeo vulgo invaluit, ut visi sint nuper aliter sentientes, temere atque injuriose de sanctis loqui. Quare non mirum Baronium in eam sententiam abiisse, quia ejus tempore ea communissima erat; sed Joannes Beslius in Historia comitum Pictavensium et ducum Aquitanie parte 2, integrum tractatum habet de mendaciis, falsitatibus et anachronismis Operi Joannis Hæti inspersis, qui sæculo præterito Commentarum Historicum edidit, hanc fabulam pluribus exponente et propagante. Beslius part. 1, cap. 37, asserit testamentum Guillelmi ultimi ducis Aquitanie quod et a Baronio integrum recitatur, in eisdem Hæti Commentariis editum, « esse falsum et confictum, uti reliqua ejusdem libri ». Baronius tamen quamvis illud fuisse confictum nesciret, motus auctoritate Sugerii et Pseudo-Roberti de Monte ac reliquorum scriptorum judicavit, ducem Guillelmum in sua ad Sanctum-Jacobum peregrinatione defunctum esse, ac plures Guillelmos a recentioribus per errorem in unum conflatos. Sed post ea quæ Henschenius laudatus in medium affert, nulli dubium esse debet, quin *Theobaldus*

Vitam sancti Guillelmi ab Alberto ejus discipulo scriptam interpolavit corrumperique, multaque falso sancto Guillelmo affinxerit. Prolixam illam Vitam a Theobaldo editam recitat ibidem Henschenius, et vera a falsis discernere conatur, et de Ordine eremitarum a sancto Guillelmo instituto pluribus disserit, quæ apud eum legenda.

14. *David Scotiæ rex Mathildis imperatricis defensionem suscipit.* — Anno superiori *Mathildes* imperatrix, filia Henrici Angliæ regis, quæ secundis nuptiis duxerat *Godefridum* Andegavensem comitem, ex Anglia aberat, quando *Henricus* pater naturæ debitum solvit, et de jure suo securâ coronam sibi melius cessuram putabat, si ad illam procerum votis et suffragiis vocaretur. *Stephanus* vero Bononiæ comes, post suam ad regiam dignitatem evocationem, duo imprimis formidabat, *Davidem* nempe Scotiæ regem, qui *Mathildi* fidem dederat, se illam, non alium pro principe agiturum. Secundo, *Robertum* Glocestriæ comitem, Henrici regis filium naturalem, virum prudentiæ singularis, qui in Normannia cum Mathilde sorore præsumptam tyrannidem non æquo animo laturus credebatur. Audiendus auctor anonymus cœvius, qui gesta Stephani regis litteris mandavit : « Erat rex in Scotia, inquit, quæ confinis est Angliæ, flavio quodam certis limitibus duo regna determinante (legendum *determinante*), rex pectoris mansueti, progenitoribusque religiosus exortus, et ipse justo vivendi tramite illos cœquans. Iste cum in præsentia regis Henrici, cum cæteris regni summatis, imo omnium primus jurejurando se constrictisset, nullum illo expirante, nisi aut filiam regis, aut ejus heredem in regno suscepturum, vehementer indoluit Stephanum ad regni Anglorum gubernaculum successisse. Sed quia illud sine suo consulto ab ipsis baronibus provisum fuit et actum, extrema rerum sapienter metiens, ad quem finem cœpta devenirent, tempore aliquanto tacitis expectabat. Tandem cum regis Henrici filia litteris ad eum missis intimaret, se patrio testamento alienatam, regno sibi sponso et jurato privatam, leges solutas, justitiam calcatam, fidem baronum Angliæ fœdusque juratum raptum ex toto, et nihili pensum; ideoque suppliciter illum et lacrymose deprecari, quatenus, ut cognatus destitutus subveniret, ut sibi adjuratus miserandæ subsidium impenderet. Rex alte ingemuit, zeloque justitiæ succensus, tum pro communis sanguinis cognatione, tum pro fide mulieri repromissa et debita, regnum Angliæ turbare disposuit : ut undique in regem dissensione commota, quod injuste, ut sibi videbatur, occupaverat, justiori se coope-rante Deo, linquere cogitur.

15. *Bellum infert Stephanus Angliæ regi.* — « Habebat rex secum, qui cum admonitionis calcare adurbationem contitandam stimulant, hinc filium Roberti de Bathentona, ejusque collaterales, qui ex Anglia, ut dictum est, exulati, sub specie recuperandæ patriæ ad illum confugerant,

inde filium Joannis Enstachium regis Henrici summum vel popularem amicum, aliosque quamplures, qui vel quæstus gratia, vel justitiæ, ut sibi videbatur, defendendæ occasione discordiam amichebant. Rex igitur David, sic enim vocabatur, perperse per Scotiam edicto, omnes in arma commovit, laxatisque permissionis suæ frenis, quidquid in Anglos truculentius, quidquid execitare possent inhumanius, remota pietate peragere præcepit. Est autem Scotia, quæ et Albania dicitur, regio locis palustribus circumsepulta, sylvarum fertilium, lactis et armatorum copiosa, portubus salubribus, insulis opulentis circumcincta: sed incolas barbaros habens et impuros, nec nimio frigore fractos, nec aspera fame detritos, citis pedibus, levique armaturæ confidentes: anxium amaræ mortis exitum pro nihilo ducentes inter suos domesticos, sed inter sibi extraneos omnes crudelitatem excedentes. Hujus igitur gentis rebellem multitudinem a ceterioribus Scotiæ partibus in exercitum inopinabilem adunans, penes Angliam direxit, regniq; ulriusque transitus interitum, in provinciam Nordlumbriæ, quæ lata erat et populosa, omniumque necessariorum copiis referta, fuit castrametatus ».

Porro gesta hoc anno in hoc bello legenda

apud Joannem priorem Hagustaldensem in Hist. sua.

16. *Concil. Burgense.* — Hoc anno, mense Octobri, Guido cardinalis legatus Apostolicus *Burgis* Concilium celebravit, ut refert Sandovalius in Alphonso VII, fol. 161, qui ait hujus legati in Hispaniam adventus causam notatam non fuisse a scriptoribus Hispanicis, sed ipse recte conjicit, præter cultum divinum seu ritum Romanum in Hispaniarum Ecclesias introducendum, cum venisse ad reges Navarra, Aragoniæ et Alphonsum Castellæ regem, invicem præliantes conciliandos. Hujus Concilii mentionem facit idem Alphonsus in Privilegio Ecclesiæ Asturgi concessio, et tam a se quam a *Berenguela* uxore subscripto, die secunda mensis Octobris « *Æra mclxxiv*, anno II, quo coronam imperii primum in Legionem suscepit ». Subscribunt et *Sancia* soror ejusdem imperatoris, quinque præsules, et multi ex proceribus. Cum vero eodem tempore cardinales duo Guidonis nomine appellati vixerint, existimo hunc *Guidonem* esse *Guidonem de Via*, postea cancellarium Eugenio III sedente; ex variis enim Innocentii II Rescriptis, quibus alter Guido subscripsit, apparet hunc sub eodem Pontificatu a curia nunquam abfuisse.

INNOCENTII II ANNUS 8. — CHRISTI 1137.

1. *Congressus Lotharii imperatoris cum Innocentio papa.* — Redemptoris annus agitur trigessimus septimus supra millesimum atque centesimum, Indictione decima quinta, quo Lotharius imp. se contulit ad Innocentium papam Viterbium, ubi habito simul colloquio inire consilium, ut imperator Apuliam invaderet, dux Henricus autem ejus gener una cum Innocentio papa Campaniam a Rogerio possessam aggrediretur. Ilæc autem in Chronico Beneventano a Falcone præsentem rerum inspectore narrantur, quem sequemur, cum singulos ferme passus eorundem imperatoris atque Pontificis assectetur, stylo licet rudi, tamen veritate nitente; sic enim habet: « Anno millesimo centesimo trigesimo septimo, et octavo anno Pontificatus domini Innocentii, mense Martio, quintadecima Indictione, præfatus Apostolicus Innocentius,

qui tunc Pisis morabatur, consilio communicato, de civitate Pisana ad civitatem Viterbium advenit, præfatum imperatorem allocuturus. Imperator igitur Henricum generum suum cum tribus millibus equitum ad Pontificem destinavit Innocentium, addens ut Romanos fines teneat, et principi Roberto principatum suum (Capuanum videlicet) restituat: ipse vero marchias adire disposuit ». Sed quoniam ambos ad diversas tendentes stylus simul consequi minime valeat, Pontificis primum, postea vero sectabimur vestigia imperatoris.

2. *Innocentius S. Bernardum accersit, qui contra schismaticos laboret.* — Innocentius igitur, uti vicarius Christi, Petrique successor, sic rem agendam armis adversus tyrannum Siculum rerum Ecclesiæ invasorem aggreditur, ut tamen, si penes eum vel alios Ecclesiæ Catholicæ hostes locus ali-

quis capescendæ rationis reliquis esse posset, eos potius religione quam armis subigeret. Cujus rei præstandæ causa præpotentem virum opere et sermone Bernardum Claravallensem abbatem ad se litteris accersivit, quo potissimum ad suadendos, convincendosque obduros schismaticos uteretur. De hac vocatione viri sanctissimi, qui ejus res gestas conscripsit abbas Bonævallis, sic narrat ¹: « Interea litteræ Apostolicæ virum Dei vocant, et ut adsit laboranti Ecclesiæ, supplicant cardinales. Intermittuntur studia (super Cantica tunc homilias elaborabat ²) et quæ modo continua erant interpolatis discursibus resumuntur. Nulla vacatio superest, servus Dei aut orat, aut meditat, aut legit, aut concionatur. Videns igitur excusationes frustra obtendi, convocatos a multis partibus fratres diu profundeque suspirans affatur :

3. « Videtis, fratres, in quantis tribulationibus laboret Ecclesia. Pars quidem Petri in Italia et in Aquitania, auctore Deo, elisa, jam non parurit, sed abortit. Evasati sunt in his regionibus schismatici defensores, Romæ magna pars nobilium Innocentium sequitur, et favent ei multi fidelium, qui tamen temerariæ multitudinis impetum formidantes, non audent publice confiteri quem Innocentio firmavere consensum. Conjuratos habet Petrus homines perditos, quos corrupti pecunia, et munitionibus eorum occupatis, non Simonis Petri fidem, sed Simonis Magi præsentat præstigia. Contra unam gentem Occidente edomito superest lucta. Orantibus vobis et jubilantibus, Jericho ruet ³, et cum extenderitis ad Deum cum Moyse manus ⁴, Amalech victus aufugiet. Josue pugnat ⁵, et ut ad consummationem victoriæ dies sufficiat protelata, soli ut stet, non tam orat quam imperat, et meretur fides tam solis obedientiam, quam de hoste prostrato victoriam. Nobis igitur pugnantes vos ferte præsidium, et auxilium de celo supplicibus animis implorate. Agite quæ agitis, et state in gradu quo statis; et licet nihil vobis consilii sitis, iudicio tamen vestro non aestimetis vos justos : quia solus Deus quos justificat judicat, et perfectissimus quisque iudicii divini districtum examen ignorat. Judicari autem ab humano die non multum curetis, neque vestra propria neque aliena iudicia approbantes, sub timore Dei sic state, ut nec vos quempiam judicantes aliquando extollamini, nec aliorum curantes iudicia excidatis in nugas; singula vero prosequentes, vos servos inutiles reputetis. Eundem est autem quo nos obedientia vocal, et hujus domus paternitatem, et vestri custodiam Deo, pro quo hunc laborem assumimus, confidentes de ejus clementia tradimus et commendamus. Hæc dicens et benedicens, flentibus universis discessit ». Discedens sanctus Bernardus, reliquit sermones super Cantica absolutos viginti tres, ut apparet ex sequenti sermone vice-

simo quarto, quos statim descriptos misit ad amicum charissimum, Bernardum de Portis Carthusianum, ut ejusdem sancti Bernardi ad eum litteræ scripte testantur ¹; pro quo et ad Innocentium papam scripsit ², cum ab eo ad episcopatum assumendus esset, rogans ne Longobardis daretur episcopus eo præsertim tempore procelloso.

4. Recedens igitur a suis sanctus Bernardus Romam versus, cum pervenisset in Tusciam, putans Pisis reperire Pontificem, ubi hactenus commoratus esset, ubi audivit inde ipsum recessisse, quo sciebat Pontificem præcessisse Innocentium, Viterbium venit, ibique passus est fratrem charissimum Gerardum ægrotantem, quod idem ipse testatur in sermone, super Cantica ³, quem in ejus obitu post reditum habuit : ubi hæc ejus verba : « Recordor, Domine, pacti mei, et miserationis tuæ, ut magis justificeris in sermonibus tuis, et vincas cum judicaris ⁴. Cum pro causa Ecclesiæ anno præterito Viterbii essemus, ægrotavit ille, et invalescente languore, cum jam proxima videretur vocatio, ego ægerrime ferens comitem peregrinationis, et illum comitem in terra relinquere aliena, nec resignare his qui mihi eum commiserant, quoniam amabatur ab omnibus, sicut erat amabilis valde : conversus ad orationem cum fletu et gemitu, exspecta, inquam, Domine, usque ad reditum : restitutum amicis tolle jam eum si vis, et non causabor. Exaudisti me, Deus, convaluit, etc. » Sed et de commoratione facta Viterbii, idem ipse S. Bernardus meminit in Epistola centesima quinquagesima prima ad Philippum. Cum autem ad Innocentium pervenisset post dies aliquot, legavit cum papa Romam, ad convertendum eos qui adhuc in schismate permanissent. De quo ista auctor, qui supra, Vite ipsius ⁵ : « In cujus adventu tam dominus papa quam fratres lætati sunt, communicatis cum eo consiliis, secundum rerum proventus et statum causarum, abbas alia via opus aggreditur, nec in curribus, nec in equis spem ponens, sed colloquia quorundam suscipiens, sciscitatur, quæ sit eorum facultas, qui fautorum animi, utrum errore an malitia seducti tantum scelus protrahant et protelent.

5. « Intelligit ex secretis, clerum qui cum Petro erat, de statu suo sollicitum, scire quidem peccatum, sed non audere reverti, ne perpetua notatus infamia, vilis inter cæteros haberetur; et malle sub umbra honestatis interim sic esse, quam expelli a sedibus suis, et publice mendicanti exponi. Eorum qui de Petri prosapia erant, hæc erat responsio : Quia jam credi eis a nemine posset, si demembrarent genus suum, et eum relinquerent, qui cognationis suæ esset et dominus. Cæteri juramento fidelitatis excusabant perfidiam, nec aliquis ex sana conscientia parti illi conferebat suffragia. Denuntiabat itaque abbas eis, colligationes impie-

¹ Vit. S. Bern. l. II, c. 7. — ² Bern. Ep. CLIII. — ³ Josue VI. — ⁴ Exod. XVII. — ⁵ Josue X.

¹ Bern. Ep. CLIV. — ² Ibid. Ep. CLV. — ³ Idem in Cont. ser. XXVI. in fin. — ⁴ Psal. L. — ⁵ Vit. S. Bern. l. II, c. 7.

tatis esse sacrilegas, et profanas conspirationes legibus et canonibus condemnatas, juramentis non posse miniri; nec posse nec debere veritatis sacramenta mendacio suffragari. Insanire autem eos, qui rem illicitam sacramenti patrocinio constare existimant, cum oporteat extraordinarias pactiones quocumque religionis obtentu sanctitas revocari in irritum, et auctoritate divina dissolvere. Auditis his aliisque viri Dei sermonibus, defluebant a Petro, et quotidie partis illius dissociatis agminibus, vincula rumpebantur, ipsius quoque Petri animus tabescebat, quia se quotidie minui, Innocentium vero crescere minime dubitabat. Defecerant pecunie, contabuerat curie amplitudo, aruerant ministeria domus, rarus mensam ejus frequentabat conviva, deliciae in plebeia cibaria commutatae, cultus obsequentium vetustate obscurus, stipendiarii aere alieno oppressi, et tota domus effigies pallida dissolutionem proximam indicabat. Haec de statu schismaticorum in Urbe, ubi diu moram magno proventus Catholicorum sanctus Bernardus protraxit. Quomodo autem post haec, eodem tamen anno, inde sit vocatus ad castra, suo loco inferius dicturi sumus. Jam Innocentii papae et ejus qui cum eo erat, Henrici ducis vestigia assectemur, de quibus haec habet in primis Beneventanum Chronicon: « Apostolicus autem continuo post congressum cum imperatore habitum Viterbii, ad Romanorum fines advenit, et civitatem Albanum et provinciam totam Campaniae suae obtinuit fidelitati. Romanus quidem ingredi noluit, ne Romanorum negotiis impediretur ». Haec ibi de Pontifice, de quo haec amplius Petrus Diaconus his praesens in Chronicis Cassinatus¹:

6. *Res feliciter gestae in Apulia ab Henrico duce et Lothario imp. pro Innocentio papa.* — « Eodem tempore Henricus dux, gener imperatoris, intravit Campaniam una cum papa Innocentio ab imperatore transmissus. Igitur cum in planitie Cassini contigua castra posuissent, Richardum Pontificis memorati capellanum et Cassinensis cenobii monachum ad monasterium mittunt, mandantque, si se suscipere velint, et Innocentio papae obedire, se illos ut filios, ut fratres, ut socios dilecturos, monasteriumque sub custodia et protectione imperatoris habituros. Non consentiente Rainaldo, abbate nuper creato videlicet, fratribusque illum monasterio deturbare idcirco accipientibus, convocat ad capitulum fratres, hortatur ut in Rogerii fide permaneant, ac Petri Leonis filio pareant; auxilium illis non defuturum. Postremo fatetur abbatem se ab eis accepisse, eamque pro illorum arbitrio sive tenere, sive dimittere paratum. Haec ille. Jam vero Gregorius Adenulphi filium cum exercitu clam advocaverat, cuius ope monasterium contra papam, ducem, atque monachos retinere posset. Ei advenienti federatus abbas monasterii munitiones tradit, impetuque facto, Pontificis nun-

tios fugat. Apocrisiarii Pontificis, dum ad civitatem quae monti adiacet pervenissent, cives jurare imperatori fidem suadent, sicque ad castra redeunt. Rainaldus autem abbas intra monasterium cum Gregorio inclusus, sata monasterii vicina incidabat, vastabatque omnia, ne quid ad victum hominum vel jumentorum reliquum esset. Jam fere undecim transierant dies, cum dux monasterii consumi bona perspiciebat, simulque pugnae praeterire tempus, Rainaldum evocat, acceptoque aureo calice, et quadringentis libris obsidibus datis, abbatiam illi, si in ejus fide permaneat ex imperatoris parte confirmat, et eum a se suisque securum reddens, imperatoris vexillum intra beati Benedicti Ecclesiam induci, ac demum in arce, quae Eccl. inninet, ingenti cum laude praecipit imponi. Die altera movens castra, exercitum contra Capuam dirigit. Ibi Raho Rahelis filius, et Goffridus Aquilanus venientes, se suosque Pontifici ac Roberti princ. et Henrici duci imperio subdunt. Hoc facto, Capuanus omnis principatus Rogerii jussa linquentes, papae vestigiis advolvuntur omnia imperata facturos pollicentes, plerique ob antiquam Roberti principis amicitiam, alii spe praemii illecti, alii ut officio suo satisfacerent, dominosque suos recognoscere, ad eos confluebant.

7. « Interea Henricus una cum Innocentio, restituto Roberto principatu, ad pontem S. Valentini juxta Beneventum castra ponunt ». At ista Beneventana ex Falcione, qui tunc ista scribebat, sunt accipienda, qui cuncta per singulos ferme dies gesta recenset, atque in primis de imperatore, tentante Apuliam, et subjiciente eam sibi ista praemittit:

« Praefatus autem imperator ad flumen Piscariae adveniens, Pascha Domini ibi celebravit: inde flumen transiens, civitatem Thermulensem, et illius provinciae comites obtinuit; et inde moto exercitu Apuliam ingreditur, et civitatem Sipontum et montem Sancti-Angeli, octavo die intrantis mensis Maii comprehendit. Tantus itaque timor totam invasit Apuliam, quod universus populus usque ad Barum ad ejus imperium aggregatus est. Et his actis, post captam civitatem S. Germani atque Capuam, et restitutam eam Roberto, praedictus Apostolicus decimo kalendas Junii Beneventum venit, et retro montem Sancti-Felcis prope Beneventum cum Henrico duce praedicti imperatoris genero castrametatus est. Qui continuo dominum Gerardum cardinalem virum prudentem et discretum prope civitatem misit Beneventanam, ut cum Beneventanis loqueretur, utrum cum eo pacis firmamentum ponere vellent. Venerant itaque ad eum quidam de civibus Beneventanis, et cum illis satis abundeque de civitatis concordia tractavit, et his actis reversus ad domnum Apostolicum, omnia quae dicta sunt exposuit. Alio autem die adveniente, praedictus Apostolicus consilio arrepto, castra inde amovit, die videlicet sabbati, et ex parte dicti montis S. Felcis, transivit cum exer-

¹ Pet. Diacon. Chr. Cas. l. iv. c. 10.

citu dicti Henrici ducis ad planitiem S. Petri juxta flumen Sabbatum. Beneventanus autem populus nihil ex his quæ fiebant agnoscere poterat; quod ubi Beneventani noverunt, timore admodum percussi sunt. Tunc Rosemanus intrusus ab Anacleto Beneventanus archiepiscopus, Romanæ Sedis adversarius, cives fere universos commovit, ut contra Apostolicum venientem insurgerent, et ad eorum posse resisterent.

8. « Tunc absque mora prædictus Gerardus cardinalis vocari fecit Landolphum judicem Beneventanum, et Ludovicum medicum, et Malfredum de Grimoaldo abbatem, ut de pacis federe loquerentur, et civitatem domino papæ Innocentio redderent. Exierunt itaque illi vocati, et petitionibus Apostolici faventes ad civitatem revertuntur. Interea quidam Beneventani ad horam fere nonam exeuntes, cum Teutonicis pugnare ceperunt, putantes eis timorem incutere, et in fugam agere. Dux vero illorum audiens Beneventanos ita in se insilire, suos armavit occulte, et posuit in insidiis, in quos Beneventani incurrentes, ab ipsis sunt in fugam acti, cæsis ex eis nonnullis et vulneratis, aliis vero captis; quod magnam afflictionem civibus intulit. Die Dominico quidam de civibus veniunt ad Apostolicum, petentes suppliciter captivos, quos statim ipse Apostolicus jussit absolvi, reddique liberos suis. Quibus acceptis, facta est ex parte deditio civitatis. Nam exhibita sunt juramenta fidelitatis eidem Innocentio papæ ab iis, qui ad Innocentium ipsum venerunt. Cumque interea Teutonici provocati a quodam Beneventanorum primario, civitatem ingredi et perdere festinarent, occurrit Innocentius papa, et per ducem ipsorum Henricum compescuit eos, sique opera papæ liberata est civitas et præda Teutonum. Tunc quoque accidit, ut Crescentius cardinalis partis Anacleti, qui tum in Beneventana erat civitate pro eodem schismatico papæ, comprehensus a civibus ductus sit ad Innocentium papam, cujus erat magnopere adversarius; sique intra civitatem mota sunt a civibus arma adversus eos, qui Anacleto favissent. Fugit pseudoarchiepiscopus timore actus. Tunc exhibita est ab Innocentio ea humanitas, ut exules in civitatem reverti liberos sinceret, inter quos fuit auctor chronicorum horum, Falco dictus, ut ipse testatur. « His peractis, rebusque bene dispositis, rursus tertio idem Apostolicus Gerardum cardinalem mittit in civitatem, qui a civibus juramentum fidelitatis exigeret, quod et factum est.

9. « His ita peractis, Innocentius consilio habito, iter arripuit, octavo kalendas Junii ad imperatorem. Veniens autem ante portam, *Summam* cognominatam, invenit ibi populum ipsum expectantem, ad quos ista locutus est: Gratias vobis agimus, quia concorditer et voluntate sincera fidelitatem nobis præstistis. Rogo itaque fraternitatem vestram et probitatem, ut pacem teneatis et constantiam justitiæ inter vos. Nam vita comite,

dignam vobis retributionem impendemus. Civitatem vero modo intrare non possumus pro multis et variis negotiis, quæ cum domino imp. definienda decrevi. At his divina clementia definitis, ad vos revertemur, et de civitatis utilitate tractabimus. Nunc vero fratrem nostrum Gerardum cardinalem vobiscum morari permitimus, qui erga vestras utilitates assiduo vigilabit, et pacem inter vos conservabit. His et aliis dictis, Innocentius ceptum prosecutus iter, ad imperatorem Lotharium venit, quem obsidentem Barensium civitatem invenit. Sic igitur profuit Beneventanis præsentia Innocentii, ut qui furore Teutonico consumendi fuisset, conservarentur incolumes cum civitate, iis exceptis, qui sponte sua sese dederunt imprudenter in hostes.

10. Cum igitur imperator Barim civitatem cepisset, et castellum ejus munitissimum post obsidionem quadraginta dierum pariter expugnasset, cæteras civitates Apuliæ in deditionem accepit, sique brevi tempore universa Lotharius imperator est potius Apulia. Ubi dum esset apud Melfium una cum Innocentio papa, apud lacum Pensilem audisse imperatorem Cassinenses monachos a se vocatos, et disceptionem ab eis habitam cum quibusdam S. R. E. cardinalibus mense Julii, describitur in Actis¹: quorum cum dubia sit fides, dicemus de illis anno sequenti, quo eadem Acta signata noscuntur. Modo reliqua prosequamur. His igitur feliciter gestis, ad expugnandum Salernum imperator convertit exercitum, quam civitatem et ita perstrinxit, ut ad deditionem coegerit.

Inter hæc accidit, ut Innocentius papa de rebus hactenus prospere gestis brevem Epistolam scripserit ad Petrum abbatem Cluniacensem, quæ hactenus inter ejusdem Petri Epistolas conservata sic se habet²:

« Innocentius episcopus, servus servorum Dei, dilectio filio Petro abbati Cluniacensi, salutem et Apostolicam benedictionem.

« Super sollicitudine atque diligentia, quam erga nos et B. Petri negotia te exhibere cognovimus, omnipotenti Deo et tuæ devotioni gratias agimus. Benedictus igitur Dominus Deus Israel, qui visitavit et fecit redemptionem plebis suæ. Qui etiam ita nobiscum magnificare dignatus est misericordiam suam ita fecit prosperum iter nostrum, ut ab Urbe Roma usque Barim vix aliqua civitas castrumve remanserit, quod B. Petro et nobis subjectum et obediens non existat. Qua in re gaudemus divine manus antiqua concuscare miracula, dum S. Ecclesia, quanto amplius sub malleo tribulationis tundi conspicitur, tanto altius sublevari (sublimatur), et more aromatatum, quo magis verberibus teritur, eo latius odoramenta suavitatis effundit. Et quidem optabile nobis erat, si quemadmodum nobis per litteras indicasti, personæ tuæ possemus habere præsentiam, ut vel sic

¹ Pet. Dac. Chron. Cass. l. IV, c. 109, 110. — ² Pet. Clun. l. IV, Ep. XXVI.

labores nostri diurni atque nocturni valerent Deo propitio mitigari. Sed quoniam aëstivi fervores, et aeris intemperies, necnon fragilitas complexionis tuæ id minime patiuntur, charitatem tuam hortamur in Domino, quatenus his omnis, una cum sacro Cluniacensi collegio orationibus consuetis insistas, ut benignitatem quam conditor noster voluit nobis hactenus exhibere felici consummatione perficiat, et diutinis laboribus sponsæ suæ atque Christiani populi sub iugo illius tyranni Siculi macerati, vestris et aliorum religiosorum precibus inclinatus, jam nunc optatum finem imponat. Quod profecto sicut de ipsius pietate confidimus, velociter consummabitur. De cetero præfatum conventum per te in Domino salutantes, nos et fratres nostros tuis et eorum orationibus commendamus. Data in territorio Potentienti, XIII kalend. Augusti. Est locus in provincia Picentina hand longe a Salernitana civitate.

11. *Innocentius Beneventi Rainulphum ducem Apuliæ creat, et episcopum Beneventanum consecrat.* — Inde vero idem Innocentius papa venit cum imperatore Beneventum versus, et in Avellina civitate considit die secunda mensis Augusti. « Ubi », inquit Falco, « ipse Apostolicus Innocentius ducem ad defensionem Apuliæ ordinare nomine suo satagebat, imperator vero nomine suo contra voluntatem Apostolici ordinare volebat. Unde factum est, ut per triginta fere dies ad invicem ea de re fuerit discordatum; sed sapientium consilio communicato, discordia talis destructa est. Quid multa? divina favente clementia, et ipso imperatore annuente, omnibusque suis, predictus Apostolicus suo nomine ad B. Petri fidelitatem, comitem Rainulphum, virum utique prudentem et discretum, in ducem elegit, et eo electo, vexillum ad honorem ducatus Apostolicus et imperator in conspectu omnium ei tradiderunt et confirmaverunt ». Post biduum vero idem imp. Lotharius una cum imperatrice Beneventum se contulit ipsis kalendis Septembris, ubi digne excepti sunt: post triduum vero adventit Innocentius papa, tibi a clero et populo solenni pompa fuit exceptus.

12. At quomodo ibi primum omnium Beneventanum creaverit archiepiscopum, more majorum, his verbis idem auctor qui præsens aderat, sic narrat: « Altera die adveniente, idem Apostolicus in sacro palatio sedens, in conspectu cleri et populi Beneventani clamavit, ut si quis contra personam et electionem Gregorii Beneventani electi canonice et rationabiliter opponere vellet, libera fronte opponeret. Sed clementia divina opitulante, et quia electus ipse vitam suam religiose custodierat, nemo civium contra ejus electionem aliquid objecit. Apostolicus vero hoc aspiciens, gratias Deo egit: ipse de persona electi testificatus est, quod honeste et religiose vixisset: et eidem electo præcepit, ut de peccatis suis confiteretur, et die Dominico adveniente, Spiritu sancto cooperante, consecrationem acciperet. Quid multa? Die adveniente

Dominico, Apostolicus in Ecclesiam episcopi descendit quinta die mensis Septembris, et electum ipsum consecravat. Cui consecrationi patriarcha interfuit Aquileiæ, et alii archiepiscopi, episcopi, abbates Teutonicorum, viri religiosi ». Hæc de consecratione archiepiscopi Beneventani. « Sexta autem die Septembris, quod petierunt Beneventani obtinuerunt ab imperatore, nempe ut barones omnes circumpositi jurarent, relinquere Beneventanos immunes ab omnibus angariis, quas illi imponere consueverant eorum possessionibus, sub eorum dominis constitutis ». His autem peractis, una simul cum imperatore Innocentium papam Romam versus iter capessisse, idem auctor affirmat. Sed in itinere divertisse Cassinum, Petrus habet in Chronico Cassiensi.

13. *Acta Cassini in causa depositionis Rainaldi abbatis, et electionis Guibaldi ab Innocentio papa et Lothario imperatore, cujus pietas immotescit.* — Quænam tunc inter Innocentium papam et imperatorem occasione Cassinensium monachorum gesta fuerint, ex Appendice Petri Diaconi ad Cassinense Chronicon videamus¹. Rainaldus abbas assertus Cassinensis, qui vocatus venerat ad imperatorem cum aliquibus ex suis, jussus est ab Innocentio papa schisma, quod hactenus sectatus fuerat, abjurare una cum suis, quos secum duxerat. Jussus vero redire ad suos, « misit », inquit Petrus (Innocentius) « Pontifex cum dicto Rainaldo Balduinum presbyterum cardinalem, præcipientem, ut filium Petri Leonis, (Anacletum scilicet pseudopontificem) a Cassinensibus monachis anathematizari laceret, ac pape ejusque successoribus obedientiam ab ipsis exigeret. Quod ita factum est ». Addit his Petrus, « eundem Rainaldum abbatem accusatum quod Rogerio faveret, ab imperatore compressum ». Cum ipse imperator, subdit Petrus « omnibus negotiis rite ordinatis ad S. Germani oppidum cum exercitu, papa quoque comitante, pervenit; ibique Rainaldo tunc sub custodia degente, honorifica processione susceptus est. Et eo quidem die electus Rainaldus ipse in secretario Basilicæ S. Salvatoris custoditus est, postmodum vero ad monasterium ubi examinandus erat, sub custodia diligenti remittitur.

14. « Alia² die imperator direxit Hannonem, abbatem cenobii Luneburgensis, et Petrum Diaconum ad monasterium, per eos fratribus mandans, ne quid incompositum aut indisciplinatum in habitu, in incessu, seu locutione præferrent. Venturum se ad monasterium cum cardinalibus, archiepiscopis, episcopis, abbatibus, principibus, ducibus, religiosisque ex omni imperio viris: ac siquidem inveniret Rainaldum tanto ordine indignum, confestim eum removeret, atque in B. Benedicti sede idoneum præponere omni studio quæreret. Ipse vero coronam patriciatus accepturus, in civitate remansit. Quippe tunc Exaltationis

¹ Pet. Diacon. Chr. Cas. l. IV, c. 419. — ² Ibid. c. 420.

Sanctæ-Crucis agebatur celebritas, (nempe dies decima quarta erat mensis Septembris). Cum vero illuxisset, Richiza Augusta montem totum pedibus ascendit, papa in civitate remanente. Lotharius quoque imperator innumero vallatus exercitu, Cassinum pervenit, atque a fratribus maximo cum honore susceptus est. Obtulit autem ipso die S. Benedicto pluviale optimum aureis listis ornatum, et planetam ejusdem operis, candelabra quoque argentea duo librarum fere tredecim, auri marcham unam, et novemdecim marchas argenti. Richiza autem Augusta posuit super altare stolam phrygiam cum manipulo suo, et mitram auro decenter ornatam.

15. « Eo etiam die, dum imperator in Ecclesia consisteret, Rainaldus fratres ad capitulum convocans, ostendere cepit se ab eis electum, ad illorum nutum abbatiam dimissurum, nihil opus esse pro hac re fatigari. Et cum hæc et alia multa repperet, quidam ex laicis capitulum ingressi, arguere fratres ceperunt quod abbatem vellent in tanto discrimine constitutum relinquere. Fratres autem indignatione commoti, illos verberibus affectos capitulo deturbant, clamantes illum se abbatem ulterius nolle qui monasterium non monachorum, sed laicorum præsidio tenere mallet. Dehinc ea die ante solis occasum, papa Innocentius, nuntio ad monasterium misso, mandat fratribus per fidem et obedientiam, quam sibi et B. Petro promiserant, ut eidem electo ulterius non obedirent, illumque ex ipso cœnobio quamprimum deturbare curarent, observantibus præcepta sua gratiam suam, contemnentibus perpetuum exilium indicens. Mane facta, Haimericus diaconus cardinalis Romanæ Ecclesiæ cancellarius, et Gerardus cardinalis Sanctæ-Crucis, et abbas Claravallensis ab eodem papa transmissi sunt, qui Rainaldum ipsum examinarent, et a monasterii cura amoverent.

16. « Residente itaque imperatore in capitulo cum imperii proceribus, considente quoque Peregrino Aquileiensi patriarcha, cum archiepiscopis, episcopis, cardinalibus, abbatibus, jusserunt electum introduci, multa contra eum proferentes, rebellem, hostemque imperii clamantes. Tunc quidam surgens in medium dicere cepit, eum, posteaquam cum Henrico duce convenerat, hostem Pontificis atque imperatoris clamasse. Contradicente illo, jubet imperator utramque partem capitulum egredi, ut cum patriarcha et cardinalibus inde consultaret. Tunc Peregrinus patriarcha, Haimericusque diaconus cancellarius dixerunt, illum tanto cœnobio præesse non posse multis ex causis: quod scilicet a filio Petri Leonis, (Anacleto nempe pseudopapa), subdiaconus ordinatus esset, sacramentumque Rogerio regi præbuisset; tum quia contra præcepta canonum excommunicati eligere non potuissent: postremo quod contra Ecclesiastica instituta subdiaconum elegerint, proferentes Eugenii papæ capitulum ita scribentis: Abbates

per monasteria tales eligantur et ordinentur, qui sacerdotali, vel levitico honore sint præditi, etc. Sed cum sol jam ad occasum vergens noctem induceret terris, imperatore jubente, solutus conventus est». Cardinales autem cum vidissent haud legitime ista ab imperatore tractari quæ Pontificis essent, recesserunt, et ad Innocentium se contulerunt. Pergit Petrus¹:

17. « Die altera imperatore residente in capitulo cum prælatis atque magnatibus, electus Rainaldus in medium surgens, cum vellet objecta diluere, priusquam verba finiret, surgentes fratres, accusare illum ceperunt, sicut et prius, dicentes electionem ejus seditiose, non canonice fuisse celebratam. Illi autem qui ex parte ejus erant, eos mendacii insimulabant. Sicque coram omnibus variis se verborum contumeliis afficiebant. Imperator his motus surrexit, et manu silentium indicens, multum se mirari dixit, tantam Congregationem adeo inordinate loqui, negotiaque sua tam indisciplinate agere. Præcepit itaque rationabiliter negotia sua exquererentur. His dictis resedit, et reliquis considerare jussis, congregationem illa affari cepit: Electionem abbatis tanta discordia se plene examinare non posse, nisi ambæ seorsum partes audirentur. Jussitque ut omnes archiepiscopi, episcopi et abbates, parsqe quæ electo favebat, januis obsecratis convenirent.

18. « Quod dum factum esset, Hanno episcopus Basiliensis dixit: Si quid contra electum habetis, rationabiliter et non tumultuose proferte. Tunc quidam ex eis illum accusare ceperunt, quod electionem suam munere linguæ, manus promissione redemisset. His ita prosequentibus, Pandolphus vestiararius exurgens dixit: Sunt quidem multa, quæ adversus electum proferri possunt, sed illud intolerabile, quod a filio Petri Leonis ordinatus est; indignumque valde ducimus, ut in tanta Ecclesia quæ monasteriorum omnium caput ac mater est, abbas subdiaconus sit, qui nec missarum solemniam celebrare, nec possit a delictis absolvere. Tunc Anselmus episcopus: Multa, inquit, adversus electum proferuntur, sed hoc potissimum ad deponendum illum objicitur, quod teste Domino², fundamentum, quod super arenam collocatur, durare non potest. Unde si placeat, sepositis cæteris, hoc unum teneamus. Quod cum placuisset, cæteris fratribus egredi jussis, Rainaldum cum suis ad se purgandum introduci præcipiunt. Et cum diu moras traherent: mandat imperator his, qui ad discutiendum convenerant, ut electo suaderent, seipsum in potestate imperatoris ac Pontificis poneret, ut quidquid illi statuerent, hoc ipse absque dilatione sequeretur. Ad hæc ille diu cunctatus, tandem consensit; seque illis libere ex toto permisit. Post hæc omnibus ad imperatorem reversis, Basiliensis episcopus gesta omnia cunctis per ordinem pandit. Demum impe-

¹ 1^o Pet. II, c. 1, v. 21. — ² Matth. VII.

ralore seiscitante, quid qui electo faverant, iidem facere vellent, ad omnia paratos imperator invenit, sique secundi diei contentus solutus est. Acta sunt hæc quarta et quinta feria tertiæ hebdomadis mense Septembrio, secundo post festum sanctæ Crucis die.

19. « Post hæc mittuntur ab imperatore, qui papæ Innocentio rei seriem indicent. Qui dum venissent, iratum valde invenerunt, prohibitiveque sunt ad eum ingredi, quia præseste Romano Pontifice, imperator cum optimatibus suis Cassinensis abbatis examinationem facere præsumpsisset. Quamobrem archiepiscopos, episcopos, et abbates, qui astiterant, officio privare minatus est. Reversi autem qui missi fuerant, quæ apud papam invenissent imperatori nuntiare studuerunt. Imperator ista Pontifici mandare curavit: Quæ gesta erant, simpliciter, neque ad ejus injuriam, sed ad honorem magis facta esse: omnia quippe ex ejus potestate pendere; quidquid ipse decerneret, id omnes pro rato haberent. Atque ideo aliquos a latere suo dirigere, qui retractantes omnia, quod justum esset inde decernerent ». Ad hoc igitur, quod sic sacerdotali constantia obstitit Innocentius imperatori, cum redarguens, quod causam Ecclesiasticam, ipso inconsulto, cognoscendam suscepisset, alludere videtur sanctus Bernardus in Epistola ad eundem Innocentium papam, dum pluribus exemplis ejus commendat vigorem sacerdotalem in resistendo et redarguendo principes sæculi, sic dicens¹: « Quid apud sanctum Benedictum? Numquid regia indignatio prohibere potuit spiritum libertatis accensum atque accinctum adversus carnem et sanguinem? etc. » ad hoc, inquam, alluisse putamus, cum nullus alius fuerit apud S. Benedictum Innocentio cum aliquo rege congressus. Pergit vero Petrus²:

20. « His placatus antistes, (Innocentius papa videlicet), sexta feria quatuor temporum Hainericum cancellarium, et Gerardum, aliosque cardinales eandem electionem examinare direxit. Qui dum advenientes eam rem diutius discuterent, convenientes in refectorium, omnes monasterii priores convenerunt, dicentes, Rainaldum omnino amovendum esse, quia fuisset ab excommunicatis ordinatus. Post hæc sigillatim de persona eligendi abbatis tractare cœperunt. Ubi cum varias sententias animadverterent, egressi in claustrum monasterii, convocato electo, ex parte Apostolicæ Sedis præceperunt, ut a monasterii cura quiesceret, quia ultra jam abbas esse non posset. Sique ad papam redeuntes, gesta omnia referre studuerunt. Sequenti die rursus ascendentes ad monasterium, in capitulo resedere: ubi post factum a venerabili Claravallense abbate sermonem, cardinales auctoritate Apostolica Raynaldo abbacie officium interdixerunt, sique una cum imperatore, prælati imperique proceribus surgentes, B. Bene-

dicti Ecclesiam intrant, eundemque Rainaldum Hainericus cancellarius, et Peregrinus Aquileiensis patriarcha, et Gerardus cardinalis evocantes, depositionis in eum tulere sententiam. Sicque illorum jussu, astantibus omnibus, virgam et annulum et regulam supra corpus sanctissimi Benedicti deposuit. Et Rainaldi quidem hic exitus fuit.

21. Post hæc in capitulum convenientibus, Gerardus cardinalis ita loqui orsus est¹: Nostis, amantissimi fratres, quia juxta regulæ præceptum abbas jubetur a fratribus eligi. Sed vos licet vestra obligatio hac potestate privaverit, jamque ad Romanam Ecclesiam hujusmodi electio pertineat, tamen ob unitatis bonum hac vos uti potestate per omnia volumus. Verum ex præcepto Sedis Apostolicæ injungimus, ut duodecim ex omni congregatione fratres eligatis, qui una nobiscum dignum tanto officio eligant. Fratribus omnino reuuentibus, electionemque liberam poscentibus, cum ad eam rem cardinales flecti non possent, magna ultimique est orta dissensio. Pars enim quæ Rainaldo faverat, nunquam ex eo cœnobio se abbatem electuros; cardinales contra, nunquam ut tanto monasterio aliunde abbas quæreretur, passuros confiteri. Sed cum pars neutra cederet, plurimis frustra consumptis verbis, cancellarius iratus ex parte Romanæ Ecclesiæ interdixit, ne ullam omnino electionem facere auderent. Sique ad papam regressi, rei ordinem pandunt. Post hæc imperator e suo latere strenuos viros ad Innocentium dirigens, rogat ut monachis eligendi auctoritas restitueretur. Annuit volis precantis Pontifex, privilegiaque sibi et præcepta monasterii omnia ad legendum ex monasterio mitti postulat, factumque ita est. Relectis itaque coram Pontifice de abbate eligendo Caroli regis præceptis, Benedicti Septimi, Leonisque Nomi privilegiis, quibus continebatur, quomodo Henricus Pius Romano Pontifici Benedicto Septimo consecrationem Theobaldi abbatis Cassinensis, quem ipse imperator ordinaverat, concessit, et unum in eundo prandium, alterum in redeundo, reliqua imperio Romano reservavit. Idque ipsum Conradus et Henricus suus filius confirmaverunt. Lecto itidem præcepto Caroli, ut abbas in Cassinensi cœnobio ille eligatur, quem digniorem Romanoque imperio fidiorem invenissent: victus rationibus Pontifex, Cassinensis abbatis electionem fratribus, ordinationem Lothario imperatori ejusque successoribus concessit atque firmavit; sibi vero suisque successoribus abbatis confirmationem prandiumque in eundo Beneventum ac redeundo reservavit ». Subjicit his Petrus de electione Guibaldi abbatis ex abbate monasterii Stabulensis, consentiente Pontifice, precibus imperatoris, id magnopere exposcentis tandem flexo. Quorum occasione idem Petrus qui aderat, religionem ejusdem imperatoris commendans, hæc digna perpetua memoria narrat²:

¹ Bern. Ep. cl. — ² Petr. Diac. Chr. Cas. I. IV. c. 122.

¹ Petr. diac. Chr. Cas. I. IV. c. 125. — ² Ibid. c. 125.

22. « Jam vero quis tanti imperatoris clementissimum animum non admiretur? sed erat ad secundas dissensiones fratrum in capitulo a prima diei hora usque ad vesperam, absque cibo potuque perdurans, dum paci unitatque consuleret; nempe enim sub imperii chlamyde caelesti militabat regi. Nam ut ipse testis sum in expeditione constitutus, summo diluculo missam pro defunctis, dehinc pro exercitu, tertiam postremo diei missam audiebat. Demum viduis et orphanis cum Augusta pedes lavans, tergebat crinibus, et osculabatur, cibumque illis ac potum large distribuens, quæstiones et oppressiones Ecclesiarum prius relevans, ultimo in loco imperii ponebat. Quandiu vero in Cassinensi claustro remoratus est, ita omnes officinas monasterii, ac si abbas, vel decanus, circuibat, scire cupiens quomodo quisque sub B. Benedicti magisterio viveret: factoque mane orans, monasterii Ecclesias nudis pedibus circuibat. Et hæc agens, nunquam a consortio episcoporum et abbatum avellabatur, et cum sapientibus sermocinatio ejus. Erat profecto cæcorum baculus, esurientium cibus, miserorum spes, lugentium consolatio, atque ita in singulis eminebat virtutibus, ut omnes perfecte haberet. Sacerdotes honorabat ut patres, pauperes fovebat ut filios, viduas ut matres. Erat orationibus pervigil, lacrymasque creberrimas contriti cordis Deo offerebat ». Sed hæc hactenus. At de professione ipsius subdit hæc inferius:

23. « Igitur ordinato imperator monasterio, octavo postquam illuc advenerat die, B. Benedicto se ac fratribus multum commendans, cum jam grandævus esset, ac fere centenarius, dierum suorum finem imminere cognoscens, ad civitatem S. Germani una cum Guibaldo (novo abbate) descendit, abbatemque papæ commendans, juxta veterem Aquinensem civitatem tentoria fixit ». Recensetque cuncta per eundem imperatorem tunc gesta pro indemitate rerum monasterii Cassinensis: « Post hæc imperator, subdit ¹, atque Apostolicus festum sancti martyris Christi Mauriti in Ecclesia beati Petri Apostoli celebrans, Guibaldum abbatem cum fratribus ad prandium exocavit, dicens: Puto quia comedendi bibendique vobiscum hic mihi erit ultimus dies; idque postea rei probavit eventus ». Nam sequenti anno ex hac vita migravit, ut suo loco dicturi sumus. Post hæc advenit imperator cum Innocentio papa in Urbem, ubi et compositis rebus, inde recessit in Tusciam; reliqua autem de ipso sequenti anno. Abbas autem recens, ubi rediens Rogerius rex Siciliæ universam Campaniam sibi subegit, cunctaque igne ferroque vastans, eidem mortem est comminatus, sponte cedens inde discessit, et in Germaniam ad suos reversus est antiquos monachos Stabulenses, inter quos a pueritia coaluisset. Extant de his litteræ ipsius ad imperatorem, cum his premeretur angustiis. At de his hactenus. Quæ autem post dis-

cessionem Lotharii et Campania, et reditum Innocentii papæ ad Urbem confingerint, videamus.

24. *Rogerus ablati recuperaturus venit et pugnat: ad quem S. Bernardi legatio et cum schismaticis disputatio.* — Inter hæc autem Rogerius Siciliæ rex, diu paratus ad prælium, expectans discessionem imperatoris, quem sciret revertendi iniisse consilium atque firmasse propositum, ubi comperit eum profectum esse, Romanque pervenisse, inde in Galliam Cisalpinam profectum: darata classe, ad oras Salernitani littoris appulit; moxque alios populos sponte venientes in dedicationem accepit, armis alios expugnavit, et contra Robertum Capuæ principem, qui ad imperatorem confugerat, et eundem illuc duxerat cum exercitu, majori ira succensus, Capuanam civitatem invadens, eam captam ferro igneque vastavit, nec locis sacris parcens, Ecclesias præde militum dedit, et proli nefas! eorundem ludibrio exposuit moniales. Tunc Beneventani his auditis sibi timentes, legatis missis, Rogerio se dedere, et Innocentium abjurantes, Anacletum in Pontificem assumpsere. O rerum humanarum volucris instabilitas, et mortalium infida fidelitas, et vana in continendo in officio homines studia principum! Ecce eodem ferme momento conversa est victoria in captivitate, libertas in vincula, jurata ubique fidelitas in infidelitatem. Ut plane apparuerit, vana prorsus existere studia hominum, quibus non aspiret divina potentia, qua tantummodo factum, ut paucos post menses extincto morte pessimo antipapa, plenam mox acceperit Ecclesiam pacem, quam parere frustra laboravit imperatoris exercitus. Sed de his dicendum anni sequentis exordio. Interea res gestas a tyranno Siculo, (sic enim appellare consuevit S. Bernardus) prosequamur, qui multiplici jure, fidelitate sæpe jurata, feudatarius Romanæ Ecclesiæ, nihil concupivit avidius, atque tentavit audacius, quam potiri ejusdem Ecclesiæ rebus, cujus desiderat esse filius, jamdiu ab ejus communione sejunctus.

25. At quid auditis his Innocentius papa? re ipsa expertus quam vana salus hominis, spe contra spem nitens in tanta desperatione rerum, contra furentes tyranni Siculi impetus, adversus ferociam altioris et victoris exercitus unum objecit hominem humilem, sed Dei virtute potentem, qui in fugam converteret sanctæ Romanæ Ecclesiæ victores hostes. Ejusmodi plane novit esse opera Dei, nimirum quod infirma mundi eligat, ut confundat fortia. Sic igitur imperio Christi gladium exertum in defensionem Ecclesiæ, in vagina recondens, ad arma spiritualia Deo potentia se convertit, sumens scutum fidei, eoque omnia tela nequissimi securus excipiens, illesus lædere adversarium festinavit. Quomodo ista? Audi S. Bernardum Claravallensem abbatem, quem Romæ reliquerat ad reducendos schismaticos devios ad Ecclesiam (ut audimus superius esse narratum) ad Rogerium tyrannum, spirantem minarum et cædis in omnes, qui essent

¹ P. L. Hist. Chr. Cas. I, IV, c. 126.

Innocentii papae communionis, pacis nuntium mittit. Quid autem hac legatione sit actum ut accipias: primum omnium admonendum putamus, duas simul legationes confundi ab auctore, qui res gestas sancti Bernardi conscripsit, cum videlicet una cum sancto Bernardo missum esse Haimericum cardinalem cancellarium affirmat, et ex parte Anacleti Petrum Pisanum itidem cardinalem. Nam ista de missis ex parte utraque cardinalibus postea confugerunt, ut ex auctore qui aderat et ea scriptis mandabat, Falcone Beneventano satis evidenter apparet. Missus est ergo primum S. Bernardus, postea vero, petente Rogerio, cardinales, cum videlicet a Deo humiliatus, verba pacis, quae contemnebat, audire libenter cepit. Sed audiamus ipsum:

26. « Interca, inquit, abbas de Claravalle, vir valde mirabilis et discretus, ad regem illam venerat, pro tanti dissidii infestatione sedanda inter regem illum et ducem Rainulphum fidelem Ecclesiae, et pacem fœdere inter eos alligare conatus, sed frustra ». Nam cum proximè utriusque copiae essent, et longe potentiores vires Rogerii, et jam pararentur ad praelium, repulsus est ab eo nuntius pacis. Sed quid attulerit belli exitus, audi ex eodem auctore: « Rex ipse exercitum suum divisit, et ad bellandum viriliter stabilivit. Similiter et dux ille sapienter suos omnes ordinavit. Primum quidem regis acies ordinata ab eo aggreditur, et inter ducis armatos intravit; illico acies illa regis prostermitur. Rex autem, qui cum aliis aciebus suis armatus erat, Dei adveniente iudicio, timore percussus, primus terga vertens, in fugam conversus est ». Sicque potius est victoria Rainulphus, qui ditissima hostium castra diripuit, insecutus quae hostes ingenti eos strage confecit. Sed sicut fortis, ita sapiens laud sibi viribusque suis adeo gloriosam licet insperatam victoriam tribuit, sed Deo ipsi per sancti viri Bernardi preces obtentam, tulit acceptam: nam audi quid in Vita ipsius Bonevallis abbas de his scripserit¹:

27. « Parato namque ad bellum innumerabili exercitu adversus Rainulphum ducem, idem rex in campum armatas produxerat acies; cum subito viso duce audacter obviam procedente, territus fugit, effusumque exercitum praedae et credibus exposuit, et innumeris militibus captis et interfectis, invitus ducem ditavit opibus, gloria sublimavit. Quae quidem ei juxta verbum viri Dei omnia contigerunt. Cum enim primus eorum qui vocati fuerant, abbas sanctus adveniens, regem in castris positum invenisset, per multos dies vicinas acies ne praelium committerent, impedivit: denuntians regi, quia si conflictum inieris, victus et confusus abibis. Novissime vero cum ejusdem regis plurimum crevisset exercitus, ignorans quod non in multitudine foret eventus belli, virum sanctum quaerentem ea quae pacis erant, ulterius audire contempsit. At ille

ducem Rainulphum, et Catholicorum aciem verbis potentibus adhortatus, sicut regi fugam, sic illis victoriam pollicitus est et triumphum. Cumque ad proximam villulam declinasset, et instaret orationi, repente fugientium et insequentium clamor auditur. Siquidem per eundem locum fugientem regis exercitum Rainulphus persequabatur. Egressus itaque frater quidam ex his, qui cum abbate erant, uni ex militibus occurrit, et quid accidisset interrogat. At ille (siquidem litteras noverat): Vidi, inquit, impium superexaltatum et elevatum sicut cedros Libani, et transivi, et ecce non erat. Nec mora, dux ipse secutus, ut monachum vidit, sicut erat armatus, equo desiliit, et ejus pedibus advolutus: Gratias, inquit, ago Deo et fidei servo ejus, quia non nostris viribus, sed ejus fidei collata haec victoria est. Iterumque insiliens equo hostes insecuebatur. Nec tamen hac plaga sibi inflicta caelitus correctus est animus regis, nec detumuit procella, quam conglomerarat pravae mentis elatio: sed post fugam reversis qui evaserant, simulans alacritatem, regio se ornatu atollens, stipula militibus curia, utranque partem praecipit accersiri ». Quid hoc? audi vatum consilium. Ne a victore Rainulpho graviorem pateretur impressionem, ut cum ab insecutione divelleret, et seipsum ad potentiores vires comparandas parare posset, astute nimis illud excogitavit, nempe ut in suae conversionis spem conjiceret adversarios, siquae cessaretur ab armis, et conflictus reduceretur ad rhetoricorum argumenta; utque vitaret pugnam, disputationem procurare se simulat. Quomodo autem ista se habuerit, ex chronographo Beneventano primum haec accipe:

28. « Cumque praefatus abbas de Claravalle, vir valde mirabilis et disertus, de pacis fœdere et Ecclesiae unitate cum nominato rege confabularetur assidue, rex ipse cum abbate illo stabilivit, ut tres cardinales ex parte Innocentii papae, qui ejus interfuisset electioni, ad regem ipsum venirent, et tres ex parte Anacleti, et ordinem electionis utriusque insinuarent; deinde ipse rex, audito ordine utriusque partis, justiore quam putaret electionem eligeret; et sic Spiritu sancto favente, ad pacis perveniret cum totius regni magnitudine firmamentum, quam suo arbitrio et sententia confirmarent. Cognoverat enim, firmiterque crediderat, totius mundi Christicolae parti favere Innocentii, et ejus Pontificatum venerari, se vero solum cum sui regni latitudine dissentire. His auditis, continuo ad Innocentium papam et Anacletum delegatum est, et cursu rapido regis positio destinatur. Placuit itaque eis, et consilio firmato, a parte Innocentii Haimericus cancellarius, et Gerardus cardinalis, vir valde venerabilis, Salernum simul cum praedicto abbate de Claravalle super hujusmodi electione ventilanda venerunt. Ex parte vero Anacleti Mathaeus cancellarius et Petrus Pisanus, cardinales, et

¹ Vit. S. Bern. I. II. c. 7.¹ Psal. XXXVI.

alius cardinalis, nomine Gregorius, similiter acceperat.

29. « His ita congregatis, rex ipse, ut erat sagacis animi providique consilii, prius partem Innocentii quadriduo usque ad occasum solis mirabiliter et ultra quam credi potest examinavit; sequenti autem quadriduo Anaclei partem similiter perscrutatus est. Studiose igitur et diligenter partibus utriusque electionis auditis, rex ipse clerum omnem et populum civitatis Salernitanæ congregari mandavit, et episcopos et abbates monasteriorum qui convenerant, et coram eis taliter exorsus est: Domini et fratres, vestram credimus non latere prudentiam, qua de re cardinales istos partis utriusque fecerim convocari: putavi enim, quantum nostræ obigit virtuti, tali et tanto negotio finem imponere, et justitiæ semitam evidenter sectari. Sed quia multis quaestionibus, variisque responsionibus animus noster impeditur, solus ego super hoc tanto negotio finem imponere nequeo. Unde si domitis istis cardinalibus videtur, ordinem utriusque scribant electionis et ab utraque parte unus mecum in Siciliam ascendat cardinalis, ubi favente Deo, Nativitatis Jესу Christi Salvatoris celebraturi sumus festivitatem, ibique sapientes archiepiscopos, episcopos, aliosque inveniemus prudentis animi viros, quorum consilio Anaclei partem usque modo sectatus sum. Nunc itaque ipsorum et aliorum sapientum consilio, super hoc negotio, divina inspirante clementia, certissimum finem, quantum ad meam pertinet potestatem, imponemus. Card. ad hæc Gerardus respondit: Sciatis revera, quoniam ex parte nostra ordinem partis nostræ non scribemus. Audistis enim ex ore nostro seriem electionis; audistis omnia quæ circa nos gesta sunt. Cardinalem quidem mittemus Guidonem de Castello sapientem virum atque disertum, qui vobiscum, sicut petitis, in Siciliam veniat, si sapientiæ vestræ placuerit; et perficietis, quo Spiritus sanctus Paracletus cor vestrum illuminet, et recto corde ad Ecclesiam et veritatis lumen perducatur. Et his actis unusquisque ad propria remeavit. Ex parte vero Anaclei similiter cardinalis alius destinatur: cum quibus, paratis navigiis, rex ipse in Siciliam transfretavit ». Hæc Falco Beneventanus in Chronico.

30. Abbas autem Bonævallis Bernardus rem longe aliter tractatam esse inter Petrum Pisanum, atque sanctum Bernardum affirmat, nec duos vel tres sed unum tantum ab alterutra missum parte testatur, nempe ab Innocentio Haimericum, et ab Anacleto Petrum Pisanum. Disputationem vero habitam inter sanctum Bernardum atque Petrum Pisanum in hunc modum: « Prior itaque Petrus electionem domini sui canonicam probare contendit, et verba sua multis legum et canonum assertionibus munit. At vero vir Dei non in sermone, sed in virtute regnum Dei esse intelligens: Scio, inquit, Petre, te virum sapientem et litteratum esse, et utinam sanior pars et honestiora te

occupassent negotia. Utinam te patronum causa felicior obtineret, et sine dubio rationabilia allegantem nulla posset impedire facundia. Et nos quidem agrestes, lignonibus magis quam declamationibus assueti, si causa fidei non urgeret, institutum silentium teneremus. Nunc autem cogit nos charitas eloqui, quia tunicam Domini quam in tempore Passionis nec ethnicus præsumpsit scindere nec Judæus, fautore hoc domino Petrus Leonis lacerat et dirumpit. Una est fides, unus Dominus, unum baptisma¹: nos neque duos dominos, neque geminam fidem, nec duo baptismata novimus. Ut ab antiquis ordiatur, una arca² tempore diluvii fuit, in hæc octo animæ, cæteris omnibus pereuntibus, evaserunt, et quotquot extra arcam inventi sunt, perierunt. Arcam hanc typum habere Ecclesiæ, nemo est qui ambigat. Arca alia nuper fabricata est, et cum sint duæ, alteram necesse est esse adulteram, et in profundum demergi. Arca quam regit Petrus (Leonis scilicet,) si ex Deo est, necesse est ut arca quam regit Innocentius obruatur. Peribit ergo Orientalis Ecclesia, peribit Occidens totus, peribit Francia, peribit Germania, Iberi et Angli, et Barbara regna in profundum pelagi demergentur. Religio Camaldulensis, et Carthusiensis, et Cluniacensis, et Grandimontensis, et Cisterciensis, et Præmonstratensis, aliaque innumerabilia servorum et ancillarum Dei collegia necesse est, ut sub uno turbine corruant in abyssum. Episcopos et abbates et reliquos Ecclesiæ principes collo præcipiti mola asinaria alligata pelagus vorax excipiet. Solus ex principibus mundi arcam Petri intrabit iste Rogerius, et cæteris omnibus enecatis, solus ipse salvabitur? Absit ut totius mundi religio pereat, et ambitio Petri (cujus vita palam est qualis extiterit) regnum cælorum obtineat.

31. « Ad hæc verba non ultra se poterant qui præsentés aderant, continere, sed abominati sunt et vitam Petri et causam. Abbas autem tenens manum Petri, elevavit eum, et simul ipse surrexit: Tutiorem, inquit, simili credas, intrabimus arcam. Et sicut jampridem mentem conceperat, salutaribus illum aggrediens monitis, cooperante gratia Dei protinus persuasit, ut ad Urbem rediens, Innocentio pape reconciliaretur. Soluta concione, rex necdum voluit obedire quia sancti Petri patrimonium, quod in Cassinensi et Beneventana provincia amplissimum est, cupidus occupaverat, putabatque hujusmodi suspensionibus aliqua a Romanis extorquere privilegia, per quæ in jus proprium deinceps sibi stabiliretur hereditas. Sic Herodes visum Salvatorem contempsit, et quem desideravit absentem, contempsit præsentem ». Narrat post hæc miraculum quod Salerni, ubi hæc sunt facta, est operatus in majorem detestationem Rogerianæ perfidiæ, his paucis:

32. « Igitur circa curationem cujusdam viri

¹ Ephes. IV. — ² Gen. VI, VII, VIII.

nobilis, et in urbe Salernitana notissimi, succumbentibus medicis, quorum ibi præcipue ars viget et studium : eidem viro de medicorum auxilio desperanti, noctu quidam per somnium apparetis intimavit advenisse Salernum virum sanctum, et in curationibus efficacem : hunc inquirere jubetur, et de lavacro manuum ejus bibere. Quæsit, invenit, aquam petiit, bibit, convaleuit. Ille verbum per totam urbem divulgatum, ad aures regis et procerum ejus pervenit. Cum omnium igitur populorum favore, solo rege in malitia permanente, abbas Romæ revertitur ; prædictum quoque Petrum Pisanum, et quosdam alios reconciliat Ecclesie, et Innocentio papæ confederat ». Hic finis legationis S. Bernardi ad Rogerium Siciliæ regem. Inter hæc autem suos Claravallenses consolatus est litteris, quarum est exordium ¹ : « Ex vobis perpendite quid patiar ego. Si vobis molesta est absentia mea, nemo dubitet mihi esse molestiorum », et quæ sequuntur. Alias adhuc addidit ² post reconciliatos complures schismaticorum Catholice Ecclesie, tacens lamen illa, quæ gloriæ suæ esse possent, tantum gloriæ in infirmitatibus suis. Est autem illarum exordium : « Tristis est anima mea usquedum redeam, et non vult consolari usque ad vos ». Et post multa :

33. « Sed et hæc vice quam necessaria Ecclesie Dei sit vel fuerit præsentia parvitalis nostræ, dicere ad consolationem vestram, si non gloriam redoleret. Nunc autem melius est, ut hoc per alios cognoscatis. Instantissima postulatione imperatoris, Apostolicoque mandato, necnon Ecclesie ac principum precibus flexi, dolentes et nolentes, debiles atque infirmi, et ut verum fatear, pavidæ mortis pallidam circumferentes imaginem, trahimur in Apuliam. Rogate quæ ad pacem sunt Ecclesie ; rogare quæ ad salutem sunt nobis, ut iterum vos videamus, vobiscum et vivamus et moriamur ; et sic vivite ut obtineatis. Infirmus in arcto temporis, certe cum lacrymis et singultibus ista dictavi, teste charissimo fratre nostro Balduino, qui stylo ea excepit : quem Ecclesia vocavit ad aliud officium et ad aliam dignitatem. Orate et pro ipso tanquam unico solatio meo, et in quo spiritus meus plurimum requiescit. Orate pro domino papa, qui me pariter et universatem vestram paterno fovet affectu. Orate et pro domino cancellario, (Haimérico cardinali videlicet), qui mihi pro matre est, etc. »

Quod ad Balduinum pertinet exceptorem sancti Bernardi, Pisanus hic patria erat, et Pisanæ Ecclesie creatus archiepiscopus, de quo hoc elogium Bernardus abbas Bonavallis in Vita S. Bernardi ³ : « In Tuscia Pisis natalis soli gloria et magnum Ecclesie lumen Balduinus effulsit ». Hæc ipse, dum recenset eos qui ex Ordine Cisterciensi ad episcopatum diversarum Ecclesiarum vocati

fuissent sub Innocentio papa. Sed et cardinalem hunc creatum fuisse, habet Petrus Diaconus in Chronico Cassinensi his verbis ⁴ : « Balduinus cardinalis (interfuit scilicet), qui post Pisanum archiepiscopus fuit ». Et inferius : « Misit autem Pontifex cum dicto Rainaldo (Cassinensi abbate) Balduinum presbyterum cardinalem, præcipiens ut filium Petri Leonis a Cassinensibus monachis anathematizari faceret, ac papæ ejusque successoribus obedientiam ab ipsis exigeret. Quod ita factum est ». Extat S. Bernardi ⁵ Epistola officiosissima et affectuosissima ad Balduinum abbatem Reatini monasterii, quem eundem puto cum hoc qui ad cardinalatus dignitatem assumptus est.

34. *S. Malachie metropolitæ Hiberniensis Romam adventus et signa.* — Hoc eodem anno, cum jam Innocentius papa Romæ consisteret, contigit mirifici illius S. Malachie archiepiscopi Ardinachæ, totius Hibernie metropolitane Romam adventus ad ipsum Innocentium Romanum Pontificem pro pallio tum suæ, tum etiam alterius in eadem insula metropolitane Ecclesie. Sed et alia præcipua causa ejus Romam adventus asserit a sancto Bernardo, ejusdem Vitæ scriptore, nimirum ut Evangelium prædicaret auctoritate Romani Pontificis, quamvis Apostolatus ipsius innumeris miraculis visus esset comprobatus a Deo. Sed sanctum audi de sancto scribentem ⁶ : « Ipse interdum ibat et exhibet seminare semen suum, disponens et decernens tota auctoritate de rebus Ecclesiasticis tanquam Apostolus unus. Et nemo illi dicebat : In qua potestate hæc facis? videntibus cunctis signa et prodigia quæ faciebat ; et quia ⁷ : Ubi spiritus Domini, ibi libertas. Visum tamen sibi, non tuto satis actitari ista absque Sedis Apostolicæ auctoritate. Et Romam proficisci deliberat, maximeque quod metropolitæ sedi deerat adhuc, et defuerat ab initio pallii usus, quod est plenitudo honoris. Et visum est bonum in oculis suis, si Ecclesia, pro qua tantum laborarat, quem hactenus non habuerat, suo acquireret studio et labore. Erat et altera metropolitica sedes, quam de novo constituerat Celsus prædecessor, primæ tamen sedi, et illius archiepiscopo subdita tanquam primati ; et huic quoque optabat nihilominus pallium Malachias, confirmarique auctoritate Sedis Apostolicæ prærogativam, quam beneficio Celsi adipisci meruerat ». Quomodo autem ab Innocentio papa digne exceptus fuerit, ita inferius idem sanctus Bernardus enarrat :

35. « Erat, inquit, tunc temporis in Sede Apostolica felicitis memoriæ Innocentius Secundus papa, qui cum benigne suscepit, humane satis illi super longa peregrinatione compassus. Et primo quidem Malachias quod altius infixerat animo, cum multis lacrymis implorabat, licere sibi vivere et mori in Claravalle, permissu et benedictione summi Pontificis. Et petiit hoc, non oblitus ad quod venerat,

¹ Bern. Ep. CXLIII — ² Ibid. Ep. CXLIV. — ³ Vit. S. Bern. l. II, c. 8.

⁴ Pet. Diac. Chr. Cas. l. IV, c. 110. in princ. et 119. — ⁵ Bern. Ep. CCI. — ⁶ Ibid. in Vita S. Malach. — ⁷ 2. Cor. III.

sed affectus quo venerat desiderio Clarævallis. Non autem obtinuit, quod vir Apostolicus lucris potius uberioribus aucupandum decerneret. Nec tamen omnino frustratus est a desiderio cordis sui, cui mori ibi, etsi non vivere, donatum est. Mensem integrum fecit in Urbe, loca sancta perambulans, et frequentans causa orationis. Cumque per id temporis sæpe ac diligeret ab eo et ab iis qui cum eo erant, summus Pontifex inquisisset esse patriæ, mores gentis, statum Ecclesiarum, et quanta in terra Deus per eum operatus fuisset : paranti jam repatriare, commisit vices suas per universam Iiberniam, legatum illum constituens. Significatum siquidem erat ei ab episcopo Gilleberto, qui (ut supra memoravimus) tunc legatus extiterat, quod jam non posset præ senio et debilitate corporis villicare. Post hæc petit Malachias confirmari novæ metropolis constitutionem, et utriusque sedis pallia sibi dari. Et confirmationis quidem privilegium mox accepit : de palliis autem oportet (ait summus Pontifex) solemnitus agi. Convocatis episcopis et clericis et majoribus terræ, celebrabis generale Concilium, et sic convivia et communi voto universorum, per honestas personas requiretis pallium, et dabitur vobis. Deinde tollens mitram de capite suo (mos namque erat nonnisi mitratos Romanos Pontifices ad audientiam admittere penitentes audiri) imposuit capiti ejus : sed et stolam cum manipulo dedit illi, quibus uti inter offerendum solebat. Et salutatum in osculo pacis, dimisit eum Apostolica fultum benedictione et auctoritate ». Hactenus de congressu sancti Malachie cum Innocentio. Quomodo autem reverso in Iiberniam concertandum ipsi fuerit cum hæretico Sacramentario, idem S. Bernardus inferius ita describit errantis unius historiam, quæ saluti esse possit omnibus novatoribus :

36. « Fuit quidam clericus in Lesmor, probabilis ut fertur vite, sed fidei non ita. Is sciolus in oculis suis præsumpsit dicere, in Eucharistia esse tantummodo sacramentum, et non rem sacramenti, id est, solam sanctificationem, et non corporis veritatem. Super quæ a Malachia secreto et sæpe conventus, sed incassum, vocatus ad medium est, seorsum tamen a laicis, ut si fieri posset, sanaretur, et non confunderetur. Itaque in conventu clericorum data facultas homini est, pro sua sententia respondendi. Cumque totis ingenii viribus,

quo non mediocriter callebat (valebat), asserere et defendere conaretur errorem, Malachia contra disputante et convincente, iudicio omnium superatus, de conventu confusus quidem exiit, sed non correctus. Dicebat autem se non ratione victum, sed episcopi pressum auctoritate : Et tu, inquit, o Malachia, sine causa me hodie confudisti, adversus profecto veritatem locutus, et contra tuam ipsius conscientiam.

37. « Mæstus Malachias pro homine sic indurato, sed magis fidei dolens injuriam, timens periculum, Ecclesiam convocat, errantem publice arguit, publice monet ut resipiscat. Suadentibus hoc ipsum episcopis et universo clero, cum non acquiesceret, contumaci anathema dicunt, hæreticum protestantes. Nec sic evigilans, omnes, inquit, faveis homini potiusquam veritati. Ego personam non accipio, ut deseram veritatem. Ad hoc verbum subtomachans sanctus : Dominus, inquit, fateri te veritatem faciat, vel ex necessitate. Quo respondente, Amen, solvitur conventus. Tali ille inustus cauterio fugam meditatur, iofamnis alque inhonoris fore non sustinens. Et continuo sua tollens exibat. Cum ecce subita correptus infirmitate, sistit gradum, viribusque deficiens, eodem loco jactat se super solum anhelus et fessus. Forte incidens in id loci vagabundus insanus offendit hominem ; quidquam ibi agat, percunctatur. Respondet, gravi se infirmitate teneri, et neque procedere, neque redire valentem. Et ille : Infirmitas ista haud alia, inquit, quam ipsa mors est. Hoc autem non dixit a semetipso ; sed pulchre Dominus per insanum corripuit eum, qui sanis acquiescere noluit consiliis sensatorum. Et addit : Revertere domum, ego te juvabo. Denique ipso duce revertitur in civitatem, redit ad cor, et ad misericordiam Domini. Eadem hora accitit episcopus, agnoscitur veritas, abjicitur error, confessus reatum absolvitur, petit viaticum, datur conciliatio, et uno pæne momento perfidia ore abdicatur, et morte diluitur. Ita mirantibus cunctis, sub omni celeritate completus est sermo Malachie, et Scripturæ pariter dicentis ¹ : Quia vexatio dat intellectum auditui ». Hæc S. Bernardus. Sed progrediamur ad res anni sequentis.

¹ Is. XXVIII.

Anno periodi Græco-Romanæ 6630. — Anno Æræ Hispan. 1175. — Anno Hegiræ 532, inchoato die 19 Sept., Fer. 1. — Jesu Christi 1137.

— Innocentii II papa 8. — Lotharii reg. 13. imp. 5. Joannis Comneni imp. 20.

1. *Secunda projectio Romana Lotharii imp. et Innocentii II.* — A num. 1 ad 13. « In anno octavo Pontificatus domini Innocentii », inquit Falco in Chron., « mense Martio, XV Indict. præfatus Apostolicus Innocentius, qui tunc Pisis morabatur, consilio communicato, de civitate Pisana exivit, et apud civitatem Bitervum, (id est, Viterbium), advenit, præfatum imperatorem (sc. Lotharium) allocuturus. Imperator igitur Henricum generum suum cum tribus millibus equitum ad Pontificem destinavit Innocentium; addens se facturum, ut Romanos fines teneat, et principi Roberto (Capuano) principatum suum restituat. Ipse vero marchias adire disposuit (per marchiam Anconitanam). Apostolicus autem continuo Romanos fines advenit, et civitatem Albanum, provinciam totam Campaniæ suæ obtinuit fidelitati. Romam quidem ingredi noluit, ne in Romanorum negotiis impediretur (quia nempe Anacletus et ejus parentes ibi prævalebant). Præfatus autem imperator flumen Piscariæ adveniens, Pascha Domini ibi celebravit. Inde flumen illud transiens, civitatem Termulensem, et illius provinciæ comites obtinuit, et inde amoto exercitu Apuliam ingreditur, et civitatem Sipontum, et montem S. Angeli octavo die intrante mensis Maii comprehendit. Tantus ilaque timor totam invasit Apuliam, quod universus populus usque ad civitatem Barum ad ejus imperium alligatus est.

2. *Innocentius II Beneventum venit.* — « Et his actis Apostolicus ipse ad civitatem Sancti-Germani (prope montem-Casinensem) pervenit, quam suæ submisit ditioni. Inde Capuam veniens Roberto principi eam restituit, et his actis Beneventum venit prædictus Apostolicus X kalendas Junii, etc. Cumque in planitie Sancti-Petri castra Apostolici et ducis (nempe Henrici) ponerent, etc. Roscemannus, qui tunc præerat, Romanæ Sedis adversarius cives fere universos submovit, ut contra Apostolicum venientem insurgerent, et ad eorum posse resisterent, etc. Præterea ad horam fere novam quidam Beneventanorum excentes cum Teutonicis pugnare cœperunt, etc. Dux vero illorum, Henricus, audiens Beneventanos ita super se insilire, armari suos omnes occulte præcepit, etc.

Et ex improvise leonum more frendentes Teutonici insiliunt, et Beneventanos illos, qui contra eos pugnabant, usque ad Pontem-Majorem in fugam convertunt, etc. Nocte insecuta, cives qui capti fuerant, vinculis districti sunt et alligati. Mane autem facto, die Dominico ad dominum papam veniunt quidam de civibus Beneventanis, viri sapientes et discreti, qui omnia, quæ Apostolicus exquisierat, assecuti sunt; continuo captivos cives Beneventanos, quos Teutonici comprehenderant, dominus Apostolicus absolvit jussit, et ad propria reverti. Et sic sacramentis firmatis fidelitatem domino papæ, complures civium, qui ad ipsum Pontificem exierant, juraverunt.

3. *Beneventani fidelitatem ei jurant.* — « Cumque taliter sacramenta illa perficerentur, vir quidam, Taquintus (Jaquintus) nomine, civis Beneventanus, quique per triennium exulaverat, ultionem reddere de acceptis excogitans, Teutonicos omnes submovit, ut civitatem ingredienti, quod possent caperent, et bona eorum auferrent; qui cursu rapido armis arreptis insiliunt, etc. Jaquintus per Clavicam, quæ Sancti-Renati vocatur, ingrediens, cum quibusdam consociis suis ad sacrum palatium curiæ perrexit, et Crescentium cardinalem, Pontificis Innocentii adversarium, qui tunc ibi occultabatur, comprehendit. Nec mora, per plateam illum ducentes ad dominum papam captivum illum transmiserunt ». Narrat postea Falco, ut Jaquintus vulneratus fuerit, perieritque, cum Bernardum comitem palatii, Innocentii II hostem, detinere vellet: « Dominus autem Apostolicus sic illum vulneratum et mortuum, suaque sponte taliter fuisse perductum, audiens, ut erat sapientis animi et pacifici cordis, nullam cum Beneventanis, qui eum interfecerant, excitavit quæstionem. Roscemannus autem, qui tunc contra voluntatem ipsius Apostolici episcopus fuerat, et qui civitatem violento nomine tenuerat, noctis silentio timore coactus fugit. Quibus omnibus ita peractis, ita prædictus Falco (loquitur auctor de semetipso) et Rolfrido judex, etc. qui per triennium exules fueramus, cum aliis Beneventanis similiter exilibus licentia prædicti Pontificis ad propria reversi sumus, etc. Præfatus autem Apostolicus supra nomina-

tum Girardum cardinalem ad civitatem mandavit, ut a civibus universis fidelitatem acciperet, quod et factum est. His omnibus ita evolutis, Pontifex Innocentius sacramentis fidelitatis acceptis, consilio habito, iter arripuit VIII kalendas Junii, ut ad imperatorem nominatum festinaret. Veniens autem ad portam Summam, invenit ibi populum, et cætera apud Baronium num. 9 legenda.

4. *Progressus Innocentii II et imperat. in Apulia.* — « Cardinalis igitur jussu prædicti Apostolici in Beneventana civitate moratus est, etc. Prius vero quam Apostolicus de civitate discederet, Octavianum subdiaconum, virum prudentem et sapientis animi, rectorem Beneventi ordinavit, qui simul cum domino Girardo statum civitatis et pacis firmamentum studiosè regebat ». Hæc Falco pag. 303 et duabus seqq. Deinde pag. 305: « Cumque Pontifex ipse ad imperatorem pervenisset cum præfato Henrico (genero Lotharii, Bavariæ et Saxonie duce, Superbo cognominato) honore mirabili et gaudio ab imperatore suscipitur. Deinde Barensis populus castellum civitatis, quod pro eorum afflictione rex Rogerius fabricari jusserat, valde terribile et munitum expugnaverunt, sicque per quadraginta dies illud obsidentes cum Teutonicorum auxilio virtute multa castellum illud comprehenderunt, et terratenus prostraverunt. Custodes autem castelli, quia jam amplius illud defendere non poterant, capti et trucidati, et in mare præcipitati sunt (pag. 306). Inde maritima omnis usque ad Tarentum et Calabriam ad imperatoris fidelitatem alligari satagebat. Cumque castellum illud Barensis taliter comprehensum est, super civitatem Melium Apostolicus et imperator venerunt, et eam viriliter obsidentes, diebus non multis elapsis, comprehenderunt, et suæ obtinuerunt fidelitati. Hæc inter, Pisanorum exercitus, sicut juraverat, centum navigiis armatis, ad civitatem pervenit Neapolitanam. Nec mora, jussu prædicti imperatoris super civitatem Anaphitnam festinat, excogitans igne ferroque eam depopulari. Cives autem Anaphitani, consilio salutis invento, pecunia data, ad imperatoris et Pisanorum permansit fidelitatem, etc.

5. *Salernum sese utrique dedit.* — « Interim præfatus imperator, et Apostolicus civitatem dimisit Melium et civitatis Potentiæ fines descendit, ibique juxta fluentem de lacu Pesce per dies fere triginta moratur. Inde universa Apuliæ oppida et civitates ad suum imperium alligavit. Et his actis mandavit imperator, ut Pisanorum exercitus Salernum obsideat; præcepit quoque Roberto principi, et magistro militum Neapolitanum, ut viribus totis et armis simul cum Pisanis eandem Salernitanam obsiderent civitatem, quod et factum est XV kalendas Augusti. Quinellam Rainulphum comitem, quem affectione multa secum detinebat, nulle Teutonicorum viris datis, super civitatem ipsam Salernum destinavit, quibus ita convenientibus prope muros obsederunt. » Falco pag. 307 refert

Salernitanos Rogerio regi fideles urbem fortiter propugnasse, et deinde ait: « Audiens autem imperator civitatis Salernitanæ constantiam, et quia igne ferroque Pisani eam obsidebant, consilio invento, simul cum domino Apostolico ad eandem civitatem celeriter festinavit. Sequenti igitur die sapientes civitatis ad ipsum imperatorem venire; et pactis intervenientibus civitatem ipsam suo imperio submiserunt. Quidam vero militum illorum securitate accepta, licentiam exeundi impetrarunt; quidam vero et prædicti Rogerii proceres ad turrem majorem, quæ super civitatem erat, confugerunt. Sicque civitas ipsa in gaudium conversa sub tali tantoque imperio exultabat.

6. *Discordia inter Innoc. II et Lothar. II cito sopita.* — « Audiens autem populus Pisanorum civitatem Salerni sine eorum consilio et voluntate ab imperatore captam fuisse, mirabiliter contristati sunt, et furore arripso, machinam lignorum factam combusserunt, et paratis navigiis Pisas regredi disponebant; sed Apostolici Innocentii precibus et promissionibus coacti ad imperatoris voluntatem reversi sunt; sicque castrum illud turris majoris præ eorum vecordia dimissum est. (Ilujus castri opera Rogerius postea Salernum et quæcumque hoc anno amiserat, recuperavit). His ita peractis, præfatus imperator et Apostolicus castra inde (id est, Salerno) amoventes, Abellinum venerunt (circa initium Augusti, aut sub finem Julii, quia eo in loco per mensem fere castrametatus est, et non nisi die xxx Augusti inde discessit). Deinde Beneventum et juxta fluvium Caloris ex hac parte ad Ecclesiam Sancti-Stephani castrametati sunt secundo die stante mensis Augusti (id est, die xxx illius mensis). Cum autem Abellinum venisset Apostolicus ipse Innocentius duces ad defensionem Apuliæ ordinare nomine suo satagebat. Imperator vero nomine suo contra voluntatem Apostolici ordinare volebat. Unde factum est, ut per triginta fere dies (per quos Abellini castrametati sunt) ad invicem discordatum sit, sed sapientum consilio communicato, discordia talis destructa est. Quid multa? Divina favente clementia, et ipso imperatore favente, omnibusque suis Apostolicus nomine suo ad B. Petri fidelitatem comitem Rainulphum, virum utique prudentem et discretum, (qui Mathildem sororem Rogerii uxorem duxerat) in duces elegit, et eo electo vexillum ad honorem ducatus Apostolicus et imperator in conspectu omnium ei tradiderunt et confirmaverunt ».

7. *Greg. ab Innocentio II consecratur episc.* Benevent. — Abellino ad civitatem Beneventanam die xxx Augusti ventum: « Cumque », inquit Falco, « taliter in prædicto loco castrametati sunt, triduo post, die videlicet calendarum Septembris, imperatrix, nomine Florida, militibus fere centum assumptis, ad Ecclesiam B. Bartholomæi Apostoli venit, Portam-Auream ingreditur ». Imperatrix magnifica munera Ecclesiæ illi dedit. Postea « per Portam-Summam exiens, ad exercitum suum re-

meavit. Triduo autem post imperatoris adventum, præfatus Apostolicus Beneventanam civitatem intravit, et a clero et populo universon honorifice susceptus est. Altera autem die adveniente, in sacro Beneventano palatio sedens in conspectu cleri et populi Beneventani clamavit, ut si quis contra personam, sive electionem Gregorii Beneventani electi canonice et rationabiliter opponere vellet, libera fronte opponeret: sed clementia divina opitulante, et quia electus vitam suam religiose custodierat, nemo civium contra ejus electionem objecit. Apostolicus itaque hoc aspiiciens gratias Deo egit, et ipse de persona et vita electi testificatus est honeste et religiose, et eidem electo præcepit, ut de peccatis suis confiteatur, et die Dominico adveniente, Spiritu sancto cooperante, consecrationem acciperet. Quid multis? die adveniente Dominico, Apostolicus ipse Ecclesiam episcopii descendit, quinto die videlicet intrante mensis Septembris, electum ipsum consecravit; ad cuius consecrationem patriarcha interfuit Aquileia, et complures alii archiepiscopi, episcopi et abbates Teutonicorum viri religiosi, etc. »

8. *Discessus Lotharii et Innocentii ex Apulia.* — « Quibus ita peractis, præfatus imperator de predicto loco castra movens, viam Romanam redeundi arripuit, qui ante Portam-Summan cum toto suo exercitu transivit, et prædictus Apostolicus cum illo festinavit nono die intrantis mensis Septembris. Tunc ipse imperator castrametatus est ubi Tres-Sancti nominatur. Deinde Capuam petens Romanam transierunt. Quid multa? Imperii sui altitudinem et palatia imperator ille repedit; Apostolicus autem Innocentius palatium Lateranense audivit (legendum *adivit*; sic partem Urbis Innocentius II, partem aliam Anacleti tenebat). In Chronico Magdeburgensi a Meibomio edito, de Conrado XIV archiep. Magdeburgensi nepote Lotharii imp. dicitur: « Imperator Italiam circumcundo pertransiens, Apuliam intravit, et ad Barum civitatem devenit, ubi in die sancto Pentecostes dominus Apostolicus præsentem imperatorem missam cum magna gloria celebravit, et in ipsa hebdomada in sabbato Quatuor Temporum ipso domino Apostolico præcipiente, in ejus præsentia idem archiepiscopus de clero multitudinem maximam ad sacros ordines promovit ». Sed redeo ad Falconem.

9. *Rogerius rex amissa recuperat.* — « Audiens rex Rogerius imperatorem illum viam redeundi arripuisse, exercitu convocato Salernum venit; continuo super Nuceriam veniens, illud suæ obtinuit potestati, deinde castra amovens terram Rainulphi comitis (id est, ditiones ad se tanquam comitem pertinentes, non vero novum suum Apulie ducatum) obtinuit. Inde procedens, Capuam furore multo et tempestate comprehendit, et eam igne ferroque depopulatur; universa siquidem civitatis illius spolia et divitias partim igne, partimque virtute consumi præcepit; Ecclesias siqui-

dem et earum ornamenta diripuit; mulieres quoque et sanctimoniales in opprobrium conversæ sunt, et his taliter evolutis Abellinum et usque ad confinia Beneventi obtinuit. Confestim magister militum Sergius civilis Neapolitanæ ad suam convertitur fidelitatem: deinde judices Beneventanæ civitatis cum aliis civibus regem ipsum advenientes ad Anacleti fidelitatem et ipsius regis amorem civitatem submittunt Beneventanam, Innocentii papæ fidelitatem parvipendentes, etc. » Ita Falco.

10. *Sedando schismati divus Bernardus incumbit.* — « Dux igitur Rainulphus, audiens regem illum ob ejus confusionem Apuliam fuisse ingressum, et ejus desolationem ubique tractare, Barenses populum, et Tranensem, et Trojanum, et Melphensem et mille quingentos milites congregavit, affirmans prius velle morti succumbere, quam vitam ducere infelicem, et taliter dux ille paratus prope regis exercitum adivit. Interea abbas de Claravalle (nempe sanctus Bernardus) vir valde mirabilis et discretus, qui ad regem illum venerat pro tanti dissidii infestatione sedanda, inter regem illum et ducem pacis fœdera alligare conatur; sed pro multis variisque negotiis, quæ inter eos quærebantur, apud Salvatoris Dei potentiam nondum complacuit concordia alligari ». Ita Falco pag. 313, qui pag. 317 resumens de more quæ omiserat, ait: « Cum præfatus abbas de Claravalle, vir mirabilis et discretus, de fœdere pacis et Ecclesiæ unitate cum nominalo rege confabularetur, assidue rex ipse cum abbate ipso stabilivit, ut tres cardinales ex parte Innocentii papæ, qui ejus interfuisset electioni, ad regem ipsum venirent, et tres ex parte Anacleti, et ordinem electionis utriusque regi insinuarent; deinde rex ipse ordine audito utriusque partis, sanctiorem et iustiorum eligeret electionem et sic Spiritu S. favente, ad pacis perveniret, cum totius sui regni magnitudine firmamentum, quantum in sui arbitrio et scientia contineret. Cognoverat enim, firmiterque crediderat totius mundi Christicolæ parti favere Innocentii, et ejus Pontifici venerari. Ipse vero solus cum regni sui latitudine discordabat. Continuo ad Innocentium papam et Anacletum delegatum est, et cursu rapido regis positio destinatur ».

11. *Rogerius rex a Rainulpho duce victus.* — Post primum istum Rogerii regis et sancti Bernardi congressum, processit ille adversus hostem, sed parum felicitur; nam uti narrat Falco pag. 313 et seq.: « Illico acies regis prosternitur. Rex autem, qui cum aliis aciebus suis armatis inerat, Dei adveniente iudicio, timore percussus ipse primum terga vertens in fugam conversus est, sicque universa regis congregatio cursu præcipiti confugit, dimissis omnibus divitiarum apparatibus, et tentoriis, auri argentique magnitudine infinita, quorum numerare copia non est humanæ scientiæ. Quid multa? Dux ille victor effectus de regis exercitu comprehendit et occidit, omnemque illam

magnitudinem, divitiasque tam ipse quam populus Barensis et Transensis, cæterique quos rogaverat, ad propria locupletati detulerunt. Tria millia, sicut audivimus, hominum in bello mortua sunt. Ibi Sergius magister militum Neapolitanæ civitatis mortuus est, etc. (Sergius enim, qui post imperatoris discessum Rogerii partes amplexus fuerat, pro eo prælabatur). Rex itaque nominatus taliter cum sequacibus suis confugiens noctis tempore, altera quidem die ad castrum Paludis pervenit, deinde Salernum festinavit; diebus autem non multis evolutis, Roscemannus Beneventanus antistes (qui statim in sedem suam restitutus fuerat) consilio accepto cum iudicibus civitatis et sapientibus quibusdam ad regem ipsum consolandum et servilia civitatis offerenda festinavit. Precatur insuper, ut libertatem possessionum Beneventanorum, quam supradictus imperator concesserat, populo Beneventano ipse largiretur. Rex igitur precibus eorum acceptis pro totius civitatis amore inveniendi privilegio facto et signato, omnes fidentias et exactio-nes, quas soliti fuimus persolvere, condonavit. Falco ejus diploma, et ex eo Ughellus tom. 8 Ital. Sacræ refert, ejusque hoc initium est: « In nomine Domini Dei Salvatoris æterni Jesu Christi, Dom. Incarnat. anno mcccxxvii, mense Novembri, primæ Indictionis, Ego Rogerius, Dei gratia Siciliæ et Italiæ rex, Christianorum adjutor et clypeus, Rogerii Primi comitis filius, etc. » Hæc vero ejus conclusio: « Illius concessionis initium per manus Henrici nostri scribi præcepimus, et Bulla aurea insigniri anno regni nostri septimo ».

12. *Victoriam prosequitur Rainulphus.* — Pergit Falco: « Cumque privilegium hoc coram Beneventanorum cætu lectum esset, Deo Salvatori omnium præfatoque regi, et jam dicto antistiti gratias egimus, quia quod avi et patres nostri videre non potuerunt, libertatis et securitatis donum nobis dignatus est, etc. offerre ». Quibus ex verbis apparet, Falconem et socios ad Rogerii et Anacleti partes tandem divertisse. « Rainulphus », inquit idem Falco, « ex sua victoria commodum capiens civitatem Trojanam sibi subdidit, et Rogerium comitem Ariani subjungavit, dum Rogerius rex in urbe Salernitana morabatur. Tunc enim dux ipse prope castellum Paludis suorum virtute stipulas castrametatur die quidem kalendarum Decembris. Mirabatur interea populus Beneventanus de ducis illius continentia (id est, quod haberet in plano) et in prædicti regis amore et fidelitate, et Anacleti servitio die noctuque simul cum domino Roscemanno antistite invigilabat etc. » Rogerius rex Salernum redux civium fidelitatem remuneraturus. Privilegium ab Ughello tom. 7 Italiæ Sacræ relatum eis concessit: « Anno Incarnat. mcccxxvii mense Novembri, Indictione 1, etc. Salernitanos fideles nostros honorare et exallare decrevimus, qui Roberto Guiscardo bonæ memoriæ, et Rogerio et Willelmo ducibus prædecessoribus nostris semper fideles fuerunt: nobis quoque maxime hoc

tempore, quod Lotharius cum Teutonius per prædictorum nostrorum perfidiam in Apuliam intraret; et cum jam tota fere terra infidelitatis macula contaminaretur, sola Italiæ Salerni civitas fidelitatem intemeratam conservavit. Illius rei gratia, magnificentiæ nostræ munera in prædictam civitatem et ejus populum extendere volentes, donamus, concedimus, etc. Datum Salerni X kal. Decemb. per manum Henrici venerabilis Messanenensis electi, anno regni nostri septimo.

13. *Irrita de pace Ecclesiæ tractatio.* — Dum Rogerius rex Salerni versaretur, Innocentii II et Anacleti legati ad eum venire, ut narrat Falco pag. 317 et seq.: « Ex parte Innocentii, Aimericus cancellarius et Girardus cardinalis, vir valde venerabilis, cum prædicto abbate de Claravalle Salernum super hujusmodi electione ventillanda advenērunt. Ex parte vero Anacleti, Matthæus cancellarius, et Petrus Pisanus cardinalis, et cardinalis alius nomine Georgius similiter acceleravere. Quibus ita congregatis, rex ille, ut erat sagacis animi providique consilii, prius partem Innocentii quadriduo usque ad occasum mirabiliter et ultra quam credi potest, examinavit; sequenter autem Anacleti partem quadriduo similiter perscrutatus est. Studiosè igitur et diligenter partibus utriusque electionis auditis rex ipse clerum omnem et populum civitatis Salernitanæ congregari mandavit, et episcopos et abbates monasteriorum qui convenerant », et cætera num. 29 et seqq. recitata; sed hæc tractatio pacis irrita fuit.

14. *Mors Lotharii, et S. Bernardi brevis in Urbe mora.* — Hæc ad supplendos Annales Ecclesiasticos. Præterea huc revocanda mors Lotharii imp. que initio mensis Decembris hujus anni contigit, ut anno sequenti, ad quem eam Baronius distulit, demonstrabimus. Insuper idem doctissimus cardinalis num. 5 ait, *sanctum Bernardum* diu Romæ moram protraxisse cum magno Catholicorum proventu. Verum Mauricius in Annal. Cisterc. hoc anno cap. 1. animadvertit, Petrum Diaconum, hujus temporis scriptorem, in Chron. Casinensi lib. 4, cap. 106, tradere cum mense Julio in Campaniam rediisse, ac ad Montem-Casinum legatum, cum Pontifex et imperator ibidem consisterent; præterquam quod mox vidimus, *Bernardum* ad Rogerium regem missum fuisse. Quare Bernardi mora Romæ non potuit non esse brevis.

15. *Priores in Cantica sermones a S. Bernardo absoluti.* — Ad hæc Baronius num. 3 ait, *S. Bernardum* ab Innocentio II ad se litteris hoc anno accersitum, reliquisse *Sermones supra Cantica* absolutos viginis tres, ut apparet ex sequenti sermone xxiv, eosque statim descriptos misisse ad *Bernardum de Portis* Carthusianum, quod dicit testari S. Bernardi ad eum Epistolam cliv. Sed, ut observat Mauricius citatus an. mcccxxv, cap. 6, Ernaldus abbas Bonævallensis in Vita S. Bernardi lib. 2, in fine capitis 5, ait, sanctum abbatem post suum ex Aquitania reditum, quem anno mcccxxv

contigisse vidimus, *solis meditationibus dicinis vacare* disposuisse; per quam quietem et otium sermones in Cantica Canticorum exorsus est: idque ad instantiam *Bernardi de Portis*, Carthusiani sanctissimi, ut eruitur ex Vita S. Stephani Diensis, non multo post scripta, in qua de eodem *Bernardo de Portis* dicitur, «cujus hortatu S. Bernardus abbas Clarevallensis exposuit Cantica Canticorum». Priores sermones mox ac dictatos, a Bernardo ad Bernardum transmissos, antequam cderentur, liquido constat ex Epistola cliii et Epistola cliv ejusdem sancti abbatis. In priori enim dicit: «Sermones paucos in principio Canticorum Salomonis recens dictatos, en facio transcribi, et tibi, cum necdum egiderim quanto citius mitto». In sequenti vero: «Sermones super principia Canticorum, quos tu petisti, et ego promiseram, transmittito tibi». Quare utraque Epistola non hoc anno, sed anno mxxv, quo et eam collocavit Mabillonius, scripta. San-Marthani in Episc. Bellicensibus notant «tres extitisse Bernardos priores in domo Portarum». Bernardus primus regimen abdicavit, successorem sortitus alterum Bernardum itidem Portarum priorem, post abdicatum Bellicensem episcopatum, ut censet Petrus Franciscus Chiffletius in Prefat. ad *Manuale Solitariorum*, qui huic Bernardo II utramque Epistolam laudatam directam putat. Addit Chiffletius tertium per hoc tempus fuisse *Bernardum* Portarum etiam *priorem*, postea episcopum Diensem; sed is ad rem nostram non facit. Utramque autem Epistolam Bernardo II tum nondum priori datam esse recte deducit Mabillonius ex prioris Epistolæ num. 2, ubi S. Bernardus *domnum priorem* salutat, hoc est, Bernardum primum tunc priorem Portarum, qui locus est in Bangesio diocesis Lugdunensis prope Rhodanum, tribus leucis a Bellicio urbe episcopali dissitus. Sed legendi San-Marthani laudati, et Guichenonis in Historia Bangesii, ubi de tribus istis Carthusianis verba faciunt.

16. *Hortatu Bernardi Carthusiani*. — Baronius ibidem citat Epistolam clv divi Bernardi ad Innocentium papam, datam *pro eodem, quando electus est*, ut dicitur in inscriptione, id est pro eodem Bernardo II, quando electus est episcopus pro Longobardia. In ea S. Bernardus ait, *Bernardum de Portis* in Lombardia destinatum episcopum, dignum quidem eo honore, sed tali loco minus idoneum, ideoque alteri convenientius reservandum. Innocentius II detulit S. Bernardi consilio, et *Bernardus Portarum* electus est in episcopum Bellicensem, isque an. mcliii. Sede Bellicensi relicta, rediit in Carthusiam Portarum, ibidem ante annum mclviii, Bernardo priori primo se abdicanti successit. Ea Epistola clv anno incerto data, nisi quis velit cum Mabillonio eandem referre ad annum mxxv, quo duæ præcedentes exaratæ.

17. *Epocha Epistolæ cli divi Bernardi*. — Denique Baronius num. 4 mentionem facit Epi-

stolæ cli Bernardi ad *Philippum Turonensis Ecclesiæ invasorem*, quem in rectam viam reducere conabatur, significatque se esse *in proximo*, ubi cum videre posset, si vellet: «Sumus enim, inquit, Viterbii, et te morari in Urbe audivimus». Quare quia Bernardus, sermone xxv in Cant. hoc anno composito, memorat suam apud Viterbium moram, Baronius hanc Epistolam ad presentem annum retulit. Verum duplex Bernardi mora in urbe Viterbiensi distinguenda. Prima accidit anno mxxiii, quo *Lotharium* Romanum, ubi coronandus erat imperator, comitatus est, uti suo loco diximus, alteraque hoc anno. Sed ea Epistola in priori ejus professione scripta; nam *Hildeberto* archiepiscopo Turonensi anno mxxxi demortuo, uti eo anno ostendimus, *Philippus* nepos Gisleberti malis artibus sedem, quam Gislebertus tenebat, invasit, jamque eam fere a triennio occupabat, quando Bernardus hanc Epistolam ad Philippum dedit. In altera enim ordine cli ad Innocentium II missa ait: «Quanta dominandi cupiditate et iste juvenis inardescat, indicat matris suæ Ecclesiæ diuturnus et miserabilis cruciatus, quo pæne eam eviscerat miser, ut se parturiat in honorem. Est tamen, auctore Deo, ejus tergiversationibus finis tandem impositus; si tamen, quod dictante justitia et compellente malitia, et pace provocante in eum actum est, Apostolicæ auctoritatis ratum habere placuerit». Mauricus an. mxxvii, Epistolam cli divi Bernardi cum Baronio in hunc annum rejiciens ex ea deduxit, *Hildebertum* archiep. Turonensem anno præcedenti seu anno Christi mxxvii demortuum, quæ et multorum sententia fuit. Verum cum nunc constet eam mortem pertinere ad annum mxxxi, nulla amplius dubitatio esse potest de hujus Epistolæ epocha, sicuti nec de prima professione Romana S. Bernardi, quam eo etiam anno ab eo susceptam monstravimus.

18. *Baldwinus abbas Reatinus diversus a Balduino cardinali*. — Ad num. 32 et seq. Baronius refert partem Epistolæ cxliv a divo Bernardo suis Clarevallensibus datæ, in qua molestiam longioris absentiae suæ a dilecta Clarevalle exprimit, atque: «Cum lacrymis et singultibus ista dictavi, teste charissimo fratre nostro Balduino, qui stylo ea excepit: quem Ecclesia vocavit ad illud officium, et aliam dignitatem»; quam Epistolam currenti anno datam esse, ipsa evis lectio evincit. Verum Baronius *Baldwinum* istum cardinalem primum ex Ordine Cisterciensi creatum ab Innocentio II, anno mxxix, in Concilio Claramontano, et postea archiepiscopum Pisanum, qui dignabatur esse scriba divi Bernardi, perperam confundit cum altero *Balduino* Reatini cœnobii primo abbate, itidemque Bernardi discipulo, ad quem est Epistola divi Bernardi cci, cum Reatinum monasterium regeret. Illud autem monasterium duplex, alterum Sancti-Matthæi, alterum Sancti-Pastoris, et huic Baldwinus iste præfectus erat, quo tempore alter *Baldwinus* cardinalitiam dignitatem obtinebat.

Baldwinus abbas ex monumentis Ecclesie Reatinæ ab Ughello his verbis celebratur : « Multis operibus et miraculis clarus obiit anno mxxi, et in Cathedrali Reatina humatus est. ibique summa cum veneratione Augusti xi die colitur ». Alter Baldwinus sanctitate etiam clarus fuit, purgatoriis tamen flammis post mortem expiatus, quod, ut habet Herbertus lib. 3 de Miraculis cap. 31, civilibus discordiis se immiscens, bello Pisanorum cum Lucensibus occasionem dedisset. Porro facile fuit utrumque *Baldwinum* in unum conflare; cum uterque Italus, uterque ex Claravalle, atque uterque Bernardi discipulus fuerit. Fallitur enim Ciacconius in Innocentio II, qui Baldwinum cardinalem Gallum facit, cum Ernaldus abbas Bonævallis in Vita S. Bernardi lib. 2, cap. 8, cum *Pesis in Tuscia* natum asserat. Herbertus autem laudatus cum Ordinem Clarevallensem ingressus fuisset, anno mclxxviii *librum Miraculorum* conscripsit, et postea ad archiepiscopatum Turritanum seu Turrium in Sardinia evectus fuit, ut dicitur in Chron. Clarevallensi, a Chiffletio cum tribus libris Herberti de Miraculis publicato. Baldwinus S. Bernardi discipulum diversum esse a Baldwinio cardinali observavit Mauricus in Annal. Cistere. an. mxxx, cap. 6.

19. *S. Malachias fit archiep. Armachanus.* — Ad num. 34 et seqq. Sanctus *Malachias*, quem suo loco ostendimus, an. mxxiv Connecretensem episcopum in Hibernia renuntiatum fuisse, occasione bellorum sede sua pulsus, alio se contulit *cum centum et viginti fratribus*, et monasterium Ibracense edificavit, ut refert S. Bernardus in ejus Vita, cap. 9: « Ubi », subdit Bernardus, « velut de novo inchoans legem et disciplinam, quam aliis imponebat, magis ipse portabat episcopus et magister. Ipse in Ordine vici suæ coquina ministerio inserviebat, ipse fratribus cum recumberent ministrabat, etc. » Interim Celsus archiepiscopus Armachanus in Ultonia provincia « moriens misit baculum suum Malachie, tanquam sibi successuro », ait Bernardus cap. 10, qui jam dixerat : « Jam octo exstiterant ante Celsum viri uxorati et absque ordinibus, litterati tamen. Inde tota illa per universam Hiberniam, de qua superius diximus, dissolutio Ecclesiasticæ disciplinæ, censuræ enervatio, religionis evacuatio : inde illa ubique, pro mansuetudine Christiana sevim subintroducta barbaries, imo paganismus quidam indutus sub nomine Christiano ». Mortuo Celso, Malachias archiepiscopus possessionem inire non potuit, quia quidam potentes non « patiebantur episcopari, nisi qui essent de tribu et familia sua ». Tandem, ut narrat Bernardus cap. 12 : « Anno ætatis suæ trigesimo octavo, pauper Malachias pulso incubatore, intravit Ardmaccha pontifex et metropolitani totius Hiberniæ », ideoque anno Christi mxxxii, cum ejus Nativitas in annum mxcv incidit.

20. *Romam petit anno mxxxix aut insequenti.* — « Malachias, intra triennium reddita retributione superbis, et libertate Ecclesiæ restituta, pulsa

barbarie, et reformatis ubique moribus Christianæ religionis, videns omnia in pace esse, cepit cogitare et de sua pace ». Cum vero duos episcopatus in unum ambitio conflasset, nempe Connecretensem et Dunensem, eos iterum divisit, Dunensi contentus. « Erat et altera metropolitica sedes, quam de novo constituerat Celsus, primæ tamen sedi et illius archiepiscopo subdita, tanquam primati : et huic quoque optabat nihilominus pallium Malachias, confirmarique auctoritate Sedis Apostol. prerogativam, quam beneficio Celsi adipisci meruerat ». Quare Romam profectus est, non quidem hoc anno, ut putavit Baronius, sed anno millesimo centesimo trigesimo nono aut insequenti, ut notavit Mauricus in Annal. Cistere. anno mxxxix, c. 5. Bernardus enim cap. 15 asserit, Malachiam *novem annos* postea supervivisse; mortuus est autem anno mclxviii. « Mensem integrum » Romæ moratus est, et « paranti jam repatriare commisit vices suas, per universam Hiberniam legatum illum constituens (nempe Innocentium II) », inquit Bernardus cap. 16, qui subiungit, Innocentium II pallii concessionem distulisse, donec celebrato generali Concilio in Hibernia illud a se peteretur. Dum Romam pergeret, Claravallensem venit, et petiit licere sibi vivere et mori in Claravalle, quod a Pontifice non obtinuit, « quod virum Apostolicus fueris potius uberioribus occupandum decerneret ». Frequens et receptum erat istis temporibus, ut episcopi monachos induerent, dignitate retenta, non secus ac retento monachatu, monachi ad infulas protraherentur.

21. *Moritur Ludovicus VI rex Franciæ et Guillelmus IX dux Aquitanie.* — Hoc anno, *die prima mensis Augusti*, mortuus est *Ludovicus VI*, cognomento *Grossus*, Francorum rex, et *die nona* mensis Aprilis *Guillelmus IX*, ultimus Aquitanie dux, ut anno superiori ostendimus. *Guillelmus* mortem sibi imminere conspiciens, optimates principatus sui juramento constrinxit, ut *Eleonoram* filiam Ludovico regis Ludovici filio copularent, uti narrat chronographus Mauriniacensis, initio lib. 3. Ad eam mittuntur a Ludovico rege aliqui inagnates, et inter eos Gaufridus Carnotensis episc. qui Burdegalam veniunt, ubi « universis Aquitanicis Pontificibus cum archiepiscopo suo Gaufrido adstantibus, Ludovicus est puella, nomine *Ænoræ*, legali vinculo sociatus » ; sed in medio convivii legatus pernici cursu delatus Ludovicum regem vitam Parisiis finisse denuntiat. Ludovicus filius, hujus nominis VII, ei in regnum succedens festinato in Galliam venit, Eleonore regiæ cura Gaufrido Carnotensi episc. commissa. Ita Aquitania Gallie regno hoc anno adjuncta. Quas ditiones contineret, Ernaldus abbas Bonævallis in Vita S. Bernardi lib. 2, cap. 6, indicat scribens « potentatui ducis Guillelmi subditas fuisse provincias Burdegalensem, Anxiensem (sc. in Aquitania n et m) et Turonicam, et quidquid a collibus Iberorum usque ad Ligerim complectitur et clau-

dil Oceanus, paruisse ejus imperio ». Turonica tamen provincia ultra dexteram Ligeris ripam late distenta, quæ continet Britanniam, Armoricam et novem in ea episcopatus, parbat tunc Britannie comili.

22. *Obitus Guigonis prioris Carthusiæ.* — Guigo quintus prior Majoris Carthusiæ, Valentie in Delphinatu natus « anno a natiuitate sua quinquagesimo circiter quarto, a conversione ejus tricesimo, et a prioratu vicesimo septimo, cum ab exordio Carthusiensis eremi annus quinquagesimus tertius ageretur, sexto kal. Augusti » sanctum Deo spiritum commendavit, ut dicitur in Institutionibus Ordinis Carthusiensis tom. 1 Biblioth. Labbei recitatis, ideoque hoc anno, cum Carthusianorum Ordo anno MXXXIV, ut suo loco ostendimus, fundatus fuerit. Scripsit Guigo Vitam sancti Hugonis Gratianopolitani episcopi, aliaque opuscula ab Oudino in Supplement. de Scriptur. Ecclesiasticæ enumerata, ubi tamen male ait, sanctum Hugonem fuisse primum Carthusianorum fundatorem.

23. *Obitus B. Oldegarii archiep. Tarracon. et episc. Barcinonensis.* — Obiit et beatus Oldegarius archiepiscopus Tarraconensis et episcopus Barcinonensis in Hispania pridie nonas Martii, ut testatur Diagus in Hist. Comitum Barcinonensium, et ex eo, aliisque, Bollandus in Actis SS. ad diem vi mensis Martii, qui mox a peractis solemniter exquis miracula quamplurima cepit patrare; quibus prodigiis cleri populiue Barcinonensis aucta erga beatum veneratio anno XIX et XX Ludovici VII Francie regis perennes census constituti sunt, fovendis, quæ ad tumulum sancti arderent, lampadibus, et post aliquot annos semel et iterum canonizatio ejus a sancta Sede petita. Ante episcopatum fuerat abbas S. Rufi juxta Avenionem, cui succedere Wilhelmus, Pontius, Severus, de quibus anno MCXVI egimus, et Guillelmus II, qui hoc anno S. Rufi abbatiam adhuc regebat. Baluzius enim in Appendice ad Marcam Hispanicam num. 391, refert Chartam Raimundi comitis Barcinonensis datam anno MCXXXVII, tertio nonas Aprilis, qua comes quamdam Ecclesiam largitur Ecclesie Sancti-Rufi et domino Guillelmo abbati, et omnibus successoribus ejus.

24. *Concilium Vallisoletanum.* — Hoc anno cardinalis Guido, qui superiori Concilium in civitate Burgensi congregarat, aliud Vallisoleti celebravit, quod Sandovalius in Alfonso VII, fol. 163, eruit ex Charta Alfonsi VII, Castellæ regis et imperatoris, data in gratiam monasterii Vallis-Paradisi inter Zamoram et Salmanticam die quarta Octobris, Æra MCLXXV, ex qua etiam deducit, eundem Alfonsum cum Alfonso Portugallie colloquium habuisse. In ea enim dicitur, « tempore quo Guido Romanæ Ecclesie cardinalis Concilium in Vallisoleti celebravit, et ad colloquium regis Portugallie cum imperatore venit ». Tharasia, Alphonsi Portugallie comitis mater, semper sese Lusitanie regi-

nam appellavit, et in laudata Charta regis titulus Alfonso honoris causa tributus; eum tamen nondum hoc nomen sumpsisse, Chartæ ab eo datæ demonstrant. Hispani omnibus principibus regis titulum sæpe tribuebant, quamvis ipsimet in Actis publicis hunc titulum non usurparent.

25. *Ranimirus dimisso Aragoniæ regno redit ad suum monasterium.* — Ranimirus monachus, Aragoniæ rex, Raimundo IV Barcinonensi comiti filiam suam duobus aut ad summum tribus annis natam in uxorem dedit cum totius regni integritate. Baluzius in Appendice ad Marcam Hispanicam num. 394, Instrumentum exhibet, « quod est actum III idus Augusti, anno Incarnat. Dom. cxxxvii post millesimum Æra MCLXXV, præfato rege Ranimiro regnante ». Paulo post, IV kal. Septemb. Ranimirus rex Instrumento ibidem relato irritum declarat quidquid hactenus alieni dedisset vel concessisset, ad quod ab hodierno die in ante daret, absque consilio et bona voluntate comitis, dicens se id facere propter multas fraudes, quas in multis passus esset. Denique idibus Novembris cum Casaraugustæ esset, regnum plane abdicavit in favorem Raimundi generi sui. Instrumentum ibidem refertur n. 396. Cum vero Ranimirus rex de deserendo mundo serio cogitaret, et morte beati Oldegarii Ecclesiæ Barcinonensis et Tarraconensis vacarent, earum episcopus electus fuit, ut eruitur ex Instrumento ibidem num. 290 recitato, quod Ranimirus his verbis confirmat: « Ego Ranimirus Dei gratia rex et electus Tarraconensis et Barcinonensis, concedo et confirmo hoc quod superius scriptum est ». Hæc tamen electio confirmata non fuit, Ranimirus enim rex in monasterio suo vitam clausit, et Gregorius archiepiscopus Tarraconensis anno MCLXIII jam electus erat, ut certum facit Instrumentum ibidem a Baluzio num. 402 relatum, « quod est actum quinto kal. Decembris apud Gerundam, domino Guidone S. R. E. cardinali diacono et legato celebrante conventum in præsentia omnium subscriptorum festiun, anno Dom. Incarn. MCLXIII ». Et paulo post inter testium nomina legitur: « S. Gregorii electi Tarraconensis archiepiscopi ». Idem Instrumentum recitat Diagus in Hist. Comit. Barcinon. Auctor de Gestis comitum Barcinon. capite XVII unionem regni Aragoniæ cum comitatu Barcinonensi hoc etiam anno consignavit de Raimundo IV comite Barcinonensi scribens: « Adhuc valde juvenis regnum Aragoniæ acquisivit cum Urracha, filia regis Aragoniæ Ranimiri anno Christi MCXXXVII », ubi Petronillam Urracam appellat, quia, teste Roderico lib. 6, cap. 2, ea postea ita appellata. Ranimirus vero in suo monasterio demortuum tradit auctor de Gest. Comit. Barcinon. cap. 21: « Suscepit filiam nomine Urracam quæ Raimundo Barcinonensi comiti fuit nupta. Post hæc Ranimirus fuit monasterio restitutus, et recuperato habitu, finivit ibidem in Domino dies suos ». Huic auctori consentit Rodericus Toletanus.

INNOCENTII II ANNUS 9. — CHRISTI 1138.

1. *Mortuo Anacleto frustra alius subrogatur : unde pax Ecclesiae reddita.* — Sequitur annus salutis humanae millesimus centesimus trigesimus octavus, Indictione prima, quo die septima Januarii homo peccati, invasor Apostolicæ Sedis Petrus Leonis pseudopapa, Deo vindice, ex hac vita divulsus, ad supernum horribilem tribunal iudicandus atque condemnandus adducitur, accepturus cruciatum æternum. Hæc ab huius temporis scriptore Falcone, in Chronico Beneventano. Et cum numeral annos ejus intrusionis : « Sedit, inquit, annis septem, mensibus undecim, et diebus viginti duobus ». De ipso hæc alius itidem ejusdem temporis, scriptor Bernardus Bonævallis abbas¹ : « Advenerat tempus, in quo completa Amorrhæi malitia, Angelus percussit gladium jam vibrabat, et pertransiens domos, quarum superliminaria sanguis agni imbuerat, ad domum Petri Leonis veniens, salutare in ea non reperit signum. Percussit igitur miserum : nec tamen illico defungitur, sed datur per triduum penitentiae locus. Ille patientia Dei abutitur, et in peccato suo moritur desperatus. Miserabili pompa corpus ejus effertur, cadaver ejus in latebris sepelitur, et usque hodie fovea illa a Catholicis ignoratur ». Hæc ipse. Sed audiamus S. Bernardum ista de his scribentem ad Petrum abbatem Cluniacensem² :

2. « Hæc plane gloria mea, et exaltans caput meum, Ecclesie triumphus. Nam si socii fuimus laboris, erimus et consolationis. Collaborandum fuit et compatiendum matri, ne de nobis quereretur, dicens³ : Qui juxta me erant de longe steterunt, et vim faciebant qui quarebant animam meam. Deo autem gratias, qui dedit ei victoriam, honestavit eam in laboribus, et complevit labores illius. Tristitia nostra in gaudium, et luctus noster versus in citharam est⁴. Illi transit, imber abiit et recessit. Flores apparuerunt in terra nostra, tempus putationis advenit. Amputatum est sarmentum inutile, putre membrum. Ille, ille ini-

quus, qui peccare fecit Israel, morte absorptus est, et traductus in ventrem inferi. Fecerat quippe (secundum Prophetam⁵) pactum cum morte, et cum inferno fœdus inierat. Ideoque juxta Ezechielem⁶, factus est perditio, et non subsistit in æternum. Alius quoque omnium sicut maximus, ita et pessimus inimicus abscissus nihilominus est : et is unus erat ex amicis Ecclesie, sed illis, de quibus solet queri et dici⁷ : Amici mei et proximi mei adversum me appropinquaverunt et steterunt. Si qui restant, cito speramus de similibus idem judicium. Prope est ut revertar ad fratres meos, si vita comes fuerit, per vos (sicut intendo) transilurus ». Hæc S. Bernardus.

3. Sed quomodo Rogerii tyranni jussu creatus sit a schismaticis cardinalibus antipapa successor, in sæpe citatis Chronicis Beneventanis ita de scribitur : « Cum prædictus Anacletus mortuus esset, cardinales ejus, consilio accepto a fratribus ipsius Anacleti, ad regem miserunt Rogerium, ipsique Anacleti mortem significantes, quæsiwerunt, si ei placeret ut papam constituerent. Rex itaque, ut domini Innocentii partem impediret, voluntati eorum assensit, et papam eligendi potestatem dedit. Qui Romam reversi, fautoribus eorum congregatis, medio mense Martio Gregorium cardinalem presbyterum sibi papam, imo invasorem constituerunt, Victoremque eum vocaverunt. Sed Dei clementia auxiliante, hæresis illa et invasio paucis tempore regnavit. Diebus autem non multis evolutis, fratres prædicti Anacleti tantam cognoscentes turbationem, in se reversi, Domino favente, cum prædicto domino Innocentio papa pacis firmamentum composuerunt, et ipsi, et omnes Innocentii adversarii ad ejus fidelitatem conversi sunt. Et sceleratus ille, qui sub Victoris nomine apparuit, vestem et mitram deposuit, et ad voluntatem Pontificis Innocentii pervenit. Sicque gaudio magno, et gloria exultationis tota Romana civitas exultavit.

« Nam ipse Innocentius ad unitatem et con-

¹ Val. S. Bern. l. II. c. 7 — ² Bern. Ep. CXLVII. — ³ Psal. XXXVII. — ⁴ Cant. II.

⁵ Isa. XXVIII. — ⁶ Ezech. VII. — ⁷ Psal. XXXVII.

cordiam universam Ecclesiam, Domino auxiliante, perduxit». Hæc de his ibi; in Vita autem S. Bernardi hæc de his brevier :

4. « Attamen pars illius (Anacleti) papam sibi pro illo alterum statuerunt, non tam ex pertinacia schismatis, quam ut opportunius per aliquam temporis moram papæ Innocentio reconciliarentur. Quod sine mora per manum servi sui, (S. Bernardi scilicet), Christus effecit. Nam et ipse ridiculus Pontifex, Petri Leouis hæres, ad eundem virum Dei nocte se contulit, et ille enim nudatum quidem usurpatis insignibus ad domini Innocentii pedes adduxit. Quo facto civitas gratulabunda lætatur, Innocentio Ecclesia redditur, Romanus populus ut pastorem et dominum Innocentium veneratur. Abbas Clarevallensis in mira reverentia habetur, ab omnibus auctor pacis et pater patriæ prædicatur. Procedentem viri nobiles prosequuntur, acclamat populus, matronæ sequuntur, et omnes ei prompto animo obsequuntur. Sed quam diu ille gloriam toleravit? quam diu pace fruitus est post tantum laborem? nec diem pro anno recipere acquievit. Sedatis omnibus et compositis, vix quinque dies teneri potuit, qui septem annis et ultra pro resarcienda eadem scissione sudavit. Exeuntem Roma prosequitur, deducit clerus, accurrit populus, universa nobilitas comitatur; nec poterat sine communi mœrore dimitti, qui colebatur amore communi. Igitur firmata pace, vir Dei regreditur, et duplex exhibens gaudium, cum exultatione universæ terræ suscipitur ». Hæc Bernardus de reditu sancti Bernardi. Sed jucundius erit ipsum sanctum audire Bernardum, de his perbreve scribentem Epistolam ad Godefredum postea Lingoniensem episcopum istis verbis ¹ :

5. « Fratri Godefredo, frater Bernardus salutem.

« In octavis Pentecostes ipsa die complevit Deus desiderium nostrum, Ecclesiæ unitatem, et Urbi dando pacem. Nam illa die filii Petri Leonis omnes simul humiliaverunt se ad pedes domini papæ; et facti homines ejus legii, juraverunt ei legiam fidelitatem. Clerici quoque qui in schismate erant, simul cum idolo quod erexerant, (antipapa videlicet), humiliantes se ad pedes domini papæ, obedientiam ei juxta morem promiserunt, et facta lætitia magna in populo. Hanc pacem nisi cum quadam securitate, occulta tamen, diu a nobis expectavissemus, jamdudum venissemus. De cætero jam nihil est quod nos hic detineat. Facio quod imperastis, *Veniam* vertimus in *Venio*. Ecce enim venio cito; etiam et merces mea mecum est, victoria Christi, et pax Ecclesiæ. Sexta feria post diem illum egressus est nosser de civitate. Itaque venientes veniemus, cum exultatione portantes manipulos pacis. Et hæc quidem verba pulchra sunt, sed pulchriora sunt facta. Etenim tam pulchra sunt, ut quisquis non lætatur in eis, aut stultus

sit, aut nequam. Vale ». Hæcenus ad Godefredum S. Bernardus.

6. At nullam conciliant sibi fidem ea, quibus Petrus Diaconus Cassinensis in fine libri quarti Chronicorum ita sugillat Innocentium papam ipse schismaticus, dum ait ² : « Innocentius vero magna in filios Petri Leonis illorumque complices effusa pecunia, illos ad suam partem attraxit, etc. » Ista, inquam, schismaticus, carpenti Innocentium nullam relinquens occasionem vel argumentum, illud autem tunc admiratione dignum accidit, quod qui stabat a schismaticis Gilo cardinalis episcopus Tusculanus, adhuc permansit in schismate, quem atias Petrus Cluniacensis litteris admonitum ³, aliis additis magnopere (ut par erat) redarguit ⁴; ex Cluniacensi enim cœnobio ad cardinalatum proventus fuerat. Ad quem inter alia : « Sed forte ea spe, ut hunc innuebas, rem distulisti, qua sperabas ab imperatore Lothario aut Petrum Leonis Innocentio papæ præferri, aut utroque deposito, in Apostolica Sede alium sublimari. At nunc quid ultra novarum rerum vel moliri, vel præstolari poteris, quando et Lotharius mortuus est, et Petrus extinctus est, et Innocentius in papam ac summum Pontificem primo ab Urbis parte, postmodum a toto orbe, et tandem a tota Urbe sublimatus est, et tota vanitatis spes divini oris gladio undique circumcisa est? etc. » Quod autem Lotharium imperatorem mortuum ait, sequenti potius anno hanc ad eum datam esse Epistolam apparet : siquidem Lotharius (ut dicitur) mortuus est in fine anni hujus. Sed ad sanctum Bernardum recedentem ab Urbe revocemus orationem.

7. *Bernardus ad suum monasterium revertitur et pro electione episcopi Lingoniensis laborat.* — At quid? Nam aliquod secum saltem munusculum detulit? utique et ingentis pretii, imo incomparabilis munera Romæ se accepisse gavisus est. At quænam ista fuerint, accipe ab auctore ⁵, qui fidelissime res ab eo gestas præsens etiam fortasse conscripsit; ait enim : « Rediens autem pater sanctus ab Urbe, ex sanctorum Apostolorum martyrumque corporibus xenia secum retulit pretiosa, haud modicum hunc sibi reputans fructum esse laboris. Inter quæ B. Cesarii dentem quoniam modo receperit, memorandum. Cum enim integrum ei prædicti martyris caput exhiberetur, ut tollerit inde quod vellet : dari sibi petiit dentem unum. Frustra vero aliquandiu fratres, qui cum eo venerant laborantes, concessum sibi trahere penitus non valebant. Fractis eorum cultellis duobus aut tribus quos applicuerant, nihilominus adhuc dens immobilis permanebat. Tum ille : Orandum nobis, ait : nec enim habere possumus, nisi martyr ipse concedat. Facta denique oratione, reverenter accedens, incredibili facilitate duobus tulit digitis, quod ferreis ante moveri non poterat instrumen-

¹ Bern. Ep. cccxx.

² Petr. Diac. Chr. Cass. l. iv, c. ult. — ³ Pet. Cl. l. iv, Ep. iv. — ⁴ Ibid. Ep. xxx. — ⁵ Vit. S. Bern. l. iv, c. 1.

tis ». Hæc de his ibi. Quanta autem lætitia exceptus fuerit ab universis populis Gallicanis, idem auctor tradit, et quod reversus ad suos, integerrimam expositionem in Cantica Canticorum rogatus ab ipsis resumens, sic primum sermonem post reditum est exorsus, qui tamen junctis superioribus, vicinissimus quartus enumeratur : Hoc demum tertio, fratres, reditum ab Urbe nostrum clementior oculus e caelo respexit, et vultus tandem serenior desuper arrisit nobis. Quievit Leonina rabies, finem accepit malitia, Ecclesia pacem recepit. Ad nihilum deductus est in conspectu ejus malignus, qui eam per hoc ferme octennium diro schismate conturbat. Num vero ego gratis de tantis periculis ero redditus vobis ? Vestris desideriis donatus sum, vestris me profectibus paro, quorum vivo meritis, volo vivere studiis et saluti etc. » Sed de negotiis ab eo in Urbe ceptis adhuc sermo.

8. Antequam autem ab Urbe recederet, occasione vacantis Ecclesiæ Lingoniensis, sub cujus diocesi suum erat positum monasterium, fuit ei plurimum laborandum. Testatus est id ipse in litteris datis postea ad Innocentium papam ¹, quibus et rei geste fidelis est intexta narratio istis verbis : « Dum adhuc Romæ essemus, contigit illo venire dominum archiepiscopum Lugdunensem. Venerunt et cum eo Robertus decanus Ecclesiæ Lingoniensis, et Olricus canonicus, quærentes licere sibi et capitulo Lingoniensi eligere sibi episcopum. Mandatum siquidem a domino papa acceperant, nequaquam præsumere hoc nisi ad consilium religiosorum virorum. Quod dum per me cuperent et peterent obtinere : Absit, inquam, nisi sciam et certus sim, quod bonam idoneamque personam intendatis eligere. Responderunt propositum suum atque intentionem de nostro pendere arbitrio, nihil aliud se facturos nisi quod ego consulerem, et spoponderunt. Verum me non satis fidem accommodante accessit ad persuadendum archiepiscopus, pollicens firmiter idipsum. Et addidit, quod si secus clerici agere molirentur, quidquid aliud facerent, minime se confirmaturum, nec ratum habiturum. Adductus est et dominus cancellarius in testimonium. Nec contenti, adivimus etiam præsentiam domini papæ, ut ejus favore et auctoritate quod inter nos convenerat confirmaretur : prius tamen habita inter nos collatione mutua ac diuturna super faciendâ electione. Et de multis personis quarum ibi mentio facta est, duabus tandem nominatis, a quibus nullus nostrum penitus dissentiret, quamlibet illarum eligi placuisset. Itaque quod nobis complacuit, dominus papa immutabiliter observari præcepit, et tam archiepiscopus, quam clerici firmiter promiserunt ». Sed quomodo post promissiones facta est nihilominus electio, ipso inconsulto S. Bernardo, demonstrat, cum hæc subiicit : « Illis abeuntibus, ego post discessum eorum dies paucos in Urbe faciens, ubi a domino

meo impetrare polui facultatem redeundi ad fratres, iter arripimus, et transalpinantes, comperimus instare diem, qua foret sacrandus homo in episcopum Lingoniensem, de quo utinam meliora atque honestiora audivissemus. Nolo autem dicere quæ invitus, audivi etc. » Interpositam tandem refert appellationem ad Apostolicam Sedem tum ab archidiacono Lingoniensi, tum a decano Lugdunensi, et fratribus Claravallensibus : excusasse tamen se Lugdunensem archiepiscopum dicit ob principum contradictionem, omniaque fieri ob bonum pacis.

9. Scripsit de his primum S. Bernardus (ut diximus) literalas litteras ad ipsum Innocentium papam, et scorsum ad cardinales ¹, ob oculos ponens labores et ærumnas, quas ob Ecclesiæ Romanæ pacem ipse sit passus : rogans ut electio committatur personis non suspectis ²; ita in litteris ad Innocentium papam ultimo loco datis. Quod et obtinuit ab ipso Pontifice, sicut ab electoribus deputatis electus est vir integerrimus, prior videlicet monasterii Claravallensis, nomine Godfredus, de quo excusare se oportuit S. Bernardum apud Ludovicum Francorum regem, litteris aculeatis ad ipsum datis ³. Quod autem in Epistola ad cardinales conqueri videtur de abbate Cluniacensi, sicut et de archiepiscopo Lugdunensi, dum ait ⁴ : « Ecce rediens a vobis, tribulationem et dolorem inveni, et nomen Domini invocavi, sed non profuit : invocavi et vestrum, et non valuit. Siquidem dii fortes terræ vehementer elevati sunt, Lugdunensis scilicet archiepiscopus, et Cluniacensis abbas. Hi confidentes in virtute sua, et in multitudine divitiarum suarum gloriantes, adversum me appropinquarent et steterunt, et non adversum me tantum, sed adversum magnam multitudinem servorum Dei, adversum vos quoque, adversum seipsos, contra Deum, contra omnem equitatem et honestatem. Denique imposuerunt hominem super capita nostra, quem proli pudor ! et boni horrent, et mali rident etc. » Quod, inquam, ita expostulet sanctus Bernardus, non disputo de Lugdunensi archiepiscopo : sed quod spectat ad Cluniacensem abbatem (hic erat Petrus) idem ipse de his satis locupletem scripsisse reperitur Epistolam ⁵ apologeticam, dolens quod calumniantibus idem sanctus Bernardus præstiterit aures, fidei quæ adhibuerit. Ad ipsam amando lectorem. Quæ etsi non extaret, duæ aliæ Epistolæ ejusdem Petri eodem argumento datæ ad Innocentium papam, eum culpa liberant; quarum ⁶ altera impetrare rogat licentiam Ecclesiæ Lingoniensi, ut secundum canones, jure communis suum eligere possit episcopum : altera ⁷, ut electum ab illis abbatem quemdam Ordinis Cluniacensis nullo pacto patiatur ab abbatiâ ab eo bene instituta divelli. Quæ quidem Epistola quo-

¹ Bern. Ep. CLXIV, CLXVI, CLXVII.

¹ Bern. Ep. CLXVIII. — ² Ibid. Ep. CLXIX. — ³ Ibid. Ep. CLXX. — ⁴ Ibid. Ep. CLXXII. — ⁵ Pet. I. III, Ep. XXIX. — ⁶ Ibid. I. IV, Ep. XXXVI. — ⁷ Ibid. Ep. XXXVIII.

niam brevior est, haud hic eam describere recusabo, sic se habet :

10. « Summo Pontifici et nostro speciali patri, domino papae Innocentio, frater Petrus humilis Cluniacensis abbas obedientiam et amorem.

« Rumor ad nos usque pervenit, quod quidam paternitatis vestrae aurbus importuni existant, ut dominus Vizeliacensis abbas de Vizeliacensi monasterio ad Lingoniensem Ecclesiam, de abbate in episcopum transferatur. Hos ne audialis, et nos rogamus, et ipsa ratio implorat, nec tantum implorat, sed ut audacter et veraciter loquar, imperat et compellit. Imperat plane et compellit, quia cum iure majestas Apostolica omnibus dominetur, soli tamen rationi subijci gloriatur. Qualem ille faciem loci illius auctoritate vestra a nobis ibi positus invenerit, qualem jam reddiderit, ne longum faciam, vos quidem audistis, sed nos cognovimus : vos forte nostis, sed nos melius. Super aridum et caliginosum montem levatus in signum, ita cum pinguem religione, sic cum luminosum bono nomine reddidit, ut in partibus nostris Vizeliacus, excepto Cluniaco, in nostri Ordinis studiis nullum patiatur habere priorem, vereque etiam de ipso dici possit ¹ : Mons coagulatus, mons pinguis, mons in quo beneplacitum est Deo habitare in eo. Quodque valde difficile, et ideo mirum est, labore hujus nec turba ibi secretum, nec clamor silentium, nec strepitus ordinem, nec mundus monachis potest auferre quietem. Unde vestrae sapientiae providendum est, ne longo tempore et multo labore parva bonamomento deperant. Quia et domus diuturno sudore constructa, una die destrui; et arbor multis annis vix ad fructum provecta, subito eradicari; et puer magna nutricum cura tandem in virum productus, uno potest ictu occidi. Hoc de Vizeliaco abbate sublato provenire timemus. Quod si cum ratione et auctoritas juvare nos potest, recordamini primam curam debere vos vestris. Et audite Apostolum dicentem ² : Operemur bonum ad omnes, maxime autem ad domesticos fidei. Et ³ : Qui suorum curam negligit, et maxime domesticorum, non est meum sequentia adungere, nec patri Apostolico saltem de Apostoto aliqua duriora proferre : scitis ipsi quid sequatur. Hoc ideo dixi, quia etsi Lingoniensis Ecclesia vestra, multo magis Vizeliacensis vestra, multo magis Cluniacensis vestra. Quod igitur magis vestrum est, auctoritate et ratione magis a vobis diligendum et conservandum est. Quod tunc fiet, si domino abbate in locum proprium restituto, nullum adversa suadentem audieritis ». Hæc Petrus ad Innocentium. Quibus clarissime demonstratur, calumniose admodum assertum S. Bernardo, opera, nimirum abbatis Cluniacensis monachum eligi curatum Cluniacensem episcopum Lingoniensem, ut audisti ex ejusdem S. Bernardi querelis, ad cardinales Romanæ Ecclesie

litteris cumulatis. Cessisse tamen ipsum Petrum importunitati petentium, ipsemet testatur in apologetica Epistola ad ipsum sanctum Bernardum conscripta ⁴. Certe quidem magnum ipse Petrus specimen edidit Christianæ charitatis et observantiae erga sanctum Bernardum, quem mirifice coluit et amavit, et idem in omnibus controversiis didicit deferre. Testatur id ipse Petrus in Epistola ad ipsum eodem argumento conscripta, ubi hæc verba ⁵ : « Quantum ad eam charitatem spectat, quam vobis in abdito cordis mei jam ab antiquo reservo, videtur mihi, quod aquæ multæ (ut scriptum est ⁶) non poterunt eam exstinguere, nec flumina obnecare. Quando enim exstingui vel obrui poterit sincerus erga vos et ignitus mei pectoris affectus quilibet sinister rumoris rivulus, cum nec aquæ multæ decimarum (quarum causa controversias gravissimas inter Cluniacenses et Cistercienses motas diximus) potuerint eum exstinguere, nec impetus Lingoniensium fluminum obruere ? nostis quod dico. Nec ob aliud dico, nisi ut constantis in amoris proposito erga vos animi mei insignia recolens, stabilem de cætero me esse posse, prudentia vestra præsumat etc. » Hæc ad S. Bernardum Petrus, mea sententia, sanctitate, quæ per dilectionem operatur, ipsi non impar.

11. *Exstincto schismate, Roma refloret.* — Comitatus redeuntem sanctum Bernardum ad propria, redeamus ad Innocentium, quem Romæ reliquimus, de quo ista dicere pergit Bernardus Bonævallensis abbas in Vita S. Bernardi : « Interea Romæ Innocentius potestative agenda disponit. Undique visitatores occurrunt, alii cum negotiis, alii tantum gratia congaudendi adveniunt. Processiones per Ecclesias solemniter celebrantur : depositis armis, ad audiendum verbum Domini plebes accurrunt. Post multifarias egestates in brevi civitas opulenta refloret : quæ discordiæ tempore distracta fuerant, pax solidata revocat et reducit. Arantur solitudines, et deserta pinguescunt. Requiescunt singuli sub vite et ficulnea sua : nocturnæ silent exubiæ, et apertis januis omnis timor excluditur. Dato tempore, Innocentius Ecclesiæ ruinas restaurat, recolligit exules, Ecclesiis antiqua servitia, depopulatas colonias expulsis restituit, insuper et congrua dona largitur. Monasterium etiam apud Aquas Salvias in S. Anastasii martyris honore constituit. Quod quidem ibi prius fuerat; sed hoc tempore sola Ecclesia, decrat habitator. Constructis itaque cenobialibus mansionibus, et reformata Ecclesiæ, assignatis etiam ad alimonias domus agris et vineis, a Claravalle abbatem et conventum fratrum sibi mitti dominus papa petiit et obtinuit. Mittitur igitur Bernardus, Pisanæ olim Ecclesiæ vicedominus, et religiosi cum eo fratres, qui secundum B. Benedicti regulam in eodem loco Domino deserviant. Cito profecit illa plantatio, et associatis sibi viris indigenis, servorum Dei mul-

¹ Psal. LXXVII. — ² Gal. VI. — ³ 1. Tim. V.

⁴ Pet. Cl. I. III, Ep. LXXIX. — ⁵ Ibid. I. V, Ep. XVI. — ⁶ Cant. V.

tiplicatus est numerus, et pascua congrua nutrientis multiplex in brevi producere peculium». Hæc ipse. Extant de his ejusdem sancti Bernardi litteræ ad eundem Innocentium papam¹. Post hæc quid aggressus fuerit Innocentius, sed Dei voluntate prohibitus sit, narrat Falco in Chronicis Beneventanis:

« Non multis diebus evolutis, prædictus Apostolicus, consilio accepto, Albanum venit, disposens, exercitu congregato, ad ducem reipublicæ Rainulphum, pugnante adversus Rogerium, venire: sed infirmitate percussus venire non potuit». Porro Rogerius neque extincto Anacleto, et submoto Victore, recognoscere adhuc voluit Innocentium summum Pontificem, sed solus cum suis absque capite mansit in schismate, nihil omittens crudelitatis, quam exerceret in loca quæ armis sibi subigere posset. El inter alia Alifanæ civitatem absque delectu sacrorum locorum et personarum exercitui ferro flammæque delendam tradidit ea crudelitate, quæ omnem barbariem excederet. Describuntur ista omnia pluribus in iisdem Chronicis Beneventanis: sed ad institutum hæc satis.

12. *Lotharii imp. obitus.* — Hoc eodem anno, in fine ipsius, nempe tertio nonas Decembris, moritur Lotharius imperator, de quo Petrus Cassinensis Diaconus: Apud Clusam Liguriæ se contulerat (*imperator*), ibique Henricum ducem Bavarie generum suum Saxonie hæredem constituit, et diem clausit extremum». Otto autem Frisingensis ait, eum apud Tridentum morbo correptum, in ipsis montibus in vilissima casa diem obisse: cuius corpus delatum est Moguntiam. Fuit interregnum quatuor mensibus. Quod enim prole mascula careret, quoniam assumendus in imperium esset, comitiis generalibus fuit decernendum. Quisnam autem electus fuerit ejus successor in imperium; dicemus anno sequenti. Extat Epistola Petri Diaconi consolatoria ad Richizam Augustam de morte Lotharii imperatoris ejus conjugis, in antiquitus scripto Codice Cassinate.

13. *Acta de disputatione coram Lothario a Petro Cassinensi scripta arguuntur falsitatis.* — Cujus Acta de disputatione cardinalium cum ipso Petro coram Lothario imperatore, ab aliquo pro arbitrio concinnata, cum multipliciter arguantur falsitatis, indigna putamus quæ Annalibus intexantur. Ita Deus mentienti resistit, ut quamvis vafer et callidus sit qui orditur telum mendacii, ejus obscuret veluti fascino intellectum, ut videre non sinat, quæ aliis sunt perspicua, ut sic inde possit redargui falsitatis. Recensentur ipsa in quarto libro Chronicæ Cassinatis, quem Petrus posuit Appendicem ad Leonem Ostiensem. Est autem illorum exordium ejusmodi²:

« In nomine Domini et Salvatoris nostri Jesu Christi, anno ab Incarnatione ejus millesimo

centesimo trigesimo octavo. Indictione prima. VII id. Julii, anno imperii domini Lotharii Caesaris septimo, residente eodem invictissimo principe ad Aquas Pensiles, etc.» Locum autem iste, qui dicitur ab auctore, ad Aquas Pensiles, ubinam fuerit, ab eodem superior asseruit¹, nempe fuisse prope Melfim; ait enim: « Monachi accelerare fugam contententes, Melfim primo, inde ad Lactum Pensilem, ubi omnis imperatoris exercitus cum Innocentio papa condeserat, advenerunt». Ibi vero contigit adesse imperatorem non hoc anno, sed superiori, quo descendit cum exercitu in Apuliam, ut suo loco superius est demonstratum auctoritate scriptorum ejusdem temporis. Quomodo ergo a Petro præsens annus et anni præsentis Indictio ponitur, et certa dies consignatur mensis Julii ejus anni, quo nec imperator, nec Pontifex fuere ad Aquas Pensiles, sed Rōmæ eo tempore degeret Innocentius; et imperator Lotharius jam ab Urbe recessisset versus Galliam Cisalpinam? Præterea quisnam ibi ponitur Robertus abbas Claravallensis interhuise una cum cardinalibus publice disputationi, cum non alius quam sanctus Bernardus fuerit hoc tempore abbas Claravallensis? Insuper quomodo passurus fuisset Innocentius, Lotharium imperat. præfuisse judicem inter cardinales et monachos Cassinenses, qui (ut vidimus) maxime indigno animo tulit, eundem audisse causam monachorum inter se dissidentium? Hæc sunt et alia, quæ arguant, eadem illius affixa Acta esse penitus commentitia, sicut sunt magni dedecoris schismaticorum monachorum illorum, qui contra Rom. Eccles. eo modo disserere tanta procacia propinantur. Sic igitur Acta illa non anno Christi signanda erant trigesimo octavo post millesimum centesimum, sed trigesimo septimo, non Indictione prima, sed decima quinta, non anno septimo Lotharii imperatoris, sed quinto, et in aliis castiganda, ut diximus.

14. *Causa inter patriarcham Hierosolymitanum et archiepiscopum Tyrensem, de qua litteræ Innocentii papæ.* — Quod ad res pertinet Orientis, hoc tempore, nempe postquam Innocentius Romam reversus est, agitari contigerunt controversie illæ, occasione Fulcheri Tyrii archiepiscopi cum Wilhelmo Hierosolymorum patriarcha obortæ, quæ a Wilhelmo itidem Tyrio postea archiepiscopo describuntur: ac primum, quomodo contigerit hominem Aquitanum profugum ex Gallis ad insignem adeo Ecclesiam eligi archiepiscopum. Sic enim ait²: « Substitutus est dominus Fulcherius (Tyrensis archiepiscopus) bonæ memoriæ, Aquitanicus, vir religiosus ac timens Deum, modice litteratus, sed constans et amator disciplina. Ille apud suos abbas extiterat canonicorum regularium in monasterio, cui Cella nomen. Sed postmodum tempore prædicti schismatis, quod inter Innocentium papam et Petrum Petri Leonis filium exortum

¹ B. rn. Ep. CLXXXIV. — ² Chr. Cas. l. IV, c. 116.

¹ Chr. Cas. l. IV, c. 103. — ² Wil. Tyr. l. XIV, c. 21.

est, favens prædicto Petro Gerardus Engolismensis episcopus Apostolicæ Sedis legatus, alii parti præstantes assensum molestiis quamplurimis fatigabat. Quod vir vitæ venerabilis non ferens, sumpta licentia a fratribus, orationis gratia Hierosolymam venit, tandemque in claustrum Ecclesiæ Dominici Sepulchri regularem vitam et assiduitatem professus, ad Ecclesiam Tyrensem vocatus est. Rex autem eandem Ecclesiam strenue et feliciter annis duodecim, quartus ante nos, qui nunc eidem Ecclesiæ non electione meriti, sed sola Domini dignatione et patientia præsidemus. Qui postquam a domino Hierosolymitano patriarcha Wilhelmo suæ munus consecrationis accepit, exemplo prædecessoris sui volens ad Ecclesiam Romanam pro obtinendo pallio properare, ab eodem patriarcha et ejus complicibus passus est insidias et violentiam, ita ut vix, et cum multa difficultate manus eorum posset effugere, et ad Ecclesiam Romanam pro causa prædicta pervenire, sicut ex tenore litterarum domini papæ Innocentii deprehenditur. Ait enim :

« Innocentius episcopus, servus servorum Dei, venerabili fratri Wilhelmo Hierosolymitano patriarchæ, salutem et Apostolicam benedictionem.

« Magisterium totius Ecclesiæ et Ecclesiasticæ institutionis B. Petro Apostolorum principi cælesti privilegio esse collatum, Evangelica declarat auctoritas. Et infra : Miramur autem, quoniam cum Romana Ecclesia pro liberatione Orientalis Ecclesiæ tantopere laboraverit, et filiorum multorum sanguinem effundendo, corda tam Ecclesiasticorum quam secularium ad ejus servitium excitaverit, nequaquam prout convenit, eidem matri tuæ hac vice respondere curasti. Parum enim tibi visum fuerat, quod venerabilem fratrem nostrum Wilhel mum Tyrensem archiepiscopum more prædecessorum suorum pro susceptione pallii ad Romanam Ecclesiam venientem disturbare præsumperis, ubi te erga eum a nobis redeuntem inhumanum, difficilemque et nimis asperum exhibueris. Adeo quod nec antiquam dignitatem Tyrensis Ecclesiæ

sibi restituere, nec de damnis sibi illatis, aut etiam de Caypha sive Porphyra juxta mandatum nostrum infra tres menses, post acceptionem nostrarum litterarum justitiam facere volueris. Cum utique satis indignum sit, ut honor, qui sibi, si ei obediret, ab Antiochena exhiberetur Ecclesiæ, a te vel tuis successoribus subtrahatur. Præterea in subiectos illius nimis potestative diceris te habere. Quocirca auctoritate Apostolica præcipimus, si ejusdem matris tuæ piis optas studiis atque solatiis confoveri, si in tuis necessitatibus ejus patrociniis desideras adjuvari. Jam dictum archiepiscopum diligas et honores, et in nullo perturbare præsumas : quin potius de omnibus, de quibus apud te querimoniam deposuerit, sibi plenam justitiam intra quadraginta dies, postquam præsentia scripta susceperis, exhibere non differas, nec aliquid in subditos suos contra statuta canonum præsumas. Alioquin timendum tibi erit, ne tam ipsum quam suffraganeos suos a tua obedientia subtrahamus, eosque intra manus nostras retineamus. Datum XV kalendas Januarii ». Hæc Innocentius.

15. Vidisti, lector, non Græcos tantum, sed Latinos nostros refractarios esse inventos adversus Romanos Pontifices? ut non mireris, si tanti ædificii moles corruerit, cujus compagine malæ cohererent Catholicæ unitati. Sunt et alia ejusdem Innocentii papæ litteræ scriptæ ad diversos in causa Tyrensis diocæseos, quas idem Wilhelmus recitat¹.

Hoc eodem anno, Innocentius papa altero oculorum respiciens extremas orbis partes, ad componendas res Ecclesiæ Anglicanæ misit a latere legatum Albericum cardinalem episcopum Ostiensem, qui celebravit Londoniense Concilium, et ibi annuente Stephano rege, Theobaldum Beccensem abbatem creavit archiepiscopum Cantuariensem. Hæc Rogerius in Annalibus.

¹ Wil. Tyr. l. xiv. c. 13.

Anno periodi Græco-Romanæ 6631. — Anno .Ere Hispan. 1176. — Anno Hegire 533, inchoato die 8 Sept., Fer. 5. — Jesu Christi 1138.

— Innocentii II papæ 9. — Conradî reg. 1. Joannis Comneni imp. 21.

4. *Obitus Anacleti antipapæ.* — A num. 1 ad 12. Falco qui annum a kalendis Martii exorditur, ad annum MCXXXVII ait: « Hoc anno Anacletus, qui sub nomine Pontificatus vixit, septimo die stante mensis Januarii mortuus est ». Baronius num. 1 Mabillonius in Notis fusiorebus ad Epistolam cxxvi divi Bernardi, Papebrocius in Conatu Chronico-Hist., alique passim viri docti diem illum a Falcone memoratum diem septimum mensis Januarii interpretantur. Verum Peregrinus in Notis ad Falconem recte hunc loquendi modum a Falcone usurpatum explicat, de Januario exeunte, docetque mensem *stantem*, seu *instantem*, seu *adstantem*, esse mensem finientem, quod postea Ducangius in Gloss. mediæ et inf. Latinit. ad vocem *mensis stans* variis exemplis probavit, Peregrinus nequidem nominato, quod illi non raro accidit, sed non sine laboris aliorum præjudicio. *Anacletus* igitur mortuus est die vicesima quinta mensis Januarii, qui septimus est a die ultimo ejusdem mensis, a quo Falco, et qui eo loquendi modo usi sunt, diem primum stantis alicujus mensis inchoant. Hanc Peregrini explanationem confirmat Ordericus lib. 13, pag. 915, dicens: « Petrus Anacletus, qui Sedem Apostolicam fere vii annis usurpaverat, in cathedra sedens, VIII kal. Februarii (seu die xxv Januarii) subita morte decessit: atque, ut fertur, a fratribus suis, filiis videlicet Petri Leonis, quorum in Urbe Roma maxima potestas est, ita occultatus, ut ubi cadaver ejus sepultum sit, ignoretur », quod ultimum alii etiam tradidere. Durationem invasionis ejus, quam Ordericus numero rotundo exprimit, et septem circiter annorum fuisse didicit, Falco definierat, sed librarii numeros corrumpere; ait enim: « qui sedit annis septem et mensibus undecim, et diebus xxii », loco enim *diebus* xxii, legendum *diebus* xii, si Anacletus anno MCXXX, die xiv Februarii electus fuerit, vel *diebus* xi, si ejus electio uno die tardius facta; nonnisi enim de unico die controversia esse potest.

2. *Victor antipapa creatus abdicat.* — Falco pag. 318, narrata Anacleti morte, subdit: Innocentius Pontifex continuo viribus sumptis, et amicorum virtute accepta, contra inimicos viriliter insilivit. Roscemannus igitur episcopus totius civi-

tatis tintinnabula Beneventanæ pulsare præcepit, mortem ipsius Anacleti significans. Anno MCXXXVIII (a kalend. Martii inchoato) nono anno Pontificatus domini Innocentii II summi Pontificis, mense Martio prima Indictionis, cum prædictus Anacletus mortuus esset, cardinales sui, consilio accepto a fratribus ipsius Anacleti, ad regem miserunt Rogerium, ipsius Anacleti mortem significantes, ut si ei placeret, pacem constituerent. Rex itaque ut domini papæ Innocentii partem impediret, voluntati eorum assensit, et papam eligendi potestatem dedit; qui Romani reversi fautoribus eorum congregatis medio mense Martio, Gregorium cardinalem papam sibi et invasorem constituunt, Victoremque eum vocaverunt; sed Dei misericordia auxiliante, hæresis illa et invasio paucis tempore regnavit; ut enim Baronius num. 3 ex eodem Falcone refert, intra paucos dies Victor mitram deposuit, et universa Ecclesia ad unitatem rediit.

3. *Rogerus rex Innocentium II Pontificem agnoscit* — Baronius num. 12, alium Falconis locum recitat circa protectionem quam Innocentius suscipere cogitabat ad Rainulphum ducem contra Rogerium, sed Innocentius « infirmitate percussus venire non potuit », inquit Falco, ad cujus verba Baronius hæc de suo addit: « Porro Rogerius neque extincto Anacleto, et submoto Victore, recognoscere adhuc voluit Innocentium summum Pontificem ». Sed Baronius, vel memoria lapsus, vel ab exscriptore deceptus fuit. Hæc enim Falconis verba: « Interea rex Rogerius congregato exercitu in finibus venit Apuliæ, cogitans sibi civitates ab imperatore ablatas suæ submittere potestati. Dux igitur Rainulphus regis illius sentiens adventum, totius Apuliæ partes submovit, ut contra ejus rabiem unanimiter insistant. Nec mora, cursu rapido ad ducem festinant nominatum, et sic contra illius ferociam mensibus fere duobus resistunt. Hæc inter, sicut est nobis relatum, prædictus rex dominum papam Innocentium in patrem et dominum accepit: et civitati Beneventanæ, et per totius regni sui partes mandavit, eum patrem et dominum accepisse. Nos autem (sc. Beneventani) dominum illum ac patrem vocavimus ». Refert postea Rogerium Beneventanos sibi demeruisse,

eos a prædatoribus liberasse, et quæ eis incommodo erant propugnacula, funditus evertisse.

4. *Gesta militaria Rogerii regis.* — Non multo post castellum *Apicis*, quod Rainulpho duci parebat, obsidione cingens, « Beneventanos precatur, ut in ejus auxilio unanimiter festinarent. Rosemannus igitur, qui tunc præsul aderat, amore regis coactus cives universos rogavit, et in ejus mandavit auxilio ». Postea scribit Falco, non obstante eo auxilio, regem obsidionem solvisse, et ad alia conversum plura minoris momenti propugnacula incendio delevisse, ipsam etiam *Alipham* urbem, cujus, sciculi et *Venafrii*, direptionem describit. » Quibus actis, rex inde revertens Beneventum venit, et ad Paludis castellum castrametatur duodecimo die mensis Septembris intrante. Dux interea Rainulphus, qui tanto regi resistere non poterat, dolore cordis concussus, circa Aliphanos fines morabatur ». Rogerius rex Melphim aggressus est, sed postea ab eo consilio destitit, ut *Toccum* castellum sibi subderet, quod ei deditum fuit *tertio kal. Octobris* post dierum octo obsidionem. Inde rex ad Beneventum castrametatus est, ubi per tres dies obpluvias et tempus nimis importunum moram fecit. « Rex interea nominatus civitatem intravit Beneventanam quarto die intrante mensis Octobris, et Ecclesias, et civitatis palatia, et curiam Apostolici studiose perquisivit, et exercitu refocillato, castra a civitate amovit ».

5. *Sanmarium rerum hoc anno gestarum.* — Rainulphus dux, uti postea narrat Falco, ditiones et vassallos Rogerii comitis Ariani adversus Rogerium regem ab injuriis vindicavit, Melphim tuitus est, et ita sese gessit, ut rex Salernum secedere, quo in Siciliam transfretavit, coactus fuerit : « At dux (nempe Rainulphus) nominatus Barum descendit, et marinos fines visitavit populum omnem hortando, ut tempore opportuno, viribus sumptis et armis contra regem obsistant, qui unanimiter et corde devoto paratos fore clamabant ». Anonymus Casinensis ad annum *mcxxxvii*, qui nobis est *mcxxxviii*, gesta hæc omnia paucis perstringit : « Conradus fit imperator. Obiit Petrus Leonis, qui et Anacletus. Sed post duos menses fratres ejus cum suis elegerunt quemdam Gregorium hæresiarcham, qui post tres menses a papa Innocentio deponitur. Rex Rogerius venit super Rainulphum ducem Apulie, et exheredavit Alexandrum de Claramonte, Aliphas redegit in cinerem, sicque in Siciliam reversus est ». Porro divus Bernardus in Epist. cccxvii, non vero cccxx, ut errore librarii legitur apud Baronium num. 5, ubi eam integram recitat, confirmat quod scribit anonymus Casinensis de duratione schismatis post Anacleti interitum. Ait enim in *Octavis Pentecostes ipsa die* unitatem Ecclesiæ redditam fuisse, eaque die filios Petri Leonis omnes *Innocentio* papæ fidelitatem jurasse ; dies autem octava Pentecostes hoc anno in diem xxix mensis Maii incidit, et a morte

Anacleti ad diem illum fluxerunt menses quinque utrimque incompleti, ut numeranti patebit. Addit divus Bernardus, qui tantam operam in hoc schismate profligando insumpsit, se *feria sexta Urbem* relicturum, et Claramvallem venturum. Quare sanctus abbas die tertia mensis Junii sese viae dedit.

6. *Annus emortualis Lotharii imp.* — Ad num. 12 et seq. Baronius mortem *Lotharii* imp. usque ad mensem Decembrem currentis anni, et electionem *Conradi* ejus successoris usque ad annum insequentem differt. Verum *Lotharium* superiori anno demortuum, præsentique *Conradum* electum, extra omnem controversiam esse debet. Robertus enim de Monte, Dodechinus abbas, continuator Lamberti Schafnaburgensis, chronographus Hildensheimensis, et alii passim *Lotharium* anno præcedenti demortuum produnt, et *Conradum* currenti ei successisse ejus Diplomata invicte demonstrant. Fundamentum Baronii anno sequenti evertemus. Falco in Chronic. ad annum *mcxxxvii* ait : « Hoc anno prædictus imperator, cum ad imperium suum revertebatur, mortuus est in partibus Tusciæ, et eo defuncto Conradus ad imperium unanimi voto sublimatus est », sed non eodem anno, verum currenti, uti suo loco ostenditur. Verum non in Tuscia Lotharius mortuus est, sed, ut tradit Otto Frisingensis, cum apud Tridentum morbo correptus fuisset, in ipsis montibus diem obiit ; ita apud Baronium num. 12. Chronographus Magdeburgensis postquam de ejus expeditione Italica egit, ait : « Imperator ab inde reversus, apud Tridentinam veniens festum S. Martini celebravit gaudens, et ibidem infirmari cœpit, dumque quotidie languor ingravesceret, nec ob hoc iter suum intermisisset, tandem prævalente mortali agitudine apud Bredunavillam in faucibus Alpium constitutam » mortuus est. Porro perperam ibidem scribit sine ullo teste Baronius, corpus Lotharii delatum Moguntiam ; ut enim docent Urspergensis, Dodechinus, continuator Lamberti Schafnaburgensis et alii, in Saxoniam relatum per suos in monasterio Luterensi, quod ipse in Saxonia construxerat, honorifice sepultum est. « Henricus Bavarie dux, qui socero morienti astabat, insignia imperialia, hoc est, coronam, sceptrum, gladium et crucem, quæ Caroli imperatoris Magni fuisse traduntur, sibi cum imperio usurpare nitebatur », inquit Trithemius in Chron. Hirsaug. ad an. *mcxxxvii*, alique confirmant.

7. *Dies emortualis ejusdem imp.* — Dies ejus emortualis in controversiam vocatus ; Dodechinus enim abbas ait, Lotharium *III kal. Decembris* defunctum esse, sed standum Alberto Stadeni in Chron., chronographo Magdeburgensi et Sigonio lib. 11 Hist. Reg. Ital. qui eum *III nonas Decemb.* diem obiisse scribunt ; præsertim cum chronographus Hildensheimensis, qui ad annum *mcxxxvii* Chronicon suum absolvit, referat eum *II nonas mensis Decemb.*, id est, die quarta mensis Decem-

bris e vivis excessisse, quod et Trithemius laudatus habet; ex hoc enim unius diei discrimine intelligimus, *Lotharium* nocte inter III et II nonas Decembris media vivere desiisse. Et sine dubio Dodechinus abbas *III nonas Decemb.* scripserat, sed librarii per oscitantiam nonas in kalendas vertunt, cujus erroris non desunt exempla. « Erat », inquit Urspergensis de Lothario loquens, « strenuus belli ductor, præcipuus in armis, providus in consilio, terribilis inimicis Dei et sanctæ Ecclesiæ, qui quamdiu vixit totum Romanum imperium titubare non potuit ». Porro non tantum chronographus Hildensheimensis, cujus opus trium esse auctorum supra indicavimus, sed etiam Anselmus Gemblacensis Chronica sua usque ad an. mcccxxvii perduxere; sed hic præsentem annum excludit, et monachus anonymus fere æqualis, qui opus ejus continuavit, a morte Lotharii incipiens ait: « Rex Lotharius anno uno et dimidio in Italia commoratus est cum expeditione militari ».

8. *Nefanda patrata ab exercitu Davidis Scotiæ regis.* — Ad num. 15. Meminit Baromius Concilii Londoniensis; sed quia que illud præcessere connexionem cum eo habent, scituque necessaria sunt, hic quanta poterimus brevitate ex Richardo priore Hagustaldensi in Hist. de Gest. Reg. Stephani, non necessariis resectis, ea narrabimus. David Scotiæ rex ad Northymbriam devastandam cum toto suo exercitu properavit. « Igitur ille detestandus exercitus omni paganorum genere atrocior, nec Deo, nec hominibus reverentiam deferens, tota provincia depredata, utriusque sexus, cujusque ætatis et conditionis homines passim trucidavit, villas, Ecclesias, domos destruxit, spoliavit, accendit. Namque languentes in grabatis, ac mulieres prægnantes, et parturientes, et in cunis infantes, et alios innocentes inter ubera et in sinibus matrum suarum cum ipsis matribus, et decrepitos senes, et defectas anus, et cæteros qualibet occasione debiles, ubicumque inveniebant, in ore gladii trucidaverunt, vel lanceis suis confixerunt. Et quanto miserabiliore mortis genere illos disperdere poterant, tanto plus gratulabantur, etc. Coadunatus autem erat iste nefandus exercitus de Normannis, Germanis, Anglis, de Northymbrianis et Cumbris, de Teswetadala, et Lodonea, de Pictis, qui vulgo Gallewicienses dicuntur, et Scotis; nec erat qui eorum numerum sciret. Infiniti enim absque omni mandato aut depredandi amore, aut occasione ulciscendi, aut sola voluntate nocendi qualibet regio illa abundabat, se supradictis commiscuerunt. Igitur per provinciam discurrentes, et nemini parentes, exceptis oppidis et maritima regione, quæ ex Orientali parte est, fere totam Northymbriam usque ad Tinam fluvium hac vice ferro et flamma vastaverunt. Nam autem in reditu suo destruere proposuerant ».

9. *Prælium ad Standardum habitum.* — Ventum tandem ad prælium decretorium, cui *Stephanus* Angliæ, et *David* Scotiæ reges inter-

fuere. Vocatur bellum istud *bellum Standardii*, quia Angli in medio ejusdam machinæ, unius navis malum erexerunt, quod *Standard* appellaverunt, in cujus summitate quandam argenteam pixidem cum corpore Christi et SS. Petri Apostoli, et Joannis Beverlaciensis, et Wilfridi vexilla suspenderunt, « ut Jesus Christus per præsentiam sui corporis eis dux belli esset, quod pro ejus Ecclesia ac sua patria defendenda susceperant. Igitur in Octavis Assumptionis sanctæ Mariæ, XI kal. Septemb. feria II, inter primam et tertiam, hujus prælii conflictus iuitus et finitus est. Nam statim in primo congressu, innumeris Pictis interfectis, cæteri projectis armis turpem fugam inierunt. Campus cadaveribus repletus, quamplurimi capiuntur, rex et alii omnes terga dederunt. Denique de exercitu omnes aut cæsi sunt, aut capti, aut sicut oves percusso pastore dispersi. Mirumque in modum quasi sensu alienati, non minus in circumjacentes regiones hostium suorum a patria sua elongando, quam adversus patriam suam revertendo fugerunt. Sed ubicumque sunt reperti, tanquam oves occisionis sunt interfecti. Justoque Dei judicio, qui multos miserabiliter interemerant, ac insepultos reliquerant, ipsi multo miserabilius trucidati, nec patrio, nec peregrino more sepulchri usi, canibus, avibus ac feris expositi, aut lacerati et discerpti sunt, aut sub divo contabuerunt et computruerunt.

10. *In eo Scoti interneccione deleti.* — « Rex quoque, qui paulo ante præ nimia mentis elatione et exercitus sui numerositate cœli sidera vertice tangere videbatur, et ideo vel totam, vel maximam partem Angliæ in exterminium ducere minabatur, mox inglorius ac paucis comitatus cum summa confusione et ignominia vix vivus evasit. Itaque divinæ ultionis virtus in hoc quoque manifestissime claruit, quod victorum exercitus inæstimabiliter major erat quam vincentium. Nec interfectorum numerus ab aliquo æstimari potest. Nam sicut plures testantur, de illo exercitu, qui de sola Scotia exiit, plus quam decem millia defuisse reversis recensiti sunt. Nam per diversa loca Deiorum, Berniciorum, Northanymbrorum, Cumbrorum, et aliarum provinciarum post bellum multo plures sunt interempti quam in bello sunt interfecti. At Anglorum exercitus paucis de suis amissis, Deo auxiliante, victoria expedite politus, sumpta præda, quæ satis copiosa ibi reperta est, brevi fere totus dissolvitur, et unusquisque ad propria revertens, vexilla quæ acceperant, cum gaudio et gratiarum actione Ecclesiis sanctorum reconsignant. Quippe cum cultioribus vestibus, et omnibus divitiis suis ad hoc bellum quasi ad regales nuptias processerant ». De memorabili hoc prælio historici fere omnes Angliæ mentionem fecerunt, Malmesburiensis, Huntindoniensis, alique; et Ethelredus abbas Ricvalliensis peculiari libello a Setdeno in decem scriptoribus Historiæ Anglicanæ publicato, descripsit bellum *inter regem Scotiæ*

et barones Angliæ apud Standardium juxta Alvertonam gestum. De Standardo legendum Glossarium Ducangii.

11. *Albericus cardinalis Ostiensis legatus Angliæ et Scotiæ*. — « Circa idem tempus quidam Albericus Ostiensis episcopus in illas partes venit, quem Innocentius Romanæ Sedis Apostolicus, ut legationis officio in Angliæ et Scotia fungeretur, miserat. Erat autem vir iste natione Gallicus, professione monachus, observatione Cluniacus, divina ac seculari eruditione perspicuus, in Ecclesiasticis negotiis optime exercitatus, facundia præclarus, consilio providus, et, quod his omnibus majus est, in habitu et vultu, denique in omni conversatione et actione sua magnæ mansuetudinis ac religionis documentum præferebat. etc. Iste igitur in Angliam veniens, de statu sanctæ Romanæ matris Ecclesiæ omnibus ejus fidelibus filiis magnam gaudium attulit. Namque dominus papa supranominatus universis Catholicæ Ecclesiæ filiis chartam suam per illum direxit. In hac autem referebat, quomodo dum navis sancti Petri diutissime ac gravissime fluctibus inimicorum occupata et operâ præcipitaretur, atque scopulis schismaticorum conquisata ac dilacerata pessumdaretur, de salutis suæ reparatione jam pæne desperare cogebatur, quia ineffabilis desolatio atque detestabilis abominatio quæ a primogenito Satanae, scilicet Petro Leone, et ejus fautoribus, miserabiliter afflicta est, vii annis continuus duravit, etc. Porro omnium inimicorum suorum superbiam et gloriam in conculcationem et ignominiam convertit, et omnium sibi adversantium colla suæ potestatis imperio subiecit. etc.

12. *Apud Londoniam Concil. convocat.* — « Exceptis autem his litteris, alias litteras regibus Angliæ et Scotiæ, et Turstino archiepiscopo Eboracensi (quippe tunc temporis Cantuariensis metropolitæ proprio pastore carebat) et episcopis atque abbatibus, ac præclaris S. Ecclesiæ utriusque regni a prædicto papa directas, de auctoritate suæ legationis attulit. Igitur ab his omnibus honorifice susceptus est, etc. Deinde per Northymbriam, et Cumberland iv die ante festum sancti Michaelis ad Castel pervenit, ibique regem Scotiæ cum episcopis, abbatibus, prioribus, baronibus suæ terræ reperit. Illi vero diu a Cisalpina, imo fere ab universa Ecclesia discordantes eosæ memoriæ Petroleoni, et apostasie ejus nimium favisse videbantur. Tunc vero divina gratia inspirati, mandata Innocentii papæ, et legatum ejus omnes unanimiter cum magna veneratione susceperunt, etc. Convenit quoque regem de reformanda pace inter eum et regem Angliæ, et hujus rei gratia ad pedes ejus cecidit, scilicet ut sanctæ Ecclesiæ, et sui ipsius et suorum miseretur, quibus tot et tanta mala lece- rat. Sed vix inducias impetravit, quod nullum exercitum, et nullum malum, excepta obsidione quæ circa Carrum erat, ante festum sancti Martini in terram regis Angliæ induceret, etc. Supranominatus vero legatus, ut prædictum est, per epi-

scopatus ac monasteria ad curiam regis Angliæ reversus, quemdam alium legatum, qui nuperrime a domno papa Innocentio venerat, ibidem reperit. Igitur Turstinum Eboracensem archiep. et omnes episcopos atque abbates, ac priores canonicorum per totam Angliam summoneri fecerunt, ut ad festum S. Nicolai in civitate Londonia ad generale Concilium convenirent ».

13. *Illud idibus Decemb. celebratum.* — Ger-vasius tamen in Chron. pag. 1314, ubi de eadem Alberici card. legatione, et de eodem Concilio Londoniensi verba facit, in aliquibus a Richardo discrepat. Ait enim : « Lectis litteris coram rege et primoribus Angliæ, licet non imprimis, vix tandem pro reverentia domini papæ susceptus est. Doluit enim rex fratrem suum Wintoniensem episcopum, (Henricum appellatum) legatione potita privari, qua, vacante sede Cantuariensi, admodum gloria- batur ». Recitat postea litteras citatorias de eligendo Cantuariensi archiepiscopo missas, atque se episcopos et abbates convocasse ad colloquium « quod Londoniæ habere disposuerat apud Westmonasterium Dominica Adventus Domini, qua cantabatur, *Gaudete in Domino* ». Præcipit etiam ut V aut VI feria ante prædictum terminum Londoniam veniant. Tum ait, *idibus Decemb.* celebra- tum esse Synodum *apud Westmonasterium*, præ- sidente Alberico Ostiensi episcopo, et Innocentii II in Angliam et Scotiam legato, cum episcopis num. xvii, abbatibus fere xxx, et cleri et populi multitudine numerosa. Deinde exhibet capitula 16 in hoc Concilio statuta, scribitque, soluto Concilio, Jeremiam priorem Cantuariensis Ecclesiæ elegisse *Theodbal- dum* abbatem Beccensem ad regimen Cantuarien- sis Ecclesiæ *proximo sabbato ante Natale*. His addit Ricardus laudatus Albericum legatum invi- tasse omnes episcopos et abbates plurimos Angliæ *ad generale Concilium*, quod Innocentius II « ad medium Quadragesimæ Romæ celebraturus erat. Dum autem hæc agerentur, de pace reformanda inter duos reges sæpissime ac diligentissime cum pluribus, et maxime cum regina Angliæ tractavit », quam anno sequenti ad exitum perduxit, ut ibi- dem narrabimus. Hujus Concilii canones legendi tom. x Concil. ubi numerantur 17, quia unus ibidem in duos dispersitus fuit.

14. *Expeditio Alphonso Castellæ regis in Mau-ros.* — « Æra mclxxvi (Christi nempe mccxxxviii), mense Maio », ut dicitur in Historia Toletana apud Sandovalium fol. 161 et seq., Alphonso imperator cum ingenti exercitu Toletum digressus est, et hostiles agros usque ad Betum fluvium devastavit. Christianorum pars inconsulto imperatore fluvium trajecit, et in Maurorum ditiones penetra- vit, omnia prædando et depopulando. Sed tantus imber depluit, ut fluvius accreverit, et amplius vadosus non fuerit. Quare cum milites Christiani ad suos redire non possent, Mauri, qui magno num- ero unum in locum coierant, hos temerarios internecione delevere, ipso Alphonso imperatore

vidente, qui cum eis auxilium ferre nequiret, Toletum mœstus secessit.

15. *Donatio Alphonsi Lusitanie comitis.* — Hoc anno Alphonsus infans, « nepos Alphonsi imperatoris Hispaniarum, filius consulis id est comitis) domini Henrici et reginæ Tharasie, princeps Portugalliæ (non vero rex) » Chartam emisit provincie in gratiam episcopi Petri de Rabaibi et successorum ejus, recitatam a Roderico de Cunha episcopo Portuensi, et deinde archiepiscopo Braccarensi, in Catalago episcoporum Portuensium an. mxcxxiii, lingua Lusitanica impresso apud Portum. Ait Rodericus eam confirmatam a *Monio episcopo Sal-*

mantiensi; sed non dubito quin Chartam male legerit, cum eo tempore nihil Salmantice cum Lusitania commune esset, et Ecclesia Salmanticensis pacifice regeretur a *Berengario* imperatoris Alphonsi cancellario, anno mxcxxvii ordinato, postquam Innocentius II *Petrum* episcopum tanquam parum idoneum deposuit, et Epist. cccxxi divi Bernardi in ejus gratiam ad Innocentium II scripta ei inutilis fuit. In Charta itaque Portuensi *Munio*is Lamacensis episcopi nomen scriptum tuit, *Lameca* enim, et *Portus* parum inter se distant.

INNOCENTII II ANNUS 10. — CHRISTI 1139.

1. *Conradus rex creatur, rejecto Henrico.* — Annus Redemptoris sequitur millesimus centesimus trigesimus nonus, Indictione secunda, quo Innocentius papa in Germania ad electionem successoris Lotharii imperatoris legatum a latere militit Theodinum episcopum cardinalem. Agit de hac legatione Otto Frisingensis, atque¹: « Anno ab Incarnatione Domini millesimo centesimo trigésimo octavo, defuncto sine filiis imperatore Lothario, conventus generalis principum Moguntie in proxima Pentecoste indicitur. Quidam autem ex principibus timentes, ne forte in generali curia Henricus dux Noricorum, qui tunc præcipui et nominis et dignitatis in regno fuit, per potentiam prævaleret, circa mediam Quadragesimam, consilio habito in oppido Gallie Confluentia, conventum celebrant, ibique Conradum imperatoris Henrici sororium, de quo supra diximus, præsentem Theodino (Theodino) episcopo cardinali, ac S. R. E. legato, summi Pontificis ac totius Romani populi urbiumque Italie assensum promittente, nonagesimum quartum ab Augusto regem creant. Qui mox ad palatium Aquis veniens, a prædicto cardinale (nam Coloniensis, qui id facere jure debebat, noviter inthronizatus pallio carebat) cooperatoribus Coloniensi et Trevirensi archiep. cum cæteris episcopis, in regem ungitur ». Hæc de pro-

motione Conradi. De Henrici vero ducis dejectione inferius. Porro qui nonnisi imp. Occidentalium tantum, non regum Romanorum annos præfigere, chronographiæ consuevimus, jam cum desunt imperatores, notas numeri regum Romanorum ad clariorem temporum significationem ponemus, sed cum suo titulo tantum.

2. « Itaque Conradus rex », inquit Otto, « in Pentecoste curiam in præfata civitate, ut dictum erat, cum maximo regni fastigio, et maximo conventu principum habuit, ubi omnes Saxones simul cum viduata imperatrice Richiza venientes, ultro se suæ ditioni subdidere. Solus ex principibus dux Henricus regalia servans aberat: ad quæ reddenda in festivitate Apostolorum Petri et Pauli dies ei præfigitur Ratisponæ. Quo veniens, regalia quidem multis illectus promissis reddidit, sed tamen ea minime consecutus, infecto pacis negotio, sine gratia ejus recessit. Cumque multis modis homo præpotens et animosus, sed nutu Dei humiliatus, misericordiam peteret nec impetraret, tandem judicio quorundam principum apud Herbipolim proscribitur, ac proxima Nativitate Domini in palatio Goslariensi ducatus ei abjudicatur. Et, mirum dictu, princeps ante potentissimus, et cujus auctoritas (ut ipse gloriabatur) a mari usque ad mare, id est, a Dania usque in Siciliam extendebatur: in tantam brevi humilitatem venit, ut pene omnibus fidelibus et amicis suis in Bajoaria a se

¹ Ott. Frising. l. vii. c. 22, 23, 24.

deficientibus, clam inde egressus, quatuor tantum comitatus sociis, in Saxoniam veniret ». Et inferius : « Cum dux Henricus auctoritate socii sui imperatoris, propriisque viribus in tantum excrevisset, ut omnes despiciens, nulli pro regno supplicare dignaretur, Dominus qui humilia respicit, et alta a longe cognoscit, deponit potentes, et exaltat humiles, illum (Conradum scilicet), humiliatum et pæne desperatum ad fastigium regni provexit, hunc de alto in gloria et potentia sua gloriantem dejecit ». Et haud diu post consumptus mœrore, morte sublatus est.

3. Quæ S. Bernardus ad Conradum scribit.

— Creatus Conradus rex Romanorum, ad sanctum Bernardum litteras scripsit, questus quod olim favisset Lothario adversus eum. Ad quem hæc breviter idem sanctus Bernardus rescripsit¹ :

« Scripta vestra et salutationes tam devotus suscipio, quam modicus sum ad illa; modicus dixerim dignitate, sed non devotione. Querimonie regis nostræ sunt, et maxime illa quam dignanter exprimitis de invasione imperii. Regis dedecus, regni diminutionem nunquam volui, volentes odit anima mea. Legi quippe² : Omnis anima potestibus sublimioribus subdita sit : et qui potestati resistit, Dei ordinationi resistit. Quam tamen sententiam cupio vos, et omnimodis moneo custodire in exhibenda reverentia summæ et Apostolicæ Sedi et B. Petri vicario, sicut ipsam vobis vultis ab universo servari imperio. Sunt quæ non putavi scribenda : præsens ea fortassis opportunius intimarem ». Hæc Bernardus ad Conradum.

4. *Concilium generale Romanum, et ejus triginta canones.* — Eodem anno « proxima media Quadragesima », idem inquit Otto Frisingensis episcopus³, « Synodus maxima circiter mille episcoporum Romæ, presidente summo Pontifice Innocentio celebratur : ibique post multa salutifera decreta promulgata, schismatici qui parti Petri Leonis faverant damnantur ». Hæc tantum de Synodo maxima Otto. Nos autem non sine magno labore, quæ ad tam celebre Concilium spectant, simul hinc inde colligere studuimus. Atque primum quod ad diem spectat, in scripto Chronico Beneventano hæc de ejusdem Concilii certa die : « Hoc anno præfatus Apostolicus Innocentius, octavo die intrante mensis Aprilis Romæ Synodum celebravit. Ad cuius sacri conventus præsentiam archiepiscopi, episcopi, et abbates innumeri conveniunt : ibique inter cætera, quæ Spiritu sancto mediante statuta sunt, vinculis excommunicationis affligavit regem Rogerium prædictus Apostolicus Innocentius in præsentia omnium Catholicorum virorum qui conveniunt, et omnes ejus sequaces ». Hæc de Synodo. Extant canones hujus Concilii in libro censuum Vaticanæ Bibliothecæ, et alio Codice Vaticano Decretorum collationis, ex

quo Gratianus aliqua capita intulit in Decretum⁴. Quæ inde accepta hic tibi subjicimus; sunt numero canones triginta his verbis conscripti :

5. « 1. Statuimus, ut si quis simoniace ordinatus fuerit, ab officio omnino cadat, quod illicite usurpavit.

« 2. Si quis præbendam, vel prioratum seu decanatum, aut honorem, vel promotionem aliquam Ecclesiasticam, seu quodlibet sacramentum, ut puta, chrisma vel oleum sanctum, consecrationes altarium vel Ecclesiarum interveniente excommunicabili (emptionis) ardore : male acquisito careat, et emptor atque venditor, et intervenditor, nota infamie percellantur. Et nec pro pastu, nec sub obtentu alicujus consuetudinis ante vel post, a quoquam aliquid exigatur, vel ipse dare præsumat : quoniam simoniacum est : sed libere et absque imminutione aliqua collata sibi dignitate atque beneficio perfruat.

« 3. A suis episcopis excommunicatos, ab alio suscipi, modis omnibus prohibemus. Qui vero excommunicato, antequam ab eo qui eum excommunicaverit absolvatur, scienter communicare presumpserit, pari sententiæ teneatur obnoxius.

« 4. Præcipimus etiam, quod tam episcopi quam clerici in statu mentis, in habitu corporis Deo et hominibus placere studeant, et nec in superfluitate, aut colore vestium, nec in tonsura, intuentium, quorum forma et exemplum esse debent, offendant aspectum, sed potius, quam eos deceat sanctitatem. Quod si moniti ab episcopis emendare noluerint, Ecclesiasticis careant beneficiis.

« 5. Illud enim quod in sacro Chalcedonensi constitutum est Concilio, inrefragabiliter conservari præcipimus : ut videlicet decedentium bona episcoporum a nullo omnino hominum diripiantur, sed ad opus Ecclesiæ et successoris sui in libera œconomi et clericorum permaneant potestate. Cesset igitur de cætero illa detestabilis et sæva rapacitas. Si quis autem hoc amodo attentare presumpserit, excommunicationi subiaceat. Qui vero morientium presbyterorum, vel clericorum bona rapuerint, simili sententiæ subjiciantur.

« 6. Decernimus etiam, ut hi, qui in ordine subdiaconatus et supra uxores duxerint, aut concubinas habuerint, officio atque beneficio careant. Cum enim ipsi templum Dei, vasa Domini, sacramenta Spiritus sancti debeant esse et dici; indignum est eos cubilibus et immunditiis deservire.

« 7. Ad hæc præcessorum nostrorum Gregorii VII, Urbani, et Paschalis Romanorum Pontificum vestigiis inhaerentes interdiximus, ut nullas missas eorum audiat, quos uxores vel concubinas habere cognoverit. Ut autem lex continentiae, et Deo placens munditia in Ecclesiasticis personis et

¹ Bernard. Epist. CLXXXIII. — ² Rom. XIII. — ³ Otto lib. 7. cap. 23.

⁴ Dist. XC. c. pen. 12. q. II. c. II. dist. 17. q. 4. c. Si quis suadente diab. XIII. q. IV. c. I. et alia plura.

sacris ordinibus dilataetur : statuimus, quatenus episcopi, presbyteri, diaconi, subdiaconi, regulares canonici et monachi, atque conversi, professi, qui sacrum transgredientes propositum, uxores sibi copulare præsumperint, separentur. Huiusmodi namque copulationem, quam contra Ecclesiasticam regulam constat esse contractam, matrimonium non esse censemus. Qui etiam ab invicem separati, pro tantis excessibus poenitentiam agant condignam.

« 8. Idipsum quoque de sanctimonialibus feminis, si quod absit, nubere attentaverint, observari decernimus.

« 9. Prava autem consuetudo (prout accepimus) et detestabilis inolevit, quod et monachi et regulares canonici post susceptum habitum et professionem factam, sprete beatorum magistrorum Benedicti et Augustini regula, leges temporales et medicinam gratia lucri temporalis addiscunt. Avaritiæ namque flammis accensi, se patronos causerum faciunt : et cum psalmodia et hymnis vacare deberent, gloriose vocis confisi munimine, allegationum suarum varietate justum et injustum fasque nefasque confundunt. Attestantes enim imperiales constitutiones absurdum, imo opprobrium esse clericis, si peritos se velint disceptationum esse forensium, huiusmodi temeroribus graviter feriendis. Ipsi quoque canonici et monachi, neglecta animarum cura, Ordinis sui propositum nullatenus attendentes, pro detestanda pecunia sanitatem pollicentes, humanorum se faciunt curatores corporum. Cumque impudicus oculus impudici cordis sit nuntius, illa etiam, de quibus loqui erubescit honestas, non debet religio pertractare. Ut ergo Ordo monasticus et canonicus Deo placens, in sancto proposito inviolabiliter conservetur, ne hoc ulterius presumatur, auctoritate Apostolica interdicens. Episcopi autem, abbates, et priores tante enormitati consentientes, et non corrigentes, propriis honoribus spoliuntur, vel ab Ecclesiæ liminibus arceantur.

« 10. Decimas Ecclesiarum, quas in usu pietatis concessas esse, canonica demonstrat auctoritas, a laicis possideri auctoritate Apostolica prohibemus. Sive enim ab episcopis, vel regibus, vel quibuscumque personis acceperint, nisi Ecclesiæ reddiderint, sciant sacrilegii crimen committere, et periculum æternæ damnationis incurrere. Præcipimus etiam, ut laici qui Ecclesias tenent, aut eas episcopis restituant, aut excommunicationi subjaceant. Innovamus autem et præcipimus, ut nullus in archidiaconum vel decanum, nisi diaconus, vel presbyter ordinetur. Archidiaconi, vel præpositi, vel decani, qui infra ordines prænominatos existunt, si inobedientes ordinari contempserint, honore priventur suscepto. Prohibemus autem, ne adolescentibus, vel infra sacros ordines constitutis, nisi qui prudentia et merito vite clarescant, prædicti concedantur honores. Præcipimus etiam, ne inductiis presbyteris Ecclesiæ

committantur : et unaquæque Ecclesia, cui facultas suppetit proprium habeat sacerdotem.

« 11. Præcipimus etiam, ut presbyteri, clerici, monachi, peregrini, et mercatores, rustici, euntes et redeuntes, et in agricultura persistentes, omni tempore securi sint.

« 12. Treugam autem Dei, et ab occasu solis in quarta feria usque ad ortum solis in secunda feria, et ab Adventu Domini usque ad octavas Epiphaniæ, et a Quinquagesima usque ad octavas Paschæ ab omnibus inviolabiliter observari præcipimus. Si quis autem frangere tentaverit, post tertiam communionem si non satisfecerit, episcopus suus in eum sententiam dicet, et scriptam vicinis episcopis annuntiet. Episcoporum autem nullus excommunicatos in communionem suscipiat, imo scripto susceptam sententiam quisque confirmet. Si quis autem hoc violare præsumperint, ordinis sui periculo subiacebit. Et quoniam funiculus triplex difficile rumpitur, præcipimus, ut episcopi ad solum Deum et salutem propriam habentes respectum, omni tepiditate seposita, ad pacem firmiter tenendam mutuum sibi consilium et auxilium præbeant : ne hoc alicuius amore, aut odio prætermittatur. Quod si quis in hoc tempore Dei tepidus inventus fuerit, damnum propriæ dignitatis incurrat.

« 13. Porro detestabilem et probrosam, divinis et humanis legibus per Scripturam in veteri ac novo Testamento abdicatam, illam, inquam, insatiabilem feneratorum rapacitatem damnamus, et ab omni Ecclesiastica consolatione sequestramus : præcipientes, ut nullus archiepiscopus, nullus episcopus, vel cujuslibet Ordinis abbas, seu quivis in ordine et clero, nisi cum summa cautela usurarios recipere præsumat : sed in tota vite infames habeantur, et nisi resipuerint, Christiana sepultura priventur.

« 14. Detestabiles autem illas nundinas, vel serias, in quibus milites et conducto convenire solent, et ad ostentationem virium suarum et audacie temerarie congregiuntur, unde mortes hominum, et animarum pericula sepe proveniunt, omni modo fieri interdicens. Quod si quis eorum ibidem mortuus fuerit, quamvis ei poscenti poenitentia et viaticum non negetur, Ecclesiastica tamen careat sepultura.

« 15. Item placuit, ut si quis snadente diabolo, in sacrilegii reatum incurrerit, sive in clericum, vel monachum manus injecerit violenter, anathemati subjaceat. Et nullus episcoporum illum præsumat absolvere, nisi mortis urgente periculo, donec Apostolico conspectui præsentetur et ejus mandatum suscipiat. Præcipimus etiam, ut in eos, qui ad Ecclesiam vel cæmeterium conflugerint, nullus omnino manus mittere audeat. Quod qui fecerit excommunicetur.

« 16. Indubitatum est, quoniam honores Ecclesiastici sanguinis non sunt, sed meriti ; et Ecclesia Dei non hæreditario jure, non secundum

carnem successores expectet, sed ad sua regimina et officiorum suorum dispensationes, honestas, sapientes et religiosas personas exposcat. Propterea auctoritate prohibemus Apostolica, ne quis Ecclesias, præbendas, præposituras, capellanias, aut Ecclesiastica officia, hæreditario jure valeat vindicare, aut expostulare (expoliare) præsumat. Quod si quis improbus, aut ambitiosus attentare præsumperit, debita pœna mulctabitur, et postulatis carebit.

« 17. Sane conjunctiones consanguineorum omnino fieri prohibemus; hujusmodi namque incestus, quod jam stimulante humani generis inimico, in usum versum est, sanctorum Patrum instituta, et sacrosancta Dei detestatur Ecclesia: leges etiam sæculi de tali contubernio natos infames pronuntiant, et ab hæreditate repellunt.

« 18. Pessimam siquidem et depopulatricem et horreudam incendiis malitiam auctoritate Dei, et beatorum Apostolorum Petri et Pauli, omnino detestatur et interdicimus. Hæc enim pestis, hæc hostilis vastitas omnes alias deprædationes exsuperat. Quæ quantum populo Dei sit damno, quantumque detrimentum animabus et corporibus conferat, nullus ignorat. Assurgendum est igitur et omnino laborandum, ut tanta perniciis pro salute populi eradicetur et extirpetur. Si quis igitur post hujus nostræ prohibitionis promulgationem, malo studio, sive pro odio, sive pro vindicta ignes apposerit vel apponi fecerit, aut appositoribus consilium vel auxilium tribuerit, excommunicatur. Et si mortuus fuerit incendiarius, Christianorum careat sepultura. Nec absolvatur, nisi prius damno cui intulit secundum facultatem suam resarcito, juret se ulterius ignem non appositurum. Pœnitentia ei detur ut Hierosolymis aut in Hispania in servitio Dei per annum integrum permaneat.

« 19. Si quis autem archiepiscopus hæc relaxaverit, damnum restituat, et officio episcopali absteineat.

« 20. Sane regibus et principibus faciendæ facultatem justitiæ, consultis archiepiscopis et episcopis, non negamus.

« 21. Presbyterorum filios a sacri altaris ministeriis removendos decernimus, nisi aut in cœnobiis aut in canonicis religiose fuerint conversati.

« 22. Sane quia inter cætera unum est, quod sanctam maxime perturbat Ecclesiam, falsa videlicet pœnitentia, confratres nostros et presbyteros commoneamus, ne falsis pœnitentiis lacorum animas decipiant, et in infernum pertrahi patiantur. Falsam autem pœnitentiam esse constat, cum spretis pluribus de uno solo pœnitentia agitur: aut cum sic agitur de uno, ut non discedatur de alio. Unde scriptum est¹: Qui totam legem observaverit, offendat autem in uno, factus est omnium reus, scilicet, quantum ad vilam æternam. Falsa

est autem pœnitentia, cum pœnitens ab officio vel curiali vel negotiali non recedit, quod sine peccatis agi nulla ratione prævalet; aut si odium in corde gestetur; aut si cuilibet offenso non satisfiat; aut si non offendentis offensum indulgeat; aut si arma quis contra justitiam gerat.

« 23. Hos qui religionis speciem simulantes, Domini Corporis et Sanguinis sacramentum, baptismis puerorum, sacerdotium, et cæteros Ecclesiasticos ordines, et legitimarum damnant fœdera nuptiarum, tanquam hæreticos ab Ecclesia Dei pellimus et damnamus, et per potestates cæteras coerceri præcipimus. Defensores quoque ipsorum ejusdem damnationis vinculo innodamus.

« 24. Illud quoque adjicientes præcipimus, ut pro chrismatis, olei sacri, et sepulture acceptione nullum venditionis pretium exigatur.

« 25. Si quis præposituras, præbendas, vel alia Ecclesiastica beneficia de manu laicali acceperit, indigne suscepto careat beneficio. Juxta namque decreta sanctorum Patrum, laici quamvis religiosi sint, nullam tamen habent disponendi de Ecclesiasticis facultatibus potestatem.

« 26. Ad hæc perniciosam et detestabilem consuetudinem quarundam mulierum, quæ licet neque secundum regulam beati Benedicti, neque Basilii, aut Augustini vivant, sanctimoniales tamen vulgo censi desiderant, aboleri decrevimus. Cum enim juxta regulam degentes in cœnobiis, tam in Ecclesia, quam in refectorio atque dormitorio communiter esse debeant, propria sibi ædificant receptacula, et privata domicilia, in quibus hospitalitatis velamine passim hospites et minus religiosos contra sacros et bonos mores suscipere nullatenus erubescunt. Quia ergo omnis qui male agit odit lucem, ac per hoc ipsæ abscondite in inistorum tabernaculo opinantur se posse latere ante oculos Judicis cuncta cernentis: hoc tam inhonestum detestandumque flagitium ne ulterius fiat, omnimodis prohibemus, et sub pœna anathematis interdicimus.

« 27. Similiter prohibemus, ut sanctimoniales simul cum canonicis sive monachis in Ecclesia, in uno choro convenient ad psallendum.

« 28. Obvultibus sane episcopis, quoniam ultra tres menses vacare Ecclesiam, Patrum prohibent sanctiones: sub anathemate interdicimus, ne canonici de sede episcopali ab electione episcoporum excludant religiosos viros, sed eorum consilio honesta et idonea persona in episcopum eligatur. Quod si exclusis eisdem religiosis electio fuerit celebrata, quod absque eorum assensu et conniventia factum fuerit, irritum habeatur et vacuum.

« 29. Artem autem illam mortiferam et Deo odibilem balistarum et sagittariorum, adversus Christianos et Catholicos exerceri de cætero, sub anathemate prohibemus.

« 30. Ad hæc ordinationes factas a Petro Leonis, et aliis schismaticis et hæreticis, evacuumus, et ir-

¹ Luc. 11.

ritas esse censemus ». Haecenus canones Romani Concilii sub Innocentio papa Secundo.

Cum igitur cuncta (ut audisti) fuerint abolita, quæ ab antipapa statuta fuissent et ordinala, ab eodem Innocentio papa in ordinem redacti sunt omnes cardinales Petri Leonis, et inter alios Petrus Pisan. cardinalis coryphaeus, qui (ut vidimus) per sanctum Bernardum ad Ecclesiam revocatus fuerat. Illicigitur cum cardinalatu privatus esset, idem sanctus Bernardus pro eo has breves ad Innocentium papam litteras dedit :

6. *Pro Petro cardinale Pisano intercedit S. Bernardus.* — « Quis mihi faciet iustitiam de vobis ? Si haberem iudicem, ad quem vos trahere possem, jam nunc ostenderem vobis (ut parturiens loquor) quid meremini. Extat quidem tribunal Christi ; sed absit, ut ad illud appellem vos, qui illic, si vobis necessarium et mihi possibile esset, vellem magis totis viribus stare, et respondere pro vobis. Itaque recurro ad eum, cui in presenti datum est iudicare de universis, hoc est ad vos. Vos appello ad vos : vos iudicate inter me et vos. In quo, quæso, puer vester tam male meruit de vestra paternitate, ut eum inurere et insignire placeret nota et nomine proditoris ? Numquid non me vestrum vicarium dignatus vestra constituit in reconciliatione Petri Pisani, si forte illum Deus per me revocare a lœce schismatis dignaretur ? Si negatis, probabo tot testibus, quot in curia tunc temporis fuerunt. Numquid non denique post hæc, juxta verbum Domini mei, homo in suo ordine et honore receptus est ? Quisnam ergo constantie vestre suo consilio, vel magis suo dolo surripuit indulta repetere, et quæ processere de labiis vestris, facere irrita ? Et hoc ego dixerim, non ut Apostolicum reprehendam rigorem, et zelum igne Dei succensum contra schismaticos, qui in spiritu vehementi conteras naves Tharsis, et instar Phinees confodiat fornicantes, juxta illud¹ : Nonne qui oderunt te, Domine, oderam, et super inimicos tuos tabescebam ? sed ubi non est par culpa, par plane non debet procedere poena : nec convenit eandem involvi sententia eum qui peccatum, cum his quos magis peccatum deseruit. Propter eum, qui ut peccatoribus parceret, sibi ipsi non pepercit, auferte opprobrium meum : et restituendo quem statuitis, vestræ etiam tam sanæ et integræ opinioni consulte. Super hoc jam alia vice scripseram vobis, sed quid non est responsum mihi, puto non pervenit ad vos hoc ipsum quod scripseram ». Haecenus ipse.

7. Quod autem ad eundem Petrum Pisanum spectat, magna fuisse Romæ auctoritatis hominem, significat quæ Joannes Saresberienensis, hujus temporis scriptor candidissimus, habet his verbis : « Quot et quantos tumultus et strages dedit illa collisio, quando filius Petri Leonis adversus Innocentium bonæ memoriæ II domini Hadriani præ-

decessorem, cujus vitam et felicitatem in ævum in se protendat Dominus, conatus est ab Aquilone ascendere ? Nonne et stellarum partem secum traxit ruina ejus ? Quis nescit Aegidium Tusculanum ? quis Petrum Pisanum, cui nullus aut vix similis erat in curia ? Quis recenset episcopos, qui in tota fere Italia corruerunt ? Profecto dum illius ruinae stabit ætate nostra memoria, incredibile est quemquam adeo misere ambitiosum, ut Ecclesiam scindere non formidet ». Hæc ipse. Quid autem factum sit de ipso Petro Pisano, nescimus : illud sane compertum, Innocentium ad cautelam futurorum, omni spe restitutionis voluisse reliquos nudare schismaticos.

8. *Arnaldus de Brixia cum suis erroribus damnatus.* — In hoc eodem magno, imo maximo Concilio Lateranensi, inter alia delata est accusatio adversus Arnaldum de Brixia recentem hæreticum, discipulum Petri Abailardi. De Arnaldo, sive Arnolphe vel Arnolpho (ita varie nominatus reperitur) hæc habet Otto Frisingensis sui temporis rerum gestarum scriptor² : « Accessit ad hujus seditiosi facinoris argumentum, quod Arnolphus (Arnaldus) quidam Brixienensis, de quo supra dictum est, sub typo religionis, et ut Evangelicis verbis utar, sub ovina pelle lupum gerens, Urbem ingressus ad factionem istam, (nempe ut revocaret antiquum senatum, cui et summam rerum committeret), rudis populi animis premoli dognate ad animositatem accensis, innumeram post se duxit, imo seduxit multitudinem. Arnaldus iste ex Italia, civitate Brixia oriundus, ejusdemque Ecclesiæ clericus, ac tantum lector ordinatus. Petrum Abailardum olim præceptorem habuerat : vir quidem nature non hebetis, plus tamen verborum profluvio, quam sententiarum pondere copiosus, singularitatis amator, novitatis cupidus, ejusmodi hominum ingenia ad fabricandas hæreses schismaticumque perturbationes sunt prona. Is a studio a Gallis in Italiam revertens, religiosum habitum, quo amplius decipere posset, induit, omnia laceans, omnia rodens, nemini parens, clericorum ac episcoporum derogator, monachorum persecutor, laicis tantum adulans. Dicebat enim nec clericos proprietatem, nec episcopos regalia, nec monachos possessiones habentes aliqua ratione posse salvari : cunctaque hæc principis esse, ab ejusque beneficentia in usum tantum laicorum cedere oportere. Præter hæc de sacramento altaris, baptismi parvulorum non sana dicitur sensisse. His alisque modis, quos longum est enumerare, dum Brixensem Ecclesiam perturbaret, laicisque terræ illius, prurientes erga clerum aures habentibus, Ecclesiasticas malitiose exponeret paginas : in magno Concilio Romæ sub Innocentio habito ab episcopo civitatis illius, virisque religiosis accusatur. Romanus ergo Pontifex, ne perniciosum dogma ad plures serperet, imponendum viro silentium de-

¹ Bern. Ep. CCXII. — ² Psal. CXXXVIII.

¹ Otto Frising. de reb. gestis Ind. imp. I. II. c. 20.

cernit. Sicque factum est. Ita homo ille de Italia fugiens, ad Transalpina se contulit, ibique in oppido Alemanniæ Turego officium doctoris assumens, perniciosum dogma aliquot diebus seminavit etc.» Subjicit de rebus ab eo gestis sub Eugenio post obitum Innocentii, cum Romam se contulit. Porro non inane Arnaldi prædicationem fuisse Romanis, sed renouasse senatum, et adversus propinquos Tiburtinos prælia cœpisse, inferius suo loco dicitur.

9. Sed haud ingratum erit Guntherum Ligu-
rinum versibus ita canentem audire, hujus tem-
poris scriplorem eximium¹:

Cujus origo mali, tantraque voraginis actor
Exiit Arnoldus (Arnaldus), quem brixia protulit ortu
Pestifero, tenui nutrit Galia sumptis,
Educitque diu: tandem natalibus oris
Redditus, assumpta sapientis fronte, disertio
Fall-bat sermone rudes, clerumque procaci
Insectans odio, monachorum acerrimus hostis,
Plebis adulator, gaudens popularibus auris,
Pontifices, ipsumque gravi corrodere lingua
Audebat papam, sceleratæque dogmata vulgo
Diffundens, variis implebat vocibus aures.
Nil proprium cleri fuodis et prædia, nullo
Jare sequi monachos, nulli fiesia jura
Pontificum, nulli curæ popularis honorem
Abbatum, sacros referens concedere leges.
Omnia principibus terrenis subdita, tantum
Committenda viris popularibus atque regenda.
Ilis primitias, et quæ devotio plebis
Offerat, et decimas castos in corporis usus,
Non ad luxuriam, sive oblectamina carnis
Cocedens, mollesque cibos, cultusque nitorem,
Illicitosque thoros, lascivique gaudia cleri,
Pontificum fastus, abbatum denique laxos
Damnabat penitus mores, monachosque superbos.
Veraque multa quidem, nisi tempora nostra fideles
Respuerent monitus, falsis admixte monebat;
Et fateor, pulchram fallendi noverat artem;
Veris falsa probans, quia tantum falsa loquendo
Fallere nemo potest: Veri sub imagine falsum
Infinit, et fortim deceptos occupat aures.
Ariculos etiam lutei certumque tenorem
Non satis exacta stolidus pietate fovebat,
Impia mellibus admixcens toxica verbis.
Ille suam vecors in clerum Pontificemque,
Atque alias plures adeo commoverat urbes,
Ut jam ludibrio sacer, extremoque pudori
Clerus haberetur. Quod adhuc, ni fallor, in illa
Gente nocet, multumque sacro detruncat honori.
Mox in Concilio Romæ damnatus ab illo
Præsule, qui numeros vetitum contingere nostros
Nomen ab innocua ducit laudabile vita.
Territus, et misere confusus imagine culpæ,
Fugit ab urbe sua, Transalpinisque receptus,
Quæ sibi vicinas Alemanniæ suspexit Alpes,
Nomen ab Alpino dicens (ut fama) Lemauno
Nobile Turegum, doctoris nomine falso
Insedit, totamque brevi sub tempore terram
Perfidus impure fedavi dogmatis aura.
Ualde venerator dudum corrupta sapore,
Et nimium falsi doctrina vatus inhaerens,
Servat adhuc nostræ gustum gens illa paternæ.

Hucusque de his quæ sub Innocentio facta
sunt, reliqua sub Eugenio suo loco inferius.

10. *Innocentius papa captivus factus a Roge-
rio, eundem regem Siciliae creat, dato diplomate,
unde pax juramento firmata.* — Hoc eodem anno

vix celebrato Concilio (quod præter sententiam ac-
cidit) post sacra Innocentio papæ bellica tractanda
fuerunt. Occasio ista præcessit, quæ in Chro-
nico Beneventano sæpe citato exacte describitur,
nimirum, quod hoc anno, ultima die mensis Apri-
lis, cum diem obiisset Rainulphus dux Apuliæ
S. R. E. feudatarius, Rogerius rex Siciliae, qui
hunc solum timere didicisset, ad invadendam
Apuliam magno comparato exercitu transfretavit,
pervenitque Salernum septima mensis Maii. Ita
certis diebus cuncta descripta habentur in Chro-
nico Beneventano a Falcone ejus temporis scriptore,
ista vidente: « Sublato igitur obice, Rogerius per-
currit Apuliam, omnibus civitatibus ipsi se sponte
dantibus præter Trojam ac Barum. Tunc autem
Innocentius papa, audita morte Rainulphi ducis, et
Rogerii tyrannica invasione, collectis copiis egres-
sus ab Urbe, compositurus res cum Rogerio usque
ad Sanctum-Germanum se contulit, oppidum ad
radices Cassini montis: ibique constitutus nuntios
pacis, sed dolosos suscepit a Rogerio, et alios ipse
ad Rogerium sincere legavit. Cum autem Pontifex
id in primis satageret, ut Roberto principi Capua-
nus principatus redderetur, et ille negaret se fac-
turum, idem Rogerius insidians Pontifici, clam
filium misit cum equitibus mille, qui Pontificem
e loco in alium transmigrantem a tergo invaderet,
atque aggressum captivum duceret: quod permit-
tente Deo, ex sententia accidit. Capitur Pontifex,
et non sine ignominia ducitur ad Rogerium die
decima mensis Julii. » Ita Chronicon Beneventanum,
ubi et hæc subjiciuntur: « O quantus luctus et mæ-
roris abundantia mentes fidelium et civitates omnes
invasit! quod si plenius scribere vellem, nec tem-
pus, nec dies sufficerent.

11. « Quid multa? continuo rex ille per lega-
tos suos Pontifici Innocentio, quem captivum tene-
bat, suppliciter et ultra quam credi potest, man-
davit humiliter, ut paci et concordiae manum
apponat. Apostolicus itaque se destitutum viribus
et armis, et desolatam adspiciens, precibus regis et
petitionibus assensit: et capitularibus et privilegiis
ex utraque parte firmatis, rex ipse et dux filius
ejus, et princeps decimo septimo die stante mensis
Julii, ante ipsius Apostolici præsentiam veniunt:
et pedibus ejus advoluti, misericordiam petunt, et
ad Pontificis imperium usquequaque flectuntur.
Continuo per Evangelia firmaverunt B. Petro et
Innocentio papæ, ejusque successoribus canonice
intransibus fidelitatem deferre, et cætera quæ con-
scripta sunt. Regi vero Rogerio statim Siciliae
regnum per vexillum donavit. » Petiit hoc Roge-
rius ut titulum regis Siciliae, quem male acceperat
ab Anacleto pseudopontifice, ab Innocentio
Catholica Ecclesiæ legitimo papa obtineret. Quod
idem licet in captivitate positus libere præstitit
Innocentius, suscepto ab eo pro ejusdem investi-
tura regni juramento fidelitatis de more. Testatur
hoc item Otto Frisingensis, titulum regium ab
Anacleto perperam impertitum, per Innocentium

¹ Ligu- de cest. Frid. t. I. III.

legitime concessum. Pergit Falco : « Duci filio Rogerii ducatum Apulie, principi alteri filio ejus principatum Capuæ largitus est. Die vero illa, in qua prædictus Apostolicus pacem cum rege firmavit, beati Jacobi Apostoli festività celebrabatur, septimo kalendas Augusti ». Ilæc autem omnia perpaucis Otto Frisingensis ita perstrinxit¹ : « Rogerius Innocentium papam in Apuliam cum militia Romanorum venire volentem, flagitiose in Christum (Dominum) Deum manum mittens ex insidiis cepit, et regii nominis in Sicilia ab eo auctoritatem, et absolutionem anathematis extorsit cum ducatu Apulie, Calabrie, ac principatu Capuæ ». At ne videretur probare et confirmare quod fecisset antipapa, ad conferendam Rogerio regiam dignitatem usum se exemplo prædecessoris Honorii pape, qui insignierat eundem Rogerium titulo ducis, professus est in Diplomate a se dato. Extat ipsum vi extorlum Innocentii pape de titulo regis eidem Rogerio hoc anno Julii mense concesso Diploma, quod descripsimus ex Codice Basilicæ S. Petri in Vaticano, in quo Epistolæ extant diversorum Romanorum Pontificum; quod sic se habet :

12. « Innocentius episcopus, servus servorum Dei, charissimo in Christo filio Rogerio, illustri et glorioso Siciliæ regi, ejusque hæredibus in perpetuum.

« Quos dispensatio divini consilii ad regimen et salutem populi ab alto elegit, et prudentia, justitia, aliarumque virtutum decore decenter ornavit, dignum et rationabile est, ut sponsa Christi sancta et Apostolica Romana mater Ecclesia affectione sincera diligit, et de sublimibus ad sublimiora promoveat. Manifestis siquidem probatum est argumentis, quod egregiæ memoriæ strenuus et fidelis miles B. Petri Robertus Guiscardus prædecessor tuus, dux Apulie, magnificos et potentes hostes Ecclesiæ viriliter expugnavit, et posteritati suæ dignum memoria nomen, et imitabile probitatis exemplum reliquit. Pater quoque tuus illustris recordationis Rogerius per bellicos sudores et militaria certamina inimicorum Christiani nominis intrepidus extirpator, et Christiane religionis diligens propagator, utpote bonus ac devotus filius, multimoda obsequia matri suæ S. R. E. impertivit. Unde et prædecessor noster religiosus et prudens papa Honorius nobilitatem tuam de prædicta generositate descendente intuitus, plurimum de te sperans, et prudentia ornatum, justitia munitum, atque ad regimen populi te idoneum esse credens, valde dilexit, et ad altiora provexit.

13. « Nos ergo ejus vestigiis inherentes, et de potentia tua ad decorem et utilitatem sanctæ Dei Ecclesiæ spem atque fiduciam oblinentes, regnum Siciliæ, quod utique (prout in antiquis refertur historiis) regnum fuisse non dubium est, tibi ab eodem antecessore nostro concessum, cum in-

gritate honoris regii et dignitate regibus pertinente, excellentiæ tuæ concedimus, et Apostolica auctoritate firmamus. Ducatum quoque Apulie tibi ab eodem collatum, et insuper principatum Capuanum integre nihilominus nostris favoris robore communimus, tibi que concedimus. Et ut ad amorem atque obsequium B. Petri Apostolorum principis et nostrum ac successorum nostrorum vehementius adstringaris, hæc ipsa, id est, regnum Siciliæ, ducatum Apulie, et principatum Capuæ, hæredibus tuis, qui nobis et successoribus nostris (nisi per nos et successores nostros remanserint) ligium homagium fecerint, et fidelitatem quam tu jurasti, juraverint, tempore videlicet competenti, et loco non suspecto, sed tuto nobis et ipsis, atque salubri, duximus concedenda; et cosque super his, que concessa sunt, Deo propitio manebimus. Quod si per eos forte remanserint, iidem hæredes tui nihilominus teneant quod tenebant sine diminutione. Census autem, sicut statutum est, id est, sexcentorum schifatorum, a te tuisque hæredibus nobis nostrisque successoribus singulis annis reddatur, nisi forte impedimentum interveniat: removen- te vero te impedimentum, nihilominus persolvetur. Tua ergo, fili charissime, interest ita te erga honorem atque servitium matris tuæ S. R. E. devotum et humilem exhibere, ita tenetissimum in ejus opportunitatibus exercere, ut de tam devoto et glorioso filio Sedes Apostolica gaudeat, et in ejus amore quiescat. Si qua sive Ecclesiastica secularisve potentia luic nostræ concessionis temere contraire tentaverit, donec præsumptionem suam congrua satisfactione coercuit, indignationem Dei omnipotentis et beatorum Petri et Pauli Apostolorum ejus incurrat, et quousque resipuerit, anathematis sententia percellatur. Amen.

« Ego Innocentius Catholice Ecclesiæ episcopus.

« Ego Albericus Ostiensis episcopus.

« Haimericus S. R. E. diaconus cardinalis. Datum in territorio Mamanensi (Marianensi) per manum H. cancell. sexto kalendas Augusti, Indictione secunda, Incarnationis Dominicæ anno millesimo centesimo trigesimo nono, Pontificatus vero domini Innocentii pape Secundi anno decimo ». Hactenus Diploma Innocentii. Quæ autem hæc sint secuta, Beneventanum scriptum antiquum Chronicon ita docet :

14. « His actis, missæ solemnibus celebravit Apostolicus ipse, et habito sermone, satis abunde de pacis continentia tractavit. Lætitia igitur et gaudii abundantia universos invasit, celorum regem magnificantes, super pace firmata atque concordia lætati sunt. Beneventanus itaque populus pacem audient firmatam, et regem voluntati Apostolici juramento alligatum, tanto gaudio et exultatione triumphat, ut si ex toto describerem, delicerem tempore et locutione. Apostolicus igitur, pace firmata cum nominato rege, Beneventum ingressus est die kalendarum Augustarum, quem Bene-

¹ Otto Frising. l. vii. c. 21, in fin.

ventanus populus honore multo et devotione cordis suscipiens, quasi B. Petrum in carne adspiciens letabatur, et valde gaudebat. Rex autem foris civitatem Beneventanam castrametatus est. Qui rex usque ad portam Sancti-Laurentii dominum Apostolicum est comitatus. Die vero ipsa ad vesperam rex ipsam civitatem ingreditur, et curiam domini papae ascendens, cum eo aliquantulum est moratus. Deinde ad episcopium pergens, et beate Mariae Basilicam et Bartholomaei Apostoli ingrediens, pro salute sua oravit. Intravit quoque monasterium Sanctae-Sophiae, et ante altare Sancti-Mercurii se prostravit. Inde procedens claustra monasterii et dormitorium et refectorium perambulavit; et monachorum orationibus se commendans, civitatem exivit per Portam Summam, et ad castra gaudens remeavit. Rossimanus autem, qui contra voluntatem Apostolici archiepiscopi a Petro Leonis fuerat consecratus, jam alias expulsus, et iterum reversus, iterum expulsus est, et miser ipse cum domino rege festinavit; et his actis castellum, quod ipse Rossimanus ad Portam Summam fabricari jussit, dominus papa destruxit. Et in his diebus cives Neapolitani venerunt Beneventum, et civitatem Neapolitanam ad fidelitatem domini regis tradentes, ducem filium ejus duxerunt et ejus fidelitati colla submiserunt. Et inferius de eodem Innocentio papa: « Die vero Assumptionis sanctae Mariae, et in passione sancti Bartholomaei ad episcopium descendit, et missarum solennia honorifice celebravit. Et his peractis, praedictus Apostolicus a Romanis saepe vocatus, secundo die stante mensis Septembris, Romam repedavit, relicto Gregorio archiepiscopo Beneventano in sua Ecclesia, et Guidone diacono cardinale constituto rectore ejusdem Beneventanae civitatis. Audiens autem populus Romanus domini papae Innocentii adventum, celeratim obviam exivit, et illum gaudio magno et honore suscepit. Deinde cum hortabatur, ut pacem quam cum rege posuerat, consilio eorum confringeret: Apostolicus autem nullo modo petitionibus eorum consentire voluit. Dicebat quidem sic Domino placuisse, quod per ejus captivum pax hujusmodi facta fuisset. » Haec Falco de Innocentio.

43. Et sane loco miraculi habitum est, quod Innocentius papa captivus ductus, et sub libera potestate regis, imo hactenus tyranni crudelissimi constitutus, qui cum adeo provocasset, et per Lotharium imperatorem saepe vicisset, ac per ducem Apuliae Rainulphum saepe superasset (omnium namque bellorum promotor ipse ob recuperanda Ecclesiae bona fuerat) nihilominus ab eo omnem reverentiae et honoris cultum acceperit, et fidelitatis juramentum pro investitura regni Siciliae, et a filijs pro ducatu Apuliae, et principatu Capuano, quos jam illi sibi armorum potentia vindicassent et pacifice possiderent, tanquam a victis et superatis extorserit. Cum tanta fuisset in hanc usque diem in tyranno ferocitas, et insita natura crudelitas; adeo aucta est ipsa, ut hostibus nec quidem

parceret defunctis. Nam addit Otto Frisingensis¹, hujus saeculi scriptor et veritatis amantissimus, quod ducis Rainulphi nuper defuncti (nominat ipsum Reginaldum) necnon Brunonis episcopi cadaver, quos vivos habuerat inimicos, e sepulchro educta per plateas trahi jusserit. Sed de cadavere Rainulphi ducis ita exacte in Beneventano Chronico:

16. « Episcopus autem Trojanæ civitatis Wilhelmus, et populus civitatis, legatos prefato regi miserunt, rogantes ut ingrederetur civitatem, et inter fideles suos amicos honeste maneret et securus. Rex vero legatis acceptis: Non civitatem, inquit, ingrediari, donec traditor ille Rainulphus inter vos manserit. Continuo qui missi fuerant, in civitatem regressi, regis intentionem omnibus patefaciunt. Cum eis autem et suos rex ad hoc perficiendum misit. Et licet dolore commoti cives fuerint ex tanta regis responsione, quatuor tamen militibus praeceperunt, ut sepulchro aperto, cadaver ipsius Rainulphi extraherent, illudque extra civitatem educerent, ut furore regis sedato, et eos pacificus ingrederetur. Jusserunt etiam inimici prefati ducis cuidam militi, nomine Gallicano, qui ducis illius fidelissimus fuerat, ut ipse ob injuriam ducis defuncti, et ejusdem Gallicani dolorem, tumulum frangeret, et ducis ossa et pelle et fetore adhuc circumposita manu sua extraheret. Qui Gallicanus timore coactus, ne tanti regis furorem incurreret, fecit quod praeceptum erat, et fune iisdem alligato, eadem per plateas traxerunt iidem ducis inimici usque ad castellum extra civitatem, et in stagnum lutosum et putridum projecerunt ipsum ducis cadaver. » Haec Falco, plura addens in detestationem tanti facinoris Christiano homine prorsus indigni, cum et ethnici complures suis hostibus honorifica exerxisse sepulchra inventiuntur.

17. *S. Petri Cluniacensis et S. Bernardi litterae gratulatoriae et hortatoriae ad Rogerium.* — Quod igitur tam crudelem hominem barbarum dirumque tyrannum reddiderit sibi Innocentius captivus mitem, humanum, urbanum, piique regem, ut acciperet ab eo cultum, honorem et reverentiam; imo et juramento firmatam subjectionem, juratamque fidelitatem, quis tribuat humanae prudentiae, et non potius divinae potentiae? Qua factum, ut non sicut Samson², qui e leonis mortui capite mellis favum acceperit, sed majori ipse miraculo e vivente et rugiente leone pradam eliceret, quam teneret unguitibus, exarmaret et dentibus, et victus ipse licet vincenti ac vincienti leges suae praecriberet libertatis, ipsique neceret vincula quae vellet juramenti religione constricta. Ita plane vincere consuevit Ecclesia, et conculcata consurgat, et depressa comprimat, atque humiliata extollatur in altum. Tunc et adgavisi sunt boni omnes bono pacis. Tunc et ad eundem Rogerium de his litteras dedit Petrus Cluniacensis abbas³, de regio

¹ Otto Frising. l. vii. c. 23. — ² Jud. xvi. — ³ Pet. Cl. l. iv. Ep. lrv.

titulo ipsi ab Apostolica Sede collato per Innocentium gratulatus :

« Illustri et glorioso regi Siciliae, domino et amico Rogerio, frater Petrus humilis Cluniacensis abbas, salutem ab eo qui dat salutem regibus.

« Per me, ait Dei Sapientia¹, reges regnant, et legum conditores iusta decernunt. De quorum numero quia vos esse celestis censura censuit, eidem supernae moderationi, quas possumus gratias agimus; non tantum quia sublimitatem vestram magnis populis praeiulit, sed quoniam maxime eisdem populis vos preferendo providit. Inde enim laetamur, inde in Domino gloriamur, inde celsitudinem vestram, etsi vultu incognitam, verè dilectionis brachiis amplectimur : et ut ad honorem nominis sui, ad salutem populi sui omnipotens Salvator vestram regalem potentiam magnificet et conservet, humiliter et frequenter precamur. Quis enim non gaudeat, quis non totis viribus, si necesse fuerit, collaboret, ut post tantos bellorum et malorum turbines tam profunde (proficue) pacis bonum a Deo per vos Siculis, Apulis, Calabris, multisque aliis gentibus collatum, conservetur, augeatur, dilatetur? Quis Ecclesiae Dei se membrum agnoscens, de tantarum Ecclesiarum tam inconcussa et stabili pace per vos (ut dixi) et restituta et conservata in Domino non exultet? Quis audiens clericis, monachos, milites, rusticos, onustos pecuniis et diversis mercibus mercatores, omneque genus hominum in terra vestra manentium, aut per eam transeuntium, tyrannorum, raptorum, insuper ipsorum latronum omni timore sublato, sua omnia pacifice obtinere? quis, inquam, tanta bona per unum bonum principem tot tantisque hominum generibus impendi audiens, non quas potest Regi regum gratias agat; et ut tali regi regnum ab eo conservetur et augeatur, imploret?

« Ista me (ut dixi) ad vos amandum primitus impulerunt : ista ut inter magnos reges, Romanos dico, Francos, Anglos, Hispanos, maximos Cluniacensis Ecclesiae amicos et benefactores, vos quoque admitterem, coegerunt. Ea de causa jam ex multo tempore pro pace, pro honore, pro salute vestra, et apud Deum precatorem, et apud homines praedcatorem me constitui, et ad idem agendum, tam de nostris, quam de alienis, quos potui attraxi. Testis est horum conscientia mea, testis Romanus cancellarius, testis et ipse dominus papa, quem Pisis, quem Romae, quem intra Gallias constitutum, praesens verbis, absens litteris de pace vestra saepe conveni, et ne inimicis vestris vestram pacem, ejusque perturbantibus crederet, et rogavi et monui. Quod licet diu dilatatum, sed nunc tandem ad effectum perductum, nos et omnes quicunque audire poterunt, pacis amatores letificat, et ad gratiarum actiones Deo persolvendas invitat. Rogo ergo, et in quantum possum, vos ut clarissimum

et sublimem amicum admonco, ut hanc pacem pastoris vestri ac summi Ecclesiae Dei magistri toto affectu amplectamini, toto annisu retinere studeatis : quatenus et ipse (Innocentius scilicet) de vobis, sicut de optimo et speciali filio; et vos de ipso, sicut de benigno et singulari patre in spiritualibus pariter et temporalibus gaudeatis. Huicque de his Petrus ad Rogerium regem. Misit vero rex Gaufridum monasterii Cluniacensis praefectum in Sicilia, quod unicuique vobis extabat ejus Ordinis, ad ipsum Petrum cum litteris, cui et ad eum eas quas vidimus litteras reddidit, commendans in fine suos ibi positos Cluniacenses.

18. Sed et sanctus Bernardus, qui ante reconciliationem ipsius cum Romana Ecclesia, eum non nisi tyrannum nominare consueverat, ubi ista audivit de iuncta cum Ecclesia Romana concordia, ad eum scribens, salutaria monita impertitur, sic exordiens¹ :

« Longe lateque satis dilatata est magnificentia vestra super terram. Etenim gloria nominis vestri quos fines non attingit? Sed audite consilium diligenti vos : studeite quod in vobis est, hanc ipsam gloriam referre ad illam a quo est, si non vultis eam perdere, aut certe perdi ab ea. Hoc autem sic fiet, si inter eos, quos regie magnificentiae celebris opinio evocat de longinquo, discretiorum oculum aperitis, manumque extenditis non tam cupidis quam egenis. Et vere beatus qui intelligit non super cupidum, sed super egenum etc.» Commendat enim quemdam egentem, cujus causa eam scribit Epistolam.

19. *Cistercienses missi in Siciliam, unde Rogerius valde proficit.* — Porro idem rex cogitans quae Dei sunt, magnopere optavit in Sicilia Cistercienses habere monachos, quos expetivit ab eodem S. Bernardo, quem cuperet praesentem adesse, et monasterium edificare. Cui in eo consensit S. Bernardus, ut mitteret ad eum monachos Cistercienses : sed excusat quod ipse non venerit, istis verbis² : « Si me quaeritis, ecce ego et pueri mei, quos dedit mihi Deus; fertur namque mea humilitas invenisse gratiam apud regiam maiestatem, ita ut quaerat videre me. Et quis ego sum, ut dissimulem beneplacitum regis? Accurro, et qui querebar, ecce adsum, non in praesentia corporis infirma, in qua despexit Dominum Herodes; attamen in visceribus meis. Nam quis me separabit ab his? sequar eos quocumque ierint; etsi habitaverint in extremis maris, non erunt absque me. Habes, rex, lumen oculorum meorum, habes cor meum et animam meam. Quid si modicum nostri abest? corpusculum loquor, vile istud mancipium, quod etsi voluntas exponeret, sed retineret necessitas. Non valet sequi volentem animum, quoniam infirmum est, et solum pene illi superest sepulchrum etc.» Misit ergo petenti regi collegium monachorum Cisterciensium sub regimine magistri Brunonis,

¹ Prov. VIII.

² Bern. Ep. CCVII. — ² Ibid. Ep. CCVIII.

virī admodum probati atque selecti, ab eodem Bernardo mirifice commendati¹.

20. Profecit ex his plane Rogerius, atque adeo, ut magnopere a Petro Cluniacensi meruerit commendari Epistola ad eum scripta, sed citra adulationem, ut ipse testatur. Quam hic ex parte recitandam putamus, ut ejus cujus plurima retulimus mala, bona etiam a sanctis viris decantata in medium afferamus. Sic enim se habet²:

« Glorioso ac magnifico principi Rogerio Sicilia regi, frater Petrus humilis Cluniacensium abbas, bonorum regum dignitatem et gloriam.

« Gratias omnipotenti Regi regum, qui sublimitatem vestram, inter universos Christiani orbis reges ac principes quadam specialis magnificentia gloriæ insignivit, quadam gloriosi nominis fama singulariter exaltavit. In tantum ut cum plures regii nominis habeatis consortes, magnanimitate, prudentia, probitate nullos, aut pene nullos habere inveniamini pares. Indicat hoc Sicilia, Calabria, Apulia, et non modica sui parte in quibusdam aliis regionibus subjecta vobis Italia. Quæ cum ante vestra tempora, vel receptacula essent Saracenorum, vel foveæ prædonum, vel speluncæ latronum, nunc gratia misericordis Dei incitante studia vestra, juvante labores vestros, factæ sunt pacis domicilium, tranquillitatis hospitium, et velut alterius pacifici Salomonis, pacificum ac jucundissimum regnum. Utinam (quod secretorum omnium cognitore Deo teste non adutans dico) utinam, inquam, miserabilis atque infelicitus Tusciæ partes felici vestro imperio cum adjacentibus provinciis adjungerentur, et res perditissimæ pacifico regni vestri corpori unirentur! Vere non tunc sicut nunc res diviæ atque humanæ nullo servato ordine confunderentur, non urbes, non castra, non burgi, non villa, non strata publicæ, non ipsæ Deo consecratæ Ecclesiæ homicidis, sacrilegis, raptoribus exponerentur. Non pœnitentes, non peregrini, non clerici, non monachi, non abbates, non presbyteri, non ipsi supremi ordinis sacerdotes, episcopi, archiepiscopi, primates, vel patriarchæ in manus talium traherentur, spoliarentur, distraherentur. Et quid dicam? verberarentur, occiderentur.

21. « Hæc plane universa multaque his similia tam nefanda, tam execranda justitiæ regiæ gladio succisa cessarent: ursorum, pardorum, luporum ungulæ rapaces languerent, et ut de beato ac ma-

gno viro Job dictum est¹: Omnes bestię agri, quæ nunc in prædam insanunt, pacificæ nobis essent. Sed luit adhuc scelerum pœnas, et gemit misera terra sub flagello divino, quia in his omnibus nondum est aversus furor Dei, sed adhuc manus ejus extenta. Spem tamen maximam gero, et in Jesu salutari meo omniumque suorum confido, quod multorum id desiderantium pauperum desiderium exaudiet Dominus², et præparationem cordis eorum audiet auris ejus. Sed ne forte quorundam hominum, et ex semetipsis alios metientium corrupta corda me in corde et corde loqui, aut venditorem olei suspiciuntur, reprimendus est sermo, ne si casu ad aliquem talium Epistola vobis missa pervenit, meditentur inanità et suspiciuntur falsa. Novit enim testis et conscius meus in excelsis, me neque aliter loqui quam sentio, neque ob aliud (ut et notum vobis sit) id me sentire quod sentio; et ut regalis nobilitas vestra magis ac magis anime-tur ad meliora, agnoscens me ista quæ dixi, multosque mecum sentire. Nam ut sæpe majestati vestræ mandavi, et verum est: his de causis, ante viginti annos super omnes reges et principes temporis nostri, uno excepto, qui mortuus est, ut pacis amatorem et scelerum vindicem sinceriter dilexi, et hujusmodi affectum vobis usque ad ultimum diem servare proposui. Hæc de causa in conspectu Romanorum Pontificum, regum, principum, majorum, sive minorum hæc atque similia vestra bona semper extuli, et personam vestram regnumque omnipotenti Deo, religiosisque tam nostris, quam aliis congregationibus studiosissime commendavi. Sed de eis hactenus. Ista Petrus, sincero (ut vidisti) corde de Rogerio fatetur ac prædicat.

Innocentius autem, rebus ita compositis, lætus cum suis est reversus in Urbem, ubi in gratiarum actionem Deo, Deique genitrici Mariæ, quavis fornice triumphali augustiorem erexit Ecclesiam a fundamentis. Hoc namque anno sui Pontificatus decimo collabentem vetustate Basilicam S. Mariæ trans Tiberim, memoria Callisti papæ erectoris, et aliorum positorum ibi martyrum corporum, et fontis oleum scatulentis antiquo miraculo celeberrimam dejecit, et ea qua apparet hodie amplitudine, fortitudine, atque decore insigniter excitavit. Ita ejus Ecclesiæ docent vetera monumenta.

¹ Job. v. — ² Isa. v. ix, x.

¹ Bern. Ep. ccix. — ² Petr. Clun. l. v. Ep. xxxiv.

Atto periodi Græco-Romanæ 6632. — Anno Ære Hispan. 1177. — Anno Hegire 534, inchoato die 28 Aug. Fer. 2. — Jesu Christi 1139.

— Innocentii II pape 10. — Lotharii reg. 2. Joannis Comneni imp. 22.

1. *Conradus anno superiori rex Rom. electus.* — A num. 1 ad 4. *Conradus*, Henrici imp. hujus nominis V nepos ex Agnete sorore, qui imperante Lothario sese imperatorem dixerat, ut suo loco vidimus, non hoc anno, ut habet Baronius, sed superiori Romanorum rex renuntiatus est, ut Otto Frisingensis, ejus verba recitat Baronius, declarat; ait enim: « Anno ab Incarn. Dom. mcxxxviii, (defuncto sine filiis imperatore Lothario) conventus generalis principum Moguntiae in proxima Pentecoste indicitur ». Tum ait, *circa mediam Quadragesimam Confluentiae* a quibusdam principibus, praesidente Thednino cardinali ac S. Sedis legato, Conradum electum fuisse Romanorum regem. Idem habet Trithemius in Chron. Hirsaug. et longe ante eum Dodechinus in Chron. qui ad an. mcxxxviii ait: « Conventus principum apud Confluentiam urbem factus est in cathedra Sancti-Petri, ubi Conradum, Henrici imp. ex sorore nepotem, regem constituerunt. Qui deinde mediae Quadragesimae Dominico die, a Dieuvino (legendum Thednino) cardinale Aquisgrani civitate constitutus est », sed legendum, *coronatus est*. Porro, ut statim ostendo, Dodechinus abbas in die conventus habiti errat. Baronius citata Ottonis Frisingensis verba legens, existimavit eum asserere, *Lotharium* an. mcxxxviii fato functum esse; cum tamen an. mcxxxviii non ad Lotharii mortem, sed ad conventum Moguntinum Otto referat, supponatque Lotharium sub finem anni mcxxxviii e vivis abiisse, et ejus hac de re verba inter duas parentheses, uta nobis factum, includenda sint.

2. *Refellitur opinio contraria.* — Posset objici locus Orderici lib. 13. pag. 945, qui ait, Anacleto mense Januario anno mcxxxviii demortuo, *sequenti mense* famam personuisse « quod Rogerius Apuliae dux defunctus esset, quem praefatus schismaticus (scilicet Anacletus) regem consecraverat, dataque sorore sua sibi ad perturbandum Ecclesiae jus acceperat. Porro Lotharius imp., ut Rogerius occasum audivit, in Apuliam festinavit ». At Ordericus dupliciter errat. Primo, cum vult *Lotharium* mortuo Anacleto in Apuliam ingressum esse; certum enim est, id ante hujus pape mortem accidisse. Secundo, cum asserit, ruuorem de morte Rogerii

regis mense Februario anni mcxxxviii sparsum esse; cum jam anno mcxxxv id contigisse demonstraverimus. Quare Ordericus dum de rebus sua aetate gestis verba facit, cum magna cautela legendus.

3. *Conradus post cathedram S. Petri anno superiori rex electus.* — *Conradum* anno superiori, non vero praesenti, Romanorum regem electum esse, ideoque et *Lotharium* anno mcxxxviii denatum, varia Conradi Diplomata certum indubitatumque reddunt; in illis enim primus Conradi regni annus non a praesenti, sed ab antecedenti deducitur. Contentus hic ero duo memorare. Unum quod extat lib. 2 Hist. metropolis Rhemensis c. 44, cui subscribit « Theduinus Sanctae-Rufinae cardin. et Apostolicae Sedis legatus ». Tum legitur: « Signum domini Conradi invictissimi regis, Arnulphus cancellarius vice summi cancellarii. Moguntini script. et subscript. Coloniae III idus Aprilis, anno mcxxxviii ». Ex eo enim necessario sequitur, exente anno mcxxxviii vivere desiisse, et *Conradum* anno mcxxxviii regem Romanorum electum fuisse. Alterum Diploma profert Trithemius in Chron. Hirsaug. datum ab Embricone Herbipolensi episcopo, in cujus fine legitur: « Acta sunt haec anno Incarn. Dom. mcxxxix, Indict. secunda, regnante Conrado, anno primo regni ejus. Data Wirseburg. per manum Gebhardi IV kalend. Martii », id est, die xxvi mensis Februarii. Quibus ex verbis duo eruo. Primum, *Conradum* anno superiori regem renuntiatum esse; cum hoc anno ante Quadragesimam die viii Martii inchoatam jam regnaret, et juxta Ottonem Frisingensem *circa mediam Quadragesimam* rex dictus fuerit. Secundum, errasse Dodechinum abbatem quando scripsit, eum *in cathedra S. Petri*, seu die xxii Februarii anni mcxxxviii electum, quia hoc anno die xxvi ejusdem mensis annum primum regni sui adhuc numerabat. Caeterum *Conradus* in Diplomati modo dicitur *Conradus III*, modo vero *Conradus II*, quia tertius hujus nominis fuit inter reges Germaniae, et secundus inter reges Romanorum; quo pacto etiam *Henricus* aliquando Quartus et aliquando Quintus appellatus reperitur.

4. *Concil. Lateran. II Oecumenicum.* — A

num. 4 ad 10. Celebratum hoc anno *Concilium Lateranense II*, quod inter Œcumenica decimum numeratur, cui mille circiter Patres interfuerunt, ut Otto Frisingensis a Baronio laudatus, et abbas Urspergensis testantur. De anno inter omnes convenit; diem vero notavit Falco in Chron. Benevent. qui ait, illud habitum *octavo die intrante mensis Aprilis*. Sed ex Ottone Frisingensi, Urspergensis abbate, et Orderico clicio, loco *octavo die*, legendum esse *secundo die*. Scriptores enim Iudati tradunt, illud habitum *proxima media Quadragesima*, ut Otto, vel *mediante Quadragesima*, ut Urspergensis, vel in *medio Quadragesimæ*, ut Ordericus; dies vero octavus Aprilis incidit hoc anno in sabbatum ante Dominicam de Passione, et Concilium de more feria secunda inchoatum die præcedenti, nempe secunda Aprilis, prævis ad Deum precibus destinato. Verba Orderici infra recitabo.

5. *Pauci episcopi et abbates Angliæ Concilio interfuerunt.* — Ricardus prior Hagustaldensis in Hist. de Gestis regis Stephani, postquam de legatione Alberici Ostiensis episcopi anno superiori ab Innocentio in Angliam missi locutus est, de Concilio Lateranensi hæc habet: « Anno mccccxix, perfectis negotiis suis in Anglia sepe dictus legatus, mox post octabas Epiphaniæ cum suis ad mare reversus transfretavit. Nam ad prædictum Concilium domni pape tempore congruo pervenire properavit. Theobaldus quoque Cantuariensis archiepiscopus, et Earnulphus Roffensis, et Simon Wigorniensis, Rogerius Coventrensis, Robertus Excestruensis. Isti quinque episcopi, et cum illis quatuor abbates, pro omnibus episcopis et abbatibus Angliæ ad idem Concilium iverunt. Namque rex Stephanus propter turbationem regni sui, quæ gravis tunc imminabat, plures illic mittere noluit. Præterea bonæ memoriæ Turstinus Eboracensis archiepiscopus, et propter Concilium et propter quædam alia privata negotia, quæ per illum facere disponebat, Ricardum abbatem de Fontibus eximie virtutis virum, de quo superius mentionem fecimus, illic direxit. Namque, sicut vulgo dicebatur, de sede sua seipsum deponere, et germanum fratrem suum Andoenum nomine Eboreicensem episcopum pro se archiepiscopum Eboraci substituere cogitaverat. Sed interim dum hæc parabantur, et nuntius ejus infectis negotiis Romæ defunctus est, et frater ipsius sumpto ante mortem suam religioso habitu canonicorum apud Meretum de hac vita migravit. Verum Cantuariensis archiepiscopus cum suo pallio, et prædicti episcopi et abbates, finito Concilio et confectis negotiis suis, sani et incolumes redierunt ».

6. *Laudatur Ricardus abbas Fontanensis, qui Concilio interfuit.* — Jam autem Ricardus ad annum mccccxvii, Albericum legatum in Angliam proficiscentem, abbatem Molesmuni cenobii cum pluribus monachis, et Ricardum monasterii ad Fontes abbatem, *magnæ religionis et auctoritatis*

virum secum duxisse scripserat. Agit de monasterio ad Fontes, et de Ricardo primo ejus abbate Manrius in Annual. Cisterce, ad annum mccccxii, cap. 8, sed quia ejus tempore Seldenus nondum in lucem emiserat decem historicos Anglicos, inter quos Ricardus prior Hagustaldensis comprehenditur, mox narrata scire non potuit. Monasterium illud in agro Eboracensi situm erat, et Ricardus cum quibusdam aliis Eboracensibus monachis studio majoris perfectionis ad Cisterciense institutum commigrarat anno mccccxii. Divus Bernardus Epistola xcv ad Turstinum archiep. Eboracensem eo anno data, charitatem et beneficentiam ejus erga præfatos religiosos laudat, et in Epistola xcvi, eodem tempore ad Ricardum Fontanensem abbatem, et socios ejus qui de alio Ordine ad Cisterciensem transierant scripta, laudat eos ob renovationem religiosæ disciplinæ, et denique tom. i Monastici Anglic. pag. 733 et seqq. horum monachorum fervor ex cœtaneo auctore describitur, et summo pere laudatur. Quæ obiter dicta sunt.

7. *Ordinationes ab Anaæto factæ rescinduntur.* — In Concilio Lateranensi quatuor præcipue agitata. Primum, acta Petri Leonis rescissa sunt, et ordinationes ejus annullatæ canone xxx, cujus hæc sunt verba: « Ad hæc, ordinationes factas a Petro Leonis, et aliis schismaticis et hæreticis, evacuamus et irritas esse censuimus ». Qui canon quomodo intelligendus sit, docet chronographus Mauriniacensis pag. 383 et seq. qui postquam recitavit Orationem ab Innocentio II in Synodo Œcumenica habitam subdit: « Illis et hujusmodi assertionibus dominus Apostolicus cæteris prælatis divini sermonis laxos impertiens, omnibus propatula ratione ostendit, quod Petrus Leonis non aliorum assentatione, imo rapina se Apostoli Petri vicario fecisset æqualem. Cunctisque religiosis viris, quibus illud detestabile schisma displicuerat, verbis ejus cum magna laude unanimiter acclamantibus, respondit: Unde quia inordinate persone inordinata sunt decreta, quodcumque ille statuerat destruimus, quoscumque exaltaverat degradamus, et quosque consecraverat exordinamus et deponimus. Et quicumque per Girardum Engolismensem ad altaris officium accesserunt, Apostolica auctoritate interdicimus, ne ipsum impliceant, et in illo ordinis gradu perenniter demorantes ad superiorem non ascendant. Illis dictis, singulos, quos reos cognoverat, propriis nominibus exprimens, eosque cum indignatione et jurgio exprobrans, pastorales baculos de manibus violenter arripuit, et pontificalia pallia, in quibus summa dignitas consistit, de humeris verecundose abstulit. Ipsos quoque annulos, in quibus ad ipsos pertinens Ecclesiæ desponsatio exprimitur, sine respectu misericordiæ abstulit ».

8. *Rogerius rex excommunicatur.* — Secundo, in hoc Concilio Lateranensi « vinculis excommunicationis alligavit Rogerium prædictus Apostolicus Innocentius, in præsentia omnium Catholicorum

rum virorum qui convenerunt, et omnes ejus sequaces », ut inquit Faleo in Chron.

9. *Arnaldus et sectatores damnantur.* — Tertio, *Petrus de Bruis*, et *Arnaldus de Brizia* discipulus ejus, qui errores ipsius instauravit et propagavit, damnati sunt canone Concilii Lateranensis xiii: « Eos, qui religiositatis speciem simulantes, Domini corporis et sanguinis sacramentum, baptismum puerorum, sacerdotium, et cæteros Ecclesiasticos ordines, et legitima damnant fœdera nuptiarum, tanquam hæreticos ab Ecclesia Dei pellimus et damnamus, et per potestates exheredes coerceri præcipimus. Defensores quoque ipsorum ejusdem damnationis vinculo innodamus ».

10. *Damnantur et Petrobusiani.* — Porro cum canon iste Lateranensis xiii idem sit cum tertio Concilii Tolosani anno mcxix, præside Callisto II coacti adversus *Petrobusianos*, apparet eosdem iterum in Concilio Oecumenico Lateranensi II proscriptos fuisse cum Arnaldistis. Baronius anno mcxxvi, num. 13 et seq. refert capita hæreseon *Petrobusianorum* a Petro Venerabili notata, et hujus hæresis originem ad eum Christi annum refert: verum cum Concilium Tolosanum septennio antea celebratum fuerit, et errores quos memorat Petrus Venerabilis, et Petrobusiani tribuit, iidem sint cum iis qui in Concilio Tolosano proscripti fuerant, verosimile est, Petrobusianos in Concilio Tolosano, et postea in Lateranensi II Oecumenico fuisse damnatos.

11. *Canones xxviii editi ad disciplinam Ecclesiasticam restituendam.* — Quarto, quia diuturni schismatis occasione collapsa erat disciplina Ecclesiastica, et omnium Ordinum mores dissoluti, Synodus hæc Lateranensis canonibus octo supra viginti his malis mederi curavit; alii enim duo nonnisi hæreticorum et schismaticorum damnationem respiciunt. Inter canones notabilis est duodecimus, qui est de *treuga et pace*, seu de induciis a bellis privatis, quæ ratione clericorum omnium, peregrinorum, mercatorum, agricolarum cum bobus aratorum, dominarum cum sociis suis inermibus, mulierum omnium, rerum ad clericos monachosque pertinentium, et molendinorum omni tempore indulta esset; ratione tamen cæterorum *treuga* tantum, id est, induciæ aliquot dierum ab omnibus servandæ erant; et excommunicatione mulcebantur pacis et *treugæ* violatores, et ad resarciendum damnum leso cogebantur. Cum enim Ecclesia privatorum furorem sistere non posset, quædam veluti repagula et obices ad ea suspendenda posuit. Quo tempore *treuga* hæc primum in usum vocata, sæculo superiori demonstravimus, et ad eam hæc Ivonis Carnotensis episcopi verba, in Epist. xc ad Daimbertum Senonensem archiepiscopum, data, referenda: « Trevia Dei non est communi lege sancita, pro communi tamen utilitate hominum, ex placito et pacto civitatis ac patrie episcoporum et Ecclesiarum, ut nostis, est auctoritate firmata. Unde judicium violatæ pacis modificari

oportet secundum pacta et definitiones, quas unaquæque Ecclesia consensu parochianorum instituit, et per scripturam, vel bonorum hominum testimonium, memorie commendavit ». Bella ista privata a sancto Ludovico Franciæ rege vetita fuere; sed cum revivissent, Philippus IV Franciæ rex Constitutione sua Tolosæ edita in perpetuum ea prohibuit anno millesimo trecentesimo tertio.

12. *Canones illi observati non fuere.* — Orde-ricus lib. 13, pag. 919, capitula in hoc Concilio statuta parum profuisse declarat, ait enim: « Innocentius papa II Romæ in medio Quadragesimæ ingens Concilium tenuit, et multitudini prælatorum statuta sanctorum Patrum inviolabiliter teneri præcepit. De multis regionibus exciti ad Synodum convenerant, et hac de causa brumali tempore periculosum iter inierant; sique cum multis suarum dispendiis rerum Romana mœnia viderant. Nulla illis papa de prisca codicibus propalavit, insignemque sacrarum Decretorum textum concessit. Sed nimis abundans per universum orbem nequitia terrigenarum corda contra Ecclesiastica scita obduravit, unde remeantibus ad sua magistris, Apostolica decreta passim per regna divulgata sunt: sed nihil, ut manifeste patet, oppressis et opem desiderantibus profuerunt, quoniam a principibus et optimatibus regnorum cum subjectis plebibus parvipensa sunt ».

13. *Duo Sedis Apostolicæ in Gallia legati.* — Celebrato Concilio: « Gaufridus Carnotensis episcopus, ut supra dictum est, totius Aquitanie legatus, accepta domini papæ præceptione, omnem Gallie regionem, ipsius quoque Aquitanie, studiose circueus, omnia sanctarum Ecclesiarum altaria, quæ vel Girardus ille seditious auctor et obtentor (nempe Gerardus episcopus Engolismensis) vel Gilo Tusculanensis episcopus, aut eorum complices, chrisimalis unctionis benedictione, in illius odiosi schismatis tempore consecraverant, propriis manibus dissipavit, nec relinquens lapidem super lapidem, quæ non destrueret, solo funditis adæquavit: et ratione dictante, alia eorum loco restaurare curavit », inquit chronographus Mauriniacensis. Existimo Guillelmum Ausciensem archiepiscopum, quem Diploma ab eo datum et a San-Marthani in archiepiscopum Ausciensium relatum docet, *treugam* ac pacem Domini promulgasse dum *Sedis Apostolicæ legatus* esset, hoc circiter anno ea legatione exornatum fuisse. Ait enim: « Cum ex officii nostri debito teneamus universis fidelibus curæ nostræ commissis salubri dispositione providere, nunc præsertim urgente Apostolici mandati auctoritate, ad quem spectat totius populi profectibus invigilare, oportet nos bono pacis ac *treugæ* Dei subditis nostris propensorem curam impendere. Inde est quod juxta statuta Generalis Concilii Romæ nuper celebrati, pacem ac *treugam* Dei in provincia nostra ex parte Dei, et domini papæ, et nostra ab omnibus inconcusse et inviolabiliter præcipimus observari, etc. »

14. *Innocentius II a Rogerio rege capitur.* — Ad num. 10 et seqq. Baronius, narrata *Rainulphi* ducis Apulie morte, ait ex Falcone in Chron. Innocentium II ea audita egressum esse ab Urbe compositurum res cum Rogerio, qui cum nuntios pacis ad eum legasset, eundem *Rogerium* clam filium misisse, qui Pontificem a tergo invaderet, eumque captum ductum esse ad Rogerium *die decima mensis Julii*. Tum pace facta, « rex ipse et dux filius ejus et princeps xvii die stante mensis Julii » misericordiam petunt, et Pontifex regi Rogerio « statim Siciliae regnum per vexillum donavit ». Ita Baronius ex Falcone, qui ex eodem addit, pacem cum rege firmatam esse « die in qua B. Jacobi Apostoli festivitas celebratur, VIII kalendas Augusti ». Tum refert Baronius Diploma Pontificis hoc anno *sexto kalendas Augusti* ab eo emissum, quo titulus regis eidem Rogerio tribuitur. Denique « praedictus Apostolicus », inquit Falco, « a Romanis saepe vocatus, secundo die stante mensis Septembris Romanam repeditavit ». Ita apud Baronium num. 14.

15. *Id contigit die xxii mensis Julii.* — Verum cum cardinalis doctissimus non advertisset, Falconem *mensem stantem* a die, quem numeramus ultimum inchoare, et apud eum *mensem stantem* idem esse ac mensem finientem, ut nos docuit Peregrinus in Notis ad idem Chronicon, et jam supra variis exemplis confirmavimus, chronologiam pervertit. Num. enim 10, cum scribere debuisset cum Falcone, « decimo autem die stante mensis Julii, Pontifex ipse Innocentius captus est », absolute posuit, *decimo die mensis Julii*, ac perinde censuit id contigisse *VI idus Julii*, seu die x mensis Julii. Verum, ut accurate Peregrinus pag. 182 Castigat. in Falconem, Innocentius captus est a Rogerio « XI kal. Augusti, decem tantum diebus Julii restantibus », die scilicet vicesima secunda mensis Julii, nam « quarto die », inquit anonymus Casinensis, « pace facta, confirmavit illi totam terram », die nempe xxv praedicti mensis, a quo Falco non discrepat, licet Peregrinus die uno ab eo differre credat, idque ex eodem Peregrinio confirmatur, qui subdit apud Falconem haec verba ita legenda esse : « Rex ipse et dux filius ejus, et princeps septimo die stante mensis Julii ante ipsius Apostolici praesentiam veniunt », non vero, ut Baronius num. 11 legit, *decimo septimo die stante mensis Julii*. Si enim die xxv mensis Julii S. Jacobo Apostolo sacra, ante Pontificem venire, id contigit *quarta die* post Pontificem captum.

16. *Innocentius II, Rogerio Siciliae rege declarato, Romam revertitur.* — Baronius num. 14 quaedam a Falcone hoc anno narrata omittit : « Hoc anno », inquit Falco, « Gregorius Beneventanus antistes, a domino papa Innocentio consecratus (post expulsam nempe Roscemannum Anacletistam) Beneventum intravit secundo die intrante mensis Septembris, et dominus papa Guidonem

diaconem cardinalem rectorem Beneventi ordinavit. Audientes autem populus Romanus domini papae Innocentii adventum, catervatim obviam exiit, et illum gaudio magno et honore suscepit; deinde eum hortabatur, ut pacem, quam cum rege Rogerio posuerat, consilio eorum confringeret. Apostolicus autem nullo modo petitionibus eorum consentire voluit; dicebat quidem sic Domino placuisse, quod per ejus captionem pax hujusmodi facta fuisset. Cumque, ut supra dictum est, praefatus rex civitatem obsedisset Barensen, Innocentius papa, cum intra civitatem esset Beneventanam, episcopum Ostiensem virum valde venerabilem ad civitatem Barensen delegavit, populum civitatis monendo, ut ad regis fidelitatem colla submittant, et ejus voluntati famuleantur. Populus autem Barensis, ut erat superbia animi et elatione suppositus, episcopum illum, ut civitatem ingrederetur, nullatenus est passus, dictis quoque ejus nullo modo credere pertentavit. Quid multa? Episcopus ille reverens Barensis populi ferociam et elationem domino intimabat Apostolico; inde, ut dictum est, dominus papa Romam reversus est.

17. *Rogerius rex, vindicta de inimicis sumpta, Panormum transfretavit.* — Rex igitur Rogerius, populi illius Barensis aspiciens superbiam, consilio habito, machinas lignorum et turres triginta fere ordinari praecipit, ut civitatis muros et munitiones prosternat, quibus peractis prope civitatis murum machinas illas appropinquari virtute multa mandavit, et continuo turres et muri civitatis prostrati frangebantur. Palatia etiam civitatis, quae prope civitatis murum intrinsecus erant, fracta ruebant; sique duorum mensium spatio, Augusti videlicet et Septembris ruinam illam et timorem passi sunt, famis etiam asperitatem et sitis sustinentes ». Quare cives civitatem certis conditionibus dedere coacti sunt. Paulo post : « His ita gestis, consilio accepto, rex ipse exercitum dividens Salernum adivit quinto die stante mensis Octobris », die scilicet vicesima septima ejusdem mensis. Paucis interpositis : « Inimicis suis terras omnes eorum abstulit, et sacramento eos perstrinxit, ut ultra montes festinarent; quod et factum est. Comitem vero Rogerium de Ariano ejus adversarium simul cum uxore sua navigio parato, in partes Siciliae captivum mandavit; sique vindictam perficiens super inimicis, quinto die intrante mensis Novembris navigio armato Panormum transfretavit ».

18. *Neapolitani sese Rogerio regi dedunt.* — Narrat Baronius num. 14 ex Falcone cives Neapolitanos Beneventum venisse, « et civitatem Neapolitanam ad fidelitatem domini regis tradentes, ducem filium ejus duxerunt, et ejus fidelitati colla submiserunt », ex quibus perspicuum fit, falsum esse quod Pyrrhus in Hist. Siciliae, alique recentiores historici rerum Sicularum et Neapolitanarum tradidere, *Rogerium* scilicet filium suum *Alphonsum* secundo genitum Neapolitanum du-

cem constituisse; cum Falco asserat, Neapolitanos *ducem* agnovisse, sine dubio Rogerium, non vero Albrunsum, quem Falco *principem* jam appellarat.

19. *Pax inter reges Angliæ et Scotiæ sancita.* — Ricardus prior Hagustaldensis laudatus, postquam retulit Albericum cardinalem sancte Sedis in Anglia legatum Romam ad Concilium Lateranense profectum esse, subiungit: « Postquam saepe nominatus legatus ab Anglia discessit, intercurrentibus nuntiis inter duos reges, pax facta est hoc modo. Stephanus rex Angliæ, cum omnibus terris suis, quas antea habebat, Henrico filio David regis Scotiæ comitatum Northumbriæ », exceptis duobus oppidis, concessit. « Rex autem Scotiæ, et Henricus filius ejus cum omnibus suis, ex tunc quamdiu viverent, Stephano regi Angliæ per omnia pacifici et fidelissimi existere debebant ». Et hic Ricardus Historiam suam *de bello Standardii* absolvit.

20. *Adventus Mathildis imperatricis in Angliam causa magnorum motuam.* — Verum pax illa inutilis fuit, quia *Mathildis* imperatrix uxor comitis Andegavensis, quæ sibi regnum debitum contendebat, hoc ipso anno in Angliam venit cum fratre suo Roberto comite Glocestriæ, filio notho Henrici Angliæ regis. « In autumno », inquit Ordericus lib. 13, pag. 920, « Mathildis Andegavorum comitissa cum Rodberto de Cadomo fratre suo, et Guidone de Sablois, aliisque pluribus in Angliam transfretavit, et Arendello suscepta, permissu regis ad oppida, quæ suæ parti favebant, cum pace perrexit. In hac nimirum permissione magna regis simplicitas sive socordia notari potest: et ipse a prudentibus, quod suæ salutis, regniq. sui securitatis immemor fuerit, ludentes est. Ingens enim nimis malitiæ fomentum facile tunc extinguere potuisset, si calliditatem sapientum imitatus, lupum ab introitu ovilis statim expulisset: si salvatis ovibus, malignantium nequitiam in ipso initio præfocasset, et vires lethiferas in capitibus eorum, qui rapinas et cædes hominum, patriæque depopulationem quærebant, gladio justitiæ more patrum præcensisset ». Anonymus a Duchesno editus in Vita Stephani Angliæ regis in eandem rem scribit pag. 946: « Concussa protinus Anglia, et eximio pavore tremefacta, modis diversis agitabatur, quia quicumque clanculo vel aperte illi favebant, solito erant acriores et ad regem perturbandum accensiores: qui vero regi obtemperabant, quasi horrendo oppressi tonitruo humiliabantur ».

21. *Concil. Wintoniense.* — Parte alia, ut narrat idem anonymus pag. 943, quidam episcopi puram et simplicem Christianæ religionis conversationem neglectui habentes, militiæ prorsus et pompe secularis studium adeo accommodabant, ut *quotiens ex conductu curiæ interessent*, propter miram, qua undique stipabantur, militantium secum frequentiam, admirabiles et ipsi cunctis probarentur. Verum complures, qui regi arctius et

privatius adhibebant, hanc magnificam episcoporum gloriam ægre ferentes, conceptamque malitiæ suæ flammam minime sulcantes, « multis eis et indignis accusandi vituperiis apud regem criminabantur », consulebantque, ut manus in illos injiceret, cogeretque, ut castella, et quæcumque alia erant discordiæ et bellorum materia, sibi dimitterent. « Fuit post habitum in Anglia, et firme statutum Concilium, ut quæcumque in quorumlibet episcoporum manus belli essent ac tumultus receptacula, tanquam propria regis regi permitterentur: ubi etiam rex de teneraria, quam in episcopos commisit, invasione publice accusatus, ratione valida, ut putavit, et efficaci, se et suos excusavit. Sed quia ab omni clero juste et provisum et discrete fuit dijudicatum, nulla ratione in Christos Domini manus posse immittere. Ecclesiastici rigoris duritiam humilitatis subjectione molliovit, habitumque regalem exutus, gemensque animo, et contritus spiritu, commissi sententiam humiliter suscepit ». Historia hujus Concilii, *III kal. Septemb.* Wintoniæ celebrati, recitatur tom. x Concil. p. 1014 et seqq. ex Malmesburiensi lib. 2 Hist. Novellæ, diciturque lectum fuisse in Concilio Decretum Innocentii, quo Henrico Wintoniensi episcopo legationem Anglicam committebat. Is Stephani regis frater erat, sed fraterna necessitudo eum a vero exorbitare non coegit, inquit Malmesburiensis.

22. *Multi viri illustres in Gallia florent.* — « Florebat hoc tempore Gallicana Ecclesia », inquit Robertus de Monte in Chron. « per viros religionis ac sapientiæ illustres, Milonem Morinensem episcopum, humilitatis virtute præcipuum, Alvisum Attrebatensem liberalitate, atque consilio et facundia clarum, Godefridum Lingonensem, Hugonem Antissiodorensem, Joslenum Successionensem, Gotfridum Carnotensem, Albericum Bituricensis archiepiscopum, scientia literarum atque consilio et prudentia clarissimum. Inter hos etiam alios multos tunc claros scientia viros Bernardus abbas Clarevallensis, vir opinatissimæ religionis, eminentissime clarebat ».

23. *Alphonsus Henricus primus Portugalliæ rex.* — Baronius anno MCLXXXIX, num. 16, de institutione regni Portugalliæ in gratiam *Alphonsi Henrici* ducis sermonem habet, quod ante Alexandrum III Pontificem Romani regis nomine eum appellare noluerint. Quod quidem verum est; sed Garibayus lib. 34 Compendii Historialis Hispaniæ cap. 11, Faria in Europa Portugallensi tom. II, part. 1, cap. 3, Mariana lib. 10, cap. 17, Sandovalius, cæterique passim historici hujus regni conditum a currenti anno, quo certum est Alphonsus a subditis regis nomen attributum, arcescunt. Præterea *Alphonsus* non tantum a subditis, sed a vicinis etiam principibus *regis* nomine cohonestatus fuit, ipseque divus Bernardus, anno MCLIII demortuus, Epistolam cœcum ad *Alphonsum Portugalliæ regem* dedit. Alphonsus itaque Portugalliæ dux non minus belli quam pacis artibus clarus con-

tractis undique ex tota ditione copiis in Maurorum fines populabundus penetravit, Tagoque superato *Isnarem* Maurorum regem, qui ea loca obtinebat, aggressus est; sed is quam maximos potest tota provincia delectus habet, quatuor alios Maurorum regulos in auxilium evocat, et numerosum exercitum conflat. *Alphonsus* videns milites ad pugnam ineundam alacres, eos ad eam iunxit. Vicina planities, cui *Urichii* nomen, ad pugnam delecta. Altero ante pugnam die, VIII kalend. Augusti, divi Jacobi memorie sacra, milites *Alphonsum* in castris magna letitie significatione regem proclamarunt; Portugallia enim a quadraginta septem aut circiter annis titulo tantum comitalis potiebatur. Pugnatur utrimque acriter, pro gloria, pro salute, et pro imperio, sed Mauri magno numero trucidati, plerique capti, et quinque regulum signa Mauris erepta, indeque regum Lusitanie insignia in clypeo cæruleo quique alia scuta minora esse ceperunt. Post celebrem hanc victoriam Lusitanie reges brevi in magnam potentiam crevere.

24. *Ex ea innovatione bella civilia in Hispania exorta.* — Faria laudatus observat *Alphonsum Henricum* ante hunc annum supremum principem non fuisse, sed tantum *primum inter pares*, uti Venciarum dux, qui solo principis titulo gaudet, et antea magnates comiti Portugallie in omnibus pares exstitisse; comes enim hoc eis denegare non potuerat. Addit Faria pactiones tunc inter eum et proceres transactas ad nos pervenisse. Hæc innovatio *Alphonsum Castellæ regem*, Hispaniarum imperatorem appellatum, summo pereculit, statimque Romam misit, qui *Innocentium II* sollicitarent, ut *Alphonsum* et *Lusitanos* excommunicationis vinculis innodaret. Interim *Alphonsus Henricus* ut novam suam dignitatem tueretur, cum *Garsia Ramire* Navarræ rege, qui ab *Alphonso* imperatore dissidebat, foedus iniit, et bella inter reges Christianos Hispanie hujus innovationis occasione inchoata, toto anno sequenti continuata sunt. Quibus durantibus, Mauri variis in locis Christianos aggressi ex eorum dissensionibus fructum capere conati sunt.

25. *Techesinus Almorabitarum imp. ex Africa in Hispaniam transit.* — Ex annis, quibus in Hispania bella civilia in Christianos arserunt, qui in dubium revocari non possunt, eruitur bella a *Techesino* Almorabitarum imperatore in Hispaniis gesta ad hunc et sequentem Christi annum pertinere; licet enim in antiqua Historia Toletana, in qua ea narrantur, anni non memorentur, ut docet *Sandovalius* in *Alphonso VII*, fol. 173, nihilominus cum in illa dicatur ea contigisse, dum principes Christiani bellis civilibus occuparentur, ad hanc epocham figendam, hæc notitia sufficit; præterquam quod infra visuri sumus, *Techesinum*

ipso initio anni *mcxlii*, non in Hispaniis, sed in Africa versatum esse. Refert itaque *Sandovalius* fol. 170 et seq. *Techesinum* imperatorem ingenti congregato exercitu clanculum et magna celeritate Toletum versus, ut illud ex insidiis caperet, properasse. Interea equites mille magnifice instructi cum quibusdam peditibus in urbibus *Abule* et *Segovie* collectis *Cordubam* versus, hostium consilium ignorantes progressi sunt, et cum Maurorum castra detexissent, media nocte in illa tanta felicitate irruptionem fecerunt, ut directo in *Techesini* imperatoris tentorium penetrarint. Is tamen evasit, et consensu equo valide hostes repulit; sed in coxendice ictu lanceæ vulneratus, fugere coactus fuit, ejusque copie dissipatæ. *Cordubam* secessit, ubi ejus vulnus feliciter quidem curatum, sed ex eo, quoad vixit, claudicavit. Impedimenta et Maurorum spolia Christianorum præda fuere.

26. *Varia fortuna bellum adversus Christianos gerit.* — Non multo post cives *Salmanticensis* collectis copiis, *Bagozum* seu *Pacem Augustam* usque progressi, agros ejus devastarunt, sed cum disciplinam militarem non observarent et duce destituerentur, *Techesinus* imperator eos facile oppressit. Interim *Rodericus Fernandes* de Castro novus *Toleti* præfectus in Mauros excurrit, maximasque prædas fecit. *Techesinus*, ut illatæ sibi injuriæ penas repeleret, magnas copias ex Africa evocavit, et in *Toletanas* ditiones veniens, locum *Almontium* dictum occupavit; sed *Rodericus* magno hostium numero minime territus urbe cum suis egreditur, consertoque prælio hostes in fugam conjicit, et optimis spoliis onustus Toletum regreditur. Ita vetus Historia Toletana.

27. *Obitus Boleslai III Poloniæ ducis.* — Obiit hoc anno *Boleslaus III*, cognomen *Crievostus*, Poloniæ dux, qui omnem fere principatum suum bella gerendo exegit; post cujus mortem Poloniæ principatus inter quatuor filios divisus, et bellis civilibus laceratus; de quibus legendus *Cromerus* lib. vi de Gest. Polonorum. *Otto Frisingensis* lib. 1 cap. 55, loquens de Concilio Rhemensi, anno *mcxlviii* ab *Eugenio III* celebrato, ait: « Venerunt ad prædictum Concilium cum Bulla Aurea nuntii junioris Romanorum regis *Henrici*, tam de sublimatione sua ad imperium Romano Pontifici significantes, quam de tribus fratribus Poloniæ, qui ejecto quarto et seniore, ducatum inter se dividerant, ac de episcopis illius provincie, qui super hoc patri ipsorum juramentum præstiterant, querimoniam facientes ». Quid ea de re Concilium definiarit, nullus ex antiquis posteritati mandavit; nos vero necessarii tantum intenti, neque de *Henrico* rege ante *Conradum* patrem demortuo, neque de successionem horum Poloniæ ducum impostorum verba facimus.

INNOCENTII II ANNUS 11. — CHRISTI 1140.

1. *S. Bernardus Guidonem cardinalem legatum Apostolicum monet de Arnaldo.* — Sequitur quadragesimus post centesimum atque millesimum annum, Indictione tertia, quo Innocentius papa Guidonem de Castello ita cognominatum, S. R. E. cardinalem Benevento revocatum, ubi civitatis rector fuerat constitutus, Joanne subdiacono in regimine civitatis loco ipsius relicto, mittit legatum in Gallias. Est mentio de eadem legatione apud sanctum Bernardum, ad eundem Guidonem scribentem adversus Arnaldum Brixianum, jam damnatum hæreticum in Romano Concilio ab eodem Innocentio papa, et post damnationem hinc inde fugatum. Qui cum apud eundem legatum confugium habuisse diceretur, idem sanctus Bernardus ad eum has acriores (quod sic causa exigeret) litteras dedit¹:

2. « Arnaldus de Brixia, cujus conversatio mel, et doctrina venenum, cui caput columbe, cauda scorpionis est, quem Brixia evomuit, Roma exhorruit, Francia repulit, Germania abominatur, Italia non vult recipere, fertur esse vobiscum. Videte, quæso, ne vestra auctoritate plus noceat. Nam cum et artem habeat et voluntatem nocendi, si accesserit favor vester, erit funiculus triplex, qui difficile rumpitur, supra modum (ut vereor) nociturus. Et unum existimo de duobus (si tamen verum est, quod vobiscum hominem habeatis) aut minus scilicet notum vobis esse illum; aut vos (quod est credibilius) de ejus correctione confidere. Et utinam id non frustra! Quis del de lapide hoc suscitare filium Abraham? Quam gratum munus suscipiet mater Ecclesia de manibus vestris vas in honorem, quod tamdiu passa est in contumeliam? Licet tentare. Sed vir prudens cautus erit non transgredi præfinitum numerum ab Apostolo, qui ait²: Hæreticum hominem post unam et secundam correptionem devita; sciens quia subversus est, qui ejusmodi est, et delinquit proprio judicio condemnatus. Alioquin familiarem habere et frequenter admittere ad colloquendum, ne dicam ad convivandum, suspicio favoris est, et inimici ho-

minis fortis armatura. Secure annuntiabit, et facile persuadebit quæ volet, domesticus et contubernalis legatus Apostolicæ Sedis. Quis enim a latere domini papæ mali quidpiam suspicetur?

« Sed etsi in manifesto perversa loquitur, quis se facile opponere audeat vestro collaterali? Deinde videtis, qualia post se, ubicumque habitavit, reliquit vestigia. Non sine causa vigor Apostolicus hominem Italia ortum transalpinare coegit, repatriare non patitur. Quis vero extraneorum, ad quos ejectus est, non cum omnino cuperet suis reddidisse? Et certe sic se habere ad omnes, ut omnibus odio habeatur, approbatio judicii est, quod portat, ne quis dicat, surreptum fuisse domino papæ. Quale est ergo summi Pontificis sugillare sententiam, et illam sententiam, cujus rectitudinem ejus ipsius in quem data est, etsi lingua dissimulat, vita clamat? Itaque favere huic, domino papæ contradicere est, etiam Domino Deo. Per quemcumque enim justa sententia juste debetur, ab illo certum est processisse, qui loquitur in Propheta¹: Ego qui loquor justitiam. Confido autem de vestra prudentia et honestate, quia visis his litteris, de veritate certus, non abdecemini admodo quidpiam assentire in hac re, nisi quod vos deceat, et Ecclesiæ Dei expediat, pro qua legatione fungimini. Diligimus vos, et ad vestrum obsequium parati sumus». Hæc Bernardus, qui et eundem perversum hæresiarcham in Ecclesia Constantiensi docentem exagitavit litteris suis ad Constantiensem episcopum datis², in quibus hæc inter alia prophetice scripta leguntur: «Denum cum fuerit de illorum captata benevolentia et familiaritate securus, videbitis hominem aperte insurgere in clerum, fretum tyrannide militari insurgere in ipsos episcopos, et in omnem passim Ecclesiasticum ordinem deservire». Quod contigit, cum post obitum Innocentii Romam se contulit sub Eugenio papa, ut suo loco dicturi sumus.

3. *Petrus Abailardus S. Bernardum provocat ad disserendum, a cujus colloquio prosternitur.* — Hoc etiam pariter anno delata est accusatio ad

¹ Bern. Ep. CXCVI. — ² Til. III.¹ Is. LXIII. — ² Bern. Ep. CXCIV.

Innocentium papam adversus Arnaldi magistrum, Petrum Abailardum, accusantibus eum episcopis ex Synodo, accusante, urgente ac persringente magis magistro sancto Bernardo abbate Claravallensi. Quomodo autem ista se habuerint dicturi: in primis, quod ad tempus spectat, ipsum audi sanctum Bernardum, ita querentem¹: «Stulte mihi dudum requiem promittebam, si quidem Leonina rabies quievisset, et pax Ecclesiae redderetur». Sed secus accidit, nam inferius: «Leonem evasimus, sed incidimus in draconem, qui non minus forsitan noceat sedens in insidiis, quam ille rugiens de excelso. Quanquam non jam in insidiis, cujus virulenta folia utinam jam lateant in scriniis, et non in triviis legerentur. Volant libri, et qui ode-runt lucem, quoniam mali sunt, impegerunt in lucem, putantes lucem tenebras. Urbibus et castellis ingeruntur pro luce tenebrae, pro melle, vel potius in melle venenum passim omnibus propinatur. Transierunt de gente in gentem, et de regno ad populum alterum. Novum ceditur populis et gentibus Evangelium, nova proponitur fides, fundamentum aliud ponitur præter id quod positum est. De virtutibus et vitiis non moraliter, de sacramentis Ecclesiae non fideliter, de arcano sanctae Trinitatis non simpliciter nec sobrie disputatur; sed cuncta nobis in perversum, cuncta præter solitum, et præterquam accepimus, ministrantur. Procedit Goliath procero corpore nobili illo suo bellico apparatu circummunitus; antecedente quoque ejus armigero Arnaldo de Bri-xia. Squama squamæ conjungitur, et nec spiraculum incedit per eas. Siquidem sibilavit apes quæ erat in Francia apud de Italia, et venerunt in unum adversus Dominum, et adversus Christum ejus etc.» Ecce tempus, nempe post extinctum schisma Petri Leonis, et cum Arnaldus ex Italia (ut audisti) rediit in Franciam ad suum magistrum Petrum Abailardum, quando et cœptum est agi adversum ejusmodi hæreses recens emergentes.

4. At dicamus, quomodo ipso primo egressu provocaverit S. Bernardum ad disputandum in publico episcoporum et abbatum conventu, sicut alter Goliath (ut audisti) insultans agminibus Dei viventis, ratus nimirum perfacilem sibi fore suarum hæresum promulgationem, si ejus qui colebatur ab omnibus doctissimus atque sanctissimus, victor existeret. Nam captionibus inanis philosophiæ eum ase vincendum nullatenus dubitabat. Ut autem hoc præstaret, adiit metropolititanum, nempe archiepiscopum Senonensem, qui ejusmodi disputationem indiceret, eo colore, quod si ipse vinceretur, omnino cedens palinodiam recantaret. Cum idem archiepiscopus, ut fastum comprimeret insultantis hæretici, ne gloriari posset, non inventum in Gallia, qui suis propositionibus contra dicere se posse confideret: pollicitus est illi congressum quem

peteret, et conventum quem cuperet. Sicque suffraganeos ad Synodum vocans episcopos, de his scripsit ad sanctum Bernardum, ut se ad hæreticum expugnandum pararet. Sed audi ista ab eodem sancto Bernardo in dicta Epistola ad Innocentium, cum subjicit:

«Denique, inquit, scripsit mihi, sollicitante quidem ipso, archiepiscopus Senonensis, diem statuens congressionis, quo ille in præsentia ejus et coepiscoporum suorum deberet, si posset, statuere prava dogmata sua, contra quæ ego mutire ausus fuisssem. Abnuui, tum quia puer sum, et ille vir bellator ab adolescentia; tum quia judicarem indignum, rationem fidei humanis committi rationibus agendam, quam tam certa ac stabili veritate constet esse subnixam. Dicebam sufficere scripta ejus ad accusandum eum, nec mea referre, sed episcoporum, quorum esset ministerii de dogmatibus judicare. Ille nihilominus, imo eo amplius levavit vocem, vocavit multos, congregavit complices. Quæ de me ad discipulos suos scripserit, dicere non euro. Disseminavit ubique, se mihi die statuto apud Senonas responsurum. Exiit sermo ad omnes, et non potuit me latere. Dissimulavi primum: nec enim satis rumore populari movebar. Cedens tandem, licet vix, ita ut starem, consilio amicorum, qui videntes quomodo se quasi ad spectaculum omnes pararent, timebant ne de nostra absentia et scandalum populo, et cornua crescerent adversario; et quia error magis confirmaretur, cum non esset qui responderet, aut contradiceret etc.» Hæc de suo consensu ad conserendum manus cum novo hæretico tandem extorto.

5. Scripsit de his interea idem Bernardus¹ ad episcopos, qui causæ Christi faverent, quo scirent omnes se invitum, sed necessitate coactum ejusmodi suscepisse certamen. At quid tandem accidit? Audiamus ea ab eo qui interfuit, vel a fide dignissimis testibus qui viderunt accepit, Gofrido monacho Claravallensi, qui ait²: «Affluit dies, et Ecclesia copiosa convenit, ubi a Dei famulo Petri illius (Abailardi) in medium scripta prolata sunt, et erroris capitula designata. Demum illi optio data est, aut sua esse negandi, aut errorem humiliter corrigendi, aut respondendi si posset obijciendis sibi rationibus pariter et sanctorum testimoniis Patrum. At ille nec volens respicere, nec valens resistere sapientiæ et spiritui qui loquebatur, ut tempus redimeret, Sedem Apostolicam appellavit. Sed et postea ab egregio illo Catholicæ fidei advoco, (Bernardo videlicet) monitus, ut vel jam sciens, in personam suam nihil agendum, responderet tam libere quam secure, audiendus tantum et ferendus omni patientia, non sententia aliqua feriendus: hoc quoque omnimodis recusavit. Nam et confessus est postea suis (ut aiunt) quod ea hora, maxima quidem ex parte memoria ejus

¹ Bern. Ep. CLXXXIX.

² Bern. Ep. CLXXXVII. — ³ Vita S. Bern. l. III. c. 5.

turbata fuerit, ratio caligaverit, et interior fugerit sensus. Nihilominus tamen Ecclesia, quæ convenerat, dimisit hominem, mulctavit abominationem, a persona abstineus, sed dogmata prava condemnans. Hæc ipse. Sed audiamus ipsum sanctum Bernardum ita scribentem in Epistola citata superius ad Innocentium ¹:

6. « Occurri ad locum et diem imparatus quidem et immunitus, nisi quod illud menteolvebam ²: Nolite præmeditari qualiter respondeatis: dabitur enim vobis in illa hora quid loquamini. Et illud ³: Dominus mihi adjutor, non timebo quid faciat mihi homo. Convenerant autem præter episcopos et abbates plurimi viri religiosi, et de civitatibus magistri scholarum, et clerici litterati multi, et rex præsens erat. Itaque in præsentia omnium, adversario stante, ex adverso producta sunt quadam capitula de libris ejus excerpta. Quæ cum copiosè legi, nolens audire exivit, appellans ab electis iudicibus, quod non putamus licere. Porro capitula iudicio omnium examinata, inventa sunt fidei adversantia, contraria veritati. Hæc pro me, ne levitate, aut certe temeritate usus in tanto negotio putarer. Verum tu, o successor Petri, iudicabis, an debeat habere refugium Sedem Petri, qui Petri fidem impugnât. Tu, inquam, amice sponsi, providebis, quomodo liberes sponsam a labiis iniquis et a lingua dolosa. Sed ut paulo audacius loquar cum domino meo, attende etiam tibi ipsi, amantissime pater, et gratiæ Dei quæ in te est. Nonne cum esses parvulus in oculis tuis, ipse te constituit super gentes et regna? Ad quid, nisi ut evellas et destruas, et ædifices et plantes? Qui igitur tulit te de domo patris tui, et unxit te unctione misericordiæ suæ, attende, quæso, ex tunc et deinceps, quanta fecit animæ tuæ, quanta per te Ecclesiæ suæ, quanta in agro Dominico, celo et terra testibus, tam potenter quam salubriter evulsa sunt et destructa, quanta rursus bene ædificata, plantata, propagata. Suscitavit Deus furorem schismaticorum in tuo tempore, ut tuo opere contererentur. Vidi stultum firma radice, et statim maledictum est pulchritudini ejus. Vidi, inquam, vidi impium superexaltatum, et elevatum sicut cedros Libani: et transivi, et ecce non erat. Oportet autem, ait ⁴, hæreses et schismata esse, ut qui probati sunt manifesti fiant. Et in schismate quidem jam (ut dictum est) Dominus probavit te et cognovit te. Sed ne quid desit coronæ tuæ, en hæreses surrexerunt. Itaque ad consumptionem virtutum, et ne quid minus tecisse inveniamini a magnis episcopis antecessoribus vestris, capite nobis, pater amantissime, vulpes, quæ demoluntur vineam Domini etc. » Hæc scripsit S. Bernardus ad Innocentium.

7. *De Abailardi erroribus S. Bernardus et episcopi Gallicani docent Innocentium papam, qui dat rescriptum.* — Quippe qui ut audivit appellau-

tem ad Apostolicam Sedem hæreticum hominem, ut ipse Pontifex, et universa Romana Ecclesia de his omnibus certior redderetur, idem sanctus Bernardus legavit Romam ad eundem Pontificem Nicolaum monachum Cisterciensem, ejus est plurima laus in Epistolis ad eum datis a Petro Cluniacensi: huic, inquam, litteras dedit ad Innocentium ipsum, itemque ad eundem scripsit errores ejusdem Abailardi atque confutationes ¹. Quod, inquam, ille Sedem Apostolicam appellasset, et causa ibi cognoscenda esset, voluit de omnibus eundem Pontificem certiores reddidisse, a quo esset sententia expectanda. Sed ex persona Rhemensis archiepiscopi, et quorundam aliorum episcoporum scripsit alias eodem argumento litteras ad eundem Innocentium papam ². Scripsit et ad S. R. E. cardinales ³, et de eodem Epistolam scripsit ad Guidonem de Castello ⁴, qui postea fuit Cælestinus papa, antea vero fuerat in philosophia ejusdem Abailardi discipulus, ne videlicet ob antiquam amicitiam ejus susceperet patrocinium; perstringensque errores ejus quam enormes fuerint, hæc breviter habet in fine: « Cum de Trinitate loquitur, sapit Arium: cum de gratia, sapit Pelagium: cum de persona Christi, sapit Nestorium etc. » Scripsit pariter ad Iyonom S. R. E. cardinalem, et cum de ejus animo pravo testificationes adducit, addit jam antea damnatum fuisse una cum opere suo coram Sedis Apostolicæ legato; sed adhuc securum esse, inquit, quod cardinales et Romanæ Ecclesiæ clericos se habuisse discipulos gloriaretur. Etenim ipse publice professus erat in Gallia, et ob celebre nomen ejus complures ad eum confluerant discipuli litteris philosophicis imbuedi. Scripserunt tunc etiam post appellationem Abailardi ad Innocentium papam episcopi illi, qui interfuerant disputationi, et præfuerant iudices, has litteras:

« Reverendissimo domino et dilectissimo patri, Dei gratiasummo Pontifici Innocentio, R. Rhemensis archiepiscopus, Jocelinus Suessionensis, Wilhelmus Catalaunensis, A. Ancbanensis, episcopi, debite subjectionis voluntarium obsequium.

« Auribus occupatis ad plurima verbum facimus breve de prolixo negotio pro eo maxime, quod id ipsum plenius et diffusius continetur in litteris domini Senonensis. Petrus Abailardus Christianæ fidei meritum evacuare nititur, dum totum quod Deus est, humana ratione arbitratur comprehendere. Ascendit usque ad celos, et descendit usque ad abyssos. Nihil est quod lateat eum, sive in profundum inferni, sive in excelsum supra. Homo est magnus in oculis suis, disputans de fide contra fidem, ambulans in magnis et mirabilibus super se, scrutator majestatis, hæresum fabricator. Jamdudum fecerat librum de sancta Trinitate, sed sub legato Romanæ Ecclesiæ igne examinatus est, quia

¹ Bern. Ep. CLXXXIX. — ² Matth. x. — ³ Psal. cxvii. — ⁴ 1. Cor. xi.

¹ Bern. Ep. CLXXXIX, cxc. — ² Ibid. Ep. cxci. — ³ Ibid. Ep. clxxxviii. — ⁴ Ibid. Ep. cxclii.

inventa est in eo iniquitas. Maledictus qui rædificat ruinas Ihericho. Surrexit a mortuis liber ille, et cum eo multorum hæreses quæ dormierant surrexerunt, et apparuerunt multis. Denique jam extendit palmites suos usque ad mare, et usque Romam propagines ejus. Hæc gloriatio hominis illius, quod liber suus in curia Romana habet ubi caput suum reclinet. Hinc confortatus et confirmatus est error illius. Proinde cum fiducia prædicat verbum iniquitatis usquequaque. Propterea cum in conspectu episcoporum super his cum argueret abbas Claravallensis, zelo justitiæ et fidei armatus ille nec confessus est nec negavit, sed a die, a loco, et iudice, quem ipse sibi elegerat, sine læsione, sine gravamine, ut prolongaret iniquitatem, Sedem Apostolicam appellavit. Episcopi, qui propter hoc munus convenerant, vestræ reverentiæ deferentes, nihil in personam ejus egerunt: sed tantummodo capitula, a sanctis olim Patribus condemnata, medicinali necessitate, ne morbus serperet, adjudicaverunt. Quia ergo homo ille multitudinem trahit post se, et populum qui sibi credat habet, necesse est ut huic morbo celeri medicina occurrat. Sero enim medicina paratur, cum mala per longas convalescere moras. Processimus nos in hoc negotio quousque ausi sumus. Tuum, beatissime pater, est de cætero providere, ne aliqua hæreticæ pravitatis macula decor Ecclesiæ contaminetur. Tibi commissa est sponsa Christi, o amice sponsi. Tuum est eandem uni viro virginem castam exhibere Christo ».

Rescriptum vero Innocentii tale est :

« Innocentius episcopus, servus servorum Dei, venerabilibus fratribus Ilcrico Senonensi, Reinaldo Rhemensis archiepiscopis, eorumque suffraganeis, et charissimo in Christo filio Bernardo Claravallensi abbati, salutem et Apostolicam benedictionem.

« Testante Apostolo, sicut unus Deus, una fides esse dignoscitur, in qua tanquam immobili fundamento, præter quod nemo aliud potest ponere, firmitas Catholice Ecclesiæ inviolata consistit: inde est, quod beatus Petrus Apostolorum princeps pro proxima hujus fidei confessione audire meruit: Tu es, inquam, beatus Petrus, et super hanc petram ædificabo Ecclesiam meam: petram utique firmitatem fidei, et Catholice unitatis soliditatem manifeste designans. Hæc siquidem est inconsutilis tunica Redemptoris nostri, super quam milites sortiti sunt, sed eam dividere minime potuerunt. Contra quam in initio fremuerunt gentes, et populi meditati sunt inania: astiterunt reges, et principes terræ convenerunt in unum. Verum Apostoli duces Domini gregis, et eorum successores Apostolici viri, ardore charitatis et zelo rectitudinis successi, fidem defendere, et eam in cordibus populorum proprii sanguinis effusione plantare non dubitaverunt. Demum cessante persecutorum rabie, imperavit ventis, et facta est in Ecclesia tranquillitas magna. Sed quia hostis humani gene-

ris semper circuit, quærens quem devoret, ad expugnandum sinceritatem fidei fraudulentam hæreticorum fallaciam subinduxit. Contra quos veri Ecclesiarum rectores viriliter insurgentes, eorum prava dogmata cum ipsorum auctoribus condemnarunt. In magna namque Nicæna Synodo Arius hæreticus est damnatus. Constantinopolitana Synodus Macedonium hæreticum debita sententiâ condemnavit. In Ephesina Synodo Nestorius condignam sui erroris condemnationem recepit. Chalcedonensis quoque Synodus Nestorianam hæresim, et Eutychianam cum Dioscoro, et ejus complicitibus iustissima sententiâ confutavit. Martianus præterea licet laicus, Christianissimus tamen imperator Catholice fidei amore succensus, prædecessori nostro sanctissimo papæ Joanni scribens adversus eos qui sacra mysteria profanare contendunt, inter cætera sic loquitur, dicens: Nemo clericus, vel militaris, vel alterius cujuslibet conditionis, de fide Christiana publice conetur in posterum tractare. Nam injuriam facit iudicio reverendissimæ Synodi, si quis semel iudicata et recte disposita revolvere, et iterum disputare contendit: et in contemptores hujus legis tanquam in sacrilogos, pœna non deerit. Igitur si quis clericus erit, qui publice tractare de religione ausus fuerit, a consortio clericorum removebitur. Dolemus autem, quoniam sicut ex vestrarum litterarum inspectione, et missis a fraternitate vestra nobis errorum capitulis cognovimus, in novissimis diebus, quando instant periculosa tempora, magistri Petri Abailardi perniciosa doctrina, et prædicatorum hæreses, et alia perversa dogmata catholice fidei obviantia pullulare cœperunt. Verum in hoc maxime consolamur, et omnipotenti Deo gratias agimus, quod in partibus vestris pro patribus tales filios suscitavit, et in tempore Apostolatus nostri in Ecclesia sua tam præclaros voluit esse pastores, qui novi hæretici studeant calumniis obviare, et immaculatam sponsam uni viro virginem castam Christo exhibere. Nos itaque, qui in Cathedra sancti Petri, cui a Domino dictum est: Et tu aliquando conversus confirma fratres tuos, licet indigni residere conspiciamur, communicato fratrum nostrorum episcoporum cardinalium consilio, destinata nobis a vestra discretione capitula, et universa ipsius Petri dogmata, sanctorum canonum auctoritate cum suo auctore damnavimus, eique tanquam hæretico perpetuum silentium imposuimus. Universos quoque erroris sui sectatores et defensores a fidelium consortio sequestrandos, et excommunicationis vinculo innodandos esse censemus. Datum Laterani duodecimo kal. Augusti ». Ita Innocentius, confirmans quæ gesta fuissent per Catholicos episcopos in Synodo Gallicana. At quæ hæc secula sint, videamus.

8. *Petrus Abailardus ab Innocentio papa damnatus, convertitur fit monachus, et sancte moritur.* — Abailardus itaque prosecuturus appellationem, Romam versus dirigens iter, divertit ad Cluniacensem

monasterium, ubi libenter passus est, se retineri a Petro venerabili ejusdem monasterii abbate, qui pro eo, ut pœnitens posset Cluniaci monasticam vitam profiteri, ad Innocentium papam has litteras dedit ¹:

« Summo Pontifici et nostro speciali patri, domino papæ Innocentio, frater Petrus humilis Cluniacensis abbas, obedientiam et amorem.

« Magister Petrus sapientiæ vestræ (ut credo) optime notus, nuper a Francia veniens per Cluniacum transitum fecit. Quæsimus quo tenderet. Gravatum se vexationibus quorundam, qui sibi (quod valde abhorrebat) nomen hæretici imponebant, majestatem Apostolicam se appellasse, et ad eam confugere velle respondit. Laudavimus propositum, et ut ad notum et commune refugium confugeret, admonuimus. Justitiam Apostolicam, quæ nulli unquam etiam extraneo vel peregrino defuit, sibi non defuturam diximus. Misericordiam ipsam, ubi ratio postularet, sibi occurruram promissimus. Venit interim dominus Cisterciensis abbas, et de pace ipsius et domini Claravallensis, cujus causa appellaverat, nobiscum et cum ipso pariter egit. Dedimus et nos operam paci ejus; et ut ad illum cum ipso iret, hortati sumus. Addidimus hoc monitis nostris, ut si qua Catholicas aures offendit aut scripsisset, aut dixisset hortatu ejus, et aliorum honorum et sapientum, et a verbis suis amoveret, et a libris abraderet: et factum est ita. Ivi, redit, cum domino Claravallensi, mediante Cisterciensi, sopitis prioribus querelis, se pacifice convenisse, reversus relitit.

9. « Interim a nobis admonitus, magis autem a Deo (ut credimus) inspiratus, dimissis scholarum et studiorum tumultibus, in Cluniaco vestro sibi perpetuam mansionem elegit. Quod nos senectuti ejus, debilitati ejus, religioni ejus congruere putantes, et scientiam ejus vobis ex toto non cognitam, magnæ fratrum nostrorum multitudini proficere posse credentes, voluntati ejus assensimus, et si sic benignitati vestræ beneplacitum esset, benigne et cum gaudio nobiscum, vestris (ut nostis) per omnia, remanere concessimus. Rogo igitur ego qualiscumque vester, rogat devotissimus vobis Cluniacensis conventus, rogat ipse per se, per nos, per præsentium latores filios vestros, per has quas ut scriberem rogavi litteras, ut reliquos dies vitæ et senectutis suæ, qui fortasse non multi sunt, in Cluniaco vestro eum consummare jubeatis; et ne a domo quam velut passer, ne a nido quem velut turtur invenisse se gaudet, aliquorum instantia aut expelli, aut commoveri valeat; more quo omnes bonos colitis, et etiam istum dilexistis, scuto defensionis Apostolicæ protegatis ». Illicusque ad Innocentium Petrus abbas Cluniacensis.

10. Sed de sententiâ interim lata hic insuper recitandæ sunt litteræ ipsius Innocentii papæ ad episcopos, et ad sanctum Bernardum simul scriptæ,

de ipso videlicet Petro Abailardo, et de Arnaldo de Brixia includendis, quæ perbreves habentur in Codice Vaticano, cujus titulus est, Liber antiquorum canonum.

« Innocentius servus servorum Dei, Samsoni Rhemensi archiepiscopo, Henrico Senonensi, et Bernardo abbati Claravallensi, salutem et Apostolicam benedictionem.

« Præsentia scripta fraternitati vestræ mandamus, quatenus Petrum Abailardum, et Arnaldum de Brixia, perversi dogmatis fabricatores, et Catholicæ fidei impugnatores, in religiosis locis, ut vobis melius visum fuerit, separatim faciatis includi, et libros eorum, ubicumque reperti fuerint, igne comburi. Datum Laterani decimo septimo kalendas Augusti. Insuper transcripta ista vobis ostendere cuipiam, donec ipsæ litteræ in Parisiensi colloquio, quod prope est, præsentate fuerint ipsis archiepiscopis ». Hæc ibi. His autem subjiciuntur in Codice triginta capitula pro Ecclesiastica disciplina servanda.

Qua pariter die idem Innocentius papa alias dedit litteras de damnatione errorum ipsius Abailardi ad eosdem episcopos, simulque ad S. Bernardum abbatem, ad cujus finem hæc de sententiâ in eum lata ¹: « Nos itaque, qui in beati Petri cathedra (cui a Domino est dictum ²: Et tu aliquando conversus, confirma fratres tuos) licet indigni residere conspiciamur, communicato fratrum nostrorum episcoporum et cardinalium consilio, destinata nobis a vestra discretione capitula et universa ipsius Petri perversa dogmata, sanctorum canonum auctoritate cum suo auctore damnavimus; eique tanquam hæretico, perpetuum silentium imposuimus. Universos quoque errores damnantes, eorum sectatores et defensores a fidelium consortio sequestrandos, excommunicationisque vinculo innodandos esse censuimus. Datum Laterani decimo septimo kalendas Augusti ». Hæc Innocentius. Quem et acquievisse abbatem Cluniacensis petitioni, ut idem Petrus Abailardus in Cluniacensi monasterio monachus esset, certum est ex iis quæ idem abbas affirmat. Et quod mirandum valde est, quod et sit raro contingens, idem hæreticus pœnitens perseverans usque ad finem, magnum edidit specimen sanctitatis. Perseverans enim in æretissima monastica observantia, demum sancto fine quievit, dignusque habitus est, qui ab eodem venerabili Petro Cluniacensi scripta Epistola post obitum magnopere laudaretur ³. Scribens enim ad Eloysam abbatissam, ejus quondam conjugem, quæ et ipsa doctrina excellens idem vitæ genus arripuisset, hæc post multa in laudem ipsius:

11. « Concessum est de illo tuo, de illo, inquam, sæpe ac semper cum honore nominando, servo ac vero Christi philosopho, magistro Petro,

¹ Apud S. Bern. Ep. cxciv. — ² Luc. xxii. — ³ Petr. Clun. l. v. Ep. xx.

¹ Petr. Clun. l. v. Ep. iii.

quem in ultimis vitæ suæ annis eadem divina dispositio Cluniacum transmisit; et eam in ipso et de ipso super omne aurum et topazium munere chariore ditavit. Cujus sancte humili ac devotæ inter nos conversationi, quod quantumve Cluniacus testimonium ferat, brevis sermo non explicat. Nisi enim fallor, non recolo visisse me illi in humilitatis habitu et gestu similem, in tantum ut nec Germanus abjectior, nec ipse Martinus bene discernenti pauperior appareret. Cumque in magno illo fratrum nostrorum grege, me compellente, gradum superiorem teneret, ultimus omnium vestitu incultissimo videbatur. Mirabar sepe, et in processionibus eo me cum reliquis pro more præcedente, pæne stupebam, tanti tamque famosi nominis hominem sic semetipsum contemnere, sic se abjicere posse. Et quia sunt quidam religionis professores, qui ipsum quem gerunt habitum religiosum, nimis esse cupiunt sumptuosum, erat ille prorsus parvus in istis, et cujusque generis simplici veste contentus, nihil ultra quærebat, hoc et in cibo, hoc et in potu, hoc et in omni cura corporis sui servabat, et non dico superflua, sed et cuncta nisi valde necessaria tam in se, quam in omnibus verbo pariter et vita damnavat. Lectio erat ei continua, oratio frequens, silentium iuge, nisi cum aut fratrum familiaris collatio, aut ad ipsos in conventu de divinis publicus sermo eum loqui urgebant. Sacramenta cælestia, immortalis Agni sacrificium Deo offerendo, prout poterat, frequentabat: imo postquam litteris et labore meo Apostolice gratiæ redditus est, pæne continuabat. Et quid multa? Mens ejus, lingua ejus, opus ejus semper divina, semper philosophica, semper eruditoria meditabatur, docebat, fatebatur.

12. « Tali nobiscum vir simplex et rectus, timens Deum et recedens a malo, tali, inquam, per aliquantum temporis conversatione ultimos vitæ suæ dies consecrans Deo, pausandi gratia (nam plus solito scabie, et quibusdam corporis incommoditatibus gravabatur) a me Cabilonem missus est. Nam propter illius soli amenitatem, qua cunctis pæne Burgundiæ nostræ partibus præminet, locum ei habilem prope urbem quidem, sed tamen Arari interflorente provideram. Ibi juxta quod incommoditas permittebat, antiqua sua renovans studia, libris semper incumbere, nec, sicut de magno Gregorio legitur, momentum aliquod præterire sinebat, quin semper aut oraret, aut legeret, aut scriberet, aut dictaret. In his sacrarum operum exercitiis cum adventus illius Evangelici visitatoris reperit, nec cum ut multos dormientem, sed vigilantem invenit. Invenit eum vere vigilantem, et ad æternitatis nuptias, non ut fatuam, sed ut sapientem virginem evocavit. Attulit enim ille secum lampadem plenam oleo, hoc est, conscientiam refertam sanctæ vitæ testimonio. Nam ad solvendum commune mortalium debitum morbo correptus, eoque ingravescente, in brevi ad extrema perductus est. Tunc vero quam sancte,

quam devote, quam Catholice primo fidei, dehinc peccatorum confessionem fecerit, quanto inhiantis cordis affectu viaticum peregrinationis ac vitæ æternæ pignus, Corpus scilicet Redemptoris Domini acceperit, quam fideliter corpus suum et animam hic et in æternum ipsi commendaverit, testes sunt religiosi fratres, et totus illius monasterii, in quo corpus S. martyris Marcelli jacet, conventus. Hoc magister Petrus fine dies suos consummavit, et qui singulari scientiæ magisterio toti pæne orbi terrarum notus et ubique famosus erat, in illius discipulatu qui dixit¹: Discite a me, quia mitis sum et humilis corde, mitis et humilis perseverans, ad ipsum (ut dignum est credere) sic transivit. Hæc Petrus, qui et ejus Epitaphium in fine ita descriptum misit:

Gallorum Socrates, Plato maximus Hesperiarum,
Noster Aristoteles, Logicis quicumque fuerunt
Aut par, aut melior: studiorum cognitus orbi
Princeps, ingenio variis, subtilis et acer.
Omnia vi superans rationis, et arte loquendi
Abelardus (Abailardus) erat. Sed tunc magis omnia vicit,
Cum Cluniacensem monachum, moremque professus,
Ad Christi veram transivit philosophiam.
In qua longævæ bene complens ultima vitæ,
Philosophis quandoque bonis se commemorandum
Spem dedit, undenas Maio renovante kalendas.

Porro Eloyssa abbatissa, olim conjux ejusdem Petri, et ipsi scientia haud impar, post obitum sollicita de existimatione viri, rogavit per litteras eundem Petrum, ut viri absolutio facta ab Apostolica Sede omnibus innotesceret, ait enim²: « Placeat etiam vobis aliud mihi sigillum mittere, in quo magistri (Petri videlicet) absolutio litteris apertis continetur, ut sepulchro ejus suspendatur. Hæc ipsa, quæ defuncti viri corpus acceperat.

13. *De Hugone et Richardo de S. Victore.* — Eodem quoque anno, sicut pietate, ita et doctrina præstantior ex hac vita migrat Hugo de S. Victore celeberrimus doctor, cujus superius mentio facta est. Ita in Appendice ad Siebertum per Robertum de Monte, rerum sæculi hujus scriptorem, constat. Apponimus nos ejus Epitaphium, quod legitur in ejus sepulchro in Ecclesia S. Victoris in suburbio Parisiensi his versibus:

Conditur hoc tumulo doctor celeberrimus Hugo,
Quem brevis eximium continet urna virum.
Dogmate præcipuus, nullique secundus amore,
Claruit ingenio, moribus, ore, stylo.

Porro in ejusdem monasterii claustrum sepulchrum continetur Richardi de S. Victore, clarissimi ejusdem temporis theologi, qui etsi isdem cum Hugone vixit temporibus, quoniam anno ex hoc sæculo decesserit, haud nobis compertum. Quadam viri præstantissimi ad sanctum Bernardum scripta, ut, De tribus appropriatis personis in Trinitate tractatus, Libellus de Verbo incarnato, et

¹ Matth. xi. — ² Apud Petr. Clun. l. vi. Ep. xxiiii.

Declarationes nonnullarum difficultatum divinæ Scripturæ, plane demonstrant magnam inter eos familiaritatem intercessisse. In ejus autem sepulchro hujusmodi legitur Epitaphium :

Moribus, ingenio, doctrina clarus et arte,
Pulvere hic teperis, docte Richarde, situ.
Quem tellus genuit felici Scotia parlu :
Te fovet in gremio Gallicæ terra suo.
Nil tibi parca ferox nocuit, quæ stamioa parvo
Tempore tracta gravi rupit acerba manu.
Plurima namque tui superant monumenta laboris,
Quæ tibi perpetuum sunt paritura decus,
Senior ut lento sceleratas mors petit æles,
Sic propro nimis it sub pia tecta gradu.

In calce operum ejus editionis Lugdunensis anno **MDXXXIV**, dicitur plenus dierum transiisse ex hac vita sexto idus Martias, sed annus non exprimitur. Ita plane claruit idem cœnobium S. Victoris hoc sæculo viris insignibus, Parisiensis Academiæ doctoribus, iisdem canonicis regularibus Ordinis sancti Augustini, quos Ludovicus Crassus hujus regnantis his diebus Ludovici pater verificè coluit : in quorum gratiam martyri sancto Victori templum paulo ante construxit, ut ibidem posita ita significat ejus Inscriptio :

Illustris genitor Ludovici, rex Ludovicus,
Vir clemens, Christi servorum semper amicus,
Instituit (institutum), fecit pastorem canonicorum,
In cella veteri trans flumen Parisiorum.
Hanc vir magnanimis, almi Victoris amore,
Auro, reliquiis ornavit, rebus, honore.
Sancte Dionysi, qui servas corpus humatum,
Martyr et antistes Ludovici solve reatum.
Christi centeno cum mille decem et tribus anno,
Templum hoc Victoris struxit regalis honoris.

Jam vero e funeribus emergentes, quæ sunt reliqua anni hujus prosequamur.

14. Rogerii invasiones. — Eodem anno princeps Capuæ, Rogerii regis filius, invasit Piscariam, et adjacentia loca, quasi spectarent ad Capuæ principatum; quibus nonnihil commotus est Innocentius papa. Sed Rogerius ipse ex Sicilia veniens, res componere studuit : cujus expetentis ejusdem Innocentii papæ colloquium, idem Innocentius congressum præteritis aliquibus impedimentis subterfugit. Displacuit et illud magnopere eidem papæ, quod idem rex edicto prohibuerat, ne moneta Romana in ejus regno expendetur, sed ea tantum quam ipse cuderet : quod quidem ingens attulit tum subditis, tum externis etiam damnum. Post hæc idem rex Neapolitanam civitatem recens sibi deditam primum ingressus est, apparatu regio exceptus a civibus, metrique faciens ejusdem circuitum civitatis, bis mille trecentorum sexaginta trium passuum circuitus est inventus. Tradit ista Falco Beneventanus in Chronico a se scripto de rebus Beneventanis sui temporis, quod et in hunc usque annum perduxit, ceptum ab anno Redemptionis millesimo centesimo duodecimo, quinta Indictione, Paschalis papæ Pontificatus decimo ter-

tio; quæ sublata lucerna, remanent quæ sunt reliqua Pontificatus Innocentii subobscura. In Chronico dicto domini de Ceccano, quod in monasterio Fossæ-Novæ asservatur, habetur hoc anno venisse Rogerium Siciliæ regem et filios ejus, et expugnasse Soram, Arcem, et oppida interjacentia usque Ceperanum.

15. De Willelmo intruso Eboracensi archiepiscopo, cujus fama vindicatur. — Hoc anno pugnandum fuit Innocentio papæ adversus Willelmum bis intrusum, et a rege primum, deinde a legato in Angliā, in archiepiscopatum Eboracensem, cujus Ecclesiæ fuerat thesaurarius : contra quem legitime electus fuit Henricus Murdac. Hæc Rogerius in Annalibus. Porro Henricus iste ille est, ad quem extat S. Bernardi Epistola ¹, divini Spiritus favore dictata, cum eum ad solitudinem invitavit. Extant et aliæ ejusdem sancti Bernardi Epistolæ diversæ pro eodem adversus eundem Willelmum intrusum. Siquidem improbus homo nefandis sceleribus infamatus, sententiæ Innocentii non acquiescens, ubi sensit eum esse defunctum, a successore ipsius Cælestino surripuit consecrationem, et ad eandem Ecclesiam restitutionem. Qua de causa declamandum fuit eidem S. Bernardo, ad ipsum Cælestinum scribenti Epistolam ducentessimam trigesimam quartam, in qua post alia abominanda in eum invecita, his agit verbis de ipsius intrusionibus : « Sinite obedituri huic, et sacramenta accepturi ab homine bis intruso ? primo quidem per regem, deinde per legatum ? Quippe qui illum in sanctuarium Dei contra jus et fas, contra mandatum summi Pontificis, in injuriam summæ Sedis et totius Romanæ curiæ, cum non potuit per ostium, fodit argenteo, ut aiunt, saculo, unde impudenter intrusit, etc. » De iisdem idem S. Bernardus ad cardinales Romanæ curiæ sub eodem Cælestino papa dedit acerrimas litteras ², quarum est exordium : « Omnibus scribendum fuit de eo quod spectat ad omnes. Nec vercor ne forte præsumptione arguat, quippe qui, licet omnium minimus, tamen Romanæ curiæ injuriam a me non judico alienam. Urinur assidue, dico vobis, urinur graviter nimis, ita ut nos tædeat etiam vivere. In domo Dei videmus horrenda, et quia corrigere non possumus, saltem suggerimus his ad quos spectat, etc. » At licet clamans et exclamans Bernardus, nihil lamen proficit, quominus turpissimus intrusus sub Cælestino Pontifice sederit.

16. Quo defuncto, cum illi Eugenius successisset, rursus suis litteris contra eundem intrusum itidem sanctus Bernardus egit, tertio ad eum scribens ³. In quarum primis : « Nonne, inquit, Eboracensis ipse est, cui te præsentem, cum adhuc esses quasi unus ex nobis, fratres tui resisterunt in faciem, eo quod reprehensibilis erat ?

¹ Bern. Ep. CVI. — ² Ibid. Ep. CCXXXV. — ³ Ibid. Ep. CCXXXVII, CCXXXVIII, CCXXXIX.

Sed speravit in multitudine divitiarum suarum, et praevaluit in vanitate sua. Certum est tamen quod non intravit per ostium in ovile ovium, sed ascendit aliunde etc. » Secundis autem ad eundem Eugenium litteris fortius urget enim, ut in ipsum damnationis sententiam jacularetur; ait namque : « Quis enim in manu forti sagittas mittere potest, nisi filius excussorum ? Qui locum Petri tenet, potest uno ictu extinguere Ananiam, uno Simonem Magum. Et ut planius quod loquimur fiat, peremptoriam dare sententiam ad depositionem episcoporum, solius Romani Pontificis nescitur esse, pro eo nimirum, quod etsi alii multi vocati sunt in partem sollicitudinis, solus ipse plenitudinem habet potestatis. Solus proinde (si dicere audeam) in culpa est, si culpa non feritur, quæ ferienda est etc. » Præstitit Eugenius quod sanctus Bernardus quam iustissime litteris expetierat, damnavit et eiecit intrusum. Qui, quoad vixit Eugenius, sic mausil extorris : eo vero defuncto (inquit Rogerius in Annalibus) sub ejus successore Anastasio, defuncto Henrico Murdac legitimo archiepiscopo Eboracensi, idem Willelmus Romam se contulit, et inveniens gratiam apud eum, restitutus est eidem, qua iuste fuerat privatus Ecclesia. At anno sequenti, qui fuit Redemptoris millesimus centesimus quinquagesimus quartus, susceptus in sedem, proditiōe suorum clericorum appposito veneno in ablutione calicis post sumptum sanguinem, eo poto, mortem infelix hausit. Illicque finis hominis non meritis, sed divitiis ad Ecclesiam Dei sibi aditum aucupantis. Quæ plurium annorum curriculis actitata, et sub tribus Romanæ Ecclesiæ Pontificibus agitata hic in unum collecta posuimus, quo uno intuitu fiat lectori perspicua historia non contemnenda, quæ tot S. Bernardi sudoribus madeat, et Epistolis scriptis eluceat.

At sicut judicem ex noviter repertis monimentis, revocare quam tulit sententiam decet : ita concessum sit nobis eadem ratione, quæ scripta sunt de Willelmo Eboracensi archiepiscopo. quantumlibet auctoritate et testificatione sancti Bernardi et aliorum absque dispendio probatæ fidei ipsorum, novis adinventis probationibus, novo examine agitare. Non solum enim Neubrigensis, ¹ qui iisdem temporibus vixit, et de his exactam pervestigationem adhibuit, ut veritatem rerum gestarum assequi posset, sed et alii auctores favent Willelmo Eboracensi archiepiscopo causæ, atque adeo, ut eundem inter sanctos Ecclesiæ Anglicanæ connumerent : quibus fidem adhibens haud dubiam, Molanus restitutor et illustrator Martyrologii Usuardi, eundem Willelmum suo loco reposuit inter sanctos, natali die ipsius, nempe octava die mensis Junii. De eo Acta citantur Eboracensia ab Harpessfeldio, ² quibus assentiuntur absque controversia recentiores, inter quos est Joannes Capgravius, qui scripsit Vitas sanctorum Angliæ, et postremo loco Polydorus Virgilius in historia Anglicana, anno Christi millesimo centesimo quinquagesimo quarto. Quibus omnibus traditio ipsa Ecclesiæ Anglicanæ consentiens, nos pariter secum trahit in eandem sententiam, ita tamen ut nihil derogatum velimus sanctitati Bernardi, qui favit causæ quam putavit esse iustissimam, falsa deceptus insinuatione eorum, quorum existimatio apud eum haud dubiæ fidei esset. Interdum enim contigisse se decipi falsa relatione potentium, suis ipse testatur Epistolis.

¹ Neub. l. II. c. 17 et 26. — ² Act. Eborac. l. I. c. 16. Harpessfeld. apud Alan. Copum hist. Angl. l. XIV. c. 41.

Anno periodi Græco-Romanæ 6633. — Anno Æræ Hispan. 1178. — Anno Hegiræ 535, inchoato die 17 Aug., Fer. 7. — Jesu Christi 1140.

— Innocentii II papæ 11. — Conradi III reg. 3. Joannis Comneni imp. 23.

1. *Arnoldus de Brizia in Germaniam et Galliam fugit.* — Ad num. 1 et seq. *Arnoldus* hæreticus anno superiori in Concilio Lateranensi II damnatus, cum omnium clericorum et monachorum insidiis appeteretur, Romam Italiamque deseruit, et in Galliam primum, dein in Germaniam se contulit, ac aliquandiu apud episcopum Con-

stantiensem demoratus est. Quod cum accepisset sanctus Bernardus, statim Epistolam cxcv ad episcopum Constantiensem dedit, rogavitque, ne apud se aut in sua diocesi pestem ejusmodi, jam ex Gallia et Italia pulsam fugatamque, delitescere pateretur : « Execratus quippe », inquit Bernardus, « a Petro Apostolo, adhæserat Petro Abailardo, cu-

jus omnes errores ab Ecclesia jam deprehensos atque damnatos cum illo etiam et pro illo defendere acriter et pertinaciter conabatur ». Fuerat Arnoldus, sen Arnaldus de Brixia, discipulus Petri Abaelardi in Ruensi cœnobio, cujus is abbas erat. Quæ quidem duorum hominum in fide suspectiorum conjunctio et conversatio tam suspecta et odiosa fuit omnibus bonis et vere Catholicis, ut utrumque exterminare conati fuerint. Præcipuus eorum adversarius *Bernardus* egit apud *Innocentium* II. et apud *Guidonem de Castello*, cardinalem S. Sedis in Gallia legatum, ut suprema in eos supplicia decernerentur. Baronius num. 2, recitat Epistolam S. Bernardi ad *Guidonem legatum*, quæ ordine est cxcvi. Innocentius II Bernardi litteris acceptis, scripsit *Samsoni* Rhemensi, *Henrico* Senonensi archiepiscopis et *Bernardo* Clarevallis abbati, injunxitque, ut Petrum Abaelardum et Arnaldum de Brixia separatim includi facerent, et libros erroris eorum igne comburi. Litteræ datæ sunt *Laterani*, *XVII kalend. Aug.* et referuntur a Baronio num. 10.

2. *Ecclesiasticorum inimicus*. — Verum id ubi præsensit *Arnoldus*, e Gallia clam se subdixit, et in Germaniam ad episcopum Constantiensem fugit, ut mox diximus. Licet autem Ecclesiasticis præsertim viris odiosus esset *Arnaldus*, non omnibus tamen bonis ejus doctrina improbatatur, quod caperet sacerdotum et prælatorum mores tunc valde dissolutos. Sed, ut mos est hæreticorum cum reprimuntur, frena laxavit impudentiæ, et mediocritatis atque moderationis terminos transgressus est, ut patet ex iis quæ Baronius anno superiori num. 8, et seq. in medium adducit.

3. *Concilium Senonense adversus Abaelardum coactum*. — A num. 3 ad 13. Cum *Abaelardus*, ejusque sectatores censuram deriderent, quæ in Concilio Synessionensi facta olim fuerat nonnullarum ejus propositionum, ulterius progressus est, et plurima effutisse dicebatur dogmata, Catholicæ fidei parum consona. Cumque clam et palam de *Bernardo* deliraret, suæque dogmata libentius spargeret inter conciones et colloquia, rursus sanctum abbatem adeo irritavit, ut non ante quiescere compulerit, quam ipse damnatus sit. Abaelardus sophisticis captionibus confidens, petiit ab *Henrico* Senonensi, ut sibi cum *Bernardo* publice congressi liceret, effecitque ut ad definiendas ejusmodi lites *Senonis* Concilium in *Octavis Pentecostes*, utliquet ex Epistola cccxxxvii Bernardi ad Innocentium II, celebraretur. Ei interfuit *Henricus* metropolitanus et suffraganei, *Samson* Rhemensis, *Jatenus* Suesionensis, et *Gaufridus* Catalaunensis; *Ludovicus* rex cum multis regni proceribus, abbates plurimi, et non pauci magistris scholarum ex *Bernardi* Epist. clxxxix. Baronius in *Addendis* ad annum mcm. refert litteras citatas ab episcopis ad Innocentium II post Concilium Senonense datas, et inter eos numeratur *Willelmus Catalaunensis*, uti etiam in iisdem litteris tom. x Concil. recitatis. Verum *Wil-*

helmus, de Campellis cognominatus, jam ab anno mcm. e vivis excesserat, et hoc anno *Gaufridus* Ecclesiam Catalaunensem regebat. Qui error inde profluxit, quod episcoporum nomina sæpe unica littera exprimerentur, et postea librarii hujusmodi Epistolas describentes nomen integrum ponerent, et sæpe unum in aliud transformarent; quod hic contigisse oportet, cum certum sit *Gaufridum* hoc tempore Ecclesiæ Catalaunensi præfuisse, et ejus nomen, non vero *Guillelmi* in eadem Epistola, quæ inter *Bernardinas* refertur, legatur.

4. *Abaelardus ad Innoc. II appellat*. — Dies dicta est *Abaelardo*, dicta quoque *Bernardo*; at is abnuat adesse, præsertim quod de damnatis erroribus questio renovaretur. Quia tamen magna prælatorum et nobilium virorum multitudo cum *Ludovico VII* Franciæ rege concurrerat, *Bernardus* sese præsentem exhibuit, et excerpta ex *Abaelardi* libris capitula proposuit. Sed *Abaelardus* videns se ab amicis quos advocarat desereri, Sedem Apostolicam appellavit. Cui appellationi ex Sanctæ Sedis reverentiam episcopi deferentes, errorum ejus quædam capita ad *Innocentium* transmissere, eorumque censuram obtinere, ut refert Baronius tam in hic quam *Appendice* ad hunc annum ex *Otione* Frisingensi lib. 1, cap. 48; quod tamen exactius enarravit *Gaufridus* Clarevallensis monachus, *Abaelardi* olim discipulus, lib. 3 Vitæ S. Bernardi cap. 5, ubi inter alia scribit, Synodum damnasse quidem capitula prout jacebant, et ab auctoris nomine, qui videbatur incertus, abstinuisse: « Ecclesia quæ convenerat », inquit *Goufridus* citatus, « dimisit hominem, mulcavit abominationem, a persona abstinens, sed dogmata prava condemnans ». Interim dum hæc agerentur, *Berengarius Pictaviensis*, unus ex omnibus *Abaelardi* discipulis, ausus est ejus *Apologiam* publicam facere, plenam acrimoniam adversus S. Bernardum. Quamobrem reprehensus a multis, quod tam gravem sanctumque virum lascivientis styli acumine pupugisset, excusavit se, idque joco potius quam serio factum affirmavit. *Petrus* vero *Abaelardus*, ut vidit se ab omnibus tanquam hæreticum descri, Cluniacum se contulit, Apologeticumque, et fidei Confessionem scripsit.

5. *Abaelardus Cluniacum secedit*. — Eodem tempore *Petrus Venerabilis*, abbas Cluniacensis, scripsit ad Innocentium II se *Abaelardum*, ignarum quo se verteret, Cluniaci retinuisse, et de pace egisse inter *Bernardum* et eundem, atque eo rem adduxisse, ut ambo tandem convenirent, dissidiaque sua pacifice composuerint: cæterum *Petrum* dimissis scholis, perpetuam sibi sedem elegisse apud Cluniacum, si domino papæ ita placeret, ne deinceps occasionem ulli daret de sua conquerendi doctrina. *Petri Venerabilis* litteras recitat Baronius num. 11. *Berengarii* vero Apologeticum pro magistro contra *Bernardum* Clarevallensem, Capitula hæresæon *Petro* *Abaelardo* attributarum, Apologiam seu Confessionem ejusdem *Abaelardi*, varias-

que Epistolas ad eandem rem facientes refert Bulaeus tom. II Hist. Universit. Parisiensis ad hunc Christi annum. Porro *Petrus Abaelardus*, præsertim post fidei suæ expositionem, et errorum emendationem, hæreticus immerito ab aliquibus dicitur, ut ostendit Natalis Alexander in parte 3 Sæc. XI et XII, Dissert. VII, art. 11, quod enim errores suos emendarit, Petrus Venerabilis in sua Epistola a Baronio memorata, et Otto Frisingensis lib. 1 de Gest. Frederici cap. 49, locupletes testes sunt, et ipsemet testis locupletior, qui in suo Apologético, seu Confessione fidei ait: « Quod si uspiam per multiloquium excessi, ut scriptum est: *In multiloquio non effugies peccatum*, nunquam importuna defensio me effecit hæreticum, paratus semper ad satisfactionem de malis meis corrigendis, sive delendis, in quo certe proposito usque in finem perseverabo, etc. » Deinde sigillatim Catholica dogmata capitulis erroneis a se assertis vel sibi objectis contraria profitetur. De pia ejus morte anno MCXIII agemus.

6. *Epocha Concilii Senonensis.* — Sed redeo ad Concilium Senonense, quod in *Octavis Pentecostes* celebratum fuisse diximus, quodque Henschenius ad diem XX mensis Februarii illustrans Vitam sancti Eleutherii episcopi Tornacensis in Belgio pag. 196, ait, non hoc anno, ut *passim alii referunt*, sed sequenti congregatum fuisse, in cuius rei testimonium refert Historiam revelationis corporis sancti Eleutherii, Henrico canonico Tornacensi factæ, ab oculato teste scriptam, qui ait se visionem suam scriptam transmisisse Patribus Concilii Senonensis in *Octava Pentecostes* eo anno habiti. In ea enim Historia revelatio illa dicitur contigisse *feria secunda, XI kal. Maii*, id est, die XXI mensis Aprilis, qui anno sequenti in feriam secundam incidit. Ita Henschenius. Verum loco *XI kal. Maii*, legendum *X kal. Maii*, qui dies hoc anno cum feria secunda concurret. Concilium enim Senonense hoc anno coactum fuisse testantur non solum pseudo-Robertus de Monte in Chron. et Vincentius Bellovacensis, qui sæculo sequenti vixit, in Spec. Hist. part. 3, cap. 83; sed etiam Hugo Autissiodorensis monachus Præmonstratensis, qui Chronicon suum Roberto monacho etiam Sancti-Mariani Autissiodorensis perperam attributum perduxit ad annum usque MCCII. Hugoni enim, non Roberto illud attribuendum esse probat ex Codice Ms. Chiffletius in Appendice ad Diatribam de illustri genere sancti Bernardi cap. 20, additque postmodum Appendicem adiecit *Robertum* usque ad annum MCCX, inde anonymum quæ supersunt usque ad finem et annum MCCXVII. Hæc Hugonis Autissiodorensis verba: « Anno Domini MCXL, Senonis, præsentē rege Ludovico, episcopo et abbatum et religiosorum fit conventus contra Petrum Abailardum. Hic ingenio subtilissimus, mirabilisque philosophus, qui construxerat cœnobium in territorio Tricassino in prato quodam, ubi legere solitus fuerat, in quo sanctimo-

niales plurimas episcopali auctoritate congregavit, quod Paractum nominavit, quibus sanctimonia-libus Heloissam quondam uxorem suam, religionem feminam, et litteris tam Hebraicis quam Latinis apprime eruditam, præfecit abbatissam. Quæ vere ipsius amica magnam ei post mortem in assidue precibus fidem conservavit ». Collectanea hujus Chronici publicavit Nicolaus Camuzatus, sed optandum esset, ut integrum Opus in publicum prodiret.

7. *In eo examinata visio Henrici Tornacensis canonici.* — Visio Henrici Tornacensis canonici in Concilio Senonensi examinata fuit, inter alia autem Henricus « palam prædixit, quod Ecclesia Tornacensis infra non multum tempus proprium esset episcopum habitura, et pristinam dignitatem receptura », ut in eadem Historia legitur. Quod revera anno MCXLVI contigisse videbimus; eo enim anno sedes episcopalis Tornacensis in pristinum statum restituta fuit.

8. *Floret Richardus de S. Victore.* — Ad num. 12 et seq. *Richardus de S. Victore*, natione Scotus, canonicus regularis Ordinis S. Augustini in cœnobio S. Victoris Parisiensi, discipulus Hugonis a S. Victore, post hoc tempus clauvit. Trithemius in Chron. Hirsang. ad annum MCXVII ejus mentionem facit, numeratque ejus Opera. Divus Bernardus eum in graviorebus theologiæ difficultatibus consulere solitus erat, extatque ejus tractatus De tribus appropriatis personis in Trinitate, ad divum Bernardum scriptus. Extat et alius de Incarnato Verbo ad divum Bernardum abbatem *Clarevalensem*, aliusque sub hoc titulo: *Declarationes nonnullarum difficultatum Scripture ad Bernardum Clarevalensem*. Trithemius laudatus anni ejus emortualis non meminit, quem tamen nobis exhibent San-Marthani in Catalogo abbatum Sancti-Victoris Parisiensis, ubi asserunt eum ejusdem monasterii priorem fuisse sub *Guarino abbate*, et vita functum anno millesimo centesimo septuagesimo tertio, sexto idus Martii. De ejus operibus jam locuti sumus cum de *Hugone de Folieto* verba fecimus. De iis legendus etiam Labbeus de Script. Eccles.

9. *Patria et annus emortualis Hugonis a S. Victore.* — Quoad *Hugonem de Sancto-Victore* canonicum regularem Sancti-Victoris Parisiensis, virum in divinis Scripturis eruditissimum, et in sæculari philosophia nulli priscorum inferiorem, ut ait Trithemius, nunc tandem certum eum anno millesimo centesimo quadragesimo secundo vitam cum morte commutasse. Verus enim Robertus de Monte, seu Robertus de Torinejo, abbas in monte Sancti-Michaelis de Periculo maris, in Tractatu de Immutatione Ordinis monachorum, cap. 5, agens de Parisiensi monasterio Sancti-Victoris scribit, multos clericos nobiles in illum locum convenisse: « Inter quos, inquit, magister Hugo Lothariensis et scientia litterarum, et humili religione maxime floruit ». In veteri vero Codice Ms. Aquicinctensi

non lantum annus ejus emortalis. sed etiam dies disertè exprimuntur : « Anno ab Incarnat. Domini MCXII, obiit dominus Hugo, canonicus S. Victoris, III idus Febr. qui ex Iprensi territorio ortus, a puero exulavit, et hæc et plura alia sui ingenii monumenta reliquit ». Hoc testimonium Mabillonius tom. I Analect. pag. 327, ex citato Ms. eruit, inde recte deduxit, vulgarem sententiam, quæ hunc virum celeberrimum *Saxonem* facit, falsam esse. Verum in hoc ei adherere non possum, quod dicit, Robertum de Monte Lotharii regnum late usurpasse, eique territorium Iprensi, quod conterminum erat, attribuisse, ut ipsemet postea suam sententiam explicavit in fine tom. I Analect. Nam *Flandria*, ubi *Aquicinctum* ad Scarpam fluvium, haud procul ab urbe *Duaco* monasterium sub regula S. Benedicti conditum, nunquam in Austrasia vel in Lotharingia comprehensa fuit; neque *Parvatus Flandriæ* Lotharingiam aliquando continuit. *Hugo* itaque dictus *Lothariensis* a Roberto de Monte propter longam in Lotharingia moram, sicuti propter eandem rationem dicitur *Parisiensis* a Pseudo-Roberto de Monte in Chron. ad annum MCXI, quo mortem ejus collocat. Meibomius in Dissert. novæ Collectioni subjuncta, contendens antiquam de Hugonis a Sancto-Victore patria opinionem retinendam esse, ait neque Robertum de Monte, neque ullum antiquum, aut Hugonis de Sancto-Victore ætati proximum hujus patriæ mentionem fecisse; sed non viderat vir doctissimus Chronicon verum et sincerum Roberti de Monte, a Bacherio cum Operibus Guiberti abbatis de Novingento in lucem emissum. Neque opinio, quam tuctur, amplius defendi potest, cum nullum antiquiorem scriptorem *Theodoro Engesluso*, qui anno MCCCXX florebat, anonymo Aquicinctensi, et vero Roberto de monte opponat, et alios plures isto Theodoro juniores; licet in critica non numerus auctorum, sed pondus et antiquitas eorundem attendi debeant.

10. *Dissidium inter Innocentium II et Rogerium regem.* — Ad num. 13. Falco in Chron. ubi annum a primo die mensis Martii exorditur, sub finem anni MCXXXIX ait, *Guidonem* cardinalem diaconum *rectorem Beneventi* constitutum, *usque ad kalendas Martias* permansisse. « Deinde Apostolicus alium misit rectorem, Joannem nomine, consanguineum suum, et Guido ille (quem superius virum *valde discretum et moribus ornatum* appellarat, qui quæ post sub Cælestini II nomine Ecclesiam Romanam rexit) Romam repeditavit ». Baronius ex Falcone laudato ait, Alphonsum principem Capuanum, Rogerii regis filium, suapte sponte ditiones Ecclesiæ invasisse, Rogerio rege inscio. Verum hoc Falco non asserit, sed ait : « Prædictus rex Rogerius Amphusum filium suum, principem Capuanorum, magno cum exercitu militum et peditem trans civitatem Piscariam misit, ut provinciam (hodie Abrutium Ulterius appellatam) suæ subjugaret potestati; qui vero princeps

exercitu illo accepto, sicut rex paler ejus jusserat, labore multo peregit, et Piscariam transiens castella copiosa ibi contigua, et vicos comprehendit, et spolia illorum prædatus est : et quadam eorum igne consumpsit. Diebus autem non multis interjectis, præfatus rex Rogerium ducem filium suum mille cum militibus, et peditem manu copiosa in auxilium præfati principis delegavit. Dux itaque cum principe fratre suo simul alligati provinciam illam prope Romanos fines adjacentem timore multo ad eorum imperium submiserant. Unde prædictus Apostolicus Innocentius turbatus, consilio accepto Romanorum, ad eos per cardinales direxit, ne aliena invaderent, et Romanis fines non usurparent; qui Apostolico rescribentes responderunt, non aliena petere, sed solummodo terras ad principatum pertinentes velle redintegrare.

11. *Componitur.* — « Dum hæc et alia geruntur, nominatus rex medio mense Julio navigiis paratis Salernum venit, ut filiorum ducis et principis facta, quos, ut supra dixi, cum exercitibus miserat, insuper cum domino Apostolico Innocentio alloqui, et simul esse excogitabat. Continuo rex ille, consilio habito, Salernum exivit, et ducentis militibus aggregatis, prope civitatem venit Beneventanam, et cum Joanne subdiacono Romanæ Sedis, tunc Beneventano rectore, et aliis Beneventanis de pace et civitatis utilitatibus, et domini Apostolici fidelitate tenenda, satis abunde locutus est, et inde procedens Capuam ingressus est, ibique diebus non multis commorans, de quibusdam suis negotiis tractavit; deinde apud Sanctum-Germanum festinavit. Illico habito consilio, legatos duci et principi filiis suis mandavit, ut ad eum reverterentur; audierat enim rex ipse Apostolicum Innocentium de provinciæ illius invasione valde turbatum esse et contristatum. Dux autem et princeps nuntiis acceptis ad patrem eorum reversi sunt ». Fanum Sancti-Germani ad Montis Casinensis pedem positum, rexque ad illud monasterium profectus, ut dissidia quæ inter se et monachos versabantur dirimeret, ut asserit anonymus Casinensis ad an. MCXXXIX, qui nobis est MCXI : « Idem rex ad hoc monasterium venit III kal. Aprilis (legendum *Augusti*, cum rex hoc anno nonnisi medio mense Julio Salernum pervenerit) cui per chartulam Rocca de Baura traditur pro ponte Curvo, quem dicebat injuste a nobis detineri ».

12. *Aliud dissidium ex monetarum immutatione ortum.* — Baronius summarie refert quæ Falco de monetarum immutatione a Rogerio rege facta narrat. Is autem ita narrationem suam concludit : « Illis omnibus ita peractis, ipse Salernum properavit, et ibi diebus non multis moratur quarto die intrante mensis Octobris, navigio parato, mare ingressus est, deinde Panormum festinavit. Dux vero filius ejus in Apuliæ partibus remansit, et princeps alter ejus filius apud civitatem Capuam mansitavit. Cumque, ut prædiximus prædictus rex Rogerius monetas illas superius di-

etas introduceret, domino Joanni subdiacono sanctae Romanae Sedis, Beneventano rectori, et civibus Beneventanis delegavit, ut monetas illas infra civitatem suscipiat: quod praedictus rector audiens mirabiliter contristatur. Aiebat quidem rector ipse, quoniam sine domini papae licentia monetas illas recipere non posset, praecipue cum ad totius Italiae mortem monetarum illarum introductio spectaret. Tandem communicato consilio, rector praefatus praedicto Pontifici regis edicta mandavit, ut quid super his negotiis esset agendum, mittere dignaretur. Pontifex itaque Innocentius his auditis, ultra quam credi potest condoluit, et super regis Rogerii execrandis actibus mirabatur. Confestim Beneventanis mandavit litteras suas ita continentes: Facta regis et monetarum suarum inventiones et a vobis accepimus, et ab aliis nobis in veritate referentibus; unde mandamus, ut non terreamini, neque jam mentes vestras moveatis, quoniam transitura sunt et cito possunt emendari. Nos autem circa utilitates vestras quotidie invigilamus. Litteris talibus acceptis et lectis, gratiarum egimus actiones, et aliquantulum roborati aspiravimus. Et his actis, praefatus Pontifex Innocentius ad regem transmisit Rogerium, significando qualiter totus populus Italiae et extra, de introductione monetarum istarum doluisset et quomodo ad famis afflictionem devenisset ».

13. *Finit Chronicon Falconis, et Petri Casinensis.* — Hic desinit Chronicon Ms. *Falconis* non minus in fine quam in principio mutilum. Saeculo praeterito, antiquius exemplar lingua Langobardica scriptum, ex quo novum descriptum fuit, tam in fine quam in principio uno folio mutilatum erat. Baronius hic ait, Falconem Chronicon suum ab anno mxxii exorsum esse; verum illum ab anno mci ejus initium repetere, et priores hujus Chronici annos Baronium non vidisse, jam anno mxxiii, num. 4 observavimus. Imposterum rerum Sicularum et Neapolitanarum tractatio junior erit; praesertim cum *Petrus Diaconus*, qui Historiam monasterii Casinensis a Leone Marsicano editam continuavit, hoc ipso anno, non vero superiori, ut quidam tradidere, Continuationem suam absolvat. Nam cap. 139, refert *Rogerium* regem pacem cum monachis Casinensibus iussisse, quod ex Falcone et ex anonymo Casinensi hoc anno contigisse mox narravimus. Praeter illud Opus, aliaque quaedam, scripsit Petrus librum *de viris illustribus coenobii Casinensis*, qui extat tom. xx Biblioth. Patrum edit. Lugdun. Annus mortis ejus incertus.

14. *Moritur Turstinus archiepiscopus Eboracensis.* — Ad num. 15. Baronius in Appendice ad annum mxxl retractat quae in Annalibus de *Willelmo electo* archiepiscopo Eboracensi scripserat, fateturque divum Bernardum, qui in suis litteris eum semel *intrusum* vocavit, falsa deceptum fuisse insinuatione eorum, quorum existimatio apud se haud dubiae fidei esset. Cumque haec

controversia usque ad annum mcliii perduravit, majoris claritatis gratia eam in suos annos distribuimus. Hoc itaque anno Turstinus archiepiscopus Eboracensis multis laboribus senioque confectus, dimisso sponte archiepiscopatu, monachum induit, et *Nonas Februarii* in Domino obdormivit. Ita non solum Thomas Stubbs in Actis Pontif. Eboracensium; sed etiam alii historici Angliae. Addit Vigorniensis eum plurimorum monasteriorum fundatorem extitisse, et corpus ejus post annos et menses quinque sepulturae suae integrum et odoriferum repertum esse.

15. *Willelmus et Henricus de Murdach archiepiscopi Eboracenses electi.* — Quo defuncto (nempe Turstino) statim fit schisma in Eboracensi Ecclesia de electione pontificis. Quidam enim elegerunt Willelmum Eboracensis Ecclesiae thesaurarium, quem Henricus Wintoniensis Ecclesiae episcopus, Romanae Sedis legatus, consecravit. Ceteri vero canonicorum elegerunt sibi archiepiscopum Henricum Murdach, qui praevaluit, et archiepiscopatum tenuit quamdiu vixit », inquit Rogerius Hovedenus in Stephano rege ad hunc Christi annum pag. 485, Baronius hunc locum referens ait, *contra quem legitime electus fuit Henricus Murdach*; verum Hovedenus ait tantum contra Willelmum electum fuisse Henricum Murdach, nec litem dirimit. Praeterea Hovedenus uno tenore refert quae variis annis contingere; Henricus enim nominis sub Eugenio III praevaluit, ut infra videbimus. Audiendus Guillelmus Neubrigensis lib. 1, cap. 17: « Venerabili Turstino defuncto, Eboracensis Ecclesiae pontificatum suscepit Willelmus, ejusdem Ecclesiae thesaurarius, vir plane secundum carnem nobilis, et morum ingenua lenitate amabilis. Qui cum ad Sedem Apostolicam responsales idoneos pro petendo solemniter pallio direxisset, emergentibus adversariis, et multa contra eum proponentibus, negatum est ». Willelmus natus erat ex Emma, Stephani Angliae regis sorore. Henricus vero Murdach, praeclearis doctrinae et pietatis dotibus instructus, salutaria monita S. Bernardi secutus, Fontanense monasterium Ordinis Cisterciensium ingressus, ibi abbatiam gessit.

16. *Innocent. II et Celestinus III Willelmo pallium dare noluerunt.* — Joannes prior Hagustaldensis in Hist. ad annum mxxlii, qui nobis est mxxlii, scribit: « His diebus Willelmi electi Eboracensis causa audita est in consistorio papae Innocentii. Affluit et magister Walterus, Londoniensis archidiaconus, praee manibus scriptas gerens allegationes abbatum et priorum in eum. Tandem datum est praecipuum, ut in Dominica III Quadragesimae sequenti anno super quaestione hac, et qui affuerant tunc, et qui abfuerant illic concurrerent ». Tum anno mxxlii Joannes Hagustaldensis scribit: « Secundum tenorem praeecepti Apostolici Willelmo abbas Rievallis, Ricardus abbas II de Fontibus, etc. convenerunt, cum quibus Walterus Londoniensis archidiaconus et Wil-

Ielms cantor Eboracensis. Adstitit et Willelmus electus cum suis coadjutoribus. Adversus quem coram Apostolice processerunt in causam hi qui eum appellaverant. Summa vero querelæ eorum in hoc niti videbatur, quod Willelmus comes Eboracensis in capitulo Eboracensi præcepit ex ore regis, ut si decanus Eboracensis Willelmum juraret, hoc regis præceptum, ad capitulum per comitem nequaquam perlatum hunc ad consecrationem solemniter posse admitti, si tamen et ipse pro se fidem daret, datione pecuniæ hunc honorem se non appetisse. Ex Epist. autem divi Bernardi ad Cælestinum pap. cccxxiv, et ex ejus Epist. cccxxv data ad cardinales curie discimus, *Willelmum decanum* jurare noluisse, indeque sanctus Bernardus inferit, Willelmi in archiepiscopum Eboracensem consecrationem fuisse sacrilegam, eumque *intrusum* appellat.

17. *Willelmus usque ad Eugenium III præfuit Ecclesiæ Eborac.* — Loquitur et de isto schismate Serlo monachus Cisterciensis æqualis in Historia Fontanensis cœnobii tom. I Monastici Anglic. pag. 733 recitata, et pag. 745, Turstini morte relata, habet : « Conventibus clericis ad electionem faciendam, pars major numero Willelmum thesaurarium in archiepiscopum elegit, pars vero sanior appellatione interposita reclamavit, etc. ipse tamen Willelmus ad tempus obtinuit, amicitia functus potentum, fretus regia potestate, favente episcopo Wintoniensi Henrico, qui ei manus imposuit, et in episcopum consecravit; pallium tamen, procurante adversa parte, impetrare non potuit ». Dein pag. 747, inquit Willelmum cathedræ præsedisse usque ad Pontificatum Eugenii III. Ex quibus liquet primo errasse Thomam Stubbs in Actis Pontif. Eborac. ubi ait, Willelmum remansisse cum episcopo Wintoniensi, usque ad obitum Henrici Murdach, seu usque ad Pontificatum Eugenii III, qui Henricum archiep. Eboracensem declaravit. Secundo Willelmi causam superiorem fuisse; cum primus, et a majori parte capituli in archiep. Eboracensem electus fuerit. Bernardum vero falsis declarationibus inimicorum Guillelmi deceptum fuisse, ostendit Alfordus anno mclxiii, num. 6 et seq.

18. *Anglia ob intestina bella in miseriam statum redacta.* — Malmesburiensis in Hist. Novella lib. 2, pag. 183, quo in statu hoc anno Anglia fuerit, hoc modo narrat : « Totus annus ille asperitate guerræ inhorrui. Castellâ erant crebra per totam Angliam, quæque suas partes defendentia, imo, ut verius dicam, depopulantia. Milites castellorum abducebant ab agris et pecora et pecudes, nec Ecclesiis nec cœmeteriis parentes. Domibus miserorum rusticorum usque ad stratum expilatis, ipsos victos incarcerationibus; nec, nisi omnibus quæcumque habebant, et quocumque modo acquirere poterant, in redemptionem consumptis, dimittebant. Plures in ipsis tormentis, quibus ad se redimendum constringebantur, dulces efflabant

animas, quod solum poterant, Deo miseras suas applorante, etc. »

19. *Irrito conatu de pace actum* — Hæc fuisse prosequitur Malmesburiensis, et postea subjungit : « Eodem anno in Pentecoste resedit rex Lundeniæ in turri, episcopo tantummodo Sagiensi præsentante : cæteri vero vel fastidierunt, vel timuerunt venire. Aliquanto post mediante legato (sc. Henrico episc. Wintoniensi) colloquium inductum est inter imperatricem (Mathildem filiam Henrici Angliæ regis) et regem (sc. Stephanum), si forte Deo inspirante pax reformari posset. Conventum juxta Barthoniæ, misso ex parte imperatricis Roberto fratre, et cæteris suis : ex parte regis legato et archiepiscopo (nempe Theobaldo Cantuariensi) simul et regina (nempe Mathilde, de qua mox) sed inaniter, inquam, triverunt et verba et tempora, infectaque pace discessum. Nec fuit ambarum partium æquum dissidium, dum imperatrix ad bonum propior, Ecclesiasticum non se revereri iudicium mandasset, et rex illud quam maxime cavere, consiliis illorum male credulus, qui nihil minus quam pacem vellent. Dum ei dominari ad utilitates suas valeret. Postremo Septembris legatus, qui noscet officii sui potissimum interesse, ut pax conveniret, pro ea restituenda laborem itineris transmarini aggressus, in Galliam navigare maturavit. Ibi a rege Francia (Ludovico VII) et comite Theobaldo (fratre Stephani Angliæ regis), multisque religiosi ordinis personis, magno et sollicito tractatu de pace Angliæ habito, reversus est in fine pene Novembris, salubria patriæ mandata referens, si esset qui verba factis apponeret. Et plane imperatrix et comes (nempe Henricus filius ejus, qui postmodum rex fuit) confestim assensere; rex vero de die in diem producere, postremo in summa frustrari. Tum demum legatus se intra se continuit, rerum exitum, ut cæteri, speculatorus ».

20. *Laudatur Mathildis regina Angliæ.* — Mathildis regina Angliæ anno mclxxxviii de pace cum Davide Scotiæ rege sancienda Stephanum regem conjugem suum plurimum urserat, nec per eam stetit, quin ea effectum sortita sit, sed plures barones, qui belli occasione gravia damna passi erant, regis Stephani animum ab ejus consilio avocarunt, uti refert Ricardus prior Hagustaldensis in Hist. de Gest. regis Stephani. Huic pie regine magna erat cum sancto Bernardo necessitudo, ut ostendit Epistola cccxv ejusdem sancti ad *Mathildem reginam Anglorum* data, in qua ait, se, dum *Boloniæ* esset, gratiam aliquam ab ea petiisse, additque : « Bene servate mihi filium, quem nunc peperistis, quia et ego quoque (si regi non displicet) in eo mihi vindicet portionem ». Mabillonius in Nota ad eam Epistolam, eam *Mathildem* interpretatur filiam Malcolm III Scotiæ regis, quam dicit Henrici V imp., dein Henrici I Angliæ regis uxorem, additque illam ex eo genuisse Henricum II, « de quo Bernardus in fine Epistolæ, quæ ante annum mclxxxv Henrici I mortalem, scripta

est ». Verum animus ejus, quod magnis non raro viris accidit, quando hæc scripsit, peregrinabatur. Neque enim Henricus II Angliæ rex filius fuit Henrici I, sed *Godefridi* Andegavensis comitis, et Mathildis imperatricis, filia, non vero uxoris Henrici I, qui nuperat Mathildi filia Malcolm III et sorori Mariæ, quæ uxor data fuit ab Henrico I rege Angliæ Eustachio III Bononiæ comiti. Quo ex matrimonio nata unica filia *Mathildis* Bononiæ comitissa. Hæc vero conjugio copulata fuit cum *Stephano* Moritonii comite, dein Moritonie et Bononiæ, tandemque rege Angliæ, ut unanimi consensu scriptores Belgici et Anglici docent. Ad hanc itaque *Mathildem* sanctus Bernardus scripsit; neque enim Mathildis imperatrix, vivente Henrico I patre, *regina* appellata, multo minus *Godefridus* conjux ejus *regis* titulo colonestatus. Quare ea Epistola post annum mccccxv a sancto Bernardo data; cum ultimis diebus illius anni Stephanus Angliæ rex et Mathildis *regina* appellati fuerint. Alfordus in Annal. anno mccccxiii, num. 20 suspicatus fuerat, Mathildem, ad quam est Epistola divi Bernardi, fuisse Mathildem imperatricem; verum postea hoc anno, num. 3, eam opinionem jure merito retractavit, et in viam rediit. Ad majorem hujus S. Bernardi Epistolæ intelligentiam legendus Gaudridus lib. 4 Vitæ ejus cap. 1.

21. *Dedicatio Ecclesiæ S. Dionysii præsentæ Ludovico rege facta.* — In Gallia anno mclx, « dedicatum est novum opus Ecclesiæ beati Dionysii anteriori parte a domno Hugone Rothomagensi archiepiscopo xix anno administrationis domni Sugerii abbatis, qui idem opus construxit », ut legitur in brevi Chronico Sancti-Dionysii ab auctore anonymo illius abbatie monacho scripto, et tom. II Spicilegii Bacheriani recitato, qui recte, licet subobscurius, tradit anteriorem partem hujus Ecclesiæ duntaxat dedicatam fuisse ab Hugone archiep. quia dedicatio principalis partis ejusdem Ecclesiæ anno mclxiv peracta est, ut ibidem videbimus. Sugerius abbas Sancti-Dionysii, qui illam Ecclesiam ædificavit, libellum edidit de ejus Consecratione, et Translatione corporum sancti Dionysii ac sociorum ejus tunc facta, atque se *pridie idus Julii, die Dominica*, hoc scilicet anno, solemnem ordinasse processionem, cui *Ludovicus VII* Franciæ rex, et multi episcopi ac abbates interfuere, et regem propriis manibus primum lapidem posuisse capitalis Ecclesiæ partis, nonnisi post quadriennium absolutæ. Cum vero Chronographus asserat, hunc annum esse xix administrationis Sugerii abbatis, qui et administer Ludovici VII regis erat, manifeste apparet, *Sugerium* anno mccxii, non vero anno insequenti, abbatem renuntiatum fuisse; neque hoc imposterum in dubium revocandum.

22. *Alphonsus VII Castellæ rex bellum inferit Garsie Ramiro Navarræ regi.* — Hoc anno *Alphonsus VII*, Castellæ rex et Hispaniarum imperator, *Garsie Ramiro* Navarræ regi bellum intulit. Sandovalius in *Alphonso VII* testatur, se legisse

fœdus tunc imperatorem inter et Raymundum IV comitem Barcinonensem initum *Carionii*, *Æra mclxxviii*, hoc scilicet Christi anno, non vero, ut quidam historici Hispani scribere, *Æra mclxxvi, pridie idus Junii*. Eo tractatu imperator cedit *Raimundo* comiti et principi Aragonensi Casaragustam, Tarracanam, aliaque vicina oppida, quæ jam in potestate Castellavorum erant, ea conditione ut Raimundus supremum jus ejus agnoscat, eique hominum præstat. Statim imperator Pamplonem obsidione cinxit, sed *Garzias Ramires*, qui sese in ea non incluserat, ex melioribus suis copiis exercitu congregato, irrumpit in Aragonios, et gloriosam de illis victoriam reportavit in loco inter Callum et Cortem posito, ut dicitur in antiqua Historia a Sandovalio fol. 469 memorata, idque *Dominica in Albis* hujus anni. Quare cum prælium hoc die xiv mensis Aprilis habitum fuerit, fœdus ad Carionem sancitum, non *pridie idus Junii*, sed *pridie idus Januarii*. Alphonsus imperator medio mense Maio in Navarram irrumpere proposuerat, et Garzias Ramirus Ludovici VII Galliæ regis et Aquitanie ducis ac amicorum auxilia expectabat, cum *Alphonsus Jordanus* Tolosæ comes ad Sanctum-Jacobum devotionis gratia proficiscens per Naierensem urbem, ubi imperator copias congregabat, transiens Navarros et Castellanos ad amorum suspensionem adduxit.

23. *Alphonsus Portugallicæ rex regnum suum Rom. Ecclesiæ vectigale reddit.* — Verum *Alphonsus imperator* eodem fere tempore aliam expeditionem adversus Alphonsum, qui se Portugallicæ regem vocabat, suscepit. Innocentius II legatum in Hispaniam miserat, qui hunc principem excommunicatione percelleret, nisi Alphonsum imp. agnosceret, sed Lusitanus maluit excommunicari, quam *Alphonso imperatori* subijci. Faria tamen, alique tradunt promississe postea Lusitanum legato se singulis annis marcas duas auri Ecclesiæ Romanæ loco census persolaturum, si Innocentius II eum in dignitate regia confirmaret: quod cum pollicitus esset legatus, Lusitanum legatos misisse, qui sancto Bernardo apud Pontificem agente, anno sequenti regni Portugallicæ investituram ab eo obtinueret. Postea sub *Lucio II* Alphonsus Lusitaniam Romanæ Ecclesiæ vectigalem annuo censu unciarum auri quatuor constituit, ea conditione ut defensionem ac solatium Apostolicæ Sedis haberet, et nullam potestatem aliojus Ecclesiastici vel secularis domini, nisi tantum Apostolicæ Sedis vel ipsius legatorum, in regno suo reciperet. *Innocentio II* jam hominum fecerat *Alphonsus*, qui in suis ad Lucium litteris se quidem regem inscribit, sed a Pontifice *dux* tantum salutatur, ut videre est apud Baluzium lib. 2 Miscell. pag. 220 et seq., ubi Alphonsi et Lucii II Epistolas in lucem emisit. Rodericus de Cunha in suo episcoporum Portuensium Catalogo part. 2, cap. 3, Diploma Alphonsi hoc anno datum repræsentat, in quo is se Portugallicæ regem dicit.

24. *Pax inter Alphonsum VII Castellæ et Garsiam Navarrae reges sancita.* — Interim Sanctus episcopus Calahorre, Michael episcopus Tarrasonensis, et prior monasterii Sanctæ Mariæ Regalis de Naiara omnem diligentiam adhibebant, ut Garsiam Ramirum Navarrae regem cum Alphonso imperatore pacificarent. Illi ad limites utriusque regni venerant, seseque ad decretorum prælium parabant, sed major apparatus terrorque, quam belli exitus fuit. Pax enim inter utramque gentem ad Iberi ripam, *Calagurrim* inter et *Alfarum* constituta; ad colloquium ventum, cui Berengaria Alphonsi imp. uxor, tres præsules memorati, multique proceres interfuerunt. Neque tantum concordia in eo colloquio sancita, sed etiam pactis nuptiis firmata, *Sanctio* Alphonsi natu majore filio et *Blanca* Garsie regis filia matrimonio junctis. Sandovalius laudatus, et Mariana lib. 10, de Reb. Hisp. cap. 18, fidem faciunt, fœdus illud mense Octobri initum, sed Mariana diem xxiv illius mensis, Sandovalius vero diem xxv, et Brizius abbas diem quintum ejusdem mensis notant; quod dierum discrimen librariis potius quam auctoribus attribuendum.

25. *Synodus adversus Chrysomalum a patriarcha Constantinop. coacta.* — Hoc etiam anno Constantinii *Chrysomali* scripta omnia in judicium vocata, et examinata; cumque continerent multa Enthusiastarum et Bogomilorum dictis absurdiora, coacta Synodo, a Leone Styoppita patriarcha Constantinopolitano proscripta condemnataque fuere. Sententiam Synodi Allatius lib. 2 de Eccles. Occident. et Orient. Consensione cap. 11 publicavit, quam resectis minus necessariis hic referemus: « Mense Maio, Indictione iii, presidente sanctissimo nostro domino et recumenico patriarcha domino Leone, in dextris catechumenis S. Alexii, assidentibus et sanctissimis præsulibus, Ancyrano, Cyziceno, Amasiensi, Melitenensi, Laodicensi, Cretensi, Antiocheno Pisdia, Trajanopolitano, Philippensi, Amastriano, Mesembriensi, et Dei amantibus archiepiscopis Paravisiensi et Gotthiensi, nec non adstantibus et illustribus principibus. Curæ corporum incumbere, etc. Propterea nos, cum multos adscribendum, instituendumque alios, sua sponte et voluntate ex sese animatos, refrenantes, etc. Quorundam monachorum adventu, qui in sacro domini Nicolai monasterio exercebantur, edocti, Commentaria quædam Constantinii *Chrysomali*, qui olim obijt, ibidem reperiri; quæ cum ibi percurrissent, non parum scandalizatos fuisse propter multas in illis contentas nugas atque ineptias, ut tradebant et jam multis communicari, tanquam omnium utilissima, aptissimaque ad vitam exquisitiorem alios manducare: rem maximæ considerationis esse rati, ab illis qui ea possederant Commentaria, libris recuperatis, namque disquisitione facta, etc. Quæ in illis continebantur, et privatim considerantes, et coacta Synodo examinantes, non tantum nugarum, ineptiarum, et

stultiloquiorum, sed et comperitarum hæreseon plena reperimus, et dictis Enthusiastarum et Bogomilorum absurdiora.

26. *Absurdæ Chrysomali hæreses.* — « Ut enim alia prætereamus, quæ præter Ecclesiasticos mores et traditiones ex ventre eructavit, et ex infelici sua mente confinxit, etc. dicens satanæ eos cultum præbere, qui cuicumque principi honorem et venerationem exhibent, dum nihilominus dicit, omnem Christianum, in infantia, uti moris est, baptismalum, absque eo quod catechizatus sit, ut ipse ait, baptizari illum quidem, sed revera Christianum non esse, licet ita vocetur; et, licet virtutes aliquas assecutus sit, cum non aliter ac pagannum et ethnicum assecutus fuisset, nec oportere ipsum percurrere doctrinæ Evangelicæ sermones, sed prius catechizari et initiari, et transelementari, hoc est, secedere a potestate satanæ. Item quicumque, licet ita nuncupentur Christiani, non percipiunt suam ex divino Baptismate transelementationem, nec ad archieraticum gradum pervenerunt, etsi universam divinitus inspiratam Scripturam ex ore recitent et instruant, cognitione eos instante gloriantes nullam inde utilitatem cepisse, nisi rursus catechizati, transelementationis participes facti sint, et animorum suorum habitum formationis, per mysticam meditationem, et manuum impositionem, dispensatorum magni hujus mysterii, et sacrosanctæ cognitionis guarorum.

27. *Alia Chrysomali dogmata.* — « In alio item capite addit: Quicumque intellectuali sensu intellectualiter non persentit Deum in eo operantem voluntatem suam per Jesum Christum, incassum laborat: et Christiano nondum catechizato, si præniteat et confiteatur peccata, quæ post sacrum Baptisma commisit, nihil prodesse vincula et medicamenta auxiliaria, sed requiri doctrinam divinam, et initiationem, et fidem. Rursusque si Christianus Baptismate ablutus, non est ab infirmitate corroboratus, et a propensione in peccatum, et adeat eum, qui antea corroboratus est per fidem, et manum impositionem dispensatorum divinæ gratiæ, quæ ex fide datur, non ex operibus. Præterea veros apud illum Christianos non subijci legi; quemadmodum postquam pervenerunt ad mensuram ætatis Christi, non amplius posse esse sub lege, sed pro viribus, quæ legis sunt facienda. Item tanquam dogma sancit animas post sanctum Baptismum, habitationis cogitationibus vexatas, non posse ab illis liberari, nisi per interpolatores fatue adhortentur, neque in Ecclesiâ ingredi, neque canere, neque Christum compellere, neque quidpiam Christianum opus efficere; alibi etiam, neque aliquam virtutem consecrari, antequam per bonam illam immutationem immutentur, quod Deus ab eis se avertat, illaque odio prosequatur: namque dæmonibus similes sunt, qui similia peragunt, affirmantque se per Deum peragere; inconsulte vero, ut ait, illa efficiunt.

28. *Alia ejus dogmata.* — « Et, ut pleraque

summam dicamus, in diversis ille capitibus affirmat nullum commodum Christianos percipere, licet omnem virtutem expleverint, et ab improbitate omni declinarint, etiamsi illa per Deum operentur, nisi intellectualem sensum divini Spiritus accipiant, naturaliter et sine dolore in illis bonum efficiens, et immobiles omnino facientis ad malum. Decernit etiam nisi tutelam in sensu acceperint illuminationem qui regenerantur, ut, dum canunt, inconcussam atque immobilem habeant mentem, et percipiant eorum quæ canuntur sententiam universam, neque psallere eos omnino, neque orare, imo neque ut fideles in Ecclesiam ingredi, donec per eam, quæ ab illo affertur, catechesi rursus et initiatione, unguentorumque unctione transelementati, divini Spiritus in semetipsis roboris ac efficacie sensum perceperint. Imo eadem affirmat de tonsura, cum nempe qui tondetur, sine ulla utilitate tonderi, nisi in intellectuali sensu, et non in fide donatæ eidem sensibilis Spiritus gratiæ, et per eam transmutationis et transelementationis, in posterum neque velit, neque possit peccare.

29. *Libri, in quibus ejus dogmata continentur, flammis addicti.* — « Præter autem multa alia, illud quoque intonuit, singulos Christianos duas habere animas, quarum una sit impecabilis, alia peccatis obnoxia : quod si unam habuerit animam, Christianus nondum factus est. Annon ista jam indicatarum hæreseon propria sunt? Namque intellectualem sensum, rursusque sensibilem intellectionem aut solum sensum, ut in aliis tradit, et illuminationem, et revelationem, et cognitionem ab eo requiri in baptizatis; si minus, inutile iisdem

asserere baptisma, licet omne bonum consequi studeant, Enthusiastarum omnino hæresis est, qui revelationes divinas pravorum dæmonum fraudibus sibi infundi imaginantur : post divinum porro Baptisma baptizatos, quod absque catechesi, ut ipse ait, regenerati sunt, hoc est, non omnes Christianos, etiam magistros et sacerdotes, et ipsos hierarchas, indigere rursus ab initio catechesi, initiatione, et transelementatione, per ceremonias ab eo intrusas, et manuum impositionem, sapientum dispensatorum mysticæ hujus gratiæ, quos summis conalibus perquirendos esse tradit; raro enim inveniuntur ii, qui soli possunt ad se accedentes renovare, ea divini gratiæ participes facere; Bogomilorum hæreseos indubitabile est signum, qui, tanquam imperfectum nostrum Baptisma redarguunt, et secundum important, suum proprium, quod perfectum faciat hominem, et divini Spiritus participem. Illud etiam aut duas animas Christianum habere, ut tradit, aut non esse Christianum, ipsissimis verbis inter Massalianorum aut Bogomilorum detestandæ sectæ dogmata reperitur ». Decernit postea Synodus libros illos, in quibus innumera alia hujusmodi disseminantur, igne exurendos esse, prohibetque ne quispiam audeat novas doctrinas edere, antequam a Catholica Ecclesia prius judicatæ et approbatæ fuerint. Ait deinde vocatos fuisse penes quos libri *Chrysomali* inventi sunt, qui proprio ore dixere se nihil tenere, nisi quæ hodie in Synodo decreta : et veniam poscere quod bona præsumptione virum persecuti fuerint; seque ejus Commentaria perpetuo anathemati subjicere.

INNOCENTII II ANNUS 12. — CHRISTI 1141.

1. *Occasione belli Tiburtini Romana seditione, instigante Arnaldo de Brizia.* — Annus Redemptionis millesimus centesimus quadragesimus primus, Indictione quarta, ordine sequitur, quo bellum Tiburtinum magis ac magis ingravescit; usque adeo ut illi Romanos absque ordine militari ab Urbe progressos in fugam ignominiosam converte-

rint. Accidit namque his temporibus, ut finitimæ civitates Italiæ obstinato animo adversus invicem confligerent, Lucenses adversus Pisanos in Tuscia, in Longobardia Patavini adversus Veronenses, Mediolanenses implacabili odio Comenses perdere conarentur, et si quæ aliæ adversus alias iisdem furiis insanirent : quibus factum, ut peregrinis ad

Urbem commeantibus perdifficilis pateret transitus, quia sive a latronibus, sive militibus pati dirissima cogerentur. Tiburtini igitur occasione schismatis haud parere Pontifici assueti, per pacem redigi in obedientiam indignantes, resistere Innocentio ausi sunt. Qua contumelia se affici Romani videntes, dum eorum clandestinas paterentur iugiter incursiones, indignatione commoti valde, ad subjugandos sibi propinquiores populos omne studium impendere sunt aggressi. Sed imperitos militiæ fuisse et longe degeneres ab antiquo militantium robore, redarguerunt eventa : dum adversarios quasi imbelles contemnentes, ab iisdem ipsis adeo turpiter fugati sunt Tiburtinis, quod Deus ad comprimendum fastum ipsorum permisit. At vero cum non esset impunita relinquenda Tiburtinorum audacia, et resistens Ecclesiæ contumacia, Innocentius ad eos expugnandos Ecclesiæ vires omnes intendit, quos obsessos diu, arctique constrictos, compulsi ad deditionem, qui et Romanos in eos plus satis savire volentes compressit. Cujus occasione et a Pontifice resistentes, veterem reipublicæ formam meditantes, et restituere aggredientes, ad senatores describendos sunt reversi, resistente tamen illis in omnibus Innocentio. Hæc usque ad ejusdem Innocentii papæ obitum perducta fuisse, Otto Frisingensis enarrat, summamque recenset his verbis ¹ :

2. « Dum hæc aguntur in Gallia et Germania, Romanus Pontifex Innocentius, qui jam per multum temporis Tiburtinos excommunicaverat, ac aliis modis presserat, coangustatos ad deditionem acceptis obsidibus, ac jurejurando interposito coegit. Populus vero Romanus volens ut eos per obsides et sacramentum ad durissima præcepta, id est, ut muris ruptis, omnes provincias cederent, cogeret : dum nobilissimus ac liberalissimus sacerdos tam irrationabili et inhumane petitioni annuere nollet, seditionem iisdem Romani movent, ac in ipso impetu in Capitolio convenientes, antiquam Urbis dignitatem renovare cupientes, ordinem senatorum, qui jam per multa curricula temporum deperierat, constituunt, et rursum cum Tiburtinis bellum innovant. Causa vero tantæ immanitatis fuit, quod in priori anno, dum cum Pontifice suo in obsidione præfatæ civitatis mora-

rentur, civibus egressis et cum ipsis manum conserentibus, multis amissis spoliis, turpiter in fugam conversi sunt. Idcirco nulla, nisi quam diximus, conventionem usque hodie se posse placari asserunt. Verum sapientissimus antistes prævidens, ne forte Ecclesia Dei, quæ per multos annos sæcularem Urbis bonorem a Constantino sibi traditum potentissime habuit, hac occasione quandoque perderet, multis modis tam minis quam muneribus, ne ad effectum res procedat, impedire conatur. Sed invalescente populo, dum proficere non posset, lecto cubans, juxta quosdam, de futuris visione sibi monstrata, in pace quievit ». Hæc ipse de rebus gestis usque ad obitum Innocentii, qui contigit post annum sequentem.

3. Pestilentem auram istam laicis insufflavit Arnaldus de Brixia, novus hæresiarcha, de quo superius. Dum enim Romæ esset, jactare ista tunc cepit, laicorum esse omnia temporalia, et ea a clericis injustissime detineri. Quo nomine politicorum hæreticorum patriarcham atque principem se constituit. Audiebatur libenter ab illis, qui affluentiam bonorum clericis ac monachis inviderent. Quo inflati vento Romani, ita instabili motu agitantur, et meditantur prorsus inania, convenientes in unum adversus Dominum, et adversus Christum ejus dicentes (quod in Psalmis est) ² « Dirumpamus vincula eorum, et projiciamus a nobis jugum ipsorum ». Sed et impletum est, quod prophetice vates cælestis mox subdidit : « Qui habitat in cælis irridebit eos, et Dominus subsannabit eos ».

Hoc eodem anno orta est dissensio (ut habet Auctarium ad Siebertum) « inter papam Romanum et Francorum regem Ludovicum, unde Ecclesia Gallicana turbatur. Defuncto enim Alberico Bituricensi archiepiscopo, missus est Petrus a papa Innocentio eidem Ecclesiæ pastor consecratus ; sed a rege Ludovico repudiatus, eo quod sine ejus assensu fuerat consecratus, in civitatem minime recipitur. Cujus partes quia propter reverentiam, seu voluntatem papæ, comes Theobaldus fovere credebatur, simultas quæ sopita videbatur, inter regem et ipsum cepit repullulare ». Hæc ibi hoc anno. Quæ autem hæc secuta sint, dicuntur anno sequenti.

¹ Otto Frising, l. vii. c. 27.

² Psal. II.

Anno periodi Græco-Romanæ 6634. — Anno Æræ Hispan. 1179. — Anno Hegiræ 536, inchoato die 6 Aug., Fer. 4. — Jesu Christi 1141.

— Innocentii II papæ 12. — Conradi III reg. 4. — Joannis Comneni imp. 24.

1. *Tiburtes in Innocentiam II rebelles.* — Ad num. 1 et seq. Hoc anno *Rogerus* Siciliæ rex nullum bellum movit, sed *Tiburtes*, Prænestini, Tusculani, et Albani, qui superiori dissidio depravati, solenne *Innocentio* obsequium denegaverant, in contumacia perstabant. Hos tamen *Innocentius II* sacrorum interdicto percutere opportunum non judicavit, uti narrat *Baronius* ex *Ottone Frisingensi* lib. 7, cap. 27. Quare perperam scripsit *Sigonius* lib. 41 Hist. de Reg. Ital. Pontificem eos excommunicasse.

2. *In Sicilia plures Saraceni sunt Christiani.* — In *Sicilia Saraceni* non pauci Christianam fidem amplectebantur, et ex iis aliqui magnas donationes Ecclesiis faciebant. *Rochus Pirrhus* Chartam cujusdam *Rogerii Chameti* hoc anno datam refert, quam adhuc superesse testatur. In ea *Chametus* unica donatione casalia tria, seu terras tres Ecclesiæ Panormitanæ largitur, atque : « Respicendo te venerabilem electum archiepiscopatum civilis Panormi, dominum *Rogesium Tresera*, idoneum hominem, pacificum, virtuosum et justum, et Deo ex toto te datum et jugo suo, rectum in fide, et omnibus verbum recitatis prædicantem, ut sis in præceptis Dei et regalis culminis et suus specialis orator etc. pro salute animæ mei spiritualis patris et receptoris quondam comitis et Siciliæ Calabriæ domini *Rogerii*, etc. offero etc. et inter vivos donationem facio sanctissimo templo Dei Genitricis virginis Mariæ archiepiscopatus civilis Panormi, et tibi prædicto amico meo electo ipsius archiepiscopatus, etc. tria conjuncta casalia, etc. cum nostra bulla plumbea plumbavi anno ab initio mundi 6649, mense Februario, Indictione iv, dominante et regnante sanctissimo a Deo coronato pio *Rogerio*, magno rege et Christianorum adjutore. Amen ». Est is annus mundanus periodi Constantinopolitanæ, a kalendis Septemb. superioris Christi anni inchoatus. Quæ Æra Constantinopolitana in regno Siciliæ et Neapolis diu usurpata.

3. *Dissidium inter Innocentium II et Ludovicum VII regem Franciæ.* — Ad num. 3. *Albericum Bituricensem* archiep. anno mcccxxxix demortuum esse, et sedem vacasse per annum et menses tres, docet auctor *Patriarchii Bituricensis*, cap. lxxiii.

Quid vero post ejus mortem contigerit, narrat *Baronius* ex *Pseudo-Roberto de Monte* in Chron. ad hunc annum. Sed præstat audire chronographum *Mauriniacensem*, qui hoc ipso tempore vivebat. Is lib. 3, pag. 386, ait : « Tunc temporis etiam Ecclesia Bituricensis, sui pastoris defunctione non mediocriter desolata, gravis et importuni schismatis morbo insolente concussa est. In tantum vero discordiæ hujus malum processit, ut usque ad Apostolicum et Franciæ regem perveniret. Quidam enim prædictæ Ecclesiæ clerici assentiente rege *Cadurcum* quemdam sibi volebant præficere. Altera pars illorum *Petro*, *HaimERICI* Romani cancellarii consobрино, prærogativam illius honoris affectabant. Papa vero cancellarium diligens, contritulem quoque suum pro ipso dirigebat. Unde et ipsi consecrato in archiepiscopum, suum integre auxilium impendebat. Et licet contra regis voluntatem ipse præficiendus esset, ipsum misit Bituriges, *Cadurcum* vero omni Ecclesiastico honore privavit. Videns rex voluntatem suam ad efficaciam non potuisse perlingere, non modico fremitu iræ concussus est, et quasi in auctoritatem Apostolici volens indignationem conceptam retorquere, *Petro* totius terræ suæ introitum interdixit. *Innocentius* vero gladium Ecclesiasticum in ultionem exerens, per omne regis dominium divini celebrationem officii interdixit. Hujus autem discordiæ malum omnibus diebus vite suæ integre dulcorari non potuit ».

4. *Franciæ regnum ab Innocentio II interdictum suppositum.* — Loquitur etiam de hoc dissidio *Guillelmus Nangius* in Chron. ad annum mxxlii, et de *Petro de Castro* cognominato, ut ipse asserit, scribit : « Rex archiepiscopum exclusit redemptem. Sed eum comes Campaniæ *Theobaldus* (*Stephani Angliæ regis* frater) recepit in terra sua, et ei omnes Ecclesiæ obediebant. Indignatus ob hoc rex, concitavit omnes fere proceres suos, ut una cum eo guerram inferrent comiti *Theobaldo*. Tum ad annum mxxliii cepit rex *Vitriacum*, oppidum comitis *Theobaldi*, ubi admoto igne incensa est Ecclesia, et in ea mccc homines diversi sexus et ætatis periere ». In *Chronici* tamen *Gemblicensi* et *Catalaunensi*, *Vitriacum* anno mxxlii dicitur incensum fuisse. Illis addit *Radulphus de Diceto* in

Abbreviat. Chron. pag. 509 : « Per triennium persona regis interdicto subiacuit. In quamcumque civitatem, castellum, vel vicum intrabat, celebratio divinorum suspendebatur ». Herimannus vero monachus Tornacensis, aut ejus continuator ait, papam in Bituricensem archiep. consecrasset Petrum, « quod quia rex concedere noluit, Christianitate privatus est ».

5. *Ludovicus VII Tolosam obsidet.* — Ordericus lib. xiii Hist. ad annum mxcxi de Ludovico VII Francorum rege scribit : « Ludovicus-Juvenis Francorum rex ingentem exercitum congregavit, ac ad festivitatem sancti Joannis-Baptiste Tolosam obsidere perrexit, et in consulem (id est, comitem) Andeionem Raimundi (comitis Sancti-Egidii appellati) filium preliari contendit ». Paulo post : « En Stephanus rex Anglorum in carcere gemens detinebatur, et Ludovicus rex Francorum expeditionem agens contra Gothos et Gascones pluribus curis crebro anxietur ». Castellus lib. 2 Hist. comitum Tolosæ cap. 4, existimat hujus belli causam provenisse ex *Eleonora* filia Philippæ, Guillelmi comitis Tolosani hæredis. Ea enim de causa *Ludovicus* rex ejus maritus aliquot sibi jus in comitatum illum assererat. Hoc tamen bellum extinctum matrimonio *Constantiæ* Ludovici regis sororis cum Raimundo V comite Tolosano.

6. *Prælium inter Stephanum Angliæ regem ejusque adversarios.* — Hoc etiam anno idem Ordericus narrat, *Ranulphum* comitem Cestræ multos in Angliā contra Stephanum regem excitasse, et imprimis Mathildem Andegavorum comitissam vulgo imperatricem dictam, nec quiescisse donec rex captus fuerit : « Quotidie », inquit Ordericus, « de adventu inimicorum rumores audiens rex parvipescebat, ut eos tales esse et tantos ausus præsumerent, credebat, sed illos qui in arce (Lincolniensi) clementiam ejus obsecrabant, aptatis expugnari machinis cogebat. Denique Dominico Sexagesimæ, dum sacra solemnitas Hyppapanti Domini celebraretur (id est, Purificationis beatæ Virginis, ideoque hoc anno, quo festum illud in Dominicam Sexagesimæ incidit), et ipse rex hostium phalanges jam a-lesse intueretur, proceres advocavit, consiliumque quid agerent, ab eis inquisivit. Quidam igitur persuaserunt, ut ingentem familiam cum devotis civibus ad tutandam urbem constitueret, et ipse ad congregandum exercitum de cunctis Angliæ regionibus honeste discederet, et rursus opportuno tempore, si hostes ibidem permansissent, ad expugnandos illos regali severitate remearet. Admonebant etiam alii, ut debita sacræ Purificationi S. Dei Genitricis Mariæ reverentia exhiberetur, et tempus prælii nuntiis pacis intercurrentibus commode proteleretur, ut procrastinatione interposita neutra pars confunderetur, nec humanus sanguis ad multorum dolorem fundere- tur. Obstinatus autem princeps persuasioni prudentium obaudire contempsit, et prælium pro aliqua ratione induciani indignum duxit : sed pro-

tinuus suos ad bellum armari præcepit. Acies igitur pugnantium prope urbem convenerunt, et ordinatis utrimque turmis bellum commiserunt ».

7. *Stephanus rex captus et incarcerationatus.* — Paulo post subdit Ordericus : « Rex, fortium actuum antecessorum suorum inemor, fortiter dimicavit, et quamdiu tres secum pugiles habuit (scilicet Galerannum comitem, Guillelmum de Guarenna fratrem ejus, et Gislebertum de Clara), ense vel securi Norica, quam quidam illi juvenis ibi administraverat, pugnare non cessavit. Tandem fessus et ab omnibus derelictus, Roberto comiti consobrino suo se commisit, et captus est, et ab eodem paulo post Mathildi comitissæ oblatum est, etc. et miser, proh dolor ! incarcerationatus est ». Narrat postea Ordericus mala occasione hujus captivitatis hoc anno in Angliā perpetrata, et Historiam suam Ecclesiasticam libris xiii comprehensam absolvit, lxxvii ætatis suæ annum agens, ut ipsemet affirmat. Ex ea multa ad supplendos Annales Ecclesiasticos mutuati sumus ; nam licet hic auctor non raro in Chronologiam peccet, multa tamen scitu dignissima in medium profert, et sincere narrat. Existimo eum ante mortem Opus suum revisisse ; librum enim primum finiens, ait tunc *Lotharium* dominari Alemannis, *Ludovicum* Francis, *Stephanum* Anglis et *Ranimum* monachum Hispanis, et tamen *Lotharius* imp. anno mxcxvii obiit, eodemque anno *Ranimirus* regnum Aragoniæ dimisit, et in suum monasterium reversus est. Præterea librum suum xiii in Stephani regis captivitate absolvit. Nullum neque in Bibliotheca regia, neque in aliis Parisiensibus hujus Historiæ exemplar Ms. superest, cujus ope errores aliqui, qui in eam irrepserunt, emendari possent, et interpolationes, si quæ forte sint, dignosci.

8. *Observanda in legendis Malmesburiensi et Joanne Hagustaldensi.* — Quæ post regem captum in Angliā confluxerint, narrat Malmesburiensis complurium testis oculatus, in lib. 2 Hist. Novel. pag. 187 et seqq., quæ tamen librariorum errore cum anno mxcxii conjuncta sunt. In Historia Joannis prioris Hagustaldensis, alio modo ab excerptoribus peccatum ; annus enim mxcxi in duos dividitur, in annum nempe mxcxi, et mxcxii, et deinde sub anno mxcxii, quæ præsentī accidere, narrantur, et sic deinceps. Sed feriæ, aliæque temporum note in Malmesburiensi, et in Joanne Hagustaldensi sæpe expressæ, ne in errorem trahamur, impediunt. Ad hanc textus Malmesburiensis depravationem cum omnino non advertisset Labbeus, tom. x Concil. pag. 1024, Concilium Wintoniense hoc anno indictum citato Malmesburiensi in sequentem distulit. Porro Malmesburiensis narrationem ejus verbis repræsentabo, omissis tamen quibuscumque ad rem nostram non facientibus, et characteribus temporariis, aliisque id genus ad majorem explicationem additis.

9. *Mathildis imperatrix agnoscitur regina Angliæ a legato S. Sedis.* — *Mathildis* imperatrix et

Robertus comes Glocestriæ apud Henricum Wintoniensem episc. S. Sedis legatum, et Stephani regis fratrem nuntiis egerunt, ut ipsam tanquam Henrici regis filiam, et cui omnis Anglia et Normannia jurata esset, incunctanter in Ecclesiam et regnum reciperet. « XIV kal. Martii eo anno prima Dominica Quadragesimæ fuit », ideoque hoc anno, non vero insequenti. Ita mediantibus utrobique nuntiis ad hoc res expedita, ut ad colloquium conveniretur. Juravit imperatrix episcopo, quod omnia negotia majora in Anglia ejus nutum spectarent, si eam ipse in dominam reciperet. Idem juraverunt cum ea *Robertus* frater ejus, comes Glocestriæ, et nonnulli alii. Nec dubitavit episcopus imperatricem in dominam Angliæ recipere, quod quamdiu ipsa pactum non infringeret, ipse quoque fidem ei custodiret. Nam multo post *Theobaldus* Cantuariæ archiep. et plerique præsules cum aliquantis laicis in sententiam legati cessere. Pascha quod tunc fuit III kalend. Aprilis, ideoque hoc Christi anno, imperatrix apud *Ozeneford* egit.

10. *Et a præsulibus in Concilio Wintoniensi.* — Feria II post Octavas Paschæ, Concilium archiepiscopi Cantuariæ *Theobaldi* et omnium episcoporum Angliæ multorumque abbatum, legato præsidente, Wintoniæ ingenti apparatu inceptum. Malmesburiensis ait se huic interfuisse. Feria tertia legatus dixit, se Concilium congregasse, ut de pace patriæ consuleretur in medium: *Henricum* Angliæ regem jurare fecisse, ut omnes imperatricem filiam tanquam dominam Angliæ, et ducatus Normanniæ, post mortem suam agnoscerent: eoque mortuo, quia imperatrix in Normannia residebat, provisum esse paci patriæ, regnare permissio fratre suo; sed cum nullam justitiam exercuisset, episcopos captos, abbatias venditas, Ecclesiam thesauris depilata: hesterni die ventilatam esse secreto causam coram omni majori parte cleri Angliæ, seque imperatricem in Angliæ Normanniæque dominam eligere; denique Londinenses nuntiis suis convenisse, ut tuto veniant, seseque confidere eos non ultra hunc diem moraturos. Feria quarta venerunt deputati a Londinensibus, et dixere Londinenses omnes rogare, ut rex de captione liberaretur. Responsum est a legato, non decere, ut Londinenses, qui præcipui habebantur in Anglia, partes illorum foverent, qui dominum suum in bello reliquerant, quorum consilio idem sanctam Ecclesiam exhonorerat. Feria quinta solum est Concilium excommunicatis ante multis, qui regiarum erant partium. Pleraque tunc pars Angliæ dominatum imperatricis suscipiebat.

11. *Legatus S. Sedis Mathildem deserit et Stephanus rex a carcere exit.* — Sed dum ipsa putaretur omni Anglia statim posse potiri, inutata sunt omnia. Londinenses in aperti odii vocem eruperunt, et insidiis etiam eam ejusque comites appetiverunt. Quare hi urbe cesserunt, et imperatricem comitati sunt, legatus, rex Scotiæ, et frater ejus *Robertus*; *Londinenses* vero quidquid rerum

pro festinatione reliquerant, furati sunt. Nec multis post diebus exorta simulas inter legatum et imperatricem, et legatus offensus multis diebus ab imperatricis curia abstinuit, et omnes illius partis, quos in Concilio excommunicaverat, inconsultis episcopis absolvit, ferebantur etiam per Angliam ejus querelæ in imperatricem, quod eum capere voluerit. Post hæc tumultibus omnia in Anglia turbata, *Robertus* imperatricis frater, dum ejus partes armis tueretur, die sanctæ Crucis Exaltationis, quæ tunc habebatur in Dominica, ideoque hoc Christi anno, captus fuit, tandemque die festo Omnium sanctorum inter partes conventum, ut et rex et ipse absolveretur, nullo pacto alio interveniente nisi ut quisque partes suas pro posse sicut prius tutaretur. Sic ea die rex eluctatus est captionem.

12. *Concilium Westmonasteriense.* — Interea legatus immodici animi pontifex qui quod semel proposuisset, non ineffectum relinquere vellet, Concilium apud *Westmonasterium* die Octavarum sancti Andræ coegit. Lectæ in eo litteræ Innocentii II, quibus modeste legatum arguebat, quod liberare fratrem suum dissimulasset. Ait Malmesburiensis se huic Concilio non adfuisse, sed hoc fama accepisse, sicuti et regem ipsum in Concilium introisse et questum esse, quod homines sui eum ceperint: ipsum legatum dixisse se imperatricem non voluntate, sed necessitate recepisse: quinetiam, certis auctoribus ad se delatum, eam et suos vitæ struxisse insidias: itaque jubere se, ut regem voluntate populi et assensu Sedis Apostolicæ innectum, quantis possint viribus, juvarent. Fuit ergo hic annus, ut subdit Malmesburiensis, pæne perniciosus Angliæ.

13. *Robertus de Sigillo fit episcopus Londoniensis.* — Anno MCCCXXV diximus, *Anselmum* abbatem Sancti-Edmundi a parte tantum capituli Londinensis electum fuisse episcopum ejusdem urbis in Concilio apud *Westmonasterium* anno MCCCXXVI celebrato, et *Innocentium II* electionem illam rescidisse. Ille vero anno, ut refert Joannes prior Hagustaldensis in sua Historia, *Robertus* de Sigillo, « qui fuit cancellarius regis Henrici, tunc monachus de Redingas, vir bonus, ad regimen illius sedis accitus est », idque ab imperatrice, ut habet etiam *Gervasius* in Chron. qui hanc electionem cum currenti anno recte connectit, uti et præstiterat Joannes Hagustaldensis, sed, uti jam monui, numeros annorum librarii corruperunt. Idem etiam scribit *Radulphus* de Diceto in Abbreviat. Chron. pag. 508. Robertum autem initio Sedis suæ vexatum fuisse, eruo ex Epist. CCXI divi Bernardi ad Innocentium II, qua ei Roberti causam commendat: « Ille antiquus amicus, fidelis servus; devotus filius (Robertum loquor Londonensem episcopum) clamat ad vos, quod occupator ille, qui eum prævenit in sedem quam Deo auctore ipse sortitus est, ipsius Ecclesiæ vadia terrasque distraxerit, et distractas restituere nolit ». *Maillonius* in margine notat

hanc Epistolam anno *mcxxxix* datam; verum eam ad annum *mcxliii* pertinere ex ipsamet deducitur. In ea enim Bernardus de Theobaldo Cantuariensi archiep. ait: « Injuste in causam trahitur »; excusaturque eum quod ob tempestatem bellorum ad præsentiam ejus, ubi causa terminanda fuerat, venire non possit. Gervasius autem in Chron. ad annum *mcxliii* ait Jeremiam priorem Cantuariensem, cum videret se Theobaldo archiep. proxime depnendum, ad Sedem Apostolicam appellasse; cumque Theobaldus appellanti non detulisset, et illum a prioratu amovisset, Jeremiam Romam profectum obtinuisse litteras ab Innocentio II, quarum virtute Roma redux, ab Henrico Wintoniensi episc. et S. Sedis legato in pristinum gradum restitutus est. Quare eo Christi anno sanctus Bernardus Epistolam *ccxi*, qua tam Theobaldum quam Robertum commendat, ad Innocentium II dedit. Vide quæ anno sequenti de eadem Epistola dicemus.

14. *Templarii jus suum cedunt in regnum Aragoniæ.* — *Alphonsus VI*, Aragoniæ rex, Hispaniarum imperator appellatus, testamento suo san-

xe rat, ut si sine liberis vita fungeretur, regnum ejus in partes tres scinderetur, quarum una S. Sepulchro Hierosolymitano, altera hospitali in eadem urbe instituto, tertiæque Templariis Hierosolymitanis cederet; sed cum *Raimirus* monachus *Petronillam* ex legitimo matrimonio suscepisset, hæcque *Raimundo* Berengarii IV comiti Barcinonensi uxor desponsata fuisset, hæreses isti jus omne quod habere poterant in regnum Aragoniæ, die *xxix* mensis Augusti currentis anni in Raimundum transtulere, ut narrat *Diagus* lib. 2 Hist. Barcinon., cap. 144, juxta Instrumentum in archivis Barcinonensibus asservatum, et a se lectum.

15. *Moritur Bela II Hungariæ rex.* — Hoc anno *Thwroczius* in Chron. Hungar. cap. 74 refert, *Belam Cæcum* regem Hungariæ hujus nominis II, qui filius erat ducis *Almi Cæci* migrasse ad Dominum, idibus Februarii, *feria quinta*, eique in regnum successisse *Geysam II*, filium ejus primogenitum, qui adhuc in puerilibus annis agebat.

INNOCENTII II ANNUS 13. — CHRISTI 1142.

1. *Divortium Radulphi Viromandorum comitis, quem Ivo cardinalis legatus damnat S. Bernardi consilio.* — Sequitur annus millesimus centesimus quadragessimus secundus, Indictione quinta, quo (ut est apud Sigebertum) decernitur ab Innocentio papa Ivo presbyter cardinalis S. R. E. legatus in Gallias, tum ob causam archiepiscopi Bituricensis, de quo anno superiori, tum etiam ob injuste dimissam uxorem a Radulpho comite, et aliam superinductam. De his enim hæc Robertus apud Sigebertum hoc anno:

« Radulphus Viromandorum comes uxorem suam dimittit, et sororem reginæ Petronillam ducit. Propter quod instantia comitis Theobaldi mittitur Romanæ Sedis Ivo legatus, qui et Radulphum comitem excommunicavit, et episcopos Laudunensem Bartholomæum, Noviomensem Sironem, Petrum Silvanectensem, qui divortium illud fecerant, suspendit ». Hæc ibi.

Cum autem hæc adeo nefanda de comite Radulpho sanctus Bernardus intellexisset, percussit

zelo offensæ Christianæ legis, ad Innocentium papam hæc scribens, eundem tanti sceleris interpellat ultorem ¹:

« Scriptum est ²: Quod Deus conjunxit, homo non separet. Surrexerunt viri audaces, qui non timuerunt conjunctos a Deo contra Deum disjungere. Neque id solum, insuper et adjecerunt conjungere non conjungendos, addentes prævaricationem. Lacerantur sacra Ecclesiæ, scinduntur (prohi dolor!) vestes Christi, idque ad cumulum doloris, ab his a quibus resarciri debuerant ³. Amici tui Deus et proximi tui adversum te appropinquaverunt et steterunt. Nam qui mandatum tuum transgrediuntur, non sunt alieni, non sunt extranei a sanctuario tuo, sed eorum locum tenent, quibus dixisti ⁴: Si diligitis me, mandata mea servate. Comitem Radulphum et uxorem ejus Deus conjunxerat per ministros Ecclesiæ, et Ecclesia per

¹ Bernard. Epist. *ccxvi*. — ² Matth. *xix*. — ³ Psal. *xxvii*. — ⁴ Joan. *xiv*.

Deum, qui dedit potestatem talem hominibus. Quomodo quos Ecclesia conjunxit, disjuncta camera? In quo facto illud solum convenienter provisum est, quod in tenebris facta sunt opera tenebrarum. Qui enim male agit, odit lucem, et non venit ad lucem, ut non arguantur opera ejus a luce. Quid meruit comes Theobaldus? Quid peccavit homo ille? Si peccatum est, quod diligit justitiam et odit iniquitatem, non potest excusari. Si peccatum est quod reddidit regi quæ regis sunt, et quæ sunt Dei Deo, non potest excusari. Si archiepiscopum Bituricensem suscepit ad imperium vestrum: hoc est maximum et primum peccatum. En sanguis iste de manu ejus exquiritur. Qui retribuunt mala pro bonis, detrahunt ei; quoniam sequitur bonitatem. Multi clamant ad vos in toto corde suo, ut injuriam filii vestri, et oppressionem Ecclesiæ digna animadversione vindicetis, et artifices hujus scelestis cum ipso eorum capite, cui quicquid libuit, licuit, Apostolico vigore coerceatis, ut in verticem ipsius iniquitas ejus descendat. Illicusque ad Innocentium S. Bernardus.

2. Illis igitur acceptis litteris, Innocentius (ut diximus) Ivonem presbyterum cardinalem legatum in Galliam misit: qui eundem Radulphum excommunicatione mulcavit, et regnum subjecit interdicto et consultores suspendit episcopos, et cætera quæ opus erant, canonice explevit, ut idem sanctus Bernardus sequentibus declarat Epistolis¹ in delinquentes. Quod autem rex omnia ista accepta tulisset sancto Bernardo, atque etiam comiti Theobaldo, ac questus esset per litteras scriptas ad sanctum Bernardum: rescripsit ipse, excusans se atque pariter comitem Theobaldum. Extant litteræ², quarum est exordium: « Libenter quidem, etc. » Sed et cum ex illis nihil rex proficeret, sed in deteriora deficeret, idem sanctus Bernardus ad regis ipsius consiliarios Joslenum Suessionensem episcopum, et Sugeriū Sancti-Dionysii abbatem litteras dedit, quarum est exordium³: « Scripseram regi, etc. » Quibus in sui excusationem et Theobaldi cum multa afferat, quæ rex in deterius magis magisque lapsus adversus Ecclesias perpetravit, monens ipsos consiliarios, ut ei resisterent, hæc ad finem habet: « Denique esto quod omnino male meruit comes, sed Ecclesiæ Dei quid meruit? Quid, inquam, meruit non jam sola Bituricensis Ecclesia, sed et Catalaunensis, etiam et Rhemensis, etiam et Parisiensis? Habet rex adversus comitem jus: sed de quo jure, obsecro, de quo jure præsumit, ut Ecclesiarum possessiones et terras devastet, ut Christi ovibus pastores præfici non permittat, ut his quidem electorum promotionem prohibeat, aliis vero (quod haecenus inauditum est) dilationem electionis indicat, donec universa consumpserit, donec diriperit pauperum facultates, donec penitus desoletur terra? At vos ei consulitis talia? Mirum

valde, si contra vestrum consilium fiunt hæc: mirum magis et malum, si vestro consilio fiunt. Etenim consulere talia, manifeste schisma fabricare est, Deo resistere, Ecclesiam ancillare, et novam in servitum Ecclesiasticam redigere libertatem. Si quis Dei fidelis, si quis Ecclesiæ filius est, profecto stabit et opponetse, quoad poterit, murum pro domo Dei. Nam et vos ipsi, si pacem desideratis Ecclesiæ, sicut oportet filios pacis: quomodo non dico, tractatis ea, sed vel interestis consiliis tam malignis? Quidquid enim mali fecerit, merito non regi juveni, sed consiliariis senibus imputatur. » Hæc ad eos S. Bernardus.

3. S. Bernardi ad episcopum Suessionensem excusatio et admonitio. — Quibus mirum in modum offensus, in primis ipse Suessionensis episcopus, acerbiores ad eundem S. Bernardum litteras reddidit, quibus inter alia ipsum talia scribentem, spiritu blasphemiae afflatum esse redarguit. Ad quem quidem ista digna perenni memoria idem sanctus Bernardus rescripsit, sane sapientiæ Christianæ condita, quæ sic se habent⁴:

« Bernardus Josleno Suessionensi episcopo, salutem in Domino, et non in spiritu blasphemiae.

« Minime quidem ego spiritu blasphemiae habere me arbitror; sed nec cuiquam maledixisse, aut maledicere velle me scio, principi præsertim populi mei. Cæterum quidquid illud sit, quo se lasam vestra dignitas judicat, peto veniam. Scio enim qui dixit⁵: Blasphemamur et obsecramus. Dico ergo cum B. Job⁶: Quæ locutus sum, utinam non dixissem, et ultra non addam. Jam domino abbati S. Dionysii pro communi querimonia scribens, utrique vestrum responderam, et putaveram me fecisse satis. Et quoniam ut video, nondum quievit indignatio vestra, quæ forsitan adversus Ecclesiæ conculcatores justus incanduisset, etiam vobis dico, schismaticos vos aut fomitem esse scandali, nec dixi, nec scripsi, nec credidi, et dico securus, nec vereor quod me mea pagina arguat mendacii. Scrutamini eam, si placet, et si ita inveneritis, reum me fatebor grandis sacrilegii, et revera sicut notatis, spiritu blasphemiae agitatū illa scripsisse.

4. « Ne tamen humilis satisfactio spiritum videatur excludere libertatis: dolui, fateor, et doleo, quod nondum vos ea libertate, qua deceret, compertimus Christi ulcisci injurias, Ecclesiæ defendere libertatem. Dole istor compulsi me scribere dura, non tamen illa quæ impingitis. Putaveram siquidem et adhuc putarem, nisi timerem vobis in hoc esse molestus, nequaquam sufficere, quod schismatis non estis auctores, nisi et eos qui sunt, ejuscumque dignitatis sint, tota libertate pro viribus coerceatis, et eorum consilium atque consortium exerceatis. Putarem, inquam, gloriam vobis esse, si dicere possetis et vos⁷: Odivi Ecclesiam

¹ Bern. Ep. cxvii et cxviii. — ² Ibid. Ep. ccxx. — ³ Ibid. Ep. ccxxii.

⁴ Bernard. Ep. ccxxv. — ⁵ 1. Cor. ix. — ⁶ Job. xxxix. — ⁷ Psal. xxv.

malignantium, et cum impiis non sedebo. Numquid solum decebat zelus ille Prophetam, et non hodie quoque a Domini sacerdote requiritur, de quo dicebat ¹ : Nonne qui oderunt te Domine odieram, et super inimicos tuos tabescebam ? Optarem sane (et salva vestra serenitate id quoque eloquar) hunc zelum vos exercuisse in puerum regem, qui non tam pueriliter, quam crudeliter sine causa irrita fecit et vestra sana consilia, et sua pacta : sine causa regnum suum conturbat, bella ubique cælis terrisque suscitât, Ecclesiæ vastat, sacra temerat, exaltat iniquos, bonos persequitur, perimit innocentes. Hæc, inquam, vellem vos dolere, his contradicere et resistere, quod in vobis est : sed meum non est magistrum docere Jesum, minus autem reprehendere episcopum, qui magis me et alios peccantes redarguere, et errantes corrigere debet. En quantum vos timeo. Clausam habetis Epistolam, qui de priore aperta male suspicati estis. Nam ego quidem nihil adhuc aliud cogitavi, nisi quod ad diversos scribentem necesse est, juxta consuetudinem, Epistolam cera non claudere. Jam et pro hoc quoque veniam peto ».

Hucusque sanctus Bernardus. Qui tamen nihil cum consiliariis, nec cum rege profecit, quin in dies in graviores atque deformiores dilaberetur excessus : de quibus dicendum anno sequenti.

5. *Petrus Cluniacensis pro rege Ludovico apud Innocentium II agit.* — Eodem tempore, cum ageretur causa eadem Bituricensis Ecclesiæ, Petrus Cluniacensis abbas pro Ludovico rege ista ad Innocentium papam scripsit ² :

« Summo Pontifici et nostro speciali patri domino papæ Innocentio, frater Petrus humilis Cluniacensis abbas obedientiam et amorem.

« Si quid minus sapienter dixerò, rogo ut pietas paterna suppetat. Nam fortassis ineptum esse poterit, sed indevotum erga vos esse non poterit. Pro domino rege Franciæ, magno nobili et speciali filio vestro, benignitatem Apostolicam deprecor, ut quia non solum rex est, non solum magnificus

rector Christiani populi est, sed etiam quia opus manuumstrarum vestrarum est, quem ad regnum provexit, quem sacris manibus vestris inunxistis, quem Gallis nostris potentioribus patribus regem designastis, si quid forte adhuc ut ætate juvenis inconsulte agit, ei condescendatis, et ejus forte errorem sapientiæ vestræ velamine contegatis. Est enim patris, ut filii, et maxime tanti, et errorem emendet et honorem conservet. Hoc pro dissidio, quod inter ipsum et dominum Bituricensem archiepiscopum est, dico. Est enim, sicut sensi, res non levis; et ne de gravi incepto graviores vergat in exitum, multum cavenda. Spiritus autem consilii, qui spirat ubi vult, qui per vos Ecclesiæ suæ per totum orbem diffusæ assidue consulit, etiam nunc per vos regno Franciæ, non vili portioni Ecclesiæ suæ consulat, et tam de his quam de omnibus unctio ejus cor vestrum edoceat ». Hucusque de causa regis : subjicit vero de causa Lexoviensis monasterii, frustra ad reformationem per eundem Innocentium revocati. Hoc enim dederat in mandatis idem Pontifex eidem Petro, ut eosdem Lexovienses ad interlapsum vetus revocaret monasticum institutum. De cujus miserando statu hæc lugenda habet : « In deteriorem statum quam prius fuerat relapsum, omni pæne monastica religione et observantia destitutum, parum a sæcularibus differre. In tantum, ut quod priscis temporibus cuncta Galliarum monasteria anteibat; nunc pæne universa vix a longe sequi videatur ».

6. *Fulco rex Hierosolymitanus moritur, Balduinus succedit.* — Quod ad res pertinet Orientis, Fulco ¹, Hierosolymorum rex, lapsus equo hoc anno moritur, Balduinum annorum tredecim relinquens regni successorem, cujus administrationem mater ipsa regina Melesendis suscepit; ad quam extant litteræ sancti Bernardi ². Porro quod factum id dicat Tyrus sub Eugenio papa, sibi ipsi adversatur; dum nonnisi anno millesimo centesimo quadragesimo quinto Eugenius sedere cœpit.

¹ Will. Tyr. l. xvi. c. 3. — ² Bern. Ep. cclxxxix.

¹ Psal. cxxxviii. — ² Petr. Clun. l. v. Ep. ii.

Anno periodi Græco-Romanæ 6635. — Anno Æræ Hispan. 1180. — Anno Hegiræ 537, inchoato die 26 Julii, Fer. 1. — Jesu Christi 1142.

— Innocentii II papa 13. — Conradus III reg. 5. Joannis Comneni imp. 25.

1. *Radulphus comes Veromanduorum uxorem repudiat.* — A num. 1 ad 6. Divus Bernardus hoc anno scripsit Epistolam cxcvi ad Innocentium II adversus *Radulphum* Veromanduorum comitem, qui repudiata uxore, aliam duxerat. Factum narrat Herimannus monachus Tornacensis, aut ejus continuator tom. xii Spicilegii, pag. 480. in quo de Radulpho legitur : « Volens in matrimonium sibi copulari germanam Alienoræ reginæ Francorum, (nomine Petronillam), uxorem suam legitimam », quæ Theobaldi Campaniæ comitis neptis erat, consanguinitatis specie repudiavit, tribus episcopis divortium illud probantibus, nempe Simone Tornacensi ejus fratre, Bartholomeo Laudunensi, et Petro Silvanectensi.

2. *Laudatur Theobald. Campaniæ comes quod divortium illud improbet.* — Scripsit etiam divus Bernardus Epistolam cxcvii ad Innocentium II in gratiam *Theobaldi* Campaniæ comitis, quem ait causa justitiæ et fidelitatis erga Sedem Apostolicam a Ludovico rege male haberi, et Epistolam cccx ad eundem *Ludovicum* Francorum regem, in qua iniquam ejus postulationem in gratiam *Radulphi* factam rejectit. Ad *Ludovicum* regem etiam dedit Epistolam cccxi, graviter eum arguens, quod pravis consiliis adhaerescens, pacis inter eum et *Theobaldum* faciendæ concilia respuat. Ad hæc Epistolam cccxii dedit ad *Joslemum* Suessionensem episcopum, et *Sugerium* abbatem S. Dionysii, querens apud eos, uti regis consiliarios, de ejus contra *Theobaldum* molitionibus, contra pactum et pacem initam. De hac Bernardi ad Joslemum episc. Epistola mentio est in Vita sancti Bernardi lib. 3, cap. 7, num. 23, ubi de admirabili ejus patientia sermo est : « Scripserat », inquit Gaufridus, « aliquando Dei famulus ad episcopum aliquem de curia et consilio regis, monens eum super quibusdam verbis regi suadere et consulere meliora. At ille vehementer exacerbatus, amaris-inimæ ei reddidit Epistolam (quæ ordine est cccxiii, et a Baronio num. 3 recitatur) dicens in ip-sa salutatione prima, salutem, et non spiritum blasphemici, tanquam videlicet vir sanctus (quod horror est dicere) ex blasphemici spiritu illa scripsisset. Ad quod verbum mansuetissimus

Christi servus memor Dominicæ responsionis : *Ego demonium non habeo* (sicut hodieque extans ejus Epistola continet), minime quidem, ait, spiritum blasphemici habere me credo, sed nec maledixisse cuiquam, aut maledicere velle me scio, præsertim principi populi mei. Nec minus postea charum, nec minus familiarem eundem episcopum habuit, sed elogium illud prædictum apud eum sic fuit, quasi non dictum ».

3. *Moritur Fulco rex Hierosol.* — Ad num. 6. Hoc anno *idibus Novembris* mortuus est *Fulco* Hierosolymorum rex, duobus superstitiis liberis adhuc impuberibus relictis, *Baldūno* videlicet primogenito annorum xiii, et *Amalrico* annorum vii, reseditque regni potestas penes *Milisendam* reginam cui jure hæreditario competebat, inquit Tyrinus in fine lib. 15, qui initio libri insequentis ait, Fulconi successisse *Baldūnum* præfactum, hujus nominis III, juvenem formæ admirabilis, cui mentis quoque bene constitutæ respondebat habitus. Coronatus fuit cum matre subsecuto Dominici Natalis die, non præsidente Ecclesiæ Romanæ *Eugenio* papa, ut perperam dicit Tyrinus, sed Innocentio II. Tyrinus fatetur, ut alibi diximus, se gesta Hierosolymis ante annum xcliv, nonnisi ex aliorum relatione didicisse, ideoque non mirum, si quandoque de illis male edoctus fuerit. Divus Bernardus quatuor Epistolas ad *Milisendam* Hierosolymorum reginam, filiam Baldūni II regis et Fulconis uxorem, scripsit, nempe Epist. ccccliv, qua eam monet, qualiter mortuo viro suo sese gerere debeat, Epistolam cccclv, qua *Præmonstratenses* Hierosolymani peregrinantes commendat et pluribus laudat, Epistolam cccvi, qua eam hortatur ita vivere, ut perpetuo regnet, et Epist. cccxxxix.

4. *Litteræ S. Bern. ad Milisendam Hierosolym. reginam.* — Jam a multo tempore Bernardus nullas a *Melisinde* acceperat litteras, audieratque illam apud aliquos infamia laborare, quasi muliebri impotentia distraheretur : « Audivimus, fateor, nescio quæ sinistra : quæ etsi non pro certo credimus, dolumus tamen sine veritate, sive mendacio tuam aliquatenus decolorari opinionem ». Subdit Bernardus, *Andream* tamen avunculum suum, qui Templi miles erat, sibi significasse quod

sapientum consilio sese regeret. Cum vero Godefridus ejus notarius in S. Bernardi Vita scribat, sanctum abbatem morti proximum ad avunculum suum scripsisse Epistolam, in qua inter cætera ait : « Ego enim jam delibor, nec puto me longum facere super terram », ideoque et ea Epistola ad Andream, quæ ordine est cclxxxviii, anno mclm data sit, manifestum est, Epistolam cclxxxix ad *Milisendam* reginam eodem anno scriptam fuisse, et Manricum in Annal. Cisterc. anno mclm, cap. 1, Epistolam ad Andream cum eo Christi anno recte connexuisse, Epistolam vero ad *Milisendam* reginam, in qua Andree mentio, anno mclm, cap. 10, ad eum annum male retraxisse. Quare Mabillonius utramque ad annum mclm pertinere in margine recte notavit. Porro *Amalricum* Milisende reginæ filium minorem natu, *Baldvino III* in regnum successisse, suo loco videbimus.

5. *Ieo card. et Gaufridus Carnotensis episc.* *S. Sedis in Gallia legati.* — Hoc anno in Gallia legatione Sedis Apostolicæ functi sunt, *Ieo*, qui ex canonico regulari Sancti-Victoris Parisiensis, anno incerto ab Honorio II cardinalis Sancti-Laurentii in Damasco creatus fuit, et *Gaufridus* Carnotensis episcopus. *Ieonis* legationis mentionem facit Baronius num. 1. Legationis vero *Gaufridi* Helias Aurelianorum episcopus in quadam donatione a s^e facta monachis Sancti-Martini de Campis, recitata a Duchesno in Notis ad Epistolam xi Petri Venerabilis abbatis Cluniacensis, lib. 1. Ait enim *Helias* se illam facere precibus regis Francorum Ludovici et *Gaufridi* venerabilis Carnotensis episcopi, Apostolicæ Sedis legati. In fine Chartæ legitur : « Actum Aurelianis anno ab Incarnat. Domini mclm, Ludovico Juniore, anno ejus quinto ». Hujus Chartæ et anni, quæ ea scripta, meminere San-Marthani in episc. Aurelianensibus cum de Helia agunt. Quare in episcopis Carnotensibus *Gaufridi* mortem cum anno mclxxxviii perperam postea illigant. Annum *Gaufridi* Carnot. emortualem infra notabimus. Porro duas in Gallia legationes fuisse non semel monuimus; et *Ieonem* legatum Treviris hoc anno obisse scribit Brouverus in Annal. Trevirens. lib. 14, ubi refert veteris Epitaphium, in quo dicitur mortuus : « Sole duodenas Julii vergente kalendas ».

6. *Obitus Petri Abaelardi.* — In Chronico Sancti-Petri-Vivi Tom. II Spicilegii Ducheriani recitato legitur : « Anno mclxin, magister Petrus Abaelardus moritur ». Is in Epistola ordine in ad *Helioissam* data rogat, ut quocumque modo vel loco enim ex hac vita migrare contingat, ejus corpus ad Paracletense cœnobium deferatur : « Quod si me Dominus, inquit, in manibus mimicorum tradiderit, scilicet ut ipsi prævalentes me interficiant, aut quocumque casu viam universæ carnis absens a votis ingrediari, cadaver, obsecro, nostrum, ubicumque vel sepultum vel expositum jacerit, ad cimiterium vestrum deferri faciat, ubi filie nostræ, imo in Christo sorores, sepulchrum nostrum sepius

videntes, ad preces pro meo domino fundendas amplius invitentur ». Morbo lento correptus, a Petro Venerabili abbate suo Cabilonem missus est, ubi cum e vita excessisset, monachi illius monasterii istud ei Epitaphium posuere : « Hoc magister Petrus hinc dies suos consummavit : et qui singulari scientiæ magisterio toti pene orbi terrarum notus, et ubique lamosus erat, in illud discipulatu qui dixit, *discite a me, quia mitis sum et humilis corde*, mitis et humilis corde perseverans, ad ipsum, ut dignum est credere, sic transivit ». Qua de re statim Petrus Venerabilis Epistola sua XXI libri 4, scripsit ad *Helioissam*, ejus quondam uxorem, tunc vero abbatissam monasterii Paracletensis, ut eam de pio *Abaelardi* obitu consolaretur, jussitque ejus corpus ad illud cœnobium transferri, misso Epitaphio a se in honorem ipsius composito, in quo dicitur *Abaelardum XI kalend. Maii* animam Deo reddidisse. Postea ipsemet mclm *Helioissam* inivit, quia fama tantum eam noverat. Baronius anno mclx, num. 11 et seq. Epistolam laudatam Petri Cluniacensis ad eam datam, et *Abaelardi* Epitaphium recitat. Ejus opera Andreas Duchesnius Parisiis publicavit, et Notis illustravit. De his legendis Oudinus in Supplem. Script. Eccles. ubi quæ adhuc inedita sunt, enumerat. *Helioissa* toto tempore quo *Abaelardo* supervixit, vite sanctimonie incubuit, et XVI kalendis Junii anni mclxiv sancto fine quievit, ut videre est apud San-Marthanos in abbatia Paracletensi, ubi tamen perperam dicitur *Abaelardus* juxta Chronicon Senonense anno mclm demortuus; quod lectorem non moneam, nisi vidissem Bokenham tom. II Hist. Universit. Parisiensis, aliosque quodam mendosa illa citatione deceptos, *Abaelardi* mortem in eum Christi annum distulisse.

7. *Corrigitur Catalogus abbatissarum Paracleti.* — *Helioisse* in abbatiam Paracletensem successit *Ermengardis*, cujus meminit Calendarium Paracleticum, ut videre est apud San-Marthanos tom. IV Gall. Christ. in abbatissis Paracletensibus, et in Notis Andreæ Duchesnii ad Hist. Calanit. Petri Abaelardi, pag. 1188, in Elencho abbatissarum ejusdem monasterii. *Helvildis* enim, quam uterque secundum Paracleti abbatissam proponit, eadem est cum *Helioissa*, quæ binominis erat, ut vel ex loco, quem uterque auctor ad suam sententiam probandam profert, perspicuum est. Aiunt enim inter *Helvildem* Paracleti abbatissam, et Norpaldum abbatem Vallis-Lucensis controversiam quandam pacificatam esse apud Triangulum, quod castrum est in Tricassina diocesi situm, vulgo *Treyuel*, ut ostendit Valesius in Notitia Gall. voce *Triangulum*; sed cum uterque lateret *Helvildem* diversam non esse ab *Helioissa*, annum quo publicum istud Instrumentum notatur, consulto prætermisere, illum mendose descriptum existimantes. Verum San-Marthani in abbatibus abbatie Vallislucentis Ordinis Cisterciensis, in diocesi Senonensi posite, hallucinationem suam manifeste

aperiunt, cum de Norpald, ejusdem abbacie abbate primo, loquentes pag. 896, scribunt: Transegit cum Hloissa abbatissa Paracleti MCXLI anno. Neque dici potest sermonem ibi esse de transactione diversa ab ea, quam Norpaldus cum Helvide fecit, cum in Chronico Sancti-Petri-Vivi ad annum MCXXIX habeatur: « Ecclesia Vallis-Lucentis fundata est, cujus primus abbas domnus Herpaldus (sen Norpaldus) fuit, sedens annis XXX, et ad annum MCXLII ibidem legatur: « Ecclesia Vallis-Lucentis primo dedicata est ».

8. *Hloissa binominis fuit.* — Præterea San-Marthani Norpaldi mortem cum anno MCXIX connectunt, licet Chronicon Sancti-Petri-Vivi non vidissent, quia revera eo Christi anno, trigessimus annus sedis Norpaldi in finem vergebat, ideoque *Norpaldus* non post *Hloissam*, ut San-Marthani supponunt, sed ante eam e vivis excessit. Incluta itaque hæc abbatissa, *Hloissa* et *Helvildis* appellata, anno qui dedicationem Ecclesiæ Vallislucentis præcessit, controversiam, quam cum Norpald abbate habebat, diremit, et postea usque ad an. MCXLIV supervixit. In Necrologio monasterii Paracletensis ideo nulla Helvidis mentio, quia eadem est cum Hloissa. Loquitur de abbacia Vallislucentis divus Bernardus in Epist. LXXV ad Artalkum Pruliacensem abbatem, Vallislucentis conditorem, ut eum interpretatur Mauricus in Annal. Cister. ad annum MCXXIX, cap. 7, num. 3. Mabillonius qui ad hanc Duchesnii et San-Marthanonum hallucinationem animum non adverterat, in brevi tamen nota ad Epistolam CCLXXVII divi Bernardi ad Eugenium III, recte observat longum Metellum Helvildis nomine Epistolas duas ad Hloissam scripsisse: « Helvildi venerabili abbatissæ Paracleti.

« Feminæ sexum vos excessisse fama nobis notificavit. Quomodo dictando, versificando et (quod excellentius omnibus est) muliebrem molliem exsuperasti, etc. » Quibus etiam ex verbis intelligimus *Hloissam* poetriam fuisse, et jure merito Petrum Venerabilem in laudata ad eam Epistola scripsisse: « Tu illo cfferendo studio tuo et mulieres omnes evicisti, et pæne viros universos superasti », ubi tamen Petrus Venerabilis de litteratorie scientiæ, et secularis sapientiæ studio verba facit.

9. *Gesta in Anglia.* — Gesta hoc anno in Anglia Malmesburiensis lib. 2 Hist. Novell., antequam scribendi finem faciat, summarie narrat, quæ, ejus verbis utens, magis abbreviabo. Superveniens Quadragesima omnibus vacationem bellorum indixit, qua mediante *imperatorix* cum suis deliberavit vocare *Godefridum* comitem Andegavensem maritum suum, qui filiorum hereditatem in Anglia tuiturus veniret. Nuntii ex Andegavis redeuntes retulere comitem Andegavensem respondisse, si *Robertus* comes Glocestrensis, cujus prudentiam jam olim probatam habuisset, ad se veniret, voluntati ejus se pro posse non defuturum. *Robertus* ergo cum expeditis militibus ad vicum *Warham* profectus est, indeque *Cadomum* comi-

tem Andegavensem accessivit, qui veniens varia prælexuit, ut adventum suum in Angliam excusaret. Dedit tamen filium suum ex imperatrice progenitum *Henricum* appellatum, cujus intuitu procures ad justis hæredis partes propugnandas animarentur. Interim *Stephanus rex* Oxonium civitatem concremavit, et castellum, in quo imperatrix erat, obsedit. Nuntiatum postea imperatricem egressam ab obsessio castello, et apud *Wallingford* tuto manere, et hic Malmesburiensis Historiam suam claudit.

10. *Malmesburiensis Historiam suam absolvit.* — Cum vero Huntindoniensis lib. 8 scribat, *Stephanum regem* obsessisse imperatricem apud Oxonium post festum sancti Michaelis usque ad Adventum Domini, et non procul a Natali Christi eam fugisse ad Castellum de *Wallingford*, et sic Oxonium tandem regi redditum esse perspicuum est, Malmesburiensem res anno sequenti gestas non attigisse, perperamque Userium lib. de Antiquit. Britannic. Eclesiorum cap. 6 tradidisse eum principia gestorum anni MCXLII in Novella sua Historia exposuisse, ac verum esse quod habet Matthæus Parisiensis, et cum eo Bulaeus lib. de Script. Britan. Centur. 2, cap. 73, *Gualelmum bibliothecarium Malmesburiensem* anno MCXLII Anglorum Historiam terminasse. An vero tunc etiam vivere desierit, ut habet idem Bulaeus, prorsus incompertum. Vidit Malmesburiensis, ut Pitsius in Malmesbur. scribit, in vetustis codicibus multa antiquitatis monumenta, quæ ab interitu liberavit. Nec satis officio factum putavit, si solum vetera et aliena conservaret, nisi etiam nova et sua adjiceret, et adeo accurate Historias Anglicas tractavit, « ut vix quisquam in illo genere sit illi conferendus, non o antefendus ».

11. *Miser status Eccl.* — Westmonasteriensis ad hunc Christi annum scribit: « Captus est Robertus Londoniensis episcopus apud Fullentiam a Galfrido de Mandevilla, nono kalendas Julii ». Post mortem *Gilberti* episcopi Londoniensis, *Universalis* appellati, ob multiplicem litteraturam, quæ teste Radulpho de Diceto in Abbreviat. Chron. anno MCXXIV accidit, Ecclesia Londinensis diu vacavit et Alfordus hoc anno num. 1 et seq. conjicit *Galfridum* Ecclesiarum prædatorem Londinensem invasisse, ut turrim Londinensem sibi suisque munit; cum Huntindoniensis hoc anno testetur, *Stephanum regem* eum in curia sua delinuisse, et *Galfridum*, ut a rege liberaretur, reddidisse ei turrim Londoniensem et aliqua castella, sed postea invasisse abbatiam Ramesiensem, et Ecclesiam Dei speluncam fecisse latronum. Ex quibus infert Epistolam divi Bernardi CCXI ad Innocentium datam, in qua loquitur de occupatore sedis Londoniensis, indicatque Innocentio II illud corrigendum esse, intelligendam de præfato Galfrido. Verum ex laudatis a nobis anno superiori num. 13 Bernardi verbis evidenter apparet, *Bernardum* verba facere de viro in sedem episcopalem intruso, qui in ea

Robertum præcessit, quod dici non potest de *Galfredo* viro militari, pro quo coercendo non Pontifex Romanus, sed rex adeundus erat; præsertim cum populator iste Ecclesiarum nihil faceret excommunicationes, ut perspicuum est ex iis quæ narrat Gervasius in Chron. anno MCXLIV. Occupator itaque sedis Londinensis alius non est quam Anselmus, cujus electio in episcopum Londinensem rescissa fuit ab Innocentio II, ut loco laudato diximus.

12. *Floret Robertus Pullus, postea cardinalis.* — Hoc anno *Ascelinus* prior Doveriæ factus est Roffensis episcopus sub archiep. Cantuariensi, ut prodit Edmundus de Hadenham, monachus Roffensis, in Annal. Ecclesiæ Roffensis, ad annum Christi MCCCVII ab eo perductus, et a Whartono in Anglia Sacra part. I publicatis. Hoc confirmat Gervasius in Chron. qui annum a Natali Christi incipiens, ad annum Christi MCXLVII ait, *Ascelinum* obiisse eo Christi anno, *episcopatus sui sexto, IX kal. Februarii*, qui ideo currenti ad eam sedem evectus fuerat, et Gervasius annos Julianos enumerat. Ad *Ascelinum* scripsit sanctus Bernardus Epistolam CCV, rogavitque, ut pateretur « magistrum Robertum Pullum aliquantum temporis facere Parisiis, ob sanam doctrinam, quæ apud illum esse dignoscitur ». Alfordus in Annal. hanc Epistolam recitat anno MCXXXVII, quo *Ascelinum* episcopum dictum putavit; Mabillonius vero in ejus margine, et in

Notis fusioribus, ait eam circa annum MCXL scriptam, licet in *Ascelini* episcopatus initio consignando ab Alfordo non discrepet; sed ea citius quam currenti anno data non fuit. Porro *Robertus Pullus*, in Anglia natus, studiorum causa Galliam petiit, et Parisiis scientias, tum sacras, tum profanas edidit, et ex parte docuit, ut habet Pitsius in Roberto Pullano. « Ab inenunte ætate Philosophiæ deditus, ejusque obtentu episcopalem honorem ab Henrico rege (hujus sc. nominis I) oblatum respiciens, victum et vestitum habens, his contentus fuit », inquit Joannes prior Hagustaldensis in Hist. ad an. MCXLVII. Romam ab Innocentio II vocatus, a Lucio II ejus successore cardin. et ab Eugenio III S. R. E. cancellarius renuntiatus est. *Octo sententiarum libros* ab eo editos publicavit Hugo Mathoudus, monachus Congregationis S. Mauri.

13. *Romani erga Innoc. II magis insolescunt.* — Romani, qui, ut anno MCXLI, num. 2 habet Baronius, adversus Innocentium II rebellant, et senatum restituerant, currenti, ut ibidem ex Otone Frisingensi lib. 7, cap. 27, Baronius narrat, audaciores tuere: « Invalescente populo, dum proficere non posset (nempe Innocentius II) lecto cubans juxta quosdam de futuris visione sibi monstrata, in pace quievit ». Quæ tamen mors nonnisi anno sequenti contigit.

INNOCENTII II ANNUS 14. — CHRISTI 1143.

1. *S. Bernardus in Ivonis legati morte calumniam passus ad Innocentium papam scribit.* — Annus Redemptoris millesimus centesimus quadragessimus tertius sequitur Indictione sexta, quo Ivo cardinalis legatus in Gallis ex hac vita migravit; cujus occasione sanctus Bernardus apud Innocentium papam calumniam passus est, quasi in pauperes ejus bona dissipasset, potius quam legitime erogasset. Quamobrem in ipsum nonnihil commotus est atque succensus. Hæc de indignatione Pontificis ubi idem sanctus Bernardus accepisset, Epistolam apologeticam ad ipsum scripsit, qua suam causam defendens, et se potenter excu-

sans, ostendit se nihil in eo peccasse, ut ejus indignationem commoveret. Sed audi tu ipsam¹:

2. « Domino, et patri reverendissimo Innocentio, Bernardus nihilum, id quod est.

« Putabam me aliquando aliquid vel modicum esse, sed nunc, ut sentio, prorsus ad nihilum redactus sum, dum nescivi. Nec enim me dixerim omnino nihilum tunc fuisse, cum oculi domini mei super puerum suum essent, et aures ejus ad preces meas; cum omne quod scriberem obvis manibus accepisset, et vultu hilari perlegisset, be-

¹ Bern. Ep. CCXVIII.

nigriissime atque plenissime ad omnia postulata respondens. Modo autem me merito, non modicum dico, sed nihilum, quoniam ab heri et nudiustertius averil faciem suam a me. Cur hoc? quid peccavi? multum fateor, si pecunia cardinalis Ivonis bonæ memoriæ meo arbitrio distributa fuit, et non ad nutum ipsius.

« Quod utique ad aures domini mei fuisse perlalum, mihi relatum est. Sed confido, quia nunc huius rei veritatem cognoscetis, et veritas liberabit me. Non sum tam hebes, ut ignorem Ecclesiæ esse, quicquid ille rerum suarum non dederit. Sed jam audite simpliciter veritatem. Si inventum fuerit in ore meo mendacium, ipsum os meum condemnabit me.

« Quando homo exiit hominem, absens eram, imo et valde remotus; audiivi autem ab his qui affuerunt, quod ipse fecerit suum testamentum: et quod fecit, fecit et scribit; et de rebus quas voluit, quibus voluit ipse divisit. Quod residuum fuit, duobus abbatibus assistentibus tunc sibi et mihi pariter qui absens eram, dividendum commisit, eo quod nobis nota essent loca pauperiora sanctorum. Porro abbates illi domum venientes, et non invenientes me (definebar enim tunc temporis ex vestro mandato pacis quærendæ negotiis) nihilominus pecuniam, sicut eis visum est, diviserunt, me non solum non convivente, sed nesciente quid fecerint. Cedat jam, si placet, manifestæ indignatio veritati; nec mihi deinceps frons rugetur, aut supercilium deponatur; sed solita redeat serenitas blando et benigno vultui, ac suo denno sole læta facies induatur.

3. « Nam quod item comperi displicuisse me in nullis scriptationibus meis, hoc me jam metuere non oportebit, quoniam facile emendabo. Scio, scio, præsumpsi plusquam oportuit, parum attendens, quis cui scripsisse præsumerem. Sed ad id quidem audendum vestra me armarat benignitas, non negabitis: urgebat deinde charitas amicorum. Etenim perpaucæ pro me scripsi, si bene memini. Sed ne quid nimis. Dabo, si potero, zelo meo de cætero temperamentum scientiam, et ponam digitum meum super os meum. Tolerabilis enim offendam aliquos amicorum, quam multis precibus defatigem Christum Domini. Et nunc quoque non sum scribere ausus vobis de imminenti Ecclesiæ periculis, et gravi schismate quod timeamus, ac plurimis quæ sustinemus incommodis. Scripsi autem sanctis episcopis vestro lateri adherentibus. Ab ipsis audire poteritis, si scire placuerit, quæ scripserim ego ». Hactenus ad Innocentium S. Bernardus. Est ultima Epistola eus, quas ad ipsum scripsit.

Accidit plane secundum illud Sapientis¹: « Calumnia conturbat sapientem », ut sanctus Bernardus ob calumniatores apud Innocentium papam æstimatione minuerentur, adeoque ut tot

tantisque exhibitis per eundem sanctum officiis et beneficiis oblvioni traditis, jam nulla eorum habita ratione, exciderit ipse e gratia ejus. An autem acceptis his ab eo litteris, Innocentius æquiori erga eum animo fuerit, haud nobis compertum habetur. At si in terra ista aruerunt sata Bernardi, stante vento urente: certe alibi quidem collegit ad vitam æternam, quæ non humano, sed divino intuitu ab eo sunt jactata semina in terram viventium. Sic discant homines non sperare in principibus, neque in filiis hominum, in quibus non est salus.

4. *De schismate imminente S. Bernardi Epistola.* — Sed quanto discrimini esset exposita Ecclesia Gallicana, nisi Innocentius papa parceret regi, his litteris, datis ad quatuor cardinales episcopos, videlicet ad Albericum Ostiensem episcopum, Stephanum Prænestinum, Ignarum Tusculanum, et Gerardum cancellarium aperuit. Sunt istæ, de quibus scripserat ad Innocentium, quæ sic se habent²:

« Quantum malum schisma in Ecclesia sit, et quam sit detestandum, et omnimodis devitandum, evidenter quondam ostendit famosa et horrenda mors virorum illorum, quos ob istiusmodi pestem terra deglutiens³, vivos transmisit ad inferos. Ostendit et illa persecutio Guibertina, sive Burdini temeritas, quos nostra jam tempora experta sunt, inter regnum et sacerdotium dividendes plagâ pæne incurabili, et castigatione crudeli. Ostendit et illa, quæ nuper adhuc post nullam et multifariam Ecclesiæ vexationem et vastationem, tandem, Deo miserante, finem accepit rabies Leonina. Merito proinde Salvator in Evangelio⁴: Væ, inquit, homini illi, per quem scandalum venit! Væ nobis qui vivimus, plangere quæ pertulimus, dolere quæ sentimus, timere quæ expectamus! Et quod peius est, ad tam malum habitum humanæ res devenerunt, ut nec rei humiliari velint, nec iudices misereri. Dicimus iniquis⁵: Nolite inique agere; et delinquentibus: Nolite exaltare cornu, et non audiunt nos, quia domus exasperans est⁶. Supplicamus his, quorum esset peccata arguere, peccantes servare, ne calamum quassatum conterant⁷, et lignum fumigans non extinguant: et magis in spiritu vehementi conterunt naves Tharsis. Si denuntiamus filiis cum Apostolo⁸, ut obediant patribus per omnia: quasi aerem verberamus. Si patribus loquimur⁹, ne ad indignationem provocent filios: in nos potius eorum indignationem provocamus. Nec delinquentes satisfacere, nec rectores seu correctores condescendere ullatenus acquiescunt: omnes suum stomachum sequuntur, et totis viribus fuem in diversa trahentes rumpunt.

5. « Ille necdum recenti Ecclesiæ plagâ cicatrix occalluit, et rursus scindere parant, rursus corpus Christi affigere cruci, rursus fodere latus

¹ Eccl. vii.

² Bern. Ep. CCXIX. — ³ Num. xvi. — ⁴ Luc. xvii. — ⁵ Psal. lxxiv. — ⁶ Ezech. ii. — ⁷ Isa. xlii. — ⁸ Colos. iii. — ⁹ Ephes. vi.

innoxium, rursus vestimenta dividere, atque ipsam (quod in ipsis est) tunicam inconsutilem, quamvis frustra, dirumpere satagunt. Si qua in vobis sunt viscera pietatis, tantis vos opponite malis, ne in illa præcipue terra scissura fiat, in qua solent (sicut optime nostis) scissuræ aliæ resarci. Nam si auctor scandali ore singulariter Iudicis tremendo addicitur maledicto¹, quibus putamus benedictionibus dignos hujus nequitiae fugatores et propugnatores?

« De duobus non excusamus regem. Nam et juravit illicite, et perseverat injuste. Verum id non voluntate, sed verecundia. Nam probro ducitur (sicut optime nostis) apud Francigenas juramentum solvere, quamlibet male publice juratum sit: quamvis nemo sapiens dubitet, illicita juramenta non esse tenenda. Verumtamen ne in hoc quidem excusari posse fateamur. Neque enim excusare nos, sed veniam postulare suscepimus. Vos videte, an excusare aliquatenus cum possit ira, ætas, majestas. Poterit sine dubio, si misericordiam iudicio superexaltandam decernatis; quatenus videlicet talis aliqua consideratio in rege et puero habeatur, ut hac ei vice tali quidem tenore pareatur, quo tale aliquid de cætero non præsumat. Parcatur sane dixerim, si fieri possit, salva in omnibus Ecclesiæ libertate, simul et archiepiscopo debita veneratione servata, quem manus Apostolica consecravit. Hoc ipse rex humiliter petit, hoc nostra universa Citramontana nimium jam afflicta Ecclesia suppliciter deprecatur. Alioquin damus manus morti, tabescentes et arescentes præ timore et expectatione, quæ supervenerunt universo orbi. Siquidem deprecatio mea super hoc ab anno priore, et peccatis meis exigentibus, deprecationem meam non exaudito, sed indignatio; indignationem autem desolatio pene universæ terræ secuta est. Si quid zelo urgente erupit, quod non fuit, aut secus quam fuit dicendum, sit, queso, apud vos quasi non dictum. Ubi vero dixi quod oportuit, et ubi oportuit dici, sit non frustra dictum ». Hucusque S. Bernardus ad episcopos.

6. *Ludovici regis furores et persecutionem compescere studet S. Bernardus.* — Sed eodem pariter anno Ludovicus rex Francorum magis exasperatus, in comitem Theobaldum furorem convertens, in ejus comitatum arma movit, illudque crudelitate summa memorabile facinus perpetravit, de quo ita apud Sigebertum hoc anno: « Ludovicus rex Vitriacum castrum comitis Theobaldi capit, ubi igne admo, Ecclesia incensa, et in ea mille trecente animæ diversi sexus et ætatis sunt igne consumptæ. Super quo rex Ludovicus misericordia motus, plorasse dicitur. Et hac de causa peregrinationem Hierosolymitanam aggressus a quibusdam existimatur ». At non ista tantum, sed alia pleraque nefanda idem rex, solutus timore Dei, pro perturbati animi voluntate gessit, quæ sanctus

Bernardus, scribens ad eum litteras redarguit. Habet enim hæc inter alia²:

7. « At quidquid vobis de regno vestro, de anima et corona vestra facere placeat, nos Ecclesiæ filii, matris injurias, contemptum et conculationem omnino dissimulare non possumus, quæ illi præter illa, quæ in eam jam præcessisse miserabiliter plangimus, iterum de novo partim inferri, partim imminere sentimus. Profecto stabimus et pugnabimus usque ad mortem, si ita oportuerit, pro matre nostra armis quibus licet, non sentis et gladiis, sed precibus flentibusque ad Deum. Et ego quidem, qui me memini præter quotidianas preces, quas pro pace et salute vestra atque regno, coram Domino supplicem, ipso teste, fundebam: etiam apud Sedem Apostolicam litteris et nuntiis causam vestram egisse (lateor) usque pæne ad propriæ conscientie lisionem et ipsius summi Pontificis justam (quod diffiteri non debeo) contra me indignationem. Ego, inquam, assiduis vestris, quos innovare quotidie non cessatis, excessibus provocatus, dico vobis, incipio penitere super insipientia mea priori, qua plus justo vestræ adolescentiæ hucusque favi. Et de cætero pro mea exiguitate non deero veritati. Non tacebo, quod cum excommunicatis iterato fœdus et societatem inire satagitis: quod in necem hominum, combustionem domorum, destructionem Ecclesiarum, dispersionem pauperum, raptoribus et prædonibus (sicut dicitur) adheretis, juxta illud Prophetæ³: Si videbas furem, currebas cum eo, et cum adulteris portionem tuam ponebas: quasi non satis per vos mala facere valeatis. Non silebo, quod illicitum illud maledictumque juramentum inconsultissime usurpatum a vobis contra Bituricensem Ecclesiam (pro quo, heu! tot et tanta mala jam nunc merito provenerunt) non ita tandem corrigitis, ut Christi ovibus apud Catalaunum pastorem præfici non sinatis: insuper et fratri vestro, ejusque militibus sagittariis balistarisque, domos episcopales contra jus et fas inhabitandas, et res Ecclesiæ in hujusmodi nefandis usus profligandas, audacter nimium expointis. Dico vobis, non erit diu inultum, si hæc ita facere pergitis. Et ideo, domine mi rex, amicebiliter moneo vos, et fideliter consulo vobis, ut citius ab hac malitia desistatis, si forte jam ferire parantis manu, Nivivite regis exemplo, penitentia et humilitate prævenire possitis. Dura loquor, quia duriora vobis formido. Sed mementote a Sapiente dictum⁴: Meliora esse vulnera amici, quam fraudulenta oscula inimici ». Hæc ad regem Bernardus, alter nostri temporis Elias, non parcens regi per devia gradienti; ad quem rursus eodem argumento aliam una cum Hugone Antiodorensi episcopo scripsit Epistolam⁵. Pro quo cum (ut vidimus) scripsisset ad Innocentium papam, rogans ut indulgeret ipsi, et paterno

¹ Matth. XVII.

² Bern. Ep. CCXVI. — ³ Psal. XLIX. — ⁴ Psal. XXVII. — ⁵ Bern. Ep. CCXXV.

amore pateretur, quæ peccasset in Apostolicam Sedem, ejus præcepta implere nolens; quod ipse rex nec se respicerit, sed magis magisque desiperet, et deteriora in dies addere non prætermitteret; hæc pro sui excusatione ad Stephanum cardinalem episcopum Prænestinum papæ legenda conscripsit¹; qui ipsi papæ non amplius a se scribendum fore (ut vidimus) animo proposuerat:

8. « Loquitur Hieremias ad Deum pro adversariis suis ita dicens²: Recordare, Domine, quod steterim in conspectu tuo, ut loquerer pro eis bonum, et averterem indignationem tuam ab eis. Et infert: Propterea, inquit, da filios eorum in famem, et deduc eos in manus gladii; et adhuc alia in hunc modum æque gravia imprecatur illis. Quod propterea nunc apud vestram reverentiam memorandum putavi, quoniam simile mihi aliquid cum propheta video accidisse. Vos enim scitis, quomodo ego quoque pro rege steterim in conspectu domini mei, corpore quidem absens, sed præsens spiritu, ut loquerer pro eo bonum; bona siquidem pollicebatur. Nunc autem ipso reddente pro bono malum, cogor contraria scribere. Pudet erroris et falsæ spei, quam de eo conceperam; et gratias ago, quod pro eo simpliciter supplicans, non fuero exauditus. Putabam me deferre regi pacifico: et ecce invenio, gravissimum hosti Ecclesiæ assentia-se. Conculcantur apud nos sancta, Ecclesiæ tripiter ancillatur. Nam et electiones episcoporum prohibentur fieri, et sicubi id præsumptum a clericis fuerit, electus episcopari non sinatur. Denique sedet in tristitia Ecclesia Parisiensis, proprio destituta pastore; et nemo est qui de substituendo alio mutare audeat. Non sufficit spoliari bonis præsentibus domos episcopales: etiam in terras et in homines manus sacrilega circumquaque descevit, totius insuper anni ex eis sibi redditus vindicando. Vestra Catalaunensis fecit quidem electionem, sed qui electus est, ecce jam diebus multis debito honore frustratur, et scitis quam non absque gravi gregis Domini detrimento. Commisit rex germano suo Roberto vices episcopi, et ille in cunctis terris, rebusque Ecclesiæ polestative versans, et pro vice sua ubique laudè sequitur agens, infert cælis quotidianas hostias, non plane pacificas, clamores pauperum, lacrymas viduarum, plactus orphanorum, gemitus compellitorum, et sanguinem interfectorum. Verum angustus est malitiæ ejus ille episcopatus. Rhemensis invadit, atque in terra sanctorum iniqua gerit, non clericis, non monachis, non sanctimonialibus parens. Denique sanctæ Mariæ, sancti Remigii, sancti Nicasi, sancti Theodori terras fructiferas, et villas populosas ita in ore gladii devastavit, ut pene in solitudinem redegerit universas. Frequens in omnium auribus vox³: Hæreditate possideamus sanctuarium Dei. Sic rex emendat, quod in Ecclesiam Bituricensem Herodiano juramento commisit.

9. « Præterea rex, nobis quidem non parum laborantibus, pacem cum comite Theobaldo fecerat, firmam, ut putavimus, amicitiae fœdus iniecit: et ecce occasiones quærit, quomodo recedat ab amico. Atque hoc grande crimen, quod impingitur comiti, quia cum baronibus regis de liberis suis contrahit matrimonia. Suspecta est illi dilatio charitatis, nec se putat regem, si se amaverint principes. Confiat prudentia vestra quid animi erga subditos gerat, qui de odio atque discordia, si fuerit inter suos, se astimat fortiozem. Videat et perpendat, si est hic homo a Deo, qui in suorum magis mutua similitate quam charitate confidit, cum charitas sit Deus. Quod minime faceret, si sapientiam illius haberet, qui ait⁴: Fortis est ut mors dilectio, dura sicut infernus æmulatio. Præterea ergo pacis conventiones et constitutiones manifeste transgreditur, nec tenet pacta sua, quæ distinxerunt labia sua. Denique revocavit in domum suam, et ad consilium suum virum adulterum et excommunicatum, nempe Radulphum comitem, quem ex constituto eiecerat, et pro exercenda majori militia, aliis multis nequam æque excommunicatis, perjuriis, incendiariis, homicidis rex et advocatus Ecclesiæ adversus Ecclesiæ (quod non est dubium) amatorem et defensorem denno sociatur, juxta illud Propheta⁵: Si videbas furem, currebas cum eo; et cum adulteris portionem tuam ponebas. Ad hæc cogit suo more episcopi, ad maledicendum benedicendis, et iterum benedicendum maledicendis. Et quoniam non obtemperatur pro suo libito sibi, circum mare et aridam, ut inveniat juratores, quorum perjuriis, quos fortassis Deus conjungit, per homines separentur. Qua fronte, obsecro, tantopere aliis præscribere de consanguinitate laborat homo, cum sua (quod palam est) tertio consanguinitatis gradu ferme permanens consobrina? Et quidem inter filium comitis Theobaldi, et comitis Flardrensis filiam, et item inter comitem Suesionensem, et filiam comitis Theobaldi, si consanguinitas sit, nescio: (scienter enim illicita matrimonia nec laudavi unquam nec laudo) sed sciatis vos et sciat dominus meus, prohiberi horum nuptias. Si quo modo conjungi fas fuerit, exarmare Ecclesiam est, et multam illi subtrahere fortitudinem. Nec aliam puto adversantium ipsis nuptiis intentionem, nisi ut in terris præfatorum principum non possint habere refugium, quicunque audebunt contradicere schismati quod minantur. Hucusque zelus meus. Non possum enim ego emendare quod potui redarguere, potui et commonere eum qui possit. Zelus domini mei faciet hoc. Ipsum duxi necessarium in magno Ecclesiæ labore atque periculo compellendum, et per nullum dignum quam per vos, qui ejus lateri et spiritui adhaeretis. Apud quem, quaeso, habete me excusatum, quod rege mutato mutaverim styllum, qui ad ipsum Deum

¹ Bern. Ep. CXXIV. — ² Jer. XVIII. — ³ Psal. LXXXII.

⁴ Saul. VIII. — ⁵ Psal. XLIX.

Dei Prophetam dixisse scitis¹ : Cum viro innocente innocens eris, et cum perverso perverteris ». Hæc Bernardus ad Innocentium per Stephanum cardinalem insinuanda.

10. *Innocentii papæ obitus, qui multas Ecclesias instauravit.* — Porro Innocentius hoc tempore adversus Romanos senatum restituere satagentes laboravit usque ad mortem : siquidem in his laboribus diem clausit extremum octavo kal. Octobris, cum (ut ait Otto Frisingensis²) invalescente populo, dum periclitare non posset, ut eos scilicet impediret, lecto cubans, in pace quievit, cum sedisset annos tredecim, et menses septem. Hic autem inter alia religiosa opera pro Ecclesiis impensa, restauravit collapsum lectum Lateranensis Basilicæ, ad quod opus missæ sunt trabes e Calabria a Rogero Siciliæ rege, qui et alia munera eidem Ecclesiæ contulit. Hæc ex scripto Codice archivi Lateranensis, ubi etiam legitur, ipsum sepultum fuisse in eadem Basilica in porphyretico mausoleo, in quo olim sepultus fuerat Hadrianus imperator. Itemque Pontifex Basilicam S. Mariæ, quæ dicitur Callisti trans Tiberim, restauravit, et apsidem ex mure opere picturis ornavit, ut versus in ea intexti eodem opere usque hodie docent. Item lectum Basilicæ S. Pauli resarciivit, et Ecclesiam muris munivit, insuper et Ecclesiam S. Stephani in monte Cælio vetustate labantem reparavit.

11. De eodem insuper Pontifice hæc in Vaticano Codice scripta leguntur : « Hic beatus Pontifex annualem censum, centum videlicet librarum papalis monete iudicibus et advocatis Romanæ Urbis de camera sua constituit, et eos ejusmodi juramentum exhibere mandavit :

JURAMENTUM QUOD PRESTITERUNT ADVOCATI CONSTITUTI A PAPA INNOCENTIO SECONDO.

« In nomine Domini. Amen. Ego N. advocatus juro, quod ab hac hora in antea placita vel negotia Romanorum, in quibus advocatus ero vel patronus, Romanos malitiose non impugnabo vel defendam : sed pro conscientia a Deo mihi præstita, secundum constitutiones et leges ac bonos mores ea tractabo. Et postquam justitia de iisdem causis a me cognita fuerit, si requisitus fuero, iudicibus patefaciam, et eis in ipso iudicio assensum meum adhibebo. Pretium exinde non accipiam, nec per me, nec per interpositam personam suscipi permittam. Et si susceptum fuerit, postquam scivero, infra xv dies illud reddi faciam. Et patrocinium meum alicui habendi cauam, si ab eo rogatus fuero, malo studio non negabo ; salvis beneficiis quæ habemus ab Ecclesiis vel aliis, et exceptis sententiis valentibus duodecim denarios, quæ gratis et sine exactione nobis obliuntur. Hæc omnia observabo bona fide sine fraude et malo ingenio, quamdiu papa Innocentius, vel successores sui censum centum libras valentem denariozorum papalem nobis advocatis et iudicibus annis singulis

solvere perseverabunt ». Hæc ibi. Et in fine : « Hic ordinationes fecit permultas per Decembrem et alios menses, et diaconos in eis creavit decem et octo, presbyteros viginti, et episcopos septuaginta duos, quos per diversa loca constituit ». Hæc ibi. Reliquit nondum penitus absolutam quam restituebat Basilicam Callisti, titulo Sanctæ Mariæ nobilitatam, quam germanus ejus episcopus Albanensis absolvit, qui et corpus ejus in eadem Basilica intra majorem portam sepelivit, hoc sepulture simpliciter indito Epitaphio :

HIC REQUIESCUNT VENERABILIA OSSA SANCTISSIMÆ MEMORIÆ DOMINI INNOCENTII II PAPÆ SECUNDI DE DOMO PAPARUM, QUI PRESENTIUM ECCLESIAM AD DONOREM DEI GENTRICIS MARIE SICUT EST A FUNDAMENTIS SYMPTIBUS PROPRIIS RENOVAVIT.

Cætera legi non possunt, quæ notis numeri videntur apposta. Porro ipsius Innocentii imaginem musivo opere expressam invenies in apside a dextro ipsius latere, quæ referat hominem ætate virentem.

12. *Pacifica Cælestini II Pontificis creatio.* — Elapso autem die ab obitu Innocentii, Guido de Castello presbyter cardinalis tituli S. Marci, creatus est summus Pontifex, nominatusque Cælestinus Secundus. Quod cum imminerebat a Romanis civile bellum ab senatum restitutum in pristinum conservandum, in causa fuit, ut cardinales absque mora sine dissensione et controversia unanimi consensu convenirent, atque crearent cito Pontificem ; extat Petri Cluniacensis de electione ejusdem Cælestini ad ipsum scripta Epistola istis verbis¹ :

« Universali Pontifici et speciali Ecclesiæ Cluniacensis patri, domino papæ Cælestino, frater Petrus humilis Cluniacensis abbas, sincerum amorem et plenam obedientiam.

« Benedictus Dominus Deus noster, qui memor verbi sui, in quo nobis spem dedit, more suo nullatenus se oblitum verborum suorum etiam hoc tempore monstravit, quibus suos ab ipsis recedens consolari dignatus est, dicens² : Ecce ego vobiscum sum omnibus diebus usque ad consummationem sæculi. Apparet hoc in innumeris suæ gratiæ donis ; apparet hoc nunc specialiter et in vobis, quem his nostris diebus summum Pontificem, animarum nostrarum custodem, totius Ecclesiæ suæ adhuc in terris peregrinantis, hoc est, unicæ columbæ inter corvos gentantis, præsumit, propitia mortalibus divina benignitas concessit.

« Non hoc tamen nobis relatum est) humanus fistus, non sibi providens humana cupiditas, non Romanus turbo saepe auditis, orbemque terrarum suo impulsu concutere solitus efficit ; sed adversa pacificans, diversa uniens, discissa redintegrans, spiritus ille qui ubi vult spirat, velut in sibilo auræ tenuis, juxta verbum Domini lactum ad Eliam, le-

¹ Psal. LVII. — Otto Frising. l. VII. c. 27.

² Petr. Clun. l. V. Ep. XXVII. — Math. XXVII.

niter adimplevit. Gavisus sumus audientes ista, et in immensum cor nostrum exhilaratum est, agnoscens, non in armis, non turribus, non minacibus agminibus rem divinam tutari, sed sola misericordis Domini manu et suavi protectione ad pacem compositam esse. Agnovimus vere quod agnoscendum erat, imperasse Christum ventis et mari, et factam esse insolitam tranquillitatem; statuisse procellam maris in auram, et sibiisse fluctus ejus. Et hoc quis non miretur? Quis, inquam, hoc non miretur, a tempore Alexandri Secundi papæ, per Gregorium, Urbanum, Pascalem, Gelasium, Callistum, Honorium, Innocentium, summos Ecclesiæ Dei ac præclaros Pontifices, quantum ad eorum promotionem pertinet, Ecclesiasticam pacem pertransisse, sed in nullo eorum præter vos quiescere? Nec adeo lapidei sumus ut non sentiamus, nec adeo bruti ut non intelligamus eum, sine cujus nutu, ut legitur, nec passer ad terram, nec folium cadit arboris: non sine causa, non sine certo inhexhaustæ sapientiæ consilio hanc pacem eorum primordiis subtraxisse, vestris contulisse: quam esse illam puto, et hanc vobiscum semper durare confido, de qua in Psalmis Propheta¹: Secundum multitudinem, inquit, dolorum meorum in corde meo consolationes tuæ kelificaverunt animam meam. Credo enim et spero in Deo salutari meo, quod qui principiis vestris dedit tam amabilem pacem, dabit et fini suo tempore commendabilem laudem. Lætabitur sub umbra alarum ejus vobis amodo subditus orbis terrarum, et se tantos fidei suæ patres, Apostolicos viros, confessores dico, et quod majus est, martyres, vel quod excellentius est, ipsos Apostolorum summos Petrum et Paulum, imo ipsum Christum in vobis solo se habere gloriabitur. Gaudebit, et jam ineffabiliter gaudet, licet non numero, tamen virtutibus, pusillus grex vester Cluniacensis, qui obedientiam, qui subjectionem, qui (quod majus est) dilectionem, quia per seipsum non potest, ore proprio per has litteras vobis ingerit, et se totum, licet absens, sanctitatis vestræ pedibus subijcit.

13. *a* Certitudinem electionis vestræ, et collati a Deo Apostolatus sero accepi: ideoque tarde descripsi. Nam diu variante fama, vix in vigilia sancti Andree Epistolam vestram mihi et conventui missam suscepi, atque die ipsa publice in capitulo lectam tam litteratis quam illitteratis (quos conversos vocamus) exposui. Audita est et vere suscepta ab omnibus filiali affectu; quod vobis melius ore proprio, vel nuntiorum proxime per Dei gratiam indicabo. Habeo enim omnimodam voluntatem veniendi ad vos, et novum quidem patrem, sed antiquum amicum amore et honore debito visitandi. Faciam hoc, si congrue potuero, si non, per nostros, cum maxime vacaverit, Christi juvante gratia, visitabo. Commendo interim paternitati vestræ negotium fratris præsentium latoris, ut illud

benigne et ad commodum Ecclesiæ ejus, quantum iustitia permiserit, audiat et definias. In fine quas possum gratias ago, quod sicut mihi relatum est, et in litteris vestris legi, quasdam alias causas beatæ memoriæ prædecessori vestro directas benigne accepistis, siquæ defuissent, ut in sententia successoris non sit lugenda/sancti mors prædecessoris». Illeusque Petrus.

Ad hunc eundem Cælestinum papam exant litteræ S. Bernardi¹ pro electo Eboracensi adversus intrusum hominem nefandissimum, de quo etiam litteras idem dedit ad S. R. E. cardinales².

Hoc pariter anno dissidia fuisse composita inter regem Francorum et Romanum Pontificem, testatur Robertus in Chronico Appendice ad Siebertum: quibus autem conditionibus, ignoratur.

14. *Concilium Londoniense.* — Itemque eodem anno Londoniæ in Anglia celebratur Concilium pro libertate Ecclesiastica exule jamdiu restituenda, de quo Rogerius in Annalibus his verbis: «Anno gratiæ millesimo centesimo quadagesimo tertio, qui erat annus octavus regni regi Stephani, rex Stephanus interfuit Concilio Londoniæ in media Quadagesima. Quo quia nullus honor vel clericis vel Ecclesiæ Dei a raptoribus deferrebat, et æque capiebantur et redimebantur clerici ut laici; tenuit idem Wintoniensis episcopus, Urbis Romanæ legatus, Concilium apud Londonium, clericis pro tempore necessarium: in quo sancitum est, ne qui alicui clerico violentas manus injecerit, ab alio possit absolvi, quam ab ipso papa, et in præsentia ipsius. Unde clericis aliquantum serenitatis vix tandem illuxit». Hæc Rogerius.

Hoc eodem anno ex hac via sublato Radulpho Antiocheno patriarcha, propinato illi veneno, in locum ipsius subrogatus est Haimericus, decanus ejusdem Ecclesiæ. Ita ex Tyrio.

15. *Obitus Joannis imperatoris Orientis, cui succedit Manuel, et Leonis patriarchæ.* — Quod item ad res pertinet Orientis, hoc anno mense Aprilis moritur Joannes imperator, relinquens Manuelem filium suum hæredem imperatorem. Ita quod tempus spectat, Nicetas, qui ejus imperio tribuit annos viginti quatuor et menses octo. Idem Otto Frisingensis³. Ex quibus corrigas errorem illapsum in Wilhelmo Tyrium⁴, dum apud ipsum legitur ipse Joannes defunctus anno millesimo centesimo trigesimo octavo, imperasse annos viginti septem: inest enim utrobique error, qui ex dictis auctoribus et aliis arguatur; imo ab ipsomet Tyrio, qui cum, ut alii, Joannis ingressum ponat anno millesimo centesimo decimo octavo, si eidem numero addas, quos ponit Joannis imperii annos viginti septem, non trigesimo octavo, sed quadagesimo quinto post centesimum millesimum eum defunctum oportuisset asserere; cum tamen anno

¹ Psal. xciii.

¹ Bern. Ep. ccxxxiv. — ² Ibid. Ep. ccxxxv. — ³ Otto Frising. l. vii. c. 78. — ⁴ Tyf. l. xv. c. 23. in fin.

trigesimo octavo apud ipsum legatur Joannes esse defunctus. Porro quod ad genus mortis pertinet ejusdem Joannis imperatoris, nonnisi divina contigisse vindicta historici omnes tam Græci quam Latini affirmant. Cum enim a Latinis abripere Antiochiam pertentasset, et quamvis monitus ab Innocentio Romano Pontifice per legatum episcopum Gabalensem, minime destitisset, imo acerbius deservisset etiam in viros sanctissimos (ut testatur Otto) eremum incolentes : factum est, ut post obitum duorum filiorum, quo potuisset a ceptis desistere ita admonitus, suæ ipsius sagittæ venenatæ vulnuscule, cum in venatione ea. pharetra eversa, caderet, sibi ipsi mortem intulerit. Post autem ejus obitum, Manuel ipse patris judicio comprobatus regendas sumpsit habenas imperii. Huic novo imperatori Conradus Rom. rex matrimonio junxit sororem conjugis suæ. Intercurrerant ea de re jam ad patrem Joannem imperatorem litteræ per nuntios Hembriconem Herbiopolensem episcopum, et Robertum principem Capuanum, et aliæ postea ad eundem Mannelem Comnenum missæ. Recitat eas Otto Frisingensis ¹.

16. Hoc eodem anno, ipsis primordiis Mannelis Comneni imperatoris, moritur Leo Stytiota patriarcha Constantinopolitanus, ut testatur Nicetas Choniata. De eodem Leone Theodorus Balsamon meminit, dum interpretatur sancti Basilii Epistolam Canonicam ad Amphilochem, et in canone octogesimo tertio agit adversus eos qui more gentium exercent vaticinia ac veneficia, quorum occasione subjicit hanc narrationem : « Cum enim beatæ in Domino vitæ conjux domini Alexii Comneni filii inclyti imperatoris in gravem morbum incidisset, et medici de ejus sanitate desperassent propter multiplicitatem morborum contrarietatem, quidam ethnici se eam curaturos professi, utpote quæ magicis artificijs laboraret, effecerunt, ut multæ et

admirandæ ejus feminae, et viri etiam exanimarentur. Clam autem projiciebant imagines ex cera factas, et satanice eorum contractationem et inventionem significabant, atque alia multa gravia fecerunt in Dei contemptum, et multorum hominum supplicium; et ipsi quidem impii, cum rem efficere non potuissent, evanuerunt. Nobilissima autem illa mulier non modo nihil adjumenti adepta est, sed etiam diuturno morbo vexata vita excessit, malo a se suscepto viatico, divinorum scilicet canonum adversus se indignatione, quam Deus propter alia ejus bona opera allevare dignetur. Post ejus autem mortem, tempore sanctissimi patriarchæ domini Leonis Styppæ (Styptote), nonnulli quidem ejus cognati et etiam subditi graviter puniti sunt, ut qui sapissime vaticinati essent, et satanice nefariæ operationi toto animo credidissent. Alii autem mediocri supplicio curati sunt, ut qui non sæpe, nec ex animo malum illud secuti essent. Est itaque canon attendendus, et Dei judicio relinquenda ægrotantium cura, qui solo verbo dissolutas carnes adstringit et colligat; nec tradere se oportet satanicis imposturis, quæ non solum corporum sanitatem auferunt, sed etiam animarum ». Hæc Balsamon occasione Leonis patriarchæ ejusdem canonis acerrimi vindicis; extat ejusdem Leonis decretum de nuptiis duorum fratrum in Codice juris Orientalis, necnon Arsenii, qui post ipsum patriarcha vixit, licet in catalogo patriarcharum Constantinopolitanorum nulla de eo sit mentio. At Nicetas affirmat subrogatum post Leonem Michaelum monachum monasterii Acuti, sic dicti, « virum (ut ait) virtute celebrem, et nostris litteris eruditum ». Hic ipse dictus est etiam cognomento Oxytas, quod ex Oxy insula, in qua summum erat monasterium,eductus esset. In serie patriarcharum ponitur hic sedisse annos duos et menses octo, indeque se abdicasse, ut suo loco inferius dicturi sumus.

¹ Otto de Gestis Frid. 1. 1. c. 23 et 24.

1. *Miser status Ecclesiæ Gallicanæ.* — A num. 4 ad 10. Luctuosam Ecclesiæ Gallicanæ faciem sub Ludovico VII Franciæ rege his verbis describit Otto Frisingensis testis oculatus lib. 7.

Chron. cap. 21, ubi ait : « Francia Occidentalis, rege suo amisso, sub illius filio Ludovico, qui adhuc superstes est, ob ipsius ac Theobaldi Ble-sensis comitis guerram tot præliis ac incendiis per-

pessa est discrimina, quod nisi religiosorum, qui ibidem morabantur, meritis, orationibus et consilio nuper pacata fuisset, usque ad interuersionem deleta pulcraretur. Id satis ostendunt Epistole divi Bernardi hoc anno a Baronio recitatae. Basilica tamen castri *Vitraci* non hoc anno, ut refert Baronius num. 6, ex Pseudo-Roberto de Monte, sed anno MCXLI incensa, ut anno MCXLI ostendimus.

2. *Moritur Innoc. II PP.* — A num. 10 ad 14. Cum *Innocentius II* anno MCXXX, die decima quinta mensis Februarii, Pontifex Romanus electus fuerit, et ab eo die sui Pontificatus annos deduxerit, ut ibidem ostendimus, sedit *annos tredecim, menses septem, dies novem*, emortuali ex-cluso. Eum enim currenti anno *octavo kalendas Octobris*, seu die XXIV mensis Septembris, e vivis excessisse, certum et indubitatum. Joannes quidem Ceccanus in Chr. Fosse Novæ tom. I Italiae Sacrae ab Ugheilo edito scribit, mortem ejus contigisse *IV idus Septembris*, aliique fere omnes cum Baronio et Onuphrio *VIII kalend. Octob.*, sed nullo ad id probandum testimonio in medium adducto; verum mox unum proferam, de quo nullus ambigere poterit.

3. *Ejus sepultura et beneficia in Ecclesiam Lateranensem.* — « In navi Ecclesie », inquit Joannes Diaconus junior, Basilicæ Salvatoris patriarchii Lateranensis canonicus, in libro de Ecclesia Lateranensi apud Mabillonium tom. II Musei Ital. « jacet Innocentius papa II in concha porphyretica, quæ fuit Adriani imperatoris sepultura. Hic renovavit tectum hujus Basilicæ, propriis expensis, novis trabibus, quas gloriosus et potens Rogerius Siciliæ rex precibus suis eidem Ecclesiæ transmisit : quod videlicet tectum suo tempore cecidit, suoque tempore restauratum est. Turrim etiam ante Ecclesiam, quæ ruinæ vicina videbatur, renovari jussit : atque quamplurima, dum vixit, Ecclesiæ dona ad ornamentum altaris obtulit, cycladem videlicet auro textam », et alia ibi sigillatim memorata.

4. *Cælestinus II ei succedit.* — Innocentio II successit *Guido*, natione Tuscus, antea presbyter cardinalis Sancti-Marci, qui *Cælestinus II* in Pontificatu appellatus fuit, electus die vigesima sexta Septembris, et, ut in morte ejus videbimus, eodem die inthronizatus. Ipsemet Cælestinus de sua electione certiores fecit Cluniacenses Epistola data *Laterani, VIII idus Novemb.*, tom. IV Spicilegii Dacheriani recitata, et inde in tom. X Concil. translata, in qua ait : « Notum facimus dilectioni vestræ quod domino nostro bonæ memoriæ papæ Innocentio, VIII kal. Octob. defuncto, et in Lateranensi Ecclesia cum maxima cleri ac populi Romani frequentia tumulto, cardinales, presbyteri et diaconi, una cum fratribus nostris episcopis et subdiaconis, clero ac populo Romano acclamante, partiti et expetente, tertia die in ipsa Ecclesia unanimi voto et pari consensu, me indignum, et prorsus tanti officii imparem, nescio quo Dei judicio, in

Romanum Pontificem concorditer elegerunt ». Videtur Cælestinum II tertia die a morte Innocentii II electum fuisse Pontificem Rom. i. hocque Baronium, passimque alios, non bene initium ejus repetere a die XXV mensis Septembris. Nam licet num. 12 non satis clare mentem suam explicet, cum tamen anno sequenti asserat, *Cælestinum* diē octava Martii post Sedem mensium quinque et dierum XII e vivis abiisse, necessario supponit, eum die XXV Septembris hujus anni creatum, quæ et sententia Onuphri fuerat, *Innocentium* vero Secundum VIII kalend. Octob. demortuum fuisse, præter Spicilegium Dacherianum, nos docet vetus monasterii Casmen-sis Necrologium.

5. *Litteræ gratulatoriæ Arnulphi episc. Luxoviensis ad Cælestinum II.* — *Arnulphus*, qui ex archidiacono Sagiensi Luxoviensis episcopus a clero et populo creatus fuit, ut testatur Petrus Venerabilis lib. 4. Epist. VII ad Innocentium II data (idque anno MCXLI, cum eo anno Ordericus lib. 13, in fine Operis sui Joannem tunc ejus decessorem obiisse prodit, et a Rothomagensi episcopo consecrationem accepit, ubi audivit *Cælestinum*, a quo plurimum amabatur, ad Sedem Romanam evectum fuisse, ad eum scripsit Epistolam congratulatoriam, quæ extat tom. II Spicilegii Dacheriani. In ea Innocentium II Ecclesiam Romanam egregie rexisse asserit : « quod sane, inquit, tam regularis disciplina, quam religionis monasticæ proventus ostendit ; cum civitates et castella passim pro secularibus regulares clericos habeant, et deserta plus hodie monachorum, quam ferarum habuerunt quondam bestiarum ». Subdit, se ad Pontificatum venturum fuisse, nisi circa *confirmandam* sibi *recentem nobi principis gratiam* gravior occuparetur. Petrus Venerabilis in laudata Epistola petit ab Innocentio II ut *Arnulphi* electio a Sede Apostolica confirmetur, et comes Andegavensis nullatenus audiat, scilicet Gaufridus, etc. « ne tyrannus, ut dicunt, appellatione Apostolica, non tyrannis, sed indigentibus debita, abutatur, permittat prudentia vestra ». De Arnulpho rursus infra. Novus princeps de quo Arnulphus loquitur, alius non est quam Gaufridus præfatus, de quo Matthæus Paris. in Hist. ad hunc annum : Gaufridus comes Andegavensis a civibus Rothomagensibus solemniter susceptus est, et exinde dux Normanniæ appellatus est ». Item ac Matthæus Paris. habet Radulphus de Diceto in Abbreviat. Chron. pag. 508. Arnulphus itaque non multo ante Cælestini II electionem pacem cum Gaufrido inierat, a quo antea vexatus fuerat, ut ipsemet in Epistola ad Lucium III papam data, et tom. II Spicilegii pag. 482 recitata, testatur his verbis : « XVII menses in initio mee promotionis assumpsit, quia bona omnia episcopalia redimere de manu comitis Andegavensis angebar, quæ ipse mihi per duos annos et tres menses abstulerat ».

6. *Pax inter Cælestinum II et Ludovicum VII Gallie regem constituta.* — Chronographus Man-

riniaensis narrata morte Innocentii II, ait : « Cujus honori subrogatus est Cælestinus, qui alio nomine magister Guido de Castellis nominatus est. Hic vero prælacione illa dignissimus erat, quoniam ei tria, quæ inter homines pæne habentur præcipua, simul confluerant, eccl. brevemente magistrum reddiderant : nobilitas scilicet generis, mentis industria in omni statu æqualis, litterarum quoque, quarum doctrinæ intentissimus fuit, scientia multiformis. Ad hunc rex noster (Ludovicus VII Galliarum rex) legatos pro pace incutenda misit, quam ita dulcissima impetratione obtinuerunt, ut in conspectu illorum, multorumque nobilium, quorum frequentia Roma fremere solet, benigne adsurgeret, manique elevata signum benedictionis contra regionem hanc faciens, ipsam a sententia interdictionis absolveret ». Quare Pseudo-Robertus de Monte in Chron. accurate hoc anno scribit : « Pax reformatur inter papam et regem Ludovicum »; recteque etiam Radulphus de Diceto in Abbreviat. Chron. pag. 509, ait *per triennium* interdictum durasse.

7. *Pax alia inter eundem Ludovicum et Theobaldum Campanie comitem.* — Verum pax inter Ludovicum regem et Theobaldum comitem Campanie, quem rex ita male habuerat, anno tantum sequenti constituta. Pseudo-Robertus enim de Monte ad eum Christi annum scribit : « Mediante abbate Claravallis (sc. divo Bernardo) simulas, quæ inter regem Ludovicum et comitem Theobaldum incanduerant, sopiuit ». Porro pax hæc adeo firma fuit, ut Ludovicus rex, post divortium cum Eleonora, et post Constantiam secundam uxorem vita tuncam, *Adelam* Theobaldi filiam matrimonio sibi junxerit, ex qua *Philippus* cognomento *Augustus*, qui patri in regnum successit, natus est. De dissensione inter Ludovicum regem et Theobaldum vide dicta anno MCXII, num. 44, et anno MCXIII, num. 1 et seq.

8. *Paulum Willelmo archiepiscopo Eboracensi denegatur.* — Sanctus *Bernardus*, ut videre est apud Baronium num. 13 scriptis hoc anno Epistolam CCXXXV, alias CCXXXIV, ad *Cælestinum II*, et Epistolam CCXXXVI, alias CCXXXV, ad *totam euriæ Romanam* adversus Willelmum Eboracensem archiepiscopum electum, quem *intrusum* appellat. Jam anno MCXL, de utraque Epistola verba dicimusque, *Willelmi* causam usque ad Pontificatum *Eugenii III* indecisam mansisse, interimque *Willelmum* Ecclesie Eboracensi præfuisse; ac præterea Baronium, quæ hic breviter adversus Willelmum scribit, postea retractasse.

9. *Obitus Joannis Comneni imperatoris.* — Ad num. 15. De anno emortuali *Joannis Comneni* Græcorum imperatoris scriptores inter se non conveniunt. Tyrus enim lib. 13, cap. 23, mortuum scribit an. MCXXXVII, mense Aprili, imperii XXVII, et Pseudo-Robertus de Monte in Chron. anno MCXLI. Verum cum plerique e Græcis, uti Nicetas in Joanne Comneno cap. 44, et Joël in Synopsi scri-

bant regnasse *Joannem* annos XXIV, menses vii, consequens est Ottonem Frisingensem libro 7, cap. 28, et Albericum in Chron. accurate ejus obitum cum præsentis anno copulasse; præsertim cum Codinus, sive quisquis auctor est Chronicæ eidem subjunxit, prodit eum denatum *anno mundi* scilicet Constantinopolitano, 6651, qui kalend. Septemb. superioris Christi anni inchoatur, et Joannes Comnenus mense Aprili mortuus sit, cum imperasset, inquit Codinus, *annos XXIV, menses vi, dies XXIII*. Sic enim legendum, ut ait Ducangius in Familis Aug. Byzantinis, characterismus annorum Manuelis ab eodem Codino observatus demonstrat; cum perperam dies XVII tantum pro XXIII ibidem exarati legantur. Uxorem duxerat, superstite adhuc parente, *Irenem* Hungariæ regis filiam, Ladislai nempe, teste Zonara pag. 240.

10. *Manuel filius ejus ei succedit.* — Cinnamus in fine libri I hæc de morte ejus habet : « Moritur in Cilicia imperator, interprimusque adipiscitur Manuel, qui erat ætatis posterior, sed patri gravior ». Subdit Cinnamus : « Manuel, qui singulari præceteris in parentem amore flagrabat, nature leges reveritus, demissis oculis, pronoque in pectus capite, profusis lacrymis pavimentum rigavit (quando nempe pater ejus accersitis magnalibus cum sibi successorem designavit) Chlamydem tamen induens, sumptuose diademate, ab universo exercitu imperator proclamatur. Joannes vero paucis post diebus moritur, cum totos viginti quinque annos, mensesque septem Romanis imperasset, octavo die mensis, quem Xanthicum Græci, Romani Aprilem vocant ». Sed loco *annos XXV*, legendum *annos XXIV*, ut ex dictis imperii ejus initio sequitur. Obiter observabis, quod jam non semel monuimus, *Tyrimum* de rebus ante annum MCXIV in Oriente gestis sæpe male edoctum fuisse; cum Joannis Comneni Aug. mortem sexennio prævertat.

11. *Michael Oxi'es fit patriarcha Constantinopolitanus.* — Ad num. 16. Cum *Leo Styppita* annos octo et menses octo Ecclesiam Constantinopolitanam admodum stravit, ut habet Catalogus episcoporum Pyzantinorum lib. 4 Juris Græco-Romani relatu, annoque MCXXXIV ad eam sedem promotus fuerit, obitus ejus optime a Baronio, et antea ab Ouphrio in Chron. Eccles., hoc anno consignatus fuit. « Cum vacaret patriarchalis sedes Constantinopoli », inquit Cinnamus in Historia sua lib. 2, pag. 18, « Michael illi imponit, (nempe Manuel imp.) monasterio in insula quam Oxiam ex situ vocant antea prefectum, virum liberalibus disciplinis humanioribusque litteris leviter quidem imbutum, ac morum elegantiam rerumque divinaram scientia nemine inferiorem, unumque adeo ex iis, quorum ea ætate virtus erat maxime conspicua. Hujus vicissim manibus cum in Ecclesia imperatorio diademate fuisset insignitus, deposito in sacra mensa auri centenario, inde excessit, omnibus mox ore liberalitatem illius et magnificentiam

prædicantibus. Clero etiam annuam ex palatio duorum centenariorum pensionem assignavit. Id numismatis vulgo Secundum nuncupant. Ejusmodi fuere Manuelis imperii exordia ». Quibus ex verbis Manuelem hoc anno imperium iussisse etiam intelligimus. Porro *Ozia* monasterium erat in insula et monte ejusdem nominis, Chalcedoni proximum, qui mons etiam Auxentii appellationem sumpsit.

12. *Concilium cogit adversus quosdam Bogomilos* — Cinnamus libro 2, num. 10, loquens de rebus imperante Manuele gestis ait: « Sub idem tempus Cosmas (patriarcha Constantinop.) qui ea tempestate res Ecclesiasticas moderabatur, vir vite integritate et gravitate sermonis illustris, a sede hanc ob causam depulsus est. Monachus quidam, Niphon nomine, qui liberales disciplinas, humanasque scientias ne summis quidem labris degustaverat, etsi sacris a pueritia litteris imbutus, cum, Michael viro pio viultuque insigni Ecclesiasticam dignitatem regente, haud sana circa Christianam religionem sentire visus esset, ideoque judicio Sydonali fuisset condemnatus, barba ad talos usque protensa detersa, carceri mancipatur ». Refert hanc Synodum Allatus lib. 2 de Consens. Eccles. Orient. et Occident. cap. 12, ex qua discimus, cum rursus Bogomilorum hæresis repullulascere in Niphone monacho deprehensa esset, Synodo celebrata, *Niphonem* ipsum, necnon pseudo-episcopos *Clementem* et *Leontium* condemnatos esse a Michael Oxita, et quod majus est, *Cosmam Atticum*, patria Eginetam, post Michael patriarcham Constantinopolitanum, quod eundem Niphonem protegeret. Illi *Bogomili* deprehensi sunt, *mensis Augusti xx, feria vi, Indict. vi*. Sententia vero lata *mensis Octobris 1, feria sexta, Indictione vii*.

13. *Institutio novi Ordinis militaris facta a Raimundo IV Barcinonensi comite*. — Hoc anno V kal. Decemb. congregatus est insignis et celebris conventus apud *Gerundam*, in quo a *Raimundo*, hujus nominis IV, comite Barcinonensi, et dominatore regni Aragonensis constituta est nova militia ad defendendam Occidentalem Ecclesiam, quæ erat in Hispaniis, ita tamen ut ea semper esset in subjectione et obedientia militie Templi Hierosolymitani, ad cujus formam ista constitueretur. Eam ob rem *Raimundus* Roberto magistro militiæ Templi, et successoribus ejus quædam castra tradidit, enumerata in litteris foundationis recitatis a Baluzio in Appendice ad Marcam Hispanicam num. 402. Litteris subscriptus est inter alios Gregorius electus Tarraconensis archiepi-

scopus, et Raimundus in iis dicitur tantum *gratia Dei regni dominator Aragonensis*; ex quibus patet, *Raimundum* ex-regem archiepiscopatu Tarraconensi renuntiassse, et Raimundum regis titulum sibi nunquam sumpsisse, cum in nullis aliis Diplomatibus illum usurparit, licet Petronilla ubique Aragoniæ regina dicta reperitur.

14. *Raimundus IV regis Aragoniæ nomen nunquam assumere voluit*. — Vere itaque Guillelmus Neubrigensis lib. 2, cap. 10, post narratam Raimiri monachi abdicacionem a dignitate regia subdit: « Quibus actis suasum inveni, ut regni insignia, id est, coronam et purpuram solemniter sumeret (nempe Raimundus IV) cum regnum haberet. Negavit se ille hoc facturum, ita allegans: Cum nullus progenitorum meorum super comitem fuerit, natura sum comes, qua contentus, sicut non sum melior, ita nec excellentior esse volo quam patres mei. Ut ergo in me fortuna naturam non superet, nomen et insignia regis omitto. Porro ut in me etiam serviat fortuna naturæ, retento comitis nomine, regni amplitudinem et potestatem non respuo. Huc accedit, quod regia dignitate assumpta non multis regibus, in divitiis et gloria cederem. At cum mihi regni sint opes, cum potestate regia: Barcinonensi comiti nullus in mundo comes potest æquari. Proinde malo esse comitem primum, quam regum nec septimus. Sic itaque vir mirabilis, nobili quodam regni honoris contemptu, vel allegabat, vel vocabatur, cum ab amicis excellentiam induere regiam moneretur. Nec unquam vel rex vel dux, sed comes tantum Barcinonensis appellari voluit, licet ducatum provincie, id est, illius regionis, quæ sic dicitur, et a Rhodano usque ad Italiæ fines extenditur, cum regno Aragonum possideret. Porro ejus filius post decessum patris, juxta materni prærogativam generis a Romano Pontifice in regem solemniter consecratus ».

15. *Alcoran. cura Petri Venerabilis in linguam Latinam versum*. — « Anno Domini MCXLIII, per industriam abbatum Petri Cluniacensis, Iher qui dicitur Alchoranus cum tota secta impij et pseudo-prophete Mahumet de Arabico in Latinum translatus est, etc. et hic erat annus alligere (id est, Hegiræ) DXXXVII », inquit auctor Magni Chronici Belgici pag. 163. (1) Fusc de hac versione loquitur Petrus Venerabilis in Epistola ad sanctum Bernardum data, quæ libri 4 decimaltertia est: « Misi, inquit, et novam translationem nostram contra pessimam nequam Mahumet hæresim disputantem, quæ dum nuper in Hispaniis morarer, meo studio de lingua Arabica versa est in Latinam, etc. Fuit autem in transferendo hæc mea

(1) Annum, quo versio hæc Alcorani, procurante Petro Venerabili, cepta fuit, certior em indicat idem Petrus Venerabilis in suo adversus sectam Saracenorum opere, quod libris quatuor complexus fuit, ex quo duo priores libri nuper in amplissima Veterum monumentorum collectione tom. ix, col. 1120, prodierunt. Assent ibi Petrus procuratum a se fuisse hæc versionem anno quo ipse Hispanias adiit et colloquium cum Adelphonso victorioso Hispaniarum imperatore habuit, qui annus, addit, ab Incarnatione Domini fuit MCXLI. Usum autem se in ea re perhibet opera Roberti Keceueusis non *Retenensis*, Armanui Dalmata, Petri Toletani, et Saraceni ejusdem nomine *Mohamed*. Ut annus iste cum anno ab auctore magni Chronici indicato componatur, reputandum est anno MCXLI cœpisse opus, atque anno demum MCXLIII absolutum fuisse.

intentio, ut morem illum Patrum sequeretur quo nullam unquam suorum temporum vellevissimam, ut sic dicam, hæresim silentio præterirent, quin ei totis fidei viribus resisterent, et scriptis ac disputationibus esse detestandam ac damnabilem demonstrarent. Hoc ego de quo hoc præcipuo errore errorum, de hac fece universarum hæresum, in quam omnium diabolicarum sectarum, quæ ab ipso Salvatoris adventu ortæ sunt, reliquæ confluerunt, facere volui : ut sicut lethali ejus peste dimidius pæne orbis infectus agnoscitur, ita quam sit execrandus et conculcandus, detecta ejus stultitia et turpitudine, a nescientibus agnoscalur. Agnoscelis ipse legendo, et sicut arbitror, ut dignum est, deflebitis : per tam nefarias et abje-

ctissimas sordes tantam humani generis partem deceptam, et a conditore suo per spurcissimi hominis sectam, etiam post Redemptoris gratiam, tam leviter aversam, etc.». Petrus Cluniacensis usus est *Roberto Retenensi*, natione Anglo, Pampelonæ archidiacono, qui et Alcoranum in Epitomen redegit, quique in Asia inter Saracenos diu versatus fuerat, ut narrat Nicolaus Cusanus in *Cribratione Alchorani* lib. 1. Roberti versio cum opusculis aliorum *Alchoranum* refutantibus edita fuit sæculo elapso Norimbergæ et Basileæ, ut notavit Miræus in *Auct. de Script. Eccles.* Expectamus in dies novam et accuratissimam versionem ejusdem *Alchorani*, quæ ab aliquot annis sub prælo sudare dicitur.

LUCII II ANNUS 1. — CHRISTI 1144.

1. *Cælestino mortuo succedit Lucius II papa.*

— Millesimus centesimus quadragessimus quartus, Indictione septima, sequitur annus, quo Cælestinus papa, ubi sedisset mensibus quinque et diebus decem et tribus, obiit octavo idus Martii, Ita Vaticanus Codex de Vitis Pontificum, ubi et ista notata habentur : « Ille fecit ordinationem per mensem Decembrem, in qua creavit diaconos septem, presbyteros per diversa loca, et episcopos per diversa loca.... Defunctus est apud Palladium octavo idus Martii, et in Ecclesia Lateranensi tumulatus ».

Cumque vacasset Sedes die una, successit est in locum ipsius Gerardus camerarius presbyter cardinalis tituli Sanctæ-Crucis in Hierusalem, ex Ordine canonicorum regularium, cujus primordia hæc describuntur in dicto Codice Vaticano : « Ille fuit ex provincia Emiliæ, patria Bononiensis, ex patre Viseo. Ille assumptus est a domino papa Honorio in titulo Sanctæ-Crucis, et creatus Romane Ecclesiæ bibliothecarius, suamque Ecclesiam sicut bonus pastor, tam in ædificiis, quam in possessionibus multum ac plurimum augmentavit, et divitem de pauperrima fecit. Fabrica autem ipsius Ecclesiæ a summo usque deorsum in melius reformatam, et claustrum cum omnibus officinis de novo ædificavit, et conventum ibidem canonicorum regularium, Deo auctore, constituit. Hunc autem præclarum virum pro scientia et vite suæ meritis

papa Innocentius post mortem HaimERICI cancellarii arctius sibi adstrinxit, et cancellarium Apostolicæ Sedis constituit, alque in obitu suo tanquam præcipuo et digniori Ecclesiæ membro bona Ecclesiæ commisit. Ille tanquam vir prudens et fortis, habito cum Ecclesiæ fidelibus consilio, senatores, qui contra prohibitionem prædecessoris sui papæ Innocentii capitulum conscendere, senatum abjurare coegit : lamen ab hoc anno tempus restituti senatus eos numerare consuevisse, ipsorum publica monimenta docent inferius recitanda.

2. *Cluniacensibus datum monasterium S. Sabæ Romæ.* — Repentina ægritudine occupatus convaleuit, ut patet ex litteris ejusdem Lucii, quibus narrat sibi etiam laborandum adversus Rogerium Siciliæ regem, quem patiebatur ; infestum de his enim et aliis hæc scripsit ad Petrum Cluniacensem abbatem ¹ :

« Lucius episcopus, servus servorum Dei, dilecto filio Petro Cluniacensi abbati, salutem et Apostolicam benedictionem :

« Dilectionis tuæ litteras debita benignitate suscepimus, et petitiones tuas, quæ nobis et fratribus nostris rationabiles visæ sunt, libenter admisimus. De statu vero nostro te sollicitum cognovimus.

¹ Petr. Clun. l. v. Ep. XIX.

scentes, scire te volumus, quia omnipotens Dominus sua nos gratia visitavit, castigans castigavit, sed morti non tradidit. Per ipsius misericordiam convalescimus; et pristinam sanitatem in brevi nos recepturos speramus. At colloquium regis Siciliae condescendimus; et quia ad honorem Dei et Ecclesiae suae firmam pacem cum eo facere non potuimus, instanti tamen ipsius violentia nos cogente, irem cum eo composuimus. Placet autem nobis, ut sicut litteris tuis nobis significasti, tresdecim de fratribus tuis, quam citius poteris, ad nos transmittas: quia nos, Domino auxiliante, eos honeste recipere, et ad honorem Dei et Cluniacensis Ecclesiae collocare curabimus. Sanctam Congregationem vestram pro nobis orantem gratia divina custodiat, et ab omnibus peccatis absolvat. Datum Laterani decimo kalend. Octobris». Haec Lucius papa ad Petrum abbatem Cluniacensem. Quae autem stabilita fuerint inter regem Rogerium et Romanum Pontificem pacta, dicitur inferius ex litteris Romanorum ad Conradum. Porro Petrus ipse, ubi idem Lucius creatus est Pontifex, ad eum in Urbem venerat, eoque salutato rediens Cluniacum, de reditu suo et studio Cluniacensium erga eum, deque monachis illi mittendis ad eundem papam Epistolam scripserat quae extat¹; ad quam papa recitatas superius litteras reddidit.

3. Misit ex iussione ejusdem Pontificis tresdecim monachos Cluniacenses Petrus, ac per ipsos litteras dedit ad eundem Lucium papam², quibus eos mirum in modum commendavit rogans, ne dividerentur ab invicem. Hos ergo Lucius papa collocavit Romae in famoso monasterio S. Sabbae, ut apparet ex ejusdem Petri litteris ad Eugenium Lucii successorem Romanum Pontificem³, cum et ostendit eosdem monachos inde fuisse pulsos atque verberatos, ab Eugenio autem papa benigne susceptos. Sunt haec ejus ad Eugenium verba: «Unde hoc tam antiquo usu, quam jam experta erga nos in expulsiōne fratrum nostrorum de S. Sabba, pastoralī dilectione ac studio vestro, quos ejectos suscepistis, desolatos aluistis, verberatos confovistis, etc.» A quibusnam talia passi sint, præterquam ab Arnaldistis Romanis, non invenimus. Extant et aliae ejusdem Petri ad eundem Lucium papam commendatitiae litterae pro Aurelianiensi episcopo⁴.

Hujus Pontificis tempore Alphonsus Portugalliae dux pietatis ergo suum ducatum constituit Romanæ Ecclesiae vectigalem annuo censu unciarum auri quatuor. Testatur id Innocentius papa Tertius Epistola centesima libri primi Epistolarum ejus. Ita quidem, dum Romani rebellant, et adversantur, longe positi principes ab extremis terræ laudant et prædicant Romanam Ecclesiam; et cum resiliunt illi, isti accurrunt spontanea subjectione.

4. *Lucius papa adversus Romanos Arnaldistas Conradum interpellat, et ejusdem regis auxilium.* — Quantum autem a Romanis rebellantibus vexatus fuerit Lucius papa, litteræ ejus ad Conradum regem ostendunt, quas recitat Otto Frisingensis hujus temporis auctor¹, qui et ista præmittit: «Per idem tempus Lucius papa, vir pro mansuetudine et humilitate sui officio sacerdotali dignus, Cælestini, qui non plene sex mensibus sederal, successor, gravem a civibus persecutionem passus, humiles ad regem Conradum, tam suam oppressionem continentes, quam de incolumitate et prosperitate ejus Deo gratias agentes, ipsumque ad patrocinium Romanæ Ecclesiae invitantes, litteras mittit in hunc modum:

«Lucius episcopus, servus servorum Dei charissimo filio Conrado Romanorum regi illustri, salutem et Apostolicam benedictionem.

«Omne datum optimum, etc. Populus enim Romanus nullas insanie suæ metas ponere volens, senatoribus quos ante instituerant, patricium adijciunt, atque ad hanc dignitatem Jordanem Petri Leonis filium eligentes, omnes ei tanquam principi subjiciuntur». Hucusque ex Lucii Epistola Otto, quibus ista subjicit, dicens: «Deinde Pontificem suum adeunt, ac omnia regalia ejus tam in Urbem quam extra posita, ad ejus patricii sui repossunt; eumque more antiquorum sacerdotum de decimis tantum et oblationibus sustentari oportere dicentes, de die in diem animam justī affligere non timuerunt». Haec ipse. Subjicit autem de ejus obitu, sed de eo, suo loco anno sequenti.

Ab obitu namque Cælestini hoc anno (ut ait idem Otto in Fridericō) invalescere cepit istiusmodi rebellio Romanorum adversus Pontificem, eadenque heresis dicta politicorum, sive alio nomine (si ab ejus heresiarcha denominare magis placeat) Arnaldistarum, ab Arnaldo Brixiano, sub Innocentio (ut dictum est) vulgari cepla; damnata vero cum auctore ab eodem Pontifice in Concilio Lateranensi. Quomodo autem idem heresiarcha post obitum Lucii se ad Urbem contulerit, suo loco dicendum. Ea erant tempora infeliciissima, cum Romani ipsi, quorum fides in universo orbe jam a tempore Apostolorum annuntiata semper fuit, resiliētes modo a Pontifice dominandi cupidine, ex filiis Petri et discipulis Christi, fiunt soboles et alumni pestilentissimi Arnaldi de Brixia. Ut non mireris, si in Romanos hujus temporis sanctus Bernardus (ut suo loco dicitur) vehementer commotus, adversus eos ferreo stylo acuto valde pungarit. Verum cum tu Romanos audis, ne putes omnes eadem insanā percitos, et furore agitados: nam complures ex nobilium Romanorum familiis, iis relictis, pro Pontifice rem agebant, quamvis multa paterentur ab istis: hæc ut intelligas, sunt hic recitandæ litteræ eorundem delirantium hereticorum, qui ut se excusarent, et ad se favorem

¹ Petr. Clun. l. v. Ep. XVIII. — ² Ibid. Ep. XXIII. — ³ Ibid. Ep. XXIV. — ⁴ Ibid. Ep. XXI.

¹ Otto Fris. l. vii. c. 31.

allicerent Christianorum principum, potissimum vero regis Romanorum Conradi: hæc se ipsius nomine facere, pro ipso laborare, litteris significarunt, quas recitat Otto Frisingensis in Friderico: hic autem suo loco ad fidem pleniorum rerum gestarum reddende, quibus idem qui eas recitat Otto, ista præmittit¹:

3. « Illis diebus Arnoldus (Arnaldus), quidam religionis habitum habens, sed eum minime (ut ex doctrina ejus patuit, servans, ex Ecclesiastici honoris invidia Urbem Romam ingreditur, ac senatoriam dignitatem equestremque ordinem renovare ad instar antiquiorum volens, totam pene Urbem, ac præcipue populum adversus Pontificem suum concitavit. Unde et ad eorundem temeritatis, vel potius fatuitatis corroboracionem ab eis ad principem destinatum tale rescriptum invenitur:

« Excellentissimo atque præclaro Urbis et orbis totius domino Conrado, Dei gratia Romanorum regi semper Augusto, senatus populusque Romanus salutem, et Romani imperii felicem et inclytam gubernacionem.

« Regali excellentiæ per plurima jam scripta nostra facta et negotia diligenter exposuimus, et quomodo in vestra fidelitate permaneamus, ac pro vestra imperiali corona ex optanda et omnimodo augenda quotidie decertamus. Ad quæ, quia regalis industria (ut postulavimus) rescribere dignata non fuit, plane tanquam filii et fideles, de domino et patre satis miramur. Nos enim quicquid agimus, pro vestra fidelitate et honore facimus. Et quidem regnum et imperium Romanorum vestro a Deo regimini concessum exaltare atque amplificare cupientes, in eum statum, quo fuit tempore Constantini et Justiniani, qui totum orbem vigore senatus et populi Romani suis tenere manibus, reducere, senatu pro his omnibus Dei gratia restituto, et eis qui vestro imperio semper rebelles erant, quique tantum honorem Romano imperio surripuerant, magna ex parte concultis: quatenus ea quæ Cæsari et imperio deberentur, per omnia et in omnibus oblineatis, vehementer atque unanimiter satagimus atque studemus. Et ob hujus rei effectum, bonum principum ac fundamentum fecimus, nam pacem et justitiam omnibus eam volentibus observamus, fortitudines, id est, turres et domos potentum Urbis, qui vestro imperio una cum Siculo et papa resistere parabant, cepimus, et quasdam in vestra fidelitate tenemus, quasdam vero subvertentes solo coarctavimus. Sed pro his omnibus, quæ vestre dilectionis fidelitate homines, papa, Frangipanes, et filii Petri Leonis, homines et amici Siculi, excepto Jordane, nostro fidelitate in vestra vexillifero et adjutore: Ptolemaus quoque, et alii plures undique nos impugnant, ne libere (ut decet) imperialis regio capiti valeamus imponere coronam. At nos, quoniam amanti nullus labor gravis est, licet inde plurima

damna sustineamus: pro vestro amore et honore gralanter patimur. Scimus namque nos a vobis proinde præmium sicut a patre accepturos; vosque in eos sicut in imperii hostes, vindictam daturos.

6. « Cum tanta igitur nostra in vobis fidelitas sit, tantaque pro vobis sustineamus, precamur ne spes ista nobis deficiat, ne regia dignitas nos vestros fideles et filios despiciat. Neque si in regalibus auri bus aura sinistra de senatu et nobis flaverit, in eam intendat aut respiciat; quia qui de nobis vestre altitudini mala suggerunt, de vestra et nostra (quod absit) dissensione letari volunt; et utrosque, ut soliti sunt, calide opprimere moluntur. Sed circa hæc, ne fiant, regalis prudentia, ut decet, sollicita sit et provida. Reminiscaturque vestra solertia, quot et quanta mala papalis curia, et dicti quondam cives nostri imperatoribus qui fuerunt ante vos, fecerint, et nunc deteriora vobis cum Siculo facere tentaverunt. Sed nos Christi gratia in vestra fidelitate viriliter eis resistimus, ac plures ex illis ab Urbe sicut pessimos hostes imperii, ut sunt, pepulimus. Appropinquet itaque nobis imperialis celeriter vigor, quoniam quidquid vultis in Urbe, obtinere poteritis. Et ut breviter ac succincte loquamur, potenter in Urbe, quæ caput mundi est (ut optamus) habitare, tot Italiae ac regno Teutonico, omni clericorum remoto obstaculo, liberius et melius, quam omnes fere antecessores vestri, dominari valebitis. Sine mora ergo precamur, ut veniatis; et interim de statu vestro, quem semper desideramus salubrem et prosperum, de his regalibus litteris ac nuntiis nos keltificare dignemini. Sinus enim per omnia vestre voluntati semper obtemperare parati. Sciatis præterea, quia pontem Milvium extra Urbem parum longe, per tempora multa pro imperatorum contrario destructum, nos, ut exercitus vester per eum transire queat, ne Petri leones per Castellum S. Angeli vobis nocere possint, ut statuerant cum papa et Siculo, magno conamine restauramus, et in parvi temporis spatio, muro fortissimo et silicibus, juvante Deo, complebitur.

7. « Concordiam autem inter Siculum et papam hujusmodi esse accepimus. Papa concessit Siculo virgam et amulum, dalmaticam et mitram atque sandalia. Et ne ullum mittat in terram suam legatum, nisi quem Siculus petierit. Et Siculo dedit ei multam pecuniam pro detrimento vestro, et Romani imperii, quod Dei gratia vestrum existit. Hæc omnia sollicitè vestra animadvertat, optime rex, prudentia. » Salutationem autem sequenti pentastichio impertiunt:

Flex valeat, quicquid cupit obtineat, super hostes
Imperium tenet, Romæ sedet, regat orbem
Princeps terrarum, cœn fecit Justinianus.
Cæsar accipiat Cæsar, quæ sunt sua presul,
Ut Christus jussit, Petro solvite tributum.

¹ Otto Fris. de gest. Fris. l. i. c. 27, 28.

Nos de cætero legatos nostros precamur, ut heni-

gne recipiatis et quod vobis dixerint, credatis; quia scribere cuncta nequimus. Sunt enim nobiles viri, Guido senator, Jacobus filius Sixti procuratoris, et Nicolaus eorum socius». Hucusque Romanorum Arnaldistarum litteræ ad Conradum.

8. Quanti autem eas fecerit Conradus, idem Otto sic docet: « At Christianissimus princeps hujusmodi verbis sive nuntiis præbere aures abnuvit. Quinimo venientes ad se ex parte Romanæ Ecclesiæ viros magnos et claros, quorum unus Guido Pisanus ejusdem curiæ cardinalis et cancellarius erat, renovationemque antiquorum privilegiorum suorum postulantes, honorifice suscepit et honeste dimisit ». Itactenus de his Otto. Audisti, lector, ex adversariorum testimonio, non omnes Romanos, Arnaldistas fuisse hæreticos, imo nobiliores tum

temporis permansisse constantes gloria confessionis illustres. Licet enim a concubivis plurima paterentur, ab Ecclesia tamen nullatenus desciverunt: ut inter allos Frangipannum familia, quæ perstans in fide diluit eam quam contraxerat dedecoris notam tempore Gelasii Secundi: cui (ut vidimus) hostiliter est adversata; sic et filii magni illius Petri Leonis, uno (ut audisti) Jordane excepto, inter Arnaldistas proficiente. Quod autem in eadem Epistola nulla de ipso Petro Leonis parente mentio fiat, quem haud pridem subscripsisse novimus publicis monumentis, conjici satis potest cum his diebus ex hac vita migrasse, sepultumque fuisse in atrio Basilicæ Sancti-Pauli, ubi in tabella marmorea parieti imposita supra sepulchrum legitur ejusmodi Epitaphium:

PETRVS LEONIS
PRÆTERIT UT VENTUS PRINCEPS, SEU REX OPULENTUS,
ET NOS UT FUMUS, PULVIS, ET UMBRA SUMUS.
TOT, TANTISQUE BONIS POLLENS PETRUS ECCE LEONIS,
RESPICE QUAM MODICO NUNC TEGITUR TUMULA.
VIR FUIT IMMENSUS, QUEM PROLES, GLORIA, CENSUS
SUSTULIT IN VITA, NON SIT UT ALTER ITA.
LEGUM SERVATOR, PATRIÆ DECUS, URBIS AMATOR,
EXTRUXIT CELSIS TURRIBUS ASTRA POLI.
OMNIA PRÆCLARA MORS OBTENEBRAVIT AMARA,
NOMINIS ERGO DEI GRATIA PARCAT EI.
JUNIOR IN MUNDO FULGEBAT SOLE SECUNDO.
SEPARAT HUNC NOBIS CUM POLUS ATQUE LAPIS.

In ipso sepulchro:

TE PETRUS ET PAULUS CONSERVENT PETRE LEONIS,
DENT ANIMAM COELO, QUOS TAM DEVOTUS AMASTI.
ET QUIBUS EST IDEM TUMULUS, SIT GLORIA TECUM.

Sed oratio petat externa.

9. *Divina ultio in Ecclesiarum violatores.* — Hoc eodem anno, flagrante bello civili in Ecclesia Anglicana, divina ultio adversus profanatores Ecclesiarum multipliciter est demonstrata. Res tunc gestas sic narrat Rogerius in Annalibus: « Mense autem Augusti miraculum justitiæ sua dignum virtus divina monstravit. Duos namque, qui monachis evulsis, Ecclesias Dei converterant in castella, similiter peccantes simili poena multavit. Robertus namque Marmion, vir bellicosus, hoc in Ecclesia de Coventre perversus egerat. Porro Gaudredus (ut diximus) in Ecclesia Ramesiensi scelus idem patravat. Insurgens igitur Robertus Marmion in hostes, inter ingentes suorum cuneos coram ipso monasterio solus interfectus est, et excommunicatus, morte perenni depascitur. Similiter Gaudredus prædictus, consul novus, inter acies suorum confertas a quodam pedite vilissimo solus sagitta percussus est. Et ipse quidem vulnus ridens, post aliquot dies tamen ex ipso vulnere excommunicatus occubuit. Ecce Dei laudabilis et omnibus saeculis prædicanda ejusdem sceleris eadem vindicta. Dum autem Ecclesia illa pro castello

teneretur, ebullivit sanguis a parietibus Ecclesiæ et claustris adjacentis, indignationem divinam manifestans, sceleratorum exterminationem denuntians. Quod multi quidem viderant, et ego ipse quidem meis oculis insexpi. Quia igitur improbi dicebant Deum dormire, excitatus est Deus et in hoc signo, et in significato.

10. « Eodem quippe anno et Arnulphus filius Gaufredi consulis, qui post mortem patris Ecclesiæ in castellam retinebat, captus est, et per hoc exulatus. Et princeps militum suorum in hospitio suo ab equo corruens, effuso cerebro expiravit. Princeps autem peditum suorum, Reimerius nomine, cujus officium fuerat frangere Ecclesias vel incendere, dum mare cum uxore sua transiret (uti multi perhibuerunt) navis immobilis facta est. Quod monstrum navitis stupentibus, sorte data rei causam inquirentibus, res cecidit super Reimerium. Quod cum ille nimirum totis contradiceret viribus, secundo et tertio sors jacta, in eum devenit. Positus igitur in scapha est, et uxor ejus, et pecunia sceleratissime acquisita: et statim navis cursu velocissimo, ut prius fecerat, mare sulcat. Scapha vero cum nequissimis subita voragine cir-

cumducta in æternum absorpta est ». Hucusque Rogerius de Ecclesiarum violatoribus.

11. *S. Crucis ope exercitus Christianorum liberatur.* — Quod ad res pertinet Orientis hoc anno, ¹ qui secundus numeratur Balduini pueri regis, exercitus Christianorum sub spe potiundi Bostro metropoli Arabum, insidiis circumventus, in extremis periculis constitutus, virtute sacratissime Crucis eripitur, et duce cælesti nuntio incolumis ad propria restituitur. Rem gestam pluribus narrat Willelmus Tyri archiepiscopus, ex quibus hæc reddere satis ad institutum ² : « Videntes porro hostes quod sic non proficerent, ad alia se convertunt molimina. Erat sane regio tota vepribus et frutetis humilibus, cardonibus aridis, et sinapis silva, veteribus stipidus et frugibus jam maturis obsita : his omnibus ignem subiiciunt, vento nostris obvio fomitem et vires ministrante. Hic incendii vicinioris afflatu, fumique occurrentis nube densissima nostris ingeminatur molestia. Cum ecce ad venerabilem virum dominum Robertum Nazarenum archiepiscopum, qui Crucem Dominicam bajulabat, omnis populus eum clamore et ejulatu conversus, postulabat eum lacrymis, dicens : Ora pro nobis, pater, et per hoc vivificæ Crucis lignum, quod manibus gestas, in quo nostræ salutis auctorem credimus pependisse, crue nos ab his malis; nam diutius sustineri non possumus. Erat autem

populus in modum fabrorum ferrariorum officinas exercebant, vento agitante fuliginem, tam facie quam toto corporis habitu nigredine factus decolor, et tam æstatis quam incendiorum caumate duplicato, ad supremum afflictus siti, supra vires laborabat. Ad has itaque gementis populi voces vir Deo amabilis contritus corde, et animo valde compatiens, salutare lignum erigit contra incendia, quæ illi totis viribus procurabant, et invocato desuperius auxilio, statim affuit virtus divina, et in momento conversis in oppositum flatibus incendia tetra simul cum fumi caligine in hostes, qui nostrum præcedebant exercitum, se dirigunt : et quæ in nostram paraverant lesionem, in suam vident retorta perniciem. Stupent hostes novitate miraculi, et singularem reputant Christianorum fidem, quæ tam præsens a Domino Deo suo pro votis impetraret beneficium ». Et paulo inferius : « Cum in alia inevitabilia Christianorum exercitus incidisset discrimina, ut errarent omnes in invio et non in via, et angustiis locorum intercludendi, ab ingruentibus hostibus omnes cædendi essent, prævio ignoto duce, nempe cælesti nuntio, eodemque signifero, per alias vias est secunde deductus Hierosolymam usque. Qui et admirabili perfunctus ministerio, ab omnium mox evanuit oculis. Sicque sacratissima Crucis adminiculo, in expeditione omnium periculosissima cum rege omnis exercitus divina virtute est liberatus ».

¹ Will. Tyr. l. xvi. c. 8. — ² Ibid. c. 11, 12, 13.

Anno periodi Græco-Romanæ 6637. — Anno Ætæ Hispan. 1182. — Anno Hegiræ 539, mæchato die 4 Julii, Fer. 3. — Jesu Christi 1144.

— Lucii II papæ 1. — Conrad III reg. 7. Manuelli Comneni imp. 2.

1. *Obitus Cælestina II PP.* — Ad num. 4 et seq. *Cælestinus II* hoc anno, postquam « sedisset mensibus quinque, et diebus decem et tribus, obiit VIII idus Martii », inquit Baronius ex Vaticano Codice de Vitis Pontific. Sed cum certum sit, eum die vicissima sexta mensis Septemb. anni superioris Pontificem creatum, manifestum est, errorem irrepisse vel in dies, quibus supra menses quinque sedit, vel in diem ejus mortualem, uti numeranti patet. Quare Sigonius in Hist. de Regn. Ital. lib. 14, et Onuphrius in Chron. Eccles. quos verosimile est, Codicem illum Vaticanum legisse, loco *VIII idus Martii*, recte habent *VII idus Martii*; sic enim Cælestinus mortuus die nona mensis Martii Ecclesiam Romanam rexit menses quinque et dies tre-

decim, quod et Martinus Potoanus, Urspergensis in Chron., auctor magni Chronici Belgici pag. 168, et VII Catalogus noster tradunt, Cæcanus in Chron. et Catalogus noster VII, qui habent dies *quatuordecim*, diem sepulture seu diem x Martii in summam conferunt.

2. *Lucius II ei succedit.* — Post triduum cardinales convocati *Gerardum Caccianivicum*, civem Bononiensem, quem *Honorius II* ex canonico regulari cardinalem crearat, sublegere, coque consecrato *Lucianum Secundum* appellarunt, inquit Sigonius citatus, quod et Onuphrius etiam habet, asserens eum renuntiatum Pontificem *quarto idus Martii*, et consecratum proxima Dominica; sed cum dies xii mensis Martii hoc anno in Domi-

nicam inciderit, ejus electionem et consecrationem eadem die peractas existimandum. Mabillonius in *Itinere Italico* pag. 199, loquens de abbacia Sancti-Salvatoris in urbe Bononiensi sita, quæ caput est Congregationis canonicorum regularium S. Augustini, ait quatuor a Bononia passuum millibus extare ejusdem Congregationis abbatiam Beatæ Mariæ de Rheno, « ex qua, inquit, Lucius II ad Pontificatum assumptus fuit, antea *Gerardus* dictus: cujus mentio est in Necrologio loci, tum ad XI kal. Octob. quo die coronatus est anno MCXLIV, tum ad VIII kal. Septemb. qui dies ejus supremus fuit anno sequenti ». Verum jam sæpius monuimus hujusmodi annotationes Martyrologiis et Necrologiis non raro insertas esse; quod de ista negari non potest, ut tam ex mox dictis, quam ex infra dicendis perspicuum fit, cum enim nominis de uno aut altero die quoad diem mortualem Cælestini II dissidium sit inter auctores, coronatio *Lucii II* ejus successoris in mensem Septembrem differri non potuit.

3. *Pontifex magnis dotibus præditus.* — Chronographus Mauriniacensis pag. 387, de Cælestini II morte et *Lucii II* initio ait: « Mors nemini parcens tantum Pontificem VII infultionis suæ mense (utrimque scilicet incompleto et paucis diebus constante, quod passim variis exemplis indicavimus) sæculo præmatura abstractione eripuit; quo ergastulo carnis exto, substitutus est in papam *Lucius*, Girardus de Sancta-Cruce, qui et ipse strenuissimus erat, sed et morte citius præoccupatus est. Hic diversarum Ecclesiarum statui consulere volens, duos legatos a latere suo mittere curavit, Albericum Ostiensem in Franciam, Haimerum Tusculanensem in Angliam ». Haimerum, seu, ut rectius alii, Igmarius vel Ymarus, ex monacho Cluniacensi S. Martini a Campis prior Charitatis ad Ligerim, dein abbas Monasterii-Novi apud Pietavos, ac demum cardinalis ab Innocentio II creatus et Tusculanensis Ecclesiæ titulo decoratus, memoratur et laudatur in Chron. Cluniacensi, ubi sermo est de Pontio I abbate Cluniacensi, ac de eo inter alia dicitur, sub *Lucio* papa legatione functum esse in Anglia, et ad subvertendum judicium nullis potuisse pecuniis expugnari. De eo legendus Baronius in ipso fine Appendicis ad tomum XII, et quæ de Ymari morte anno MCXXXV dicimus; hunc enim sub *Lucio III* legationem illam obiisse credit didit cardinalis doctissimus.

4. *Ymarus card. legatus S. Sedis in Galliam mittitur.* — *Lucium II* sub hujus anni finem Ymarum e legatione Anglicana ad Gallicanam transtulisse, cruo ex tomo III Spicilegii Dachériani lib. 4 Historiæ Vezeliacensis pag. 473 et seqq. Scribit *Lucius* ad Pontium abbatem Vezeliacensem ejusque fratres, Paschalem II episcopis Galliæ mandasse, ut interfectores Artaldi abbatis sui in exilium detruderent, et impedirent ne hujusmodi homicidæ in monasterio Vezeliacensi habitarent. Epistola data est *Lateran. VI idus April.* Tum alias

litteras dedit ad S. Bernardum Clarevallensem abbatem, dicens se accepisse Guillelmum Nivernensem comitem contra Sedis Apostolicæ auctoritatem a Pontio abbate Vezeliacensi exigere, ut de qualibet querimonia cum hominibus suis in curia sua respondeat: « Ideoque, subdit, per Apostolica tibi scripta mandamus, quatenus eundem comitem ex nostra parte diligenter commoneas, ut etc. ab hujusmodi exactione desistat, aut in præsentia venerabilium fratrum nostrorum A. Ostiensis et I. Tuscul. episcoporum, Apostolicæ Sedis legatorum, juxta tenorem Sedis Apostolicæ privilegiorum, quod justitia dictaverit, ab eodem abbate recipiat, etc. datum Lateran. XIII kal. Decemb. » Eæ litteræ leguntur nunc tom. X Concil. in *Lucio II*, ex iisque evidenter deducitur, electionem aut coronationem *Lucii II* recte a nobis fuisse consignatas. Secundo, Ymarum mense Novembri hujus anni sanctæ Sedis legatum in Francia extitisse; et cum omnia in Anglia turbata essent, suspicor eum cito ex ea reversum. Tertio, Willelmum illum secundum ordine fuisse; cum *Willelmus III* ejus filius principatum Nivernensem nonnisi post triennium ex infra dicendis inierit.

5. *Lucius II an. Incarnat. a die xxv Martii exorsus est.* — Ad num. 3 tom. X Concil. referuntur aliquæ Epistolæ *Lucii II* hoc anno datæ, quarum in Annalibus mentio non est. Hic tantum aliquid dicendum de Epistola ordine VI ad Petrum Venerabilem Cluniacensem abbatem, cujus Baronius meminit, subscriptio enim observatu digna; cum ex ea, qua Incarnationis Æra *Lucius II* usus sit, nobis innoscat: « Datum Romæ per manum Baronis S. R. E. subdiaconi XVI kal. Februarii, Indict. viii, Incarnat. Dominicæ anno MCXLIV, Pontificatus vero domini *Lucii II* pape anno primo ». Eæ Epistola non hoc anno, quo eam Baronius memoravit, sed sequenti scripta, ut Indictio VIII kalendis tantum Septemb. hujus anni inchoata demonstrat. Quare *Lucius II* annum Incarnationis a die xxv mensis Martii inchoavit, quod et postea in usu fuit. In eâ Epistola *Lucius II* scribit, in monasterio S. Sabæ a Gregorio M. Romæ fundato religionem lapsam esse, mores corruptos et possessiones distractas, seque illud eidem et successoribus in perpetuum committere. Quoad litteras *Alphonsi* Portugalliæ principis, quibus Romanæ Ecclesiæ ducatum suum vespigalem reddit, anno MCXL eas a Baluzio v. cl. e tenebris erutas fuisse diximus; Baronius enim tempore non extabant.

6. *Lucius II a Romanis rebellibus vexatur.* — A num. 4 ad 9. Cum *Lucius II* a Romanis persecutionem pateretur, *Conradum* Romanorum regem adversus eos interpellavit. Scripsere et ad *Conradum* regem *Arnaldistæ*, seu rebelles adversus Pontificem Romanum, eumque Roman vocarunt. Sed *Conradus* eorum legationem despexit, quæ a Baronio ex *Ottone Frisingensi* lib. 7, cap. 31, narratur. Addunt *Arnaldistæ* se accepisse concordiam factam inter *Siculum* et papam. Ad horum majore

rem intelligentiam, et majorem Annalium Ecclesiast. illustrationem hæc addam. Anonymus Casinensis in Chron. ad an. MCXLII. qui nobis est MCXLIII. de Rogerio scribit : « Rex iterum ad hunc locum venit (nempe ad Montem-Casinum). Terra Marso- rum (est circa Celanum et lacum Ficinum) se ei tradidit ». Joannes vero Ceccanus in Chron. : « Rex Siciliae venit Arcini et inisit in suo jure... filii regis ceperunt totam terram Marsorum ». Laudatus anonymus Casinensis queritur de Rogerio rege, atque : « Thesaurum hujus loci omnem cum tabulis ante altare tollit, præter crucem majorem cum ciborio et tribus tabulis altaris ». Hæc anno superiori gesta (1).

7. *Gesta a Rogerio rege in regn. Neapol.* — Hoc etiam anno Joannes Ceccanus habet : « Venit rex Siciliae in mense Junio Ceperanum et dux filius ejus intravit in terram S. Petri, et cepit eam » ; et in anonymo Casinensi legitur de Rogerio rege : « Iterum ad hunc locum veniens cum papa loquitur, et discordans papa recedit. Rex partem Campanie cum Terracina cepit ; Berculas obsedit, deinde quodam pacto facto, quæ ceperat, reddidit ; Siciliam abiit. Obiit Alfusus princeps, et frater ejus Guillelmus fit princeps ». Ubi principis nomine intelligit Capuæ principem, cum Guillelmus jam princeps Tarenti esset, et eam dignitatem a Rogerio rege patre obtinisset, uti assertit Hugo Falcandus in sua Historia. Peregrinus in Notis ad anonymum Casinensem, ait, in Ms. Montis-Casini hæc verba legi : « Rex iterum ad hunc locum veniens, Ceperanum abiit, ubi cum papa loquitur, et discordantes papa recedit, etc. » et hæc notat : « Celestini Pontificis obitus in annum incidit MCXLV, et mensem Martium. Quo quidem anno, sicut hoc etiam loco anonymus trahit, Anfusum Capuæ principem diem obiisse, eique a patre ac rege Rogerio suffectum, tum in eodem principatu, tum in ducatu Neapolis alterum filium, nomine Guillelmum, ex antiquis manifestum est Chartulis ». Ita ille qui debuisset aliquam ex Chartis illis citare, cum Falco Beneventanus in Chronico. affirmet Neapolitanos sese *Rogério regi* et Rogerio duci, non vero principi Alphonso subdidisse. Si Chartæ ille clare

in favorem *Guillelmi* se exprimant, *Rogério* ducem jus suum in Neapolim Guillelmo fratri cessisse oportet, et forsân ut ab eo Tarentum acciperet.

8. *Jordanus a rebellibus creatus patricius Roman.* — Subjungit Peregrinus : « Hugo itaque Falcandus certe est memoria lapsus. *Guillelmum* hunc ex Tarenti principem in regni collegam et successorem a patre dicens postea adscitum, quem rectius Romualdus Salernitanus, non tamen sine novo errore, ex Capuæ principe in regem evectum notat ; dudum enim ante *Anfusi* mortem in fata etiam concesserat *Tancredus* Tarentinus, qui Barrensis quoque dictus est princeps ; duxque Apulie *Rogérius* in anno MCXLVI post *Anfusum* e vivis et ipse abierat, solusque patri remanserat præsens *Guillelmus* ». Ita Peregrinus. Verum Falcandus de solo Tarenti principatu loquitur, quia hic primus *Guillelmi* filulus fuit, et Romualdus de solo principatu Capuano, quia is confirmatus, et Salerno, ejus Romualdus archiepiscopus erat, vicinus. Præter hæc anonymus Casinensis hoc anno habet : « *Jordanus* filius Petri Leonis cum senatoribus et parte totius populi minoris contra papam rebellat ». Quibus lucem accipiunt quæ Baronius num. 4 ex Ottone Frisingensi lib. 7, cap. 31, narrat, nempe ab hoc anno Romanos tempus restituti senatus numerare consuevisse, ipsorum publica monumenta docere. Sigonius vero lib. 11 Hist. de Regn. Ital. refert Romanos instituisse hoc anno *Patricium*, et eam dignitatem detulisse ad *Jordanum* Petri Leonis filium, eique vectigalia omnia Pontifici crepta attribuisse.

9. *Miser status Angl.* — Ad num. 9 et seq. *Guillelmus* Neoburgensis, qui hoc tempore vivebat, lib. 1, cap. 22, miserum Angliæ statum hoc modo representat : « In diebus illis non erat rex in Israel, sed unusquisque quod rectum sibi videbatur faciebat. At in Anglia sub rege Stephano, pejus fiebat ; nam quia hunc impotens erat rex, et per regis impotentiam languida lex, quibusdam quod rectum sibi videbatur, agentibus ; multi, quod insita ratione malum esse sciebant, subdito legis et regis metu, proclivius faciebant. Et primo

(1) Ex Codice Epistolarum Wibaldi abbat. Stabulensis et Gorbien. Conrad. II regi per familiaris, vulgato in Collectione Marteni tom. II plura erunt, quæ historiam hæc de Romanorum in Pontifices perditione, eorumque cum eodem Conrado occultis molitionibus mire illustrat et emendat. Eatur ex eorumdem Epistolarum contextu intelligimus, Conradum fortius invisse cum Gregorio imperatore Emma-nuele ; atque ex ejus Gregoriorum consueidine ab ardenti sua in Romanum Ecclesiam charitate deferbuisse. Vide Epistolam CCXXV ad G. cardinalem. Accedunt hæc omnia quo tempore Conradus ab expeditione Jerusalemiana redux Constantinopoli aliquandiu subslit, nempe anno MCXLVII. Scribit enim in eadem Epistola Wibaldus « hominem fidei et modestie Gregorium aliquandulum corruptum longa cohabitatio-ne, et assidua colocatione etc. » tandem ad Ecclesiam obsequium sese perduxisse. Circa id tempus Romani perducunt Pontificem et Urbem exuperant, quod in annum MCXL Pagus rejcit. Ea de causa litteras ad imperatorem dederunt quas ex Frisingensi Baronius recitat, et Pagus hic, anno MCXLIV, 6, commemorat, sed non suo loco ; cum in eadem Epistola Wibaldus illarum meminerit, easque datas fuisse mense Januario affirmat. Ex hoc autem colligitur Evensius anno MC, ipso Januarii mense depulsum ex Urbe exulasse. Præter Epistolam Romanis senatus, aliæ duæ ejusdem argumenti ab amplissimo Romani curie viris ad imperatorem datæ sunt, quarum omnium numerus est argumentum, ut quancumque Romanæ se conferens jus suum adversus papam et Siculum locaret. Nec segnor fuit Pontifex cum suis ; ut enim causam suam læterent, litteras ad familiares imperatoris, maxime ad Wibaldum dederunt. Extat num. 114 Epistola Gui domini darent cardinalis et S. R. E. cancellarii ad eundem, quæ Pontificis causam commendans memorat Pontificem illum, post imperatoris in expeditionem Jerusalemitanam discessum, omni sollicitudine curasse ut Henricus huius ejus quietam regni administrationem haberet, immensusque illi bellum averteret. Wibaldus tum religio-ne sua, cum his amicis litteris incitatus id ellect ut motus omnes sopirentur, et Conradus in suam obsequii sui Henricum ablegatum suum ad papam mitteret, cum Epistola observante p'ena, quæ hic num. 126 recitatur. Ex incusque dictis constat ea quæ Baronius et Pagnus cum anno MCXLVI, quo sacris præerat Lucius II, digne, in annum MC, Pontificatum acente Eugenio III referenda esse ; neque his repugnat Otto Frisingensis loco a Pagus notato ; ille enim motus hosce Romanorum, eorumque ad imperatorem Epistolam referens nihil addit, quod Lucium potiusquam Eugenium desi. art.

quidem videbatur regnum Angliæ scissum esse in duo : quibusdam regi, quibusdam imperatrici fauentibus. Non quod vel rex vel imperatrix suæ parti potenter imperaret, sed quod suorum bellicis quisque studiis pro tempore mitteretur. Neuter enim in suis imperiose agere, et disciplinæ vigorem exercere poterat ; sed uterque suos, ne a se deficerent, nihil negando mulcebat. Sane inter partes diu multumque certatum est, alternante fortuna ».

10. *De eodem.* — « Processu vero temporis inter eos jam sæpius fortunæ infidelitatem expertos, remissiores motus esse cœperunt. Quod tum Angliæ non cessit in bonum illis quippe diutinæ concertationis pertas et mollius agentibus, provinciales discordantium procerum motus effluere. Castella quippe per singulas provincias, studio partium, crebra surrexerant : erantque in Anglia tot reges, vel potius tyranni, quot domini castellorum, habentes singuli percussuram proprii numismatis, et potestatem subditis, regio more, dicendi juris. Cumque ita singuli excellere quærent, ut quidam superiorem, quidam vel parem sustinere non possent ; feralibus inter se odiis discipantes, rapinis atque incendiis regiones clarissimas corruperunt. Et in fertilissima olim patria, fere omne robur panis assumpsere ».

11. *S. Bernardus scribit adversus Willelmum archiepiscopum Eboracensem.* — *Willelmus* Eboracensis archiep. illam quidem Ecclesiam regebat. Sed propter ea quæ perperam de eo jactabantur mala, quæ divus Bernardus vera esse putabat, pallium hacenus obtinere non potuerat. Verum hoc anno, ut scribit Joannes prior Hagustaldensis in Hist. ad annum MCLVI, (duplici tamen errore Chronologico), « Henricus (vel rectius Ymarus) episcopus cardinalis directus ab Apostolico Lucio legatus venit in Angliam, habens pallium Willelmo archiepiscopo destinatum. Moram autem fecit per negligentiam idem Willelmus occurrere ei, circa alia minus necessaria occupatus, ut consuetudinem habuit ». Hoc autem ad præsentem annum pertinere ostendunt obitus Lucii, qui statim illi narratur, et Ymari legatio quæ hoc anno cœpta absolute, *Willelmus* abbas Rievallensis, vir magnæ sanctitatis, alique, sedente Innocentio II, Romam venerant, ut impedirent ne Willelmus a Pontifice confirmaretur, et pallium obtineret ; quod cum hoc anno consecutus fuisset, divus Bernardus ad *Willelmum abbatem de Rievall* scripsit Epistolam CCCIX, alias CCCLXXX, qua eum denno hortatur ad patientiam et æquanimitatem : « Laboravimus », inquit Bernardus, « quantum potuimus, adversus pestem communem (id est, Willelmum electum Eboracensem), et si quo minus impetravimus quod optavimus, manet tamen nobis fructus laboris nostri apud Deum, apud quem nullum bonum irremuneratum est ». Post aliqua interposita subdit : « Nos tamen, quod potuimus, suggestimus domino Tusculano episcopo (nempe Ymario in Anglia legato), cui injunctum est, ut legatione fungatur in

partibus illis : et omnino promisit nobis, se nisi aliquid melius fecerit nobis, id saltem omnimodis observaturum, ne tradat ei pallium quod portat, si non juraverit decanus ille (nempe Eboracensis, de quo supra agimus) nunc vero episcopus (nempe Dunelmensis), in cujus juramento causa pendebat : sed causam referat ad dominum papam ». Mabillonius in illius Epistolæ margine notat an. MCLIII, sed eo anno nec *Lucius II* adhuc Pontifex Romanus erat, nec *Ymarus* Angliæ legatus. Willelmum ab Eugenio III dignitate motum fuisse, et ab Anastasio IV, cognita ejus innocentia, in eandem restitutum infra visuri sumus.

12. *Translatio reliquiarum S. Dionysii et sociorum.* — In Chronico brevi S. Dionysii tom. II Spicilegii Dacheriani habetur : « MCLIII, (legendum MCLIV, ut mox certo constabit) dedicatio capitalis partis Ecclesiæ (S. Dionysii), et translatio B. Dionysii et sociorum ejus in eandem partem capitalem, aliorumque sanctorum quorum ibidem corpora continentur, XIII anno administrationis domini Sugerii abbatis ». Et postea anni MCLIV et MCLV vacui sunt. Cum vero idem chronographus discrete affirmet, Sugerium anno MCLIII abbatem ordinatum esse, annus præsens XIII est ordinationis ejus, sed librarii, ut non raro fit, hanc dedicationem in annum præcedentem retraxerunt. Ipsemet Sugerius libellum edidit de consecratione Ecclesiæ a se edificatæ, atque se ad eam translationem faciendam elegisse secundam Junii Dominicam, *videlicet III idus, quod est Barnabæ Apostoli*. Quare eam ad currentem annum pertinere certo constat. Ea sollemnissima fuit ; interfuere enim Ludovicus VII Franciæ rex, Eleonora conjux ejus, Adalais mater, regni optimates, et varii archiepiscopi et episcopi, inter quos Guido Senonum archiep. *Gaufridus Carnoti episc. et Guido Catalaunsi episc.*

13. *Aliqui librorum errores correcti.* — Extat libellus Sugerii de Consecratione Ecclesiæ suæ tom. IV Duchesnii, qui cum eum mutilum reperisset, Mabillonius tom. I Analect. pag. 328, supplevit quod deerat ex Codice Victorino, et in eo supplemento nomina trium præsulum memoratorum iterantur, sed in eo Catalaunensis episcopus Werbo et Senonensis archiep. Werbo nominantur, manifesto librorum errore, qui *Widonem* in *Werdonem*, *Hugonem* etiam in *Werdonem* et *Guidonem* mutarunt. Hoc enim anno Hugonem, cognominatum de Touciaco, vel Tuciensem, Henrico archiepiscopo Senonensi successisse docet chronographus Sancti Petri-Vivi, et Guidonem Catalaunensi Ecclesiæ præfuisse videre est in San-Marthanis. *Gaufridus Carnotensis*, neque in libello, neque in supplemento, neque in chronico Mauriniacensi sanctæ Sedis legatus dicitur, ideoque hoc anno eo munere functus non est. Chronographus Mauriniacensis pag. 357, de electione abbatis sui loquens ait : « Hanc electionem, cum rex (Ludovicus VII) et prædicti episcopi confirmassent, domnus Thoi-

nus Senonas profectus, et a Gaufrido Carnotensi episcopo, qui archiepiscopo absente ejus in officii executione vicarius esse solet, benedictione solenni sublimatus est ». Ubi multa observanda. Primo, Gaufridum Carnotensem non appellari legatum S. Sedis. Secundo, episcopos Carnotenses peculiari prærogativa primos suffraganeos esse archiepiscopi Senonensis. Tertio, episcopos qui electionem abbatis Mauriniacensis confirmarunt, fuisse *Albericum Ostiensem*, et *Haimerum* seu melius *Imarum* Tusculanensem, quos jam dixerat chronographus legatos missos, illum in Galliam, istum in Angliam. Quare confirmatur quod supra diximus, *Imarum* nempe hoc anno legatum in Francia fuisse. Quarto ex Sugerii verbis deducitur, *Hugonem* ante diem xi mensis Junii jam archiepiscopum Senonensem fuisse. Denique corrigendus error qui irrepsit in Chronicon Mauriniacense, ubi dicitur *domnus Thoinus Senonas profectus*; loco enim vocis *Thoinus*, legendum *Tuciacus*, vel *Tuciacensis*. Corrigendus et error, qui extat in Inscriptione Epistolæ ab Ecclesia Senonensi ad Gaufridum Carnotensem date quem rogant, ut archiepiscopum electo benedictionis manus imponat. In Catalogo enim archiep. Senonens. a Mathondo composito pag. 118, ea dicitur data ad *Gostenum Carnot. episc.* cum tamen *Gostenus* ibidem perperam *Gostenus* appellatus nondum episcopus Carnotensis esset. Sed librarius litteram G, quæ sola erat in exemplari, insolite interpretatus est. Ille non prætermittendum, *Amedeum* archiep. Lugdunensem Apostolicæ Sedis legatum in Francia fuisse anni hujus initio, cum San-Marthani in arch. Lugdunensibus mentionem faciant Rescripti Cælestini II, dati *Laterani, XIII kalendas Martii*, in quo Amedeus dicitur legatus sanctæ Sedis.

14. *Edessa a Turcis capta.* — *Edessæ*, celeberrimæ Mesopotamiæ civitatis, capte desolatæque epocha a chronologis varie constituta, quia enim plerique antiquorum annos Incarnationis hoc tempore a die Natali Christi exordiebantur, variis inde errores enati. Civitas nocte Nativitatis Christi a Turcis capta, Dodechino in Chron. Hovedeno, aliisque testibus. Præterea Willelmus Tyrius magnam hanc Christianorum jacturam lib. 16, num. 3, copulat cum anno MCXLI, et Engenii III Pontificatu, et cum ipse testis irrefragabilis videatur in narratione rerum hoc tempore in Oriente gestarum, non de fuere qui piaculum duxerint ab ejus sententia discedere, cum tamen ipseniet fateatur, se in rebus quæ ante annum MCLIV in sacris bellis configere, auritum testem esse, non vero oculatum. Verum *Edessam* nocte Nativitatis Christi anni Æræ vulgaris MCXLIV, in Turcorum potestatem venisse certum imposterum esse debet. Dodechinus enim, qui annum a Natali Christi auspiciatur, ad an. MCXLV scribit: « Hoc anno Rohas (ita Edessa a Turcis aliisque Orientalibus appellata) a Saracenis capitur in sacra nocte Nativitatis Dom. quorum rex extitit quidam Sanguin nomine ». Signantius Urspergen-

sis abbas, qui annum etiam a Natali Christi inchoat, habet: « Anno Dom. MCXLV incipiente, in ipsa sacrosanctæ Nativitatis Christi sollemnitate, lugubre et miserabile ex peccato Christiani populi accidit in Oriente piaculum. Sanguinis enim Halapensis, Syria ac Mesopotamiæ, excepta Antiochia et Damasco princeps, Persarum vero et Medorum regis seu soltani (nempe Bagadensis) subditus, Edissam quæ nunc Rohas dicitur, unicum Hierosolymitanæ Ecclesiæ pro magnitudine ac abundantia sui refugium, cum infinita Saracenorum multitudo circumdedit, ac in ipsa, ut dixi, Nativitate Domini irrupit, cunctis ibidem cum urbe Christianis in ore gladii occisis, vel miserabili captivitate in servitutum redactis, Ecclesias Christi, et præcipue B. Mariæ semper Virginis Basilicam, et eam in qua Thomæ Apostoli corpus reconditum est, ad Salvatoris nostri ignominiam intro ferens, ea quæ non hecbat (legendum *licebant*) fœde polluit, nostrisque penitus exterminatis, Saracenos ibi ad habitandum collocavit ». Falsam tamen esse traditionem, quæ fert corpus S. Thomæ Apostoli apud Edessam extitisse, alibi ostendimus. Denique Otto Frising. hujus temporis scriptor lib. 7, cap. 30, eundem diem ac annum designavit.

15. *Quam magna fuerit hæc jactura.* — Quomodo nobilis hæc civitas propugnatrix non tantum murorum, sed etiam finium suorum in medio hostium innumerabilium per tot sæcula invicta, hostium præda facta fuerit, refert his verbis Neubrigensis lib. 1 de Reb. Angl. cap. 18: « Armenius quidam, civis Evissenus, habitans in turri muro contigua, ob filiam suam a principe civitatis corruptam, coqueus animo vindictam, invitatos pactis intestinis Turcos ipsa nocte Nativitatis Dominicæ intronisit in urbem: qui irruentes in populum secure in Ecclesia excubantem, et archiepiscopum quidem altari assistentem mactarunt; populum vero non resistantem, sed subiti casus stupore rigentem, gladiis trucidarunt. Sic capta et in potestatem spurcissimæ gentis redacta est Edissa, tantis retro temporibus semper invicta et antiqua fidei Christianæ alumna. Latissimis quoque finibus ejus pertinaci hostium furore pervasis, et in eorum possessionem cedentibus, Christianæ religionis cultus trans Euphratem funditus deletus est ». Sed quia tantæ cladis fama anno sequenti ad Occidentem pervenit, aliqui historici eo etiam anno hoc infortunium collocarunt, et ibidem ea Baronius memorat.

16. *Dissidium canonicorum et monachorum Mediolanensium.* — Anno superiori canonicis Ecclesiæ Mediolanensis et monachis ejusdem Ecclesiæ de jure campanarum pulsandarum inter sese dissidentibus, urbs Mediolanensis rursus perturbata. Consules urbis, dissidii iudices electi, partes in palatio archiepiscopali, *Robaldo* archiepiscopo præsentem audire, et utriusque aliquid concessere. Robaldus consulum efflagitatu « jussit et præcepit prædicto abbati et monachis, atque præposito et canonicis, ut ita attenderent et adimplerent, sicut

ipsi consules eis præciperent ». Instrumentum a Puricello in Monum. Eccl. Ambr. 391, relatum, datum dicitur anno *Incarn.* mclm, *medio mense Januarii, Indictione vi.* Hoc vero anno dissidium illud non solum renovatum, sed etiam auctum. *Robaldus* archiep. de eo cognovit, ut liquet ex Instrumento a Puricello num. 398 recitato, et hoc anno *mense Novembris, Indictione octava* dato. *Galdinus* his verbis ei subscripsit : « Ego Galdinus subdiaconus et cancellarius a me dictatæ subscripsi ». Is postea archiepisc. Mediolanensis fuit, et in numerum sanctorum relatus, ut suo loco videbimus.

17. *Moritur Robaldus archiepiscopus Mediolanensis.* — Non multo post *Robaldus* e vivis excessit. Ejus obitus a Puricello num. 399, his verbis notatur : *Clarissimi viri Aloysii ab Ecclesia Catalogus* expresse habet, « obijt prædictus Robaldus secundo die ante kalendas Januarii anno Domini mcliv ». In Catalogo tam a Mabillonio, quam a Pa-

pebrocio publicato legitur : *Obijt III kal. Jan.* quod idem prorsus est, cum dies xxx Decembris secundus sit ante kalendas Januarii, et III kal. Januarii. Obertus seu Ubertus *venit ad sedem secunda Februarii die, anno Domini mcliv*, ut legitur in præfato Aloysii Catalogo, cujus auctor annum usque ad diem xxv Martii sequentis anni Dionysiani continuat. In Catalogo archipresbyteri metropolitani Mediol. apud Puricellum post narratam Robaldi mortem habetur : « Vacat tum sedes diebus xxii ; Obertus venit ad sedem xxi Januarii anno Dom. mclv », a primo die Januarii inchoato. Verum est in Catalogo a Mabillonio edito legi : « Fuerunt autem ab ipsius obitu usque ad electionem domini Oberti dies xxvi, sed legendum dies xxiii, ut habet Papebrocius, qui eundem Catalogum etiam edidit. Verum non bene hic vir doctissimus *Robaldi* mortem usque ad diem xxx mensis Decembris sequentis Christi anni distulit.

EUGENII III ANNUS 1. — CHRISTI 1145.

1. *Lucii papæ obitus et Eugenii III creatio et fuga.* — Christi Domini et Dei nostri anno millesimo centesimo quadagesimo quinto, Indictione octava, quinto kal. Martii, Lucius papa ex hac vita migravit, cum sedisset menses undecim, dies vero quatuordecim. In Codice Vaticano, qui inscribitur de Privilegiis Romanæ Ecclesiæ, inter res gestas Lucii, de ejus obitu occasione hoc asseritur : ipsum cum Romanos ad nova studia concitatos depellere conaretur a Capitolio, incerto lapidis ictu percussus fuisse, atque non post multos dies regrotasse, eoque morbo ex hac vita migrasse. At nihil de ictu lapidis Otto ejus temporis auctor, sed hæc tantum : « Ipse Lucius quotidianis cruciatibus (de ejusmodi Romanorum rebellionem videlicet), ac tædio vite affectus, infra anni spatium Pontificatus sui diem obijt ». Rursus de ipso hæc in scripto Codice Vaticano : « Hic dedit Basilicæ Sancti-Salvatoris Lateranensi Ecclesiam Sancti-Joannis ante Portam Latinam cum omnibus capellis atque tenimentis suis. Dedit etiam eidem Ecclesiam Sancti-Nicolai in Hospitali cum omnibus tenimentis suis : item textum Evangelicum ex auro et argento opere rose factum. Dedit etiam ampullas ad servitium

altaris optimas et mirabiles. Hic fecit ordinationem unam mense Decembri, in qua creavit diaconos, presbyteros et episcopos per diversa loca, ex quibus Nicolaum diaconum S. Laurentii in Damaso creavit bibliothecarium, quo munere ipse functus erat, virum imprimis litteris Hebraicis peritissimum : qui de emendatione divinarum Scripturarum commentarium edidit. Moritur in monasterio Sancti-Gregorii ad Clivum Scauri, et sepelitur in Lateranensi Basilica ». Non vacavit Sedes, sed repente (ut ait sanctus Bernardus) ob periculum imminens fuit successor electus.

2. Etenim post obitum Lucii, ob tumultuantes Romanos Arnaldistas convenerunt unanimis cardinales metuentes in Ecclesiam monasterii Sancti-Cæsarii, illicque Dei nutu, haud de gremio ex more aliquem eligendum putarunt ex cardinalibus in Romanum Pontificem, sed convertentes oculos in abbatem monasterii S. Anastasii Trium-Fontium, Ordinis Cisterciensis, eidem haud pridem sub Innocentio papa Secundo a sancto Bernardo præfectum, Bernardum itidem nominatum, patria Pisanum, virum probitate insignem, et prudentia in negotiis obeundis locupletem, tempore perditis-

sumo, quo huiusmodi bello civili Urbs flagraret, putarant fore aptissimum: quem cum sagacissimum fuissent experti, pari consensu summa concordia elegerunt. Quæ autem mox post electionem sint secuta, ex sæpe citato scripto Codice Vaticano sic accipe:

3. « Electus deductus est ad Lateranense palatium, et in Apostolica Sede secundum morem positus est, et nominatus Eugenius papa Tertius. Qui cum proxima die Dominica consecrationis munus apud Sanctum-Petrum sicut consuetudinis ordo poscebat et dispositum fuerat, deberet suscipere; præcognito senatorum perverso consilio, quo ejus electionem violenter retractare disposuerant, nisi eorum voluntatem faceret, et usurpatum senatum eis Apostolica auctoritate confirmaret, noctis silentio Urbem cum paucis fratribus exiit, et ad arcem Monticelli se in tutum recepit. Congregatis vero alia die cunctis patribus, qui dispersi fuerant propter metum furentis populi, processit ad Farnense monasterium in Sabinis positum cum domestica familia, et consecrationis gratiam in sequenti Dominica pro plenitudine sui Apostolatus, secundum morem Ecclesie, Domino auctore, suscepit. Exiit ergo rumor iste, sicut vox lætitiæ ad omnes gentes, et de tam sancta promotione universa Ecclesia exultavit, dicens cum Psalmista ¹: Benedictus Deus in donis suis, et sanctus in omnibus operibus suis, quoniam ex inspirato exaltavit humilem ², et sublimavit cornu Christi sui ». At quid Arnaldiste Romani? Ubi viderunt tum Eugenium, tum cardinales omnes ex eorum manibus elapsos esse, converterunt se ad demolitionem atque depredationem ipsorum domorum. Ita quidem testatur sanctus Bernardus in Epistola ad Romanos ipsos hoc anno data, quam suo loco inferius reddiduri sumus; necnon etiam Otto Frisingensis ejusdem temporis scriptor fama celebris affirmat.

4. *S. Bernardi Epistolæ ad papam et cardinales de Eugenio creatione.* — Ipse vero sanctus Bernardus, ubi audisset certo nuntio tamam de sui abbatis in Pontificem electione, expectabat se de his ab eo reddi litteris certiorum; sed cum fuga, et alia plura ingruentia tunc negotia eundem Eugenium occupatum detinerent, ruptis ipse silentium, ad eundemque Eugenium has plane aureas litteras dedit ³:

« Amantissimo patri et domino, Dei gratia summo Pontifici Eugenio, Bernardus Clarevallensis vocatus abbas, modicum id quod est.

« Audivimus est in terra nostra, et celebri sermone vulgatum verbum hoc, quod tactum est de vobis a Domino. Prosseram stylium hactenus, rem tacitus considerabam. Expectabam enim litteras vestras, et præveneri a vobis in benedictionibus dulcedinis. Expectabam virum fidelem, qui veniret a latere tuo, qui diceret cuncta per ordinem, quid, quomodo vel qualiter actum esset. Expectabam si

quis forte de filiis meis reverteretur, qui leniret dolorem patris, qui diceret ⁴: Joseph filius tuus vivit, et ipse dominatur in tota terra Egypti. Illic est quod litteræ istæ non sunt voluntatis, sed necessitatis, et amicorum extorque precibus, quibus negare non possum modicum illud quidquid residuum est vite meæ. Quia tamen semel cepti, loquar ad dominum meum: jam enim filium dicere non audeo, quia filius in patrem, pater mutatus est in filium. Qui post me venit, ante me factus est: sed non invidio, quia quod mihi dederat, in eo me habere confido, qui non solum post me, sed etiam per me venit. Nam si dignaris, quodammodo per Evangelium ego te genui. Quæ est ergo spes nostra et gaudium nostrum, et corona gloriæ? nonne vos ante Deum? Denique filius sapiens gloria est patris. Amodo tamen non vocaberis filius? sed vocabitur tibi nomen novum, quod os Domini nominavit ⁵. Illic est mutatio dextere Excelsi, et multi in mutatione ista gaudent. Nam quemadmodum olim Abram in Abraham ⁶, Jacob in Israel, et, ut de tuis magis prædecessoribus tibi proponam: Sicut Simon in Cepham ⁷, Saulus in Paulum ⁸; sic filius meus Bernardus in patrem meum Eugenium, laeta prorsus et utili, ut speramus, translatione promotus est. Digitus Dei est iste ⁹, suscitans de pulvere egenum, et de stercore erigens pauperem: ut sedeat cum principibus, et solium gloriæ teneat. Superset, ut facta hæc commutatione tui, ipsa quoque quæ tibi commissæ est Domini tui sponsa mutetur in melius, et jam nequaquam Sarai, sed Sara de cætero nominetur.

5. « Intellige quæ dico: dabit enim tibi Dominus intellectum. Si amicus sponsi es, ne dixeris dilectam ejus *principem meam*, sed *principem*; nil tuum in ea vendicans, nisi quod pro ea si oportuerit, etiam animam dare debes. Si Christus te misit, æstimabis te non ministrari, sed ministrare venisse: et ministrare non solum substantiam, sed ipsam quoque animam, sicut præfatus sum. Verus successor Pauli dicet cum Paulo ¹⁰: Non quia dominamur fidei vestræ, sed adiutores sumus gaudii vestri. Petri heres audiet Petrum dicentem ¹¹: Neque ut dominantes in cleris, sed forma facti gregis. Sic enim jam non ancilla, sed libera et formosa speciosissimi sponsi per te in consideratos adseiscetur amplexus. Alioquin per quem alium hæc tam debita libertas sperabitur; si et tu (quod absit) in Christi hereditate quæras quæ tuæ sunt, qui jam, et ante didiceras, non dico tua non retinere, sed nec tuus esse? Ergo fiduciam talem habens in te, qualem in nullo prædecessorum tuorum a multis retro temporibus visa est habuisse, exultat merito ubique, et gloriatur in Domino omnis Ecclesia sanctorum: et specialiter illa, cujus uteris te portavit, et cujus ubera in suxisti. Quid ergo? Nonne et mihi licet gaudere cum gaudenti-

¹ Psal. XLIV. — ² 2. Reg. II. — ³ Bern. Ep. CC. LXVI.

⁴ Gen. XXXV. — ⁵ Psal. LXXVI. — ⁶ Gen. XVII. — ⁷ Marc. III. — ⁸ Act. XIII. — ⁹ Psal. CXXII. — ¹⁰ 2. Cor. I. — ¹¹ 1. Pet. v.

bus? Numquid non ero unus de numero lætantium? Exultavi, fateor, sed cum tremore. Exultavi, sed in ipso exultationis mee articulo, timor et tremor venerunt super me. Ego enim etsi nomen patris deposui, sed non timorem, sed non anxietatem, postremo nec affectum, nec viscera patris. Considero gradum, et casum vereor: considero fastigium dignitatis, et intueor faciem abyssi jacentis deorsum. Attendo celsitudinem honoris, et e vicino periculum reformido, pro eo quod scriptum est ¹: Homo cum in honore esset, non intellexit. Quod quidem ad causam magis, quam ad tempus arbitror esse referendum: ut sic intelligatur dictum: Cum in honore esset non intellexit; ac si diceretur: Honor absorbit intellectum.

6. « Et quidem elegeras abjectus esse in domo Dei tui, et recumbere in novissimo loco in convivio ejus, sed placuit dicere ei qui te invitavit ²: Amice, ascende superius. Itaque ascendisti in altum: noli altum sapere, sed time: ne forte contingat sero miserabilem illam emittere vocem ³: A facie iræ et indignationis tuæ elevans alisisti me. Altiores quippe locum sortitus es, sed non tutiorem; sublimiorem, non securiorem. Terribilis prorsus, terribilis est locus iste. Locus, inquam, in quo stas, terra sancta est, locus Petri est, locus principis Apostolorum, ubi steterunt pedes ejus. Locus illius est, quem constituit Dominus dominum domus suæ, et principem omnis possessionis suæ. Si forte declinaveris a via Domini, sepultus est in eodem loco, ut sit tibi contra te in testimonium. Merito tali pastori, tali nutricio commissæ est Ecclesia, cum adhuc tenera, adhuc in cunabulis esset: cujus docta magisterio et exemplo educata, omnia terrena calcaret, utpote qui excusserat manus suas ab omni munere: qui dicebat de corde puro et conscientia bona ⁴: Argentum et aurum non est mihi ». Hæc hactenus.

« Cæterum causa, quare ante tempus scripserim vobis, hæc est. Wintoniensis episcopus et Eboracensis archiepiscopus non gradiuntur uno spiritu cum Cantuariensis archiepiscopo, sed incedunt sibi ex adverso; et hæc vetus est de legatione querela. Veruntamen quis est ille, et qui sunt illi? Nonne Eboracensis ipse est, cui te præsentem, cum adhuc esses quasi unus ex nobis, fratres tui restiterunt in faciem, eo quod reprehensibilis erat? Sed speravit in multitudine divitiarum suarum, et prævaluit in vanitate sua. Certum est tamen, quod non intravit per ostium in ovile ovium, sed ascendit aliunde. Si pastor fuisset, diligendus erat; si mercenarius, tolerandus. Nunc autem cavendus et repellendus, utpote fur et latro. Quid dicam de domino Wintoniensi? Opera quæ ipse facit, testimonium perhibent de eo. Porro archiepiscopus Cantuariensis cui adversantur, vir religiosus est et suavulentis opinionis. Pro ipso petimus, ut respondeat ei justitia sua. Verum illo-

rum iniquitas super eos, ut sit sicut scriptum est ⁵: Justitia justi super eum erit, et impietas impii erit super eum. Cum acceperis tempus, secundum opera manuum illorum retribuens illis, ut sciant prophetam esse in Israel.

7. « Quis mihi det antequam moriar, videre Ecclesiam Dei sicut in diebus antiquis, quando Apostoli laxabant retia in capturam, non in capturam argenti vel auri, sed in capturam animarum? Quam cupio illius te hæreditare vocem, ejus adeptus es Sedem? Pecunia, inquit, tua tecum sit in perditionem. O vox tonitru! o vos magnificentie et virtutis, ad cuius terrorem confundantur et convertantur retrorsum omnes qui oderunt Sion? Hoc vehementer expectabat, et omnino expetit a te mater tua: hoc filii matris tuæ pusilli eum majoribus desiderant, hoc suspirant, ut omnis plantatio, quam non plantavit Pater cælestis, tuis manibus eradicetur. Ad hoc enim constitutus es super gentes et regna, ut evellas et destruas, et ædifices et plantes. Multi audito hoc verbo, dixerunt apud se ⁶: Jam securis ad radicem arborum posita est. Multi dicunt in corde suo ⁷: Flores apparuerunt in terra nostra, tempus putationis adventit, in quo sarmenta sterilia recidentur, ut ea quæ prævalent, uberius fructum afferant.

« Confortare igitur, et esto robustus: manus tuæ in cervicibus inimicorum tuorum. Vindica tibi animi tui constantia et vigore spiritus partem, quam dedit extra fratres tuos tibi Omnipotens Pater, quam et tulit de manu Amorrhæi in gladio et arcu suo. In omnibus tamen operibus tuis memento te esse hominem, et timor ejus, qui aufert spiritum principum, semper sit ante oculos tuos. Quantom in brevi Romanorum Pontificum mortes tuis oculis aspexisti? Ipsi te prædecessores tui, tuæ certissimæ et citissime decessionis admoneant, et modicum tempus dominationis eorum paucitatem dierum tuorum nuntiet tibi. Jugi proinde meditatione inter hujus transeuntis gloriæ blandimenta memorare novissima tua, quia quibus successisti in Sedem, ipsos sine dubio sequeris ad mortem ». Hactenus ad Eugenium sanctus Bernardus, ad electores vero S. R. E. cardinales has litteras dedit ⁸:

8. « Dominis et patribus reverendis cardinalibus et episcopis omnibus qui sunt de curia, puer sanctitatis eorum.

« Pareat vobis Deus, quid fecistis? sepultum hominem revocastis ad homines: fugitantem curas et turbas curis denuo implicuistis, et immiscuistis turbis. Fecistis novissimum primum, et ecce novissima illius periculosiore prioribus. Crucifixus mundo per vos revixit mundo: et qui elegerat abjectus esse in domo Dei sui, ipsum vos in dominum omnium elegistis. Cur consilium inopis confudistis? cur pauperis hominis et mendici et

¹ Psal. XLIII. — ² Luc. XIV. — ³ Psal. CI. — ⁴ Act. III.

⁵ Ezech. XVIII. — ⁶ Act. IV. — ⁷ Matth. III, et Luc. III. — ⁸ Cant. II. — ⁹ Bern. Ep. CCXXVI.

compuncti corde iudicium perturbastis? Currebat bene. Quid vobis visum est seipre vias ejus, avertere semitas, gressus involvere? Quasi descendere de Hierusalem, et non magis ascenderet de Jericho, sic incidit in latrones. Et qui se tanquam violentis quibusdam diaboli manibus, carnis illecebris et gloriæ sæculi potenter excusserat, non tamen valuit effugere manus vestras. Nam idcirco Pisam deseruit, ut reciperet Romanam? Num qui in una Ecclesia non sustinuit vicedominatum, dominatum in omni Ecclesia requirebat? Quid igitur rationis seu consilii habuit, defuncto summo Pontifice, repente irruere in hominem rusticatum, latentem injicere manus, et excussa e manibus securi et ascia, vel ligone, in palatium trahere, levare in cathedram, induere purpura et bysso, accingere gladio ad faciendam vindictam in nationibus, increpationes in populi¹: ad alligandos reges eorum in compedibus, et nobiles eorum in manicis ferreis? Sic non erat inter vos sapiens et exercitatus, cui potius ista convenirent?

9. «Ridiculum profecto videtur, pannosum homuncionem assumi ad præsidendum principibus, ad imperandum episcopis, ad regna et imperia disponenda. Ridiculum an miraculum? Plane unum horum. Non nego, non diffido posse fuisse hoc etiam opus Dei, qui facit mirabilia magna solus, præsertim cum audiam usquequaque ex ore multorum, quoniam a Domino factum est istud². Sed nec ego oblitus sum iudiciorum Dei antiquorum, et Scripturæ, plurimos recensentis ex privata, seu etiam rusticana vita olim assumptos in voluntate Domini ad regendum populum ejus. Denique nomen (ut unum e pluribus memorem) tali quodam modo elegit David servum suum, et suscepit eum de gregibus ovium, de post fetantes accepit eum³? Ita, inquam, ita et de nostro Eugenio in beneplacito Domini potuit contigisse. Non sum securus tamen, quoniam filius delicatus est, et tenera verecundia ejus assueta potius otio et quieti, quam tractandis quæ foris sunt: timendumque ne non ea auctoritate qua oportuerit, sui Apostolatus officia exequatur. Quid putatis gerere animi nunc hominem illum, qui de secreto internæ contemplationis, et amica solitudine cordis tanquam infans et gremio et sinu matris subito proturbatus, tractum se ad medium videt, et quasi ovem ad victimam ductum ad tam insueta et insuavia? Nisi Dominus supponat manum suam, heu, necesse est obruatur et opprimatur onere insano et nimio, quod et gigantinis (ut aiunt) vel ipsi quoque angelicis humeris formidabile videatur.

10. «Verumtamen quia sic factum est, et sicut multi dicunt, a Domino factum est: vestra interest, charissimi, vestris ferventibus studiis fidelibusque obsequiis sollicite confovere quod vestris manibus constat elaboratum. Si qua ergo conso-

latio in vobis, si qua virtus charitatis in Domino, si qua miseratio pietatis, si qua compassionis viscera, assistite et collaborate illi in opere, ad quod assumptus est per vos a Domino. Quæcumque sunt vera, quæcumque pudica, quæcumque iusta, quæcumque sancta, quæcumque amabilia, quæcumque bonæ famæ; hæc ei suggerite, hæc suadete, hæc agite, et Deus pacis erit vobiscum». Hactenus ad cardinales sanctus Bernardus.

11. *Arnaldistæ in Urbe debacchantur.* — At quæ post hæc Romani Arnaldistæ egerint adversus S. R. E. cardinales consilio ejusdem Arnaldi, se horum favore in Urbem intrudentis, hic ex Ottone ejus temporis auctore prodamus, qui ait¹: «Circa principia Pontificatus Eugenii pestifer Arnaldus Urbem ingressus, cum eam contra Pontificem suum in seditionem excitatam invenisset, viri sapientis haud seclatus consilium, de hujusmodi dicentis: Ne in ejus ignem ligna struas: amplius eam in seditionem excitavit, proponens antiquorum Romanorum exempla, qui ex senatus maturitatis consulto, et ex juvenum animorum fortitudinis ordine, et integritate totum orbem terre suum fecerint. Quare reædificandum Capitolium, renovandum dignitatem senatoriam, reformandum equestrem ordinem docuit. Nihil in dispositione Urbis ad Romanum spectare Pontificem: sufficere sibi Ecclesiasticum iudicium habere. In tantum vero hujus venenose doctrinæ cepit invalescere malum, ut non solum nobilium Romanorum, (ipsis videlicet adversantium), sed cardinalium diruerentur domus et splendida palatia; verum etiam de cardinalibus reverendæ personæ inhoneste sauciatis quibusdam, a furenti plebe tractarentur». Hæc Otto. Reliqua autem quæ subijcit, ad tempora Hadriani papæ sunt referenda.

12. Quæ vero sub Eugenio bestia ista ausa est, cecinit etiam istis versibus Ligurinus in Frederico²:

Ast ubi de medio sublato Præsele summa,
Eugenius sacra suscepit jura cathedræ,
Ille petri solidam cupiens convellere petram,
Ut caput laurum per cætera membra dolorem
Diffundit, Romana petit temerarius ausu
Mrema sacrilego, totamque nefarius Urbem
Inlicit, impia corruptam semine verbi:
Et populi tantas in clero concitat iras,
Ut pontus nullum summo deferret honorem
Pontifici, clerumque odio vexaret iniquo,
Et si quis, cui mens æqui et reverentior esset,
Et melior pio flagrant viscera voto,
Forte refragui seu dissuadere furorem
Ausus erat, seseque novis opponere monstris:
Omnibus creptis, subversa funditus æde,
Corporis afflictis, seu tandem sanguine fuso
Clericus, aut etiam popularis facta luebit,
Quinetiam titulus Urbis renovare vetustos.
Patricios recitare viros, patriciosque Quirites,
Nomen plebeo secernere nomen equestre,
Jura tribunorum, sanctum reparare senatum,
Et senio fessas, multasque reponere leges,
Lapsa rumpis et adhuc pendenti muris
Reddere primævo Capitolii præsea nitore,

¹ Psal. CXLIX. — ² Psal. CXVII. — ³ Psal. LXXVII.

¹ Otto de reb. Frid. I. II. c. 20. — ² Ligur. in Frid. I. III.

Consiliis, armisque suae moderamina summa
Arbitrio tractare suo. Nil juris in hac re
Pontifici summo, modicum concedere regi
Sandeat populo. Sic laesa stultus uterque
Majestate reum gemina se fecerat aula.

13. Otto autem rursus alibi de his quæ ad hæc Eugenii tempora spectant¹ : Viterbium veniens, ibi per aliquod tempus moram fecit. At Romanus populus cum patricio suo Jordane in furorem versus, præfecturæ dignitatem abolentes, omnes principes ac nobiles ex civilibus ad subjectionem patricii compellunt, et non solum quorundam illustrium laicorum turres, sed et cardinalium ac clericorum domus subruentes, prædam immensam diripiunt. Ecclesiam etiam beati Petri, omnium Ecclesiarum caput, sacrilege et profanissime incastellare non metuant, peregrinos causa orationis advenientes, ad oblationem quæstus gratia, plagis et verberibus cogunt, ac quosdam ex ipsis offerre nolentes, in ipsa porticu et vestibulo templi netario ausu occidere non verentur». Hactenus de Arnaldo atque Arnaldistis hujus temporis Otto.

14. S. Bernardus per Epistolam monet Romanos. — His igitur adeo nefandis longe lateque per orbem sparsis, trans Alpes transmissis, sanctus Bernardus ad eundem populum Romanum ab Arnaldo seductum has litteras dedit² :

« Nobilibus et optimatibus atque universo populo Romano, frater Bernardus Clarevallensis vocatus abbas, declinare a malo, et facere quod bonum est.

« Sermo mihi est ad te, popule sublimis et illustris, cum sim vilis exiguaque persona, ac nullius præne momenti homuncio. Id quidem verecundum atque onerosum mihi consideranti, quis, quibus scribam, simulque quam aliter hoc alius indicare possit. Sed levius reor verecundia apud homines periclitari, quam condemnari apud Deum silentio, veri taciturnitate, et absconione justitiæ. Ipse enim dicit³ : Annuntia populo meo scelera eorum. Erit mihi etiam in testimonium aule faciem Domini, si dicere potero⁴ : « Justitiam tuam non abscondi in corde meo, veritatem tuam et salutarem tuam dixi. Pro hujusmodi sane non vereor, quamvis verecundia reluctante, pro mea ignobilitate scribere de longinquo ad populum gloriosum, atque his litteris transmontanis sui ipsorum periculi atque peccati commonere Romanos, si forte audiant et quiescant. Quis scit si convertantur ad precem pauperis, qui non cedunt potentium minis, non omni armaturæ fortium? Nonne quondam in Babylone ad vocem pueri junioris unius, omnis ille populus, qui a senibus iniquis iudicibus seductus fuerat, reversus est ad iudicium, et sic servatus est sanguis innoxius in die illa? Ita nunc quoque etsi adolescentulus sum ego et contemptus (adolescentulus dico non annorum paucitate, sed

meritorum) potens est tamen Deus dare etiam vocem vocem virtutis, per quam fiat, ut et is populus, quem nihilominus constat esse seductum, ad iudicium revertatur. Mea ergo defensio ad eos, qui mihi hinc forte succensendum indignandumve putaverint, hæc sit. Si neque hoc satis est, etiam istud adjicio. Communis est causa, et non est distinctio pusilli et magni. Dolor nempe in capite est, ac per hoc minime alienus ne a minimis quidem vel extremis quibusque corporis partibus, nec a me ergo. Pervenit profecto usque ad me, quamvis omnium minimum, dolor maximus ita, quia maximus est, et quia cum sit capitis, non potest non esse et corporis, cuius membrum sum ego. Numquid non dolente capite, clamat lingua pro omnibus corporis membris, in capite se dolere, et omnia per ipsam suum caput, suumque capitis fatentur incommodum?

15. « Dimittite proinde, quæso, dimittite, ut plangam paululum apud vos dolorem meum, nec meum tantum, sed et totius Ecclesiæ. Nomen ipsius vox est hodie per universum mundum⁵ : Caput meum doleo, caput meum doleo? Quis namque vel novissimus Christianorum in toto sit orbe, qui non gloriatur hoc capite, quod ambo illi gloriosi principes terræ, alter amisso, alter submisso in cruce capite, suo triumpho extulerunt, suo sanguine ornaverunt? Ad omniem itaque spectat Christianum injuria Apostolorum⁶ : et sicut in omnem terram exivit sonus eorum; sic læsio eorumdem ab omnibus usqueaque sentitur, usqueaqueque plangitur et doletur.

« Quid vobis visum est, o Romani, offendere principes mundi, vestros autem speciales patronos? Cur regem terræ, cur Dominum cæli furorẽ tam intolerabili, quam irrationabili in vos pariter provocatis, dum sacram et Apostolicam Sedem diviniæ regalibusque privilegiis singulariter sublimam ausu sacrilego incessere, suoque minuire honore contenditis, quem vel soli contra omnes, si oportuisset defendere debuistis? Sic fatui Romani non judicantes, neque quod honestum est discernentes, caput vestrum atque omnium, quod in vobis est, deturbatis, pro quo magis nec vestris ipsis cervicibus parcendum a vobis foret, si necessitas exigeret? Patres vestri Urbi orbem subjugarunt, vos Urbem properatis orbi facere fabulam. En Petri hæres Petri Sede et Urbe a vobis expulsus est. En rebus et domibus suis, vestris manibus spoliati sunt cardinales atque episcopi ministri Domini⁷. O popule stulte et insipiens, o columba seducta non habens cor! Nonne ille caput, et illi oculi tui erant? Quid ergo nunc Roma, nisi sine capite truncum corpus, sine oculis frons efflosa, facies tenebrosa? Aperi, gens misera, aperi oculos tuos, et vide desolationem tuam janijamque immineantem. Quomodo in brevi mutatus est color optimus⁸, facta est quasi vidua domina Gentium,

¹ Otto Fris. I, VII, c. 3^a. — ² Bern. Ep. CCXL. — ³ Isa. LVIII. —

⁴ Psal. XXXIX.

⁵ 1^a Reg. IV. — ⁶ Psal. XVIII. — ⁷ Osee VII. — ⁸ Thir. IV.

princeps provinciarum? Verum initia malorum sunt hæc, graviora timeamus.

16. « Numquid non prope interitum es, si persistis? Revertere, revertere, Synanitis, revertere ad cor tuum : agnosce jam, vel sero, quæ, quanta, a quibus patiaris, vel passa sis. Recordare qua causa, quo fine, per quos, et in quos usus, non longe ante hos dies cunctarum quæ in te sunt Ecclesiarum omnis ornatus, et census proligatus est, quidquid in altaribus et in altarium vasis, quidquid in ipsis sacris imaginibus auri et argenti reperiri tunc potuit, manibus impiorum direptum et asportatum est. Quid ex his omnibus tu in tuis nunc marsupis invenis? Porro decor domus Domini irreceptabiliter perit. Et nunc quid tibi visum est iterare malitiam, innovare denuo super te dies malos? Quid modo vel lucri amplioris, vel certioris spei arridet tibi? Nisi quod in eo novissima tua cernuntur incantoria prioribus, quod tunc quidem non solum multi de plebe, sed etiam de clero, et de principibus nonnulli per orbem in schismate illo faverunt tibi : nunc vero sicut manus tuæ contra omnes, sic manus omnium contra te. Mundus est a sanguine tuo mundus omnis, præter te solam et filios tuos qui in te sunt. Væ ergo nunc tibi, popule miserande, et væ duplo quam ante, non ab exteris nationibus, non a feritate Barbarorum, non a millibus armatorum : væ tantum a facie tuorum tibi, væ a domesticis et amicis, a clade intestina, a cruciatu præcordiorum, a torsionibus viscerum.

17. « Agnosceisne jam, quia non omnes pacifici, qui domestici, nec omnes amici, qui videntur? Etsi alias noveramus, sed nunc per te manifestius edocemur omnem veritatem illius sermonis Domini, quem dixit ¹ : Quoniam inimici hominis domestici ejus. Væ fratri a fratre in medio tui, et filiis a parentibus. Væ non a gladiis, sed a labiis iniquis et a lingua dolosa. Usquequo male in malo vos alternitrum confortatis : et gladiis laborum invicem sernitis, invicem perditis, ut ab invicem consumamini? Congregamini, oves dispersæ, redite ad pascua, redite ad pastorem et episcopum animarum vestrarum : redite prævaricatores ad cor. Quod loquor non quasi hostis convicians, sed quasi amicus obijurgans. Habet vera amicitia nunquam obijurationem, adulationem nunquam ; sed jungimus et obsecrationem.

18. « Obsecramus pro Christo, reconciliamini Deo, reconciliamini principibus vestris (Petrum loquor et Paulum) quos utique in Vicario et successore suo Eugenio suis Sedibus et ædibus effugastis. Reconciliamini, inquam, orbis principibus, ne forte incipiat pro eis pugnare orbis terræ contra insensatos. An nescitis, quia his offensis nihil omnino valetis, his propitiis nihil omnino timetis? Non, inquam, non timebis sub horum tutela milia populi circumdantis te, Urbs incluta, civitas

fortium. Reconciliare proinde illis simul et millibus martyrum, qui quidem apud te, sed contra te sunt, propter grande peccatum quod peccastis, in quo et persistis. Reconciliare etiam omni Ecclesiæ sanctorum, qui ubique terrarum, audito hoc verbo, scandalizati sunt. Alioquin pagina ista contra te testimonium erit : sed et ipsi Apostoli et martyres tui stabunt in magna constantia adversus eos qui se augustiaverunt, et qui abstulerunt labores eorum. Sed jam finem loquendi omnes pariter audiamus. Annuntiavi justitiam, prænuntiavi periculum, veritatem non tacui, hortatus sum ad meliora : superest, ut aut de vestra citius correctione letemur, aut de justa imminente damnatione certi inconsolabiliter lugeamus, arescentes et tabescentes præ timore et expectatione, quæ supervenient universæ Urbi ». Illicque sanctus Bernardus in spiritu vehementi, sed sancto.

19. *Idem hortatur Conradum regem ad defensionem Ecclesiæ.* — Qui etiam contra eosdem Arnaldistas Romanos et istam ad Conradum regem tunc scripsit Epistolam, magistralem illam quidem, Bernardo dignam, et eo ad quem scribitur, orthodoxo rege ; quæ sic se habet ¹ :

« Nec dulcius, nec amabilius, sed nec arctius omnino regnum sacerdotumque conjungi seu complantari in invicem potuerunt, quam ut in persona domini ambo hæc pariter convenirent, utpote qui factus est nobis ex utraque tribu secundum carnem summus et sacerdos et rex. Non solum autem, sed et commiscuit ea nihilominus ac confederavit in suo corpore quod est populus Christianus, ipse caput illius : ita ut hoc genus hominum Apostolica voce regem electum, regale sacerdotium appelletur. ² In alia quoque Scriptura, quotquot sunt prædestinati ad vitam, nonne omnes reges et sacerdotes nominantur? Ergo quæ Deus conjunxit, homo non sepat. ³ Magis autem quod divina sanxit auctoritas, humana studeat adimplere voluntas. Et jungant se animis qui juncti sunt institutis : invicem se foveant, invicem se defendant, invicem onera sua portent. Ait sapiens ⁴ : Frater adjuvans fratrem, ambo consolabuntur. Quid si alterutrum se (quod absit !) corroserint et momorderint, nonne ambo desolabuntur? Non veniat anima mea in consilium eorum, qui dicunt, vel imperio pacem et libertatem Ecclesiarum, vel Ecclesiis prosperitatem et exaltationem imperii nocituram. Non enim utriusque institutor Deus in destructionem ea connexit, sed in ædificationem. Si hoc scitis, quosque vos communem contumeliam, communem dissimulatis injuriam? Nonne ut Apostolica Sedes, ita et caput imperii Roma est? Ut ergo de Ecclesia taceam, num honor regi est, truncum in manibus tenere imperium? Et quidem ignoro, quid vobis super consulant sapientes vestri et principes regni : sed

¹ Matth. v.

² Bernard. Epist. CXXIV. — ³ 1. Pet. II. — ⁴ Matth. XIX. — ⁵ Prov. XVII.

ego in insipientia mea loquens, quod sentio non tacebo.

20. « Ecclesia Dei ab exortu sui usque ad hanc tempora pluries tribulata est, et pluries liberata est. Denique audile quid ipsa de se loquatur in Psalmo. Ipsius enim vox est ¹: Sæpe expugnaverunt me a juventute mea, etenim non potuerunt mihi. Supra dorsum meum fabricaverunt peccatores, prolongaverunt iniquitatem suam. Certus esto, o rex ², quoniam, nec nunc quoque relinquet Dominus virgam peccatorum super sortem justorum. Non est abbreviata manus Domini ³, nec facta impotens ad salvandum. Liberabit et hoc tempore absque dubio sponsam suam, qui suo sanguine redemit eam, suo spiritu donavit, donis celestibus exornavit, dilavit nihilominus et terrenis. Liberabit, inquam, liberabit; sed si in manu alterius, viderint regni principes, idne honor regis, regnive utilitas sit, non est utique. Quamobrem accingere gladio tuo super femur tuum, potentissime, et restituat sibi Caesar quæ Caesaris sunt, et quæ sunt Dei Deo. Utrumque interesse Caesaris constat, et propriam tueri coronam, et Ecclesiam defensare. Alterum regi, alterum convenit Ecclesiæ advocato.

21. « Victoria, sicut in Domino confidimus, præ manibus est. Superbia et arrogantia Romanorumplius quam fortitudo eorum. Quid enim? Numquid quispiam magnus vel potens, verbi gratia imperator aut rex, fecdam rem istam in imperium pariter sacerdotumque præsumit? Sed populus hic maledictus et tumultuosus, qui suas nescit metiri vires, cogitare finem, considerare proventum, in insipientia sua furore suo ausus est hoc grande sacrilegium attentare. Absit ut vel ad momentum stare possit ante faciem regis popularis manus, vulgi temeritas. Factus sum insipiens, qui cum sim vilis ignobilisque persona, tanquam aliquis magnus consiliis tantæ magnitudinis tantæque sapientiæ me ingressi, et de re magna. At, quo ignobilior atque abjectior, tanto liberior sum ad loquendum quod charitas suggerit. Unde et adhuc addo in eadem insipientia mea: Si quis aliud quam locutus sum vobis (quod non credimus) suadere conabitur, is profecto aut non diligit regem, aut parum intelligit quid regiam deceat majestatem: aut certe quæ sua sunt quaerit, et non valde quæ vel Dei, vel regis sunt, curare convincitur ». Hæc ad Conradum Romanorum regem S. Bernardus contra Romanos illos Arnaldi furore bacchantes.

22. *Legatio ex Anglia, Armenia et Syria ad Eugenium papam in oppido Viterbii.* — Inter hæc autem accidit secundum illud divinum oraculum Veritatis ore pronuntiatum de prædestinatione sanctorum ⁴: « Venient ab Oriente et Occidente, et recumbent cum Abraham, Isaac et Jacob, et filii regni ejicientur in tenebras exteriores ». Quod dum Romani resiliunt, accurrant populi e

longinquo; cum negant isti qui prope, profleantur qui longe sunt positi; ut ita saltem erubescant omnes qui oderunt Sion. Vidisti anno superiori ab Occidentis extremo limite ad papam accurrisse honorificentissima legatione Portugalliæ principem, inferentem in Romanam Ecclesiam dono provinciam, anno censu constitutam eidem spontaneo vectigalem, tunc cum inierentes lateri, sed rebelles animo Romani illi hæretici Arnaldistæ temporali dominio exuendam Sedem ipsam Apostolicam conclamarent. Accidit modo (quod non poteris nisi vehementissime admirari) quod eodem hoc ipso tempore, quo a suis civibus fugatur et expellitur ab Urbe Eugenius papa, legationibus Borealium, Occidentalium, atque Orientalium frequentatur? dum extorris ab Urbe, profugus Viterbii consideret. Quis infelix ignorans, seu potius negans Deum, casui tribuet ista, et non providentiæ Dei? quem qui negat, sententia sapientum, Deum negare pariter intelligatur.

Qui igitur sui principatus in terra Petrum constituit successorem, super Sedem ejus et sedentes desuper successores invigilare, ut intelligerent insipientes in populo, et stulti aliquando saperent; et quod non dormitabit, neque dormiet, qui custodit Israel: vocat ab Oriente legatos qui Christum Domini venerunt, pervenientes ad eum eo tempore, cum contemnerent, despicerent, fugarent insuper et persequerentur, qui proxime ejus lateri filii inhærebant. Sed audies ista ab auctore ejus temporis qui rei gestæ seriem scripsit ⁵, Ottone Frisingensi episcopo, probitate insigni, et veritatis cultore exactissimo, qui ea quæ post consecrationem Eugenii papæ contigerunt, primum narrans quæ sunt superius recitata de Arnaldistarum Romanorum grassatione in cardinalium aedes; postmodum cum agit de ipsius Pontificis commoratione Viterbii (ubi eum contigit ad finem usque anni hujus commemorari) ostendit illic eundem Eugenium visitatum legationibus diversarum Borealiū provinciarum. Quando enim et idem ipse Frisingensis Ecclesiæ episcopus Viterbium etiam accessit, et invisit eundem Pontificem; venerunt ad eum et legationes ex ultimis orbis finibus, ex Anglia, itemque ex Oriente, nempe ex Armenia et Syria. Agemus de singulis.

23. Ex Anglia quidem hoc anno ad Eugenium papam recens creatum venit Alexander episcopus Lincoliensis, qui benigne acceptus est ab ipso Eugenio papa, cujus benignitas et affabilitas mirifice commendatur a Rogerio in Annalibus, ubi hæc habet: « Eodem anno, episcopus Lincoliensis Alexander iterum Romam petens, susceptus est honorifice ab Eugenio papa novo, viro summa dignitate condigno. Cujus mens semper benigna, cujus discretio semper æqua, cujus facies semper non solum hilaris, sed etiam et jucunda ». Hæc de Eugenio Rogerius, hujus temporis scriptor accu-

¹ Psal. cxxviii. — ² Psal. cxiv. — ³ Isa. lix. — ⁴ Matth. viii.

⁵ Otto Fris. l. vii. c. 31, 32, 33.

ratissimus. Tunc quoque temporis, cum Viterbii Eugenius consisteret, Orientales ex Armenia atque Syria legationes accepit, prout ab eo qui præsens aderat¹, Ottone, qui et ea quæ vidit, etiam fidelissime scripsit, refertur :

« Ea tempestate legati Armeniorum episcoporum, eorumque metropolitani, quem ipsi Catholicon, id est, Universalem, propter infinitum, id est, amplius quam mille episcoporum sub se habentem numerum vocant, legati ab ultimo pane Oriente, summum Pontificem Viterbii laboriosum iter per annum et sex menses complentes adeunt : eique ex parte illius Ecclesiæ subjectionem omnimodam cum consalutando offerentes, causas viæ nobis cum aliis multis præsensibus apud veterem aulam aperiunt, quæ tales erant. Inter ipsos et Græcos quædam de ritu sacrificii habitudo est in quibusdam, in aliis vero discrepantia. Ponunt enim fermentatum panem sicut illi, aquam autem vino non admiscunt, sicut nos et illi. Præterea Nativitatem Domini Epiphaniæ continuantes, duas illas festivitates unam faciunt. Pro his et aliis, dum inter se dissentirent, Romanam Ecclesiam iudicem eligentes, consultum veniunt, formamque sacrificii juxta consuetudinem ejus sibi tradi deposcunt :

24. « Quos Romanus antistes gratanter suscipiens, missarum solemnibus ac sacrificiis secretis adhibuit, diligenterque ea quæ fiebant ibidem, eos animadvertere monuit. Quod dum facerent, intentique sacro altari astarent, unus ex eis Pontificali dignitate præditus, sicut postmodum in plena curia retulit, in beati Martini octava, quando dedicatio Ecclesiæ beati Petri celebrari solet, summo Pontifice divina mysteria agente, splendide fulgore radium solis super caput ejus coruscare, et in ipso duas columbas ascendentes et descendentes vidit. Cumque diligentius hac illacque oculos circumferret, nullumque aditum, per quem lux illa transfunderetur, inveniret, deificum hoc esse cognoscens, ac ad obedientiam Romanæ Sedis amplius accessus, cunctis quæ viderat, aperuit. At venerabilis pater non suis hoc meritis attribuens, ipsius potius fide cælitus hoc sibi monstratum affirmabat; ut videlicet Ecclesia, a qua ipse missus fuerat, sacramentorum virtutem veritatis luce perfusam cognosceret, ac deinceps quali ea reverentia et forma tractare deberet, addisceret. Retulit etiam præfatus episcopus, quod in confinio Armeniæ quædam gentes essent, quæ fœtus suos fœtentes generarent, eosque statim ad aquas Armeniorum lavandos transmitterent. Quos cum illi baptismatis unda tingentes, immatum eis fœtorem propellerent, mox tamen remissi, ad paganismi ritum et spurcilitium redibant. Quod utrum faciendum esset, item Romanam Ecclesiam consuluerunt.

25. « Vidimus etiam ibi tunc prælatum de Syria Gabulensem episcopum, cujus præcipue

opera ad plenum Antiochia Romanæ Sedi subesse cepit, tam de patriarcha suo Antiocheno, et de principis matre, Balduini Hierosolymitani quondam regis filia, querimoniam facientem, quam de spoliis Sarracenis ablatis, jure antiquitatis exemplo Abrahamæ decimas (qui eas Deo recognoscens victoriam, de suis spoliis Melchisedech dedit) exigentem, ac super hoc Apostolicæ Sedis auctoritatem requirentem. Audivimus eum periculum transmarinæ Ecclesiæ post captam Edessam lacrymabiliter conquerentem, et ob hoc Alpes transcendere ad regem Romanorum et Francorum pro flagitante auxilio volentem ». Hæc de Syri episcopo legatione. Subjicit ejus narrationem de rebus Æthiopiæ regis presbyteri Joannis vulgo nominati.

26. *Rolandus electus S. R. E. cancellarius.* — Sic igitur delictibus Romanis Arnaldistis, universus terrarum orbis confluit veluti ex condiclo ad Eugenium papam, vocante eo, cui curæ est regimen Ecclesiæ, Christo Domino nostro. Tunc illud accidit, ut in tanta negotiorum frequentia ipse Eugenius non potuerit penitus vitare surreptionem litigantium, quo factum est, ut lata tunc quædam sententia ab eo, revocanda fuerit postea per Innocentium Tertium papam. Ait enim ipse Innocentius¹ : « Persepinimus, quod primo mense sui Pontificatus fuerit ab eo sententia promulgata, quando non plene de meritis ipsius causæ videbatur instructus, illa nitens præcipua ratione, quod Privilegium Urbani Secundi ex parte vestra productum subiectum fuerit falsitati, cujus tenorem nos in Registro ejus invenimus incorruptum ». Hæc Innocentius.

27. Ut autem ejusmodi surreptiones, quibus decipi solent sæpe Pontifices quamvis prudentes, Eugenius papa quantum possibile esset vitare posset, illud remedium quod magis opportunum videretur adhibendum putavit, nimirum ut fidesimum haberet cancellarium cardinalem. Ad quod munus delegit intimum amicum, canonicum Pisani, Rolandum nomine ad quem sanctus Bernardus litteras dedit in quibus hæc inter alia² : « Benedictus Deus, qui secundum suam misericordiam Engenium nostrum, imo sumum, prævenit in benedictionibus dulcedinis, parare scilicet lucernam Christo suo, et præmittere virum fidelem in adiutorium ejus, et nostram etque plurimam consolationem. Nam cum molesta esset amico amici vocatio et absentatio, cujus nimirum præsentia frui delectatur in Domino : jam tunc (ut manifeste video) cogitabat ipse cogitationes pacis et non afflictionis, et dicebat³ : Quod ego facio, tu nescis modo : scies autem postea. Quamobrem sollicitus sis, charissime, pro eo cui te consolatorem et consiliarium ordinavit Deus, et observa caute secundum datam tibi sapientiam, ne forte inter tanti multiplicium negotiorum tumultus, maligno-

¹ Otto Frising. l. vii. c. 31, 32, 33.

² C. Tum ex litteris de integ. rest. in vi. — ³ Bern. Ep. cccxxxiv. — ⁴ Joan. xiii.

rum fraude circumveniri possit, ut surripiatur ei verbum, quod indignum sit Eugenii Apostolatu, etc. » Ista Bernardus. At quod dictum ait ipsi : « Quod ego facio, tu nescis modo : scies autem postea », potuit allusisse ad prædictionem futuri Pontificatus, quo idem Rolandus foret initian- dus. Pontifex enim postea fuit, et vocatus Alexander Tertius, ab Eugenio primo in diaconum SS. Cosmæ et Damiani, deinde in presbyterum tituli S. Marci cooptatus. At nec sic plane satis consultum, quin mendacia inferrentur in curiam : ut saepe queritur idem ipse suis Epistolis. Ubi, quæso, sine zizaniis seges Dominica ?

28. *Eugenius, favente Ludovico rege, pro expeditione in Terram-Sanctam dat litteras Apostolicas.* — Hoc anno, auditis legationibus e Syria missis de damnis illatis ab infidelibus, Edessa capta, Antiochia atque Hierosolymis in discrimen adductis, de expeditione Occidentalium in Terram-Sanctam agitari coeptum. Eugenius siquidem papa non curans quæ sua essent, sed quæ Dei esse sciret : non ad sui liberationem exilii adversus Romanos Occidentalium Christianorum principum arma convertenda putavit, sed adversus Sarracenos res Christianorum in Oriente invadentes et possidentes, fore movenda omni conatu, Pontificia auctoritate laborat, primum omnium scribens ad Ludovicum Francorum regem. Perfacile namque fuit ad religiosum opus impellare ipsum, qui jam voverat eandem inire ad sancta loca peregrinationem ; de quo ista Otto Frisingensis ¹ :

29. « Ludovicus, dum occulte Hierosolymam eundi desiderium haberet, eo quod frater suus Philippus eodem voto adstrictus, morte præventus fuerat : dutilius protelare nolens propositum, quibusdam ex principibus suis vocatis, quid in mente volveret aperuit. Erat tunc temporis in Gallia cenobii Clarevallensis abbas quidam, Bernardus dictus, vita et moribus venerabilis, religionis ordine conspicuus, sapientia litterarumque scientia præditus, signis et miraculis clarus. Hunc principes vocandum, ab eoque quid de hac re fieri oporteret, tanquam a divino oraculo consulendum decernunt. Vocatur præfatus abbas, consiliumque ipsius super prædicti exposcitur principis voluntate. Ille de tam grandi negotio ex propriæ auctoritatis arbitrio responsum dare frivolum iudicans, ut ad Romani Pontificis audientiam et examen deferatur, optimum esse respondit. Itaque missa ad Eugenium legatione, totum illi negotium aperitur. Qui antecessorum suorum exempla revolvens, quod videlicet Urbanus huiusmodi occasione transmarinam Ecclesiam, duasque patriarchales sedes, id est, Antiochiam et Hierosolymam ab obedientia Romane Sedis scissas, in pacis unitatem receperit : votis prædicti regis, pro dilatando Christianæ religionis ritu annuit : auctoritate prædicandi, animosque cunctorum ad hoc commovendi, præno-

minato abbati, qui apud omnes Galliæ ac Germaniæ populos ut propheta vel Apostolus habebatur, concessa. Unde ejus scriptum tale ad regem principesque suos directum invenitur :

30. « Eugenius episcopus, servus servorum Dei, charissimo filio Ludovico, illustri et glorioso Francorum regi, dilectis filiis principibus, et universis Dei fidelibus per Galliam constitutis, salutem et Apostolicam benedictionem.

« Quantum prædecessores nostri Romani Pontifices pro liberatione Orientalis Ecclesiæ laboraverunt, antiquorum relatione didicimus, et in gestis eorum scriptum reperimus. Prædecessor etenim noster felices memorie papa Urbanus, tanquam tuba intonuit, et ad ipsius deliberationem S. R. E. filios de diversis mundi partibus sollicitari curavit. Ad ipsius siquidem vocem Ultramontani, et præcipue Francorum regni fortissimi et strenni bellatores, et illi etiam de Italia, charitatis ardore succensi convenerunt, ut maximo congregato exercitu non sine magna proprii sanguinis effusione, divino eos auxilio comitante, civitatem illam, in qua Salvator noster pro nobis pati voluit, et gloriosum ipsius sepulchrum passionis suæ nobis memoriale dimisit, et quamplures alias, quas proximitatem vi- tantes, memorare supersedimus, a paganorum spurcicia liberarent. Quæ per gratiam Dei et patrum vestrorum studium, qui per intervalla temporum eas defendere, et Christianum nomen in partibus illis dilatare pro viribus studuerunt, usque ad nostra tempora Christianis detentæ sunt, et aliæ urbes infidelium ab ipsis viriliter expugnatae.

31. « Nunc autem nostris et ipsius populi peccatis exigentibus (quod sine magno dolore et gemitu proferre non possumus) Edessa civitas, quæ nostra lingua Rohais dicitur ; quæ etiam, ut fertur, cum quondam in Oriente tota terra a paganis delinere- tur, ipsa sola sub Christianorum potestate Domino serviebat, ab inimicis crucis Christi capta est, et multa Christianorum castella ab ipsis occupata : ipsius quoque civitatis archiepiscopus cum clericis suis, et multi alii Christiani ibidem interfecti sunt : et sanctorum reliquiæ in infidelium conculcationem date sunt et dispersæ. In quo quantum Ecclesiæ Dei et toti Christianitati periculum imminet, et nos cognoscimus, et prudentiam vestram latere non credimus. Maximum namque nobilitatis et probitatis indicium fore cognoscitur, si ea, quæ patrum strenuitas acquisivit, a vobis filiis strenue defendantur. Verumtamen si (quod absit) secus contigerit, patrum fortitudo in filiis imminuta probatur.

« Universitatem itaque vestram in Domino commonemus, rogamus, atque præcipimus, ut in peccatorum remissionem injungimus, ut qui Dei sunt, et maxime potentiores et nobiles, viriliter accingantur, et infidelium multitudini, quæ se tempus victoriae super nos adeptam lætatur, sic occurrere, et Ecclesiam Orientalem tanta patrum

¹ Otto Fris. de Gest. Frid. I. 1 c. 24.

vestrorum (ut prædiximus) sanguinis effusione ab eorum tyrannide liberatam, ita defendere, et multa captivorum millia confratrum nostrorum de ipsorum manibus eripere studeatis; ut Christiani nominis dignitas vestro tempore augeatur, et vestra fortitudo, quæ per universum mundum laudatur, integra et illibata servetur. Sit vobis etiam in exemplum bonus ille Mathathias¹, qui pro paternis legibus conservandis, seipsum cum filiis et parentibus suis morti exponere, et quicquid in mundo possidebat relinquere nullatenus dubitavit; atque tandem, divino cooperante auxilio, per multos tamen labores tam ipse quam sua progenies de inimicis viriliter triumphavit.

32. « Nos autem vestrorum quieti et ejusdem Ecclesiæ destitutioni paterna sollicitudine providentes, illis, qui tam sanctum, tamque pernecessarium opus et laborem devotionis intuitu suscipere et perficere decreverint, illam peccatorum remissionem, quam præfatus prædecessor noster papa Urbanus instituit: auctoritate nobis a Deo concessa, concedimus et confirmamus. Atque uxores et filios eorum, bona quoque et possessiones sub sanctæ Ecclesiæ, nostra etiam et archiepiscoporum, episcoporum, et aliorum prælatorum Ecclesiæ Dei protectione manere decernimus.

« Auctoritate etiam Apostolica prohibemus, ut de omnibus quæ, cum crucem acceperint, quiete possederint: nulla deinceps questio moveatur, donec de ipsorum reditu, vel obitu certissime cognoscatur.

« Præterea, quoniam illi, qui Domino militant, nequaquam in vestibus pretiosis, nec cultu formæ, nec canibus, vel accipitribus, vel aliis quæ portandam lasciviam, debent intendere, prudentiam vestram in Domino commonemus, ut qui tam sanctum opus incipere decreverint, ad hæc non intendant; sed in armis, equis, et cæteris, quibus infideles expugnent, totis viribus studium et diligentiam adhibeant.

« Quicumque vero ære premuntur alieno, et tam sanctum iter puro corde inceperint, de præterito usuras non solvant; et si ipsi vel alii pro eis occasione usurarum adstricti sunt, sacramento, vel fide Apostolica eos auctoritate absolvimus.

« Liceat eis etiam terras, sive cæteras possessiones suas, postquam commoniti propinqui sive domini, ad quorum feudum pertinent, pecuniam commodare aut noluerint, aut non valuerint: Ecclesiis, vel personis Ecclesiasticis, vel aliis quoque fidelibus libere sine ulla reclamazione impignorare.

« Peccatorum remissionem et absolutionem juxta præfati prædecessoris nostri institutionem, omnipotentis Dei et beati Petri Apostolorum principis auctoritate nobis a Deo concessa, talem concedimus, ut qui tam sanctum iter devote inceperit

et perfecerit, sive ibidem mortuus fuerit, de omnibus peccatis suis de quibus corde contrito et humiliato confessionem suscepit, absolutionem obtineat, et sempiternæ retributionis fructum ab omnium remuneratione (remuneratore) percipiat. Datum Vetrallæ kal. Decembris ». Est Vetralla oppidum haud longe a civitate Viterbiensi. Quæ vero de expeditione ista secuta sint, dicentur pro temporis ratione anno sequenti.

33. *Reditus Eugenii papæ in Urbem.* — Quid autem de Pontifice actum? Utique quod Christus pollicitus fuerat, dicens¹: « Primo quærite regnum Dei et justitiam ejus, et hæc omnia adjicientur vobis », dum Eugenius laborat pro liberatione Terræ-Sanctæ, Deus expugnat inimicos ejus, Romanos ipsos, de quibus hæc habet idem auctor²: « Quos venerabilis Pontifex, percusso prius cum quibusdam fautoribus suis anathematis gladio Jordane creato ab ipsis patricio, adjuncta Tiburtinis Romanorum antiquis hostibus militia coercuit, tandemque pacem petere coegit ». Adeo ut Eugenius rediens in Urbem, ibi Natalem diem Domini solemniter celebravit. De ejus ad Urbem regressu et ingressu hæc idem auctor inferius³: « At Eugenius cum Romanis hoc tempore pacem fecit, ut patriciatus dignitatem exstinguere, (abolere scilicet), et præfectum, qui videlicet arbitrio Pontificis eo munere fungeretur, in pristinam dignitatem reciperent, senatores vero ex ejus auctoritate tenerent. Sicque in Urbem rediens, Nativitatem Domini ibidem celebravit, incipiente anno Dom. Incarn. millesimo centesimo quadragesimo sexto ». Ita incipientibus annis ab ipso solemniter die Dominicæ Nativitatis, id factum sequenti anno dicitur: inchoantes autem annis ab ipsis kalendis Januarii, hoc ipso anno rem gestam legitime consignabunt. In scripto autem Codice Vaticano ita ingressus Eugenii in Urbem narratur:

« Factum est igitur, Deo auctore, gaudium magnum in tota Urbe ex inopinato accursu ipsius Pontificis. Occurrit ei maxima frequens populi multitudo cum ramis; ad ejus vestigia continuo accurrentes, post pedum oscula elevabantur ad oris oscula. Procedebant signiferi cum bandis, sequebantur scriniarii et judices. Judæi quoque non deerant tantæ lætitiæ, portantes cum humeris suis legem Moysaïcam. Universus enim Romanus chorus psallebat in unum dicens⁴: Benedictus qui venit in nomine Domini. Sic itaque cum magno populi gaudio idem Pontifex Lateranense palatium, conscendere meruit ». Hæc ibi.

34. *Petri Cluniacensis adventus Romam ad Eugenium papam, sedandis Etruriæ tumultibus, et quid ei Romæ contigerit.* — Sed et in eo hoc anno idem Eugenius papa magnopere laboravit, ut dissidentes et concertantes inter se implacabili bello Tusciæ civitates, mutua concordia simul concili-

¹ Matth. v. — ² Otto Frising. Chron. I. VII. c. 21 in fin. — ³ Ibid. c. 24. — ⁴ Matth. XXII.

ciliaret. Placuit uti ad tantum opus dignissimo viro Petro abbate Cluniacensi; qui non renuens, ea de causa hoc anno se ad Eugenium contulit. Erat quippe vir sanctitate præcipuus, erga sanctam Romanam Ecclesiam studiosissimus, quem non Eugenius tantum, sed ejus prædecessores omnes plurimi fecerint, percharus in primis sancto Bernardo, ut mutue inter illos datæ Epistolæ docent. Qui cum ipsum Romam profecturum audisset, commendatitias ad Eugenium litteras dedit, in quibus plura de ipso laude digna, et inter alia ista¹: « Nam si nescitis, iste est qui manus suas extendit ad pauperes Ordinis nostri: iste est qui ex possessionibus Ecclesiæ suæ, quantum cum pace potest suorum, libenter frequenterque largitur ad victum ». Porro etsi inter duos magnos istos viros altercatio aliqua intercessit, cum quisque ipsorum veritatem fieri se crederet: tamen non tantum charitas lesa non est, sed sicut ignis exagitationibus magis incenditur, ita majoribus contentionibus magis magisque aucta, in flammis semper vehementioris amoris erupit. Positi ambo in exemplum in Ecclesia Dei religiosi omnibus, de mutua inter se pacis et charitatis unitate in controversiis oriri solitis servanda. Sed jam prosequamur historiam.

35. Porro autem ipsam sui Romam adventus causam refert ipse Petrus, ubi ait²: « Septem deinde annis exactis, cum ad Urbem proficiscerer, causa reformandæ pacis inter Pisanos et Lucenses, etc. » De bellis inter has civitates conflatis hoc tempore, meminit Otto Frisingensis, ubi ait³: « Pisani et Lucenses propter nimiam viciniam opportunitatem indefesso furore bellantes, ruinæ suæ omnes Tusciæ vires implicuere. Nam et Florentini una cum marchione terræ Ulrico, usque ad ipsas portas Senensium procedentes, suburbia ejus cremaverunt: Senenses vero numero et viribus impares se cognoscentes Florentinis, Lucensium auxilium flagitant. Lucenses tam pro ipsis, quam pro comite Guidone Guerra, qui et ipse cum Florentinis atrox bellum gerens eos adierat, Florentinos hostes pronuntiant. Illi autem Pisanis adjuncti non solum Lucenses bello attentant, sed et castella, oppida, agros præfati comitis incendio et rapina devastant. Senenses etiam, qui ad vastandos agros egressi fuerant, insidiis a tergo positis, vix paucis fuga elapsis captivant. Porro ex Pisanis et Lucensibus non tantum plurimi ferro cæsi, compendio mortis miseriam miserabiliter terminare; sed et innumerabiles utrobique comprehensi, ac longa (ut ipse vidi) carceris inedia et squalore macerati, omnibus prætereuntibus lacrymabile humani casus in se spectaculum præbent ». Hæc vidit Otto et refert de rebus Tuscis. Ut intelligas, quam magnam subierit Petrus provinciam in tractanda inter eos pace tempore asperissimi belli.

36. At statum Tusc. admodum deplorandum ob intestina bella inter primarias civitates in primis deplorat vehementer idem ipse Petrus⁴, in Epistola eodem anno data, cum esset recessurus ab Urbe ad Rogerium regem Siciliæ, excusans, non fuisse sibi facultatem ipsum conveniendi, ut instituerat. Recitavimus eam alia occasione superius, sed hic illa tantum repetenda, quibus optare se dicit, ut præset ipse Tusciæ, quo ejus severa iustitia cessarent mala, quæ jugiter perpetrarentur; ait enim: « Utinam (quod secretorum omnium cognitore Deo teste non adulus dico) utinam, inquam, miserabilis et infelicit Tusciæ partes felici vestro imperio cum adjacentibus provinciis adjungerentur, et res perditissimæ pacifico regni vestri corpori unirentur: vere non tunc, sicut nunc, res divinæ atque humane, nullo servato ordine confunderentur, non urbes, non castra, non burgi, non villæ, non strætæ publicæ, non ipsæ Deo consecratæ Ecclesiæ homicidis, sacrilegis, raptoribus exponerentur. Non pœnitentes, non peregrini, non clerici, non monachi, non abbates, non presbyteri, non ipsi supremi ordinis sacerdotes, episcopi, archiepiscopi, primates, vel patriarchæ in manus talium traderentur, spoliarentur, distraherentur, et quid dicam? verberarentur, occiderentur. Hæc plane universa, multaque his similia tam nefanda, tam execranda iustitiæ regiæ gladio succisa cessarent, etc. »

37. Hæc ipse Petrus, qui et in itinere incidit in latronem marchionem Opizonem, a quo est spoliatus, sed opera Placentinorum in integrum restitutus. Rem gestam commemorat paucis idem ipse in Epistola ad Eugenium papam; cum ei commendat populum Placentinum, ubi hæc inter alia⁵: « Ante quinquennium, quando videndi et visitandi vos gratia Romam pergebam, super injuria mihi, imo et vobis a marchione Opizone illata fecerint, quantum inde doluerint, quanta vi fugitantem et latibula quærentem bestiam de fovea sua ad publicum protraxerint, quidquid sorbuerat totum usque ad obolum revomere compulerint, satisfacere tam ipsum, quam sceleris socios, pro arbitrio meo, velent nollent, coegerint etc. »

Venit in Urbem Petrus, antequam primus Eugenii (ut dictum est) annus elaboraretur; fuitque iste primus ejus sub Eugenio papa in Urbem adventus, ut testatur in Epistola ad sanctum Bernardum, hospitatusque est in monasterio Sanctæ Mariæ-Novæ apud ejus loci cardinalem. An autem nuntius pacis, pacem inter dissidentes civitates conciliaverit, nihil invenimus: sed excussisse potius pulverem de pedibus suis contra eos pacem precipientes, ex iis quæ tunc reversurus in Galliam scripsit ad Rogerium Siciliæ regem, quæ audisti nuper, plane possumus intelligere.

38. At quid sibi tunc Romæ, cum hospitaretur in dicto monasterio Sanctæ-Mariæ-Novæ, memoria

¹ Bern. Ep. cclxxviii. — ² Petr. Clun. l. ii. tit. c. 25. — ³ Otto Frising. l. vii. c. 29.

⁴ Petr. Clun. l. v. Ep. xxxiv. — ⁵ Ibid. l. vi. Ep. xlv.

dignum contigerit, scriptis testatum reliquit vir veritatis cultor admirabilis, in posteriori libro Miraculorum, quæ suo tempore acciderant, quæ ipse viderat, vel certa testificatione probata, ab aliis didicerat¹: adeo ut levitatis redargui ea jure non possint, quæ libris illis intexuit. Hæc ut intelligant, quæ præmittit, sunt breviter ingerenda: primum nempe, quod paulo ante discessum, monachum unum ex suis, Willelmum nomine, priorem officio, virum eximie sanctitatis, a quodam ipsi subdito pessimo monacho, qui disciplinam aversaretur, contigit veneno necari. Ita creditum, quod verum, licet de interfectore nulla adhuc potuerit haberi quæstio a primario iudice ipso abbate Petro, cum ipse jam in Urbem urgentibus causis acceleraret adventum. At ubi ventum in Urbem, per eundem ipsum Willelmum necatum Deus voluit certa assertionem manifestari sacrilegum homicidam. Quomodo id acciderit, ab ipso Petro sic accipe:

« In primordiis Pontificatus domini papæ Eugenii, ad visitandum tam ipsum quam communem matrem Romanam Ecclesiam, Romam adii. Illuc perveniens, apud cardinalatum Sanctæ-Mariæ-Novæ, quod juxta antiquum Romuli templum constructum est, hospitium suscepi. Ibi dum nocte quadam quiescerem, ecce vir venerandæ vitæ dominus Willelmus, qui nuper de vita excesserat, mihi dormienti visus est in somno adstare». Et post multa, quibus de nece ipsi illata agit, sic pergit: « Quem cum viderem, valde gavisus surrexit, et multo cum affectu amplecti eum et osculari cœpi. Licet autem altus sopor exteriorum sensuum officia occupasset, vigeat tamen velut in vigilante memoria, neque dormire dormiens non ignorabam. Nec illud mente exciderat, illum qui videbatur in somnis videri: nec eram immemor, aut non multum temporis mortuum, et dolo quem supra scripti extinctum. Quodque magis mirum est, et illud nescio qua vi occulta nature statim menti occurrir, non posse mortuum diu cum vivente morari, nec prolixum sermonem miscere. Unde priusquam recedere virtute invisibili cogeretur, interrogare illum festinanter de quibusdam decrevi. Quæ tamen, ut non phantastica, sed verax, quæ apparebat visio videretur, nequaquam prius præmeditatus fueram, sed tunc ea dormiens, natu, ut arbitrator, Dei, noviter menti occurrentia, cogitare incipiebam. Quatuor ergo quedam, quæ nescio unde dormienti occurrebant, interrogando ei proposui.

39. « Quomodo, inquam, vobis est, domine prior? vocas eum non ex proprio nomine, sed ex

officio. Ad quod ille breviter, ut fuerat semper brevis loquax, ac bis vel ter ex more verba replicans, respondit: Multum, ait, mihi bene est, multum mihi bene est. Huic primæ interrogationi secundam subiunxi: Vidistis adhuc Dominum? et ille: Assidue video, assidue video. His duabus et tertiam addo: Estne, inquam, certum, quod de Deo credimus? estne absque dubitatione vera fides quam tenemus? Nihil, ait, ita verum, nihil ita verum. Et quarto: Verum est, aio, quod fama refert, verum est, quod multi opinantur, quosdam, quos ipsi non ignoratis, fraude sua ac veneficio vos occidisse? Verum est, inquit, verum est. His dietis et ipse disparuit. Et ego evigilans, ea quæ videram recolere et admirari incipiebam. Interim dum hæc agerem, et visa memoriæ commendarem, rursum somno opprimor. Et sicut in hiemalium noctium prolixitatibus (nam dies Adventus Domini tunc instabant) iterum caput ad dormiendum compono. Nec mora, adest qui supra, et se eo modo, quo prius ostendit. Occurro et ego illi non segnius quam ante, et visionis præmissæ omnino immemor, amplecti eum et osculari, ut prius, cœperam. Quid multa? nihil plus minusve in animo meo, nihil plus minusve in ore meo, in hac secunda visione fuit, quam in prima fuerat. Eadem quæ supra interrogo: eadem quæ supra audio de statu suo, de visione Dei, de certitudine Christianæ fidei, de morte sua, ordine quo præmissi, a me interrogatus, eadem, nec pauciora respondit. Huic tamen secundæ visioni in fine aliquid additum est. Mox enim ut dixit, se vere dolo falsorum fratrum extinctum in fletus amarissimos, ut mihi in somnis videbatur, prorupi: et quia jam de facto non dubitabam, tantum nefas insatiabilibus lacrymis deplorabam. In fletibus istis evigilans, oculos humectos, genasque meas recentibus lacrymis tepentes inveni. Ut vero hujus visionis vel somnii indubia veritas commendaretur, regressus ab Urbe, atque ad Galliam nostram rediens, et Cluniacum perveniens, quæ de morte sancti viri suspicatus fueram, ipsius nefarii parricidæ publica confessione vera fuisse probavi, etc. » Audisti visionem potiusquam somnium, utpote veritate constans, et divinitus, ut apparet, immissum. Cujus quidem generis sepe reperies a sanctis Patribus recitata, nec quidem contemptui habita, sed ut oracula divinitus allata ac recepta: et inter alios (quod memoria ad præsens suggerit) sanctus Augustinus hoc fecit², cum Gennadii medici recitat somnium, a Deo ejus causa salutis immissum superius a nobis itidem enarratum.

¹ Petr. Clau. l. ii. Mir. c. 25.

² Aug. Ep. c.

Anno periodi Græco-romane 6638. — Anno Ære Hispan. 1183. — Anno Hegire 549, incognito die 23 Junii, Fer. 7. — Jesu Christi 1145.

— Eugenii III papæ I. — Conradii III reg. 8. Manuensis Comneni imp. 3.

1. *Moritur Lucius II PP.* — Ad num. 1. Gotfridus Viterbiensis in Chron. pag. 512: « Lucius Secundus, inquit, intendens senatum extinguere, cum ingenti militia Capitolium Romæ conscendit, ut sedentes ibi tunc senatores cum dedecore removeret. Senatus autem populusque Romanus ad arma conversus, papam cum suis omnibus a Capitolio in momento repellunt, ubi papa (sicut tunc audivimus) lapidibus magnis percussus, usque ad obitus sui diem, qui proxime secutus est, non sedit in Sede. Cui tunc successit Eugenius, abbas S. Anastasii Romæ ». De lapidis ictu idem refert Baronius numero 1 ex Codice Vaticano, atque nihil de illo habere Ottonem Frisingensem ejus temporis auctorem, sed tantum eum quotidianis cruciatibus affectum diem obiisse; verum cum Viterbiensis hujus etiam temporis scriptor sit, et consentientem habeat Codicis Vaticani scriptorem, non video quod Viterbiensis de illo ictu refert, in dubium revocandum esse. Obiit Lucius II *quinto kal. Martii*, id est, die xxv Februarii, ut tradunt Baronius, Onuphrius in Chron. et Sigonius lib. 11 Hist. de Regn. Ital. seditque *menses undecim, et dies quatuordecim*, ut Baronius et Onuphrius habent, et Sigonius supponit, non vero dies iv supra menses xi, ut perperam legitur in Martino Polono (1). Matthæus Parisiensis, qui in Chron. dies tantum xiii numerat, diem emortualem excludit.

2. *Fuerat canonicus regularis Ord. S. Augustini.* — Joannes Diaconus junior, Basilicæ Salvatoris Patriarchii Lateranensis canonicus, in libro de Ecclesia Lateranensi apud Mabillonium tom. II Musei Ital. verba faciens de Lucio II, ait: « Retro sub absida est altare sanctorum Chrysanthi et Darie, in quo recondita olim fuerant eorum pretiosa corpora, etc. In eadem parte sunt sepultura Apostolicorum, in quibus sanctæ recordationis Lucius papa II. Illic vixit in canonicali proposito longo tempore in Ecclesia ista, atque hinc assumptus presbyter cardinalis ordinatus est in Ecclesia Sanctæ

Crucis in Jerusalem, quam de ruinis a fundamento præclaro et admirando opere renovavit, atque ad normam religionis secundum B. Augustini regulam informatam, ante Apostolatam multis possessionibus ditavit. Sed et istam Ecclesiam, assumptionis suæ memor, et pristinae conversationis, per omnia dilexit, magnisque beneficiis honoravit », quæ ibidem postea sigillatim enumerantur. Fuerat itaque Lucius II canonicus regularis Ordinis S. Augustini.

3. *Lucio II succedit Eugenius III.* — A num. 2 ad 11. Onuphrius et Sigonius recte inquirunt Bernardum S. Anastasii abbatem, S. Bernardi Clara-vallensis discipulum, magnisque animorum consensu *tertio kal. Martii* Pontificem electum esse, et *Eugenium III* appellatum. Baronius existimat, Eugenium die xxvi Februarii Pontificem dictum, quod divus Bernardus in Epistola ad cardinales et episc. de curia post hanc electionem data, et a se num. 8 integra recitata scribat: « Nam idcirco Pisam deseruit, ut reciperet Romam? Quid igitur rationis sui consilii habuit, defuncto summo Pontifice, repente irruere in hominem rusticum, latenti injicere manus, et excussa e manibus securi et ascie vel ligone, in palatium trahere, levare in cathedram, induere purpura et bysso? etc. » Verum Bernardus in Epistola illa rhetoricatur, tantumque indicat, Eugenium III cito electum, secundo nempe a prædecessoris obitu die. Has voces, *statim, mox, repente*, et alia hujusmodi tempus significantes magnam latitudinem habere passim in hoc Opere significavimus, qui eas hallucinationum seminarium fuisse deprehendimus.

4. *Ordinatur die quarta Martii.* — Anonymus Casinensis Lucii papæ morte relata, subdit: « Qui tertio die snæ electionis nocte (inter primum et secundum Martii diem, feriamque v et vi) cum omnibus cardinalibus et episcopis Roma egressus fugit, et apud Farfensem abbatiam Pontifex consecratur, et apud Biturum (id est Viterbium) Pascha ce-

(1) Diem emortualem Lucii II ex cardinali Aragonio desumpsisse Baronium, ceterosque arbitror, sed mendose ibi scriptum esse V kal. pro XV kal. vix dubito, cum vetus Cassinense Necrologium in tom. VII Rerum Italicarum pag. 940, obitum ejusdem Pontificis, die illis XV kal. Martii consignet. Hujus autem scripti fides eo assertor est, quo in obitu aliorum Pontificum consignando nunquam errat, ut in obitu Stephani IX, IV kal. Aprilis, Gelasii II ad IV kal. Februar., Honorii II ad XVI kal. Martii etc. constat. Illis autem admissis, tempus Sedis recte a Martino, Bernardo Guidonis, et Pandolfo Pisano ad menses xi, dies iv definitur.

lebrans, ibique per octo menses remoratus, demum cum Romanis paciscens Romam reversus est ». De Farfa insigni Ordinis Benedicti monasterio, in territorio Sabinensi sito, quod Roma tantum distat xxv passuum millibus anonymus loquitur, indicatque Eugenium III in Farfensi monasterio die quarta mensis Martii, quæ in Dominicam cadebat, Romanum Pontificem consecratum fuisse. Disertius illud narrat Otto Frisingensis, qui hoc ipso anno Romæ versabatur. Is lib. 7 Chron. cap. 31, de Eugenio ait : « Hic in principio dignitatis susceptæ, eo quod auctore Arnaldo, populus ad tradenda Urbis regalia, sicut antecessores suos ita ipsum sollicitare vellet, cum episcopis et cardinalibus Urbe cedit, ac proxima Dominica in monasterio Farfensi, consecratione Pontificali ob persecutionis immanitatem morem mutans, sublimatur ». Quare accurate in Annalibus Waverleiensibus nuper in Anglia publicatis, hoc anno traditur : « Fuit ordinatus prima hebdomade mensis Martii, et vocatus est Eugenius, papa cxxxi ». Prima autem Martii hebdomada die quarta Martii inchoatur. Quæ verba etiam sine ulla immutatione extant in Chron. Normanniæ in fine Historiæ Orderici a Duchesno edito. Hic obiter notabo monasterii Waverleii Ordinis Cisterciensis Annales extare tom. II Collectio- nis Oxoniensis.

5. *Ejus ordinatio tardius differri non debet.* — Baronius num. 3 refert ordinationem Eugenii III ex Codice Vaticano, in quo dicitur *cum proxima die Dominica* consecrari debuisset, « præcognito senatorum perverso consilio, noctis silentio Urbem cum paucis fratribus exiisse, et ad arcem Monticelli se in tutum recepisse ». Congregatis vero alia die cunctis patribus, processisse ad Farfense monasterium et consecrationis gratiam in sequente Dominica suscepisse ». Quibus ex verbis consequi videtur, *Eugenium III* Dominica secunda mensis Martii consecratum esse. Verum anonymus ille de unica Dominica loquitur, eamque modo proximam, modo sequentem Dominicam vocat. Castrum enim Monticelli, ut vel ex Chartis Sansonis apparet, in Sabinis situm, et Farfensi monasterio vicinum.

6. *Anno sequenti Eugenius III iterum fugere coactus fuit.* — A num. 11 ad 22. Epistola cxxli divi Bernardi, nunc cclm, ad Romanos data, et Epistola cclm ad Conradum Romanorum regem, quæ novo ordine est cxxlv, pertinent ad annum sequentem, et ad secundam *Eugenii III* fugam, ut recte vidit Sigonius lib. 11 de Regn. Ital. quo etiam anno a Mabillonio in margine notantur. Supra diximus ex anonymo Casinensi *Eugenium III* Viterbii per octo menses remoratum esse, et postea cum Romanis paciscentem Romam reversum; sed cum Romaneditionem redintegantes rursum ab eo, ut Tibur everteret, postulassent, et ni quod peterent, impetrarent, vim adhibuituros ostenderent, *Eugenius III*, consilio cum cardinalibus habito, rursus Urbe cum eis cedere statuit, Tiburque contendit. Quod cum accepisset *divus Bernardus*, anno sequenti

laudatas ad Romanos et ad Conradum Epistolas dedit. Aspere, sed juste Romanos in priori increpat, quod tam iniqui in Pontificem essent, atque eos Dei vindictam non evasuros, nisi mox resipiscant. Romanos impellebat *Arnaldus* hæreticus, dum antiquæ reipublicæ ac libertatis formam restituere nitebantur, sola sacerorum cura Pontifici relicta, et vectigalia Pontificum sibi vindicabant, volentes Pontificem decimis et oblationibus tantum more prisco contentum vivere. *Arnaldistæ* dicuntur hæretici a *Bonacurso*, qui Henricianos, sese *Catharos*, id est, solos mundos jactantes, confutavit; quoniam errores eorum Mediolani, dum eorum magister esset, in apertam lucem posuerat. Libellum ejus publicavit Bacherius tom. xii Spicilegii. Bonacursus eos *Passagiis* et *Catharis* adiungit, quorum illi Mosaicæ legis ritus omnes observandos esse docebant, Filii et Spiritus sancti aequalitatem negabant, et Ecclesiæ universæ doctores omnes, Romanæque imprimis auctoritatem abjiciebant; Arnaldistæ vero asserebant per malos ministros sacramenta irrita esse.

7. *Legatio Orientalium ad papam.* — A num. 22 ad 27. Dum adhuc Viterbii *Eugenius* commoraretur, missa ad eum ex Armenia atque Syria legatio, quam Baronius recitat ex Ottone Frisingensi, qui Romæ erat : « Audivimus autem (nempe Syriæ legatum) periculum transmarinæ Ecclesiæ post captam Edessam lacrymabiliter conquerentem, et ob hoc Alpes transcendere ad regem Romanorum et Francorum pro flagitando auxilio volentem ». Edessam autem die Natali Christi superioris anni a Turcis captam ibidem demonstravimus. Quare nonnisi currenti tantæ cladis nuntium in Italiam, Galliamque proferri potuit.

8. *Legatio Armeniorum ad papam.* — Combesius in Auctario Biblioth. Patrum tom. II invectivas duas *Isaaci Catholici* contra Armenios a se Notis illustratos publicavit, illumque non longe ab anno isto quo Armeniorum legationem ad Romanum Pontificem Baronius narrat, omnibus Armeniæ episcopis primatis jure præsedisse ex eo colligit, quod *Constantinum* ante octingentos annos a suo tempore baptizatum tradat. Armenii legationem hoc anno ad Pontificem Romanum misere, eumque super iis in quibus a Græcis dissentiebant, judicem postularunt. Otto Frisingensis pauca quædam duntaxat ad sacrificii ritum ac cærimonias commemorat, quæ ut Armenii sola exposuerint, majoribus aliis ac spectantibus ad fidem suppressis, sicque Ecclesiæ Romanæ communionem furati sint, eorum gentis astutiæ fuerit, quam auctor in eis insecratur, quamque olim Gregorius Nazianzenus in Armeniis detexit. Legendæ Combesii in utramque orationem Notæ, et observandum Ottonem Frisingensem apud Baronium num. 23 a legato deceptum fuisse quando scribit : « Inter ipsos (id est, Armenios) et Græcos quædam de sacrificii ritu habitudo est in quibusdam, in aliis vero discrepantia. Ponunt enim fermentatum pa-

nem, sicut et illi : aquam autem vino non admiscunt, sicut nos et illi ». Constantissimum enim est, inquit Combefisius, ante *sanctum Niconem* Armenia oriundum azyma apud Armenios viguisse, nec postmodum abjecta fuisse inducto fermento.

9. *Presbyter Joannes in Asia regnat.* — « Narabat etiam », inquit Otto Frisingensis lib. 7, cap. 33, loquens de Gabulensi episcopo a Syria misso, « quod ante non multos annos Joannes quidam (qui ultra Persidem et Armeniam, in extremo Oriente habitans, rex et sacerdos cum gente sua Christianus est, sed Nestorianus) Persarum et Medorum reges fratres, Saniardos dictos, bello petierit, atque Ecbatani sedem regni eorum expugnaverit. Cui dum præfati reges cum Persarum, Medorum et Assyriorum copiis occurrerent, triduo, utrisque magis mori quam fugere volentibus, dimicatum est, presbyter Joannes (sic enim cum nominare solent) tandem versis in fugam Persis, cruentissima cæde victor exiit. Post hanc victoriam dicebat, prædictum Joannem ad auxilium Jerosolymitanæ Ecclesiæ procinctum movisse, sed dum ad Tigrim venisset, ibique nullo vehiculo traducere exercitum potuisset, ad Septentrionalem plagam, ubi eundem annum hyemali glacie congelari didicerat, iter flexisse. Ibi dum per aliquot annos moratus, gelu expectaret, sed minime hoc impediens aeris temperie, obtineret, multos ex insueto cælo de exercitu amittens, ad propria redire compulsus est ». Baronius num. 25 dicit presbyterum Joannem Æthiopiarum regem fuisse; verum hunc regem, hoc sæculo nominatissimum, in Asia, non vero in Africa regnasse, nunc extra omnem controversiam esse debet, ut vel locus laudatus demonstrat. De isto rege, ejusque regno anno MCLXXVII sermo erit.

10. *S. Bernardus scribit ad Robertum Pullum card. et cancell. S. R. E.* — Ad num. 27. Epistola divi Bernardi, alias CCCXXXIV, nunc vero CCLXII, a Baronio num. 27 recitata, non ad Rolandum ut ex Codicibus editis Baronius habet, sed ad Robertum Pullum cardinalem et cancellarium scripta, ut deducit Mabillonius in Notis ad eum ex Codice Ms. Cisterciensi, et quia is, de quo in illa agitur antiquus Bernardi amicus erat, litteris et eruditione clarus, ac demum cancellarius, *præmissus* ad Eugenii adiutorium; quod præter alia, Roberto Pullo signanter convenit. Robertus Pullus usque ad annum in Eugenii, teste Onuphrio, cancellarii munus gessit : Rolandus vero illud adeptus non est ante vii ejusdem Pontificis annum. Recens autem electus erat Eugenius, cum sanctus Bernardus hanc Epistolam scripsit. Fallitur enim Ciaconius in Eugenio III, ubi enumerans cancellarios S. R. E. sub hoc Pontifice, ait Robertum ab anno Pontificatus ejus primo usque ad quintum dignitatem illam obtinuisse; cum anno MCLXVI, num. 9 et sequitur simul eo officio tunc functum fuisse Guidonem card.

11. *Non vero ad Rolandum cardinalem et cancellarium.* — Robertum vero Pullum ipso Pontificatus Eugenii III principio cancellarium extitisse, demonstrat Diploma ejusdem Pontificis, quod extat in fine Tractatus de Gestis episc. Turonens. et abbatum Majoris-Monast., pag. 430 et seqq. : « Datum apud civitatem Castellanam per manum Roberti S. R. E. presbyteri card. et cancellarii, V idus April., Indict. viii, Incarnat. Dominicæ anno MCLXIV, Pontificatus vero domini Eugenii III papæ anno primo ». Denique Robertum anno MCLXVI cancellarii Romanæ adhuc præfuisse docet Eugenii III Diploma, tom. x Concil. pag. 1849 productum. Quare Joannes prior Hagustaldensis in Hist. ad annum MCLXVI, qui juxta rectam Chronologiam est annus MCLXVI, accurate scripsit : « Præeminuit his diebus in clero Rodbertus Pullanus cancellarius Apostolicæ Sedis, in omni sapientia et doctrina experientissimus, Britannia oriundus ». Ciaconius itaque citatus recte ait, Guidonem cardinalem SS. Cosmæ et Damiani cancellarium fuisse post Robertum, illoque mortuo, *Rolandum*, qui postea fuit Alexander papa III, cancellarii munus anno Pontificatus Eugenii vii consecutum esse, et denique in prima creatione cardinalium hoc anno ab Eugenio peracta Rolandum dictum esse card. presbyterum tituli S. Marci.

12. *Conventus Bituricensis.* — A num. 28 ad 34. Eugenius III, kalend. Decemb. *Vetrallæ*, quod oppidum non longe a civitate Viterbiensi situm, ageret, litteris ad Ludovicum VII Franciæ regem datis, et a Baronio num. 30 recitatis, sollicitavit eum ad protectionem in Terram-Sanctam suscipiendam. Odo de Diogilo monachus Sancti-Dionysii, et in abbatiam ejusdem monasterii Sugerii successor, septem libellos edidit de Ludovici VII Francorum regis protectione in Orientem, a Petro Francisco Chiffletio in *Asserto Genere Illustri* sancti Bernardi a tenebris erutos, quibus Historia Ecclesiastica locupletari potest. In priori libello hæc habet : « An. Verbi incarnati MCLXVI, (a die Natali Christi inchoato) gloriosus rex Francorum, etc. ut dignus esset Christo, Vezaliaco in Pascha (sequentis Christi anni) bajulando crucem suam aggressus est eum sequi. In Natali Domini præcedenti (hujus anni secundum Æram vulgarem) cum idem pius rex Bituricas curiam celebrasset, episcopis et optimatibus sui regni ad coronam suam generalius solito de industria convocatis, secretum cordis sui primitus revelavit. Tunc religiosus vir (Godefridus), episcopus Lingonensis, de Robes, quæ antiquo nomine vocatur Edessa, depopulatione, et oppressione Christianorum, et insolentia paganorum, satis episcopaliter peroravit, et de flebili materia fletum plurimum excitavit, monens omnes, ut cum rege suo, ad subveniendum Christianis, regi omnium militarent. Ardebat et lucebat in rege zelus fidei, contemptus voluntatis et glorie temporalis, exemplum omni sermone præstantius. Tamen quod serebant verbo

episcopus, rex exemplo, non illico messuerunt. Statutus est ergo dies alius Verzeliaci in Pascha (sequentis Christi anni), quo in Passione Domini omnes unanimiter convenirent; et in Resurrectione, quibus foret cælitus inspiratum Crucis gloriā exaltarent. Rex interim pervigil in incepto, Romam Eugenio papæ super hac re nuntios mittit. Est Verzeliacum, seu melius Vezeliacum, urbs in Autissiodorensi tractu posita.

13. *Projectionem Orientalem ex voto suscepit Ludovicus VII.* — Chronographus Mauriniacensis, qui annum a die Natali Christi exorditur, hæc in rem nostram habet: « Eodem quoque anno Edessa civitas ab inimicis crucis Christi, nostrorum dormitante providentia, capta, Saracenorum dominationi repente accessit. Unde et eos, qui in regione Hierusalem adjacente manebant, doloris inmoderata angustia usque ad intima perculit. Venerunt ergo ab Antiochia et Hierusalem in nostram regionem (nempe in Galliam) legati a primoribus partium illarum missi suppliciter exorantibus, ut Francorum invincibilis probitas periculum quod evenerat emendaret, et futura repelleret ». Subdit chronographus, regem *celsiores regni sui* in Pascha apud Vizieliacum convocasse, et omnes suos allocutum esse. Inter alia in ejus oratione memorata hæc observanda: « Magnam super hoc scilicet jam mihi devotionem incumbere. Unde et vos obnixè deprecor, ut meam studeatis voluntatem vestro comitatu et auxilio roborare ». Legitur in Chron. Cisterciensi Ms. a Chiffletio in Præfatione ad libellos Odonis de Diogilo citato, et apud Robertum de Monte, compluresque alios, ad sanctum Sepulchrum peregrinationem illam susceptam ex voto a Ludovico rege, compuncto ob incensum castri Vitrici Basilicam, cum mille et trecentis promissuæ multitudinis, quæ in eam confluerant, capitibus in ea inclusis. *Vitriacum*, quod *Victoriacum* alias appellabatur, *Vitriacum Incensum*, gallice, *Vitri le brûlé* postea appellatum fuit, propterea quod a Ludovico VII igne consumptum est. Cujus in locum Franciscus I, Francia rex, illud ad thumini Matronæ ripas extruxit, quod ab ipso *Victoriacum Francisci* cognominatum est, *Vitri le François*, ut notat Hadrianus Valesius in Not. Galliarum.

14. *Obitus Tessephini Almorabitarum imp.* — Anno superiori Mauri Hispaniam habitantes ab *Almohadibus* valide oppugnabantur, et *Tessephinus* eorum imperator eis auxilium ferre non poterat. Ingentem exercitum adversus *Abdelmumen* congregarat, uti narrat Nowcirus; verum in bello exercitatus sese intra montes continuit, interimque *Tessephini* exercitus in cœnosa planitie, ubi castra posita fuerant, fame et morbis perit; eoque dissipato *Tessephinus Oranum*, celebre oppidum ad mare situm, fugit. Cumque aliud aylum quæsisset, rursumque eum *Abdelmumen* persecutus esset, equo decedit, interitque, exeunte anno Hegiræ dxxxix, ideoque currentis anni hyeme. *Tessephi-*

mus illustribus quibusdam facinoribus magnum sibi nomen collegit, sed cum ei fortuna minus arrisisset, a suis contemptus fuit, ut videre est in Historia Arabum a Roderico scripta, et ex ejusdem nationis auctoribus collecta, ubi cap. ultimo inquit: « Quia viderunt a regalibus actibus alienum, in eum ubilibet insurgabant, ubique, et quilibet rebellabant, et gueris indesinentibus infestabant, et fere perdidit totum regnum, et hoc fuit anno Arabum quingentesimo trigesimo nono (præsenti Christi anno absoluto) et regnum Wandalie (Hispaniæ nempe, quam multoties monimus *Vandaliam* dictam fuisse, indeque criticos, qui illud non animadvertere, sæpius in errore incidisse) quinquaginta tribus annis possederant, citra mare ».

15. *Post ejus mortem magnæ turbæ inter suos excitatæ.* — *Jussephus* seu *Juffelus* Marochii rex, et Almorabitarum seu Almoravidum imperator regnare cœperat anno Christi mxc, ut ibidem narravimus: « Totam terram Wandalie », inquit Rodericus citatus cap. 48, « occupavit, et fuit monarcha ultramarinus et cismarinus, et duravit sibi (ubi Alim filium ejus et Tessephinum nepotem comprehendit) hujusmodi monarchia annis quinquaginta quinque, ab anno Arabum quadringentesimo octogesimo quarto (anno Christi mxc inchoato,) usque ad quingentesimum trigesimum novum annum (hoc Christi anno finitum), quando per Almohades dominium perdiderunt », seu, ut capite superiori dixerat, « donec venientes Almohades ab Africa et Wandalia, Amoravides extirparunt ». Hoc itaque anno maxima Maurorum Hispaniensium pars a Mauris Africanis discessere, et quilibet quæ potuit in Hispania Saracenica occupavit. *Almoravides*, seu quod idem est *Almorabites*, qui *Marochiæ* incolebant, ubi imperatoris sui mortem accepere, fratrem ejus ad thronum regium evexere, ut inquit Nowcirus, interimque *Abdelmumen*, de quo suo loco locuti sumus, *Oranum* et *Fezzam* majores Africæ civitates occupavit. Mauri Hispaniæ, Valentiam Mursiam, Tortosam et Herdam incolentes omnium Africanorum cædem fecere, et *Safadaula* rex Cordubæ populos Bæticam inhabitantes ducens, non minori crudelitate in Cordubam, Granatam, Giennam et Anduxartam sævit. *Abengania* prorex, vir fortis et magnanimus, Cordubæ arcem conservavit; sed qui ei adhærebant, nullum ex Africa subsidium expectare poterant, quia ibi Musmudes et Calters Almorahidini omnia igne et cædibus miscebant. Numquam in Hispania tantum barbarum extitit; sicut enim in Africa, ita et in Hispania Mauri inter se dispugnabant. *Alphonsus VII*, Castellæ rex et imperator copias ad *Safadaulam* regem, Christianorum amicum misit, sed parum profecit, quia Mahmmetani valde a *Safadaula* abhorrebant, eumque tanquam infidelem et Christianorum fautorem habebant. Porro cum tunc monarchiæ Almorabitarum Historiam suam Saracenicam Rodericus Toletanus absolvit.

EUGENII III ANNUS 2. — CHRISTI 1146.

1. *Eugenius III rursus infestatur a Romanis.*
— Sequitur Redemptoris annus millesimus centesimus quadragesimus sextus Indictione nona, quo Eugenius papa iterum a Romanis Arnaldistis exagitari coëptus, cogitur e Lateranensi palatio decedens trans Tiberim se conferre; id enim Otto Frisingensis istis verbis¹: « A populo Romano pro excidio Tiburtinorum in tantum de die in diem sollicitatur, ut a Lateranensi palatio, improbitatem eorum non sustinens, ad Transiberinam regionem migrans, animam suam vite suæ tædere confiteretur ». Hæc Otto. Erat trans Tiberim munio Sancti-Angeli, quam filios Petri Leonis Pontificis amicos tenere superius dictum est, in quam se Eugenium recepisse ad evitandum populi insanientis furorem, existimamus.

2. *In Concilio Carnotensi decernitur expeditio Hierosolymitana cujus primarius dux S. Bernardus.* — Interea autem in Galliis fervet opus parandæ expeditionis in Terram-Sanctam: cujus causa promovendæ statuitur certa dies certusque locus Concilii celebrandi. Dies indicitur tertia Dominica post Pascha, et locus deputatur Carnotum civitas. De his enim ita S. Bernardus in Epistola ad Petrum abbatem Cluniacensem²: « Episcopi Franciæ una cum domino rege et principibus tertia Dominica post Pascha apud Carnotum venturi sunt, et de verbo hoc tractaturi: ubi utinam mereamur habere præsentiam vestram. Quia enim magnis omnino magnorum virorum consiliis hoc verbum constat egere: gratum profecto obsequium præstabitis Deo, si negotium ejus a vobis non duxeritis alienum, etc. » Multis quidem eum invitat; sed indictum jam ab ipso omnium priorum Cluniacensium capitulum ne ire posset, eum detinuit, ut ejus litteræ ad S. Bernardum reddite docent, in quibus hæc inter alia³: « Quem enim Christianum, in Christo suo aliquam spem habentem fama tam lamentabilis non moveret, qua, ut ex litteris etiam domini abbatis S. Dionysii comperi, jam pæne ubique divulgatum est, fratres

templi, regem Hierosolymitanum, ipsam insuper Dominicam ac salvatricem Crucem in urbe Antiochena cum aliis multis obsessos: ac nisi manus Domini in brachio extento cito succurrat, omnes in brevi captivandos? Quem non moveat, ne forte terra illa sancta a jugo impiorum, tantis patrum laboribus, tanto Christicolarum sanguine ante non multum temporis erula, rursus impiis et blasphemis subdatur? Quem non moveat, si tam salubris peccatorum pœnitentium via, quæ (ut dignum est credere) innumera peregrinantium millia, a quinquaginta jam annis inferis abstulit, cælo restituit, nequam Sarracenorum obice obstante claudatur? Absit, absit, etc. »

Extant de his ipse Sugerii abbatis S. Dionysii tunc datæ litteræ ad eundem Petrum Cluniacensem, invitantis ipsum ad indictum ea de causa Concilium; et ipsius Petri ad eum ejusdem argumenti redditæ litteræ, quibus et significatur, idem Concilium fuisse generale ex omnium Galliarum provinciis episcopis, et archiepiscopis. Conveniunt igitur undique ex Galliis Carnotum archiepiscopi, episcopi et abbates, adstifit et rex una cum principibus regni. Quid actum ibi? illud in primis plane mirandum quod obstupefaciet omnes audientes: dum videlicet ibi totius belli dux ipse S. Bernardus omnium consensu deligitur, qui principem militiæ agat, cui milites omnes et principes ipsi subicerentur; hoc decretum in Concilio consensu omnium. Hæc ne tu putes fabulam, describendæ hic sunt litteræ S. Bernardi ad Eugenium papam de his agentis, primumque studium Eugenii ex scriptis ab eo litteris commendantis, eundemque ad ulteriora hortantis, atque ad postremum quid actum in Carnotensi Concilio, enarrantis. Sic enim se habent⁴:

3. « Non est leve verbum quod sonnit, triste satis et grave est. Et cui triste? imo cui non triste? soli filii iræ iram non sentiunt, nec tristantur tristibus, sed letantur et exultant in rebus pessimis. De cætero, communis tristitia est, quia communis est causa. Bene fecistis justissimum zelum nostræ

¹ Otto I. VII. Chr. c. 34. — ² Petr. Cluni I. VI. Ep. VII. — ³ Ibid. Ep. XX.

⁴ Bern. Ep. CLXVI.

Gallicanæ Ecclesiæ collaudando, et corroborando auctoritate litterarumstrarum. Non est (dico vobis) in causa tam generali et tam gravi tepide agendum, sed ne timide quidem. Legi apud quemdam sapientem : Non est vir fortis, cui non crescit animus in ipsa rerum difficultate. Ego autem dico : Fideli homini magis et inter flagella fidendum. Intraverunt aquæ usque ad animam Christi, tacta est pupilla oculi ejus. Exerendus est nunc uterque gladius in passione Domini, Christo denuo patiente, ubi et altera vice passus est. Per quem autem, nisi per vos? Petri uterque est, alter suo nutu, alter sua manu, quoties necesse est, evaginandus. Et quidem de quo minus videbatur, de ipso ad Petrum dictum est¹ : Converte gladium tuum in vaginam. Ergo suus erat et ille, sed non sua manu utique educendus. Tempus et opus esse existimo, ambos educi in defensionem Orientalis Ecclesiæ. Cujus locum tenetis, zelum negligere non debetis. Quale est hoc, principatum tenere, et ministerium declinare? Vox clamantis : Venio Hierosolymam item crucifigi. Ad quam vocem etsi alii tepidi, alii et surdi sint, successori Petri dissimulare non licet. Loquatur et ipse² : Etsi omnes scandalizati fuerint, sed non ego. Nec terribitur damnis prioris exercitus, quibus magis resarciendis operam dabit. Numquid ideo non debet facere homo quod debet, quia Deus facit quod vult?

4. « Ego vero pro tantis malis, tanquam Christianus et fidelis, meliora sperabo, et omne gaudium æstimabo, quod in varias tentationes incidimus. Revera panem doloris comedimus, et potati sumus vino compunctionis. Quid diffidis, amice sponsi, quasi non more suo vinum bonum servaverit usque adhuc benignus et sapiens sponsus? Quis scit, si convertatur et ignoscat Deus, et relinquat post se benedictionem? et certe sic operari, sic judicare superna divinitas solet. Scienti loquor. Quando autem magna bona mortalibus provenerunt, quæ non magna prevenerint mala? Nam ut cætera taceam, nonne illud unicum et singulare beneficium nostræ salutis præcessit mors Salvatoris? Tu ergo, amice sponsi, amicum te in necessitate probato. Si triplici illo amore, de quo tuus interrogatus est prædecessor³, tu quoque toto corde, tota anima, tota virtute Christum diligis, ut oportet : nihil reservabis, nihil dissimulabis in tanto periculo sponsæ ejus, sed quicquid habes virum, quicquid zeli, quicquid sollicitudinis, quicquid auctoritatis, quicquid potestatis impendes. Singulare periculum singularem exigit operam. Fundamentum concutitur, et tanquam imminenti ruinæ totis est nisibus occurrendum. Et hæc propter vos fidenter quidem, sed fideliter dicta ». Subdit autem de his quæ gesta essent in conventu illo Carnotensi, his verbis :

5. « De cætero verbum illud, quod jam (ni fallor) audistis, quomodo videlicet in Carnotensi

conventu (quoniam judicio satis miror) me quasi in ducem et principem militiæ elegerunt : certum sit vobis, nec consilii mei, nec voluntatis meæ fuisse vel esse, sed nec possibilitatis meæ (quantum melior vires meas) pervenire usque illuc. Quis sum ego, ut disponam castrorum acies? ut egrediar ante facies armatorum. Aut quid tam remotum a professione mea, etiamsi vires supplerent, etiam si peritiam non deesset? sed neque hoc meum est, vestram docere sapientiam. Nostis hæc omnia. Tantum obsecro per illam charitatem, qua mihi specialiter debitor estis; ne me humanis voluntatibus exponatis; sed sicut singulariter vobis incumbit, divinum consilium perquiratis, et operam detis, ut sicut fuerit voluntas in cælo, sic fiat ». Hucusque ad Eugenium papam S. Bernardus, in spiritu quidem ardoris eum hortando, et spiritu humilitatis ejus consilium rogando de his quæ essent agenda.

At quid ad hæc Eugenius papa? Satis visum, si S. Bernardus tuba sacerdotali indiceret bellum, et sive verbis docens, sive concionibus, sive scriptis litteris, ubi adesse non posset, Christianum populum excitaret. Quod et quam felicissime præstitit, et utique sequentibus signis, quibus Dei voluntas evidens cunctis fieret, atque hoc Dei opus esse, cui ipse tot signis, quot litteris subscribere videretur. Nam audi quæ de his tunc scripta sunt a Gofrido in Vita S. Bernardi verbis istis¹, post declaratum de his Eugenii papæ ipsi exhibitum munus prædicandi et annuntiandi bellum sacrum fidelibus : « Evidenter enim, inquit, verbum hoc prædicavit, Domino cooperante, et sermonem confirmante sequentibus signis. Sed quantis et quam multiplicibus signis? quanta vel numerare, nedum narrare, difficile foret. Nam et eodem tempore scribi creperant, sed ipsa demum scriptorum numerositas scribendorum, et materia superavit auctorem : mirum cum aliquando una die viginti, seu etiam plures ab incommodis variis sanarentur, nec facile ab hujusmodi dies ulla vacaret. Denique plures eo tempore Christus per servi sui factum et orationem, ex ipsis etiam matrum uteris cæcos videre, claudos ambulare, aridos convalescere, surdos fecit audire, et mutos loqui, mirabilis restituit gratia, quod minus præstitum fuerat a natura ». Hæc ipse. At quantum profecerit, vix credi potest. Quisnam nomen non daret sacræ militiæ, cum tanto tonitruo audiretur vox Domini in virtute, vox Domini in magnificentia? Vis scire quantum profecerit, audi ista in fine Epistolæ ad eundem Eugenium papam ita scribentem² : « De cætero, inquit, mandastis et obedivi; et fecundavit obedientiam præcipientis auctoritas³. Siquidem annuntiavi et locutus sum, et multiplicati sunt super numerum. Vacuantur urbes et castella, et pene jam non inveniunt quem apprehendant septem mulieres virum nutum, adeo ubique viduæ vivis remanent

¹ Joan. XXVII. — ² Matth. XXVI. — ³ Joan. XXI.

¹ Vit. S. Bern. I. IV. c. 4. — ² Bern. Ep. CCXLVI. — ³ Psal. XXXIX.

viris ». Hæc ad Eugenium papam S. Bernardus, et quidem florida.

6. *In quo Ludovicus rex deliquit, unde infelicem belli exitum sit expertus.* — Ita plane. Quod enim auctoritate Apostolica indictum est bellum, episcoporum Concilio probatum, sanctorum prædicationibus annuntiatum, signis et miraculis comprobatum, causa (quod prætermiseram) iustissima promulgatum, atque ut apparet, undique sanctificatum (quod faciendum monuit Jeremias ¹) : Quid minus habuit, ut non faverit ipsi Deus, qui voluit ipsum? Sed terribilis plane « Deus in consiliis super filios hominum », ait Psalmus ². Fuit sane (quod diximus) voluntas Dei, et utique bona, sed an beneplacens in omnibusque perfecta, hoc exacte inquirendum, monet Apostolus ad Romanos scribens, cum ait ³ : « Reformamini in novitate sensus vestri, ut probetis quæ sit voluntas Dei bona, et beneplacens, et perfecta », in bono probando opere; bona utique Dei voluntas accessit, sed in offerente non sibi Deus complacuit, nec fuit voluntas Dei in eo. Non ergo respexit ad offerentem, licet bona quæ essent offerret, sicut nec ad Cain, nec ad munera ejus⁴. Quid enim ab offerente requiritur, Evangelica lege? « Vade prius, inquit Dominus, ⁵ reconciliare fratri tuo » multo magis patri tuo, magis magisque vero patribus tuis. Quotnam autem sanctos episcopos suarum sedium rex esse ipse fecit extorres, et suis privavit pastoribus Ecclesias, jam tu ipse audisti ex litteris ejusdem S. Bernardi superius recitalis. At dixerit quispiam : Emendavit rex ista. Inno certum est non corripisse, et adhuc ea de causa Ecclesias interdicto perseverasse subjectas. Est de his evidentissimum testimonium, quod Eugenius papa severe admodum Apostolica censura punierit Rhemensensem archiepiscopum, eo quod Carnoti, ubi conventus ille pro expeditione Hierosolymitana ageretur, diceretur celebrasse Missam in loco interdicto, et solemniter ritu coronasse ipsum regem, cujus rei causa eundem archiepiscopum privaverit pallio. Quod tamen displicuit mirum in modum sancto Bernardo, timenti ne rex hujusmodi occasione successus, a proposito resiliat : quam ob causam has tunc ad Eugenium litteras dedit ⁶ :

7. « Amatissimo patri et domino Eugenio, Dei gratia summo Pontifici, Bernardus Claravallensis abbas, modicum id quod est.

« Pareat vobis Deus, quid fecistis? faciem hominis verecundissimi confudistis, et cujus laus est in Ecclesia, ipsum in facie Ecclesiæ humiliastis, lætificastis omnes inimicos ejus, sed quantos vos contristasse putatis? Non est modus condolendi, quia amicorum non est numerus. Directus a Deo et hominibus grandis criminis luit poenas, nullius convictus, nullius confessus. Tenemus, Phinees sentimus zelum : Israelites perfoditur, sed non

cum Madianitide. Imponitur ei quod regem coronavit : sed in hoc non existimat excessisse se tenorem privilegiorum suorum. Objicitur quod scienter divina præsumpserit celebrare in Ecclesia interdicta; negat. Suo tempore probabitur illud, purgabitur istud. Esto autem, pulemus omnia constare, quæcumque in absentem adversariis ejus licuit, aut libuit loqui : debuitne hoc solo excessu, cujus cætera laudabilia existerunt, tam dure feriri, tam severe animadverti? semel excessisse etiam virtus poterat reputari, si de vestro, non de vultu inimicorum ejus judicium prodidisset.

8. « Deinde quid in arcto illo fieri oportebat? Dies celebris, sollemnis curia, juvenis rex; et quod his majus est, Dei negotium, de Hierosolymitana scilicet expeditione, propter quod omnes convenerant. Prorsus hæc omnia, missarum, et coronæ regiæ sollemnis, debitive honoris frustrationem nullatenus admittebant. Sed nec ipsi Bituricensi archiepiscopo omnino expediebat, ut honor regis per eum impidiretur. Quæ cum ita se habuerint, æstimamus locum misericordiæ non deesse, ubi tanta necessitas typum excusat contumaciæ: Numquid potestatem habetis tantum percutere, et nequaquam sanare? Nostis qui dixerit: Percutiam, et ego sanabo. Absit, ut cujus tenetis vicem, non usurpetis et vocem, vocem præcipue pietatis. Ergo sola hac vice redeat sagitta Jonathæ retrorsum, et si necesse fuerit, in me magis mittatur. Tolerabilius fateor, habuissem interdicti mihi missarum celebrationem, quam archiepiscopo pallii usum.

« Est etiam quod non mediocriter vestro pio rigori obviat in hac parte, quod filio vestro regi Ludovico possit hinc non parvæ offensionis et irritationis occasio dari, cum ipse sibi tota mali hujus videatur esse occasio. Quod plane tempore isto non expedit, ne bonum, quod vestro hortatu bono et magno animo cepit, dignum (quod absit) non habeat exitum, si in scandalo et animi perturbatione hoc egerit ». Pergit dicere de copioso proventu ex prædicatione collecto, quem nuper recitavimus.

9. Sic igitur vides, lector, non extincta, nec emendata, quæ regem vidimus deliquisse, et præcipue in causa Bituricensis archiepiscopi, ex qua dissidium sumpsit originem. Quomodo ergo Deo placere possit, si princeps altera manu pro Ecclesia pugnet, altera contra Ecclesiam prælietur? At numquid non de his S. Bernardus et summus Pontifex regem redarguerunt? Sane quidem, et impenso studio, opportune et importune agentes apud ipsum litteris, ut superius est pluribus demonstratum. Quid ergo? Num quia ea corrigere prætermisit, excludendus fuit ab hoc opere quod vehementi studio peragendum suscepit? minime gentium, sed hortandus magis magisque, si forte Deus ad alia peragenda lumen suæ gratiæ imperiret. At dicet aliquis, amplissimum Jubilæum ab

¹ Hier. VI. — ² Psal. LXX. — ³ Rom. XII. — ⁴ Gen. IV. —

⁵ Marc. V. — ⁶ Bern. Ep. CXLVI.

¹ Deut. XXXII.

Eugenio papa ipsi aliisque ea de causa concessum, annon satis ad expianda maxima quæque delicta? sane quidem, si veram poenitentiam satisfactio comiletur. Hæc præmississe necessarium duximus, ne mens humana in scandalum impingat, quo iustificatis homines, Deum impie aut impudenter accuset, si non egressus est Deus in virtutibus nostris, sed reliquit in manibus inimicorum suorum. Pergamus jam enarrare rerum gestarum historiam.

10. *S. Bernardus tum in conventu, tum per litteras ad principes et reges datas, excitat ad bellum sanctum, Judæorum cædem retans.* — Annuntiato per sanctum Bernardum pro expeditione verbo Dei in Gallia, conventus alius generalis indicitur, in quo illi, qui militiæ nomen dederant, cruceæ acciperent. De quo ista Otto Frisingensis habet¹: « Excitatis ad transmarinam expeditionem multorum animis, tandem curia generalis apud Verzeham Gallia oppidum, ubi beate Mariæ Magdalena ossa recondita sunt, indicitur. convocatis ex diversis Gallia provinciis, optimatibus virisque illustribus. Ibi Ludovicus Francorum rex crucem a prætaxato abbate cum multa mentis alacritate sumens, militiam transmarinam professus est cum Theodorico Flandrensi, et Henrico Theobaldi Blesensis filio, comitibus, et aliis de regno suo baronibus, virisque nobilibus ». Hæc Otto. At ista feliciter promovisse, non satis visum sancto Bernardo: alias quoque penetrat regiones.

Itaque insistens commisso sibi operi ab Eugenio, ubi prædicatione præsens esse non potuit, scriptis litteris ad persuadendum efficacissimis affluit, quarum adhuc aliquot reliquæ sunt, ut inter alias quas dedit (ut habet Otto) ad Francos Orientales et Bajoarios, vel (ut apud S. Bernardum legitur) ad Spirensem Ecclesiam. Ad diversos enim cædem dabantur, non eodem tantum argumento, sed interdum totidem verbis; sic enim se habent:

11. « Dominis et patribus charissimis archiepiscopis, episcopis, et universo clero et populo Orientalis Franciæ et Bajoariæ, Bernardus Clavallensis vocatus abbas, spiritu fortitudinis abundare.

« Sermo mihi ad vos de negotio Christi, in quo est utique salus nostra. Hæc dico, ut excuset indignitatem personæ loquentis auctoritas Domini, excuset et consideratio propriæ utilitatis. Modicus quidem sum, sed non modice cupio vos in viscibus JESU CHRISTI. Ea nunc mihi ratio scribendi ad vos ea causa, ut universalitatem vestram litteris audeam convenire. Agerem id libentius viva voce, si, ut voluntas non deest, suppeteret et facultas. Ecce nunc, fratres, tempus acceptabile, ecce nunc dies copiosæ salutis. Commota est siquidem et contremuit terra, quia cœpit Deus cæli perdere terram suam. Suam in qua visus est, et amnis plusquam triginta homo cum hominibus conversatus

est: suam utique, quam illustravit miraculis, quam dedicavit sanguine proprio, in qua primi resurrectionis flores apparuerunt. El nunc, peccatis nostris exigentibus, Crucis adversarii caput extulere sacrilegum, depopulantes in ore gladii terram benedictam, terram promissionis. Prope est, si non fuerit qui resistat, ut in ipsam Dei viventis irruant civitatem, ut officinas nostræ redemptionis evertant, ut polluant loca sancta Agni immaculati purpurata cruce. Ad ipsum, prohi dolor! religionis Christianæ sacrarium inbiant ore sacrilego, lectumque ipsum invadere et concutere conantur, in quo et propter nos Vita nostra obdormivit in morte.

12. « Quid facilis, viri fortes? quid facilis, servi Crucis? Itane dabitis sanctum canibus, et margaritas porcis? Quam multi illic peccatores confidentes peccata sua cum lacrymis veniam obtinere, postquam patrum gladiis eliminata est spureitia paganorum? Videt hoc malignus et invidet, dentibusque frendet et tabescit. Excitat vasa iniquitatis suæ, nec ulla quidem tantæ pietatis signa aut vestigia relicturus, si quando forte (quod Deus avertat) obtinere valuerit illa Sancta Sanctorum. Verum id quidem omnibus sæculis deinceps inconsolabilis dolor, quia irrecuperabile damnum, specialiter autem generationi huic pessimæ infinita confusio et opprobrium sempiternum. Quid tamen arbitramur, fratres? Numquid abbreviata est manus Domini, aut impotens facta est ad salvandum, quod ad tuendum et restituendum sibi hereditatem suam exiguis vermiculos vocat²? Numquid non potest mittere Angelorum plusquam duodecim legiones, aut certe tantum dicere verbo, et liberabitur terra? Omnino subest ei, eum voluerit, posse. Sed dico vobis, tentat vos Dominus Deus vester. Respicit super filios hominum, ut si forte sit, qui intelligat, et requirat, et delectat vicem ejus. Miseratur enim Dominus populum suum, et lapsis graviter providet remedium salutis. Considerate quanto ad salvandos vos artificio utitur, et obstupescite. Intuemini pietatis abyssum, et confidite, peccatores. Non vult mortem vestram, sed ut convertamini et vivatis: quia sic querit occasionem non adversum vos, sed pro vobis. Quid est enim nisi exquisita prorsus et inventibilis soli Deo occasio salvationis, quod homicidas, raptores, adulteros, perjuros, cæterisque obligatos criminibus, quasi gentem quæ iustitiam fecerit, de servitio suo submonere dignatur omnipotens? Nolite diffidere, peccatores, benignus est Dominus. Si vellet punire vos, servitium vestrum non modo non expeteret, sed nec susciperet quidem oblatum. Iterum dico, pensate divitias bonitatis Dei Altissimi, consilium miserationis attendite, necessitatem se habere, aut facit, aut simulat, dum vestris caput necessitatibus subvenire. Teneri vult debitor, ut militantibus sibi stipendia

¹ Otto Fris. de reb. gest. Fridr. I. c. 36, et Ber. Ep. GOSWALD.

² L. L.

reddat, indulgentiam delictorum et gloriam sempiternam. Beatam ergo dixerim generationem, quam apprehendit tam uberis indulgentiæ tempus, quam invenit superstitem annus iste placabilis Domino, et vere Iubilæus. Diffunditur enim hæc benedictio in universum mundum; et ad signum vite certatim convolant universi.

13. « Quia ergo fecunda est terra vestra viro- rum fortium, et robusta nescitur juventute repleta, sicut laus est vestra in universo mundo, et virtutis vestræ fama replevit orbem terrarum : accingi- mini et vos viriliter, et felicia arma accipite Chri- stiani nominis zelo. Cesset pristina illa non mili- tia, sed plane malitia, qua soletis invicem sternere, invicem perdere, ut ab invicem consumamini. Quæ miseros tam dira libido excitat, quod proximi corpus gladio, cuius fortasse et anima perit, trans- verberent? Sed nec effugit qui gloriatur : et ipsius animam pertransibit gladius, cum solum hostem gaudet cecidisse. Illi se dare discrimini, insanite est, non virtutis; nec audacie, sed amenitiæ potius est adscribendum. Habes nunc, fortis miles, habes, vir bellicose, ubi dimices absque periculo; ubi et vincere gloria, et mori lucrum. Si prudens mer- cator es, si conquisitor huius sæculi, magnas quas- dam tibi nundinas indico, vide ne pereant. Susci- pe Crucis signum, et omnium pariter, de quibus corde contrito confessionem leceris, indulgentiam obtinebis. Materia ipsa si emitur, parvi constat; si devoto assumitur humero, valet sine dubio reg- num Dei. Bene ergo fecerunt, qui jam cælesti signaculum susceperunt, bene cæteri faciunt. Sed nec ad insipientiam eis, si festinent et ipsi appre- hendere, quod et eis in salutem existat ». Pergit post hæc monere, ne Judæos interficerent, neque effugarent. Demum vero hæc pro cautela ad finem ponit :

14. « Illud quoque admonitos vos esse est necesse, fratres dilectissimi, ut si quis forte amans primatum gerere inter vos, expeditione sua regni voluerit exercitum prævenire, nullatenus audeat : et si a nobis missum se simulet, non est verum : aut ostendat litteras tanquam a nobis datas, sed omnino falsas, ne dicam furtivas esse dicatis. Viros bellicosos et gnaros talium duces eligere est, et simul predicisci exercitum Domini, ut ubique ha- beat robur, et non possit a quibuslibet violentiam sustinere. Fuit enim in priori expeditione, ante- quam Hierosolyma caperetur, vir quidam Petrus nomine, cuius et vos, ni fallor, sæpe mentionem audistis. Is populum qui sibi crediderat, solum cum suis incedens tantis periculis dedit, ut aut nulli, aut paucissimi eorum evaserint, qui non cernerent aut fame, aut gladio. Propterea omnino timeundum est, si similiter et vos feceritis, ne con- tingat et vobis similiter, quod avertat a vobis Deus, qui est benedictus in sæcula. Amen ». Hactenus sanctus Bernardus. Qui non solum ejusdem argu- menti, sed totidem ferme verbis immutatis, vel decurtatis perpaucis, litteras ad alias civitates mit-

tere consuevit, ut apparet ex illis datis ad Brixien- ses in Gallia Cisalpina populos, quas repertas in scripto Codice, in quo est Vita SS. Faustini et Jovite, et alia, hic describendas curavimus; quæ sic se habent :

15. « Mailredo Brixienis Ecclesiæ episcopo, necnon consulibus, militibus, et universis populis sub eo constitutis, frater Bernardus, Claravallis vocatus abbas, spiritu fortitudinis abundare.

« Sermo mihi ad vos de Christi negotio est; qui est utique vestra salus. Excuset proinde exi- guitatem personæ loquentis consideratio propriæ utilitatis. Licet enim exiguus sum, et nullius mo- menti homuncio; cupio tamen omnes vos in viscē- ribus Jesu Christi. Et ecce nunc tempus acceptabi- le, et dies copiosæ salutis. Commota est et contremuit terra, quia cæli Dominus cepit perdere terram suam. Suam, quam tricenaria est inhabi- tatione dignatus : suam, quam dedicavit proprio sanguine : suam, quam honoravit gloria resur- rectionis. Et nunc, peccatis exigentibus, Crucis adversarii caput extulere sacrilegum, depopulantes in ore gladii terram benedictam, terram promi- sionis. Heu ! prope est, ut in ipsam irruant civita- tem Dei viventis et virtutum, ut officinas nostræ redemptionis evertant, polluant sancta loca, Agni immaculati purpurata cruore. Proh dolor ! ad ipsum præcipuum Christianæ religionis sacrarium, vite thesaurum, divitias salutis, inbiant ore sacri- lego, et radicibus conantur evellere, et dissipare lectum, in quo propter nos Dominus majestatis obdormivit in morte.

16. « Quid facitis, viri fortes? quid facitis, servi Crucis? Itane dabitur sanctum canibus, et margarite porcis? Si semel arripuerint Sancta illa Sanctorum, ubi jam plurimum peccatores adepti sunt veniam delictorum, certum est, ne ulla qui- dem eos signa ac vestigia relicturos. Verum id quidem omnibus sæculis incomparabilis dolor, quia irrecoverabile damnum; specialiter autem huic generationi infinita confusio, et opprobrium sempiternum. Numquid tantum (tamen) arbitra- mur, quod abbreviata sit manus Domini, et facta impotens ad salvandum, quod exiguus terræ ver- miculus vocat ad tuendam hæreditatem suam? Numquid non mittere potest Angelorum plusquam duodecim legiones, aut certe tantum dicere verbo, et liberabitur terra? Omnino subest ei, cum volue- rit posse. Sed dico vobis, tentat vos Dominus Deus vester. Respicit super filios hominum, si forte quis intelligat, et requirat, et doleat vicem ejus. Miseratur enim populum suum Deus, et lapsis graviter providet remedium salutare. Considerate, quanto ad salvandos vos artificio utitur, obstu- pescite. Intuemini pietatis abyssum, et redite in spem, peccatores. Non vult mortem vestram, sed ut convertamini et vivatis; qui sic querit occasio- nem, nisi exquisita prorsus et inventibilis soli Deo salvationis occasio, quod homicidas, raptores,

adulteros et perjuros, cæterisque obligatos criminibus, quasi gentem quæ justitiam fecerit, de servitio suo submonere dignatur Omnipotens ?

« Confidite, peccatores, quia benignus est; et si vellet punire vos, servitium vestrum non tantummodo non expelleret, sed ne susciperet quidem. Teneri vult debitor, ut sibi militantibus stipendia reddat, veniam peccatorum, et gloriam sempiternam. Secura plane et fructuosa militiæ, ubi fit et victoria gloriosa, et mors ipsa felicior. Beatam dixerim generationem, quam apprehendit tam uberis indulgentiæ tempus, quam superstitem invenit vere Jubilæus hic annus, annus placabilis Domino. Diffunditur hæc benedictio in universam terram, et ad suscipiendum signum vite certatim convolant universi. Quia ergo fecunda est virorum fortium terra vestra, et robusta nascitur juventute referta, sicut est laus vestra in universo mundo, virtutis vestræ fama replevit orbem : accingimini et vos viriliter, et felicia arma corripite Christiani nominis zelo, ad faciendam vindictam in nationibus, et increpationes in populis. Valele. Amen ». Hactenus ad Brixienses, et ad alias civitates ubique terrarum.

17. Sed ut revertamur ad superiora, quidnam sit, quod in recitata ante istam Epistola ad Germaniam populos, monet in fine, ut abstineant ab interfectione Judæorum, discas ab Ottone qui aderat, atque : « Inter hæc Radulphus monachus, vir quidem religionis habitum habens, religionisque severitatem solerter imitans, sed litterarum notitia sobrie imbutus, eas partes Galliæ, quæ Rhenum attingunt, ingreditur, multaque populorum millia ex Agrippina, Moguntia, Wormatia, Spira, Argentina, aliisque vicinis civitatibus, oppidis, seu vicis, ad accipiendam crucem accendit. Hoc tamen doctrinæ suæ non vigilantiter interserens, quod Judæi in civitatibus oppidisque passim manentes, tantquam Christianæ religionis hostes trucidarentur. Quod doctrinæ semen in multis Galliæ Germaniæque civitatibus vel oppidis tam firmiter radicem figens germinavit, ut plurimis ex Judæis hac tumultuosa seditione necatis, nulli sub principis Romanorum alas tuitionis causa confugerent. Unde factum est, ut non pauci ex ipsis hujusmodi immanitatem fugientes, in oppido principis, quod Noricum, seu Nurenberg appellatur, aliisque municipiis ejus ad conservandam vitam se reciperent. At præfatus Claravallensis abbas hujusmodi doctrinam præcavendam docens, ad Galliæ Germaniæque populos nuntios, seu litteras destinavit, quibus ex auctoritate sacræ pagine luculenter ostendit, Judæos ob scelorum suorum excessus non occidendos, sed dispergendos fore, etc. »

18. Extat autem Epistola ejusdem ² S. Bernardi ad Henricum archiepiscopum Moguntinum adversus eundem Radulphum eremitam, necem Judæorum predicantem, qua cum plurimis notis

sugillat infamie. Nam post exordium hæc habet : « Homo ille, de quo agitur in litteris vestris, neque ab homine, neque per hominem, sed neque a Deo missus venit. Quod si se monachum aut eremitam jactat, et ex eo sibi assumit libertatem vel officium prædicationis, potest scire et debet, quod monachus non habet docentis, sed plangentis officium; quippe cui oppidum carcer esse debet, solitudo paradisi. Ille vero a contrariis, et solitudinem pro carcere, et oppidum habet pro paradiso. O hominem sine pectore! o hominem sine fronte! ejus stultitia elevata est super candelabrum, ut appareat omnibus qui sunt in domo. Tria sunt in eo reprehensione dignissima, usurpato prædicationis, contemptus episcoporum, homicidii approbati libertas ». Et post multa in confutationem hæresis hæc de ipso : « Tua doctrina non est tua, sed ejus qui misit te, patris. Sed, credo, sufficit tibi, si sis sicut magister tuus. Ille enim erat homicida ab initio, ille mendax, et pater mendacii. O monstruosa scientia! o sapientia infernalis, contraria prophetis, et Apostolis inimica, subversio pietatis et gratiæ! O immundissima hæresis! o meretrix sacrilega! quæ impregnata de spiritu falsitatis, concepit dolorem et peperit iniquitatem. Libet, sed non licet ultra progredi. Ad ultimum, ut omnia que sentio super his breviter comprehendam : homo est magnus in oculis suis, plenus spiritu arrogantiae, verba et opera ejus prætendunt, quod conatur sibi facere nomen juxta nomen magnorum qui sunt in terris; sed non habet sumptus ad perficiendum. Vale ». Hucusque de Radulpho novæ hæresis auctore Bernardus.

19. Rursus vero, quod ad inferendam Judæis necem pertinet, Petrus insuper Cluniacensis abbas¹, scribens ad Ludovicum Francorum regem, pro eadem expeditione promovenda de Judæis pariter agens, eos non occidendos quidem existimat, sed impunitos non relinquendos de excessibus suis, quibus bona Christianorum vel usuris exhauriant, vel emendo furto rapta possideant; quibus eos juste expoliandos suadet, iisdemque militantes pro Christo alere milites. Ut autem iis temporibus penes omnes Judæi execrabiliores haberentur præter antiquam maledictionem, qua tenetur omne genus eorum adstrictum, recentia accesserunt demerita, et præsertim ea quæ hoc anno ab eis sunt scelestissime perpetrata : quæ cum innotuissent orbi, fideles omnes in eos sunt vehementer incensi. Siquidem hoc anno Judæi implacabili odio, quo cum Christo Christianos omnes semper sunt persecuti, execrandum facinus perpetrarunt, quod a Roberto de Monte in Appendice ad Sigebertum ita paucis describitur : « Apud Norvicum Angliæ civitatem Judæi crucifixerunt puerum quendam Christianum, nomine Wilhelnum : quem etiam foras civitatem ab eis sepultum divina lux (ut ferunt) super eum emicans declaravit : sique a fidelibus

¹ Otto Fris. de gest. Frid. I. l. c. 17. — ² Bern. Ep. c. cxxxii.

¹ Petr. Clun. l. v. Ep. xxxii.

inventus, honorabiliter est in Ecclesia positus ». Crevit ob ejusmodi eorum scelera in Judæos odium immensum, quo caderent eos Christiani milites frequenter. Sed et quod stylo deserto eos exagitavit Petrus abbas Cluniacensis, crevit magis, adeo ut de omnibus Judæis necandis data fuerit ea occasio proclamandi, quam nuper vidimus per S. Bernardum esse repressam.

20. Sed redeamus ad eundem Bernardum operi insistentem. Ipse quidem præter alios hoc anno insumptos labores, ubi ad finem præsens inclinaret annus, se contulit in Germaniam, ut Conradum Romanorum regem in expeditionem Hierosolymitanam ad decorum Christi signaculum, (ut cum Francorum rege fecerat) suscipiendum hortaretur. De quo ista Frisingensis antistes, et ipse unus ex cruce signatis¹: « Igitur immunerabilibus in Occidentali Gallia ad transmarinam expeditionem excitatis, Bernardus prædicationis nomine movendum Orientale Francorum regnum aggredi disponit, tam ob hoc, ut animum principis Romanorum sacræ exhortationis verbo ad accipiendam crucem emolliret, quam ut Radulpho occasione Judæorum crebras in civitatibus seditiones populo contra dominos suos moventi silentium imponeret. Audiens hoc princeps, generalem curiam in Nativitate Domini apud Spiram civitatem celebrandam indixit. Quo veniens prædictus abbas, principi cum Friderico fratris sui filio, aliisque principibus et viris illustribus crucem accipere persuasit, plurima in publico vel occulto faciendo miracula. Moguntiam quoque veniens, Radulphum in maximo favore populi morantem invenit. Quo accessito premonitoque, ne contra monachorum regulam per orbem vagando, propria auctoritate verbum prædicationis assumeret; tandem ad hoc eum, ut sibi promissa obedientia, in cænobium suum transiret, induxit, populo graviter indignante, et nisi ipsius sanctitatis consideratione revocaretur, etiam seditionem movere volente ». Hactenus de Bernardi rebus gestis anni hujus in Gallia atque Germania.

21. *In quos expeditio parata.* — At non simplex in Terram-Sanctam tantum indicta fuit a papa Eugenio expeditio, sed duplex, altera (ut dictum est) in Palestinam, altera adversus Boreales paganos adhuc populos, diversæque iis dabantur pro tessera militari sanctæ Crucis imagines. Quod habes expressum ab eodem Ottone Frisingensi, qui aderat, dum ait²: « Saxones vero, quia quasdam gentes spurcissimas idolorum deditas vicinas habent, ad Orientem proficisci abnuentes, cruces itidem, easdem gentes bello attentatius, assumpserunt, a nostris in hoc distantes, quod non simpliciter vestibus assutæ, (cruces scilicet), sed a rota subterposita in altum protendebantur ». Hæc Otto, qui ista tunc præsens inspiciebat. Sed qui tunc scribebat Saxo Grammaticus, de ista expeditione in Bo-

reales paganos sicut luculentius, ita et locupletius tractat, atque³: « Per eadem tempora Romanus antistes Barbaricæ tempestatis procella rem divinam pæne obrutam eversamque conspiciens, datis per Europam Epistolis, universos Christianæ credulitatis hostes ab ejus cultoribus oppugnari præcepit. Singule autem Catholicorum provinciarum confinem sibi barbariem incessere jubebantur. Ne ergo bani private militiæ rebus publicæ religionis officia detrectarent, sumptis sacræ peregrinationis insignibus, imperium amplectuntur. Igitur Canutus ac Sveno invicem obsidibus datis, depositisque inimicitiarum exercitiis, rei melius gerendæ gratia pacem pro tempore statuunt, revocantque a suis visceribus ferrum, ad sacrorum vindictam convertunt. Discordiam itaque a regni æmulatione profectam sociæ expeditionis fœdere castigantes, junctis viribus Slaviam petunt, Germanis ex conducto diversam ejus invadentibus plagam ». Erant hi Saxones, ut audisti ex Ottone nuper; nam et paulo inferius idem Saxo hæc subdit: « Occurrunt in littore Saxones, et ipsi vindicandæ religionis cupientissimi, militiæ socii Danis futuri », sed quam parum felicem exitum habuerit expeditio ista, ad sociale bellum conversis principibus, idem Saxo pluribus narrat. At non in Boreales tantum paganos, sed et in Sarracenos illos, qui adhuc loca quamplurima Hispaniæ possidebant, expeditionem navalem motam esse, Dodechinus tradit in Chronico anno sequenti. Quod autem in paganos idolorum cultores perfici hoc anno non potuit, feliciter postea peractum per Waldemarum filium S. Canuti martyris Daniæ regis suo loco dicturi sumus.

22. *Nicolaus falsarius litterarum S. Bernardi.*

— Quod autem nuper audisti sanctum Bernardum contestatum esse, ne litteras tanquam a se missas acciperent, quas scire deberent penitus esse falsas: sciendum est, quod his diebus idem sanctus Bernardus passus est ab uno suorum intimorum monachorum fallacias, qui falsis litteris tanquam ab ipso scriptis, falsoque sigillo usus, pro animi arbitrio, prout sibi expedire videretur, ad diversos datis, usus erat. Latuit falsarius aliquandiu sub hypocrisis velamento: demum Dei voluntate detectus est. De his et questus est apud Engenium papam, scribens ac dicens⁴: « Periclitati sumus in falsis fratribus, et multe litteræ falsæ sub falso sigillo nostro in manus multorum exierunt, et quod magis vereor, etiam usque ad vos dicitur falsitas pervolasse. Hæc necessitate abjecto illo novello, quod cernitis de novo utimur, continente et imaginem nostram et nomen. Figuram aliam tanquam ex nostra parte jam non recipiatis, nisi forte pro episcopo Clarimontis, cui sub altero sigillo litteras dedi, cum necdum istud haberem ». Hæc ipse. At quid impostor falsarius? sicut Bernardus vetus sigillum abiecit et novum formavit: ita ipse, rejecto illo, quod amplius non esset in

¹ Otto Fr. de gest. Fr. l. I. c. 39. — ² Ibid. l. I. c. 4. in fin.

³ Saxo Gram. l. XIV. — ⁴ Bern. Ep. CCLXXXIV.

usu, novum in similitudinem illius quod formandum curarat ipse Bernardus, effigiandum curavit, ut idem ipse sanctus Bernardus affirmat in aliis litteris ad Eugenium papam.

23. At quisnam fuerit iste perversissimus homo, qui adeo immane scelus praesumpserit, aliis litteris ad eundem Eugenium datis sic aperit¹: « Nicolaus ille exiit a nobis, quia non erat ex nobis. Exiit autem, foras post se relinquens vestigia. Et ego longe ante hominem noveram, sed expectabam, ut aut Deus eum converteret, aut instar Iudae ipse se proderet. Quod et factum est. Praeter libros, denarios, et aureos multos, in ipso exitu ejus inventa sunt super eum sigilla tria, unum ejus proprium, alterum prioris, tertium nostrum, ipsumque non antiquum, sed novellum, quod et ob ipsius dolos et turpivas surreptiones mutare nuper coactus fueram. Hoc enim est, quod vobis tacito nomine scripsisse me memini, quia videlicet periclitati sumus in falsis fratribus. Quis possit dicere, ad quam multas personas sub nomine meo, me ignorante, quae voluit scripsit? Quis mihi det, ut ipsa curia vestra ad purum purgetur faece mendaciorum ejus? Quis mihi det, ut vel eorum innocentia, qui mecum sunt, satis valeat excusari apud circumventos et praeventos impudentissimis mendaciis? Vobis quoque aliquoties in eadem falsitate scripsisse, et non semel, partim convictus, partim et confessus est. De turpitudinibus ejus, quibus terra sordet, et facte sunt omnibus in parabolam, supersedeo pollucere labia mea et vestras aures. Si ad vos venerit (nam hoc gloriatur, et amicos se habere confidit in curia) mementote Arnaldi de Brixia, quia ecce plus quam Arnaldus hic. Nullus perpetua dignior conclusione, nihil et perpetuo silentio justius ». Haec ad Eugenium Bernardus.

24. Qui dum et nomine ipsum notat, et coloribus pingit, nempe comparans Arnaldo de Brixia, ipsum fuisse doctum insinuans, quique plurimum obesse possit Ecclesiae Dei, nisi perpetuo silentio os ipsius obstrueretur; quique etiam talis esset, qui in scribendo ejusdem S. Bernardi stylum imitaretur, adeo ut tantum sigillo litteris addito, ipsius ore credi potuissent esse dictata: plane in eam sententiam adducor ut existimem, hunc illum esse Nicolaum monachum Cisterciensem, S. Bernardo conjunctum, virum doctrina insignem, et scribendi peritia praestantem, qui ex Cluniacensis transisset ad Cistercienses; quem Petrus Cluniacensis plurimum coluit, atque litteris frequentavit², talem eum esse existimans, qualis foris per litteras appareret. De ipso enim ad S. Bernardum alias litteras dedit³, ut ad se mitteret eum litterarum consortio amantissimum; et Bernardi de Petrum responsiones exant, et ejusdem Petri ad ipsum ad alios Cistercienses⁴. Insuper et ejusdem

Nicolai ad ipsum Petrum Epistolae date binae habentur⁵, quibus cum significetur, ipsum fuisse eidem S. Bernardo charum summeque conjunctum, quam bene imitatus esset ejus scribendi stylum, ex ipsis satis apparet, quarum alterius est exordium⁶: « Patri suo domino Cluniacensi, frater Nicolaus.

Indica mihi quem diligit anima mea. Quando veniam et apparebo ante faciem tuam? Quando videbo te? quando consolaberis me? consolaberis, inquam, quia consolatio abscondita est ab oculis meis, donec videam et desideratam et desiderandam praesentiam tuam: et tristis est anima mea usque ad te, etc. » Ut merito ipse Petrus melleas ejus litteras dicat⁷, summeque laudet, his scilicet verbis⁸: « Si talis, inquit, est stylus tuus, qualis est animus tuus? si talis littera tua, qualis lingua tua? » Et alia plura de laude litterarum ejus, ut plane Bernardum redoleret stylo, cui esset longe moribus impar, ac plane contrarius. Ita sane in hac misera vita tenebris obvoluta, falsitatibus plena saepe periclitari contingit in falsis fratribus, sed verum illud, quod Veritas dixit⁹: « Nihil occultum quod non sciatur ». Et certum illud Job⁶, quod « gloria hypocritae ad instar puncti ». Quod autem tantus esset, ut sententia S. Bernardi Arnaldum de Brixia superaret haeresiarcham, nec de eo alia usquam mentio: forte accidit, ut Eugenius papa (ut visum ipsi Bernardo) perpetuo carceri hominem manciparit, perpetuoque silentio condemnaret. Sed de his haecenus.

25. *Fulcherus patriarcha Hierosolymitanus.* — Hoc eodem anno, Willelmus patriarcha Hierosolymitanus, ubi absolvisset in sede annos quindecim, ex hac vita decessit: in cujus locum subrogatus est Fulcherus Tyri archiepiscopus, de quo superius dictum est. Haec ex Willelmo⁷. Porro Tyriae metropoli, inquit idem auctor substitutus est vir mire simplicitatis et mansuetudinis, timens Deum, et recedens a malo, cujus memoria in benedictione est apud Dominum et homines, dominus Petrus Dominici Sepulchri prior, de ceteriore natus Hispania, de civitate Barcinona, nobilis secundum carnem, sed spiritu nobilior, cujus vita et conversatio longiores et diligentiores postulant tractatus, sed nos historia revocat, ut omnis specialibus, de publicis edisseramus ». Haec ipse. Porro explosum fuisse narrat Radulphum cancellarium cui rex favebat, sed resistebat Joannes Pisanus ejusdem Tyrensis Ecclesiae archidiaconus, « qui, inquit, postea fuit cardinalis S. R. E. tituli Sanctorum Silvestri et Martini ». Subdit vero, quo cum Radulphus biennio sedisset intrusus, Eugenii papae sententia fuerit inde demotus.

26. *Obitus Oxytae patriarchae Constantinopolitani.* — Hoc eodem anno Michael Oxyta patriarcha

¹ Bern. Ep. CCXCVIII. — ² Pet. Cl. l. VI. Ep. VII, XXXI, XXXVII et XLVII. — ³ Ibid. Ep. V, XXX, XXXVI. — ⁴ Ibid. Ep. IV, XXXII.

⁵ Pet. Cl. l. VI. Ep. VIII, XXXIX. — ⁶ Ibid. Ep. XXXIX, XXXIV. — ⁷ Ibid. Ep. XXXV. — ⁸ Ibid. Ep. XXXVII. — ⁹ Matth. x. — ⁶ Job. XX. — ⁷ Wil. Tyr. l. XVI. c. 17.

Constantinopolitanus, cum sedisset annos duos et menses octo, ut habet Græca series patriarcharum Constantinopolitanorum, se abdicavit : de quo ista habet Nicetas Choniata his verbis : « Is Michael summa sede ultro cessit, et in Oxyam insulam rediit, in qua vite inopis et simplicis institutum a puero fuerat amplexus. Ibi in templi vestibulo prostratus, cuius monacho collum calcandum præbuit, quod contra quam sibi expediret, adamalam a primis annis quietem repudiasset, nulloque cum fructu thronum sublimem conscendisset ». Hæc Nicetas, qui de ejus successore mox subijcit ista :

« Cosmus vero tum in numero diaconorum erat, patria Aegineta, et quamvis eruditissimus, virtutum tamen choro erat illustrior. In primis benignitate erga pauperes erat insignis, quæ tanquam in pretioso monili gemma radians, sic ipsa inter virtutes cæteras elucebat. Adeo ut aliquando pallium et tunicam, et lineam calyptram capitis pauperibus, misericordia motus, distribueret ; nec de suo tantum largiretur, sed alios etiam, ut pauperum inopie subvenirent, impelleret ». Hæc de Cosmo Nicetas. In serie patriarcharum Constantinopolit. menses tantum decem hic sedisse ponitur.

Anno periodi Græco-Romane 6639. — Anno Ære Hispan. 1181. — Anno Hegire 541, inchoato die 12 Junii, Fer. 5. — Jesu Christi 1146.

— Eugenii III papæ 2. — Conradi III reg. 9. Manuelis Comneni imp. 4.

1. *Secunda Eugenii III fuga ex Urbe Romana.*

— Ad num. 1. Tiburtes jam a multis annis Romanis infensi erant, indeque Romani Eugenium III pro excidio *Tiburtinorum* sollicitabant, sed Pontifex *improbabilitatem eorum non sustinens* ad Transiberinam regionem migravit, ut narrat Baronius ex Ottone Frisingensi lib. 7, cap. 34. Durante secunda hac Romane Urbis seditione, *divus Bernardus* litteris Romanos increpavit, et *Conradum* Romanorum regem hortatus est, ut si forte obstinati perseverarent, armis compescerentur. Baronius quidem utramque Bernardi Epistolam anno precedenti recitat, sed eas ad præsentem spectare Sigonius lib. xi Hist. de Regn. Ital. et post illum Mauricius in Annal. Cisterc. hoc anno cap. 3, alii-que observant. Quæ refert Otto Frisingensis, confirmantur ab anonymo Casinensi, et Joanne Ceccano in Chron. a quibus et aliqua singularia notantur. Prior ad an. mclxv, qui nobis est mclxvi, scribit : « Eugenius papa per Transiberinam exiens, Viterbum, (id est, Viterbium) devenit, et pacem (Peregrinus observat in Mss. legi, *pactum*) reformans muros Tiburtine civitatis destrui præcepit, et apud civitatem Lucensem abiit ». Ceccanus vero ad hunc annum : « Romani venerunt super Tiberrim, et multos ex eis decollaverunt ».

2. *In Franciam venit anni sequentis initio.* — *Eugenius III* in his rerum augustis prædecessorum suorum exemplo in Franciam ire constituit. Iter terra ingressus, Senis diaconos duos *Gilberti Porretani* Pictaviensis episcopi offendit, qui episco-

pum suum de fide Trinitatis male sentientem deferebant, quibus se in Francia dixit ex Concilii sententia responsurum. *Pisas* inde, ac trajecto Apennino per mensem Augustum *Brixiam* venit, unde X kalend. Septemb. litteras ad *Gerardum* episcopum Bononiæ dedit, quibus eum docuit, se Regensibus et Parmensibus præcepisse, ne Mutinensibus adversus abbatem Nonantulani adessent. Inde in Franciam progressus, a *Ludovico rege* ingenti honore exceptus est, inquit Sigonius ad annum mclxvi, quo etiam Brouverus lib. 14 Annal. Trevir. tom. II, pag. 47, accessum *Eugenii III* in Franciam collocat. Verum utrumque falli et Eugenium III initio tantum sequentis Christi anni, per Burgundiam Galliam intrasse ibidem videbimus.

3. *Conventus Wezeliacensis.* — A num. 2 ad 41. Anno superiori diximus ex Odone Diogilo libell. 4, Ludovicum VII Franciæ regem proceres Wezeliacum convocasse ad Pascha præsentis anni nuntiosque hac de re ad Eugenium papam misisse ; hoc vero anno hæc Odo narrat : « Qui lætanter suscepti sunt (sc. ab Eugenio III), lætantesque remissi, referentes omni favo litteras dulciores, regi obedientiam, armis modum et vestibus impo- nentes, jugum Christi suave suscipientibus, peccatorum omnium remissionem parvulisque eorum et uxoris patrociniū promittentes ; et quædam alia quæ summi Pontificis sanctæ curæ et prudenti visa sunt utilia continentes. Optabat ipse tam sancto operi manum primam præsens imponere, sed ty-

rannide Romanorum præpeditus non potuit; sancto vero Clarevallensi abbati Bernardo curam istam delegavit. Tandem dies alluit regi optatus. Abbas etiam Apostolica auctoritate, et propria sanctitate munitus, et convocatorum maxima multitudo, loco et termino pariter affuerunt. Suscepit ergo rex a summo Pontifice sibi missum crucis insigne. et proceres multi cum eo. Et quoniam in castro locus non erat qui tantam multitudinem capere posset, extra in campo fixa est abbatum lignea machina, ut de eminenti circumstantibus loqueretur. Ilanc ascendit cum rege cruce ornato. Cunque celeste organum more suo divini verbi rorem fudisset, cœperunt undique conclamando, cruce, cruce expetere. Et cum earum fascem præparatum seminasset potiusquam dedisset, coactus est vestes suas in cruce scindere et seminare. In hoc laboravit quandiu fuit in villa (Vezeliacensi), etc.»

4. *Cruz passim pro expeditione Terræ-Sanctæ suscepta.* — « Tandem edicto quod post annum progredierentur, omnes ad sua cum gaudio repedarunt. Abbas vero sub tenui corpore et pæne præmortalno robustum tegens spiritum, ubique circumvolat predicando, et multiplicati sunt super numerum in parvo tempore, crucem portantes. Rex quasi jam nactus gaudium summum fidei propagande, de spe futuri exercitus copiosi, Apuliam regi Rogerio nuntios mittit. Qui de omnibus rescripsit ad libitum. Insuper viros remisit nobiles, qui regnum summum in victualibus, et navigio, et omni necessitate, et se vel suum filium itineris socium promittebat. Misit etiam alios Constantinopolitano imperatori (nempe Manueli), cujus nomen ignoro, quia non est scriptum in libro Vite. Hic in longo rotulo prolixam adulationem depinxit, et regem nostrum nominando sanctum, amicum et fratrem, promisit plurima, quæ opere non implevit. Sed hæc alias. Alemannorum et Hungarorum etiam reges (nempe Conradum et Geysam II), de foro (id est, de comiteatu, seu cibariis ad alimentum exercitus) et transitu requisivit; quorum nuntios et litteras ad suam voluntatem recepit. Harum quoque regionum duces multi et comites, ejus exemplo provocati, de itineris illi societate scribebant. Sic ad notum omnia procedebant. Interea fama volat, Angliam transfretat, et aliarum recessus penetrat insularum. Parant naves maritimi cum rege navigio processuri. Cæterum dum rex iustrans omnia statum regni ordinat, dum subditis imposterum pacem firmat, omnes undique nuntii Parisius convenerunt. Revertenti omnes pariter affuerunt: imperatorum sacras et duem chartas offerunt, verboque et litteris quidquid poposcerat, pollicentur. Habet rex optionem, cui fidem habeat, in quo compendium credat. Sed illi nunc erat, ut socii essent consilii, qui forent et laboris ».

5. *Insigniores ex Crucesignatis.* — Baronius num. 10 exhibet quæ Otto Frisingensis de conventu Vezeliacensi die xxxi Martii, quod Pascha ce-

lebratum, habito refert; sed Otto neque tempus conventus celebrati, neque episcopos qui crucem susceperere memorat. Chronographus Mauriniacensis in fine sui Operis insigniores recenset: « Famosiores inter omnes qui cum rege hujus itineris angustiam subierunt, fuerunt hi Alemannorum imperator Henricus (legendum *Conradus*) Robertus frater regis, Meldensis comes Henricus, comes Flandrie Gaufridus (legendum *Theodoricus*) Alunus episcopus Attrebatensis, Girardus (legendum *Godefridus*) episcopus Lingonensis, Gaucherius de Monte-Gaii, comes de Warena, Rainaldus Tornodorenensis, Manasses de Bullis, Euraldus de Bretolio ». Continuator Aimoini lib. 57 cap. 53, aliquos alios episcopos, abbates, et proceres plures, qui crucem accipere in medium adducit.

6. *Conventus Laudunensis et Carnotensis.* — Præter conventum Vezeliacensem Carnotensis hoc anno coactus, cui Ludovicus rex interfuit, multique archiepiscopi, episcopi et proceres; celebratus est tertia Dominica post Pascha, ut liquet ex Epistola xvi Petri Venerabilis lib. 6, et ibidem recitatur Epistola xix ejusdem libri Petro Venerabili a Sugero Sancti-Dionysii abbate data, in qua ait: « Inde est quod archiepiscopi et episcopi, quietiam dominus rex, et regni optimates, et nos super hoc (nempe expeditionem in Terram-Sancam) Lauduni convenimus: et usque adeo res processit, quod xv dies post Octavas Paschæ Carnoti generaliter conventum celebrare super hac causa, etc. et omni-modam operam adhibere disposuimus ».

7. *Conventus Bituricensis, anno superiori habitus.* — Meminit alterius conventus sanctus Bernardus in Epist. cxxviii ad Eugenium scripta. Mos horum temporum ferebat, ut Francorum reges in præcipuis festis coronam solemniter ritu acciperent; quod cum Samson archiepiscopus Rhemensis, Petro Bituricensi archiepiscopo, Romæ existente, *tenere usurpasset*, ut legitur in Patriarchio Bituricensi, Eugenius III ob hanc causam usum pallii eidem Rhemensi interdixit, ut liquet ex ejusdem pape Epistola ad Samsonem data, et in Patriarchio Bituricensi recitata sub *datum Sutri VII kal. April.* seu die xxvi mensis Martii. Verum conventus Bituricensis die Natali Christi superioris Christi anni congregatus, ut ibidem num. 12 Odo de Dioglo disertè scribit. Quare sicut Carnotensem Laudunensis ita et Vezeliensem Bituricensis in futura Conciliorum editione omitti debent; cum in eam conventus Vezeliacensis et Carnotensis jam inserti fuerint. Divus Bernardus, ut legere est in Epistola ejus cxxlviii ad Eugenium III data, qui Samsonis amississimus erat, graviter conquesus est, tam severe animadversum ab eo, præsertim cum nihil præter jus et Privilegii tenorem usurparit, principumque conventus pro expeditione Hierosolymitana id prorsus ab eo extorquere videretur: « Quid in arcto illo fieri oportebat? Dies celebris, sollemnis curia, juvenis rex: et quod his majus est, Dei negotium, de Hierosolymitana scilicet expeditione, propter quod omnes

convenerant. Prorsus hæc omnia missarum et coronæ regie solemniss, debitique honoris frustrationem nullatenus admittabant. Sed nec ipsi Bituricensi archiep. omnino expediebat, ut honor regis per eum impediretur. Quibus ex verbis perspicuum fit Petrum archiep. Bituricensem anno superiori, quo ea coronatio facta, a sua diœcesi absentem fuisse.

8. *Pueri Christiani diversis temporibus a Judeis necati.* — A num. 11 ad 22. Pseudo-Robertus de Monte in Chron. narrat, Judæos hoc anno puerum, nomine *Willelmum*, christianum, apud Norwicum Angliæ civitatem crucifixisse, quod tamen Westmonasteriensis in Chron. ad annum præcedentem, Bromptonus vero in suo Chron. ad regis Stephani annum nonum, qui Christi fuit MCXLV retrahunt. Bromptono suffragatur Chronicon Fiscannense tom. 1 Biblioth. Labbei. In eodem Bromptoni Chronico extat aliud exemplum pueri anno MCX, Henrici regis anno VI, a Judeis crucifixi prope Gloverniam, ut videre est pag. 1050. Neque hic finis crudelitatis; rursus enim anno MCXXXI: « Martyrizatus est ad Pascha apud Sanctum-Edmundum a Judeis puer quidam, Robertus nomine: qui in proximo in Ecclesia S. Edmundi honorifice sepultus, multis, ut fama fuit, claruit miraculis », inquit Gervasius monachus in Chron. Denique Henricus de Knygton Leicestrensis abbatie canonicus lib. 2 de Eventibus Anglorum cap. 15 affirmat, quod « anno MCCLV Judei crucifixierint Hugonem, novennem puerum, Lincolnæ, kal. Augusti ». Quare videtur Judei multiplicatis ante annos sexaginta suorum cedibus, suppliciis non fractos, sed exasperatos magis, et frequentius in Christianorum innocentium sanguinem sævisse, quam ab historicis libuerit referre in Chronica. Similia hujus crudelitatis exempla refert Bollandus ad diem xxv Martii, dum verba facit de sancto Willelmo puero Norwici in Anglia martyrium passo, cujus meminit Baronius num. 49.

9. *S. Bern. profectio Germaniæ.* — Baronius num. 20 ait, sanctum Bernardum, *ubi ad finem præsens inclinaret annus*, se in Germaniam contulisse. Verum, uti observat Mauricus in Annal. Cisterc. hoc anno cap. 8, motus ad id videtur Baronius ex Historia miraculorum ejus in præmio, ubi a prima Dominica Adventus eorum exordium sumitur; cum tamen longe probabilius sit, hunc auctorem non a primo Bernardi in Germaniam ingressu, sed ab ejus ad Constantiam accessu eorum exordium deduxisse. Sed quidquid hæc de re sit, sanctus vir in Germaniam venit et ut Christianos ad crucem sumendam impelleret, et a Judeis necandis retraheret. Inter alios enim eremita quidam, *Radulphus* nomine, seu nimio zelo, seu captandæ plebis avidus, quasi a *Bernardo* missus, crucem contra Saracenos, et internecionem contra domesticos *Judeos* concionabatur, uti refert Otto Frisingensis in Friderico lib. 4, cap. 37. Doluere episcopi seipsis inconsultis, imo renitentibus, ex

injuncto Bernardi, totam lere Germaniam perturbare. Quare sanctus abbas purgandæ huic calumnie, et reprimendo serpenti malo, primo ad *Henricum* Moguntinum præsulem, mox ad omnes Germaniæ episcopos scripsit. Epistola ad Moguntinum præsulem, quæ alias cccxxiii, nunc est cccxv, et Epistola ad Orientalis Frantiæ clerum et populum, alias cccxxii, nunc est cccxiii. In priori in *Radulphum* monachum invehitur, atque tria in eo reprehensione esse dignissima, usurpationem prædicationis, contemptum episcoporum, homicidii approbati libertatem. In posteriori vero non solum arma contra infideles pro Orientalis Ecclesiæ defensione suscipienda hortatur; sed etiam Judæos non esse persequendos, nedum occidendos scribit. Prior legenda apud Baronium num. 18, et posterior apud eundem, num. 11 et seqq.

10. *Floret S. Hildegardis.* — Bernardus sub mensis Octobris finem ad *Wormaticum* urbem commoratus, multos ad sacrum bellum crucisignavit. De eo enim sub initium Januarii anni sequentis, eandem urbem rursus adeunte, Philippus tunc archidiaconus, postea monachus, qui præsens fuit, in lib. de Miraculis sancti Bernardi cap. 11 scribit: « Transierat per Wormaticum ante duos menses, et sermone habito, innumerabilem ibi signaverat populum signaculo militiæ Christianæ ». Dein *Francofurti* convenit Conradum regem Romanorum, sed virum, quamvis sui reverentissimum, facilem in hoc negotio non invenit nec persuasibilem, ut ad illud adduceretur, uti refert laudatus Philippus cap. 7. Sanctum abbatem Francofurto discedentem, *Bingium*, quod oppidum ad Rhenum positum, navigio pervenisse refert Trithemius in Chron. Hirsaug. ad annum MCXLVI. Ibi *sancta Hildegardis* cui antea per litteras verba sanctæ admonitionis transmiserat, sanctimonialibus præsedebat, et voluminibus ab ipsa virgine conscriptis diligenter revisis, ad circumstantes dixit: « Hæc scripta non sunt humanitus adinventæ, sed per sanctum Spiritum divinitus inspiratæ. Cumque capellanus sanctæ virginis multos ea tanquam « somnia muliebria, et destructi cerebri deliramenta » traducere asservisset, Bernardus ad Hildegardem dixit: « Tu, filia charissima, non metuas opprobria hominum, Deum habens defensorem ». De ea chronographus Autissiodorensis ad hunc annum habet: « Per idem tempus in Alemanniæ partibus habebatur admirabilis virgo quædam provecta ætatis, cui tantam gratiam virtus divina contulerat, ut cum ipsa laica et illiterata esset, mirabiliter tamen ab hoc mundo raperetur frequentius, et in summis disceret, non solum quod postea in imis diceret, sed potius (quod satis mirabile est inauditum) etiam scribendo latine dictaret, et dictando libros Catholicæ doctrinæ conficeret ». Annus tamen hujus colloquii Bernardi cum Hildegarde non satis certus. Vincentius Bellocar. in Spec. Histo. lib. 27, cap. 83, refert laudata verba ex auctore anonymo, atque

sese existimare eum spectare ad Hildegardem prædicationibus clarum.

11. *Conradus imp. crucem accipit.* — Philippus citatus cap. 3, narrat miracula, quæ sanctus abbas per singulos dies patrabat, atque mense Novembri exeunte *Constantiam* venisse rogatu Hermannii Constantiensis episcopi, qui eum primum *Basileam*, mox *Argentoram* reduxit. Conradus Germaniæ rex generalem curiam Spire, cui Bernardus adesset, in die Natali Christi congregavit: « Ibi eum diem festum celebravit rex Conradus, ibi coronatus est, ibi affuit episcoporum principumque conventus. Illic sanctus advenit inter principes quosdam pacem cupiens reformare, quorum inimicis exercitus Christi delinebatur », inquit Philippus cap. 7. Vides in Germania, sicuti et in Gallia, reges septies coronatos fuisse. Conradus primum iter transmarinum aversatus est, nec facile ad illud adductus. Tandem Bernardo dixit: « Paratus sum servire ei, quandoquidem ex parte ejus moneor », et tradit idem Philippus, qui paulo post addit: « Continuo signatus est rex, et vexillum ab altari per manum patris nostri, quod ipse in exercitu Domini manu propria deportaret, accepit. Signatus cum eo nepos ejus dux Fredericus Junior (qui postea imperavit): signati illic principes, quorum non est numerus ». Agit de hac sancti Bernardi professione Germanica Baronius num. 20.

12. *Conversio Nicolai Clarevallensis.* — A num. 22 ad 25. *Nicolaus*, qui ex monacho Arremarensi factus est Cisterciensis, et sancti Bernardi amanuensis sive notarius, Petro Venerabili propter ejus ingenium et eloquentiam in deliciis fuit (ut ejusdem Petri Epistolæ xxxiii, xxxiv, et xxxv libri sexti demonstrant) et reliquis in admiratione. Verum sigillo *sancti Bernardi* non semel abusus, et deprehensus falsarius præclaras animi sui doles obscuravit. Vir versipellis videns sanctum *Bernardum* in summa omnium existimatione, et Clarevallenses ubicunque in honore, *Theobaldo* Arremarensi priori persuasit, ut ad ejus Ordinem majoris perfectionis prætextu simul transirent. *Theobaldus* cedente inbelli senecta sarcine graviori, ex Ordine Clarevallensi exivit, sed *Nicolaus* perseveravit. Probi in speciem mores ejus, ingenium acre, et stylus dulcis illum valde Bernardo commendabant, ideoque ejus calamo, atque ipsius exemplo, etiam alii, uti voluit, et *Nicolaus*, quod adeo concupierat, celebre nomen in brevi sibi comparavit. Porro Arremarensis monasterium, Gallice *Montier-Ramey*, positum est in diocesi Trecenti.

13. *In annum præcedentem retrahenda.* — *Nicolai* fraudulenta conversio in superiorem Christi annum incidit, quod colligit Mauricius anno mxcxlv, cap. 9, num. 4, ex Epistola 7 Nicolai Clarevallensis data pro sua receptione in eorum Ordinem. In ea enim mentionem Nicolaus facit Eugenii jam summi Pontificis, indeque recte de-

ducit, Baronium perperam scripsisse *Nicolaum* currenti anno detectum, atque delatum ad Eugenium papam, præsertim cum id multo posterius accidisse, tota historie series palam faciat. Opinionem suam Baronius num. 22 ex his Bernardi verbis in Epist. cccxlii, alias cccxiii, ad episcopos Orientalis Franciæ data, eruit, in qua sanctus abbas ait: « Illud admonitos vos esse necesse est, fratres dilectissimi, ut si quis forte amans primatum gerere inter vos, expeditione sua regni voluerit exercitum prevenire, nullatenus audeat, et si a nobis missum se simulat, non est verum: aut si ostendat litteras tanquam a nobis datas, omnino falsas, ne dicam furtivas, esse dicatis ». Verum loquitur Bernardus de *Radulpho* eremita sub ejus nomine prædicante, quæ fuit querela *Henrici* Meguntini præsulis, ut patet ex divi Bernardi Epistola ad hunc præsulē data, et a Baronio num. 18 recitata. Neque credibile *Nicolaum* tam cito falsarium a sancto Bernardo deprehensum, et tamen non statim a suo obsequio dimissum.

14. *Nicolai Clarevallensis lapsus.* — *Nicolai* itaque Franci, vel ut ab aliis appellatur, Clarevallensis lapsus contigit anno millesimo centesimo quinquagesimo primo, ut docet Epistola Bernardi cccxviii, veteri ordine cclxxxvi, ejus locum affert Baronius n. 22 et ceteris etiam ex Epist. cccclxxxviii, quæ est Petri Venerabilis de electione Gratianopolitana eodem anno peracta; qua in Epistola *Nicolaus*, uti Bernardo et Petro adhuc clarus ac fidelis amborum internuntius, laudatur. Hanc epocham recte statuunt Mauricius citatus ad eum Christi annum cap. 9, et Mabillonius Præfatione in totum tertium Operum S. Bernardi num. 48 et seq. Nicolaus post varios hinc inde dekursus, constitit tandem in suo Arremarensi monasterio, ut liquet ex Epistola lxx Arnulphi Lexoviensis episcopi ad ipsum Nicolaum, tum ex ipsius Nicolai Epistola ad Guillelmum Rhemorum antistitem scripta a Baluzio tom. II Miscel. vulgata, quæ ideo ante annum mclxxvi, quo Guillelmus Rhemensis archiepiscopus dictus, data non fuit. In ea Nicolaus Guillelmum laudat quod se receperit infra *sacrarium* suæ familiaritatis, et quod susurrōni et detractori (hos quippe timebat Nicolaus) locum non daret, et deinde se excusat, quod ab ejus conspectu longius abstinerit. Nicolaum Henrico Campaniæ seu Trecentium comiti addictissimum fuisse ostendunt duæ ejus ad eum Epistolæ. Sed de Nicolao plura Mabillonius in laudata Præfatione. Scripsit librum Epistolarum tum in editione Patrum Colonienſi quam Lugdunensi relatum, et librum Sermionum dictum *Henrici Campaniæ comiti*, recitatum in Biblioth. Script. Ordinis Cisterciensis tom. III. Annus ejus mortis incertus.

15. *Obitus Guillelmi patriarchæ Hierosolymitani.* — Ad num. 25. Tyrus lib. 14 in fine, et initio libri 15 narrat, quomodo pro Wiilmi patriarchæ Hierosolymitani mantus, anno mclxxi Fulco Hierosolymorum rex tumulatus fuerit, et de eodem

patriarcha capit. xvii scribit : « Obiit V kal. Octob. pontificatus ejus anno xv. cui postmodum, subsequente Januario, substitutus est dominus Fulcherus Tyrensis archiepiscopus ». Si itaque Tyrius annos completos numeret, Willelmus anno superiori mortalitatem explevit et *Fulcherius* mense Januario presentis anni in ejus locum subrogatus est. Quod si anni illi xv incompleti fuerint, *Willelmi* mors in annum xcviij retrahenda.

16. *Michael Oxyta abdicat patriarchatum Constantinopolitanum.* — Ad num. 26. Cum *Michael Oxita* patriarcha CP. anno xcxiij patriarchatum Constantinopolitanum consecutus fuerit, et ut legitur in Catalogo Græco episcoporum Constantinop. annos duos et menses octo sederit, hoc anno patriarchatum abdicavit, uti recte Baronius habet. In eodem Catalogo referitur *Cosmam Atticum* ejus successorem, Pontificatum menses decem administrasse, posteaque ex eo dejectum; Ecclesiamque viduam mansisse *menses x*. Quare *Cosmas* anno sequenti ob hæresim Bogomilorum sede pulsus fuit. Allatus lib. 2 de Consens. Eccles. Occident. et Orient. cap. 12, pag. 686, refert sententiam adversus *Cosmam* latam : « Sententia depositionis patriarchæ Constantinopolitani, Cosmæ Affici, qui nunc cum Bogomilo Niphone sentire compertus est, extracta, et ut moris est, corroborata, editaque anno viii cclv, mense et Indictione sententia præfixit. Mensis Februarii xxvi, die (id est, feria) iv, Indictione x, presidente in palatio Blachernarum potentissimo et a Deo coronato, sancto nostro rege et imperatore, domino Manuele Commeno, etc. » Sed annus mundi secundum *Eram* Constantinop. a Septembris incipiente corruptus est, legendumque anno viii cclv, qui mense Febuario frequentis anni concurrit cum Indictione x, quo seria vi incidit in diem xxvi Februarii. *Nicetas Choniata* lib. 2, ait *Cosma* annulos eum apud Manuelem imp. calumniatos esse, in vindictam injuste dejectionis imperatricem nullos mares peperisse, ut ei *Cosmas* imprecatus fuerat.

17. *Hæretici prope Coloniam exorti.* — Hoc circiter anno *Everwinus*, Steinfeldensis prope Coloniam prepositus, scripsit Epistolam ad sanctum Bernardum abbatem contra quosdam hæreticos nuper exortos. Eam refert Mabillonius tom. iii Analect. pag. 452, et rursus ante Sermones lxxv et lxxvi in Cantica Cantecorum, hoc circiter anno editos, quia in iis sanctus abbas hos hæreticos refellit. Pauca hic ex eadem Epistola et Mabillonii in eam Notis referemus, quia extra consilii nostri limites egredi non possumus. Varia fere per hæc tempora hæreticorum genera, in quibus *Petrobussiani* seu Henriciani in partibus Tolosanjs; *Cathari*, quorum antesignanus et detector Bonacursus Mediolani, ut jam insinuavimus; *Bonilhomines* (ita sese appellabant) cum Oliverio sectæ auctore damnati anno m cxxxv in Concilio Lumbertiensi; *Pataveni* et *Passageni*, qui omnes occasionem dederunt Albigensibus hæreticis, de quibus infra.

Isti, quos relexit *Everwinus*, nullo nomine censentur, et nullo sectæ auctore insignes erant : « Quo nomine istos, titulove censetis? » inquit Bernardus in Sermone laudato lxxvi, « nullo; quoniam non est ab homine illorum hæresis, neque per hominem illam acceperunt ». Viguerunt maxime circa Coloniam, ut docet *Everwinus* in sua ad Bernardum Epistola : « Nuper apud nos juxta Coloniam quidam hæretici detecti sunt, quorum quidam cum satisfactione ad Ecclesiam redierunt. Duo ex eis, scilicet qui dicebatur episcopis eorum cum socio suo, nobis restiterunt in conventu clericorum et laicorum, præsentem ipso domino archiepiscopo cum magnis viris nobilibus hæresim suam defendentes ex verbis Christi et Apostoli ». Sed nonnulli ex illis, qui illam sectam profitebantur a furente turba igni traditi sunt.

18. *In duas classes distincti.* — Colonienses isti hæretici duas in classes ab *Everwino* distinguuntur. Uni dicebant, Ecclesiam apud se tantum esse, quasi ipsi soli Christi vestigijs inhererent. In sacramentis suis velo se legebant, et quotidie cibum et potum suum in Christi corpus et sanguinem se consecrare, ceteros vero in sacramentis procul a veritate abesse asseriebant. Præter baptismum aquæ, alium admittere in igne et spiritu per solam manuum impositionem. Baptismum nostrum cum nuptiis respuebant, aiebantque quemlibet e suis electum seu baptisatum habere potestatem alios qui digni fuissent baptizandi, et in mensa sua Corpus Christi et Sanguinem conficiendi. Alii autem sacerdotibus Ecclesiæ, utpote sæculari more viventibus, consecrandi potestatem abjudicabant, aliaque sacramenta conferendi, excepto baptismo, quem solis adultis, non parvulis conferiebant. Omne conjugium præter illud, quod inter virgines masculinum et feminam contrahitur, fornicationem reputabant. Postremo suffragia sanctorum, jejunia, cæterasque corporis macerationes respuebant, uti et purgatorium et suffragia pro mortuis. Itaque Henricianis et Coloniensibus hæreticis communis fuit genius, odium in Ecclesiæ ministris, sacramenta, baptismum parvulorum et nuptias : pauca peculiaria, quæ non sectæ genus, sed quamdam tantum capitum diversitatem arguunt. Uno verbo divisi fuerunt rami, sed ex eadem radice prodeuntes, inquit Mabillonius in Prefat. generali ad opera S. Bernardi §. vi, ubi et ostendit hos hæreticos in multis ab Henricianis discrepasse. S. Bernardus sub currentem annum ad singula hæreticorum Coloniensium capita respondet, sed quasi unius ejusdemque sectæ fuissent omnes.

19. *Tornacenses jugum episcoporum Norviemsiensium excutere tentant.* — Sancto Eleutherio episcopo Tornacensi demortuo, uti jam diximus anno dxxxii, sanctus *Medardus* jam Noviomensis episcopus, Tornacensis etiam creatus est. Verum Tornacenses Noviomensis episcopi jugum excutere, et proprium episcopum adipisci sæpe tentarunt.

Ivo Carnotensis episcopus cum suo tempore de utriusque episcopatus divisione ageretur, veritus ne inde schisma in regno Franciæ oriretur, scripsit ad Paschalem II Epistolam cccxxvii, eumque rogavit, ut statum duarum illarum Ecclesiarum inconcussum manere concederet. « ne hæc occasione schisma, quod est in Germanico regno adversus Sedem Apostolicam, in Galliarum regno suscitetur ». Paulo post : « Præterea cum dignitas episcopalis paupertatem his diebus honeste ferre non valeat, providendum est, ne ista divisione uterque episcopus fiat pauper ». Paschali Secundo vivis exempto, Tornacensis majori studio insudarunt apud Callistum II, qui tamen rogatu Ludovici VI Francorum regis Rescriptum dedit pro confirmatione unionis duarum Ecclesiarum, a Marlotto lib. 2 Hist. Metropolis Rhemensis cap. 31 relatum, in quo ait : « Noviomensis et Tornacensis Ecclesiarum et parochiarum unitatem, a nostris prædecessoribus inconcussam, usque ad hæc tempora conservatam, præsentis decreti pagina confirmamus, et ratam in perpetuum permanere decrevimus ».

20. *Episcopatus Tornacensis restituitur.* — Eugenio III ad summum Pontificatum promotum, intermissum diu negotium Romæ totis viribus Tornacenses redintegrarunt, a quo, intercessore præsertim sancto Bernardo, voti compotes effecti obtinere, ut Anselmus electus ab eis episcopus suis manibus Romæ consecraretur, idque currenti Christi anno, non vero præcedenti, ut aliqui putarant. Hermannus enim monachus de *Miraculis Sanctæ Mariæ Laudunensis*, lib. 3, cap. 21, de eodem Anselmo scribit : « A domino papa Eugenio invitatus consecratur anno mclxv, Dominica *Lectare Jerusalem* », Dominica scilicet quarta Quadragesimæ. Hermannus autem annos Incarnationis a die xxv mensis Martii, vel a Paschate exorditur, ut vel hic locus demonstrat. Ipsemet enim Eugenio in Epistola ad Anselmum Tornacensem episcopum data testatur seipsum propriis manibus in episcopum consecrasset, sequè illum Tornacum transmittere ad regendum populum illi commissum. In fine legitur : « Datum Viterbii IX kal. Augusti, Indict. ix, Incarnat. Dom. anno mclxvi, Pontificatus vero domini Eugenii III pape anno ii ». Denique Hermannus in Narratione Restaurationis abbatiæ Sancti-Martini Tornacensis num. 113 et seqq. fuse disserit de restitutione episcopatus Tornacensis, atque Anselmum abbatem Sancti-Vincentii Laudunensis invitum pape consecrandum præsentatum esse, « qui obedientie vinculo coactum Dominica *Lectare Jerusalem* solemniter consecrat ». Paulo post : « Acta est consecratio domini Anselmi episcopi Romæ anno Incarnat. Verbi Dei mclxvi, quo anno fumes fuit gravissima, ita ut Tornaci venderetur sextarius tritici lvi solidis. Sicut ergo per sanctum Medardum dignitatem proprii episcopi perdidimus, dum ipse curam episcopii Tornacensis sibi injunctam a

clero et metropolitano tenuit; ita etiam per eundem libertatem nostram recepinus, dum Deus proprium nobis pastorem restituens, monachum S. Medardi in episcopum dedit », Anselmum nempe.

21. *Floret Nicolaus canonicus regularis postea papa Hadrianus IV dictus.* — Anno superiori in prima creatione cardinalium ab Eugenio facta *Rolandus Paparo* Senensis, presbyter cardinalis tituli S. Marci dictus est; hoc vero anno in secunda eorumdem creatione *Nicolaus de Brekspere*, seu Brekspere, Anglus, episcopus cardinalis Albanus renuntiatus, ita habet Ciacconius in Historic. cardin. Uterque postea Romanus Pontifex electus, ille sub Alexandri III, iste sub Hadriani IV nomine. Nicolaus per plures annos canonicus regularis fuit, et per aliquot abbas monasterii Sancti-Rufi prope Avenionem, de cujus varia fortuna Guillelmus Neubrigensis lib. 2 de Reb. Angl. cap. 6 scribit : « Is natione Anglicus, patrem habuit clericum quemdam non multe facultatis, qui relicto cum sæculo filio impubere, apud Sanctum-Albanum factus est monachus (Robertus nempe Nicolai pater). Ille vero adolescentium ingressus cum propter inopiam scholis vacare non posset, idem monasterium quotidiane stipis gratia frequentabat. Unde pater erubuit, verbisque mordacibus socordiam ejus increpitans omni solatio destitutum cum gravi indignatione abegit ». Tum de Nicolao subdit : « Ille vero sibi relictus, et forte necessitate aliquid audere coactus, Gallicanas adiit regiones, ingenuè erubescens in Angliæ vel fodere vel mendicare. Cumque in Francia minus prosperaretur, ad remotiora progrediens trans Rhodanum peregrinatus est, in regione quæ Provincia dicitur. Est autem in illa regione monasterium nobile clericorum regularium, quod dicitur Sancti-Rufi (extra civitatem Avenionensem positum, Valentiam postea translatum, ut videre est anno mclii), ad quem locum ille veniens et subsistendi occasionem ibidem inveniens, quibus potuit obsequiis iisdem se fratribus (canonicis enim regulares modo fratres, modo monachi appellati) commendare curavit.

22. *Vit abbas S. Rufi.* — « Et quoniam erat corpore elegans, vultu jucundus, prudens in verbis, ad injuncta impiger, placuit omnibus, rogatusque canonici ordinis suscipere habitum, annis plurimis ibidem resedit regularis imprimis discipline amulator. Cumque esset acris ingenii et linguæ expedite, frequenter et studiosa lectione ad scientiam atque eloquentiam multum profecit. Unde factum est, ut abbate defuncto (Willelmo nempe, ut anno mclxxxvii insinuavimus), fratres eum concorditer atque solemniter in patrem eligerent. Quibus cum aliquandiu præfuisset (scilicet usque ad præcedentem vel currentem annum), penitentia ducti, atque indignati quod hominem peregrinum levassent super capita sua, facti sunt ei de cætero infidi atque infesti. Odis itaque paulatim crudescens, ut jam graviter aspicerent

in quo sibi paulo ante bene complacuerat, tandem confectis et propositis contra eum capitulis, ad Sedem Apostolicam provocarunt. Pie autem memorie Eugenius, qui tunc arcem Pontificis tenebat, cum rebellium filiorum contra patrem querelas audisset, et ejus pro se allegantis prudentiam modestiamque animadverteret, paci inter eos reformande efficacem operam dedit, multumque imperans et saepius inculcans utrique parti, ut partes esse desinerent, et unitatem spiritus in vinculo pacis servarent, reconciliatos ad propria remisit.

23. *Postea cardinalis creatur.* — « At non diu quievit nescia quietis malitia, graviusque intonuit rediuvia tempestas. Interpellatus est iterum idem venerabilis Pontifex, cujus jam aures fratrum illorum querelis et susurris timebant. Utrique ergo parti pie et prudenter prospiciens: Scio, inquit, fratres, ubi sedes sit Satanae, scio quid in vobis suscitet procellam istam: ite, colligite vobis cum quo pacem habere possitis, vel potius velitis: iste non erit vobis ulterius oneri. Itaque dimissis fratribus, abbatem in B. Petri obsequio retinens, Albanensem ordinavit episcopum ». Ita Neubrigensis Anglus ipse, et hoc tempore vivens. Idem refert Mattheus Parisius in Vita abbatis Sancti-Albanensium in Roberto abbate.

24. *Alter Nicolaus in abbatiam S. Rufi succedit.* — *Nicolaus Brekspear* successit in abbatiam Sancti-Rufi alter *Nicolaus*. Baluzius enim lib. 4 Marce Hisp. pag. 501, ex Instrumento publico refert, anno MCXLIX, *captionis Hertose primo*, Guillelmum episcopum Barcinonensem cum consensu et voluntate canonicorum suorum dedisse Ecclesiae Sancti-Rufi, cujus tunc abbas erat *Nicolaus*, Ecclesiam Sancti-Michaelis castri Marmellariensis in agro Pœnilensi (pago sito inter Tarracoenem et Barcinonem, hodie Panades dicto) cum tota parochia et cœmeterio suo et cæteris ad eam pertinentibus, « salva ibi, inquit, nostra sedis canonica obedientia et reverentia ». Decretum est autem ab episcopo, ut « in eadem Ecclesia reverendi Sancti-Rufi fratres religionem canonicam secundum regulam B. Augustini constituent perpetuum permanendi, et disponant eam sicut alias obedientias Sancti-Rufi ». Erant obedientiae Cella, Praepositurae et Grangiae a monasteriis dependentes, ut videre est in Glossario Ducangii. Nicolaus iste praetermissus a San-Marthanis tom. IV Gall. Christ. in Catalogo abbatum Sancti-Rufi.

25. *Rogerus rex Africam minorem sibi subjicit.* — Hoc anno *Rogerus* Siciliae et Neapolis rex, Africam Minorem, cujus incolae Siciliam alias sibi subdiderant, eamque cum universo ferme Neapolis regno diu captivam tenebant, debellandam suscepit, principio a Tripoli Barbariae oppido facto, De hac expeditione loquitur verus Robertus de Monte a Dacherio editus, atque: « Rex Rogerius Siciliae Tripolitanae provinciam in Africa super paganos

cepit. In hac expeditione fuit, et multum profuit Ricardus de Linghene miles optimus, qui nuper de Bajocensi comitatu illic perrexerat, et a rege Rogero comitatum Andri insulae, quem nuper idem rex super imper. Constantinop. ceperat, denuo acceperat ». Ille tamen Robertus enormiter percat; expugnationem enim Tripolis cum an. MCXLV copulat, cum tamen ad praesentem pertineat. Praeterea anno MCXLV loquitur de eclipsi solari, quae *V kal. Novemb.* contigerit, cum tamen ea acciderit die XXVI mensis Octobris, feria prima, annoque Christi MCXLVI, ut videre est apud Calvisium, qui eam supputavit in Opere Chronologico. Apud vulgatum Robertum de Monte eclipsis recte cum anno MCXLVI connectitur, sed erratum a librariis in die, ideoque loco *VIII kalendis Novembris*, legendum *VII kalendas Novembris*.

26. *Alphonso Hispaniae imp. Cordubam occupat.* — *Safadaula* Cordubae rege et Christianorum amico ab *Aben Haudi* Aera MCXXXIV, mense Februario occiso, ut antiqua Toletana monumenta habent, *Abengamia*, qui Almeriae regnabat, Cordubam ingressus est, et *Aben Haudi* fugiens Alphonsi Hispaniarum imperatoris auxilium implovavit. Postea idem imperator Cordubam occupavit, eamque *Abengamia* dedit quia is promiserat se ei hominum praestiturum. Hujus Cordubensis expugnationis mentio est in Tumbo Nigro in Aera MCXXXV. Verum *Abengamia* imperatorem ludificavit, quia Mauri non minus post illam expugnationem quam ante eam Cordubae domati sunt.

27. *Ejus de Saracenis victoria.* — Videns imperator se principum Christianorum auxilio indigere conventum generale mense Novembri indixit, ut *Garsiam Ramirez* Navarrae regem, et *Raimundum* Berengarii, hujus nominis IV, comitem Barcinonensem inter se dissidentes conciliaret, sed cum pax iniri non posset, factae inducie, quibus durantibus tres isti reges adversus Mauros pugnarent. *Garsia* rex statim cum suis Navarreis perquam alacribus et expeditis adversus hostem progressus est, jamque mense Januario sequentis Christi anni *Cordubam*, quae in Christianis rebelarat, pervenerat. Ea eodem mense capta, ubi in monumentis Toletanis apud Sandovalium fol. 489, Aera MCXXXV. legitur. Quare in illis Monumentis duae civitates Cordubensis expugnationes recte distinctae, prior quae mense Maio Aera MCXXXIV, posterior quae anno insequenti mense Januario contigerit. Cepit etiam imperator *Calatravam*, ut apparet ex Charta monasterii Arlancensis datam « anno videlicet, quo Eldifonsus Hispaniarum Cordubam et Calatravam vi cepit, et Abengamiam regem Moabiturum (qui caput erat Almorabiturum) sibi subjugavit ». Ilarum induciarum, et foederis inter Castellanos et Navarreum reges ac comitem Barcinonensem pacti sermo est in Historia Catalanae a Diago scripta lib. 2, cap. 149.

FINIS TOMI OCTAVIDECIMI.

Barri-Ducis. — Typis Ludovici GUERIN et Sociorum.





BP
145
B37
1364
T.18
C.1
P3BA

